


Re ĩhâimana u'âsi
mono zadawa wasu'u



New Testament in Xavante (BR:xav:Xavante)

'Re ĩhâimana u'âsi mono zadawa wasu'u New Testament in Xavánte (BR:xav:Xavánte)

copyright © 2004 Wycliffe Bible Translators, Inc.

Language: Xavánte

Translation by: Wycliffe Bible Translators, Inc.

Xavánte [xav], Brazil

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 1882536746

The New Testament

in Xavánte

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
744f0b3a-210f-53c7-b3a1-39b62617ba0c

Contents

MATEUSI	1
MARCUSI	77
RUCASI	118
ZUWĀ	187
ATUSI	237
ROMANU	300
1 CORĪTU	337
2 TORĪTU	375
Darasiza	397
ĒPĒZU	409
PIRIPU	419
TOROSU	428
1 TESARONITA	436
2 TESARONITA	443
1 TIMOTIU	447
2 TIMOTIU	456
TITU	462
PIREMO	466
EBREUSI	468
TIADU	495
1 PEDRU	503
2 PEDRU	512
1 ZUWĀ	517
2 ZUWĀ	526
3 ZUWĀ	528
ZUDASI	530
Apocaripsi	533

Mateusi **Zezu Cristuhu wasu'uwē na Mateusi te te āma ĩrob'ui'érézē** **Ībaihā wasu'uzē**

Zezihi siré 're ĩnomro mono norī siré hā aibā hā te 're hāimana, Mateusi na ĩsisi hā, Réwi na ĩsisi hāiba amo hā. Ta hā ma tō ā ĩbaihā na hā dama rob'ui'éré, 'Re ĩhāimana u'āsi mono te te tāma ĩwaihū'uzéb zarina. Zezihi siré 're morī ō ré hā, rob'uiprazé hā ma tō te te dawī 're a'ubumro, danhib'apito ma. Zezihi āma ma tō rob'ui'éré, 'Re ĩhāimana u'āsi mono te te ĩpisutu na Danho'reptui'wa da. Āne na rob'ui'éré 'rata 'wa norī hā te te āma 're ĩrob'ui'éré za'ra mono zéb zarina, sena na da te 're waihu'u za'ra mono da, ma tō āma rob'ui'éré, Mateusi hā. Ma tō duré sima wē, te te dama waihu'u pese da, Zezihi hā tō sena zudezu norī nhīb'apito na hā, duré tō ōhō zō si 're ĩsimipari za'ra mono na hā.

Zezu Cristuhu hi'rata norī za'ratazé
Rucasi 3.23-38

¹ Ā hā rob'ui'éré hā Zezu Cristuhu hi'rata norī za'ratazé. Ta hā Dawihi nhihudu, duré Abra'āhā nhihudu.

² Abra'ā hā Izatihi mama. Izati hā Zacoho mama. Zaco hā Zuda norī mama, tisisānawā norī me.

³ Zuda hā Perezihī mama, duré Zeraha mama. Īna zahuré hā Tama na ĩsisi hā. Duré Perezī hā Esirōhō mama. Duré Esirō hā Arāhā mama, ta hā.

⁴ Arā hā Aminadabehe mama. Duré Aminadabe hā Nasōhō mama. Duré Nasō hā Samohō mama.

⁵ Samo hā Bu'azihi mama. Bu'azihi na hā Ra'abi na ĩsisi hā. Duré Bu'azi hā Obedihī mama. Obedihī na nhisi hā, Ruti na ĩsisi hā. Duré Obedi hā Zéséhé mama.

⁶ Zésé hā Dawihi mama, dama ĩpire mama. Dawi hā Saromahā mama. Uri'asi ĩdā'ā mro wa, ma podo, Saroma hā.

⁷ Saroma hā Robu'āhā mama. Duré Robu'ā hā Abizaha mama. Duré Abiza hā Azaha mama.

⁸ Aza hā Zosapaha mama. Duré Zosapa hā Zorāhā mama. Zorā hā Uzi'asihi hi'rada.

⁹ Uzi'asi hā Zotāhā mama. Duré Zotā hā Acasihī mama. Duré Acasi hā Ezetizaha mama, ta hā.

¹⁰ Ezetiza hā Manaséhé mama. Duré Manasé hā Amosihī mama. Amosi hā Zozī'asihi mama, ta hā.

¹¹ Zozī'asi hā Zeconiza norī mama, tisisānawā norī me. Babironiza u Izarazéhé nhihudu norī, da te séme da, da te simroi mono ré, ma tō ta norī hā tipoto za'ra.

¹² Tawamhā Izarazéhé nhihudu norī, Babironiza u da te simroi mono za'u si, ma tō Zeconiza hā poto, Saratī'é hā. Saratī'é hā Zorobabéhé mama, ta hā.

¹³ Zorobabé hā Abi'udihī mama. Duré Abi'udi hā Eri'atīhī mama. Duré Eri'atī hā Azoho mama.

¹⁴ Azo hā Sadotihī mama. Duré Sadoti hā Atīhī mama. Duré Atī hā Eri'udihī mama.

¹⁵ Eri'udi hā Eri'azaha mama. Duré Eri'aza hā Matāhā mama. Duré Matā hā Zacoho mama, ta hā.

¹⁶ Zaco hā Zuzéhé mama. Zuzé hā Marizaha mro. Mariza hā, Zezihi na, ta hā. Zezusi hā, ta hā Cristu, 'Re ĩhāimana u'āsi mono te te ĩpisudu, Danho'reptui'wa da, da te 're ĩsisi za'ra mono.

¹⁷ Āne hā 14 na dahi'rata norī hāiba za'ra hā, Abra'āhā hawimhā, Dawihi u hā. Duré 14 na dahi'rata norī hāiba za'ra hā Dawihi hawimhā, Izarazéhé nhihudu norī, da te ĩsimroi mono zéb u hā, Babironiza u. Duré 14 na dahi'rata norī hāiba za'ra hā Izarazéhé nhihudu norī, da te ĩsimroi mono zém hawimhā, Cristu ĩpotozéb u hā.

Zezu Cristuhu waptā'ázé wasu'u
Rucasi 2.1-7

¹⁸ Tawamhā āne Zezu Cristuhu potozé hā: Mariza hā Zezusi, āma ĩna da hā ma tō sima ropisutu zahuré Zuzéhé me, sina mro zahuré da. Tane nherē, sina mro zahuré ō ré, ma tō 'Re ĩhāimana u'āsi mono pē'ēzani na tiwasā Mariza hā, te te sa'rese ō nherē.

¹⁹ Tawamhā aibā hā Marizaha āma ĩmro da hā 're morī wē di, Zuzé na ĩsisi hā. Ta hā mari ĩwē si te te 're 'manharī u'āsi. Taha wa, ma tō sima rosa'rata, āma ĩmro da ropisudu hā pi'uriwi za te te siwi ĩpari na hā, duré danho'a ĩwasété na te te āma hiri wa, da te dasiwi waihu'u za'ra tō da.

²⁰ Āne na te te sima rosa'rata wamhā, hāiwa hawi Wanhib'apito ma romhuri'wa hā ma tō tāma sihāi'ré, sōtō 'rowi. Āne te tāma tinha:

— Zuzé, Dawihi nhihudu, asina aihātā'ā tō, Marizaha āma aimro tō da hā. Ta hā ma tō tiwasā, 'Re ihāimana u'āsi mono pē'ēzani na.

²¹ Ī'ra hā 'watébrémi na te za tāma podo. Tawamhā Zezusi na te za Īsisi. Danho'reptui'wa te wasu'u, Īsisi hā. Taha si te za tinhib'a'uwē hā te te 're anho'reptu, Īwasété hawi, duré 'Re ihāimana u'āsi mono te te 're Īdahā za'ra mono zém hawi.

²²⁻²³ Āne da hā ma tō pisutu, Zezusihi ma, 'Re ihāimana u'āsi mono hā duréihā tizadawa wasu'u 'rata 'wai ma, Iza'izaha ma, te te Īwaih'u'uzém na te te āma uwaimrami da. Āne ma tō tāma waih'u, duréihā:

“Pi'oi ubuni hā te za tiwasā. Duré Ī'ra hā te za tāma waptārā, aibā na.

Taha nhisi hā za, Emanuwé na Īsisi hā.”

('Re ihāimana u'āsi mono, wasiré 're Īmorī u'ā, te wasu'u, Īsisi hā.) Āne 'Re ihāimana u'āsi mono te te āma Īrowaih'u'uzé hā, duréihā.

²⁴ Tawamhā Zuzé hā utu wamhā, hāiwa hawi Wanhib'apito ma romhuri'wa te te tāma Īwaih'u'uzéb zarina, ma tō āma timro oto, Marizaha āma, awa'awi.

²⁵ Tane nheré, Zuzé hā te te sima āma rosa'rata ō di a'ā Marizaha āma, Ī'ra tāma waptā'ā ō ré. Taré te Īré 'madā. Tawamhā Ī'ra tāma waptā'ā wamhā, Zuzé hā ma tō sisi, Zezusi na.

2

Bâtâ pusizém hawi, aibâ norī Īsi'aba'rézé wasu'u, Zezusihi u

¹ Tawamhā Zezusi hā ma tō podo, Beré na 'ri nho'ōmo nhisi āma, Zudeza na danhipti'a nho'ōmo nhisi āma. Apito Erodi hā, Izarazéhé nhihudu norī te te 're 'madā'ā za'ra mono ré, ma waptārā. Waptā'ā parip si, ma tō wasi na romnhoré'wa norī hā aihutu Zeruzaré u, bātâ pusizém hawi, rowaih'u'pese 'wa norī hā.

² Tawamhā te sō anharī za'ra, Zezusihi zō:

— E mahāta 'watébrémi, zudezu norī nhib'apito da, Īpodo hā. Wa norī hā wa tō 'madā'ā za'ra ni, wasi hā, bātâ pusizém niwīmhā, zudezu norī nhib'apito da, Īpotozé te te Īwasu'u hā. Taha wa, wa we ai'aba'ré ni, āma wawata za'ra da. — Āne ma tō sō anharī za'ra.

³ Tawamhā apito Erodi te te wapari wamhā, hātā'ā uptabi di, uburé Zeruzaré āma 're Īdasi'ubumroi mono norī zama.

⁴ Tawamhā apito Erodi hā ma tō 'rā'ōtō, 'Re ihāimana u'āsi mono ma, da'āma romhuri'wa Īpire norī hā, duré Īsimiroti na rob'ui'éré 'rata na dama rowahutu'wa norī hā te te sadanharī za'ra da:

— E mame te za waptārā, 'Re ihāimana u'āsi mono te te Īpisudu hā, Danho'reptui'wa da. — Āne te sadanharī za'ra.

⁵ Tawamhā ma āma sada'ābā za'ra:

— Beré na 'ri nho'ōmo nhisi āma te za waptārā, Zudeza na danhipti'a nho'ōmo nhisi āma. Duréihā 'Re ihāimana u'āsi mono zadawa wasu'u 'rata 'wa hā ma tō āne na āma rob'ui'éré siro, 'Re ihāimana u'āsi mono mreme na:

⁶ “A norī wa'wa hā Beré āma 're aihāimana za'ra wa'aba mono norī hā Zudaha nhihudu norī nhīpti'ai āma 're aihāimana za'ra wa'aba mono norī hā dama aiwapu na 're aihāimana za'ra wa'aba mono newa, te za oto dama asisi za'ētē na dama 're aihāimana u'āsi za'ra wa'aba mo. E marī wa. Tame danhib'apito da hā za poto wa, Īnhib'a'uwē norī hā te te 're ab'madā'ā pese mono da, Izarazéhé nhihudu norī hā.”

Āne duréihā ma tō āma rob'ui'éré siro, 'Re ihāimana u'āsi mono zadawa wasu'u'wa hā.

⁷ Tawamhā Erodi hā ma tō sō tihārā za'ra, bātâ pusizém hawi Īshihutu norī zō, pi'uriwi te te sadanharī za'ra da, ta norī hā:

— E mahāna ma tō wasi hā watobro. — Āne te sadanharī za'ra.

⁸ Te te sadanharī za'ra pari, ma tō tāma rob'ru za'ra, Beré u si'aba'ré da. Āne te duré tāma rob'ru za'ra:

— Mo oto ai'aba'rēi wa'aba, 'watébrémi zō asinharī pese za'ra wa'aba da. Sōpētē za'ra wa'aba wamhā, ma'āpē apā we asiwi Īpo're pu'u aba za, te waih'u' da, Ītēme Īmorī da duré wa hā, āma Īwata da, Īzama. — Āne ma tō tāma waih'u' za'ra, apito Erodi hā.

⁹ Tawamhā apito mreme te te wapari za'ra parimhā, robzabui'wa norī hā te oto ai'aba'rē, Beré u. Tawamhā bādādi na si'aba'rēi ré, ma tō wasi hā 'madā'ā za'ra, tō ō hā tirob āma ré te te Ī'madā'ā za'ra hā. Te Īsōwa timorī za'ra. Tawamhā ma tō oto mazazā. 'Watébrémi Īsāmrazém nho'ōmoi baba, te oto za, wasi hā.

¹⁰ Tawamhā aibā norī hā wasi te te 'madā'ā za'ra wamhā, toi uptabi za'ra di. Taha wa, te re to za'ra.

¹¹ Tawamhã 'ri para u ma tô asisi. Sisisi wamhã, ma tô sabu za'ra 'watébrémi hã, Ìna Ìré sãmra ré, Mariza hã. Tawamhã hi'rãitô ma tô asimro, ãma wata za'ra da. Taha pari, ma tô 'ridawa za'ra, tinhimiro'wapézéb za'ra hã. Ma tô ãma sawi za'ra, tinhoprub za'ra zém na; ètè'ubuzi pré oru hã, duré wedewati isadaze hã, duré wedewati isadaze si'u'ène hã. Taha na ma tô tâma tinhoprub za'ra.

¹² Tawamhã rosawêrê na ma tô 'Re ìhâimana u'âsi mono hã tâma waihu'u za'ra, bâta pusizém hawi ìsihutu norî ma, apâ si'aba'rê tô da, Erodihi u. Taha wa, te bâdâdi amo na apâ ai'aba'rê, tirob u.

Zuzé norî hã Ezitu u ìnebzé wasu'u

¹³ Tawamhã aibâ norî si'aba'rê za'u si, ma tô hãiwa hawi Wanhîb'apito ma romhuri'wa hã Zuzéhé ma sihâi'rê, sôtô 'rowi. ãne te tâma rowasu'u:

— Apito Erodi hã ma tô dama rob'ru, ai'uté zô danhopré mono da, Ìsadowa para da te wîrî da. Taha wa, te za oto ai'u. Ai'uté hã sa'ra na. Duré ìna zama ìré saprôni Ezitu u, tame a'â ìré aimasisi aba da, dawî. Tawamhã apâ we ì'ane wa'aba zéb da hã, wa hã te aima ìwaihu'uzéb zô si, te za asina asimipa. — ãne ma tâma waihu'u, hãiwa ãma romhuri'wa hã.

¹⁴ Tawamhã Zuzé hã ma tô udu. Utu wamhã, awa'awi ma tô ai'utére hã sa'ra. Ìna hã ma tô ìré saprô barana, Ezitu u.

¹⁵ Tawamhã tame te oto ìré aimasisi zahuré, apito Erodi hã idâ'âzéb u. ãne ma tô tiromhãiba, duréihã 'Re ìhâimana u'âsi mono, tizadawa wasu'u 'rata 'wai ma, te te ìwaihu'uzém na te te sina uwaimrami da. ãne ma tô tâma waihu'u siro: “Wa hã ì'ra, wa satô, Ezitu hawi morî da.” ãne duréihã 'Re ìhâimana u'âsi mono mreme hã, ti'ra ãma hã.

Ai'uté, da te 're ìsimroi mono zé wasu'u

¹⁶ Tawamhã apito Erodi hã aibâ norî, bâta pusizém hawi we ìsi'aba'rê norî hã pi'uriwi tiwi ìsi'aba'rê na te te ãma rowaihu'u za'ra wa, ma tô ab'ruî pese. Sib'ruî wa, tâma da'wapéi'wa norî hã ma tô satôri za'ra Berê u, 'watébrémi zô si'aba'rê da, uburé te te dawî uprosi mono da, maparane ãma ìwahu mono ô hã, Berê ãma 're ìdahâimana za'ra mono norî 'ra hã, duré Berê 'rata 're ìdahâimana za'ra mono norî 'ra zama. Aibâ norî hã wasi te te ì'madâ'â za'ra zém na te te tâma ìwaihu'u za'ra zéb zarina, ma tô apito Erodi hã ãne 'manha.

¹⁷ ãne ma tô tiromhãiba, duréihã 'Re ìhâimana u'âsi mono zadawa wasu'u 'rata 'wa te te ìrowasu'uzéb zarina, Zeremiasi hã. Ma tô ãne ãma rob'ui'ére siro, 'Re ìhâimana u'âsi mono mreme na:

¹⁸ “Rama na romnhisi ãma hã dawawa hã ma tô wapari za'ra ni, dazadari 'ràihã hã. Raté hã te aiwa'ô, ti'ra norî ãma. Pè'ézé uptabi wa, te te sima wê ô di, da te ipè'ètété da hã, ì'ra norî hã uburé tiwi si'utôri wa.”

ãne ma tô Zeremiasi hã rowasu'u.

Ezitu hawi, Zuzé norî hã apâ te te sina ìsiri zahuré zé wasu'u

¹⁹ Tawamhã apito Erodi dâ'â parimhã, ma tô hãiwa ãma Wanhîb'apito ma romhuri'wa hã Zuzéhé ma sihâi'rê, sôtô 'rowi, Ezitu ãma sãmra ré.

²⁰ ãne te tâma tinha:

— Oto ai'utu. 'Watébrémi hã oto subzari aba. Ìna ìré saprôni, Izarazéhé nhihudu norî nhipti'ai u. Aibâ norî hã 'watébrémi te te aré siwi wîrî da, sô ìsi'aba'rê norî hã ma tô tidâ'â za'ra. — ãne te tâma rowasu'u.

²¹ Tawamhã Zuzé hã utu wamhã, ma tô apâ saprôni zahuré 'watébrémi hã, ìna me, Izarazéhé nhihudu norî nhipti'ai u.

²² Tane nherê, ma tô wapa Aterazu, ma Erodihi 'ra wasu'u hã, timama nhowa're're ìsêbré na hã Zudeza ãma te te 're ìda'ab'madâ'â mono da hã. Taha wa, pahi di, tame ìré 're ìhâimana zahuré mono da hã. Tawamhã sôtô 'rowi ma tô tâma waihu'u na sahu, hãiwa ãma 'Re ìhâimana u'âsi mono ma romhuri'wa hã, Zuzéhé ma, Zudeza u neb zahuré tô da, Darireza na danhipti'a nho'ômo nhisi u si neb da. Taha wa, ma tô tamomop si tineb zahuré, Zuzé norî hã.

²³ Tame te oto 're simasisi zahuré, Nazaré na 'ri wa'ô'tô nhisi ãma. ãne ìromhâimanazé hã, duréihã 'Re ìhâimana u'âsi mono zadawa wasu'u 'rata 'wa norî nhimi'ui'ére hã te te ãma uwaimrami da. ãne duréihã ìwasu'u na rob'ui'ére 'rada hã: “Ta hã Nazaré ãma 're ìsãmra mono na te za oto da te 're sisi za'ra.” ãne ma tô waihu'u sirômo za'ra, za da te dasima 're ìwasu'u za'ra mono zéb da na hã.

3

*Zuwã Batita te te dama 're ìrowahutu mono zé wasu'u
Marcusi 1.1-8; Rucasi 3.1-9, 15-17; Zuwã 1.19-28*

¹ Tawamhã wahub ahã na ãma wahu pari, ma tô Zuwã Batita hã mo a'ubuni u, Zudeza na danhipti'a nho'õmo nhisi ãma, 'Re ìhâimana u'ãsi mono zadawa wasu'u na te te dama ãma sãna'rata da.

² ãne te dama rowasu'u:

— Ma'ãpé, aiwasété wi aipizari za'ra wa'aba. 'Re ìhâimana u'ãsi mono, da'ãma 're ìsib'a'uwê mono zéb u hã romhuture di oto. — ãne te dama rowahutu, Zuwã Batita hã.

³ Duréihã Iza'iza hã ma tô Zuwã Batitaha ãma rob'ui'ééré siro, 'Re ìhâimana u'ãsi mono zadawa wasu'u 'rata 'wa hã. ãne ìsimi'ui'ééré hã:

“Ni'wa hã te za te te dama 're rob'mahârã, a'ubuni wi:

Bãdãdi hã asiwi ropese aba, Wanhîb'apito zô.

Ìmana 'rãmi bãdãdi hã sô sa'ra wa'aba, awa'awi da.”

ãne ma tô Iza'iza hã ãma rob'ui'ééré, romhã ré.

⁴ Zuwã hã awaru ba'õmore zéré 'manharî na te 're si'uzã. Duré romhã 'manharî hãiwaré na te 're si'usisi. 'Riti na si te 're sa. Duré rom na ropîni na zama te 're sa.

⁵ Tawamhã Zeruzarê ãma 're ìdasi'ubumroi mono norî hã, duré Zudeza na danhipti'a nho'õmo nhisi ãma daza'rui mono bã 're ìdahâimana za'ra mono hã, duré Zodã pa nhisi 'rata 're ìdahâimana za'ra mono norî zama, ma tô ìtême 're dasito, daro mono bã. ìsimirowasu'u hã da te 're wapari za'ra mono da, ma tô ìtême 're dasito.

⁶ Taha wa, dawasété na ma tô 're dasiwê'õ za'ra 'rãwi, sô'awi, 'Re ìhâimana u'ãsi mono ma. Dawasété na 're dasiwê'õ za'ra mono sidãpãsi, ma tô Zuwã Batita hã â dawabzuri hã te te dama 're ab'manharî, Zodã pa ãma.

⁷ Tawamhã Zuwã hã ma tô 'madã'ã za'ra, parisezu norî hã ahã uptabi na, duré sadusezu norî hã. Te ìtême ai'aba'rê, â dawabzuri te te dame 'manharî za'ra da. Tawamhã Zuwã hã te te 'madã'ã za'ra wamhã, te tãma nharî za'ra, parisezu norî ma:

— A norî wa'wa hã wahi ne te 're anomro aba mo. E 'wa simiroti zarina, te we ìtême ai'aba'rêi wa'wa bété, â dawabzuri si 'manharî za'ra wa'aba zém na, 'Re ìhâimana u'ãsi mono nhimiházé wi, asisó'reptu za'ra wa'aba da bã, aiwasédé hã rême za'ra wa'aba õ nherê.

⁸ Sena na aiwasédé hã ìrême za'ra wa'aba zém na, da te 're aiwaih'u za'ra wa'aba mono da, te za oto 're anomro wê wa'aba mo.

⁹ Duré Abra'ãhã nhihudu wê te, asina 're rosa'rata za'ra wa'aba mono õ di za, 'Re ìhâimana u'ãsi mono te te 're ì'aihã za'ra wa'aba mono õ na hã. 'Re ìhâimana u'ãsi mono ma, waih'u'u pese di, â étê norî ma, te te nharî da, tãma si'a'uwê za'ra da, Abra'ãhã nhihudu oto 're hâimana za'ra mono da, êne hã.

¹⁰ Hãtãra hã te za oto ni'wa hã sarõtõ, wedepa nhihãrizéb da hã. Uburé wede hã 're ì'rãi pese za'ra mono õ hã te za te te ãma 're anhihãri. Tawamhã unhama u te za te te 're anhamra.

— ãne te dama ãma simiré'ê Zuwã hã, 'Re ìhâimana u'ãsi mono nhimiházém na hã.

¹¹ Te duré dama tinha:

— Wa hã wa tô â uptabi na si te 're aihãiba ubu za'ra wa'wa, â dawabzuri hã te aima 're ab'manharî aba mono wamhã, aiwasété wi 're aipizari za'ra wa'aba mono zém na, da te oto ãma 're aiwaih'u'u za'ra wa'aba mono da. Tane nherê, ìza'u si te za ìma ìpire uptabi hã wei wi. Taha si te za oto 'Re ìhâimana u'ãsi mono pë'êzani na te te duré 're aihãiba ubu za'ra wa'wa, unhama ne na zama, â na te aima 're ì'ab'manharî aba mono ne hã. Ta hã ìma ìpire uptabi wa, ìpara'uzã hã te tãma mrami waih'u'u õ di za, tãma ìwapure wa.

¹² Wei morî wapsi, te za da'ãma aipo'o. Buru nho, da te 're upõrî za'ra mono parimhã, te za da te 're sa'wari za'ra, ìsa'warizéb 're. Tawamhã ìtomhã na te za da te ãma 're ro'o za'ra. Ìro hã sa'ëtê nherê, da te wîrî waih'u'u õ di za. Tane ìma ìpire hã wei morî wapsi, te za da'ãma aipo'o, tridu upõrî za'wari ne, ìtomhã za'wari ne. — ãne ma tô dama rowasu'u, Zuwã Batita hã.

Zezusi, â dawabzuri hã te te ì'manharîzé wasu'u

Marcusi 1.9-11; Rucasi 3.21-22

¹³ Tawamhã Zezusi hã ma tô mo, Darireza na danhipti'a nho'õmo nhisi hawi, Zodã pa u, tame Zuwã Batita, â dawabzuri hã te te tãma 'manharî da.

¹⁴ Tane nherê, ma tô pibu Zuwã Batita hã, ìsimirosa'rada hã te te tiwi ãma saprî da, â dawabzuri te te tãma 'manharî tô da. ãne te tãma tinha:

— E marî da, te ìma aipire uptabi nherê, ìma asi'ru, â dawabzuri hã te aima 'manharî da. A hã te aré ìma ì'manha.

¹⁵ Tawamhã Zezusi hã asa te tãma tinha:

— Tane tô. Ìbã ma te asina ìma ìwaih'u. Tane nherê, te za ìma ì'manha, 'Re ìhâimana u'ãsi mono te te wama ìpisutuzéb zarina, wa te wasina uwaimrami da. — ãne ma tô tãma waih'u'u

Zezusi hã, Zuwã Batitaha ma. Taha wa, Zuwã hã ma tô ãma saze. Ma tô â dawabzuri hã tâma 'manha, Zezusihi ma.

¹⁶ Tawamhã â dawabzuri te te tâma 'manharĩ pari, ma tô â hawi watobro, Zezusi hã. Watobro wi, ma tô hãwi hã tâma si'ridawa. Tawamhã Zezusi hã ma tô tisã, 'Re ihãimana u'âsi mono pẽ'êzani hã we itẽme imorĩ hã hãwi hãwi, utu'u ne hã. Tawamhã ma tô ãma za.

¹⁷ Tawamhã hãwi hãwi te we ãma tinha:

— Æ hã ĩ'ra. ĩma sawi uptabi di. Tãma ĩto za'etẽ uptabi di. — Æne te we tinha, ĩmama hã.

4

Zezusi hã, Wa'uburé te te ĩpibuzé wasu'u

Marcusi 1.12-13; Rucasi 4.1-13

¹ Tawamhã 'Re ihãimana u'âsi mono pẽ'êzani hã ma tô Zezusi hã saprõ a'ubuni u, tame Wa'uburé hã te te nasi pibu da.

² Tawamhã a'ubuni wi sãmra ré, ma tô bâdá hã 40 na ãma ai'utõ, sai ãna sãmra ré hã. 40 na ma duré ãma timara. Tãma mrab uptabi di.

³ Tawamhã Wa'uburé ma tô itẽme wi. Itẽme wisi wamhã, te tâma tinha:

— Sena a hã 'Re ihãimana u'âsi mono 'ra wamhã, ma'apẽ etẽ ma nharĩ, ĩ'u'etẽ wapu na aima si'manharĩ za'ra da.

⁴ Tawamhã Zezusi asa te tâma tinha, ãne:

— 'Re ihãimana u'âsi mono mrema na rob'ui'ére hã ãne: “Dasa na si 're danhiptete za'ra mono õ di za. 'Re ihãimana u'âsi mono te te dama 're ĩ'awaihu'u mono zém na zama, te za 're danhiptete za'ra.” — Æne te tâma tinha, Zezusi hã.

⁵ Taha pari, Wa'uburé hã ma tô Zezusi hã saprõ Zeruzarẽ u, 'ri nho'u ĩwẽ uptabi u, te te duré pibu da. 'Re ihãimana u'âsi mono ãma 're ĩdawata za'ra mono zéb u, te saprõ, 'ri nhisi u, sab da hãimo, 'ri 'rãihã uptabi nhisi.

⁶ Tawamhã ãne te tâma tinha, Wa'uburé hã:

— Sena a hã 'Re ihãimana u'âsi mono 'ra wamhã, ma'apẽ atobro, ti'ai u. 'Re ihãimana u'âsi mono, te za, u, hãwi hãwi we atẽme satõrĩ za'ra, tâma ĩromhuri'wa norĩ hã, te te ai'madá'ã za'ra da. Tindhĩ'rata na te za, u, siwi asapa, ãne hã te te ai'u'a õ'umnhasite, aipara wi. Æne 'Re ihãimana u'âsi mono zadawa wasu'u'wa nhimi'ui'ére hã, duréihã, ĩbahã na hã.

⁷ Tawamhã Zezusi hã te asa tâma tinha:

— Mare di. “Asib'apito za'ra wa'wa hã, 'Re ihãimana u'âsi mono hã marĩ hã te te aima 're pisutu za'ra wa'aba mono õ nherẽ, 're pibu za'ra wa'aba mono õ di za, ta hã te te 're aipawaptob za'ra wa'aba mono zõ.” Æne duré ĩmrema na rob'ui'ére, ĩbahã na hã. — Æne te Zezusi hã tâma tinha.

⁸ Taha pari, te duré Wa'uburé Zezusi hã saprõ, etẽ 'rãihã u, danhib'apito norĩ nhipti'ai mono bâ te te rob'madá'ã mono da, uburé ro ĩwẽ uptabi hã te te ab'madá'ã mono da.

⁹ Tawamhã Wa'uburé te ãne tâma ropisutu, Zezusihi ma:

— Asib'apito na ĩ'ãma aiwata da, te za aihĩ'rãtitõ ĩma aime. Tawamhã ã hã uburé wa za aima tisõ, ate da.

¹⁰ Tawamhã Zezusi te asa tâma tinha:

— Satanasi, mo oto aimorĩ, ĩnhiti. 'Re ihãimana u'âsi mono zadawa wasu'u'wa, ma tô ãne rob'ui'ére: “Uburé Danhib'apito uptabi ãma si, te za 're aiwata za'ra wa'aba mo, 'Re ihãimana u'âsi mono ãma si. Taha ma si te za 're ĩromhuri za'ra wa'aba mo, Asib'apito za'ra wa'aba ma si.” Æne ĩmrema na rob'ui'ére, ĩbahã na hã. — Æne te rob'ui'ére 'rada hã tâma 'rãzarõtõ Zezusi hã, Satanasihi ma.

¹¹ Tawamhã Wa'uburé ma tô ihawi mo. Morĩ wamhã, hãwi ãma romhuri'wa norĩ hã ma tô we itẽme aihutu, te te siwi pawaptob da, Zezusi hã.

Zezusi hã, romhuri na te te ĩsãna'ratazé wasu'u

Marcusi 1.14-15; Rucasi 4.14-15

¹² Tawamhã Zezusi hã Zuwã da te ĩsẽrẽzé wasu'u te te wapari wa, ma tô mo, Darireza na danhipti'a nho'õmo nhisi u.

¹³ Tawamhã Nazaré ãma 're ĩsãmra mono da hã, te te sima rowẽ õ di oto. Taha wa, Capana'u na 'ri nho'õmo nhisi u si ma tô mo, tame oto 're sãmra mono da, Darireza ãma ĩsõ'u zapoto 'rata, Zeburõhõ nhihudu norĩ nhipti'a niwĩ, duré Naptarihi nhihudu norĩ nhipti'a niwĩ.

¹⁴ Æne ma tô Zezusi hã 'manha, duréihã Iza'iza hã te te ãma ĩrob'ui'érezéb zarina te te sina uwaimrami da, 'Re ihãimana u'âsi mono zadawa wasu'u 'rata 'wa hã. Æne ĩsimi'ui'ére hã 'Re ihãimana u'âsi mono mrema na:

¹⁵⁻¹⁶ “Zeburõhõ nhihudu norĩ nhipti'ai ãma 're ĩdahãimana za'ra mono, duré Naptarihi nhihudu norĩ nhipti'ai ãma zama, ĩsõ'u tẽme bâdádi wa, 're ĩdahãimana za'ra mono hã,

Zodã na pa nhisi zara niwĩ 're ãdahãimana za'ra mono hã, Darireza ãma zudezu'õ norĩ hã dawazari 're ãhãimana za'ra mono norĩ hã te uburé robra na 're dahãimana za'ra. Tane nherẽ, te za oto rowa'a za'ẽne hã da te 're 'madã'ã za'ra, tame. Te za oto dama rowa'a, dapẽ'ẽ 're robra na 're ãdanomro mono norĩ ma."

Ãne Iza'izaha nhimi'ui'éré wasu'u hã, Zeburõhõ nhihudu norĩ 're ãhãimana za'ra mono norĩ ãma hã, Naptarihi nhihudu norĩ ãma zama.

¹⁷ Tawamhã ta hawim harẽ ma oto romhuri na sãna'rata Zezusi hã, Timama zadawa wasu'u na. Ãne ma tinhimirowasu'u na dama ãma sãna'rata:

— Aiwaseté wi te za oto 're aipizari za'ra wa'aba mo. Ãhãna bãdã hã ma tã oto ãwa waptãrã, 'Re ãhãimana u'ãsi mono hã da'ãma 're ãsib'a'uwẽ mono zẽb da hã.

Zezusi hã, tepe na romhuri'wa norĩ zõ ãhãrã za'ra zé wasu'u
Marcusi 1.16-20; Rucasi 5.1-11

¹⁸ Tawamhã Zezusi hã Darireza na ãsõ'u nhisi zaihã baba 're morĩ wamhã, ma tã aibã norĩ hã sãmri zahuré, tepe mrami na romhuri'wa norĩ hã, tisisãnawã me: Sima na ãsisi hã, Pedru na ãsisi amo hã. Duré ãno hã Ãdéré na ãsisi hã. ãsõ'ui wa, te nasi abazipara hã wabzuri zahuré, tepe zõ.

¹⁹ Tawamhã Zezusi hã te sõ tihãrã zahuré:

— We ane wa'aba, ãsiré 're ane wa'aba da oto, romhuri na aima ãsisanho wa'aba da, ãma 're ãda'awabui wa'aba mono zẽb da hã. — Ãne te sõ tihãrã zahuré, Zezusi hã.

²⁰ Taha wa, ma te awa'awi tãma marẽme zahuré abazipara ma, Zezusihi siré 're neb zahuré da oto.

²¹ Tawamhã syru na sina pahã wi, ma duré 'madã'ã zahuré, Ti'adu norĩ hã Zuwãhã me. Ta norĩ hã Zebedehe 'ra zahuré. Timama siré te abazipara sisinarĩ hã te te ãma a'rã'õtõ zahuré apã, uba're wa. Tawamhã te duré sõ tihãrã zahuré.

²² Sõ hãrã zahuré wamhã, awa'awi ma tã tinhimiromhuri ma marẽme zahuré. Timama zama ma rẽme zahuré, Zezusihi siré 're neb zahuré da.

Zezusi hã da'ahã na te te ãda'apesezẽ wasu'u
Rucasi 6.17-19

²³ Tawamhã daza'ruĩ mono bã te 're mo Zezusi hã, Darireza na danhipti'a nho'õmo nhisi ãma hã. Zudezu norĩ te, rowahutuzé mono bã, ma tã te te dama 're rowahutu. 'Re ãhãimana u'ãsi mono, da'ãma 're ãsib'a'uwẽ mono zé wasu'u na te duré te te dama 're rowasu'u, ãwasu'uwẽ na. Dahãzẽ mono bã ma duré da'apese. Hãzẽ u'ãsi wa, sib'uwẽ na 're ãnomro mono norĩ zama ma apese, Zezusi hã.

²⁴ Tawamhã Zezusi te te ãda'apesezẽme na, ma tã rowasu'u hã te te ropé, Siriza na danhipti'a nho'õmo nhisi ãma. Taha wa, ma tã ãtẽme da te 're 'wasari dahãzẽ mono bã, uburé aimawi hã dahãzẽ da te 're ãsepata za'ra mono norĩ hã, wa'uburé te te 're ãwamnarĩ za'ra mono norĩ hã, duré da'rã siwamnarĩ wa, 're ãdahãiba popo'o za'ra mono norĩ hã, duré ãmorĩ'õ norĩ hã. Uburé ma tã da'apese, Zezusi hã.

²⁵ Taha wa, ma tã da'ahã uptabi na ãsarina dasi'rẽ, Darireza hawi, duré Decapori hawimhã, duré Zeruzarẽ hawimhã, duré Zudeza na danhipti'a nho'õmo nhisi hawimhã. Duré Zodã pa zara niwĩ 're ãdasi'ubumroi mono norĩ zama ma tã ãtẽme dasito.

5

Zezusi hã, etẽ 'rãihã ãma te te dama ãrowahutuzé wasu'u
Rucasi 6.20-23

¹ Tawamhã Zezusi hã da'ahã uptabi na te te da'madã'ã wamhã, etẽ 'rãihã na ma tã sai'u, tame a'ã sãmra da. Tawamhã ãsiré 're ãnomro mono norĩ hã ma tã 'rãwi ãtẽme ubumro.

² Tawamhã tame ma tã Zezusi hã tinhimirowahutu na tãma sãna'rata za'ra, ãne:

³ — Ni'wam norĩ hã umnhasi sina 'rãwi 're ãsipawapto waihu'u za'ra mono õ na 're siwaihu'u za'ra mono wamhã, duré 'Re ãhãimana u'ãsi mono si za ta norĩ hã ã'upana te te 're ãpawapto wẽ za'ra mono na te te sina 're waihu'u za'ra mono wamhã, ta norĩ si te za rowẽ na 're hãimana za'ra, ãma 're sib'a'uwẽ za'ra mono wa.

⁴ — Duré, ni'wam norĩ hã ti'ab ré dawaseté u'ãsi 're ãdanomro mono wa, da'ãma 're ãpẽ'ẽzẽ za'ra mono norĩ hã ta norĩ ma si tãma 're rowẽ za'etẽ za'ra mono di za. Ta norĩ ma si te za 'Re ãhãimana u'ãsi mono hã te te tãma 're pisutu za'ra, toi u'ãsi 're ãhãimana za'ra mono zẽb da hã.

⁵ — Duré, ni'wam norĩ hã tiwaihu'u pese na 'rãwi 're ãsi'madã'ã ze za'ra mono õ norĩ hã, 'Re ãhãimana u'ãsi mono si te te sima 're ãmadã'ã za'ra mono norĩ hã, ta norĩ ma si, tãma 're rowẽ za'etẽ za'ra mono di za. Ta norĩ ma si te za 'Re ãhãimana u'ãsi mono hã ãwẽ hã te te 're tãma anhomri, te te tãma 're ãpõpisutu za'ra mono zẽb zarina.

6 — Duré, ni'wam nori hã 'Re İhâimana u'âsi mono te te sima 're İwê za'ra mono zéb uwaibaba, uburé marı İwê hã te te tâma 're İ'manharı za'ra mono da si, te te sima 're wê za'ra mono wamhã, ta nori ma si, tâma 're rowê za'êtê za'ra mono di za. Ta nori ma si, te za 'Re İhâimana u'âsi mono hã te te tâma âma 're a'uwaimrami, rowê te te tâma 're İ'apisutu mono zém na hã.

7 — Duré, ni'wam nori hã da'âma 're İpê'êzê za'ra mono zéb zarina, da'âma 're İsina mono nori hã, ta nori ma si, tâma 're rowê za'êtê za'ra mono di za. Ta nori âma si te za 'Re İhâimana u'âsi mono hã âma tipê'êzê za'ra, za da'âma İsipo'ozêb âma hã.

8 — Duré, ni'wam nori hã marı wasétê zô 're sipizari za'ra mono âna 'Re İhâimana u'âsi mono ma si, tâma 're İsihâiba nhomri u'âsi za'ra mono nori hã ta nori ma si, tâma 're rowê za'êtê za'ra mono di za. Ta nori si te za titômo na 'Re İhâimana u'âsi mono hã te te 're 'madâ'â za'ra, 'rãwi.

9 — Duré, rowê na dasiré 're dahâimana za'ra mono da, ni'wam nori hã tinhimiroti wê na te te 're dapawaptob u'âsi za'ra mono wamhã, ta nori ma si, tâma 're rowê za'êtê za'ra mono di za. Ta nori si te za ti'ra na te te 're sisi za'ra, 'Re İhâimana u'âsi mono hã.

10 — Duré, ni'wam nori hã 'Re İhâimana u'âsi mono te te sima 're İwê za'ra mono zéb zarina, uburé marı İwê hã te te 're 'manharı za'ra mono da si, te te sima 're wê za'ra mono wa, da te tâma 're İrob'manharı wasétê za'ra mono nori ma si, tâma 're rowê uptabi za'ra mono di za. E marı wa. 'Re İhâimana u'âsi mono hã ta nori âma 're sib'a'uwê za'ra mono wa. — Âne ma tó Zezusi hã tâma rowasu'u za'ra, tisiré 're İnomro mono nori ma.

11 Tawamhã âne te duré tâma rowahutu za'ra:

— İzazei'wa oto 're anomro aba mono wa, da te ai'âma 're wasétê za'ra wa'aba mono nherê, duré da te aima 're rob'manharı wasétê za'ra wa'aba mono nherê, duré dazadawa nhipse na taré da te dama 're aiwasu'u wasétê za'ra wa'aba mono nherê, İwi 're apizari za'ra wa'aba mono o wamhã, aima 're rowê uptabi za'ra wa'aba mono di za.

12 Taha wa, ma'âpê atoi u'âsi, âma 're anomro aba mono za. 'Re İhâimana u'âsi mono hã te za marı İwê hã sa'êtê na te te aima 're sömri za'ra wa'wa, hãıwa âma asô 're İsimi'wara aba mono hã. Duréihã 'Re İhâimana u'âsi mono zadawa wasu'u 'rata 'wa nori ma, ma tó da te tâma 're rob'manharı u'âsi za'ra, da te aima 're İrob'manharı wasétê za'ra wa'aba mono ne. — Âne na ma tó Zezusi hã tâma waihu'u sirômo za'ra romhã ré, te te waihu'u zara da.

Dasai warırızê wasu'u, rob'uıwêzê wasu'u me

Marcusi 9.50; Rucasi 14.34-35

13 Tawamhã âne te duré tâma rowasu'u za'ra, tisiré 're İnomro mono nori ma:

— Âne wa za duré aima âma romnhimire'ê za'ra wa'wa. A nori wa'wa hã sa ne, te za dama 're aihâimana za'ra wa'aba mo. Sa na hã dasa hã âma se ti, dasai warırızê wasu. Tane nherê, oto 're se si'utôri za'ra mono wamhã, niha da te 'manharı waihu'u o di, apê se da, dasa da te âma 're İwarırı za'ra mono da hã. Marı dai o di oto, dama hã. Taré te za da te 're sa'wari za'ra rob u, marı dai o wa oto. Taha wa, te za oto taré İsisıwi 're danomro, dapara na. Tane duré, a nori wa'wa hã İzadawa wasu'u na dama 're romhuri wê za'ra wa'aba mono nherê, oto romhuri hã 're sahari za'ra wa'aba mono wamhã, marı dai o di oto, 're aihâimana za'ra wa'aba mono zé hã za, İma hã.

14 — Âne wa za duré aima âma romnhimire'ê za'ra wa'wa. A nori wa'wa hã rob'uıwêzém ne, te za dama 're aihâimana za'ra wa'aba mo. 'Re dasimani za'ra mono tó da, da te dasima 're İrob'uıwê za'ra mono ne, te za 're İdanhimroi wê wa'aba mo, 'Re İhâimana u'âsi mono u. 'Rinhu'u hã sa'a nhisiwi, da te 're İ'ri za'ra mono hã dawi 're simani waihu'u za'ra mono o di. 'Madâ'â pese di, dama hã. Tane duré, a nori wa'wa hã dawi 're aimani waihu'u za'ra wa'aba mono o di za. Sô'awi te za dama 're İwasu'u wê u'âsi za'ra wa'aba mo.

15 Duré, rob'uıwêzê hã da te ro'o wamhã, e piza'na te za uppsıbi ni. Mare di. İsima'warazém na si te za sô'awi da te 're söré, 'ri paramhã te te dama 're rob'uıwê za'ra mono da, 'ri 're, 're İdasi'ubumroi mono nori ma.

16 Tane duré, a nori wa'wa hã te za sô'awi dama 're aihâimana za'ra wa'aba mo, rob'uıwêzê hã sô'awi te te dama 're İrob'uıwê za'ra mono ne. Uburé marı hã te za dama 're İ'manharı wê u'âsi za'ra wa'aba mo, dama 're İ'manharı wê za'ra wa'aba mono zé hã da te 're İ'madâ'â za'ra mono zéb zarina, Aımama za'ra wa'aba âma 're dawata za'ra mono da, hãıwa âma 're İsamra mono âma.

'Re İhâimana u'âsi mono nhimiroti 'rata na, Mozési te te âma İrob'ui'érezê wasu'u

17 — Duré, rosa'rata na İ'âma upa za'ra wa'aba o di za, duréihã 'Re İhâimana u'âsi mono nhimiroti 'rata na Mozési te te âma İrob'ui'érezê hã, duré İsadawa wasu'u 'rata 'wa nori nhimiroti zama, te dawi sawi da, we İmorı na hã ti'ai u. Ta nori nhimirowasu'u 'rada hã te dawi İsawi da hã, we İmorı o di. Mare di. 'Re İhâimana u'âsi mono nhimiroti 'rata na rob'ui'ére hã te İsina İ'uwaimrami da si, wa wei mo.

¹⁸ Tô sena, wa za âne aima waihu'u sirômo za'ra wa'wa. Hâiwa norî hâ ti'ai me nimahâ na si'utôri zahuré da nherê, duréihâ 'Re Ihâimana u'âsi mono nhimiroti 'rata na rob'ui'ére hâ pire na te za tô dama 're hâimana u'âsi. Nima hâ dawi 'masi'utôri waihu'u ô di za, i'ui'ére misi hâ, duréi'ui'ére 'ràzazé hâ, iwaptêrê mono bâ. Za niha dama 're ïromhâimana mono zéb da hâ, ïbahâ na duréihâ ïsada wasu'u wa norî te te âma ïrob'ui'ére sirômo za'ra zéb zarina, rob'râsutuzéb u za niha dama 're romhâimana uptabi za'ra mono ô rê, si'utôri za'ra ô di za, ïsimiroti na rob'ui'ére 'rata norî hâ.

¹⁹ Duré, ni'wam norî hâ 'Re Ihâimana u'âsi mono nhimiroti 'rata na rob'ui'ére hâ nima hâ roti hâ taré dama 're maihâimana mono newa, te te 're 'madâ'â za'ra mono ô wamhâ, duré ïsine da te 're 'madâ'â tô za'ra mono da, te te dama âma 're roti za'ra mono wamhâ, ta norî si te za dama wapu na 're hâimana za'ra, 'Re ihâimana u'âsi mono, da'âma 're ïsib'a'uwê mono zéb âma hâ. Tane nherê, ni'wam norî si ïsimiroti na rob'ui'ére 'rada hâ te te 're 'madâ'â pese za'ra mono wamhâ, duré ïsine da te 're 'madâ'â pese za'ra mono da, te te dama âma 're roti za'ra mono wamhâ, ta norî si te za dama pire na 're hâimana za'ra, da'âma 're ïsib'a'uwê mono zéb âma hâ.

²⁰ Âne wa za duré aima waihu'u za'ra wa'wa. Parisezu norî hâimanazém nhipai u, duré 'Re ihâimana u'âsi mono nhimiroti na rob'ui'ére na dama rowahutu'wa norî hâimanazém nhipai u, Wamama te te sima 're l'aiwê za'ra wa'aba mono zéb zarina si, 're aihâimana wê za'ra wa'aba mono wamhâ, tawapsi, te za dame 're asisisi aba mo, 'Re ihâimana u'âsi mono, da'âma 're ïsib'a'uwê mono zéb u hâ.

Dasisada 're ïdanhiti'ruï wairébé mono zé wasu'u

²¹ — Âne hâ ma tô duré 're ïwapari za'ra wa'aba mo, duréihâ 'Re ihâimana u'âsi mono te te dama ïrotizé hâ: “Re danhimroi wa'aba mono ô di za. Ni'wam norî hâ te te 're danhimroi mono wamhâ, te za dawasété na dawaihu'u'wa norî u da te 're simro, ta norî hâ ïwasété na te te siwi 're waihu'u za'ra mono wa, te te dama 're 'ru za'ra mono da, da te dasiwi 're simroi mono da.” Âne duréihâ aihî'rata norî wa'aba ma, ma tô roti.

²² Âne na roti hâ tô sena nherê, wa za oto wa hâ aimawi aima waihu'u za'ra wa'wa, âne na roti na hâ. Ni'wam norî hâ tisiré 're ihâimana za'ra mono norî da, 're siti'ru za'ra mono wamhâ, ta norî hâ te za 'Re ihâimana u'âsi mono hâ te te siwi 're awê'ô, ïwasété na te te 're l'awaihu'u mono zéb zarina. Duré âté ni'wa hâ te za tisiré ma tinha, âne: “A hâ, marî da, 're aihâimana mono ô.” Âne ni'wam norî hâ te te dama 're nharî za'ra mono wamhâ, te za da te 're simro, zudezu norî ma roti'wa norî u, dawasété na dawaihu'u'wa norî tême, ta norî hâ te te siwi 're wê'ô za'ra mono da, ïwasété na te te siwi 're waihu'u za'ra mono wa. Duré ni'wa hâ âté âne te za tisiré ma tinha: “E niha asimiza'rese'ô a hâ, 'Re ihâimana u'âsi mono wasu'u na hâ.” Âne ni'wam norî hâ tisiré ma, te te 're nharî za'ra mono wamhâ, âté ta norî hâ te za ropipa u 're sisisi, unhama ro'o u'âsi u.

²³⁻²⁴ Âté a norî wa'wa hâ te za 're anomro aba mo, 'Re ihâimana u'âsi mono nhorôwa u, marî hâ tâma asôprubzéb da hâ, wedeza ne nhisiwi 're sa'ra za'ra wa'aba mono da, tâma danhoprubzê nomrizé nhisiwi. Tawapsi âté te za asina 're aipo're pu'u za'ra wa'aba mo, marî hâ asiré ma, 're nharî wasété za'ra wa'aba mono wa, asisada 're aihâimana za'ra wa'aba mono zém na hâ. Âne wa, te za a'â asisô 're isa'ra wa'aba mo, 'Re ihâimana u'âsi mono ma, asôprubzê hâ wedeza ne nho're, asiré u a'â asitême 're anomro aba mono da, asima 're asiwasu'u za'ra wa'aba mono wa, apâ duré asina 're asiwadi za'ra wa'aba mono da. Taha parip si te za apâ 're anomro aba mo, 'Re ihâimana u'âsi mono nhorôwa u, tâma asôprubzê hâ oto tâma 're sômri za'ra wa'aba mono da.

²⁵ — Âté ni'wa hâ te za sima ai'âma rosa'rata 'wa, dama rowairébé'wai u te te ai'mazaprôni aba da, marî tiwi l'mai'manharî wasété aba zém na te te tâma ai'maiwasu'u wa'aba da. Âne wamhâ, te te ai'mazaprôni aba ô ré, te za tâma ai'masiwasu'u wa'wa, te te âma ai'mazazei wa'aba wa, dama rowairébé'wa norî u, te te ai'mazaprôni aba tô da, damrami'wai ma, te te ai'mai'ruï wa'aba tô da, dazazéb 're, da te ai'manherê aba tô da.

²⁶ Dazazéb 're, da te ai'manherê aba wamhâ, marî hâ dawi l'mai'manharî wasété aba wa'râmi, dama asi'maiwa'âbâ 'râsutu pese aba ô nherê, ta hawi ai'maiwatobro waihu'u aba ô di za. Tô sena, wa âne na hâ aima rowasu'u za'ra wa'wa.

Damro na dasiwi danhipsaihuri wasu'u

²⁷ — Âne hâ ma tô duré 're ïwapari za'ra wa'aba mo, duréihâ 'Re ihâimana u'âsi mono te te dama ïrotizém na hâ: “Aimro na asiwi 're asipsaihuri za'ra wa'aba mono ô di za.”

²⁸ Âne na roti hâ tô sena nherê, wa za oto wa hâ aimawi aima roti za'ra wa'wa, tô ôhõ na roti na hâ. Ni'wam norî hâ pi'ô, titômo na te te 're 'madâ'â ze za'ra mono wa, te te 're waibui mono da, te te sima âma 're rosa'rata za'ra mono wamhâ, taha na zama te za tiwasédé hâ te te 're 'manharî za'ra, tinhimirosa'rata na si nherê.

²⁹ Duré marī hā atōmo nhimire niwīm na 're 'madā'ā za'ra wa'aba mono wa, aiwasédé hā 're waibui wa'aba mono wamhā, tawamhā atōmo nhimire niwī asiwi 're sani za'ra wa'aba mono wa, romhā na asisiti 're ĩsāmra aba mono ne, te za oto 're anomro wē wa'aba mo. Ato hā sahuré aima 're ĩhāmāna za'ra wa'aba mono ō nherē, aima 're rowē uptabi za'ra wa'aba mono di za. Aihāiba wahuré ré, duré atōmo zahuré ré, 'Re ĩhāmāna u'āsi mono hā ropipa u, te te 're asāmra aba mono wamhā, aima 're rowē za'ra wa'aba mono ō di za.

³⁰ Duré, asib'rata nhimire niwīm na aiwasédé hā 're waibui wa'aba mono wamhā, asiwi 're sihāri za'ra wa'aba mono wa, romhā na asisiti 're ĩsāmra aba mono ne, te za oto 're anomro wē wa'aba mo. Asib'rada hā sahuré aima 're ĩhāmāna za'ra wa'aba mono ō nherē, aima 're rowē uptabi za'ra wa'aba mono di za. Aihāiba wahuré ré, duré asib'rata zahuré ré, ropipa u 're asisiti aba mono wamhā, aima 're rowē za'ra wa'aba mono ō di za.

Damro, da te 're ĩrēme za'ra mono zé wasu'u

Mateusi 19.1-9; Marcusi 10.1-12; Rucasi 16.18

³¹ — Duréihā 'Re ĩhāmāna u'āsi mono te te duré dama ĩrotizé hā, āne: “Aibā norī hā timro te te 're rēme za'ra mono ō ré, te za rob'ui'éré hā te te tāma 're sōmri za'ra, za te te ĩrēmezém na. Taha parip si, te za oto timro hā te te 're rēme za'ra, pibu pese na.” Āne duréihā Mozési te te āma ĩrob'ui'érezé hā, āne na hā.

³² Āne na roti hā tō sena nherē, wa za oto wa hā aimawi aima waihu'u za'ra wa'wa, tō ōhō na roti na hā. Pi'ō norī hā aibā aimawi na 're sipsaihuri za'ra mono ō nherē, ĩmro te te 're rēme za'ra mono wamhā, tiwasédé hā te za te te 're 'manharī za'ra, aibā norī hā. E marī wa. Pi'ō norī hā ĩmro te te 're rēme za'ra mono nherē, aibā aimawi na duré apā 're mro zahu za'ra mono wamhā, tawapsi te za tiwasédé hā te te 're 'manharī za'ra, pi'ō norī hā. Taha wa, aibā norī hā tiwasédé te te tāma 're ĩ'manharī za'ra mono zém hawi wa, te za duré ō norī zama aibā aimawi na 're mro za'ra mono wa, tiwasédé hā te te 're 'manharī za'ra. Duré aibā norī hā, pi'ō, da te 're ĩrēme za'ra mono na 're mro za'ra mono wamhā, tawapsi, te za duré ta norī zama tiwasédé hā te te āma 're 'manharī za'ra, aibā norī hā.

Marī na da te dasima 're ĩropisutu za'ra mono zé wasu'u

³³ — Āne hā ma tō duré 're ĩwaparī za'ra wa'aba mono, duréihā 'Re ĩhāmāna u'āsi mono te te dama ĩrotizém na Mozési te te āma ĩrob'ui'érezé hā: “‘Re ĩhāmāna u'āsi mono nho'a, marī na dama 're ropisutu za'ra wa'aba mono wamhā, te za tō dama āma 're ĩ'uwaimrami za'ra wa'aba mo.” Āne duréihā 'Re ĩhāmāna u'āsi mono te te dama ĩrotizém na rob'ui'éré hā.

³⁴⁻³⁵ Āne na roti hā tō sena nherē, wa za oto wa hā aimawi aima waihu'u za'ra wa'wa, tō ōhō na roti na hā. Marī pire na taré dama 're ropisutu za'ra wa'aba mono ō di za oto, 'Re ĩhāmāna u'āsi mono nho'a. Mare di. Duré āne na dama 're ropisutu za'ra wa'aba mono ō di za: “Hāiwa hā tō sena wahuré 're ĩsa'wari mono ne, wa duré wa hā tō sena aima ropisutu.” Āne wasu'u zarina taré dama 're ropisutu za'ra wa'aba mono ō di za. E marī wa. Hāiwa hā taré hā 're ĩhāmāna mono ō wa, tamé 'Re ĩhāmāna u'āsi mono hā 're sāmra u'āsi mono wa, ta hawi te te we duré 're da'ab'madā'ā mono wa. Duré āne na dama 're ropisutu za'ra wa'aba mono ō di za: “Ti'a hā tō sena wahuré 're ĩsa'wari mono ne, wa duré wa hā tō sena aima ropisutu.” Āne wasu'u zarina taré dama 're ropisutu za'ra wa'aba mono ō di za. E marī wa. Ti'a zama pire wa, 'Re ĩhāmāna u'āsi mono te si wa. Duré āne na dama 're ropisutu za'ra wa'aba mono ō di za: “Zeruzarē na 'ri nho'ōmo nhisi hā tō sena 're ĩsa'wari mono ne, wa duré wa hā tō sena aima ropisutu.” Āne wasu'u zarina taré dama 're ropisutu za'ra wa'aba mono ō di za. E marī wa. Ta hā 'Re ĩhāmāna u'āsi mono te si wa duré, uburé Danhib'apito uptabi te si wa.

³⁶ Duré āne na dama 're ropisutu za'ra wa'aba mono ō di za: “Īrā hā tō sena ĩma 're ĩhāmāna mono ne, wa duré wa hā tō sena aima ropisutu.” Āne wasu'u zarina taré dama 're ropisutu za'ra wa'aba mono ō di za. E marī wa. Ai'rā za'ra wa'wa hā ate za'ra wa'aba ō wa, 'Re ĩhāmāna u'āsi mono te si wa. Asi'uihā na aséré hā asima 're rādā'ā waihu'u za'ra wa'aba mono ō di. Duré asi'uihā na 're asisé'é'a waihu'u za'ra wa'aba mono ō di.

³⁷ Marī hā dama 're 'manharī za'ra wa'aba mono da, asina dama 're ropisutu za'ra wa'aba mono wamhā, āne si te za dama 're ĩnharī za'ra wa'aba mo: “Īhe. Wa za tō 'manha.” Duré marī hā dama 're 'manharī za'ra wa'aba mono da, asima 're wē za'ra wa'aba mono ō wamhā, āne si te za duré dama 're ĩnharī za'ra wa'aba mo: “Mare di. Wa hā te 'manharī ō di za.” Āne si te za dama 're ĩnharī za'ra wa'aba mo. Āne si dama 're nharī za'ra wa'aba mono ō wamhā, Wa'uburé nhimiwada'uri zarina te za aiwasédé hā 're ĩ'manharī za'ra wa'aba mo.

Marī na da te dasima 're ĩwa'rāmi za'ra mono zé wasu'u

Rucasi 6.29-30

³⁸ — Āne hā ma tō duré 're ĩwaparī za'ra wa'aba mo, duréihā 'Re ĩhāmāna u'āsi mono te te dama ĩrotizém na hā: “Ni'wam norī hā te te 're datōmo wamnarī za'ra mono wamhā, te za

asa da te 're tōmo wamnarī za'ra īwa'rāmi, aiwab da. Duré ni'wam norī hā da'wa te te dawī 're prub za'ra mono wamhā, te za duré asa īwa'rāmi da te 're 'waprub za'ra, aiwab da." Āne na duréhā roti hā.

³⁹ Tane nherē, wa za duré wa hā aimawi aima waihu'u za'ra wa'wa, tō ōhō na rotizém na hā. Da te aima 're rob'manharī wasété za'ra wa'aba mono nherē, asa dama āma 're wa'rāmi za'ra wa'aba mono ō di za. Atob'rata nhimire niwī da te 're aihā za'ra wa'aba mono wamhā, dama āma 're wa'rāmi za'ra wa'aba mono ō di za. Taré te za 're aipizari za'ra wa'aba mo, atob'rata amo niwī, da te duré 're aihā za'ra wa'aba mono da.

⁴⁰ Āté ni'wa hā te za ai'āma wa'aba sima rosa'rata, dawasété na dawaihu'u'wa norī u te te ai'mazaprōni aba da, marī tiwi ī'mai'manharī wasété aba zém na te te tāma ai'maiwasu'u wa'aba da. Tawamhā áté te za tāma ai'maiwasu'u wa'wa, ta norī hā te te aima 'maipisutu aba da, asō'tutu'u īwa'ābā syryre hā īwa'rāmi tāma 'manhomri aba da, tiwi ī'mai'manharī wasété aba wa'rāminhā. Āne wamhā, te te aiwi 'mai'āri aba wamhā, asi'ubuzéb zama te za tāma ī'manhomri 'wa, wa'ābā za'etē nherē, te te aiwi 'maiwaptērē ō nherē.

⁴¹ Duré, ni'wam norī hā bādādi na marī hā misi ti'ai pibuzém na tāma 're 'wasari aba mono da, te te aima 're 'ru za'ra wa'aba mono wamhā, asi'uihā na te za asima 're īwē za'ra wa'aba mo, taha nhipai u, maparane ti'ai pibuzém na tāma 're 'wasari aba mono da a'ā.

⁴² Duré marī hā da te aiwi 're waptērē za'ra wa'aba mono wamhā, te za dama 're īsōmri za'ra wa'aba mo. Duré marī hā asibro hā taré a'ā da te aiwi 're waptērē za'ra wa'aba mono wamhā, dawī 're sawi za'ra wa'aba mono ō di za, asimarī 'wa hā. Te za tō taré dama 're īsōmri za'ra wa'aba mo, a'ā.

*Da'ruiwapari'wa norī, da te 're īsawi pese za'ra mono zé wasu'u
Rucasi 6.27-28, 32-36*

⁴³ — Āne hā ma tō duré 're īwapari za'ra wa'aba mo: "Asiré 're aihāimana za'ra wa'aba mono norī si te za 're īsawi pese za'ra wa'aba mo. Ai'ruiwapari'wa norī si te za asa asiwi 're īwē ō pese za'ra wa'aba mo."

⁴⁴ Tane nherē, wa za duré wa hā aimawi aima waihu'u za'ra wa'wa, tō ōhō na rotizém na hā. Ai'ruiwapari'wa norī hā te za 're īsawi pese za'ra wa'aba mo. Duré te te aima 're īrob'manharī wasété za'ra wa'aba mono norī āma, te za 're aimreme zusi aba mo, 'Re īhāimana u'āsi mono ma, īwē si te te tāma 're apisutu mono da, ta norī ma.

⁴⁵ Āne te za dama 're ī'manharī za'ra wa'aba mo, Aimama aba 'ra na sena na da te 're aiwaihu'u za'ra wa'aba mono da, hāiwa āma 're īsāmra mono 'ra na. E marī wa, te za ai'ruiwapari'wa norī hā 're īsawi pese za'ra wa'aba mo. Ni'wai ma, īsawi hā te te ba'a ō wa, 'Re īhāimana u'āsi mono hā. Uburé te te 're da'azawi pese, te te 're īsawi pese za'ra mono norī hā, duré te te 're īsawi ō za'ra mono norī zama. Aiwapasi te bādā hā te te dama 're rob'uiwē za'ra, 're īnomro wē mono norī ma, duré 're īnomro wasété mono norī ma zama, 'Re īhāimana u'āsi mono nhimipisutuzéb zarina. Aiwapasi te duré tā hā dama 're ta'a za'ra, 'Re īhāimana u'āsi mono nhimiroti te te 're ī'madā'ā pese za'ra mono norī ma, duré te te 're īwapari za'ra mono ō norī ma zama, īsimipisutuzéb zarina.

⁴⁶ Rob'uiprazé ubunroi'wa norī hā bété. Ta norī hā dawī 're sipsaihuri u'āsi za'ra mono wa, te 're nomro wasété. Ta norī hā te tizawi pese 'wa norī si te te 're sawi za'ra. Tawamhā asawi pese 'wa norī si, 're sawi pese za'ra wa'aba mono wamhā, e te za 'Re īhāimana u'āsi mono hā īwē hā te te aima 're sōmri za'ra wa'wa. Mare di. Īwē hā te te aima 're sōmri za'ra wa'aba mono ō di za.

⁴⁷ Duré 'Re īhāimana u'āsi mono waihu'u'ō'wa norī hā te te 're saze za'ra mono ō nherē, te tisiwadi norī ma, marī īwē hā te te tāma 're 'manharī za'ra, siré 're īhāimana za'ra mono norī ma hā. A norī wa'wa hā bété, asiré 're aihāimana za'ra wa'aba mono norī ma si, marī īwē hā tāma 're 'manharī za'ra wa'aba mono wamhā, aiwapasi te aiwasété na dame 're aihāimana za'ra wa'aba mo, 'Re īhāimana u'āsi mono waihu'u'ō'wa norī siré.

⁴⁸ Taha wa, te za a norī wa'wa hā uburé 're īdazawi pese za'ra wa'aba mo, 'Re īhāimana u'āsi mono hā te te da'āma 're a'upai mono āna, uburé te te 're īda'azawi pese mono ne.

6

Dasisō'a, marī hā da te dasima 're ī'manharī za'ra mono zé wasu'u

¹ — 'Re īhāimana u'āsi mono āma, 're aiwata za'ra wa'aba mono da, marī hā dama 're ī'manharī wē za'ra wa'aba mono zém na hā āma 're aihāimana za'ra wa'aba mono ō di za, danho'a hā, āne na hā taré da te 're ai'madā'ā wē za'ra wa'aba mono zō. Asimiza'rese te za 're anomro aba mo, āne hā 're 'manharī za'ra wa'aba mono tō da. Āne hā danho'a 're 'manharī za'ra wa'aba mono wamhā, Aimama 'wa hā hāiwa āma 're īhāimana mono hā tinhoprubzé īwē uptabi hā te te aima 're sōmri za'ra wa'aba mono ō di za, marī īwē hā 're ī'manharī za'ra wa'aba mono zé wa'rāminhā.

2 — Taha wa, İsbrob'ô norî ma, marî hâ tâma 're İsômri za'ra wa'aba mono zém na, da te 're aiwêsâmri za'ra wa'aba mono da, dama 're asiwasu'u za'ra wa'aba mono ô di za, âne na hâ. Âne hâ te ni'wam norî hâ te te dama 're 'manharî za'ra, 'Re İhâimana u'âsi mono âma 're İdawata za'ra mono zéb 're, 'ri 're, duré 'ri nhî'rîti na 're İdahâimana za'ra mono norî ma zama. 'Re hâimana wê za'ra mono newa, te ta norî hâ âma 're dawata za'ra mono zô, âne hâ te te dama 're 'manharî za'ra. Tawamhâ, âma 're dawata za'ra mono wamhâ, taha na si te za tô âma 're hâimana za'ra. 'Re İhâimana u'âsi mono nhoprubzê hâ nimahâ bâtâ na hâ tâma 're hâimana za'ra mono ô di za. Tô sena, wa âne hâ aima waihu'u sirômo za'ra wa'wa.

3-4 Taha wa, ni'wai wi, marî zô 're rowaptâ'â mono wa, 're pawaptob za'ra wa'aba mono wamhâ, sô'awi 're pawaptob za'ra wa'aba mono ô di za, da te âma 're aiwaihu'u za'ra wa'aba mono tô da, marî na 're İpawaptob za'ra wa'aba mono zém na hâ. Dama 're İrob'manharî wê za'ra wa'aba mono zém na hâ, da te 're ai'madâ'â za'ra wa'aba mono ô nherê, te Aimama aba si te te ai'âma 're 'madâ'â za'ra wa'wa. Taha wa, te za taha si İwê hâ te te aima 're sômri za'ra wa'wa, İwa'râmi.

*'Re İhâimana u'âsi mono ma, 're İdamreme zusi mono zé wasu'u
Rucasi 11.2-4*

5 — Duré ni'wam norî hâ te te sima 're İwê za'ra mono zéb zarina, te danho'a 're mreeme zusi, 'Re İhâimana u'âsi mono ma. Hâiwi 're simasa mono sina, te 'Re İhâimana u'âsi mono âma 're İdawata za'ra mono zéb âma, 're mreeme zusi, 're hâimana wê za'ra mono newa, da te 're 'madâ'â wê za'ra mono da. 'Ri nhî'rîti wa, bâdâdi sitob âma, te duré âne 're mreeme zusi, da'ahâ norî nho'a. Tawamhâ, da te 're 'madâ'â wê za'ra mono wa, âma 're dawata za'ra mono wamhâ, taha na si te za tô âma 're hâimana za'ra. Nimahâ na hâ 'Re İhâimana u'âsi mono nhoprubzê hâ tâma 're İhâimana za'ra mono da hâ, mare uptabi di za, ta norî ma hâ. Tô sena wa âne na aima waihu'u sirômo za'ra wa'wa.

6 Duré, a norî wa'wa hâ 'Re İhâimana u'âsi mono ma, 're aimreme zusi aba mono da, te za 'ri para u 're asisisi aba mo, asôrôwa 'ri 're wa'wa u. Tawamhâ te za asiré 're İ'ridawa nhitob za'ra wa'aba mo, Aimama aba ma, 're aimreme zusi aba mono da, romnhiwasi nimahâ bâtâ na da te 're İ'madâ'â waihu'u za'ra mono ô ma hâ. Âne wamhâ, aihâiba pisutu 're aimreme zusi aba mono ré, Aimama aba si te te ai'âma 're 'madâ'â za'ra wa'aba mono wa, te za taha si İwê hâ te te aima 're sômri za'ra wa'wa, İwa'râmi.

7 — Duré, 'Re İhâimana u'âsi mono ma, 're aimreme zusi aba mono wamhâ, taré aimreme na 're sahu ahâ za'ra wa'aba mono ô di za apâre, 'Re İhâimana u'âsi mono hâ te te 're aiwapari za'ra wa'aba mono ô newa. 'Re İhâimana u'âsi mono waihu'u'ô'wa norî si te timreme na te te tâma 're sahu u'âsi za'ra taré, taha zarina si te te 're pawaptob za'ra mono da newa.

8 Taha wa, ta norî ne 're aimreme zusi aba mono ô di za. E marî wa. Aimama aba wi, marî hâ tiwi 're waptêrê za'ra wa'aba mono ô ré, marî zô aiwi 're İrowaptâ'â za'ra wa'aba mono zé hâ, te te 're awaihu'u sirômo mono wa.

9 Âhâ zarina si te za 're aimreme zusi aba mo, 'Re İhâimana u'âsi mono ma:
“Wamama, hâiwa âma 're asâmra mono hâ, asisi wê na uburé da te 're aiwaihu'u za'ra mono da, wa aima da'âma 're İmreme.

10 Uburé da'âma 're asib'auwê mono da, wa duré da'âma 're İmreme. Hâiwa âma aima romhuri'wa norî hâ, asima 're İwê mono zéb zarina si, te te 're İ'aiwapari pese za'ra mono ne, ti'ai âma uburé da te duré 're aiwapari pese za'ra mono da, wa da'âma 're İmreme.

11 Â bâtâ na, wei wama 're anhomri mono, wasa hâ âma 're İwasaihuri mono zéb da hâ.

12 Dawasédé hâ da te wa'âma 're 'manharî za'ra mono wa, wa te wasina 're İ'madâ'â za'ra mono ô ne, a hâ duré wa'âma 're ab'madâ'â mono ô di za, wawasédé hâ.

13 Duré, 're wa'ab'madâ'â nhimini mono ô di za, Wa'uburé hâ te te 're wa'au'upi mono wa, wawasété u 're warere'e tō mono da. Ma'âpé, 're wa'anho'reptui u'âsi mono, İwasété uptabi wi.”

Âne si te za Aimama aba wi, 're İrowaptêrê za'ra wa'aba mo. — Âne ma tô Zezusi hâ tâma waihu'u za'ra, tisiré 're İnomro mono norî ma.

14-15 Tawamhâ âne te duré tâma roti za'ra:

— Dawasédé hâ da te ai'âma 're İ'manharî za'ra wa'aba mono zé hâ asina 're 'madâ'â u'âsi za'ra wa'aba mono wamhâ, Aimama 'wa hâ te za duré uburé aiwasédé hâ 're İ'manharî za'ra wa'aba mono zé hâ te te ai'âma 're 'madâ'â u'âsi za'ra wa'wa. Dawasédé hâ da te ai'âma 're 'manharî za'ra wa'aba mono nherê, asina 're 'madâ'â za'ra wa'aba mono ô wamhâ, tawapsi, aiwasédé hâ te te ai'âma 're 'madâ'â za'ra wa'aba mono ô di za Aimama 'wa hâ, hâiwa âma 're İsâmra mono hâ.

Dasai âna a'â 're İdahâimana za'ra mono zé wasu'u

¹⁶ — 'Re ìhâimana u'âsi mono ma, 're aimreme zusi aba mono da, asai âna a'â 're aihâimana za'ra wa'aba mono wamhâ, ai'ubu pire na 're aihâimana za'ra wa'aba mono ò di za. Ni'wam norî si te za ubu pire na sai âna 're mre me zusi, 're nomro wê mono newa, da te 're 'madâ'â wê za'ra mono da. Tawamhâ, da te 're 'madâ'â wê za'ra mono wa, âma 're dawata za'ra mono wamhâ, taha si te za tô tâma 're hâimana za'ra. Nimahâ na 'Re ìhâimana u'âsi mono nhoprubzé hâ tâma 're hâimana za'ra mono ò di za, ta norî ma hâ. Tô sena wa âne na hâ aima waihu'u sirômo za'ra wa'wa.

¹⁷⁻¹⁸ Taha wa, a norî wa'wa hâ 'Re ìhâimana u'âsi mono ma, 're aimreme zusi aba mono da, asai âna a'â 're aihâimana za'ra wa'aba mono wamhâ, te za taré â na 're asi'ubu upsô za'ra wa'aba mo, tô 're aihâimana za'ra wa'aba mono zém na 're aihâimana za'ra wa'aba mono da. Te za duré taré 're asiwarîrî za'ra wa'aba mo, a'â asai âna 'Re ìhâimana u'âsi mono ma, 're aihâimana za'ra wa'aba mono zém na, da te 're aiwaihu'u za'ra wa'aba mono tô da, Aimama aba si te te 're aiwaihu'u za'ra wa'aba mono da, datômo na da te 're ì'madâ'â waihu'u za'ra mono ò si. Âne wamhâ, aihâiba pisutu, asai âna a'â tâma 're aimreme zusi aba mono ré, Aimama aba si te te ai'âma 're 'madâ'â za'ra wa'aba mono wa, te za ìwê hâ te te aima 're sômri za'ra wa'wa, ìwa'râmi.

Hâiwa âma, marî hâ wê uptabi na 're ìhâimana za'ra mono wasu'u
Rucasi 12.33-34

¹⁹ — Marî ìwa'âbâ za'êne hâ asima si 're ubumroi pese za'ra wa'aba mono ò di za, ti'a 're anomro aba mono ré hâ. Ti'ai âma marî na 're ìdanhimarî za'ra mono hâ si'utôrî pese di, dawi 're u're su'u za'ra mono wa, duré zazahâi hâzapu'u'wa hâ te te dawi 're hâiwasété za'ra mono wa. Ìsipsaihuri norî hâ te za duré dawi sô 're sisisi, dawi 're sipsaihuri za'ra mono da, danhimarî na.

²⁰ Hâiwa âma asimarî za'ra wa'wa hâ ìsi'utôrî'ô zô si te za asima 're ìrob'ruiwapari za'ra wa'aba mo, 'Re ìhâimana u'âsi mono, ìwê uptabi hâ te te asô 're ì'madâ'â pese za'ra wa'aba mono zô si. Tame marî hâ dawi 're u're waihu'u za'ra mono ò di. Zazahâi hâzapu'u'wa hâ te te duré dawi 're hâiwasété waihu'u za'ra mono ò di. Duré ìsipsaihuri norî hâ dawi 're sipsaihuri waihu'u za'ra mono ò di, tamemhâ.

²¹ Ti'ai âma asimarî ahâ zô si 're rob'ruiwapari za'ra wa'aba mono wamhâ, taha na si te za aipê'ê 're, asima 're ìrosa'rata u'âsi za'ra wa'aba mo, hâiwa âma ìwê hâ ìsi'utôrî'ô upana. Duré hâiwa âma ìwê uptabi zô si, asima 're rob'ruiwapari za'ra wa'aba mono wamhâ, taha na si te za asima 're ìrosa'rata u'âsi za'ra wa'aba mo, 'Re ìhâimana u'âsi mono, ìwê te te asô 're ì'apisutu aba mono zô si.

Rob'uiwézé wasu'u
Rucasi 11.34-36

²²⁻²³ — Rob'uiwézé hâ te za da te dasima 're ro'o za'ra, dama rob'madâ'â pibu pese da. Tane duré, dato hâ aiwa rob'uiwézém ne. Datômo wê wamhâ, dama rob'madâ'â pese di. Datob'a wamhâ, dama rob'madâ'â waihu'u ò di. Tane duré, a norî wa'wa hâ asimirosa'rata wê za'ra wa'aba wamhâ, te za rowa'a na ne 're aihâimana u'âsi za'ra wa'aba mo. Duré, asimirosa'rata wasété za'ra wa'aba wamhâ, robra na ne te za 're aihâimana za'ra wa'aba mo.

Rob'uiuprazéb zô si da te dasima 're ìrob'ruiwapari za'ra mono zé wasu'u
Rucasi 16.13; 12.22-31

²⁴ — Dama romhuri'wa hâ ìsib'apito maparane wamhâ, aiwa te te tâma 're romhuri wê zahuré mono ò di za. Ìsib'apito maparane wamhâ, sahuré te te 're sawi pese zahuré mono ò di za. Misi te za te 're sawi pese. Ìhâiba amo si te za te siwi 're wê'ô. Duré sahuré te te 're wapari pese zahuré mono ò di za, romhuri'wa hâ. Misi te za te te 're wapari pese. Ìhâiba amo si te za te te 're ruiwapari. Tane, a norî wa'wa hâ rob'uiuprazéb zô si, asima 're romhuri za'ra wa'aba mono wamhâ, 'Re ìhâimana u'âsi mono ma, 're romhuri wê waihu'u za'ra wa'aba mono ò di za. Mare di.

Marî na 're dahâtâ'â za'ra mono âna 're ìdanomro mono zé wasu'u

²⁵ — Taha wa, wa za duré âne aima waihu'u za'ra wa'wa. Marî na 're aihâtâ'â za'ra wa'aba mono ò di za, asazé wa'aba na, duré 're ì'âhuri aba mono ò na zama. Duré ai'uzazém na zama, asina 're aihâtâ'â za'ra wa'aba mono ò di za. E taré wasa zô si wa za 're wahâimana za'ra. Mare di. Wasazé nhipai u'pire uptabi di, wahâimanazé hâ. E taré 're ìwasi'uza za'ra mono zép si, te wahâiba hâ wama 're hâimana za'ra. Mare di. Marî ìwê uptabi da, te wahâiba hâ wama 're hâimana za'ra.

²⁶ Duré, sire norî hâ bété. Ta norî hâ te te sima 're robzuri mono ò di. Duré te te sima 're rob'râihâri za'ra mono ò di. Robza'razéb âma te te sisa 're robza'wari za'ra mono ò di duré, âma 're ìsaihuri mono zéb da hâ. Tane nheré, te Aimama 'wa hâ hâiwa âma 're ìsâmra mono hâ

Īsa hā te te tāma 're anhomri u'āsi. E tawamhā sire si te te 're azawi pese, 'Re ĩhāimana u'āsi mono hā. Mare di. Sire zawi nhipai u, tāma asawi uptabi za'ra wa'aba di. Taha wa, sire te te 're ĩ'ab'madā'ā mono zém nhipai u, te za te te 're ai'madā'ā pese za'ra wa'wa, Aimama 'wa hā, asina 're aihâtâ'ā za'ra wa'aba mono tō da.

²⁷ Duré, 're atâ'ā za'ra wa'aba mono zém na asina 're aihâtâ'ā za'ra wa'aba mono wamhā, e asibâtâ na 're atâ'ā za'ra wa'aba mono ò di za. E asibâtâ nhipai u, te za 're aihâimana siroptub za'ra wa'aba mo. Mare di. Asina 're aihâtâ'ā za'ra wa'aba mono zéb zarina, asibâtâ nhipai u 're aihâimana siroptub za'ra wa'aba mono ò di za.

²⁸ — E marĭ wa, te bété ai'uzazéb ò na asina 're aihâtâ'ā za'ra wa'aba mo. E asina 're aihâtâ'ā za'ra wa'aba mono zéb zarina, te za rowē na 're aihâimana za'ra wa'aba mo. Mare di. Ma'āpé, romnhirārā 're ĩhâimana za'ra mono zém na rosa'rata za'ra wa'aba a'ā, rom na 're ĩsimasa mono na hā. Ta norĭ hā ti'uzazéb da hā, te te sisada 're 'manharĭ za'ra mono da, te te 're romhuri za'ra mono ò di.

²⁹ Tane nherē, dama 're si'ūza zeĭ uptabi di, romnhirārā hā. Apito Saroma hā sibro pese wa, uza wē uptabi na 're si'ūza mono nherē, taha nhipai u, dama 'madâ'ā zeĭ uptabi di, romnhirārā hā.

³⁰ Romnhirārā hā hāiwi 're simnhatâ mono ré, te za du hā ĩré da te 're wazāri za'ra, unhamā da, da te 're ub'rā za'ra mono da. Taha wa, 're simasam hā mono dai ò nherē, ma tō wē uptabi na te te 're ab'manharĭ, 'Re ĩhâimana u'āsi mono hā. E tawamhā, ai'uzazé hā te te aima 're sōmri za'ra wa'aba mono ò di za bété. Te za tō te te aima 're sōmri za'ra wa'wa, du hâimanazéb zawi nhipai u te te 're asawi pese za'ra wa'aba mono wa, a norĭ wa'wa hā. E niha Aimama 'wa hā asina 're umnhasi za'ra wa'aba mono ò di, taha si ai'uzazé hā te te aima 're sōmri za'ra wa'aba mono wa.

³¹⁻³² Aimama 'wa hā hāiwa āma 're ĩsāmra mono ma hā, tāma aiwaihu'u pese za'ra wa'aba di, marĭ zō aiwi 're ĩrowaptâ'ā za'ra wa'aba mono zém na hā. Taha wa, marĭ na asina 're aihâtâ'ā za'ra wa'aba mono ò di za. Āté asina 're aihâtâ'ā za'ra wa'aba mono wa, te za āne asina 're ĩrosa'rata za'ra wa'aba mono zéb zarina, āne asina 're ĩnharĭ za'ra wa'aba mo: "E ma hawi te za mra hā wama 're wairébé, duré wa te 're ĩ'āhuri mono zéb da hā, duré wa'uzazéb da hā." Āne na asina 're rosa'rata za'ra wa'aba mono ò di za. 'Re ĩhâimana u'āsi mono waihu'u'ō'wa norĭ hā, taha zō si te sima 're sōpré, sina 're hâtâ'ā za'ra mono wa.

³³ 'Re ĩhâimana u'āsi mono hā āma 're ĩsib'a'uwē za'ra mono norĭ ma, ĩwē uptabi hā te te tāma 're ĩsōmri za'ra mono zéb zō si, te za asina 're asōpré u'āsi aba mo. 'Re ĩhâimana u'āsi mono te te sima 're aiwē za'ra wa'aba mono zéb zarina si, 're anomro wē wa'aba mono da, te za asina 're ĩwē u'āsi za'ra wa'aba mo. Tawamhā, āhā zō si 're asōpré wa'aba mono wamhā, marĭ zō aiwi 're ĩrowaptâ'ā za'ra wa'aba mono zéb uwaibaba, te za tō te te aima 're anhomri 'wa, Aimama 'wa hā.

³⁴ Awē sidāpāsi te marĭ hā asada 're hâimana za'ra wa'wa. Tane nherē, oto ai'āma 're awē za'ra wa'aba mono wamhā, te za asina 're ĩwaihu'u za'ra wa'aba mo, 'Re ĩhâimana u'āsi mono te te 're aiwaptob za'ra wa'aba mono zém na hā, marĭ hā asada 're hâimana za'ra wa'aba mono nherē. Taha wa, za duré ai'āma 're ĩ'awē za'ra wa'aba mono zéb bātâ na hā 're aihâimana za'ra wa'aba mono zém na hā, asina 're aihâtâ'ā za'ra wa'aba mono ò di za. 'Re ĩhâimana u'āsi mono si te za awē sidāpāsi bādâ hā te te ai'āma 're ab'madâ'ā 'wa.

7

*Dawasédé hā da te dasi'āma 're ĩsa'ra mono zé wasu'u
Rucasi 6.37-38, 41-42*

¹ — Dawasédé hā da'āma 're ĩsa'ra za'ra wa'aba mono zéb zarina, asiwi 're dawē'ō za'ra wa'aba mono ò di za, taha zarina 'Re ĩhâimana u'āsi mono hā te te siwi 're aiwē'ō za'ra wa'aba mono tō da.

² Asi'uihā na asiwi 're dawē'ō pese za'ra wa'aba mono wamhā, taha zarina te za tō 'Re ĩhâimana u'āsi mono hā te te siwi 're aiwē'ō pese za'ra wa'wa, ĩwa'rāmi. Asiwi 're dawē'ō za'ra wa'aba mono ò wamhā, tawapsi, te te siwi 're aiwē'ō za'ra wa'aba mono ò di za, āne na hā aiwa.

³⁻⁵ Āne, wa za duré āma aima romnhimiré'é za'ra wa'wa. Āté wede wa'ōno hā atob 're te nomro, sabui ò nherē. E niha te za bété sō ĩtōmo 'madâ, wede nhĭprubre wazere da, asisānawā tōmo hawimhā. E āne hā ĩ'uwaibaba. Mare di. Wede wa'ōno hā atob 're ĩnomro hā sabui ò nherē, e niha te za tāma ĩnha: "Ropru hā a'ā te aima wazere, atōmo hawimhā." Mare di. Wede wa'ōno hā te za a'ā atōmo hawimhā ĩwaze. Tawamhā te za sō airĭtĭ wē, wazere da, asisānawā tōmo hawimhā, wede nhĭprubre hā.

⁶ — Duré 'Re ĩhâimana u'āsi mono 'ruiwapari'wa norĭ ma, ĩwasu'uwē na tāma 're rowasu'u za'ra wa'aba mono ò di za, te te āma 're ĩwasété za'ra mono norĭ ma hā. E marĭ wa. Ta norĭ

hã wapsã ma, marĩ ìse hã da te tãma 're a za'ra mono nherẽ, dazô 're sipizari za'ra mono wa, te te 're ìdahãzu mono ne, te za ta norĩ hã asada 're hãimana waseté za'ra wa'wa. Uhãbã norĩ hã marĩ wẽ zô, sima 're sôprẽ waihu'u mono ô di. Marĩ ìwẽ hã wa'ãbã za'etẽ nherẽ, uhãbã ma, da te 're sãmra mono wa, taré te te 're ìwati'i za'ra mono ne, te za ta norĩ hã taré te te 're wapari za'ra, ìwasu'uwẽ hã. Taha wa, ta norĩ ma, 're rowasu'u za'ra wa'aba mono ô di za, 'Re ìhãimana u'ãsi mono 'ruiwapari'wa norĩ ma hã.

'Re ìhãimana u'ãsi mono wi, da te 're ìrowaptêrẽ za'ra mono zé wasu'u

Rucasi 11.9-13

⁷⁻⁸ — 'Re ìhãimana u'ãsi mono wi, te za ìwẽ hã 're ìwaptêrẽ za'ra wa'aba mo. Tawamhã te za tô te te aima 're anhomri 'wa. Ìwẽ zô si te za duré asima 're asôprẽ u'ãsi aba mo. Tawamhã taha zarina te za tô te te aima ãma 're a'uwaimrami 'wa, 'Re ìhãimana u'ãsi mono hã, 'rãwi aima 're hãimana za'ra wa'aba mono da. Duré ni'wa hã 'ri tede'wa zô te te 're ìridawa ta'a mono ne, te za ìwẽ hã tiwi 're ìwaptêrẽ za'ra wa'aba mo. Tawamhã 'ri tede'wa te te tãma ìridawa ne, te za tô 'Re ìhãimana u'ãsi mono hã te te aima 're anhomri 'wa, ìwẽ hã, 'si'uihã na.

⁹ ãne, wa za duré aima ãma romnhimiré'é za'ra wa'wa. Ai'ra hã ì'u'etẽ wapu te te aiwi 'maiwaptêrẽ aba wamhã, e ãne te aré tãma ì'manhomri 'wa, te te ìwaptêrẽ upana. Mare di. Ì'u'etẽ wapu si te aré tãma ì'manhomri 'wa, te te 'rêne da, ai'ra wa'wa hã.

¹⁰ Duré, tebe te te aiwi 'maiwaptêrẽ aba wamhã, e wahi te aré tãma ì'manhomri 'wa, te te ìwaptêrẽ upana. Mare di. Tepe si te aré tãma ì'manhomri 'wa, te te 'rêne da.

¹¹ Tane duré, a norĩ wa'wa hã 're anomro wẽ uptabi aba mono ô nherẽ, te marĩ ìwẽ si tô ai'ra norĩ ma, 're ìsômri za'ra wa'aba mo. E tawamhã Aimama 'wa hã hãiwa ãma 're ìsãmra mono hã wẽ uptabi na 're hãimana mono nherẽ, e ai'ra norĩ ma 're asôprub za'ra wa'aba mono zém nhipai u, te te aima 're sômri za'ra wa'aba mono ô di za bété, tinhoprubzẽ ìwẽ hã. Te za tô ìsipai u te te aima 're sômri za'ra wa'wa ìwẽ hã, tiwi 're ìwaptêrẽ za'ra wa'aba mono zéb uwaibaba.

¹² — Marĩ ìwẽ si da te aima 're 'manharĩ za'ra wa'aba mono da, asima 're ìdawẽ za'ra wa'aba mono ne, te za marĩ ìwẽ si dama 're ì'manharĩ u'ãsi za'ra wa'aba mo, ìwa'rãmi. ãne duréihã 'Re ìhãimana u'ãsi mono nhimiroti na Mozési te te ãma ìrob'ui'ére hã te wama wasu'u za'ra, duréihã ìsadawa wasu'u 'rata' wa norĩ nhimi'ui'ére zama.

Bãdãdi nhitobzẽ wasu'u

Rucasi 13.24

¹³⁻¹⁴ — Duré, ropipa u 're ìdanhisisi mono zé hã bãdãdi hã sa'etẽ uptabi di. Duré ìsitobzẽ hã, sa'etẽ uptabi di. Taha wa, dama wapure di, ãma 're ìdanomro mono zéb da hã, bãdãdi hã sa'etẽ uptabi wa. Taha wa, te da'ahã uptabi na ãma 're danomro, ropipa u, tamomo 're danhisisi mono wa, da te 're robzépata u'ãsi za'ra mono da. Tane nherẽ, 'Re ìhãimana u'ãsi mono 'rata 're ìdahãimana u'ãsi za'ra mono zéb u, 're ìdanhisisi mono zéb da hã, bãdãdi nhitobzẽ hã syryre di. Tamomo bãdãdi hã syry uptabire di duré, ãma 're ìdanomro mono zéb da hã. Dama pire di, ãma 're ìdanomro mono zéb da hã. Taha wa, te da'umro na si da te dasina 're uwaimrami za'ra. Taha wa, ma'ãpé, sada 're asiptete za'ra wa'aba mono, bãdãdi nhitobzẽ ìsyryre na si 're asisisi aba mono da, rowẽ uptabi u.

Rob'rãi wasu'u, 'wabzéré wasu'u me

Rucasi 6.43-44

¹⁵ — Duré, 'Re ìhãimana u'ãsi mono zadawa wasu'u uptabi ô 'wa norĩ wi, te za 're asi'madã'ã pese za'ra wa'aba mo. Ta norĩ hã tô sena dasiré 're hãimana wẽ za'ra mono newa, te za te te dama 're roti za'ra taré. Ta norĩ hã te abaze zahi ne 're hãimana u'ãsi za'ra, ìsazei'wa norĩ zãda.

¹⁶ Ta norĩ hã uburé marĩ hã te te 're ì'manharĩ za'ra mono zém na te za ãma 're ìwaihu'u za'ra wa'aba mo, 'Re ìhãimana u'ãsi mono zadawa wasu'u uptabi 'wai ô na hã. E 'wabzéré hã te za rob'rã na 're 'rã za'ra, uwa 'ru 'rã na. Mare di. Uwa 'ru 'rã na 're 'rã waihu'u za'ra mono ô di, 'wabzéré hã. Duré, e apto hã rob'rã ìse na te za 're 'rã za'ra. Mare di. ãma 're 'rã waihu'u za'ra mono ô di, apto hã.

¹⁷⁻¹⁸ Duré rowede hã wẽ wamhã, 're 'rãi wasété za'ra mono ô di za. Te za 're 'rãi wẽ u'ãsi za'ra. Wasété wapsi, te za 're 'rãi wasété u'ãsi za'ra. Ta norĩ hã 're 'rãi wẽ waihu'u za'ra mono ô di za.

¹⁹ Rowede hã 're 'rã za'ra mono ô wa, te za da te 're sãna'rata nhihãri za'ra, unhama u da te 're sãmra mono da.

²⁰ Tane, aibã norĩ hã roti tô senai'õ na te te dama 're ìroti za'ra mono norĩ hã uburé marĩ hã te te 're ì'manharĩ wasété za'ra mono zém na, te za ãma 're ìwaihu'u za'ra wa'aba mo, 'Re ìhãimana u'ãsi mono zadawa wasu'u uptabi 'wai ô na hã.

'Re ìhâimana u'âsi mono, da'âma 're ìsib'a'uwê mono zéb u, 're ìdanhisisi mono zé wasu'u
Rucasi 13.25-27

²¹ — Âté ni'wam norî hâ te za dama 're siwasu'u za'ra, âne: “Zezusi hâ ta hâ Ìnhib'apito. Wa hâ tâma romhuri'wa, wa tô 're ìhâimana u'âsi.” Âne ni'wam norî hâ dama 're siwasu'u za'ra mono nherê, uburé 're sisisi mono ô di za, 'Re ìhâimana u'âsi mono, da'âma 're ìsib'a'uwê mono zéb u hâ. Ni'wam norî si te za 'Re ìhâimana u'âsi mono nhib'a'uwê, 're hâimana za'ra, Ìmama hâ hâiwa âma 're ìsâmra mono hâ te te sima 're ì'awê mono zéb zarina, marî ìwê si te te 're ì'manharî za'ra mono norî si.

²² Nimahâ bâtâ na ropsi'utôrizéb âma, Ìmama za oto da'âma ìsipo'ozéb âma hâ te za da'ahâ na ìma nharî za'ra ni, âne: “Wanhib'apito, Wanhib'apito, wa norî hâ asadawa para, wa tô wa te dama 're sadawa wasu'u za'ra, 'Re ìhâimana u'âsi mono hâ. Asadawa para, wa tô duré wa'uburé hâ wa te dama 're sâmbra za'ra. Marî dama ì'manharî waihu'u'ô hâ wa tô duré wa te dama 're 'manharî za'ra, asadawa para.” Âne na hâ da'ahâ na te za ìma tasiwasu'u za'ra ni, ìnhib'a'uwê uptabi hâ 're danomro mono newa.

²³ Tane nherê, wa za wa hâ ìsî'uihâ na tâma nharî za'ra, âne: “Te aiwaihu'u za'ra wa'aba ô di, ìzazei'wa na. Marî ìwasété si ma tô 're ì'manharî u'âsi za'ra wa'aba mo. Mo oto ai'aba'réi wa'aba, ìnhiti.” Âne wa za ta norî ma nharî za'ra, misi harê.

'Ri'wa norî wasu'u

Rucasi 6.46-49

²⁴⁻²⁵ — Âne, wa za duré âma aima simiré'é za'ra wa'wa, 'ri'wai wasu'u na. 'Ri'wa hâ tâma rosa'rata waihu'u pese wa, ma tô êtê nhisiwi 'ri hâ 'manha, siptete na 're sa mono da. Tawamhâ tâ hâ pîni za'êtê na 're ta'a mono wa, ma tô 're âpré. 'Re âpré mono wamhâ, 'ri u ma tô 're praba, â hâ. Rowa'u'u za'êne hâ ma tô duré 're pusi, 'ri uwaibaba, te te me da arê. Tane nherê, 'ri hâ simeî ô di, êtê nhisiwi te te sima 'ri wa, aihâ hâ. Tane duré, â hâ te ìrotizé hâ ni'wam norî hâ te te 're wapari za'ra mono wa, te te oto 're 'madâ'â pese za'ra mono wamhâ, ta norî si te za rowê na 're hâimana u'âsi za'ra, 'Re ìhâimana u'âsi mono 'rata.

²⁶⁻²⁷ — 'Ri'wa hâiba amo na, wa za duré âma aima simiré'é za'ra wa'wa, tâma ìrosa'rata waihu'u'ô hâ. Ta hâ supara nhisiwîp si ma tô sima 'ri, siptete na tâma 're sab u'âsi mono da newa. Tawamhâ tâ hâ pîni za'êtê na 're ta'a mono wa, ma tô 're âpré. 'Re âpré mono wamhâ, 'ri u ma tô 're praba, â hâ. Rowa'u'u za'êne hâ ma tô duré 're pusi, 'ri uwaibaba. Tawamhâ 'ri hâ ma tô 'marôwî, awa'awi. Tane duré, â hâ te ìrotizé hâ ni'wam norî hâ tipo're na te te 're wapari za'ra mono nherê, te te 're 'madâ'â za'ra mono ô wamhâ, ta norî si te za si'uihâ na 're sisimini za'ra, 'Re ìhâimana u'âsi mono 'rata za 're ìdahâimana u'âsi za'ra mono zé hâ.

²⁸ Tawamhâ Zezusi hâ âne na te te dama rowasu'u parimhâ, ma tô âma tatob'uzu za'ra ni, te te dama ìrowahutuzém na hâ.

²⁹ 'Re ìhâimana u'âsi mono nhimiroti 'rata na rob'ui'ére na dama rowahutu'wa norî, simirowasu'u wapure na te te dama 're ìrowahutu za'ra mono ne, te te dama 're rowahutu mono ô di, Zezusi hâ. Simirowahutu pire uptabi na ma tô te te dama 're rowasu'u. Taha wa, ma âma tatob'uzu za'ra ni, dama ìwaihu'u'ô hâ te te dama wasu'u wa.

8

Aibâ ì'wa're ré hâ Zezusi te te ìpesezé wasu'u

Marcusi 1.40-45; Rucasi 5.12-16

¹ Tawamhâ Zezusi hâ ma tô êtê 'râihâ hawi si'ra. Te te si'rai wamhâ, da'ahâ uptabi na ma tô ìsarina ai'aba'ré ni.

² Tawamhâ aibâ ì'wa're ré hâ ma tô ìtême wi. Ìtême wisi wamhâ, ma tô hi'râtitô nhamra, ìpapara. Te tâma tinha:

— Apito, ìma aiwaihu'u pese di, asimipese waihu'u pese na. Taha wa, asima ìwê wamhâ, te za ìpe.

³ Tawamhâ Zezusi ma tô tinhîb'rada hâ wahutu, te te âma upi da. Te te upi wamhâ, te tâma tinha:

— Tane tô. Wa tô ìsima aiwê, te aipese da. Tâibâ oto aihâzé hâ.

Tawamhâ awa'awi ma ì'wa're hâ tâma apa.

⁴ Tawamhâ Zezusi hâ te tâma tinha, âne:

— Ìwapari pese, asina. Ni'wai ma, asina ìwasu'u ô di za, te aipesezém na hâ. Sasedoti u si te za aimo, aihâiba wê zô te te aihâiba 'madâ'â da. Taha parip si, te za tâma asôpru 'Re ìhâimana u'âsi mono ma, Mozésihi nhimiroti zarina, aipesezém na da te âma aiwaihu'u za'ra da, sena na. — Âne te Zezusi hâ tâma roti, aibâ te te ìpese ma.

Da'wapéi'wa norî wada'uri'wai ma romhuri'wa, Zezusi te te ìpesezé wasu'u

Rucasi 7.1-10

⁵ Tawamhã Zezusi hã Capana'u na 'ri nho'õmo nhisi u ma tô wi. Wisi wamhã, ma tô aibã sôpêtê, romanu hã. Ta hã da'wapéi'wa nori wada'uri'wa. Tawamhã, te te sôpêtê wamhã, ma tô aibã hã tâma ti'ru Zezusihi ma, tâma ïromhuri'wa hã te te tâma pese da.

⁶ Æne te tâma tinha:

— Apito, ïma romhuri'wa hã ïnhorõwa ãma te nomro. Hãzé uptabi di. Hãzé uptabi wa, sirési waihu'u õ di, hãzé za'êtê wa.

⁷ Tawamhã Zezusi hã te asa tâma tinha:

— Wa za ãma mo tô, te pese da.

⁸ Tawamhã romanu hã te duré tâma tinha, da'wapéi'wa nori wada'uri'wa hã:

— Tô'ã, apito. Wa hã aima ïwapure di, ïnhorõwa u asébré da hã. Ma'ápé, taré ã hawi pese aimreme na, séptã'ã da. Tawamhã te za tâma tirowê, ïma romhuri'wai ma.

⁹ Wa hã da'wapéi'wa nori wada'uri'wa zapari romhuri'wa. ïzapari te duré 're hâimana za'ra, da'wapéi'wa nori hã. Nimomo te 'mazatõri wamhã, te za 'maïmo. Duré sô ï'maihãrã wamhã, te za we 'maimo, ïtême. Duré ïma romhuri'wai ma, marĩ hã te 'rui wamhã, te za 'manha awa'awi, ïzadawa para. — Æne te siwasu'u, Zezusihi ma.

¹⁰ Tawamhã Zezusi hã ãne hã te te wapari wamhã, ma tô ãma titob'uzu, ïsiwasu'uzém na. Taha wa, ïsarina ïdasi'aba'rê nori ma, ma tô nharĩ za'ra:

— Tô sena wa aima waihu'u za'ra wa'wa. Æ hã te te sina ï'umnhasizém na hã niwa te ï'madã'ã õ, ïzarazéhê nhihuudu nori nhipti'ai ãma hã. Ta nori hã te te ãma siwi wabzu õ di, te te sina ï'umnhasizém na hã.

¹¹ Æne, wa za duré aima waihu'u za'ra wa'wa. Da'ahã uptabi na te za 're dasihutu, båtã pusizém hawi, duré båtã zasizém hawi, 'Re ïhâimana u'ãsi mono u, ïsiré 're dasihuri mono da, da'ãma 're ïsib'a'uwê mono zéb ãma. Abra'ãhã siré te za 're dasi'ubumro, duré ïzatihi siré, duré Zacoho siré.

¹² Tane nherê, ni'wam nori hã 'Re ïhâimana u'ãsi mono, ãma 're sib'a'uwê za'ra mono da nherê, ïsiré 're si'ubumroi mono da nherê, te za sãmra sisiti, robra si 're ïsa'wari mono u. Tame te za sina 're 'ry'ry. Te za duré 're 'wasitete za'ra, te te 're robzépata za'êtê za'ra mono wa. — Æne ma tô Zezusi hã dama rowasu'u.

¹³ Tawamhã te duré da'wapéi'wa nori wada'uri'wai ma tinha:

— Mo oto aimorĩ apã, asõrõwa u. Asina ï'umnhasizéb zarina, wa za aipawapto.

Tawamhã ãne te te tâma nharĩ wi, ma tô tipese, romanuhu ma, romhuri'wa hã.

Da'ahã uptabi na, Zezusi te te ïda'apesezé wasu'u

Marcusi 1.29-34; Rucasi 4.38-41

¹⁴ Tawamhã Zezusi hã Pedruhu nhorõwa u ma tô mo. Morĩ wamhã, ïmaprewa ma tô sabu. Hãzé ré, te nomro waptã wa, wa'ro na.

¹⁵ Tawamhã ma tô sib'rata upi, Zezusi hã. Te te sib'rata upi wamhã, ma tô tiwahã. Tawamhã ma tô wahudu, pi'õ hã. Wahutu wamhã, ma tô ïsa hã tâma tisõ Zezusihi ma, sa da.

¹⁶ Tawamhã bådã sébrézéb u, ma tô wa'uburé ré 're ïdanomro mono hã da te simro, Zezusihi u, ahã uptabi na. Tawamhã misi si te nasi dama azatõ wa'uburé hã, misi haré timreme na si. Uburé ïhãzé ré nori zama te apese duré.

¹⁷ Æne ma tô Zezusi hã te te 're da'apawapto, Iza'iza hã duréhã te te ãma ïrob'ui'érezéb zarina te te sina uwaimrami da. Æne Iza'izaha nhimi'ui'ére hã:

“Waházé mono bã, ma tô te te wawi 're awaibu.”

Æne duréhã 'Re ïhâimana u'ãsi mono zadawa wasu'u 'rata 'wa nhimi'ui'ére hã, Zezusihi ãma hã.

Aibã nori hã Zezusihi siré ïneb zahuré zé wasu'u

Rucasi 9.57-62

¹⁸ Tawamhã Zezusi hã da'ahã uptabi na da te dasiwi ï'uirĩ za'ra nori hã ma tô 'madã'ã za'ra. Te te da'ab'madã'ã wamhã, ma tô tisiré 're ïnomro mono nori ma rob'ru za'ra, ïsõ'u na te te saprĩ za'ra da, zara u.

¹⁹ Tawamhã 'Re ïhâimana u'ãsi mono nhimiroti na rowahutu'wa hã ma tô ïtême wi, Zezusihi u. Æne te tâma tinha:

— Rowahutu'wa, ãhãna wa ïsima aiwê, asiré 're ïmorĩ da oto, daro mono bã.

²⁰ Tawamhã Zezusi te asa tâma tinha:

— Wapsã wawêre hã ab're 're, ïsõrõwa hã. Duré si nori hã tizasi te te sima 're 'manharĩ za'ra, tinhorõwa da hã. Tazahã, wa hã ti'ai ãma dasiré ïpodo hã ïnhorõwa õ di, ãma 're ïwa'utu mono zéb da hã. Hãwi si wa datême 're morĩ u'ã.

²¹ Tawamhã Zezusi ma tô duré aibã hãiba amo 'mahã, ïsarina 're ïmorĩ hã, ïsiré 're morĩ u'ãsi da oto. Tawamhã aibã hã te asa tâma tinha:

- Apito, a'â apâ ĩmorĩ, ĩmama hã ĩwi dâ'â wa, ĩsisa'u te âma ti'a da. — Āne te sina 'mahã.
 22 Tane nherẽ, te Zezusi hã tãma tinha, asa:
 — Ône harẽ te za ĩsiré 're aimo oto. Īdâ'â norĩ hã te za tisiré ĩdâ'â norĩ âma te te 're ti'a za'ra.

*Zezusi hã rowa'u'u za'êtẽ ma, te te ĩnharĩzẽ wasu'u
 Marcusi 4.35-41; Rucasi 8.22-25*

23 Tawamhã Zezusi hã ma tã âzẽ, uba're 're. ĩsiré 're ĩnomro mono norĩ zama ma ĩsiré asisi, ĩsiré si'aba'rẽ da.

24 Tawamhã uba're na si'aba'rẽi rẽ, ma tã rowa'u'u za'êne hã tiwi tiwatobro za'ra. Ā sisasi hã te te ĩrẽ wabzuri za'ra, uba're hã. Tane nherẽ, Zezusi te nhono.

25 Tawamhã ĩsiré 're ĩnomro mono norĩ hã ma tã ĩtẽme sina roptob za'ra, te te siwi utu da. Tawamhã âne te 'mahârã za'ra:

— Wanhĩb'apito, ma'âpẽ wanhõ'reptu za'ra na. Wa za ai'utõrĩ ni.

26 Tawamhã Zezusi hã te tãma nharĩ za'ra:

— E marĩ da, ma aipahi za'ra wa'wa. E ĩ'umnhasi za'ra wa'aba âna.

Tawamhã ma tã wahudu, Zezusi hã. Wahutu wamhã, ma tã rowa'u'u ma tinha, te te sazãri da, â sisasisi ma zama. Tawamhã ma tã sazã, rowa'u hã. Ma tã durẽ ti'ãtu.

27 Tawamhã ma tã âma titob'uzu za'ra, ĩsiré 're ĩnomro mono norĩ hã. Āne te sima nharĩ za'ra:

— Pra, e niha ĩwaihu'u pe, õ hã. ĩsadawa hawi ma rowa'u hã sazã, â sisasisi zama. — Āne te sima rowasu'u za'ra, ĩsiré 're ĩnomro mono norĩ hã.

*Zezusi hã aibã norĩ, wa'uburé ré 're ĩneb zahuré te te ĩpese zahuré zẽ wasu'u
 Marcusi 5.1-20; Rucasi 8.26-39*

28 Tawamhã Zezusi hã ma tã mo, Dadara na danhipti'a nho'õmo nhisi u, Darireza na ĩsõ'u nhisi zara u. Tame ma tã aibã norĩ hã sõpõtẽ zahuré, wa'uburé ré 're ĩneb zahuré hã. Adã'ã 'ru hawi, ma we sina uzusi zahuré, êtẽ zahãpã ab're sirõmo 're, 're ĩsimasisi u'ãsi zahuré mono zẽm hawi. Ta norĩ hã ĩsipãrĩ su'u zahuré, durẽ simimnhasi zahuré di. Taha wa, 're ĩhãimana zahuré mono zẽ wa'wai baba 're danomro waihu'u mono õ di.

29 Tawamhã rosa'rese õ rẽ, ma tã sa'êtẽ 'mahârã zahuré Zezusi hã, âne:

— 'Re ĩhãimana u'ãsi mono 'ra, e marĩ wa'ãma 'manharĩ da, te we aimo, wawa'wai baba. E ropsi'utõrĩzẽ wana wa'ahãri da, te we aimo, wa te robzẽpata da.

30 Tawamhã romhã prã na te uhãbã hã tisa hã te te 're huri, ahã na.

31 Tawamhã wa'uburé norĩ hã aibã norĩ pẽ'ẽ 're, 're ĩhãimana za'ra mono hã te sa'êtẽ sina 'mahârã za'ra:

— Nimomo wazatõrĩ za'ra da wamhã, ma'âpẽ uhãbã norĩ u wazatõrĩ za'ra na, ĩhãiba 're, 're wahãimana za'ra mono da.

32 Tawamhã Zezusi hã ma tã õne harẽ tãma rob'ru za'ra:

— Mo oto ai'aba'rẽi wa'aba.

Tawamhã uhãbã hãiba 're ma tã sisisi, wa'uburé norĩ hã. Taha wa, te sa'êtẽ sisa're, uhãbã norĩ hã, ĩ'rãsipra u. Āi ba ma tã rere. Taha wa, ma ai'utõ, â na uburé.

33 Tawamhã uhãbã 'madã'ã'wa norĩ hã ma tã ĩsiti sisa're. 'Ri nho'õmo u ma tã sisa're. Tame ma tã uburé dama rowasu'u za'ra, aibã norĩ ma, niha ĩromhãimana zahuré zẽm na hã, wa'uburé ré 're ĩneb zahuré ma.

34 Tawamhã 'ri nho'õmo âma 're ĩdasi'ubumroi mono norĩ hã ma tã aihĩni tawairébé ni, Zezusi hã da te dasina uzusi za'ra da. Tawamhã ma tã sãmri za'ra ni. Da te dasiwi sãmri wamhã, ma tã tãma rob'ru za'ra ni:

— Ma'âpẽ, warom nhiti aimorĩ, nimomo. — Āne te dasiwi satõrĩ ni, Zezusi hã.

9

*Īmorĩ'õ, Zezusi te te ĩwahutuzẽ wasu'u
 Marcusi 2.1-12; Rucasi 5.17-26*

1 Tawamhã Zezusi hã ma tã uba're 're âzẽ, zara u te te saprĩ da. Te te saprĩ wamhã, ma tã 'ri nho'õmo u wĩ, tĩrob u.

2 Tamomo ma tã ni'wam norĩ hã we siwi ti'ã, ĩmorĩ'õ hã ĩsimiwapã rẽ. ĩmorĩ'õ hã za te te ĩpese na ma tã âma umnhasi za'ra, Zezusi hã. Tawamhã Zezusi hã taha na ma tã sina simirosa'rata waihu'u za'ra, aibã norĩ hã. Taha wa, te ĩmorĩ'õ ma tinha:

— ĩsiwadi, aiwi robzei'õ tã. Aiwasédẽ hã 're ĩ'ab'manharĩ wasétẽ mono zẽ hã te ai'ãma 're ab'madã'ã mono õ di za oto. — Āne te tãma tinha.

3 Tawamhã ni'wam norĩ hã 'Re ĩhãimana u'ãsi mono nhimiroti 'rata na rob'ui'ére na dama rowahutu'wa norĩ hã ma tã 'rãwi sima rowasu'u za'ra, âne:

— Ô hã te 'Re ĩhãimana u'ãsi mono âma wasétẽ.

⁴ Tane nherê, Zezusi hã ma tô sina waihu'u, ãsimirosa'rata za'ra hã. Taha wa, te tâma nharĩ za'ra:

— E marĩ da, ma tô ãne ãma ãrosa'rata wasété za'ra wa'wa.

⁵ Wa hã dawasété hã te dama 're ã'apari waihu'u pese mono zém na hã, sena na ãwaihu'u za'ra wa'aba da hã, e niha te za ãwaihu'u za'ra wa'wa. Aibã ma, wa tô tinha: “Aiwasété hã 're ã'ab'manharĩ mono zé hã te ai'ãma 're ab'madã'ã mono õ di za oto.” ãne na si ãmreme wamhã, aima pibu prã za'ra wa'aba di. ã hã ãmorĩ'õ hã wahutu da, duré oto morĩ da, te tâma nharĩ wapsi, te za ãwaihu'u za'ra wa'wa, ãwaihu'u pese na sena na ãwaihu'u pese za'ra wa'aba da oto. Taha wapsi, aima pibu pese za'ra wa'aba di za.

⁶ Ti'ai ãma dasiré ãpodo hã ãma waihu'u pese di, dawasété te dama 're ã'apari mono da hã, 'Re ãhãimana u'ãsi mono zadawa para. ãne na asiwi ãwaihu'u za'ra wa'aba da, wa za ãhi're ma tinha, wahutu da.

Tawamhã ãmorĩ'õ ma, te tinha Zezusi hã:

— Ma'ãpé, aiwahutu. Asa'warizé hã ãri, asõrõwa u aimorĩ da oto.

⁷ Tawamhã awa'awi ma tô wahudu aibã hã, tinhorõwa u morĩ da.

⁸ Tawamhã ãne hã da te 'madã'ã za'ra wamhã, ma tô tâma tapé'ẽwara za'ra ni, dama sa'rese õ wa. Ma tô duré 'Re ãhãimana u'ãsi mono ãma tawata za'ra ni, tiwaihu'u pe hã te te dama 're anhomri mono wa.

Mateusihi zô Zezusi, sisarina ãhãrãzé wasu'u

Marcusi 2.13-17; Rucasi 5.27-32

⁹ Tawamhã Zezusi hã ma tô mo, dahawi. Morĩ ré, ma tô ãsã, danhib'apito ma, rob'uiuprazé ubumroi'wa hã, Mateusi na ãnhisi hã. ãnhimiromhurizéb ãma wa nhamra, rob'uiuprazé te dawĩ 're ã'ubumroi mono zéb ãma. Tawamhã Zezusi hã te ãmahã:

— We aimorĩ, ãsiré 're aimorĩ da oto.

Tawamhã awa'awi wa tô wahudu, ãsiré 're ãmorĩ da oto.

¹⁰ Tawamhã barana wa oto wasiré wasaihuri ni Zezusi norĩ hã, ãsiré 're ãwanomro mono norĩ me. ãnhorõwa ãma wa wasaihuri ni. Wasaihuri ré, ma tô rob'uiuprazé ubumroi'wa norĩ hã ãtème asisi 'ri para u, ahã na, ãsiré saihuri da. Ni'wam norĩ hã zudezu nherê, parisezu norĩ ãhimiroti zarina 're ãhãimana za'ra mono õ norĩ zama ma tô duré ãtème aihutu, Zezusihi u.

¹¹ Tawamhã parisezu norĩ hã ãne hã te te 'madã'ã za'ra wamhã, ma tô Zezusihi siré 're ãwanomro mono norĩ hã wazadanharĩ za'ra, ãne:

— E niha bã, te asib'apito za'ra wa'wa hã rob'uiuprazé ubumroi'wa norĩ siré tisa, dawasété na 're ãdahãimana za'ra mono norĩ siré zama.

¹² Tawamhã Zezusi hã te te sina wapari za'ra wa, ma tô tâma nharĩ za'ra, ãne:

— Hãzé ãna 're ãnomro mono norĩ zô, dawede'wa hã 're siwasutu za'ra mono õ di, te te 're wede za'ra mono da. ãhãzé ré norĩ zô si te za 're siwasutu za'ra, te te 're pese za'ra mono da.

¹³ Duréihã ma tô 'Re ãhãimana u'ãsi mono zadawa wasu'u'wa hã ãne na rob'ui'ére, 'Re ãhãimana u'ãsi mono mreme na: “Asimizama hã ãma 're ãzata za'ra wa'aba mono zô hã, sô 're ãnhimipari mono õ di oto. Asimizawi pese zarina, da'ãma 're aiwamri za'ra wa'aba mono da si, wa ãsima te 're aiwé za'ra wa'wa oto.” ãne duréihã 'Re ãhãimana u'ãsi mono mreme na rob'ui'ére hã sô sabu za'ra wa'aba ãbaihã hã, waihu'u pese za'ra wa'aba da. Dawé na 're ãdanomro mono norĩ zô ãsitème 're ãhãrã mono da, we ãmorĩ õ di. Dawasété na 're ãdanomro mono norĩ zô si 're ãhãrã mono da, wa wei mo.

Dasai ãna bãtã na a'ã 're ãdahãimana za'ra mono zé wasu'u

Marcusi 2.18-22; Rucasi 5.33-39

¹⁴ Tawamhã Zuwã Batitaha siré 're ãnomro mono norĩ hã ma tô Zezusihi u ai'aba're. Tawamhã ãne te siwi sadanha:

— Wa norĩ hã, duré parisezu norĩ hã 'Re ãhãimana u'ãsi mono ma, 're wamreme zusi mono da hã, wasai ãna wa a'ã 're wahãimana za'ra, bãtã na. E marĩ wa, sai ãna a'ã 're hãimana za'ra mono õ di bété, asiré 're ãnomro mono norĩ hã.

¹⁵ Taha wa, te Zezusi hã asa tâma nharĩ za'ra:

— Aibã hã ãmrozéb u, sô ãhãrã za'ra norĩ hã sihutu wamhã, e aibã ãmro da hã ãsiré sãmra za'ra ré, te za robzei'õ na tihãimana za'ra, ta norĩ hã. Mare di. ãnei õ di. Niwapsi te za bãdã hã ãwa waptãrã, aibã ãmro da hã ãsiwadi norĩ wa'wa hawĩ, da te tiwi ã'ãri za'ra zéb da hã. Tawapsi te za tô sai ãna 're si'ubumro, robzei'õ na.

¹⁶ — Duré da'uzã hã hã'ratare wamhã, te za hãihata. E tawamhã ãhãtê hãnhãhãri na te za hãiwa'aba ni. Mare di. ãhãtê hãnhãhãri na da te hãiwa'aba wamhã, da te ãré hã'upsõi wamhã, te za tihãzahutu, ãhãiwa'abazé hã. Tawamhã te za oto hãsisinarĩ pese, da'uzã 'rada hã.

¹⁷ Duré e romhã 'manharĩ 'rata 're, te za uwa 'rãi wa'u ãsé hã da te 're sé, wa'ui ware õ ré. Mare di. Wa'ui ware õ ré, da te 're séme mono wamhã, oto wa'ui ware wamhã, te za

romhâ 'manharî 'ratarê hã sina wazu. Tawamhã uwa 'rãî wa'u ïsé hã te za asa'wa. Romhã 'manharî hã te za duré hãihaiwamna. Ítép si'uiwa na si, te za da te 're sé, dawi 're sisa'wari za'ra mono tó da, rob'rãî wa'u zé té hã. Tawapsi, romhã 'manharî hã dawi 're hãsiwamnarî za'ra mono ô di za duré. — Æne ma tó Zezusi hã âma romnhimiré'é, uwa 'ru 'rãî wa'u ïsé, da te 're ïséme mono zém na hã.

Zezusi hã pi'ô norî te te ïpese zahuré zé wasu'u, azarutu me

Marcusi 5.21-43; Rucasi 8.40-56

¹⁸Tawamhã Zezusi hã te te dama rowasu'u ré, ma tó aibã hã ïtème wi, dama roti'wa hã. Ítème wisi wamhã, ma tó hi'rãitôtô ïpapara nhamra. Tawamhã te tãma tinha, âne:

— Í'ra hã azarudu hã ma tó ïwi dârã, âhãna si. Tane nherê, ma'ápé âma ïme aimorî, asib'rada âma hiri da, hãiwa'utu da, ïma 're morî da apã.

¹⁹Tawamhã Zezusi hã ma tó wahudu. Wahutu wamhã, ma tó ïsiré mo. ïsiré 're ïwanomro mono norî zama, wa ïsiré ai'aba'ré ni.

²⁰Tawamhã morî ré, te pi'ô hã we ïsarina mo, ïbabarãî hawi. Pi'ô hã ïhãzé te te ïsazãri'ô, 12 na ma tó âma tiwahu, ïhãzé te te 're 'manharî mono ré hã. We ïsarina morî wamhã, ma tó ï'uzã hãnhisudu hã upi.

²¹Ta hã ma tó âne sima rosa'rata: "Í'uzã si te tiwi upi nherê, wa za séptãrã." Æne te sima rosa'rata, pi'ô hã.

²²Tawamhã pi'ô, ï'uzã te te upi wamhã, ma tó Zezusi hã só aipi'ra. Sipi'rai wamhã, ma tó pi'ô hã tisã. Æne te tãma tinha:

— ïsiwadi, aiwi robzei'ô tó. Za te aipesezém na, ï'umnhasi zarina ma tó aihãzé hã aima apa.

Tawamhã awa'awi ma tó pi'ô hã séptãrã.

²³Taha pari, te mo Zezusi hã, dama roti'wa nhorôwa u. Morî wamhã, rowamreme'wa norî hã ma tó sôpêté za'ra, adã'ã âma simnhihãsi ré. Da'ahã na ma tó da'anhopêté, âma ïda'ry'ry norî hã.

²⁴Tawamhã âne te dama tinha:

— Mo oto aiwairébé aba. Azarudu hã dá'ã ô di. Taré te nhono.

Tawamhã ma tó âma tawa'é za'ra ni, dá'ã uptabi nherê, taré ïsôtô na te te waihu'u wa, Zezusi hã.

²⁵Tawamhã rob u ma tó tawairébé ni. Dawairébé wi, ma tó Zezusi hã ázé 'ri 're wa'wa u, azarudu ïnomrozéb u. Tawamhã awa'awi ma tó pa'ã. Te te pa'ãri wamhã, ma tó awa'awi wahudu, azarudu hã.

²⁶Tawamhã ïwasu'u hã ma tó te te ropé daro mono bã, Darireza na danhipti'a nho'ômo nhisi 'remhã.

Ítob'a norî, Zezusi te te ïpese zahuré zé wasu'u

²⁷Tawamhã 'ri para hawi watobro wamhã, morî ré, ma tó aibã norî hã ïsarina tineb zahuré, ïtob'a zahuré hã. Tawamhã te 'mahãrã zahuré, âne:

— Dawihi nhihudu, ma'ápé wa'âma aipé'ézé na.

²⁸Tawamhã 'ri para u ma tó ázé, Zezusi hã. Sébré wi, ma tó ïtob'a norî hã ïtème aimasisi zahuré. Tawamhã Zezusi hã te sadanharî zahuré:

— E te asina ï'umnhasi 'wa, te ato pese aba da hã.

Tawamhã asa te tãma nharî zahuré:

— Íhe, wa tó wasina ai'umnhasi ni, apito.

²⁹Tawamhã Zezusi hã ma tó tómo upi zahuré. Te duré tãma nharî zahuré:

— Asina ï'umnhasi aba zéb zarina, wa za tó ato pese 'wa.

³⁰Tawamhã ma tó oto tito pese zahuré, aibã norî hã. Ma tó duré sadawa uwati zahuré, âne:

— Te aima ï'manharî wê wa'aba zém na, dama ïwasu'u wa'aba ô di za. Tô'ã. — Æne te sina sadawa uwati zahuré.

³¹Tane nherê, oto neb zahuré wamhã, ma tó tisiwasu'u na te te ropé zahuré ropã, Zezusi te te ïpese zahuré zém na.

Ímreme'ô, Zezusi te te ïpesezé wasu'u

³²Tawamhã Zezusi te te ïto pese zahuré neb za'u si, ma tó aibã hã we ïtème dasiwi saprôni ni Zezusihi u, wa'uburé ré wa, mreme'ô u'ãsi 're ïhãimana mono hã.

³³Tawamhã Zezusi hã ma tó wa'uburé ma rob'ru, ïhawi watobro da, ïsiti. Te te tãma rob'rui wi, ma tó aibã hã mreme watobro. Taha wa, ma âma tatob'uzu za'ra ni. Te duré dasima nharî za'ra ni, âne:

— Niwa, wa te ï'madã'ã za'ra ô, âne hã, Izarazéhé nhihudu norî nhipti'ai 'remhã.

³⁴Tane nherê, ma tó parisezu norî hã taré ïwasédé hã âma hiri za'ra, âne:

— Wa'uburé norī nhīb'apito zadawa para, te ò hā wa'uburé hā te te dama 're anhamra, Satanasihi zadawa para. — Āne ma tō parisezu norī hā siwi wē'ò, Zezusi hā.

Zezusi hā da'āma ĩswamrizé wasu'u

³⁵ Tawamhā Zezusi hā ma tō datēme 're mo, 'ri wa'òtō mono bâ, te te dama 're rowahutu mono da, zudezu norī te, rowahutuzé mono bâ. 'Re ĩhāimana u'āsi mono, da'āma 're ĩsib'a'uwē mono zé wasu'u na te te dama 're rowasu'u, ĩwasu'uwē na. Dahāzé mono bâ ma tō duré da'apese. Hāzé u'āsi wa, sib'uware na 're ĩnomro mono norī zama te apese, Zezusi hā.

³⁶ Tawamhā da'ahā uptabi na te te da'ab'madâ'ā wamhā, ma tō Zezusi hā da'āma aiwamri tipē'ē na, pone'ērebâ 'madâ'ā āna 're ĩnomro mono ne, robzei āna 're dahāimana za'ra mono wa, 're dasipawapto waihu'u za'ra mono ò wa.

³⁷ Tawamhā ĩsiré 're ĩwanomro mono norī ma, te tinha, āne:

— Amnho hā sa'ētē uptabi di, da te 're ĩ'ubumroi mono da hā. Tane nherē, sada hā da'umrore di, ĩ'ubumroi'wa da hā.

³⁸ Taha wa, ma'āpé tiwi 're rowaptērē u'āsi za'ra wa'aba mono, rob're tede'wai wi, romhuri'wa da hā we te te da'azatōrī da da'ahā na, rob're hā te te 're ubumro za'ra mono da. — Āne ma tō Zezusi hā da'āma romnhimiré'.

10

Zezusi hā tisiré 're ĩnomro mono norī te te ĩsatōrī za'ra zé wasu'u, daro mono bâ

Marcusi 3.13-19; Rucasi 6.12-16

¹ Tawamhā Zezusi hā ma tō sitēme wazò hā, ĩsiré 're ĩwanomro mono norī zò, 12 na wahāiba norī zò. Wazò hārâ za'ra wamhā, ma tō wama pisutu za'ra, ĩwaihu'u pese zarina ĩsadawa para, wa'uburé norī te te 're ĩdawamnarī za'ra mono hā wa te dama 're sāmra za'ra mono da. Duré ĩhāzé ré norī hā dahāzé mono bâ ĩsadawa para, wa te 're dapeze za'ra mono da, ma tō duré wama pisutu za'ra, duré hāzé u'āsi 're hāimana za'ra mono wa, 're ĩsib'upa pese za'ra mono norī zama.

² Zezusi hā daro mono bâ te za oto wazatōrī za'ra, ĩsiré 're ĩwanomro mono norī hā, ĩsadawa para wa te dama 're sadawa wasu'u za'ra mono da. Tizadawa wasu'u'wa na, ma tō wanhisi za'ra oto, Zezusi hā. Wanhisi za'ra hā, āne: Sima na ĩsisi hā. Taha nhisi amo hā Pedru. Duré ĩno nhisi hā Ādére na ĩsisi hā. Duré Ti'adu, duré Ti'aduhu no, Zuwā. Ta norī hā Zebedehe 'ra norī.

³⁻⁴ Duré Piripi, duré Batoromezu, duré Tome, duré wa hā Mateusi. Wa hā rob'uiprazé ubumroi'wa aré. Duré Ti'adu, Apezuhu 'ra hā. Duré Tadezu, duré Sima aimawi hā. Ta hā ma tō aré dame 're hāimana, romanu norī zada, tirom hawi apâ te te 're satōrī za'ra mono da. Duré Zudasi Icarizoti, Zezusi hā te te dama ĩhāiba nhomri da hā.

⁵ Tawamhā Zezusi hā te te wazatōrī za'ra da, ma tō āne wama roti za'ra, 12 na wahāiba norī ma hā:

— Zudezu'ò norī nhipti'ai u 're anomro aba mono ò di za. Duré samaritanu norī nhipti'ai u 'ri nho'òmo mono bâ, 're asisisi aba mono ò di za.

⁶ Izarazéhé nhihu du norī u si te za 're anomro aba mo, pone'ērebâ 'madâ'ā āna, siwa'ru 're ĩnomro mono ne, 're ĩdahāimana za'ra mono norī u si.

⁷ Āne te za dama 're ĩrowahutu za'ra wa'aba mo: “‘Re ĩhāimana u'āsi mono, da'āma 're ĩsib'a'uwē mono zéb u hā romhuture di oto.”

⁸ ĩhāzé ré norī hā te za duré 're ĩpese za'ra wa'aba mo. 'Re dadâ'ā za'ra mono nherē, te za duré 're ĩdahāiwa'utu za'ra wa'aba mo. ĩ'wa're ré norī zama te za 're ĩpese za'ra wa'aba mo. Wa'uburé hā te za dama 're ĩsāmra za'ra wa'aba mo. Wa'ābâ āna wa tō ĩwaihu'u pe hā aima sòmri za'ra wa'wa. Taha wa, wa'ābâ āna te za āne uburé dama āna 're ĩ'uwaimrami wē za'ra wa'aba mo.

⁹ Rob'uiprazé ĩspotore hā asiré 're 'wasari aba mono ò di za, ētē'ubuzi pré oru hā duré ētē'ubuzi'a prata zama.

¹⁰ Dama romhuri'wai ma, te za dasa hā da te tāma 're sòmri za'ra, tiwi sò robaba wa. Taha wa, nimomo 're anomro aba mono wamhā, romramizé hā asiré 're 'wasari aba mono ò di za. Duré ai'uzza misire ré si te za 're anomro aba mo. Aipara'uzza misire ré si te za duré 're anomro aba mo. Wedehu hā asiwazusizé hā misire te za duré asiré 're ĩ'wasari aba mo.

¹¹ — Nimomo daza'ru u 're anomro aba mono wamhā, asò 're ĩtob'uzu za'ra wa'aba mono norī u si te za 're asisisi aba mo. Tawamhā tame te za ĩsiré 're aihāimana za'ra wa'aba mo, 'ri tede'wa siré, nimomo 're anomro aba mono zéb u hā.

¹² Danhorōwa u 're asisisi aba mono wamhā, āne te za 're ĩdazawi za'ra wa'aba mo: “Rowē na 're aihāimana za'ra wa'aba mono.” Āne te za 're ĩdazawi za'ra wa'aba mo.

¹³ Tawamhā danhorōwa u 're aihutu aba mono wi, da te 're ai'mazasi wē za'ra wa'aba mono wamhā, 're ĩsawi za'ra wa'aba mono zéb zarina, te za rowē na 're hāimana za'ra, 'ri

tede'wa nori hã. Duré da te 're ai'mazasi wê za'ra wa'aba mono ô wamhã, rowê na 're hãimana za'ra mono ô di za, 'ri tede'wa nori hã.

¹⁴ Duré nimomo darob u 're aihutu aba mono wamhã, asô 're datob'uzu za'ra wa'aba mono ô wamhã, da te 're aiwaparî ze za'ra wa'aba mono ô wamhã, ta hawi te za 're aiwairébé aba mo. 'Re anomro aba mono zéb u, te za asisa'u aipara zapru hã 're itata'a za'ra wa'aba mo, ti'ai u 're rere'e mono da, dapo're ô na 're danomro mono wa, 'rãwi 're dasisãmri za'ra mono da.

¹⁵ Tô sena, wa aima waihu'u za'ra wa'wa. Niwapsi 'Re Ihãimana u'âsi mono, da'ãma ïsipô'ozéb ãma hã Sodoma ãma duré Domora ãma 're Idahãimana wasété uptabi za'ra mono nori ma, te te ïrob'manharî pipa zém nhipai u, te za asô 're itob'uzu za'ra wa'aba mono ô nori hã te te tãma 're arob'manharî za'ëtê. — Æne ma tô Zezusi hã wama waihu'u za'ra, ïsiré 're ïwanomro mono nori ma.

Zezusi te te ïsatôri za'ra ma, za da te tãma 're ïrob'manharî wasété za'ra mono zé wasu'u Marcusi 13.9-13; Rucasi 21.12-19

¹⁶ Tawamhã Zezusi te duré wama rowasu'u za'ra, ïsiré 're ïwanomro mono nori ma:

— Ma'ãpé ïwaparî pese za'ra wa'aba. Pone'ërebãire, robzahî wa'wa u 're ïsisisi mono ne, wa za datême asatôri za'ra wa'wa. Taha wa, te za asimiza'rese 're anomro aba mo, wahi ne. Duré utu'u, marî ïwasédé hã te te 're ïmanharî za'ra mono ô ne, te za 're anomro wê wa'aba mo.

¹⁷ Taha wa, te za 're asipibui pese za'ra wa'aba mo, dawî. Æté ni'wam nori hã te za te te sima 're aiwê za'ra wa'wa, te te 're aiwaibui wa'aba mono da, zudezu nori ma roti'wa nori u, te te 're asimroi wa'aba mono da. Tawamhã ta nori hã te te siwi 're aiwê'ô za'ra wa'aba mono zéb zarina, te za duré ïsimirowahutuzéb ãma da te 're ai'maipré'ê 'wa, romhã nhorô 'manharî na.

¹⁸ Duré ï'ãma si 're anomro aba mono wa, te za dama ïpire nori u da te 're asimroi wa'wa, zudezu'ô nori nhîb'apito nori u, te te 're aiwaihu'u za'ra wa'aba mono zéb zarina, te te siwi 're aiwê'ô za'ra wa'aba mono da. Taha ré, ïsô're 're aimasa aba mono ré, te za ïwasu'u wê na tãma 're ïrowasu'u za'ra wa'aba mo, ïsib'a'uwê nori ma zama.

¹⁹ Tawamhã dama ïpire nori u, da te 're asimroi wa'aba mono wamhã, asimirosa'rata na asisôwa asina 're aihâtã'ã za'ra wa'aba mono ô di za, niha tãma 're asiwasu'u za'ra wa'aba mono zém na da hã. Da te aima 're ïropipa za'ra wa'aba mono zéb u, da te 're asimroi wa'aba mono wamhã, 'Re ihãimana u'âsi mono te za te te aima 're sômri za'ra wa'wa, niha tãma 're asiwasu'u za'ra wa'aba mono zéb da hã.

²⁰ Tãma 're asiwasu'u za'ra wa'aba mono wamhã, asi'uihã na asimirosa'rata na tãma 're aimreme zusi aba mono ô di za. 'Re ihãimana u'âsi mono, Tipê'ëzani na te te aima 're ïwaihu'u za'ra wa'aba mono zéb zarina si, te za tãma 're asiwasu'u za'ra wa'aba mo, danhib'apito nori ma.

²¹ — Da te 're ïzaze za'ra mono 'ru te, te za dasisãnawãi uptabi nherê, da te dasima 're dahãiba nhomri za'ra, da te 're danhimroi mono da. Damama nori hã te za ti'ra ma, ãne te te tãma 're rob'manharî wasété za'ra, 'rãwim nherê. Duré da'ra nori hã timama uptabi da nherê, te za sada 're hãimana za'ra, te te dama 're hãiba nhomri za'ra mono da, da te 're simroi mono da, ïna me.

²² Uburé te za da te 're ai'ruiwaparî za'ra wa'wa, ïzazei'wa 're anomro aba mono wa. Tane nherê, asiptete sina ône haré ï'ãma 're anomro u'âsi aba mono wamhã, te za asina 're ï'uwaimrami za'ra wa'aba mo, asô'reptu za'ra wa'aba zé hã.

²³ Tawamhã nimame 'ri nho'ômo ãma da te 're ai'ruiwaparî za'ra wa'aba mono wa, da te aima 're 'manharî wasété za'ra wa'aba mono wamhã, ta hawi te za 're aimani za'ra wa'aba mo, 'ri nho'ômo amoi u 're anomro aba mono da. Tô sena wa aima waihu'u za'ra wa'wa. Izarazéhé nhihudu nori nhîpti'ai 're, 'ri wa'ôtô mono bâ ïwasu'u wê na romhuri 'rãsutu za'ra wa'aba ô ré, wa za we dama ïshîhã'ré apã, dasiré ïpodo hã.

²⁴⁻²⁵ — Romnhoré'wa nori hã te te 're romnhoré'wa mono ré hã, pire na 're hãimana waihu'u za'ra mono ô di, tãma ïromnhoré'wa nori ma hã. Tane nherê, romnhoré hã te te 're ruiwaparî u'âsi za'ra mono wamhã, zahadu wapsi te za tãma ïromnhoré'wa nori ne oto 're hãimana za'ra, aiwa. Duré te te dama 're ïromhuri za'ra mono nori hã te te dama 're romhuri za'ra mono ré hã, hãimana pire na 're hãimana waihu'u za'ra mono ô di, tinhîb'apito nori nhîpau u hã. Tane nherê, tipire zô te te 're rob'ruiwaparî u'âsi za'ra mono wamhã, zahadu wapsi te za tinhîb'apito ne pire na 're hãimana za'ra oto. ï'ruiwaparî'wa nori hã te Bezebu na te te 're ïnhisi za'ra, wa'uburé nori nhîb'apito nhisi na. Æne te ta nori hã te te ï'ãma 're wasété za'ra. Taha wa, taha nhîpau u te za duré te te ai'ãma 're wasété uptabi za'ra wa'wa, ïsiré 're anomro aba mono wa.

*'Re ihâimana u'âsi mono si, da te dasima 're îpîpa za'ra mono zé wasu'u
Rucasi 12.2-7*

²⁶ Tawamhã Zezusi te duré wama rowasu'u za'ra, îsiré 're îwanomro mono norî ma:
— Taha wa, dama 're aipahi za'ra wa'aba mono ô di za. Uburé marî hã upsibi na 're ihâimana za'ra mono hã zahadu wapsi te za suwa nhamra ni. Duré uburé marî hã pi'uriwi 're ihâimana za'ra mono hã te za niwapsi waihu'u za'ra ni.

²⁷ Uburé pi'uriwi te aima 're îwaihu'u za'ra wa'aba mono hã te za oto sô'awi dama âma 're îrowasu'u za'ra wa'aba mo.

²⁸ Dahâiba te te dawî 're îsimroi mono norî ma hã, tâma 're aipahi za'ra wa'aba mono ô di za, dapê'êzani hã te te dawî 're simroi waihu'u mono ô nherê. 'Re ihâimana u'âsi mono si te za asima 're îpîpa za'ra wa'aba mo. Taha ma si waihu'u pese di, dahâiba hã duré dapê'êzani zama, te te dawî 're î'a'uprosi mono zéb da hã.

²⁹ Sire wa'â hã wa'âbâ syryre nherê, uburé Damama zadawa para ô nherê, 're si'utôri mono da hã, mare di, sire norî hã.

³⁰ Tane duré, aséré za'rata aba zama, tâma waihu'u pese di, 'Re ihâimana u'âsi mono ma hã. Simi'madâ'â pese uptabi di.

³¹ Sire hã tâma sawi pese za'ra nherê, sire zawi nhipai u, tâma asawi uptabi za'ra wa'aba di, 'Re ihâimana u'âsi mono ma hã. Taha wa, asina 're aihâtâ'â za'ra wa'aba mono ô di za. — Âne ma tô wama rowasu'u za'ra Zezusi hã, îsiré 're îwanomro mono norî ma hã.

*Zezusihî zazei'wa na 're îdasiwasu'u za'ra mono zé wasu'u, îsazei'ô'wa na zama
Rucasi 12.8-9*

³² Tawamhã Zezusi hã te duré wama rowasu'u za'ra, îsiré 're îwanomro mono norî ma:
— Ni'wam norî hã îzazei'wa na dama 're siwasu'u za'ra mono wamhã, wa hã wa za duré Îmama nho'a te 're awasu'u, îzazei'wa na, hâiwa âma 're îsâmra mono nho'a.

³³ Tazahã, ni'wam norî hã îzazei'ô'wa na dama 're siwasu'u za'ra mono wamhã, wa hã wa za duré Îmama nho'a te 're awasu'u, îzazei'ô'wa na, hâiwa âma 're îsâmra mono nho'a. — Âne te wama rowasu'u za'ra, Zezusi hã.

*Zezusihî âma dasina 're îdasipo'o za'ra mono zé wasu'u
Rucasi 12.51-53; 14.26-27*

³⁴ Tawamhã te duré îsiré 're îwanomro mono norî ma rowasu'u za'ra, Zezusi hã:
— E ti'ai u we îmorî wa, te za ti'ab ré rowê na si dasiré 're dahâimana za'ra, simisutu. Mare di. Âne hã î'âma 're rosa'rata za'ra wa'aba mono ô di za. Ti'ai u we îmorî wa, rowê na si 're dahâimana za'ra mono ô di za. Te za î'âma dasima 're dasiwanhizari. Te za duré î'âma 're dasi'wapé za'ra.

³⁵ Ti'ai u we îmorî wa, te za da'ra si'aibâ norî hã timama âma 're sitob'ru za'ra. Da'ra sipi'ô norî hã te za duré tina âma 're sitob'ru za'ra. Duré dasani'aba norî hã te za timaprebaba sipi'ô'âma 're sitob'ru za'ra.

³⁶ Âne te za dasisânawâi uptabi nherê, dasina 're danhitob'ru uptabi za'ra, 'râwi dasiré 're dahâimana za'ra mono nherê.

³⁷ — Ni'wam norî hã te te 're îzawi za'ra mono zém nhipai u, timama norî hã te te 're sawi pese za'ra mono wamhã, î'âma 're nomro waihu'u mono ô di za. Duré ni'wam norî hã îzawi nhipai u ti'ra norî te te 're sawi pese za'ra mono wamhã, î'âma 're nomro waihu'u mono ô di za duré.

³⁸ Wedepo'o nnonhi'râmi hã, daza'ozéb da, da te dasisada 're î'wasari mono ne, ni'wam norî hã da te 're simroi mono da nherê, sisawi âna îzarina 're nomro mono wapsi, te za î'âma 're hâimana u'âsi za'ra. Ânei ô wamhã, î'âma 're nomro waihu'u mono ô di za.

³⁹ Ni'wam norî hã si'uihâ na tihâimanazép si te te sima 're sawi za'ra mono wamhã, rowê îsi'utôri'ô hã te te sina 're uwaimrami za'ra mono ô di za. Ni'wam norî hã îzarina 're nomro mono da, 're sihâiba zawi za'ra mono ô wapsi, te za te te sina 're uwaimrami za'ra, rowê hã. — Âne ma tô wama rowasu'u za'ra, Zezusi hã.

*'Re ihâimana u'âsi mono, za te te dama 're î'awa'âbâ mono zé wasu'u
Marcusi 9.41*

⁴⁰ Tawamhã te duré âne na wama rowasu'u za'ra, îsiré 're îwanomro mono norî ma:
— Ni'wam norî hã te te 're aiwalbui wê wa'aba mono wamhã, ta norî hã ai'u'âbâ wa'aba te za te te siwi 're îmrami wê. Ta norî hã te te siwi 're îmrami wê mono wa, we îzatôri'wa zama te za duré îsiré te te siwi 're mrami wê.

⁴¹ Âté ni'wa hã te za 'Re ihâimana u'âsi mono zadawa wasu'u'wa hã âri wê, îsadawa wasu'u'wa na te te waihu'u wa. Âne ni'wam norî hã te te 're 'manharî wê za'ra mono wamhã, tizadawa wasu'u'wa norî ma, za te te 're î'awa'âbâ mono ne, te za 'Re ihâimana u'âsi mono hã te te tâma 're awa'âbâ aiwa, damrami wê 'wa norî ma hã. Âté ni'wa hã te za duré

'Re ihâimana u'âsi mono nhimiroti zarina 're ïmorî wê uptabi hâ âri wê, 're ïmorî wê uptabi na te te waihu'u wa. Âne ni'wam norî hâ te te 're 'manharî wê za'ra mono wamhâ, tinhimiroti 'madâ'â pese 'wa norî ma, za te te 're i'awa'âbâ mono ne, te za duré 'Re ihâimana u'âsi mono hâ te te tâma 're awa'âbâ aiwa.

⁴²— Âté ni'wa hâ te za jzazei'wai ma, â wahâ hâ tâma ô, te te hâ'rêne da, isiré jzazei'wa norî ma îwapu ma, 're ïmorî na te te waihu'u wa. Âne hâ jzazei'wa norî hâ marî 'rare na nherê, ni'wam norî hâ te te 're pawapto za'ra mono wamhâ, 'Re ihâimana u'âsi mono, za te te tâma 're i'awa'âbâ mono zé hâ te za te te sina 're uwaimrami za'ra. Tô sena, wa aima waihu'u za'ra wa'wa. — Âne ma tô Zezusi hâ wama rowasu'u za'ra, daro mono bâ te te îwazatôri za'ra zéb u hâ.

11

Zuwâ Batita hâ Zezusihî u, tizadawa wasu'u'wa norî te te îsatôri za'ra zé wasu'u Rucasi 7.18-35

¹ Tawamhâ 12 na isiré 're îwanomro mono norî ma, âne na te te wama roti za'ra pari wamhâ, ma tô mo Zezusi hâ, dama îsâmrazém hawî, tamomo 'ri nho'ômo mono bâ te te dama rowahutu mono da.

² Tawamhâ Zuwâ Batita, dazazéb 're sâmrâ ré, ma tô Cristuhu wasu'u hâ wapa, marî te te dama 're i'ab'manharî wê mono zé hâ. Te te wapari wamhâ, ma tô isiré 're ïnomro mono norî hâ 'mazatôri za'ra, Zezusi hâ te te siwi 'mazadanharî da.

³ Âne ma tô siwi sadanha:

— E a hâ Zuwâ Batita te te dama 're aiwasu'u mono, te we aimo. E zahadu aimawi zô, wa za 're wanhimipari za'ra.

⁴ Tawamhâ Zezusi hâ te asa tâma nharî za'ra, âne:

— Mo oto apâ ai'aba'réi wa'aba Zuwâhâ u, marî hâ îwapari za'ra wa'aba zém na tâma rowasu'u za'ra wa'aba da, marî hâ i'madâ'â za'ra wa'aba zém na zama.

⁵ Îtob'a norî hâ to pese za'ra wa, ma tô apâ te te 're rob'madâ'â za'ra. Ìmorî'ô norî hâ te oto para na 're nomro. Duré i'wa're ré norî hâ ma tô 're pese za'ra. Hâiba wê na te oto 're nomro. Duré îpo'reptô norî hâ te oto 're simipari za'ra. Duré 're îdâ'â za'ra mono norî hâ ma tô duré apâ 're hâiwa'utu za'ra. Îwasu'uwê hâ ma tô duré îsibrob'ô norî hâ te te 're wapari za'ra. Âne na te za tâma îrowasu'u za'ra wa'wa, Zuwâhâ ma.

⁶ Ni'wam norî hâ, wa hâ 'Re ihâimana u'âsi mono zadawa para we ïmorî na, 'râwi j'âma 're siwawâ za'ra mono ô wamhâ, ta norî ma si tâma 're rowé uptabi za'ra mono di za. — Âne te tâma rowasu'u za'ra, Zezusi hâ.

⁷ Tawamhâ Zuwâ Batitaha siré 're ïnomro mono norî hâ apâ si'aba'réi wamhâ, ma tô Zezusi hâ dama rowasu'u, Zuwâ Batitaha hâimanazém na. Da'ahâ na îdasi'ubumroi mono norî ma, te âne tâma rowasu'u za'ra:

— Zuwâ hâ a'ubuni wi 're sâmrâ mono ré, ma tô îtême 're anomro aba mo, 're sabu za'ra wa'aba mono da. E tawamhâ du teihî 'râihâ hâ uware wa, rowa'u te te 're îhâpâ za'ra mono ne, Zuwâ Batita hâ roti da, sib'uware na 're hâimana mono wa, ma tô îtême 're anomro aba mo. Mare di. Ta hâ roti da, siptete na ma tô 're hâimana.

⁸ E uza wê na 're si'uza mono wa, ma tô îtême 're anomro aba mo, 're sabu za'ra wa'aba mono da. Mare di. Uza wê na 're si'uza mono ô di. Uza wê ré 're ïnomro mono norî hâ, te danhib'apito ñhorôwa âma si 're si'ubumro, 'ri 'râihâ âma si.

⁹ Ma'âpé, îma wasu'u za'ra wa'aba za. E 'Re ihâimana u'âsi mono zadawa wasu'u'wai wa, te îtême 're anomro aba mo, 're sabu za'ra wa'aba mono da. Tane tô. Ô hâ uburé îwana 'Re ihâimana u'âsi mono zadawa wasu'u'wa norî nhipai u te pire na 're hâimana, Zuwâ hâ.

¹⁰ Duréihâ ma tô 'Re ihâimana u'âsi mono zadawa wasu'u'wa hâ âne âma rob'ui'ére, Zuwâhâ âma, 'Re ihâimana u'âsi mono mreme na: "Îzadawa wasu'u'wa, wa za aiwana satô, te te asô ropese mono da." Âne duréihâ 'Re ihâimana u'âsi mono mreme na rob'ui'ére, îbahâ na hâ.

¹¹ Tô sena wa aima waihu'u za'ra wa'wa. Uburé îwana 're ïnomro mono norî hâ te te siwi âma wabzu za'ra ô di Zuwâ Batita hâ, îsimiromhuri pire na hâ. Tane nherê, 'Re ihâimana u'âsi mono te te 're îda'azawi mono zéb zarina te te 're îda'apawapto mono zé hâ, hâiba ré ré, te te waihu'u ô di za, Zuwâ Batita hâ. Ni'wam norî si, 'Re ihâimana u'âsi mono nhîb'a'uwê norî si te za te te sina 're waihu'u za'ra, i'uirî na. Taha wa, ta norî hâ te za pire na 're hâimana za'ra, Zuwâ Batitaha nhîpai u. Duré ni'wam norî hâ 'Re ihâimana u'âsi mono nhîb'a'uwê norî hâ, tisiré norî ma, wapu na 're hâimana za'ra mono nherê, te za pire na 're hâimana za'ra, Zuwâ Batitaha nhîpai u, ta norî si i'uirî na te te sina 're waihu'u za'ra mono wa za, 'Re ihâimana u'âsi mono te te 're îda'apawapto mono zé hâ.

¹² Zuwā Batita hā, 'Re ihāimana u'āsi mono te te dama 're īsada wasu'u mono zém na te te dama āma īsāna'ratazém hawim haré, te oto ni'wam norī hā sib'ru na 're hāimana za'ra, 'Re ihāimana u'āsi mono hā da'āma 're sib'a'uwē mono tō da. Da te dasima 're wē za'ra mono nherē, te ta norī hā te te dawi 're ro'wa'rutu za'ra, 'Re ihāimana u'āsi mono hā āma 're sib'a'uwē za'ra mono tō da.

¹³ Zuwāhā wana ré hā, ma tō 'Re ihāimana u'āsi mono zadawa wasu'u 'rata 'wa norī hā te te āma 're rob'ui'éré za'ra Mozésihi zama, 'Re ihāimana u'āsi mono, za da'āma 're īsib'a'uwē mono zé wasu'u na hā.

¹⁴ Tawamhā īsimirowasu'u za'ra na, 're saze za'ra wa'aba mono wamhā, taha zarina te za duré āne 're īsaze za'ra wa'aba mo, Eriasi ti'ai u za we īmorī na Zuwā te te īwasu'u na hā.

¹⁵ Asimipari pese aba wamhā, ma'āpé īwapari pese za'ra wa'aba.

¹⁶⁻¹⁷ — E 'wai āma, wa za oto romnhimire'é, āhāna 're īdahāimana za'ra mono norī āma hā. Ai'uté norī āma, wa za simire'é. 'Ri nhi'rīti wa, rowedezéb āma si'ubumroi ré, te za āne si'mahārā za'ra, ai'uté norī hā: "Wa norī hā wa tō aima rowamreme za'ra wa'aba ni aré, dasina damro wa, rowamremezém na. Tane nherē, āma ato za'ra wa'aba ō di. Duré da te dasina 're ti'a za'ra mono wa, rowamremezém na wa tō aré aima rowamreme za'ra wa'aba ni. Tane nherē, wame ai'ry'ry wa'aba ō di." Āne te za si'mahārā za'ra. Āne wa tō ai'uté norī āma simire'é, āhāna 're īdahāimana za'ra mono norī hā.

¹⁸ Duré Zuwā Batita hā te te dama 're sadawa wasu'u mono ré, 'Re ihāimana u'āsi mono 'madā'ā sina ma tō sai āna te te 're romhuri, misi bātā na. Duré uwa 'ru 'rāi wa'u hā te te dame 're hāsi mono ō di. Taha wa, ma tō da te tāma 're nhi'rī wasété za'ra. Āne ma tō da te tāma 're nhi'rī za'ra: "Ō hā wa'uburé te te 're pibui u'āsi."

¹⁹ Duré wa hā ti'ai āma dasiré īpodo hā wa īto sina dasiré 're īsa, dasazém na. Uwa 'rāi wa'u īsé hā wa duré te dame 're hāsi. Taha wa, ma tō āne na da te īma 're nhi'rī wasété za'ra: "Ma'āpé 'madā'ā za'ra wa'aba. Ōhōta te aibā hā sa za'ētē na 're sai u'āsi. Ta hā uwa 'ru 'rāi wa'u ze'i'wa duré. Rob'ui'prazé ubumroi'wa norī siwadi ta hā, uburé siwa'ru 're īdanomro mono norī siwadi." Āne ma tō da te īma 're nhi'rī wasété za'ra. Ni'wam norī hā 'Re ihāimana u'āsi mono nhimiroti zarina 're nomro mono wamhā, te za marī īwē si te te 're 'manharī u'āsi za'ra. Āne wa, te za īwaihu'u pese za'ra wa'wa, tō sena 'Re ihāimana u'āsi mono nhimiroti īwē uptabi na hā. — Āne ma tō Zezusi hā dama rowasu'u.

²⁰ Tawamhā nima niwīmhā 'ri wa'ōtō mono bā 're īdahāimana za'ra mono norī hā dawasété wi 're dasipizari za'ra mono ō wa, ma tō Zezusi hā siwi dawé'ō, tiwaihu'u pese na marī dama ī'manharī waihu'u'ō hā tamep si te te dama 're ab'manharī wē u'āsi mono nherē.

²¹ Āne te 'ri wa'ōtō āma ma tinha Zezusi hā, 'ri wa'ōtō 're, 're īdahāimana za'ra mono norī ma:

— Corazi na 'ri wa'ōtō nhisi āma 're aihāimana za'ra wa'aba mono norī ma, aima 're ropipa uptabi za'ra wa'aba mono di za, Besada na 'ri wa'ōtō nhisi āma 're aihāimana za'ra wa'aba mono norī ma zama. Marī dama ī'manharī waihu'u'ō hā asō'a za'ra wa'aba, te 're ī'ab'manharī wē mono ne, Tiru āma 'ri nho'ōmo āma, duré Sido āma 'ri nho'ōmo āma 're īdahāimana za'ra mono norī nho'a, te dama 're ab'manharī mono 'wa'āhā, duré te aré ta norī hā 're sipizari za'ra, tiwasété wi. Tiwasété wi 're īsipizari za'ra mono zém na, da te 're waihu'u za'ra mono da, te aré 'ru'a hā ti'rā nhisiwi te te 're sa'wari za'ra. Te duré aré sa'u ihāiro na 're si'uzza za'ra.

²² Tō sena wa aima waihu'u za'ra wa'wa. Niwapsi 'Re ihāimana u'āsi mono, da'āma īsipo'ozéb āma hā Tiru āma duré Sido āma 're īdahāimana wasété za'ra mono norī ma, te te īrob'manharī pipa zém nhipai u, te za te te 're aihā za'ra za'ētē za'ra wa'wa, 'Re ihāimana u'āsi mono hā.

²³ Duré Capana'u āma 're aihāimana za'ra wa'aba mono norī hā e danhipai u aipire na 're aihāimana za'ra wa'aba mono da, ma tō asina 're īrosa'rata za'ra wa'aba mo. Ropipa u si, te za 'Re ihāimana u'āsi mono hā te te 're asāmra 'wa, dap'ē 're dadā'ā u'āsi ne 're īdahāimana za'ra mono zéb u. Marī dama ī'manharī waihu'u'ō hā asō'a za'ra wa'aba, te dama 're ī'ab'manharī wē mono ne, duréihā Sodoma āma 're īdahāimana wasété za'ra mono norī hā te āma 're pawapto' za'ra mono 'wa'āhā, aré si'utōrī ō di, ta norī hā. Rowē na te aré 're hāimana u'āsi za'ra.

²⁴ Niwapsi 'Re ihāimana u'āsi mono hā da'āma īsipo'ozéb āma hā Sodoma āma 're īdahāimana wasété za'ra mono norī ma, te te īrob'manharī pipa zém nhipai u, te za te te 're aihā za'ra za'ētē za'ra wa'wa, tō sena. — Āne ma tō Zezusi hā dama waihu'u, Capana'u āma 're īdahāimana za'ra mono norī ma hā.

²⁵ Tawamhā Zezusi hā te duré Timama ma mre:

— Īmama, a hā Danhib'apito uptabi, hāiwa āma zama, ti'ai āma zama. A hā ma tō rowaihu'u pese 'wa norī wi 're ī'anhito mo, roti īwē hā te te waihu'u za'ra tō da. Rowaihu'u

prāi 'wa na 're ihâimana za'ra mono norī ma si, ma tō marī īwē hā 're ī'awaihu'u mo. Taha wa, wa al'āma īwata, asōpru wa.

²⁶ Tane tō, Īmama. Asima 're ī'awē mono zéb uwaibaba si, ma tō ō norī ma si 're ī'awaihu'u mo. — Āne Zezusi hā ma tō Timama ma mre.

²⁷ Taha wa, te duré wama nharī za'ra, īsiré 're īwanomro mono norī ma:

— Īmama ma tō īma waihu'u, uburé 're ihâimana mono zé hā. Ni'wam norī hā si'uihā na te te 're īwaihu'u za'ra mono ō di, 're ihâimana mono zém na hā. Īmama si ma tō tī'ra na īwaihu'u pese, 're ihâimana mono zém na hā. Duré dasi'uihā na Īmama, da te 're waihu'u za'ra mono ō di za. Īwétési wa tō Īmama hā waihu'u pese, 're ihâimana mono zém na hā. Te īsima 're ī'awē mono zéb uwaibaba si, wa za ni'wam norī ma si te 're awaihu'u, ta norī zama Īmama hā te te waihu'u za'ra da, 're ihâimana mono zém na hā. — Āne ma tō wama waihu'u za'ra, Zezusi hā.

²⁸ Tawamhā Zezusi hā te oto uburé dama tinha, āne:

— Marī ĩpire, da te 're 'wasari mono wamhā, te za 're dazadā'ā wairébé. Tane te duré a norī wa'wa hā 're asiwasutu u'āsi za'ra wa'aba mo, dama rowahutu'wa norī nhimirowasu'u hā 're ī'madā'ā pese za'ra wa'aba mono zéb zarina, 'Re ihâimana u'āsi mono te te 're asō'reptu za'ra wa'aba mono da newa. Tane nherē, asina 're uwaimrami waihu'u za'ra wa'aba mono ō di za. Āne hā uburé 're aihâimana za'ra wa'aba mono norī hā ma'āpé we ĩzō 're asōpré u'āsi aba mono. We ĩzō 're asōpré u'āsi aba mono wamhā, wa za te 're aipé'ē nomri za'ra wa'wa, 're asiwasutu za'ra wa'aba mono tō da oto.

²⁹ Wa hā ĩpé'ē na ĩnhimizawi pese uptabi di. Atāma ĩhâimanazé hā. Taha wa, ma'āpé ĩ'āma 're sasōmri za'ra wa'aba mono, ĩ'āma 're waihu'u pese za'ra wa'aba mono da. Tawapsi te za aipé ĩ're aima 're simi'wara 'wa.

³⁰ Marī ĩwapure, da te 're 'wasari mono wamhā, 're ĩdazadā'ā wairébé mono ō ne, te za aipé'ē wapu na 're anomro aba mo oto, ĩnhimiroti zarina si.

12

*Zudezu norī wa'utuzé wasu'u
Marcusi 2.23-28; Rucasi 6.1-5*

¹ Tawamhā wa norī hā sabadu na wa tō ro'rahāri za'ra ni Zezusi norī hā, buru nho wa'wai baba, zudezu norī te, romhuri zahārizém na. Tawamhā īsiré 're īwanomro mono norī hā mrapp te, wa tō aro 'rā ne hā da te 're ĩzuri mono hā wa te wasima 'rānhinarī tridu 'rā hā, wa te huri mono da.

² Tawamhā parisezu norī hā te te āma wa'madā'ā za'ra wamhā, Zezusihi ma, te nharī za'ra, āne:

— E 'madā'ā za'ra āna, asiré 're ĩnomro mono norī hā. Ta norī hā ma tō aro 'rā ne hā te te sima 'rānhinarī, sabadu na wawa'utuzém na nherē. Taha wa, wahi'rata nhimiroti hā ma tō āma upa za'ra, dawa'utuzé bātā na romhuri, wa te dawi 're ĩsawi za'ra mono zém na roti hā.

³ Tawamhā Zezusi hā te asa tāma nharī za'ra:

— E apito Dawihi wasu'u na rob'ui'ére hā 're sōré za'ra wa'aba mono ā bā, te te ĩrob'manharizém na tisiré norī me, mra te te simroi wamhā.

⁴ 'Re ihâimana u'āsi mono āma 're ĩdawata za'ra mono zéb u, ma tō āzé, apito Dawi hā. Sébré wamhā, ma tō 'mai'rē, ĩ'u'ēne hā. ĩsiré norī zama ma tō tihu, 'Re ihâimana u'āsi mono ma, aré da te ĩsa'ra hā. 'Re ihâimana u'āsi mono, ma tō pisutu aré, da'āma romhuri'wa norī si ĩ'u'ēne hā te te 're huri mono da, sasedoti norī si. Tane nherē, ma tō 'mai'rēne za'ra, Dawi norī hā. Te te 'mai'rēne za'ra nherē, 'Re ihâimana u'āsi mono hā te te siwi wé'ō za'ra ō di, ta norī hā.

⁵ E sasedoti norī wasu'u zama, 're sōré za'ra wa'aba mono ō di duré, 'Re ihâimana u'āsi mono nhimiroti na Mozési te te āma ĩrob'ui'ére na hā. Ta hā ma tō 're ĩsōré za'ra wa'aba mo, tō. Taha wa, te za oto āma īwaihu'u pese za'ra wa'wa. Duréihā ta norī hā ma tō te te 're romhuri za'ra sabadu na, dawa'utuzém na nherē, 'Re ihâimana u'āsi mono āma 're ĩdawata za'ra mono zéb āma. Tawamhā 'Re ihâimana u'āsi mono hā romhuri zahārizém na romhuri hā te te dawi sawi nherē, te te 're romhuri za'ra mono wamhā, ĩwasédé hā te te āma 're sa'ra mono ō di ta norī āma hā, dawa'utuzém na te te 're romhuri za'ra mono nherē.

⁶ Tō sena, wa aima waihu'u za'ra wa'wa. ĩnhimiroti hā ĩpire uptabi di, duréi roti ma hā, 'Re ihâimana u'āsi mono nhorōwa āma da'āma romhuri'wa norī hâimanazém na, danhimiroti ma hā.

⁷ Duréihā 'Re ihâimana u'āsi mono zadawa wasu'u'wa hā ma tō āne na rob'ui'ére ĩbahā na hā, 'Re ihâimana u'āsi mono mre me na: "Asimizama hā ĩma 're ĩzata za'ra wa'aba mono zō, 're ĩnhimipari mono ō di oto. Asimizawi pese zarina da'āma 're aiwamri za'ra wa'aba mono da si, wa ĩsima te 're aiwé za'ra wa'wa oto." Āne hā āma waihu'u za'ra wa'aba wamhā, aré

Īwasédé há āma sa'ra wa'aba ō di, Īsiré 're Īnomro mono norī āma hā, marī Īwasédé há te te 'manharī za'ra ō wa, ā bātā na.

⁸ Wa hā 'Re Īhāimana u'āsi mono te te ĩpisudu, dasiré ĩpoto da, ti'ai āma. Taha wa, dama ĩpire di, romhuri zahārizém na roti hā te dama 're ĩ'apisutu mono zéb da hā. — Āne ma tō Zezusi hā tāma siwasu'u za'ra, parisezu norī ma.

Aibā ĩsimizu'rā're hā Zezusi te te ĩpesezé wasu'u

Marcusi 3.1-6; Rucasi 6.6-11

⁹ Tawamhā Zezusi hā ta norī hawi morī wamhā, zudezu norī te, rowahutuzéb u ma tō āzé.

¹⁰ Tame te aibā hā nhamra, ĩsimizu'rā're hā. Tawamhā ni'wam norī hā ma tō sima wē za'ra, duréihā 'Re Īhāimana u'āsi mono nhimiroti na Mozési te te āma ĩrob'ui'ééré na hā sabadu na romhuri zahārizém na roti hā, te te āma upai wa, Zezusi hā āma Īwasédé hā te te āma hiri za'ra da. Ma tō āne siwi āma sadanha, Zezusi hā:

— Dawa'utuzém na dapesezé hā romhuri zahārizém na hā, e Mozési hā nhimi'ui'ééré zarina. — Āne te āma siwi sadanha.

¹¹ Tawamhā asa te tāma nharī za'ra, Zezusi hā:

— Pone'ērebā hā aima 'mai'hāimana aba wamhā, ab're 'rehā wa, aiwi 'maiwaptā'ā aba wamhā, e te aré ĩ'maiwazere 'wa, 'manho'reptui aba da hā. Te aré tō ĩ'maiwazere 'wa, romhuri zahārizém na 'maiwaptā'ā nheré, pone'ērebā hā.

¹² Duré, 'Re Īhāimana u'āsi mono hā pone'ērebā te te 're azawi pese mono nheré, pone'ērebā zawi nhipai u, tāma dazawi uptabi di. Taha wa, sabadu na romhuri zahārizém na ni'wam norī hā marī te te dama 're 'manharī wē za'ra mono wamhā, duréihā 'Re Īhāimana u'āsi mono nhimiroti zarina, te za tō te te 're 'manharī za'ra, te te āma 're upa za'ra mono āna, ta norī hā. — Āne te tāma rowasu'u za'ra, Zezusi hā.

¹³ Tawamhā ĩsimizu'rā're ma, te duré tinha, Zezusi hā:

— Ma'āpé, asimizu wahutu.

Tawamhā ma tō tinhimizu hā wahutu, aibā hā. Te te wahutu wamhā, awa'awi ma tō tinhimizu pese apā. ĩsimizu amo ne, wē di oto.

¹⁴ Tawamhā te te pese pari, ma tō parisezu norī hā wairé, te te sima āma roti za'ra da, Zezusi hā āma, da te dasiwi wīri da, ĩsadawa parab za'ra.

'Re Īhāimana u'āsi mono hā tāma romhuri'wa da, Zezusi te te ĩpisutuzé wasu'u

¹⁵ Tawamhā Zezusi hā ma tō sina waihu'u, parisezu norī te te sima āma ĩroti za'ra zé hā te te siwi wīri da. Taha wa, ma tō ĩhawi timorī za'ra. ĩhawi morī za'ra wamhā, da'ahā na ma tō ĩsarina ai'aba'ré ni. Tawamhā daro mono bā 're morī ré, ma tō uburé dahāzé ré hā da'apese, Zezusi hā.

¹⁶ Te te da'apese parimhā, ma tō duré sina da'azadawa uwati, da te dasina 're wasu'u za'ra mono tō da.

¹⁷ Āne ma tō Zezusi hā sina da'azadawa uwati, duréihā 'Re Īhāimana u'āsi mono mreme na, Iza'iza hā ĩsadawa wasu'u 'rata'wa te te āma ĩrob'ui'éérézé hā te te āma uwaimrami da. Āne duréihā 'Re Īhāimana u'āsi mono mreme na rob'ui'ééré hā:

¹⁸ “Āhāta te ĩpisudu ĩma romhuri'wa da, te 're ĩsawi pese mono hā. Taha āma si wa āma 're ĩtōi u'āsi.

Taha ma, wa za ĩpē'ēzani hā tāma tisō. Tawamhā daro mono bā te 're ĩda'anho'reptui mono zé wasu'u na te za te te dama 're rowasu'u, da te 're ĩwaihu'u za'ra mono zéb da hā.

¹⁹ Ta hā awa'awi te te dama 're anharī mono ō di za. Āma 're ĩdawata za'ra mono zéb da hā, mreme 'rāihā na te te dama 're rowasu'u mono ō di za, sō'awimhā.

²⁰ Duré, buru teihi hā sihāpā na 're simasa mono wamhā, e te za da te 're si'é. Mare di. Taré te za da te 're wahutu za'ra, wahu na apā 're simasa mono da. Tane duré, sib'uware na ĩ'āma 're ĩnomro mono norī ma, te te tāma 're rob'manharī wasété za'ra mono ō di za, ta hā. Duré ĩro'ore hā ro'o nhib'uware nheré, da te 're ĩsimroi mono ō ne, sib'uware na ĩ'āma 're ĩnomro mono norī ma, te te tāma 're rob'manharī wasété za'ra mono ō di za duré. Ta norī āma te za 're siwamri u'āsi za'ra. Tawamhā nimahā na si te za oto ĩsimipawapto wē zéb zarina, da te 're waihu'u za'ra, dapoto mono bā, te 're ĩda'anho'reptui mono zém na hā, ĩsitob'ru norī hā te te dawī 're ro'wa'rutu u'āsi za'ra mono nheré, da te 're waihu'u za'ra mono tō da, te 're ĩda'anho'reptui mono zé wasu'u hā.

²¹ Tawamhā daro mono bā te za tō sena sō 're danhimipari za'ra, te te 're ĩda'anho'reptui mono zéb zō.”

Āne duréihā 'Re Īhāimana u'āsi mono mreme na rob'ui'ééré hā, Zezusi hā āma hā.

*Bezebuhu wasu'u**Marcusi 3.20-30; Rucasi 11.14-23*

²² Tawamhã Zezusihî tême, ma tô aibã hã dasiwi saprõni ni, wa'uburé te te 're pibui u'âsi mono wa, itob'a hã duré ìmreme'ô hã. Tawamhã Zezusi hã ma tô pese. Te te pese parip si, ma oto mreme watobro, apã. Te te rob'madã'ã wê di duré, aibã hã.

²³ Tawamhã da'ahã na ma âma tatob'uzu za'ra ni. Taha wa, te dasima nharî za'ra ni, âne:
— Âté ô hã apito Dawihi nhihudu, sô 're Ìwanhimipari za'ra mono. — Âne te dasima âma romnomri za'ra ni.

²⁴ Tawamhã âne na parisezu norî te te dawapari za'ra wamhã, ma tô sima nharî za'ra, âne, ta norî hã:

— Ô hã Bezebuhu zadawa para, ma tô wa'uburé hã te te dama 're anhamra, wa'uburé norî nhîb'apito zadawa para. Bezebu hã tiwaihu'u pe hã te te tâma 're sômri mono ô 'wa'âhã, aré te te dama 're anhamra waihu'u mono ô di, wa'uburé hã. — Âne ma tô parisezu norî hã Zezusihî nhimromhuri na sima rowasu'u za'ra.

²⁵ Tawamhã te te âma Ìrosa'rata wasété za'ra na, ma tô sina waihu'u za'ra, Zezusi hã. Taha wa, te âne tâma âma romnhimiré'ê za'ra:

— Danhib'apito nhîb'a'uwê norî hã 'rãwim nherê, oto sisada 're simasa mono wamhã, te aré 're si'uprosi. Duré 'ri nho'ômo âma 're Ìdahâimana za'ra mono norî hã sisada 're hâimana za'ra mono wamhã, te aré 're si'uprosi. Duré dasisânawã nherê, 'rãwi dasisada 're dahâimana za'ra mono wa, 're dasi'wapé za'ra mono wamhã, te aré 're dasi'uprosi, 'rãwim nherê.

²⁶ Tane duré, wa'uburé norî hã Satanasihî nhîb'a'uwê, simisutu 're hâimana za'ra mono nherê, dapê'ê hawi 're wairébé mono da, te te sima 're rob'ru za'ra mono wamhã, te aré sisada 're hâimana za'ra, wa'uburé norî hã. Tawamhã sisada 're sipo'o za'ra mono wa, te aré wara sina 're si'utõrî, Satanasihî nhîb'a'uwê norî hã. Âne, Ìma Ìnharî za'ra wa'aba zéb zarina, Bezebuhu zadawa para, wa'uburé te dama 're anhamra mono 'wa'âhã, 'rãwim nherê, te aré tô sisada 're simasa. Taha zarina, te aré tô ta norî hã 're si'uprosi.

²⁷⁻²⁸ Ma tô Ìma Ìnharî za'ra wa'wa, Bezebuhu zadawa para wa'uburé te dama 're Ì'anhamra mono na. Asiré norî hã bété. E 'wa sadawa para, te bété wa'uburé norî hã te te dama 're sãmra, ta norî hã. E Bezebuhu zadawa para. Mare di. E Bezebuhu zadawa para wa'uburé te te dama 're Ìsãmra mono na, ma tô dama 're Ìwasu'u za'ra wa'aba mo. Mare di. Âne na dama 're wasu'u za'ra wa'aba mono ô di. Taha wa, ma tô âma Ì'upa za'ra wa'wa, Ìma Ìnharî za'ra wa'aba zém na hã, Bezebuhu zadawa para, wa'uburé te dama 're Ì'anhamra mono na. 'Re Ìhâimana u'âsi mono pê'êzani zadawa parap si, wa tô te dama 're anhamra, wa'uburé hã. Taha zarina si, te za oto Ìwaihu'u za'ra wa'wa, tô sena 'Re Ìhâimana u'âsi mono, ai'âma 're Ìsib'a'uwê za'ra wa'aba mono zéb da, te te âma Ìsãna'rata na hã.

²⁹ — Ni'wa hã aibã Ìsîptete nhorõwa u sébré wamhã, te te sima pawasisi ô ré, Ìsîmarî hã te te tiwi ubumroi waihu'u ô di za, aibã Ìsîptete wi hã. Te te sima pawasisi wapsi, te za Ìsîmarî hã tiwi ubumro oto, 'ri 're tâma Ìromnhimi'wara hã.

³⁰ — Ni'wam norî hã Ìwê'wa 're nomro mono ô wamhã, ta norî hã te Ìzwa 're hâimana za'ra. Duré ni'wam norî hã 'Re Ìhâimana u'âsi mono u, te 're Ìda'anhimroi mono ne, te te 're danhimroi mono ô wamhã, ta norî hã te 'Re Ìhâimana u'âsi mono nhiti, te te 're datatõrî za'ra.

³¹ Taha wa, wa za duré âne aima waihu'u za'ra wa'wa. Dawasété hã da te 're 'manharî za'ra mono nherê, duré 'Re Ìhâimana u'âsi mono âma da te 're wasété za'ra mono nherê, dawasété na tâma 're dasiwasu'u za'ra mono wamhã, tâma waihu'u pese di, dawasété hã te te dama 're Ì'apari mono zéb da hã, te te oto da'âma 're ab'madã'ã tô mono da. Tane nherê, 'Re Ìhâimana u'âsi mono pê'êzani âma, da te 're wasété za'ra mono wamhã, taha na dawasété hã te te dama 're 'apari mono ô di za oto. Te za te te da'âma 're ab'madã'ã u'âsi, 'Re Ìhâimana u'âsi mono hã.

³² Duré ni'wam norî hã dasiré Ìpoto âma te te Ì'âma 're wasété za'ra mono wamhã, oto tiwasété na 'Re Ìhâimana u'âsi mono ma, 're siwasu'u za'ra mono wamhã, tâma waihu'u pese di, âne hã Ìwasédé hã te te tâma 're pari za'ra mono da, te te oto âma 're 'madã'ã tô za'ra mono da. Tane nherê, ni'wam norî hã 'Re Ìhâimana u'âsi mono pê'êzani âma te te 're wasété za'ra mono wamhã, te za ôhõ na Ìwasédé hã te te âma 're 'madã'ã u'âsi za'ra, 'Re Ìhâimana u'âsi mono hã. — Âne na ma tô tâma rowasu'u za'ra, Zezusi hã.

*Rowede Ìwê wasu'u, rowede Ìwasété wasu'u me**Rucasi 6.43-45*

³³ Tawamhã Zezusi hã ma tô duré tâma romnhimiré'ê za'ra, rowede Ìwê na. Rowede Ìwasété na ma tô duré tâma romnhimiré'ê za'ra, parisezu norî âma. Âne te tâma âma romnhimiré'ê za'ra, parisezu norî ma:

— Rowede hā wē wamhā, te za 're 'rāi wē u'āsi za'ra. Rowede hā wasété wamhā, te za duré 're 'rāi wasété u'āsi za'ra. Rowede, 're 'rā za'ra mono zéb zarina te za āma waihu'u za'ra ni, rowede iwē na, duré rowede iwāsété na hā.

³⁴ A norī wa'wa hā te wahi ne 're anomro aba mo. Dapē'ē 're, da te 're 'rosarata za'ra mono zéb zarina te za 're damreme zusi. Taha wa, aiwasété 're 're aihāimana za'ra wa'aba mono wa, marī iwē na 're aimreme zusi waihu'u aba mono ō di. Aipē'ē 're, 're 'rosarata wasété za'ra wa'aba mono zéb zarina si, te marī iwāsété na si 're aimreme zusi aba mo, a norī wa'wa hā.

³⁵ Ni'wa hā 're morī wē wamhā, tipē'ē 're tinhimirosa'rata wē hawim na te za 're mreme wē u'āsi. Duré ni'wa hā 're morī wasété wamhā, tinhimirosa'rata wasété hawim na te za duré 're mreme wasété u'āsi.

³⁶ — Tō sena, wa za aima waihu'u za'ra wa'wa. 'Re ihāimana u'āsi mono, za da'āma īsipo'ozéb āma hā dahāiba mono bā te za tāma tasiwasu'u za'ra ni, rosa'rata āna marī iwāsété na te te dama 're 'nharī za'ra mono zēm na hā.

³⁷ Taha wa, ti'ab ré uburé marī na 're aimreme zusi aba mono zéb zarina, te za 'Re ihāimana u'āsi mono hā aima rowairébé za'ra wa'wa, za da'āma īsipo'ozéb āma hā. Ti'ab ré, marī iwē na 're aimreme zusi aba mono zéb zarina si, te za aiwēsāmri za'ra wa'wa. Duré, marī iwāsété na 're aimreme zusi aba mono zéb zarina si, te za siwi aiwē'ō za'ra wa'wa, 'Re ihāimana u'āsi mono hā. — Āne ma tō Zezusi hā tāma waihu'u sirōmo za'ra, parisezu norī ma.

Zonahā wasu'u, apito Saromahā wasu'u me

Marcusi 8.11-12; Rucasi 11.29-32

³⁸ Tawamhā parisezu norī hā, 'Re ihāimana u'āsi mono nhimiroti na rob'ui'ére na dama rowahutu'wa norī me, ma tō Zezusihi ma, nharī za'ra, āne:

— Rowahutu'wa, wa wasima wē za'ra ni, marī dama 'l'manharī waihu'u'ō hā aiwaihu'u pese na wanhō'a 'manharī da, wa te 'maddā'a za'ra da, 'Re ihāimana u'āsi mono zadawa para dama 're 'l'ab'manharī mono na, sena na wa te āma aiwaihu'u za'ra da. — Āne te Zezusihi wi waptērē za'ra, ta norī hā.

³⁹⁻⁴⁰ Tawamhā Zezusi hā te asa tāma nharī za'ra, āne:

— Nimosi aipoto té wa'aba mono hā, 'l'aihāimana wasété za'ra wa'wa. 'Re ihāimana u'āsi mono zō 're asimipari za'ra wa'aba mono zahā, ma tō 'l'wi iwaptērē za'ra wa'wa, marī dama 'l'manharī waihu'u'ō hā te 'manharī da, asō'a za'ra wa'aba, 'Re ihāimana u'āsi mono zadawa para, te dama 're 'l'ab'manharī mono na sena na 'l'waihu'u za'ra wa'aba da. Tane nherē, te 'manharī ō di za, āhāna. Āne si wa za a'ā aima waihu'u za'ra wa'wa. Duréihā Zona hā 'Re ihāimana u'āsi mono zadawa wasu'u 'rata 'wa hā si'ubdatō ma tō bādā hā āma ai'utō, tebe 'sa'ētē di'i 're, hāimana ré hā. Taha parimhā, ma tō 'Re ihāimana u'āsi mono hā sō'reptu. Ā zadaré u ma tō 'rē 'rāiwatobro, rob u, tebe hā, Zonahā ré. Tane duré, wa hā dasiré 'podo hā si'ubdatō bādā hā te za 'l'āma ai'utō, 'l'dā'ā wa, ab're 're 'inomro ré hā. Taha parip si, wa za duré hāiwa'udu, apā. Āne wapsi, te za 'l'waihu'u za'ra wa'wa, 'Re ihāimana u'āsi mono hawi we 'l'morī na sena na oto 'l'waihu'u za'ra wa'aba da.

⁴¹ Niwamhā 'Re ihāimana u'āsi mono, za da'āma īsipo'ozéb āma hā, duréihā Niniwé na 'ri nho'ōmo nhisi āma 're 'l'dasi'ubumroi mono norī hā te za asada tihāimana za'ra wa'wa, aiwasédé hā te te ai'āma hiri za'ra wa'aba da, 'Re ihāimana u'āsi mono nho'a. E marī wa. Duréihā Zona hā 'Re ihāimana u'āsi mono te te tāma 're sadawa wasu'u za'ra mono wamhā, ma tō te te 're waparī za'ra. Taha wa, ma tō ta norī hā tiwasété wi 're sipizari za'ra. Zonahā nhimiroti hā pire nherē, 'l'sipai u 'l'nhimiroti si pire uptabi di. Tane nherē, a norī wa'wa hā 'l'zaze za'ra wa'aba ō di. 'Re ihāimana u'āsi mono nhimipisutuzéb zarina we atēme 'l'morī aba na hā. Taha wa, te za tō 'l'uwaibaba aiwasédé hā ai'āma sa'ra wa'wa, Niniwé āma 're 'l'dasi'ubumroi mono norī hā.

⁴² Niwamhā 'Re ihāimana u'āsi mono, za da'āma īsipo'ozéb āma hā, duréihā danhib'apito sipi'ō hā Saba na romnhisi āma te te 're 'l'da'ab'madā'ā mono hā te za duré asada tihāimana 'wa, aiwasédé hā te te ai'āma hiri za'ra wa'aba da, 'Re ihāimana u'āsi mono nho'a. E marī wa. Ta hā duréihā romhā uptabi nherē, ma tō wi, apito Saromahā u, 'l'simiroti hā te te waparī da, 'l'simiroti hā dahāimanazēm na rowaihu'u na hā wē uptabi wa. Taha nhimiroti hā pire nherē, 'l'sipai u 'l'nhimiroti si pire uptabi di. Tane nherē, 'l'nhimiroti hā aima waparī ze za'ra wa'aba ō di. Taha wa, te za tō 'l'uwaibaba aiwasédé hā ai'āma hiri za'ra wa'wa, danhib'apito sipi'ō hā.

Wa'uburé norī, da'āma 're 'l'isō'ōwa za'ra mono zé wasu'u

Rucasi 11.24-26

⁴³⁻⁴⁴ — Āne wa za duré aima āma romnhimire'é za'ra wa'wa. Āté wa'uburé hā te za aibā hawi 'l'maiwatobro. Watobro wamhā, a'ubuni wi te za 're mo, rob're na. Tawamhā dazō 're ri'i baba mono wa, nimomo wa'utu ō wa, te za sima tinha: "Īnhorōwa 'rata u, wa za apā

mo, āma 're ĩnhorōwa u'āsi mono da oto, ĩpē'ē 'remhā." Āne te za sima tinha. Tawamhā apā te za oto mo, aibā u, ĩpē'ē 're apā sébré da. Tawamhā ĩhawi watobro haré, te aré hāiba baba na 're hāimana, 'ri hā baba na 're simasa mono wa, 'ri 're wa'wa su'u na 're ĩsimasa mono ne, duré 'ri paramhā robza'ra wē u'āsi 're ĩromnhimi'wara mono ne. Taha wa, wa'uburé ma, wē di, aibā hā apā āma 're ĩsōrōwa mono da hā.

⁴⁵ Tawamhā tisiré norī zō te za mo wa'uburé hā, si'u āma 're sōrōwa za'ra mono da. Tawamhā te za ĩtēme āwisi za'ra, 7 na ĩhāiba za'ra hā ĩsipai u ĩwasété uptabi za'ra hā. Tawamhā siré te za tō āma 're sōrōwa za'ra, aibā āma. Aibā ma, tāma rowē prā ti aré, wa'uburé misi, āma 're sōrōwa mono ré hā, ĩpē'ē 'remhā. Ahā na oto ĩwa 're hāimana za'ra mono wa, tāma rowē ō uptabi di oto. Tane duré, a norī wa'wa hā aima 're rowē prā za'ra wa'aba mono di aré. Tane nherē, aiwasété wi 're aipizari za'ra wa'aba mono newa, zahadu ĩzazei āna 're aihāimana wasété u'āsi za'ra wa'aba mono wa, aima 're rowē ō uptabi za'ra wa'aba mono di za oto. — Āne ma tō Zezusi hā tāma waihu'u za'ra, parisezu norī ma, rowahutu'wa norī ma zama.

Zezusihī na wasu'u, ĩno norī wasu'u me

Marcusi 3.31-35; Rucasi 8.19-21

⁴⁶ Tawamhā Zezusi hā te te dama rowasu'u ré, ma tō ĩno norī hā ĩtēme aihutu, tina me. Tawamhā rowi simasa wamhā, ma tō da'maipore pu'u za'ra, Zezusihī ma, da te 'maïrowasu'u da, ĩtēme watobro za'ra da, rob u.

⁴⁷ Tawamhā Zezusihī ma, ma tō 'maïrowasu'u ni, āne:

— Ano norī hā te rowi asō aimasa, ana me. Te sima aiwē za'ra, marī na te te aima rowasu'u za'ra da.

⁴⁸ Tawamhā Zezusi hā ma uburé dama waihu'u, āne:

— E 'wa hā ĩna. E 'wam norī hā ĩno norī. — Āne hā ma dama waihu'u, Zezusi hā.

⁴⁹⁻⁵⁰ Tawamhā tinhiptōmo na ĩsiré 're ĩwanomro mono norī hā te te wawasu'u za'ra sina, te duré dama tinha:

— Āhāta, ĩna. Āhāta ĩno norī. Āhāta ĩhidiba norī. Ni'wam norī hā ĩmama, hāiwa āma 're ĩsāmra mono hā te te sima 're ĩwē za'ra mono zéb zarina, te te tāma āma 're ĩuwaimrami za'ra mono norī si, ta norī hā ĩno, duré ĩhidiba, duré ĩna. — Āne ma tō Zezusi hā dama siwaihu'u, (da te waihu'u za'ra dai ō nherē).

13

Amho potozé wasu'u

Marcusi 4.1-9; Rucasi 8.4-8

¹ Tawamhā tō taha bātā na ma tō Zezusi hā watobro 'ri hawi, ĩsō'ui u morī da. Tame ma tō nhamra, ĩsō'u zaihā na, te te dama rowahutu da.

² Tawamhā da'ahā uptabi na ma tō ĩtēme dasito, da te wapari za'ra da. Da'ahā uptabi na da te dasiwi uirī wa, ma tō uba're wa dawi āzé, Zezusi hā. Uba're wa, te oto nhamra. Tawamhā ĩsō'u zaihā na te ĩrata aimasam ni.

³ Taha wa, te Zezusi hā tinhimīromnhimīré'é na dama rowahutu, āne:

— Aibā hā te buru u mo, ti'ai hāibādā wa, amho hā te te anhamra mono da, poto mono da.

⁴ Tawamhā, amho hā te te anhamra mono wamhā, nima norī hā bādādi zababa ma rere'e. Tawamhā sire hā ma te te uprosi uburé, poto mono ō ré.

⁵ Ētē nhisiwi ma duré nima norī hā rere'e. Ti'ai baihāire di, étē nhisiwimhā. Ti'ai baihāire wa, ma tō 'wanhipré su'u, amho hā.

⁶ Tawamhā bādā hā oto 'rāi watobro wamhā, rowa'ro wa, ma ro'wanhipré hā ti'wanhipré 'ré za'ra, ĩsari hā te te rowa'rei mono ō wa.

⁷ Nima norī hā ma duré rere'e, wab'ru wazari. Tawamhā siré ma tō 'wanhipré. Siré 'wanhipré mono wamhā, ma te te ubu, wab'ru hā. Taha wa, 'rāi mono ō di, ta norī hā.

⁸ Ti'ai wē wa, ma duré nima norī hā rere'e. Tawamhā, oto 'wanhipré 'rāihā mono wamhā, ma tō ti'rā za'ra. 'Rāi mono wamhā, nima niwīmhā 'rāi ahā prā ti, amho hā. Duré nima niwīmhā 'rāi ahā di. Duré nima niwīmhā 'rāi pese uptabi di. — Āne na ma tō Zezusi hā dama āma romnhimīré'é.

⁹ Tawamhā āne na ma tō duré dama āma 'rāsutu, tinhimiroti na:

— Asimipari pese za'ra wa'aba wamhā, ma'apé ĩwapari pese za'ra wa'aba, ĩnhimīrowasu'u na hā waihu'u za'ra wa'aba da. — Āne ma tō dama waihu'u, da te waihu'u za'ra da.

Romnhimīré'é na si, Zezusi te te dama 're ĩrowahutu mono zé wasu'u

Marcusi 4.10-12; Rucasi 8.9-10

¹⁰ Tawamhã wa norĩ hã Ìsiré 're Ìwanomro mono norĩ hã wa tó Zezusihi u ubumro ni. Tawamhã ãne, wa oto wasiwi sadanharĩ ni:

— E marĩ wa, te romnhimiré'é na si dama 're Ìrowahutu mo. — ãne, wa wasiwi sadanharĩ za'ra ni, wa norĩ zama, wa te waihu'u za'ra ò wa.

¹¹ Tawamhã Zezusi hã te asa wama nharĩ za'ra, ãne:

— 'Re Ìhâimana u'âsi mono hã a norĩ wa'aba ma si, ma tó aima waihu'u za'ra wa'wa, dama Ìwaihu'u'ò hã, da'ãma 're Ìsib'a'uwê mono zém na hã, sô'awi te te dama waihu'u ò nherê.

¹² Ni'wam norĩ hã 'Re Ìhâimana u'âsi mono nhimirowaihu hã te te 're 'ruiwapari u'âsi za'ra mono wamhã, taha zarina te za 'Re Ìhâimana u'âsi mono hã sa'êtê na tãma ãma 're sôprub za'ra, te te aré ãma 're Ìrowaihu'u za'ra mono zém nhipai u, te te waihu'u pese za'ra da oto. Tane nherê, ni'wam norĩ hã Ìsimirowaihu'u na te te 're 'ruiwapari za'ra mono ò wamhã, ta norĩ wi te za tinhimirowaihu hã tãma waihu'u pese za'ra ò nherê, te te tiwi 're awaihu 'Re Ìhâimana u'âsi mono hã, te te aré ãma 're Ìwaihu'u za'ra mono zé hã.

¹³ Ìnhimiromhuri hã datómo na da te 're 'madâ'â za'ra mono nherê, te taré da te 're 'madâ'â za'ra, da te ãma 're waihu'u za'ra mono ãna. Duré Ìnhimiroti hã dapo're na da te 're wapari za'ra mono nherê, te taré da te 're wapari za'ra, da te ãma 're waihu'u za'ra mono ãna. Taha wa, wa romnhimiré'é na si te dama 're rowasu'u.

¹⁴ Duréihã Iza'iza hã, 'Re Ìhâimana u'âsi mono zadawa wasu'u'wa hã ma tó da'ãma rob'ui'ére, za da'ãma 're Ìromhâimana mono zém na hã. Taha wa, ãhãna ma tó da'ãma uwaimra. ãne duréihã Ìsimi'ui'ére hã, 'Re Ìhâimana u'âsi mono mreme na hã:

“Ìnhimiroti hã dapo're na da te 're wapari u'âsi za'ra mono nherê, taré te za da te 're wapari za'ra, da te ãma 're waihu'u za'ra mono ãna. Duré Ìnhimiromhuri hã datómo na da te 're 'madâ'â u'âsi za'ra mono nherê, taré te za da te 're 'madâ'â za'ra, da te ãma 're waihu'u za'ra mono ãna.

¹⁵ E marĩ wa. Dapê'é 're, da te 're Ìrosa'rata za'ra mono zé hã sitom haré te za Ìré 're dahâimana u'âsi za'ra, da te Ì'ãma 're rosa'rata wê za'ra mono ò wa. Dapo're nhitom haré, te za duré 're dahâimana za'ra, Ìnhimiroti hã da te 're wapari ze za'ra mono ò wa. Duré datómo sitom haré te za 're dahâimana za'ra, Ìnhimiromhuri hã dama 'madâ'â zeĩ ò wa.

ãneĩ ò 'wa'ãhã, te aré Ìnhimiromhuri hã da te 're 'madâ'â ze za'ra, datómo na. Te aré duré da te 're wapari ze za'ra, Ìnhimiroti hã. Te aré duré da te 're Ìwaihu'u pese za'ra, dapê'é 're, da te Ì'ãma 're rosa'rata wê za'ra mono wa. Taha zarina si, te aré duré Ìtême 're dasipizari za'ra, dawasété wi hã. Tawamhã dahâzé wa, da te 're Ìdapeze za'ra mono ne, wa aré dawasédé hã te dama 're aparĩ, te da'ãma 're ab'madâ'â tó mono da oto.”

ãne duréihã, 'Re Ìhâimana u'âsi mono mreme na rob'ui'ére hã.

¹⁶⁻¹⁷ Tawamhã Ìsiré 're Ìwanomro mono norĩ ma, te oto nharĩ za'ra, Zezusi hã:

— A norĩ wa'wa hã Ìnhimiromhuri, atómo na 're 'madâ'â za'ra wa'aba mono wamhã, ma tó Ì'ãma Ìwaihu'u pese za'ra wa'wa. Duré Ìnhimiroti hã aipo're na 're wapari za'ra wa'aba mono wamhã, ma tó duré Ì'ãma Ìwaihu'u pese za'ra wa'wa. Taha wa, aima 're rowê uptabi za'ra wa'aba mono di, a norĩ wa'aba ma si. Tó sena wa ãne hã aima waihu'u za'ra wa'wa. Duréihã 'Re Ìhâimana u'âsi mono zadawa wasu'u 'rata 'wa norĩ hã duré Ìsimiroti 'madâ'â pese 'wa norĩ hã te aré te te sima 're wê uptabi za'ra, Ìnhimiromhuri na 're Ì'madâ'â za'ra wa'aba mono zé hã te te 're 'madâ'â za'ra mono da. Ma tó duré aré te te sima 're wê za'ra, Ìnhimiroti na 're Ìwapari za'ra wa'aba mono zé hã te te 're wapari za'ra mono da. Taha wa, a norĩ wa'aba ma si, aima 're rowê uptabi za'ra wa'aba mono di za. — ãne hã ma tó wama waihu'u za'ra, Zezusi hã.

Amnho potozém na Ìsimiré'ézé hã, Zezusi hã sô'awi te te dama Ìwaihu'uzé wasu'u Marcusi 4.13-20; Rucasi 8.11-15

¹⁸ Tawamhã Zezusi hã ma tó duré wama waihu'u za'ra:

— Ma'ápé, Ìwapari pese za'ra wa'aba. ãhãna wa za oto aima waihu'u za'ra wa'wa, amnho potozém na te ãma Ìsimiré'ézé hã waihu'u za'ra wa'aba da.

¹⁹ Amnho hã aibã te te Ì'anhamra mono hã, 'Re Ìhâimana u'âsi mono zadawa wasu'u, te wasu'u. Ni'wam norĩ hã 'Re Ìhâimana u'âsi mono, da'ãma 're Ìsib'a'uwê mono zé wasu'u hã, tipo're na te te 're wapari za'ra mono nherê, te te ãma 're rosa'rata ze za'ra mono ò wamhã, te te ãma waihu'u pese za'ra ò di za. Ta norĩ hã amnho hã bádâdi zababa Ìrere'e mono ne, te 're hâimana za'ra. Amnho hã sire te te Ì'uprosi mono ne, te za Ìwasété uptabi hã Ìtême 're simasisi za'ra, 'Re Ìhâimana u'âsi mono zadawa wasu'u hã tipo're na taré te te 're Ìwapari za'ra mono hã te te tiwi 're awaihu'i mono da, Wa'uburé hã.

²⁰ Duré ni'wam norĩ hã aiwa amnho hã êtê nhisiwi, ti'ai baihãire wa Ìrere'e mono ne, te 're hâimana za'ra. 'Re Ìhâimana u'âsi mono zadawa wasu'u hã te te 're wapari za'ra mono

wamhã, amnho hã ti'ai baihiãre wa ãpoto su'u mono ne, te ta norĩ hã awa'awi te te ãma 're saze za'ra, to sina.

²¹ Tane nherẽ, ãsadowa wasu'u hã te te 're saze za'ra mono wa, da te tãma 're ãrob'manharĩ waseté za'ra mono zéb zarina, te te 're robzépata za'ra mono wamhã, te za sazei utõrĩ za'ra. Amnho hã ti'ai baihiãre wa, ãre'e mono hã sari õ wa, ã'wanhipré 'ré mono ne, te za romhutu na sazei utõrĩ za'ra, ta norĩ hã.

²² Duré ni'wam norĩ hã aiwa amnho hã wab'ru wazari ãre'e mono ne, te 're hãimana za'ra. Wab'ru hã ro'wanhipré siré 'wanhipré mono wa, te te oto ubu mono wa, ã'rã za'ra õ ne, 'Re ãhãimana u'ãsi mono zadawa wasu'u hã tipo're na te te 're wapari za'ra mono nherẽ, ãwẽ hã te te 're 'manharĩ za'ra mono õ di za, ta norĩ hã. Tihãimanazém na si te za sina 're hãtã'ã u'ãsi za'ra. Duré danhibro pe hã wẽ uptabi newa te za taha zõ si te te 're rob'ruiwapari u'ãsi za'ra. Taha wa, amnho 'wanhipré hã ã'rã za'ra õ ne, 're nomro wẽ mono õ di za, ta norĩ hã.

²³ Duré ni'wam norĩ hã aiwa amnho hã ti'ai wẽ wa ãre'e mono ne, te za 're hãimana za'ra. Ta norĩ hã 'Re ãhãimana u'ãsi mono zadawa wasu'u te te 're wapari za'ra mono wamhã, te za te te sima 're wẽ uptabi za'ra, te te 're waihu'u pese za'ra mono da. Tawamhã, rowede ã'rã pese uptabi ne, te za wẽ u'ãsi 're hãimana za'ra, ta norĩ hã. — ãne ma tõ Zezusi hã wama waihu'u za'ra, te te da'ãma ãromnhimiré'ézé hã.

Wab'ru hã rob're ãwẽ wazari, ãpoto mono zé wasu'u

²⁴ Tawamhã Zezusi hã ma tõ duré wama ãma romnhimiré'é za'ra, ãne:

— 'Re ãhãimana u'ãsi mono, da'ãma 're ãsib'a'uwẽ mono zém na, wa za oto aima ãma romnhimiré'é za'ra wa'wa, ãne. Aibã hã tiburu na ma tõ amnho potozé ãwẽ hã te te a're, amnho hã tãma 'rã da.

²⁵ Tawamhã nimahã na barana danhotõ mono ré, ãsitob'ru hã ma tõ ãburu u mo. Wab'ru hã ma tõ te te a're, amnho ãwẽ wazari. Te te a're mono pari, ma tõ apã mo.

²⁶ Tawamhã rob're hã ma tõ prédu. Taha wa, ma tõ 'rã. 'Rãĩ mono wamhã, dama 'madã'ã pibu pese di oto, wab'ru hã ãwazari ãpoto mono na hã.

²⁷ Tawamhã buru tede'wai ma, romhuri'wa norĩ hã ma tõ ãtẽme aihutu. ãtẽme sihutu wamhã, ãne te tãma rowasu'u za'ra: "Apito, oro amnho hã ãwẽ si aiburuna na a're mono za, ma wab'ru hã ãsiré 'wanhipré." ãne te ãma siwi sadanha, buru tede'wa hã.

²⁸ — Tawamhã buru tede'wa hã te asa tãma nharĩ za'ra, ãne: "Ni'wa hã ã'ruiwapari'wa, ma tõ ãne ãma 'manha."

Tawamhã tãma ãromhuri'wa norĩ hã te siwi sadanha, ãne: "E ãne hã aima wẽ di, wab'ru hã uburé wa te ãsanoi mono da hã, tãma ropese da."

²⁹ — Tawamhã asa te tãma nharĩ za'ra: "Tõ'ã. Rob're hã ã'rãĩ ré hã ãsu sano za'ra wa'aba tõ da, taha wa, sano za'ra wa'aba õ di za a'ã, wab'ru hã.

³⁰ A'ã simisutu siré prédu mono, roptehãri na da te 're ãsãna'rata mono zéb u hã. Tawapsi wa za oto roptehãri na romhuri'wa norĩ ma 'ru za'ra, wab'ru uimrehẽne te te siwi sanoĩ mono da, te te duré wasisi mono da, unhama u te te siwi sãmra da, si'unhama da. Taha parip si, te za oto tehãri za'ra, amnho za'razéb u te te siwi sa'ra da, ãma." — ãne na ma tõ Zezusi hã ãma romnhimiré'é, 'Re ãhãimana u'ãsi mono, da'ãma 're ãsib'a'uwẽ mono zém na hã, ãne hã sõ'awib õ nherẽ.

Motada nhamare wasu'u

Marcusi 4.30-32; Rucasi 13.18-19

³¹ Tawamhã romnhimiré'é na ma tõ duré wama rowasu'u za'ra, Zezusi hã, ãsiré 're ãwanomro mono norĩ ma:

— 'Re ãhãimana u'ãsi mono, da'ãma 're ãsib'a'uwẽ mono zém na, wa za duré aima ãma simiré'é za'ra wa'wa, motada nhamare na, aibã tiburu na te te ã'a're hã.

³² Motada nhamare hã uburé romnhamare norĩ ma syryre nherẽ, oto prédu mono wamhã, uburé romnhamare, da te 're ãzuri mono hã te za te te 're sipai pese za'ra. Papo za'ëté wamhã, ãsu 'rowi te za si norĩ hã te te sima 're sasi za'ra. — ãne na ma tõ duré Zezusi hã wama ãma romnhimiré'é za'ra.

ã'u'ëté wapuzé wasu'u

Rucasi 13.20-21

³³ Tawamhã Zezusi hã ma tõ duré ãne na wama ãma romnhimiré'é za'ra, ãsiré 're ãwanomro mono norĩ ma:

— 'Re ãhãimana u'ãsi mono, da'ãma 're ãsib'a'uwẽ mono zém na, wa za duré aima ãma romnhimiré'é za'ra wa'wa, ãne. Pi'õ hã te za ã'u'ëté wapuzé hã syry na sa'wa, aro 'rã ne zu pese wazari, tridu 'rã zu pese wazari. Aro 'rã ne zúb'a si, sa'ëté uptabi di. Tawamhã te te wazari pese wamhã, te za tidupto, ã'u'êne hã. Sa'ëté uptabi di za oto. ãne duré, 'Re

ĩhâimana u'âsi mono, da'âma 're ĩsib'a'uwẽ mono zé hã. — Āne na ma tō duré Zezusi hã ãma romnhimiré'é.

³⁴ Marĩ na te te dama ãma 're romnhimiré'é mono nherẽ, te te dama ãma 're arowasu'u mono ô di, Zezusi hã. Romnhimiré'é na si ma tō te te dama 're rowasu'u.

³⁵ Duréihã 'Re ĩhâimana u'âsi mono zadawa wasu'u 'rata 'wa te te ãma ĩrob'ui'érézéb zarina te te sina uwaimrami da, ma tō romnhimiré'é na si te te dama 're rowasu'u, Zezusi hã. Āne duréihã ãma ĩrob'ui'éréé siro hã:

“Te dama 're rowasu'u mono wamhã, wa za te dama ãma 're aromnhimiré'é.

Wa za duré te dama 're awaihu'u, ropoto na'rata hawimhã dama ĩwaihu'u'ô hã.”

Āne duréihã 'Re ĩhâimana u'âsi mono zadawa wasu'u 'rata 'wa te te ãma ĩrob'ui'éréé siro hã.

Wab'ru na ĩsimiré'ézé hã, Zezusi hã sô'awi te te dama ĩwaihu'uzé wasu'u

³⁶ Tawamhã Zezusi hã ma tō dawĩ mo. Dawĩ morĩ wamhã, ma tō 'ri para u'ázé. Tawamhã ĩsiré 're ĩwanomro mono norĩ hã wa tō 'rãwi ĩtẽme ubumro ni, wa te wasiwi sadanharĩ da, ãne:

— Ma'ápé wama waihu'u za'ra na. E marĩ na ma tō wab'ru na hã ãma ĩromnhimiré. E marĩ te wasu'u.

³⁷ Tawamhã Zezusi hã te asa wama nharĩ za'ra, ãne:

— Aibã hã tiburu na amnho ĩwẽ te te ĩ'a're mono hã, wa hã 'Re ĩhâimana u'âsi mono zadawa para dasiré ĩpodo hã, te ĩwasu'u.

³⁸ Duré aibã buru hã, daro mono bã ti'ai wa, 're ĩdahâimana za'ra mono hã te dawasu'u. Duré amnho ĩwẽ hã uburé 'Re ĩhâimana u'âsi mono, ãma 're ĩsib'a'uwẽ za'ra mono norĩ, te wasu'u. Duré wab'ru hã ĩwasété uptabi nhĩb'a'uwẽ norĩ, te wasu'u, Wa'uburé nhĩb'a'uwẽ norĩ hã.

³⁹ Duré buru tede'wa nhĩb'ru hã wab'ru hã ĩburu na te te tiwi ĩ'azuri mono hã wa'uburé norĩ nhĩb'apito te wasu'u, tō ô hã. Duré da te 're ĩroptehãri za'ra mono zé hã rob'rãsutuzéb ãma za da'ãma ĩsipo'ozé, te wasu'u. Duré buru nho ubumroi'wa norĩ hã hãiwa ãma 'Re ĩhâimana u'âsi mono ma, romhuri'wa norĩ, te wasu'u.

⁴⁰ Wab'ru hã da te 're sano za'ra mono wa, unhamu u da te 're ĩsãmra mono ne, te za dama ĩtiromhãiba, rob'rãsutuzéb ãma hã.

⁴¹ Wa hã dasiré ĩpodo hã hãiwa ãma ĩma romhuri'wa norĩ hã wa za we satõrĩ za'ra ti'ai u, marĩ ĩwasédé hã da te 're ĩ'manharĩ u'âsi za'ra mono norĩ hã te te da'ubumro za'ra da, 'Re ĩhâimana u'âsi mono nhĩb'a'uwẽ norĩ nhiti. Dawasédé hã da te 're 'manharĩ za'ra mono da, te te dama 're ĩroti za'ra mono norĩ zama te za ubumro za'ra, hãiwa ãma ĩma romhuri'wa norĩ hã. Wab'ru hã da te 're ĩsano za'ra mono ne, te za da'ubumro za'ra, õne haré.

⁴² Taha parimhã te za unhamu ro'o za'ëtê u danhamra, ropipa u. Tame te za 're da'ry'ry u'âsi. Te za duré 're da'wasitete u'âsi za'ra, da te oto 're robzépata za'ëtê za'ra mono wa.

⁴³ Tawamhã 'Re ĩhâimana u'âsi mono nhimiroti te te 're ĩ'madã'ã pese za'ra mono norĩ si, te za pire na dama 're hãimana za'ra. Bãdã hã daro mono bã te te dama 're rob'uiwẽ za'ra mono wa, uburé da te 're ĩ'madã'ã za'ra mono ne, te za uburé da te 're waihu'u za'ra, pire na oto dama 're ĩhâimana za'ra mono na, Wamama za oto da'ãma 're ĩsib'a'uwẽ mono zéb ãma hã.

Asimipari pese za'ra wa'aba wamhã, ma'ápé ĩwapari pese za'ra wa'aba, ĩnhimiroti na hã.

— Āne ma tō Zezusi hã wama rowasu'u za'ra.

Ĕtẽ'ubuzi wasu'u

⁴⁴ Tawamhã ãne te duré wama rowasu'u za'ra:

— 'Re ĩhâimana u'âsi mono, da'ãma 're ĩsib'a'uwẽ mono zém na, wa za duré aima ãma romnhimiré'é za'ra wa'wa, ãne. Aibã hã daburu na te te romhuri ré, ma tō etẽ'ubuzi ĩwa'ãbã za'ëtê uptabi hã 'masã, ti'ai 'rowi ni'wa hã te te aré dawĩ ĩsuwa hã. Te te sãmri wamhã, ma tō apã dawĩ suwa tame, da te sãmri tō da. Tawamhã toi uptabi wa, ma tō uburé tinhibro hã dama wede, buru hã tō ô hã te te dawĩ uipra da, etẽ'ubuzi, ĩwa ĩnomro hã te te sima ãri da. Āne 'Re ĩhâimana u'âsi mono, da'ãma 're ĩsib'a'uwẽ mono zé wasu'u hã.

Ĕtẽwaipo wasu'u

⁴⁵ — Āne duré, 'Re ĩhâimana u'âsi mono, da'ãma 're ĩsib'a'uwẽ mono zé hã. Aibã hã ma tō sima wẽ, dasima danhipesezé hã etẽwaipo ĩwa'ãbã za'ẽne hã te te dawĩ 'manhopëtê wa, te te sima uipra da, dama ĩ'madã'ã ze hã.

⁴⁶ Tawamhã etẽwaipo ĩwa'ãbã za'ëtê uptabi hã te te 'masãmri wamhã, uburé tinhibro hã ma tō dama wede, etẽwaipo hã te te sima uipra da. Āne 'Re ĩhâimana u'âsi mono hã da'ãma 're ĩsib'a'uwẽ mono zé wasu'u hã. — Āne ma tō Zezusi hã wama rowasu'u za'ra, ĩsiré 're ĩwanomro mono norĩ ma, wa te waihu'u za'ra da, sô'awib ô nherẽ.

Tepe mramizé wasu'u

47-48 Tawamhã Zezusi hã ma tô duré âne na wama rowasu'u za'ra, tinhimiromnhimiré'ê na:

— Âne hã duré, 'Re ìhâimana u'âsi mono, da'âma 're ìsib'a'uwê mono zé hã. Tepe mrami'wa norî hã ma tô abazipara hã sô siwi time, ìsô'ui wa. Te te siwi mei wamhã, ahã na ma tô siwi âma 'mai'âri za'ra, ìpoto mono bâ, tebe hã. Tawamhã tebe hã ahã uptabi wamhã, ma tô abazipara hã siwi tisa, â zada'rê u. Tame ma tô oto tebe hã ìwê si siwi waihu, si'ôtô 're, te te 'manherê za'ra da. Tebe siwamnarî norî hã da te 're ìhuri mono ô hã ma tô taré siwi sãmra.

49 Tane te za dama tiromhâiba, rob'râsutuzéb âma hã. Hâiwa âma romhuri'wa norî hã te za we dazô ai'aba'rê ti'ai u, dawasété na 're ìdahâimana u'âsi mono norî si te te da'ubumro za'ra da, 'Re ìhâimana u'âsi mono nhimiroti te te 're ì'madâ'â pese za'ra mono norî nhiti, te te dazani za'ra da oto.

50 Tawamhã unhama ro'o za'êtê u te za oto danhamra, ropipa u. Tame te za 're da'ry'ry u'âsi. Te za duré 're da'wasitete u'âsi za'ra, da te 're robzêpata za'êtê za'ra mono wa. — Âne Zezusi hã te te wama âma ìromnhimiré'ê za'ra zé wasu'u hã.

Marî itê hã da te dasima 're ìsômri za'ra mono zé wasu'u

51 Tawamhã Zezusi hã ma tô wazadanharî za'ra, ìsiré 're ìwanomro mono norî hã:

— E ma tô asiwi ìwaihu'u 'wa, uburê te aima âma ìromnhimiré'ê za'ra wa'aba zé hã.

Tawamhã asa wa tâma nharî za'ra ni:

— Ìhe. Wa tô waihu'u za'ra ni.

52 Tawamhã âne te duré wama rowasu'u za'ra, Zezusi hã:

— Wa za duré aima âma romnhimiré'ê za'ra wa'wa, âne. Âté 'ri tede'wa te za marî ìwê hã te te 're azani, 'ri 're wa'wa 're ìromnhimi'wara mono zém hawi, te te dama 're anhomri mono da. E tawamhã marî ì'ratere si te za te te dama 're azani. Mare di. Marî itêb zama te za duré te te dama 're azani, te te dama 're anhomri mono da. Tane duré, ni'wam norî hã 'Re ìhâimana u'âsi mono nhimiroti waihu'u pese 'wa norî hã da'âma 're ìsib'a'uwê mono zé wasu'u te te waihu'u pese za'ra wamhã, ta norî hã te za ìsimiroti itêb zama te te dama 're waihu'u za'ra, ìsimiroti 'rata me. — Âne ma tô wama rowasu'u za'ra, Zezusi hã.

*Zezusi hã, ìprédubzéb âma da te dasiwi ìwê'ôzé wasu'u**Marcusi 6.1-6; Rucasi 4.16-30*

53-56 Tawamhã Zezusi hã marî nhimiré'ê na te te dama arowasu'u pari, ma tô mo, aré 're ìhâimana mono zéb u. Tamomo wisi wamhã, te oto dama rowahutu, zudezu norî te, rowahutuzéb âma. Tawamhã ìsimiroti hã da te wapari za'ra wamhã, ma tô âma tatob'uzu za'ra ni. Te duré dasima âma nharî za'ra ni, âne:

— Ô hã wede'ê na romhuri'wai 'ra. Ìna nhisi hã, Mariza na ìsisi hã. Duré ìno norî nhisi hã Ti'adu, duré Zuzé, duré Sima, duré Zudasi. Ìhidiba norî hã te duré wa'rata 're hâimana za'ra. E niha ma bété ôhō si uburê marî hã waihu'u, tiwaihu'u pese na te te dama 're ìrowasu'u mono zéb da hã, duré marî dama ì'manharî waihu'u'ô hã te te dama 're ì'ab'manharî wê mono zéb da hã. — Âne ma tô âma dasima romnhoré za'ra ni.

57 Taha wa, ma tô dasiwi wê'ô ni, Zezusi hã.

Taha wa, te Zezusi hã âne dama tinha:

— 'Re ìhâimana u'âsi mono zadawa wasu'u'wa norî hã daro mono bâ datême 're nomro mono wamhã, ìsimiroti na wazép sina, te za sô 're datob'uzu za'ra. Ìsipti'ai âma 're ìhâimana za'ra mono norî si, sô 're datob'uzu za'ra mono ô di, ìsipti'ai âma wa. Ìsisânawâ norî zama, ìsô'rôwa âma 're ìsi'ubumroi mono norî hã te te duré siwi 're hâiba wazé mono ô di. — Âne hã ma tô dama waihu'u, Zezusi hã.

58 Tawamhã ìsimipawaptobzém na da te dasina 're umnhasi za'ra mono ô wa, marî dama ì'manharî waihu'u'ô hã ahã na te te dama 'manharî ô di, tamemhã.

14*Zuwâ Batita, da te ìbutu nhizârizé wasu'u**Marcusi 6.14-29; Rucasi 9.7-9*

1 Tawamhã apito Erodî hã Darireza na danhipti'a nho'ômo nhisi âma te te 're da'madâ'â mono ré, ma tô Zezusihi wasu'u hã wapa.

2 Ìwasu'u hã te te wapari wamhã, ma tô te te tâma 're ìromhuri za'ra mono norî ma rowasu'u, Zezusihi hâiba na:

— Zuwâ Batita te dama 'ruî wa, da te wîrî wa, apâ ìhâiwa'udu, ta hã. Taha wa, te tiwaihu'u pese na te te dama 're ab'manharî, marî dama ì'manharî waihu'u'ô hã.

3-4 Âne ma tô apito Erodî hã Zezusihi wasu'u na tâma rowasu'u za'ra. Ta hã ma tô aré tinoi mro zô rowasutu, Erodiza na pi'ô nhisi zô. Ìno nhisi hã Piripi na ìsisi hã. Zuwâ Batita hã ma

tô aré te te tãma 're roti u'âsi, âne: “Re ìhâimana u'âsi mono nhimiroti 'rata na rob'ui'éré hã te te âma roti ô di, asisânawâi mro na aimro da hã. Tãma wê ô di, 'Re ìhâimana u'âsi mono ma hã.” — Âne ma tô te te tãma 're roti u'âsi, Erodihî ma. Tane nherê, ma tô apito Erodi hã tinoi mro na tiwi âma ai'rê. Taha wa, ma tô dama ti'ru, Zuwã Batita hã da te âri da, da te pawasisi da, duré da te sêrê da, dazazêb 're.

⁵ Apito Erodi hã ma tô sima wê aré, te te dama 'ru da, Zuwã Batita da te wĩrĩ da. Tane nherê, pahi di zudezu norĩ ma hã, Zuwã Batita hã 'Re ìhâimana u'âsi mono zadawa wasu'u'wa na da te waihu'u za'ra wa.

⁶ Tawamhã Erodihî waptã'ázém na ma tô dato hã dasiwi 'manharĩ ni. Tawamhã Erodizaha 'ra hã ma tô danho'a apese azarudu hã, apito Erodihî nho'a zama. Taha wa, te te 'madã'â ze ti, apito Erodi hã.

⁷ Taha zarina, ma tô azarutu ma ropisutu, âne:

— Tô sena, wa za uburé marĩ hã aima tisô, asima ìwézéb uwaibaba, ìwi ìwaptêrêzéb zarina.

⁸ Tawamhã ìna hã te te tãma ìrotizéb zarina, ma tô tiwi rowaptê, âne:

— Zuwã Batitaha 'rà si, wa ìsima wê, piza'a 'renho'a wa, ìma hiri da, âhãna awa'awi.

⁹ Taha wa, ma tô apito Erodihî wi tirobzei'ô. Tane nherê, sô ìhãrá norĩ nho'a te te azarutu ma ropisutu wa, ma tô âma tãma uwaimra, te te tiwi ìwaptêrêzéb uwaibaba.

¹⁰ Ma tô dama ti'ru oto, dazazêb u Zuwã Batitaha zô da'maimorĩ da, da te butu nhizãri da.
¹¹ Da te butu nhizãri wamhã, ma tô oto siwi ti'ã ì'rã hã, azarutu ma, piza'a 'renho'a wa. Tawamhã ma tô tina ma ti'ã oto, azarudu hã.

¹² Tawamhã Zuwãhã siré 're ìnomro mono norĩ hã ma tô sô ai'aba'rê, ìhãiba zô, te te siwi âri da, te te siwi sêrê da, ab're 're. Taha parip si, te ai'aba'rê Zezusihi u, te te tãma rowasu'u za'ra da.

*Zezusi hã dasa te te dama ìmanharizé wasu'u
Marcusi 6.30-44; Rucasi 9.10-17; Zuwã 6.1-14*

¹³ Tawamhã Zezusi hã Zuwãhã wasu'u te te wapari wamhã, ma tô danhiti mo uba're na siwaprosi, romnhiwasi sãmra da. Tane nherê, nimomo ìsãmra na ìwasu'u hã da te wapari za'ra wamhã, ma tô darom hawi tawairébé ni da'ahã na, ìsarina dasi'aba'rê da ìsô'rãmi, ti'ai baba.

¹⁴ Tawamhã Zezusi hã uba're hawi watobro wamhã, da'ahã uptabi na ma tô da'ab'madã. Te te da'ab'madã'ã wamhã, ma tô da'ãma tipê'ézé, Zezusi hã. Taha wa, ìhãzê ré norĩ hã tame ìsi'ubumro norĩ hã ma tô apese.

¹⁵ Tawamhã hãiwahã pesere, wa norĩ hã ìsiré 're ìwanomro mono norĩ hã wa tô ìtème ubumro ni, Zezusihi u. Âne, wa tô tãma nharĩ za'ra ni:

— Ma tô tihãiwahã. Âme a'ubuni wi, wa wahãimana za'ra ni, 'ri nhiti. Taha wa, ma'ãpé dama rob'ru na, 'ri wa'ôto u dasi'aba'rê da, dasa hã da te dasima uipra za'ra da.

¹⁶ Tawamhã Zezusi hã te asa wama nharĩ za'ra, âne:

— Mare di. Dasi'aba'rêi ô di za. A norĩ wa'wa hã te za dasa hã dama ì'a za'ra wa'wa, dasaihuri da.

¹⁷ Tawamhã wa duré asa tãma nharĩ za'ra ni, Zezusihi ma:

— Ì'u'êtê wapu hã 5 na te wama tihãimana za'rare. Duré pe'a hã maparanere. Â norĩ si, umrore di.

¹⁸ Tawamhã Zezusi hã te oto wama 'ru za'ra:

— Ma'ãpé we ìma waibui wa'aba, ì'u'êtê wapu hã, duré pe'a hã.

¹⁹ Tawamhã te oto dama tinha, duiroi wa, dasi'ubumroi mono da. Taha pari, ma tô oto ì'u'êtê wapu hã waibu, 5 na ìhãiba hã. Duré pe'a hã maparane. Tawamhã hãiu u te ìré rob'madã, Timama âma wata da, sôpru wa. Taha pari, ma tô te te wê'ê, ì'u'êtê wapu hã. ìsiré 're ìwanomro mono norĩ ma, ma tô wama sômri za'ra, wa te dama sômri za'ra mono da.

²⁰ Tawamhã aihĩni ma tô dasa hã huri ni. Ma tô da te 'mahãpãrĩ. Tawamhã Zezusihi siré 're ìwanomro mono norĩ hã wa tô apã si'ôto 're, wa te sé danho'rada hã, ì'u'êtê wê'ê hã pe'a wê'ê zama. 12 na si'ôno hã ìré hã, danho'rata ré hã. Si'ôto 'remhã 'masisi di.

²¹ Aibã norĩ hã 5 miu na ìhãiba za'ra hã ìsaihuri norĩ hã, aibã norĩ za'rata si hã. Pi'ô norĩ hã duré ai'uté norĩ hã sa'rata ô di.

*Zezusi hã â nhisi baba ìmorizé wasu'u
Marcusi 6.45-52; Zuwã 6.15-21*

²² Tawamhã Zezusi hã ma tô wama rob'ru za'ra, ìsiré 're ìwanomro mono norĩ ma, uba're wa, wanhisisi da, ìwana zara u wa te saprĩ za'ra da ìsô'u na, waza'u za'ra te te dama rob'ru da, darob u apã da te ropéi mono da.

²³ Te te dama rob'rui pari, te oto Zezusi hã mo sa'a u, siwaprosi Timama ma mreme da. Tame siwaprosi sãmra ré, ma tô âma timara.

²⁴Taha ré, Ísiré 're Íwanomro mono norí hã wa tó â wa'wa u wahâimana za'ra ni, uba're na. Tame ma tó â sisasi hã te te waré wabzuri za'ra uba're hã, rowa'u'u za'êne hã ísô'ômoi baba te te rowapôrí za'ra wa.

²⁵Tawamhã zahadu mara hã ré, te Zezusi hã watême timorí za'ra, â nhisi baba.

²⁶Tawamhã, wa te wasiwi 'madâ'â wamhã, wa tó tâma wapê'êwara za'ra ni, adâ watême morí za'ra newa. Âne, wa wasima 'mahârâ za'ra ni:

— Ôhóta adâ'â hãiba warô, te wei watême mo. — Âne, wa wasima 'mahârâ za'ra ni. Tawamhã tâma wapahi za'ra wa, wa tó tâma wazadari za'ra ni.

²⁷Tawamhã awa'awi ma tó Zezusi hã wama sí'mahârâ za'ra:

— Wa hã wa we atême Ìmorí 'wa. Ìma aipahi za'ra wa'aba ô di za.

²⁸Tawamhã Pedru te tâma tinha, âne:

— Wanhib'apito, tó sena a hã wamhã, ma'âpé we Ìzô aihârâ, â nhisi baba âma atême Ìmorí da, asabzéb u.

²⁹Tawamhã asa te tâma tinha, Pedruhu ma:

— We aimorí pé, Ìtême.

Taha wa, ma tó uba're hawi watobro Pedru hã, â nhisi baba morí da, Zezusihi u.

³⁰Tawamhã â nhisi baba Ìtême morí wa, ma tó rowa'u'u za'êtê ma tipahi, Pedru hã. Taha wa, ma tó tizadari. Ma tó aré âzé, â 'rowi. Te sina 'mahâ, âne:

— Wanhib'apito, ma'âpé Ìnho'reptu na, Ìdâ'â tó da.

³¹Tawamhã awa'awi ma tó Zezusi hã pa'â, tinhib'rata na. Âne te tâma tinha, Pedruhu ma:

— E niha Ìzaze syry di. E marí da, ma tó 'râwi Ìâma asiwawâ, te aipawaptobzém na hã. — Âne ma tó tâma tinha, Zezusi hã.

³²Tawamhã uba're 're ma tó tizasi zahuré, Zezusi norí hã Pedruhu me. Zasi zahuré wi, ma tó rowa'u'u hã tiwa'u'utu.

³³Tawamhã Ísiré 're Íwanomro mono norí hã wa tó âma wawata za'ra ni, Zezusihi âma. Âne wa âma wawata za'ra ni:

— Wanhib'apito, a hã tó sena 'Re Ìhâimana u'âsi mono 'ra, te 're aimo. — Âne wa âma wawata za'ra ni.

Zezusi hã te te Ìda'apesezé wasu'u

Marcusi 6.53-56

³⁴Tawamhã wa norí hã wa tó saprí za'ra ni, Zezusihi me, ísô'u na. Wa te saprí za'ra wamhã, wa tó aihutu ni, Zenezaré na danhipti'a nho'ômo nhisi u.

³⁵Tamemhã ma tó dasiwi waihu'u ni, Zezusi hã. Taha wa, ma tó Zezusihi wasu'u na âma dasima da te ropé, 'ri wa'ôto mono bâ, ti'ai 're dasi'rata 're idahâimana za'ra mono norí hã. Tawamhã da'ahã na ma tó Ìhâzé ré norí hã Ìtême 'wasari ni.

³⁶Tawamhã ma tó Ìhâzé ré norí hã tiwi waptêré za'ra, Ì'uzza nhisutu si te te tiwi upi za'ra da. Tawamhã Ì'uzza nhisutu si te te nasi upi za'ra nherê, ma tó tizéptâ'â za'ra, uburé Ìhâzé ré norí hã, awa'awi.

15

Zudezu norí hi'rata hâimanazé wasu'u

Marcusi 7.1-13

¹Tawamhã parisezu norí hã, duré 'Re Ìhâimana u'âsi mono nhimiroti na rob'ui'ére na dama rowahutu'wa norí hã ma tó ai'aba're Zeruzarê hawi, Zezusi hã te te siwi âma sadanharí da, zudezu norí hi'rata nhimiroti na. Âne te siwi sadanha, âma:

²— E niha asiré 're Ìnomro mono norí hã te te 'madâ'â za'ra ô di, duréi wahi'rata norí nhimiroti hã. Ta norí hã 're saihuri mono ô ré, 're simisôí pese za'ra mono ô di. Âne wa, te ta norí hã wahâimanazé hã te te âma wawí 're upa za'ra.

³Tawamhã asa te Zezusi hã tâma nharí za'ra:

— E niha bâ bété, a norí wa'wa hã 'Re Ìhâimana u'âsi mono nhimiroti hã 're 'madâ'â za'ra wa'aba mono ô di, te bété asimiroti na si 'râwi 're asi'madâ'â za'ra wa'aba mo.

⁴Duréihã 'Re Ìhâimana u'âsi mono hã ma tó âne dama roti: “Aimama norí hã te za 're Ìwazéb za'ra wa'aba mo, ana zama.” Âne Ìsimiroti amo hã duré: “Ni'wam norí hã timama nherê, duré tina nherê, te te âma 're waseté za'ra mono wamhã, te za da te 're simro.” Âne Ìsimiroti hã duréihã.

⁵⁻⁶Tane nherê, te aimawi dama 're Ìroti za'ra wa'aba mo, âne: “Âté ni'wa hã te za sima rosa'rata, marí hã timama norí ma, te te sômri da, te te âma pawaptob zahuré da. Tane nherê, te za tipê'ê na sima tinha: ‘Â hã 'Re Ìhâimana u'âsi mono te hã.’ Âne wamhã, timama norí ma, te te sômri zahuré ô di za, te te âma pawaptob zahuré da.” Âne te dama 're Ìroti

wasété za'ra wa'aba mo. 'Râwi asimiroti na si 're anomro aba mono da, ma tô 'Re İhâimana u'âsi mono nhimiroti hâ asiwi 're İwê'ô za'ra wa'aba mo.

⁷ A norî wa'wa hâ aihâimana si'ahâ za'ra wa'aba di. Duréihâ Iza'iza hâ ma tô İ'uwababa ai'âma rob'ui'ére sirômo za'ra wa'wa, za 're İ'aihâimana za'ra wa'aba mono zém na hâ. 'Re İhâimana u'âsi mono mreme na ma tô âne na ai'âma rob'ui'ére sirômo za'ra wa'wa:

⁸ "Ô norî hâ tô sena newa, te timreme na si taré İ'âma 're wata za'ra. Tane nherê, te tipê'ê 're aimawi zô si te te 're rosa'rata u'âsi za'ra, İ'upana.

⁹ Danhimiroti zarina si, te ta norî hâ te te dama 're rowahutu za'ra, İnhimiroti zarina newa. Taha wa, senai ô di, ta norî hâ İ'âma 're İwata za'ra mono zé hâ."

Âne ma tô ai'âma waihu'u sirômo za'ra wa'wa, 'Re İhâimana u'âsi mono zadawa wasu'u'wa hâ, duréihâ. — Âne ma tô Zezusi hâ tâma rowasu'u za'ra, parisezu norî ma.

Dasa hâ da te 're huri mono wa, dasa na dawasédé, da te 're İmanharî za'ra mono ô zé wasu'u

Marcusi 7.14-23

¹⁰ Tawamhâ Zezusi hâ ma tô sima dazô hâ, İsimirowasu'u hâ da te wapari za'ra da. Âne te dama tınha:

— Ma'âpé, İwapari pese za'ra wa'aba za, marî hâ waihu'u za'ra wa'aba da, âma.

¹¹ Uburé marî na 're dasaihuri mono wamhâ, dapê'ê 're, 're sisisi mono wamhâ, taha na 're dasiwasété za'ra mono ô di za 'râwi. Dapê'ê hawim na danhimirosa'rata wasété zarina, da te dasima 're nharî wasété za'ra mono wapsi, te za 're dasiwasété za'ra, 'râwi. — Âne ma tô Zezusi hâ dama waihu'u.

¹² Tawamhâ wa norî hâ İsiré 're İwanomro mono norî hâ wa tô İtême ubumro ni, Zezusihi u, wa te wasiwi âma sadanharî za'ra da, âne:

— E ma tô asina İwaihu'u za'ra. Parisezu norî hâ ma tô aimreme hâ siwi wê'ô pese za'ra.

¹³ Tawamhâ Zezusi hâ te asa wama âma romnhimire'é za'ra, parisezu norî âma:

— İmama hâ hâiwa âma 're İsâmra mono hâ rob're te te İ'a're'ô hâ taha si te za uburé te te 're aza'o'o.

¹⁴ Parisezu norî âma 're aihâtâ'â za'ra wa'aba mono ô di za. Si'uihâ na 're hâimana za'ra mono. Ni'wa hâ te za tisiré hâ saprô, İtob'a zahuré hâ. Te te saprôni wamhâ, te za ab're 're siré tiwaptâ'â zahuré. Tane te parisezu norî hâ tob'a ne te te 're danhimro. — Âne ma tô Zezusi hâ wama âma romnhimire'é za'ra, İsiré 're İwanomro mono norî ma.

¹⁵ Tawamhâ Pedru te âma 'mahâ, Zezusi hâ:

— Ma'âpé âma wama rowasu'u za'ra na, taha na âma İromnhimire'é na hâ wa te waihu'u za'ra da.

¹⁶ Tawamhâ Zezusi te asa wama nharî za'ra:

— E niha a norî wa'aba zama, waihu'u za'ra wa'aba ô di bété.

¹⁷ Dasa hâ da te 're huri mono wamhâ, taré te za dadub 're, 're sisisi. Taha pari, te za duré apâ 're wairébé, dahâiba hawi.

¹⁸ Tazahâ, dapê'ê hawi da te 're İsani za'ra mono na si, te za 'râwi 're dasiwasété za'ra.

¹⁹ Dapê'ê 're, danhimirosa'rata wasété hawim na si, te za dawasédé hâ uburé da te 're 'manharî za'ra, dasipârî hâ, duré dasina danhimisaihuri hâ, duré marî na danhimisaihuri hâ, duré dazadawa nhipe hâ, duré da te da'âma 're İwasété za'ra mono hâ.

²⁰ Âne uburé dapê'ê 're, da te 're rosa'rata wasété za'ra mono wapsi, te za dawasédé hâ da te 're 'manharî za'ra. Tane nherê, danhimisôî âna 're dasaihuri mono wamhâ, âma 're dasiwasété waihu'u za'ra mono ô di za. Mare di. — Âne ma tô Zezusi hâ wama waihu'u za'ra.

Pi'ô hâ zudezu'ô 'ra, Zezusi hâ te te İpesezé wasu'u

Marcusi 7.24-30

²¹ Tawamhâ Zezusi hâ ma tô mo Zenezaré hawi, Tiru na 'ri nho'ômo nhisi niwî, Sido na 'ri nho'ômo nhisi niwîb zama.

²² Tame sâmrâ ré, ma tô pi'ô zudezu'ô hâ İtême wi, Cana'â norî siré hâ, ta niwî 're İsâmra mono hâ. İtême wisi wamhâ, ma tô 'mahâ, âne:

— Apito, Dawihi nhihudu, ma'âpé İ'âma aipê'ézé na. İ'ra sipi'ô, wa'uburé ré 're hâimana u'âsi mono wa, te te 're robzépata za'êtê u'âsi.

²³ Tawamhâ âne na pi'ô te te 'mahârâ nherê, te te sada'âbâ ô di asa, Zezusi hâ. Tawamhâ wa norî hâ İsiré 're İwanomro mono norî hâ wa tô İtême ai're za'ra ni, Zezusihi u. Âne, wa tô tâma 'ru za'ra ni:

— Ma'âpé pi'ô satôri apâ, wa hawi morî da. Wazarina te we 're mo. Te duré we te te wa'ab'mahârâ, mreme 'râihâ na.

²⁴ Tawamhâ Zezusi te wama nharî za'ra, asa:

— Pone'ërebâ 're ĩsimani za'ra mono norĩ zô si, ma tô we ĩmama hã ĩzatô, Izarazéhé nhihudu norĩ zô si.

²⁵ Tawamhã âne na Zezusi hã te te rowasu'u wamhã, ma tô pi'ô ĩtême mo. Ma tô hi'rãtitô ĩpapara aime. Tawamhã te tãma tinha, âne:

— Apito, ma'ãpé ĩ'ãma aime na.

²⁶ Tawamhã Zezusi te tãma tinha:

— E 're dasaihuri mono ré, te za dasa hã da'ra wi, da te 're waibu, wapsã ma, da te 're sa'wari za'ra mono da. Mare di. Âne hã ĩ'uwaibaba ô di. — Âne te Zezusi hã pi'oi ma âma romnhimiré'ê, zudezu'ô norĩ âma hã, sô'awib ô nherê.

²⁷ Tawamhã pi'ô hã te duré asa tãma tinha, âne:

— Apito, tô ĩbã ma tane hã ĩma ĩwaihui. Tane nherê, wapsã hã wedeza zahãpã ĩtede'wa sai'a'a hã te za te 're huri, ĩsahãpã 're ĩrere'e mono hã.

²⁸ Tawamhã pi'oi mremente te te wapari wamhã, te tãma tinha, Zezusi hã:

— Pi'ô, wa tó aiwaihui'u, aima ĩ'umnhasi za'ëtê na, ĩwi ĩwaptêrêzêb zarina te aima ĩ'manharĩ da hã. Taha wa, wa za aima âma uwaimra, tó. — Âne ma tó Zezusi hã tãma waihui'u, pi'oi ma. Tawamhã âne te te tãma nharĩ wi, ma tó wa'uburé hã ĩ'ra sipi'oi hawi watobro. Taha wa, ma tó tipese oto.

Zezusi hã da'ahã uptabi na te te ĩda'apesezé wasu'u

²⁹ Tawamhã ta hawi te oto mo Zezusi hã, Darireza na ĩsô'u zapoto nhisi u. Ta hawi te duré sa'a u mo, sa'a nhisiwi sãmra da.

³⁰ Tame sãmra ré, ma tó da'ahã uptabi na ĩtême aihutu ni. ĩhãzé ré norĩ hã ma tó ĩtême da te simro, ĩmorĩ'ô norĩ hã, duré ĩtob'a norĩ hã, duré ĩrãtêire norĩ hã, duré ĩmreme'ô norĩ hã. Uburé siwa'ru ma tó ĩhãzé ré norĩ âma dasito, ĩpapara da te sôré da. Tawamhã uburé ma tó da'apese, Zezusi hã.

³¹ Tawamhã ĩmreme'ô norĩ hã ma tó mremente wairé. Duré ĩrãtêire norĩ hã ma tó timorĩ wê za'ra. ĩmorĩ'ô norĩ hã para na te oto 're nomro. ĩtob'a norĩ hã te duré rob'madá'ã za'ra oto. Tawamhã âne hã da te 'madá'ã za'ra wamhã, ma tó âma tatob'uzu za'ra ni. 'Re ĩhãimana u'ãsi mono âma, ma tó duré âma tawata za'ra ni, Izarazéhé nhihudu norĩ nhĩb'apito âma.

Zezusi hã dasa te te dama ĩ'manharĩzé wasu'u hãiba amo

Marcusi 8.1-10

³² Tawamhã Zezusi hã ma tó ĩsiré 're ĩwanomro mono norĩ zô sima wazô tihãrã za'ra. Tawamhã te wama nharĩ za'ra, âne:

— Âhãna ĩ'rata dasi'ubumroi ré, ma tó dasa hã dawi ai'utô, bãdã si'ubdatô da'ãma si'utôri wa. Taha wa, da'ãma ĩpê'êzé di, wa hã. Dasai ô nherê, te dama rob'rui waihui'u ô di, apã da te ropéi mono da hã. Danhib'uware wa, bãdãdi wa, dawi robra za'ra ô'umnhasite, te dama rob'rui waihui'u ô di.

³³ Tawamhã wa norĩ hã ĩsiré 're ĩwanomro mono norĩ hã wa tó wasiwi sadanharĩ ni, Zezusi hã:

— E niha wa za ĩ'u'ëtê wapu hã 'masãmri za'ra ni, a'ubuni wi wasi'ubumro nherê, dahãiba mono bã wa te dama ĩ'a za'ra da hã. Da'ahã uptabi di.

³⁴ Tawamhã te asa wazadhanharĩ za'ra, Zezusi hã:

— E niha te ĩ'u'ëtê wapu hã aima tihãimana za'ra wa'wa.

Tawamhã âne te asa tãma wasu'u za'ra:

— 7 na te wama tihãimana za'ra. Duré pe'a hã umrore na te tihãiba. — Âne, wa asa tãma wasu'u za'ra ni.

³⁵ Tawamhã Zezusi te dama rob'ru, ti'ai wa dasi'ubumroi mono da.

³⁶ Taha pari, ma tó duré 7 na ĩ'u'ëtê wapu hã waibu, pe'a zama, 'Re ĩhãimana u'ãsi mono âma wata da, sôpru wa. Âma wata pari, ma tó te te wê'ê, ĩ'u'ëtê wapu hã, pe'a zama. ĩsiré 're ĩwanomro mono norĩ ma, ma tó wama sômri za'ra, wa te dama sômri za'ra mono da.

³⁷ Tawamhã uburé ma tó tasaihuri ni. Ma da te 'mahãpãri. Tawamhã ĩsiré 're ĩwanomro mono norĩ hã wa tó danho'rada hã apã wa te ubumro za'ra, 7 na si'ôno hã ĩsi'atarême ré hã.

³⁸ Aibã norĩ hã tisa te te ĩhuri norĩ hã 4 miu na ĩhãiba za'ra hã. Pi'ô norĩ hã duré ai'uté norĩ hã sa'rata ô di.

³⁹ Tawamhã Zezusi hã te oto dama rob'ru, apã dasi'aba're da, darob u. Taha pari, ma tó uba're 're âzé, Madadã na danhipti'a nho'ômo nhisi u te te saprĩ da.

16

Zezusi hã marĩ ĩwaihui'u'ô hã te te 'manharĩ da, da te tãma ĩ'ruzé wasu'u

Marcusi 8.11-13; Rucasi 12.54-56

¹ Tawamhã parisezu norĩ hã duré sadusezu norĩ hã ma tô Zezusihi u ai'aba'ré, te te tãma 'ru za'ra da, marĩ dama i'manharĩ waihu'u'õ hã te te 'manharĩ da, isõ'a za'ra, 'Re ihãimana u'âsi mono zadawa para di pâ, marĩ hã tô sena te te 'manharĩ zô. ãne ma tô tãma 'ru za'ra, te te siwi pibu da, Zezusi hã.

² Tawamhã Zezusi hã te asa tãma nharĩ za'ra:

— Bãdã isébrézéb u hãiwa pré wamhã, te za ãne asima 're irowasu'u za'ra wa'aba mo: "Awêmhã hãiwa wê di za oto."

³ Duré nimahã na bãdã 'rãĩ watobrozéb u, hãiwa nhirõtõ si simi'wara wamhã, iwatobrozéb ãma si bãdã te te hãiwa nhirõtõ pré wamhã, te za duré ãne asima 're irowasu'u za'ra wa'aba mo: "Ãhãna hã tã te za we tita'a." ãne hã hãiwa u 're asimizawêrê za'ra wa'aba mono wamhã, aima waihu'u pese za'ra wa'aba di, tã 're ita'a mono zéb da hã duré 're ihãiwa pese mono zéb da hã. Tane nherê, ãhãna uburé 're iromhãimana mono zé hã 'madã'ã za'ra wa'aba nherê, za 're iromhãimana mono zéb da hã waihu'u za'ra wa'aba õ di.

⁴ Nimosi apito té wa'aba mono hã i'aihãimana wasété za'ra wa'wa. 'Re ihãimana u'âsi mono zõ, 're asinipari za'ra wa'aba mono zahã, te ima i'ru za'ra wa'wa, marĩ dama i'manharĩ waihu'u'õ hã te aima 'manharĩ za'ra wa'aba da. Tane nherê, te 'manharĩ õ di za. Duréihã Zonahã ma iromhãimanazém na si te za ãma aipo're pu'u za'ra wa'wa, 'Re ihãimana u'âsi mono, marĩ dama i'manharĩ waihu'u'õ hã te te tãma i'manharizém na. — ãne ma tô Zezusi hã tãma waihu'u za'ra, parisezu norĩ ma, duré sadusezu norĩ ma zama.

Tawamhã Zezusi hã te oto tiwi timorĩ za'ra, nimomo morĩ da.

Ï'u'êtê wapuzém na Zezusi te te ãma isimiré'é za'ra zé wasu'u, parisezu norĩ ãma Marcusi 8.14-21

⁵ Tawamhã wa norĩ hã wa tô saprĩ za'ra ni, Zezusihi me, isõ'u na. Wa te saprĩ za'ra wamhã, wa tô i'u'êtê wapu na po're ha'ari za'ra ni. Taha wa, wa wa'ubana ai'aba'ré ni.

⁶ Tawamhã Zezusi hã ma tô wama nharĩ za'ra, isiré 're iwanomro mono norĩ ma:

— Ma'ãpé 're asi'madã'ã pese za'ra wa'aba mono, i'u'êtê wapuzém nhiti 're anomro aba mono da, parisezu norĩ nhimi'manharizém nhiti, sadusezu norĩ me. — ãne ma tô wama ãma romnhimiré'é za'ra, sõ'awib õ nherê.

⁷ Tawamhã wa norĩ hã wa wasima nharĩ za'ra ni, ãne:

— Áté õ hã i'u'êtê wapu hã wa te wei wasiré 'mai'ari õ wa, ma tô ãne wama nharĩ za'ra.

⁸ Tawamhã Zezusi hã wanhimirosa'rata za'ra hã te te sina waihu'u wa, te wama nharĩ za'ra, ãne:

— E niha te i'u'êtê wapu hã aima ihãimana za'ra wa'aba õ na, sô asimrami za'ra wa'wa. E asiwi i'umnhasi za'ra wa'aba ãna.

⁹ E zahadu bété asiwi i'zadaihu'u za'ra wa'aba ã bã. E ma tô ãma aipo're si'ari za'ra wa'wa, 5 miu na aibã norĩ ma, i'u'êtê wapu hã 5 na te iwê'êi mono zém na hã. E niha si'õno hã i'masisi za'ra wa'wa hã, i'u'êtê wapu wê'êi ré hã. E ma tô duré ãma aipo're si'ari za'ra wa'wa.

¹⁰ Duré 4 miu na aibã norĩ ma, i'u'êtê wapu hã 7 na te wê'êi mono wamhã, e niha si'õno hã i'masisi aba mono hã. E ma tô duré ãma aipo're si'ari za'ra wa'wa.

¹¹ E niha bã waihu'u za'ra wa'aba õ di bété, i'u'êtê wapu 'manharizém na te inharĩ uptabi õ zém na hã. Ma'ãpé 're asi'madã'ã pese za'ra wa'aba mono, i'u'êtê wapuzém nhiti 're anomro aba mono da, parisezu norĩ nhimi'manharizém nhiti, sadusezu norĩ me.

¹² Tawamhã isiré 're iwanomro mono norĩ hã wa tô wasina waihu'u za'ra ni, Zezusihi mreime hã, i'u'êtê wapu 'manharizém na te te wama inharĩ uptabi õ na hã, parisezu norĩ nhimiroti wasété na te te ãma isimiré'ézém na si, sadusezu norĩ me.

Zezusi hã 'Re ihãimana u'âsi mono te te ipisutu na, Danho'reptui'wa da, Pedru te te iwasu'uzé wasu'u

Marcusi 8.27-30; Rucasi 9.18-21

¹³ Tawamhã Zezusi hã te oto mo darob amoi u, apito Piripihĩ te, Sézareza na 'ri nho'õmo nhisi niwĩ. Tame ma tô wazadanharĩ za'ra, isiré 're iwanomro mono norĩ hã:

— E niha ma tô dasima i'wasu'u za'ra ni, dasiré ipodo hã ti'ai ãma. E 'wa hã, wa hã wa 're mo.

¹⁴ Tawamhã ãne wa asa tãma nharĩ za'ra ni:

— Aiwasu'u hã, ahã di. A hã, u, Zuwã Batita, apã aihãiwa'udu. Duré a hã, u, Eriasi apã we i'aimorĩ. Duré a hã, u, Zeremiasĩ. Duré a hã, u, duréihã 'Re ihãimana u'âsi mono zadawa wasu'u 'rata 'wa ihãiba amo, apã aihãiwa'udu.

¹⁵ Tawamhã Zezusi hã te duré wazadanharĩ za'ra:

— A norĩ wa'wa hã bété, e niha ma tô asima 're iwasu'u za'ra wa'aba mo.

¹⁶ Tawamhã Sima Pedru te asa tãma tinha:

— A hã Cristu, 'Re ìhâimana u'âsi mono te te aipisudu, Danho'reptui'wa da. A hã 'Re ìhâimana u'âsi mono 'ra.

¹⁷Tawamhã Zezusi, te Pedru oto 'mahâ:

— Sima, Zuwãhã 'ra, aima 're rowê mono di. Ma tô âma ì'uwaimra. A hã danhimirowasu'u hawi, âne na ì'waihu'u u ô di. Ìmama, hãiwa âma 're ìsãmra mono si ma tô âne na aima ì'waihu'u. — Âne ma tô Zezusi hã wêsã Pedru hã, te te ì'waihu'uzém na.

¹⁸Tawamhã te duré tâma âma romnhimiré'é:

— Pedru, âne wa za aima waihu'u. Êtê na, wa ai'âma simiré'é. Ni'wa hã êtê nhisiwi te za 'ri na'rada hã 'manha, 'ri hã siptete na 're sa mono da, tâma. Tane hã 'Re ìhâimana u'âsi mono te te ì'pisutu na, ma tô ì'waihu'u na'ra. Taha wa, ni'wa hã êtê nhisiwi te te ì'ri ne, te za oto ì'waihu'u na'rata zém hawim na ì'waihu'u za'ra ni, za da te 're ìzaze za'ra mono nori hã. 'Re ìdadâ'â za'ra mono zé hã dama siptete nherê, pire nherê, ìzazei'wa nori âma te te ai'uté waihu'u za'ra ô di za.

¹⁹Danhib'apito, 'ri za'êtê 're, 're ìsãmra mono hã te za 'ridawazé hã tâma ìromhuri'wai ma tisô, te te dama âma 're 'ridawa mono wa, âma 're danhisisi mono da. Tane, wa za aima tisô 'ridawazé hã, 'Re ìhâimana u'âsi mono, da'âma 're ìsib'a'uwê mono zéb u, dama 're a'ridawa mono da, âma 're danhisisi mono da. Uburé marî hã da te 're 'manharî tô za'ra mono da, dawî 're ì'azawi mono hã te za 'Re ìhâimana u'âsi mono hã te te âma 're asaze, hãiwa âma. Duré uburé marî hã dawî 're ì'azawi mono ô hã te za duré te te âma 're ai'uzei pese. — Âne ma tô Zezusi hã tâma waihu'u, Pedruhu ma.

²⁰Taha wa, Zezusi hã ma tô sina wazadawa uwati za'ra, ìsiré 're ìwanomro mono nori hã, wa te dama wasu'u tô za'ra da a'â, Danho'reptui'wa na 'Re ìhâimana u'âsi mono te te ì'pisutu na hã.

*Zezusi hã za ìdâ'âzém na ìsiwasu'uzé, za ìhãiwa'utuzém na zama
Marcusi 8.31-9.1; Rucasi 9.22-27*

²¹Tawamhã ta hawim haré te oto tidâ'âzém na wama 're siwasu'u u'âsi sô'awi Zezusi hã, tihãiwa'utuzém na zama. Âne ma tô wama 're siwasu'u za'ra, ìsiré 're ìwanomro mono nori ma:

— Ìmama te te ìma ì'pisutuzéb zarina wa za mo, Zeruzarê u. Tamemhã zudezu nori ma roti'wa nori hã, duré 'Re ìhâimana u'âsi mono ma da'âma romhuri'wa ìpire nori hã, duré ìsimiroti na rob'ui'éré 'rata na dama rowahutu'wa nori hã te za ìma rob'manharî wasété za'ra. Taha zarina, wa za robzépata za'êtê. Te za duré dasiwi ìwirî ni. Tawamhã bâdâ maparane ì'âma si'utôri ô ré, wa za hãiwa'udu apâ.

²²Tawamhã Pedru ma tô Zezusi hã sima saprô tisiré nori nhiti, romnhiwasi, tâma ìsiwasu'u za'ra zé hã te te tiwi sawi da. Âne te tâma tinha:

— Wanhib'apito, âne hã ai'âma ìromhâimana da hã mare di za. 'Re ìhâimana u'âsi mono hã te te aima ba'a da si, wa ìsima wê, da te aima rob'manharî tô da.

²³Tawamhã Zezusi hã ma tô aipi'ra, Pedruhu u. Âne te tâma tinha:

— Satanasi, mo oto aimori, ìnhiti. Marî hã bâdâdi wa, 're ìsimi'wara mono, te te 're ìda'marôpârî za'ra mono ne, te ìwasutu mo, Ìmama te te ìma ì'pisutuzéb zarina te ìsina dama uwaimrami tô da. 'Re ìhâimana u'âsi mono nhimirosa'rata nei ô di, asimirosa'rada hã. Tî'ai âma danhimirosa'rata zarina si te ì'âma ìrosa'ra, a hã.

²⁴Tawamhã Zezusi te duré wama nharî za'ra, ìsiré 're ìwanomro mono nori ma:

— Ni'wam nori hã ìsiré 're nomro u'âsi mono da, te te sima 're ìwê za'ra mono wamhã, tihãimanazém na te te 're rosa'rata za'ra mono ô di za. Tiza'ozéb ré, ìzarina 're ìnomro mono ne, te za ìsiré 're nomro, da te 're simroi mono da nherê.

²⁵Ni'wam nori hã tihãimanazé te te sima 're sawi za'ra mono wamhã, rowê ìsi'utôri'ô hã te te sina 're uwaimrami za'ra mono ô di za. Ni'wam nori hã ìzarina 're nomro mono da, tihãimanazé te te sima 're sawi za'ra mono ô wapsi, tawapsi te za te te sina 're uwaimrami za'ra, rowê hã.

²⁶Âté ni'wa hã te za tinhibro hã te te sima 're a'ubumroi pese, sibrob ahâ uptabi da. Tawamhã te za oto dârâ. Tî'ab ré, sibrob ahâ nherê, e tâma 're rowê mono di za, rowê ìsi'utôri'ô hã te te sina uwaimrami'ô wamhã. Mare di. Tâma 're rowê mono ô di za. Tî'ai âma, simarî ahâ uptabi nherê, tâma waihu'u ô di za, marî na ìsiwa'âbâzéb da hã, rowê âma 're ìhâimana mono zéb da hã.

²⁷Wa hã ti'ai âma dasiré ìpodo, niwapsi wa za wei mo apâ, Ìmama zadawa para, hãiwa âma tâma ìromhuri'wa nori siré. Tamep si uburé marî hã da te 're ì'manharî za'ra mono zéb zarina, wa za dama rowairébé, ìwê nori ma, duré ìwasété nori ma zama.

²⁸Tô sena wa aima rowasu'u za'ra wa'wa. A nori wa'wa hã aihini ô nherê, ai'matâ'â aba ô ré, te za ì'madâ'â za'ra wa'wa ti'ai âma dasiré ìpodo hã, uburé Danhib'apito uptabi na apâ we ìmorî wamhã. — Âne ma tô wama siwasu'u za'ra, Zezusi hã.

17

*Ētē 'rāihā āma, Zezusihi hāiba na rowa'a za'ētē wasu'u
Marcusi 9.2-13; Rucasi 9.28-36*

¹ Tawamhā bādā 6 na āma si'utōrī pari, ma tō Zezusi hā Pedru norī si te te simro, Ti'adu norī zama ĩnoi me, Zuwāhā me. Ētē 'rāihā u, ma tō te te simro.

² Tame si'ubumroi ré, ma tō Zezusi hā aimawi tihāiba na saprī, Pedru norī nho'a. Ma tō ti'uburā pese, bātā ro'o ne. Duré ĩ'uzā hā rā uptabi di, rowa'a za'ētē ne.

³ Tawamhā Pedru norī hā ma tō 'madā'ā za'ra, Mozési norī hā, Eriasihi me. Zezusihi me, te sima rowasu'u za'ra.

⁴ Tawamhā Pedru te Zezusihi ma tinha, āne:

– Wanhib'apito, āme wama rowē za'ra di. Aima wē wamhā, uridi hā si'ubdatō te aima 'manharī za'ra wa'aba da, wa tō rosa'rata, ate da hā, duré Mozésihi te da hā, duré Eriasihi te da hā.

⁵ Tawamhā āne Pedru te te tāma nharī ré, ma tō hāiwa nhirōtō'a za'ēne hā we hāiba zuwa za'ra, Zezusi norī hā. Tawamhā hāiwa nhirōtō'a hawī, ma tō 'Re ĩhāimana u'āsi mono hā mre:

– Ā hā ĩ'ra, te 're ĩsawi pese mono. Tāma 're ĩto za'ētē mono di. Ma'āpé ĩsimiroti hā 're wapari pese za'ra wa'aba mono za.

⁶ Tawamhā Pedru norī hā Zezusihi siré ĩsi'aba'rē norī hā, 'Re ĩhāimana u'āsi mono mre me te te wapari za'ra wamhā, ma tō tāma tipahi za'ra. Tāma pahī za'ra wa, ma tō ti'ai wa rere, dumana na. Ti'ubu na ma tō roptob za'ra.

⁷ Tawamhā Zezusi hā ma tō ĩtēme ai'rē za'ra. Simi'wara ré, ma tō upi za'ra, tinhib'rata na. Te te upi za'ra wamhā, te tāma nharī za'ra:

– Ma'āpé aiwahutu za'ra wa'aba. Aipahi za'ra wa'aba tō.

⁸ Tawamhā ma tō ti'rāihawutu za'ra oto, te te rob'madā'ā za'ra da. Te te rob'madā'ā za'ra wamhā, Zezusihi si ma tō 'madā'ā za'ra.

⁹ Tawamhā ētē 'rāihā hawī, ma tō si'ra za'ra, Zezusi norī hā. Si'aba'rē ré, ma tō Zezusi hā Pedru norī hā sadawa uwati za'ra, āne:

– Ētē 'rāihā āma ĩ'madā'ā za'ra wa'wa hā dama wasu'u za'ra wa'aba ō di za a'ā. Wa hā ti'ai āma dasiré ĩpodo hā ab're hawī, ĩmama te te ĩhāiwa'utu parip si, te za dama 're ĩrowasu'u za'ra wa'aba mo.

¹⁰ Tawamhā Pedru norī hā te oto āma siwi sadanha, āne:

– E marī wa, te dama rowahutu'wa norī hā te te dama 're roti za'ra, Cristu, Danho'reptui'wa da, 'Re ĩhāimana u'āsi mono te te ĩpisutu wana, Eriasi za we ĩmorī na hā.

¹¹ Tawamhā Zezusi hā te asa tāma nharī za'ra:

– Duréihā 'Re ĩhāimana u'āsi mono zadawa wasu'u'wa hā ma tō ĩ'uwaibaba āma rob'ui'ére, Eriasi za we apā ĩmorizēm na te te ropese da.

¹² Tane nherē, wa za aima waihu'u za'ra wa'wa. Eriasi hā ma tō wei morī pa. Tane nherē, ō hā da te dasiwi waihu'u ō wa, ma tō tāma rob'manharī wasété za'ra ni, da te dasima iwē za'ra zéb zarina. Tane te za duré da te ĩma 're rob'manharī wasété za'ra, ti'ai āma dasiré ĩpoto ma hā.

¹³ Tawamhā Pedru norī hā ma tō waihu'u za'ra, Zezusi te te tāma ĩrowasu'u za'ra zé hā, Eriasihi upana Zuwā Batita te te ĩwasu'u na hā.

*Zezusi hā ai'reputu ma, wa'uburé te te ĩmezé wasu'u
Marcusi 9.14-29; Rucasi 9.37-43*

¹⁴ Tawamhā wa norī hā wa tō apā ai'aba'rē ni, Zezusihi me, da'ahā uptabi na sō ĩdahāimana za'ra u. Tawamhā aibā hā ma tō Zezusihi u wi. Wisi wamhā, ma tō ĩpapara nhamra, hi'rāititō.

¹⁵ Tawamhā te tāma tinha, Zezusihi ma:

– Apito, ma'āpé ĩ'ra āma aipē'ēzé na. Te 're sitete u'āsi. 'Re sitete u'āsi mono wa, te unhamā u 're waptā'ā, āi ba zama.

¹⁶ Asiré 're ĩnomro mono norī u, wa tō aré saprō. Tane nherē, te te siwi pese waihu'u ō di, ta norī hā.

¹⁷ Tawamhā Zezusi ma tō tinha, āne:

– E niha bété ai'rata 're ĩnhamra u'āsi za'ra wa'aba mono nherē, asina 're ĩ'umnhasi za'ra wa'aba mono ō di, te 're ĩ'aipawaptob za'ra wa'aba mono zéb da hā. Nimosi aipoto té wa'aba mono hā ĩaihāimana wasété za'ra wa'wa. E ĩpē'ēzé u'āsi, wa za ai'rata 're ĩmorī u'āsi 'wa, 're ĩ'umnhasi za'ra wa'aba mono ō wa. Ma'āpé we ĩtēme saprōni aba, ai'repudu hā.

¹⁸ Tawamhā wa'uburé ma, ma tō rob'ru Zezusi hā, ai'repudu te te 're ĩpibui u'āsi mono nhiti, morī da. Te te tāma rob'rui wi, ma tō awa'awi watobro, ai'reputu hawī. Tawamhā awa'awi ma tāma tirowē, ai'reputu ma hā.

¹⁹ Tawamhã wa norĩ hã Ìsiré 're Ìwanomro mono norĩ hã, wa tô wahâiba pisutu Ìtême ai'ré za'ra ni Zezusihi u, romnhiwasi wa te wasiwi sadanharĩ da. Âne, wa tô wasiwi sadanharĩ ni:

— E niha bâ bété wa norĩ hã, wa'uburé ma, wa te rob'ru za'ra nherê, wa te wasiwi Ìmei waihu'u ô, tâma.

²⁰⁻²¹ Tawamhã Zezusi hã te asa wama nharĩ za'ra:

— 'Re Ìhâimana u'âsi mono hã syry na 're umnhasi za'ra wa'aba mono wa, tâma mei waihu'u za'ra wa'aba ô di. Tô sena, wa aima waihu'u za'ra wa'wa. Motada nhamare hã syryre nherê, da te 're wamhã, oto poto wamhã, wede za'êtê uptabi di. Tane, a norĩ wa'wa hã syryre na 'Re Ìhâimana u'âsi mono 're umnhasi za'ra wa'aba mono wamhã, syryre na nherê, uburé marĩ hã te aré 're Ì'manharĩ za'ra wa'aba mo, asi'uihã na aima waihu'u za'ra wa'aba ô nherê. Â êtê 'râihã ma, te aré Ìnharĩ za'ra wa'wa, si'uihã na si'rê da, Ìsabzém nhiti. Tawamhã te aré tô ai'ré. — Âne ma tô Zezusi hã wama waihu'u za'ra, Ìsiré 're Ìwanomro mono norĩ ma.

Zezusi hã za Ìdâ'ázém na Ìsiwasu'uzé hâiba amo, Ìhâiwa'utuzém na zama

Marcusi 9.30-32; Rucasi 9.43-45

²² Tawamhã wa norĩ hã Zezusihi siré wa tô asimro ni, Darireza na danhipti'a nho'ômo nhisi âma. Wasiré wasi'ubumroi wamhã, ma tô Zezusi hã wama siwasu'u za'ra, âne:

— Wa hã dasiré Ìpodo hã te za dasima Ìhâiba nhomri za'ra ni.

²³ Te za Ìwĩri ni duré, dasiwi. Tane nherê, bâdâ maparane Ì'âma si'utõrĩ ô ré, te za Ìmama hã apã Ìhâiwa'utu.

Tawamhã, wa te wapari za'ra wamhã, ma tô wawi tìrobzei'ô pese za'ra, Ìsiré 're Ìwanomro mono norĩ wi.

'Re Ìhâimana u'âsi mono nhorõwa 'ri 'madâ'ázéb da, rob'uiprazé da te tâma 're Ìpo'o za'ra mono zé wasu'u

²⁴ Tawamhã wa norĩ hã Zezusihi siré 're Ìwanomro mono norĩ hã wa tô ai'aba'ré ni, Capana'u na 'ri nho'ômo nhisi u. Wasihutu wamhã, rob'uiprazé ubumroi'wa norĩ hã ma tô Pedru siwi sadanha, 'Re Ìhâimana u'âsi mono âma 're Ìdawata za'ra mono zé ma, rob'uiprazé ubumroi'wa norĩ hã. Âne ma tô siwi sadanha:

— E asib'apito za'ra wa'wa hã rowahutuzé 'madâ'ázéb da, te te dame 're wa'âbã mono ô di.

²⁵ — Ìhe. Te te 're wa'âbã. — Âne ma tô sada'â, Pedru hã.

Tawamhã Pedru ma tô ázé 'ri para u, Zezusihi zarina, te te âma sadanharĩ da. Sébré wamhã, ma tô Zezusi hã timreme na sôzâ, Pedru hã:

— Sima, e niha ma asimirosa'rada Ìwaihu. Daro mono bâ danhib'apito norĩ ma, e 'wam norĩ hã te rob'uiprazé hã te te tâma 're po'o za'ra. E Ìsib'a'uwê norĩ hã, e darob zô te te da'âma 're Ì'ai'uté za'ra mono norĩ si te za te te tâma 're po'o za'ra. — Âne te sadanha, Zezusi hã.

²⁶ Tawamhã Pedru te asa tâma tinha:

— Darob zô te te da'âma 're Ì'ai'uté za'ra mono norĩ si, te za te te 're wa'âbã za'ra.

Tawamhã Zezusi hã te duré tâma tinha, âne:

— Tane tô. Daro mono bâ danhib'apito nhĩb'a'uwê norĩ, tinhib'apito ma, te te 're Ìwa'âbã za'ra mono da hã mare di. (Tane, wa hã Ìmama nhĩb'a'uwê wa, rowahutuzé 'madâ'ázéb da, te dame 're wa'âbã mono ô nherê, te âma dame 're upai mono ô di za.)

²⁷ Tane nherê, wawasédé, da te wa'âma 're sa'ra mono ô'umnhasite, wa za wa'âbã za'ra ni, âhãna hã. Ma'âpé ai'maimorĩ aba Ìsõ'ui u, tepe zô 'maiméi wa'aba da. Tawamhã Ìmorĩ'rada 'mai'âri aba wamhã, te za Ì'masari waré wa'wa, rob u. Tawamhã Ìsada'i'ré 're, te za Ì'manhopêtê 'wa, rob'uiprazé Ìsapatore hã. Ta hã Ìwabre za, rowahutuzé 'madâ'ázéb da hã te Ìwa'âbázéb da hã, duré âma Ìwa'âbã za'ra wa'aba zéb da hã. Taha wa, rob'uiprazé Ìsapatore hã 'mai'âri aba wamhã, te za asiwi Ì'mai'âri 'wa, rowahutuzé ma, rob'uiprazé ubumroi'wa norĩ u, âma wa'âbã za'ra wa'aba da. — Âne te tinha, Zezusi hã.

18

Danhipai u dama Ìpire na Zezusi hã te te Ìrowasu'uzé wasu'u

Marcusi 9.33-37; Rucasi 9.46-48

¹ Tawamhã wa norĩ hã Zezusihi siré 're Ìwanomro mono norĩ hã wa tô Ìtême ubumro ni, wa te wasiwi sadanharĩ da, âne:

— E 'wa hã 'Re Ìhâimana u'âsi mono nhĩb'a'uwê, siré 're Ìhâimana za'ra mono norĩ hã danhipai u dama Ìpire.

² Tawamhã Zezusi hã ma tô ai'uté hã 'mahã, Ìsiré 're Ìwanomro mono norĩ wa'wa, te te sãrĩ da.

³ Tawamhã te wama nharĩ za'ra oto:

— Tô sena, wa aima waihu'u za'ra wa'wa. Aihâimanazém na saprĩ za'ra wa'aba õ wamhã, 'Re ìhâimana u'âsi mono hã ai'âma 're sib'a'uwẽ za'ra wa'aba mono õ di za. Dama ìwapu na ai'utẽ hâimanazém ne 're aihâimana za'ra wa'aba mono wapsi, te za ai'âma 're sib'a'uwẽ za'ra wa'wa.

⁴ Nĩ'wam norĩ hã ã ai'utẽ ne tipire na 'rãwi 're si'madã'ã za'ra mono õ wapsi, te za pire na 're hâimana u'âsi za'ra, 'Re ìhâimana u'âsi mono, da'ãma 're ìsib'a'uwẽ mono zéb ãma hã.

⁵ Duré ni'wam norĩ hã te te 're ìzawi pese za'ra mono wa, ai'utẽ zõ 're tob'uzu za'ra mono wamhã, ta norĩ u'ãbã te duré ìzõ 're tob'uzu za'ra. — ãne ma tã wama waihu'u za'ra, ìsiré 're ìwanomro mono norĩ ma.

Dawasédé, da te 're ìmanharĩ za'ra mono õ zé wasu'u
Marcusi 9.42-48; Rucasi 17.1-2

⁶ Tawamhã Zezusi hã te duré wama rowasu'u za'ra, ãne:

— ãhãta ai'utẽ norĩ te asimro. ãtẽ ni'wa hã te za tinhimiroti wasétẽ na ãma ropé, ai'utẽ norĩ ãma, te te sina 're ì'umnhasi za'ra mono norĩ ãma. Tawamhã ìsimiroti wasétẽ hawi, ai'utẽ te te ì'mairẽme wamhã, tãma ropipa uptabi di za, tãma ìroti wasétẽ 'wai ma hã, 'Re ìhâimana u'âsi mono, za te te azãri wa. Ìbutu na ètẽ tãmo wawẽ, da te ãma wasisi pari, dãã da, ãi ba da te mei 'wa'ãhã, tãma ropipa di aré. Tane nherẽ, ìsimiroti wasétẽ zarina ai'utẽ te te ìrẽme wamhã, tãma ropipa uptabi di za, roti wasétẽ 'wai ma hã.

⁷ Danhimiroti wasétẽ hawi 're dasi'marõpãrĩ u'âsi za'ra mono wa, taha wa, dama 're ropipa uptabi za'ra mono di za, daro mono bã. Te za tã da te 're ìrẽme za'ra. Tane nherẽ, tinhimiroti wasétẽ hawi te te 're ìda'marõpãrĩ za'ra mono norĩ ma si, danhipai u tãma 're ropipa uptabi za'ra mono di za.

⁸ — Asib'rata na aiwasédé hã 're waibui wa'aba mono wamhã, duré aipara na aiwasédé hã 're waibui wa'aba mono wamhã, te za asiwi 're ìsihãri za'ra wa'aba mo, 're sãmra aba mono da. Asib'rada asiwi 're sihãri za'ra wa'aba mono newa, duré aipara hã asiwi 're sihãri za'ra wa'aba mono newa, te za oto misire ré si newa, hãiwa u 're anomro aba mo, 're asimroi u'âsi aba mono da oto, tame. Tawapsi aima 're rowẽ uptabi za'ra wa'aba mono di za. Tane nherẽ, asib'rata zahuré ré, duré aipara zahuré ré, unhama u'âsi u 'Re ìhâimana u'âsi mono te te 're asãmra aba mono wamhã, aima 're ropipa uptabi za'ra wa'aba mono di za.

⁹ Duré atõmo na marĩ 're 'madã'ã za'ra wa'aba mono wa, aiwasétẽ na 're asi'marõpãrĩ za'ra wa'aba mono wamhã, ato hã te za asiwi 're ìsani za'ra wa'aba mo, 're sãmra aba mono da. Tawamhã ato hã asiwi 're sani za'ra wa'aba mono newa, te za atõmo misire ré si newa, 're asisisi aba mo, hãiwa u, 're ai'ubumroi u'âsi aba mono da, tame. Tawapsi aima 're rowẽ uptabi za'ra wa'aba mono di za. Tane nherẽ, atõmo zahuré ré ropipa u unhama u'âsi u, 'Re ìhâimana u'âsi mono te te 're asãmra aba mono wamhã, aima 're ropipa uptabi za'ra wa'aba mono di za. — ãne ma tã Zezusi hã ìsiré 're ìwanomro mono norĩ ma, wama waihu'u sirõmo za'ra.

Pone'ërebãire ìsimanizé wasu'u
Rucasi 15.3-7

¹⁰⁻¹¹ Tawamhã Zezusi hã te duré wama rowasu'u za'ra, ìsiré 're ìwanomro mono norĩ ma:

— ãhãta ai'utẽ norĩ hã te asimro. ãma 're rosa'rata wasétẽ za'ra wa'aba mono tã, dama ìwapu newa. Tô sena, wa aima rowasu'u za'ra wa'wa. Hãiwa ãma 'Re ìhâimana u'âsi mono ma romhuri'wa norĩ hã te ai'utẽ mono bã te te 're 'madã'ã pese za'ra, misi si, tite mono bã. Ta norĩ hã te ìmama nho'a te te 're 'madã'ã pese za'ra, hãiwa ãma 're ìsãmra mono nho'a.

¹² — Wa za oto aima ãma romnhimír'é za'ra wa'wa. Aibã hã pone'ërebã 100 na ìsimizama hãiba hã misi tiwi 'masimani wamhã, e sã rĩtĩ mono õ di za. Te za tã sã 're rĩtĩ. Pone'ërebãire hã te za a'ã rẽme za'ra 99 na ìhãiba hã. Ìsa'u rom na tisa te te 're huri mono ré, te za sã rĩtĩ, tiwi ìsimani zõ.

¹³ Tawamhã te te sãmri wẽ te, te za 're to, pone'ërebã tede'wa hã. Pone'ërebã hã ìsimani'õ norĩ hã rowẽ u'âsi tãma 're hâimana za'ra mono wa, tãma 're ìrowẽ mono zém nhipai u, te za 're to za'ètẽ.

¹⁴ Tane, ã ai'utẽ norĩ hã Aímama aba wi, 're ìsimani za'ra mono da hã sã 're simipari mono õ di, tãma wẽ õ wa. — ãne ma tã Zezusi hã pone'ërebãire ìsimanizém na simiré'é.

Dasiré ìsazei'wa nherẽ, dasiwi 're ìdawasété za'ra mono zé wasu'u

¹⁵ ãne te duré rowasu'u, Zezusi hã:

— Asisãnawã, asiré ìsazei'wa nherẽ, asada 're wasétẽ za'ra wa'aba mono wamhã, te za ìtẽme 're anomro aba mo, asada 're ìwasété za'ra wa'aba mono zém na tãma 're asiwasu'u za'ra wa'aba mono da, aihãiba pisutu. Tawamhã tãma 're asiwaihu'u za'ra wa'aba mono zé hã te te 're wipari za'ra mono wamhã, te za apã asina 're asisãnawã za'ra wa'aba mo.

¹⁶Tane nherê, te te 're aiwapari za'ra wa'aba mono ò wamhã, te za oto asiré Ìsazei'wa hã misi, niwamhã maparane asiré 're Ìsimroi wa'aba mo, asada 're Ìwasété za'ra wa'aba mono u, oto Ìsô'a zahuré tãma 're asiwaihu'u za'ra wa'aba mono da, ta norí nho'a. Duréihã 'Re Ìhãimana u'ási mono nhimiroti na rob'ui'éré hã ãma 're uwaimrami za'ra wa'aba mono da, te za ãne 're Ìmanharí za'ra wa'aba mo, asima. ãne Ìsimiroti na rob'ui'éré hã: "Ni'wam norí hã sada 're dawasété za'ra mono wamhã, dahãiba maparane nho'a te za dama 're siwaihu'u za'ra, Ìwapari'wa norí hã danho'a te te ãma 're mreme waptob za'ra mono da." ãne duréihã 'Re Ìhãimana u'ási mono nhimiroti na rob'ui'éré, Ìbahã na hã.

¹⁷Tawamhã asiré Ìsazei'wa norí nho'a tãma 're rotí za'ra wa'aba mono nherê, te te 're aiwapari za'ra wa'aba mono ò wamhã, te za oto uburé asiré Ìsazei'wa norí ma 're Ìrowasu'u za'ra wa'aba mo, asada 're Ìwasété za'ra wa'aba mono zém na. Tawamhã uburé asiré Ìsazei'wa norí hã te te 're wapari za'ra mono ò wamhã, Ìsazei'ô'wa hãimanazém ne, te za oto ãma 're Ìrosa'rata za'ra wa'aba mo, tiwasété na 're siwaihu'u za'ra mono ò wa oto. — ãne ma tó Zezusi hã wama waihu'u za'ra, Ìsiré 're Ìwanomro mono norí ma.

¹⁸Tawamhã te duré wama rowasu'u za'ra Zezusi hã, Ìsiré 're Ìwanomro mono norí ma:

— Tó sena wa aima waihu'u za'ra wa'wa. Uburé marí hã da te 're 'manharí tó za'ra mono da, dawi 're Ìsawi za'ra wa'aba mono hã te za 'Re Ìhãimana u'ási mono hã te te ãma 're asaze za'ra wa'wa, hãiwa ãma. Duré uburé marí hã dawi 're Ìsawi za'ra wa'aba mono ò hã, te za duré te te ãma 're ai'uzei pese za'ra wa'wa.

¹⁹— ãne wa za duré aima waihu'u za'ra wa'wa, tó sena. Ni'wam norí hã maparane nherê, marí na ti'ai ãma 're asisaze za'ra wa'aba mono wamhã, Ìmama wi 're Ìrowaptêré za'ra wa'aba mono zéb uwaibaba, te za te te aima ãma 're a'uwaímrami 'wa, hãiwa ãma 're Ìsãmra mono hã.

²⁰Ni'wam norí hã maparane, áté si'ubdatò nherê, Ìzadawa para 're mreme zusi mono da, siré 're si'ubumroi mono wamhã, wa hã wa za tame duré Ìsiré 're Ìhãimana za'ra. — ãne ma tó wama rowasu'u za'ra, Zezusi hã.

²¹Tawamhã Pedru hã ma tó Zezusihi u ai'rê, te te sadanharí da. ãne te sadanha:

— Wanhib'apito, wasiré Ìsazei'wa nherê, Ìzada 're Ìwasété u'ási mono zé hã e mame Ìsa'ratazém nhítò ãma wa za Ìsina 'madã'ã zazã, Ìwasédé te Ìsina Ì'madã'ã'özém na hã za. E 7 ãma.

²²Tawamhã Zezusi te asa tãma tinha:

— Mare di. 7 ãma asina 'madã'ã zazãri ò di za. Áté 77 ãma si te za asina Ì'madã'ã zazã, Ìwasédé hã asina Ì'madã'ã'özém na hã.

²³ãne, wa za oto aima ãma romnhimírê'é za'ra wa'wa, 'Re Ìhãimana u'ási mono, da'ãma 're Ìsib'a'uwê mono zém na hã. Tawamhã ti'ai ãma danhib'apito hã ma tó rosa'rata, tite rob'uprazé te te sa'rata da, Ìsapari tãma rob'madã'ã'wa norí hã rob'uprazé te te tiwi 're Ìwaptêré za'ra mono hã wahuré Ìsôwa're're te te tãma 're sòmri za'ra mono zò.

²⁴Tawamhã te te ãma sãna'rata wi, ma tó Ìtême sapróni ni aibã hã, Ìsapari rob'madã'ã'wa hã. Ta hã ma tó rob'uprazé hã tinhib'apito wi te te 're awaptêré, sa'été uptabi na. Sa'été uptabi wa, niwa Ìsôwa're're te te tãma Ìsòmri da hã waihu'u ò di.

²⁵Tawamhã te te tãma sòmri waihu'u ò wa, ma tó Ìsib'apito hã dama ti'ru, da te wede da, da te uipra da, Ìmro zama, Ì'ra norí zama, pawã'ãbã ãna te te dama 're romhuri za'ra mono da oto. Uburé Ìsibro hã da te dama wede za'ra da, ma tó dama ti'ru duré, rob'uprazé te te tiwi 're Ìawaptêré mono hã te te ãma wa'ãbã da.

²⁶Tawamhã ò hã tó tãma rob'madã'ã'wa hã aré, ma tó hi'rãtitò tãma aime Ìpapara, tinhib'apito ma. Tawamhã te tiwi waptê, ãne: "Apito, a'ã Ìzapari ze na asimi'ê na. Zahadu uburé wa za aima wa'ã, wa hã." ãne ma tó tãma siwaihu'u, aibã hã.

²⁷— Tawamhã Ìsib'apito hã ma tó ãma aiwamri, Ìmreme na. Taha wa, ma tó tãma sisisi apã, òne haré nomro da, te te tãma sòmri tó da. Òne haré ma duré satò oto, apã morí da.

²⁸Tawamhã ò hã aibã hã te oto mo. Morí wamhã, ma tó tisiré romhuri'wa hã sòpêté. Taha wi, ma tó duréihã rob'uprazé misi bãtã na dapawa'ãbãzé hã waptê syry na, apito hawi Ìmorí wi. Tawamhã Ìsôwa're're te te tãma sòmri ò wa, ma tó ti'ã, Ìbutu na awa'awi. Ìbutu na te te tété sina, ma tó tiwi waptê, ãne: "Ma'ãpé ãhãna Ìma sòmri, zahadu Ìma Ìwa'ãbã ò hã." ãne te tiwi waptê.

²⁹— Tawamhã Ìsiré romhuri'wa ma tó hi'rãtitò nhamra Ìpapara, te te tiwi rowaptêré da, ãne: "Ma'ãpé, Ìzapari ze na a'ã syry na. Wa za tó aima tisò uburé, Ìsôwa're're."

³⁰— Tawamhã ãne te te tiwi waptêré nherê, te te ãma sazei ò di. Te te ãma sazei ò wa, ma tó dama ti'ru, da te sêré da, dazazéb 're. Rob'uprazé hã te te tãma sòmri wapsi, te za dama ti'ru, apã da te wazere da, dazazém hawi.

³¹ Tawamhã ïsiré rob'madá'â'wa norî hã ma tô ïwasu'u hã wapari za'ra, te te dama ï'ru na hã da te sêrê da, dazazéb 're. Te te wapari za'ra wamhã, ma tô sada tihâimana za'ra. Ma tô duré ai'aba're, tinhîb'apito ma, te te siwi wasu'u da.

³² Tawamhã te te tâma wasu'u za'ra parimhã, ma tô ïsib'apito hã sô hã, dazazéb 're danherê'wa zô. Sô hârâ wamhã, âne te tâma tinha: "A hã romhuri wasété 'wa, ïwi ïwaptêrêzéb zarina wa tô po're ha'â, rob'uiprazé ïwi 're ï'awaptêrê mono zém na hã apâ ïma sômri ô nherê. Te 'ruiwapari ô di.

³³ E niha bâ bété, âma aipê'êzé ô di asiré romhuri'wai âma hã, wa hã ai'âma ïpê'êzé ne." Æne te tâma tinha ïsib'apito hã, tâma rob'madá'â'wai ma.

³⁴ – Tawamhã ïsib'apito hã ma tô ab'ruï pese. Sib'ruï wa, ma tô dama ti'ru, dazazéb 're da te sêrê da, da te tâma 're ïrob'manharî u'âsi za'ra mono zém na, tame te te 're robzépata mono da. Rob'uiprazé te te tiwi 're ï'awaptêrê mono nhowa're're tinhîb'apito ma, te te tâma sômri wapsi, te za wazere ni apâ. – Æne ma tô Zezusi hã wama âma romnhimîrê'é za'ra, ïsiré 're ïwanomro mono norî ma.

³⁵ Tawamhã âne ma tô timreme hã wama 'râsutu za'ra, Zezusi hã:

– Æne hã asiré ïsazei'wa hã asada 're ïwasété za'ra wa'aba mono zém na sena na asina 're 'madâ'â zahâri za'ra wa'aba mono ô wamhã, te za ïmama hã te te aima 're rob'manharî wasété za'ra wa'wa aihâiba mono bâ wa'aba, hâiwa âma 're ïsâmra mono hã.

19

Damro, da te 're ïrême za'ra mono zé wasu'u

Mateusi 5.31-32; Marcusi 10.1-12; Rucasi 16.18

¹ Tawamhã âne na Zezusi te te rowasu'u parimhã, ma tô Darireza hawi mo, Zudeza na danhipti'a nho'ômo nhisi u morî da, Zodã pa zara u.

² Da'ahâ uptabi na te ïsarina ai'aba're nî. Tawamhã Zudeza u wisi wamhã, ma tô ïhâzé ré norî hã apese, tame.

³ Tawamhã parisezu norî hã ni'wam norî hã ma tô ïtême aihutu Zezusihi u, te te siwi sadawa pibu da, timreme na te te upai wa, te te siwi mreme wê'ô da. Æne ma tô siwi sadanha:

– E aibâ hã te za timro hã marî ïpire hã te te tiwi 're 'manharî za'ra mono ô nherê, te te 're rême za'ra. E wahi'rata norî nhimiroti zarina, âne hã.

⁴ Tawamhã Zezusi hã te asa tâma nharî za'ra:

– E ïbaihâ na âne hã 're sôré za'ra wa'aba mono ã bâ, 'Re ïhâimana u'âsi mono nhimiroti 'rata na rob'ui'éré hã. Æne rob'ui'éré hã: "Ropoto na'rata hawimhã ma tô 'Re ïhâimana u'âsi mono hã a'uwê hã aibâ na 'manha. Pi'ô zama ma tô duré 'manha." Æne duréihâ ïbaihâ na rob'ui'éré hã.

⁵ Æne ma tô duré roti 'Re ïhâimana u'âsi mono hã, ïbaihâ na hã: "Taha wa, aibâ hã 're mro za'ra mono wamhã, te za timama norî hã te te 're rême za'ra, timro me si siré 're simasisi zahuré mono da oto. Sina 're hâiba sitob zahuré mono wa, maparane ïhâiba nherê, misi ïhâiba ne, te za siré 're simasisi u'âsi zahuré oto." – Æne 'Re ïhâimana u'âsi mono nhimiroti 'rata na rob'ui'éré hã.

⁶ Æne wa, dasina 're damro za'ra mono wamhã, dahâiba maparane nherê, te za oto dahâiba misi ne dasiré 're dasi'ubumro. Taha wa, 'Re ïhâimana u'âsi mono, dasi'âma te te 're da'ahâiba to mono nherê, ni'wa hã da'âma 're siwanhizari mono ô di za. Mare di. – Æne ma tô Zezusi hã parisezu norî ma waihu'u za'ra.

⁷ Tawamhã parisezu norî hã ma tô duré siwi sadanha, Zezusi hã:

– Oro zapre te Mozési hã te te wama 're roti za'ra, aibâ hã timro te te 're rême za'ra mono da wamhã, timro te te 're ïrême za'ra mono zém na rob'ui'éré te te tâma 're sômri za'ra mono da, te te duré ïré 're satôri za'ra mono da, ïsiti oto sina 're pahâ za'ra mono da. – Æne te siwi sadanha.

⁸ Tawamhã Zezusi hã te asa tâma nharî za'ra, âne:

– Ta hã Mozési hã aipê'ê tete za'ra wa'aba wa, ma tô âne na te te aima 're roti za'ra wa'wa. Tane nherê, ropoto na'rata hawimhã, âne na 're ïromhâimana mono zé hã robaba di.

⁹ Taha wa, tô sena wa za duré aima waihu'u za'ra wa'wa. Ni'wa hã aibâ hã, ïmro aibâ na sipsaihuri ô nherê, timro te te mei wamhã, pi'ô aimawi na mro wamhã, te za tiwasédé hã 'manha, aibâ hã.

¹⁰ Tawamhã wa norî hã Zezusihi siré 're ïwanomro mono norî hã wa tâma nharî za'ra ni, âne:

– Tane ze te bâ, damro âna te za 're danomro pé.

¹¹ Tawamhã Zezusi hã te duré asa wama nharî za'ra:

— Æ hã te ãma ĩrowasu'uzé hã aihĩni da te 're ĩwaih'u za'ra mono da hã mare di za. 'Re ĩhãimana u'ãsi mono te te tãma 're ĩwaih'u za'ra mono norĩ si, te za te te 're waih'u u pese za'ra, ãne hã.

¹² Aibã hã ni'wam norĩ hã 're ĩpoto za'ra mono zém hawim haré, 're 'ra waih'u u za'ra mono õ wa, te za ta norĩ si mro ãna 're nomro, õne haré. Duré aibã hã ni'wam norĩ hã da te 're sihãri za'ra mono wamhã, oto 're 'ra waih'u u za'ra mono õ wa, te za duré ta norĩ hã mro ãna 're nomro. Duré ni'wam norĩ hã te za tihãiba hã te te 're sawi pese za'ra 'rãwi, 're mro za'ra mono tã da, 'Re ĩhãimana u'ãsi mono nhib'a'uwé si 're nomro mono da. Ni'wam norĩ hã ãne hã te te 're waih'u u pese za'ra mono wamhã, te za tã ãma 're sõpré u'ãsi. — Æne ma tã Zezusi hã wama waih'u u za'ra, ĩsiré 're ĩwanomro mono norĩ ma.

Zezusi hã, ai'uté te te ĩazawizé wasu'u

Marcusi 10.13-16; Rucasi 18.15-17

¹³ Tawamhã ma tã Zezusihi u, ai'uté da te simro, tinhib'rada hã ĩ'rã nhisiwi, te te nasi ãma aza'ra sina, Timama ma, ãma mreme za'ra da. Tane nheré, ĩsiré 're ĩwanomro mono norĩ hã wa tã dama nharĩ za'ra ni, da te ĩtème simro tã mono da, ai'uté norĩ hã.

¹⁴ Tawamhã Zezusi te wama nharĩ za'ra, ĩsiré 're ĩwanomro mono norĩ ma:

— Tã ã. Dawi rosawi za'ra wa'aba tã. A'ã we ĩtème da te simroi mono, ai'uté norĩ hã. Æ norĩ hã ai'uté norĩ hã õne haré simizazei pese na 're ĩhãimana za'ra mono ne, tane ni'wam norĩ hã 're hãimana za'ra mono wapsi, ta norĩ hã te za 'Re ĩhãimana u'ãsi mono hã ãma 're sib'a'uwé za'ra. — Æne te wama rowasu'u za'ra, Zezusi hã.

¹⁵ Tawamhã tinhib'rada, ĩ'rã nhisiwi te te nasi ãma aza'ra sina te hãiwa u nasi ãma timreme za'ra. Taha pari ma tã mo.

Aibã ĩsibro pese wasu'u

Marcusi 10.17-31; Rucasi 18.18-30

¹⁶ Tawamhã nimahã bãtã na ma tã aibã hã mo, Zezusihi u, te te sadanharĩ da. Æne te sadanha:

— Rowahutu'wa, e marĩ ĩwé hã wa za 'manha, 're ĩdanomro u'ãsi mono zé hã te ĩsina ĩ'uwaimrami da hã.

¹⁷ Tawamhã Zezusi te asa tãma tinha:

— E marĩ da, te ãne ĩzadanha, marĩ ĩwé hã da te 're ĩ'manharĩ za'ra mono zém na hã. Misire 're ĩmorĩ wé uptabi hã te 're hãimana. 'Re ĩhãimana u'ãsi mono nhimiroti 'rata na Mozési te te ãma rob'ui'ére hã 're 'madã'ã pese mono wapsi, te za asina ĩ'uwaimra, dadã'ã ãna 're ĩdanomro u'ãsi mono zé hã.

¹⁸ Tawamhã aibã te duré sadanha, Zezusi hã:

— E ma hã 'Re ĩhãimana u'ãsi mono nhimiroti 'rata na rob'ui'ére hã wa za te 're 'madã'ã pese.

Tawamhã asa te tãma tinha, Zezusi hã:

— “Re danhimroi wa'aba mono õ di za. Duré aimro na asiwi 're asipsaihuri za'ra wa'aba mono õ di za. Duré danhibrom na dawi 're asipsaihuri za'ra wa'aba mono õ di za. Duré dawasu'u wasété na dama 're asadawa nhipse za'ra wa'aba mono õ di za.

¹⁹ Duré aimama hã te za 're ĩwazé pese za'ra wa'aba mo, ana zama. Te za duré uburé 're ĩdazawi pese za'ra wa'aba mo. Marĩ ĩwé zã asima 're asõpré wa'aba mono ne, te za duré uburé dama zama sã 're asõpré wa'aba mo, ĩwé zã.” — Æne ma tã Zezusi hã tãma waih'u u, aibã ma.

²⁰ Tawamhã ĩprédupté hã ma duré ãma sada'ã apã, tã õ hã:

— Tã õhõ si, wa tã 'Re ĩhãimana u'ãsi mono nhimiroti 'rata na rob'ui'ére hã te 're 'madã'ã pese, uburé. E marĩ, wa za 'manha, ãhã nhipai u hã bété.

²¹ Tawamhã Zezusi te asa tãma tinha, ãne:

— Rowé na 're aihãimana mono zéb zã, 're rosa'rata mono wamhã, mo oto aimorĩ, uburé asibro hã dama wede mono da, da te aiwi ĩ'uipra za'ra zé hã rob'ui'prazé hã ĩsibrob'õ norĩ ma, sãmri mono da. Tawapsi asibro pese di za, hãiwa ãma. Taha parĩ si te za we apã aimo ĩtème, ĩsiré 're aimorĩ da oto.

²² Tawamhã ãne hã te te wapari wamhã, ma tã aibã ĩprédupté hã robzei ãna mo, tinhibro pese si te te sima sawi wa.

²³ Tawamhã ĩsa'u ma tã Zezusi hã wama waih'u u za'ra, ĩsiré 're ĩwanomro mono norĩ ma:

— Tã sena wa aima waih'u u za'ra wa'wa. ĩsibro pese norĩ hã 'Re ĩhãimana u'ãsi mono, da'ãma 're ĩsib'a'uwé mono zéb u 're ĩsisisi mono da hã, pire di. Tãma pire uptabi za'ra di za.

²⁴ E niha te za awaru ba'õmore hã İsi'uwazi para'õtõ zapu'u 're äzé. Sébré waihu'u õ di. Tane, İsbro pese nori hã si'uihã na 're sisisi waihu'u mono õ di za, 'Re İhãimana u'asi mono, da'ama 're İsb'a'uwẽ mono zéb u hã. — Äne ma tõ wama waihu'u za'ra, Zezusi hã.

²⁵ Tawamhã äne İmreme hã wa te wapari za'ra wamhã, wa tõ äma watob'uzu za'ra ni, İsiré 're İwanomro mono nori hã. Tawamhã wa wasisadhanari za'ra ni, äma:

— İsbro pese nori ma, waihu'u za'ra õ wamhã, e 'wam nori hã te za bété danho'reptuzé hã te te sina 're uwaimrami za'ra, dadã'ã äna 're İdanomro u'asi mono zé hã.

²⁶ Tawamhã Zezusi hã te wa'madã'ã pese za'ra, İsiré 're İwanomro mono nori hã. Tawamhã, te te wa'madã'ã pese za'ra wamhã, te duré asa wama nharĩ za'ra:

— Dasi'uihã na danho'reptuzé hã da te dasina 're uwaimrami za'ra mono õ di za. Dama waihu'u õ di. 'Re İhãimana u'asi mono si siminho'reptu waihu'u pese di. Taha ma si waihu'u pese di, uburé marĩ hã te te 're İ'ab'manharĩ mono zéb da hã.

²⁷ Tawamhã Pedru te tãma siwasu'u, äne:

— Wa nori hã wa tõ wanhibro hã uburé rême pese za'ra ni wasipara, asiré 're wanomro mono da oto. Äne wamhã, e marĩ te za 'Re İhãimana u'asi mono hã te te wama 're apisutu, te te wama 're İ'anhomri mono da hã.

²⁸ Tawamhã Zezusi te asa wama nharĩ za'ra:

— Äne, tõ sena wa za duré aima waihu'u za'ra wa'wa. Niwapsi wa hã dasiré İpodo hã wa za ro İtéb äma danhib'apito simasisizém na 're İnhamra. İsimasisizé İwẽ uptabi äma wa za 're İnhamra, te 're da'ab'madã'ã u'asi mono da oto. Tame te za duré a nori wa'wa hã İsiré 're anomro aba mono nori hã 12 na danhib'apito simasisizém na 're asimroi wa'aba mo, aipire na İzarazéhé 'ra nnihudu mono bã 're 'madã'ã za'ra wa'aba mono da.

²⁹ Äté ni'wam nori hã te za tinhorõwa hã te te 're rême pese za'ra, duré äté tisisãnawã nori hã, duré äté timama nori hã, duré äté ti'ra nori hã, duré äté tinhipti'a hã. Äté İsiré 're nomro mono da, te za uburé marĩ hã te te 're rême pese za'ra. Ta nori ma, te za uburé marĩ te te 're İrême za'ra mono zém nhapai u pese, 'Re İhãimana u'asi mono te te tãma 're anhomri. Ta nori ma si te za dadã'ã äna 're İdanomro u'asi mono zé hã te te tãma 're apisutu.

³⁰ Ni'wam nori hã dama İpire na ti'ab ré 're hãimana za'ra mono nheré, te za 'Re İhãimana u'asi mono hã te te tãma 're apisutu da'ahã na, wapu na 're hãimana za'ra mono da oto, za da'ama 're İsb'a'uwẽ mono zéb äma hã. Duré ni'wam nori hã ti'ab ré dama wapu na 're hãimana za'ra mono nheré, te za te tãma 're apisutu, pire na oto 're hãimana za'ra mono da. — Äne ma tõ Zezusi hã wama waihu'u sirõmo za'ra, İsiré 're İwanomro mono nori ma.

20

Buru na romhuri'wa nori wasu'u

¹ Tawamhã Zezusi hã ma tõ duré romnhimiré'é na wama rowasu'u za'ra, İsiré 're İwanomro mono nori ma:

— 'Re İhãimana u'asi mono, da'ama 're İsb'a'uwẽ mono zém na, wa za duré aima äma romnhimiré'é za'ra wa'wa, äne. Aibã hã buru tede'wa hã bãdã 'rãiwatobro wi, ma tõ mo, tãma İromhuri'wa nori da hã, te te da'maipisutu za'ra da, te te äma tãma romhuri za'ra da, uwa 'ru na.

² Tawamhã te te da'anhopëté wamhã, ma tõ tãma pisutu za'ra, misi bãtã na dapawa'ãbãzéb uwaibaba te te äma pawã'ãbã za'ra mono da. Taha wa, ma tõ äma saze za'ra, tãma İromhuri za'ra 'wa da hã. Tawamhã ma tõ tãma rob'ru za'ra, misi bãtã na te te romhuri za'ra da, rob're na, uwa 'ru na.

³ Tawamhã mararé ma tõ duré mo, bãtã si'ré na, 'ri nhi'rity wa, da te dasima 're İrowede za'ra mono zéb u. Tame ma tõ duré aibã nori hã sõpëté za'ra, romhuri äna taré da'rata İsi'ubumro hã.

⁴ Tawamhã äne ma tõ tãma nharĩ za'ra: "A nori wa'wa hã te za oto ai'aba'rúi wa'wa İburu u, uwa 'ru na dame romhuri za'ra wa'aba da. Tawamhã dapawa'ãbãzéb uwaibaba, wa za duré aipawa'ãbã za'ra wa'wa." Äne ma tõ duré buru tede'wa hã tãma pisutu za'ra.

⁵ — Tawamhã İburu u te oto ai'aba'rúi, te te tãma romhuri za'ra da. Tawamhã abzuma ma tõ duré aibã nori hã sõpëté za'ra, buru tede'wa hã. Taha wa, te duré satõri za'ra, İburu na te te dame romhuri za'ra da. Bãdã supra wi, ma duré sõpëté za'ra aibã nori hã, aimawi hã. Tõ õhõ si ma duré tãma pisutu za'ra. Tawamhã ta nori hã te duré dazarina ai'aba'rúi.

⁶ Tawamhã hãiwahã pesere te duré mo buru tede'wa hã, 'ri nhi'rity wa, da te dasima 're İrowede za'ra mono zéb u. Tawamhã aibã nori hã ma duré sõpëté za'ra aimawi hã, romhuri äna taré da'rata İsi'ubumro hã. Te te sõpëté za'ra wamhã, äne te sadanharĩ za'ra: "E marĩ wa, te taré asimroi wa'wa, bãtã bã, marĩ hã dame 'manharĩ za'ra wa'aba äna."

7 — Tawamhã asa te tãma nharĩ za'ra, ãne: “Ni'wa hã marĩ hã te te wama pisutu õ di, wa te tãma ïromhuri za'ra zéb da hã. Taha wa, marĩ na wa te dame romhuri za'ra õ di, ã båtã na hã.”

— Tawamhã buru tede'wa te duré tãma rob'ru za'ra: “Mo oto a norĩ wa'aba zama dazarina ai'aba'rúi wa'aba, ïburu na dame romhuri za'ra wa'aba da, uwa 'ru na.” ãne ma tó buru tede'wa hã satõrĩ za'ra.

8 — Tawamhã mara simeĩ wamhã, tãma ïromhuri'wa norĩ 'madã'ã'wai ma, te tinha ãne, buru tede'wa hã: “Ma'ãpé, uburé ïma romhuri'wa norĩ zõ aihãrã za'ra na oto, pawã'ãbã mono da. Tawamhã daza'u romhuri na te te ïsãna'rata za'ra norĩ, uimrehene te za ïpawã'ãbã na'rata za'ra. Taha parip si te za duré romhuri na ïsãna'rata'wa norĩ hã ïpawã'ãbã za'ra.” ãne ma tó tãma waihu'u, buru tede'wa hã.

9 — Tawamhã hãiwahã pesere, romhuri na te te ïsãna'rata za'ra hã ma tó rob'uiprazé hã waihu hãiba mono bã, misi båtã na dapawã'ãbãzéb uwaibaba, båtã bã te te romhuri za'ra õ nherê.

10-11 Tawamhã dawana romhuri na te te ïsãna'rata za'ra norĩ hã ma tó duré hãiba mono bã waihu rob'uiprazé hã, aiwapsi. Tane nherê, te te waihu wamhã, ma tó tãma nharĩ za'ra, buru tede'wai ma, ïsa'u romhuri na te te ïsãna'rata za'ra norĩ pawã'ãbã nhipai u, te te waihu õ wa.

12 ãne te mreme nhiti'ru na tãma nharĩ za'ra: “Õ norĩ hã hãiwahã si romhuri na te te ïsãna'rata za'ra hã misi båtã za'ratazé hã ma tó sina uprosi za'ra. Wa norĩ hã bété. Båtã bã, wa te ïromhuri za'ra hã, rowã'ro uptabi nherê. E niha bã, ma bété õ norĩ zama tipawã'ã hã waihu, aiwa wapawã'ãbã za'ra me.”

13 — Tawamhã aibã norĩ siré ma, te misi tinha, buru tede'wa hã: “Ïsiwaihu, ïwapari pese. Wa hã te aima 'manhari wasété õ di, ãne hã. Oro ãma ïzaze za, båtã bãre ïma romhuri da, tó misi båtã na dapawã'ãbãzéb uwaibaba te aipawã'ãbã da.

14 Ma tó dame asima ï'ãri pa. Taha wa, te za oto aimo. Wa tó ïsima wê, aiwa aipawã'ãbã za'ra wa'aba ne te pawã'ãbã za'ra da, asa'u wa'aba romhuri na te te ïsãna'rata za'ra norĩ hã.

15 Te ïsima ïwê zéb zarina, ïte rob'uiprazém na te da'apawã'ãbã wamhã, e ïwasédé wa tó 'manha. Mare di. ïwasédé hã te 'manharĩ õ di. Áté taré dama ïnhopru wa, ma tó ïzada asahi, båtã bã te te ïma romhuri za'ra õ nherê, båtã na dapawã'ãbãzém na te pawã'ãbã za'ra 'ru te.” ãne ma tó buru tede'wa hã tãma siwaihu'u, tãma ïromhuri'wai ma. — ãne ma tó Zezusi hã wama ãma romnhimír'é za'ra, ïsiré 're ïwanomro mono norĩ ma.

16 Tawamhã ãne ma tó Zezusi hã timreme na wama 'rãsutu za'ra:

— Ni'wam norĩ hã dama pire na ti'ab ré 're hãimana za'ra mono nherê, 'Re ïhãimana u'ãsi mono si te za te te tãma 're pisutu za'ra, wapu na 're hãimana za'ra mono da oto, za da'ãma 're ïsib'a'uwê mono zéb ãma hã. Duré ni'wam norĩ hã ti'ab ré dama wapu na 're hãimana za'ra mono nherê, te za te tãma 're pisutu za'ra, pire na oto 're hãimana za'ra mono da. — ãne ma tó timreme na wama 'rãsutu za'ra, Zezusi hã.

*Zezusi hã, si'ubdatõ ãma za ïdã'ãzém na ïsiwasu'uzé, ïhãiwa'utuzé me
Marcusi 10.32-34; Rucasi 18.31-34*

17 Tawamhã wa norĩ hã Zeruzarê u wa oto ai'aba'rúi ni, Zezusi siré. Wasi'aba'rúi ré, ma tó wahãiba pisutu, wama rowasu'u za'ra, ïsiré 're ïwanomro mono norĩ ma, 12 na wahãiba za'ra ma. ãne te wama rowasu'u za'ra, Zezusi hã:

18 — ïwapari pese za'ra wa'aba. ãhãna, wa Zeruzarê u ai'aba'rúi ni. Tame wa hã dasiré ïpodo hã te za dasima ïhãiba nhomri ni, sasedoti ïpire norĩ ma, 'Re ïhãimana u'ãsi mono nhimiroti 'rata na rob'ui'éré na dama rowahutu'wa norĩ ma zama. Ta norĩ hã ïwasédé te te ï'ãma ïsa'ra za'ra zéb zarina, te za dama ï'ru za'ra, da te ïwĩrĩ da, dasiwi.

19 Taha zarina te za oto zudezu'õ norĩ ma siwi ïhãiba nho. Tawamhã te za ï'ãma tiwa'ê za'ra, zudezu'õ norĩ hã. Te za ï'ãma wasété za'ra ni duré. Te za duré da te dasiwi 're ïpré'ê. Taha parip si, te za wedepo'o nhonhi'rãmi na dasiwi ïzasõmri ni hãiwi, ïdã'ã da. Tane nherê, bådã maparane ï'ãma si'utõrĩ õ ré, wa za apã hãiwa'udu. — ãne ma tó wama siwaihu'u sirõmo za'ra, Zezusi hã.

*Zebedehe mro, Zezusihi wi, te te ïrowaptêrêzé wasu'u, ti'ra norĩ ma
Marcusi 10.35-45*

20 Tawamhã Zebedehe mro hã ma tó Zezusihi u mo, ti'ra si'aibã norĩ siré. Ïtême morĩ wamhã, tãma pire wa, ma tó tãma aiwê'ê, ti'ra norĩ ma, te te tiwi rowaptêrê da.

21 Tawamhã Zezusi hã te pi'õ sadanha, ãne:

— E marĩ ma tó asima ïwê, te aima ãma ï'uwaimrami da hã.
Tawamhã pi'õ te asa tãma tinha:

— Ma'āpé, ɪ'ra norī ma, tāma ropisutu sirōmo zahuré na, danhib'apito simasisizém na asimire niwī duré asimī'e niwī dama pire na 're simasisi u'āsi zahuré mono da, za 'Re ɪhāimana u'āsi mono hā da'āma ɪsib'a'uwézéb āma hā. — Āne te Zezusihi wi rowapté, tī'ra norī ma, pi'ō hā.

²² Tawamhā Zezusi hā te ɪ'ra norī ma oto rowasu'u zahuré, āne:

— E marī da, te rosa'rata āna asina ɪzadanharī 'wa. Wa hā wa za robzépata za'ēté, dawi ɪsīsawi āna. E tawamhā sada asiptete aba di, za te ɪrobzépata za'ēté ne, ɪrobzépata aba da hā.

Tawamhā asa te tāma nharī zahuré, Zebedehe 'ra norī hā:

— ɪhe. Sada wanhiptete di za, asine wa te ɪrobzépata da hā. — Āne ma asa tizadawa na tāma wa'rāmi zahuré, Zezusihi ma.

²³ Tawamhā Zezusi hā te duré tāma rowasu'u zahuré, āne:

— Te za tō ɪsine ɪrobzépata za'ēté 'wa. Tane nheré, ɪsi'uihā na te aipisutu waihu'u aba ō di za, dama aipire wa'aba na 're aihāimana aba mono zéb da hā, ɪnhimire niwī, duré ɪnhimī'e niwīmhā. ɪmama te te ɪpisutu za'ra norī si te za dama pire na ɪ'rata 're hāimana u'āsi za'ra. Ta norī hā te pisutu za'ra ō di za, wa hā. — Āne te tāma siwasu'u zahuré, Zezusi hā.

²⁴ Tawamhā Zezusihi siré 're ɪwanomro mono norī hā 10 na wahāiba za'ra hā, Zebedehe 'ra norī mre me wa te waparī za'ra wamhā, wa tō sada wanhi'tu ru za'ra ni.

²⁵ Taha wa, Zezusi hā te sima wazō tihārā za'ra, ɪsiré 're ɪwanomro mono norī zō. Tawamhā āne te wama nharī za'ra:

— Tī'ai āma danhib'apito norī hā te pire uptabi na dama 're hāimana za'ra. Sa'ēté te duré te 're dawada'uri za'ra, ɪsimiroti hā da te 're 'madá'ā pese za'ra mono da.

²⁶ Tane asima 're aihāimana za'ra wa'aba mono ō di za, a norī wa'wa hā. Asiré norī ma, ai'maipire wa'aba da, asina 're 'mairob'ruiwaparī aba mono wamhā, te za asiré hā 're ɪ'maipawaptob u'āsi aba mo, marī zō 're ai'manhimnhasi aba mono āna.

²⁷ Duré 'rāwi asima aipire uptabi na 're ai'maihāimana aba mono da, asima 'maiwē uptabi aba wamhā, pawa'ābā āna romhuri'wa ne, te za asima 're ɪ'mairomhuri wē wa'aba mo.

²⁸ Tane duré, wa hā dasiré ɪpodo hā da te ɪma 're romhuri za'ra mono da, we ɪmorī ō di, tī'ai u. Te 're da'apawapto mono da si, wa wei datēme mo, ɪsihāiba zawī āna dadaza ɪdā'ā da, da'upana te da'awa'ābā da. — Āne ma tō Zezusi hā wama siwasu'u za'ra.

Zezusi hā, ɪtob'a norī te te ɪpese zahuré zé wasu'u

Marcusi 10.46-52; Rucasi 18.35-43

²⁹ Tawamhā wa norī hā wa tō ai'aba'ré ni, Zezusihi siré, Zerico hawi. Wasī'aba'réi wamhā, da'ahā na ma tō wazarina hā ai'aba'ré ni.

³⁰ Tawamhā ahā ɪtob'a norī hā bādādi waptoma ɪsimasisi zahuré hā ma tō Zezusihi wasu'u hā waparī zahuré, bādādi na ɪsababa za te te ɪro'razāri zahuré na hā. Āne hā te te waparī zahuré wamhā, te nasi sina 'mahārā zahuré, āne:

— Dawihi nhihudu, ma'āpé wa'āma aipē'ézé na. — Āne te nasi sina 'mahārā zahuré, ɪtob'a norī hā.

³¹ Tawamhā da'ahā na Zezusihi zarina ɪdasi'aba'ré norī hā ma tō tāma nharī za'ra, ari'iwi simasisi zahuré da. Tane nheré, sa'ēté te nasi sina 'mahārā zahuré, āne:

— Apito, Dawihi nhihudu, ma'āpé wa'āma aipē'ézé na.

³² Tawamhā ma Zezusi hā ɪ'rata mazazāri zahuré, bādādi wa. Taha wa, te 'mahārā zahuré, ɪtob'a norī hā:

— E marī te asima ɪwē wa'wa, te aima ɪ'manharī aba da hā.

³³ Tawamhā asa te tāma nharī zahuré:

— Apito, wato pese da, wa wasima wē ni. — Āne ma tizadawa na tāma wa'rāmi zahuré, ɪtob'a norī hā.

³⁴ Tawamhā Zezusi hā ma tō āma tipē'ézé zahuré, ɪtob'a norī āma. Taha wa, ma tō tōmo upi zahuré, apā tōmo wē zahuré da. Te te tōmo upi zahuré wi, awa'awi ma tō tito pese zahuré. Te te rob'madā'ā wē zahuré di oto. Tawamhā Zezusihi zarina te oto tineb zahuré, awa'awi.

21

Zezusi hā, Zeruzarē u datēme ɪwisizé wasu'u

Marcusi 11.1-11; Rucasi 19.28-40; Zuwā 12.12-19

¹ Tawamhā wa norī hā wa tō oto ai'aba'ré ni, Zezusihi siré, Zeruzarē u. Tawamhā wa tō rob'umhutu za'ra ni oto, Betazé na 'ri wa'ōtō nhisi u. Oriwera na etē 'rāihā nhisi āma 'ri wa'ōno hā. Wa te rob'umhutu za'ra wamhā, ma tō Zezusi hā ɪsiré 're ɪwanomro mono norī hā maparane wa'mazatō sisōwa, 'ri wa'ōtō u.

² Āne ma tō satōrī zahuré:

— Ōwa te za ane wa'wa, 'ri wa'ōtō u, asō're uwaibaba wa'aba. Tawamhā aimasisi aba wi, te za awaru po'repore hā īsāmri 'wa, butu wazi na da te āma wasisi haré, īsa hā. Tame te duré ī'ra hā īsiré za. Tawamhā te za īwasihu zahuré wa'wa, sahuré we īma saprōni aba da.

³ Tawamhā ni'wa hā awaru po'repore, sahuré we īma īsaprōni aba na te te asadanharī aba wamhā, āne te za tāma īzadawa wasu'u wa'wa, asa: “Wanhib'apito hā marī ō wa, āma morī da, wa we sō wanem ni, wa te tāma saprōni zahuré da.” Āne hā tāma waihu'u aba wi, te za āma asazei wa'wa, sahuré we īma saprōni aba da, awaru po'repore hā. — Āne ma tō Zezusi hā tāma waihu'u zahuré.

⁴ Duréihā 'Re īhāimana u'āsi mono zadawa wasu'u 'rata 'wa te te āma īrob'ui'ére sirōmo zéb zarina te te sina uwaimrami da, ma tō Zezusi hā āne tāma pisutu zahuré, awaru po'repore te te itēme saprōni zahuré da. Āne duréihā āma īrob'ui'ére siro hā:

⁵ “Ma'āpé, tāma rowasu'u za'ra wa'aba, Si'ā na été 'rāihā nhisi āma 're īdasi'ubumroi mono norī ma, āne:

‘Ōhōta te we oto atēme timorī 'wa, asib'apito za'ra wa'wa hā. Ta hā dazada 're īhāimana mono ō hā īsimizawi pe hā te we āma mo, awaru po'repore na, īpréduptém na hā.’ ”

Āne duréihā 'Re īhāimana u'āsi mono zadawa wasu'u'wa nhimi'ui'ére hā, Zeruzarē āma 're īdasi'ubumroi mono norī ma hā.

⁶ Tawamhā Zezusi te te tāma īpisutu zahuré zéb zarina, ma tō awaru po'repore norī zō tineb zahuré, wasiré norī hā.

⁷ Tawamhā, te te sāmri zahuré wamhā, ma tō apā saprōni zahuré Zezusihi u, awaru po'repore hā ī'ra ré. Tawamhā tisi'ubuzém na ma tō tāma ba'ubu zahuré. Taha pari, ma tō āma darōno Zezusi hā, āma morī da.

⁸ Tawamhā da'ahā uptabi na ma tō dasi'ubuzém na tāma waptā za'ra ni bādādi na, īsisiwi īmorizéb da hā, dama pire wa, sō 're datob'uzu za'ra mono wa. Wedepa nhipti su na zama ma duré tāma waptā za'ra ni.

⁹ Tawamhā Zezusihi nhowa īdasi'aba're norī hā duré īsarina īdasi'aba're norī zama te nasi dasima 'mahārā za'ra ni, āne:

— Apito Dawihi nhihudu āma, 're wawata za'ra wa'aba mono. Wanhib'apito zadawa para, te we oto mo. 'Re īhāimana u'āsi mono hā īwé si te te tāma 're pisutu u'āsi mono neza. 'Re īhāimana u'āsi mono āma zama duré 're wawata za'ra wa'aba mono, hāiwa āma 're īsāmra mono āma, wei watēme te te satōri wē te. — Āne te nasi dasima 'mahārā za'ra ni, da'ahā na.

¹⁰ Tawamhā Zeruzarē u ma oto wi, Zezusi hā. Wisi wamhā, īwa 're īdasi'ubumroi mono norī hā ma tō da'ahā uptabi na 're dasiwairōtō, da te dasima 'mahārā za'ra sina. Taha wa, te nasi tasisadanharī za'ra ni, āne:

— E 'wa hā, ō hā bété.

¹¹ Tawamhā Zezusihi zarina īdasi'aba're norī hā ma tō dama nharī za'ra, Zeruzarē āma 're īdasi'ubumroi mono norī ma:

— Ā hā Zezusi, 'Re īhāimana u'āsi mono zadawa wasu'u'wa, Nazaré na 'ri wa'ōtō nhisi hawi we īmorī hā, Darireza na danhipti'a nho'ōmo nhisi hawi. — Āne ma tō īsiré īdasi'aba're norī hā dama wasu'u za'ra.

'Re īhāimana u'āsi mono āma 're īdawata za'ra mono zém hawi, Zezusi te te īdazate mono zé wasu'u

Marcusi 11.15-19; Rucasi 19.45-48; Zuwā 2.13-22

¹² Tawamhā Zezusi hā ma tō oto āzé, 'ri 'rāihā u, 'Re īhāimana u'āsi mono āma 're īdawata za'ra mono zéb u. Tame te dama rowede'wa norī hā 're si'ubumroi, dawī marī uipra'wa norī zama, 'ri 'wawi wa'ra 're. Tawamhā Zezusi hā ta norī hā te te 'madā'ā za'ra wamhā, ma tō te te sate, rob u. Wedeza hā rob'ui'prazém na te te dawī āma 're īsapri za'ra mono norī te hā ma tō te te tiwi anhamra, utu'u te te dama 're īwede za'ra mono norī simasisizéb zama.

¹³ Tawamhā Zezusi hā āne te tāma nharī za'ra, rowede'wa norī ma:

— Duréihā wahi'rada hā ma tō āne na rob'ui'ére, 'Re īhāimana u'āsi mono mreme na: “Īnhorōwa hā īwa īma 're īdamreme zusi mono zém na, te za da te 're sisi za'ra, 'ri hā.” Āne te tinha. Tane nheré, a norī wa'wa hā ma tō īwa asima āma 're īrob'manharī wasété za'ra wa'aba mo. Taha wa, danhibrom na dawī 're īsipsaihuri za'ra mono norī, 're īsi'ubumroi mono zém ne, te oto 'ri hā 're sa, wasété uptabi na. Āne duréihā ai'āma rob'ui'ére za'ra wa'wa hā, ībaihā na hā. — Āne na ma tō Zezusi hā tāma waihu'u za'ra, duréi rowasu'u na hā.

¹⁴ Tawamhā Zezusi hā 'Re īhāimana u'āsi mono nhorōwa āma 'ri 'wawi wa'ra 're, zahadu sāmra ré, ma tō da'ahā na itēme dasito, itob'a norī hā īmorī waihu'u'ō norī zama. Itēme dasito mono wamhā, ma tō da'ape, uburé ihāzé ré norī hā.

¹⁵ Tawamhā ai'uté norī hā ma tō nasi sima 'mahārā za'ra, āne: “Apito Dawihi nhihudu āma, 're wawata za'ra wa'aba mono.” Āne te nasi sima 'mahārā za'ra, 'ri 'wawi wa'ra 're,

sāmra ré. Tawamhā 'Re ihāimana u'āsi mono ma, da'āma romhuri'wa norī ma, ĩpire norī hā tisiré ma, duré ĩsimiroti na rob'ui'éré 'rata na dama rowahutu'wa norī hā, ai'uté norī te te nasi sima ĩ'mahārā za'ra zé hā te te wapari za'ra wamhā, duré tinhimiromhōsi na Zezusi te te 're ĩda'apawapto mono zé te te 'madā'ā za'ra wamhā, ma tō sada tizahi za'ra, Zezusihi zada.

¹⁶ Tawamhā ta norī hā te Zezusi hā siwi sadanha:

— E wapari ō di, ai'uté norī mreme hā. E asina sadawa uwati za'ra āna. — Āne te tāma nharī za'ra, rowahutu'wa norī hā.

Tawamhā Zezusi hā asa te duré tāma nharī za'ra, āne:

— Wa tō wapari za'ra. A norī wa'wa hā bété. E sōré za'ra wa'aba ō di, wahi'rata nhimi'ui'éré hā: “Ai'uté norī ma, ma tō ĩwaihu'u sirōmo za'ra, ai'utépré norī ma zama, ĩwē na si ai'āma 're wata za'ra mono da.” Āne ma tō wahi'rada hā ĩ'āma rob'ui'éré siro, ĩbahā na hā. — Āne ma tāma waihu'u za'ra.

¹⁷ Tawamhā Zezusi hā te oto ĩhawi timorī za'ra, Betānha na 'ri wa'ōtō nhisi u, tame a'ā sōtō da.

Pidera wede ma, Zezusi te te ĩnharīzé wasu'u

Marcusi 11.12-14, 20-25

¹⁸ Tawamhā mararé ma tō Zezusi hā apā mo Zeruzarē u, ĩsiré 're ĩwanomro mono norī me. Morī ré, ma tō mra hā tīwī, Zezusi hā.

¹⁹ Tawamhā wede hā ma tisā, bādādi zada ré ĩsa hā. Pidera na wede nhisi hā. Te te sāmri wamhā, ma tō ĩtēme apa, te te sabu da, 'rā zō. Tane nheré, 'rāi āna te za, ĩsui ré si. Tawamhā pidera wede ma, te oto tinha:

— Niwa ĩ'ai'rā da hā, mare di za oto. Ai'rā'ō u'āsi, te za oto 're asa mo. — Āne te wede ma tinha, Zezusi hā.

Tawamhā awa'awi ma wede hā tiwede'ré oto.

²⁰ Tawamhā wa norī hā Zezusihi siré 're ĩwanomro mono norī hā āne hā wa te 'madā'ā za'ra wamhā, wa tō āma watob'uzu za'ra ni. Taha wa, wa tō Zezusi hā wasiwi sadanharī ni, āne:

— E niha ma awa'awi tiwede'ré, pidera wede hā.

²¹ Tawamhā Zezusi te asa wama nharī za'ra:

— Tō sena wa aima waihu'u za'ra wa'wa. 'Re ihāimana u'āsi mono hā 're wawā za'ra wa'aba mono āna, ōhō si 're umnhasi za'ra wa'aba mono wamhā, te za marī hā aima waihu'u pese za'ra wa'aba ō nheré, 're ĩ'manharī za'ra wa'aba mo ĩsadawa para, wa hā pidera wede ma, te ĩnharī ne, āne hā aiwa. Ōhōta ētē 'rāihā te za. 'Re ihāimana u'āsi mono si 're umnhasi za'ra wa'aba mono wamhā, te za ētē 'rāihā ma ĩnharī za'ra wa'wa, 'rāwi sisa'o'o da, āi ba waptā'ā da. Tawamhā asadawa para wa'aba, te za tō āi ba waptārā, ētē 'rāihā hā. Āne 'Re ihāimana u'āsi mono si 're umnhasi za'ra wa'aba mono wamhā, te za tō ĩsadawa para, marī ĩwē hā 're ĩ'manharī za'ra wa'aba mo, aima waihu'u pese za'ra wa'aba ō nheré, āne hā.

²² 'Re ihāimana u'āsi mono hā 're umnhasi za'ra wa'aba mono sina, marī na tiwi 're rowaptērē za'ra wa'aba mono wamhā, tō sena te za te te aima āma 're a'uwaimrami 'wa. — Āne hā ma tō Zezusi hā wama waihu'u za'ra, ĩsiré 're ĩwanomro mono norī ma.

Zezusi hā, ni'wa sadawa para uburē marī hā te te dama 're ĩ'ab'manharī mono zéb zō, da te dasiwi ĩsadanharīzé wasu'u

Marcusi 11.27-33; Rucasi 20.1-8

²³ Tawamhā Zezusi hā ma tō apā mo, 'Re ihāimana u'āsi mono nhorōwa u. Tame te oto dama rowahutu, 'ri 'wawi wa'ra 're. Tawamhā sasedoti ĩpire norī hā ma tō ĩtēme aimasa, zudezu norī ma roti'wa norī zama. Tawamhā Zezusi hā te siwi sadanha, āne:

— E 'wa sadawa para, te bété āne hā marī hā dama 're ĩ'ab'manharī mo. E 'wa hā, aipisutu'wa.

²⁴ Tawamhā Zezusi te asa tāma nharī za'ra:

— Wa hā wa za a'ā asadanharī na aima āma wa'rāmi za'ra wa'wa. Tawamhā ĩ'uwaibaba, ĩma waihu'u za'ra wa'aba wapsi, wa za asa aima wasu'u za'ra wa'wa, ni'wa sadawa para te dama 're ĩ'ab'manharī mono na hā.

²⁵ Āne wa za asadanharī za'ra wa'wa: E 'wa sadawa para, ma tō Zuwā hā ā dawabzuri hā te te dama 're ab'manharī bété. E 'Re ihāimana u'āsi mono zadawa para. E dazadawa para. — Āne ma tō Zezusi hā sadanharī za'ra, te te tāma waihu'u za'ra da, a'ā.

Tawamhā 'rāwi te sima nharī za'ra, dama rowahutu'wa norī hā:

— E niha, wa za tāma waihu'u za'ra ni, ōne wamhā. 'Re ihāimana u'āsi mono zadawa para, ā dawabzuri te te dama 're ĩ'ab'manharī mono na wa te tāma waihu'u za'ra wamhā, te za wazanharī na sahu za'ra, āne: “E niha bété, Zuwā Batitaha nhimirowasu'u hā saze za'ra wa'aba ō di, dame.”

²⁶ Tane nherê, taré dazadawa parap si â dawabzuri te te dama 're ĩ'ab'manharĩ mono na wa te tãma waihu'u za'ra wamhã, wa za wasina wapahi za'ra ni dama, niha da te wama rob'manharĩ za'ra õ'umnhasite. E marĩ wa. Zuwã Batĩta hã 'Re ĩhãimana u'ãsi mono zadawa wasu'u'wa 're ĩmorĩ na, da te 're saze za'ra mono wa. — ãne te 'rãwi sima nharĩ za'ra.

²⁷ Tawamhã Zezusihi ma, te oto asa nharĩ za'ra:

— Wa norĩ hã wa te waihu'u za'ra õ di, ni'wa sadawa para, Zuwã Batita hã â dawabzuri te te dama 're ĩ'ab'manharĩ mono zé hã.

Tawamhã Zezusi hã asa ma tizadawa na tãma wa'rãmi za'ra:

— Tane tó. A norĩ wa'wa hã ĩma waihu'u za'ra wa'aba õ nherê, wa hã te duré aima waihu'u za'ra wa'aba õ di za, ni'wa sadawa para marĩ hã te dama 're ĩ'ab'manharĩ mono na hã. — ãne ma tó Zezusi hã asa tãma waihu'u za'ra, dama rowahutu'wa norĩ ma hã.

Aibã hã, ĩ'ra poto'rada hã te te sina ĩsadawa zamarĩzé wasu'u

²⁸ Tawamhã Zezusi hã te duré tãma rowasu'u za'ra, 'Re ĩhãimana u'ãsi mono ma, da'ãma romhuri'wa norĩ ma, ãne:

— Wa za oto aima ãma romnhimiré'é za'ra wa'wa. Ma'ãpé ãma rosa'rata pese za'ra wa'aba za. Aibã hã te 're sãmra. Maparane ĩ'ra hã. Tawamhã ĩ'ra poto'rata ma, ma tó rob'ru, ãne: "Ī'ra, mo oto aimorĩ buru u, romhuri da, ã bãtã na."

²⁹ — Tawamhã asa te tãma tinha, ĩ'ra poto'rada hã: "Te ĩsima rowê õ di, ĩmorĩ da hã. Wa za nhamra u'ã." ãne ma tó timama ma waihu'u asa. Tane nherê, te te ĩnharĩzém na ãma ronometro wapsi, ma tó tinhimirosa'rata na ãma saprĩ. Taha wa, ma tó oto mo buru u, te te romhuri da.

³⁰ — Tawamhã ĩ'ra hãiba amoi ma, te duré rob'ru, ĩdub'rata ma, te te ĩrob'ruzém ne, buru u morĩ da, te te romhuri da. Tawamhã ĩ'ra hã te asa tãma tinha, timama ma, ãne: "Wê di tó, ĩmama. Wa za tó mo, te romhuri da." Tane nherê, ta hã timama mreime hã awa'awi te te saze nherê, morĩ õ di, buru u.

³¹ — E'wa hã tawamhã, timama te te sina ĩsaze hã te te tãma ĩrob'ruzéb uwaibaba, ĩmorĩ da hã. E ĩdub'rada. E ĩno. — ãne ma tó Zezusi hã ãma sadanharĩ za'ra, 'Re ĩhãimana u'ãsi mono ma, da'ãma romhuri'wa norĩ nhib'apito norĩ hã, duré zudezu norĩ ma rowahutu'wa norĩ hã.

Tawamhã asa te tãma nharĩ za'ra:

— Dama ĩpoto'rada ma tó timama mreime hã sina saze.

Tawamhã Zezusi te duré ãne tãma rowasu'u za'ra:

— Tane tó. Tane duré, danhib'apito ma rob'uiprazé ubumroi'wa norĩ hã duré pi'õ hã aibã zó si siwa'ru 're ĩhãimana za'ra mono norĩ hã, ta norĩ hã aré 're hãimana wasété za'ra mono nherê, áté te za 're sisisi, 'Re ĩhãimana u'ãsi mono, da'ãma 're ĩsib'a'uwê mono zéb u hã, ta norĩ si tó sena na te te 're sazei pese za'ra mono wamhã. Tane nherê, a norĩ wa'wa hã áté dame 're asisisi aba mono õ di za. Tó sena, wa ãne na hã aima waihu'u sirõmo za'ra wa'wa.

³² Zuwã Batita hã ma tó aré atême timorĩ za'ra wa'wa, 'Re ĩhãimana u'ãsi mono te te sima 're ĩ'aiwê za'ra wa'aba mono zéb zarina 're anomro wê wa'aba mono zéb da hã, te te aima 're wasu'u za'ra wa'aba mono da. Tane nherê, ĩsimirowasu'u na hã ãma 're saze za'ra wa'aba mono õ di. Rob'uiprazé ubumroi'wa norĩ si ma tó ãma saze za'ra ĩsimirowasu'u na hã, pi'õ hã aibã zó si siwa'ru 're ĩhãimana za'ra mono norĩ zama. Tawamhã ta norĩ hã atõmo na 're 'madã'ã za'ra wa'aba mono nherê, a norĩ wa'aba zama asimirosa'rata na 're saprĩ za'ra wa'aba mono õ di, ĩsimirowasu'u na ãma 're ĩsaze za'ra wa'aba mono zéb da hã. — ãne ma tó Zezusi hã tãma wasu'u za'ra, 'Re ĩhãimana u'ãsi mono ma da'ãma romhuri'wa norĩ nhib'apito norĩ ma, duré dama rowahutu'wa norĩ ma zama.

Buru na romhuri wasété'wa norĩ wasu'u

Marcusi 12.1-12; Rucasi 20.9-19

³³ Tawamhã Zezusi hã te duré ãne tãma rowasu'u za'ra:

— ãne wa za duré aima ãma romnhimiré'é za'ra wa'wa. Ma'ãpé, ĩwapari pese za'ra wa'aba za. Aibã hã te 're sãmra, buru tede'wa hã. Tawamhã tibururu ãma ma tó a're, uwa 'ru hã. Te te a're pari, ma tó buru 'wawi wa'ra. Ma tó duré été nhisiwi sada ab're, ĩwa uwa 'rãi watizéb da hã, ĩwa'u zó. Taha pari, 'ri 'rãihã hã ma duré buru wa'wa 'manha, ĩsipsaihuri norĩ zó, dasipapara rob'madã'ázéb da hã. Tawamhã ma tó ni'wam norĩ hã sisõ'a ré pisutu za'ra, ĩburu hã te te sô 're 'madã'ã za'ra mono da. Uwa 'ru 'rã hã 're 'rã prédub za'ra mono wapsi, te za te te tãma 're po'õ za'ra, buru tede'wai ma hã. Taha pari, te oto mo, buru tede'wa hã darob amoi u, tamomo a'ã sãmra da.

³⁴ Tawamhã oto 'rãĩ prédu mono wa, ma tó buru tede'wa hã tãma ĩromhuri'wa norĩ hã satõrĩ za'ra tibururu u, uwa 'ru 'rã hã buru 'madã'ã wa norĩ te te tãma ĩpo'õ za'ra zó.

³⁵ Tawamhã buru u sihutu wamhã, ma tô buru tede'wa te te Ìsatôrî za'ra hã siwi waibu, buru 'madâ'â'wa norî hã. Tawamhã buru tede'wai ma, romhuri'wa norî ma, ma tô rob'manharî wasété za'ra. Taha wa, ma tô misi siwi azâ. Ìhâiba amo ma duré siwi tîwî. Ìhâiba amo ma duré êtê na siwi u'a za'êtê, dâ'â da.

³⁶ Tawamhã buru tede'wa hã te duré sô satôrî za'ra, tâma Ìromhuri'wa norî hã, ahâ na. Tawamhã, ta norî hã buru u sihutu wamhã, ma duré tâma rob'manharî wasété za'ra, buru 'madâ'â'wa norî hã.

³⁷ Tawamhã 'râwi te oto sima rosa'rata, buru tede'wa hã: "Ì'ra si'aibâ hã te Ìtême satôrî za'ra wamhã, âté te za siwi hâiba wazé." Âne te sima rosa'rata, buru tede'wa hã. Tawamhã uburé da te tiwi uprosi za'ra wa, te oto ti'ra uptabi hã satô, tâma Ìburu 'madâ'â'wa norî u.

³⁸ Tawamhã wisi wamhã, buru 'madâ'â'wa norî hã te te duré sima sâmrî za'ra wamhã, te âne sima 'mahârâ za'ra: "Ôhôta buru tede'wai 'ra hã te wei mo, timama uirî na buru tede'wa da hã. Wa te wasiwi wîrî aba, buru hã wate za'ra da." Âne na ma tô sima 'mahârâ za'ra, buru 'madâ'â'wa norî hã.

³⁹ — Tawamhã wisi wi, ma tô siwi ti'â, buru tede'wai 'ra hã. Buru nhiti ma tô siwi waze. Tame ma tô siwi tîwî, buru 'madâ'â'wa norî hã. Âne buru tede'wai 'ra wasu'u 'râsudu hã.

⁴⁰ Tawamhã Zezusi hã te oto sadanharî za'ra, 'Re Ìhâimana u'âsi mono ma da'âma romhuri'wa norî nhîb'apito norî hã, âne:

— Buru tede'wa hã tiburu u apâ wisi wamhã, e marî te za tâma 'manharî za'ra, tâma Ìburu 'madâ'â'wa norî ma hã.

⁴¹ Tawamhã asa te tâma nharî za'ra:

— Buru tede'wa hã âma pê'ézé za'ra âna, te za dama 'ru za'ra, da te dasiwi uprosi da, aibâ Ìwasété uptabi norî hã. Tawamhã te za duré da'apisutu, dama Ì'umha hã tâma Ìburu 'madâ'â'wa da hã. Ta norî hã te za Ì'uwaibaba si te te tâma 're po'o za'ra, uwa 'ru 'râ hã, 're 'râ préduv za'ra mono wa. — Âne ma asa tâma waihu'u za'ra, Zezusi ma, 'Re Ìhâimana u'âsi mono ma da'âma romhuri'wa norî nhîb'apito norî hã.

⁴² Tawamhã Zezusi hã te oto sina âma simiré'ê êtê na, âne:

— Oro 'Re Ìhâimana u'âsi mono zadawa wasu'u na rob'ui'ére hã 're sôre za'ra wa'aba mono za, aima waihu'u za'ra wa'aba ô di bété. Âne Ìbaihã na rob'ui'ére hã:

"Êtê tomhâpâ wê hã 'ri na'ratazéb da hã, wê uptabi nherê, wasété newa, 'ri'wa norî te te aré siwi Ìwê'ô hã 'ri na'rata uparizéb da, te oto 're sa'wari u'âsi, pire na.

Uburé Danhîb'apito hã ma tô âne hã pisutu, 'ri na'rata uparizéb da, pire na 're Ìsa'wari mono da hã.

Taha wa, âne na wa te âma 're rosa'rata za'ra mono wamhã, wa âma 're watob'uzu u'âsi za'ra, wa norî hã."

Âne duréihã wahî'rata nhîmi'ui'ére na rowasu'u hã.

⁴³ — Êtê tomhâpâ wê hã da te dasiwi Ìwê'ô ne, a norî wa'wa hã asiwi 're Ìwê'ô za'ra wa'aba mono wa, 'Re Ìhâimana u'âsi mono nhîb'a'u'wê, 're aihâimana u'âsi za'ra wa'aba mono ô di za. Ai'upana wa'aba si te za oto 'Re Ìhâimana u'âsi mono hã da'âma 're sib'a'u'wê, Ìsimiroti te te 're Ì'madâ'â pese za'ra mono norî âma. Tô sena, wa âne na aima waihu'u za'ra wa'wa.

⁴⁴ Duré, êtê tomhâpâ nhisiwi, zé'a 'manharî hã 're rere'ê mono wa, 're Ìsîpru pese za'ra mono ne, te za Ìwê'ô'wa norî hã hã za'ra, 'Re Ìhâimana u'âsi mono hã. Duré êtê tomhâbâ hã zé'a 'manharî nhisiwi 're rere'ê mono wa, te te 're Ìpru pese za'ra mono ne, te za 'Re Ìhâimana u'âsi mono wê'ô'wa norî si hã za'ra. Ta norî âma hã 're sib'a'u'wê za'ra mono ô di za. — Âne ma tô Zezusi hã sina âma simiré'ê, êtê wasu'u na hã.

⁴⁵ Tawamhã sasedoti Ìpire norî hã, duré parisezu norî hã, Zezusi te te âma Ìromnhimîrê'êzé hã te te wapari za'ra wamhã, ma tô sina waihu'u za'ra, tô ô norî udâna te te âma Ìromnhimîrê'ê mono na hã.

⁴⁶ Taha wa, ma tô aré sima hâiba 'ru za'ra, te te dama 'ru za'ra da, dazazéb 're da te dasiwi sêrê da, Zezusi hã. Tane nherê, ma tô dama tipahi za'ra aibâ norî hã, Zezusi hã 'Re Ìhâimana u'âsi mono zadawa wasu'u'wa, oto 're Ìmorî na da te 're saze za'ra mono wa, da'ahâ na.

22

Dasina damrozém na dasai ahâ wasu'u

Rucasi 14.15-24

¹ Tawamhã Zezusi hã ma tô duré romnhimîrê'ê na tâma rowasu'u za'ra, parisezu norî ma, âne:

² — 'Re Ìhâimana u'âsi mono, da'âma 're Ìsib'a'u'wê mono zém na wa za duré aima âma romnhimîrê'ê za'ra wa'wa, âne. Apito 'ra si'aibâ hã tâma mro wê te, tâma Ìrowézéb zarina ma tô sima roti, dasa hã te te dama 'manharî da, sa'êtê na, ti'ra mrozém na hã.

³ Tawamhã ma tô ïsiré dasaihuri da, da'apisutu. Taha parip si ma tô tâma ïromhuri'wa norĩ hã satõrĩ za'ra, dazõ hãsi da, ïtème dasihutu da, ïsiré dasaihuri da. Tane nherê, ta norĩ hã te te sima rowê za'ra õ di, ïtème si'aba'rê da hã, ïsiré ïsaihuri da hã arê.

⁴ Taha wa, te duré apito, tâma ïromhuri'wa norĩ hãiba amo hã satõrĩ za'ra, âne: "Mo oto ai'aba'rêi wa'aba, arê sô ïhârâ 'rata za'ra norĩ zô. Tawamhã âne te za tâma ïzadawa wasu'u za'ra wa'wa: 'Powawê norĩ hã, duré powawê zapu da te dasima ïhâipse za'ra hã ma dasiwi simro ni. Uburê ma tô marĩ hã dasiwi 'rã'õtõ ni, dasa da te ïhurizêb da hã. Taha wa, te za we ïtème ai'aba'rêi wa'wa oto, wasiré wasa hã wa te huri da, ïra ïma ïmrozém na.' Âne te za ta norĩ ma ïzadawa wasu'u za'ra wa'wa." Âne ma tô apito hã tâma ïromhuri'wa norĩ ma waihu'u za'ra.

Tawamhã apito hã te te sô satõrĩ za'ra wa, te oto sô ai'aba'rê.

⁵ — Tane nherê, sô ïhârâ 'rata za'ra norĩ hã sô simipari za'ra õ di, ïtème si'aba'rê da, ïsiré saihuri da hã. Taha wa, sô simipari za'ra âna ma tô ni'wam norĩ hã tiburu u ai'aba'rê, duré tinhimromhurizêb u hã.

⁶ Ni'wam norĩ hã ma tô apito ma romhuri'wa norĩ hã siwi waibu. Te te waibui pari wamhã, ma tô niha tâma rob'manharĩ waseté za'ra. Taha pari, ma uprosi uburê.

⁷ Tawamhã apito hã tâma ïromhuri'wa norĩ, da te ï'uprosi wasu'u te te wapari wamhã, ma tô ab'rui pese. Taha wa, tâma da'wapéi'wa norĩ hã ma tô ïtème satõrĩ za'ra, tâma ïromhuri'wa norĩ, da te tiwi ï'uprosi za'ra u. Tawamhã da'wapéi'wa norĩ hã ma tô uprosi, ta norĩ hã. Ma tô duré ta norĩ nhorõwa hã te te 'ri su, 'ri nho'õmo wa, arê tâma 're ïsimasa mono hã.

⁸ Taha pari, ma tô duré sô hã, tâma ïromhuri'wa norĩ zô, aimawi norĩ zô. Tawamhã âne te tâma nharĩ za'ra: "Dasazêb da hã tâiba da hã tâiba ma tô api pari za'ra ni, ïra ïmrozém na dasa da te ïhurizêb da hã. Tane nherê, sô ïhârâ 'rata za'ra norĩ hã we si'aba'rêi õ di. ïbâre ma tô ta norĩ zô rowasédê hã tiwatobro za'ra, sô ïhârâ za'ra nherê, te te ïwapari za'ra õ wa.

⁹ Taha wa, te za oto dazõ ïropéi wa'aba mo 'ri nhi'ríti mono bâ, dasai u we danhimroi wa'aba mono da, danhopêté za'ra wa'aba mono sidâpâsi." Âne te satõrĩ za'ra, apito hã.

¹⁰ — Tawamhã te oto ai'aba'rê, 'ri nhi'ríti mono bâ, dazõ sõprê mono da. Tawamhã te te danhopêté za'ra mono sidâpâsi, ma tô te te dazatõrĩ za'ra da'ahã na, 're ïdanomro wê mono hã, 're ïdanomro waseté mono norĩ zama. Tawamhã da'ahã uptabi na ma tô 'ri 're wa'wa nho'u hã dasiwi sitom ni, apito 'ra ïmrozém na dasai u, dasi'rã'õtõ wa.

¹¹ Tawamhã apito hã ma tô datême âzê, dasi'rã'õtõzêb u, te te da'ab'madâ'â da. Datême sébrê wamhã, ma tô aibã hã 'madâ'â pese, dasina damro wa, da'uzazê hã te te dame sima 'manherê õ wa, ïhâi wê hã.

¹² Tawamhã âne te sadanha, apito hã: "Ïsiwaihu, e niha bâ ma we tane ré asé, dasina damro wa, da'uzazê hã we dame asima sêrê âna." Âne te sadanha.

— Tawamhã aibã hã te ari'iwu za, niha te te tâma nharĩ waihu'u õ wa, te te tâma âma upai wa.

¹³ Tawamhã apito hã ma tô âne tâma ïromhuri'wa norĩ ma nharĩ za'ra: "Ma'âpé, ã hã aibã hã asiwi âri aba, asiwi pawasisi aba da, duré asiwi hiwasisi aba da, rob u asiwi mei wa'aba da, robra u. Tame te za oto sina tiwawa, sina pê'êzê wa. Te za duré 'wasitete, te te oto robzépata za'êté wa." Âne ma tô apito hã tâma waihu'u za'ra. — Âne na ma tô Zezusi hã tâma âma romnhimírê'ê za'ra.

¹⁴ Tawamhã Zezusi hã ma tô âne na timreme na 'rãsutu:

— 'Re ïhâimana u'âsi mono hã da'ahã uptabi na dazõ 're hârâ mono nherê, da'umro na si te za da'âma 're sib'a'uwê. — Âne na ma tô Zezusi hã timreme na tâma 'rãsutu za'ra.

*Rob'ui'prazê, danhib'apito ma, da te 're ïpo'o za'ra mono zé wasu'u
Marcusi 12.13-17; Rucasi 20.20-26*

¹⁵ Tawamhã parisezu norĩ hã ma tô ai'aba'rê Zezusihi nhiti, si'rã'õtõ da, a'â. Si'rã'õtõ wamhã, ma tô sima âma roti za'ra, Zezusi hã te te siwi pibu da, tinhimrowasu'u na te te tâma âma upa za'ra zô, te te tâma âma upa za'ra wa, da te dasiwi wê'õ da, duré da te dasiwi âri da.

¹⁶ Tawamhã Zezusihi u ma tô 'mazatõrĩ za'ra, tizadawa zapari'wa norĩ hã, apito Erodihĩ nhimiroti wê 'wa norĩ zama. Tawamhã Zezusihi u sihutu wamhã, âne te siwi sadanha:

— Rowahutu'wa, asadawa nhipse õ na 're aihâimana mono zém na hã wa tô aiwaihu'u za'ra ni. Tô sena na te ïwê na si dama 're ïrowasu'u u'âsi mo, 'Re ïhâimana u'âsi mono nhimiroti zarina si. Asimiroti hã da te dasiwi 're wê'õ za'ra mono nherê, te tô õhõ na si dama 're ï'aroti u'âsi mo. Duré ni'wam norĩ hã dama pire na 're hâimana za'ra mono nherê, aimawĩ hã aima 're hâimana mono õ di. Aiwapsi te 're dahâimana za'ra, aima hã.

¹⁷ Taha wa, wa za oto wa norĩ hã wasiwi asadhanharĩ za'ra ni, âne. E Roma âma danhib'apito uptabi ma, wa za rob'ui'prazê hã wa te tâma 're po'o za'ra, ïsimiwada'uri zarina. E 'Re ïhâimana u'âsi mono ma, wê di, âne hã. E tâma wê õ di. Ma'âpé wama waihu'u za'ra na

asimirosa'rada hã, wa te waihu'u za'ra da. — ãne te siwi sadanha, Zezusi hã te te ãma tãma upa za'ra zô, timreme na hã.

¹⁸ Tawamhã tinhimirosa'rata wasété zarina te te sima ãma ïroti za'ra zé hã ma tô sina waihu'u, Zezusi hã. Taha wa, ma ãne tãma tizadawa na wa'rãmi za'ra:

— A nori wa'wa hã te asadawa nhipese na 're aihãimana za'ra wa'aba mo. E marĩ da, te ãne na asiwi ïzadanhari'wa, ïmreme na te aima ãma upa za'ra wa'aba da newa, asiwi ïwê'ô wa'aba da.

¹⁹ Tane wamhã, ma'ãpé rob'uiprazé ïsapotore hã we ïma 'mai'ãri aba pé, te 'madã'ã da, romanu nori nhib'apito ma, da te tãma 're ïpo'o za'ra mono zéb da si, rob'uiprazé ïsapotore hã.

Taha wa, nima hawi ma rob'uiprazé ïsapotore hã tãma 'mai'ãwis ni.

²⁰ Tawamhã Zezusi hã te te 'madã'ã wamhã, te oto sadanhari'za'ra:

— E 'wai hãbarĩ, rob'uiprazé ïsapotore na hã. E 'wa sisi ui'ére duré, ãma hã.

²¹ Tawamhã asa te tãma nhari'za'ra:

— Á hã, Roma ãma danhib'apito hãbarĩ, duré taha nhisi ui'ére.

Tawamhã Zezusi hã ma duré tãma waihu'u za'ra, ãne:

— Taha wa, Roma ãma danhib'apito ma, te za ïsimiwada'uri zarina, marĩ hã tãma 're ïpo'o za'ra wa'aba mo apã, ïte wa. Tane duré, 'Re ïhãimana u'ãsi mono ma, te za marĩ hã ïsimiwada'uri zarina si tãma 're ïsômi za'ra wa'aba mo apã, ïte wa, marĩ hã. — ãne ma tãma waihu'u za'ra, Zezusi hã.

²² Tawamhã parisezu nori zadawa zapari'wa nori hã ãne na te te wapari za'ra wamhã, ma tô ãma titob'uzu za'ra. Tawamhã Zezusi hã ãma, marĩ te te 'manhari'za'ra ãna, ma tô ïhawi ai'abare', apã.

*Dahãiwa'utuzém na, Zezusi da te dasiwi ïsadanharizé wasu'u
Marcusi 12.18-27; Rucasi 20.27-40*

²³ Tawamhã sadusezu nori hã ma duré ïtème aihutu Zezusi hã u, te te siwi sadanhari' da, tinhimirowasu'u na te te tãma ãma upa za'ra zô. Ta nori hã 're dadã'ã za'ra mono wamhã, ab're hawi apã 're ïdahãiwa'utu za'ra mono ô na te te dama 're ïroti za'ra mono.

²⁴ Tawamhã, Zezusi hã u simasa wamhã, te tãma nhari'za'ra, ãne:

— Rowahutu'wa, duréihã wahi'rada Mozési hã ma tô ãne dama rob'ui'ére, 'Re ïhãimana u'ãsi mono nhimiroti na: "Aibã hã 'ra ô ré, 're dá'ã za'ra mono wamhã, te za ïno hã ãma 're mro za'ra, tizédé'aba mro na, 're 'ra za'ra mono da, ïwasu'u hã si'utôri tô da, ïsédé'aba wasu'u hã." ãne na Mozési hã nhimi'ui'ére hã, wahi'rata nori ma hã. — ãne ma Zezusi hã ma waihu'u za'ra, sadusezu nori hã.

²⁵ Tawamhã Zezusi hã ma, te duré rowasu'u za'ra, ãne:

— Dasisãnawã si 're ïhãimana za'ra mono nori wasu'u hã wa za oto aima wasu'u za'ra ni. Ta nori wasu'u hã wa te waihu'u za'ra da, wa za ãma asadanhari' za'ra ni za. Dasisãnawã si hã ma tô wasiré 're si'ubumro aré, wasiré zudezu nori hã 7 na ïhãiba za'ra hã, aibã nori hã. Tawamhã ïpoto'rada hã ma tô timro. Mro nheré, ti'ra hã sisô'a ré te te 'maipoto ô ré, ma tô dãrã. Taha wa, ïuirĩ na ma tô ïsôsi hã ãma timro tizédé'aba mro na, Mozési hã nhimi'ui'ére zarina.

²⁶ Tawamhã ïsôsibi zama ma tô dãrã, 'ra ô ré. Taha wa, ma duré taha nhosi hã ãma timro, tizédé'aba mro na. Tawamhã taha zama ma duré dãrã, ti'ra hã sisa'u te te 'maipoto ô ré. ãne zarina ma tô uburé ïdub'rata nori hã dá'ã sidãpãsi, nasi ãma timro za'ra aré, sisôwa're' re. Tawamhã uburé ma sisarina ai'utôri za'ra, 'mai'ra ô ré.

²⁷ Tawamhã pi'ô zama ma tô duré dãrã, timro nori zarina.

²⁸ Aibã nori hã 7 na ïhãiba za'ra hã ma tô pi'ô ãma siparabãsi nasi ãma timro za'ra. ãne ma tô tãma tiromhãimana za'ra. Tawamhã e 'wai mro uptabi za bété pi'ô hã, ab're hawi 're dahãiwa'utu za'ra mono wamhã. — ãne te Zezusi hã siwi sadanha, sadusezu nori hã.

²⁹ Tawamhã Zezusi hã asa te tãma nhari'za'ra:

— Ab're hawi apã 're ïdahãiwa'utu za'ra mono zé wasu'u na, 'Re ïhãimana u'ãsi mono nhimiroti 'rata na rob'ui'ére hã aima ïwaihu'u za'ra wa'aba ô zarina, ma tô ãma ïupa za'ra wa'wa, asimirosa'rata na hã. 'Re ïhãimana u'ãsi mono, tiwaihu'u pese na te te 're ïda'ahãiwa'utu mono zé wasu'u na zama, aima ïwaihu'u za'ra wa'aba ô zarina, ma tô asimirosa'rata na ãma ïupa za'ra wa'wa.

³⁰ 'Re ïhãimana u'ãsi mono hã ab're hawi apã te te 're da'ahãiwa'utu mono wamhã, hãiwa ãma romhuri'wa nori ne, te za oto 're dahãimana u'ãsi za'ra, dasina 're damro za'ra mono ãna.

³¹ 'Re ïhãimana u'ãsi mono hã ab're hawi te te 're ïda'ahãiwa'utu mono zém na, a nori wa'wa hã 're saze za'ra wa'aba mono ô di. E 're sôré za'ra wa'aba mono ô di bété, duréihã 'Re

Īhâimana u'âsi mono mre me na rob'ui'ééré hã, wahi'rada Mozésihî ma, Īsiwasu'uzé hã, âne na hã:

³² “Wa hã Abra'âhã nhîb'apito, wa 're Īhâimana u'âsi, duré Izatihî nhîb'apito, duré Zacoho nhîb'apito.” Âne ma tô 'Re Īhâimana u'âsi mono hã Abra'â norî uirî na nherê, Mozésihî ma, siwaihû'u. Wahi'rata norî hã dawî 're dâ'â za'ra mono nherê, 'Re Īhâimana u'âsi mono wî, 're dâ'â za'ra mono ô di. Taha wa, ma tô Īsib'apito za'ra na siwasu'u. Dâ'â u'âsi 're hâimana za'ra mono 'wa'âhã, Īsib'apito za'ra na aré siwasu'u ô di. — Âne ma tô Zezusi hã Abra'â norî wasu'u hã tâma waihû'u za'ra, sadusezu norî ma.

³³ Tawamhã âne hã da'ahã uptabi na da te wapari za'ra wa, ma tô âma tatob'uzu za'ra ni, Īsimirowasu'u na hã.

'Re Īhâimana u'âsi mono nhimiroti ĩpire uptabi wasu'u

Marcusi 12.28-34; Rucasi 10.25-28

³⁴ Âne na Zezusi hã te te tâma rowasu'u za'ra wamhã, ari'iwî te oto aimasa, sadusezu norî hã, niha te te âma sada'âbã waihû'u za'ra ô wa, waihû'u pese uptabi wa, Zezusi hã.

Tawamhã parisezu norî hã âne na te te wapari za'ra wamhã, ma tô sitême ubumro a'â, Zezusihi u sîré si'aba'ré da.

³⁵ Tawamhã 'Re Īhâimana u'âsi mono nhimiroti 'rata na dama rowahutu'wa hã tô parisezu norî sîré hã ma tô Zezusi hã sadanha, te te tâma âma upa zô, te te pibu da, âne:

³⁶ — Rowahutu'wa, e ma hã bété, danhipai u ĩpire uptabi hã, 'Re Īhâimana u'âsi mono nhimiroti na Mozési te te âma ĩrob'ui'ééré hã, ĩbahã na hã.

³⁷ Tawamhã Zezusi hã asa te tâma tinha, âne:

— 'Re Īhâimana u'âsi mono nhimiroti, danhipai u ĩpire uptabi hã, âne: “'Re Īhâimana u'âsi mono hã, Asib'apito za'ra wa'wa hã 're morî wa, te za asiwi 're ĩsawi pese za'ra wa'aba mo, sena na. Taha zarina, te za ĩsimiroti na âma 're ĩrosa'rata u'âsi za'ra wa'aba mo. Taha zarina, te za duré asimi'ê na tâma 're ĩromhuri u'âsi za'ra wa'aba mo.”

³⁸ Âne 'Re Īhâimana u'âsi mono nhimiroti, danhipai u ĩpire uptabi wasu'u hã.

³⁹ Duré 'Re Īhâimana u'âsi mono nhimiroti amo hã, aiwa ĩpire uptabi hã, âne: “Te za 're ĩdazawi pese za'ra wa'aba mo, uburé. Marî ĩwê zô asima 're asôpré wa'aba mono ne, te za duré uburé dama zama sô 're asôpré wa'aba mo, ĩwê zô.” Âne ĩsimiroti amo hã ĩpire uptabi hã, Mozési te te âma ĩrob'ui'ééré hã.

⁴⁰ Â norî si, 'Re Īhâimana u'âsi mono nhimiroti ma, pire uptabi zahuré di. Uburé 'Re Īhâimana u'âsi mono nhimiroti na Mozési te te âma ĩ'arob'ui'ééré mono hã duré ĩsadawa wasu'u 'rata 'wa norî zama te te âma 're ĩrob'ui'ééré za'ra mono zé hã, e marî te âma wasu'u za'ra, â norî hã. Tô ô norî na si te âma rowasu'u za'ra, 'Re Īhâimana u'âsi mono, da te dasiwi 're ĩsawi pese za'ra mono zéb da hã, duré 're ĩdasisawi pese za'ra mono zéb da hã. — Âne ma tô Zezusi hã 'Re Īhâimana u'âsi mono nhimiroti na dama rowahutu'wai ma waihû'u.

Danho'reptui'wa na Zezusi te te ĩda'azadhanharîzé wasu'u

Marcusi 12.35-37; Rucasi 20.41-44

⁴¹ Tawamhã parisezu norî hã zahadu sîré hâimana za'ra ré, te Zezusi hã sadanharî za'ra, âne:

⁴² — E niha asimirosa'rata za'ra wa'wa hã Danho'reptui'wa da, 'Re Īhâimana u'âsi mono te te ĩpisutu na, we datême ĩmorî na hã. E 'wa sihudu na ma bété a norî wa'wa hã âma ĩwaihû'u za'ra wa'wa.

Tawamhã asa te tâma rowasu'u za'ra, parisezu norî hã:

— Apito Dawihî nhihudu te za, u, 're mo. — Âne te duré asa tâma nharî za'ra.

⁴³ Tawamhã Zezusi te duré tâma rowasu'u za'ra:

— Tane wamhã, ma'âpé âma rosa'rata pese za'ra wa'aba, âne na hã. Duréhã apito Dawî hã ma tô tinhib'apito na sisi, Danho'reptui'wa da, 'Re Īhâimana u'âsi mono te te ĩpisudu hã. 'Re Īhâimana u'âsi mono pé'êzani nhimipawaptobzê zarina, ma tô tinhib'apito na sisi. Oro Dawihî mre me wasu'u na rob'ui'ééré hã, âne hã nomro za:

⁴⁴ “'Re Īhâimana u'âsi mono, ma tô ĩnhîb'apito ma tinha, âne:

Ī'rata te za 're asâmra mo ĩnhimire niwî, dama aipire na ĩsîré 're aihâimana u'âsi mono da. Asitob'ru norî nhîptetezé hã wa za te tiwî 're a'uprosi, wapu na aima 're hâimana za'ra mono da oto, duré aima sib'uwa na 're hâimana za'ra mono da oto.' Âne ma tô tâma waihû'u.”

Âne apito Dawihî mre me wasu'u na rob'ui'ééré hã.

⁴⁵ Dawî hã tinhib'apito na te te sisi nherê, e niha te za ĩsihudu si 're hâimana, Danho'reptui'wa da, 'Re Īhâimana u'âsi mono te te ĩpisudu hã. Ma'âpé âma rosa'rata pese za'ra wa'aba, waihû'u za'ra wa'aba da. — Âne na te Zezusi hã tâma rowasu'u za'ra, parisezu norî ma.

⁴⁶ Tawamhã ni'wa hã te te ãma sada'âbã waihu'u õ di oto, Zezusihi zãda, 're İsiwamhãsi za'ra mono norĩ hã, parisezu norĩ hã. Taha wa, Zezusi hã timreme na te te tãma ãma upa za'ra zõ, te te siwi sadanharĩ waihu'u za'ra õ di oto ta norĩ hã, te te sina mreme wazéb za'ra wa oto.

23

Parisezu norĩ hãimanazé wasu'u

Marcusi 12.38-39; Rucasi 11.43, 46; 20.45-46

- ¹ Tawamhã Zezusi hã ma tõ dama rowasu'u, İsiré 're İwanomro mono norĩ ma zama, ãne:
² — 'Re İhãimana u'ãsi mono nhimiroti 'rata na rob'ui'ére na dama rowahutu'wa norĩ hã duré parisezu norĩ hã dama pire za'ra di, 'Re İhãimana u'ãsi mono nhimiroti zarina Mozési te te ãma İrob'ui'érezém na te te dama 're İrowasu'u za'ra mono zéb da hã.
³ Taha wa, parisezu norĩ nhimiroti hã te za 're İwapari pese za'ra wa'aba mo, ãma 're anomro aba mono da. Tane nheré, 're İhãimana za'ra mono zéb zarina, İsine 're aihãimana za'ra wa'aba mono õ di za. E marĩ wa. Te te dama 're İroti za'ra mono zém na si 're sõpré mono õ wa, ta norĩ hã.
⁴ Danhoihĩ waptob ãna, marĩ İpire uptabi hã da te 're 'wasari mono da, da te dama 're İromnhibu za'ra mono ne, te ta norĩ hã tinhimiroti na zama te te dama 're rotu u'ãsi za'ra, 'Re İhãimana u'ãsi mono nhimiroti upana, taha na si 're danomro mono da, dama pire uptabi nheré, da te dasina 're İuwaimrami za'ra mono zéb da hã. Tane nheré, ta norĩ hã te te 're dapawaptob za'ra mono õ di, ãma 're İdanomro wé mono zéb da hã.
⁵ Taré da te 're 'madã'ã wé za'ra mono da, te marĩ hã te te 're 'manharĩ za'ra, danho'a. Powawé hã 'manharĩ hã 'Re İhãimana u'ãsi mono nhimiroti u'i'ére na İbahĩ nhemezébze hã İsa'ëté uptabi na si te ãma 're si'uihã wasisi za'ra, tipaihi wib zama, 're nomro wé mono newa, da te 're 'madã'ã wé za'ra mono da. Taha da, te duré ti'uzã hãpa za'ru pa ré na 're si'uzã za'ra.
⁶ Te duré te te sima 're pisutu za'ra, dama İpire norĩ simasisizém na si 're si'ubumroi mono da, dasa da te 're huri mono sidãpãsi, duré rowahutuzé mono bã, 'ri hã 're İsimasa mono zéb 'remhã.
⁷ Te duré te te sima 're wé za'ra, dama İpire norĩ hã damreme İpire na da te 're İsawi za'ra mono ne, dahãimana prédup sina da te 're sawi za'ra mono da, da'ahã na 'ri nhi'rĩti wa, da te dasima 're İrowede za'ra mono zéb ãma hã. Te duré te te sima 're wé za'ra, da te 're sawi za'ra mono wamhã, rowahutu'wa na da te 're sisi za'ra mono sina, da te 're sawi za'ra mono da, dama 're İdapire za'ra mono norĩ 'mahãrãzém na. ãne te ta norĩ hã uburé marĩ hã te te sima 're wé za'ra, dama İpire zarina, da te 're 'madã'ã wé za'ra mono da.
⁸ Tane nheré, te a norĩ wa'wa hã simisutu asisãnawã 're anomro aba mo, asiré İsazei'wai wa. Duré misire Asib'apito wa'wa hã. Taha wa, "rowahutu'wa" na dama aiwaptéré pire na da te 're asisi za'ra wa'aba mono da, 're asi'madã'ã ze za'ra wa'aba mono õ di za, a norĩ wa'wa hã.
⁹ Dawaptéré pire wé te, aimama za'ra wa'aba na 're danhisi za'ra wa'aba mono õ di za. E marĩ wa. Misire te Aimama za'ra wa'wa hã 're hãimana hãiwa ãma, siwaprosi.
¹⁰ Wa hã misire Asib'apito za'ra wa'wa hã wa 're İhãimana, 'Re İhãimana u'ãsi mono, İwétési te te İpisutu wa, Danho'reptui'wa da. Taha wa, 're asi'madã'ã ze za'ra wa'aba mono õ di za, danhĩb'apito na da te 're İ'asisi za'ra wa'aba mono zéb da hã.
¹¹ Asiré norĩ ma ai'maipire wa'aba da, asina 'mairõb'ruwipari aba wamhã, te za 're İ'maipawaptob u'ãsi aba mo, marĩ zõ 're ai'manhimhãsi aba mono ãna.
¹² Ni'wam norĩ hã pire na 'rãwi sina 're sõpré mono wamhã, 'Re İhãimana u'ãsi mono si te za tãma pisutu za'ra, wapu na dama 're hãimana za'ra mono da oto. Duré, ni'wam norĩ hã pire na 'rãwi 're si'madã'ã za'ra mono õ wamhã, ta norĩ ma si te za pisutu za'ra, pire na oto dama 're hãimana za'ra mono da. — ãne ma tõ Zezusi hã dama waihu'u, İsiré 're İwanomro mono norĩ ma zama.

Zezusi hã parisezu norĩ ma, te te İnharĩ za'ra zé wasu'u

Marcusi 12.40; Rucasi 11.39-42, 52; 20.47

- ¹³⁻¹⁴ Tawamhã parisezu norĩ ma, te oto rowasu'u za'ra Zezusi hã, ãne:
 — Parisezu norĩ, duré dama rowahutu'wa norĩ, aihãimana uptabi õ na dama 're aihãimana za'ra wa'aba mono wa, aima 're ropipa uptabi za'ra wa'aba mono di za. 'Ridawa hã 're danhisi tõ mono da, da te dawi 're İsitob za'ra mono ne, te a norĩ wa'wa hã dawi 're İsawi za'ra wa'aba mo, 'Re İhãimana u'ãsi mono, da'ãma 're İsib'a'uwé mono zéb u 're danomro tõ mono da. A norĩ wa'aba zama te 'Re İhãimana u'ãsi mono wi 're asihãiba zawi za'ra wa'aba mo, ai'ãma 're sib'a'uwé za'ra wa'aba mono tõ da.

15 — Parisezu norī, duré dama rowahutu'wa norī, a norī wa'aba ma, aima 're ropipa uptabi za'ra wa'aba mono di za. Ma tō datēme 're ĩropéi wa'aba mo daro mono bā, dama 're rowasu'u za'ra wa'aba mono da, asimirowasu'u na da te 're asaze za'ra wa'aba mono da. Tawamhā ni'wam norī hā asiniwī 're sipizari za'ra wa'aba mono wamhā, 're anomro wasété aba mono zéb zarina, ma tō 're hāimana wasété uptabi za'ra, asimiroti wasété aba zarina. Taha wa, ropipa āma 'Re ĩhāimana u'āsi mono mo te 're aihā za'ra wa'aba mono zém nhipai u, te za te 're hā za'ra za'ētē, ta norī hā.

16 — A norī wa'aba ma, aima 're ropipa uptabi za'ra wa'aba mono di za. E ni'wa hā tob'a nherē, te za dazaprōni wē. Mare di. Tane te duré a norī wa'wa hā roti senai'ō na dama 're ĩroti wasété za'ra wa'aba mo, 'Re ĩhāimana u'āsi mono nhimiroti hā sena na waihu'u za'ra wa'aba ō wa. Āne te dama 're ĩroti wasété za'ra wa'aba mo: "Āté ni'wam norī hā te za marī na te te dama 're ropisutu za'ra. Tawamhā āté tō sena te te dama 're ĩropisutu za'ra mono zém na, da te 're saze za'ra mono da, te za 'Re ĩhāimana u'āsi mono nhorōwa nhisi hā te te āma dama 're waptob za'ra, tinhimiropisutu me. Āne na te te dama āma 're uwaimrami za'ra mono ō nherē, 'Re ĩhāimana u'āsi mono hā te te 're hā za'ra mono ō di za. Tane nherē, ni'wam norī hā marī na te te dama 're ropisutu za'ra mono wamhā, oru 'manharī hā ētē'ubuzi prē 'manharī hā, 'Re ĩhāimana u'āsi mono nhorōwa 're, 're ĩsimasa mono na te te dama 're rowasu'u za'ra mono nherē, te te dama āma 're uwaimrami za'ra mono ō wamhā, te za te te 're hā za'ra, 'Re ĩhāimana u'āsi mono hā." Āne te ai'rā ahā na dama 're ĩroti za'ra wa'aba mo, tō senai'ō na.

17 E niha waihu'u za'ra wa'aba ō di bété, 'Re ĩhāimana u'āsi mono nhimiroti hā. Datob'a na 're ĩdanomro mono ne, te 're anomro aba mo. Ētē'ubuzi prē 'manharī hā 'ri 're wa'wa 'Re ĩhāimana u'āsi mono nhorōwa āma 're simasa mono wa, tāma sawi di, oru 'manharī hā. Oru 'manharī hā ĩsōrōwa āma 're simasa mono ō 'wa'āhā, aré tāma sawi ō di. Taha wa, 'ri hā 'Re ĩhāimana u'āsi mono āma 're ĩdawata za'ra mono zé hā oru 'manharī, ĩwa 're ĩsimasa mono zawī nhipai u, sawi uptabi di tāma, 'ri hā. Taha wa, 'Re ĩhāimana u'āsi mono nhorōwa nhisi na zama taré dama 're dasiwaptob za'ra mono ō di za. E āne hā asima waihu'u za'ra wa'aba ā bā.

18 Āne na te duré dama 're ĩroti wasété za'ra wa'aba mo: "Ni'wa hā marī na te te dama 're ropisutu mono wamhā, 'Re ĩhāimana u'āsi mono nhorōwa āma, tāma danhoprubzé nomrizém nhisi na wedeza ne nhisi na te te dama āma 're waptob za'ra mono wamhā, duré te te dama āma 're uwaimrami za'ra mono ō wamhā, tane nherē, 'Re ĩhāimana u'āsi mono hā te te azāri ō di za. Tane nherē, ni'wa hā tāma danhoprubzé nomrizém nhisiwi, tinhoprubzé te te ĩhiri nhisi na dama āma 're siwaptob za'ra mono wamhā, duré te te dama āma 're uwaimrami za'ra mono ō wamhā, taha nhisi te za azā, 'Re ĩhāimana u'āsi mono hā." Āne te duré siwa'ru dama 're ĩroti za'ra wa'aba mo, tō senai'ō na.

19 E niha waihu'u za'ra wa'aba ō di bété, 'Re ĩhāimana u'āsi mono nhimiroti hā. Datob'a na 're ĩdanomro mono ne, te 're anomro aba mo. Danhoprubzé hā tāma danhoprubzé nomrizém nhisiwi, da te tāma 're ĩsa'ra mono zé hā 'Re ĩhāimana u'āsi mono ma, sawi di. Tane nherē, tāma 're ĩdanhoprub za'ra mono zé hā ĩsōrōwa āma tāma danhoprubzé nomrizém nhisiwi 're simi'wara mono ō 'wa'āhā, aré tāma sawi prā ti, 'Re ĩhāimana u'āsi mono ma hā. Taha wa, tāma danhoprubzé nomrizé hā tāma 're ĩdanhoprub za'ra mono zéb zawī nhipai u, tāma sawi uptabi di. E āne hā asima waihu'u za'ra wa'aba ō di bété.

20 Taha wa, ni'wam norī hā 'Re ĩhāimana u'āsi mono ma, danhoprubzé nomrizém nhisi na dama āma 're siwaptob za'ra mono wamhā, taha nhisi zarina te duré uburé ĩsimasiwā danhoprubzém nhisi na zama dama āma 're siwaptob za'ra.

21 Duré ni'wam norī hā 'Re ĩhāimana u'āsi mono nhorōwa nhisi na dama āma 're siwaptob za'ra mono wamhā, taha nhisi zarina te duré ĩwa 're ĩsāmra mono nhisi na 're siwaptob za'ra, 'Re ĩhāimana u'āsi mono nhisi na.

22 Duré ni'wam norī hā hāiwa nhisi na dama 're siwaptob za'ra mono wamhā, taha nhisi zarina te duré 'Re ĩhāimana u'āsi mono, pire na te te 're ĩda'ab'madā'ā mono zém nhisi na dama āma 're siwaptob za'ra, ĩwa 're ĩsāmra mono nhisi na zama, tō ōhō nhisi na.

23 — Parisezu norī, duré dama rowahutu'wa norī, aihāimana uptabi ō na dama 're aihāimana za'ra wa'aba mono wa, aima 're ropipa uptabi za'ra wa'aba mono di za. 'Re ĩhāimana u'āsi mono nhimiroti rada hā taha ma, tāma ĩpire prā si te 're ĩ'madā'ā pese za'ra wa'aba mo. Wesuirā ĩsu zadazei mono hā ma tō 'Re ĩhāimana u'āsi mono ma, ĩsimiroti 'rata zarina, tāma 're ĩpo'o za'ra wa'aba mo, syra na, oterā na dasai wazarizém nhisi hā, duré wesuirā ze, duré cominhu. Tane nherē, ĩsimiroti pire na Mozési te te āma ĩ'arob'ui'éré mono hā 're 'madā'ā za'ra wa'aba mono ō di, ĩsarina si dama 're ĩrob'manharī wē za'ra wa'aba mono zéb da hā, duré da'āma 're aipē'ézé za'ra wa'aba mono zéb da hā, duré 'Re ĩhāimana u'āsi mono wi, 're aipizari za'ra wa'aba mono āna 're anomro aba mono zéb da hā. Āne hā ĩsimiroti

Īpire prā norī zu, 're 'madâ'â za'ra wa'aba mono 'wa'âhâ, te aré tô sena aihâimanazém na asina tâma 're ĩ'uawimrami za'ra wa'aba mo, 'Re ĩhâimana u'âsi mono ma.

²⁴ E ĩtob'a hâ simizaprōni wē bâ. Mare di. Tane te duré a norī wa'wa hâ roti senai'ō na dama 're ĩroti wasété u'âsi za'ra wa'aba mo, 'Re ĩhâimana u'âsi mono nhimiroti hâ sena na aima waihu'u pese za'ra wa'aba ō wa. ĩsimiroti pire norī hâ 're 'madâ'â za'ra wa'aba mono ō nherē, ĩsimiroti ĩpire prā norī si, 're ĩ'madâ'â pese za'ra wa'aba mono zéb da si, te 're asiwasutu u'âsi za'ra wa'aba mo.

²⁵ — Parisezu norī, duré dama rowahutu'wa norī, aihâimana uptabi ō na dama 're aihâimana za'ra wa'aba mono wa, aima 're ropipa uptabi za'ra wa'aba mono di za. Āne na wa za aima āma romnhimiré'é za'ra wa'wa: Hâsizé hâ duré pratu hâ ĩmana wawip si, da te 're upsō za'ra mono wamhâ, ĩwa'wamhâ wasété di, zahadu upto wa. Tane, a norī wa'wa hâ 're anomro wē wa'aba mono newa, da te 're ai'madâ'â wē za'ra wa'aba mono da, te 'Re ĩhâimana u'âsi mono nhimiroti ĩpire prā norī si 're ĩ'madâ'â pese za'ra wa'aba mo, danho'a. Tane nherē, aipē'ē 'remhâ asimirosa'rata wasété na te zahadu ĩré 're aihâimana u'âsi za'ra wa'aba mo. Te duré danhibrob na si 're ĩda'ruiwapari za'ra wa'aba mo. Aihâimana uptabi ō zarina, te duré marī na dawī 're asipsaihuri za'ra wa'aba mo.

²⁶ Parisezu norī, datob'a ne 're ĩ'aihâimana za'ra wa'aba mono norī, ma'āpé aihâimana wasété za'ra wa'aba zé hâ rēme pese za'ra wa'aba, danhimihâsizé wa'wa hâ upto wa, da te 're ĩ'upsō za'ra mono ne. Tawapsi te za oto 're anomro wē wa'aba mono zém na sena na da te 're aiwaihu'u za'ra wa'wa.

²⁷⁻²⁸ — Parisezu norī, duré dama rowahutu'wa norī, aihâimana uptabi ō na dama 're aihâimana za'ra wa'aba mono wa, aima 're ropipa uptabi za'ra wa'aba mono di za. Āne na wa za duré aima āma romnhimiré'é za'ra wa'wa: Adâ'â 'ru hâ ĩmana wawimhâ te za a ni, ĩ'madâ'â ze zéb da hâ. Tane nherē, 're ĩdadâ'â za'ra mono norī hi hâ te ĩwa 're simi'wara u'âsi ab're 're, dahâiba 'ro zama. ĩwasété si te ĩwa 're simi'wara, ab're 'remhâ.

Tane duré, a norī wa'wa hâ 're aihâimana wē za'ra wa'aba mono newa, te da te 're ai'madâ'â wē za'ra wa'wa, sō'awim na hâ. Tane nherē, aipē'ē 'remhâ aiwasété uptabi na te ĩré 're aihâimana za'ra wa'aba mo. Aihâimana uptabi ō zéb zarina si, te dama 're anomro aba mo.

²⁹ — Parisezu norī, duré dama rowahutu'wa norī, aihâimana uptabi ō na dama 're aihâimana za'ra wa'aba mono wa, aima 're ropipa uptabi za'ra wa'aba mono di za. A norī wa'wa hâ duréihâ 'Re ĩhâimana u'âsi mono zadawa wasu'u 'rata 'wa norī nhimirowasu'u hâ aima 're wē uptabi za'ra wa'aba mono newa, ma tō ta norī 'ru na marī hâ 're ĩ'manharī za'ra wa'aba mo, ĩ'madâ'â ze zéb da hâ, 'Re ĩhâimana u'âsi mono nhimiroti 'madâ'â pese 'wa norī 'ru na hâ.

³⁰ Asina 're aiwata za'ra wa'aba mono sina, te duré āne dama 're asiwasu'u za'ra wa'aba mo: "Wa norī hâ wahi'rata norī siré 're wahâimana za'ra mono 'wa'âhâ, 'Re ĩhâimana u'âsi mono zadawa wasu'u 'rata 'wa norī hâ wa te aré 're simroi mono ō di, ĩsiré za'ra." Āne te dama 're asiwasu'u za'ra wa'aba mo.

³¹ E marī te bété aima wasu'u za'ra wa'wa, 'Re ĩhâimana u'âsi mono zadawa wasu'u 'rata 'wa pāri'wa norī nhihudu na dama 're asiwasu'u za'ra wa'aba mono zé hâ. ĩsine marī ĩwasété si 're ĩ'manharī za'ra wa'aba mono zé, te aima wasu'u za'ra wa'wa.

³² Taha wa, aihī'rata norī te te 're ĩrob'manharī na'rata wasété za'ra mono zéb zarina, 're anomro aba mono tô, asima āma 're sa'ētē za'ra wa'aba mono da, aima wē za'ra wa'aba ze te bâ.

³³ Parisezu norī, a norī wa'wa hâ wahi nhipārī pese ne, te 're anomro aba mo. E ropipa u, 'Re ĩhâimana u'âsi mono te te 're asatōri za'ra wa'aba mono zém na ĩsimihâzē wī, tiwī 're aiwairébé aba mono da bâ.

³⁴ Nī'wam norī hâ wa za oto te 're satōri za'ra, atēme 're nomro aba mono da, ĩmama 'Re ĩhâimana u'âsi mono hâ te te aima 're sadawa wasu'u za'ra wa'aba mono da, ĩsimiroti na te te aima 're rowahutu za'ra wa'aba mono da, āma 're anomro wē wa'aba mono da oto. Tane nherē, ĩzadawa para ō nherē, te za 're ĩsimroi wa'aba mo ta norī hâ, 'Re ĩhâimana u'âsi mono zadawa wasu'u 'wa norī hâ. Te za duré dama 're ĩ'ru za'ra wa'aba mo, wedepo'o nnonhī'rāmi na hāiwi da te 're sasōmri za'ra mono da, 're dâ'â za'ra mono da, hāiwi. Rowahutuzéb 're, te za duré 're ĩhâ za'ra wa'aba mo, powawē hāiwaré na. 'Ri wa'ōtō mono bâ te za duré sō 're anomro aba mo, 'Re ĩhâimana u'âsi mono zadawa wasu'u'wa norī zō, tâma 're rob'manharī wasété za'ra wa'aba mono da, ta norī ma zama.

³⁵ Duréihâ aihī'rata 'wa hâ ma tō Abé hâ tīwī, marī te te 'manharī wasété ō nherē. Ta hawim haré, ma tō aihī'rata norī hâ te te 're danhimro za'ra da'ahâ na, 're danomro wasété mono ō nherē. Daza'u si ma duré Zacaria hâ siwī tīwī. Ta hâ Baratizaha 'ra, 'Re ĩhâimana u'âsi mono ma da'āma romhuri'wa. 'Re ĩhâimana u'âsi mono nhorōwa āma 'ri 'wawi wa'ra

're, tãma danhoprubzê nomrizêb 'rata te te tãma romhuri ré, ma tô wĩrĩ ni, wedeza ne 'rata. Æne ma tô aihĩ'rata norĩ hã da'ahã na te te 're danhimro, 'Re ìhãimana u'ãsi mono nhimiroti si te te 're 'madã'ã pese za'ra mono nherê, ta norĩ hã. Ta norĩ ne, te duré a norĩ wa'wa hã dama 're ìrob'manharĩ wasété za'ra wa'aba mo. Taha wa, wa hã wa za aiwasédé hã te ai'ãma 're sa'ra wa'wa, uburé aihĩ'rata norĩ te te 're ìdanhimroi mono zéb zarina. Taha wa, te za te te 're aihã za'ra za'ëté za'ra wa'wa, 'Re ìhãimana u'ãsi mono hã.

³⁶ Æne hã wa tô sena, aima waihu'u za'ra wa'wa. 'Re ìhãimana u'ãsi mono hã te za tô te te 're aihã za'ra za'ëté 'wa, nimosi ì'aipoto té wa'aba mono hã ì'aihãimana za'ra wa'wa hã, ãne na dama 're ìrob'manharĩ wasété za'ra wa'aba mono zéb zarina, aihĩ'rata norĩ nhĩpãrĩ zarina zama. — Æne ma tô Zezusi hã parisezu norĩ ãma simiré'é za'ra, ìhi'rata norĩ na.

*Zezusi hã, Zeruzarê ãma 're ìdahãimana za'ra mono ãma ìpê'èzézé wasu'u
Rucasi 13.34-35*

³⁷ Tawamhã Zezusi te duré dama tinha, ãne:

— Zeruzarê ãma 're ai'ubumroi wa'aba mono norĩ ãma, ai'ãma ìpê'èzézé za'ra wa'aba di. Aihĩ'rata norĩ hã ma tô 'Re ìhãimana u'ãsi mono zadawa wasu'u 'rata 'wa norĩ hã te te 're simroi u'ãsi. Datême te te 're ìsatõrĩ za'ra mono norĩ zama, te duré te te 're simroi u'ãsi, ètê na. Si'a hã ti'ra zawi te, 're ìpapo za'ra mono ne, wa aré te ìsima 're aiwê u'ãsi za'ra wa'wa, ìsitême te 're ai'awaibui wa'aba mono da. Tane nherê, asima 're ìwê za'ra wa'aba mono õ di asa.

³⁸ Taha wa, tinhorõwa hã te za oto tirê, 'Re ìhãimana u'ãsi mono hã, ãma 're ì'aiwata za'ra wa'aba mono zé hã. Baba na te za oto 're sa, 'ri 'rãihã hã. Ma'ãpé ãne na ìzadaihu'u za'ra wa'aba.

³⁹ Duré a norĩ wa'wa hã ìhãiba 'madã'ã na sahu za'ra wa'aba õ di za, a'ã. Niwapsi te za duré ìhãiba 'madã'ã za'ra wa'wa, ãne na ìwaihu'u za'ra wa'aba wapsi: “Zezusi hã, ta hã 'Re ìhãimana u'ãsi mono zadawa para we ìmorĩ ti'ai u, Danho'reptui'wa da. Taha wa, ìwê si te te tãma 're anhomri u'ãsi, ìmama hã.” Æne na aipê'è 're ìwaihu'u za'ra wa'aba wapsi, te za ìhãiba 'madã'ã na duré ìsahu za'ra wa'wa.

Æne ma tô Zezusi hã dama siwaihu'u.

24

*'Re ìhãimana u'ãsi mono ãma 're ìdawata za'ra mono zé, romhutu'õ za ìsi'utõrízé wasu'u
Marcusi 13.1-2; Rucasi 21.5-6*

¹ Tawamhã wa norĩ hã wa tô wawairébé ni, Zezusihi siré, 'ri 'rãihã hawi, 'Re ìhãimana u'ãsi mono ãma 're ìdawata za'ra mono zém hawi. Aré oto morĩ da, ma rob u watobro, Zezusi hã. Tane nherê, wa norĩ hã ìsiré 're ìwanomro mono norĩ hã wa tô 'rãwi ìtême aimasam ni, 'Re ìhãimana u'ãsi mono nhorõwa hã te te wama wasu'u za'ra da, uburé 'ri 'wawi wa'ra 're, 'ri, 're ìsimasa mono zama.

² Tawamhã Zezusi te wama nharĩ za'ra, ãne:

— Æhãta tô 'ri hã wê na 're simasa mono ré, te ì'madã'ã za'ra wa'wa. Tane nherê, niwapsi te za dasiwi pru pese ni, ètê na 'ri hã. Tawamhã misi si te za oto simi'wara, ène hã. Sisisiwi 'manomro waihu'u õ di za oto, ène hã. Tãibã za oto. Tô sena, wa ãne hã aima waihu'u za'ra wa'wa. — Æne ma tô Zezusi hã wama waihu'u sirõmo za'ra, ìsiré 're ìwanomro mono norĩ ma.

*Robzépata wasu'u, da'ruiwapari na rowasu'u me
Marcusi 13.3-13; Rucasi 21.7-19*

³ Tawamhã Zezusi hã te oto nhamra, Oriwera na ètê 'rãihã nhisi ãma. Sahã na sãmra wamhã wa tô 'rãwi ìtême ubumro ni Zezusihi u, ìsiré 're ìwanomro mono norĩ hã, wahãiba pisutu te te wasiwi sadanharĩ za'ra da, ãne:

— E niwa te za ãne hã ãma tiromhãiba, 'ri nhamrazéb da hã. Ma'ãpé wama waihu'u za'ra na, marĩ ìwatobrozé hã, ìsõwa wa te ãma waihu'u sirõmo za'ra da. Duré e marĩ te za watobro, apã we aimorízéb da hã, wa te ãma ìwaihu'u sirõmo za'ra zéb da hã, duré rob'rãsutuzéb u hã bádã, ìwa ìwaptã'ázéb da hã. — Æne wa tô wasiwi sadanharĩ ni, Zezusi hã.

⁴⁻⁵ Tawamhã Zezusi hã te ãne na asa wama rowasu'u za'ra:

— Ni'wam norĩ hã te za sadawa nhĩpese na sisarina datême 're nomro, ahã na. Wa hã newa, te za taré ìnhisi na dama 're siwasu'u za'ra, Cristu na, Danho'reptui'wa na. Tawamhã da'ahã na te za ta norĩ ãma da te 're sasõmri za'ra, tô sena newa, dama 're ìsiwasu'u za'ra mono zé hã. Taha wa, te za a norĩ wa'wa hã aihãimana nhimiza'rese, 're aihãimana za'ra wa'aba mo, sadawa nhĩpese sina, datême 're ìnomro mono norĩ ãma, 're sasõmri za'ra wa'aba mono tô da.

⁶ 'Re dasi'wapé za'ra mono wa, da te dasina 're ìropupu'u za'ra mono zé hã te za 're ìwapari za'ra wa'aba mo, romhã na 're ìdasi'wapé za'ra mono norĩ wasu'u zama. Æne hã 're wapari

za'ra wa'aba mono wamhã, tãma 're aipahi za'ra wa'aba mono ò di za, dasi'wapéi ma hã. Dasi'wapé te za tò dazada 're wairébé. Tane nherê, ta hã rob'rãsutu ò di.

⁷ Danhipti'ai amoi u te za dasisô 're dapra, 're dasi'wapé za'ra mono da. Tawamhã daro mono bâ te za tò 're dasiwasutu za'ra. Nima niwĩmhã danho ò wa, te za duré da te 're robzépata za'ra, dasa syryre wa. Nima niwĩm norĩ ré hã te za duré ti'a hã daré 're popo'ò za'ra.

⁸ ãne na dama 're romhãimana mono wamhã, za daré ìrob'rãsutu na'rata zé, te wasu'u, pi'òĩ ãma ìwasã hã 're ìsepu'u na'rata za'ra mono ne hã. ãhã haré dazô 're wairébé mono ò di za. — ãne ma tó Zezusi hã wama rowaihu'u za'ra, romhã ré.

⁹ ãne ma tó duré wama rowaihu'u za'ra, ìsiré 're ìwanomro mono norĩ ma:

— Tawamhã ãne na oto daré 're romhãimana mono wamhã, te za da te 're aiwaibui wa'wa, da te dama 're ai'ru za'ra wa'aba mono da, rowasédé hã da te aima 're 'manharĩ za'ra wa'aba mono da, duré da te 're asimroi wa'aba mono da. Ìzazei'wa oto 're anomro aba mono wa, te za uburé da te 're ai'ruiwapari za'ra wa'wa, daro mono bã.

¹⁰ ãne na daré 're romhãimana mono ré, te za ìzazei'wa norĩ hã te te 're ìzazei utòrĩ za'ra, ahã na. 'Rãwim nherê, te za duré dama 're sihãiba nhomri za'ra, da te 're ì'ruiwapari za'ra mono zéb zarina, da te 're waibui mono da. Ìzazei'wai wa, tisisãnawã na sima 're hãimana za'ra mono nherê, te za oto 're si'ruiwapari za'ra, 'rãwim nherê.

¹¹ 'Re ìhãimana u'ãsi mono zadawa wasu'u'wa newa, roti tó senai'ò na te te dama 're ìroti za'ra mono norĩ hã te za datême 're nomro, sadawa nhipse na te te dama 're rowasu'u za'ra mono da, taré. Tawamhã ìsimiroti hã te za tó da te 're saze za'ra, tó sena newa, ta norĩ hã sadawa nhipse na taré dama 're siwasu'u za'ra mono nherê.

¹² Duré dawasété uptabi na si da'ahã uptabi na za oto 're danomro mono wa, te za 're ìdasisawi za'ra mono zé hã dawĩ 're si'utòrĩ za'ra.

¹³ Tane nherê, ni'wam norĩ hã rob'rãsutu u siptete sina ì'ãma 're nomro u'ãsi mono wamhã, duré ìwi 're sipizari za'ra mono ò wamhã, ta norĩ si te za ropipa hawi tinho'reptuzé hã te te sina 're uwaimrami za'ra.

¹⁴ 'Re ìhãimana u'ãsi mono, da'ãma 're ìsib'a'uwê mono zé wasu'u hã ìwê uptabi hã, ìzazei'wa norĩ hã te za daro mono bã te te dama 're wasu'u za'ra, daro mono bã da te oto 're wapari za'ra mono da, da te ãma 're ìsaze za'ra mono zéb da hã. Tame te za oto tirob'rãsutu. — ãne ma tó Zezusi hã wama rowaihu'u za'ra, romhã ré.

*Robzépata za'ètê uptabi wasu'u
Marcusi 13.14-23; Rucasi 21.20-24*

¹⁵⁻¹⁶ Tawamhã Zezusi hã ma duré ãne na wama rowaihu'u siròmo za'ra:

— Zahadu wapsi, te za asiwi ì'madã'ã za'ra wa'wa, mari ìwasété uptabi hã. 'Re ìhãimana u'ãsi mono nhoròwa ãma te za tihãiba, te te siwi ìwê'ò pe hã. Taha ãma ma tó Dani'é hã rob'ui'ére siro duréihã, 'Re ìhãimana u'ãsi mono zadawa wasu'u 'rata'wa hã. (ãhã wasu'u na rob'ui'ére hã 're sòre za'ra wa'aba mono wamhã, ma'ápé ãma 're rosa'rata pese za'ra wa'aba mono za, waihu'u za'ra wa'aba da.) Tawamhã ãne hã za oto daré romhãimana wamhã, rowasété si te za a'ã daré 're sa'wari. Taha wa, Zudeza na danhipti'a nho'òmo nhisi ãma 're ìsi'ubumroi mono norĩ hã, wara sina te za 're sisa're, ètê 'rãihã u tiwi simani za'ra da, duré sisò'reptu za'ra da.

¹⁷ Ni'wam norĩ hã 'ri nhisi hãpã ãma si'ubumroi wamhã, tinhibrob zô sisisi ò di za a'ã, 'ri para u hã. Òne haré te za dame sisa're, ètê 'rãihã u, ta norĩ hã.

¹⁸ Duré ni'wam norĩ hã buru ãma te te romhuri za'ra wamhã, 'ri tême sisa'rei mono ò di za apã, tisi'ubuzéb zô. Mare di. Òne haré te za duré ta norĩ hã ètê 'rãihã u dame sisa're.

¹⁹ ãne hã rowasédé hã daré hãimana wamhã, ìwasã ré norĩ ma hã tãma ropipa uptabi za'ra di za, ì'ra pré ré norĩ ma zama.

²⁰ Taha wa, te za 'Re ìhãimana u'ãsi mono ma 're aimreme zusi aba mo, rowa'u'u wahã 're sa'wari mono ré, duré sabadu na romhuri zahãrizém na bãdã hã te te pisutu tó da, ètê 'rãihã u asa'rei wa'aba mono zéb da hã, rowasété wi aimani za'ra wa'aba zéb da hã.

²¹ Rowasédé hã oto dazô 're wairébé mono wamhã, te za oto robzépata za'ètê za'ra ni. 'Re ìhãimana u'ãsi mono te te ì'aropoto na'rata mono zém hawimhã, ãne na hã da te 're robzépata za'ètê uptabi za'ra mono ò di. Niwamhã ãne na hã da te 're robzépata zahu za'ra mono ò di za.

²² 'Re ìhãimana u'ãsi mono hã ma tó sima pisutu, bãdã hã za da te 're ìrobzépata za'ra mono zéb da hã, te te dama wãtari da, rowasété ré da'ãma romhãimana pahã tó da. ãne hã te te sima pisutu ò 'wa'ãhã, te aré uburé dasi'utòrĩ pese, za daré ìrob'rãsutuzém na hã. 'Re ìhãimana u'ãsi mono hã ãma 're sib'a'uwê za'ra mono da, te te sima 're ì'apisutu mono norĩ zawi te, te za ãne hã 'manha.

²³ — Za da te 're robzépata za'ětē za'ra mono ré, átē ni'wam norī hā te za te aima 're da'mahārā za'ra wa'wa, āne: “Āhāta, Cristu, 'Re ĩhāimana u'āsī mono te te ĩpusudu, Danho'reptui'wa da.” Áté aimawi norī hā te za duré āne te te aima 're da'mahārā za'ra wa'wa: “Ōhōta, Cristu.” Āne wamhā, āma 're dazaze za'ra wa'aba mono ō di za, damreme na hā.

²⁴ E marī wa, wa āne aima waihu'u za'ra wa'wa. Ni'wam norī hā te za datēme 're nomro, danho'reptui'wa na, niha wamhā, 'Re ĩhāimana u'āsī mono zadawa wasu'u'wa na dama 're siwasu'u za'ra mono da, sadawa nhipese na. Ta norī hā marī dama ĩ'manharī waihu'u'ō hā te za duré te te dama 're 'manharī za'ra, 'Re ĩhāimana u'āsī mono zadawa para newa, da te āma 're sasōmri za'ra mono da. Īsazei'wa norī zama te te dame āma 're saze za'ra mono da, te za āne na te te dama 're romhōsi za'ra. Tane nherē, te te dame 're sazei waihu'u za'ra mono ō di za ta norī hā, 'Re ĩhāimana u'āsī mono te te sima 're apisutu sirōmo mono wa, āma 're sib'a'uwē za'ra mono da.

²⁵ Āne hā wa aima waihu'u sirōmo za'ra wa'wa, zahadu romhāimana ō ré. Taha wa, ma'āpé āma 're asōpré u'āsī aba mono za, āne na hā.

²⁶ — Áté ni'wam norī hā te za taré te te aima 're rowasu'u za'ra wa'wa, āne: “Danho'reptui'wa da, 'Re ĩhāimana u'āsī mono te te ĩpusudu hā ma tō wei mo, apā. Ōhōta te nhamra, a'ubuni wi.” Āne hā 're wapari za'ra wa'aba mono wamhā, a'ubuni u 're anomro aba mono ō di za, ĩzō 're asōpré wa'aba mono da. Áté te za duré āne da te aima 're rowasu'u za'ra wa'wa: “Āhāta ma dawi aima'u.” Āne wamhā, āma 're dazaze za'ra wa'aba mono ō di za, senai'ō na hā, wa hā pi'uriwi nimahā na hā za we apā ĩmorī ō na dā'āsina.

²⁷ Tā 're si'ubuzi za'ra mono wamhā, dama rob'madā'ā pibu pese di, hāiwa mono bā hā. Tane duré, wa hā dasiré ĩpodo hā apā we ĩmorī wamhā, aihīni te za ĩ'madā'ā za'ra ni.

²⁸ — Sipahudu hā marī dā'ā u 're si'rā'ōtō mono wamhā, dama pibui pese za'ra di, marī hā 're dā'ā za'ra mono wa, 're ĩsimi'wara mono zé hā. Tane, wa hā apā we ĩmorizé hā uburé dama ĩpibu pese za'ra di za oto. — Āne ma tō Zezusi hā wama sina rowaihu'u sirōmo za'ra, ĩsiré 're ĩwanomro mono norī ma.

*Ti'ai āma dasiré ĩpodo hā za we apā ĩmorizé wasu'u
Marcusi 13.24-27; Rucasi 21.25-28*

²⁹ Āne na ma duré wama waihu'u sirōmo za'ra:

— Tawamhā da te 're robzépata za'ětē za'ra mono parip si, awa'awi te za bātā na tirobra. A'amo zama te te rob'uiwē ō di za oto. Wasi norī hā te za duré rere, hāiwa hawi. Uburé hāiwa na 're ĩsimasa mono hā te za duré 're sisa're.

³⁰ Āne hā daré romhāimana pari, marī hā te za watobro hāiwa na, dama ĩpibu pese zéb da hā, wa hā dasiré ĩpodo, apā we ĩmorizém na da te ĩ'āma waihu'u za'ra da oto. Tawapsi te za oto daro mono bā dasiwi ĩ'madā'ā ni, hāiwa'a na we ĩmorī ré. ĩwaihu'u pese na wa za wei mo apā, duré ĩhāiba na hā rowa'a za'ětē ré. Da te dasiwi ĩ'madā'ā za'ra wamhā, te za 're dazadari za'ra, robzawi te, danhimiza'rese ĩzō 're danhimipari za'ra mono ō wa.

³¹ Tawamhā hāiwa āma ĩma romhuri'wa hā tinhimnihārāzém na te za oto amnihā, hārā 'rāihā uptabi na, daro mono bā da te ĩwapari za'ra da hā. Simnihārā wi, hāiwa hawi ĩma romhuri'wa norī hā wa za we dazō satōrī za'ra, ti'ai u. Tawamhā 'Re ĩhāimana u'āsī mono hā āma 're sib'a'uwē za'ra mono da, te te sima 're ĩ'apisutu mono norī hā te za we daro mono bā te te simro, ĩtēme. — Āne na ma tō Zezusi hā romhā ré wama waihu'u sirōmo za'ra.

Pidera wede wasu'u

Marcusi 13.28-31; Rucasi 21.29-33

³² Tawamhā āne te duré wama rowasu'u za'ra:

— Pidera wede na, wa za oto aima āma romnihimiré'é za'ra wa'wa, waihu'u za'ra wa'aba da. Pidera wede panhipti hā wapti'i wamhā, duré ĩsu té hā 're wairébé mono wamhā, tawapsi te za oto āma ĩwaihu'u za'ra wa'wa, tā 're ĩta'a mono zéb u 're ĩromhutu mono zém na hā.

³³ Tane duré, marī hā 're ĩromhāimana mono zéb da, te aima ĩwasu'u za'ra wa'aba zéb zarina, 'madā'ā za'ra wa'aba wamhā, te za ĩwaihu'u za'ra wa'wa, rob'rāsutuzé hā za oto ĩwatobro na hā.

³⁴ Tō sena, wa āne hā aima waihu'u sirōmo za'ra wa'wa. Ā hā uburé rowasédé hā dazō 're wairébé mono ré, ti'ai āma 're ĩdahāimana za'ra mono norī hā 're dā'ā za'ra mono ō ré, te za ĩsō'a za'ra ti'rāsutu, romhāimanazé hā.

³⁵ Nimahā na te za hāiwa norī hā ai'utōrī zahuré, ti'ai me. Si'utōrī zahuré nherē, ĩnhimirowasu'u hā si'utōrī waihu'u ō di za. Pire na te za dama 're hāimana u'āsī. — Āne ma tō Zezusi hā wama waihu'u za'ra, ĩsiré 're ĩwanomro mono norī ma.

*Danhimiza'rese āna 're danomro mono ré, Zezusi hā za we apā ĩmorĩzé wasu'u
Marcusi 13.32-37; Rucasi 17.20-37*

³⁶ Tawamhā Zezusi hā ma duré āne na wama waihu'u sirōmo za'ra:

— Āne hā uburé za daré 're ĩromhāimana mono zéb da hā, ni'wa hā bādā hā te te waihu'u ō di. Hāiwa āma romhuri'wa norĩ zama, bādā hā te te waihu'u za'ra ō di duré. Wa hā 'Re ĩhāimana u'āsi mono 'ra nherē, te duré bādā hā waihu'u ō di. ĩmama ma si, waihu'u pese di bādā hā.

³⁷ Danhimiza'rese āna 're danomro mono ré, wa za wei mo apā dasiré ĩpodo hā, duréihā Nowé 're hāimana mono ré hā, danhimiza'rese āna 're ĩdahāimana za'ra mono ne.

³⁸ Ta norĩ hā daro mono bā daré āpusi mono ō ré hā, ma tō 're saihuri, tisa na. Te te 're āhuri duré, rowē na 're rosa'wari u'āsi mono da newa. Te duré sina 're mro za'ra. Āne ma tō danhimiza'rese āna 're dahāimana za'ra, Nowé hā uba're ne 'manharĩ 're sébré ō ré, 'ri ne 'manharĩ 'remhā.

³⁹ Tawamhā rosa'rese ō ré, ma tō daré āpusi. Tawamhā uburé ma dasi'utōrĩ pese, ā na. Tane duré, wa hā dasiré ĩpodo hā danhimiza'rese āna 're danomro mono ré, wa za wei mo, apā.

⁴⁰ — Āté aibā norĩ hā buru na siré te te romhuri zahuré ré, wa za we apā mo, dazō. Tawamhā ĩhāiba amo hā āté te za tiwi ti'ā hāiwa u, 'Re ĩhāimana u'āsi mono hā. ĩhāiba amo si te za tirē.

⁴¹ Āté pi'ō norĩ hā siré 'ru'u zahuré ré, te za tiwi ti'ā, ĩhāiba amo hā. Tawamhā ĩhāiba amo si te za tirē, 'Re ĩhāimana u'āsi mono hā.

⁴² Taha wa, te za asimiza'rese, ĩzō 're asimipari u'āsi za'ra wa'aba mo, wa hā Asib'apito za'ra wa'wa hā apā we ĩmorĩzé hā bādā hā waihu'u za'ra wa'aba ō wa.

⁴³ Wa za duré aima āma romnhimire'é za'ra wa'wa, āma rosa'rata za'ra wa'aba da. 'Ri tede'wa hā ĩsōrōwa u ĩsipsaihuri ĩwisizé hā, bādā te te waihu'u sirōmo wamhā, tawamhā barana te za sō rob'madā'ā u'āsi, sōtō āna, 'ri para u sébré tō da, tiwi sipsaihuri ō'umnhasite.

⁴⁴ Tane duré, a norĩ wa'wa hā te za asimiza'rese ĩzō 're asōpré u'āsi aba mo. E marĩ wa. Wa hā dasiré ĩpodo hā nimahā bātā na ĩzō asimipari za'ra wa'aba ō zém na za we apā ĩmorĩ na dā'āsina. — Āne te Zezusi hā wama roti za'ra, ĩsiré 're ĩwanomro mono norĩ ma, wanhimiza'rese sō 're wanhimipari za'ra mono da.

*Romhuri'wa ĩ'umnhasi wasu'u, romhuri'wa ĩ'umnhasi'ō wasu'u me
Rucasi 12.41-48*

⁴⁵ Tawamhā Zezusi te duré wama āma romnhimire'é za'ra, āne:

— Dama romhuri'wa ĩ'umnha hā duré ĩsimiroti wē hā, e niha 're ĩhāimana mono zé hā. Āne hā 're hāimana mono wamhā, te za ĩsib'apito hā nimomo tiwi morĩ ō ré, tāma pisutu, uburé tāma ĩromhuri'wa norĩ hā ĩsa'u nherē, te te sō 'madā'ā za'ra da. Te za duré tāma roti, bātā pisutuzém na ĩsazéb da hā, te te tāma āma uwaimrami za'ra da, tāma ĩromhuri'wa norĩ ma.

⁴⁶ Tawamhā apā we ĩmorĩzéb u, tinhib'apito nhimiroti hā te te tāma āma uwaimrami wamhā, tāma rowē di za, romhuri'wai ma hā.

⁴⁷ Taha ma, tāma rowē uptabi di za tō. E marĩ wa. ĩsib'apito hā apā wisi wapsi, te za tāma pisutu, uburé ĩsimarĩ hā te te tāma 're 'madā'ā u'āsi mono da oto, tāma umnhasi uptabi wa.

⁴⁸ Tazahā, tinhib'apito za're'ra, ĩsimiroti hā te te tāma āma uwaimrami ō wamhā, tāma rowē ō di za. Āté apito za're'ra, te za 'rāwi sima tinha: "ĩnhib'apito hā simahudu ō di."

⁴⁹ Tawamhā sō rowaptā'ā wē te, te za oto tizapari romhuri'wa norĩ hā te te 're ahā za'ra. Āzé hā te za duré te te 're hāsi, āzézei'wa norĩ siré. Siwa'ru te za oto 're hāimana.

⁵⁰ Tawamhā simisa'rese āna hāimana ré, te za ĩsib'apito hā ĩtēme wi apā, sō ĩsimipari ō zém na nimahā bātā na, siwa'ru.

⁵¹ Tawamhā sa'ētē te za azā, tāma ĩromhuri'wa hā. Tane ni'wam norĩ hā apā we ĩmorĩ ō ré, 'Re ĩhāimana u'āsi mono nhimiroti te te 're 'madā'ā pese za'ra mono ō wamhā, te za tāma pisutu za'ra, ropipa u 're sisisi mono da, dasiré, ĩsimiroti hā te te 're 'madā'ā pese za'ra mono newa, taré āma 're dawata za'ra mono da, 're ĩhāimana wasété za'ra mono norĩ di. Tame te za oto 're 'ry'ry. Te za duré 're 'wasitete za'ra, te te 're robzépata za'ētē za'ra mono wa. — Āne na ma tō Zezusi hā wama waihu'u za'ra, ĩsiré 're ĩwanomro mono norĩ ma.

25

Pi'ōi hāiba tém norĩ hā dasina damro u, ĩs'aba'rézé wasu'u

¹ Tawamhā Zezusi hā ma tō tinhimiroromnhimire'é na wama rowasu'u za'ra, ĩsiré 're ĩwanomro mono norĩ ma, āne:

— Nimahā na si 'Re ĩhāimana u'āsi mono, da'āma 're ĩsib'a'uwē mono zéb da, apā we dazō ĩmorĩ wamhā, ni'wam norĩ si te za, ĩzō 're simipari za'ra mono sina, hāimana nhimiza'rese

're hâimana za'ra. Â norî wasu'u zarina, wa za âma aima romnhimiré'ê za'ra wa'wa, âne. Pi'ô îpréduptém norî hâ barana ma tô ai'aba'rê, dasina damro u, 10 na îhâiba za'ra hâ, îmro'ô norî hâ. Aibâ hâ za azarutu na îmro zô simipari za'ra da, ma tô îtême ai'aba'rê, pi'ô nhorôwa u. Âro'ore hâ te siré 'wasa hâiba bâ, aibâ hâ za pi'ô na îmro u wisi wa, te te tâma âma rob'uîwê za'ra da, zudezu norî hâimanazéb zarina.

²⁻⁴ Tane nherê, pi'ô îpréduptém norî hâ 5 na si ma tô hâiba mono bâ rob'râi wa'u to hâ siré 'wasa, simhi ne êtê 'manharî 're, âro'ore da hâ, ta norî si hâimana nhimiza'rese 're hâimana za'ra mono wa. Îhâiba amo norî hâ 5 na îhâiba za'ra hâ te te siré 'mai'âri za'ra ô di, rob'râi wa'u tob ré hâ simhi ne êtê 'manharî 'remhâ, hâimana nhimiza'rese 're hâimana za'ra mono ô wa.

⁵ Tawamhâ aibâ zô te tirowaptâ'â hâ, za pi'ô na îmro zô. Sô rowaptâ'â wamhâ, ma tô aptâ hâ simro. Taha wa, ma tô nasi titomhâima'â za'ra. Taha wa, te oto tinhotô za'ra, îwana.

⁶ – Tawamhâ mara wa'wa ma tô ni'wa hâ 'mahâ: “Ôhóta te we oto aibâ hâ mo. We aiwairébe su'u aba, wa te wasina uzusi za'ra hâ.” Âne te ni'wa hâ aibâ hâ dama 'mahâ.

⁷ – Tawamhâ pi'ô îpréduptém norî hâ sô îsimipari za'ra hâ ma tô ti'utu za'ra. Utu za'ra wamhâ, âro'ore na wedenhorô hâ ma tô sôrô nhîhâri za'ra, ro'o wê da.

⁸ Tawamhâ hâimana nhimiza'rese âna 're îhâimana za'ra mono norî hâ ma tô tiwi rowaptêrê za'ra, tihâiba amo norî wi, hâimana nhimiza'rese sina 're îhâimana za'ra mono norî wi: “Ma'âpê syry na wama sa'wari za'ra wa'aba, âro'ore na rob'râi wa'u to hâ. Âro'ore hâ wate za'ra hâ te za oto wawi tidâ'â za'ra.” Âne te pi'ô îpréduptém norî hâ tisiré norî wi rowaptêrê za'ra.

⁹ – Tawamhâ asa te tâma nharî za'ra: “Rob'râi wa'u to hâ wa te aima sômri za'ra wa'aba ô di za. Mara wab ô di za, wa te aima a za'ra wa'aba wamhâ. Te za wawi ai'utôri za'ra. Ma'âpê tiha, da te 're î'uipra za'ra mono zéb u, ai'aba'rê su'u aba, tamemhâ asima 'mai'uipra za'ra wa'aba da.” Âne te satôri za'ra, tisiré norî hâ.

¹⁰ – Tawamhâ pi'ô îpréduptém norî hâ hâimana nhimiza'rese âna 're îhâimana za'ra mono norî hâ ma tô ai'aba'rê, rob'râi wa'u tob zô, te te sima 'mai'uipra za'ra da. Tawamhâ ta norî za'u si ma tô aibâ hâ wi, timro zô. Wisi wamhâ, pi'ô îpréduptém norî hâ 5 na îhâiba hâ hâimana nhimiza'rese 're îhâimana za'ra mono norî hâ ma tô îsiré asisi 'ri para u, îsiré saihuri da, sina îmro zahuré zém na. Sisisi wamhâ, ma tô îrê 'ridawa nhitop tete za'ra ni.

¹¹ – Âma ronomro za'ra wapsi, ma tô îhâiba amo norî hâ aihutu apâ, pi'ô îpréduptém norî hâ, aibâ hâ pi'ôî âma îmrozéb u hâ. Sihutu wamhâ, âne te nasi 'mahârâ za'ra, rowi hawi: “Apito, apito, wei wama 'ridawa za'ra na, âma atême wanhisisi da.”

¹² – Tawamhâ aibâ hâ pi'ô na îmro hâ te asa tâma nharî za'ra: “Mare di. Te aima 'ridawa za'ra wa'aba ô di za, îma aiwaihu'u za'ra wa'aba ô wa.” Âhâ wasu'u na wa tô aima âma romnhimiré'ê za'ra wa'wa, âne na hâ.

¹³ – Taha wa, a norî wa'wa hâ aihâimana nhimiza'rese te za îzô 're asôpré u'âsi aba mo, bâdâ hâ aima waihu'u za'ra wa'aba ô wa, apâ za we îmorizé hâ. – Âne ma tô Zezusi hâ wama waihu'u sirômo za'ra, îsiré 're îwanomro mono norî ma.

Romhuri'wa norî hâ, tinhîb'apito zô rob'uiprazé te te 're î'madâ'â za'ra mono norî wasu'u Rucasi 19.11-27

¹⁴⁻¹⁵ Tawamhâ Zezusi hâ ma duré tinhimiromnhimiré'ê na marî hâ wama waihu'u za'ra, îsiré 're îwanomro mono norî ma, âne:

– 'Re îhâimana u'âsi mono, za da'âma 're îsib'a'uwê mono zém na, wa za duré aima âma romnhimiré'ê za'ra wa'wa, âne. Aibâ hâ ma tô sima rowê, darob amoi u morî da. Tawamhâ morî ô ré, ma tô sô tîhârâ za'ra, tâma îromhuri'wa norî zô, tite rob'uiprazé hâ te te tâma sômri za'ra da, îsa'u te te sô 're 'madâ'â za'ra mono da, duré tâma sina hâ'â da, taré 're simi'wara tô mono da, rob'uiprazé hâ. Îsimiromhuri wê na tâma î'umhâsi za'ra zarina, ma tô tâma sômri za'ra. Îmorî'rata ma hâ ma tô 5 miu na tâma tisô rob'uiprazé îsapotore hâ, oru 'manharî hâ. Duré îsâna're ma hâ 2 miu na ma tô tâma tisô. Duré da'râsutu'wai ma hâ, miu na ma tô tâma tisô. Taha pari te oto mo, darob amoi u, danhib'apito hâ.

¹⁶ Tawamhâ tâma îromhuri'wa hâ, 5 miu na rob'uiprazé îsapotore te te î'âri hâ ône haré ma tâma sina hâ, te te âma îromhuri wê zéb zarina. Tawamhâ 5 miu na nherê, ma tô duré 5 miu na âma ato, îsib'apito te te tâma îsômri na hâ. Uburé hâ 10 miu na oto, rob'uiprazé îsapotore hâiba hâ, âma sito wamhâ.

¹⁷ Tane duré tâma îromhuri'wa hâ 2 miu na rob'uiprazé îsapotore te te î'âri hâ ma tô duré tâma sina hâ. 2 miu na nherê, ma tô duré 2 miu na âma ato. Uburé hâ 4 miu na îhâiba hâ oto.

¹⁸ Tane nherê, tâma îromhuri'wa hâ miu na rob'uiprazé îsapotore te te î'âri hâ tinhîb'apito nhimiroti te te 'madâ'â ô di. Taré ma tô sada ab're, tinhîb'apito wi, rob'uiprazé hâ te te sêrê da.

¹⁹ — Tawamhã âma ronometro hã wapsi, ma tã ïsib'apito za'ra hã apã ïtême tiwisi za'ra, darob amoi hawi. Wisi wi, te só tihârã za'ra, tâma ïromhuri'wa nori zô, rob'uiprazé ïsapotore hã niha si te te hâimana mono zô, te te tâma wasu'u za'ra da.

²⁰ Tawamhã romhuri'wa hã 5 miu na rob'uiprazé te te aré ï'ari hã ma tã ïtême âzé ïmorî'rata na, tinhib'apito u. Âne te tâma tinha: "Apito, rob'uiprazé ïsapotore hã 5 miu na ma tã ïma ïsô, asa'u aima sina hã'ã da, tawapsi, aima âma ïsitob da, taré aiwi simi'wara tã da. Âhãta ma tã sina hã, 5 miu na, te âma aima ïromhuri wê zéb zarina. Uburé hã 10 miu na oto ïhâiba hã, rob'uiprazé ïsapotore hã. Âhãta te asô nomro." Âne te romhuri'wa hã tinhib'apito ma wasu'u, tinhimiromhuri hã.

²¹ — Tawamhã ïsib'apito te asa tâma tinha, âne: "Wê di tã. A hã ïma romhuri wê 'wa. ïma ai'umnhasi di. Rob'uiprazé hã syryre nheré, ma tã âma ïromhuri wê, ïzô. Taha wa, âhã nhipai u wa za oto aima pisutu, marî ahã uptabi na ïma 're ab'madã'ã u'âsi mono da. Te za oto ïsiré 're aihâimana mo, wasiré âma 're watoi u'âsi mono da." Âne ma tã tâma ropisutu siro, tâma ïromhuri wê 'wai ma.

²² — Tawamhã romhuri'wa hã 2 miu na rob'uiprazé te te aré ï'ari hã ma tã duré ïtême âzé, tinhib'apito u. Tawamhã âne te tâma tinha: "Apito, rob'uiprazé ïsapotore hã 2 miu na ma tã ïma ïsô, asa'u aima sina hã'ã da, tawapsi, aima âma ïsitob da, taré aiwi simi'wara tã da. Âhãta ma tã aima sina hã, 2 miu na, te âma ïromhuri wê zéb zarina, aima. Uburé hã 4 miu na ïhâiba hã rob'uiprazé ïsapotore hã. Âhãta te asô nomro." Âne te romhuri'wa hã tinhib'apito ma siwasu'u, tinhimiromhurizém na.

²³ — Tawamhã ïsib'apito asa te tâma tinha, âne: "Wê di tã. A hã ïma romhuri wê 'wa. ïma ai'umnhasi di. Rob'uiprazé hã syryre nheré, ma tã âma ïzô ïromhuri wê. Taha wa, âhã nhipai u wa za duré aima pisutu, marî ahã uptabi na ïma 're ab'madã'ã u'âsi mono da. Te za oto ïsiré 're aihâimana mo, wasiré âma 're watoi u'âsi mono da." Âne ma tã duré tâma ropisutu siro, tâma ïromhuri wê 'wai ma hã.

²⁴ — Tawamhã romhuri'wa hã miu na rob'uiprazé te te aré ï'ari hã ma tã duré ïtême âzé, tinhib'apito u. Tawamhã âne te tâma tinha, ta hã senai ô na hã: "Apito, ïma aiwaihui'u pese di. A hã da'âma 're aipê'êzé mono ô. Ni'wa hã te te dame 're rob're mono ô nheré, danho hã tite da, te te dawî sima 're ï'a'râihâri mono ne, te danhimarî hã dawî asima 're ï'awaibui mo, ate da.

²⁵ Âne na te aiwaihui'u wa, wa tã aima ïpahi. Taha wa, te aiwi simini wa, niha ïma rob'manharî ô'umnhasite, wa tã rob'uiprazé ïsapotore hã simi'u ti'ai rowi, wê na asô 're sa'wari mono da. Âhãta te wê na asô nomro, uburé ate rob'uiprazé hã te asô 're 'madã'ã mono da, ïma ïsômi hã." Âne te romhuri'wa hã tâma siwasu'u, tinhib'apito ma.

²⁶ — Tawamhã ïsib'apito, te âne asa tâma tinha: "A hã ïma romhuri wasété 'wa. Aiwa'uptabi di. Ma tã ï'ama ïrosa'ra, marî hã date nheré, te dawî ïsima 're ï'awaibui mono na, ïte da. Âne ma tã ï'ama ïrosa'ra, asima.

²⁷ Âne na 're ïhâimana mono wamhã, e marî wa bété, rob'uiprazé ïzô sêrê ô di, wedehãpã 're. Tawamhã apã we ïwisi wapsi, te aima ïsômi nhipai u, wa aré ïsima waze uburé, ïzô sina hã'ã wa." Âne ma tã tâma waihui'u, tâma ïromhuri wasété 'wai ma.

²⁸⁻²⁹ Tawamhã te duré tâma rowasu'u za'ra, uburé ï'rata ïsimasam nori ma: "Ni'wam nori hã marî ahã nheré, simi'ê na te te 're romhuri za'ra mono wamhã, te za âma tâma 're dasito, marî na. Tane nheré, ni'wam nori hã marî syryre na simi'ê na te te âma 're romhuri za'ra mono ô wamhã, te za syryre nheré, tiwi sani za'ra ni. Taha wa, te za tiwi ï'ari 'wa, rob'uiprazé ïsapotore hã, ïma romhuri wasété 'wai wi, 10 miu na te te ïzô ïhâiba ma, sômiri aba da.

³⁰ Taha pari, te za asiwi ïmei wa'wa rob u, robra u. Tame te za oto sina tiwawa. Te za duré 'wasitete, te te robzépata za'êtê wa." Âne ïsib'apito hã ma tã dama hâiba 'ru. — Âne na ma tã Zezusi hã wama âma romnhimiré'ê za'ra, ïsiré 're ïwanomro mono nori ma.

Zezusi hã, za da'âma ïsipo'ozé wasu'u

³¹ Tawamhã Zezusi hã ma tã duré romhã ré wama rowaihu'u sirômo za'ra, âne:

— Wa hã ti'ai âma dasiré ïpodo hã niwapsi wa za wei mo apã ïmama zadawa para, hâiwa âma tâma ïromhuri'wa nori siré. Tawapsi wa za danhib'apito simasisizém na 're ïnamra, ïpire na te 're da'ab'madã'ã u'âsi mono da oto.

³² Tame te za aihîni pese ïnho're aimasam ni, daro mono bã 're ïdahâimana za'ra mono nori hã, dapoto mono bã. Tawamhã tame wa za oto da'âma aipo'o. Pone'êrebã 'madã'ã wa hã te za tinhimizama na 're sipo'o, pone'êrebã zéré mapu hã, pone'êrebã zéré uzé zama. Tane wa za duré wa hã da'âma aipo'o, ïwê hã duré ïwasédé hã.

³³ Re ĩhâimana u'âsi mono nhimiroti te te 're ĩ'madâ'â pese za'ra mono norĩ hã ĩnhimire niwĩ wa za sôré, ta norĩ si te 're awêsâmri mono wa. 'Re ĩdanomro waseté mono norĩ hã ĩnhimi'e niwĩ wa za duré sôré, ta norĩ si te ĩsiwi 're awê'ô pese mono wa.

³⁴ Tawamhã wa hã uburé Danhib'apito hã wa za âne ta norĩ ma nharĩ za'ra, ĩnhimire niwĩm norĩ ma: "Īmama, ĩwê si te te aima 're ĩsômri za'ra wa'aba mono norĩ hã te za oto ĩ'rata 're aihâimana u'âsi za'ra wa'aba mo. Duréihã te te aropoto mono wamhã, ma tã sima aipisutu za'ra wa'wa, ai'âma 're sib'a'uwê za'ra wa'aba mono da. Taha wa, te za oto ĩ'rata 're aihâimana u'âsi za'ra wa'aba mo, ai'âma 're sib'a'uwê u'âsi za'ra wa'aba mono da oto.

³⁵ Ti'ab ré, mram na 're ĩhâimana mono ré hã, ma tã mra hã ĩma 're ĩsômri za'ra wa'aba mono. Duré 'rubu ré ma tã ô hã ĩma 're ĩ'ôb za'ra wa'aba mono. Duré asiré ô nherê, ma tã ĩzô 're atob'uzu za'ra wa'aba mo, asôrowa u atême 're ĩzasi aba mono da.

³⁶ ĩ'uzza ô ré, ma tã asiwi 're ĩ'uzza za'ra wa'aba mo. Duré ĩhâzé wa, ma tã asiwi 're ĩpibui wa'aba mo. Dazazéb 're, 're ĩza mono ré, ma tã duré asiwi 're ĩzabu za'ra wa'aba mo. Âne na 're ĩpawaptob u'âsi za'ra wa'aba mono wa, hãiwa âma te za oto ĩsiré 're anomro u'âsi aba mo, ĩmama hã ai'âma 're ĩsib'a'uwê za'ra wa'aba mono zéb âma hã." Âne na wa za nimahã na hã tâma ĩsiwasu'u za'ra, ĩnhimire niwĩ ĩsimasam norĩ ma.

³⁷ — Tawamhã ô norĩ hã 'Re ĩhâimana u'âsi mono nhimiroti te te 're ĩ'madâ'â pese za'ra mono norĩ hã te za sina ĩzadanharĩ za'ra, âne: "Wanhib'apito, e niwa wa tã mra hã wa te aima 're sômri za'ra, mram na 're aihâimana mono ré hã. E niwa duré 'rubu na 're aihâimana mono ré, wa tã ô hã wa te aima 're ôb za'ra.

³⁸ E niwa wa tã aiwaih'u u ô nherê, asô 're watob'uzu za'ra, wanhorôwa u zama 're azasi mono da. E niwa wa tã duré ai'uzazéb da hã wa te aima 're sômri za'ra, ai'uzza ô wa.

³⁹ E niwa wa tã duré wa te wasiwi 're aipibu, aihâzé ré. E niwa wa tã duré atême 're wanomro, wa te 're asabu za'ra mono da, dazazéb 're, 're asa mono ré hã." Âne te za ta norĩ hã sina amrami za'ra, ĩma.

⁴⁰ — Tawamhã wa hã uburé Danhib'apito hã wa za ta norĩ ma âne tâma rowasu'u za'ra: "Tã sena wa aima rowasu'u za'ra wa'wa. ĩsisânawã norĩ hã ti'ab ré âne na te te 're robzépata za'ra mono wamhã, dama wapu na 're hâimana za'ra mono nherê, marĩ ĩwê hã tã ôhõ na hã tâma 're 'manharĩ wê za'ra wa'aba mono wamhã, ta norĩ hãiba u'âbã ma tã ĩma 're ĩ'manharĩ wê za'ra wa'aba mo." Âne na wa za ta norĩ ma waih'u za'ra.

⁴¹ — Tawamhã ĩnhimi'e niwĩ ĩsimasam norĩ ma, wa za nharĩ za'ra oto, âne: "A norĩ wa'wa hã ma tã 'Re ĩhâimana u'âsi mono hã te te siwi 're aiwê'ô pese za'ra wa'wa. Mo oto ĩnhiti ai'aba'rêi wa'aba, unhama ro'ô u'âsi u, wa'uburé norĩ zô 'Re ĩhâimana u'âsi mono te te ĩpisutuzéb u, ta norĩ nhib'apito zô zama.

⁴² Ti'ab ré mram na 're ĩhâimana mono ré hã, ĩsa hã ĩma 're sômri za'ra wa'aba mono ô di. Duré 'rubu ré, â hã ĩma 're ôb za'ra wa'aba mono ô di.

⁴³ Wa hã aima ĩwaih'u u za'ra wa'aba ô nherê, ĩzô 're atob'uzu za'ra wa'aba mono ô di, asôrowa u 're ĩzasi aba mono da hã. Duré ĩ'uzza ô ré, asiwi 're ĩ'uzza za'ra wa'aba mono ô di. Duré ĩhâzé ré, asiwi 're ĩpibu za'ra wa'aba mono ô di. Dazazéb 're, 're ĩza mono ré, ĩtême 're anomro aba mono ô di, 're ĩzabu za'ra wa'aba mono da." Âne wa za ta norĩ ma nharĩ za'ra, ĩnhimi'e niwĩ ĩsimasam norĩ ma hã.

⁴⁴ — Tawamhã ta norĩ hã te za asa ĩma nharĩ za'ra, âne: "Apito, e niwa wa tã taré wa te 're ai'madâ'â za'ra, mram na 're aihâimana mono ré hã, duré 'rubu 're sépata mono ré hã, duré wama aiwaih'u u ô nherê, nima hawi watême 're aimasisi mono na hã, duré ai'uzza âna 're aimorĩ wamhã, duré aihâzé na 're aihâimana mono ré hã, duré dazazéb 're, 're asa mono ré hã. E niwa wa tã âne na hã taré wa te 're ai'madâ'â za'ra, wa te wasiwi 're aipawaptob za'ra mono âna." Âne te za duré ta norĩ hã ĩzadanharĩ na ĩma wa'rãmi za'ra, ĩnhimi'e niwĩ ĩsimasam norĩ hã.

⁴⁵ — Tawamhã ta norĩ ma, wa za duré âne rowasu'u za'ra: "Tã sena wa aima rowasu'u za'ra wa'wa. Ti'ab ré, â norĩ hã dama wapu na 're ĩhâimana za'ra mono norĩ hã âne na te te 're robzépata za'ra mono ré hã, marĩ ĩwê na 're pawaptob za'ra wa'aba mono ô di. 'Re pawaptob za'ra wa'aba mono ô wamhã, ta norĩ hãiba u'âbã, asiwi 're ĩpawaptob za'ra wa'aba mono ô di duré." Âne wa za ta norĩ ma, tâma waih'u u na wa'rãmi za'ra, ĩnhimi'e niwĩ ĩsimasam norĩ ma hã.

⁴⁶ — Tawamhã ta norĩ hã te za oto ai'aba'rê, 'Re ĩhâimana u'âsi mono nhiti, ĩsimihâzém na za te te 're ĩrobzépata u'âsi za'ra mono zéb u hã. 'Re ĩhâimana u'âsi mono nhimiroti te te 're ĩ'madâ'â pese za'ra mono norĩ si, te za ĩ'rata 're hâimana u'âsi za'ra, rowê u'âsi âma.

26

Zezusihĩ āma da te ĩrosa'rata za'ra zé, da te dasiwi wĩrĩ da

Marcusi 14.1-2; Rucasi 22.1-2; Zuwā 11.45-57

¹ Tawamhā Zezusi hā tinhimiroti na uburé āne na te dama rowahutu parimhā, ma tō wama nharĩ za'ra, ĩsiré 're ĩwanomro mono norĩ ma, āne:

² — Romhuture di oto, dato hā da te 're ĩmanharĩ za'ra mono zéb u hā, 'Re ĩhāimana u'āsi mono, Ezitu hawi te te ĩdawaibuzém na āma dasipo're pu'u za'ra da, Pascowa na dato nhisi hā. Awé amo na te za ĩwa waptārā, bādā hā. Āne hā aima waihu'u pese za'ra wa'aba di. Tawapsi te za oto dasiwi ĩhāiba nhomri ni, Danho'reptui'wa da 'Re ĩhāimana u'āsi mono te te ĩpisudu hā, da te dasiwi ĩzasōmri da hāiwi, wedepo'o nhonhi'rāmi na. — Āne ma tō Zezusi hā sina wama rowasu'u sirōmo za'ra, ĩsiré 're ĩwanomro mono norĩ ma.

³ Tawamhā sasedoti ĩpire norĩ hā, duré zudezu norĩ ma roti'wa norĩ hā ma tō si'rā'ōtō, Caipasihi nhorōwa u, 'ri za'ētē u. Ta hā sasedoti ĩpire uptabi, 're ĩhāimana mono, 'Re ĩhāimana u'āsi mono ma, da'āma romhuri'wa.

⁴ Tawamhā, sitēme si'rā'ōtō wamhā, ma tō sima āma rosa'rata za'ra. Taha wa, te roti hā pi'uriwi siwi 'manha, Zezusi hā pi'uriwi te te siwi āri da, da te oto dasiwi wĩrĩ da.

⁵ Āne te sima āma roti za'ra:

— Dasa hā da te 'manharĩ za'ra ré, wa te wasiwi āri ō di za, wazada dazahi za'ra ō'umnhasite, wazada dahāimana za'ra tō da. — Āne ma tō sima āma roti'rāsutu za'ra.

Pi'ō nhoprubzé wasu'u, Zezusihi ma

Marcusi 14.3-9; Zuwā 12.1-8

⁶ Tawamhā Zezusi hā ma tō mo, Betānha na 'ri wa'ōtō nhisi u. Tame te oto nhamra, Simahā nhorōwa āma, ĩ'wa're ré nhorōwa āma.

⁷ Tawamhā sai ma sāmra ré, ma tō pi'ō hā ĩtēme wi, Zezusihi u. Wedewa'u zadaze hā ma siré sada āwisi, ētē 'manharĩ remhā, simhi ne 'remhā ĩdup syryre wamhā. Wa'ābā za'ētē di ta hā, wedewa'u zadaze hā. Wa'ābā za'ētē nheré, ma tō Zezusihi 'rā nhisiwi sa'wa pi'ō hā, tāma sawi wa.

⁸⁻⁹ Tawamhā wa norĩ hā Zezusihi siré 're ĩwanomro mono norĩ hā āne hā wa te 'madā'ā za'ra wamhā, wa tō sada ab'ru za'ra ni, pi'ō da. Taha wa, wa tō wasima āma nharĩ za'ra ni, āne:

— Oro ō hā wa'ābā za'ētē za, ma taré ĩ'rā nhisiwi sa'wa, wedewa'u zadaze hā. Te te dama wede 'wa'āhā, aré wa'ābā za'ētē di. Tawamhā ĩwa'ā hā te aré ĩsibrob'ō norĩ ma, te te sōmri. — Āne wa tō wasima āma nharĩ za'ra ni, pi'ō nhoprubzém na hā.

¹⁰ Tawamhā Zezusi hā wa te wasima āma ĩnharĩ za'ra zé hā te te wawi waihu'u za'ra wamhā, te āne na wazadanharĩ za'ra:

— E marĩ da, te pi'ōi ma ĩnharĩ za'ra wa'wa. Tāma nharĩ za'ra wa'aba tō. Tō'ā. ĩ'uwaibaba ma tō āne na hā āma ĩzawi wē.

¹¹ ĩsibrob'ō norĩ hā te ai'rata 're si'ubumroi u'āsi 'wa, 're ĩpawaptob za'ra wa'aba mono zéb da hā. Tanei ō di, wa hā. Ai'rata 're ĩnhamra u'āsi aba mono ō di za oto.

¹² Pi'ō hā wedewa'u zadaze hā ĩ'rā nhisiwi te te sa'wari wamhā, za ĩdā'ā wa, da te dasiwi ĩnherézéb u te te āma ĩhāiba u'ré da, ma tō āne hā ĩma 'manha, zudezu norĩ hāimanazéb zarina.

¹³ Daro mono bā te za ĩwasu'u wē na da te 're dapo're pu'u za'ra. Tawamhā pi'ō hā te te ĩma ĩmanharĩ wē zém na zama, te za da te dasima 're wasu'u u'āsi za'ra, āma 're dasipo're pu'u za'ra mono da. Tō sena, wa āne aima waihu'u za'ra wa'wa. — Āne ma tō Zezusi hā wama waihu'u za'ra, ĩsiré 're ĩwanomro mono norĩ ma.

Zudasi hā, Zezusi te te dama hāiba nhomri da, te te sima ĩrosa'ratazé wasu'u

Marcusi 14.10-11; Rucasi 22.3-6

¹⁴ Tawamhā 12 na Zezusihi siré 're ĩwanomro mono norĩ hā misi wa tō wa'maimorĩ ni, Zudasi Icarizoti na ĩsisi hā sasedoti ĩpire norĩ u, te te sadanharĩ za'ra da.

¹⁵ Tawamhā āne te sadanharĩ za'ra:

— Zezusi hā ma tō asima ĩwē za'ra wa'wa, asiwi āri aba da. E āne hā aima wē za'ra wa'aba di za, te aima ĩhāiba nhomri za'ra wa'aba da hā. Aima wē za'ra wa'aba wamhā, e niha te za ĩma ĩwa'ābā za'ra wa'wa. — Āne te āma sadanharĩ za'ra, Zudasi Icarizoti hā, 'Re ĩhāimana u'āsi mono ma, da'āma romhuri'wa norĩ ĩpire za'ra norĩ hā.

Tawamhā āne na āma sisaze za'ra wamhā, ma tō rob'uiprazé ĩspotore hā tāma sa'rata za'ra, 30 na ētē'ubuzi'a prata 'manharĩ hā. Taha pari, ma tō tāma sōmri za'ra, Zudasihĩ ma.

¹⁶ Tawamhā ta hawim haré te oto Zudasi hā sima āma rob'madā'ā u'āsi, nimahā bātā na Zezusi te te oto dama ĩhāiba nhomrizéb da hā, danhimiza'rese āna dahāimana za'ra ré.

*Zezusi nori hã Pascowa na siré Isaihurizé wasu'u
Marcusi 14.12-21; Rucasi 22.7-23; Zuwã 13.21-30*

¹⁷Tawamhã bâdã ma tô iwa waptãrã, i'u'ëtê duptoio, da te 're ihuri mono zé hã, Pascowa na dato nhisi hã. Taha ré, wa tô Zezusihi siré 're iwanomro mono nori hã wasina tété za'ra ni, wa te wasiwi sadanharĩ za'ra da, ãne:

— E momo ma tô asima irowê, asô iwanhipi za'ra zéb da hã, Pascowa na dato nhisi na iwasaihurizéb da hã. — ãne, wa tô wasiwi sadanharĩ ni, Zezusi hã.

¹⁸Tawamhã Zezusi te asa wama nharĩ za'ra:

— 'Ri ahã u te za oto ai'aba'réi wa'wa, aibã hã asiwi sôpêtê aba da. Tawamhã ãne te za tâma ižadawa wasu'u wa'wa: "Wama rowahutu'wa hã wa za aima sadawa wasu'u za'ra ni, ãne: 'Inhibãdã hã romhuture di oto, Imama te te ipisutuzé hã, i'ãma. Asôrowa ãma wa za wasa hã huri ni, Isiré 're inomro mono nori me, Pascowa na dato nhisi na 're idasaihuri mono zém na hã." ãne te za tâma ižadawa wasu'u za'ra wa'wa, aibã ma. — ãne hã ma tô Zezusi hã wama waihu'u za'ra.

¹⁹Tawamhã Isiré 're iwanomro mono nori hã wa tô ãma uwaimrami za'ra ni, te te wama iwaihu'u za'ra zéb zarina. Wanhipi wa tô 'manharĩ za'ra ni, Pascowa na dato nhisizém na.

²⁰Tawamhã mara wamhã, wa oto asimro ni, wasiré wasaihuri da, 12 na wahãiba za'ra hã, Zezusihi me.

²¹Tawamhã wasaihuri ré, ma tô Zezusi hã wama waihu'u sirômo za'ra, ãne:

— Tô sena, wa aima waihu'u sirômo za'ra wa'wa. Misire te za dama i'maihãiba nhomri 'wa.

²²ãne, wa te wasina mreme wapari za'ra wamhã, ma tô wawi tirobzei'ô pese za'ra, Isiré 're iwanomro mono nori wi hã. Ahã wamhã, misi si wa tô nasi ãma tâma romnomri za'ra ni, ãne:

— Wanhib'apito, e wa hã te dama aihãiba nhomri da bâ, te ãne wama inharĩ za'ra. — ãne, wa nasi wasina tâma amrami za'ra ni, ãne na hã wasiwaihu'u za'ra ô wa.

²³Tawamhã asa te Zezusi hã duré wama nharĩ za'ra:

— Za dama ihãiba nhomri'wa hã, i'u'êne hã te za piza'a 're Isiré di'.

²⁴Wa hã ti'ai ãma dasiré ipodo hã duréihã ma tô idã'ázém na rob'ui'ére sirômo za'ra, 'Re ihãimana u'ási mono zadawa wasu'u'wa nori hã. Ta nori hã te te i'ãma irob'ui'ére za'ra zéb zarina wa za ãma mo tô, idã'ázéb u. Tane nheré, aibã ma, tâma 're ropipa uptabi mono di za, za te te dama ihãiba nhomri'wai ma hã. 'Re ihãimana u'ási mono za te te azãri wamhã, te za sima rosa'rata, ãne: "Ipoto ô 'wa'ãhã, aré wê di. E marĩ wa. ãne na te 're robzépata mono ô wa aré." ãne te za 'rãwi si'ãma rosa'rata, za dama ihãiba nhomri'wa hã. — ãne ma tô Zezusi hã wama waihu'u za'ra.

²⁵Tawamhã Zudasi hã dama isômri'wa da hã te Zezusi hã sina sadanha, ãne:

— Rowahutu'wa, e wa hã za te dama i'aihãiba nhomri na, ma tô asina iwaihu.

Tawamhã asa te Zezusi hã tâma tinha:

— Tane tô. Asi'uihã na ma tô ãne na hã asiwaihũ. — ãne ma tô Zezusi hã tizadawa na tâma warã.

²⁶Tawamhã wasaihuri ré, ma tô i'u'êne hã ti'ã, Zezusi hã. 'Re ihãimana u'ási mono ãma te iré ãma tiwata, sôpru wa. Taha pari, ma tô te te wê'ê, i'u'êne hã. Te te wê'êi mono parimhã, ma tô te te wama sômri, Isiré 're iwanomro mono nori ma. ãne te oto wama nharĩ za'ra:

— ã, i'u'êne hã huri aba. ã hã ihãiba te wasu'u. — ãne ma tô Zezusi hã sina wama waihu'u za'ra.

²⁷Taha pari, hãsizé hã ma duré ti'ã, uwa 'ru 'rãri wa'u isé ré hã. 'Re ihãimana u'ási mono ãma te duré tiwata, sôpru wa. Taha pari, ma tô iré te te wama sômri, uwa 'rãri wa'u isé ré hã. ãne te duré wama nharĩ za'ra:

— ã, rob'rãri wa'u hã ahuri aba, aihĩni.

²⁸ã hã iwapru, te wasu'u. Rob'rãri wa'u za'wari ne, te za iwapru hã iwi asa'wa, da'ahã zada idã'ã wamhã, 'Re ihãimana u'ási mono hã dawasédé hã te te oto 're ab'madã'ã tô mono da, da'ãma. ã hã iwapru, iwi sisa'wari wamhã, 'Re ihãimana u'ási mono hã tinhib'a'uwê ma, te te tâma iropisutuzé hã tô sena za te te tâma ãma 're i'uwaimrami mono zé, te wasu'u.

²⁹Tô sena, wa za aima isiwasu'u za'ra wa'wa. ãne hã rob'rãri wa'u te 're hãsi mono ô di za oto, a'ã. Niwapsi Imama hã uburé da'ãma 're sib'a'uwê mono wapsi, wa za duré te 're hãsi, asiré wa'aba. — ãne ma tô wama siwasu'u za'ra, Isiré 're iwanomro mono nori ma.

³⁰Tawamhã wanho're na wa tô ãma wawata za'ra ni, 'Re ihãimana u'ási mono ãma. Wanho're za'ra parimhã, wa tô wawairébé ni, Oriwera na êtê 'rãihã nhisi u wasi'aba'ré da.

*Pedru hã te te dawi i'udázém na, Zezusi te te tâma iwaihu'u sirômo zé wasu'u
Marcusi 14.27-31; Rucasi 22.31-34; Zuwã 13.36-38*

³¹ Tawamhã Zezusi hã ma tô Ìsiré 're Ìwanomro mono norĩ ma rowasu'u za'ra, ãne:

— A norĩ wa'wa hã ã barana, niha Ìma romhãimana wamhã, te za aihĩni asiwi Ìrême 'wa. Duréihã 'Re Ìhãimana u'ási mono zadawa wasu'u'wa hã ma tô ãne na Ì'ãma rob'ui'ééré siro, 'Re Ìhãimana u'ási mono mreme na hã: "Pone'ërebã 'madã'ã'wa hã wa za tiwĩ. Tawamhã pone'ërebã hã te za ropé." ãne na duréihã 'Re Ìhãimana u'ási mono mreme na rob'ui'ééré, Ìbaihã na hã.

³² Tane nherê, asiwi Ìrême aba nherê, ab're hawi apã Ìhãiu'utu parip si, wa za aiwana Ìmorĩ 'wa, Darireza na danhipti'a nho'õmo nhisi u, tamomo Ìnhopëtê za'ra wa'aba da. — ãne ma tô Zezusi hã wama siwasu'u za'ra, Ìsiré 're Ìwanomro mono norĩ ma.

³³ Tawamhã Pedru, te Zezusihi ma tinha:

— Asiré 're Ìwanomro mono norĩ hã aihĩni za te te airême za'ra nherê, wa hã te dame airême õ di za.

³⁴ Tawamhã Zezusi te asa tãma tinha, Pedruhu ma:

— Tô sena wa za aima rowasu'u. ãma aipo're pu'u za. ã barana si'a hãrã õ ré, te za si'ubdatõ dawĩ Ì'udã, aima Ìza'rese õ na.

³⁵ Tawamhã Pedru te duré tãma tinha, Zezusihi ma:

— Wa hã asiré Ìdã'ã da nherê, te dawĩ ai'udã õ di za, te Ì'aiwihu'u õ na hã. — ãne ma Pedru hã tizadawa na tãma wa'rã.

Tawamhã õhõ na si, wa tô wa norĩ hã Ìsiré 're Ìwanomro mono norĩ hã tãma wasiwasu'u za'ra ni, za wa te dawĩ Ì'udã za'ra õ na hã.

*Zezusi norĩ hã Zésemãni ãma Ìsi'ubumrozé wasu'u
Marcusi 14.32-42; Rucasi 22.39-46*

³⁶ Tawamhã Zezusihi me, wa tô ai'aba'rê ni oto, Zésemãni na rob're nhisi u. Wasihutu wamhã, ma tô wama nharĩ za'ra, Ìsiré 're Ìwanomro mono norĩ ma, ãne:

— ãme Ìzõ asimroi wa'aba. Õwa wa za a'ã mo asiti wa'aba, romnhiwasi Ìmama ma, Ìmreme da. — ãne ma wama siwaihũ'u za'ra, Zezusi hã.

³⁷ Tawamhã Pedru hã te siré saprõ, Zebedehe 'ra norĩ me. Tawamhã ma tô tiwi tirobzei'õ pese, Zezusihi wi. Za te te Ìrobzépatazê hã ma tô sima simimnhasi.

³⁸ Tawamhã Pedru norĩ ma, te rowasu'u, Zezusi hã:

— Ìpê'ëzé hã sa'ëtê na te Ìma tihãiba. Ìpê'ëzé uptabi wa, wa aré dãrã. ãme a'ã asimroi wa'aba Ì'rata, asõtõ ãna. Asõpré u'ási aba. — ãne ma tãma waihũ'u za'ra, Pedru norĩ ma.

³⁹ Tawamhã romhã prã na ma tô Ìsiti timorĩ za'ra, Zezusi hã. Dumana na te nomro ti'ai wa, Timama ma, mreme da. ãne te tãma mre:

— Ìmama, asima wê wamhã, Ìma ba'a, Ìdã'ázé hã te sépata tõ da. Tane nherê, te Ìsima Ìwézéb uwaibaba, Ìma pisutu õ di za. Asima Ìwézéb uwaibaba si, te 'manharĩ da hã, Ìma wê di. — ãne te Timama ma siwasu'u, Zezusi hã.

⁴⁰⁻⁴¹ Tawamhã Timama ma mreme pari, ma tô apã mo, Pedru norĩ u. Sõtõ za'ra ré, ma tô siza za'ra. Tawamhã Pedruhu ma, te tinha, Zezusi hã:

— E niha asimiza'rese syry na asãmra da hã, aima waihũ'u õ di, Ìsiré. Satanasihĩ zãda, asiptete sina 're aihãimana za'ra wa'aba mono da, asima 're wê za'ra wa'aba mono nherê, asi'uihã na sada 're asiptete waihũ'u za'ra wa'aba mono õ di. Taha wa, asimiza'rese te za ai'ubumroi wa'wa ãhãna hã, 'Re Ìhãimana u'ási mono wi, asima rowaptêrê za'ra wa'aba da, Wa'uburé nhimiwada'uri wasété wi, te te aipawaptob za'ra wa'aba da. — ãne ma tô Zezusi hã tãma waihũ'u za'ra.

⁴² Tawamhã te duré romhã prã na Ìsiti timorĩ za'ra, Timama ma mreme da. ãne te tãma mre:

— Ìmama, Ìdã'ázé hã te sépata da, asima wê wamhã, Ìma wê di duré, asima Ìwézéb uwaibaba, Ìma pisutu da. — ãne te Timama ma siwasu'u, Zezusi hã.

⁴³ Timama ma mreme pari, te duré apã mo, Pedru norĩ u. Sõtõ za'ra ré, ma duré siza za'ra. Aptã'ã si te huri u'ási, sõpré waihũ'u ãna.

⁴⁴ Tawamhã apã te duré Ìsiti timorĩ za'ra Zezusi hã, Timama ma mreme da. Si'ubdatõ ma oto sina siri. Tô õhõ na si te tãma mre, tãma Ìmreme na'rata zéb zarina.

⁴⁵ Tawamhã apã te duré mo, Pedru norĩ u. ãne te duré tãma nharĩ za'ra:

— E niha bã te zahadu asõtõ za'ra wa'wa bété. Ma'ãpé, waihũ'u za'ra wa'aba. Romhuturu di oto bãdã hã, Ìmama te te Ì'ãma Ìpisutuzé hã. Wa hã ti'ai ãma dasiré Ìpodo hã te za aibã hã tãma Ìhãiba nhomri za'ra oto, aibã Ìwasété norĩ ma.

⁴⁶ Oto aiwahutu za'ra wa'aba. Wasĩ'aba'rêi hã. Õhõta te we oto mo, dama Ìhãiba nhomri'wa da hã. — ãne ma Zezusi hã sina tãma waihũ'u za'ra, tisiré norĩ ma.

*Zezusi hã da te dasiwi Ì'ãrizé wasu'u
Marcusi 14.43-52; Rucasi 22.47-53; Zuwã 18.3-12*

⁴⁷ Tawamhã Zezusi hã zahadu te te rowasu'u ré, ma we Zudasi hã sô wi, aré ĩsiré 're ĩwanomro mono norĩ siré, 12 na wahãiba za'ra siré hã. Da'ahã na te duré we ĩsiré ai'aba'ré ni, sib'ézé 'wa pa ré, uibroi ré zama. Sasedoti ĩpire norĩ zadawa para te we ai'aba'ré, zudezu norĩ ma roti'wa norĩ zadawa para zama.

⁴⁸ Āne ma tō Zudasi hã tãma waihu'u za'ra, te te siwi ĩ'ári wana ré hã: “Aibã hã te tob'rata hãrã wamhã, ta hã te za asiwi ĩ'ári 'wa.” Āne ma tō dama waihu'u, te te ãma ĩrosa'ratazém na hã, Zudasi hã.

⁴⁹ Tawamhã wisi wi, ma tō ĩtème mo òne haré, Zezusihi u, awa'awi. Āne te sawi, timreme na:

— Rowahutu'wa, rowē na 're aihãimana mono.

Tawamhã tob'rata hãrã na ma tō sawi, Zezusi hã.

⁵⁰ Tawamhã Zezusi asa te tãma tinha, ãne:

— ĩsiwadi, te we tō ĩzō aimo, marĩ hã ĩ'ãma 'manharĩ da. Ma'ãpé, niha ĩma rob'manharĩ su'u.

Tawamhã ma tō sô ai'ré za'ra oto, Zezusihi zô, te te siwi ãri da. Te te siwi ãri wamhã, ma tō siwi pawasisi.

⁵¹ Tawamhã Zezusihi siré 're ĩmorĩ hã ĩ'rata ĩsa hã ma tō sib'ézé 'wapa waze. Te te wazere wi, ma romhuri'wa hã ãma po're nhizã, sasedoti ĩpire uptabi ma, romhuri'wa hã.

⁵² Tawamhã Zezusi te tãma tinha, ĩ'u'a'wai ma:

— Ma'ãpé, sib'ézé 'wapa hã apã sērē. Ni'wam norĩ hã sib'ézé 'wapa na te te 're danhimroi mono wamhã, asa sib'ézé 'wapa na te za da te 're simro, tō te te ãma 're ĩdanhimroi mono zéb zarina.

⁵³ Te ĩsima wē 'wa'ahã, wa aré ĩmama wi waptē, hãiwa ãma tãma ĩromhuri'wa norĩ hã ahã uptabi na te te we ĩtème satōrĩ za'ra da, ãhãna ĩ'ãma sisaprĩ za'ra da, dawĩ. E ãne na ĩ'ãma rosa'rada hã waihu'u ò di bété.

⁵⁴ ĩ'ãma dawĩ sisaprĩ za'ra wamhã, 'Re ĩhãimana u'ãsi mono hã te te ĩ'ãma uwaimrami ò di aré, duréihã ĩsada wasu'u'wa norĩ te te ĩ'ãma ĩrob'ui'ére za'ra zéb zarina hã, za niha ĩ'ãma ĩromhãimanazém na hã. Taha wa, te tiwi waptērē ò di za, ĩmama wi. — Āne ma tō Zezusi hã tãma waihu'u, sib'ézé 'wapa na te te ĩda'mai'u'a ma.

⁵⁵ Tawamhã Zezusi hã te oto dama rowasu'u, ãne:

— E wa hã danhibrob zô dapãri'wa pã, ma bété we ĩzō aihutu 'wa, sib'ézé 'wapa ré, uibroi ré zama. Bãtã sidãpãsi wa tō asô'a wa'aba 're ĩsimasisi, 'Re ĩhãimana u'ãsi mono ãma 're ĩdawata za'ra mono zéb ãma 'ri 'wawi wa'ra 're, te dama 're rowahutu mono da. Zapre bété, tameb ré asiwi ĩ'ári za'ra wa'aba ò di.

⁵⁶ Tane tō. Āne hã ma tō ĩ'ãma tĩromhãiba ãhãna hã, duréihã 'Re ĩhãimana u'ãsi mono zadawa wasu'u 'rata 'wa norĩ nhimi'ui'ére hã te te ĩ'ãma uwaimrami da. — Āne te dama siwasu'u, Zezusi hã.

Tawamhã ĩsiré 're ĩwanomro mono norĩ hã wa tō oto rēme za'ra ni. Wawara sina wa dawĩ wasisa're.

Dama roti'wa norĩ hã ĩsi'rã'õtözé wasu'u, Zezusihi zada

Marcusi 14.53-65; Rucasi 22.54-55, 63-71; Zuwã 18.12-14, 19-24

⁵⁷ Tawamhã Zezusi, da te oto dasiwi ãri wamhã, ma tō dasiwi saprõni ni, Caipasihĩ nhorõwa u, 'Re ĩhãimana u'ãsi mono ma da'ãma romhuri'wa ĩpire uptabi nhorõwa u, sasedoti ĩpire uptabi u. Tame ma tō sô si'rã'õtõ, 'Re ĩhãimana u'ãsi mono nhimiroti 'rata na rob'ui'ére na dama rowahutu'wa norĩ hã, duré dama roti'wa norĩ hã.

⁵⁸ Zezusi hã da te dasiwi saprõni ré, te Pedru hã romhã na te te pibu. Sasedoti ĩpire uptabi nhorõwa u, te ĩsarina mo. Wisi wamhã, 'ri 'wawi wa'ra 're, ma ãzé. Sébré wamhã, tame te dame nhamra rowĩ, 'Re ĩhãimana u'ãsi mono nhorõwa 'madã'ã'wa norĩ me. Zezusi hã te te 'madã'ã da, te nhamra, niha da te tãma rob'manharĩ ò'umnhasite.

⁵⁹ Tawamhã sasedoti ĩpire norĩ hã, duré uburé zudezu norĩ ma roti'wa norĩ hã, te ni'wam norĩ zô tinhopré, Zezusi hã marĩ te te 're ĩ'ab'manharĩ wasété mono zém na, sadawa nhípese na te te siwi ãma hirĩ da, tawapsi romanu norĩ hã te te siwi wirĩ da.

⁶⁰ Tawamhã da'ahã na ma tō taré Zezusihi ãma ĩwasédé hã sa'ra ni, dama roti'wa norĩ nho'a. Tane nherē, ãma dasisaze za'ra ò di, ĩwasédé hã dasisõ'a da te ãma ĩsa'ra za'ra zém na hã, taha zarina si, da te oto dasiwi ĩwē'özéb da hã. Taré te nasi ĩwasédé hã ãma sa'ra ni, dazadawa nhípese na. Tawamhã aibã norĩ hã ma tō sipisutu zahuré, dama ĩpire norĩ nho'a, ĩwasédé hã te te ãma ĩhiri zahuré zéb da hã.

⁶¹ Āne te oto wasu'u zahuré Zezusi hã, ĩsõ'a za'ra:

— Ā hã aibã hã ma tō ãne dama siwasu'u, sadawa nhípese na: “Wa hã ĩma waihu'u pese di, ã hã 'ri 'rãihã hã te sãmra da, 'Re ĩhãimana u'ãsi mono ãma 're ĩdawata za'ra mono zé hã,

duré apâ te 'ri su'u da, si'ubdatô bâdâ hã ï'âma si'utôri ô ré, te 'ri pari da." Æne ma tô dama siwasu'u. — Æne te aibâ norî hã Zezusi hã taré wasu'u zahuré.

⁶² Tawamhã sasedoti ïpire uptabi hã ma tô hãwi za, dawa'wa. Æne te sadanha, Zezusi hã: — E asadawa na dama âma wa'râmi âna, da te dasiwi ï'aiwasu'u wasété na hã. E tô ïsarina ma tô aiwasédé hã ai'âma hiri zahuré. E taré. — Æne te sadanha.

⁶³ Tane nherê, te Zezusi hã ari'ïwi za. Tawamhã sasedoti ïpire uptabi hã te duré sadanha: — E a hã Danho'reptui'wa da, 'Re ïhâimana u'âsi mono te te ï'aipisudu. E a hã 'Re ïhâimana u'âsi mono 'ra. Ma'âpé sena na wama asiwasu'u na. Wawi ai'udâ tô, 'Re ïhâimana u'âsi mono nho'a.

⁶⁴ Tawamhã Zezusi te asa tâma tinha:

— Tahata ma tô tane hã tô ï'âma ïwaihu. Æne wa za duré aima ïsiwasu'u za'ra wa'wa. Wa hã dasiré ïpodo hã te za asiwi ï'madâ'â za'ra wa'wa, ïwaihu'u pese uptabi nhimire niwî 're ïnhamra mono na, dama ïpire na. Hãwa'a na apâ we ïmorî wamhã, te za ãne na ï'madâ'â za'ra wa'wa. — Æne ma tô Zezusi hã tâma siwasu'u za'ra.

⁶⁵ Tawamhã sasedoti ïpire uptabi hã, Zezusihi mreme te te wapari wamhã, ma tô ti'uza hã hãiwazu, te te wê'ô wa, tip'é na sada sahi wa. Tawamhã ïsi'râ'ôto norî ma, te oto tinha, ãne:

— Tãibâ oto. Aibâ aimawi norî zô, ai'maihârâ aba ô di za, Zezusi te te wama ïwasu'u za'ra da hã, iwasété na. 'Re ïhâimana u'âsi mono newa, si'uïhã na ma tô tiwaihu'u pe hã sina tihî, wasine 're hãimana mono nherê. Si'uïhã na ma tô timreme wasété. ïmreme ma tô ïwapari za'ra wa'wa.

⁶⁶ E marî tawamhã, ma tô âma ïpisutu za'ra wa'wa. — Æne te âma da'a'mahã.

Tawamhã asa te tâma nharî za'ra:

— Tiwasédé hã ma tô 'manha. Te za tô dêrâ.

⁶⁷ Tawamhã te te oto siwi wê'ô pese za'ra wa, ma tô tizadaipro na nasi siwi ubu uptob za'ra. Tinhîb'rata hi'râti na, te duré nasi siwi ahã. Tinhîb'rata na te duré nasi ï'ubu wi siwi ahã.

⁶⁸ Tawamhã te te nasi siwi ahâri sina, te nasi 'mahârâ za'ra, ãne:

— A hã danho'reptui'wai wamhã, ma'âpé ai'azâri'wa norî hã wama wasu'u za'ra na. — Æne te nasi âma wa'ê za'ra sina 'mahârâ za'ra.

Pedru hã, Zezusi te te dawi ï'udâzé wasu'u

Marcusi 14.66-72; Rucasi 22.56-62; Zuwâ 18.15-18, 25-27

⁶⁹ Tawamhã Pedru, 'ri 'wawi wa'ra 're, rowi sãmra ré, ma tô pi'ô hã 'râwi ïtême za. Sasedoti ïpire uptabi ma romhuri'wa, pi'ô hã. Æne te tâma tinha, Pedruhu ma:

— A zama te Zezusihi siré 're aimo, Darireza âma aré 're ïsãmra mono siré.

⁷⁰ Tawamhã Pedru te tiwi ai'udâ, uburé danho'a, ãne:

— Te waihu'u ô di, we ïma ïnharî hã. — Æne ma pi'ôi ma, asa tizadawa na wa'râ.

⁷¹ Tawamhã te oto mo, 'ri 'wawi wa'ra âma 'ridawa u. Tame sãmra ré, ma tô duré pi'ô ïhãiba amo hã tisã Pedru hã, 'Re ïhâimana u'âsi mono ma da'âma romhuri'wa norî nhîb'apito ma romhuri'wa hã. Te te sãmri wamhã, ï'rata ïsimasam norî ma, te wasu'u za'ra, ãne:

— Ô hã Zezusihi siré 're ïmorî, Nazaré âma aré 're ïsãmra mono siré.

⁷² Tawamhã Pedru te duré dawi ai'udâ, ãne:

— Tô sena, wa aima ïsiwasu'u za'ra wa'wa, 'Re ïhâimana u'âsi mono nho'a. Ta hã ïma sa'rese ô di, aibâ hã.

⁷³ Tawamhã syry na âma ïnomro wi, ma duré ï'rata ïsimasam norî hã 'râwi ïtême aimasa Pedruhu u, te te tâma nharî za'ra da, ãne:

— Darireza âma 're ïdamreme zusi mono ne, aimreme hã. Taha wa, wa tô wasiwi aiwaihu'u ni, Darireza âma aré 're asãmra mono na. Taha wa, tô sena wa tô duré wasiwi aiwaihu'u ni, Zezusihi siré 're ïnomro mono norî siré 're aimorî na. — Æne hã ma tô tâma waihu'u za'ra, Pedruhu ma.

⁷⁴ Tawamhã Pedru te asa tâma nharî za'ra, ãne:

— Mare di. Tane na ïwaihu'u nherê, ô hã ïma sa'rese ô di. Tô sena te aiwi udâ za'ra wa'aba di pâ, 'Re ïhâimana u'âsi mono te te ï'azâri pé. — Æne te tâma sina waihu'u za'ra.

Tawamhã ãne na dama siwasu'u wi, ma tô si'a hã hârâ watobro, awa'awi.

⁷⁵ Tawamhã Zezusi te te tâma ïwaihu'uzém na ma sina po're puru, Pedru hã. Æne Zezusi te te tâma ïwaihu'u sirômo zé hã, ïsôwa: "Si'a hã hârâ ô ré, si'ubdatô te za dawi ï'udâ, ïzadawa para ô nherê." Æne Zezusi hã te te tâma ïwaihu'u sirômo zé hã.

Tawamhã ãne na oto ïmreme na sina po're pu'u wamhã, ma tô watobro rob u, Pedru hã. Taha wa, te oto aiwa'ô, sina pé'êzé uptabi wa.

27

*Zeuzi hã, apito Piratuhu u, da te dasiwi İsaprõnizé wasu'u
Marcusi 15.1; Rucasi 23.1-2; Zuwã 18.28-32*

¹ Tawamhã mararé ma uburé sasedoti İpire norĩ hã, duré zudezu norĩ ma roti'wa norĩ hã si'rã'õtõ, te te sima âma roti za'ra da, Zezusihi âma, te te dama sòmri za'ra da, da te dasiwi İwĩrĩzéb da hã. Taha da, te roti hã sima 'manharĩ za'ra, Zezusihi hãiba na.

² Tawamhã sasedoti İpire norĩ zadawa para, ma tã Zezusi hã dasiwi pawasisi ni, da te dasiwi saprõni da, Piratuhu u. Ta hã Zudeza na danhipti'a nho'õmo nhisi âma da'madã'ã'wa, romanu norĩ nhĩb'apito uptabi nhĩmĩpisudu. Tawamhã İtẽme da te dasiwi âwisu wamhã, ma tã tãma hãiba nhomri ni, Zezusi hã, Piratuhu ma.

*Zudasihĩ dã'ázé wasu'u
Atusi 1.18-19*

³ Tawamhã Zudasi, dama İhãiba nhomri'wa hã, Zezusi dã'ã da, da te dasiwi İpisutu na siwaihũ'u wamhã, ma tã si'ruiwapa. Taha wa, 30 na rob'uiprazé İsapotore hã etẽ'ubuzi'a prata 'manharĩ hã ma tã apã tãma sòmri za'ra, sasedoti İpire norĩ ma, duré zudezu norĩ ma roti'wa norĩ ma zama.

⁴ Tawamhã âne ma tã tãma siwaihũ'u za'ra:

— İwasédé hã wa tã 'manha, âhãna hã. Marĩ hã te te 'manharĩ wasété õ nherẽ, wa tã aima hãiba nhomri za'ra wa'wa, asiwi wĩrĩ aba da. — Âne na ma tã tãma siwẽ'õ za'ra Zudasi hã, dama İpire norĩ ma.

Tawamhã asa te tãma nharĩ za'ra:

— E marĩ, wa te wasiwi âma 'manharĩ da bã. E wate bã. Ta hã ate hã. Asiwaprosi ma aiwasédé hã âma İ'manha. — Âne ma asa tãma waihũ'u za'ra, Zudasihĩ ma.

⁵ Tawamhã Zudasi hã rob'uiprazé İsapotore ma tã sãmra, 'Re İhãimana u'âsi mono âma 're İdawata za'ra mono zéb âma, 'ri para. Te te sãmra pari, ma tã watobro rob u. Tawamhã siwĩrĩ da, ma tã 'rãwi sisõ'reti, wedenhorõ na.

⁶ Tawamhã 'Re İhãimana u'âsi mono ma, da'âma romhuri'wa norĩ İpire za'ra hã ma tã rob'uiprazé İsapotore hã siwi waibu, sasedoti İpire norĩ hã. Te te siwi waibu wamhã, ma tã sima âma roti za'ra, âne:

— Â hã rob'uiprazé hã dawapruĩ wa'âbãzé. Taha wa, 'Re İhãimana u'âsi mono nhĩmiroti na Mozési te te âma İrob'ui'érézéb zarinaĩ õ wa, rob'uiprazé nhemezéb 're, wa te wasiwi sêrẽ waihũ'u õ di za, wedehãpã 're, 'Re İhãimana u'âsi mono âma 're İdawata za'ra mono zéb te, danhoprubzẽ wazari. — Âne ma tã sima âma rowaihũ'u za'ra.

⁷ Taha wa, âma sisaze za'ra parimhã, tã õhõ na rob'uiprazém na ti'a hã ma tã siwi uipra, zé na piza 'manharĩ'wa nhĩpti'a hã. Darob amoi hawi, Zeruzarẽ u 're İdasihutu mono norĩ hã tãme 're dadã'ã za'ra mono wa, adã da te 're İsẽme mono zéb da hã, ma siwi uipra, âma.

⁸ Taha wa, ti'a hã Dawapruĩ wa'âbã na da te dasiwi İ'uipra na te oto da te 're sisi za'ra.

⁹⁻¹⁰ Âne ma tã tiromhãiba, duréihã 'Re İhãimana u'âsi mono zadawa wasu'u 'rata 'wa hã te te âma İrowaihũ'u si'õmo zéb zarina, Zeremiasi na İsisi hã. Âne na ma tã âma rob'ui'ére siro, duréihã:

“Tawamhã 30 na rob'uiprazé İsapotore hã ma tã ubuni na siwi ti'ã, zé'a na piza 'manharĩ'wa nhĩpti'a hã te te siwi âma uipra da. Taha wa, ma tã İzarazéhẽ nhĩhudu norĩ hã siwi pisutu, 30 na te te tãma İwa'âbã za'ra zéb da hã. Âne ma tã 'manharĩ za'ra, 'Re İhãimana u'âsi mono te te İma İruzéb zarina, te tãma 'ru za'ra da.”

Âne duréihã ma tã Zeremiasi hã âma rob'ui'ére siro, âne na hã.

*Apito Piratu, Zeuzi te te İsadanharizé wasu'u
Marcusi 15.2-5; Rucasi 23.1-5; Zuwã 18.33-38*

¹¹ Tawamhã Zezusi hã Zudeza âma da'madã'ã'wa nho're, te oto za, Piratuhu nho're. Tawamhã Piratu te sadanha, âne:

— E a hã, zudezu norĩ nhĩb'apito.

Tawamhã Zezusi te asa tãma tĩna:

— Tahata ma tã tane hã tã İ'ãma İwaihũ. — Âne ma asa tizadawa na tãma âma wa'rã.

¹² Tawamhã sasedoti İpire norĩ hã duré dama roti'wa norĩ hã ma tã siwi wasu'u wasété za'ra Zezusi hã, Piratuhu ma. Tane nherẽ, Zezusi hã tizadawa na te te tãma âma wa'rãmĩ za'ra õ di, asa.

¹³ Tawamhã Piratu te oto sadanha:

— E asina dazadawa 'rui õ di bété, da te nasi dasiwi aiwasu'u wasété za'ra zém na hã. E asi'uihã na asadawa na wa'rãmĩ âna, dama. — Âne ma tã aré Piratu hã Zezusihi ma waihũ'u.

¹⁴ Tawamhã dama ĩpire norĩ hã te te nasi siwi wasu'u wasété za'ra nherê, tizadawa na te te âma wa'rãmi ô di, Zezusi hã. Te te âma wa'rãmi ô uptabi di. Âne wa, ma tã apito Piratu hã âma titob'uzu, Zezusihi âma.

*Zezusi, da te dasiwi wĩri da, Piratu te te dama ihãiba nhomrizé wasu'u
Marcusi 15.6-15; Rucasi 23.13-25; Zuwã 18.38-19.16*

¹⁵ Pascowa na dasai 'manharizép sidápãsi, ma tã apito Piratu hã misi si te te 're da'azani, dazazém hawi, da te tiwi 're ĩwaptêrê za'ra mono zéb zarina.

¹⁶ Aibã hã dazazéb 're, te dame 're sa, Barabasi na ĩsisi hã, ihãimana wasété te dama ĩwaih'u pe hã.

¹⁷⁻¹⁸ Zezusi hã ĩwê na si te te dama 're rowahutu mono 'ru te, ma tã zudezu norĩ ma ĩpire za'ra norĩ hã te te siwi 're ruiwapari, ô norĩ upana Zezusihi âma si 're datob'uzu za'ra mono 'ru te. Âne zarina ma tã siwi hãiba nhomri za'ra tãma, apito Piratuhu ma. Âne na da te dasiwi 're ĩruiwapari za'ra mono zéb zarina, da te tãma ihãiba nhomri na ma tã apito Piratu hã âma da'awaih'u. Taha wa, te âne âma da'azadanha, da'ahã na, ĩtême dasi'rã'õtô wa:

— E 'wa hã te tawamhã asima ĩwê za'ra wa'wa, te tãma ĩrob'ru da hã. E Barabasi. E Zezusi, Danho'reptui'wa da, 'Re ihãimana u'ãsi mono te te ĩpisutu na da te 're ĩsisi za'ra mono. — Âne te ihãiba na zahuré âma da'azadanha, Piratu hã.

¹⁹ Tawamhã Piratu hã te te 're ĩda'awaih'u mono zéb da, roti ma, 're ĩsimasisi mono zéb âma sãmra ré, ma tã ĩmro hã timreme hã tãma tisô. Âne ma tãma waih'u:

— Ma'ápé âma rosazã, aibã hã. Ta hã tiha te te 're ab'manharĩ mono ô di. Barana hã ĩnhotô 'rowi te ĩsawêrêzém na hã wa tã âma robzépata za'ëtê, taha na hã. Âma ĩpê'ézé uptabi di. Taha wa, te za âma ĩrosazã. — Âne na ma tã ĩmro hã tãma sadawa wasu'u ni, Piratuhu ma.

²⁰ Âne ré, ma tã sasedoti ĩpire norĩ hã duré dama roti'wa norĩ hã da'ahã norĩ ma 're sadawa si'aba'rê za'ra, Barabasihi si Piratuhu wi, da te waptêrê za'ra da, dazazém hawi te te tãma rob'ru da, duré Zezusihi si te te dama hãiba nhomri da, taha si da te dasiwi wĩri da, ĩsadawa para.

²¹ Tawamhã apito Piratu hã ma tã duré da'mahãrã na sahu, âne:

— E 'wa hã te tawamhã asima ĩwê za'ra wa'wa, te aima tãma ĩrob'ru za'ra wa'aba da hã, dazazém hawi aima watobro za'ra wa'aba da.

Tawamhã asa te tãma nharĩ za'ra ni:

— Barabasihi ma, rob'ru na, taha si dazazém hawi watobro da.

²² Tawamhã Piratu te duré âma da'azadanharĩ zahu, âne:

— E marĩ, wa za tawamhã aima âma pisutu za'ra wa'wa, Zezusihi âma hã, Danho'reptui'wa da, 'Re ihãimana u'ãsi mono te te ĩpisutu na da te 're ĩsisi za'ra mono âma hã.

Tawamhã aihĩni ma tã âne âma 'mahãrã za'ra ni:

— Wedepo'o nnonhi'rãmi na da te dasiwi sasômri, dã'ã da.

²³ Tawamhã Piratu te duré asa dama tinha:

— E marĩ te te 're ab'manharĩ wasété mono bã. — Âne te dama tinha, asa.

Tane nherê, âne na hã da te wapari ô di. Dahãrã 'rãihã na te oto nasi 'mahãrã za'ra ni:

— Wedepo'o nnonhi'rãmi na da te dasiwi sasômri, dã'ãre da. — Âne te dahãrã 'rãihã na nasi dasiwi 'mahãrã u'ãsi ni, Zezusihi hãiba na.

²⁴ Tawamhã Piratu, marĩ hã te te oto âma waih'u ô di, da te oto dasiwi âma ĩrosazãrizéb da hã. Aihĩni te oto ôhõ da si tahãimana za'ra ni, Zezusihi da, dazahi uptabi na. Âne na te te sina waih'u wamhã, ma tã piza'a zõ da'mazatõ, âma sisimisõ da, uburé danho'a. Tawamhã Zezusihi âma marĩ ĩwasédé hã te te ĩmanharĩ ô na aihĩni da te ĩwaih'u za'ra zéb da hã, ma tã danho'a sisimisõ. Âne te duré dama siwasu'u:

— Zezusi hã da te wĩri da, te dama 'rui wamhã, ĩwasédé hã te 'manharĩ ô di za, wa hã. Mare di. Ate za'ra wa'aba si, ta hã. — Âne te Piratu hã dama siwasu'u.

²⁵ Tawamhã asa te tãma nharĩ za'ra ni:

— Wê di tã. Wa te wasiwi ĩwaptêrêzéb zarina, da te dasiwi wĩri wamhã, 'Re ihãimana u'ãsi mono te te wahã za'ra pé tã, wa'ra norĩ zama wanhihudu norĩ zama, wawasédé hã wa te âma 'manharĩ za'ra di pã. — Âne ma asa tãma tasiwaih'u za'ra ni, Piratuhu ma.

²⁶ Tawamhã da te tiwi ihãiba waptêrê za'ra zéb uwaibaba, ma tã Piratu hã da'wapéi'wa norĩ ma 'ru za'ra oto, Barabasihi ma si te te tãma rob'ru da, dazazém hawi dama watobro da. Ma tã duré tãma 'ru za'ra, Zezusi hã powawê hãiwaré na te te siwi 're pré'é mono da, taha pari te te duré siwi sasômri da, wedepo'o nnonhi'rãmi na dã'ã da oto.

*Zezusihi âma, da'wapéi'wa norĩ hã nasi ĩwa'ê za'ra zé wasu'u
Marcusi 15.16-20; Zuwã 19.2-3*

²⁷ Tawamhã Piratuhu ma da'wapéi'wa norĩ hã ma tã Zezusi hã siwi 'mazé ĩsõrõwa u, 'ri 'rãihã u. Te te siwi 'mazébré wamhã, tame da'wapéi'wa norĩ hã ma tã aihĩni âma si'rã'õtô.

²⁸ Tawamhã ï'uzã hã ma tô siwi waze. Tisi'ubuzém na ma ïwa'rãmi siwi ãma hãiba ubu, ti'uzã hãpa ìhã pré na, danhib'apito ãma 're ïsi'uzã za'ra mono zém ne hã.

²⁹ 'Wabzéré panhipti hã ma duré sada 'ma'manharĩ za'ra, ï'wa ahã hã. Taha pari, ma ï'rã nhisiwi tãma hiri za'ra, te te ãma siwi sôpre da, danhib'apito hã ãma 're ïsisôpre za'ra mono ne hã. Wedehu ma duré ïsib'rata tãma hiri za'ra, ïsib'rata nhimire niwĩ, danhib'apito hã tinhiwedehu ré, 're ïsimãsiso mono ne. Tawamhã hi'rãitôt ma tô nasi ïsô're tãma asimro, ãma wa'ë za'ra sina te te nasi sawi za'ra da, ãne:

— Zudezu norĩ nhib'apito, rowê na 're aihãimana mono. — ãne te nasi ãma tiwa'ë za'ra, tô sena newa.

³⁰ Tizadaipro na te duré nasi siwi uptob za'ra. Wedehu te duré nasi tiwi mrami za'ra, ï'rã wi, te te nasi siwi ãma ahãri da.

³¹ Tawamhã nasi ãma wa'ë za'ra parimhã, zazahã hãpa ìhãpré hã ma tô apã tiwi wazere za'ra. Apã ma duré siwi uza, 're ïsi'uzã mono zém na. Taha pari, te oto siwi saprô, te te siwi sasômri da oto, wedepo'o nhonhi'rãmi na.

*Zezi hã da te ïsasômri zé wasu'u, wedepo'o nhonhi'rãmi na
Marcusi 15.21-32; Rucasi 23.26-43; Zuwã 19.17-27*

³² 'Ri nho'ômo nhiti te te oto Zezi hã siwi wazere wamhã, aibã hã ma tô siwi tisã, Sima na ïsisi hã. Sireni na ïsa'ru nhisi hã. Te te siwi sãmri wamhã, ma tô tãma 'ru za'ra da 'wapéi'wa norĩ hã, wedepo'o nhonhi'rãmi hã tinhisé te te tãma ãri da, Zezi te te sisada ï'ãri hã.

³³ Tawamhã ma tô oto siwi ãwisi, Dodota na sa'a nhisi u, da te 're ïdanhimroi mono zéb u. Dodota hã wasimremézém na Da'rãihi na sa'a nhisi, te wasu'u.

³⁴ Tamomo te te siwi ãwisi wamhã, uwa 'ru 'rãni wa'u ïsé hã ma tô aré tãma sômri za'ra Zezusihi ma, wedewa'u ïsé na ïwazari ré hã, te te hã'rêne da, Zezi hã. Tane nherê, te te téiwai wamhã, te te sima wê ô di, te te hã'rêne da, Zezi hã.

³⁵ Tawamhã ma tô oto siwi sasô, wedepo'o nhonhi'rãmi na. Te te siwi sasômri pari, ma tô êtê zapotore ï'ui'ére ré hã nasi sima sãmra da 'wapéi'wa norĩ hã, Zezusihi uzazéb zô. Taha zarina, ma tô sima ãma aipé.

³⁶ Taha pari, te oto ï'rata asimro, Zezi hã te te dawu 'madã'ã za'ra da, hãwi sa'o ré.

³⁷ Tawamhã Zezusihi 'rã nho'ômoi baba ma tô siwi sasô, wedepo'o na rob'ui'ére hã, ïwasédé hã da te ãma ïhirizéb ui'ére ré hã. ãne ãma ïrob'ui'ére hã: "ã hã Zezi, zudezu norĩ nhib'apito."

³⁸ Zezusihi me ma tô aibã norĩ hã dasiwi sasômri zahuré ni, ïsiré dá'ã zahuré da. Danhibrob zô dapãri'wa norĩ, aibã norĩ hã. Te ãma aiwa'aba zahuré ïsimire niwĩ, duré ïsimi'e niwĩmhã.

³⁹ ïwa'wai baba, da te nasi ïro'rahãri za'ra norĩ hã te nasi ãma tawa'ë za'ra ni, Zezusihi ãma. Nasi ãma da'rãsiwanari za'ra sina, te nasi ãma wasété za'ra ni.

⁴⁰ ãma dawa'ë sina, te duré nasi ãne tãma nharĩ za'ra ni:

— Oro a hã asima roti za, 'ri 'rãihã hã sãmra da, 're ïhãimana u'ãsi mono ãma 're ïdawata za'ra mono zé hã, duré apã 'ri da, si'ubdatô bâdã hã ai'ãma si'utôri ô ré. A hã tô sena 're ïhãimana u'ãsi mono 'ra wamhã, ma'ãpé asisô'reptu na. Wedepo'o nhonhi'rãmi hawi we si'ra na, atã'ã tô da. — ãne te nasi ãma dawa'ë za'ra sina 'mahãrã za'ra ni.

⁴¹ Sasedoti ïpire norĩ zama te duré nasi ãma tiwa'ë za'ra, 're ïhãimana u'ãsi mono nhimiroti 'rata na rob'ui'ére na dama rowahutu'wa norĩ zama, dama roti'wa norĩ zama. ãne te nasi ta norĩ hã ãma tiwa'ë za'ra:

⁴² — Oro ô hã ïzarazéhé nhihudu norĩ nhib'apito za. E niha hã bété, tinhimirohmôsi na te te 're da'anho'reptui mono nherê, 'rãwi sisô'reptu waihu'u ô di bété oto. ãhãna wedepo'o nhonhi'rãmi hawi, we te te si'ra pé, wa te wasina ï'umnhasi za'ra zéb da hã.

⁴³ Ô hã ma tô 're ïhãimana u'ãsi mono hã te te sina 're umnhasi, ïsiré 'rãwi 're ïmorĩ u'ãsi na. Ma tô duré dama 're siwasu'u, 're ïhãimana u'ãsi mono 'ra na. Ma'ãpé ãhãna 're ïhãimana u'ãsi mono te te sô'reptu oto, wanho'a. — ãne te nasi ãma tiwa'ë za'ra, zudezu norĩ ma ïpire za'ra norĩ hã.

⁴⁴ Tawamhã danhibrob zô dapãri'wa norĩ hã ma tô duré nasi dasiré ãma tiwa'ë zahuré, ïsiré dá'ã zahuré da, da te dasiwi ïsasômri zahuré hã.

Zezihi dá'ázé wasu'u

Marcusi 15.33-41; Rucasi 23.44-49; Zuwã 19.28-30

⁴⁵ Tawamhã ma tô ti'abzuma oto. Abzuma wamhã, ma tô tirobra, daro mono bâ. Bãdã siprazéb u, te oto robra si nomro.

⁴⁶ Tawamhã bâdã supra wi, te Zezi hã Timama hã sa'ëté sina 'mahã:

— Eri, Eri, rema sabatani. ãne wamremézém na hã: "ïnhib'apito, ïnhib'apito, e marĩ da, ma tô oto ïrê."

⁴⁷ Tawamhã ni'wam norĩ hã ì'rata Ìsimasam norĩ hã Zezusihi hãrã te te wapari za'ra wamhã, ma tã sima rowasu'u za'ra, ãne:

— Òhõta Eriasihi zõ te hã, te te we pawaptob da. — ÌÑe te sima ãma romnomri za'ra.

⁴⁸ Tawamhã ni'wa hã ì'rata Ìsimasam norĩ siré hã si'aba'ré na ma tã piza 're upsõzém ne hã 'mai'ã, uwa 'ru 'rãl wa'u isé na te te tãma ãma di'ì da, Zezusihi ma, iwa'ãbã syry na. Tawamhã wedewaré 'rãsutu na ma tã ãma sapu'u, Zezusihi ma, te te wé da, te te upsõmri da.

⁴⁹ Tane nheré, Ìsiré Ìsimasam norĩ hã ma tã ãma sipa'uwati za'ra, ãne:

— A'ã pé, wanhipipari za'ra wa'aba a'ã, Eriasi we ìtème morĩ ò'umnhasite, te te sõ'reptu da, dà'ã tã da. — ÌÑe te a'ã siwi ãma pa'uwati, te te tãma sõmri tã da, te te ì'upsõmri da hã.

⁵⁰ Tawamhã Zezusi hã ma tã duré tihãrã 'ràihã na ãma sahu, ìrème ma. Taha pari ma pè'è hai'utõ.

⁵¹ Dã'ã wi, zazahã ìhãpa hã 'ri 're wa'wa nhitobzé hã ma uihã na hãihai'po'o aiwa, hãimo hawi pi'reba, 'Re ìhãimana u'ãsi mono nhorõwa ãma hã. Ti'a hã te duré sãsã'ã. Sãsã'ã wamhã, ètè tãmo wawè hã ti'a 're ìsimi'wara mono zama ma tãmo sipo'o.

⁵²⁻⁵³ Taha wa, ma tã duré adã'ã 'ru hã si'ridawa za'ra. Si'ridawa za'ra wamhã, 'Re ìhãimana u'ãsi mono nhĩb'a'uwè norĩ hã aré 're ìdã'ã za'ra mono hã ma tã apã ahãiwa'utu ahã uptabi na, 'Re ìhãimana u'ãsi mono hã. Ta norĩ hã, Zezusi hã ab're hawi za hãiwa'utu parimhã, te za ab're hawi wairé. Tawamhã Zeruzarè u te za asisi, 'ri nho'u ìwè uptabi u, dama sihãi'rè za'ra da. Tawamhã da'ahã uptabi na te za ãma tanhopré ni, tame.

⁵⁴ Tawamhã Zezusi te te dawì ì'madã'ã za'ra norĩ hã da'wapéi'wa norĩ hã, duré da'wapéi'wa norĩ wada'uri'wai me, ti'a ìsãã ìwatobro hã te te 'madã'ã za'ra wamhã, duré uburé ropipa ìwairébé mono te te 'madã'ã za'ra wamhã, ma tã sa'ètè uptabi tip'è'ewara za'ra. Tawamhã ãne te sima nharĩ za'ra:

— Nare ò hã, 'Re ìhãimana u'ãsi mono 'ra. — ÌÑe ma tã ta norĩ hã ãma titob'uzu za'ra, da'wapéi'wa norĩ hã.

⁵⁵ Tawamhã pi'õ norĩ hã ahã na te 'madã'ã za'ra romhã na, Zezusi hã hãiwi sa'ò ré. Ta norĩ hã ma tã ìsiré 're nomro Darireza hawi, Zeruzarè u, te te siwi 're pawaptob za'ra mono da.

⁵⁶ Ta norĩ me, ta Mariza Madarena hã dame za. Marizaha hãiba amo zama te dame za. Taha 'ra hã Ti'adu, Zuzé duré. Zebedehe mro zama te duré pi'õ norĩ me za.

Zezusi dà'ã pari, da te dasiwi ìsèrèzé wasu'u

Marcusi 15.42-47; Rucasi 23.50-56; Zuwã 19.38-42

⁵⁷ Tawamhã ma tã bådã hã aipra pese oto. Taha wa, aibã Ìsibro pe hã ma tã mo Piratuhu u, Zuzé na Ìsisi hã. Ta hã Arimateza na 'ri nho'õmo nhisi ãma 're ìsãmra mono. Ta hã Zezusihi nhimiroti si te te 're ì'madã'ã pese mono.

⁵⁸ Tawamhã, Piratuhu u oto morĩ wamhã, ma tã Zezusihi hãiba hã tiwi waptè, ab're 're, te te sèrè da. Tawamhã apito Piratu ma tã dama ti'ru, Zezusihi hãiba hã da te tãma 'ru da.

⁵⁹ Tawamhã Zuzé hã Zezusihi hãiba, ma tã ti'ã. Taha pari ma tã ubu, zazahã ìhãirã na.

⁶⁰ Te te hãiba ubu pari, ma oto tite ab're sirõmo wa tisë Zuzé hã, sa'a zahãpã da te aré tãma ì'ab're sirõmo wa. Taha pari ma tã ètè tãmo zapodo hã te te pizari, ab're te te ãma ìrè sitob da. Te te sito pari, te oto mo, òne haré.

⁶¹ Zuzé hã Zezusihi hãiba te te sèrè ré, te pi'õ norĩ hã ab're nho'õmoi baba aimasisi zahuré, Mariza Madarena norĩ hã duré Mariza ìhãiba amoi me. 'Rãwi te te ãma 'madã'ã zahuré da, te ì'rata aimasisi zahuré.

Da'wapéi'wa norĩ hã, ab're nhitobzé te te siwi ì'madã'ã za'ra zé wasu'u

⁶² Tawamhã oto ãma awè wamhã, sasedoti ìpire norĩ hã, duré parisezu norĩ hã ma tã Piratuhu nhorõwa u si'rã'õtõ, sabadu na romhuri zahãrizém na.

⁶³ Ìtème si'rã'õtõ wamhã, ãne te tãma nharĩ za'ra:

— Apito, ò hã ìsadawa nhipe hã zahadu 're morĩ ré, dama 're ìsiwasu'u mono zém na wa tã ãma wapo're pu'u za'ra ni, ãhãna hã. ÌÑe te dama 're siwasu'u: “Bådã si'ubdatõ ì'ãma si'utõrĩ ò ré, wa za apã hãiwa'udu.” ÌÑe dama 're ìsiwasu'u mono zé hã.

⁶⁴ Taha wa, ãtè ìsiré 're ìnomro mono norĩ hã te za apã siwi waze ìhãiba hã, pi'uriwi. Tawamhã ãtè sadawa nhipese na te za duré dama wasu'u za'ra, apã ab're hawi ìhãiwa'utu na hã. Zezusi hã 're morĩ ré, sadawa nhipese na te tã dama 're siwasu'u. Tane nheré, ìsiré 're ìnomro mono norĩ hã ãne na te te dama wasu'u za'ra wamhã, taha nhipai u te za duré dama sadawa hapeze za'ra. Taha wa, te za dama ì'ru, sa'a zahãpã ab're nhitobzé hã da te ìrè dasiwi 'madã'ã pese da, si'ubdatõ bådã, ãma ìsi'utõrĩzéb u hã, ìhãiba hã te te siwi wazere za'ra ò'umnhasite, pi'uriwi. — ÌÑe ma tã parisezu norĩ hã tiwi rowaptèrè za'ra, 'Re ìhãimana u'ãsi mono ma da'ãma romhuri'wa norĩ nhĩb'apito norĩ me.

⁶⁵ Tawamhã Piratu te asa tãma nharĩ za'ra:

— Tane tō. Da'wapéi'wa norī hā wa za tō pisutu za'ra, asiré si'aba'rési wa'aba da, ab're u. Mo oto itēme ai'aba'rési wa'aba pé, da'wapéi'wa norī ma, 'ru za'ra wa'aba da, ab're nhitobzé hā te te siwi 'madâ'â pese za'ra da, dawī. — Āne te itēme tāma rob'ru za'ra, apito Piratu hā.

⁶⁶Tawamhā ab're u te oto ai'aba'rési, da'wapéi'wa norī siré. Tawamhā etē tōmo zapodo hā, ab're nhitobzé hā marī na ma tō siwi upto, sitop tete na iré sab da, da te dasiwi sa'ré tō da. Da'wapéi'wa norī ma, ma tō duré rotī za'ra, ab're nhitobzéb 'rata simasab da, te te siwi 'madâ'â u'āsi za'ra da, sôtō za'ra āna.

28

Zezusi ihāiwa'utuzé wasu'u

Marcusi 16.1-8; Rucasi 24.1-12; Zuwā 20.1-10

¹Sabadu parimhā rowa'a wī, dumidu na ma tō Mariza Madarena norī hā sisaprōni zahuré Marizaha me, sa'a zahâpâ ab're u, Zezusi da te isērēzéb u.

²Tawamhā simiza'rese ō ré, ma tō ti'a hā iré 're tiwara zahuré, hāiwa hawī Wanhib'apito ma romhuri'wa hā itēme wisi zahuré wamhā. Tawamhā hāiwa āma romhuri'wa hā ma tō ab're nhitobzé hā sa'ré, etē tōmo wawé hā. Te te sa'rési wamhā, ma tō isisiwi nhamra.

³Tā si'ubuzi ne ihāiba hā. Ī'uzā hā rā uptabi di.

⁴Tawamhā ab're 'madâ'â'wa norī hā ma tō tipahi za'ra. Pahi uptabi za'ra wa, ma tō tiréré'ē za'ra. Tawamhā ti'ai u ma tō tāma ana. Dadâ'â wa, darési āna 're idanhimi'wara mono ne, ma tō rési āna daba'wara.

⁵Tawamhā hāiwa āma romhuri'wa hā ma tō tāma nharī zahuré, pi'ō norī ma, āne:

— Īma aipahi wa'aba tō. Zezusi hā da te dasiwi wīri wa, wedepo'o nnonhi'rāmi na da te dasiwi isasōmri zō robzabui wa'aba da, te we ane wa'wa. Wa hā wa tō aiwaihu'u'wa, we sō ĩrobzabui wa'aba zém na hā.

⁶Tane nheré, āne hāimana ō di. Te te sina ĩrotizéb zarina ma tō hāiwa'udu. We ane wa'aba pé, ĩnomrozé hā sabui wa'aba da.

⁷Taha parip si, te za sa'etē ane wa'wa, ĩsiré 're ĩnomro mono norī ma, wasu'u za'ra wa'aba da. Āne te za tāma ĩwasu'u za'ra wa'wa: “Ma tō hāiwa'udu. Darireza u ma tō asōwa timorī za'ra wa'wa. Tamep si te za ĩsabu za'ra wa'wa.” Āne na ĩmreme na āma aipo're simrami aba tō. — Āne ma tō hāiwa āma romhuri'wa hā pi'ō norī ma waihu'u zahuré.

⁸Taha wa, te sa'etē oto asamro zahuré ab're hawī, pahi te. Pahi zahuré nheré, tāma rowé zahuré di, pi'ō norī ma hā. Zezusi siré 're ĩwanomro mono norī ma, te te rowasu'u zahuré da, te asamro zahuré.

⁹Sisamroi ré, ma tō Zezusi hā sōpētē zahuré, pi'ō norī hā. Simiza'rese āna sisamroi ré, ma sōpētē zahuré. Tawamhā Zezusi hā ma tō sawi zahuré, āne:

— Rowé na 're aihāimana aba mono. — Āne te sawi zahuré, Zezusi hā.

Tawamhā pi'ō norī hā ma tō oto 'rāwi itēme aima'wara zahuré. Tinhīb'rata na te te para zawi zahuré sina, ma tō āma tiwata zahuré, tāma pi're zahuré wa.

¹⁰Tawamhā Zezusi te tāma nharī zahuré:

— Aipahi wa'aba tō. Mo oto ane wa'aba, ĩsisānwā norī ma, ĩwasu'u wa'aba da, Darireza u ĩzarina āma si'aba'rési da. Tamep si te za ĩzabu za'ra.

Ab're 'madâ'â'wa norī, Zezusi hā zō ab're baba wa, 'ri tēme oto ĩsi'aba'rési wasu'u

¹¹Tawamhā Mariza Madarena norī hā zahadu neb zahuré ré, ma tō ab're 'madâ'â'wa norī hā ni'wam norī hā ai'aba'rési, Zeruzaré u. Zahadu te duré ni'wam norī hā asimro, ab're 'rata. Tawamhā Zeruzaré u ĩsi'aba'rési norī hā, sasedoti ĩpire norī ma, ma tō rowasu'u za'ra, uburé ĩromhāimana mono zém na hā.

¹²Tawamhā sasedoti ĩpire norī hā ma tō duré si'rā'ōtō, zudezu norī ma rotī'wa norī me, te te sima āma rotī za'ra da. Tawamhā ma tō rob'uiprazé hā sa'etē na tāma sōmri za'ra, da'wapéi'wa norī ma, ab're 'madâ'â'wa norī ma, dama 're sadawa nhipese za'ra mono da, Zezusi wasu'u na.

¹³Te te tāma sōmri za'ra sina, te āne nasi tāma nharī za'ra:

— Āne te za dama ĩrowasu'u za'ra wa'wa, Zezusi hā ĩhāiba na hā: “Īsiré 're ĩnomro mono norī hā barana ma we sō aihutu. Wanhotō ré ma tō siwi waze.” Āne te za dama ĩrowasu'u za'ra wa'wa.

¹⁴Tawamhā Zudeza na danhipti'a nho'ōmo nhisi āma danhib'apito hā āne hā te te wapari wamhā, wa za tāma aiwasu'u wē za'ra wa'aba ni, asada sahi za'ra wa'aba tō da, marī ĩ'upa za'ra wa'aba ō na hā, niha te te aima rob'manharī za'ra wa'aba tō da. — Āne ma tō tāma rotī za'ra, da'wapéi'wa norī ma.

¹⁵Tawamhā ab're 'madâ'â'wa norī hā ma tō rob'uiprazé hā waibu, da'wapéi'wa norī hā. Te te sima waibu wamhā, 'Re ĩhāimana u'āsi mono ma da'āma romhuri'wa norī nhiib'apito

norĩ, te te tãma ĩroti za'ra zéb zarina, ma tō 'manharĩ za'ra, ĩmreme hã. Āne ma tō Zezusihi hãiba na rowasu'u zadawa nhipe hã te te ropé, zudezu norĩ nhipti'ai 'remhã. Ta hawim haré te zahadu rowasu'u zadawa nhipe hã 're hãimana, Zezusihi hãiba na hã.

Zezusi hã tisiré 're ĩnomro mono norĩ ma, ĩsihã'i'rézé wasu'u

Marcusi 16.14-18; Rucasi 24.36-49; Zuwã 20.19-23; Atusi 1.6-8

¹⁶ Tawamhã wa norĩ hã Zezusihi siré 're ĩwanomro mono norĩ hã wa tō ai'aba'ré ni Darireza u, 11 na wahãiba za'ra hã. Ētē 'rãihã u wa ai'aba'ré ni, Zezusi te te wama ĩpisutu za'ra zéb u.

¹⁷ Tawamhã Zezusi hã wa te wasiwi sãmri wamhã, wa tō ãma wawata za'ra ni. Tane nherē, nima norĩ hã wa tō wawã za'ra ni, õ hãĩ õ newa.

¹⁸ Tawamhã Zezusi hã ma tō 'rãwi watēme timorĩ za'ra oto. Ma tō wama nharĩ za'ra, ãne: — ĩmama hã ma tō ĩma pisutu, ĩsadawa para dama ĩpire na 're ĩhãimana mono da, ti'ai ãma, hãiwa ãma zama.

¹⁹ Taha wa, te za 're ĩropéi wa'aba mo a'uwē mono bâ, dama 're ĩzadawa wasu'u za'ra wa'aba mono da, a'uwē mono bâ da te 're ĩzaze za'ra mono da, taha zarina ĩnhimiroti 'madã'ã'wa 're dahãimana za'ra mono da oto. Da te 're ĩzaze za'ra mono sidãpãsi, te za ã dawabzuri hã dama 're ĩ'manharĩ za'ra wa'aba mo, ĩmama nhisi na, duré ĩnhisi na, duré ĩmama pē'ezani nhisi na, ta norĩ zadawa para.

²⁰ Te za duré dama 're ĩroti za'ra wa'aba mo, uburé te aima 're ĩroti za'ra wa'aba mono zéb zarina, ĩnhimiroti si da te 're 'madã'ã u'ãsi za'ra mono da. Ōne u'ãsi, wa za asiré 're ĩmorĩ u'ãsi za'ra wa'wa, ro ĩsi'utõrĩzéb u hã. Āne na aipo're si'ãri za'ra wa'aba õ di za. — Āne ma tō Zezusi hã wama siwaihu'u za'ra sisa'u, ĩsiré 're ĩwanomro mono norĩ ma.

Marcusi **Zezu Cristuhu wasu'uwê na Marcusi te te âma ĩrob'ui'érézé** **Ībaihâ wasu'uzé**

Ā ĩbaihâ na rob'ui'éré'wa nhisi hâ Zuwâ Marcusi na, ĩsisi hâ. Zezusihi zazei'wa, ta hâ. Tane nherê, 12 na ĩhâiba norĩ siré 're morĩ ô di, Zezusi te te sima ĩpisutu norĩ siré hâ.

Marcusi hâ tĩnhimi'ui'éré na hâ te te rowasu'u za'êtê ô di, Zezusihi nhimirowasu'u mono zém na hâ. Te te 're ĩda'apawapto mono zém na si ma tô rowasu'u za'êtê. Ma tô duré wama waihu'u za'ra, Zezusi hâ ĩsimizawi pese na dama romhuri'wa na hâ. Marcusi 10.45 âma hâ ma tô âne na wama waihu'u za'ra. Zezusi hâ ĩmreme pire na ma tô duré Marcusi hâ wama rowasu'u za'ra, te te dama 're ĩrowahutu mono na hâ, duré wa'uburê te te dama 're ĩ'anhama mono na zama, duré dawasédé hâ te te dama 're ĩ'apari mono na zama. Ā ĩbaihâ na ma tô Zezusi hâ dama 're siwasu'u, tidâ'ázéb zarina dawasété hawi, za te te 're ĩda'awaibui mono na hâ.

Zuwâ Batitaha wasu'u

Mateusi 3.1-12; Rucasi 3.1-20; Zuwâ 1.19-28

¹⁻³ Āhâna ĩsâna'rata hawi, wa za aima rowasu'u za'ra wa'wa, Zezu Cristuhu wasu'uwê na, 'Re ĩhâimana u'âsi mono 'ra wasu'u na. Romhâ ré, ma tô âma rob'ui'éré siro, Iza'iza hâ, 'Re ĩhâimana u'âsi mono zadawa wasu'u 'rata 'wa hâ. Duréihâ 'Re ĩhâimana u'âsi mono hâ, tĩ'ra ma, te te ĩwaihu'uzém na ma tô âma rob'ui'éré, âne:

“Wa hâ wa za satô ĩzadawa wasu'u'wa hâ, aiwana, te te asô ropese mono da. Āne te za te te dama 're rob'mahârâ, mreme 'râihâ sina, a'ubuni wi:

Nĩ'wa hâ te za te te dama 're rob'mahârâ, a'ubuni wi:

Bâdâdi hâ asiwi ropese aba, Wanhĩb'apito zô.

Īmana 'râmi bâdâdi hâ sô sa'ra wa'aba, awa'awi da.”

Āne ma tô Iza'iza hâ âma rob'ui'éré, romhâ ré.

⁴ Tawamhâ Iza'iza te te dama ĩrob'ui'éré zarina, te oto Zuwâ Batita hâ â dawabzuri hâ te te dama 're ab'manharĩ, a'ubuni wi. Āne te oto te te dama 're roti:

— Ma'âpé, aiwasété wi aipizari za'ra wa'aba, 'Re ĩhâimana u'âsi mono, marĩ 're ĩ'manharĩ wasété za'ra wa'aba mono zé hâ te te aima pari za'ra wa'aba da. Tawamhâ â dawabzuri hâ wa za te aima 're 'manharĩ za'ra wa'wa. — Āne ma tô te te dama 're roti, Zuwâ Batita hâ.

⁵ Da'ahâ uptabi na te ĩtême 're dasito, Zudeza na danhipti'a nho'ômo nhisi hawi. Zeruzarê na 'ri nho'ômo nhisi hawib zama, te ĩtême 're dasito. Tawamhâ dasisô'a dawasété na, 'Re ĩhâimana u'âsi mono ma 're dasiwasu'u za'ra mono wamhâ, ma tô â dawabzuri hâ te te dama 're ab'manharĩ Zuwâ hâ, Zodâ pa na â nhisi âma.

⁶ Zuwâ hâ awaru ba'ômore zéré 'manharĩ na te 're si'uzza. Duré romhâ 'manharĩ hâiwaré na te âma 're si'usisi. 'Riti na si, te 're sa. Ropĩni na zama te duré 're sa.

⁷ Āne te te oto dama 're rowasu'u:

— Īza'u si te za ĩma ĩpire uptabi hâ wei wi. Īma pire uptabi wa, ĩpara'uzza wasisizé, te tâma wasihu waihu'u ô di za.

⁸ Wa hâ wa tô â uptabi na si te 're aihâiba ubu za'ra wa'wa, â dawabzuri hâ te aima 're ab'manharĩ aba mono wamhâ. Tanei ô di za oto. Īma ĩpire hâ wei wisi wapsi, te za oto 'Re ĩhâimana u'âsi mono pê'ézani na te te 're aihâiba ubu za'ra wa'wa, ĩré 're anomro u'âsi aba mono da. Wê uptabi di, ĩpê'ézani hâ. — Āne ma tô Zuwâ Batita hâ te te dama 're wasu'u.

Zezusi hâ â dawabzuri te te ĩ'manharĩzé wasu'u

Mateusi 3.13-17; Rucasi 3.21-22

⁹ Tawamhâ âne te te dama 're wasu'u mono ré, ma tô Zezusi hâ ĩtême wi, Nazaré na 'ri wa'ôtô nhisi hawi. Darireza na danhipti'a nho'ômo nhisi âma, Nazaré hâ. ĩtême wisi wamhâ, ma â dawabzuri hâ Zezusihi ma 'manha, Zodâ pa na â nhisi âma.

¹⁰ Tawamhâ â hawi watobro wi, ma hâiwa hâ aipo'o. Hâiwa hawi, ma we 'Re ĩhâimana u'âsi mono pê'ézani hâ ĩtême si'ra, utu'u ne. Ma tô sina 'madâ, Zezusi hâ.

¹¹ Tawamhâ hâiwa hawi, te we 'Re ĩhâimana u'âsi mono hâ Zezusihi ma tinha:

— A hâ ĩ'ra. Īma asawi uptabi di. Aima ĩto za'êtê uptabi di. — Āne te we tâma tinha, Īmama hâ.

Wa'uburé hâ Zezusi te te ĩwada'urizé wasu'u

Mateusi 4.1-11; Rucasi 4.1-13

¹² Tawamhâ Zezusi hâ â dawabzuri te te 'manharĩ pari, te oto 'Re ĩhâimana u'âsi mono pê'ézani hâ satô, a'ubuni u sâmra da. Taha wa, te oto mo.

¹³ Tawamhã a'ubuni wi sãmra ré, bâdá hã ahâ na ma ãma si'utõrĩ, 40 na. Tame sãmra ré, Satanasi hã te aré nasi wada'u, Isimiroti na te te saze da. A'ubuni ãma abaze zahi hã te 're hãimana za'ra. Tane nherê, 'Re ìhãimana u'ãsi mono ma romhuri'wa norĩ hã hãiwa hawimhã, te we siwi 'madã'â pese.

ZeZusi hã romhuri na te te ìsãna'ratazé wasu'u

Mateusi 4.12-22; Rucasi 4.14-15; 5.1-11

¹⁴ Tawamhã ZeZusi hã te mo, Darireza na danhipti'a nho'õmo nhisi u. Zuwã Batita hã dazazéb 're, da te dasiwi sêrê pari, te ZeZusi hã mo. Tawamhã rowasu'u wê hã, 'Re ìhãimana u'ãsi mono te te tãma ìsõmri na, te ZeZusi hã te te dama 're rowasu'u oto.

¹⁵ ãne te tinha:

— ãhãna bâdá hã ma tó oto ìwa waptãrã, 'Re ìhãimana u'ãsi mono, da'ãma 're ìsib'a'uwê mono zéb da hã. Ma'ápé aiwasété wi, 're aipizari za'ra wa'aba mono za, 'Re ìhãimana u'ãsi mono niwĩ, ìwasu'uwê hã 're saze za'ra wa'aba mono da. — ãne ma tó te te dama 're rowasu'u, ZeZusi hã.

¹⁶ Tawamhã â zaihã u ma tó wi, ZeZusi hã, Darireza na ìsõ'u nhisi u hã. Wisi wamhã, â zababa 're mori ré, ma tó tepe mrami na romhuri'wa norĩ hã sôpêtê zahuré. Ta norĩ hã Sima Pedru na ìsisi hã ìsisãnawã me, ãdéréhé me. Tepe zô, te nasi abazipara hã wabzuri zahuré.

¹⁷ Tawamhã ãne te ZeZusi hã 'mahãrã zahuré:

— We ane wa'aba, ìsiré 're ane wa'aba da oto, romhuri na aima ìsisanho wa'aba da, ìma 're ìda'awaiui wa'aba mono zém na da hã. — ãne ma tó tãma waihu'u zahuré.

¹⁸ Tawamhã õne haré ma tãma marême zahuré, abazipara ma. ZeZusihi siré te oto tineb zahuré.

¹⁹ Tawamhã syru na sina pahã wi, ma duré 'madã'â zahuré, Ti'adu norĩ hã Zuwãhã me. Ta norĩ hã Zebedehe 'ra zahuré. Abazipara sisinarĩ hã te te ãma a'rã'õtõ zahuré apã, uba're wa.

²⁰ Tawamhã ZeZusi te duré sô tihãrã zahuré, ìsiré neb zahuré da. Tawamhã õne haré timama hã ma rême zahuré, tãma ìromhuri'wa norĩ zama, uba're 're ìsi'ubumro norĩ hã, ZeZusihi siré 're neb zahuré da oto.

ZeZusi hã aibã ma, wa'uburé te te ìsãmrazé wasu'u

Rucasi 4.31-37

²¹ Tawamhã ZeZusi norĩ hã ma tó aihutu, Capana'u na 'ri nho'õmo nhisi u. Tawamhã sabadu na wa, ma awa'awi ãzé ZeZusi hã, zudezu norĩ te rowahutuzéb u, te te dama rowahutu da, tó romhuri zahãrizém na hã.

²² 'Re ìhãimana u'ãsi mono nhimiroti 'rata na rob'ui'ére na dama rowahutu'wa norĩ nhimirowasu'u nei õ di, ZeZusi te te dama ìrowahutu mono zé hã. Simirowahutu pire na te dama rowahutu. Simirowasu'u wê wa, ma tó ãma tatob'uzu za'ra ni.

²³ Tawamhã te te dama rowasu'u ré, ma we aibã hã ãzé, rowahutuzéb u, wa'uburé ré 're ìmorĩ hã. Sébré wi, te sa'ëtê 'mahã:

²⁴ — ZeZusi, Nazaré nhihudu, e marĩ zô te we aimo. E wa'uprosi da, te we aimo. A hã ìma aiwaihu'u pese di, 'Re ìhãimana u'ãsi mono, we te te asatõri na hã. Aiwê uptabi di, a hã. — ãne te 'mahã.

²⁵ Tawamhã ZeZusi te asa tãma tinha, wa'uburé ma:

— Tô'ã, we ìma nharĩ tó. Mo oto aibã hawi aiwatobro.

²⁶ Tawamhã sisa'u te sa'ëtê hãiba wasutu, wa'uburé hã. Tawamhã sadari sina, ma aibã hawi watobro.

²⁷ Tawamhã ma ãma tatob'uzu za'ra ni. 'Rãwi te ãma dasima rowasu'u za'ra ni, ãne:

— Ô hã, e niha. Wama ìsa'rese õ na, te wama rowahutu. Wa'uburé norĩ ma, te te rob'rui wamhã, ma tó wapari za'ra, ìmreme hã. — ãne te dasima ãma romnhoré za'ra ni.

²⁸ Taha wa, ZeZusihi wasu'u hã ma tó waptu na ropé, Darireza na danhipti'a nho'õmo nhisi 're, daro mono bã.

Sima Pedruhu maprewa, ZeZusi te te ìpesezé wasu'u

Mateusi 8.14-15; Rucasi 4.38-39

²⁹ Taha pari, ma tó ZeZusi norĩ hã rowahutuzém hawi wairé, Sima Pedru norĩ nhorõwa u si'aba're da. Tisiséme me, ãdéréhé me, te siré 're simasisi zahuré, Sima Pedru norĩ hã. Ta norĩ hã, Ti'adu nori me, Zuwã nori me, ma asisi 'ri para u, ZeZusihi siré.

³⁰ Tame te Simahã maprewa hã házê ré nomro, wa'ro na. Tawamhã sisisi wi, te ZeZusihi ma 'mahãrã za'ra, házê na ìnomro na.

³¹ Taha wa, te oto ìtème mo, ìnomrozéb u. Tawamhã ma pa'ã, wahutu da. Taha wa, ma awa'awi tiwahã. Tawamhã ma tó tãma api za'ra ZeZusi norĩ ma, saihuri da.

ZeZusi hã Darireza ãma te te 're ĩda'apawapto mono zém na rowasu'u

Mateusi 8.16-17; Rucasi 4.40-41

³² Tawamhã bâdã sébrézéb u, ma tã itême tasi'ãwisi za'ra ni, ZeZusihi u, dahâzê mono bâ. Wa'uburé ré 're ĩdanomro mono norĩ zama, ma itême ãwisi za'ra ni.

³³ Uburé 'ri ahã 're, 're ĩdasi'ubumroi mono norĩ hã ma itême tasi'rã'õtõ ni, 'ri nho're uwaibaba.

³⁴ Tawamhã dahâzê mono bâ, ma da'apese, da'ahã na. Duré timreme na ma wa'uburé norĩ hã dama anhamra, ahã na. Wa'uburé norĩ hã ma tã waihu'u za'ra ZeZusi hã, 'Re ĩhãimana u'ãsi mono 'ra na. Taha wa, ZeZusi ma tã wa'uburé norĩ hã sadawa uwati za'ra, te te dama rowasu'u za'ra tã da.

³⁵ Tawamhã robza'rã ré, ma wahudu ZeZusi hã, 'ri nhiti morĩ da, a'ubuni u. Tame te a'ã tihãiba, 'Re ĩhãimana u'ãsi mono ma, mre me da.

³⁶ Tawamhã Sima Pedru norĩ hã te ZeZusihi zõ sõpré ropã, tisiré norĩ me hã, te te siwi sõpêtê da.

³⁷ Tawamhã te te siwi sõpêtê wamhã, te tãma rowasu'u za'ra:

— Aihĩni te asõ tanhopré ni.

³⁸ Tawamhã ZeZusi te asa tãma nharĩ za'ra:

— Oto wasi'aba'rêi wa'aba, 'rãwi 'ri wa'õtõ 're, 're ĩdahãimana za'ra mono u, tamomo zama te ĩwasu'uwê na da'apo're pu'u mono da. Taha da, wa wei mo. — ãne ma ZeZusi hã tãma siwaihu'u za'ra.

³⁹ Tawamhã daro mono bâ te 're mo, Darireza na danhipti'a nho'õmo nhisi ãma 're ĩdasi'ubumroi mono norĩ ma, ĩwasu'uwê hã te te dama 're wasu'u mono da, zudezu norĩ te, rowahutu zê mono bâ. Wa'uburé hã te te duré dama 're anhamra.

Aibã ĩ'wa're ré hã, ZeZusi te te ĩpesezê wasu'u

Mateusi 8.1-4; Rucasi 5.12-16

⁴⁰ Tawamhã aibã hã ma itême wi, ĩ'wa're ré hã. Hi'rãtitõ ma aime, ZeZusihi papara, te te tãma nharĩ da, ãne:

— ĩma aiwaihu'u pese di, asimipese waihu'u pese na hã. Taha wa, asima ĩwê wamhã, te za ĩpe. — ãne te ZeZusihi ma si'ru, te te pese da.

⁴¹ Tawamhã ZeZusi hã ãma pẽ'ézê wa, ma tã tinhib'rada hã wahutu, te te ãma upi da. Te te upi wamhã, ãne te tãma tinha:

— Tane tã. Wa tã ĩsima aiwê, te aipese da. Tãibã oto aihâzê hã. — ãne ma ZeZusi hã tãma waihu'u asa.

⁴² Tawamhã awa'awi ma ĩ'wa're hã tãma apa. Ma tã tihãiba wê oto.

⁴³⁻⁴⁴ Tawamhã ZeZusi hã ma tã sina sadawa uwati, te te dama sina wasu'u tã da. ãne te tãma tinha:

— ĩwapari pese, asina. Ni'wai ma, asina ĩwasu'u õ di za, te aipesezém na. Sasedoti u si te za aimo, 'Re ĩhãimana u'ãsi mono ma, da'ãma romhuri'wai u si, aihãiba wê zõ te te aihãiba 'madã'ã da. Taha parip si, 'Re ĩhãimana u'ãsi mono ma, te za asõpru, Mozésihi nhimiroti zarina, aipesezém na da te ãma aiwaihu'u za'ra da, sena na. — ãne ma tã aibã hã satõ, ZeZusi hã.

⁴⁵ Tazahã aibã hã rowasu'u wê na ma tã ãma ropé. Taha wa, sõ'awi 'ri ahã u hã datême 're ne waihu'u mono õ di, ZeZusi hã. Taha wa, a'ubuni wi te a'ã 're hãimana, danhiti. Tame 're hãimana mono ré, te itême 're dasihutu, daro mono bâ, da te 're sabu za'ra mono da.

2

ZeZusi hã aibã ĩhi'rê te te ĩpesezê wasu'u

Mateusi 9.1-8; Rucasi 5.17-26

¹ Syry na ãma ronomro parip si, ma ZeZusi norĩ hã apã aihutu, Capana'u na danhipti'a nho'õmo nhisi u. Tawamhã awa'awi ma ĩwasu'u hã ropé, 'ri para ãma oto ĩhãimana na hã, ZeZusi hã.

² Tawamhã da'ahã na ma itême dasito. Da'ahã na itême dasito mono wamhã, 'ri 're wa'wa ãma hã da'masisi di, 'ridawa ãma zama.

³ Tawamhã ZeZusi hã rowasu'u wê na te te dama rowasu'u ré, aibã norĩ hã ma tã ĩhi'rê hã itême siwi ãwisi, ĩsimiwaptã wa. Aibã norĩ hã maparane si'uiwa na ĩhãiba za'ra hã.

⁴ Tazahã da'ahã wamhã, te te siwi 'mazébré waihu'u õ di, ZeZusihi u hã. Taha wa, sipapara 'ri nhisi hawi, ma tã siwi 'ri 're pu'u za'ra sada, ZeZusihi uwaibaba te te siwi hiri da. Tawamhã ma tã ãma siwi si'ra, ĩsa'warizéb ré, ĩhi'rê hã.

⁵ Aibã norĩ hã ma tã ZeZusi hã siwi ãma umnhasi, ĩsiwadi hã za te te ĩpesezém na. ZeZusi hã ma tã tiwi waihu'u za'ra, sina ĩsimirosa'rata za'ra hã. Taha wa, te ĩhi'rê ma tinha:

— Īsiwadi, aiwasédé hã 're ĩ'ab'manharĩ wasété mono zé hã, te ai'ãma 're ab'madã'ã mono õ di za oto. — Āne ma tã tãma waihu'u, ĩhi'ré ma.

⁶Tame aibã norĩ hã te dame asimro, 'Re ĩhãimana u'ãsi mono nhimiroti 'rata na rob'ui'éré na dama rowahutu'wa norĩ hã.

⁷Ta norĩ hã te 'rãwi sima ãma rosa'rata za'ra, ãne:

— E niha te aibã ma tinha bété, õ hã, ĩmorĩ'õ ma. 'Re ĩhãimana u'ãsi mono ma, wẽ õ di, aibã ma, te te ĩnharizé hã. Dawasédé hã da te 're ĩ'manharĩ wasété za'ra mono zé hã, ni'wa hã te te dama 're aparĩ waihu'u mono õ di. 'Re ĩhãimana u'ãsi mono ma si waihu'u pese di, dawasédé hã te te dama 're ĩ'aparĩ mono zé hã. — Āne te Zezusihi ãma sima rosa'rata za'ra, rowahutu'wa norĩ hã.

⁸Tawamhã 'rãwi te te sima ãma ĩrosa'rata za'ra zém na, ma tã sina waihu'u, Zezusi hã. Taha wa, te tãma nharĩ za'ra:

— E marĩ da, te ãne ĩ'ãma ĩrosa'rata za'ra wa'wa.

⁹Wa hã dawasédé hã te dama 're ĩ'aparĩ waihu'u pese mono na, e niha te za ĩwaihu'u za'ra wa'wa, sena na ĩwaihu'u za'ra wa'aba da. ĩhi'ré ma, wa tã tinha: “Aiwasédé hã 're ĩ'ab'manharĩ wasété mono zé hã, te ai'ãma 're ab'madã'ã mono õ di za oto.” Āne hã ĩmreme si wamhã, aima pibu prã za'ra wa'aba di tã. Ā hã ĩmorĩ'õ hã wahutu da, duré tiza'warizé hã te te sima ãri da, oto morĩ da, te tãma nharĩ wapsi, te za ĩwaihu'u za'ra wa'wa, ĩwaihu'u pese na sena na ĩwaihu'u pese za'ra wa'aba da oto. Taha wapsi, aima pibu pese za'ra wa'aba di za oto.

¹⁰Tĩ'ai ãma dasiré ĩpodo hã ĩma waihu'u pese di, dawasédé te dama 're ĩ'aparĩ mono da hã, 'Re ĩhãimana u'ãsi mono zadawa para. Āne na asiwi ĩwaihu'u za'ra wa'aba da, wa za ĩhi'ré ma tinha, wahutu da.

Tawamhã ĩhi'ré ma, te tinha oto:

¹¹— Ma'ãpé, aiwahutu. Asa'warizé ãri, asõrõwa u aimorĩ da oto.

¹²Tawamhã awa'awi ma tã wahuu, aibã hã. Tiza'warizé, ma tã tĩ'ã. Rob u, ma tã ĩré watobro, danho'a. Taha wa, uburé, ma ãma tatob'uzu za'ra ni. 'Re ĩhãimana u'ãsi mono ãma, te duré ãma tawata za'ra ni. Āne ma tã dasima rowasu'u za'ra ni:

— Āne hã niwa wa te ĩ'madã'ã za'ra õ. — Āne ma tã dasima rowasu'u za'ra ni.

Réwihĩ wasu'u

Mateusi 9.9-13; Rucasi 5.27-32

¹³Tawamhã Darireza ãma ĩsõ'u zapoto u, te apã mo Zezusi hã. Da'ahã na ma tã ĩtẽme 're danomro. Tawamhã dasihutu sidãpãsi te nasi dama rowahutu, rowasu'u wẽ na.

¹⁴Tawamhã morĩ ré, ma tã aibã tisã, danhib'apito ma, dawĩ rob'ui'prazé ubumroi'wa hã, Réwi na ĩsisi hã, Apezuhu 'ra hã. Tĩnhimromhurizéb ãma te nhamra, rob'ui'prazé te te dawĩ 're ĩ'a'ubumroi mono zéb ãma. Tawamhã Zezusi hã te 'mahã:

— We aiwahutu, ĩsiré 're aimorĩ da oto. — Āne te 'mahã. Tawamhã awa'awi ma wahuu Réwi hã, ĩsiré oto 're morĩ da.

¹⁵Tawamhã syry na ãma ronomro wamhã, Zezusi hã te tisa, Réwihĩ nhorõwa ãma. ĩsiré 're ĩnomro mono norĩ zama, te ĩsiré tisaihu. Da'ahã na duré ĩsarina ĩdasi'aba're hã te duré ĩsiré tasaihuri ni. Ta norĩ hã rob'ui'prazé ubumroi'wa, duré parisezu norĩ nhimiroti zarina 're ĩhãimana za'ra mono õ.

¹⁶Tawamhã ta norĩ me sai ma, sãmra ré, ma tã Zezusi hã 'madã'ã za'ra, dama rowahutu'wa norĩ hã, parisezu norĩ hã. Ta norĩ hã Zezusihi siré 're ĩnomro mono norĩ ma, te nharĩ za'ra:

— E niha bã, te bété rob'ui'prazé ubumroi'wa norĩ siré tisa, dawasété na 're ĩdahãimana za'ra mono norĩ siré zama.

¹⁷Tawamhã Zezusi hã ãne te te sina wapari za'ra wamhã, ma tã tãma nharĩ za'ra, ãne:

— Hãzé ãna 're ĩnomro mono norĩ zõ, dawede'wa hã 're siwasutu za'ra mono õ di, te te 're wede za'ra mono da. ĩhãzé ré norĩ zõ si te za 're siwasutu za'ra, te te 're pese za'ra mono da. Tane duré wa hã. Dawẽ na 're ĩdanomro mono norĩ zõ, ĩsitẽme 're ĩhãrà mono da, we ĩmorĩ õ di. Dawasété na 're ĩdanomro mono norĩ zõ si, 're ĩhãrà mono da, wa wei mo. — Āne ma tã dawede'wa na tãma siwasu'u za'ra, Zezusi hã.

Bãtã na dasai ãna, ĩdahãimana za'ra zé wasu'u

Mateusi 9.14-17; Rucasi 5.33-39

¹⁸Tawamhã Zuwã Batitaha siré 're ĩnomro mono norĩ hã, duré parisezu norĩ hã, ã bãtã na te saihuri ãna tihãimana za'ra, 'Re ĩhãimana u'ãsi mono ma, mreme zusi da. Taha wa, ni'wam norĩ hã te Zezusihi ma, nharĩ za'ra:

— Zuwāhā siré 're ñomro mono norī hā, duré parizezu norī hā, ā bātā na saihuri āna te tihāimana za'ra, 'Re ihāimana u'āsi mono ma, mreme zusi da. E marī wa, asiré 're ñomro mono norī hā, saihuri āna ā bātā na hāimana za'ra ō di bété, tāma mreme zusi da.

¹⁹Tawamhā Zezusi, ma tō asa tāma waihu'u za'ra:

— Aibā hā ñmrozéb u, sō ihārā za'ra norī hā sihutu wamhā, e saihuri āna, te za tihāimana za'ra. Mare di. Saihuri āna hāimana za'ra ō di za. Aibā ñmro da hā ñ'rata sāmra za'ra ré, te za tō ñsiré tisa hā tihu, to sina.

²⁰Niwapsi te za bādā hā ñwa waptārā, aibā ñmro da hā ñsiwadi norī wa'wa hawi, da te tiwi ñ'ārī za'ra zéb da hā. Tawapsi te za tō sai āna 're si'ubumro, robzei'ō na. — Āne sō'awib ō nheré, ma tō aibā ñmrozé wasu'u na, sina āma simiré'é, Zezusi hā.

²¹Tawamhā āne ma duré tāma waihu'u za'ra:

— Da'uzā hā 'ratāre hā, e te za ihāi wē na āma hāiwa'aba ni, ihā nhihāri tém na. Mare di. Āne wamhā, te za dawī 're hāzahutu za'ra. Tawamhā ihā'rada hā te za sina hāta. Te za oto dawī hāihātari za'ētē.

²²Duré e romhā 'manharī 'rata 're, te za uwa 'rāi wa'u ñsé hā da te 're sé, wa'ui ware ō ré. Mare di. Wa'ui ware ō ré, da te 're séme mono wamhā, oto wa'ui ware wamhā, te za romhā 'manharī 'ratāre hā sina wazu. Tawamhā uwa 'rāi wa'u ñsé hā te za asa'wa. Romhā 'manharī hā te za duré hāihaiwamna. Ītép si'uiwa na si, te za da te 're sé, rob'rāi wa'u té hā. — Āne sō'awib ō nheré, ma tō tinhimiroti tém na tāma rowasu'u za'ra, Zezusi hā.

Romhuri zahārizém na roti wasu'u

Mateusi 12.1-8; Rucasi 6.1-5

²³Tawamhā romhuri zahārizém na, ma tō buru nho wa'wai baba ro'rahāri za'ra Zezusi norī hā, sabadu na. Īsiré 're ñomro mono norī hā ma tō te te sima 'rānhinarī za'ra, te te huri mono da.

²⁴Tawamhā parizezu norī hā te Zezusihi ma nharī za'ra:

— E niha, romhuri zahārizém na nheré, te te sima 'rānhinarī za'ra, asiré 're ñomro mono norī hā, wahi'rata norī hā romhuri zahārizém na te te dawī 're sawi za'ra mono nheré.

²⁵Tawamhā Zezusi ma asa tāma waihu'u za'ra:

— E apito Dawihī wasu'u na rob'ui'ére hā 're sōré za'ra wa'aba mono ā bā, te te ñrob'manharizém na, ñsiré norī me, mra te te simroi wamhā.

²⁶'Re ihāimana u'āsi mono āma 're ñdawata za'ra mono zéb u, ma tō āzé, apito Dawi hā. Abi'ata hā 're hāimana mono ré, ma tō āzé. 'Re ihāimana u'āsi mono ma da'āma romhuri'wa ñpire uptabi, Abi'ata hā, sasedoti ñpire uptabi hā. Tawamhā sébré wamhā, ma tō 'mai'rē ñ'u'ēne hā, Dawi hā, 'Re ihāimana u'āsi mono ma, aré da te ñsa'ra za'ra hā. Duré tisiré norī ma, ma tō tāma a za'ra. 'Re ihāimana u'āsi mono, ma tō aré pisutu, da'āma romhuri'wa norī si, ñ'u'ēne hā te te 're ñhuri mono da hā, sasedoti norī si. Tane nheré, ma tō 'mai'rēne za'ra, Dawi norī hā. — Āne ma tō tāma hāimanazéb 'rāzarōtō za'ra Zezusi hā, parizezu norī ma.

²⁷⁻²⁸Tawamhā āne ma tō Zezusi hā tāma 'rāsutu za'ra, tímreme na:

— Wa hā 'Re ihāimana u'āsi mono te te ñpisudu, dasiré ñpoto da, t'āi āma. Taha wa, dama ñpire di, sabadu na roti hā te dama 're ñ'apisutu mono zéb da hā. — Āne ma tō tāma waihu'u za'ra, parizezu norī ma.

3

Aibā ñsimizu prā hā, romhuri zahārizém na Zezusi te te ñpesezé wasu'u

Mateusi 12.9-14; Rucasi 6.6-11

¹Tawamhā zudezu norī te, rowahutuzéb u, ma duré āzé Zezusi hā. Tame te aibā hā dame nhamra, ñsimizu'rā' re hā.

²Tame te ni'wam norī hā Zezusi hā siwi 'madā, zudezu norī te, romhuri zahārizém na, aibā hā te te pese zō. E marī da. Sabadu na te te pese wa, te te siwi wē'ō da, romhuri zahārizém na roti, te te ñmadā'ā ō na.

³Tawamhā Zezusi hā te aibā 'mahā:

— We aimorī āwa.

⁴Te duré da'ab'mahā:

— E niha romhuri zahārizém na roti hā. E marī, wa za wa te dama 're 'manharī za'ra, romhuri zahārizém na, sabadu na hā. E ñwē na, wa za wa te 're dapawaptob za'ra. E ñwasété si, wa za wa te dama 're 'manharī za'ra. E romhuri zahārizém na, wa za wa te 're danho'reptu za'ra. E bātā na, wa te 're danho'reptu za'ra mono āna, wa za taré wa te 're da'madā'ā za'ra. — Āne te da'a'mahā.

Tawamhā ni'wa hā asa te te āma sada'ābā ō di, Zezusi te te ñsadanharī za'ra zém na hā.

⁵ Tawamhã Zezusi te da'ab'madã. Te te ãma ãrosa'rata norĩ ãma hã, toi õ di. Simirosa'rata wasété nhiptete za'ra wa, ta norĩ ãma pê'êzé za'ra di. Tawamhã ãsimizu'rã're ma, te tinhã:

— Ma'ãpé, asimizu wahutu.

Tawamhã ma tõi tinhimizu hã wahutu, aibã hã. Taha wa, ma tõi tinhimizu pese.

⁶ Te te pese pari, ma awa'awi wairé, parisezu norĩ hã. Tawamhã Erodihi niwĩ 're ãhãimana za'ra mono norĩ me, ma tõi sima ãma roti za'ra, Zezusi te te sima hãiba za're za'ra da.

Zezusi hã te te ãda'apesezé wasu'u

⁷⁻⁸ Tawamhã Zezusi norĩ hã te ai'aba're, Darireza na ãsõ'u nhisi u. Da'ahã uptabi na te ãsarina ai'aba're ni, Darireza na danhipti'a nho'õmo nhisi hawimhã, duré Zudeza na danhipti'a nho'õmo nhisi hawimhã, duré Zeruzarê hawimhã, duré Idumeza hawimhã, duré Zodã pa zara hawimhã, duré Tiru hawimhã, duré Sido hawimhã. Zezusihi wasu'u hã ma tõi wapari za'ra ni aré, te te 're ãda'apawapto mono zé wasu'u na hã. Taha wa, ma tõi ãtème dasito, daro mono bã.

⁹⁻¹⁰ Uburé ãhãzé ré norĩ hã te ãtème 're sisãmra, te te siwi upi da, tinhib'rata na. Taha wa, tisiré 're ãnomro mono norĩ ma, te 'ru za'ra, uba're hã te te 'ma'ãri za'ra da dawĩ, ãwap sébré da, da te dasiwi hãiba watĩ tõi da.

¹¹ Wa'uburé te te 're ãda'awamnaĩ mono norĩ hã, Zezusi te te 're 'madã'ã za'ra mono wamhã, hi'rãtitõ te ãpapara 're sina. Te duré siwi 'mahã, sa'ëté:

— A hã 'Re ãhãimana u'ãsi mono 'ra.

¹² Taha wa, wa'uburé norĩ hã 'Re ãhãimana u'ãsi mono 'ra na te te dama sisi tõi za'ra da, te sina sadawa uwati za'ra, Zezusi hã.

Aibã 12 na ãhãiba za'ra hã, Zezusi te te ãpisutu za'ra zé wasu'u

Mateusi 10.1-4; Rucasi 6.12-16

¹³ Tawamhã êtê 'rãihã na, ma tõi sai'u Zezusi hã. Tame te te sima ãwëzéb uwaibaba, te sitème sõi tihãrã za'ra, aibã norĩ zõi. Sitème sõi hãrã za'ra wa, ma tõi ãtème aihutu 'rãwi.

¹⁴ Tawamhã 12 na ãhãiba za'ra hã ma tõi pisutu za'ra, ãsiré a'ã 're ãhãimana za'ra mono da, nimahã na te te datème satõrĩ za'ra da, za te te 're ãda'anho'reptui mono zé wasu'u na, ãsõwa te te 're dapo're pu'u za'ra mono da, ãsadawa para. Tizadawa wasu'u'wa na ma tõi sisi za'ra oto.

¹⁵ Ma tõi duré pisutu za'ra, ãwaihu'u pese zarina, wa'uburé norĩ te te dama 're sãmra za'ra mono da.

¹⁶⁻¹⁷ Aibã norĩ hã, 12 na ãhãiba hã ãne ãsisi za'ra hã: Sima hã Pedru na, ma tõi sisi té, Zezusi hã. ãsiré norĩ hã ãne ãsisi za'ra hã: Ti'adu, duré Zuwã, Zebedehe 'ra norĩ hã. Bu'anezi na, ma tõi sisi tãb zahuré, Ti'adu norĩ hã Zezusi hã. Bu'anezi na, ãsisi hã, tãirãrã te wasu'u, ãsisi té hã.

¹⁸⁻¹⁹ Duré ãsiré norĩ hã ãne ãsisi za'ra hã: Ádéré, duré Piripi, duré Batoromezu, duré Mateusi, duré Tome, duré Ti'adu, Apezuhu 'ra hã, duré Tadezu, duré Sima, Zeroti norĩ niwĩ aré 're ãhãimana mono hã, duré Zudasi Icarizoti, si'uihã na Zezusihi hãiba nhomri'wa da hã dama. ãne ãsisi za'ra hã.

Bezebuhu wasu'u

Mateusi 12.22-32; Rucasi 11.14-23; 12.10

²⁰ Tawamhã Zezusi hã 'ri tème oto morĩ wamhã, da'ahã na ma duré ãtème dasito. ãtème dasito mono wa, Zezusi norĩ hã saihuri waihu'u õ di.

²¹ Tawamhã Zezusihi wasu'u te te wapari za'ra wa, ma tõi sõi ai'aba're, ãsisãnawã norĩ hã. Ma tõi ni'wam norĩ hã 'rã siwamnaĩ na Zezusihi ãma romnomri za'ra. Taha wab zama, te sõi ai'aba're, Zezusihi zõi, ãsisãnawã norĩ hã.

²² 'Re ãhãimana u'ãsi mono nhimiroti 'rata na rob'ui'ére na dama rowahutu'wa norĩ hã, Zeruzarê hawi datème ãihutu norĩ hã, ãne te taré sima rowasu'u za'ra, Zezusihi hãiba na:

— Õ hã Bezebuhu zadawa para te 're mo, wa'uburé norĩ nhib'apito zadawa para. Bezebu hã romhõsi na te te 're pawapto, wa'uburé te te dama 're anhamra mono da. — ãne te taré 'rãwi sima rowasu'u za'ra Zezusihi hãiba na, zudezu norĩ ma, rowahutu'wa norĩ hã.

²³⁻²⁶ Tawamhã Zezusi te sima sõi tihãrã za'ra, rowahutu'wa norĩ zõi, marĩ hã te te tãma waihu'u za'ra da, romnhimire'é na. Tawamhã ãtème simasa wamhã, ãne te tãma nharĩ za'ra:

— E niha te za Satanasi hã tinhib'a'uwë norĩ hã te te dama 're sãmra. Te te dama 're ãsãmra mono da hã, mare di. ãne wa za aima ãma romnhimire'é za'ra wa'wa, waihu'u za'ra wa'aba da. Danhib'apito nhib'a'uwë norĩ hã 'rãwim nheré, oto sisada 're simasa mono wamhã, te aré 're si'uprosi. Duré dasisãnawã nheré, dasisada 're dasimasa mono wamhã, te aré 're dasi'uprosi, 'rãwim nheré. Tane duré Satanasihi nhib'a'uwë norĩ hã 'rãwi sisada 're simasa mono wamhã, te aré 're si'uprosi. Tãibã aré ãsib'a'uwë norĩ hã. Taha wa, Satanasi hã tinhib'a'uwë norĩ hã te te dama 're ãsãmra mono da hã, mare di.

27 — Āne wa za duré aima rowasu'u za'ra wa'wa, marī hā āma waihu'u za'ra wa'aba da. Ni'wa hā aibā ĩsiptete nhorōwa u, sébré wamhā, ĩsibro hā te te tiwi ubumro da, te te tiwi ubumroi waihu'u ō di za, te te sima pawasisi ō ré hā. Te za a'ā sima pawasisi. Taha parip si, te za ĩsibro hā tiwi ubumro, 'ri' re ĩromnhi'mi'wara mono hā, aibā ĩsiptete wi. — Āne te tāma rowasu'u za'ra, Zezusi hā.

28 Ma duré tāma waihu'u za'ra:

— Ma'āpé, ĩwapari pese za'ra wa'aba za. Dawasédé hā da te 're 'manharī za'ra mono nherē, duré 'Re ĩhāimana u'āsi mono āma, da te āma 're wasété za'ra mono nherē, dawasété na tāma 're dasiwasu'u za'ra mono wamhā, dawasédé hā tāma waihu'u pese di, te te dama 're ĩ'apari mono zéb da hā, te te oto da'āma 're ab'madā'ā tō mono da.

29-30 Tane nherē, ĩpē'ézani hā wē nherē, ĩsimiromhuri na da te 're wē'ō pese za'ra mono wamhā, taha na dawasédé hā te te dama 're apari mono ō di za. Te za te te da'āma 're ab'madā'ā u'āsi, 'Re ĩhāimana u'āsi mono hā. — Āne Zezusi ma tō tāma waihu'u za'ra, rowahutu'wa norī ma, taré te te sima rowasu'u za'ra wa, wa'uburé zadawa para, 're ĩmorī na. Āne wē'ō te, ma tō āne tāma waihu'u za'ra, te te waihu'u za'ra da.

Zezusihī na wasu'u, ĩsīānawā norī wasu'u me

Mateusi 12.46-50; Rucasi 8.19-21

31 Tawamhā Zezusihi no norī hā ma tō ĩtēme aihutu, tina me. Rowi simasab ré, ma da'maipo're pu'u za'ra, Zezusihi zō da'maihārā da, ĩtēme watobro za'ra da.

32 Da'ahā na te ĩ'rata asimro ni. Tawamhā ni'wam norī hā te tāma rowasu'u za'ra, āne:

— Ano norī hā te rowi asō aimasa, ana me. Te asō tihārā za'ra. — Āne te oto tāma rowasu'u za'ra.

33 Tawamhā tāma ĩrowasu'u'wa norī ma, ma tō waihu'u za'ra, āne:

— E 'wa hā ĩna. E 'wam norī hā ĩno norī.

34 Tawamhā siwi ĩ'uirī'wa norī 'madā'ā sina, te āne tinha:

— Āhāta ĩna. Āhāta ĩno norī. Āhāta ĩhidiba norī.

35 Ni'wam norī hā 'Re ĩhāimana u'āsi mono te te sima 're ĩwē za'ra mono zéb zarina, te te tāma āma 're ĩ'uwaimrami za'ra mono norī hā, ta norī hā ĩno, duré ta norī hā ĩhidiba, duré ta norī hā ĩna. — Āne Zezusi ma tō tāma waihu'u za'ra, da te waihu'u za'ra da.

4

Aibā hā amnho te te ĩ'anhamra mono zé wasu'u

Mateusi 13.1-23; Rucasi 8.4-15

1 Tawamhā Zezusi hā te duré dama rowahutu, Darireza āma, ĩsō'u zapoto 'rata. Da'ahā uptabi na ĩtēme dasito mono wa, ma uba're wa āzé, ā zadaré prā na.

2 Tawamhā sa'ētē na ma tō dama rowaihu'u marī na, tinhirowasu'u na romn-himírē'ézém na. Āne te dama tinha:

3 — Ma'āpé ĩwapari pese za'ra wa'aba za. Amnho potozé wasu'u na, wa za aima rowasu'u za'ra wa'wa. Aibā hā te buru u mo, ti'ai hāibādā wa, amnho hā te te anhamra mono da, poto mono da.

4 Tawamhā, amnho hā te te anhamra mono wamhā, nima norī hā bādādi zababa ma tō rere'e. Tawamhā sire hā ma te te uprosi uburé, poto mono ō ré.

5 Ētē nhisiwi ma duré nima norī hā rere'e. Ti'ai baiháire wa, ma tō 'wanhipré su'u, amnho hā.

6 Tawamhā bādā hā oto 'rāiwatobro wamhā, rowa'ro wa, ma ti'wanhipré 'ré za'ra, ĩsari hā te te rowa'rēi mono ō wa.

7 Nima norī hā ma duré rere'e, wab'ru wazari. Tawamhā siré ma tō 'wanhipré. Siré 'wanhipré mono wamhā, ma te te ubu, wab'ru hā. Taha wa, 'rāi mono ō di, ta norī hā.

8 Ti'ai wē wa, ma duré nima norī hā rere'e. Tawamhā oto 'wanhipré 'rāihā mono wamhā, ma tō ti'rā za'ra. 'Rāi mono wamhā, nima niwīmhā 'rāi ahā prā ti, rob're hā. Duré nima niwīmhā 'rāi ahā di. Duré nima niwīmhā 'rāi pese uptabi di. — Āne amnho potozé wasu'u na, ma tō dama rowasu'u, Zezusi hā.

9 Tawamhā āne ma tō āma dama 'rāsutu, timreme na:

— Asimipari pese za'ra wa'aba wamhā, ma'āpé ĩwapari pese za'ra wa'aba, ĩnhimirowasu'u na hā waihu'u za'ra wa'aba da. — Āne ma tō āma dama waihu'u.

10 Tawamhā dazahutu parip si, ni'wam norī dame ĩsimasa hā ma tō ĩtēme sina rotété za'ra dawa'rāmi, aibā 12 na ĩhāiba norī me. Tawamhā āne te siwi 'mahā:

— E niha amnho potozém na rowasu'u hā.

11-12 Taha wa, Zezusi asa ma tō āma sada'ābā za'ra:

— 'Re İhâimana u'âsi mono hã a norĩ wa'aba ma si, ma tã aima waihu'u za'ra wa'wa, dama İwaihu'u'õ hã, da'âma 're İsib'a'uwẽ mono zém na hã, sã'awi te te dama waihu'u õ nherẽ. İzazei'õ'wa norĩ ma, wa za İnhimirominhimiré'é na si te tãma 're rowasu'u za'ra. Tawamhã ta norĩ hã titõmo na te te 're rob'madã'ã za'ra mono nherẽ, taré te za te te 're rob'madã'ã za'ra. Duré 're simipari za'ra mono nherẽ, taré te za 're simipari za'ra, te te 're waihu'u za'ra mono âna. Te te 're waihu'u za'ra mono wamhã, te aré tiwaséé wi 're sipizari za'ra, 'Re İhâimana u'âsi mono niwĩ, İwaséé hã te te âma 're ab'madã'ã tã mono da. — Æne ma tã tãma waihu'u za'ra, Zezusi hã.

¹³ Tawamhã ma duré tãma waihu'u za'ra:

— A norĩ wa'wa hã waihu'u za'ra wa'aba õ wamhã, amnho potozém na te İrowasu'u hã, e niha te za tawamhã İnhimirowasu'u amo hã İwaihu'u za'ra wa'wa. — Æne ma tã tãma waihu'u za'ra.

¹⁴ Tawamhã ma duré tãma waihu'u za'ra:

— Amnho hã aibã te te İ'anhamra mono hã, 'Re İhâimana u'âsi mono zadawa wasu'u, te wasu'u.

¹⁵ Ni'wam norĩ hã 'Re İhâimana u'âsi mono zadawa wasu'u hã, tipo're na te te 're İwapari za'ra mono hã, aiwa amnho hã bãdãdi zababa İrere'e mono ne, te za 're hâimana za'ra. Awa'awi te te wapari za'ra wamhã, Satanasi hã te za İtême tiwisi za'ra, 'Re İhâimana u'âsi mono zadawa wasu'u hã te te tiwĩ âri za'ra da.

¹⁶ Ni'wam norĩ hã aiwa amnho hã êtê nhisiwi İrere'e mono ne, te za 're hâimana za'ra. 'Re İhâimana u'âsi mono zadawa wasu'u hã te te 're wapari za'ra mono wamhã, te za te te 're saze za'ra awa'awi, to sina.

¹⁷ Tane nherẽ, te za te te 're sazei hutu za'ra. Tawamhã âté robzépada hã duré rowaséé hã te za İzazei'õ'wa norĩ hã te te tãma 're 'manharĩ za'ra. Tawamhã 'Re İhâimana u'âsi mono zadawa wasu'u hã aré te te 're İsaze za'ra mono zé hã, te za te te 're sazei utõĩ za'ra.

¹⁸ Ni'wam norĩ hã aiwa amnho hã wab'ru wazari İrere'e mono ne, te 're hâimana za'ra. 'Re İhâimana u'âsi mono zadawa wasu'u hã te za te te 're wapari za'ra, taré.

¹⁹ Âté marĩ na si te za duré te te 're rosa'rata za'ra. Âté danhibro pese na si, te za te te sima 're rosa'rata za'ra, İwẽ uptabi newa. Âté marĩ hã te za te te sima 're wẽ uptabi za'ra. Tawamhã rob're İ'rãĩ õ ne, tãma 're hâimana wẽ za'ra mono õ di za.

²⁰ Ni'wam norĩ hã aiwa amnho hã ti'ai wẽ wa İrere'e mono ne, te za 're hâimana za'ra. Ta norĩ hã 'Re İhâimana u'âsi mono zadawa wasu'u hã te te 're wapari za'ra mono wamhã, te za te te sima 're wẽ za'êté za'ra. Tawamhã rob're İ'rãĩ pese uptabi ne, te za hâimana wẽ uptabi na 're hâimana za'ra. — Æne ma tã tinhimirowasu'u hã tãma 'rãsutu za'ra, Zezusi hã.

Rob'uiwêzé wasu'u

Rucasi 8.16-18

²¹ Tawamhã te duré tãma rowasu'u za'ra:

— Rob'uiwêzé hã 'ri 're wa'wa u, da te âri wamhã, e piza'a na te za upsibi ni. E daza'warizéb 'rowi, te za sãĩ ni. Mare di. İsima'warazém na si te za sã'awi da te 're sãrẽ, te te dama 're rob'uiwẽ za'ra mono da.

²²⁻²³ Taha wa, marĩ hã a'ã dama İwaihu'u'õ hã, niwapsi dama waihu'u pese di za. Aipo're na ma tã İnhimiroti hã İwapari za'ra wa'wa. Taha wa, ma'ãpé âma 're rosa'rata za'ra wa'aba mono, waihu'u za'ra wa'aba da.

²⁴⁻²⁵ — Ni'wam norĩ hã 'Re İhâimana u'âsi mono hã İsimirowaihu'u na te te 're 'ruiwapari u'âsi za'ra mono wamhã, taha zarina te za 'Re İhâimana u'âsi mono hã sa'êtê na tãma âma 're sãprub za'ra, te te aré âma 're İwaihu'u za'ra mono zém nhipai u, te te waihu'u pese za'ra da oto. Tane nherẽ, ni'wam norĩ hã İsimirowaihu'u na te te 're 'ruiwapari za'ra mono õ wamhã, ta norĩ wi te za tinhimirowaihu hã tãma waihu'u pese za'ra õ nherẽ, te te tiwĩ 're awaihu 'Re İhâimana u'âsi mono hã, te te aré âma 're İwaihu'u za'ra mono zé hã. — Æne ma tã tãma waihu'u za'ra, Zezusi hã.

Amnho potozé wasu'u

²⁶ Tawamhã ma duré tãma waihu'u za'ra:

— 'Re İhâimana u'âsi mono hã da'âma 're İsib'a'uwẽ mono zém na, wa za aima rowasu'u za'ra wa'wa, âne. Aibã hã ti'ai wa, te za amnho hã te te anhamra, potõ mono da.

²⁷ Tawamhã aibã hã riti ré nherẽ, duré sãtõ ré nherẽ, si'uihã na te za ti'wanhipré za'ra, amnho hã. Te za ti'rãihã za'ra. E niha te za ti'wanhipré za'ra. E niha te za ti'rãihã za'ra. Aibã hã te te waihu'u õ di.

²⁸ Ti'ai 'rowim nherẽ, te za si'uihã na 're 'wanhipré za'ra, 're 'rã za'ra mono da. Te za a'ã ti'wanhipré za'ra. Taha parip si, te za 're sitoro wairébé. Taha parip si te za 're 'rã za'ra.

²⁹ 'Rāi 'ré wapsi, te za oto 'rāihā, ro'wa na aibā hā, bādā hā oto ĩwa waptā'ā wa, te te ĩ'rāihārizéb da hā. — Āne ma tō tāma rowasu'u za'ra, Zezusi hā.

Motada nhamā 'rare wasu'u
Mateusi 13.31-32; Rucasi 13.18-19

³⁰ Tawamhā ma duré tāma waihu'u za'ra:

— 'Re ĩhāimana u'āsi mono, da'āma 're ĩsib'a'uwē mono zé hā, e marī na, wa za āma romnhimiré'é.

³¹ Motada nhamare na, wa za aima āma romnhimiré'é za'ra wa'wa, 'Re ĩhāimana u'āsi mono, da'āma 're ĩsib'a'uwē mono zé hā. Motada nhamare hā syry uptabire di, aimawi norī ma hā.

³² Tazahā da te 're zuri mono wamhā, 're 'wanhipré za'ra mono wamhā, te za tī'rāihā za'ra. Aimawi rob're hā te te 're sipai pese za'ra. Papo za'ētē wamhā, ĩsu 'rowi te za si norī hā te te sima 're sasi za'ra. Āne wa aima āma romnhimiré'é za'ra wa'wa. — Āne te tinha, Zezusi hā.

³³ Āne ma tō Zezusi hā tinhimirowasu'u ahā na te te āma 're romnhimiré'é, marī hā da te āma 're ĩwaihu'u za'ra mono zéb da hā.

³⁴ Tinhimiroromnhimiré'é na si, ma tō te te dama 're rowasu'u. Tisiré 're ĩnomro mono norī ma si, ma tō hāiba pisutu za'ra, te te tāma 're awaihu'u pese, sō'awi.

Zezusi hā rowa'u'u ma, te te ĩnharizé wasu'u
Mateusi 8.23-27; Rucasi 8.22-25

³⁵ Tawamhā Zezusi hā barana ma tō satōrī za'ra, tisiré 're ĩnomro mono norī hā:
— Oto zara u, wa te saprī za'ra wa'aba. — Āne ma tō satōrī za'ra.

³⁶ Tawamhā te a'ā dazatōrī za'ra, apā dasi'aba're da. Taha pari, Zezusi hā uba're 're ĩsébrézéb 're, ma asisi ĩsarina, zara u te te saprī za'ra da. Ni'wam norī hā te duré siré sari za'ra uba're hā, Zezusi hā zarina.

³⁷ Tawamhā rowa'u hā ma tō watobro, sa'ētē na. Tawamhā āsisasi hā sa'ētē wamhā, ma tō nasi asisi, uba're wa. Ā hā te te ĩ'masisizéb u hā romhuture di oto.

³⁸ Tane nherē, te Zezusi hā nhono, uba're na're āma. Da'rā zaparizém na te 'rā zapa. Taha wa, ma tō siwi utu. Āne te oto siwi 'mahā:

— Rowahutu'wa, wa za ai'utōrī ni. E wa'āma aipē'ézé za'ra ō di za.

³⁹ Tawamhā ma tō wahudu. Wahutu wamhā, rowa'u'u ma, te tinha, wa'u'utu da. Duré āsisasi ma zama, te tinha, āne:

— Ma'āpé ai'ātu na.

Tawamhā ma tō sazā, rowa'u hā. Ma tō duré ti'ātu oto.

⁴⁰ Tawamhā Zezusi hā te āne tāma nharī za'ra:

— E marī da, ma aipahi za'ra wa'wa. E niha zahadu asiwi 're ĩ'umnhasi za'ra wa'aba mono zé hā aima 're hāimana za'ra wa'aba mono ō di.

⁴¹ Tawamhā te sima rowasu'u za'ra:

— Pra, e niha ō hā ĩwaihu'u pe. ĩsadawa hawi ma rowa'u hā sazā, āsisasi zama. — Āne te sima rowasu'u za'ra. Ōne hā tāma sa'rese za'ra ō wa, ma tāma tipahi za'ra.

5

Aibā hā wa'uburé ré 're ĩmorī hā, Zezusi te te ĩpawaptobzé wasu'u
Mateusi 8.28-34; Rucasi 8.26-39

¹ Tawamhā Zezusi norī hā ma tō zara u aihutu, Zeraza na danhipti'a nho'ōmo nhisi u. Darireza āma ĩsō'u zapoto zara niwī, Zeraza hā.

² Tawamhā uba're hawi watobro wamhā, ma tō aibā hā wa'uburé ré 're ĩmorī hā sina uzusi.

³⁻⁴ Aibā hā adā'ā 'ru hawi, ma tō ĩtēme watobro. Adā'ā 'ru āma, te 're sāmra. Te aré da te 're pawasisi, ĩsi'uwazi nhorō rutu na. Te aré duré da te 're hiwasisi. Tazahā ma tō te te sina 're anhinārī. Ni'wa hā sada 're siptete waihu'u mono ō di.

⁵ Bātā sidāpāsi, duré mara sidāpāsi te adā'ā 'ru āma 're hāimana, ētē 'rāihā āma zama, sadari sina. Ētē na te duré 're sisihāri u'āsi.

⁶ Romhā na, ma tō aibā hā tisā, Zezusi hā. Te te sāmri wa, te ĩtēme wara, Zezusi hā. Tawamhā hi'rāitō ma tō ĩpapara aime.

⁷ Sa'ētē te 'mahā, āne:

— Zezusi, 'Re ĩhāimana u'āsi mono, danhipai u 're ĩsāmra mono 'ra, e marī ĩ'āma 'manharī da, te we aimo. ĩ'azārī ō di za. 'Re ĩhāimana u'āsi mono nho'a, wa ĩsina aipa'uwati.

⁸ Āne te Zezusi hā ma tinha wa'uburé hā, te te tāma rob'rui wa, aibā hāiba hawi watobro da.

⁹ Tawamhã Zezusi te ĩsisi zô sadanha:

— E niha asisi hã.

— Ahã na, ĩnhisi hã. E marĩ wa. Wa norĩ hã wa'ahã wa. — Āne te Zezusihi ma sisisi.

¹⁰ Tawamhã Zezusihi wi, te nasi tiwi rowaptê, wa'uburé norĩ ma, te te rob'ru tō da, darob amoi u, si'aba'rê tō da.

¹¹ Tawamhã romhutu na te uhâbã hã tisa te te 're huri, ahã na, sa'a āma.

¹² Tawamhã wa'uburé norĩ hã te Zezusihi wi sina rowaptêrê za'ra, uhâbã u:

— Ma'ápé uhâbã u wazatōrĩ za'ra na, ihâiba 're, 're wasi'ubumroi mono da oto.

¹³ Tawamhã ma tō tãma rob'ru za'ra, aibã hãiba hawi wairébê da, uhâbã hãiba 're, sisisi da. Tawamhã uhâbã hãiba 're sisisi wi, uhâbã te sisa're, wara sina, ĩrã sipra u. Āi ba ma rere. Āi ba rere'e wa, ma uburé ai'utō, uhâbã hã. 2 miu na ma tidã'ã za'ra.

¹⁴ Si'utōrĩ wi, te uhâbã 'madã'ã'wa norĩ hã ĩsiti sisa're wara sina, 'ri ahã u, te te dama rowasu'u za'ra da, rom na 'ri wa'otō āma zama. Tawamhã da'ahã na ma tō ĩtême ai'aba'rê ni, da te 'madã'ã za'ra da.

¹⁵ Tawamhã Zezusihi u dasihutu wamhã, ma tō aibã hã 'madã'ã za'ra ni, wa'uburé norĩ ré aré 're ĩmorĩ hã. Uza ré, te oto nhamra, rowê na. Tawamhã ma tō tãma tapahi za'ra ni, òne hã dama sa'rese ò wa.

¹⁶ Tawamhã āma ĩ'madã'ã za'ra 'wa norĩ hã, te aibã wasu'u hã dama wasu'u za'ra, ĩsihutu norĩ ma. Aibã hã Zezusi te te ĩpawaptobzém na, duré uhâbã ma, te te ĩrob'manharizém na zama, te dama rowasu'u za'ra.

¹⁷ Tawamhã, te siwi satō, danhipti'ai hawi watobro da, Zezusi hã.

¹⁸ Taha wa, Zezusi ma oto āzé uba're wa, danhiti morĩ da. Uba're wa, sébré wi, te aibã hã āne sina 'mahã, wa'uburé ré aré 're ĩmorĩ hã:

— Ma'ápé ĩma pisutu, asiré 're ĩmorĩ da.

¹⁹ Tane nherê, Zezusi te te āma sazei ò di. Taha wa, ma te aibã ma waihu'u, āne:

— Apã te za aimo, asōrōwa u, 'Re ĩhãimana u'asi mono, ĩwê na te te aipawaptobzém na asisãnawã norĩ ma, asiwasu'u da.

²⁰ Tawamhã te oto mo, aibã hã. Zezusi, ĩwê na te te ĩpawaptobzém na, ma tō te te dama 're rowasu'u, Decapori na danhipti'a nho'òmo nhisi 're. Tawamhã ĩsimirowasu'u na da te 're wapari za'ra mono wamhã, ma tō āma 're datob'uzu za'ra.

Zairuhu 'ra wasu'u, pi'ò'i wasu'u me

Mateusi 9.18-26; Rucasi 8.40-56

²¹ Tawamhã Zezusi hã ma tō apã saprĩ, zara u. Da'ahã na, ma ĩtême tasi'rã'otō ni, ã zaihã u hã.

²² Tawamhã aibã hã ma ĩtême wi, Zairu na ĩsisi hã zudezu norĩ te, rowahutuzé 'madã'ã'wa hã. ĩtême wisi wi, ma tō hi'rãtitō aime, Zezusihi papara.

²³ Āne te tãma tinha:

— ĩrã hã hãzé ahã di, azaruture hã. Te za ĩwi dãrã. Taha wa, te za āma ĩsiré aimo, asib'rada hã āma nomri da, ĩma pese da, dã'ã tō da. — Āne ma tō tãma tinha.

²⁴ Tawamhã Zezusi te ĩme mo. Da'ahã na ĩsiré dasi'aba'rêi wamhã, ma dasiwi hãiba wati ni.

²⁵ Tawamhã morĩ ré, ma pi'ò hã ĩtême wi, ĩhãzé te te 're ĩ'manharĩ mono hã. Wahub ahã na te hãzé ré 're hãimana, 12 na āma ĩwahubzé hã.

²⁶ Dawede'wa norĩ hã ma tō ahã na te te 're wede za'ra. Dawede'wa nhĩb'rata 're hãimana mono ré, ma tō te te 're robzépata za'êtê, pi'ò hã. Uburé tinhibro hã ma tiwede'wa norĩ ma uprosi, tiwede wa'ãbãzém na. Taha wa, 're séptã'ã mono ò wa, ma tō ĩhãzé hã te te tiwi 're waseté u'asi, ĩhãiba hã.

²⁷⁻²⁹ Tawamhã Zezusihi wasu'u te te wapari wamhã, dawa'wa u ma tō ázé, ĩbabarã hawi. Āne ĩsimirosa'rada hã: “Zezusihi uza si te tiwi upi nherê, wa za ĩpese.” Āne te sima rosa'rata, pi'ò hã. Taha wa, te ĩtême mo. ĩ'uza si ma tiwi upi. Tawamhã ĩ'uza te te tiwi upi wi, awa'awi ma tō séptãrã. Marĩ hã tãma ĩsipari na, ma tō 'rãwi sihãiba waihu'u.

³⁰ Awa'awi ma tō duré sina waihu'u, Zezusi hã tiwaihu'u pese na te te ĩda'maipese na. Taha wa, ma aipi'ra, da'ahã wa'wa. Āne te tawamhã da'a'mahã:

— E 'wa hã ma ĩ'uza hã ĩwi upi.

³¹ Tawamhã ĩsiré 're ĩnomro mono norĩ hã te asa tãma nharĩ za'ra:

— Oro aihĩni ai'ãma wasi'uiri mono za, te ĩwa'azadanhã. — Āne te asa tãma nharĩ za'ra, ĩsiré 're ĩnomro mono norĩ hã.

³² Tane nherê, Zezusi hã ti'upi'wa zô te te 're rob'madã'ã.

³³ Taha wa, te ĩtême mo, pi'ò hã. Ma tō sihãiba waihu'u, ĩhãzé te te tãma ĩpari na. Taha wa, pahĩ nherê, te ĩtême mo, rêrê'ê sina. Hi'rãtitō ma aime Zezusihi papara, tãma siwasu'u da. Ma tō tãma siwasu'u pese, pi'ò hã.

³⁴ Tawamhã Zezusi ma tô tâma waihu'u:

— Ìhidiba, za te aipesezém na, asina Ì'umnhasi wa, ma tô aihâzé hã aima apa. Rowē na si aimorī. Ma tô aipe. — Āne ma tô tâma waihu'u.

³⁵ Tawamhã pi'oi ma, te te rowasu'u ré, ma tô aihutu, Zairuhu nhorōwa hawimhã tâma Ìromhuri'wa norī hã. Āne te tâma rowasu'u za'ra:

— Ai'ra azarutere hã ma tô aiwi dârâ. Simiromhuri nherē, rowahutu'wai wi, ro'wa'rê ò'umnhasite, te za âma ïrosazâ. — Āne te tâma rowasu'u za'ra.

³⁶⁻³⁷ Tazahã ïsimirowasu'u za'ra hã te te 'madâ'â ò di, Zezusi hã. Taha wa, te Zairuhu ma tinha:

— Ai'ra wasu'u ma, aipahi tô. Ìwétési Ì'umnhasi, te aipawaptob da. — Āne ma tâma waihu'u. Ni'wa hã ïsiré morī tô da, ma tô pisutu za'ra, Pedru norī hã Ti'adu, Zuwã norī me si, ïsiré si'aba'rêi da, Zairuhu 'ra u. Ti'adu, duré Zuwã, ta norī hã tisisânawã zahuré.

³⁸ Tawamhã Zairuhu nhorōwa u sihutu wamhã, ma tô da'ab'madã, Zezusi hã. Azarutu âma te ta'ry'ry ni, dawawai 'râihã sina. Taha wa, ro'wa'rutu di 'ri paramhã.

³⁹ Tawamhã te dama tinha:

— E marī wa, te ai'ahã na aiwa'õ za'ra wa'wa. Azarutere hã dâ'â ò di. Taré te nhono. — Āne ma tô tâma waihu'u za'ra.

⁴⁰ Tawamhã asa te tâma nharī za'ra:

— Oro taré sôtõ za. Pě'ēzani ò di.

Tawamhã Zezusi hã ma tô dama rob'ru, rob u dawairébé da, uburé. Si'ubdatõ ïsiré 're ïnomro mono norī hã ma tô ïsiré asisi, 'ri 're wa'wa u, ïnomrozéb u hã. Ìna norī si, ma tô ïsiré tizasi zahuré.

⁴¹ Tawamhã ma tô pa'â, Zezusi hã. Āne te tâma tinha:

— Tarita tumi.

Āne âma ïsaprízé hã: "Azarutere aihahutu."

⁴² Tô awa'awi azarutere hã ma wahudu, 12 na âma ïwahu hã. Para na te oto 're mo. Tawamhã uburé 'ri para ïsimasam norī hã ma âma titob'uzu za'ra.

⁴³ Tawamhã Zezusi te ïna norī ma nharī zahuré, rowasu'u na te te dama âma ropé zahuré tô da. Mram na si, te duré wada'uri zahuré, ti'ra ma, te te a zahuré da.

6

Zezusi hã Nazaré u ïmorizé wasu'u

Mateusi 13.53-58; Rucasi 4.16-30

¹ Tawamhã Zezusi norī hã Nazaré u, ma tô apã ai'aba'rê, Zezusi hã aré 're ïhâimana mono zéb u.

²⁻⁴ Tawamhã datême sihutu wamhã, zudezu norī te, romhuri zahârizém na te oto dama rowahutu, sabadu na, rowahutuzéb âma. Da'ahã na da te wapari za'ra wamhã, ma tô âma tatob'uzu za'ra ni, ïsimirowasu'u na hã. Āne te duré âma tasisadanharī za'ra ni:

— Pra. E ma hawimhã, ma uburé marī hã awaihu'u, waihu'u pese na, te te dama 're ïrowasu'u mono da hã. E niha bété òhõ ma si waihu'u pese di, marī dama Ì'manharī waihu'u'õ hã te te dama 're Ì'ab'manharī wē mono zéb da hã. Ò hã wede'é na romhuri'wa, Marizaha 'ra. Ìno norī hã Ti'adu, duré Zuzé, duré Zuda, duré Sima. Ìhidiba norī hã te duré wa'rata 're ïhâimana za'ra. — Āne te âma dasima romnhoré za'ra ni.

Āne wa, Zezusihi zõ datob'uzu za'ra ò di, dama waihu'u pese wa, âne na hã. Taha wa, ma âne dama waihu'u, Zezusi hã:

— 'Re ïhâimana u'âsi mono zadawa wasu'u'wa norī hã daro mono bâ datême 're nomro mono wamhã, ïsimiroti na wazép sina, te za sô 're datob'uzu za'ra. Ìsipti'ai âma si sô 're datob'uzu za'ra mono ò di za, Ìsipti'ai âma wa. Ìsisânawã norī zama, sô 're tob'uzu za'ra mono ò di za, ïsörõwa âma ïsiré 're ïdahâimana za'ra mono norī zama. — Āne sō'awib ò nherē, ma tô dama siwasu'u, Zezusi hã.

⁵ Taha wa, Nazaré âma sô datob'uzu za'ra ò wa, marī dama Ì'manharī waihu'u'õ hã ahã na te te dama 'manharī ò di, tiwaihu'u pese na hã. Ni'wam norī si, ma tô upi za'ra, tinhib'rata na te te pese za'ra da, da'umro na.

⁶ Taha wa, 'Re ïhâimana u'âsi mono zadawa wasu'u'wa na da te dasiwi saze za'ra ò wa, te taré da'âma rosa'rata, da te dasiwi ïsaze za'ra ò zém na hã.

Tawamhã Nazaré 'rata 're ïdahâimana za'ra mono norī ma, te te 're rowahutu oto Zezusi hã, 'ri wa'õtõ mono bâ.

Zezusi hã tisiré 're ïnomro mono norī hã te te datême ïsatõrī za'ra zé wasu'u

Mateusi 10.5-15; Rucasi 9.1-6

⁷ Tawamhã tisiré 're ñomro mono norĩ zô, te tihârâ za'ra, aibâ 12 na ñhâiba norĩ zô. Taha pari, ma tô maparane si te te apisutu, daro mono bâ si'aba'rê da, datême. Si'aba'rêi ô ré, ma tô duré tâma pisutu za'ra, ñisimromhõsi zarina, wa'uburé hã te te dama 're sãmra za'ra mono da.

⁸ Ma duré tâma waihu'u za'ra, marĩ hã te te siré 'wasari tô da, bådâdi na da hã. Tisiwazusizéb ré si si'aba'rê da, ma tô tâma waihu'u za'ra. Mra hã duré romramizé hã duré rob'uprazé hã te te 'wasari tô da, ma tô duré tâma waihu'u za'ra.

⁹ Tipara'uza ré si si'aba'rê da, ma tô tâma waihu'u za'ra. Duré da'uza ñhâpa ñsô'utu'u hã te te 'wasari tô da, tihâiba na ré si si'aba'rê da, ma tô tâma waihu'u za'ra.

¹⁰ Æne ma tô duré tâma waihu'u za'ra:

— Darob u, 're aihutu aba mono wamhã, te te 're ñ'aiwaibui wê wa'aba mono norĩ nhorõwa ãma si, te za a'ã 're asimroi wa'aba mo, darob amoi u, duré 're aiwairébé aba mono ô ré.

¹¹ Da te 're aiwaibui wê za'ra wa'aba mono ô wamhã, dura da te 're aiwapari ze za'ra wa'aba mono ô wamhã, te za dahawi 're aiwairébé su'u abo mo. Tawamhã dahawi 're aiwairébé aba mono ô ré, te za asisa'u aipara zapru hã 're ñtata'a za'ra wa'aba mo, ti'ai u 're rere'e mono da, dapo're ô na 're danomro mono wa, 'rãwi 're dasisãmri za'ra mono da. — Æne ma tô tâma waihu'u za'ra.

¹² Tawamhã ñisiré 're ñomro mono norĩ hã te oto datême ai'aba'rê, te te dama 're sadawa wasu'u za'ra mono da, dawasété wi 're dasipizari za'ra mono da, 'Re ñhãimana u'ãsi mono niwĩ.

¹³ Wa'uburé hã te te oto dama 're sãmra za'ra. Duré azeitona 'rãi wa'u wam na, te te 're da'rãi u'rê za'ra mono pari, ma tô da'ahã na te te 're dapesa za'ra, daházé u'ãsi 're ñdahãimana za'ra mono hã.

*Zuwã Batitaha dâ'ázé wasu'u
Mateusi 14.1-12; Rucasi 9.7-9*

¹⁴ Tawamhã apito Erodĩ hã ma tô Zezusihi wasu'u hã wapa, ñwasu'uwê hã daro mono bâ waptã'ã mono wa. Æne te ni'wam norĩ hã Zezusihi wasu'u na taré te te sima 're romnomri za'ra:

— Ô hã, Zuwã Batita apã ñhãiwa'udu. Taha wa, te marĩ hã dama ñmanharĩ waihu'u'ô hã te te dama 're ab'manharĩ, tiwaihu'u pese na. — Æne te te sima ãma 're romnomri za'ra, taré.

¹⁵ Ni'wam norĩ hã te duré te te sima ãma 're romnomri za'ra, ãne:

— Ô hã Eriasi, duréihã dâ'ã nheré, apã ñhãiwa'udu. — Æne te te ãma sima 're romnomri za'ra, taré. Ni'wam norĩ hã te duré te te sima ãma 're romnomri za'ra, ãne:

— Ô hã 'Re ñhãimana u'ãsi mono zadawa wasu'u'wa, duréihã 're ñomro mono norĩ ne hã. — Æne te Zezusihi wasu'u na taré da te dasima ãma 're romnomri za'ra.

¹⁶ Tawamhã apito Erodĩ, ma tô Zezusihi wasu'u na hã danhimirowasu'u hã wapa. Tawamhã ãne te tinha:

— Tô ô hã, Zuwã Batita. Te 'rui wa, da te butu nhizãri nheré, apã ñhãiwa'udu te 're mo. — Æne ma tô Erodĩ hã Zuwã Batita dama wasu'u, ta hã newa.

¹⁷⁻¹⁸ Erodĩ hã ma tô aré dama ti'ru, Zuwã Batita da te dasiwi pawasisi da, da te dasiwi sêrê da, dazazéb 're, 're sa mono da. Æne ma tô Erodĩ hã Zuwãhã ma, rob'manharĩ wasété. E marĩ da. ñmro ma, tâma rowê da, Erodizaha ma. Tinói wi, ãma ñsi'rê na, ma timro, Pipipihi mro na, Erodĩ hã. Æma mro wa, Zuwã ma tô Erodĩhi ma tinha: "'Re ñhãimana u'ãsi mono nhimiroti hã ãne: 'Asisãnanãwi mro hã tiwi ãma 're ai'rê za'ra wa'aba mono ô di za.' " — Æne ma tô Erodĩhi ma waihu'u, 'Re ñhãimana u'ãsi mono nhimiroti hã.

¹⁹⁻²⁰ Taha wa, Erodiza hã te te sina 're mreme 'ruiwapari, Zuwã hã. Te te wĩri neza. Tane nheré, te te wĩri waihu'u ô di. E marĩ wa. Erodĩ hã te te tiwi 're madã'ã pese, Zuwã Batita hã. Zuwã hã wê uptabi na, te dama 're hãimana. Æne na ma tô ñhãimanazém na waihu'u, Erodĩ hã. Taha wa, sina 're pahĩ mono wa, ma tô dawĩ te te 're 'madã'ã pese, Zuwã hã. Zuwãhã nhimirowasu'u hã te nasi wapa, Erodĩ hã. Tawamhã wapari ze na nasi te te wapari wa, zahadu rosa'rada te te sima ãma waihu'u ô di Erodĩ hã, Zuwã Batitaha ãma hã.

²¹ Tawamhã ma tô bådã hã pisutu Erodĩ hã, ñwa ñwaptã'ãzém na dasipo're pu'u za'ra wa, ñsiré dasa hã da te huri da. Taha wa, ma tô dama ñpire norĩ hã ñsiré tisa tihu, da'wapéi'wa norĩ nhĩb'apito norĩ hã, duré Darireza na danhipti'a nho'õmo nhisi ãma dama ñpire 're ñhãimana za'ra mono hã. Tawamhã aihĩni dasiré dasaihuri ré, Erodizaha ma wê di, Zuwã Batita idã'ázéb da hã.

²² Taha wa, dasaihuri ré, ma Erodizaha 'ra sipi'ô hã ázê 'ri para u, dama sipese da. Tawamhã Erodĩ norĩ hã ma tô ãma uze za'ra, tâma sipese za'ra wê te. Taha wa, te apito hã azarutu ma tinha:

— Marĩ ñwi waptêrê, asima ñwêzéb uwaibaba. Tawamhã wa za aima tisô.

²³ Tō sena marī īwi waptērē wamhā, wa za aima āma uwaimra. Īnhipti'a īwi waptērē wamhā, aiwa wa za āma aipo'o aima, ate da, duré ĩte da. — Āne ma tō tāma waihu'u, azarutu ma.

²⁴ Taha wa, te tina u a'ā mo, marī hā apito wi te te īwaptērē da na, te te sadawa pibu da, tina hā. Tawamhā ĩna hā āne te asa tāma tĩna:

— Ma'āpé, Zuwā Batitaha 'rā si tiwi waptērē, taha si te te aima sōmri da. — Āne ma ti'ra ma waihu'u.

²⁵ Taha wa, si'aba'rē na ma apā āzé apito u, azarudu hā. Tawamhā āne te apito ma tĩna: — Zuwā Batitaha 'rā si, wa ĩsima wē, piza'a 're nho'a wa, ĩma hiri da, āhāna awa'awi. — Āne te tiwi waptē.

²⁶ Tawamhā ma tō tiwi tirobzei'ō, apito Erodihī wi. Tane nherē, uburé sō ĩdahārā norī nho'a, te te azarutu ma ropisutu wa, ma tō tāma āma uwaimra, te te tiwi īwaptērēzēb uwaibaba.

²⁷ Tawamhā ma tō ti'ru, awa'awi ĩ'rā te te we āri da, da'wapé'i'wa hā. Tawamhā awa'awi te sō mo, dazazēb u. Tame awa'awi ma tō butu nhizā, Zuwā Batita hā.

²⁸ Taha wa, te awa'awi ti'ā, piza'a 'renho'a wa, azarutu ma, te te sōmri da. Te te tāma sōmri parip si, ma tina ma oto tisō, Zuwā Batitaha 'rā hā.

²⁹ Tawamhā Zuwā Batitaha zawi'wa norī hā ĩwasu'u te te wapari za'ra wamhā, ma tō sō ai'aba'rē, ĩhāiba zō, te te siwi sērē da, ab're 're.

Zezusi hā dasa na te te ĩdapawaptobzēm na rowasu'u

Mateusi 14.13-21; Rucasi 9.10-17; Zuwā 6.1-14

³⁰ Tawamhā Zezusihi zadawa wasu'u'wa norī hā darob amoi hawi apā sihutu wamhā, Zezusihi ma, ma tō siwasu'u za'ra, iwē na te te ĩdapawaptob za'ra mono zēm na hā. Duré te te dama ĩrowasu'u za'ra mono zēm na zama ma tō tāma siwasu'u za'ra.

³¹ Tawamhā da'ahā uptabi na ĩtēme dasisamarī pese wa, saihuri waihu'u ō di, Zezusi norī hā. Taha wa, ma tō āne satōrī za'ra, Zezusi hā:

— Oto wasi'aba'rēi wa'aba a'ubuni u, wawa'utu za'ra da a'ā, danhiti.

³² Tawamhā hāiba pisutu te oto ai'aba'rē, uba're u. Uba're wa, ma tō asisi, zara u te te saprī za'ra da, danhiti hāimana za'ra da a'ā, zara niwi.

³³ Tane nherē, da'ahā na ma tō waihu'u za'ra ni, zara u te te ĩsaprī za'ra na hā. Taha wa, ma tō ĩsō'rāmib za'ra dasisa're, ā zada'rēi baba, Zezusi norī nho'rāmi, daza'ruī mono bā 're ĩdahāimana za'ra mono norī hā. Tawamhā Zezusi norī wana, ma tō aihutu ni.

³⁴ Tawamhā Zezusi hā uba're hawi watobro wi, ma tō da'ahā uptabi na da'ab'madā. Taha wa, ma tō da'āma tipē'ēzē, pone'ērebā 'madā'ā āna 're ĩnomro mono ne, 're danomro mono wa. Tawamhā tame ma tō marī na tĩnhimirowasu'u ahā uptabi na dapawapito, Zezusi hā.

³⁵ Tame tiwi hāiwahā wamhā, Zezusihi siré 're ĩnomro mono norī hā ma ĩtēme ubumro. Āne ma Zezusihi ma waihu'u za'ra:

— A'ubuni wi wahāimana za'ra ré, ma wawi tihāiwahā za'ra.

³⁶ E dama rob'ruī ō di za, dasi'aba'rē da, marī hā dasazēb da, da te dasima uipra za'ra da, re na 'ri ĩsimasa mono u, 'ri wa'ōtō u zama.

³⁷ Tawamhā Zezusi, ma tō asa tāma waihu'u za'ra:

— Mare di. A norī wa'wa hā te za dama ĩ'a za'ra wa'wa, dasaihuri da.

Tawamhā asa ma duré tāma waihu'u za'ra, Zezusihi ma:

— E niha wa za dasa hā dama uipra za'ra ni, da'ahā uptabi nherē. Rob'uiprazé hā ahā uptabi na, wama hāimana za'ra 'wa'āhā, 200 na wa aré dasa hā dama uipra za'ra ni, ĩ'u'ētē wapu hā.

³⁸ Tawamhā Zezusi te asa sō sadanharī za'ra:

— E niha te bété ĩ'u'ētē wapu hā aima tihāimana za'ra wa'wa. Ma'āpé sō sabu za'ra wa'aba. Tawamhā ĩsiré 're ĩnomro mono norī hā te te sabu za'ra pari wamhā, Zezusihi ma, te wasu'u za'ra:

— 5 na ĩhāiba hā ĩ'u'ētē wapu hā, duré maparane pe'a hā. — Āne ma apā Zezusihi ma waihu'u za'ra.

³⁹ Tawamhā Zezusi hā ma tō dama waihu'u, dui wa, dawa'ōtō mono bā dasi'ubumroi mono da, uburé.

⁴⁰ Taha wa, dui wa, te oto dasi'ubumro, ni'wam norī si 100 na ĩhāiba hā, duré ni'wam norī hā 50 na ĩhāiba hā.

⁴¹ Tawamhā ma tō oto ĩ'u'ētē wapu hā waibu, 5 na ĩhāiba hā. Pe'a zama ma duré timra. Tawamhā hāiwa u te ĩré rob'madā. Timama āma te tiwata, sōpru wa. Taha pari, ma tō te te wē'ē, ĩ'u'ētē wapu hā. Te te wē'ēi mono pari, ma tō tisiré 're ĩnomro mono norī ma sōmri za'ra, te te dama sōmri za'ra mono da. Pe'a zama, ma tō te te wē'ē zahuré, te te duré dama sōmri za'ra mono da.

⁴² Tawamhã ì'u'ètê wapu hã umrore nherê, wê'êi ahâ di. Duré pe'a hã maparane nherê, wê'êi ahâ di. Taha wa, ma tô aihîni dasa hã huri ni. Ma tô duré da te 'mahâparî. Da'ahâ uptabi nherê, da'âma si'utôri ô di.

⁴³ Tawamhã ìsiré 're ìnomro mono norî hã ma tô apâ si'ôtô 're te te sé, danho'rada hã, ì'u'ètê wapu wê'ê hã, pe'a wê'ê zama. 12 na ìré hã si'ôno hã, danho'rata ré hã. Si'ôtô 'remhã 'masisi di.

⁴⁴ 5 miu na aibâ norî hã ìhâiba hã, ì'u'ètê wapu na ìsaihuri hã.

ZeZusi hã â nhisi baba ìmorîzé wasu'u
Mateusi 14.22-33; Zuwã 6.15-21

⁴⁵ Taha pari, ma tô ZeZusi hã tâma rob'ru za'ra, tisiré 're ìnomro mono norî ma, uba're wa sisisi da, ìwana te te saprî za'ra da zara u, Besada na 'ri wa'ôtô nhisi u, si'aba're da, ìwana. Tawamhã ZeZusi hã te a'â ìsa'u tizab za'ra, te te dama rob'ru da, danhorôwa u, da te ropéi mono da.

⁴⁶ Te te dama rob'rui pari, te êtê 'râihâ u mo, Timama ma, mreme da.

⁴⁷ Tawamhã oto tiwi mara za'ra wamhã, uba're hã â wa'wa u, ma tô ìré tihâimana za'ra. Taha ré, ZeZusi hã siwaprosi te a'â tihâiba, êtê 'râihâ âma.

⁴⁸ Tawamhã êtê 'râihâ hawi, ma tô 'madâ'â za'ra tisiré 're ìnomro mono norî hã, uba're sari na si'u'ètê za'ra mono ré, rowa'u'u za'êne apâ te te tiwi wabzuri za'ra mono wa, uba're hã ìsô'ômoi baba te te rowapôri za'ra wa. Taha ré, ma tô ZeZusi hã ìtême timorî za'ra â nhisi baba, mara hã ré. Tawamhã ìsô'râmi te aré timorî za'ra, ZeZusi hã.

⁴⁹⁻⁵⁰ Â nhisi baba ìtême morî za'ra wamhã, te âma rosa'rata za'ra, adâ'â hâiba warô newa. Taha wa, tâma pahî za'ra wa, te tâma 're sadari za'ra. Taha wa, te ZeZusi hã awa'awi tâma si'mahâra za'ra, âne:

— Wa hã wa we atême ìmorî 'wa. ìma aipahi za'ra wa'aba ô di za.

⁵¹⁻⁵² Tawamhã awa'awi uba're wa, ma tô ìtême tizébré za'ra. Sébré wi, ma rowa'u hã sazâ. Taha wa, rowa'u te te ìsazârizém na, ma âma titob'uzu za'ra, ìsiré 're ìnomro mono norî hã. E marî wa. ZeZusi hã ì'u'ètê wapu te te dama wê'êi mono wamhã, ahâ di. Tane nherê, te te siwi âma waihu'u su'u ô di, ìwaihu'u pese uptabi na hã.

ZeZusi hã, Zenezaré âma te te ìda'apesezé wasu'u
Mateusi 14.34-36

⁵³ Tawamhã ZeZusi norî hã ma tô saprî za'ra, ìsô'u na zara u. Te te saprî za'ra wamhã, ma tô aihutu, Zenezaré na danhipti'a nho'ômo nhisi u. Tame ma tô â zada're âma, uba're na âma wasisi za'ra.

⁵⁴ Tawamhã uba're hawi wairébé wamhã, awa'awi ma tô dasiwi waihu'u za'ra ni, ZeZusi hã.

⁵⁵ Tawamhã daza'rui mono bâ, ma tô ìhâzé ré norî hã ìtême 'wasari ni, ZeZusihi hâimanazêb u, ìsimiwaptâ ré.

⁵⁶ Daro mono bâ te ZeZusi hã datême 're mo, 'ri wa'ôtô u zama 'ri nho'ômo u zama, re na 'ri ìsimasa mono u zama. Darob u datême 're simasisi mono wi, ma tô ìhâzé ré norî hã da te tâma 're sa'ra za'ra, 'ri nhî'rîti wa, da te dasina 're ì'ubumroi mono zéb âma. Tawamhã ma tô tiwi rowaptêré za'ra ni, ì'uza nhisutu si ìhâzé ré norî hã te te tiwi 're upi za'ra mono da. Tawamhã ì'uza nhisutu si te te tiwi 're upi za'ra mono nherê, ma tô 're séptâ'â za'ra, uburé ìhâzé ré norî hã.

7

Zudezu norî hi'rata hâimanazém na, parisezu norî ma, ZeZusi te te ìwaihu'uzé wasu'u
Mateusi 15.1-9

¹ Tawamhã aibâ norî hã Zeruzarê hawi ìshudu hã ma tô ZeZusihi u si'râ'ôtô, zudezu norî hã. Ta norî hã parisezu, duré 'Re ìhâimana u'âsi mono nhimiroti 'rata na rob'ui'ére na dama rowahutu'wa norî.

² Ta norî hã ma tô 'madâ'â za'ra, ZeZusihi siré 're ìnomro mono norî hã, parisezu norî nhimiroti hã te te 'madâ'â za'ra âna, saihuri wa, simisôï pese âna.

³⁻⁴ Zudezu norî hã tihî'rata norî nhimiroti zarina si, te 're hâimana za'ra. Tisiré zudezu norî nhîpai u, te taha si te te 're 'madâ'â pese za'ra, parisezu norî hã. Taha wa, 're simisôï pese za'ra mono parip si, te za 're saihuri. Duré marî hã dasai wedezém hawi 'ri tême te te 're ì'âwisi za'ra mono hã, te za te te 're upsôï pese za'ra, âma 're saihuri mono ô ré. Duré te za hâsîzé hã te te 're upsôï pese za'ra, duré piza'a hã duré piza'a ìsi'uwazi 'manharî hã, tihî'rata norî nhimiroti zarina.

⁵ Taha wa, parisezu norî hã ZeZusihi u si'râ'ôtô wamhã, ma tô ZeZusi hã siwi 'mahâ, rowahutu'wa norî me:

— E marī wa, te bété asiré 're ĩnomro mono norī hā simisōi āna 're saihuri, wahi'rata norī nhimiroti na te te rosa'rata za'ra āna.

⁶⁻⁷ Taha wa, ma tō Zezusi hā asa āma sada'ābā za'ra, āne:

— Tō senai ō di, 're aihāimana za'ra wa'aba mono zé hā. Duréihā Iza'iza hā ma tō ĩ'uwaibaba ai'āma rob'ui'ére sirōmo za'ra wa'wa, aihāimanazéb za'ra wa'aba na hā. 'Re ĩhāimana u'āsi mono mrema na ma tō āne na ai'āma rob'ui'ére sirōmo za'ra wa'wa:

“Ō norī hā tō sena newa, te timreme na si taré ĩ'āma 're wata za'ra. Tane nherē, te tipē'ē 're aimawi zō si te te 're rosa'rata u'āsi za'ra, ĩ'upana. Danhimiroti zarina si, te ta norī hā te te dama 're rowahutu za'ra, ĩnhimiroti zarina newa. Taha wa, senai ō di, ta norī hā ĩ'āma 're ĩwata za'ra mono zé hā.”

— Āne ma tō tāma waihu'u, 'Re ĩhāimana u'āsi mono hā. Taha wa, ma tō āne da'āma rob'ui'ére, Iza'iza hā. Duréi pese, te te da'āma rob'ui'ére nherē, tō sena na te aiwasu'u za'ra wa'wa.

⁸ A norī wa'wa hā, 'Re ĩhāimana u'āsi mono nhimiroti na 're asapa'a za'ra wa'aba mono ō di. Ti'ai āma danhimiroti na si, te 're aihāimana za'ra wa'aba mo. — Āne ma tō parisezu norī ma 're ĩhāimana za'ra mono zé hā tāma waihu'u za'ra, Zezusi hā.

⁹ Āne ma tō duré tāma waihu'u za'ra:

— A norī wa'wa hā aihāimana nhipese sina te 're ĩrēme za'ra wa'aba mo 'Re ĩhāimana u'āsi mono nhimiroti hā, 'rāwi asimirosa'rata na si 're aihāimana za'ra wa'aba mono da.

¹⁰ Duréihā Mozési hā ma tō dama roti, āne: “Aimama hā te za 're ĩwazéb za'ra wa'aba mo, ana zama.” Āne ĩsimiroti amo hā duré: “Ni'wam norī hā timama āma nherē, duré tina āma nherē, te te āma 're wasété za'ra mono wamhā, te za da te 're simro.” Āne ĩsimiroti hā duréihā.

¹¹⁻¹² Tane nherē, te āhāna hā asimiroti za'ra wa'aba zéb zarina si 're dahāimana za'ra, damama norī hā da te 're pawaptob za'ra mono āna, dana norī zama. Āté ni'wai ma, te za ĩsibro hā 're hāimana, timama hā duré tina hā te te ĩpawaptob zahuré zéb da hā. Wē nherē, te za āté āne timama ma waihu'u, tina ma zama: “Marī na te aipawapto wa'aba da hā, te ĩsima wē nherē hā, tane nherē, wa tō 'Re ĩhāimana u'āsi mono ma, āma ropisutu, te tāma sōmri da, āma ĩwata zéb da hā.” Āté āne te za timama ma waihu'u, tina ma zama. Āne wamhā, te za tāma 're ĩwaihu'u wasété za'ra wa'aba mo, āne: “Re ĩhāimana u'āsi mono ma, ma tō ĩropisutu pa. Taha wa, te za tāma āma ĩ'uawimra, aimama norī, āma pawaptob zahuré ō nherē, ana me.” Āne ma tō dama 're ĩroti wasété za'ra wa'aba mo.

¹³ Āne wa, 'Re ĩhāimana u'āsi mono zadawa wasu'u hā aima wapu za'ra wa'aba di, ĩsimiroti upana aih'i'rata norī nhimiroti na si, dama 're roti u'āsi za'ra wa'aba mono wa. Tane duré aimawi na dama 're ĩroti za'ra wa'aba mono zé hā, ahā uptabi di. — Āne parisezu norī 're ĩhāimana za'ra mono zém na, ma tō Zezusi hā tāma rowaihu'u za'ra.

*'Rāwi 're ĩdasiaswété za'ra mono zém na rowasu'u
Mateusi 15.10-20*

¹⁴ Tawamhā Zezusi te duré sima dazō hā, te te dama roti da, āne:

— Ma'āpé, ĩnhimirowasu'u hā wapari pese za'ra wa'aba za, marī hā waihu'u za'ra wa'aba da āma.

¹⁵⁻¹⁶ Uburé marī na 're dasaihuri mono wamhā, taha na 're dasiaswété za'ra mono ō di za. Dapē'ē hawim na danhimirosa'rata wasété zarina, da te dasima 're nharī wasété za'ra mono wapsi, te za 're dasiaswété za'ra, 'rāwi. — Āne ma tō dama rowasu'u, da te dasina waihu'u za'ra da.

¹⁷ Tawamhā te te dama rowasu'u pari, te oto ai'aba'ré, 'ri tēme, tisiré 're ĩnomro mono norī me. Tawamhā 'ri tēme sihutu wapsi, te oto siwi sadanha, ĩsiré 're ĩnomro mono norī hā, marī na te te dama ĩrowasu'uzém na hā te te tāma waihu'u za'ra da, 'rāwi 're ĩdasiaswété za'ra mono zém na hā.

¹⁸ Tawamhā ma tō tāma waihu'u za'ra:

— E niha a norī wa'aba ma zama, aima waihu'u za'ra wa'aba ō di bété. Dasa hā da te 're huri mono wamhā, taha na 're dasiaswété za'ra mono ō di za 'rāwi.

¹⁹ E marī wa. Dapē'ē na, da te 're ĩrosa'rata za'ra mono zéb u, 're sisisi mono ō wa za, dasa hā. Danomo u si, te za 're sisisi, dasa hā. Taha pari, te za 're wairébé apā, rob u. — Āne ma tō tāma waihu'u za'ra, te te āma waihu'u za'ra da, dasai mono bā ĩwē na 're ĩdasaihuri mono zéb da hā.

²⁰⁻²² Āne ma duré tāma waihu'u za'ra:

— Dapē'ē hawi, da te 're ĩsani za'ra mono na si, te za 'rāwi 're dasiaswété za'ra. Dapē'ē 're, danhimirosa'rata wasété hawim na si, te dawasédé hā uburé da te 're 'manharī za'ra, marī na danhipsaihuri hā, duré dasipārī hā, duré dasina danhipsaihuri hā, duré danhibrom na da'ruiwapari hā, duré dawasété 'manharī hā, duré dazadawa nhipe hā, duré marī na

danhimino'ru hã, duré danhisi wasédé hã, duré marĩ na 'rãwi dasina dawada hã, duré 'rãwi dawasété na 're İdasisãmri za'ra mono õ zé hã.

²³ Dasi'uihã na te za 'rãwi da te dasima 're rosa'rata wasété za'ra. Taha pari, te za uburé marĩ hã İwasétére hã da te 're 'manharĩ za'ra. Āne wapsi, te za 'rãwi 're dasiwasété za'ra. — Āne ma tō Zezusi hã tãma waihu'u za'ra, tisiré 're İnomro mono norĩ ma.

Pi'õ zudezu'õ ra hã, Zezusi te te wa'uburé hã İhawi İsatõrizé wasu'u Mateusi 15.21-28

²⁴ Tawamhã Zezusi norĩ hã te oto ai'aba're, darob amoi u. Tiru na 'ri nho'õmo nhisi 'rata, daro hã. Tawamhã 'ri para u ma tō asisi. Tame İsamrazém na da te dasiwi İwaihu'uzéb da hã, te te sima wê õ di, Zezusi hã. Tane nheré, a'ã da te sa'rese āna, sãmra waihu'u õ di.

²⁵⁻²⁶ Tawamhã pi'õ hã ma tō duré İsamrazém na danhimirowasu'u hã wapa. Zezusihi wasu'u te te wapari wi, ma awa'awi İtēme mo. Ī'ra hã ba'õtõre hã, wa'uburé hã te te 're wamnarĩ mono wa, te İtēme mo, te te tãma wasu'u da. Tawamhã İtēme wisi wi, ma tō Zezusihi papara aime, hi'rãtitõ. Pi'õ hã deredu na İpodo, zudezu'õ, Siru Penisiza nhihudu. Tane nheré, ma tō Zezusihi wi rowaptē, wa'uburé ma, te te rob'ru da, Ī'ra ma watobro da, Ī'ra hã rowē na si, tãma 're hãimana mono da oto.

²⁷ Tawamhã Zezusi te asa tãma tinha pi'õ ma, āne:
— İmorĩ'rata na te za da'ra ma, İsa hã da te tãma 're sãmri za'ra, tisa hã te te 're 'mahãpãrĩ za'ra mono da, a'ã. Da'ra sa hã İmorĩ'rata na wapsã ma, da te 're sãmra mono wamhã, İ'uwaibaba õ di.

²⁸ Tawamhã, pi'õ hã ma asa āma sada'ã:
— Tõ İ'uwaibaba, ma tane hã İma İwaihu. Tane nheré, te za da'ra saipru hã, da'ra norĩ wi 're rere'e mono wamhã, wapsã hã te te 're huri, wedezai 'rowi.

²⁹ Tawamhã Zezusi ma duré asa tãma waihu'u:
— Tane tō. Asa āma İma uwaimrami wē wa, te za oto apã aimo, 'ri tēme. Ai'ra ma, ma tō wa'uburé hã watobro.

³⁰ Tawamhã pi'õ hã te apã mo, tinhorõwa u. Wisi wamhã, rowē na ma tō ti'ra hã sabu, waptã nomro ré. İwana ma tō tãma watobro, wa'uburé hã. Taha wa, tãma rowē di oto.

Zezusi hã aibã İpo'reptõ duré İmreme waihu'u'õ, te te İpesezé wasu'u

³¹ Tawamhã Zezusi norĩ hã Tiru na 'ri nho'õmo nhisi 'rata, hãimana za'ra pari, ma tō ai'aba're. Sido na daza'ru nhisi wa'wai baba, ma tō ro'rahãri za'ra. Duré Decapori na danhipti'a nho'õmo nhisi wa'wai baba, ma tō ro'rahãri za'ra, 10 na daza'ru wa'wai baba. Tawamhã Darireza āma â zaihã u, ma tō aihutu, İsõ'ui u.

³² Tawamhã İsõ'u zaihã u sihutu wamhã, aibã İpo'reptõ hã ma tō İtēme dasiwi saprõni ni, İmreme waihu'u'õ hã. Tawamhã Zezusihi ma, te oto 'ru za'ra, siwi İsaprõni'wa norĩ hã tinhib'rada te te āma hiri da, te te pese da.

³³ Tawamhã Zezusi hã ma tō aibã hã danhiti sima saprõ. Tawamhã tinhipto hã ma tō İpo're 're tiza. Taha pari, ma duré tizadaipro na tinhipto hã sada di'i, te te āma soto u're da.

³⁴ Taha pari, te hãiwa u rob'madã. Hãiwa u te te rob'madã'ã sina, aibã āma pē'ézé wa, tip'e 're te āi'ã. Tawamhã tisimremezém na te tãma tinha:

— Epata. — Āne āma İsaprizé hã, wamreme na: "Aipo're 'repu'u."

³⁵ Tawamhã ma tō po're 'repuru oto, awa'awi. Duré ma tō tinhoto wairo. Tawamhã mreme wē di oto, aibã İmreme waihu'u'õ hã.

³⁶ Tawamhã Zezusi hã te sina dazadawa uwati pese, İwasu'u na da te dasima āma ropé tō da. Tane nheré, Ī'madã'ã'wa norĩ hã te nasi dama rowasu'u za'ra, aibã te te İpesezém na.

³⁷ Tawamhã İsimirowasu'u, da te wapari za'ra wamhã, ma tō āma tatob'uzu za'ra ni. Āne te Zezusi hã dasima wasu'u za'ra ni:

— Tõ sena, te uburé marĩ İwē hã te te dama 're ab'manharĩ. İpo'reptõ hã ma tō pese, İmreme waihu'u'õ hã. — Āne te āma tawata za'ra ni.

8

Zezusi hã, 4 miu na dahãiba hã te te İsaihurizé wasu'u Mateusi 15.32-39

¹ Tawamhã syry na āma ronomro parip si, ma tō duré apã İtēme tasi'rã'õtõ ni, Zezusihi u hã. Tawamhã marĩ na dasaihuri õ wa, dasazé hã oto hãimana õ wa, te Zezusi hã sima sõ tihãrã za'ra, tisiré 're İnomro mono norĩ zõ.

² Āne te tãma siwasu'u za'ra:

— Āhãna Ī'rata dasi'ubumroi ré, ma tō dasa hã dawi ai'utõ, bãdã si'ubdatõ da'ãma si'utõrĩ wa. Taha wa, da'ãma İpē'ézé di, wa hã.

³Mram nherē, te dama rob'rui wamhã, te za dasi'marôpãrĩ za'ra bådâdi na, danhib'uware wa, romhã hawi we ïdasihutu norĩ hã.

⁴Tawamhã asa te tãma nharĩ za'ra, ãne:

— E niha wa za dasa hã dama 'mai'uipra za'ra ni, wa te dama sômri za'ra mono da. ãmemhã a'ubuni wi, wa ai'ubumro ni.

⁵Tawamhã Zezusi te asa sadanharĩ za'ra, ãne:

— E niha te ï'u'ëtê wapu hã aima tihâimana za'ra wa'wa.

— 7 na te wama tihâimana za'ra. — ãne ma tô tãma waihu'u za'ra asa.

⁶Taha wa, ma tô Zezusi hã dama rob'ru, ti'ai wa, dasi'ubumroi mono da. Taha pari, ma tô duré 7 na ï'u'ëtê wapu hã waihu, 'Re ïhâimana u'âsi mono ãma wata da, sôpru wa. ãma wata pari, ma tô te te wê'ê, ï'u'ëtê wapu hã. Tawamhã tisiré 're ïnomro mono norĩ ma, ma tô te te sômri, te te dama sômri za'ra mono da.

⁷Pe'a hã ïsyryre hã te duré tãma ti'maihãiba, ïsebre siro hã. Tawamhã 'Re ïhâimana u'âsi mono ãma te duré tiwata, pe'a ïsyryre na zama, sôpru wa. Taha pari, te duré tãma 'ru za'ra, te te dama sômri za'ra mono da.

⁸Tawamhã aihini te oto dasa hã huri ni. Dasa hã ma da te 'mahãpãrĩ, aihini. Taha pari, dasa ïsi'azazãri hã ïsiré 're ïnomro mono norĩ hã ma tô apã te te sé. Si'õno hã 7 na ïhãiba wa, ma tô ãma 'masisi za'ra.

⁹ïdasaihuri za'ra norĩ hãiba za'ratazé hã, 4 miu u, ma watobro, áté.

Taha pari, te oto Zezusi hã dama rob'ru, apã darob u, da te ropéi mono da.

¹⁰Tawamhã te te dama rob'rui pari, ma uba're wa asisi, Zezusi norĩ hã, zara u te te saprĩ za'ra da, Damanuta na ti'a nhisi u si'aba'rê da.

Parisezu norĩ hã, Zezusihi wi, te te ïrowaptêrê za'ra zé wasu'u

Mateusi 12.38-42; 16.1-4; Rucasi 11.29-32

¹¹Tawamhã parisezu norĩ hã ma Zezusihi u aihutu, ïsimirowasu'u na te te saze za'ra õ wa, ïsada wa'rãmi te te nasi tãma nharĩ za'ra da. Tawamhã Zezusihi wi, te oto rowaptêrê za'ra, tiwaihu'u pese na marĩ dama ï'manharĩ waihu'u'õ hã te te tãma 'manharĩ za'ra da. E marĩ da. Tô sena 'Re ïhâimana u'âsi mono zadawa para, dama ïwaihu'u'õ hã te te 're ï'ab'manharĩ mono zô, te te siwi pibu za'ra da. Taré te te siwi wê'õ da, te ãne tiwi rowaptêrê za'ra.

¹²Tawamhã Zezusi hã ãma pê'êzé za'ra wa, ma sa'ëtê pê'êwaze. Tawamhã te sima tinha, ãne:

— E niha ma tô nimosi dapoto tém norĩ hã siwi ïwada'u, marĩ dama ï'manharĩ waihu'u'õ hã ïsõ'a te tãma 'manharĩ za'ra da. Mare di, ãne hã. Te tãma 'manharĩ za'ra õ di za. — ãne te sima tinha, Zezusi hã.

¹³Taha pari, te tiwi timorĩ za'ra. Uba're wa, ma oto ãzé, zara u te te saprĩ da apã.

Parisezu norĩ te, duré Erodihite, ï'u'ëtê wapuzé wasu'u

Mateusi 16.5-12

¹⁴Tawamhã zara u, ma tô oto aihutu, Zezusi norĩ hã. ï'u'ëtê wapu hã siré te te 'ma'ãri za'ra da nherē, ma tô ãma po're ha'ãri za'ra, ïsiré 're ïnomro mono norĩ hã. Misire te nomro, uba're 'remhã.

¹⁵Tawamhã Zezusi ma ãne tãma waihu'u za'ra:

— Ma'ãpé, 're asi'madã'ã pese za'ra wa'aba mono, ï'u'ëtê wapuzém nhiti 're anomro aba mono da, parisezu norĩ nhimi'manharizém nhiti, apito Erodihite me.

¹⁶Tawamhã te sima nharĩ za'ra, ãne:

— ï'u'ëtê wapu hã áté wama hâimana za'ra õ wa, ma ãne wama waihu'u za'ra.

¹⁷Tawamhã Zezusi ma sina wapari za'ra. Taha wa, te sadanharĩ za'ra, ãne:

— E niha te ï'u'ëtê wapu hã aima ïhâimana za'ra wa'aba õ na, sô asimrami za'ra wa'wa. E asiwi ïzadaihu'u za'ra wa'aba õ di bété, ï'u'ëtê wapuzém na te aima ïwaihu'u za'ra wa'aba zém na hã. E niha waihu'u su'u za'ra wa'aba õ di bété.

¹⁸⁻¹⁹E niha atõmo na marĩ 're 'madã'ã za'ra wa'aba mono nherē, aima waihu'u za'ra wa'aba õ di. E niha aipo're na marĩ 're wapari za'ra wa'aba mono nherē, aima waihu'u za'ra wa'aba õ di. 5 na ï'u'ëtê wapu hãiba hã te dama ïwê'ei ahã mono zém na hã, duré 5 miu na dahãiba nherē, aihini ïdasaihurizém na hã, e ma ãma aipo're si'ãri za'ra wa'wa. E niha si'õtõ hãiba hã ïré danho'rada hã ïsi'azazãri hã, apã ïwa ïsême aba mono hã. — ãne te Zezusi hã sadanharĩ za'ra. Tawamhã asa ma Zezusihi ma waihu'u za'ra:

— Si'õno hã 12 na ïhãiba hã danho'rata ré hã.

²⁰Tawamhã Zezusi hã ïsadanharĩ na, ma duré tãma ãma sahu za'ra:

— Duré, 7 na ï'u'ëtê wapu hã hâimana nherē, te dama ïwê'ei ahã mono zém na hã, duré 4 miu na dahãiba nherē, da te 'mahãpãrĩ mono wamhã, e niha si'õtõ hãiba hã danho'rata ré hã. — ãne te sadanharĩ za'ra.

— Si'õno hã, 7 na ìhâiba hã danho'rata ré hã. — Ìne ma asa tâma waihu'u za'ra.

²¹ Tawamhã Zezusi te duré tâma nharĩ za'ra:

— E niha bété zahadu ìwaihu'u za'ra wa'aba ô di, ìwaihu'u pese na hã. — Ìne ma tô Zezusi hã tâma nharĩ za'ra.

Zezusi hã ìtob'a te te ìpesezé wasu'u

²² Taha pari, te oto ai'aba'ré Zezusi norĩ hã, Besada na 'ri wa'õtõ nhisi u. Tawamhã datême sihutu wamhã, aibã ìtob'a hã ma tô ìtême dasiwi saprõni ni, Zezusihi u. Tinhib'rata na te te upi da, te te to pese da, te tâma 'ru za'ra, siwi ìsaprõni'wa norĩ hã.

²³ Tawamhã Zezusi hã ma ìtob'a hã pa'â, danhiti te te sima saprõni da. Tawamhã tizadaipro na ma sada sisiptõmo di'i, te te âma tob'u'ré da, aibã hã. Taha pari, ma duré tinhib'rada hã âma tihi. Taha parimhã, te sadanha, âne:

— E zahadu marĩ hã 'madã'â ô di. E ma tô marĩ hã ì'madã.

²⁴ Tawamhã aibã te te rob'madã'â wamhã, Zezusihi u, te asa tinha, âne:

— Zahadu te rob'madã'â pese ô di. Aibã norĩ hã te ai'aba'ré, wede ne ìhâiba za'ra hã. — Ìne ma asa tâma waihu'u, te te rob'madã'â pese waihu'u ô wa.

²⁵ Taha wa, tinhib'rada hã ma tô duré âma tino, ìtomhã âma, Zezusi hã. Tawamhã ma tô tito pese oto, aibã hã. Te rob'madã'â wê di oto.

²⁶ Tawamhã Zezusi hã te aibã ma rob'ru, tinhorõwa u morĩ waré da oto, apã morĩ tô da, 'ri wa'õtõ u hã.

Zezusi hã Danho'reptui'wa na, Pedru hã asa te te tâma ìwaihu'uzé wasu'u

Mateusi 16.13-20; Rucasi 9.18-31

²⁷ Taha pari, Zezusi norĩ hã te oto 're nomro, 'ri wa'õtõ mono bâ. Apito Piripihĩ te, Sézareza na 'ri nho'õmo nhisi niwĩ, 'ri wa'õno hã. Tawamhã bâdãdi na si'aba'ré sina, te tâma nharĩ za'ra, Zezusi hã:

— E niha ma tô da te dasima 're ìwasu'u za'ra. E 'wa hã, wa hã.

²⁸ Tawamhã asa ma tâma waihu'u za'ra:

— Aiwasu'u hã, ahã di. A hã, u, Zuwã Batita, apã aihãiwa'udu. A hã, u, Eriasi apã we'ĩ'aimorĩ. A hã, u, 'Re ìhãimana u'âsi mono zadawa wasu'u 'rata 'wa hãiba amo, duré pese atã'â nheré, apã aihãiwa'udu.

²⁹ Tawamhã Zezusi te duré sina sadanharĩ za'ra:

— A norĩ wa'wa hã bété, e niha ma tô asima 're ìwasu'u za'ra wa'aba mo.

Tawamhã Pedruhu si, ma asa tâma waihu'u na wa'rã:

— A hã Cristu, 'Re ìhãimana u'âsi mono te te aipisudu, Danho'reptui'wa da.

³⁰ Tawamhã Zezusi te sina sadawa uwati za'ra, Danho'reptui'wa na, te te a'â dama wasu'u za'ra tô da.

Zezusi hã, za ìdã'ázém na, duré za apã ìhãiwa'utuzém na ìsiwasu'uzém na rowasu'u

Mateusi 16.21-28; Rucasi 9.22-27

³¹⁻³² Tawamhã âne te Zezusi hã tâma siwasu'u za'ra, tisiré 're ìnomro mono norĩ ma:

— Ti'ai âma dasiré ìpodo hã, 'Re ìhãimana u'âsi mono te te ìma ìpisutuzéb zarina, wa za robzépata za'ëté. Wama roti'wa norĩ hã te za siwi ìwê'õ za'ra, ìhi norĩ hã. Sasedoti ìpire norĩ zama, duré dama rowahutu'wa norĩ zama, te za siwi ìwê'õ za'ra. Tawapsi te za dasiwi ìwĩri ni. Tawamhã bâdã maparane ì'âma si'utõrĩ ô ré, wa za hãiwa'udu apã. — Ìne sô'awi ma tô Zezusi hã tâma siwasu'u za'ra, tâma ìrob'rãsutuzém na hã te te âma waihu'u sirõmo za'ra da. Tawamhã Pedru hã âne tâma ìsiwasu'u za'ra zé hã te te tiwi sawi da, te sima saprõ Zezusi hã, tisiré norĩ nhiti.

³³ Tawamhã te te sina wapari wamhã, tisiré 're ìnomro mono norĩ u, ma aipi'ra. Tawamhã Pedruhu ma, te âne tinha:

— Satanasi, mo oto aimorĩ, ìnhiti. 'Re ìhãimana u'âsi mono nhimirosa'rata zarina rosa'rata ô di, a hã. Danhimirosa'rata zarina si, te ì'âma ìrosa'ra, a hã.

³⁴ Taha pari, Zezusi te duré sima dazõ hã, uburé ìtême dasi'rã'õtõ mono da. Tisiré 're ìnomro mono norĩ zõ zama, te duré tihãrã za'ra sima. Tawamhã âne ma si'âma dama rowaihu'u:

— Ni'wam norĩ hã ìsiré 're nomro u'âsi mono da, te te sima 're ìwê za'ra mono wamhã, tihãmanazém na te te 're rosa'rata za'ra mono ô di za. Tiza'ozéb ré, ìzarina 're ìnomro mono ne, da te dasiwi uprosi da nheré, te za ìsiré 're nomro.

³⁵ Ni'wam norĩ hã si'uihã na tihãmanazép si te te sima 're sawi za'ra mono wamhã, rowé ìsi'utõrĩ'õ hã te te sina 're uwaimrami za'ra mono ô di za. Ni'wam norĩ hã ìzarina 're nomro mono da, duré ìzadawa wasu'u'wa 're nomro mono wa, 're sihãiba zawi za'ra mono ô wapsi, te za te te sina 're uwaimrami za'ra, rowé hã.

³⁶⁻³⁷ Āté ni'wa hā te za tinhibro hā te te sima 're a'ubumroi pese, sibrob ahā uptabi da. Tawamhā te za oto dārā. Ti'ab ré sibrob ahā nherē, e tāma 're rowē mono di za, rowē ūsi'utōrī'ō hā te te sina 're uwaimrami mono ō wamhā. Mare di. Tāma 're rowē mono ō di za. Ti'ai āma simarī ahā uptabi nherē, tāma waihu'u ō di za, marī na ūsiwa'ābāzéb da hā, rowē āma 're ūhāimana mono zéb da hā. — Āne Zezusi ma tō dama waihu'u siro, da te waihu'u za'ra da.

³⁸ Ma tō duré dama rowaihu'u āne:

— Āhāna da'ahā na 'Re ūhāimana u'āsi mono nhimiroti hā ma tō rēme za'ra ni. Dawasété na si te oto 're danomro, ā nimosi dapoto té mono hā. Tawamhā ni'wam norī hā ūzazei'wa na, duré ūreme waparī pese 'wa na, āté dama 're siwasu'u za'ra mono ō di za, 're siséb za'ra mono ō ūmhasite. Āté te za dawī 're si'udā za'ra, ūzazei'ō'wa ne. Ti'ai āma dasiré ūpodo hā nimahā na si, wa za wei mo apā. ūmama te hā, rowa'a za'ētē ré, wa za wei mo, hāiwa āma tāma ūromhuri'wa norī siré. Tawamhā apā we ūmorī wapsi, ū'udā'wa norī hā ūzazei'wa na te waihu'u za'ra ō di za. — Āne ma tō dama rowasu'u, Zezusi hā.

9

¹ Tawamhā Zezusi hā ma duré dama waihu'u, āne:

— Tō sena wa aima rowasu'u za'ra wa'wa. Aihīni ō nherē, ai'matā'ā aba ō ré, te za tiwaihu'u pese na 'Re ūhāimana u'āsi mono, da'āma 're ūsib'a'uwē mono zé hā āma ū'madā'ā za'ra wa'wa. — Āne ma Zezusi hā dama waihu'u siro, da te dasina waihu'u za'ra da.

Zezusi hāiba ūsisaprizé wasu'u

Mateusi 17.1-13; Rucasi 9.28-36

² Tawamhā bādā 6 na āma si'utōrī pari, ma tō Zezusi hā Pedru norī si te te simro, Ti'adu norī me, Zuwāhā zama. Ētē 'rāihā u ma tō ai'aba'rē. Tame ma tō Zezusi hā tihāiba na saprī, Pedru norī nho'a.

³ ūza hā ma tō tihāirā uptabi. Rowa'a za'ētē ne, ma ai'ubuzi, rā uptabi na. Da'uzā hā da te 're hā upsōi pese za'ra mono nherē, hāirā prā ti, Zezusi hā ūza ma hā.

⁴ Tawamhā dahi'rata norī hā ma tō 'madā'ā za'ra, Eriasi norī hā Mozésihī me. Zezusi hā me, te sima rowasu'u za'ra.

⁵⁻⁶ Tawamhā Pedru te Zezusi hā ma tinha, āne:

— Rowahutu'wa, āme wama rowē za'ra di. Si'ubdatō, wa za aima 'ri za'ra wa'aba ni aihāiba bā wa'aba, ate da hā, duré Mozésihī te da hā, duré Eriasi hā te da hā. — Āne ma Pedru hā tāma waihu'u, a'ā te te rosa'rata āna. Te te 'madā'ā za'ra wa, ma tāma tipahi za'ra, Pedru norī hā.

⁷ Tawamhā hāiwa nhirōtō'a za'ēne hā ma ubu za'ra, Zezusi norī hā. Taha wa, hāiwa nhirōtō'a hawi, ma we tāma nharī za'ra, 'Re ūhāimana u'āsi mono hā, Pedru norī ma:

— Ā hā ū'ra, te 're ūsawi pese mono. Ma'āpē ūsimiroti hā 're waparī pese za'ra wa'aba mono za.

⁸ Taha wamhā, taré te titōmo na sō rowaimrami za'ra. Zezusi hā si te āma siwi 'madā, siwaprosi ūsam na.

⁹ Tawamhā Ētē 'rāihā hawi, ma oto si'ra za'ra, Zezusi norī hā. Si'aba'rē sina, te Zezusi hā tāma nharī za'ra, āne:

— Ētē 'rāihā āma ū'madā'ā za'ra wa'aba zém na hā, dama rowasu'u za'ra wa'aba ō di za a'ā. Wa hā ti'ai āma dasiré ūpodo hā ab're hawi ūhāiwa'utu parip si, te za dama 're ūrowasu'u za'ra wa'aba mo.

¹⁰ Tawamhā ūreme ma tō waparī za'ra, Pedru norī hā. Taha wa, te 'rāwi sima rowasu'u za'ra, āne:

— E niha ūsiwasu'uzé hā ab're hawi, za te te ūhāiwa'utu na. Wa norī hā wama waihu'u za'ra ō di. — Āne te 'rāwi sima rowasu'u za'ra.

¹¹ Tawamhā te oto siwi sadanha, Zezusi hā:

— E marī wa, te rowahutu'wa norī hā te te dama 're rowasu'u za'ra bété, Cristu, Danho'reptui'wa da, 'Re ūhāimana u'āsi mono te te ūpisutu wana, Eriasi za we ūmorī na hā.

¹²⁻¹³ Tawamhā Zezusi ma tō asa tāma waihu'u za'ra:

— Duréihā 'Re ūhāimana u'āsi mono zadawa wasu'u'wa hā ma tō ū'uiwābaba āma rob'ui'éré ūbāihā na, Eriasi za we apā ūmorizém na te te ropese da. Tane nherē, wa za aima waihu'u za'ra wa'wa. Eriasi hā ma tō wei morī pa. Da te dasima ūwē za'ra zéb zarina, ma tō tāma rob'manharī wasété za'ra ni, ūwana da te duré āma ūrob'ui'érezéb zarina. 'Re ūhāimana u'āsi mono zadawa wasu'u'wa norī hā ma tō ū'āma rob'ui'éré sirōmo za'ra, ti'ai āma dasiré ūpoto āma hā, sa'ētē na za te ūrobzepatazém na hā, duré za da te dasiwi ūwé'ōzém na hā. E marī wa, ma tō āne ū'āma rob'ui'éré sirōmo za'ra. — Āne te Zezusi hā sina sadanharī za'ra.

Ai'repudu ipesezé wasu'u

Mateusi 17.14-20; Rucasi 9.37-43

¹⁴ Tawamhã Zezusi norĩ hã te oto apã ai'aba're, tisiré norĩ u. Īwana za'ra ma tã da'ahã na tasi'rã'õtõ ni. Tame 'Re ĩhãimana u'ãsi mono nhimiroti ui'ére na rowahutu'wa norĩ hã te nasi ĩsada wa'rãmi tãma nharĩ za'ra, Zezusihi siré 're ĩnomro mono norĩ ma, ĩsimirowasu'u na te te saze za'ra õ wa.

¹⁵ Zezusi hã da te 'madã'ã za'ra wamhã, uburé ma tã ama tatob'uzu za'ra ni. Taha wa, ma tã ĩtẽme dasisa're, da te sawi za'ra da.

¹⁶ Tawamhã Zezusi te dama tinha:

— E marĩ na, te asima ĩrowasu'u za'ra wa'wa.

¹⁷ Tawamhã aibã hã dawa'wa hawi te 'mahã:

— Rowahutu'wa, ĩra wa we atẽme saprõ, ĩma pawaptob da. Wa'uburé te te 're upi mono wa, mre me õ u'ãsi te 're sãmra.

¹⁸ Wa'uburé hã te te 're wabzuri, ti'ai u. Tawamhã ĩsadaipro hã te tiwi 're pusi. Te duré 're 'wahãihãsi. Te duré 're sitete. Te duré 're sib'uwa. Wa tã aré waptêrê za'ra, asiré 're ĩnomro mono norĩ hã wa'uburé te te siwi me da, tãma. Tane nherê, tãma waihu'u za'ra õ di, ĩra ma, te te siwi ĩme da hã. — Āne te aibã hã rowasu'u, Zezusihi ma.

¹⁹ Tawamhã aibã mre me te te wapari wamhã, ma tã tisiré 're ĩnomro mono norĩ ma tinha:

— E niha bété ai'rata 're ĩnhamra u'ãsi aba mono nherê, asina 're ĩ'umnhasi za'ra wa'aba mono õ di bété, te 're ĩ'aipawaptob za'ra wa'aba mono zéb da hã. E ĩpê'ézé u'ãsi, wa za ai'rata 're ĩmorĩ 'wa, 're ĩ'umnhasi za'ra wa'aba mono õ wa. Ma'ãpé, ai'repudu hã we ĩtẽme saprõni aba.

²⁰ Tawamhã ma tã ĩtẽme siwi saprõ, ai'repudu hã. ĩtẽme te te siwi ãwisi wi, te wa'uburé hã Zezusi hã 'madã. Taha wa, te sisa'u ai'repudu hã wasutu. Sa'etê te 're sipizari, ti'ai wa. Ma duré sadaipro waze.

²¹ Tawamhã Zezusi hã te ĩmama hã ãma sadanha:

— E niha ma tã ama tiwahu, ai'ra hã ĩré 're hãimana mono ré hã.

— ĩra hã sapore ré, ma tã 're siwamnari.

²² Unhama u te te 're wabzuri wa'uburé hã, unhama na te te wĩri da. Āi ba zama te te 're wabzuri, ã na te te wĩri da. Tã sena aiwaihu'u pese wamhã, wapawapto na. Ma'ãpé, wa'ãma aipê'ézé na.

²³ Tawamhã ãne te Zezusi hã tãma tinha:

— E niha te ãne ĩma ĩna, tã sena ĩwaihu'u pese wamhã, te aipawapto wa'aba da hã, ai'ra ãma. ĩwaihu'u pese na, da te 're ĩ'umnhasi za'ra mono wamhã, uburé dama waihu'u pese di za, marĩ na da te 're ĩdapawaptob za'ra mono zéb da hã. — Āne ma tã Zezusi hã tãma waihu'u.

²⁴ Tawamhã awa'awi te aibã hã Zezusihi ma tinha:

— Asimpawaptobzém na, wa tã ai'umnhasi. Ma'ãpé, 're ĩpawaptob u'ãsi mono, asimpawaptobzém na te 're asazei pese mono da oto. Taha da, wa aima ĩsiwasu'u.

²⁵ Tawamhã Zezusi hã ĩtẽme ĩdasi'rã'õtõ norĩ hã da'ahã na te te da'ab'madã'ã wamhã, ma tã wa'uburé ma rob'ru, ãne:

— Wa'uburé, ai'repudu 're upi u'ãsi mono wa, te mre me õ u'ãsi 're hãimana. Te duré po'reptõ u'ãsi 're sãmra. Aiwatobro, ai'reputu hawi. Niwa apã asébré tã, ai'reputu u.

²⁶ Tawamhã wa'uburé, ma tizadari. Sisa'u te duré wasutu, ai'repudu hã. Tawamhã ĩhawi ma tã watobro. Ai'repudu hã rési ãna te oto nomro, dã'ã newa. Taha wa, te dasima rowasu'u za'ra ni, ai'repudu hã ĩdã'ã na.

²⁷ Tane nherê, ma tã Zezusi hã ai'repudu hã pa'ã. Ma tã hãwi wahutu, para na sab da.

²⁸ Taha pari, ma asisi'ri para u, Zezusi norĩ hã. Tame hãiba pisutu ma tã si'ãma sadanharĩ za'ra, ĩsiré 're ĩnomro mono norĩ hã:

— E niha bã bété wa norĩ hã, wa'uburé ma, wa te rob'ru za'ra nherê, wa te wasiwi ĩmei waihu'u õ, tãma.

²⁹ Tawamhã asa ma Zezusi hã ãne tãma waihu'u za'ra:

— 'Re ĩhãimana u'ãsi mono ma, te za a'ã 're damreme zusi ãma. Taha parip si, dama waihu'u pese di za, wa'uburé hã dama 're ĩwairébé mono zéb da hã. — Āne ma tãma waihu'u za'ra.

Zezusi hã za ĩdã'ázém na duré za apã ĩhãiwa'utuzém na ĩsiwasu'uzém na rowasu'u

Mateusi 17.22-23; Rucasi 9.43-45

³⁰⁻³¹ Tawamhã Zezusi norĩ hã ta hawi te oto ai'aba're. Darireza na danhipti'a nho'õmo nhisi wa'wai baba, ma ro'rahãri za'ra. Zezusi hã ma tã sima wê, ĩhãimanazém na a'ã da te sa'rese za'ra tã da, tisiré 're ĩnomro mono norĩ ma, a'ã hãiba pisutu tãma siwasu'u za'ra da. Tawamhã ma tã tãma siwasu'u za'ra, ãne:

— Wa hã dasiré ïpodo hã te za dasima ïhãiba nhomri ni. Te za duré dasiwi ïwĩrĩ ni. Da te dasiwi ïwĩrĩ wamhã, bãdã maparane ïãma si'utõrĩ õ ré, wa za apã hãiwa'udu ab're hawi, ïdã'ã uptabi nherẽ. — ãne te tãma siwasu'u za'ra, tisiré 're ïnomro mono norĩ ma.

³² Tawamhã te te siwi sadaihu'u za'ra õ di, tãma ïsiwasu'u za'ra zém na hã. Tane nherẽ, tãma pahĩ za'ra wa, te te siwi ãma sadanharĩ õ di oto. Ari'iwĩ te oto asimro.

*Danhipai u dama ïpire na, Zezusi te te ïrowasu'uzém na rowasu'u
Mateusi 18.1-5; Rucasi 9.46-48*

³³ Tawamhã Capana'u na 'ri nhisi u, ma tã oto aihutu, Zezusi norĩ hã. Tame 'ri para u sisisi wamhã, te Zezusi hã sadanharĩ za'ra, tisiré 're ïnomro mono norĩ hã, ãne:

— Bãdãdi na we wasi'aba'réri ré hã e marĩ na, te we asima ïrowasu'u za'ra wa'aba mo.

³⁴ Tazahã te ari'iwĩ tihãimana za'ra oto, bãdãdi na si'aba'réri sina, sipibu za'ra wa aré, 'rãwi sima ï'maipire zõ.

³⁵ Zezusi hã ma tã nhamra oto. Tisiré 're ïnomro mono norĩ zõ, te tihãrã za'ra, sitême. ãne te tãma nharĩ za'ra:

— Ni'wam norĩ hã dama pire da, 'rãwi te te si'ãma 're rosa'rata za'ra mono wamhã, dama ïwahu ne, te za dama 're si'ai'uté za'ra.

³⁶⁻³⁷ Taha pari, ma ai'uté hã pa'ã, tisiré 're ïnomro mono norĩ wa'wa, te te sãrĩ da, tipa. Tawamhã tipa te te sãrĩ sina, ma ãne tãma waihu'u za'ra:

— Ni'wam norĩ hã te te 're ïzawi pese za'ra mono wa, ai'uté zõ 're tob'uzu za'ra mono wamhã, ta norĩ u'ãbã te duré ïzõ 're tob'uzu za'ra. Tawamhã, e ïzõ si te 're tob'uzu za'ra. Mare di. We ïzatõrĩ'wa zõ zama te sõ 're tob'uzu za'ra. — ãne ma tã tãma waihu'u za'ra, te te waihu'u za'ra da.

*Zezusi norĩ wẽ 'wa norĩ wasu'u na rowasu'u
Rucasi 9.49-50*

³⁸ Tawamhã Zuwã hã te Zezusihi ma siwasu'u:

— Rowahutu'wa, aibã wa tã 'madã'ã za'ra ni, asisi na wa'uburé ma, te te 're ïrob'rui mono hã, dama 're wairébé mono da. Tawamhã ma tã dama 're wairébé. Õ hã wasiré 're morĩ õ di. Taha wa, wa tã tiwi sawi za'ra ni, asisi na wa'uburé ma, te te 're arob'ru tã mono da, wasiré 're morĩ õ wa. — ãne te Zezusihi ma siwasu'u, Zuwã hã.

³⁹⁻⁴⁰ Tawamhã Zezusi hã ma tã asa tãma waihu'u za'ra, Zuwã norĩ ma:

— Tiwi sawi za'ra wa'aba õ di za, te te 're ïda'apawapto mono zé hã. Áté ni'wam norĩ hã ïwaihu'u pese zarina, te za ïwẽ hã te te dama 're 'manharĩ za'ra, dama ï'manharĩ waihu'u'õ hã. E taha pari, te za ta norĩ hã awa'awi na ïnhisi wasété za'ra. Mare di. Te te 're ïnhisi wasété za'ra mono õ di za. E marĩ wa. Ni'wam norĩ hã wazada 're hãimana za'ra mono õ wamhã, ta norĩ hã wahãiba niwĩ te za 're hãimana za'ra. Taha wa, aibã hã wahãiba niwĩ 're hãimana mono nherẽ, tiwi sawi za'ra wa'aba õ di za, te te 're ïda'apawapto mono zé hã. — ãne ma tã tãma waihu'u za'ra.

⁴¹ Tawamhã ma tã duré tãma nharĩ za'ra:

— Ma'ápé, ïwapari pese za'ra wa'aba asina. A norĩ wa'wa hã ïzazei'wa 're aihãimana za'ra wa'aba mono wa, ã hã ni'wam norĩ hã te te aima 're sãmri za'ra wa'aba mono wamhã, 'Re ïhãimana u'ãsi mono, za te te tãma 're ï'awa'ãbã mono zé hã tiwi 're simani za'ra mono õ di za. Te za te te sina 're uwaimrami za'ra. — ãne ma tã tãma siwaihu'u za'ra Zezusi hã, tisiré 're ïnomro mono norĩ ma.

*Dawasété na romnhimimnhasi wasu'u
Mateusi 18.6-9; Rucasi 17.1-2*

⁴² Tawamhã Zezusi hã roti na ma duré tãma ãma uzusi za'ra:

— Áté ã norĩ hã, ai'uté dama ïwapu ne, te za 're nomro, ïzazei'wa norĩ hã. Tawamhã áte ni'wa simiroti zarina, te za ï'mairé. Tawamhã tãma ïroti wasété'wai ma hã, tãma rowẽ õ uptabi di za, 'Re ïhãimana u'ãsi mono, za te te azãri wa. Ìbutu na êtẽ tãmo wawẽ, da te ãma wasisi pari, ãi ba da te mei 'wa'ãhã, uihã na dá'ã da, tãma rowẽ õ di aré. Tane nherẽ, ïsimiroti wasétézéb zarina, ïzazei'wa te te ïrême wamhã, tãma rowẽ õ uptabi di za, roti wasété'wai ma hã.

⁴³ Taha wa, wa za ãne aima waihu'u za'ra wa'wa. Asib'rata na aiwasédé hã 're waibui wa'aba mono wamhã, asib'rada asiwĩ 're ïsihãri za'ra wa'aba mono newa, te za oto 're anomro wẽ wa'aba mo. Asib'rada misire ré si rowẽ uptabi u, 're asisisi aba mono wamhã, aima 're rowẽ za'ra wa'aba mono di za, hãiwa ãma hã. Asib'rata zahuré ré, ropipa u 're asisisi aba mono wamhã, unhamã u'ãsi u, aima 're ropipa uptabi za'ra wa'aba mono di za.

⁴⁴⁻⁴⁵ Duré nimomo 're aiwairébé aba mono wa, aiwasédé hã 're waibui wa'aba mono wamhã, aipara asiwĩ 're ïsihãri za'ra wa'aba mono newa, te za oto 're anomro waré wa'aba mo. Aipara misire ré si, rowẽ uptabi u 're asisisi aba mono wamhã, aima 're rowẽ za'ra

wa'aba mono di za, hâiwa âma hâ. Aipara zahuré ré ropipa u, 're asisisi aba mono wamhâ, aima 're ropipa uptabi za'ra wa'aba mono di za.

⁴⁶⁻⁴⁷ Duré marî hâ atômo na 're 'madâ'â za'ra wa'aba mono wa, aiwasédé hâ 're waihuu wa'aba mono wamhâ, tawamhâ ato asiwi 're îsani za'ra wa'aba mono newa, te za oto 're anomro waré wa'aba mo. Atômo misire ré si, 'Re îhâimana u'âsi mono u, 're asisisi aba mono wamhâ, Asib'apito wa'aba u, aima 're rowê za'ra wa'aba mono di za. Atômo zahuré ré ropipa u, 'Re îhâimana u'âsi mono te te 're asâmra aba mono wamhâ, aima 're ropipa uptabi za'ra wa'aba mono di za.

⁴⁸ Ropipa âma ubu hâ te te 're îdahâiba uprosi za'ra mono hâ, si'utôri ô di. Duré uzâ hâ si'utôri waihu'u ô di. Ône u'â te 're hâimana u'âsi. — Âne Zezusi ma tô tâma waihu'u za'ra, tisiré 're înomro mono norî ma.

⁴⁹ Tawamhâ âne ma duré tâma waihu'u za'ra:

— Marî na da te 're îrobzêpata za'ra mono zém na, te za te te 're da'apibu, 'Re îhâimana u'âsi mono hâ, tô sena îzazei'wa 're danomro mono zô.

⁵⁰ Wa za duré aima rowasu'u za'ra wa'wa, âne. Sa na hâ dasa hâ âma se ti, dasai warîrîzéb da hâ. Tane nherê, oto 're se si'utôri mono wamhâ, niha da te 'manharî waihu'u ô di, apâ se da, dasa da te âma 're îwarîri za'ra mono da hâ. Sa na, wa za duré aima rowasu'u za'ra wa'wa, âne. Ni'wam norî hâimanazéb zarina, te za dasi'u syry na sa na 're dasaihuri, dasisawi te. Tane asisawi te, te za rowê na asiré 're aihâimana za'ra wa'aba mo. — Âne ma tô tâma waihu'u za'ra Zezusi hâ, tisiré 're înomro mono norî ma.

10

*Dasiwi 're îdasiwanhizari za'ra mono zém na rowasu'u
Mateusi 5.31-32; 19.1-12; Rucasi 16.18*

¹ Tawamhâ Zezusi hâ Capana'u hawi te oto mo, Zudeza na danhipti'a nho'ômo nhisi u, morî da. Tawamhâ Zoda pa zara u, ma tô saprî. Te te saprî wamhâ, da'ahâ uptabi na ma tô duré îtème dasito. Taha wa, te duré dama rowahutu, te te dama 're îrowahutu u'âsi mono zém na, Zezusi hâ.

² Tawamhâ ni'wam norî hâ parisezu norî hâ, timreme na te te tâma âma upa za'ra wa, te te siwi mre me wê'ô da, ma âne siwi sadawa pibu:

— Aibâ norî hâ timro me sima 're siwanhizari za'ra mono wamhâ, e wahi'rata norî nhimiroti zarina, te za timro hâ time, aibâ hâ. — Âne te siwi sadanha.

³ Tawamhâ asa ma Zezusi hâ sada'âbâ za'ra:

— E niha ma tô Mozési hâ bété dama waihu'u aré, damro me dasiwi 're îdasiwanhizari za'ra mono zém na hâ.

⁴ Tawamhâ asa ma duré âma sada'âbâ za'ra:

— Mozési hâ âne ma tô dama roti: Aibâ norî hâ timro me, siwi 're siwanhizari za'ra mono ô ré, te za rob'ui'ére hâ timro ma te te 're sômri za'ra pi'ôï ma, da te âma 're waihu'u za'ra mono da, te te îmezém na hâ. Taha parip si, te za oto pi'ôï ma, te te 're rob'ru za'ra.

⁵ Tawamhâ Zezusi te duré asa tâma nharî za'ra:

— Ta hâ Mozési hâ aipê'ê tete za'ra wa'aba wa, ma tô âne na te te aima 're roti za'ra wa'wa.

⁶ Ropoto na'rata hawimhâ, ânei ô di. Ropoto na'rata hawimhâ, ma tô 'Re îhâimana u'âsi mono hâ aibâ hâ poto, a'uwê na. Pi'ô zama ma tô duré poto.

⁷ Taha wa, aibâ hâ 're mro za'ra mono wamhâ, te za timama norî hâ te te 're rême za'ra, timro me si, siré 're simasisi zahuré mono da oto.

⁸ Sina hâiba sitob zahuré wamhâ, maparane îhâiba nherê, misi îhâiba ne, te za siré 're hâimana u'âsi zahuré oto.

⁹ Taha wa, 'Re îhâimana u'âsi mono, dasi'âma te te 're da'ahâiba to mono nherê, ni'wa hâ da'âma 're siwanhizari mono ô di za. Mare di. — Âne ma tô Zezusi hâ parisezu norî ma waihu'u za'ra.

¹⁰ Taha pari, 'ri tème sihutu wamhâ, îsiré 're înomro mono norî hâ ma tô âma siwi sadanha.

¹¹ Tawamhâ Zezusi asa ma tô tâma waihu'u za'ra:

— Ni'wa hâ aibâ hâ timro te te mei wamhâ, pi'ô aimawi na mro wamhâ, te za tiwasédé hâ 'manha, aibâ hâ.

¹² Duré ni'wa hâ pi'ô hâ, timro te te mei wamhâ, aibâ aimawi na mro wamhâ, te za duré tiwasédé hâ 'manha, pi'ô hâ. — Âne ma tô tâma waihu'u za'ra.

*Zezusi hâ, ai'uté te te î'azawizém na rowasu'u
Mateusi 19.13-15; Rucasi 18.15-17*

¹³ Taha pari, ma tô da'ra hâ âwisi za'ra ni Zezusihi u, 'Re îhâimana u'âsi mono ma, âma mre me za'ra da, te te 're apawaptob u'âsi mono da, îwê na. Tane nherê, îsiré 're înomro mono norî hâ ma tô dawê'ô za'ra, da'ra hâ da te îtème 'wasari tô da, Zezusihi u.

¹⁴ Āne te te ĭdawē'ō za'ra zém na hā, te te wapari ze za'ra ō di, Zezusi hā. Taha wa, te āne tāma nharī za'ra:

— Tō'ā. Dawi rosawi za'ra wa'aba tō. A'ā we ĭtēme da te simroi mono, ai'uté norī hā. Ā norī hā ai'uté norī hā ōne haré simizazei pese na 're ĭhāimana za'ra mono ne, tane ni'wam norī hā 're hāimana za'ra mono wapsi, te za 'Re ĭhāimana u'āsi mono hā āma 're sib'a'uwē za'ra.

¹⁵ Tō sena, wa aima waihu'u za'ra wa'wa. Ni'wam norī hā ai'uté dama ĭwapu ne, 're hāimana za'ra mono ō wamhā, 'Re ĭhāimana u'āsi mono, da'āma 're ĭsib'a'uwē mono zéb u, 're sisisi mono ō di za. — Āne ma tō tāma waihu'u za'ra, Zezusi hā.

¹⁶ Tawamhā awa'awi ma tō nasi ai'uté hā dawi azaza tipa. Duré tinhib'rata na te te nasi upi za'ra sina, 'Re ĭhāimana u'āsi mono wi, ma tō āma arowaptē, ĭwē hā te te tāma 're anhomri mono da.

*Aibā ĭsibro pese na rowasu'u
Mateusi 19.16-30; Rucasi 18.18-30*

¹⁷ Zezusi norī hā sina pahā za'ra ō ré, te aibā hā ĭsarina tiwara za'ra. Āma wisi za'ra wamhā, Zezusihi papara ma aime hi'rātītō. Tawamhā āne te sina sadanha:

— Rowahutu'wa, aiwē di a hā. E marī ĭwē hā wa za 'manha, 're ĭdanomro u'āsi mono zé hā te ĭsina ĭ'uwaimrami da hā.

¹⁸ Tawamhā asa te Zezusi hā tāma tinha:

— E niha te ĭ'āma aiwa, ĭwē na. 'Re ĭhāimana u'āsi mono si ĭwē uptabi hā, ōhō si. Ni'wa hā ĭsine hā mare di.

¹⁹ A hā aima waihu'u pese di, 'Re ĭhāimana u'āsi mono nhimiroti hā. Āne dama ĭsimiroti hā: “'Re danhimroi wa'aba mono ō di za. Duré aimro na asiwi 're asipsaihuri za'ra wa'aba mono ō di za. Duré danhibrom na dawi 're asipsaihuri za'ra wa'aba mono ō di za. Duré dahāiba wasu'u na dama 're asadawa nhipese za'ra wa'aba mono ō di za. Duré dama 're asadawa nhipese za'ra wa'aba mono ō di za. Duré aimama hā te za 're ĭwazé pese mo, ana zama.” Āne 'Re ĭhāimana u'āsi mono nhimiroti hā.

²⁰ Tawamhā asa te Zezusihi ma siwasu'u:

— Rowahutu'wa, ĭprédu wi, wa tō te 're 'madâ'ā pese, ĭsimiroti hā.

²¹ Tawamhā Zezusi hā te aibā 'madâ, sawi sina. Āne te tāma tinha:

— Zahadu te misi aiwi sô rowaptâ, tāma āma ĭ'uwaimrami'ō hā. Mo oto aimorī apâ, asibro hā uburé dama wede mono da, ĭwa'ābâ zō, ĭsibrob'ō norī ma, sōmri mono da. Āne wamhā, duré asibro pese di za, hāiwa āma. Taha parip si, te za we apâ aimo ĭtēme, ĭsiré 're aimorī da oto. — Āne ma tō aibā ma waihu'u, Zezusi hā.

²² Aibā hā āne hā te te wapari wamhā, ma tō tiwi tirobzei'ō. E marī wa. Sibrob ahâ uptabi wa. Taha wa, te oto mo apâ, robzei āna.

²³ Tawamhā aibā za'u, te Zezusi hā 'madâ'ā za'ra, tisiré 're ĭnomro mono norī hā. Taha wa, ma tō āne tāma waihu'u za'ra:

— ĭsibro pese norī hā 'Re ĭhāimana u'āsi mono, da'āma 're ĭsib'a'uwē mono zéb u 're ĭsisisi mono da hā, pire di. Tāma pire uptabi za'ra di za.

²⁴ Tawamhā te āma rosa'rata za'ra, te te tāma ĭwaihu'u za'ra zém na hā. Āne ma duré tāma waihu'u za'ra:

— ĭsiwadi norī, e niha te za 'Re ĭhāimana u'āsi mono āma, 're sib'apito za'ra, ĭtēme 're ĭsisisi mono zéb da hā. Tāma pire uptabi za'ra di.

²⁵ E niha te za awaru ba'ōmore hā ĭsi'uwazi para'ōtō zapu'u 're āzé. Sébré waihu'u ō di. Tane, ĭsibro pese norī hā si'uihā na 're sisisi waihu'u mono ō di za, 'Re ĭhāimana u'āsi mono, da'āma 're ĭsib'a'uwē mono zéb u hā. — Āne ma tō tāma waihu'u za'ra, Zezusi hā.

²⁶ Āne ĭmreme hā te te wapari za'ra wamhā, ma tō āma titob'uzu za'ra. Tawamhā te āma sisadhanarī za'ra, āne:

— ĭsibro pese norī ma, waihu'u za'ra ō wamhā, e 'wam norī hā te za bété danho'reptuzé hā te te sina 're uwaimrami za'ra, dadâ'ā āna 're ĭdanomro u'āsi mono zé hā. Āté ni'wai ō di.

²⁷ Tawamhā Zezusi hā te 'madâ'ā za'ra. Āne ma tō tāma waihu'u za'ra:

— Dasi'uihā na danho'reptuzé hā, da te dasina 're uwaimrami za'ra mono ō di za. Dama waihu'u ō di. 'Re ĭhāimana u'āsi mono si siminho'reptu waihu'u pese di. Taha ma si, uburé marī hā 'manharī waihu'u pese uptabi di. — Āne ma tō tāma waihu'u za'ra.

²⁸ Tawamhā Pedru hā te asa tāma siwasu'u:

— Wa norī hā uburé wa tō wanhibro hā wasipara rēme za'ra ni, asiré 're wanomro mono da oto.

²⁹ Tawamhā Zezusi hā āne ma duré tāma waihu'u za'ra:

— Tane tō. ĭwapari pese za'ra wa'aba. Āté ni'wa hā te te 're ĭzawi pese mono zéb zarina, te za tinhorōwa hā a'ā tiré, te te dama 're ĭzadawa wasu'u mono da. Āté tisisānawā norī, duré

tihidiba norī te za a'â rēme za'ra. Āté tina, timama, duré ti'ra norī hā te za a'â rēme za'ra. Āté tinhipti'a zama, te za a'â tirē.

³⁰ Āne wamhā, ti'ai āma 're morī ré, te za marī īwē uptabi hā ahā na tāma 're hāimana za'ra, 'Re ihāimana u'āsi mono nhib'ratamhā, īsōrōwa za'ra hā, īsisānwā norī hā, ihidiba norī hā, ī'ra norī hā, duré īsipti'a hā. Marī īwē hā tāma 're ihāimana za'ra mono zu, te za duré rowasédé hā tāma 're hāimana za'ra, taré da te 're ī'ruiwapari za'ra mono zéb zarina. Niwapsi te za duré tāma pisutu, dā'ā āna 're mori u'āsi da, rowē uptabi āma, 'Re ihāimana u'āsi mono hā.

³¹ Ni'wam norī hā ahā uptabi na pire na ti'ab ré dama 're hāimana za'ra mono nherē, te za 'Re ihāimana u'āsi mono hā te te tāma 're apisutu, wapu na 're hāimana za'ra mono da oto, za da'āma 're īsib'a'uwē mono zéb āma hā. Duré ni'wam norī hā ahā uptabi na ti'ab ré wapu na dama 're hāimana za'ra mono nherē, te za te tāma 're apisutu, pire na oto 're hāimana za'ra mono da. — Āne ma tō romhā ré tāma waihu'u sirōmo za'ra, tisiré 're īnomro mono norī ma.

Zezusi hā za tidā'āzém na, duré za tihāiwa'utuzém na zama īsiwasu'u zahu zé
Mateusi 20.17-19; Rucasi 18.31-34

³² Tawamhā Zezusi norī hā ma oto sai'uri za'ra, bādādi na sō'a na, Zeruzarē u. Zezusi hā tisiré 're īnomro mono norī nhowa, ma tō mo. Sina hātā'ā āna, morī wa, te āma rosa'rata za'ra. Taha wa, ma tō īsiré 're īnomro mono norī me īsi'aba'rē norī hā sina tipahi za'ra. Tawamhā danhiti te sima satōrī za'ra, tisiré 're īnomro mono norī hā, te te tāma rowasu'u sirōmo za'ra da, za tāma īromhāimanazém na.

³³⁻³⁴ Tawamhā āne te tāma rowasu'u za'ra:

— Īwapari pese za'ra wa'aba. Āhāna Zeruzarē u, wa ai'aba'rē ni. Tame wa hā ti'ai āma dasiré īpodo hā te za dasima ihāiba nhomri ni, sasedoti īpire norī ma, 'Re ihāimana u'āsi mono nhimiroti 'rata na rob'ui'éré na dama rowahutu'wa norī ma zama. Ta norī hā īwasédé te za ī'āma īsa'ra za'ra zéb zarina, te za dama ī'ru za'ra, da te īwīrī da, dasiwi. Tawamhā zudezu'ō norī ma, te za siwi ihāiba nho. Ta norī hā te za ī'āma tiwa'ē za'ra, zudezu'ō norī hā. Tizadaipro na te za duré nasi siwi ī'upto. Te za duré te te siwi 're īpré'é. Tawamhā te za oto siwi īwī. Tane nherē, bādā maparane ī'āma si'utōrī ō ré, wa za apā hāiwa'udu. — Āne ma tō tāma siwasu'u sirōmo za'ra, Zezusi hā.

Ti'adu norī hā Zuwāhā me, te te sina īrowaptērē zahuré zé wasu'u
Mateusi 20.20-28

³⁵ Taha pari, Ti'adu hā Zuwāhā me, Zebedehe 'ra zahuré hā, ma tō Zezusihi u sina rotété zahuré, te te tāma nharī zahuré da, āne:

— Rowahutu'wa, wa za aiwi rowaptērē ni. Ma'āpé, āma wama uwaimrami, wa te wasima īwē hā.

³⁶ Tawamhā Zezusi ma āma sada'ābā zahuré:

— E niha ma tō asima īwē wa'wa, te aima āma ī'uwaimrami aba da hā, asima īwē wa'aba zé hā. — Āne te sadanharī zahuré.

³⁷ Tawamhā asa te duré tāma nharī zahuré, Zezusihi ma:

— Niwamhā danhib'apito simasisizém na te za 're asāma mo, dama aipire uptabi na 're aihāimana mono da. Āhā wa, ma'āpé wapisutu, asimire niwī 're wa'manhamra mono da, duré asimi'e niwīb zama, asine dama wapire na 're wahāimana mono da.

³⁸ Tawamhā te duré asa tāma nharī zahuré:

— Rosa'rata āna te āne asina īzadanharī 'wa. Wa hā wa za robzépata za'ētē, dawi īsisawi āna. E tawamhā sada asiptete aba di za, za te īrobzépata za'ētē ne, īrobzépata aba da hā.

³⁹ Tawamhā asa te duré Zezusihi ma siwaihu'u zahuré:

— Īhe. Sada wanhiptete di za, asine wa te īrobzépata da hā.

Tawamhā Zezusi ma duré asa tāma waihu'u zahuré:

— Te za tō īsine īrobzépata za'ētē 'wa.

⁴⁰ Tane nherē, īsi'uihā na te aipisutu waihu'u aba ō di, dama aipire wa'aba na 're aihāimana aba mono zéb da hā īnhimire niwī, duré īnhimi'e niwī. 'Re ihāimana u'āsi mono si te za te te dama 're apisutu, te te sima 're īda'awē mono zéb uwaibaba, dama pire na ī'rata 're dahāimana u'āsi za'ra mono da. — Āne ma tō tāma waihu'u zahuré, Ti'adu norī ma.

⁴¹ Tawamhā Zezusihi siré 're īnomro mono norī hā 10 na ihāiba za'ra hā, Ti'adu norī mreme te te wapari za'ra wamhā, ma tō sada tinhiti'ru za'ra.

⁴² Taha wa, Zezusi te sō tihārā za'ra, 'rāwi itēme si'rā'ōtō da. Tawamhā āne ma tō tāma waihu'u za'ra:

— Ti'ai āma danhib'apito na da te 're īwamri za'ra mono norī hā te pire uptabi na dama 're hāimana za'ra. Sa'ētē te duré te te 're dawada'uri za'ra, īsimiroti hā da te 're 'madā'ā za'ra mono da.

⁴³Tane asima 're aihâimana za'ra wa'aba mono ò di za, a nori wa'wa hã. Asiré nori ma, ai'maipire wa'aba da, asima 're 'mairob'ruiwapari aba mono wamhã, te za asiré hã 're i'maipawaptob u'âsi aba mo, marî zô 're a'manhimnhasi aba mono âna.

⁴⁴Duré 'rãwi asima aipire uptabi na, 're ai'maihâimana aba mono da, asima 'maiwê uptabi aba wamhã, pawa'âbã âna romhuri'wa ne, te za asima 're i'mairomhuri wê wa'aba mo.

⁴⁵Tane duré, wa hã dasiré ipodo hã da te i'ma 're romhuri za'ra mono da, we imori ò di, ti'ai u. Te 're da'apawapto mono da si, wa wei datême mo, isihâiba zawi âna dazada idâ'â da, da'upana te da'awa'âbã da. — Âne ma tô tâma siwaihu'u za'ra Zezusi hã, te te âma waihu'u za'ra da.

Zezusi hã Batimezu te te ito pesezé wasu'u

Mateusi 20.29-34; Rucasi 18.35-43

⁴⁶Tawamhã Zezusi nori hã ma tô oto aihutu, Zerico na 'ri nho'ômo nhisi u. Zerico hawi duré si'aba'rêi wamhã, da'ahã uptabi na te isiré ai'aba'rê ni. Si'aba'rêi ré, ma tô aibã hã sôpêtê za'ra itob'a hã, bådãdi zababa isãmra hã. Itob'a hã Batimezu na isisi hã, Timezuhu 'ra. Rob'uiptazém na te nasi da'awa, da te tâma a za'ra da.

⁴⁷Tawamhã ma tô Zezusihi wasu'u hã wapa, Nazaré nhihudu hã isababa te te i'rozãri na hã. Taha wa, te te sina 'mahãrã, sa'êtê, itob'a hã:

— Zezusi, Dawihi nhihudu, ma'ãpé i'âma aipê'êzé na. — Âne te nasi sina 'mahã.

⁴⁸Tawamhã da'ahã na te tâma nhari za'ra ni, ari'iwi sãmra da. Tane nherê, te nasi sa'êtê sina 'mahã:

— Dawihi nhihudu, i'âma aipê'êzé na.

⁴⁹Tawamhã ma tô mazazã, Zezusi hã. Âne te dama ti'ru:

— Sô aihãrã za'ra wa'aba, we itême mori da.

Taha wa, te dasiwi 'mahãrã ni, itob'a hã:

— Aiwahutu. Zezusi hã te asô hã, itême aimori da. Aima rowê di za oto.

⁵⁰Tawamhã Batimezu hã tisi'ubuzê ma tô time, si'aba'rê na wahutu da, Zezusihi u mori da.

⁵¹Itême wisi wamhã, Zezusi te âne sadanha:

— E marî te asima iwê, te âma aima i'uwaimrami da hã.

— Rowahutu'wa, ito pese da, wa isima wê, apã te 're rob'madã'â mono da. — Âne te asa tâma si'ru.

⁵²Tawamhã Zezusi te âne tâma tinha:

— Te za oto aimo. Asina i'umnhasi wa, ma tô ato pe.

Tawamhã awa'awi ma tô rob'madã'â wê, aibã hã. Tawamhã Zezusihi zarina te oto mo, bådãdi na.

11

Zezusi hã Zeruzarê u, isébrézé wasu'u

Mateusi 21.1-11; Rucasi 19.28-40; Zuwã 12.12-19

¹⁻²Tawamhã Zezusi nori hã Zeruzarê u si'aba'rêi wamhã, ma tô a'ã aihutu, Oriwera na êtê rãihã nhisi u. Êtê rãihã 'rata, te 'ri wa'ono hã 're hâimana zahuré, Betazé hã duré Betãnha. Tawamhã Zezusi hã sisôwa ma tô tisiré 're inomro mono nori hã 'mazatôri zahuré maparane. Âne te tâma rob'ru zahuré:

— Ôwa te za oto ane wa'wa, 'ri wa'otô u, asô're uwaibaba wa'aba. Âma aimasisi aba wi, awa'awi te za awaru po'repore hã isôpêtê 'wa, iprédupté hã, zahadu ni'wa hã nimomo âma imorî'ô hã. Da te âma wasisi haré, te za. Tawamhã da te âma iwasisizé hã te za iwasihui wa'wa, we i'ma saprôni aba da.

³Ni'wa hã âne te te asadhanari aba wamhã: “E marî da, ma iwasihui wa'wa, âma iwasisizé hã,” tawamhã asa te za âne tâma iwaihu'u 'wa: “Wanhîb'apito hã marî ô wa, âma mori da, wa tâma wasihu ni. Te za we aima sômri su'u apã.” Âne te za tâma izadawa wasu'u wa'wa, itede'wai ma.

⁴Tawamhã te oto sô tineb zahuré, awaru po'repore zô. Simasisi wi, awaru po'repore ma tô sôpêtê zahuré. 'Ridawa 'rata, te wasisi haré za.

⁵Te te wasihu zahuré wamhã, ma tô ni'wam nori hã âma 'mahãrã za'ra, i'rata isimasam nori hã:

— E marî te a nori wa'wa hã i'manharî 'wa. E marî da, te asapa'abã iwasihui wa'wa, awaru po'repore hã.

⁶Tawamhã asa ma tô dazada'âbã zahuré, Zezusi hã te te tâma iwaihu'u zahuré zém na. Taha wa, ma tô tâma 'ru zahuré ni, awaru po'repore hã te te saprôni zahuré da, Zezusihi ma.

⁷ Tawamhã te te ãwisi zahuré wamhã, awa'awi ma tô tâma ba'ubu zahuré, tisi'ubuzém na. Taha pari, ma tô âma darôno, Zezusi hã.

⁸ Âma sarôtô wamhã, da'ahã na ma tô bâdâdi hã tâma waptâ za'ra ni, dasi'ubuzém na. Ni'wam norî hã rom na isupo suiwawê te te î'manhizâri za'ra na, ma duré tâma waptâ za'ra.

⁹ Tawamhã Zezusihi nhowa isi'aba're norî hã isarina isi'aba're norî zama, mreme 'râihã na te sima 'mahârã za'ra:

— 'Re îhâimana u'âsi mono âma 're wawata za'ra wa'aba mono. Îsawata para we îmorî ma, îwê si te te tâma 're pisutu u'âsi mono neza. Apito Dawihi ma, te te îropisutuzéb zarina, te we oto mo, watêmeb za'ra, Wanhîb'apito 're hâimana mono da.

¹⁰ 'Re îhâimana u'âsi mono hã tô sena sôprub di. — Âne te âma tawata za'ra ni.

¹¹ Tawamhã Zeruzarê u oto wisi wamhã, 'Re îhâimana u'âsi mono âma 're îdawata za'ra mono zéb u, ma âzé Zezusi hã, te te robzabu da. Tame tiwi hâiwahã wa, te oto mo, Betânha na 'ri wa'ôtô nhisi u, tisiré norî me, aibã 12 na îhâiba za'ra norî me.

Pidera wede ma, Zezusi te te înharizé wasu'u

Mateusi 21.18-19

¹² Tawamhã bâtã amo na Betânha hawi te apã ai'aba're, Zeruzarê u. Morî ré, ma tô mra hã tîwî, Zezusi hã.

¹³ Tawamhã si'aba'reí ré, romhã ré, ma wede hã tisã, pidera wede hã. Sui hãza'ôtô wa, te sô mo, 'râi ô'umnhasite. Tawamhã 'rãwi îsu si ma tô 'madã. Îrã hã robaba di. Zahadu a'amo hã watobro ô di, Îrã uptabi zéb da hã.

¹⁴ Tawamhã Zezusi te wede ma tinha:

— Ai'rã hã da te 're huri mono ô di za oto. Ai'rã'ô u'âsi, te za oto 're asa mo.

Tawamhã ma tô mreme wapari za'ra, wede ma, te te înharizém na hã, isiré 're înomro mono norî hã.

'Re îhâimana u'âsi mono âma 're îdawata za'ra mono zém hawi, Zezusi te te îdazate mono zém na rowasu'u

Mateusi 21.12-17; Rucasi 19.45-48; Zuwã 2.13-22

¹⁵ Tawamhã Zezusi norî hã ma tô Zeruzarê u apã aihutu. 'Re îhâimana u'âsi mono âma 're îdawata za'ra mono zéb u, ma tô asisi, 'ri 'wawi wa'ra 're. Tame te da te 're rowede za'ra. Ni'wam norî hã te duré te te dawî 're rob'uipra za'ra. Tawamhã dama rowede'wa norî hã ma tô Zezusi hã te te sate, rob u. Te te dawî 're îrob'uipra za'ra mono norî zama, te te sate. Duré rob'uiprazém na te te dawî âma 're isapri za'ra mono norî wi, ma wedeza hã te te tiwi anhamra, utu'u wede'wa norî simasisizéb zama.

¹⁶ Te duré dawî rosawi, 'ri 'râihã nho're wa'wai baba, da te 're ro'wasari tô mono da.

¹⁷ Te duré dama rowasu'u, da te âma îrob'ui'érezéb zarina, âne:

— Duréihã wahi'rada hã ma tô âne na rob'ui'éré îbaihã na. 'Re îhâimana u'âsi mono mreme na: "Înhorôwa hã îwa îma 're îdamreme zusi mono zém na, te za da te 're sisi za'ra, 'ri hã." Âne te tinha. Tane nherê, a norî wa'wa hã ma tô îwa asima âma 're îrob'manharî waseté za'ra wa'aba mo. Taha wa, danhibrom na dawî 're îsipsaihuri za'ra mono norî, 're îsi'ubumroi mono zém ne, te oto 'ri hã 're sa, wasété uptabi na. — Âne ma tô Zezusi hã dama waihu'u, da te waihu'u za'ra da.

¹⁸ Tawamhã aibã norî hã ma tô îwasu'u hã wapari za'ra, sasedoti îpire norî hã, rowahutu'wa norî zama. Âne hã te te wapari za'ra wamhã, ma tô ta norî hã sima âma rosa'rata za'ra, te te siwi wîrî da. Tane nherê, Zezusihi nhimiroti na, da'ahã na âma 're dawata za'ra mono wa, te te sima danhimimnhasi za'ra wa, te te siwi wîrî ô di za a'ã.

¹⁹ Tawamhã bâdã sébré wi, te Zezusi norî hã Zeruzarê hawi apã ai'aba're, Betânha na daza'ru nhisi u.

Pidera wede wasu'u

Mateusi 21.20-22

²⁰ Awêm na mararé si'aba'reí wamhã, ma tô Zezusi norî hã 'madã'ã za'ra, pidera wede hã, uburé îwede 're na.

²¹ Tawamhã Pedru hã ma tô âma po're puru, Zezusi hã wede ma, te te înharizém na hã. Tawamhã âne te Zezusihi ma tinha:

— Rowahutu'wa, 'madã'ã. Ôhôtã pidera wede. Ahâmhã tâma înhari hã ma tô tiwede're.

²²⁻²³ Tawamhã Zezusi te asa tâma tinha:

— Tô sena wa aima waihu'u za'ra wa'wa. 'Re îhâimana u'âsi mono si, te za asiwi 're î'umnhasi za'ra wa'aba mo, te te 're aipawaptob za'ra wa'aba mono da. Tawamhã ã êtê 'râihã ma, nhari za'ra wa'aba wamhã, uihã na sisa'o'o da, âi ba sime da, te za âma aima uwaimrami za'ra wa'wa. 'Rãwi asiwawã za'ra wa'aba ô di za, za te te aima âma î'uwaimrami za'ra wa'aba zém na hã. Tãma înhari za'ra wa'aba zéb uwaibaba, za te te âma

aima i'uwaimrami aba na, te za āma ĩsaze za'ra wa'wa. Tawamhā te za tō te te āma aima 're a'uwaimrami 'wa, 'Re ĩhāimana u'āsi mono hā.

²⁴Taha wa, wa aima waihu'u za'ra wa'wa. 'Re ĩhāimana u'āsi mono ma, 're aimreme zusi aba mono wamhā, duré marī na tiwi 're rowaptērē za'ra wa'aba mono wamhā, za te te āma aima 're ĩ'a'uwaimrami aba mono zém na, te za āma 're ĩsaze za'ra wa'aba mo. Tawamhā te za tō te te āma aima 're a'uwaimrami u'āsi 'wa.

²⁵⁻²⁶'Re ĩhāimana u'āsi mono ma, 're aimreme zusi aba mono da wamhā, te za a'ā aiwi 're da'ru simani za'ra wa'wa. Dawasédé hā da'āma 're 'madā'ā za'ra wa'aba mono ō di za oto. Tawamhā Aimama 'wa hā hāiwa āma 're ĩsāmra mono hā te te duré ai'āma 're 'madā'ā za'ra wa'aba mono ō di za oto, aiwasété 'wa hā. — Āne ma tō tāma waihu'u za'ra, Zezusi hā.

*Zezusi hā ĩpisutu 'wai āma, da te dasiwi ĩsadanharĭzém na rowasu'u
Mateusi 21.23-27; Rucasi 20.1-8*

²⁷Tawamhā ma tō apā aihutu Zeruzarē u, Zezusi norī hā. 'Re ĩhāimana u'āsi mono āma 're ĩdawata za'ra mono zéb āma, 'ri 'wawi wa'ra 're, te 're mo, Zezusi hā. Tame 're morī ré, ma tō aibā norī hā ĩtēme aihutu, sasedoti ĩpire norī hā, duré dama rowahutu'wa norī hā, duré zudezu norī ma roti'wa norī hā.

²⁸Tawamhā āne te siwi sadanha:

— E 'wa sadawa para, te bété āne hā marī hā dama 're ĩ'ab'manharī mo. E 'wa hā, aipisutu'wa.

²⁹Tawamhā Zezusi te asa tāma nharī za'ra:

— Wa hā wa za duré asadhanarī na aima āma wa'rāmi za'ra wa'wa. We ĩma waihu'u za'ra wa'aba wapsi, wa za duré wa hā aima waihu'u za'ra wa'wa, ĩpisutu'wa hā.

³⁰Ma'āpé, we ĩma waihu'u za'ra wa'aba. E 'wa sadawa para, te Zuwā Batita hā ā dawabzuri te te dama 're ab'manharī. E 'Re ĩhāimana u'āsi mono zadawa para. E taré dazadawa parap si. — Āne te Zezusi hā sadanharī za'ra.

³¹Tawamhā 'rāwi te sima nharī za'ra:

— E niha, wa za tāma waihu'u za'ra ni, ōne wamhā. 'Re ĩhāimana u'āsi mono zadawa para, ā dawabzuri te te dama 're ĩ'ab'manharī mono na, wa te tāma waihu'u za'ra wamhā, te za wazadhanarī na sahu za'ra, āne: “E niha bété, Zuwā Batitaha nhimirowasu'u hā saze za'ra wa'aba ō di.”

³²Tazahā dazadawa parap si, ā dawabzuri te te dama 're ĩ'ab'manharī mono na, wa te tāma waihu'u za'ra wamhā, te za wazada tazahi za'ra ni. — Āne te 'rāwi sima nharī za'ra, dapipa te, Zuwā Batita hā tō sena 'Re ĩhāimana u'āsi mono zadawa wasu'u'wa 're ĩmorī na, da te 're saze za'ra mono wa.

³³Taha wa, sada dazahi za'ra ō'umnhasite, sina pahī za'ra wa, ma tō duré Zezusihi ma waihu'u na wa'rāmi za'ra, āne:

— Ni'wa sadawa para, ma tō Zuwā hā ā dawabzuri hā te te dama 're ab'manharī. Wa norī hā wa te waihu'u za'ra ō di, ĩpisutu'wa hā.

Tawamhā Zezusi te asa tāma nharī za'ra:

— A norī wa'wa hā ĩma waihu'u aba ō nherē, wa hā te duré aima waihu'u za'ra wa'aba ō di za, ni'wa sadawa para, marī hā te dama 're ĩ'ab'manharī mono na. — Āne ma tō Zezusi hā tāma timreme na wa'rāmi za'ra.

12

Buru na romhuri wasété 'wa norī wasu'u

Mateusi 21.33-46; Rucasi 20.9-19

¹Tawamhā tinhimirowasu'u na ma tō duré tāma āma sāna'rata za'ra, āne:

— Aibā hā te 're sāmra, buru tede'wa hā. Tawamhā tiburu āma ma tō a're, uwa 'ru hā. Te te a're pari, ma tō buru 'wawi wa'ra. Ma tō duré étē nhisiwi sada ab're, uwa 'rāi watizéb da hā, ĩwa'u zō. Taha pari, 'ri 'rāihā hā ma duré buru wa'wa 'manha, ĩsipsaihuri norī zō, dasipapara rob'madā'āzéb da hā. Tawamhā ma tō ni'wam norī hā sisō'a ré pisutu za'ra, ĩburu hā te te sō 're 'madā'ā za'ra mono da. Uwa 'ru 'rā hā 're 'rāi préduz za'ra mono wapsi, te za te te tāma 're po'o za'ra, buru tede'wai ma hā. Taha pari, te oto mo, buru tede'wa hā darob amoi u, tamomo a'ā sāmra da.

²Tawamhā oto 'rāi prédu mono wa, ma tō buru tede'wa hā tāma ĩromhuri'wa hā 'mazatō tiburu u, uwa 'ru 'rā hā buru 'madā'ā'wa norī te te tāma ĩpo'o za'ra zō.

³Tane nherē, ĩtēme wisi za'ra wi, ma tō siwi ti'ā, te te siwi azāri da. Tawamhā ubana ma tō siwi satō apā.

⁴Taha pari, te duré ĩwa'rāmi sō 'mazatō, tāma ĩromhuri'wa hā. Tane nherē, buru u ĩtēme wisi za'ra wamhā, ma tō tāma rob'manharī wasété za'ra. ĩ'rāi wi, ma tō siwi azā.

⁵ Taha pari, te duré 'mazatō, ĩwa'rāmi. Tane nherē, ma tō siwi tīwī, buru na romhuri'wa norī hā. Siwa'rāmi sihutu sidāpāsi, ma tō nasi hā za'ra. Ma tō duré nasi simro.

⁶ Tawamhā buru tede'wai 'ra si te oto ĩrata 're hāimana, danhowa're re te te ĩsatōrī da hā, ĩburu na romhuri'wa norī u. ĩ'ra hā tāma sawi pese uptabi di. Tāma sawi nherē, ma tō satō, buru na romhuri'wa norī u, morī da. Āne te ĩmana hā sima rosa'rata: "ĩ'ra si'aibā hā te ĩtēme satōrī za'ra wamhā, āte te za siwi hāiba wazé."

⁷ Tane nherē, buru na romhuri'wa norī u wisi wamhā, te āne sima 'mahārā za'ra: "Ōhōta buru tede'wai 'ra hā te wei mo, timama uirī na buru tede'wa da hā. Wa te wasiwi wīrī aba, buru hā wate za'ra da." Āne ma tō sima 'mahārā za'ra, buru na romhuri'wa norī hā.

⁸ – Tawamhā ma tō siwi ti'ā, buru tede'wai 'ra hā, te te siwi wīrī da. Te te siwi wīrī pari, ma tō ĩhāiba hā siwi time, buru nhiti.

⁹ – Buru na romhuri'wa norī ma hā e niha te za buru tede'wa hā tāma rob'manharī za'ra. Te za sō timorī za'ra, uburē te te uprosi da, buru na romhuri'wa norī hā. Tawamhā te za duré aimawi da'maipisutu, tiburu 'madā'ā wa da. – Āne buru na romhuri'wa norī wasu'u hā ma tō tāma wasu'u za'ra, Zezusi hā.

¹⁰ Tawamhā te duré 'mahārā za'ra:

– Oro 'Re ĩhāimana u'āsi mono zadawa wasu'u na rob'ui'ére hā 're sōré za'ra wa'aba mono za, aima waihu'u za'ra wa'aba ō di bété. Āne ĩbaihā na rob'ui'ére hā:

"Ētē tomhāpā wē hā 'ri na'ratazéb da hā wē uptabi nherē, 'ri'wa norī te te siwi ĩwē'ō hā te oto pire na 're sa'wari u'āsi.

¹¹ Uburē Danhib'apito hā ma tō āne hā pisutu, 'ri na'rata uparizéb da, pire na 're ĩsa'wari mono da hā.

Taha wa, āne na wa te āma 're rosa'rata za'ra mono wamhā, wa āma 're watob'uzu u'āsi za'ra, wa norī hā."

Āne ma tō ětē wasu'u na tāma rob'rāzarōtō za'ra, Zezusi hā.

¹² Buru na romhuri'wa norī wasu'u hā te te dama wasu'u wamhā, tisiré zudezu norī ma, pire na 're ĩhāimana za'ra mono norī, te wasu'u, Zezusi hā, 'Re ĩhāimana u'āsi mono ma, da'āma romhuri'wa norī hā, duré dama rowahutu'wa norī hā, duré dama rotī'wa norī hā. Āne na ma tō sina waihu'u za'ra. Taha 'ru te, te aré siwi ti'ā. Tane nherē, da'hā nhimimnhasi te, te ōne haré ai'aba'rē, ĩsiti.

Zezusi hā, rob'ui'prazé ĩsapotore na da te ĩsadanharīzé wasu'u Mateusi 22.15-22; Rucasi 20.20-26

¹³ Tawamhā 'Re ĩhāimana u'āsi mono ma, da'āma romhuri'wa norī hā ma tō parisezu norī hā 'mazatōrī za'ra, Zezusi hā, u'āsi mono ma, da'āma romhuri'wa norī hā, duré dama rowahutu'wa norī hā, duré dama rotī'wa norī hā, ma tō ĩtēme 'mazatōrī za'ra, tinhimiroti na te te upai wa, te te siwi wē'ō za'ra da.

¹⁴ Tawamhā ĩtēme sihutu wamhā, te siwi sadanha:

– Rowahutu'wa, tō sena na wa tō aimreme na aiwaihu'u za'ra ni. Danhimirosa'rata na 're aihāimana mono ō di. Duré dapire na 're dahāimana za'ra mono nherē, aima hā aiwapsi dahāimanazé hā. 'Re ĩhāimana u'āsi mono nhimiroti zarina si, te uburē marī hā dama 're ĩ'waihu'u mo, sena na. Taha wa, te za asimirosa'rada hā wama ĩwaihu'u za'ra, wa te aiwapari za'ra da. E Roma āma danhib'apito uptabi ma, wa za rob'ui'prazé hā wa te 're po'o za'ra, ĩsimiwada'uri zarina. E 'Re ĩhāimana u'āsi mono ma, wē di. E tāma wē ō di. – Āne ma tō āma siwi sadanha, Zezusi hā.

¹⁵ Tō sena te te siwi āma waihu'u za'ra da newa, ma tō siwi sadanha. Āne na hā senai ō na, ma tō sina waihu'u, Zezusi hā. Taha wa, te āne tāma nharī za'ra:

– E marī da, te āne na asiwi ĩzadanharī 'wa, ĩmreme na te aima āma upa za'ra wa'aba da newa, asiwi ĩwē'ō wa'aba da. Tane wamhā, ma'āpé rob'ui'prazé ĩsapotore hā we ĩma 'mai'āri aba, te 'madā'ā da.

¹⁶ Tawamhā ma tō ni'wa hā tāma tisō, Zezusi hā. Te āma dazadanharī za'ra, āne:

– E 'wai hāibarī, rob'ui'prazé ĩsapotore na hā. E 'wa sisi ui'ére duré, āma hā.

Tawamhā asa ma tō tāma waihu'u za'ra:

– Ā hā, Roma āma danhib'apito hāibarī, duré taha nhisi ui'ére.

¹⁷ Tawamhā Zezusi ma duré asa tāma waihu'u za'ra:

– Roma āma danhib'apito ma, te za ĩsimiwada'uri zarina, marī tāma 're ĩpo'o za'ra wa'aba mo apā, ĩte wa. Tane duré, 'Re ĩhāimana u'āsi mono ma, te za marī hā ĩsimiwada'uri zarina, tāma 're ĩsōmri za'ra wa'aba mo apā, ĩte wa marī hā. – Āne ma tō asa tāma waihu'u za'ra.

Tawamhā ma tō āma titob'uzu za'ra, te te tāma ĩwaihu'u za'ra zém na asa, Zezusi hā.

Zezusi hā, dahāiwa'utuzém na da te ĩsadanharīzé wasu'u Mateusi 22.23-33; Rucasi 20.27-40

18-19 Taha pari, ni'wam nori hã ma itême aihutu, Zezusihi u, sadusezu nori hã. Ta nori hã 're dadã'ã za'ra mono wamhã, ab're hawi apã 're İdahãiwa'utu za'ra mono õ na te te dama 're İroti za'ra mono. Ta nori hã te tãma rowasu'u za'ra, Zezusihi ma, ãne:

— Rowahutu'wa, wahi'rada Mozési hã ma tã ãne dama roti: “Aibã İmro ré hã 'ra õ ré, dã'ã wamhã, tizédé'aba mro na te za timro İno hã, ai'uté hã te te 'maipoto da, İwa İsedé'aba 'ra ne, 're mori da.” ãne wahi'rata nhimiroti na rob'ui'ére hã.

20 Wa za oto aima rowasu'u za'ra ni, dasisãnawã si 're İhãimana za'ra mono nori wasu'u na. Aibã hã sisãnawã si, te 're hãimana za'ra, 7 na İhãiba za'ra hã. Tawamhã İpoto'rada hã ma tã timro oto. Tawamhã 'ra õ ré, ma dãrã, aibã hã.

21 Tawamhã İsõsi hã ma tã ãma timro pi'õi ãma hã, İsõwa're're. Ta hã 'ra õ ré, ma duré dãrã. Taha nhosi, ãma mro wamhã, 'ra õ ré, ma duré dãrã.

22 Aibã nori hã ma tã nasi sisõwa're're ãma timro za'ra, pi'õi ãma, 7 na İhãiba za'ra hã aibã nori hã. Tane nheré, 'ra õ ré, ma tã sisarina ai'utõ. Tawamhã nimahã bãtã na ma tã duré pi'õ hã, timro nori zarina, dãrã.

23 Aibã nori hã 7 na İhãiba za'ra hã, misi pi'õ nheré, ma tã nasi sisõwa're're ãma timro za'ra. Tawamhã 're İdadã'ã za'ra mono nori hã, 're İhãimana u'ãsi mono, ab're hawi za apã oto te te 're da'ahãiwa'utu mono wamhã, e 'wai me te za oto 're simasisi zahuré. — ãne te ãma siwi sadanha, sadusezu nori hã.

24 Tawamhã Zezusi te asa tãma rowasu'u za'ra:

— A nori wa'wa hã ma tã rosa'rata na ãma İ'upa za'ra wa'wa, ab're hawi, za apã 're İdahãiwa'utu za'ra mono õ na hã. E marĩ wa. 'Re İhãimana u'ãsi mono zadawa wasu'u na rob'ui'ére hã 're sõré za'ra wa'aba mono nheré, aima waihu'u za'ra wa'aba õ wa, duré tiwaihu'u pese na, za ab're hawi apã te te 're İda'ahãiwa'utu mono zé hã, aima waihu'u za'ra wa'aba õ wa.

25 'Re İhãimana u'ãsi mono hã ab're hawi apã te te 're da'ahãiwa'utu mono wamhã, hãiwa ãma romhuri'wa nori ne, te za oto 're dahãimana u'ãsi za'ra, dasina 're damro za'ra mono ãna.

26 Marĩ, wa za duré aima waihu'u za'ra wa'wa, 're dadã'ã za'ra mono pari, apã 're İdanomro mono zé wasu'u na. Wede zapore İro'o na ma tã ãma rob'ui'ére, Mozési hã. E niha 're sõré za'ra wa'aba mono nheré, aima waihu'u za'ra wa'aba õ di. ãne ma tã Mozésihi ma siwasu'u, 're İhãimana u'ãsi mono hã: “Wa hã Abra'ãhã nhib'apito, wa 're İhãimana u'ãsi, duré İzatihĩ nhib'apito, duré Zacoho nhib'apito.” ãne ma tã Mozésihi ma siwasu'u, 're İhãimana u'ãsi mono hã, Abra'ã nori uiri na nheré.

27 Wahi'rata nori hã dawi 're dã'ã za'ra mono nheré, 're İhãimana u'ãsi mono wi, 're dã'ã za'ra mono õ di. Taha wa, ma tã İsib'apito za'ra na siwasu'u. Dã'ã u'ãsi 're hãimana za'ra mono 'wa'ãhã, İsib'apito na aré siwasu'u õ di. ãne wa, ma tã rosa'rata na ãma İ'upa za'ra wa'wa, ab're hawi apã 're İdahãiwa'utu za'ra mono õ na hã. — ãne ma tã Zezusi hã tãma waihu'u za'ra, sadusezu nori ma.

*'Re İhãimana u'ãsi mono nhimiroti hã danhipai u İpire uptabi wasu'u
Mateusi 22.34-40; Rucasi 10.25-37*

28 Tawamhã 'Re İhãimana u'ãsi mono nhimiroti 'rata na rob'ui'ére na dama rowahutu'wa hã ma tã ãma mreme wapa, da'rata İsa hã. Zezusi hã sadusezu nori ma, te te rowasu'u wê wa, te ãne sadanha:

— 'Re İhãimana u'ãsi mono nhimiroti hã e ma hã te tihãiba, uburé dama İpire uptabi hã.

29 Tawamhã Zezusi hã ma tã ãma sada'ã asa:

— 'Re İhãimana u'ãsi mono nhimiroti, danhipai u İpire uptabi hã ãne: “İzarazéhé nhihudu nori, ma'ãpé İwapari pese za'ra wa'aba za. 'Re İhãimana u'ãsi mono hã Wanhib'apito hã, misire danhib'apito uptabi, te 're hãimana.

30 Taha wa, Asib'apito 're hãimana aba mono wa, te za asiwi 're İsawi pese za'ra wa'aba mo, sena na. Taha zarina, te za İsimiroti na ãma 're İrosa'rata u'ãsi za'ra wa'aba mo. Taha zarina, te za duré asimi'ë na tãma 're İromhuri u'ãsi za'ra wa'aba mo.” ãne İsimiroti hã danhipai u İpire uptabi hã.

31 ãne duré İsimiroti hãiba amo hã aiwa İpire uptabi hã: “Uburé te za 're İdazawi pese za'ra wa'aba mo. Marĩ İwê zõ asima 're asõpré wa'aba mono ne, te za duré uburé dama zama sõ 're asõpré wa'aba mo, İwê zõ.” ã nori si İsimiroti hã, İpire uptabi zahuré hã. İsipai u hã roti hã 'mai'ãmana õ di, İpire uptabi hã.

32 Tawamhã rowahutu'wa hã te asa tãma tinha:

— Tane tã rowahutu'wa. Tã sena uptabi, asimirowasu'u hã. Misire danhib'apito uptabi te 're hãimana, 're İhãimana u'ãsi mono hã. Ni'wa hã 're hãimana mono õ di, İsipai u hã.

³³ Taha wa, wa za tō wa te 're sawi pese za'ra, 'Re ihâimana u'âsi mono hã. Taha zarina, wa za isimiroti na wa te âma 're rosa'rata u'âsi za'ra. Wa za duré wanhimi'ê na wa te tâma 're romhuri u'âsi za'ra. Wa za duré wa te 're dazawi pese za'ra. Marî iwê zô wasima 're iwanhopré mono ne, wa za uburé dama zama sô 're wanhopré, iwê zô. Wa norî hã wa za wanhimizama hã duré wanhimarî hã wa te tâma 're sômri za'ra, 'Re ihâimana u'âsi mono ma, da te tâma 're zata za'ra mono da, izatazém na. Âne wamhã, tâma wê di, 'Re ihâimana u'âsi mono ma. Tane nherê, maparane isimiroti hã ipire uptabi hã wa te 're 'madâ'â pese za'ra mono wamhã, tâma wê uptabi di za. — Âne ma tō Zezusihi ma waihu'u na wa'rã, rowahutu'wa hã.

³⁴ Tawamhã rowahutu'wa hã te te tâma âma uwaimrami wê wa, ma duré Zezusi hã tâma waihu'u:

— Tane tō. A hã, 'Re ihâimana u'âsi mono, da'âma 're isib'a'uwê mono zém nhiti, romhã na aihâimana ô di, ahãna hã. — Âne ma tō tâma waihu'u, rowahutu'wai ma.

Taha parimhã, ni'wa hã te te sadanharî na sahu ô di oto, Zezusi hã tinhimiroti na te te âma upai ô wa.

*Danho'reptui'wa na, Zezusi te te ãda'azadanharizém na rowasu'u
Mateusi 22.41-46; Rucasi 20.41-44*

³⁵ Tawamhã bâtã na te Zezusi hã dama rowahutu, 'Re ihâimana u'âsi mono âma 're ãdawata za'ra mono zé 'wawi, wa'ra 're. Tawamhã te te dama rowahutu ré, te da'mahã:

— E niha rowahutu'wa norî hã te te dama 're rowasu'u za'ra, Dawihi nhihudu 're ãmorî na hã, 'Re ihâimana u'âsi mono te te ipisutu na hã Danho'reptui'wa da.

³⁶ Duréihã apito Dawi hã ma tō danho'reptui'wa na âma rob'ui'éré, 'Re ihâimana u'âsi mono hã Tipé'êzani na te te tâma iwaihu'uzéb zarina. Âne âma ãrob'ui'éré hã:

“‘Re ihâimana u'âsi mono hã ma tō ãnhib'apito ma tinha, âne: ‘Ïrata te za 're asãmra mo, ãnhimire niwî dama aipire na ãsiré 're aihâimana u'âsi mono da. Asitob'ru norî nhiptetezê hã wa za te tiwi 're a'uprosi, wapu na aima 're hâimana za'ra mono da oto, duré aima sib'uwa na 're hâimana za'ra mono da oto.’ ”

— Âne te tâma tinha. Âne duréihã, ma tō âma rob'ui'éré, apito Dawi hã.

³⁷ Danho'reptui'wa da hã tinhib'apito na ma tō sisi, Dawi hã. Isib'apito 're morî nherê, e niha te za isa'u si poto nherê, Danho'reptui'wa da hã isihudu na 're hâimana. — Âne ma tō da'ahã na da'mahã, Zezusi hã. Tawamhã Zezusihi nhimiroti hã wê wa, ma da'ahã na wapari ze za'ra ni.

*Dama rowahutu'wa norî hâimanazém na rowasu'u
Mateusi 23.1-36; Rucasi 20.45-47*

³⁸⁻³⁹ Tawamhã Zezusi hã ma duré dama waihu'u, âne:

— Ma'âpé rowahutu'wa norî hâimanazé hã waihu'u za'ra wa'aba. Ta norî hã uza pa ré, 're ãnomro mono da si, tâma iwê za'ra hã. Duré dama pire na 're hâimana za'ra mono wa, 'ri nhî'riti wa, da te dasina 're ã'ubumroi mono zéb âma, da te 're iwazéb za'ra mono da si, ma tō te te sima 're wê za'ra. Duré dama ipire norî simasisizém na 're si'ubumroi mono da si, tâma iwê za'ra hã, rowahutuzéb âma duré 'ri para dasiré 're ãdasaihuri mono zéb âma hã.

⁴⁰ Dama rowahutu'wa zahã, te sadawa nhipese na pi'oi mrotô norî wi, isimarî na 're sipsaihuri za'ra. Tane nherê, te ta norî hã danho'a 'Re ihâimana u'âsi mono ma 're mreime zusi hã, 're hâimana wê uptabi za'ra mono newa. Taha wa, te te dama 're ãrob'manharî za'ra mono zém nhipai u, te za 'Re ihâimana u'âsi mono hã te te tâma 're rob'manharî za'êtê za'ra. — Âne ma tō dama rowasu'u, rowahutu'wa norî hâimanazém na.

*Pi'oi mrotô nhoprubzé wasu'u
Rucasi 21.1-4*

⁴¹ Tawamhã 'Re ihâimana u'âsi mono ma, rob'ui'prazé da te 're iséme mono zéb 'rata, te nhamra Zezusi hã, 'ri 'wawi wa'ra 're. Rob'ui'prazé, da te nasi séme za'ra ré, te da'ab'madã. Isibro pese norî hã, ahã na te nasi séme za'ra, rob'ui'prazé hã sa'êtê na.

⁴² Taha ré, ma tō wi pi'oi mrotô hã, isibro'ô hã. Tawamhã rob'ui'prazé isapotore hã ma tō tiza, syryre nherê.

⁴³⁻⁴⁴ Tawamhã tisiré 're ãnomro mono norî zô, te sima sô tihãrã za'ra, Zezusi hã. Âne te tâma rowasu'u za'ra:

— Tō sena ã pi'oi mrotô hã sibrob'ô nherê, ma tō tinhoprubzém na uburé da'a'rãnhipa. Isiré iséme'wa norî hã rob'ui'prazé, nasi tâma isi'ataréme za'ra si, te nasi sé. Tanei ô di, pi'oi mrotô hã. Simarî ô nherê, tihâimanazéb da, te te aré itédé hã ma tō ãbãre tâma tisô, wahuré. Âne wamhã, ma tō tinhoprubzém na uburé da'a'rãnhipa. — Âne ma tō Zezusi hã tâma waihu'u za'ra, tisiré 're ãnomro mono norî ma hã.

13

'Re ihâimana u'âsi mono âma 're idawata za'ra mono zé, za 'isi'utôrizé wasu'u

Mateusi 24.1-2; Rucasi 21.5-6

¹ Tawamhâ Zezusi norî hâ 'Re ihâimana u'âsi mono âma 're idawata za'ra mono zé 'wawi wa'ra hawi, oto wairébé wi, misi te 'isiré hâ 'mai'mahâ:

— Rowahutu'wa, 'ri hâ 'madâ'â za'ra na. Êne hâ e itômo wasétére. E 'ri wasétére duré. — Âne te tâma âma tiwata, 'ri wê na.

² Tawamhâ Zezusi te asa tâma tinha, âne:

— Â hâ 'ri 'madâ'â za'ra wa'wa hâ, nimahâ na si te za dasiwi pru pese ni, êtê na 'ri hâ. Tawamhâ misi si te za oto simi'wara, Êne hâ. Sisisiwi 'manomro waihu'u ô di za oto, Êne hâ. Tâibâ za oto. — Âne ma tô 'ri na tâma âma rowasu'u sirômo za'ra Zezusi hâ, te te waihu'u za'ra da.

Robzépata na rowasu'u, duré da'ruiwapari na rowasu'u

Mateusi 24.3-14; Rucasi 21.7-19

³ Tawamhâ Zezusi hâ te oto nhamra, Oriwera na êtê 'râihâ nhisi âma, tisiré 're inomro mono norî me. Sisô're u, te 'ri 'madâ, 'Re ihâimana u'âsi mono nhorôwa hâ. Te te 'madâ'â ré, te siwi sadanha, hâiba pisutu Pedru norî hâ, Ti'adu, Zuwâ, Âdéré norî me:

⁴ — E niwa te za âne hâ âma tiromhâiba, 'ri nhamrazéb da hâ. E marî te za watobro, da te 'iwaihu'uzéb da hâ. Ma'âpé, wama waihu'u za'ra na, 'isôwa wa te âma 'iwaihu'u sirômo za'ra zéb da hâ.

⁵⁻⁶ Tawamhâ Zezusi ma tô asa tâma waihu'u za'ra, âne:

— Ni'wam norî hâ te za sadawa nhipese na sisarina datême 're nomro, ahâ na. Wa hâ newa, te za taré 'nhisi na we 're siwasu'u za'ra, danho'reptui'wa na. Tawamhâ da'ahâ na te za ta norî âma da te 're sasômri za'ra, tô sena newa, dama 're 'siwasu'u za'ra mono zé hâ. Taha wa, te za a norî wa'wa hâ asimiza'rese tiwi 're aihâimana za'ra wa'aba mo, sadawa nhipese sina datême 're inomro mono norî âma, 're sasômri za'ra wa'aba mono tô da.

⁷ 'Re dasi'wapé za'ra mono wa, da te dasina 're 'ropupu'u za'ra mono zé hâ, duré romhâ na 're 'dasi'wapé za'ra mono norî wasu'u zama, 're wapari za'ra wa'aba mono wamhâ, tâma 're 'aipahi za'ra wa'aba mono ô di za 'a. Dasi'wapé te za tô dazada 're wairébé. Tane nheré, da'âma rob'râsutu uptabi ô di za 'a.

⁸ Danhipti'ai amoi u te za dasisô 're dapra, 're dasi'wapé za'ra mono da. Tawamhâ daro mono bâ te za tô 're dasiwasutu za'ra. Nima niwîmhâ, te za duré ti'a hâ daré 're popo'o za'ra. Duré danho ô wa, te za da te 're robzépata za'ra, dasa syryre wa. Âne hâ rowasédé, dazô 're wairébé mono wamhâ, za daré 'rob'râsutu na'rata zé, te wasu'u, pi'oi âma 'iwasâ hâ 're 'isépu'u na'rata za'ra mono ne. Âhâ haré dazô 're wairébé mono ô di za.

⁹ — Ma'âpé, aihâimana nhimiza'rese, 're aihâimana za'ra wa'aba mono za. Niwapsi te za a norî wa'wa hâ da te 're aipawasisi za'ra wa'wa, roti'wa norî u, da te 're asimroi wa'aba mono da. Tawamhâ ta norî zadawa para, te za rowahutuzéb âma da te 're aihâ za'ra wa'wa, romhâ nhorô 'manharî na. 'Izazei'wa 're anomro aba mono wa, te za da te 're asimroi wa'wa, dama 'pire norî u, duré danhib'apito norî u zama. Âne wamhâ, te za tâma 're 'rowasu'u za'ra wa'aba mo, 'izazei'wa 're anomro aba mono na.

¹⁰ Rob'râsutu ô ré, te za 'iwasu'u wê na te te 're dapore pu'u za'ra, daro mono bâ, 'izazei'wa norî hâ.

¹¹ Tawamhâ dama 'pire norî u da te 're asimroi wa'aba mono wamhâ, asimirosa'rata na asisôwa asina 're aihâtâ'â za'ra wa'aba mono ô di za, niha tâma 're 'asiwasu'u za'ra wa'aba mono zéb da hâ. Misi bâtâ na, aihâimanazém na da te 're 'aiwaihu'u za'ra wa'aba mono zém na, 'Re ihâimana u'âsi mono hâ te za te aima 're waihu'u za'ra wa'wa, dama âma 're 'asiwaihu'u za'ra wa'aba mono zéb da hâ. Asimirosa'rata na, 'asi'uihâ na dama 're 'asiwasu'u za'ra wa'aba mono da hâ, mare di. 'Re ihâimana u'âsi mono pë'êzani hâ te za te te 're aipawaptob za'ra wa'wa, dama 're 'asiwasu'u za'ra wa'aba mono zéb da hâ.

¹² Niwamhâ te za dasisânawâi uptabi nheré, da te dasima 're dahâiba nhomri za'ra, da te 're simroi mono da. Damama norî hâ te za ti'ra ma, âne te te tâma 're 'manharî wasété za'ra, 'râwim nheré. Duré da'ra norî hâ timama uptabi da nheré, te za sada 're hâimana za'ra, te te dama 're hâiba nhomri za'ra mono da, da te 're simroi mono da, ina me.

¹³ 'Izazei'wa oto 're anomro aba mono wa, te za uburé da te 're ai'ruiwapari za'ra wa'wa. Tane nheré, Ône haré 'i'âma 're anomro u'âsi aba mono wamhâ, te za asô'reptuzé hâ asina 're 'i'uwaimrami za'ra wa'aba mo. — Âne ma tô Zezusi hâ tisiré 're inomro mono norî ma, waihu'u za'ra, te te sina waihu'u sirômo za'ra da.

Robzépata za'êtê wasu'u

Mateusi 24.15-28; Rucasi 21.20-24

¹⁴ Tawamhã ma duré tãma waihu'u za'ra:

— Nimahã na te za asiwi i'madã'ã za'ra wa'wa, 'Re ihãimana u'ãsi mono te te siwi iwẽ'õ pe hã, te te dawi irosawizéb ãma ãsa hã. (Ãhã wasu'u na rob'ui'ére hã 're sóre za'ra wa'aba mono wamhã, ma'ãpé ãma 're rosa'rata pese za'ra wa'aba mono za, waihu'u za'ra wa'aba da.) Tawamhã ãne hã za oto daré romhãimana wamhã, rowasété si te za a'ã daré 're sa'wari. Taha wa, Zudeza na danhipti'a nho'õmo nhisi ãma 're isi'ubumroi mono norĩ hã, wara sina te za sisa're, êtê 'rãihã u ta norĩ hã tiwi simani za'ra da, duré sisõ'reptu za'ra da.

¹⁵ Ni'wam norĩ hã 'ri nhisi hãpã ãma si'ubumroi wamhã, tinhibrobro zõ sisisi õ di za a'ã, 'ri para u. Õne haré te za dame sisa're, êtê 'rãihã u, ta norĩ hã.

¹⁶ Duré ni'wam norĩ hã buru ãma te te romhuri za'ra wamhã, 'ri tẽme sisa'rei mono õ di za apã, tisi'ubuzéb zõ. Mare di. Õne haré te za duré ta norĩ hã êtê 'rãihã u dame sisa're.

¹⁷ ãne hã rowasédé hã daré hãimana wamhã, iwasã ré norĩ ma hã tãma ropipa uptabi za'ra di za, i'ra pré ré norĩ ma zama.

¹⁸ Taha wa, rowa'u'u wahã 'rowi, marĩ hã dazõ watobro tõ da, te za 'Re ihãimana u'ãsi mono wi, 're irowaptêrê za'ra wa'aba mo.

¹⁹ E marĩ wa. Rowasédé hã oto dazõ 're wairébé mono wamhã, te za oto robzépata za'êtê za'ra ni. 'Re ihãimana u'ãsi mono te te i'ropoto na'rata mono zém hawimhã, ãne na da te irobzépata za'êtê uptabi za'ra õ. Niwamhã ãne na hã da te 're robzépata zahu za'ra mono õ di za.

²⁰ 'Re ihãimana u'ãsi mono hã ma tõ sima pisutu, bãdã hã za da te 're irobzépata za'ra mono zéb da hã, te te dama wãtari da, rowasété ré da'ãma romhãimana pahã tõ da. ãne hã te te sima pisutu õ 'wa'ãhã, te aré uburé dasi'utõrĩ pese, za da'ãma irob'rãsutuzém na hã. 'Re ihãimana u'ãsi mono hã ãma 're sib'a'uwê za'ra mono da, te te sima 're i'apisutu mono norĩ zawi te, te za ãne hã 'manha.

²¹ — Marĩ hã wa za duré aima waihu'u za'ra wa'wa. Ãtê ni'wam norĩ hã te za taré te te aima 're rowasu'u za'ra wa'wa, ãne: "Ãhãta danho'reptui'wa da, 'Re ihãimana u'ãsi mono te te i'pisudu hã te nhamra. Õhõta te nhamra." ãne wamhã, ãma 're dazaze za'ra wa'aba mono õ di za, damreme na hã.

²² E marĩ wa, wa ãne aima waihu'u za'ra wa'wa. Ni'wam norĩ hã te za datẽme 're nomro, danho'reptui'wa na, niha wamhã, 'Re ihãimana u'ãsi mono zadawa wasu'u'wa na dama 're siwasu'u za'ra mono da, sadawa nhipese na. Ta norĩ hã marĩ dama i'manharĩ waihu'u'õ hã te za te te dama 're 'manharĩ za'ra, 'Re ihãimana u'ãsi mono zadawa para newa, da te ãma 're sasõmri za'ra mono da. ãsazei'wa norĩ zama te te dame ãma 're saze za'ra mono da, te za ãne na te te dama 're romhõsi za'ra. Tane nherê, te te dame 're sazei waihu'u za'ra mono õ di za ta norĩ hã, 'Re ihãimana u'ãsi mono te te sima 're apisutu sirõmo mono wa, ãma 're sib'a'uwê za'ra mono da.

²³ ãne hã wa aima waihu'u sirõmo za'ra wa'wa, romhã ré, pibui pese sina, ãma sõ 're rob'madã'ã za'ra wa'aba mono da. — ãne ma tõ tãma waihu'u sirõmo za'ra, Zezusi hã.

Ti'ai ãma dasiré ipodo hã, za we apã imorizé wasu'u

Mateusi 24.29-31; Rucasi 21.25-28

²⁴ Tawamhã Zezusi ma duré tãma waihu'u za'ra, tisiré 're inomro mono norĩ ma:

— Da te robzépata za'ra pari wamhã, bãdã hã te za titobra. A'amo zama te te rob'uiwê õ di za oto.

²⁵ Wasi hã te za duré hãiwa hawi rere. Uburé hãiwa na 're i'isimasa mono hã te za duré 're sisa're.

²⁶ Tawamhã ti'ai ãma dasiré ipodo hã, hãiwa'a na wa za wei mo apã, danho'a. I'waihu'u pese uptabi na, wa za wei mo apã, duré ihãiba na rowa'a za'êtê uptabi na.

²⁷ Tawamhã hãiwa ãma ãma romhuri'wa norĩ hã wa za we dazõ satõrĩ za'ra, Ropoto'wa te te sima 're i'apisutu mono norĩ zõ, te te itẽme da'ubumro za'ra mono da, daro mono bã. — ãne ma tõ romhã ré tãma waihu'u sirõmo za'ra.

Pidera wede wasu'u

Mateusi 24.32-35; Rucasi 21.29-33

²⁸ Tawamhã Zezusi hã ma duré ãne tãma waihu'u za'ra:

— Pidera wede na wa za oto aima ãma romnhimire'é za'ra wa'wa, waihu'u za'ra wa'aba da. Pidera wede panhipti hã wapti'i wamhã, duré i'isu te hã 're wairébé mono wamhã, tawapsi te za oto ãma i'waihu'u za'ra wa'wa, tã 're ita'a mono zéb u 're iromhutu mono zém na hã.

²⁹ Tane duré, marĩ hã 're iromhãimana mono zéb da, te aima iwasu'u za'ra wa'aba zéb zarina, 'madã'ã za'ra wa'aba wamhã, te za ãma irowaihu'u za'ra wa'wa, rob'rãsudu hã za oto iwatobro na hã.

³⁰ Tô sena wa ãne hã aima waihu'u sirõmo za'ra wa'wa. Æ hã uburé rowasédé hã dazô 're wairéré mono ré, ti'ai ãma 're idasi'ubumroi mono nori hã ta nori hã 're dá'á za'ra mono ô ré, te za isô'a za'ra ti'rãsutu, rowasédé hã.

³¹ Nimahã na te za hãiwa nori hã ai'utõri zahuré, ti'ai me. Si'utõri zahuré nherë, ãnhimiroti hã si'utõri waihu'u ô di za. Pire na te za dama 're hãimana u'ãsi. — Æne ma tô tãma waihu'u za'ra, te te waihu'u sirõmo za'ra da.

*Zezi hã, za we apã timorizém na te te ãromhimiré'ézé wasu'u
Mateusi 24.36-44*

³² Tawamhã ãne ma duré tinhimiroti 'rãsudu hã tãma waihu'u sirõmo za'ra, Zezusi hã:

— Æne hã uburé za daré 're ãromhãimana mono zéb da hã, ni'wa hã bádã hã te te waihu'u ô di. Hãiwa ãma romhuri'wa nori zama, te te waihu'u za'ra ô di duré. Wa hã 'Re ãhãimana u'ãsi mono 'ra nherë, te duré bádã hã waihu'u ô di. Ìmama ma si, waihu'u pese di, bádã hã.

³³ A nori wa'aba zama, bádã hã waihu'u za'ra wa'aba ô wa, ma'ãpé asimiza'rese, 're aihãimana za'ra wa'aba mono za.

³⁴ Romnhimiré'éna, wa za marĩ hã aima waihu'u za'ra wa'wa. Æté aibã hã te za tinhorõwa hawi watobro, romhã na 're mori da. Tawamhã sisô'a ré, tãma ãromhuri'wa nori ma, te za romhuri hã te te tãma pisutu. Duré 'ridawa 'madã'ãwai ma zama te za roti, te te sô 're rob'madã'ã pese mono da.

³⁵⁻³⁶ 'Ri tede'wa hã apã za ãwisizé hã, bádã te te waihu'u za'ra ô di, tãma ãromhuri'wa nori hã. Apã tinhorõwa u'ãwisizé hã, Æté hãiwahã, Æté mara wa'wa, Æté si'a hãrã wi, Æté awë wi. Tane bádã hã apã we ãmorizé hã waihu'u za'ra wa'aba ô wa, te za asimiza'rese ãzô 're asimipari za'ra wa'aba mo, a nori wa'aba zama, 're asôto za'ra wa'aba mono newa, asimiza'rese ãna 're aihãimana za'ra wa'aba mono ré, apã we ãmorĩ ô'umnhasite.

³⁷ Æne hã aima si, te waihu'u za'ra wa'aba ô di. Uburé ãzazei'wa nori udãna zama, wa aima waihu'u sirõmo za'ra wa'wa, asimiza'rese, ãzô 're asimipari za'ra wa'aba mono da. — Æne Zezusi hã 'ri tede'wai wasu'u na te te sina ãsimiré'ézé wasu'u 'rãsudu hã.

14

*Da te dasima ãma ãrowa'õtô za'ra zé wasu'u, Zezusihi wirizéb da na
Mateusi 26.1-5; Rucasi 22.1-2; Zuwã 11.45-57*

¹ Maparane te oto sô rowaptã båtã zô hã, dato hã da te 're ãmanharĩ za'ra mono zéb u hã, 'Re ãhãimana u'ãsi mono, Ezitu hawi te te ãdawaibuzém na ãma dasipo're pu'u za'ra da, Pascowa na dato nhisi hã. Tawapsi dasi'rã'õtô ré, te za romhuri na ã'u'ëté duptoio'õ hã huri ni. Tawamhã bádã ãwa waptã'ã ô ré, te sasedoti ãpire nori hã rowahutu'wa nori me, sima ãma rosa'rata za'ra, Zezusi hã pi'uriwi te te siwi ãri da, da te dasiwi wiri da.

² Æne te sima ãma roti za'ra:

— Dato hã hãimana ré, wa te wasiwi ãri ô di za, wama dazahi za'ra ô'umnhasite, uburé hã wazada hãimana za'ra tô da. — Æne ma tô sima ãma roti za'ra.

*Betãnha ãma, Zezusihi ma, pi'õ nhoprubzé wasu'u
Mateusi 26.6-13; Zuwã 12.1-8*

³ Tawamhã Zezusi hã Betãnha na 'ri wa'õtô nhisi ãma, te a'ã tihãiba, Simahã nhorõwa ãma, ã'wa're ré hã, aré ta hã. Tame sai ma, sãmra ré, ma tô we pi'õ hã ãzé, 'ri para u. Wedewa'u zadaze hã ãté 'manharĩ remhã, ma siré ãwisi. Wedewa'u zadaze hã, nadu na ãsisi hã, ãwa'ãbã za'ëne hã. Tawamhã ãsé hã ma tô sô pru. Taha pari, ma Zezusihi 'rã nhisiwi sa'wa.

⁴ Ni'wam nori hã tame ãhãimana za'ra hã ma tô ãma wë'õ za'ra. Taha wa, ma tô sima rowasu'u za'ra:

— E niha, ma taré ãma si'uba, wedewa'u zadaze na hã.

⁵ Te te dama wede 'wa'ãhã, ãwa'ã hã ãsa'ëté uptabi hã 300 na te aré tihãiba, rob'uiprazé ãspotore hã, ãsibrob'õ nori ma, te te sãmri mono da. — Æne ma sima ãma rowaihu'u za'ra, ãtede'wai upana nherë. Pi'õ ãma, ma tô duré wasété za'ra.

⁶ Tawamhã Zezusi hã te tãma nharĩ za'ra:

— Tô'ã. Pi'õ hã rowë na hãimana. E marĩ da, ma tô sada asahi za'ra wa'wa. Pi'õ hã ãwë uptabi hã ma tô ãma 'manha.

⁷ ãsibrob'õ nori hã te ai'rata 're si'ubumroi u'ãsi 'wa. Nimahã båtã na, asima 're ãwë za'ra wa'aba mono zéb uwaibaba si, te za 're ãpawaptob za'ra wa'aba mo, ãsimarĩ'õ nori hã. Tanei ô di, wa hã. Ai'rata 're ãnhamra u'ãsi aba mono ô di za oto.

⁸ Pi'õ hã ma tô ã'uwaibaba tô ãma 'manha, ãwë hã. Æ hã ãdã'ã wana ré, ma tô ãma ãhãiba zadaze, da te ãré ãnherézéb u.

⁹ Tô sena, wa ãne aima waihu'u za'ra wa'wa. Daro mono bã te za ãwasu'uwë na da te 're dapo're pu'u za'ra. Tawamhã pi'õ hã te te ãma ãmanharĩ wë zém na zama, te za da te dasima

're wasu'u u'âsi za'ra, âma 're dasipo're pu'u za'ra mono da. — ãne ma tô Zezusi hã tâma waihu'u za'ra, âma iwê'ô'wa nori ma.

Zudasi hã, Zezusi za te te dama ihâiba nhomrizé wasu'u

Mateusi 26.14-16; Rucasi 22.3-6

¹⁰ Tawamhã Zudasi Icarizoti hã te mo, sasedoti ipire nori u. Aibã 12 na Zezusihi siré 're inomro mono nori siré 're imori, Zudasi hã. Zezusihi âma te te tâma âma roti za'ra da, te itême timori za'ra, te te tâma âma rowairébé za'ra da, Zezusi za te te tâma ihâiba nhomri za'ra zém na hã.

¹¹ Tawamhã Zudasihi mreme te te wapari za'ra wamhã, tâma rowé uptabi za'ra di. Taha wa, ma tô rob'uprazém na tâma ropisutu za'ra, te te tâma wa'âbã za'ra da. Tawamhã Zudasi hã te oto sima rosa'rata, nimahã bâtã na te te dama ihâiba nhomri da hã.

Zezusi nori hã, dasai 'manharizém na, siré isaihurizém na rowasu'u

Mateusi 26.17-30; Rucasi 22.7-23; Zuwã 13.21-30; 1 Coritu nori 11.23-25

¹² Tawamhã bâdã ma tô oto iwa waptãrã, i'u'etê dupto'ô, da te ihurizéb da hã. ã bâtã na, imori'rata na zudezu nori hã te za pone'erebã 'ra hã te te sima 're simro, tisa te te âma ihurizéb da hã, Pascowa na dato nhisi na hã. Tawamhã Zezusihi siré 're inomro mono nori hã, te âne siwi sadanha:

— E momo ma tô asima iwê, asô iwa'manhipizéb da hã, Pascowa na dato nhisi na iwasaihurizéb da hã. — ãne te siwi sadanha.

¹³ Tawamhã Zezusi hã ma tô tisiré 're inomro mono nori hã 'mazatôri zahuré. ãne ma tô tâma rob'ru zahuré:

— 'Ri ahã u, ane wa'aba. Tame te za aibã hã isôpêtê 'wa, piza'a te te i'âri hã, â ré. Tawamhã isarina te za ane wa'wa, 'ri tême.

¹⁴ Aibã hã nimomo sébré wamhã, te za 'ri tede'wa hã isadhanari 'wa: "Rowahutu'wa hã te tinha: E ma niwí 'ri 're wa'wa hã, isiré 're inomro mono nori me, iwa iwasaihurizéb da hã, Pascowa na dato nhisi na hã."

¹⁵ Tawamhã 'ri tede'wa hã, hãimo 'ri 're wa'wa za'êne hã te za aima 'mazabui wa'wa. Tame te uburé iwa romhaimasa wedeza hã, danhamrazé hã. Tame te za wazô irobza'ra pese 'wa. — ãne ma tâma waihu'u zahuré.

¹⁶ Tawamhã te oto tineb zahuré, 'ri ahã u. Tamomo simasisi wamhã, Zezusi te te tâma iwaihu'u zahuré zéb uwaibaba, ma tô sabu zahuré. Tawamhã tinhipi ma tô 'manhari zahuré, Pascowa na dato nhisi na da hã.

¹⁷ Tawamhã ma'rã wi, ma tô aihutu Zezusi nori hã 'ri tême, aibã 12 na ihâiba za'ra nori me.

¹⁸ Tawamhã sai ma, si'ubumroi ré, ma tô Zezusi hã tâma waihu'u sirômo za'ra, âne:
— Tô sena, wa aima waihu'u sirômo za'ra wa'wa. A nori wa'wa hã isiré asaihuri aba nherê, misire te za dama i'maihâiba nhomri 'wa.

¹⁹ Tawamhã âne te te sina wapari za'ra wamhã, ma tô tiwi tirobzei'ô za'ra. Taha wa, ma tô siparabâsi si'mahârã za'ra:

— E wa hã.

²⁰ Tawamhã Zezusi asa ma tâma waihu'u za'ra:

— Misire te za tô dama i'maihâiba nhomri 'wa. I'u'êne hã isiré piza'a 're te te idi hã, te za dama ihâiba nho.

²¹ Wa hã ti'âi âma dasiré ipodo hã duréihã ma tô idã'âzém na rob'ui'ére sirômo za'ra ibaihá na, 'Re ihâimana u'âsi mono zadawa wasu'u wa nori hã. I'âma rob'ui'érezéb zarina wa za tô mo, idã'âzéb u. Tane nherê, aibã ma, tâma 're ropipa uptabi mono di za, za te te dama ihâiba nhomri wai ma hã. 'Re ihâimana u'âsi mono, za te te azãri wamhã, te za sima rosa'rata, âne: "Ipoto ô 'wa'âhã, aré wê di, âne na hã te aré 're robzépata mono ô wa." ãne te za 'rãwi si'âma rosa'rata, za dama ihâiba nhomri wa hã. — ãne ma tô tâma waihu'u za'ra, te te waihu'u sirômo za'ra da.

²² Tawamhã saihuri ré, ma tô ti'â, i'u'êne hã. 'Re ihâimana u'âsi mono âma te tiwata, sôpru wa. Taha pari, ma tô te te wê'ê, i'u'êne hã. Te te wê'êi mono parimhã, tisiré 're inomro mono nori ma, ma tô te te sômri. ãne ma tâma sina waihu'u za'ra:

— ã, i'u'êne hã huri aba. ã hã ihâiba, te wasu'u.

²³ Taha pari, ma duré ti'â hãisizé hã, uwa 'ru 'rãi wa'ui ré hã. 'Re ihâimana u'âsi mono âma te duré tiwata, sôpru wa. Taha pari, ma tô tâma sômri za'ra, uwa 'ru 'rãi wa'ui ré hã. Tawamhã aihîni ma âhu.

²⁴ ãne ma duré tâma sina waihu'u za'ra, Zezusi hã:

— Ā hā ĩwapru, te wasu'u. Rob'rāi wa'u za'wari ne, te za ĩwapru hā ĩwi asa'wa, da'ahā zada ĩdā'ā wamhā. Ā hā ĩwapru hā ĩwi sisa'wari wamhā, 'Re ĩhāimana u'āsi mono hā tinhib'a'uwē ma, te te tāma ĩropisutuzé hā tō sena za te te tāma āma 're ĩ'uwaimrami mono zé, te wasu'u.

²⁵ Tō sena wa za aima ĩsiwasu'u za'ra wa'wa. Ā hā rob'rāi wa'u hā te 're hāsi mono ō di za oto, a'ā. 'Re ĩhāimana u'āsi mono hā za uburé da'āma ĩsib'a'uwé zéb āma si, wa za duré te 're hāsi. — Āne ma tō tāma siwasu'u za'ra.

²⁶ Tawamhā Zezusi norī hā tinho're na te oto āma tiwata za'ra, 'Re ĩhāimana u'āsi mono āma. Taha pari, ma tō wairé, Oriwera na ētē 'rāihā nhisi u si'aba'rē da.

Pedru hā za te te dawī ĩ'udāzém na, Zezusi te te tāma ĩwaihu'u sirōmo zé wasu'u Mateusi 26.31-35; Rucasi 22.31-34; Zuwā 13.36-38

²⁷ Tawamhā āne ma Zezusi hā tisiré 're ĩnomro mono norī ma, waihu'u za'ra:

— A norī wa'wa hā ĩzadawa para ō nherē, te za aihīni asiwi ĩrēme 'wa. Duréihā 'Re ĩhāimana u'āsi mono zadawa wasu'u'wa hā ma tō āne na ĩ'āma rob'ui'éré siro, 'Re ĩhāimana u'āsi mono mreme na hā: “Pone'ērebā 'madā'ā'wa hā wa za tīwī. Tawamhā pone'ērebā hā te za ropé.” Āne ĩāma rowasu'u na rob'ui'éré, ĩbahī na hā.

²⁸ Tane nherē, ab're hawi apā ĩhāiwa'utu parip si, wa za aiwana ĩmorī 'wa, Darireza na danhipti'a nho'ōmo nhisi u, tamomo ĩnhopētē za'ra wa'aba da.

²⁹ Tawamhā Pedru hā te Zezusi ma tīnha:

— Aihīni za te te airēme za'ra nherē, wa hā te airēme ō di za.

³⁰ Tawamhā Pedruhu ma, te Zezusi hā asa tīnha, āne:

— Tō sena wa za aima waihu'u. Ā barana, si'a hā tihārā na te te sahu ō ré, te za si'ubdatō dawī ĩ'udā, aima ĩza'rese ō na. — Āne ma tō tāma waihu'u siro.

³¹ Tawamhā mreme tete sina, te asa tāma tīnha, Pedru hā:

— Wa hā asiré ĩdā'ā da nherē, te dawī ai'udā ō di za. — Āne te Zezusi ma siwasu'u.

Tawamhā uburé ĩsiré 're ĩnomro mono norī hā ma tō ōhō na si tāma siwasu'u za'ra, za te te dawī ĩ'udā za'ra ō na hā.

Zezusi hā, Zésemāni āma ĩsāmrazém na rowasu'u Mateusi 26.36-46; Rucasi 22.39-46

³² Tawamhā Zezusi norī hā ma tō aihutu, Zésemāni na rob're nhisi u. Sihutu wamhā, āne te tāma nharī za'ra:

— Āne ĩzō asimroi wa'aba. Wa hā wa za a'ā asiti ĩmorī 'wa, romnhiwasi ĩmama ma, ĩmreme da.

³³ Tawamhā Pedru norī hā te siré saprōni za'ra, Ti'adu norī hā, Zuwāhā me. Tawamhā te te sina rosa'rata pese wamhā, sina pē'ēzé uptabi di.

³⁴ Taha wa, Pedru norī ma, ma āne sina tāma rowaihu'u za'ra:

— ĩpē'ēzé hā sa'ētē na te ĩma tihāiba. ĩpē'ēzé uptabi wa, wa aré dārā. Āne a'ā asimroi wa'aba ĩ'rata, asōtō za'ra wa'aba āna. Asōpré u'āsi aba. — Āne ma tō tāma waihu'u za'ra.

³⁵ Tawamhā romhā prā na te ĩsiti timorī za'ra. Tawamhā hi'rātitō ma tō nhamra. Sāmra wamhā, ma tō aiwē'ē, ti'ai u. Tawamhā Timama wi, te rowaptē, robzépada hā te te tāma ba'a da.

³⁶ Āne ma tō Timama wi rowaptē:

— ĩmama, uburé marī hā aima waihu'u pese di. Taha wa, ma'āpé robzépada hā ĩma ba'a za, te robzépata za'ētē tō da. Tane nherē, āne aima ĩsiwasu'uzéb uwaibaba, te ĩsina uwaimrami da, wa hā te ĩsima ĩwézém na ĩma pisutu ō di za. A hā ĩma ĩwézéb uwaibaba si, te ĩsina uwaimrami da, te za ĩma ĩpisu. — Āne ma tō Timama wi sina rowaptē.

³⁷ Tawamhā Timama ma, mreme pari, te apā mo, si'ubdatō tisiré 're ĩnomro mono norī u. Tawamhā sōtō za'ra ré, ma tō siza za'ra. Taha wa, te Pedru 'mahā, utu da:

— Sima, e niha te asō. E niha asimiza'rese rob'madā'ā waihu'u ō di, syry na.

³⁸ Satanasihī zada, asiptete sina 're aihāimana za'ra wa'aba mono da, asima 're wē za'ra wa'aba mono nherē, asi'uihā na sada 're asiptete waihu'u za'ra wa'aba mono ō di. Taha wa, asimiza'rese te za ai'ubumroi wa'wa āhāna hā, 'Re ĩhāimana u'āsi mono wi, asima rowaptēre za'ra wa'aba da, Wa'uburé nhimiwada'urizé wi, te te aipawaptob za'ra wa'aba da. — Āne ma tō tāma waihu'u za'ra.

³⁹ Tawamhā Pedru norī nhiti, te duré apā mo, Timama ma mreme da. Tawamhā ōhō na si, te duré Timama wi rowaptē.

⁴⁰ Timama ma, mreme pari, te duré apā ĩtēme timorī za'ra. Tawamhā sōtō za'ra ré, ma duré siza za'ra. Tāma aptā'ā uptabi za'ra wa, te tinhotō pese za'ra, sōpré waihu'u āna. Tawamhā utu za'ra da, Zezusi te te 'mahārā za'ra wamhā, asa te te tāma ĩwaihu'u za'ra da hā, mare di.

⁴¹ Tawamhã ĩsiti te duré timorĩ za'ra. Taha pari, ma duré apã sina siri. Si'ubdatõ tinem na, ma tõ oto ãma sahu. Tawamhã sõtõ za'ra ré, ma tõ duré apã siza za'ra. Taha wa, te ãne 'mahârã za'ra:

– E niha bã te zahadu asõtõ za'ra wa'wa bété. Te duré aiwa'utu za'ra wa'wa. Tõ'ã oto. Bãdã ma tõ oto ĩwa waptãrã. Ti'ai ãma dasiré ĩpodo, te za oto ĩhãiba nhomri ni, aibã ĩwasété norĩ ma.

⁴² Oto aiwahutu za'ra wa'aba, wasi'aba'rê da. Ôhõta te wei oto mo, dama ĩhãiba nhomri'wa da hã. – ãne te tãma 'mahârã za'ra.

ZeZusi hã da te oto dasiwi ĩ'ãrizém na rowasu'u

Mateusi 26.47-56; Rucasi 22.47-53; Zuwã 18.3-12

⁴³ ZeZusi hã te te tãma 'mahârã za'ra ré, ma Zudasi hã ĩtẽme wi, ZeZusihi siré aré 're ĩmorĩ hã. Da'ahã uptabi na ma tõ ĩsiré sõ aihutu ni, sib'ézé 'wapa ré, uibroĩ ré zama. Sasedoti ĩpire norĩ zadawa para, duré rowahutu'wa norĩ zadawa para, duré zudezu norĩ ma, roti'wa norĩ zadawa para zama, ma tõ sõ aihutu ni.

⁴⁴ Zudasi hã ma tõ ãne dama ĩpire norĩ ma, roti aré:

– Aibã hã te tob'rata hãrã wamhã, ta hã te za asiwi ĩ'ãri 'wa. Tawamhã asiptete sina, te za asiwi ĩsaprõni 'wa. – ãne ma tõ Zudasi hã tãma waihu'u za'ra, te te siwi ĩ'ãri wana ré hã.

⁴⁵ Tawamhã Zudasi hã ZeZusihi u oto wisi wamhã, ãne te 'mahã:

– Rowahutu'wa.

Tawamhã tob'rata hãrã na, ma tõ sawi, ZeZusi hã.

⁴⁶ Tawamhã ma tõ oto dasiwi ãri ni.

⁴⁷ Tawamhã ZeZusihi siré ĩsa hã, ma tõ sib'ézé 'wapa hã waze. Te te wazere wi, ma romhuri'wa hã ãma po're nhizã, sasedoti ĩpire uptabi ma romhuri'wa hã.

⁴⁸ Tawamhã ZeZusi hã sõ ĩdasihutu norĩ ma, te tinha, ãne:

– E wa hã danhibrob zõ dapãri'wa pã, ma bété we ĩzõ aihutu 'wa, sib'ézé 'wapa ré, uibroĩ ré zama.

⁴⁹ Bãtã sidãpãsi wa tõ asõ'a za'ra wa'aba te 're da'apawapto, ĩnhimirowasu'u na, 'Re ĩhãimana u'ãsi mono ãma 're ĩdawata za'ra mono zé 'wawi, wa'ra 're. Zapre tameb ré asiwi ĩ'ãri aba õ di bété. Tane nherẽ, te za tõ asiwi ĩ'ãri 'wa, ĩ'ãma rob'ui'érézé hã te ĩsina uwaimrami hã. – ãne ma tãma sina waihu'u za'ra.

⁵⁰ Tawamhã ĩsiré 're ĩnomro mono norĩ hã aihĩni ma siwi tirẽ. Wara sina, ma dama ropé.

⁵¹ Aibã hã ĩprédupté hã, ZeZusihi zarina ĩmorĩ hã ma tõ ni'wam norĩ hã siwi ti'ã, ĩ'ubuzém na.

⁵² Tane nherẽ, ma tõ tãma rẽme za'ra, ti'ubuzé hã. Tawamhã ai'uréiwi te oto dawĩ wara, ĩprédupté hã.

Dama roti'wa norĩ hã ZeZusihi da, ĩsi'rã'õtõzém na rowasu'u

Mateusi 26.57-68; Rucasi 22.54-55, 63-71; Zuwã 18.12-14, 19-24

⁵³ Tawamhã ZeZusi hã te oto dasiwi sãprõni ni, 'Re ĩhãimana u'ãsi mono ma da'ãma romhuri'wa ĩpire uptabi nhorõwa u, sasedoti ĩpire uptabi nhorõwa u. Tame ĩwana ma tõ si'rã'õtõ, sasedoti ĩpire norĩ hã, duré zudezu norĩ ma roti'wa norĩ hã, duré rowahutu'wa norĩ hã.

⁵⁴ ZeZusi hã da te dasiwi sãprõni ré, te Pedru hã romhã na te te pibu, sasedoti ĩpire uptabi nhorõwa u. Tawamhã 'ri 'wawi wa'ra 're, ma ãzé. Sébré wamhã, ma tõ nhamra unhamã dawa, hã'ro da, romhuri'wa norĩ me.

⁵⁵⁻⁵⁶ Tawamhã sasedoti ĩpire norĩ hã duré uburé zudezu norĩ ma roti'wa norĩ hã, te ni'wam norĩ zõ tinhopré za'ra, ZeZusi hã marĩ te te 're ĩ'ab'manharĩ wasété mono zém na, sadawa nhĩpese na te te siwi ãma hiri da, tawapsi romanu norĩ hã te te siwi wĩri da. Tawamhã da'ahã na dazadawa nhĩpese na, ZeZusihi ãma ĩsimiroti wasété na da te ãma sa'ra za'ra nherẽ, ãma dasisaze za'ra õ di.

⁵⁷ Tawamhã ni'wam norĩ hã ma tiwahutu zahuré hãwi, ZeZusi hã sadawa nhĩpese newa, ĩsadawa nhĩpe te te ãma hiri zahuré da, ãne:

⁵⁸ – Wa norĩ hã wa tõ wasi'uihã na ĩsimirowasu'u hã wapari ni. 'Re ĩhãimana u'ãsi mono nhorõwa hã te za, u, sãmra, étẽ na da te dasiwi ĩ'ri hã. Tawamhã te za, u, aimawi 'ri duré. Da te dasiwi ĩ'ri da hã, mare di. Te te 'ri ré hã, bãdã hã si'ubdatõ te za, u, ãma ne, te te ãma romhuri ré hã. ãne taré dama siwasu'u ré, wa tõ wapari ni, wasi'uihã na. – ãne te ZeZusi dama wasu'u zahuré, taré.

⁵⁹ Tane nherẽ, 'Re ĩhãimana u'ãsi mono ma da'ãma romhuri'wa norĩ hã te te siwi sadawa pibu zahuré wamhã, aiwab õ di, te te dama ĩwasu'u zahuré zé hã.

⁶⁰ Tawamhã 'Re ĩhãimana u'ãsi mono ma da'ãma romhuri'wa ĩpire uptabi hã dawa'wa ma hãwi za, ZeZusi hã uihã na te te sadanharĩ da, ãne:

— E asadawa na dama āma wa'rāmi āna, da te dasiwi ī'aiwasu'u wasété na hā. E tō īsarina ma tō aiwasédé hā ai'āma hiri zahuré. E taré. — Āne te sadanha.

⁶¹ Tane nherē, te Zezusi hā ari'iwi za. Te te āma wa'rāmi ō di, timreme na. Tawamhā 'Re ihāimana u'āsi mono ma da'āma romhuri'wa ĩpire uptabi hā te duré sadanharī na sahu, sasedoti ĩpire uptabi hā:

— E tō sena a hā, 'Re ihāimana u'āsi mono te te aipisudu, Danho'reptui'wa da. E tō sena 'Re ihāimana u'āsi mono 'ra, a hā.

⁶² Tawamhā Zezusi hā asa te tāma siwasu'u oto:

— Īhe. Wa hā, Danho'reptui'wa. Wa hā 'Re ihāimana u'āsi mono 'ra. A norī wa'wa hā aihīni te za ĩ'madâ'â za'ra wa'wa, ti'ai āma dasiré ĩpodo hā, 'Re ihāimana u'āsi mono nhimire niwī, 're ĩnhamra mono na, ĩwaihu'u pese 'rata. Hāiwa'a na apā we ĩmorī wamhā, te za āne na ĩ'madâ'â za'ra wa'wa. — Āne ma tō tāma siwasu'u sirōmo za'ra.

⁶³ Tawamhā te te sadawa 'rui wa, ma ti'uzza hā hāiwazu, sasedoti ĩpire uptabi hā. Tawamhā āne ma tō āma da'mahā:

— Tāibâ oto. Aibâ aimawi norī zō, ai'maihârâ aba ō di za, Zezusi te te wama ĩwasu'u za'ra da hā, ĩwasété na.

⁶⁴ 'Re ihāimana u'āsi mono newa, si'uihâ na ma tō tiwaihu'u pe hā sina tihi, wasine 're hāimana mono nherē. Si'uihâ na ma tō timreme wasété. Īmreme ma tō ĩwaparī za'ra wa'wa. E marī tawamhā, ma tō āma ĩpisutu za'ra wa'wa. — Āne te āma da'mahā. Tawamhā aihīni ma tō sima wē za'ra, da te dasiwi wīri da.

⁶⁵ Tawamhā te te siwi wē'ō wa, ma tō nasi ni'wam norī hā siwi ubu upto, tizadaipro na. Zazahâ na ma duré siwi ubu ubu. Taha pari, ma tō duré nasi siwi ahâ. Āne ré, te nasi siwi 'mahâ:

— E 'wa hā ai'azâri'wa. Ma'āpé, waihu'u. — Āne te nasi siwi 'mahâ.

'Re ihāimana u'āsi mono āma 're ĩdawata za'ra mono zé 'madâ'â'wa norī zama, ma tō siwi ti'â, te te nasi siwi ahâri da.

Pedru hā, Zezusi te te dawi ĩ'udâzém na rowasu'u

Mateusi 26.69-75; Rucasi 22.56-62; Zuwâ 18.15-18, 25-27

⁶⁶ Āne ré, te zahadu Pedru hā dame nhamra, 'ri 'wawi wa'ra 're, pi'reba 'ri zahâpâ. Tawamhā tame sāmra ré, ma we pi'ō hā datême wi, sasedoti ĩpire uptabi ma romhuri'wa hā.

⁶⁷ Wisi wi, ma Pedru hā tisâ, unhamā āma hâ'ro ré. Tawamhā te te 'madâ'â pese pari, te Pedruhu ma tinha:

— A zama te duré Zezusihi siré 're aimo, Nazaré āma 're ihāimana mono siré.

⁶⁸ Tawamhā Pedru te asa tāma tinha:

— Tane na ĩwaihu'u nherē, ō hā ĩma sa'rese ō di. — Āne te pi'ōi wi ai'udâ, Pedru hā.

Tawamhā 'ri nhi'rīti u te oto mō, 'ridawa u morī da, dapuszéb u. Tawamhā si'a ma oto hā.

⁶⁹ Tawamhā ma tō romhuri'wa sipi'ō hā tisâ Pedru hā, 'ri nhi'rīti āma. Tawamhā ĩ'rata ĩsimasam norī ma, te wasu'u za'ra:

— Ā hā Zezusi norī siré, 're ĩmorī.

⁷⁰ Tawamhā Pedru te duré tiwi ai'udâ. Tawamhā āma ronomro ō ré, te duré tāma nharī za'ra, ĩ'rata ĩsimasa hā:

— Tō sena, a hā Zezusi norī siré, te 're aimo. A hā tō, Darireza āma 're ĩ'aihāimana mono.

⁷¹ Tawamhā Pedru te asa tāma nharī za'ra:

— Mare di. Tane na ĩwaihu'u nherē, ō hā ĩma sa'rese ō di. Tō sena te aiwi udâ za'ra wa'aba di pâ, 'Re ihāimana u'āsi mono te te ĩ'azâri pé. — Āne te tāma sina waihu'u za'ra.

⁷² Tawamhā si'a hā awa'awi ma tihârâ na sahu. Tawamhā Zezusi te te tāma ĩwaihu'uzém na, ma sina po're puru, Pedru hā. Āne ma tō Zezusi hā aré tāma walhu'u siro: "Si'a hā tihârâ na te te sahu ō ré, te za si'ubdatō dawi ĩ'udâ, ĩzadawa para ō nherē."

Tawamhā Zezusihi mrepe na sina po're pu'u wa, te oto aiwa'ō, Pedru hā.

15

Apito Piratu, Zezusi te te ĩsadawa pibuzé wasu'u

Mateusi 27.1-2, 11-26; Rucasi 23.1-5, 13-25; Zuwâ 18.28-19.16

¹⁻² Tawamhā awém na mararé, ma duré si'râ'ôtō, sasedoti ĩpire norī hā, duré zudezu norī ma roti'wa norī hā, duré 'Re ihāimana u'āsi mono nhimiroti 'rata na rob'ui'éré na dama rowahutu'wa norī hā. Zezusihi āma te te sima roti za'ra da, ma si'râ'ôtō, dama roti'wa ĩpire norī me. Taha pari, ma oto siwi pawasisi Zezusi hā, Piratuhu u te te siwi saprōni da. Tawamhā ĩtême te te siwi āwisi wamhā, Piratu te Zezusi sadanha:

— E a hā, zudezu norī nhib'apito.

Tawamhā Zezusi te asa tāma tinha:

— Tahata ma tō tane hā tō ĩ'āma ĩwaihū. — Āne te tāma tinha.

³Tawamhā sasedoti ĩpire norī hā te Zezusi hā āma ĩwasédé hā sa'ra za'ra taré, marī ĩwasétére na 'Re ĩhāimana u'āsi mono ma, da'āma romhuri'wa norī ĩpire za'ra hā.

⁴Taha wa, Piratu te Zezusi 'mahā:

— Marī ahā na ma tō ai'āma sa'ra za'ra ni. E asadawa na tāma āma wa'rāmi za'ra ō di za. — Āne te 'mahā.

⁵Tane nherē, tizadawa na te te wa'rāmi ō di, Zezusi hā. Taha wa, ma tō Piratu hā āma titob'uzu, tizadawa na te te āma wa'rāmi ō wa.

⁶⁻⁷Wahub sidāpāsi, ma tō apito Piratu hā misi si te te 're da'azani, dazazéb 're, 're ĩdasimasa mono norī hā 're dawairébé mono da, misi si. 'Re ĩhāimana u'āsi mono, tinhimiházé te te dama ĩba'azém na dasa da te dasiwi 're ĩmanharī za'ra mono zém na, ma tō te te 're da'azani, da te tiwi 're ĩwaptērē za'ra mono zéb uwaibaba. Aibā hā dazazéb 're, te dame 're sa, Barabasi na ĩsisi hā. Romanu norī da, dasi'wapé watobro wamhā, te te da'mapārī za'ra wa, ma tō séme ni, dazazéb 're.

⁸Tawamhā ma duré bātā na Piratuhu u tasi'rā'ōtō ni, da te tiwi rowaptērē za'ra da, te te 're ĩmanharī wē mono zéb zarina, misi te te dama 'mairōb'ru da, dazazém hawi da'maiwatobro da, apā morī da.

⁹⁻¹⁰Tawamhā Piratu te da'a'mahā:

— Zudezu norī, e asib'apito za'ra wa'aba ma, wa za rob'ru, apā morī da. — Āne te da'a'mahā, Zezusi hā. Sasedoti ĩpire norī hā Zezusi te te sō'ru za'ra wa, ma tō itēme siwi āwisi, Piratuhu u. Āne na ma tō Piratu hā āma dawaihu'u.

¹¹Piratu hā Zezusi hā apā morī da, te te nasi āma da'ab'mahārā nherē, te sasedoti ĩpire norī hā nasi dawada'uri za'ra, Barabasi si da te waptērē za'ra da, tiwi, Zezusi upana te te wazere da.

¹²Tawamhā Piratu te duré da'ab'mahā:

— E marī, wa za bété aima āma pisutu za'ra wa'wa, asib'apito na asiwi 're ĩsisi za'ra wa'aba mono āma hā, te aima āma ĩ'uwaimrami za'ra wa'aba zéb da hā.

¹³— Wedepo'o nnonhi'rāmi na da te dasiwi sasōmri, dā'ā da. — Āne te nasi sa'ētē āma 'mahārā za'ra ni, Piratu hā.

¹⁴— E marī te te 're ab'manharī wasété mono bā. — Āne te āma da'ab'mahā, Piratu hā.

Tane nherē, hārā 'rāihā na te nasi āma 'mahārā za'ra, Piratu hā:

— Wedepo'o nnonhi'rāmi na, da te dasiwi sasōmri, dā'ā da.

¹⁵Tawamhā Piratu hā dama rowē za'ra da, ma tō da'wapéi'wa norī ma 'ru za'ra, Barabasi ma si te te tāma rob'ru za'ra da, dazazém hawi watobro da, apā 're morī da. Taha pari, te Zezusi tāma 'ru za'ra, da'wapéi'wa norī ma, powawē hāi waré na te te siwi 're pré'é mono da, taha pari, te te duré siwi sasōmri da, wedepo'o nnonhi'rāmi na dā'ā da oto.

*Da'wapéi'wa norī hā Zezusi hā āma ĩto za'ra zé wasu'u
Mateusi 27.27-31; Zuwā 19.1-3*

¹⁶Tawamhā da'wapéi'wa norī hā ma tō Zezusi hā siwi āwisi, Piratuhu nhorōwa u, 'ri 're wa'wa nho'ōmo u. Tamemhā te oto sitēme sisō tihārā za'ra, uburé sitēme si'rā'ōtō da.

¹⁷Tawamhā dasi'ubuzém na ma tō Zezusi hā siwi āma hāiba ubu, ĩhā pré na. 'Wabzéré panhipti na ma duré siwi sōpre.

¹⁸Tawamhā sisarina te nasi timreme na sawi za'ra, taré:

— Zudezu norī nhib'apito, rowē na aihāimana.

¹⁹Tawamhā ĩ'rāi wi, ma tō nasi siwi ahā, wedehu waré na. Te duré nasi siwi upto, tizadaipro na. Te duré nasi hī'rāitō tāma asimro, Zezusi papara, āma wata za'ra da newa.

²⁰Tawamhā nasi āma wa'ē za'ra parimhā, tisi'ubuzém na te te siwi āma ĩhāiba ubu hā ma tō apā tiwi wazere za'ra. ĩ'uzazém na ma oto apā siwi uza. Taha pari, te oto rob u siwi saprō, wedepo'o nnonhi'rāmi na te te siwi sasōmri da, 'ri nho'ōmo nhiti.

*Zezusi hā wedepo'o nnonhi'rāmi na da te dasiwi ĩsasōmrizé wasu'u
Mateusi 27.32-56; Rucasi 23.26-49; Zuwā 19.17-30*

²¹Tawamhā bādādi na te te siwi saprōni ré, ma tō aibā hā siwi sōpētē, Sima na ĩsisi hā, tirom hawi we ĩmorī hā, 'ri ahā u. ĩsa'ru nhisi hā, Sireni na. Sima hā Aresādiri norī mama, Rupuhu me. Tawamhā da'wapéi'wa norī hā, Simahā ma, ma tō 'ru za'ra, wedepo'o nnonhi'rāmi hā te te tāma āri da, Zezusi hā.

²²Tawamhā Dodota na romnhisi u, ma tō siwi saprō, Zezusi hā. Dodota na romnhisi hā, da'rāihi te wasu'u.

²³ Tawamhã da'wapéi'wa norĩ hã te aré tãma sômri za'ra, uwa 'ru 'rã'i wa'u ísé hã te te hã'rêne da, miha na wedepa wa'u nhisi na, iwazari ré hã. Tane nheré, te te hã'rêne ô di, Zezusi hã.

²⁴ Taha pari, ma tô oto wedepo'o nnonhi'rãmi na siwi sasô. Te te siwi sasômri pari, ma tô êtê zapotore i'ui'éré ré hã nasi sima sãmra da'wapéi'wa norĩ hã, pibu pese na Zezusihi uza hã te te siwi waihu da.

²⁵ Zezusi te te siwi ísasômri zém na hã, bådã ma tô oto tinho're za'a.

²⁶ Zezusihi 'rã'i uwaibaba wedepo'o na rob'ui'éré hã ma siwi tété, da te dasiwi iwê'ô za'ra zém na, da te dasiwi ãma waihu'u za'ra da. ãne ãma írob'ui'éré hã: ã hã, zudezu norĩ nhib'apito.

²⁷ Zezusihi siré, ma tô duré aibã norĩ hã sasômri zahuré ni, danhibrob zô dapãri'wa norĩ hã. Zezusihi ãma te aiwa'aba zahuré ísimire niwĩ, duré ísimi'e niwĩ.

²⁸ ãne ãma íromhãmanazé hã ma tô rob'ui'éré zarina, sina uwaimra, Zezusi hã. ãne duréihã ãma írob'ui'éré hã: "Íwasété norĩ zu, te za taré dasiwi wê'ô ni." ãne ãma írob'ui'éré hã, íbãihã na hã.

²⁹⁻³⁰ Tawamhã íwa'wai baba, da te nasi ro'rahãri za'ra sidãpãsi, te nasi ãma tawa'ê za'ra ni, Zezusihi ãma. Nasi ãma da'rã siwanarĩ za'ra sina, te nasi ãma wasété za'ra ni:

— Oro a hã asima roti za, 'ri 'rãihã hã sãmra da, 'Re íhãimana u'ãsi mono ãma 're ídawata za'ra mono zé hã, si'ubdatô bådã hã ai'ãma si'utôri ô ré, duré apã 'ri da. Mã'ápé, asisô'reptu na. Wedepo'o nnonhi'rãmi hawi we si'ra na, atã'ã tô da. — ãne te nasi ãma tiwa'ê za'ra.

³¹ Duré sasedoti ípire norĩ hã te nasi ãma wa'ê sina, ãne sima nharĩ za'ra ãma, rowahutu'wa norĩ me:

— Oro te te 're da'anho'reptui mono za, 'rãwi sisô'reptui ô di bété.

³² Mã'ápé, ãne ré, wedepo'o nnonhi'rãmi hawi we te te si'ra wanho'a, Danho'reptui'wa hã Izarazéhé nhihudu norĩ nhib'apito hã, wa te wasina í'umnhasi za'ra zéb da hã. — ãne ma sima ãma rowaihu'u za'ra.

Tawamhã ísiré ísa'o zahuré zama, te nasi tãma nharĩ wasété zahuré, Zezusihi ma.

³³ Tawamhã ma tô ti'abzuma. Abzuma wamhã, ma tô tirobra, daro mono bã. Bådã siprazéb u, te oto robra si nomro.

³⁴ Tawamhã si'ubdatô båtã ãma, te Zezusi hã Timama hã sina 'mahã, hãrã 'rãihã na ãne:

— Eroi, Eroi, rema sabatani.

Íhãrãzém na hã, ãma ísaprízê hã, ãne:

— Ínhib'apito, Ínhib'apito, e marĩ da, ma tô oto írê. — ãne ãma ísaprízê hã.

³⁵ Tawamhã ni'wam norĩ hã í'rata ísimasam norĩ hã Zezusihi hãrã te te wapari za'ra wamhã, ma tô sima rowasu'u za'ra, ãne:

— Ôhõta wapari aba. Eriasihi zô te hã, te te we pawapto da.

³⁶ Tawamhã ni'wa hã si'aba'rê na ma tô piza're upsôzém ne hã 'mai'ã, uwa 'ru 'rã'i wa'u ísé na te te tãma ãma di'i da, Zezusihi ma, íwa'ábã syry na. Tawamhã wedewaré 'rãsutu na ma tô ãma sapu'u, Zezusihi ma, te te wê da, te te upsômri da. Taha pari, te ãne dama tinhã:

— A'ã pé wanhipari za'ra wa'aba, Eriasi we sô morĩ ô'umnhasite, wedepo'o nnonhi'rãmi hawi, te te si'ra da. — ãne ma dama waihu'u.

³⁷ Tawamhã Zezusi hã hãrã 'rãihã na te hã, írême ma. Taha pari, ma pẽ'ê hai'utô.

³⁸ Zezusi hã dã'ã wi, zazahã íhãpa hã 'ri 're wa'wa nhitobzê hã ma uihã na hãihaipo'o aiwa, hãimo hawi pi'reba, 'Re íhãimana u'ãsi mono nhorõwa ãma hã.

³⁹ Zezusi hã hãwi sa'o ré, da'wapéi'wa norĩ wada'uri'wa hã ísô're te za, ípapara, romanu hã. Tawamhã Zezusi hã írême ma hãrã 'rãihã na hãrã wamhã, te te wapari wamhã, ma ãma rowaihu'u:

— Nare ô hã, 'Re íhãimana u'ãsi mono 'ra.

⁴⁰ Pi'ô norĩ zama, romhã hawi te Zezusi hã 'madã'ã za'ra. Nima norĩ nhisi hã ãne: Mariza Madarena, duré Sarome, duré Mariza, Zuzé norĩ na hã Ti'aduhu me. Ti'adu hã íhãiba té.

⁴¹ Zezusi hã Darireza ãma 're morĩ ré hã, pi'ô norĩ hã ísiré te 're nomro. Ma tô duré marĩ na te te siwi 're pawapto. Ta norĩ siré, te duré pi'ô norĩ hã ahã na Zeruzarê u ai'aba'rê, Zezusihi siré. Ta norĩ zama te romhã hawi siwi 'madã'ã za'ra.

Zezusi hã da te ísêrêzé wasu'u

Mateusi 27.57-61; Rucasi 23.50-56; Zuwã 19.38-42

⁴²⁻⁴³ Sabadu u bådã 're íne mono u, te zudezu norĩ hã te te sima 're ropese za'ra, sabadu na hã te te 're romhuri za'ra mono ô na dá'ãsina. Tawamhã sabadu u oto hãiwahã wa, romhuri 'rãsutuzéb ãma te Zuzé hã Piratuhu u mo. Arimateza ãma te aré 're hãimana, Zuzé hã. Zudezu norĩ ma roti'wa ípire, ta hã. Taha wa, te nasi si'rã'õtô, siré dama roti'wa ípire za'ra norĩ me. Zuzé hã, 'Re íhãimana u'ãsi mono da'ãma 're ísib'a'uwê mono zéb zô, te 're simipari u'ãsi.

Tawamhã romhuri zahârizéb u, romhuture wa, ma tô sada aptete Zuzé hã, Piratuhu u mori da, Zezusihi hãiba hã te te tiwi waptêrê da, ab're sirômo 're, te te sêrê da.

⁴⁴ Zuzé hã, Zezusi hã idâ'â na te te tâma rowasu'u wamhã, Piratu hã te âma rosa'rata, dâ'â su'u wa. Tawamhã Piratu hã da'wapéi'wa nori wada'uri'wa zô te hã, idâ'âzém na te te âma sadanharî da, tô sena zô.

⁴⁵ Tawamhã tô sena Zezusi hã idâ'â na te te tâma rowasu'u parimhã, Zuzéhé ma, te oto Piratu hã tâma ti'ru, Zezusihi hãiba hã ab're sirômo 're, te te sêrê da.

⁴⁶ Tawamhã Zuzé hã zazahã, ma sada uipra, ihâirã hã. Taha pari, Zezusihi hãiba hã ma oto si'ra, wedepo'o nhonhi'rãmi hawi. Tawamhã zazahã ihâirã na ma ubu. Te te ubu pari, ma tô ab're 're tisê. Sa'a zahâpã êtê wa, ab're sirômo 're, ma tisê. Taha pari, te êtê tômo wawê hã te te pizari, ab're te te âma îrê sitob da.

⁴⁷ Âne Zezusihi hãiba te te sêrê ré, ma tô pi'ô nori hã âma 'madâ'â zahuré, Mariza Madarena hã Marizaha me. Ta hã Zuzéhé na. Tawamhã ma tô sabu zahuré, nimame Zuzé te te îsêrêzê hã.

16

Zezusi apã ihâiwa'utuzé wasu'u

Mateusi 28.1-8; Rucasi 24.1-12; Zuwã 20.1-10

¹ Tawamhã bâdã oto sébré wamhã, tâibã oto sabadu hã romhuri zahârizé hã zudezu nori te hã. Tawamhã pi'ô nori hã iwa'u zadaze hã, ma tô siwi uipra, te te siwi âma hãiba u'rê da, Zezusi hã. Pi'ô nori nhisi hã Mariza Madarena, duré Sarome, duré Mariza, Ti'aduhu na hã.

² Tawamhã pi'ô nori hã mararé te ai'aba'rê, sa'a zahâpã ab're u, bâdã rãiwatobro wi, dumidu na.

³ Bâdãdi na si'aba'rêi ré, ma âne sima waihu'u za'ra:

— E 'wa hã te za êne hã wama sa'rê za'ra, ab're nhitobzé hã.

⁴ Ab're nhitobzé hã êne hã tômo wawê uptabi wa, ma âne sima waihu'u za'ra. Tane nherê, sihutu wamhã, êne da te isa'rê na ma tô 'madâ'â za'ra.

⁵ Tawamhã ab're 're, sisisi wamhã, ma tô aibã hã siwi sôpêtê îprédupté hã, uza hãirã ré îsãmra hã. Înomrozé nhimire niwi te nhamra. Taha wa, pi'ô nori hã ma tâma tip'êwara za'ra.

⁶ Tawamhã âne te tâma nharî za'ra, pi'ô nori ma:

— Îma aipahi za'ra wa'aba tô. Zezusi hã Nazaré âma aré îprédu hã wedepo'o nhonhi'rãmi na, da te dasiwi îsasômri zô robzabu za'ra wa'aba da, te we ai'aba'rêi wa'wa. Âne na, wa tô aiwaihu'u za'ra wa'wa. Âne hãimana ô di oto. Apã ma tô hãiwa'udu. Ma'âpé, înomrozé hã sabu za'ra wa'aba. Robaba di.

⁷ Taha wa, te za oto apã ai'aba'rêi wa'wa, Pedru nori ma tâma rowasu'u za'ra wa'aba da, âne: "Zezusi hã aiwana te za, u, timori 'wa, Darireza u. Tame te za, u, îsôpêtê za'ra wa'wa, aima îsiwaihu'u za'ra wa'aba zéb zarina." — Âne ma tô pi'ô nori ma waihu'u za'ra.

⁸ Tawamhã ma wairé ab're hawi, wara sina sisa'rei mono da. Tãma p'êwara za'ra wa, te tirêrê'ê za'ra. Pahi te, ni'wai ma, te te rowasu'u za'ra ô di a'â.

Zezusi hã, Mariza Madarenahã ma, îsihãi'rézé wasu'u

Mateusi 28.9-10; Zuwã 20.11-18

⁹ Zezusi hã dumidu na ma tô apã hãiwa'udu, mararé. Tawamhã îmori'rata na ma tô Mariza Madarenahã ma, sihãi'rê. Ti'ai baba 're mori ré, ma tô taha ma, wa'uburé hã 7 na sãmra.

¹⁰ Tawamhã Zezusihi siré 're înomro mono nori u, te mo Mariza Madarena hã, te te tâma rowasu'u za'ra da. Tãma robzei'ô za'ra di. P'êzê uptabi za'ra wa, te aiwa'ô za'ra. Âne ré, ma tô îtême tiwisi za'ra, Mariza Madarena hã.

¹¹ Tawamhã Zezusi apã 're îmori na, duré îtême îwisizém na hã te te tâma rowasu'u za'ra wamhã, te te âma saze za'ra ô di.

Zezusi hã, maparane tizazei'wa nori ma, îsihãi'rézé wasu'u

Rucasi 24.13-35

¹² Taha pari, ma duré Zezusi hã aimawi tihãiba na sihãi'rê, maparane tizazei'wa nori ma. Rom na bâdãdi na neb ré, ma tô îtême tiwisi zahuré.

¹³ Tawamhã apã te tineb zahuré, Zezusihi siré 're înomro mono nori ma, te te rowasu'u zahuré da. Tane nherê, te te tâma rowasu'u za'ra nherê, te te âma saze za'ra ô di duré.

Zezusi hã tisiré nori ma, îsihãi'rézé wasu'u, 11 na ihãiba nori ma

Mateusi 28.16-20; Rucasi 24.36-49; Zuwã 20.19-23; Atusi 1.6-8

¹⁴ Tawamhã Zezusi hã tisiré 're înomro mono nori u ma duré wi, sai ma, si'ubumroi ré, 11 na ihãiba za'ra u. Tawamhã timreme ma tô tâma pêtê za'ra, siwi îsabui'wa nori nhimirowasu'u hã te te saze za'ra ô wa, apã ihãiwa'utuzém na da te îwasu'u na hã.

¹⁵ Taha wa, te âne oto tâma nharî za'ra:

— Daro mono bâ te za oto 're ĩropéi wa'aba mo, a'uwē mono bâ, ĩwasu'uwē na 're dapo're pu'u za'ra wa'aba mono da.

¹⁶Tawamhã Danho'reptui'wa na da te dasina 're ĩ'umnhasi za'ra mono wa, â dawabzuri hã da te 're 'manharĩ za'ra mono wamhã, te za te te 're da'anho'reptu, 'Re ĩhãimana u'âsi mono hã. Da te dasina 're ĩ'umnhasi za'ra mono õ wamhã, 'Re ĩhãimana u'âsi mono te za te 're da'awē'õ.

¹⁷Da te dasina 're ĩ'umnhasi za'ra mono wamhã, wa za te 're da'apawapto, ĩwaihu'u pese zarina, marĩ dama ĩ'manharĩ waihu'u'õ hã te te dama 're ab'manharĩ wē mono da, ĩwasu'u na tô sena na da te 're waihu'u za'ra mono da. Āne te za te te 're dapawapto za'ra. ĩnhisi na te za wa'uburé hã te te dama 're sãmra za'ra, ĩzadawa para. Duré 're ĩdasisadaihu'u za'ra mono õ na zama, te za 're mre me zusi.

¹⁸Sa'rese āna, wahi hã te te 're waibui mono nherē, duré dapārĩzé hã te te 're āhuri mono nherē, tãma 're rowē za'ra mono di za. Duré, tinhib'rata na ĩhãzé ré norĩ hã te te 're upi za'ra mono wamhã, te za 're séptã'ã za'ra, ĩhãzé ré norĩ hã. — Āne ma tô tãma waihu'u sirõmo za'ra, tisiré 're ĩnomro mono norĩ ma.

Ze zusi hã hã iwa u ĩmorĩzé wasu'u

Rucasi 24.50-53; Atusi 1.9-11

¹⁹Wanhib'apito Ze zusi hã te te tãma rowasu'u za'ra pari, ma tô hã iwa u tiwi āri za'ra, 'Re ĩhãimana u'âsi mono nhimire niwĩ oto 're sãmra mono da, pire uptabi na.

²⁰Tawamhã ĩsiré 're ĩnomro mono norĩ hã ĩsadawa para, ma tô te te ropé daro mono bâ, ĩwasu'uwē na te te 're dapo're pu'u za'ra mono da. Wanhib'apito hã ma tô te te 're pawapto za'ra, ĩsimi'manharĩ waihu'u pese zarina, marĩ dama ĩ'manharĩ waihu'u'õ hã te te dama 're ab'manharĩ wē mono da, ĩsimirowasu'u za'ra na tô sena uptabi, da te 're waihu'u za'ra mono da.

Rucasi ZeZu Cristuhu wasu'uwé na Rucasi te te āma ĩrob'ui'érézé Ībaihā wasu'uzé

Ā ĩbaihā na rob'ui'éré'wa nhisi hā Rucasi na ĩsisi hā. Duré Atusi na rob'ui'éré'wa, ta hā. Ta hā aré dawede'wa (Corosu. 4.14). ZeZusihī wasu'u na rob'ui'éré'wa hāiba amo norī hā ta norī hā zudezu, Mateusi, duré Marcusi hā, duré Zuwā. Rucasihi si zudezu ō di. Duré Tezopiru hā ĩsiré zudezu ō ma, ma tō ā ĩbaihā na rob'ui'éré hā tāma tisō, Rucasi hā.

Tawamhā Rucasi hā ma tō ZeZusihī wasu'u na rob'ui'éré, ĩwaptā'ázém hawī sada 're ĩromhāimana mono zém na hā, hāiwa u apā ĩmorizéb u hā. Ma tō duré wama āma rowasu'u za'eté za'ra, ZeZusihī nhimirowahutuzém na hā. Ma tō duré wama wasu'u za'ra, ZeZusi hā ti'ai āma wasine za'ra ĩpoto na hā. Ma tō duré wama waihu'u za'ra, ZeZusi hā a'uwé mono bā te te 're da'anho'reptui mono da, wei ĩmorī na hā, duré zudezu norī tēmep si we ĩmorī ō na hā. Taha wa, ma tō ZeZusi hā dama siwaihu'u, ti'ai āma dasiré ĩpoto na hā.

Duré Rucasihi nhimi'ui'éré zarina, wa za waihu'u za'ra ni, ZeZusi hā ĩhāzé ré norī āma 're ĩpé'ézé mono zém na hā, duré ĩsimarī ō norī āma hā, duré da te dasiwi 're ĩwé'ō za'ra mono norī āma, duré samaritanu norī āma, duré wasété na 're ĩnomro mono norī āma.

¹⁻⁴ Tezopiru, asawi di. Āhāna wa za aima rob'ui'éré, Wanhib'apito ZeZu Cristuhu wasu'u na, sena na waihu'u da. Ni'wam norī hā ma tō ZeZusihī wasu'u na te te 're dapo're pu'u na'rata za'ra, titōmo na te te āma 're ĩ'madā'ā za'ra mono norī hā. Ta norī hā ma tō ĩwasu'u na'rata hawī wama rowasu'u za'ra. Tawamhā ĩsimirowasu'u zarina, ma tō ĩwasu'u na āma rob'ui'éré za'ra ni, da'ahā na. Taha wa, wa hā wa duré ĩsima wé, te āma aima rob'ui'éré da. ĩwasu'u na'rata hawī, wa tō rosa'rata pese, te waihu'u pese da. Ni'wam norī hā ma tō ĩwasu'u hā aima wasu'u za'ra. Taha wa, wa tō ĩsima wé, upsātā pese na te aima rowasu'u da, rob'ui'éré na, ZeZusihī wasu'u hā sena na waihu'u da.

Zuwā Batitaha potozé wasu'u

⁵ Erodī hā zudezu norī nhipti'ai 're, apito na 're hāimana mono ré hā, aibā hā te 're hāimana, Zacaria na ĩsisi hā. Zacaria hā sasedoti, 'Re ĩhāimana u'āsi mono ma da'āma romhuri'wa. Abizaha nhihudu norī me, te te tāma 're romhuri za'ra. ĩmro nhisi hā, Izabé na ĩsisi hā. Izabéhé hi'rada hā, Arā na ĩsisi hā. 'Re ĩhāimana u'āsi mono ma, da'āma romhuri'wa, Arā hā.

⁶ Zacaria norī hā ma tō 're hāimana wé zahuré. 'Re ĩhāimana u'āsi mono nhimiroti te te 're 'madā'ā pese zahuré. Taha wa, tāma wé zahuré di, 'Re ĩhāimana u'āsi mono ma.

⁷ Tane nheré, 'ra zahuré ō di. Izabé hā 'ra waihu'u ō wa, ma tō 'ra āna si'ĩhi zahuré.

⁸ Tawamhā nimahā bātā na ma tō Zacaria hā tinhimirohuri hā 'manha, sasedoti te te 're ĩ'manharī za'ra mono hā, 'Re ĩhāimana u'āsi mono āma 're ĩdawata za'ra mono zéb 'remhā. Taha te hā bātā wa, ma tō romhuri 'manha.

⁹ ĩsiré norī hā ma tō tāma pisutu za'ra, 'ri para u sébré da, te te tāma romhuri da. Taha wa, 'ri para u, ma tō oto ázé Zacaria hā, wedewati ĩsādaze hā wedeza ne na te te tāma zata da.

¹⁰⁻¹¹ Tawamhā te te tāma zata ré, te ai'ubumro ni rowī, 'Re ĩhāimana u'āsi mono ma, mre me zusi da. Āne ré, hāiwa hawimhā uburé Danhib'apito ma romhuri'wa hā ma tō tāma sihāi'ré. Wedeza nhimire niwī te za, ĩsō're uwaibaba, ro'o ré, wedewati ĩsādaze hā.

¹² Tawamhā te te sāmri wamhā, ma tāma pē'ewara, Zacaria hā. Te te rosa'rata waihu'u ō di.

¹³ Tawamhā te tāma tinha:

– Zacaria, aipahi tō. 'Re ĩhāimana u'āsi mono, ma tō aimreme hā wapa, tiwi ĩrowaptērézém na hā. Aimro te za oto t'ra. Waptā'ā wapsi, ai'ra te za ĩsisi, Zuwā na.

¹⁴ Ai'ra hā aima waptā'ā aba wapsi, aima rowé wa'aba di za. Da'ahā norī ma zama, rowé za'ra di za.

¹⁵⁻¹⁶ Prédu wapsi, ĩsimiroti hā pire di za. Taha wa, te za ĩsimiroti pire na waihu'u, 'Re ĩhāimana u'āsi mono hā. Uwa 'rāi wa'u ĩsé hā te te 're hāsi mono ō di za. Duré ázé hā te te 're hāsi mono ō di za. Waptā'ā hawim haré, te za 'Re ĩhāimana u'āsi mono pē'ézani ré 're mo. Taha si, te za te te 're wapari pese. Taha wa, te za tisiré Izarazéhé nhihudu norī hā te te 're apawapto tinhimiroti na, 'Re ĩhāimana u'āsi mono nhimiroti si, da te 're 'madā'ā pese za'ra mono da oto.

¹⁷ 'Re ĩhāimana u'āsi mono zadawa wasu'u'wa, te za 're mo. Wahi'rada Eriasihi ne, te za 're mo, mre me pire na, duré waihu'u pese na. Tawamhā ai'ra nhimiroti zarina, te za damama norī hā t'ra norī hā te te 're sawi pese za'ra. Duré dapo're ō wamhā, te za apā 're dasipizari za'ra, 're ĩdanomro wé mono zarina, oto 're danomro mono da. Āne wamhā, te za

danhimiza'rese sô 're danhimipari za'ra, Danhib'apito zô. — ãne ma tô İwana ré âma tâma rowasu'u, Zacariaha ma, hâiwa hawi romhuri'wa hâ.

¹⁸Tawamhâ Zacaria asa ma tô sadanha, romhuri'wa hâ:

— E niha wa za asaze, tane na hâ. Wa hâ İhi uptabire oto. Duré İmro zama, İhi uptabire. — ãne hâiwa hawi romhuri'wai ma, te tinha.

¹⁹Tawamhâ te duré asa tâma tinha:

— Wa hâ Dabrizé, 'Re İhâimana u'âsi mono ma romhuri'wa. Ta hâ ma tô we İzato, rowasu'uwe hâ te aima wasu'u da.

²⁰Tazahâ, İnhimirowasu'u na İzazei ô di, sena na. Taha wa, te za aima rob'manha 'Re İhâimana u'âsi mono hâ, aimreme ô na, ai'ra waptâ'âzéb u. Ai'ra waptâ'â wapsi, te za apâ aima tisô, aimreme hâ. — ãne ma tô tâma rowasu'u, Dabrizé hâ.

²¹Zahadu te rowi sô mapari za'ra ni, Zacariaha zô. Sô danhimipari za'ra wamhâ, ma âma tatob'uzu za'ra ni, sô İrowaptâ'âzém na hâ, 'ri para.

²²Tawamhâ Zacaria hâ ma tô oto datême watobro, rob u. Datême watobro wamhâ, mreime waihu'u ô di. Taha wa, te dasima nharî za'ra ni:

— Marî hâ ma tô sô'awi sabu Zacaria hâ, danhotô 'rowi, da te 're İrosawêrê za'ra mono ne hâ. — ãne te dasima nharî za'ra ni. Tawamhâ, mreime waihu'u ô wa, ma tô tinhiptômo na si dama rowasu'u.

²³Tawamhâ Zacaria, te te romhuri pari, te apâ mo, âma 're İdawata za'ra mono zém hawi, tinhorôwa u.

²⁴Syry na âma ronomro wi, ma tô tiwasâ, Izabé hâ. Tawamhâ a'amo İmrotô na âma İsi'utôrizém na hâ watobro ô di, tinhorôwa hawimhâ.

²⁵Tawamhâ te sima tinha:

— ãhâna ma tô Wanhib'apito hâ İpawapto. Da te oto İma 're nharî za'ra mono ô di za, İ'ra ô na hâ. — ãne te tinha, Izabé hâ.

Zezusi za İwaptâ'âzém na, Dabrizé te te İwaihu'uzé wasu'u, Marizaha ma

²⁶⁻²⁷Tawamhâ a'amo İmropâ hâ Izabéhé âma oto si'utôri wamhâ, İwasâ na hâ, 'Re İhâimana u'âsi mono hâ ma we duré satô ti'ai u, Dabrizé hâ, hâiwa âma tâma İromhuri'wa hâ. Nazaré u, ma we satô, pi'ô ubuni ma, te te sadawa wasu'u da. Darireza na danhipti'a nho'ômo nhisi âma, Nazaré hâ. Pi'ô nhisi hâ, Mariza na İsisi hâ. Ta hâ, azarudu. Niwapsi, Zuzéhé me te za sina timro zahuré, apito Dawihi nhihudu me.

²⁸Tawamhâ ma tô we İtême wi, Marizaha u, hâiwa âma romhuri'wa hâ. İtême wisi wamhâ, te tâma tinha:

— Mariza, rowê na 're aihâimana mono. 'Re İhâimana u'âsi mono, ma tô aiwêsâ, Wanhib'apito hâ. Taha wa, te za aima tinhopru, İwê uptabi na. — ãne te tâma rowasu'u, Marizaha ma.

²⁹Tane nherê, Mariza hâ te te waihu'u ô di, İsimirowasu'u hâ. Taha wa, tipê'ê na, te sima tinha:

— E niha bâ, te ône İma tinha. — ãne te sima tinha.

³⁰Tawamhâ te duré tâma tinha, hâiwa hawi romhuri'wa hâ:

— Mariza, aipahi tô. 'Re aimorî wê na, ma tô 'Re İhâimana u'âsi mono hâ aiwêsâ.

³¹Taha wa, te za aiwasâ. Ai'ra te za aibâ na aima podo. Ai'ra hâ poto wapsi, Zezusi na te za İsisi.

³²Ai'ra hâ prédu wapsi, dama pire na te za 're mo. 'Re İhâimana u'âsi mono 'ra na İsisi hâ za, danhipai u İpire uptabi 'ra na. Ta hâ uburé Danhib'apito uptabi hâ te za ti'ra ma pisutu, tihirata ne, si'apito da, Dawihi ne.

³³Danhib'apito 're morî wa, Zacoho nhihudu sidâpâsi, te za İsib'apito 're sâmrâ. Ône u'âsi. Te za âma 're sib'a'uwe u'âsi za'ra. — ãne te Marizaha ma rowasu'u, hâiwa hawi romhuri'wa hâ.

³⁴Tawamhâ asa te tâma tinha, Mariza hâ:

— E niha wa za İ'ra, aibâ te sa'rese ô nherê. — ãne te tâma tinha.

³⁵Tawamhâ asa te tâma tinha:

— 'Re İhâimana u'âsi mono, te za we aipawapto, tiwaihu'u pese na aiwasâ da, ai'ra da. Taha da, te za Tipê'êzani hâ we atême satô. Taha wa, 'Re İhâimana u'âsi mono 'ra na, te za ai'ra hâ da te 're sisi za'ra. — ãne te Marizaha ma rowasu'u.

³⁶Te duré tâma tinha:

— Ana wapté hâ wa za duré aima wasu'u, Izabé hâ. Si'tih uptabi nherê, ma tô tiwasâ. 'Ra waihu'u ô na, ma tô da te 're wasu'u za'ra. Tazahâ, wasâ ré sâmrâ ré hâ, 6 na ma tô oto âma ai'utô, a'amo hâ.

³⁷ Uburé marī hā tāma waihu'u pese di, 'Re ihāimana u'āsi mono ma. Taha wa, ma tō tiwasā. — Āne ma tō tāma rowasu'u.

³⁸ Tawamhā Mariza te asa tāma tinha:

— Wa hā, Wanhib'apito ma, romhuri'wa. Ta hā te te ĩma pisutu wa, wa tō ĩsima wē, ĩmreme hā. — Āne Mariza te tāma tinha.

Tawamhā te te tāma rowasu'u pari, ma tō mo apā hāiwa u, romhuri'wa hā.

Mariza ĩmorizé wasu'u, Izabéhé u

³⁹⁻⁴⁰ Tawamhā bādā umro na āma si'utōrī pari, ma tō Mariza hā sima robza'ra pese, tina waptéb u morī da, Izabéhé u. Tawamhā Zudeza na danhipti'a nho'ōmo nhisi u, te ĩtēme mo si'aba'ré na, 'ri ahā u, sa'a u. Tawamhā ma tō oto wi, Zacariaha nhorōwa u. 'Ri para u sébré wamhā, ma tō tina wapté hā sawi.

⁴¹ Tawamhā Izabé hā Mariza te te ĩsawizém na te te wapari wamhā, ma tō ĩwasā hā 're rési, ĩdi'i 'remhā. Tawamhā ma tō ti'ra wapté ma rowasu'u, Izabé hā.

⁴² 'Re ihāimana u'āsi mono pē'ēzani te te tāma ĩwaihu'uzéb zarina, rowē te, te mreme 'rāihā na tāma rowasu'u, āne:

— A hā pi'ō norī nhapai u, ma tō aima tinhopru, ĩwē uptabi na, 'Re ihāimana u'āsi mono hā. Ai'ra ma zama, te za tinhopru, ĩwē uptabi na, ai'uté norī nhapai u.

⁴³ Duré a hā Wanhib'apito na te za 're aimo. Taha wa, ĩma aipire di. Tane nherē, asisawi ō di, we ĩtēme aimorī tō da. Taha wa, ĩma rowē di.

⁴⁴ Aimreme na ĩzawi wi, ma tō ĩ'ra hā 're rési, ĩdi'i 'remhā, rowē te.

⁴⁵ A hā aima rowē di. E tihai wa. Wanhib'apito hā te te aima ĩnharizém na āma sazei wa, sena na. Taha wa, aima rowē di. — Āne te ti'ra wapté ma tinha, Izabé hā.

Mariza, 'Re ihāimana u'āsi mono āma ĩwatazé wasu'u

⁴⁶ Tawamhā Mariza te tinha:

⁴⁷⁻⁴⁹ — Wanhib'apito āma, wa za 're ĩwata u'āsi. 'Re ihāimana u'āsi mono hā ĩnho'reptui'wa, te 're mo. Tāma ĩwapure nherē, ma tō ĩāma rosa'rata. Taha wa, ĩpē'ē na, wa 're ĩto. 'Re ihāimana u'āsi mono hā ĩwaihu'u pe hā, ĩwē uptabi hā ĩwē na ma tō ĩma 'manha. Taha wa, ĩwē na te te ĩma ĩmanharī wē na, te za dasima da te 're ĩwasu'u u'āsi.

⁵⁰ ĩmreme, da te 're 'madā'ā pese za'ra mono wamhā, te za da'āma 're pē'ēzé u'āsi. Ōne u'āsi.

⁵¹ Tiwaihu'u pese na 'rāwi sina 're ĩwata za'ra mono norī hā te za te te wama 're awano'ō.

⁵² Apito norī hā te za roti hawi te te 're azani, wapure na oto 're nomro mono da. Tipire na sina 're ĩwata za'ra mono ō norī si te za te te 're apisutu, pire na oto 're nomro mono da.

⁵³ Mra, da te 're sépata za'ra mono wamhā, sa'ētē na te za dama 're sōpru. ĩsibrob ahā norī hā te za sisitē te te 're azatōrī, ubana oto 're nomro mono da.

⁵⁴⁻⁵⁵ Duréihā wahi'rata norī ma, ma tō ropisutu, ĩsihudu sidápāsi te te 're apawapto mono da. Taha wa, ma tō wa norī hā Izarazéhé nhihudu norī hā te te 're wa'apawapto, wa te tāma 're ĩromhuri za'ra mono hā. Simizawi pese wa, ma tō Abra'āhā āma 're pē'ēzé u'āsi. Tiwi simani ō di. Duré ĩsihudu sidápāsi, ma tō āma 're pē'ēzé u'āsi za'ra. Tiwi simani za'ra ō di.

Āne 'Re ihāimana u'āsi mono āma te tiwata, Mariza hā.

⁵⁶ Tawamhā Izabéhé 'rata sāmra ré, ma tō a'amo hā si'ubdatō āma ai'utō. Taha pari, te apā mo Mariza hā, tinhorōwa u.

Zuwā Batitaha waptā'āzé wasu'u

⁵⁷ Tawamhā Izabéhé āma ĩ'ra hā ĩsépu'uzé hā ma tō bādā hā ĩwa waptārā. Tawamhā ma tō tāma podō, 'watébrēmi na.

⁵⁸ Poto wamhā, ĩ'rata 're ĩsōrōwa za'ra mono norī hā ma tō ĩwasu'u hā wapari za'ra. ĩsisānawā norī zama, ma tō ĩwasu'u hā wapari za'ra, 'Re ihāimana u'āsi mono hā tiwē hā te te tāma ĩsōmri na hā. Taha wa, te uburé ĩsabādā 're to za'ra.

⁵⁹ Tawamhā bādā hā ĩwaptā'āzém na hā, 7 na ma tō āma ai'utō. Taha wa, awēm na ma oto sihāiwata nhizāri ni. 'Re ihāimana u'āsi mono nhib'a'uwē 're morī da, ĩpibui pese zéb da, ma sihāiwata nhizāri ni. Tawamhā ĩmama nhisi na, te aré sisi za'ra ai'uté hā, Zacaria na, ĩsisānawā norī hā.

⁶⁰ Tazahā, ĩna hā te tāma nharī za'ra:

— Maze di. Zuwā na, te za tinhisi. — Āne te tāma nharī za'ra.

⁶¹ Tawamhā asa te tāma nharī za'ra:

— E mahāta ĩmama sisānawā, āma ĩsisizéb da hā. E Zuwā na, ma tō ti'manhisi. Mare di. ĩmama sisānawā hā āma 'manhisi ō di, Zuwā na. — Āne te ĩna ma nharī za'ra ni.

⁶² Tawamhā Zacaria te sadanharī za'ra, ĩ'ra nhisi na.

⁶³ Tawamhã tinhiptômo na, ma tô dama tinha, ïbaihã te te tâma âri za'ra da, ti'ra nhisi na te te rob'ui'ére da. Tawamhã wedepo'ore hã ma tô tâma âri ni, ïsryre hã. Tawamhã âne ma tô rob'ui'ére: “Zuwã na ïsisi hã za.” Âne ma tô tâma waihu'u za'ra. Tawamhã ïsisânawã nori hã te âma titob'uzu za'ra, tinhisi na te te sisi ô wa.

⁶⁴ Tawamhã ti'ra nhisi na te te rob'ui'ére pari, ma oto mreme watobro apã, Zacaria hã. Tawamhã 'Re ïhãimana u'âsi mono âma te tiwata, sôpu wa.

⁶⁵ Tawamhã 'ri 'rata 're ïsi'ubumroi mono nori hã ïwasu'u te te wapari za'ra wamhã, ma tô tâma tipahi za'ra, òne hã tâma sa'rese za'ra ô wa. Tawamhã sa'a âma, ma tô ïwasu'u wapari za'ra ni, daro mono bâ, Zudeza na danhipti'a nho'ômo nhisi âma.

⁶⁶ Tawamhã, da te wapari za'ra wamhã, ïwasu'u hã wê wa, te âma rosa'rata u'âsi za'ra ni. Te duré âma tasisadhanari za'ra ni:

– Prédu wamhã, e marĩ na te za 're hãimana, 'watébrémi hã. – Âne te dasima nharĩ za'ra ni, ïwê na te te sada 'manharĩ wa, Zuwãhã zada, 'Re ïhãimana u'âsi mono hã.

Zacaria, 'Re ïhãimana u'âsi mono âma ïwatazé wasu'u

⁶⁷ Tawamhã Zacaria hã 'Re ïhãimana u'âsi mono pë'ëzani nhimipawaptom na, ma tô mre, 'Re ïhãimana u'âsi mono zadawa wasu'u na, âne:

⁶⁸ – 'Re ïhãimana u'âsi mono hã wê di, Wanhib'apito hã. Wê wa, wa za âma 're wawata u'âsi za'ra. Wa nori hã Izarazéhé nhihudu, te za we oto wapawaptob za'ra, wanhitob'ru nhimiwada'uri hã wama wapu za'ra da, rowê na 're wasi'ubumroi mono da.

⁶⁹ Ma tô we oto watême satô ïwaihu'u pe hã, Wanho'reptui'wa da hã, apito Dawihi nhihudu hã. Tãma ïromhuri'wa, Dawi hã.

⁷⁰ Âne duréihã, ma tô romhã ré rowa'ôto za'ra dama, 'Re ïhãimana u'âsi mono zadawa wasu'u 'rata 'wa nori hã, te te sima ïpisutu za'ra nori hã. Wê uptabi za'ra di.

⁷¹ Wazawi'ô'wa nori wi, ma tô wama âma ropisutu, 'Re ïhãimana u'âsi mono hã, te te 're wa'anho'reptui mono da, wawê'ô'wa nori, te te 're wawada'uri tô za'ra mono da.

⁷² Te za tô te te dama 're ab'manharĩ wê u'âsi, wahi'rata nori ma, te te ïropisutuzéb uwaibaba. Tô sena te te tâma ïropisutuzé hã, te za te te âma 're a'uwaimrami u'âsi. Tiwi simani ô di za.

⁷³⁻⁷⁵ Duréihã ma tô Abra'ãhã ma tinha, tô sena ïsihudu te te 're wa'apawapto mono da, wawê'ô'wa nori wi, te te 're wa'anho'reptui mono da, wapahi ãna, wa te tâma 're romhuri za'ra mono da, duré ti'ai âma ré, ïsô'a 're wanomro mono da, wawê uptabi na.

Âne Zacaria hã ma tô dama tinha.

⁷⁶ Te duré tinha, ti'ra ma:

– 'Re ïhãimana u'âsi mono hã, danhipai u ïpire uptabi. A hã ïsadawa wasu'u'wa, te za 're aimo. ïsadawa wasu'u'wa na, te za aiwaihu'u za'ra ni. Datême te za 're aimo, Wanhib'apito wana, asimiroti na 're da'apawapto mono da, Wanhib'apito zô danhimipari sina 're danomro wê mono da.

⁷⁷ Datême 're aimori wamhã, te za 're ïda'apo're pu'u mo, âne: “'Re ïhãimana u'âsi mono hã te za te te aima 're apari 'wa, marĩ hã 're ï'manharĩ wasété za'ra wa'aba mono zé hã. Âne te za te te 're asô'reptu za'ra wa'wa.” Âne te za 're ïda'apo're pu'u mo.

⁷⁸ Wahuré te tâma 're hãimana, ïpë'ëzézé hã, duré ïsimizawi pese zé hã. Âne 'Re ïhãimana u'âsi mono hã, Wanhib'apito hã. Taha wa, te za oto te te 're wa'anho'reptu, rowê na 're wanomro mono da. Bãdá 'rãri watobro wamhã, tâibã oto robra hã. Tawamhã dama 're rowê za'ra mono di za. Tane, Wanho'reptui'wa hã te te wama 're apari mono wamhã, marĩ, wa te 're ï'manharĩ wasété za'ra mono zé hã, taha wa, wama 're rowê za'ra mono di za.

⁷⁹ Tawamhã ab're pipa te, robzei'ô u'âsi, 're wanomro mono ô di za. Te za oto te te 're wa'anhimroi wê, rowê na 're ïwanomro mono zém na.

Âne Zacaria hã te ti'ra ma rowasu'u.

⁸⁰ Tawamhã 'watébrémi hã ma tô tiprédu. ïhãiba hã siptete di, prédu wamhã. Tiwasété wi siptete wamhã, 're mori wê di. A'ubuni wi, te oto 're sãmra. Bãdá ïwa waptã'ã wapsi, te za datême 're mo, te te dama 're sadawa wasu'u mono da, Izarazéhé nhihudu nori ma.

2

Zezihi waptã'ázé wasu'u

Mateusi 1.18-25

¹⁻² Tawamhã Zuwã hã waptã'ã wamhã, ma tô Roma âma danhib'apito Adusitu hã dama ti'ru, uburé danhisi na, da te daza'rata za'ra da. Dahãiba te te waihu'u da, ma tô dama ti'ru, daza'ratazé hã. Daza'rui mono bâ danhib'apito uptabi, apito Adusitu hã. Tawamhã ma tô

dahâiba za'rata na sâna'rata za'ra ni, Sirenizu hã, ãsadowa para te te dama 're roti mono ré, Ñiriza na ti'a nhisi âma.

³ Taha wa, dahi'rata za'ru u, ma tô 're danomro daro mono bâ, danhisi na da te 're daza'rata za'ra mono da.

⁴ Taha wa, Zuzé hã te mo, tihi'rata za'ru u. Apito Dawi hã ãhi'rata wa, tihi'rata za'ru u te mo, Beré u. Zudeza na danhipti'a nho'ômo nhisi âma, Beré hã. Nazaré hawi te mo, Beré u. Darireza na danhipti'a nho'ômo nhisi âma, Nazaré hã.

⁵ Timro me, te tineb zahuré Marizaha me, ãsisi na, da te dame rob'ui'ééré zahuré da. Wasã ré, te sapró.

⁶⁻⁷ Tawamhã Beré u, ma tô aimasisi zahuré. Beré âma simasisi ré, ma tô ãwasã hã âma sépu, te te âma ãrosôwada 'rada hã. Tawamhã ma tô tâma waptãrã, aibã 'rare hã. Waptã'ã wamhã, zazahã pa na ma tô ubu, ãna hã. Te te ubu pari, ma tô tihi, nomro da, danhimizama hã 're ãsaihuri mono zéb 're, wede're wa. 'Re ãdanhimi'wara mono zéb âma hã, 'ri 're baba hã tâma 'maihãimana zahuré ô wa, ma tame tihi.

Pone'ërebã 'madã'ã'wa nori ma, romhuri'wa te te ãrowasu'uzé wasu'u

⁸ Tamemhã pone'ërebã 'madã'ã'wa nori hã ma tô mara bãre asimro, Beré 'rata. Tinhimizama te 'madã'ã'za'ra a'ubuni wi, rom na.

⁹ Tawamhã tinhimizama te te 'madã'ã'za'ra ré, misi, ma tâma sihãiré'za'ra, hãiwa hawimhã uburé Danhib'apito ma romhuri'wa hã. Tawamhã aibã nori 'rata, rowa'a ma tô tâma rowa'a za'ra. Rowa'a sa'ëté di, 'Re ãhãimana u'ãsi mono hawimhã. Tawamhã, ãsisiwi rowa'a za'ra wamhã, ma tô tâma tipahi za'ra.

¹⁰ Tawamhã hãiwa hawi romhuri'wa, te tâma nharĩ za'ra:

— Aipahi za'ra wa'aba tô. Wa hã wa wei mo, rowasu'uwé hã te aima wasu'u za'ra wa'aba da. Rowasu'uwé hã da te wapari za'ra wamhã, dama 're rowé uptabi za'ra mono di za.

¹¹ ã bãtã na ma tô waptãrã Beré âma, danho'reptui'wa da hã, Dawihi za'ru ãma. Ta hã 'Re ãhãimana u'ãsi mono te te ãpisudu, Danho'reptui'wa da, uburé Danhib'apito da hã.

¹² ãwaptã'ãzé hã tô sena na waihu'u za'ra wa'aba da, te za ai'uté hã ãsabu za'ra wa'wa. Wede're wa, te nomro, zazahã pa na, ubu ré. — ãne te tâma rowasu'u za'ra, hãiwa hawi romhuri'wa hã.

¹³ Tawamhã awa'awi ma tô tâma sihãiré'za'ra romhuri'wa nori hã, ahã uptabi na, hãiwa hawimhã. 'Re ãhãimana u'ãsi mono âma te tiwata za'ra, ãne:

¹⁴ — 'Re ãhãimana u'ãsi mono hã sôprub di, hãiwa âma 're ãsãmra mono hã. Ma tô sima dawé, ãwé hã te te dama 're anhomri mono da, rowé na 're danomro mono da oto, ti'ai âma hã. — ãne te tinho're na ãma tiwata za'ra.

¹⁵ Tawamhã romhuri'wa nori hã hãiwa u apã si'aba'rei wamhã, pone'ërebã 'madã'ã'wa nori hã ma tô sima nharĩ za'ra:

— Oto wasi'aba'rei wa'aba Beré u, Wanhib'apito, marĩ te te wama ãwaihu'u za'ra hã wa te sabu za'ra da. — ãne te si'ru za'ra.

¹⁶ Tawamhã si'aba're na te oto ai'aba're, Beré u. Tame ma tô sabu za'ra Mariza hã, Zuzéhé me. Ai'uté zama, ma duré sabu za'ra. Danhimizama sazé wa, wede're wa, te nomro.

¹⁷ Te te 'madã'ã'za'ra wamhã, ma tô Zuzé nori ma rowasu'u za'ra, hãiwa hawi romhuri'wa nori nhimirowasu'u na, ai'uté âma hã.

¹⁸ Uburé da te wapari za'ra wamhã, ma tô âma tatob'uzu za'ra ni, pone'ërebã 'madã'ã'wa nori nhimirowasu'u na hã.

¹⁹ Mariza hã ãsimirowasu'u na te te 're rosa'rata u'ãsi, tipé'ë na.

²⁰ Taha pari, te apã ai'aba're, pone'ërebã 'madã'ã'wa nori hã. Morĩ sina, te âma tiwata za'ra, 'Re ãhãimana u'ãsi mono âma, rowasu'u te te ãwapari za'ra zém na, duré te te ã'madã'ã'za'ra zém na. Hãiwa hawi romhuri'wa nhimirowasu'u zarina, tô sena na te te waihu'u za'ra wa, ma tô tinho're na ãma tiwata za'ra.

ZeZusi na, da te ãsisi wasu'u

²¹ Romhuri misi âma si'utôri pari, ai'uté ãwaptã'ãzém na hã, ma tô oto sihãiwata nhizãri ni. Ma tô duré sisi zahuré ãna nori hã, ZeZusi na. ã hã ãsisi hã waptã'ã ô ré, hãiwa hawi romhuri'wa te te tâma ãwaihu'uzéb zarina, ma sisi zahuré.

²²⁻²⁴ Tawamhã bãdã ma tô oto ãwa waptãrã, 'Re ãhãimana u'ãsi mono nhimiroti te te âma uwaimrami zahuré da, Zuzé nori hã, Marizaha me. Te za âma uwaimrami zahuré, ti'ra na, duré pi'ô na. ãne Mozésihi nhimi'ui'ééré hã, 'Re ãhãimana u'ãsi mono nhimiroti na: "Aibã 'rare, waptã'ã wamhã, te te âma ãrosôwada 'rada hã te za ãmama nori te te tâma 're sômri za'ra apã, 'Re ãhãimana u'ãsi mono ma." ãne ãsimiroti hã. ãsimiroti hãiba amo hã, ãne: "Pi'ô hã 're 'ra za'ra mono wamhã, te za maparane naire hã te te tâma 're sômri za'ra, 'Re ãhãimana u'ãsi mono ma. Naire ô wamhã, te za maparane utu'ure te te tâma 're sômri za'ra, apã tâma 're

hâiba wê za'ra mono da, pi'ô norî hâ." Âne ĩsimiroti hâ. Taha wa, ĩsimiroti zarina, te oto Zuzé norî hâ tineb zahuré ti'ra ré, Zeruzarê u, 'Re ĩhâimana u'âsi mono ma, ti'ra te te sômri zahuré da, duré si te te tâma sômri zahuré da, da te tâma zata zahuré da.

Simi'âhâ wasu'u

²⁵ Tawamhâ aibâ hâ te 're sâmbra Zeruzarê âma, Simi'â na ĩsisi hâ. Wê na te 're mo, Simi'â hâ. 'Re ĩhâimana u'âsi mono nhimiroti hâ te te 're 'madââ pese. Danho'reptui'wa zô, te 're simipari u'âsi, Izarazéhé nhihudu norî te te sô'reptu za'ra da.

²⁶ 'Re ĩhâimana u'âsi mono pē'ēzani ré, te 're mo, Simi'â hâ. Īpē'ēzani hâ ma tō tâma ropisutu, âne: "Atâ'â ô ré, te za Danho'reptui'wa da hâ ĩsabu, 'Re ĩhâimana u'âsi mono te te ĩpisudu hâ." Âne ma tō Simi'âhâ ma waihu'u siro.

²⁷ Tawamhâ te te tâma ĩwaihu'uzéb zarina, te oto mo, 'Re ĩhâimana u'âsi mono âma 're ĩdawata za'ra mono zéb u, Simi'â hâ. ĩsa'u si, ma tō tizasi zahuré, Zuzé norî hâ, 'Re ĩhâimana u'âsi mono nhimiroti te te âma uwaimrami zahuré da.

²⁸ Tawamhâ Simi'â, ma tō tipa ti'â ĩ'ra hâ, 'Re ĩhâimana u'âsi mono âma wata da. Âne te âma tiwata:

²⁹ – Âhâna ma tō âma ĩma ĩ'uwaimra, aimreme hâ. Taha wa, ĩto na, wa za a'rê.

³⁰ Wa hâ ĩtômo na, wa tō oto sabu, danho'reptui'wa da hâ.

³¹ Uburé da'udâna zama ĩpisudu hâ wa tō sabu.

³² Rob'uiwêzé hâ te te bādâdi uiwê wamhâ, damorî wê di. Tane te za zudezu'ô norî ma, te te 're awaihu'u asimiroti hâ, âma 're nomro wê mono da. Wa norî ma, 're rowê za'ra mono di za, asib'a'uwê norî ma, Izarazéhé nhihudu norî ma, ĩsabâdâ za da te dasima 're wawasu'u wê u'âsi za'ra mono wa.

Âne te 'Re ĩhâimana u'âsi mono âma tiwata, Simi'â hâ.

³³ Tawamhâ Simi'âhâ mreime, 'watébrémi âma te te wapari zahuré wamhâ, ma tō âma titob'uzu zahuré, ĩmama norî hâ, ĩna me.

³⁴⁻³⁵ Tawamhâ Simi'â hâ te tiwi rowaptê, 'Re ĩhâimana u'âsi mono wi, te te 're pawaptob zahuré mono da. Marizaha ma, te duré tinha:

– 'Re ĩhâimana u'âsi mono, ma tō ai'ra hâ pisutu, watême wei morî da, Izarazé na warom nhisi u. Tawamhâ, watême wei morî wa, te za da'ahâ na danho'reptuzé hâ da te dasina 're waihu'u za'ra. Tane nherê, da'ahâ na danho'reptuzé hâ da te dasina 're waihu'u za'ra mono ô di za. Danho'reptui'wa na da te dasina 're waihu'u za'ra mono da, te te pisutu nherê, niwapsi te za ai'ra hâ dasiwi wê'ô ni, da'ahâ na. Tawamhâ da te dasiwi wê'ô wamhâ, dama waihu'u pese di za oto, danhimirosa'rata wasédé hâ ai'ra âma hâ. Sib'ézé ĩ'wa pese na, da te 're danhihâri za'ra mono wamhâ, dama 're rowê za'ra mono ô di za. Tane ai'ra hâ da te dasiwi wê'ô wamhâ, aipē'ézé ahâ di za. – Âne te romhâ ré Zezusihî na ma rowasu'u, Simi'â hâ.

Âna na, pi'ô nhisi wasu'u

³⁶⁻³⁸ Tawamhâ pi'ô hâ te 're hâimana, Âna na ĩsisi hâ. 'Re ĩhâimana u'âsi mono zadawa wasu'u'wa, pi'ô hâ. ĩmama nhisi hâ, Panuwé na ĩsisi hâ. ĩhî'rata nhisi hâ, Asé na ĩsisi hâ. Ma tō oto si'ŋhi uptabi, Âna hâ. Sahuré 're simasisi zahuré mono ré, ma tō âma tiwahub zahuré, 7 na. Tawamhâ ĩmro, ma tō dârâ. Tiwi ĩdâ'ázém na hâ ma tō oto âma tiwahub ahâ, 84 na. Pi'ô hâ te 're sâmbra u'âsi, 'Re ĩhâimana u'âsi mono âma 're ĩdawata za'ra mono zéb âma, 'ri 'wawi wa'ra âma. Rowa'a ré zama, te âma 're wata, barana zama. Nimahâ bâtâ na si, te sai âna 're sâmbra, 'Re ĩhâimana u'âsi mono ma, 're mreime mono da. Tawamhâ Simi'â hâ Marizaha ma, te te rowasu'u ré, ma tō ĩtême tiwisi za'ra, Âna hâ. Tawamhâ ai'uté te te sabui wê te, 'Re ĩhâimana u'âsi mono âma te tiwata, sôpru wa. Tawamhâ ma tō te te dama 're wasu'u, Danho'reptui'wa da hâ, ai'uté hâ. Danho'reptui'wa zô, 're ĩsimipari za'ra mono norî ma, ma tō te te 're rowasu'u za'ra. Ta norî hâ te sô 're simipari za'ra, te te da'anho'reptu da, Zeruzarê âma.

Nazaré u, apâ ĩnebzé wasu'u

³⁹ Zuzé norî hâ zahadu te aimasisi, Zeruzarê âma. Tame simasisi ré, ma tō âma uwaimrami zahuré, uburé 'Re ĩhâimana u'âsi mono nhimiroti hâ. Tawamhâ te oto tineb zahuré apâ, tirob u. Darireza na danhipti'a nho'ômo nhisi u, te tineb zahuré apâ, Nazaré u. Tawamhâ ma tō aimasisi zahuré apâ, tinhorôwa u.

⁴⁰ Tawamhâ ma tō tiprédu, 'watébrémi hâ. Hâiba nhiptete di oto. ĩsimiroti hâ wê uptabi di duré. 'Re ĩhâimana u'âsi mono te te 're pawapto mono wa, wê uptabi di, ĩsimiroti hâ.

Zezusi hâ, 'Re ĩhâimana u'âsi mono âma 're ĩdawata za'ra mono zéb âma, ĩsâmrázé wasu'u

⁴¹ Wahup sidâpâsi, te Zezusihi mama norî hã dame 're neb zahuré Zeruzarê u, dato hã da te 're î'manharî za'ra mono zéb u hã, 'Re îhâimana u'âsi mono, Ezitu hawi te te îdawabuzém na âma dasipo're pu'u za'ra da, Pascowa na dato nhisi hã.

⁴² Tawamhã 12 na Zezusihi âma wahu wamhã, te duré îme timorî zahuré oto, datoi u hã.

⁴³ Tawamhã dasi'rã'ôtô pari, îmama norî hã ma tô dame tipusi zahuré, tirob u apâ neb zahuré da. Tazahã, Zezusi hã te zahadu nhamra, Zeruzarê âma, timama norî za'u. Îsa'u îsâmra zahuré zém na hã te te waihu'u zahuré ô di.

⁴⁴ Dame morî newa, te îmama norî hã dame tineb zahuré apâ, tirob u, te te âma rosa'rata zahuré âna. Bâtâ bâ, te dame tineb zahuré. Tawamhã te sô da'ab'madâ'â zahuré. Îsisânawã norî, te te sô ab'madâ'â zahuré. Îsiwadi norî zama, te duré sô ab'madâ'â zahuré. Tane nherê, ma tô sô amrami zahuré.

⁴⁵ Tawamhã, sô simrami zahuré wamhã, te apâ tineb zahuré, sô rîti zahuré da.

⁴⁶ Tawamhã si'ubdatô bâdã âma ne wapsi, ma tô sôpêtê zahuré, 'Re îhâimana u'âsi mono nhorôwa âma dame sãmra ré. Zudezu norî ma, rowahutu'wa norî me, te dame nhamra. Tame te Zezusi hã da'awapa, roti na. Te duré roti na da'azadanha, roti hã te te tâma waihu'u pese za'ra da.

⁴⁷ Zezusi hã roti te te waihu'u pese wa, ma tô âma tatob'uzu za'ra ni, îsimirowaihu'u na hã.

⁴⁸ Duré îmama norî hã te te 'madâ'â zahuré wamhã, ma duré âma titob'uzu zahuré. Tawamhã îna te tâma tinha:

— Î'ra, e tiha da, ma tô âne hã wama î'manha. Taré wa tô asô 're warîti, aimama me, wapê'êzé sina. — Âne te îna hã tâma tinha.

⁴⁹ Tawamhã te asa tâma nharî zahuré:

— E marî da, ma tô îzô 're airîti aba mo. E î'âma rowaihu'u aba âna, îmama nhorôwa âma înhamra na hã.

⁵⁰ Tane nherê, te te waihu'u zahuré ô di, te te înharîzém na hã.

⁵¹ Tawamhã Zezusi te îme timorî zahuré apâ, Nazaré u. Tame timama norî mreime, te te 're wapari pese. Îna hã î'ra tâma îsiwasu'uzéb zahuré na, te te 're rosa'rata u'âsi, tipê'ê na.

⁵² Tawamhã ma tô oto tiprédu, Zezusi hã. Îsimiroti hã wê uptabi di. Wê na 're morî wa, ma tô wêsã, 'Re îhâimana u'âsi mono hã. Îsiré zudezu norî hã ma tô duré wêsãmri za'ra.

3

Zuwã Batita te te dama îrotizé wasu'u

Mateusi 3.1-12; Marcusi 1.1-8; Zuwã 1.19-28

¹ Tawamhã 15 na ma tô âma tiwahu, Tiberizuhu âma, danhib'apito na 're hâimana mono ré, Roma âma. Îsadawa para, te Pôsi'u Piratu hã te te dama 're roti, Zudeza na danhipti'a nho'ômo nhisi âma. Duré Erodî hã te te dama 're roti îsadawa para, Darireza na danhipti'a nho'ômo nhisi âma. Duré Erodîhi no hã Piripi hã te te dama 're roti, îsadawa para, Itureza na danhipti'a nho'ômo nhisi âma, duré Taraconiti na danhipti'a nho'ômo nhisi âma. Duré Risâniza hã te te dama 're roti, îsadawa para, Abireni na danhipti'a nho'ômo nhisi âma.

² Duré Anasi hã, Caipasihi me, dama pire uptabi na te 're tineb zahuré, sasedoti na hã. Uburé 'Re îhâimana u'âsi mono ma, da'âma romhuri'wa norî ma, pire zahuré di. Âne wamhã, ma tô 'Re îhâimana u'âsi mono hã timreme hã Zuwãhã ma tisô, a'ubuni u 're sãmra mono ré. Zacariaha 'ra, Zuwã hã. Îsadawa para te te dama 're roti mono da, ma tô timreme hã tâma tisô.

³ Taha wa, Zuwã hã te oto datême 're mo, Zodã pa 'rata, 're îsi'ubumroi mono norî u. Tawamhã, datême 're morî wamhã, âne te te dama 're roti:

— Ma'âpé, aiwasété wi aipizari za'ra wa'aba, 'Re îhâimana u'âsi mono, marî 're î'manharî wasété za'ra wa'aba mono zé hã te te aima pari za'ra wa'aba da. Tawamhã â dawabzuri hã wa za te aima 're ab'manharî 'wa. — Âne ma tô te te dama 're roti, Zuwã Batita hã.

⁴ Âne wamhã, ma tô sina uwaimra romhã ré, Iza'iza te te dama îrowasu'uzé hã. Âne, 'Re îhâimana u'âsi mono zadawa wasu'u 'rata 'wa, te te dama îrowasu'uzém na rob'ui'ére hã:

“Ni'wa hã te za te te dama 're rob'mahârã, a'ubuni wi:

Bãdãdi hã asiwi ropese aba, Wanhib'apito zô.

Îmana 'rãmi bãdãdi hã sô sa'ra wa'aba, awa'awi da.

⁵ Sa'a wa'wa, rob'rehã hã te za asiwi îsito wa'wa, aiwab da. Sa'a zama, te za asiwi îhãpã 'wa. Bãdãdi nhi'oto wamhã, îmana 'rãmi te za asiwi îhiri 'wa, awa'awi da. Roptãi wamhã, te za asiwi îromhãpã 'wa, aiwab da.

⁶ Tawamhã, watême wei wisi wamhã, te za aihîni sabu za'ra ni, 'Re îhâimana u'âsi mono te te îpisudu hã, Danho'reptui'wa da. Âne te za ni'wa hã te te dama 're roti, a'ubuni wi.”

Âne romhã ré, ma tô âma rob'ui'ére, Iza'iza hã.

⁷ Tawamhã da'ahâ na ma tô Zuwãhã u 're dasihutu, â dawabzuri hã te te dama 're ab'manharĩ mono da. Tawamhã â dawabzuri hã te te dama 're ab'manharĩ mono õ rê, te ãne te te dama 're anharĩ:

— A norĩ wa'wa hã wahi ne, te 're anomro aba mo. E 'wa simiroti zarina, te we ãtẽme ai'aba'rẽi wa'wa bêté, taré â dawabzuri hã 'manharĩ za'ra wa'aba wa, 'Re ãhãimana u'ãsi mono nhimiházé wi, asisõ'reptu za'ra wa'aba da bã, aiwasédé hã rême za'ra wa'aba õ nherê.

⁸ Sena na aiwasédé hã ãrẽme za'ra wa'aba zém na, da te 're aiwaihũ'u za'ra wa'aba mono da, te za oto 're anomro wẽ wa'aba mo. Duré Abra'ãhã nhihudu wẽ te, asina 're rosa'rata za'ra wa'aba mono õ di za, 'Re ãhãimana u'ãsi mono te te 're ãaihã za'ra wa'aba mono õ na hã. 'Re ãhãimana u'ãsi mono ma, waihũ'u pese di, ã ètê norĩ ma, te te nharĩ da, tãma si'a'uwẽ za'ra da, Abra'ãhã nhihudu oto 're nomro mono da oto, êne hã.

⁹ Hãtãra hã ma tô ni'wa hã sarõtõ oto, wede te te ãma sari nhihãri da. Uburé wede hã 're ãrãi pese za'ra mono õ hã te za te te ãma 're anhihãri. Tawamhã unhama u te za te te 're anhamra. — ãne te dama ãma simiré'é Zuwã hã, 'Re ãhãimana u'ãsi mono nhimiházém na hã.

¹⁰ Tawamhã ãsimirowasu'u hã da te 're wapari za'ra mono wamhã, te sadanharĩ za'ra ni, ãne:

— E marĩ, wa za 'manharĩ za'ra ni, ãwẽ hã, 'Re ãhãimana u'ãsi mono te te wama rob'manharĩ za'ra tõ da hã. — ãne te sadanharĩ za'ra ni.

¹¹ Tawamhã asa te tãma nharĩ za'ra:

— Te za 're asipawaptob za'ra wa'aba mo. Ni'wa hã, ti'uza ãsõ'utu'u hã maparane wamhã, te za tihãiba amoi ma misi tisõ, uza õ wa. Duré ni'wa hã, tisa hã te za tihãiba amoi ma tisõ, sai õ wa. — ãne te tãma roti za'ra.

¹² Tawamhã danhib'apito ma, rob'uiprazé ubumroi'wa norĩ hã ma ãtẽme aihutu, â dawabzuri te te tãma 'manharĩ za'ra da. Tawamhã ãtẽme sihutu wamhã, te siwi 'mahã:

— Rowahutu'wa, wa norĩ hã bêté e marĩ, wa za 'manharĩ za'ra ni ãwẽ hã, 'Re ãhãimana u'ãsi mono te te wama rob'manharĩ za'ra tõ da hã. — ãne te sadanharĩ za'ra.

¹³ Tawamhã asa te tãma nharĩ za'ra:

— ã'uwaibaba si, te za dawĩ 're ãwaptêrê za'ra wa'aba mo, rob'uiprazé hã. ãma dawĩ 're pararé za'ra wa'aba mono õ di za. — ãne ma tô tãma waihũ'u za'ra, Zuwã hã.

¹⁴ Tawamhã da'wapéi'wa norĩ hã te duré siwi 'mahã:

— Wa norĩ hã bêté, e marĩ, wa za 'manharĩ za'ra ni, ãwẽ hã, 'Re ãhãimana u'ãsi mono te te wama rob'manharĩ za'ra tõ da hã. — ãne te sadanharĩ za'ra.

Tawamhã asa te tãma nharĩ za'ra:

— Asiptete na, rob'uiprazé hã dawĩ 're waibu za'ra wa'aba mono õ di za. Duré asadawa nhipese na, rob'uiprazé hã dawĩ 're waptêrê za'ra wa'aba mono õ di za. Duré aipawa'ãbã 'wa hã 're ãwaibui aba mono na hã asima ãma 're rowé pese za'ra wa'aba mono. — ãne ma tô tãma waihũ'u za'ra, da'wapéi'wa norĩ ma.

¹⁵ Tawamhã, Zuwã hã ma tô te te dama 're rowasu'u, Danho'reptui'wa, za we ãmorĩ na hã. Tawamhã te dasima nharĩ za'ra ni, ãne:

— Átê wanho'reptui'wa da hã romhutu na, te za wei mo. Átê Zuwã hã, wanho'reptui'wa. — ãne te dasima nharĩ za'ra ni.

¹⁶ Tazahã, ãne ma tô dama tinha, Zuwã hã:

— Wa hã wa tõ ã na si â dawabzuri hã te aima 're 'manharĩ za'ra wa'wa. ãza'u si te za ãma ãpire uptabi hã wei wi. ãma ãpire wa, ãpara'uza wasisizé, te tãma wasihu waihũ'u õ di za. ãma ãpire hã wei morĩ wapsi, te za Tipê'ézani hã te te aima 're anhomri 'wa, unhamã ro'o ne hã.

¹⁷ Wei morĩ wapsi, te za da'ãma aipo'o. Buru nho, da te 're upõrĩ za'ra mono parimhã, te za da te 're sa'wari za'ra, ãsa'warizéb 're. Tawamhã ãtomhã te za da te ãma ro'o za'ra. Iro hã sa'ètê nherê, da te wĩrĩ waihũ'u õ di za. Tane, ãma ãpire hã wei morĩ wapsi, te za da'ãma aipo'o, tridu upõrĩ za'wari ne, ãtomhã za'wari ne. — ãne ma tô Zuwã Batita hã dama rowasu'u.

¹⁸ ãwasu'uwẽ na te te 're da'apo're pu'u, Zuwã Batita hã. Tawamhã marĩ na hã ãsimirowasu'u hã ahã di, 're danomro wẽ mono da, te te dama 're roti mono rê hã.

¹⁹ Tawamhã apito Erodihi ma, te duré tinha, wasété na 're morĩ wa. Tinoi mro, ma tô ti'ã, Erodi hã. ãnoi mro nhisi hã, Erodiã na. Ma tô duré tiwasédé hã te te 're ab'manharĩ. Taha wa, te tãma tinha, Zuwã hã.

²⁰ Taha wa, Erodi hã ma tô Zuwã hã dama ti'ru, dazazéb 're, da te sêrê da. ãne wamhã, ma tô ãsipai u tiwasédé hã 'manha, Erodi hã.

Zezusi hã, â dawabzuri te te ã'manharizé wasu'u

Mateusi 3.13-17; Marcusi 1.9-11

²¹⁻²² Tawamhã dazazéb 're, zahadu da te sêrê õ rê, te â dawabzuri hã te te dama 're ab'manharĩ, Zuwã hã. Te te dama ab'manharĩ parimhã, Zezusihĩ ma zama, ma 'manha.

Tawamhã Zezusi hã te mre, 'Re İhâimana u'âsi mono ma. Mreme ré, hâiwa ma we si'ridawa, İsisı nho'õmoi baba. Tawamhã 'Re İhâimana u'âsi mono pê'ëzani hã ma we İtême wi, utu'u ne. Hâiwa hawı, te we tãma tinha, âne:

– A hã İ'ra. İma asawi uptabi di. Aima İto za'ëtê uptabi di. – Āne te we tãma tinha, İmama hã.

Zezusıhi hi'rata norĩ wasu'u

Mateusi 1.1-17

²³ Zezusi hã 30 na ãma İwahub ãma, ma tã romhuri na sãna'rata, Timama zadawa wasu'u na hã. Zuzéhé 'ra newa, ma tã İ'ra na, da te 're sisi za'ra. Zuzéhé potowa nhisi hã, Eri na İsisı hã.

²⁴ Erihi potowa nhisi hã, Matati na İsisı hã. Matatihi potowa nhisi hã, Réwi na İsisı hã. Réwihi potowa nhisi hã, Meti na İsisı hã. Metihi potowa nhisi hã, Zana'ı na İsisı hã. Zana'ıhi potowa nhisi hã, Zuzé na İsisı hã.

²⁵ Zuzéhé potowa nhisi hã, Matatiza na İsisı hã. Matatiza potowa nhisi hã, Amosi na İsisı hã. Amosıhi potowa nhisi hã, Na'u na İsisı hã. Na'uhu potowa nhisi hã, Eziri na İsisı hã. Ezirihi potowa nhisi hã, Nada'ı na İsisı hã.

²⁶ Nada'ıhi potowa nhisi hã, Ma'ati na İsisı hã. Ma'atihi potowa nhisi hã, Matatiza na İsisı hã. Matatiza potowa nhisi hã, Seme na İsisı hã. Semehé potowa nhisi hã, Zuzé na İsisı hã. Zuzéhé potowa nhisi hã, Zoda na İsisı hã.

²⁷ Zodaha potowa nhisi hã, Zuwãna na İsisı hã. Zuwãnahã potowa nhisi hã, Reza na İsisı hã. Rezaha potowa nhisi hã, Zorobabé na İsisı hã. Zorobabéhé potowa nhisi hã, Sarati'é na İsisı hã. Sarati'éhé potowa nhisi hã, Neri na İsisı hã.

²⁸ Nerihi potowa nhisi hã, Meti na İsisı hã. Metihi potowa nhisi hã, Adi na İsisı hã. Adıhi potowa nhisi hã, Cosã na İsisı hã. Cosãhã potowa nhisi hã, Emadã na İsisı hã. Emadãhã potowa nhisi hã, Ere na İsisı hã.

²⁹ Erehe potowa nhisi hã, Zuzuwé na İsisı hã. Zuzuwéhé potowa nhisi hã, Eri'ézé na İsisı hã. Eri'ézéhé potowa nhisi hã, Zorı na İsisı hã. Zorıhı potowa nhisi hã, Matati na İsisı hã. Matatihi potowa nhisi hã, Réwi na İsisı hã.

³⁰ Réwihi potowa nhisi hã, Simi'ã na İsisı hã. Simi'ãhã potowa nhisi hã, Zuda na İsisı hã. Zudaha potowa nhisi hã, Zuzé na İsisı hã. Zuzéhé potowa nhisi hã, Zona na İsisı hã. Zonahã potowa nhisi hã, Eri'atı na İsisı hã.

³¹ Eri'atıhi potowa nhisi hã, Mereza na İsisı hã. Merezaha potowa nhisi hã, Mena na İsisı hã. Menahã potowa nhisi hã, Matata na İsisı hã. Matataha potowa nhisi hã, Natã na İsisı hã. Natãhã potowa nhisi hã, Dawı na İsisı hã.

³² Dawıhi potowa nhisi hã, Zésé na İsisı hã. Zéséhé potowa nhisi hã, Obedi na İsisı hã. Obedihi potowa nhisi hã, Bu'azi na İsisı hã. Bu'azıhi potowa nhisi hã, Sara na İsisı hã. Sarahã potowa nhisi hã, Nasõ na İsisı hã.

³³ Nasõhõ potowa nhisi hã, Aminadabe na İsisı hã. Aminadabehe potowa nhisi hã, Ademi na İsisı hã. Ademıhi potowa nhisi hã, Arini na İsisı hã. Arinihi potowa nhisi hã, Esirõ na İsisı hã. Esirõhõ potowa nhisi hã, Perezi na İsisı hã. Perezıhi potowa nhisi hã, Zuda na İsisı hã.

³⁴ Zudaha potowa nhisi hã, Zaco na İsisı hã. Zacoho potowa nhisi hã, Izati na İsisı hã. Izatihi potowa nhisi hã, Abra'ã na İsisı hã. Abra'ãhã potowa nhisi hã, Tera na İsisı hã. Teraha potowa nhisi hã, Na'o na İsisı hã.

³⁵ Na'oho potowa nhisi hã, Serudi na İsisı hã. Serudıhi potowa nhisi hã, Rada'u na İsisı hã. Rada'uhu potowa nhisi hã, Peredi na İsisı hã. Peredıhi potowa nhisi hã, Ébé na İsisı hã. Ébéhé potowa nhisi hã, Sera na İsisı hã.

³⁶ Seraha potowa nhisi hã, Ca'ına na İsisı hã. Ca'inahã potowa nhisi hã, Apasadi na İsisı hã. Apasadıhi potowa nhisi hã, Sê na İsisı hã. Sêhê potowa nhisi hã, Nowé na İsisı hã. Nowéhé potowa nhisi hã, Rameti na İsisı hã.

³⁷ Rametihi potowa nhisi hã, Matuzarê na İsisı hã. Matuzarêhé potowa nhisi hã, Enoti na İsisı hã. Enotıhi potowa nhisi hã, Zareti na İsisı hã. Zaretihi potowa nhisi hã, Marere na İsisı hã. Marerehe potowa nhisi hã, Ca'ına na İsisı hã.

³⁸ Ca'inahã potowa nhisi hã, Enosi na İsisı hã. Enosıhi potowa nhisi hã, Sete na İsisı hã. Setehe potowa nhisi hã, Adã na İsisı hã. Adãhã potowa hã, 'Re İhâimana u'âsi mono.

4

Zezusi hã a'ubuni wi hâimana ré, Wa'uburé te te İpıbuzé wasu'u
Mateusi 4.1-11; Marcusi 1.12-13

¹ Tawamhã Zodã pa hawi, te oto mo Zezusi hã, tirob u apâ morî da. 'Re ìhâimana u'âsi mono pë'êzani ré, te 're mo. Taha si, te te 're wapari pese. Tawamhã Ìpë'êzani hã te saprô, a'ubuni u.

² A'ubuni wi hâimana ré hã, bâdâ hã ahâ na ma tô âma ai'utô, 40 na. Tame hâimana ré, ma tô ìfême wi Wa'uburé hã, te te nasi pibu da, ìsimiroti na te te saze da. Taha ré hã, sai âna te tihâiba, Zezusi hã. Taha wa, ma tô mra hã sépata.

³ Tawamhã Wa'uburé hã te Zezusi ma tinha, âne:

— Sena a hã, 'Re ìhâimana u'âsi mono 'ra wamhã, ma'âpë êtë ma nharî, ì'u'êtë wapu na aima si'manharî da.

⁴ Tawamhã Zezusi te asa tâma tinha:

— 'Re ìhâimana u'âsi mono mreme na rob'ui'ére hã, âne: “Dasa na si 're danhiptete za'ra mono ô di za.” — Âne te Zezusi hã tâma rowasu'u, Wa'uburé ma.

⁵ Tawamhã Wa'uburé hã te Zezusi saprô, sa'a nhisi u. Tawamhã sa'a nhisi sima'wara wamhã, ma tô Zezusi ma tinha, danhib'apito norî nhipti'ai mono bâ, te te rob'madâ'â mono da.

⁶⁻⁷ Tawamhã te te rob'madâ'â mono pari, te duré tâma tinha, Zezusi ma:

— Uburé danhipti'a hã ma tô ìma sômri ni, ìte da. Tawamhã te ìsima ìwêzëb uwaibaba, wa za dama tisô. Aihî'râitô, te za ìnho're ìma aime, asib'apito na ì'âma aiwata da. Tawamhã wa za aima tisô danhipti'ai mono bâ, ate da. Tawamhã danhipai u, dama aipire di za. Duré asibrob ahâ uptabi di za. — Âne te Zezusi ma tinha.

⁸ Taha wa, te Zezusi hã asa tâma tinha:

— Mare di. 'Re ìhâimana u'âsi mono zadawa wasu'u'wa, ma tô âne rob'ui'ére, ìbaihã na hã: “Uburé Danhib'apito uptabi âma si, te za 're aiwata za'ra wa'aba mo, 'Re ìhâimana u'âsi mono âma si. Taha ma si, te za 're ìromhuri za'ra wa'aba mo, Asib'apito za'ra wa'aba ma si.” Âne ìmreme na rob'ui'ére hã. — Âne te Zezusi hã tâma rob'râzarôtô.

⁹⁻¹¹ Tawamhã Wa'uburé hã ma tô Zezusi hã saprô Zeruzarë u, te te duré pibu da. 'Re ìhâimana u'âsi mono âma 're ìdawata za'ra mono zëb u, te saprô, 'ri nhisi u sab da hâimo, 'ri râihã uptabi nhisi. Tawamhã Zezusi ma, te tinha:

— Sena a hã 'Re ìhâimana u'âsi mono 'ra wamhã, ma'âpë ã hawi atobro, ti'ai u. 'Re ìhâimana u'âsi mono, te za, u, hâiwa hawi we atême satôri za'ra, te te ai'madâ'â za'ra da, tâma ìromhuri'wa norî hã. Tinhib'rata na te za, u, siwi asapa, êne hã te te ai'u'a ô'umnhasite, aipara wi. Âne 'Re ìhâimana u'âsi mono zadawa wasu'u'wa nhimirob'ui'ére, ìbaihã na hã. — Âne ma tô Zezusi ma sadawa 'râzarôtô, wa'ru'i'wa hã.

¹² Tawamhã Zezusi te asa tâma tinha:

— Mare di. “Asib'apito za'ra wa'wa hã 'Re ìhâimana u'âsi mono hã, marî hã te te aima 're pisutu za'ra wa'aba mono ô nherë, 're pibu za'ra wa'aba mono ô di za, ta hã te te 're aipawaptob za'ra wa'aba mono zô.” Âne ìmreme na rob'ui'ére hã. — Âne te Zezusi hã duré tâma rob'râzarôtô.

¹³ Tawamhã Wa'uburé hã taré te te Zezusi hã pibui mono pari, te oto ìsiti mo, ìsimiroti na te te sazei ô wa, a'â sadawa utu da.

Zezusi hã, tinhimirohuri na te te ìsâna'ratazé wasu'u, Darireza âma

Mateusi 4.12-17; Marcusi 1.14-15

¹⁴ Tawamhã apâ te mo Darireza u, Zezusi hã. 'Re ìhâimana u'âsi mono pë'êzani ré, te 're mo. Ìré 're morî wa, te waihu'u pese na 're mo. Tawamhã ma tô ìwasu'u hã wapari za'ra ni, Darireza âma daro mono bâ.

¹⁵ Zezusi hã te te dama 're rowahutu, zudezu norî te, rowahutuzé mono bâ. Tawamhã da te 're wapari za'ra mono wamhã, te âma 're dawata za'ra, ìsimirowasu'u hã wë uptabi wa.

Zezusi ìprédubzëb âma, da te dasiwi ìwë'ôzé wasu'u

Mateusi 13.53-58; Marcusi 6.1-6

¹⁶ Tawamhã Nazaré u te mo Zezusi hã, tiprédubzëb u. Sabadu sidâpâsi dame 're zasi mono wa, ma duré dame âzé, zudezu norî te, rowahutuzëb u, romhuri zahârizëm na hã. Tawamhã rowahutuzëb âma sâmra wamhã, ma wahudu. Hâiwi te za, 'Re ìhâimana u'âsi mono mreme ui'ére hã te te dama sôré da.

¹⁷ Tawamhã ma tô tâma sômri ni, Iza'izaha nhimi'ui'ére hã. 'Re ìhâimana u'âsi mono zadawa wasu'u 'rata 'wa, Iza'iza hã. Tawamhã ma tô oto sima sôzi, ìbaihã hã. Te te sôzi wamhã, ma tô tisâ, da te âma ìrob'ui'ére hã, âne:

¹⁸ “'Re ìhâimana u'âsi mono, ma tô ìma tisô, Tipë'êzani hã. Ta hã ma tô ìpisutu, ìwasu'uwë na, ìsibrob'ô norî hã te 're apo're pu'u mono da. Ma tô we ìzatô, dama romhuri'wa da, da te ìwaibu za'ra norî hã te 're apawapto mono da, apâ oto 're nomro mono da, robze u'âsi. Duré ìtob'a hã te 're ato pese mono da, ma tô we ìzatô, datômo wë na apâ oto

're danomro mono da, robze na. Duré ma tô we ïzatô, da te tâma 're ïmanharî waséré za'ra mono zém hawî, te 're da'awaibui mono da.

19 'Re ïhâimana u'âsi mono hã te te sima ïropisutuzé hã ma tô ïwa waptârã, tinhîb'a'uwé hã te te 're ï'anho'reptui mono zéb da hã. Taha wasu'u na te 're da'apo're pu'u mono da, ma tô wé ïzatô."

Ãne ma tô Iza'izaha nhimi'ui'éré hã dama sôré, Zezusi hã.

20 Tawamhã te te sôré pari, ma tô apã sito, ïbaihã hã. Tawamhã apã ma tô tâma tisô, dapawapto'wai ma. Tawamhã ma tô nhamra, te te dama rowasu'u da. Ûburé rowahutuzéb âma ïsi'ubumro norî hã tâma rîti si'ê za'ra âna, ma tô Zezusi hã siwi 'madã'â pese.

21 Taha wa, ma tô Zezusi hã tâma nharî za'ra, âne:

— Wa tô aima sôré za'ra wa'wa, 'Re ïhâimana u'âsi mono mreme ui'éré hã. ïwasu'u hã ma tô ïwaparî za'ra wa'wa. Âhãna ïwaparî za'ra wa'aba ré, ma tô oto we âma uwaimra, 'Re ïhâimana u'âsi mono hã. — Ãne Zezusi ma tô tâma rowasu'u za'ra.

22 Tawamhã ïsimirowasu'u hã wé wa, aihîni te âma tawata za'ra ni. Mreme wé uptabi wa, ma âma tatob'uzu za'ra ni. Tazahã, te dasima nharî za'ra ni, âne:

— E niha ô hã simirowasu'u waihu'u pese di, Zuzéhé 'ra nherê. — Ãne te dasima nharî za'ra ni.

23 Tawamhã Zezusi te dama tinha:

— Até da te dasima ïnharî za'ra zém na, te za ïma ïnharî za'ra wa'wa, âne: "Wawede'wa, ma'ápé 'rãwi asipese." Até te za duré ïma ïnharî za'ra wa'wa, âne: "Ma'ápé, âmeb zama 're wa'apawapto mono, aiwaihu'u pese na, Capana'u âma 're ïda'apawapto mono ne. Aiwasu'u hã wa tô waparî za'ra ni." Até, âne te za ïma ïnharî za'ra wa'wa. — Ãne te Zezusi tâma nharî za'ra.

24 Te duré tâma nharî za'ra, âne:

— 'Re ïhâimana u'âsi mono zadawa wasu'u'wa norî zô, 're datob'uzu za'ra mono ô di, ïsîpti'ai âma wa. Mare di. Sô 're datob'uzu za'ra mono ô di za.

25-26 ïwaparî pese za'ra wa'aba. Wahi'rada Eriasi hã, 'Re ïhâimana u'âsi mono zadawa wasu'u'wa, te 're mo. Tawamhã ti'ai âma 're morî ré hã, tâi âna hã ma tô da'âma tiwahu, si'ubdatô. Tãî ô wa, mra hã te da te 're sêpata za'ra. Tawamhã ïmrotô ahã nherê, Izarazé na darom nhisi âma, ma tô darob amoi u satô, zudezu'ô u, 'Re ïhâimana u'âsi mono hã. Sido na danhipti'a nho'ômo nhisi u, ma tô pi'ô mrotô u satô, Sarepata na 'ri nho'ômo nhisi u.

27 Duré wahi'rada Erisezú hã 're morî ré hã, da'ahã na te 're danomro, ïwa're ré hã, Izarazé na darom nhisi 'remhã. Tane nherê, aibã misi, ma tô pese, Na'ama na ïsisi hã, Siriza na 're ïhâimana mono hã zudezu'ô hã. — Ãne, Zezusi ma tô tâma rob'rãzarôto za'ra.

28 Taha wa, ïsimirowasu'u hã te te waparî za'ra wamhã, ma tô sada tazahi za'ra ni, rowahutuzéb âma ïsi'ubumro norî hã.

29 Tawamhã ma tô sô tiwahutu za'ra, rob u te te siwi wazere da. Ma tô te te âma robãdá za'ra, 'ri nho'ômo nhiti. Sa'a na, ma tô âma siwi sai'u, sa'a nhisi hawî, ï'rã sipra u te te siwi me da.

30 Tazahã, ma tô dawa'wai baba ro'razã. Dahawi te oto mo.

Zezusi hã aibã ma, wa'uburé te te ïsatôrîzé wasu'u

Marcusi 1.21-28

31 Tawamhã Capana'u na 'ri nho'ômo nhisi u, te mo Zezusi hã. Darireza âma, Capana'u hã. Tame sabadu na te dama rowahutu, zudezu norî te, rowahutuzéb âma.

32 Tawamhã mreme pire na te te dama rowasu'u wamhã, ma âma tatob'uzu za'ra ni.

33 Tame te aibã hã dame nhamra, zudezu norî te, rowahutuzéb âma, wa'uburé ré 're ïmorî hã. Tawamhã aibã hã te sa'êtê 'mahã, âne:

34 — Zezusi, Nazaré nhihudu, e marî zô, te we aimo. E wa'uprosi da, te we aimo. A hã ïma aiwaihu'u pese di, 'Re ïhâimana u'âsi mono we te te asatôrî na hã. Aiwé uptabi di, a hã. — Ãne te 'mahã.

35 Taha wa, ma tô Zezusi hã wa'uburé ma tinha, âne:

— Tô'ã, we ïma nharî tô. Mo oto aiwatobro, aibã hawî. — Ãne ma tô tâma rob'ru, wa'uburé ma. Tawamhã sisa'u ma tô aibã hã time ti'ai u, danho'a. Taha pari, ma aibã hawî watobro. Te te u'a ô di.

36 Tawamhã, da te 'madã'â za'ra wamhã, ma âma tatob'uzu za'ra ni, uburé. Taha wa, te âne dasima nharî za'ra ni:

— Ô hã mreme pire di. Waihu'u pese di. Dahawi si'aba'rê da, te za tâma rob'ru za'ra. Tawamhã te za dahawi ai'aba'rê. — Ãne te dasima nharî za'ra ni.

37 Taha wa, Zezusihi wasu'u hã wa'uburé te te dama ïsãmra na, ma tô ïwasu'u hã ropé, daro mono bã.

ZeZusi hã, da'ahã na te te 're ìda'apese mono zé wasu'u

Mateusi 8.14-17; Marcusi 1.29-39

³⁸ Tawamhã ma tó watobro rowahutuzém hawi, ZeZusi hã. Simahã nhorôwa u, te oto mo. Tame Simahã maprebaba sipi'ô hã, hâzé ré te nomro, wa'ro za'êtê na. Taha wa, ma tó ZeZusihi ma wasu'u za'ra ni.

³⁹ Taha wa, ìsimiwaptã u te ìtême mo. Ìrata te za. Tawamhã ìwa'ro ma, te tinha, wahã da. Taha wa, ma tó tiwahã. Awa'awi ma tó wahudu. Wahutu wamhã, ma tó tâma api za'ra, saihuri da.

⁴⁰ Tawamhã bâdã sébrézéb u, ma tó we ìtême âwisi za'ra ni ZeZusihi u, ìsiwadi nori hã, ìhâzé sipu'u nori hã. Tawamhã tinhîb'rada, ma tó te te da'âma aza'ra, misi si. Taha wa, ma tó tazéptã'â za'ra ni.

⁴¹ Duré wa'uburé hã ma tó dahawi wairé. Da'ahã na, ìré 're ìdanomro mono nori hawi, ma tó wairé, wa'uburé nori hã. Tawamhã dahawi wairébé sina, te âne 'mahârã za'ra:

— A hã, 'Re ìhâimana u'âsi mono 'ra. — Âne te te wairébé sina, te âne 'mahârã za'ra. ZeZusi hã, Danho'reptui'wa da, 'Re ìhâimana u'âsi mono te te ìpisutu na te te waihu'u za'ra wa, ma tó ZeZusi hã ìmreme hã tiwi sisihi za'ra sa'êtê, ari'wi dahawi wairébé da.

⁴² Tawamhã awê ma tó watobro, 'ri nho'ômo hawi, a'ubuni u mori da, ZeZusi hã. Taha wa, ma tó sô danhopré. Da te sôpêtê za'ra wamhã, ma tó âma ropti za'ra ni, nimomo danhiti mori tó da.

⁴³ Taha wa, te ZeZusi hã asa tâma nharĩ za'ra:

— 'Re ìhâimana u'âsi mono hã danhib'apito uptabi hã, te te dapawapto waihu'u pese di. Ta hã ma tó we ìzatô, ìwasu'uwê na te 're da'apo're pu'u mono da, daza'rui mono bâ. Taha wa, a nori wa'aba si te 're aipo're pu'u za'ra wa'aba mono ô di za, ìwasu'uwê na hã. Uburé wa za ìwasu'uwê na te 're da'apo're pu'u. — Âne te tâma siwasu'u za'ra, ZeZusi hã.

⁴⁴ Taha wa, te datême 're mo, zudezu nori te, rowahutuzé mono bâ, ìwasu'uwê na te te 're da'apo're pu'u mono da, daro mono bâ.

5

Tepe ahã wasu'u

Mateusi 4.18-22; Marcusi 1.16-20

¹ Tawamhã ZeZusi hã te nhamra, ìsô'u zaihã na. Zenezaré na ìsô'u nhisi âma te nhamra, 'Re ìhâimana u'âsi mono te te dama sadawa wasu'u da. Da'ahã uptabi na ma tó ìtême dasito, da te wapari za'ra da.

² Tawamhã uba're maparane ma tó sabu zahuré. Ìsô'u zaihã na, te da'wa. Tepe na romhuri'wa nori hã ma tó ìwana wairé. Abazipara, te oto upsô za'ra.

³ Tawamhã ZeZusi ma tó âzé, uba're wa, Simahã te 're. Tawamhã, uba're wa, sébré wamhã, te Simahã ma tinha, syry na te te ìré sa'rê da, supara'rê nhiti. Tawamhã uba're wa, te oto nhamra, te te dama rowasu'u da.

⁴ Tawamhã, te te dama rowasu'u pari wamhã, te Simahã ma tinha, âne:

— Uba're hã asiré sari, â 'rehã u, abazipara hã asiré nori me, tepe zô sãmra aba da. — Âne te Simahã ma tinha.

⁵ Taha wa, ma tó Sima hã asa tâma siwasu'u, âne:

— Mara bâre, wa tó wei wa te sô sãmra. Tane nherê, wa te 'mai'âri za'ra ô di. Tepe ô di. Tane nherê, ìruzéb zarina wa za sô sãmra ni. — Âne te ZeZusihi ma tinha asa. Tawamhã te oto sô sari za'ra, â wa'wa u.

⁶ Taha wa, abazipara, ma tó â wa'wa u sô sãmra. Tawamhã tebe hã ahã na ma tó waibu za'ra, abazipara na. Taha wa, te aré te te sina sinari, abazipara hã.

⁷ Tawamhã tisiré tepe mrami'wa nori zô ma tó pahamrimi zahuré, uba're ìhâiba amo hã te te ìtême sari zahuré da, te te âma pawaptob za'ra da. Taha wa, te ìtême sari zahuré. Tawamhã uba're wa, ma tó sãmra za'ra, aibã nori hã. Tebe hã uba're si'uiwa na hã 'masisi zahuré di. Tebe hã ahã uptabi wa, te aré sina 'mazasi zahuré, uba're hã.

⁸⁻¹⁰ Tebe ahã na te te awaihui wamhã, ma tó âma titob'uzu za'ra. Ti'adu nori zama, ma tó âma titob'uzu zahuré, Zuwãhã me. Ta nori hã Zebedehe 'ra zahuré. Ìsiré tepe na, te te 're romhuri zahuré, Simahã siré. Tawamhã hi'rãtitô, ma aime ZeZusihi papara, Sima Pedru hã, tebe ahã na te te 'madã'â wamhã. Âne te ZeZusihi ma tinha:

— Ìrata asãmra ô di za. Te za oto aimo, ìnhiti. Wa hã ìwasétêre di. — Âne te ZeZusihi ma siwasu'u. Tawamhã ZeZusi te asa tâma tinha:

— Asina aipahi ô di za. Tepe na 're ìromhuri mono ne, te za oto ìma 're ìda'awaihui wê mo.

— Âne te ZeZusi hã Simahã ma tinha.

¹¹ Tawamhã uba're, ma tó sani za'ra, rob'rê u. Uburé ma tó marĩ hã rême za'ra, tinhimiromhuri za'ra zé hã, ZeZusihi siré oto 're nomro mono da.

Aibâ i'wa're ré hã, Zezusi te te ipesezé wasu'u

Mateusi 8.1-4; Marcusi 1.40-45

¹² Tawamhã Zezusi hã te nhamra, 'ri nho'õmo ãma. Tame te aibã hã 're sãmra, i'wa're ré hã. Uburé ihãiba na, i'wa're hã. Tawamhã Zezusi te te sôpêtê wamhã, hi'rãtitô ma aime, Zezusihi papara. Ti'ai u, ma tô ti'ubu na ropto. Tawamhã Zezusihi ma, te tinha, ãne:

— Apito, ãma aiwaihu'u pese di, asimipese waihu'u pese na hã. Taha wa, te za ãpe, asima ãwê wamhã. — ãne te tãma tinha.

¹³ Tawamhã tinhib'rada hã ma tô wahutu Zezusi hã, te te ãma upi da. Te te upi wamhã, te tãma tinha:

— Wa tô ãsima aiwê, te aipese da. Tãibã za oto aihãzé hã. — ãne te tãma tinha.

Tawamhã awa'awi ma i'wa're hã tãma apa.

¹⁴ Tawamhã Zezusi ma tô sina sadawa uwati, te te dama sina wasu'u tô da. Te tãma tinha, ãne:

— 'Re ihãimana u'ãsi mono ma, da'ãma romhuri'wai u, te za aimo, aihãiba wê zô te te aihãiba 'madã'ã da. Taha parip si, te za tãma asôpu, 'Re ihãimana u'ãsi mono ma, Mozésihi nhimiroti zarina, dama aipibu pese zéb da, aipesezém na hã. — ãne te tãma tinha, Zezusi hã.

¹⁵ Tane nherê, ma tô Zezusihi wasu'u hã wapari za'ra ni, daro mono bã. Taha wa, ma tô da'ahã na ãtême 're dasihutu, da te 're wapari za'ra mono da. Duré te te 're da'apese mono da, ma tô ãtême 're dasihutu.

¹⁶ Tane nherê, Zezusi hã ma tô dawu 're ne, a'ubuni u, 're mreme mono da, Timama ma.

Aibã ãhi'rê hã, Zezusi te te ipesezé wasu'u

Mateusi 9.1-8; Marcusi 2.1-12

¹⁷ Tawamhã apã datême wisi wamhã, te nimahã bãtã na dama rowasu'u, Zezusi hã. Te te dama rowasu'u ré, te i'rata ai'ubumro, parisezu nori hã. Rowahutu'wa nori me, te i'rata ai'ubumro, 'Re ihãimana u'ãsi mono nhimiroti 'rata na rob'ui'ére na dama rowahutu'wa nori hã. Ta nori hã ma tô ãtême sito Darireza hawi, duré Zudeza hawi, duré Zeruzarê hawi. Tawamhã 'Re ihãimana u'ãsi mono tiwaihu'u pe hã, te te tãma ãsômi na, ma tô da'apese, Zezusi hã.

¹⁸ Tawamhã aibã nori hã, ãhi'rê hã ma tô siwi ti'ã, ãsimiwaptã wa. Ma tô sima wê za'ra, 'ri para u te te siwi 'mazébré da, Zezusihi nho're te te siwi hiri da.

¹⁹ Tazahã da'ahã wamhã, te te siwi 'mazébré waihu'u ô di. Tawamhã 'ri nhisi hawi, ma tô tãma 'ri 're pu'u za'ra, te te siwi 'mazébré da. Tawamhã dawa'wa ma tô siwi tihi, Zezusihi nho're, ãsa'warizéb ré.

²⁰ Zezusi hã simiwaihu'u pese wa, ma tô ãma saze za'ra. Taha wa, ma tô siwi ti'ã, te te pese da. Zezusi ma tô sina waihu'u siro, te te ãma ãsaze za'ra na. Taha wa, te ãhi'rê ma tinha, ãne:

— ãsiwadi, aiwasédé hã 're i'ab'manharí wasété mono zé hã te ai'ãma 're ab'madã'ã mono ô di za oto. — ãne te ãhi'rê ma tinha, ãne:

²¹ Tawamhã rowahutu'wa nori hã te parisezu nori me tãma nharí za'ra, tipê'ê na:

— E niha ma tô bété ô hã tãma tinha, ãmorí'ô ma. 'Re ihãimana u'ãsi mono ma, wê ô di, aibã ma, te te ãnharizé hã. Dawasédé hã da te 're i'ab'manharí wasété za'ra mono zé hã, ni'wa hã te te dama 're aparí waihu'u mono ô di. 'Re ihãimana u'ãsi mono ma si, waihu'u pese di, dawasédé hã te te dama 're i'aparí mono da hã. — ãne te Zezusihi ma nharí za'ra, tipê'ê na.

²² Tawamhã Zezusi ma tô sina waihu'u za'ra, ãsimirosa'rata za'ra hã. Taha wa, te tãma nharí za'ra:

— E marí da, te ãne i'ãma ãrosa'rata za'ra wa'wa.

²³⁻²⁴ Wa hã dawasédé hã te dama 're i'aparí waihu'u pese mono na, e niha te za i'waihu'u za'ra wa'wa, sena na i'waihu'u za'ra wa'aba da hã. Aibã ma, wa tô tinha, ãne: "Aiwasédé hã 're i'ab'manharí wasété mono zé hã, te ai'ãma 're ab'madã'ã mono ô di za oto." ãne hã ãmreme si wamhã, aima pibu prã za'ra wa'aba di tô. Á hã ãmorí'ô hã wahutu da, duré oto morí da, te tãma nharí wapsi, te za i'waihu'u za'ra wa'wa, i'waihu'u pese na sena na i'waihu'u za'ra wa'aba da oto. Ti'ai ãma dasiré ãpodo hã ãma waihu'u pese di, dawasédé te dama 're i'aparí mono da hã, 'Re ihãimana u'ãsi mono zadawa para. ãne na asiwi i'waihu'u za'ra wa'aba da, wa za ãhi'rê ma tinha, wahutu da.

Tawamhã ãhi'rê ma, te oto tinha:

— Ma'ãpé, aiwahutu. Asa'warizé hã ãri, asôrôwa u aimorí da oto. — ãne te aibã ma tinha.

²⁵ Tawamhã awa'awi ma tô aibã hã wahudu, danho'a. Tiza'warizé, ma tô siré ti'ã. Tinhorôwa u, te oto mo. Morí sina, te ãma tiwata, 'Re ihãimana u'ãsi mono ãma.

²⁶ Tawamhã uburé ma tô ãma tatob'uzu za'ra ni. 'Re ihãimana u'ãsi mono ãma, te tawata za'ra ni. ãne te dasima nharí za'ra ni:

— Aibã te te ipesezé hã, wê uptabi di. Áhãna, wa tô wasiwi 'madã'ã za'ra ni. — ãne te dasima nharí za'ra ni.

Réwihi wasu'u

Mateusi 9.9-13; Marcusi 2.13-17

²⁷ Tawamhã rob u, ma tô watobro, Zezusi hã. Watobro wamhã, ma aibã hã 'madã, danhib'apito ma, dawî rob'uiprazé ubumroi'wa hã, Réwi na Ìsisi hã. Ìsimiromhurizéb âma sãmra ré, ma tô 'madã. Tame te da te tâma 're sômri za'ra rob'uiprazé hã, T'ubumrozéb âma, danhib'apito nhimiwada'uri zarina. Tawamhã Zezusi hã ma tô âne 'mahã:

— We aimorî, Ìsiré 're aimorî da oto.

²⁸ Tawamhã ma wahudu. Tinhimiromhurizé, ma tô tiré, Zezusihi siré 're morî da oto.

²⁹ Tawamhã Zezusi te te sawi da, ma tô tinhorôwa âma dasa hã dama 'manha, sa'ëté na. Zezusihi siré, te za dasa hã huri ni. Taha wa, rob'uiprazé ubumroi'wa norî hã te Ì'rata ai'ubumro, Ìsiré saihuri da, da'ahã na. Ni'wam norî zama, te Ìsiré tisa tihu.

³⁰ Tawamhã saihuri da, si'ubumroi ré, ma tô 'madã'â za'ra parisezu norî hã, rowahutu'wa norî me. Taha wa, te âne tâma nharî za'ra, Zezusihi siré 're Ìnomro mono norî ma:

— E niha bâ, te bété dawazari asaihuri 'wa, rob'uiprazé ubumroi'wa norî siré, dawasété na 're Ìdanomro mono norî siré zama. — Ìne te tâma nharî za'ra.

³¹ Taha wa, te Zezusi hã tâma nharî za'ra, âne:

— Hãzé âna 're Ìnomro mono norî zô, dawede'wa hã 're siwasutu za'ra mono ô di, te te 're wede za'ra mono da. Ìhãzé ré norî zô si te za 're siwasutu za'ra, te te 're pese za'ra mono da.

³² Tane duré wa hã, dawê na 're Ìdanomro mono norî zô, Ìsitême 're Ìhãrã mono da, we Ìmorî ô di. Dawasété na 're Ìdanomro mono norî zô si, 're Ìhãrã mono da, wa wei mo, dawasédé hã da te 're rême pese za'ra mono da, 're danomrô wê mono da oto. — Ìne ma tô Zezusi hã tâma waihu'u za'ra.

³³ Tawamhã ni'wam norî hã te Zezusihi ma nharî za'ra, âne:

— Zuwã Batitaha siré 're Ìnomro mono norî hã nimahã bâta na si, te sai âna 're si'ubumro, 'Re Ìhãimana u'âsi mono ma, te te 're romhuri za'ra mono da, parisezu norî zadawa 'madã'â pese 'wa norî zama. Ìnei ô di, asiré 're Ìnomro mono norî hã. Te 're saihuri u'âsi, asiré. Te duré asiré te te 're âhuri. Ìne te Zezusihi ma nharî za'ra.

³⁴ Taha wa, te Zezusi hã asa tâma nharî za'ra:

— Aibã hã Ìmrozéb u, sô Ìhãrã za'ra norî hã sihutu wamhã, e te za dasa hã tiwi sawi za'ra ni, saihuri âna si'ubumro da, ta norî hã. Mare di. Aibã Ìmro da hã, T'rata sãmra za'ra ré, te za tô Ìsiré tisa tihu, to sina.

³⁵ Niwapsi te za bâdã hã Ìwa waptãrã, aibã Ìmro da hã Ìsiwadi norî wa'wa hawi, da te tiwi Ì'ari za'ra zéb da hã. Tawapsi te za tô sai âna 're si'ubumro, robzei âna. — Ìne ma tô Zezusi hã tâma rowasu'u za'ra. Ìne sô'awib ô nherê, te te si'âma Ìsimiré'ézé hã.

³⁶ Tawamhã te duré âma romnhimiré'é, âne:

— Zazahã Ìhãiwê hã e te za sizãri ni, Ìhã'ratare hã da te âma hãiwa'aba da. Mare di. Ìne wamhã, te za aiwamna, Ìhãiwê hã. Duré Ìhãtém na da te hãiwa'aba wamhã, aiwab ô di, Ìhã hã. Hãiwê hã ô di.

³⁷ Duré e romhã 'manharî 'rata 're, te za uwa 'rãî wa'u Ìsé hã da te 're sé, wa'ui ware ô ré. Mare di. Wa'ui ware ô ré, da te 're séme mono wamhã, oto wa'ui ware wamhã, te za romhã 'manharî 'ratare hã sina wazu. Tawamhã uwa 'rãî wa'u Ìsé hã te za asa'wa. Romhã 'manharî hã te za duré hãihaiwamna.

³⁸ Ìtép si'uiwa na si, te za da te 're sé, rob'rãî wa'u zé té hã. — Ìne te Zezusi hã tâma rowasu'u za'ra.

³⁹ Te duré tâma âma simiré'é za'ra:

— Uwa 'rãî wa'u Ìsé Ì'ratare hã da te 're âhuri mono pari, e te za da te dasima 're wê za'ra, uwa 'rãî wa'u zé Ìté hã. Mare di. Àté Ìté hã da te dasima 're wê za'ra mono ô di za. Te za dasima da te 're nharî za'ra: "Ìwa'u 'ratare si, wê uptabi di." Ìne te za dasima da te 're nharî za'ra. — Ìne te Zezusi hã tâma âma simiré'é za'ra, sô'awib ô nherê.

6

Sabadu na, Zezusihi nhimirotizé wasu'u

Mateusi 12.1-8; Marcusi 2.23-28

¹ Tawamhã sabadu na, Zezusi norî hã ma tô ro'rahãri za'ra, amnho wa'wai baba, zudezu norî te, romhuri zahãrizém na. Tawamhã tridu 'rã ne hã ma tô te te sima 'rãnhinarî, tinhîb'rata na te te sima tomhãiwazu za'ra da, te te huri mono da, Ìsiré 're Ìnomro mono norî hã.

² Tawamhã parisezu norî hã te tâma nharî za'ra:

— Wahi'rada Mozési hã ma tô wama roti, sabadu na, wa te 're romhuri za'ra mono tô da. E marî da, te bété ïromhuri za'ra wa'wa, âne te te wama roti ô nherê. — Âne te tâma nharî za'ra.

³ Tawamhã Zezusi te asa tâma nharî za'ra, âne:

— E apito Dawihi wasu'u na rob'ui'ére hã 're sôré za'ra wa'aba mono ã bâ, te te ïrob'manharizém na hã, tisiré norî me.

⁴ Mra te te simroi wamhã, ma tô âzé 'ri para u, 'Re ïhâimana u'âsi mono âma 're ïdawata za'ra mono zéb u. Tawamhã sébré wamhã, ma tô 'ma'rê ï'u'êne hã, 'Re ïhâimana u'âsi mono ma, aré da te ïsa'ra za'ra hã. Duré tisiré norî ma, ma tô tâma a za'ra. 'Re ïhâimana u'âsi mono, ma tô aré pisutu, da'âma romhuri'wa norî si, ï'u'êne hã te te 're ïhuri mono da hã, sasedoti norî si. Tane nherê, ma tô 'ma'rêne za'ra, Dawi norî hã. — Âne Zezusi hã ma tô parisezu norî ma Dawihi wasu'u hã 'râzarôtô za'ra.

⁵ Te duré tâma nharî za'ra:

— Wa hã 'Re ïhâimana u'âsi mono te te ïpisudu, dasiré ïpoto da, ti'ai âma. Taha wa, dama ïpire di, sabadu na roti hã te dama 're ï'apisutu mono zéb da hã. — Âne ma tô tâma waihu'u za'ra, Zezusi hã.

*Aibã ïsimizu'rã're hã, Zezusi te te ïpesezé wasu'u
Mateusi 12.9-14; Marcusi 3.1-6*

⁶ Tawamhã sabadu ïhâiba amo na, ma tô duré âzé zudezu norî te, rowahutuzéb u, Zezusi hã. Tame te duré aibã hã dame nhamra, ïsimire niwî ïsimizu'rã're hã.

⁷ Tawamhã 'Re ïhâimana u'âsi mono nhimiroti 'rata na rob'ui'ére na dama rowahutu'wa norî hã ma tô siwi 'madã Zezusi hã, sabadu na te te pese zô, romhuri zahârizém na hã. Parisezu norî me, te simiza'rese sina 'madã'â za'ra. Mozésihi nhimiroti te te 'madã'â ô wa, te te siwi wê'ô da, te 'madã'â pese za'ra.

⁸ Tawamhã Zezusi ma tô sina waihu'u za'ra, ïsimirosa'rata za'ra hã. Tawamhã aibã ma, te tinha:

— Aiwahutu, dawa'wa asab da. — Âne te tâma tinha. Tawamhã aibã ma tô wahudu. Hâiwi te za.

⁹ Tawamhã Zezusi ma tô âma sadanharî za'ra, âne:

— Wa za asadanharî za'ra wa'wa. E niha 'Re ïhâimana u'âsi mono nhimiroti hã, sabadu na hã, romhuri zahârizé bâta na roti hã. E ma hã ïwê, wa te 're ï'manharî za'ra mono zéb da hã sabadu na hã. E ma hã ïwê'ô. E wa te âma 're dapawaptob za'ra mono ô di za. E wa te âma 're danho'reptu za'ra mono ô di za. E niwamhã wa za taré wa te 're da'madã'â za'ra, 're dadã'â za'ra mono da. — Âne te Zezusi hã sadanharî za'ra.

¹⁰ Tawamhã Zezusi te ab'madã, te te siwi ï'uirî za'ra norî hã. Tawamhã ïsimizu'rã're ma, te tinha:

— Ma'âpé, asimizu wahutu. — Tawamhã ma tô tinhimizu wahutu, aibã hã. Tawamhã awa'awi ma tô tinhimizu pese.

¹¹ Tawamhã rowahutu'wa norî hã ma tô sada tizahi za'ra, Zezusihi zada. Tawamhã te sima rosa'rata za'ra, marî hã te te tâma 'manharî za'ra da.

*Zezusi hã aibã 12 na te te ïpisutu za'ra zé wasu'u, tizadawa wasu'u'wa da
Mateusi 10.1-4; Marcusi 3.13-19*

¹² Tawamhã êtê 'râihã na ma tô Zezusi hã sai'u, 'Re ïhâimana u'âsi mono ma, mreme da. Tawamhã mara bâ te tâma mre.

¹³ Taha wa, awê wi ma tô sô tihârã za'ra, tizazei'wa norî zô. Tawamhã ïtême sihutu wamhã, ma tô pisutu za'ra, 12 na ïhâiba za'ra hã ïsiré 're nomro mono da. Ma tô oto sisi za'ra, tizadawa wasu'u'wa na.

¹⁴ Ta norî nhisi za'ra hã âne: Sima Pedru, tiniu me, Âdéréhé me. Pedru na te za sisi té, Zezusi hã. Duré Ti'adu norî hã tisisânawâi me Zuwâhã me, duré Piripi norî hã, Batoromezuhu me,

¹⁵ duré Mateusi norî hã, Tomehê me, duré Ti'adu, Apezuhu 'ra hã, duré Sima Zeroti,

¹⁶ duré Zudasi Ti'aduhu 'ra hã, duré Zudasi Icarizoti hã, dama ïhâiba nhomri'wa da hã.

*Zezusi te te ïrowasu'uzé, duré te te ïda'apesezé wasu'u
Mateusi 4.23-25*

¹⁷ Tawamhã Zezusi norî hã ma tô sa'a hawi si'ra za'ra. Tawamhã ti'ai haré u sihutu ô ré, te a'â nhamra, sônhihâpã âma, tizazei'wa norî me. ïsazei'wa norî hã ahã di. Tame duré da'ahã uptabi na, te sô ai'ubumro ni. Daro mono bâ, ma tô ïwana sô tasi'rã'ôitô ni, Zudeza na danhipti'a nho'ômo nhisi hawi, duré Zeruzarê hawi, duré Tiru na 'ri nho'ômo nhisi hawi, duré Sido hawib zama. Â zaihã na Tiru hã, duré Sido hã, 'ri nho'u.

¹⁸ Zezusihî mreme hã da te wapari za'ra da, ma tã ãtẽme dasito. Duré te te da'apese da zama, ma tã ãtẽme ai'aba'rẽ ni, duré wa'uburé te te dama anhamra da. Tawamhã ma tã dama anhamra.

¹⁹ Simipese waihu'u pese wa, ma tã dasima wẽ za'ra ni, danhib'rata na da te upi za'ra da, rowẽ na oto 're dasi'ubumroi mono da.

Dama 're ãrowẽ za'ra mono zé wasu'u, robzei'õ na 're ãdasi'ubumroi mono zé wasu'u me Mateusi 5.1-12

²⁰ Tawamhã Zezusi hã te tisiré 're ãnomro mono norĩ hã 'madã'ã pese za'ra. Taha wa, te ãne tãma nharĩ za'ra:

– Áté asibrob ãna, te oto 're anomro aba mo. Tane nherẽ, aima 're robze za'ra wa'aba mono di za. 'Re ãhãmana u'ãsi mono hã, Danhib'apito uptabi. Taha wa, ãsib'a'uwẽ 're anomro aba mono wa, aima 're robze za'ra wa'aba mono di za.

²¹ – Áté mra, te oto 're ãsepata za'ra wa'aba mo. Tane nherẽ, te za robze na 're ãhãmana za'ra wa'aba mo. Niwapsi mra hã, ahã di za.

– Áté te oto 're ai'ry'ry wa'aba mo, aipẽ'ẽzẽ za'ra wa'aba wa. Tane nherẽ, te za robze na 're ãhãmana za'ra wa'aba mo. Niwapsi te za aipẽ'ẽ 're, 're ato za'ra wa'aba mo, rowẽ te.

²² – Wa hã ti'ai ãma dasiré ãpodo. A norĩ wa'wa hã ãzazei'wa, 're anomro aba mono wa, ãtẽ te za da te 're ai'ruiwapari za'ra wa'wa. Áté te za da te 're aiwẽ'õ za'ra wa'wa. Áté te za da te aima 're nharĩ wasétẽ za'ra wa'wa. Áté aiwasédẽ hã te za taré da te ai'ãma 're sa'ra za'ra wa'wa. ãne wamhã, te za robze na 're ãhãmana za'ra wa'aba mo.

²³ Rowẽ te, te za 're asarõtõ za'ra wa'aba mo. A norĩ wa'aba ma si, rowasédẽ hã da te aima 're 'manharĩ za'ra wa'aba mono õ di za. Wahi'rata norĩ ma, ma tã rowasédẽ hã da te aima 're 'manharĩ za'ra duré. 'Re ãhãmana u'ãsi mono zadawa wasu'u 'rata 'wa norĩ ma. Taha wa, da te 're ai'ruiwapari za'ra wa'aba mono nherẽ, aima 're rowẽ za'ra wa'aba mono di za. Niwapsi, 'Re ãhãmana u'ãsi mono, te za marĩ ãwẽ hã te te aima 're sãmri za'ra wa'wa, hãiwa ãma asõ 're ãsimi'wara aba mono hã. Taha wa, aima 're rowẽ za'ra wa'aba mono di za. – ãne romhã ré ma tã tãma waihu'u sirõmo za'ra, tisiré 're ãnomro mono norĩ ma.

²⁴ Taha pari, te uburé dama tinha oto:

– Áté asibrob ahã na, te a'ã 're ãhãmana za'ra wa'aba mo. Niwapsi tãibã za oto asibrob ahã za'ra wa'wa hã. Tawamhã robzei õ na, te za 're ai'ubumroi wa'aba mo.

²⁵ – Áté asai ahã na, te a'ã 're ãhãmana za'ra wa'aba mo. Niwapsi, te za mra hã 're ãsepata za'ra wa'aba mo. Tawamhã te za robzei õ na 're ãhãmana za'ra wa'aba mo.

– Áté rowẽ te, te a'ã aipẽ'ẽ na 're ato za'ra wa'aba mo. Niwapsi te za robzei ãna 're asimroi wa'aba mo. Tawapsi te za 're ai'ry'ry wa'aba mo.

²⁶ – Tane duréihã ma tã aibã norĩ ãma 're dawata za'ra. 'Re ãhãmana u'ãsi mono zadawa wasu'u uptabi 'wa newa, ma tã ãma 're dawata za'ra, wahi'rata norĩ hã. Taha wa, a'ã ai'ãma 're dawata za'ra wa'aba mono nherẽ, niwapsi aima 're rowẽ za'ra wa'aba mono õ di za. – ãne ma tã dama rowasu'u, Zezusi hã.

Zezusihî nhimiroti wasu'u, da te 're ãdazawi pese za'ra mono zém na Mateusi 5.38-48

²⁷ Te duré dama tinha:

– ãwapari'wa norĩ, wa za aima waihu'u za'ra wa'wa, ãne hã: Asawi'õ'wai wa'aba norĩ hã te za 're ãsawi pese za'ra wa'aba mo. Duré ai'ruiwapari'wa norĩ ma, te za marĩ tãma 're ã'manharĩ wẽ za'ra wa'aba mo, ãwẽ na.

²⁸ Duré da te aima 're nharĩ wasétẽ za'ra wa'aba mono nherẽ, te za da'ãma 're aimreme zusi aba mo, 'Re ãhãmana u'ãsi mono ma, ãwẽ hã te te dama 're anhomri mono da. Da te aima 're rob'manharĩ wasétẽ za'ra wa'aba mono nherẽ, te za 'Re ãhãmana u'ãsi mono wi 're ãrowaptẽrẽ za'ra wa'aba mo, te te 're da'apawapto mono da.

²⁹ Ai'u'rata wi, da te 're ãihã za'ra wa'aba mono wamhã, dama ãma 're wa'rãmi za'ra wa'aba mono õ di za. Taré te za 're aipizari za'ra wa'aba mo, ai'u'rata amo niwĩ, da te 're ãihã za'ra wa'aba mono da. Duré asi'ubuzẽ hã da te aiwi 're waibui wa'aba mono wamhã, dawi 're sawi za'ra wa'aba mono õ di za, asõ'utu'u zama, da te aiwi 're waibui wa'aba mono da.

³⁰ Marĩ hã da te aiwi 're waptẽrẽ za'ra wa'aba mono wamhã, te za dama 're ãsãmri za'ra wa'aba mo. Áté ni'wa hã te za asibro hã aiwi ãri 'wa. Tawamhã sã ãihãrã õ di za, apã te te aima sãmri da.

³¹ Marĩ ãwẽ si, da te aima 're 'manharĩ za'ra wa'aba mono da, asima 're ãdawẽ za'ra wa'aba mono ne, te za marĩ ãwẽ si dama 're ã'manharĩ u'ãsi za'ra wa'aba mo, ãwa'rãmi.

³² – Siwa'ru, te za 're ãdazawi pese za'ra wa'aba mo. Dawasétẽ na 're ãdanomro mono hã, tizawi pese 'wa si, te te 're sawi pese za'ra. Tanei õ di, a norĩ wa'wa hã za. ãne wamhã,

iwē na te te 're asawi za'ra wa'aba mono ō di za, 'Re ihāimana u'āsi mono hā. Taha wa, te za uburē 're idazawi pese za'ra wa'aba mo.

³³ Duré, uburē te za marī hā dama 're ī'manharī wē za'ra wa'aba mo. Dawasété na 're idanomro mono norī hā, tizawi pese 'wa norī ma si, te za te te tāma 're 'manharī wē za'ra. Tanei ō di, a norī wa'wa hā za. Āne wamhā, e niha te za 're ī'umnhasi za'ra wa'aba mo, iwē na te te aima āma 're ī'a'uwaimrabi aba mono da hā, 'Re ihāimana u'āsi mono hā. Taha wa, te za marī hā uburē dama 're ī'manharī wē za'ra wa'aba mo.

³⁴ Duré, uburē te za dama 're asōprub za'ra wa'aba mo. Āté marī hā te za da te aiwi 're waptērē za'ra wa'wa, a'ā dama 're sōmri za'ra wa'aba mono da. Tawamhā te za dama 're īsōmri za'ra wa'aba mo, iwa'rāmib zō 're asimnhasi za'ra wa'aba mono āna. Dawasété na 're idanomro mono hā te marī hā tisirē norī ma si, te te 're sōmri za'ra, te te siwi 're waptērē za'ra mono wamhā. Tawamhā te duré iwa'rāmib zō 're simnhasi za'ra. Tanei ō di, a norī wa'wa hā za. Āne wamhā, iwē na te te 're asawi za'ra wa'aba mono ō di za, 'Re ihāimana u'āsi mono hā. Taha wa, te za uburē dama 're asōprub za'ra wa'aba mo.

³⁵ Dawasété na 're idanomro mono ne, 're anomro aba mono ō di za. Uburē te za 're idazawi pese za'ra wa'aba mo. Asitob'ru norī zama, te za 're isawi pese za'ra wa'aba mo. Uburē te za marī hā tāma 're ī'manharī wē za'ra wa'aba mo. Āté marī hā te za da te aiwi 're waptērē za'ra wa'wa, syry na a'ā dama 're sōmri za'ra wa'aba mono da. Tawamhā te za tāma 're īsōmri za'ra wa'aba mo. Iwa'rāmib zō 're asimnhasi za'ra wa'aba mono ō di za. Āne wamhā, te za iwē na te te 're asawi za'ra wa'wa, 'Re ihāimana u'āsi mono hā. Ī'ra te za 're aihāimana za'ra wa'aba mo, danhipai u ipire uptabi 'ra hā. Marī wē na, uburē te dama 're sōpru. Īsōprum na āma 're idawata za'ra mono ō norī ma zama, te dama 're sōpru. Dawasété na 're idanomro mono ma zama, te 're sōpru.

³⁶ Taha wa, te za Aimama aba ne, 're anomro aba mo, aiwē na. — Āne ma tō Zezusi hā tāma roti za'ra.

³⁷ Ma duré tāma waihu'u za'ra, āne:

— Dawasédé hā da'āma 're isa'ra za'ra wa'aba mono zéb zarina, asiwi 're dawē'ō za'ra wa'aba mono ō di za. Tawamhā te te siwi 're aiwē'ō za'ra wa'aba mono ō di za, 'Re ihāimana u'āsi mono hā. Dawasédé hā da'āma 're isa'ra za'ra wa'aba mono zéb zarina, dama 're nharī za'ra wa'aba mono ō di za. Tawamhā 'Re ihāimana u'āsi mono, te te aima 're anharī aba mono ō di za. Marī, da te aima 're ī'manharī wasété za'ra wa'aba mono zé hā, asina 're 'madā'ā za'ra wa'aba mono ō di za. Tawamhā aiwasété'wa hā te te 're ab'madā'ā mono ō di za, 'Re ihāimana u'āsi mono hā.

³⁸ Asibrom na te za dama 're asōprub za'ra wa'aba mo, īsimarī'ō norī ma. Tawamhā 'Re ihāimana u'āsi mono hā te za marī hā iwa'rāmi sa'ētē na te te aima 're sōmri za'ra wa'wa. Marī na asima 're asōprub za'ētē za'ra wa'aba mono ne, te za aima 're sōprub za'ētē za'ra wa'wa. Sa'ētē na dama 're sōmri za'ra wa'aba mono wamhā, te za sa'ētē na te te aima 're sōmri za'ra wa'wa, iwa'rāmi, 'Re ihāimana u'āsi mono hā. Syry na dama 're sōmri za'ra wa'aba mono wamhā, te za syry na te te aima 're sōmri za'ra wa'wa. — Āne ma tō Zezusi hā tāma waihu'u za'ra.

³⁹ Tawamhā āne te tāma āma romnhimiré'é za'ra:

— Ni'wam norī hā tob'a zahurē wamhā, nimomo sisaprōni zahurē wamhā, sisaprōni wē zahurē ō di za. Te za siré tiwaptā'ā zahurē, ab're u. — Āne ma tō tāma rowasu'u za'ra.

⁴⁰ Te duré tāma rowasu'u za'ra, āne:

— Romnhoré'wa norī hā te te 're romnhoré za'ra mono ré hā, pire na 're hāimana waihu'u za'ra mono ō di, tāma īromnhoré'wa norī ma hā. Niwapsi te te 're uprosi za'ra mono wapsi, te za te te 're waihu'u za'ētē za'ra, tāma īromnhoré'wa ne hā. — Āne ma tō tāma rowasu'u za'ra.

⁴¹ Te duré tāma rowasu'u za'ra, āne:

— Āté wede wa'ōno hā atob 're, te nomro, sabui ō nherē. E niha te za bété sō itōmo 'madā, wede nhiprubre wazere da, asisānawā tōmo hawimhā.

⁴² Wede wa'ōno hā atob 're īnomro, sabui ō nherē, e niha te za tāma īnha: “Ropru hā a'ā te aima wazere, atōmo hawimhā.” Mare di. Wede wa'ōno hā te za a'ā atōmo hawimhā iwaze. Tawamhā te za sō airīti wē, wazere da, asisānawā tōmo hawimhā, wede nhiprubre hā. — Āne ma tō Zezusi hā tāma rowasu'u za'ra.

⁴³⁻⁴⁵ Tawamhā Zezusi ma tō da'āma āma romnhimiré'é, rob'rā na, āne:

— Rowede hā wē wamhā, 're rāi wasété za'ra mono ō di za, wede wē wa. Wasété wamhā, 're rāi wē za'ra mono ō di za, wede wasété wa. 'Re rāi wē za'ra mono wamhā, te za āma waihu'u za'ra ni, rowede iwē na. E wab'ru u, te za 're aimo, rob'rā īse zō. Mare di. Wab'ru na 're simnhatā mono ō di, rob'rā īse hā. E aptob u, te za 're aimo, rob'rā īse zō. Mare di. Aptom na 're simnhatā mono ō di, rob'rā īse hā. Āne ni'wa hā 're morī wē wamhā, tipē'ē 're, tinhimirosa'rata wē hawim na, te za 're mreime wē u'āsi. Duré ni'wa hā 're morī

wasété wamhã, tinhimirosa'rata wasété hawim na, te za duré 're mreme wasété u'ási. Danhimirosa'rata zarina, te za tô ône u'ási 're damreme zusi. — ãne Zezusi ma tô tâma waihu'u za'ra.

'Ri'wa norĩ wasu'u

Mateusi 7.24-27

⁴⁶Te duré tâma nharĩ za'ra, ãne:

— E marĩ da, ma tô Asib'apito na asiwi 're ãnhisi za'ra wa'aba mo, ãnhimiroti hã 're 'madã'ã pese za'ra wa'aba mono ô nherê.

⁴⁷Ãté ni'wam norĩ hã te za we ãtême aihutu, ãnhimiroti hã te te wapari za'ra da. Tawamhã te te wapari za'ra wamhã, te za oto ãnhimiroti hã te te 're 'madã'ã pese za'ra.

⁴⁸Taha wa, wa za ãnhimiroti 'madã'ã'wai ãma simiré'é, 'ri'wa na. Aibã hã ma tô ab're, 'ri da, ti'ai 'rowi êne hã ãnomro u. Tawamhã ma tô ãma tipahã, ab're na. Ab're 'rehã di oto. Tawamhã êtê nhisiwi ma tô 'ri, aibã hã. Tawamhã ãpré wamhã, ã hã ma tô 're praba, 'ri u. Tete na ma tô 'ri hã 'manha, aibã hã. Taha wa, rêsi ãna te 're sa, 'ri hã.

⁴⁹Ãté ni'wam norĩ hã te za ãnhimiroti hã tipo're na te te 're wapari za'ra. Tane nherê, te te 're 'madã'ã za'ra mono ô di za, ãnhimiroti hã. Taha wa, wa za ãnhimiroti 'madã'ã'wai ãma simiré'é, 'ri'wa ãhãba amo na. Aibã hã 'ri na'rata da, te te ab're ô di. Ti'a nhisiwip si, ma tô sima 'ri. Tawamhã 'ri u, ã 're praba mono wamhã, ã, ma tô 'marôwi, 'ri hã. Tãibã oto. Taha wa, ma tô aipru pese, 'ri hã. — ãne ma tô 'ri'wa na simiré'é dama Zezusi hã, da te waihu'u za'ra da.

7

Romanuhu ma romhuri'wa, Zezusi hã te te ãpesezé wasu'u

Mateusi 8.5-13

¹Tawamhã te te dama roti parimhã, te oto mo Zezusi hã, Capana'u na 'ri nho'ômo nhisi u. Tawamhã ma tô wi.

²Tame aibã hã te 're hãimana romanu hã, da'wapé'wa norĩ wada'uri'wa. Tãma ãromhuri'wa hã te te sawi pese di. Hãzé na te oto nomro, tâma ãromhuri'wa hã. Hãzé ahã wa, te za oto dêrã.

³Tawamhã hãzé na nomro ré, ma tô Zezusihi wasu'u hã wapa, romanu hã. Taha wa, ma tô zudezu norĩ ma roti'wa norĩ hã 'mazatôri' za'ra, Zezusihi zô, ãhãzé ré hã te te pese da.

⁴Tawamhã te te sô ãsatôri' za'ra hã ma tô ãtême aihutu, Zezusihi u. ãtême sihutu wamhã, ma tô tâma rowasu'u za'ra:

— Aibã hã ãwê, romanu hã. Wê wa, pawapto na.

⁵Wasiré ô nherê, te te 're wa'azawĩ pese. Taha wa, ma tô ãsiminhimi'ru zarina wama 'ri za'ra ni, wate da, rowahutuzé hã. Ta hã ma tô duré pawa'ãbã za'ra, 'ri'wa norĩ hã. — ãne te Zezusihi ma rowasu'u za'ra.

⁶Tawamhã Zezusi te ãsiré timori' za'ra. Ma tô oto rosahutu za'ra, 'ri u. Te te rosahutu za'ra wamhã, romanu hã ma tô tisiwadi norĩ hã 'mazatôri' za'ra, te te tâma 'mazadawa wasu'u za'ra da, Zezusihi ma. Tawamhã te te uzusi za'ra wamhã, ãne te tâma 'maïrowasu'u za'ra, Zezusihi ma:

— Wasiwadi hã zudezu'ô nherê, ãté asébré ô di za, u, ãsôrôwa u. A hã, u, aiwê di. Ô hã, u, wê prã ti. Wê prã wa, ãté ãsôrôwa u asébré ô di za, u.

⁷Wê prã wa, si'uihã na we atême mori' ô di za, u, tâma ãromhuri'wa hã tâma pese da. Romhã na nherê, aïmreme pire wa, te za, u, aïmreme na tâma ãpe, rowê na tâma 're sãmra mono da.

⁸Romanu hã, damreme ãpire hã tâma waihu'u pese di, u. ãsib'apito norĩ mreme hã tâma pire za'ra di, u. Duré ô hã, u, ãmreme hã pire di, tinhib'a'uwê norĩ ma, da'wapé'wa norĩ ma. Tawamhã, te te 'mazatôri' wamhã, te za, u, mo, ãsãdawa para. Sô hãrã wa, te za u, ãtême wi, ãsãdawa para. Duré marĩ hã tâma ãromhuri'wai ma, te te 'rui wamhã, te za, u, tâma 'manha, te te tâma ãruzéb' uwaibãba. Taha wa, aïmreme hã pire wa, te za, u, tâma ãpe, tâma ãromhuri'wa hã, rowê na tâma 're sãmra mono da. — ãne te Zezusihi ma sadawa wasu'u za'ra, romanuhu siwadi norĩ hã.

⁹Tawamhã Zezusi hã ãne hã te te wapari wamhã, ma tô ãma titob'uzu, ãsimirowasu'u za'ra na, romanuhu ãma hã. Tawamhã ma aipi'ra, datême. Da'ahã uptabi na ãsarina ãsi'aba'rê norĩ u, ma aipi'ra. ãne te dama tinha:

— Tô sena, wa aima waihu'u za'ra wa'wa. ã hã te te sina ãumnhasizém na hã, niwa te ã'madã'ã ô, ãzarazéhé nhihudu norĩ nhipti'ai ãma hã. Ta norĩ hã te te ãma siwi wabzu ô di, te te sina ãumnhasizém na hã. — ãne Zezusi hã te tinha, ãsarina ãsi'aba'rê norĩ ma.

¹⁰Tawamhã apã ma tô aï'aba'rê, romanu siwadi norĩ hã, ãsôrôwa u. Sihutu wamhã, ma tô ãhãzé ré hã sabu za'ra. Rowê na te oto nhamra, hãzé ãna.

ãmrotô 'ra hã, Zezusi te te ãhãwa'utuzé wasu'u

¹¹ Tawamhã âma romomro ô ré, te Zezusi hã mo, 'ri wa'ô'tô u. Na'ï na 'ri wa'ô'tô nhisi u, te mo. Ísiré 're ñomro mono norí hã te Ísiré ai'aba'ré. Da'ahã na te duré Ísiré ai'aba'ré ni.

¹² Tawamhã 'ri wa'ô'tô 'wawi wa'ra u, ma tô rob'uwe za'ra, Zezusi norí hã, 'ridawa u. Tawamhã íwab'rere, ma tô dasiwi âri ni, ab're u, Ìmrotô 'ra ídã hã. Misire aibã Ì'ra hã. Da'ahã na te Ísiré ai'aba'ré ni, Ìmrotô siré, ab're u.

¹³ Tawamhã Ìmrotô te te 'madã'â wamhã, ma tô âma tipê'ezé, Zezusi hã. Tawamhã ma tô tâma tinha, wawa tô da.

¹⁴ Tawamhã ma tô oto ìtême wi. Te te âri za'ra ré, ma tinhîb'rata na Íré upi. Taha wa, ma Íré mazahâri za'ra. Tawamhã te oto 'mahã:

— Ai'repudu, wa za aima tinha: Ai'utu. — Âne te 'mahã.

¹⁵ Tawamhã ai'repudu hã ma tô udu. Sahã na te oto nhamra. Tawamhã tâma rowê wa, te oto mre. Taha wa, te Zezusi hã ñna ma ti'ru, âne:

— Á ai'ra, âma saprôni. — Âne te tâma tinha. Dã'â zahã, oto sahã na sãmra wa, ma tâma tapê'êwara za'ra ni.

¹⁶ Âne te dasima nharí za'ra ni:

— Tinhîb'a'uwê norí hã te za we te 're wa'apawapto, 'Re ñhãimana u'âsi mono hã. Ma tô we watême satô, tizadawa wasu'u'wa hã. Mreme pire uptabi di. — Âne 'Re ñhãimana u'âsi mono âma, te tawata za'ra ni.

¹⁷ Tawamhã ñwasu'u hã ma tô wapari za'ra ni, daro mono bã, Zezusi te te ñhãiwa'utuzé wasu'u hã. Zudezu norí rob 'rata, 're ñdasi'ubumroi mono norí zama, ma tô ñwasu'u hã wapari za'ra ni.

Zuwã Batita hã Zezusihi u, tizadawa wasu'u'wa norí te te ñsatô'ri zahuré zé wasu'u Mateusi 11.2-19

¹⁸⁻¹⁹ Tawamhã Zezusi te te ñhãiwa'utuzé hã ma tô Zuwãhã ma wasu'u za'ra, ñsawã 'madã'â pese 'wa norí hã. Tawamhã maparane te só tihãrã zahuré, Wanhib'apito u neb zahuré da, te te sadanharí zahuré da. Âne Zuwã te tâma nharí zahuré:

— Ane wa'aba wamhã, te za ñsadanharí 'wa, âne: “E a hã Zuwã Batita te te dama 're aiwasu'u mono, te we aimo. E zahadu aimawi zô, wa za 're wanhimipari za'ra.” Âne te za tâma ñzadawa wasu'u wa'wa. — Âne Zuwã hã ma tô tâma nharí zahuré.

²⁰ Tawamhã Zezusihi u, te tineb zahuré. Ìtême simasisi wamhã, ma tô sadanharí zahuré:

— E a hã Zuwã Batita te te dama 're aiwasu'u mono, te we aimo. E zahadu aimawi zô, wa za 're wanhimipari za'ra. — Âne te sadanharí zahuré.

²¹ Tawamhã ñsô'a zahuré, te a'ã da'apese da'ahã na, Zezusi hã. Duré wa'uburé ré, 're ñdanomro mono hã ma tô dama anhamra. Duré ñtob'a norí hã ma tô ato pese, ahã na.

²² Tawamhã te te da'apese parimhã, te oto tâma nharí zahuré, Zuwã Batitaha mreme 'madã'â pese 'wa norí ma, âne:

— Apã te za ane wa'wa Zuwãhã u, tâma ñwasu'u wa'aba da. Ìtob'a norí hã to pese za'ra wa, ma tô apã te te 're rob'madã'â za'ra. Ìmorí'ô norí hã te oto para na 're nomro. Duré ñ'wa're ré norí hã ma tô 're pese za'ra. Hãiba wê na te oto 're nomro. Duré ñpo'reptô norí hã te oto 're simipari za'ra. Duré 're ñdã'ã za'ra mono norí hã ma tô duré apã 're hãiwa'utu za'ra. ñwasu'uwê hã ma tô duré ñsibrob'ô norí hã te te 're wapari za'ra. Âne na te za tâma ñrowasu'u za'ra wa'wa, Zuwãhã ma.

²³ Ni'wam norí hã, wa hã 'Re ñhãimana u'âsi mono zadawa para we ñmorí na, 'rãwi ñ'ãma 're siwã za'ra mono ô wamhã, ta norí ma si tâma 're rowê uptabi za'ra mono di za. — Âne ma tô Zezusi hã tâma waihu'u zahuré.

²⁴ Tawamhã apã te tineb zahuré Zuwã Batitaha u, aibã norí hã. Tawamhã ñsa'u zahuré si, te Zuwã hã dama wasu'u wê, Zezusi hã. Da'ahã na ñdasi'ubumroi mono norí ma, te âne tâma rowasu'u za'ra:

— A'ubuni u, ma tô 're anomro aba mo, Zuwã hã sabu za'ra wa'aba da. E tawamhã du teihi 'rãihã hã uware wa, rowa'u te te 're ñhãpã za'ra mono ne, Zuwã Batita hã roti da, sib'uware na 're ñhãimana mono wa, ma tô ñtême 're anomro aba mo. Mare di. Ta hã roti da, sipetete na ma tô 're hãimana.

²⁵ E uza wê na 're si'uza mono wa, ma tô ñtême 're anomro aba mo, 're sabu za'ra wa'aba mono da. Mare di. Uza wê na 're si'uza mono ô di. Uza wê ré 're ñnomro mono norí hã, te apito nhorôwa âma 're si'ubumro. Uburé marí hã ñwê uptabi si, te tâma 're hãimana za'ra, ta norí ma.

²⁶ Ma'ápé, ñma wasu'u za'ra wa'aba za. E 'Re ñhãimana u'âsi mono zadawa wasu'u'wai wa, te ñtême 're anomro aba mo, 're sabu za'ra wa'aba mono da. Tane tô. ñwana ñsawã wasu'u'wa norí hã, ñpire na te te siwi âma wabzu za'ra ô di, Zuwã hã.

²⁷ Duréihã ma tó 'Re İhâimana u'âsi mono zadawa wasu'u'wa hã âne âma rob'ui'éré, Zuwãhã âma, 'Re İhâimana u'âsi mono nreme na: "İzadawa wasu'u'wa, wa za aiwana satô, te te asô ropese mono da." Âne duréihã âma rob'ui'éré hã, İbahã na hã.

²⁸ Te duré tãma rowasu'u za'ra, Zezusi hã:

– Uburé İwana 're İnomro mono norĩ hã te te siwi âma wabzu za'ra ô di Zuwã hã, İsimiromhuri pire na hã. Tane nheré, 'Re İhâimana u'âsi mono te te 're İda'azawi mono zéb zarina, te te 're İda'apawapto mono zé hã, hãiba ré ré, te te waihu'u ô di za, Zuwã hã. Ni'wam norĩ si, 'Re İhâimana u'âsi mono nhib'a'uwé norĩ si te za te te sina 're waihu'u za'ra, İ'uirĩ na. Taha wa, ta norĩ hã te za pire na 're hâimana za'ra, Zuwã Batitaha nhipai u. Duré ni'wam norĩ hã 'Re İhâimana u'âsi mono nhib'a'uwé norĩ hã, tisiré norĩ ma, wapu na 're hâimana za'ra mono nheré, te za pire na 're hâimana za'ra, Zuwã Batitaha nhipai u, ta norĩ si İ'uirĩ na te te sina 're waihu'u za'ra mono wa, 'Re İhâimana u'âsi mono te te 're İda'apawapto mono zé hã. – Âne ma tó Zezusi hã dama wasu'u, Zuwã hã.

²⁹ Tawamhã uburé ma tó İsimirowasu'u hã wapari za'ra ni. Danhib'apito ma, rob'ui'prazé ubumroi'wa norĩ zama, ma tó dame wapari za'ra. Ta norĩ hã ma tó oto wapari pese za'ra, 'Re İhâimana u'âsi mono nhimiroti hã. Taha wa, ma tó Zuwã hã â dawabzuri hã tãma 'manharĩ za'ra.

³⁰ Tazahã, parisezu norĩ hã rowahutu'wa norĩ me, ma tó siwi wé'ô za'ra 'rãwi, 'Re İhâimana u'âsi mono te te sima İda'awézé hã. Taha wa, te te siwi wé'ô za'ra wa, â dawabzuri hã te te tãma 'manharĩ za'ra ô di, Zuwã hã.

³¹ Tawamhã Zezusi te duré dama tinha:

– E 'wam norĩ âma, wa za âma simiré'é za'ra, â nimosi dapoto tém norĩ âma hã.

³² Âté ai'uté norĩ âma, wa za âma simiré'é za'ra. 'Ri nhi'riti wa, da te dasina 're İ'ubumroi mono zéb âma si'ubumroi ré, âne ai'uté norĩ hã te za si'mahârâ za'ra: "Wa norĩ hã wa tó aima rowamreme za'ra wa'aba ni aré, dasina damro wa, rowamremezém na. Tazahã, âma ato za'ra wa'aba ô di. Duré da te dasina 're ti'a za'ra mono wa, rowamremezém na, wa tó aré aima rowamreme za'ra wa'aba ni. Tazahã, a norĩ wa'wa hã wazu ai'ry'ry wa'aba ô di." Âne te za si'mahârâ za'ra.

³³ Tane a norĩ wa'wa hã. Zuwã Batita hã te sai âna nasi aimasisi. Duré uwa 'rãwi wa'wa İsé hã te te 're hãsi mono ô di. Tazahã, âne 're hâimana mono wa, ma tó tãma 're İnharĩ wasété za'ra wa'aba mo, wa'uburé ré 're İmorĩ na.

³⁴ Wa hã ti'ai âma dasiré İpodo hã dasazém na, wa 're İsa. Uwa 'rãwi wa'wa İsé hã wa duré te dame 're hãsi. Tazahã, İsa za'êtê na 're İsai mono na, duré uwa 'rãwi wa'wa zé zei 'wa na, ma tó İma 're İnharĩ wasété za'ra wa'aba mo. Duré siwa'ru 're İdanomro mono norĩ siwadi na, ma tó İma 're İnharĩ wasété za'ra wa'aba mo.

³⁵ Tane tó. 'Re İhâimana u'âsi mono nhimiroti hã, wé di. Tawamhã İsimiroti hã da te dasima 're wé za'ra mono wamhã, te za İwé hã da te 're waihu'u za'ra. Da te 're wé'ô za'ra mono ô di za, İwé hã dasiwi. – Âne Zezusi ma tó tãma siwasu'u za'ra.

Simahã wasu'u

³⁶ Tawamhã aibã parisezu hã ma tó Zezusi hã zô hã, İme sa da. Taha wa, te Zezusi hã İdôrôwa u mo. Tawamhã ma tó nhamra tame, sa da.

³⁷ Tame 'ri wa'ôto âma hã ma tó İwasu'u hã wapa pi'ô hã, siwa'ru 're İmorĩ hã. Parisezu nhorôwa âma sa da, İsãmra na ma tó wapa. Taha wa, ma tó simhi ti'â, Zezusi hã zarina, wedewa'u zadaze ré hã. Simhi hã, êtê'a 'manharĩ. Wa'âbã za'êtê di, wedewa'u zadaze hã.

³⁸ Tawamhã Zezusi hã babarã na ma tó nhamra, wawa sina. Wawai wamhã, Zezusi hã para nhisiwi, ma tó ti'upĩni a'a. Taha wa, te tizéré na tãma u'ô. Tawamhã da te 're İdatob'rata hãrã za'ra mono ne, tizadawa na ma tó para hãrã. Ma tó wedewa'u zadaze hã İpara nhisiwi sa'wa, pi'ô na.

³⁹ Tawamhã, parisezu te te 'madã'â wamhã, ma tó tipé'ê na tãma tinha, Zezusi hã:

– Tó sena, 'Re İhâimana u'âsi mono zadawa wasu'u'wai 'wa'âhã, te aré İwasété na âma waihu'u, pi'ô'i âma hã. Tawamhã te aré tiwi sisawi, te te upi tó da. – Âne ma tó tipé'ê na tãma tinha.

⁴⁰ Tawamhã İsimirosa'rada hã te te sina waihu'u wa, te aibã ma tinha, Zezusi hã:

– Sima, marĩ, wa za aima waihu'u, waihu'u da. – Âne te tãma tinha.

Tawamhã Sima te asa tãma tinha:

– Ma'âpé, İma waihu'u, marĩ hã te waihu'u da.

⁴¹ Taha wa, te Zezusi hã tãma rowasu'u oto, âne:

– Aibã norĩ hã ma tó rob'ui'prazéb ô wa, taré a'â dawi 'maiwaptêrê zahuré. İmorĩ'rada hã 500 na ma tó dawi waptê. Duré İhãiba amo hã, 50 na ma tó dawi waptê. Niwapsi te za İdôwa're' re tãma sômri zahuré, aibã ma.

⁴² Tawamhã rob'uprazéb ò wa, Ìsôwa're're te te tãma sômri zahuré ò di. Sôpru wa, ma tô tãma waihu'u zahuré aibã hã, Ìsôwa're're te te tãma sômri zahuré tô da. — Æne ma tô Simahã ma rowasu'u, Zezusi hã. Tawamhã te oto ãma sadanha:

— E 'wa hã te za sawi pese, aibã Ìsôpru hã. E 500 na te te tãma Ìsômri hã te za sawi pese. E 50 na te te tãma Ìsômri hã te za sawi pese. — Æne Zezusi te sadanha.

⁴³ Tawamhã Sima te asa tãma tinha:

— Áté 500 na te te tãma Ìsômri hã te za sawi pese. — Æne Sima, te Zezusihi ma tinha.

Tawamhã Zezusi te duré asa tãma tinha:

— Tane tô. Ì'uwaibaba ma tô Ìma Ìwaihu. — Æne ma tô ãma saze.

⁴⁴ Tawamhã pi'ò'i u sipi'rai wamhã, te duré tãma tinha, Simahã ma:

— Àhãta, pi'ò hã. Tãma Ìzawi pese di. A hã we Ìzébré wamhã, à hã dama 'rui ò di, da te Ìpara upsô da. Pi'ò si ma tô Ìpara upsô, ti'upîni na. Ma tô duré tizéré na Ìpara u'ò.

⁴⁵ A hã we Ìwisi wi, Ìzawi ò di, Ìtob'rata hãrã na. Pi'ò si Ìzébré wi, ma tô Ìpara hãrã.

⁴⁶ A hã dama Ì'rui ò di, azeitona 'rã'i wa'ui wam na da te Ìzébré u'ré da, Ìma robze da. Pi'ò hã wedewa'u zadaze pire hã ma tô Ìpara nhisiwi sa'wa.

⁴⁷ Tãma Ìzawi uptabi wa, ma tô Ìma 'manharĩ wê. Marĩ hã te te 're Ì'ab'manharĩ wasété mono zé hã ahã nherê, wa tô tãma tipa. Taha wa, tãma Ìzawi uptabi di, te tãma apari wa. Dawasété ahã na 're dasisãmri za'ra mono ò wamhã, da te dasina 're waihu'u za'ra mono ò di za. 'Re Ìhãimana u'ãsi mono, dawasété ahã na te dama 're Ì'apari mono zé hã. Tawamhã 'Re Ìhãimana u'ãsi mono, dama sawi prã ti za. Dawasété ahã na 're dasisãmri za'ra mono wapsi, te za da te dasina 're waihu'u za'ra, 'Re Ìhãimana u'ãsi mono, dawasété ahã na te te dama 're Ì'apari mono zé hã. Tawamhã 'Re Ìhãimana u'ãsi mono, dama sawi uptabi di za. — Æne ma tô Simahã ma waihu'u, Zezusi hã.

⁴⁸ Tawamhã pi'ò'i ma, te oto tinha:

— Marĩ hã 're Ì'ab'manharĩ wasété mono zé hã wa tô oto aima tipa. — Æne te pi'ò'i ma tinha.

⁴⁹ Tawamhã Zezusihi mreme, ma tô pi'ò'i ãma wapari za'ra, Ìsiré Ìsaihuri norĩ hã. Taha wa, ma tô tipê'ê na tãma nharĩ za'ra:

— E 'wa hã ò hã, marĩ, da te 're Ì'manharĩ wasété za'ra mono zé hã, te te dama 're Ì'apari mono hã. — Æne te tãma nharĩ za'ra, tipê'ê na.

⁵⁰ Tawamhã Zezusi te duré pi'ò'i ma tinha:

— Ìzazei wa, wa tô aipawapto, aiwasédé hã rême pese da. Rowê na te za oto 're aimo. — Æne te pi'ò'i ma tinha, Zezusi hã.

8

Pi'ò norĩ hã, Zezusihi siré Ìsi'aba'rezé wasu'u

¹ Tawamhã ãma ronometro wapsi, te Zezusi hã datême 're mo, daro mono bâ. 'Ri nho'ômo mono bâ, te datême 're mo, 'ri wa'òtô mono bâ. Tawamhã datême 're morĩ wamhã, ma tô Ìwasu'uwê na te te 're da'apo're pu'u, 'Re Ìhãimana u'ãsi mono, da'ãma 're Ìsib'a'uwê mono zé wasu'u na. Datême 're morĩ wamhã, aibã norĩ hã 12 na Ìhãiba za'ra hã, te Ìsiré 're nomro.

² Pi'ò norĩ zama, te Ìsiré 're nomro, wa'uburé, te te tãma 're Ì'anhamra mono norĩ hã. Duré, Ìhãzé hã te te tãma 're Ì'apari mono norĩ zama, te Ìsiré 're nomro. Pi'ò nhisi hã, Mariza Madarena na Ìsisi hã, wa'uburé hã, 7 na Ìhãiba za'ra hã te te tãma Ìsãmra za'ra hã.

³ Duré, Zuwãna na pi'ò nhisi hã. Cuzaha mro hã, apito Erodihĩ ma romhuri'wai mro hã. Duré, Suzana na pi'ò nhisi hã. Aimawi norĩ hã te duré Ìsiré 're nomro, pi'ò norĩ hã, ahã na. Ta norĩ hã tinhimarĩ na, te Zezusi norĩ hã te te 're pawapto za'ra.

Aibã hã amnho poto mono da, te te Ì'anhamra mono zé wasu'u

Mateusi 13.1-23; Marcusi 4.1-20

⁴ Tawamhã da'ahã na ma tô Ìtême aihutu ni Zezusihi u, 'ri ahã mono bâ, da te sabu za'ra da. Tawamhã, Ìtême dasi'rã'òtô wamhã, ma tô dama romnhimiré'ê, ãne:

⁵ — Aibã hã te buru u mo, ti'ai hãibãdá na, amnho hã te te anhamra mono da, poto mono da. Tawamhã, amnho hã te te anhamra mono wamhã, nima norĩ hã bãdádi zababa ma rere'e. Taha wa, ma tô dapara na nasi wati'i za'ra ni, tiwi Ìrere'e mono hã. Sire hã ma duré te te uprosi, poto mono ò ré.

⁶ Ètê nhisiwi, ma duré nima norĩ hã rere'e, amnho hã. Ti'a baiháire di, ètê nhisiwimhã. Tawamhã, 'wanhipré wairébé mono wamhã, ti'ai wa'ro wamhã, ma 'wanhipré 'ré.

⁷ Nima norĩ hã ma duré rere'e, wab'ru wazari. Tawamhã siré ma tô 'wanhipré. Siré 'wanhipré mono wamhã, ma te te ubu, wab'ru hã. Taha wa, ma tô te te uprosi.

⁸ Ti'ai wê wa, ma duré nima norĩ hã rere'e. Ma tô oto 'rã. 'Rã'i mono wamhã, 'rã'i pese uptabi di, rob're hã. — Æne Zezusi ma tô dama rowasu'u.

Te duré dama tinha:

— Asimipari pese za'ra wa'aba wamhã, ma'ápé ìwapari pese za'ra wa'aba ìnhimirowasu'u na hã, waihu'u za'ra wa'aba da. — Æne te dama tinha.

⁹Tawamhã Zezusihi siré 're ìnomro mono norĩ si, te sadanharĩ za'ra:

— E marĩ na, te ãma ìsimiré, amnho potozém na hã. — Æne te sadanharĩ za'ra.

¹⁰Tawamhã Zezusi asa te tãma nharĩ za'ra:

— 'Re ìhãimana u'ãsi mono hã ma tô dawĩ sawi, a'ã da te waihu'u tô za'ra da, da'ãma 're ìsib'a'uwẽ mono zé wasu'u hã. A norĩ wa'aba ma si, ma tô oto ìwasu'u hã aima waihu'u za'ra wa'wa, waihu'u za'ra wa'aba da, dama ìwaihu'u'õ hã. Taha wa, wa tô ìnhimiromnhimiré'é na si, te dama 're arowasu'u. Tawamhã dapo're na, da te 're wapari za'ra mono nheré, da te waihu'u za'ra õ di za, ãma ìsimiré'ézé hã.

¹¹— Æhãna, wa za aima waihu'u za'ra wa'wa, te ãma ìsimiré'ézé hã waihu'u za'ra wa'aba da. Amnho potozé hã, 'Re ìhãimana u'ãsi mono mreme, te wasu'u.

¹²Amnho hã bâdãdi zababa ìrere'e mono hã, aimawi a'uwẽ, te wasu'u. Ta norĩ hã áté te za ìsada wasu'u hã taré tipo're na te te 're wapari za'ra. Tawamhã te za Wa'uburé hã ìtème 're sihutu áté, te te tãma 're roti za'ra mono da, te te 're saze za'ra mono tô da, te te 're sô'repu za'ra mono tô da, 'Re ìhãimana u'ãsi mono hã. Tawamhã wa'rui'wa nhimiroti zarina, te te saze za'ra õ di za, 'Re ìhãimana u'ãsi mono zadawa wasu'u hã.

¹³Duré amnho hã êtê nhisiwi ìrere'e mono hã, aimawi a'uwẽ, te wasu'u. Ta norĩ hã áté te za 'Re ìhãimana u'ãsi mono zadawa wasu'u hã te te 're wapari za'ra, tipo're na. Tawamhã te za ìwasu'u ma 're to za'ra. Tazahã, õne haré te te 're saze za'ra mono õ di za. Áté, te za te te 're saze hutu za'ra. Áté rowasédé hã da te tãma 're 'manharĩ za'ra mono õ'umnhasite, te za apã 're sipizari za'ra.

¹⁴Duré amnho hã wab'ru wazari'ĩ'a'a mono hã, aimawi a'uwẽ, te wasu'u. Ta norĩ hã áté te za taré tipo're na te te 're wapari za'ra, ìsada wasu'u hã. Tazahã, marĩ wamhã, õhõ ãma si 're nomro mono õ di za. Áté, marĩ na si te za te te 're rosa'rata za'ra sima, áté rob'uiprazém na si, áté titozém na si. Tawamhã rob'rã'ĩ'rã wẽ prã ne, 're hãimana wẽ uptabi za'ra mono õ di za.

¹⁵Amnho hã ti'ai wẽ wa, te te ì'anhamra mono hã, aimawi a'uwẽ, te wasu'u. Ta norĩ hã áté te za tipo're na te te 're wapari za'ra, 'Re ìhãimana u'ãsi mono zadawa wasu'u hã. Tawamhã te za te te 're 'madã'ã pese za'ra. Õne haré, te za ìsimiroti na 're nomro. Tawamhã rob'rã'ĩ'rã wẽ uptabi ne, hãimana wẽ uptabi na, te za oto 're hãimana za'ra. Æne amnho potozé wasu'u na, wa aima ãma simiré'é za'ra wa'wa. — Æne, Zezusi te tãma rowasu'u za'ra, tisiré 're ìnomro mono norĩ ma.

¹⁶Tawamhã rob'uiwézém na te duré ãma simiré'é:

— Rob'uiwézé hã da te ro'o wamhã, e piza'a na te za upsibi ni. E daza'warizéb 'rowi, te za sãrĩ ni. Mare di. Ìsima'warazém na si, te za sô'awi da te 're sô're, rowa'a na 're danhisisi mono da. Taha da, te za ro'o ni, rob'uiwézé hã.

¹⁷Tane, ìmreme hã a'ã te dama ìwaihu'u'õ hã te za niwapsi waihu'u za'ra ni. Taha wa, wa tô rob'uiwézém na ãne ãma simiré'é.

¹⁸— Taha wa, ma'ápé ìmreme hã 're wapari pese za'ra wa'aba mono. Tawamhã ìzadawa wasu'u hã te za te te aima 're waihu'u za'ëté za'ra wa'wa, 'Re ìhãimana u'ãsi mono hã. ìmreme hã 're wapari pese za'ra wa'aba mono õ wamhã, te za apã te te aiwi 're awaibui wa'wa, ìzadawa wasu'u hã. Tawamhã ìmreme waihu'u'wa na, 'rãwi 're asi'madã'ã ze za'ra wa'aba mono nheré, te za ìmreme waihu'u'õ'wa ne, oto 're anomro aba mo. — Æne te Zezusi hã tisiré 're ìnomro mono norĩ ma rowasu'u za'ra.

Zezusihi na wasu'u, ìno norĩ wasu'u me

Mateusi 12.46-50; Marcusi 3.31-35

¹⁹Tawamhã Zezusihi u, te ìna hã mo, ìno norĩ me. Te te sabu za'ra da, te ìtème ai'aba're. Tazahã, da'ahã uptabi wamhã, ìtème sisisi waihu'u õ di.

²⁰Tawamhã Zezusihi ma, ma tô ni'wa hã rowasu'u, ãne:

— Ano norĩ hã te rowi asõ aimasa, ana me. Te sima wẽ za'ra, te te asabu za'ra da. — Æne ma tô tãma rowasu'u ni.

²¹Tawamhã Zezusi te uburé dama tinha:

— Ni'wam norĩ hã, 'Re ìhãimana u'ãsi mono zadawa wasu'u hã tipo're na te te 're wapari za'ra mono wamhã, duré te te 're 'madã'ã pese za'ra mono wamhã, ta norĩ hã ìna, duré ìno. — Æne Zezusi ma tô dama waihu'u.

Zezusi hã rowa'u'u ma, te te ìnharizé wasu'u

Mateusi 8.23-27; Marcusi 4.35-41

²²Tawamhã bâta na, te Zezusi hã tãma nharĩ za'ra:

— Oto zara u, wa te saprī za'ra wa'aba. — Āne te tāma nharī za'ra, tisiré 're ĩnomro mono norī ma. Tawamhā uba're wa, ma tō asisi, zara u te te saprī za'ra da, ĩsō'u na.

²³ Tawamhā te te siré sari za'ra ré, te oto Zezusi hā nhono, uba're wa. Sōtō ré, ma tō rowa'u ĩsa'ēne hā watobro. Taha wa, uba're 're, ma tō ā hā āzé. Uba're 'remhā, ā hā 'masisi wamhā, simimnhasi di oto.

²⁴ Taha wa, ma Zezusihī u tiwahutu za'ra, te te siwī utu da. Tawamhā āne te siwī 'mahā: — Rowahutu'wa, rowahutu'wa, wa za ai'utōrī ni. — Āne te 'mahārā za'ra. Tawamhā Zezusi ma tō udu. Ma tō wahudu. Rowa'u'u ma, te tinha, te te sazāri da. Duré ā ma, te tinha, ātu da. Taha wa, ma tō sazā, rowa'u hā. Ma tō ti'ātu oto.

²⁵ Tawamhā tisiré 're ĩnomro mono norī ma, te tinha:

— E niha bā asiwī ĩ'umnhasi aba ō di. — Āne te tāma nharī za'ra. Taha wa, te sima nharī za'ra:

— E niha ō hā aibā hā. Rowa'u'u ma, te tinha. Tawamhā rowa'u hā ma tō sazā. Duré, ā nhibzaihā ma, te tinha. Taha wa, ma tō ti'ātu. ĩmreme hā ma tō wapari zahuré. — Āne te sima nharī za'ra. Mreme pire wa, ma āma titob'uzu za'ra. Ōne hā tāma sa'rese za'ra ō wa, ma tō tāma tipahi za'ra, ĩsiré 're ĩnomro mono norī hā.

Zezusi hā, aibā hawī wa'uburé te te ĩsatōrī za'ra zé wasu'u
Mateusi 8.28-34; Marcusi 5.1-20

²⁶ Tawamhā Darireza na danhipti'a nho'ōmo nhisi hawī, te ĩsō'u na siré sari za'ra, te te saprī za'ra da, zara u, Zezusi norī hā. Tawamhā ma tō oto aihutu zara u, Zeraza na danhipti'a nho'ōmo nhisi niwī.

²⁷ Tawamhā uba're hawī, ma tō watobro, Zezusi hā. Watobro wamhā, ma tō aibā hā ĩtēme wi, wa'uburé ré 're ĩmorī hā. 'Re si'uzā mono ō di oto, aibā hā. Ai'urēiwi, te oto 're mo. Duré 'ri 're, 're sāmra mono ō di oto. Adā'ā 'ru āma si te oto 're sāmra, ētē wa, ab're sirōmo āma. Tame 're hāimana mono ré hā, ma tō āma tironomro pese.

²⁸⁻²⁹ Aibā hā da'rata 're sāmra mono ré, ma tō da te 're 'madā'ā za'ra, 're pusi tō mono da. Ma tō da te dasiwi 're hi wasisi, ĩsi'uwazi nhorō rutu na. Te duré da te dasiwi 're pa wasisi. Tazahā, tihi wasisizé hā te te sina 're anhinari, tipawasisizéb zama. Taha pari, te wa'uburé hā te te siwī 're saprōni, a'ubuni u. Tawamhā aibā hā Zezusi te te 'madā'ā wamhā, ma tō 're sadari. Taha wa, hi'rātītō ma aime, Zezusihī papara. Tawamhā mreme 'rāihā na te tāma tinha, āne:

— Zezusi, 'Re ĩhāimana u'āsi mono 'ra, e marī ĩ'āma 'manharī da, te we aimo. ĩ'azāri ō di za. Āne, wa ĩsina aipa'uwati. — Āne te Zezusihī ma tinha, wa'uburé ma, te te rob'rui wa, aibā hawī watobro da.

³⁰ Tawamhā Zezusi hā te sadanha, ĩsisi zō:

— E niha asisi hā.

— Ahā na, ĩnhisi hā. — Āne te aibā hā tāma sisisi, wa'uburé hā āma ahā wa.

³¹⁻³² Tawamhā romhutu na te uhābā norī hā tisa te te 're huri ahā na, sa'a zahāpā para wi. Tawamhā wa'uburé norī hā te Zezusihī wi rowaptērē za'ra sina, rob'rehā u te te satōrī tō za'ra da. Uhābā u, te te satōrī za'ra da, te sina rowaptērē za'ra, uhābā hāiba 're, 're si'ubumroi mono da. Taha wa, ma tō Zezusi hā āma saze za'ra.

³³ Tawamhā aibā hawī ma tō wairé wa'uburé norī hā, uhābā u si'aba'rē da, ĩhāiba 're, 're si'ubumroi mono da. Tawamhā, ĩtēme sisisi wamhā, uhābā norī hā te sisa're, wara sina. Sa'a hawī, te pi'reba sisa're, ĩsō'ui u. Tawamhā āi ba ma tō rere. Taha wa, ma ai'utō uburé.

³⁴ Tawamhā uhābā 'madā'ā'wa norī hā te te 'madā'ā za'ra wamhā, te ĩsiti datēme sisa're, wara sina. 'Ri nho'ōmo āma, ma tō dama rowasu'u za'ra. Rom na, 'ri wa'ōtō āma zama, ma tō dama rowasu'u za'ra.

³⁵ Tawamhā ĩsimirowasu'u hā da te wapari za'ra wamhā, te ĩtēme ai'aba'rē ni, da te sabu za'ra da. Zezusihī u dasihutu wamhā, ma tō aibā hā 'madā'ā za'ra ni, wa'uburé ĩhawī ĩwairébé hā. Uza ré, te oto nhamra Zezusihī papara, rowē na. Tawamhā tōma rowē wa, ma tō tāma tipahi za'ra, dama 're ĩrowē za'ra mono zé hā tāma sa'rese za'ra ō wa.

³⁶ Tawamhā āma ĩ'madā'ā za'ra 'wa norī hā te aibā wasu'u hā dama wasu'u za'ra, ĩsihutu norī ma. Aibā, Zezusi te te ĩpawaptobzēm na, te tāma rowasu'u za'ra.

³⁷ Tawamhā aibā wasu'u te te wapari za'ra wamhā, ma tō tāma tipē'ēwara za'ra. Taha wa, te Zezusihī ma rob'ru za'ra, ĩrom nhiti morī za'ra da. Aihīni te tāma rob'ru za'ra, Zeraza na danhipti'a nho'ōmo nhisi āma 're ĩsi'ubumroi mono norī hā.

Tawamhā Zezusi te za oto āzé, uba're wa, danhiti morī da.

³⁸ Tawamhā aibā te sina 'mahā, Zezusihī siré 're morī da, te te tāma pisutu da, wa'uburé ĩhawī ĩwairébé hā.

Tane nherē, te Zezusi hā aibā ma tinha, āne:

³⁹ — Apâ aimorĩ, asõrõwa u, 'Re ìhâimana u'âsi mono, ìwē na te te aipawaptobzém na asisânawā norĩ ma, asiwasu'u da. — Āne te aibâ ma tinha.

Tawamhã aibâ te oto mo, tinhorõwa u, 'ri baba dama siwasu'u mono da, Zezusi te te ìpawaptobzém na hã.

Zezusi, Zairuhu 'ra te te ìhâiwa'utuzé wasu'u, bâdâdi wâi wa, pi'õ hã te te ìpesezé wasu'u me Mateusi 9.18-26; Marcusi 5.21-43

⁴⁰ Tawamhã ma tô Zezusi norĩ hã apâ saprĩ za'ra, zara u. Zara niwĩ, ma tô da'ahã na ìwana sô ropsãmri za'ra ni. Tawamhã apâ datême wisi wē te, ma Zezusi hã sawi za'ra ni, dato sina.

⁴¹⁻⁴² Tawamhã ma tô aibã hã ìtême wi, Zairu na ìsisi hã, zudezu norĩ te, rowahutuzéb ãma dawada'uri'wa hã. Ìtême wisi wi, ma tô hi'rãtitõ aime, Zezusihi papara, ti'ra ãma te te sadawa pibu da, ìsõrõwa u morĩ da, ì'ra hã hãzé wa, te te tãma pese da. Ì'ra hã pi'õ pisi, azarudu hã 12 na ãma ìwahu. Hãzé ahã wa, te za oto tiwi dârã. Tawamhã Zezusi te oto mo, ìsõrõwa u. Morĩ ré, te da'ahã na ãma dasi'uirĩ. Ma dasiwi hõti ni.

⁴³⁻⁴⁴ Tawamhã bâdâdi na morĩ ré, ma tô pi'õ hã wi, Zezusihi u, ìhãzé ré hã, marĩ te te 're ì'manharĩ mono hã. Hãzé ré, ma tô ãma tiwahub ahã, 12 na ãma ìwahubzé hã. Dawede'wa norĩ ma, ma tô uburé tinhibro hã uprosi, tisiwa'âbázém na. Tazahã, dawede'wa norĩ hã te te siwi hõsi õ di, ìwede na hã. Tawamhã pi'õ hã, Zezusihi babarã niwĩ ma tô saprĩ. Ì'uza 'rãsudo hã ma tô tiwi upi. Taha wa, ma awa'awi séptârã. Tãibã oto ìhãzé hã.

⁴⁵ Taha wa, ma tô ãne da'mahã, Zezusi hã:

— E 'wa hã ma ì'uza hã ìwi upi. — Āne te da'mahã.

Tane nherē, te tãma amrami za'ra ni. Taha wa, te Pedru hã tãma tinha:

— Rowahutu'wa, oro aihĩni ai'ãma wasi'uirĩ mono za, wa wasiwi aihõti ni. — Āne te tãma tinha.

⁴⁶ Tawamhã Zezusi asa te tãma tinha:

— Ni'wa hã ma tô ì'uza hã ìwi upi. Ìwaihũ'u pese na, wa tô pese. Āne, wa tô ìsina waihu'u. — Āne te tãma tinha.

⁴⁷ Tawamhã ma tô pi'õ hã sina wapa, Zezusihi mreme hã. Da te sa'rese ãna, sãmra õ di oto, pi'õ hã. Āne ma tô sina waihu'u. Tawamhã rērē'ē sina, ma tô Zezusihi papara aime hi'rãtitõ. Danho'a te Zezusihi ma siwasu'u pese, ãne:

— Ìhãzé wa, wa ai'uza aiwi upi, ìpese da. Tawamhã awa'awi wa tô séptârã. — Āne te tãma siwasu'u.

⁴⁸ Tawamhã Zezusi te tãma tinha:

— Ìhidiba, za te aipesezém na ì'umnhasi wa, ma tô aihãzé hã aima apa. Rowē na te za oto 're aimo. — Āne, Zezusi ma tô tãma tinha.

⁴⁹ Tawamhã pi'õ ma, te te rowasu'u ré, ma tô ãma wi, aibã hã. Zairuhu u, ma wi. Ìsõrõwa hawi, ma ìtême wi, rowahutuzéb ãma 're da'anhimi'ruĩ mono 'wai u hã. Tawamhã te Zairuhu ma rowasu'u aibã hã, ãne:

— Ai'ra hã ma tô aiwi dârã, azaruture hã. Rowahutu'wai wi, ro'wa're õ'umnhasite, simiromhuri nherē. — Āne te tãma tinha.

⁵⁰ Tawamhã Zezusi ma tô sina wapa. Taha wa, te Zairuhu ma tinha:

— Ai'ra wasu'u ma, aipahi tõ. Ìwétési asina ì'umnhasi, te aipawaptob da. Ìwétési ì'umnhasi wamhã, rowē na te za oto aima 're sãmra. — Āne te Zezusi hã tãma tinha.

⁵¹ Tawamhã Zezusi hã Zairuhu nhorõwa u oto wisi wamhã, ma tô pisutu za'ra, Pedru norĩ si ìsiré sisisi da, Zuwã hã duré Ti'adu hã, azaruture mama norĩ siré hã.

⁵² Tame da'ahã na te ãma ta'ry'ry ni, dapē'ézé te. Taha wa, te Zezusi hã dama tinha, ãne:

— Āma ai'ry'ry wa'aba õ di za. Azaruture hã dâ'a õ di. Taré te nhono. — Āne te dama tinha.

⁵³ Tawamhã asa te tãma nharĩ za'ra ni:

— Oro taré sõtõ za, te pē'ézani ãna nomro. — Āne te tãma nharĩ za'ra ni. Ìdâ'ázém na, ma tô waihu'u za'ra ni. Taha wa, ma tô ãne tãma nharĩ za'ra ni.

⁵⁴ Tazahã, te te damreme 'madâ'a õ di, Zezusi hã. Ma tô pa'ã. Mreme 'rãihã na, te tãma tinha, ãne:

— Azaruture, aiwahutu. — Āne te tãma tinha.

⁵⁵ Tawamhã ma tô apã pē'ē waze, awa'awi. Hãiwi te oto za. Taha wa, mram na te wada'uri zahuré, te te tãma a zahuré da, ìmama norĩ hã.

⁵⁶ Taha wa, ì'ra apã hãiwa'utu wa, ma tô ãma titob'uzu zahuré, ìmama norĩ hã, timro me. Taha wa, tãma rowē zahuré di. Tane nherē, te ì'ra na sadawa uwati zahuré, te te dama rowasu'u zahuré tõ da a'ã.

9

ZeZusi hã, aibã norĩ te te datẽme ãsatõrĩ za'ra zé wasu'u

Mateusi 10.5-15; Marcusi 6.6-13

¹ Tawamhã ZeZusi hã ma tã sitẽme sô tihãrã za'ra, ãsiré 're ãnomro mono norĩ zô, aibã norĩ hã 12 na ãhãiba za'ra hã zô. Tawamhã ma tã tãma pisutu za'ra, waihu'u pese na 're nomro mono da, wa'uburé norĩ hã te te dama 're sãmra za'ra mono da, duré ãhãzé ré norĩ hã te te 're pese za'ra mono da, ãsadawa para.

² Tawamhã ma tã duré satõrĩ za'ra, ãwasu'uwẽ na te te 're dapo're pu'u za'ra mono da, 'Re ãhãimana u'ãsi mono, da'ãma 're ãsib'a'uwẽ mono zé wasu'u na. Taha wasu'u na te te 're dapo're pu'u za'ra mono da, ma tã satõrĩ za'ra. Duré te te 're dapesé za'ra mono da, ma tã datẽme satõrĩ za'ra.

³ ãne te tãma roti za'ra:

– Ai'ubana te za 're anomro aba mo. Marĩ hã asiré 're 'wasari aba mono õ di za, asiwazusizé hã, duré romramizé hã. Marĩ hã 'wasari aba õ di za, mra hã, duré rob'uiprazé hã, duré ai'uzazé hã, asõ'utu'u wa'wa hã. Datẽme 're aihutu aba mono wapsi, áté 're aihutu aba mono wi, te za da te 're asawi za'ra wa'wa.

⁴ Tawamhã asõ ãhãrã 'rata aba nhorõwa ãma si, te za 're ai'ubumroi wa'aba mo, 're aiwairébé aba mono õ ré.

⁵ Datẽme 're aihutu aba mono wamhã, áté asõ 're datob'uzu za'ra wa'aba mono õ di za. Tawamhã dahawi te za 're aiwairébé aba mo, darob amoi u. Dahawi 're aiwairébé aba mono wamhã, aipara'uza zapru hã te za 're ãtata'a za'ra wa'aba mo, ti'ai u 're rere'e mono da, dawasété ma ropibuma, asimirowasu'u na, da te dasiwi 're aiwẽ'õ za'ra wa'aba mono wa. – ãne ma tã tãma roti za'ra, ZeZusi hã.

⁶ Tawamhã te oto datẽme ai'aba'ré, 'ri wa'õtõ mono bã. Daro mono bã, ma tã ãwasu'uwẽ na te te 're dapo're pu'u za'ra, ZeZusi hã siré 're ãnomro mono norĩ hã. Ma tã duré te te 're dapesé za'ra.

Apito Erodi hã, ZeZusi hã ãma te te ãrosa'ratazé wasu'u

Mateusi 14.1-12; Marcusi 6.14-29

⁷ Tawamhã apito Erodi hã, Darireza na danhipti'a nho'õmo nhisi ãma da'madã'ã'wa hã ma tã ZeZusi hã wasu'u hã wapa. ãne ma tã ni'wam norĩ hã ãma rosa'rata za'ra, ZeZusi hã ãma hã:

– Áté Zuwã Batita apã ãhãiwa'udu.

⁸⁻⁹ Áté Eriasi apã we ãmorĩ. Áté 'Re ãhãimana u'ãsi mono zadawa wasu'u 'rata 'wa, duré pese ãdá, apã ãhãiwa'udu. – ãne ma tã ZeZusi hã ãma romnomri za'ra ni. Tawamhã Erodi te tinha:

– Wa hã te waihu'u õ di. Áté ni'wa hã. Wa hã, Zuwã hã wa tã dama ti'ru, da te 'rã nhizãri da. Tãibã Zuwã hã. E 'wa hã bété ãwasu'u hã, te ãwari hã. Te sabu neza. – ãne te tinha, Erodi hã.

ZeZusi, dasa na te te ãdapawaptobzé wasu'u

Mateusi 14.13-21; Marcusi 6.30-44; Zuwã 6.1-14

¹⁰ Tawamhã ãsadawa wasu'u wa norĩ hã ma tã aihutu apã, ZeZusi hã u, ãsadawa para datẽme ãsi'aba'ré norĩ hã. Sihutu wamhã, ma tã tãma siwasu'u za'ra, te te 're ãdapawaptob za'ra mono zém na. ZeZusi hã te oto te te simro siré, Besada na 'ri nhisi u, hãiba pisutu.

¹¹ Tazahã ma tã ãwasu'u hã wapari za'ra ni. Taha wa, da'ahã na te ãsarina ai'aba'ré ni. ãtẽme dasihutu wamhã, uburé ma tã dazawi, ZeZusi hã. 'Re ãhãimana u'ãsi mono hã da'ãma 're ãsib'a'uwẽ mono zém na, te dama rowasu'u, ZeZusi hã. Duré, ãhãzé ré norĩ hã ma tã pese za'ra.

¹² ãne ré, ma tã tãhãiwahã. Taha wa, ma ãtẽme ubumro, ãsiré 're ãnomro mono norĩ hã, 12 na ãhãiba za'ra hã, te te tãma nharĩ za'ra da, ãne:

– ãmemhã robaba di, 'ri hã. Õhõta romhuture di, 'ri wa'õtõ u hã. Duré, re na 'ri ãsimasa mono u hã, romhuture di. Ma'ápé tamomo dazatõrĩ za'ra na, dasa hã da te huri da, danhotõ za'ra da zama. – ãne te tãma nharĩ za'ra.

¹³ Taha wa, te ZeZusi hã asa tãma nharĩ za'ra:

– Mare di. A norĩ wa'wa hã te za dama ã'ã za'ra wa'wa, dasaihuri da. – ãne te tãma nharĩ za'ra.

Taha wa, te asa tãma nharĩ za'ra:

– Wasazé hã syryre di. ã'u'ëté wapu hã 5 na si, ãhãiba hã. Duré pe'a hã maparanere. E da'ahã uptabi nheré, wa za tawamhã ai'aba'ré ni, dasazé hã wa te dama uipra za'ra da. – ãne te tãma nharĩ za'ra, tame da'ahã uptabi na, dasimasa wa.

¹⁴ Aibã norĩ hã 5 miu na ãhãiba za'ra hã te aimasa. ZeZusi hã te duré asa tãma nharĩ za'ra:

— Ma'āpé, dama roti za'ra wa'aba, 50 na si dasi'ubumroi mono da, da'upsātā pese na. — Āne te tāma nharī za'ra.

¹⁵ Tawamhā te dama nharī za'ra, 50 na si dasi'ubumroi mono da, da'upsātā pese na.

¹⁶ Tawamhā ī'u'ētē wapu hā ma oto waibu Zezusi hā, 5 na īhāiba hā. Pe'a ma duré timra. Hāiwa u te iré rob'madā, timama āma wata da, sōpru wa. Taha pari, ma tō te te wē'ē, ī'u'ētē wapu hā. Pe'a zama, ma tō te te wē'ē. Ma tō te te sōmri oto, tisiré 're īnomro mono norī ma, te te dama sōmri mono da.

¹⁷ Tawamhā dasa hā aihīni ma tō huri ni. Ma tō da te 'mahāpārī. Da te 'mahāpārī mono parip si, ma tō si'ōtō wa, te te apā ubumro za'ra, danho'rada hā, Zezusihi siré 're īnomro mono norī hā. Si'ōno hā ahā di, danho'rata ré hā, 12 na īhāiba hā.

*Pedru hā Zezusi, Danho'reptui'wa na te te īwasu'uzé wasu'u
Mateusi 16.13-28; Marcusi 8.27-9.1*

¹⁸ Tawamhā Zezusi hā bātā na te nhamra danhiti, mre me da, 'Re īhāimana u'āsi mono ma. Aibā norī hā te ī'rata asimro, īsiré 're īnomro mono norī hā. Timama ma, mre me pari, te sadanharī za'ra tisiré norī hā, āne:

— E niha ma tō dasima īwasu'u za'ra ni. E 'wa hā wa hā, wa 're mo. — Āne te sadanharī za'ra.

¹⁹ Taha wa, te asa tāma nharī za'ra:

— Aiwasu'u hā, ahā di. A hā, u, Zuwā Batita, apā aihāiwa'udu. A hā, u, Eriasi apā we aimorī. A hā, u, 'Re īhāimana u'āsi mono zadawa wasu'u 'rata 'wa, duréi pese atā, apā aihāiwa'udu. Āne, wa tō aiwasu'u hā wapari za'ra ni. — Āne te Zezusihi ma rowasu'u za'ra.

²⁰ Tawamhā Zezusi te duré sadanharī za'ra, āne:

— A norī wa'wa hā bété, e niha ma tō asima 're īwasu'u za'ra wa'aba mo. — Āne te sadanharī za'ra.

Taha wa, te Pedru hā tāma tinha, āne:

— A hā Danho'reptui'wa, 'Re īhāimana u'āsi mono te te aipisudu. — Āne te tāma tinha.

²¹ Tawamhā Zezusi te sadawa uwatī za'ra, te te a'ā dama wasu'u tō za'ra da, Danho'reptui'wa na.

²² Taha wa, te tāma siwasu'u za'ra, āne:

— Wa hā ti'ai āma dasiré īpodo hā, wa za robzépata za'ētē. Dama roti'wa norī hā te za siwi īwē'ō za'ra. Duré 'Re īhāimana u'āsi mono ma, da'āma romhuri'wa īpire norī hā, te za siwi īwē'ō za'ra, sasedoti īpire norī hā. Rowahutu'wa norī zama, te za siwi īwē'ō za'ra. Taha wa, te za dasiwi īwīri ni. Tawamhā bādā maparane ī'āma si'utōrī ō ré, wa za hāiwa'udu apā. — Āne te tāma siwasu'u za'ra, Zezusi hā.

²³ Tawamhā te uburé oto dama tinha, āne:

— Ni'wam norī hā īsiré 're nomro u'āsi mono da, te te sima 're īwē za'ra mono wamhā, tihāimanazém na te te 're rosa'rata za'ra mono ō di za. Awē sidāpāsi, tiza'ozéb ré, īzarina 're īnomro mono ne, da te dasiwi uprosi da nherē, te za īsiré 're nomro.

²⁴ Ni'wam norī hā tihāimanazé te te sima 're sawi za'ra mono wamhā, rowē īsi'utōrī'ō hā te te sina 're uwaimrami za'ra mono ō di za. Ni'wam norī hā īzarina 're nomro mono da, tihāimanazé te te sima 're sawi za'ra mono ō wapsi, te za te te sina 're uwaimrami za'ra, rowē hā.

²⁵ Āté ni'wa hā te za tinhibro hā te te sima 're a'ubumroi pese, sibrob ahā uptabi da. Tawamhā te za oto dārā. Ti'ab ré sibrob ahā nherē, e tāma 're rowē mono di za, rowē īsi'utōrī'ō hā te te sina uwaimrami ō wamhā. Mare di. Tāma 're rowē mono ō di za.

²⁶ Ni'wam norī hā dapipa te, īzazei'wa na, duré īmreme 'madā'ā pese 'wa na, āté dama 're siwasu'u za'ra mono ō di za, 're siséb za'ra mono ō'umnhasite. Āté te za dawī 're si'udā za'ra, īzazei'ō'wa newa. Nimahā na, wa hā ti'ai āma dasiré īpodo hā wa za wei mo apā, īhāiba na hā rowa'a za'ētē na. Īmama hā rowa'a ré, te 're hāimana u'āsi. Hāiwa āma tāma īromhuri'wa norī zama te duré iré 're hāimana u'āsi za'ra, hāimana wē na. Tane duré wa hā, wa za duré rowa'a za'ētē ré wei mo apā. Tawamhā, apā we īmorī wapsi, ī'udā'wa norī hā īzazei'wa na te sisi za'ra ō di za, ta norī hā.

²⁷ Tō sena wa aimā rowasu'u za'ra wa'wa. Aihīni ō nherē, ai'matā'ā aba ō ré, te za 'Re īhāimana u'āsi mono, da'āma 're īsib'a'uwē mono zé hā āma ī'madā'ā za'ra wa'wa. — Āne ma tō dama waihu'u, Zezusi hā.

*Ētē 'rāihā āma, Zezusihi hāiba na rowa'a za'ētē wasu'u
Mateusi 17.1-13; Marcusi 9.2-13*

²⁸ Romhuri hā misi āma si'utōrī pari, ma tō Zezusi hā te te siré simro, Pedru norī hā Zuwā norī me, Ti'adu norī me, 'Re īhāimana u'āsi mono ma, mre me da. Ētē 'rāihā na, ma tō sai'uri za'ra.

²⁹ Zezusi hã Timama ma, mreme ré hã, aimawi oto ĩ'ubu hã. Duré, ma tã ti'uzã hãirã. Hãirã uptabi di, ĩ'uzã hã. Ma ai'ubuzi.

³⁰⁻³¹ Tawamhã aibã hã maparane, ma tã ĩtẽme sihãiré zahuré, Mozési norĩ hã, Eriasihi me. ĩhãiba na hã rowa'a sa'etẽ zahuré di. Ta norĩ hã Zezusihi me, te sima rowasu'u za'ra, 'Re ĩhãimana u'ãsi mono te te tãma ĩpisutuzéb zarina, za idã'ázẽm na Zeruzarẽ ãma.

³² Te te sima rowasu'u za'ra ré, te Pedru norĩ hã tinhotõ za'ra. Sõtõ pese za'ra di. Oto utu za'ra wamhã, ma tã Zezusi hã 'madã'ã za'ra. ĩhãiba na hã rowa'a sa'etẽ di. Aibã norĩ zama ĩ'rata ĩsima'wara zama ma tã 'madã'ã za'ra.

³³ Aibã norĩ hã oto apã tiwi neb zahuré wa za, te Pedru hã Zezusihi ma tinha, ãne:
— Rowahutu'wa, ãme wama rowẽ za'ra di. Si'ubdatõ, wa za aima 'ri za'ra wa'aba ni, aihãiba bã wa'aba, ate da hã, duré Mozésihi te da hã, duré Eriasihi te da hã. — ãne te tãma tinha, te te rosa'rata ãna, Pedru hã.

³⁴ Tawamhã Zezusihi ma, te te nharĩ ré, ma hãiwa nhirõtõ'a za'ẽne hã we hãiba zuwa za'ra, Zezusi norĩ hã. Taha wa, ma tãma tipahi za'ra.

³⁵ Hãiwa nhirõtõ hawi, te we 'Re ĩhãimana u'ãsi mono hã tãma nharĩ za'ra, ãne:
— ã hã ĩ'ra, te ĩpisudu. Ma'ãpẽ ĩsimiroti hã 're wapari pese za'ra wa'aba mono za. — ãne te we tãma nharĩ za'ra, Pedru norĩ ma.

³⁶ We tãma mreme pari wamhã, siwaprosi te oto za, Zezusi hã. Ari'iwĩ te a'ã tihãimana za'ra, mreme ãna, ĩsiré 're ĩnomro mono norĩ hã. Ni'wai ma, te te rowasu'u za'ra õ di a'ã, te te ĩ'madã'ã za'ra zẽm na hã.

*Zezusi hã, ai'reputu ma, wa'uburé te te ĩmezẽ wasu'u
Mateusi 17.14-20; Marcusi 9.14-29*

³⁷ Tawamhã awẽpsi ma tã etẽ 'rãihã hawi si'ra za'ra, Zezusi norĩ hã. Taha wa, da'ahã na ma tã danhopetẽ za'ra, Zezusihi u'ĩdasi'aba'ré hã.

³⁸ Aibã hã dawa'wa ĩsa hã ma tã 'mahã, ãne:
— Rowahutu'wa, ĩ'ra ma, wa aiwi rowaptẽ, ĩma pese da. ĩ'ra misire hã, ai'repudu.

³⁹ Wa'uburé hã te za upi. Te te upi wamhã, te za tizadari, ĩ'ra hã. Te za sitete. Te za sadaiproĩ watobro. Te te 're u'a u'ãsi. Te te sazãri õ di. Õne u'ã.

⁴⁰ Asiré 're ĩnomro mono norĩ ma, wa tã aré tãma 'ru za'ra, wa'uburé te te tãma me za'ra da. Tazahã, te te tãma mei waihu'u za'ra õ di. — ãne te Zezusihi ma rowasu'u, ĩmama hã.

⁴¹ Tawamhã te Zezusi hã tãma nharĩ za'ra, ãne:
— E niha bété, ai'rata 're ĩnhamra u'ãsi aba mono nherẽ, asina 're ĩ'umnhasi za'ra wa'aba mono õ di, te 're ĩ'aipawaptõ za'ra wa'aba mono zéb da hã. E niha te aiwaseté na si 're anomro aba mo. E ĩp'ẽ'ézẽ u'ãsi, wa za ai'rata 're ĩmorĩ 'wa, 're ĩ'umnhasi za'ra wa'aba mono õ wa. — ãne te tãma nharĩ za'ra. Taha wa, te aibã ma tinha, ãne:

— We ĩtẽme saprõni pé, ai'ra hã.
⁴² Tawamhã te te ĩtẽme saprõni ré, ma tã wa'uburé hã 'marõwĩ. Te sitete. Taha wa, te Zezusi hã tãma rob'ru, ai'reputu hawi watobro da. Taha wa, ma ĩhawi watobro. Rowẽ na te oto 're sãmra, ai'repudu hã. Taha wa, te Zezusi hã ĩmama ma tinha, ãne:

— ãhãta ai'ra hã. Tãma rowẽ di oto. — ãne ma tã ĩmama ma waihu'u, Zezusi hã.
⁴³ Taha wa, ma ãma tatob'uzu za'ra ni, waihu'u pese uptabi wa, 'Re ĩhãimana u'ãsi mono hã.

Zezusi te te 're ĩda'apese mono zẽm na, ãma datob'uzu za'ra ré, te tisiré 're ĩnomro mono norĩ ma Zezusi hã tinha, ãne:

⁴⁴ — Wa za aima ĩsiwasu'u za'ra wa'wa. Aima ĩsiwasu'u za'ra wa'aba zẽm na, aipo're si'ãri za'ra wa'aba õ di za. Wa hã ti'ai ãma dasiré ĩpodo hã te za dasima ĩhãiba nhomri ni. — ãne te tãma siwasu'u za'ra.

⁴⁵ Tane nherẽ, te te siwi waihu'u za'ra õ di, te te sina ĩrowasu'uzẽm na hã. Ma tã tiwi sawi za'ra Zezusi hã, te te waihu'u pese za'ra tã da a'ã, te te sina ĩrowasu'uzẽ hã. Taha wa, te te sina ĩrowasu'uzẽ ma, pahĩ za'ra wa, te te siwi sadanharĩ za'ra õ di, ãma. Taha wa, te ari'iwĩ ai'ubumro.

*Dama ĩpire wasu'u
Mateusi 18.1-5; Marcusi 9.33-37*

⁴⁶ Tawamhã sima ĩ'maipire zõ sõprẽ wa, ãma sisaze za'ra õ wa, te timreme na 'rãwi si'wapẽ za'ra, ĩsiré 're ĩnomro mono norĩ hã.

⁴⁷ ĩsimirosa'rada hã ma tã waihu'u za'ra, Zezusi hã. Taha wa, ma tã ai'utẽ hã sisababa tisã.

⁴⁸ Te duré tãma nharĩ za'ra, ãne:
— Ni'wam norĩ hã te te 're ĩzawi pese za'ra mono wa, ai'utẽ zõ 're tob'uzu za'ra mono wamhã, ta norĩ u'ãbã te duré ĩzõ 're tob'uzu za'ra. Tawamhã, e ĩzõ si te 're tob'uzu za'ra. Mare di. We ĩzatõr'wa zõ zama te duré sõ 're tob'uzu za'ra. Dama ĩwapu norĩ hã 're sawi

pese za'ra wa'aba mono wamhã, asima ai'maipire zô asôpré wa'aba ãna, wa za aipire na te 're ai'awaihu'u 'wa. — ãne, Zezusi ma tô tâma waihu'u za'ra, tisiré 're ñomro mono nori ma.

Zezusihi wê'wa nori wasu'u

Marcusi 9.38-41

⁴⁹ Tawamhã Zuwã hã te tinha, ãne:

— Rowahutu'wa, aibã, wa tô 'madã'ã za'ra ni, asisi na wa'uburé ma, te te 're ñrob'ruï mono hã, dama 're wairébé mono da. Taha wa, ma tô dama 're wairébé. Ô hã, wasiré 're mori ô di. Taha wa, wa tô tiwi sawi za'ra ni, asisi na wa'uburé ma, te te 're arob'ru tô mono da, wasiré 're mori ô wa. — ãne te Zezusihi ma siwasu'u, Zuwã hã.

⁵⁰ Taha wa, te Zezusi hã asa tâma nharĩ za'ra, Zuwã nori ma:

— Tiwi sawi za'ra wa'aba ô di za, ñsimiromhuri hã. Até ni'wa hã te te 're aiwasu'u waseté za'ra wa'aba mono ô di za. Tane wamhã, aiwê wa'aba 'wa na, te za ãma ñwaihu'u za'ra wa'wa. Taha wa, aibã hã aiwê wa'aba 'wa, 're mori nherê, tiwi sawi za'ra wa'aba ô di za, ñsimiromhuri hã. — ãne, Zezusi te tâma roti za'ra, tisiré 're ñomro mono nori ma.

Samaritanu nori hã, Zezusihi zô ñtob'uzu za'ra ô zé wasu'u

⁵¹ Zezusi hã hãiu u za ñmorizé hã romhuture wa, ma tô sina roti, Zeruzarê u mori da.

⁵² Taha wa, ma tô aibã nori hã sisôwa satôri za'ra, ñsãmrazéb da hã, te te sô 'maipisutu za'ra da. Si'aba'rêi wamhã, ma tô aihutu, 'ri wa'ôto u. Samaritanu nori rob ãma, 'ri wa'ono hã.

⁵³ Sihutu wamhã, sô tob'uzu za'ra ô di, samaritanu nori hã. Zeruzarê u, za mori wa, te te sima wê za'ra ô di, ñ'rata sãmra za'ra da, Zezusi hã.

⁵⁴ Tawamhã samaritanu nori wasu'u, ma tô wapari zahuré, Ti'adu nori hã, Zuwãhã me. Ñwasu'u hã te te wapari zahuré wamhã, te Zezusi 'mahãrã zahuré, ãne:

— E aima wê di, unhama zô wahãrã da, hãiuwa hawi we te te da'uprosi da. — ãne te 'mahãrã zahuré.

⁵⁵ Taha wa, ma Zezusi hã ñtème aipi'ra zahuré. Ñmreme hã ma tô tiwi sisisi zahuré.

⁵⁶ Taha pari, ma tô ai'aba'rê, 'ri wa'ôto hãiba amoi u.

Zezusi te te dama ñrotizé wasu'u, sena na ñsiré 're danomro mono da

Mateusi 8.18-22

⁵⁷ Tawamhã bãdãdi na si'aba'rêi ré, te aibã hã Zezusihi ma tinha, ãne:

— Nimomo 're aimori wamhã, asiré, wa za 're mo. — ãne te Zezusihi ma tinha.

⁵⁸ Taha wa, te Zezusi hã asa tâma tinha:

— Wapsã wawêre hã, ab're 're ñsôrowã hã. Si nori hã te duré tizasi hã te te sima 're 'manharĩ za'ra, tinhorôwa da hã. Tanei ô di wa hã, ti'ai ãma dasiré ñpodo hã. Mari'ima hãimana ô di, 're ñwa'utu mono zéb da hã. Hãiu si wa datême 're mori u'ã. — ãne, Zezusi ma tô tâma siwasu'u.

⁵⁹ Tawamhã Zezusi te aibã hãiba amo 'mahã, ñsiré mori da. Taha wa, te asa tâma tinha:

— Apito, a'ã apã ñmori, nimahã bãtã na ñmama hã ñwi dã'ã wa, ñsisa'u te ãma ti'a da. — ãne te sina 'mahã.

⁶⁰ Tane nherê, te aibã ma tinha asa:

— Ìdã'ã nori hã te za tisiré ñdã'ã nori ãma, te te 're ti'a za'ra. A hã te za datême 're aimo, 'Re ñhãimana u'ãsi mono, da'ãma 're ñsib'a'uwê mono zém na, 're da'apo're pu'u mono da. — ãne te aibã ma tinha.

⁶¹ Aibã hãiba amo hã te duré Zezusi 'mahã, ãne:

— Wa hã wa za asiré 're mo. A'ã ñsisãnawã nori, te sawi za'ra, ñsisa'u. — ãne te Zezusihi ma tinha.

⁶² Taha wa, ma tô tâma ãma romnhimiré'é Zezusi hã, ãne:

— Até ni'wa hã te za romhuri na sãna 'rata, ti'a te te hãibãdã da. Siwa'rãmi te te nasi 'madã'ã wamhã, tinhib'apito ma, romhuri'wa da hã mare di. Tane duré, 'Re ñhãimana u'ãsi mono, da'ãma 're ñsib'a'uwê mono zém na romhuri'wa da hã mare di, misi, da te 're pisutu za'ra mono ô wa. — ãne ma tô aibã ma waihu'u, Zezusi hã.

10

Aibã ahã na, Zezusi te te datême ñsatôri za'ra zé wasu'u

¹ Taha pari, ma tô Zezusi hã aibã ahã na pisutu za'ra, ñsôwa datême 're nomro mono da, 72 na aibã nori hãiba za'ra hã. Maparane si, ma tô te te apisutu, 'ri wa'ôto mono bã ñwana te te datême ropéi mono da, za datême ñmorizé wana, datême si'aba'rê da.

² Taha wa, si'aba'rêi ô ré, te tâma romnhimiré'é za'ra, ãne:

— Amnho hã sa'êtê na 're simi'wara mono wamhã, duré romhuri'wa nori hã umrore wamhã, te za buru tede'wai wi waptêrê za'ra, sada dasitob da. Tane a nori wa'wa hã ai'umrore wa'aba wa, te za 'Re ñhãimana u'ãsi mono wi 're ñrowaptêrê za'ra wa'aba mo, te te 're da'apisutu mono da, ñsãdawa wasu'u'wa da hã.

³ Te za oto datême 're ĩropéi wa'aba mo. Pone'ërebâ 'ra, robzahi wa'wa u 're ĩsisi mono ne, wa za datême asatōri za'ra wa'wa, datême 're ropéi wa'aba mono da oto.

⁴ Marĩ hã asiré 're 'wasari aba mono ò di za, ro'wapézé hã, duré rob'uíprazé nhemézé hã, duré aipara'uza hã. Duré, 're asimizahãri za'ra wa'aba mono ò di za, bådãdi wa, 're dazawi za'ra wa'aba mono da.

⁵ Duré, danhorōwa u 're aihutu aba mono wamhã, te za a'ã 're ĩdazawi za'ra wa'aba mo, rowē na 're dahãimana za'ra mono da.

⁶ Simizawi pese wamhã, 'ri tede'wa hã rowē na te za 're hãimana. Mreme wasété wamhã, rowē na 're hãimana mono ò di za.

⁷ Datême 're aihutu aba mono wamhã, 'ri baba 're anomro aba mono ò di za. 'Re aihutu aba mono zéb ãma si, te za 're aihãimana za'ra wa'aba mo. Tame te za danhipi hã da te aima 're ĩsōmri za'ra wa'aba mono na 're asaihuri aba mo. Tame te za duré 're ĩ'ãhuri aba mo. Romhuri'wa pawã'ã hã tãma 're ĩwairébé mono ne, te za taré asa hã da te aima 're sōmri za'ra wa'wa, wa'ãbã ãna asimirowasu'u wa'rãmi wa'aba.

⁸ — Datême 're aihutu aba mono wamhã, áté 're aihutu aba mono wi, te za da te 're asawi za'ra wa'wa. Duré danhipi, da te aima 're ĩsōmri za'ra wa'aba mono na te za 're asaihuri aba mo.

⁹ Tame 're ai'ubumroi wa'aba mono ré, te za 're ĩdapese za'ra wa'aba mo. Duré te za ãne dama 're ĩrowasu'u za'ra wa'aba mo: "Ãhãna bådã hã ma tō oto ĩwa waptãrã, 'Re ĩhãimana u'ãsi mono hã da'ãma 're ĩsib'a'uwē mono zéb da hã." ãne te za dama 're ĩrowasu'u za'ra wa'aba mo.

¹⁰⁻¹¹ Datême 're aihutu aba mono wamhã, da te 're asawi za'ra wa'aba mono ò di za áté. Taha wa, te za dahawi 're aiwairébé aba mo. Dahawi 're aiwairébé aba mono ò ré, te za dama 're ĩrowasu'u za'ra wa'aba mo, ãne: "Wanhimirowasu'u na, ma tō asiwi ĩwawē'õ za'ra wa'wa. Taha wa, wa za wapara zapru hã wamirĩ za'ra ni, rere'e da, ti'a hã, aiwasété na ãma 're asiwaihū'u za'ra wa'aba mono zéb da hã. Ãhãna bådã hã ma tō oto ĩwa waptãrã, 'Re ĩhãimana u'ãsi mono hã da'ãma 're ĩsib'a'uwē mono zéb da hã. ãne na, te za ĩwaihū'u za'ra wa'wa." ãne te za aiwē'õ'wa norĩ wa'aba ma 're ĩrowasu'u za'ra wa'aba mo. — ãne te tãma roti za'ra, Zezusi hã.

¹² Ma duré tãma waihū'u za'ra, ãne:

— Niwapsi, aiwē'õ'wa norĩ wa'aba ma hã, 're robze za'ra mono ò di za. Niwapsi bådã hã ĩwa ĩwaptã'ãzém na, te za dazó nhamra, marĩ, da te 're ĩ'manharĩ za'ra mono zém na, te te 're da'awaihū'u mono da, 'Re ĩhãimana u'ãsi mono hã. Sodoma ãma 're ĩdasi'ubumroi mono norĩ ma, te te ĩrob'manharĩ pipa zém nhipai u, te za tō aiwē'õ'wa norĩ wa'aba ma, te te tãma 're arob'manharĩ za'ëtē. — ãne ma tō Zezusi hã tãma waihū'u za'ra, tisiré 're ĩnomro mono norĩ ma.

Zezusihĩ wē'õ'wa norĩ wasu'u

Mateusi 11.20-27

¹³ Tinhimiroti na ma tō duré ãne ãma uzusi, Zezusi hã:

— Corazi na 'ri wa'õtō nhisi ãma 're aihãimana za'ra wa'aba mono norĩ ma, aima 're ropipa uptabi za'ra wa'aba mono di za, Besada na 'ri wa'õtō nhisi ãma 're aihãimana za'ra wa'aba mono norĩ ma zama. Marĩ, dama ĩ'manharĩ waihū'u'õ hã asõ'a za'ra wa'aba, te 're ĩ'ab'manharĩ wē mono ne, Tiru ãma 'ri nho'õmo ãma, duré Sido ãma 'ri nho'õmo ãma 're ĩdahãimana za'ra mono norĩ nho'a, te dama 're ab'manharĩ mono 'wa'ãhã, duré te aré ta norĩ hã 're sipizari za'ra, tiwasété wi. Tiwasété wi 're ĩsipizari za'ra mono zém na, da te 're waihū'u za'ra mono da, te aré 'ru'a hã tĩ'rã ãma te te 're sa'wari za'ra. Te duré aré sa'u ĩhãiro na 're si'uza za'ra.

¹⁴ Tane nherē, tanei ò di, a norĩ wa'wa hã. Niwapsi 'Re ĩhãimana u'ãsi mono, da'ãma ĩsipo'ozéb ãma hã, Tiru ãma duré Sido ãma 're ĩdahãimana wasété za'ra mono norĩ ma, te te ĩrob'manharĩ pipa zém nhipai u, te za te te 're aihã za'ra za'ëtē za'ra wa'wa, 'Re ĩhãimana u'ãsi mono hã.

¹⁵ Capana'u ãma 're aihãimana za'ra wa'aba mono norĩ hã, e danhipai u aipire na 're aihãimana za'ra wa'aba mono da, ma tō asina 're ĩrosa'rata za'ra wa'aba mo. Ropipa u si, te za 'Re ĩhãimana u'ãsi mono hã te te 're asãmra 'wa. — ãne Zezusi ma tō tãma nharĩ za'ra, da'ãma pē'ézé uptabi wa.

¹⁶ Tawamhã te tãma nharĩ za'ra, tisiré 're ĩnomro mono norĩ ma, ãne:

— Ni'wam norĩ hã ĩzadawa wasu'u na, te te 're aiwapari pese za'ra wa'aba mono wamhã, ĩmreme 'madã'ã pese 'wa na, wa za ta norĩ hã te ĩsina 're awaihū'u. Duré ni'wam norĩ hã ĩzadawa wasu'u na te te 're aiwē'õ'wa za'ra wa'aba mono wamhã, ĩwē'õ'wa na, wa za duré ta norĩ hã ĩsina te 're awaihū'u. We ĩzatōrĩ'wai wē'õ'wa na zama, wa za ta norĩ hã te ĩsina 're awaihū'u. — ãne ma tō tãma waihū'u za'ra, tisiré 're ĩnomro mono norĩ ma, Zezusi hã.

Aibâ norî, Zezusihi u apâ îshihutuzé wasu'u

¹⁷ Tawamhã datême 're nomro mono pari, ma tô apâ aihutu itême, aibâ norî hã, 72 na îhãiba za'ra hã. Tãma rowê za'ra wa, toi uptabi za'ra di. Taha wa, te âne siwasu'u za'ra, Zezusihi ma:

– Wanhîb'apito, asisi na, wa tô wa'uburé ma, wa te 're rob'ru za'ra, dahawi 're wairébé mono da. Taha wa, ma tô te te 're wawapari za'ra, ta norî hã. – Âne te tãma siwasu'u za'ra.

¹⁸ Taha wa, ma tô Zezusi hã asa tãma waihu'u za'ra, âne:

– Tane tô. 'Re îhâimana u'âsi mono hã ma tô Satanasi hã wa'ru'i'wa hã hãiwa hawi time. Waptã'ã wamhã, wa tô 'madã. Wara sina, ma waptãrã, tâiwapsa'a ne.

¹⁹ Îwapari pese za'ra wa'aba. Wa tô aima waihu'u za'ra wa'wa, îzadawa para, wahi norî hã duré apa'apa 'wa nhi'oto norî hã, aipara na 're simroi wa'aba mono da. Wa'ru'i'wa hã dama siptete nherê, te za asiptete sina tiwi 're anomro aba mo. Tawamhã te te 're aihôsi za'ra wa'aba mono ô di za, wa'ru'i'wa hã. Niha te te aima 're rob'manharî za'ra wa'aba mono ô di za.

²⁰ Asimirob'ru zarina wa'aba, wa'uburé hã dama 're wairébé mono wa, ma tô 're ato za'ra wa'aba mo. Tane nherê, taha nhipai u te za 're ato uptabi za'ra wa'aba mo, asisi hã hãiwa âma 're hãimana za'ra wa'aba mono wa, asisi ui'éré za'ra wa'wa hã. – Âne ma tô Zezusi hã tãma waihu'u za'ra.

²¹ Tame 'Re îhâimana u'âsi mono pê'ézani te te tãma îwaihu'uzéb zarina, te 're to, Zezusi hã. Toi uptabi di oto. Taha wa, te Timama ma tinha, âne:

– Îmama, a hã Danhîb'apito uptabi, hãiwa âma zama, ti'ai âma zama. Â norî hã marî te te waihu'u za'etê za'ra ô di. Tane nherê, ma tô marî îwê hã tãma îwaihu'u za'ra. Rowaihu'u pese 'wa norî ma hã, marî hã îwê hã tãma waihu'u za'ra ô di. Tane tô, Îmama. Asima îwêzéb uwaibaba, ma tô â norî ma si a'ã îwaihu'u za'ra, marî îwê hã. Taha wa, wa ai'âma îwata, asôpru wa. – Âne te Timama ma tinha, Zezusi hã.

²² Te duré tãma nharî za'ra, aibâ norî ma:

– Îmama ma tô îma waihu'u, uburé 're îhâimana mono zé hã. Ni'wam norî hã si'uihã na te te 're îwaihu'u za'ra mono ô di, 're îhâimana mono zém na hã. Îmama si ma tô ti'ra na îwaihu'u pese, 're îhâimana mono zém na hã. Duré dasi'uihã na Îmama, da te 're waihu'u za'ra mono ô di za. Îwétési wa tô Îmama hã waihu'u pese, 're îhâimana mono zém na hã. Te îsima 're î'awê mono zéb uwaibaba si, wa za ni'wam norî ma, te 're awaihu'u, ta norî zama Îmama hã te te waihu'u za'ra da, 're îhâimana mono zém na. – Âne ma tô tãma waihu'u za'ra, Zezusi hã.

²³⁻²⁴ Taha pari, ma tô aipi'ra, tisiré 're inomro mono norî u, siwaprosi te te tãma rowasu'u za'ra da. Taha wa, te âne tãma nharî za'ra:

– A norî wa'wa hã aima 're rowê za'ra wa'aba mono di. Atômo na ma tô 're î'madã'ã za'ra wa'aba mo, te dama 're î'ab'manharî wê mono zé hã. Aiwana wa'aba, ma tô da'ahã na 're dasi'ubumro, 'Re îhâimana u'âsi mono zadawa wasu'u'wa norî hã, danhîb'apito norî zama. Ta norî hã ma tô aré te te sima 're wê za'ra, te te 're 'madã'ã za'ra mono da, 're î'madã'ã za'ra wa'aba mono zé hã. Ma tô duré te te sima 're wê za'ra, te te 're wapari za'ra mono da, 're îwapari za'ra wa'aba mono zé hã. Taha wa, a norî wa'aba ma si, 're rowê za'ra wa'aba mono di. – Âne ma tô tãma waihu'u za'ra, Zezusi hã.

Samaritanu 're îmorî wê wasu'u

²⁵ Tame ma tô aibã hã wahudu hãiwi, 'Re îhâimana u'âsi mono nhimiroti na dama rowahutu'wa hã. Zezusi te te îroti na te te pibu da, ma tô âne 'mahã:

– Rowahutu'wa, e marî, wa za te 're ab'manharî îwê hã, 're îhâimana u'âsi mono zéb da hã, te îsina uwaimrami da hã, hãiwa âma. – Âne te 'mahã.

²⁶ Taha wa, te Zezusi hã asa tãma tinha:

– E niha 'Re îhâimana u'âsi mono nhimiroti na, îwasu'u na rob'ui'éré hã. E niha asimirosa'rada hã, âma. – Âne te sadanha.

²⁷ Taha wa, ma tô aibã hã âma sada'ã asa:

– 'Re îhâimana u'âsi mono hã, Asib'apito za'ra wa'wa hã 're morî wa, te za asiwi 're îsawi pese za'ra wa'aba mo. Taha zarina, te za îsimiroti na âma 're îrosa'rata u'âsi za'ra wa'aba mo. Taha zarina, te za duré asimî'ê na tãma 're îromhuri u'âsi za'ra wa'aba mo. Te za duré 're îdazawi pese za'ra wa'aba mo, uburé. Marî îwê zô asima 're asôpré wa'aba mono ne, te za duré uburé dama zama sô 're asôpré wa'aba mo, îwê zô. Âne îsimiroti na rob'ui'éré hã. – Âne ma tô aibã hã Zezusihi ma rob'rãzarôtô.

²⁸ Taha wa, te Zezusi hã asa duré tãma tinha:

– Tane tô. Î'uwaibaba ma tô îma îwaihu. Tawamhã, taha zarina 're aihâimana mono wamhã, 'Re îhâimana u'âsi mono 'rata te za 're aihâimana u'âsi mo, hãiwa âma. – Âne te aibã ma tinha.

- ²⁹ Aibâ hã, uburé te te 're da'azawi pese mono ô di. Taha wa, te asa Zezusihi ma tinha:
 – E 'wam nori hã wa za wa te 're sawi pese za'ra. – Âne te Zezusihi ma tinha.
- ³⁰ Taha wa, te Zezusi hã tâma romnhimire'ê, âne:
 – Aibâ hã ma tô si'ra Zeruzarê hawi, Zerico u mori da. Tawamhã mori ré, ma tô sô wairé, ïsipsaihuri nori hã. Í'uzza, ma tô tiwi sani za'ra. Te te siwi 're pré'ê. Te aré oto siwi tiwi. Te te siwi 're pré'ê mono pari, te oto ai'aba're.
- ³¹ Tawamhã isa'u za'ra si te sasedoti hã mo duré, da te 'i'u'iti wa'wai baba, 'Re ihâimana u'âsi mono ma, da'âma romhuri'wa hã. Aibâ hã te te sâmri wamhã, bâdâdi zada're niwî, te timori waré, Isiti.
- ³² Tawamhã aibâ ihâiba amo hã te duré i'wa'wai baba mo, Réwihî nhihudu hã, sasedoti nori pawapto'wa hã. Aibâ te te 'madâ'â wamhã, te duré bâdâdi zada're niwî mo, Isiti.
- ³³ Tawamhã te duré aibâ hãiba amo hã i'wa'wai baba mo, darob amoi u mori da. Ta hã, samaritanu. Ta hã ma tô 'madâ, aibâ ihâzé ré hã. Te te 'madâ'â wamhã, ma tô âma tipê'êzé.
- ³⁴ Taha wa, ma tô itême mo. Ma tô 'wa're upsô, rob'râi wa'u isé na. Taha pari, ma tô 'wa're u'rê, rob'râi wa'u na, iwab ré na. Te te u'rê parimhã, ma tô 'wa're ubu. Taha pari, ma tô tinhimizama ba nhisiwi tihi, 're idanhimi'wara mono zéb u te te hiri da. Tame te 'madâ, a'â.
- ³⁵ Tawamhã awêmhã, rob'uiprazé hã ma tô 'ri tede'wai ma tisô, maparane ïsapotore hã, êtê'ubuzi'a prata 'manharî hã. Te tâma tinha, âne: "Ízô 'madâ'â pese. Apâ we ïmori wapsi, wa za aima wa'âbâ 'râsutu, iwab ô wamhã, rob'uiprazé hã." Âne ma tô 'ri tede'wai ma tinha, samaritanu hã. Âne samaritanu wasu'u hã. – Âne ma tô rowasu'u Zezusi hã, rowahutu'wai ma.
- ³⁶ Tawamhã Zezusi hã te oto aibâ hã âma sadanha:
 – Aibâ si'ubdatô, ma tô siparabâsi aibâ wa'wai baba ai'aba're, da te aré iwîri wa'wai baba. E 'wa hã ïsawi pese 'wa, te 're mo. – Âne te sadanha, Zezusi hã.
- ³⁷ Taha wa, te asa tâma tinha:
 – Aibâ pawapto'wa, ta hã ïsawi pese 'wa. – Âne te Zezusihi ma tinha.
 Zezusi te duré asa tâma tinha:
 – Tane tô. Mo oto aimori, isine 're aimori da. – Âne ma tô tâma waihu'u Zezusi hã, rowahutu'wai ma.

Zezusi te te Mata nori isabuzé wasu'u, Marizaha me

- ³⁸ Tawamhã Zezusi nori hã te duré ai'aba're, isiré 're inomro mono nori me. 'Ri wa'ôto u, ma tô aihutu. Sihutu wamhã, ma tô pi'ô hã Zezusihi ma tinha, 'ri para u sisisi da, Mata na pi'ô nhisi hã.
- ³⁹ 'Ri para u sisisi wamhã, ma tô Mariza hã Zezusihi 'rata nhamra, ti'a, isimirowasu'u hã te te wapari da. Mataha no, Mariza hã.
- ⁴⁰ Mata hã si'wa'rutu di, 'ri paramhã romhuri hã ahâ wa. Taha wa, te Zezusihi u mo, Mata hã. Âne te tâma tinha:
 – Îno hã, ï'âma sapa'a ô di. ïsiwaprosi, wa romhu. Romhuri hã ahâ di. ï'âma aipê'êzé wamhã, ma'âpé we itême satôri, te te ipawapto'ba da. – Âne Mata te Zezusihi ma tinha.
- ⁴¹ Taha wa, ma tô Wanhib'apito hã asa tâma tinha:
 – Mata, marî hã ahâ wamhã, tô asi'wa'rutu di.
- ⁴² Marî hã misi iwê hã asima pisutu ô di. Ta hã ma tô Marizaha si sima pisutu. Taha wa, ni'wa hã iwê hã te te tiwi âri ô di za, te te iwaparizé hã. – Âne Zezusi ma tô Mataha ma waihu'u.

11

'Re ihâimana u'âsi mono ma, 're idamreme zusi mono zéb da na, âma isisanhozé wasu'u Mateusi 6.5-15; 7.7-11

- ¹ Tawamhã nimahã bâta na, te Zezusi hã nhamra, Timama ma, mreme da. Tâma mreme pari, ma tô misi isiré 're inomro mono nori hã 'mai'mahâ:
 – Wanhib'apito, ma'âpé wama waihu'u, 'Re ihâimana u'âsi mono ma, 're iwamreme zusi mono zéb da hã, wa te waihu'u za'ra da. Zuwâ hã tinhimi'ubumro nori ma, te te iwaihu'u ne, te za wama iwaihu, wa te waihu'u za'ra da. – Âne te tâma tinha.
- ² Taha wa, ma tô Zezusi hã asa tâma nharî za'ra:
 – Âne te za 're aimreme zusi aba mo, 'Re ihâimana u'âsi mono ma:
 "Wamama, asisi wê na uburé da te 're aiwaihu'u za'ra mono da, wa aima da'âma 're imreme. Uburé da'âma 're asib'a'uwê mono da, wa duré da'âma 're imreme.
- ³ Awê sidâpâsi, wei wama 're anhomri mono, wasa hã âma 're iwasaiahuri mono zéb da hã.
- ⁴ Dawasédé hã da te wa'âma 're 'manharî za'ra mono wa, wa te wasina 're i'madâ'â za'ra mono ô zarina, a hã duré wa'âma 're ab'madâ'â mono ô di za, wawasédé hã.

Duré, 're wa'ab'madâ'a nhimino mono ô di za, Wa'uburé hã te te 're wa'upî mono wa, wawasété u 're warere'e tō mono da."

Āne ma tō Zezusi hã tãma waihu'u za'ra, tisiré 're ĩnomro mono norĩ ma.

⁵ Taha pari, te tãma āma romnhimiré'é za'ra, tisiré 're ĩnomro mono norĩ ma, āne:

— Āté, asiwadi te za mara wa'wa atēme ti'maiwisi 'wa, asōrōwa wa'aba u hã. Tawamhã, āté marĩ ô wa, te za ai'maimorĩ 'wa, asiwadi hãiba amo nhorōwa u. Rowĩ, te za tãma ĩ'manharĩ 'wa: "Wa we atēme mo, ĩ'u'ētē wapu hã ĩma 'manhomri da a'ã taré. Taha wa, te za si'ubdatō ĩma ĩsō a'ã.

⁶ Nimosi ma tō we ĩtēme wi, ĩsiwadi hã, romhã hawimhã. Tane nherē, marĩ ô di, te tãma ĩsōmri da hã." Āté, āne te za tãma ĩ'manharĩ 'wa, 'ri tede'wai ma.

⁷⁻⁸ — Taha wa, te za āté asa aima 'manharĩ 'wa: "Tane nherē, ĩ'utu zei ô di. Taha wa, ĩ'u'ētē wapu hã te aima sōmri neza. Wa tō 'rinhito. ĩ'ra norĩ me, wa oto wanhotō za'ra ni." Āté, āne te za aima 'manharĩ 'wa, asiwadi wa'wa hã. Tazahã, te za sō wahudu, ĩ'u'ētē wapu zō, tiwi ĩwaptērēzēb uwaibaba, te te aima 'manhomri da. E marĩ wa, te za aima 'manho. E asiwadi wa, te za aima 'manho. Mare di. Taha wab ô di. Marĩ ô wa, nasi tiwi waptērē wa, te za aima 'manho.

⁹⁻¹⁰ Taha wa, 'Re ĩhãimana u'ãsi mono wi, te za ĩwē hã 're ĩwaptērē u'ãsi za'ra wa'aba mo. Tawamhã te za tō te te aima 're anhomri 'wa. ĩwē zō si te za duré asima 're asōpré u'ãsi aba mo. Tawamhã taha zarina te za tō te te aima āma 're a'u'waimrami 'wa, 'Re ĩhãimana u'ãsi mono hã, 'rãwi aima 're hãimana za'ra wa'aba mono da. Duré ni'wa hã 'ri tede'wa zō, te te 're ĩ'ridawa ta'a mono ne, te za ĩwē hã tiwi 're ĩwaptērē za'ra wa'aba mo. Tawamhã 'ri tede'wa te te tãma ĩ'ridawa ne, te za tō te te aima 're anhomri 'wa, ĩwē hã, 'Re ĩhãimana u'ãsi mono hã.

¹¹ Āne, wa za duré aima āma romnhimiré'é za'ra wa'wa. Damama na 're ai'maihãimana aba mono wamhã, āté ai'ra hã pe'a hã te za aiwi waptē. E tawamhã, te za wahi hã tãma ĩsō. Mare di. Pe'a si, te za tō tãma ĩsō, te te 'rēne da.

¹² Duré ai'ra hã, si'a're hã te te aiwi waptērē wamhã, e te za apa'apa 'wa nhi'odo hã tãma ĩsō. Mare di. Si'a're si, te za tō tãma ĩsō.

¹³ Tane duré, a norĩ wa'wa hã 're anomro wē uptabi aba mono ô nherē, te za marĩ ĩwē si tō ai'ra norĩ ma 're ĩsōmri za'ra wa'aba mo. Aimama 'wa hã hãiwa āma 're ĩhãimana mono hã, te za asōpru wa'aba zēm nhipai u, ĩwē hã te te aima 're sōmri za'ētē za'ra wa'wa, tiwi 're rowaptērē za'ra wa'aba mono wamhã. Tipē'ēzani hã te za te te aima 're anhomri 'wa. — Āne ma tō Zezusi hã tãma waihu'u za'ra, tisiré 're ĩnomro mono norĩ ma.

Bezebu na, wa'uburé norĩ wada'uri'wa nhisi wasu'u

Mateusi 12.22-32; Marcusi 3.20-30

¹⁴ Tawamhã Zezusi hã aibã ma, ma tō wa'uburé hã time. ĩpē'ē 're, sãmra wa, mreme waihu'u ô di aré, aibã hã. Oto aibã hawi watobro wamhã, ma tō mreme watobro, aibã hã. Taha wa, ma tō āma tatob'uzu za'ra ni.

¹⁵ Tazahã, ni'wam norĩ hã dame ĩsimasam norĩ hã, te Zezusihi ma nharĩ wasété za'ra, āne: — Bezebuhu zadawa para, ma tō wa'uburé hã te te dama 're anhamra, wa'uburé norĩ nhĩb'apito zadawa para. — Āne te tãma nharĩ wasété za'ra.

¹⁶ ĩhãiba amo norĩ hã te duré wada'uri za'ra, āne:

— Ma'ãpé wanho'a, marĩ dama ĩ'manharĩ waihu'u'ô hã wama 'manharĩ za'ra na, aiwaihu'u pese na, 'Re ĩhãimana u'ãsi mono zadawa para, wa'uburé, dama 're ĩ'anhamra mono na, wa te aiwaihu'u za'ra da. — Āne te wada'uri za'ra.

¹⁷⁻¹⁹ Taha wa, ma tō sina waihu'u za'ra, te te āma ĩrosa'rata wasété za'ra na, Zezusi hã. Taha wa, te tãma āma romnhimiré'é za'ra, āne:

— Danhib'apito nhĩb'a'uwē norĩ hã 'rãwim nherē, oto sisada 're simasa mono wamhã, te aré 're si'uprosi. Duré, dasisãnanã nherē, dasisada 're dasimasa mono wamhã, te aré 're dasi'uprosi. Tane duré, Satanasihĩ nhĩb'a'uwē norĩ hã sisada 're simasa mono wamhã, e niha te za sina 're sapa'a za'ra. Waihu'u ô di, ta norĩ hãimanazé hã. Ma tō ĩma ĩnharĩ za'ra wa'wa, Bezebuhu zadawa para, wa'uburé te dama 're ĩ'anhamra mono na. Asiré norĩ hã bété. E 'wa sadawa para, te bété wa'uburé norĩ hã te te dama 're sãmra, ta norĩ hã. E Bezebuhu zadawa para. Mare di. Āne, wasu'u za'ra wa'aba ô di. Taha wa, ma tō ĩwasu'u za'ra wa'wa, ĩ'upa na, Bezebuhu zadawa para, wa'uburé, te dama 're ĩ'anhamra mono na.

²⁰ Tō sena, wa 'Re ĩhãimana u'ãsi mono zadawa para si, te dama 're anhamra, wa'uburé hã. Taha zarina si, te za oto ĩwaihu'u za'ra wa'wa, tō sena 'Re ĩhãimana u'ãsi mono, ai'ãma 're ĩsĩb'a'uwē za'ra wa'aba mono zéb da, te te āma ĩsãna'rata na hã. — Āne ma tō tãma waihu'u za'ra, Zezusi hã.

²¹ Te duré tãma āma romnhimiré'é za'ra, āne:

— Áté, aibâ Ìsiptede hã te za 're 'manhamra. Tawamhã si'wa'rutu ré, te za tinhorôwa te da dawi 're 'madâ'á pese. Taha wa, te za rowê na sa 're romnhimi'wara, Ísibro hã, da te upi âna.

²² Áté aibâ Ìsiptete u te za oto wi, Ísipai u Ìsiptete uptabi hã. Tãma siptete wa, te za 'marôwî. Te za tiwi waibu Ísi'wa'rudu hã, te te Ì'umhasizé hã. Uburé Ísibrob zama te za tiwi waibu. Tawamhã te za oto dama âma aipé. — Áne te tãma âma romnhimiré'é za'ra, Zezusi hã.

²³ Te duré tinha:

— Ni'wam norî hã Ìwê'wa 're nomro mono ô wamhã, ta norî hã te Ìzada 're hâimana za'ra. Duré ni'wam norî hã te te 're Ìpawaptob za'ra mono ô wamhã, Ìtême te 're Ìda'ubumroi mono na hã ta norî hã Ìnhiti dazatô'î'wa na te za 're hâimana za'ra. — Áne ma tô tãma waihu'u za'ra, tiwê'ô'wa norî ma.

²⁴ Te duré tãma âma romnhimiré'é za'ra, Zezusi hã, âne:

— Áté wa'uburé hã te za aibâ hawi 'maiwatobro. Te za duré a'ubuni wi 're mo, â'ô wa'wai baba. Te za dazô 're rîti. Dazô 're rîti baba mono wa, nimomo wa'utu ô wa, te za sima tinha: "Ìnhorôwa 'rata u, wa za apâ mo, âma 're Ìnhorôwa u'âsi mono da, Ìpê'ê 'remhã." Áne te za sima tinha.

²⁵ Tawamhã te za apâ mo aibâ u, Ìpê'ê 're, apâ sébré da. Tawamhã Ìhawi watobro haré, te aré hãiba baba na 're hâimana, 'ri hã baba na 're simasa mono wa, 'ri 're wa'wa su'u na 're Ísimasa mono ne, duré 'ri paramhã robza'ra wê u'âsi, 're Ìromnhimi'wara mono ne. Taha wa, wa'uburé ma, wê di, aibâ hã apâ âma 're Ísôrôwa mono da hã.

²⁶ Tawamhã te za rob u watobro, tisiré norî zô morî da, wa'uburé hã. Tawamhã te za Ìtême âwisi za'ra, 7 na Ìhãiba hã Ísipai u Ìwasété uptabi za'ra hã, si'u âma 're sôrôwa za'ra mono da, aibâ âma. Tãma rowê prâ ti aré, wa'uburé misi, âma 're sôrôwa mono ré hã, Ìpê'ê 'remhã. Ahã na oto âma 're sôrôwa za'ra mono wa, tãma rowê'ô uptabi di oto. — Áne, Zezusi ma tô tãma rowasu'u za'ra.

²⁷ Taha wasu'u te te dama wasu'u pari, te pi'ô hã Zezusihi ma tinha, dawa'wa Ísa hã:

— Asépata'wai ma, 're rowê mono di za, aiprédu'wai ma. A hã Ísimiprédu wa, tãma 're rowê mono di za. — Áne te pi'ô hã Zezusihi ma tinha, mreme 'rãihã na.

²⁸ Taha wa, te Zezusi hã asa tãma tinha:

— Tane tô. Tãma 're rowê mono nherê, Ísipai u ni'wam norî ma, 're rowê uptabi za'ra mono di za. Ni'wam norî hã, 'Re Ìhâimana u'âsi mono zadawa wasu'u hã tipo're na te te 're wapari za'ra mono wamhã, duré te te 're 'madâ'á pese za'ra mono wamhã, tãma 're rowê uptabi za'ra mono di za. — Áne ma tô pi'ô ma waihu'u, Zezusi hã.

Zonahã wasu'u, apito Saromahã wasu'u me

Mateusi 12.38-42; 16.1-4; Marcusi 8.11-13

²⁹⁻³⁰ Tawamhã Zezusihi tême ma oto dasina tahã'â ni. Taha wa, te dama tinha:

— E niha ã nimosi dapoto té mono hã Ìaihâimana wasété za'ra wa'wa. Ma tô Ìma Ì'ru za'ra wa'wa, marî dama Ì'manharî waihu'u'ô hã te 'manharî da, asô'a za'ra wa'aba, Ìwaihu'u pese na, 'Re Ìhâimana u'âsi mono te te Ìwêsâmri na, Ìwaihu'u za'ra wa'aba da. Taha wa, taré 'madâ'á za'ra wa'aba da, niha te te 'manharî ô di za. 'Re Ìhâimana u'âsi mono hã, tiwaihu'u pese na niha Zonahã ma, te te Ì'manharî wê ne, te za niwapsi 'manha, dama Ì'manharî waihu'u'ô hã. Duréihã, Zonahã ma, te te 'manharî wê wamhã, Ísadawa para datême Ìmorî na, ma tô waihu'u za'ra, Niniwê âma 're Ìdasi'ubumroi mono norî hã. Tane, wa hã ti'ai âma dasiré Ìpoto ma, te za niha Ìma 'manharî wê, Ísadawa para atême Ìmorî aba na, Ìwaihu'u za'ra wa'aba da.

³¹ Niwamhã 'Re Ìhâimana u'âsi mono, za da'âma Ísipo'ozéb âma hã, duréihã danhib'apito sipi'ô hã Saba na romnhisi âma te te 're Ìda'ab'madâ'á mono hã, te za duré asada tihâimana 'wa, aiwasédé hã te te ai'âma sa'ra wa'aba da, 'Re Ìhâimana u'âsi mono nho'a. E marî wa. Ta hã duréihã romhã uptabi nherê, Ìwi, apito Saromahã u, Ísimiroti hã te te wapari da, Ìsimiroti hã dahâimanazém na rowaihu'u na hã wê uptabi wa. Taha nhimiroti hã pire nherê, Ísipai u Ìnhimiroti si pire uptabi di. Tane nherê, Ìnhimiroti hã aima wapari ze za'ra wa'aba ô di. Taha wa, te za tô Ì'uwaibaba aiwasédé hã ai'âma sa'ra wa'wa, danhib'apito sipi'ô hã.

³² Niwamhã 'Re Ìhâimana u'âsi mono, za da'âma Ísipo'ozéb âma hã, duréihã Niniwê na 'ri nho'ômo nhisi âma 're Ìdasi'ubumroi mono norî hã te za asada tihâimana za'ra wa'wa, aiwasédé hã te te ai'âma sa'ra wa'aba da, 'Re Ìhâimana u'âsi mono nho'a. E marî wa. Duréihã Zona hã 'Re Ìhâimana u'âsi mono te te tãma 're sadawa wasu'u za'ra mono wamhã, ma tô te te 're wapari za'ra. Taha wa, ma tô ta norî hã tiwasété wi 're sipizari za'ra. Zonahã nhimiroti hã pire nherê, Ísipai u Ìnhimiroti si pire uptabi di. Tane nherê, a norî wa'wa hã Ìzaze za'ra wa'aba ô di, 'Re Ìhâimana u'âsi mono nhimipisutuzéb zarina, we atême Ìmorî aba na hã. Taha wa, te za tô Ì'uwaibaba aiwasédé hã ai'âma sa'ra wa'wa, Niniwê âma 're Ìdasi'ubumroi mono norî hã. — Áne te dama tinha, Zezusi hã.

Rob'uiwēzé wasu'u
Mateusi 5.15; 6.22-23

³³ Taha wa, te duré tãma ãma romnhimiré'é za'ra, ãne:

— Rob'uiwēzé hã da te ro'o wamhã, e te za nima niwī dawi simi'uri ni. E piza'a na, te za upsibi ni. Mare di. Īsima'warazém na si te za sō'awi da te 're sōré, rowa'a na 're danhisisi mono da. Taha da, te za ro'o ni, rob'uiwēzé hã.

³⁴ Tane duré dato hã, aiwa rob'uiwēzé me. Datōmo wē wamhã, dama rob'madã'ã wē di. Datob'a wamhã, dama rob'madã'ã waihu'u ō di. Tane duré, a norī wa'wa hã asimirosa'rata wē za'ra wa'aba wamhã, te za ĩwē hã asimirosa'rata na 're ĩwaihu'u za'ra wa'aba mo. Duré, asimirosa'rata wasété za'ra wa'aba wamhã, ĩwē hã 're waihu'u za'ra wa'aba mono ō di za.

³⁵ Taha wa, 'rãwi te za asimirosa'rata na 're asi'madã'ã za'ra wa'aba mo.

³⁶ Wa za duré aima ãma romnhimiré'é za'ra wa'wa, ãne: Rob'uiwēzé hã te te aima 're rob'uiwē za'ra wa'aba mono wamhã, uburé aihãiba ma hã 're rowa'a za'ra wa'aba mono di za. Aiwī 're robra za'ra wa'aba mono ō di za. Tane, asimirosa'rata wē za'ra wa'aba wamhã, te za aiwasédé hã 're ĩwē'ō za'ra wa'aba mo, ĩwē si 're waihu'u za'ra wa'aba mono da. — ãne ma tō dama waihu'u, Zezusi hã.

³⁷ Tawamhã tame te te dama rowasu'u pari, ma tō aibã hã tãma tinha, ĩsōrōwa u morī da, ĩsiré sa da. Aibã hã, parisezu. Taha wa, ma tō Zezusi hã ãma saze. Tawamhã 'ri para u sébré wamhã, te nhamra, sa da.

³⁸ Tane nheré, sai ō ré, simisōi ō di Zezusi hã, dahi'rada hã 're ĩsimisō za'ra mono zéb zarina hã. Taha wa, te parisezu hã tãma tinha, tip'ē na, simisōi ō wa.

³⁹ Tawamhã ma tō Wanhib'apito hã tãma tinha, Zezusi hã:

— Parisezu norī, wa za aima ãma romnhimiré'é za'ra wa'wa, ãne: Hãsisé hã duré pratu hã ĩmana wawip si, da te 're upsō za'ra mono wamhã, ĩwa'wamhã wasété di, zahadu upto wa. Tane, a norī wa'wa hã 're anomro wē wa'aba mono newa, da te 're ai'madã'ã wē za'ra wa'aba mono da, te 're ĩhãimana u'ãsi mono nhimiroti ĩpire prã norī si 're ĩ'madã'ã pese za'ra wa'aba mo, danho'a. Tane nheré, aip'ē 're remhã asimirosa'rata wasété na te zahadu ĩré 're aihãimana u'ãsi za'ra wa'aba mo. Danhibrob na si te duré 're ĩda'ruiwapari za'ra wa'aba mo. Aihãimana nhipese zarina, te duré marī na dawi 're asipsaihuri za'ra wa'aba mo.

⁴⁰ E niha waihu'u za'ra wa'aba ō di bété. Uburé Dapoto'wa hã e wahãiba na si, ma tō te te 're wa'awaihu'u. Mare di. Wanhimirosa'rata na zama, ma tō te te 're wa'awaihu'u, 'Re ĩhãimana u'ãsi mono hã.

⁴¹ Taha wa, ma'ápé ĩsibrob'ō norī ma, 're asōprub za'ra wa'aba mono. ãne dama 're 'manharī za'ra wa'aba mono wamhã, asimirosa'rata wē na, te za te te 're ai'awaihu'u 'wa, 'Re ĩhãimana u'ãsi mono hã.

⁴² — Parisezu norī, a norī wa'aba ma, aima 're ropipa uptabi za'ra wa'aba mono di za. Ma tō asimirohuri wa'ã hã 'Re ĩhãimana u'ãsi mono ma, 're ĩpo'o u'ãsi za'ra wa'aba mo, wesuirã zapore wa'ã hã, syra na tãma 're sōmri za'ra wa'aba mono da. Uburé danhipi wazarizé wa'ã hã tãma 're po'o nhimini za'ra wa'aba mono ō di. Ta hã, wē di. Tazahã, ĩsimarī'ō norī ma, 're asōprub za'ra wa'aba mono ō di. Duré 'Re ĩhãimana u'ãsi mono, 're sawi pese za'ra wa'aba mono ō di. Ma tō tãma 're asōprub za'ra wa'aba mo. ĩbare aré ĩsimarī'ō norī ma, 're asōprub za'ra wa'aba mono 'wa'ãhã. Tazahã, ma tō 're ĩ'mararé za'ra wa'aba mo. Taha wa, niwapsi aima 're robze za'ra wa'aba mono ō di za.

⁴³ — Parisezu norī, ai'ãma ĩpē'ézé za'ra wa'aba di. Aima 're ropipa uptabi za'ra wa'aba mono di za. Dama ĩpire norī simasisizém na, 're asimro zeĩ wa'aba mono di, rowahutuzéb ãma. Duré 'ri nhi'riti wa, da te dasina 're ĩ'ubumroi mono zéb ãma asisi pire na, da te 're asawi za'ra wa'aba mono wamhã, asina 're dawapari ze za'ra wa'aba mono di. Taha wa, niwapsi aima 're robze za'ra wa'aba mono ō di za.

⁴⁴ — A norī wa'aba ma, aima 're ropipa uptabi za'ra wa'aba mono di za. Taha wa, wa za aima ãma romnhimiré'é za'ra wa'wa, ãne. Áté ni'wa hã adã'ã 'ru uwaibaba te za mo, sa'rese ãna, ti'ai haré newa. Taha wa, te za siwasété. Tane aiwē za'ra wa'aba newa, asirã za'ra wa'aba zarina 're danomro mono wamhã, te za 're dasiwasété za'ra. Taha wa, aiwē prã za'ra wa'aba wa, aima 're robze za'ra wa'aba mono ō di za. — ãne Zezusi te tãma nharī za'ra, parisezu norī ma.

⁴⁵ Tawamhã aibã hã te Zezusihi ma tinha:

— Rowahutu'wa, parisezu norī, wē'ō za'ra wa, ma tō ta norī zu, wa norī zama ĩwa'awē'ō. — ãne te Zezusihi ma tinha, 'Re ĩhãimana u'ãsi mono nhimiroti na dama rowahutu'wa hã.

⁴⁶ Tawamhã Zezusi te asa tãma tinha:

— Rowahutu'wa norī, ai'ãma ĩpē'ézé za'ra wa'aba di. A norī wa'aba ma zama, aima 're ropipa uptabi za'ra wa'aba mono di za. Wa za aima ãma romnhimiré'é za'ra wa'wa, ãne: Áté marī ĩpire uptabi hã te za ni'wa hã dama sibu, te te sōihi waptob ãna. Tane a norī wa'wa

hã. Dama asimiroti za'ra wa'aba zé hã ahâ uptabi na ma tô dama 're ipisutu za'ra wa'aba mo, da te 're 'madâ'â za'ra mono da, 're dapawaptob za'ra wa'aba mono âna. Taha wa, te robzei'ô na oto 're danomro. Taha wa, aima 're robze za'ra wa'aba mono di za.

⁴⁷⁻⁴⁹ — A norĩ wa'aba ma, aima 're ropipa uptabi za'ra wa'aba mono di za. Aihĩ'rata aba norĩ hã ma tô 'Re ihâimana u'âsi mono zadawa wasu'u 'rata 'wa norĩ hã te te 're simro, ïsadawa wasu'u na te te 're wê'ô za'ra mono wa. A norĩ wa'wa hã ïsadawa wasu'u na, 're wê za'ra wa'aba mono newa, ma tô êtê tōmo wawê hã 're ïsōré za'ra wa'aba mo, ab're 'wawi, dama ipibu pese zéb da, I'ru hã. Tazahã, aihĩ'rata aba ne, ma tô ïsadawa wasu'u hã 're ïwê'ô za'ra wa'aba mo. E marĩ, te bété wasu'u, ab're 'wawi êtê tōmo wawê, 're ïsōré za'ra wa'aba mono hã. Aihĩ'rata 'wa, ïsadawa wasu'u 'rata 'wa norĩ te te 're ïsimroi mono zé, ma tô 're ïsaze za'ra wa'aba mo. Áne te wasu'u, ab're 'wawi êtê tōmo wawê, 're ïsōré wa'aba mono hã. Aiwana wa'aba, ma tô romhã ré dapo're pu'u, 'Re ihâimana u'âsi mono hã. Datême, wa za te 're da'azatōrĩ, da te dama 're ïzadawa wasu'u za'ra mono da. Tazahã, ïzadawa para ô nherê, te za da te 're simro, ni'wam norĩ hã. Rowasédé hã te za duré da te tâma 're 'manharĩ za'ra, ni'wam norĩ ma. Áne, tâma waihu'u pese sirōmo wa, ma tô romhã ré dapo're pu'u, 'Re ihâimana u'âsi mono hã.

⁵⁰⁻⁵¹ Ropoto na'rata hawi, ma tô âma dasiwi sãna'rata ni, ïsadawa wasu'u 'rata 'wai pãrĩ na hã. Imorĩ'rada hã ma tô Abé hã wĩrĩ 'rata ni. Abéhé za'u si, ma tô ïsadawa wasu'u'wa sidâpãsi, da te 're simro. Zacariaha zama, ma duré wĩrĩ ni, 'ri nho're âma. 'Re ihâimana u'âsi mono âma 're idawata za'ra mono zém nho're âma, ma wĩrĩ ni. Ìbabarã na te 'ri hã za, 'ri ïwê hã. Ô niwĩmhã, tâma danhoprubzê nomrizé te za, wedeza ne hã. Tame sab ré, ma wĩrĩ ni, Zacaria hã. Taha wa, te za 'ruiwa'âbã za'ra, uburé tizadawa wasu'u'wa norĩ hã, da te 're ïsimroi mono norĩ hã. Taha wa, â nimos dapoto té mono hã I'aihâimana za'ra wa'wa hã, te za aima rob'manharĩ za'ra wa'wa, ïsadawa wasu'u'wa norĩ, ïsimirowasu'u na 're wê'ô za'ra wa'aba mono 'ru te.

⁵² — Rowahutu'wa norĩ, a norĩ wa'aba ma, aima 're ropipa uptabi za'ra wa'aba mono di za. E marĩ wa. Wa za âma romnhimírê'é, âne: Áté, aibã hã te za 'manhamra, ridawa tétézéb ré. Ta hã 're zasi mono ô di, 'ri para u hã. Duré, 'ri para u 're danhisisi mono ô di, te te dawĩ 're azawi mono wa, ridawa tétézé hã. Tane, a norĩ wa'wa hã 're 'madâ'â pese za'ra wa'aba mono ô di, 'Re ihâimana u'âsi mono nhimiroti hã. Ma tô duré dawĩ 're ïsawi za'ra wa'aba mo, ïsimiroti mono bã, da te 're waihu'u za'ra mono tô da. — Áne ma tô Zezusi hã tâma rowasu'u za'ra, rowahutu'wa norĩ ma.

⁵³⁻⁵⁴ Tawamhã rob u, ma tô watobro, Zezusi hã. Watobro wamhã, te rowahutu'wa norĩ hã tâma nharĩ za'ra, parisezu norĩ me. Te te sadawa 'ru za'ra wa, te duré sadanharĩ na sima tirê, timreme na te te âma upa zô, te te âma upai wa, te te siwi wê'ô za'ra da. Tazahã, timreme na te te âma upai ô di, Zezusi hã.

12

Dahâimanazé tô senai ô wasu'u

Mateusi 10.26-33; 12.31-32; 10.19-20

¹⁻³ Tawamhã ma tô dasina tahã'â ni. Da'ahâ uptabi di oto. Da'ahâ uptabi wa, ma tô 're dasipara wati'i za'ra. Áhã wa, te Zezusi hã a'â tâma nharĩ za'ra, tisiré 're ïnomro mono norĩ ma, âne:

— Parisezu norĩ hâimanazé hã, tô senai ô di. Taha wa, te za tiwi 're asi'madâ'â pese za'ra wa'aba mo, I'u'êtê wapuzém nhiti 're anomro aba mono da, parisezu norĩ nhimi'manharizém nhiti. Wa za âma simiré'é, âne: Áté te za marĩ hã da te dawĩ 're sahãri za'ra, da te 're waihu'u tô za'ra mono da, danhimirowasu'uzé hã, danhimi'manharizé hã. Tane nherê, te za niwapsi waihu'u za'ra ni. Tane barana, aihãiba pisutu dama asimirowasu'uzé hã te za rowa'a ré dama asimirowasu'uzém na aiwasu'u za'ra wa'aba ni. Duré 'ri nhitob ré, aihãiba pisutu dama asimirowasu'uzé hã, te za sô'awi dama asimirowasu'uzém na aiwasu'u za'ra wa'aba ni. Taha wa, te za 'rãwi 're asi'madâ'â za'ra wa'aba mo, parisezu norĩ hâimanazéb zarina, 're aihâimana za'ra wa'aba mono tô da, tô senai ô wa, 're ihâimana za'ra mono zé hã, ta norĩ hã.

⁴⁻⁵ — Ìsiwadi norĩ, tô sena wa za aima rowasu'u za'ra wa'wa. Da te 're ai'uprosi aba mono da nherê, asima 're dapipa za'ra wa'aba mono ô di za. Da te 're ai'uprosi aba mono pari, niha oto da te aima 're rob'manharĩ za'ra wa'aba mono ô di za oto. Aipãrĩ'wa norĩ hã ropipa u, te te 're asãmra waihu'u aba mono ô di za oto. 'Re ihâimana u'âsi mono ma si, waihu'u pese di, ropipa u dawabzurizé hã. Taha wa, taha si te za tô 're ïpipa za'ra wa'aba mo.

⁶⁻⁷ — Wa za aima âma romnhimírê'é za'ra wa'wa. Sire wa'ã hã wa'ãbã syryre nherê, âma po're si'ãri waihu'u ô di, 'Re ihâimana u'âsi mono hã. Tane duré, aséré za'rata aba zama, tâma waihu'u pese di. Sire hã tâma sawi pese za'ra nherê, sire zawi nhipai u, tâma asawi uptabi

za'ra wa'aba di, 'Re ìhâimana u'âsi mono ma hã. Taha wa, te za asina aihâtâ'â âna 're anomro aba mo. — Âne ma tô tâma waihu'u za'ra Zezusi hã, tisiré 're ìnomro mono norî ma.

⁸ Te duré tâma nharî za'ra:

— Ni'wam norî hã ìzazei'wa na danho'a dama 're siwasu'u za'ra mono wamhã, wa hã ti'ai âma dasiré ìpodo hã wa za duré ìzazei'wa na te 're awasu'u, hãiwa âma 'Re ìhâimana u'âsi mono ma romhuri'wa norî nho'a.

⁹ Tanei ô di za, ni'wam norî hã ìzazei'ô'wa na dama 're siwasu'u za'ra mono wamhã. Âne wamhã, ìzazei'ô'wa na wa za duré te 're awasu'u, hãiwa âma 'Re ìhâimana u'âsi mono ma romhuri'wa norî nho'a.

¹⁰ — Âté ni'wam norî hã dasiré ìpoto ma, te za ìma nharî wasété za'ra. Tane nherê, tiwasété na 'Re ìhâimana u'âsi mono ma, siwasu'u za'ra wamhã, te te âma 'madâ'â za'ra ô di za oto, ìwasédé hã. Tazahã, ni'wam norî hã, ìpê'êzani hã te te 're wê'ô u'âsi za'ra mono wamhã, te za te te âma 're 'madâ'â u'âsi za'ra ìwasédé hã, 'Re ìhâimana u'âsi mono hã.

¹¹ — Âté ìzazei'wai wa, te za taré da te 're aiwê'ô za'ra wa'wa. Taha wa, âté te za rowahutuzéb u, da te 're asimroi wa'wa, ìzazei'wa na, da te 're aiwaihu'u za'ra wa'aba mono da. Âté roti'wa norî u, te za da te 're asimroi wa'wa, âté danhib'apito norî u. Tane nherê, asina 're aihâtâ'â za'ra wa'aba mono ô di za. Tãma asiwasu'u za'ra wa'aba zéb zô, 're rosa'rata za'ra wa'aba mono ô di za.

¹² Nimahã bâtã na, da te aiwaihu'u za'ra wa'aba wamhã, te za 'Re ìhâimana u'âsi mono hã Tipê'êzani na aima waihu'u za'ra wa'wa, dama 're asiwasu'u za'ra wa'aba mono zéb da hã. Taha wa, asina 're aihâtâ'â za'ra wa'aba mono ô di za. — Âne ma tô tâma waihu'u za'ra, Zezusi hã.

Aibã ìsimarî ahã wasu'u

¹³ Tawamhã aibã hã dawa'wa ìsa hã te Zezusi ma tinha, âne:

— Rowahutu'wa, ìdub'rada hã ma'âpé ì'âma wada'uri, te te ìma po'o da, wamama hã wawi dâ'â ô ré, te te wama ìpisudu hã. — Âne te tâma tinha.

¹⁴ Taha wa, te Zezusi hã asa tâma tinha:

— Mare di. E 'wa hã ma tô ìpisutu, te ai'âma wada'uri da, te te aima po'o da hã. Ni'wa te te ìpisutu ô di. — Âne te aibã ma tinha.

¹⁵ Tawamhã te uburé dama tinha:

— Ma'âpé, ìwapari pese za'ra wa'aba. 'Rãwi te za 're asi'madâ'â za'ra wa'aba mo, asimarî ahã zô, 're rob'ruiwapari za'ra wa'aba mono tô da. Danhimarî ahã uptabi nherê, robze u'âsi, âma 're danomro mono ô di za. Rowëzéb ô di, ta hã. — Âne ma tô Zezusi hã tâma waihu'u za'ra.

¹⁶⁻¹⁷ Te duré âma romnhimiré, âne:

— Aibã hã te 're hâimana, ìsimarî ahã hã. Buru nho ahã wamhã, 'rãwi te sima rosa'rata, âne: "Ri hã 'ri 're sy'yre di, buru nho za'warizéb da hã. E marî wa za 'manha.

¹⁸ Âté ri wa za sãmra, te 'ri za'êtê da, buru nho za'warizéb da hã. Tamomo, wa za ubumro buru nho hã, 'ri za'êtê u. Ìnhimarî zama, wa za sa'ra, buru nho zu hã.

¹⁹ Taha parip si, wa za ìsima tinha, âne: 'Âhãna ìma rowé di. Marî hã ahã na, te ìza daba'wara, ìwê hã. Ìwi ìropsi'utôri da hã, mare di. Wahub ahã na, te za ì'âma tiwahu, ìsa hã ìma 're hâimana mono ré hã. Wa za oto 're ìwa'utu u'âsi. Âté, te 're romhuri mono ô di za oto. Âté âhãna si, wa za oto 're ìsa. Wa za te 're zâsi u'âsi. Marî na, wa za 're ìto, ìtozém na.' " Âne te aibã hã sima rosa'rata.

²⁰ Taha wa, te 'Re ìhâimana u'âsi mono hã tâma tinha: "A hã ma tô âma ì'upa za'ê, asimirosa'rata na. Â barana te za atã. Atã'â wamhã, e 'wa te hã za oto asimarî hã, asima si 're ì'a'ubumroi pese mono hã." Âne te aibã ma tinha.

²¹ — Tane, danhimarî hã dasima si, da te 're ubumroi pese za'ra mono wamhã, 'Re ìhâimana u'âsi mono ma, 're danhoprub za'ra mono âna, te za taré da te dasima 're ubumroi pese za'ra, danhimarî hã. — Âne ma tô Zezusi hã tâma waihu'u za'ra.

Marî na 're dahâtã'â za'ra mono âna, 're ìdanomro mono zé wasu'u
Mateusi 6.25-34

²² Tawamhã Zezusi te tinha, tisiré 're ìnomro mono norî ma, âne:

— Taha wa, wa za duré âne aima waihu'u za'ra wa'wa. Marî na 're aihâtã'â za'ra wa'aba mono ô di za. Asazé wa'aba na asina 're aihâtã'â za'ra wa'aba mono ô di za. Duré, ai'uza ô na zama asina 're aihâtã'â za'ra wa'aba mono ô di za.

²³ Wasazém nhipai u pire uptabi di, wahâimanazé hã. Duré, wa'uzazém nhipai u pire uptabi di, wahãiba hã.

²⁴ Ôhõta, si norî hã. Ma'âpé, 'madã'â za'ra wa'aba. Si norî hã te te sima 're robzuri mono ô di. Te te duré sima 're rob'rãihãri za'ra mono ô di. Duré robza'warizéb ô di, ìsazéb za'warizéb

da hã. Tane nherê, te ïsa hã te te tãma 're anhomri u'âsi, 'Re ïhâimana u'âsi mono hã. E si norï si, te te 're azawi pese. Mare di. Si hã tãma sawi pese za'ra nherê, si zawi nhipai u, tãma asawi uptabi za'ra wa'aba di.

²⁵⁻²⁶ Duré 're atã'ã za'ra wa'aba mono zém na, asina 're aihâtã'ã za'ra wa'aba mono wamhã, e asibâtã na 're atã'ã za'ra wa'aba mono õ di za. E asibâtã nhipai u, te za 're anomro siroptu wa'aba mo. Mare di. Asina 're aihâtã'ã za'ra wa'aba mono zéb zarina, asibâtã nhipai u 're anomro siroptu wa'aba mono õ di za. E marï da, te za bété marï na 're aihâtã'ã za'ra wa'aba mo.

²⁷ Ma'ápé, romnhirãrã 're ïhâimana za'ra mono zém na rosa'rata za'ra wa'aba a'ã, rom na 're ïsimasa mono na hã. Ta norï hã ti'uzazéb da hã, te te sisada 're 'manharï za'ra mono da, te te 're romhuri za'ra mono õ di, zazahã da hã. Tane nherê, dama 'madã'ã zeï uptabi di, romnhirãrã hã. Apito Saroma hã uza wê uptabi na 're si'uzã mono nherê, taha nhipai u, dama 'madã'ã zeï uptabi di, romnhirãrã hã.

²⁸ Romnhirãrã hã hãiwï 're simnhatã mono ré, te za du hã ïré da te 're wazãri za'ra, unhama da, da te 're ub'rã za'ra mono da. Taha wa, 're simasam hã mono dai õ nherê, ma tã wê uptabi na te te 're ab'manharï, 'Re ïhâimana u'âsi mono hã. E tawamhã, ai'uzazé hã te te aima 're sãmri za'ra wa'aba mono õ di za bété. Te za tã te te aima 're anhomri 'wa. E niha Aimama 'wa hã asina 're umnhasi za'ra wa'aba mono õ di bété, taha si ai'uzazé hã za te te aima 're ï'anhomri aba mono na hã.

²⁹⁻³¹ Taha wa, marï na asina 're aihâtã'ã za'ra wa'aba mono õ di za. Asazéb zõ si, duré ã zõ si, 're asõpré wa'aba mono õ di za. Taha zõ si, te za ïsazei'õ'wa norï hã 're sõpré. Aimama 'wa hã ma tã aiwaihũ'u za'ra wa'wa, marï hã aiwi sã 're ïrowaptã'ã za'ra wa'aba mono na. Aimama 'wa hã, 'Re ïhâimana u'âsi mono, Danhib'apito uptabi. Taha wa, õhõ si, te za 're ïpisutu za'ra wa'aba mo, õhõ ãma si 're anomro aba mono da. Tawamhã marï hã aiwi sã 're ïrowaptã'ã za'ra wa'aba mono zéb uwaibaba, te za te te aima 're anhomri 'wa, Aimama 'wa hã. — ãne, ma tã Zezusi hã tãma waihũ'u za'ra, tisiré 're ïnomro mono norï ma.

³² Te duré tãma nharï za'ra:

— ïsiré norï, ai'umrore wa'aba nherê, asina 're aihâtã'ã za'ra wa'aba mono õ di za. Aimama 'wa hã Danhib'apito uptabi hã, te za aima pisutu za'ra wa'wa, ïsiré dama 're roti za'ra wa'aba mono da. ãne ma tã sima aiwê za'ra wa'wa.

³³⁻³⁴ Taha wa, te za uburé asimari hã dama ïwede za'ra wa'wa, ïwa'ãbã zõ, ïsimari'õ norï ma, sãmri aba mono da. Tawamhã asimari hã ïsi'utõri'õ hã te za hãiwa ãma asõ 're hãimana u'âsi za'ra wa'wa, wê u'âsi na. Tame, ïsipsaihuri norï hã sã 're sisisi waihũ'u mono õ di za. Tame duré, da'uzã hãzapu'u'wa hã 're hãimana za'ra mono õ di. Ti'ai ãma asimari ahã zõ si 're rob'ruiwaparï za'ra wa'aba mono wamhã, taha na si te za aipé'ê 're, asima 're ïrosa'rata u'âsi za'ra wa'aba mo, hãiwa ãma ïwê hã ïsi'utõri'õ upana. Duré hãiwa ãma ïwê uptabi zõ si, asima 're rob'ruiwaparï za'ra wa'aba mono wamhã, taha na si te za asima 're ïrosa'rata u'âsi za'ra wa'aba mo, 'Re ïhâimana u'âsi mono hã ïwê hã te te asõ 're ï'apisutu aba mono zõ si. — ãne ma tã tãma waihũ'u za'ra, Zezusi hã.

Romhuri'wa norï, hãimana nhimiza'rese sina, 're ïhâimana za'ra mono wasu'u

³⁵⁻³⁶ Tawamhã Zezusi hã te duré tãma romnhimiri'é za'ra, ãne:

— Romhuri'wa norï hã hãimana nhimiza'rese sina, te za tinhib'apito zõ 're simipari za'ra. Tane, te za aihãimana nhimiza'rese sina, 're aihãimana za'ra wa'aba mo. Áté dasina damrozéb u, te za ïsib'apito hã tiwi timorï za'ra, dame sa da. Tawamhã apã wisi õ ré, te za si'uzã za'ra, tãma ïromhuri'wa norï hã, te te tãma romhuri za'ra da. Te za sã ro'õ za'ra rob'uiwézé hã, rowa'a na sébré da, ïsib'apito za'ra hã. Tawamhã 'ri tãme wisi wi, te za ïsib'apito za'ra hã 'ridawa ta'a, te te tãma 'ridawa za'ra da. Taha wa, te za awa'awi tãma 'ridawa za'ra.

³⁷⁻³⁸ Tãma ïromhuri'wa norï hã sõtõ ãna, sã simipari za'ra wamhã, tãma rowé za'ra di za. Tawamhã áté mara wa'wa, te za apã wi, ïsib'apito za'ra hã. Áté si'a hãrã wi, te za apã wi. Hãimana nhimiza'rese sina, sã 're simipari za'ra mono ré, apã wisi wamhã, tãma rowé za'ra di za, tãma ïromhuri'wa norï ma hã. Tawamhã apito nherê, sai õ ré, te za a'ã ti'uzã na ãma saprï, ïsa te te tãma sãmri mono da, tãma ïromhuri'wa norï ma. Te za duré tãma nharï za'ra, tisai ma, si'ubumro da. Taha pari, te za duré tãma sãmri za'ra, ïsa hã.

³⁹ Wa za duré ãma simiri'é, ãma rosa'rata za'ra wa'aba da. Dahãimana nhimiza'rese ãna, 're dahãimana za'ra mono ré, te za ïsipsaihuri norï hã danhibrob zõ 're sisisi. 'ri para u hã. Bãdá hã we ïsébrézé hã 'ri tede'wa te te waihũ'u wamhã, te za tiwi 'madã'ã pese, sébré tã da, 'ri para u.

⁴⁰ Tane te za a norï wa'wa hã aihãimana nhimiza'rese ïzõ 're asimipari u'âsi za'ra wa'aba mo. Wa hã ti'ai ãma dasiré ïpodo hã, wa za wei mo apã, ïzõ asimipari za'ra wa'aba õ zém na,

nimahã bātã na. Taha wa, te za aihâimana nhimiza'rese ĩzô 're asimipari u'âsi za'ra wa'aba mo. — Âne te Zezusi hã tâma roti za'ra, tisiré 're ĩnomro mono norĩ ma.

Romhuri'wa ĩumnhasi wasu'u, romhuri'wa ĩumnhasi'ô wasu'u me Mateusi 24.45-51

⁴¹ Tawamhã Pedru te 'mahã:

— Apito, e 'wai udãna, te âne âma ĩsimiré. E uburé da'udãna zama, te âma ĩsimiré. — Âne te sadanha.

⁴² Taha wa, te Wanhib'apito hã asa âma romnhimiré'é, Zezusi hã âne:

— Dama romhuri'wa ĩumnhã hã duré ĩsimiroti wê hã, e niha 're ĩhâimana mono zé hã. Âne hã 're hâimana mono wamhã, te za ĩsib'apito hã nimomo tiwi morĩ ô ré, tâma pisutu, uburé tâma ĩromhuri'wa norĩ hã ĩsa'u nherê, te te sô 'madã'ã za'ra da. Te za duré tâma pisutu, bātã pisutuzém na ĩsazéb da hã, te te tâma âma uwaimrami za'ra da, tâma ĩromhuri'wa norĩ ma.

⁴³⁻⁴⁴ Tawamhã apã we ĩmorĩzéb u, tinhib'apito nhimiroti hã te te tâma âma uwaimrami wamhã, tâma rowê di za, romhuri'wai ma hã. Taha ma, tâma rowê uptabi di za tô. E marĩ wa. ĩsib'apito hã apã wisi wapsi, te za tâma pisutu, uburé ĩsimarĩ hã te te tâma 're 'madã'ã u'âsi mono da oto, tâma umnhasi uptabi wa.

⁴⁵ Tazahã, tinhib'apito za're'ra, dama 're hâimana wê mono ô wamhã, tâma 're rowê mono ô di za. Âté apito za're'ra, te za 'rãwi sima tinha, âne: “ĩnhib'apito hã simahudu ô di.” Âté, âne te za sima tinha. Taha wa, sô rowaptã'ã wê te, te za oto tizapari romhuri'wa norĩ hã te te 're ahã za'ra âté, aibã norĩ hã pi'ô norĩ zama. Âté, te za taré tisa zô si 're hâimana. Âté te za âzé hã te te 're hãsi. Ône u'âsi, te te 're hãsi mono wa, te za 'rãri wasété na 're hâimana.

⁴⁶ Tawamhã rosa'rese âna hâimana ré, te za ĩsib'apito hã ĩtême wi apã, sô ĩsimipari ô zém na nimahã bātã na, siwa'ru. Taha wa, te za sa'êtê azã, tâma ĩromhuri'wa hã. Sib'ézé 'wa pa na, te za te te wa'ôtô. Taha wa, te za dapô're'ô norĩ zu robzei'ô te te sina 're sô'ôtô, tâma ĩromhuri'wa hã.

⁴⁷ — Âté, ni'wa hã te za waihu'u pese, tinhib'apito nhimiroti hã, tâma ĩromhuri'wa hã. Tane nherê, wa'a te, ĩsimiroti hã te te 're uwaimrami mono ô di za. Taha wa, te za sa'êtê azãri ni, powawê hãwaré na, apito zadawa para.

⁴⁸ Âté, ni'wai ma, waihu'u pese ô di za, ĩsib'apito nhimiroti hã. Tawamhã marĩ te za upa. Taha wa, te za syru na si azãri ni, tâma waihu'u pese ô wa, ĩsib'apito nhimiroti hã. Âté te za ni'wai ma waihu'u pese, tinhimiroti hã, 're ĩhâimana u'âsi mono hã. Te te tâma waihu'u pese wamhã, te za sô 're simipari, danhipai u te te tâma âma 're uwaimrami mono da, ĩsimiroti hã. — Âne ma tô tâma waihu'u za'ra, Zezusi hã.

⁴⁹ Te duré tâma nharĩ za'ra:

— Tĩ'ai u, wa wei mo, tĩ'a na te sazu da, zata da. Zata sirômo 'wa'ãhã, aré ĩma wê di.

⁵⁰ Wa za a'ã robzépata za'êtê. Te robzépata ô ré hã, rosa'rata ahã di za.

⁵¹ E datême we ĩmorĩ wa, te za ti'ab ré rowê na si dasiré 're dahâimana za'ra, simisutu. Mare di. Âne hã ĩ'ãma 're rosa'rata za'ra wa'aba mono ô di za. Rosa'rata na te za ĩ'ãma dasima aipo'o za'ra ni.

⁵² Âté, 5 na ĩhãiba hã te 'ri âma siré 're si'ubumro. Ta norĩ hã te za rosa'rata na ĩ'ãma sima aipo'o za'ra. Âté, si'ubdatô te za ĩwê'wa, 're hâimana za'ra. Âté maparane te za ĩwê'ô'wa, 're hâimana zahuré. Âté, maparane te za ĩwê'wa hã 're hâimana zahuré. Âté duré si'ubdatô te za ĩwê'ô'wa hã 're hâimana za'ra.

⁵³ Âté, damama hã te za ti'ra norĩ hã wê'ô za'ra, ĩzazei'wa 're hâimana za'ra mono wa, ĩ'ra si'aibã hã. Âté, da'ra norĩ hã te za timama hã siwi wê'ô za'ra, ĩzazei'wa, 're hâimana mono wa, ĩmama hã. Âté, dana hã te za ti'ra norĩ hã wê'ô za'ra, ĩzazei'wa, 're hâimana za'ra mono wa, ĩ'ra sipi'ô hã. Âté, pi'ô norĩ hã te za tina hã siwi wê'ô, ĩzazei'wa, 're hâimana mono wa, ĩna hã. Âté, damaprewa hã te za tisanĩ'aba norĩ hã wê'ô za'ra, ĩzazei'wa 're hâimana za'ra mono wa, isani'aba norĩ hã. Âté, pi'ô norĩ hã te za timaprebaba norĩ hã wê'ô za'ra, ĩzazei'wa, 're hâimana za'ra mono wa, ĩmaprebaba norĩ hã. — Âne ma tô tâma waihu'u za'ra Zezusi hã, tisiré 're ĩnomro mono norĩ ma.

⁵⁴ Uburé te oto dama tinha:

— Âté, te za hãiwa nhirôno ĩ'madã'ã za'ra wa'wa, bātã pusizém niwĩ. Taha wa, te za asima ĩrowasu'u za'ra wa'wa, âne: “Tã, te za we tita'a.” Âté, âne te za asima ĩrowasu'u za'ra wa'wa, awa'awi. Tawamhã tã hã te za we tita'a tô.

⁵⁵ Âté, rowa'u hã te za wei watobro, hãiwa'a're nhimi'e hawi. Taha wa, te za âne asima ĩrowasu'u za'ra wa'wa, “Te za oto tirowa'ro.” Âne te za asima ĩrowasu'u za'ra wa'wa. Tawamhã te za tô tirowa'ro.

⁵⁶ Marī hā ti'ai āma hā, duré hāiwa na hā aima waihu'u pese za'ra wa'aba di, 'madâ'â za'ra wa'aba wamhā. E niha bété tane aiwa, aima waihu'u pese za'ra wa'aba ô di, marī te te iwasu'u hā, te dama 're i'ab'manharī wē mono zé hā, āma 're i'madâ'â za'ra wa'aba mono nherē. — Āne ma tô dama tinha, Zezusi hā.

⁵⁷⁻⁵⁸ Uburé ma, te duré dama tinha:

— E marī wa, asina 're roti wē za'ra wa'aba mono ô di, iwē hā 're 'manharī za'ra wa'aba mono da. Wa za āma simiré'é, āne: Āté, ni'wa hā te za asaprō, dama 're irowairébé mono 'wa, 're iāmra mono zéb u. Marī 'manharī wa, te za asaprō, te te tāma aiwasu'u da. Taha wa, te za bādādi na ane wa'aba ré, tāma asiwasu'u aiwasété na, rowairébé'wai u te te asaprōni tô da, damrami'wai ma, te te ai'ru tô da, dazazéb 're, te te aséré tô da.

⁵⁹ Te te aséré wamhā, asiwa'âbâ 'rāsutu pese ô nherē, ta hawī aiwatobro waihu'u ô di za. Āne, wa aima waihu'u za'ra wa'wa, asina 're roti wē za'ra wa'aba mono da, iwē hā 're 'manharī za'ra wa'aba mono da. — Āne, ma tô tāma waihu'u za'ra, Zezusi hā.

13

Dawasété wi 're i'asipizari za'ra mono zé wasu'u

¹ Tawamhā Zezusi te te dama rowasu'u ré, ma tô ni'wam norī hā itēme aihutu. Taha wa, te tāma rowasu'u za'ra, Zezusihi ma:

— A'uwē norī hā ma tô simro ni, Darireza tede'wa norī hā. Piratuhu nhimiwada'uri zarina, ma tô simro ni. 'Re ihāmana u'āsi mono ma, tinhimizama te te simroi ré, ma tô uprosi ni. — Āne te Zezusihi ma rowasu'u za'ra.

² Tawamhā Zezusi te asa tāma nharī za'ra:

— E Darireza norī hā ma tô danhipai u tiwasédé hā te te 're 'manharī za'ra. E taha wa, ma tô tidâ'â za'ra. E āne, ma tô āma i'rosa'rata za'ra wa'wa.

³ Mare di. Taha wab ô di. Ta norī hā danhipai u, tiwasédé hā te te 're 'manharī za'ra mono ô di. Tane nherē, ma tô tidâ'â za'ra. Tane, te za tô a norī wa'wa hā i'isine 're atâ'â za'ra wa'aba mo, aiwasété wi 're aipizari za'ra wa'aba mono ô wamhā.

⁴ A'uwē norī hā, Siro'é na 'ri sipo'o āma 're i'si'ubumroi mono norī nhisiwi, ma tô 'ri rāihā hā waptārā, da'madâ'ázé hā. Taha wa, ma da'ahā na ai'utōri ni. 18 na ma 'ri hā da'uprosi. Ta norī hā bété, e ma tô danhipai u tiwasédé hā te te 're 'manharī za'ra, Zeruzarē āma 're i'dahāmana za'ra mono norī upana. E taha wa, ma tô tidâ'â za'ra.

⁵ Mare di. Taha wab ô di. Ta norī hā danhipai u, tiwasédé hā te te 're 'manharī za'ra mono ô di. Tane nherē, ma tô tidâ'â za'ra. Tane, te za tô a norī wa'wa hā i'isine 're atâ'â za'ra wa'aba mo, aiwasété wi 're aipizari za'ra wa'aba mono ô wamhā. — Āne ma tô tāma waihu'u za'ra, Zezusi hā.

Pidera wede i'rāi'ô wasu'u

⁶ Tawamhā te tāma āma romnhimiré'é za'ra āne, Zezusi hā:

— Aibā hā te 're 'mai'hāmana, buru tede'wa hā. I'buru āma hā, rob'ru hā te 're hāmana za'ra, uwa 'ru hā. Pidera wede hā te duré tamede 're sa. Tawamhā bātā na te mo, pidera 'rā zô. Tane nherē, i'rā hā te te 'masāmri ô di. Rāi āna te za.

⁷ Taha wa, te buru 'madâ'â'wai ma tinha, āne: "Si'ubdatō, ma tô i'āma tiwahu oto, taré nasi we sô i'neb ré hā, pidera 'rā zô. Wa tô 'madâ'â wa'a. Te za i'sizā. E marī da, te za taré 're sab u'āsi, 're 'rāi mono āna." Āne te romhuri'wai ma tinha.

⁸ Tawamhā romhuri'wa hā te asa tāma tinha: "Apito, misi āma wahu a'ā. Wa hā wa za ab're, powawē nhana na te uiri da, wē na sab da.

⁹ Wahub amo na 'rāi wamhā, wē di za. 'Rāi ô wapsi, te za i'ma i'ru, te sizāri da." Āne, romhuri'wa te tinha, buru tede'wai ma. — Āne ma tô tāma āma romnhimiré'é za'ra, Zezusi hā.

Zezusi hā, romhuri zahārizém na pi'ô i'sihâpâre te te i'pesezé wasu'u

¹⁰ Tawamhā romhuri zahārizém na ma tô dama rowasu'u Zezusi hā, zudezu norī te, rowahutuzéb āma.

¹¹ Tame te pi'ô hā ihāzé ré hā dame nhamra. Hāzé ré ma tô āma tiwahub ahā, 18 na, wa'uburé te te 're upi u'āsi mono wa. Sihâpā u'āsi, te 're mo, wāi wahutu āna.

¹² Tawamhā Zezusi te te sabui wamhā, te 'mahā:

— Pi'ô, aihāzé hā te za oto aima apa.

¹³ Taha pari, ma tô tinhib'rada hā āma tihi. Tawamhā ma tô awa'awi wāi wahudu. Wāi wahutu wamhā, te āma tiwata, 'Re ihāmana u'āsi mono āma, te te pese wē te.

¹⁴ Tane nherē, rowahutuzé 'madâ'â'wa hā ma tô sada tizahi, Zezusihi zada, sabadu na te te pese wa. Taha wa, te uburé dama tinha:

— Bâdâ hã, 6 na ìhâiba hã, wa te 're ìromhuri za'ra mono zéb da hã. Taha bâtâ na si, te za we 're anomro aba mo, da te 're aipese za'ra wa'aba mono da. Sabadu na hã mare di za, romhuri zahârizém na hã. — Æne ma tô dama waihu'u, rowahutuzé 'madâ'â wa hã.

¹⁵⁻¹⁶ Tawamhã Wanhîb'apito te tâma tinha:

— Oro sabadu na te dapeso wa, ìma nharî za, te za powawê hã awaru po'repore zama, 're ìwasihu za'ra wa'aba mo, âi ba, 're simroi wa'aba mono da, te te 're âhuri mono da. Æhâtâ pi'ô hã, Abra'âhã nhihudu hã. Satanasi hã te te 're pibui mono ré hã, ma tô 18 na âma tiwahu. Sabadu na nherê, wa tô pese, hâzé âna oto 're hâimana mono da. E niha bâ bété, aima wê za'ra wa'aba ô di, sabadu na te ìpesezé hã rowê na pi'ô hã oto 're ìmorî da hã. — Æne ma tô Zezusi hã tâma waihu'u, dawasété na dasisâmri ma ropibuma.

¹⁷ Tawamhã, Zezusihi mreme hã te te waparî za'ra wamhã, ma tô ìwê'ô'wa norî hã aséb za'ra, Zezusihi mreme ma. ìwê'wa norî ma, rowê za'ra di. Marî hã te te dama 're ab'manharî wê mono wa, te 're to za'ra, tipê'ê na.

Motada nhamare wasu'u, ì'u'êtê wasu'u me

Mateusi 13.31-33; Marcusi 4.30-32

¹⁸⁻¹⁹ Tawamhã Zezusi hã te dama tinha, âne:

— E niha, wa za âma simiré'ê, 'Re ìhâimana u'âsi mono, da'âma 're ìsib'a'uwê mono zém na hã. Motada nhamare na, wa za âma simiré'ê. Motada nhamare hã aibâ hã ma tô a're. Tawamhã ma tô tiwa'ru. Wa'ru wamhã, papo za'êtê di oto. Tawamhã si hã te ìsu 'rowî, te te sima 're sasi za'ra. Æne, 'Re ìhâimana u'âsi mono, da'âma 're ìsib'a'uwê mono zé hã. — Æne ma tô âma simiré'ê, Zezusi hã.

²⁰ Te duré dama tinha:

— E marî na, wa za duré âma simiré'ê, 'Re ìhâimana u'âsi mono, da'âma 're ìsib'a'uwê mono zém na hã.

²¹ ì'u'êtê wapuzém na, wa za âma simiré'ê. Pi'ô hã te za ì'u'êtê wapuzé hã syru na sa'wa, tridu 'râ zu pese wazari. Tridu zup si, sa'êtê uptabi di. Tawamhã te te wazari pese wamhã, te za tidupto, ì'u'êne hã. Sa'êtê uptabi di za oto. Æne duré, 'Re ìhâimana u'âsi mono, da'âma 're ìsib'a'uwê mono zé hã. — Æne ma tô âma simiré'ê, Zezusi hã.

'Ridawa, 're sy'yre wasu'u

Mateusi 7.13-14, 21-23

²² Tawamhã Zezusi norî hã te oto ai'aba're, Zeruzarê u. 'Ri nho'ômo mono bâ, te te dama 're rowasu'u u'âsi Zezusi hã, 'ri wa'ôto u zama.

²³ Tawamhã te ni'wa hã sadanha:

— Apito, e da'umro na si, te za danho'reptuzé hã da te dasina 're waihu'u za'ra. — Æne te sadanha.

Taha wa, ma tô Zezusi hã asa uburé dama tinha:

²⁴ — Tô sena, te za niwapsi da'ahã na da te dasima 're wê za'ra, 'Re ìhâimana u'âsi mono u 're danhisisi mono da. Tazahã, ìtême 're danhisisi mono ô di za. Taha wa, 'ri para u 'ridawa 're sy'yre na 're danhisisi mono da, sada 're ìdanhîptete za'ra mono ne, te za sada 're asiptete za'ra wa'aba mo, 'Re ìhâimana u'âsi mono u 're asisisi aba mono da.

²⁵ Nimahã na te za 'ri tede'wa hã wahudu, te te siré 'rinhitop tete da. Tawamhã te za ì'ridawa ta'a za'ra wa'wa, rowî 're ai'ubumroi wa'aba mono hã. 'Ri tede'wa hã te za ì'mahârâ za'ra wa'wa, âne: "Apito, ma'âpê we wazô 'ridawa za'ra na, âma atême wanhisisi da." Æne te za 're ìmahârâ za'ra wa'aba mo. Tazahã, te za asa aima nharî za'ra wa'wa, âne: "Te aiwaihu'u za'ra wa'aba ô di. E ma hawimhã, a norî wa'wa hã."

²⁶ Tawamhã âne te za asa tâma asiwasu'u za'ra wa'wa: "Wa norî hã, wa tô asiré wasaihuri ni. Asiré, wa tô duré âhuri ni. Warob âma hã ma tô duré dama 're ìrowahutu mo, waza'ru âma hã." Æne te za 'ri tede'wa ma asiwasu'u za'ra wa'wa.

²⁷ Taha wa, te za asa duré aima nharî za'ra wa'wa, âne: "Te aiwaihu'u za'ra wa'aba ô di, ìzazei'wa na hã. Aiwasédé hã ma tô 're ì'manharî u'âsi za'ra wa'aba mo. Mo oto ai'aba'réi wa'aba, ìnhiti." Æne te za aima rob'ru za'ra wa'wa.

²⁸ Tawamhã rowê uptabi âma, 'Re ìhâimana u'âsi mono 'rata 're ìsi'ubumroi mono hã te za ì'madâ'â za'ra wa'wa, Abra'â norî hã, duré Izati, duré Zaco, duré uburé ìsadowa wasu'u'wa norî hã. Tazahã, a norî wa'wa hã te za rowî 're ai'ubumroi u'âsi aba mo. Taha wa, te za asina 're ai'ry'ry aba mo. Te za duré 're ai'wasitete za'ra wa'aba mo, 're robzépata za'êtê za'ra wa'aba mono wa.

²⁹ Daro mono bâ, te za ìtême 're dasihutu, 'Re ìhâimana u'âsi mono 'rata 're dasaihuri mono da, Danhîb'apito uptabi na 're ìhâimana mono zéb u. Bâtâ pusizém hawi, te za ìtême 're dasihutu, bâtâ zasizém hawib zama, duré hâiwa'a're nhimire hawib zama, duré hâiwa'a're nhimi'e hawib zama.

³⁰ Tawapsi, te za dama ĩwapu ma nharĩ za'ra, dama pire na 're hâimana za'ra mono da oto. Duré, dama ĩpire ma, te za nharĩ za'ra, dama wapu na 're hâimana za'ra mono da oto. — Āne ma tō Zezusi hâ tâma waihu u sirômo za'ra.

*Zeruzarê âma Zezusi hâ ĩpê'êzéé wasu'u
Mateusi 23.37-39*

³¹ Tawamhâ Zezusi hâ te te apo're pu'u parip si, awa'awi ma tō ĩtême 'maihihutu, parisezu norĩ hâ. Taha wa, ma tō Zezusi hâ ma rob'ru za'ra, âne:

— Mo oto â hawi aimorĩ. E marĩ wa. Apito Erodi hâ ma tō sima aiwê, da te dasiwi aiwĩrĩ da. — Āne te tâma rob'ru za'ra.

³² Tawamhâ Zezusi hâ apâ te tâma rob'ru za'ra:

— Mo oto ĩtême ai'aba'rei wa'aba apâ, tâma ĩzadawa wasu'u za'ra wa'aba da, wapsâ wawê ne 're ĩmorĩ ma. Wa'uburê hâ wa tō te dama 're anhamra. Wa duré te 're da'apese, â bâta na duré awê na. Awê amo na, wa za ĩnhimiromhuri hâ uprosi. Āne te za tâma ĩzadawa wasu'u za'ra wa'wa, Erodi hâ ma.

³³ — Zeruzarê âma, ma tō da te 're simro, 'Re ĩhâimana u'âsi mono zadawa wasu'u 'rata 'wa norĩ hâ. Ōne u'âsi. Taha wa, wa za âma mo, âhâna, awêb zama, awê amo na zama, tame, da te dasiwi ĩwĩrĩ da, ĩsadawa wasu'u'wa hâ. — Āne ma tō Zezusi tâma siwasu'u za'ra, parisezu norĩ ma.

³⁴ Tawamhâ ma tō sisôwa tinha, Zezusi hâ:

— Zeruzarê âma 're ai'ubumroi wa'aba mono norĩ âma, ai'âma ĩpê'êzéé za'ra wa'aba di. Aihĩ'rata norĩ wa'wa hâ ma tō 'Re ĩhâimana u'âsi mono zadawa wasu'u 'rata 'wa norĩ hâ te te 're simroi u'âsi, êtê na. Datême te te 're ĩsatōrĩ za'ra mono norĩ zama, ma tō duré te te 're simroi u'âsi, êtê na. Si'a hâ ti'ra zawi te, 're ĩpapo za'ra mono ne, wa aré te ĩsima 're aiwê u'âsi za'ra wa'wa, ĩsitême te 're ai'awaihui wa'aba mono da. Tane nherê, asima 're ĩwê za'ra wa'aba mono ō di asa.

³⁵ Taha wa, tinhorôwa hâ te za oto tirê, 'Re ĩhâimana u'âsi mono hâ, âma 're ĩ'aiwata za'ra wa'aba mono zé hâ. Duré a norĩ wa'wa hâ, ĩhâiba 'madâ'â na sahu za'ra wa'aba ō di za a'â. Niwapsi duré ĩhâiba 'madâ'â za'ra wa'aba wa, te za âne asima ĩwasu'u za'ra wa'wa: “'Re ĩhâimana u'âsi mono zadawa para we ĩmorĩ ma, 're rowê za'êtê mono di za.” Āne te za asima ĩwasu'u za'ra wa'wa, ĩhâiba 'madâ'â na duré sahu za'ra wa'aba wa. Āne na aipê'ê 're asina ĩwaihũ'u za'ra wa'aba wapsi, te za ĩhâiba 'madâ'â na duré ĩsahu za'ra wa'wa. — Āne ma tō sisôwa tinha, Zezusi hâ.

14

Zezusi hâ romhuri zahârizém na, aibâ te te ĩpesezéé wasu'u

¹ Zudezu norĩ te, romhuri zahârizém na ma tō Zezusi hâ âzéé, aibâ nhorôwa u, ĩsiré sa da. Aibâ hâ, parisezu. ĩsiré parisezu norĩ ma, pire di, aibâ hâ. Tame 'ri para, ĩsi'ubumro norĩ hâ ma tō Zezusi hâ 'madâ'â za'ra.

² Tame sâmrá ré, ma aibâ ĩhâzé ré hâ ĩtême wi, Zezusi hâ u. Hâzé wa, te dupto zahuré di. Duré, paihi dupto zahuré di.

³ Taha wa, ma tō Zezusi hâ rowahutu'wa norĩ hâ azadanha, parisezu norĩ me:

— E romhuri zahârizém na, wa za wa te 're dapeze za'ra, sabadu na hâ. E ma tō wawi sawi, 'Re ĩhâimana u'âsi mono hâ, sabadu na, wa te 're dapeze tō za'ra mono da. E niha ĩsimiroti na rob'ru'éré hâ. — Āne te Zezusi hâ azadanha, rowahutu'wa norĩ hâ.

⁴ Tane nherê, asa te te âma sada'âbâ za'ra ō di. Tawamhâ Zezusi hâ ma tō aibâ hâ pa'â. Ma tō pese. Taha pari, ma tō tâma rob'ru, morĩ da oto, 'ri tême.

⁵ Tawamhâ aibâ za'u si, te tâma nharĩ za'ra, âne:

— Áté ai'ra hâ te za aiwi ti'maiwaptâ'â 'wa, â zô ab're u, áté powawê hâ. Tawamhâ e â zô ab're hawimhâ asiwi wazere aba ō di za, romhuri zahârizém na nherê. — Āne ma tō Zezusi hâ asa âma azadanha.

⁶ Tazahâ asa te te âma sada'âbâ waihu'u za'ra ō di.

Dama dawapu wasu'u, dama dapire wasu'u me

⁷ Tawamhâ wedeza na dasi'ubumroi wamhâ, ma tō ni'wam norĩ hâ dama ĩpire norĩ te na ai'ubumro, dame sô idahârâ za'ra norĩ hâ. Āne ma tō âma da'madâ, Zezusi hâ. Taha wa, ma tō tâma âma romnhimírê'e za'ra, âne:

⁸ — Ni'wa hâ asô hârâ wamhâ, dasina damro u dame asa da, aimorĩ wamhâ, dama ĩpire norĩ te na, asâmrá ō di za. E marĩ wa. Áté, aima ĩpire hâ te dame tihâiba, dame sô idahârâ hâ.

⁹ Tawamhâ te za aima tinha, 'ri tede'wa hâ, ō niwĩ asâmrá da, asâmrázém na sâmrá da, aima ĩpire hâ. Taha wa, te te aima ĩnharĩ ma, asisêb di za. Da'râsutu u, te za oto asâ.

¹⁰ Taha wa, âne tō da, dame asa da, asō dahârâ wamhâ, da'râsutu u, te za a'â asâ. E marî da. 'Ri tede'wa hâ si'uihâ na si te te aima pisutu da, dama ïpire norî 'rata asâmra da, asa da. Danho'a te te aima pisutu wamhâ, aima rowê uptabi di za.

¹¹ Tane, ni'wa hâ ïpire wê te, 'râwi sina 're wata mono wamhâ, 'Re ïhâimana u'âsi mono, te za tâma pisutu, wapu na 're hâimana mono da oto. Duré ni'wa hâ, tipire na 'râwi 're si'madâ'â mono ò wamhâ, te za tâma pisutu, dama ïpire na 're hâimana mono da oto. — Âne ma tō tâma waihu'u, Zezusi hâ.

¹² Tawamhâ dame sa da, sô ïhârâ ma, te tinha, Zezusi hâ:

— Dasaihurizé, dama 're 'manharî mono wamhâ, âté sô aihârâ za'ra ò di za, asiwadi norî zô hâ duré asisânawâ norî zô hâ, duré aimama norî zô hâ duré ïsibrob ahâ norî zô hâ, aiwaptoma 're ïsi'ubumroi mono norî zô hâ. Ta norî zô aihârâ wamhâ, asiré saihuri da, te za asa asô tihârâ za'ra, te te asa aima âma wa'râmi za'ra da.

¹³ Taha wa, dasaihurizé hâ dama 'manharî wamhâ, te za ïsibrob'ò norî zô aihârâ za'ra, duré ïmorî'ò norî zô, duré ï'râtêire norî zô, duré ïtob'a norî zô.

¹⁴ Âne wamhâ, aima 're rowê mono di za. E marî wa. Ta norî hâ simarî ò di, marî na te te aima âma ïwa'râmi za'ra zéb da hâ. 'Re ïhâimana u'âsi mono si, te za asôprubzé wa'râmi aima tisô. 'Re ïnomro wê mono norî te te ahâiwa'utu wapsi, te za aima âma uwaimra. — Âne ma tō 'ri tede'wai ma waihu'u, Zezusi hâ.

Dasaihuri za'êtê zé wasu'u

Mateusi 22.1-14

¹⁵ Tame ma tō aibâ hâ dame nhamra, 'ri para, sa da. Tawamhâ Zezusi te te dama ïwaihu'uzé hâ ma tō dame wapa. Taha wa, te Zezusihi ma tinha:

— 'Re ïhâimana u'âsi mono, Danhib'apito uptabi na 're ïhâimana mono zéb âma, ï'rata 're ïsaihuri mono norî ma, 're rowê uptabi za'ra mono di za. — Âne te Zezusihi ma tinha.

¹⁶ Tawamhâ Zezusi hâ te asa aibâ wasu'u hâ tâma wasu'u, âne:

— Aibâ hâ dasa hâ sa'êtê na te te dama 'manharî da, ma tō sina roti. Tawamhâ te te dama 'manharî ò ré, ma tō da'apo're pu'u siro, da'ahâ na ïtême dasihutu da, ïsiré dasaihuri da.

¹⁷ Sipî pari wamhâ, tâma ïromhuri'wai ma, te tinha, âne: "Mo oto aimorî dazô, we dasi'aba'rê da. Dasa hâ te oto dazô aimasa." Âne te tâma tinha. Taha wa, romhuri'wa hâ ma tō datême mo, dazô hârâ da.

¹⁸ — Tane nherê, te nasi aibâ norî hâ siparabâsi niha tâma nharî za'ra, romhuri'wai ma, te te sima wê za'ra ò wa. Sô ïhârâ 'rada hâ te tâma tinha, âne: "Âma ïmorî neza. Tane nherê, ti'a hâ wa 'mai'uipra. Tamomop si wa za mo, te sabu da. Âne asib'apito ma, ïzadawa wasu'u na za." Âne te tâma ïromhuri'wai ma tinha.

¹⁹ — Tawamhâ ïhâiba amo hâ te duré tâma tinha: "Âma ïmorî neza. Tane nherê, powawê hâ wa 'mai'uipra, 10 na ïhâiba za'ra hâ. Tamomop si wa za mo, te sabu za'ra da, te te romhuri wê za'ra zô. Âne, asib'apito ma, ïzadawa wasu'u na za." Âne te romhuri'wai ma tinha.

²⁰ — ïhâiba amo hâ te duré tâma siwasu'u: "Nimosi, wa ïmro. Taha wa, dame ïsa da, âma ïmorî waihu'u ò di." Âne te romhuri'wai ma tinha.

²¹ — Taha wa, te apâ mo romhuri'wa hâ, tinhib'apito ma, te te sadawa wasu'u za'ra da. Te te wapari wamhâ, ma tō ab'rui pese, ïsib'apito hâ. Taha wa, te âne tâma tinha: "Ai'aba'rê na dazô 're aimorî, 'ri nhi'rîti na we danhimroi mono da, ïsibrob'ò norî hâ, duré ïmorî wê'ò norî hâ, duré ïtob'a norî hâ, duré ï'râtêire norî hâ." Âne te tâma rob'ru. Taha wa, te ta norî zô si mo, we te te simroi mono da.

²² — We te te danhimroi mono pari, te tinha, tinhib'apito ma: "Apito, wa tō aimreme hâ âma uwaimra, aima. Zahadu da'masisi ò di." Âne te tâma tinha.

²³ — Taha wa, te ïsib'apito hâ duré asa tâma tinha: "Tane wamhâ, dazô airîti mono pé, bâdâdi na. Da'manhopêtê wamhâ, ta norî hâ te za we ïsimroi mo, ïnhorôwa hâ da te dasiwi 'masisi da.

²⁴ Tō sena, wa aima waihu'u za'ra wa'wa. Sô ïhârâ 'rata norî hâ, ïsa na saihuri ò di za." Âne te ïsib'apito hâ tâma tinha. — Âne te aibâ ma rowasu'u, Zezusi hâ.

Zezusihi zazei'wa, 're ïnomro mono zé wasu'u

Mateusi 10.37-39

²⁵ Tawamhâ Zezusi norî hâ si'aba'rêi ré, te da'ahâ na ïsarina ai'aba'rê ni. Tawamhâ ma tō Zezusi hâ datême aipi'ra. Âne te dama tinha:

²⁶ — Âté, ni'wam norî hâ te za we ïtême ai'aba'rê, ïzazei'wa, 're nomro mono da. Tawamhâ te za te te 're ïzawi pese za'ra, timama zawi nhipai u, duré tina zawi nhipai u, duré timro zawi nhipai u, duré ti'ra norî zawi nhipai u, duré tisisânawâ norî zawi nhipai u, duré tihâimanazém nhipai u.

²⁷ Tiza'ozéb ré, ĩzarina 're ĩnomro mono ne, da te 're uprosi za'ra mono da nherë, te za ĩsiré 're nomro. Ānei ò wamhã, ĩzazei'wa na te 're waihu'u za'ra mono ò di za. — Āne ma tó dama waihu'u, Zezusi hã.

²⁸ Te duré dama tinha:

— 'Ri'wa na, wa za aima āma romnhimiré'é za'ra wa'wa. Áté, a norĩ wa'wa hã te za asima ĩ'mairosa'rata 'wa, asima 'mai'ri wa'aba da, rob'madá'ázéb da. Taha wa, te za a'ã ĩ'mairosa'rata 'wa, 'ri wa'ábázéb da, rob'uiprazé hã, ĩwab zó.

²⁹⁻³⁰ Ānei ò wamhã, áte òne haré te za ĩsãna'rata si ĩ'manharĩ 'wa. 'Ri 'rãihã hã 'mai'uprosi aba ò di za. Da te sabu za'ra wamhã, te za ai'ãma 're dawa'ë za'ra wa'wa: “Oro te te 'ri 'ru za, te òne haré za.” Āne te za ai'ãma 're dawa'ë za'ra wa'wa. Āne, 'ri'wa na te aima āma ĩsimiré'é za'ra wa'aba zé hã.

³¹⁻³³ — Duré apito na, wa za aima āma simiré'é za'ra wa'wa. Áté danhib'apito te za dama 're 'manhamra. ĩsib'a'uwë norĩ hã dasi'wapé 'manharĩ'wa norĩ hã te ahã na 're si'ubumro, 10 miu na ĩhãiba za'ra hã. Tawamhã ma tó apito hãiba amoi wasu'u wapa, danhib'apito hã. Dasi'wapé 'manharĩ'wa hã te we, u, ahã uptabi na te te simro tinhib'a'uwë hã, 20 miu na, u, ĩhãiba za'ra hã. Tawamhã dazó wairébé ò ré, te za a'ã nhamra, ĩsib'a'uwë hã, dazada siptete za'ra zó. Dazada ĩsiptete za'ra ò na, te te waihu'u za'ra wamhã, te za tinhitob'ru norĩ u da'mazató, te te tãma 'mazadawa wasu'u da, ĩsib'apito za'ra ma. ĩsitob'ru norĩ hã zahadu romhã ré, te za ĩtëme da'mazató, we dasihutu tó da, dasi'wapé za'ra tó da. Āne, apito na te aima āma ĩsimiré'é za'ra wa'aba zé hã. Tane ĩzazei'wa, 're anomro aba mono da, marĩ hã asima 're sawi za'ra wa'aba mono ò di za, aipë'ë 're. Marĩ hã aipë'ë 're, asima 're sawi za'ra wa'aba mono wamhã, ĩzazei'wa na te 're aiwaihu'u za'ra wa'aba mono ò di za. — Āne ma tó dama waihu'u, Zezusi hã.

Dasai warĩrízé wasu'u

Mateusi 5.13; Marcusi 9.50

³⁴ Te duré dama tinha, Zezusi hã:

— Sa na hã dasa hã āma se ti, dasai warĩrízé wa. Tane nherë, oto 're se si'utõrĩ mono wamhã, niha da te 're 'manharĩ waihu'u mono ò di, apã se da.

³⁵ Sei ò wamhã, ti'a hã wë da, ti'ai wa, da te 're sa'wari za'ra mono ò di za. Duré powawë nhana ubumro nhisiwi, da te 're sa'wari za'ra mono ò di za. Taré, te za robu, da te 're sa'wari za'ra, marĩ dai ò wa oto. Āne romnhimiré'ézë hã. Asimipari pese za'ra wa'aba wamhã, ma'ápé ĩwapari pese za'ra wa'aba. — Āne te Zezusi hã dama si'ru.

15

Pone'ërebã ĩsimanizé wasu'u

Mateusi 18.10-14

¹ Tawamhã Zezusihi u ma tó aihutu ni, da'ahã na, ĩmreme hã da te wapari za'ra da. Danhib'apito ma, rob'uiprazé ubumroi'wa norĩ hã ma tó duré ĩtëme aihutu, siwa'ru 're ĩnomro mono norĩ zama.

² Tawamhã parisezu norĩ hã te āne tãma nharĩ za'ra, 'Re ĩhãimana u'ãsi mono nhimiroti 'rata na rob'ui'éré na dama rowahutu'wa norĩ me:

— Ò hã ma tó āma 're siwadi za'ra, siwa'ru 're ĩnomro mono āma hã. Ta norĩ siré, te nasi tisa. — Āne te Zezusihi ma nharĩ za'ra.

³ Taha wa, Zezusi hã ma tó tãma āma romnhimiré'é za'ra, āne:

⁴ — Asimizama hã ahã wamhã, áte misi te za aiwi aimani, 100 na ĩhãiba za'ra wamhã. E tawamhã, sô airĩtĩ mono ò di za, aiwi 'masimani wamhã. Te za tó sô airĩtĩ mo, apã ãri da. Asimizama zó airĩtĩ mono ré, te za 99 na ĩhãiba za'ra hã asa'u daba'wara, ĩtehutu wa.

⁵ Tawamhã aiwi ĩsimani hã oto sãmri wamhã, atoi uptabi di za. Taha wa, te za asisé we ĩã apã, sãmri wë te.

⁶ 'Ri tëme āwisi wamhã, te za sô aihãrà za'ra, asiwadi norĩ zó. 'Rãwi ai'rata 're ĩsõrõwa za'ra mono norĩ zó zama, te za sô aihãrà za'ra. Tawamhã te za tãma ĩrowasu'u za'ra, āne: “Āhãna ĩma rowë di. ĩnhimizama hã wa tó tisã, ĩwi ĩsimani hã. ĩzabãdá te za 're ato za'ra wa'aba mo.” Āne te za tãma ĩrowasu'u za'ra.

⁷ — Tane duré, ni'wa hã siwa'ru 're ĩmorĩ hã tiwasédé hã te te oto rëme pese wamhã, hãiwa āma 're ĩsi'ubumroi mono norĩ hã te za tãma 're to za'ra, misi nherë. Òhõ āma si, te za 're toi uptabi za'ra, 're ĩnomro wë mono norĩ nhipai u hã, 99 na ĩhãiba za'ra nhipai u hã. Ta norĩ hã 're nomro wë mono wa, tiwaséte na 're ĩsiw'õ za'ra mono da hã, mare di. — Āne ma tó tãma rowasu'u za'ra, rowahutu'wa norĩ ma, Zezusi hã.

Rob'uiprazé ĩsapotore simanizé wasu'u

⁸ Tawamhã Zezusi hã te duré tãma ãma romnhimiré'é za'ra, ãne:

— Pi'ô te, rob'uprazé hã ahã wamhã, áté misi te za tiwi 'maihaimani, 10 na hãimana za'ra wamhã, ïsapotore hã. E tawamhã sô 're rĩĩ mono ô di za, tiwi 'masimani wamhã. Te za tô sô 're rĩĩ. Īro'ore hã te za duré sô ro'o, sô rĩĩ da. Te za duré sô 'ri 're wamro. Sô 're rĩĩ pese mono wamhã, te za oto tisã.

⁹ Tawamhã te te sãmri wê te, tisiwadi norĩ zô te za oto tihârã za'ra. Ī'rata ĩsôrôwa za'ra norĩ zô zama, te za tihârã za'ra. Tawamhã, te za oto tãma rowasu'u za'ra, ãne: “Āhãna, ĩma rowê di. Rob'uprazé ĩsapotore hã wa tô tisã, ĩwi ĩsimani hã. Īzabãdã te za 're ato za'ra wa'aba mo duré, a norĩ wa'aba zama.” Āne te za tãma rowasu'u za'ra.

¹⁰ — Tane duré, ni'wa hã siwa'ru 're ĩmorĩ hã, tiwasédé hã te te oto rême pese wamhã, hãiwa ãma 'Re ĩhãimana u'ãsi mono ma romhuri'wa norĩ hã te za ãma 're to za'ra, tiwasédé hã te te rême pese wê te, misi nherê. — Āne ma tô tãma rowasu'u za'ra, Zezusi hã.

Ai'repudu, timama te te ĩrêmezé wasu'u

¹¹ Zezusi hã te duré tãma ãma romnhimiré'é za'ra, ãne:

— Aibã 'ra hã maparane.

¹² Tawamhã te bãtã na ĩno hã timama wi waptê, tinhibrom na ãma tãma siwanhizari zahuré da.

— Taha wa, ma ĩmama hã ãma tãma aipo'o zahuré.

¹³ Āma ronomro ô ré, te uburé tinhibro hã sima ubumro, darob amo u morĩ da, ĩno hã. Darob amoi u wisi wamhã, wasété ahã na te 're mo. Marĩ na si, ma taré tinhibro hã uprosi, ĩmama te te tãma ĩpo hã.

¹⁴ — Tawamhã tinhibro hã ma uburé uprosi pese oto, ai'repudu hã. Tawamhã tame darob ãma 're ĩdasi'ubumroi mono norĩ hã ma tô duré mram na 're dasi'ubumro. Dasai ô di. Taha wa, ma tô ai'repudu hã mra hã dame sêpata.

¹⁵ Taha wa, te aibã u mo, te te tãma 're romhuri mono da, tame. Taha wa, ma tô aibã hã satô tiburu u, buru ãma uhãbã te te tãma 're 'madã'ã mono da.

¹⁶ Mrap te, ma tô sima wê, uhãbã sa na 're sai mono da. Mra, te te 're sêpata mono nherê, ai'repudu ma hã, da te 're ai mono ô di.

¹⁷ Taha wa, ma tô si'ãma rosa'rata, ãne: “Īmama ma, romhuri'wa norĩ hã ahã nherê, ma tô dasa hã 're si'azahãri. Wa hã wa ãme mra hã te 're sêpata za'êtê.

¹⁸ Taha wa, wa za oto mo, ĩmama u apã. Īwisi wamhã, wa za ĩmama ma ĩsiwasu'u, ãne: “Īmama, ĩwasété na wa tô 're mo. 'Re ĩhãimana u'ãsi mono nhimiroti hã, wa tô upa. Asimiroti zama, wa duré upa.

¹⁹ Īwasété wa, áté ĩ'ãma 're ai'ra mono ô di za oto. ĩma romhuri'wa da, oto 're ĩmorĩ da, te za ĩma ĩpisi.” Āne ma tô rosa'rada hã sima 'manha, ai'repudu hã.

²⁰ — Tawamhã aré 're ĩsãmra mono zém hawi te oto mo, timama nhorôwa u. Tawamhã zahadu romhã ré, ma ĩmama hã tisã ti'ra hã. Taha wa, te itême wara, ĩ'ra hã te te sina pê'ê tari wa. Itême wisi wamhã, tinho'utu ma tô ti'ã, ti'ra hã. Tob'rata hãrã na, ma duré sawi.

²¹ Tawamhã te timama ma tinha, ai'repudu hã: “Īmama, ĩwasété na, wa tô 're mo. 'Re ĩhãimana u'ãsi mono nhimiroti hã, wa tô upa. Asimiroti zama, wa duré upa. ĩwasété wa, áté ĩ'ãma 're ai'ra mono ô di za.” Āne te timama ma siwasu'u, ai'repudu hã.

²² — Wasété na 're morĩ nherê, te te wê'ô ô di, ti'ra hã, ĩmama hã. Tãma ĩromhuri'wa norĩ hã te oto 'mahãrã za'ra sa'êtê, zazahã ĩhãiwê we te te siwi 'mai'ãri da, te te siwi ãma uza da. Duré ĩsiptômohi wasisizé, te te tãma sêrê za'ra da, ma tô 'mahãrã za'ra. Duré ĩpara'uza zama te te tãma sêrê za'ra da, ma tô 'mahãrã za'ra.

²³ Taha wa, te duré tãma nharĩ za'ra: “Powawê zapu zama, we ãwisi aba, wĩri aba da, ĩhãipe hã.

²⁴ E marĩ wa. Ī'ra hã dã'ã newa. Tane nherê, dã'ã ô di. Ma tô aré ãma ropsisa'rese'ô. Tane nherê, ma tô we apã wi. Taha wa, wasa hã wa za oto wasiré huri ni, rowê te.” Āne ĩmama te tãma nharĩ za'ra, te te tãma 're ĩromhuri za'ra mono norĩ ma. Taha na ma tô dasa hã dama 'manha.

²⁵ — Tawamhã ĩno hã wisi wamhã, ĩdub'rada hã te buru ãma nhamra. 'Ri tême te oto mo. Te te oto rob'umhutu wa, ma tô rowamreme hã wapa, te te ĩrowamreme za'ra hã. Dapara 'rasi zama, ma tô wapa, rowê te, dasima 're ĩdato za'ra mono zé hã.

²⁶ Taha wa, te romhuri'wa hã 'mahã, ãne: “E marĩ, te 'manharĩ za'ra ni.” Āne te sadanha.

²⁷ — “Āno hã rowê na ma tô wei wi. Taha wa, wei wisi wê te, ma tô wama ti'ru aimama hã, powawê ĩhãipe hã wa te wĩri da, wasaihuri da.” Āne te ĩdub'rata ma rowasu'u, romhuri'wa hã.

²⁸ — Tawamhã ma ĩdub'rada hã tizahi. 'Ri para u sébré da hã, te te sima wê ô di. Tawamhã ĩmama, ma itême watobro, te te tãma nharĩ da, sébré da. Tane nherê, sébré zeĩ ô di.

²⁹ Tane nherê, te timama ma tinha: “Wa hã wa tô te aima 're romhuri pese. Ìãma wahub ahã di, te aima 're romhuri mono ré hã. Niwa, aimreme hã te simini ô di. Tane nherê, marĩ ìma sòmri ô di, pone'ërebã hã, dasa hã te ìsiwadi norĩ ma 'manharĩ da.

³⁰ Àhãna aì'ra hã ma tô wi. Asibro hã tãma ìpo hã ma tô pi'ô na uprosi. Tane nherê, ma tô wisi wi, dama Ì'ru, powawê ìhãipe hã da te tãma wĩri da.” Àne te timama ma tinha, ìdub'rada hã.

³¹ — Tawamhã ìmama te asa tãma tinha: “Ì'ra, a hã ì'rata, te 're asãmra u'ási mo. Marĩ hã ìnhibro hã, uburé ate hã.

³² Uburé wama rowê za'ra wa, wa tô dasa hã dama 'manha, ì'ra hã ìwisizém na. Ano hã dâ'â newa. Tane nherê, dâ'â ô di. Ma tô aré ãma ropsisa'rese'ô. Tane nherê, ma tô we apã wi.” Àne ma tô ti'ra ma waihu'u. — Àne Zezusi ma tô tãma rowasu'u za'ra, rowahutu'wa norĩ ma.

16

Aibã hãimana nhipese wasu'u

¹ Zezusi hã te duré ãne tãma rowasu'u za'ra, tisiré 're ìnomro mono norĩ ma:

— Aibã hã te 're hãimana, ìsibrob ahã hã. Tãma ìromhuri'wa hã te duré 're sãmra, tãma rob'madã'ã'wa hã. Tawamhã ma tô tãma 'mairowasu'u ni, ãne: “Rob'uiprazé hã te te aiwi 're anhimini, aima rob'madã'ã'wa hã.” Àne te tãma 'mairowasu'u ni.

² Taha wa, te sô hã, tãma ìrob'madã'ã'wa zô. Te tãma tinha, ãne: “Aiwasu'u hã wa tô wapa. Ìma 're ìrob'madã'ã'wa mono zé hã, tâibã za oto. Te za rob'ui'éré hã oto ìma ìsô, uburé ìnhimarĩ na 're rob'ui'éré mono zé hã.” Àne te tãma tinha, tãma ìrob'madã'ã'wai ma.

³ — Tawamhã te 'rãwi sima tinha, tãma ìrob'madã'ã'wa hã: “Ìnhib'apito, ma tô ìma tinha, te tãma 're romhuri mono tô da oto. E marĩ, wa za oto te 're 'manharĩ. Ìnhiptete uptabi ô di, buru na te dama 're ìromhuri mono zéb da hã. Duré ìnhiséb di za, rob'uiprazém na te 're da'awari mono wamhã.

⁴ Ìhe, wa tô ìsima waihu'u, marĩ te ì'manharĩ da hã, ìãma 're dasiwadi za'ra mono da. Tawamhã, apito te te ìmei wamhã, áté ìsiwadi norĩ hã te za te te siwi 're ìmrami, tinhorôwa u, ìsiré 're ìsa za'ra mono da.” — Àne te 'rãwi sima tinha.

⁵ — Tawamhã te sô hã, apito ma, marĩ te te ìwa'ãbã za'ra ô norĩ zô. Tawamhã ìtème ìwisi 'rada hã te sadanha: “E niha tãma ìwa'ãbã'ô hã zahadu, rowa'rãmimhã.”

⁶ — “Piza'a, 100 na ìhãiba za'ra hã, azeitona 'rã wa'ui wab ré hã.” — Àne te tãma rowasu'u.

Taha wa, te asa tãma tinha: “Àhãta ìwa'ãbã'ô na, rob'ui'éré hã. Asãmra. 50 na ãma rob'ui'éré, rowa'rãmimhã, tãma wa'ãbã da.” — Àne te aibã ma ti'ru, tãma ìrob'madã'ã'wa hã. Taha wa, te te tãma ì'ru zarina, ma tô ahã prã na ãma rob'ui'éré.

⁷ — Tawamhã aibã hãiba amo hã ma duré ìtème wi. Tawamhã te sadanha: “A hã bété, e niha tãma ìwa'ãbã'ô hã zahadu, rowa'rãmimhã.”

— “Sa'u hã, miu na ìhãiba hã, tridu ré hã te tãma ìwa'ãbã'ô hã.” — Àne te tãma rowasu'u.

— Tawamhã te asa tãma tinha: “Ma'ápé, 800 na ãma rob'ui'éré, rowa'rãmimhã tãma ìsòmri da.” — Àne te tãma ti'ru, rob'madã'ã'wa hã. Taha wa, te te tãma ì'ru zarina, ma ahã prã na ãma rob'ui'éré.

⁸ — Te te dama ì'ru wasu'u, te te wapari wamhã, te tinha, ìsib'apito hã: “Pra. E niha rosa'rada tãma ìwaihu'u pe.” Àne te ìsa'u tãma tinha. — Àne Zezusi te tãma rowasu'u za'ra, tisiré 're ìnomro mono norĩ ma.

Ma tô duré tãma waihu'u za'ra:

— Marĩ zô si, da te 're ìrosa'rata za'ra mono norĩ ma, waihu'u pese di, rosa'rada hã, rowa'a nhib'a'uwê norĩ nhipai u.

⁹ Taha wa, ti'ab ré te za asimarĩ na 're ìdazawi za'ra wa'aba mo, ãma 're asiwadi za'ra wa'aba mono da. Asimarĩ hã asipara 're rême za'ra wa'aba mono wapsi, hãiwa u, asôrôwa u 're asisisi aba mono wi, te za asô 're tob'uzu za'ra wa'wa, asawi'wa norĩ wa'wa hã. — Àne Zezusi te tãma roti za'ra, tisiré 're ìnomro mono norĩ ma.

¹⁰ Te duré tãma nharĩ za'ra:

— Áté ni'wam norĩ hã te za danhibrob 'rare hã, dazô te te 're 'madã'ã wê za'ra. Tawamhã dama umnhasi wa, te za da te tãma 're pisutu za'ra, danhibrob ahã na, te te dazô 're 'madã'ã za'ra mono da oto. Tane, danhibrob 'rare, dazô te te 're 'madã'ã waseté za'ra mono wamhã, te za da te 're waihu'u za'ra, ìsa'ëtê na zama, za dawi 're ìsipsaihuri za'ra mono na.

¹¹ Ti'ai ãma danhimarĩ hã, dazô 're 'madã'ã waseté za'ra wa'aba mono wamhã, e 'wa hã te za marĩ ìwê uptabi hã te te aima 're pisutu za'ra wa'wa, sô 're 'madã'ã za'ra wa'aba mono da. Mare di. Ni'wa, te te aima 're pisutu za'ra wa'aba mono ô di za.

¹² Marī hā date hā, dazō 're 'madā'ā wasété za'ra wa'aba mono wamhā, e niha te za marī ĩwē hā da te aima 're sōmri za'ra wa'wa, ate da. Mare di. Ni'wa te te aima 're sōmri za'ra wa'aba mono ō di za. — Āne Zezusi ma tō tāma waihu'u za'ra.

¹³ Te duré tāma nharī za'ra:

— Dama romhuri'wa hā ĩsib'apito maparane wamhā, aiwa te te tāma 're romhuri wē zahuré mono ō di za. Duré sahuré te te 're sawi pese zahuré mono ō di za. Misi te za te te 're sawi pese. Īhāiba amo si te za te te siwi 're wē'ō. Duré sahuré te te 're wapari pese zahuré mono ō di za, romhuri'wa hā. Misi te za te te 're wapari pese. Īhāiba amo si te za te te 're 'ruiwapari. Tane, a norī wa'wa hā rob'uiprazéb zō si asima 're romhuri za'ra wa'aba mono wamhā, e aiwa asimirohuri za'ra wa'wa hā za, 'Re ĩhāimana u'āsi mono ma, romhuri me. Mare di. Aiwab ō di. — Āne ma tō Zezusi hā tāma waihu'u za'ra, tisiré 're ĩnomro mono norī ma.

Zezusihi nhimirowasu'u hāiba amo

Mateusi 11.12-13; 5.31-32; Marcusi 10.11-12

¹⁴ Tawamhā parisezu norī hā ma tō Zezusihi mreime hā wapari za'ra. Tawamhā rob'uiprazé ze'i 'wa, 're nomro mono wa, ma tō Zezusihi ma nharī za'ra.

¹⁵ Taha wa, te Zezusi hā tāma nharī za'ra, āne:

— A norī wa'wa hā aiwē newa, te ai'āma 're dawata za'ra wa'wa. Tazahā asimirosa'rata 'wa hā, 'Re ĩhāimana u'āsi mono ma, waihu'u pese di. Āté, marī na te za dasima āma 're dawata za'ra, ĩwē newa. Tazahā tāma wē ō wamhā, te za te te 're awē'ō, 'Re ĩhāimana u'āsi mono hā.

¹⁶ — Uburé marī hā Mozési te te dama 're ĩ'apisutu mono hā, da te 're 'madā'ā za'ra mono da, duré 'Re ĩhāimana u'āsi mono zadawa wasu'u 'rata 'wa norī nhimiroti hā ma tō dasipara bā si, da te 're pese za'ra, Zuwā Batita datēme morī ō ré. Tawamhā ĩwasu'uwē hā te oto da te 're wapari za'ra, 'Re ĩhāimana u'āsi mono hā, da'āma 're ĩsib'a'uwē mono zé wasu'u hā. Taha wa, marī zō dasima ĩwézéb uwaibaba, da te 're ĩrob'ruiwapari za'ra mono ne, te za oto da te dasima 're rob'ruiwapari za'ra, ĩtēme 're dasihutu mono da.

¹⁷ — Pire u'āsi, te za dama 're hāimana za'ra, uburé marī hā, 'Re ĩhāimana u'āsi mono te te dama 're ĩ'apisutu mono hā, da te 're 'madā'ā za'ra mono da, ĩsimiroti na rob'ui'éré' rada hā. Hāiwa hā si'utōrī nheré, duré ti'a hā si'utōrī nheré, te za pire u'āsi dama 're hāimana u'āsi. — Āne ma tō tāma waihu'u za'ra.

¹⁸ — Ni'wa hā aibā hā timro te te rēme wamhā, duré pi'ō aimawi na mro wamhā, te za tiwasédé hā 'manha, aibā hā. Duré, pi'ō, da te ĩme na aibā mro wamhā, te za duré 'manharī wasété. — Āne, Zezusi ma tō tāma waihu'u za'ra, parisezu norī ma.

Īsibro pese wasu'u, Īsibro'ō me

¹⁹ Tawamhā Zezusi hā te duré tāma rowasu'u za'ra, parisezu norī ma, āne:

— Aibā hā te 're mo, ĩsibro pe hā. Zazahā ĩwa'ābā za'ētē na si, te 're si'uzā. Duré dasa ĩwē uptabi na si, te 're sa.

²⁰ Tawamhā aibā ĩhāiba amo hā te 're sāmra, ĩsibro'ō hā, ĩ'wa're ré hā, Razaru na ĩsisi hā. Īsiwadi norī hā te te siwi 're mrami, ĩsibro pese nhorōwa u, te te siwi 're simizusi mono da, 'ridawa u.

²¹ Dasai rere'e na si, te 're sa. Wapsā si ma tō ĩ'wa're hā te te 're upsōmri siwi.

²² Tawamhā ma tō oto dārā, ĩsibro'ō hā. Dā'ā wamhā, hāiwa u ma tō siwi ti'ā, 'Re ĩhāimana u'āsi mono ma, romhuri'wa norī hā. Abra'āhā 'rata, te oto 're sāmra, dame 're sai mono da. Īsibro pe hā ma tō duré dārā. Dā'ā wamhā, ma tō dasiwi séré ni, ab're 're.

²³ Tawamhā ropipa hā te te oto 're sēpata za'ētē, adā 're ĩsi'ubumroi mono zéb āma hā. Ta hawi ma tō rob'madā, ĩsibro pe hā. Te te rob'madā'ā wamhā, ma tō Abra'ā hā tisā, romhā na. ĩ'rata te Razaru hā nhamra, ĩsibro'ō hā.

²⁴ Te te 'madā'ā wamhā, ma tō tāma si'mahā, āne: “Wahi'rada Abra'ā, ĩ'āma aipé'ézé na. Ma'āpé, Razaru hā we ĩtēme satōrī, ā we te te ĩma āri da, te te āma ĩnhoto di'ī da, tihiptōmo na, ĩnhoto wahā da. Āme ropipa, wa oto te 're sēpata za'ētē, unhamā āma.” Āne te Abra'āhā ma siwasu'u.

²⁵ — Taha wa, ma tō Abra'ā hā asa tāma tinha, ĩsibro pese ma: “Īnhihudu, aihāiba ré ré, aima 're rowé mono di. Uburé marī ĩwē hā ma tō asō 're simi'wara. Razaru hā, marī hā ĩwasétére si, ma tō da te tāma 're sōmri za'ra. Āhāna hā rowé na te oto 're hāimana. A hā te oto ropipa, 're ĩsēpata mo.

²⁶ Duré, ab're 'rehā hā ĩsa'ēne hā te 're sa'wari, wawa'wa. Taha wa, wa te āma 're saprī waihu'u za'ra mono ō di, atēme wa'aba hā. Duré a norī wa'wa hā we 're saprī waihu'u za'ra wa'aba mono ō di, watēme hā.” Āne te tāma tinha, Abra'ā hā.

²⁷ — Tawamhã İsbro pe hã te asa tãma tinha: “Wahi'rada Abra'ã, tane wamhã, ma'ãpé Razaru hã satõrî, İmama nhorõwa u.

²⁸ Tame te İsisãnawã norî hã 're si'ubumro, 5 na İhãiba za'ra hã. Ropipa, wa oto te 're sêpata. Taha wa, te za İsatõ, İtême morî za'ra da, te te tãma rowasu'u za'ra da, İzarina we 're sisisi tõ mono da, ropipa u.” Åne te Abra'ãhã ma tinha.

²⁹ — Taha wa, ma tõ duré Abra'ã hã asa tãma tinha: “Re İhãimana u'ãsi mono nhimiroti na Mozési te te ãma İrob'ui'éré hã te nomro, ano norî 'ratamhã. 'Re İhãimana u'ãsi mono zadawa wasu'u 'rata 'wa norî nhimi'ui'éré zama, te İrata tinomro za'ra. Ta hã te za te te 're wapari za'ra za, ti'ai ãma ré.” Åne ma tõ İsbro pese ma rowasu'u, Abra'ã hã.

³⁰ — İsbro pe hã te duré asa tãma tinha: “Tane nherê, te te saze za'ra õ di, İsimiroti na hã. Ni'wa hã dá'ã nherê, hãiwa'utu wamhã, İtême morî za'ra wamhã, te za İsimirowasu'u na saze za'ra, İsisãnawã norî hã. Åne wapsi, te za tiwasédé hã rême pese za'ra, rowê na oto 're nomro mono da.” Åne te Abra'ãhã ma tinha.

³¹ — Tawamhã Abra'ã hã te duré asa tãma tinha: “Ano norî hã Mozési nhimiroti hã te te saze za'ra õ di. Duré 'Re İhãimana u'ãsi mono zadawa wasu'u'wa norî nhimiroti zama, te te saze za'ra õ di. Åne wamhã, ni'wa hã dá'ã nherê, apã hãiwa'utu wamhã, e te aré ãma saze za'ra. Te te ãma saze za'ra õ di aré, İsimirowasu'u na hã.” Åne Abra'ã hã ma tõ tãma waihu'u, İsbro pese ma.

17

¹ Tawamhã Zezusi te tãma nharî za'ra, tisiré 're İnomro mono norî ma:

— Åté ni'wa simiroti zarina, te za ni'wam norî hã 're hãimana wasété za'ra. Tawamhã roti wasété'wai ma, 're ropipa za'ra mono di za.

² Åhãta, ai'uté norî hã. Åté, ni'wa simiroti zarina, te za ai'uté hã 're 'mai'ãimana wasété. Tawamhã tãma İroti wasété'wai ma, 're ropipa mono di za. İbutu na êtê tõmo wawê hã da te ãma wasisi pari, dá'ã da, ãi ba da te meî wamhã, tãma ropipa di, tãma İroti wasété 'wai ma hã. Tane nherê, İsimiroti wasété zarina, ai'uté te te İrême wamhã, taha nhipai u hã tãma ropipa uptabi di za, roti wasété'wai ma hã.

³ Taha wa, te za 'rãwi asina 're asõpré wa'aba mo, 're anomro wê wa'aba mono zéb zõ. Åté asisãnawã hã te za asada 're wasété za'ra wa'wa. Åne wamhã, aimreme wê na, te za tãma 're İroti za'ra wa'aba mo, asada 're wasété za'ra wa'aba mono tõ da. Tiwasété na aima 're siwê'õ za'ra wa'aba mono wamhã, te za tãma 're İnharî za'ra wa'aba mo, ãne: “Te İsina 'madá'ã õ di, İzada aiwasétézé hã.” Åne te za tãma 're İnharî za'ra wa'aba mo.

⁴ Åté, ã båtã na te za båtã bã asada 're wasété za'ra wa'wa, asisãnawã norî hã. Åté 7 na asada İwasétézé hã za. Tane nherê, tiwasété na aima siwê'õ wa'aba da, apã atême nasi simasisi aba wamhã, te za nasi tãma İnharî 'wa: “Te İsina 'madá'ã õ di, İzada aiwasétézé hã.” — Åne ma tõ Zezusi hã tãma waihu'u za'ra, tisiré 're İnomro mono norî ma.

Wanhib'apito, wa te wasina 're İ'umnhasi za'ra mono zé wasu'u

⁵ Tawamhã İsadawa wasu'u'wa norî hã ma tõ tiwi rowaptêrê za'ra, ãne:

— Wanhib'apito, wama 're aza'été u'ãsi mono, wa te wasina 're İ'ai'umnhasi za'ra mono zé hã. — Åne te tiwi rowaptêrê za'ra.

⁶ Taha wa, te Zezusi hã asa tãma ãma romnhimiré za'ra, ãne:

— Motada nhamare hã syryre nherê, da te 're wamhã, oto poto wamhã, wede za'êtê uptabi di. Tane, a norî wa'wa hã asina 're İ'umnhasi za'ra wa'aba mono zé hã, syryre na nherê, aima 're hãimana za'ra wa'aba mono wamhã, te aré pidera wede ma İnharî za'ra wa'wa, ãne: “Ma'ãpé asi'uihã na asisa'o'o, ã 're, asi're da.” Tawamhã te aré asadawa zamarî za'ra wa'wa, pidera wede hã. — Åne, Zezusi ma tõ tãma waihu'u za'ra, tisiré 're İnomro mono norî ma.

⁷ Ma duré tãma waihu'u za'ra, ãne:

— Åté aima romhuri'wa hã te 're 'manhamra, åté buru na te te aima 're İromhuri mono hã, åté pone'ërebã 'madá'ã'wa. Tawamhã båtã na te za atême wi, romhuri hawimhã. 'Ri para u sébré wamhã, e te za ãne tãma İnha: “We oto asãmra, asa da.” E ãne, te za tãma İnha.

⁸⁻⁹ Mare di. Åne te za tãma İnha: “A'ã İma asipi na. Asipi parip si, zazahãi wa'õtõ na asi'usisi, İsa hã we İma İré ãri da, ã zama. İsai parip si, te za asa. Te za duré İhã'rê.” Åne te za tãma İnha. Tawamhã te za aima ãma uwaimra, tãma İ'ru zarina. Asiminimi'ru hã te te ãma aima uwaimrami wa, e te za sô amnhasi, ãma aiwata zõ. Mare di. Sô simnhasi õ di za.

¹⁰ Tane a norî wa'wa hã, asib'apito nhimiwada'uri 'wa, İma ãma 're uwaimrami za'ra wa'aba mono wamhã, te za 're İnharî za'ra wa'aba mo, ãne: “Sõ 're wanhimnhasi za'ra mono õ di za, wa'ãma 're aiwata za'ra mono zõ hã. Taré aima romhuri'wai wa, wa tõ wa te ãma

aima 're uwaimrami za'ra, asimiwada'uri hã." Æne te za 're ïnharĩ za'ra wa'aba mo. — Æne, Zezusi ma tã tãma waihu'u za'ra, tisiré 're ïnomro mono norĩ ma.

Zezusi hã ï'wa're ré norĩ hã te te ïpese za'ra zé wasu'u

¹¹ Tawamhã Zezusi norĩ hã te oto ai'aba'ré, Zeruzarê u. Darireza hã Samariza me 're ïsiwaptob zahuré mono wa'wai baba, te ai'aba'ré, bâdâdi na.

¹² 'Ri wa'õtõ u sihutu õ ré, ma tã aibã norĩ me si'uzusi za'ra. Aibã norĩ hã ï'wa're ré hã, 10 na ïhãiba za'ra hã. Romhã prã na ma tã tãma 'mazahãri za'ra.

¹³ Tame ma tã sina 'mahãrã za'ra, ãne:

— Zezusi, rowahutu'wa, wa'ãma aipê'ézé za'ra na, wapese za'ra da. — Æne te sina 'mahãrã za'ra.

¹⁴ Taha wa, te Zezusi hã tãma nharĩ za'ra, ãne:

— Ówa te za ai'aba'réri wa'wa, sasedoti norĩ u, 'Re ïhãimana u'ãsi mono ma, da'ãma romhuri'wa norĩ u, te te aiwaihu'u za'ra wa'aba da, aséptã'ã za'ra wa'aba zém na hã. — Æne te tãma nharĩ za'ra. Taha wa, te ai'aba'ré, ï'wa're ré norĩ hã. Bãdãdi na si'aba'réri ré, ma tã tizéptã'ã za'ra.

¹⁵ Tawamhã ma tã misi apã mo Zezusihi u, tihãiba hã te te 'madã'ã wa. Ta hã samaritanu. 'Re ïhãimana u'ãsi mono ãma wata sina, te apã mo, mreme 'rãihã sina.

¹⁶ Zezusihi u wisi wamhã, ïsahãpã ma aime, hi'rãtitõ. Te te ïpesezém na te ãma tiwata, aibã hã.

¹⁷ Taha wa, te Zezusi hã tinha, ãne:

— Aibã hã 10 na ïhãiba za'ra hã, wa tã pese za'ra. E mahãta aibã norĩ hã, 9 na ïhãiba za'ra hã.

¹⁸ Wasiré zudezu'õ nherê, e niha te we ãhã si mo apã siwaprosi. 'Re ïhãimana u'ãsi mono ãma wata da, ïsimipese waihu'u pese na.

¹⁹ Tawamhã Zezusi hã te aibã ma tinha, ãne:

— Hãiwi asa na, asõrõwa u aimorĩ da oto. A hã ma tã ïzaze, te aipesezém na. Taha wa, ma tã aséptã, ïzazei wa. — Æne ma tã aibã ma waihu'u, Zezusi hã.

'Re ïhãimana u'ãsi mono, da'ãma 're ïsib'a'uwê mono zé wasu'u
Mateusi 24.23-28, 36-44

²⁰ Tawamhã parisezu norĩ hã ma tã Zezusi hã siwi sadanha, ãne:

— E niwa te za bâdã hã ïwa waptãrã, 'Re ïhãimana u'ãsi mono, da'ãma 're ïsib'a'uwê mono zéb da hã. — Æne te siwi 'mazadanha. Taha wa, Zezusi te asa tãma nharĩ za'ra, ãne:

— 'Re ïhãimana u'ãsi mono, da'ãma 're sib'a'uwê mono wapsi, marĩ hã datõmo na a'ã, da te 're 'madã'ã za'ra mono õ di za.

²¹ Taha wa, ãne da te 're romnhoré za'ra mono õ di za: "Ãhãta, da'ãma 're ïsib'a'uwê mono zé hã. Õhõta, da'ãma 're ïsib'a'uwê mono zé hã." Æne, da te 're romnhoré za'ra mono õ di za. E marĩ wa. Dapê'ê 're, 're hãimana mono wa, da'ãma 're ïsib'a'uwê mono zé hã. — Æne, Zezusi ma tã tãma rowasu'u za'ra, parisezu norĩ ma.

²² Tawamhã te tãma nharĩ za'ra, tisiré 're ïnomro mono norĩ ma, ãne:

— Niwapsi te za asima ïwê za'ra wa'wa, bâdã ïwa waptã'ã da, ti'ai ãma dasiré ïpodo hã te te dama 're ïroti mono zé hã. Áté ãne te za asima ïnharĩ za'ra wa'wa: "Misi bãtã na nherê, Wanhib'apito na, wa te wasina waihu'u za'ra neza." Æne te za asima ïnharĩ za'ra wa'wa. Tawamhã a'ã asina waihu'u za'ra wa'aba õ di za.

²³ Ìzadawa para õ nherê, te za ni'wam norĩ hã te te aima 're romnhoré za'ra wa'wa, taré: "Ãhãta ti'ai ãma dasiré ïpodo hã te nhamra. Õhõta, te nhamra." Æne te za te te aima 're romnhoré za'ra wa'wa, taré. Æne wamhã, danhimirowasu'u zarina, ïzõ 're rob'madã'ã za'ra wa'aba mono õ di za.

²⁴ Tã si'ubuzi, te te 're rowa'ã mono wamhã, dama rob'madã'ã pibu pese di, hãiwa mono bã hã. Tane, ti'ai ãma dasiré ïpodo hã apã wei ïmorĩ wamhã, aihĩni te za ï'madã'ã za'ra ni.

²⁵ Tazahã, wa za a'ã robzépata za'ëtê, ã nimosi dapoto tém norĩ hã te te siwi ïwê'õ za'ra wa.

²⁶ Tawamhã ïzõ 're ïdanhimipari za'ra mono õ zém na, wa za wei mo apã. Apã we ïmorizéb u hã Nowé 're hãimana mono ré, 're ïdahãimana za'ra mono ne, te za 're dahãimana za'ra za.

²⁷ Ta norĩ hã daré âpusi mono õ ré hã, ma tã simiza'rese ãna tisa te te 're huri, rowê na 're nomro u'ãsi mono da newa. Simiza'rese ãna te duré te te 're âhuri. Rowê na te duré sina 're mro za'ra. Æne, 're ïdahãimana za'ra mono zé hã, Nowé hã 'ri ne 'manharĩ 're, sébré õ ré. Sébré parip si, ma tã oto tã hã we tita'a. Ti'ai hawib zama, ma â pu'u. Taha wa, ma uburé ã na dasi'utõrĩ.

²⁸ Duré, Ro hã 're hãimana mono ré, 're ïdahãimana za'ra mono zém ne, te za 're dahãimana za'ra, apã we ïmorizéb u hã. Ta norĩ hã ma tã 're saihuri. Ma tã duré te te 're âhuri. Marĩ hã

ma tō da te dasiwi 're uipra za'ra duré. Ma tō da te dasima 're rowede za'ra. Daburu āma, ma tō da te 're robzuri. Ma tō duré da te dasima 're 'ri za'ra. Āne, 're idahāimana za'ra mono zé hā.

²⁹ Tawamhā bātā na, Sodoma hawi Roho watobrozém na hā ma tō dasi'utōrī. Tā we ita'a ne, ma we uzā hā asa'wa ti'ai u, étē ro'o nhizédé uzé pire zama. Taha wa, ma uburé dasi'utōrī.

³⁰ Tane, ti'ai āma dasiré ĩpodo hā apā we ĩmorizéb u hā te za 're dahāimana za'ra. Īzō 're danhimipari za'ra mono ō di za.

³¹ Apā we ĩmorī ō ré, áté te za ni'wam norī hā ai'ubumro, 'ri nhisi hāpā na. Tawamhā, apā we ĩmorī wamhā, tinhibrobo zō te te si'ra za'ra ō di za. Mare di. Awa'awi te za tinhorōwa hawi ai'aba're, tinhibrobo zō sisisi āna. Duré tiburu hawi, apā 'ri tēme si'aba'rei ō di za. Mare di. Ōne haré te za duré ta norī hā étē 'rāihā u dame sisa're.

³² Ma'āpé Roho mro wasu'u na 're rosa'rata u'āsi za'ra wa'aba mono, ĩsine 're anomro aba mono tō da.

³³ Ni'wam norī hā si'uihā na tihāimanazép si te te sima 're sawi za'ra mono wamhā, rowē ĩsi'utōrī'ō hā te te sina 're uwaimrami za'ra mono ō di za. Ni'wam norī hā ĩzarina 're nomro mono da, 're sihāiba zawi za'ra mono ō wapsi, te za te te sina 're uwaimrami za'ra, rowē hā.

³⁴ Taha barana te za ni'wam norī hā siré tinhotō zahuré, áté. Siré sōtō zahuré ré, ĩhāiba amo hā te za 'Re ĩhāimana u'āsi mono hā ti'ā, hāiwa u. ĩhāiba amo si te za tiré.

³⁵ Áté, pi'ō norī hā te za siré ti'ru'u zahuré. Siré 'ru'u zahuré ré, te za ti'ā, ĩhāiba amo hā. ĩhāiba amo si te za tiré, 'Re ĩhāimana u'āsi mono hā. Tō sena, wa aima waihu'u za'ra wa'wa.

³⁶ Áté, aibā norī hā te za siré romhuri zahuré, buru āma. Tawamhā ĩhāiba amo hā te za ti'ā hāiwa u, 'Re ĩhāimana u'āsi mono hā. ĩhāiba amo si te za duré tiré. — Āne, ma tō Zezusi hā tāma waihu'u za'ra, tisiré 're ĩnomro mono norī ma.

³⁷ Tawamhā te sadanharī za'ra, āne:

— E mame te za āne tiromhāiba. — Āne te āma sadanharī za'ra.

Taha wa, te Zezusi hā asa tāma āma romnhimiré'é za'ra, āne:

— Sipahudu hā marī dá'ā u 're si'rā'ōtō mono wamhā, dama pibui pese di, marī hā 're dá'ā za'ra mono wa, 're ĩsimi'wara mono zé hā. — Āne ma tō tāma rowasu'u za'ra.

18

Īmrotō wasu'u, dama rowairébé'wai me

¹ Tawamhā Zezusi hā ma tō tāma āma romnhimiré'é za'ra, tisiré 're ĩnomro mono norī ma, wa'a āna 'Re ĩhāimana u'āsi mono wi, te te 're rowaptērē u'āsi za'ra mono da, te te 're pawaptob u'āsi za'ra mono da. Āne te āma simiré'é:

² — Aibā hā te 're hāimana, 'ri nho'ōmo āma, dama rowairébé'wa hā. 'Re ĩhāimana u'āsi mono nhimiroti 'madā'ā'ō'wa ta hā, duré danhimiroti na zama ĩsimiwazéb ō.

³ Tame ma tō pi'oi mrotō hā 're sāmra. Te itēme 're neb u'āsi, te te tāma 're rowairébé mono da ne. Āne te te tiwi 're rowaptērē: "Ītāma aime na. Ma'āpé ĩzawi'ō'wai ma roti na, te te ĩma 'manharī wasété tō da." Āne te nasi tāma tinha.

⁴⁻⁵ — Tane nherē, duré nherē, te te pawaptob ō di. Tawamhā itēme 're neb u'āsi mono wa, te to 'rāwi sima tinha, dama rowairébé'wa hā: "Wa hā 'Re ĩhāimana u'āsi mono nhimiroti, te 'madā'ā ō nherē, duré danhimiroti na ĩnhimiwazéb ō nherē, te te sina ĩwa'a wa, wa za oto tāma rowairébé, marī te te sima ĩwē na. Te tāma rowairébé ō wamhā, itēme 're neb u'āsi mono wamhā, te za te te 're ĩwasutu u'āsi, timreme na. Āne ō'umnhasite, wa za oto pawapto." Āne te sima tinha, tipé'ē na. — Āne te Zezusi tāma rowasu'u za'ra, tisiré 're ĩnomro mono norī ma.

⁶ Te duré tāma nharī za'ra, Wanhib'apito hā āne:

— Ma'āpé, āma rosa'rata za'ra wa'aba, dama rowairébé'wa, te te sina ĩrotizém na hā.

⁷ Wē prā zahā, te za u, ĩmrotō hā pawapto. E bété tinhib'a'uwē hā te te 're pawaptob za'ra mono ō di za, 'Re ĩhāimana u'āsi mono hā. Áté rowa'a na, áté barana te za sō 're hāsi, te te 're pawaptob za'ra mono da. E bété te te 're pawaptop su'u za'ra mono ō di za.

⁸ Mare di. Te te sima 're ĩwē za'ra mono zarina, te za tō te te 're pawaptob za'ra. Te za te te 're pawaptop su'u za'ra. Te te 're pawaptob za'ra mono nherē, e niha za, ti'ai āma dasiré ĩpodo hā, apā we ĩmorī wapsi. E te za da te 're ĩzaze za'ra. E ti'ai āma te za dama tihāiba, da te dasina 're ĩ'umnhasi za'ra mono zé hā. — Āne te Zezusi hā āma sadanharī za'ra, tisiré 're ĩnomro mono norī hā.

Parisezu norī wasu'u, danhib'apito ma, rob'uiprazéb ubumroi'wai me

⁹Tawamhã Zezusi hã te za duré dama ãma romnhimire'é, ni'wam norĩ udãna. Ta norĩ hã 're hãimana wê za'ra mono newa, ma tã 'rãwi sina 're wata za'ra. Tihãiba amo norĩ hã te duré te te siwi 're wê'õ za'ra, waseté za'ra newa. Taha wa, ma tã tãma ãma simiré'é za'ra, ãne:

¹⁰ — Aibã norĩ hã ma tã tizasi zahuré, 'Re Ihãimana u'ãsi mono ãma 're İdawata za'ra mono zéb u, tãma mreme zahuré da. Aibã norĩ hã, parisezu, duré danhib'apito ma, rob'uiprazéb ubumroi'wa.

¹¹Zasi wamhã, hãwi te oto za, parisezu hã, rob'uiprazéb ubumroi'wa nhiti. ãne ma tã mre: "Re Ihãimana u'ãsi mono, ãhãna, wa za ai'ãma İwata. E marĩ wa. Wa hã İsiré aibã norĩ ne, İwaseté na 're İmorĩ õ di. Danhibrob zõ, te 're rob'ruiwapari mono õ di. Wa hã rob'uiprazém na, dawı 're İnhipsaihuri mono õ di. Duré pi'õ na zama, dawı 're İnhipsaihuri mono õ di. Taha wa, wa za duré ai'ãma İwata, õhõ ne, rob'uiprazéb ubumroi'wa ne, 're İmorĩ õ wa.

¹²Maparane båtã na romhuri sidãpãsi, wa İsai ãna 're İnhemra, te aima 're romhuri mono da, İmreme na. İpawa'ã hã wa duré te aima 're po'o, syry na." ãne ma tã parisezu hã tiwê hã sina tihl, 'Re Ihãimana u'ãsi mono ma.

¹³ — Tanei õ di, rob'uiprazéb ubumroi'wa hã. Hãwi te za, romhã na. Te ti'rã po. 'Rãwi siwê'õ wa, 'rãwi wahutu õ di. ãne te tãma siwasu'u: "Re Ihãimana u'ãsi mono, wa hã İwaseté di. İwaseté wa, İ'ãma aipé'ezé na, İwasédé hã İma pari da." ãne te tãma siwasu'u, tiwaseté na.

¹⁴Taha wa, ma tã Zezusi hã dama tinha, ãne:

— Tã sena, wa aima waihu'u za'ra wa'wa. Rob'uiprazéb ubumroi'wa si, rowê na te apã mo tinhorõwa u, parisezu upana. E marĩ wa. 'Re Ihãimana u'ãsi mono te te wêsãmri wa, tãma İsiwasu'uzém na, duré waseté nheré, marĩ te te 're İ'manharĩ waseté mono na, te te 're 'madã'ã mono õ wab zama. Ni'wam norĩ hã danhipai u wê newa, tiwê na sina 're wata za'ra mono wamhã, 'Re Ihãimana u'ãsi mono, te za tãma pisutu za'ra, wapu na dama 're hãimana za'ra mono da. Duré ni'wam norĩ hã tiwê na sina 're wata za'ra mono õ wamhã, 'Re Ihãimana u'ãsi mono, te za tãma pisutu za'ra, pire na dama 're hãimana za'ra mono da. — ãne Zezusi ma tã dama waihu'u.

Zezusihi u, ai'uté, da te İ'ãwisi za'ra zé wasu'u

Mateusi 19.13-15; Marcusi 10.13-16

¹⁵Taha pari, ma duré ni'wam norĩ hã ai'uté hã ãwisi za'ra, Zezusihi u, ai'uté ãma mreme da, İwê hã te te tãma 're anhomri mono da, ai'uté ma. Tawamhã İsiré 're İnomro mono norĩ hã te te da'madã'ã za'ra wamhã, ma tã tãma nharĩ za'ra.

¹⁶Tawamhã ma tã Zezusi hã ai'uté norĩ zõ hã, İtème si'aba'ré da. Te duré tisiré 're İnomro mono norĩ ma tinha, ãne:

— Tã'ã. Dawı rosawi za'ra wa'aba õ di za. A'ã we İtème da te simroi mono, ai'uté norĩ hã. ã ai'uté norĩ hã õne haré simizazei pese na 're Ihãimana za'ra mono ne, tane ni'wam norĩ hã 're hãimana za'ra mono wapsi, te za 'Re Ihãimana u'ãsi mono hã ãma 're sib'a'uwê za'ra, ta norĩ ãma hã.

¹⁷Tã sena, wa aima waihu'u za'ra wa'wa. Ni'wam norĩ hã ai'uté hã simizazei pese na 're Ihãimana za'ra mono ne, 'Re Ihãimana u'ãsi mono ãma 're si'apito za'ra mono da, te te sina 're saze za'ra mono õ wamhã, ãma 're sib'a'uwê za'ra mono õ di za. — ãne ma tã Zezusi hã tãma waihu'u za'ra.

Aibã İsihrob ahã wasu'u

Mateusi 19.16-30; Marcusi 10.17-31

¹⁸Tawamhã roti'wa hã te Zezusi sadanha, zudezu hã:

— Rowahutu'wa, aiwê di. E marĩ İwê hã wa za 'manha, 're İdanomro u'ãsi mono zé hã te İsina İ'uwaimrami da hã. — ãne te Zezusi sadanha.

¹⁹Taha wa, te Zezusi hã asa tãma tinha:

— E niha te İ'ãma aiwa, İwê na. 'Re Ihãimana u'ãsi mono si, İwê uptabi hã, õhõ si.

²⁰Aima waihu'u pese di, 'Re Ihãimana u'ãsi mono nhimiroti hã. ãne, dama İsimiroti hã: "Aimro na asiwi 're asipsaihuri za'ra wa'aba mono õ di za. Duré, 're danhimroi wa'aba mono õ di za. Duré, danhibrom na dawı 're asipsaihuri za'ra wa'aba mono õ di za. Duré, dahãiba na dama 're asadawa nhipese za'ra wa'aba mono õ di za. Duré aimama hã te za 're İwazé pese mo, ana zama." — ãne ma tã Zezusi hã tãma rob'rãzarõtõ, 'Re Ihãimana u'ãsi mono nhimiroti na hã.

²¹Tawamhã aibã hã te duré asa tãma tinha, ãne:

— İprédu wı, wa tã te 're wapari pese, İsimiroti hã. Õne u'ãsi. Te 'madã'ã nhimini õ di. — ãne te Zezusihi ma sihãimanazéb 'rãzarõtõ, roti'wa hã.

²²İshãimanazéb 'rãzarõno hã te te wapari wamhã, te asa tãma tinha, Zezusi hã:

— Tane nherê, misi te zahadu aihâimanazéb zô aiwi rowaptâ. Ma'âpé, uburé asibro hã dama wede mono, iwa'âbâ zô, ïsibrob'ô norĩ ma, sômri mono da. Tawapsi, asibro pese di za, hãiwa âma hã. Asibro hã dama wede mono parip si, te za apâ we ïtême aimo, ïsiré 're aimorĩ da oto. — Æne te roti'wai ma tinha, Zezusi hã.

²³ Æne aibã ma, te te roti wamhã, sibrob ahã uptabi wa, ma tô tiwi tirobzei'ô, tinhibrob zawi te.

²⁴ Tawamhã Zezusi hã tiwi ïrobzei'ô na ma tô waihu'u. Taha wa, te âma simiré'ê, âne:

— ïsibro pese norĩ hã 're ïhâimana u'âsi mono, da'âma 're ïsib'a'uwê mono zéb u 're ïsisis mono da hã, pire di. Tãma pire uptabi za'ra di za.

²⁵ E niha te za awaru ba'ômore hã ïsi'uwazi para'ôtô zapu'u 're âzé. Sébré waihu'u ô di. Tane, ïsibro pese norĩ hã si'uihã na 're sisisi waihu'u mono ô di za, 're ïhâimana u'âsi mono, da'âma 're ïsib'a'uwê mono zéb u hã. — Æne ma tô tãma waihu'u za'ra, Zezusi hã.

²⁶ Taha wa, te ïwaparĩ'wa norĩ hã sadanharĩ za'ra, âne:

— ïsibro pese norĩ ma, waihu'u za'ra ô wamhã, e 'wam norĩ hã te za bété danho'reptuzé hã te te sina 're uwaimrami za'ra, dadá'â âna 're ïdanomro u'âsi mono zé hã. Áté ni'wai ô di. — Æne te siwi sadanha.

²⁷ Tawamhã Zezusi hã ma tô asa tãma nharĩ za'ra:

— Dasi'uihã na danho'reptuzé hã da te dasina 're uwaimrami za'ra mono ô di za. Dama waihu'u ô di. 'Re ïhâimana u'âsi mono si siminho'reptu waihu'u pese di. — Æne ma tô Zezusi hã tãma waihu'u za'ra.

²⁸ Tawamhã Pedru hã te sadanha:

— Wa norĩ hã wa tô wanhorôwa hã wasipara rême za'ra ni, asiré 're wanomro mono da oto. — Æne te Zezusi ma tinha.

²⁹ Taha wa, te asa tãma tinha, Zezusi hã:

— Tane tô. Tô sena wa za aima waihu'u za'ra wa'wa. Áté, ni'wam norĩ hã te za tinhorôwa hã rême za'ra, 'Re ïhâimana u'âsi mono, da'âma 're ïsib'a'uwê mono zé, te te dama 're wasu'u za'ra mono da. Áté timro hã te za a'â te te 're rême za'ra, âté, tisisânawã norĩ hã, âté timama hã, âté tina hã, âté ti'ra norĩ hã.

³⁰ Tawamhã ti'ab ré, te za tô marĩ hã te te tãma 're anhomri za'êtê, iwa'rãmimhã, 'Re ïhâimana u'âsi mono hã. Te za tô duré tãma pisutu za'ra, niwa, rowê hã te te sina 're ï'uwaimrami za'ra mono zéb da hã, hãiwa âma. — Æne ma tô tãma waihu'u za'ra, Zezusi hã.

Zezusi hã tidá'ázém na ïsiwasu'uzé, tihãiwa'utuzém na zama

Mateusi 20.17-19; Marcusi 10.32-34

³¹ Tawamhã Zezusi hã hãiba pisutu ma tô sani za'ra, tisiré 're ïnomro mono norĩ hã, aibã 12 na ïhãiba za'ra hã. Æne te tãma nharĩ za'ra:

— ïwaparĩ pese za'ra wa'aba. Ahãna, wa Zeruzarê u ai'aba'rê ni. Tame te za marĩ hã ïzô watobro. 'Re ïhâimana u'âsi mono zadawa wasu'u'wa norĩ hã, dasiré ïpoto âma, te te ï'âma ïrob'ui'éré za'ra zéb zarina, te za marĩ hã ïzô watobro.

³² Te za, u, dasiwi ï'âri ni, zudezu'ô norĩ ma, da te dasiwi ïhãiba nhomri da. Te za, u, ï'âma tawa'ê za'ra ni, zudezu'ô norĩ hã. Te za, u, ï'âma waseté za'ra. Tizadaipro na te za, u, nasi siwi ï'uptob za'ra.

³³ Te za, u, da te dasiwi 're ïpré'ê. Taha pari, te za, u, dasiwi ïwĩrĩ ni. Tane nherê, bâdá maparane ï'âma si'utôrĩ ô ré, wa za, u, apâ hãiwa'udu. — Æne ma tô sina tãma rob'rãzarôtô za'ra, tisiré 're ïnomro mono norĩ ma.

³⁴ Tazahã, tãma pibu prã za'ra di, te te tãma sina ïrob'rãzarôtô za'ra zé hã. Tãma waihu'u za'ra ô di, te te tãma ïwaihu'u za'ra zé hã.

Ïtob'a te te 're ïda'awari mono hã, Zezusi te te ïto pesezé wasu'u

Mateusi 20.29-34; Marcusi 10.46-52

³⁵ Tawamhã Zezusi norĩ hã ma tô rob'umhutu za'ra oto, Zerico na 'ri nho'ômo nhisi u. Tame te aibã hã ïtob'a hã nhamra, bâdâdi zababa te te 're ïda'awari mono hã.

³⁶ Aibã hã ma tô da'awapa, da'ahã na da te ïro'rahãri za'ra hã. Taha wa, te anha:

— E niha bâ.

³⁷ Taha wa, te asa tãma rowasu'u za'ra ni:

— Zezusi, Nazaré hawĩ we ïmorĩ, ma ro'razã. — Æne te tãma rowasu'u za'ra ni.

³⁸ Tawamhã te ïtob'a hã nasi 'mahã:

— Zezusi, Dawihi nhihudu, ma'âpé ï'âma aipê'êzé na. — Æne te nasi 'mahã.

³⁹ Tawamhã danhowa ïsi'aba'rê, te tãma nharĩ za'ra, ari'iwĩ sãmra da. Tazahã, te te waparĩ za'ra ô di. Taha wa, te nasi 'mahã:

— Dawihi nhihudu, ï'âma aipê'êzé na. — Æne te nasi 'mahã.

⁴⁰Taha wa, ma tō Zezusi hā mazazā. Te dama ti'ru, ĩtob'a hā da te saprōni da, ĩtēme. ĩtēme da te saprōni wamhā, Zezusi te sadanha:

⁴¹— E marī te asima ĩwē, te āma aima ĩ'uwaimrami da hā. — Āne te Zezusi sadanha.

— Apito, ĩto pese da, wa ĩsima aiwē, apā te 're rob'madā'ā mono da. — Āne te asa tāma tinha, ĩtob'a hā.

⁴²Tawamhā te Zezusi hā tāma tinha:

— Rob'madā'ā. Asina ĩ'umhasi wa, ma ato pe. — Āne te Zezusi tāma tinha.

⁴³Tawamhā awa'awi ma tō rob'madā'ā wē, aibā hā. Zezusihi siré te oto mo, 'Re ĩhāimana u'āsi mono āma, wata sina. Uburé, āma ĩ'madā'ā'wa norī zama, te 'Re ĩhāimana u'āsi mono āma tiwata za'ra. Āne Zezusi, ĩtob'a te te ĩto pesezé wasu'u hā.

19

Zateuhu wasu'u

¹Tawamhā Zezusi hā Zerico u, ma tō wi. Wisi wamhā, 'ri nho'ōmo wa'wai baba, ma ro'razā.

²Zerico āma, te aibā hā 're hāimana, ĩsibro pe hā, Zateu na ĩsisi hā. Danhib'apito ma, rob'uprazéb ubumroi'wa norī 'madā'ā'wa, Zateu hā.

³Ta hā ma tō sima wē, Zezusi hā te te sabu da, te te hāiba pibu da. Tane nherē, da'ahā uptabi wamhā, te te 'madā'ā waihu'u ō di Zezusi hā, sapore wa, Zateu hā.

⁴Taha wa, ma tō danho'a wara, wede u, te te sai'uri da, sipapara te te 'madā'ā da, ĩwa'wai baba za wei morī wa, Zezusi hā.

⁵Tawamhā Zezusi hā wede u oto wisi wamhā, hāimo te rob'madā. Taha wa, te 'mahā Zateu hā, āne:

— Zateu, ai'aba're na si'ra na. Ā bātā na hā asōrōwa āma ĩhāimana hā.

⁶Taha wa, ma si'aba're na si'ra. To sina, ma tō tāma tinha, ĩsōrōwa u ĩsiré morī da, ĩ'rata a'ā sāmra da.

⁷Tawamhā ĩsōrōwa u sébré wamhā, te dasima nharī za'ra ni, Zezusihi za'u, āne:

— Zapre, ma bété ĩsōrōwa u āzé, aibā ĩwasété nhorōwa u. — Āne te dasima nharī za'ra ni.

⁸Zateu hā hāiwi te oto za, Wanhib'apito ma, siwasu'u da. Tawamhā āne te tāma tinha:

— Āhāta, ĩnhibro hā wa za āma aipo'o, ĩsibrob'ō norī ma, te sōmri mono da. Duré, dawī ĩnhipsaihuri wamhā, wa za, te ĩsimi'uri nhowa're're, dama āma 'rānhipa, ĩwa'rāmi. Rob'uprazé misi wamhā, wa za maparane si'uiwa na dama āma 'rānhipa. — Āne te Zezusihi ma siwasu'u.

⁹⁻¹⁰Taha wa, te Zezusi hā dama tinha:

— Āhāna hā rowē di oto, ĩsōrōwa āma hā. Ā hā aibā hā ma tō tinho'reptuzé hā sina waihu'u. Abra'āhā nhihudu, te za tō oto 're mo. Taha da, wa tō we datēme mo, te 're da'anho'reptui mono da, dawē na oto 're danamro mono da. Wa hā ti'ai āma dasiré ĩpodo. — Āne ma tō dama siwasu'u, Zezusi hā.

Romhuri'wa norī, 10 na ĩhāiba za'ra wasu'u *Mateusi 25.14-30*

¹¹Tawamhā ma tō wapari za'ra ni, Zezusihi mreme hā. Taha wa, te za duré tāma āma romnhimiré'é za'ra. E marī wa. Zeruzarē u, ĩwisizéb u, ĩwihutere di oto. Āne wamhā, te dasina rosa'rata za'ra ni:

— Āté, bādā te za oto ĩwa waptārā, 'Re ĩhāimana u'āsi mono, da'āma 're ĩsib'a'uwē mono zéb da hā. — Āne te dasina rosa'rata za'ra ni.

¹²Taha wa, te āma simiré'é Zezusi hā, āne:

— Aibā hā dama ĩpire hā darob amoi u ma tō mo, tinhib'apito hā te te sabu da. ĩsib'apito hā te za pisutu, apito na dama 're hāimana mono da, ĩrob āma. Taha da, te za mo, si'apito da. Taha parip si, te za wei mo apā, tirob u.

¹³Taha wa, te morī ō ré, sitēme sō tihārā za'ra, tāma ĩromhuri'wa norī zō, 10 na ĩhāiba za'ra norī zō. Misi si, ma tō te te tāma sōmri, rob'uprazé ĩsapotore hā. Ētē'ubuzi ĩpré 'manharī, ta hā, oru 'manharī. Tawamhā te āne tāma 'ru za'ra: “Marī hā te za 're ĩ'manharī za'ra wa'aba mo, rob'uprazém na āma atob za'ra wa'aba da, apā we ĩmorī ō ré.” Āne te tāma 'ru za'ra. Taha pari, te oto tiwi timorī za'ra.

¹⁴— Dama si'apito da nherē, ĩrob 're, 're ĩdahāimana za'ra mono hā te siwi 'ruiwapa, dama si'apito tō da. Taha wa, te ĩsarina siwi da'mazatō, ĩsib'apito ma, te te āma dazadawa wasu'u za'ra da.

¹⁵— Tane nherē, ma tō aibā hā ĩsib'apito hā pisutu, dama si'apito da. Taha wa, ma tō wi apā, tirob u. Wisi wi, ma tō sitēme sō tihārā za'ra, tāma ĩromhuri'wa norī zō hā, niha āma sitob za'ra wamhā, te te waihu'u da.

¹⁶ Tawamhã ìtême Ìwisi 'rada hã te tãma tinha, ãne: "Apito, rob'uprazé Ìsapotore hã ma tó ìma ìsô, misi. 10 na ìhãiba za'ra hã, wa tó ãma ato." ãne te tãma siwasu'u, ìtême ìwisi 'rada hã.

¹⁷ — Tawamhã Ìsib'apito te asa tãma tinha: "Wê di tó. A hã, romhuri wê 'wa. Marĩ hã 'rare nherê, ma tó ìma 're ì'manharĩ wê u'ãsi mo. Ìma ai'umnhasi di. Taha wa, wa za oto aipisutu, 're da'ab'madã'ã mono da. 'Ri ahã, wa za aima pisutu za'ra, 10 na 'ri ìhãiba za'ra hã tame 're da'ab'madã'ã mono da." — ãne te tãma tinha.

¹⁸ — Tawamhã Ìsãna'remhã, ma we duré ìtême wi. Ta hã te duré tinhib'apito ma tinha: "Apito, rob'uprazé Ìsapotore hã ma tó ìma ìsô. Ìmrotô na ìhãiba za'ra hã, wa tó ãma ato." ãne te tãma wasu'u, tinhib'apito ma.

¹⁹ — Taha wa, te Ìsib'apito hã asa tãma tinha: "Tane tó. 'Ri ahã hã Ìmrotô na, wa za aima pisutu za'ra, tame 're da'ab'madã'ã mono da." ãne te tãma tinha.

²⁰ — Tawamhã Ìsãna'remhã, ma we duré ìtême wi. Tinhib'apito ma, te tinha: "Apito, ãhãta rob'uprazé ate hã, ìma ìsômri hã. Zazahã na, wa tó ubu, te asô 'madã'ã pese da.

²¹ A hã, da'ãma aipê'êzé õ di. Date hã te dawĩ asima 're ì'apisutu mo, ate da. Duré asimirob're õ nherê, te za asima 're ìrob'rãihãri mo, ate da, danho hã. ãne na, wa tó aiwaih'u. Taha wa, aipipa di." ãne te tãma tinha.

²² — Tawamhã Ìsib'apito te asa tãma tinha: "A hã ìma romhuri wasété 'wa, te 're aimo. Aimreme wê õ wa, wa za aimreme hã aima sizusi, aimreme zarina te aiwê'õ da. Ìte na, ma tó u, ìwaih'u, da'ãma ìpê'êzé õ na. Wa hã wa za date hã te Ìsima 're apisutu, u, ìte da. Duré wa za, u, te Ìsima 're a'rãihãri, ìte da, danho hã. ãne ma tó ìma ìnha.

²³ ãne na 're ìhãimana mono wamhã, e marĩ wa bété rob'uprazé hã ìzô sêrê õ di, wedehãpã 're. ãne we apã ìmorĩ wapsi, te aima ìsômri nhipai u, wa arã ìsima waze, ìzô sina hã'ã wa." ãne te romhuri'wai ma tinha.

²⁴ — Taha wa, te ì'rata Ìsimasam norĩ ma ti'ru: "Ma'ápé, tiwi ãri aba rob'uprazé hã, 10 na te te ìhãiba ma, sômri aba da." ãne te ti'ru, Ìsib'apito hã.

²⁵ — Tawamhã asa te tãma nharĩ za'ra: "Oro õhõ te hã, 10 na ìhãiba za." ãne te tãma nharĩ za'ra, tinhib'apito ma.

²⁶ — Asa te duré tãma nharĩ za'ra: "Tó sena wa aima waih'u za'ra wa'wa. Ni'wam norĩ hã marĩ ahã nherê, simi'ê na te te 're romhuri za'ra mono wamhã, te za ãma tãma 're dasito, marĩ na. Tane nherê, ni'wam norĩ hã marĩ na syryre nherê, simi'ê na te te ãma 're romhuri za'ra mono õ wamhã, te za syryre nherê, tiwi sani za'ra ni.

²⁷ Oto ì'rui'wa norĩ hã we ìtême ãwisi za'ra wa'aba. Ma tó siwi ìwê'õ za'ra, tãma ìsi'apito za'ra tó da. Taha wa, te za ìnho'a asiwi Ìsimroi wa'wa." ãne ma tó Ìsib'apito tãma 'ru za'ra. — ãne te dama ãma romnhimiré'ê, Zezusi hã.

Zezusi hã Zeruzarê u ìwisizé wasu'u

Mateusi 21.1-11; Marcusi 11.1-11; Zuwã 12.12-19

²⁸ Tawamhã te te dama rowasu'u pari, te oto danhowa mo, Zeruzarê u, Zezusi hã.

²⁹⁻³⁰ 'Ri wa'õtô u, ma tó rob'umhutu oto, Betazé u hã, duré Betãnha u hã. Oriwera na êtê 'rãihã nhisi 'rata, 'ri wa'õno hã. Tisiré 're ìnomro mono norĩ hã ma tó sisôwa satôri zahuré, maparane. ãne te tãma rob'ru zahuré, Zezusi hã:

— Ówa te za datême ane wa'wa, 'ri wa'õtô u, asô're uwaibaba wa'aba. Aimasisi aba wi, te za awaru po'repore Ìsãmri 'wa, ìprédupté hã, zahadu ni'wa ãma ìmor'õ hã. Butu wazi na te za, da te ãma wasisi haré. Tawamhã te za ìwasihui wa'wa, we saprõni aba da.

³¹ Ni'wa hã ãne te te asadhanarĩ aba wamhã: "E marĩ da, te ìwasihui wa'wa," tawamhã, ãne te za asa tãma ìnharĩ 'wa: "Wanhib'apito hã ãma morĩ da, wa tãma wasihu ni." ãne te za asa tãma ìnharĩ 'wa. — ãne ma tó Zezusi hã tãma waih'u u zahuré.

³² Tawamhã te oto tineb zahuré. Zezusi te te tãma ìwasu'u zahuré zéb uwaibaba, ma tó sãmri zahuré, awaru po'repore hã.

³³ Te te wasihu zahuré wamhã, ìtede'wa norĩ hã te sadanharĩ zahuré:

— E marĩ da, te asapa'abã ìwasihui wa'wa ari'iwĩ. — ãne te tãma nharĩ zahuré.

³⁴ Taha wa, te asa tãma nharĩ zahuré:

— Wanhib'apito, marĩ õ wa, ãma morĩ da, wa tãma wasihu ni. — ãne ma tó tãma waih'u u zahuré.

³⁵ Tawamhã te oto saprõni zahuré, awaru po'repore hã, Zezusi ma. Te te tãma ãwisi zahuré wamhã, ma tó tisi'ubuzém na tãma ba'ubu zahuré. Tawamhã ma tó Zezusi pawaptob zahuré, ãma sarõtô da.

³⁶ ãma morĩ ré, ma tó dasi'ubuzém na bâdãdi hã da te waptã za'ra.

³⁷⁻³⁸ Tawamhã ma tó rob'umhutu, Zeruzarê u hã. Oriwera na te za oto si'ra, Zeruzarê u wisi da. Tamomo, te da'ahã na Zezusi zarina ai'aba're ni, Ìsazei'wa norĩ hã. Ma tó te te ãma

're 'madá'á za'ra aré, Zezusi te te 're 'ída'apawapto mono zém na, tiwaihu'u pese uptabi na. Taha wa, te oto damreme 'râihâ na dasima nharî za'ra ni, âne:

— Uburé Danhib'apito te we oto mo, 'Re îhâimana u'âsi mono zadawa para. Tâma 're rowê za'êtê mono di za. Rowê hâ hâiwa âma 're 'îsa'wari u'âsi mono da si, wa wasima wê za'ra ni. — Âne te dasima nharî za'ra ni.

³⁹Taha wa, parisezu norî hâ dawa'wa 'îsi'aba'rê hâ, te Zezusi ma nharî za'ra:

— Rowahutu'wa, ma'âpé asazei'wa norî hâ sadawa uwati za'ra na, ari'iwi si'aba'rê da. — Âne te tâma nharî za'ra.

⁴⁰Tawamhâ te Zezusi hâ asa tâma nharî za'ra:

— Tô sena wa aima waihu'u za'ra wa'wa. Ari'iwi si'aba'rêi'wa'âhâ, te aré tô êne hâ mreme 'râihâ na, 'Re îhâimana u'âsi mono âma tiwata za'ra. — Âne ma tô tâma waihu'u za'ra, parisezu norî ma.

Zezusi hâ Zeruzarê norî âma 'îsiwa'ôzé wasu'u

⁴¹Tawamhâ Zezusi hâ ma tô rob'umhutu oto, Zeruzarê u hâ. 'Ri ahâ hâ te te 'madá'â wamhâ, te aiwa'ô, 'îwa 're 'îdasi'ubumroi mono norî âma hâ.

⁴²Taha wa, te âne tinha:

— Âhâna dama 're 'îrowê za'ra mono zé hâ dama waihu'u za'ra 'wa'âhâ, aré dama 're rowê za'ra mono di. Tane nherê, dama waihu'u za'ra ô di. Taha wa, da'âma 'îpê'êzé di.

⁴³Niwapsi, te za danhitob'ru norî hâ daré 'ri uirî za'ra. Ti'a za'wari na te za te 're 'ri uirî za'ra, 'îmana wawi, 're dawairêbé tô mono da, nimomo.

⁴⁴Danhitob'ru norî hâ te za 'ri hâ daré te te 're sâmbra za'ra. 'Ri hâ, tâibâ za oto. 'Ri tede'wa zama, te za uprosi za'ra. 'Ri tâibâ wamhâ, êne hâ te za oto re na 're simi'wara, 'rizé hâ. 'Re îhâimana u'âsi mono, te aré danho'reptu za'ra. Tane nherê, danho'reptui'wa, datême 'îwisi na hâ da te waihu'u za'ra ô di. — Âne ma tô romhâ ré da'âma rowa'ô'to sîro, Zezusi hâ.

Zezusi te te dama 'înharîzé, rowede'wa norî ma

Mateusi 21.12-17; Marcusi 11.15-19; Zuwâ 2.13-22

⁴⁵Tawamhâ 'Re îhâimana u'âsi mono âma 're 'îdawata za'ra mono zéb u, ma tô âzé Zezusi hâ, 'ri 'wawi wa'ra 're. Sébré wamhâ, ma tô rowede'wa norî hâ te te sate, rob u wairêbé da.

⁴⁶Âne te tâma nharî za'ra:

— Duréihâ wahi'rada hâ ma tô âne na rob'ui'éré 'îbaihâ na hâ, 'Re îhâimana u'âsi mono mreme na: "Înhorôwa hâ 'îwa 'îma 're 'îdamreme zusi mono zém na, te za da te 're sisi za'ra, 'ri hâ." Âne te tinha. Tane nherê, ma tô a norî wa'wa hâ 'îwa asima 're 'îrob'manharî wasété za'ra wa'aba mo. Taha wa, danhibrom na dawî 're 'îsipsaihuri za'ra mono norî, 're 'îsi'ubumroi mono zém ne, te oto 'ri hâ 're sa, wasété uptabi na. — Âne te Zezusi hâ tâma nharî za'ra.

⁴⁷Tawamhâ bâtâ sidâpâsi, te nasi dama rowasu'u Zezusi hâ, 'ri 'wawi wa'ra 're. Ni'wam norî hâ ma tô Zezusi hâ sima 'ru za'ra, te te siwi wîrî da. Ta norî hâ 'Re îhâimana u'âsi mono ma, da'âma romhuri'wa 'îpire norî hâ, duré 'îsimiroti na rob'ui'éré 'rata na dama rowahutu'wa norî hâ, duré roti'wa norî hâ.

⁴⁸Tane nherê, Zezusi te te siwi wîrî da nherê, te te siwi wîrî ô di. E marî wa. Te te 're 'îwaparî za'ra mono norî hâ ahâ wa, te te siwi wîrî waihu'u ô di.

20

Zezusi hâ pisutu'wa zô, da te 'îsadanharîzé wasu'u

Mateusi 21.23-27; Marcusi 11.27-33

¹Nimahâ bâtâ na te Zezusi hâ nhamra, 'Re îhâimana u'âsi mono âma 're 'îdawata za'ra mono zéb âma. 'Ri 'wawi wa'ra 're, te nhamra, te te dama rowahutu da, duré 'îwasu'uwê na te te da'apo're pu'u da. Tawamhâ aibâ norî hâ ma 'îtême aimasa. Ta norî hâ sasedoti 'îpire norî hâ, duré 'Re îhâimana u'âsi mono nhimiroti 'rata na rob'ui'éré na dama rowahutu'wa norî, duré zudezu norî ma roti'wa norî.

²Îtême simasa wamhâ, te siwi sadanha:

— E 'wa sadawa para, te bété âne hâ dama 're 'îab'manharî mo. E 'wa hâ, aipisutu'wa. Ma'âpé wama asiwasu'u za'ra na, wa te waihu'u za'ra da. — Âne te siwi sadanha.

³Taha wa, te Zezusi hâ asa tâma nharî za'ra:

— Wa hâ wa za duré a'â asadanharî na âma aima wa'râmi za'ra wa'wa.

⁴E 'wa sadawa para, ma tô Zuwâ hâ â dawabzuri hâ te te dama 're ab'manharî. E 'Re îhâimana u'âsi mono zadawa para. E dazadawa parap si. Ma'âpé, Zuwâhâ âma asimirosa'rada hâ, 'îma waihu'u za'ra wa'aba. — Âne te Zezusi hâ tâma nharî za'ra.

⁵Taha wa, te 'râwi sima nharî za'ra, âne:

— E niha, wa za tâma waihu'u za'ra ni, ône wamhâ. 'Re îhâimana u'âsi mono zadawa para, â dawabzuri te te dama 're 'îab'manharî mono na, wa te tâma waihu'u za'ra wamhâ, te za

wazadanharī na sahu za'ra, āne: “E niha bété, Zuwā Batitaha nhimirowasu'u hā saze za'ra wa'aba ō di, dame.” Áté āne, te za wama nharī za'ra.

⁶Ma tō da te 're saze za'ra Zuwā hā, 'Re ihāimana u'āsi mono zadawa wasu'u'wa 're ĩmorī na. Tawamhā dadadawa parap si, ā dawabzuri te te dama 're ĩ'ab'manharī mono na, wa te tāma nharī za'ra wamhā, áté te za étē na dasiwi wa'uprosi ni. — Āne te sima nharī za'ra, 'rāwi.

⁷Tawamhā Zezusihi ma, te oto nharī za'ra:

— Ni'wa sadawa para, ma tō Zuwā hā ā dawabzuri hā te te dama 're ab'manharī. Wa norī hā wa te waihu'u za'ra ō di, ĩpisutu'wa hā. — Āne te tāma nharī za'ra.

⁸Taha wa, te asa tāma nharī za'ra, Zezusi hā:

— A norī wa'wa hā ĩma waihu'u za'ra wa'aba ō nherē, wa hā te duré aima waihu'u za'ra wa'aba ō di za, ni'wa sadawa para, te dama 're ĩ'ab'manharī mono na hā. — Āne te Zezusi hā asa tāma nharī za'ra.

Buru 'madâ'â'wa norī wasu'u

Mateusi 21.33-46; Marcusi 12.1-12

⁹Tawamhā Zezusi hā te duré dama romnhimiré'é, tinhimirowasu'u na, āne:

— Aibā hā te 're hāimana, buru tede'wa hā. Tawamhā tiburu āma ma tō a're, uwa 'ru hā. Taha wa, ma tō ni'wam norī hā sisō'a ré pisutu za'ra, ĩburu hā te te sō 're 'madâ'â' za'ra mono da. Uwa 'ru 'rā hā 're 'rāi prédu za'ra mono wapsi, te za ĩwa'rāmi te te tāma 're po'o za'ra, buru tede'wai ma hā. Taha pari, te oto mo, buru tede'wa hā darob amoi u, tamomo a'ā hāimana da. Tame te a'ā 're hāimana hā.

¹⁰Tawamhā oto 'rāi prédu mono wa, ma tō buru tede'wa hā tāma ĩromhuri'wa hā 'mazatō tiburu u, uwa 'ru 'rā hā buru 'madâ'â'wa norī te te tāma ĩpo'o za'ra zō. Tazahā, buru u wisi wamhā, ma tō romhuri'wa hā siwi azā, buru 'madâ'â'wa norī hā. Taha wa, te ubana siwi satō apā, ĩsib'apito u.

¹¹Ītēme wisi wamhā, ĩwa'rāminhā te duré sō 'mazatō. Tazahā, buru u wisi wamhā, ma duré siwi azā, buru 'madâ'â'wa norī hā. Ma tō tāma rob'manharī wasété za'ra. Taha wa, te duré ubana apā siwi satō, ĩsib'apito u.

¹²Īwa'rāmi ma tō duré sō 'mazatō, buru tede'wa hā. Si'ubdatō oto te te ĩsatōrī za'ra zé hā. Tazahā, buru u wisi wamhā, ma duré siwi azā. Ma siwi u'a. Buru hawi, te duré siwi satō apā.

¹³Taha wa, te 'rāwi sima tinha, buru tede'wa hā, āne: “E marī, wa za 'manha. Áté ĩ'ra hā wa za oto satō, buru 'madâ'â'wa norī u hā, ĩma sawi pese nherē, ĩ'ra hā. ĩburu u te satōrī wamhā, áté te za siwi hāiba wazé.” Āne te 'rāwi sima tinha, buru tede'wa hā. Tawamhā ti'ra si'aibā hā te oto satō, tiburu u.

¹⁴— Tawamhā buru u oto morī wamhā, buru 'madâ'â'wa norī hā ma tō romhā ré sima sāmri za'ra. Taha wa, te sima 'mahārā za'ra, āne: “Ōhōta buru tede'wai 'ra hā te wei mo, timama uirī na buru tede'wa da hā. Oto wa te wasiwi wīrī aba, buru hā wate za'ra da oto.” Āne te sima 'ru za'ra.

¹⁵— Tawamhā buru hawi ma siwi time. Ma tō siwi tīwī. Āne, buru 'madâ'â'wai 'ra wasu'u hā.

— Āne wamhā, e marī te za 'manha, buru tede'wa hā.

¹⁶Te za sō timorī za'ra, uburé te te uprosi da. Tawamhā te za duré aimawi da'maipisutu, tiburu 'madâ'â'wa da hā. — Āne, Zezusi ma tō tāma rowasu'u za'ra.

Tawamhā ĩsimirowasu'u hā da te wapari za'ra wamhā, te nharī za'ra ni, āne:

— Rowasédé hā watobro ō neza. — Āne te nharī za'ra ni.

¹⁷Tawamhā Zezusi te da'ab'madâ'â' pese. Te dama tinha, āne:

— Étē wasu'u na rob'ui'éré hā, āne: Étē tomhâpá wē hā 'ri na'ratazéb da hā, wē uptabi nherē, wasété newa, 'ri'wa norī te te aré siwi ĩwē'ō hā 'ri na'rata uparizéb da, te oto 're sa'wari u'āsi, pire na.” Āne, étē wasu'u na rob'ui'éré, ĩbaihā na hā.

¹⁸Duré, étē tomhâpâ nhisiwī, zé'a 'manharī hā 're rere'e mono wa, 're ĩsiprub za'ra mono ne, te za ĩwē'ō'wa norī hā hā za'ra, 'Re ihāimana u'āsi mono hā. Duré étē tomhâbâ hā zé'a 'manharī nhisiwī, 're rere'e mono wa, te te 're ĩpru pese za'ra mono ne, te za ĩwē'ō'wa norī hā hā za'ra, sa'ētē uptabi na. Ta norī āma hā 're sib'a'uwé za'ra mono ō di za. — Āne te Zezusi hā sina āma simiré'é.

Rob'ui'prazé hā Roma āma danhib'apito uptabi ma, da te tāma 're ĩpo'o za'ra mono zé wasu'u
Mateusi 22.15-22; Marcusi 12.13-17

¹⁹Buru 'madâ'â'wa norī wasu'u te te dama wasu'u wamhā, ma tō sina waihu'u za'ra, dama rowahutu'wa norī hā. Sasedoti norī hā sima ĩpire za'ra norī me, ma tō sina waihu'u

za'ra. Taha 'ru te, te aré sima wē za'ra, te te siwi ārī da, Zezusi hā, awa'awi. Tane nherē, dama pahi za'ra wa, ma tō siwi āma rosazā a'ā.

²⁰ Taha wa, ma tō taré a'ā āma 're sōpré. Āne te aibā norī ma tāma āma roti za'ra:

— Zezusihi u te za ai'aba'rēi wa'wa, marī na asiwi sadanharī za'ra wa'aba da, tō sena, marī asiwi waihu'u za'ra wa'aba dai ō nherē, ĩsimirowasu'u na hā. Tawapsi te za asiwi ĩsadanharī za'ra wa'wa, tinhimirowasu'u na te te āma upa zō, te te āma upai wa, wanhib'apito u, wa te wasiwī saprōni da, marī te te tāma 'manharī wasété da. — Āne te aibā norī ma roti za'ra. Tawamhā ma tō rob'uiprazém na tāma wa'ābā za'ra, Zezusi za te te siwi ĩsadanharī'wa norī ma.

²¹ Ītēme simasa wamhā, te āne siwi sadanha, aibā norī hā:

— Rowahutu'wa, aimreme hā tō sena na, wa tō aiwaihu'u za'ra ni. Asimirowahutu zama wē di. Asimiroti na 're da'ab'mairēme mono ō di. Sena na te dama 're ĩ'aroti mo, 'Re ĩhāimana u'āsi mono nhimirotizéb zarina.

²² Āne wa, a hā ma'āpé, marī hā wama waihu'u za'ra na, marī hā wa te waihu'u za'ra da. E Roma āma danhib'apito uptabi ma, wa za rob'uiprazé hā wa te tāma 're po'o za'ra, ĩsimiwada'urizéb zarina. E 'Re ĩhāimana u'āsi mono ma, wē di. E tāma wē ō di. Āne niha ĩsimiroti hā āma. — Āne te siwi sadanha.

²³ Tazahā ma tō sina waihu'u, Zezusi hā. Tinhimirowasu'u na te te tāma āma upa za'ra da newa, ma tō āne siwi sadanharī za'ra. Taha wa, te tāma nharī za'ra, aibā norī ma:

²⁴ — Rob'uiprazé ĩsapotore hā we ĩma 'maiwē wa'aba, te 'madā'ā da. E 'wai hāibarī, rob'uiprazé ĩsapotore na hā. E 'wa sisi ui'ééré duré, āma hā.

Tawamhā ma asa āma sada'ābā za'ra, āne:

— Roma āma danhib'apito hāibarī ā hā, duré taha nhisi ui'ééré, ā hā. — Āne te asa tāma nharī za'ra.

²⁵ Tawamhā Zezusi hā te duré asa tāma nharī za'ra:

— Roma āma danhib'apito ma, te za ĩsimiwada'uri zarina rob'uiprazé hā tāma 're ĩpo'o za'ra wa'aba mo apā, ĩte wa. Tane duré, 'Re ĩhāimana u'āsi mono ma, te za marī hā ĩsimiwada'uri zarina tāma 're ĩsōmri za'ra wa'aba mo apā, ĩte wa. — Āne ma tō tāma waihu'u za'ra, Zezusi hā.

²⁶ Tinhimirowasu'u na te te tāma āma upa za'ra da newa, ma tō danho'a siwi sadanha, aibā norī hā. Tazahā, tinhimirowasu'u na te te tāma āma upa za'ra ō di, Zezusi hā. ĩsimirowasu'u hā, wē uptabi di. Wē uptabi wa, ma āma titob'uzu za'ra, aibā norī hā. Taha wa, te ari'iwi tihāimana za'ra oto.

Zezusi hā, da te ĩsadanharīzé wasu'u, dahāiwa'utuzém na

Mateusi 22.23-33; Marcusi 12.18-27

²⁷⁻²⁸ Tawamhā ma we aibā norī hā ĩtēme aimasa, Zezusihi u. Aibā norī hā, sadusezu. Ta norī hā 're dadā'ā za'ra mono wamhā, ab're hawi apā 're ĩdahāiwa'utu za'ra mono ō na, te te dama 're ĩroti za'ra mono. Zezusihi u simasa wamhā, ma tō tāma rob'rāzarōtō za'ra, āne:

— Rowahutu'wa, wahi'rada Mozési hā ma tō āne dama roti: "Aibā ĩmro ré hā 'ra ō ré, dá'ā wamhā, tizédé'aba mro na, te za timro ĩsisānawā hā, ai'uté hā te te 'maipoto da, ĩwa ĩsédé'aba 'ra ne, 're morī da." Āne, wahi'rata nhimiroti na rob'ui'ééré hā. — Āne te Zezusihi ma sadawa 'rāzarōtō za'ra, sadusezu norī hā.

²⁹ Te duré tāma rowasu'u za'ra:

— Aibā hā ĩsisānawā si hā te 're hāimana za'ra, 7 na ĩhāiba za'ra hā. Tawamhā ĩpoto'rada hā ma tō timro oto. Tazahā, 'ra ō ré, ma tō dārā, aibā hā.

³⁰ Taha wa, ma tō ĩsōsi hā duré āma timro, tizédé'aba mro na. Tane nherē, ma duré dārā, 'ra ō ré.

³¹ Taha wa, ma tō taha nhosi hā duré āma timro. Tane nherē, ma duré dārā, 'ra ō ré. Āne siparabāsi, ma tō aré sisōwa're'le nasi āma timro za'ra. Tawamhā ma tō oto uburé sisarina ai'utō, 'ra ō ré.

³² Tawamhā pi'ō zama ma tō oto dārā, timro norī zarina.

³³ ĩmro 7 na ĩhāiba za'ra wamhā, e 'wai mro za bété pi'ō hā, ab're hawi apā te te 're da'ahāiwa'utu mono wamhā, 'Re ĩhāimana u'āsi mono hā. — Āne te siwi sadanha, sadusezu norī hā.

³⁴ Taha wa, te Zezusi hā asa tāma rowasu'u za'ra, āne:

— Tī'ab ré si, te za dasina 're damro za'ra.

³⁵ Hāiwa āma hā, dasina 're damro za'ra mono ō di za oto. Niwapsi, te za ab're hawi ahāiwa'utu, 'Re ĩhāimana u'āsi mono hā te te 're ĩ'awēsāmri mono norī hā, hāiwa āma ĩ'rata 're si'ubunroi u'āsi mono da.

³⁶ 'Re ihâimana u'âsi mono ma romhuri'wa norî ne, te za dâ'â âna 're hâimana u'âsi za'ra, dâ'â waihu'u âna. 'Re ihâimana u'âsi mono 'ra, te za 're dahâimana za'ra, ab're hawi za te te da'ahâiwa'utu wa.

³⁷⁻³⁸ Mozési hâ ma tô dama waihu'u, ab're hawi 'Re ihâimana u'âsi mono te te 're îda'ahâiwa'utu mono zém na hâ. Wede zapore îro'o na, te te dama âma rob'ui'éré wamhâ, ma tô 'Re ihâimana u'âsi mono dama wasu'u, tihî'rata norî nhîb'apito na. Abra'âhâ nhîb'apito, te, u, 're hâimana, 'Re ihâimana u'âsi mono hâ. Duré Izatihi nhîb'apito, te, u, 're hâimana. Duré Zacoho nhîb'apito, te, u, 're hâimana. Âne te dama rowasu'u, Mozési hâ. 'Re îdahâimana u'âsi za'ra mono nhîb'apito, te 're mo, 'Re ihâimana u'âsi mono hâ. Dahâiba hâ nhîb'apito, 're morî ô di. Aihîni te îsô'a 're dahâimana za'ra. 'Re îdadâ'â za'ra mono norî zama, te îsô'a 're hâimana za'ra. Âne, Mozési te te dama îrowasu'uzéb zarîna, wa tô waihu'u za'ra ni. — Âne ma tô tâma sadawa 'râzarôtô za'ra, sadusezu norî ma, Zezusi hâ.

³⁹ Tawamhâ te rowahutu'wa norî hâ Zezusihi ma nharî za'ra:

— Asimirowasu'u hâ wê di, rowahutu'wa. — Âne te âma tiwata za'ra.

⁴⁰ Taha wa, ma tô roti wê na sôwada za'ra, sadusezu norî hâ. Taha wa, marî na te te siwi sadanharî waihu'u ô di oto, te te sina mreme wazéb za'ra wa, ta norî hâ.

Danho'reptui'wa na, Zezusi te te îda'azadanharîzé wasu'u

Mateusi 22.41-46; Marcusi 12.35-37

⁴¹ Tawamhâ Zezusi hâ te da'azadanha, âne:

— Danho'reptui'wa da, 'Re ihâimana u'âsi mono te te îpisudu hâ Dawihi nhîhudu te za, u, 're mo. E marî wa, te îsihudu na wasu'u za'ra ni.

⁴²⁻⁴³ Apito Dawi hâ ma tô tinhib'apito na danho'reptui'wa hâ sisi, tinho're na. Âne, Dawihi nho're na rob'ui'éré hâ:

“'Re ihâimana u'âsi mono, ma tô înhîb'apito ma, tinha: 'Î'rata te za 're asâmra mo, înhimire niwî dama aipire na îsiré 're aihâimana u'âsi mono da. Wa hâ wa za te tâma 're nharî za'ra, asitob'ru norî ma, aima 're sib'uwa za'ra mono da.' ”

Âne Dawihi nho're wasu'u na rob'ui'éré, 'Re ihâimana u'âsi mono ma danho're na, Saumusi na îbahî nhisi na hâ.

⁴⁴ Dawi hâ tinhib'apito na te te sisi nherê, e niha te za îsihudu si 're hâimana, Danho'reptui'wa da, 'Re ihâimana u'âsi mono te te îpisudu hâ. — Âne ma tô Zezusi hâ da'azadanha.

Zezusi te te dama îroti mono zé wasu'u, rowahutu'wa norî ne, 're dahâimana za'ra mono tô da

Mateusi 23.1-36; Marcusi 12.38-40

⁴⁵ Tawamhâ uburé, da te wapari za'ra ré, te Zezusi hâ tinha, tisiré 're înomro mono norî ma:

⁴⁶ — Ma'âpé, rowahutu'wa norî hâ waihu'u za'ra wa'aba, îhâimanazém na hâ. Ta norî hâ uza pa ré, 're nomro mono da si, tâma îwê za'ra hâ. Duré 'ri nhî'riti wa, da te dasina 're îubumroi mono zéb âma dama pîre wa, da te 're wazéb za'ra mono da, ma tô te te sima 're wê za'ra. Duré dama îpire norî simasisizém na 're îsi'ubumroi mono da si, tâma îwê za'ra hâ, rowahutuzéb âma duré 'ri para dasiré 're îdasaihuri mono zéb âma hâ.

⁴⁷ Rowahutu'wa zahâ, te za pi'ôi mrotô norî wi, îsibro hâ te te tiwi 're uprosi za'ra. Tane nherê, te ta norî hâ danho'a 'Re ihâimana u'âsi mono ma, 're mreme zusi hâ, 're hâimana wê uptabi za'ra mono newa. Taha wa, te te dama 're î'arob'manharî mono zém nhîpai u, te za 'Re ihâimana u'âsi mono hâ te te tâma 're rob'manharî za'êtê za'ra. — Âne ma tô tâma waihu'u za'ra, tisiré 're înomro mono norî ma.

21

Pi'ôi mrotô nhoprubzé wasu'u

Marcusi 12.41-44

¹ Tawamhâ 'Re ihâimana u'âsi mono âma 're îdawata za'ra mono zéb âma, ma tô da'ab'madâ Zezusi hâ, danhoprubzé, da te 're îséme mono zéb 're, îsibro pese norî hâ te te séme ré, 'Re ihâimana u'âsi mono ma. Âne na ma tô da'ab'madâ, 'ri 'wawi wa'ra 're, Zezusi hâ.

² Pi'ôi mrotô zama ma duré 'madâ, îsibrob'ô hâ. Ta hâ ma tô rob'ui'prazé îsapotore hâ dame tiza, marî te te âma î'ui'pra da hâ aré, syryre nherê.

³⁻⁴ Taha wa, te Zezusi hâ tinha, tisiré 're înomro mono norî ma:

— Tô sena, â hâ pi'ôi mrotô hâ sibrob ô nherê, ma tô tinhoprum na uburé da'a'rânhipa. Îsiré norî hâ rob'ui'prazé hâ nasi tâma îsi'atarême za'ra si, te nasi sé. Tanei ô di, pi'ôi mrotô hâ. Simarî ô nherê, tihâimanazéb da, te te aré îtédé hâ ma tô îbâre tâma tisô. Âne wamhâ, ma tô tinhoprum na uburé da'a'rânhipa. — Âne ma tô Zezusi hâ tâma waihu'u za'ra, tisiré 're înomro mono norî ma.

'Re ihâimana u'âsi mono âma 're idawata za'ra mono zé wasu'u, za isi'utôrîzém na Mateusi 24.1-2; Marcusi 13.1-2

⁵ Tawamhâ ni'wam norî hâ ma tô 'ri 'râihâ âma tiwata za'ra, âne:

— Êne hâ wê uptabi di, 'ri 'manharîzé hâ. Duré waipo wê di, danhibzari hâ. — Âne te 'ri âma tiwata za'ra, 'Re ihâimana u'âsi mono nhorôwa âma.

Taha wa, te Zezusi hâ tinha:

⁶ — Niwapsi te za dasiwi prum ni, êtê na 'ri hâ. Tawamhâ misi si te za oto simi'wara, êne hâ. Sisisiwi 'manomro waihu'u ô di za oto, êne hâ. Tâibâ za oto. — Âne ma tô romhâ ré âma rowa'ôto, Zezusi hâ.

⁷ Tawamhâ te siwi sadanha:

— Rowahutu'wa, e niwa te za âne na hâ âma tiromhâiba. E marî te za watobro, îsôwa, wa te âma îwaihu'u sirômo za'ra zéb da hâ. — Âne te sadanharî za'ra.

⁸ Taha wa, te Zezusi hâ asa tâma nharî za'ra:

— Ni'wam norî hâ te za sadawa nhipese na sisarina datême 're nomro, ahâ na. Wa hâ ne, te za taré înhisi na dama 're siwasu'u za'ra, danho'reptui'wa na. Taré te za duré te te dama 're rowasu'u za'ra, âne: “Bâdâ te za oto îwa waptârâ, 'Re ihâimana u'âsi mono te te îpisudu hâ.” Âne te za taré te te dama 're rowasu'u za'ra. Taha wa, te za aihâimana nhimiza'rese tiwi 're aihâimana za'ra wa'aba mo, sadawa nhipese sina datême 're inomro mono norî âma, 're sasômri za'ra wa'aba mono tô da.

⁹ 'Re dasi'wapé za'ra mono wa, da te dasina 're îropupu'u za'ra mono zé hâ 're wapari za'ra wa'aba mono wamhâ, tâma 're aipahi za'ra wa'aba mono ô di za. Duré ti'ai âma danhib'apito norî hâ, da te 're îsani za'ra mono zé wasu'u hâ 're wapari za'ra wa'aba mono wamhâ, tâma 're aipahi za'ra wa'aba mono ô di za. Dasi'wapé hâ te za a'â 're wairébé. Danhib'apito hâ te za a'â da te 're sani za'ra, tô. Tane nherê, rob'râsutu uptabi ô di za a'â. — Âne ma tô romhâ ré tâma waihu'u sirômo za'ra, Zezusi hâ.

¹⁰ Ma duré tâma waihu'u za'ra, âne:

— Danhipti'ai amoi u te za dasisô 're dapra a'â, 're dasi'wapé za'ra mono da. Tawamhâ daro mono bâ te za tô 're dasiwasutu za'ra.

¹¹ Nima niwîmhâ te za duré ti'a hâ daré 're popo'o za'ra, sa'êtê. Nima niwîmhâ, danho ô wa, te za da te 're robzépata za'ra, dasa syryre wa. Nima niwîmhâ te za duré dahâzé îpire uptabi hâ te te 're daduri. Marî îpîpa hâ te za duré hâiwa nho're na danho'a 're wairébé.

¹² — Âne na romhâimana ô ré, te za da te 're aiwaibu'wa'wa. Rowasédé hâ te za duré da te aima 're 'manharî za'ra wa'wa. Rowahutuzéb u, te za da te 're ai'mézasi za'ra wa'wa, aihâimanazém na da te 're aiwaihu'u za'ra wa'aba mono da. Taha wa, te za taré da te 're aiwê'ô za'ra wa'wa. Taha pari, te za da te 're aséme 'wa, dazazéb 're, 're aïmasa wa'aba mono da. Îzazei'wa 're anomro aba mono 'ru te, te za duré da te 're asimroi wa'wa, danhib'apito norî u. Roti'wa, si'upana te te îpisutu norî u zama, te za da te 're asimroi wa'wa.

¹³ Âne wamhâ, îwasu'uwê na te za 're idapo're pu'u za'ra wa'aba mo.

¹⁴ Duré asisôwa, asina aihâtâ'â te, asiwasu'uzéb zô 're rosa'rata hâ za'ra wa'aba mono ô di za.

¹⁵ Wa hâ wa za te 're aipawaptob za'ra wa'wa, danhib'apito norî ma, 're asiwasu'u za'ra wa'aba mono zéb da hâ. Âne wa, aimreme wê na te za aiwê'ô'wa norî hâ 're îsôwada za'ra wa'aba mo.

¹⁶ Ni'wam norî hâ te za te dama 're ai'ru za'ra wa'wa, dazazéb 're, da te 're aséme aba mono da. Âté aimama norî hâ te za te te dama 're ai'ru za'ra wa'wa, âté asisânawâ norî hâ, âté asiwadi norî hâ. Âté asawi'wa norî zama te za te te dama 're ai'ru za'ra wa'wa. Taha zarina, te za ai'mai'uprosi aba ni.

¹⁷ Îzazei'wa oto 're anomro aba mono wa, te za uburé da te 're ai'ruiwapari za'ra wa'wa.

¹⁸ Tane nherê, aihâimanazé hâ aiwi 're si'utôri uptabi za'ra wa'aba mono ô di za.

¹⁹ Taha wa, te za 're asiptete za'ra wa'aba mo, î'âma 're anomro u'âsi aba mono da. Tawapsi, te za asô'reptuzé hâ asina 're î'uwaimrami za'ra wa'aba mo. — Âne ma tô tâma waihu'u sirômo za'ra, tisiré 're inomro mono norî ma.

Zeruzarê âma, za îropsisa'wari mono na rowasu'u

Mateusi 24.15-28; Marcusi 13.14-23

²⁰ Tawamhâ Zezusi hâ ma duré tâma waihu'u sirômo za'ra, âne:

— Niwapsi te za dasi'wapéi 'manharî'wa norî hâ Zeruzarê u aihutu, 'ri 'wawi wa'ra, te te siwi uirî da. Ta norî hâ 'madâ'â za'ra wa'aba wamhâ, te za îwaihu'u sirômo za'ra wa'wa, za te te daré î'ri nhamra mono na hâ.

²¹ Zudeza âma, dame 're ai'ubumroi wa'aba mono wamhâ, te za êtê 'râihâ u asa'rei wa'aba mo, aiwara sina. 'Ri ahâ âma 're ai'ubumroi wa'aba mono wamhâ, te za aiwairébé su'u 'wa,

'ri ahâ nhiti. Rom na 're ai'ubumroi wa'aba mono wamhâ, 'ri ahâ u 're asisisi aba mono ò di za.

²² 'Re ìhâimana u'âsi mono te te dama 're arob'manharî mono wa, te za rowasété si a'â 're sa'wari. Taha ré, te za marî hâ uburé dazò pusi, romhâ ré, 'Re ìhâimana u'âsi mono zadawa wasu'u'wa norî hâ te te âma ìrob'ui'éré za'ra zéb zarina.

²³ Tawamhâ âne hâ rowasédé hâ daré romhâimana wamhâ, îwasâ ré norî ma hâ tâma ropipa uptabi za'ra di za, ì'ra pré ré norî ma zama. 'Re ìhâimana u'âsi mono hâ te te dama 're ì'arob'manharî pipa mono zé bâtâ na hâ, tâma 're ropipa za'ra mono di za, zudezu norî ma.

²⁴ Sib'ézé 'wapa na hâ da'ahâ na te za tadâ'â za'ra ni. Duré, ni'wam norî hâ daro mono bâ, te za da te simro. Te za da te âma ropé, daro mono bâ. 'Re ìhâimana u'âsi mono zazei'ò'wa norî hâ sahi sina te za a'â te te dama 're roti za'ra, Zeruzarê âma, zudezu'ò norî hâ. Bâdâ hâ îwa tâma îwaptâ'â za'ra zéb u, te za da'madâ'â ì'râsutu za'ra. — Âne ma tô romhâ ré tâma waihu'u za'ra, tisiré 're ìnomro mono norî ma.

*Ti'ai âma dasiré ìpodo hâ apâ za we ìmorîzé wasu'u
Mateusi 24.29-31; Marcusi 13.24-27*

²⁵ Romhâ ré, ma tô duré âne hâ tâma waihu'u sirômo za'ra, Zezusi hâ:

— Niwapsi te za marî aimawi hâ 'madâ'â za'ra ni, bâtâ na hâ, a'amo na zama, wasi norî na zama. Â poré a'a 'reptâ'â ma, te za tapahi za'ra ni, â poré nhibzaihâ ma zama. Daro mono bâ, dama robzei'ò uptabi za'ra di za.

²⁶ Marî hâ hâiwa na 're ìsimasa mono hâ, tizabzéb âma 're simasab u'âsi mono ò di za. Taha wa, te za daro mono bâ dawî tirobra za'ra, rowasédé hâ dazò îwatobrozém na te te rosa'rata pipa za'ra wa.

²⁷ Tawamhâ ti'ai âma dasiré ìpodo hâ hâiwa'a na, wa za wei apâ mo, danho'a. Ìwaihu'u pese uptabi na, wa za wei mo apâ, duré ìhâiba na hâ rowa'a sa'êté uptabi na.

²⁸ Âne wana ré, marî hâ pusi mono wamhâ, te za asiptete na 're aihâimana u'âsi za'ra wa'aba mo. Duré 're ai'râiwahutu za'ra wa'aba mono. E marî wa. Romhutu na te za asò'reptu za'ra wa'aba zé hâ asina ì'uwaimrami za'ra wa'wa. — Âne ma tô romhâ ré tâma waihu'u sirômo za'ra, tisiré 're ìnomro mono norî ma, Zezusi hâ.

Pidera wede wasu'u

Mateusi 24.32-35; Marcusi 13.28-31

²⁹ Zezusi hâ te duré romnhimiré'é, pidera wede na, âne:

— Ma'âpé pidera 'râ na rosa'rata za'ra wa'aba, wede ìpoto mono bâ.

³⁰ Ìsu té hâ 're wairébé mono wamhâ, te za âma 're ìwaihu'u za'ra wa'aba mo, tâ 're ìta'a mono zéb u, 're ìrob'umhutu mono zém na hâ.

³¹ Tane duré, marî hâ 're ìromhâimana mono zéb da, te aima ìwasu'u za'ra wa'aba zéb zarina, 'madâ'â za'ra wa'aba wamhâ, te za âma ìrowaihu'u za'ra wa'wa, romhuture di oto, 'Re ìhâimana u'âsi mono, da'âma 're ìsib'a'uwé mono zéb u hâ.

³² Tô sena, wa âne na aima waihu'u sirômo za'ra wa'wa. Â hâ uburé rowasédé hâ dazò 're wairébé mono ré, ti'ai âma 're ìdasi'ubumroi mono norî hâ ta norî hâ 're dâ'â za'ra mono ò ré, te za ìsò'a za'ra ti'râsutu, rowasédé hâ.

³³ Nimahâ na te za hâiwa norî hâ ai'utôri zahuré, ti'ai me. Si'utôri zahuré nheré, ìnhimiroti hâ si'utôri ò di za. Pire na te za dama 're hâimana u'âsi. — Âne ma tô Zezusi hâ tâma waihu'u za'ra, tisiré 're ìnomro mono norî ma.

³⁴⁻³⁵ Tawamhâ Zezusi hâ tinhimiroti na ma tô tâma 'râsutu za'ra, âne:

— Asimiza'rese sina, te za 're aihâimana za'ra wa'aba mo. Datoi u hâ âsipâri na 're asapa'a za'ra wa'aba mono ò di za. Marî na si 're rosa'rata za'ra wa'aba mono ò di za. E marî wa. Rosa'rese ò ré, bâdâ ìpire, îwa waptâ'â ò'umnhasite. Rosa'rese ò ré, te robzari hâ ìtede'wa hâ te te 're waihu'u, wedenhorô na. Tane, duré rosa'rese ò ré, te za bâdâ ìpire hâ îwa waptârâ, uburé ti'ai âma hâ.

³⁶ Taha wa, te za asimiza'rese sina 're aihâimana u'âsi za'ra wa'aba mo. Te za duré asima 're ìrowaptêrê u'âsi za'ra wa'aba mo. E marî da. Marî hâ 're wairébé mono wamhâ, asiptete na 're aihâimana za'ra wa'aba mono da, apâ we ìmorî wa, ìnho're asisép te, ai'râipo tô za'ra wa'aba da, ti'ai âma dasiré ìpoto nho're. — Âne ma tô Zezusi hâ tâma waihu'u za'ra.

³⁷ Tawamhâ Zezusi hâ bâtâ sidâpâsi, te nasi dama rowasu'u, 'ri 'wawi wa'ra 're, 'Re ìhâimana u'âsi mono âma 're ìdawata za'ra mono zéb âma. Barana hâ te nasi ne, Oriwera na êtê'râihâ nhisi u. Tame ma tô nasi âma ti'awé.

³⁸ Awé wi, te nasi ìtême dasito, 'Re ìhâimana u'âsi mono nhorôwa u, ìmreme hâ da te nasi wapari za'ra da.

22

ZeZusihî âma, da te îrosa'rata za'ra zé, da te dasiwi wîrî da

Mateusi 26.1-5; Marcusi 14.1-2; Zuwâ 11.45-57

¹ Î'u'êtê duptoi'ô, da te 're îhuri mono zéb u hâ, romhuture di oto, Pascowa na dato nhisi u hâ.

² 'Re îhâimana u'âsi mono ma, da'âma romhuri'wa îpire norî hâ, te rowahutu'wa norî me sima âma rosa'rata za'ra, pi'uriwi te te siwi wîrî da, ZeZusi hâ. Dama pahi za'ra wa, te âne sima âma rosa'rata za'ra.

ZeZusi te te dama hâiba nhomri da, Zudasi hâ te te îrosa'ratazé wasu'u

Mateusi 26.14-16; Marcusi 14.10-11

³ Tawamhâ Satanasi hâ ma tô oto Zudasihî pê'ê 're âzé. Icarizoti na, Zudasihî nhisi hâiba amo hâ. ZeZusihî me dame 're îmorî, Zudasi hâ, 12 na îhâiba za'ra siré hâ.

⁴ Tawamhâ te oto mo, sasedoti îpire norî u. Duré, 'Re îhâimana u'âsi mono âma 're îdawata za'ra mono zé 'madâ'â'wa norî u, te mo, îpire norî u, ZeZusihî âma te te sadawa pibu za'ra da, te te dama hâiba nhomri da.

⁵ Îmreme te te wapari za'ra wamhâ, tâma rowê za'ra di. Taha wa, te tâma ropisutu za'ra, rob'uprazé te te tâma sômri za'ra da.

⁶ Taha wa, ma tô Zudasi hâ âma saze za'ra, rob'uprazé te te tâma sômri za'ra da, sasedoti îpire norî hâ. Taha wa, te oto rosa'rata, nimahâ bâta na ZeZusi te te dama hâiba nhomri da, danhimiza'rese ô ré.

⁷ Tawamhâ bâdâ hâ ma tô îwa waptârâ oto, î'u'êtê duptoi'ô, da te 're îhuri mono zé hâ. Zudezu norî hâ te za pone'êrebâ 'ra hâ simro, tisaihurizéb da, Pascowa na dato nhisi na da hâ.

⁸ Taha wa, te ZeZusi hâ Pedru norî ma rob'ru zahuré, Zuwâhâ me, âne:

— Mo oto ane wa'aba, wazô asipi wa'aba da, Pascowa te bâta na îwasaihurizéb da hâ. — Âne te tâma rob'ru zahuré.

⁹ Tawamhâ te Pedru norî hâ sadanharî zahuré, âne:

— E momo ma tô asima îrowê, asô îwanhipi za'ra zéb da hâ. — Âne te sadanharî zahuré.

¹⁰ Taha wa, te ZeZusi asa tâma nharî zahuré:

— Îwapari pese aba. 'Ri ahâ u aimasisi aba wamhâ, aibâ hâ te za îsôpêtê 'wa, piza'a â ré, te te î'âri hâ. Sôpêtê aba wamhâ, pibui wa'aba mono za, 'ri para u îsêbrézéb u.

¹¹ Tame te za 'ri tede'wa hâ îsadanharî 'wa, âne: "Rowahutu'wa hâ te wama tinha, wa te asadanharî da: E ma niwî 'ri 're wa'wa hâ, îsiré 're înomro mono norî me, îwa îwasaihurizéb da hâ, Pascowa na dato nhisi na hâ."

¹² Tawamhâ 'ri tede'wa, te za hâimo 'ri 're wa'wa za'êne hâ aima pisutu 'wa, marî î'ubumro sirômo âma. Tame te za wazô îroza'ra pese 'wa. — Âne te ZeZusi hâ tâma roti zahuré.

¹³ Tawamhâ 'ri ahâ u simasisi wamhâ, ZeZusi te te tâma î'awasu'u zahuré zéb uwaibaba, ma tô uburé anhopêtê zahuré. Tame ma tô dasa hâ 'manharî zahuré, Pascowa na dato nhisi na da hâ.

¹⁴ Tawamhâ te za oto tsaihuri ni. Taha wa, te oto ZeZusi norî hâ ai'ubumro, saihuri da, tizadawa wasu'u wa norî me.

¹⁵ Tawamhâ te oto tâma siwasu'u za'ra, âne:

— Wa tô îsima wê upta, aime îsa za'ra wa'aba da, te robzépata ô ré, Pascowa na 're îdasaihuri mono zém na.

¹⁶ Âne, îsa na 're îsai mono ô di za oto. Bâdâ îwa waptâ'â wapsi, 'Re îhâimana u'âsi mono hâ uburé da'âma 're sib'a'uwê mono wapsi, wa za duré 're îsa. Tawapsi, dasaihurizéb hâ marî te te îwasu'u hâ te îsina uwaimrami wapsi, wa za duré 're îsa. — Âne ma tô tâma siwaihu'u za'ra.

¹⁷ Tawamhâ ma hâsizé hâ ti'â, uwa 'ru 'râi wa'ui ré hâ. 'Re îhâimana u'âsi mono âma te tiwata, sôpru wa. Te duré tâma nharî za'ra:

— Â, âhuri aba, uburé.

¹⁸ Â hâ te 're hâsi mono ô di za oto, a'â. Niwapsi, wa za duré te 're hâsi, 'Re îhâimana u'âsi mono hâ uburé da'âma 're sib'a'uwê mono wapsi. — Âne te tâma siwasu'u za'ra.

¹⁹ Î'u'êne hâ ma duré ti'â. 'Re îhâimana u'âsi mono âma te duré îré âma tiwata, sôpru wa. Taha pari, ma tô te te wê'ê, Î'u'êne hâ. Te te wê'êi mono parimhâ, ma tô te te tâma sômri, tisiré 're înomro mono norî ma. Te duré tâma nharî za'ra, âne:

— Â, Î'u'êne hâ huri aba. Â hâ îhâiba, te wasu'u, za asada îsisômri aba zé hâ. Â hâ te za 're îhuri aba mo, î'âma 're asipo're pu'u u'âsi za'ra wa'aba mono zéb da hâ. — Âne te tâma nharî za'ra.

²⁰ Tawamhã saihuri pari, ma duré hâsizé hã ti'â, uwa 'ru 'râi wa'u İsé ré hã. Te tâma nharĩ za'ra:

— 'Re ihâimana u'âsi mono te te dama İropisutuzép té, te wasu'u, rob'râi wa'u hã. Rob'râi wa'u za'wari ne, asada İdâ'â za'ra wa'aba wamhã, te za İwi puru, İwapru hã. Tô sena, te za te te dama âma 're a'uwaimrami, te te dama İropisutuzép té hã. Âne na waihu'u za'ra wa'aba da, te za İwi puru, İwapru hã.

²¹ Ma'âpé, asiwi waihu'u aba. Ni'wa hã İzawi'wa newa, te İme nhamra, wedeza na, dama İnhomri'wa da hã.

²² Wa hã ti'ai âma dasiré İpodo hã wa za dârâ, 'Re İhâimana u'âsi mono te te İma İpisutuzéb zarina. İdâ'â da, te te İma pisutu nheré, aibâ ma, tâma 're ropipa uptabi mono di za, za te te dama İhâiba nhomri'wai ma hã. — Âne ma tô tâma waihu'u za'ra.

²³ Taha wa, te 'râwi sisadanharĩ za'ra, âne:

— E 'wa hã te za dama tisô. — Âne te 'râwi sisadanharĩ za'ra.

²⁴ Tawamhã sima İ'maipire tô sôpré wa, âma sisaze za'ra ô wa, te timreme na 'râwi si'wapé za'ra, İsiré 're İnomro mono norĩ hã.

²⁵ Taha wa, te Zezusi tâma nharĩ za'ra, âne:

— Ti'ai âma danhib'apito norĩ hã, simiwada'uri pese za'ra di. Duré, İsiwaihu'u zarina, te za dama marĩ 'manharĩ wê 'wa na, da te 're sisi za'ra.

²⁶ Tane asima 're aihâimana za'ra wa'aba mono ô di za, a norĩ wa'wa hã. Asiré norĩ ma, aipire wa'aba nheré, te za tâma 're asidai'uté za'ra wa'aba mo. Duré dawada'uri'wa, 're anomro aba mono nheré, aiwapu na te za dama 're İromhuri za'ra wa'aba mo.

²⁷ E 'wa hã, dama İpire. E tisa da, wedeza na İsamra, dama İpire. E dama dasai 'wapéi'wa hã dama İpire. Tisa da, wedeza na İsamra hã, tô dama İpire. Tazahã, wa hã dama dasai 'wapéi'wa ne, wa 're mo.

²⁸ — A norĩ wa'wa hã marĩ te 're sépata mono ré, ma tô İsiré 're anomro u'âsi aba mo.

²⁹ Taha wa, roti'wa da, dama İpire na 're İhâimana mono da, İmama te te İma İpisutu ne, tane wa za duré wa hã aipisutu za'ra wa'wa, dama aipire na 're aihâimana za'ra wa'aba mono da, dama roti'wa da.

³⁰ A norĩ wa'wa hã niwapsi, te za İsiré 're asimroi wa'aba mo, wedeza na wasiré 're wasaihuri mono da, wa te 're âhuri mono da zama. Danhib'apito simasisizém na, te za 're ai'ubumroi wa'aba mo, İzarazéhé nhihudu norĩ ma, 're roti za'ra wa'aba mono da. Wahi'rada İzarazé hã, 12 na İ'ra si'aibâ norĩ hã. Taha nhihudu norĩ hã te za 're İ'madâ'â za'ra wa'aba mo. — Âne ma tô Zezusi hã tâma waihu'u sirômo za'ra, te te waihu'u za'ra da.

Zezusi hã, Pedru te te İpo're pu'uzé wasu'u

Mateusi 26.31-35; Marcusi 14.27-31; Zuwã 13.36-38

³¹ Tawamhã Zezusi hã te Pedruhu ma tinha, âne:

— Sima, İwapari pese. Satanasi hã ma tô 'Re İhâimana u'âsi mono wi aiwaptêré za'ra wa'wa, tô sena İzazei uptabi 'wa zô, te te aipibu za'ra wa'aba da. Tridu hã İ'rã uptabi zô, da te 're İ'upôri za'ra mono ne, te za te te 're aipibu za'ra wa'wa, İzazei uptabi 'wa zô.

³² Sima, tane nheré, İmama wi, wa tô te 're rowaptêré aima, te te 're aipawaptob u'âsi mono da, İ'âma 're aimorĩ u'âsi da. Apâ İtême aipi'rai wapsi, te za asisânawâ norĩ hã 're İpawaptob za'ra mo, hâimana nhiptete na 're nomro mono da. — Âne te Pedruhu ma tinha.

³³ Tawamhã Pedru hã te asa tâma tinha, âne:

— Apito, wa tô İsima wê, asiré âma İmorĩ da, asiré, da te İnheré da nheré, duré asiré İdâ'â da nheré. — Âne te Pedru hã tâma siwasu'u.

³⁴ Taha wa, te Zezusi hã asa tâma tinha, âne:

— Pedru, İwapari pese. İzadawa para ô nheré, â bâtâ na si'a hârâ ô ré, te za si'ubdatô dawi İ'udâ, aima İza'rese ô na. — Âne ma tô romhã ré tâma waihu'u siro, Pedruhu ma.

Zezusi hã, tisiré 're İnomro mono norĩ te te İpo're pu'u za'ra zé wasu'u

³⁵ Tawamhã Zezusi te sadanharĩ za'ra, tisiré 're İnomro mono norĩ hã, âne:

— Datême te asatôri za'ra wa'aba wamhã, wa tô aré aiwi sawi za'ra wa'wa, marĩ hã asiré 'wasari aba tô da, rob'uiprazém nhemézé hã, duré ro'wapézé hã, duré aipara'uzazé wa'wa hã. E tawamhã marĩ hã aiwi só rowaptâ'â aba ô di. — Âne te Zezusi hã sadanharĩ za'ra.

— Marĩ zô, wawi rowaptâ'â za'ra ô di. — Âne te asa tâma nharĩ za'ra.

³⁶ Taha wa, te Zezusi hã tâma nharĩ za'ra, âne:

— Rob'uiprazém nhemézé, ate wamhã, te za oto İ'â, duré ro'wapézé, ate wamhã. Duré sib'ézé 'wapa ô wamhã, te za asi'upsibizé dama İwe, İwa'âbâ na sib'ézé 'wapa, asima uipra da.

³⁷ E marĩ wa, wa âne aima 'ru za'ra wa'wa. İwaseté newa, te za rowaseté 'manharĩ'wa norĩ zu İma rob'manharĩ za'ra ni. Âne, duréihã ma tô romhã ré İ'âma rob'ui'ére sirômo za'ra

ĩbaihã na, 'Re ĩhãimana u'ãsi mono zadawa wasu'u'wa norĩ hã. Taha wa, te za ĩ'ãma rob'ui'ére zarina, tã ĩ'ãma uwaimrami za'ra ni. — ãne ma tã Zezusi hã romhã ré sina tãma rowaihu'u sirõmo za'ra.

³⁸ Tawamhã ãne te asa tãma nharĩ za'ra, ĩsiré 're ĩnomro mono norĩ hã:

— Wanhĩb'apito, ãhãta sib'ézé 'wapa maparane.

— Wẽ di tã. Taha si. — ãne te asa tãma nharĩ za'ra, Zezusi hã.

Zezusi norĩ hã, êtẽ 'rãihã ãma ĩsi'ubumrozé wasu'u

Mateusi 26.36-46; Marcusi 14.32-42

³⁹ Tawamhã Zezusi hã ma oto rob u watobro, êtẽ 'rãihã u morĩ da, Oriwera u. Tamomo 're ĩne mono zéb u te duré mo, Oriwera u. ĩsiré 're ĩnomro mono norĩ hã te ĩme ai'aba'ré.

⁴⁰ Tawamhã te te sima ĩwézéb u, ma tã ĩ'ãma aihutu. Tame Zezusi te tãma roti za'ra, ãne:

— Ma'ãpé, asima rowaptêrẽ za'ra wa'aba, 'Re ĩhãimana u'ãsi mono wi, te te aipawaptob za'ra wa'aba da, Wa'uburé nhimiwada'uri wi. — ãne te tãma nharĩ za'ra.

⁴¹ Tawamhã ĩsiti za'ra te mo, siwaprosi sãmra da, romhã prã na. Tame ma hi'rãtitõ nhamra, Timama ma, mreme da.

⁴² ãne te Timama ma mre:

— ĩmama, asima wẽ wamhã, ĩma ba'a ĩdã'ázé hã, te robzépata tã da. Tane nherẽ, te ĩsima ĩwézéb uwaibaba, ĩma pisutu õ di za. Aima ĩwézéb uwaibaba, te 'manharĩ da hã ĩma wẽ di.

— ãne te Timama wi rowaptẽ.

⁴³ Tawamhã ma ĩtẽme sihã'rẽ, hãiwa ãma romhuri'wa hã, te te pawaptob da, siptete na 're morĩ da, Zezusi hã.

⁴⁴ Tiwi robzei'õ uptabi nherẽ, ma tã duré mre, Timama ma, mreme 'rãihã na. Taha wa, ma tã 're su'u a'a, dawapru ne, ti'ai wa.

⁴⁵ Tawamhã Timama ma, mreme pari, ma tã wahudu, tisiré 're ĩnomro mono norĩ u morĩ da apã. Sõtõ za'ra ré, ma siza za'ra. Pẽ'ézé uptabi za'ra wa, te tinhotõ za'ra.

⁴⁶ Taha wa, te tãma nharĩ za'ra, ãne:

— E marĩ wa, te asõtõ za'ra wa'wa. Aiwahutu za'ra wa'aba. 'Re ĩhãimana u'ãsi mono wi, rowaptêrẽ za'ra wa'aba asima, Wa'uburé nhimiwada'uri wi, te te aipawaptob za'ra wa'aba da. — ãne te tãma nharĩ za'ra.

Zezusi hã, da te ĩ'ãrizé wasu'u

Mateusi 26.47-56; Marcusi 14.43-52; Zuwã 18.3-12

⁴⁷ Tawamhã Zezusi te te tãma nharĩ za'ra ré, ma ĩtẽme aihutu ni, da'ahã na. Zudasi hã 12 na Zezusihi siré 're ĩnomro mono norĩ me hã aré, ta hã 're ĩmorĩ, te te sã danhimro, Zezusihi zõ. Tawamhã Zezusihi u, ma ai'rẽ, 'rãwi te te sawi da, tob'rata hãrã na.

⁴⁸ Taha wa, te Zezusi hã tãma tinha, ãne:

— Zudasi, oro ĩzawi pese 'wa zahã, ma ĩtob'rata hãrã na taré dama ĩzawi, ti'ai ãma dasiré ĩpodo hã da te ĩwaihu'u za'ra da. — ãne te tãma tinha.

⁴⁹ Tawamhã ĩsiré 're ĩnomro mono norĩ hã ma tã oto waihu'u za'ra, da te oto dasiwi ĩ'ãri da na hã. Taha wa, te siwi sadanha, ãne:

— Wanhĩb'apito, e wa te da'wapé za'ra õ di za, wanh'i'wa na, sib'ézé 'wapa na. — ãne te sina sadanharĩ za'ra.

⁵⁰ Taha wa, Zezusihi siré hã ma da'u'a ni, sib'ézé 'wapa na. Sasedoti ĩpire uptabi ma romhuri'wa hã ma po're nhizãri ni, ĩsimire niwĩ.

⁵¹ Tawamhã ma tã Zezusi hã tãma tinha, ãne:

— Tã'ã. Tane hã 'manharĩ tã. — ãne te tãma tinha.

Tawamhã ma po're upi, tinhib'rata na. Taha wa, ma tipo're wẽ apã.

⁵² Zezusihi zõ ĩshudu hã ta norĩ hã sasedoti ĩpire norĩ, duré 'Re ĩhãimana u'ãsi mono nhorõwa 'madã'ã'wa norĩ, ĩpire norĩ, duré zudezu norĩ ma roti'wa norĩ. Taha wa, ma tã Zezusi hã tãma nharĩ za'ra, ãne:

— E wa hã danhibrob zõ dapãrĩ'wa pã, ma bété we ĩzõ aihutu 'wa, sib'ézé 'wapa ré, uibroi ré zama.

⁵³ Bãtã sidãpãsi, wa tã asõ'a wa'aba nasi aimasisi, 'Re ĩhãimana u'ãsi mono ãma 're ĩdawata za'ra mono zéb ãma. E niha bã tameb ré, asiwi ĩ'ãri aba õ di bété. ãhãna ma tã bãdã hã ĩwa waptãrã, asiwi ĩ'ãri aba zéb da hã, robra tede'wa hã pire na 're ĩmorĩzéb da hã. — ãne ma tã Zezusi hã tãma waihu'u za'ra.

Pedru hã, Zezusi te te dawi ĩ'udãzé wasu'u

Mateusi 26.69-75; Marcusi 14.53-54, 66-72; Zuwã 18.15-18, 25-27

⁵⁴ Tawamhã ma tã oto siwi ti'ã, Zezusi hã. Te te siwi ãri wamhã, ma tã siwi saprõ, sasedoti u, ĩpire uptabi nhorõwa u. Pedru hã te romhã na te te dapibu.

⁵⁵ 'Ri' wawi wa'ra 're, da te dasima ĩpré za'ra u, ma wi, Pedru hã. Tame te nhamra Pedru hã, uzã, da te dasiwi ĩ'uirĩ norĩ 'rata.

⁵⁶ Unhama ãma sãmra ré, ma tã pi'õ hã 'madã, romhuri'wa hã. Taha wa, te 'madã'ã pese, te te waihu'u da. Te te waihu'u wamhã, te oto dama 'mahã, ãne:

— ãhã zama, te Zezusihi siré 're mo. — ãne te pi'õ dama wasu'u.

⁵⁷ Tane nherê, ma tã tiwi ai'udã, ãne:

— Mare di. ĩma sa'rese õ di, ta hã. — ãne te pi'õĩ ma tinha asa.

⁵⁸ Tawamhã ãma ronometro pari, te duré aibã hã Pedru 'madã, sãmra ré.

Taha wa, te Pedruhu ma tinha, ãne:

— A zama, te dasiré 're aimo. — ãne te tãma tinha. Tazahã, Pedru te asa tãma tinha, ãne:

— Mare di. Wa hã, õ norĩ siré hãĩ õ di. — ãne te aibã ma tinha.

⁵⁹ Tawamhã bãtã pibuzé hã misi te te sa'oto wi, te duré ni'wa hã tãma tinha, ãne:

— A hã te tã ĩsiré 're aimo. A hã, Darireza hawimhã duré. — ãne te tãma tinha.

⁶⁰ Taha wa, te duré Pedru hã asa tãma tinha, ãne:

— Mare di. Tane ĩma ĩnharĩ hã, te waihu'u õ di. Sa'rese õ di. — ãne te aibã ma tinha. ãne na ĩtreme hã te te 'rãsutu wi, ma awa'awi si'a hã hã.

⁶¹ Taha wa, ma tã Wanhib'apito hã aipi'ra. Sipi'rai wamhã, te Pedru hã 'madã'ã pese. Te te 'madã'ã wamhã, ma Wanhib'apito mremera na po're puru, Pedru hã. Romhã ré, ma tã tãma waihu'u siro, te te dawi ĩ'udãzém na, Zezusi hã. ãne ma tã tãma tinha: "ã bãtã na si'a hã hãrã õ ré, te za si'ubdatõ dawi ĩ'udã, ĩzadawa para õ nherê." ãne ma tã romhã ré, Pedruhu ma waihu'u siro.

⁶² ãne na oto ĩtreme na sina po're pu'u wamhã, ma tã watobro rob u, Pedru hã. Taha wa, te oto aiwa'õ, sina pẽ'ezé uptabi wa.

⁶³ Tawamhã aibã norĩ hã ma tã Zezusihi ma nharĩ wasété za'ra, siwi ĩ'madã'ã wa norĩ hã. Te duré nasi siwi ahã.

⁶⁴ Zazahã na ma duré siwi rã ubu. Taha wa, te tãma nharĩ za'ra, ãne:

— Ma'ãpé wama waihu'u zara na, ni'wa hã ai'azãri'wa hã. E niha ĩsisi hã. — ãne te nasi tãma nharĩ za'ra, te te nasi siwi ahãri sina.

⁶⁵ Te duré tãma nharĩ wasété za'ra, ĩwasété na.

⁶⁶ Tawamhã mararé ma tã zudezu norĩ ma roti'wa norĩ hã si'rã'õtõ, duré sasedoti ĩpire norĩ hã, duré 'Re ĩhãimana u'ãsi mono nhimiroti 'rata na rob'ui'ére na dama rowahutu'wa norĩ hã. Si'rã'õtõ wamhã, ma tã dama 'ru za'ra, Zezusi hã da te we dasiwi saprõni za'ra da, ĩtẽmeb za'ra.

⁶⁷ Da te ĩtẽme dasiwi ãwisi wamhã, te siwi sadanha, Zezusi hã, ãne:

— E a hã 'Re ĩhãimana u'ãsi mono te te ĩ'apisudu, Danho'reptui'wa da. Ma'ãpé, wama asiwasu'u za'ra na.

Taha wa, te Zezusi hã asa tãma nharĩ za'ra, ãne:

— Danho'reptui'wa na aima ĩsiwasu'u za'ra wa'aba wamhã, e te za ãma ĩzaze za'ra wa'wa. ãtẽ ãma ĩzaze za'ra wa'aba õ di za.

⁶⁸ Duré, ĩzadanhari za'ra wa'aba wa'rãmi, te asadanhari za'ra wa'aba wamhã, e marĩ te za ĩma ĩwaihu'u za'ra wa'wa. Marĩ hã ĩma waihu'u za'ra wa'aba õ di za.

⁶⁹ Tane nherê, wa hã ti'ai ãma dasiré ĩpodo hã, wa za oto dama ĩpire na 're ĩnhamra, dama ĩpire uptabi 'rata. Wa za oto ĩsimire niwĩ 're ĩnhamra, 'Re ĩhãimana u'ãsi mono 'rata. — ãne te Zezusi hã tãma siwasu'u za'ra.

⁷⁰ Tawamhã te duré siwi sadanha, ãne:

— E tawamhã, 'Re ĩhãimana u'ãsi mono 'ra na, ma tã 're asi'madã'ã mo. — ãne te siwi sadanha.

Taha wa, te duré asa tãma nharĩ za'ra, Zezusi hã:

— A norĩ wa'wa hã te ĩnharĩ za'ra wa'wa, tane na hã. — ãne te tãma nharĩ za'ra.

⁷¹ Tawamhã te sima nharĩ za'ra:

— Tãibã oto. Da te wama ĩwasu'u za'ra zéb zõ, wanhimipari za'ra õ di za oto. Wasi'uihã na wa tã ĩsiwasu'uzé hã wapari za'ra ni. — ãne te sima nharĩ za'ra, dama ĩpire norĩ hã.

23

Zezusi hã Piratuhu uiwada ĩsabzé wasu'u

Mateusi 27.1-2, 11-14; Marcusi 15.1-5; Zuwã 18.28-38

¹ Taha pari, ma tã aihĩni tiwahutu za'ra, Zezusi hã te te siwi saprõni da, Piratuhu u.

² Tawamhã te te ĩtẽme siwi ãwisi wamhã, ma tã siwi wasu'u wasété, ãne:

— ã hã ma tã dawi ro'warutu, tinhimirowasu'u na. Roma ãma danhib'apito ma, rob'uprazé hã da te tãma 're po'o za'ra mono tã da, ma tã te te 're da'apawati.

Danhib'apito na te duré dama 're siwasu'u, 'Re ihâimana u'âsi mono te te ĩpisutu na, Danho'reptui'wa da. — Āne te taré Zezusi wasu'u za'ra, Piratuhu ma.

³Tawamhâ Piratu te Zezusihi ma tinha:

— E a hâ, zudezu nori nhîb'apito. — Āne te sadanha.

Taha wa, ma tō Zezusi hâ asa tãma tinha, āne:

— Tahata ma tō tane hâ ĩ'ãma ĩwaihū tō. — Āne ma tō tizadawa na tãma wa'rã, Zezusi hâ.

⁴Tawamhâ Piratu te dama tinha, āne:

— Īwasété na te waihu'u ō di, wasété wa, te ĩwē'özéb da hâ. — Āne te sasedoti ĩpire nori ma nharĩ za'ra, 'Re ihâimana u'âsi mono ma da'ãma romhuri'wa ĩpire nori me, uburé dama zama.

⁵Tane nheré, te mreme tete na asa tãma nharĩ za'ra, āne:

— Tinhimirowasu'u na, ma tō te te dawī 're ro'wa'rutu, tinhimirowasu'u na, daza'rui mono bã, Zudeza āma. Darireza āma, ma tō roti na sãna'rata. Āhãta ma tō wei wī oto. — Āne te taré wasu'u za'ra, Piratuhu ma, Zezusi hâ.

⁶⁻⁷Tawamhâ te Piratu hâ da'azadanha, damreme te te wapari wa:

— E ā hâ, Darireza hawī te wei mo. — Āne te da'azadanha.

— Īhe. Ta hawī te wei mo, tiza'rui hawī. — Āne te asa tãma rowasu'u za'ra ni.

Apito Erodi te te dama 're ĩroti mono zé, Darireza na danhipti'a nho'õmo nhisi hâ. Taha wa, Piratu te te wapari wamhã, te tãma 'ru za'ra, Erodihi u te te siwi saprõni da, tame za a'ã sãmra wa, Zeruzaré āma.

⁸Erodi hâ Zezusihi wasu'u hâ ma tō te te 're wapari. Taha wa, ma tō te te sima 're wē u'âsi, Zezusi te te sabu da. Tawamhã, ĩtēme da te dasiwi āwisi wamhã, toi uptabi di Erodi hâ, titõmo na te te oto 'madã'ã wa. Īsõ'a, marĩ dama ĩ'manharĩ waihu'u'õ hã tiwaihū'u pese na te te 'manharĩ da, ma tō aré sima wē, Erodi hâ.

⁹Taha wa, ma tō Erodi hâ marĩ na sadanharĩ ahã, Zezusi hâ. Tazahã, te te sada'ãbã ō di asa.

¹⁰Taha wa, te oto Erodihi u aimasa, sasedoti ĩpire nori hã. Rowahutu'wa nori me, te ĩtēme aimasa. Mreme tete sina, ma taré siwi pisutu za'ra, Zezusi hã.

¹¹Tawamhã Erodi nori hã ma tō Zezusihi āma tiwa'ē za'ra, taré. Tinhib'a'uwē nori me, ma āma tiwa'ē za'ra, da'wapéi'wa nori me. Ma tō āma tito za'ra. Dasi'ubuzém na ma tō siwi āma hãiba ubu, ĩwē na. Tawamhã Erodi hã te oto dama ti'ru, apã da te dasiwi saprõni da, Piratuhu u. Taha wa, te apã siwi saprõ.

¹²Piratu nori hã Erodihi me, te aré 're si'ruiwapari zahuré. Āhãna, ma tō oto sisawi zahuré.

Zezusi hã da te dasiwi wĩri da, Piratu te te ĩdazazézé wasu'u

Mateusi 27.15-26; Marcusi 15.6-15; Zuwã 18.39-19.16

¹³Tawamhã Piratu te sitēme dazô hã, sasedoti ĩpire nori zô, 'Re ihâimana u'âsi mono ma, da'ãma romhuri'wa ĩpire nori zô. Duré roti'wa nori zô, te tihãrã za'ra, ĩsib'a'uwē nori me, te te ĩtēme ubumro da.

¹⁴Ītēme sihutu wamhã, te tãma nharĩ za'ra:

— We ĩtēme asiwi āwisi aba wī hã, ma tō āne ĩma ĩwasu'u za'ra wa'wa: “Āhã nhimirowasu'u zarina, te oto ro'wa'rutu na 're dahãimana za'ra.” Āne ma tō ĩma ĩwasu'u za'ra wa'wa. Taha wa, wa tō asõ'a za'ra wa'aba, sadanharĩ pese aré, ĩwasété zô, ĩwasédé hã āma sa'ra za'ra wa'aba wa. Tazahã, marĩ hã āma hãimana ō di, ĩwasédé hã.

¹⁵Erodi hã te te duré sadanharĩ wamhã, marĩ hã te te ĩ'manharĩ wasété zé hã te te duré āma sõpēté ō di. Taha wa, ma tō we apã watēme satõri za'ra, marĩ hã āma hãimana ō wa. Marĩ te te 'manharĩ wasété ō nheré, e niha wa za dama ti'ru, da te dasiwi wĩri da. Mare di.

¹⁶Taré wa za da'wapéi'wa nori ma 'ru za'ra, te te siwi 're pré'é mono da. Taha parimhã, wa za satõ, apã morĩ da. — Āne te Piratu hã tãma nharĩ za'ra.

¹⁷Pascowa na dasaihurizép sidãpãsi, ma tō Piratu hã dazazém hawī te te 're da'azani, misi si.

¹⁸Tawamhã aihĩni te damreme 'rãihã na tãma nharĩ za'ra ni, āne:

— Da te dasiwi wĩrre. Barabasihi si, wama wazere za'ra na apã. — Āne te āma 'mahãrã za'ra ni, Piratu hã.

¹⁹Barabasi hã dazazéb 're, te dame 're sa. Īsimiroti zarina, ma tō dasi'wapé hã watobro, romanu nori zãda, Zeruzaré āma. Ma tō duré da'maiwĩ, Barabasi hã. Taha wa, ma tō dasiwi séré ni, dazazéb 're, sab da.

²⁰Piratu hã ma tō sima wē, Zezusi hã apã te te satõri da. Taha wa, te āne duré dama tinha.

²¹Tane nheré, damreme 'rãihã na te nasi 'mahãrã za'ra ni, āne:

— Wedepo'õ nonhi'rãmi na, da te dasiwi sasõmri, dã'ã da. — Āne te nasi 'mahãrã za'ra ni.

²²Tawamhã te Piratu hã duré dama tinha:

— E marĩ te te 're ab'manharĩ waseté mono bâ. Īwaseté zô, te sadanharĩ wamhã, marĩ hã âma hãmana ô di. E niha wa za bété taré dama ti'ru, da te dasiwi wĩrĩ da. Mare di. Taré wa za ti'ru, da te dasiwi 're pré'é mono da. Taha parip si, te za mo, Īzadawa para. — Āne Piratu te dama tinha. Si'ubdatô oto ĩreme hã.

²³ Tane nherê, te aihĩni norĩ hã âma sé za'ra, mreime 'rãihã na, âne:

— Wedepo'o nhonhi'rãmi na sa'o, dâ'â da. — Āne te nasi 'mahãrã za'ra ni. Taha wa, Piratu ma tó oto dawapa.

²⁴ Da te tiwi ĩwaptêrêzéb uwaibaba, ma tó pisutu, wedepo'o nhonhi'rãmi na sa'o da, Zezusi hã, dâ'â da.

²⁵ Da te dasima ĩwê za'ra zéb uwaibaba, ma tó dama ti'ru, aibã, da te wazere da, dazazém hawi watobro da, apã morĩ da. Aibã nhimiroti zarina, ma tó dasi'wapé hã watobro aré, romanu norĩ zada hã. Ma tó duré da'maiwĩ, aibã hã. Taha wa, ma tó sêrê ni, dazazéb 're, sab da. Tawamhã Piratu te oto ti'ru, Zezusi hã te te siwi âri da da'wapé'wa norĩ hã, da te dasima ĩwê za'ra zéb uwaibaba, te te tãma 'manharĩ za'ra da, Zezusihi ma.

Zezusi hã, wedepo'o nhonhi'rãmi na dâ'â da, da te dasiwi ĩsasômrizé wasu'u

Mateusi 27.32-44; Marcusi 15.21-32; Zuwã 19.17-27

²⁶ Tawamhã Zezusi hã te oto siwi saprô, ĩdã'ázéb u. Te te siwi saprôni ré, ma tó buru hawimhã aibã hã da'razã. Aibã nhisi hã, Sima na ĩsisi hã. Simahã za'ru nhisi hã, Sireni na. Te te da'razãri wa, ma tó siwi pa'ã, da'wapé'wa norĩ hã. ĩsisé ma tó tãma hiri za'ra wedepo'o nhonhi'rãmi hã, Zezusihi zarina te te âri da. Taha wa, te ĩsarina ti'ã.

²⁷ Tawamhã da'ahã na te Zezusihi zarina ai'aba'ré ni. Pi'ô zama, te dame ai'aba'ré, wawa sina. Zezusihi âma pê'ézé uptabi za'ra wa, te 'ry'ry.

²⁸ Taha wa, Zezusi hã ma tó ĩtême aipi'ra za'ra, pi'ô norĩ u, te te tãma nharĩ za'ra da, âne:

— Pi'ô norĩ, Zeruzarê âma 're ai'ubumroi wa'aba mono norĩ hã, ĩzô ai'ry'ry wa'aba tó. Āté asisô si, te za 're ai'ry'ry wa'aba mo, ai'ra norĩ zô zama.

²⁹ Niwapsi dama 're rowasété za'ra mono di za. Taha wa, te za nharĩ za'ra ni, âne: "Pi'ô'i 'ra'ô norĩ ma si, 're rowê za'ra mono di za, duré niwa ai'uté te te ĩwapsômri za'ra ô norĩ ma zama." Āne te za nharĩ za'ra ni.

³⁰ Duré dama rowasété wapsi, êtê 'rãihã ma, te za tasi'ru za'ra ni, danhisiwi waptã'ã da, te te da'uprosi da. Duré sa'a ma, te za tasi'ru za'ra ni, te te dazuwã za'ra da.

³¹ E marĩ da, wa tó romhã ré aima rowã'ôtô za'ra wa'wa. Āhãna, mi wapti'i ré, te za oto rowasété hã ĩma 'manharĩ za'ra ni. Mi hã 'ré wamhã, e niha za bété. Dama 're rowasété uptabi za'ra mono di za. — Āne te Zezusi hã pi'ô norĩ ma nharĩ za'ra.

³² Zezusihi me, te aibã norĩ hã dasiwi saprôni zahuré ni, ĩsiré dâ'ã zahuré da, ta norĩ hã. Rowasété 'manharĩ'wa zahuré, aibã norĩ hã.

³³ Tawamhã ma tó oto âwisi za'ra, Da'rãihã na romnhisi u. Tame ma tó siwi sasô Zezusi hã, wedepo'o nhonhi'rãmi na dâ'â da. Ma duré rowasété 'manharĩ'wa norĩ hã ĩsiré sasômri zahuré ni. Te âma aiwa'aba zahuré, ĩsimire niwĩ, duré ĩsimi'e niwĩ.

³⁴ Tawamhã Zezusi hã te Timama ma tinha, âne:

— ĩmama, da'ãma 'madã'ã ô di za, da te ĩma ĩ'manharĩ wasété za'ra zé hã. Da te dasiwi ĩwãihu'u âna, ma tó ĩma 'manharĩ wasété za'ra ni. — Āne te Timama ma tinha, Zezusi hã.

Tawamhã êtê zapotore ĩ'ui'éré ré hã ma tó nasi sima sãmra, Zezusihi uzazéb zô. Taha zarina, ma tó sima âma aipé.

³⁵ Zezusi norĩ hã simnhatã ré, te zudezu norĩ hã ĩ'rata asimro, te te 'madã'ã za'ra da. Taha wa, te roti'wa norĩ hã sima nharĩ za'ra, âne:

— Ma tó te te 're da'anho'reptu aré. Tó sena Danho'reptui'wa da, 'Re ĩhãimana u'ãsi mono te te pisutu wamhã, ma'ãpé sisô'reptu. — Āne ma tó âma tiwa'ê za'ra.

³⁶ Da'wapé'wa norĩ zama, ma tó âma tiwa'ê za'ra. Tawamhã ma ĩtême ai'ré za'ra, te te tãma wê za'ra da, uwa 'ru 'rãĩ wa'u ĩsé hã, ĩwa'ãbã sry hã.

³⁷ Āne te tãma nharĩ za'ra:

— A hã zudezu norĩ nhĩb'apito wamhã, ma'ãpé asisô'reptu na. — Āne te tãma nharĩ za'ra, da'wapé'wa norĩ hã.

³⁸ Zezusihi 'rãĩ uwaibaba, te âma ĩrob'ui'éré ré hã da'o. "Ā hã, zudezu norĩ nhĩb'apito." Āne âma ĩrob'ui'éré hã.

³⁹ Tawamhã rowasété 'manharĩ'wa hãiba amo hã te tãma tinha, âne:

— A hã Danho'reptui'wa da, 'Re ĩhãimana u'ãsi mono te te aipisutu wamhã, ma'ãpé asisô'reptu na. Wa norĩ zama, wanho'reptu na. — Āne te Zezusihi ma tinha, wa'ê sina.

⁴⁰ Taha wa, ma ĩsiré hã âma sadapsisi, âne:

— Tô'ã. E 'Re ìhâimana u'âsi mono nhimihâzé, asima pipa ã bâ, ma tô tane tâma ìnha. Wa norî hã wa wasiré waza'o ni, apito nhimiwada'uri zarina. Taré, da te wama rob'manharî ò di, dasiwi.

⁴¹ Wa norî hã wawasété wa, ma tô wama rob'manharî ni. Tazahã, ã hã marî hã te te dama 'manharî wasété ò di. — ãne te tâma tinha.

⁴² Taha wa, te Zezusihi ma tinha, ãne:

— Zezusi, ì'ãma aipo're pu'u za, Danhib'apito na apã we aimorî wamhã. — ãne te Zezusihi ma tinha.

⁴³ Taha wa, te Zezusi hã asa tâma tinha, ãne:

— Tô sena wa za aima waihu'u. ã bâtã na te za ì'rata 're asãmra mo, rowê uptabi ãma. — ãne ma tô aibã ma ropisutu, Zezusi hã.

Zezusihi dâ'ázé wasu'u

Mateusi 27.45-56; Marcusi 15.33-41; Zuwã 19.28-30

⁴⁴ Tawamhã ma tô ti'abzuma oto. Abzuma wamhã, ma tô tirobra, daro mono bâ. Bãdã siprazéb u, te oto robra si nomro.

⁴⁵ Bãdã sipra wi, ma tô zazahã hã hãihaipo'o, 'ri 're wa'wa nhitobzé hã, 'Re ìhâimana u'âsi mono ãma 're ìdawata za'ra mono zéb ãma hã.

⁴⁶ Taha wa, ma tô Zezusi hã Timama ma tinha, mreme 'rãihã na:

— Ìmama. ãhãta, wa za ìpê'ezani hã aima tisõ, asib'rata. — ãne te si'mahã, mreme 'rãihã na. Tawamhã awa'awi ma pê'ê hai'utõ oto.

⁴⁷ Tawamhã aibã hã ma tô ãma rob'madã, da'wapéi'wa norî wada'uri'wa hã, romanu hã. Te te ãma rob'madã'ã wamhã, te ãma tiwata, 'Re ìhâimana u'âsi mono ãma. ãne te tinha:

— Nare ò hã, aibã 're ìmorî wê tô. — ãne te tinha.

⁴⁸ Tawamhã da'ahã na ma tô tasi'rã'õtõ ni, da te ãma rob'madã'ã za'ra da. Tawamhã Zezusi hã dã'ã wi, te 'ri tême apã ai'aba're ni, dawawa sina. ãma dapê'ezé uptabi za'ra di.

⁴⁹ Zezusihi zawi pese'wa norî hã, romhã na ma tô ãma 'madã'ã za'ra. Pi'õ norî zama, te romhã na ãma 'madã'ã za'ra, Darireza hawî ìsarina ìsi'aba're norî hã.

Zezusi da te ìsêrêzé wasu'u

Mateusi 27.57-61; Marcusi 15.42-47; Zuwã 19.38-42

⁵⁰⁻⁵¹ Aibã hã te 're hãimana, Zuzé na ìsisi hã. Arimateza na ìsa'ru nhisi hã, Zudeza na danhipti'a nho'õmo nhisi ãma. Aibã hã ìwê. Hãimana wê uptabi di, dama. 'Re ìhâimana u'âsi mono, da'ãma 're ìsib'a'uwê mono zéb zõ, te 're simipari u'âsi. Ta hã, roti'wa ìpire. Zudezu norî ma roti'wa ìpire norî siré, te 're simasisi. Tazahã, Zezusi te te siwi ãri da, te te sima ãma roti za'ra wamhã, te te ãma dazazei ò di.

⁵² Zezusi hã dã'ã wamhã, te oto Piratuhu u mo Zuzé hã, Zezusihi hãiba hã te te tiwi waptêrê da.

⁵³ Taha wa, ma tô ãma saze, Piratu hã. Taha wa, ma tô si'ra, wedepo'o nhonhi'rãmi hawî, Zuzé hã. Te te si'rai wamhã, ma tô hãiba ubu, zazahã ìhãirã na. Taha pari, ma tô tisê, ab're wa, etê zahãpã ab're sirõmo wa. Tame ma tô Zezusihi hãiba hã tisê, da te ìwa ìda'manherê'õ wa.

⁵⁴ ãhã romhuri 'rãsutu na ma tisê. Romhutu na te za zudezu norî hã romhuri zahãrizé hã 'madã'ã za'ra.

⁵⁵ Tawamhã Zuzé hã ab're u morî wamhã, ma tô pi'õ norî hã ìsarina ai'aba're. Zezusihi zarina, Darireza na danhipti'a nho'õmo nhisi hawî we ìsi'aba're, pi'õ norî hã. Tawamhã ab're hã ma tô sabu za'ra. Duré Zezusihi hãiba, Zuzé te te ìsêrêzé hã ma tô sabu za'ra.

⁵⁶ Tawamhã 'ri tême te apã ai'aba're. Taha wa, ma tô marî hã sada wa'u za'ra, wedewa'u ìsadaze hã, te te siwi ãma hãiba u're da. Romhuri zahãrizém na hã ma tô tiwa'utu za'ra, 'Re ìhâimana u'âsi mono te te ìpisutuzéb zarina.

24

Zezusi hã, Ìmama te te ìhãiwa'utuzé wasu'u

Mateusi 28.1-10; Marcusi 16.1-10; Zuwã 20.1-10

¹ Dumidu na rowa'a wi, te pi'õ norî hã ai'aba're, ab're u. Marî wa'u te siré ãri za'ra, ìsadaze hã.

² Ab're u sihutu wamhã, ãne ma tô 'madã'ã za'ra, ab're nhitobzé hã. Sitob ò di oto. Ni'wa hã ma tô ab're nhiti pi'ra.

³ Tawamhã sisisi wamhã, te te sãmri za'ra ò di, Wanhib'apito Zezusihi hãiba hã. Robaba di.

⁴ Te te waihu'u za'ra ò wa, te ãne sima rosa'rata za'ra:

— E niha ab're hã baba di. E mahãta ìhãiba. — Æne te sima sô amrami za'ra. Tawamhã aibã norî hã maparane ma ìtème aima'wa. Ì'uzã hã ma ai'ubuzi zahuré.

⁵ Taha wa, ma tô pi'õ norî hã tãma tipahi za'ra. Pahi te, ma tô aiwë'ê za'ra, ti'ai u. Taha wa, te ãne tãma nharî za'ra, pi'õ norî ma:

— E niha da, te ìhãiba zô ìrob'madã'ã za'ra wa'wa, adã'ã 'ru ãma. Apã ma tô hãiwa'udu.

⁶⁻⁷ Æne nomro ô di oto. Ma tô hãiwa'udu. Darireza ãma 're sãmra mono ré, ma tô romhã ré aima siwasu'u sirõmo za'ra wa'wa aré, ãne: “Wa hã ti'ai ãma dasiré ìpodo hã te za dama ìnhomri ni, aibã ìwaseté norî ma. Wedepo'o nhonhi'rãmi na te za dasiwi ìzasõmri ni, ìdã'ã da. Bãdã maparane ì'ãma si'utõrî ô ré, wa za apã hãiwa'udu.” Æne ma tô romhã ré aima siwasu'u sirõmo za'ra wa'wa. — Æne ma tô Zezusihi mreme na ãma po're pu'u za'ra, aibã norî hã.

⁸ Taha wa, ma tô pi'õ norî hã ãma tipo're pu'u za'ra, Zezusihi mreme na.

⁹ Taha pari, te ab're hawi apã ai'aba'ré, ìsazei'wa norî u. Aibã 11 na ìhãiba za'ra norî ma, ma tô rowasu'u pese za'ra, Zezusihi siré 're ìnomro mono norî ma. Ìsiré ìsi'ubumro norî ma zama, ma tô tãma rowasu'u pese za'ra.

¹⁰ Pi'õ norî nhisi hã, ãne: Mariza Madarena, duré Zuwãna, duré Mariza, Ti'aduhu na. Ta norî hã ìsiré pi'õ norî me, ab're u ìsi'aba'ré hã, te Zezusihi zadawa wasu'u'wa norî ma rowasu'u pese za'ra.

¹¹ Tane nheré, ìsimirowasu'u na te te saze za'ra ô di, taré newa.

¹² Tane nheré, Pedru hã ma tô wahudu, ab're u wara da, te te sabu da. Ab're u wisi wamhã, ma tô sô aiwë'ê, te te sô rob'madã'ã da. Sô siwë'êi wamhã, T'ubuzé si, ma tô sabu. Taha wa, ma tô apã mo 'ri tème, tob'uzu sina, marî hã ìhãimana na.

*Emausi u, ìsazei'wa norî nebzé wasu'u
Marcusi 16.12-13*

¹³ Tawamhã tô taha bãtã na te tineb zahuré, Emausi na 'ri wa'õtõ nhisi u, Zezusihi zazei'wa norî hã. Zeruzarê hawi te tineb zahuré, 'ri wa'õtõ u. Zeruzarê hawimhã, 10 na ti'ai pibuzé hã, Emausi u hã.

¹⁴ Nep sina, ma tô te te sima rowasu'u zahuré, uburé marî hã ìwairébé mono na.

¹⁵ Te te sima rowasu'u zahuré mono ré, duré ãma sisada'ãbã zahuré mono ré, ma tô Zezusi hã ãma tiwisi zahuré. Te oto ìme timorî zahuré.

¹⁶ Titõmo na ma tô 'madã'ã zahuré. Tane nheré, te te waihu'u zahuré ô di, ni'wa newa.

¹⁷ Tawamhã Zezusi te sadanharî zahuré, ãne:

— E marî, te asima ìwasu'u wa'aba mo, bãdãdi na ane wa'aba sina. — Æne te sadanharî zahuré. Taha wa, ma tô mazahãri zahuré. Ubu pire zahuré di.

¹⁸ Tawamhã ma tô ìhãiba amo hã sadanha, Tezopasi na ìsisi hã:

— Zeruzarê ãma 're asãmra mono nheré, e aiwétési aima ìsa'rese ô, ã nimosi marî hã ìwairébé mono hã. — Æne te sadanha, Tezopasi hã.

¹⁹ Taha wa, ma tô Zezusi hã asa sadanharî zahuré:

— E marî, wairébé mono bã bété. — Æne te sadanharî zahuré.

— Zezusi, Nazaré hawi ìmorî ma, ma tô rob'manharî waseté za'ra ni. 'Re ìhãimana u'ãsi mono zadawa wasu'u'wa, te 're mo aré. Tiwaihu'u pese na ma tô marî hã te te dama 're ab'manharî aré, ìwë hã. Duré mreme pire na, te 're mo. Æne na ma tô waihu'u, 'Re ìhãimana u'ãsi mono hã. Æne na hã uburé ma tô waihu'u za'ra ni.

²⁰ Tane nheré, wa'madã'ã'wa norî hã sasedoti ìpire norî hã ma tô danhib'apito u siwi saprõ. Roti'wa norî dama ìpire norî me, ma tô ìtème siwi saprõ, te te dama 'ru za'ra da, da te dasiwi wîri da. Taha wa, ma tô ìsimiwada'uri zarina, dasiwi sasõmri ni, wedepo'o nhonhi'rãmi na dã'ã da.

²¹ Ìzarazéhé nhihudu norî hã, danhimiwada'uri na oto 're wahãimana za'ra mono tô da, te te 're wa'apawapto mono da ne, wa tô 're wanhimnhasi za'ra aré. Æhãna bãdã maparane ma tô ãma ne, da te ìwîrízém na hã.

²²⁻²³ Ni'wam norî hã pi'õ norî hã ma tô ai'aba'ré ab're u, wasiré ìsazei'wa norî hã. Tane nheré, te te siwi sãmri za'ra ô di, ìhãiba hã. Ab're hã baba na, ma tô sô sabu za'ra. Apã sihutu wamhã, ãne te wama rowasu'u za'ra: “Re ìhãimana u'ãsi mono ma romhuri'wa norî si, wa tô wasiwi 'madã'ã za'ra ni, hãiwa hawi we ìne hã. Zezusi hã, u, dã'ã ô di. Te u, oto 're mo. Æne ma tô wama rowasu'u zahuré.” Æne te pi'õ norî hã wama rowasu'u za'ra. Taha wa, wa tô ãma watob'uzu za'ra ni, ìsimirowasu'u za'ra na hã.

²⁴ Taha wa, ma tô wasiré norî hã 'mane, pi'õi wa'rãmi, ab're u. Te te robzabu zahuré wamhã, ab're hã baba na ma tô duré sabu zahuré, pi'õ norî nhimirowasu'u zarina. Te duré wama rowasu'u za'ra, Zezusihi hãiba hã te te ìsãmri zahuré ô na. — Æne te tãma rowasu'u zahuré, Zezusihi ma, Tezopasi norî hã.

²⁵⁻²⁶ Tawamhã Zezusi hã te asa tãma nharĩ zahuré, ãne:

— E niha bété, waihu'u su'u aba ô di, sazei aba da, 'Re ihãimana u'ãsi mono zadawa wasu'u 'rata 'wa norĩ nhimirowasu'u mono bâ, Danho'reptui'wa na rob'ui'ére hã. Danho'reptui'wa da, 'Re ihãimana u'ãsi mono te te ipisudu hã te za a'ã robzépata, rowasédé, da te tãma 'manharĩ wamhã. Taha parip si, te za rowé ãma 're sãmra, 'Re ihãimana u'ãsi mono te te tãma ipisutuzéb uwaibaba. — ãne ma tó Zezusi hã tãma waihu'u zahuré, sô'awi tãma siwasu'u zahuré ô nheré, Danho'reptui'wa na.

²⁷ Romhã ré, ma tó iwana Danho'reptui'wa na rob'ui'ére za'ra ni. Tawamhã Mozési te te ãma irob'ui'ére na, te oto tãma rob'rãzarôtô zahuré. Taha pari, uburé 'Re ihãimana u'ãsi mono zadawa wasu'u 'rata 'wa norĩ, te te ãma irob'ui'ére za'ra na, te tãma rob'rãzarôtô zahuré.

²⁸ Tawamhã ma tó rob'umhutu za'ra oto, 'ri wa'ôtô u hã, Emausi u hã. Zezusi hã te aré tiwi timorĩ waré zahuré.

²⁹ Taha wa, ma tó tãma nharĩ zahuré, tiwi morĩ zahuré tó da:

— Wa'rata asãmra a'ã. Ma tó wawi tihãiwahã. Te za wawi tirobra. — ãne te tãma nharĩ zahuré.

Taha wa, ma tó ãzé 'ri para u, i'rata sãmra zahuré da, a'ã.

³⁰ Tawamhã i'rata te tinhamra zahuré, siré saihuri da. Sãmra wamhã, ma tó i'u'ëne hã ti'ã, Zezusi hã. 'Re ihãimana u'ãsi mono ãma te tiwata, sôpru wa. Taha pari, ma tó te te wë'ë, i'u'ëne hã. Ma tó tãma sômri zahuré.

³¹ Taha wa, ma tó oto waihu'u zahuré, Zezusi hã. Tazahã, ma tó tiwi aimani zahuré.

³² Taha wa, te isa'u sima rowasu'u zahuré, ãne:

— Bãdãdi na we te te wama rowasu'u mono ré hã, e watoi ôre, wapë'ë 'remhã. Wato sina, wa we wa te wapari. Wapari ze ti. — ãne te sima rowasu'u zahuré.

³³ Tawamhã awa'awi, ma tó tiwahutu zahuré, Zeruzarê u neb da apã. Simasisi wamhã, ma tó Zezusi siré norĩ hã sabu za'ra, 11 na ihãiba za'ra hã. 'Ri para, te siré ai'ubumro, isazei'wa norĩ me.

³⁴ — Tô sena, ma tó Wanhib'apito hã hãiwa'udu. Simahã ma, ma tó sihãiré. — ãne te tãma rowasu'u za'ra, datême isimasisi norĩ ma.

³⁵ Tawamhã Wanhib'apito, bãdãdi na itême iwisi zahuré na, ma tó asa dama rowasu'u zahuré, isazei'wa norĩ ma. Duré, Wanhib'apito te te iwaihu'u zahuré zém na, ma tó siwasu'u zahuré. I'u'ëne te te tãma iwë'ë zahuré na, ma tó duré Wanhib'apito hã waihu'u zahuré. ãne na ma tó siwasu'u zahuré, Zezusi hã zazei'wa norĩ ma.

Zezusi hã, tizazei'wa norĩ ma, isihãirézé wasu'u

Mateusi 28.16-20; Marcusi 16.14-18; Zuwã 20.19-23; Atusi 1.6-8

³⁶ Tawamhã isazei'wa norĩ ma, te te rowasu'u zahuré ré, ma tó Zezusi hã iwa'wa tizab za'ra. ãne te tãma nharĩ za'ra:

— Rowé na 're aihãimana za'ra wa'aba mono. — ãne te tãma nharĩ za'ra.

³⁷ Tawamhã dahãiba warô newa, ma tó tãma tipë'ëwara za'ra.

³⁸ Taha wa, te Zezusi hã tãma nharĩ za'ra, ãne:

— E marĩ da, ma tó ima aipë'ëwara za'ra wa'wa. E marĩ da, ma tó iwawã za'ra wa'wa, ihãiwa'utuzém na.

³⁹ Inhib'rada, 'madã'ã za'ra wa'aba. Duré ipara hã 'madã'ã za'ra wa'aba. Ma'ãpé oto izaze za'ra wa'aba. Wa hã tó, Zezusi. Dahãiba warô hã nhi ô di, duré hi ô di. Wa hã inhi ré hã, duré inhi ré hã. Ma'ãpé asib'rata na i'upi za'ra wa'aba, tó sena izaze za'ra wa'aba da.

⁴⁰ — ãne ma tó Zezusi hã tãma si'ru za'ra. Taha wa, ma tó tinhib'rada hã tãma sô'a za'ra, duré tipara hã.

⁴¹ Inreme te te wapari za'ra wamhã, te 're to za'ra, tipë'ë na. Tãma rowé uptabi za'ra di. Tane nheré, Zezusi hã hãiwa'utu ô newa, te te ãma saze za'ra ô di. Taha wa, mrab zô te sadanharĩ za'ra oto, Zezusi hã:

— E mra, te aima tihãimana za'ra wa'wa. — ãne te sadanharĩ za'ra.

⁴² Tawamhã syru na ma tó tãma sômri za'ra, tepe zebre hã.

⁴³ Tawamhã ma ti'ã, te te 'rêne da, isô'a za'ra.

⁴⁴ Taha wa, te Zezusi hã tãma nharĩ za'ra, ãne:

— Romhã ré wa tó aima rowasu'u za'ra wa'wa, ai'rata 're inhamra za'ra wa'aba mono ré hã, marĩ hã za izô iwairébé mono na, Mozési nhimi'ui'ére zarina, duré 'Re ihãimana u'ãsi mono zadawa wasu'u 'rata 'wa norĩ nhimi'ui'ére zarina, duré isô're na rob'ui'ére zarina. — ãne te Zezusi hã tãma nharĩ za'ra.

⁴⁵⁻⁴⁶ Tawamhã ma tó ãne tãma waihu'u za'ra, ibaihã na rob'ui'ére zarina:

— Romhã ré ma tó ãne i'ãma rob'ui'ére za'ra ni: "Danho'reptui'wa te za robzépata za'ëtë, 'Re ihãimana u'ãsi mono te te ipisudu hã. Tane nheré, bãdã maparane ãma si'utôri ô ré, te za hãiwa'udu apã, ab're hawi.

⁴⁷ Duré, te za ĩwasu'uwē na ĩsawana para te te 're dapo're pu'u za'ra, āne: 'Dawasédé hā te za da te 're rēme pese za'ra. Tawamhā te za te te dama 're apari dawasédé hā, 'Re ĩhāimana u'āsi mono hā.' Āne te za ĩwasu'uwē na uburé te te āma 're dapo're pu'u za'ra, daro mono bā. Zeruzarē āma ĩsāna'rada hā za." Āne ma tō duré romhā ré āma rob'ui'éré za'ra, ĩbaihā na hā.

⁴⁸ A norī wa'wa hā ma tō ĩ'āma ĩ'madā'ā za'ra wa'wa, ĩdā'ázé hā. Duré ĩhāiwa'utuzé hā ma tō ĩ'āma ĩwaihu'u za'ra wa'wa. Taha wa, te za ĩwasu'u wē'wa, 're anomro aba mo.

⁴⁹ Wa hā wa za we atēme satōrī za'ra wa'wa, ĩmama te te aima ĩropisutu za'ra wa'aba zéb zarina. Taha wa, te za a'ā 'ri ahā āma sō asimipari za'ra wa'wa, hāiwa hawi te we atēme ĩsatōrī za'ra wa'aba zéb u, ĩwaihu'u pese na 're ĩmorī ne, 're anomro aba mono da. — Āne te Zezusi hā tāma nharī za'ra, tisiré 're ĩnomro mono norī ma.

Zezusi hā, hāiwa u ĩmorīzé wasu'u

Marcusi 16.19-20; Atusi 1.9-11

⁵⁰ Tawamhā Zezusi hā ma tō tisiré 're ĩnomro mono norī hā te te simro, 'ri ahā nhiti, Betānha na 'ri wa'ōtō nhisi u. Tamomo te te rob'umhutu za'ra wamhā, ma tō tinhib'rada hā wahutu, tisi hawimhā, ĩwē hā te te tāma sōmri za'ra da, Zezusi hā.

⁵¹ Tawamhā taha ré, ma tō tiwi timorī za'ra. ĩmama hā ma tō tiwi āri za'ra, hāiwa u.

⁵² Tawamhā ĩsa'u, te Zezusi hā āma tiwata za'ra, hi'rātitō. To sina, te apā ai'aba'ré, Zeruzarē u.

⁵³ Tawamhā 'Re ĩhāimana u'āsi mono āma 're ĩdawata za'ra mono zéb āma, te 're si'ubumroi u'āsi, 'ri 'wawi wa'ra 're, āma 're wata u'āsi za'ra mono da.

Zuwā **Zezu Cristuhu wasu'uwē na, Zuwā te te āma ĩrob'ui'érézé** **Ībailhā wasu'uzé**

Ā ĩbailhā na rob'ui'éré'wa nhisi hā, Zuwā na ĩsisi hā. Ā hā Zezusihi siré 're ĩmorī, Ti'aduhu sisānawā. Ta norī hā tepe mrami na aré romhuri'wa zahuré. Duré Zuwā hā ĩhāiba amo hā te duré 're hāimana, ā dawabzuri te te dama 're ĩ'ab'manharī mono hā. Taha nhisi hā, Zuwā Batita. Tazahā ā ĩbailhā na rob'ui'éré'wa hā ta hāi ō di.

Zuwā hā ma tō wama wasu'u za'ra, Zezusi hā tō sena 'Re ĩhāimana u'āsi mono 'ra uptabi na hā. Zuwā 20.31 āma te āhā wasu'u hā tihāiba. Ma tō duré wama waihu'u za'ra, Zezusi hā Danho'reptui'wa na ni'wam norī hā te te sina 're ĩ'umnhasi za'ra mono hā rowē na 're ĩdahāimana u'āsi za'ra mono zé hā za ta norī si te te sina 're ĩ'uwaimrami za'ra mono na hā. Zuwā hā ma tō duré wama āma romnhimír'é za'ra, marī mono bā, wahāimanazém na wa te āma 're ĩrosa'rata za'ra mono zéb da hā. Ā na ma tō wama āma romnhimír'é za'ra, duré ĩ'u'ēté wapu na, duré rowa'a na, duré pone'ērebā na, duré pone'ērebā 'madā'ā'wa na zama, duré uwa 'ru na zama.

'Re ĩhāimana u'āsi mono mre me na ĩsisi hā ĩsihāibazé wasu'u

¹ Duréihā ti'ai ō ré hā, marī ō uptabi di. Ropoto na te te sāna'rata ō ré, te 're mo, 'Re ĩhāimana u'āsi mono mre me na ĩsisi hā. Ta hā te siré 're simasisi u'āsi zahuré, 'Re ĩhāimana u'āsi mono me. Duré ta hā 'Re ĩhāimana u'āsi mono.

² Ti'ai ō ré hā, te siré 're simasisi zahuré, marī ō uptabi ré hā.

³ Ta hā ma tō uburé te te ro'apoto, 'Re ĩhāimana u'āsi mono te te tāma ĩpisutuzéb zarina. Te te ro'apoto mono ō 'wa'āhā, aré marī ō uptabi di.

⁴ Ta hā rowē na 're ĩdahāimana u'āsi za'ra mono zé nhomri'wa, te dama 're hāimana, 'Re ĩhāimana u'āsi mono mre me na ĩsisi hā. Dama rob'uiwē'wa ne, rowa'a na damorī wē na 're danomro mono da, te za roti wē na te te dama 're awaihu'u.

⁵ Robra na ne, dawasété na 're danomro mono nherē, te za dama rob'uiwē'wa ne 're ĩmorī hā te te 're da'apawaptob u'āsi, tinhimiroti na. Niwa da te dawī uprosi waihu'u ō di za ĩsimiroti hā, dawasété na 're ĩdanomro mono norī hā.

⁶ Tawamhā 'Re ĩhāimana u'āsi mono hā ma tō aibā hā satō, te te dama 're sadawa wasu'u mono da. Aibā nhisi hā Zuwā na ĩsisi hā.

⁷ Ta hā ma tō te te dama 're wasu'u, rob'uiwē'wa ne 're ĩmorī wasu'u hā.

⁸ Zuwā hā rob'uiwē'wa ne 're ĩmorī hā 're hāimana mono ō di. Rob'uiwē'wa ne 're ĩmorī wasu'u na te te 're da'apo're pu'u mono da si, ma tō we datēme wi, Zuwā hā.

⁹ Rob'uiwē'wa ne 're ĩmorī hā tō sena ĩsimiroti hā. Ta hā ti'ai u ma we datēme wi, aihīni ĩsimiroti hā da te waihu'u pese za'ra da.

¹⁰⁻¹¹ Ta hā te oto ti'ai āma 're hāimana, 'Re ĩhāimana u'āsi mono mre me na ĩsisi hā. Tazahā 'Re ĩhāimana u'āsi mono zadawa para, te te ro'apoto mono nherē, ro'apoto mono 'wa na da te waihu'u za'ra ō di. Tisiré zudezu norī rob u, ma tō wei mo. Tane nherē, sō 're tob'uzu za'ra mono ō di, ta norī hā.

¹² Ni'wam norī si ma tō sō 're tob'uzu za'ra. Ma tō te te āma 're sasōmri za'ra. Taha wa, ma tō ta norī si pisutu za'ra, 'Re ĩhāimana u'āsi mono 'ra, 're hāimana za'ra mono da.

¹³ E ĩ'ra siro, ma tō ta norī hā 're rere'e, ti'ai āma timama sipoto na. Mare di. Taha zarina, ĩ'ra siro, 're rere'e mono ō di. 'Re ĩhāimana u'āsi mono si ma tō āma 're 'ra za'ra.

¹⁴ Dama 'Re ĩhāimana u'āsi mono wasu'u'wa da hā, wa'rata 're sāmra mono da, ma tō sihāiba. Simizawī pese uptabi di. ĩsimiroti hā wē uptabi di. 'Re ĩhāimana u'āsi mono 'ra wa, ōhō si 're morī wē uptabi di. Misire ĩ'ra hā. Ōhō si, waihu'u pese uptabi di. Wa norī hā wa tō wasiwi waihu'u za'ra ni, 're ĩmorī wē uptabi na. ĩwaihu'u pese na zama, wa tō waihu'u za'ra ni.

¹⁵ Ta hā ma tō Zuwā Batita hā te te dama 're wasu'u, 'Re ĩhāimana u'āsi mono 'ra na, da te 're waihu'u za'ra mono da. Āne ĩtēme wisi wamhā, te dama 'mahā, Zuwā Batita hā:

— Ōhōta aibā hā te wei mo. ĩwana, wa tō te aima 're wasu'u za'ra wa'wa: “Ō hā ĩza'u si wei morī nherē, ĩma pire di. E marī wa. ĩpoto ō ré, 're morī u'āsi wa.” — Āne ma tō dama rowasu'u, Zuwā Batita hā.

¹⁶⁻¹⁷ Duréihā wahī'rada Mozési hā ma tō te te dama 're roti, 'Re ĩhāimana u'āsi mono nhimiroti zarina. 'Re ĩhāimana u'āsi mono te te tāma ĩwaihu'uzéb zarina, ma tō te te dama 're roti, āma 're danomro wē mono da. Zezu Cristu hā ma tō ōhō si te te dama 're waihu'u, dawasété nherē, 'Re ĩhāimana u'āsi mono te te 're ĩda'azawi pese mono zém na. Simizawī pese uptabi wa, te te 're wa'apawaptob u'āsi, āma 're wanomro wē mono da, Zezu Cristu hā.

¹⁸ Ti'ai āma 're Īdanomro mono hā datōmo na da te 're 'madâ'â za'ra mono ō di, 'Re Īhâimana u'âsi mono hā. Ōhō si, ma tō Timama hā 'madâ, siré 're simasisi u'âsi zahuré mono wa, Timama me. Ī'ra hā misire, 'Re Īhâimana u'âsi mono 'ra hā. Ta hā ma tō te te dama 're wasu' u'âsi Timama hā, da te 're waihu' u' za'ra mono da.

Zuwā Batita te te dama 're ĩrowasu' u' mono zé wasu' u' Marcusi 1.1; Rucasi 3.2-3

¹⁹ Tawamhā aibā norī hā ma tō aihutu, Zuwā Batitaha u, 'Re Īhâimana u'âsi mono ma, da'āma romhuri' wa norī hā. Tipawapto' wa norī me, ma tō ĩtēme aihutu, réwita norī me. Zudezu norī ma roti' wa norī hā te te satōrī za'ra wa, ma ĩtēme aihutu, Zeruzarē hawi.

Tawamhā ĩtēme sihutu wamhā, te siwi sadanharī za'ra, āne:

— E 'wa hā, a hā.

²⁰ Taha wa, te āne tāma siwasu' u' za'ra:

— Wa hā Cristu ō di, 'Re Īhâimana u'âsi mono te te ĩpisudu hā, Danho'reptui' wa da.

²¹ Te duré siwi sadanharī za'ra:

— E 'wa hā bété, a hā. E a hā, Eriasi apā aihâiwa' udu.

Tawamhā asa te duré tāma nharī za'ra:

— Mare di. Ta hāi ō di, wa hā.

Taha wa, te duré siwi sadanha:

— E a hā, 'Re Īhâimana u'âsi mono zadawa wasu' u' wa zō, 're Īdanhimipari za'ra mono, te 're aimo.

Tawamhā asa te duré tāma nharī za'ra:

— Mare di. Wa hā, ta hāi ō di.

²² Tawamhā te duré siwi sadanha:

— E 'wa hā bété, a hā. Ma'āpé wei wama asiwasu' u' su' u' za'ra na, wa te aiwaihu' u' za'ra da, wei wazatōrī' wa norī ma, wa te aiwasu' u' za'ra da.

²³ Taha wa, te oto tāma siwasu' u' za'ra, āne:

— Wa hā a'ubuni wi, dama roti' wa. Āne, wa tō te dama 're rob' mahârâ: "Wanhib' apito zō, te za bâdâdi hā ĩmana 'râmi asiwi ĩsa' ra wa'aba mo, awa'awi da." Āne ma tō wahi' rada Iza'iza hā te te dama 're roti aré, 'Re Īhâimana u'âsi mono zadawa wasu' u' 'rata 'wa hā. Tane wa tō duré wa hā te dama 're roti, ĩsimiroti zarina. — Āne te Zuwā Batita hā tāma siwasu' u' za'ra, aibā norī ma.

²⁴⁻²⁵ Tawamhā asa te tāma nharī za'ra, āne:

— Ma tō wama asiwasu' u' za'ra. A hā, Cristu ō di. A hā, Eriasi ō di. A hā, 'Re Īhâimana u'âsi mono zadawa wasu' u' wa zō, 're Īdanhimipari za'ra mono ō di. E marī da, te bété â dawabzuri hā dama 're ĩ'ab' manharī mo, a hāi ō nherē. — Āne te tāma nharī za'ra.

²⁶⁻²⁷ Tawamhā Zuwā te asa tāma nharī za'ra, āne:

— Ā na si, wa tō â dawabzuri hā te dama 're ab' manharī. Tane nherē, ĩza' u' si we ĩmorī hā 'Re Īhâimana u'âsi mono te te dama 're sadawa wasu' u' mono da, ma tō wei wi. Zahadu sa'rese za'ra wa'aba ō di, a norī wa'wa hā. Ta hā ĩma pire wa, ĩpara'uza wasisizé te tāma wasihu waihu' u' ō di. — Āne Zuwā Batita hā te tāma siwasu' u' za'ra.

²⁸ Āne romhâimanazé hā Betânha na 'ri wa'otō nhisi āma Zodā zara niwī â dawabzuri te te dama 're ĩ'ab' manharīzéb āma hā.

'Re ĩhâimana u'âsi mono 'ra wasu' u' Marcusi 1.10; Rucasi 3.22

²⁹ Tawamhā awé ma tō Zuwā Batita hā Zezusi hā tisā, ĩtēme morī ré. Te te sāmri wi, te dama 'mahā, āne:

— Ōhōta te we oto mo, Pone'ērebā hā, 'Re Īhâimana u'âsi mono te te ĩpisudu hā dawasédé hā te te dama 're aparī mono da.

³⁰ Īwana wa tō āne hā aima wasu' u' za'ra wa'wa: "Īza' u' we ĩmorī hā ĩma pire di. Īpoto ō ré, 're morī u'âsi wa, ĩma pire di." Āne, wa tō aima rowasu' u' za'ra wa'wa.

³¹ Wa hā te duré waihu' u' ō di aré, 'Re Īhâimana u'âsi mono te te ĩpisutu na hā Danho'reptui' wa da. Tazahā, wa norī hā Izarazéhé nhihudu hā wa te waihu' u' za'ra da, wa â dawabzuri hā te dama 're ab' manharī.

³²⁻³³ — ĩsi' uihā na, wa hā te duré waihu' u' ō di. 'Re Īhâimana u'âsi mono, ma tō ĩma waihu' u', te te ĩpisudu hā. Āne te ĩma wasu' u': "Ītēme wa za satō ĩpé'ēzani hā, te ĩpisutu u. ĩhawi morī ō di za. Ī'rata te za 're sāmra u'âsi. A hā te za āma ĩ'madâ. Āma 'madâ'â wamhā, te za oto ĩwaihu, ō hā te ĩpisutu na, ĩpé'ēzani te te dama 're anhomri mono da." Āne ĩzatōrī' wa hā te ĩma wasu' u'. Tō sena ma tō ĩma rowasu' u'. Wa hā wa tō āma 'madâ. Ma tō we ĩtēme mo, hāiwa hawi utu' u' ne, 'Re Īhâimana u'âsi mono pé'ēzani hā. ĩhawi morī ō di.

³⁴ Wa hã wa tô âma 'madâ. Tô sena, wa aima rowasu'u za'ra wa'wa. Ô hã, 'Re İhâimana u'âsi mono 'ra. — Âne te dama wasu'u, Zuwâ Batita hã.

Aibâ norî hã, Zezusihi âma te te İsasômri na'rata zahuré zé wasu'u

³⁵ Tawamhã awê te duré Zuwâ Batita hã wasiré tihâiba. Wa norî hã İsiré 're wane wa, wa İsiré aima'wara ni. Tawamhã wasiré wasimasab ré, ma Zezusi hã ro'razâ.

³⁶ Tawamhã, Zuwâ Batita hã te te 'madâ'â wamhã, te dama 'mahâ:

— Ôhõta Pone'ërebâ, 'Re İhâimana u'âsi mono hawi we İmorî.

³⁷ Tawamhã Zuwâ Batitaha mreime hã wa te wapari wa, wa tô oto wanem ni, Zezusihi zarina.

³⁸ Taha wa, Zezusi hã ma wei wazô aipi'ra. Te wei wa'madâ. Tawamhã te wama tinha, âne:

— E marî zô, te we ane wa'wa.

Tawamhã asa wa tâma nharî ni:

— Rowahutu'wa, asâmrazé hã wa te waihu'u da, wa wei wanem ni.

³⁹⁻⁴⁰ Tawamhã Zezusi te wama tinha:

— Oto pé İzaprõni aba, İnamrazé hã sabui wa'aba da. Taha wa, wa oto İme wanem ni, İsamrazéb u. Wasihutuzéb u ma tô bâdâ hã we tinho're za'a. Tawamhã bâtâ na wa İ'rata aimasisi ni, Âdéréhé me. Simahã no, Âdéré hã.

⁴¹ Tawamhã tidub'rata zô te mo, Âdéré hã. Te te sãmri wamhã, âne te tâma rowasu'u:

— Danho'reptui'wa hã wa tô sôpêtê ni, 'Re İhâimana u'âsi mono te te İpisudu hã. Danho'reptui'wa hã ta hã "Cristu", damreme amo na hã.

⁴² Tawamhã ma tô Zezusihi u we saprõ apâ. We te te İtême âwisi wamhã, Zezusi te Sima hã 'madâ. Te tâma tinha:

— A hã Sima, Zuwâhã 'ra. Âhâna wa za asisi na saprî. Sepasi na asisi hã za oto. — Âne te tâma tinha. Âma İsaprî hã Pedru na İsisi hã.

Zezusi hã, Piripi norî te te İpisutu na'rata zahuré zé wasu'u

⁴³ Tawamhã awê Darireza na danhipti'a nho'õmo nhisi u morî da, te Zezusi hã sina ropisutu. Taha wa, wa İsiré oto ai'aba're ni. Wasi'aba'rei ré, wa tô aibã hã sôpêtê za'ra ni, Piripi na İsisi hã. Tawamhã Zezusi te tâma tinha:

— We aimorî, İsiré 're aimorî da oto.

Taha wa, te oto İsiré mo.

⁴⁴ Piripihî za'ru hã Besada na 'ri nhisi hã. Tame te duré Âdéré norî hã 're simasisi zahuré, Pedruhu me.

⁴⁵ Tawamhã Piripi te Natâna'éhé zô mo. Te te sãmri wamhã, âne te tâma tinha:

— Aibã hã wa tô sabu za'ra ni, wahi'rada Mozési te te âma İrob'ui'ére siro hã romhã ré, 'Re İhâimana u'âsi mono zadawa wasu'u 'rata 'wa norî zama İsa'u te te âma İrob'ui'ére za'ra hã. Ta hã Zezusi, Nazaré hawi we İmorî hã, Zuzéhé 'ra hã. — Âne te Piripi hã tâma rowasu'u.

⁴⁶ Tawamhã te Natâna'é hã asa tâma tinha, âne:

— Oro Nazaré hawi İwê hã wei morî õm ne.

Tawamhã Piripi asa te tâma tinha:

— We aimorî, wanem hã, sabu da.

Taha wa, te apâ İtême saprõ.

⁴⁷ Tawamhã te te sãmri wi, te Zezusi hã tâma tinha, Natâna'éhé ma, âne:

— Ôhõta te wei mo, İzarazéhé nhihudu uptabi hã 're İmorî wê uptabi hã. Sadawa nhipese âna te 're mo.

⁴⁸ Taha wa, te Natâna'é hã asa tâma tinha:

— E niha ma tô İwaihu.

Taha wa, te duré Zezusi asa tâma tinha:

— Piripi hã te te ai'mahârâ õ ré, wa tô ai'madâ, pidera wede 'rowi asâmra ré.

⁴⁹ Tawamhã Natâna'é asa te duré tâma tinha:

— Rowahutu'wa, a hã 'Re İhâimana u'âsi mono 'ra. A hã uburé İzarazéhé nhihudu norî nhîb'apito.

⁵⁰⁻⁵¹ Tawamhã Zezusi asa te duré tâma tinha:

— Tane tô. Wede 'rowi asâmra ré, te aiwaihu'u wa, ma tô asina İwaihu, asina İwapari wa. İwaihu'u pese wa, ma tô İ'âma atob'uzu. Niwapsi te za marî hã İ'madâ, İwaihu'u pese na marî hã te aima İwaihu'uzém nhîpai u. Asõ'a wa'aba, te za hâiwa hã we 'ridawa, İnho'õmoi baba. Tawamhã siwa'râmi te za nasi we İtême ai'aba're hâiwa hawi, 'Re İhâimana u'âsi mono ma romhuri'wa norî hã, dasiré İpoto u hã. — Âne ma tô tâma waihu'u sirõmo za'ra, Zezusi hã.

2

Cana āma dasina damrozé wasu'u

¹ Tawamhā maparane ma tō wa'āma timara. Taha pari, dasaihurizé hā ma tō 'manharī za'ra ni, dasina damrozém na hā. Cana na 'ri wa'ōtō nhisi āma, ma tō 'manharī za'ra ni. Darireza na danhipti'a nho'ōmo nhisi āma, Cana hā. Zezusihi na hā te tame dame tihāiba.

² Zezusihi zō zama, te tahārā ni, ĩsiré 're ĩwanomro mono norī zō zama, dasina damro u wasi'aba'ré da. Taha wa, wa duré wa norī hā dame asimro ni.

³ Tawamhā, ma tō uwa 'ru 'rāi wa'u ĩsé hā da'āma ai'utō, da te 'mahāpārī mono ō ré. Taha wa, te Zezusihi ma ĩna hā tinha, āne:

— Uwa 'ru 'rāi wa'u ĩsé hā ma tō da'āma ai'utō, da te 'mahāpārī mono ō ré.

⁴ Tawamhā Zezusi asa te tāma tinha:

— Āté a hā ĩma waihu'u ō di za, marī te ĩ'manharī da hā. Bādā zahadu ĩwa waptā'ā ō di, āne te ĩ'manharī da hā.

⁵ Taha wa, te ĩna hā romhuri'wa norī ma tinha, āne:

— Tiha te te aima waihu'u za'ra wa'aba wamhā, ma'āpé ĩmreme hā 'madā'ā pese za'ra wa'aba za. — Āne te tāma nharī za'ra.

⁶ Tame te piza hā 're simasa ētē 'manharī hā, ā ré hā 6 na ĩhāiba hā. Nima norī hā 80 na ā za'ratazé hā, duré nima norī hā 120 na ā za'ratazé hā. 'Re wasaihuri mono ō ré hā, wahi'rata norī nhimiroti zarina, wa 're wanhimisō za'ra, wa norī hā zudezu wa. Taha da, te 're simasa, piza ĩsa'ēne hā.

⁷ Tawamhā Zezusi te romhuri'wa norī ma tinha, āne:

— Ā hā nasi amrami za'ra wa'aba, piza 're sa'wari za'ra wa'aba da. 'Masisi za'ra wa'aba.

Tawamhā ma tō siwi 'masisi, piza 'remhā ā hā.

⁸ Tawamhā Zezusi te tāma nharī za'ra, āne:

— Ma'āpé, ā hā oto amrami za'ra wa'aba, danhipi na dawada'uri'wai u 'wasari aba da, te te téiwa pibu da.

⁹⁻¹⁰ Tawamhā ma tō ĩtēme 'wasa, te te téiwa da. Te te téiwai wamhā, ā si ō di oto. Ma tō sirob'rāi wa'u. Nima hawi uwa 'ru 'rāi wa'u ĩsé hā te te waihu'u ō di, danhipi na dawada'uri'wa hā. Romhuri'wa norī si ma tō waihu'u za'ra. Tawamhā te te téiwa wamhā, sina ĩmro zahuré zō, te hā, aibā zō. Taha wa, te āne tāma tinha:

— E niha ma bété ĩsei uptabi si dawi ité, wasaihuri na'rata hawi, wa te āhuri tō da. Dasaihuri na'rata hawi, te ĩsei uptabi hā da te dama 're sōmri za'ra, da te 're āhuri mono da. Sa'ētē na da te 're āhuri mono wapsi, te za ĩwa'u zeĩ prā hā da te dama 're sōmri za'ra. Tanei ō di, a hā. Nimosi ma tō ĩsei uptabi hā dama ĩ'ru, da te āhuri da. — Āne te aibā ma tinha, danhipi na dawada'uri'wa hā.

¹¹ Āne hā marī dama ĩ'manharī waihu'u'ō hā te te dama ĩ'manharizém na ma tō Zezusi hā dapawaptom na sāna'rata, tiwaihu'u pese na, Cana na 'ri nho'ōmo nhisi āma. Darireza na danhipti'a nho'ōmo nhisi 'remhā, Cana hā. Taha wa, waihu'u pese wa, wa tō wasina umnhasi za'ra ni, ĩsiré 're ĩwanomro mono norī hā.

¹² Tawamhā Capana'u na 'ri nho'ōmo nhisi u te oto mo, Zezusi hā. ĩna zama te ĩsiré mo. ĩno norī zama te ĩsiré ai'aba'ré. Wa norī zama, wa ĩsiré ai'aba'ré ni, ĩsiré 're wanomro mono wa. Tawamhā, wasihutu wamhā, syry na wa tame asimro ni.

*'Re ĩhāimana u'āsi mono nhorōwa hawi, Zezusi te te ĩdazate mono zé wasu'u
Mateusi 21.12-17; Marcusi 11.15-19; Rucasi 19.45-48*

¹³ Romhuture di oto, zudezu norī te, dato hā da te 're ĩ'manharī za'ra mono zéb u hā, 'Re ĩhāimana u'āsi mono, Ezitu hawi te te ĩdawaibuzém na āma dasipo're pu'u za'ra da, Pascowa na dato nhisi hā. Tawamhā romhuture wa, datoi u te oto mo Zeruzarē u, Zezusi hā. Wa norī zama, wa duré ĩsiré ai'aba'ré ni.

¹⁴ Zeruzarē āma te 'ri za'ēne hā 're sa, 'Re ĩhāimana u'āsi mono āma 're ĩdawata za'ra mono zé hā. 'Ri 'wawi wa'ra 're, te aibā norī hā 're si'ubumro. Ta norī hā powawē te te dama 're wede za'ra, duré pone'ērebā, duré utu'u. ĩhāiba amo norī hā te duré rob'uiprazém na te te dawi āma 're saprī za'ra.

¹⁵ Tawamhā Zezusi hā aibā norī hā te te 'madā'ā za'ra wamhā, ma tō marī hā sada 'manharī za'ra, wedenhorō na te te āma sate mono da, rob u. Tawamhā ma tō te te sate, ĩsimizama ré. Wedeza hā ma tō duré tiwi pizari za'ra, rob'uiprazé hā te te tiwi sāmra za'ra da, te te dawi āma 're ĩsaprī za'ra mono norī wi.

¹⁶ Te duré tāma rob'ru za'ra, utu'u wede'wa norī ma, āne:

— Mo oto rob u sani za'ra wa'aba. 'Ri hā ā hā, ĩmama āma 're ĩdawata za'ra mono zé. Āme dama 're rowede za'ra wa'aba mono ō di za oto. — Āne te tāma nharī za'ra.

¹⁷Taha wa, wa tó âma wapo're pu'u za'ra ni, 'Re ìhâimana u'âsi mono zadawa wasu'u wai mreme u'éré na. Âne duréihâ ma tó wahi'rada hâ tinha, 'Re ìhâimana u'âsi mono ma: "Asôrówa da hâ marĩ na te romhuri za'êté wa, wa tó ìwa âma waze, asawi te." Âne ìmreme na wa tó wapo're pu'u za'ra ni.

¹⁸Taha wa, te dama ìpire norĩ hâ tâma nharĩ za'ra, âne:

— E 'wa sadawa para, ma tó ìdazate mo, rob u. 'Re ìhâimana u'âsi mono zadawa para, sate mono wamhâ, e marĩ te za ì'manha, dama ì'manharĩ waihu'u'ô hâ wa te âma aiwaihu'u za'ra da.

¹⁹Tawamhâ Zezusi te asa tâma nharĩ za'ra, âne:

— Marĩ hâ wa za aima wasu'u za'ra wa'wa, âma ìwaihu'u za'ra wa'aba zéb da hâ. Â hâ 'ri hâ asiwi sâmbra aba wamhâ, wa za apâ 'ri su'u. Bâdâ misi te za ì'âma mo, apâ te 'ri ré hâ. — Âne te tâma siwasu'u za'ra.

²⁰Tawamhâ asa te tâma nharĩ za'ra:

— E niha te za ì'ri su. E niha bâdâ misi te za ai'âma mo, apâ 'ri ré, a hâ. Â hâ da te dasiwi 'ri su'u ô di, 'ri za'êté wa. Wahub ahâ na ma tó da'âma tiwahu, da te dasiwi 'ri za'ra ré hâ. 46 na ma tó âma dawu tiwahu. — Âne asa te Zezusihi ma nharĩ za'ra.

²¹'Ri te te wasu'u wamhâ, tihâiba te wasu'u, Zezusi hâ. Sô'awi siwasu'u ô wa, ìmreme hâ dama pibu prâ za'ra di.

²²Ab're hawi hâiwa'utu wapsi, wa za âma wapo're pu'u za'ra ni, apâ za te te ì'ri wasu'u na hâ. Wa za wasima rowasu'u za'ra ni, âne: "Tô sena na ma tó Zezusi hâ tihâiwa'utuzém na dama siwasu'u. Tô sena na ma tó duré wahi'rata norĩ hâ romhâ ré ìhâiwa'utuzém na rob'u'éré sirômo za'ra ìbâihâ na, 'Re ìhâimana u'âsi mono zadawa wasu'u'wa norĩ hâ." Âne, wa za wasima rowasu'u za'ra ni.

Zezusihi ma, uburé danhimirosa'rata na tâma ìdawaihu'u pese zé wasu'u

²³Tawamhâ Zezusi hâ zahadu Zeruzarê âma hâimana ré, ma tó Pascowa na dato nhisi hâ dasiwi 'manharĩ ni. Tame sâmbra ré, ma tó marĩ dama ì'manharĩ waihu'u'ô hâ te te dama 're ab'manharĩ wê, tiwaihu'u pese na, 'Re ìhâimana u'âsi mono we te te ìsatôri na, da te waihu'u za'ra da. Taha wa, marĩ dama ì'manharĩ waihu'u'ô hâ danho'a te te dama 're ab'manharĩ mono wê te, ma tó da'ahâ na saze za'ra ni.

²⁴⁻²⁵Tane nherê, da te dasina ì'umnhasi za'ra na, te te sina damreme zazei ô di, Zezusi hâ. E marĩ wa. Uburé danhimirosa'rada hâ tâma waihu'u pese wa. Ni'wa ì'upana te te tâma 're da'awaihu'u mono ô di, Zezusihi ma. Si'uihâ na ma tó te te 're da'awaihu'u, danhimirosa'rata na. Taha wa, tô sena da te dasina umnhasi za'ra ô wa, te te sina damreme zazei ô di, Zezusi hâ.

3

Zezusi hâ, Nicodemosihi ma, te te ìnharizé wasu'u

¹Aibâ hâ te 're hâimana, Nicodemosi na ìsisi hâ. Ta hâ roti'wa, wasiré zudezu. Parisezu na, wa tó wa te 're sisi za'ra, wahi'rata norĩ nhimiroti, parisezu norĩ siré te te 're 'madâ'a pese mono wa.

²Ta hâ ma tó Zezusihi u wi, barana. Ìtême wisi wamhâ, âne te tâma tinha:

— Rowahutu'wa, 'Re ìhâimana u'âsi mono hâ ma tó wei watême asatô, wama 're rowasu'u mono da. Âne wa tó ai'âma waihu'u za'ra ni. Taha zadawa para, ma tó marĩ hâ dama ì'manharĩ waihu'u'ô hâ dama 're ì'ab'manharĩ wê u'âsi mo, da te âma aiwaihu'u za'ra da, we te te asatôri na. Ta hâ te te aima 're waihu'u mono ô 'wa'âhâ, a hâ ìwaihu'u'ô hâ dama 're ab'manharĩ mono ô di aré. — Âne te Zezusihi ma tinha.

³Taha wa, te Zezusi hâ asa tâma tinha:

— Tô sena, wa aima waihu'u. Dapê'ê 're, 're dapoto téb za'ra mono ô wamhâ, 'Re ìhâimana u'âsi mono nhîb'a'uwê 're danomro mono ô di za.

⁴Tawamhâ Nicodemosi te duré asa tâma tinha:

— E niha te za aibâ hâ si'îhi nherê, tipoto té. E niha te za tina dub're apâ âzé, duré apâ pototo téb da. — Âne te Zezusihi ma tinha.

⁵⁻⁶Tawamhâ Zezusi te duré asa tâma tinha:

— Tô sena, wa aima waihu'u za'ra wa'wa. Ai'uté hâ dama 're pototo za'ra mono wamhâ, 'Re ìhâimana u'âsi mono nhîb'a'uwê, 're nomro sirômo mono ô di za. Tipê'ézani hâ te te dama 're anhomri mono wapsi, te za 're dapoto téb za'ra, dapê'ê 're. Tawapsi te za oto ìsib'a'uwê si 're danomro. 'Re ìhâimana u'âsi mono hâ 're ìdanomro wasété mono hawi te te 're da'a'upsôï mono wa, duré Tipê'ézani hâ te te dama 're anhomri mono wapsi, te za oto dapê'ê 're, 're dapoto téb za'ra. Tawapsi te za oto duré ìsib'a'uwê 're danomro. Dapê'ê 're, 're dapoto téb za'ra mono ô wamhâ, 'Re ìhâimana u'âsi mono nhîb'a'uwê, 're danomro mono ô di za.

⁷ A hã, aipoto tém neza. Āne te aima nharī wa, Īma nharī ō di za, āne: “E niha wa za ĩpoto té.”

⁸ Rowa'u wa za aima wasu'u, waihu'u da. Rowa'u hã te te 're rowapōrī mono wamhã, ĩpupu'u si wa wa te 're wapari za'ra. ĩpupu'u na si wa za wa te 're waihu'u za'ra, 're ĩwairébé mono zém na hã. Uihã na te rowa'u hã 're wairébé, nimomo 're wa'u'u 'rãsutu za'ra mono da. E ma hawi te rowa'u hã 're wairébé na'rata. E momo te duré 're wa'u'u 'rãsutu za'ra. Wama waihu'u pese za'ra ō di. Tane dama waihu'u pese ō di, dapē'ē 're, 're ĩdapoto téb za'ra mono zé hã. Dama waihu'u pese ō nherē, te za 'Re ĩhãimana u'ãsi mono hã te te dama 're anhomri, Tipē'ēzani hã dapē'ē 're, 're ĩdapoto téb za'ra mono zém na, da te dasina 're waihu'u za'ra mono da. — Āne te Zezusi hã tãma rowasu'u.

⁹ Tawamhã Nicodemosi te duré asa tãma tinha:

— E niha te za Tipē'ēzani hã te te dama 're anhomri, dapē'ē 're, 're dapoto téb za'ra mono da.

¹⁰ Taha wa, te duré Zezusi hã asa tãma tinha:

— A hã ĩzarazéhé nhihudu norī ma, rowahutu'wa. Tane nherē, ĩnhimirowasu'u hã aima pibui prã ti. E niha waihu'u ō di bété.

¹¹ Tô sena, wa aima waihu'u za'ra wa'wa. Wa norī hã marī hã wama waihu'u pese wa, duré wa te 'madã'ã wa, wa āne wa te dama 're wasu'u. Tane nherē, wa te aima 're rowasu'u za'ra wa'aba mono nherē, āma 're wazaze za'ra wa'aba mono ō di.

¹² Ti'ai āma romhãimanazé hã, wa tô aima wasu'u za'ra wa'wa. Tane nherē, te aima wasu'u za'ra wa'aba nherē, āma ĩzaze za'ra wa'aba ō di. E niha te za tawamhã hãiwa āma da te 're ĩwaihu'u za'ra mono zéb da hã te aima wasu'u za'ra wa'aba wamhã, āma ĩzaze za'ra wa'wa. Áté āma ĩzaze za'ra wa'aba ō di za.

¹³ Ni'wa hã hãiwa u sébré ō di, apã wei morī da, hãiwa āma romhãimanazé hã te te dama 're wasu'u mono da. Wa hã ti'ai āma dasiré ĩpodo hã ĩsiwaprosi, wa we hãiwa hawi mo, te dama 're rowasu'u mono da.

¹⁴⁻¹⁵ — Duréihã Mozési hã ma tô a'ubuni wi wahi ne 'manharī hã sasō, ĩsi'uwazi waipo 'manharī hã, wedewaré na sa'o da. Ta hã wahi te te ĩsari za'ra hã te te 'madã'ã za'ra wamhã, ma tô tizéptã'ã za'ra. Dã'ã za'ra ō di. Tane te za duré wa hã dasiwi ĩzasōmri ni, wedepo'o nnonhi'rãmi na ĩza'o da. Tawamhã wa za dazada dãrã. E marī da. Danho 'reptui'wa na da te dasina 're ĩ'umnhasi za'ra mono wa, 're dadã'ã za'ra mono āna, 're dasi'ubumroi u'ãsi mono da, hãiwa āma, 'Re ĩhãimana u'ãsi mono 'rata.

¹⁶ 'Re ĩhãimana u'ãsi mono hã te te 're da'azawi pese uptabi. Taha wa, ma tô ti'ra hã misi nherē, we tisō, dazada dã'ã da. Tawamhã ĩ'ra, da te dasina 're umnhasi za'ra mono wamhã, dadã'ã āna te za hãiwa āma ĩ'rata 're dasi'ubumroi u'ãsi. Ropipa āma ĩsiti 're dasi'ubumroi mono ō di za.

¹⁷ Dapo're'ō u'ãsi 're danomro mono wa, te te 're da'ahã za'ra mono da, we te te satōrī ō di ti'ra hã, 'Re ĩhãimana u'ãsi mono hã. 'Re ĩdanomro wasété mono hawi te te 're da'anho'reptui mono da si, ma tô we satō, ti'ai u.

¹⁸⁻¹⁹ — Ni'wam norī hã ĩ'ra te te sina 're umnhasi za'ra mono wamhã, e 'Re ĩhãimana u'ãsi mono hã te za te te tãma 're nharī za'ra, āne: “Aiwē'ō za'ra wa'aba wa, wa za te 're aihã za'ra wa'wa.” Āne na hã te te tãma 're nharī za'ra mono ō di za. Tizazei'ō'wa norī ma si te za āne na te te tãma 're nharī za'ra, ĩ'ra te te sina 're umnhasi za'ra mono ō wa. Duré tiwasédé te te sima 're sawi pese za'ra mono wa, te za āne na te te tãma 're anharī. 'Re ĩmorī wē uptabi hã ti'ai u ma tô wei mo, rowa'a ĩwē hã. Ta hã wē nherē, da te dasiwi 're sawi pese za'ra mono ō di. Dapo're'ō u'ãsi 're danomro mono wa, te robra si da te dasima 're sawi pese za'ra.

²⁰ Ni'wam norī hã 're nomro wasété u'ãsi mono wamhã, te za 're ĩmorī wē uptabi hã te te 're 'ruiwapari za'ra, rowa'a ĩwē hã. Tawamhã ĩtēme 're nomro mono ō di za, ĩsimirosa'rata wasété na te te 're awaihu'u mono wa, 're siséb za'ra mono ō'umnhasite.

²¹ 'Re ĩnomro wē mono norī si te za ĩtēme 're nomro, rowa'a u. E marī da. 'Re ĩhãimana u'ãsi mono nhimiroti si te te 're ĩ'madã'ã pese mono na, te te 're awaihu'u mono da. — Āne ma tô Zezusi hã Nicodemosi hã waihu'u.

Zezusi norī wasu'u, Zuwã Batitaha wasu'u me

²² Tawamhã Zezusi hã te mo, Zudeza na danhipti'a nho'ōmo nhisi u. Wa norī hã wa ĩsiré ai'aba'ré ni. Wasihutu wamhã, tame wa a'ã wahãimana za'ra ni. Tame te Zezusi hã á dawabzuri hã dama ab'manha.

²³⁻²⁴ Zuwã Batita hã te duré te te te dama 're ab'manharī á dawabzuri hã, wanhiti. Sarī na 'ri nhisi 'rata á hã, sa'ētē di. Taha wa, te tame a'ã nhamra, Eno na á nhisi 'rata, Zuwã Batita hã. Tawamhã te nasi ĩtēme dasito, á dawabzuri hã te te dama 'manharī da. Zahadu Zuwã hã danhib'apito te te 'rui ō di, da te dasiwi sērē da, dazazéb 're. Taha wa, te zahadu te te dama 're ab'manharī.

²⁵ Tawamhā aibā me te timreme na ai'wapé, Zuwāhā siré 're ĩnomro mono norī hā. Ā dawabzuri wasu'u na te ai'wapé za'ra.

²⁶ Taha wa, ma Zuwā Batitaha tēme aimasa, ĩsiré 're ĩnomro mono norī hā. Āne te tāma wasu'u za'ra:

– Rowahutu'wa, Zoda zara niwī aihāimana ré, ma tō Zezusi hā we atēme wi. Wisi wi, ma tō dama ĩwasu'u, 'Re ĩhāimana u'āsi mono te te ĩpisutu na Danho'reptui'wa da. E niha te bété ō hā te te duré dama 're ab'manharī, ā dawabzuri hā. Zezusihi u si te oto aihīni 're danomro. – Āne te tāma rowasu'u za'ra.

²⁷⁻²⁸ Tawamhā Zuwā asa te tāma nharī za'ra, āne:

– 'Re ĩhāimana u'āsi mono si te za te te dama 're apisutu romhuri hā, da te tāma 're romhuri za'ra mono da. Wa tō aré aima ĩsiwasu'u za'ra wa'wa, āne: “Ta hā ma tō datēme ĩzatō ĩwana, Danho'reptui'wa te dama 're wasu'u mono da. Wa hā, Cristu ō di. Danho'reptui'wa da, te te ĩpisutu ō di.” Āne na hā aima ĩsiwasu'u za'ra wa'aba zém na hā ma tō aré ĩwapari za'ra wa'wa. – Āne Zuwā Batita hā te tāma siwasu'u za'ra.

²⁹ Tawamhā aibā ĩmro siwadi na ma tō sina simiré'é, āne:

– Dasina 're damro za'ra mono wamhā, aibā hā oto mro wa, ĩsiwadi hā toi uptabi di. Aibā hā ĩmro hā tito na siwasu'u wamhā, toi uptabi di, ĩsiwadi hā. Tane duré wa hā, ĩtoi uptabi di. E marī wa. Da'ahā na oto 're danomro mono wa, Zezusihi u.

³⁰ Taha wasu'u hā, wasu'u za'ētē uptabi di za oto, dama. Wa hā oto ĩwasu'u syryre di za. Tane nheré, ĩma rowē uptabi di. – Āne te tāma siwasu'u za'ra, Zuwā Batita hā.

Hāiwa hawi we ĩmorī si, uburé dama ĩpire uptabi wasu'u

³¹ Hāiwa hawi we ĩmorī hā, uburé dama pire uptabi di. Wa norī hā ti'ai āma a'uwē wa, marī hā ti'ai āma, wa te 're ĩ'madā'ā za'ra mono si, wa wa te dama 're wasu'u za'ra. Hāiwa hawi we ĩmorī si, uburé dama pire uptabi di.

³² Hāiwa āma uburé te te 're ĩ'ab'madā'ā mono na, duré te te 're ĩ'awapari mono na, te za sena na te te dama 're wasu'u. Taha wa, te te dama āma 're arowasu'u mono wamhā, mreme pire uptabi di. Tane nheré, aihīni ĩmreme hā da te 're saze za'ra mono ō di.

³³ Da te 're saze za'ra mono wamhā, āne te za da te dasima 're wasu'u za'ra: “Tō sena, ma tō t'ra na te te dama 're wasu'u, 'Re ĩhāimana u'āsi mono hā.” Āne te za ĩsazei'wa norī hā te te sima 're rowasu'u za'ra.

³⁴ T'ra we te te satōrī wamhā, ma tō Tipē'ēzani hā tāma tisō, ĩré 're morī u'āsi da. Taha wa, te Timama nhimiroti si te te dama 're wasu'u.

³⁵ T'ra te te 're sawi pese uptabi, 'Re ĩhāimana u'āsi mono hā. Tawamhā ma tō pisutu, uburé dama pire uptabi da. Duré uburé marī ma pire da, ma tō t'ra hā pisutu, hāiwa āma ti'ai āma zama.

³⁶ ĩ'ra hā Danho'reptui'wa na da te dasina 're umnhasi za'ra mono wamhā, dama 're rowē za'ra mono di za. 'Re dadā'ā za'ra mono āna, te za 're dasi'ubumroi u'āsi ĩ'rata, hāiwa āma. ĩmreme, da te 're wapari za'ra mono ō wamhā, dama 're rowē za'ra mono ō di za. 'Re ĩhāimana u'āsi mono nhimihāzé hā te za da te dasina 're waihu'u u'āsi za'ra, ĩ'ra mreme hā da te 're wapari za'ra mono ō wa.

4

Zezusi hā pi'oi wi, ā te te ĩwaptērēzé wasu'u

¹ Tawamhā parisezu norī hā ma tō Zezusihi wasu'u hā wapari za'ra. Āne ma tō dasima wasu'u za'ra ni: “Da'umro na si te oto 're dahāimana za'ra, Zuwā Batitaha nhimiroti 'madā'ā'wa hā. Da'umro na si te ā dawabzuri hā te te dama 're ab'manharī. Zezusihi nhimiroti 'madā'ā'wa si te oto da'ahā na 're dahāimana za'ra.”

² Āne, da te dasima rowasu'u za'ra nheré, si'uihā na te te dama 're ab'manharī mono ō di, Zezusi hā. Wa norī si, wa ĩsadawa para wa te dama 're 'manharī za'ra, ā dawabzuri hā.

³ Tawamhā Zezusihi āma danhimirowasu'u hā parisezu norī u ĩwaptā'ā na te te waihu'u wamhā, te ĩsiti timorī za'ra, Zudeza na danhipti'a nho'ōmo nhisi hawī. Apā te mo, Darireza na danhipti'a nho'ōmo nhisi u. Wa norī hā wa ĩsiré ai'aba're ni, ĩsiré 're wanomro mono wa.

⁴⁻⁶ Tawamhā Darireza u morī wamhā, ma tō sima wē, awa'awi dawa'wai baba te te ro'razāri da. Taha wa, wa tō samaritanu norī ro wa'wai baba, ro'rahāri za'ra ni, Samariza na danhipti'a nho'ōmo nhisi wa'wai baba. Wa tō oto rob'umhutu za'ra ni, 'ri nho'ōmo u, Sica u hā. Tawamhā ā zō ab're u, wa tō aihutu ni, abzumazéb u. Zuzéhé nhipti'ai āma te ā zō ab're hā 're hāimana, Zaco hā t'ra ma, ti'a hā te te ĩšomri wa. Tame te Zezusi hā nhamra, ā zō ab're āma. Te te āma wazere wa, te tame nhamra.

⁷⁻⁸ Tawamhā 'ri nho'ōmo u, wa tō ai'aba're ni, wasa hā wa te wasisa 'mai'uipra za'ra da. Zezushi si te waza'u tinhamra za'ra, â zô ab're âma. Tame sâmbra ré, te we pi'ô hā mo, â zô, samaritanu na îwaptêrê hā. Tawamhā â zô ab're u wisi wi, te Zezusi hā 'mahâ, âne:

— Â we îma a'âri, te hâ'rêne da. 'Rubu di.

⁹ Tawamhā te pi'ô hā asa tâma tinha:

— E niha te â hā îwi îwaptê, wasirê samaritanu ô nherê. A hā zudezu. — Zudezu norî hā durê samaritanu norî hâ sirê 're hâimana za'ra mono ô wa, te âne pi'ô hâ tâma tinha.

¹⁰ Taha wa, ma tō Zezusi hā asa tâma tinha:

— 'Re îhâimana u'âsi mono nhoprubzé hâ waihu'u 'wa'âhâ, durê îwaihu'u 'wa'âhâ, te arê â hâ îwi îwaptê. Tawamhâ â u'â hâ wa arê aima tisô.

¹¹ Taha wa, te durê pi'ô hâ asa tâma tinha:

— Â zô ab're hâ, ab're 'rehâ di. A hâ ai'ubana te asâ. Tiha na â hâ a'âri ô di za. E niha te za tawamhâ î'a'â, â u'â hâ.

¹² Wahi'rada Zaco hâ ma tō dama tisô â hâ, â zô ab're hâ. Ti'ra norî me te te 're î'âhuri mono zé, â hâ wanhib'â hâ. Îsimizama zama te te 're î'âhuri mono zé. Wahi'rada hâ wama pire za'ra di. E a hâ tâma aipire wa, te za bétê â u'â hâ îma îsô. — Âne te pi'ô hâ asa tâma tinha.

¹³ Tawamhâ Zezusi te durê asa tâma tinha:

— Tane tō. Â hâ da te 're âhuri mono wamhâ, apâre 'rubu di.

¹⁴ Înhîb'â hâ te dama 're anhomri mono wa, da te 're âhuri mono wamhâ, 'rubu âna te za îré 're dasi'ubumroi u'âsi. Ub're 're îsidototo u'âsi za'ra mono ne, dawî 're si'utôri waihu'u za'ra mono ô di za, da te 're âhuri mono wamhâ. Tawamhâ 're dadâ'â za'ra mono âna, te za 're dasi'ubumroi u'âsi, hâiwa âma.

¹⁵ Taha wa, te pi'ô hâ oto tiwi waptê, îsib'â hâ:

— Ta hâ asib'â hâ te za îma îsô, te 're 'rubu u'âsi tō mono da, we sô 're îneb u'âsi tō mono da.

¹⁶ Taha wa, te Zezusi hâ tâma rob'ru, âne:

— Mo oto aimorî aimro zô, we îtême saprôni da.

¹⁷ Tane nherê, ma tō pi'ô hâ âne tâma siwasu'u:

— Wa hâ îmro ô di.

Taha wa, te Zezusi hâ oto tâma rowasu'u:

— Tane tō. Âhâna oto aimro ô di.

¹⁸ A hâ 5 na aimro hâ arê. Âhâna hâ aimro uptabi ô di. Tarê te asirê 're aimasisi aba mo, aibâ me. Tō sena ma tō îma asiwasu'u, aimro ô na hâ.

¹⁹ Pi'ô hâ te durê asa tâma tinha:

— Wa tō oto aiwaihu'u. A hâ 'Re îhâimana u'âsi mono zadawa wasu'u'wa, te 're aimo.

²⁰ E mame te za 'Re îhâimana u'âsi mono âma 're dawata za'ra. E â êtê 'râihâ âma. E Zeruzarê âma. Â êtê 'râihâ hâ ma tō wahi'rata norî hâ pisutu za'ra, âme âma 're dawata za'ra mono da. Asirê zudezu norî hâ ma tō Zeruzarê hâ pisutu za'ra, tame âma 're dawata za'ra mono da.

²¹ Tawamhâ Zezusi te durê pi'ô ma tinha:

— Niwapsi, âne da te dasima 're wasu'u za'ra mono ô di za oto: "Â êtê 'râihâ âma si, te za Wamama âma 're dawata za'ra." Durê âne da te dasima 're wasu'u za'ra mono ô di za: "Zeruzarê âma si te za âma 're dawata za'ra."

²²⁻²⁴ Âhâna te za oto daro mono bâ âma 're wata za'ra, Îsazei uptabi 'wa norî hâ. 'Re îhâimana u'âsi mono pê'êzani ré 're nomro mono wa, te za tō sena âma 're wata za'ra. Te za tâma 're sisômri u'âsi za'ra, Îsimiroti zarina si 're nomro mono da. Ta norî si ma tō te sima 're awê, âma 're wata u'âsi za'ra mono da. 'Re îhâimana u'âsi mono hâ waihu'u pese uptabi di. Hâiba ô nherê, te daro mono bâ 're sâmbra, Îpê'êzani hâ. Taha wa, te za oto daro mono bâ âma 're wata za'ra, Îsazei uptabi 'wa norî hâ. Îpê'êzani ré 're nomro mono wa, te za tō sena âma 're wata za'ra. Te za tâma 're sisômri u'âsi za'ra, Îsimiroti zarina si 're nomro mono da. A norî wa'wa hâ te âma 're aiwata za'ra wa'aba mo. Tane nherê, waihu'u za'ra wa'aba ô di, 'Re îhâimana u'âsi mono hâ. Wa norî hâ wa tō waihu'u za'ra ni. Taha wa, wa âma 're wawata u'âsi za'ra. 'Re îhâimana u'âsi mono te te Îpisudu hâ Danho'reptui'wa da, ta hâ zudezu. Âne na hâ wama waihu'u pese za'ra di. — Âne Zezusi te pi'ô ma rowasu'u.

²⁵ Tawamhâ pi'ô te durê tâma tinha:

— Niwapsi te za we datême wi, Danho'reptui'wa da, 'Re îhâimana u'âsi mono te te Îpisudu hâ, Cristu na da te 're Îsisi za'ra mono hâ. Wei wisi wapsi, te za uburê 'Re îhâimana u'âsi mono nhimiroti hâ te te wama 're awaihu'u, wa te 're waihu'u za'ra mono da. Âne na hâ îma waihu'u pese di, îwasu'u hâ.

²⁶ Tawamhâ Zezusi te durê asa tâma tinha:

— Wa hã wa tô we datême wi. Wa hã te aima ĩrowasu'u hã Danho'reptui'wa, wa 're mo. — Āne te pi'oi ma siwasu'u, Zezusi hã.

²⁷ Tawamhã pi'oi ma siwasu'u ré, wa tô itême aihutu ni. Pi'oi ma nherê, siwasu'u wa, wa âma watob'uzu za'ra ni, wanhimirosa'rata na si. Tane nherê, pi'oi hã wa te wasiwi sadanharĩ ô di, âne: “E marĩ zô te ĩ'rata asa.” Duré Zezusi hã âne wa te wasiwi sadanharĩ ô di: “E niha te pi'oi ma nherê, asiwasu'u. E marĩ da, te pi'oi ma nherê, ĩrowasu'u.” Āne, wa te wasiwi sadanharĩ za'ra ô di.

²⁸⁻²⁹ Taha pari, te pi'oi hã oto mo, 'ri tême. Sisa'u ma piza hã tirê. Wisi wamhã, ma tô dazô hã awa'awi, âne:

— Oto wasi'aba'rêi wa'aba, aibã hã sabu za'ra wa'aba da. Uburé te 're ĩ'ab'manharĩ mono zé hã ma tô ĩma waihu'u. Até ô hã 'Re ĩhâimana u'âsi mono te te ĩpisudu, Danho'reptui'wa da.

³⁰ Taha wa, te we oto awa'awi itême ai'aba'rê ni, da'ahã na.

³¹ Wa norĩ hã pi'oi morĩ za'u si, wa ĩsa hã tâma 'ru za'ra ni, sa da.

³² Tawamhã Zezusi te wama nharĩ za'ra, âne:

— ĩsa hã te ĩma tihâiba, aima ĩwaihu'u'ô za'ra wa'wa hã.

³³ Āne hã te te wama waihu'u za'ra wa, wa tô wasima nharĩ za'ra ni:

— Até ĩsa hã ma we tâma 'ma'awisi ni, nima hawi.

³⁴ Tawamhã te Zezusi hã asa wama nharĩ za'ra, âne:

— 'Re dasaihuri mono wamhã, dama 're rowê za'ra mono di za. Tane, wa hã. We ĩzatôri'wa te te ĩ'âma ĩrotizé hã te ĩsina uwaimrami wamhã, ĩma rowê di za. ĩnhimiromhuri hã te tâma uprosi wamhã, ĩma rowê di za duré. — Āne Zezusi te wama siwasu'u za'ra.

³⁵ Te duré wama rowasu'u:

— Daburu hã ma tô ĩ'madã'á za'ra wa'wa. 'Madã'á za'ra wa'aba wa, ma tô âne ĩrowasu'u za'ra wa'wa: “Zahadu romhã di, danho hã da te 're ĩ'rãihãri za'ra mono zéb u hã. Maparane si'uiwa na a'amo hã âma 're si'utôri' mono parip si, te za amho hã da te 're 'rãihãri za'ra. Tawapsi dama romhuri ahã di za oto.” Āne te a norĩ wa'wa hã ĩrowasu'u za'ra wa'wa. Āne, wa za wa hã aima rowasu'u za'ra wa'wa oto, waihu'u za'ra wa'aba da. Buru hã 'madã'á za'ra wa'aba. Ôhõta te we oto ai'aba'rê ni. Romhuture di oto, da te ĩzaze za'ra zéb u hã. Aima romhuri ahã za'ra wa'aba di za, da te 're ĩzaze za'ra mono zém na da hã. — Āne te wama siwasu'u, Zezusi hã.

³⁶ Te duré wama rowasu'u za'ra, âne:

— Danho hã dama 're 'rãiré za'ra mono wapsi, te za da te 're 'rãihãri za'ra, buru tede'wai ma. Da te tâma 're uprosi za'ra mono wapsi, te za te te 're da'apawa'ábã, buru tede'wa hã. Romhuri te te 're uprosi za'ra mono wamhã, tâma 're rowê za'ra mono di za oto, rob'rãihãri'wa norĩ ma hã. Robzuri'wa norĩ ma zama 're rowê za'ra mono di za. Tane wa hã buru tede'wa ne, wa za te tâma 're wa'ábã za'ra, ĩzadawa wasu'u'wa norĩ ma. Ta norĩ ma zama tâma 're rowê za'ra mono di za. E marĩ wa. Te te dama 're ĩzadawa wasu'u za'ra mono ré, da te 're ĩzaze za'ra mono wa. Duré dadã'ã âna hãiwa âma 're dasi'ubumroi u'âsi mono wa za, taha wa, tâma 're rowê za'ra mono di za.

³⁷⁻³⁸ Daburu na da te 're robzuri za'ra mono wamhã, te za duré da te 're 'rãihãri za'ra. Tawamhã ni'wa hã te te rob're nherê, te te 'rãihãri ô wamhã, te za wasu'u ni, âne: “Ô hã ma rob're 'rata. Tane nherê, te te 'rãihãri ô di, si'uihã na. ĩ'upana sô ĩromhuri'wa si ma ĩsimiromhuri hã uprosi.” Āne te za wasu'u ni. Tane ma tô aibã norĩ hã aiwana te te dama 're ĩwasu'u 'rata za'ra. Taha wa, te za oto da te 're ĩzaze za'ra, a norĩ wa'aba zama 're ĩzadawa wasu'u za'ra wa'aba mono nherê, datême te 're asatôri za'ra wa'aba mono wamhã. — Āne Zezusi ma tô wama rowasu'u za'ra, ĩsiré 're wanomro mono wa.

³⁹⁻⁴⁰ Tawamhã ahã na ma tô itême aihutu samaritanu norĩ hã, 'ri nho'õmo hawi. Pi'oi nhimirowasu'u hã da te saze sirõmo za'ra wa, ma tô we itême aihutu ni. Āne 'ri tême wisi wi, ma tô aré pi'oi hã dama rowasu'u: “Ô hã aibã hã uburé te 're ĩ'ab'manharĩ mono zé hã ma tô ĩma waihu'u.” Āne ma tô aré dama rowasu'u.

Tawamhã itême dasihutu wamhã, te âma ropti za'ra ni, a'ã da'rata sãmra da. Taha wa, te syry na da'rata nhamra, 'ri nho'õmo âma. Tame sãmra ré, te bãdã hã maparane âma ne.

⁴¹ Taha wa, da'ahã na ma tô dasina umnhasi za'ra ni, dasi'uihã na ĩmreme hã da te wapari za'ra wa. Danho'reptui'wa na ma tô saze za'ra ni, 'Re ĩhâimana u'âsi mono te te ĩpisutu na hã.

⁴² Tawamhã te âne pi'oi ma nharĩ za'ra, pi'oi nhimirowasu'u wapari'wa norĩ hã:

— Asimirowasu'u hã wa te wapari za'ra wa, wa tô saze za'ra ni. Āhãna wasi'uihã na wa tô ĩmreme hã wapari za'ra ni. Taha wa, wa oto waihu'u za'ra ni, ô hã Danho'reptui'wa te 're mo. — Āne te samaritanu norĩ hã tâma nharĩ za'ra, pi'oi ma.

Zezusi hã, dama ĩpire zadawa zapari'wai 'ra te te ĩpesezé wasu'u

⁴³ Tame sāmra pari, te oto apā mo Darireza na danhipti'a nho'ōmo nhisi u, Zezusi hā. Wa norī hā wa ĩsiré ai'aba'ré ni.

⁴⁴⁻⁴⁵ Zezusi hā ma tō āne nasi wama rowasu'u za'ra aré: “Re ĩhāimana u'āsi mono zadawa wasu'u'wa norī hā ĩrob āma 're ĩdasi'ubumroi mono norī si, ĩsimiroti na wazép sina sō 're datob'uzu za'ra mono ō di.” Āne Zezusi hā ma tō wama sina wasu'u'wa za'ra aré. Taha wa, te apā mo, Darireza u. Apā wasihutu wamhā, ma tō dasima wē za'ra ni, da'rata 're sāmra mono da. E mari wa. Ta norī hā ma tō aihutu Zeruzarē u, Pascowa na datoī wa, dame si'rā'ōtō da. Tame ma tō āma 'madā'ā za'ra, Zezusi hā tiwaihu'u pese na te te ĩdapawaptobzém na. Taha wa, ma tō sō tatob'uzu za'ra ni, Darireza āma 're ĩdasi'ubumroi mono norī hā.

⁴⁶ Tawamhā Zezusi hā ma tō apā wi, Cana na 'ri wa'ōtō nhisi u. Darireza na danhipti'a nho'ōmo nhisi āma, Cana hā. Tame ma tō Zezusi hā ā na uwa 'ru 'rāi wa'u isé 'manha aré, te te 're ĩromhōsi mono na. Cana āma sāmra ré, ma tō aibā hā ĩtēme wi, Capana'u na 'ri nho'ōmo nhisi hawī. Ta hā apito zadawa zapari'wa.

⁴⁷ Zezusihi wasu'u hā te te waparī sirōmo wa, ma ĩtēme wi, ĩ'ra hā hāzé wa. Āne te dasima wasu'u za'ra ni: “Zudeza hawī ma tō Zezusi hā wi, Darireza u.” Tawamhā ĩtēme wisi wamhā, āne te ti'ra hā tāma wasu'u, wawa sina: “Ī'ra hā hāzé ahā wa, wa we asō mo, ĩma pese da. Te za oto ĩwi dārā.”

⁴⁸ Tawamhā Zezusi te asa tāma tinha:

— E niha te za mari dama ĩ'manharī waihu'u'ō hā te dama 're ĩ'ab'manharī mono zéb zarina si 're ĩzaze za'ra wa'aba mo.

⁴⁹ Taha wa, te asa tāma tinha, aibā hā:

— Ī'ra hā ĩwi dā'ā ō ré, ĩsiré āma aimorī, ĩtēme.

⁵⁰ Tawamhā Zezusi te duré asa tāma tinha:

— Te za oto apā aimo, ĩtēme. Ai'ra hā aiwi dā'ā ō di za. Rowē na te za aima 're mo. — Āne te tāma tinha, Zezusi hā.

Tawamhā ma aibā hā ti'ra na mre me zaze. Taha wa, te apā mo, ti'ra u. Tane nherē, bātā na ti'ra u wisi sirōmo ō di. Misi ma a'ā nhono. Awēpsi te za wi, ti'ra u hā.

⁵¹ Tawamhā tāma ĩromhuri'wa norī hā 'ri tēme wisi ō ré, ma tō sina uzusi za'ra. Ma tō tāma rowasu'u za'ra, āne:

— Ai'ra hā hāzé ō di. Rowē na te oto nhamra.

⁵² Taha wa, ma tō ĩmama hā asa āma sadanharī za'ra, āne:

— E mame bātā na ma tō séptārā.

Tawamhā te āne asa tāma rowasu'u za'ra:

— Bādā supra wi ma tō tiwahā.

⁵³ Tawamhā ĩmama te tāma rowasu'u za'ra oto:

— Tane tō. Ahāmhā bādā supra wi, ma tō Zezusi hā āne ĩma tinha: “Ai'ra hā aiwi dā'ā ō di za. Rowē na te za aima 're mo.” — Āne te tāma rowasu'u za'ra, Zezusihi mre me na. Taha wa, ma tō Zezusi hā sazei pese, aibā hā. ĩmro zama ma tō saze. Aihīni ma tō saze za'ra Zezusi hā, ti'ra norī me. Tāma ĩromhuri'wa norī zama ma duré saze za'ra.

⁵⁴ Āne Darireza na danhipti'a nho'ōmo nhisi āma ma tō tiwaihu'u pese na mari ĩ'manharī waihu'u'ō hā dama 'manha Zezusi hā, Zudeza hawī wisi wi. Āne dapawaptom na ma tō āma sahu, 'Re ĩhāimana u'āsi mono we te te ĩsatōrī na, da te waihu'u'wa za'ra da.

5

Zezusi hā aibā ĩhi'ré te te ĩpesezé wasu'u

¹ Tawamhā daro mono bā ma tō Zeruzarē āma tasi'rā'ōtō ni, 'Re ĩhāimana u'āsi mono āma dawata za'ra da. Taha wa, ma tō Zeruzarē u dame mo Zezusi hā, dame āma wata da. Wa norī hā wa ĩsiré ai'aba'ré ni duré, ĩsiré 're wanomro mono wa.

²⁻⁵ Tawamhā Zeruzarē āma te aibā hā 're sāmra, ĩhāzé ré hā. 38 na ma tō oto āma tiwahu, tihāzé te te 're sépata mono ré hā. Ta hā te dame nomro, ĩhāzé ré norī me, ĩtob'a norī me, duré ĩ'rātēire norī me, duré ĩhi'ré norī me zama. Pu'u 'rata te ta norī hā 're simi'wara, pu'u wawē 'rata. 'Ri'wawi wa'ra āma, pu hā. Tame 'ridawa hā pone'ērebā 'mazasizé hā. Wamremezém na Betezata na 'ridawa nhisi hā. Pu'u 'rata te uridi hā 're simasa, 5 na ĩhāiba hā. Tame te da'ahā na 're danhimi'wara uriti wa, ĩhāzé ré hā. Hāiwa āma Danhib'apito uptabi ma romhuri'wa zō, te dasina 're danhimipari za'ra. Ta hā te we 're ne hāiwa hawī, ā hā te te 're upi mono wa, 're āsisasisi mono da. Tawamhā ni'wa hā ā sisasisi ré, te te ĩsi'rai 'rada hā te za séptārā.

⁶ Tawamhā Zezusi hā ma tō oto datēme wi, ĩhāzé ré norī u. Wisi wi, ma aibā hā tisā. Hāzé ré āma ĩwahub ahā na ma tō waihu'u, Zezusi hā. Taha wa, te aibā ma tinha:

— E aséptā'ā da hā te asima ĩwē.

⁷ Tawamhā aibā ma asa sada'ā:

— Apito, ni'wa hā hāimana ō di, 're āsisasisi mono ré, ĩ'āma ĩsi'rai'wa da hā pu'u u. Āi ba atāma hāire nasi ĩsi'rúi mono ré, te nasi ĩwana si'ra za'ra ni, āi ba. — Āne te aibā hā Zezusihi ma siwasu'u.

⁸ Taha wa, ma tō Zezusi hā tāma tinha, āne:

— Ma'āpé, aiwahutu. Asa'warizé hā āri, aimorī da oto.

⁹ Taha wa, ma awa'awi tipese, aibā hā. Pese wamhā, tiza'warizé hā ma tō ti'á. Tawamhā para na te oto 're mo. Āne na hā sabadu na ma tō tīromhāiba, romhuri zahārizém na.

¹⁰ Taha wa, ma tō zudezu norī nhib'apito norī hā tāma nharī za'ra, āne:

— 'Re ĩhāimana u'āsi mono ma tō dama roti, da te 're romhuri za'ra mono tō da, sabadu na hā. A hā ĩsimiroti 'madâ'ā āna te asa'warizé hā 're ĩ'á, romhuri zahārizém na hā.

¹¹ Taha wa, te aibā hā asa tāma nharī za'ra:

— Aibā hā ĩpese'wa hā ma tō ĩza'warizé hā ĩma ti'ru. ĩpara na oto 're ĩmorī da, te duré ĩma tinha.

¹² Tawamhā te sadanharī za'ra:

— E 'wa hā ma tō asa'warizé hā aima ti'ru. E 'wa hā ma tō duré aima tinha, aipara na 're aimorī da hā oto.

¹³ Taha wa, ma tō duré aibā hā asa tāma nharī za'ra:

— Me. Te waihu'u ō di, wa hā. — Āne te tāma nharī za'ra. Zezusi hā te te pese pari, āma sapa'a ō di. Da'ahā wa, te awa'awi ĩsiti mo. Āne wa, Zezusihi nhisi hā te te waihu'u ō di, aibā hā.

¹⁴ Tawamhā 'ri 'wawi wa'ra 're, ma tō aibā hā sōpētē Zezusi hā, 'Re ĩhāimana u'āsi mono āma 're ĩdawata za'ra mono zéb āma. Te te sōpētē wamhā, āne te aibā ma tinha, Zezusi hā:

— Ma tō oto aséptā, āhāna hā. Taha wa, aiwasédé hā 're 'manharī mono ō di za oto, 're 'manharī u'āsi mono wa, marī ĩwasété uptabi hā aima romhāimana ō'umnhasite. — Āne te tāma tinha.

¹⁵ Tawamhā aibā te mo, dama ĩpire norī u. Āne te tāma siwasu'u za'ra:

— ĩpese'wa hā, wa tō waihu'u. Zezusi hā ma tō ĩpese.

¹⁶ Taha wa, dama ĩpire norī hā te oto sada tihāimana za'ra, romhuri zahārizém na te te pese wa, sabadu na.

¹⁷ Tawamhā Zezusi hā ma tō tāma nharī za'ra, āne:

— ĩmama hā te za te te 're da'apawaptob u'āsi. ĩzama wa za duré te 're da'apawapto. — Āne te tāma siwasu'u za'ra.

¹⁸ Taha wa, te āma sima roti za'ra, te te siwi wīrī da, romhuri zahārizé hā ĩsimiroti za'ra zarina, te te 'madâ'ā ō wa, duré 'Re ĩhāimana u'āsi mono hā Timama na te te wasu'u wa, aiwa ĩwaihu'u pese zahuré na hā.

Zezusi hā, Timama zadawa para dama pire na 're ĩhāimana mono zé wasu'u

¹⁹ Tawamhā Zezusi hā te duré tāma nharī za'ra:

— Tō sena, wa aima waihu'u za'ra wa'wa. Wa hā ĩsi'uihā na dama ĩmanharī waihu'u ō na te 're da'apawapto waihu'u mono ō di. ĩmama zadawa para, wa tō te 're da'apawapto. ĩmama hā tiwaihu'u pese na te te 're ĩda'apawapto mono ne, wa tō te 're da'apawapto.

²⁰ Wa hā ĩ'ra wa, te te 're ĩzawi pese. Ta hā ma tō ĩpisutu, dama ĩmanharī waihu'u ō na te te 're ĩda'apawapto mono ne, te duré 're da'apawapto mono da. Wa hā te 're da'apese mono wa, ma tō ĩ'āma 're datob'uzu za'ra. Zahadu wapsi, ĩmama te za duré ĩma tinha, tiwaihu'u pese na te te 're da'apawapto mono zarina, te 're da'apawapto mono da. Tawamhā te za duré ĩ'āma 're datob'uzu za'ra, ĩwaihu'u pese uptabi wa.

²¹ 'Re dadâ'ā za'ra mono wa, te ĩmama hā ab're hawi te te 're da'ahāiwa'utu, apā 're danomro u'āsi mono da. ĩzama te ĩsima 're ĩ'awē mono norī ma, wa za duré te 're anharī, apā 're hāiwa'utu za'ra mono wa, 're nomro u'āsi mono da, wa hā ĩ'ra wa. Tawapsi te za da te 're ĩwaihu'u za'ra, ĩwaihu'u pese uptabi na.

²²⁻²³ ĩmama hā 'rāwi sipisutu ō di, ti'ai āma dahāimanazéb zarina te te dama 're arowairébé mono da. Taha da, ma tō ti'ra wa, ĩpisutu. E marī da. Āma 're ĩdawata za'ra mono ne, ĩsine ĩwaihu'u pese wa, ĩ'āma zama 're dawata za'ra mono da. ĩ'āma 're dawata za'ra mono ō wamhā, we ĩzatōrī'wai āma zama duré 're dawata za'ra mono ō di za, ĩmama āma.

²⁴⁻²⁵ — ĩmreme hā da te 're wapari za'ra mono wamhā, duré we ĩzatōrī'wa hā da te dasina 're umnhasi za'ra mono wamhā, te za tipé'e na sina uwaimrami sirōmo za'ra, rowē na 're ĩdahāimana u'āsi za'ra mono zé hā. 'Re ĩhāimana u'āsi mono nhimiházé hā te te sina 're waihu'u za'ra mono ō di za. Te za tipé'e na āma saprī sirōmo za'ra, dapé'e 're, dadâ'ā u'āsi 're ĩdahāimana za'ra mono zém hawī, dapé'e 're rowē na 're ĩdahāimana u'āsi za'ra mono zéb u hā.

²⁶ Īmama hā dapē'ē 're, dadā'ā āna rowē na 're ĩdahāimana u'āsi za'ra mono zé nhomri'wa dama. Ī'ra wa, ma tō duré ĩpisutu, ĩzama 're ĩdahāimana u'āsi za'ra mono zé nhomri'wa na dama 're ĩhāimana mono da.

²⁷ Ta hā ma tō duré ĩma tinha, ti'ai āma dahāimanazéb zarina, te dama 're arowairébé mono da, isadawa para wa hā ti'ai āma dasiré ĩpodo hā 're ĩhāimana mono wa.

²⁸⁻²⁹ — Īmreme na atob'uzu za'ra wa'aba mono ō di za. Niwapsi te za 're ĩdadā'ā za'ra mono hā tahāiwa'utu za'ra ni. Īhārā hā da te wapari za'ra wa, te za ab're hawi tawairébé ni. Tawamhā 're ĩnomro wē mono norī hā te za apā hāiwa'utu za'ra, rowē u'āsi 're hāimana u'āsi za'ra mono da oto, 'Re ĩhāimana u'āsi mono 'rata. 'Re ĩnomro wasété mono norī zama, te za duré apā hāiwa'utu za'ra, 'Re ĩhāimana u'āsi mono nhimiházé hā te te sina 're waihu'u za'ra mono da.

Zezusi hā, Timama zadawa para datēme 're ĩmorīzém na dama ĩsiwasu'uzé

³⁰ — Īnhimipisutu zarina si, marī na te dama 're arowairébé mono ō di za. Īmama nhimipisutu zarina si, wa za ti'ai āma 're ĩdahāimana za'ra mono zéb zarina, te dama 're arowairébé. Īnhimipisutu zarina, marī na te dama 're arowairébé mono da, te ĩsima 're da'awē mono ō di, wa hā. We ĩzatōrī'wa nhimipisutu zarina si, te dama 're arowairébé mono da, wa ĩsima te 're da'awē u'āsi. Taha wa, te dama 're arowairébé mono wamhā, te dama āma upa za'ra ō di za. Duré ropipa hā 're ĩnomro wasété mono norī ma, te 're apisutu mono wamhā, te tāma āma upa za'ra ō di za.

³¹ — ĩsiwaprosi uptabi, aima ĩsiwasu'u za'ra wa'aba ō di. Ni'wa te te ĩzadawa waptob ō wamhā, áté te za ĩzadawa nhipese na ĩma 're ĩnharī za'ra wa'aba mo. Taha wa, ĩsiwaprosi uptabi, aima ĩsiwasu'u za'ra wa'aba ō di.

³² Īhāiba amo hā ma tō ĩzadawa wapto. Tō sena ma tō aima sina ĩwasu'u za'ra wa'wa. Āne na wa tō waihu'u.

³³⁻³⁷ — Ā ro'ore hā te te dama rob'uuiwē wamhā, dama rowē di. Tane Zuwā Batita hā ma tō simi'ē na te te dama 're sadawa wasu'u, 'Re ĩhāimana u'āsi mono hā. Tawamhā te te dama 're sadawa wasu'u mono ré, dama rowē di. A norī wa'wa hā ma tō itēme ĩda'mazatōrī za'ra wa'wa, te te siwi sadanharī za'ra da, ĩsimirowasu'u na. Tō sena ĩsimirowasu'u hā. E marī da, wa āma aipo're pu'u za'ra wa'wa, Zuwā Batita te te ĩ'āma ĩrowasu'uzém na hā. 'Re ĩzaze za'ra wa'aba mono da, te 're asō'repu za'ra wa'aba mono da, wa āma aipo're pu'u za'ra wa'wa, ĩsimirowasu'u na hā ĩsina. Zuwā Batita hā ma tō mreime pire na te te dama 're ĩwasu'u wē. Mreime pire nherē, ti'ai āma ĩpoto si, ō hā. Ti'ai āma 're ĩpoto za'ra mono zō si, ĩnhimipari mono ō di, te te dama 're ĩwasu'u wē za'ra mono wa, da te 're ĩzaze za'ra mono da. E marī wa. Īmama hā te te dama 're ĩwasu'u wē mono wa, 'Re ĩhāimana u'āsi mono hā. Ta hā ma tō ĩpisutu, te te 're ĩromhōsi mono zarina, te 're da'apawapto mono da, we te te ĩzatōrī na da te dapīwi 're waihu'u za'ra mono da. A norī wa'wa hā niwa atōmo na 'madā'ā za'ra wa'aba ō di, Īmama hā. Duré niwa aipo're na ĩmreme hā wapari za'ra wa'aba ō di.

³⁸ Duré ĩmreme hā aipē'ē 're, 're hāimana za'ra wa'aba mono ō di. Taha wa, te te we atēme ĩzatōrī za'ra wa'aba nherē, asina 're ĩ'umnhasi za'ra wa'aba mono ō di.

³⁹⁻⁴⁰ A norī wa'wa hā te āne asima 're ĩrowasu'u za'ra wa'aba mo: "Wa norī hā wa wa te 're sōré u'āsi za'ra, 'Re ĩhāimana u'āsi mono mreime ui'éré hā. Taha wa, wa za āma wasina uwaimrami za'ra ni, 're ĩdanomro u'āsi mono zé hā." Āne te asima 're ĩrowasu'u za'ra wa'aba mo. Ta hā te ĩwasu'u, 'Re ĩhāimana u'āsi mono mreime ui'éré hā. 'Re sōré u'āsi za'ra wa'aba mono nherē, asima 're ĩwē za'ra wa'aba mono ō di, 're ĩzaze za'ra wa'aba mono da. 'Re ĩzaze za'ra wa'aba mono 'wa'āhā, wa aré aima pisutu za'ra wa'wa, 're ĩdanomro u'āsi mono zé hā asina uwaimrami za'ra wa'aba da.

⁴¹ — Wa hā ĩ'āma 're aiwata za'ra wa'aba mono zō, ĩsina 're ĩnhimnhasi mono ō di.

⁴² E marī wa. Te ĩsina aiwaihu'u za'ra wa'aba wa, asimirosa'rata na. 'Re ĩhāimana u'āsi mono, 're sawi pese za'ra wa'aba mono ō di.

⁴³ ĩzama asiwi 're ĩzawi pese za'ra wa'aba mono ō di. Īmama zadawa para we atēme ĩmorī za'ra wa'aba nherē, āma 're ĩzaze za'ra wa'aba mono ō di. Áté te za ni'wam norī nhimirowasu'u si 're ĩsazei pese za'ra wa'aba mo, 'Re ĩhāimana u'āsi mono te te we datēme 're satōrī za'ra mono ō nherē, ta norī hā.

⁴⁴ A norī wa'wa hā 'Re ĩhāimana u'āsi mono te te 're aiwēsāmri za'ra wa'aba mono da, asima 're wē uptabi za'ra wa'aba mono ō di. Ma tō asima 're ĩdawē uptabi za'ra wa'aba mo, ti'ai āma 're ĩdanomro mono si te te 're aiwēsāmri za'ra wa'aba mono da. E niha te za tawamhā, asina 're ĩ'umnhasi za'ra wa'aba mo. Wa hā ĩ'ra nherē, áté asina 're ĩ'umnhasi za'ra wa'aba mono ō di za.

⁴⁵ E Īmama ma, wa za aiwasu'u za'ra wa'wa, 're ĭzaze za'ra wa'aba mono ō na. Mare di. Mozési hā te za tāma aiwasu'u za'ra wa'wa, 're ĭzaze za'ra wa'aba mono ō na, aima ĩ'umnhasi za'ra wa'wa hā.

⁴⁶ Durēihā Mozési hā ma tō ĭwana ĩ'āma rob'ui'ére siro dama. Tane nherē, ĩsimi'ui'ére hā sena na 're saze za'ra wa'aba mono ō di. 'Re saze za'ra wa'aba mono 'wa'āhā, te aré 're ĭzaze za'ra wa'aba mo.

⁴⁷ ĩ'āma rob'ui'ére hā sena na 're saze za'ra wa'aba mono ō wamhā, e niha te za tawamhā ĩmreme na 're ĭzaze za'ra wa'aba mo. Āté ĩmreme na 're ĭzaze za'ra wa'aba mono ō di za. — Āne Zezusi ma tō tāma rowasu'u za'ra, dama ĩpire norī ma.

6

*Zezusi hā da'ahā uptabi nherē, te te ĩda'asaihurizé wasu'u
Mateusi 14.13-21; Marcusi 6.30-44; Rucasi 9.10-17*

¹ Tawamhā Zezusi hā ma tō uba're na saprī, ĩsō'ōmo na. Darireza na danhipti'a nho'ōmo nhisi āma, ĩsō'u hā. Tiberizadi na ĩsō'ōmo nhisi hāiba amo hā. Wa norī hā wa ĩsiré saprī za'ra ni, ĩsiré 're wanomro mono wa.

² Da'ahā na te duré ĩsarina ai'aba're ní. E marī wa. Tiwaihū'u pese na, marī dama ĩ'manharī waihū'u'ō hā te te dama ab'manharī wē mono wa, danho'a.

³ Tawamhā sa'a nhisi u, wa hāimo ai'aba're ní, Zezusihi siré. Sa'a nhisi āma, wa oto ĩsiré asimro ní.

⁴ Romhuture di oto, zudezu norī te, dato hā da te 're ĩ'manharī za'ra mono zéb u hā, Pascowa na dato nhisi hā.

⁵ Tawamhā ĩtēme dasi'aba'rei wamhā, ma tō da'ab'madā, Zezusi hā. Da'ahā uptabi na te ĩtēme ai'aba're ní. Te te da'ab'madā'ā wamhā, Piripihī ma, te tinha, āne:

— E mame dasa hā te 're simi'wara, wa te dama ĩ'uipra za'ra da hā, aihīni āma dasaihuri da hā.

⁶ Taré ma sadawa pibu Piripi hā, 'rāwi te te sina roti sirōmo nherē, te te ĩda'apawaptobzéb da hā.

⁷ Taha wa, te Piripi hā asa tāma tinha:

— Da'ahā uptabi wamhā, wa aré dasa na rob'ui'prazé hā ahā uptabi nherē, uprosi za'ra ni, 200 na ĩhāiba nherē. Tane nherē, te aré da'āma ai'utō, ĩ'u'ētē wapu hā. Syry na dasa hā da te huri da nherē, aihīni dasa hā da te huri ō di aré. — Āne Piripi te tāma tinha.

⁸⁻⁹ Taha wa, wa ĩsiré 're ĩwanomro mono hā misi Zezusihi ma 'manharī ni. Ādéré hā Sima Pedruhu no hā te tāma tinha, āne:

— 'Watébrēmi te, ĩ'u'ētē wapu hā te tihāiba, arozum ne u'ēne hā. 5 na ĩhāiba hā. Duré pe'a hā maparanere. Tawamhā āne aihīni dasaihuri ō di za. — Āne te Ādéré hā Zezusihi ma wasu'u.

¹⁰ Tawamhā ma tō Zezusi hā asa wama nharī za'ra:

— Te za dama ĩnharī za'ra wa'wa, ti'ai wa, dasi'ubumro da. — Āne te wama nharī za'ra. Tame du hā sa'ētē di. Taha wa, ma tō ti'ai wa asimro ní. Da'ahā uptabi di. Aibā si, wa te wasiwi sa'rata wamhā, 5 miu na ĩhāiba hā.

¹¹ Tawamhā Zezusi ma tō waibu, ĩ'u'ētē wapu hā. 'Re ĩhāimana u'āsi mono āma te tiwata, sōpru wa. Taha parī, ma tō wama sōmri za'ra, wa te dama sōmri za'ra mono da. Pe'a zama ma duré wama sōmri za'ra, wa te dama sōmri za'ra mono da. Tawamhā ĩ'u'ētē wapu hā umrore nherē, da'āma si'utōrī ō di. Pe'a zama maparane nherē, da'āma si'utōrī ō di. Taha wa, ma tō aihīni dasa hā huri ni. Ma tō da te 'mahāpārī, da'āma si'utōrī āna.

¹² Da te 'mahāpārī mono wamhā, Zezusi hā te wama 'ru za'ra, apā wa te ubumroi mono da, danho'rada hā taré simi'wara tō mono da.

¹³ Taha wa, wa tō apā wa te ubumro za'ra. Si'ōtō wa, wa tō wa te sé. Si'ōno hā ahā di, danho'rata ré hā, wa te ĩ'ubumro za'ra hā ĩ'u'ētē wapu wē'ēi ré hā. 12 na si'ōno hā.

¹⁴ ĩ'u'ētē wapu hā umrore nherē, da'āma si'utōrī ō wa, ma tō āma tatob'uzu za'ra ni, waihū'u pese wa, Zezusi hā. Tawamhā te āne dasima rowasu'u za'ra ni, dasaihuri wē te:

— Tō sena ō hā 'Re ĩhāimana u'āsi mono zadawa wasu'u'wa, we datēme ĩmorī zō 're ĩdanhimipari za'ra mono. Oto wa te wasiwi saprōni aba, āma wanhib'apito za'ra da. — Āne te dasima rowasu'u za'ra ni.

¹⁵ Tawamhā Zezusi hā danhimiroti hā ma tō sina waihū'u. Taha wa, te siwaprosi sa'a nhisi u mo apā, danhiti.

*Zezusi hā ā nhisi baba ĩmorizé wasu'u
Mateusi 14.22-33; Marcusi 6.45-52*

¹⁶⁻¹⁷ Tawamhā mara simeī wamhā, wa tō si'ra za'ra ni âi ba, uba're na wa te saprī za'ra da, zara u, Capana'u na 'ri nho'ōmo nhisi u. Robra di oto. Zahadu watēme wisi za'ra ō di, Zezusi hā.

¹⁸ Tawamhā ma rowa'u hā wawi tiwatobro za'ra, rowa'u'u za'ēne hā. Taha wa, âsiasī hā sa'ētē di.

¹⁹ Wa norī si, wa tō wasirē sari za'ra ni uba're hā, Zezusihi sirē 're īwanomro mono norī si. Sa'a hawi wasi'aba'reī wamhā, â wa'wa u ma tō uba're hā warē tihāimana za'ra. 5 na ti'ai pibuzēm na, wa tō oto wasina wapahā za'ra ni, niha wamhā, âtē 6 na ti'ai pibuzēm na. Tawamhā Zezusi hā wa tō wasiwi sāmri ni. Â nhisi baba te wei watēme timorī za'ra, uba're u. Romhuture di oto. Wa te wasiwi sāmri wamhā, wa tāma wapē'ēwara za'ra ni.

²⁰ Taha wa, Zezusi te wama si'mahārā za'ra, āne:

— Wa hā wa we atēme īmorī 'wa. Īma aipahi za'ra wa'aba tō.

²¹ Tawamhā āne wama si'mahārā za'ra wa, tāma wapahi za'ra āna, wa tō sō wahārā za'ra ni, uba're u watēme sébré za'ra da, wama rowē za'ra wa. Watēme sébré za'ra wi, ma tō uba're hā â zadarē u sina ropto, wa te wasima āma īrotizéb u.

Zezusihi zō īdanhoprézē wasu'u

²² Tawamhā da'ahā na te waza'u asimro ni, Isō'u zaihā na bātā pusizēm niwī. Taha wa, awēmhā te āne dasima rowasu'u za'ra ni:

— Ahāmhā hā uba're hā misire te nomro, āmhā. Zezusihi sirē 're īnomro mono norī si ma tō asisi uba're wa, te te sirē sari za'ra da. Zezusi hā īsirē sébré za'ra ō di. E momo te bété mo. — Āne te tasisadhanarī za'ra ni.

²³ Tawamhā ni'wam norī hā ma tō uba're na datēme saprī za'ra wawa'rāmi, zara u. Tiberizadi hawi ma tō datēme saprī za'ra, 'ri nho'ōmo hawi. Wanhīb'apito hā 'Re īhāimana u'āsi mono āma īwatazéb u, ma tō āma roptob za'ra, dasa hā da te īhurizéb u.

²⁴ Tawamhā Zezusi hā sāmra ō wa, duré wa norī zama wasi'ubumroi ō wa, ma tō uba're wa, asisi ni, tisa te te īhuri norī hā zara u te te āma saprī za'ra da apā. Tawamhā Zezusihi zō danhopré da, ma tō uba're na saprī za'ra ni, Capana'u u.

Zezusi hā dasai uptabi na dama īsiwasu'uzé

²⁵ Tawamhā Zezusi hā ma tō sāmri za'ra ni, Capana'u āma īsō'u zara niwī. Da te dasiwi sāmri wamhā, āne te sadanharī za'ra ni:

— Rowahutu'wa, e niwa ma tō we aiwī, āwa.

²⁶ Taha wa, te Zezusi hā asa tāma nharī za'ra:

— E marī da, te we ĵzō asōpré wa'aba mo. E marī dama īmanharī waihu'u'ō hā ĵwaihu'u pese na te aima 'manharī za'ra wa'aba wa, ma tō ĵwaihu'u za'ra wa'wa, 'Re īhāimana u'āsi mono we te te ĵzatōrī na. E taha wa, te we ĵzō asōpré wa'aba mo. Mare di. Taré ī'u'ēne hā 'mahāpārī za'ra wa'aba mono wē te, te we ĵzō asōpré wa'aba mo.

²⁷ Dasa hā dawi wasété su'u di. Taha wa, asa zō si 're rob'ruiwapari za'ra wa'aba mono ō di za. Dasa ne zō si, te za 're īrob'ruiwapari za'ra wa'aba mo, wē na 're īhāimana u'āsi mono ne zō si. Ta hā rowē u'āsi dadā'ā āna 're īdahāimana u'āsi za'ra mono zé, te wasu'u. Wa hā ti'ai āma dasiré īpoto wa, ma tō Īmama hā īpisutu, Isadawa para te dama 're anhomri mono da, rowē u'āsi 're īdahāimana u'āsi za'ra mono zé hā.

²⁸ Tawamhā ma tō asa tāma nharī za'ra ni, āne:

— E marī na ma tō 'Re īhāimana u'āsi mono hā te te sima 're da'awē, te te sima 're īwē mono zéb uwaibaba, wa te tāma āma 're uwaimrami za'ra mono da. Ma'āpé wama waihu'u za'ra na, wa te waihu'u za'ra da.

²⁹ Tawamhā te Zezusi hā asa tāma nharī za'ra, āne:

— 'Re īhāimana u'āsi mono, ma tō we ĵzatō, da te dasina 're ĵumnhasi za'ra mono da. Tawamhā asina 're ĵumnhasi za'ra wa'aba mono wamhā, te za tāma āma 're ĵuwaimrami za'ra wa'aba mo, te te sima 're īwē mono zéb uwaibaba, 're ĵzaze za'ra wa'aba mono wa.

³⁰⁻³¹ Taha wa, te asa tāma nharī za'ra ni, āne:

— Wahi'rata norī hā a'ubuni wi 're nomro mono ré, ma tō te te 're huri mana na dasa nhisi hā. Āne ma tō daza'u āma rob'ui'éré ībahā na, 'Re īhāimana u'āsi mono zadawa wasu'u'wa hā: “Ma tō te te dama 're anhomri, hāiwa hawi dasazé hā.” A hā bété. E marī te za wanho'a duré wama īmanha, dama īmanharī waihu'u'ō hā, wa te āma aiwaihu'u pese za'ra wa, wa te asaze za'ra da.

³² Taha wa, te Zezusi hā tāma nharī za'ra, āne:

— Mozési hā hāiwa hawi te te dama 're anhomri mono ō di, dasazé hā. Īmama si hāiwa hawi dasa nhomri'wa te 're hāimana, ate wa'aba da, dasai uptabi hā.

³³ Dasa hā 'Re īhāimana u'āsi mono nhibzari hā hāiwa hawi we īmorī te wasu'u, dadā'ā āna 're īdahāimana u'āsi za'ra mono zé hā te te dama 're anhomri mono da. — Āne te Zezusi hā tāma rowasu'u za'ra.

³⁴ Tawamhã te asa tâma nharĩ za'ra ni, ãne:

— Wama 're anhomri u'ási mono, wasai uptabi hã.

³⁵ Taha wa, te Zezusi hã oto tâma siwasu'u za'ra, ãne:

— Wa hã dasai uptabi na, wa ĩsiwasu'u. Mra wa, dasa hã da te 're 'mahãpãrĩ za'ra mono wamhã, dama 're rowẽ za'ra mono di za. 'Rubu wa, â hã da te 're âhuri mono wamhã, dama 're rowẽ za'ra mono di za. Tane duré, Danho'reptui'wa na da te dasina 're ĩ'umnhasi za'ẽtẽ za'ra mono wamhã, dama 're rowẽ za'ra mono di za.

³⁶ A norĩ wa'wa hã ma tô ĩ'madã'â za'ra wa'wa. Tane nherẽ, asina 're ĩ'umnhasi za'ra wa'aba mono õ di. ãne wa tô aima wasu'u za'ra wa'wa aré.

³⁷ ĩmama ma tô da'apisutu, ĩnhĩb'a'uwẽ si 're danomro mono da. Ta norĩ si te za te te 're ĩzaze za'ra, te te ĩpisutu za'ra norĩ hã. Te te 're ĩzaze za'ra mono nherẽ, e wa za ĩsiwi te 're awẽ'õ. Mare di. Te ĩsiwi 're awẽ'õ mono õ di za.

³⁸ Wa hã hãiwa hawi wa wei mo. E marĩ da. E 'rãwi ĩnhimiroti si te ĩsima 're 'madã'â mono da. Mare di. 'Rãwi ĩnhimiroti si te ĩsima 're 'madã'â mono da, we ĩmorĩ õ di. We ĩzatõrĩ'wa nhimiroti si te 're 'madã'â mono da, wa wei mo.

³⁹ E marĩ, ma tô te te sima 're wẽ, ĩmama hã. ĩzazei'wa norĩ te 're ab'madã'â pese u'ási mono wa, ĩte u'ási 're nomro mono da, ma tô te te sima 're wẽ, ĩte da, te te ĩma 're apisutu sirõmo mono wa. Ma tô duré te te sima 're ĩwẽ, ĩzazei'wa norĩ na hã 're dá'â za'ra mono wa, bãtã na te ahãiwa'utu da, apã 're hãimana u'ási za'ra mono da oto, ti'a ĩsi'utõrĩzéb âma.

⁴⁰ ĩmama ma tô duré te te sima 're da'awẽ, da te dasina 're ĩ'umnhasi za'ra mono wa, rowẽ na 're dahãimana u'ási za'ra mono da, hãiwa âma. Tawamhã 're dá'â za'ra mono wa, wa za bãtã na hãiwa'utu za'ra, ti'a ĩsi'utõrĩzéb âma. — ãne te Zezusi hã tâma siwasu'u za'ra.

⁴¹⁻⁴² Dasa hã hãiwa hawi we ĩmorĩ na siwasu'u wa, te ãne sima rowasu'u za'ra, dama ĩpire norĩ hã:

— Oro hãiwa hawi wei morĩ za. Õ hã Zezusi, Zuzéhé 'ra. ĩna zama wama waihu'u pese za'ra di. — ãne te sima rowasu'u za'ra.

⁴³ Taha wa, te Zezusi hã asa tâma nharĩ za'ra:

— Tô'ã. Tane ĩma nharĩ za'ra wa'aba õ di za.

⁴⁴ Dasi'uihã na da te 're ĩzazei waihu'u za'ra mono õ di za. ĩmama si te za te te 're da'apisutu we ĩzatõrĩ'wa hã, da te 're ĩzaze za'ra mono da. Tawapsi te za da te 're ĩzaze za'ra. Tawamhã 're dadã'â za'ra mono wa, wa za bãtã na ab're hawi da'ahãiwa'utu ti'a ĩsi'utõrĩzéb âma, apã 're dahãimana u'ási za'ra mono da oto.

⁴⁵ Duréhã ma tô ãne na rob'ui'ére, 'Re ĩhãimana u'ási mono zadawa wasu'u 'rata 'wa hã: "Timreme te za te te dama 're awaihu'u, 'Re ĩhãimana u'ási mono hã." ãne ma tô âma rob'ui'ére. Tawamhã ĩmama, timreme te te dama 're awaihu'u mono wamhã, da te âma 're sazei pese za'ra mono wamhã, ĩmreme na zama te za duré da te 're ĩzazei pese za'ra.

⁴⁶ ĩmama hã datõmo na da te 're 'madã'â za'ra mono õ di. ĩwétési wa tô te 're 'madã'â, ĩhawi we ĩmorĩ wa.

⁴⁷ — Tawamhã Danho'reptui'wa na da te dasina 're ĩ'umnhasi za'ra mono wamhã, rowẽ u'ási te za dadã'â âna 're dahãimana u'ási za'ra hãiwa âma, 'Re ĩhãimana u'ási mono 'rata. Tô sena, wa aima rowasu'u za'ra wa'wa, waihu'u za'ra wa'aba da.

⁴⁸ Wa hã dasa na, wa ĩsiwasu'u, rowẽ na 're ĩdahãimana u'ási za'ra mono zé nhomri'wa, 're ĩmorĩ wa, dama.

⁴⁹ Wahi'rata norĩ hã a'ubuni wi 're nomro mono ré, ma tô mana na te te 're huri. Tane nherẽ, dá'â âna 're hãimana u'ási za'ra mono õ di, ta norĩ hã. Ma tô tidã'â za'ra.

⁵⁰ Hãiwa hawi dasa na 're dasaihuri mono wamhã, rowẽ u'ási te za dadã'â âna ĩ'rata 're dahãimana u'ási za'ra, hãiwa âma.

⁵¹ Wa hã dasa na wa tô ĩsiwasu'u, hãiwa hawi we ĩmorĩ wa. Ni'wam norĩ hã ĩ'ãma 're saihuri u'ási mono wamhã, te za dá'â âna 're hãimana u'ási za'ra, hãiwa âma. Taha da, wa za ĩhãiba hã dama tisõ, dazada ĩdã'â da. — ãne Zezusi te tâma siwasu'u za'ra, dama ĩpire norĩ ma.

⁵² Taha wa, te sima rowasu'u za'ra:

— E niha te za õ hã tihãiba hã wama sõmri za'ra, âma 're wasaihuri u'ási mono da.

⁵³ Tawamhã Zezusi te duré asa tâma nharĩ za'ra:

— Wa hã ti'ai âma dasiré ĩpodo. ĩhãiba na 're asaihuri aba mono õ wamhã, duré ĩwapru, 're âhuri aba mono õ wamhã, rowẽ u'ási ĩ'ãma 're anomro aba mono õ di za.

⁵⁴ ĩ'ãma 're dasaihuri mono wamhã, duré ĩwapru, da te 're âhuri mono wamhã, rowẽ u'ási te za ĩ'ãma 're danomro. Tawamhã 're dadã'â za'ra mono wa, wa za bãtã na ab're hawi da'ahãiwa'utu ti'a ĩsi'utõrĩzéb âma, apã 're dahãimana u'ási za'ra mono da.

⁵⁵ ĩhãiba hã dasai uptabi. Duré ĩwapru hã, â uptabi.

⁵⁶ Īhāiba na 're dasaihuri mono wamhā, duré ĩwapru, da te 're āhuri mono wamhā, te za ĩsiré 're dahāimana u'āsi za'ra. Wa hā wa za duré ĩsiré 're ĩmorī u'āsi za'ra.

⁵⁷ Īmama hā ma tō we ĩzatō, 're ĩmorī u'ā hā. Ta hā 're hāimana u'āsi mono wa, wa za duré wa hā 're ĩhāimana u'āsi. Taha wa, ĩ'āma 're dasaihuri mono wamhā, te za ĩsine 're dahāimana u'āsi za'ra hāiwa āma, 're dadā'ā za'ra mono āna.

⁵⁸ Wa hā dasa na, wa tō ĩsiwasu'u, Īmama, hāiwa hawi te te we dama ĩnhomri na. Wahi'rata norī hā ma tō duréihā hāiwa hawim na tisa hā te te 're huri. Tane nherē, dā'ā āna 're hāimana u'āsi za'ra mono ō di. Ma tō tidā'ā za'ra. ĩ'āma 're dasaihuri mono wapsi, dadā'ā āna te za 're dahāimana u'āsi za'ra, hāiwa āma.

⁵⁹ Āne Zezusi ma tō tāma siwaihu'u za'ra, zudezu norī te, rowahutuzéb āma, Capana'u āma.

Zezusi hā tisiré norī te te sina ĩsadanharī za'ra zé wasu'u, za te te ĩrēme za'ra zéb zō

⁶⁰ Tawamhā Zezusihi nhimirowasu'u hā ma tō dame wapari za'ra, ĩsazei'wa norī hā. Te te wapari za'ra wamhā, āne te ahā na sima rowasu'u za'ra:

— ĩsimirowasu'u hā wama pire di, wa te āma ĩsaze za'ra zéb da hā.

⁶¹ Ta norī hā sima si te te rowasu'u za'ra nherē, ma tō ĩmreme hā sina waihu'u za'ra, Zezusi hā. Taha wa, te tāma nharī za'ra, āne:

— E ĩmreme hā asiwī wē'ō za'ra wa'aba wa, te za ĩrēme za'ra wa'wa.

⁶² Wa hā ti'ai āma dasiré ĩpodo hā, apā hāiwa u ĩmorī ré, ĩ'madā'ā za'ra wa'aba wamhā, e niha te za tawamhā asima ĩrowasu'u za'ra wa'wa.

⁶³ 'Re ĩhāimana u'āsi mono pē'ēzani si te za te te dama 're anhomri, dadā'ā āna 're ĩdahāimana u'āsi za'ra mono zé hā. Dasi'uihā na da te dasina 're uwaimrami za'ra mono ō di za. Marī na te aima 're ĩrowasu'u za'ra wa'aba mono zéb zarina, te za ĩpē'ēzani hā te te dama 're anhomri, 're ĩdahāimana u'āsi za'ra mono zé hā.

⁶⁴⁻⁶⁵ Āne, wa aima ĩsiwasu'u za'ra wa'wa, waihu'u za'ra wa'aba da. Tane nherē, āne aima ĩsiwasu'u za'ra wa'aba nherē, aihīni ĩmreme na ĩzaze za'ra wa'aba ō di za, āté. Dasi'uihā na da te 're ĩzazei waihu'u za'ra mono ō di za. Īmama si te te dama 're anharī mono wapsi, te za ĩmreme na da te 're ĩzaze za'ra. Āne wa tō aima rowasu'u za'ra wa'wa aré. — Āne Zezusi ma tō tāma rowasu'u za'ra. E marī wa. Da'ahā na ĩsiré 're danomro mono nherē, aihīni te te sazei uptabi za'ra ō wa. Ta norī hā tō senai ō na, ma tō Zezusi hā sina waihu'u za'ra. Duré te te dama ĩhāiba nhomri da hā ma tō sina waihu'u siro, Zezusi hā.

Taha wa, ma tō aré dama rowasu'u:

— Dasi'uihā na da te 're ĩzaze za'ra mono ō di za. Īmama si te te dama 're anharī mono wapsi, te za te te 're ĩzaze za'ra. — Āne ma tō dama rowasu'u aré, da te waihu'u za'ra da.

⁶⁶ Tawamhā da'ahā na oto ĩsiré 're danomro mono ō di, ĩsazei'wa norī hā. ĩmreme te te wapari ze za'ra ō wa, ma tō oto rēme za'ra ni.

⁶⁷ Taha wa, te Zezusi hā wazadanharī za'ra:

— E a norī wa'aba zama te za ĩrēme za'ra wa'wa. — Āne te wazadanharī za'ra, 12 na wahāiba norī hā ĩsiré 're ĩwanomro mono norī hā.

⁶⁸ Tawamhā Sima Pedruhu si te asa tāma tinha:

— Mare di. Wa te airēme za'ra ō di za. Wa te airēme za'ra wamhā, e 'wa tēme, wa za 're wanomro, rowasu'uwē hā wa te 're ĩwapari za'ra mono da hā. Aimreme si wama pire za'ra di. Aimreme na si da te 're asaze za'ra mono wamhā, rowē u'āsi te za ai'āma 're danomro. Te za duré hāiwa āma 're dadā'ā za'ra mono āna 're dahāimana u'āsi za'ra, 're ĩhāimana u'āsi mono 'rata.

⁶⁹ 'Re ĩhāimana u'āsi mono, ma tō we asatō. Wa norī hā wa tō asaze za'ra ni. A hā 're aimorī wē uptabi di. Āne na wa tō aiwaihu'u za'ra ni. — Āne te Zezusihi ma tinha.

⁷⁰ Tawamhā Zezusi asa te wama nharī za'ra:

— A norī wa'wa hā 12 na aihāiba za'ra wa'wa hā wa tō aipisutu za'ra wa'wa, ĩsiré 're anomro aba mono da, dama 're ĩzadawa wasu'u za'ra wa'aba mono da. Tane nherē, misire Wa'uburé nhīb'a'uwē te 're mo, asiré wa'aba. — Āne ma tō wama waihu'u za'ra.

⁷¹ Wa'uburé nhīb'a'uwē hā te te wama wasu'u za'ra wamhā, Zudasi te wasu'u, Sima Icarizotihī 'ra hā. Ta hā 12 na Zezusihi siré 're ĩwanomro mono norī siré 're morī nherē, te za niwapsi dama hāiba nho, Zezusi hā.

7

Zezusi hā ĩsisānawā norī, Zudeza u te te siwi ĩsatōrīzé wasu'u

¹ Tawamhā Zezusi hā te datēme 're mo, Darireza na danhipti'a nho'ōmo nhisi āma si. Zudeza na danhipti'a nho'ōmo nhisi āma oto datēme 're morī ō di. E marī wa. Te te siwi wīrī da, te te sima āma rotī za'ra wa, dama ĩpire norī hā. Taha wa, te oto ĩsiti 're timorī za'ra datēme si, Darireza āma si.

² Romhuture di oto bâdâ hã dasi'rã'õtôzéb u hã, âma îdasipo're pu'u za'ra da hã, 'Re İhâimana u'âsi mono te te İdanhimroi wê mono zém na a'ubuni wi, darop téb u.

³ Tawamhã İno norĩ hã te apâ siwi satô Zezusi hã, Zudeza u morĩ da. Āne te tâma nharĩ za'ra:

— Apâ te za oto aimo, Zudeza u asazei'wa norĩ u, marĩ İwê hã dama ab'manharĩ ré, te te âma ai'madâ'â za'ra da, asazei'wa norĩ hã.

⁴ Ni'wam norĩ hã te te sima 're dawê za'ra mono wamhã, dama marĩ 'manharĩ wê na da te 're waihu'u za'ra mono da, pi'uriwi İwê hã te te dama 're 'manharĩ za'ra mono ô di za. Sô'awi te za te te dama 're ab'manharĩ. Taha wa, ma'âpé sô'awi dama 're ab'manharĩ u'âsi mono za, da te âma 're aiwaihu'u za'ra mono da. — Āne ma tô İno norĩ hã tâma waihu'u za'ra, Zezusihi ma.

⁵ Ta norĩ hã tidub'rada hã zahadu te te saze za'ra ô di, 'Re İhâimana u'âsi mono, we te te İsatôri na Danho'reptui'wa da.

⁶ Taha wa, te Zezusi hã asa tâma nharĩ za'ra, âne:

— Zahadu bâdâ hã İwa waptâ'â ô di, âma İmorizéb da hã. Niwam na âma ai'aba'rei' wa'aba wamhã, aima rowê za'ra wa'aba di za.

⁷ Da te 're ai'ruiwapari za'ra wa'aba mono ô di za. İwétési te da te dasiwi 're İruiwapari. E marĩ wa. Da te 're İ'manharĩ wasété za'ra mono zé hã te dama 're awaihu'u mono wa.

⁸ A norĩ wa'aba si te za ai'aba'rei' wa'wa, dasi'rã'õtôzéb u hã. Āhãna İmorĩ ô di za. Zahadu bâdâ hã İwa waptâ'â ô di, âma İmorizéb da hã. — Āne Zezusi te tâma nharĩ za'ra.

⁹ Taha wa, te a'â nhamra Darireza âma, Zezusi hã.

Zezusi hã dasi'rã'õtôzéb âma İsãmrazé wasu'u

¹⁰ Tawamhã İno norĩ hã datozeb u si'aba're' za'u si, te oto Zezusi hã mo pi'uriwi.

¹¹ Dasi'rã'õtô wamhã, te sô rob'madâ'â za'ra, dama İpire norĩ hã. Te nasi sô anharĩ za'ra:

— E mahãta Zezusi hã. — Āne te nasi sô anharĩ za'ra.

¹² Dasi'rã'õtôzéb u İdasito mono norĩ hã te duré dasima rowasu'u za'ra ni. Misire damreme ô di âma. Ni'wam norĩ hã te âne dama rowasu'u za'ra:

— Ô hã te 're timorĩ wê, Zezusi hã.

Ni'wam norĩ hã te duré dama rowasu'u za'ra:

— Mare di. Sadawa nhipese na te ô hã te te dama 're rowasu'u. — Āne te dama rowasu'u za'ra. Tawamhã İwasu'u na âma dasisaze za'ra ô di.

¹³ Pi'uriwi te âne dasima wasu'u za'ra ni, Zezusi hã. Sô'awi da te dasima rowasu'u za'ra ô di, dama İpire norĩ pipa te.

¹⁴ Tawamhã dasi'rã'õtô ré, ma tô Zezusi hã wi, 'ri za'ëtê u, 'Re İhâimana u'âsi mono âma 're İdawata za'ra mono zéb u. 'Ri 'wawi wa'ra 're, te dama rowahutu.

¹⁵ Tawamhã dama İpire norĩ hã İmreme te te wapari za'ra wamhã, ma tô âma titob'uzu za'ra. Āne te sima rowasu'u za'ra:

— Ô hã watême 're zasi mono ô di, 'Re İhâimana u'âsi mono nhimiroti, wa te tâma 're waihu'u za'ra mono da. E niha ma tô waihu'u pese, te te dama 're İrowasu'u mono zéb da hã. — Āne te sima rowasu'u za'ra.

¹⁶ Taha wa, te Zezusi hã asa tâma nharĩ za'ra:

— İsi'uihã na te dama 're rowasu'u mono ô di. 'Re İhâimana u'âsi mono, ma tô we İzatô, te dama 're rowasu'u mono da. Taha zadawa para, wa tô te dama 're rowasu'u.

¹⁷ E niha te za da te 're İwaihu'u za'ra, 'Re İhâimana u'âsi mono nhimiroti na si te dama 're İrowasu'u mono na hã, niha wamhã, İsi'uihã na İnhimiroti na si te dama 're İrowasu'u mono ô na hã. 'Re İhâimana u'âsi mono nhimiroti si, da te 're 'madâ'â pese za'ra mono wamhã, te za da te âma 're İwaihu'u za'ra.

¹⁸ Dasi'uihã na danhimirosa'rata na da te dama 're rowasu'u za'ra mono wamhã, te za sô 're simnhasi za'ra, mreme wê wa, âma 're dawata za'ra mono zô. Datême dazatôri'wai âma si 're dawata za'ra mono da, da te dasima 're wê za'ra mono wamhã, tô sena na si danhimirowasu'u hã. Dazadawa nhipese ô di.

¹⁹ Duréhã Mozési hã ma tô aima sômri za'ra wa'wa, 'Re İhâimana u'âsi mono nhimiroti hã, aihirata norĩ wa'aba ma hã. Tane nherê, İsimiroti hã 're 'madâ'â pese za'ra wa'aba mono ô di. E marĩ wa, te bété asima İwê za'ra wa'wa, asiwi İwirĩ aba da. — Āne te Zezusi hã tâma nharĩ za'ra.

²⁰ Tawamhã âne hã da te wapari za'ra wamhã, te asa tâma nharĩ za'ra ni:

— E 'wam norĩ hã ma tô bété sima aiwê za'ra, te te siwi aiwirĩ da. Wa'uburé te te aima nharĩ wa, te asimiza'rese âna wama İnharĩ za'ra. — Āne te Zezusihi ma nharĩ za'ra ni.

²¹⁻²³ Tawamhã te Zezusi hã asa dama tinha:

— Misi dama ĩ'manharĩ waihu'u'õ hã wẽ nherẽ, te dama 'manharĩ 'ru te, ma tõ ĩ'ama atob'uzu za'ra wa'wa. Duréihã Mozési hã ma tõ dama pisutu danhihãiwata nhihãrizé hã, ĩwana wahi'rata norĩ hã te te dama ĩpisutuzéb zarina. Taha wa, bâdã te te ĩpisutuzém na te za aibã 'rare hã 're ĩshãiwata nhihãri za'ra wa'aba mo, sabadu na. Āne na te za tâma âma 're ĩ'uwaĩrami za'ra wa'aba mo, Mozési te te dama ĩpisutuzé hã. Tawamhã e marĩ da, ma bété ĩzada asahi za'ra wa'wa, romhuri zahãrizém na aibã te pese wa, sabadu na.

²⁴Ma'ápé atõmo na dahãiba mana wawi, asiwi 're ĩda'madã'ã za'ra wa'aba mono zéb zarina si, asiwi 're dawë'õ za'ra wa'aba mono tõ, ĩ'uwaibaba si 're dawaihu'u za'ra wa'aba mono da. — Āne Zezusi te dama tinha.

Zezusi hã 'Re ĩhãimana u'âsi mono te te ĩpisutu na rowasu'u

²⁵Tawamhã ni'wam norĩ hã ma tõ Zezusihi mreme hã wapari za'ra, Zeruzarë âma 're ĩsi'ubumroi mono norĩ hã. Taha wa, te âne âma sima rowasu'u za'ra:

— Ni'wai âma te sima roti za'ra, te te siwi wĩrĩ da, wama ĩpire norĩ hã. Āté õ hã da te dasiwi ĩwĩrĩ da hã.

²⁶Ni'ã. Sõ'awi te te dama 're rowasu'u mono nherẽ, da te tâma nharĩ za'ra õ di, rowahutu na te te sazãri da. E Danho'reptui'wa na ma tõ siwi waihu'u za'ra, wama ĩpire norĩ hã.

²⁷Danho'reptui'wa wei morĩ wamhã, ĩsa'ru hã dama waihu'u za'ra õ di za. Ôhõ za'ru hã wama waihu'u pese za'ra di. — Āne te dasima rowasu'u za'ra ni.

²⁸Tawamhã ma tõ sina damreme waihu'u, Zezusi hã. Taha wa, 'ri za'ëté 'wawi wa'ra 're, zahadu te te dama rowahutu ré, te âne da'mahã, mreme 'rãihã na:

— Oro asiwi ĩwaihu'u za'ra wa'aba za. Oro ĩza'ru hã aima waihu'u pese za'ra wa'aba za duré. Tõ sena ĩwaihu'u za'ra wa'aba õ di. ĩza'ru uptabi hã waihu'u za'ra wa'aba õ di duré. ĩsi'uihã na we ĩmorĩ õ di. 'Re ĩhãimana u'âsi mono zadawa para, wa wei mo. Tõ sena ĩsimiroti hã we ĩzatõrĩ'wa nhimiroti hã. Tane nherẽ, ta hã asiwi waihu'u za'ra wa'aba õ di.

²⁹Wa hã ĩma waihu'u pese di we ĩzatõrĩ'wa hã, ĩhawi we ĩmorĩ wa. — Āne te Zezusi hã dama siwasu'u.

³⁰Tawamhã ma tõ duré sima âma roti za'ra, te te siwi âri da, dama ĩpire norĩ hã. Tane nherẽ, te te siwi âri õ di. E marĩ wa. Zahadu bâdã hã 'Re ĩhãimana u'âsi mono te te âma ĩpisutuzé hã, ĩwa waptã'ã õ wa.

³¹Tawamhã ta norĩ hã sada hãimana za'ra nherẽ, ma tõ da'ahã na saze za'ra ni, Zezusi hã. Taha wa, te âne dasima rowasu'u za'ra ni:

— Danho'reptui'wa da, 'Re ĩhãimana u'âsi mono te te ĩpisudu hã oto wei morĩ wamhã, e te za te te dama 're ab'manharĩ, marĩ dama ĩ'manharĩ waihu'u'õ hã, Zezusi te te dama 're ĩ'ab'manharĩ mono nhipai u hã. — Āne te dasima rowasu'u za'ra ni.

Parisezu norĩ hã, Zezusihi zõ te te ĩdazatõrĩ za'ra zé wasu'u

³²Tawamhã parisezu norĩ hã ma tõ Zezusihi âma dawapari za'ra. Taha wa, ma tõ sõ da'mazatõrĩ za'ra, Zezusi hã te te siwi âri da, 'ri 'madã'ã'wa norĩ hã, 'Re ĩhãimana u'âsi mono nhorõwa 'madã'ã'wa norĩ hã. 'Re ĩhãimana u'âsi mono ma, da'âma romhuri'wa ĩpire norĩ me, ma tõ sõ satõrĩ za'ra, sasedoti ĩpire norĩ me.

³³Tawamhã ĩtème sihutu wamhã, Zezusi te tâma nharĩ za'ra:

— Syry na wa za oto ai'rata ĩnhamra 'wa. Taha pari, wa za apã mo, we ĩzatõrĩ'wai u.

³⁴ĩzõ rob'madã'ã za'ra wa'aba nherẽ, asiwi ĩsãmri za'ra wa'aba õ di za. Nimomo wa za mo. Nimomo ĩmorĩ wamhã, âma ĩtème 're anomro waihu'u aba mono õ di za. — Āne te tâma siwasu'u za'ra.

³⁵Taha wa, te sima rowasu'u za'ra, dama ĩpire norĩ hã:

— E momo te za bété mo, wa te wasiwi sãmri za'ra tõ da hã. E darob amoi u te za mo, wasiré zudezu norĩ u deredu norĩ 'rata, 're ĩsi'ubumroi mono norĩ u. E tamomo te za oto mo, deredu norĩ rob'ãma te te 're rowahutu mono da.

³⁶Ma tõ wama rowasu'u za'ra, wa te sõ rob'madã'ã za'ra nherẽ, za wa te wasiwi ĩsãmri õ na hã. Ma tõ duré wama rowasu'u za'ra, nimomo morĩ wamhã, za ĩtème ĩwasihutu waihu'u õ na hã. Wa te wasiwi waihu'u za'ra õ di, te te wama ĩnharĩ za'ra zé hã. — Āne te sima rowasu'u za'ra.

Zezusi hã â u'âsi na dama ĩsiwasu'uzé wasu'u

³⁷Tawamhã ĩrème ma dasi'rã'õtõ mono wa, ma tõ Zezusi hã hãwi za, te te dama rowahutu da, datozém na bâdã ĩpire uptabi na. Āne te dama tinha:

— Rubu wamhã, ma'ápé we ĩtème 're anomro aba mono za, â u'ã hã te aima 're sãmri za'ra wa'aba mono wa, 're âhuri aba mono da.

³⁸Duréihã ma tõ âne â u'âsi na rob'ui'éré, 'Re ĩhãimana u'âsi mono zadawa wasu'u'wa hã: "Ā u'ã hã 're sidototo u'âsi mono wamhã, dama rowézé hã te za dama 're hãimana u'âsi, ĩsipti hã. Tane Danho'reptui'wa na da te dasina 're ĩ'umnhasi za'ra mono wamhã, taha zarina te

za rowē nhomri'wa hā dama 're hāimana za'ra." Āne ma tō āma rob'ui'éré, ībaihā na hā. — Āne te Zezusi hā dama rowasu'u.

³⁹ Ā u'ā te te dama wasu'u wamhā, Tipē'ēzani te wasu'u, Zezusi hā. Niwapsi te za te te tāma 're anhomri, tizazei'wa norī ma. Dā'ā wa, hāiwa'utu parip si, te za Tipē'ēzani hā te te tāma 're anhomri.

Zezusihi āma īdasisadanharī za'ra zé wasu'u

⁴⁰ Tawamhā Zezusihi mreme, da te wapari za'ra wamhā, te dasima rowasu'u za'ra ni:

— Tō sena ō hā 'Re īhāimana u'āsi mono zadawa wasu'u'wa zō, 're īdanhimipari za'ra mono.

⁴¹ Ni'wam norī hā te duré dama rowasu'u za'ra:

— Ō hā Danho'reptui'wa da, 'Re īhāimana u'āsi mono te te īpisudu.

Ni'wam norī hā te duré dama rowasu'u za'ra:

— Oro ō hā Darireza hawi wei morī za. Danho'reptui'wa da, 'Re īhāimana u'āsi mono te te īpisudu hā Darireza hawi wei morī ō di za.

⁴² Danho'reptui'wa da hā apito Dawihi nhihudu te za, u, 're mo. Berē āma te za, u, podo, tihi'rata za'ru āma, Dawihi za'ru āma. Āne duréhā ma tō āma rob'ui'ééré siro, 'Re īhāimana u'āsi mono zadawa wasu'u'wa hā. — Āne te dasima rowasu'u za'ra ni.

⁴³ Taha wa, īwasu'u na dasisaze za'ra ō di.

⁴⁴ Ni'wam norī si te sima wē za'ra, te te siwi āri da. Tane nherē, te te siwi āri ō di.

Dama īpire norī hā, Zezusi, Danho'reptui'wa na te te dame 're īsaze za'ra mono ō zé wasu'u

⁴⁵ Tawamhā Zezusihi zō īsihutu norī hā te apā ai'aba'rē, sasedotī īpire norī u, parisezu norī u zama. Ubana itēme sihutu wamhā, te sadanharī za'ra, āne:

— E marī da, we asiwi saprōni aba ō di, watēme.

⁴⁶ Tawamhā te asa tāma nharī za'ra:

— Ni'wa te te āma wabzu ō di, īsimiroti wē na hā. Taha wa, wa te wasiwi āri ō di, wa te wei wasiwi saprōni da, atēme za'ra wa'aba.

⁴⁷ Taha wa, te parisezu norī hā asa tāma nharī za'ra, āne:

— E niha a norī wa'aba zama ma tō īmreme hā dame īsaze za'ra wa'wa, tō sena te te dama 're rowasu'u mono newa.

⁴⁸ E Danho'reptui'wa na ma tō 'mazaze dama īpire hā, duré parisezu hā. Mare di. Ni'wa te te āma sazei ō di.

⁴⁹ Ō norī hā ma tō saze za'ra, tāma waihu'u pese za'ra ō wa, 'Re īhāimana u'āsi mono nhimiroti na Mozési te te āma īrob'ui'éérézē hā. Taha wa, te za ō norī hā te te siwi 're wē'ō pese za'ra, 'Re īhāimana u'āsi mono hā. — Āne te parisezu norī hā 'ri za'ētē 'madā'ā'wa norī ma nharī za'ra.

⁵⁰⁻⁵¹ Tawamhā parisezu norī siré hā ma tō oto rowasu'u, Nicodemosi hā, Zezusihi u aré īmorī hā barana. Āne te tāma rowasu'u za'ra, tisiré parisezu norī ma:

— E marī te te īmanharī zō, wa te wasiwi waihu'u āna, wa za wasiwi wē'ō za'ra ni. E āne wahi'rada Mozési ma tō dama roti, 'Re īhāimana u'āsi mono nhimiroti zarina. Mare di. Āne te te dama roti ō di. — Āne Nicodemosi te tāma rowasu'u za'ra, tisiré parisezu norī ma.

⁵² Taha wa, te duré asa tāma nharī za'ra:

— E a zama Darireza hawi we aimorī wa, te āne wama īwaihu'u za'ra. Darireza hawi te te 're da'azatōrī mono ō di, te te dama 're īsada wasu'u za'ra mono da hā, 'Re īhāimana u'āsi mono hā. Īmreme ui'ééré hā robaba di, āma. Ma'āpé sōrē na za, āma īrob'ui'ééré ō na waihu'u da. — Āne te tāma nharī za'ra, Nicodemosi hā.

⁵³ Taha pari, tinhorōwa u te te ropé da, ma oto wairé.

8

Pi'ō hā aibā aimawi ré nomro wa, Zezusihi u da te dasiwi īsaprōnizé wasu'u

¹ Tawamhā Zezusihi me, wa ai'aba'rē ni, ētē 'rāihā u, Oriwera u.

² Awēmhā mararé, wa apā ai'aba'rē ni 'ri za'ētē u, 'Re īhāimana u'āsi mono āma 're īdawata za'ra mono zéb u. Wasihutu wamhā, 'ri 'wawi wa'ra u, wa asisi ni. Tamomo da'ahā na ma tō Zezusihi u ubumro ni. Tawamhā ma tō nhamra, te te dama rowahutu da, Zezusi hā.

³ Te te dama rowahutu ré, ma tō we itēme aihutu, 'Re īhāimana u'āsi mono nhimiroti 'rata na rob'ui'ééré na dama rowahutu'wa norī hā, parisezu norī me. Pi'ō hā te we itēme siwi saprō. Mro ré nherē, aibā aimawi ré nomro ré, da te 'madā'ā wa, te we itēme siwi saprōni za'ra, niha īsimiroti hā te te āma waihu'u za'ra da. Tawamhā dawa'wa u ma tō siwi 'mazé pi'ō hā, Zezusihi nho're sab da.

⁴ Tawamhā Zezusi te siwi 'mahā, āne:

— Rowahutu'wa, ā hā pi'ō hā mro ré nherē, aibā aimawi ré nomro ré, ma tō dasiwi 'madá'ā ni. Taha wa, wa we atēme wasiwi saprōni ni, asimiroti hā wa te āma waihu'u za'ra da.

⁵ Damro ré nherē, aibā aimawi ré 're danhimi'wara mono wa, ētē na da te dasiwi 're simroi mono da, ma tō te te dama 're a'ru, wahi'rada Mozési hā. A hā bété, e niha asimiroti hā pi'ōi āma hā. — Āne te siwi āma sadanha.

⁶ Mozésihi nhimiroti zarina te te dama 'rui ō wa, te te siwi wē'ō za'ra da, ma tō āne siwi āma sadanha. Tane nherē, Zezusi hā asa te te āma sada'ābā za'ra ō di. Ti'a zō ma tō aiwē'ē, tinhiptōmo na te te ui'ére da.

⁷ Īmreme zō, te te nasi 'mahārā za'ra wamhā, ma tō apā wahudu. Āne te tāma nharī za'ra: — Ni'wa hā wasété āna 're morī wamhā, te za simrimi 'rata, ētē na.

⁸ Tawamhā ma tō duré aiwē'ē, ti'a zō te te ui'ére da.

⁹ Tawamhā Īmreme te te wapari za'ra wamhā, dawana Īhāiba préduw 'rata, uimrehēne ma tō watobro. Īsa'u si te nasi wairé, misi si siwi Īsaprōni'wa hā Īmreme te te sina wapari za'ra wa, sisép te. Zezusi hā siwaprosi te oto za. Pi'ō si te dawa'wa za, Zezusihi nho're.

¹⁰ Tawamhā Zezusi hā ma tō apā wahudu. Pi'ō siwaprosi sa wa, te oto sadanha:

— E mahāta aiwasu'u'wa norī hā. E 'mazab ō di, te te dama ai'ru za'ra da, da te dasiwi aiwīrī da, aiwasédé hā te te ai'āma Īsa'ra za'ra norī hā.

¹¹ Taha wa, te pi'ō hā asa tāma tinha:

— Maze di. Ni'wa hā sab ō di, te te dama Ī'ru da, da te dasiwi Īwīrī da.

Taha wa, Zezusi te duré asa tāma tinha:

— Tane tō. Wa hā te duré dama ai'rui ō di za, da te dasiwi aiwīrī da. Mo oto aimorī. Aiwasédé hā 'manharī na sahu ō di za. — Āne te pi'ōi ma tinha.

Zezusi hā dama rob'uiwē'wa na dama Īsiwasu'uzé wasu'u

¹² Tawamhā Zezusi te duré dama tinha, āne:

— Wa hā dama rob'uiwē'wa na wa Īsiwasu'u. Īnhimiroti zarina 're danomro mono wamhā, dawasété na 're danomro mono ō di za, robra na. Rowa'a na si te za Īāma 're danomro u'āsi, rowē na si.

¹³ Tawamhā parisezu norī hā te asa tāma nharī za'ra:

— Asiwaprosi wama asiwasu'u wamhā, tō sena wama asiwasu'u ō di.

¹⁴ Taha wa, te Zezusi hā asa duré tāma nharī za'ra:

— Tane nherē, Īsiwaprosi aima Īsiwasu'u za'ra wa'aba nherē, tō sena, wa aima Īsiwasu'u za'ra wa'wa. Nima hawi we Īmorizé hā waihu'u za'ra wa'aba ō di. Īwétési, wa tō Īsina waihu'u. Nimomo Īmorizé hā duré waihu'u za'ra wa'aba ō di. Īwétési wa tō Īsina waihu'u siro. Taha wa, tō sena te Īsina waihu'u pese wa, te za Īmreme na 're Īzaze za'ra wa'aba mo.

¹⁵ Danhimirosa'rata zarina si, te 're Īdawaihu'u za'ra wa'aba mo, dawē na dawasété na zama. Tanei ō di, wa hā.

¹⁶ Tō sena, wa za te 're da'awaihu'u, dawē na dawasété na zama. Īsiwaprosi te 're da'awaihu'u mono ō di za. We Īzatōrī'wai me, wa za wa te 're da'awaihu'u, dawē na dawasété na zama.

¹⁷ Duréihā ma tō Mozési hā āne na te te dama 're roti, 'Re Īhāimana u'āsi mono zadawa para: "Ni'wa hā siwaprosi te te 're da'awasu'u mono wamhā, 're saze za'ra wa'aba mono ō di za, Īsimirowasu'u na. Siwaprosi wamhā, mreme wapure di. Maparane wapsi, 're Īne wē hā āma 're sisaze zahuré mono wamhā, te za Īsimirowasu'u zahuré na 're Īsaze za'ra wa'aba mo. Sahuré wamhā, mreme pire zahuré di." Āne Mozésihi nhimiroti na rob'ui'ére hā.

¹⁸ Wa hā wa Īsiwasu'u. We Īzatōrī'wa hā te duré Īwasu'u, Īmama hā. Taha wa, Īsiwaprosi Īsiwasu'u ō wa, te za wamreme hā tō sena na 're Īsaze za'ra wa'aba mo.

¹⁹ Tawamhā parisezu norī hā te asa tāma nharī za'ra, āne:

— E mahāta tawamhā, aimama.

Taha wa, ma tō duré Zezusi hā asa tāma nharī za'ra:

— Īmama te aima wasu'u za'ra wa'aba nherē, asiwi Īwaihu'u za'ra wa'aba ō di. Īmama zama, asiwi waihu'u za'ra wa'aba ō di. Tō sena Īwaihu'u za'ra wa'aba 'wa'āhā, Īmama zama te aré Īwaihu'u za'ra wa'wa.

²⁰ Āne te tāma rowasu'u za'ra, 'Re Īhāimana u'āsi mono āma 're Īdawata za'ra mono zéb āma, 'ri 'wawi wa'ra 're, te te dama rowahutu ré. Rob'uiprazé, da te 're Īsēme mono zéb 'rata sab ré, te āne tāma rowasu'u za'ra. Taha wa, te te siwi āri ze za'ra nherē, te te siwi āri ō di, dama Īpire norī hā. E marī wa. Zahadu bādā hā Īwa waptā'ā ō wa, te te sima āma Īrotizé hā, 'Re Īhāimana u'āsi mono hā.

"E 'wa hā a hā." Āne Zezusi da te dasiwi Īsadanharī za'ra zé wasu'u

²¹ Tawamhā Zezusi hā te duré tāma nharī za'ra, parisezu norī ma:

— Aihawi wa za ĩmorĩ za'ra wa'wa. Tawamhā aiwaseté ré, te za 're atâ'â za'ra wa'aba mo, 'Re ĩhâimana u'âsi mono hā aiwasédé hā te te aima 're pari za'ra wa'aba mono âna. Aiwaseté ré, 're atâ'â za'ra wa'aba mono wamhā, nimomo ĩmorĩ wamhā, ĩzarina âma 're anomro waihu'u aba mono ô di za. — Âne te Zezusi tâma rowasu'u za'ra.

²²Taha wa, ma tô âne sima rowasu'u za'ra:

— Ô hā ma tô wama nharĩ za'ra, nimomo morĩ wamhā, ĩsarina 're wanomro waihu'u mono ô di za. E 'rāwĩ siwĩrĩ da bā, te âne wama nharĩ za'ra. — Âne te sima rowasu'u za'ra.

²³Tawamhā ma tô Zezusi hā duré tâma nharĩ za'ra:

— A norĩ wa'wa hā ti'ai âma si te 're anomro aba mo. Wa hā hāiwa hawĩ, wa wei mo. A norĩ wa'wa hā ti'ai âma a'uwé te 're aihâimana za'ra wa'aba mo. Taneĩ ô di, wa hā.

²⁴A norĩ wa'wa hā aiwaseté ré, te za 're atâ'â za'ra wa'aba mo. Âne wa tô aima rowasu'u za'ra wa'wa aré. Tawamhā wa hā aima ĩsiwasu'u za'ra wa'aba zéb zarina, 're ĩhâimana mono na 're ĩzaze za'ra wa'aba mono ô wamhā, te za tô aiwaseté ré 're atâ'â za'ra wa'aba mo. — Âne Zezusi ma tô tâma waihu'u za'ra.

²⁵Tawamhā ma tô siwĩ sadanha:

— E 'wa hā bété, a hā.

Tawamhā ma duré âma sada'âbâ za'ra asa:

— Rowahutu na te dama âma 're ĩsâna'rata mono hawĩ, wa tô aima 're ĩsiwasu'u za'ra wa'wa, 're ĩhâimana mono zém na hā.

²⁶Zahadu uburé marĩ hā te te aima waihu'u za'ra wa'aba ô di, 're anomro wasété aba mono zém na hā. We ĩzatōrĩ'wa hā tô sena ma tô te te ĩma 're da'awaihu'u. Taha wa, duré wa hā te te ĩma 're ĩda'awaihu'u mono zéb zarina si, wa za te dama 're awaihu'u, ĩsine. — Âne ma tô Zezusi hā tâma rowasu'u za'ra.

²⁷We tizatōrĩ'wa hā te te tâma wasu'u za'ra wamhā, ĩmama te wasu'u, 'Re ĩhâimana u'âsi mono hā. Sô'awi te te tâma rowasu'u za'ra ô wamhā, ĩmreme tâma pibu prā za'ra di, dama ĩpire norĩ ma.

²⁸Taha wa, te Zezusi hā duré tâma nharĩ za'ra, âne:

— Wa hā dasiré ĩpodo hā niwapsi te za asiwi ĩzasōmri za'ra wa'wa, hāiwi ĩza'ô da. Tawapsi te za ĩwaihu'u za'ra wa'wa, aima 're ĩsiwasu'u za'ra wa'aba mono zéb zarina, 're ĩhâimana mono zém na hā. Te za duré ĩwaihu'u za'ra wa'wa, ĩsi'uihā na te dama 're ĩrowasu'u mono ô na hā, ĩmama te te ĩma ĩwaihu'uzéb zarina si, te dama 're ĩrowasu'u mono na hā.

²⁹We ĩzatōrĩ'wa hā te te ĩma 're ĩroti mono zéb zarina si, wa tô te tâma âma 're uwaimrami u'âsi. Taha wa, ĩ'rata te 're sāmra u'âsi. Te te 're ĩrême mono ô di. — Âne Zezusi ma tô tâma siwasu'u za'ra.

³⁰Tawamhā ĩmreme hā da te wapari za'ra wamhā, ma tô da'ahā na Danho'reptui'wa na saze za'ra ni.

Īsazei uptabi 'wa, za 're ĩdanomro mono zé wasu'u

³¹Tawamhā Zezusi te tâma nharĩ za'ra, ĩsazei'wa norĩ ma hā:

— ĩmreme 're 'madâ'â pese za'ra wa'aba mono wamhā, ĩzazei uptabi 'wa, te za 're anomro aba mo.

³²Tawamhā aima waihu'u pese za'ra wa'aba di za, 'Re ĩhâimana u'âsi mono nhimiroti hā. Ta hā tô sena uptabi. Taha zarina te za asō'reptuzé hā asina 're ĩwaihu'u za'ra wa'aba mo, wada'uri âna si'uihā na 're ĩhâimana za'ra mono norĩ ne, rowē na 're aihâimana za'ra wa'aba mono da oto. — Âne Zezusi te tâma rowasu'u za'ra.

³³Tawamhā te duré asa tâma nharĩ za'ra, Zezusihi ma:

— Wa norĩ hā Abra'âhā nhihudu, wa 're wanomro. Niwa dama romhuri'wa da, danhimi'uipra na 're wahâimana za'ra mono ô di. E niha wa za tawamhā wanho'reptuzé hā wasina wa te 're waihu'u za'ra.

³⁴Tawamhā Zezusi asa te duré tâma nharĩ za'ra:

— Tô sena wa aima waihu'u za'ra wa'wa. Dawasété na 're danomro u'âsi mono wamhā, dawasédé, da te 're sahâri waihu'u za'ra mono ô di za, danhimi'uipra norĩ hā titede'wai hawĩ 're ĩwairébé waihu'u mono ô ne.

³⁵Apito ma, romhuri'wa norĩ hā, apito 'ra me, aiwab ô di. Apito 'ra, te za timama nhorōwa âma 're sāmra u'âsi, ĩ'ra wa. Tâma ĩromhuri'wa norĩ hā ĩsōrōwa âma 're si'ubumroi u'âsi mono ô di za.

³⁶Wa hā wa aima ĩsiwasu'u za'ra wa'wa, 'Re ĩhâimana u'âsi mono 'ra na. Aiwasété hawĩ te 're asō'reptu za'ra wa'aba mono wamhā, tô sena te za rowē na ĩ'âma 're anomro aba mo.

³⁷A norĩ wa'wa hā Abra'âhā nhihudu te 're anomro aba mo. Âne na ĩma aiwaihu'u pese za'ra wa'aba di. Tane nheré, ĩsihudu nheré, ma tô asiwi ĩwē'ô za'ra wa'wa, asiwi ĩwĩrĩ za'ra wa'aba da. E marĩ wa. ĩnhimiroti hā taré asiwi 're wē'ô za'ra wa'aba mono wa.

³⁸ Wa hā Īmama, te te Īma 're ĩwaihū'u mono zéb zarina si, wa tō aima te 're waihū'u za'ra wa'wa. A norī wa'wa hā aaimama te te 're ĩ'awada'uri za'ra wa'aba mono zéb zarina si, te 're ĩ'manharī za'ra wa'aba mo. — Āne Zezusi te tāma nharī za'ra.

³⁹ Tawamhā Zezusihi ma, te duré asa nharī za'ra, āne:

— Wa norī hā, Abra'āhā nhihudu.

Tawamhā asa te duré Zezusi hā tāma nharī za'ra:

— Abra'āhā nhihudu uptabi 'wa'āhā, te aré 're anomro wē wa'aba mo, ĩsine.

⁴⁰ Re ĩhāimana u'āsi mono nhimiroti hā tō sena uptabi. Taha si, wa tō te aima 're wasu'u za'ra wa'wa, te te Īma 're ĩ'awaihū'u mono zéb zarina. Tane nherē, ma tō ĩ'āma asima ĩroti za'ra wa'wa, asiwi ĩwīrī za'ra wa'aba da. Āne dama 're hāimana mono ō di, Abra'ā hā. A norī wa'wa hā aaimama ne, te 're anomro aba mo. — Āne Zezusi te tāma nharī za'ra.

⁴¹ Tawamhā asa te duré tāma nharī za'ra:

— Misire Wamama hā, 'Re ĩhāimana u'āsi mono hā. Wa norī hā ĩ'ra uptabi, wa 're wahāimana za'ra.

⁴² Tawamhā Zezusi hā te duré asa tāma nharī za'ra:

— Tō sena 'Re ĩhāimana u'āsi mono hā, Aaimama za'ra wa'aba 'wa'āhā, te aré asiwi 're ĩzawi pese za'ra wa'aba mo. E marī wa. Īhawē we ĩmorī wa, atēme za'ra wa'aba. ĩsī'uihā na we ĩmorī ō di. Ta hā ma tō we ĩzatō.

⁴³ E niha aima waihū'u pese za'ra wa'aba ō di, ĩnhimirowasu'u hā. Wē nherē, aima wapari ze za'ra wa'aba ō wa, aima pibu prā za'ra wa'aba di.

⁴⁴⁻⁴⁵ Aaimama za'ra wa'wa hā, Wa'uburē. A norī wa'wa hā ĩ'ra te 're anomro aba mo. Te te sima 're ĩwē mono zém na si, te asima 're ĩwē za'ra wa'aba mo, tāma āma 're uwaimrami za'ra wa'aba mono da. Ta hā dapoto na'rata hawi dapārī'wa te 're mo. Sadawa nhipese u'āsi wa, tō sena te te dama 're rowasu'u mono ō di. Tizadawa nhipese na ma tō sāna'rata. Simirosa'rata wasété u'āsi wa, sadawa nhipese u'āsi di. Taha wa, ĩ'ra 're anomro aba mono wa, ĩnhimirowasu'u hā tō sena nherē, āma 're ĩzaze za'ra wa'aba mono ō di.

⁴⁶⁻⁴⁷ Tō sena na wa aima te 're wasu'u za'ra wa'wa, 'Re ĩhāimana u'āsi mono nhimiroti hā. Tane nherē, ĩnhimirowasu'u na 're ĩzaze za'ra wa'aba mono ō di. E marī wa. 'Re ĩhāimana u'āsi mono nhīb'a'uwē norī si te za te te 're wapari pese za'ra, ĩsimiroti hā. A norī wa'wa hā ĩsīb'a'uwē 're anomro aba mono ō di. Taha wa, ĩsimiroti hā 're wapari pese za'ra wa'aba mono ō di. — Āne Zezusi ma tō tāma waihū'u za'ra.

Zezusihi wasu'u, Abra'āhā wasu'u me

⁴⁸ Tawamhā dama ĩpire norī hā ma tō asa tāma nharī za'ra:

— A hā, samaritanu. Wa'uburē ré, 're aimorī wa, te asimiza'rese āna āne na hā wama ĩrowasu'u. Tō sena, wa tō nasi āne na aima nharī za'ra ni. — Āne te taré tāma nharī za'ra, Zezusihi ma.

⁴⁹ Tawamhā Zezusi asa te tāma nharī za'ra:

— Mare di. Wa'uburē ré, 're ĩmorī ō di. Wa hā ĩmreme wazép sina, wa Īmama hā te aima 're wasu'u wē za'ra wa'wa. Tazahā a norī wa'wa hā asiséb āna te āne Īma ĩnharī wasété za'ra wa'wa.

⁵⁰ ĩ'āma 're dawata za'ra mono zō, ĩsina 're ĩnhimnhasi mono ō di, wa hā. Misire ma tō te te sima 're da'awē, ĩ'āma 're dawata za'ra mono da. Tō ĩ'uwaibaba te te ĩ'āma sima 're ĩda'awē mono zé hā.

⁵¹ Tō sena wa za aima rowasu'u za'ra wa'wa. ĩnhimiroti hā da te 're 'madā'ā pese za'ra mono wamhā, 're dadā'ā za'ra mono āna te za 're dahāimana u'āsi za'ra. — Āne te tāma rowasu'u za'ra.

⁵² Sō'awi te te tāma rowasu'u za'ra ō wa, ĩmreme hā tāma pibu prā za'ra di. Taha wa, asa te duré Zezusihi ma nharī za'ra:

— Wa'uburē ré, 're aimorī na, wama aiwaihū'u pese za'ra di oto. Wahi'rada Abra'ā hā ma tō dārā. Uburē 'Re ĩhāimana u'āsi mono zadawa wasu'u'wa norī zama ma duré tidā'ā za'ra. Tane nherē, ma tō ĩna, da te 're asaze za'ra mono wamhā, 're dadā'ā za'ra mono āna, 're ĩdahāimana u'āsi za'ra mono na hā.

⁵³ E Abra'āhā nhipai u'āsi na aipire bā, te āne wama ĩnharī za'ra. Ma tō dārā, ta hā. 'Re ĩhāimana u'āsi mono zadawa wasu'u'wa norī zama ma tō duré 're dā'ā za'ra. E 'wa hā bété, a hā. Ma'āpé asina asimirosa'rata na wama waihū'u za'ra na, wa te aiwaihū'u za'ra da.

⁵⁴ Tawamhā Zezusi te duré asa tāma nharī za'ra:

— Wa hā, ĩpire na ĩsina 're ĩwata mono ō di. ĩpire na ĩsina 're ĩwata mono 'wa'āhā, aré dama ĩwapure di. Īmama si te ĩpire na te te dama 're ĩwasu'u. Ta hā Asīb'apito na te 're ĩsisi za'ra wa'aba mo, 'Re ĩhāimana u'āsi mono hā.

⁵⁵ Tane nherē, Asīb'apito na 're sisi za'ra wa'aba mono nherē, waihū'u za'ra wa'aba ō di. Taha wa, te taré Asīb'apito na 're ĩsisi za'ra wa'aba mo. Wa hā wa tō waihū'u, 'Re ĩhāimana

u'āsi mono hā. Aima sô 're ĩnhimrami za'ra wa'aba mono 'wa'āhā, aré ĩzadawa nhipese di wa hā, asine za'ra wa'aba. Tō sena wa tō waihu'u, 'Re ĩhāimana u'āsi mono hā. ĩsimiroti hā wa tō duré te 're 'madā'ā pese.

⁵⁶ Aihī'rata 'wa, Abra'ā hā ma tō ĩwaihu'u siro, we datēme ĩmorizém na hā ti'ai u. Taha wa, Abra'āhā ma, rowē di. Te 're to. — Āne Zezusi te tāma rowasu'u za'ra.

⁵⁷ Tawamhā te asa tāma nharī za'ra, dama ĩpire norī hā:

— E niha ma tō Abra'ā hā ĩwaihu, duréi pese dawi dā'ā nherē. Te aré āne wama ĩwasu'u za'ra, ai'āma wahub ahā uptabi 'wa'āhā. Zahadu a hā, ai'āma wahub ahā ō di. 50 na zahadu ai'āma wahub ō di. — Āne te Zezusihi ma, nharī za'ra.

⁵⁸ Taha wa, Zezusi te duré asa tāma nharī za'ra:

— Tō sena, wa aima ĩsiwasu'u za'ra wa'wa. Abra'ā hā poto ō ré, wa 're ĩhāimana u'āsi. — Āne Zezusi ma tō tāma siwasu'u za'ra, dama ĩpire norī ma.

⁵⁹ Tawamhā te te sadawa 'ru za'ra wa, ma ēne hā sada waibu za'ra, te te siwi āma wīri da. Tane nherē, te te siwi wīri ō di, rob u watobro da, tiwi si'wahi za'ra wa, 'ri 'wawi wa'ra hawi.

9

Zezusi hā aibā ĩpotozém hawi ĩtob'a te te ĩpesezé wasu'u

¹ Tawamhā morī ré, ma tō aibā hā tisā Zezusi hā, ĩwaptā'āzém hawi ĩtob'a hā.

² ĩsiré, wa te wasiwi sāmri za'ra wa, wa tō āne wasiwi sadanharī ni:

— E marī wa, ma tob'a na waptārā. E tiwasédé te te 'manharī wa, ma tob'a na waptārā. E ĩmama norī hā timro me tiwasédé te te 'manharī zahuré wa, ma ĩ'ra hā tob'a na waptārā.

³ Taha wa, te Zezusi hā asa wama nharī za'ra:

— Mare di. Tiwasédé te te 'manharī ō di. ĩmama norī zama, tiwasédé te te 'manharī zahuré ō di. Rowē na 're morī wa za, ma tob'a na podo, ĩwaihu'u pese na da te waihu'u za'ra da, 'Re ĩhāimana u'āsi mono hā.

⁴ Ta hā ma tō we ĩzatō, dapawaptom na te tāma 're romhuri mono da. Rowa'a ré, te za da te 're romhuri za'ra. 'Re mara mono wa, da te 're romhuri waihu'u za'ra mono ō di. Tane rowē ré, wa za wa te tāma 're romhuri za'ra.

⁵ Tawamhā ti'ai āma 're ĩnhamra mono ré, dama rob'uuiwē'wa ne, wa hā dama rowē nhomri'wa, wa 're ĩhāimana. — Āne te wama siwasu'u.

⁶⁻⁷ Tawamhā Zezusi hā ma tō tizadaipro hā oto time ti'ai u, ti'a te te āma wai'ō da, te te āma tomhā u'ré da. Tawamhā tinhiptōmo na ma tō sada a'ā. Te te āma tomhā u'réi pari wamhā, te tāma tinha:

— Mo oto aimorī pu'u u, asitōmo upsō da, Siro'é na pu'u nhisi u. — Āne te satō. Siro'é na pu'u nhisi hā dazatōri, te wasu'u.

Taha wa, te mo, sitōmo upsō da. Sitōmo upsōi wamhā, tōmo wē di oto aibā hā. Tawamhā te wei mo apā.

⁸ Tawamhā da te 'madā'ā za'ra wamhā, te dasima rowasu'u za'ra ni, āne:

— E ō hā rob'uprazém na te te 're da'awari mono da, 're ĩsāmra mono. — Āne te dasima rowasu'u za'ra ni, ĩsōrōwa 'rata 're ĩdahāimana za'ra mono norī hā. Tob'a ré, te te siwi 're ĩ'madā'ā za'ra mono norī me, te āne sima rowasu'u za'ra.

⁹ Tawamhā ni'wam norī hā te sima rowasu'u za'ra:

— Tō ō hā, tob'a na aré 're ĩsāmra mono.

Ni'wam norī hā te duré sima rowasu'u za'ra:

— Mare di. Ta hāi ō di. Taré ĩtob'a ne, ō hā.

Tawamhā te te sina dawapari wamhā, te oto dama sina wasu'u, tito pese'wa hā:

— Wa hā ĩtob'a di aré tō.

¹⁰ Tawamhā te sadanharī za'ra:

— E niha ma tō atōmo wē.

¹¹ Taha wa, te asa tāma siwasu'u za'ra:

— Aibā hā ma tō tizadaipro na waza ti'a hā, te te āma ĩtomhā u'ré da, Zezusi na ĩsisi hā. Pu'u u ĩmorī da, te ĩma rob'ru, ĩsitōmo upsō da. Taha wa, wa tō mo. ĩsitōmo upsōi wamhā, ĩtōmo wē di oto. — Āne te aibā hā sina dama wasu'u.

¹² Tawamhā ma tō sō sadanharī za'ra:

— E mahāta tawamhā, Zezusi hā.

Tawamhā te asa tāma rowasu'u za'ra:

— Me. Wa hā te waihu'u ō di. — Āne te asa tāma rowasu'u za'ra, aibā hā.

Parisezu norī hā aibā ĩtob'a, Zezusi te te ĩpe, te te siwi ĩsadanharizé wasu'u

¹³ Tawamhā parisezu norī u te siwi saprō, aré tob'a na 're ĩsāmra mono hā.

¹⁴ Romhuri zahârizém na te itême siwi saprô, Zezusi hã tizadaipro na ti'a te te iwazarizém na, duré te te ito pesezém na, sabadu na.

¹⁵ Tawamhã te te itême siwi awisi za'ra wamhã, te siwi sadanha, parisezu nori hã, niha te te ito pesezéb zô. Tawamhã asa te tãma siwasu'u za'ra:

— Tizadaipro na ti'a hã te te iwai'o na, ma tó itômo u're. Taha pari, wa tó isitômo upsô. Ahãna hã wa oto rob'madâ'â wê.

¹⁶ Tawamhã ni'wam nori si, te Zezusihi ma nharĩ za'ra, parisezu nori hã:

— Ô hã sabadu na te te pese nherê, te te 'madâ'â pese ô di, romhuri zahârizém na roti hã. 'Re ihâimana u'âsi mono hã we te te satôri ô di. We te te satôri 'wa'âhã, te aré te te 're 'madâ'â pese, isimiroti hã. — Âne te Zezusihi ma nharĩ za'ra.

Tawamhã ihâiba amo nori hã te rowasu'u za'ra duré:

— 'Re mori wasété 'wa'âhã, aré waihu'u pese ô di, marĩ dama i'manharĩ waihu'u ô hã te te dama 'manharĩ da hã. — Âne Zezusihi âma ma tó tasisada 'rãmi za'ra ni.

¹⁷ Taha wa, te duré siwi sadanha, parisezu nori hã:

— Ô hã te te ato pese nherê, e niha asimirosa'rada hã âma hã.

Tawamhã ma tó duré asa tãma nharĩ za'ra:

— Ô hã 'Re ihâimana u'âsi mono zadawa wasu'u'wa, te 're mo. — Âne te tãma rowasu'u za'ra.

¹⁸ Tômo wê u'âsi, 're mori newamhã, te te ito pesezém na ma tó wawã za'ra, dama ipire nori hã. Taha wa, ma tó aibã mama zô tihârã za'ra, te te âma sadanharĩ za'ra da. Îna zô zama te tihârã za'ra.

¹⁹⁻²¹ Tawamhã itême simasisi zahuré wamhã, te âma siwi sadanharĩ za'ra:

— E ô hã ai'ra. Ma tó dama iwasu'u wa'wa, tob'a na iwaptã'â na. E niha ma ahãna titômo wê, tob'a nherê. Rob'madâ'â wê di oto.

Tawamhã imama te asa tãma nharĩ za'ra:

— Ta hã tó wa'ra, te 're mo. Tob'a na ma tó waptãrã. Âne na wama waihu'u pese di. Niha oto te te irob'madâ'â wê na wa te waihu'u ô di. Duré ito pese'wa hã wa te waihu'u ô di. A nori wa'wa hã te za i'ra hã asiwi isadanharĩ 'wa, ito pese'wa zô te te aima wasu'u za'ra wa'aba da. Ma tó tîprédu oto. Si'uihã na te za aima siwasu'u za'ra wa'wa.

²² Âne imama te tãma nharĩ za'ra, dama ipire nori mreme pipa te. Âne ma tó sima âma roti za'ra aré: "Ni'wam nori hã Zezusi, Danho'reptui'wa da, 'Re ihâimana u'âsi mono te te ipisutu na te te saze za'ra wamhã, wa za wa te tiwi 're rosawi za'ra, rowahutuzéb u dame 're sisisi tó mono da." Âne na ma tó te te sima 're roti za'ra.

²³ Taha wa, te te tãma wasu'u za'ra ô di, ti'ra to pese'wa hã. I'ra si te te siwi sadanharĩ za'ra da, i'ra hã oto prédu wa, te ti'ra si tãma 'ru za'ra.

²⁴ Tawamhã parisezu nori hã te sô tihârã za'ra, te te ito pese zô, apã itême sébré za'ra da. Itême sébré za'ra wamhã, te tãma nharĩ za'ra:

— Zezusi hã 're mori wasété di. Âne wama waihu'u pese za'ra di. Ma'âpé 'Re ihâimana u'âsi mono âma si aiwata, taha si te te ato pese wa.

²⁵ Tawamhã ma tó asa tãma nharĩ za'ra:

— Âté tó sena 're mori wasété di, Zezusi hã. Âté 're mori wê di. Wa hã te waihu'u ô di. Itômo wê zép si, wa tó isina waihu'u. Itob'a u'âsi, wa aré 're inhamra. Ahãna itômo wê di oto.

— Âne te tãma siwasu'u za'ra, parisezu nori ma.

²⁶ Tawamhã asa te te ito pese ma, te nharĩ za'ra:

— E niha ma tó ato pese.

²⁷ Taha wa, te aibã hã asa duré tãma nharĩ za'ra:

— Wa tó aima rowasu'u za'ra wa'wa aré. Tane nherê, âma iwapari ze za'ra wa'aba ô di. E marĩ da, wa za bété aima isiwasu'u na sahu za'ra wa'wa. E Zezusi hã saze za'ra wa'aba da bâ, wa za isiwasu'u na aima sahu za'ra wa'wa. — Âne te tãma nharĩ za'ra.

²⁸ Tawamhã te te sadawa 'ru za'ra wa, te asa tãma nharĩ za'ra:

— A hã isazei'wa, te 're aimo. Wa nori hã Mozésihi zazei'wa, wa 're wanomro.

²⁹ 'Re ihâimana u'âsi mono, ma tó Mozésihi ma pisutu, isadawa para datême 're mori da. Âne wama waihu'u pese za'ra di, wa nori hã. Ô hã bété, Zezusi hã e ma hawi te wei mo. Wa nori hã âne na hã wa te waihu'u za'ra ô di.

³⁰ Tawamhã te duré asa tãma nharĩ za'ra:

— E niha bété, Zezusi te te ito pese nherê, waihu'u za'ra wa'aba ô di, we isatôri'wa hã.

³¹ Ni'wa hã 're mori wasété wamhã, imreme te te 're wapari mono ô di za, te te tãma âma 're a'uaimrami mono da, 'Re ihâimana u'âsi mono hã. Ni'wa hã isimiroti te te 're 'madâ'â pese mono wamhã, te za imreme hã te te 're wapari u'âsi, te te tãma âma 're u'uaimrami u'âsi mono da. Âne wama waihu'u pese za'ra di, wa nori hã.

³² Ropoto na'rata hawi 're datob'a za'ra mono wa, ni'wa hã te te 're da'ato pese mono ò di. Ìwasu'u hã robaba di aré.

³³ Ò hã aibã hã 'Re Ìhãimana u'ãsi mono hawi wei morì ò 'wa'âhã, aré ìto pese ò di. Tãma waihu'u ò di aré. — Ìne te tãma nharì za'ra.

³⁴ Tawamhã parisezu norì, te asa tãma nharì za'ra:

— Aiwaseté ré, ma tò ana dub're asa'ê. Taha wa, ma tò atob'a na aipo. E niha te bété wama Ìrowasu'u za'ra, aiwaseté nherê. Mo oto aimorì. Rowahutuzéb u dame 're azasi mono ò di za oto. — Ìne Zezusi te te ìto pese ma, te nharì za'ra, parisezu norì hã.

Sõ'awib ò nherê, Zezusi hã datob'a na tizazei'ò'wa norì ãma Ìsimiré'ézé wasu'u

³⁵ Tawamhã te te ìto pese wi, te te tiwi Ìrosawi za'ra zé hã ma tò wapa, Zezusi hã. Taha wa, te sô rob'madã, tinhimito pese zô. Te te sãmri wamhã, te tãma tinha:

— E dasiré ìpodo hã, ma tò Ìsaze.

³⁶ Tawamhã asa te Zezusihi ma tinha:

— E 'wa hã dasiré ìpodo. Ma'ápé Ìma wasu'u na, te waihu'u da, duré te saze da.

³⁷ Tawamhã Zezusi asa te duré tãma tinha:

— Wa hã dasiré ìpodo, Ìmadã hã wa aima Ìsiwasu'u.

³⁸ Tawamhã ma tò aibã hã Zezusihi ma tinha:

— Apito, wa za oto asaze.

Taha wa, hi'rãtitò ma tò tãma nhamra, Zezusihi ãma wata da.

³⁹ Tawamhã Zezusi te dama tinha:

— Ti'ai u, wa we datême mo, te da'ãma 're arowairébé mono da. E marì da. Tipê'ê 're, tob'a na 're Ìsiwaihu'u za'ra mono norì hã tob'a ãna oto 're nomro mono da, duré tipê'ê 're, tob'a ò na taré 're Ìsi'madã'ã za'ra mono norì hã tob'a u'ãsi 're nomro mono da. — Ìne Zezusi ma tò dama rowasu'u.

⁴⁰ Tawamhã parisezu norì Ì'rata Ìsimasa, te tãma nharì za'ra:

— Wa norì hã bété. E wapê'ê 're, watob'a na wa 're wanomro. E wa norì hã te Ìwasu'u za'ra.

⁴¹ Tawamhã Zezusi asa te tãma nharì za'ra:

— Aipê'ê 're, atob'a na 're asiwaihu'u za'ra wa'aba mono 'wa'âhã, te te 're aiwê'ò za'ra wa'aba mono ò di aré, 'Re Ìhãimana u'ãsi mono hã. Tawamhã aipê'ê 're, atob'a ò na 'rãwi 're asi'madã'ã za'ra wa'aba mono wa, te za te te 're aiwê'ò za'ra wa'wa. — Ìne Zezusi ma tò tãma rowasu'u za'ra, parisezu norì ma.

10

Pone'ërebã 'madã'ã'wa na, Zezusi hã te te sina Ìsimiré'ézé wasu'u

¹ Tawamhã Zezusi te duré pone'ërebã tede'wai wasu'u hã dama wasu'u. Ìne te dama wasu'u:

— Tò sena wa za aima rowasu'u za'ra wa'wa, pone'ërebã tede'wai wasu'u na. Pone'ërebã hã wa'ra 're, 're simi'wara mono wamhã, Ìsimisaihuri hã 'ridawa u, sô 're sisisi mono ò di. Wa'ra na si te za sô 're sarõtò za'ra.

² Ìtede'wa si te za 'ridawa u sô 're ne, 're zasi mono da, wa'ra 're.

³ Ta hã 'ridawa u, sô 're simasisi mono wamhã, te za te te tãma 're 'ridawa, 'ridawa 'madã'ã'wa hã. Sô 're simasisi mono wamhã, Ìmreme te za waihu'u za'ra, pone'ërebã hã. Ìsisi mono bã, te za sitême sô 're hãrã, rob u te te 're sani za'ra mono da.

⁴ Tinhimizama hã rob u te te 're simroi mono wamhã, Ìsôwa te za 're ne. Titede'wai mreme te te waihu'u pese za'ra wa, te za Ìsarina 're nomro, Ìsimizama hã.

⁵ Pone'ërebã tede'wai upana nherê, e te za dazarina 're nomro. Mare di. 'Re nomro mono ò di za, dazarina. Te za tiwi 're sisa're, Ìmreme te te 're waihu'u za'ra mono ò wa. — Ìne Zezusi, ma tò dama rowasu'u, pone'ërebã tede'wai wasu'u na.

⁶ Tane nherê, marì te te Ìwasu'u hã da te waihu'u za'ra ò di.

Zezusi hã 'ridawa na te te sina Ìsimiré'ézé wasu'u

⁷ Tawamhã Zezusi te duré dama tinha:

— Tò sena wa za aima Ìsiwasu'u za'ra wa'wa. Wa hã wa 'ridawa na Ìsina simiré'é, pone'ërebã 'mazasizém na wa'ra u.

⁸ Pone'ërebã hã, titede'wai upana norì mreme hã te te 're wapari za'ra mono ò di za, Ìsipsaihuri norì mreme hã, danhibrob zô dapãrì'wa norì mreme hã. Tane 'Re Ìhãimana u'ãsi mono zazei uptabi 'wa norì hã te te 're wapari za'ra mono ò di za, aimawi te te dama 're Ìrowasu'u za'ra mono norì mreme hã, Ìwana datême 're Ìnomro mono norì mreme hã.

⁹ Wa hã, 'ridawa na wa tò Ìsina simiré'é, Ìsiwaprosi Danho'reptui'wai wa. 'Ridawa na te za wa'ra u 're sisisi, pone'ërebã hã. 'Re sisisi mono wamhã, tãma 're rowé za'ra mono di

za. Tane, da te 're ĭzaze za'ra mono wamhā, dama 're rowē za'ra mono di za, wa hā te 're da'anho'reptui u'āsi mono wa. Wa'ra hawi, te za pone'ērebā hā tisa zō 're wairébé. Īsa zō, tiwi 're rowaptā'ā za'ra mono ō nherē, tāma 're rowē za'ra mono di za. Tane ĭzazei'wa norī wi, ĭwē zō tiwi 're rowaptā'ā za'ra mono ō di za.

¹⁰ E marī da, te ĭsimisaihuri norī hā wa'ra u 're sisisi. Pone'ērebā zō te 're nomro, te te dawī 're waiubi mono wa, te te dawī 're simroi mono da. Tanei ō di, wa hā. Wa hā wa tō we datēme mo, robzei u'āsi ĭāma 're danomro mono da, duré 're dadā'ā za'ra mono āna, 're dasi'ubumroi u'āsi mono da, hāiwa āma.

Zezusi hā pone'ērebā tede'wa na te te sina ĭsimiré'ézé wasu'u

¹¹ — Wa hā pone'ērebā tede'wa na, wa ĭsina simiré'é, tinhimizama te te 're ĭazawi pese mono na. E marī wa. ĭsisawi āna, ĭzazei'wa norī zada, ĭdā'ā wa za, te 're anho'reptui mono da.

¹² Tite wa, te te 're azawi pese, tinhimizama hā, pone'ērebā tede'wa hā. Tāma ĭromhuri'wa hā tite ō wa, te te 're azawi pese mono ō di. Taré rob'uiprazéb zō si, te te 're romhuri. Robzahi hā we sō morī wamhā, te za tiwi wara. Pone'ērebā, te za rēme za'ra. Taha wa, te za 'mai'ā, robzahi hā. Te te 'mai'āri wamhā, te za āma ropé.

¹³ E marī wa, te za tiwi wara, romhuri'wa hā. ĭtede'wai ō wa, te za tiwi wara, te te 're azawi pese mono ō wa.

¹⁴⁻¹⁵ Wa hā pone'ērebā tede'wa, ĭsimizawi pese na, wa tō ĭsina simiré'é, ĭzazei'wa norī te 're azawi pese mono wa. ĭmama hā ma tō ĭwaihu'u, ti'ra na. Wa hā wa duré ō hā waihu'u, ĭmama na. Tane duré ĭzazei'wa norī hā wa tō te 're awaihu'u u'āsi, ĭnhib'a'uwē na. ĭzazei'wa norī hā ma tō duré ĭwaihu'u za'ra, tinhib'apito na. Ta norī zada, wa za ĭsisawi āna dārā, te 're anho'reptui mono da.

¹⁶ Ni'wam norī hā te duré 're nomro, ĭnhib'a'uwē 're hāimana za'ra mono da hā. Ta norī āma, wa za pone'ērebā na simiré'é za'ra, ĭnhimiwa'ra 're, 're ĭsi'ubumroi mono ō na hā. Ta norī zama wa za ĭsitēme ubumro. Tawamhā te za ĭmreme hā te te 're wapari pese za'ra. Pone'ērebā norī hā maparane danhimi'ubumro hā siré oto 're ĭsi'ubumroi mono ne, te za simisutu ĭnhib'a'uwē 're nomro, misi ĭ'madā'ā'wa, tāma 're ĭhāimana za'ra mono wa za.

¹⁷ — Taha wa, ĭmama te te 're ĭzawi pese, ĭsisawi āna, sada ĭdā'ā za'ra wa za, apā ĭhāiwa'utu pari, 're ĭmorī u'āsi da.

¹⁸ Dasi'uihā na da te dasiwi ĭwīri da hā mare di. ĭsi'uihā na, wa za dārā, dazada. Wa za duré hāiwa'udu, ĭsi'uihā na. Āne wa za 'manha, ĭmama te te ĭma ĭpisutuzéb zarina. — Āne Zezusi te dama siwasu'u.

¹⁹⁻²¹ Tawamhā ĭmreme, te te wapari za'ra wamhā, ma tō ni'wam norī hā dama rowasu'u za'ra, āne:

— Wa'uburé ré, 're morī wa, te āne simiza'rese āna wama siwasu'u. E marī da, te za bété ĭmreme hā ĭwapari za'ra wa'wa.

Tawamhā ni'wam norī hā te dama rowasu'u za'ra:

— Mare di. Wa'uburé ré, 're morī 'wa'āhā, aré mreme wē ō di. Mreme wē di, ō hā. E wa'uburé, ma tō pawapto, ĭtob'a te te ĭto pese da hā. Mare di. Ta hā waihu'u ō di. — Āne Zezusi hā āma ma tō tasisada'rāmi za'ra ni.

Zudezu norī hā, Zezusi te te siwi ĭwē'ō za'ra zé wasu'u

²²⁻²³ Tawamhā wasiré zudezu norī hā daro mono bā ma tō duré si'rā'ōtō, Zeruzarē āma, 'Re ĭhāimana u'āsi mono āma dawata za'ra da. E marī wa. Apā 'ri za'ēne hā te te tāma pisutu za'ra wē te, āma 're ĭdawata za'ra mono zéb da hā ma tō tasi'rā'ōtō ni, bādā dama ĭpire na, āma dasipo're pu'u za'ra da, rowa'u'u wahā, 're sa'wari mono ré. Tawamhā Zezusi hā me, wa ai'aba'rē ni, 'ri za'ētē u. 'Ri 'wawi wa'ra wa'wai baba, wa 're wanomro, Apito Saromahā nhib'uriti na uriti nhisi wa'wai baba.

²⁴ Tamomo ma tō ĭtēme si'rā'ōtō, dama ĭpire norī hā, Zezusi hā u. Tawamhā te tāma nharī za'ra:

— E niwa te za wama asiwasu'u za'ra. Wama asiwasu'u za'ra zéb zō, wanhimipari wa'za za'ra di. A hā, tō sena Danho'reptui'wa da, 'Re ĭhāimana u'āsi mono te te aipisutu wamhā, ma'āpé sō'awi wama asiwasu'u za'ra na, wa te aiwaihu'u za'ra da. — Āne te Zezusi hā nharī za'ra.

²⁵ Tawamhā Zezusi hā te asa tāma nharī za'ra:

— Wa tō aima ĭsiwasu'u pari za'ra wa'wa. Tane nherē, ĭmreme na 're ĭzaze za'ra wa'aba mono ō di. ĭmama zadawa para, wa tō marī dama ĭ'manharī waihu'u'ō hā te dama 're ab'manharī wē, da te 're ĭwaihu'u za'ra mono da.

²⁶ Tane nherē, asina 're ĭ'umnhasi za'ra wa'aba mono ō di, ĭnhib'a'uwē 're anomro aba mono ō wa.

²⁷ Īnhib'a'uwē si te za ĩmreme hā te te 're wapari pese za'ra. Pone'ērebā tede'wa, tinhimizama hā te te 're ĩ'awaihu'u mono ne, wa tō ĩnhib'a'uwē norī hā waihu'u za'ra. Ta norī si te za ĩnhimiroti hā te te 're 'madā'ā pese za'ra.

²⁸ Ta norī ma, wa za pisutu za'ra, 're dā'ā za'ra mono āna, 're hāimana u'āsi za'ra mono da, hāiwa āma 'Re ĩhāimana u'āsi mono 'rata. Nī'wa hā te te ĩwi 're waihu'u mono ō di za, ĩzazei'wa norī hā.

²⁹ Īmama, ma tō ĩma pisutu za'ra, ĩnhib'a'uwē si 're nomro mono da. Ta hā danhipai u, uburé dama pire di, Īmama hā. Uburé marī ma, pire di, hāiwa āma ti'ai āma zama. Taha wa, ni'wa hā te te tiwi 're waihu'u mono ō di za.

³⁰ Wa norī hā aiwa waihu'u pese di, Īmama me. — Āne Zezusi te tāma siwasu'u za'ra, dama ĩpire norī ma.

³¹ Tawamhā ta norī hā ma duré ēne hā sada waihu, te te āma siwi wīrī da.

³² Taha wa, te Zezusi hā duré tāma nharī za'ra:

— Wa hā Īmama te te ĩma ĩpisutuzéb zarina, wa tō marī dama ĩ'manharī waihu'u ō na te 're da'apawapto u'āsi. E ma hā ĩnhimipawaptozbé hā aima wé za'ra wa'aba ō wa, te za asiwi ĩwīrī 'wa, étē na. Ma'āpé, ĩma waihu'u za'ra wa'aba.

³³ Tawamhā asa te tāma nharī za'ra:

— 'Re da'apawapto mono wa, wa te wasiwi aiwīrī ō di za. Aimreme wasété wa, wa za wasiwi aiwīrī ni. Ti'ai āma aipoto nherē, 'Re ĩhāimana u'āsi mono me, aiwa aiwaihu'u pese aba na siwasu'u wa, wa za wasiwi aiwīrī ni, aimreme wasété wa.

³⁴⁻³⁶ Tawamhā Zezusi asa te tāma nharī za'ra:

— E ĩ'ra na ĩsiwasu'u wa, ma tō ĩmreme hā asiwi ĩwē'ō za'ra wa'wa. Duréihā 'Re ĩhāimana u'āsi mono, ma tō tinhimiroti hā te te dama 're awaihu'u, da te dasima āma 're rotī za'ra mono da. Ti'ra na ma tō rotī'wa norī hā te te 're sisi za'ra. Āne ma tō ĩbaihā na āma rob'ui'ére, ĩsada wa'wa hā. Tō sena, ĩmreme ui'ére hā. Rotī'wa norī hā, ti'ra na te te 're sisi za'ra mono wamhā, e wa hā ĩmreme wē'ōre di, ĩ'ra na ĩsiwasu'u wamhā, ti'ai u we te te ĩzatōrī nherē, 'Re ĩhāimana u'āsi mono hā.

³⁷⁻³⁸ Īmama hā tiwaihu'u pese na, te te 're da'apawapto. ĩzama, wa tō ĩsine te 're da'apawapto. Taha wa, te za ĩ'ra na ĩwaihu'u za'ra wa'wa. ĩsine, te 're da'apawapto mono ō wamhā, ĩ'ra na 're ĩzaze za'ra wa'aba mono ō di za. ĩ'ra na wa tō aima 're ĩsiwasu'u za'ra wa'wa aré. Tane nherē, ĩmreme na 're ĩzaze za'ra wa'aba mono ō di. Taha wa, Īmama hā tiwaihu'u pese na te te 're ĩda'apawapto mono ne, te 're da'apawapto mono nherē, te za ĩ'ra na 're ĩzaze za'ra wa'aba mono. Tawamhā te za ĩwaihu'u za'ra wa'wa, ĩ'āma 're ĩhāimana mono na, Īmama hā. Te za duré ĩwaihu'u za'ra wa'wa, Īmama āma 're ĩhāimana mono na. — Āne Zezusi te tāma siwasu'u za'ra.

³⁹ Tawamhā ma tō duré sima wé za'ra, te te siwi āri da, dama ĩpire norī hā. Tane nherē, tiwi simani za'ra wa, te te siwi āri za'ra ō di.

⁴⁰ Tawamhā apā ma tō mo, Zodā pa u Zezusi hā. ĩsiré, wa ai'aba'ré ni. Tawamhā wasihutu wi, wa saprī za'ra ni, zara u. Zuwā Batita hā ā dawabzuri te te dama 're ĩ'ab'manharī 'rata mono zéb u, wa saprī za'ra ni. Tame te a'ā nhamra, Zezusi hā.

⁴¹ Tame sāmra ré, te da'ahā na nasi ĩtēme aihutu ni. Nasi ĩtēme dasihutu wamhā, āne te dasima rowasu'u za'ra ni:

— Zuwā Batita hā, ĩmreme na da te 're saze za'ra mono da, marī dama ĩ'manharī waihu'u ō hā te te dama 're ab'manharī mono ō di. Tane nherē, tō sena ma tō Zezusi hā te te dama 're wasu'u. — Āne te dasima rowasu'u za'ra ni.

⁴² Taha wa, tame wasi'ubumroi ré, ma tō da'ahā na Zezusi hā saze za'ra ni, Danho'reptui'wa na.

11

Razaru ĩdā'ázé wasu'u

¹⁻³ Tawamhā aibā hā te 're hāimana, Razaru na ĩsisi hā. Betānha na 'ri wa'ōtō nhisi āma te 're sāmra. Tame te duré ĩhidiba norī hā 're simasisi zahuré Mariza norī hā, Mataha me. Mariza hā niwapsi te za Zezusihi para u'ré, wedewa'u zadaze na, tāma rowé da. Taha parip si te za para u'ō, tizéré na.

Tawamhā ma tō tiházé, Razaru hā. Házé wa, ma tō ĩhidiba norī hā da'mazató, Zezusihi zó da'maimorī da, ĩhitébré hā te te tāma 'maiwasu'u da. ĩtēme wisi wamhā, āne te Zezusihi ma sada wa'wa u:

— Apito, aibā 're ĩsawi pese mono hā ma tō tiházé.

⁴ Tawamhā Zezusi hā te te wapari wamhā, te tinha:

— Tane tō. Dâ'â u'âsi nomro ò di za. Taha wa, te za 'Re Ìhâimana u'âsi mono âma 're dawata za'ra, waihu'u pese wa. Ì'âma zama te za duré 're dawata za'ra. Wa hâ Ì'ra wa, te za duré Ì'âma 're dawata za'ra. — Âne te Zezusi hâ tinha.

⁵ Mata norî hâ Zezusihi ma, sawi pese za'ra di, Razaru norî hâ.

⁶ Tane nherê, Ìwasu'u te te waparî wamhâ, awa'awi Ìtême morî ò di. Maparane ma tō âma timara, tame sâmrâ ré.

⁷ Taha parî, te oto wazatôri za'ra, apâ wa te wasiwi saprôni da, Zudeza na danhipti'a nho'ômo nhisi u. Ìsiré 're wanomro mono wa, te wazatôri za'ra.

⁸ Taha wa, wa tō asa tâma nharî za'ra ni:

— Rowahutu'wa, e niha te za apâ aimo. Nimosi dama Ìpire norî hâ te aré siwi aiwî, êtê na.

⁹ Tawamhâ âne te wama rowasu'u za'ra, Zezusi hâ:

— Bâtâ pusizém hawimhâ bâdâ sébrézéb u hâ rowa'a di. Tawamhâ, ni'wa hâ rowa'a na morî wamhâ, simeî ò di za. E marî wa. Rowa'a na hâ rob'madâ'â pibui pese wa.

¹⁰ Robra na morî wamhâ, te za aime. — Âne sô'awib ò nherê, te wama siwasu'u za'ra, Zezusi hâ. 'Re Ìhâimana u'âsi mono, ma tō tâma pisutu, 're Ìmorizé hâ a'â 're morî da. Taha wa, te sina hâtâ'â âna 're mo.

¹¹ Tawamhâ Zezusi te duré wama nharî za'ra, âne:

— Wasiwadi te nhono, Razaru hâ. Wa za Ìtême mo, te utu da.

¹² Tawamhâ wa tō duré asa tâma nharî za'ra ni:

— E marî da, te za Ìtême aimo. Séptâ'â wa, te oto tinhotô wê. — Âne wa tō tâma nharî za'ra ni.

¹³ Zezusihi si ma tō idâ'â uptabi na waihu'u. Ìsôtô na te te wama wasu'u za'ra wamhâ, idâ'âzé te wasu'u. Taré sôtô newa, wa norî hâ wa te waihu'u za'ra ò di, idâ'âzé hâ.

¹⁴ Wa te waihu'u za'ra ò wa, sô'awi te oto wama rowasu'u za'ra:

— Razaru hâ ma tō dârâ.

¹⁵ Hâzé ré Ì'rata Ìnhamra ò nherê, Ìma rowê di. E marî wa. Romhâimanazéb zarina, Ìwaihu'u pese na Ìzaze za'ra wa'aba wa za, Ìma rowê di. Oto Ìtême wasi'aba'rêi wa'aba.

— Âne te wazatôri za'ra, Zezusi hâ.

¹⁶ Taha wa, Tome hâ Ìsi'ubza na da te 're Ìsisi za'ra mono hâ te wama nharî za'ra, âne:

— Oto Ìme wasi'aba'rêi wa'aba, Ìsu da te wa'uprosi da nherê. — Âne te tinha, Tome Didimo hâ. Didimo na Ìsisi hâ dasi'ubza, te wasu'u.

Tawamhâ wa tō Ìtême wasiwi saprôni ni, Betânha na 'ri nhisi u.

Zezusi hâ apâ dahâiwa'utu'wa na Ìsiwasu'uzé wasu'u

¹⁷⁻¹⁹ Tawamhâ Betânha u wasihutu wamhâ, ma tō ni'wa hâ Zezusihi ma rowasu'u, âne:

— Razaru hâ ma tō dârâ. Ma tō dasiwi sêrê ni. Maparane si'uiwa na ma tō âma timara oto, da te dasiwi Ìsêrêzém na hâ. — Âne te tâma rowasu'u. Betânha u hâ romhuture wa, ma da'ahâ na wawana aihutu ni, Zeruzarê hawimhâ. Si'ubdatô 'ti'ai pibuzé hâ Betânha u da hâ. Mata norî hâ da te pê'êtété zahuré da, ma Ìtême aihutu ni, Ìhitébré hâ tiwi dâ'â zahuré wa.

²⁰ Tawamhâ ni'wa hâ ma tō Mata norî ma rowasu'u, âne:

— Zezusi hâ te we oto mo.

Taha wa, ma tō Mata hâ awa'awi watobro rob u, Zezusi hâ te te sina uzusi da. Marizaha si te Ìsa'u nhamra, 'ri para.

²¹ Tawamhâ Mata hâ Zezusi te te sina uzusi wamhâ, âne ma tō tâma tinha:

— Wanhîb'apito, wahitébré hâ hâzé ré wa'rata asâmrâ 'wa'âhâ, wawi dâ'â ò di aré.

²² Dâ'â nherê, 'Re Ìhâimana u'âsi mono ma, aimreme wamhâ, te za aima âma uwaimra.

²³ Tawamhâ Zezusi te asa tâma tinha:

— Tane tō. Dâ'â nherê, te za hâiwa'udu, aihitébré 'wa hâ.

²⁴ Mata te duré asa tâma tinha:

— Tane tō. Bâdâ ma tō sima pisutu 'Re Ìhâimana u'âsi mono hâ, adâ hâ te te Ì'ahâiwa'utuzéb da hâ. Tawapsi te za wahitébré hâ dazu hâiwa'utu.

²⁵⁻²⁶ Tawamhâ Zezusi te duré asa tâma tinha:

— Wa hâ 're dadâ'â za'ra mono nherê, te 're da'ahâiwa'utu mono parî, 're Ìdanomro u'âsi mono zé te dama 're Ì'apisutu mono, wa 're mo. Ni'wam norî hâ Danho'reptui'wa na te te sina 're Ìumnhasi za'ra mono wamhâ, tâma 're rowê za'ra mono di za. 'Re dâ'â za'ra mono wamhâ, dâ'â âna te za 're hâimana u'âsi za'ra, hâiwa âma. E tō sena ma Ìmreme hâ Ìsaze.

²⁷ Tawamhâ Mata asa te tâma tinha:

— Ìhe. Tō sena, wa aimreme hâ saze. A hâ Danho'reptui'wa da, 'Re Ìhâimana u'âsi mono te te aipisudu. A hâ 'Re Ìhâimana u'âsi mono 'ra. Wahi'rata norî hâ asô 're Ìsimipari za'ra mono, a hâ, ti'ai u we aimorî da hâ. — Âne te Zezusihi ma tinha.

Zezusi Ìsiwa'ôzé wasu'u

²⁸Tawamhã apâ te mo Mata hã, 'ri tême. Ti'awi pesere ma tô tinoi ma rowasu'u, Marizaha ma:

— Rowahutu'wa te we asô hã, itême aimorî da.

²⁹⁻³⁰Taha wa, ma si'aba're na wahudu, Zezusihi u wei morî da, Mariza hã. Zahadu 'ri tême, wasihutu ô di. Mata te te iwa'uzusizéb âma, wa zahadu aimasam ni.

³¹Tawamhã Mariza hã watobro wamhã, ma isarina wairé rob u, itême isihutu norî hã. Âne te sima âma romnomri za'ra: “Até tihitébré 'ru u te mo, âma wawa da.” Tane nherê, tihitébré 'ru u morî ô di, Mariza hã. Zezusihi u te wei mo. Taha wa, ma tô we isarina ai'aba're ni.

³²Mariza hã we itême wisi wamhã, hi'râtito ma ipapara nhamra, Zezusihi ma wapu wa. Tawamhã âne te tâma tinha:

— Wanhib'apito, wahitébré hã hâzé ré, wa'rata asâmra 'wa'âhã, aré wawi dâ'â ô di. — Âne te tâma tinha, wawa sina.

³³Tawamhã Mariza hã pê'ézé te, siwa'ô wa, duré we isarina isihutu zama 'ry'ry wa, pê'ézé di, Zezusi hã. Pê'ézé ahâ di.

³⁴Âne ma tô sadanharî za'ra:

— E mame ma tô asiwi isêrê 'wa.

Tawamhã asa te tâma rowasu'u za'ra:

— We aimorî wasiré, sabu da.

³⁵Tawamhã pê'ézé ahâ wa, te aiwa'ô, Zezusi hã.

³⁶Taha wa, te dasima nharî za'ra ni:

— Ô hã te te sawi pese uptabi di. Te te sawi pese uptabi wa, te sô tiwawa.

³⁷Tawamhã da'umro na te tâma nharî za'ra ni, âne:

— Ô hã aibâ itob'a, ma tô to pese. E niha bété hâzé ré te te pese ô di, dâ'â tô da, Razaru hã. — Âne te tâma nharî za'ra ni.

Zezusi hã Razaru te te ihâiwa'utuzé wasu'u

³⁸Tawamhã isiré, wa ai'aba're ni, ab're u. Sa'a zahâpâ, ab're hã. Pê'ézé ahâ di, Zezusi hã. Pê'ézé uptabi na te mo. Tawamhã, ab're u wasihutu wamhã, da te dasiwi âma sitom haré, te êne hã za. Tômo za'êtê di, êne hã.

³⁹Tawamhã ma tô Zezusi hã êne hã dama ti'ru, isitobzé hã da te dasiwi sa're da.

Taha wa, ma tô Mata hã Zezusihi ma tinha:

— Wanhib'apito, da te dasiwi isêrêzém na hã, maparane si'uiwa na ma tô âma timara. Taha wa, ma tô ti'ro. E 'ro nherê, te za isitobzé hã dasiwi sa're ni.

⁴⁰Tawamhã Zezusi te asa tâma tinha:

— Tane nherê, te za dasiwi sa're ni. Âma izazei wamhã, dama iwaihu'u'ô te za i'madâ, 'Re ihâimana u'âsi mono te te i'manharîzé hã. E âne na hã te aima rowasu'u ô di. Wa tô aima rowasu'u.

⁴¹⁻⁴²Tawamhã isitobzé ma tô dasiwi sa're ni. Tawamhã hâimo te oto rob'madâ, Timama ma mre me da, Zezusi hã. Âne te tâma tinha:

— Imama, da'âma aima 're imre me mono wamhã, imre me te ima âma 're i'awaimrami u'âsi mo. Ahâna te za duré imre me hã iwapa. Taha wa, ima rowê di. Danho'a, wa âne aima rowasu'u, aima imre me ré, da te iwapari za'ra da. E marî da. Aibâ âma aima imre mezé hã âma ima uwaimrami wamhã, a hã we izatôri'wa na dama 're isiwasu'u mono zém na, da te 're izaze za'ra mono da. — Âne te Timama ma tinha.

⁴³Timama ma mre me pari, te oto Razaruho zô hã, mre me 'râihã na:

— Razaru, ab're hawi we aiwatobro, rob u.

⁴⁴Tawamhã sô hârâ pari, ma watobro, dâ'â nherê, sib'rata ubu ré, duré para ubu ré, duré 'râ ubu ré. Taha wa, ma tô Zezusi hã dama ti'ru:

— I'ubuzé hã asiwi wasihui wa'aba, 're morî da.

Taha wa, ma tô siwi wasihu, i'ubuzé hã.

Zezusi, da te dasiwi wirî da, dama ipire norî te te âma i'rosa'rata za'ra zé wasu'u

Mateusi 26.1-5; Marcusi 14.1-2; Rucasi 22.1-2

⁴⁵Tawamhã da'ahâ na ma tô Zezusi hã saze za'ra ni, Marizaha u isihutu norî hã. Razaru hã danho'a te te hâiwa'utu wa, ma saze za'ra ni, 'Re ihâimana u'âsi mono we te te isatôri na.

⁴⁶Tane nherê, ni'wam norî hã ma tô apâ ai'aba're, Zeruzarê u parisezu norî u, Razaru te te ihâiwa'utuzém na te te tâma rowasu'u za'ra da.

⁴⁷Tawamhã isimirowasu'u hã te te wapari za'ra wamhã, tisiré norî zô te sitême tihârâ za'ra, dama ipire norî zô. Taha wa, ma sitême si'râ'otô, sasedoti ipire norî hã, duré parisezu norî hã duré uburé zudezu norî ma roti'wa norî zama. Sitême si'râ'otô wamhã, âne te sima rowasu'u za'ra:

— E marî, wa te i'manharî za'ra da hã. Ô hã te marî hã dama i'manharî waihu'u'ô hã te te dama 're ab'manharî u'âsi, tiwaihu'u pese na.

⁴⁸ Marī, wa te tĀma 'manharī za'ra ō wamhā, aihīni te za da te 're saze za'ra, 'Re ihāimana u'āsi mono te te ipisutu na Danho'reptui'wa da. Tawamhā romanu norī hā te za wei wazō aihutu. 'Ri za'ēne hā te za wawi sāmra za'ra. Te za duré wa'uprosi za'ra, uburé wasiré zudezu norī zu. — Āne te sima rowasu'u za'ra.

⁴⁹⁻⁵⁰ Ā wahum na hā te Caipasi hā 're hāimana, sasedoti ipire uptabi na hā. Tawamhā ta hā te tĀma nharī za'ra, āne:

— E marī da, rosa'rada hā waihu'u aba ō di bété. Aibā misire wa te wasiwi wīrī wamhā, aré wama 're rowē za'ra mono di. Aré aihīni wasi'utōrī ō di. — Āne ma tō Caipasi hā tisiré norī ma waihu'u za'ra, dama ipire norī ma hā.

⁵¹ Āne te te tĀma rowasu'u za'ra wamhā, ā wahum na sasedoti ipire uptabi na 're ihāimana mono zéb zarina, si'uihā nai ō nherē, te tĀma rowaihu'u sirōmo za'ra, Zezusi hā dazada idā'ázém na hā.

⁵² Zudezu norī zada si, dá'ā ō di za, Zezusi hā. Daro mono bâ 'Re ihāimana u'āsi mono, ti'ra da, uburé te te 're i'apisutu mono norī zada, te za dārā, simisutu i'ra si 're danomro mono da.

⁵³ Tawamhā Caipasihi nhimiroti hawi te sima āma roti zahī u'āsi za'ra oto, te te siwi wīrī da, dama ipire norī hā.

⁵⁴ Taha wa, irob āma 're morī ō di oto, Zudeza na danhipti'a nho'ōmo nhisi āma, Zezusi hā. Darob amoi u te mo, Epra'i na 'ri nho'ōmo nhisi u. Tī'a 'ré u'āsi 'rata, Epra'i hā. Wa norī hā wa isiré ai'aba'rē ni. Tame wa a'ā 're wasi'ubumro.

⁵⁵ Romhuture di oto, dato hā da te 're i'manharī za'ra mono zéb u hā, Pascowa na dato nhisi hā. Taha wa, da'ahā na te Zeruzarē u 're danomro daro mono bâ, zudezu norī hā. Dato hā sāna'rata ō ré, te za dawasété na tasiwasu'u za'ra ni, 'Re ihāimana u'āsi mono ma, dawē na datoi u danhisi da. Taha da, ma tō Zeruzarē u aihutu ni, bâdā hā romhuture wa oto, datoi u hā.

⁵⁶ Dasihutu wamhā, Zezusihi zō te tanhopré ni. Āne te dasima rowasu'u za'ra ni:

— E datoi u te za wei mo, 're idasi'ra'ōtō mono zéb u hā. Āté wei morī ō di za. — Āne 'ri za'ētē 'wawi wa'ra 're, dasimasab ré, te dasima āma romnomri za'ra ni.

⁵⁷ E marī wa. Zezusihi āma te dama roti za'ra aré, dama ipire norī hā:

— Ma'āpé nimame isāmra na 'mai'madā'ā aba wamhā, wei wama wasu'u za'ra wa'aba za, wa te waihu'u za'ra da. — Āne ma tō dama āma roti za'ra aré, sasedoti ipire norī hā, parisezu norī me. Te te siwi āri da, ma tō āne dama āma roti za'ra.

12

Mariza hā Zezusi te te ipara upsōzé wasu'u

Mateusi 26.6-13; Marcusi 14.3-9

¹ Romhuri misi da'āma si'utōrī parip si, te za dato hā dasiwi 'manharī ni, Pascowa na dato nhisi hā. Tawamhā Zezusi hā te apā mo, Betānha u. Wa norī hā wa isiré ai'aba'rē ni. Tame Razaru hā te 're sāmra, ab're hawi Zezusi te te ihāiwa'udu hā.

² Tawamhā, wasihutu wamhā, ma tō wama api za'ra ni, wasa hā wa te huri da, Zezusi hā sawi te. Mata hā ma tō wasa hā te te wama sé. Razaru hā te wame tisa.

³ Tawamhā Mariza hā ma tō we ti'ā, wedewa'u isadaze hā. Nadu na wedewa'u nhisi hā. Ta hā iwa'ābā wawē. Zezusihi zō te we ti'ā, te te āma para u'rē wa, tĀma rowē da. Tawamhā, te te āma para u'rē pari wamhā, ma tō para u'ō, tizéré na. Sadazei pire wa, ma tō 'ri 're zadaze sina.

⁴⁻⁵ Tawamhā Zudasi Icarizoti hā tĀma toi ō di, Marizaha ma. Zezusihi siré 're imorī Zudasi hā, Zezusi hā te te dama ihāiba nhomri da hā. Taha wa, te Marizaha ma tinha, Zudasi hā:

— E marī da bété, te te dama wede ō di wedewa'u zadaze hā, rob'uiprazéb zō isibrob'ō norī ma, āma sipé da, iwa'ā hā. — Āne te Zudasi hā tĀma tinha.

⁶ E marī wa. E isibrob'ō norī hā te te pawaptob ze wa. Mare di. Te te pawaptob ze za'ra wab ō di. Ta hā sipsaihuri di. Rob'uiprazé hā te te wama 're i'madā'ā mono hā, te pi'uriwi te te sima 're 'mazani.

⁷⁻⁸ Tawamhā Zezusi hā ma tō Zudasihi ma tinha:

— Tō'ā. TĀma nharī tō. Idā'ā wapsi, da te dasiwi inherē ō ré, te te āma ihāiba u'rē da, te aré izada tété. Isibrob'ō norī hā te ai'rata 're si'ubumroi u'āsi 'wa. Nimahā aima wē za'ra wa'aba wamhā, te za 're ipawaptob u'āsi za'ra wa'aba mo. Tanei ō di, wa hā. Ai'rata 're inhamra u'āsi aba mono ō di za oto. Taha wa, ai'rata inhamra aba ré, ima sōpru wa, ima rowē di. — Āne ma tō wama waihu'u za'ra, Zezusi hā.

Sasedoti ipire norī hā, Razaru te te siwi wīrī da, te te āma irosa'rata wasété za'ra zé wasu'u

⁹ Tawamhā ma tō dasima rowasu'u za'ra ni, āne:

— Betānha āma te nhamra, Zezusi hā. — Āne te dasima rowasu'u za'ra ni. Taha wa, da'ahā na ma tō we itēme ai'aba're ni, da te sabu za'ra da. Zezusihi u si, we dasi'aba'rei ō di. Razaruhu u zama te we ai'aba're ni, ab're hawi te te ihāiwa'utu u zama, da te sabu za'ra da.

¹⁰⁻¹¹ Tawamhā Razaru hā da te sabu za'ra wamhā, da'ahā na ma tō Zezusi hā Danho'reptui'wa na saze za'ra ni. Ta nori ma, oto wapu za'ra di, 'Re ihāimana u'āsi mono ma, da'āma romhuri'wa ipire nori mreme hā, sasedoti ipire nori mreme hā. Taha wa, Zezusi, da te saze za'ra 'ru te, te sima āma roti za'ra Razaruhu āma, taha zama te te siwi wiri da.

Zezusi hā Zeruzarē u iwisizé wasu'u

Mateusi 21.1-11; Marcusi 11.1-11; Rucasi 19.28-40

¹²⁻¹⁸ Tawamhā awē wa duré Zezusihi siré ai'aba're ni, Zeruzarē u. Zezusi hā Razaru ab're hawi te te hāiwa'utu wamhā, ma tō āma 'madā'ā za'ra ni aré. Tawamhā āma i'madā'ā'wa nori hā ma tō dama rowasu'u za'ra aré, Zeruzarē āma 're isi'ubumroi mono nori ma. Zeruzarē u dasi'rā'ōtō wamhā, daro mono bā ma tō Razaruhu wasu'u hā wapari za'ra ni, idasi'rā'ōtō mono hā. Zezusihi wasu'u, ma duré wapari za'ra ni, Zeruzarē u imori na hā. Taha wa, te itēme ai'aba're ni, Zeruzarē u idasi'rā'ōtō mono hā bādādi wa, da te uzusi za'ra da. Wa'asu te dasiré 'wasari ni, dama rowē wa, Zezusi da te āma sawi za'ra da.

Tawamhā Zezusi hā da te uzusi za'ra wamhā, te dasima 'mahārā za'ra ni, āne:

— 'Re ihāimana u'āsi mono āma 're wawata za'ra wa'aba mono. Ōhōta Wanhib'apito, te we oto mo, 'Re ihāimana u'āsi mono zadawa para. 'Re ihāimana u'āsi mono hā iwē si te te tāma 're pisutu u'āsi mono da si, wa wasima wē za'ra ni, Izarazéhé nhihudu nori nhib'apito ma hā. — Āne te dasima 'mahārā za'ra ni.

Tawamhā wasi'aba'rei ré, ma tō awaru po'repore hā tisā Zezusi hā, iprédupté hā. Tawamhā ma tō āma darōno, āma mori da. Āne wamhā, ma tō sina uwaimra, āma rob'ui'ére hā. Duréihā ma tō āma rob'ui'ére siro, 'Re ihāimana u'āsi mono zadawa wasu'u wa hā. Āne ma tō āma rob'ui'ére, Zeruzarē āma 're idasi'ubumroi mono nori ma:

“Si'ā na 're aihāimana za'ra wa'aba mono nori, aipahi za'ra wa'aba ō di za. Ōhōta te we atēme timori za'ra wa'wa, Asib'apito za'ra wa'wa hā awaru po'repore na ipréduptém na.”

Āne duréihā ma tō āma rob'ui'ére, ibaihá na hā.

Āma rob'ui'ére te te sina uwaimrami nherē, wama waihu'u pese za'ra ō di, āma rob'ui'ére hā. Zezusi hā ab're hawi hāiwa'utu wa, hāiwa u rowē uptabi u apā mori parip si, wa za āma wasipo're pu'u za'ra ni, rob'ui'ére na. Tawapsi wa za wasima rowasu'u za'ra ni, āne: “Tō sena ma tō sina uwaimra, āma rob'ui'ére hā. Āma dawata za'ra ré, ma tō datēme mo, awaru po'repore na ipréduptém na.” Āne wa za wasima rowasu'u za'ra ni.

¹⁹ Tawamhā da'ahā na da te uzusi za'ra da, itēme dasi'aba'rei wamhā, āne te sima rowasu'u za'ra, parisezu nori hā:

— Aihini te Zezusihi niwi' re danomro. Taré, wa nasi āma wasima roti u'āsi za'ra ni. — Āne te sima nharí za'ra, parisezu nori hā.

Deredu nori, Zezusi te te 'madā'ā za'ra da, Piripihī wi te te iwaptērē za'ra zé wasu'u

²⁰ Tawamhā deredu nori zama ma tō aihutu, Zeruzarē u, 'Re ihāimana u'āsi mono āma dame wata za'ra da, zudezu'ō nori hā.

²¹ Tawamhā tame si'ubumroi ré, te ai'aba're, Piripihī u. Darireza hawimhā Piripihī hā. Besada na isa'ru nhisi hā. Piripihī u sihutu wamhā, te tāma nharí za'ra:

— Wa wasima wē za'ra ni, wa te 'madā'ā za'ra da, Zezusi hā.

²² Taha wa, te Piripihī hā mo Adéréhé u, te te tāma sadawa wasu'u za'ra da. Zezusihi u te sisaprōni zahuré, te te tāma sadawa wasu'u za'ra da.

²³ Tawamhā imreme te te wapari wamhā, āne te Zezusi hā tāma siwasu'u zahuré:

— Wa hā dasiré ipodo. Romhuture di oto bādā hā, i'āma 're idawata za'ra mono zéb u hā.

²⁴ Tō sena wa za aima rowasu'u za'ra wa'wa, amnho potozé wasu'u na hā. E niha te za amnho hā ti'rā ahā. Ai'uréiwi nomro wamhā, poto ō di za. Ab're 're, 're rere'e mono wa, itomhā, 're si'utōri mono wapsi, te za 're poto za'ra. 'Re poto za'ra mono wapsi, rāi ahā di za. Misire nherē, poto wamhā, nhamā wamhā, zāb ahā di za. — Āne Zezusi te sina simiré'é, sō'awib ō nherē.

²⁵ Te duré tāma rowasu'u zahuré, āne:

— Ni'wam nori hā tihāimanazé te te sima 're sawi za'ra mono wamhā, rowē isi'utōri'ō hā te te sina 're uwaimrami za'ra mono ō di za. Ni'wam nori hā izarina 're nomro mono da, tihāimanazé te te sima 're sawi za'ra mono ō wapsi, tawapsi te za te te sina 're uwaimrami za'ra, rowē hā.

²⁶ Ni'wam nori hā te te i'ima 're romhuri za'ra mono da, te te sima 're iwē za'ra mono wamhā, 're imorizém na si te za 're nomro, izarina si. Tawamhā i'rata te za 're hāimana u'āsi

za'ra, hāiwa āma. Te te ĩma 're romhuri pese za'ra mono wa, ĩmama te za āma 're wata za'ra. Te za duré te te tāma 're wa'ābā za'ra, ĩsimiromhuri hā.

ZeZusi hā za tidā'āzém na ĩsiwasu'uzé wasu'u

²⁷ – Āhāna te ĩsina rosa'rata ahā di. E ĩmama ma, wa za ĩsi'ru, te te dawī ĩnho'reptu da, ĩdā'ā ō ré, te robzépata tō da. Mare di. Tāma ĩsi'rui ō di za, te te dawī ĩnho'reptu da. Dazada ĩdā'ā da si, wa wei mo.

²⁸ ĩmama, ma'āpé we ĩpawapto na, ĩ'āma ĩrotizém na te ĩsina uwaimrami da, ai'āma 're dawata za'ra mono hā. – Āne te Timama ma mre. Tawamhā hāiwa hawi ma tō tāma tinha:

– Wa tō te 're aipawapto u'āsi, ĩ'āma 're dawata za'ra mono da. Wa za duré aipawapto, ĩ'āma 're dawata u'āsi za'ra mono da.

²⁹ Tawamhā ma tō sima rowasu'u za'ra, ĩ'rata ĩsimasa hā:

– Ōhōta te wei rārā, tā hā.

Tawamhā ni'wam norī hā te dama rowasu'u za'ra:

– Mare di. 'Re ĩhāimana u'āsi mono ma romhuri'wa, te we tāma mre, hāiwa hawi.

³⁰ Taha wa, te ZeZusi hā dama tinha:

– ĩ'udāna wei mre me ō di. Ai'udāna wa'aba zama wapari za'ra wa'aba da, te we ĩma mre.

³¹ 'Re ĩhāimana u'āsi mono, ma tō āma roti siro, dawasété na. Romhuture di oto bādā hā te te āma ĩrotizém na, te te āma ĩ'uwaimramizéb da hā. Romhutu na te za duré tinha Wa'uburé ma, dama sib'uwa wa, oto te te 're dawada'uri tō mono da.

³² Hāiwi'iza'o da, da te dasiwi'izasōmri wapsi, wa za ĩsitēme te 're da'a'ubumro, ĩnhib'a'uwē 're dahāimana za'ra mono da, daro mono bā. – Āne te ZeZusi hā dama siwasu'u.

³³ E marī da. Wedepo'o nhonhi'rāmi na ĩdā'āzém na da te waihu'u sirōmo za'ra da.

³⁴ Tawamhā te āne asa tāma nharī za'ra ni:

– Danho'reptui'wa da, 'Re ĩhāimana u'āsi mono te te ĩpisudu hā dā'ā ō di za. Te za 're morī u'ā. Āne duréihā ma tō āma rob'ui'éré za'ra, 'Re ĩhāimana u'āsi mono zadawa wasu'u'wa norī hā. E niha tawamhā te ĩnha, hāiwi da te dasiwi'īsasōmri na, ti'ai āma dasiré ĩpodo hā. E 'wa hā dasiré ĩpoto na ĩsisi hā. – Āne te ZeZusi hā siwi sadanha.

³⁵ Tawamhā ZeZusi hā sō'awib ō nherē, te rowa'a na siwasu'u, āne:

– Rowa'a hā te za syry na aima 're hāimana za'ra wa'wa oto. Tawamhā aima 're hāimana za'ra wa'aba mono ré, te za 're anomro aba mo, aiwi 're robra za'ra wa'aba mono ō ré hā. Robra na damorī wamhā, nimomo damorī da hā dama waihu'u ō di.

³⁶ Ai'rata 're ĩnhamra za'ra wa'aba mono ré, te za asina 're ĩ'umnhasi za'ra wa'aba mo, ĩ'āma 're anomro wē uptabi aba mono da. – Āne ZeZusi te dama roti.

Zudezu norī hā, ZeZusi Danho'reptui'wa na te te 're ĩsazei ō za'ra mono zé wasu'u

Taha pari te danhiti mo, da te dasiwi 'madā'ā tō da, ZeZusi hā.

³⁷ Marī hā dama ĩ'manharī waihu'u'ō hā ma tō te te dama 're ab'manharī wē u'āsi, ZeZusi hā, tiwaihu'u' pesa na. Tane nherē, Danho'reptui'wa da, 'Re ĩhāimana u'āsi mono te te ĩpisutu na, da te saze za'ra ō di.

³⁸ Da te saze za'ra ō wamhā, ma dasina uwaimrami za'ra ni, Iza'izaha mre me hā. Duréihā ma tō ta hā 'Re ĩhāimana u'āsi mono ma dawasu'u, isadawa wasu'u 'rata 'wa hā. Āne ma tō tāma dawasu'u:

“Wanhib'apito, wa te dama 're asadawa wasu'u za'ra mono wamhā, e ma tō ai'āma da te 're wazaze za'ra. Mare di. Ai'āma, da te 're wazaze za'ra mono ō di. Duré aiwaihu'u' pesa na 're da'apawapto mono wamhā, e ma tō aiwaihu'u' pesa na da te 're aiwaihu'u' za'ra. Mare di. Da te 're aiwaihu'u' za'ra mono ō di.”

Āne ma tō tāma dawasu'u Iza'iza hā, wawa sina. Āne ma tūmreme na rob'ui'éré.

³⁹⁻⁴⁰ Tawamhā da te 're saze za'ra mono da, da te dasima 're wē za'ra mono ō wa, da te 're sazei waihu'u' za'ra mono ō di oto. Āne ma tō duré rowasu'u Iza'iza hā, 'Re ĩhāimana u'āsi mono zazei'ō'wa norī āma:

“Re ĩhāimana u'āsi mono, ma tō oto dama tinha, ĩsimiroti hā da te 're waihu'u' za'ra mono āna oto 're danomro mono da, dawasété wi 're dasipizari za'ra mono tō da, te te 're da'anho'reptui' mono tō da.”

Āne duréihā ma tō rowasu'u Iza'iza hā, wahi'rada hā. ZeZusi, da te 're saze za'ra mono ō wamhā, ma tō oto dasina uwaimrami za'ra ni, Iza'izaha nhimrowasu'u zarina.

⁴¹ Duréihā Iza'iza hā sōt'owī te te ĩrosawērē ne, ma tō Wanhib'apito 'madā, ZeZusi hā. ĩhāiba na hā rowa'a za'ētē di. Te te 'madā'ā wa, te āne na rowasu'u siro.

⁴² Tawamhā da'ahā na ZeZusi, da te saze za'ra ō nherē, ma tō ni'wam norī hā saze za'ra, dama ĩpire norī hā, ahā na. Tane nherē, te te saze za'ra nherē, isazei'wa na sō'awi dama 're siwasu'u za'ra mono ō di, parisezu norī mre me pipa te. Zudezu norī te, rowahutuzéb

u dame 're sisisi tō mono da, te te tiwi 're rosawi za'ra mono ò'umnhasite, te ari'iwi 're si'ubumroi u'âsi.

⁴³ Parisezu norī si te te 're wēsāmri za'ra mono da, ma tō te te sima 're wē za'ra. 'Re ĩhāimana u'âsi mono si te te 're wēsāmri za'ra mono da, te te sima 're wē za'ra mono ò di. Taha wa, te ari'iwi 're si'ubumroi u'âsi, 're siwasu'u za'ra mono āna, ĩsazei'wa na.

Timreme wē'ō'wa norī āma, Zezusi te te āma ĩrowasu'uzé

⁴⁴ Tawamhā Zezusi te da'ab'mahā:

— Ni'wam norī hā Danho'reptui'wa na te te sina 're ĩ'umnhasi za'ra mono wamhā, ĩzazei'wa si 're nomro mono ò di za. ĩ'u'âbā te za we ĩzatōrī'wa zazei'wa 're nomro.

⁴⁵ Duré ni'wam norī hā te te ĩ'madā'ā za'ra wamhā, ĩ'u'âbā te za we ĩzatōrī'wa zama 'madā'ā za'ra.

⁴⁶ Wa hā wa tō we datēme mo, dama rob'uuiwē'wa ne 're ĩmorī da. E marī da. Da te dasina 're ĩ'umnhasi za'ra mono wa, robra na ne, dawasété na oto 're danomro tō mono da.

⁴⁷ Āté ni'wam norī hā te za taré ĩmreme hā te te 're wapari za'ra. E tawamhā wa za ta norī hā awa'awi te 're ahā za'ra. Mare di. Awa'awi te 're dahā za'ra mono da, we ĩmorī ò di. Te 're da'anho'reptui' mono da si, wa wei mo.

⁴⁸ Ni'wam norī hā te te 're ĩwē'ō za'ra mono wamhā, duré ĩmreme te te 're wē'ō za'ra mono wamhā, zahadu wapsi te za oto siwaihu'u za'ra, tiwasété na. Ti'a ĩsi'utōrīzéb āma ĩmreme na po're pu'u za'ra wa, te za bātā na siwaihu'u za'ra, tiwasété na.

⁴⁹⁻⁵⁰ — ĩmama hā ma tō ĩzazei'wa norī ma pisutu sirōmo za'ra, robzei u'âsi āma 're nomro mono da. Duré ĩ'rata 're hāimana u'âsi za'ra mono da, hāiwa āma 're dā'ā za'ra mono tō da, ma tō tāma pisutu sirōmo za'ra. Āne si ma tō ĩmama hā ĩma waihu'u, te dama 're awaihu'u mono da. Wa hā ĩsi'uihā na ĩnhimirosa'rata si te dama 're awaihu'u mono ò di. We ĩzatōrī'wa, te te ĩma ĩwaihu'uzéb zarina si, wa tō te dama 're awaihu'u. — Āne te dama siwasu'u Zezusi hā.

13

Zezusi hā, tisiré 're ĩnomro mono norī te te ĩpara upsō za'ra zé wasu'u

¹ Awē te za oto dato hā dasiwi 'manharī za'ra ni, Pascowa na dato nhisi hā. Zezusi hā ma tō sina waihu'u, romhuture di oto apā ĩmorīzéb hā, Timama u. Ōne u'âsi te te 're wa'azawi pese Zezusi hā, ĩsiré 're wanomro mono wa.

² Tawamhā wasa, wa te huri da, wa tō asimro ni, barana. Wasa hā wa te huri ò ré, ma tō Zudasi Icarizoti hā rosa'rata, Zezusi hā zō te te danhimroi mono da, te te dama hāiba nhomri da. Wa'uburé nhimirosa'rata hawim na, te āne āma rosa'rata. Simahā 'ra, Zudasi hā.

³ Zezusi hā ma tō ĩmama hā pisutu, dama pire da. Uburé marī ma, pire da, ma tō pisutu, ti'ai āma hāiwa āma zama. 'Re ĩhāimana u'âsi mono hawi, ma tō wei mo. Apā te za oto ĩtēme mo. Āne ma tō sina waihu'u siro, Zezusi hā.

⁴ Tawamhā wasa hā wa te huri ò ré, ma tō Zezusi hā wahudu. Ti'uzā, ma tō sani. Tisi'u'ōzém na ma tō si'awasisi.

⁵ Tawamhā ā, ma tō sa'wa, piza'a 're nho'a wa, ĩsiré 're ĩwanomro mono norī hā te te āma wa'apara upsō da. Te te ĩwa'apara upsō na ma tō sāna'rata, wa'āma. Te te wa'apara upsōi pari, te za duré te te wa'apara u'ō, tisi'u'ōzém na.

⁶ Sima Pedruhu 'rata te oto za. Tawamhā Pedru te tāma tinha:

— Wanhīb'apito, e te za ĩpara upsō. Mare di. ĩpara upsōi ò di za.

⁷ Tawamhā Zezusi asa te tāma tinha:

— Te aipara upsō za'ra wa'aba zé hā, marī te aima wasu'u za'ra wa'wa. Zahadu waihu'u ò di, a hā. Zahadu wapsi te za ĩwaihu.

⁸ Tawamhā Pedru te duré tāma tinha:

— ĩpara upsōi ò di za.

Zezusi te duré asa tāma tinha:

— Te aipara upsōi ò wamhā, ĩnhīb'a'uwē ò di za, a hā.

⁹ Tawamhā Sima Pedru te tāma tinha:

— Wanhīb'apito, ĩpara si upsōi ò di za. ĩnhīb'rata zama te za ĩ'upsō, ĩ'rā zama.

¹⁰ Taha wa, ma tō Zezusi hā asa tāma tinha:

— Mare di. 'Re dasisōi mono wapsi, dahāiba hā wē di za. Dapara si 're uptob za'ra mono wa, te za apā da te 're upsō za'ra. A norī wa'wa hā aiwē za'ra wa'aba di, ĩma. Misire ĩma ĩwē ò hā. — Āne te Zezusi hā wama rowasu'u za'ra.

¹¹ Aibā hā ma tō sina waihu'u siro, te te dama ĩhāiba nhomri'wa da hā. Taha wa, ma wama waihu'u za'ra, misire ĩwē'ō na hā.

¹² Tawamhā te te wapara upsō za'ra pari, ma tō apā si'uzā. Ti'a ma tō nhamra. Sāmra wapsi, te wama nharī za'ra:

— E marī te aima wasu'u za'ra wa'wa, te aipara upsō za'ra wa'aba zé hā. E ma tō asina īwaihū'u za'ra wa'wa.

¹³⁻¹⁵ A norī wa'wa hā rowahutu'wa na te 're īnhisi za'ra wa'aba mo. Asib'apito na zama te 're īnhisi za'ra wa'aba mo. Wa hā rowahutu'wa na 're īnhisi za'ra wa'aba mono wamhā, īma wē di. E marī wa. Wa hā rowahutu uptabi 'wai wa. Duré Asib'apito na 're īnhisi za'ra wa'aba mono wamhā, īma wē di. E marī wa. Wa hā, Asib'apito uptabi aba wa. Wa hā Asib'apito wa'aba nherē, aiwi īsisawi za'ra wa'aba ō di, te aipara upsō za'ra wa'aba tō da. Duré rowahutu'wai uptabi 'wa nherē, aiwi īsisawi za'ra wa'aba ō di, te aipara upsō za'ra wa'aba tō da. Taha wa, te za īsine īnhirā zarina 're asipara upsō za'ra wa'aba mo, īnhirā zarina 're anomro aba mono da, īsine 're asisawi za'ra wa'aba mono āna, 're asipawaptob u'āsi za'ra wa'aba mono da.

¹⁶ Ma'āpé īwapari pese za'ra wa'aba za. Danhib'apito norī hā 're sisawi za'ra mono āna, te te 're dapawaptob za'ra mono wamhā, tāma īromhuri'wa norī zama, te za īsine te te 're dapawaptob za'ra, 're sisawi za'ra mono āna. Duré te te 're īsatōrī za'ra mono hā 're sisawi za'ra mono āna, te te 're dapawaptob za'ra mono wamhā, īsadawa wasu'u'wa norī zama te za īsine te te 're dapawaptob za'ra, 're sisawi za'ra mono āna.

¹⁷⁻¹⁸ — Āne wa tō aima rowasu'u za'ra wa'wa, waihū'u za'ra wa'aba da. Īnhimiroti hā 're 'madā'ā pese za'ra wa'aba mono wamhā, aima 're rowē za'ra wa'aba mono di za, uburé aima 're rowē za'ra wa'aba mono ō nherē. Asimīrosa'rata na, wa tō aiwaihū'u za'ra wa'wa. Īsiré 're anomro aba mono da, te aipisutu za'ra wa'wa hā, misire ma tō ī'maiwē'ō wa'wa. Ta hā wa tō pisutu, īsiré 're morī da, 'Re īhāimana u'āsi mono mreme ui'ére te te sina uwaimrami da. Āne ma tō wahi'rada hā tinha, aré: "Wasiré 're īwasai mono, ma tō īwē'ō." Āne ma tō duré īwē'ō'wa na rob'ui'ére siro, poto ō ré, wahi'rada hā. Taha wa, te za oto sina uwaimrami su'u, īwē'ō'wa hā.

¹⁹ Taha ō ré, wa aima waihū'u sirōmo za'ra wa'wa, te te sina uwaimrami wapsi, te īsina īwaihū'uzém na, 're īzazei u'āsi za'ra wa'aba mono da.

²⁰ Īwapari pese za'ra wa'aba. Zahadu wapsi, wa za īzazei'wa norī hā datēme te 're satōrī za'ra, te te dama 're īzadawa wasu'u za'ra mono da. Tawamhā īmreme za'ra hā da te 're wapari za'ra mono wamhā, da te dasiwi 're sawi pese za'ra mono wamhā, ta norī u'ābā te za īzama da te dasiwi 're īzawi pese za'ra. Da te dasiwi 're īzawi pese za'ra mono wamhā, ī'u'ābā te za duré we īzatōrī'wa da te dasiwi 're sawi pese. — Āne ma tō wama siwasu'u zara, Zezusi hā.

Zezusi hā Zudasi te te īwasu'uzé wasu'u, za te te dama īhāiba nhomri'wa da hā

Mateusi 26.17-25; Marcusi 14.17-21; Rucasi 22.7-13, 21-23

²¹ Tawamhā pē'ezé uptabi di, Zezusi hā. Taha wa, te duré wama siwasu'u za'ra, āne:

— Tō sena, wa aima waihū'u sirōmo za'ra wa'wa. Misire te za dama ī'maihāiba nhomri 'wa. — Āne te wama nhari za'ra.

²² Tawamhā aibā te te sina īwaihū'uzém na, wa te waihū'u za'ra ō wa, wa taré wasi'madā'ā za'ra ni.

²³ Wa hā, Zezusi te te 're īzawi pese mono, wa ī'rata nhamra.

²⁴ Tawamhā Sima Pedru te Zezusihi āma īwada'u, te sadanharī da, sadawa 'rasi sina:

— Ma'āpé sadanharī. E 'wa hā te za we te te sō danhimro, te te dama hāiba nhomri da.

²⁵ Tawamhā ī'rata īnhamra wa, wa oto sadanha, Zezusi hā:

— Wanhīb'apito, e 'wa hā te za we asō te te danhimro, te te dama aihāiba nhomri da hā.

— Āne wa sadanha, Zezusi hā.

²⁶ Taha wa, te āne asa īma tinha:

— Ī'u'ēté wē'ē, wa za di'i, te tāma sōmri da. Taha na te za īwaihū, dama īhāiba nhomri'wa da hā.

Tawamhā ma tō di'i, te te tāma sōmri da, Zudasihī ma. Sima Icarizotihī 'ra, Zudasihī hā.

²⁷ Te te tāma sōmri pari, ma oto Satanasihi nhimiroti hā wapari pese Zudasihī hā, īpē'ē 're oto sébré wa. Taha wa, te Zezusi hā Zudasihī ma tinha:

— Marī hā 'manharī su'u pé. — Āne te tāma tinha.

²⁸ E marī da, te āne tāma roti. Wa norī hā wa te waihū'u za'ra ō di.

²⁹ Ni'wam norī hā te āma rosa'rata za'ra, āne: "Rob'uiprazé hā te te 're 'madā'ā mono wa, āté marī hā wasazéb da, te te wama uipra za'ra da, te āne tāma roti." Īhāiba amo norī hā te duré āma rosa'rata za'ra: "Āté īsibrob'ō norī ma, syry na te te sōmri mono da, te tāma roti." Āne, wa īmreme na wasima āma romnhoré za'ra ni.

³⁰ Tawamhā te te 'rēne pari, rob u ma tō watobro Zudasihī hā, robra u.

Zezusihi nhimirotizép tém na rowasu'u

³¹ Tawamhā rob u watobro za'u si, te āne wama siwasu'u za'ra, Zezusi hā:

— Wa hā dasiré ĩpodo. Romhuture di oto bādā hā ĩāma 're ĩdawata za'ra mono zéb u hā. ĩāma 're dawata za'ra mono wamhā, 'Re ĩhāimana u'āsi mono āma te za duré 're dawata za'ra, ĩsiré.

³² ĩsiré āma 're dawata za'ra mono wamhā, te za duré ĩāma tiwata, 'Re ĩhāimana u'āsi mono hā. Te za ĩāma tiwata su'u.

³³ ĩno norī, syry na wa za oto ai'rata ĩnhamra 'wa. Ai'rata 're ĩnhamra u'āsi aba mono da, te za asima 're ĩwē za'ra wa'aba mo. Tane nherē, wa za mo. Nimomo ĩmorī wamhā, āma ĩtēme 're anomro waihu'u aba mono ō di za a'ā. Āne wa tō dama waihu'u aré.

³⁴ ĩnhimiroti tēm na, wa za oto aima roti za'ra wa'wa, 're asisawi pese za'ra wa'aba mono zéb da hā. Wa hā te 're asawi pese za'ra wa'aba mono ne, te za 're asisawi pese za'ra wa'aba mo.

*Pedru hā, Zezusi za te te dawi ĩudâzém na te te ĩpo're pu'uzé wasu'u
Mateusi 26.31-35; Marcusi 14.27-31; Rucasi 22.31-34*

³⁵⁻³⁶ Tawamhā Sima Pedru te sadanha:

— Wanhib'apito, e momo te za aimo.

Tawamhā Zezusi asa te tāma tinha:

— Nimomo wa za mo. Āma ĩzarina, aimorī waihu'u ō di za a'ā. Zahadu wapsi te za ĩzarina āma aimo.

³⁷ Tawamhā Sima Pedru te asa tāma tinha:

— E marī wa, āhāna asarina āma ĩmorī waihu'u ō di. Te asō'reptu da, asada ĩdâ'ā da hā ĩma wē di.

³⁸ Tawamhā ma tō Zezusi hā asa duré tāma tinha:

— E tō sena asiwasu'uzé hā. Tō sena wa aima rowasu'u. ĩzadawa para ō nherē, si'a hârâ ō ré, te za si'ubdatō dawi ĩ'udâ, aima ĩza'rese ō na. — Āne ma tō Zezusi hā tāma waihu'u siro, Pedruhu ma.

14

Zezusi hā, Timama u bādâdi na te te dama sina ĩsimiré'ézé wasu'u

¹ Tawamhā Zezusi te duré wama nharī za'ra, āne:

— ĩāma aipē'ézé za'ra wa'aba ō di za. 'Re ĩhāimana u'āsi mono, te za asina 're ĩ'umnhasi za'ra wa'aba mo. ĩzama te za duré asina 're ĩ'umnhasi u'āsi za'ra wa'aba mo, Danho'reptui'wa na.

²⁻³ ĩmama nhorōwa āma hā rob're za'ētē di, 're ĩdasi'ubumroi mono zéb da hā. Tame 're ĩdasi'ubumroi mono zéb ō 'wa'āhā, te aré aima rowasu'u za'ra wa'aba ō di. Wa za oto aiwi ĩmorī 'wa, 're asimroi wa'aba mono zéb da hā, te asō pisutu za'ra wa'aba da. Te asō pisutu za'ra wa'aba parip si, wa za wei mo apā, te āma asimroi wa'aba mono da, 're ĩnhamra mono zéb u, tame ĩ'rata 're aihāimana u'āsi za'ra wa'aba mono da.

⁴ Nimomo aiwi ĩmorī za'ra wa'aba zé hā ma tō ĩwaihu'u za'ra wa'wa. Bādâdi hā ma tō duré ĩwaihu'u za'ra wa'wa. — Āne te wama rowasu'u za'ra.

⁵ Tawamhā Tome te tāma tinha, āne:

— Wanhib'apito, nimomo wawi aimorīzé hā wa te waihu'u za'ra ō di. E niha wa za tawamhā bādâdi hā waihu'u za'ra ni, āma 're ĩwanomro mono zéb da hā.

⁶ Tawamhā Zezusi asa te tāma tinha:

— Wa hā bādâdi na, wa ĩsina simiré'é. E marī wa. Da te 're ĩzaze za'ra mono wapsi, amo ĩzarina 're dasihutu mono wa za, ĩmama tēme. Wa hā tō sena roti na'rata 'wa. Wa hā 're ĩdanomro u'āsi mono zé, te dama 're ĩ'apisutu mono, wa 're mo. Taha wa, da te 're ĩzaze za'ra mono wapsi, te za amo 're dasihutu, ĩmama u ĩ'rata 're dasi'ubumroi u'āsi mono da.

⁷ 'Re ĩwaihu'u za'ra wa'aba mono ō di aré, 'Re ĩhāimana u'āsi mono 'ra na. Taha wa, ĩmama na 're waihu'u za'ra wa'aba mono ō di aré, 'Re ĩhāimana u'āsi mono hā. Wa hā 're ĩwaihu'u za'ra wa'aba mono 'wa'āhā, te aré ĩmama hā 're ĩwaihu'u za'ra wa'aba mo. Ma tō oto ĩ'ra na ĩwaihu'u za'ra wa'wa. Taha wa, ma tō duré ĩmama hā ĩwaihu'u za'ra wa'wa, 'Re ĩhāimana u'āsi mono hā. ĩmama ma tō oto ĩ'madâ'ā za'ra wa'wa.

⁸ Tawamhā Piriipi te duré tāma tinha:

— Wanhib'apito, ma'āpé Aímama zō aihârâ, wa te 'madâ'ā za'ra da. Wa te 'madâ'ā za'ra wamhā, marī zō wawi 're rowaptâ'ā za'ra mono di za, wama 're ĩrowé za'ra mono zéb da hā.

⁹ Tawamhā Zezusi te asa tāma tinha:

— Piriipi, e zahadu ĩwaihu'u ō di, ai'rata 're ĩnhamra hā za'ra wa'aba mono nherē. Ni'wam norī hā te te 're ĩ'madâ'ā za'ra mono wamhā, ĩ'u'ābâ te za ĩmama hā te te 're 'madâ'ā za'ra. E niha te bété a hā ĩma ĩna, ĩmama zō ĩhârâ da, 'madâ'ā za'ra wa'aba da.

¹⁰ Wa hā ĩmama āma, wa 're ĩhāimana. Ō hā te duré ĩ'āma 're hāimana, ĩmama hā. E te ĩsina aima ĩwasu'u za'ra wa'aba na, āma ĩzazei ō di. ĩsi'uihā na te ĩsina aima wasu'u za'ra wa'aba

ō di. Īmama hā ĩ'āma 're ĩhāimana mono hawi, te aima 're ĩrowasu'u za'ra wa'aba mono zé hā. Āne ĩsimiromhuri hā.

¹¹ Īmama āma, wa 're ĩhāimana. ĩ'āma te duré 're hāimana, Īmama hā. Te ĩsina aima 're ĩwasu'u za'ra wa'aba mono na, te za āma 're ĩzazei u'āsi za'ra wa'aba mo. Te ĩsina aima ĩwasu'u za'ra wa'aba na si, āma 're ĩzazei waihu'u za'ra wa'aba mono ō wamhā, te za ĩ'āma 're ĩrosa'rata u'āsi za'ra wa'aba mo, marī dama ĩ'manharī waihu'u'ō hā te dama 're ĩ'ab'manharī wē mono na, taha zarina te ĩsina aima 're ĩwasu'u za'ra wa'aba mono na, āma 're ĩzaze za'ra wa'aba mono da.

¹² Tō sena wa za aima rowasu'u za'ra wa'wa. Asina 're ĩ'umnhasi za'ra wa'aba mono wamhā, te za ĩwaihu'u pese zarina 're ĩdapawaptob u'āsi za'ra wa'aba mo. A norī wa'wa hā 're ĩdapawaptob za'ra wa'aba mono zé hā, ĩnhimipawaptobzé ma, sa'ētē di za. E marī wa. Wa hā Īmama u za oto apā ĩmorī wa.

¹³⁻¹⁴ Taha wa, uburé marī hā te aima 're ĩwē za'ra wa'aba mono zéb uwaibaba si, te za tiwi 're rowaptērē za'ra wa'aba mo, Īmama wi, ĩzadawa para. Tawamhā wa za te aima āma 're a'uwaimrami 'wa. ĩwi zama ĩzadawa para, ĩwi 're rowaptērē za'ra wa'aba mono wamhā, wa za te aima āma 're a'uwaimrami 'wa. E marī da. Īmama āma 're aiwata za'ra wa'aba mono da, wa hā ĩ'ra te aima āma 're a'uwaimrami aba mono wa za.

ZeZusi hā tisiré norī ma, Timama pē'ēzani na te te tāma ĩropisutu za'ra zé wasu'u

¹⁵ Tawamhā ZeZusi te duré wama rowasu'u za'ra, āne:

— 'Re ĩzawi pese za'ra wa'aba mono wamhā, ĩnhimiroti si te za 're ĩ'madā'á pese za'ra wa'aba mo.

¹⁶⁻¹⁷ Tawamhā Īmama wi, wa za waptē, Tipē'ēzani hā te te aima sōmri za'ra wa'aba da, ĩsine te te 're aipawaptob u'āsi za'ra wa'aba mono da, ai'rata 're sāmra u'āsi za'ra wa'aba mono da. Tō sena na te za ĩnhimiroti hā te te aima 're waihu'u u'āsi za'ra wa'wa, ĩpē'ēzani hā. ĩzazei'ō wa norī hā te te waihu'u za'ra ō di, Īmama pē'ēzani hā. Taha wa, te te sima 're wē za'ra mono ō di, ĩ'rata 're sāmra u'āsi za'ra mono da. A norī wa'aba si ma tō ĩwaihu'u za'ra wa'wa, ĩpē'ēzani hā ai'rata 're sāmra aba mono wa. Zahadu wapsi te za aipē'ē 're, 're sāmra u'āsi za'ra wa'wa.

¹⁸ — Damama norī hā timro me 're dā'á za'ra mono wa, waptép si 're ĩdasi'ubumroi mono ne, asiwaprosi 're asimroi wa'aba mono ō di za. Wa hā wa za we apā atēme ĩmorī 'wa.

¹⁹ Syry na, wa za oto ai'rata ĩnhama 'wa, ĩrēme ma. Taha ré hā te za duré a'á dasiwi ĩ'madā'á ni. Taha parip si, da te dasiwi ĩzabu na sahu ō di za oto. A norī wa'aba si, te za duré ĩzabu za'ra wa'wa. ĩdā'á nherē, ab're hawi ĩhāiwa'utu wa, wa za oto ĩdā'á āna 're morī u'á. Taha wa, te za duré a norī wa'wa hā atā'á āna 're asimroi u'āsi aba mo, hāiwa āma.

²⁰ Apā we atēme ĩwisi za'ra wa'aba wapsi, te za ĩwaihu'u za'ra wa'wa, Īmama āma 're ĩhāimana mono na. ĩ'āma 're ai'hāimana za'ra wa'aba mono na, te za asina 're ĩwaihu'u za'ra wa'aba mo. Wa hā ai'āma wa'aba 're ĩhāimana mono na te za duré asina 're ĩwaihu'u za'ra wa'aba mo.

²¹ — Ni'wam norī hā ĩnhimiroti si te te 're 'madā'á pese za'ra mono wamhā, ta norī si ĩzawi pese 'wa, te za 're nomro. Te te 're ĩzawi pese za'ra mono wamhā, te za asa Īmama hā te te 're sawi pese za'ra. Wa hā wa za duré te 're sawi pese za'ra, ĩzawi pese 'wa norī hā. Ta norī ma si, wa za 're ĩhāimana mono zém na tāma 're ĩsiwaihu'u za'ra. — Āne ZeZusi te wama siwasu'u za'ra.

²² Tawamhā Zudasi te oto sadanha:

— E marī da, te za bété wa norī ma si 're asiwaihu'u mo. E marī wa, asazei'ō wa norī ma, 're asiwaihu'u za'ra mono ō di bété. — Āne Zudasi te sadanha. Zudasi aimawi hā. Icarizoti ō di.

²³ Tawamhā ZeZusi asa te duré tāma tinha, āne:

— Ni'wam norī hā te te 're ĩzawi pese za'ra mono wamhā, te za ĩnhimiroti si te te 're 'madā'á pese za'ra. Tawamhā Īmama, te za asa te te 're sawi pese za'ra. Wa norī hā wa za ĩtēme 're wasimasisi za'ra, ĩ'rata 're wahāimana u'āsi za'ra mono da.

²⁴ Ni'wam norī hā te te 're ĩzawi pese za'ra mono ō wamhā, ĩnhimiroti te te 're 'madā'á pese za'ra mono ō di za. Āne, wa aima rowasu'u za'ra wa'wa, waihu'u za'ra wa'aba da. ĩ'si'uihā na ĩmreme na te aima rowasu'u za'ra wa'aba ō di. Īmama mremera na si, wa aima rowasu'u za'ra wa'wa, we ĩzatōrī'wai mremera na.

²⁵ — Ai'rata ĩnhama aba ré, wa tō āne aima rowasu'u za'ra wa'wa.

²⁶ Zahadu wapsi Īmama wi, te waptērē wa, te za Tipē'ēzani hā we atēme satōrī za'ra wa'wa, aipawaptob za'ra wa'aba 'wa da hā. Wē uptabi di ĩpē'ēzani hā. Ta hā te za uburé marī hā te te aima 're waihu'u za'ra wa'wa. Uburé marī hā te aima 're ĩwaihu'u za'ra wa'aba mono zém na te za te te 're aipo're pu'u u'āsi za'ra wa'wa.

27 — Rowē na si 're anomro aba mono zéb si, wa za oto aima pisutu za'ra wa'wa, ĩ'āma 're aipē'ézé za'ra wa'aba mono tō da, duré asina 're aihâtâ'â za'ra wa'aba mono āna, 're anomro aba mono da. Taré te aima pisutu za'ra wa'aba ô di. Īzazei'ô'wa norī nhimipisutuzém nei ô di, ĩnhimipisutuzé hā.

28 Wa za oto aiwi ĩmorī 'wa. Niwapsi wa za duré we apâ atēme ĩmorī 'wa. Āne ma tō te ĩsina ĩrotizé hā ĩwapari za'ra wa'wa aré. Īmama u wa za oto apâ mo, ĩma ĩpire u. 'Re ĩzawi pese za'ra wa'aba mono 'wa'āhā, te aré 're ato za'ra wa'aba mo, Īmama u za oto ĩmorī wa, wa hā.

29 Apâ ĩtēme ĩmorī ô ré, wa aima ĩsiwasu'u sirōmo za'ra wa'wa. E marī da. Te ĩsina ĩrotizé hā te ĩsina uwaimrami wapsi, āma ĩzaze za'ra wa'aba da.

30-31 Aima ĩmreme syry aba di za oto. E marī wa. Īzazei'ô'wa norī wada'uri'wa, we ĩzô morī wa, Wa'uburé hā. Ta hā ĩma pire ô di. ĩma pire ô nheré, ĩtēme wasi'aba'rēi wa'aba, Īmama te te ĩ'āma ĩrotizé hā te ĩsina uwaimrami da. Tawamhā te ĩsina uwaimrami wapsi, Īmama te 're ĩsawi pese mono na te za da te 're ĩwaihu'u za'ra. — Āne Zezusi te wama siwasu'u za'ra.

15

Zezusi hā uwa 'ru uptabi na te te sina ĩsimiré'ézé wasu'u

1 Tawamhā Zezusi te duré wama siwasu'u za'ra, āne:

— Rob'ru na, wa za ĩsina simiré'é, uwa 'ru na. Uwa 'ru 'madâ'â'wai āma, wa za ĩmama āma simiré'é.

2 Uwa 'ru panhipti sisa'ridi hā wē ô di, 're ĩrā za'ra mono ô hā. Taha wa, uwa 'ru 'madâ'â'wa hā te za ĩpanhipti hā te te 're anhihâri ĩrāi'ô hā, te te 're anhamra mono da. Tane te za ĩmama hā ĩzazei'ô'wa norī hā te te 're azatōrī, ĩnhiti 're hâimana za'ra mono da. Uwa 'ru panhipti sisa'riti amo hā wē za'ra di, 're 'rā za'ra mono wa. Taha wa, wa za 're ĩrā za'ra mono na simiré'é, ĩzazei'wa norī āma 're nomro wē mono wa. ĩ'wanhipré te te 're ĩanhihâri mono hā, wa za āma simiré'é, ĩzazei'wa norī te te 're ĩmanharī wasété za'ra mono zém na. 'Re ĩrā za'ra mono hā ĩpanhipti wāi wa, ĩ'wanhipré ahâ wamhā, te za misi si te te 're anhihâri ĩ'madâ'â'wa hā, 're 'rāi pese za'ra mono da. Tane te za ĩmama hā ĩzazei'wa norī wī ĩwasédé hā te te 're anhihâri, 're nomro wē uptabi mono da oto.

3 A norī wa'wa hā te oto 're anomro wē wa'aba mo, ĩnhimiroti si 're 'madâ'â pese za'ra wa'aba mono wa.

4 Ma'āpé ĩ'āma 're aihâimana za'ra wa'aba mono za. Tawamhā wa za 'rāwi ai'rata 're ĩhâimana u'āsi za'ra wa'wa. Uwa 'ru panhipti sisa'riti amo hā 're sab u'āsi mono ô wamhā, 're 'rāi mono ô di za, ta hā. Tane a norī wa'wa hā ĩ'āma 're aihâimana u'āsi za'ra wa'aba mono ô wamhā, 're anomro wē waihu'u aba mono ô di za.

5 — Uwa 'ru na wa za ĩsina simiré'é. Uwa 'ru panhipti sisa'riti na wa za duré ai'āma simiré'é za'ra wa'wa. ĩ'āma 're aihâimana u'āsi za'ra wa'aba mono wamhā, wa za te 're aipawaptob u'āsi za'ra wa'wa, 're anomro wē uptabi aba mono da. Asiwaprosi 're anomro wē waihu'u aba mono ô di za.

6 Ni'wam norī hā ĩ'āma 're hâimana u'āsi za'ra mono ô wamhā, 're nomro wē mono ô di za. Ta norī āma, wa za uwa 'ru panhipti nhihâri hā āma simiré'é. Uwa 'ru panhipti nhihâri hā te te 're ĩ'anhamra mono hā, te za 're 'ré za'ra. 'Re 'ré za'ra mono wapsi, te za simisutu te te 're aza'ra ĩ'madâ'â'wa hā, te te 're asui mono da, 're zata za'ra mono da.

7 A norī wa'wa hā te za ĩ'āma 're aihâimana u'āsi za'ra wa'aba mo, 're anomro wē wa'aba mono da. Tawamhā ĩmama hā te za te te 're aiwapari u'āsi za'ra wa'wa, tiwi 're ĩrowaptērē za'ra wa'aba mono zém na hā. Tawamhā tiwi 're ĩwaptērē za'ra wa'aba mono zéb uwaibaba, te za tō te te aima āma 're a'uwaimrami 'wa.

8 'Re anomro wē uptabi aba mono wamhā, ĩzazei uptabi 'wa na te za da te 're aiwaihu'u za'ra wa'wa. Tawamhā ĩmama āma te za 're dawata za'ra. E marī wa. 'Re anomro wē wa'aba mono da, te te 're aipawaptob u'āsi za'ra wa'aba mono wa.

9 ĩmama, te te 're ĩzawi pese mono ne, wa tō te 're asawi pese za'ra wa'wa. Ma'āpé ĩ'āma 're anomro u'āsi aba mono, te 're ĩ'asawi pese za'ra wa'aba mono zém na asina 're waihu'u u'āsi za'ra wa'aba mono da.

10 Wa hā ĩmama nhimiroti si, wa tō te 're 'madâ'â pese. Taha wa, ĩmama te te 're ĩzawi pese mono zém na wa tō ĩsina te 're waihu'u u'āsi. Tane duré a norī wa'wa hā ĩnhimiroti si 're 'madâ'â pese za'ra wa'aba mono wamhā, te 're ĩ'asawi pese za'ra wa'aba mono zém na, te za asina 're ĩwaihu'u u'āsi za'ra wa'aba mo.

11 — Āne wa tō aima roti za'ra wa'wa, ĩsine robzei u'āsi 're anomro aba mono da, duré ĩsine aipē'ē 're, 're atoi uptabi za'ra wa'aba mono da.

¹² Wa hā te 're ī'asawi pese uptabi za'ra wa'aba mono ne, te za 're asisawi pese za'ra wa'aba mo. Āne wa aima roti za'ra wa'wa, waihu'u za'ra wa'aba da.

¹³ Ni'wam norī hā te te 're dazawi pese za'ra mono wamhā, te za te te 're danho'reptu za'ra. 'Re dadā'ā za'ra mono da nherē, te za te te 're danho'reptu za'ra, dawi 're sisawi za'ra mono āna.

¹⁴ Īnhimiroti si 're 'madā'ā pese uptabi za'ra wa'aba mono wamhā, īzawi pese 'wa, te za 're anomro aba mo.

¹⁵ Danhib'apito norī hā uburē tinhimiroti hā te te tāma 're waihu'u za'ra mono ō di, tāma ĩromhuri'wa norī ma hā, tāma ĩromhuri'wa norī si 're hāimana za'ra mono wa. Tanei ō di, wa hā. Uburē, wa tō Īmama nhimiroti hā te aima 're wasu'u za'ra wa'wa. Taha wa, ĩma romhuri'wa na si te 're asisi za'ra wa'aba mono ō di za oto. Te 're ī'asawi pese za'ra wa'aba mono na zama, wa za oto te 're asisi za'ra wa'wa.

¹⁶ A norī wa'wa hā asima īwē na'rata za'ra wa'aba ō di, īsiré 're anomro aba mono da. Wa hā wa tō ĩsima aiwē na'rata za'ra wa'wa, īsiré 're anomro aba mono da. Wa tō duré aipisutu za'ra wa'wa, datēme 're anomro aba mono da, da'āma asimiromhuri 'wa hā ĩma āma 're uwaimrami za'ra wa'aba mono da. Tawamhā asimiromhuri za'ra wa'aba na hā robaba ō di za. Āne wamhā, Īmama te za te te 're aiwaparī u'āsi za'ra wa'wa. Tawamhā uburē marī hā te te aima 're īwē za'ra wa'aba mono zéb uwaibaba si, tiwi 're rowaptērē za'ra wa'aba mono wamhā, te za te te aima āma 're a'uwaimrami 'wa.

¹⁷ Āne wa za duré aima roti za'ra wa'wa. Ma'āpé, 're asisawi pese za'ra wa'aba mono za.

Zeusihī siré 're ĩnomro mono norī, da te 're ĩ'ruiwaparī za'ra mono zé wasu'u

¹⁸ — Īzazei'ō'wa norī hā te te siwi 're ai'ruiwaparī za'ra wa'aba mono wamhā, asōwa wa'aba, da te dasiwi 're ĩ'ruiwaparī 'rata mono na, te za āma 're aipo're pu'u u'āsi za'ra wa'aba mo.

¹⁹ Īzazei'ō'wa norī niwī 're anomro u'āsi aba mono 'wa'āhā, te aré da te dasiwi 're asawi pese za'ra wa'wa. Tane nherē, a norī wa'wa hā Īzazei'ō'wa norī niwī 're anomro aba mono ō di oto. Wa hā wa tō aipisutu za'ra wa'wa, ĩniwīp si 're anomro aba mono da. Taha wa, te za tō Īzazei'ō'wa norī hā te te siwi 're ai'ruiwaparī u'āsi za'ra wa'wa, ĩsiniwī 're anomro u'āsi aba mono ō wa.

²⁰ Asina ĩwaparī pese za'ra wa'aba, āma 're rosa'rata u'āsi za'ra wa'aba mono da, ĩmreme na. Danhib'apito norī ma, da te 're ĩ'manharī za'ra mono zéb zarina, te za duré tāma ĩromhuri'wa norī ma, da te 're 'manharī za'ra. Wa hā Asib'apito za'ra wa'wa hā da te ĩma 're ĩrob'manharī wasété za'ra mono ne, te za duré aima wa'aba da te 're rob'manharī wasété za'ra. Duré ĩnhimiroti hā da te 're 'madā'ā pese za'ra mono wamhā, asimiroti za'ra wa'aba zama te za da te 're 'madā'ā pese za'ra.

²¹ We ĩzatōrī'wa na da te 're waihu'u za'ra mono ō di, 'Re ĩhāimana u'āsi mono hā. Taha wa, te za da te aima 're rob'manharī wasété za'ra wa'wa, ĩzazei'wa 're anomro aba mono wab zama.

²² Tawamhā wa hā we datēme ĩmorī wa, te za oto te te siwi 're da'awē'ō 'Re ĩhāimana u'āsi mono hā, da te 're ĩzaze za'ra mono ō wa. Tawamhā ari'wi te za 're dasi'ubumro, da te 're ĩzaze za'ra mono ō na, da te dasiwi 're udā waihu'u za'ra mono ō wa za.

²³ Wa hā da te dasiwi 're ĩ'ruiwaparī mono wamhā, ĩ'u'ābā te za Īmama hā da te dasiwi 're 'ruiwaparī.

²⁴ Wa hā marī dama ĩ'manharī waihu'u'ō hā wa tō te dama 're ab'manharī wē aré, danho'a, da te dasiwi 're ĩzaze za'ra mono da, 'Re ĩhāimana u'āsi mono we te te ĩzatōrī na. Ni'wa ĩsine hā te te 're da'apawapto mono ō di aré. Tane nherē, da te dasiwi 're ĩzaze za'ra mono ō di, we te te ĩzatōrī na. Marī dama ĩ'manharī waihu'u'ō hā, te dama 're ab'manharī mono ō 'wa'āhā, te te aré 're da'awē'ō mono ō di, da te 're ĩzaze za'ra mono ō zém na hā. Tane nherē, danho'a te dama 're ab'manharī wē mono nherē, ma tō Īmama me da te dasiwi 're wa'ruiwaparī.

²⁵ "Marī hā te dama 're ab'manharī wasété mono ō nherē, ma tō taré da te dasiwi 're ĩ'ruiwaparī." Āne duréihā ma tō wahi'rada hā ĩ'āma rob'ui'éré siro, romhā ré. Īzazei'ō'wa norī hā ma tō oto sina uwaimrami za'ra, te te siwi 're ĩ'ruiwaparī mono zém na hā.

²⁶ — Zahadu wapsi wa za we atēme satōrī za'ra wa'wa, Īmama pē'ézani hā, aipawaptoob za'ra wa'aba 'wa da hā. Tō sena uptabi ĩsimirowasu'u hā. Īmama hawi te za we atēme timorī za'ra wa'wa, ĩnhimiroti na te te 're aipawaptoob u'āsi za'ra wa'aba mono da.

²⁷ A norī wa'wa hā ma tō īsiré 're anomro aba mo, Īmama nhimiroti na te dama āma ĩsāna'ratazém hawi. Taha wa, te za a norī wa'aba zama ĩnhimiroti na 're ĩdapawaptoob u'āsi za'ra wa'aba mo. — Āne ma tō Zezusi hā sina wama roti za'ra.

16

¹ Āne te duré wama nharī za'ra, Zezusi hā:

— Īnhimiroti hā 're rēme za'ra wa'aba mono tō da, wa tō āne aima roti za'ra wa'wa.

² Dama ĩpire norī hā te za aiwi te te 're rosawi za'ra wa'wa, rowahutuzéb u dame 're asisisi aba mono tō da. Duré 'Re ĩhāimana u'āsi mono te te tāma pisutu za'ra newa, te za ai'uprosi aba ni.

³ 'Re ĩhāimana u'āsi mono hā da te dasiwi 're waihu'u mono ō di, ĩmama na. Īzama we te te ĩzatōrī na, da te dasiwi 're ĩzaze za'ra mono ō di. Taha wa, ĩzadawa wasu'u'wa 're anomro aba mono nherē, te za da te 're ai'ruiwapari u'āsi za'ra wa'wa.

⁴ Āne, wa aima waihu'u sirōmo za'ra wa'wa, da te dasiwi 're ai'ruiwapari za'ra wa'aba mono wapsi, ĩmreme na 're aipo're pu'u u'āsi za'ra wa'aba mono da, marī zō asipibu ma, 're asōpré wa'aba mono tō da. — Āne ma tō wama waihu'u sirōmo za'ra, Zezusi hā.

Zezusi hā, Timama pē'ēzani na te te dama ĩropisutuzé wasu'u, dapawapto'wa da

Tawamhā āne ma tō duré wama waihu'u za'ra:

— Āne na te aima 're rowasu'u za'ra wa'aba mono ō di aré, zahadu ai'rata 're ĩhāimana za'ra wa'aba mono wa.

⁵⁻⁶ Apā wa za oto aiwi ĩmorī za'ra wa'wa, we ĩzatōrī'wai u. Taha wa, āhāna si wa tō uburé aima rowasu'u za'ra wa'wa, asina waihu'u sirōmo za'ra wa'aba da. Āne aima ĩsiwasu'u za'ra wa'aba wa, aipē'ézé ahā za'ra wa'aba di, we ĩzatōrī'wai u za oto aiwi ĩmorī za'ra wa'aba wa. "E momo te za aimo," āne asiwi ĩzadanhārī na sahu za'ra wa'aba ō di za, te aima waihu'u pese za'ra wa'aba da.

⁷ Tō sena, wa za aima rowasu'u za'ra wa'wa. Wa za oto aiwi ĩmorī za'ra wa'wa, aipawaptob za'ra wa'aba 'wa da hā we te atēme satōrī za'ra wa'aba hā, rowē u'āsi 're anomro aba mono da. Aiwi ĩmorī za'ra wa'aba ō wamhā, we atēme morī za'ra wa'aba ō di za, aipawaptob za'ra wa'aba 'wa da hā. ĩmorī wapsi, ĩsiwa'rāmi wa za we atēme satōrī za'ra wa'wa.

⁸⁻¹¹ We atēme wisi za'ra wa'aba wapsi, te za marī hā te te dama 're awaihu'u, da te dasina 're waihu'u za'ra mono da. ĩmreme na da te 're ĩzaze za'ra mono ō wa, 'Re ĩhāimana u'āsi mono ma, dawē ō na te za te te dama 're awaihu'u. 'Re ĩmorī wē u'āsi na zama te za duré te te dama 're ĩwasu'u, da te 're ĩwaihu'u za'ra mono da. 'Re ĩmorī wē u'āsi wa, wa za apā mo, ĩmama u. Apā ĩmorī wamhā, asiwi 're ĩzabui waihu'u za'ra wa'aba mono ō di za. 'Re ĩhāimana u'āsi mono hā ma tō sima āma roti siro, ti'ai āma dawada'uri wasété 'wa te te azāri da, Wa'uburé hā. Āne na te za duré te te dama 're awaihu'u, aipawaptob za'ra wa'aba 'wa da hā.

¹² — Uburé marī hā ĩnhimirowasu'u na te aima wasu'u ze za'ra wa'aba nherē, te aima rowasu'u za'ra wa'aba ō di za a'ā. E marī wa. Zahadu aima pibu pese za'ra wa'aba ō wa.

¹³ Zahadu wapsi aipawaptob za'ra wa'aba 'wa da hā, te za we atēme timorī za'ra wa'wa, 'Re ĩhāimana u'āsi mono pē'ēzani hā. Tō sena uptabi, ĩsimiroti hā. We atēme wisi za'ra wa'aba wapsi, te za uburé roti tō sena uptabi hā te te aima 're waihu'u pese za'ra wa'wa. Si'uihā na te te aima 're waihu'u za'ra wa'aba mono ō di za. ĩnhimirowasu'u zarina si te za te te aima 're waihu'u za'ra wa'wa. Romhā ré te za duré za romhāimanazé hā te te aima 're waihu'u sirōmo za'ra wa'wa.

¹⁴ ĩnhimiroti si te za te te aima 're waihu'u u'āsi za'ra wa'wa. ĩnhimiroti te te aima 're waihu'u u'āsi za'ra wa'aba mono wamhā, ĩnhisi za'ētē di za, ĩzazei'wa norī ma.

¹⁵ Aiwa wanhimiroti hā, ĩmama me. Taha wa, te za ĩnhimiroti si te te aima 're waihu'u za'ra wa'wa, ĩmama pē'ēzani hā.

Zezusihi siré norī hā za tiwi ĩrobzei'ō za'ra zé wasu'u, duré apā za tāma ĩrowē za'ra zé wasu'u me

¹⁶ — Syry na, wa oto ai'rata ĩnhamra 'wa. Āhā parip si, ĩzabu za'ra wa'aba ō di za a'ā. Taha parip si te za duré ĩzabu za'ra wa'wa. — Āne Zezusi te wama siwasu'u za'ra.

¹⁷⁻¹⁸ Tawamhā ĩsiré 're ĩwanomro mono norī hā wa wasima rowasu'u za'ra ni, ti'a wi:

— Wa'rata te za nhamra. Syry na wa'rata sāmra parip si, wa te sabu za'ra ō di za a'ā, Timama u za apā morī wa za oto. Taha parip si, wa za duré sabu za'ra ni. E niha, syry na ĩmreme hā. Āne wamhā, wama pibu prā za'ra di. — Āne aihīni ō nherē, wa wasima rowasu'u za'ra ni.

¹⁹ Zezusihi mreme hā wa te wasiwi waihu'u ō wa, wa te wasiwi sadanhārī ze ti oto. Āne ma tō sina wawaihu'u za'ra, Zezusi hā. Taha wa, te wama nharī za'ra, āne:

— Wa tō aima ĩsiwasu'u za'ra wa'wa, āne: "Syry na wa oto ai'rata ĩnhamra 'wa. Āhā parip si, ĩzabu za'ra wa'aba ō di za a'ā. Taha parip si te za duré ĩzabu za'ra wa'wa." Āne wa tō aima ĩsiwasu'u za'ra wa'wa. E ĩmreme hā aima pibu prā za'ra wa'aba di. E aima pibu prā za'ra wa'aba wa, te āne asima ĩrowasu'u za'ra wa'wa.

²⁰ Asina ĩwapari pese za'ra wa'aba za. A norĩ wa'wa hā aiwawa ahā za'ra wa'aba di za. Īzazei'ō'wa norĩ si te za 're to za'ra. Aipē'ēzé ahā za'ra wa'aba nherē, aipē'ēzé u'āsi 're anomro aba mono ō di za. Zahadu wapsi, aima 're rowē uptabi za'ra wa'aba mono di za.

²¹ Pi'ōi āma te za ĩwasā hā 're sépu'u za'ra, tāma 're ĩrere'e mono zéb u hā, romhuture wa oto. Tāma 're rere'e mono parip si, tāma 're rowē za'ra mono di za oto, ĩna ma. Taha wa, tihāzé na hā te te 're rosa'rata u'āsi za'ra mono ō di za oto.

²² Tane duré a norĩ wa'wa hā, te za aipē'ēzé hā a'ā ĩsépata za'ra wa'wa. Apā atēme ĩwisi aba wapsi, aima 're rowē za'ra wa'aba mono di za. Robzei u'āsi te za 're anomro aba mo.

²³ — Niwapsi, ĩmama hā te za we Tipē'ēzani hā atēme satōrĩ za'ra wa'wa. Tawapsi asiwi 're ĩzadanharĩ za'ra wa'aba mono ō di za, marĩ hā 're waihu'u za'ra wa'aba mono da. Tō sena wa za aima rowasu'u za'ra wa'wa. Marĩ hā te aima 're ĩwē za'ra wa'aba mono zéb uwaibaba si, te za ĩmama wi 're ĩwaptērē za'ra wa'aba mo, ĩmreme zarina. Tawamhā te za te te aima āma 're a'uwaimrami 'wa.

²⁴ Zahadu marĩ hā te aima 're ĩwē za'ra wa'aba mono zéb uwaibaba, ĩmama wi 're waptērē za'ra wa'aba mono ō di. Te za oto tiwi 're ĩrowaptērē za'ra wa'aba mo, te te aima 're sōmri za'ra wa'aba mono da, robzei u'āsi 're anomro aba mono da.

Zezusi hā sisa'u za te te ĩdarēme na, duré Timama u za ĩmorĩzém na ĩsiwasu'uzé wasu'u

²⁵ — Āhāna sō'awi, ĩmama hā te aima wasu'u za'ra wa'aba ō di. Romnhimiré'é na si wa tō te aima 're rowasu'u za'ra wa'wa. Niwapsi, wa za sō'awi te aima 're rowasu'u za'ra wa'wa, romnhimiré'é āna.

²⁶⁻²⁷ Tawapsi te za marĩ hā te aima 're ĩwē za'ra wa'aba mono zéb uwaibaba, ĩmama wi 're ĩwaptērē za'ra wa'aba mo, ĩmreme zarina. Wa hā ĩmama wi, marĩ hā te aima 're waptērē za'ra wa'aba mono ō di za. Asi'uihā na te za tiwi 're ĩwaptērē za'ra wa'aba mo. Tawamhā ĩmama si te za si'uihā na te te aima 're sōmri za'ra wa'wa, ta hā te te duré 're asawi pese za'ra wa'aba mono wa. E marĩ wa, ma tō ĩmama hā te te 're asawi pese za'ra wa'wa. A norĩ wa'wa hā ma tō 're ĩzawi pese za'ra wa'aba mo. ĩmama hawi we ĩmorĩ na ma tō duré 're ĩzaze za'ra wa'aba mo. Taha wa, ma tō te te 're asawi pese za'ra wa'wa, ĩmama hā.

²⁸ ĩmama hawi wa we datēme mo. Apā wa za duré dahawi ĩtēme mo, ĩmama u. — Āne te wama siwasu'u za'ra, Zezusi hā.

²⁹⁻³⁰ Taha wa, wa tō tāma nharĩ za'ra ni:

— Sō'awi ma tō oto wama asiwasu'u za'ra, romnhimiré'é āna. Wanhimirosa'rata za'ra hā ma tō asina ĩwaihu'u siro. Taha wa, wa te wasiwi asadanharĩ da, asina wazō asimipari ō di. Āne wama waihu'u pese za'ra di oto. Taha wa, wa tō asaze za'ra ni, tō sena 'Re ĩhāimana u'āsi mono hawi we aimorĩ na. — Āne wa tō tāma nharĩ za'ra ni.

³¹⁻³² Taha wa, ma tō Zezusi hā asa wama nharĩ za'ra:

— E tō sena ma tō oto ĩzaze za'ra wa'wa, 'Re ĩhāimana u'āsi mono hawi we ĩmorĩ na hā. Āré tō sena ĩzaze za'ra wa'aba ō di. Romhuture di oto bādā hā, ĩhawĩ ĩropéi wa'aba mono zéb u hā, asōrōwa wa'aba u. Tane nherē, asiwi ĩrēme za'ra wa'aba nherē, ĩsiwaprosi ĩhāimana ō di za. ĩmama, te ĩsiré 're hāimana u'āsi.

³³ Āne na wa tō aima rowasu'u za'ra wa'wa, ĩ'āma 're aihāimana za'ra wa'aba mono wa, rowē na 're aihāimana za'ra wa'aba mono da. Tane nherē, ĩzazei'ō'wa norĩ hā te za tō te te 're ai'ruiwapari u'āsi za'ra wa'wa. Taha wa, te za 're ĩrobzépata za'ra wa'aba mo. Tane nherē, te za asiptete sina ĩ'āma 're anomro aba mo. Wa hā ĩzazei'ō'wa norĩ ma, ĩnhiptete uptabi wa, wa tō āma ai'uté za'ra. — Āne te Zezusi hā wama siwasu'u za'ra.

17

Zezusi hā Timama ma ĩmremezé wasu'u

¹ Tawamhā wama siwasu'u za'ra pari, Timama ma mre me da, te hāimo rob'madā, Zezusi hā. Āne te Timama ma tinha:

— ĩmama, bādā ĩma ĩpisutuzé hā ma tō ĩwa waptārā. Ma'āpé, we ĩpawapto na, ĩ'āma ĩrotizé hā te dama ĩsina uwaimrami da, ai'āma 're dawata u'āsi za'ra mono da.

² A hā ma tō ĩma 're ĩda'apisutu mo, ĩzazei'wa 're danomro mono da. Wa hā ma tō duré ĩpisu, uburé dama ĩpire uptabi da. E marĩ da. ĩzazei'wa norĩ ma, te 're apisutu mono da, robzei u'āsi ĩ'āma 're nomro u'āsi mono da, duré 're dā'ā za'ra mono āna, ai'rata 're hāimana u'āsi za'ra mono da, hāiwa āma.

³ A hā misire Danhib'apito uptabi. Wa hā Zezu Cristu Danho'reptui'wa da, ĩpisudu, we datēme ĩzatōrĩ. Āne na, da te 're wawaihu'u za'ra mono wa, da te 're wazazei pese za'ra mono wamhā, robzei u'āsi te za ĩ'āma 're danomro. 'Re dadā'ā za'ra mono āna, te za duré 're dasi'ubumroi u'āsi, hāiwa āma.

⁴ Romhuri hā ĩma ĩpisudu hā wa tō oto ĩsina uwaimra. Te ĩsina uwaimrami wa, te za oto ai'āma 're dawata u'āsi za'ra.

⁵ Ti'a ō ré hā, wa tō aiwa wawaihu'u pese na wasiré 're wasimasisi u'āsi, marī ō uptabi ré hā. Taha wa, rowē uptabi di, wama. Ma'āpé, we ĩma nharī, aiwa wasiré 're wasimasisi u'āsi mono da duré apā.

⁶ — Ā norī hā te asib'a'uwē 're nomro. Asib'a'uwē si 're nomro mono wa, ma tō oto ĩma ĩpisutu za'ra, ĩnhib'a'uwē 're nomro mono da. Wa tō te tāma 're aiwasu'u u'āsi za'ra, 're aihāimana mono zém na. Asimiroti hā ma tō te te 're 'madā'ā pese za'ra.

⁷⁻⁸ Marī hā ĩma 're ĩ'awaihu'u mono zém na si, wa tō te tāma 're waihu'u za'ra. Āne na ma tō ā norī hā te te 're ĩzaze za'ra. Ā norī ma, asimiroti hā wē za'ra di. Tō sena aihawi we ĩmorī na ma tō ĩzaze za'ra. A hā we ĩzatōrī'wa na ma tō duré ĩzaze za'ra.

⁹ — Āhāna wa aima āma wasu'u za'ra, 're pawaptob u'āsi za'ra mono da. ĩzazei'ō'wa norī hā te aima āma wasu'u za'ra ō di. We ĩma ĩpisutu za'ra norī si, wa āma aima wasu'u za'ra, asib'a'uwē 're nomro mono wa, duré 're pawaptob u'āsi za'ra mono da.

¹⁰ ĩnhib'a'uwē norī hā uburé asib'a'uwē te 're nomro. Asib'a'uwē norī hā uburé ĩnhib'a'uwē te duré 're nomro. Tawamhā ĩ'āma 're ĩnomro wē mono zéb zarina, te za ĩ'āma 're dawata u'āsi za'ra.

¹¹ Āhāna āme 're ĩnhamra u'āsi mono ō di za oto. Atēme wa za oto āma mo. Ā norī si te za ĩza'u 're si'ubumro, ĩzazei'ō'wa norī 'rata. ĩmama, a hā aiwē uptabi na te 're asāmra mo. Ma'āpé, we ĩma ĩpisutu za'ra hā we 're apawaptob u'āsi mono, aiwaihu'u pese na, wasine 're sisawi pese za'ra mono wa, tinhimirosa'rata na 're sisazei pese u'āsi za'ra mono da.

¹² ĩ'rata 're ĩnhamra za'ra mono ré, wa tō uburé te 're 'madā'ā pese za'ra, aiwaihu'u pese zarina, ĩwi 're si'utōrī za'ra mono tō da, duré ĩnhib'a'uwē u'āsi 're nomro mono da. Mísire ma tō simini. ĩnhib'a'uwē uptabi hā 're morī ō wa, ma tō asimiroti hā tiré. Duréihā poto ō ré, ma tō ōhō āma ĩbaihā na rob'ui'éré siro, wahi'rada hā. Āhāna ma tō oto sina uwaimra, ō hā.

¹³ Āhāna bādā hā romhuture di oto, āma atēme ĩmorizé hā. Āme ĩnhamra ré, wa āne aima mre, te te ĩwaparī za'ra wa, ĩsine robzei u'āsi 're nomro mono da.

¹⁴ ĩsiré 're nomro mono ré, wa tō te tāma 're asadawa wasu'u za'ra, uburé. Wa hā ĩzazei'ō'wa norī niwī 're ĩmorī ō di. Tane ā norī hā ĩzazei'ō'wa norī niwī, 're nomro mono ō di duré. Taha wa, ma tō ĩzazei'ō'wa norī hā ĩsiré te te 're 'ruiwaparī za'ra.

¹⁵ Āne te āma aima wasu'u za'ra ō di, ĩzazei'ō'wa norī wi, āma asitēme waibu da. Wa'uburé wi, ĩwasété uptabi wi, āma 're asisapri u'āsi za'ra mono da, wa āne āma aima wasu'u za'ra.

¹⁶ Wa hā ĩzazei'ō'wa norī niwī, 're ĩmorī ō di. Tane ā norī hā ĩzazei'ō'wa norī niwī 're nomro mono ō di duré.

¹⁷ Asimiroti hā tō sena uptabi. Tawamhā te za asimiroti na 're ĩpawaptob u'āsi za'ra mo, ai'āma si 're nomro wē uptabi mono da.

¹⁸ A hā we datēme ĩzatōrī ne, wa za oto datēme satōrī za'ra, te te dama 're ĩzadawa wasu'u za'ra mono da.

¹⁹ Wa hā wa tō ĩsina asaze, ĩ'āma ĩrotizé hā te ĩsina uwaimrami da. E marī da. Ā norī zama āma 're ĩroti za'ra mono zé hā te te sina 're asazei pese za'ra mono da, taha zarina, te te āma 're uwaimrami za'ra mono da.

²⁰⁻²¹ — ĩmama, 're wasisawi pese mono wa, wa tō wanhimirosa'rata na 're wasisazei pese u'āsi. Ma'āpé, uburé ĩzazei'wa norī hā 're apawaptob u'āsi mono, wasine 're sisawi pese za'ra mono wa, tinhimirosa'rata na 're sisazei pese za'ra mono da. Ā norī si 're pawaptob za'ra mono ō di za. Ā norī nhimirowasu'u zarina, za te te 're ĩzaze za'ra mono norī zama te za 're ĩ'apawaptob u'āsi mo. Tawamhā wasine 're sisawi pese za'ra mono wa, te za duré tinhimirosa'rata na 're sisazei pese za'ra. Āne wamhā, tō sena datēme we ĩzatōrī na, te za da te 're ĩzaze za'ra.

²² A hā 're ĩzawi u'āsi mono wa, ĩma 're rowē u'āsi mono di. A hā 're ĩzawi pese mono ne, wa za ĩzazei'wa norī hā ōne u'ā te 're azawi pese. E marī da. Wasine 're sisawi u'āsi za'ra mono wa, tinhimirosa'rata na zama 're sisazei pese u'āsi za'ra mono da, ta norī ma zama 're rowē u'āsi za'ra mono da.

²³ ĩsiré 're aimorī ne, wa za duré wa hā ĩsiré 're ĩmorī u'āsi za'ra. Tawamhā wasine 're sisawi u'āsi za'ra mono wa, tinhimirosa'rata na zama te za 're sisazei pese u'āsi za'ra. Āne wamhā, te za da te 're ĩzaze za'ra, tō sena datēme we ĩzatōrī na. Duré 're ĩzawi pese mono ne, ĩzazei'wa norī hā 're ĩ'azawi pese mono na, te za da te 're aiwaihu'u za'ra.

²⁴ — Ti'ai ō ré te 're ĩzawi pese mo, marī ō uptabi ré. 'Re ĩzawi pese mono wa, ma tō ĩma ĩpisu, ĩ'āma 're dawata u'āsi za'ra mono da, duré ĩhāiba na rowa'a za'etē ré, 're ĩhāimana u'āsi

mono da. Īmama, āne na hā te te 're ĩmadâ'â za'ra mono da hā, wa tō ĩsima wē za'ra, za 're ĩhāimana mono zéb āma, ĩrata 're si'ubumroi u'āsi mono da, ĩma ĩpisutu za'ra norī hā.

²⁵ Īmama, a hā aiwē uptabi na te 're asāmra mo. A hā we datēme ĩzatōrī na te te 're asaze za'ra mono ō di, ĩzazei'ō'wa norī hā. Tazahā, ĩma aiwaihu'u pese di, we ĩzatōrī'wa na. Āne na hā ĩzazei'wa norī ma zama, tāma aiwaihu'u pese za'ra di.

²⁶ Taha wa, wa tō te tāma 're aiwasu'u u'āsi za'ra, 're ĩda'azawi pese mono zém na, te te siwi 're aiwaihu'u u'āsi za'ra mono da. Ōne u'āsi, wa za duré te tāma 're aiwasu'u za'ra, 're ĩzawi pese mono zarina, duré 're sisawi pese za'ra mono da. — Āne te Timama ma rowasu'u, Zezusi hā.

18

Zezusi hā da te dasiwi ĩ'arizé wasu'u

Mateusi 26.47-56; Marcusi 14.43-50; Rucasi 22.47-54

¹ Tawamhā Timama ma mrepe pari, wa tō rob u wawairébé ni oto, ĩsiré āi ba wasi'aba're da. Séderō pa zara u, wa saprī za'ra ni, wede 're ĩsimasa mono zéb u.

² Tamomo wa tō nasi wasi'rā'ōtō ni Zezusihi me, wede 're ĩsimasa mono zéb āma. Nasi ĩwasi'rā'ōtōzé hā Zudasihī ma, waihu'u pese di.

³ Tawamhā te te oto sō danhimro, tamomo. Da'wapéi'wa norī hā te sō te te simro, ahā na. Zeruzarē āma 'ri za'ētē 'madâ'â'wa norī zama te sō te te simro, sasedoti ĩpire norī zadawa para, duré parisezu norī zadawa para. Tawamhā rāsītō ré, te sō ai'aba're ni, uzi ré zama. Danhiwāi ré zama te sō ai'aba're ni, sib'ézé 'wapa ré zama.

⁴ We oto sō dasihutu wamhā, Zudasihī zama ma we dame wi. Romhā ré ma tō uburé sina waihu'u siro, Zezusi hā da te tāma ĩmanharī za'ra zém na. We sō dasihutu wamhā, ma datēme watobro. Āne te dama tinha:

— E 'wa sō, te asōpré wa'wa.

⁵ Tawamhā asa te āne tāma nharī za'ra:

— Zezusihi zō, wa wanhopré ni, Nazaré hawi we ĩmorī zō.

Tawamhā Zezusi te dama siwasu'u oto:

— Wa hā Zezusi. Āhāta wa za.

⁶ Tawamhā ĩmreme ma, ma tō ai'marōpārī za'ra ni.

⁷ Tawamhā Zezusi te duré dama tinha:

— E 'wa sō, te asōpré wa'wa.

Tawamhā asa te duré tāma nharī za'ra, āne:

— Zezusihi zō, wa wanhopré ni, Nazaré hawi we ĩmorī zō.

⁸ Taha wa, te duré Zezusi hā asa dama siwasu'u:

— Wa hā Zezusi. Wa tō aima ĩsiwasu'u za'ra wa'wa. ĩzō si asōpré wa'aba wamhā, ma'āpé ā norī hā satōrī za'ra wa'aba, si'aba're da. — Āne te tāma nharī za'ra, timreme, Timama ma, te te wa'āma āma uwaimrami za'ra da.

⁹ Āne Zezusi hā ma tō Timama ma siwasu'u, aré: “Īma ĩpisutu za'ra norī hā wa tō te 're 'madâ'â pese za'ra, ĩwi si'utōrī tō da.” Āne ma tō tāma siwasu'u aré. Tawamhā da'wapéi'wa norī, te te siwi wawaihui ō wamhā, timreme, Timama ma, ma tō wa'āma āma uwaimra.

¹⁰ Tawamhā Sima Pedru ma tō sib'ézé 'wapa hā waze. Te te wazere wi, ma romhuri'wa hā āma po're nhizā, ĩpo're nhimire niwī. Sasedoti ĩpire uptabi ma romhuri'wa, ta hā. Romhuri'wa nhisi hā, Macu na ĩsisi hā.

¹¹ Tawamhā Zezusi hā te Pedruhu ma tinha:

— Sib'ézé 'wapa hā apā sērē. E wa za dawi ĩsisawi, Īmama te te ĩāma ĩrotizé hā te ĩsina uwaimrami tō da. Mare di. Te robzépata da nheré, wa za oto ĩsina uwaimra. — Āne te Pedruhu ma tinha, Zezusi hā.

Anasihī u, Zezusi da te dasiwi ĩsaprōnizé wasu'u

¹² Tawamhā Zezusi hā da'wapéi'wa norī hā ma tō siwi ti'ā, tinhib'apito me. 'Ri za'ētē 'madâ'â'wa norī me zama ma tō siwi ti'ā. Ma tō dasiwi pawasisi ni oto.

¹³ Tawamhā Anasihī u te oto siwi saprōni za'ra. Ta hā Anasi hā, Caipasihī maprewa. Sasedoti ĩpire uptabi, Caipasi hā.

¹⁴ Ta hā ma tō āne tisiré norī ma roti za'ra aré, dama ĩpire norī ma: “Misire, wa te wasiwi wīrī wamhā, wama rowē za'ra di. Wama pire za'ra ō di.” Āne ma tō tāma roti za'ra aré.

Pedru hā Zezusi te te dawi ĩ'udázé wasu'u

Mateusi 26.69-70; Marcusi 14.66-68; Rucasi 22.54-57

¹⁵⁻¹⁷ Tawamhā Zezusi hā da te dasiwi saprōni wamhā, Pedru hā te Zezusihi zarina mo. ĩzama wa duré ĩsarina mo, sasedoti ĩpire uptabi nhorōwa u. ĩwétési, wa ĩsarina āzé 'ri 'wawi wa'ra u, tāma ĩwaihu'u pese wa, 'ri tede'wai ma. Pedru hā te rowi za, 'ridawa 'rata. 'Ri 'wawi

wa'ra āma 'ridawa te pi'ō hā 'madā. Tawamhā wa hā wa mo, 'ridawa u. Pi'ōi ma, wa tinha, Pedruhu wi te te rosawi tō da. Taha wa, te te tāma wē wa, wa tō 'mazé Pedru hā, 'ri 'wawi wa'ra u. Taha wa, te pi'ō hā Pedru sadanha:

— E a hā, Zezusihi siré 're aimo.

Tawamhā Pedru asa te tāma tinha:

— Mare di. Wa hā ĩsiré 're ĩmorī ō di. — Āne te tāma tinha.

¹⁸Tame romhuri'wa norī hā te sima ro'o za'ra, hā te, hāi'ro za'ra da. 'Ri za'ētē 'madā'ā'wa norī me, te sima ro'o za'ra. Pedruhu zama te dame tihāi'ro.

*Sasedoti ĩpire uptabi hā, Zezusi te te ĩsadanharĭzé wasu'u
Mateusi 26.57-68; Marcusi 14.53-65; Rucasi 22.54, 66-71*

¹⁹Tawamhā sasedoti ĩpire uptabi hā te Zezusi sadanha, ĩsiré 're ĩwanomro mono norī na. ĩsimiroti na zama te sadanha.

²⁰⁻²¹Tawamhā Zezusi asa te tāma tinha:

— Sō'awi wa tō te dama 're rowahutu u'āsi, rowahutuzé mono hā. Āne dasi'rā'ōtōzéb āma zama, wa tō nasi dama rowahutu, 'Re ĩhāimana u'āsi mono āma 're ĩdawata za'ra mono zéb āma hā. Pi'uriwi te dama 're rowahutu mono ō di. E marī da, te ĩzadanha. ĩwaparī'wa norī hā te za ĩsadanharī za'ra wa'wa, te te aima ĩzadawa wasu'u za'ra da. Ta norī ma, waihu'u pese za'ra di, ĩnhimirowasu'u hā. — Āne Zezusi te tāma tinha.

²²Tawamhā Zezusihi 'rata aibā ĩsa, ma tinhīb'rata na 'rāime. Te tāma tinha:

— E niha te āne tāma ĩnha, sasedoti dama ĩpire uptabi ma nherē.

²³⁻²⁴Taha wa, te Zezusi hā asa tāma tinha:

— ĩmreme na te āma upai wamhā, ma āpé we ĩma waihu'u. E marī da, ma ĩrāime, ĩmreme wē nherē. — Āne Zezusi te aibā ma tinha. Tawamhā ĩsana hā ma tō Zezusi hā dama ti'ru, Caipasihī u da te dasiwi saprōni da.

Tawamhā pawasisi ré, ma tō ĩtēme dasiwi saprōni ni, sasedoti ĩpire uptabi u.

*Pedru hā Zezusi te te duré dawi tūdā na ĩsahuzé wasu'u
Mateusi 26.71-75; Marcusi 14.69-72; Rucasi 22.58-62*

²⁵Tawamhā Sima Pedru te zahadu za, unhama āma hāi'ro da. Taha wa, te āne sadanharī za'ra:

— E a hā te Zezusihi siré 're aimo.

Tawamhā Pedru hā ma tō dawi ai'udā. Te tāma nharī za'ra:

— Mare di. Wa hā ĩsiré 're ĩmorī ō di.

²⁶Tawamhā aibā te duré sadanha Pedru hā, sasedoti ĩpire uptabi ma, romhuri'wa hā. Taha sisānawā, ma tō Pedru po're nhizā. Āne te Pedru sadanha:

— E a hā, wede, 're ĩsimasa mono zéb āma, wa tō ai'madā.

²⁷Taha wa, ma tō duré Pedru hā tiwi ai'udā.

Tiwi si'udā parip si, ma tō si'a hā awa'awi hā.

*Zezusi hā Piratuhu u da te ĩsaprōnizé wasu'u
Mateusi 27.1-2, 11-14; Marcusi 15.1-5; Rucasi 23.1-5*

²⁸Tawamhā Caipasihī nhorōwa hawi ma tō Zezusi hā siwi saprōni za'ra, wasiré zudezu norī hā, romanu nhorōwa u robza'rā ré. Roti'wa dama ĩpire uptabi romanu hā, Piratu na ĩsisi hā. Te te ĩtēme siwi āwisi wamhā, 'ri para u te te siwi 'mazébré ō di, Piratuhu u. Rowī te ĩré aimasa. E marī wa. 'Re ĩhāimana u'āsi mono nhimiroti waihu'u'ō'wai wa, Piratu hā. Tawamhā Pascowa na dato nhisi bātā na, dasi'rā'ōtō ré, sisisi ō di za, siwasété za'ra tō da. Siwasété za'ra 'wa'āhā, aré dame saihuri waihu'u ō di.

²⁹Tawamhā Piratu hā ma tō datēme watobro. Āne te dama tinha:

— E marī wa, te we bété asiwi ĩsaprōni 'wa. E marī, ma 'manha.

³⁰Tawamhā te asa tāma rowasu'u za'ra:

— Tiwasédé te te 're 'manharī u'āsi mono ō 'wa'āhā, aré wa te aima hāiba nhomri za'ra ō di.

³¹Tawamhā Piratu te asa tāma nharī za'ra:

— A norī wa'wa hā te za asiwi ĩsaprōni za'ra wa'wa, asi'uihā na aihī'rata norī nhimi'manharĭzéb zarina, marī hā tāma 'manharī za'ra wa'aba da, tiwasédé hā asō'a za'ra wa'aba, te te 're 'manharī u'āsi mono wamhā.

Taha wa, ma tō asa tāma nharī za'ra, Piratuhu ma:

— Mare di, wa te wasiwi saprōni ō di za. Asīb'apito, ma tō wawi sawi za'ra, ni'wa hā tiwasédé te te 'manharī wamhā, wa te wasiwi wīrī tō da. — Āne te Piratuhu ma nharī za'ra.

³²Romhā ré ma tō Zezusi hā siwasu'u tidā'ázém na, wedepo'o nnonhi'rāmi na da te dasiwi ĩsasōmrizém na. Tawamhā Piratu te te dama 'rui wapsi, te za 're ĩsiwasu'u mono zéb zarina, dasiwi sasōmri ni.

³³ Tawamhã Piratu, ma tō 'ri para u apâ âzé. 'Ri para u sébré parip si, te Zezusihi zô há, 'ri para u ítême sébré da, te te sadanharĩ da, Piratu hã. Tawamhã âne te sadanha:

— E a hã, zudezu norĩ nhĩb'apito.

³⁴ Tawamhã Zezusi asa te tãma tinha:

— E apito na da te aima ĩwasu'u za'ra wa, te ĩzadanha. E asi'uihã na te ĩzadanha, wa hã apito zô.

³⁵ Tawamhã Piratu hã te duré asa tãma tinha:

— E wa hã zudezu na 're ĩhãimana mono bâ, ĩsi'uihã na te asadanharĩ da hã. Asiré zudezu norĩ hã ma tō siwi ĩma aihãiba nho, sasedoti ĩpire norĩ me. E marĩ, ma bété ĩ'manha.

³⁶ Tawamhã ma tō Zezusi hã asa tãma siwasu'u:

— Wa hã ti'ai âma danhib'apito na 're ĩhãimana mono ô di. Danhib'apito na 're ĩhãimana mono 'wa'âhã, wa aré ĩnhĩb'a'uwé norĩ hã wada'uri za'ra, te te da'wapé za'ra da, da te dasiwi ĩhãiba nhomri tō da, dama ĩpire norĩ u. Wa hã ti'ai âma danhib'apito na 're ĩhãimana mono ô di. — Âne ma tō Zezusi hã tãma siwasu'u.

³⁷ Taha wa, ma tō Piratu hã asa duré sadanha:

— E a hã danhib'apito.

Zezusi te duré tãma tinha:

— Tahata ma tō tane hã ĩ'ãma ĩwaihu. Taha da, wa tō ti'ai âma podo. Taha da, wa tō we ti'ai u datême mo, roti tō sena uptabi hã te dama 're wasu'u mono da. Ni'wam norĩ hã roti tō sena uptabi hã te te sima 're wê za'ra mono wamhã, ta norĩ si te za te te 're ĩwapari ze za'ra. — Âne Zezusi te tãma tinha.

³⁸ Piratu te duré asa tãma tinha:

— E ma hã, roti tō sena uptabi hã.

*Piratu hã Zezusi da te dasiwi wĩrĩ da, te te dama ĩhãiba nhomrizé wasu'u
Mateusi 27.15-31; Marcusi 15.6-20; Rucasi 23.13-25*

Tawamhã Piratu hã apâ ma datême watobro, rob u. Âne te dama tinha:

— Wa tō sadanha. Ma tō ĩma siwasu'u. Marĩ hã te te 're ab'manharĩ wasété mono ô di.

³⁹ Âme ma tō asi'rã'ôtô 'wa, Pascowa na datozé nhĩbâtã na. Ma tō asima 're ĩwê za'ra wa'aba mo, 're asi'rã'ôtô aba mono ré, misi si dazazém hawi te dama 're arob'ruĩ mono da, apâ 're dawairébé mono da. Zudezu norĩ, e tawamhã wa za asib'apito za'ra wa'aba ma rob'ru, apâ morĩ da. — Âne te Piratu hã dama tinha.

⁴⁰ Tawamhã hãrà 'rãihã na te 'mahãrà za'ra:

— Mare di. Taha ma, rob'ru ô di za, morĩ da. Barabasihĩ ma si te za ĩrob'ru, apâ morĩ da. Taha si. — Âne te Piratuhu ma nharĩ za'ra. Rowasété 'manharĩ'wa, Barabasi hã.

19

¹ Tawamhã Piratu ma tō da'wapéi'wa norĩ ma 'ru za'ra, powawê hã waré na te te siwi 're pré'é mono da, Zezusi hã.

² Te te siwi 're pré'é mono pari, ma tō 'wabzéré na siwi âma sôpre za'ra. Tisi'ubuzém na ma duré siwi âma hãiba ubu, ĩhã pré na.

³ Siwa'rãmi te nasi ítême ai'ré za'ra, tō sena te te nasi sawi za'ra da newa. Âne te tãma nharĩ za'ra:

— Zudezu norĩ nhĩb'apito, rowê na aihãimana. — Âne te tãma nharĩ za'ra, âma wa'ê za'ra sina.

Tawamhã te te nasi sawi za'ra pari, te nasi siwi 'rãĩ wabzu, sisa'u.

⁴⁻⁵ Tawamhã Piratu, ma apâ datême watobro. Âne te dama tinha:

— Âhãta wa we atême saprõni za'ra wa'wa. Wa tō sadanha. Ma tō ĩma siwasu'u. Marĩ hã te te 're ab'manharĩ wasété mono ô di. Âne hã waihu'u za'ra wa'aba da, wa tō we atême saprõni za'ra wa'wa. — Âne te dama tinha.

Tawamhã Zezusi ma ítême watobro, 'wabzéré na sôpre ré. Zazahã pré na ubu ré zama ma ítême watobro.

Taha wa, te Piratu hã dama 'mahã, âne:

— Ôhõta aibã hã. 'Madã'ã za'ra wa'aba.

⁶ Tawamhã te 'madã'ã za'ra, 'Re ĩhãimana u'ãsi mono ma, da'ãma romhuri'wa ĩpire norĩ hã, sasedoti ĩpire norĩ hã. 'Re ĩhãimana u'ãsi mono âma 're ĩdawata za'ra mono zé 'madã'ã wa norĩ zama te 'madã'ã za'ra. Te te 'madã'ã za'ra wamhã, hãrà 'rãihã na te nasi 'mahãrà za'ra, âne:

— Wedepo'o nhonhi'rãmi na da te dasiwi sasõmri, dã'ã da.

Tawamhã te Piratu asa tãma nharĩ za'ra:

— Asi'uihã na te za asiwi ĩsaprõni za'ra wa'wa, asiwi sasõmri za'ra wa'aba da. Wa hã wa tō sadanha. Ma tō ĩma siwasu'u. Marĩ hã te te 're ab'manharĩ wasété mono ô di.

⁷ Taha wa, te asa tĀma nharī za'ra, dama ĩpire norī hā:

— Ti'ai āma poto nherē, ma tō dama 're siwasu'u, 'Re ĩhāimana u'āsi mono 'ra na. Mreme wē'ōre di. Wahi'rata norī hā ma tō dama roti za'ra, āne ni'wa, 're siwasu'u mono wamhā, wa te wasiwi wīri da. — Āne te tĀma nharī za'ra.

⁸⁻⁹ Tawamhā Zezusi dama 're ĩsiwasu'u mono zém na ma tō Piratu hā damreme wapa. Taha wa, ma tō pē'ēwara. Tawamhā 'ri para u ma duré āzé. Zezusi hā ĩsarina ma duré āzé. Taha wa, te duré Zezusi sadanha, Piratu hā:

— E ma hawi te we aimo bété. — Āne te sadanha. Tane nherē, tizadawa na te te wa'rāmi ō di, Zezusi hā. Ari'iwi te za.

¹⁰ Tawamhā Piratu te tĀma tinha:

— E marī da, ĩma asiwasu'u ō di. E aima ĩpire na asina ĩwaihu'u ō di. Wa hā te dama ai'ruwi wamhā, te aré aipawasisizé hā aima wasihu ni apā, dawī aimorī da. Wa hā te dama ai'ruwi wamhā, te aré dasiwi asasōmri ni, atā'ā da. E āne aima ĩmreme pire na asina ĩwaihu'u ō di. — Āne Piratu te Zezusihi ma tinha.

¹¹ Tawamhā Zezusi asa te tĀma tinha:

— 'Re ĩhāimana u'āsi mono, ma tō aipisutu, ĩma aipire da. ĩma aipire da, te te aipisutu ō 'wa'āhā, aré ĩma aipire ō di. Tawamhā ĩma aipire da, te te aipisutu nherē, ĩ'āma asimiroti wasété wamhā, tĀma aiwē ō di za, aiwasédé hā ĩ'āma 'manharī wa. Tane nherē, aibā hā si'uihā na te te aima ĩhāiba nhomri hā aiwasété nhpai u wasété uptabi di, ō hā. — Āne Zezusi te Piratuhu ma siwasu'u.

¹² Tawamhā Zezusihi mreme te te sina waihu'u wa, ma tō sima wē, Zezusi te te satōri da, apā dawī morī da. Tane nherē, hārā 'rāihā na te nasi ĩsadawa wa'rāmi 'mahārā za'ra, dama ĩpire norī hā, āne:

— Ō hā danhib'apito na ma tō 're siwasu'u. Ni'wa hā danhib'apito na 're siwasu'u mono wamhā, apito Séza hā danhib'apito na te te da'āma waihu'u ō di za. Apā morī da, tĀma rob'ruwi wamhā, apito Séza hā aima toi ō di za. — Āne te nasi tĀma nharī za'ra, sa'ētē.

¹³⁻¹⁴ Tawamhā damreme te te sina wapari wa, ma tō Zezusihi zō āzé, te te tĀma nharī da, rob u ĩsarina watobro da. Taha wa, ma tō ĩsarina watobro, rob u. Tawamhā étē 'manharī nhisiwi, te wedeza na nhamra 'ridawa, Piratu hā. Wasimremezém na étē 'manharī nhisi hā, Dabata na. Tame danhib'apito, te 're simasisi u'āsi, dawasété na te te 're da'awaihu'u mono da, dawē na zama te te duré 're da'awaihu'u mono da. Tame sāmra ré, ma tō abzumazéb u za bādā hā, sabadu ō ré hā, duré Pascowa na dato nhisi ō ré hā. Tawamhā Zezusi hā rob u ĩsarina watobro wamhā, Piratu te tinha, wasiré zudezu norī ma:

— Ōhōta asib'apito za'ra wa'wa.

¹⁵ Tawamhā dahārā 'rāihā na te nasi 'mahārā za'ra ni asa:

— Wedepo'o nnonhi'rāmi na da te dasiwi sasōmri, dā'ā da.

Tawamhā Piratu asa te tĀma nharī za'ra:

— E asib'apito za'ra wa'wa, wa za dama ti'ru, wedepo'o nnonhi'rāmi na da te dasiwi sasōmri da, dā'ā da.

Tawamhā sasedoti ĩpire norī hā te asa tĀma nharī za'ra, Piratuhu ma:

— Ōhō si wanhib'apito hā, Roma āma apito Sézaha si. — Āne te tĀma nharī za'ra, sasedoti ĩpire norī hā.

¹⁶ Tawamhā da'wapéi'wa norī ma, te oto ti'ru Piratu hā, wedepo'o nnonhi'rāmi na te te siwi sasōmri da, dā'ā da, Zezusi hā.

Zezusi hā wedepo'o nnonhi'rāmi na da te dasiwi ĩsasōmrizé wasu'u

Mateusi 27.32-44; Marcusi 15.21-32; Rucasi 23.26-43

¹⁷⁻¹⁸ Tawamhā 'ri nhiti te oto siwi saprō, Zezusi hā. Wedepo'o nnonhi'rāmi hā te sisada ti'ā, Da'rāihi na romnhisi u. Wasimremezém na Dodota na romnhisi hā.

Tamomo te te siwi āwisi za'ra wamhā, wedepo'o nnonhi'rāmi na ma tō oto siwi sasō, da'wapéi'wa norī hā. Aibā norī wa'wa, ma tō siwi sasō. Aibā maparane te āma aiwa'aba zahuré, da te dasiwi ĩsasōmri zahuré hā.

¹⁹ Tawamhā Piratu, ma tō āne āma rob'ui'ére: “Ā hā Zezusi, Nazaré hawi we ĩmorī, zudezu norī nhīb'apito.” Āne ma tō āma rob'ui'ére. Tawamhā te te āma rob'ui'ére pari, te dama ti'ru, ĩ'rāi uwaibaba te te siwi 'mazasōmri da, rob'ui'ére hā. Si'ubdatō damreme na rob'ui'ére hā. Wasiré zudezu norī mremezém na, duré romanu norī mremezém na, duré deredu norī mremezém na.

²⁰ ĩsa'ozém hawimhā 'ri nho'ōmo u hā, romhuture di. Taha wa, wasiré zudezu norī hā te ahā na te te 're sōré za'ra, āma rob'ui'ére hā.

²¹⁻²² Tawamhā Piratuhu ma, te nharī za'ra, sasedoti ĩpire norī hā:

— Rob'ui'éré na āma saprī na. “Ā hā zudezu norī nhib'apito,” āne tō da. Āne āma saprī na. “Āne te ā hā 're siwasu'u: Wa hā zudezu norī nhib'apito.” Āne āma saprī na. — Āne te Piratuhu ma nharī za'ra.

Tawamhā Piratu asa te tāma nharī za'ra:

— Mare di. Te āma saprī ō di za. Ōhō u'āsi za. — Āne te tāma nharī za'ra.

²³ Tawamhā te te siwi sasōmri pari, ma ī'uzazém na sima āma aipé, misi si da'wapéi'wa norī hā. Maparane si'uiwa na ihāiba hā. Misire ihāpa hā, te tihāiba, ihā're'ō hā. Ōne haré ī'manharī hā.

²⁴ Taha wa, te āne sima nharī za'ra:

— Wasima āma wasipé na, wa te wasima hānhihāri mono tō da. Ētēre hā misi, wanhisi ui'éré ré hā wa te wasiwi mei wa'aba, itede'wa hā wa te wasiwi āma waihu'u za'ra da. — Āne te sima nharī za'ra.

Tawamhā ma tō sima me za'ra. Duréihā wahi'rada, ma tō āne āma rob'ui'éré siro, 'Re ihāimana u'āsi mono zadawa wasu'u'wa hā:

“Ī'uzazé hā ma tō sima āma aipé. Ētēre, ma duré siwa'wa sima me za'ra, itede'wa hā te te siwi āma waihu'u za'ra da.”

Āne ma tō āma rob'ui'éré siro, ībaihā na hā. Tawamhā rob'ui'éré zarina, ma tō 'manharī za'ra, da'wapéi'wa norī hā.

²⁵ Tame te pi'ō norī hā aimasa, Zezusihi za'ozéb 'rata īna hā duré īna wapté hā, duré Mariza hā Coropasihi mro hā, duré Mariza Madarena hā.

²⁶⁻²⁷ Tawamhā Zezusi te tina hā 'madā. Wa hā te te 're īzawi pese mono zama te duré īmadā, ipapara īza wa.

Tawamhā āne te tina ma tinha:

— Āhāta ai'ra. Te za oto āma 're ai'ra mo.

Tawamhā īma zama te duré tinha:

— Āhāta ana. Te za oto āma 're ana mo.

Tawamhā te te īma īrotizéb zarina, wa za īnhorōwa u saprō, īrata 're sāmra u'āsi mono da.

Zezusihi dā'ázé wasu'u

Mateusi 27.45-56; Marcusi 15.33-41; Rucasi 23.44-49

²⁸ Tawamhā Zezusi hā sa'o ré, ma tō sina uwaimra, īmama te te āma īrotizé hā. Āne na ma tō sina waihu'u, Zezusi hā. Tawamhā āma īrob'ui'éré 'rata zéb zarina, te tinha:

— Wa hā 'rubu di. — Āne te tinha, Zezusi hā.

²⁹ Piza'a 're nho'a hā te ipapara za, uwa 'rāi wa'u īsé ré hā. Tawamhā ma tō marī hā wedehu na siwi āma 'rā'ubu da'wapéi'wa norī hā, uwa 'rāi wa'u īsé na te te āma siwi di'ī da, īwa'ābā syry na, Zezusihi ma, te te siwi wē da, īsadawa u. Taha wa, te oto upsō Zezusi hā, tizadawa na.

³⁰ Te te upsōmri parip si, te tinha:

— Tāibā oto. Wa tō oto īsina uwaimra.

Taha pari, ma tō oto 'rāi waptārā. Tawamhā si'uihā na ma pē'ē hai'utō.

Da'wapéi'wa hā Zezusi ī'a're wi te te īwa'rézé wasu'u

³¹ Tawamhā dama īpire norī hā te Piratuhu u ai'aba're, īsōrōwa u. Ītēme sihutu wamhā, te āma sadanharī za'ra, wedepo'o nnonhi'rāmi na īsimnhana hā te te dama 'ru za'ra da, da te dasiwi hi'ē za'ra da. E marī da. Dā'ā su'u za'ra da, wedepo'o nnonhi'rāmi hawi da te dasiwi wamirī hā. Āne te āma sadanharī za'ra. E marī wa. Romhuri zahārizém na simnhatā u'āsi wamhā, dama wē prā ti. Hāiwahā pesere si te za bādā hā īwa waptārā, romhuri zahārizé hā. Tawamhā romhuri zahārizéb u simnhatā ré, āma hāiwahā pese tō za'ra da, te āne āma sadanharī za'ra, bādā hā dama pire uptabi wa, romhuri zahārizé hā.

³² Tawamhā Piratu hā te tāma 'ru za'ra, da'wapéi'wa norī ma, te te siwi hi'ē za'ra da. Te te tāma 'ru za'ra wa, ma tō aibā norī hā siwi hi'ē zahuré, Zezusihi siré īsa'o zahuré hā.

³³ Taha pari, ma tō Zezusihi zō ai're za'ra. Īwana dā'ā zahuré wamhā, te te siwi hi'ēi ō di.

³⁴ Īwana dā'ā zahuré nherē, ma tō ī'a're wi wa're da'wapéi'wa hā, si'uwazi 'rā'wa pa na. Te te wa'rei wi, ma īwapru hā puru. Ā zama ma īsu asa'wa.

³⁵ Wa hā 'rāwi īmadā'ā'wa, wa aima wasu'u za'ra wa'wa, waihu'u za'ra wa'aba da, 're saze za'ra wa'aba mono da. Tō sena, wa aima rowasu'u za'ra wa'wa.

³⁶ Duréihā ma tō 'Re ihāimana u'āsi mono zadawa wasu'u'wa hā āma rob'ui'éré siro, da te dasiwi ihī'ēi ō na hā. Tawamhā āma īrob'ui'éré zarina, te te siwi hi'ēi ō di, da'wapéi'wa norī hā.

³⁷ Ma tō duré āne āma rob'ui'éré siro, īsadawa wasu'u'wa hā, āne: “Da te īwa'rézé hā te za 'madā'ā za'ra ni.” Tawamhā āma īrob'ui'éré zarina, īwa'rézé hā ma tō 'madā'ā za'ra ni.

Zezi dâ'â pari, da te dasiwi ãsêrêzé wasu'u

Mateusi 27.57-61; Marcusi 15.42-47; Rucasi 23.50-56

³⁸⁻³⁹ Tawamhã Zuzé hã ma tô Piratuhu u mo, Zezusihi hãiba na te te tãma rowairébé zô, te te âri da, ab're 're, te te sêrê da. Arimateza na romnhisi hawimhã, Zuzé hã. Zezusihi zazei'wa, 're mori nherê, ãsazei'wa na siwasu'u ô di, dama ãpire nori mreme pipa te. Tawamhã Zezusihi hãiba na ma tô âma saze, Piratu hã. Tawamhã te oto sô mo, Zuzé hã. Nicodemosihi me, ma tô âri zahuré, te te hãiba u'rê zahuré da. Marĩ zu wazari, ma tô Nicodemosi hã we sada âwisi ãsadaze hã ahã na, 35 na ãpire pibuzé hã. Wede nhinihã hã zum ne hã, 'rém nhana'rê ne hã, ãwazarimhã. Nicodemosi hã ta hã Zezusihi u barana ãmorĩ, ãsimiroti te te wapari da.

⁴⁰ Tawamhã zazahã ãhã pa na ma tô hãiba ubu zahuré. Zazahã hã te nasi âma hãzub zahuré, ãsadaze na te te âma hãiba ubu zahuré ré. Ône u'á wasiré zudezu nori hã 're dadã'á za'ra mono wamhã, te te dama 're 'manharĩ za'ra, da te danherê ô ré.

⁴¹ Zezusihi za'ozéb âma te wede hã 're simasa, rob'rere wede hã. Tame sa'a zahãpã, te ab're hã 're sa'wari, ab're siro hã, ã'ubuni hã, ni'wa ãwa da te ãsêrê ô hã.

⁴² Tawamhã romhuri zahãrizéb u oto romhuture wa, duré ab're siro hã ãsa'ozéb 'rata hãimana wa, ma tô ãwa siwi tisê, Zuzé nori hã.

20

Zezi hã ab're hawi apã ãhãiwa'utuzé wasu'u

Mateusi 28.1-8; Marcusi 16.1-8; Rucasi 24.1-12

¹ Tawamhã pi'ô hã robza'rã ré te ab're u mo, Mariza Madarena hã, dumidu na. Ab're u mori wamhã, ab're nhitobzê hã êne hã, baba di. Ni'wa ma tô ãwana ãsiti sa'rê.

² Taha wa, te apã wara, Sima Pedruhu u. ãtêmeb zama ma duré wi, Zezusi te te ãzawi pese u hã. ãne te wama rowasu'u:

– Wanhãb'apito hã ma tô dasiwi wazere ni, ab're hawi. Da te dasiwi ãhirizé hã wa te wasiwi waihu'u za'ra ô di. – ãne te wama rowasu'u.

³ Tawamhã te te wama rowasu'u pari, wa tô awa'awi wanem ni, ab're u, Pedruhu me.

⁴ Wa oto asamro ni. Te rême wamhã, ãwana wa wi, ab're u.

⁵ ãwisi wi, wa ab're u sô aiwê'ê, te sô rob'madã'á da. ãzêbré ô di. ã'ubuzéb si wa tô 'madã'á za'ra, ãhãirã hã. ã'ubuzéb si te daba'wara.

⁶ Sima Pedru hã ma tô we ãzarina wi. Wisi wi, ma taha si ab're u ãzé. Sébré wamhã, ma duré ã'ubuzéb si 'madã'á za'ra.

⁷ Romhã na te ã'ubuzém nhiti ã'rã ubuzé hã nomro. Hã nhinhai haré te nomro.

⁸ Tawamhã ab're u ãwisi 'rada hã wa tô duré ãsarina ãzé. ã'ubuzé hã wa tô duré 'madã'á za'ra. ã'rã ubuzé hã ãsiti ãnomro hã wa duré 'madã, hã nhinhai haré. Te 'madã'á wamhã, wa tô saze Zezusi hã, ãhãiwa'utuzém na.

⁹ Duréhã ma tô ãhãiwa'utuzém na rob'ui'éré sirômo za'ra ãbaihã na hã, 'Re ãhãimana u'ãsi mono zadawa wasu'u'wa nori hã. Tane nherê, ãhãiwa'utuzém na rob'ui'éré hã zahadu wama waihu'u pese ô di.

¹⁰ Tawamhã ab're, wa te sabui pari, wa oto apã wanem ni, wanhorôwa u.

Zezi hã Mariza Madarenahã u ãshãi'rézé wasu'u

Mateusi 28.9-10; Marcusi 16.9-11

¹¹ Tawamhã Mariza Madarenahã si te waza'u za ab're 'rata, wawa sina. Wawa sina ma ab're u aiwê'ê, te te duré sô rob'madã'á da.

¹² Siwê'êi wa, ma tô aibã hã sãmri zahuré, 'Re ãhãimana u'ãsi mono ma romhuri'wa nori hã, hãiwa hawi we ãne hã. Zazahã ãhãirã ré te aimasisi zahuré, siwanhizari. Zezusihi 'rã nomrozéb âma te ãhãiba amo hã nhamra. ãhãiba amo hã ãte nomrozéb âma te duré nhamra.

¹³ Tawamhã hãiwa hawi romhuri'wa nori hã te Mariza Madarena sadanharĩ zahuré, ãne:
– Pi'ô. E marĩ wa, te aiwawa.

– Wanhãb'apito, da te dasiwi wazere wa, da te dasiwi ãhirizé hã te waihu'u ô wa, wa ãwawa. – ãne te tãma siwasu'u zahuré.

¹⁴ Tawamhã tãma siwasu'u zahuré pari, ma aipi'ra. Sipi'rai wi, ma tô aibã hã tisã, Mariza Madarena hã. Tane nherê, Zezusi te te waihu'u ô di, ni'wa newa.

¹⁵ Tawamhã Zezusi te tãma tinha:

– Pi'ô, e marĩ wa, te aiwawa. E 'wa sô, te ãrob'madã.

Tawamhã Mariza te asa tãma tinha:

– A hã wazere wamhã, ãma wasu'u na ãhirizé hã te waihu'u da, nimomo sô ãmorĩ da, apã te we âri da. – ãne te tãma tinha. Rob'rere wede 'madã'á'wa newa, te te waihu'u ô di, Zezusi hã.

¹⁶ Tawamhā Zezusi te tāma tinha:
— Mariza.

Tawamhā tinhisi te te wapari wamhā, ma ĩtēme aipi'ra, Mariza hā. Tawamhā wasimremezém na ebreusi mreme na te tāma tinha, āne:

— Raboni. (Ā hā damreme hā āma ĩsaprī na hā “Rowahutu'wa.”)

¹⁷ Tawamhā Zezusi te tāma tinha:

— ĩtété ô di za. Zahadu apā ĩmorī ô di, ĩmama u hā. Mo oto aimorī, ĩsisānawā norī u tāma ĩzadawa wasu'u za'ra da. ĩmama u, wa za oto mo apā hāiwa u, Aimama aba u. ĩnhib'apito u, wa za oto mo, Asib'apito za'ra wa'aba u. — Āne tāma ĩzadawa wasu'u za'ra na za.

¹⁸ Tawamhā Mariza Madarena te oto watēme mo, Zezusihi siré 're ĩwanomro mono norī u, te te wama sadawa wasu'u za'ra da. Watēme wisi wamhā, te wama rowasu'u za'ra, āne:

— Wanhib'apito, wa tō sabu. Timama u te za, u, oto mo, hāiwa u Wamama u. Tinhib'apito u te za, u, oto mo, Wanhib'apito u. — Āne te wama sadawa wasu'u za'ra, Mariza Madarena hā.

Zezusi hā tisiré norī u ĩshāi'rézé wasu'u

Mateusi 28.16-20; Marcusi 16.14-18; Rucasi 24.36-49

¹⁹ Tawamhā tō taha bātā na dumidu na bādā sébré wi, wa tō wasi'rā'ōtō ni, Zezusihi siré 're ĩwanomro mono norī si. Dama ĩpire norī pipa te, wa tō wasiré 'rinhitop tete za'ra ni. Tame wasi'rā'ōtō ré, ma tō Zezusi hā wama sihāi'ré za'ra wawa'wa. Wawa'wa te tizab za'ra. Tawamhā te āne wama nharī za'ra:

— Rowē na 're aihāimana za'ra wa'aba mono.

²⁰ Tawamhā tinhib'rada, ma tō wama wē za'ra, wa te 'madâ'â za'ra da. Ti'a're āma ti'wa're hā ma duré wama urīrī za'ra. Tawamhā Wanhib'apito, wa te sabu za'ra wamhā, wa 're wato za'ra.

²¹ Tawamhā Zezusi te duré wama nharī za'ra:

— Rowē na 're aihāimana za'ra wa'aba mono. ĩmama we te te datēme ĩzatōrī ne, wa za duré datēme asatōrī za'ra wa'wa.

²² Tawamhā tizadawa wa'u u na ma tō waza'uri za'ra. Āne te wama nharī za'ra:

— Wa za oto ĩpē'ēzani hā aima sōmri za'ra wa'wa. Wē uptabi di, ta hā.

²³ Taha zarina te za ĩzadawa para dama 're ĩwaihu'u za'ra wa'aba mo, 'Re ĩhāimana u'āsi mono hā dawasédé hā te te da'āma 're ĩ'ab'madâ'â mono ô zém na hā. Tawamhā dama 're ĩwaihu'u za'ra wa'aba mono zéb zarina, te za te dama 're aparti, dawasédé hā. Āne na dama 're waihu'u za'ra wa'aba mono ô wamhā, dawasédé hā te te dama 're aparti mono ô di za, 'Re ĩhāimana u'āsi mono hā. — Āne ma tō wama waihu'u za'ra.

Tome hā Zezusi te te ĩwawāzé wasu'u

²⁴⁻²⁵ Tawamhā wasi'rā'ōtō wamhā, Tome hā wame sāmra ô di, ĩsi'ubza na da te 're ĩsisi za'ra mono hā. Taha wa, wa tō tāma rowasu'u za'ra ni:

— Wanhib'apito, wa tō sabu za'ra ni.

Tawamhā Tome te wama nharī za'ra, āne:

— Wa hā ĩsib'rata zapu'uzé, te 'madâ'â ô wamhā, duré ĩsib'rata zapu'uzéb 're, ĩnhipto te sērē ô wamhā, duré ĩ'a're wa'rē 're, ĩnhib'rada te sērē ô wamhā, ĩhāiwa'utuzém na te sazei ô di za, wa hā. — Āne te Tome hā wama nharī za'ra.

²⁶ Tawamhā romhuri hā misi wa'āma si'utōrī pari, wa duré wasi'rā'ōtō ni, dumidu na. Tome hā te oto wame tinhamra za'ra. Tawamhā 'ri nhitop tete nherē, ma tō duré wei watēme tizébré za'ra, Zezusi hā. Wawa'wa te duré tizab za'ra. Āne te wazawi za'ra:

— Rowē na 're aihāimana za'ra wa'aba mono.

²⁷ Tawamhā Zezusi te Tomehē ma tinha:

— We ĩtēme aimorī, ĩnhib'rada 'madâ'â da. ĩnhib'rata zapu'uzéb 're, asipto hā sērē. Duré ĩ'a're 'wa're 're, asib'rada hā sērē. ĩhāiwa'utuzém na ĩwasu'u na, ĩwawā tō. Te za oto ĩzaze, ĩhāiwa'utuzém na hā. — Āne te tāma tinha.

²⁸ Tawamhā Tome te asa tāma tinha:

— A hā, ĩnhib'apito uptabi. A hā, 'Re ĩhāimana u'āsi mono. Ai'āma si, wa za 're ĩwata u'āsi.

²⁹ Tawamhā Zezusi te asa tāma tinha:

— ĩzabu wapsi, ma tō oto ĩzaze, ĩhāiwa'utuzém na. Ni'wam norī hā te te 're ĩzabu za'ra mono ô nherē, te te 're ĩzaze za'ra mono wamhā, tāma 're rowé za'ra mono di za. — Āne ma Tomehē ma waihu'u, Zezusi hā.

Rowasu'u 'rāsutuzém na rowasu'u

³⁰ Zezusi hã dâ'â ò ré, ma tô tiwaihu'u pese na marĩ dama ĩ'manharĩ waihu'u'ò hã te te dama 're ab'manharĩ wê u'âsi, wanho'a. Īsimipawaptobzé hã ahã di. Wa hã wa tô âma rob'ui'ére, uburé te âma rob'ui'ére ò nherê, Īsimipawaptobzém na hã.

³¹ E marĩ da, wa tô âma rob'ui'ére. Danho'reptui'wa da, 'Re ĩhâimana u'âsi mono te te ĩpĩsutu na, Zezusihi si 're saze za'ra wa'aba mono da, duré 'Re ĩhâimana u'âsi mono 'ra na 're saze za'ra wa'aba mono da. E marĩ da, te za Zezusihi si asina 're ĩ'umnhasi za'ra wa'aba mo. Rowê u'âsi âma 're anomro aba mono da, duré 're atâ'â za'ra wa'aba mono âna 're aihâimana u'âsi za'ra wa'aba mono da, 'Re ĩhâimana u'âsi mono 'rata, hãwa âma. Taha da, te za Zezusihi si asina 're ĩ'umnhasi za'ra wa'aba mo.

21

Zezusi hã tisiré norĩ 7 na ĩhãiba za'ra norĩ u, ĩsihã'i-rézé wasu'u

¹ Tawamhã Zezusi hã ma tô duré wama sihã'i-ré za'ra, ĩsiré 're ĩwanomro mono norĩ u. Īsô'u zaihá u ma tô watême sihã'i-ré za'ra. Tiberizadi na 'ri nho'òmo nhisi 'rata, ĩsô'u hã. Âne duré watême ĩsihã'i-ré za'ra zé wasu'u hã.

² Wa norĩ hã wa tô wasiré asimro ni, Sima Pedruhu me, duré Tomehê me ĩsi'ubza na da te 're ĩsisi za'ra mono me hã, duré Natâna'éhé me, duré aibã maparane ĩsiré 're ĩwanomro mono norĩ me hã. Cana na 'ri nhisi âma 're ĩhâimana mono, Natâna'é hã. Darireza na danhĩpti'a nho'òmo nhisi âma, Cana hã. Wa norĩ hã Zebedehe 'ra, Ti'aduhu me.

³ Tawamhã Sima Pedru te wama nharĩ za'ra:

– Tepe zô, wa za mo, wa hã.

Tawamhã wa tô tâma nharĩ za'ra ni:

– Asiré, wa za amo ai'aba're ní, tepe zô.

Tawamhã wa tô oto wawairébé ní rob u, tepe zô wasi'aba're da. Tawamhã âi ba wasihutu wamhã, uba're wa, wa tô asisi ní, abazipara hã wa te nasi wasiwi wabzuri da, tepe zô. Tane nherê, wa te wasiwi 'mai'ári ò di, â barana hã.

⁴ Tawamhã awê u hãwa pré wi te aibã hã za, ĩsô'u zaihá na. Wa te wasiwi sãmri wamhã, wa te wasiwi waihu'u za'ra ò di, Zezusi hã.

⁵ Tawamhã ma tô wa'mahârã za'ra, âne:

– Īsisânawã norĩ, e ma tô ĩ'mai'ári za'ra wa'wa, tebe hã.

Tawamhã asa wa tô tâma nharĩ za'ra ni:

– Mare di. Wa te 'mai'ári za'ra ò di. Â baba di.

⁶ Tawamhã te wama 'ru za'ra:

– Ma'âpé, abazipara hã asimire niwĩ asiwi mei wa'aba, tebe hã 'mai'ári za'ra wa'aba da.

Taha wa, wa tô oto abazipara hã wanhimire niwĩ wasiwi me ni, âi ba. Wa te wasiwi mei wamhã, â hawi wa te wasiwi wazere waihu'u ò di, uba're u hã, tebe hã ahã uptabi wa, ĩ'remhã.

⁷ Taha wa, wa Pedruhu ma tinha:

– Ô hã, Wanhib'apito. – Âne wa tô tâma tinha, Zezusihi siré 're ĩmorĩ hã te te 're ĩzawi pese mono hã.

Tawamhã ĩmreme te te wapari wi, awa'awi ma tô si'uza, Sima Pedru hã. Te te romhuri da, ma tô aré ti'uza hã sani. Tawamhã si'uza pari, ma tô uba're hawi tobros, âi ba, Zezusihi u morĩ da.

⁸ Wa norĩ hã wa uba're na abazipara hã wasiwi sari ni. Romhuture di oto, â zãda're u hã.

⁹ Â zãda're u, wa te wasiwi âma ropto wamhã, wa tô oto wawairébé ní, rob u. Tawamhã uzã, wa tô wasiwi sãmri ni. Pré'a nhisiwĩ, te tebe hã daba'wara. ĩ'u'etê wapu zama te ĩsu daba'wara.

¹⁰ Tawamhã âne te wama nharĩ za'ra:

– Tebe hã asiwi ĩ'mai'ári za'ra wa'wa hã we 'mai'ári aba.

¹¹ Tawamhã Sima Pedru uba're wa, ma tô âzé abazipara zô, â zãda're u te te sari da, tepe ré hã. Tebe hã 'masisi uptabi di. 153 na ĩhãiba hã, ĩsa'etê si. Tebe hã ahã uptabi nherê, abazipara hã te te sina tari ò di.

¹² Tawamhã Zezusi te wazô tihârã za'ra:

– We ai'aba'rei wa'aba, asaihuri aba da.

Tawamhã âne wa te wasiwi sadanharĩ za'ra ò di: “E 'wa hã a hã.” Wanhib'apito, wa te waihu'u za'ra wa, wa te wasiwi sadanharĩ za'ra ò di.

¹³ Tawamhã Zezusi hã ma tô ĩ'u'etê wapu hã wama sãmri za'ra. Tepe zama, ma duré wama sãmri za'ra, wa te ĩhuri da hã.

¹⁴ Ab're hawi hãwa'utu pari, te nasi watême sihã'i-ré za'ra, Zezusi hã. Âhãna watême wisi wamhã, si'ubdatô oto watême ĩsihã'i-ré za'ra zé hã, ĩsiré 're ĩwanomro mono norĩ u hã.

Zezusi hã Pedru te te sina ĩsadanharizé wasu'u

¹⁵ Tawamhã wasaihuri pari, Zezusi hã te Sima Pedruhu ma tinha:

– Sima, Zuwãhã 'ra, ma'ãpé, ĩma waihu'u. Ā norĩ ma, ĩzawi pese za'ra di. A hã bété, e ta norĩ nhipai u aima ĩzawi pese di.

Tawamhã Pedru te asa tãma tinha:

– ĩhe. Ma tã asina ĩwaihu'u siro, te 're ĩ'asawi pese mono zém na.

Tawamhã Zezusi te tãma tinha:

– Pone'ërebã 'madã'ã'wa, tinhimizama te te 're ĩ'madã'ã pese za'ra mono ne, ma'ãpé ĩzazei'wa norĩ hã 're ab'madã'ã pese mono za.

¹⁶ Tawamhã te duré sadanha:

– Sima, Zuwãhã 'ra, e aima ĩzawi pese uptabi di.

Pedru te duré asa tãma tinha:

– ĩhe. Ma tã asina ĩwaihu'u siro, te 're asawi pese mono zém na.

Tawamhã Zezusi te tãma tinha:

– Ma'ãpé ĩzazei'wa norĩ hã 're ab'madã'ã pese mono za, pone'ërebã 'madã'ã wẽ 'wa ne hã.

¹⁷ Te duré sadanha:

– Sima, Zuwãhã 'ra, e aima ĩzawi pese uptabi di. – Āne te Pedru sadanha. Si'ubdatõ oto te te ĩsadanharizé hã.

Tawamhã si'ubdatõ te te sadanharĩ wa, pẽ'ëzé di oto, Pedru hã. Tawamhã Zezusihi ma, te duré tinha, ãne:

– Uburé marĩ hã aima waihu'u pese di. A hã ma tã asina ĩwaihu'u siro, te 're ĩ'asawi pese mono zém na.

Tawamhã Zezusi te tãma tinha:

– Ma'ãpé, ĩzazei'wa norĩ hã 're ab'madã'ã pese mono za, pone'ërebã 'madã'ã wẽ 'wa ne hã.

¹⁸ Te duré tãma tinha:

– Tõ sena wa aima rowasu'u: Aipréduptéb ré, ma tã 're asi'uza mo, nimomo 're ane mono da, asima 're ĩrowẽ mono zéb uwaibaba. Niwapsi, ãnei õ di za. Asi'ĩhi wapsi, te za aipano hã ĩwẽ zahuré, da te ai'awasisi da, nimomo asima rowẽ õ nherẽ, da te asaprõni da.

¹⁹ Āne sã'awib õ nherẽ, ma tã tãma rowaihu'u siro, ĩdã'ázem na hã, za tãma ĩromhãimanazém na hã. Sihãiba zawi ãna, za dã'ã wa, te za 'Re ĩhãimana u'ãsi mono ãma 're dawata za'ra.

Tawamhã Zezusi te duré Pedruhu ma tinha:

– 'Re ĩmorizém na te za 're aimo, ĩzarina. – Āne te tãma roti.

Zezusi hã Pedruhu ma, te te ĩrotizé wasu'u, Zuwãhã ãma

²⁰⁻²¹ Tawamhã nimomo simisutu wasi'aba'réri ré, ma tã Pedru hã aipi'ra. Sipi'rai wamhã, ma tã ĩ'madã, Zezusihi siré 're ĩmorĩ hã te te 're ĩzawi pese mono hã. Barana wasi'ubumroi ré wasaihuri da, wa tã ĩsõ're ãma nhamra aré. Wa hã wa tã sadanha aré: “Wanhib'apito, e 'wa hã te za asõ te te danhimro, te te dama aihãiba nhomri da.” Āne wa tã sadanha aré. Tawamhã Pedru te te ĩ'madã'ã wamhã, te Zezusi sadanha, ĩ'ãma:

– Wanhib'apito. Ā hã bété, e niha za tãma ĩromhãimanazé hã.

²² Tawamhã Zezusi asa te tãma tinha:

– Apã we ĩmorĩ õ ré, ĩdã'ã'õzé te tãma pisutu wamhã, taha si ãma 're 'madã'ã mono õ di za, 're aimorĩ da, ĩzarina. Asi'ãma si te za 're ĩrosa'rata mo, 're ĩmorizém na si 're aimorĩ da. – Āne te Pedruhu ma roti.

²³ Tawamhã ĩdã'ã ãna 're ĩhãimana u'ãsi mono na rowasu'u hã ma tã te te ropé, Zezusihi zazei'wa norĩ u. Zezusi hã te te ĩma pisutu õ di, ĩdã'ã'õzé hã. Taré ma tã Pedruhu ma waihu'u aré: “Apã we ĩmorĩ õ ré, ĩdã'ã'õzé te tãma pisutu wamhã, taha si ãma 're 'madã'ã mono õ di za.” Āne si ma tã tãma tinha aré.

²⁴ Ta hã Zezusihi wasu'u na aima rowasu'u za'ra wa'aba 'wa hã, Zezusihi siré 're ĩmorĩ. Ta hã duré ãma rob'ui'ére'wa. Zezusihi wasu'u na ĩsimirowasu'u hã sena uptabi na wa tã wasina waihu'u za'ra ni.

Zuwã te te ĩrob'ui'ére' rãsutu zé

Zuwã 20.30-31

²⁵ Zezusi hã te te dama 're ĩ'arob'manharĩ wẽ mono zé hã ahã uptabi di, da te ãma ĩrob'ui'ére' za'ra õ hã. Da te ãma rob'ui'ére' za'ra 'wa'ãhã, aré tãma rob're syryre di ĩbahã ma hã, ti'ai ãma hã. Nimame 're ĩsimi'wara mono zéb da hã mare di.

Atusi **Zezusihî zadawa wasu'u'wa norî nhimiromhuri na rob'ui'ére** **Ïbaihâ wasu'uzé**

Ï baihâ na Rucasi hâ ma tô âma rob'ui'ére. Zezusihi mreme wapari'wa norî hâ 'Re Ïhâimana u'âsi mono pê'ézani hâ za we te te Ïtême Ïsi'ra za'ra zéb zô, Ïsimipari za'ra na hâ ma tô âma rob'ui'ére. Zezusi hâ ti'ai âma oto 're morî ô di.

Capituru 1 âma hâ Rucasi ma tô wasu'u, Zezusi hâ hâiwa u apâ Ïmorîzém na hâ. Capituru 2 âma ma tô duré wasu'u, 'Re Ïhâimana u'âsi mono pê'ézani hâ Ïsazei'wa norî pê'é mono bâ oto âma 're Ïsôrôwa za'ra mono na hâ. Capituru 3 hawimhâ Ïbaihâ 'râsutu u hâ ma tô wama rowasu'u za'ra, Zezusihi zadawa wasu'u'wa norî nhimiromhurizém na hâ, daro mono bâ Zezusihi wasu'uwé hâ te te dama 're wasu'u za'ra mono ré, marî hâ sada 're Ïhâimana za'ra mono zém na hâ.

Cristuhu wasu'uwé na hâ Zeruzarê 're, ma tô zudezu norî ma âma rowasu'u na rata za'ra ni. Taha pari, ma tô samaritanu norî nhipti'ai u hâ âma ropé ni. Ta hawimhâ zudezu'ô norî u, ma tô duré te te ropé oto, Zezusi hâ zudezu norî u si we morî ô wa.

¹⁻² Tezopiru, wa hâ Rucasi, Ïnhimi'ui'ére 'rata na wa tô aima rob'ui'ére pa, Zezusi 're Ïmorîzém na. Ti'ai âma 're morî ré hâ ma tô te te 're da'apawapto. Ma tô duré te te dama 're arowahutu. Ïsâna'rata hawimhâ, Ï'râsutu u wa tô aima âma rob'ui'ére. Hâiwa u Ïmorîzé wasu'u na wa tô duré aima rob'ui'ére pa.

Tawamhâ hâiwa u morî ô ré, ma tô tizadawa wasu'u'wa norî ma rob'ru za'ra, te te sima Ïwé za'ra zéb uwaibaba, sô Ïhârâ za'ra norî ma. 'Re Ïhâimana u'âsi mono pê'ézani ré, 're morî wa, ma tô Ïsada para tâma rob'ru za'ra, te te duré âma 're dapawapto za'ra mono da, duré Ïwasu'uwé te te dama 're wasu'u za'ra mono da, Ïsine. Âhâna wa za duré aima rob'ui'ére, hâiwa u morî za'u si, te te 're Ïpawapto za'ra mono zé wasu'u na hâ.

Zezusi hâ tizadawa wasu'u'wa norî ma, nasi Ïshâi'rézé wasu'u

³ Zezusi hâ dâ'â nherê, hâiwa'utu wamhâ, tihâiba na u'âsi te nasi tâma sihâi'rê za'ra, tizadawa wasu'u'wa norî ma hâ. Nasi Ïtême Ïshâi'rê za'ra zém na hâ, 40 na ma tô bâdâ hâ âma ne. Tô sena, Zezusi hâ hâiba ré za oto apâ 're Ïmorî na te te âma waihu'u za'ra da, te nasi Ïtême sihâi'rê za'ra, taré newa, te te siwi âma wawâ tô za'ra da. 'Re Ïhâimana u'âsi mono, da'âma 're Ïsib'a'uwé mono zém na ma tô duré tâma rowasu'u za'ra.

⁴ Tawamhâ nimahâ bâtâ na Ï'rata sâmra za'ra ré, te tâma roti za'ra, Zeruzarê âma simipari sina a'â hâimana za'ra da. Âne te tâma roti za'ra, Zezusi hâ:

— Ïmama, te te aima Ïropisutu za'ra wa'aba zéb zô asimipari za'ra wa'aba za a'â. Te te Ïropisutuzé hâ wa tô aima wasu'u za'ra wa'wa.

⁵ Zuwâ Batita hâ ma tô â uptabi na si te te 're da'ahâiba ubu, â dawabzuri te te dama 're ab'manharî mono wamhâ. Ânei ô di za oto, a norî wa'wa hâ. Ai'âma 're ronometro za'ra wa'aba mono ô ré, te za oto 'Re Ïhâimana u'âsi mono hâ Tipê'ézani na te te 're aihâiba ubu za'ra wa'wa, Ïré 're anomro u'âsi aba mono da. — Âne te tâma nharî za'ra.

⁶ Tawamhâ siré si'ubumroi ré, te siwi sadanha, Ïsada wasu'u'wa norî hâ:

— Wanhib'apito, e tawamhâ, âhâna te za wama asi'apito za'ra, Ïzarazéhé nhihudu norî ma hâ warob 're duré wama 're roti mono da, wahi'rada Dawi hâ te te dama 're Ïroti mono ne hâ, romanu norî te te 're wawada'uri za'ra mono tô da. — Âne te siwi sadanha.

⁷ Tawamhâ Zezusi te asa tâma nharî za'ra:

— Ïmama ma si waihu'u pese di. Taha si ma tô bâdâ hâ sima pisutu pese, te te dama âma Ï'uwaimramizéb da hâ. A norî wa'wa hâ bâdâ hâ waihu'u za'ra wa'aba da, Ïmama te te aima pisutu za'ra wa'aba ô di, te te dama âma Ï'uwaimramizéb da hâ.

⁸ Tane nherê, te za Tipê'ézani hâ we aima sômri za'ra wa'wa. Tawapsi, te za tiwaihu'u pese na asiptete za'ra wa'wa, dama 're Ïzadawa wasu'u za'ra wa'aba mono da. Tawamhâ te za tô dama 're Ïzadawa wasu'u za'ra wa'aba mo, Zeruzarê na 'ri nho'ômo nhisi âma. Zudeza na danhipti'a nho'ômo nhisi âma te za duré dama 're Ïzadawa wasu'u za'ra wa'aba mo, daza'rui mono bâ, Samariza na danhipti'a nho'ômo nhisi âma zama. Uburé daza'rui mono bâ romhâ na zama te za oto dama 're Ïzadawa wasu'u za'ra wa'aba mo. — Âne te tâma roti za'ra.

Zezusi hâ hâiwa u Ïmorîzé wasu'u

⁹⁻¹⁰ Tawamhâ tizadawa wasu'u'wa norî ma, te te tâma roti za'ra pari, ma tô Ïmama hâ tiwi âri za'ra, Ïsô'a za'ra, hâiwa u morî da oto, Zezusi hâ. Morî ré, te te siwi sawêré za'ra. Tawamhâ hâiwa'a 'rowi ma tô tiwi tizébré za'ra oto. Te te siwi sâmri za'ra ô di oto. Tawamhâ

hâimo te te siwi sawērē mono ré, aibâ norī hā ma tō sa'rese āna aima'wara zahurē, ĩsababab za'ra, uza hāirā ré.

¹¹ Tawamhā āne te tāma nharī za'ra:

– Darireza āma 're aihāimana za'ra wa'aba mono norī, e marī da, te aimasap sina, hāimo āma ĩsawērē za'ra wa'aba mo. Zezusi hā 'Re ĩhāimana u'āsi mono, hāiwa u te te aiwi ĩ'ārī za'ra wa'wa hā, ta hā te za wei apā mo. Hāiwa u āma morī ré, ma tō ĩsawērē za'ra wa'aba mo. Hāiwa u āma aiwi ĩmorī aba ne, te za wei apā mo. – Āne ma tō tāma rowasu'u za'ra, hāiwa hawi romhuri'wa norī hā.

Zeruzarē āma Zezusihi zadawa wasu'u'wa norī, nasi ĩsi'rā'ōtōzé wasu'u

¹² Tawamhā Zezusihi zadawa wasu'u'wa norī hā te oto apā ai'aba'rē, Oriwera na ētē 'rāihā nhisi hawi, Zeruzarē na 'ri nho'ōmo nhisi u. Ta hawimhā, Zeruzarē u hā misi na ti'ai pibuzé hā.

¹³ Ma tō oto aihutu, Zeruzarē u. Sihutu wamhā, 're ĩdanhimi'wara mono zéb u te oto ai'aba'rē. Hāimo te sai'uri za'ra, tisi'ubumrozéb u sisisi da, 'ri nhisi u. ĩsada wasu'u'wa norī hā āne ĩsisi za'ra hā: Pedru hā, duré Zuwā hā, duré Ti'adu hā, duré Ādéré hā, duré Piripi hā, duré Tome hā, duré Batoromezu, duré Mateusi, duré Apezuhu 'ra Ti'adu na ĩsisi hā, duré Sima hā zeroti norī me aré 're ĩmorī hā, duré Zudasi Ti'aduhu 'ra hā. Ta norī hā ma tō hāimo sai'uri za'ra.

¹⁴ Tawamhā awē sidāpāsi te nasi si'rā'ōtō, 'Re ĩhāimana u'āsi mono ma, mreme zusi da nasi, Zezusihi no norī me, duré ĩna zama Mariza na ĩsisi hā aimawi pi'ō norī me zama.

Mati'asi hā Zudasihī nhowa're're, 'Re ĩhāimana u'āsi mono te te ĩpisutuzé wasu'u

¹⁵ Tawamhā bādā hā siwaptom na āma ne pari, ma tō ĩsazei'wa norī hā si'rā'ōtō, 120 na ĩhāiba za'ra hā. Tawamhā Pedru hā ma tō wahudu hāiwi, te te tāma rowasu'u za'ra da. Āne te tāma rowasu'u za'ra:

¹⁶⁻²⁰ – Wasiré Zezusihi zazei'wa norī, ĩwaparī za'ra wa'aba. Zudasihī wasu'u na wa za aima rowasu'u za'ra wa'wa. Duréihā, 'Re ĩhāimana u'āsi mono pē'ēzani hā ma tō Zudasi hā waihu'u siro, romhā ré. Taha wa, Dawihi ma, ma tō tinha, dama roti'wai ma, te te ĩwaihu'u sirōmo zém na te te āma rob'ui'ére da. Tawamhā Dawi hā ma tō Zudasihī āma rob'ui'ére siro, potō ō ré. Āne ĩbaihā na āma ĩrob'ui'ére hā: “ĩsōrōwa āma hā 'ri baba di za oto. 'Ri baba na te za oto 're sa. Ni'wa hā ĩwa 're sāmra mono ō di za oto.” Āne Zudasihī dā'ázé wasu'u na ma tō wama rob'ui'ére.

– Rob'ui'ére na ĩwasu'u hā ma tō sina uwaimra Zudasi hā, tidā'ázé wasu'u hā te te sina waihu'u āna. Siwi ĩwē'ō'wa norī hā ma tō te te só simro, Zezusihi zō. ĩsiré 're wanomro mono nherē, wasiré romhuri, Zezusi te te tāma pisutu nherē, ma tō te te sō danhimro, te te dama hāiba nhomri da. Te te dama hāiba nhomri parip si, ma tō sima uipwa ti'a hā, Zezusi te te dama ĩsōmrizé wa'ābā na. Tawamhā tame ma tō dārā, tinhipti'ai 're, Zudasi hā. Ma tō waptārā, ti'ai wa. Waptā'ā wamhā, ma tō nomohaipo'o. Nomosipo'o wamhā, uburē ĩsāna ma tiwi asa'wa. Āne ma tō Zudasi hā sina uwaimra, za idā'ázé wasu'u na rob'ui'ére zarina.

– Tawamhā ĩwasu'u hā 'ri baba, ma tō te te ropé, Zeruzarē āma. Taha wa, Asédama na ma tō ĩsipti'a hā da te 're sisi za'ra, dasimremezém na. Wamreme na āma ĩsaprízé hā, dawapru za'warizém na darom nhisi hā.

– Duré āne 'Re ĩhāimana u'āsi mono, te te ĩwaihu'u sirōmo zéb zarina ma tō rob'ui'ére siro, Dawi hā Zudasihī wasu'u na: “Romhuri hā, ĩtei ō di oto. Ni'wa te hā za oto, ĩsōwa're'remhā.” Āne ma tō āma rob'ui'ére siro, Dawi hā.

²¹⁻²² – Taha wa, wa norī hā wa za aibā hā wasiwi 'maipisutu ni, Zezusi apā ĩhāiwa'utuzém na wasiré te te dama 're rowasu'u mono da, Zudasihī nhowa're're. Zuwā Batita, ā dawabzuri hā te te dama 're ĩ'ab'manharī mono zém hawi, ti'ai āma 're morī ré, Wanhib'apito Zezusihi siré 're ĩwanomro mono norī zō, wa za wanhopré ni, duré hāiwa u morī ré, wasiré wa te ĩ'madā'ā za'ra norī zō. – Āne te dama rowasu'u, Pedru hā.

²³ Tawamhā aibā maparane ma tō ĩsisi na pisutu zahurē ni, Zuzé Zusitu na ĩsisi hā, duré ĩhāiba amo hā, Mati'asi na ĩsisi hā. Zuzé Zusitu hā, Basaba na ĩsisi amo hā.

²⁴⁻²⁵ Taha pari, te oto tiwi rowaptērē za'ra, 'Re ĩhāimana u'āsi mono wi, āne:

– Wanhib'apito, a hā aima dawaihu'u pese di. Taha wa, ma'āpé wei wama waihu'u za'ra na. E niha aibā hā te asima ĩwē, ĩpisutu da hā, wasiré Zezusihi zadawa wasu'u'wa da hā. Zezusihi ma, te te 're ĩromhuri mono zéb da hā Zudasi hā ma tō tirē. Taha wa, a hā tāma ĩpisutuzéb u, ma tō mo. E 'wa hā te za za ĩpisu, Zudasihī nhowa're're, wasiré ĩsada wasu'u'wa da hā. – Āne ma tō tiwi rowaptērē za'ra.

²⁶ Tawamhā 'Re ĩhāimana u'āsi mono hā te te ĩpisudu hā te te waihu'u za'ra da, ma tō marī hā sima me za'ra, te te siwi āma uwaimrami da. Tawamhā ma tō siwi āma uwaimra oto. Mati'asi hā ma tō oto siwi waihu'u za'ra, 'Re ĩhāimana u'āsi mono te te ĩpisutu na hā, Zudasihī

nhowa're'reb da hã. Tawamhã Mati'asi hã aibã 11 na Ìsawawa wasu'u'wa da hã, Zezusi te te Ìpisutu za'ra norĩ me, te za oto 're mo. Taha wa, 12 na Ìhãiba za'ra hã oto apã, Zezusihi zadawa wasu'u'wa norĩ hã.

2

'Re Ìhãimana u'ãsi mono hã Tipẽ'ezani we te te dama Ìsõmrizé wasu'u

¹⁻⁵Tawamhã zudezu norĩ hã ma tã 're sihutu Zeruzarẽ u, 'Re Ìhãimana u'ãsi mono zadawa 'madã'ã'wa norĩ hã, tisiré norĩ u. Daro mono bã ma tã 're dasihutu, Pẽtecoti na bãtã nhisi u, 're danho ahã za'ra mono wẽ te, 'Re Ìhãimana u'ãsi mono ãma 're dawata za'ra mono da.

Tawamhã Pẽtecoti na bãtã nhisi na Zezusihi zazei'wa norĩ hã ma tã sina ubumro. Siré si'ubumroi ré, awa'awi ma tã marĩ hã wapari za'ra, hãiwa hawimhã. Rowa'u'u wawẽ pupu'u ne hã 'ri 're wa'wa mono bã ma tã marĩ hã wapari za'ra, aihĩni. Unhama ro'o ne hã ma tã marĩ hã sina sãmri za'ra. Ìhãiba mono bã ma tã te te ropé, Ìtẽme, unhama ro'o ne hã. Tawamhã Ì'rãni mono bã, ma tã simasa. 'Re Ìhãimana u'ãsi mono pẽ'ezani hã ma tã Ìtẽme tiwisi za'ra, Ìsazei'wa norĩ u. Ìhãiba mono bã, ma tã Ìpẽ'ẽ 're sisisi, Ìpẽ'ezani hã. Taha na si ma tã oto damreme mono bã dama rowasu'u za'ra, timreme nai õ nherẽ, Ìpẽ'ezani te te tãma Ìwaihu'u za'ra zéb zarina.

⁶Tawamhã Zeruzarẽ u 're Ìdasi'rã'õtõ mono norĩ hã ropupu hã da te wapari za'ra wamhã, da'ahã na ma tã Ìtẽme dasito, Pedru norĩ u. Ìdasito mono hã, damreme mono bã da te wapari za'ra wamhã, ma tã ãma tatob'uzu za'ra ni, Ìmreme za'ra na hã.

⁷⁻⁸Tawamhã ãne te dasima rowasu'u za'ra ni:

— Pra. E niha, wa bété wamreme mono bã wapari za'ra ni, õ norĩ hã, Darireza na danhipti'a nho'õmo nhisi ãma 're hãimana za'ra mono nherẽ. E niha, ma tã bété õ norĩ hã wamreme hã waihu'u za'ra. — ãne te dasima rowasu'u za'ra ni.

⁹Taha pari, te duré dasima nharĩ za'ra ni, ãne:

— Wa norĩ hã darob amoi hawimhã wa we aihutu ni, Patiza na danhipti'a nho'õmo nhisi hawimhã, duré Mediza na danhipti'a nho'õmo nhisi hawimhã, duré Erã na danhipti'a nho'õmo nhisi hawimhã, duré Mesapotamiza na danhipti'a nho'õmo nhisi hawimhã, duré Zudeza na danhipti'a nho'õmo nhisi hawimhã, duré Capadosiza na danhipti'a nho'õmo nhisi hawimhã, duré Põtu na danhipti'a nho'õmo nhisi hawimhã, duré Azi'a na danhipti'a nho'õmo nhisi hawimhã,

¹⁰⁻¹¹ duré Prizi'a na danhipti'a nho'õmo nhisi hawimhã, duré Pãpiriza na danhipti'a nho'õmo nhisi hawimhã, duré Ezitu na romnhisi hawimhã, duré Ribiza na danhipti'a nho'õmo nhisi hawimhã, tame Sireni na 'ri nhisi 'rata daza'ru'i hawimhã. Nima norĩ hã Roma na 'ri nho'õmo nhisi hawimhã ma tã we aihutu. Duré nima norĩ hã Cereta na romnhisi hawi ma tã we aihutu. Duré nima norĩ hã Arabiza na danhipti'a nho'õmo nhisi hawi, ma tã we aihutu. Nima norĩ hã zudezu norĩ hã. Duré nima norĩ hã zudezu õ norĩ, 'Re Ìhãimana u'ãsi mono ãma 're Ìdawata za'ra mono norĩ hã. E niha bété, wa wapari za'ra ni, wamreme mono bã, aibã norĩ hã te te wama Ìrowasu'u za'ra na hã, 'Re Ìhãimana u'ãsi mono, tiwaihu'u pese na te te dama 're Ì'ab'manharĩ wẽ uptabi mono wasu'u na hã. — ãne te dasima nharĩ za'ra ni.

¹²Tawamhã damreme mono bã da te wapari za'ra wamhã, ma tã ãma tatob'uzu za'ra ni. Da te ãma rosa'rata waihu'u za'ra õ di. Taha wa, te ãne ãma tasisadanharĩ za'ra ni:

— E niha te te wama Ìrowasu'u za'ra zém na wa za wasina rosa'rata za'ra ni. Wa te waihu'u za'ra õ di, wa te Ìwaihu'u za'ra zéb da hã. — ãne te dasima nharĩ za'ra ni.

¹³Tawamhã ni'wam norĩ si ma tã Pedru norĩ ãma tiwa'ẽ za'ra. Taha wa, te ãne sima rowasu'u za'ra:

— Oro õ norĩ hã wamreme mono bã, te te waihu'u za'ra za, ma uwa 'rãni wa'u Ìsé na si'uihã idi'iti za'ra. — ãne te sima rowasu'u za'ra.

Pedru te te dama Ìrowasu'uzé wasu'u

¹⁴Tawamhã Pedru hã ma tã hãiwi za. Ìsiré Zezusihi zadawa wasu'u'wa norĩ hã ma tã duré Ìsiré hãiwi aimasa, 11 na Ìhãiba za'ra hã. Tawamhã mreme 'rãihã na te dama rowasu'u Pedru hã, da te wapari za'ra da. ãne te dama tinha:

— Wasiré zudezu norĩ, Ìwapari pese za'ra wa'aba za, duré uburé Zeruzarẽ ãma 're ai'ubumroi wa'aba mono norĩ zama, Ìnhimirowasu'u hã waihu'u za'ra wa'aba da.

¹⁵A norĩ wa'wa hã te Ìsiré Ìsimasam norĩ ãma Ìrosa'rata waseté za'ra wa'wa. Uwa 'rãni wa'u Ìsé na wasi'uihã idi'iti za'ra newa, te wa'ãma Ìrosa'rata waseté za'ra wa'wa. Mare di. ãnei õ di. Rob'rãni wa'u zé na wa'uihã idi'iti za'ra õ di. Zahadu bãdã we sõ're za'ra õ di. ãne ré, da te 're ãhuri mono õ di, rob'rãni wa'u Ìsé hã.

¹⁶Ãhãna Ìsawawa wasu'u 'rata 'wai mreme hã ma tã wama ãma uwaimra oto, 'Re Ìhãimana u'ãsi mono hã. Zuwéhé mreme hã ma tã wama ãma uwaimra, Ìsawawa wasu'u 'rata 'wai

mreme hã. Taha wa, te ãne wa'ãma asõpré wa'wa. Taha wa, te duré ãne ïwawapari za'ra wa'wa. Duréihã, 'Re ìhãimana u'ãsi mono mreme hã ma tô wahi'rata nori ma, te te 're awaihu'u, Zuwé hã. ãne 'Re ìhãimana u'ãsi mono mreme hã:

17 "Rob'rãsutu u ti'a si'utõri õ ré, wa za Ìpë'èzani hã te dama 're anhomri, daro mono bã. Tawamhã asihudu za'ra wa'wa hã, aibã nori hã pi'õ nori zama te za te te 're ìzadawa wasu'u za'ra. Ìhi nori ma, sõtõ 'rowi te te 're ìrosawêrê za'ra mono na wa za tãma 're ìsiwaihu'u za'ra, ìnhimiroti na. Duré, ìpréduptém nori ma zama 're sõtõ za'ra mono õ nherê, sõtõ 'rowim ne te te 're ìrosawêrê za'ra mono ne, wa za tãma 're ìsiwaihu'u za'ra, ìnhimiroti na.

18 Ìma romhuri wa nori ma, wa za te tãma 're anhomri, Ìpë'èzani hã aibã nori ma, pi'õ nori ma zama. Tawamhã te za te te dama 're ìzadawa wasu'u za'ra.

19 Hãiwa na wa za marí dama ìwaihu'u'õ hã 'manha, ãma ìdatob'uzu za'ra zéb da hã. Ti'ai ãma zama wa za duré marí hã dama ìwaihu'u'õ hã 'manha. Dawapru te za puru. Duré uzã te za ãro. Tawamhã ìsizé sa'etê na watobro wamhã, te za rob'utõ.

20 Bãdá te te rob'uiwê õ di za. Te za tirobra. A'amo zama te za titõmo wapru. ãne wa za 'manha, uburé Danhib'apito nhibãdá hã ìwa waptã'ã õ ré, ìpire uptabi hã.

21 Tawamhã te dapawaptob da, da te ìwi waptêrê za'ra wapsi, wa za tô sena da'anho'reptu." ãne Zuwé hã ma tô 'Re ìhãimana u'ãsi mono mreme hã wahi'rata nori ma, te te 're awaihu'u. — ãne ma tô Pedru hã Zuwéhê nhimirowasu'u na dama rob'rãzarõtõ.

22 Tawamhã Pedru hã ma tô duré ãma uzusi, tinhimirowasu'u na, ãne:
— Wasiré Izarazéhé nhihudu nori, ìwapari pese za'ra wa'aba za. Zezusi hã Nazaré ãma aré 're ìsãmra mono hã, ta hã, 'Re ìhãimana u'ãsi mono zadawa para, ma tô te te 're da'apawapto, danho'. Marí ìwê hã dama ìmanharí waihu'u'õ hã ma tô te te dama 're ab'manharí. Tô sena, õ hã 'Re ìhãimana u'ãsi mono zadawa para, te te dama 're ì'ab'manharí mono zém na da te 're waihu'u za'ra mono da, ma tô Timama waihu'u pese zarina marí ìwê hã te te dama 're ab'manharí. Ai'rata 're hãimana za'ra wa'aba mono wa, ma tô ãne na hã asiwi ìwaihu'u za'ra wa'wa.

23 'Re ìhãimana u'ãsi mono hã ma tô tiwaihu'u pese na waihu'u siro romhã ré, Zezusihi dã'ázé hã. Te te ìwaihu'u sirõmo zéb uwaibaba, duré te te sima ìwêzéb uwaibaba, ma tô aima pisutu za'ra wa'wa, Zezusi hã dama 'ru za'ra wa'aba da, 'Re ìhãimana u'ãsi mono nhimiroti waihu'u'õ'wa nori ma, ai'upana za'ra wa'aba, te te siwi wírí da. Taha wa, ma tô siwi sasõ, wedepo'o nnonhi'rãmi na. Taha na ma siwi tíwí.

24 Tane nherê, 'Re ìhãimana u'ãsi mono hã ma tô hãiwa'utu, ab're hawi watobro da, dã'ã uptabi nherê. Ma tô duré pawapto, dã'ã u'ãsi nomro tõ da. Ìdã'ázé tãma wapure wa, dã'ã u'ãsi nomro waihu'u õ di, Zezusi hã.

25 Taha wa, wahi'rada Dawi hã ma tô Zezusi wasu'u duréihã, ãne:
"Wanhib'apito, te za Ì'rata 're asãmra u'ãsi mo. Taha wa, ìpahi õ di za.

26 Taha wa, ìto sina, wa 're ìhãimana, ìpë'è remhã. Ìmreme toi u'ãsi na, wa 're ìmreme. Ìhãiba ré 're ìmorí u'ãsi dã'õ nherê, ìpahi ãna wa za asõ ìsina 're ìnhimipari u'ãsi.

27 Ìdã'ã nherê, ìrême õ di za, adã 're ìhãimana za'ra mono zéb ãma hã. Wa hã te aima 're romhuri wê u'ãsi mono wa, ìdã'ã wamhã, ìhãiba 'roi õ di za. Taha wa, wa hã ìdã'ázé hã te pipa õ di za.

28 'Re ìmorí wê u'ãsi da, ma tô ìma ìwaihu. Taha wa, ìto sina wa za 're mo, asõ'a 're ìmorí wa." ãne ma tô Dawi hã wahi'rata nori ma, Zezusi wasu'u siro. — ãne ma tô Pedru hã dama sadawa 'rãzarõtõ.

29 Taha pari, te duré dama tinha, ãne:

— Wasiré Izarazéhé nhihudu nori, ìwapari pese za'ra wa'aba za. Wahi'rada Dawi hã wa za aima wasu'u za'ra wa'wa oto sõ'awi. Tô sena, ma tô dãrã, Dawi hã. Dã'ã wamhã, etê zahãpã wa, ab're 're, ma tô dasiwi sêrê ni. Da te isêrêzé hã wama waihu'u pese za'ra di, ãhãna hã.

30 Ta hã, 'Re ìhãimana u'ãsi mono zadawa wasu'u 'rata 'wa, te 're hãimana. Tawamhã 'Re ìhãimana u'ãsi mono, ma tô tãma ropisutu, ìsihudu hã ìsine dama si'apito da, zahadu wapsi, ìuirí na te te dama 're aroti mono da.

31-32 Taha wa, 'Re ìhãimana u'ãsi mono te te tãma ìwaihu'uzéb zarina, ma tô wasu'u siro Dawi hã, Danho'reptui'wa da, te te ìpisudu hã apã za ìhãiwa'utuzém na hã, ãne:

"Dã'ã nherê, 'Re ìhãimana u'ãsi mono te te rême õ di za. Ìhãiba hã 'roi õ di za."

ãne ma tô Dawi hã wahi'rata nori ma rowasu'u za'ra, apã za ìhãiwa'utuzém na hã. 'Re ìhãimana u'ãsi mono hã ma tô Zezusi hã hãiwa'utu. Apã te te hãiwa'utu wamhã, wa nori hã wa tô sabu za'ra ni. Taha wa, wa wa te dama 're wasu'u za'ra, ìhãiwa'utuzém na hã.

33 'Re ìhãimana u'ãsi mono hã ma tô sitême ti'ã apã, ìsimire niwí oto 're sãmra u'ãsi mono da. Tawamhã Tipë'èzani hã ma tô tí'ra ma tisõ, te te tãma ãma ìropisutu siro hã, te te sima 're

Īda'awē mono zéb uwaibaba, te te dama 're anhomri mono da. Āhāna, Zezusi hā ma tō wama sōmri za'ra, Tipē'ēzani hā. Taha wa, ma tō āne wa'āma asōpré wa'wa. Ma tō duré āne Īwawapari za'ra wa'wa, aimreme mono bâ wa'aba.

³⁴Dawi hā dā'ā wamhā, hāiba wahuré morī ō di, hāiwa u hā. Cristuhu si ma tō hāiba wahuré mo, hāiwa u apā. Taha wa, āne ma tō duré wahi'rata norī ma Cristu wasu'u wē, Dawi hā:

“Re Īhāimana u'āsi mono te roti, Īnhib'apito ma: ‘We aimorī, Ī'rata 're asāmra mono da, Īnhimire niwī.

³⁵Zahadu, wa za aipwapto. Siwi aiwē'ō'wa norī ma, asiptete di za. Taha wa, a hā tō sena Danhib'apito uptabi na te te siwi aiwaihu'u wa, te za aima 're 'rā po za'ra. Asisiti te za duré 're Ī'azatōrī mo.’”

Āne ma tō Dawi hā wahi'rata norī ma waihu'u, 'Re Īhāimana u'āsi mono mreme hā.

³⁶Taha wa, wa hā wa aima rowasu'u za'ra wa'wa, waihu'u pese za'ra wa'aba da, duré uburé wasiré Izarazéhé nhihudu norī te te waihu'u pese za'ra da. Zezusi hā da te dasiwi sasōmri da, dama Ī'ru za'ra wa'wa hā, ta hā 'Re Īhāimana u'āsi mono te te ĩpisudu, uburé Danhib'apito da hā, duré Danho'reptu'wa da hā. Ma'āpé āhā wasu'u hā tō sena na waihu'u pese za'ra wa'aba. — Āne ma tō dama rowasu'u, Pedru hā.

³⁷Tawamhā Pedruhu mreme, da te wapari za'ra wamhā, ma tō tapē'ēwara za'ra ni. Taha wa, te āne tāma nharī za'ra ni, Pedru norī ma, Zezusihi zadawa wasu'u'wa norī ma hā:

— Wasiré Izarazéhé nhihudu norī, e niha za, tawamhā. E marī, wa za 'manharī za'ra ni. — Āne te tāma nharī za'ra ni asa.

³⁸Tawamhā Pedru te duré asa dama tinha:

— Aiwasété wi, te za aipizari za'ra wa'wa, rēme pese za'ra wa'aba da, Zezusihi nhimiroti na si oto 're anomro aba mono da. Zezu Cristuhu zazei uptabi 'wa na asiwasu'u za'ra wa'aba sina, te za ā dawabzuri hā Ī'manharī za'ra wa'wa. Aihāiba mono bâ te za āne Ī'manharī za'ra wa'wa, aiwasédé hā te te aima pari za'ra wa'aba da, 'Re Īhāimana u'āsi mono hā. Tawamhā Tipē'ēzani hā te za aima sōmri za'ra wa'wa.

³⁹Āne ma tō aima ropisutu sirōmo za'ra wa'wa, te te aima 're sōmri za'ra wa'aba mono da, asihudu norī ma zama. Wasiré'ō norī ma zama ma tō tāma ropisutu sirōmo za'ra. Wanhib'apito, 'Re Īhāimana u'āsi mono, za sitēme sō 're Īhârâ za'ra mono norī ma, ma tō ropisutu sirōmo za'ra, Tipē'ēzani na hā.

⁴⁰— Taha wa, wasiré Izarazéhé nhihudu norī 're Īhāimana wasété za'ra mono zém na 're aihāimana za'ra wa'aba mono ō di za. Āhāna tiwi aipizari za'ra wa'aba, 're Īdanomro wē mono zém niwī oto 're anomro aba mono da, asisō'reptu za'ra wa'aba da, 'Re Īhāimana u'āsi mono hā te te dasiré aiwē'ō' pese za'ra wa'aba tō da. — Āne ma tō dama rowasu'u pese, Pedru hā. Simiroti za'ētē uptabi di.

⁴¹Tawamhā da'ahā na ma tō Zezusi hā saze za'ra ni, Pedru te te dama Īsadawa wasu'uzém na hā. Taha wa, ma oto ā dawabzuri hā 'manharī za'ra ni, 3 miu na dahāiba hā. Tawamhā Zezusihi zazei na'rata 'wa norī me, ma tō oto sitēme atob za'ra. Tawamhā ahā uptabi di oto, Īsazei'wa norī hā.

Īsaze na'rata 'wa norī 're Īhāimana za'ra mono zé wasu'u

⁴²Tawamhā Zezusihi zazei'wa norī hā Īsadawa wasu'u'wa norī nhimirowahudu hā te te 're wapari pese za'ra. Te te rēme za'ra ō di. Ma tō 're sisawi pese za'ra. Ma tō 're si'rā'ōtō, tisa da, duré 'Re Īhāimana u'āsi mono ma, 're mreme zusi mono da.

⁴³Zezusihi zadawa wasu'u'wa norī hā marī Īwē hā ahā na ma tō te te dama 're 'manharī za'ra, dama Ī'manharī waihu'u'ō hā. Taha wa, ma tō āma 're datob'uzu za'ra.

⁴⁴Tawamhā Īsazei'wa norī hā te oto siré 're hāimana za'ra, aihīni. Tinhibrom na tite da si, te te āma 're rosa'rata za'ra mono ō di oto.

⁴⁵Ni'wam norī hā ma tō tinhipti'a hā te te dama 're wede za'ra, duré tinhibrob zama, Īwa'ābâ zō. Tawamhā Īwa'ā hā ma tō te te sima 're po'ō za'ra, marī zō tiwi 're Īro'wanhi'riti za'ra mono zéb zarina.

⁴⁶Awē sidâpâsi ma tō duré 're si'rā'ōtō, 'Re Īhāimana u'āsi mono āma 're Īdawata za'ra mono zé 'ri 'wawi wa'ra 're, 're mreme zusi mono da, tāma. Tinhorōwa mono bâ, ma tō duré 're si'rā'ōtō, Ī'u'ētē wapu na siré 're saihuri mono da. Sima 're sōprub za'ra mono wa, ma tō to sina tisa na siré 're saihuri.

⁴⁷'Re Īhāimana u'āsi mono āma te duré siré āma 're wata za'ra, uburé Īsōprubzém na hā. Tawamhā aihīni, ma tō Īsazei'wa norī hā wēsāmri za'ra ni. Tawamhā awē sidâpâsi, ma tō Īsazeté'wa sidâpâ dasina tahā'ā ni, 'Re Īhāimana u'āsi mono hā rowasété hawi te te 're Ī'anho'reptui mono norī hā.

3

Pedru hã ìhi'ré te te ìpesezé wasu'u

¹ Tawamhã nimahã bâtà na ma tò Pedru norĩ hã dame tineb zahuré, Zuwãhã me, 'Re ìhãimana u'âsi mono âma 're ìdawata za'ra mono zéb u hã. Bâdã sipi'rai wi, te dame tineb zahuré, 'Re ìhãimana u'âsi mono âma 're ìdawata za'ra mono zé bâtà na.

² Tame te aibã hã nhamra, ìpotozém hawi ìmorĩ'õ hã. Ì'madã'â ze na 'ridawa nhisi u te ta hã nasi dasiwi mrami ni, rob'uiprazém na te te 're da'awari mono da, 're danhisisi mono sidãpãsi.

³ Tawamhã Pedru norĩ hã 'ri 'wawi wa'ra u zasi zahuré õ ré, ìhi'ré hã ma tò sãmri zahuré. Te te sãmri zahuré wamhã, te nasi 'mahãrà zahuré, marĩ te te tãma sãmri zahuré da.

⁴ Tawamhã Pedru norĩ hã ma tò 'madã'â pese zahuré, Zuwãhã me. Tawamhã Pedru te tãma tinha:

— Wei wa'madã'â. — Æne te tãma tinha.

⁵ Tawamhã ma tò 'madã'â zahuré, marĩ te te tãma sãmri zahuré da newa.

⁶ Tawamhã Pedru te duré tãma tinha:

— Wa hã ìnhimarĩ õ di. Rob'uiprazé hã robaba di, ìte hã. Tane nheré, 'Re ìhãimana u'âsi mono te te ìma ìsòmri na wa za aipawapto. Zezu Cristu, Nazaré âma aré 're ìsãmra mono zadawa para, wa za aima tinha: Aiwahutu, aipara na 're aimorĩ da oto. — Æne te tãma tinha, Pedru hã.

⁷ Taha pari, Pedru hã ma tò pa'ã ìsimire niwĩ, ìhi'ré hã te te wahutu da. Te te wahutu wamhã, awa'awi ma tò parahaptete, ìpara'õtò zama.

⁸ Tawamhã ma tò darõno. Hãwi te oto za. Tame ma timorĩ na sãna'rata oto. Tawamhã Pedru norĩ me, ma tò siré asisi, 'Re ìhãimana u'âsi mono âma 're ìdawata za'ra mono zé 'ri 'wawi wa'ra u. Tawamhã morĩ sina te sarõtõ, rowé te. 'Re ìhãimana u'âsi mono âma te duré tiwata.

⁹ Tawamhã aihĩni ma tò 'madã'â za'ra ni, aibã hã sarõtõ mono ré hã, duré 'Re ìhãimana u'âsi mono âma wata ré hã.

¹⁰ Morĩ wé wa, ma tò duré âma tatob'uzu za'ra ni. Tawamhã ãne te dasima nharĩ za'ra ni:

— Oro õ hã ìhi'ré hã sãmra sina, rob'uiprazém na te te nasi da'awari za, morĩ wé di oto. Ì'madã'â ze na 'ridawa nhisi âma 're ìsãmra mono aré. — Æne te dasima nharĩ za'ra ni, morĩ wé wa oto.

'Re ìhãimana u'âsi mono nhorõwa âma, Pedru te te dama ìrowasu'uzé wasu'u

¹¹ Tawamhã aibã hã ma tò Pedru norĩ hã te te 're patété zahuré, Zuwãhã me, Saromahã nhisi na 'ri zahãpã nhisi âma. Te te 're patété zahuré mono ré, da te 'madã'â za'ra wa, ma tò aihĩni ìtème dasisa're. Tawamhã ma tò âma tatob'uzu za'ra ni.

¹² Tawamhã Pedru te te da'madã'â wamhã, te dama tinha, ãne:

— Wasiré Izarazéhé nhihudu norĩ, e marĩ wa, ma wa'ãma atob'uzu za'ra wa'wa. Wasi'uihã na ìhi'ré hã wa te morĩ wé newa, te wei wa'ãma asõpré wa'wa. Wasi'uihã na wa te pese õ di, wa norĩ hã. 'Re wane wé wa, wa te pese newa, te wei ìwa'madã'â za'ra wa'wa. Mare di. Æne wab õ di.

¹³ 'Re ìhãimana u'âsi mono, wahi'rata norĩ nhib'apito, Abra'ãhã nhib'apito, duré Izatihi nhib'apito, duré Zacoho nhib'apito. Ta hã ma tò Zezusi hã wësã, tãma ìromhuri wé 'wa hã. Tane nheré, Zezusi hã ma tò asiwi ìwé'õ za'ra wa'wa. Ma tò asiwi ìsòmri 'wa, Piratuhu ma. Taha nho'a, ma tò asiwi ìwé'õ za'ra wa'wa, te te sima wé nheré Piratu hã, morĩ da apã, dazazém hawi.

¹⁴ Zezusi hã 're morĩ wé uptabi nheré, ma tò asiwi ìwé'õ za'ra wa'wa. Rob'manharĩ waseté'wa si ma tò asima ìwé za'ra wa'wa, dazazém hawi da te dasiwi wazere da, Zezusihi upana.

¹⁵ Dahãimana wé zéb da, dapë'ëwë hã za te te dama 're ì'anhomri mono 'wa hã, aima za'ra wa'aba, da te dasiwi wĩri da, ma tò dama ì'ru za'ra wa'wa. Tazahã 'Re ìhãimana u'âsi mono, ma tò apã hãiwa'utu, dá'ã uptabi nheré. Wa norĩ hã Zezusi apã hãiwa'utu wa, wa te ìsabu za'ra hã wa tò wa te dama 're wasu'u za'ra.

¹⁶ Zezusi hã tiwaihu'u pese na ma tò ìhi'ré hã pese, ìmreme te te sazei wa. Taha wa, ma tò aptete oto. Ma tò ì'madã'â za'ra wa'wa. Ma tò ìwaihu'u za'ra wa'wa oto. Tò sena te te sazei wa, morĩ wé di oto wanho'a.

¹⁷ — Wasiré Izarazéhé nhihudu norĩ, ìwaparĩ pese za'ra wa'aba za. Wa hã wa tò aiwaihu'u za'ra wa'wa. Asiwĩ waihu'u aba ãna, ma tò dama ì'ru za'ra wa'wa, Zezusi hã. Aima ìpire za'ra wa'aba norĩ zama te te siwi waihu'u ãna, ma tò ta norĩ zama dama 'ru za'ra, Zezusi hã da te dasiwi wĩri da.

¹⁸ Taha zarina, ma tō 'Re ihāimana u'āsi mono hā timreme hā āma uwaimra, duréihā ĩsadawa wasu'u 'rata 'wa norī hā wahi'rata norī ma, te te āma 're ī'awaihu'u sirōmo mono zéb zarina, Cristu hā za te te ĩrobzépatazém na hā, Danho'reptui'wa da, te te ĩpisudu hā.

¹⁹⁻²⁰ Taha wa, te za aiwasédé hā 're ĩrēme za'ra wa'aba mo, 'Re ihāimana u'āsi mono u 're aipizari za'ra wa'aba mono da, aiwasédé hā te te aima 're pari za'ra wa'aba mono da. Tawamhā 'Re ihāimana u'āsi mono, te za te 're aipawaptob za'ra wa'wa, aipē'ē 're, asiptete u'āsi āma 're anomro aba mono da. Zezusi hā te za we apā satō, Danho'reptui'wa da, 'Re ihāimana u'āsi mono hā te te aima ĩpisutu za'ra wa'wa hā.

²¹ Tane nherē, te za hāiwa āma 're hāimana a'ā, 'Re ihāimana u'āsi mono hā te te a'ā ropese da, duréihā ĩsadawa wasu'u 'rata 'wa norī, wahi'rata norī ma, te te 're ī'awaihu'u mono zéb zarina.

²² Duréihā, Mozési ma tō wahi'rata norī ma rowasu'u siro, āne: "Uburé Danhib'apito uptabi, 'Re ihāimana u'āsi mono hā ma tō ĩpisutu, tizadawa wasu'u'wa da, Asib'apito za'ra wa'wa hā. Āne ni'wa hā asiré wa'wa hā te za ĩza'u si aima pisutu za'ra wa'wa, 'Re ihāimana u'āsi mono hā, ĩsine te te aima 're sadawa wasu'u za'ra wa'aba mono da. Tawamhā te za ĩsimirowasu'u na 're ĩwaparī pese za'ra wa'aba mo.

²³ Ni'wa hā ĩmreme te te waparī ō wamhā, te za dasiwi wē'ō ni. 'Re ihāimana u'āsi mono nhīb'a'uwē nhiti, te za satōrī ni. 'Re ihāimana u'āsi mono zama te za siwi wē'ō pese." Āne ma tō rowasu'u, Mozési hā.

²⁴ Duréihā uburé 'Re ihāimana u'āsi mono zadawa wasu'u 'rata 'wa norī hā ma tō āne na te te tāma 're ī'apisutu mono zéb uwaibaba, te te dama āma 're rowasu'u za'ra. Samuwé hā uimrehēne ma tō ĩsadawa wasu'u na āma sāna'rata, wahi'rata norī ma. Taha za'u si ma tō duré ĩsadawa wasu'u'wa sidāpāsi te te dama āma 're rowasu'u sirōmo za'ra. Uburé ma tō duré ā nimosi ĩromhāimanazém na zama, te te dama 're rowasu'u sirōmo za'ra.

²⁵ A norī wa'wa hā, wasiré wahi'rata norī nhihudu te 're aihāimana za'ra wa'aba mo. Taha wa, wahi'rata norī ma, 'Re ihāimana u'āsi mono te te 're ī'apisutu mono zé hā te duré wama 're hāimana za'ra. Abra'āhā ma, uimrehēne ma tō tāma ropisutu 'rata. Āne ma tō tāma ropisutu: "Romhutu'ōpsi te za ni'wa hā asihudu hā te te 're da'apawapto, daro mono bā rowē na 're danomro mono da." Āne ma tō taha ma ropisutu na'rata.

²⁶ — Taha wa, ma tō 'Re ihāimana u'āsi mono hā tindhimiropisudu hā āma uwaimra. Ti'ra hā ma tō we atēme uimrehēne satōrī za'ra wa'wa, te te 're aipawaptob za'ra wa'aba mono da. Te te tāma 're ĩromhuri mono da hā te te pisutu wamhā, ma tō we atēme satōrī za'ra wa'wa, 're anomro wasété aba mono zé hā 're rēme za'ra wa'aba mono da, rowē na āma 're anomro aba mono da. — Āne ma tō Pedru hā dama rowasu'u.

4

Pedru norī hā Zuwāhā me dama roti'wa norī nho're ĩsima'warazé wasu'u

¹ Tawamhā Pedru norī hā Zuwāhā me, zahadu te te dama rowasu'u zahuré ré, ma tō sasedoti norī hā aihutu, 'Re ihāimana u'āsi mono āma 're ĩdawata za'ra mono zéb 'madā'ā'wa norī nhīb'apito me, sadusezu norī zama. Sadusezu norī hā apā dahāiwa'utuzé wasu'u wē'ō'wa norī.

² Ta norī hā ma tō sada ab'ru za'ra, Pedru norī zada, apā 're ĩdahāiwa'utu za'ra mono zém na te te dama rowasu'u zahuré wa. Āne ma tō dama rowasu'u zahuré: "Dadā'ā nherē, te za apā te te 're da'ahāiwa'utu, 'Re ihāimana u'āsi mono hā, Zezusi te te ĩhāiwa'utu ne." Āne na te te dama rowasu'u zahuré 'ru te, ma tō sada tizahi za'ra.

³ Tawamhā ma tō dasiwi mrami zahuré ni. Hāiwahā pesere wa, ma a'ā siwi tiza, dazazéb 're, awēpsi te te siwi sani zahuré da, ĩwasété na te te dama rowasu'u zahuré ré ne, te te tāma nharī za'ra da.

⁴ Tane nherē, da'ahā na ma tō saze za'ra ni, Zezusihi wasu'uwē hā da te ĩwaparī za'ra norī hā. ĩsazei'wa norī hā ahā uptabi di oto. Aibā norī za'rata si hā 5 miu na ĩhāiba za'ra hā.

⁵ Tawamhā ma tō da'āma ti'awē za'ra. Da'āma awē za'ra wamhā, ma tō si'rā'ōtō, Zeruzarē āma sasedoti ĩpire norī hā. Zudezu norī ma, roti'wa norī hā ma tō ĩme si'rā'ōtō. 'Re ihāimana u'āsi mono nhimiroti 'rata na rob'ui'ére na dama rowahutu'wa norī me zama.

⁶ Anasi norī hā ma tō duré datēme aimasisi zahuré, Caipasihē me. 'Re ihāimana u'āsi mono ma, da'āma romhuri'wa ĩpire uptabi Anasi hā, sasedoti ĩpire uptabi. Duré ni'wam norī hā ma tō dame aimasisi zahuré, Zuwā hā Aresādirihē me. Anasihī sisānawā zahuré, ta norī hā. Duré Anasihī sisānawā hāiba amo norī hā ma tō ĩsiré ubumro, Zeruzarē āma dama ĩpire za'ra norī hā.

⁷ Tawamhā dama ĩpire norī hā ma tō dama 'ru zahuré, Pedru norī hā da te sani zahuré da, Zezusihi zadawa wasu'u'wa norī hā, ĩsō'reb za'ra da te dasiwi simizusi zahuré da.

Tawamhā ma tō sadanharī zahuré ni, āne:

— E niha ma tô bété âne î'manharî 'wa. E 'wa sadawa para, ma bété a norî wa'wa hâ îhi'rê hâ îpese 'wa. — Âne te sadanharî zahuré ni.

⁸⁻⁹Tawamhâ 'Re îhâimana u'âsi mono pê'êzani na ma tô Pedru hâ aptete, dama pahi tô da, te te dama rowasu'u wê da. Taha wa, te âne tâma rowasu'u za'ra, dama îpire norî ma hâ:

— Dama îpire norî, âne te îwazadhanarî za'ra wa'wa: “E niha, ma tô bété âne hâ î'manharî 'wa. E 'wa sadawa para, ma tô bété a norî wa'wa hâ îhi'rê hâ îpese 'wa.” Âne ma tô îwazadhanarî za'ra wa'wa. Taha wa, wa za aima rowasu'u za'ra wa'wa.

¹⁰Tawamhâ a norî wa'wa hâ te za îwaihu'u pese za'ra wa'wa, aihâiba mono bâ wa'aba. Uburé wasiré Izarazéhé nhihudu norî zama te za duré waihu'u pese za'ra. Zezu Cristuhu zadawa para, wa tô pese ni, îhi'rê hâ. Zezusi hâ Nazaré âma aré 're isâmra mono hâ asiwi wîrî aba da, ma tô dama î'ru za'ra wa'wa. Tawamhâ ma tô dasiwi sasômri ni, wedepo'o nhonhi'râmi na. Ma tô dârâ. Dâ'â nherê, 'Re îhâimana u'âsi mono, ma tô apâ hâiwa'utu. Taha zadawa para, te aibâ îhi'rê hâ âme za, rowê na. Ma tô tipese oto.

¹¹Durêihâ ma tô Zezusihi wasu'u na wahi'rata norî ma rob'ui'éré siro, 'Re îhâimana u'âsi mono zadawa wasu'u wa hâ. Êtê na ma tô âma simir'é, âne:

“Êne hâ wê nherê, ma tô 'ri'wa norî hâ siwi wê'ô za'ra, taré nomro da. Tane nherê, te te siwi wê'ô nherê, taré nomro ô di, êne hâ. Ni'wa hâ ma tô ti'â, 'ri uparizéb da hâ, wê uptabi wa.”

Âne ma tô Zezusihi wasu'u na wahi'rata norî ma rob'ui'éré siro, îbaihâ na hâ.

— A norî wa'wa hâ êtê wê'ô'wa norî ne hâ. Duré Zezusi hâ êtê ne hâ.

¹²Tane nherê, Zezusihi si Danho'reptui'wa hâ. Ni'wa hâ, aimawi hâ 'Re îhâimana u'âsi mono te te dama pisutu ô di, ti'ai âma te te 're îda'anho'reptui mono da hâ. Taha wa, Zezusihi si uburé Danho'reptui'wa hâ. — Âne te dama îpire za'ra norî ma rowasu'u, Pedru hâ.

¹³Pedru norî hâ mreme pahi zahuré ô di. Te te datômo pipa zahuré ô di. Taha wa, zudezu norî ma roti'wa norî hâ ma tô âma titob'uzu za'ra. Rowahutu'wa da, te te dame 're romnhoré zahuré mono ô nherê, mreme pahi zahuré ô di. Tawamhâ ma tô âma tipo're pu'u za'ra oto, Zezusihi siré 're îneb zahuré na, ti'ai âma 're morî ré hâ.

¹⁴Aibâ îhi'rê hâ, Pedru norî te te îpese zahuré hâ te îsiré tizab zahuré, danho're. Taha wa, dama îpire za'ra norî hâ asa te te tâma nharî waihu'u za'ra ô di oto.

¹⁵Tawamhâ ma tô tâma rob'ru za'ra, dasi'râ'ôtözém hawi pusi da. Pusi za'u si, ma tô âma sisadawa pibu za'ra, dama roti'wa norî hâ.

¹⁶Âne te sisadhanarî za'ra:

— E marî, wa za 'manharî za'ra ni, aibâ norî ma hâ. Tô sena, marî hâ dama î'manharî waihu'u'ô hâ ma tô 'manharî zahuré, danho'a. Îhi'rê hâ ma tô pese zahuré. Aihîni Zeruzarê âma 're îdahâimana za'ra mono hâ ma tô wapari za'ra ni, îhi'rê wasu'u hâ. Taha wa, wa norî hâ îwasu'u, wa te dawî 're udâ waihu'u za'ra mono ô di za.

¹⁷Tane nherê, îwasu'u hâ daza'rui mono bâ te te ropé tô da, wa za tâma amhâzépa za'ra ni, te te dama 're rowasu'u zahuré mono tô da oto, Zezusi 're îmorizém na hâ. — Âne ma tô âma sisaze za'ra, dama îpire za'ra norî hâ.

¹⁸Tawamhâ ma tô sô tihârâ za'ra, apâ îtêmeb za'ra neb zahuré da. Îtêmeb za'ra zasi zahuré wamhâ, ma tô sadawa uwati zahuré ni, Zezusihi hâimanazém na te te dama 're rowasu'u zahuré mono tô da, duré îsadawa para te te dama 're rowahutu zahuré mono tô da.

¹⁹⁻²⁰Tawamhâ Pedru norî hâ te asa tâma nharî za'ra, Zuwâhâ me:

— E ma hâ bété, 'Re îhâimana u'âsi mono ma, îwê. E îmreme, wa za wapari ni. E aimreme za'ra wa'wa, wa za wapari ni bété. 'Re îhâimana u'âsi mono mreme si, wa za wapari ni. Ma'âpê, asima âma rosa'rata za'ra wa'aba, waihu'u za'ra wa'aba da. Wa norî hâ wa za wa te dama 're rowasu'u u'âsi za'ra, uburé wa te 're î'madâ'â za'ra mono zém na hâ, wa te 're îwapari za'ra mono zém na zama. Wa te dawî 're udâ waihu'u za'ra mono ô di za. — Âne te asa tâma nharî za'ra, Pedru hâ.

²¹⁻²²Aibâ îhi'rê hâ pese ô ré hâ, 40 na ma tô âma tiwahu. Taha wa, aihîni 'Re îhâimana u'âsi mono âma te tawata za'ra ni, aibâ îhi'rê hâ morî wê wa oto. Taha wa, da te dasiwi ahâri da, te te dama 'ru waihu'u za'ra ô di, zudezu norî ma roti'wa norî hâ. Taha wa, te taré duré tâma amhâzépa zahuré ni, Pedru norî ma, Zuwâhâ me, te te dama rowasu'u zahuré tô da oto, Zezusihi wasu'u na. Taha parimhâ, ma tô tâma rob'ru zahuré ni, neb zahuré da oto.

Zezusihi zazei'wa norî hâ îmreme zusi zé wasu'u

²³Tawamhâ Pedru norî hâ zudezu norî ma, îpire za'ra norî hawi pusi wamhâ, ma tô tineb zahuré, tisiré îsazei'wa norî u, Zuwâhâ me. Tawamhâ ma tô tâma rowasu'u za'ra, 'Re îhâimana u'âsi mono ma, da'âma romhuri'wa îpire norî mreme na, dama îpire za'ra norî mreme na zama.

²⁴ Āne hā da te wapari za'ra wamhā, aihīni ma tō dasiré āma tawata za'ra ni, 'Re ihāimana u'āsi mono āma. Te oto tiwi rowaptērē za'ra ni, āne:

— 'Re ihāimana u'āsi mono, a hā Wanhib'apito uptabi. A hā Ropoto na'rata 'wa. Uburé, ma tō marī hā ī'apoto mo, hāiwa hā, duré ti'a hā, duré āporé hā. Uburé īwa 're idanomro mono da hā ma tō duré īpo.

²⁵ A hā ma tō Aipē'ēzani hā Dawihi ma īsō, wahi'rata ma, aima romhuri'wai ma, aimreme hā wahi'rata norī ma, te te 're wasu'u mono da. Āne ma tō tāma rowasu'u za'ra Dawi hā, wahi'rata norī ma:

“E marī wa, zudezu'ō norī hā ma tō sada tizahi pese za'ra, daro mono bā. E marī wa, īsimirosa'rata za'ra hā tō senai ō di.

²⁶ Roti'wa norī hā te sada aimasa. Īsadowa para da'uwati'wa norī me, ma sada atob za'ra, Wanhib'apito 'Re ihāimana u'āsi mono zada, duré Danho'reptui'wa da, te te īpisutu zada.”

Āne te tāma rowasu'u za'ra, Dawi hā.

²⁷ — Āhāna, tō sena Zeruzarē āma ma tō tasi'rā'ōtō ni, aima romhuri wē 'wa zada, Zezusihi zada, Danho'reptui'wa da īpisutu zada. Erodī norī hā ma tō sitēme ubumro, Pōsi'u Piratuhu me. Ta norī hā zudezu'ō norī me duré Izarazéhé nhihudu norī me, ma tō sada si'rā'ōtō, te te siwi wīrī da.

²⁸ A hā romhā ré, āma Īropisutuzéb zarina ma tō si'uīhā na āma siwi uwaimra tō, te te waihu'u za'ra ō nherē, Erodī norī hā.

²⁹ Āhāna dama ĩpire za'ra norī hā te duré wama amhāzēpa za'ra. Wa norī hā aima romhuri'wa norī. Wei wapawaptob za'ra na, ai'umnhasi sina aimreme hā wa te dama 're wasu'u za'ra mono da, wapahi āna.

³⁰ Zezusihi zadawa para, wa te 're dapese za'ra mono da, wei wapawaptob za'ra na. Zezusi hā aima romhuri wē 'wa, taha zadawa para, marī īwē hā dama ī'manharī waihu'u'ō hā wa te dama 're 'manharī za'ra mono da, wei wapawaptob za'ra na. — Āne ma tō tāma mreme zu, īsazei'wa norī hā.

³¹ Tawamhā 'Re ihāimana u'āsi mono ma, mreme zusi pari, 'ri ma tō ĩré sāsā'ā za'ra. Tawamhā 'Re ihāimana u'āsi mono pē'ēzani na ma tō aptete za'ra, ĩpē'ē mono bā. Pahi āna, ma tō dama sadawa wasu'u za'ra oto, 'Re ihāimana u'āsi mono hā.

Īsazei'wa norī hā, sōprum na 're ihāimana za'ra mono zé wasu'u

³² Tawamhā īsazei'wa norī hā uburé, ma tō sisaze za'ra, tinhimirosa'rata za'ra na hā. Ni'wam norī hā tinhibro te te sima 're sawi za'ra mono ō di, tite da si. Uburé, ma tō īsibrob'ō norī udāna te te 're po'o za'ra.

³³ Mreme prédup sina, ma tō Zezusihi zadawa wasu'u'wa norī hā te te dama 're rowasu'u za'ra, Wanhib'apito Zezusi apā ĩhāiwa'utuzé wasu'u na. Duré 'Re ihāimana u'āsi mono hā ma tō Zezusihi zazei'wa norī ma 're sōprub za'ra, īwē na si.

³⁴⁻³⁵ Tawamhā 'ri tede'wa norī hā duré ti'a tede'wa norī hā ma tō tinhorōwa hā duré tinhipti'a hā te te dama 're wede za'ra, īwa'ābā zō. Tawamhā īwa'ā hā ma tō te te 're sōmri za'ra, Zezusihi zadawa wasu'u'wa norī ma. Tawamhā, īsazei'wai mono bā marī zō tiwi 're ĩro'wanhi'riti za'ra mono zéb zarina, ma tō te te tāma 're po'o za'ra, Zezusihi zadawa wasu'u'wa norī hā. Taha wa, ni'wa hā simarī āna 're hāimana mono ō di oto.

³⁶⁻³⁷ Tawamhā aibā hā Zuzé na ĩsisi hā ma tō tinhipti'a hā dama wede, īwa'ābā zō. Roti wē 'wa, ta hā. Taha wa, Banabé na ma tō siwi sisi, Zezusihi zadawa wasu'u'wa norī hā. (Banabéhé nhisi hā dama rowē zani'wa, te wasu'u, ĩsisi hā.) Réwihī nhihudu, ta hā. Sipri na rob'ré za'iti nhisi āma ĩpotozé hā. Tinhipti'a hā te te dama wede wamhā, īwa'ā, ma tō uburé ti'ā, Zezusihi zadawa wasu'u'wa norī u.

5

Ananizaha wasu'u, Sapiraha me

¹ Aibā hā Ananiza na ĩsisi hā tinhipti'a hā ma tō īwa'ābā zō dama wede zahuré timro me, Sapiraha me.

² Tawamhā ti'ai wa'ā hā ma tō sima po'o zahuré, pi'uriwi. Ī'rāsutu si ma tō Ananiza hā ti'ā uburé newa, Zezusihi zadawa wasu'u'wa norī u, wahuré newa.

³ Tawamhā Pedru te tāma tinha:

— Ananiza, e marī da, ma tō Satanasihī nhimiwada'uri zarina ī'manha. Taha wa, ma tō 'Re ihāimana u'āsi mono pē'ēzani ma, asadawa nhipe. Asipti'ai wa'ā hā pi'uriwi ma tō asima ĩpo'o 'wa.

⁴ Asipti'a, da te aiwi uipra ō ré hā, ate hā. Duré, da te aiwi uipra wamhā, īwa'ābā zama ate hā. E marī da, ma tō bété wama asadawa nhipe. E wama si ma tō asadawa nhipe. Mare di. 'Re ihāimana u'āsi mono ma zama ma tō asadawa nhipe. — Āne te tāma tinha, Pedru hā.

⁵⁻⁶ Tawamhã Pedruhu mreime te te wapari wi, ma tô waptârã ti'ai wa, Ananiza hã. Waptã'ã wamhã, ma tô dêrã. Tawamhã ãpréduptém norĩ hã ma tô sô tiwahutu za'ra. Ma tô siwi ubu. Taha pari, ma tô siwi ti'ã, te te siwi sêrê da. Tawamhã taha wasu'u hã da te wapari za'ra wamhã, aihĩni ma tô tapê'êwara za'ra ni.

⁷ Tawamhã ãsa'u si, te duré ãmro hã mo, Zezusihi zadawa wasu'u'wa norĩ u. Timro dê'ãzé te te waihu'u ãna, ma ázé, 'ri para u.

⁸ Sébré wamhã, Pedru te 'mahã:

— We ãma wasu'u na. E niha ma tô asipti'ai wa'wa hã dama ãwede 'wa. E ôhõ na si ãwa'ã hã tô. — ãne te sadanha, Pedru hã.

Tawamhã asa te tãma rowasu'u:

— ãhe, tô ôhõ na si ãwa'ã hã. — ãne te tãma wasu'u.

⁹ Tawamhã Pedru te tãma tinha, ãne:

— Te asima ãrosa'rata waseté 'wa, 'Re ãhãimana u'ãsi mono pê'êzani hã tô sena ãwaihu'u pese zô pibui wa'aba da. E marĩ da, ma bété ãne hã ã'manharĩ 'wa. Ôhõta, wapari. Aimro nherê'wa norĩ hã te we para'rasi za'ra. Ta norĩ hã te za siwi ai'ã. — ãne te tãma tinha, Pedru hã.

¹⁰ Tawamhã awa'awi ma duré waptârã, pi'õ hã, Pedruhu papara. Ma tô duré dêrã. ãpréduptém norĩ hã ma tô duré apã asisi. Ma tô duré sabu za'ra, pi'õ ãdã hã. Ta hã ma tô duré siwi tisê, ab're 're ãmro zu.

¹¹ Tawamhã uburé pese, ma tô tapê'êwara za'ra ni oto, ãsazei'wa norĩ, siré 're ãsi'rã'õtõ mono norĩ hã. Duré ãwasu'u hã da te wapari za'ra wamhã, aihĩni ma tô tapahi za'ra ni.

Zezusihi zadawa wasu'u'wa norĩ hã dama ãwaihu'u'õ te te dama 're ã'manharĩ za'ra mono zé wasu'u

¹² Tawamhã Zezusihi zadawa wasu'u'wa norĩ hã, marĩ ãwê hã ahã na ma tô te te dama 're ã'manharĩ za'ra, dama ã'manharĩ waihu'u'õ hã. Duré ãsazei'wa norĩ hã ma tô 're si'rã'õtõ u'ãsi aihĩni, Saromahã nhisi na 'ri zahãbã, da te 're ãsisi za'ra mono u hã.

¹³ Tawamhã ãsazei'õ'wa norĩ hã, ãsazei'wa norĩ me 're hãimana za'ra mono da, te te sima 're rosa'rata za'ra mono nherê, pahi za'ra di oto. Tazahã te oto ãsazei'wa norĩ hã da te 're wêsãmri za'ra, 're hãimana wê za'ra mono wa.

¹⁴ Taha wa, ma tô da'ahã uptabi na saze za'ra ni, Wanhib'apito niwĩ 're danomro mono da oto. Aibã hã ahã uptabi na ma tô saze za'ra, pi'õ zama. Taha wa, ãsazei'wa norĩ hã ma tô sina hã.

¹⁵ ãne hã Zezusihi zadawa wasu'u'wa norĩ hã te te dama 're ã'manharĩ za'ra mono wa, ma tô ãhãzé ré norĩ hã da te 're sa'ra, 'ri nhĩ'riti wa, 're simi'wara mono da, ãsa'warizé wa, duré wetenhamri wa. Pedru hã ãwa'wai baba za'ra te te ro'razãri wa, Tawã hã te te hãiba upsibi za'ra da, te tame 're simi'wara, te te pese za'ra da.

¹⁶ Zeruzarê 'rata 'ri wa'õtõ mono hawi, ma tô da'ahã na dasito, Zeruzarê u. ãhãzé ré norĩ hã ma tô dasiré 'wasari ni. Duré wa'uburé ré 're ãhãimana za'ra mono norĩ zama, ma tô 'wasari ni, dasiré. Tawamhã aihĩni ma tô tapese za'ra ni oto.

Zezusihi zadawa wasu'u'wa norĩ hã dama ãpire za'ra norĩ nho're ãsimasabzé wasu'u

¹⁷ Tawamhã sasedoti ãpire uptabi hã, duré uburé ãsiré sadusezu norĩ me, ma tô ta norĩ hã Zezusihi zadawa wasu'u'wa norĩ hã ãma sô'ru za'ra. Tawamhã ma tô sima ãma roti za'ra, niha te te tãma rob'manharĩ za'ra da.

¹⁸ Taha wa, ma tô dama 'ru za'ra, da te dasiwi waibu da, Zezusihi zadawa wasu'u'wa norĩ hã. Tawamhã dazazéb 're, ma tô dasiwi séme ni.

¹⁹ Tawamhã barana Wanhib'apito ma, hãiwa ãma romhuri'wa hã ma tô ãtème si'ra za'ra, te te tãma 'ridawa za'ra da. Te te tãma 'ridawa za'ra wamhã, ma tô sani za'ra, rob u. ãne te tãma nharĩ za'ra:

²⁰ — Mo oto ai'aba'rêi wa'aba, 'Re ãhãimana u'ãsi mono ãma 're ãdawata za'ra mono zéb u, 're ãdanomro mono zép tém na dama rowasu'u za'ra wa'aba da. — ãne te tãma nharĩ za'ra.

²¹ Tawamhã, ãne hã te te wapari za'ra wamhã, bãdã 'rãiwatobro wi, ma tô asisi, 'Re ãhãimana u'ãsi mono nhorõwa ãma 'ri 'wawi wa'ra u. Tame ma tô rowahutu na dama ãma sãna'rata za'ra.

Tawamhã sasedoti ãpire uptabi hã, ãsiré 're ãnomro mono norĩ zama ma tô zudezu norĩ ma ãpire za'ra norĩ zô da'mazatõ, Zeruzarê ãma 're ãsi'ubumroi mono norĩ zô. Tawamhã ma tô ãtème ubumro uburé. Tawamhã dazazéb u ma tô Zezusihi zadawa wasu'u'wa norĩ zô tihãrã za'ra, da te ãtème simroi mono da.

²² Tawamhã 'Re ãhãimana u'ãsi mono nhorõwa 'madã'ã'wa norĩ hã ma tô sô ai'aba'rê, dazazéb u. Sô sisisi wamhã, 'ri 're baba di. Taha wa, te apã ai'aba'rê ubana, dama roti'wa norĩ u.

²³ ãtème sihutu wamhã, te ãne tãma rowasu'u za'ra:

— Pra. E niha bā. Dazazé hā, baba di. 'Ridawa nhitop tete uptabi nherē, duré dazazé 'madá'á'wa norī hā 'ridawa āma simasam nherē, wa te 'ridawa za'ra wamhā, 'ri 're baba di. Ni'wai ō di. Robaba na wa sō rob'madâ'â za'ra ni. — Āne te tāma rowasu'u za'ra.

²⁴ Tawamhā 'Re ihāimana u'āsi mono āma 're idawata za'ra mono zé 'madá'á'wa norī nhīb'apito hā, duré sasedoti ipire norī hā āne hā te te wapari za'ra wamhā, te te waihu'u za'ra ō di oto. Taha wa, ma tō sō amrami za'ra, tinhimirosa'rata na, Zesusihi zadawa wasu'u'wa norī zō.

²⁵ Taha ré, ni'wa hā te wei mo, aibā hā. Ta hā ma tō tāma rowasu'u za'ra, āne:

— Īwapari pese za'ra wa'aba. Aibā norī hā dazazéb 're, iséme 'wa hā, 'Re ihāimana u'āsi mono āma 're idawata za'ra mono zéb āma 'ri 'wawi wa'ra 're, te dama rowahutu za'ra. — Āne te tāma rowasu'u za'ra.

²⁶ Tawamhā 'Re ihāimana u'āsi mono āma 're idawata za'ra mono zé 'madá'á'wa norī hā ma tō sō ai'aba're tinhib'apito norī me, apā te te simroi mono da. Īsimroi mono 'wa norī hā ētē na da te hā za'ra mono ō'umnhasite, ma tō pawasisi āna te te simro.

²⁷ Te te simroi mono wamhā, te tāma nharī za'ra, dama roti'wa norī nho're simasab da. Tawamhā 'Re ihāimana u'āsi mono ma, da'āma romhuri'wa ipire uptabi hā te tāma nharī za'ra, Zesusihi zadawa wasu'u'wa norī ma:

²⁸ — Wa tō aré aiwi sawi za'ra wa'aba ni, Zesusihi nhimiroti na dama 're rowahutu tō za'ra wa'aba mono da. Tazahā dama 're wasu'u za'ra wa'aba mono wa, iwasu'u hā ma tō te te ropé 'ri pā, āme Zeruzarē āma hā. Taha wa, ma tō da te dasima 're wawasu'u za'ra. Wa norī hā, u, Zesusihi wīri'wa. — Āne te tāma nharī za'ra.

²⁹ Tawamhā Pedru norī hā te asa tāma nharī za'ra, tisiré Zesusihi zadawa wasu'u'wa norī me:

— 'Re ihāimana u'āsi mono mreme si wa za wa te 're 'madá'á' pese za'ra. Aimawi mreme hā wa te 're 'madá'á' za'ra mono ō di za.

³⁰ 'Re ihāimana u'āsi mono, wahi'rata norī nhīb'apito hā ma tō hāiwa'utu Zesusi hā, asadawa para wa'aba, da te dasiwi iwīri hā. Wedepo'o nhonhi'rāmi na asiwi Īsasōmri 'wa hā ma tō hāiwa'utu.

³¹ Ta hā ma tō 'Re ihāimana u'āsi mono hā ti'ā apā, Īsimire niwī 're sāmra u'āsi mono da oto, dama ipire na 're hāimana mono da, duré tiwaihu'u pese zarina te te 're da'anho'reptui mono da. Taha wa, te za te te 're wapawaptob za'ra, wasiré Īzarazéhé nhihudu mono bā, wawasédé hā wa te 're rēme za'ra mono wa, te te wama 're apari mono da.

³² Wa norī hā wa tō āne na hā watōmo na 'madá'á' za'ra ni. Taha wa, wa za wa te dama 're wasu'u u'āsi za'ra. 'Re ihāimana u'āsi mono hā da te 're wapari za'ra mono wamhā, te za Tipē'ēzani hā te te dama 're anhomri. Taha zama te za duré āne uburé te te dama 're awaihu'u, Zesusihi wasu'uwé hā. — Āne te tāma nharī za'ra, Pedru norī hā.

³³ Tawamhā dama roti'wa norī hā āne te te wapari za'ra wamhā, ma tō sada tizahi za'ra. Taha wa, ma tō sima āma roti za'ra, te te dama 'ru za'ra da, da te dasiwi simro da.

³⁴ Tane nherē, aibā Īwē hā Damarizé na Īsisi hā ma tō hāiwi za. Ta hā parisezu norī niwī te 're mo, dama iwazé pe hā. 'Re ihāimana u'āsi mono nhimiroti na dama rowahutu'wa, te 're hāimana. Tawamhā ta hā ma tō oto dama 'ru za'ra, Zesusihi zadawa wasu'u'wa norī hā da te sani za'ra da, dama ipire norī nhiti si'ubumro da, sryr na.

³⁵ Taha pari, ma tō dama roti'wa norī ma tinha, āne:

— Wasiré Īzarazéhé nhihudu norī, Īwapari pese za'ra wa'aba, āma asōpré wa'aba da, aibā norī āma. E marī te za tāma Ī'manharī za'ra wa'wa. Āma rosa'rata pese za'ra wa'aba.

³⁶ Aibā hā Te'udasi na Īsisi hā duréihā, waihu'u pese newa, ma tō dama ipire na dama siwasu'u. Tawamhā aibā ahā na ma tō Īsiré 're nomro, 400 na Īhāiba hā. Tane nherē, da te wīri wamhā, Īsiré 're Īnomro mono norī hā ma tō te te ropé. Robaba di oto.

³⁷ Te'udasihī uiri'na si ma tō duré Zudasi hā datēme wi, Darireza āma aré 're Īsāmra mono hā. Romanu norī nhīb'apito hā dahāiba za'rada hā te te waihu'u da, danhisi mono bā da te tāma ubumro za'ra ré, ma tō Zudasi hā datēme wi. Tawamhā da'ahā na ma tō duré Īsiré 're danomro, Te'udasihī ne. Īsine, ma tō duré wīri ni, Zudasi hā. Tawamhā Īsiré 're Īnomro mono norī hā ma tō duré te te ropé.

³⁸⁻³⁹ Taha wa, āhāna hā wa te hāiba upi za'ra wa'aba tō, Pedru norī hā. Tō'ā. Ta norī hā si'uīhā na te te 're rowahutu za'ra mono wamhā, Īsimirowahutu za'ra hā te za Īsarina 're si'utōri za'ra. Tazahā 'Re ihāimana u'āsi mono zadawa para te te 're rowahutu za'ra mono wamhā, tiwī uprosi waihu'u za'ra wa'aba ō di za, Īsimirowahutu za'ra hā. Taha wa, 'Re ihāimana u'āsi mono hā 'wapé za'ra wa'aba ō'umnhasite, te za aibā norī ma Īwaprosi waré za'ra wa'wa, si'aba're da. — Āne te dama roti'wa norī ma roti, Damarizé hā.

Tawamhā Īsimiroti hā ma tō saze za'ra.

⁴⁰ Tawamhã Zezusihi zadawa wasu'u'wa norĩ zô ma tô sitême tihârâ za'ra apâ. Ma tô dama hâiba 'ru za'ra, taré da te dasiwi hâ za'ra da. Taha pari, ma tô duré sadawa uwati za'ra, te te duré dama 're rowasu'u tô za'ra mono da, Zezusihi wasu'u na hâ. Taha parip si, ma tô tâma rob'ru za'ra, apâ si'aba'rê da.

⁴¹ Tawamhã ma tô dawı wairé, dama roti'wa norĩ hawi. Da te hâ za'ra nheré, to za'ra di, Zezusihi zadawa wasu'u'wa norĩ hâ. Ísazei'wai wa, Zezusihi ne te te 're robzépata za'ra mono da, 'Re íhâimana u'âsi mono hâ te te tâma ípisutu za'ra zém na hâ ma tô sina waihu'u za'ra. Taha wa, tâma rowê za'ra di.

⁴² Tawamhã awê sidâpâsi ma tô te te dama 're rowahutu za'ra, 'Re íhâimana u'âsi mono âma 're ídawata za'ra mono zéb âma 'ri 'wawi wa'ra 're. 'Ri baba, ma tô duré te te dama 're rowasu'u za'ra, Zezusihi wasu'uwê na. Zezusi hâ tô sena, Danho'reptui'wa da, 'Re íhâimana u'âsi mono te te wama ípisutu na ma tô duré te te dama 're rowasu'u za'ra.

6

Aibâ norĩ hâ 7 na íhâiba za'ra hâ dapawapto'wa da, da te dasiwi ípisutu za'ra zé wasu'u

¹ Tawamhã ahâ uptabi na ma tô zudezu norĩ hâ saze za'ra, deredu norĩ mre me na 're ímreme zusi mono norĩ hâ, duré ebreusi norĩ mre me na 're ímreme zusi mono norĩ zama. Tawamhã deredu norĩ mre me na 're ímreme zusi mono norĩ hâ ma tô aiwapsari za'ra, dazari'wa norĩ hâ deredu norĩ ímrotô norĩ âma 're po're simrami u'âsi za'ra mono wa. Awê sidâpâsi, ísazei'wa norĩ hâ ro te te sima 're wai bui mono wamhã, te âma 're po're simrami u'âsi za'ra. Taha wa, ma tô dama nharĩ za'ra, aibâ norĩ hâ deredu norĩ mre me na 're ímreme zusi mono norĩ hâ.

² Tawamhã Zezusihi zadawa wasu'u'wa norĩ hâ, 12 na íhâiba za'ra hâ ma tô só tihârâ za'ra, tisiré ísazei'wa norĩ zô. Hâiba mono bâ ítême si'aba'rê da, te só tihârâ za'ra. Ítême sihutu wamhã, te tâma nharĩ za'ra, âne:

— Wasiré Zezusihi sazei'wa norĩ, e 'Re íhâimana u'âsi mono wasu'uwê hâ wa za dawı wasu'u zazarı za'ra ni, taha upana wa te 're ídazari za'ra mono da si. Mare di. Wa te dama âma 're rowasu'u za'ra mono ô wamhã, 'Re íhâimana u'âsi mono hâ te te wama 're arowaré mono ô di za.

³ Ma'âpé, só asôpré wa'aba mono, aibâ 7 na íhâiba norĩ zô. Aibâ norĩ hâ da te íwêsâmri za'ra zô, te za só asôpré wa'aba, 'Re íhâimana u'âsi mono pê'êzani na si 're ínomro mono norĩ zô, hâiwa hawi dahâimanazém na rowaihu'u ré 're íhâimana za'ra mono norĩ zô. Ta norĩ ma, wa za romhuri hâ pisutu za'ra ni, awê sidâpâsi te te 're dazari za'ra mono da.

⁴ Tawamhã wa norĩ hâ 'Re íhâimana u'âsi mono ma, wa za 're wamreme zusi u'âsi. Ímreme na wa za wa te 're dapawapto u'âsi za'ra. — Âne te tâma nharĩ za'ra.

⁵ Tawamhã ísimiroti za'ra hâ aihîni ma tô saze za'ra, ísazei'wa norĩ hâ. Taha wa, ma tô aibâ norĩ zô rob'madâ'â za'ra. Tawamhã ma tô sâmri za'ra, Esitéwâ hâ. Ta hâ, 'Re íhâimana u'âsi mono âma te te ísasômri. Ípê'êzani na si te 're hâimana. Tawamhã ma tô duré sâmri za'ra Piripi hâ, duré Procoru hâ, duré Nicano hâ, duré Timo hâ, duré Pamenasi hâ, duré Nicorazu hâ. Átizotiza na 'ri nho'ômo nhisi âma 're ísâmra mono aré, Nicorazu hâ. Zudezu'ô aré, ma tô sizudezu, 'Re íhâimana u'âsi mono âma oto dame 're wata mono da.

⁶ Tawamhã â norĩ hâ ma tô oto te te simro, Zezusihi zadawa wasu'u'wa norĩ u, tinhib'rada te te âma sa'ra za'ra da, T'râ nhisiwi, âma mre me zusi da. Âne Zezusihi zadawa wasu'u'wa norĩ hâ ma tô romhuri hâ tâma pisutu za'ra.

⁷ Tawamhã 'Re íhâimana u'âsi mono zadawa wasu'u hâ ma tô duré te te ropé, 'ri baba. Zezusihi nhirâ zarina 're ínomro mono norĩ hâ ma tô sina hâ, Zeruzarê âma hâ. Sasedoti norĩ hâ ahâ na ma tô duré Zezusi hâ saze za'ra oto.

Esitéwâ, da te dasiwi í'ârízé wasu'u

⁸ 'Re íhâimana u'âsi mono hâ ma tô Esitéwâ hâ te te 're pawapto pese, tiwaihu'u pese na. Taha wa, íwaihu'u pese na si te 're hâimana, Esitéwâ hâ. Taha zarina ma tô marĩ íwê hâ te te dama 're ab'manharĩ, dama í'manharĩ waihu'u'ô hâ, danho'a.

⁹ Tane nheré, ni'wam norĩ hâ zudezu norĩ hâ ma tô sada 're hâimana za'ra, ímreme te te 're wê'ô za'ra mono wa. Ta norĩ hâ darob amoi hawi, Zeruzarê u 're ísihutu mono aré, Sireni na 'ri nho'ômo nhisi hawi, duré Aresâdiriza na 'ri nho'ômo nhisi hawi, duré Sirisiza na danhipti'a nho'ômo nhisi hawi, duré Azi'a na danhipti'a nho'ômo nhisi hawi. Ta norĩ hâ ma tô 're si'râ'ôtô u'âsi, rowahutuzéb u dasi'uuihâ na 're ídahâimana za'ra mono zém na rowahutuzém nhisi u hâ. Tawamhã ta norĩ hâ, Esitéwâhâ mre me te te siwi wê'ô za'ra wa, te nasi aimawi na tâma nharĩ za'ra.

¹⁰ Tawamhã 'Re íhâimana u'âsi mono pê'êzani hâ ma tô tite hâ rowaihu'u pese zé hâ tâma tisô, Esitéwâhâ ma, mre me waihu'u pese da. Taha wa, aibâ norĩ ma, te te asa tâma âma wa'râmi za'ra wamhã, ma tô nasi mre me nhihâri za'ra.

¹¹ Taha wa, ta norī hā ma tō ni'wam norī hā sada wada'uri za'ra pi'uriwi, Esitéwā te te siwi wasu'u wasété za'ra da, dama. Rob'uprazé ma tō tāma sōmri za'ra, sada simasab da. Āne te tāma roti za'ra:

— Āne te za Esitéwā hā dama īwasu'u za'ra wa'wa: “Esitéwā hā wa tō wapari za'ra ni. Mozési hā te te dama 're wasu'u wasété. 'Re ihāimana u'āsi mono āma, te te duré 're wasété.” Āne te za dama īwasu'u wasété za'ra wa'wa, Esitéwā hā. — Āne ma tō aibā norī hā sada wada'uri za'ra.

¹² Taha wa, ma tō āne hā dama wasu'u wasété za'ra, Esitéwā hā. Duré 'Re ihāimana u'āsi mono nhimiroti 'rata na rob'ui'ére na dama rowahutu'wa norī ma zama, ma tō āne wasu'u wasété za'ra, dama roti'wa norī ma zama. Aihīni sada danhiti'rui wairébé da, ma tō āne dama wasu'u wasété za'ra. Tawamhā ma tō oto sō ai'aba'ré, Esitéwāhā zō. Taha wa, ma tō siwi ti'ā. Te te siwi āri wamhā, ma tō siwi saprō, zudezu norī ma, ĩpire za'ra norī u.

¹³ Tawamhā, Esitéwāhā mreme te te siwi ĩw'ē'ō za'ra norī zō, ma tō sō tihārā za'ra, taré te te siwi īwasu'u wasété 'wa norī zō, Esitéwā te te tāma wasu'u wasété za'ra da. Āne te dama ĩpire za'ra norī ma, Esitéwā hā taré wasu'u za'ra:

— Ō hā aibā hā, rowasu'u wasédé hā te te sazāri ō di, 'Re ihāimana u'āsi mono āma 're ĩdawata za'ra mono zém na hā. Duré 'Re ihāimana u'āsi mono nhimiroti wē wa'rāmi, ma tō te te dama 're rowasu'u wasété u'āsi.

¹⁴ Wa norī hā wa tō wapari za'ra ni, ĩmreme hā. Zezusi hā Nazaré āma aré 're ĩsāmra mono hā te za, u, 'ri hā uprosi, 'Re ihāimana u'āsi mono āma 're ĩdawata za'ra mono zé hā. Duré, roti hā Mozési te te aré wama ĩsōmri hā 're ĩwahāimana za'ra mono zéb da hā te za, u, wawī āma saprī. — Āne ma tō Esitéwāhā wasu'u wasété za'ra taré.

¹⁵ Tawamhā zudezu norī ma roti'wa norī hā, duré aihīni ĩsi'ubumrozéb āma ihāimana za'ra norī hā te āma tinhopré, Esitéwāhā ubu āma hā. 'Re ihāimana u'āsi mono ma, hāiwa āma romhuri'wai ubu ne, Esitéwāhā ubu hā.

7

Dama ĩpire norī nho're, Esitéwā dama ĩsiwasu'uzé wasu'u

¹ Tawamhā 'Re ihāimana u'āsi mono ma, da'āma romhuri'wa ĩpire uptabi hā te tāma tinha, Esitéwāhā ma:

— E tō sena aiwasu'u hā.

²⁻³ Tawamhā Esitéwā ma tō tāma rob'rāzarōtō za'ra, dahi'rata norī wasu'u na hā, āne:

— Wasiré Izarazéhé nhihudu norī, wamama norī zama, ĩwapari za'ra wa'aba. 'Re ihāimana u'āsi mono hā, rowa'a na 're ĩsāmra mono hā duréihā ma tō Abra'āhā ma sihāi're, wahi'rata ma. Mesapotamiza na danhipti'a nho'ōmo nhisi āma 're sāmra mono ré, ma tō ĩtēme wi, zahadu Harā na 'ri nho'ōmo nhisi u morī ō ré. Āne te tāma tinha: “Ma'āpé aironhiti aiwatobro, asisānawā norī nhiti aimorī da. Airop téb u wa za asaprō, tamomo 're aihāimana mono da oto.” Āne ma tō tāma roti.

⁴ Taha wa, tisiré cadeza norī nhipti'ai hawi ma tō watobro. Harā na 'ri nho'ōmo nhisi āma te oto 're sāmra, Abra'ā hā. Tame, ĩmama hā ma tō tiwi dārā. Tiwi dā'ā parip si, ma tō 'Re ihāimana u'āsi mono hā saprō, ĩroptéb u, Abra'ā hā. Taha wa, te oto a norī wa'wa hā ĩwa 're aihāimana za'ra wa'aba mo, ĩsipti'ai āma.

⁵ Tane nherē, we te te saprōni nherē, te te tāma sōmri uptabi ō di, ti'a hā ĩte da hā. Taha wa, te āne hā tāma tinha: “Tō sena, ti'a, wa za aima tisō, ate da, asihudu sidāpāsi, asihudu norī te da.” Āne ma tō tāma ropisutu, Abra'āhā ma, 'ra ō ré.

⁶ Te duré tāma tinha: “Apto'oré hā asihudu norī hā te za dasiré 're si'ubumro, darob amoi āma tinhipti'ai āmai ō nherē, tisiré'ō norī siré. Tawamhā ti'a tede'wa norī nhimiwada'uri zarina si te za 're hāimana za'ra, te te tāma 're romhuri pese za'ra mono da taré, wa'ābā āna. Si'uihā na si'āma 're hāimana waihu'u za'ra mono ō di za. Da te 're ihā za'ra mono zé hā te za duré te te 're sépata za'ra. Āne te te 're robzépata za'ra mono ré hā, te za āma tiwahub ahā za'ra, 400 na.

⁷ Tawamhā wa za te 're 'ruiwa'ābā za'ra. Marī, wa za asa te 're ab'manharī, daza'ru tede'wa norī ma hā asihudu norī wi, 're robzei'ō za'ra mono wa. Taha parip si, asihudu norī hā te za wei wairé apā. Tawamhā āne te za ĩ'āma 're dawata za'ra oto.” Āne te tāma ropisutu, 'Re ihāimana u'āsi mono hā.

⁸ — Te duré tāma roti, āne: “Te za 're asisihāiwata nhihāri za'ra wa'aba mo, ĩzazei'wa na aipibui pese aba zéb da hā.” Āne ma tō tāma roti. Taha wa, Izati hā waptā'ā wamhā, ma tō sihāiwata nhizā, ĩmama hā, Abra'ā hā. 8 na āma mara wapsi, ma tō sihāiwata nhizā. Izati hā ma duré ti'ra hā sihāiwata nhizā, Zaco hā. Zaco hā ĩsarina ma duré ti'ra hā te te

're anhihâiwata nhuhâri, poto sidâpâsi, 12 na ihâiba norî hâ. Ta norî hâ Zacoho 'ra norî hâ, wahi'rata na'rata uptabi. — Âne te Esitéwâ hâ rob'râzarôtô, dama ïpire za'ra norî ma.

⁹Tawamhâ Esitéwâ hâ ma tô duré tinhimirob'râzarôtô na tâma âma uzusi za'ra, âne:

— Ta norî hâ wahi'rata norî hâ ma tô tinoire hâ dama wede za'ra, Zuzé na ïsisi hâ. Ihâimanazém na te te siwi 're 'ruiwapari za'ra mono wa, ma tô dama wede za'ra. Taha wa, ï'uipra'wa norî hâ ma tô siwi saprôni za'ra, Ezitu u, tame danhimiwada'uri zarina si te te dama 're romhuri mono da, pawa'âbâ âna. Tane nherê, 'Re ihâimana u'âsi mono hâ ma tô ïsiré 're hâimana u'âsi.

¹⁰Taha wa, te te ïrobzépata mono zéb sidâpâsi ma tô nasi pawapto, tiwi robzei'ô tô da. Tawamhâ apito Para'oho ma, sihâi're wamhâ, 'Re ihâimana u'âsi mono ma tô tiwaihû'u pe hâ tâma tisô, ihâimana wê zéb da hâ. Taha wa, apito Para'o hâ ma tô wêsâ, Zuzé hâ. Taha zarina ma tô tâma pisutu, Ezitu âma roti'wa da oto, ïsadawa para. ïsibro hâ duré ïsôrôwa zama te te tâma 're 'madâ'â mono da zama, ma tô duré pisutu.

¹¹Tawamhâ nimahâ wuhum na dasa hâ poto ô di, Ezitu âma hâ duré wahi'rada 're ihâimana za'ra mono zéb âma hâ, Cana'â na romnhisi âma hâ. Taha zarina, ma tô oto mra hâ da te 're sêpata za'ra. Marî ô di, te te 're ïhuri mono da hâ, wahi'rata norî hâ.

¹²Tawamhâ wahi'rada Zaco hâ ma tô dasai wasu'u hâ wapa, Ezitu âma buru nho wasu'u hâ, tamép si da te 're ïsa'wari mono na hâ. Taha wa, ma tô ti'ra norî hâ wahi'rata norî hâ satôri'ra, Ezitu u si'aba're da, mra hâ te te 'mai'uipra za'ra da. Tawamhâ ïmorî'rata na si'aba'rei wamhâ, ma tô aihutu apâ, timama u. Mra hâ ma tô te te âwisi.

¹³Taha parip si, ma tô duré sô ai'aba're, Ezitu u, maparane âma. Tawamhâ Zuzé hâ ma tô tâma siwasu'u za'ra oto, tidub'rata norî ma. Tawamhâ apito Para'o hâ ma tô wapa, Zuzéhé sisânawâ norî wasu'u hâ. Taha wa, ma tô oto waihu'u za'ra, ïsisânawâ za'ra na hâ.

¹⁴Taha wa, ma tô Zuzé hâ timama zô hâ, Zacoho zô, aihîni pese ïtême si'aba're da, ïmro norî hâ ï'ra norî zama, duré uburé ïsiré 're ïdahâimana za'ra mono norî zama. Âne dahâiba za'ra hâ, 75 na.

¹⁵⁻¹⁶Tawamhâ Zaco norî hâ te oto zâmo, Ezitu u, tame 're si'ubumroi mono da oto. Tame ma oto Zaco hâ dârâ. Tame ma tô duré ï'ra norî hâ 're dâ'â za'ra. Tawamhâ ïmama hâ tiwi dâ'â za'ra wamhâ, ïhi hâ ma tô siwi ti'â apâ, ïrob u, Sité na danhipti'a nho'ômo nhisi u, tame te te siwi sême da. Ti'a hâ Abra'â hâ dâ'â ô ré, Hamohô nhihudu norî wi, te te sisada ï'uipra sirômo âma, ma siwi sé, ïhi hâ. 'Re dâ'â za'ra mono sidâpâsi, ma tô wahi'rata norî hi zama apâ da te 're 'wasari tamomo, Zacoho 'ra norî hi hâ, tame da te 're sême mono da, êtê zahâpâ wa, ab're 're.

¹⁷— Tawamhâ 'Re ihâimana u'âsi mono hâ Abra'âhâ ma, te te ïropisutuzé hâ te te tâma âma ï'uwaimramizéb u hâ, romhuture di oto. ïsihudu norî hâ wahi'rata norî hâ ma tô oto sina hâ, Ezitu âma. Da'ahâ uptabi di oto.

¹⁸Tawamhâ roti'wa aimawi hâ ma tô oto âzé, si'apito da, Ezitu âma, Zuzéhé waihu'u'ô'wa hâ.

¹⁹Tawamhâ tizadawa nhipese na si ma tô wahi'rata norî ma 're hâimana ta hâ. Ma tô te te tâma 're rob'manharî wasété u'âsi za'ra. Ma tô damama norî ma roti za'ra, rowi te te 're sa'ra za'ra mono da, ai'uté hâ, 're dâ'â za'ra mono da.

²⁰Taha ré, ma tô Mozési hâ podo, ai'utépré ïwê uptabi hâ. A'amo si'ubdatô ma tô âma ai'utô, ïmama norî te te ï'madâ'â zahuré zém na hâ, 'ri para.

²¹Tawamhâ 'ri nhiti ma tô ïna hâ tihi. Taha wa, apito Para'oho 'ra sipi'ô hâ ma tô âma ti'ra, Mozésihi âma. Ti'ra uptabi newa, ma tô prédu.

²²Taha wa, Ezitu âma danhimirowaihu hâ ma tô uburé dawî waihu'u, Mozési hâ. Oto prédu wamhâ, te te waihu'u pese wa, uburé te te rob'manharî wê di. ïsimiroti hâ wê wa, dama mrepe pire di. — Âne te dama ïpire za'ra norî ma, rob'râzarôtô, Esitéwâ hâ, dahi'rata wasu'u na hâ.

²³Âne te duré tâma rob'râzarôtô za'ra:

— Tawamhâ Mozési hâ 40 na âma wahu wamhâ, ma tô sima rosa'rata, tisiré norî hâ te te waimrami mono da, Izarazéhé nhihudu norî hâ.

²⁴Tawamhâ te te ab'madâ'â mono wamhâ, ma tô 'mai'hâiba pibu tisiré hâ, ezipsiu hâ te te 're pré'é mono ré hâ. Taha wa, ma tô ïtême mo, âma sisapri' da. Tawamhâ te te 're pré'é mono 'ru te, ma tô tiwî, ï'azâri'wa hâ, tisiré hâ te te 'ruiwa'âbâ da.

²⁵Mozési hâ ma tô tisiré norî âma rosa'rata, âne: "Ësiré norî hâ âtê te za siwi ïwaihû'u, 'Re ihâimana u'âsi mono te te tâma ïpisutu za'ra zém na Ezitu hawî te dawî ubumroi mono da." Âne te tisiré norî âma rosa'rata. Tane nherê, te te siwi waihu'u ô di, ïsiré norî hâ.

²⁶Tawamhâ awém na hâ ma tô duré mo, tisiré norî u. Morî wamhâ, te duré ïsiré norî hâ ïsô'a si'wapé zahuré, maparane. Taha wa, ma timreme hâ tâma 'marôwirî zahuré, âne:

“Tô'â. Asi'wapéi wa'aba tô. Oro asiré 're anomro aba mono za, te asi'wapéi wa'wa.” Áne ma tô timreme hã tâma 'marôwîrî zahuré.

²⁷ — Tawamhã âma îsâna'rata'wa hã ma tô Mozésihi mreme hã wê'ô. Taha wa, ma tô mreme sina sa'rê, âne: “E 'wa sadawa para we aimorî bâ, wanhib'apito da, duré wama rowairébé'wa da hã.

²⁸ E îzama te za îwî, ezipisiu hã îwîrî ne, ahâmhá.” Áne te tâma tinha, Mozésihi ma.

²⁹ Tawamhã îmreme hã te te wapari wamhã, ma tô Ezitu hawi aimani Mozési hã, Midi'â na romnhisi u, tame 're hâimana mono da oto. Tame ma timro. Î'ra maparane oto, aibâ norî hã.

³⁰ — Midi'â âma 're sãmra mono ré hã, ma tô âma tiwahu, 40 na. Tawamhã nimahã bâta na ma tô 'Re îhâimana u'âsi mono ma romhuri'wa hã itême sihâi'rê, hâiwa hawimhã. Sina'î na êtê 'râihâ nhisi 'rata, ma tô itême sihâi'rê, a'ubuni u, wede zapore ro'o wa'wa.

³¹ Tawamhã Mozési ma tô âma titob'uzu, te te sãmri wa. Taha wa, ma tô itême ai'rê, 'râwi te te sabu da. Tawamhã 'Re îhâimana u'âsi mono mreme ma tô wapa. Áne te tâma tinha:

³² “Wa hã 'Re îhâimana u'âsi mono, aihî'rata norî nhîb'apito, Abra'âhâ nhîb'apito, duré Izatihi nhîb'apito, duré Zacoho nhîb'apito.” Áne ma tô tâma si'mahã, Mozésihi ma. Tawamhã Mozési hã îmreme te te wapari wamhã, te tâma rêrê, pipa te. Tâma pahi wa, te te 'madâ'â waihu'u ô di.

³³ Tawamhã Wanhib'apito te duré tâma tinha: “Înho'a asabzé hã wê uptabi di, ti'a hã. Aima îpire uptabi wa, îma asiséb zarina te za aipara'uza hã îsani.

³⁴ Wa hã wa tô înhîb'a'uwê norî hã te 're 'madâ'â za'ra. Romhuri pire na te te 're rob'ma'wamarî mono wa, te robzei'ô u'âsi 're hâimana za'ra, Ezitu âma hã. Taha wa, ma tô romhuri pire te, 're 'wab'êtê u'âsi za'ra. Î'wab'êtê za'ra hã wa tô te 're wapari u'âsi za'ra. Taha wa, wa we oto itême si'ra za'ra, te sô'reptu za'ra da, Ezitu hawi. A hã wa za oto asatô, Ezitu u apâ aimorî da.” Áne ma tô tâma rob'ru, Mozésihi ma.

³⁵ — Tawamhã te oto mo apâ, Mozési hã Ezitu u, tisiré norî te te sô'reptu za'ra da. Tane nherê, Izarazéhé nhîhudu norî hã ma tô aré siwi watawa, âne: “E 'wa sadawa para we aimorî bâ, wanhib'apito da, duré wama rowairébé'wa da.” Áne ma tô aré siwi wê'ô. Tane nherê, 'Re îhâimana u'âsi mono hã ma tô apâ itême satôrî za'ra, Mozési hã. Tawamhã hâiwa âma 'Re îhâimana u'âsi mono ma romhuri'wa hã, wedezapore ro'o wa'wa sô îsãmra hã ma tô Mozési hã pawapto, Ezitu hawi te te danhimroi mono da apâ, danhipti'ai u.

³⁶ Taha wa, ma tô Mozési hã te te danhimro tô, Ezitu hawi. Duré Ezitu âma zahadu 're sãmra mono ré, ma tô marî hã dama î'manharî waihu'u'ô hã te te dama 're ab'manharî. Â pré na â poré nhisi âma, ma duré dama rob'manha, îwaihu'u'ô na. A'ubuni wi siwa'ru 're danomro mono ré, ma duré marî dama î'manharî waihu'u'ô hã te te dama 're ab'manharî, 40 na da'âma wahub za'ra ré.

³⁷ Ta hã ma tô tisiré Izarazéhé nhîhudu norî ma rowasu'u, âne: “'Re îhâimana u'âsi mono hã te za ni'wa hã asiré wa'wa hã we aima pisutu za'ra wa'wa, îsine, te te aima 're îsadawa wasu'u za'ra wa'aba mono 'wa da hã.” Áne te tâma rowasu'u za'ra, Mozési hã. — Áne ma tô Esitéwã hã dahi'rata wasu'u na tâma rob'râzarôtô za'ra, dama îpire za'ra norî ma.

³⁸ Áne te duré tâma rob'râzarôtô za'ra:

— Izarazéhé nhîhudu norî hã a'ubuni wi 're nomro mono ré, ma tô Mozési hã dasiré 're mo, wahi'rata norî siré. Nimahã bâta na siré si'râ'ôtô wamhã, ma tô hâiwa âma 'Re îhâimana u'âsi mono ma romhuri'wa hã tâma rowasu'u, Mozésihi ma, Sina'î na êtê 'râihâ nhisi âma. 'Re îhâimana u'âsi mono nhîmipisutu zarina, robzei u'âsi î'rata 're îdanomro u'âsi mono zé wasu'u hã ma tô tâma tisô, Mozésihi ma, ta hã te te wama 're anhomri mono da, îsipai u.

³⁹ Tazahã wahi'rata norî hã te te wapari ze za'ra ô di, Mozésihi mreme hã. Ezitu u apâ îsi'aba'rê da si, ma tô tinhimirosa'rata na sizaze za'ra.

⁴⁰ Taha wa, te Arâhã ma nharî za'ra, âne: “Ma'âpé, marî hã romhâiba hã wama 'ma'manharî za'ra na, 'Re îhâimana u'âsi mono ne îwaihu'u'upe hã, te te îwanhimroi mono da hã.” Áne ma tô tiwi waptêrê za'ra, romhâiba hã te te 'manharî za'ra da. Te duré âne tâma nharî za'ra: “Mozési hã ma wawi aimani, Ezitu hawi we îwanhimroi mono 'wa hã. Wa te sa'rese za'ra ô di oto.” Áne te wahi'rata norî hã tâma nharî za'ra, Arâhã ma.

⁴¹ Taha wa, tame ma tô powawê 'ra hâiba ne hã tâma 'manharî za'ra, âma 're îwata za'ra mono zéb da hã, 'Re îhâimana u'âsi mono upana. Tawamhã ma tinhimizama hã oto siwi simro, tinhimirob'manharî âma wata za'ra da. Aimawi te te sima rob'manharî za'ra wê te, ma tô duré dasa hã siwi 'manha.

⁴² Taha wa, 'Re îhâimana u'âsi mono, ma tô tiwi aipi'ra za'ra, aimawi na si si'uîhã na za 're wata za'ra mono da, î'upana. Bâtâ âma î'upana 're wata za'ra mono da, ma tô duré tiwi aipi'ra za'ra, duré a'amoi âma, duré wasi âma zama. Taha na ma tô 'Re îhâimana u'âsi mono zadawa wasu'u 'rata 'wa hã âma rob'ui'éré, duréihã îmreme na:

“Izarazéhé nhihudu norí, e ĩ́āma si 're aiwata za'ra wa'aba mono da, ma tó ĩ́nhimipodo hā asiwí 're ĩ́simroi wa'aba mo, a'ubuni wí 're anomro aba mono ré hā. Mare di. ĩ́upana aimawí āma si 're aiwata za'ra wa'aba mono da, ma tó āne hā 're ĩ́manharí za'ra wa'aba mo. Āne 're anomro aba mono ré, ma tó 40 na ai'āma tiwahub za'ra wa'wa.

43 ĩ́upana āma 're aiwata za'ra wa'aba mono da, ma tó romhāiba hā asima ĩ́manharí za'ra wa'wa, waihu'u pese newa, Moroti ĩ́hāiba'ō na romhāiba 'manharí nhisi āma. Duré Rēpā na wasi nhisi āma ma tó 're aiwata za'ra wa'aba mo, waihu'u pese newa ĩ́hāiba'ō āma hā. Ta hā ma tó asiwí 're ĩ́rami aba mo, āma 're aiwata za'ra wa'aba mono da, a'ubuni wí. Taha wa, wa za oto airom nhiti asatōrí za'ra wa'wa, Babironiza na 'ri nho'ōmo nhisi nhipai u ai'aba'réi wa'aba da.”

Āne ma tó wahi'rata norí ma rowasu'u, ĩ́sadawa wasu'u'wa nhimi'ui'ére na, 'Re ĩ́hāimana u'ási mono mreme zarina. Timreme, ma tó wahi'rata norí āma uwaimra. — Āne te Esitéwā hā zahadu dama ĩ́pire norí ma rob'rāzarōtō za'ra, dahi'rata norí wasu'u na hā.

44-45 Te duré tāma rob'rāzarōtō za'ra, āne:

— 'Re ĩ́hāimana u'ási mono hā ma tó tāma pisutu, Mozésíhi ma, wahi'rata norí hā te te siwí ĩ́ri mono zéb da hā, a'ubuni wí. Tawamhā Mozésíhi ma, te te ĩ́pisutuzéb zarina ma tó da te dasiwí simizusi romhā 'manharí na 'ri hā, dasiré ĩ́wa simasisi mono da, 'Re ĩ́hāimana u'ási mono hā. Taha wa, ma tó 'rizé hā te te siwí 'wapé siré, danhimizahāri sidāpāsi te te siwí simizusi mono da. Tawamhā ta norí uirí na si ma tó wahi'rata norí hā siwí āwisi, tirop téb u sihutu wamhā, Zuzuwéhé siré. Sihutu wamhā, 'Re ĩ́hāimana u'ási mono hā ma tó wahi'rata norí hā pawaptob za'ra, dasi'wapé na. Ma tó te te tāma dazate za'ra, tame 're ĩ́dahāimana za'ra mono norí hā. Tawamhā wahi'rata norí hā ma tó asisi oto, tirop téb u. Sisisi wamhā, ma tó siwí tisā 'ri hā, 'Re ĩ́hāimana u'ási mono ĩ́wa 're ĩ́sāmra mono zéb da hā. Tame te oto 're sab u'ási, Dawi za ĩ́potozéb u hā.

46-47 Tawamhā Dawi hā ma tó tiprédu. Prédu wamhā, 'Re ĩ́hāimana u'ási mono hā ma tó wēsā. Taha wa, Dawi hā ma tó tiwí waptē, 'ri ĩ́té hā te te tāma sārí da, ĩ́wa 're ĩ́sāmra mono zéb da hā. Āne te tiwí waptē: “E te za ĩ́ma ĩ́ru, 'ri té, te aima sārí da. A hā 'Re ĩ́hāimana u'ási mono, Zacoho nhīb'apito. Taha wa, wa ĩ́sima wē, 'ri hā te aima sārí da.” Āne ma tó tiwí waptē, 'Re ĩ́hāimana u'ási mono wí. Tane nherē, Dawi hā te te tāma 'ri ō di. ĩ́'ra si, ma tó tāma 'ri, Saroma hā tipoto'wa uirí na si.

48 — E tawamhā 'ri hā da te dasiwí ĩ́sārí 'rep si te 're sāmra u'ási, 'Re ĩ́hāimana u'ási mono hā. Mare di. 'Ri 'rep si 're sāmra mono ō di. Āne ma tó duréihā āma rob'ui'ére, ĩ́sadawa wasu'u 'rata 'wa hā:

“Wanhib'apito, ma tó āne ĩ́ma siwaihu'u:

49-50 Wa hā hāiwa nhipai āma, Apito. Ti'ai āma zama, Apito. ĩ́waihu'u pese wa, wa hā uburé Apito. ĩ́wétési uburé marí hā te 'manharí waihu'u pese di. E niha te za tawamhā ĩ́nhorōwa hā ĩ́ma ĩ́ri za'ra wa'wa, ĩ́wa 're ĩ́nhamra u'ási mono zéb da hā. Mare di. 'Re ĩ́nhamra u'ási mono zéb da hā ĩ́ma 'ri waihu'u za'ra wa'aba ō di za.”

Āne ma tó Wanhib'apito mreme hā wama wasu'u, ĩ́sadawa wasu'u'wa hā. — Āne ma tó Esitéwā hā dama ĩ́pire za'ra norí ma rob'rāzarōno hā 'rāsutu za'ra, dahi'rata norí wasu'u na hā.

Esitéwāhā dā'ázé wasu'u

51 Tawamhā Esitéwā hā te duré tāma nharí za'ra, dama ĩ́pire za'ra norí ma:

— A norí wa'wa hā aipo're za'ra wa'aba ō di. Aip'ē tete za'ra wa'aba di. 'Re ĩ́hāimana u'ási mono zadawa wasu'u hā aipo'reptō newa, 're wapari za'ra wa'aba mono ō di. Aihí'rata norí wa'wa hā 're ĩ́hāimana za'ra mono zém ne, te 're aihāimana za'ra wa'aba mo. 'Re ĩ́hāimana u'ási mono pé'ézani hā te asiwí 're ĩ́wē'ō za'ra wa'aba mo, aihí'rata norí wa'aba ne hā.

52 Aihí'rata norí wa'wa hā ma tó sada 're sib'ru za'ra, 'Re ĩ́hāimana u'ási mono zadawa wasu'u 'rata 'wa norí zada. 'Re ĩ́morí wē uptabi hā za we ĩ́wisi wana, ma tó aré te te dama 're wasu'u za'ra, ĩ́sadawa wasu'u'wa norí hā. Tane nherē, ma tó aihí'rata norí wa'wa hā te te 're simro, ta norí hā. Aihí'rata norí wa'wa hā āne te te 're ĩ́manharí za'ra mono ne, ma tó duré a norí wa'aba zama dama ĩ́sa'ré za'ra wa'wa, 're ĩ́morí wē uptabi hā da te dasiwí wírí da.

53 'Re ĩ́hāimana u'ási mono ma, hāiwa āma romhuri'wa norí, ĩ́simiroti hā te te aima 're sōmri za'ra wa'aba mono nherē, ĩ́simiroti na 're wapari za'ra wa'aba mono ō di. — Āne te tāma nharí za'ra, dama ĩ́pire za'ra norí ma, Esitéwā hā.

54 Tawamhā zudezu norí ma roti'wa norí hā Esitéwāhā mreme te te wapari za'ra wamhā, ma tó sadawa 'ru za'ra. Taha wa, te 'wasitete za'ra, Esitéwāhā āma.

55 Tane nherē, 'Re ĩ́hāimana u'ási mono pé'ézani na ma tó aptete, Esitéwā hā. Taha wa, hāimo ma tó 'mazawē. Tawamhā 'Re ĩ́hāimana u'ási mono hāiba na rowa'a za'ēne hā ma tó 'madā. Zezusi hā ma duré tisā. 'Re ĩ́hāimana u'ási mono nhimire niwí te za.

⁵⁶ Tawamhã Esitéwã te 'mahâ, âne:

— 'Madâ'â za'ra wa'aba. Ôhōta hâiwa, ma we 'ridawa. Ti'ai âma dasiré ïpodo hã wa tō sabu. 'Re ìhâimana u'âsi mono nhimire niwî te za. — Âne te tâma 'mahârâ za'ra.

⁵⁷ Taha wa, tinhîb'rata na ma tō tiwi sipo're nhidâ za'ra, dama roti'wa norî hã. Asa tâma 're sipari za'ra mono sina, ma tō sô rere, te te siwi âri da.

⁵⁸ Sa'êtê te siwi 'mapra, 'ri nho'ômo babarâi u, êtê na te te siwi wîrî da. Tawamhã ti'uza ïsisiwîmhã, ma tō sada sani za'ra, Esitéwãhã 'ruiwapari'wa norî hã te te nasi siwi ahâri pibui pese da. Saru na aibâ ïpréduptém nhisi 'rata, ma tō ti'uza hã sa'ra za'ra, ta hã te te sa 'madâ'â za'ra da.

⁵⁹ Tawamhã êtê na te te nasi siwi ahâri ré, ma tō Esitéwã hã mre, Zezusihi ma. Âne ma tō sina 'mahâ:

— Wanhib'apito Zezusi, ïpê'êzani te za ïwi ï'â, âma atême ïmorî da.

⁶⁰ Tawamhã hi'râtito ma tō nhamra, Esitéwã hã. Mreme 'râihã na ma tō duré tâma mre, âne:

— Wanhib'apito, tiwasédé te te ï'âma 'manharî za'ra nherê, tâma pisutu za'ra ô di za, rowasédé hã.

Tawamhã mrepare, ma tō dârâ oto, Esitéwã hã.

8

Saru hã ïsazei'wa norî âma te te ïrowasutu na'rata zé wasu'u

¹⁻³ Esitéwã hã da te ïwîrîzém na hã ma tō Saru hã dapa'uze.

Tawamhã aibâ norî hã ma tō Esitéwã siwi tisê, 'Re ìhâimana u'âsi mono zadawa 'madâ'â pese 'wa norî hã. Te te siwi sêrê wamhã, te âma ti'ry'ry, wawai 'râihã na. Tawamhã Esitéwã dâ'â parimhã, bâtâ na ma tō awa'awi sada tazahi za'ra ni, ïsazei'wa norî zada. Taha wa, ïsazei'wa norî hã Zeruzarê âma 're ïsi'ubumroi mono zô, ma tō rowasédé hã sô tiwatobro na'rata za'ra, sada dazahi za'ra wa. Saru hã Zezusihi zazei'wa norî âma ma tō rowasutu, ïsazei'wa hâimanazé hã si'utôri da. 'Ri baba te nasi zasi, ïsazei'wa norî zô. Tawamhã rob u te te nasi da'anhamra, aibâ hã duré pi'ô zama. Taha pari, te nasi te te da'âma arobâdâ, te te nasi da'a'maza da, dazazêb 're. Taha wa, ïsazei'wa norî hã ma tō te te siwi ropé, Zeruzarê hawi. Ta hawimhã Zudeza na danhipti'a nho'ômo nhisi u ma tō te te ropé, duré Samariza na danhipti'a nho'ômo nhisi u zama, daza'rui mono bâ. Zezusihi zadawa wasu'u'wa norî si te zahadu 're si'ubumro, Zeruzarê âma hã.

Samariza na danhipti'a nho'ômo nhisi âma, Piripi hã ïwasu'uwê na te te dama ïrowasu'u za'ra zé wasu'u

⁴ Tawamhã daro mono bâ, ïsazei'wa norî te te ïropéi mono hã sihutu sidâpâsi, ma tō te te dama 're rowasu'u za'ra, Cristuhu wasu'uwê na.

⁵ Tawamhã Piripi hã Samariza na danhipti'a nho'ômo nhisi u, ma tō mo. Tame ma tō Cristu hã te te dama 're wasu'u, 'Re ìhâimana u'âsi mono te te ïpisudu hã, Danho'reptui'wa da.

⁶ Marî ïwê hã dama ï'manharî waihu'u'ô hã ma tō te te dama 're ab'manharî. Piripihî mrepare hã da te wapari za'ra wamhã, aihîni ma tō ïmreme na 're danhopré, marî ïwê hã te te 're ï'ab'manharî mono hã da te sabu za'ra wamhã.

⁷ Wa'uburé ré 're ìhâimana za'ra mono norî hã ahâ na ma tō apese. Sadari sina te nasi wairé, wa'uburé hã. ïmorî waihu'u'ô hã ahâ na ma duré pese za'ra, Piripi hã. ïhi'rê zama ma tō ahâ na apese.

⁸ Taha wa, datoî uptabi za'ra di, 'ri nho'ômo âma 're ïdahâimana za'ra mono norî hã.

⁹ Tame te aibâ hã 're sãmra, Sima na ïsisi hã. Romhōsi pese 'wa, ta hã. Taha âma ma tō aré 're tob'uzu za'ra, samaritanu norî hã. Sima hã ïwaihu'u pese newa, te dama 're siwasu'u u'âsi, dama ïpire na.

¹⁰ Aihîni ma tō Simahã mrepare na 're danhopré aré. Âne te da te dasima 're rowasu'u za'ra, ô hã 'Re ìhâimana u'âsi mono newa:

— "Ôhō ma hã, aibâ ma hã ïwaihu'upe te tâma tihâiba. 'Re ìhâimana u'âsi mono waihu'u pe hã sa'êtê na te tâma tihâiba." — Âne te da te dasima 're wasu'u za'ra.

¹¹ Wahub ahâ na ma tō âma 're datob'uzu za'ra, te te dama 're ï'aromhōsi mono zém na hã. Taha wa, te âma 're danhopré pese.

¹² Tane nherê, 'Re ìhâimana u'âsi mono, da'âma 're ïsib'a'uwê mono zé wasu'u na, duré Zezu Cristuhu wasu'u na, Piripi hã te te dama rowasu'u wamhã, ma tō saze za'ra ni. ïsimirowasu'u hã da te saze za'ra wamhã, â dawabzuri ma tō 'manharî za'ra ni, aibâ norî hã, duré pi'ô norî zama.

¹³ Simahã zama ma tô saze. Â dawabzuri ma duré dame 'manha. Te te 'manharĩ parimhã, te oto Piripihĩ siré 're mo. Tawamhã te nasi âma titob'uzu, dama ĩ'manharĩ waihu'u'õ hã te te nasi dama ab'manharĩ wa, Piripihĩ hã.

¹⁴ Tawamhã Zezusihĩ zadawa wasu'u'wa norĩ hã zahadu Zeruzarê âma hãimana za'ra ré, ma tô samaritanu norĩ wasu'u hã wapari za'ra, 'Re ĩhãimana u'âsi mono zadawa wasu'u, da te ĩsaze za'ra zém na rowasu'u hã. Taha wa, ma tô Pedru norĩ hã siwi satõrĩ zahuré, Zuwãhã me. Samariza u datême neb zahuré da, ma tô satõrĩ zahuré ni.

¹⁵ Tawamhã ma tô datême aimasisi. Simasisi wi, ma tô 'Re ĩhãimana u'âsi mono ma timreme zahuré, da'âma, Tipê'êzani hã te te dama sômri da.

¹⁶ 'Re ĩhãimana u'âsi mono pê'êzani hã zahadu datême wisi õ di, tamomomhã. Wanhĩb'apito Zezusihĩ nhisi na si ma tô â dawabzuri hã 'manharĩ za'ra ni.

¹⁷ Tawamhã Pedru norĩ hã ma tô tinhib'rata na da'a'rã upi zahuré. Te te âma da'a'rã upi zahuré mono wamhã, 'Re ĩhãimana u'âsi mono, ma tô Tipê'êzani hã dama sômri za'ra.

¹⁸ Tawamhã Sima hã ma tô sabu, Zezusihĩ zadawa wasu'u'wa norĩ, da'rã nhisiwi tinhib'rada hã te te nomri zahuré mono ré hã, 'Re ĩhãimana u'âsi mono, Tipê'êzani te te dama ĩ'anhomri mono zé hã. Taha wa, ma tô sima wê, rob'uiprazé hã te te tâma sômri zahuré da.

¹⁹ Âne te tâma nharĩ zahuré:

— Â. Rob'uiprazé, wa za aima sômri 'wa, asine wa'aba, ĩnhĩb'rada hã da'rã nhisiwi te 're aza'ra mono da, aiwaihũ'u pese 'wa hã we ĩma sômri aba da, asine wa'aba te 're da'a'rã upi mono wamhã, 'Re ĩhãimana u'âsi mono, Tipê'êzani te te dama 're anhomri mono da. — Âne te tâma nharĩ zahuré, Sima hã.

²⁰ Tawamhã Pedru te asa tâma tinha, âne:

— E niha ma tô ĩrosa'rata wasé, rob'uiprazém na asima uipra da, 'Re ĩhãimana u'âsi mono hã tiwaihũ'u pe te te wama ĩsômri hã. Mo oto aimorĩ ropipa u, ate rob'uiprazéb ré.

²¹ 'Re ĩhãimana u'âsi mono, ma tô aiwaihũ'u, asima asimirosa'rata wasété na hã. Taha wa, a hã wanhimĩromhuri zarina, romhuri waihu'u õ di za. Ta hã atei õ di.

²² Aiwaseté wi aipi'ra na. Wanhĩb'apito ma, aimreme. Tãma asiwasu'u na asimirosa'rata wasédé hã te te aima pari da.

²³ Wa tô ĩsina aiwaihũ'u. Zahadu asimi'ru hã sa'etê di. Zahadu te Satanasi hã atété, aiwasété hawi aiwatobro tô da. — Âne te Simahã ma tinha, Pedru hã.

²⁴ Tawamhã Sima te asa tâma tinha:

— A norĩ wa'wa hã te za ĩ'âma aimreme 'wa, 'Re ĩhãimana u'âsi mono ma, ropipa hã uburé ĩma ĩrowasu'u na te te ĩma âma uawimrami tô da. — Âne te Sima hã asa tâma nharĩ zahuré, Pedru norĩ ma, Zuwãhã me.

²⁵ Tawamhã Pedru norĩ hã Wanhĩb'apito mreme na te te dama rowahutu zahuré pari, ma tô apã tineb zahuré, Zeruzarê u. Neb zahuré wamhã, te sipa zahuré, daza'ruĩ mono bã, Samariza na danhĩpti'a nho'õmo nhisi âma, Zezusihĩ wasu'uwê na te te dama rowasu'u zahuré mono da.

Piripihĩ hã aibã te te ĩsõpêtêzé wasu'u, Etizopizaha nhihudu hã

²⁶⁻²⁸ Tawamhã aibã hã ma tô mo, Zeruzarê u. Etizopiza na darom nhisi âma Cãdasi na pi'õ siroti'wa nhisi ma, rob'madã'á'wa hã. Etizopiza âma dama pire di, ta hã. 'Re ĩhãimana u'âsi mono âma wata da, ma tô mo. Âma wata pari, te oto mo apã tirob u, awaru na wedewara zapore na. Morĩ sina te te romnhoré, 'Re ĩhãimana u'âsi mono zadawa wasu'u 'rata 'wa nhĩmĩ'ui'ére na, Iza'izaha nhĩmĩ'ui'ére na.

Tawamhã hãiwa âma Wanhĩb'apito ma, romhuri'wa hã ma tô Piripihĩ ma rob'ru, âne:

— Aiwahutu, pi'reba aimorĩ da, Daza na 'ri nho'õmo nhisi u bádãdi tum na aimorĩ da, Zeruzarê hawi. — Âne te tâma tinha.

Taha wa, te Samariza hawi oto mo Piripihĩ hã, Daza u bádãdi na morĩ da. Tawamhã morĩ ré, ma tô tisã aibã hã, Zeruzarê hawi apã ĩmorĩ hã.

²⁹ Tawamhã 'Re ĩhãimana u'âsi mono pê'êzani hã ma tô tâma tinha Piripihĩ ma, ĩtême si'ré da, ĩsababa morĩ da, awaru na wedewara zapore zababa.

³⁰ Tawamhã ma tô ĩtême sina rotété, Piripihĩ hã. Tawamhã ma tô te te wapari, te te romnhoré mono ré, aibã hã. 'Re ĩhãimana u'âsi mono zadawa wasu'u 'rata 'wa nhĩmĩ'ui'ére hã te te sõré, Iza'izaha nhĩmĩ'ui'ére hã. Tawamhã Piripihĩ te âma 'mahã, aibã hã:

— E ĩwasu'u hã ma tô ĩwaihũ, ĩ'ui'ére, ĩsõré mono hã. — Âne te âma 'mahã.

³¹ Tawamhã asa te tâma tinha:

— E 'wa te te ĩma waihu'u bã, wa za waihu'u. — Âne te asa tâma tinha.

Tawamhã ma tô 'mahã, ĩtême sarõtõ da, awaru na wedewara zapore 're, siré neb da.

³² Rob'ui'ére te te ĩsõré mono hã âne:

"Pone'ërebâ, da te wîrî da, da te dasiwi Îsaprôni ne, ma tô dasiwi saprôni ni, da te dasiwi wîrî da. Tawamhâ dawî sisawî âna ma tô dama mo. Duré pone'ërebâ 'ra hâ da te séré nhîhâri wamhâ, Îsadari ô ne, ari'iwi ma tô tîhâiba.

³³ Wê nherê, ma tô dasiwi wîrî ni, wasété newa. Ni'wa hâ te te dawî sawî ô di, da te dasiwi wîrî tô da. Ti'ai âma 're morî ô di oto. 'Ra âna ma tô dârâ. Sihudu ô di. Sihudu ô wamhâ, da te wasu'u waihu'u ô di, Îsihudu wasu'u hâ."

Âne Îbaihâ na rob'ui'ééré, aibâ te te Îsôré mono hâ.

³⁴ Tawamhâ aibâ te oto sadanha, Pirîpi hâ:

— Îsadawa wasu'u 'rata 'wa hâ e 'wa hâ te wasu'u. E te siwasu'u. E aimawî hâ te wasu'u. Ma'âpé, Îma wasu'u na. — Âne te sadanha.

³⁵ Tawamhâ Pirîpi, rob'ui'ééré te te Îsôré mono zém na ma tô tâma rowasu'u na'rata. Zezusihi wasu'uwê hâ ma tô tâma waihu'u, aibâ ma.

³⁶ Tawamhâ bâdâdi na neb zahuré ré, ma tô â u aimasisi zahuré. Tawamhâ aibâ hâ ma tô â hâ tâma 'mahâ, Pirîpihi ma:

— Âhâta â. E wanhimizahâri ô di za a'â, â dawabzuri hâ Îma 'manharî da. — Âne te aibâ hâ sina 'mahâ.

³⁷ Taha wa, te Pirîpi hâ asa sadanharî pese:

— E tô sena, ma tô Îsazei pe. Sazei pese wamhâ, â dawabzuri te za tô Î'manha. — Âne ma tô Pirîpi hâ tâma tinha asa.

Tawamhâ aibâ, te duré tâma tinha:

— Tô sena wa saze, Zezu Cristu, 'Re Îhâimana u'âsi mono 'ra hâ. — Âne te tâma tinha.

³⁸ Taha wa, aibâ hâ ma tô tâma Îromhuri'wai ma tinha, awaru na wedewara zapore hâ a'â simizazâri da. Taha wa, ma tô Îré mazazâri za'ra. Âi ba, ma tô oto si'ra zahuré. Tawamhâ â dawabzuri, ma tô Pirîpi hâ tâma 'manha, aibâ ma. Tawamhâ apâ ma tô pu.

³⁹ Â hawî pusi wamhâ, Wanhîb'apito pê'êzani hâ awa'awi ma tô Pirîpihi âma aimani. Te te sâMRI ô di oto, aibâ hâ. Tane nherê, ma tô rowê na tirob u hâ wara apâ, to sina.

⁴⁰ Tawamhâ Pirîpi hâ sisa'rese âna ma tô wi, Azotu na 'ri nho'ômo nhisi u hâ. Siwaihu'u ô di. Tawamhâ ta hawî te oto mo, Sézarea na 'ri nho'ômo nhisi u. Tamomo morî ré, 'ri nho'u hâ te te anhopêté mono sidâpâsi ma tô sipa, Zezusihi wasu'uwê hâ te te dama wasu'u mono da. Tawamhâ ma tô oto wi, Sézarea u.

9

Saru hâ tîhâimanazém na te te Îsaprîzé wasu'u

Atusi 22.6-16; 26.12-18

¹ Tawamhâ Îsazei'wa norî hâ Zezusihi wasu'uwê na daro mono bâ te te siwi âma 're ropéi mono ré, te zahadu Saru hâ te te tâma 're amhâzépa za'ra, Îsazei'wa norî ma. Wanhîb'apito Zezusihi nhîrâ zarina 're nomro mono 'ru te, te te tâma 're amhâzépa za'ra, te te uprosi da. Tawamhâ nimahâ bâtâ na sasedoti Îpire uptabi u ma tô mo, 'Re Îhâimana u'âsi mono ma, da'âma romhuri'wa hâ Îpire uptabi u, rob'ui'ééré hâ te te tiwi waptêrê da.

² Ta hâ rob'ui'ééré hâ Damasitu na 'ri nho'ômo nhisi u te te âri da, ma tô tiwi waptê, tame zudezu norî te, rowahutu'wa norî ma, te te sômri za'ra da, sasedoti Îpire zadawa para Îtême Îmorî za'ra na rob'ui'ééré hâ. Tawamhâ Wanhîb'apito 're Îhâimana mono zém na 're Înomro mono norî hâ, rob'ui'ééré'wa zadawa para te za Saru hâ we te te simro, Zeruzarê u pawasisi ré, aibâ hâ, pi'ô zama.

³ Tawamhâ Damasitu u te te rosahutu wamhâ, waptu na ma tô hâiwa hawî rowa'a za'êne hâ tâma ai'ubuzi, Saruhu ma. Îhâiba nho'ômo, ma rob'uiuwê.

⁴ Taha wa, ma tô waptârâ, ti'ai wa. Ni'wai mreme hâ ma tô wapa. Âne te 'mahâ:

— Saru. Saru. E marî wa, te Îwi 're Îrowasutu u'âsi mo. — Âne te 'mahâ.

⁵ Tawamhâ Saru hâ te asa 'mahâ:

— Apito, e 'wa hâ, a hâ. — Âne te sadanha.

Asa te duré tâma tinha:

— Wa hâ Zezusi, wa ai'mahâ. Te Îwi 're Îrowasutu u'âsi mo.

⁶ Ma'âpé âhâna aiwahutu, 'ri nho'ômo u aimorî da. Tame te za ni'wa hâ aima roti, marî 'manharî da. — Âne te tâma tinha, Wanhîb'apito hâ.

⁷ Tawamhâ aibâ Îsiré Îsi'aba'rê norî hâ ône haré ma mazahâri za'ra. Ari'iwi te aimasa. Sadaihu'u âna ma tô ni'wa hâ âma mreme wapari za'ra. Tane nherê, ni'wa hâ te te âma sâMRI za'ra ô di, ta norî hâ.

⁸ Tawamhâ Saru, ma tô wahudu oto. Wahutu wamhâ, ma tô toporo. Tane nherê, te te rob'madâ'â waihu'u ô di. Tob a di. Taha wa, Îsiré Îsi'aba'rê norî hâ ma tô te te siwi patété, te te siwi saprôni da, Damasitu u.

⁹ Tame bādâ hã si'ubdatô te âma ne, te te rob'madâ'â waihu'u âna hâimana ré hã. Marî na si'upari ô di. Sai âna te nasi da'wa. Te te hã'rêne ô di duré.

¹⁰ Tawamhã Damasitu âma aibâ hã te 're sãmra, Zesusihi nhirã zarina 're ïmorî hã, Ananiza na aibâ nhisi hã. Tawamhã sôtô ô nherê, sôtô 'rowi te te ïrosawêrê ne, ma tô Wanhib'apito hã tâma sihâi'rê. Âne te 'mahâ:

— Ananiza.

Tawamhã asa ma sada'â:

— E marî, Ìnhib'apito.

Tawamhã Wanhib'apito te tâma tinha:

¹¹ — Aiwahutu, Zudasihî nhorôwa u aimorî da, “Awa'awi” 'ri nho'ômo nhî'riti nhisi âma ïsôrôwa u. Tame te za aibâ zô asinha, Saru na aibâ nhisi zô, Tasu na 'ri nho'ômo nhisi âma ïpoto zô. Âhãna te we ïma mre.

¹² Sôtô ô nherê, sôtô 'rowi te te ïrosawêrê ne, ma tô aiwaih'u'u, ïtême aiwisi ô ré. Te te rob'madâ'â hã. Asib'rada ï'râi âma hiri da, tômo wê da, ïtême ï'aimorîzém na hã ma tô waihu'u siro. — Âne te Ananizaha ma tinha, Wanhib'apito hã.

¹³ Tawamhã Ananiza te asa tâma tinha:

— Ìnhib'apito, da'ahâ na ma tô ïma wasu'u za'ra ni. Ô hã, u, Zeruzarê âma ma tô ïwasédé hã te te âma 're ab'manharî, asazei'wa norî âma.

¹⁴ Âme te za oto, u, sasedoti ïpire norî zadawa para dapawasisi za'ra, ai'âma 're ïdawata za'ra mono norî hã apâ te te simroi mono da. — Âne te asa tâma tinha.

¹⁵ Tawamhã Wanhib'apito te asa tâma tinha:

— Mo oto ïtême aimorî. Ô hã, Saru hã wa tô ïsima pisutu, ïzadawa wasu'u'wa da. Zudezu'ô norî ma, te za te te 're ïzadawa wasu'u, duré dama roti'wa norî ma, duré ïzarazéhé nhihudu norî ma zama.

¹⁶ Tawamhã, te te dama 're ïzadawa wasu'u mono wamhã, te za oto te te 're robzépata. Uburé za te te 're ïrobzépata mono zém na wa za tâma awaihu'u siro, Saruhu ma. — Âne te tâma tinha, Wanhib'apito hã.

¹⁷ Taha pari, ma tô mo Ananiza hã, Zudasihî nhorôwa u. Tawamhã ma tô 'ri para u âzé. Sébré wamhã, ma tô tinhib'rada hã tino, ï'râ nhisiwi, Saruhu 'râi âma. Âne te tâma tinha:

— ïsisânawâ Saru, Wanhib'apito hã ma tô we atême ïzatô, tô ô hã Zezusi hã, Damasitu u we aimorî ré, bādâdi wa, aima ïsihâi'rê hã. Ta hã ma tô we atême ïzatô, atômo wê da, apâ rob'madâ'â hã, duré ïpê'êzani ré si 're aihâimana mono da, aipê'ê wê na si. — Âne te tâma tinha.

¹⁸ Tawamhã awa'awi pe'a hã ne hã ma tô tizarôtô zahuré, ïtômo hawi. Ma tô apâ tâma ïromnho'a. Tômo wê di oto. Tawamhã ma tô wahudu. Wahutu wamhã, â dawabzuri ma tô tâma 'manharî ni awa'awi.

¹⁹ Â dawabzuri te te 'manharî parip si, ma tô ai'upa. Taha wa, apâ ma tô aptete oto.

Saru hã Damasitu âma ïsãmrazé wasu'u

Tawamhã bādâ umro na ma tô âma ne, Damasitu âma ïsazei'wa norî 'rata sãmra ré, Saru hã.

²⁰ Tawamhã awa'awi ma tô ïwasu'uwê na dama âma sãna'rata oto, rowahutuzé mono bâ, Zezusi hã 'Re ïhâimana u'âsi mono 'ra, 're ïhâimana mono na hã.

²¹ Da te wapari za'ra wamhã, aihîni, ma tô âma tatob'uzu za'ra ni. Taha wa, te âne dasima nharî za'ra ni:

— Oro ô hã Zezusihi zazei'wa te te 're 'mapârî mono za, Zeruzarê âma hã. Oro we wisi za duré âwa, Zezusihi zazei'wa norî zô, pawasisi ré apâ te te simroi mono da, sasedoti ïpire norî u. — Âne te dasima nharî za'ra ni.

²² Saru hã te te rowasu'u waihu'u pese di. Simirowasu'u pire di duré. Tawamhã tinhimirowasu'u pire na ma tô te te âma rosa'rê. Zezusi hã Danho'reptui'wa da, 'Re ïhâimana u'âsi mono te te ïpisutu wasu'u na ma tô mre me pire na tâma rowasu'u za'ra, zudezu norî ma. Tawamhã te te rowasu'u pire wa, zudezu norî hã te te sada'âbâ waihu'u za'ra ô di.

²³⁻²⁴ Tawamhã Damasitu âma hâimana ré, bādâ ahâ na âma ne pari, ma tô zudezu norî hã sada si'râ'ôtô, Saruhu da. Tawamhã ma tô dama âma rowairébé za'ra, te te siwi dama hâiba 'ru za'ra da, da te dasiwi wîri da. Taha wa, bātâ bāre ma tô sô tinhoprê, 'ri nho'ômo 'wawi wa'ra 'ridawa âma, te te siwi wîri da. Barana zama, te duré sô rob'madâ'â za'ra. Tawamhã da te dasima ï'ru za'ra zé wasu'u hã ma tô sina wapa, Saru hã.

²⁵ Taha wa, nimahã mara na Saruhu siré 're ïnomro mono norî hã ma tô Saru hã si'ôtô 're siwi âma si'ra 'ri zadazâri hawi, 'ri nho'ômo uirîzém na'rata âma 'ri mana u te te siwi hiri da, dawî.

Saru hã Zeruzarê âma ïsãmrazé wasu'u

²⁶ Tawamhã Zeruzarê u te oto mo, Saru hã. Tamomo oto wisi wamhã, Zezusihi nhirã zarina 're ñomro mono norĩ siré 're hãimana mono neza. Tane nherê, ta norĩ hã te te pipa za'ra di. Saru hã ãsazei uptabi 'wa na tãma siwasu'u za'ra wamhã, te te ãma saze za'ra ô di, ãsiwasu'uzém na hã.

²⁷ Tawamhã Banabé hã ma tô Saruhu ãma aime. Zezusihi zadawa wasu'u'wa norĩ u ma tô saprô, te te tãma wasu'u za'ra da, bãdãdi wa Wanhib'apito te te ãsabuzém na hã. Duré Saruhu ma, Wanhib'apito te te ãrowasu'uzém na ma tô tãma wasu'u za'ra. Damasitu ãma pahi ãna Zezusi te te dama ãwasu'uzém na, te duré tãma rowasu'u za'ra.

²⁸ Taha parip si, ma tô dasiré 're mo oto Saru hã, Zeruzarê ãma ãsazei'wa norĩ siré. Pahi ãna, ma tô Wanhib'apito hã te te dama 're sadawa wasu'u, Zeruzarê 're, 'ri wa'õno 're ãhãimana za'ra mono 'remhã.

²⁹ Zudezu norĩ, deredu norĩ mreme na 're ãmreme zusi mono norĩ ma, ma tô duré te te 're rowasu'u. Ta norĩ hã ma tô nisi asa tãma nharĩ za'ra, ãsimirowasu'u wa'rãmi. Tawamhã ta norĩ hã te sima 'ru za'ra, te te siwi wĩri da.

³⁰ Tawamhã ãsazei'wa norĩ hã da te dasima 'ru za'ra zé hã te te waihu'u za'ra wamhã, ma tô Saru hã siwi saprô, Sézareza na 'ri nho'õmo nhisi u. Ta hawi ma tô duré siwi satô, Tasu na 'ri nho'õmo nhisi u morĩ da.

³¹ Tawamhã ãsazei'wa norĩ ma, rowê di oto, Zudeza na danhipti'a nho'õmo nhisi ãma, duré Darireza na danhipti'a nho'õmo nhisi ãma, duré Samariza na danhipti'a nho'õmo nhisi ãma zama. Uburé tãma rowê za'ra di oto, siré 're ãsi'rã'õtô mono norĩ ma hã daro mono bã. 'Re ãhãimana u'ãsi mono pẽ'ẽzani nhimipawaptobzém na ma tô ãsazei'wa norĩ hã 're hãimana nhiptete za'ra. Taha zarina, ma tô duré ãsazei'wa norĩ za'rada hã sina hãimo. Ta norĩ hã ma tô Wanhib'apito Zezusi hã te te 're wazé pese za'ra.

Pedru hã Rida ãma ãhi'ré te te ãpesezé wasu'u

³² Tawamhã Pedru hã ma tô 're mo, daza'rui mono bã. 'Re morĩ wamhã, nimahã bãtã na ma tô wi, Rida na 'ri nho'õmo nhisi u, 'Re ãhãimana u'ãsi mono nhĩb'a'uwê, tame 're ãhãimana za'ra mono norĩ hã te te waimrami mono da.

³³ Tame ma tô aibã hã sôpêtê ãmorĩ'õ hã, Ene'asi na ãsisi hã. 8 na ma tô ãma tiwahu, waptãp si 're sa'wari mono ré hã.

³⁴ Tawamhã Pedru te tãma tinha:

— Ene'asi, Zezu Cristu ma tô aipese. Aiwahutu. Asa'warizé hã sa'ra pese. — ãne te tãma tinha.

Tawamhã awa'awi ma tô wahudu, Ene'asi hã.

³⁵ Tawamhã uburé Rida ãma 're ãdahãimana za'ra mono hã, duré Sarô na romhãpã nhisi ãma 're ãdahãimana za'ra mono hã te te 'madã'ã za'ra ni, ãhi'ré pesezé hã. Taha wa, ma tô aipizari za'ra ni, Wanhib'apito niwĩ oto 're danomro mono da.

Pedru hã Zopi ãma pi'õ te te ãhãiwa'utuzé wasu'u

³⁶ Tawamhã pi'õ hã Zezusihi nhirã zarina 're ãmorĩ hã te 're hãimana, Zopi na 'ri nho'õmo nhisi ãma. Tabita na pi'õ nhisi hã. Deredu norĩ nhiminhisizém na Docasi na ãsisi amo hã. ãsibrob'õ norĩ ãma te 're siwãrĩ u'ãsi, Docasi hã. Marĩ ãwê si te te dama 're ab'manharĩ u'ãsi.

³⁷ Tawamhã Rida ãma Pedru hã zahadu sãmra ré, ma tô tiházé. Docasi hã. Házé pire wa, ma tô dãrã. Taha wa, ma tô dasiwi hãiba upsõ ni. Da te dasiwi hãiba upsõi pari, ma tô dasiwi hiri ni, 'ri 're wa'wa u hãimo.

³⁸ Tawamhã Pedru hã Rida ãma zahadu ãhãimana na ma tô ãwasu'u hã wapari za'ra, Zezusihi nhirã zarina 're ãnomro mono norĩ hã. Rida u hã, romhuture di, Zopi hawimhã. Taha wa, ãwasu'u te te wapari za'ra wamhã, ma tô aibã norĩ hã 'mazatõrĩ zahuré ni sô, te te tãma sadawa wasu'u zahuré da, Zopi u ãtème morĩ su'u za'ra da.

³⁹ Tawamhã Pedru te sima rowê, ãme morĩ zahuré da. Tawamhã tamomo wisi wi, ma tô siwi saprô hãimo, 'ri 're wa'wa u. Tame, uburé pi'õi mrotô norĩ hã ma tô siwi uirĩ Pedru hã, siwa'õ za'ra sina. 'Ry'ry sina, te nasi zazahã hã tãma wê za'ra, te te 'madã'ã za'ra da, hãiba ré ré te dama 're ãhã'ãre mono hã, Docasi hã.

⁴⁰ Taha wa, ma tô Pedru hã tãma rob'ru za'ra, aihĩni wairébé da. Wairébé za'u si, ma tô hi'rãtitô nhamra, 'Re ãhãimana u'ãsi mono ma, mreme da. Tawamhã ma tô aipi'ra, pi'õ ãdã'ã u. Te tãma tinha, ãne:

— Tabita, ai'utu. — ãne te 'mahã.

Tawamhã pi'õ hã ma tô toporo. Pedru te te 'madã'ã wamhã, ma tô udu.

⁴¹ Taha wa, Pedru hã ma tô pa'ã, te te pawaptob da, para na sab da hãiwi. Tawamhã, wahutu wamhã, Pedru ma tô dazô hã, uburé Zezusihi zazei'wa norĩ zô, duré ãmrotô norĩ zô zama, ãhãiwa'udu hã te te sabu za'ra da. Taha wa, ma tô sabu za'ra ãhãiwa'udu hã, tihãibazém na apã hãimana wa.

⁴² Tawamhã 'ri pã ma tô pi'oi wasu'u hã te te ropé, Zopi ãma hã. Īwasu'u da te wapari za'ra wamhã, da'ahã na ma tô saze za'ra ni, Wanhib'apito hã.

⁴³ Tawamhã Pedru hã bātã ahã na ma tô tame tihãiba a'ã, Zopi ãma. Sima na romhã su'u'wa nhisi nhorōwa ãma te nhamra.

10

Conerizu hã, Pedruhu zô ìhãrãzé wasu'u

¹ Sézarea na 'ri nho'õmo nhisi ãma te aibã hã 're sãmra, da'wapéi'wa norĩ wada'uri'wa hã, Conerizu na ĩsisi hã. Ta hã romanu. Da'wapéi'wa norĩ hã, ĩsimi'ubumro norĩ hã Itarianu na ĩwaptērē zara hã. Ta norĩ zama romanu.

² 'Re ĩhãimana u'ãsi mono zadawa 'madã'ã'wa te 're hãimana Conerizu hã, duré ĩsõrõwa ãma ĩsiré 're ĩhãimana za'ra mono norĩ zama. Zudezu norĩ, ĩsibrob'õ norĩ ãma ma tô 're siwãrĩ u'ãsi ta hã, zudezu õ nherē. Te duré 're mreme u'ãsi, 'Re ĩhãimana u'ãsi mono ma.

³ Tawamhã nimahã bātã na bãdã supra wi, ma tô marĩ hã sabu, sõtõ õ nherē, sõtõ 'rowi te te ĩrosawērē ne. Hãiwa ãma 'Re ĩhãimana u'ãsi mono ma, romhuri'wa hã ma tô sabu. Ma tô we ĩtēme sina rotété. Taha wa, te oto 'mahã:

— Conerizu. — ãne te 'mahã.

⁴ Tawamhã tãma pē'ēwara nherē, te te 'madã'ã pese sina, ma sada'ã asa:

— E marĩ na te we ĩ'mahã.

Tawamhã asa te tãma tĩnha, hãiwa ãma romhuri'wa hã:

— 'Re ĩhãimana u'ãsi mono hã ma tô te te 're aiwapari ze, tiwi 're ĩrowaptērē mono zém na hã. Duré da'ãma 're aiwãrĩ pese mono na zama ma tô aiwaih'u. Taha wa, te ai'ãma 're po're pu'u u'ãsi.

⁵ Taha wa, te za ĩda'mazatõ, Zopi u Sima Pedru na aibã nhisi zõ.

⁶ Tinhipsara 'rata te a'ã nhamra, romhã su'u 'wai 'rata. ĩsõrõwa hã ãporé zaihã na te 're sa, 'ri hã. — ãne te tãma tĩnha.

⁷ Tawamhã ãne na te te tãma rowasu'u pari, ma tô apã mo ĩhawi, hãiwa ãma 'Re ĩhãimana u'ãsi mono ma, romhuri'wa hã.

Taha wa, te Conerizu hã sitēme sõ tihãrã zahuré, ĩsõrõwa 're, tãma ĩromhuri'wa norĩ zõ. Tizadawa zapari'wa zõ zama te hã, da'wapéi'wa zõ. 'Re ĩhãimana u'ãsi mono zadawa 'madã'ã'wa, da'wapéi'wa hã.

⁸ Marĩ te te ĩ'madã'ãzém na te tãma rowasu'u za'ra. Taha parimhã, ma tô satõrĩ za'ra, Zopi u si'aba'ré da.

⁹ Tawamhã si'aba'réi ré, ma tô tiwi ti'awē za'ra. Awē bātã na te duré ai'aba'ré, Zopi u. Tawamhã tamomo na tô oto rosahutu za'ra.

Tawamhã ta norĩ hã, Conerizu te te ĩsatõrĩ za'ra norĩ hã ĩtēme sihutu õ ré, abzuma ma tô Pedru hã sai'u 'ri nhisi hãpã u hãimo, 'Re ĩhãimana u'ãsi mono ma, mreme da.

¹⁰ Tawamhã mra hã ma tô tiwĩ. Sa neza. Tawamhã sõ danhipi ré, ma tô duré marĩ hã sabu, sõtõ õ nherē, sõtõ 'rowi te te ĩrosawērē ne.

¹¹ Hãiwa 'ridawa, ma tô sabu. Marĩ hã te we si'ra ti'ai u, zazahã hã wawē ne hã. ĩhã nhipti na ma we 'rã'õtõ.

¹² Abaze hã te ĩ're daba'wara, ĩnhize hã ĩnhi zei'õ zama siwazari, ti'ai baba di'i na te te sina 're ĩrobãdã za'ra mono norĩ zama. Si zama te siwazari daba'wara.

¹³ Tawamhã Pedru, ma tô wapa, ni'wai mreme hã. ãne te 'mahã:

— Pedru, aiwahutu, asima 'maiwĩrĩ da, asai hã. — ãne te 'mahã.

¹⁴ Tawamhã asa te tãma tĩnha:

— ĩnhib'apito, mare uptabi di. Marĩ ĩwasétère hã te 're 'masi mono õ di, wahi'rada Mozési hã te te wawĩ ĩwē'õ hã.

¹⁵ Tawamhã tãma ĩrowasu'u'wa te duré tãma tĩnha:

— 'Re ĩhãimana u'ãsi mono, marĩ hã ĩwē na te te aima wasu'u wamhã, wasété õ nherē, asiwi wē'õ õ di za.

¹⁶ Tô õhõ na si ma duré tãma ãma sahu, maparane. Taha pari, ma tô ti'ã apã, hãiwa u zazahã hã wawē ne hã.

¹⁷ Tawamhã Pedru te zahadu ãma rosa'rata, te te ĩ'madã'ãzém na hã marĩ te te tãma ĩwasu'u hã te te waih'u u õ wa. Te te ãma rosa'rata ré, Conerizu te te ĩsatõrĩ za'ra norĩ hã ma tô aihutu, 'ri nho'õmo u. Tawamhã Simahã nhorõwa zõ ma tô dazadanharĩ za'ra. 'Ridawa, te aimaasa oto.

¹⁸ Tawamhã te sõ da'mahãrã za'ra:

— E Sima Pedru hã te nhamra. — ãne te dazadanharĩ za'ra.

¹⁹ Zahadu te Pedru hã ãma rosa'rata, te te ĩ'madã'ãzém na. Tawamhã 'Re ĩhãimana u'ãsi mono hã ma tô Tipē'ezani na tãma waih'u, ãne:

— Ôhōta, aibâ norî hâ te we asô sinharî za'ra, si'ubdatô îhâiba norî hâ.

²⁰ Taha wa, ma'âpé aiwahutu, îtême si'ra za'ra da. Ta norî hâ zudezu'ô na 're hâimana za'ra mono nherê, tiwi aiwairî za'ra ô di za, wa hâ te we atême îsatôri za'ra na dâ'âsina. — Âne ma tô Pedruhu ma waihu'u, 'Re îhâimana u'âsi mono p'êzani hâ.

²¹ Tawamhâ Pedru, ma tô si'ra oto, aibâ norî u. Te tâma siwasu'u za'ra, âne:

— Wa hâ Sima Pedru na înhisi hâ. E marî da, te îzô asinharî za'ra wa'wa. — Âne te tâma siwasu'u za'ra.

²² Tawamhâ asa te tâma nharî za'ra:

— Da'wapé'wa norî wada'uri'wa hâ ma tô wei wazatôri za'ra atême, Conerizu na îsisi hâ. Ta hâ aibâ îwê, 'Re îhâimana u'âsi mono âma 're îwata u'âsi mono. Duré zudezu norî te te 're î'awêsamri mono. Hâiwa âma 'Re îhâimana u'âsi mono ma romhuri'wa hâ ma tô po're pu'u Conerizu hâ, asô hârâ da, asimirowasu'u hâ te te wapari da. — Âne ma tô tâma sadawa wasu'u za'ra, Pedruhu ma.

²³ Tawamhâ Pedru te tâma rob'ru za'ra, 'ri para u sisisi da, sôtô za'ra da a'â.

Tawamhâ ma tô âma ti'awê za'ra. Awêpsi, te îme timorî za'ra, aibâ norî me. Zezusihi zazei'wa norî zama te duré umro na îsiré ai'aba'rê, Zopi âma 're îhâimana za'ra mono norî hâ.

²⁴ Awêpsi te za aihutu, Sézeza u hâ. Tame Conerizu hâ te zahadu sô mapa. Sô îhârâ za'ra norî hâ te duré îsiré sô mapari za'ra, îsisânawâ norî hâ, duré îsiwadi norî zama.

Tawamhâ Pedru norî hâ ma tô aihutu. Sihutu wi, Pedru hâ te 'ri tême mo.

²⁵ 'Ri para u sébré ô ré, ma tô sina uzusi 'ridawa u, Conerizu hâ. Tawamhâ Conerizu hâ 'râ po sina, ma tô aime îpapara hi'râtitô, Pedruhu papara, tâma wapu wa, âma wata da.

²⁶ Tane nherê, Pedru hâ ma tô wahutu. Âne te tâma tinha:

— Aiwahutu. Wa hâ asine hâ a'uwê. — Âne te tâma tinha, Pedru hâ.

²⁷ Tawamhâ te te sima rowasu'u zahuré sina, ma tô oto si'mazasi zahuré, 'ri para u. Da'ahâ na ma tô sô tasi'râ'ôtô ni.

²⁸ Tawamhâ Pedru hâ te te da'madâ'â wamhâ, te dama tinha, âne:

— A norî wa'wa hâ ma tô îwaihu'u pese za'ra wa'wa, 're îwahâimana za'ra mono zém na hâ. Wa norî hâ zudezu norî hâ, zudezu'ô norî nhorôwa u 're wanhisisi waihu'u mono ô di. Wa norî hâ 'Re îhâimana u'âsi mono nhib'a'uwê 're wahâimana za'ra mono wa, wa tiwi 're wasi'uwati pese za'ra, zudezu'ô norî wi. Âne 're îwahâimana za'ra mono zé hâ. Tane nherê, 'Re îhâimana u'âsi mono hâ ma tô îma waihu'u pese oto, ni'wa, îwê na 'Re îhâimana u'âsi mono te te îma wasu'u wamhâ, zudezu'ô nherê, te îsiwi wê'ô tô da. Âne ma tô îma waihu'u.

²⁹ Taha wa, âma îzô aihârâ za'ra wa'aba wa, awa'awi wa tô we atême îmorî za'ra wa'wa, îsiwairî âna. Ma'âpé, îma rowasu'u za'ra wa'aba. E marî da, te âma îzô îda'mazatôri za'ra wa'wa, we îmorî da, atême za'ra wa'aba. — Âne te dama tinha, Pedru hâ.

³⁰ Tawamhâ Conerizu te asa tâma rowasu'u oto, âne:

— Bâdâ si'ubdatô ma tô î'âma ai'utô, aibâ îtême îwisizém na hâ. 'Re îhâimana u'âsi mono ma, îmreme ré, ma tô îtême wi, bâdâ sipra wi. Ti'uzza hâirâ na ma tô rob'uiwê, rowa'a nherê.

³¹ Tawamhâ te îma tinha, âne: "Conerizu, 'Re îhâimana u'âsi mono ma, 're aimreme mono ré, ma tô te te 're aiwapari ze. Duré da'âma 're aiwârî pese mono na ma tô aiwaihu'u.

³² Ma'âpé da'mazatôri, Zopi u. Sima Pedruhu zô aihârâ. Sima na romhâ su'u'wa nhisi nhorôwa âma te nasi da'wa. Â poré zaihâ na te îsôrôwa hâ 're sa, 'ri hâ." Âne te îma tinha.

³³ Taha wa, wa tô îsi'aba'rê na âma asô da'mazatô, we aimorî da. Taha wa, ma tô we oto watême aiwi. Rowê di oto. Âhâna wa tô âme wasi'râ'ôtô ni, 'Re îhâimana u'âsi mono nho'a, Wanhib'apito te te aima îpisutuzéb zarina, wa te wapari za'ra da, îsimiroti hâ. — Âne te Conerizu hâ tâma rowasu'u, Pedruhu ma.

Pedru hâ Conerizu norî ma, te te îrowasu'uzé

³⁴⁻³⁵ Tawamhâ Pedru hâ timreme na ma oto âma tâma sâna'rata za'ra, âne:

— Tô ta, âhâna wa tô waihu'u. Tô sena 'Re îhâimana u'âsi mono hâ ma tô si'âma ropisutu, dawi 're sisawi tô mono da, zudezu nherê, duré zudezu'ô nherê. Daro mono bâ, îwê si da te 're 'manharî za'ra mono da, îmreme, da te 're wapari za'ra mono wamhâ, te za tô te te sima 're da'awê aiwapsi. Misi, ma tô te te da'âma sima 're rosa'rata, dawi 're sisawi tô mono da.

³⁶ 'Re îhâimana u'âsi mono zadawa wasu'u hâ ma tô îwaihu'u za'ra wa'wa. Tizadawa wasu'u hâ ma tô wama waihu'u za'ra, wasiré Izarazéhé nhihudu norî ma. Zezu Cristu hâ ma tô watême satôri za'ra, te te wama rowasu'u za'ra da, 'Re îhâimana u'âsi mono âma rowê na 're îdanomro mono zém na hâ. Zezu Cristu hâ, uburé Danhib'apito uptabi. Taha wasu'u ma tô îwaihu'u za'ra wa'wa.

³⁷ Wasiré Izarazéhé nhihudu norî nhipti'ai âma 're îhâimana mono zém na hâ ma tô duré îwaihu'u za'ra wa'wa, Zezu Cristu hâ. Zuwâ Batita hâ ma tô dama rowasu'u, â dawabzuri hâ

da te 're 'manharī za'ra mono da. Taha parip si, wasiré Izarazéhé nhihudu norī nhipiti'ai mono bā, ma tō 're mo, Zezu Cristu hā. Darireza na danhipiti'a nho'omo nhisi āma 're ĩmorĩzém na ma tō sãna'rata.

³⁸ 'Re ĩhāimana u'ási mono hā ma tō Tipē'ězani hā tãma tisō, Zezusihī ma, Nazaré āma aré 're ĩsãmra mono ma. Tiwaihu'u pese zama ma tō tãma tisō. Taha wa, wasiré Izarazéhé nhihudu norī nhipiti'ai wa'wai baba, ma tō 're mo, marī ĩwē hā te te dama 're ab'manharī mono da, dama ĩ'manharī waihu'u'ō hā. Duré, Wa'uburé nhimiwada'uri nhipitete zarina 're ĩhāimana siwamnarī za'ra mono norī hā ma tō te te 're apese. Āne ma tō ĩwē hā te te dama 're ab'manharī, ĩmama hā ĩsiré 're morī u'ási wa, 'Re ĩhāimana u'ási mono hā. Āne Zezu Cristu 're ĩhāimana mono zém na ma tō ĩwaihu'u za'ra wa'wa.

³⁹⁻⁴⁰ Wa norī hā Zeruzarē āma duré daza'ruī mono bā, Izarazéhé nhihudu norī nhipiti'ai āma uburé Zezusi te te dama 're ĩ'ab'manharī wē mono na watōmo na wa te 're ĩ'madā'ā za'ra mono zéb zarina, wa tō wa te dama āma 're rowasu'u za'ra. — Āne te tãma rowasu'u za'ra, Pedru hā.

Te duré tãma rowasu'u za'ra:

— Ta hā, Zezu Cristu hā wedepo'o nnonhi'rāmi na da te dasiwi ĩsasōmrizém na ma tō dasiwi wīri ni. Tane nherē, bādā maparane āma si'utōri'ō ré, ma tō apā hāiwa'utu, 'Re ĩhāimana u'ási mono hā. Taha pari, ma tō tãma pisutu Zezusihī ma, wama sihāi'ré za'ra da.

⁴¹ Aihīni, da te sabu za'ra ō di. Wa norī si wa tō wahāiba pisutu sabu za'ra ni. Romhā ré, ma tō 'Re ĩhāimana u'ási mono hā sima wawē za'ra, Zezusihī hāiwa'utuzém na wa te dama 're rowasu'u za'ra mono da. Taha wa, watēmep si ma tō satō, Zezusi hā hāiwa'utu parimhā. Wa tō ĩsiré wasaihuri ni. Wa tō duré ĩsiré āhuri ni, apā hāiwa'utu parimhā.

⁴² Taha wa, ma tō wama pisutu za'ra, ĩwasu'uwē na wa te dama 're rowasu'u za'ra mono da. Ma tō duré wapisutu za'ra, Zezusi hā 'Re ĩhāimana u'ási mono te te ĩpisutu na, wa te dama 're wasu'u u'ási za'ra mono da, dama rowairébé'wa da hā. Tawamhā dahāiba ré 're ĩdahāimana za'ra mono norī ma, te za te te dama 're arowairébé, duré 're ĩdadā'ā za'ra mono norī ma zama.

⁴³ Duréihā 'Re ĩhāimana u'ási mono zadawa wasu'u 'rata 'wa sidāpāsi, ma tō Zezusi za te te dama 're ĩ'ab'manharī wē mono zém na wahi'rata norī ma, te te 're wasu'u sirōmo za'ra, āne: "Ō hā da te dasina 're umnhasi za'ra mono wamhā, dawasédé hā te za te te dama 're apari, te te da'āma 're ab'madā'ā mono tō da oto." Āne ma tō wahi'rata norī ma, te te 're wasu'u za'ra, ĩsada wa wasu'u wa norī hā. — Āne ma tō tãma rowasu'u za'ra, Pedru hā.

'Re ĩhāimana u'ási mono hā zudezu'ō norī ma, Tipē'ězani te te tãma ĩsōmri za'ra zé wasu'u

⁴⁴ Tawamhā Pedru hā zahadu te te tãma rowasu'u za'ra ré, ma tō 'Re ĩhāimana u'ási mono hā Tipē'ězani hā tãma sōmri za'ra, Pedruhu mreme wapari'wa norī ma hā. Taha wa, ĩpē'ē mono bā ma tō sisisi, hāiwa hawimhā.

⁴⁵⁻⁴⁶ Tawamhā zudezu norī, Zezusihī zazei'wa 're ĩhāimana za'ra mono norī hā, Pedruhu siré, Zopi hawi ĩsi'aba'ré norī hā ma tō āma titob'uzu za'ra, zudezu'ō norī āma, 'Re ĩhāimana u'ási mono, Tipē'ězani hā ta norī ma zama, te te oto sōmri za'ra wa. Taha wa, te zudezu'ō norī hā damreme amo na sima robzanhamri za'ra, timreme nai ō nherē. 'Re ĩhāimana u'ási mono āma, te duré tiwata za'ra, ĩwaihu'u pese na. Āne hā te te wapari za'ra wamhā, te zudezu norī hā sima nharī za'ra, āne:

— Oro ō norī hā zudezu'ō za, ma 'Re ĩhāimana u'ási mono hā Tipē'ězani hā tãma sōmri za'ra. — Āne te zudezu norī hā sima nharī za'ra.

Taha wa, te Pedru hā tãma nharī za'ra, āne:

⁴⁷ — 'Re ĩhāimana u'ási mono hā ma tō Tipē'ězani hā tãma sōmri za'ra, te te wama ĩsōmri za'ra ne hā. E 'wa hā te za tawamhā ā hā tiwi sawi za'ra, ā dawabzuri hā te te 'manharī tō za'ra da, ĩwa. Mare di. Te za tō 'manharī za'ra, ta norī hā. — Āne ma tō tãma nharī za'ra.

⁴⁸ Tawamhā ma tō tãma 'ru za'ra, Zezu Cristuhu nhisi na, ĩsada wa para ā dawabzuri hā te te 'manharī za'ra da, zudezu'ō norī hā. Tawamhā Pedru te siwi waptē, ĩ'rata sãmra za'ra da a'ā.

11

Pedru hā zudezu'ō norī u ĩmorĩzém na ĩsiwasu'uzé

¹ Tawamhā ĩsazei'wa norī hā, Zudeza na danhipiti'a nho'omo nhisi āma 're ĩhāimana za'ra mono norī hā, Zezusihī zadawa wasu'u wa norī me, ma tō wapari za'ra, āne: "Zudezu'ō norī zama ma tō, u, 'Re ĩhāimana u'ási mono zadawa wasu'u hā saze za'ra, Zezusihī wasu'uwē hā." Āne ma tō ĩsazei'wa norī hā rowasu'u hā wapari za'ra, daza'ruī mono bā.

² Tawamhā Pedru hā ma tō apā mo, Zeruzarē u. Wisi wamhā, ni'wam norī hā ma tō tãma nharī za'ra. Zudezu'ō norī āma te āne sima rosa'rata za'ra, ta norī hā: "Zezusi hā da te saze

za'ra nherê, danhihâiwata nhihâri ò wamhã, 'Re ìhâimana u'âsi mono te te 're da'anho'reptui mono ò di za." Æne te sima rosa'rata za'ra.

³Taha wa, ma tô tâma nharî za'ra, Pedruhu ma, ãne:

— Zudezu'ò norî ãma te nasi asô, ìsihâiwata nhihâri'ò norî nhorôwa ãma. Ma tô duré nasi ìsiré asa za'ra. — Æne te tâma nharî za'ra.

⁴Tawamhã Pedru hã ma tô tâma siwasu'u za'ra, ìsãna'rata hawi uburé ãma ìromhâimana mono zém na hã. Æne te tâma siwasu'u za'ra:

⁵— Zopi ãma ìnhamra ré, wa tô marî hã 'madã, ìnhotô ò nherê, ìnhotô 'rowi te ìrosawêrê ne. 'Re ìhâimana u'âsi mono ma, ìmreme ré, wa tô 'madã. Zazahã hã wawê ne hã ma tô we ìtème si'ra, hãiwa hawi. Ìhã nhipti wahuré na ma tô we ãma wasisi. Tawamhã ìnho're ma tô nomro.

⁶Ìremhã te 'madã'ã wa, wa tô ropodo hã ab'madã, ìpoto mono bã. Abaze hã siwazari, wa tô ab'madã, ìsahi zama. Ti'ai baba di'i na te te sina 're ìrobãdã za'ra mono norî zama, duré hãiwi 're ìsisa'rei mono zama, si hã wa tô ab'madã, siwazari.

⁷Ni'wai mreme hã wa tô duré wapa. Te ìma tinha, ãne: "Pedru, aiwahutu. Asima 'maiwi'rî da, asai hã." Æne ma tô ìma tinha.

⁸Tawamhã wa tô asa tâma tinha: "Ìnhib'apito, mare uptabi di. Marî hã ìwasétére hã te 're 'masi mono ò di, wahi'rada Mozési hã te te wawi ìwê'ò hã." Æne wa tô asa tâma tinha.

⁹Tawamhã hãiwa hawi te we duré ìma tinha, ãne: "'Re ìhâimana u'âsi mono, marî hã ìwê na te te aima wasu'u wamhã, wasété ò nherê, asiwi wê'ò ò di za."

¹⁰Tô òhò na si si'ubdatô ma tô ìma tinha. Tawamhã apã ma tô ti'ã, hãiwa u.

¹¹Apã te te âri parip si, aibã norî hã si'ubdatô ma tô ìzò 'maihihutu, ìza'warizéb u hã. Sézarezã hawi da te ãma ìtème ìsatôri za'ra hã ma tô ìzò aihutu.

¹²Tawamhã 'Re ìhâimana u'âsi mono pë'èzani hã ma tô ìma waihu'u, awa'awi ìme ìmorî za'ra da. Taha wa, wa tô ìme ìmorî za'ra. Ìsazei'wa norî hã, Zopi hawi ìsiré we ìsi'aba're norî hã 6 na ìhãiba hã, ta norî hã ma tô duré ìsiré ai'aba're, Sézarezã u. Wasihutu wamhã, aibã hã ìzò ìhãrã nhorôwa u wa tô asisi ni, 'ri para u, Conerizuhu nhorôwa u.

¹³Ta hã ma tô wama rowasu'u za'ra, hãiwa ãma 'Re ìhâimana u'âsi mono ma, romhuri'wa 'ri para u ìtème ìsihã'ré na. Ìtème wisi wamhã, ma tô ãne tâma rowasu'u: "Ma'ápé, da'mazatôri, Zopi u da'maimorî da, Sima Pedruhu zò.

¹⁴Ta hã te za Zezusihi wasu'uwê na aima rowasu'u za'ra wa'wa, taha zarina 'Re ìhâimana u'âsi mono hã te te asô'reptu za'ra wa'aba da, aihîni asôrowã ãma 're ìsi'ubumroi mono norî zama." Æne 'Re ìhâimana u'âsi mono ma, romhuri'wa nhimrowasu'u hã, aibã ma.

¹⁵— Tawamhã wa hã wa tô tâma rowasu'u na sãna'rata oto. Te rowasu'u ré, 'Re ìhâimana u'âsi mono hã ma tô Tipë'èzani hã tâma sômri za'ra, ìsãna'rata hawi te te wama ìsômri za'ra ne hã.

¹⁶Tawamhã Wanhib'apito mreme na wa tô po're puru, ìwana te te wama ìrowasu'u za'ra hã, ãne: "Zuwã Batita hã ma tô ã uptabi na si te te 're da'ahãiba ubu, ì dawabzuri te te dama 're ab'manharî mono wamhã. Tanei ò di za oto. 'Re ìhâimana u'âsi mono hã te za oto Tipë'èzani na te te 're aihãiba ubu za'ra wa'wa, ìré 're anomro u'âsi aba mono da." Æne ma tô wama rowasu'u.

¹⁷Wanhib'apito Zezu Cristu, wa te 're saze za'ra mono wamhã, 'Re ìhâimana u'âsi mono hã ma tô Tipë'èzani hã wama sômri za'ra. Misire òhò si we te te wama ìsômri za'ra ne, ma tô tâma sômri za'ra, ta norî ma. E marî, wa za tawamhã wa hã 'manha. E 'Re ìhâimana u'âsi mono te te ì'manharî, wa za ìsiwi wê'ò. E wa za ìsiwi dawê'ò, 'Re ìhâimana u'âsi mono, te te sima dawê nherê. Mare di. Te dawê'ò ò di za. — Æne te tâma nharî za'ra, Pedru hã.

¹⁸Æne hã te te wapari za'ra wamhã, asa te te tâma nharî waihu u za'ra ò di oto. Taha wa, ma tô ãma tiwata za'ra, 'Re ìhâimana u'âsi mono ãma. Tawamhã te oto sima rowasu'u za'ra, ãne:

— 'Re ìhâimana u'âsi mono hã ma tô zudezu'ò norî zama pisutu za'ra, tiwasété wi 're sipizari za'ra mono da, 'Re ìhâimana u'âsi mono siré, rowê na 're hãimana u'âsi za'ra mono da. — Æne te sima rowasu'u za'ra, zudezu norî, ìsazei'wa norî hã.

Àtizotiza ãma Zezusihi zazei'wa norî 're ìhâimana za'ra mono zé wasu'u

¹⁹Tawamhã Esitéwã da te dasiwi ìwirizéb zarina, ìsazei'wa norî ãma da te rowasété za'ra wa, ma tô da te ropé, ìsazei'wa norî hã Zeruzarê hawi. Penisiza na danhipti'a nho'òmo nhisi u, ma tô da te ropé, duré Sipri na danhipti'a nho'òmo nhisi u, duré Àtizotiza na 'ri nho'òmo nhisi u zama. Si'aba'rêi ré, zudezu norî ma si ma tô 'Re ìhâimana u'âsi mono zadawa wasu'u na rowasu'u za'ra, Zezusihi wasu'uwê na. Zudezu'ò norî ma, zahadu te te ãma rowasu'u za'ra ò di.

²⁰ Tane nherê, ìhâiba amo norî hâ, Sipri na danhipti'a nho'ômo nhisi âma arê 're ìhâimana za'ra mono norî hâ, durê Sireni âma danhipti'a nho'ômo amoi âma arê 're ìhâimana za'ra mono norî hâ, ma tô ai'aba'rê, Âtízotiza na 'ri nho'ômo nhisi u. Ta norî hâ zudezu norî ma si, te te rowasu'u za'ra ô di, Wanhîb'apito Zezusihi wasu'uwê na hâ. Zudezu'ô norî ma zama, ma tô âma rowasu'u za'ra.

²¹ Tawamhâ Wanhîb'apito hâ ma tô ô norî hâ pawaptob za'ra, tiwaihu'u pese na. Taha wa, da'ahâ na ma tô saze za'ra ni oto, Wanhîb'apito niwî 're dahâimana za'ra mono da oto.

²² Tawamhâ taha wasu'u hâ ma tô Ìsazei'wa norî hâ wapari za'ra, Zeruzarê âma siré 're Ìsi'râ'ôtô mono norî hâ. Te te wapari za'ra wamhâ, Banabê hâ ma tô satôri za'ra, Âtízotiza u morî da.

²³ Tamomo wisi wamhâ, ma tô waihu'u, 'Re ìhâimana u'âsi mono hâ ìwê na dama 're Ìsôpru mono zém na hâ tame. Taha wa, toi uptabi di, Banabê hâ. Tawamhâ ma tô dama roti, âne: — Aihîni, aipê'ê na sada 're asimi'ê za'ra wa'aba mono, Wanhîb'apito niwîp si 're aihâimana u'âsi za'ra wa'aba mono da. — Âne te dama roti, Âtízotiza âma hâ.

²⁴ Banabê hâ, aibâ ìwê. 'Re ìhâimana u'âsi mono pê'êzani na si 're ìmorî u'â, ta hâ. Wanhîb'apito te te sina 're Ì'umnhasi u'âsi mono, ta hâ. Taha wa, ma tô Wanhîb'apito zazei'wa hâ dasina tahâ'â ni, Banabêhé nhimirowasu'u zarina.

²⁵ Banabê hâ te oto mo Tasu u, Saruhu zô te te robzabu da.

²⁶ Tawamhâ tamomo wisi wamhâ, ma tô sôpêtê. Ta hawi, ma tô apâ saprô, Âtízotiza u. Tame te aimasisi zahuré oto. Ìsazei'wa norî, siré 're Ìsi'râ'ôtô mono norî 'rata te 're simasisi zahuré, te te dama 're rowahutu zahuré mono da. Misi ma tô âma tiwahub zahuré, te te 're da'apawaptob zahuré mono ré hâ. Tame ma tô Cristuhu nhîb'a'uwê na da te 're sisi na'rata za'ra, Zezusihi nhirâ zarina 're Ìnomro mono norî hâ, Âtízotiza âma hâ.

²⁷ Tawamhâ 'Re ìhâimana u'âsi mono zadawa wasu'u'wa norî hâ, ni'wam norî hâ te ai'aba'rê, Zeruzarê hawi, Âtízotiza u.

²⁸ Adabu na aibâ nhisi hâ te ìme timorî za'ra, tisiré Ìsadawa wasu'u'wa norî me. Tawamhâ Âtízotiza u sihutu wamhâ, Adabu hâ ma tô hâiwi za. 'Re ìhâimana u'âsi mono pê'êzani te te tâma Ìwaihu'uzéb zarina, ma tô dama waihu u siro romhâ ré, amnhô hâ daro mono bâ za dawî Ìsi'utôri mono na hâ. (Roma âma danhipti'apito Caradiu hâ te te dama 're roti mono ré, ma tô âne hâ tô da'âma tiromhâiba, amnhô ô na hâ.)

²⁹ Taha wa, Zezusihi zazei'wa norî hâ ma tô sima roti za'ra, Ìsibro hâ ìhâiba mono bâ tâma 're ìhâimana za'ra mono zéb zarina, te te po'ô mono da, Zudeza âma Ìsazei'wa norî ma, te te tâma sômri za'ra da.

³⁰ Tawamhâ ma tô te te tâma po'ô. Tawamhâ Banabê norî hâ ma tô Ìrê satôri zahuré ni Zeruzarê u, Saruhu me, tame da'madâ'â'wa norî ma, te te sômri zahuré da, Ìsibzari za'ra hâ.

12

Pedru hâ dazazém hawi 'Re ìhâimana u'âsi mono te te Ìsô'reptuzé wasu'u

¹ Tawamhâ apito Erodihî zadawa para ma tô Ìsazei'wa norî ma, da te tâma 're rob'manharî waseté za'ra.

² Taha wa, Zuwâhâ dub'rada hâ, Ti'adu hâ ma tô dasiwi wîri ni, Ìsi'uwazi 'wa pa na, apito Erodihî zadawa para.

³ Tawamhâ zudezu norî hâ ma tô siwi wêsâmri za'ra, Ti'adu da te dasiwi ìwîrizé hâ. Taha wa, Erodî hâ ma tô Pedruhu zama dama ti'ru, da te dasiwi âri da, dazazéb 're, da te sêré da. Ì'u'etê duptoi'ô na dasa, da te 're ìhuri mono zé bâtâ na ma tô siwi ti'â.

⁴ Te te siwi âri wamhâ, ma tô siwi tisê, dazazéb 're. Pascowa na dato nhisi hâ si'utôri parip si, dama rowairébé'wa norî nho're sab da, ma tô a'â siwi tisê, dazazéb 're, dama rowairébé'wa norî hâ da te ìwîrizéb da hâ, te te siwi âma rowairébé da. Taha wa, da'wapéi'wa norî hâ te nasi madâ'â za'ra siwa'râmi. Maparane si'uiwa na si mararé te ìtême ai'aba'rê. Abzuma zama te nasi siwa'râmi ai'aba'rê, barana zama, mara wa'wab zama, te te nasi madâ'â za'ra da. Uburé hâ 16 na ìhâiba za'ra hâ, da'wapéi'wa norî hâ.

⁵ Pedru hâ dazazéb 're, sâmrâ nherê, Ìsazei'wa norî hâ te sa'êtê âma mreme zusi u'â, 'Re ìhâimana u'âsi mono ma, siré 're Ìsi'râ'ôtô mono norî hâ.

⁶ Pedru hâ Erodî te te dama Ì'ruzé hâ romhuture di oto, dama rowairébé'wa nho're sab da hâ oto. Awêpsi te da dasiwi wazere ni, danho'a te te siwi âma rowairébé da, niha wamhâ, da te dasiwi wîri da. Tawamhâ Pedru hâ te oto nhono, barana. Da'wapéi'wa norî wa'wa, maparane Ìsi'uwazi nhorô rutu ré te nhono, pawasisi ré. 'Ridawa Ì'madâ'â'wa norî hâ te durê aima'wara zahuré.

⁷ Tawamhâ hâiwa âma Wanhîb'apito ma, romhuri'wa hâ awa'awi ma tô ìtême wi, mara wa'wa. Mara wa'wam nherê, dazazéb 'remhâ oto robrâ di, 'ri 're wa'wa âma hâ. Hâiwa hawi romhuri'wa hâ ma tô Pedru hâ rési Ìsisé âma, utu da. Te tâma tinha, âne:

— Ai'aba're na aiwahutu. — Āne te tãma tinha.

Taha wa, ĩpawasisizé hã si'uihá na ma tó tãma asisina, ĩsi'uwazi nhorô rudu hã.

⁸Tawamhã hãwa hawi romhuri'wa hã te duré tãma tinha:

— Ai'uza hã ai'usisizém na asima wasisi. Aipara'uza zama asima za na. — Āne te duré tãma tinha.

Tawamhã Pedru, ma tó ãma saze, te te 'manharĩ da. Te duré tãma tinha:

— Ai'ubuzé ĩhãpa ré, we ĩzarina aimorĩ. — Āne ma tó duré tãma tinha.

⁹Tawamhã sôtô 'rowim newa, ma tó ĩsarina watobro Pedru hã, te te ĩrosawērē newa. Te te waihu'u ô di, tó sena 'Re ĩhãimana u'ãsi mono ma romhuri'wa, ĩtēme ĩwisi na hã, hãwa hawi.

¹⁰Tawamhã 'ridawa 'madã'ã'wa ĩmorĩ'rada hã ma tó sa're zahuré. Taha nhana're ĩsa hã ma duré sa're zahuré, Pedru norĩ hã. Tawamhã ma tó aimasisi zahuré oto, dazazé 'wawi wa'ra 'ridawa u si'uwazi 'manharĩ na 'ridawa nhito pese u. Tawamhã uihã na ma tó 'ridawa nhitobzé hã tãma aiwanhizari zahuré. Ōne haré ma tó oto tipusi zahuré. Bãdãdi na ma tó tineb zahuré. Tawamhã hãwa hawi romhuri'wa hã ma tó Pedruhu wi aimani, awa'awi.

¹¹Taha wa, Pedru hã ma tó 'rãwi sina rosa'rata:

— E niha. Te rosawērē newa. Tane nherē, tó sena ma tó Wanhib'apito hã we ĩtēme satô, hãwa hawi tãma ĩromhuri'wa hã Erodihĩ wi, te te ĩnho'reptu da, zudezu norĩ te te sima ĩwé za'ra zéb zarina, ĩdã'ã tó da. — Āne ma tó sima tinha.

¹²Tawamhã, ãma ĩromhãimanazém na tó sena te te oto sina waihu'u wamhã, Marizaha nhorôwa u ma tó mo, Pedru hã. Zuwã Marcusihĩ na, Mariza hã. Tame da'ahã na ma tó tasi'rã'ôtô ni, ãma damreme zusi da. Tamomo te oto mo, Pedru hã.

¹³Wisi wi, ma tó 'ri 'wawi 'ridawa nhitobzé hã ta'a. Tawamhã dama romhuri'wa hã ma tó ĩtēme wahudu pi'ô hã, Rodi na ĩsisi hã 'ridawa ta'a'wa, te te waihu'u da.

¹⁴Tawamhã Pedruhu mreme te te waihu'u wamhã, ma tó tãma rowē watobro. Rowē te, si'aba're na apã sipi'rai wa, ma tó 'ridawa na po're hã. Te te tãma 'ridawa ãna, te tisiré norĩ ma te te wasu'u da, wara. Āne ma tó tãma wasu'u za'ra:

— Pedru hã te za, 'ridawa. — Āne te tãma wasu'u za'ra.

¹⁵Taha wa, te pi'oi ma nharĩ za'ra:

— Mare di. A hã asimiza'rese ô di.

Te duré asa tãma nharĩ za'ra:

— Tô sena te za, Pedru hã.

Tawamhã te oto nharĩ za'ra, ãne:

— Áté Pedruhu 'madã'ã'wa te za, hãwa hawi 'Re ĩhãimana u'ãsi mono ma, romhuri'wa hã.

¹⁶Āne ré, te Pedru hã nasi 'ridawa ta'a. Taha wa, ma tó oto tãma 'ridawa za'ra. Te te sabu za'ra wamhã, uihã na ma tó ãma titob'uzu za'ra, tó sena na.

¹⁷Tawamhã Pedru hã ma tó tinhib'rada hã tãma wē za'ra hãimo, ari'iwi si'ubumro da. Taha pari, ma tó tãma siwasu'u za'ra, Wanhib'apito hã dazazém hawi, te te ĩwazere na. Te duré tãma nharĩ za'ra:

— Ti'aduhu ma, te za ĩwasu'u za'ra wa'wa, duré ĩsiré ĩsazei'wa norĩ ma zama. — Āne te tãma siháiba 'ru za'ra. Taha pari, ma tó tiwi timorĩ za'ra nimomo.

¹⁸Tawamhã ãma awē wamhã, awē wi, da'wapéi'wa norĩ hã Pedru te te siwi sa'rese za'ra ô wa, ma tó tãma tip'ēwara za'ra, da'wapéi'wa norĩ hã.

¹⁹Pedruhu zó sôpré pese da, ma tó Erodĩ hã tãma sô rob'ru za'ra. Sô sôpré pese nherē, te te siwi sãmri ô di. Taha wa, Erodĩ hã ma tó ĩ'madã'ã'wa norĩ hã sadanharĩ pese za'ra, Pedruhu ãma. Taha pari, ma tó dama 'ru za'ra, da te simro da, dazazé 'madã'ã'wa norĩ hã.

Apito Erodihĩ dã'ázé wasu'u

Tawamhã apito Erodĩ hã ma tó mo, Zudeza na danhipti'a nho'ômo nhisi hawi, Sézareza na 'ri nho'ômo nhisi u, tame sãmra da a'ã.

²⁰Tawamhã apito Erodĩ hã ma tó sahi u'ãsi dazada hãimana, Tiru na 'ri nho'ômo nhisi ãma 're ĩdahãimana za'ra mono norĩ zãda, duré Sido na 'ri nho'ômo nhisi ãma 're ĩdahãimana za'ra mono norĩ zãda zama. Taha wa, Tiru hawi ma tó da'madã'ã'wa norĩ hã ai'aba're, apito Erodihĩ u, Sido hawib zama. Erodĩ hã te te siwi sadaihu'u da, ma ĩtēme sito. Tawamhã Barasitu na Erodihĩ nhibrob 'madã'ã'wa nhisi u uimrehēne, ma aihutu. Tawamhã te ãne tãma siwasu'u za'ra, Barasituhu ma:

— Ma'ãpé, wa'ãma aime za'ra na, Erodihĩ me apã wa te wasima ropese za'ra da, wasazé hã wa te duré wasima 're uipra za'ra mono da, ĩsib'a'uwē norĩ wi apã. — Āne te tãma siwasu'u za'ra, Barasituhu ma. Tawamhã Barasitu hã ma tó ãma saze za'ra, ãma sime za'ra da. Taha pari, ma tó Erodihĩ u aihutu duré, te te sadawa pibu za'ra da duré ta hã, tisazé hã te te 're ĩ'uipra za'ra mono zéb da hã apã.

²¹ Taha wa, Erodi hã bådã te te sima ĩpisutuzém na ma tũ ti'uzã wẽ ĩhãpa hã sima tisẽ. Danhib'apito 're ĩsimasisi mono zẽb ãma ma tũ nhamra, tinhimirotizẽb ãma, te te dama roti za'ra da.

²² Tawamhã te te dama roti za'ra pari, ma tũ ãne ãma tawata za'ra ni, damreme 'rãihã na: — Őhũ mreme hã, aibã mreme ō di. ĩhãiba'ũ mreme, ĩwãihu'upese mreme. — ãne te ãma tawata za'ra ni, ĩwãihu'upese newa.

²³ Tawamhã awa'awi ma tũ hãiwa ãma Wanhib'apito ma romhuri'wa hã azã, ĩhãzẽ pire na, Erodi hã. 'Re ĩhãimana u'ãsi mono ãma si 're ĩdawata za'ra mono zẽ hã te te sima sawi wa, ma tũ azã. Marĩ hã ĩsãna wai'u ne hã ãma sẽpu'u wa, ma tũ dãrã, Erodi hã.

²⁴ Tawamhã 'Re ĩhãimana u'ãsi mono zadawa wasu'u hã ma tũ ropẽ, 'ri pã. Sadawa wasu'u za'etẽ di oto.

Banabẽ norĩ hã Saruhu me, Ātizotiza u apã ĩnebzẽ wasu'u

²⁵ Tawamhã Banabẽ norĩ hã ma tũ apã tineb zahurẽ, Saruhu me, Ātizotiza na 'ri nho'õmo nhisi u. ĩsazei'wa norĩ nhizari te te ĩ'wapẽ zahurẽ hã te te dama sũmri zahurẽ pari, ma tũ apã tineb zahurẽ, Zeruzarẽ hawi. Zuwã Marcusi hã te ĩsirẽ timorĩ zahurẽ.

13

Banabẽ norĩ hã tinhimiromhuri na te te ĩsãna'rata zahurẽ zẽ wasu'u

¹ Tawamhã Ātizotiza ãma 'Re ĩhãimana u'ãsi mono zadawa wasu'u'wa norĩ hã durẽ dama rowahutu'wa norĩ hã te 're si'ubumro, ĩsazei'wa norĩ wazari. ãne ĩsisi za'ra hã: Banabẽ hã, durẽ Simi'ã hã, ĩsisi amo hã Hãira na; durẽ Rusizu, Sireni ãma arẽ 're ĩsãmra mono hã; durẽ Saru hã, durẽ Mana'ẽ hã, apito Erodihi siwadi arẽ, Mana'ẽ hã, Erodihi nhorõwa ãma sirẽ prẽdub zahurẽ wa.

² Tawamhã nimahã bãtã na ma tũ ta norĩ hã saihuri ãna asimro a'ã, Wanhib'apito ãma wata za'ra da. Taha wa, ma tũ 'Re ĩhãimana u'ãsi mono pẽ'ẽzani hã ãne tãma waihu'u za'ra:

— Banabẽ norĩ ma, wa tũ romhuri hã pisutu zahurẽ, Saruhu me. Te te ĩma 're romhuri zahurẽ mono da, wa tũ ĩsima pisutu zahurẽ, ta norĩ hã. Taha wa, te ĩpisutu zahurẽ zẽb zarina, te za oto tãma ĩpisutu za'ra wa'wa, asiti wa'aba oto neb zahurẽ da. — ãne ma tũ tãma waihu'u za'ra.

³ Tawamhã 'Re ĩhãimana u'ãsi mono ma, te durẽ mreme zu, saihuri ãna. Tinhĩb'rada ma tũ ĩ'rãĩ ãma sa'ra za'ra, Banabẽ norĩ 'rã nhisiwĩ, 'Re ĩhãimana u'ãsi mono te te tãma ĩwãihu'u za'ra zẽb zarina, te te tãma pisutu za'ra da, romhuri hã. Taha parip si, ma tũ siwi satõrĩ zahurẽ, neb zahurẽ da oto.

Sipri ãma Banabẽ norĩ te te ĩromhuri zahurẽ zẽ wasu'u

⁴ Tawamhã Banabẽ norĩ hã ma tũ tineb zahurẽ, Saruhu me. 'Re ĩhãimana u'ãsi mono pẽ'ẽzani rẽ, ma tũ tineb zahurẽ, Sere'usiza na 'ri nho'õmo nhisi u. Ta hawi, te durẽ tineb zahurẽ, Sipri na rob'rẽ za'iti nhisi u. Rowa'u'u na uba'renem na ma tũ saprĩ zahurẽ, dame.

⁵ Tawamhã ma tũ aimasisi zahurẽ, Saramina na 'ri nho'õmo nhisi u. Tame ma tũ tinhimiromhuri na sãna'rata zahurẽ. Zudezu norĩ te, rowahutuzẽ mono bã, ma tũ tame 'Re ĩhãimana u'ãsi mono hã dama sadawa wasu'u zahurẽ. Zuwã Marcusi hã ma tũ ĩme timorĩ zahurẽ, romhuri na te te pawaptob zahurẽ da.

⁶⁻⁸ Sipri na rob'rẽ za'iti nhisi wa'wai baba, si'aba'rẽi wamhã, ma tũ aihutu, Paposi na 'ri nho'õmo nhisi u. Tame abzẽ tede'wa hã ma tũ sũpõtẽ za'ra, zudezu norĩ sirẽ hã, Bazezusi na ĩsisi hã. Deredu norĩ nhimĩnhisi na hã Erima na ĩsisi amo hã. 'Re ĩhãimana u'ãsi mono zadawa wasu'u'wa newa, te tarẽ te te dama 're rowasu'u. Danhib'apito siwadi, Bazezusi hã. Sẽzi'u Paru na danhib'apito nhisi hã. Ta hã, rosa'rata waihu'u pese 'wa. Tawamhã ma tũ sũ thãrã zahurẽ, Banabẽ norĩ zũ Saruhu me, te te waparĩ pese da, 'Re ĩhãimana u'ãsi mono zadawa wasu'u hã. Tawamhã Erima hã abzẽ tede'wa hã ma tũ 'Re ĩhãimana u'ãsi mono zadawa wasu'u hã tiwi wẽ'ũ zahurẽ, danhib'apito hã Zesusihĩ wasu'uwẽ te te saze tũ da.

⁹ Tawamhã Saru, Paru na ĩsisi amo hã ma tũ aptete, 'Re ĩhãimana u'ãsi mono pẽ'ẽzani na. Taha wa, abzẽ tede'wa te te 'madã'ã sina,

¹⁰ ma tũ tãma tinha, ãne:

— Wa'uburẽ 'ra, a hã. Uburẽ ĩwẽ nhitob'ru, a hã. Aihãimana nhipese di. ĩwasẽtẽ si, te asima 're ĩ'azawi pese mo. 'Re ĩhãimana u'ãsi mono nhimiroti hã wẽ nherẽ, te dawi ãma 're ĩ'azaprĩ u'ãsi mo, ĩwasẽtẽre na.

¹¹ Āhãna, 'Re ĩhãimana u'ãsi mono hã te za ai'azã. Tawamhã te za a'ã atob'a. Bãtã nhimirowa'a hã 'madã'ã ō di za a'ã. — ãne te tãma tinha, Paru hã.

Tawamhã awa'awi, ma tũ titũmozazu, Erima hã. Ma tũ tiwi tirobra durẽ, tob'a wa. Taha wa, ma tũ te te nasi rob'upi dazũ, ni'wa hã te te saprõni da.

¹² Tawamhã danhib'apito hã aibã ãtob'a na te te 'madã'ã wamhã, ma tã saze, sena na Zezusihi wasu'uwẽ hã. Wanhib'apito nhimiroti na ma durẽ titob'uzu.

Átizotiza amoi ãma Paru norĩ te te ãromhuri zahurẽ zẽ wasu'u

¹³ Tawamhã Paru norĩ hã te ai'aba'rẽ, Paposi hawi, Pãpiriza na danhipti'a nho'õmo nhisi u. Rowa'u na uba'renem na te ai'aba'rẽ, dame. Tane nherẽ, Zuwã Marcusi, ãme morĩ zahurẽ õ di. Ma rẽme zahurẽ, Zeruzarẽ u morĩ da apã. Pãpiriza u sihutu wamhã, Peredi na 'ri nho'õmo nhisi u te ai'aba'rẽ, Paru norĩ hã.

¹⁴ Ta hawi, te durẽ ai'aba'rẽ, Pisidiza na danhipti'a nho'õmo nhisi u. Tawamhã ma tã aihutu, Átizotiza na 'ri nho'õmo nhisi u. Sihutu wamhã, sabadu na ma tã asisi, zudezu norĩ te, rowahutuzẽb u. Tame te asimro ni.

¹⁵ Wasirẽ Izarazéhẽ nhihudu norĩ, asima wẽ za'ra wa'aba wamhã, te za wama ãrowasu'u za'ra wa'wa, wama robze za'ra da. — ãne ma tã 'mahãrã za'ra.

— Wasirẽ Izarazéhẽ nhihudu norĩ, asima wẽ za'ra wa'aba wamhã, te za wama ãrowasu'u za'ra wa'wa, wama robze za'ra da. — ãne ma tã 'mahãrã za'ra.

¹⁶ Taha wa, Paru hã hãwi ma tã za. Tinhib'rada, ma tã dama wẽ, ari'iwĩ dasi'ubumro da. Tawamhã te dama tinha, ãne:

— Wasirẽ Izarazéhẽ nhihudu norĩ, ãwapari za'ra wa'aba. Durẽ zudezu'õ norĩ, a norĩ wa'aba zama wasirẽ õ nherẽ, 'Re ãhãimana u'ãsi mono ãma 're aiwata za'ra wa'aba mono norĩ hã, ãwapari za'ra wa'aba.

¹⁷ 'Re ãhãimana u'ãsi mono hã Izarazéhẽ nhihudu norĩ nhib'apito hã ma tã wahi'rata norĩ hã sima pisutu za'ra, ãma sib'a'uwẽ za'ra da. ãsihudu sidãpãsi, ma tã te te 're apawapto, sitẽbrẽ da, Ezitu ãma tisirẽ'õ norĩ 'rata 're si'ubumroi mono rẽ hã. Ta hawi, ma tã sani za'ra, tiwaihu'u pese na.

¹⁸ A'ubuni wĩ, 're dahãimana za'ra mono rẽ, ma tã te te 're da'ab'madã'ã pese, ãma 're dazaihã popo'o za'ra mono nherẽ. 40 na ma tã da'ãma tiwahu, a'ubuni wĩ te te 're da'ab'madã'ã mono rẽ hã.

¹⁹ Cana'ã na romnhisi ãma ma tã 'Re ãhãimana u'ãsi mono hã da'uprosi. 7 na dapoto mono bã ma da'uprosi, a'uwẽ norĩ hã, ãwa 're ãdasi'ubumroi mono hã. Tawamhã tinhib'a'uwẽ ma, ma tã sãmri za'ra ti'a hã, Izarazéhẽ nhihudu norĩ ma.

²⁰ ãwa dawi 're rob za'ra mono rẽ hã, 450 na ma tã ãma tiwahub za'ra.

— Tawamhã dama ãmreme pire norĩ hã misi sidãpãsi ma tã dama pisutu za'ra, ãsadawa para dama rowairẽbẽ'wa 're hãimana za'ra mono da, Samuwẽ hã ãpotozẽb u. Tawamhã ma tã podo, Samuwẽ hã. Prẽdu wamhã, ta hã ma tã 'Re ãhãimana u'ãsi mono hã te te dama 're sadawa wasu'u. Ta hã ãsadawa wasu'u 'rata 'wa, Samuwẽ hã.

²¹ Tawamhã Izarazéhẽ nhihudu norĩ hã ma tã tiwi waptẽrẽ za'ra, 'Re ãhãimana u'ãsi mono wĩ, ni'wa hã danhib'apito ne, te te 're ãda'uwati mono da hã, te te pisutu da. Taha wa, 'Re ãhãimana u'ãsi mono hã ma tã tãma hãiba nhomri za'ra, Sau hã da'uwati'wa da. Sauhu mama hã, Tisi na ãsisi hã. Bẽzamihi nhihudu ta hã, Tisi hã. Sau hã te te 're da'uwati mono rẽ hã 40 na ma tã ãma tiwahu.

²² Tawamhã te te oto 're da'uwati mono tã da, ma tã waze, 'Re ãhãimana u'ãsi mono hã. ãsa'u hã ma tã Dawi hã dama hãiba nho, da'uwati'wa da oto. Ta hã ma tã durẽ wẽsã oto. ãne te te ãwẽsãmri zẽ hã: “Dawi hã Zẽséhẽ 'ra hã ãma wẽ di. ãnhimiroti te te ãma uwaimrami da, te za te te 're ãwapari u'ãsi.” ãne ma tã Dawi hã wẽsã, 'Re ãhãimana u'ãsi mono hã.

²³ Dawihi nhihudu uwaibaba, ma tã 'Re ãhãimana u'ãsi mono te te ãpisutu Zezusi hã, Izarazéhẽ nhihudu norĩ nho'reptui'wa da hã. Wahi'rata norĩ ma, te te ãropisutuzẽb zarina, ma tã pisutu.

²⁴ Zezusi hã tinhimiromhuri na te te dama sãna'rata õ rẽ, ma tã Zuwã Batita hã te te dama 're rowahutu, wasirẽ Izarazéhẽ nhihudu norĩ ma, dawasẽtẽ wi 're dasipizari za'ra mono da, durẽ ã dawabzuri hã da te te 're 'manharĩ za'ra mono da.

²⁵ Tawamhã tinhimiromhuri te te ãsazãrizẽb u romhutu wapsi, te dama siwasu'u, ãne: “Cristuhu zõ te te asimipari za'ra wa'aba mo. Tawamhã te ã'ãma 're ãrosa'rata za'ra wa'aba mo, Cristuhu newa, Danho'reptui'wa da, 'Re ãhãimana u'ãsi mono te te ãpisutu newa. Tazahã, ta hã ã di, wa hã. ãza'u si ãma ãpire hã te za wei mo. Wei wisi wapsi, wa hã tãma ãwapure di za. Tãma ãwapure wa, ãpara'uza wasisizẽ, te apã tiwi wasihu waihu'u õ di za, ãnhisẽ wa.” ãne te dama siwasu'u, Zuwã Batita hã. — ãne ma tã Paru hã dama rob'rãzarõtõ, dahi'rata nhihudu uwaibaba, Zezusi we ãmorizẽm na hã.

²⁶ Te durẽ dama tinha:

— Wasiré Abra'áhã nhihudu norĩ, ĩwapari za'ra wa'aba, duré zudezu'õ norĩ, 'Re ĩhâimana u'âsi mono âma 're aiwata za'ra wa'aba mono norĩ zama. Uburé wa'udâna ma tã ĩwasu'uwê hã wei watême satõrĩ za'ra, wahâiba mono bâ, danho'reptuzé wasu'u hã.

²⁷ Zeruzarê âma 're ĩsi'ubumroi mono hã, duré tame dama ĩpire norĩ zama, Zezusi hã Danho'reptui'wa na te te waihu'u za'ra õ di. Sabadu sidâpâsi, 'Re ĩhâimana u'âsi mono zadawa wasu'u 'rata 'wa norĩnhimi'ui'éré hã da te dasima 're sõrê za'ra mono nherê, ĩwasu'u hã te te waihu'u za'ra õ di, ta norĩ hã. Taha wa, Zezusi hã dá'â da, te te siwi âma roti wamhã, te te waihu'u za'ra âna, ma tã 'Re ĩhâimana u'âsi mono zadawa wasu'u 'rata 'wa norĩ nhimirowasu'u hã siwi âma uwaimra, si'uihã na.

²⁸ Zezusi hã marĩ ĩwasédé hã te te 'manharĩ õ nherê, ma tã õ norĩ hã siwi waptê, Piratuhu wi, da'wapéi'wa norĩ hã te te siwi wĩrĩ da, wasété ré ne.

²⁹ Tawamhã Zezusi hã uburé 'Re ĩhâimana u'âsi mono mreme ui'éré 'rada hã te te siwi âma uwaimrami parip si, ma tã siwi si'ra, wedepo'o nhonhi'rãmi hawi. Ma tã siwi tisê, êtê zahâpã wa, ab're 're.

³⁰ Tane nherê, 'Re ĩhâimana u'âsi mono, ma tã apã hãiwa'utu, dá'â uptabi nherê.

³¹ Tawamhã apã hãiwa'utu pari, ma tã nasi dama sihãiré, bātã ahã na, Zezusi hã. Darireza hawi, Zeruzarê u aré ĩsiré ĩsi'aba're norĩ ma, ma tã nasi sihãiré. Ta norĩ hã te oto te te dama 're wasu'u wê za'ra Zezusi hã, Izarazéhé nhihudu norĩ ma.

³² — Wa norĩ zama ĩwasu'uwê hã wa te aima sõmri za'ra wa'aba da, wa ai'rata wahâimana za'ra wa'aba ni.

³³ 'Re ĩhâimana u'âsi mono, wahi'rata norĩ ma, te te ĩropisudu hã ma tã wama âma uwaimrami za'ra oto, wasiré ĩsihudu norĩ ma. Zezusi hã ma tã apã hãiwa'udu. Apã ĩhãiwa'utuzé wasu'u na 'Re ĩhâimana u'âsi mono âma danho're na rob'ui'éré, ĩsãna'remhã, te wama wasu'u, âne:

"A hã ĩ'ra. Â bātã na aihãiwa'utuzé bātã na wa za Aimagã na aima 're ĩhâimana."

³⁴ — Duré âma rob'ui'éré 'rata hãiba amo hã te duré wama wasu'u 'Re ĩhâimana u'âsi mono, Zezusi dá'â uptabi nherê, apã za te te ĩhãiwa'utuzém na, dá'â u'âsi nomro tã da. 'Re ĩhâimana u'âsi mono te tinha:

"Dawihĩ ma, tã sena marĩ ĩwê na te tãma ĩropisutuzém na wa za taha u'âbã aima âma uwaimrami za'ra wa'wa."

Âne ĩmreme na rob'ui'éré hã.

³⁵ ĩhãiba amo na rob'ui'éré ĩsãna'remhã, te duré wama wasu'u:

"Te te aima 're ĩromhuri wê u'âsi mono hã dá'â wamhã, rême õ di za, hãiba 'ro tã da."

Âne te wama wasu'u. — Âne te Paru hã dama rob'rãzarõtõ, rowasu'u 'rata na hã.

³⁶ Te duré dama rowasu'u:

— Dawi hã ti'ai âma 're morĩ ré, ma tã 'Re ĩhâimana u'âsi mono ma sina uwaimra, te te tãma ĩpisutuzéb zarina. Te te sina tãma uwaimrami pari, ma tã dârã, Dawi hã. ĩhi'rata norĩ 'ru âma êtê zahâpã wa ab're wa, ma dasiwi sêrê ni. Da te dasiwi sêrê wamhã, ĩhãiba hã ma ti'ro.

³⁷ Tane nherê, 'Re ĩhâimana u'âsi mono apã te te ĩhãiwa'udu hã, 'roi õ di. Hãiba wê na ma tã apã hãiwa'utu.

³⁸⁻³⁹ Wasiré norĩ, ma'âpé aihĩni ĩwapari pese za'ra wa'aba, tã sena na waihu'u za'ra wa'aba da. Danho'reptuzé wasu'u hã wa za aima waihu'u za'ra wa'wa. Zezusi hã, dawasété pari'wa. Duréihã, Mozési hã ma tã wahi'rata norĩ ma âma rowasu'u za'ra, 'Re ĩhâimana u'âsi mono nhimiroti na. ĩsimiroti zarina 're dahâimana za'ra mono nherê, dawasédé da te dasima 're pari waihu'u za'ra mono õ di, âma. Tane nherê, âhãna Zezusi hã da te dasina 're umnhasi za'ra mono wamhã, dawasédé te te oto da'âma 're ĩ'ab'madã'â mono õ zarina, te za oto te te 're da'awêsãmri.

⁴⁰⁻⁴¹ Duréihã 'Re ĩhâimana u'âsi mono zadawa wasu'u 'rata 'wa hã ma tã âne na âma rob'ui'éré, 'Re ĩhâimana u'âsi mono mreme na, âne:

"'Re aihãimana za'ra wa'aba mono ré, wa za niha dama rob'manha, ĩpipa na. Tawamhã za te dama ĩrob'manharizém na te za âma 're asiwawã za'ra wa'aba mo, ni'wa hã te te âma 're aipo're pu'u za'ra wa'aba mono nherê.

'Madã'â za'ra wa'aba. A norĩ wa'wa hã ĩ'âma aiwa'ê za'ra wa'aba norĩ hã, te za tãma 're a'rãmi za'ra wa'aba mo, ĩnhimirob'manharĩ pipa ma. Tawamhã ĩzadawa para te za ai'utõrĩ 'wa."

Âne 'Re ĩhâimana u'âsi mono mreme hã. Ma'âpé âma rosa'rata pese za'ra wa'aba za âne na hã, 'Re ĩhâimana u'âsi mono nhimirob'manharĩ pipa zé hã asina uwaimrami za'ra wa'aba tã da. — Âne te Paru hã dama rob'rãzarõtõ.

⁴² Tawamhã Paru norĩ hã zudezu norĩ te, rowahutuzém hawi pusi zahuré wi, ma tã waptêrê zahuré ni, sabadu amo na te te dama rowasu'u na sahu zahuré da.

⁴³Tawamhã rowahutuzém hawi dawairébé wamhã, da'ahâ na te Paru norĩ siré ai'aba'ré ni, Banabéhé me, zudezu norĩ hã, duré zudezu'õ norĩ hã, zudezu norĩ hãimanazéb zarina 're ìhãimana za'ra mono norĩ zama. Tawamhã ma tô tâma roti za'ra, 'Re ìhãimana u'âsi mono nhimpawaptobzém na siptete sina âma 're hãimana u'âsi za'ra mono da.

⁴⁴Tawamhã sabadu amo na aihĩni ma tô tasi'rã'õtõ ni, 'ri nho'õmo âma 're ìdasi'ubumroi mono hã, Wanhib'apito zadawa wasu'u hã da te wapari za'ra da. Da'umro di, da te ìwapari za'ra õ hã.

⁴⁵Tane nherê, da'ahâ na ìdasi'rã'õno hã zudezu norĩ hã te te da'madá'â za'ra wamhã, ma tô âma da'ruiwapari za'ra. Tawamhã Paruhu mreme hã ma tô dawí wê'õ za'ra, zudezu norĩ hã. Taha wa, timreme na ma tô nasi âma tâma wa'rãmi za'ra, Paruhu mreme wa'rãmi. Ma tô duré âma tiwa'ê za'ra.

⁴⁶Tane nherê, pahi âna ma tô Paru norĩ hã tâma nharĩ za'ra, zudezu norĩ ma, âne:

— A norĩ wa'aba ma, uimrehêne wa tô aima rowasu'u za'ra wa'aba ni, 'Re ìhãimana u'âsi mono zadawa wasu'u na hã. Tane hã tô, wê di. Tane nherê, taré newa, ma tô asiwi ìwê'õ za'ra wa'wa, ìwasu'uwê hã. Taha wa, ìbãi õ di, hãiwa âma rowê âma 're ì'ahãimana u'âsi za'ra wa'aba mono zéb da hã, 'Re ìhãimana u'âsi mono 'rata. Taha wa, wa za airême za'ra wa'aba ni, zudezu'õ norĩ ma, wa te tâma 're rowasu'u za'ra mono da oto.

⁴⁷Wanhib'apito hã ma tô âne na wama roti za'ra oto:

“A norĩ wa'wa hã wa tô aipisutu za'ra wa'wa, zudezu'õ norĩ ma, 're rob'uiwê za'ra wa'aba mono da, ìwê na, taha zarina te 're ìda'anho'reptui mono zém na daro mono bâ âma 're ropéi wa'aba mono da, dama.”

Âne te wama roti za'ra, Wanhib'apito hã. — Âne ma tô Paru norĩ hã tâma rowasu'u za'ra, Banabéhé me.

⁴⁸Tawamhã zudezu'õ norĩ hã Paruhu mreme te te wapari za'ra wamhã, toi uptabi za'ra di. Wanhib'apito zadawa wasu'u na ma tô tiwata za'ra. 'Re ìhãimana u'âsi mono hã, rowê na ì'rata 're hãimana u'âsi za'ra mono da, te te sima ìpisutu za'ra norĩ hã ma tô saze za'ra, Zezusi hã.

⁴⁹Tawamhã Wanhib'apito zadawa wasu'u hã ma tô ropé, daza'rui mono bâ, tame danhipti'a nho'õmo âma 're ìdahãimana za'ra mono norĩ u.

⁵⁰Tane nherê, zudezu norĩ hã ma tô tame dama ìpire norĩ hã wada'uri wasété za'ra, Paru norĩ zãda hãimana za'ra da. Pì'õ norĩ hã ìmreme pire norĩ hã, 'Re ìhãimana u'âsi mono âma 're ìwata za'ra mono norĩ, zudezu'õ norĩ, ta norĩ zama ma tô wada'uri wasété za'ra, sada hãimana za'ra da. Tawamhã ma tô âma rowasété zahuré ni, Paru norĩ âma, Banabéhé me. Ma tô tâma rob'ru zahuré ni, ta hawi danhipti'a nho'õmo hawi neb zahuré da, danhiti.

⁵¹Tawamhã Paru norĩ hã ma tô tipara zapru hã wamirĩ zahuré, dà'âma dà'â zahuré tô da. Taha wa, õne haré ma tô tineb zahuré, Iconizu na 'ri nho'õmo nhisi u.

⁵²Tawamhã Zezusihi zazei'wa norĩ hã Âtizotiza âma 're ìsi'ubumroi mono hã te 're to za'ra. 'Re ìhãimana u'âsi mono pè'èzani na ma tô aptete za'ra, ìpè'ê mono bâ.

14

Paru norĩ hã Iconizu âma te te ìromhuri zahuré zé wasu'u

¹Tawamhã Iconizu na 'ri nho'õmo nhisi u ma tô aimasisi zahuré, Paru norĩ hã, Banabéhé me. Tamomo simasisi zahuré wamhã, Âtizotiza âma sada ìromhãimana zahuré ne, ma tô duré sada tiromhãimana zahuré. Zudezu norĩ te, rowahutuzéb u ma tô tizasi zahuré, te te dama rowasu'u zahuré da. Tawamhã simirowasu'u wê wa, mreme wapari ze zahuré di, dama hã. Taha wa, da'ahâ na ma tô saze za'ra ni, zudezu norĩ hã, zudezu'õ norĩ zama.

²Tane nherê, zudezu norĩ te te 're ìsaze za'ra mono õ hã ma tô zudezu'õ norĩ hã wada'uri wasété za'ra, sada hãimana za'ra da, Paru norĩ zãda, uburé siré ìsazei'wa norĩ zãda zama.

³Tane nherê, Paru norĩ hã te Iconizu âma aimasisi hã zahuré. Pahi âna ma tô Wanhib'apito hã dama wasu'u wê zahuré. Tawamhã ìwasu'uwê hã tô sena na da te waihu'u za'ra da, Wanhib'apito hã ma tô Paru norĩ pawaptob zahuré, da te 're ìwaihu'u za'ra mono zéb da hã, marĩ ìwê hã dama ì'manharĩ waihu'u'õ hã te te dama 're ab'manharĩ zahuré mono da tame.

⁴Tane nherê, õhõ na si misi da te dasima âma rosa'rata za'ra õ di, 'ri nho'õmo âma 're ìdasi'ubumroi mono norĩ hã. Ma tô dasima aipo'o ni. Ni'wam norĩ hã ma tô zudezu norĩ niwĩ 're hãimana za'ra. Ni'wam norĩ hã te Paru norĩ niwĩ 're hãimana za'ra, Zezusihi zadawa wasu'u'wa norĩ niwĩ.

⁵Tawamhã ni'wam norĩ hã zudezu norĩ hã zudezu'õ norĩ me, ma tinhib'apito norĩ me âma sisaze za'ra, Paru norĩ âma te te rowasété za'ra da, duré êtê na te te siwi pãri da.

⁶Tawamhã damreme te te sina wapari zahuré wamhã, ma tô dawí tipusi zahuré, wara sina, Paru norĩ hã. Rica'oniza na danhipti'a nho'õmo nhisi u ma tô tineb zahuré. Tamomo

neb zahuré wamhã, Risitira na 'ri nho'ômo nhisi u, ma tô aimasisi zahuré, duré Derebi na 'ri nho'ômo nhisi amoi u.

⁷ Tame ma tô oto dama rowahutu zahuré, Zezusihi wasu'uwê na hã.

Paru nori hã Risitira ãma duré Derebi ãma te te ïromhuri zahuré zé wasu'u

⁸ Tawamhã Risitira ãma te aibã hã 're sãmra, ïhi're hã, ïpotozém hawi ïmorï'ô hã para uwa zahuré wa.

⁹ Paru hã te te dama rowasu'u ré, ma tô ïhi're hã mreme wapa. Tawamhã Paru, ma tô ïtème rob'madã. Te te 'madã'ã wamhã, ma tô sina waihu'u, tô sena Wanhib'apito te te ïsaze na hã, duré te te pese da, te te sina ï'umnhasi na hã.

¹⁰ Taha wa, te mreme 'rãihã na tãma tinha:

— Aiwahutu. Hãwi asa na, aipara na. — ãne te tãma tinha.

Tawamhã ïhi're, si'aba're na ma tô hãwi za. Ma tô timorï wê.

¹¹ Taha wa, Paru te te ïwahudu hã da te 'madã'ã za'ra wamhã, ma tô dasima 'mahãrã za'ra ni, ãne:

— ïhãiba'ô nori, ïwaihu'upese nori hã ma tô wei watème 'manhi'ra zahuré. Ma tô si'aibã zahuré, ãma 're ïwawata za'ra mono nori hã. — ãne ma tô dasima 'mahãrã za'ra ni, dasimremezém na, Rica'oniza ãma 're ïdasi'ubumroi mono nori mreme na.

¹² Tawamhã Paru nori hã ma tô sisi zahuré ni, Banabéhé me. ïhãiba'ô nori hã waihu'u pese newa da te dasima 're ïsisi za'ra mono zém na ma tô sisi zahuré ni. Banabé hã Zupité na ma sisi ni. Duré Paru hã Mecuriu na ma tô sisi ni, rowahutu'wai wa.

¹³ Zupitéhé ãma 're ïdawata za'ra mono zé hã 'ri nho'ômo 'wawi wa'ra 'ridawa 'rata, 'ri hã. Taha wa, aibã hã Zupitéhé ma da'ãma 're ïmreme mono hã ma tô powawé hã saprõni zahuré, ãma 're ïdawata za'ra mono zéb u, 'ri nho'ômo 'wawi wa'ra 'ridawa u hã. Tawamhã romnhirãrã na ma tô sô'rebzu zahuré, tãma 'madã'ã ze zahuré da. We ïsaprõni zahuré 'wa hã ma tô dasine sima wê, powawé hã te te pãri zahuré da, ãma dawata za'ra da, Paru nori ãma, waihu'u pese zahuré newa.

¹⁴ Tawamhã te te ï'manharï wasu'u hã Paru nori hã te te wapari zahuré wamhã, wara sina ma tô dawa'wa u tizasi waré zahuré. Ti'uzã hã ma tô hãiwazu zahuré, tinho'utu nho'ômoi baba, rob'ru te. Te te hãiwazu zahuré sina, ma tô hãrã 'rãihã na da'mahãrã zahuré, ãne:

¹⁵ — Aibã nori, e marï da, te za tane ï'manharï za'ra wa'wa. Tô'ã. 'Manharï za'ra wa'aba tô. Wa nori hã aibã, asine wa'aba hã. Zezusihi wasu'uwê na wa te aima rowasu'u za'ra wa'aba da, wa tô we wanem ni, atème za'ra wa'aba. Wa tô aima roti za'ra wa'aba ni, taré romhãiba na ãma 're aiwata za'ra wa'aba mono zém hawi 're aipizari za'ra wa'aba mono da, ïwaihu'upese newa ãma 're aiwata tô za'ra wa'aba mono da, 'Re ïhãimana u'ãsi mono niwï 're anomro aba mono da oto. Ta hã ropoto na'rata 'wa, duré hãiwa nhirõtô 'manharï'wa, duré ti'ai 'manharï'wa, duré âporé 'manharï'wa. Uburé ti'ai ãma 're ïdanomro mono da hã, ma tô te da'apoto, hãiwa nhirõtô ãma 're ïdahãimana za'ra mono da zama, duré â 'rãwi 're ïnomro mono da zama.

¹⁶ Duréihã, dahi'rata sidãpãsi da te dasima ïwézéb uwaibaba te 're danomro. 'Re ïhãimana u'ãsi mono hã te te 're da'ahã za'ra su'u mono ô di.

¹⁷ Tane nheré, ma tô dama 're siwaihu'u u'ãsi, tinhoprubzém na sena 're ïhãimana mono zém na, da te 're waihu'u za'ra mono da. Tã hã ma tô pisutu, we aima 're ta'a za'ra wa'aba mono da, te te aima 're robdi'i za'ra wa'aba mono da. Buru nho hã te duré te te aima 're sômri za'ra wa'wa, 're ï'rã za'ra mono zéb da hã, te te ïpisutu zarina, ãma 're asaihuri aba mono zéb da hã, aima ãma 're ïrobzei u'ãsi za'ra wa'aba mono zéb da hã. — ãne ma tô Paru nori hã dapo're pu'u zahuré, Banabéhé me.

¹⁸ ãne Zezusihi zadawa wasu'u'wa nori hã te te dawï sawi zahuré nheré, da te ãma rosahãri waihu'u za'ra ô di aré. Powawé hã te aré tô dasiwi pãri ni, Paru nori ãma ïdawata za'ra zéb da hã. Tane nheré, dama mreme pire zahuré wa, ma tô ãma rosahãri za'ra ni oto, da te dasiwi pãri tô da, ïwaihu'upese zahuré newa, ãma dawata tô zahuré da, Paru nori ãma hã.

¹⁹ Tawamhã zudezu nori hã ãtizotiza hawi te ai'aba're, Paru nori zarina, Iconizu hawib zama. Sihutu wamhã, ma tô ãma dawada'uri wasété za'ra, aihini sada danhiti'ru za'ra da. Tawamhã, ma tô ãma tasisaze za'ra ni. Taha wa, êtê na ma tô dasiwi hã ni, Paru hã da te dasiwi wãri da. Tawamhã, dã'ã newa, ma tô ãma rosa'rata za'ra ni. Taha wa, ma tô da te ãma robãdã, 'ri ahã nhiti.

²⁰ Tawamhã ïsiré ïsazei'wa nori hã ma tô siwi uirï. ï'rata simasab ré, ma tô udu, Paru hã. Tawamhã 'ri nho'ômo u te apã mo. Tame awém na te oto ne Paru nori hã, Banabéhé me. Derebi na 'ri nho'ômo nhisi u te tineb zahuré.

²¹Tame ma tō dama rowahutu zahuré, ĩwasu'uwē na. Tawamhā da'ahā na ma tō saze za'ra ni, Zezusihi nhirā zarina 're danomro mono da. Taha pari, te oto apā tineb zahuré dahawi, siwa'rāmi.

Paru nori hā Ātizotiza u, siwa'rāmi ĩneb zahuré zé wasu'u

Tawamhā Paru nori hā Risitira wa'wai baba te apā tineb zahuré siwa'rāmi, duré Iconizu wa'wai baba, duré Ātizotiza wa'wai baba.

²²Ri nho'ōmo wa'wai baba neb zahuré wamhā, ma tō ĩsazei'wa nori hā pawaptob za'ra, hāimana nhiptete na 're nomro mono da, 'Re ĩhāimana u'āsi mono āma te te 're sasōmri u'āsi za'ra mono da. Āne te duré tāma nharī za'ra:

— A nori wa'wa hā Zezusihi zazei'wai wa, marī ĩwasédé hā da te aima 're 'manharī za'ra wa'aba mono wamhā, tāma 're aipahi za'ra wa'aba mono ō di za. Āne na hā te za tō 're ĩrobzépata za'ra wa'aba mo. Tane nheré, 'Re ĩhāimana u'āsi mono nhīb'a'uwē oto 're anomro aba mono wa, te za niwapsi hāiwa āma ĩ'rata 're aihāimana u'āsi za'ra wa'aba mo, rowē na. — Āne te tāma nharī za'ra.

²³Tawamhā 'ri nho'ōmo mono bā ĩsazei'wa nori hā siré 're ĩsi'rā'ōtō mono sidápasi ma tō da'madā'ā'wa da hā te te 're apisutu zahuré, Paru nori hā. Sai āna, te duré ta nori hā timreme zahuré, Wanhib'apito ma, te te sina 're ĩ'umhasi za'ra mono ma, ĩwasété wi da'wawi 're ĩsimapa za'ra mono zém na te te 're pawaptob u'āsi za'ra mono da, da'madā'ā'wa nori hā.

²⁴Pisidiza na danhipti'a nho'ōmo nhisi wa'wai baba, te oto tineb zahuré Paru nori hā, Pāpiriza na danhipti'a nho'ōmo nhisi u.

²⁵Tame, ma tō Zezusihi wasu'uwē na dama rowahutu zahuré, Peredi na 'ri nho'ōmo nhisi āma. Taha pari, ma tō duré tineb zahuré, Atariza na uba're nhimizahārizém nhisi u.

²⁶Ta hawi te duré tineb zahuré, rowa'u'u na uba'renem na, dame. Tawamhā apā ma tō aimasisi zahuré Ātizotiza u, Siriza na danhipti'a nho'ōmo nhisi āma timorī na te te ĩsāna'rata zahuré zéb u. Ta hawi neb zahuré ō ré, ma tō Paru nori āma tamreme zusi ni, 'Re ĩhāimana u'āsi mono ma. Te te tāma 're romhuri wē zahuré mono da, te te 're pawaptob u'āsi zahuré mono da, ma tō āma tamreme zusi ni, Ātizotiza hawi neb zahuré ō ré. Te te dama 're rowahutu zahuré mono parimhā, ma tō apā aimasisi zahuré.

²⁷Ātizotiza u apā simasisi zahuré wamhā, ma tō ĩsazei'wa nori zō tihārā zahuré, te te ĩtēme ubumro da. Taha wa, ma tō dama siwasu'u zahuré, 'Re ĩhāimana u'āsi mono nhimipawaptobzém na. Āne te tāma rowasu'u za'ra:

— 'Re ĩhāimana u'āsi mono, ma tō wapawapto, marī ĩwē hā wa te dama 're 'manharī mono da, ĩwasu'uwē hā wa te dama āwisi da, zudezu'ō nori ma zama. Tawamhā ta nori zama ma tō te te 're sazei pese za'ra. — Āne te tāma rowasu'u za'ra, ĩsazei'wa nori ma.

²⁸Ātizotiza āma te oto aimasisi hā zahuré, Zezusihi nhirā zarina 're ĩnomro mono nori 'rata, Paru nori hā.

15

Zeruzarē āma ĩdasi'rā'ōtōzé wasu'u

¹Tawamhā aibā nori hā ma tō aihutu Ātizotiza u, Zudeza na danhipti'a nho'ōmo nhisi hawi. Tawamhā ĩsazei'wa nori ma, te roti za'ra, āne:

— Zudezu'ō nori hā, Mozési hā wahi'rata nori ma, te te ĩpisutu zarina, 're sisihāiwata nhihāri za'ra mono ō nheré, 'Re ĩhāimana u'āsi mono te te 're sō'reptu za'ra mono ō di za. — Āne te tāma nharī za'ra, aibā nori hā.

²Tawamhā Paru nori hā Banabéhé me, ma tō wē'ō zahuré, ĩsimirowasu'u za'ra hā. Taha wa, te simreme wa'rāmi sa'etē āma sima nharī za'ra. Āne wa, ĩsazei'wa nori hā ma tō ni'wam nori hā pisutu za'ra, Paru nori siré si'aba're da, Zeruzarē u, tame da'madā'ā'wa nori me duré Zezusihi zadawa wasu'u'wa nori me, te te sima āma romnhoré za'ra da.

³Tawamhā ĩsazei'wa nori hā siré 're ĩsi'rā'ōtō mono nori hā ma tō āma ana, ĩsi'aba'rézém na hā. Ma tō si'mazatōri za'ra, ĩme 'masi'aba'rei hutu da. Tawamhā Paru nori hā Zeruzarē u si'aba'rei ré, Penisiza na danhipti'a nho'ōmo nhisi wa'wai baba, te ai'aba're, duré Samariza na danhipti'a nho'ōmo nhisi wa'wai baba zama. Taha wa'wai baba, si'aba'rei ré, ma tō ĩsazei'wa nori ma, te te rowasu'u za'ra, zudezu'ō nori hā 'Re ĩhāimana u'āsi mono u, 're ĩsipizari za'ra mono na hā. Tawamhā aihini ma tō dama āma rowē zani za'ra, tame ĩsazei'wa nori ma.

⁴Tawamhā Zeruzarē u ma tō oto aihutu. Sihutu wamhā, ĩsazei'wa nori hā, duré Zezusihi zadawa wasu'u'wa nori hā, duré da'madā'ā'wa nori hā ma tō siwi waibui wē, Paru nori hā. Tawamhā Paru nori hā ma tō dama rowasu'u za'ra aihini, 'Re ĩhāimana u'āsi mono nhimipawaptobzéb zarina uburé ĩsadawa para te te dama 're ĩ'ab'manharī zahuré mono zém na hā.

⁵ Tawamhā ni'wam norī hā ma hāiwi aimasa, parisezu norī hā te te dama rowasu'u za'ra da. Tawamhā te dama nharī za'ra, āne:

— Īsazei'wa norī ma, wa te roti za'ra wa'aba, zudezu'ō norī hā, dame 're sisihāiwata nhihāri za'ra mono da, uburé 'Re ĩhāimana u'āsi mono nhimiroti 'rata na Mozésihī nhimi'ui'ére zarina 're nomro mono da. — Āne te dama nharī za'ra.

⁶ Tawamhā Zezusihi zadawa wasu'u'wa norī hā ma tō si'rā'ōtō, da'madā'ā'wa norī me, te te sima āma romnhoré za'ra da niha.

⁷ Tawamhā te te sima āma romnhoré hā za'ra pari, ma tō Pedru hā hāiwi za. Āne te tāma nharī za'ra:

— Wasisānawā norī, ĩwapari za'ra wa'aba. Duréihā 'Re ĩhāimana u'āsi mono hā ma tō sima ĩpisutu, ĩhāiba pisutu zudezu'ō norī ma, Zezusihi wasu'u'wē na te tāma 're rowasu'u za'ra mono da, te te 're waparī za'ra mono wa, te te 're saze za'ra mono da. Āne na ma tō ĩ'āma ĩwaihū'u za'ra wa'wa.

⁸ 'Re ĩhāimana u'āsi mono hā dap'e'ē 'remhā danhimirosa'rada hā te te waihu'u pese di. Zudezu'ō norī hā te te 're saze za'ra mono wamhā, 'Re ĩhāimana u'āsi mono te te 're ĩwēsāmi za'ra mono zéb zarina, ma tō Tipē'ēzani hā ta norī ma zama te te 're anhomri, ĩsāna'rata hawi te te wama 're ĩ'anhomri mono ne.

⁹ Ta norī hā Zezusi te te sina 're ĩ'umnhasi za'ra mono zéb zarina si, ma tō ĩwasédé hā te te tāma 're aparī, wa norī hā wa te wasina 're umnhasi za'ra mono wa, wawasédé hā te te wama 're ĩ'aparī mono ne hā aiwa. Aimawi hā te te tāma 're apisutu mono ō di, zudezu'ō wa.

¹⁰⁻¹¹ E marī da, ma tō bété asima ĩwē za'ra wa'wa, 'Re ĩhāimana u'āsi mono hā pibu za'ra wa'aba da, niha te te aima ĩrob'manharī za'ra wa'aba ō zéb zō. 'Re ĩhāimana u'āsi mono nhimiroti 'rata na Mozési te te āma ĩrob'ui'ére hā wa te tāma āma 're uwaimrami waihu'u za'ra mono ō di, taha zarina 're ĩwasisō'reptu za'ra mono da hā. Wahi'rata norī zama te te tāma āma 're uwaimrami waihu'u za'ra mono ō di duré. Taha wa, e marī da, wa za bété wasiré ĩsazei'wa norī ma, wa te 're roti za'ra, Mozésihī nhimi'ui'ére zarina 're nomro mono da, zudezu'ō nheré. Ni'wa hā marī ĩpire uptabi hā te te danhoihī waptob āna, te te dama ĩsibu 'rāihā ne, ma tō a norī wa'wa hā ĩpire uptabi hā tāma ĩpisutu za'ra wa'wa, zudezu'ō na ĩsazei'wa norī ma hā. Tane nheré, tinhoprubzém na si ma tō Wanhīb'apito Zezusi hā te te 're wa'anho'reptu. Ōhō na si te duré ta norī zama te te 're anho'reptu, zudezu'ō norī hā. — Āne te tāma nharī za'ra, Pedru hā.

¹² Tame ĩsi'ubumro norī hā te ari'iwi asimro, Banabé norī mre me hā te te waparī za'ra da, Paruhu me. Uburé zudezu'ō norī ma, 'Re ĩhāimana u'āsi mono zadawa para, marī dama ĩ'manharī waihu'u'ō hā te te 're ĩ'ab'manharī zahuré mono zém na te dama siwasu'u zahuré.

¹³ Ta norī hā te te dama rowasu'u zahuré parimhā, te duré Ti'adu hā dama rowasu'u, āne:

— Wasisānawā norī, ĩwapari za'ra wa'aba.

¹⁴ Sima Pedru, ma tō wama rowasu'u pari za'ra, 'Re ĩhāimana u'āsi mono, tinhoprūm na zudezu'ō norī āma ĩsime na'rata zém na. Tinhīb'a'u'wē da, ma tō ni'wam norī si te te 're awaibu, zudezu'ō norī hā.

¹⁵ Āne na ma tō 'Re ĩhāimana u'āsi mono zadawa wasu'u 'rata 'wa hā āma rob'ui'ére, tō ĩsarina. Āne duréihā rob'ui'ére hā, uburé Danhīb'apito mre me na hā:

¹⁶ "Zahadu wa za apā ĩsina siri, Dawi na aihī'rata nhisi nhimirotizéb zarina ni'wa hā ĩshihudu uwaibaba hā siroti'wa da.

'Ri siprum nheré, ti'ai u'ēne hā te za ubumro ni, da te dasiwi āma 'ri téb da apā. Tane duré, Dawi hā duréihā pire na te te 're ĩda'ab'madā'ā mono zé hā si'utōrī nheré, wa za ĩshihudu hā pisutu, apā Dawihī nhimiroti zarina te te 're 'mairōti mono da.

¹⁷ Tawamhā zudezu'ō norī zama te za ĩzō 're sōpré, ĩnhīb'a'u'wē da, te ĩsima ĩpisutu za'ra norī hā te te 're ĩzaze za'ra mono da.

¹⁸ Wa hā uburé Danhīb'apito, wa tō āne hā ĩsāna'rata hawimhā dama waihu'u pa."

Āne ĩsada wasu'u ui'ére 'rada hā. — Āne ma tō Ti'adu hā tāma rob'rāzarōtō za'ra.

¹⁹ Te duré tāma nharī za'ra:

— Āhāna ĩnhimirosa'rada hā wa za aima waihu'u za'ra wa'wa. Zudezu'ō norī hā, 'Re ĩhāimana u'āsi mono u 're ĩsipizari za'ra mono norī wi, wa te tiwi 're ro'wa'rutu za'ra mono ō di za.

²⁰ Āne si wa za 'manharī za'ra ni. Wa za tāma rob'ui'ére za'ra ni, marī ĩwasété uptabi si, wa te tiwi sawi za'ra da, romhāiba 'manharī āma 're ĩdawata za'ra mono zéb da, abaze da te 're simroi mono wamhā, taha nhi hā te te 're huri tō mono da, duré siwa'ru tihāimanazé ĩwasédé hā te te 're 'manharī za'ra mono tō da, pi'ō na aibā na zama, duré danhimizama hā da te 're ĩsō'reti za'ra mono nhi hā waprui ré te te 're huri tō mono da, duré danhimizama waprui hā te te duré 're āhuri tō mono da. Āne si wa za dawī sawi za'ra ni.

²¹ Rowahutuzé mono bâ, sabadu sidâpâsi Mozésihi nhimi'ui'éré hã da te 're sôré za'ra mono ré hã, ma âma tiwahub ahã. Te duré da te dasima âma 're rowahutu u'âsi za'ra, 'ri nho'ômo mono bâ. Taha wa, Mozésihi nhimi'ui'éré hã dama waihu'u pese za'ra wa, te za â norî hã roti hã te te wama 're 'madâ'â za'ra, zudezu'ô norî hã, rowê na wasiré 're wahâimana za'ra mono da. — Âne ma tô Ti'adu hã dama rowasu'u 'râsutu.

Zudezu'ô na, Zezusihi zazei'wa norî ma, da te îrob'ui'éré za'ra zé wasu'u

²² Tawamhã Zezusihi zadawa wasu'u'wa norî hã, da 'madâ'â'wa norî me, ma tô aihîni âma sisaze za'ra, Îsiré Îsazei'wa norî me, Âtizotiza u tisiré norî hã te te siwi 'mazatôri zahuré da, Paru norî siré 'maneb zahuré da, Banabéhé me. Tawamhã Zudasi hã ma tô siwi pisutu, Basaba na Îsisi amo hã, Îsiré neb zahuré da, Siraha me. Ta norî hã simiroti prédub zahuré di, Îsazei'wa norî ma hã.

²³ Tawamhã Îsiré neb zahuré wamhã, rob'ui'éré, ma tô siré âri zahuré. Âne rob'ui'éré hã: "Wasiré Îsazei'wa norî, zudezu'ô na 're aipoto za'ra wa'aba mono hã, wa âma asawi za'ra wa'aba ni, Âtizotiza na 'ri nho'ômo nhisi âma 're aihâimana za'ra wa'aba mono norî hã, duré Siriza na danhîpti'a nho'ômo nhisi âma 're aihâimana za'ra wa'aba mono norî hã, duré Sirisiza na danhîpti'a nho'ômo nhisi âma 're aihâimana za'ra wa'aba mono norî hã. Wa norî hã Zezusihi zadawa wasu'u'wa norî hã duré âme da 'madâ'â'wa norî zama wa tô wasisânawã na wa te 're asisi za'ra wa'wa, wasiré Zezusihi zazei'wai wa.

²⁴ Wa norî hã wa tô romreme hã wapari za'ra ni. Aibã norî hã, aré wasiré 're Îsi'ubumroi mono hã ma tô, u, âma aî'aba're, atême za'ra wa'aba, wazadawa para ô nherê. Si'uihã na ma te u, tinhimirowasu'u na aiwi ro'wa'rutu za'ra wa'wa. Ma duré asimirosa'rada hã aiwi 'wa'rutu za'ra wa'wa.

²⁵ Taha wa, aihîni wa tô âma wasisaze za'ra ni, aibã norî hã maparane wasi'upana wa te wasiwi âma satôri zahuré da, atême za'ra wa'aba. Aibã norî hã Banabé norî siré te za âma tineb zahuré. Banabé norî hã Paruhu me, wama Îsawi pese zahuré.

²⁶ Ta norî hã Wanhîb'apito Zezu Cristu te te dama 're wasu'u wê zahuré mono da, 're neb zahuré ré, ma tô da te dasima 're 'ru zahuré, da te dasiwi pâri da. Tane nherê, ma tô Zezusi hã te te dama 're sadawa wasu'u u'âsi zahuré.

²⁷ Âhãna, wa Paru norî me wasiwi âma satôri zahuré ni Zudasi norî hã, Siraha me. Wanhîmi'ui'éré zarina te za 'rãwi aima wazadawa wasu'u za'ra wa'wa.

²⁸ 'Re îhâimana u'âsi mono pê'êzani hã ma tô wanhimirosa'rata waihu'u pe hã wama sômri za'ra, Îsimirosa'rada hã wa te waihu'u za'ra da. Tawamhã wa tô âma saze za'ra ni, wanhimiroti ahã na wa te aima 're roti za'ra wa'aba mono tô da. Âne si wa za aima roti za'ra wa'aba ni:

²⁹ 'Danhimizama hã romhãiba 'manharî âma 're dawata za'ra mono da, da te 're Îsimroi mono nhi hã 're huri aba mono ô di za. Duré îwapru hã 're âhuri aba mono ô di za. Duré danhimizama da te 're Îsô'reti za'ra mono nhi hã 're huri aba mono ô di za. Duré siwa'ru aihâimanazé îwasédé hã 're 'manharî za'ra wa'aba mono ô di za, pi'ô na aibã na zama.' Âne na si wanhimiroti za'ra hã, aima za'ra wa'aba hã. Âne na wanhimiroti zarina 're anomro aba mono wamhã, aima 're rowê za'ra wa'aba mono di za. Wa âma asawi za'ra wa'aba ni, îrême ma." — Âne ma tô tâma rob'ui'éré za'ra, Zeruzarê âma 're Îsi'ubumroi mono norî hã.

³⁰ Tawamhã Zeruzarê hawi, dasi'upana da te Îsatôri zahuré hã ma tô tineb zahuré, Âtizotiza u. Paru norî me te tineb zahuré. Sihutu wamhã, Îsazei'wa norî zô hãrã za'ra wa, ma tô ubumro. Rob'ui'éré, ma tô tâma sômri za'ra.

³¹ Taha wa, ma tô sôré za'ra. Te te sôré za'ra wamhã, toi uptabi za'ra di, roti hã wê wa.

³² Zudasi norî hã Siraha me, 'Re îhâimana u'âsi mono zadawa wasu'u'wa zahuré. Tawamhã ta norî hã ma tô Îsazei'wa norî ma roti zahuré. Simiroti hã zahuré di, ta norî hã. Taha wa, ma tô Îsazei'wa norî hã âma aptete za'ra, Îsimiroti zahuré na. Marî îwê hã te te 'manharî ze za'ra di.

³³⁻³⁴ Taha wa, ma tô bádã hã nasi âma si'utôri zahuré, Sira norî âma Âtizotiza âma simasisi zahuré ré hã. Tawamhã Îsazei'wa norî hã ma tô apã siwi satôri za'ra, rowê na apã neb zahuré da, te te siwi Îsatôri za'ra norî u.

³⁵ Paru norî hã te a'â aimasisi zahuré, Âtizotiza âma, Banabéhé me. Tame ni'wam norî me te te dama 're rowahutu zahuré mono da, duré Wanhîb'apito zadawa wasu'u na te te dama 're rowasu'u zahuré mono da, ma tô a'â aimasisi zahuré.

Paru norî hã siwi Îsiwanhizarizé wasu'u

³⁶ Tawamhã âma ronomro pese zahuré pari, te Paru hã Banabéhé ma tinha:

— Oto wane na apã, 're îwanebzé na'rata niwî. 'Ri nho'ômo u datême 're îwaneb na'rata zéb uwaibaba, Wanhîb'apito, wa te dama Îsadawa wasu'u na'rata zéb u, wa za wanem ni,

Īsazei'wa norī hā wa te duré sabu na sitéb za'ra da, rowē na 're hāimana za'ra mono zô. — Āne te tāma tinha.

³⁷ Tawamhā Banabé hā ma tô sima wē, Zuwā Marcusi hā Īsiré morī zahuré da.

³⁸ Tane nherē, Paru hā ma tô wē'ô, Īsiré morī zahuré tō da, ĩwana wamhā, Zeruzarē u Pāpiriza hawī apā morī sirōmo da, te te rēme zahuré wa, Zuwā Marcusi hā. Timorī hā te te ĩme 'rāsutu zahuré ô wa, ma tô siwi wē'ô.

³⁹ Tawamhā te sima āma nharī zahuré, Zuwā Marcusi hā ĩba na. Siwapari zahuré ô di. Taha wa, ma tô siwi aiwanhizari zahuré, āma sisaze zahuré ô wa. Tawamhā Banabé hā ma tô Zuwā Marcusi hā saprō. Rowa'u'u na uba'renem na te tineb zahuré dame, Sipri na rob'rē za'iti nhisi u.

⁴⁰ Tawamhā Paru hā ma tô Sira hā pisutu, Īsiré morī da. Īsazei'wa norī hā ma tô āma mreem zu, 'Re ĩhāimana u'āsi mono ma, ta hā te te pawaptob zahuré da, ĩneb zahuré zēm na hā.

⁴¹ Taha parimhā, ma tô tineb zahuré Paru norī hā, Siriza na danhipti'a nho'ōmo nhisi wa'wai baba, duré Sirisiza na danhipti'a nho'ōmo nhisi wa'wai baba. Tinhimiroti na ma tô te te 're da'apawapto, Īsazei'wa hāimanazēm na danhiptete na 're dahāimana za'ra mono da, dasiré 're ĩdasi'rā'ōtō mono bā.

16

Timotiu hā ĩme morī zahuré da, Paru te te sima ĩwēzé wasu'u

¹ Tawamhā Derebi na 'ri nho'ōmo nhisi u ma tô aimasisi zahuré, Paru norī hā. Taha pari, ma tô duré aimasisi zahuré, Risitira na 'ri nho'ōmo nhisi u. Tame te aibā hā 're sāmra, Zezusihi zazei'wa hā, Timotiu na ĩsi hā. ĩna hā zudezu, Zezusihi zazei'wa, ta hā. Tane nherē, ĩmama hā zudezu ô di, deredu norī siré hā, ta hā.

² Īsazei'wa norī hā uburé ma tô Timotiu hā wēsāmri za'ra, Risitira āma 're ĩsi'ubumroi mono norī hā, duré Iconizu āma 're ĩsi'ubumroi mono norī hā.

³ Tawamhā Paru hā ma tô sima wē, Timotiu hā Īsiré morī da. Tane nherē, zudezu norī hā uburé tāma waihu'u pese za'ra di, Timotiuhu mama hā deredu norī siré na hā. Taha wa, Paru hā ma tô Timotiu sihāiwata nhizā, sizudezu da, te te āma siwi wē'ô tō da, zudezu norī hā.

⁴ Tawamhā Paru norī hā daza'rui mono bā ma tô te te dawaimrami za'ra, Zezusihi zadawa wasu'u'wa norī nhimirosa'rata na, te te dama rowasu'u za'ra mono da, duré Zeruzarē āma da'madā'ā'wa norī nhimirosa'rata na zama. Ma tô duré dama roti za'ra, ta norī nhimirosa'rada hā da te 're 'madā'ā' pese za'ra mono da, Īsazei'wa norī hā.

⁵ Taha zarina, ma tô Wanhīb'apito te te sina 're ĩ'umhāsi za'ra mono zēm na 're siptete za'ra, Īsazei'wa norī hā daza'rui mono bā siré 're ĩsi'rā'ōtō mono hā. Awē sidāpāsi ma tô sina hā, Īsazei'wa hā.

Paru hā Torowadi āma marī hā sōtō 'rowim ne te te ĩsabuzé wasu'u

⁶ Tawamhā Paru norī hā ma tô ai'aba'rē, Prizi'a na danhipti'a nho'ōmo nhisi wa'wai baba, duré Darasiza na danhipti'a nho'ōmo nhisi wa'wai baba. Tane nherē, 'Re ĩhāimana u'āsi mono pē'ēzani hā ma tô sadawa uwati za'ra, Azi'a na danhipti'a nho'ōmo nhisi āma ĩwasu'uwē na te te dama rowasu'u za'ra tō da a'ā.

⁷ Tawamhā ma tô aihutu, ti'a nhizārizéb u, Mizi'a na danhipti'a nho'ōmo nhisi u. Bitinha na danhipti'a nho'ōmo nhisi u sisisi neza. Tane nherē, Zezusi hā ma tô Tipē'ēzani na tiwi rosawi za'ra, tamomo si'aba'rē tō da.

⁸ Taha wa, Mizi'a na danhipti'a nho'ōmo nhisi wa'wai baba, ma tô ro'rahāri waré za'ra. Tawamhā Torowadi na 'ri nho'ōmo nhisi u, ma tô aihutu, uba're za'ētē nhimizahārizéb u.

⁹ Tawamhā sōtō ô nherē, sōtō 'rowi te te ĩrosawērē ne, ma tô marī hā sabu Paru hā, barana. Aibā hā Masédoniza na danhipti'a nho'ōmo nhisi āma 're ĩsāmra mono hā te ĩ'rata za, sa'ētē te te waptērē da, āne:

— Wei watēme aimorī, Masédoniza u wa'āma aime za'ra da. — Āne te tāma tinha.

¹⁰ Tawamhā āne hā Paru hā sōtō 'rowim ne te te 'madā'ā' wamhā, wa tô wasima ro'ubumro za'ra ni, Masédoniza u wasi'aba'rē da. E marī wa. Zezusihi wasu'uwē na tame wa te dama rowasu'u za'ra da, 'Re ĩhāimana u'āsi mono te te ĩwapisutu za'ra na wa te wasina waihu'u za'ra wa.

Paru norī hā Piripu āma te te ĩromhuri na'rata za'ra zé wasu'u

¹¹ Tawamhā Torowadi hawī, wa tô ai'aba'rē ni, rowa'u'u na uba'renem na. Samotarasiza na rob'rē za'iti nhisi u, ma tô waré tiwara waré za'ra. Ta hawimhā awēpsi wa tô saprī za'ra ni zara u, Ne'apuri na 'ri nho'ōmo nhisi u hā.

¹² Tawamhā Ne'apuri hawī, wa tô aihutu ni, Piripu na 'ri nho'ōmo nhisi u, Masédoniza na danhipti'a nho'ōmo nhisi āma 'ri nho'ōmo u hā. Tame te romanu norī hā 're si'ubumro. Tame wasi'ubumroi ré, ma tô bādā hā umro na wa'āma ai'utōrī za'ra.

¹³Tawamhã sabadu na wa tô wawairébé ni, 'ri nho'ômo hawi, pazaihã u 'Re ihâimana u'âsi mono ma, wamreme zusi da. Tame, zudezu norĩ hã tâma 're ìmreme zusi mono zém na wa te wasima rosa'rata za'ra wa, wa tamomo ai'aba'ré ni. Tame ma tô pi'ô norĩ hã ubumro, âdawa. Tawamhã wa norĩ hã wa tô ì'rata asimro ni, pi'ô norĩ 'rata, wa te wasima rowasu'u za'ra da.

¹⁴Tame te pi'ô hã nhamra, Ridiza na ìsisi hã. Ti'atira na 'ri nho'ômo nhisi âma 're ìsãmra mono aré ta hã, Ridiza hã. Zazahã ìwê hã te te dama 're ì'awede mono, ìhâpré pe hã. Ta hã, 'Re ihâimana u'âsi mono âma 're ìwata mono duré. Tawamhã Paruhu nhimirowasu'u te te wapari wamhã, Wanhib'apito hã ma tô pawapto, te te âma saze da.

¹⁵Taha wa, ma tô â dawabzuri hã 'manharĩ za'ra, Ridiza norĩ hã ìsiré ìsôrôwa âma 're ìsi'ubumroi mono norĩ me. Taha pari, te duré wazô tihârã za'ra, ì'rata wasi'ubumro da a'â. Æne te wazô tihârã za'ra:

— Wa hã, Wanhib'apito zazei'wa na sena na ìwaihũ'u za'ra wa'aba wamhã, ìnhorôwa âma te za asimroi wa'wa a'â. — Æne ma tô wazô tihârã za'ra, pi'ô hã. Æne wama siwaihũ'u za'ra zawi te, wa tô ìtème ai'aba'ré ni, ì'rata wasi'ubumro da a'â.

Paru norĩ hã dazazéb 're, da te ìsitob zahuré zé wasu'u

¹⁶Tawamhã nimahã bâtã na 'Re ihâimana u'âsi mono ma, 're ìdamreme zusi mono zéb u wasi'aba'réi ré, azarudu hã ma tô wawa'rãmi mo, pawa'âbã âna dama romhuri'wa hã. Wa'uburé ré 're hâimana mono wa, te marĩ hã romhã ré te te dama 're awaihũ'u siro, ta hã. Tawamhã azarutu wada'uri'wa norĩ hã ma tô rob'uprazé hã ahã na ì'upana te te sima 're waibu, marĩ hã romhã ré te te dama 're ì'awaihũ'u mono zé wa'â hã.

¹⁷Tawamhã azarudu hã ma tô Paruhu zarina mo, wazarina zama. Mreme 'rãihã na te nasi te te wa'mahârã za'ra, Æne:

— Ô hã aibã norĩ hã, 'Re ihâimana u'âsi mono ma romhuri'wa norĩ, ìwaihũ'u pese uptabi ma romhuri'wa za'ra. Niha te za aima waihũ'u za'ra wa'wa, asisô'reptu za'ra wa'aba da. — Æne te nasi te te wa'mahârã za'ra, dama.

¹⁸Awê sidâpãsi te nasi Æne te te wa'ab'mahârã. Te te nasi wa'ab'mahârã u'âsi mono wa, wapari a te, nimahã bâtã na ma tô Paru hã sô api'ra, wa'uburé ma, te te nharĩ da. Æne te tâma tinha:

— Zezu Cristuhu zadawa para, wa aima rob'ru. Mo oto aimorĩ, azarutu nhiti. — Æne te tâma tinha, wa'uburé ma, Paru hã.

Tawamhã awa'awi, ma azarutu hawi watobro. Ma tô ìsiti mo oto.

¹⁹Taha wa, azarudu hã marĩ hã romhã ré te te oto dama 're awaihũ'u mono ô di. Taha wa, ìwada'uri'wa norĩ hã ma tô Paru norĩ zada tinhiti'ru za'ra, ìwa'â te te sima 're waibui mono ô wa oto. Taha wa, ma tô siwi pamra, Paru norĩ hã. Taha pari, ma tô siwi sari zahuré, dama ìpire norĩ u 'ri nho're u.

²⁰Tawamhã, apito siromanu norĩ nho're te te siwi simizusi wamhã, te Æne tâma rowasu'u za'ra:

— Æ hã aibã norĩ hã, zudezu norĩ siré hã 're ìwanomro mono zém na ma tô wawi ro'wa'ré zahuré, Æme waza'rui 'remhã.

²¹'Re ìdanomro mono zép tém na te dama rowasu'u zahuré, 're ìwahâimana za'ra mono zéb upana. Wa norĩ hã, romanu. Taha wa, ìsarina âma 're ìwanomro mono da hã, wa te waihũ'u za'ra ô di. — Æne te tâma rowasu'u za'ra.

²²Tawamhã ôhõ na si ma tô da'ahã na âma tasisaze za'ra ni, Paru norĩ ma, rowasédé hã da te dasiwi 'manharĩ za'ra da. Tawamhã apito norĩ hã ma tô da'wapéi'wa norĩ ma 'ru za'ra, Paru norĩ uza hã te te tiwi hãiwazu za'ra da, Siraha me. Taha wa, ma tô sa'ëté tiwi hãiwazu zahuré ni, ì'uza hã. Wedehu na te duré da te 're pré'é zahuré.

²³Da te 're pré'é zahuré mono parimhã, ma tô 'mazasi zahuré ni, dazazéb u. Taha pari, dazazé 'madã'â wai ma, ma tô 'ru zahuré ni, te te 'madã'â pese zahuré da, pusi ô'umnhasite.

²⁴Taha wa, Æne, da te tâma 'ru za'ra wa, ma tô 'mazasi zahuré, dazazé 'ri 're wa'wa amo nhipai u. Tame wedepo'o zapu'u 're, ma tô ìpara hã za zahuré ni, da te para'ôtô tété zahuré da.

Paru norĩ hã dazazéb 're ìsima'wara zahuré zé wasu'u

²⁵Tawamhã mara wa'wa, ma tô Paru norĩ hã 'Re ihâimana u'âsi mono ma timreme zahuré, Siraha me. Tinhõ're na te duré âma tiwata zahuré. Tawamhã 'ri 're wa'wa amo niwĩ ìsimasam norĩ hã te wapari za'ra, ìsô're zahuré hã.

²⁶Tawamhã te awa'awi ti'a hã 're wara. Ti'ai 'rowi, 'ri na'rata tétézé hã te sãsã'ã, dazazéb 'ri hã. Tawamhã awa'awi ma uburé 'ridawa nhitobzê hã si'ridawa za'ra. Dapawasisizé hã duré daparátétézé hã ma tô sisinarĩ, dazazéb 're ìsimasam norĩ ma, ìsi'uwazi nhorõ rudu hã.

²⁷ Taha wa, dazazé 'madá'á'wa hã ma tô udu. Utu wamhã, ma tô 'ridawa hã 'madã. 'Ridawa haré te za, dazazé hã. Taha wa, ma tô tinhi'wa hã sisada waze, âma siwîri da aré, ïsimasam norî hã wairébé newa.

²⁸ Taha wa, te Paru hã hãrã 'rãihã na 'mahã:

— Tô'ã. Asiwîri tã. Âhãta wa aihîni aimasam ni. — Âne te 'mahã.

²⁹ Tawamhã ma tô dazazé 'madá'á'wa hã rob'uiwézéb zô hã. Wara sina, ma tô ïtême tizébré zahuré, Paru norî u. Ìpapara, ma tô aime zahuré hi'rãtitô, rêrê'ê sina.

³⁰ Taha pari, ma tô sani zahuré, rob u. Te tâma nharî zahuré, âne:

— Aibã norî, e marî wa za 'manha, danho'reptuzé hã te ïsina uwaimrami da hã. — Âne te sina sadanharî zahuré.

³¹ Tawamhã ma tô asa tâma rowasu'u zahuré:

— Wanhib'apito Zezusi asina umnhasi. Tawamhã te za asô'reptu, asôrôwa âma asiré 're ai'ubumroi wa'aba mono norî me.

³² Tawamhã Wanhib'apito zadawa wasu'u na te duré tâma rowasu'u za'ra, dazazé 'madá'á'wai ma, duré ïsiré 're ïsi'ubumroi mono norî ma zama.

³³ Mara wa'wam nheré, dazazé 'madá'á'wa hã ma tô a'ã Paru norî hã hãiba upsô zahuré, da te dasiwi 're ïpré'é zahuré mono zém na da te ïhânharî zahuré mono zé hã. Te te upsô zahuré parip si, ma tô â dawabzuri hã 'manha, dazazé 'madá'á'wa hã. ïsiré 're ïsi'ubumroi mono norî zama ma tô 'manharî za'ra.

³⁴ Taha pari, tinhorôwa u te oto saprôni zahuré. Ìsa hã ma tô tâma sômri zahuré, sa zahuré da. Dazazé 'madá'á'wa hã, toi uptabi di oto. Ìsôrôwa âma ïsiré 're ïsi'ubumroi mono norî zama toi uptabi za'ra di, 'Re ïhãimana u'âsi mono te te saze za'ra wa.

Paru norî hã dazazém hawi ïpusizé wasu'u

³⁵ Tawamhã awé mararé romanu na danhib'apito norî hã ma tô damrami'wa norî hã sô 'mazatôri za'ra, Paru norî hã da te dasiwi sani da, Siraha me. Âne te tâma 'ru za'ra:

— Aibã norî hã sani wa'aba, neb zahuré da oto. — Âne te tâma 'ru za'ra.

³⁶ Tawamhã dazazé 'madá'á'wa hã ma tô Paru norî ma rowasu'u, âne:

— Danhib'apito norî hã ma tô ai'rui wa'wa, da te asani wa'aba da, ane wa'aba da oto. Rowé na ane wa'aba za. — Âne ma tô Paru norî ma tinha, dazazé 'madá'á'wa hã.

³⁷ Tawamhã te Paru hã asa tâma nharî za'ra, damrami'wa norî ma:

— Marî hã wa te 'manharî wasété ô nheré, ma tô dama wa'ru, danho'a da te 're wapré'é mono da, wa norî hã romanu norî siré nheré. Ma tô wamrami ni, dazazéb 're, wasima'wara da. Tawamhã e pi'uriwi te za wazatôri za'ra. Mare di. Apito norî hã te za wei wazô ai'aba'ré, si'uihã na danho'a te te siwi wazani da, waneb da. — Âne te Paru hã tâma nharî za'ra.

³⁸ Tawamhã damrami'wa norî hã ma tô Paru norî hã tâma sadawa wasu'u za'ra, danhib'apito norî ma. Romanu norî siré na siwasu'u zahuré wa, ma tô tipê'ëwara za'ra.

³⁹ Taha wa, ma tô ïtême ai'aba'ré, tâma siwasu'u za'ra da, Paru norî ma, ta norî hã te te sina 'ruiwaparî za'ra tô da. Taha pari, ma tô siwi sani zahuré dazazém hawi, neb zahuré da. Tawamhã ma tô tâma rob'ru za'ra, 'ri nho'ômo hawi neb zahuré da oto.

⁴⁰ Tawamhã, dazazém hawi da te sani zahuré wamhã, ma tô tineb zahuré, Ridizaha nhorôwa u. Tame ma tô ïsazei'wa norî me sisôpêté za'ra. Tawamhã tinhimirowasu'u na ma tô tâma rowé zani za'ra. Taha pari, te oto tineb zahuré, Piripu na 'ri nho'ômo nhisi hawi.

17

Paru norî hã Tesaronita âma te te ïromhuri za'ra zé wasu'u

¹ Tawamhã Paru norî hã te oto ai'aba'ré, Âpipori na 'ri nho'ômo nhisi wa'wai baba, duré Aporoniza na 'ri nho'ômo nhisi wa'wai baba zama. Tawamhã ma tô oto aihutu, Tesaronita na 'ri nho'ômo nhisi u. Tame te rowahutuzé hã 're sa, zudezu norî te hã.

² Paru hã nimomo 're simasisi mono sidâpâsi, te rowahutuzéb u 're zasi, 're ïhãimana mono zéb zarina. Taha wa, Tesaronita u wisi wamhã, ma tô duré âzé, rowahutuzéb u. Tawamhã si'ubdatô romhuri 'rãsutu na ma tô dama rowasu'u sabadu na, 'Re ïhãimana u'âsi mono zadawa wasu'u na rob'ui'ére 'rata na, tame 're ïsi'ubumroi mono norî ma.

³ Âne ma tô dama rob'rãzarôtô:

— “Cristu hã Danho'reptui'wa da, 'Re ïhãimana u'âsi mono te te wama ïpisudu hã te za robzépata. Te za duré dârã. Dã'ã uptabi nheré, te za apã hãiwa'udu.” Âne te wama âma rowasu'u, ïrob'ui'ére 'rata na hã. Zezusi hã te aima ïwasu'u za'ra wa'wa hã wa tô waihu'u pese za'ra ni, tô ô hã Cristu, 'Re ïhãimana u'âsi mono te te wama ïpisudu, Danho'reptui'wa da. — Âne ma tô Paru hã tâma rowasu'u za'ra.

⁴ Tawamhã ni'wam norî hã zudezu norî hã ma tô saze za'ra, Paru norî te te tâma ïrowasu'u za'ra zéb zarina. Taha wa, ma tô ïsiré tihãimana za'ra, Paru norî siré, Siraha me. Duré deredu

norī zudezu'ō norī hā, 'Re ihāimana u'āsi mono āma 're īwata za'ra mono norī hā, ahā na ma tō duré saze za'ra. Pi'ō norī zama ma tō saze za'ra, dama īmreme pire za'ra hā. Ta norī zama ma tō oto īsiré tihāimana za'ra.

⁵ Tane nherē, zudezu norī, īsazei'ō'wa norī hā ma tō āma 'madā'a wē'ō za'ra, Paru norī hā. Taha wa, ma tō 'ri nhi'riti na aibā īwasété norī ma si'upana 'ru za'ra, īwa'a norī ma hā. Tawamhā ta norī hā ma tō sitēme sito, Paru norī zada hāimana za'ra da. Ta norī hā ma tō āma siwi ro'wa'rutu pese, 'ri nho'ōmo āma. Aibā nhorōwa hā ma tō duré siwi uirī, Zasāhā nhorōwa hā. Paru norī zō sisisi da, ma īré siwi uirī. Taha pari, ma sō asisi, te te siwi sani da, danho're u.

⁶ Tane nherē, oto sō sisisi wamhā, robaba zahuré di, Paru norī hā. Te te sa'rese za'ra ō di. Taha wa, Zasā norī hā ma tō Paru norī upana pawaiibu ni, īsiré īsazei'wa norī me. Tawamhā dama īpire norī nho're u ma tō te te simro. Tawamhā mreme 'rāihā na te 'mahārā za'ra, īsaprōni'wa norī hā:

— Ō hā, aibā norī hā daro mono bā, 're īdahāimana za'ra mono zēm na ma tō āma dawī saprī za'ra. Ma tō dawī ro'wa'rutu za'ra. Ahāna ma tō duré we aimasisi, waza'ru u.

⁷ Zasā hā ma tō tinhorōwa u 'mazasi zahuré, ī'rata simasisi zahuré da a'ā. Roma āma danhib'apito nhimiroti wa'rāmi, te 're hāimana za'ra. Āne te wama nharī za'ra: "Zezusi hā, taha si danhib'apito uptabi hā." Āne te wama nharī za'ra. — Āne ma tō 'mahārā za'ra, apito norī ma.

⁸ Tawamhā taha wasu'u hā da te wapari za'ra wamhā, ma tō dazahi sina nharī za'ra ni. Dama īpire norī zama ma tō sada tizahī za'ra.

⁹ Taha wa, dama īpire norī ma, ma tō Zasā norī hā rob'uiprazé hā sōmri za'ra, īsisani za'ra zéb da hā. Taha pari, ma tō satōrī za'ra, tinhorōwa u si'aba'ré da apā.

¹⁰ Tawamhā mara simeī wī, ma tō īsazei'wa norī hā Paru norī hā siwi satōrī zahuré, Siraha me, Bereza na 'ri nho'ōmo nhisi u neb zahuré da.

Paru norī hā Bereza āma te te īromhuri za'ra zé wasu'u

Tawamhā Bereza na 'ri nho'ōmo nhisi u sihutu wamhā, ma tō Paru norī hā ai'aba'ré, zudezu norī te, rowahutuzéb u.

¹¹ Bereza āma 're īsi'ubumroi mono norī nhimirosa'rada hā, wē di. Tesaronita āma 're īsi'ubumroi mono norī nhimirosa'rata nei ō di. Zezusihi wasu'uwē hā ma tō wapari pese za'ra. Awē sidāpāsi, ma tō 'Re ihāimana u'āsi mono zadawa wasu'u na rob'ui'ére 'rada hā da te 're sōre za'ra, Paru norī nhimirowasu'u hā tō sena zō te te āma rosa'rata pese za'ra da.

¹² Taha wa, zudezu norī hā ahā na ma tō saze za'ra. Deredu norī si'aibā norī hā ma tō duré saze za'ra, ahā na. Deredu norī sipi'ō norī zama ma duré ahā na saze za'ra, īsibro pese norī hā.

¹³ Tawamhā taha wasu'u hā ma tō waptārā apā Tesaronita u, āne: "Bereza āma te duré u, dama rowahutu Paru hā, 'Re ihāimana u'āsi mono zadawa wasu'u na hā." Āne hā zudezu norī hā te te wapari za'ra wamhā, ma tō Paru norī zarina ai'aba'ré, Bereza u siti'ru sina. Tame ma tō duré timreme wasété na dawī ro'wa'rutu za'ra, sada dazahi za'ra da.

¹⁴ Tawamhā īsazei'wa norī hā awa'awi ma tō oto Paru hā satōrī za'ra, āporé zaihā u morī da. Sira norī si Timotiuhu me te īsa'u aimasisi zahuré, Bereza āma.

¹⁵ Paru hāiba wapto'wa da hā ma tō duré si'mazatōrī za'ra, īsazei'wa norī hā īsiré 'masi'aba'ré da, Atena na 'ri nho'ōmo nhisi u te te siwi saprōni za'ra da. Taha pari, ma tō apā ai'aba'ré, Bereza u. Paruhu mreme hā te apā siwi ti'ā, Sira norī ma, Timotiuhu me, itēme nep su'u zahuré da, Atena u hā.

Paru hā Atena āma te te īromhurizé wasu'u

¹⁶ Atena āma, Paru hā te oto sō mapari zahuré, Sira norī zō Timotiuhu me. Tame romhāiba 'manharī hā ahā na te 're simasa, āma 're īdawata za'ra mono zéb da hā. Taha wa, da'āma pē'ézé uptabi di, Paru hā.

¹⁷ Taha wa, zudezu norī te, rowahutuzéb āma ma tō awē sidāpāsi marī wasu'u na te te azada'ābā, zudezu norī hā duré zudezu'ō norī, 'Re ihāimana u'āsi mono āma 're īwata za'ra mono norī zama. 'Ri nhi'riti nho'ōmo na da te 're ī'ubumroi mono zéb u te te da'anhopētē mono sidāpāsi, ma tō duré marī wasu'u na te te da'azada'ābā, Paru hā.

¹⁸ Zezusihi wasu'uwē na ma tō dama rowasu'u. Dā'ā nherē, apā Ihāiwa'utuzém na ma tō duré dama rowasu'u. Taha wa, Epiturezuhu nhimirowahutu zarina, duré etozitu norī nhimirowahutu zarina dama rowahutu'wa norī hā ma tō duré āma sada'ābā za'ra, Paru hā. Tawamhā nima norī hā ma tō āne sisadanharī za'ra āma:

— E marī na te wama rowasu'u. Simiza'rese bā. — Āne te sima āma rowasu'u za'ra, dama rowahutu'wa norī hā.

Nima norī hā te duré āne sima nharī za'ra:

— Áté ìhâiba'ô norî wasu'u na te wama rowasu'u, ìwaihu'upese hâiba amoi wasu'u na, wa te âma 're saze za'ra mono da. — Âne te sima nharî za'ra.

¹⁹ Tawamhâ Paru hâ ma tô siwi saprô, Are'opadu na rosa'rata'wa norî si'râ'ôtrôzém nhisi u. Tame ma tô tâma nharî za'ra, âne:

— E te za wama ìwaihu, asimirowahutuzép té hâ. E marî, te wama ìwasu'u za'ra.

²⁰ Ìwasu'u hâ wa te waihu'u za'ra ô di. Duré wama âma sahu na pé, wa te waihu'u za'ra da. — Âne te tâma nharî za'ra.

²¹ Atena âma 're ìsi'ubumroi u'âsi mono norî hâ, duré darob amoi hawi ìtême 're ìsihutu mono norî hâ marî hâ rowasu'u té hâ te te 're wapari ze za'ra mono di. Te te sima âma 're rowasu'u ze za'ra mono di duré. Taha wa, te âne tâma nharî za'ra, Paruhu ma.

²² Taha wa, Paru hâ hâiwi ma tô za, danho're te te tâma rowasu'u za'ra da, Are'opadu âma. Âne te tâma nharî za'ra:

— Aibâ norî, âme Atena âma 're ai'ubumroi wa'aba mono norî hâ ma'âpé ìwapari pese za'ra wa'aba. 'Re aihâimana za'ra wa'aba mono zé hâ wa tô waihu'u. Romhâiba hâ ahâ na te 're simasa, âma 're ì'aiwata za'ra wa'aba mono zéb da hâ.

²³ 'Ri baba 're ìmorî wa, wa tô te azabu, âma 're ì'aiwata za'ra wa'aba mono zé hâ. Nimame, wa tô wedeza ne hâ sabu, romhâiba 'manharî ma, marî hâ ìsisiwimhâ da te 're ìsa'ra za'ra mono zé hâ. Taha âma rob'ui'éré hâ wa tô duré sabu. Âne rob'ui'éré hâ: “Ìwaihu'upe hâ wa te waihu'u za'ra ô nheré, âma 're ìwawata za'ra mono zé, â hâ.” Waihu'u ô nheré, âma 're ì'aiwata za'ra wa'aba mono hâ wa za oto aima waihu'u za'ra wa'wa sô'awi.

²⁴ — 'Re ìhâimana u'âsi mono hâ ma tô ti'a hâ 'manha, duré uburé marî hâ ìwa 're ìhâimana za'ra mono da hâ. Ta hâ Danhib'apito uptabi, hâiwa âma, ti'ai âma zama. Taha wa, âma 're ìdawata za'ra mono zéb da, 'ri hâ danhib'rata na da te 're ì'manharî za'ra mono âma hâ, 're sâmra mono ô di.

²⁵ Ôhô si ma tô dapê'ézanizé hâ te te dama 're anhomri. Taha zarina si te 're dapê'ézani za'ra. Taha si, ma tô uburé marî hâ te te dama 're anhomri, âma 're ìdahâimana za'ra mono zéb da hâ. Taha wa, marî zô tiwi 're rowaptâ'â mono ô di, da te 're ìpawaptob za'ra mono zéb da hâ.

²⁶ Ìsâna'rata hawimhâ, aibâ misire nheré, ma tô ta hawimhâ atébré dapoto mono bâ, 'Re ìhâimana u'âsi mono hâ. Taha wa, dapoto mono bâ ma tô dasitébré. Ma tô da'âma ropé, ropâ 're dasi'ubumroi mono da. 'Re ìdahâimana za'ra mono sidâpâsi, ma tô te te dama 're apisutu, ti'a hâ, ìwa 're ìdasi'ubumroi mono zéb da hâ. Niha wahum na ìwa 're ìdahâimana za'ra mono zéb da hâ, ma tô duré te te dama 're apisutu.

²⁷ Âne ma tô te te dama 're ab'manharî, sô 're danhopré mono da, niha wamhâ, âté te te 're sôpêté za'ra mono da. Romhâ na wanhiti 're hâimana mono ô di tô, 'Re ìhâimana u'âsi mono hâ.

²⁸ Ta hâ 're morî u'âsi ô 'wa'âhâ, âne aré 're wahâimana za'ra mono ô di. Duré waihu'u pese ô 'wa'âhâ, âne aré, 're wanomro mono ô di. Asô're za'ra wa'aba na te rosawêré'wa norî hâ âne wama rowasu'u za'ra: “Wa norî hâ ìsimipodo, ì'ra.”

²⁹ Taha wa, wa norî hâ 'Re ìhâimana u'âsi mono 'ra wamhâ, e marî na wa za wa te âma 're rosa'rata za'ra, 'Re ìhâimana u'âsi mono âma hâ. E êtê'ubuzi pré oru 'manharî na wa za wa te âma 're rosa'rata za'ra. E êtê'ubuzi'a prata 'manharî na, e êtê 'manharî na wa za wa te âma 're rosa'rata za'ra. Mare di. Âne, wa te âma 're rosa'rata za'ra mono ô di za. Danhipese na da te 're ìrob'manharî za'ra mono nei ô di, 'Re ìhâimana u'âsi mono hâ.

³⁰ 'Re ìhâimana u'âsi mono hâ dama waihu'u âna 're danomro mono ré, te te dahâ za'ra sirômo ô di, ta hâ. Tane nheré, âhâna ropâ 're ìdasi'ubumroi mono hâ te za te te 're da'awada'uri, dawasété wi 're dasipizari za'ra mono da, ìsiniwî 're danomro mono da.

³¹ Bâdâ hâ ma tô sima pisutu siri, romhâ ré, danho'a te te dama ì'arowairébézéb da hâ. Taha wa, te âne dama roti, 're dasipizari za'ra mono da. Ni'wa hâ ma tô pisutu, sena na dama rowairébé'wa da hâ. Dâ'â uptabi nheré, apâ te te ìhâiwa'udu, ma tô pisutu, 'Re ìhâimana u'âsi mono hâ. Apâ te te ìhâiwa'utuzéb zarina, ma tô âne hâ dama waihu'u za'ra, ô hâ dama rowairébé'wa na hâ. — Âne ma tô Paru hâ dama rowaihu'u siri.

³² Tawamhâ dadâ'â nheré, apâ dahâiwa'utuzé wasu'u hâ da te wapari za'ra wamhâ, ma tô âma tato za'ra ni. Tane nheré, ìhâiba amo norî hâ te âne tâma nharî za'ra:

— Nimahâ bâta na wa za duré aiwapari za'ra ni, apâ 're ìdahâiwa'utu za'ra mono zé wasu'u na. — Âne te tâma nharî za'ra.

³³ Tawamhâ Paru ma tô tiwi timorî za'ra.

³⁴ Tane nheré, ni'wam norî hâ ma tô Paruhu âma sasômri za'ra. Zezusi hâ ma tô saze za'ra. Aibâ hâ, Dizozizi'u na ìsisi hâ ma tô saze, dama rowairébé'wa norî siré Atena âma, dama ìpire uptabi hâ. Pi'ô hâ Damarisi na ìsisi hâ ma duré saze. Duré ni'wam norî hâ tamemhâ umro na ma tô siré saze za'ra.

18

Paru hã Corïtu âma te te ïromhurizé wasu'u

¹Tawamhã Paru hã ma tô watobro, Atena hawî. Corïtu na 'ri nho'ômo nhisi u te oto mo.

²Tawamhã, Corïtu u wisi wamhã, ma tô zudezu norî siré hã sôpêtê aibã hã, ïmro me. Atira na aibã nhisi hã. Põtu na danhipti'a nho'ômo nhisi âma ïwaptã'ázé hã. Roma na 'ri nho'ômo nhisi hawî ma tô ïwana aimasisi zahuré, timro me, Itaria na danhipti'a nho'ômo nhisi hawî. Pi'õ nhisi hã Prisira na. Caradiu na danhib'apito uptabi nhisi hã ma tô zudezu norî hã satõrî za'ra, Roma na 'ri nho'ômo nhisi hawî, ïsiti si'aba'rê da. Taha wa, ma tô Corïtu u aimasisi zahuré, Atira norî hã. Ta norî hã te te sabu zahuré da, ma tô ïtême timorî zahuré, Paru hã.

³Tawamhã, tame te oto ï'rata tinhamra zahuré, ïsimiromhuri za'ra hã aiwa wa. Romhã 'manharî na 'ri'wa, ta norî hã. Taha wa, ma tô siré tihâimana za'ra a'ã, siré te te romhuri za'ra da.

⁴Tawamhã sabadu sidâpâsi, ma tô nasi dama rowahutu, zudezu norî te, rowahutuzéb âma, Zezusi hã da te 're saze za'ra mono da, zudezu norî hã, deredu norî zama.

⁵Tawamhã tamomo ma tô Sira norî hã ïtême aimasisi zahuré, Masêdoniza hawî, Timotiuhu ma. ïtême simasisi wamhã, Paru hã ma tô Zezusihi wasu'uwê na si romhuri u'âsi oto. Zudezu norî ma, te Zezusi hã tâma wasu'u za'ra, õ hã Danho'reptui'wa da, 'Re ïhâimana u'âsi mono te te ïpisutu na hã.

⁶Tane nherê, ïwasu'u hã ma tô tiwi wê'õ za'ra. Timreme wasété na ma tô siwi azã, Paru hã. Taha wa, Paru hã ma tô ti'uzã zapru wami, damreme wasété na âma dã'ã tô da. Te tâma nharî za'ra:

– E ïnhimirowahutuzéb zarina te za ropipa u 're anomro aba mo. Mare di. Asi'uihã na te za 're asisimini za'ra wa'aba mo. Zudezu'õ norî u si wa za oto 're ïne, ta norî ma si te 're rowasu'u za'ra mono da oto, ïwasu'uwê na hã. — Æne te tâma siwasu'u za'ra.

⁷Tawamhã zudezu norî te, rowahutuzém hawî, ma tô oto watobro. Aibã nhorõwa u ma tô âzé, Tisizu Zusituhu nhorõwa u. Ta hã zudezu'õ, 'Re ïhâimana u'âsi mono âma 're ïwata mono. Zudezu norî te, rowahutuzéb zababa, te 're sa, Tisizuhu nhorõwa hã.

⁸Tawamhã rowahutuzéb âma 're da'anhimi'rui mono 'wa hã ma tô saze Wanhib'apito hã, Crisipu na ïsisi hã. Duré, uburé ïsõrõwa âma ïsiré 're ïsi'ubumroi mono norî hã ma duré saze za'ra. Corïtu âma 're ïdasi'ubumroi mono zama ma tô da'ahã na saze za'ra ni, Zezusihi wasu'uwê hã da te wapari za'ra wamhã. Taha wa, ma tô â dawabzuri hã 'manharî za'ra ni.

⁹Tawamhã nimahã barana, Paru hã ma tô Wanhib'apito hã sabu, danhotõ 'rowi da te 're ïrosawêrê za'ra mono ne. Te tâma tinha, âne:

– Aipahi tõ. Dama 're rowasu'u u'âsi mono. Sazãri tõ.

¹⁰Wa hã wa ai'rata 're ïnhamra. Æmemhã, ïnhib'a'uwê hã ahã di. Taha wa, ni'wa hã rowasédé te te ai'âma 'manharî waihu'u õ di za. — Æne te tâma tinha.

¹¹Taha wa, te Paru hã tame 're sãmra, te te dama 're rowahutu mono da, 'Re ïhâimana u'âsi mono zadawa wasu'u na hã. Tame 're sãmra mono ré, ma tô âma tiwahu, misi wahum na duré ïhãiba amoi wãiwab u.

¹²Tawamhã Darizu hã ma tô si'apito, Ataza na danhipti'a nho'ômo nhisi âma. Romanu norî ma, roti'wa zadawa para, ma tô si'apito, tame te te dama 're roti mono da. Tawamhã zudezu norî hã ma tô Paruhu zada si'rã'õtõ. Taha wa, ma tô siwi ti'ã, dama rowairébé'wai u.

¹³Tawamhã zudezu norî hã ma tô Paru hã tâma wasu'u za'ra, Darizuhu ma. Æne te tâma rowasu'u za'ra:

– Æ hã aibã hã te sima wê, rosa'rata na te te dama âma azaprî mono da, 'Re ïhâimana u'âsi mono âma 're ïdawata za'ra mono zém na hã. Wanhimiroti 'rata zarina 'Re ïhâimana u'âsi mono âma 're wawata tõ za'ra mono da, te za da'âma azaprî, aibã hã. — Æne te tâma rowasu'u za'ra.

¹⁴Tawamhã Paru hã te aré timreme hã waze, tâma siwasu'u za'ra da. Tane nherê, mreme õ ré, ma tô danhib'apito Darizu hã âma sõzã, zudezu norî ma, te te rowasu'u da. Æne te tâma nharî za'ra:

– Zudezu norî, marî ïpire hã te te 'manharî wasété 'wa'ãhã, wa aré asadaihu'u za'ra wa'wa.

¹⁵Tane nherê, ânei õ di. Taré ïmreme zõ te pibu da, ma tô we ïtême asiwi ïsaprõni 'wa. Asimirowasu'u za'ra wa'aba zarina, duré danhisi na, duré asimiroti za'ra wa'aba zarina ïmreme zõ te ïpibu da si, ma tô we ïtême asiwi ïsaprõni 'wa. Taha wa, te âma rowairébé õ di za. A norî wa'wa hã asi'uihã na te za âma ïrowairébé za'ra wa'wa. — Æne ma tô tâma waihu'u za'ra.

¹⁶Tawamhã da'wapéi'wa norî ma, ma tô 'ru za'ra, rob u te te sate mono da, zudezu norî hã.

¹⁷ Tawamhã ma tô aibã hã siwi ti'ã, rowahutuzéb ãma 're Ìda'anhimi'rui mono 'wa hã, Sotëni na aibã nhisi hã. Tawamhã ma tô siwi azã, dama rowairébézé nho're ãma. Te te siwi azãri nherë, te te ãma rosa'rata ô di, apito Darizu hã.

Paru hã Ìtizotiza u apã ìmorizé wasu'u

¹⁸ Tawamhã Paru hã bâta ahã na ma tô nhamra, Corïtu na 'ri nho'ômo nhisi ãma. Tawamhã ma tô oto Ìsazei'wa nori ma siwasu'u za'ra, mori da oto, Siriza na danhipti'a nho'ômo nhisi u. Prisira nori hã ma tô ìme tineb zahuré, Atiraha me, Sëtireza na 'ri nho'ômo nhisi u. Sëtireza ãma sãmra ré, ma tame 'rã pari ni Paru hã, marí na 'Re Ìhãimana u'ãsi mono ma, te te Ìropisutuzém na, te te sina tãma uwaimrami wa, te te ãma Ìuwaimrami na Ìwaih'uuzéb da. Ta hawi rowa'u'u na uba'renem na ma tô dame ai'aba're, Siriza na danhipti'a nho'ômo nhisi u.

¹⁹ Tamomo si'aba'rei wamhã, ma tô aihutu, Épézu na 'ri nho'ômo nhisi u. Prisira nori hã te za oto Ìsa'u aimasisi zahuré tame, Atiraha me. Tawamhã tame sãmra ré, ma tô Paru hã ázë, zudezu nori te, rowahutuzéb u. Tame ma tô zudezu nori me marí wasu'u na sima ãma rowasu'u za'ra.

²⁰ Tawamhã ma tô siwi ãma ropti, a'ã hãimana da, T'ratã za'ra. Tane nherë, te te sina saze za'ra ô di, Paru hã.

²¹ Taha wa, ma tô tãma nharí za'ra asa, ãne:

— 'Re Ìhãimana u'ãsi mono te te Ìma waihu'u wapsi, wa za we atëme Ìmorí 'wa apã. — Ìne te tãma nharí za'ra.

Tawamhã rowa'u'u na uba'renem na ma tô mo, Épézu hawi.

²² Sézareza u, ma tô oto wi. Ta hawi, te duré mo, Zeruzarë u awa'awi. Tame, ma tô si'aba're na sawi za'ra, Ìsazei'wa nori hã. Tawamhã ta hawi, ma tô duré mo, Ìtizotiza na 'ri nho'ômo nhisi u, Siriza na danhipti'a nho'ômo nhisi 're, 'ri nho'ômo u. Tame te a'ã nhamra oto.

²³ Tawamhã Ìtizotiza ãma sãmra parimhã, ma tô duré mo Paru hã, Darasiza na danhipti'a nho'ômo nhisi wa'wai baba, duré Prizi'a na danhipti'a nho'ômo nhisi wa'wai baba zama. Daza'rui wa'wai baba 're mori ré, ma tô Zezusihi zazei'wa nori hã te te 're apawapto, hãimana nhiptete na si 're nomro mono da.

Aporu hã Épézu ãma duré Corïtu ãma te te Ìromhurizé wasu'u

²⁴ Tawamhã aibã hã, zudezu nori siré hã ma tô wi, Épézu na, Aporu na Ìsisi hã. Aresãdiriza na 'ri nho'ômo nhisi ãma Ìpodo, ta hã. Mreme wabzuri waihu'u pese di. Duré 'Re Ìhãimana u'ãsi mono nhimiroti 'rata na Ìbaihã na da te ãma 're Ìrob'ui'ére za'ra mono hã tãma waihu'u pese di.

²⁵ Wanhib'apito 're Ìmorí wë zém na ma tô da te tãma 're romnhoré za'ra. Taha wa, mreme nhiptete na ma tô Ì'uwaibaba si te te dama 're rowahutu, Zezusihi wasu'u na hã. Tane nherë, uburé Zezusihi wasu'u hã zahadu te te waihu'u ô di. Dawasété wi 're dasipizari za'ra mono da, Zuwã, ã dawabzuri te te dama 're Ìwasu'u mono si ma tô waihu'u, Aporu hã.

²⁶ Tawamhã pahi ãna ma tô dama rowahutu na sãna'rata, zudezu nori te, rowahutuzéb ãma. Tawamhã Prisira nori hã Atiraha me Ìsimirowasu'u hã te te wapari zahuré wamhã, tinhoröwa u ma tô sapröni zahuré, Zezusihi wasu'uwë hã te te tãma waihu'u pese zahuré da, 're Ìdanomro mono zép tém na 'Re Ìhãimana u'ãsi mono te te Ìpisutu na.

²⁷ Tawamhã Aporu hã ma tô sima rowë, Ataza na danhipti'a nho'ômo nhisi u mori da. Taha wa, Épézu ãma Ìsazei'wa nori hã ma tô ãma ana, Aporuhu ãma. Rob'ui'ére hã ma tô tãma sòmri za'ra, Ataza u te te siré ãri da. Ìsazei'wa nori hã te te siwi ãri wë da, ma tô ãma wada'uri za'ra. Tawamhã Aporu hã Ataza u wisi wamhã, ma tô Ìsazei'wa nori hã pawapto pese za'ra, 'Re Ìhãimana u'ãsi mono nhimizawí pese zéb zarina te te 're Ìsaze za'ra mono nori hã.

²⁸ Tawamhã mreme nhiptete na te nasi zudezu nori ma tãma ãma wa'rãmi za'ra. 'Re Ìhãimana u'ãsi mono nhimiroti 'rata na rob'ui'ére zarina, ma tô nasi tãma rowasu'u za'ra danho'a, Zezusi hã Danho'reptui'wa da, 'Re Ìhãimana u'ãsi mono te te Ìpisutu na sena na da te 're waihu'u za'ra mono da. Zudezu nori hã te te ãma wa'rãmi za'ra neza, Zezusihi zazei'ö'wa nori hã. Tane nherë, Aporu hã ma tô aiwétési ãma ai'uté za'ra, zudezu nori ãma, tinhimirowasu'u na.

19

Paru hã, Épézu ãma romhuri na te te Ìsãna'ratazé wasu'u

¹ Aporu hã Corïtu na 'ri nho'ômo nhisi ãma sãmra ré, ma tô Paru hã ro'razã, Épézu u sa'a nhisi baba. Tame ma tô Zezusihi zazei'wa nori hã söpëtë za'ra.

² Taha wa, ma tô sadanharí za'ra:

— E saze za'ra wa'aba wamhã, ma tô 'Re Ìhãimana u'ãsi mono hã Tip'ézani hã aimã sòmri za'ra wa'wa. — Ìne ma tô sadanharí za'ra.

Tawamhã asa te tãma siwasu'u za'ra:

— Mare di, zahadu wa te wapari za'ra ò di, Ìpè'èzani 're ìhâimana mono zé wasu'u hã.

³Taha wa, ma tô duré sadanharĩ za'ra, Paru hã:

— E 'wa simirowahutu zarina ma tô â dawabzuri hã ì'manharĩ za'ra wa'wa bété.

Tawamhã asa te duré tãma nharĩ za'ra:

— Zuwãhã nhimirowahutu zarina wa tô 'manharĩ za'ra ni.

⁴Tawamhã ma tô duré Paru hã tãma nharĩ za'ra:

— Zuwã hã dawasété wi 're ìdasipizari za'ra mono norĩ ma si, ma tô â dawabzuri hã te te dama 're ab'manharĩ. Ìzarazéhé nhihudu norĩ ma, ma tô te te 're roti, ìsa'u datême ìwi hã da te dasina 're umnhasi za'ra mono da, Danho'reptui'wa na, tô Zezusi hã. — Àne ma tô tãma waihu'u za'ra.

⁵Tawamhã Paruhu nhimirowasu'u hã te te wapari za'ra wamhã, tô sena Wanhib'apito Zezusihi zazei uptabi 'wa na ìsiwasu'u za'ra zéb zarina, ma tô â dawabzuri hã 'manharĩ za'ra, ta norĩ hã.

⁶Taha wa, Paru hã ma tô tinhib'rata na 'rà upi za'ra. Te te 'rà upi za'ra wamhã, ma tô 'Re ìhâimana u'âsi mono hã Tipè'èzani hã tãma sòmri za'ra. Taha wa, te oto damreme tãma ìwaihu'u za'ra ò na dama rowasu'u za'ra, hàiba mono hã. Timreme nai ò nherè, 'Re ìhâimana u'âsi mono, Tipè'èzani na te te tãma ìwaihu'u za'ra zéb zarina, te oto mreme zu. 'Re ìhâimana u'âsi mono zadawa wasu'u na te duré dama rowasu'u za'ra.

⁷Ta norĩ hã, àté 12 na ìhãiba za'ra hã.

⁸Tawamhã Paru hã te nasi àza, zudezu norĩ te, rowahutuzéb u, te te dama rowahutu da. A'mo si'ubdatò, ma tô àma ai'utò, tame te te dama 're rowahutu mono ré hã. Da te tãma 're nharĩ za'ra mono nherè, pahì àna ma tô te te dama 're rowasu'u, da te 're saze za'ra mono da. 'Re ìhâimana u'âsi mono, za da'àma 're ìsib'a'uwé mono zém na da te 're saze za'ra mono da, ma tô te te dama 're roti. Taha wa, ni'wam norĩ hã ma tô saze za'ra.

⁹Tane nherè, ni'wam norĩ hã te te saze za'ra ò di, pè'è tete za'ra wa. Wanhib'apito 're ìmorizéb zarina 're ìdanomro mono zép té wasu'u hã ma tô tiwi wè'ò za'ra, danho'a, mreme wasété na. Taha wa, Paru hã ma tô tiwi timorĩ za'ra, rowahutuzém hawi. Zezusihi zazei'wa norĩ hã ma tô te te simro, Tiranuhu na aibã nhisi te, romnhorézéb u. Awé sidápasi, ma tô tame te te tãma 're rowahutu za'ra oto.

¹⁰Tame te te dama 're rowahutu mono ré hã, maparane ma tô àma tiwahu. Taha wa, aihĩni Azi'a na danhĩpti'a nho'òmo nhisi àma 're ìsi'ubumroi mono hã, ma tô Wanhib'apito nhimiroti hã wapari za'ra, zudezu norĩ hã, duré zudezu'ò norĩ zama.

Sewaha 'ra norĩ wasu'u

¹¹'Re ìhâimana u'âsi mono, ma tô Paru hã pawapto, marĩ dama ì'manharĩ waihu'u'ò hã te te dama 're ab'manharĩ mono da, ìwè hã.

¹²Romhurizéb da, ì'uzà wè nhisiwi, te te sima 're ì'mazai mono hã ma tô da te 're waibu, ìhãzé ré norĩ ma, te te 're 'wasari mono da. Ìsu'u u'özéb zama ma tô duré da te 're waibu, ìhãzé ré norĩ hã te te 're upi za'ra mono da. Te te 're upi za'ra mono wamhã, ma tô 're séptâ'á za'ra. Wa'uburé norĩ hã ma tô duré dahawi 're wairébé.

¹³Tawamhã ni'wam norĩ hã zudezu norĩ hã wa'uburé te te dama 're sãmra za'ra mono da, 're ìnomro mono norĩ hã ma tô si'àma rosa'rata za'ra, Wanhib'apito Zezusihi zadawa para, wa'uburé te te dama 're sãmra za'ra mono da oto, Paruhu ne. Ta norĩ hã Zezusihi zazei'ò'wa nherè, Zezusihi tadawa para newa, te oto tãma rob'ru za'ra, wa'uburé ma, àne:

— Zezusi hã Paru te te dama ìwasu'u hã taha zadawa para, wa aima rob'ru za'ra wa'aba ni, dahawi aiwairébé aba da. — Àne te nasi tãma rob'ru za'ra.

¹⁴Aibã norĩ hã 7 na ìhãiba hã ma tô àne hã 'manharĩ za'ra. Séwa na ìmama nhisi za'ra hã. Sasedoti ìpire aré, ìmama hã.

¹⁵Tawamhã, nimahã bàtâ na Sewaha 'ra norĩ hã te te tãma rob'ru za'ra wamhã, wa'uburé te asa tãma nharĩ za'ra, àne:

— Zezusi hã wa tô waihu'u. Paruhu zama wa tô duré waihu'u. E 'wam norĩ hã bété, a norĩ wa'wa hã. Te aiwaihu'u za'ra wa'aba ò di. — Àne te asa tãma nharĩ za'ra, Sewaha 'ra norĩ ma.

¹⁶Tawamhã, wa'uburé ré 're ìmorĩ hã zahadu wa'uburé te te rème ò wa, sa'ètè, ma tô sò sime za'ra, Sewaha 'ra norĩ zò. Ì'uzà hã ma tô tiwi hàiwazu za'ra. Ma tô duré te te hàiba hàpré za'ra. Taha wa, Sewaha 'ra norĩ hã ai'uréiwi ma tô sisa're, wa'uburé ré 're ìmorĩ wi hã.

¹⁷Tawamhã taha wasu'u hã da te te wapari za'ra wamhã, ma tô tapahi za'ra ni, Zezusihi zadawa para newa, marĩ hã duré da te 're 'manharĩ za'ra mono tô da. Aihĩni, ma tô ìwasu'u hã wapari za'ra ni, Èpézu àma 're ìsi'ubumroi mono norĩ hã, zudezu norĩ hã, duré zudezu'ò norĩ hã. Tawamhã da te sazei uptabi za'ra ò nherè, ma tô aihĩni àma tawata za'ra ni, Wanhib'apito Zezusihi àma.

¹⁸ Ni'wam norī hā te te 're saze za'ra mono ō ré, abzé te te 're ī'manharī za'ra mono zém na ma tō siwasu'u za'ra danho'a, tiwasédé te te 're ī'manharī za'ra mono zém hawi ĩsipizari za'ra na hā.

¹⁹ Duré ahā na abzé 'manharī'wa norī hā ma tō ĩbahāi mono bā siwi sa'wa simisutu, abzé 'manharī na rob'ui'éré ré hā. Tawamhā ma tō āma ro'o za'ra, danho'a. Wa'ābā za'ētē nherē, ma tō āma ro'o za'ra. 50 miu na ētē'ubuzi'a prata zapotore na ĩwa'ā hā, simisutu hā.

²⁰ Wanhīb'apito mreme hā dama pire di oto. Daro mono bā ma tō da te āma ropé. Taha wa, da'ahā na ma tō da te 're wapari za'ra oto.

Épézu āma ro'wa'rutuzé wasu'u

²¹ Tawamhā āne na romhāimana pari, ma tō Paru hā 'rāwi sima waihu'u, Zeruzarē u morī da, Masédoniza wa'wai baba, duré Ataza wa'wai baba. Taha wa, te sima tīnha, āne: "Zeruzarē u ĩmorī parip si, Roma na 'ri nho'ōmo nhisi u ĩmorī da, wa duré ĩsima wē, te dazabu da." Āne ma tō sima waihu'u.

²² Tawamhā tipawapto'wa norī hā ma tō satōrī zahuré, Timotiu norī hā, Erasituhu me, ĩwana neb zahuré da, Masédoniza na danhipti'a nho'ōmo nhisi u. Neb zahuré za'u hā Paru hā te a'ā nhamra, Azi'a āma.

²³ Tame sāmra ré, Wanhīb'apito 're ĩmorizéb zarina 're ĩdanomro mono zép té wasu'u hā da te wapari za'ra wa, ma tō ro'wa'rudu hā dawī watobro, Épézu āma hā.

²⁴ Aibā hā Demetirizu na ĩsisi hā ētē'ubuzi'a prata na rob'manharī'wa hā ma tō ro'wa'rutu na sāna'rata. Rob'manharī ĩsyryre te te 're ab'manharī, Demetirizu hā. Di'āna na romhāiba nhisi 're ĩsima mono zém ne hā 'ri ĩsyryre te te 're ab'manharī, ētē'ubuzi'a prata na. Tāma ĩromhuri'wa norī hā pawa'ābā za'ētē di, rob'manharī ĩsyryre wa'ābā zarina.

²⁵ Tawamhā Demetirizu hā ma tō tāma ĩromhuri'wa norī zō tihārā za'ra. Siré ī'manharī'wa norī zō zama te duré sō tihārā za'ra. Ītēme sihutu wamhā, te tāma nharī za'ra, āne:

— A norī wa'wa hā te za ĩwapari pese za'ra wa'wa. Wanhimiromhuri wa'ābā na wa tō aré wanhibro pese za'ra ni.

²⁶ Āhāna, asi'uihā na ma tō Paruhu nhimiroti hā ĩwapari za'ra wa'wa. ĩsimiromhuri hā ma tō duré ī'madā'ā za'ra wa'wa, āme Épézu āma hā duré uburé Azi'a na danhipti'a nho'ōmo nhisi 'remhā. Ta hā ma tō te te dama 're anharī, 're ĩwahāimana za'ra mono zém hawi, 're dasipizari za'ra mono da. Da'ahā na ma tō saze za'ra ni, ĩsimirowahutu na hā. Marī hā danhib'rata na da te 're ī'manharī za'ra mono hā tō sena ĩwaihu'u pese ō di, u, āma 're ĩdawata za'ra mono da hā. Āne te te dama 're rowahutu, ta hā.

²⁷ Taha wa, romnhimimnhasi di, wanhimiromhuri za'ra hē da te dasiwi wē'ō za'ra ō'umnhasite. Tawamhā e wanhimiromhuri si te za dasiwi wē'ō za'ra ni. Mare di. Di'āna ĩwaihu'u pese te, 'ri wamri hā te za duré dasiwi wē'ō za'ra ni. Azi'a na danhipti'a nho'ōmo nhisi āma uburé 're ĩdasi'ubumroi mono hā, āma 're ĩdawata za'ra mono zé hā te za da te dasima 're wasu'u wasété za'ra, daro mono bā āma 're ĩdawata za'ra mono zé hā, tō ō hā Di'āna na ĩwaihu'u pese wamri hā. Ta hā dama tarére wa, te za tō da te dasiwi 're wē'ō pese. — Āne te tāma nharī za'ra, Demetirizu hā.

²⁸ Āne hā ĩmreme te te wapari za'ra wamhā, ma tō ab'ru za'ra ni. Ma tō 're hāsi, hārā 'rāihā na:

— Di'āna hā, ta hā ĩwaihu'upe. Danhipai u, dama siptete uptabi di. Āne, Épézu āma 're ĩwasi'ubumroi mono hā āma 're ĩdawata za'ra mono hā, wē uptabi di. — Āne ma tō 're hāsi.

²⁹ Tawamhā 'ri nho'ōmo āma ma tō dazahi hā te te ropé, 'ri wa'ōtō mono bā. Uburé ro'wa'rutu di oto. 'Ri nho'ōmo āma 're ĩsi'ubumroi mono norī hā te nasi tihārā na ai'rahāri za'ra. Tawamhā Paru norī siré 're ĩneb zahuré hā ma tō dasiwi pamrami ni, Da'izu norī hā, Aritacuhu me. Masédoniza āma 're ĩsimasisi zahuré mono aré, ta norī hā. Tawamhā dasi'aba'rē na ma tō ĩpano na dasiwi sari zahuré ni, dasi'rā'ōtōzéb u, da'ahā uptabi na.

³⁰ Paru hā datēme morī neza, te te dama nharī da. Tane nherē, Zesusihi zazei'wa norī hā ma tō siwi wairī, morī tō da.

³¹ Duré ĩsiwadi norī hā tame danhib'apito norī hā ma tō duré ĩtēme da'mazatōrī za'ra, te te tiwi rosawi za'ra da, dasi'rā'ōtōzéb u morī tō da, dazahi wa.

³² Marī u newa, sisatōrī wa, ma tō tamomo ubumro ni. Tawamhā dasi'rā'ōtōzéb āma ma tō 're dahāsi, damreme aimawī na. Damreme aiwab ō di. Siwa'ru te nasi āma ai'rahāri za'ra ni, dahārā na.

³³ Tawamhā zudezu norī hā ma tō aibā ma rob'ru za'ra, Aresādiri na ĩsisi ma, danho're sab da. Ma tō siwi wada'u aré Aresādiri hā, timreme na te te dawī robzāri da. Taha wa, ma tō tīnhīb'rada hā hāiwi dama wē, ari'iwi dasi'ubumro da, te te dama rowasu'u da.

³⁴ Tane nherē, zudezu na 're ĩhāimana mono na da te waihu'u za'ra wamhā, ma tō sa'ētē tihārā 'rāihā na 'mahārā za'ra. Āne te ōhō si 'mahārā za'ra:

— Di'ána, ta hã ïwaih'u'upe. Danhipai u, siptete uptabi di, âma 're ïwawata za'ra mono hã, âme Épézu âma hã. — Âne te nasi sa'êtê 'mahârâ za'ra ni. Dahârâ hã da te sahâri su'u za'ra ô di. Maparane bâta pibuzé hã ma tô da'âma ai'utô, da te nasi 'mahârâ za'ra ré.

³⁵Tawamhã 'ri nho'ômo âma danhib'apito pazapari'wa hã ma tô dazadawa uwati, ari'iwidi dasi'ubumro da. Tawamhã dawarôtâ'â wapsi, te oto dama roti, âne:

— Épézu âma 're ai'ubumroi wa'aba mono nori, ïwapari pese za'ra wa'aba. Wa nori hã âme Épézu âma 're ïwasi'ubumroi mono hã Di'ána hã ïwaih'u'upe 're ïsa mono zé hã wa wa te 're 'madâ'â pese za'ra, 'ri hã. Di'ânahã hãiba ne êtê 'manharî hã hãiwa hawi watême we ïwaptâ hã taha zama, wa wa te 're 'madâ'â za'ra, âme.

³⁶Tawamhã âne hã ni'wa te te wawi sawi waih'u'u za'ra ô di za. Taha wa, te za aiwaimri aihâimana za'ra wa'wa, marî na wa te rosa'rata pese za'ra âna, wa te 'manharî za'ra tô da.

³⁷Aihâ nori hã we asiwi ïpamrami 'wa hã, Di'ána ïsabzém hawi, marî na sipsaihuri zahuré ô di. Pi'ô hã âma 're ïwawata za'ra mono hã te te wasu'u wasété zahuré ô di duré.

³⁸Âne wamhã, Demetirizu hã, duré tâma ïromhuri'wa nori zama marî ïwasété na te te tâma nharî za'ra da, âwa wei wama siwasu'u za'ra ô di za. Dama rowairébé'wa nori u si te za wasu'u za'ra. Tamep si dawasété na dama ïnharizé hã.

³⁹Wazadawa pibu za'ra wa'aba da, wazô aihârâ ze za'ra wa'aba wamhã, wa za âme wasi'râ'ôtô waré ni, rowê na 're ïwahâimana za'ra mono zéb zarina, wawaimri na.

⁴⁰Â bâta na wasi'râ'ôtô waré ô wa, romnhimimnhasi di, wanhib'apito nhimiroti, wa te ï'madâ'â za'ra ô zarina, wazada sahi ô'umnhasite. Marî hã hâimana ô nherê, ma ro'wa'rudu hã watobro. Wasi'râ'ôtôzém na ni'wa te te wazadanharî za'ra wamhã, e niha wa za asa tâma rowasu'u za'ra ni. Asa wa te tâma rowasu'u waih'u'u za'ra ô di za. — Âne te dama roti, danhib'apito pazapari'wa hã.

⁴¹Âne na te te dama roti parimhã, ma tô dama rob'ru, dawairébé da oto.

20

¹Tawamhã damreme 'wa'rudu hã ma tô sahâri za'ra ni. Rowê di oto. Rob u'âsi nomro wamhã, Paru hã ma tô Zezusihi zazei'wa nori zô tihârâ za'ra. Taha wa, ma tô tâma roti za'ra, siptete sina 're hâimana za'ra mono da. Tawamhã, ma tô oto tâma siwasu'u za'ra, za oto ïmorî na hã. Taha pari, te oto mo, Masédoniza u.

Paru hã Zeruzarê u apâ ïmorizé wasu'u, Masédoniza wa'wai baba

²Tawamhã Masédoniza na danhipti'a nho'ômo nhisi wa'wai baba, ma tô ro'razâ, Paru hã. Daza'rui mono bâ 're morî ré, ma tô ïsazei'wa nori hã pawaptob za'ra ïsimiroti na, siptete sina 're hâimana za'ra mono da. Taha parip si, ma tô mo, Deresiza na danhipti'a nho'ômo nhisi u.

³Tame sâmra ré, ma tô a'amo si'ubdatô âma ai'utô. Tawamhã ma tô sima rosa'rata, Siriza na danhipti'a nho'ômo nhisi u morî da. Tane nherê, rowa'u'u na uba'renem na sébé ô ré, ma tô wapa, zudezu nori te te sima ïhãiba za'rê zé wasu'u hã. Taha wa, ma tô sima âma saprî, ti'ai babap si apâ morî da oto, Masédoniza wa'wai baba.

⁴Mori wamhã, aihâ nori hã ma tô ïsiré ai'aba'rê. Ta nori nhisi za'ra hã, âne: Sopaturu hã Pirôhõ 'ra hã, Bereza âma 're ïsâmra mono, duré Aritacu nori, Seduduhu me, Tesaronita âma 're ïsimisasi zahuré mono hã, duré Da'izu, Derebi âma 're ïsâmra mono hã, duré Titicu hã Toropimuhu me, Azi'a âma 're ïsimisasi zahuré mono hã, duré Timotiu hã.

⁵Ta nori hã ma tô wawana ai'aba'rê, Torowadi na 'ri nho'ômo nhisi u. Tame ma tô wazô mapari za'ra.

⁶Tawamhã ï'u'êtê dupto'ô na dasa da te huri parip si, Piripu na 'ri nho'ômo nhisi hawi wa tô wanem ni, Torowadi u rowa'u'u na uba'renem na. Bâdâ 5 na ma tô wa'âma ai'utô, tamomo wasi'aba'rêi ré. Tame, wa tô wasi'âma aihutu ni apâ, aihâ nori hã wawana ïsi'aba'rê nori âma. Romhuri misi, ma tô wa'âma ai'utôri za'ra, tame wasi'ubumroi ré.

Paru hã Torowadi âma te te ïromhurizé wasu'u

⁷Tawamhã sabadu barana wa tô wasi'râ'ôtô ni, tame ïsazei'wa nori hã 're ïsi'ubumroi mono nori me, ï'u'êtê wapu hã wa te huri da. Tawamhã Paru hã sisa'u ma tô wama roti za'ra, awê za oto morî na dâ'âsina. Simiroti za'êtê na te mara wa'wam nherê, zahadu wama roti za'ra.

⁸Tamemhã rob'uiwézé hã ahâ di, hâimo ïwasi'ubumrozéb âma hã, si'ubdatô 'ri 're si'uzusi âma hã.

⁹Tawamhã 'ritéi'wa hã, Eticu na ïsisi hã ma tô 'ri zadazâri âma nhamra, Paru hã te te wama roti za'ra ré. Simiroti za'êtê wamhã, aptâ'â di, 'ritéi'wai ma hã. Aptâ'â uptabi wa, ma tô nhono. Sôtô pese ré, ma tô waptârâ ti'ai u, hâimo 'ri zadazâri hawi. Tawamhã dá'â sirômo, ma tô siwi ti'â.

¹⁰ Taha wa, Paru hã ma tã itême si'ra. Te te itême si'rai wamhã, ma tã tãma aiwê'ê. Tawamhã ma tã Iré pahato, te te sa'ra da. Tawamhã âne ma tã dama tinha:

— Aipê'êwara za'ra wa'aba tã. Hãiba ré, te nomro. — Âne te dama tinha.

¹¹ Taha pari, ma tã apã sai'u. Î'u'êtê wapu hã ma tã te te wê'ê oto. Taha pari, ma tã te te tãma sômri, Îsiré Îsi'ubumro nori ma. Tawamhã te Îme tisa za'ra. Taha pari, te duré tãma roti za'ra. Te te tãma roti za'ra ré, ma tã tiwi tirowa'a. Rowa'a wamhã, ma tã oto tiwi timori za'ra.

¹² Tawamhã 'ritéi'wa hã hãiba ré ma tã siwi saprô, Îsôrôwa u. Ta hã ma tã tãma rowê wazere za'ra, Îsazei'wa nori ma hã.

Paru hã Torowadi hawi Miretu u Îmorizé wasu'u

¹³ Tawamhã wa nori hã wa tã asisi ni, rowa'u'u na uba'renem na. Taha na wa tã ai'aba're ni, Asôsi na 'ri nho'ômo nhisi u, Paruhu zô tame wanhimipari za'ra da. Paru hã ma tã sima pisutu aré, ti'ai baba âma nori da. Taha wa, tamomo te za wa'âma tiwisi za'ra.

¹⁴ Tawamhã Asôsi u wisi wi, ma tã watême tizébré za'ra, rowa'u'u na uba'renem na.

¹⁵ Tawamhã taha na wa oto ai'aba're ni, Mitireni na 'ri nho'ômo nhisi u. Awêpsi, ma tã duré uba'rene hã waré wara, Ti'osi na rob're za'iti nhisi wa'wai baba. Tawamhã awêmo na ma tã wã, Samo na rob're za'iti nhisi u hã. Tawamhã awêmo na si wa tã oto aihutu ni, Miretu na 'ri nho'ômo nhisi u hã, uba're nhimizahârizéb u.

¹⁶ Paru hã ma tã aré sima rosa'rata, Épézu u hã sipa tã da, Zeruzarê u wisi su'u da. Taha wa, Azi'a na danhipti'a nho'ômo nhisi âma sãmra zeî ô di oto. Pêtecoti na bâtâ wana, Zeruzarê u Îwisi su'u da da si, ma tã sima wê, Paru hã.

Paru hã Épézu âma da'madâ'â'wa nori ma, te te Îrotizé wasu'u

¹⁷ Tawamhã Paru hã Miretu âma sãmra ré, ma tã da'mazatô, Épézu u, Îsazei'wai 'madâ'â'wa nori zô itême si'aba're da.

¹⁸ Itême sihutu wamhã oto, ma tã âne tãma rowasu'u za'ra, Paru hã:

— A nori wa'wa hã ma tã Înhimiromhuri na Îwaihu'u za'ra wa'wa, asiré 're Îhâimana za'ra wa'aba mono ré hã. Azi'a u âma Îwisi na'rata zém hawim haré, duré aihawi wa'aba za Îmorizéb u hã ma tã âne na hã Î'âma Îwaihu'u za'ra wa'wa.

¹⁹⁻²¹ Îsina 're Îwata mono âna, wa tã Wanhîb'apito ma si te 're romhuri u'âsi. Zudezu nori hã nasi Îzada siwada'uri za'ra wa, Îma ropire uptabi di. Taha wa, Îwawa sina, wa tã te tãma 're romhuri, Wanhîb'apito ma. Tane nherê, Îwasu'uwê hã te aiwi wasu'u zazâri za'ra wa'aba ô di. Âne na ma tã Î'âma Îwaihu'u za'ra wa'wa. Danho'a wa tã te aima âma 're rowasu'u za'ra wa'wa, 'ri baba zama. Zudezu nori ma, duré zudezu'ô nori ma zama, wa tã te tãma 're roti pese za'ra, tiwasété wi 're sipizari za'ra mono da, 'Re Îhâimana u'âsi mono niwî 're nomro mono da, Wanhîb'apito Zewisi hã te te 're saze za'ra mono da.

²² Âhãna Zeruzarê u wa za mo, 'Re Îhâimana u'âsi mono pê'êzani te te Îma Îwaihu'uzéb zarina. Tame za marî hã Îzô Îwatobro hã te waihu'u ô nherê, wa za mo. Tane nherê, wa za mo tã.

²³ 'Ri nho'ômo mono bâ 're Îmori ré, ma tã 'Re Îhâimana u'âsi mono pê'êzani hã te te Îma 're awaihu'u, âne: Tame, te za dazazéb 're Înherê ni. Ropire hã wa za tã te 're sépata.

²⁴ Tane nherê, Îhãiba ré 're Îmori da hã, Îhãiba hã te Îsima sawi ô di. Wanhîb'apito Zewisi hã ma tã Înhimiromhuri hã Îma tisô, 'Re Îhâimana u'âsi mono nhimizawi pese zé wasu'u na te dama 're sadawa wasu'u mono da. Înhimiromhuri hã te tãma âma uwaimrami da, wa Îsima wê, taha si.

²⁵⁻²⁷ — Airo mono bâ, te 're aiwaimrami aba mono ré hã, wa tã te aima 're rowasu'u za'ra wa'wa, 'Re Îhâimana u'âsi mono, da'âma 're Îsib'a'uwê mono zé wasu'u na hã. Tawamhã niwamhã 'Re Îhâimana u'âsi mono nhimiroti hã te aiwi wasu'u zazâri aba ô di. Mare di. Âhãna, wa hã Paru, wa Îsina waihu'u, za Îzabu na sahu za'ra wa'aba ô na dâ'âsina. E tawamhã Înhimiromhuri na te ai'âma upa za'ra wa'aba bâ, te za asô'reptuzé hã asiwi Î'manhimini wa'wa. Mare di. Asi'uihã na te za asisimini za'ra wa'wa 'rãwi. Âne na hã tã sena wa tã waihu'u.

²⁸ Taha wa, te za 're asi'madâ'â pese za'ra wa'aba mo, 're anomro wê wa'aba mono da. Duré Îsazei'wa nori hã te za 're Î'madâ'â pese za'ra wa'aba mo, siré 're Îsi'rã'ôto mono nori hã. 'Re Îhâimana u'âsi mono pê'êzani hã ma tã sima aipisutu za'ra wa'wa, Îsazei'wa nori hã tãma 're 'madâ'â za'ra wa'aba mono da. Ti'ra wapru na ma tã Îsazei'wa nori hã wa'â, tite da. Taha wa, pone'êrebã 'madâ'â wa nori ne, te za 're Îda'madâ'â pese za'ra wa'aba mo, 'Re Îhâimana u'âsi mono nhîb'a'uwê nori hã.

²⁹ Aihawi ĩmorĩ za'ra wa'aba wamhã, ni'wam norĩ hã te za we asô ai'aba'réi wa'wa. Abaze zahi, pone'ërebã da, 're isahi za'ra mono ne, te za asada tizahi za'ra wa'wa. Tindhimirowahutu wasété na te za asada tihâimana za'ra wa'wa. Ai'ãma pê'ëzé za'ra wa'aba ô di za. Æne wa tó ai'ãma waihu'u sirômo za'ra wa'wa.

³⁰ Duré ni'wam norĩ hã asiré wa'aba nheré, te za aima sadawa hapese za'ra wa'wa, ĩsiniwĩ 're anomro aba mono da, ĩsazei'wa norĩ hã uburé ĩsiniwĩ 're nomro mono da.

³¹ Taha wa, te za asimiza'rese sina 're aihâimana za'ra wa'aba mo, ta norĩ wi. Te aima 're roti za'ra wa'aba mono ré hã, ma tó si'ubdatô ĩ'ãma tiwahu. Rowa'a na wa tó aihâiba mono bã te aima 're roti za'ra wa'wa, barana zama, ĩwawa sina. Roti hã niwa te aiwi sazãri za'ra wa'aba ô di. Taha wa, ma'ãpé ĩnhimromhurizém na 're aipo're pu'u u'ãsi za'ra wa'aba mono za.

³² — Æhãna hã 'Re ĩhâimana u'ãsi mono ma, wa za oto airême za'ra wa'wa, taha si te te 're ai'madã'ã za'ra wa'aba mono da oto. ĩsimizawi pese zé wasu'u na te za 're asôpré u'ãsi aba mo. Ta hã te za te 're aipawaptob u'ãsi za'ra wa'wa, ĩsaze za'ra wa'aba zém na aiprédup sina 're aihâimana za'ra wa'aba mono da. Uburé mari iwé hã tnhib'a'uwé norĩ ma, te te 're ĩ'anhomri mono hã te za duré aima sômri za'ra wa'wa, ate za'ra wa'aba da oto.

³³ Wa hã danhibrob zó, te 're rob'ruiwapari mono ô di, rob'uiprazém na duré da'uzã na. Æne na ma tó a norĩ wa'wa hã asiwi ĩwaihu'u za'ra wa'wa.

³⁵ ĩnhimromhuri pese na wa tó aima ãma asanho za'ra wa'wa, sib'uware na 're ĩhâimana za'ra mono norĩ hã wanhimromhuri na wa te ãma 're pawaptob za'ra mono da. Wanhib'apito Zezusihĩ mreme na te za 're aipo're pu'u u'ãsi za'ra wa'aba mo. Æne ma tó wama waihu'u za'ra: "Ni'wa hã marĩ na te te dawari wamhã, da te tãma sômri wamhã, tãma rowé di. Tane nheré, te te 're ĩda'azari mono ma hã ĩsipai u'tãma rowé uptabi di." Æne Wanhib'apito Zezusihĩ mreme hã. — Æne ma tó Paru hã da'madã'ã'wa norĩ ma waihu'u za'ra.

³⁶ Tawamhã Paru hã mreme parimhã, ma tó da'madã'ã'wa norĩ me hi'rãtítô asimro, 'Re ĩhâimana u'ãsi mono ma, mreme zusi da.

³⁷ Mreme zusi pari, wawa sina ma tó Paru hã nasi tinho'utu awaibu, te te sawi za'ra da, ãma pê'ëzé za'ra wa. Ma tó duré nasi tob'rata hãrã za'ra.

³⁸ Za niwamhã te te ĩhãiba pibui za'ra ô na tãma siwasu'u za'ra wa, ãma pê'ëzé uptabi za'ra di. Tawamhã ma tó ĩme ai'aba'ré, rowa'u'u na uba'reneb u.

21

Paru hã Zeruzarë u ĩmorizé wasu'u 'rãsudu

¹ Tame wa tó oto wasisawi za'ra ni. Taha parip si, wa tó wasima wapã za'ra ni. Tawamhã rowa'u'u na uba'rene hã ma tó oto waré tiwara za'ra awa'awi, Cosi na rob'ré za'iti nhisi u. Tamomo wasihutu wamhã, awépsi, wa tó duré ai'aba'ré ni, Rodisi na rob'ré za'iti nhisi u, uba're nhimizahãrizéb u hã. Tawamhã ta hawi, wa tó ai'aba'ré ni, Patara na 'ri nho'ômo nhisi u.

² Tame, wa tó wasiwi sôpêté ni, rowa'u'u na uba'rene hã, Penisiza na danhipti'a nho'ômo nhisi u iwara da hã. Tawamhã taha na wasi'aba'ré da, wa tó asisi ni.

³ Uba'rene hã waré warã ré, wa tó Sipri na rob'ré za'iti nhisi hã 'madã'ã za'ra ni, wanhim'i'e niwĩ. Ône haré ma tó waré warã, Siriza na danhipti'a nho'ômo nhisi u. Taha wa, wa tó Tiru na 'ri nho'ômo nhisi u oto aihutu ni, tamomo da te ĩro'wasari hã da te sa'ra za'ra da. Tame wa tó wawairébé ni, uba're hawi.

⁴ Tame wa tó Zezusihĩ zazei'wa norĩ hã sôpêté za'ra ni. Wasisôpêté za'ra wamhã, romhuri misi, ma tó wa'ãma ai'utôri za'ra, wasiré wasi'ubumroi ré hã. Tawamhã ĩsazei'wa norĩ hã 'Re ĩhâimana u'ãsi mono pê'ëzani te te tãma ĩwaihu'u za'ra zéb zarina, ma tó Paruhu ma roti za'ra, Zeruzarë u morĩ tó da.

⁵ Tawamhã bâdã hã wasi'aba'rézéb da hã ĩwa waptã'ã wamhã, ĩsazei'wa norĩ hã ma tó wasiré ai'aba'ré, ã zaihã u, 'ri nho'ômo nhiti. Aihĩni ma tó wasiré ai'aba'ré, aibã norĩ hã duré ĩmro norĩ hã, duré ĩ'ra norĩ me, te te wazawi za'ra da. Tame wa tó wahi'rãtítô asimro ni, supara 'ré wa, wamreme zusi da.

⁶ Wasisawi za'ra pari, wa tó asisi ni apã uba're wawé neb 're, wasi'aba'ré da. Ta norĩ hã 'ri tème ma tó apã ai'aba'ré.

⁷ Tawamhã Tiru hawi, wa tó ai'aba'ré ni. Wasi'aba'réi wamhã, Patorema'ida na 'ri nho'ômo nhisi u, wa tó aihutu ni. Tame ĩsazei'wa norĩ hã wa tó sawi za'ra ni. Tame ma tó bâdã hã misi wa'ãma ai'utôri za'ra, ĩ'rata wasi'ubumroi ré hã.

⁸ Tawamhã awépsi, wa tó ai'aba'ré ni, Sézareza u. Tame wa tó asimro ni, Piripihĩ nhorôwa ãma. Piripihĩ hã Zezusihĩ wasu'uwé na ĩsazei'ô'wa norĩ ma rowasu'u'wa, ta hã. 7 na ĩsazei'wa norĩ pawapto'wa da, da te ĩpisutu za'ra norĩ me, aré 're ĩhâimana mono, Zeruzarë ãma.

⁹ Ī'ra norī sipi'ō norī hā ĩmro'ō za'ra hā maparane si'uiwa na ĩhāiba hā, te 'Re ĩhāimana u'āsi mono hā te te dama 're sadawa wasu'u za'ra.

¹⁰ Tame ma tō bādā hā nasi wa'āma si'utōrī za'ra. Tawamhā aibā hā ma tō watēme tiwisi za'ra, Zudeza na danhipti'a nho'ōmo nhisi hawi. Aibā hā 'Re ĩhāimana u'āsi mono zadawa wasu'u wa, Adabu na ĩsisi hā.

¹¹ Watēme wisi wi, ma tō Paruhu usisizé hā tiwi waze. Ma tō āma sipara'ōtō wasisi. Ma tō duré āma sipawasisi. Taha pari, ma tō wama rowasu'u za'ra, āne:

– 'Re ĩhāimana u'āsi mono pē'ēzani hā āne ma tō ĩma waihu'u: "Ā da'usisizép tede'wai ma, te za zudezu norī hā āne 'manharī za'ra, Zeruzarē āma 're ĩsi'ubumroi mono hā. Zudezu'ō norī ma, te za hāiba nhomri za'ra." – Āne ma tō wama waihu'u sirōmo za'ra, Adabu hā.

¹² Tawamhā ĩmreme wa te wapari za'ra wamhā, tame ĩsazei'wa norī 're ĩsi'ubumroi mono norī me, wa tō Paruhu wi rosawi za'ra ni aré, Zeruzarē u morī tō da.

¹³ Tawamhā asa te wama nharī za'ra:

– E niha da, ma aiwa'ō na ĩwi ĩrobzei'ō za'ra wa'wa. Zeruzarē u hā ĩmorī da si, wa tō ĩsima rowē upta. Zezusi hā, Wanhib'apito na te 're sisi mono wa, áté te za dasiwi ĩnherē ni, dazazéb 're. Áté, wa za dārā. Tane nherē, ĩma wē di tō, tamomo ĩmorī da hā. – Āne ma tō wama siwaihu'u za'ra asa, wa te waihu'u za'ra da.

¹⁴ Taha wa, Zeruzarē u morī tō da, wa te oto tiwi rosawi waihu'u za'ra ō di. Taha wa, wa tō tāma nharī za'ra ni oto:

– Wē di tō. Mo oto aimorī. Wanhib'apito te te aima ĩwēzéb uwaibaba, te za tō ĩ'manha. – Āne wa tō tāma rob'ru za'ra ni.

¹⁵ Tame wahāimana za'ra ré, syry na ma wa'āma ronomro. Tawamhā wanhibro hā wa oto wasima ubumro za'ra ni, Zeruzarē u wasi'aba'ré da. Taha pari, wa tō wawairébé ni oto.

¹⁶ Sézazea āma ĩsazei'wa norī hā ma tō wame si'mazatōrī za'ra, umro na wame 'masi'aba'rēi hutu da. Tawamhā Menasōhō nhorōwa u ma tō wame ai'aba'ré, tame wasi'ubumro da a'ā. Duréihā ĩsazei'wa, Menasō hā. ĩpotozé hā Sipri na rob'ré za'iti nhisi hā.

Paru hā Zeruzarē āma 're ĩsāmra mono zé wasu'u na'rada

¹⁷ Tawamhā Zeruzarē u wasihutu wi, ma tō ĩsazei'wa norī hā to sina wazawi za'ra.

¹⁸ Tawamhā awēpsi ma tō Paru hā wame timorī za'ra, Ti'aduhu u. Tame, ma tō uburé pese ubumro, ĩsazei'wai 'madā'ā'wa norī hā.

¹⁹ Tawamhā Paru hā ma tō uburé sawi za'ra, timreme na. Te te sawi za'ra parimhā, ma tō tinhimiromhurizém na tāma siwasu'u za'ra, 'Re ĩhāimana u'āsi mono, zudezu'ō norī ma, uburé te te 're ĩ'ab'manharī mono zéb zarina.

²⁰ Paruhu mreme te te wapari za'ra wamhā, aihīni ma tō āma tiwata za'ra, 'Re ĩhāimana u'āsi mono āma. Taha wa, te asa tāma rowasu'u za'ra, Paruhu ma:

– Wasisānawā, āhāna wa za aima wasiwasu'u za'ra ni. Zudezu norī hā, wasiré norī hā ahā uptabi na ma tō Zezusi hā te te sina 're umnhasi za'ra, Danho'reptui'wa na. Aihīni, te simi'ē na 're hāimana za'ra, 'Re ĩhāimana u'āsi mono nhimiroti 'rata na Mozésihī nhimi'ui'éré zarina.

²¹ Ta norī hā ma tō aiwasu'u wapari za'ra, wasiré zudezu norī ma, asimirowahutu wasété newa. Mozésihī nhimi'ui'érézé hā, te wasiré zudezu norī wi ĩsawi za'ra, u, daro mono bā 're ĩhāimana za'ra mono wi, āma 're hāimana za'ra mono tō da. Duré Mozésihī nhimi'ui'éré zarina, ti'ra norī te te 're sihāiwata nhihāri za'ra mono tō da, ma tō, u, wasiré zudezu norī wi ĩsawi. Āne ma tō aiwasu'u hā wapari za'ra, ta norī hā.

²² Āhāna aihīni, te za aiwaihu'u za'ra ni, we aiwisizém na hā. E marī, wa za tawamhā 'manharī za'ra ni, āne aiwasu'u hā tō senai ō na da te waihu'u za'ra da.

²³ Tawamhā āne wa za aima roti za'ra ni, marī 'manharī da, 're aihāimana wē mono zé hā da te waihu'u za'ra da. Wawa'wa, aibā maparane si'uiwa na ĩhāiba hā marī na ma tō tāma ropisutu za'ra, 'Re ĩhāimana u'āsi mono ma.

²⁴ Tawamhā te za asiré ĩsimroi mo, 'Re ĩhāimana u'āsi mono āma 're ĩdawata za'ra mono zéb u, marī hā Mozésihī nhimi'ui'éré zarina asiré 'manharī za'ra wa'aba da, 'Re ĩhāimana u'āsi mono ma, aihāiba wasété āna aihāimana za'ra wa'aba da, tāma. Tawamhā 'Re ĩhāimana u'āsi mono ma, pone'ērebā te te siwi ĩsimro hā te za tāma ĩwa'ābā za'ra. Tawamhā te za oto si'rāpāri za'ra, 'Re ĩhāimana u'āsi mono ma, te te ĩropisutu za'ra zéb zarina, te te tāma āma ĩ'uwaĩramani za'ra na da te ĩwaihu'u za'ra zéb da hā. Āne hā 'manharī wamhā, aihīni te za aiwaihu'u za'ra ni oto, aiwasu'u hā tō senai ō na hā. Te za duré aiwaihu'u za'ra ni, 'Re ĩhāimana u'āsi nhimiroti 'rata na Mozésihī nhimi'ui'éré zarina 're ĩ'aihāimana mono zém na hā. Āne hā 'manharī da, wa aima roti za'ra ni, wasiré ĩsazei'wa zudezu norī, te te aiwaihu'u za'ra da.

²⁵ E niha tawamhã zudezu'õ nherê, Isazei'wa norĩ 're ìhâimana za'ra mono zéb da hã. Æne wa tô tâma roti pari za'ra ni: "Danhimizama hã romhâiba 'manharĩ âma 're dawata za'ra mono da, da te 're ìsimroi mono nhi hã 're huri aba mono õ di za. Duré Ìwapru hã 're âhuri aba mono õ di za. Duré danhimizama da te 're ìsõ'reti za'ra mono nhi hã 're huri aba mono õ di za. Duré aihâiba na asiwi 're asipsaihuri za'ra wa'aba mono õ di za." Æne wa tô tâma rob'ui'ére za'ra ni. — Æne te Paruhu na rowasu'u za'ra.

²⁶ Tawamhã Paru hã ma tô âma saze za'ra, aibã norĩ siré morĩ da. Tawamhã awêpsi, ma tô Paru hã te te simro, aibã norĩ hã, 'Re ìhâimana u'âsi mono âma 're ìdawata za'ra mono zéb u. Marĩ hã ma tô ìsiré 'manharĩ za'ra, 'Re ìhâimana u'âsi mono ma, hâiba wasété âna tâma hâimana za'ra da. Taha pari, ma tô âzé, 'Re ìhâimana u'âsi mono nhorõwa u. Sébré wamhã, ma tô dama pisutu bâdã hã, marĩ te te siwi ì'manharĩ 'rãsutu zéb da hã. Te te siwi 'manharĩ parimhã, te za marĩ hã ìhâiba mono bâ tâma sômri za'ra, sasedoti norĩ ma, si'udãna za'ra. Tawamhã te za waihu'u za'ra ni, 'Re ìhâimana u'âsi mono ma, te te ì'manharĩ 'rãsutu za'ra zém na hã.

Zudezu norĩ hã, Paruhu zada ìsiti'ru za'ra zé wasu'u

²⁷ Tawamhã bâdã 7 na zahadu âma si'utõrĩ õ di, te te siwi ì'manharĩ 'rãsutu zéb u hã, Paru norĩ hã. Romhuture di oto. Tawamhã zudezu norĩ hã Azi'a hawi ìshihu da ma tô Paru hã sima sãmri za'ra, 'Re ìhâimana u'âsi mono âma 're ìdawata za'ra mono zéb âma. Izarazéhé nhihudu norĩ te, 'ri 'wawi wa'ra âma sãmra ré, ma tô siwi 'madã. Taha wa, ma tô sada dawada'uri wasété za'ra, Paruhu da. Tawamhã ma tô oto siwi pa'ã, Paru hã.

²⁸ Taha wa, te si'mahãrã za'ra zudezu norĩ hã, âne:

— Wasiré Izarazéhé nhihudu norĩ, wei wa'âma ana wa'aba. Æ hã aibã hã ma tô daro mono bâ te te dama 're rowahutu, da te dasiwi wawé'õ za'ra da, duré Mozésihi nhimiroti hã da te dasiwi wé'õ za'ra da, 'Re ìhâimana u'âsi mono nhorõwa zama da te dasiwi wé'õ za'ra da. Ma tô duré zudezu'õ norĩ hã we te te simro, 'Re ìhâimana u'âsi mono âma 're ìdawata za'ra mono zéb u. Ìsõrõwa hã wê nherê, ma tô wawi wasété za'ra. — Æne ma tô da'mahãrã za'ra, tame ìsi'rã'õtõ norĩ hã, aihĩni Paruhu zada dazahi za'ra da.

²⁹ Ta norĩ hã ma tô aibã hã 'madã'ã za'ra aré, Toropimu na ìsisi hã, Épézu âma 're ìsãmra mono hã. 'Ri nho'õmo nhi'riti na Paruhu siré morĩ ré, ma tô 'madã'ã za'ra. Taha wa, ma tô âma romnomri za'ra, zudezu'õ nherê, 'Re ìhâimana u'âsi mono nhorõwa u Paru te te saprõni 'ru te. Taha wa, te âne da'mahãrã za'ra, zudezu norĩ hã.

³⁰ Taha wa, Zeruzarê 'remhã 'ri wa'õtõ mono bâ ma tô ro'wa'rudu hã te te ropé. Tawamhã Paruhu zô ma tô dasitême dasisa're, 'Re ìhâimana u'âsi mono âma 're ìdawata za'ra mono zéb u. Ma tô dasiwi pa'ãri ni 'ri para, rob u da te dasiwi wazere da. Da te dasiwi wazere parip si, ma tô oto tiwi 'ri nhitom ni.

³¹ Tawamhã te aré dasiwi wĩri ni. Tawamhã da te aré dasiwi ìwĩrizé wasu'u hã ma tô wapa, Roma na 'ri nho'õmo nhisi hawi da'wapéi'wa norĩ nhib'apito hã, Zeruzarê âma 're ìdasi'ubumroi mono norĩ ìsib'ru za'ra zé wasu'u hã.

³² Tawamhã awa'awi ma tô tinhib'a'uwé norĩ zô hãrãhai'aba're za'ra, tiwada'uri'wa norĩ me siré sisa'rei mono da, datême. Itême Ìsisa'rei mono hã da te 'madã'ã za'ra wamhã, ma tô âma rosahãri za'ra ni, Paruhu âma hã.

³³ Tawamhã apito hã ma tô Paruhu u ai'rê 'rãwi. Ma tô pa'ã. Taha pari, ma tô duré da'wapéi'wa norĩ ma ti'ru, te te siwi pawasisi da, maparane ìsi'uwazi nhorõ rutu na. Taha pari, ma tô âma da'azadanha, âne:

— E 'wa hã ã hã aibã. E marĩ ma tô 'manha. — Æne ma tô âma da'azadanha.

³⁴ Tawamhã dasiwa'rãmi te nasi tâma 'mahãrã za'ra ni, dasimana'rãmi hawi. Da te tâma wasu'u waré za'ra õ di. Dahãrã si'rahãri ahã wamhã, Ìwasu'u uptabi hã te te waihu'u õ di, apito hã. Taha wa, da'wapéi'wa norĩ ma, ma tô ti'ru, Paru te te siwi saprõni da, tinhorõwa õ di.

³⁵ Tawamhã hãimo 'ri para u sai'urizéb u sihutu wamhã, da'wapéi'wa norĩ hã ma tô te te siwi upari, Paru hã, zudezu norĩ hã sahi sina, ìsarina si'aba'rei wa.

³⁶ Taha wa, ma tô nasi tâma 'ru za'ra, âne:

— Wĩri aba. Wĩri aba. — Æne te nasi tâma 'ru za'ra.

³⁷ Tawamhã da'wapéi'wa norĩ hã apito nhorõwa u te te siwi 'mazébré õ ré, Paru hã ma tô apito ma tinha, âne:

— E aima wê õ di, aima ìsiwasu'u da hã. — Æne te tâma tinha, deredu norĩ mremente na.

Tawamhã apito hã te asa tâma tinha:

— E nare aima waihu'u pese di, deredu norĩ mremente hã.

³⁸ Wa tô aré ai'âma romno, a hã eziptsiu newa. Nimosi ni'wa hã eziptsiu hã ma tô aibã norĩ âma aiwanhizari za'ra. Ta hã 4 miu na ma tô te te simro, rowasété 'manharĩ'wa norĩ hã a'ubuni u. Roma âma apito wi sipizari za'ra da, dapãrizéb ré, ma tô te te simro. 'Wazé, a hã simroi mono õ di. — Æne te tâma tinha, apito hã.

³⁹ Tawamhã Paru hã te asa tãma tinha:

— Wa hã zudezu. Tasu na 'ri nho'u İsa'ëtê nhisi âma İpotozé hã, Sirisiza na danhipti'a nho'ômo nhisi âma hã. 'Wazé za İma İwê, te dama İrowasu'u da hã. — Âne te asa tãma tinha, Paru hã.

⁴⁰ Tawamhã da'wapéi'wa nori nhib'apito hã ma tãma wê tã, te te dama rowasu'u da.

Paru hã si'uihã na dama İsiwasu'uzé wasu'u na'rada

Tawamhã te te dama rowasu'u da, apito te te tãma wê wa, ma tã Paru hã sai'u hãimo, 'ri para u sai'urizém na hã. Tame ma tã tinhib'rada hã dama wê hãimo, ari'iwı dasi'ubumro da. Taha wa, ma tã tawarõtã'ã za'ra ni. Dawarõtã'ã za'ra wamhã, Paru hã ma tã timreme na dama rowasu'u, ebreusi nori mre me na.

22

¹ Âne te Paru hã dama siwasu'u:

— İsiré nori, duré wamama nori, ma'âpé İwapari pese za'ra wa'aba za. Wa za oto aima İsiwasu'u za'ra wa'wa, 're İhãimana mono zém na hã İwaihı'u za'ra wa'aba da. — Âne ma tã tisiwasu'u na tãma sãna'rata za'ra.

² Tawamhã ebreusi mre me na te te dama İrowasu'u za'ra zé hã da te wapari za'ra wamhã, ma tã tãma tawarõtã'ã pese za'ra ni oto. Tawamhã te duré tãma siwasu'u za'ra, âne:

³ — Wa hã, zudezu. Tasu na 'ri nho'ômo nhisi âma İpotozé hã, Sirisiza na danhipti'a nho'ômo nhisi 'remhã. Âme Zeruzarê âma wa tã İprédu. Damarizé hã ma tã te te İma 're rowahutu, wahi'rata nori nhimiroti na hã. İnhimi'ê na wa tã te 're romhuri pese, 'Re İhãimana u'âsi mono ma. A nori wa'wa hã asimi'ê na tãma 're İromhuri za'ra wa'aba mono ne, wa tã ôhõ ma si 're İsisõmri u'âsi, İnhimi'ê na te tãma 're romhuri pese mono da, asine wa'aba.

⁴ Wa tã te da'âma 're rowasété aré, 're İdanomro mono zép tém na 're İdanomro mono nori âma hã. İzadawa para ma tã aibã nori hã da te 're pawasisi za'ra, pi'õ nori zama. İzadawa para, ma tã duré da te 're simro, dazazéb u hã. 'Re dã'ã za'ra mono da, wa tã âne hã te tãma 're 'manharı za'ra, Zezusihi zazei'wa nori ma hã.

⁵ 'Re İhãimana u'âsi mono ma, da'âma romhuri'wa İpire uptabi hã ma tã âne na hã İwaihı'u, sasedoti İpire uptabi hã, duré uburé zudezu nori ma roti'wa nori zama. Ta nori hã İ'âma sadanharı za'ra wa'aba wamhã, te za âne na hã aima İwasu'u za'ra wa'wa, sena na. Ta nori hã ma tã tinhimi'u'éré hã İma sõmri za'ra, Damasitu u te âri da, İsiré dama İpire nori ma. Taha zarina, wa tã mo, Damasitu u te we simroi mono da, İzazei'wa nori hã. İsi'uwazi nhorõ rutu na pawasisi ré, Zeruzarê u we te simroi mono da, wa tã sã İmorı za'ra, âme da te hã za'ra da.

⁶ — Tawamhã Damasitu u te rosahutu wapsi, abzuma wa'wa ma tã hãıwa hawi rowa'a za'âne hã İma ai'ubuzi, waptu na İhãıba nho'õmoi baba.

⁷ Taha wa, wa tã waptãrã, ti'ai wa. Ni'wai mre me hã wa tã wapa. Âne te İmahã: "Saru. Saru. E marı wa, te İwi 're İrowasutu u'âsi mo." — Âne te İmahã.

⁸ — Tawamhã wa tã asa sada'ã: "Apito, e 'wa hã, a hã."

— Tawamhã te duré asa İma tinha: "Wa hã Zezusi, Nazarê âma aré 're İnhemra mono. Te İwi 're İrowasutu u'âsi mo." — Âne te İma siwasu'u.

⁹ — Rowa'a za'âne hã İma si'ubuzi wamhã, İsiré İsi'aba'ré nori hã ma tã 'madã'ã za'ra, rowa'a hã. Tane nherê, ta nori hã İmreme hã te te wapari waihu'u za'ra õ di, İma İnharı'wai mre me hã.

¹⁰ Tawamhã wa tã duré 'mahã, âne: "Apito, e marı, wa za 'manha."

— Tawamhã Wanhib'apito te İma tinha: "Aiwahutu, Damasitu u aimorı da. Tame te za ni'wa hã aima roti, uburé 'Re İhãimana u'âsi mono te te aima İpisutuzé hã 'manharı da." — Âne te İma tinha.

¹¹ — Tawamhã rowa'a za'âne hã ma tã İtob'a. Taha wa, İsiré İsi'aba'ré nori hã ma tã İpano na siwi İzaprõ. Taré ta nori hã te te siwi İzaprõni na wa tã wi, Damasitu u.

¹² Tame aibã hã te 're hãimana, Ananiza na İsisi hã. Ta hã 'Re İhãimana u'âsi mono nhimiroti 'rata wapari pese 'wa. Zudezu nori hã tame 're İsi'ubumroi mono hã ma tã Ananiza hã te te 're wêsãmri za'ra.

¹³ Ta hã ma tã we İzõ rıti. Tawamhã, İtême wisi wamhã, ma tã İma tinha, âne: "İsisãnwã Saru, apã rob'madã'ã." — Âne te İma tinha, aibã hã.

— Tawamhã awa'awi, wa tã duré apã rob'madã. Taha wa, Ananiza hã wa oto 'madã.

¹⁴ Tawamhã ta hã te duré İma tinha: "'Re İhãimana u'âsi mono hã wahi'rata nori nhib'apito hã ma tã sima aipisutu, te te ai'ãma sima 're İroti mono zé hã waihu'u da. Ma tã duré aima

pisutu, Wanhîb'apito Zezusi hã Ìwê uptabi 'manharî'wa hã bâdâdi wa, sabu da, duré Ìmreme hã wapari da.

¹⁵ A hã te za dama 're Ìsadowa wasu'u mo, dahâiba mono bâ. Ta hã atômo na Ìsabu hã, duré aipo're na Ìmreme hã Ìwapari hã te za dama 're Ìwasu'u mo.

¹⁶ E marî zô te bété asimipa, âhâna hã. Ma'âpé aiwahutu, â dawabzuri hã da te aima 'manharî da, duré Wanhîb'apito wi rowaptêrê da, te te asô'reptu da. Tawamhã aiwasédé hã te za aima tipa." — Âne ma tô Ìma roti, Ananiza hã.

'Re Ìhâimana u'âsi mono hã Paruhu ma, romhuri te te Ìpisutuzé wasu'u

Tawamhã Paru hã dama siwasu'u 'râsutu da, ma tô âne dama rowasu'u:

¹⁷⁻¹⁸ — Tawamhã, Zeruzarê u apâ Ìwisi wamhã, 'Re Ìhâimana u'âsi mono âma 're Ìdawata za'ra mono zéb u wa tô mo, tâma Ìmreme da. Tawamhã tâma Ìmreme sina, Ìnhotô ô nherê, Ìnhotô 'rowi te Ìrosawêrê ne, wa tô Wanhîb'apito hã sabu. Ìmreme hã wa tô wapa. Te Ìma tinha, âne: "Aí'aba'rê na aiwatobro Zeruzarê hã, âmemhã da te aiwapari za'ra ô wa za, Ìwasu'u na hã."

¹⁹ — Tawamhã wa tô asa tâma Ìsiwasu'u: "Âne 're Ìsi'ubumroi mono norî hã ma tô Ìhâimanazém na siwi Ìwaihu'u. Rowahutuzé mono bâ wa tô asazei'wa norî zô 're Ìzasi, dazazéb 're te 're 'mazai mono da, duré te 're ahã za'ra mono da.

²⁰ Duré Esitéwã, dama aiwasu'u'wa hã da te dasiwi wîrî wamhã, wa tô dasiré Ìhâiba. Wa hã wa tô âma da'ab'madã. Ìma wê di, Ìdã'ázé hã. Ìwîrî'wa norî uza, Ìsisiwimhã Ì'ubuzé hã, wa tô sa 'madã'ã za'ra." Âne wa tô asa tâma Ìsiwasu'u, Wanhîb'apito ma.

²¹ — Âne na Wanhîb'apito ma, Ìsiwasu'u wamhã, ma tô Ìma rob'ru, âne: "Mo oto aimorî. Zudezu'ô norî tême, wa za asatô, romhã na." Âne ma tô Ìma rob'ru, Wanhîb'apito hã. — Âne ma tô Paru hã tisiré zudezu norî ma hã siwasu'u.

²² Tawamhã Paru hã zudezu'ô norî hã te te sisi wamhã, ma tô sada tizahi za'ra, zudezu norî hã zudezu'ô norî te te sisi ô ré hã te te aré wapari wê za'ra nherê. Taha wa, te sa'êtê sima 'mahârã za'ra, zudezu norî hã, âne:

— Wîrî aba. Ô hã wasétére di. Dã'ã hã.

²³ Âne ma tô zudezu norî hã âma si'mahârã za'ra, hârã 'rãihã na, Ìsisiwimhã ti'ubuzé hâimo te te 're wanarî za'ra mono sina. Ropru te duré hâimo sãmra za'ra, sada siti'ru za'ra wa.

Paru hã da'wapéi'wa norî nhîb'apito ma, Ìsiwasu'uzé

²⁴ Tawamhã romanu hã da'wapéi'wa norî nhîb'apito hã ma tô da'wapéi'wa norî ma 'ru za'ra, 'ri para u te te siwi 'mazébré da, Paru hã. Te duré tâma 'ru za'ra, te te siwi 're pré'é mono da, siwasu'u da, zudezu norî te te sima Ì'ruzém na te te waihu'u da.

²⁵ Tawamhã ma tô siwi hiwasisi, Ìsi'uwazi nhorô rutu na te te siwi 're pré'é mono da. Tawamhã Paru hã ma tô da'wapéi'wa norî nhîb'apito zadawa para dawada'uri'wai ma tinha, âne:

— E Ìwasété na asiwi Ìwaihu'u aba wa, ma tô asiwi 're Ìpré'é aba mo. E tô Ì'uwababa âne hã, wa hã romanu nherê. — Âne te Paru hã tâma tinha, da'wapéi'wa norî wada'uri'wai ma.

²⁶ Tawamhã Paruhu mreme te te wapari wamhã, da'wapéi'wa norî wada'uri'wa hã ma tô tinhîb'apito ma wasu'u:

— E marî âma 'manharî da bâ. Nî'ã. Ô hã romanu. — Âne ma tô tâma wasu'u.

²⁷ Taha wa, apito hã ma tô mo Paruhu u, te te sadanharî da. Tawamhã âne te sadanha:

— Ìma asiwasu'u na, te waihu'u da. E nare a hã romanu.

— Ìhe. Wa hã, romanu.

²⁸ Tawamhã apito hã te duré tâma siwasu'u, âne:

— Wa hã duré, romanu. Ìpoto'wa hã romanu ô nherê, wa'âbã za'êtê uptabi na wa tô Ìsiwa'ã romanu norî ma, Ìsiromanu da.

Tawamhã Paru te asa tâma tinha:

— Tazahã Ìpoto'wa hã romanu wa, wa hã duré romanu u'ã. — Âne te asa tâma tinha.

²⁹ Tawamhã Paru hã romanu na siwasu'u wa, awa'awi ma tô da'wapéi'wa norî hã tâma ai'rê za'ra, te te siwi sadanharî za'ra âna. Duré da'wapéi'wa norî nhîb'apito hã âne na te te waihu'u wamhã, ma tô pê'êwara, Ìsimiwada'uri zarina, te te siwi hiwasisi wa.

Paru hã dama rotî'wa norî nho're Ìsiwasu'uzé

³⁰ Tawamhã da'wapéi'wa norî nhîb'apito hã ma tô sima wê, zudezu norî hã Paruhu âma Ìwasédé hã te te siwi âma Ìhirizé hã sena na te te waihu'u da. Taha wa, awêpsi ma tô 'Re Ìhâimana u'âsi mono ma, da'âma romhuri'wa Ìpire norî ma 'ru za'ra, uburé zudezu norî ma rotî'wa norî ma zama, Paruhu zada si'rã'ôtô da. Da'wapéi'wa norî ma, ma tô duré 'ru za'ra, Paruhu pawasisizé hã te te tâma wasihu za'ra da, damã Ìpire norî nho're sab da.

23

¹ Tawamhã zudezu norĩ ma roti'wa norĩ tẽme, te rob'madã'à pese, Paru hã. Te tãma nharĩ za'ra, ãne:

— Wasiré Izarazéhé nhihudu norĩ, wa hã wa tã 're ĩsi'madã'à u'ãsi, 're ĩmorĩ wẽ u'ãsi da, 'Re ĩhãimana u'ãsi mono nho'a. Taha wa, ĩpẽ'ẽ wapu na wa 'rãwi 're ĩsisaze. — ãne te tãma siwasu'u za'ra.

² Tawamhã Ananiza hã sasedoti ĩpire uptabi hã ma tã ti'ru, ĩ'rata ĩsimasam norĩ ma, te te siwi sadawa prẽ'é da, Paru hã.

³ Taha wa, te Paru hã asa tãma tinha:

— Oro wama roti'wa za a hã, ma aiwasédé hã ĩ'ãma ĩ'manha. A hã ãme te asã, ĩpibu da, 'Re ĩhãimana u'ãsi mono nhimiroti 'rata na rob'ui'ééré zarina 're ĩmorizéb zó. Tane nherẽ, ĩsimiroti hã ma tã ĩ'upa. Da te ĩzadawa prẽ'é da, ma tã dama ĩ'ru. Ta hã 'Re ĩhãimana u'ãsi mono nhimiroti zarinaĩ õ di. Taha wa, te za ai'azã. — ãne te tãma tinha, Paru hã.

⁴ Tawamhã ĩ'rata ĩsimasam norĩ hã te tãma nharĩ za'ra, ãne:

— E marĩ da, ma tã sasedoti ĩpire uptabi ãma ĩwasé.

⁵ Tawamhã Paru te asa tãma nharĩ za'ra:

— E nare ta hã sasedoti dama ĩpire. Te waihu'u õ di. Te waihu'u 'wa'ãhã, te tãma nharĩ õ di aré. 'Re ĩhãimana u'ãsi mono mreme ui'ééré 'rata na wa tã ãne hã waihu'u za'ra ni: "Ni'wa hã dama pire wamhã, tãma 're aimreme wasété za'ra wa'aba mono õ di za." ãne ma tã wama waihu'u za'ra. — ãne Paru te asa tãma nharĩ za'ra.

⁶ Tawamhã Paru hã ma tã waihu'u, dama roti'wa norĩ, sina ĩsipo'o za'ra zé hã. Ni'wam norĩ hã sadusezu, duré ni'wam norĩ hã parisezu. Tawamhã, ma tã dama si'mahã, ãne:

— Wasiré Izarazéhé nhihudu norĩ, ĩwapari za'ra wa'aba. Wa hã parisezu. ĩmama norĩ zama parisezu. Dadã'à nherẽ, apã dahãiwa'utuzé wasu'u hã te sazei wa, wa asõ're ĩzab za'ra wa'wa, asiwi ĩwaihu'u za'ra wa'aba da, taha zó si 're ĩnhimipari u'ãsi mono wa. — ãne ma tã dama si'mahã.

⁷ Tawamhã mreme pari, tame ĩsi'rã'õtõ norĩ hã ma tã sina ĩsipo'ozéb zarina sima nharĩ za'ra, parisezu norĩ hã, sadusezu norĩ me.

⁸⁻⁹ Parisezu norĩ nhimizazézé hã, ãne: 'Re dadã'à za'ra mono nherẽ, apã 're ĩdahãiwa'utu za'ra mono na, duré hãiwa ãma 'Re ĩhãimana u'ãsi mono ma, romhuri'wa norĩ hã tã sena na 're ĩhãimana za'ra mono na, duré dapẽ'ézani hã dawĩ 're wairébé mono wamhã, nimomo 're ĩdanomro mono na hã. ãne parisezu norĩ nhimizazézé hã. Tane nherẽ, sadusezu norĩ hã ãne na simizaze za'ra õ di, ta norĩ hã. 'Re ĩdahãiwa'utu za'ra mono zé hã, mare di, u. Duré hãiwa ãma 'Re ĩhãimana u'ãsi mono ma, romhuri'wa norĩ hã, mare di, u. Duré dapẽ'ézani, dawĩ 're wairébé mono wamhã, nimomo 're danomro mono õ di za, u. ãne sadusezu norĩ nhimizazézé hã. Taha wa, ma tã 're sisadawa 'rui u'ãsi za'ra, parisezu norĩ hã, sadusezu norĩ me.

Tawamhã 'Re ĩhãimana u'ãsi mono nhimiroti 'rata na dama rowahutu'wa norĩ hã, parisezu na 're ĩhãimana za'ra mono norĩ hã hãiwi ma tã aimasa, Paru, da te dasiwi ĩ'arizé hã te te siwi wẽ'õ wa. ãne te mreme 'rãihã na nasi ãma si'mahãrã za'ra:

— Aibã hã, õ hã wa tã waihu'u za'ra ni. Tiwasédé hã te te ãri õ di. Áté hãiwa ãma 'Re ĩhãimana u'ãsi mono ma romhuri'wa, ma tã tãma rowasu'u. Áté ni'wai pẽ'ézani, ma tã nima hawi tãma rowasu'u. — ãne te parisezu norĩ hã nasi ãma si'mahãrã za'ra.

¹⁰ Tawamhã damreme tete na dasi'wapé za'ra wa, da'wapéi'wa norĩ nhĩb'apito hã ma tã ãma hãtãrã, Paruhu ãma, da te dasiwi hãiba'ẽi mono õ'umnhasite. Taha wa, ma tã da'wapéi'wa norĩ ma 'ru za'ra:

— Sõ ai'aba'rúi wa'aba, asiwi wazere aba da, dawa'wa hawi. Tawamhã wanhorõwa u te za we asiwi ĩsaprõni 'wa apã. — ãne te tãma 'ru za'ra.

¹¹ Tawamhã taha mara na Wanhib'apito hã ma tã tãma si'hãi'rú, Paruhu ma. Te tãma tinha, ãne:

— Aipahi tã. ãme Zeruzarẽ ãma ma tã dama ĩwasu'u pa. Roma na 'ri nho'õmo nhisi ãma te za duré õhõ na si dama ĩwasu'u, niwamhã.

Zudezu norĩ hã Paru te te sima ĩ'ru za'ra zé wasu'u

¹² Tawamhã awẽ rowa'a wĩ, zudezu norĩ hã ma tã pi'uriwi si'rã'õtõ. Te sima 'ru za'ra, Paru hã te te siwi wĩrĩ da. ãne te sima ãma roti za'ra:

— Paru hã wa te wasiwi wĩrĩ aba. Tawamhã 'Re ĩhãimana u'ãsi mono ma, wa za wasi'ru za'ra ni, wa te wasiwi wĩrĩ õ wamhã, te te wa'uprosi da, wa te wasima ĩ'ruzé hã wa te ãma uwaimrami za'ra õ wamhã. Wa te wasima ĩ'ruzé hã wa te ãma uwaimrami za'ra õ ré, wasaihuri õ di za. Duré wa te ãhuri õ di za. — ãne ma tã sima roti za'ra, Paruhu ãma.

¹³ Aibã hã 40 nhĩpai u ĩhãiba hã ma tã ãne sima 'ru za'ra.

¹⁴ Tawamhã zudezu norĩ hã ma tũ ai'aba'rẽ, 'Re İhãimana u'ãsi mono ma, da'ãma romhuri'wa İpire norĩ u, dama İpire norĩ u zama. Te tãma nharĩ za'ra, ãne:

— Paru hã wa tũ wasima 'ru za'ra ni, wa te wasiwi wĩrĩ da. 'Re İhãimana u'ãsi mono ma, wa tũ durẽ wasi'ru za'ra ni, te te wa'uprosi da, Paru hã wa te wasiwi wĩrĩ õ wamhã. Tawamhã wa te wasiwi wĩrĩ õ rẽ hã, wasaihuri õ di za.

¹⁵ Åhãna, ma'ãpẽ da'wapẽi'wa norĩ nhĩb'apito ma, waihu'u za'ra wa'aba, asi'rã'õtõ aba zẽm na. Dama roti'wa norĩ me, uburẽ asi'rã'õtõ aba zẽm na tãma waihu'u za'ra wa'aba, Paru te te İ'manharizẽ hã waihu'u pese za'ra wa'aba da newa, Paru hã te te we atẽme saprõni za'ra wa'aba da. Tawamhã wa norĩ hã bãdãdi wãi wa, wa za sũ asimro ni, atẽme wisi za'ra wa'aba õ rẽ, wa te wasiwi wĩrĩ da. — Åne te tãma nharĩ za'ra.

¹⁶ Tawamhã 'ritẽi'wa hã ma tũ wapari za'ra, sũ İdanhimipari za'ra na hã. 'Ritẽi'wa hã Paruhu 'ra waptẽ, İhidiba 'ra. Taha wa, te Paruhu u mo, da'wapẽi'wa norĩ nhorõwa u te te po're pu'u da.

¹⁷ Tawamhã Paru hã ma tũ sũ hã, da'wapẽi'wa norĩ wada'uri'wa zõ. Te tãma tinha, ãne:

— Å hã 'ritẽi'wa hã ãma saprõni, asib'apito u te te tãma rowasu'u da. Marĩ hã te te İwaihu'uzẽm na te za tãma rowasu'u. — Åne te tãma tinha.

¹⁸ Tawamhã İwada'uri'wa hã ma tũ saprõ, apito u. Te tãma tinha, apito ma:

— Paru hã da'wapẽi'wa norĩ te te 'madã'ã za'ra da, wanhorõwa ãma İsa hã ma tũ İzõ hã. Ta hã ma tũ İma tinha, 'ritẽi'wa hã te we atẽme saprõni da. Ta hã, marĩ hã te te İwaihu'uzẽm na te te aima rowasu'u da, ma tũ İma tinha, te we atẽme saprõni da. — Åne te tãma wasu'u.

¹⁹ Tawamhã da'wapẽi'wa norĩ nhĩb'apito hã ma tũ 'ritẽi'wa hã pa'ã. Danhiti ma tũ saprõ, te te tãma rowasu'u da, ãne:

— E marĩ te za bẽtẽ İma İwasu'u. — Åne te sadanha.

²⁰ Tawamhã ma tũ asa tãma rowasu'u:

— Zudezu norĩ hã ma tũ sima 'ru za'ra, Paru hã awẽpsi te te aiwi waptẽrẽ za'ra da, dama roti'wa norĩ nho're sab da, İtẽme satõrĩ za'ra da. Paru te te İ'manharizẽ hã te te waihu'u pese za'ra da newa, te za aiwi waptẽrẽ za'ra.

²¹ Tawamhã İtẽme satõrĩ za'ra da, saze za'ra õ di za. Tõ'ã. Aibã norĩ hã 40 nhipai u İhãiba hã ma tũ sima 'ru za'ra, te te siwi wĩrĩ da. Te te siwi wĩrĩ õ rẽ hã, saihuri õ di za, u. Durẽ ã hã te te åhuri õ di za, u. 'Re İhãimana u'ãsi mono ma, ma tũ durẽ si'ru za'ra, te te uprosi da, te te sima İ'ru za'ra zẽ hã te te ãma uwaimrami za'ra õ wamhã. Te za, u, sũ aima'uri za'ra. Asa tãma İrowaihu'u za'ra zẽb zõ si, te åhãna hã mapari za'ra. — Åne te tãma rowasu'u.

²² Tawamhã apito hã te sadawa uwati, 'ritẽi'wa hã, ãne:

— Ni'wai ma, İma İrowasu'uzẽm na hã rowasu'u tũ za. — Åne te sadawa uwati, apito hã. Taha pari, te tãma rob'ru, morĩ da.

Apito Perihĩ u, Paru da te İsaprõnizẽ wasu'u

²³ Tawamhã da'wapẽi'wa norĩ nhĩb'apito hã te oto sũ tihãrã zahurẽ, tizapari da'wapẽi'wa wada'uri'wa norĩ zõ. Åne te tãma rob'ru zahurẽ:

— Ma'ãpẽ sũ aihãrã aba, da'wapẽi'wa norĩ zõ, para na 're İnomro mono hã 200 na İhãiba norĩ zõ, durẽ awaru na 're İnomro mono hã 70 na İhãiba norĩ zõ, durẽ İsi'uwazi'wa na dapãrĩ'wa norĩ hã 200 na İhãiba norĩ zõ. Mara sime na te za aiwairẽbẽ 'wa, Sẽzareza u ai'aba'rẽi'wa'aba da.

²⁴ Awaru hã te za İ'ubumroi wa'wa, Paru hã ãma İmorizẽb da. Awaru na te za asiwi İsaprõni warẽ wa'wa, Peri na danhib'apito nhisi u, asiwi åwisi wẽ wa'aba da. — Åne te tãma rob'ru zahurẽ.

²⁵ Tawamhã da'wapẽi'wa norĩ nhĩb'apito hã Zeruzarẽ ãma 're İsãmra mono hã ma tũ Perihĩ ma rob'ui'ẽrẽ. Åne İsimi'ui'ẽrẽ hã:

²⁶ “Peri, wanhib'apito, uburẽ na da'madã'ã'wa, wa ãma asawi.

“Wa hã, Caradiu Risi'asi.

²⁷ “Å hã aibã hã ma tũ zudezu norĩ hã siwi ti'ã. Te arẽ siwi tiwĩ. Tawamhã wa hã wa tũ İtẽme wi, da'wapẽi'wa norĩ me. Wa tũ dawĩ ãma wasisapri' za'ra ni, romanu na 're İhãimana mono na te waihu'u wa oto.

²⁸ Wa tũ İsima wẽ, İwasẽdẽ hã da te ãma İsa'razẽ hã te waihu'u da. Taha wa, wa tũ saprõ, zudezu norĩ ma roti'wa norĩ tẽme.

²⁹ Taha wa, wa tũ waihu'u oto. Marĩ İwasẽdẽ hã te ãma waihu'u õ di, da te İwirizẽb da hã, durẽ dazazẽb 're, da te dasiwi İserẽzẽb da hã. Mare di. Zudezu norĩ 're İhãimana za'ra mono zẽ wa'rãmi, 're İhãimana mono zẽm na si ma tũ İwasẽdẽ hã siwi ãma sa'ra.

³⁰ Zudezu norĩ hã te te siwi wĩrĩ da, te te sima İ'ru za'ra zẽ hã ma tũ durẽ İma waihu'u ni. Te waihu'u wi, wa tũ ãma atẽme satõ, sa'õtẽ. İwasẽtẽ na tãma İnharĩ'wa norĩ ma, wa tũ durẽ ãma rob'ru za'ra, ãma atẽme si'aba'rẽ da, asõ'a te te İwasẽdẽ hã ãma sa'ra da. Åne si, wa ãma aima rob'ui'ẽrẽ.”

³¹ Tawamhã da'wapéi'wa norĩ hã te te tãma ĩ'ru za'ra zém na ma tō ãma uwaimrami za'ra. Paru hã ma tō siwi saprō. Tawamhã tō ã mara na ma tō aihutu, Átipatiridi na 'ri nho'õmo nhisi u.

³² Tawamhã awēpsi, da'wapéi'wa norĩ, para na ĩsi'aba're norĩ hã ma tō apã ai'aba're, tinhorōwa u. Paru hã ma tō rēme za'ra, awaru na 're inomro mono norĩ si te te siwi saprōni da oto.

³³ Tawamhã ta norĩ hã ma tō siwi saprō, Sézarea u. Tamomo sihutu wi, ma tō awa'awi siwi saprō Paru hã, apito u. Tawamhã ma tō apito ma rob'ui'ére hã sōmri za'ra.

³⁴ Apito, ma tō sōré, rob'ui'ére hã. Te te sōré parip si, ma tō Paru sadanha:

— E niha asipti'a nhisi hã.

Tawamhã te asa tãma tinha:

— Sirisiza na ĩnhipti'a nhisi hã.

³⁵ Tawamhã te te waihu'u wamhã, apito hã te tãma tinha:

— Aiwasédé hã te te ai'ãma ĩsa'ra norĩ hã we sihutu wapsi, wa za aiwapa, ta norĩ siré. —
 ãne te tãma tinha.

Tawamhã ma tō da'wapéi'wa norĩ ma Paru hã 'ru za'ra, Erodihĩ nhorōwa ãma te te siwi séré da. Te te duré siwi 'madã'ã pese da zama, te tãma 'ru za'ra.

24

Zudezu norĩ hã Paruhu ãma ĩwasédé te te siwi ãma ĩhirizé wasu'u

¹ Tawamhã bádã hã 5 na ma tō ãma ne, Erodihĩ nhorōwa ãma hãimana ré hã, Paru hã. Tawamhã Ananiza hã, 'Re ĩhãimana u'ãsi mono ma da'ãma romhuri'wa ĩpire uptabi hã ma tō Sézarea u wi, sasedoti ĩpire uptabi hã. Ni'wam norĩ hã, da'madã'ã'wa norĩ hã ma tō siré te te simro. Danhimirob'manharizém na dawasu'u'wa zama te siré saprōni za'ra, Téturu na ĩsisi hã. Ta norĩ hã apito Perihi ma, ma tō ĩwasédé hã siwi ãma tihi, Paruhu ãma.

²⁻³ Tawamhã apito Peri hã ma tō Paruhu zó hã, danho're sab da. Taha pari, Téturu hã ma tō oto Paruhu ãma ĩwasédé hã ãma tihi. Apito ma, te rowasu'u, ãne:

— Roti'wa, a hã aiwé uptabi di. A hã wama 're roti wé u'ãsi mono wa, wa rowé na si 're wahãimana za'ra ãhãna hã. Wa'madã'ã'wa norĩ ma, ma tō 're ĩroti wé u'ãsi mo, daro mono bã te te 're wa'madã'ã wé za'ra mono da, marĩ ĩwasédé hã te te wama 're pese za'ra mono da. Tawamhã waro mono bã, asimipawaptobzém na wama 're asõpru mono wa, wa wa te 're aiwēsãmri u'ãsi za'ra.

⁴ Tane nheré, ĩwapari wa'a õ'umnhasite, ĩmreme syry na wa za aima rowasu'u. Asõpru wa, da'upana te aima rowasu'u wamhã, áté aima wé di za, ĩwapari da hã.

⁵ Ó hã aibã hã wa tō waihu'u za'ra ni, timreme na daré ro'wa'rutu'wa na hã. Duré daro mono bã zudezu norĩ hã te te ĩropéi mono tēme 're morĩ wamhã, ma tō te te da'ãma 're aro'wa'rutu. Duré nazarenu na dasina dasipo'ozém nhisi niwĩ, 're inomro mono ma hã pire di, õ hã.

⁶ 'Re ĩhãimana u'ãsi mono ãma 're ĩdawata za'ra mono zé hã te aré wawi wasété, 'ri hã. Tazahã wa tō wasiwi ãri ni.

⁷ Tawamhã apito Risi'asi hã ma tō watēme wi. Sa'ëté ma tō wawi ti'ã, Paru hã.

⁸ Ta hã ma tō ĩwasété na tãma ĩnharĩ'wa norĩ ma 'ru za'ra, asõ'a simasab da, te te aima wasu'u za'ra da. Taha wa, ã hã aibã hã sadawa pibui wamhã, tō sena na te za ĩwaihu, ĩwasédé hã wa te wasiwi ãma ĩsa'razém na hã. — ãne te Téturu hã apito sada wada'u.

⁹ Tawamhã zudezu norĩ, tame ĩsimasam norĩ hã te duré sadawa waptob za'ra, ĩwasu'u tō sena na.

Paru hã, Perihi uiwada ĩsiwasu'uzé

¹⁰ Tawamhã apito hã ma tō Paruhu ma tinhib'rada sarõtõ, timreme hã te te oto wazere da. Taha wa, Paru hã timreme hã ma oto waze, ãne:

— Ma tō ai'ãma tiwahub ahã, ãme dama rowairébé'wa na 're aihãimana mono ré hã. ãne hã ĩma waihu'u pese di. Taha wa, asõ'a ĩsi'uihã na aima ĩsiwasu'u da hã, ĩma wé di.

¹¹ ĩmreme hã sena na te za ĩwaihu. Nimosi, wa tō wi, Zeruzaré u hã. Bádã 12 na ma tō ĩãma ne, tame ĩnhamra ré hã. 'Re ĩhãimana u'ãsi mono ãma ĩwata da, wa tō wi. Tawamhã 'Re ĩhãimana u'ãsi mono ãma 're ĩdawata za'ra mono zéb ãma 'ri 'wawi wa'ra 're, ĩnhamra ré, ĩsiré zudezu norĩ hã ma tō ĩsãmri za'ra.

¹² Tane nheré, ĩmreme na te ĩdazadawa 'razãri na hã te te ĩwapari za'ra õ di. Zudezu norĩ te, rowahutuzé mono bã ĩmreme na te dazada'rãmi õ di. Duré 'ri babab zama te da'azada'rãmi mono õ di.

¹³ Taha wa, ĩwasété newa, tō sena na te te siwi ĩãma sa'ra waihu'u õ di. Mare di.

¹⁴⁻¹⁵ Āne wa za aima ĩsiwasu'u. 'Re ĩdanomro mono zép téb zarina, wa tó te 're romhuri, 'Re ĩhâimana u'âsi mono ma. 'Re ĩdanomro mono zép té wasu'u hâ te zudezu norĩ hâ te te siwi 're wê'ô za'ra, senai ô newa. Tane nherê, 'Re ĩhâimana u'âsi mono nhimiroti hâ, wahi'rata norĩ nhĩb'apito nhimiroti hâ wa tó uburé saze, Mozési te te âma ĩrob'ui'ére hâ. ĩsadawa wasu'u 'rata 'wa norĩ nhimi'ui'ére hâ wa tó duré saze. ĩwasédé hâ te te siwi ĩ'âma ĩsa'ra norĩ hâ 'Re ĩhâimana u'âsi mono âma te te ĩsasômri za'ra ne, wa duré wa hâ âma sasô. Dadâ'â nherê, aihĩni apâ te te 're ĩda'ahâiwa'utu mono zém na wa tó âma sasô, iwê hâ duré ĩwasédé hâ apâ te te 're ĩda'ahâiwa'utu mono zém na hâ.

¹⁶ Taha wa, iwê hâ te 'manharĩ tó da hâ, ĩwa'a ô di, ĩpê'e wapu na 're ĩsi'madâ'â u'âsi mono da si, 'Re ĩhâimana u'âsi mono nho'a, duré danho'a zama. — Āne te Paru hâ tâma siwasu'u, apito Perihĩ ma.

¹⁷ Te duré tâma siwasu'u, âne:

— Zeruzarê nhiti 're ĩmorĩ ré, ma tó ĩ'âma tiwahub ahâ. Tawamhâ tamomo wa tó apâ mo, danhibzari hâ te âri da, ĩsiré norĩ ma, te sômri da. Duré danhimizama hâ da te ĩsimro hâ 'Re ĩhâimana u'âsi mono ma, te sômri da, âma ĩwata da, wa tó apâ mo.

¹⁸⁻¹⁹ Āne te 'manharĩ da, wa tó ĩsipese, wasiré zudezu norĩ 're ĩhâimana za'ra mono zéb zarina, 'Re ĩhâimana u'âsi mono hâ te te ĩwêsâmri da. Tawamhâ zudezu norĩ hâ Azi'a na danhipti'a nho'ômo nhisi hawi ĩsihudu hâ ma tó ĩ'madâ'â za'ra, 'Re ĩhâimana u'âsi mono âma 're ĩdawata za'ra mono zéb âma 'ri 'wawi wa'ra 're. Tame te te ĩ'madâ'â za'ra wamhâ, ĩrata dasi'râ'ôtô ô di. Da te ĩmreme 'razârĩ ô di. Rowê si. Ta norĩ hâ te te ĩ'madâ'â za'ra norĩ hâ marĩ ĩwasédé hâ te te ĩ'âma waihu'u za'ra wamhâ, we si'aba'rêi 'wa'âhâ, aré wê di, asô'a ĩwasédé hâ te te ĩ'âma sa'ra da.

²⁰ Ta norĩ hâ we si'aba'rêi ô wamhâ, âté asô'a ĩsimasam norĩ si te za aima ĩwasu'u za'ra. Dama rotĩ'wa norĩ nho're ĩzab ré, marĩ ĩwasédé hâ te te ĩ'âma ĩwaihu'u za'ra zém na, te za ĩwasu'u za'ra, âme ĩzab ré.

²¹ Wa hâ wa za aima ĩsiwasu'u, te ĩmahârâzém na, dama ĩpire norĩ nho're ĩzab ré, âne: “Ā bâtâ na wa asô'a ĩzab za'ra wa'wa, ĩpibui pese za'ra wa'aba da. Dadâ'â nherê, apâ dahâiwa'utuzé, te sazei wa, 'Re ĩhâimana u'âsi mono nhimiroti na 're ĩmorizéb zô te za ĩpibu za'ra wa'wa.” Āne si wa tó ĩsi'mahâ, dama ĩpire norĩ nho'a ĩzab ré. Āté âne ĩmreme wamhâ, te ĩ'âma rosa'rata za'ra, ĩwasété na. — Āne te Paru hâ siwasu'u, apito Perihĩ ma.

²² Tawamhâ apito Peri te tâma tinha:

— Zahadu, apito Risi'asi wei wisi wapsi, wa za niha hâ aima rowairébé. — Āne te tâma tinha.

Apito Peri hâ ma tó waihu'u pese, 're ĩdanomro mono zép té hâ. Tane nherê, te te âma wapari 'râsutu ô di.

²³ Tawamhâ apito Peri hâ ma tó da'wapéi'wa norĩ wada'uri'wai ma waihu'u, âne:

— 'Madâ'â pese za'ra wa'aba za, â hâ aibâ hâ aiwi simani za'ra wa'aba tó da. Tazahâ, marĩ hâ te te 'manharĩ da, te te sima wê wamhâ, syry na te za tâma ĩrowairébé 'wa. Duré, ĩsiré norĩ hâ ĩhâimanazéb da, te te pawaptob za'ra da, we ĩtême sisisi wamhâ, wê'ô za'ra wa'aba ô di za, tiwi. — Āne ma tó tâma waihu'u, apito hâ.

Paru hâ Apito Perihĩ nho're ĩsabzé wasu'u, Durusiraha nho're me

²⁴ Bâdâ hâ siwaptom na âma ne pari, ma tó apito Peri hâ Paruhu zô hâ, timro me, Durusiraha me. Durusira hâ, zudezu. Tawamhâ Cristu Zezusi hâ da te dasina 're ĩ'umnhasi za'ra mono zém na ma tó Paru hâ tâma rowasu'u zahuré. Apito Peri hâ ma tó ĩsimrowasu'u hâ wapari pese.

²⁵ ĩwê na si 're ĩdanomro mono zém na ma tó tâma rowasu'u, marĩ hâ ĩwasédé hâ da te dasiwi ĩwê'ôzém na zama. 'Re danomro wasété mono wa, rob'râsutu u 'Re ĩhâimana u'âsi mono, za niha te te dama ĩrob'manharĩ pipa zém na ma tó duré tâma rowasu'u. Āne hâ te te tâma awasu'u wa, ma tó apito Peri hâ tipahi. Taha wa, te tâma tinha, Paruhu ma:

— Āhâna te za aimo a'â. Niwa te ĩsima wê wapsi, wa za duré asô hâ apâ, te aiwapari da.

²⁶ Tawamhâ Paruhu âma te rosa'rata, rob'uiirazém na tâma siwa'âbâ da newa, dazazém hawi watobro da. Taha wa, te nasi só hâ, te te sima rowasu'u zahuré da.

Paru hâ Pesituhu ma, ĩsiwasu'uzé wasu'u

²⁷ Tawamhâ maparane ma tó âma tiwahu, Sezariza âma sâmra ré, dazazéb 're, Paru hâ. Tawamhâ Posi'u Pesitu hâ te za oto si'apito, Perihĩ nhowa're're. Taha wa, apito Peri hâ sisa'u ma tó tizadawa âma tirê, dazazéb 're, hâimana u'âsi da Paru hâ, ĩsa'u hâ. Zudezu norĩ ma, rowêzéb da, ma tó âne hâ tizadawa hâ âma tirê.

25

¹ Tawamhã Pesitu hã tame si'apito wamhã, bådã si'ubdatõ âma ne pari, te oto mo Zeruzarê u, Sézareza hawi.

² Zeruzarê u wisi wamhã, sasedoti Ìpire norĩ hã duré zudezu norĩ ma, roti'wa norĩ zama ma tõ tâma wasu'u za'ra Paru hã, waseté ré ne.

³ Ma tõ tiwi waptêrê za'ra, Paru hã te te tâma satõrĩ za'ra da, Zeruzarê u. Ta norĩ hã bådãdi wãï wa, te te siwi wĩrĩ da, aré âma siwada'uri za'ra na dâ'ásina, ma tõ tiwi waptêrê za'ra, Zeruzarê u te te satõrĩ da.

⁴ Tawamhã apito Pesitu hã ma tõ asa tâma nharĩ za'ra, âne:

— Paru hã Sézareza âma te nhamra dazazéb 're, da'wapéi'wa norĩ hã te te siwi 'madâ'â pese za'ra da tame. Tamomo wa za apã morĩ su.

⁵ Taha wa, dama Ìmreme pire norĩ hã asiwa'wa hawi, asiwi satõrĩ za'ra wa'aba za, Ìme si'aba'rê da. Ìwasédé hã te te âma hiri ze za'ra wamhã, tamep si te za tâma nharĩ za'ra, Ìnho'a. — Ìne te apito Pesitu hã tâma nharĩ za'ra.

⁶ Tawamhã bådã hã 8 na até niwamhã 10 na ma tõ âma ne, Zeruzarê âma sãmra ré hã, apito Pesitu hã. Taha pari, ma tõ mo apã, Sézareza u. Wisi wamhã, awê te oto nhamra, dapa'uwati'wa simasisizém na. Tawamhã Paruhu zõ ma tõ da'mazatõ, te te Ìtême siwi saprõni da.

⁷ Tawamhã Paru hã Ìtême wisi wamhã, zudezu norĩ hã Zeruzarê hawi Ìsi'aba'rê norĩ hã ma tõ siwi uirĩ. Taha wa, apito ma, ma tõ wasu'u waseté uptabi za'ra, Paru hã. Tane nherê, tõ sena na Ìwasédé hã te te siwi âma sa'ra waihu'u õ di, zudezu norĩ hã.

⁸ Tawamhã Paru hã ma tõ apito ma siwasu'u, âne:

— Zudezu norĩ nhimiroti wa'rãmi, Ìwasédé hã te 'manharĩ õ di. Mare di. 'Re Ìhãimana u'âsi mono âma 're Ìdawata za'ra mono zéb âma duré Ìwasédé hã te 'manharĩ õ di. Duré Roma âma apito Sézaha ma, marĩ hã te 'manharĩ õ di, danhipai u danhib'apito ma hã. — Ìne ma tõ Paru hã si'wawi aimapa.

⁹ Tawamhã apito Pesitu hã te asa tâma tinha:

— E Zeruzarê u aimorĩ da hã, aima wê di, tame da te asadanharĩ za'ra da, Ìnho'a. — Ìne te sadanha, zudezu norĩ ma, Ìmreme te te tâma âma uwaimrami za'ra da, tâma Ìrowê za'ra zéb da.

¹⁰ Tawamhã Paru, te asa tâma tinha:

— Mare di. Ìmorĩ da hã, te Ìsima rowê õ di. Roma âma apito Sézaha zadawa para, te âme 're Ìda'apa'uwati mo. Taha wa, âmep si te za siwi Ìzadanha, Ìhãimanazém na. Marĩ Ìwasédé hã te 'manharĩ õ di, zudezu norĩ ma hã. Ìne na hã aima Ìwaihu'u pese di, a hã.

¹¹ Marĩ Ìwasédé hã te 'manharĩ 'wa'âhã, da te dasiwi Ìwĩrĩ da hã, aré Ìsisawi õ di. Tane nherê, Ìwasédé hã te te siwi Ì'âma Ìsa'ra hã tõ senai õ wamhã, ni'wa hã te te tâma Ìza'rêi waihu'u za'ra õ di. Taha wa, Roma na 'ri nho'õmo nhisi u si te za Ìzatõ, apito Sézaha nho're Ìzab da, taha ma si Ìsiwasu'u da, tame. — Ìne te tâma si'ru, Paru hã.

¹² Tawamhã Paruhu mreme hã te te wapari wamhã, apito Pesitu hã Ìsimiroti na âma Ìsime za'ra norĩ me, ma tõ sima âma roti za'ra. Taha parip si, ma tõ asa Paruhu ma tinha, âne:

— Ma tõ Ìma asi'ru, Roma âma apito Sézaha u te asatõrĩ da. Tane tõ. Te za tõ Ìtême aimo. — Ìne ma tõ tâma rowairébé, apito Pesitu hã.

Paru hã Apito Adaripaha nho're Ìsabzé wasu'u, Berenisihĩ nho're me

¹³ Tawamhã, syru na âma ronomro pari, apito Adaripa norĩ hã ma tõ tihidiba me aimasisi zahuré, Sézareza u. Berenisĩ na Ìhidiba nhisi hã. Apito Pesitu hã te te sabu zahuré da, ma tõ Ìtême aimasisi.

¹⁴⁻¹⁵ Tawamhã tame simasisi ré, bådã hã umro na âma ne pari, ma tõ apito Pesitu hã apito Adaripaha ma wasu'u, Paru hã. Te tâma tinha, âne:

— Ìme aibã hã te za, dazazéb 're, apito Peri hã sisa'u te te dama'ĩru hã, dazazéb 're, hãimana u'âsi da, Ìsa'u hã. Tawamhã Zeruzarê u Ìmorĩ wamhã, sasedoti Ìpire norĩ hã duré zudezu norĩ ma roti'wa norĩ me, ma tõ Ìma wasu'u za'ra, Paru hã waseté ré ne. Te dama hãiba 'ru da, ma tõ Ìwasédé hã siwi âma tihi.

¹⁶ Tane nherê, wa tõ asa tâma nharĩ za'ra, âne: “Mare di. Wa norĩ hã, romanu norĩ hã âne wa te 're 'manharĩ za'ra mono õ di. Dasi'wawi 're dasimapa za'ra mono õ ré, wa te 're dahãiba za'rêi waihu'u za'ra mono õ di. Te te dama 're Ìnharĩ za'ra mono norĩ nho'a 're dasimasa mono wapsi, te za a'ã 're dasiwasu'u za'ra, sena zõ.” Ìne wa tõ asa tâma nharĩ za'ra, sasedoti norĩ ma.

¹⁷ Tawamhã ta norĩ hã ma tõ we Ìsiré ai'aba'rê. Tawamhã awê na hã awa'awi wa tõ sô nhamra, dapa'uwatizéb âma. Wa tõ dama ti'ru, da te we Ìtême saprõni da, aibã hã.

¹⁸Tawamhã tãma ãnharĩ'wa norĩ hã ma tã sada aimasa. Tane nherẽ, marĩ na te te wasu'u waseté za'ra õ di. Ìwaseté uptabi newa, wa tã aré ãma rosa'rata. Tane nherẽ, ãnei õ di oto, ãnhimirosa'rada hã.

¹⁹Zudezu norĩ nhimizazezẽm na sisada'ãbã za'ra wa, marĩ hã ãwaseté na te te ãma hiri za'ra neza. Aibã hã Zezusi na ãsisi hã dã'ã nherẽ, apã ãhãiwa'utu na te te dama 're wasu'u u'ãsi mono wa, ma tã ãwaseté na tãma nharĩ za'ra.

²⁰Taha wa, wa hã ãsimi'manharĩzẽb zõ te pibui waihu'u õ di, ãmemhã. Taha wa, wa tã sadawa pibu aré, Zeruzarẽ u morĩ da, te te sima rowẽ zõ, tame da te dasiwi sadanharĩ da.

²¹Tane nherẽ, ma tã ãwi rowaptẽ, Roma ãma apito Sãzaha u si te satõrĩ da, durẽ da'wapéi'wa norĩ nhĩb'rata sãmra da a'ã, tamomo te satõrĩ õ ré. Taha wa, wa tã dama ti'ru, da te dasiwi ãma ropti da, ãme sãmra da a'ã Paru hã, apito Sãzaha u te satõrĩ õ ré. — ãNe apito Pesitu hã ma tã tãma rowasu'u, apito Adaripaha ma.

²²Tawamhã mreme parip si, Adaripa te tãma tinha, Pesituhu ma:

— Aibã mreme hã te wapari hã, wa ãsima wẽ.

Tawamhã Pesitu te asa tãma tinha:

— Tane tã, awẽpsi te za ãwapa.

²³Tawamhã awẽpsi apito Adaripa norĩ hã Berenisihĩ me, ma tã tizasi zahuré, apito te, dasi'rã'õtõzẽb u. Uza wẽ ré, durẽ sima sipese na, ma tizasi zahuré, dama pire wẽ te, ãma datob'uzu za'ra da. Da'wapéi'wa norĩ nhĩb'apito norĩ me ma tã asisi, 'ri nho'õmo ãma dama ãpire norĩ me zama. Tawamhã apito Pesitu hã ma tã Paru hã dama ti'ru, te te ãtẽme siwi saprõni da.

²⁴Te te ãtẽme siwi saprõni wamhã, Pesitu hã ma tã dama tinha, ãne:

— Apito Adaripa, durẽ ãme 're asimroi wa'aba mono norĩ, ãwapari za'ra wa'aba. ãhãta te za, aibã hã. Zeruzarẽ ãma ãnhamra ré hã zudezu norĩ hã aihĩni ma tã siwi ãma ãwasutu. ãneb zama te siwi ãma ãwasutu, dã'ã da. ã hã hãiba ré 're morĩ u'ãsi wamhã, te za, u, te te da'ãma 're rowaseté.

²⁵Tane nherẽ, marĩ na hã te waihu'u õ di, da te dasiwi ãwirĩzẽb da hã. Tawamhã õ hã si'uihã na ma tã ãwi rowaptẽ, Roma ãma apito Sãzaha u te satõrĩ da. Taha wa, wa tã ãma saze tã, te ãtẽme satõrĩ da.

²⁶E niha, wa za tawamhã bété ãwaseté na tãma rob'ui'ére, Roma ãma wanhib'apito ma. Marĩ na sena na ãwasédé hã da te ãma ãsa'razẽm na hã te waihu'u õ di, wa hã. Baba di. Taha wa, wa tã sã hã, asõ're sab za'ra wa'aba da, apito Adaripaha nho'reb zama. Marĩ zõ te za asiwi t'madã'ã 'wa pé, marĩ na pé te ãma rob'ui'ére da, wanhib'apito ma.

²⁷Ìwasédé hã da te ãma ãsa'razẽm na te tãma rob'ui'ére waihu'u õ di. E niha da, wa za bété taré ãtẽme satõ, aibã hã da'wapéi'wa norĩ me morĩ da, Sãzaha nho're sab da, si'uihã na tãma siwasu'u da. Marĩ hã ãwasédé hã da te ãma ãsa'razé hã hãimana õ nherẽ, te ãtẽme satõrĩ waihu'u õ di. — ãNe te apito Pesitu hã dama tinha.

26

Paru hã apito Adaripaha nho're, dama ãsiwasu'uzé wasu'u

¹Tawamhã apito Adaripa ma tã Paruhu ma tinha, ãne:

— ãhãna, asi'uihã na te za wama asiwasu'u, aihãimanazẽm na.

Taha wa, Paru hã ma tã tinhib'rada hã dama wẽ, apito Adaripaha ma siwasu'u da. Taha pari, te ãne tãma siwasu'u oto danho'a:

²— Apito Adaripa, ãto ti ãhãna hã, asõ'a za oto aima ãsiwasu'u wa. Zudezu norĩ hã ãwasédé hã te te ããma ãhiri za'ra zẽm na wa za ãsiwasu'u na wa'rã.

³Zudezu norĩ hã 're ãnomro mono zé hã aima waihu'u pese di. ãsisada'rãmi za'ra zé hã, aima waihu'u pese di durẽ. Taha wa, wa aiwi rowaptẽ, asimi'ẽ na ãwapari da.

⁴— ãprẽdu wi, 're ãhãimana mono zẽm na ma tã uburẽ zudezu norĩ hã ãwaihu'u za'ra. ãrob ãma 're ãhãimana mono ré, ma tã ãwaihu'u za'ra, 're ãhãimana mono zẽm na hã. Zeruzarẽ ãma ma tã durẽ ãwaihu'u za'ra, tame 're ãhãimana mono ré hã.

⁵Parisezu norĩ siré, wa tã 're ãhãimana. Wasiré zudezu norĩ hã Mozésihĩ nhimi'ui'ére zarina sipai ãna 're ãhãimana za'ra mono zẽm nhipai u 're ãwahãimana za'ra mono zé hã, wasiré parisezu norĩ hã. ãNe ãsãna'rata hawimhã, 're ãhãimana mono zé hã. Zudezu norĩ hã sena na te te aima ãwasu'u ze za'ra 'wa'ãhã, ãne na hã te aré aima ãwasu'u wẽ za'ra.

⁶Dadã'ã nherẽ, apã te te 're ãda'ahãiwa'utu mono zéb zõ, wa 're ãnhimipari u'ãsi, 'Re ãhãimana u'ãsi mono, wahi'rata norĩ ma, te te ãropisutu zõ. Taha zarina, ma tã zudezu norĩ hã ã bãtã na ãwasédé hã ããma hiri za'ra.

⁷⁻⁸Wahi'rata norĩ, 12 na ãhãiba norĩ nhihudu mono bã, wa wanhimĩ'ẽ na ãma 're wawata za'ra, 'Re ãhãimana u'ãsi mono ãma hã. Rowa'a na wa ãma 're wawata za'ra, barana zama. 'Re ãhãimana u'ãsi mono te te wama ãropisutu zõ, wa wanhimipari sina ãma 're wawata u'ãsi

za'ra. Ōhō zō 're ĩnhimipari mono wa, te zudezu norī hā ĩwasédé hā ĩ'āma sa'ra. ĩwapari'wa norī, e marī wa, te 'Re ĩhāimana u'āsi mono āma 're ĩrosa'rata upa za'ra wa'aba mo, te te 're ĩda'ahāiwa'utu mono zéb da hā, tāma ĩwaihu'u ō newa.

⁹ — Wa tō aré ĩsina rosa'rata, Zezusihi zazei'wa norī āma te 're rowasutu u'āsi mono da, Nazaré āma aré 're ĩsāma mono zazei'wa norī āma.

¹⁰ Tawamhā Zeruzarē āma wa, wa tō āne hā te tāma 're 'manharī za'ra. Sasedoti ĩpire norī zadawa para, wa tō te 're 'maza, dzazézé 're, 'Re ĩhāimana u'āsi mono nhib'a'uwē norī hā. Duré da te dasiwi 're simroi mono da, da te dasima 're hāiba za'ré za'ra mono wamhā, wa tō te āma 're dzaze za'ra.

¹¹ Taha wa, wa tō te āma 're arowasété, rowahutuzé mono bā, Zezusi hā te te siwi 're wē'ō za'ra mono da, ĩsazei'wa norī hā. Ta norī zada ĩzahi uptabi wa, wa tō 'ri nho'ōmo mono bā te āma 're rowasété za'ra, darob amoi āma zama.

¹² — Taha da, nimahā bātā na wa tō duré mo Damasitu u, ĩsazei'wa norī zō, āne hā te tāma 'manharī za'ra da. 'Re ĩhāimana u'āsi mono ma, da'āma romhuri'wa ĩpire norī hā ma tō ĩzatōrī za'ra. Rob'ui'éré ma tō ĩma sōmri za'ra, ĩsazei'wa norī āma te 're rowasété za'ra mono da, ĩsada wa parab za'ra.

¹³ Apito, tane nheré, ma tō aimawi ĩma tiromhāiba. Damasitu u ĩmorī ré, abzuma wa'wa ma tō rowa'a za'ēté uptabi hā ĩma ai'ubuzi, hāiwa hawi. Bātā nhimirowa'a nhipai u, rowa'a za'ēté uptabi di. ĩsiré ĩsi'aba'ré norī uwaibaba zama ma tō ai'ubuzi.

¹⁴ Tawamhā aihīni wa tō warere'e ni, ti'ai wa. Wa hā ni'wai mreme hā wa tō wapa. Āne te ĩma tinha, ebreusi norī mreme na: "Saru, Saru, e marī wa, te ĩwi 're ĩrowasutu u'āsi mo. Aipé'ē 'remhā ma tō 're asi'u'a u'āsi mo, powawē hā wedehu 'rā'wa na da te zusi wa, te te sina mei wa, ĩsi'u'a ne."

¹⁵ — Tawamhā wa tō asa 'mahā: "Apito, e 'wa hā a hā."

— Tawamhā Wanhīb'apito te asa ĩma tinha: "Wa hā Zezusi, te ĩwi 're ĩrowasutu u'āsi mo.

¹⁶ Ma'āpé aiwahutu, hāiwi asab da. Wa we aima ĩsihāiré, te ĩsima apisutu da, ĩma romhuri'wa da. Ā bātā na ĩzabuzém na te za dama 're ĩwasu'u u'āsi mo. Duré zahadu wapsi te aima ĩwaihu'uzém na zama, te za dama 're ĩzadawa wasu'u u'āsi mo.

¹⁷ Wa hā wa za te 're ai'madā'ā, asiré zudezu norī, ĩsahi norī wi, te 're asō'reptui mono da, duré zudezu'ō norī wi, te 're asō'reptui mono da zama. Zudezu'ō norī tēme, wa za oto asatō.

¹⁸ Datob'a ne 're danomro mono wa, da te 're ĩdato pese za'ra mono ne, te za 'Re ĩhāimana u'āsi mono nhimiroti na 're ĩpo're pu'u za'ra mo, zudezu'ō norī hā. Robra na 're ĩnomro mono hā te za 're ĩ'awaiuib mo, rowa'a na oto 're nomro mono da, ta norī hā. Satanasihī nhiptezém hawi te za 're ĩ'apizari mo, 'Re ĩhāimana u'āsi mono niwī 're nomro mono da oto, te te sina 're ĩ'umhasi za'ra mono zéb zarina, 'Re ĩhāimana u'āsi mono hā ĩwasédé hā te te tāma 're aparī mono da, duré āma 're sib'a'uwē za'ra mono da oto dame." Āne ma tō Wanhīb'apito hā ĩma pisutu, zudezu'ō norī hā. — Āne ma tō Paru hā siwasu'u, apito Adarīpaha ma, tihāimanazém na te te āma ĩsaprízém na hā.

Paru hā tinhimirohuri na ĩsiwasu'uzé

Tawamhā Paru te duré siwasu'u, āne:

¹⁹ — Apito Adarīpa, ĩwapari. Hāiwa hawi te ĩsabiui mreme hā wa hā te sadawa rēme ō di.

²⁰ Damasitu āma uimrehēne wa tō Zezusihi zadawa wasu'u na hā dama āma sāna'rata. Taha parip si, Zeruzarē āma wa tō duré dama āma rowasu'u. Taha parip si, wa tō duré Zudeza na danhipti'a nho'ōmo nhisi āma dama sadawa wasu'u, zudezu norī ma, zudezu'ō norī ma zama. Ta norī hā tiwasédé hā te te 're rēme za'ra mono da, duré 'Re ĩhāimana u'āsi mono niwī 're nomro wē mono da, wa tō te tāma āma 're rowasu'u za'ra, tō sena tiwasété wi 're ĩsipizari za'ra mono na, da te 're waihu'u za'ra mono da.

²¹ Taha 'ru te, ni'wam norī hā zudezu norī hā ma tō siwi ĩ'ā, 'Re ĩhāimana u'āsi mono āma 're ĩdawata za'ra mono zéb āma 'ri 'wawi wa'ra 're, ĩnhamra ré. Te aré siwi ĩwi.

²² Tane nheré, 'Re ĩhāimana u'āsi mono hā ma tō te te 're ĩpawapto b u'āsi. Taha wa, ā bātā na ĩhāiba ré, wa zahadu 're ĩhāimana. Taha wa, zahadu wa nasi dama sadawa wasu'u, dama ĩwapu norī ma, duré dama ĩpire norī ma zama. Uburé Mozésihī nhimirowasu'u zarina, duré 'Re ĩhāimana u'āsi mono zadawa wasu'u 'rata 'wa norī nhimirowasu'u zarina, wa tō te dama 're sadawa wasu'u. ĩnhimizadawa wasu'uzém na āma ĩsipai ō di. Romhā ré ma tō ta norī hā te te dama 're wasu'u za'ra, āne:

²³ "Danho'reptui'wa da, 'Re ĩhāimana u'āsi mono te te ĩpisudu hā te za robzépata za'ēté. Te za dasiwi wīri ni. Dadā'ā nheré, apā te te 're ĩdahāiwa'utu mono zéb da na te za sāna'rata. Tawamhā te za dama waihu'u za'ra, rowa'a na 're ĩdanomro wē mono zé hā. Apā ĩhāiwa'utuzéb za'u si, te za āne hā zudezu norī ma waihu'u za'ra, zudezu'ō norī ma zama." Āne ma tō romhā ré dama sadawa wasu'u za'ra. Taha na wa tō duré wa hā dama rowasu'u. — Āne te siwasu'u Paru hā, apito Adarīpaha ma.

²⁴ Āne siwasu'u ré, ma tō apito Pesitu hã sadawa 'razá. Mreme 'rãihã na te tãma tinha, āne:
— Paru, ma tō aiwamna, ai'rãzadá'á wa. Asimirosa'rata ahã wa, ma tō ai'rãsiwamna.

²⁵ Tawamhã Paru te asa tãma tinha:

— Īnhĩb'apito, mare di. Īsiwamnarĩ ò di. Īmreme hã tō sena. Īmreme wẽ di. — Āne te asa tãma tinha, apito Pesituhu ma.

²⁶ Tawamhã apito Adaripaha ma, te duré tinha:

— Apito Adaripa, Zezusi hã ti'ai āma 're morĩ ré hã uburé marĩ hã tãma 're ĩromhãimana mono zẽm na hã aima waihu'u pese di, ĩdã'ázẽm na hã duré ĩhãiwã'utuzẽm na zama. Da'ahã na ma tō āma 're danhoprẽ. Taha wa, apito Adaripa, a zama ma tō ĩwaihu, uburé Zezusihi wasu'u hã te aima ĩwasu'u hã. Taha wa, sena na, wa aima ĩsiwasu'u ĩpahi āna, waihu'u da.

²⁷ Apito Adaripa, e 'Re ĩhãimana u'ãsi mono zadawa wasu'u 'rata 'wa norĩ nhimirowasu'u hã sena na ma tō ĩsaze. Ma ĩsaze tō. Āne na wa tō ĩsina aiwaihu'u.

²⁸ Tawamhã apito Adaripa, ma tō mreme to na Paruhu ma tinha:

— E tane na duré ĩma rowasu'u bã, wa za bété āma asaze, Cristu hã te saze da.

²⁹ Tawamhã Paru te asa tãma tinha:

— Īmreme 'rutu na niha wamhã, ĩmreme pa na te aima rowasu'u wamhã, tō marĩ ò di. Āhã si ĩpire hã, ĩsine 're ĩsazei pese mono da hã. Taha da, wa 'Re ĩhãimana u'ãsi mono ma ai'āma 're ĩmreme u'ãsi, uburé ā bãtã na ĩwapari'wa norĩ āma zama, te ĩsima wẽ ò nherẽ, Cristu hã saze za'ra wa'aba 'ru te, ĩsine da te aipawasisi za'ra wa'aba da hã. — Āne te asa tãma tinha, Paru hã.

³⁰ Tawamhã apito Adaripa hã duré apito Pesitu hã duré Berenisi hã, duré uburé ĩsiré ĩsi'ubumro norĩ zama ma tō tiwahutu za'ra aihĩni.

³¹ Te oto tiwi ai'aba'rẽ. Tiwi si'aba'rẽ za'u si, ma tō sima āma nharĩ za'ra, āne:

— Ō hã aibã hã marĩ ĩwasédẽ hã te te 'manharĩ ò di, da te dasiwi ĩwirizẽb da hã, niha wamhã, dazazẽb 're, da te dasiwi ĩsẽrẽ da hã.

³² Tawamhã Adaripa te tãma tinha, Pesituhu ma:

— Ō hã, aibã hã Roma āma apito Sézaha nho're sab da, te te rowaptẽrẽ ò 'wa'ahã, wa aré tãma rowairébé za'ra ni, apã 're morĩ da. Tane nherẽ, waihu'u ò di oto. — Āne te tãma tinha, Pesituhu ma.

27

Paru hã Roma u morĩ da, timorizẽm na te te ĩsãna'ratazẽ wasu'u

¹ Tawamhã apito Pesitu hã ma tō oto tãma ropibu, Paruhu ma, Itaria na danhipti'a nho'õmo nhisi u morĩ da, rowa'u'u na uba'renem na hã. Tawamhã wa hã, Rucasi hã wa tō ĩme mo. Zuri'u na da'wapéi'wa norĩ wada'uri'wa nhisi hã ma tō duré wame satõ, Paruhu 'madã'á'wa da hã, duré pawasisi ré ĩsiré ĩsi'aba'rẽ norĩ 'madã'á'wa da hã. Da'wapéi'wa wada'uri'wa nhimi'ubumro norĩ hã Danhipai u, Apito te na ĩwaptẽrẽ hã.

² Tawamhã rowa'u'u na uba'reneb 're, wa tō asisi ni, Adaramitu hawi we ĩsimizazãri na, wasi'aba'rẽ da. Azi'a na danhipti'a nho'õmo nhisi u ā zadaréi baba wara ré, uba'rene nhimizahãrizẽ mono bã te za simizahãri. Aibã hã Aritacu na ĩsisi hã te wame mo, Tesaronita na 'ri nho'õmo nhisi āma 're ĩsãmra mono hã, Masédoniza na danhipti'a nho'õmo nhisi 'remhã. Tawamhã ma tō oto waré tiwara za'ra.

³ Tawamhã awẽpsi, wa tō aihutu ni, Sido na 'ri nho'õmo nhisi u. Tame, Zuri'u hã ĩwẽ na te te pawaptõb da, ma tō Paruhu ma waprosi, tame ĩsazei'wa norĩ u morĩ da a'á, ta norĩ hã Paruhu āma sime za'ra da, ĩhãimanazẽb da hã.

⁴⁻⁵ Tawamhã Sido hawi ma tō oto waré wara, uba'rene hã. Wasi'aba'rẽi wamhã, rowa'u hã te we wawa'rãmi rowapõ, sa'etẽ. Taha wa, Sipri na rob'rẽ za'iti nhisi uwaibaba, rowa'u u syry niwĩ, te waré wara, ā poré wa'wai baba, Sirisiza na danhipti'a nho'õmo nhisi uwaibaba. Pãpiriza na danhipti'a nho'õmo nhisi uwaibaba ma tō duré wara. Tawamhã wa tō aihutu ni, Miha na 'ri nho'õmo nhisi u. Risiza na danhipti'a nho'õmo nhisi āma te za, Miha hã.

⁶ Tame da'wapéi'wa norĩ wada'uri'wa hã ma tō rowa'u'u na uba'reneb amo hã tisã, Aresãdiriza na 'ri nho'õmo nhisi hawi ĩwara hã, Itaria na danhipti'a nho'õmo nhisi u ĩwara da hã. Tawamhã ma tō wama rob'ru za'ra, ĩre wanhisisi da.

⁷ Tawamhã rowa'u'u na uba'rene hã ma tō si'ãsi, waré za'ra, wara pire wa. Bãdã ahã na te āma si'utõrĩ, si'ãsi mono ré hã. Tawamhã Sinidu na 'ri nho'õmo nhisi 'rata, ma tō waré mazazã a'á. Tawamhã rowa'u hã te zahadu wei wawa'rãmi rowapõ. Taha wa, uba'rene hã Cereta na rob'rẽ za'iti nhisi u ma tō waré wara. Tawamhã Saramona na romnhisi uwaibaba rowa'u u syry niwĩ ma tō waré uirĩ za'ra.

⁸ Ā zadaréi baba te wara u'á. Wara pire di. Wara pire nherẽ, wa tō aihutu ni, Uba're nhimizahãri wẽ zẽm na 'ri nho'õmo nhisi u, Raséza na 'ri nho'õmo nhisi 'ratamhã.

⁹ Tamemhã wa tô asimroi hã ni. Dawasété parizém na 're ìdasipo're pu'u za'ra mono zé bôtã za'u si, te rowa'u'u wawê hã 're pusi, wahup sidâpâsi. Taha wa, â wa'wai baba, 're danomro mono ô di oto, rowa'u'u wawê nhimimnhasi te. Taha wa, Paru hã ma tô dama roti, âne:

¹⁰ — Aibã norî, ïwapari za'ra wa'aba. Âhãna â nhisi baba wasi'aba'rêi wamhã, wama romnhimimnhasi za'ra di za. Uba'rene hã te za waré aiprub za'ra. Taha wa, 're ïromnhimi'wara hã te za rere'e, âi ba. Duré wa norî hã âté wa za ai'utôri ni. Âne wa tô waihu'u. — Âne te tâma nharî za'ra, Paru hã.

¹¹ Tane nherê, da'wapéi'wa norî wada'uri'wa hã Paruhu nhimirowasu'u hã te te sazei ô di. Uba'rene tede'wa norî mreme si ma tô saze, ï'mapraba'wai mreme zama.

¹² Tame uba'rene nhimizahârizéb âma, rowa'u'u wawê hã 're pusi mono ré, rowa'u'u na uba'rene hã nomro wê waihu'u ô di. Taha wa, da'ahã na ma tô dasima wê za'ra ni, ô hawi dasi'aba'rê da, Cereta âma Penisi na uba're nhimizahârizém nhisi u sihutu hã, tame uba'rene hã nomro wê da, rowa'u'u wawê hã tamemhã te te 're rowapôri mono ô wa.

Â poré âma rowa'u ïsa'êne hã te te ïrowapôrizé wasu'u

¹³ Tawamhã rowa'u ïsyrre hã hãiwa'a're nhimi'e hawi ma tô watobro. Syry na ma tô rowapô. Taha wa, ma tô âma rosa'rata za'ra, te te sima ïwê za'ra zéb uwaibaba si'aba'rê da, sihutu waré da newa. Uba're tétézé hã ma tô wazere za'ra, â 'rowi ïsimi'wara hã. Tawamhã rowa'u'u na uba'rene hã ma tô waré wara, â zada'rêi baba, Cereta na rob'rê za'iti nhisi zababa.

¹⁴ Tane nherê, zahadu wasina wapahã za'ra ô ré, ma tô rowa'u'u za'êne hã awa'awi wei watême rowapôri za'ra, rob'rê za'iti hawi. Rowa'u'u za'êne hã, Nodesiti na da te 're ïsisi za'ra mono, bôtã pusizém nhimire hawimhã 're pusi u'âsi mono wa.

¹⁵ Tawamhã â zada'rêi baba awa'awi wara da, wa aré wa te si'oto pibu za'ra. Tane nherê, te wawi tiwara u'âsi za'ra. Taha wa, wa tô tâma 'marême za'ra ni, si'uihã na wara da oto, rowa'u'u zarina.

¹⁶⁻¹⁷ Tawamhã Cazuda na rob'rê za'iti 'rare nhisi uwaibaba ma tô wara, rowa'u'u syry niwî. Tamomo wara ré, uba're 'rare hã ïna're na wa te wasiwi ïsi'u hã wa tô wasiwi wazere ni, â hawi, siprup tô da. Pire uptabi nherê, ma tô uba're na romhuri'wa norî hã siwi sarôtô, uba're ïsa'êtê 're, te te siwi sêrê da. Uba're za'êne hã ma tô duré te te siwi wasisi, wedenhorô rutu na sipo'o tô da. Ribiza na danhipti'a nho'ômo nhisi âma â zaihã uwaibaba supara uwa niwî, wara ô'umnhasite, ma tô âma tihâtã'â za'ra. Taha wa, ma tô zazahã wawê hã ï'maprabazé hã siwi si'ra, tamomo wara tô da. Tawamhã rowa'u'u wawê zababa ma tô uba'reneb za'êne hã wara.

¹⁸⁻¹⁹ Rowa'u'u za'êne hã pupu'u za'êtê di. Ropupu'u za'êtê uptabi di. Tawamhã wa'âma awê wamhã, te te dama wede za'ra da, âma ïsihãiba waptob za'ra hã ma tô siwi sãmra na'rata za'ra, âi ba, rowa'u'u na uba'rene hã wapu na waré wara da oto. Ma duré âma ti'awê, rowa'u'u za'êtê na hã. Tawamhã ï'mapraba'wa norî hã ma tô ïpu hã uba're na romhurizé hã syry na siwi sãmra, âi ba.

²⁰ Awê sidâpâsi te hãiwarutu u'âsi. Taha wa, bâdã hã te te urîri ô di. Wasi zama te te urîri za'ra ô di. Rowa'u'u wawê si te zahadu nomro. Tã hã pîni za'êtê di duré. Tawamhã wasisô'reptu za'ra zéb zô, wa te rosa'rata za'ra ô di oto. Sô wanhimipari za'ra ô di oto.

²¹ Tawamhã wasaihuri âna wahãimana za'ra ré, wa'âma ropsi'utôri za'ra wamhã, ma tô Paru hã hãiwi za, ïwa'wab za'ra. Âne te tâma rowasu'u za'ra:

— Aibã norî, ïwapari za'ra wa'aba. E marî da, ïmreme hã saze za'ra wa'aba ô di bété. ïmreme hã saze za'ra wa'aba 'wa'âhã, aré Cereta hawimhã wawairébê ô di. Taha 'wa'âhã, aré wama rowê za'ra di, âhãna hã. Aré âma wasi'uba za'ra ô di.

²² Tane nherê, sada asib'ru za'ra wa'aba. Ni'wa hã dâ'â ô di za. Uba'renep si te za wawi aiprub za'ra.

²³ Wa hã, 'Re ïhãimana u'âsi mono nhîb'a'uwê, te tâma 're ïromhuri u'âsi mono hã. Barana, hãiwa âma tâma ïromhuri'wa hã ma tô we ïtême wi.

²⁴ Te ïma tinha, âne: "Paru, aipahi tã. Tô sena Roma âma apito Sézaha nho're te za asa, asi'uihã na tâma asiwasu'u da. 'Re ïhãimana u'âsi mono hã aima isôprubzéb zarina ma tô pisutu, aihîni asiré ïsi'aba'rê norî hã aiwi dâ'â za'ra tô da." Âne ma tô ïma tinha.

²⁵ Taha wa, âhãna aipahi za'ra wa'aba ô di za. Sada asib'ru za'ra wa'aba. 'Re ïhãimana u'âsi mono hã ïma umnhasi uptabi di. Uburé te te ïma ïwaihu'u zarina, te za tô wama âma uwaimrami za'ra.

²⁶ Tazahã nimomo, rob'rê za'iti u uba'rene hã te za waré time, rowa'u hã. — Âne ma tô Paru hã po're pu'u za'ra.

²⁷ Tawamhã 14 na ma tô wa'âma timara za'ra, rowa'u'u za'êne hã wawi nomro za'ra ré hã. Taha wa, te rowa'u'u na uba'rene hã zahadu waré si'âsi za'ra siwa'ru, Mediteranizu

na âporé nhisi wa'wai baba. Tawamhã mara wa'wa ma tô uba're na romhuri'wa norĩ hã waihu'u za'ra, â zadaré u Iropi'utõrĩ na hã.

²⁸ Taha wa, wedenhorõ na êtê nhi'õmore hã ma tô siwi time, âi ba, â 'reptõ zõ te te siwi âma pibu da. Tawamhã ma tô waihu'u za'ra, 36 na â 'rehã pibuzé hã. Tawamhã syry na âma romomro pari, ma duré siwi pibu. 27 na â 'rehã pibuzé hã oto.

²⁹ Tawamhã uba'rene hã êtê wa'wai baba wara õ'umnhasite, te sima simimnhasi za'ra, êne hã te te prob õ'umnhasite. Taha wa, ma tô ãna're hawi ãtétézé hã maparane si'uiwa na siwi wabzu âi ba, simi'wara da, uba're hã wara tô da. Tawamhã rowa'a zõ te te rob'madã'ã za'ra.

³⁰ Tawamhã uba're na romhuri'wa norĩ hã ma tô sisawi za'ra, uba'renem hawi siwaprosi wairé da. Uba're 'rare hã ma tô sisada si'ra za'ra âi ba, uba'renep tétézé hã ãwata âma zama te te siwi wabzuri da newa.

³¹ Tane nheré, Paru hã ma tô da'wapéi'wa norĩ ma âne hã waihu'u, ãwada'uri'wa norĩ ma zama:

— Ô norĩ hã wa'rata si'ubumroi õ wamhã, asisõ'reptui waihu'u za'ra wa'aba õ di za. — ãne ma tô Paru hã tâma waihu'u za'ra.

³² Tawamhã da'wapéi'wa norĩ hã ma tô wedenhorõ hã siwi sizã, uba're 'rare nhi'õmozé hã. Baba na ma tô wawi tiwara za'ra, uba're 'rare hã.

³³ Tawamhã hãiwaza wi, ma tô Paru hã tâma roti za'ra, tisa hã te te huri da oto, siptete za'ra hã. ãne te tâma roti za'ra:

— Bãdã hã 14 na ma tô ai'ãma ai'utõrĩ za'ra wa'wa, asaihuri aba ãna hã, rowa'u te te ãsazãrizéb zõ asimipari za'ra wa'aba ré hã.

³⁴ ãhãna wa za aima roti za'ra wa'wa, asaihuri aba da oto, asiptete sina aihãimana za'ra wa'aba da. Ni'wa hã dãã õ uptabi di za. Aihĩni te za aihãiba ré ré aiwairébe'wa. — ãne te tâma roti za'ra, Paru hã.

³⁵ Tawamhã mreme pari, ma tô ti'ã, i'u'êne hã. 'Re ãhãimana u'ãsi mono ma, ma tô mre danho'a, ãsõprum na âma wata da. Taha pari, ma tô i'u'êne hã sima wẽ'ẽ, te te 'rêne da.

³⁶ Tawamhã aihĩni ma tô oto sada aptete za'ra ni. Taha wa, ma tô tisa hã tihu oto.

³⁷ 276 na wahãiba za'ra hã uba'reneb 'remhã.

³⁸ Tawamhã wasaihuri pari, uburé amnho hã uba'reneb 're ãsими'wara hã ma tô oto siwi sa'wa âi ba, uba'rene hã wapu na waré wara da oto.

Rob u aihĩni dahãiba ré ãdawairébézé wasu'u

³⁹ Tawamhã rowa'a pese wamhã, ro hã te te waihu'u za'ra õ di, uba're na romhuri'wa norĩ hã. Taré ma tô supara hã siwi tisã, êtê 'rãihã papara ãnomro hã, â zaihã na. Tawamhã ma tô âma siwada'uri za'ra, rowa'u na uba'rene hã tame te te siwi hiri da.

⁴⁰ Tawamhã uba're tétézé hã â 'rowi ãsими'wara hã ma tô siwi sihãri za'ra, ãsa'u 're simi'wara mono da oto, â 'rowi. Uba're wabzurizé hã ma tô siwi wasihu, te te siwi pi'ra da. Uba're wata ãma ma tô zazahã wa'õno hã siwi sasõ, rowa'u hã te te âma saprõni da, supara u. Tawamhã â zaihã u te oto waré wara, uba'rene hã.

⁴¹ Tazahã sitême â wara sitob u ma tô uba're hã âzé, supara ahã u, â 'rowi 're ãnomro mono u. Taha wa, supara hã ma tô ãwada hã ti'ã. Rési waihu'u õ di oto, uba'rene hã. Tawamhã, â sisasisi za'êtê wamhã, te te nasi ãwabzuri na ma tô na'rehaipo'o.

⁴² Tawamhã da'wapéi'wa norĩ hã te âma siwada'uri za'ra, ãpawasisi ré norĩ âma, te te siwi simro da, tiwi zãribi za'ra wa, tiwi simani za'ra õ'umnhasite.

⁴³ Tane nheré, ãwada'uri'wa hã te âma pa'uwati za'ra, Paru te te sõ'reptu da, te te sima wẽ wa. Tawamhã te tâma rob'ru za'ra, ãzãribi waihu'u pese norĩ hã âi ba rere'e da, zãribi uimrehêne za'ra da, rob u,

⁴⁴ duré ni'wam norĩ hã, ãzãribi waihu'u õ norĩ hã wede hãpã na duré uba're ãsiprum na te te tété za'ra mono sina ãsarina zãribi za'ra da. Tawamhã aihĩni ma tô rob u wairé. Ni'wa hã dãã õ di. Ni'wa hã u'a õ di duré. Rowẽ na ma wairé.

28

Maruta âma Paru norĩ ãsi'ubumrozé wasu'u

¹ Tawamhã rob u wawairébe wẽ wamhã, wa tô rowaihu'u za'ra ni oto. Maruta na rob're za'iti nhisi u wa tô wawairébe ni, rowẽ na.

² Tame 're ãsi'ubumroi mono norĩ hã ma tô siwi wawaibui wẽ. Tã hã wawi ta'a za'ra wa, duré rowahã zé wa, ma tô uzã hã wama ro'o za'ra, wahã'i'ro za'ra da. Taha wa, ma tô wama tirowẽ za'ra oto.

³ Tawamhã Paru hã ma tô mi hã waibu, unhama nhisiwi te te sa'ra da. Te te sa'ra wamhã, wahi hã ma tô mimi hawi watobro. Watobro wamhã, ma ãsib'rata wi tisa, unhama wa'ro zé te. ãsib'rata na te âma 're sipra.

⁴ Tawamhã tame 're ïsi'ubumroi mono norĩ hã, Paruhu nhĩb'rata na wahi hã te te sãmri za'ra wamhã, te sima rowasu'u za'ra, ãne:

— Ôhõta aibã hã wahi ma te tisa, ïsib'rata wi. Te za oto dârã. Âté tó dapãrĩ'wa. Taha wa, ã hawi sisõ'reptu nherẽ, te za âté tó dârã. — ãne te sima rowasu'u za'ra.

⁵ Tane nherẽ, Paru hã ma tó wahi ré 're sib'ratai wërẽ. 'Re sib'ratai wërẽ mono wamhã, unhamã wa'wa ma waptãrã, wahi hã. ãma sépu'u õ di.

⁶ Te ãma rosa'rata waseté za'ra, âté sib'rata dupto da newa, âté dâ'ã sirõmo da newa, õne haré. Tane nherẽ, te te siwi 'madã'ã hã nherẽ, marĩ hã ãma hãimana õ di. Rowẽ na te tihãiba, Paru hã. Tawamhã Paru hã dapãrĩ'wa na ãma ïsimirosa'rata za'ra zé hã ma tó rême za'ra. Taha wa, te ãne sima wasu'u za'ra oto:

— Ta hã ïhãiba'õ, ïwaihu'upe. — ãne te sima rowasu'u za'ra.

⁷ Taha 'rata te Pubiri'u na 're hãimana, rob'rẽ za'iti ãma danhib'apito hã. ïsipti'a hã romhute di. Ta hã ma tó wawaĩbu wẽ, ï'rata wasi'ubumro da a'ã, ïsõrõwa ãma. Tawamhã bãdã si'ubdatõ ma tó wa'ãma ne, tame wasi'ubumroi ré hã.

⁸ ïmama hã hãzẽ ré te nomro, waptã. Wa'ro za'ëtẽ di, ïsãnapru zama. Tawamhã Paru hã ma tó ïtẽme ãzẽ, te te sabu da. 'Re ïhãimana u'ãsi mono ma, ma tó ãma mre. ãma mrepare, ma tó tinhĩb'rada hã ãma tino. Taha wa, ma tó séptãrã.

⁹ Taha parimhã, uburẽ ïhãzẽ ré norĩ hã ma tó Paruhu tẽme we si'rẽ. Tawamhã ma tó uburẽ apese.

¹⁰ ãne hã Paru te te apese pari, ma tó wama tinhõprub za'ra, marĩ ahã na. Tame wasi'ubumroi ré, a'amo si'ubdatõ ma tó wa'ãma ai'utõ, rob'rẽ za'iti ãma hã. Tawamhã, wasi'aba'rẽ da wamhã, ma tó wasazéb da hã te te wama sé, uba'reneb 're.

Roma u ïwasihutuzé wasu'u

¹¹ Tawamhã tame a'amo si'ubdatõ wa'ãma si'utõrĩ pari, wa tó uba'reneb 're asisi ni oto, ta hawi ãma wasi'aba'rẽ da. ïhãiba'õ si'ubza na uba're nhisi hã. Aresãdiriza hawi ma tó wei mazazã, rob'rẽ za'iti u, tame nomro da a'ã, rowa'u'u wazã 're sa'wari mono ré.

¹² Tawamhã Siracusa na 'ri nho'õmo nhisi u wa tó aihutu uimrehẽne ni. Tame wasi'ubumroi ré, bãdã si'ubdatõ ma wa'ãma ne.

¹³ Ta hawi, ma tó waré si'ãsi rowa'u'u na uba'rene hã, rowa'u'u wa'rãmi. Tawamhã Rezi'u na 'ri nho'õmo nhisi u, wa tó aihutu ni. Awẽpsi, rowa'u ma tó we rowapõ, hãiwa'a're nhĩmi'e hawi, wasi'aba'rẽzéb zarina. Tawamhã bãdã maparane wa'ãma ne parip si, wa tó duré aihutu ni, Pozu'ori na 'ri nho'õmo nhisi u. Tame uba'rene hã wa tó rême za'ra ni.

¹⁴ Tame wa tó sõpõtẽ za'ra ni, ïsazei'wa norĩ hã. Ma tó wahãiba waptẽrẽ za'ra, misi romhuri na ï'rata wahãimana za'ra da a'ã. Taha parip si, wa tó Roma na 'ri nho'õmo nhisi u ai'aba'rẽ ni, wapara na.

¹⁵ Tawamhã ïsazei'wa norĩ hã, Roma ãma 're ïsi'ubumroi mono norĩ hã ma tó wawasu'u hã wapari za'ra. Taha wa, Apizu ãma rowedezém na 'ri wa'õtõ nhisi u wasihutu wamhã, Roma hawi ïsazei'wa norĩ me wa tó wasi'uzusi za'ra ni. Duré, Si'ubdatõ Daza'warizém na 'ri wa'õtõ nhisi u wasihutu wamhã, ïsazei'wa hãiba amo norĩ hã ma tó duré ïsa'u hã wa'uzusi za'ra, Roma hawi. Tawamhã Paru hã te te dazabui wamhã, 'Re ïhãimana u'ãsi mono ãma te tiwata, ïsõprum na. Ma tó duré tãma rowẽ watobro.

Paru hã, Roma ãma oto 're ïsãmra mono zé wasu'u

¹⁶ Tawamhã Roma u wasihutu wamhã, da'wapéi'wa norĩ wada'uri'wa hã ma tó Paruhu ma pisutu, hãiba pisutu 're hãimana mono da, danhorõwa ãma. Da'wapéi'wa si te za ï'rata 're hãimana, te te 're 'madã'ã mono da.

¹⁷ Tawamhã bãdã si'ubdatõ ãma ne pari, ma tó dazõ hã Paru hã, zudezu norĩ ma ïpire norĩ zõ, ïtẽme si'rã'õtõ da. ïtẽme si'rã'õtõ wamhã, te tãma nharĩ za'ra:

— Wasiré Izarazéhẽ nhĩhudu norĩ, ïwapari pese za'ra wa'aba za. Wasiré norĩ ma, ïwasédé hã te 'manharĩ õ nherẽ, duré wahi'rata norĩ nhĩmiroti zarina 're ïwahãimana za'ra mono zéb ãma ïsipai õ nherẽ, ma tó Zeruzarẽ ãma siwi ï'ã, wasiré norĩ hã. Romanu norĩ ma, ma tó ïnhomri za'ra.

¹⁸ Tawamhã romanu norĩ hã ïwasété zõ ma tó siwi ïzadanha. Tane nherẽ, ïwasédé hã te te ïãma sãmri za'ra õ di, da te dasiwi ïwãrízéb da hã. Taha wa, dazazém hawi te te ïwazere za'ra da, te sima ïru za'ra.

¹⁹ Tane nherẽ, zudezu norĩ hã ïwatobro tó da, ma tó siwi ïwẽ'õ. Taha wa, wa tó rowaptẽ, we ïmorĩ da, apito Sézaha nho're ïzab da, tãma ïsiwasu'u da. Tane nherẽ, apito Sézaha ma, ïsiré norĩ wasété na te ïnharĩ da hã, we ïmorĩ õ di.

²⁰ Taha wa, wa tó asõ ïhãrã za'ra wa'wa, te asabu za'ra wa'aba da, aima ïsiwasu'u za'ra wa'aba da. Izarazéhẽ nhĩhudu norĩ hã sõ ïsimipari za'ra ãma te sasõmri wa, wa ïpawasisi ré 're ïnhamra. — ãne ma tó tãma waihu'u za'ra.

²¹Tawamhã te asa tãma nharĩ za'ra, Paruhu ma:

— Zudeza hawi rob'ui'ére na aiwasu'u hã da te wei watême 'mai'ãwisi za'ra õ di. Duré wasiré norĩ hã we watême nasi sihutu nherê, aiwasu'u wasédé hã we te te 'mai'ãwisi õ di.

²²Tane nherê, wa tã wasima aiwê za'ra ni, asimirosa'rada hã wa te wapari za'ra da, duré wa te waihu'u za'ra da. A hã dasima 'idasipo'ozép tém niwĩ, te 're aihãimana mo. Ta niwĩ 're 'idahãimana za'ra mono hã, te 'iwasété na da te dasima 're rowasu'u za'ra, daro mono bã. Æne hã wa te waihu'u za'ra wa, wa tã wasima aiwê za'ra ni, wa te aiwapari za'ra da. — Æne te asa tãma nharĩ za'ra.

²³Tawamhã ma tã sima pisutu za'ra, nimahã bãtã na 'itême dasi'rã'õtõ da. Taha wa, ma tã da'ahã na 'itême tasi'rã'õtõ ni, Paru hã 'isãmrazéb u hã. Bãtã bã ma tã dama romhu, 'Re 'ihãimana u'ãsi mono, da'ãma 're 'isib'a'uwê mono zé wasu'u na. Mozésihi nhimi'ui'ére zarina, duré 'Re 'ihãimana u'ãsi mono zadawa wasu'u'wa norĩ nhimi'ui'ére 'rata zarina, ma tã tãma ãma rowasu'u pese za'ra, Zezusi hã Danho'reptui'wa da, 'Re 'ihãimana u'ãsi mono te te 'ipisutu na da te saze za'ra da.

²⁴Tawamhã, 'imreme da te wapari za'ra wamhã, ni'wam norĩ hã ma tã saze za'ra. Aimawi norĩ hã te te ãma saze za'ra õ di.

²⁵Tawamhã tiwi si'aba'rêi õ ré, ma tã Paru hã duré tãma nharĩ za'ra:

— Duréihã 'Re 'ihãimana u'ãsi mono pë'ëzani hã ma tã tizadawa wasu'u'wai ma waihu'u, Iza'izaha ma, aih'i'rata norĩ ma, te te sadawa wasu'u za'ra da.

²⁶Æne ma tã Iza'izaha ma waihu'u, 'Re 'ihãimana u'ãsi mono hã:

"Aimorĩ oto, asiré norĩ tême, tãma 'izadawa wasu'u za'ra da. Æne te za tãma 'izadawa wasu'u za'ra: 'Inhimiroti hã aipo're na 're wapari u'ãsi za'ra wa'aba mono nherê, taré te za 're 'iwapari za'ra wa'aba mo, ãma 're waihu'u za'ra wa'aba mono ãna. Duré 'Inhimirohmuri hã atõmo na 're 'madã'ã u'ãsi za'ra wa'aba mono nherê, taré te za 're 'i'madã'ã za'ra wa'aba mo, ãma 're waihu'u za'ra wa'aba mono ãna.' Æne te za tãma 'izadawa wasu'u za'ra.

²⁷E marĩ wa, te za ãne hã tãma 'izadawa wasu'u za'ra. Ta norĩ hã tip'ê're, te te 're 'irosa'rata za'ra mono zé hã te sitom haré 'rê 're hãimana u'ãsi za'ra, te te 'jãma 're rosa'rata wê za'ra mono õ wa. Po're sitom haré, te duré 're hãimana za'ra, 'inhimiroti hã te te 're wapari ze za'ra mono õ wa. Duré tãmo sitom haré te 're hãimana za'ra, 'inhimirohmuri hã tãma 'madã'ã ze za'ra õ wa.

Ænei õ 'wa'ãhã, te aré 'inhimirohmuri hã te te 're 'madã'ã ze za'ra, titõmo na. Te aré duré te te 're wapari ze za'ra, 'inhimiroti hã. Te aré duré te te 're 'iwaihu'u pese za'ra, tip'ê're, te te 'jãma 're rosa'rata wê za'ra mono wa. Taha zarina si, te aré duré 'itême 're sipizari za'ra, tiwasété wi hã. Tawamhã daházé wa, da te 're 'idapese za'ra mono ne, wa aré 'iwasédé hã te tãma 're apari, te ãma 're ab'madã'ã tã mono da oto."

Æne ma tã 'Re 'ihãimana u'ãsi mono pë'ëzani hã Iza'izaha ma waihu'u, sena na, 'isiré zudezu norĩ ãma hã. — Æne ma tã Paru hã tãma rowasu'u za'ra, zudezu norĩ ma.

²⁸Tawamhã Paru te duré tãma rowasu'u za'ra:

— Taha wa, ma'ãpé waihu'u pese za'ra wa'aba. 'Re 'ihãimana u'ãsi mono hã te za oto zudezu'õ norĩ ma waihu'u, 'tinhiminho'reptuzé wasu'u hã. Ta norĩ hã te za oto te te 're wapari za'ra. — Æne ma tã Paru hã 'timreme hã tãma 'rãsutu za'ra.

²⁹Tawamhã ãne na te te tãma rowasu'u za'ra pari, zudezu norĩ hã ma wairé, si'aba'rê da oto. Tawamhã si'aba'rê sina, ma tã Paruhu mreme na sa'ëtê sisada'rãmi za'ra.

³⁰Tawamhã maparane ma tã ãma tiwahu, Paruhu ãma, danhorõwa hã taré te te sima 'iwa'ãbã mono zéb 'remhã. Tame, da'ahã na ma tã 'itême 're dasihutu. Dasihutu sidãpãsi, ma tã te te 're da'awaihu wê, 'itême 're danhisisi mono da.

³¹Pahi ãna, duré da te tiwi 're sadawa uwati za'ra mono ãna, ma tã te te dama 're rowasu'u, 'Re 'ihãimana u'ãsi mono, da'ãma 're 'isib'a'uwê mono zé wasu'u na hã, duré Wanhib'apito Zezu Cristuhu wasu'u na zama.

Roma norĩ Roma norĩ ma, Paru te te ĩrob'ui'érézé Ībaihâ wasu'uzé

Paru hâ Corĩtu na 'ri nho'õmo nhisi âma sâmbra ré, ma tó â ĩbaihâ na hâ âma rob'ui'éré. Ma tó sima rosa'rata, Roma u tisiré ĩsazei'wa norĩ hâ te te sabu za'ra da, te te po're pu'u za'ra da, 'Re ĩhâimana u'âsi mono âma siptete sina 're nomro mono da. Morĩ ô ré hâ, rob'ui'prazé hâ te za a'â t'â Zeruzarê u, ĩsazei'wa norĩ ma, Masédoniza hawi danhoprubzê hâ. Paru hâ ma tó wama waihu'u za'ra, 'Re ĩhâimana u'âsi mono, sa'êtê na wama 're ĩsôpru mono zéb zarina, ĩ'ra hâ wazada dá'â da, te te we ĩsômrizém na hâ. Paru hâ ma tó duré wama waihu'u za'ra, âne: Zezusi hâ da te dasina 're ĩ'umhâsi za'ra mono zéb zarina si, te za 'Re ĩhâimana u'âsi mono hâ te te 're da'awêsâmri, dawasédé hâ te te oto dá'âma 're ĩ'ab'madá'â mono ô zéb zarina. ĩsimiroti 'rata na Mozési te te âma ĩrob'ui'éré hâ da te 're ĩ'madá'â za'ra mono zéb zarina, te te 're da'awêsâmri mono ô di.

Paru te te ĩdazawizé wasu'u

¹ Wa hâ Paru, Cristu Zezusihi ma romhuri'wa, wa âma aima rob'ui'éré za'ra wa'wa, Roma na 'ri nho'õmo nhisi âma 're aihâimana za'ra wa'aba mono norĩ ma. 'Re ĩhâimana u'âsi mono hâ ma tó ĩpisutu, ĩsadawa wasu'u na te tâma 're romhuri mono da, Zezusihi wasu'uwê hâ te te wama 're ĩ'awaihu'u mono hâ te dama 're wasu'u u'âsi mono da, ĩsadawa para.

² 'Re ĩhâimana u'âsi mono hâ ma tó duréihâ dama ropisutu siro, ĩwasu'uwê na hâ. Duréihâ ĩsadawa wasu'u 'rata 'wa norĩ hâ, ma tó âne na âma rob'ui'éré sirõmo za'ra, ĩbaihâ na hâ.

³ E 'wai wasu'uwê, â hâ. 'Re ĩhâimana u'âsi mono 'ra, Wanhĩb'apito Zezu Cristuhu wasu'uwê. Ta hâ Zezusi hâ t'i'ai âma dahâiba na dasine 're ĩhâimana mono na, wama waihu'u pese za'ra di, apito Dawihi nhihudu 're morĩ wa.

⁴ Duré 'Re ĩhâimana u'âsi mono 'ra na, wama waihu'u pese za'ra di, dá'â uptabi nherê, ĩmama hâ tiwaihu'u pese na te te hâiwa'utu wa. Duré Timama hawi we ĩmorĩ na hâ wama waihu'u pese za'ra di. Duré 're ĩmorĩ wê na zama, wama waihu'u pese za'ra di.

⁵ 'Re ĩhâimana u'âsi mono hâ tinhoprubzéb zarina ma tó Cristuhu ma ĩhâiba na roti, te te ĩpisutu da, ĩpire na te dama 're sadawa wasu'u mono da. Cristuhu ma, te 're romhuri wê mono da, ma tó ĩpisutu, ĩnhimiromhurizéb zarina dapoto mono bâ, da te 're sazei pese za'ra mono da, duré da te 're sazei pese za'ra mono wa, ĩsimiroti si, da te 're 'madá'â pese za'ra mono da.

⁶ A norĩ wa'aba ma zama, te 're sadawa wasu'u mono da, ma tó ĩpisutu 'Re ĩhâimana u'âsi mono hâ, wasiré Zezu Cristuhu nhĩb'a'uwê oto 're anomro aba mono da, te te 're ĩ'apisutu za'ra wa'aba mono norĩ ma hâ.

⁷ 'Re ĩhâimana u'âsi mono ma, asawi pese za'ra wa'aba di. Taha si ma tó aipisutu za'ra wa'wa, ĩsib'a'uwê si oto 're anomro aba mono da, tâma. Taha wa, wa âhâna aima âma rob'ui'éré za'ra wa'wa, Roma na 'ri nho'õmo nhisi âma 're aihâimana za'ra wa'aba mono norĩ ma.

Wamama ma, wa ai'âma 're ĩmreme u'âsi za'ra wa'wa, 'Re ĩhâimana u'âsi mono ma, duré Wanhĩb'apito Zezu Cristuhu ma zama, ĩsimizawizé hâ ai'âma 're hâimana u'âsi za'ra wa'aba mono da, rowê u'âsi, âma 're anomro aba mono da.

Roma u, Paru hâ datême ĩsatisôřizé wasu'u

⁸ Âhâna, wa za ĩnhĩb'apito âma uimrehêne ĩwata, ĩmreme na, 'Re ĩhâimana u'âsi mono âma, Zezu Cristuhu nhĩmipawaptobzéb zarina 're sazei pese za'ra wa'aba mono wa, aiwasu'u za'ra wa'wa hâ daro mono bâ da te 're wapari za'ra mono wa.

⁹⁻¹⁰ Wa hâ 're ĩshâiba zawi mono âna, wa 'Re ĩhâimana u'âsi mono ma, te 're romhuri u'âsi, ĩ'ra wasu'uwê hâ te dama 're ĩwasu'u mono zém na hâ. Wa ai'âma 're ĩsipo're pu'u u'âsi za'ra wa'wa. Wa duré ai'âma 're ĩmreme u'âsi za'ra wa'wa, 'Re ĩhâimana u'âsi mono ma. Tó sena, wa âne na aima rowasu'u za'ra wa'wa, 'Re ĩhâimana u'âsi mono ma, âne hâ tâma waihu'u pese uptabi wa. Taha wi si, wa nasi ĩsima rowaptêrê u'âsi âhâna hâ, te te sima ĩwêzéb uwaibaba te te ĩma âma uwaimrami da, âma atême ĩmorĩ za'ra wa'aba da.

¹¹ Te asabu su'u za'ra wa'aba da si, wa tó ĩsima rowê si'aba're, 'Re ĩhâimana u'âsi mono, Tipê'êzani na rowê te te dama 're ĩ'apisutu mono zém na, te âma aipawaptob za'ra wa'aba da, asiptete sina âma 're anomro aba mono da.

¹² Atême âma ĩwisi za'ra wa'aba wamhâ, wa za aihĩni wasipawaptob za'ra ni, Zezusi wa te 're ĩsazei pese za'ra mono zém na, wanhĩptete na âma 're wanomro mono da.

¹³ Ɔsisānawā norī, āne na aima Ɔsiwasu'u za'ra wa'aba da, wa tō Ɔsima wē, waihu'u za'ra wa'aba da. Wa tō te Ɔsima 're rosa'rata u'āsi, te asabu za'ra wa'aba da. Tane nherē, atēme āma Ɔmorī su'u aba da nherē, te marī hā Ɔma 're hāimana u'āsi, ōne u'āsi. Zudezu'ō norī hā daro mono hā 're Ɔsi'ubumroi mono hā, Ɔwasu'u'uwē hā te tāma 're Ɔwasu'u za'ra mono zēm na, te te 're saze za'ra mono wa, wa tō te 're awaibu, 'Re Ɔhāimana u'āsi mono ma. Tane da, wa tō duré te Ɔsima 're rowē, airo wa'aba āma asiré zudezu'ō norī hā te duré tāma 're awaibu mono da, tame.

¹⁴ E marī wa, wa tō Ɔsima wē, āne na te aipawaptob za'ra wa'aba da. Wa hā uburé te 're da'apawapto mono da, 'Re Ɔhāimana u'āsi mono te te Ɔpisudu. Taha wa, wa za tō te 're da'apawapto u'āsi, 'ri nho'ōmo mono hā 're Ɔdahāimana za'ra mono norī hā, duré marā 'rowi 're Ɔdahāimana za'ra mono norī hā, duré rowaihu'u pese 'wa norī hā, duré rowaihu'u'ō'wa norī hā. Ta norī hā wa za uburé te 're apawapto u'āsi, dawaptērē mono hā.

¹⁵ Taha wa, wa āma atēme Ɔsima rowē uptabi za'ra wa'wa, Roma āma 're aihāimana za'ra wa'aba mono norī ma, Ɔwasu'u'uwē na tame te duré aima 're rowasu'u za'ra wa'aba mono da.

Zezihi wasu'uwē nhipede

¹⁶ Wa hā, Zezihi wasu'uwē hā te dama 're wasu'u tō mono da, 're Ɔnhisé mono ō di. E marī wa. 'Re Ɔhāimana u'āsi mono hā siptete uptabi wa, Ɔwasu'u'uwē na te te āma 're da'anho'reptui mono da, Zezi te te sina 're Ɔ'umhāsi za'ra mono norī hā. Zudezu norī si ma tō Ɔsāna'rata hawimhā te te 're sō'reptu za'ra aré. Tane nherē, te oto āhāna hā zudezu'ō norī zama te te 're anho'reptu.

¹⁷ Zezihi wasu'uwē hā e marī, wa za wa te āma 're waihu'u za'ra. 'Re Ɔhāimana u'āsi mono, da te 're saze za'ra mono wapsi, dawasédé hā te te oto da'āma 're Ɔ'ab'madā'ā mono ō zarina, te te 're Ɔda'awēsāmri mono zé, taha wasu'u. Duréihā Habatuti hā, 'Re Ɔhāimana u'āsi mono zadawa wasu'u 'rata 'wa hā ma tō āne na āma rob'ui'ére:

“Nī'wam norī hā, 'Re Ɔhāimana u'āsi mono te te 're saze za'ra mono wamhā, ta norī si te za te te 're awēsāmri, 'Re Ɔhāimana u'āsi mono hā, Ɔwasédé hā te te oto āma 're Ɔ'ab'madā'ā mono ō zarina, po're'ō nherē, te te 're hā za'ra mono tō da. Ta norī si te za duré rowē u'āsi, āma 're hāimana za'ra.”

Āne na ma tō Ɔwasu'u na āma rob'ui'ére.

Dapo're āna 're Ɔdanomro mono na rowasu'u

¹⁸ 'Re Ɔhāimana u'āsi mono hā ma tō āne hā wama waihu'u sirōmo za'ra, dapo're'ō na 're Ɔdanomro mono norī hā za te te 're Ɔda'ahā za'ra mono zēm na. Ta norī hā te tipē'ē na te te sima 're rosa'rata wasété u'āsi za'ra. Hāimana wasété uptabi na, te duré dama 're hāimana u'āsi za'ra. Ta norī hā tiwasété si te te 're 'manharī za'ra mono wa, te 'Re Ɔhāimana u'āsi mono nhimiroti tō sena uptabi hā te te dawi 're 'wa'rutu za'ra, āne na roti Ɔwē hā da te 're waihu'u za'ra mono tō da.

¹⁹ 'Re Ɔhāimana u'āsi mono 're Ɔhāimana mono zé hā, da te 're Ɔwaihu'u za'ra mono zéb da hā, dama waihu'u pese di. E marī wa. 'Re Ɔhāimana u'āsi mono hā dawi 're si'udā mono ō wa. Uburé marī hā te te Ɔ'apoto mono hā sō'awi da te 're Ɔ'madā'ā za'ra mono zéb zarina, te da te 're waihu'u za'ra, 're Ɔhāimana mono zé hā. Taha wa, da te 're Ɔwaihu'u za'ra mono zéb da hā dama waihu'u pese nherē, dapo're āna 're danomro mono wa, te 'Re Ɔhāimana u'āsi mono hā te te 're da'ahā za'ra.

²⁰ Duréihā Ɔsāna'rata hawimhā, 'Re Ɔhāimana u'āsi mono, ma tō te te ro'apoto, tiwaihu'u pese na. Tiwaihu'u pese na te te ro'apoto mono wa, ta hawim haré te Ɔsimiwaihu'u pese zēm na, duré tō sena 're Ɔhāimana mono na, da te āma 're waihu'u pese za'ra, Ɔhāiba hā da te 're 'madā'ā waihu'u za'ra mono ō nherē. E marī zarina tawamhā, 'Re Ɔhāimana u'āsi mono, 're Ɔhāimana mono na te za tō sena na da te āma 're waihu'u pese za'ra. 'Re Ɔhāimana u'āsi mono hā uburé marī hā te te Ɔ'apoto mono hā da te 're Ɔ'madā'ā za'ra mono zéb zarina, te oto da te āma 're waihu'u za'ra, Ɔwaihu'u pese na, duré tō sena ōne u'āsi 're Ɔhāimana mono na. Taha wa, tō sena 're hāimana mono nherē, da te dasiwi 're udā waihu'u za'ra mono ō di za, 'Re Ɔhāimana u'āsi mono hā.

²¹ Ta hā tō sena 're Ɔhāimana mono na, da te dasiwi 're waihu'u za'ra mono nherē, tō sena da te dasiwi 're Ɔhāimana wazé mono na, da te tāma āma 're uwainrami za'ra mono ō di, 'Re Ɔhāimana u'āsi mono ma hā. Duré sō'rub uptabi nherē, āma 're dawata za'ra mono ō di. Taha upana, te marī na si siwa'ru da te 're rosa'rata wasété za'ra. Dapē'ē 're, robra u'āsi 're dahāimana za'ra mono wa, te danhimirosa'rata na da te 're upa za'ra.

²² Dapo're'ō na 're Ɔdanomro mono norī hā uburé marī hā te te 're waihu'u pese za'ra mono newa, te taré sina 're wata za'ra, dama. Tane nherē, te ta norī hā simiza'rese āna 're nomro.

²³ 'Re Ɔhāimana u'āsi mono upana, te ta norī hā rob'manharī āma si 're wata za'ra, a'uwē na dahāiba 'manharī āma, duré si hāiba ne 'manharī āma, duré abaze hāiba ne 'manharī āma, duré di'ī na 're Ɔnomro mono norī hāiba ne 'manharī āma.

²⁴ Ta norî hã simiza'rese'õ uptabi na 're hâimana u'âsi za'ra mono wa, ma tã 'Re ìhâimana u'âsi mono hã te te sima âma 're aroti, âne: "Ta norî hã po're za'ra õ wa, wa za oto rême za'ra. Te tâma 're roti za'ra mono õ di za oto. Si'uihã na te za oto 're hâimana za'ra." Âne ma tã 'Re ìhâimana u'âsi mono hã te te sima âma 're aroti, ta norî âma hã. Taha wa, te oto marî Ìwasété si te te sima 're ìwê u'âsi za'ra mono zéb zarina, te te 're 'manharî u'âsi za'ra, ta norî hã. Tihâiba na zama te duré 're siwasété uptabi za'ra oto, si'uihã na.

²⁵ 'Re ìhâimana u'âsi mono nhimiroti hã tã sena nherê, te ìmreme upana aimawi si te te 're wapari za'ra, tã sena'õ hã. Ropoto'wai upana, te ìsimipoto âma si 're wata za'ra, ta norî hã.

'Re ìhâimana u'âsi mono âma si, 're dawata u'âsi za'ra mono za. Ôhõ si, tã sena hã.

²⁶ Tawamhã dapo're'õ na 're ìdanomro mono norî hã, Ropoto'wa nhimipoto âma si 're dawata za'ra mono wa, ma tã oto 'Re ìhâimana u'âsi mono hã te te 're da'arême, dawasété si da te dasima 're ìwê za'ra mono zéb zarina si, dahâiba na 're dasiwasété za'ra mono da, dasi'uihã na. Âne da hã, 'Re ìhâimana u'âsi mono hã te te dama 're apisutu mono õ nherê, te dasi'uihã na pi'õ si'uiwa na dasina 're dawasété za'ra.

²⁷ Tane aibã norî hã pi'õ na dasina 're ìdamro za'ra mono zéb upana, te aibã si'uiwa na si te te sina 're rosa'rata wasété uptabi za'ra, pi'õ'i upana, aibã si'uiwa 're ìsi'ruiwapari za'ra mono na. Dasi'uihã na te aibã si'uiwa na dasina 're dawasété za'ra. Taha wa, te za 'Re ìhâimana u'âsi mono hã te te 're da'ahã za'ra, dapo're'õ si, da te dasi'âma 're ì'manharî za'ra mono zéb uwaibaba, 're danomro mono wa.

²⁸ Dapo're'õ na 're ìdanomro mono norî hã, 'Re ìhâimana u'âsi mono nhimiroti tã sena hã te te siwi 're wê'õ pese za'ra mono wa, te za 'Re ìhâimana u'âsi mono hã te te 're arême, si'uihã na te te sima 're ìrosa'rata wasété za'ra mono zéb uwaibaba si, tiwasédé hã te te 're 'manharî u'âsi za'ra mono da.

²⁹ Ta norî hã wasété uptabi na te 're hâimana za'ra. Marî zõ si te te sima 're rob'ruiwapari za'ra. Te duré te te dama 're rob'manharî wasété za'ra. Marî na te te 're da'ruiwapari u'âsi za'ra. Te duré te te 're danhimro. Siti'ru sina, te ta norî hã dazõ 're nomro, te te dama 're nharî za'ra mono da. Sadawa nhipse uptabi na, te 're hâimana za'ra. Niha te te dama 're rob'manharî za'ra mono da, te da'âma te te sima 're rosa'rata wasété u'âsi za'ra. Taré te te sima 're dabâsi wasété u'âsi za'ra duré.

³⁰ Daza're'ra nherê, te duré ta norî hã te te sima 're dabâsi wasété za'ra. 'Re ìhâimana u'âsi mono hã te te duré siwi 're ruiwapari. Te duré te te dama 're nharî wasété u'âsi za'ra. Danhipai u dama pire na dama 're hâimana za'ra mono newa, te 'râwi tipê'ê na sina 're wata za'ra. Taha wa, te sã'awi timreme na dama 're siwasu'u za'ra, marî tâma ìwaihu'u pese za'ra na. Marî te te 're ìwaihu'u za'ra mono zéb zarina si te te 're 'manharî za'ra, marî Ìwasétére hã. Timama norî nhimiroti hã te te 're wapari za'ra mono õ di duré.

³¹ Marî Ìwasété zõ si, te ta norî hã sima 're sãpré. Simiroti na saprî ahã na te 're hâimana za'ra. Da'âma 're pê'ézé za'ra mono õ di. Duré da'âma 're siwamri za'ra mono õ di.

³² 'Re ìhâimana u'âsi mono hã ma tã âne na da'âma sima roti siro, dapo're'õ na 're danomro mono wa, ìsiré ì'rata za 're ìdahâimana u'âsi za'ra mono õ na hã. Dapo're'õ norî ma hã, âne hã tâma waihu'u pese za'ra di. Tane nherê, te tihâimana wasété si te te sima 're 'ruiwapari u'âsi za'ra, te te 're rême za'ra mono âna. Tane nherê, uburé tiwasédé hã te te 're ì'manharî za'ra mono zém nhipai u, te duré marî Ìwasédé hã te te 're 'manharî za'ra. Ni'wam norî hã ìsine 're hâimana wasété za'ra mono wa, te ta norî si te te 're wêsâmri za'ra.

2

Ïpo're'õ norî, 'Re ìhâimana u'âsi mono te te siwi 're ì'awê'õ mono zé wasu'u

¹ A norî wa'wa hã, dapo're'õ na 're ìdanomro mono norî âma, Ìwasédé hã âma 're sa'ra za'ra wa'aba mono wamhã, te za 're aiwasété za'ra wa'aba mo. E marî wa. Dasine aiwasédé hã 're 'manharî za'ra wa'aba mono wa, aiwa. Taha wa, dasine 're aihâimana za'ra wa'aba mono nherê, dawasédé hã da'âma 're sa'ra za'ra wa'aba mono wamhã, te za 'Re ìhâimana u'âsi mono hã te te 're aiwê'õ pese za'ra wa'wa dasiré. Taha wa, aiwasété âna 're aihâimana za'ra wa'aba mono zém na 're asi'madã'ã waihu'u za'ra wa'aba mono õ di za.

² 'Re ìhâimana u'âsi mono hã dapo're'õ na 're ìdanomro mono norî hã te te 're ì'awaihu'u mono zéb zarina, te tã te te 're awê'õ pese, ì'uwaibaba si. Âne hã, uburé wama waihu'u pese za'ra di.

³ Tane nherê, a norî wa'wa hã dawasédé hã da'âma 're ìsa'ra za'ra wa'aba mono na, te aiwasédé hã 're ì'manharî za'ra wa'aba mo. E 'Re ìhâimana u'âsi mono nhimiházé wi, 'râwi 're asisõ'reptu za'ra wa'aba mono da bâ, te âne 're ì'manharî za'ra wa'aba mo.

⁴ Áté te za âne asima 're ìnharî za'ra wa'aba mo: "'Re ìhâimana u'âsi mono hã simizawi pese uptabi di. Dasi'uihã na dawasédé hã da te te 're 'manharî u'âsi za'ra mono nherê, da'âma 're wa'a su'u mono õ di. Taha wa, Ìwasédé te 're 'manharî mono nherê, te te 're ì'ahãri su'u

mono o di." Āne hā asi'uihā na asi'āma 're rosa'rata za'ra wa'aba mono o di za. 'Re Ihāimana u'āsi mono hā aiwasété wi 're aipizari za'ra wa'aba mono da si, te simi'ē na te te 're ai'madā'ā za'ra wa'wa, simizawi pese uptabi na. E āne hā zahadu aima waihu'u za'ra wa'aba o di bété.

⁵ A nori wa'wa hā aipē'ē tete u'āsi, te 're aihāimana za'ra wa'aba mo. Taha wa, 'Re Ihāimana u'āsi mono hā te za ropsi'utōrizéb u hā nimahā na bādā hā īwa īwaptā'āzéb āma, dazu aihā za'ra wa'wa, dawasété wa, za te te īda'awē'ōzéb āma hā. Tame te za oto tinhimihāzéb hā dama āma uwaimra, ī'uwaibaba si.

⁶ Marī hā da te 're I'manharī za'ra mono zéb uwaibaba, te za 'Re Ihāimana u'āsi mono hā te te dama 're awā'ābā, īwē na hā duré īwasété na hā.

⁷ Nī'wam norī si te marī hā simi'ē na te te dama 're 'manharī u'āsi za'ra, īwē hā. Ta norī hā 'Re Ihāimana u'āsi mono si te te 're wēsāmri za'ra mono da, te sina 're simipari za'ra, duré I'rata 're īsi'ubumroi u'āsi mono zé, te te tāma 're apisutu mono da. Ta norī ma si, te za tō 'Re Ihāimana u'āsi mono hā te te 're apisutu, 're īsi'ubumroi u'āsi mono zéb da hā, I'rata.

⁸ Duré nī'wam norī hā te marī na te te 're rosa'rata za'ra, hāiba pisutu āma 're hāimana za'ra mono da. Ta norī hā uburé marī īwē hā te te siwi 're wē'ō za'ra, marī īwasété na si 're hāimana za'ra mono da. Ta norī si te za 'Re Ihāimana u'āsi mono hā sa'ētē te te 're ahā za'ra, po're o wa.

⁹ Uburé dawasété si, da te 're I'manharī za'ra mono norī hā te za te te 're robzépata za'ētē za'ra, zudezu norī hā, duré zudezu'ō norī zama.

¹⁰⁻¹¹ E nī'wam norī hā taré zudezu na 're hāimana za'ra mono wa, te za tinhimihāzéb hā te te tāma 're ba'a za'ra, 'Re Ihāimana u'āsi mono hā. Mare di. Taha zarina, tinhimihāzéb hā te te tāma 're ba'a za'ra mono o di za. Duré e nī'wam norī hā taré zudezu na 're hāimana za'ra mono wa, te za īwē hā te te tāma 're anhomri, danhipai u. Mare di. Uburé aiwapsi 'Re Ihāimana u'āsi mono ma hā, dapoto mono bā. Tane nherē, uburé īwē si te te 're I'manharī za'ra mono norī ma si, te za 'Re Ihāimana u'āsi mono hā īwē hā te te tāma 're anhomri, zudezu norī ma, duré zudezu'ō norī ma zama. Rowē uptabi si, te za ta norī ma si te te 're apisutu. Ta norī si te za te te 're awēsāmri.

¹² 'Re Ihāimana u'āsi mono nhimiroti na, duréihā Mozési te te īrob'ui'éérézéb hā zudezu'ō norī ma, tāma 're hāimana za'ra mono o di. Tāma 're hāimana za'ra mono o nherē, tiwasété na si 're hāimana za'ra mono wamhā, e 'Re Ihāimana u'āsi mono 'rata 're īsi'ubumroi u'āsi mono zéb da hā, te za te te sina 're uwaimrami za'ra. Mare di. Te te sina 're uwaimrami za'ra mono o di za. 'Re Ihāimana u'āsi mono nhimiroti 'rata na rob'ui'éérézéb hā zudezu norī ma si, te 're hāimana za'ra. Taha wa, ta norī hā tiwasédé te te 're 'manharī za'ra mono wa, te za 'Re Ihāimana u'āsi mono hā tinhimiroti na rob'ui'ééré zarina, te te tāma 're arowairébé, īwasété na te te 're ī'awaihu'u mono zéb uwaibaba.

¹³ E 'Re Ihāimana u'āsi mono nhimiroti 'rata na rob'ui'éérézéb hā, taré dapo're na da te 're wapari za'ra mono nherē, te za 'Re Ihāimana u'āsi mono hā te te 're da'awēsāmri. Mare di. Īsimiroti zarina 're dahāimana wē za'ra mono wapsi, te za te te 're da'awēsāmri, 'Re Ihāimana u'āsi mono hā.

¹⁴ 'Re Ihāimana u'āsi mono nhimiroti na Mozési te te īrob'ui'éérézéb hā zudezu'ō norī ma, tāma 're hāimana za'ra mono o di. Tāma 're hāimana za'ra mono o nherē, si'uihā na Īsimiroti zarina 're hāimana wē za'ra mono wamhā, 'Re Ihāimana u'āsi mono ma, te za te te tāma āma 're uwaimrami za'ra, tāma 're hāimana za'ra mono o nherē, 'Re Ihāimana u'āsi mono nhimiroti na ībahā hā.

¹⁵ Ta norī hā si'uihā na 're hāimana wē za'ra mono wamhā, 'Re Ihāimana u'āsi mono nhimiroti hā ipē'ē 're, tāma 're Ihāimana u'āsi za'ra mono zé, te wasu'u. Duré īwē hā te te dama 're 'manharī za'ra mono wamhā, 'rāwi te za tipē'ē na 're sisaze za'ra. Duré marī īwasédé hā te te 're 'manharī za'ra mono wamhā, 'rāwi te za tiwasété na 're sisāmri za'ra. Taha wa, tipē'ē na 'rāwi 're sisaze za'ra mono wamhā, duré 'rāwi tiwasété na 're sisāmri za'ra mono wamhā, 'Re Ihāimana u'āsi mono nhimiroti, ipē'ē 're, tāma 're Ihāimana u'āsi za'ra mono zé, te wasu'u.

¹⁶ Āne hā īwasu'uwē na te dama 're īrowasu'u mono zéb zarina, te za tō nimahā na tiromhāiba, 'Re Ihāimana u'āsi mono nhimipisutuzéb zarina, Zezu Cristu hā da'āma īsipo'ozéb da hā. 'Rāwi dasima si da te 're īrosa'rata za'ra mono na te za oto da'awaihu'u. Taha zarina te za dama arowairébé oto, Cristu hā.

Mozési hā 'Re Ihāimana u'āsi mono nhimiroti na te te īrob'ui'éérézéb na rowasu'u

¹⁷ Zudezu norī, āhāna wa za ai'āma rob'ui'ééré za'ra wa'wa. A norī wa'wa hā, danhipai u 'Re Ihāimana u'āsi mono te te 're asawi pese uptabi za'ra wa'aba mono na, te dama 're asiwasu'u za'ra wa'aba mo, īsib'a'uwē 're anomro aba mono wē te. 'Re Ihāimana u'āsi mono nhimiroti na Mozési te te īrob'ui'éérézéb hā, aima wa'aba si 're hāimana za'ra wa'aba mono wē te, te ato sina 're anomro aba mo, aima wa'aba si 're hāimana za'ra wa'aba mono wa, 'Re Ihāimana

u'âsi mono hã te te 're aiwêsãmri za'ra wa'aba mono da newa, aiwasédé hã te te oto ai'ãma 're Ì'ab'madâ'â za'ra wa'aba mono ò zarina.

¹⁸ 'Re ìhâimana u'âsi mono te te aima 're Ì'apisutu aba mono zéb zarina 're Ì'manharì za'ra wa'aba mono zéb da hã, aima waihu'u pese za'ra wa'aba di. Duré 'Re ìhâimana u'âsi mono nhimiroti 'rata na rob'ui'ééré hã ma tò 're Ìwaihu'u za'ra wa'aba mo, ãma 're anomro wê wa'aba mono da.

¹⁹ Æne na te duré asi'ãma si 're Ìrosa'rata upa za'ra wa'aba mo: "Wa norì si datob'a ne 're Ìdanomro mono norì hã, wa wa te 're simro, tò sena. Robra u'âsi 're Ìdanomro mono norì ma, wa wa te 're rowa'a za'ra.

²⁰ Duré 're Ìdahâimana wê za'ra mono zéb da hã, da te 're Ìwaihu'u za'ra mono ò norì ma hã, wa wa te 're roti za'ra Ìwê na, duré ai'uté ne hâimana nhimiza'rese ãna 're ìhâimana za'ra mono norì ma zama." Æne na te asi'ãma 're Ìrosa'rata upa za'ra wa'aba mo. Duré 'Re ìhâimana u'âsi mono nhimiroti 'rata na rob'ui'ééré hã aima 're hâimana za'ra wa'aba mono wê te, te duré ãne na asi'ãma 're Ìrosa'rata upa za'ra wa'aba mo: "Wa norì ma si, wama waihu'u pese za'ra di, uburé roti Ìwê hã tò sena uptabi hã." Æne na te duré asi'ãma 're aiwata za'ra wa'aba mo.

²¹ E marì wa, a norì wa'wa hã dama 're roti za'ra wa'aba mono nherê, 'rãwi duré asima zama 're roti za'ra wa'aba mono ò di. Marì na dawì 're danhipsaihuri za'ra mono tò da, dama 're roti za'ra wa'aba mono nherê, te a norì wa'aba zama marì na dawì 're asipsaihuri za'ra wa'aba mo.

²² Duré damro na dasiwi 're danhipsaihuri za'ra mono tò da, dama 're roti za'ra wa'aba mono nherê, te duré a norì wa'wa hã aimro na asiwi 're asipsaihuri za'ra wa'aba mo. Duré uburé romhâiba 'manharì hã 'Re ìhâimana u'âsi mono upana, ãma 're Ìdawata za'ra mono zé hã asiwi 're wê'ò pese za'ra wa'aba mono nherê, te 'ri para 're Ìsimesa mono zéb u 're asisisi aba mo, marì, 're simi'uri za'ra wa'aba mono da.

²³ A norì wa'wa hã zudezu na da te 're aiwaptêrê za'ra wa'wa, 'Re ìhâimana u'âsi mono nhimiroti 'rata na rob'ui'ééré hã aima wa'aba si 're hâimana mono wê te, te dama asina 're Ìwasu'u za'ra wa'aba mo. Tane nherê, Ìsimiroti si 're 'madâ'â za'ra wa'aba mono ò di. Duré asiwi 're wazéb za'ra wa'aba mono ò di. Taha zarina, zudezu'ò norì ma hã tãma wê za'ra ò di, 'Re ìhâimana u'âsi mono hã.

²⁴ Æne ma tò duréihã ai'ãma rob'ui'ééré siròmo za'ra wa'wa, 'Re ìhâimana u'âsi mono zadawa wasu'u 'rata 'wa hã:

"A norì wa'wa hã zudezu na 're aihâimana za'ra wa'aba mono, 'Re ìhâimana u'âsi mono nhimiroti zarina si 're aihâimana za'ra wa'aba mono ò wa, te zudezu'ò norì hã 'Re ìhâimana u'âsi mono ãma te te 're wasété za'ra."

Æne ma tò duréihã ai'ãma rob'ui'ééré za'ra wa'aba ni, Ìbaihã na hã.

²⁵ 'Re ìhâimana u'âsi mono nhimiroti 'rata na rob'ui'ééré hã 're 'madâ'â pese za'ra wa'aba mono wamhã, Ì'uwaibaba te za 're asisihâiwata nhihâri za'ra wa'aba mo. Tane nherê, Ìsimiroti si 're 'madâ'â pese za'ra wa'aba mono ò wamhã, sihâiwata nhihâri ãna 're Ìnomro mono norì ne, te za tãma 're aihâimana za'ra wa'aba mo, 'Re ìhâimana u'âsi mono ma hã aiwa.

²⁶ Zudezu'ò norì hã sihâiwata nhihâri ãna 're nomro mono nherê, Ìsimiroti 'rata na si 're hâimana wê za'ra mono wamhã, Ìsib'a'uwê ne, te za 'Re ìhâimana u'âsi mono hã te te 're 'madâ'â za'ra, zudezu norì ne.

²⁷ A norì wa'wa hã zudezu na 're aihâimana za'ra wa'aba mono hã, 'Re ìhâimana u'âsi mono nhimiroti 'rata na rob'ui'ééré hã 're 'madâ'â pese za'ra wa'aba mono ò di, Ìbaihã na rob'ui'ééré hã aima 're hâimana za'ra wa'aba mono nherê, duré asihâiwata nhihâri ré 're aihâimana za'ra wa'aba mono nherê. Tane nherê, ni'wam norì hã zudezu'ò norì hã sihâiwata nhihâri ré, 're hâimana za'ra mono ò nherê, te 'Re ìhâimana u'âsi mono nhimiroti 'rada hã te te 're 'madâ'â pese za'ra. Taha zarina te za 'Re ìhâimana u'âsi mono hã te te siwi 're aiwê'ò pese za'ra wa'wa, te te 're aihã za'ra wa'aba mono da, zudezu'ò norì si Ìsimiroti hã te te 're 'madâ'â pese za'ra mono wa, ai'upana za'ra wa'aba.

²⁸⁻²⁹ A norì wa'wa hã, e asihâiwata nhihâri ré 're anomro aba mono wa, te 'Re ìhâimana u'âsi mono nhìb'a'uwê uptabi na 're aihâimana za'ra wa'aba mo. E danho'a uburé marì hã zudezu hâimanazéb zarina si 're 'manharì za'ra wa'aba mono wa, te za 'Re ìhâimana u'âsi mono nhìb'a'uwê uptabi hã 're anomro aba mo. Mare di. Æne hã Ì'uwaibaba nherê, Ì'uwaibaba ò di, 'Re ìhâimana u'âsi mono ma hã. 'Rãwi aipê'ê 're, Ìsimiroti hã aima 're hâimana u'âsi za'ra wa'aba mono wapsi, tawapsi te za Ìsib'a'uwê uptabi na 're aihâimana za'ra wa'aba mo, 'Re ìhâimana u'âsi mono pè'èzani nhimipawaptob zarina si. 'Re ìhâimana u'âsi mono nhimiroti 'rata na rob'ui'ééré hã danho'a 're Ìwaparì za'ra wa'aba mono zém na, tawamhã, Ìsib'a'uwê uptabi na 're anomro aba mono ò di za. 'Rãwi aipê'ê 're, Ìsimiroti hã aima 're hâimana u'âsi za'ra wa'aba mono wapsi, tawapsi te za Ìsib'a'uwê uptabi na 're aihâimana za'ra wa'aba mo.

Īsib'a'uwē uptabi na 're Īhâimana za'ra mono norī hā ti'ai āma ré, da te 're wēsāmri za'ra mono dai ō nherē, te 'Re Īhâimana u'āsi mono si te te sima 're wasu'u wē za'ra.

3

'Re Īhâimana u'āsi mono hā, tō sena na te te dama 're Ī'aropisutu mono zém na rowasu'u

¹ Tawamhā zudezu na 're Īaihâimana za'ra wa'aba mono zé hā, e taré, te bété asihâiwata nhihâri ré 're anomro aba mo. E taré, 'Re Īhâimana u'āsi mono ma hā.

² Mare di. Tō sena tāma hā, zudezu na 're aihâimana za'ra wa'aba mono zé hā. Tāma wē di, 'Re Īhâimana u'āsi mono ma hā. E niha, wa za tawamhā āne hā waihu'u za'ra ni, zudezu norī 're Īhâimana za'ra mono zé hā. Duréihā 'Re Īhâimana u'āsi mono hā ma tō zudezu norī si te te sima 're awē, Īsimiroti na rob'ui'éré 'rada hā uburé da'udāna te te 're 'madâ'â pese za'ra mono da, dawi simani tō da.

³ Tane nherē, ni'wam norī hā zudezu norī hā 'Re Īhâimana u'āsi mono nhimiroti zarina 're Īnomro mono na hā te te tāma āma 're uwaimrami za'ra mono ō di. E tawamhā 'Re Īhâimana u'āsi mono hā asa te te tāma āma 're uwaimrami za'ra mono ō di za, uburé marī na te te tāma āma 're Īropisutu za'ra mono zéb zarina.

⁴ Te za tō te te tāma āma 're uwaimrami u'āsi za'ra, te te tāma 're Ī'aropisutu mono zéb zarina. Uburé ti'ai āma dazadawa nhipese na dasima 're dahâimana za'ra mono nherē, 'Re Īhâimana u'āsi mono si, sadawa nhipese ō di, tō sena. Duréihā ma tō āne na āma rob'ui'éré Dawi hā, 'Re Īhâimana u'āsi mono āma hā:

“A hā marī na dama 're roti mono wamhā, tō sena asadawa nhipese ō na te za da te 're aiwaihu'u za'ra, tō sena asimiroti hā. Duré ni'wam norī hā asadawa nhipe te te ai'āma 're sa'ra mono wamhā, ta norī si Īsadawa nhipese na te za da te dasiwi 're waihu'u za'ra, ai'upana.”

Āne na ma tō duréihā rob'ui'éré Dawi hā, Ībahā na hā.

⁵ Ni'wam norī hā te āne na te te si'āma 're rosa'rata upa za'ra: “Wa norī hā wahâimana wasété na si, wa za oto 're wahâimana za'ra, 're Īwanomro wasété uptabi mono na, da te 're waihu'u za'ra mono wa, 'Re Īhâimana u'āsi mono si wasété āna 're Īmorī wē uptabi na, da te 're waihu'u za'ra mono da, wanhipai u. Tawamhā, wahâimana wasété na 're wahâimana za'ra mono nherē, e te za te te 're wa'ahā za'ra, 'Re Īhâimana u'āsi mono hā. Mare di. Te te 're wa'ahā za'ra mono ō di za.” Āne te ni'wam norī hā te te si'āma 're rosa'rata upa za'ra.

⁶ E tawamhā Ī'uwaibaba te ta norī hā āne na hā te te 're rosa'rata za'ra. Mare di. Ī'uwaibaba ō di. 'Re Īhâimana u'āsi mono hā te tō Ī'uwaibaba si te te 're da'ahā za'ra. Ī'uwaibaba na si te marī na te te dama 're arowairébé. Āne zarina te te dama 're arowairébé mono ō 'wa'āhā, aré te te da'awé'ō waihu'u ō di, za da'āma Īsipo'ozéb āma hā, 'Re Īhâimana u'āsi mono hā.

⁷ Āté ni'wam norī hā te za duré āne na te te si'āma 're rosa'rata upa za'ra: “Wa norī hā wawasédé, wa te 're 'manharī za'ra mono wamhā, āté te za āne na da te wa'āma 're rosa'rata za'ra: ‘Ō norī hā wasété uptabi na te 're nomro. 'Re Īhâimana u'āsi mono si, te wē uptabi na 're hâimana, ōhō si siwaprosi.’ Āne na te za 'Re Īhâimana u'āsi mono si 're Īmorī wē uptabi na, da te dasiwi 're waihu'u za'ra, wawasété si, wa te 're Ī'manharī za'ra mono na, da te 're Īwaihu'u za'ra mono zém na hā. E tawamhā Ī'uwaibaba, 'Re Īhâimana u'āsi mono, wawasédé te te wa'āma 're Ī'aza'ra mono zéb da hā. Mare di. Ī'uwaibaba ō di.” Āne na te duré ni'wam norī hā te te si'āma 're rosa'rata upa za'ra.

⁸ Taha zarina te duré te te sima 're nharī za'ra: “Wawasété si, wa za tō wa te 're 'manharī u'āsi za'ra, 'Re Īhâimana u'āsi mono si Īwē uptabi na, da te dasiwi 're Īwaihu'u za'ra mono zéb da hā.” Ni'wam norī hā ma tō āne na Īnhimiroti wasédé hā Ī'āma sa'ra, Īsi'uihā na āne hā te āma Īwaihu'u za'ra newa. Ma tō Ī'āma wasété za'ra. Taha wa, te za 'Re Īhâimana u'āsi mono hā ta norī si siwi wē'ō pese za'ra, Ī'uwaibaba.

Dahâimana wasété na 're Īdahâimana za'ra mono na rowasu'u

⁹ Tawamhā wa norī hā zudezu norī hā e taré zudezu na 're wahâimana za'ra mono wa, te za, zudezu'ō norī hâimanazém nhipai u, te te 're wa'awēsāmri, 'Re Īhâimana u'āsi mono hā. Mare di. Uburé aiwapsi tāma 're Īdahâimana za'ra mono zé hā. Uburé dahâimana wasédé hā da te 're Ī'manharī za'ra mono na si te 're dahâimana za'ra, zudezu norī hā duré zudezu'ō norī zama. Dawasété hawi, dasi'uihā na 're dawairébé waihu'u mono ō di, dama siptete wa, dawasédé hā. Āne, wa tō aima waihu'u pari za'ra wa'wa.

¹⁰ Duréihā ma tō āne na ni'wam norī hā āma rob'ui'éré za'ra:

“Ni'wam norī hā si'uihā na 're Īnomro wē mono zém na, 'Re Īhâimana u'āsi mono te te 're Īwasu'u wē za'ra mono zéb da hā, robaba di. Uburé 're Īdanomro wasété mono na si, te 're dahâimana za'ra.

¹¹ Duré ni'wam nori hã âne te te waihu'u za'ra ô di, dawê na 're îdanomro mono zé hã. Duré ni'wam nori hã 'Re îhâimana u'âsi mono zô 're sôpré mono ô di, îhâimanazém na te te 're îwaihu'u za'ra mono zéb da hã. Âne hã tâma robaba uptabi di, 'Re îhâimana u'âsi mono ma hã.

¹² A'uwê mono bâ ma tô 'Re îhâimana u'âsi mono wi, 're dasipizari za'ra.

Dasi'uihã na marî îwê hã da te 're 'manharî waihu'u za'ra mono ô di. Taré ma tô 're danomro. Ni'wam nori hã marî îwê hã te te 're 'manharî za'ra mono ô di. Mare uptabi di.

¹³ Uburé danhoto hã wasété di. Wasété uptabi di.

Danhoto wasété na te dazadawa nhipese na, da te dasima 're nharî wasété za'ra.

Duré wahi hã te te 're dahâzu mono wa, ti'wa wa'u na te te 're îdanhimroi mono ne, te damreme na da te dasima 're nharî wasété za'ra, rowê hã da te dasiwi 're uprosi za'ra mono da.

¹⁴ Damreme îwasété uptabi na si te dasi'âma da te 're wasété za'ra.

¹⁵ Dasi'aba're na te duré 're dasi'u'a za'ra. Dasi'aba're na te duré 're dasisimro.

¹⁶ Daro mono bâ 're danomro mono sidâpâsi, te da te dasiwi 're rowamnarî u'âsi za'ra. Taha wa, te dasi'u hã robzei'ô u'âsi 're dahâimana za'ra.

¹⁷ Rowê na 're îdahâimana za'ra mono zéb da hã, marî hã îwê hã da te dasima 're 'manharî waihu'u za'ra mono ô di.

¹⁸ 'Re îhâimana u'âsi mono zama, da te dasiwi 're hâimana wazé mono ô di."

Âne na ma tô 'Re îhâimana u'âsi mono nhimiroti na da'âma rob'ui'ére sirômo za'ra.

¹⁹ Duréihã 'Re îhâimana u'âsi mono nhimiroti na ma tô Mozési hã rob'ui'ére, zudezu nori ma, ôhõ na si âma 're hâimana za'ra mono da. Taha wa, 'Re îhâimana u'âsi mono nhimiroti 'rata na rob'ui'ére hã 're hâimana sirômo mono wa, ni'wa hã tiwê na 're îmorî wasété ô na dama 're siwasu'u waihu'u mono ô di. Uburé dawasété na 're dasisâmri za'ra mono da si, te dama 're hâimana, rob'ui'ére 'rada hã, duré 'Re îhâimana u'âsi mono, dawasété na te te 're îda'awê'ô mono zé hã da te dasina 're waihu'u za'ra mono da.

²⁰ 'Re îhâimana u'âsi mono nhimiroti 'rata na rob'ui'ére zarina, marî hã da te 're î'manharî wê za'ra mono na, te za te te sima da'âma 're aroti, dawasédé hã te te oto da'âma 're ab'madâ'â tô mono da, taha zarina te te oto 're da'awêsâmri mono da, dapo're'ô nherê, te te 're da'ahâ za'ra mono tô da. Mare di. Taha nai ô di. Uburé marî hã da te 're î'manharî wasété za'ra mono na, 'râwi 're dasi'waihu'u za'ra mono da si, te dama 're hâimana, rob'ui'ére 'rada hã.

'Re îhâimana u'âsi mono te te 're îda'awêsâmri mono zém na rowasu'u

²¹ Tane nherê, 'Re îhâimana u'âsi mono ma tô oto dama waihu'u, te te 're îda'awêsâmri mono zém na hã, sô'awi da te oto 're îwaihu'u za'ra mono zéb da hã. 'Re îhâimana u'âsi mono hã te te sima da'âma 're aroti mono ô di, uburé marî hã da te 're î'manharî wê za'ra mono zéb zarina, dawasédé hã te te oto da'âma 're î'ab'madâ'â mono ô zéb da hã, taha zarina te te oto 're îda'awêsâmri mono zéb da hã. Duréihã 'Re îhâimana u'âsi mono nhimiroti 'rata na rob'ui'ére'wa nori hã ma tô âne na âma rob'ui'ére za'ra, 'Re îhâimana u'âsi mono te te 're îda'awêsâmri mono zém na hã.

²² Zezu Cristu, Danho'reptui'wa na da te dasina 're î'umnhasi za'ra mono zém na si, ma tô 'Re îhâimana u'âsi mono hã te te sima da'âma 're aroti, dawasédé hã te te oto da'âma 're ab'madâ'â tô mono da, taha zarina si te te oto 're da'awêsâmri mono da, dawasété na 're danomro mono nherê, te te oto 're da'ahâ za'ra mono tô da. Uburé Zezu Cristu te te 're îsaze za'ra mono nori si, te te oto 're awêsâmri. Âne hã aiwapsi te uburé tâma 're hâimana za'ra, zudezu nori hã, duré zudezu'ô nori zama.

²³ A'uwê mono bâ te uburé dawasété na 're danomro. Taha wa, te 'Re îhâimana u'âsi mono nhiti 're dahâimana za'ra, 're îmorî wê uptabi nhiti.

²⁴ Tane nherê, 'Re îhâimana u'âsi mono nhiti 're dahâimana za'ra mono nherê, Zezusi te te 're îsaze za'ra mono nori hã te te 're awêsâmri, da'âma 're îpê'êz mono zéb zarina, asa tâma 're îdasiwa'âbã za'ra mono zéb zô, sina 're simnhasi mono âna. Cristu Zezusi hã tidâ'âzém na ma tô da'awa'â. Taha wa, ma tô dawasété hawi te te 're da'awaibu. Taha na si te oto 'Re îhâimana u'âsi mono hã te te 're da'awêsâmri, dawasédé hã za oto te te da'âma 're î'ab'madâ'â mono ô zéb zarina.

²⁵ 'Re îhâimana u'âsi mono hã ma tô Zezusi hã pisutu, dzadza idâ'âzém na dawasédé, da te 're î'manharî za'ra mono zé hã te te dama 're apari mono da, taha zarina tiwi 'rusimani da, iwa'râmi da'âma 're pê'êz mono da. Duré taha na si te te 're îda'awêsâmri mono zé hã, 'râwi da te dasina 're waihu'u za'ra mono da, ma tô âne da pisutu, Zezusi hã. Zezusi hã da te 're sazei pese za'ra mono wapsi, te za dawasédé hã te te dama 're apari. 'Re îhâimana u'âsi

mono hã da'ãma 're wa'a su'u mono ò wa, dawasédé hã te te da'ãma 're ab'madâ'ã mono ò di aré.

²⁶ Tane nherê, âhãna hã dawasédé hã da te 're ì'manharì za'ra mono zém na, te te da'ãma 're ab'madâ'ã mono ãna 're hãimana mono ò di oto. Te oto te te ãma 're da'ab'madâ'ã u'ãsi, uburé marì hã ì'uwaibaba si te te 're ì'ab'manharì wê mono na, da te dasina 're waihu'u za'ra mono na, duré uburé Zezusi hã da te 're Ìsazei pese za'ra mono norì hã te te 're ìda'awêsãmri mono na, da te dasina 're waihu'u za'ra mono da.

²⁷ E tawamhã wasi'uihã na, wa za wawê na wasina 're wawata za'ra, 'Re ìhãimana u'ãsi mono te te 're ìwa'awêsãmri mono na hã. Mare di. E marì wa. 'Re ìhãimana u'ãsi mono nhimiroti si, wa te 're ì'madâ'ã pese za'ra mono na, te te sima wa'ãma 're aroti mono ò na dà'ãsina, taha zarina wawasédé hã te te wa'ãma 're ab'madâ'ã tó mono da. Taré, Zezusi hã wa te 're Ìsazei pese za'ra mono na, te te sima wa'ãma 're aroti, taha zarina wawasédé hã te te oto wa'ãma 're ab'madâ'ã tó mono da, taha zarina te te 're wa'awêsãmri mono da.

²⁸ Æne hã wa tó wasina waihu'u pese za'ra ni oto. Tó sena, Zezusi hã da te dasina 're umnhasi za'ra mono wapsi, te za tó 'Re ìhãimana u'ãsi mono hã te te sima da'ãma 're aroti, dawasédé hã te te oto da'ãma 're ì'ab'madâ'ã mono ò zéb zarina, te te oto 're ìda'awêsãmri mono zéb da hã. Ta hã te te sima da'ãma 're aroti mono ò di, Ìsimiroti na rob'ui'éré 'rata zarina, marì hã uburé da te 're ì'manharì wê za'ra mono na, dawasédé hã te te oto da'ãma 're ì'ab'madâ'ã mono ò zéb da hã, taha zarina te te duré 're ìda'awêsãmri mono zéb da hã. Æne wasu'u zarina, wa tó wa norì hã wasina waihu'u pese za'ra ni oto.

²⁹ E zudezu norì nhìb'apito si, te 'Re ìhãimana u'ãsi mono hã 're hãimana. E zudezu'ò norì ma hã, 're hãimana mono ò di bété. Ta norì ma zama te duré 're hãimana.

³⁰ 'Re ìhãimana u'ãsi mono hã tó sena, misire uburé Danhìb'apito uptabi hã. Zezusi hã te te 're Ìsazei pese za'ra mono zéb zarina si, te za te te sima ãma 're aroti, ìwasédé hã te te oto ãma 're ab'madâ'ã tó mono da, taha zarina si te te oto 're awêsãmri mono da, zudezu norì hã, duré zudezu'ò norì zama.

³¹ Zezusi hã da te dasina 're ì'mnhasi za'ra mono zém na si, 'Re ìhãimana u'ãsi mono hã dawasédé hã te te oto da'ãma 're ab'madâ'ã tó mono da, te te sima da'ãma 're aroti mono wamhã, e tawamhã, 'Re ìhãimana u'ãsi mono nhimiroti 'rata na rob'ui'éré hã, wama hã taré hã. E wa te 're 'madâ'ã pese za'ra mono ò di za. Wa za tó taha zama, wa te 're 'madâ'ã pese za'ra, tó sena wa.

4

Abra'ãhã wasu'u, 'Re ìhãimana u'ãsi mono te te 're Ìsazei pese mono zém na

¹ Æhãna hã wasiré zudezu norì hi'rada, wa za aima wasu'u za'ra wa'wa, Abra'ã hã.

² Ta hã uburé marì hã te te 're ì'ab'manharì wê mono na, 'Re ìhãimana u'ãsi mono, ìwasédé hã te te oto ãma 're 'madâ'ã mono tó da, te te sima ãma roti 'wa'ãhã, duré taha zarina Abra'ã hã 'ràwi tiwê na sina 're wata mono 'wa'ãhã, te aré tó sena 'ràwi sina 're wata. Tane nherê, marì hã te te 're ì'ab'manharì wê mono na, 'ràwi sina 're wata waihu'u mono ò di Abra'ã hã, taha zarina 'Re ìhãimana u'ãsi mono hã te te sima ãma roti ò wa, ìwasédé hã te te oto ãma 're ì'madâ'ã mono ò zarina, te te ìwêsãmrizéb da hã.

³ Duréihã Abra'ãhã wasu'u na, ma tó ni'wa hã ãma rob'ui'éré, Æne na hã:

“Abra'ã hã 'Re ìhãimana u'ãsi mono si, ma tó te te sina 're umnhasi u'ãsi, te te tãma Ìropisutuzém na hã. Taha ãma si, ma tó sasõ. Taha wa, ma tó 'Re ìhãimana u'ãsi mono hã sima ãma roti, ìwasédé hã te te oto ãma 're 'madâ'ã tó mono da, duré taha zarina si te te oto wêsãmri da. Taha wa, tãma wê uptabi di, 'Re ìhãimana u'ãsi mono ma hã.”

Æne ma tó Abra'ãhã wasu'u na ãma rob'ui'éré ni'wa hã, ìbaihã na hã. Æ hã Abra'ã hã, marì hã te te 're ì'ab'manharì wê mono na, 'ràwi sina 're iwata mono ò zé wasu'u.

⁴ Ni'wam norì hã te te dama 're romhuri za'ra mono wamhã, da te 're ìpawa'ãbã za'ra mono ré, te 're hãimana za'ra. E sôpru wa, te za taré Ìsib'apito hã rob'ui'prazé hã te te tãma 're sômri za'ra. Mare di. Sôpru wa, te te tãma 're sômri za'ra mono ò di. Te te tãma 're Ìromhuri za'ra mono zé wa'rãmip si, te za te te tãma 're sômri za'ra, ìpawa'ã hã.

⁵ Tane ò di, 'Re ìhãimana u'ãsi mono hã. Marì hã da te 're ì'manharì wê za'ra mono na, te 'ràwi 're dasi'madâ'ã ze za'ra, taha na si 'Re ìhãimana u'ãsi mono hã dawasédé hã te te oto da'ãma 're ì'ab'madâ'ã mono ò na, te te sima da'ãma 're aroti mono newa. Tane nherê, te te sima da'ãma 're aroti mono ò di, taha na dawasédé hã te te oto da'ãma 're ab'madâ'ã tó mono da, taha zarina te te oto 're ìda'awêsãmri mono zéb da hã. 'Re ìhãimana u'ãsi mono hã da te dasina 're umnhasi za'ra mono wapsi, te za te te sina 're da'awêsãmri, dawasédé hã za oto te te da'ãma 're ab'madâ'ã mono ò wa, duré dawasété na 're danomro mono nherê, te te 're da'ahã za'ra mono tó da.

⁶ 'Re ìhâimana u'âsi mono te te sima da'âma 're aroti mono ò di tô, uburé marî hâ da te 're ì'manharî wê za'ra mono zéb zarina, dawasédé hâ te te oto da'âma 're ì'ab'madâ'â mono ò zéb da hâ, taha zarina te te oto 're ì'da'awêsâmri mono zéb da hâ. Da te 're ì'saze za'ra mono zém na si te oto te te 're da'awêsâmri tô. Taha zarina, dama 're ì'rowê uptabi za'ra mono zém na hâ, ma tô Dawi hâ âne na âma rob'ui'éré, duréihâ:

⁷ 'Ni'wam norî ma hâ, 'Re ìhâimana u'âsi mono hâ ìwasédé te te oto âma 're 'madâ'â za'ra mono ò wamhâ, ta norî ma si, tâma 're rowê za'ra mono di za, ìwasété na oto âma 're 're'pu'u za'ra mono ò wa, ta norî âma hâ.

⁸ 'Re ìhâimana u'âsi mono hâ ìwasédé hâ te te oto âma 're sa'rata za'ra mono ò wa, tâma 're rowê za'ra mono di."

Âne na ma tô Dawi hâ âma rob'ui'éré, dama 're ì'rowê uptabi za'ra mono zém na.

⁹ Âne hâ, e sihâiwata nhihâri ré 're ìnomro mono norî si, te za rowê uptabi na 're nomro. E â norî si, te wasu'u, Dawi hâ. Mare di. Sihâiwata nhihâri âna 're ìnomro mono norî zama, te wasu'u. Âne na, wa tô aima waihu'u pari za'ra wa'wa, Abra'âhâ wasu'u na rob'ui'éré hâ, duréihâ:

"Abra'â hâ 'Re ìhâimana u'âsi mono si, ma tô te te sina 're umnhasi u'âsi, te te tâma ìropisutuzém na hâ. Taha âma si ma tô sasô. Taha wa, ma tô 'Re ìhâimana u'âsi mono hâ sima âma roti, ìwasédé hâ te te oto âma 're 'madâ'â tô mono da, duré taha zarina si te te oto wêsâmri da. Taha wa, tâma wê uptabi di, 'Re ìhâimana u'âsi mono ma hâ."

Âne, wa tô aima waihu'u za'ra wa'wa.

¹⁰ E tawamhâ Abra'â hâ sihâiwata nhizâri sirômo, ma tô 'Re ìhâimana u'âsi mono hâ sima âma roti, te te wêsâmri da. Mare di. Sihâiwata nhizâri ô ré, ma tô wêsâ.

¹¹ 'Re ìhâimana u'âsi mono hâ, Abra'â hâ te te sina ì'umnhasi pese zém na si, ma tô wêsâ, sihâiwata nhizâri ô nherê. Taha wa, sihâiwata nhizâri ô ré, Abra'â hâ, 'Re ìhâimana u'âsi mono te te ìwêsâmrizém na hâ, te wama wasu'u, tô sena na uburé da te 're ìwaihu'u za'ra mono zéb da hâ. Taha wa, Abra'â hâ uburé 'Re ìhâimana u'âsi mono, da te dasina 're ì'umnhasi za'ra mono norî hi'rada, ta hâ. Sihâiwata nhihâri ô nherê, 'Re ìhâimana u'âsi mono te te 're ì'awêsâmri mono norî hi'rada.

¹² Duré, ìsihâiwata nhihâri ré norî hi'rada, zudezu norî hi'rada. E tawamhâ sihâiwata nhihâri ré 're hâimana za'ra mono wa, te ta norî hi'rada hâ 're hâimana, Abra'â hâ. Mare di. Abra'â hâ sihâiwata nhizâri ô ré, 'Re ìhâimana u'âsi mono te te ìsazei pese ne, ìsine te te 're ìsazei pese za'ra mono norî hi'rata si, te 're hâimana, Abra'â hâ.

Abra'âhâ ma, 'Re ìhâimana u'âsi mono te te ìropisutuzé wasu'u

¹³ Duréihâ 'Re ìhâimana u'âsi mono hâ Abra'âhâ ma, ma tô ropisutu, uburé danhipti'ai mono bâ te te tâma 're ì'anhomri mono da, ìsihudu norî ma ropibu ma, ìsihudu sidâpâsi. E ìsimiroti hâ uburé te te 're 'madâ'â pese uptabi mono wa, duré nimahâ na marî na misi ìsimiroti na te te upai ô wa, ma tô âne na tâma ropisutu. Mare di. Taha wab ô di. 'Re ìhâimana u'âsi mono te te ìsazei pese na, te te wêsâmri wa, ma tô âne na tâma ropisutu siro.

¹⁴ 'Re ìhâimana u'âsi mono nhimiroti 'madâ'â'wa norî hâ zudezu norî hâ, ìsimiroti te te 're ì'madâ'â pese za'ra mono zéb zarina, 'Re ìhâimana u'âsi mono, ta norî ma, uburé danhipti'ai mono bâ te te tâma 're ì'anhomri mono da hâ, te te ropisutu 'wa'âhâ, taré te aré da te 're saze za'ra, 'Re ìhâimana u'âsi mono hâ. Marî dai ô di aré. Taré te aré 'Re ìhâimana u'âsi mono hâ dama ropisutu, daro hâ te te dama 're ì'anhomri mono zém na hâ. Dama hâ, aré marî ô di.

¹⁵ 'Re ìdahâimana wê za'ra mono zéb da hâ, dasi'uihâ na da te dasima 're ìpisutu za'ra mono zé hâ dama 're hâimana za'ra mono ò 'wa'âhâ, aré da te âma 're upai waihu'u za'ra mono ò di. Tane, 'Re ìhâimana u'âsi mono nhimiroti na Mozési te te ìrob'ui'érezé hâ dama 're hâimana za'ra mono ò 'wa'âhâ, aré da te âma 're upai waihu'u za'ra mono ò di duré. Tane nherê, te tô dama 're hâimana, ìsimiroti na rob'ui'éré rada hâ. Taha wa, da te 're waihu'u pese za'ra mono nherê, da te 're 'madâ'â pese za'ra mono ò wamhâ, 'Re ìhâimana u'âsi mono te te 're ì'dahâ za'ra mono zé, te wasu'u.

¹⁶ Tawamhâ e marî hawi, ma tô 'Re ìhâimana u'âsi mono hâ Abra'âhâ ma ropisutu, ìsihudu norî ma ropibu ma. Abra'â hâ te te ìsazei pese zém hawi, ma tô tâma ropisutu. Te te tâma ìropisutuzé wa'râmi, asa tâma ìsiwa'âbâzéb zô 're ìsimnhasi mono ò na, da te dasina 're ìwaihu'u pese za'ra mono zéb da hâ, ma tô 'Re ìhâimana u'âsi mono hâ Abra'â te te ìsazei pese zém hawip si, tâma ropisutu. E Mozésihî nhimi'ui'éré 'madâ'â'wa norî ma si, te 'Re ìhâimana u'âsi mono nhimirotipisutuzé hâ tâma 're hâimana za'ra, zudezu norî te te 're ìsazei pese za'ra mono norî ma si. Mare di. Abra'â hâ, 'Re ìhâimana u'âsi mono si te te sina ì'umnhasi ne, uburé 're ìdahâimana za'ra mono norî ma zama, te tâma 're hâimana za'ra, 'Re ìhâimana u'âsi mono nhimirotipisutuzé hâ. E marî wa. Abra'â hâ uburé wahi'rata wa, uburé wasiré ìsazei'wa norî hi'rata wa.

¹⁷ Duréihā ni'wa hā ma tō āne na 'Re İhâimana u'âsi mono mreme na rob'ui'ére, Abra'āhā āma hā:

“Wa hā wa tō aipisutu, daro mono bā da te dasina 're İ'umnhasi za'ra mono norī hi'rata na, da te 're asisi za'ra mono da.”

Āne ma tō 'Re İhâimana u'âsi mono nhimipisutuzém na āma rob'ui'ére. 'Re İhâimana u'âsi mono nhimiropisutuzé hā, tō sena. Pire uptabi di. E marī wa. Ō hā tō sena, 're hâimana mono wa. Taha si, ma tō Abra'ā hā te te sina 're umnhasi u'âsi. Taha si, 're dadâ'â za'ra mono nherē, dahâiwa'utu'wa hā te 're hâimana. Taha si marī ō ré, Ropoto mono 'wa hā.

¹⁸⁻¹⁹ Duréihā Abra'ā hā 100 na āma İwahubzéb u hā romhutu na ma tō 'Re İhâimana u'âsi mono hā tāma ropisutu, āne: “Asihudu sidâpâsi, da'ahâ uptabi di za.” Āne rob'ui'ére 'rata na İwasu'u hā. Abra'ā hā romhutu na ma tō tidâ'âzé hā sina waihu'u, İhâiba sib'uware na hā oto. Timro zama ma duré waihu'u, 'ra waihu'u ō na, Sara hā. Tane nherē, siptete sina ma tō 'Re İhâimana u'âsi mono si saze, za İ'ra te te tāma İsômrizém na hā. Te te 're wawāi mono āna, te sō 're simipari u'âsi, 'Re İhâimana u'âsi mono nhimiropisutuzéb zō hā, marī hā tāma hâimana ō nherē, sō 're İsimipari mono zéb da hā. Taha wa, ma tō 'Re İhâimana u'âsi mono hā pisutu, daro mono bā da te 're İsazei pese za'ra mono norī hi'rata na, da te 're sisi za'ra mono da.

²⁰ 'Re İhâimana u'âsi mono te te tāma İropisutuzém na hā te te āma wawāi ō di. İmreme hā te te İsazei pese zéb zarina, ma tō siptete uptabi na 're hâimana. Te duré āma 're wata u'âsi.

²¹ 'Re İhâimana u'âsi mono te te tāma İropisutuzé hā za te te tāma āma İ'uwaimramizéb zō, te te 're sazei pese u'âsi. Te te sazei utōrī ō di, Abra'ā hā.

²² Taha wa, te te İsazei pese na ma tō sima āma roti 'Re İhâimana u'âsi mono hā, İwasédé hā te te oto āma 're 'madâ'â mono tō da, taha zarina te te wēsâmri da, duré po're'ō nherē, za te te azâri tō da, dame.

²³ Duréihā rob'ui'ére 'rata na Abra'āhā wasu'u hā, 'Re İhâimana u'âsi mono te te İwēsâmrizém na hā, taha wasu'u si ō di.

²⁴ Wa norī zama, wa te wasina 're İ'umnhasi za'ra mono norī hā te za duré te te 're wa'awēsâmri, Wanhîb'apito Zezusihi hâiwa'utu'wa, wa te wasina 're İ'umnhasi za'ra mono norī hā.

²⁵ 'Re İhâimana u'âsi mono hā ma tō Zezusi hā dama tisō, da te dasiwi wîrî da, wawasété na 're wanomro mono wa. Ma tō duré hâiwa'utu, taha na te te 're wa'awēsâmri mono da, wawasédé hā te te oto wa'āma 're ab'madâ'â tō mono da, 'Re İhâimana u'âsi mono hā.

5

Cristuhu zazei'wa, toi u'âsi 're İnomro mono zé wasu'u

¹ Wanhîb'apito Zezu Cristu hā ma tō wazada tidâ'â za'ra, wa'upana. Taha wa, 'Re İhâimana u'âsi mono hā ma tō te te sima wa'āma 're aroti, wa te 're İsazei pese za'ra mono na, wawasédé hā te te oto wa'āma 're ab'madâ'â tō mono da, taha zarina si te te duré 're wa'awēsâmri mono da, wawasété na 're wanomro mono nherē, te te 're wa'ahâ za'ra mono tō da. Taha wa, rowē u'âsi, wa oto āma 're wanomro, 'Re İhâimana u'âsi mono āma hā.

² Zezusi hā wa te wasina 're umnhasi za'ra mono wa, te 'Re İhâimana u'âsi mono hā İwē si te te wama 're ab'madâ'â. Taha na si, wa oto wa norī hā 're wahâimana za'ra. Niwapsi te za 'Re İhâimana u'âsi mono hā te te wama 're apisutu, İwaihu'u pese zarina İhâiba na rowa'a za'ētē na İsiré 're wahâimana u'âsi za'ra mono da, rowē uptabi na. Taha wa, wato sina, wa sō 're wanhîmipari za'ra, wa te 're sazei utōrī za'ra mono āna.

³ Duré Cristuhu zazei'wa, 're wanomro mono 'ru te, da te wama 're rob'manharî za'ra mono wa, wa te 're robzépata za'ra mono ré, wa watoi u'âsi 're wahâimana za'ra ōne haré, wa te 're İrobzépata za'ra mono zéb zarina, ōhō āma si wanhîptete sina 're İwahâimana za'ra mono zéb da hā, wa te wasima āma 're sa'ētē za'ra mono wa. Āne hā wa te wasina 're waihu'u pese za'ra mono wa, wa za watoi u'âsi 're wahâimana za'ra.

⁴ Tawamhâ wanhîptete sina, āma 're İwahâimana za'ra mono zéb da hā, wa te tāma āma 're uwaimrami za'ra mono wamhâ, te za 'Re İhâimana u'âsi mono hā wa'āma 're wata za'ra. Tawamhâ wa'āma 're İwata za'ra mono zém na, wa te wasina 're waihu'u za'ra mono wamhâ, marī te te wama 're İ'apisutu mono zéb zō, wa te 're wawâ za'ra mono āna, wa za wasina 're wanhîmipari u'âsi za'ra.

⁵ Āne zō si 're wanhîmipari za'ra mono wamhâ, taré sō 're wanhîmipari za'ra mono ō di za. Taré, wa te wasina 're umnhasi baba za'ra mono ō di za. E marī wa. 'Re İhâimana u'âsi mono hā Tipē'ēzani te te wama 're İ'anhomri mono na, tinhîmizawi pese zé hā te te wama 're awaihu'u mono wa, taré, wa te wasina 're umnhasi baba za'ra mono ō di za. Taha wa, taré sō 're wanhîmipari za'ra mono ō di za, marī İwē hā te te wama 're İ'apisutu mono zō hā.

⁶ Duréihā 're ĩdahāimana za'ra mono na'rata zém hawimhā, marī da te 're ĩ'manharī wē za'ra mono zém na hā 'Re ĩhāimana u'āsi mono te te da'āma sima 're aroti mono ō di, taha zarina dawasédé hā te te oto da'āma 're ab'madā'ā tō mono da, duré dapo're'ō nherē, te te 're da'ahā za'ra tō mono da. Ta hawim haré, dahāimana wē zém na 'rāwi 're dasi'madā'ā waihu'u za'ra mono ō di, dawasédé hā te te da'āma 're ĩ'ab'madā'ā mono ō zarina, te te 're ĩda'awēsāmri mono zéb da hā, 'Re ĩhāimana u'āsi mono hā. Taha ré, ma tō Cristu hā dazada dārá, uburé dawasété na 're ĩdahāimana za'ra mono norī zada, 'Re ĩhāimana u'āsi mono, bādā te te āma ĩpisutuzé hā ĩwa ĩwaptā'ázém na.

⁷ Ni'wa hā uburé danhimiroti wē hā te te 're 'madā'ā pese mono nherē, taha upana ĩda'matā'ā da hā, mare di. Ni'wa hā da'āma 're ĩsiwamri mono, 're 'maiĥāimana mono wamhā, taha upana si ĩda'matā'ā da hā, āté te za 're si'madā'ā za'ra.

⁸ Taneī ō di, 'Re ĩhāimana u'āsi mono nhimizawizé hā. Wa norī hā wawasété na 're wahāimana za'ra mono nherē, ma tō Cristu hā pisutu, wazada dā'ā da, wa'upana. Āne hā ma tō 'Re ĩhāimana u'āsi mono hā te te wama 're awaihu'u, te te 're ĩwa'azawi pese mono zém na hā.

⁹ Zezusi wazada ĩdā'ázém na, ma tō 'Re ĩhāimana u'āsi mono hā te te 're wa'awēsāmri, wawasédé hā te te oto wa'āma 're ĩ'ab'madā'ā mono ō zarina. Āne wa, te za duré Zezusi hā tidā'ázém na te te 're wa'anho'reptu, 'Re ĩhāimana u'āsi mono nhimiházé wi, ro hā za ĩsi'utōrízéb āma hā.

¹⁰ 'Re ĩhāimana u'āsi mono nhitob'ru, wa aré 're wanomro. Tane nherē, ti'ra dā'ázém na ma tō wa'āma 're siwadi za'ra oto. Tawamhā ĩsiwadi oto 're wahāimana za'ra mono wa, te za tō oto Zezusi hā te te 're wa'anho'reptu, dā'ā nherē, apā ĥāiwa'utu wa, dā'ā āna 're ĥāimana u'āsi mono wa za oto.

¹¹ Tane nherē, taha si ō di. 'Re ĩhāimana u'āsi mono āma, wa duré watōi u'āsi 're wahāimana za'ra, Wanĥib'apito Zezu Cristu dā'ázém na, wa'āma 're siwadi za'ra mono wa oto.

Adāhā wasu'u, Cristuhu wasu'u me

¹² Tawamhā e ma hawi, ma tō dawasédé hā tinhana'rata. Adā hā ma tō duréihā tiwasété 'rata. Ta hawimhā ma tō dawasédé hā te te ropé, uburé dapoto mono bā. Ta hawim haré, te aihīni 're dadā'ā u'āsi za'ra, dawasété na 're danomro mono wa.

¹³⁻¹⁵ Dawasété āna 're ĩdahāimana za'ra mono zéb da, 'Re ĩhāimana u'āsi mono nhimiroti hā dama 're ĥāimana za'ra mono ō nherē, dawasédé hā te te da'āma 're aza'ra mono ō di, 'Re ĩhāimana u'āsi mono hā. Tane nherē, duréihā Mozésihi ma, tinhimiroti hā te te waihu'u ō ré, duré te te rob'ui'éré ō ré, te dawasété na si 're dahāimana u'āsi za'ra. ĩsimiroti na rob'ui'éré hā dama 're ĥāimana za'ra mono ō nherē, dawasété na si 're dahāimana za'ra mono wa, ma tō Adāhā wasété na'rata hawim haré 're dadā'ā u'āsi za'ra, 'Re ĩhāimana u'āsi mono nhimiroti hā dapē'ē 're, dama 're ĥāimana za'ra mono nherē, da te dasina tāma āna 're uwaiwami za'ra mono ō wa. Mozésihi ma, za oto 'Re ĩhāimana u'āsi mono, tinhimiroti te te ĩwaihu'uzéb u hā, dawasété na si 're danomro u'āsi mono wa, ma tō 're dadā'ā u'āsi za'ra. Adāhā wi, 'Re ĩhāimana u'āsi mono, rob'rā te te sawi nherē, te te sadawa 'madā'ā āna, ma tō tiwasédé hā 'manha. Āne hā Adāhā wasété ne, aiwa da te 're 'manharī za'ra mono ō nherē, ma tō aihīni 're dadā'ā u'āsi za'ra, 'Re ĩhāimana u'āsi mono te te dama ĩrotizé hā, sō'awi dama 're ĥāimana za'ra mono ō nherē.

Adā hā wasété na'rata wamhā, ma tō ĩpire uptabi hā 'manha, tiwasédé hā. Taha uirī na si, ma tō Zezusi hā marī ĩpire uptabi hā 'manha duré ĩwē hā, ti'ai āma 're morī ré. Taha wa, Zezusihi ne Adā hā, marī ĩsine ĩpire hā te te 'manharī wa. Tane nherē, aiwab ō di, ĩsimi'manharīzé hā. 'Re ĩhāimana u'āsi mono hā ĩwē te te dama 're ĩ'anhomri mono hā, Adāhā wasété nei ō di. Adā hā tiwasédé te te ĩ'manharīzém hawi, ma tō oto uburé 're dadā'ā u'āsi za'ra, tō sena. Tane nherē, 'Re ĩhāimana u'āsi mono hā ĩwē hā te te dama 're ĩ'ab'manharī mono zé hā ĩpire uptabi di, Adā hā tiwasédé te te ĩ'manharīzém nhīpai u. Wē uptabi di. E marī tawamhā, 'Re ĩhāimana u'āsi mono, ĩwē hā te te dama 're ĩ'ab'manharī mono zé hā. Zezusi hā sisawī āna tūhāba na te te 're ĩda'azawi pese mono na, ma tō te te dama 're ab'manharī wē, tinhoprubzéb zarina.

¹⁶ Adā hā tiwasédé te te ĩ'manharīzém hawim haré, te dawasédé hā da te 're 'manharī u'āsi za'ra oto. Taha zarina, ma tō 'Re ĩhāimana u'āsi mono hā te te siwi 're da'awē'ō pese, dawasédé hā te te da'āma 're ĩ'awaihu'u mono zéb zarina. Tane nherē, ta hawim haré, dawasédé hā da te 're 'manharī u'āsi za'ra mono nherē, dama ĩsōprubzém na te oto da'ahā na te te 're da'awēsāmri 'Re ĩhāimana u'āsi mono hā, ĩ'ra dazada ĩdā'ázém na. Āne wa, 'Re ĩhāimana u'āsi mono, dama 're ĩsōpru mono zé hā, ĩpire uptabi di, Adāhā nhimi'manharīzé ma hā.

¹⁷ Tō sena aibā hā misi, tiwasédé te te ĩ'manharī na'rata hawi, ma tō oto 're dadā'ā u'āsi za'ra. Tane nherē, Zezu Cristu hā aibā misi nherē, ĩsimi'manharīzé hā ĩpire uptabi di, aibā

tiwasédé te te ĩ'manharĩ na'rata zém nhipai u. Wě uptabi di. 'Re ĩhâimana u'âsi mono hã ĩwě uptabi hã te te tãma 're ĩ'apisutu mono norĩ si, te za hâimana pire na ĩsiré 're hâimana u'âsi za'ra, tinhoprubzê hã te te tãma 're ĩ'anhomri mono norĩ si. ĩsôprubzê hã te te 're ĩda'awěsãmri mono zé, te wasu'u. Cristu ĩdã'ázém na te za hâimana pire na ĩsiré 're hâimana u'âsi za'ra.

¹⁸ Aibã hã misi tiwasédé hã te te ĩ'manharĩzém hawi, ma tã 'Re ĩhâimana u'âsi mono hã uburé te te 're da'awě'õ pese, dawasédé hã te te da'ãma 're ĩ'awaihu'u mono zéb zarina. Tane, misi Zesusihi nhĩmĩ'manharĩ wě zém na, te za oto 'Re ĩhâimana u'âsi mono hã te te 're da'anho'reptu, dapě'ê 're, dadã'ã u'âsi ne 're ĩdanomro mono zém hawi, ĩ'rata 're dahâimana u'âsi za'ra mono da oto.

¹⁹ Aibã hã misi nherě, 'Re ĩhâimana u'âsi mono te te ĩwapari õ hawimhã, ma tã oto uburé dawasété na si 're dahâimana za'ra. Tane duré, aibã hã misi nherě, 'Re ĩhâimana u'âsi mono te te ĩwapari pese zém hawi te za oto 'Re ĩhâimana u'âsi mono hã te te 're da'awěsãmri, Zezu Cristu te te ĩwapari pese zém hawimhã.

²⁰ Duréhã 'Re ĩhâimana u'âsi mono hã ma tã Mozésihi ma tinhimiroti hã waihu'u, te te ãma rob'ui'ére da, ãma 're dasipo're pu'u za'ra mono wa, dawasédé hã da te oto dasina 're waihu'u za'ra mono da. Tane nherě, ma tã dawasédé hã da te dasima 're sa'ětê u'âsi za'ra. Tane nherě, dawasédé da te dasima 're ĩsa'ětê za'ra mono zém nhipai u, ma tã 'Re ĩhâimana u'âsi mono hã te te dama 're arob'manharĩ wě, da'ãma 're ĩsiwamri u'âsi mono zéb zarina.

²¹ ãne na rowasu'u aré, wa za oto aima 'rãsutu za'ra wa'wa. Dawasété na si 're danomro u'âsi mono wa, ma tã aré dapě'ê 'remhã, dadã'ã ne 're dahâimana u'âsi za'ra, 'Re ĩhâimana u'âsi mono nhiti. Tane nherě, tinhimizawi pese zéb zarina, ma tã 'Re ĩhâimana u'âsi mono hã Wanhib'apito Zezu Cristu dã'ázéb zarina te te sima 're wa'awě, taha zarina si rowě uptabi na 're wanomro u'âsi mono da oto.

6

'Re ĩdanomro mono zép té wasu'u

¹ 'Re ĩhâimana u'âsi mono hã, simizawi pese uptabi di. Te wa'ãma 're pě'ézé u'âsi. Taha wa, wawasédé hã wa te 're 'manharĩ za'ra mono nherě, tinhimizawizé hã te te wawi 're azawi mono õ di. Wawasédé, wa te 're ĩ'manharĩ za'ra mono zé hã, te duré te te wama 're aparĩ. E tawamhã, wawasédé, wa te 're ĩ'manharĩ za'ra mono zé hã te te wama 're aparĩ mono nherě, wa za wawasédé hã duré apã wa te 're 'manharĩ u'âsi za'ra, apã te te duré wama 're aparĩ zahu mono da. E taha da, wa za wawasété u'âsi 're wahâimana za'ra.

² Mare di. 'Re dadã'ã za'ra mono wa, marĩ zõ, da te oto 're ĩrob'ruiwapari za'ra mono õ ne, wa norĩ hã wawasété zõ, wa te oto 're rob'ruiwapari za'ra mono õ di za. Taha wa, wawasédé hã wa te duré 're 'manharĩ zahu za'ra mono õ di za oto.

³ Wa norĩ hã ã dawabzuri, wa te 're 'manharĩ za'ra mono wamhã, Cristu Zesusihi siré, 'rãwi oto 're ĩwanomro mono zé, te wasu'u, simisutu. ĩsiré oto 're ĩwanomro mono ne, wa tã duré ĩsiré 're wadã'ã za'ra, simisutu. ãne hã aima waihu'u pese za'ra wa'aba di.

⁴ Tawamhã, ã dawabzuri hã oto wa te 're 'manharĩ za'ra mono wamhã, ã da te 're ĩwanhamra mono zé, Cristuhu siré 're ĩwadã'ã za'ra mono zé, te wa'ãma simiré'é. Ab're 're, ĩsiré da te 're ĩwanheme mono zéb zama, te wasu'u. E marĩ da, wa tã Zesusihi siré 're wadã'ã za'ra. Cristu hã dã'ã nherě, ĩmama hã tiwaihu'u pese na te te ĩhãiwa'utu ne, 're ĩwanomro mono zép tém na si, oto 're ĩwahâimana za'ra mono zéb da hã, wa tã ĩsiré 're wadã'ã za'ra, wa norĩ hã. ãne wa'ãma ĩsimiré'ézé hã.

⁵ Wa norĩ hã Cristuhu siré, wa tã 're wadã'ã za'ra, wawasété zõ, wa te oto 're rob'ruiwapari za'ra mono õ wa, 're dadã'ã za'ra mono wa, marĩ zõ, da te oto 're ĩrob'ruiwapari za'ra mono õ ne. ãne hã simisutu ma tã 'Re ĩhâimana u'âsi mono hã wahãiba na atob za'ra, Cristuhu tême. Duré Cristu hã dã'ã uptabi nherě, ĩmama te te ĩhãiwa'utu ne, te za duré wa norĩ hã te te 're wa'ahãiwa'utu. Taha na te za duré Cristuhu tême wahãiba na atob za'ra, 'Re ĩhâimana u'âsi mono hã.

⁶ Wawasété na 're ĩwanomro 'rata mono zé hã, tãibã oto. Cristu hã wedepo'o nhonhi'rãmi na ĩdã'ã ne, ma tã 'Re ĩhâimana u'âsi mono hã te te wama 're a'uprosi, 're ĩwanomro 'rata mono zé hã. Marĩ ĩwasétére si, wa te wasima 're ĩ'ruiwapari u'âsi za'ra mono zém hawi, te te 're wa'anho'reptu mono da, ma tã te te wama 're a'uprosi, 're ĩwanomro 'rata mono zé hã. Wawasédé hã wa te 're sahãri waihu'u za'ra mono ãna, 're wanomro mono tã da, ma tã te te wama 're a'uprosi. ãne hã wama waihu'u pese za'ra di.

⁷ 'Re dadã'ã za'ra mono wamhã, dawasédé hã da te 're 'manharĩ waihu'u za'ra mono õ di oto. Tane, 're ĩdã'ã za'ra mono norĩ ne, Cristuhu siré 're wadã'ã za'ra mono wa, wawasédé hã wa te 're 'manharĩ u'âsi za'ra mono õ di za oto.

⁸ Taha wa, Cristuhu siré 're wadâ'â za'ra mono wa, wa za wa te wasina 're waihu'u pese za'ra tô sena na, za Îsine 're Îwahâiwa'utu za'ra mono zéb da hâ, duré Îsiré za 're Îwahâimana u'âsi za'ra mono zém na hâ.

⁹ Âne na, wa tô duré wasina waihu'u pese za'ra ni. Cristu hâ dâ'â uptabi nherê, 'Re Îhâimana u'âsi mono te te hâiwa'utu wa, taha wa, niwamhâ tidâ'â na te te sahu ô di za, îdâ'â zé hâ sib'uware wa oto, Zezusihî ma hâ.

¹⁰ Dâ'â wamhâ, misi haré ma tô dawasété nhiptetezé hâ uprosi. Taha wa, oto dâ'â parimhâ, Timama ma, te oto 're hâimana u'âsi, Cristu hâ.

¹¹ Taha wa, te za âne na asi'âma 're Îrosa'rata za'ra wa'aba mo: “‘Re dadâ'â za'ra mono wa, marî zô, da te oto 're Îrob'ruiwaparî za'ra mono ô ne, wawasété zô, wa te oto 're rob'ruiwaparî za'ra mono ô di za, wa norî hâ. 'Re Îhâimana u'âsi mono ma, wa te oto 're Îromhuri za'ra mono da si, wa za oto 're wahâimana za'ra. Cristu Zezusihî âma si, wa za oto 're wahâimana za'ra.” Âne si te za asima âma 're Îrosa'rata za'ra wa'aba mo.

¹² 'Râwi marî na asima 're Îrosa'rata wasété za'ra wa'aba mono zé hâ 're 'madâ'â za'ra wa'aba mono tô da, te za aiwasété wi asina 're asiptete za'ra wa'aba mo, aipê'ê na.

¹³ Marî Îwasédé hâ 're 'manharî za'ra wa'aba mono tô da, te za aihâiba hâ 're 'madâ'â pese za'ra wa'aba mo, aihâiba hawim na marî 're 'manharî za'ra wa'aba mono tô da. 'Re atâ'â za'ra wa'aba mono wa, 'Re Îhâimana u'âsi mono te te 're 'aihâiwa'utu za'ra wa'aba mono ne, te 're aihâimana za'ra wa'aba mo, 're anomro aba mono zép tém na hâ. Taha wa, te za 'Re Îhâimana u'âsi mono ma si, 're asisômri za'ra wa'aba mo, misi haré. Taha ma si, te za aihâiba hâ 're Îsômri za'ra wa'aba mo ône haré, marî Îwê si âma 're 'manharî za'ra wa'aba mono zéb da hâ.

¹⁴ 'Re Îhâimana u'âsi mono nhimiroti 'rata na rob'ui'éré hâ asina tâma âma 're 'uwaimrami za'ra wa'aba mono zéb zarina, aiwasédé hâ te te oto ai'âma 're ab'madâ'â aba mono tô da, 're asi'madâ'â za'ra wa'aba mono ô di za. Tinhimizawi pese zém na si, ma tô 'Re Îhâimana u'âsi mono hâ ai'âma 're pê'ézé za'ra wa'wa, aiwasété na 're aihâimana za'ra wa'aba mono nherê. Taha zarina si, ma tô te te 're aiwêsâmri za'ra wa'wa. Taha wa, te za aiwasété wi asina 're asiptete u'âsi za'ra wa'aba mo oto.

'Re Îhâimana u'âsi mono ma, 're Îdasisômri za'ra mono zé wasu'u

¹⁵ Tawamhâ âté âne te za asima 're Înharî za'ra wa'aba mo: “‘Re Îhâimana u'âsi mono nhimiroti na Mozési te te Îrob'ui'éérézé hâ wa te 're 'madâ'â pese za'ra mono zéb zarina, te te sima wa'âma 're aroti mono ô di, taha zarina wawasédé hâ te te oto wa'âma 're ab'madâ'â tô mono da, taha zarina te te 're wa'awêsâmri mono da. Tinhimizawi pese zéb zarina si, ma tô te te 're wa'awêsâmri, wawasété na 're wahâimana za'ra mono nherê, wa'âma 're pê'ézé za'ra mono wa. Taha wa, wa za wawasédé hâ duré apâ wa te 're 'manharî u'âsi za'ra ône u'â, 'Re Îhâimana u'âsi mono hâ dawasété nherê, simizawi pese wa.” Âne na asima 're rosa'rata za'ra wa'aba mono ô di za. Tô'â.

¹⁶ A norî wa'wa hâ dama 're romhuri za'ra wa'aba mono da, aihâiba hâ dama 're sômri za'ra wa'aba mono wamhâ, taha nhimiwada'uri na si, te za tô 're aihâimana za'ra wa'aba mo. Âne hâ aima waihu'u pese za'ra wa'aba di. Tane, aihâiba hâ aiwasété ma, 're sômri za'ra wa'aba mono wamhâ, te za tô âma 're asiwasété za'ra wa'aba mo. Taha zarina te za atâ'â u'âsi ne, 're aihâimana za'ra wa'aba mo, aipê'ê 're, 'Re Îhâimana u'âsi mono nhiti. Tane nherê, 'Re Îhâimana u'âsi mono ma, aihâiba hâ 're sômri za'ra wa'aba mono wamhâ, taha nhimiwada'uri na si te za 're aihâimana za'ra wa'aba mo. Tawapsi te za oto te te 're aiwêsâmri za'ra wa'wa.

¹⁷ Aiwasété na si, ma tô aré 're aihâimana u'âsi za'ra wa'aba mo, 're sahâri waihu'u za'ra wa'aba mono âna. Tane nherê, âne 're aihâimana za'ra wa'aba mono ô di oto. 'Re Îhâimana u'âsi mono te te aima 're Îroti za'ra wa'aba mono zép si, te oto 're 'madâ'â pese za'ra wa'aba mo. Taha wa, 'Re Îhâimana u'âsi mono âma si, wa za 're wawata za'ra.

¹⁸ 'Re Îhâimana u'âsi mono hâ tinhiptetezé hâ ma tô te te aima 're sômri za'ra wa'wa, aiwasété âna oto âma 're anomro aba mono da. Ma tô duré aima si'apito za'ra wa'wa, aiwê na si oto tâma 're aihâimana za'ra wa'aba mono da.

¹⁹ 'Re Îdahâimana za'ra mono zém na, wa tô aima âma romnhimire'é za'ra wa'wa, Înhimirowasu'u na hâ asi'uihâ na sada asimirosa'rata nhiptete waihu'u za'ra wa'aba ô wa. Aihâiba hâ aiwasété ma, ma tô 're Îsômri za'ra wa'aba mo aré, taha na si 're aihâimana za'ra wa'aba mono da, aihâiba na asina 're aiwasété za'ra wa'aba mono da. Tane nherê, aihâiba hâ 'Re Îhâimana u'âsi mono ma si, te za oto 're Îsômri za'ra wa'aba mo, taha nhimiroti na si oto 're aihâimana za'ra wa'aba mono da, aihâimana wê uptabi na.

²⁰ Aiwasédé hâ 're sahâri waihu'u za'ra wa'aba mono âna, 're aihâimana za'ra wa'aba mono ré, 'Re Îhâimana u'âsi mono te te aima 're Îroti za'ra wa'aba mono zéb zarina 're aihâimana za'ra wa'aba mono ô di aré.

²¹ Aiwasété na si 're aihâimana za'ra wa'aba mono ré, e marî ma tô aima 're hâimana za'ra wa'wa, 're î'manharî za'ra wa'aba mono zé wa'râimihâ, âma aima 're îrowê za'ra wa'aba mono zéb da hâ. Robaba di. Taha na asimi'manharî wasété za'ra wa'aba zém na âma 're aséb za'ra wa'aba mono di oto. Âne si, da te 're 'manharî u'âsi za'ra mono wamhâ, dapê'ê 're, dadâ'â u'âsi ne, te za tô 're dahâimana za'ra.

²² Tane nherê, 'Re îhâimana u'âsi mono hâ tinhiptezé hâ ma tô te te aima 're sômri za'ra wa'wa oto, aiwasété âna âma 're anomro aba mono da oto. Ma tô duré aima si'apito za'ra wa'wa, taha ma si oto 're romhuri za'ra wa'aba mono da. Taha wa, ma tô, tiwi 're asisawi za'ra wa'aba mono âna, aihâiba hâ tâma 're îsômri za'ra wa'aba mo. Taha wa'râmi te za rowê uptabi na î'rata 're aihâimana u'âsi za'ra wa'aba mono zé hâ te te aima 're apisutu 'wa oto.

²³ Dawasété na si 're îdanomro mono zé wa'râmi, te za dadâ'â u'âsi ne 're dahâimana za'ra dapê'ê 're, 'Re îhâimana u'âsi mono nhiti. Wanhib'apito Cristu Zezusihi âma si 're danomro mono wapsi, te za 'Re îhâimana u'âsi mono hâ sôpru wa, te te dama 're apisutu, î'rata 're îdahâimana u'âsi za'ra mono zéb da hâ, asa tâma 're îdasiwa'âbâ za'ra mono zéb zô, sina 're simnhasi mono âna.

7

Îmro'ô norî mrozém na rowasu'u na îsimiré

¹ Îsisânawâ norî, 'Re îhâimana u'âsi mono nhimiroti 'rata na rob'ui'éré hâ aima waihu'u pese za'ra wa'aba di. Taha wa, âhâna înhimi'ui'éré na te aima îrowasu'u za'ra wa'aba zé hâ, aima waihu'u pese za'ra wa'aba di za duré. Ni'wa hâ ti'ai âma 're hâimana mono ré, te za 'Re îhâimana u'âsi mono nhimiroti hâ pire na tâma 're hâimana, ti'ab ré 're îdanomro mono zém na roti hâ. Tane nherê, dâ'â wamhâ oto, tâma 're hâimana mono ô di za oto, îsarina 're îhâimana mono zéb da hâ. E marî wa. Tô oto dâ'â wa.

² Âne na wa za aima romnhimiré'éré za'ra wa'wa. Pi'ô norî hâ îmro hâ tiwi 're dâ'â za'ra mono ô ré, 'Re îhâimana u'âsi mono nhimiroti 'madâ'â sina, te te 're rême waihu'u za'ra mono ô di za. Îmro tiwi 're dâ'â za'ra mono wapsi, te za oto 're mro za'ra, 'Re îhâimana u'âsi mono nhimiroti zarina, aimawi aibâ na, pi'ô wi îmro 're dâ'â za'ra mono wa, timro na te te 're sahu tô za'ra mono da, te te âma roti ô wa, 'Re îhâimana u'âsi mono hâ.

³ Tane nherê, pi'ô norî hâ îmro hâ tiwi 're dâ'â za'ra mono ô nherê, aibâ aimawi ré 're hâimana za'ra mono wamhâ, 'Re îhâimana u'âsi mono nhimiroti zarina 're hâimana za'ra mono ô wa, te za îpo're'ô hâ da te âma 're sa'ra, pi'ô norî âma hâ, tihâiba na tiwasédé te te 're 'manharî za'ra mono wa. Îmro tiwi 're dâ'â za'ra mono wapsi, te za oto 're mro za'ra, aibâ aimawi na. Tawapsi tihâiba na tiwasédé hâ te te 're 'manharî za'ra mono ô di za, apâ 're mro za'ra mono wa. Âne hâ aima waihu'u pese za'ra wa'aba di.

⁴ Îsisânawâ norî, tane duré, a norî wa'wa hâ. Cristu hâ wedepo'o nnonhi'râmi na asada dâ'â za'ra wa'aba wa, ma tô îsiré 're atâ'â za'ra wa'aba mo. Taha wa, 'Re îhâimana u'âsi mono nhimiroti 'rata na rob'ui'éré hâ asina tâma âma 're î'uwaimrami za'ra wa'aba mono zéb zarina, aiwasédé hâ te te oto ai'âma 're ab'madâ'â aba mono tô da, 're asi'madâ'â za'ra wa'aba mono ô di za. Tâibâ oto. 'Re îhâimana u'âsi mono te te îhâiwa'utu nhib'a'uwê si, wa oto 're wanomro, taha ma si, wa te oto 're romhuri za'ra mono da, iwê na si. Pi'ô wi, îmro tiwi 're dâ'â za'ra mono wamhâ, îsimiroti hâ te te 're wapari za'ra mono ô di za oto. 'Re mro zahu za'ra mono wapsi, te za duré timro tém nhimiroti hâ te te 're 'madâ'â pese za'ra. Tane hâ 'Re îhâimana u'âsi mono nhimiroti 'rata na rob'ui'éré hâ asina tâma âma 're î'uwaimrami za'ra wa'aba mono zéb zarina, 'Re îhâimana u'âsi mono, aiwasédé hâ te te oto ai'âma 're ab'madâ'â aba mono tô da, 're asi'madâ'â za'ra wa'aba mono ô di za oto, pi'ô wi îmro 're dâ'â za'ra mono wa, îsimiroti te te oto 're î'madâ'â za'ra mono ô ne hâ. Tâibâ oto. Cristuhu âma si, te za oto 're anomro aba mo, pi'ô hâ apâ 're îmro zahu za'ra mono norî, timro tém nhimiroti te te 're îwapari pese za'ra mono ne.

⁵ Wahâimana wasété na 're wahâimana za'ra mono ré, wa tô marî îwasété zô si, wa te 're rob'ruiwapari za'ra aré. Taha ré, 'Re îhâimana u'âsi mono nhimiroti 'rata na rob'ui'éré zé hâ, wawasété âna 're îwanomro mono zé waihu'uzéb da, wama 're hâimana za'ra mono nherê, duré wama waihu'u pese za'ra nherê, taha upana si, wa tô marî îwasété zô si, wa te 're rob'ruiwapari za'ra, tô ôhô zô si, 'Re îhâimana u'âsi mono te te wawi 're î'azawi mono zô si. Taha zarina wa tô aré wapê'ê 're, wadâ'â u'âsi ne 're wahâimana za'ra, 'Re îhâimana u'âsi mono nhiti.

⁶ Tane nherê, 'Re îhâimana u'âsi mono hâ ma tô te te wama 're apisutu oto, îsimiroti na rob'ui'éré 'rada hâ wa te wasina tâma âma 're î'uwaimrami za'ra mono zéb zarina, wawasédé hâ te te wa'âma 're î'ab'madâ'â mono zéb da, 're wasi'madâ'â za'ra mono tô da oto. Îsimiroti na rob'ui'éré 'rada hâ wa te wasina tâma âma 're î'uwaimrami za'ra mono zéb zarina, te te 're îwa'anho'reptui mono zéb zô, 're wanhopré mono sina, wa te oto tâma 're romhuri za'ra mono

ō di, 're ihāhāimana 'rata za'ra mono zém na hā. Īpē'ēzani hā te te wama 're ĩ'aroti mono zéb zarina si, wa oto wa te tāma 're romhuri za'ra, wahāimanazép tém na si.

'Re ihāimana u'āsi mono nhimiroti, da te oto ĩwaihu'u za'ra zéb zarina, dawasété na 're ĩdasiwaihu'u za'ra mono zé wasu'u

⁷ Tawamhā e 'Re ihāimana u'āsi mono nhimiroti 'rata na rob'ui'éré hā wasété di, Mozési te te āma ĩrob'ui'éré na hā. Mare di. Wasété ō di. Āhā wasu'u hawi, wa tō wa hā ĩwasété na ĩsiwaihu'u, rāwi. Āne, 'Re ihāimana u'āsi mono nhimiroti 'rata wasu'u hā: "Marī ĩwē hā dawī 're 'ruiwaparī za'ra wa'aba mono ō di za." Āne hā te waihu'u ō 'wa'āhā, aré ĩwasété na ĩsiwaihu'u ō di, marī te ĩsima ĩruiwaparizém na hā.

⁸ Āhā wasu'u na te oto waihu'u wamhā, marī hā te dawī 're ĩruiwaparī mono zéb da si, wa tō te ĩsima 're rosa'rata u'āsi, 're ihāimana wasété mono zéb zarina. 'Re ihāimana u'āsi mono nhimiroti 'rata na rob'ui'éré hā dama waihu'u za'ra ō wa, dawasété na 're dasisāmri waihu'u za'ra mono ō di. Wa hā bété. 'Re ihāimana u'āsi mono nhimiroti 'rata wasu'uzéb zarina si, wa tō ĩsiwaihu'u, ĩwasété na hā.

⁹⁻¹⁰ Duréihā 'Re ihāimana u'āsi mono nhimiroti 'rata na rowasu'u hā te waihu'u ō nherē, wa tō aré ĩsi'āma rosa'rata na te 're upa. ĩwasété na 're ĩsi'madā'ā mono āna, wa tō 're ihāimana. Tane nherē, ĩsimiroti 'rata na rob'ui'éré wasu'u hā te oto waihu'u wamhā, āne na te oto ĩsi'āma 're rosa'rata mono ō di. 'Re ihāimana u'āsi mono ma, ĩwasété na aré 're ihāimana mono zém na hā wa tō ĩsi'āma waihu'u. Īdā'ā u'āsi, wa tō aré 're ihāimana, ĩpē'ē 're. 'Re ihāimana u'āsi mono hā ma tō tinhimiroti 'rata na rob'ui'éré hā wama sōmri za'ra, wa te wasina tāma 're ĩuwaimrami za'ra mono zéb zarina, rowē uptabi na āma 're wanomro wē mono da. Tane nherē, te ĩsina tāma uwaimrami ō di, wa hā. Taha wa, wa tō aré ĩdā'ā u'āsi 're ihāimana u'āsi, 'Re ihāimana u'āsi mono nhiti.

¹¹ 'Re ihāimana u'āsi mono nhimiroti 'rata si te 're ĩ'madā'ā pese mono na, ĩwasédé hā te te oto ĩ'āma 're 'madā'ā tō mono da, te te sima ĩ'āma roti da newa, wa tō aré ĩnhimiza'rese āna 're ihāimana. Taha zarina, wa tō aré ĩpē'ē 're, ĩdā'ā u'āsi 're ihāimana, 'Re ihāimana u'āsi mono nhiti.

¹² Tane nherē, ĩsimiroti 'rata na Mozési te te ĩrob'ui'éré hā wē uptabi di. ĩsarina si te wama 're hāimana, ĩwē uptabi si.

¹³ E tawamhā, 'Re ihāimana u'āsi mono nhimiroti 'rata na rob'ui'éré hā wē uptabi nherē, e taha zarina, wa tō aré ĩpē'ē 're, ĩdā'ā u'āsi 're ihāimana. Mare di. ĩwasété na 're ihāimana 'rata mono zéb zarina si, wa tō aré ĩdā'ā u'āsi 're ihāimana. Taha zarina, wa tō 're ihāimana wasété mono zém na ĩsina waihu'u. Uburé marī ĩwasédé hā da te 're ĩ'manharī za'ra mono zé hā ĩwasété uptabi na wa tō duré waihu'u.

Paru hā 'rāwi tinhimirosa'rata wasété na ĩsi'wapézé wasu'u

¹⁴ 'Re ihāimana u'āsi mono nhimiroti 'rata na Mozési te te āma ĩrob'ui'éré hā e ma hawimhā. ĩpē'ēzani hawip si. Tane nherē, ta hawimhā, wa hā 're ihāimana mono ō di. A'uwē hāiba na 're ĩmorī wa, wa ihāimana nhib'uware na 're ihāimana, ĩsi'uihā na ĩsina ĩnhiptete waihu'u ō na hā. 'Re ihāimana wasété mono zé ma si, wa ihāiba hā te 're sōmri u'āsi.

¹⁵ ĩnhimiza'rese āna, wa duré 're ihāimana, ĩwasédé hā te 're ĩ'manharī mono zém na, te ĩsina waihu'u ō wa, rāwimhā. Uburé marī ĩwē si te 're ab'madā'ā mono da nherē, taha si te 're 'madā'ā mono ō di. Uburé marī hā te 're ab'manharī tō mono da, te ĩsiwi 're awē'ō mono nherē, wa tō te te 're ab'manharī tō, ĩwē upana.

¹⁶ Uburé marī hā te 're ab'manharī tō mono da, te ĩsiwi 're awē'ō mono nherē, ĩwē upana te 're ab'manharī mono wamhā, wa ĩsina waihu'u, 'Re ihāimana u'āsi mono nhimiroti 'rata na rob'ui'éré, ĩwē si 're ihāimana mono na hā, ĩsarina si.

¹⁷ Uburé marī ĩwasédé hā te 're ab'manharī mono da, te ĩsima 're awē mono ō nherē, ĩwasédé hā ĩpē'ē 're, ĩma 're ihāimana mono zéb zarina, wa te te 're ab'manharī u'āsi tō, te ĩsiwi 're wē'ō waihu'u mono āna.

¹⁸ Marī ĩwē hā ĩpē'ē 're remhā ĩma 're hāimana mono ō di. Āne hā ĩma waihu'u pese di. Uburé marī ĩwē si te 're ab'manharī mono da, te ĩsima 're awē mono nherē, te ĩsina 're uwaimrami waihu'u mono ō di, ĩsi'uihā na hā.

¹⁹ Uburé marī ĩwē si te 're ab'madā'ā mono da nherē, taha si te 're 'madā'ā mono ō di. Taha upana, wa ĩwasété si te 're ab'manharī, āne hā te 're ab'manharī tō mono da, te ĩsiwi 're awē'ō mono nherē.

²⁰ Uburé marī ĩwasédé hā te ĩsima 're awē'ō mono nherē, te 're ab'manharī mono wamhā, e ĩsi'uihā na te ĩsima ĩwézéb zarina, wa te te 're ab'manharī. Mare di. ĩwasédé hā ĩpē'ē 're, ĩma 're ihāimana u'āsi mono zéb zarina si, wa te te 're ab'manharī.

²¹ Āne hā wa tō uburé ĩsina waihu'u, 're ihāimana mono zém na hā. Marī ĩwē si te 're ab'manharī u'āsi mono da, te ĩsima 're wē mono nherē, wa ĩ'upana marī ĩwasété zō si 're ĩsipizari, te ĩsiwi 're awē'ō waihu'u mono āna.

²² Wa hã 'Re İhâimana u'âsi mono nhimiroti wê wasu'u na hã 'râwi wa tô te İsima 're wê u'âsi, İpê'ê 'remhã.

²³ Tane nherê, aimawi 're İhâimana mono zéb da hã, te İma 're hâimana u'âsi, İpê'ê 'remhã, İnhimirosa'rata wasédé hã. İpê'ê 'remhã İnhimirosa'rata wasédé hã duré İnhimirosa'rata wê hã te 'râwi nherê, 're si'wapé u'âsi zahurê, İwasédé hã te 're İ'manharî mono zéb da hã, duré te İsima 're İwê mono zéb zarina, İwê hã te 're İ'manharî mono zéb da hã. Ni'wam norî hã danhimiwada'uri zarina si 're hâimana za'ra mono wamhã, marî hã te te sima 're İwê za'ra mono zéb zarina, te te 're 'manharî waihu'u za'ra mono ô di. Tane duré, wa hã marî İwê si te 're ab'manharî u'âsi mono da, te İsima 're wê mono nherê, marî İwasédé hã İpê'ê 'remhã İma 're İhâimana mono zarina, wa marî İwasédé hã te 're ab'manharî tô.

²⁴⁻²⁵ Wa hã İwasété u'âsi 're İhâimana mono zém na, 'râwi 're İsipo're pu'u mono wa, wa 're İsiwê'ô u'âsi. 'Re İhâimana u'âsi mono nhimiroti zarina si 're İhâimana u'âsi mono da, te İsima 're rosa'rata wê u'âsi mono nherê aré, tane nherê, İpê'ê 're, İwasédé hã İma 're İhâimana u'âsi mono zéb zarina si, wa 're İhâimana u'âsi tô. E 'wa hã te za âne wamhã, İnho'reptu, İpê'ê 're, İdâ'â u'âsi 're İhâimana mono zém hawimhã. 'Re İhâimana u'âsi mono si te za İnho'reptu, İdâ'â u'âsi 're İhâimana mono zém hawî, Wanhib'apito Zezu Cristuhu nhimipawaptobzéb zarina hã. Taha wa, wa oto taha âma si 're İwata u'âsi.

8

'Re İhâimana u'âsi mono pê'êzani te te dama 're İawê mono zéb zarina si, 're İdanomro wê mono zé wasu'u

¹ Taha wa, Cristu Zesusihî âma 're İnomro mono norî hã, 'Re İhâimana u'âsi mono te te siwi 're awê'ô mono ô di za oto. Taha zarina, te te hã za'ra ô di za.

² 'Re İhâimana u'âsi mono pê'êzani hã ma tô te te 're wa'apisutu, Cristu Zesusihî âma si 're wanomro wê u'âsi mono da. Taha zarina, ma tô İwasété u'âsi 're İhâimana mono nherê, İnho'reptu, İpê'ê 're, İdâ'â u'âsi aré 're İhâimana mono zém hawî. Tiwaihu'u pese na ma tô âne hawî İnho'reptu.

³ 'Re İhâimana u'âsi mono nhimiroti 'rata na Mozési te te İrob'ui'éérézê hã wa te 're İ'madâ'â pese za'ra mono zéb zarina, te te sima wa'âma 're aroti mono ô di za 'Re İhâimana u'âsi mono hã, wawasédé hã te te oto wa'âma 're ab'madâ'â tô mono da, taha zarina te te oto 're wa'awêsâmri mono da. E marî wa. Wawasété u'âsi wahâimanazém hawî, wanhib'uware na 're wanomro u'âsi mono wa. Taha wa, wa te wasina 're uwaimrami waihu'u za'ra mono ô di, 'Re İhâimana u'âsi mono nhimiroti 'rata na rob'ui'ééré hã. Wawasété si, wa te 're İ'manharî za'ra mono zéb hã ma tô te te siwi 're awê'ô pese, 'Re İhâimana u'âsi mono hã. Taha wa, ma tô tîra hã we satô ti'ai u, da'upana dazada dâ'â da, dawasété u'âsi 're İdahâimana za'ra mono zém hawî, te te 're da'anho'reptui mono da. Ti'ai âma dahâiba na ma tô 're mo, Cristu hã. Tane nherê, dasine ti'ai âma hã tiwasédé hã te te 're ab'manharî mono ô di, tihâiba na hã.

⁴ Âne ma tô 'Re İhâimana u'âsi mono hã 'manha, İsimiroti na rob'ui'ééré hã wa te wasina 're İ'uwaimrami za'ra mono zéb da hã, İpê'êzani, wa te 're İ'madâ'â pese za'ra mono zéb zarina, wapê'ê 're wanhimirosa'rata wasété na 're wahâimana za'ra mono ô wamhã.

⁵ Ni'wam norî hã 're İhâimana wasété za'ra mono ma si, tihâiba te te 're İsômri u'âsi za'ra mono norî hã ta norî hã te siwa'ru 'râwi te te sima 're İwê za'ra mono zéb zarina si, te te 're rosa'rata wasété u'âsi za'ra. Tane nherê, ni'wam norî hã 'Re İhâimana u'âsi mono pê'êzani nhimiroti zarina si 're İhâimana za'ra mono norî hã, ta norî si te te sima 're rosa'rata wê u'âsi za'ra, İpê'êzani te te tâma 're İwê za'ra mono zéb zarina si.

⁶ Ni'wam norî hã tihâimana wasété ma si, tihâiba te te 're sômri u'âsi za'ra mono wamhã, ta norî hã te za tipê'ê 're, dâ'â u'âsi 're hâimana za'ra, 'Re İhâimana u'âsi mono nhiti. Tane nherê, ni'wam norî hã 'Re İhâimana u'âsi mono pê'êzani te te tâma 're İwê za'ra mono zéb zarina si, 're hâimana wê za'ra mono wamhã, ta norî si te za 'Re İhâimana u'âsi mono 'rata 're hâimana u'âsi za'ra, robzei u'âsi na.

⁷ Ni'wam norî hã siwa'ru 'râwi te te sima 're İwê za'ra mono zéb zarina si, te te 're rosa'rata wasété u'âsi za'ra mono wamhã, ta norî hã te za 'Re İhâimana u'âsi mono nhitob'ru 're hâimana za'ra. Ta norî hã 'Re İhâimana u'âsi mono nhimiroti te te 're 'madâ'â za'ra mono ô di. Te te 're 'madâ'â waihu'u za'ra mono ô di, tô.

⁸ Ni'wam norî hã tihâimana wasété ma, tihâiba te te 're sômri u'âsi za'ra mono wamhã, ta norî ma, 'Re İhâimana u'âsi mono hã tâma 're toi waihu'u za'ra mono ô di za.

⁹ Tane nherê, a norî wa'wa hã aipê'ê 're, aiwasédé hã aima 're İhâimana za'ra wa'aba mono zéb zarina, 're anomro aba mono ô di oto. 'Re İhâimana u'âsi mono pê'êzani te te aima 're İpisutu za'ra wa'aba mono zéb zarina si, te oto 're aihâimana wê za'ra wa'aba mo, İpê'êzani hã sena na aipê'ê 're, 're sãmra za'ra wa'aba mono wamhã. Ni'wam norî ma, İpê'êzani, İpê'ê

're, tãma 're hãimana za'ra mono õ wamhã, ta norĩ hã Cristuhu nhib'a'uwẽ 're hãimana za'ra mono õ di.

¹⁰ A norĩ wa'wa hã Cristu, aipẽ'ẽ 're, aima 're hãimana za'ra wa'aba mono nherẽ, niwamhã te za aihãiba za'ra wa'wa hã aiwi 're si'utõrĩ za'ra wa'wa, aiwasédé hã aima 're hãimana za'ra wa'aba mono wa. Tane nherẽ, 'Re ihãimana u'asi mono te te 're i'aiwẽsãmri za'ra wa'aba mono zéb zarina si, te za Ìpẽ'èzani hã te te 're aipisutu za'ra wa'wa, Ìrata' re asimroi u'asi aba mono da.

¹¹ 'Re ihãimana u'asi mono hã Zesusihi hãiwatu'wa hã, Ìpẽ'èzani te aipẽ'ẽ 're, 're sãmra za'ra wa'wa. Tõ õ hã Cristu te te Ìhãiwau'udu hã te za aihãiba hã niwamhã aiwi 're si'utõrĩ pese za'ra wa'aba mono nherẽ, te te 're aihãiwatu'wa za'ra wa'wa, Ìpẽ'èzani hã aipẽ'ẽ 're, 're ìsãmra za'ra wa'aba mono zéb zarina.

¹² Ìsisånawã norĩ, taha wa, wapẽ'ẽ 'remhã wanhimirosa'rata wasété na 're Ìwahãimana za'ra mono zé hã, mare di za oto.

¹³ Aipẽ'ẽ 'remhã asimirosa'rata wasété na 're aihãimana za'ra wa'aba mono wamhã, te za atã'ã u'asi ne 're anomro aba mo, 'Re ihãimana u'asi mono nhiti. 'Re ihãimana u'asi mono pẽ'èzani nhimipawaptobzém na, uburé aiwasédé 're Ìmanharĩ za'ra wa'aba mono zé hã asiwi 're uprosi pese za'ra wa'aba mono wapsi, te za 're aihãimana u'asi za'ra wa'aba mo, 'Re ihãimana u'asi mono 'rata.

¹⁴ Uburé 'Re ihãimana u'asi mono pẽ'èzani 'madã'ã sina 're ihãimana za'ra mono norĩ si, te 'Re ihãimana u'asi mono 'ra, 're nomro, Ìpẽ'èzani te te 're Ìsimroi wẽ mono norĩ hã.

¹⁵ E marĩ da, ma tõ 'Re ihãimana u'asi mono hã Tipẽ'èzani te te aima 're sãmri za'ra wa'wa. E Ìsimirob'manharizé ma, 're aipahi za'ra wa'aba mono sina, tãma 're romhuri za'ra wa'aba mono da, ma tõ te te aima 're sãmri za'ra wa'wa. Mare di. Taha dai õ di. 'Re ihãimana u'asi mono hã ai'ãma 're 'ra za'ra wa'aba mono da si, ma tõ te te aima 're sãmri za'ra wa'wa, Tipẽ'èzani hã. Taha nhimipawaptobzéb zarina, wa 'Re ihãimana u'asi mono hã wa te 're mahãrã za'ra, ãne: "Wamama, Wamama." ãne wa te 're Ìmahãrã za'ra mono zé hã.

¹⁶ Wa norĩ hã 'rãwi wapẽ'ẽ 're, wa tõ wa te wasina 're waihu'u pese za'ra, 'Re ihãimana u'asi mono 'ra oto 're Ìwahãimana za'ra mono na. Duré Ìpẽ'èzani hã te te wama 're Ìwaihui'u mono zéb zarina zama, wa tõ 'rãwi wa te wasina 're waihu'u za'ra, Ìra oto 're Ìwahãimana za'ra mono na.

¹⁷ 'Re ihãimana u'asi mono 'ra, oto 're wanomro mono wa, marĩ Ìwẽ na tinhib'a'uwẽ ma, 're Ìõpru mono zéb da, te te tãma 're Ìropisutu za'ra mono zéb ré, wa za 're wahãimana za'ra. Duré uburé marĩ Ìwẽ na Cristuhu ma, Ìõprubzéb da, te te tãma Ìropisutuzéb ré, wa za Ìsiré 're wahãimana za'ra. Zesusihi ne, wa te 're robzépata za'ra mono wamhã, wa za Ìsine rowẽ uptabi na 're wahãimana za'ra.

'Re ihãimana u'asi mono, tizazei'wa norĩ ma, za Ìwẽ te te tãma 're Ìapisutu mono zé wasu'u

¹⁸ Tĩ'ab ré, wa te 're Ìrobzépata za'ra mono zé hã, taré, 'Re ihãimana u'asi mono, za Ìwẽ hã te te wama 're Ìapisutu mono zé ma hã. Tõ sena, wa tõ ãne na waihu'u, wa hã.

¹⁹ 'Re ihãimana u'asi mono hã uburé te te Ìapoto mono hã, simisutu te umnhasi sina sô 're simipari za'ra, bãdã Ìwa Ìwaptã'ãzéb zõ, uburé ti'ra na sô'awi za te te oto dama Ìwasu'u hãiré za'ra zõ.

²⁰⁻²¹ 'Re ihãimana u'asi mono, marĩ te te Ìapoto mono hã te wasété na 're hãimana za'ra, a'ã. Tinhimipoto mono bã, niha tãma 're Ìhãimana za'ra mono zéb da, te te tãma 're apisutu mono nherẽ, te te sina tãma ãma 're uwaimrami za'ra mono õ di. Siwa'ru te a'ã 're hãimana za'ra, siwamnarĩ na. Tane nherẽ, ãne na si'uihã na 're hãimana za'ra mono õ di. 'Re ihãimana u'asi mono si, ma tõ tãma pisutu za'ra, siwa'ru a'ã 're hãimana za'ra mono da. Niwapsi uburé marĩ te te Ìapoto mono hã wasété u'asi 're ihãimana za'ra mono hawi, te za anho'reptu. Taha zõ, wa sô 're wanhimipari u'asi za'ra, siwamnarĩ ãna oto 're hãimana za'ra mono da. Tawamhã wasine, robzei u'asi te za oto 're hãimana za'ra, 'Re ihãimana u'asi mono 'ra, oto 're wanomro mono wa, rowẽ u'asi 're Ìwahãimana za'ra mono ne.

²² Pi'õi ãma, Ìwasã 're sépu'u za'ra mono wamhã, te za 're wab'ëté za'ra, 're séptã'ã za'ra mono hã. Tane te za duré uburé marĩ hã 'Re ihãimana u'asi mono te te Ìapoto mono hã a'ã 're wab'ëté za'ra, ti'ab ré, wasété na 're ihãimana za'ra mono zém hawi 're wairébé mono hã. ãne hã wama waihu'u pese za'ra di oto.

²³ Tane nherẽ, uburé ropodo hã ta norĩ si 're wab'ëté za'ra mono õ di. Wa norĩ zama, wa 're wawab'ëté u'asi za'ra, 'Re ihãimana u'asi mono hã tinhoprubzéb zarina, Ìmorĩ'rata na Tipẽ'èzani, te te wama 're anhomri mono wa, wapẽ'ẽ 're, 're Ìsãmra u'asi mono da hã. 'Rãwi wapẽ'ẽ na, wa 're wawab'ëté u'asi za'ra, 'Re ihãimana u'asi mono hã uburé ti'ra na sô'awi za te te oto dama Ìwasu'u hãiré za'ra zéb zõ, 're wanhimipari za'ra mono ré. Duré ti'ab ré, wanhib'uware na wahãimana wasété na 're Ìwahãimana za'ra mono zém hawi, za te te 're Ìwa'awaibui mono zéb zõ, 're wanhimipari za'ra mono ré, wa 're wawab'ëté u'asi za'ra.

²⁴⁻²⁵ 'Re ìhâimana u'âsi mono, ìwê si za te te wama 're ì'apisutu mono zéb zô, wa te 're wawâ za'ra mono âna, sô 're ìwanhimipari za'ra mono zéb zarina, ma tô te te 're wa'anho'reptu. Tì'ab ré, marî zô 're wanhimipari za'ra mono ré, wa te oto 're 'madâ'â za'ra mono wanhâ, e wa za ône u'âsi sô 're wanhimipari za'ra. Mare di. Tâibâ oto, sô 're ìwanhimipari za'ra mono zé hâ za. Marî zô 're ìwanhimipari za'ra mono zé hâ, zahadu wa te 're 'madâ'â za'ra mono ô ré si, wa za tô wanhiptete sina sô 're wanhimipari u'âsi za'ra, wa te 're sazei utôri za'ra mono âna.

²⁶ Tane duré 'Re ìhâimana u'âsi mono, ìwê hâ za te te wama 're ì'apisutu mono zéb zô, wasina sô 're wanhimipari wa'a za'ra mono wanhâ, Ìpê'êzani si te za te te 're wa'apawapto, sô 're wanhimipari wa'a za'ra mono tô da. Duré, wa norî hâ niha 'Re ìhâimana u'âsi mono ma, wasi'âma 're ìwamreme zusi mono zéb da hâ, wa te wasina tâma âma 're uwaimrami waihu'u za'ra mono dai ô nherê, te za Ìpê'êzani si wa'âma 're mreme u'âsi, 'Re ìhâimana u'âsi mono ma, wahâiba mono bâ, wa'âma 're pè'êzé uptabi mono sina. Wasi'uîhâ na ìwê hâ wa te tiwi 're ìwaptêrê za'ra mono zém na, wa te tâma âma 're uwaimrami waihu'u za'ra mono dai ô nherê, te ôhô si wa'âma 're mreme u'âsi, te te 're wa'apawapto mono da, Ìpê'êzani hâ.

²⁷ 'Re ìhâimana u'âsi mono hâ dapê'ê 're, uburé danhimirosa'rada hâ tâma waihu'u pese di. Taha wa, Ìpê'êzani nhimirosa'rada hâ tâma waihu'u pese di duré. 'Re ìhâimana u'âsi mono te te tâma 're ì'awê mono zéb uwaibaba si, te Ìpê'êzani hâ Ìsib'a'uwê norî âma 're mreme u'âsi.

²⁸ 'Re ìhâimana u'âsi mono zawî pese 'wa norî da, marî ìwasédé hâ ahâ na sada 're hâimana za'ra mono nherê, te za 'Re ìhâimana u'âsi mono hâ ìwê si te te tâma 're apisutu ìwa'râmi, te te sima 're ì'awê mono zéb zarina, tinhib'a'uwê da, te te sima 're ì'apisutu mono norî ma hâ. Âne hâ wama waihu'u pese za'ra di oto wa norî hâ.

²⁹ Duréihâ marî ô ré hâ. 'Re ìhâimana u'âsi mono te te sima âma ìrotizéb zarina, te te sima 're ìwa'apisutu mono norî hâ, ì'ra ne, tô Zezusihi ne, oto 're wahâimana za'ra mono da, ma tô duré te te 're wa'apisutu siro. Ta hâ uburé ìsazei'wa norî dub'rada, 're hâimana mono da, ma tô âne te te 're wa'apisutu siro, sima.

³⁰ Duré 'Re ìhâimana u'âsi mono te te sima 're ìwa'apisutu mono norî hâ ma tô te te sima 're wa'awê, ìtême 're wanomro mono da, wa te 're saze za'ra mono da. Tawanhâ ìtême 're wanomro mono wanhâ, ma tô duré te te 're wa'awêsâmri, wawasédé hâ te te oto wa'âma 're ì'ab'madâ'â mono ô zarina. Ma tô duré te te wama 're apisutu siro, niwapsi ì'ra Zezusi 're ìmorî wê uptabi ne, 're wahâimana za'ra mono da oto.

Cristuhu nhimizawi pese zé hâ dawi ìsi'utôri'ôzé wasu'u

³¹ 'Re ìhâimana u'âsi mono hâ âne hâ te te wama 're apisutu mono wanhâ, e niha za tawanhâ. Ta hâ, wa niwî oto 're hâimana za'ra mono wa, e 'wa hâ te za wa'âma ai'uté. Mare di. Uburé wanhitob'ru norî nhiptetezé hâ, tarére 'Re ìhâimana u'âsi mono ma hâ.

³² 'Re ìhâimana u'âsi mono hâ tì'ra te te wawî sawî za'ra ô di, wazada dà'â za'ra tô da. Wa'udâna ma tô wama sômri za'ra tô, te te wawî sawî âna. E tawanhâ uburé marî ìwê hâ te te wama 're anhomri mono ô di za. Te te wawî 're azawi mono âna, te za tô te te wama 're anhomri, 'Re ìhâimana u'âsi mono hâ.

³³⁻³⁴ Wa norî hâ 'Re ìhâimana u'âsi mono, tinhib'a'uwê da, te te sima 're ìwa'apisutu mono norî si, ma tô te te 're wa'awêsâmri, wawasédé hâ te te oto wa'âma 're ì'ab'madâ'â mono ô zarina. E ni'wam norî hâ wawasédé te te wa'âma 're sa'ra mono da bâ bété. Ni'wam norî hâ, wawasédé te te wa'âma 're sa'ra waihu'u mono ô di za oto. Âne wa za duré aima waihu'u za'ra wa'wa. Cristu Zezusi hâ ma tô wazada dârâ, wa'upana. Apâ ma tô duré hâiwa'udu. Taha wa, te oto Timama nhimire niwî 're sâmra, dama pire na. Timama ma, te duré te te 're wa'awasu'u wê u'âsi, wazada idâ'âzéb zarina, wawasédé hâ te te wa'âma 're ab'madâ'â tô mono da oto. Âne wa, e ni'wam norî hâ wawasété na te te wama 're nharî zahu za'ra mono da bâ oto. Mare di.

³⁵ Cristu hâ te te 're wa'azawi pese uptabi. E 'wa hâ te Cristuhu nhimizawi pese zém nhiti te te 're ìwa'azani mono da hâ, 're hâimana. Ni'wai ô uptabi di. Tane nherê, áté wa za a'â wa te 're robzépata za'êté za'ra. Áté marî ìwasédé hâ te za a'â wazô 're wairébé. Áté ìsazei'wa 're wanomro mono wa, te za a'â da te wama 're rob'manharî wasété za'ra. Áté mra hâ wa za a'â wa te 're sépata za'ra. Áté wanhibrob âna, wa za a'â 're wahâimana za'ra. Áté te za duré a'â da te wama 're amhâzépa za'ra, da te 're wanhimroi mono da. Áté te za duré da te 're wanhimro. E tawanhâ, âne na wa te 're robzépata za'ra mono 'ru te, te za Cristu te te 're ìwa'azawi pese mono zé hâ, wawî 're si'utôri za'ra. Mare di. Wawî 're si'utôri waihu'u za'ra mono ô di za.

³⁶ Duréihâ apito Dawi hâ ma tô âne na wa'âma rob'ui'ére siro, za wa te 're ìrobzépata za'ra mono zém na hâ:

“Wamama, 'Re ìhâimana u'âsi mono, wa norî hâ asib'a'uwê 're wanomro mono wa, wama romnhimimnhasi u'âsi na, wa 're wahâimana za'ra, da te 're wanhimroi mono ò'umnhasite.

Pone'ërebâi âma 're dapê'ëzé za'ra mono âna, dasazéb da, da te 're ìsimroi mono ne, te da te dasima 're wawê za'ra, da te 're wanhimroi mono da, da te 're wa'ruiwapari za'ra mono wa oto.”

Âne duréihâ Dawi hâ te te wa'âma ìrob'ui'éré sirômo za'ra hâ, te 're hâimana, ìbailâ na hâ.

³⁷ E tawamhâ, uburé marî ìwasédé hâ wazada 're ìhâimana za'ra mono zéb zarina, te za Cristu te te 're ìwa'azawi pese mono zé hâ wawi 're si'utôri za'ra. Mare di. Uburé marî na da te wama 're rob'manharî wasété za'ra mono da nherê, ta hâ te te 're ìwa'azawi pese mono, te za te te 're wa'apawapto, Cristuhu si, wanhitob'ru norî âma wa te âma 're ai'uté pese za'ra mono da.

³⁸ Uburé marî hâ wazada 're ìhâimana za'ra mono zém hawi, 'Re ìhâimana u'âsi mono hâ tinhimizawi pese zé hâ te te wawi 're ì'azani mono da hâ, mare di. Âne na sena na, wa tô ìsina waihu'u, wa hâ. Wahâiba ré ré 're wahâimana za'ra mono wamhâ, duré oto 're wadâ'â za'ra mono nherê, tinhimizawi pese zé te te wawi 're azani mono ò di za. Duré ìhâiba'ô norî hâ ìsib'apito norî zama, te te wawi 're sani waihu'u za'ra mono ò di, 'Re ìhâimana u'âsi mono te te 're ìwa'azawi pese mono zé hâ. Duré, â bâtâ na marî hâ wazada 're hâimana za'ra mono 'ru te, te te wawi 're azani mono ò di za, tinhimizawi pese zé hâ, 'Re ìhâimana u'âsi mono hâ. Duré niwamhâ uburé marî hâ za wazada 're hâimana za'ra mono 'ru te, te te wawi 're ì'azani mono da hâ, mare di za tô.

³⁹ Uburé marî hâ hâiwa na 're ìsimasa mono hâ duré ti'ai'rowi 're ìhâimana za'ra mono hâ te te wawi 're sawi waihu'u za'ra mono ò di za, 'Re ìhâimana u'âsi mono nhimizawi pese zé hâ. Uburé 'Re ìhâimana u'âsi mono te te ì'apoto mono hâ, niwamhâ te te wawi 're sani waihu'u za'ra mono ò di za tô, ìsimizawi pese zé hâ. Robaba uptabi di. Wanhib'apito Cristu Zezusihî âma si 're wanomro mono wa, te te 're wa'azawi pese uptabi, 'Re ìhâimana u'âsi mono hâ, ône u'âsi.

9

Izarazéhé nhihudu norî, 'Re ìhâimana u'âsi mono te te sima 're ì'apisutu mono zé wasu'u

¹ Tô sena, wa za aima rowasu'u za'ra wa'wa. Wa hâ Cristuhu te, 're ìmorî wa, 're ìzadawa nhipese mono ò di. 'Re ìhâimana u'âsi mono pê'ëzani te te ìma ìwaihu'uzéb zarina, duré 'râwi ìpê'ê na te ìsi'âma 're ìrosa'rata mono zéb zarina, wa tô waihu'u, dama 're ìzadawa nhipese mono ò na hâ.

²⁻³ Ìsiré zudezu norî âma hâ, âma 're ìpê'ëzé uptabi za'ra mono di, Cristu hâ te te siwi 're wê'ô za'ra mono wa. Taha wa, te duré ìwi 're robzei'ô pese, ìpê'ê remhâ. Ta norî âma 're ìpê'ëzé uptabi za'ra mono wa, wa aré te ìsima 're rosa'rata u'âsi ìpê'ê na, 'Re ìhâimana u'âsi mono ma, ìsipsisutu da, ì'upana za'ra te te 're ìwê'ô mono da, duré Cristuhu nhiti, ì'upana 're ìhâimana u'âsi za'ra mono da. Âne hâ 'Re ìhâimana u'âsi mono hâ te te ìma 'manharî dai ò nherê, wa taré ìsiwaihu'u, ìsiré zudezu norî âma 're ìpê'ëzé uptabi za'ra mono zém na. Âne na, wa tô aima ìsiwasu'u za'ra wa'wa, 're ìzadawa nhipese mono ò na hâ.

⁴ Ta norî hâ 'Re ìhâimana u'âsi mono nhimipisudu, te 're hâimana za'ra. Ta norî âma, ma tô 're 'ra za'ra, 'Re ìhâimana u'âsi mono hâ. Ta norî ma si, ma tô rowa'a na aré ì'rata 're sâmra za'ra 'râwi, ìwaihu'u pese zé hâ duré ìhâimana wê zé hâ te te waihu'u za'ra da. Simisutu siré, âma 're hâimana u'âsi za'ra mono da, ma tô duré marî ìwê hâ te te tâma 're apisutu. Ìsimiroti na Mozési te te ìrob'ui'érézé hâ ma tô duré tâma sômri za'ra. Ta norî ma, ma tô duré 're siwaihu'u za'ra, ì'uwaibaba si âma 're ìwata za'ra mono zéb da hâ. Ta norî ma, ma tô duré ahâ na te te tâma 're aropisutu, zudezu norî ma, za te te tâma âma 're ì'a'uwaimrami mono zém na hâ.

⁵ Wahi'rata norî nhihudu uptabi, te ta norî hâ 're hâimana za'ra, dama ìpire uptabi za'ra norî nhihudu. Cristu hâ zudezu hâiba na, ma tô podo, ti'ai âma. Cristu hâ ta hâ, 'Re ìhâimana u'âsi mono, uburé marî hâ te te 're ì'ab'madâ'â mono. Taha âma uburé 're wawata u'âsi za'ra wa'aba mono. Tô sena, wa âne na aima âma rowasu'u za'ra wa'wa.

⁶ E tawamhâ, Izarazéhé nhihudu norî hâ Cristu te te siwi 're wê'ô za'ra mono wa, te te tâma âma 're a'uwaimrami mono ò di, 'Re ìhâimana u'âsi mono, te te tâma 're ìropisutu za'ra mono zém na hâ. Ma tô te te tâma âma 're a'uwaimrami, tô. Izarazéhé nhihudu norî hâ, 'Re ìhâimana u'âsi mono nhimipisudu hâ aihîni 're hâimana za'ra mono ò di, ìsib'a'uwê uptabi, 're nomro mono da.

⁷ Duré Abra'âhâ nhihudu sidâpâsi ìshihudu norî hâ, ìshihudu ahâ na za 're ìhâimana za'ra mono na, 'Re ìhâimana u'âsi mono te te tâma ìropisutuzéb zarina, aihîni uptabi, âma 're hâimana za'ra mono ò di, 'Re ìhâimana u'âsi mono 'ra uptabi hâ 're ìhâimana za'ra mono na hâ. Duréihâ 'Re ìhâimana u'âsi mono hâ ma tô âne na Abra'âhâ ma ropisutu, romhâ ré: “Izatihî nhihudu norî

si, te za ĩnhib'a'uwẽ uptabi hã 're hãimana za'ra." Āne ma tã tãma waihu'u siro, 'Re ĩhãimana u'ãsi mono hã.

⁸ Taha wa, Abra'ãhã nhihudu mono norĩ hã 'Re ĩhãimana u'ãsi mono 'ra, aihĩni 're ĩnomro mono õ na, te wasu'u a hã, durẽihã Abra'ãhã ma, 'Re ĩhãimana u'ãsi mono te te ĩwaihu'uzẽm na. Abra'ã hã 'Re ĩhãimana u'ãsi mono nhimiropisudu hã te te ãma ĩsaze ne, tane durẽ ĩsimiropisutu na, da te 're ĩsaze za'ra mono norĩ si, te za Abra'ãhã nhihudu ne oto 're dahãimana za'ra.

⁹ Durẽihã 'Re ĩhãimana u'ãsi mono hã Abra'ãhã ma, te te ĩropisutuzẽ hã, ãne ĩsimiroti wasu'u hã: "Wahub amo na, wa za durẽ we atẽme wi, tã ã a'amo za durẽ ĩwa ĩwaptã'ãzẽm na. Tawamhã apã we atẽme ĩwisi õ rẽ, te za Saraha ma ĩ'ra podo, aibã na." Āne durẽihã Abra'ãhã ma, 'Re ĩhãimana u'ãsi mono te te ĩropisutuzẽ hã.

¹⁰ Tawamhã Saraha 'ra hã ma tã tiprẽdu oto, Izati hã. Ta hã wahi'rada. Prẽdu wamhã, ma tã timro, Rebecaha ãma. Ta hã ma tã durẽ ti'ra, ĩ'ra maparane ĩsi'ubza hã, aibã zahurẽ hã.

¹¹⁻¹² Tane nherẽ, ĩdi'i 're, zahadu hãimana zahurẽ nherẽ, durẽ marĩ ĩwẽ hã te te waihu'u zahurẽ õ nherẽ, zahadu marĩ ĩwasẽdẽ hã te te durẽ waihu'u zahurẽ õ nherẽ, ma tã ãne 'Re ĩhãimana u'ãsi mono hã tãma waihu'u siro, Rebecaha ma: "Īdub'rada hã te za tinoi ma wapu na 're hãimana." Āne ma tã 'Re ĩhãimana u'ãsi mono hã ĩno si sima pisutu, tidub'rata ma, pire na 're hãimana mono da. E marĩ hã te te 're ĩ'manharĩ wẽ zahurẽ mono zẽb zarina, ma tã ĩno si sima pisutu, 'Re ĩhãimana u'ãsi mono hã. Mare di. Taha wab õ di. Si'uihã na te te sima ĩwẽzẽb uwaibaba, ma tã sima pisutu, ĩno si.

¹³ Āne na hã 'Re ĩhãimana u'ãsi mono zadawa wasu'u'wa hã ma tã ĩmreme na rob'ui'éré, ĩbahi na hã: "Zacoho si, ĩma sawi di. Eza'uhu si, wa tã ĩsiwi wẽ'õ." Āne 'Re ĩhãimana u'ãsi mono, si'uihã na te te sima ĩwẽzẽb zarina, Zaco te te sima ĩpisutuzẽ hã, ĩdub'rata upana.

¹⁴ Atẽ ãne na te za asima 're ĩrosa'rata za'ra wa'aba mo: "'Re ĩhãimana u'ãsi mono hã te te sima ĩwẽzẽb zarina, ĩno si te te sima ĩpisutu na hã ma tã ãma upa. ĩ'uwaibaba õ di." Āne na hã asima ãma 're rosa'rata za'ra wa'aba mono õ di za. ĩ'uwaibaba si te te dama ãma 're a'uwaimrami u'ãsi, 'Re ĩhãimana u'ãsi mono hã. Te te dama ãma 're a'upai mono õ di.

¹⁵ Durẽihã Mozẽsihi ma, ma tã ãne na siwasu'u: "Ni'wam norĩ ãma 're ĩp'ẽzẽ za'ra mono da, te ĩsima 're wẽ za'ra mono wamhã, wa za tã ãma 're ĩp'ẽzẽ za'ra, ãma 're ĩsiwãrĩ za'ra mono da, ta norĩ ãma hã. Durẽ ni'wam norĩ ãma 're ĩp'ẽzẽ za'ra mono da, te ĩsima 're wẽ za'ra mono õ wamhã, ãma 're ĩp'ẽzẽ za'ra mono õ di za tã, ta norĩ ãma hã, te 're apawapto mono da." Āne Mozẽsihi ma, ĩsiwaihu'uzẽ hã, 'Re ĩhãimana u'ãsi mono hã.

¹⁶ Taha wa, da te dasima 're ĩwẽ za'ra mono zẽb zarina, te te 're da'apisutu mono õ di, da'ãma 're ĩp'ẽzẽ mono zẽm na hã, 'Re ĩhãimana u'ãsi mono hã. Durẽ dasi'uihã na sã 're ĩdaswasutu za'ra mono na, te te 're da'apisutu mono õ di, da'ãma 're ĩp'ẽzẽ mono zẽm na hã. Si'uihã na te te sima 're ĩda'awẽ mono zẽb zarina si, te za tã da'ãma 're p'ẽzẽ, da'ãma 're ĩsiwãrĩ mono zẽb da hã.

¹⁷ Durẽihã ma tã Mozẽsi hã ãne na ãma rob'ui'éré, 'Re ĩhãimana u'ãsi mono hã apito Para'oho ma te te ĩrowasu'uzẽm na, ãne:

"Wa hã wa tã aipisutu, dama asi'apito da. Wa tã durẽ nasi ai'rãnhito, asimirosa'rata nhiptete na aihãimana mono da, a'ã. Wa tã durẽ nasi aima rob'manharĩ wasẽtẽ, ĩnhimiwaihu'u pese zẽm na, da te 're ĩwaihu'u za'ra mono da, durẽ daro mono bã ĩnhisi na, da te 're ĩwaihu'u pese za'ra mono da oto."

Āne durẽihã apito Para'oho ma, ĩsiwasu'uzẽm na ma tã ĩbahi na ãma rob'ui'éré, Mozẽsi hã.

¹⁸ Taha wa, 'Re ĩhãimana u'ãsi mono hã ni'wam norĩ ãma 're p'ẽzẽ za'ra mono da, te te sima 're wẽ za'ra mono wamhã, te za tã ãma 're p'ẽzẽ za'ra, ãma 're siwãrĩ za'ra mono da. Durẽ te te sima 're ĩda'awẽ mono zẽb uwaibaba, te za te te 're da'a'rãnhito, danhimirosa'rata wasẽtẽ nhiptete na a'ã 're dahãimana za'ra mono da.

'Re ĩhãimana u'ãsi mono, te te sima 're ĩda'awẽ mono zẽb zarina si, marĩ hã te te dama 're ĩapisutu mono zẽ wasu'u

¹⁹ Atẽ ni'wam norĩ hã ãne wa'rãmi te za te te ĩma 're nharĩ za'ra, asirẽ 're aihãimana za'ra wa'aba mono norĩ hã. Atẽ ãne te za ta norĩ hã te te ĩma 're nharĩ za'ra: "'Re ĩhãimana u'ãsi mono hã danhimirosa'rata wasẽtẽ nhiptete na a'ã 're dahãimana za'ra mono da, te te 're da'a'rãnhito mono wamhã, ãne wamhã, e niha te za te te siwi 're da'awẽ'õ. Te te siwi 're da'awẽ'õ waihu'u mono õ di za. E'wa hã, te 'Re ĩhãimana u'ãsi mono nhimipisutu da, hãimana nhiptete na 're hãimana. Robaba di. Ni'wai õ di." Atẽ, ãne te za ni'wam norĩ hã te te ĩma 're nharĩ za'ra, te te 're waihu'u za'ra mono õ nherẽ.

²⁰ E a norĩ wa'wa hã 'Re ĩhãimana u'ãsi mono ma, aipire za'ra wa'aba bã, te za ãne na ĩma 're ĩnharĩ za'ra wa'aba mo. Piza na zẽ 'manharĩ hã, e ti'manharĩ'wa te za sina sadanharĩ za'ra, ãne: "E marĩ da, ma tã ãne ĩwa'ab'manha." Āne na te te sina sadanharĩ waihu'u za'ra õ di za.

²¹ Īmanharī'wa hā te te sima ĩwēzēb uwaibaba si, te za zé hā te te 're ab'manharī, piza na. Zé hā te te su pese wamhā, misi te za oto sada ub'rā. Tawamhā te za sima rosa'rata, piza maparane te te sima 'manharī da, āma. Tawamhā te te ĩmanharī 'rada hā, wē uptabi na te za 'manha, ĩ'madâ'â ze da hā. Duré ĩhâiba amo hā si'aba'ré na te za 'manha, wē prā na, ta hā marī da si' re hâimana mono da, taré.

²² Tane te za duré 'Re ĩhâimana u'âsi mono hā wa'manharī'wa hā marī hā te te wama 're apisutu, zé 'manharī'wa ne. Te te sima 're ĩwē mono zéb zarina, te za uburé marī hā te te dama 're apisutu, ĩwē hā duré ĩwē prā hā. Ta hā te te sima 're wē u'âsi, tiwaihu'u pese na dapo're'ô norī hā te te 're ahā za'ra mono da, taha zarina ĩsimihâ nhipitezém na da te dasina 're waihu'u za'ra mono da. Tane nherē, te te siwi 're ĩ'awē'ô pese mono norī āma hā, 're wa'a su'u mono ô di, za te te 're ĩda'uprosi za'ra mono norī āma hā.

²³ Āne hā ma tô duré te te sima 're wē, pire na 're ĩhâimana wē uptabi mono zém na, dama 're siwaihu'u mono da. Uburé wa'āma 're ĩpē'ézé mono zéb zarina, wa'āma 're ĩsiwārī za'ra mono norī ma, ma tô āne na wama 're siwaihu'u, 'Re ĩhâimana u'âsi mono hā. Wa norī hā ma tô oto te te 're wa'apisutu siro, rowē uptabi āma ĩ'rata 're wahâimana u'âsi za'ra mono da.

²⁴ Wa norī hā ma tô 'Re ĩhâimana u'âsi mono hā te te 're wa'apisutu, ĩsib'a'uwē uptabi hā oto 're wanomro mono da. E 'wam norī hā tawamhā, 'Re ĩhâimana u'âsi mono te te 're ĩ'apisutu mono norī hā. Wa norī hā zudezu norī hā aihīni ô nherē, duré zudezu'ô norī hā aihīni ô nherē, ma tô wasiwazari te te 're wa'apisutu, ĩsib'a'uwē oto 're wanomro mono da, wasiré.

²⁵ Duréihā 'Re ĩhâimana u'âsi mono zadawa wasu'u'wa hā ma tô ĩmreme na rob'ui'éré, Ozéza na ĩsisi hā. Zudezu'ô wasu'u na ma tô āne na rob'ui'éré:

“Īnhīb'a'uwē'ô, aré 're ĩnomro mono norī hā, wa za oto ĩnhīb'a'uwē na te 're sisi za'ra. Aré te 're ĩsawi za'ra mono ô norī hā, wa za oto ĩma ĩsawi pese na te 're waptērē za'ra.

²⁶ Tirob āma 're si'ubumroi mono ré, wa tô aré te tāma 're nharī za'ra, āne: A norī wa'wa hā ĩnhīb'a'uwē'ô te 're aihâimana za'ra wa'aba mo. Tane nherē, tame 're si'ubumroi mono ré, wa za oto ĩ'ra na te 're sisi za'ra, wa hā 'Re ĩhâimana u'âsi mono 'ra na.”

Āne Ozéza, ĩmreme na te te ĩrob'ui'érézé wasu'u hā.

²⁷⁻²⁸ Iza'iza hā ma tô duré āne na āma rob'ui'éré, Izarazéhé nhihudu norī āma hā:

“Re ĩhâimana u'âsi mono hā Wanhib'apito hā te za sa'êtē da'ahā za'ra waptu sina, daro mono bā dawasété na te te 're ĩda'awaihu'u mono zéb zarina. Taha wa, Izarazéhé nhihudu norī hā â poré zaihā na supara 're ĩsimi'wara mono ne, ahā uptabi nherē, te za umro na si te te 're anho'reptu, 'Re ĩhâimana u'âsi mono hā.”

Āne Iza'iza hā, Izarazéhé nhihudu norī āma te te ĩrob'ui'érézé hā.

²⁹ Iza'iza hā ma tô duré āne na rob'ui'éré:

“Wanhib'apito hā danhipai u ĩsiptete uptabi, te 're hâimana. Ô hā uburé wahi'rata norī hā zudezu norī hā te te wawi 're a'uprosi mono 'wa'āhā, wa aré wasiré zudezu norī hā 're wasi'utōrī pese, Sodoma na 'ri nho'ômo nhisi āma uburé ĩdasi'utōrī ne, duré Domora na 'ri nho'ômo nhisi āma ĩdasi'utōrī ne. Tane nherē, ma tô ni'wam norī āma tipē'ézé za'ra, te te sô'reptu za'ra da, uburé si'utōrī tô da, wasiré zudezu norī hā.”

Zudezu norī hā Cristu te te siwi 're ĩwē'ô za'ra mono zé wasu'u

³⁰ E marī te wama wasu'u za'ra, tawamhā, ā hā. E niha, wa za tawamhā āma waihu'u za'ra ni, āhā wasu'u na hā. Āne, wa za āma waihu'u za'ra ni. Zudezu'ô norī hā 'Re ĩhâimana u'âsi mono, ĩwasédé hā te te āma 're ĩ'ab'madâ'â mono ô zarina, te te 're ĩwēsāmri za'ra mono zéb da hā, te te aré sô 're rob'ruiwaparī za'ra mono ô nherē, ma tô te te 're awēsāmri, taré te te 're ĩsaze za'ra mono zém na si nherē.

³¹ Tane nherē, Izarazéhé nhihudu norī hā 'Re ĩhâimana u'âsi mono nhimiroti 'rata na Mozési te te ĩrob'ui'ére hā te te 're ĩ'madâ'â pese za'ra mono na, 'Re ĩhâimana u'âsi mono, ĩwasédé te te oto āma 're ab'madâ'â tô mono da, duré taha zarina te te 're awēsāmri mono da, te te sima āma 're aroti mono newa, ma tô ta norī hā taré sô 're si'wapé za'ra, te te 're ĩ'awēsāmri mono zéb zô. 'Re ĩhâimana u'âsi mono hā, ĩwasédé hā te te āma 're ĩ'ab'madâ'â mono ô zarina, te te 're ĩwēsāmri za'ra mono zéb da hā, te te sina tāma 're uwaimrami za'ra mono ô di, ta norī hā.

³² E marī wa, te te sina tāma 're uwaimrami za'ra mono ô di. 'Re ĩhâimana u'âsi mono te te 're ĩsazei pese za'ra mono zém na si, te te 're ĩwēsāmri za'ra mono zéb da hā, 're si'madâ'â za'ra mono ô wa, 'Re ĩhâimana u'âsi mono nhimiroti 'rata na rob'ui'ére na si 're si'madâ'â ze za'ra mono wa. Cristuhu āma, wa za oto ēne hā aima āma simiré'é za'ra wa'wa. Ētē tōmo wawē hā bādâdi wa, 're sa'wari mono wa, te za āma 're dasi'marôpārī za'ra. Taha wa, te za 're dasirēme za'ra. Tane duré, zudezu norī hā ma tô Cristu te te siwi 're ĩwē'ô za'ra mono zém na si'uihā na sima 're simiza'repese za'ra, wedepo'o nnonhi'rāmi na dazada ĩdâ'âzé hā taré newa, Cristu hā da te 're ĩsaze za'ra mono zém na, 'Re ĩhâimana u'âsi mono te te 're ĩda'anho'reptui mono ô newa.

³³ Duréihā Iza'iza hā ma tō āne na āma rob'ui'éré, 'Re ihāimana u'āsi mono mreme na: "Ma'āpé, iwapari pese za'ra wa'aba. Zeruzarē u, wa za ni'wa hā satō, Si'ā na sa'a nhisi u. Ētē tōmo wawē hā bādādi wa, dawī 're isa'wari mono hā, te te 're da'marōpārī za'ra mono wa, 're idasirēme za'ra mono ne, 'Re ihāimana u'āsi mono 'rata' re idanomro u'āsi mono zé hā da te dasina 're uwaimrami za'ra mono ō di za, da te dasiwi 're wē'ō pese za'ra mono wa, 'Re ihāimana u'āsi mono Zeruzarē u te te isatōrī hā.

Tane nherē, ni'wam norī hā te te sina 're umnhasi za'ra mono wamhā, taré te te sina 're umnhasi baba za'ra mono ō di za. Īwē hā te za tō te te tāma āma 're a'uwaimrami, 'Re ihāimana u'āsi mono hā. Taha wa, tāma 're rowē u'āsi za'ra mono di za."

Āne ma tō duréihā Iza'iza hā āma rob'ui'éré siro, Cristu za da te dasiwi ĩwē'ōzēm na hā.

10

¹ Īsisānawā norī, 'Re ihāimana u'āsi mono te te 're ĩda'anho'reptui mono zé hā, uburē ĩsiré zudezu norī hā te te sina tāma 're uwaimrami za'ra mono da, wa tō ĩsima wē uptabi za'ra. Taha da, wa ta norī āma 're ĩreme u'āsi za'ra, 'Re ihāimana u'āsi mono ma.

² Ta norī hā te te sima 're wē uptabi za'ra, 'Re ihāimana u'āsi mono ma, 're sisōmri u'āsi za'ra mono da, ōhō ma si, te te 're romhuri pese za'ra mono da. Āne na, wa tō ĩsi'uihā na āma waihu'u pese za'ra, tō sena. Tane nherē, 'Re ihāimana u'āsi mono ma, da te 're romhuri pese za'ra mono zé hā te te waihu'u pese za'ra ō wa, te te sina tāma 're uwaimrami za'ra mono ō di.

³ 'Re ihāimana u'āsi mono, dawasédé te te oto da'āma 're ĩ'ab'madā'ā mono ō zarina, te te 're ĩda'awēsāmri mono zé hā, tāma waihu'u pese za'ra ō di. Te te 're ĩda'awēsāmri mono zéb da, 'Re ihāimana u'āsi mono te te tāma 're ĩpisutu za'ra mono zé hā, te te 're 'madā'ā pese za'ra mono ō di, ta norī hā. Si'uihā na te te sima 're ĩpisutu za'ra mono zéb zarina si, ma tō 'rāwi sō 're si'wapé za'ra, taha na te te 're wēsāmri za'ra mono da newa.

⁴ 'Re ihāimana u'āsi mono nhimiroti na Mozési te te ĩrob'ui'éré hā da te 're ĩ'madā'ā pese za'ra mono na, da te āma 're rosa'rata u'āsi za'ra mono ō di za oto, taha zarina 'Re ihāimana u'āsi mono, te te sima da'āma 're aroti mono newa, dawasédé te te oto da'āma 're ĩ'madā'ā tō mono da, duré taha zarina te te 're ĩda'awēsāmri mono zéb da hā. Tāibā. Āne hā ma tō Cristu hā dawī uprosi. Ta hā Danho'reptui'wa na te te sina 're ĩ'umnhasi za'ra mono norī si, te za 'Re ihāimana u'āsi mono hā te te 're awēsāmri, ĩwasédé hā te te oto āma 're ĩ'ab'madā'ā mono ō zarina, po're'ō nherē, te te 're ahā za'ra tō mono da.

'Re ihāimana u'āsi mono te te 're ĩda'anho'reptui mono zé wasu'u

⁵ Duréihā Mozési hā ma tō āne na rob'ui'éré:

"Ni'wa hā ĩsimiroti na rob'ui'éré hā uburē te te 're 'madā'ā pese uptabi mono wapsi, nimahā na marī na misi ĩsimiroti na te te upai ō wapsi, tawapsi te za rowē na 're hāimana u'āsi, 'Re ihāimana u'āsi mono 'rata."

Āne ma tō Mozési hā āma rob'ui'éré.

⁶⁻⁸ Tane nherē, ni'wa hā āne te te 'manharī waihu'u ō di, ĩsimiroti zarina uptabi hā. Ni'wa hā ĩsimiroti upai'ō'wa hā 're morī ō di. Robaba di. Āté āne na te za 'rāwi asima 're ĩnharī za'ra wa'aba mo: "E'wa hā te za hāiwa u mo, Cristu hā apā we te te saprōni da, wa'upana wazada ĩdā'ā za'ra da hā." Āne hā asima 're nharī za'ra wa'aba mono ō di za, Cristu hā Danho'reptui'wa da, 'Re ihāimana u'āsi mono te te ĩpisudu hā wēi morī ō newa, ti'ai u.

Āté te za duré āne na 'rāwi asima 're ĩnharī za'ra wa'aba mo: "E'wa hā te za mo, adā 're ihāimana za'ra mono zéb u, Cristu hā te te hāiwa'utu da apā." Āne hā asima 're nharī za'ra wa'aba mono ō di za duré, Cristu hā apā hāiwa'utu ō newa, ab're hawi. 'Re ihāimana u'āsi mono, da te 're saze za'ra mono wapsi, te te 're ĩda'awēsāmri mono zém na, ma tō Mozési hā āne na āma rob'ui'éré, duréihā:

"'Re ihāimana u'āsi mono zadawa wasu'u hā ma tō aipē'ē 're, 're ĩsazei pese za'ra wa'aba mo, 'rāwi. Taha na, ma tō duré dama 're asiwasu'u u'āsi za'ra wa'aba mo, asadawa na."

Āne Mozési te te āma ĩrob'ui'érezé hā. Taha na, wa tō duré wa norī hā wa te dama 're sadawa wasu'u za'ra, Cristu, da te 're sazei pese za'ra mono wapsi, 'Re ihāimana u'āsi mono te te 're ĩda'awēsāmri mono zém na, dawasédé te te oto da'āma 're ĩ'ab'madā'ā mono ō zarina.

⁹ Zezusi hā Asib'apito uptabi na, asadawa na danho'a 're sisi za'ra wa'aba mono wamhā, duré 'rāwi aipē'ē 're 'Re ihāimana u'āsi mono, Zezusi te te ĩhāiwa'utuzém na, 're sazei pese za'ra wa'aba mono wamhā, tawapsi te za te te 're asō'reptu za'ra wa'wa, 'Re ihāimana u'āsi mono hā.

¹⁰ Zezusi hā wapē'ē 're, wa te wasina 're ĩ'umnhasi za'ra mono zém na, 'Re ihāimana u'āsi mono hā te te 're ĩwa'awēsāmri mono zé hā. Zezusi hā Wanhīb'apito na danho'a, wa te dama 're ĩsisi za'ra mono zém na, 'Re ihāimana u'āsi mono te te 're ĩwa'anho'reptui mono zé hā.

¹¹ Duréihã Iza'iza hã ma tô duré ãne na Ìbaihã na rob'ui'ére: “Re ìhâimana u'âsi mono hã, Danho'reptui'wa da, te te Ìpisudu hã da te dasina 're umnhasi za'ra mono wamhã, niwamhã te te sina 're umnhasi baba za'ra mono ò di za. Te za te te dama ãma 're a'uwaimrami u'âsi.” ãne Iza'iza hã te te ãma Ìrob'ui'érezé hã.

¹² Zudezu norĩ hã zudezu'ò norĩ me, 'Re ìhâimana u'âsi mono ma hã, tô òhõ si, tãma 're ìhâimana za'ra mono zé hã. Siwanhizari, tãma 're hâimana za'ra mono ò di oto ta norĩ hã. 'Re ìhâimana u'âsi mono, uburé Danhib'apito uptabi, te dama 're hâimana. Taha wa, ni'wam norĩ hã 'Re ìhâimana u'âsi mono te te 're sô'reptu za'ra mono da, te te tiwi 're waptêrê za'ra mono wamhã, ta norĩ ma, te za tô te te tãma ãma 're a'uwaimrami, dama 're Ìsôpru mono zéb zarina.

¹³ Duréihã 'Re ìhâimana u'âsi mono zadawa wasu'u'wa hã ma tô duré ãne na rob'ui'ére: “Ni'wam norĩ hã Danhib'apito uptabi te te 're sô'reptu za'ra mono da, te te tiwi 're waptêrê za'ra mono wamhã, ta norĩ hã te za tô te te 're anho'reptu, ìhãiba mono bâ.”

ãne duréihã 'Re ìhâimana u'âsi mono zadawa wasu'u'wa te te ãma Ìrob'ui'érezé hã.

¹⁴ E niha te za tawamhã da te tiwi 're waptêrê za'ra, te te 're da'apawapto mono da hã, Cristu, da te dasina 're umnhasi za'ra mono ò nherê. ãne wamhã, dama waihu'u ò di. Duré Zesusihĩ wasu'uwê hã dapo're'ò na da te 're wapari za'ra mono ò ré hã, e niha te za da te dasina 're umnhasi za'ra, Zesuzi hã. Da te dasina 're umnhasi waihu'u za'ra mono ò di. E niha te za duré Zesusihĩ wasu'uwê na, da te 're dapawapto za'ra mono ò nherê, da te 're wapari za'ra. Dama waihu'u ò di.

¹⁵ Duré, e niha te aré Zesusihĩ zadawa wasu'u'wa norĩ hã daro mono bâ datême 're nomro, Ìmreme na te te 're dapawapto za'ra mono da, 'Re ìhâimana u'âsi mono hã te te datême 're satôri za'ra mono ò nherê. ãne wamhã, te te ãma 're dapawapto waihu'u za'ra mono ò di aré. Tane nherê, 'Re ìhâimana u'âsi mono, ma tô te te datême 're satôri za'ra tô. Duréihã Iza'iza hã ma tô ãne na ãma rob'ui'ére:

“Rowasu'u wê hã nima hawi da te dama 're ãwisi za'ra mono wamhã, dama 're rowê uptabi za'ra mono di za.”

ãne ma tô Iza'iza hã romhã ré rob'ui'ére, Zesusihĩ wasu'uwê hã Ìsadawa wasu'u'wa norĩ hã te te oto datême 're Ì'ãwisi za'ra mono zém na hã.

¹⁶ Tawamhã Zesusihĩ wasu'uwê hã, Ìsadawa wasu'u'wa norĩ hã te te oto datême 're ãwisi za'ra mono nherê, uburé da te ãma 're saze za'ra mono ò di, wê nherê. Iza'iza hã ma tô duré ãne na ãma rob'ui'ére, 'Re ìhâimana u'âsi mono ma, te te Ìnharizém na: “Wanhĩb'apito, wa te dama 're asadawa wasu'u' za'ra mono wamhã, e ma tô aiwasu'u na da te 're wazaze za'ra. Mare di. Da te ãma 're wazaze za'ra mono ò di.”

¹⁷ Tane nherê, Cristuhu wasu'uwê na, da te ãma 're dapawapto za'ra mono ò nherê, da te ãma 're sasômri waihu'u za'ra mono ò di. Cristuhu wasu'uwê hã dapo're na da te 're wapari za'ra mono wapsi, te za da te 're saze za'ra.

¹⁸ E zudezu norĩ hã zahadu Ìwasu'uwê hã te te 're wapari za'ra mono ã bâ bété. Ìwasu'uwê hã ma tô te te 're wapari za'ra aré ta norĩ hã, tô sena. Duréihã Dawi hã ma tô ãne na ãma rob'ui'ére:

“Ìsadawa wasu'u'wa norĩ mreme hã ma tô daro mono bâ te te 're ropé.

Ta hã ma tô ropã dapo're na da te 're wapari za'ra, daro mono bâ.”

ãne ma tô Dawi hã ãma rob'ui'ére.

¹⁹ E tawamhã, Izarazéhé nhĩhudu norĩ hã Ìwasu'uwê te te 're wapari za'ra mono wamhã, e te te 're waihu'u za'ra mono ò di. Ma tô te te 're waihu'u za'ra. Tane nherê, tipê'ê na te te sima 're wê za'ra mono ò di, te te 're Ìsaze za'ra mono da hã. Zudezu'ò norĩ si, ma tô te te sima 're wê za'ra, te te 're saze za'ra mono da. ãne na, ma tô Mozési hã duréihã ãma rob'ui'ére 'rata, zudezu norĩ ma 'Re ìhâimana u'âsi mono te te tãma Ìrowaihu'u za'ra zém na hã:

“Ìnhĩb'a'uwê'ò aré 're Ìnomro mono norĩ hã oto ãma 're Ìnhĩb'a'uwê za'ra mono wa, te za oto ta norĩ hã asiwi 're Ìruiwapari za'ra wa'aba mo, Ìzadawa parab ò nherê.

Ta norĩ hã aré te te 're Ìwaihu'u pese za'ra mono ò nherê, wa tô ãma 're Ìnhĩb'a'uwê za'ra aré. Taha wa, te za asib'ru na sada 're aihâimana u'âsi za'ra wa'aba mo, Ìzadawa parab ò nherê.”

ãne zudezu norĩ ma, 'Re ìhâimana u'âsi mono te te Ìrowaihu'u mono zé hã.

²⁰ Iza'iza hã ma tô duré ãne na Ìsa'u ãma rob'ui'ére, zudezu'ò norĩ wasu'u na hã. Zudezu norĩ hã te te siwi 're Ìwê'ò pese za'ra mono zém na, ma tô siptete sina ãma rob'ui'ére, 'Re ìhâimana u'âsi mono mreme na:

“Ni'wam norĩ hã aré Ìzô 're sôpré u'âsi mono ò nherê, ma tô te te siwi 're Ìsãmri za'ra.

Ìzô 're sinharĩ za'ra mono ò nherê, wa tô ta norĩ ma 're Ìsiwaihu'u za'ra.”

²¹ ãne na ma tô duré Iza'iza hã zudezu norĩ ãma rob'ui'ére, 'Re ìhâimana u'âsi mono mreme na:

“Wa hã wa tô aré Izarazéhé nhihudu norĩ zô 're ìnhimiwê u'âsi za'ra, te 're azawi pese mono wa, apã Ìtême we 're sihotu mono da. Ta norĩ hã po're âna 're nomro u'âsi mono wa, te te siwi 're ìwê'ô pese za'ra mono nherê, wa tô aré sô 're ìnhimiwê u'âsi za'ra, te 're Ìsawi pese za'ra mono zéb zarina.”

Âne ma tô Iza'iza hã 'Re ìhâimana u'âsi mono mreme na âma rob'ui'ére, Izarazéhé nhihudu norĩ âma hã.

11

'Re ìhâimana u'âsi mono, Izarazéhé nhihudu norĩ âma 're ìpê'ézé mono zé wasu'u

¹ E tawamhã, 'Re ìhâimana u'âsi mono hã tinhib'a'uwê norĩ hã ma tô te te siwi 're wê'ô za'ra, Izarazéhé nhihudu norĩ hã. Mare di. Te te siwi 're awê'ô mono ô di. Mare uptabi di. Wa hã bété, Izarazéhé nhihudu 're ìmorĩ hã, duré Abra'âhã nhihudu 're ìmorĩ hã. Duré Bêzamihĩ nhihudu norĩ siré 're ìmorĩ wamhã, e ma tô siwi ìwê'ô, Izarazéhé nhihudu 're ìmorĩ nherê. Mare di. Te te siwi ìwê'ô ô di, 'Re ìhâimana u'âsi mono hã.

²⁻³ Tinhib'a'uwê norĩ hã, tô sena te te siwi 're awê'ô mono ô di 'Re ìhâimana u'âsi mono hã, duréihã Ìsâna'rata hawimhã, te te sima 're ì'apisutu mono norĩ hã. Duréihã Eriasi hã 'Re ìhâimana u'âsi mono zadawa wasu'u'wa hã ma tô Izarazéhé nhihudu norĩ âma Ìwasété na âma sa'ra, 'Re ìhâimana u'âsi mono ma. Âne na te te âma Ìrob'ui'érézê hã, aima waihu'u pese za'ra wa'aba di. Âne ma tô âma rob'ui'ére:

“Wanhib'apito, asadawa wasu'u 'rata 'wa norĩ hã ma tô ta norĩ hã te te 're simro. Duré êtê za'ra 'manharĩ hã, Ìsisiwi aima danhoprubzéb da, marĩ, da te ìwa 're Ìsa'ra za'ra mono zé hã ma tô uburê te te 're prub za'ra, êne hã. Ìsiwaprosi uptabi, wa oto 're ìhâimana, te 're ì'asawi pese mono hã. Taha 'ru te, te duré Ìzada 're hâimana za'ra, Ìzama te te siwi ìwĩrĩ da.”

Âne Eriasi hã 'Re ìhâimana u'âsi mono ma, Izarazéhé nhihudu âma Ìwasété na te te Ìsa'razém na te te âma Ìrob'ui'ére hã, Ìbaihã na.

⁴ Tawamhã 'Re ìhâimana u'âsi mono hã e niha ma tô asa tâma waihu'u, Eriasihi ma. Âne ma tô tâma waihu'u:

“Âne ìnhib'a'uwê nhipti'ai âma hã, wa tô te Ìsima 're sawi pese za'ra, 7 miu na ìhâiba za'ra hã, tisiré norĩ wazari si'utôrĩ tô da dame, ìhâiba'ô na dame âma 're ìwata za'ra mono ô norĩ hã, Ba'a na romhâiba nhisi âma hã. Ta norĩ si, te Ìzarina 're hâimana u'âsi za'ra.”

Âne 'Re ìhâimana u'âsi mono hã Eriasihi ma, asa te te ìwaihu'uzém na rob'ui'ére hã.

⁵ Tane te duré âhãna hã dama 're romhâimana za'ra. Da'âma 're pè'ézé mono wa, da'âma 're Ìsiwãrĩ mono zéb zarina, ma tô 'Re ìhâimana u'âsi mono hã Izarazéhé nhihudu norĩ hã te te siwi 're apisutu, umro na, Ìsib'a'uwê uptabi si oto 're hâimana za'ra mono da.

⁶ E tawamhã, marĩ hã te te 're ì'manharĩ wê za'ra mono zéb zarina, ma tô te te siwa 're apisutu, 'Re ìhâimana u'âsi mono hã, zudezu norĩ hã. Mare di. Taha zarina te te siwa 're apisutu mono ô di. Taré âma 're ìpê'ézé za'ra mono zéb zarina, âma 're siwãrĩ ze za'ra mono wa, ma tô si'uihã na te te siwa 're apisutu, ôhõ âma si 're hâimana u'âsi za'ra mono da. Marĩ hã da te 're ì'manharĩ wê za'ra mono zéb zarina, te te siwa 're da'apisutu mono 'wa'âhã, âne zarina 'wa'âhã, aré senai ô di, 'Re ìhâimana u'âsi mono, da'âma 're ìpê'ézé mono zéb zarina si, da'âma 're Ìsiwãrĩ mono zé hã.

⁷ Tawamhã e niha, wa za âne na hã âma waihu'u pese za'ra ni. Âne, wa za oto âma waihu'u za'ra ni. Izarazéhé nhihudu norĩ hã 'Re ìhâimana u'âsi mono, Ìwasédé hã te te oto âma 're ab'madã'ã tô mono da, duré taha zarina te te 're ìwêsãmri za'ra mono zéb da hã, sô 're sôpré u'âsi mono nherê, te te sina tâma âma 're uwaimrami za'ra mono ô di, ta norĩ hã. 'Re ìhâimana u'âsi mono, umro na te te siwa 're ìpisutu za'ra mono norĩ si, ma tô te te sina tâma 're uwaimrami za'ra, 'Re ìhâimana u'âsi mono te te 're ìwêsãmri za'ra mono zém na hã. Tane nherê, ni'wam norĩ hã Izarazéhé nhihudu nherê, 'Re ìhâimana u'âsi mono nhiti 're ìhâimana za'ra mono norĩ hã, ta norĩ si ma tô 'Re ìhâimana u'âsi mono hã po're nhitob za'ra, Ìmreme hã te te 're waihu'u za'ra mono âna, a'ã 're nomro mono da.

⁸ Duréihã Mozési hã ma tô âne na âma rob'ui'ére:

“‘Re ìhâimana u'âsi mono hã ma tô ta norĩ hã tiwaihu'u pese na te te 're po're nhitob za'ra, simipari âna 're hâimana za'ra mono da a'ã. Ta norĩ hã ma tô duré te te 're rãiwamnarĩ za'ra, rosa'rata waihu'u âna, a'ã 're nomro mono da. Taha wa, te ta norĩ hã 'Re ìhâimana u'âsi mono te te siwi 're waihu'u za'ra mono âna, siwa'ru 're hâimana za'ra.”

Âne duréihã Mozési hã te te âma Ìrob'ui'érezé wasu'u hã.

⁹ Dawi hã ma tô duré âne na ta norĩ âma rob'ui'ére za'ra, zudezu norĩ âma hã:

“‘Re ìhâimana u'âsi mono hã ta norĩ ma, ìwê na tâma 're sôprub za'ra mono wê te, ma tô 're si'madã'ã ze za'ra, taha na tâma 're rowê za'ra mono da newa. Taha wa, marĩ wasété

pire na 're si'marôpārī za'ra mono neza, 'râwi. Duré 'Re İhâimana u'âsi mono hâ te te hâ za'ra neza.

10 Te te duré 're tōmo nhitob za'ra mono neza, datob'a na 're İdanomro mono ne, 're nomro mono da oto. Duré ta norī hâ marīpire hâ da te 're 'wasari mono wa, İré 're İdanhîhâpâ za'ra mono ne, te te 're robzépata u'âsi za'ra mono neza."

Âne duréihâ Dawi hâ İzarazéhé nhihudu norī âma, te te İrob'ui'érezé wasu'u hâ.

11 E tawamhâ, zudezu norī hâ 'Re İhâimana u'âsi mono wi, 're si'marôpārī za'ra mono nherê, apâ İtême 're wahutu waihu'u za'ra mono ô di za. E tawamhâ apâ İtême 're sipizari waihu'u za'ra mono ô di za. Te za tō apâ İtême 're sipizari za'ra. Ta norī hâ 'Re İhâimana u'âsi mono wi, 're sipizari za'ra mono wa, tiwasédé hâ te te 're 'manharī za'ra mono wa, ma tō 'Re İhâimana u'âsi mono hâ zudezu'ô norī ma a'â pisutu za'ra, te te 're İda'anho'reptui mono zé hâ. Zudezu norī hâ te te âma 're 'ruiwapari za'ra mono da, ma tō zudezu'ô norī ma a'â pisutu za'ra, te te 're İda'anho'reptui mono zé hâ, zudezu norī hâ apâ İtême 're sipizari za'ra mono da, te te 're İda'anho'reptui mono zém niwī.

12 Zudezu norī hâ 'Re İhâimana u'âsi mono te te 're İwēsâmri za'ra mono zéb da hâ, te te sina tâma 're uwaimrami za'ra mono ô wa, ma tō 'Re İhâimana u'âsi mono hâ zudezu'ô norī ma, hâiwa hawī marī İwê na tâma 're sôprüb za'ra, daro mono bâ. Tawamhâ zudezu norī hâ 'Re İhâimana u'âsi mono niwī, ahâ uptabi na apâ za İtême 're sipizari za'ra mono wamhâ, tawapsi, te za oto marī İwê uptabi hâ te te dama 're anhomri, 'Re İhâimana u'âsi mono hâ hâiwa hawī, uburé tinhib'a'uwê norī ma hâ.

Zudezu'ô norī, 'Re İhâimana u'âsi mono te te 're İ'anho'reptui mono zé wasu'u

13 Zudezu'ô norī, wa za oto aima İsiwasu'u za'ra wa'wa. Wa hâ Cristuhu zadawa wasu'u'wa, wa aima 're İhâimana za'ra wa'wa. Wa hâ te aima 're İromhuri za'ra wa'aba mono zé hâ, taré'ô di. Taha wa, wa za tō İnhimî'ê na te aima 're romhuri u'âsi za'ra wa'wa.

14 Wa hâ te aima 're romhuri za'ra wa'aba mono wa, İsiré zudezu norī hâ te te âma 're ai'ruiwapari za'ra wa'aba mono da, wa tō ta norī si te İsima 're wê za'ra, ni'wam norī hâ apâ 'Re İhâimana u'âsi mono u 're sipizari za'ra mono wa, te te 're anho'reptui mono da.

15 Ta norī hâ te te 're saze za'ra mono ô wa, ma tō 'Re İhâimana u'âsi mono hâ asa te te siwi 're awê'ô, a'â. Âne wa, ma tō a'â ai'âma si 're siwadi za'ra wa'wa, zudezu'ô norī âma hâ. Tane nherê, ta norī hâ niwapsi 'Re İhâimana u'âsi mono u, apâ 're İsipizari za'ra mono zéb zarina, te te 're wēsâmri za'ra mono wa, te za oto rowê uptabi na 're hâimana za'ra, İwasédé hâ te te oto âma 're İ'ab'madâ'â mono ô zarina. 'Re dadâ'â za'ra mono wa, apâ 're dahâiwa'utu za'ra mono wa, dama 're İrowê za'ra mono ne, te za oto ta norī hâ rowê uptabi na 're hâimana za'ra.

16 Âne na, wa za oto aima âma romnhimîrê'ê za'ra wa'wa. İ'u'êtê wapu hâ da te 're 'manharī za'ra mono wamhâ, sebre ô ré, te za syry na da te 're po'ô za'ra, 'Re İhâimana u'âsi mono ma, da te 're sômri za'ra mono da. Misi İ'u'êtê wa'ono hâ da te tâma 're sômri za'ra mono nherê, wahuré da te tâma 're İsômri za'ra mono zé, te wasu'u. Duré âté ni'wa hâ te za 'Re İhâimana u'âsi mono ma tinha, âne: "Â hâ wede 're İsa mono zari hâ wa aima pisutu, ate da." Âne hâ wede hâ zahadu 're sa mono ré, ni'wa hâ wedezari si 'Re İhâimana u'âsi mono te da, te te tâma pisutu nherê, İpanhipti zama İte hâ za. Â hâ wedezari hâ, İzarazéhé nhihudu norī hi'rata norī, te wasu'u. Duré İpanhipti hâ ta norī nhihudu norī, te wasu'u. İzarazé norī hi'rata norī hâ, 'Re İhâimana u'âsi mono ma si, 're hâimana za'ra mono da, te te 're İpisutu za'ra mono ne, te za duré İshihudu norī zama tâma 're hâimana za'ra, wedezari si 'Re İhâimana u'âsi mono te da, da te tâma 're pisutu za'ra mono nherê, İpanhipti zama İte ne.

17 Âne na, wa za duré aima âma romnhimîrê'ê za'ra wa'wa. Âté azeitona wede hâ te a'ubuni wi 're sa, oriwera na İsisi hâ 'madâ'â âna İprédu hâ, tede'wai ô nherê. Ta hâ zudezu'ô norī, te wasu'u. Duré azeitona wede hâiba amo hâ te duré 're sa, danho'a da te dasiwi 're İ'madâ'â pese mono hâ. Ta hâ zudezu norī, te wasu'u. Tawamhâ âté azeitona wede hâ danho'a 're İsa mono panhipti hâ te za nima niwîp si panhipti nhi'ê za'ra ni, taré simi'wara da, dasiré 're 'râ za'ra mono ô wa. Ta hâ, zudezu norī hâ 'Re İhâimana u'âsi mono te te 're İsaze za'ra mono ô norī, te wasu'u. Âté a'ubuni wi azeitona wede 're İsa mono panhipti hâ te za misi we'ê ni, azeitona wede hâiba amo hâ dama İ'madâ'â pese u İwede wâi wa, da te âma wasisi da, dasiré oto 're 'râi mono da. Ta hâ, zudezu'ô norī âma, 'Re İhâimana u'âsi mono, oto âma 're İsib'a'uwê za'ra mono zé, te wasu'u. Tawamhâ azeitona wede, dama İ'madâ'â pese wede wa'u na te za oto tipanhipti prédu, wê na, a'ubuni wi azeitona wede 're İsa mono panhipti hâ rob'râi wede amo i, da te âma İwasi hâ. Tane duré, zudezu norī ma, 'Re İhâimana u'âsi mono hâ marī wê na tâma 're İsôprüb za'ra mono zé hâ, te duré aima 're hâimana za'ra wa'wa oto, zudezu'ô norī na 're aihâimana za'ra wa'aba mono ma hâ.

18 Taha wa, rob'râi wede, dama İ'madâ'â pese panhipti hâ 're 'râ za'ra mono ô wa, da te 're İsi'ê za'ra mono ne, 'Re İhâimana u'âsi mono a'â te te siwi 're İ'awê'ô mono norī ma, aipire na

tâma 're aihâimana za'ra wa'aba mono zém na, asina 're sa'ra wa'aba mono ô di za. E Îwede panhipti wa'ui hawi, te Îwede zari hã 're préduub za'ra. Mare di. Îwede zari hawip si, te Îwede panhipti hã 're préduub za'ra. Tane, a norî wa'wa hã zudezu norî ma, aipire na 're aihâimana za'ra wa'aba mono ô di. Taha wa, aipire na tâma 're aihâimana za'ra wa'aba mono zém na, 'rãwi asina 're aiwata waihu'u za'ra wa'aba mono ô di za.

¹⁹ Zudezu'ô norî, âté âhã wasu'u zarina, te za âne asima 're înhari za'ra wa'aba mo: “‘Re îhâimana u'âsi mono hã rob'râi wede panhipti, da te 're îsi'ê za'ra mono ne, e marî da, ma tô te te siwi 're awê'ô, zudezu norî hã. Wa norî hã îwa'râmi 're wahâimana za'ra mono da, ma tô ta norî hã te te siwi 're awê'ô. Rob'râi wede amo panhipti hã Îwede amo na da te âma 're îwasisi za'ra mono ne, wa oto wa norî hã 're wahâimana za'ra, î'upana za'ra.”

²⁰ Âne na asima 're nharî za'ra wa'aba mono wamhã, î'uwaibaba te za tô asima âma 're îrowaihu'u za'ra wa'aba mo, ta norî âma hã. Ta norî hã ma tô te te 're awê'ô tô siwi, te te 're saze za'ra mono ô wa. A norî wa'aba si 're sazei pese za'ra wa'aba mono wa, te tô ta norî wa'râmi 're aihâimana za'ra wa'aba mo. Tane nherê, a norî wa'wa hã asina 're aiwata za'ra wa'aba mono ô di za. Tô'â. Taha wa, te za 'Re îhâimana u'âsi mono si asiwi 're îwazéb za'ra wa'aba mo.

²¹ E 'Re îhâimana u'âsi mono hã zudezu norî ma, tinhimihâzé te te tâma 're ba'a za'ra mono ô nherê, te za bété a norî wa'aba ma tinhimihâzé hã te te aima 're ba'a za'ra wa'wa, tiwi 're aipizari za'ra wa'aba mono wamhã. Mare di. Te za tô te 're aihã za'ra wa'wa, tiwi 're aipizari za'ra wa'aba mono wamhã. Taha wa, te za 'Re îhâimana u'âsi mono si asiwi 're îwazé pese za'ra wa'aba mo.

²² Âhã wasu'u na, wa za 'Re îhâimana u'âsi mono nhimizawi pese zé hã âma waihu'u za'ra ni. Îsimihâzé pire na zama, wa za duré âma waihu'u pese za'ra ni. Tiwi 're îsi'marôpârî pese za'ra mono norî si, te za te te 're ahã za'ra za'êtê. Tane nherê, a norî wa'wa hã 'Re îhâimana u'âsi mono te te 're asawi pese za'ra wa'aba mono zéb zarina, marî îwê na te te 're aipawaptob za'ra wa'aba mono zéb da hã, tâma asina 're uwaaimrami u'âsi za'ra wa'aba mono wamhã, te za tô rowê hã te te aima 're pisutu u'âsi za'ra wa'wa, hâiwa hawi, ai'âma 're îpê'êzé za'ra wa'aba mono zéb zarina. Âne na tâma asina 're uwaaimrami za'ra wa'aba mono ô wamhã, a norî wa'aba zama te za te te siwi 're aiwê'ô pese za'ra wa'wa, rob'râi wede panhipti hã 're 'rã za'ra mono ô wa, da te 're îsi'ê za'ra mono ne.

²³ Duré zudezu norî hã Zezusihi zazei'ô'wa na 're îhâimana za'ra mono norî hã, 'Re îhâimana u'âsi mono u oto 're sipizari za'ra mono wamhã, te za oto apâ âma 're sib'a'uwê za'ra, ta norî âma. Âne hã 'Re îhâimana u'âsi mono ma, waihu'u pese di, zudezu norî ma, apâ te te 're î'manharî wê za'ra mono zéb da hã.

²⁴ Âne na, wa za oto rowasu'u na aima 'rãsutu za'ra wa'wa, azeitona wede panhipti wasu'u na âma îsimiré'ézém na hã. A norî wa'wa hã zudezu'ô na 're aihâimana za'ra wa'aba mono norî hã, a'ubuni wi azeitona wede panhipti, da te 're maiwê'êi wa, azeitona wede dama î'madâ'â pese wede u, da te âma Îwede wasisi ne, te oto simisutu 're aihâimana za'ra wa'aba mo, zudezu norî me. Duré zudezu norî hã azeitona wede dama î'madâ'â pese panhipti ne, te 're hâimana za'ra. Taha wede panhipti hã da te 're si'êi mono wa, da te 're îsâmra mono hã î'madâ'â wai ma, tâma wapure di, tô Îwede na apâ te te âma 're î'ato mono da hã. Tane duré, 'Re îhâimana u'âsi mono ma hã wapure di, zudezu norî âma apâ 're îsib'a'uwê za'ra mono zéb da hã, ta norî hã tiwi 're sipizari za'ra mono nherê, aré.

Zudezu norî hã, ahã na 'Re îhâimana u'âsi mono u, za apâ 're îsipizari za'ra mono zé wasu'u

²⁵ Îsisânawã norî, zudezu'ô na da te 're aiwaptêrê za'ra wa'aba mono norî hã, marî aré dama îwaihu'u'ô na roti pire wasu'uzém na wa za oto aima rowasu'u za'ra wa'wa, asimiza'rese âna 're aihâimana za'ra wa'aba mono tô da. Zudezu norî upana, 'Re îhâimana u'âsi mono hã ai'âma wa'aba si 're sib'a'uwê mono newa, 'rãwi asi'âma 're aiwata za'ra wa'aba mono tô da, wa za oto âne na aima rowasu'u za'ra wa'wa. Izarazéhé nhihudu norî hã 'Re îhâimana u'âsi mono wi, pê'ê tete uptabi na 're hâimana za'ra mono nherê, pê'ê tete u'âsi, tiwi 're hâimana za'ra mono ô di za. Duréihã, 'Re îhâimana u'âsi mono te te sima îpisutu sirômo zéb zarina, zudezu'ô norî hã da'ahã uptabi na Cristu za da te 're îsaze za'ra mono norî za'ratazé hã, oto îwa waptâ'â wapsi, te za oto zudezu norî hã ahã uptabi na îtême 're sipizari za'ra, ôhõ âma si oto 're nomro mono da.

²⁶ Âne 'Re îhâimana u'âsi mono te te 're îsô'reptu za'ra mono zéb da hã, Izarazéhé nhihudu norî hã. Âne na ma tô duréihã Iza'iza hã âma rob'ui'éré siro, ta norî âma hã:

“Danho'reptui'wa da hã, Zeruzarê âma Si'ã na sa'a nhisi âma, dasiré za 're îhâimana mono hã, tame.

Ta hã Zacoho nhihudu norî 're îwasété za'ra mono zé hã te za te te tâma 're aparti.

27 'Re ihâimana u'âsi mono hã ma tô ta norî âma tinhimirosa'rada hã waihu'u siro, âne: 'Ta norî ma, te îropisutuzê hã wa za tô tâma âma uwaimrami za'ra, îwasédê te tâma 're î'apari mono zém na.' "

Âne Iza'iza hã ta norî âma te te îrob'ui'érézê wasu'u hã.

28 Zudezu norî hã Cristuhu wasu'uwê hã ma tô ahã na te te siwi 're wê'ô za'ra. Taha wa, te oto 'Re ihâimana u'âsi mono nhitob'ru ne 're hâimana za'ra. Taha wa'râmi, ma tô ai'âma 're siwadi za'ra wa'wa, asiré zudezu'ô norî âma hã. Tane nherê, îsib'a'uwê 're nomro mono da, te te pisutu za'ra wa, te ta norî hã te te 're azawi pese u'âsi sima, ta norî hi'rata ma, te te sina îropisutu za'ra zéb zarina.

29 'Re ihâimana u'âsi mono te te sima 're da'apisutu mono nherê, duré marî îwê na dama 're sôprub za'ra mono nherê, e te za tinhimirosa'rata na te te âma 're saprî. Mare di. Misi harê, îsimirosa'rada hã te tâma 're hâimana u'âsi.

30 Duréihã, aihî'rata norî wa'wa hã 'Re ihâimana u'âsi mono nhimiroti hã te te 're wapari za'ra mono âna, ma tô aré 're hâimana za'ra, zudezu'ô norî hã. Tane nherê, zudezu norî hã 'Re ihâimana u'âsi mono si te te 're sazei pese za'ra mono ô wa, ma tô oto ai'âma 're pê'ézê za'ra wa'wa, ai'âma 're sib'a'uwê za'ra wa'aba mono da, zudezu'ô 're aihâimana za'ra wa'aba mono nherê.

31 A norî wa'wa hã aré asimipari âna 're anomro aba mono nherê, ai'âma 're îpê'ézê za'ra wa'aba mono ne, te za oto duré zudezu norî âma zama 're pê'ézê 'Re ihâimana u'âsi mono hã, po're âna duré ta norî hã tiwi 're hâimana za'ra mono nherê.

32 'Re ihâimana u'âsi mono wi, danhimipari âna 're danomro mono wa, ma tô te te siwi 're da'awê'ô pese, dawasédê hã te te da'âma 're î'ab'madâ'â mono hawi. Dazazéb 're, da te 're danheme mono wa, apâ dasi'uîhã na 're îdawairébé waihu'u mono ô ne, dawasétê hawi 'râwi 're dasisô'reptui waihu'u za'ra mono ô di. Taha na, dasi'uîhã na da te dasina 're waihu'u za'ra mono da, ma tô te te siwi 're da'awê'ô. Uburé da'âma 're pê'ézê mono da, ma tô âne hã te te dama 're apisutu, 'Re ihâimana u'âsi mono hã.

Îwaihu'u pese na 'Re ihâimana u'âsi mono wasu'u

33 'Re ihâimana u'âsi mono hã uburé da'âma 're îsiwamri mono zé hã tâma sa'êtê uptabi di, te te dama 're î'ab'manharî wê mono zéb da hã. Îwaihu'u pe hã tâma sa'êtê uptabi di duré. E 'wa hã te za marî hã te te sima 're î'apisutu mono zé hã tiwi waihu'u. E 'wa hã te za duré tiwi waihu'u, uburé marî hã te te 're î'ab'manharî mono zé hã.

34 Duréihã Iza'iza hã ma tô âne na âma rob'ui'ére:

"E 'wai ma, Wanhib'apito nhimirosa'rada hã waihu'u pese di.

E 'wa hã roti na tâma îwa'râmi'wa da hã, te 're hâimana. Robaba di."

35 Wahi'rata hâiba amo hã ma tô duré âne na âma rob'ui'ére, Zo na îsisi hã:

"'Re ihâimana u'âsi mono si, roptede'wa 're hâimana mono nherê, e niha te za ni'wa hã marî hã tâma tisô, îwa'râmi marî na te te tâma îwa'âbâ da hã. Âne hã robaba uptabi di, tâma hã."

Âne ma tô Zo hã rob'ui'ére, duréihã.

36 'Re ihâimana u'âsi mono si ma tô uburé te te aropoto, sima. Taha wa, te uburé marî hã te te 're ab'madâ'â, tiwaihu'u pese na. Âne wa, 'Re ihâimana u'âsi mono âma, aihîni, âma 're wawata u'âsi za'ra wa'aba mono za. Tane tô.

12

'Re ihâimana u'âsi mono ma, 're îdasisômri za'ra mono zé wasu'u

1 Îsisânawã norî, 'Re ihâimana u'âsi mono hã e wa'âma 're pê'ézê mono ô di, wa'âma 're îsiwãri mono zéb da hã. Wa'âma 're îpê'ézê mono zé hã, tâma sa'êtê uptabi di. Taha wa, wa za oto aima roti pese za'ra wa'wa, âne na hã. 'Re ihâimana u'âsi mono ma si, te za 're asisômri u'âsi za'ra wa'aba mo, tiwi 're asisawi za'ra wa'aba mono âna. Taha ma si, te za aiwê uptabi na tâma 're aihâimana za'ra wa'aba mo, te te 're ai'madâ'â wê u'âsi za'ra wa'aba mono da. Âhã zarina, âma 're anomro wê u'âsi aba mono wamhã, taha si tô sena, âma 're î'aiwata za'ra wa'aba mono zé hã.

2 Ti'ai âma dahâimana wasétê na 're îdanomro mono norî âma hã, 're sasômri za'ra wa'aba mono ô di za. 'Re ihâimana u'âsi mono wi si, te za 're îrowaptêrê u'âsi za'ra wa'aba mo, asimirosa'rata wê na si, aipê'ê 're, 're aihâimana za'ra wa'aba mono zé hã te te aima 're pisutu za'ra wa'aba mono da, 're aihâimana za'ra wa'aba mono zép tém na si, oto 're anomro aba mono da. Tawapsi te za 'Re ihâimana u'âsi mono, te te aima 're îpisutu za'ra wa'aba mono hã asina 're îwaihu'u pese za'ra wa'aba mo, marî îwê si tâma 're î'manharî za'ra wa'aba mono zém na hã.

3 'Re ihâimana u'âsi mono hã tinhimizawi pese zéb zarina, ma tô îpisutu, îsadawa wasu'u'wa na oto 're ihâimana mono da. Taha wa, wa za oto âne na aima roti pese za'ra wa'wa. Dama

aipire na, duré dama aiwē na 're aihâimana za'ra wa'aba mono ô nherê, 'râwi aipire na 're asi'madâ'â za'ra wa'aba mono ô di za. 'Re îhâimana u'âsi mono, ma tôte te sima 're aipisutu za'ra wa'wa, ôhō âma si oto 're anomro aba mono da. Tane nherê, aihîni îsazei'wa, asiré 're anomro aba mono nherê, ni'wam norî si te îsazei pese 'wa hâ 're hâimana za'ra. Duré ni'wam norî hâ îsazei prâi 'wa, te 're hâimana za'ra. Îsazei prâi 'wa norî hâ 're sazei pese za'ra wa'aba mono newa, 'râwi asi'âma 're rosa'rata za'ra wa'aba mono ô di za, 're sazei pese za'ra wa'aba mono ô nherê.

⁴ Dahâiba misi nherê, dahâiba na hâ marî hâ dama 're îhâimana za'ra mono hâ ahâ di, tite mono bâ te te 're îromhuri za'ra mono zéb da hâ, dapara hâ duré danhib'rada hâ, duré dato hâ, uburé îré 're îdahâimana za'ra mono hâ.

⁵ Tane hâ wa oto wa norî hâ wasiré îsazei'wa norî hâ Cristuhu âma, wa'ahâ nherê, 're wahâimana za'ra, simisutu. Dahâiba misi nherê, dahâiba na marî hâ ahâ na dama 're îhâimana za'ra mono hâ, tite mono bâ te te 're îromhuri za'ra mono ne, wa oto wa norî hâ wasiré îsazei'wa norî hâ wanhimîromhuri mono bâ sipu'u pese na, wa te 're romhuri za'ra, 'Re îhâimana u'âsi mono ma, dahâiba misi 're îdahâimana za'ra mono ne, simisutu wasiré 're wahâimana za'ra mono wa oto.

⁶ Taha wa, 'Re îhâimana u'âsi mono hâ simizawî pese uptabi wa, romhuri te te wama 're î'apisutu mono zéb zarina, wasipu'u pese na, wa za wa te tâma 're romhuri za'ra, wate mono bâ, âma 're îwasipawaptob za'ra mono zéb da hâ. 'Re îhâimana u'âsi mono zadawa wasu'u na, sena na îsazei'wa norî ma si te te âma 're îrowasu'u za'ra mono zéb da, te te sima 're wa'apisutu mono wamhâ, taha zarina si, wa za tô âma 're wasipawaptob u'âsi za'ra. Îsimiroti zarina si, wa za wa te 're sadawa wasu'u za'ra, wasiré îsazei'wa norî ma.

⁷ Duré ni'wam norî hâ îsazei'wa norî pawapto'wa da, te te sima 're apisutu mono wamhâ, ta norî zama te tô taha zarina si te te tâma 're dapawapto u'âsi za'ra. Duré 'Re îhâimana u'âsi mono nhimiroti na dama rowahutu'wa da, te te sima 're î'apisutu mono norî hâ te za tô ta norî zama îsarina si te te âma 're dapawapto za'ra.

⁸ Duré ni'wam norî hâ 'Re îhâimana u'âsi mono hâ te te sima 're apisutu mono wamhâ, te za îsazei'wa norî ma, îsimiroti zarina si te te 're rowahutu za'ra, te te 're wapari za'ra mono wa, pê'ê toi u'âsi, âma 're hâimana za'ra mono da, siptete sina. Duré ni'wam norî hâ tinhibrom na dama 're sôprub za'ra mono da, te te sima 're apisutu mono wamhâ, te za tô ta norî hâ dawî 're sôti za'ra mono âna, dama âma 're sôprub za'ra, sa'êtê na. Duré ni'wam norî hâ îsazei'wa norî 'madâ'â'wa da, te te 're apisutu mono wamhâ, te za tô simi'ê na te te 're 'madâ'â u'âsi za'ra, ta norî zama. Duré ni'wam norî hâ te te sima 're apisutu mono wamhâ, ta norî zama te za da'âma 're pê'êzé za'ra, dahâzé ré norî âma, duré dawî 're îrobzei'ô za'ra mono norî âma. To sina, te za âne zarina te te 're dapawapto za'ra, ta norî hâ. Âne wa za wa te wasima 're rob'ma'wamarî, romhuri mono bâ, dahâiba hâ misi nherê, dahâiba na marî hâ ahâ na dama 're îhâimana za'ra mono hâ tite mono bâ te te sima 're îromhuri za'ra mono ne.

⁹ Taré asimizawizé hâ aima 're hâimana za'ra wa'aba mono tô da, te za tô sena asimizawî pese zé hâ aima 're hâimana u'âsi za'ra wa'wa. Uburé marî wasété nhîti, te za 're aihâimana za'ra wa'aba mo, asiwi 're wê'ô pese za'ra wa'aba mono sina. Uburé aihâimanazé îwê na si te za oto 're aihâimana za'ra wa'aba mo.

¹⁰ Dasisânawâi uptabi hâ 're îdasisawî pese za'ra mono ne, te za a norî wa'wa hâ 're asisawî pese za'ra wa'aba mo, Cristuhu âma asisânawâ oto asiré 're aihâimana za'ra wa'aba mono wa. Te za duré 're asiwazé pese za'ra wa'aba mo.

¹¹ Aiwa'a âna, te za duré 're îromhuri pese za'ra wa'aba mo. Wanhib'apito ma si, te za asimi'êi uptabi na 're îromhuri u'âsi za'ra wa'aba mo, aihâiba tiwi 're sawi za'ra wa'aba mono âna.

¹² Uburé marî îwê hâ 'Re îhâimana u'âsi mono, za te te wama 're î'apisutu mono zéb zô, wa za sô 're wanhimipari za'ra mono sina, 're wahâimana za'ra, wato sina. Zezusihi zazei'wa oto 're anomro aba mono wa, da te 're ai'ruiwapari za'ra wa'aba mono nherê, te za asiptete sina âma 're anomro u'âsi aba mo. 'Re îhâimana u'âsi mono ma, te za 're aimreme zusi u'âsi aba mo.

¹³ Asiré îsazei'wa norî wi, marî zô tiwi 're îrowaptâ'â za'ra mono zéb zarina, te za asimarî na 're îpawapto za'ra wa'aba mo. Duré darob amoi hawi atême 're sihutu aba mono wamhâ, te za sô 're atob'uzu za'ra wa'aba mo, asiré îsazei'wa norî zô hâ, asôrôwa u 're 'mazasi za'ra wa'aba mono da.

¹⁴ Duré Zezusihi zazei'wa 're anomro aba mono 'ru te, da te 're ai'ruiwapari za'ra wa'aba mono wa, da te aima 're rob'manharî wasété za'ra wa'aba mono wamhâ, âne wamhâ, 'Re îhâimana u'âsi mono ma, 're dahâiba 'ru za'ra wa'aba mono ô di za, te te 're da'ahâ za'ra mono da. Rowê hâ te te tâma 're î'apisutu mono da si, te za da'âma tâma 're aimreme zusi aba mo.

¹⁵ Ni'wam norī hā toi uptabi na 're hāimana za'ra mono wamhā, ĩsine te za 're atoi uptabi za'ra wa'aba mo, ĩsiré. Duré ni'wam norī hā pē'ézé uptabi na 're hāimana za'ra mono wamhā, ĩsine te za duré aipē'ézé uptabi na ĩsarina 're aihāimana za'ra wa'aba mo.

¹⁶ Duré simisutu te za asimirosa'rata na 're asisazei pese za'ra wa'aba mo, asiré ĩsazei'wa nheré, asisada 're rosa'rata wasété za'ra wa'aba mono tō da. Duré aiwē na 'rāwi asina 're aiwata za'ra wa'aba mono ō di za. Duré dama ĩpire norī zapari, marī na romhuri wapu na da te dasima 're ĩromhuri za'ra mono zé hā asiwi 're wē'ō za'ra wa'aba mono ō di za, 're 'manharī za'ra wa'aba mono tō da, ta hā wapu nheré. Duré asiré norī nhipai u aiwaihū'u pese na 'rāwi asi'āma 're rosa'rata za'ra wa'aba mono ō di za.

¹⁷ Duré da te aima 're rob'manharī wasété za'ra wa'aba mono wamhā, asa dama āma 're wa'rāmi wasété za'ra wa'aba mono ō di za. Marī ĩwē si 're ĩ'manharī za'ra wa'aba mono na si, te za asima 're asōpré u'āsi aba mo, ĩsazei'wa 're anomro aba mono wa, da te ai'āma 're rosa'rata wasété za'ra wa'aba mono tō da.

¹⁸ Asada 're dahāimana za'ra wa'aba mono nheré, rowē na si dasiré 're aihāimana u'āsi za'ra wa'aba mono da, te za asina 're ĩrosa'rata wē u'āsi za'ra wa'aba mo.

¹⁹ Duré nimahā na, da te aima 're rob'manharī wasété za'ra wa'aba mono wamhā, 'Re ĩhāimana u'āsi mono upana asi'uihā na 'rāwi 're asi'ruiwa'ābā za'ra wa'aba mono ō di za. Taha si, tinhimihāzém na te te 're ai'ruiwa'ābā za'ra wa'aba mono da, te za ōhō si 're ĩ'madā'ā za'ra wa'aba mo. Duréihā āne na ma tō Wanhib'apito mreme na rob'ui'ére, Mozési hā:

"Wa hā ĩsiwaprosi, wa za te 're da'a'ruiwa'ābā. ĩwétési, wa za te dama āma 're awa'rāmi, marī, da te 're ĩ'manharī wasété za'ra mono zém na hā."

Āne duréihā Wanhib'apito mreme na rob'ui'ére wasu'u hā, ĩbahā na hā.

²⁰ Duré āne 'Re ĩhāimana u'āsi mono nhimiroti amo na rob'ui'ére wasu'u hā:

"Asitob'ru norī hā mra te te 're sépata za'ra mono wamhā, ĩsa na te za 're ĩpawaptob za'ra wa'aba mo. Duré 'rubu wamhā, te za tāma 're ĩ'ōb za'ra wa'aba mo. Āne zarina, asitob'ru norī ma, 're 'manharī wē za'ra wa'aba mono wamhā, ta norī hā 'rāwi 're siwaihū'u za'ra mono wa, te za aima 're siséb za'ra wa'wa."

Āne duréihā 'Re ĩhāimana u'āsi mono nhimiroti na rob'ui'ére wasu'u hā. Āhā zarina si te za dama 're ĩ'manharī wē u'āsi za'ra wa'aba mo. Taha wa, a norī wa'wa hā 'rāwi asi'uihā na 're asi'ruiwa'ābā za'ra wa'aba mono ō di za.

²¹ Āhā wasu'u na, wa za oto ĩnhimirowasu'u na hā aima 'rāsutu za'ra wa'wa. 'Rāwi dasi'uihā na 're ĩdasi'ruiwa'ābā za'ra mono zém na hā da'āma 're sasōmri za'ra wa'aba mono ō di za. Marī ĩwē si te za dama 're ĩ'manharī wē u'āsi za'ra wa'aba mo, taha na dahāimana wasédé hā dawi 're uprosi za'ra wa'aba mono da, duré taha zarina, tō sena oto ai'āma 're dasiwadi za'ra wa'aba mono da.

13

Ti'ai āma dama ĩpire norī nhimiroti, da te 're ĩwapari pese za'ra mono zéb da na rowasu'u

¹ Ti'ai āma dama ĩpire norī hā, roti'wa norī hā si'uihā na 're sipisutu za'ra mono ō di, dama 're si'apito za'ra mono da hā. 'Re ĩhāimana u'āsi mono te te 're ĩ'apisutu mono zarina si, te dama 're hāimana za'ra uburé. Taha wa, te za uburé aihīni 're ĩwapari pese za'ra wa'aba mo, ĩsimiroti hā.

² Ni'wam norī hā dama ĩpire norī nhimiroti te te siwi 're wē'ō za'ra mono wamhā, taha si te te siwi 're wē'ō za'ra mono ō di za. ĩ'u'ābā te za duré 'Re ĩhāimana u'āsi mono te te 're ĩ'apisutu mono zé hā te te siwi 're wē'ō za'ra. Āne hā ni'wam norī te te 're 'manharī wasété za'ra mono wamhā, 'rāwi te za si'uihā na te te sisada 're sani za'ra, ti'ai āma dama ĩpire norī nhimiházé hā, 'Re ĩhāimana u'āsi mono zadawa para.

³ Āne, marī te te 're ĩ'manharī wasété za'ra mono norī si, te za dama ĩpire norī nhimiházé ma, 're pahi za'ra. Tanei ō di, marī te te 're ĩ'manharī wē za'ra mono norī hā. Dama ĩpire norī ma, 're pahi za'ra mono ō di za. Taha wa, te za ĩwē si 're ĩ'manharī za'ra wa'aba mo, dama ĩpire norī ma, tāma 're aipahi za'ra wa'aba mono āna, 're aihāimana za'ra wa'aba mono da. Tawapsi te za te te 're aiwēsāmri za'ra wa'wa, ti'ai āma dama roti'wa norī hā.

⁴ Ta norī hā te 'Re ĩhāimana u'āsi mono zadawa para, te te 're romhuri za'ra, ĩwē na si te te 're aipawaptob za'ra wa'aba mono da, taha zarina, rowē na 're asimroi wa'aba mono da. Tane nheré, marī ĩwasété si 're 'manharī u'āsi za'ra wa'aba mono wamhā, te za tō tāma 're aipahi za'ra wa'aba mo. E marī wa. Dama ĩpire norī hā tō sena siptete uptabi wa, te te 're ĩdahā za'ra mono zéb da hā. 'Re ĩhāimana u'āsi mono zadawa para, te ĩsimipari'ō norī hā te te 're hā za'ra.

⁵ Āne wa, te za uburé ti'ai āma dama roti'wa norī nhimiroti hā 're ĩwapari pese za'ra wa'aba mo, asimipari ō wa, 'Re ĩhāimana u'āsi mono te te 're aiwē'ō pese za'ra wa'aba mono zéb zarina, te te 're aihā za'ra wa'aba mono tō da. Duré 're aihāimana wē za'ra wa'aba mono

zém na, 'Re ìhâimana u'âsi mono ma, tâma âma 're ì'uwaimrami za'ra wa'aba mono na, aipê'ê 're asimirosa'rata na asina 're waihu'u pese za'ra wa'aba mono da, te za ìsarina dama ìpire norî nhimiroti hâ 're ìwapari pese za'ra wa'aba mo.

⁶ Taha wa, dama ìpire norî nhimipisutuzéb zarina te za duré rob'uiprazé hâ syry na tâma 're ìpo'o za'ra wa'aba mo, ti'ai âma dama ìpire norî ma. E marî wa. Dama ìpire norî hâ 'Re ìhâimana u'âsi mono zadawa para, te te 're romhuri za'ra mono wa.

⁷ Taha wa, te za tô ìsarina tâma 're ìpo'o za'ra wa'aba mo, aipawa'âbâzé hâ duré uburé marî uiprazé hâ. Te za duré tâma 're aihâimana prédub za'ra wa'aba mo, dama roti'wa norî ma.

'Re ìdasisawi pese za'ra mono zé wasu'u

⁸ Wa'âbâ âna, dawi 're ìrowaibui wa'aba mono zém na hâ, taré dama 're ropisutu za'ra wa'aba mono ô di za. Te za dama âma 're ì'uwaimrami za'ra wa'aba mo, dama 're ìropisutu za'ra wa'aba mono zéb zarina. Asimizawizém na si te za 're ìdazawi pese za'ra wa'aba mo. 'Re dazawi pese za'ra wa'aba mono wamhâ, uburé 'Re ìhâimana u'âsi mono nhimiroti 'rata na Mozési te te ìrob'ui'érezém na te za asina tâma âma 're ì'uwaimrami za'ra wa'aba mo.

⁹ Duréihâ 'Re ìhâimana u'âsi mono, Mozésihi ma, te te ìwaihu'uzéb zarina te te âma dama ìrob'ui'érezé hâ, âne:

"Aimro na asiwi 're asipsaihuri za'ra wa'aba mono ô di za. Duré 're danhimroi wa'aba mono ô di za. Duré dawi 're asipsaihuri za'ra wa'aba mono ô di za. Duré marî ìwê hâ dawi 're ruiwapari za'ra wa'aba mono ô di za."

Âne duréihâ 'Re ìhâimana u'âsi mono nhimiroti hâ, dahâimanazé mono bâ. Â norî hâ, duré aimawi hâ ìsimiroti hâ ahâ uptabi nherê, simisutu haré te wasu'u ìsimiroti hâ, âne:

"Te za 're ìdazawi pese za'ra wa'aba mo, duré aihâimanazé hâ 'râwi asima 're ìsawi pese za'ra wa'aba mono ne."

Âne ìsimiroti hâ sa'êtê uptabi nherê, misi ìsimiroti hâ te wasu'u, simisutu haré.

¹⁰ Ni'wam norî hâ te te 're dazawi pese za'ra mono wamhâ, marî hâ ìwasédé hâ te te dama 're 'manharî waihu'u za'ra mono ô di za. Taha wa, ni'wam norî hâ te te 're dazawi pese za'ra mono wamhâ, ta hâ uburé 'Re ìhâimana u'âsi mono nhimiroti 'madâ'â pese 'wa, te za 're hâimana za'ra.

¹¹ Zezusi hâ we apâ wazô ìmorizéb u hâ romhuture di oto, te te ìwanho'reptu za'ra zé hâ te te oto wama ìrâsutu za'ra da hâ. Cristu hâ duréi, wa te wasina 're ì'umnhasi na'rata za'ra mono hawim nherê, romhuture di oto, wama hâ. Taha wa, te za oto asimiza'rese 're aihâimana za'ra wa'aba mo, darési âna 're ìdanhotô za'ra mono ne, asimiza'rese âna 're aihâimana tô za'ra wa'aba mono da. Âne na ti'ai âma 're ìwahâimana hutu za'ra mono zé hâ aima waihu'u pese za'ra wa'aba di. Âne wa, te za 're ìdazawi pese za'ra wa'aba mo.

¹² Robra ìsi'utôrizéb u hâ romhuture di oto, ti'ai âma ré dawasédé, da te 're ì'manharî za'ra mono hâ. Taibâ za oto. Cristu hâ we apâ morî wapsi, rowa'a si te za oto 're hâimana u'âsi, robra wa'râmi. Taha wa, robra 'rowi dawasédé, da te 're ì'manharî za'ra mono ne, 're wanomro mono ô di za oto. Wawasédé hâ wa za oto wa te 're sahari pese za'ra. Duré Zezusihi nhimirowa'a na si wa za 're wanomro, robra wi wanhiptete sina âma 're ìwahâimana za'ra mono zéb da hâ, danhimhi'âsi na dawi 're ìdasisôpa za'ra mono ne.

¹³ Wawasété âna, wa za oto 're wanomro wê, rowa'a na 're ìdanomro mono ne. Âzé wa te dame 're âhuri mono ô di za, dato ìwasété u 're dasi'râ'ôtô mono wa, siwa'ru da te 're ì'âhuri mono ne, 're wa'râ siwamnarî tô za'ra mono da. Duré siwa'ru wahâimanazé ìwasédé hâ wa te 're 'manharî u'âsi za'ra mono ô di za, pi'ô na aibâ na zama. Duré marî na 're ìwasiwê'ô za'ra mono hawi, wa te wasima 're nharî za'ra mono ô di za. Duré marî na 're wasi'ruiwapari za'ra mono ô di za.

¹⁴ Siwa'ru 'râwi asima ìwézéb zarina, aipê'ê 're asimirosa'rata wasété aba na âma 're rosa'rata za'ra wa'aba mono ô di za. Wanhib'apito Zezu Cristu 're ìmorizém na si te za oto 're aihâimana za'ra wa'aba mo, ìsine.

14

Ìsazei'wa nherê, sib'uware na 're ìnomro mono norî wasu'u

¹ Ìsazei'wa nherê, sib'uware na 're ìnomro mono norî zô, te za asitême sô 're aihâsi aba mo. Ìsimirosa'rata za'ra hâ aimawi nherê, aiwab ô nherê, tâma 're nharî wasété za'ra wa'aba mono ô di za. Tane nherê, te za sô 're atob'uzu za'ra wa'aba mo.

² Ni'wam norî hâ ìsazei'wa norî hâ uburé tisazéb zô te 're sôpré, te te 're huri mono da, romnhi zô zama, 'Re ìhâimana u'âsi mono te te tiwi 're ìsawi za'ra mono ô na, 'râwi 're ìsazei'wa za'ra mono zéb zarina. Tane nherê, ni'wam norî hâ ìsazei'wa nherê, te za romnhi hâ te te siwi 're wê'ô za'ra, te te 're huri mono tô da, 'Re ìhâimana u'âsi mono te te tiwi 're sawi za'ra mono newa.

³ Taha wa, ni'wam nori hã uburé romnhi te te 're ihuri mono nori hã te te siwi 're wê'ô za'ra mono ô di za, romnhi na dame 're isaihuri mono ô nori hã. Duré ni'wam nori, romnhi na dame 're isaihuri mono ô nori zama, te te siwi 're wê'ô za'ra mono ô di za, uburé siwa'ru romnhi te te 're ihuri mono nori hã. E marĩ wa. 'Re ihâimana u'âsi mono hã ma tô te te 're awêsâmri ô nori hã, romnhi na dame 're isaihuri mono ô nori me.

⁴ E a nori wa'wa hã isib'apito za'ra wa'aba bâ, te za marĩ tiwi 're iwê'ô za'ra wa'aba mo, isib'apito upana. Taha si te za te 're waihu'u za'ra, ihâimana wasété na, duré ihâimana wê na zama. Tawamhã isazei'wa nori hã te za siptete u'âsi 're hâimana za'ra. E marĩ wa. Wanhib'apito 'Re ihâimana u'âsi mono hã tiwaihu'u pese na te te 're siptete u'âsi za'ra mono wa.

⁵ Ni'wam nori hã isazei'wa nori hã te 'rãwi te te si'âma 're rosa'rata za'ra, nima hã bâdã hã romhuri'ôzé hã iwa 're irere'e mono sidâpãsi, bâdã dama 're ipire za'ra mono zém na hã. Duré ni'wam nori, isazei'wa nori hã te te da'âma 're rosa'rata za'ra asa, aiwapsi bâdã hã uburé dama 're hâimana za'ra mono nherê, âma 're idahâimana za'ra mono zéb da hã. Taha wa, ate wa'aba mono hã romhuri'ôzé bâtã mono na asimirosa'rata mono bâ te za asiptete sina âma 're aihâimana za'ra wa'aba mo, tô ôhõ na si.

⁶ Ta nori hã nimahã bâdã hã romhuri'ôzé hã dama 're ipire za'ra mono zém na te te si'âma 're irosa'rata za'ra mono nori hã, Wanhib'apito âma 're wata za'ra mono da, te âne te te 're 'manharĩ za'ra. Duré ni'wam nori hã uburé siwa'ru romnhi te te 're ihuri mono nori hã te âne te te 're 'manharĩ za'ra, Wanhib'apito 'Re ihâimana u'âsi mono âma 're wata za'ra mono da, dasa na dama 're sôpru mono wa. Duré ni'wam nori hã romnhi na dame 're isaihuri mono ô nori hã, te âne duré te te 're 'manharĩ za'ra aiwa, 'Re ihâimana u'âsi mono âma 're wata za'ra mono da, waihu'u pese wa, duré sôprub uptabi wa.

⁷⁻⁸ Wasi'uihã na 'rãwi wahâiba misire nherê, wasina 're wahâimana za'ra mono ô di za. Wanhib'apito te te wama 're i'apisutu mono zéb zarina si, wa tâma 're wahâimana za'ra. Duré wasi'uihã na bâdã hã wadã'âzé hã wa te wasima 're pisutu waihu'u za'ra mono ô di za. Wanhib'apito te te wa'âma 're i'apisutu mono zéb zarina si, wa za 're wadã'â za'ra, ôhõ ma. Taha wa, wahâiba ré 're wahâimana za'ra mono ré, duré oto 're wadã'â za'ra mono wamhã, isib'a'uwê, wa za 're wahâimana u'âsi za'ra, simisutu.

⁹ Cristu hã dá'â nherê, ma tô apã hãiwa'udu, hãiba ré 're ihâimana za'ra mono nori nhib'apito da hã, duré 're idã'â za'ra mono nori nhib'apito da zama. Uburé isazei'wa nori nhib'apito da, ma tô hãiwa'udu apã. Taha wa, wa isib'a'uwê 're wahâimana u'âsi za'ra oto, simisutu.

¹⁰ Tane nherê, e marĩ wa, te bété asisânawã nori hã 're iwê'ô za'ra wa'aba mo, asiré isazei'wa 're anomro aba mono nherê. E marĩ wa, te 're i'ruiwapari u'âsi za'ra wa'aba mo, asisânawã nherê. Niwapsi wa za uburé 'Re ihâimana u'âsi mono nho're aimasam ni, te te wa'awaihu'u da, wahâimana wê na, wahâimana wasété na zama. Tamep si za te te da'awê'ô na dá'âsina, asi'uihã na 're asiwê'ô pese za'ra wa'aba mono ô di za, ti'ab ré.

¹¹ Duréhã 'Re ihâimana u'âsi mono zadawa wasu'u wa, ma tô âne na âma rob'ui'éré, imreme na:

“Wa hã uburé Danhib'apito, tô sena 're ihâimana mono zé hã aima waihu'u pese za'ra wa'aba di. Duré tô sena aima isiwasu'u za'ra wa'aba zéb zarina, wa duré tô sena aima ropisutu za'ra wa'wa. Âne, wa aima ropisutu za'ra wa'wa. Niwapsi te za a'uwê mono bâ dahi'rãititô inho're ima ana ni, dama ipire uptabi wa. Tawamhã tame dapoto mono bâ te za inhisi za'ra ni, inhisi na 'Re ihâimana u'âsi mono na.”

Âne ma tô ibaihã na âma rob'ui'éré, 'Re ihâimana u'âsi mono mreme na rob'ui'éré'wa hã.

¹² Tamep si, wa za oto wasi'uihã na tâma wasiwasu'u za'ra ni wahâiba mono bâ, ti'ab ré wahâimazém na, uburé marĩ hã wa te 're i'manharĩ za'ra mono zém na hã.

¹³ Taha wa, wasiré isazei'wa nherê, 're iwasiwê'ô za'ra mono zé hã wa za oto rême pese za'ra ni. Âne zô si, te za asina 're asôpré wa'aba mo, marĩ iwê hã 're i'manharĩ za'ra wa'aba mono zéb zô. Marĩ hã 're 'manharĩ za'ra wa'aba mono ré, asiré isazei'wa nori hã te te 're ai'madã'â za'ra wa'aba mono wa, asarina wa'aba tiwasété na 're si'marôpãri tô za'ra mono da, te za marĩ iwê si 're i'manharĩ u'âsi za'ra wa'aba mo.

¹⁴ Wa hã Wanhib'apito Zesusihĩ âma 're ihâimana mono wa, wa tô isina waihu'u sena na, uburé dasa hã iwê na hã, duré iwasété ô na si. Tane nherê, ni'wam nori hã te za âne hã te te âma 're rosa'rata upa za'ra: “Â hã romnhi hã, waséte di. 'Re ihâimana u'âsi mono ma hã wê ô di, wa te 're ihuri mono da hã.” Âne hã ni'wam nori hã te te âma 're rosa'rata za'ra mono wamhã, ô nori ma si, romnhi hã wasété di tô. Tane nherê, te te siwi 're wê'ô za'ra mono nherê, te te 're huri mono wamhã, dawaséde te wasu'u.

¹⁵ Âté marĩ dasa hã te za 're ihuri aba mo, asiré isazei'wa nori te te siwi 're iwê'ô za'ra mono hã. Tawamhã, 're huri aba mono wamhã, 'Re ihâimana u'âsi mono te te dawĩ 're awê'ô

mono newa, âté te za âne na tiwi 're ĩrobzei'ô za'ra wa'aba mo, tô ô norĩ wi hã. Āne wamhã, asimizawi pese zé hã tâma âma 're uwaimrami za'ra wa'aba mono ô di za. Tãma sawi uptabi za'ra wa, ma tô Cristu hã sada tidâ'â za'ra. Taha wa, romnhi hã asiré ĩsazei'wa norĩ te te 're ĩwê'ô za'ra mono hã, 're huri aba mono ô di za, 're huri aba mono wa, ta norĩ hã asa na tiwi 're ĩrobzei'ô za'ra mono zéb zarina, tiwasété na 're ĩsi'marôpãrĩ za'ra mono na 're si'utôřĩ tô mono da.

¹⁶ Āne hã marĩ hã aima wasété aba ô nherê, 're 'manharĩ za'ra wa'aba mono ô di za, da te 're aiwasu'u wasété za'ra wa'aba mono tô da.

¹⁷ E marĩ wa. 'Re ĩhãimana u'âsi mono hã ĩsazei'wa norĩ âma 're ĩsib'a'uwê mono zé hã, dasa hã da te 're ĩwê'ô za'ra mono zé, te te wasu'u ô di. Uburé marĩ hã da te 're ĩâhuri mono zéb zama te te wasu'u ô di duré. E marĩ te wasu'u tawamhã, 'Re ĩhãimana u'âsi mono, da'âma 're ĩsib'a'uwê mono zé hã. Ta hã 'Re ĩhãimana u'âsi mono nhimiroti zarina 're ĩdanomro wê mono zé, te wasu'u. Duré 'Re ĩhãimana u'âsi mono, Tipê'êzani na te te 're ĩda'apawapto mono zéb zarina, rowê uptabi na 're ĩdanomro mono zé, te wasu'u, dato sina.

¹⁸ Āne na ni'wam norĩ hã Cristuhu ma, te te 're romhuri wê za'ra mono wamhã, 'Re ĩhãimana u'âsi mono ma, te za te te sina 're rowê zani za'ra, uburé 're ĩhãimana wê za'ra mono zém na. Tawamhã te za duré da te 're wêsâmri za'ra, ti'ai âma ré.

¹⁹ Taha wa, rowê na wasiré 're ĩwahãimana za'ra mono zéb zô si, wa za wasima 're wanhopré. Wanhib'apito âma wahãimana nhiptete u'âsi 're wanomro mono da, 're ĩwasipawapto za'ra mono zém na, wa za duré 're wanomro u'âsi.

²⁰ Tawamhã dasa siwa'ru 're huri aba mono wa, 'Re ĩhãimana u'âsi mono, danhiptete sina âma 're ĩdanomro mono zéb da, te te da'âma 're ĩromhuri wê mono zé hã tiwi 're uprosi za'ra wa'aba mono tô da, âté 're huri aba mono ô di za, siwa'ru dasa hã, romnhi hã. Tô sena uburé dasa hã ĩwê si da te 're ĩhuri mono da hã. Tane nherê, dasa hã siwa'ru 're huri aba mono ré, asiré ĩsazei'wa nherê, sib'uware na 're ĩnomro mono norĩ hã te te 're ai'madâ'â za'ra wa'aba mono wa, asarina wa'aba tiwasété na 're si'marôpãrĩ za'ra mono wamhã, tawamhã, aiwasédé te za tô 're ĩmanharĩ za'ra wa'aba mo.

²¹ Taha wa, romnhi hã siwa'ru 're huri aba mono ô di za, duré uwa 'rãi wa'u ĩsé hã 're âhuri aba mono ô di za, taha zarina asiré ĩsazei'wa norĩ hã tiwasété na apã 're si'marôpãrĩ tô za'ra mono da. Duré siwa'ru marĩ aimawimhã 're 'manharĩ za'ra wa'aba mono wa, ni'wam norĩ hã tiwasété na apã 're si'marôpãrĩ tô za'ra mono da, 're 'manharĩ za'ra wa'aba mono ô di za.

²² 'Re ĩhãimana u'âsi mono si te te âma 're awaihu'u mono da, te za 'rãwi asima si âma 're ĩrosa'rata za'ra wa'aba mo, siwa'ru romnhi 're huri aba mono wa, âma 're ĩ'upa za'ra wa'aba mono ô zém na hã. Ni'wam norĩ hã uburé siwa'ru, tisa te te sima 're ĩwê uptabi za'ra mono zéb zarina, te te 're ĩhuri mono na, 're siwê'ô za'ra mono ô wamhã, ĩpê'ê 're tâma 're rowê uptabi za'ra mono di za. Duré ni'wam norĩ hã siwa'ru dasa hã te te siwi 're ĩwê'ô za'ra mono zéb zarina, te te 're ĩhuri mono ô na, 're siwê'ô za'ra mono ô wamhã, ĩpê'ê 're tâma 're rowê uptabi za'ra mono di za duré, âne hã aiwa.

²³ Tane nherê, ni'wam norĩ hã romnhi siwa'ru te te 're huri mono nherê, 'rãwi âma 're siwawã za'ra mono wamhã, 'Re ĩhãimana u'âsi mono hã te za te te 're wê'ô za'ra, tisa na 're ĩsiwawã za'ra mono zéb zarina. Tane hã marĩ hã wa te 're 'manharĩ za'ra mono nherê, 'rãwi âma 're wasiwawã za'ra mono wamhã, taha na wa za wawasédé hã wa te 're 'manharĩ za'ra.

15

Īsazei'wa norĩ, prédup sina 're ĩsipawapto za'ra mono zé wasu'u

¹ Wa norĩ hã wanhiptete sina, Wanhib'apito âma, wa te 're ĩsasômri u'âsi za'ra mono norĩ hã, marĩ, wa te wasima 're ĩwê za'ra mono zéb zarina si, wa te 're 'manharĩ za'ra mono ô di za. Wasiré ĩsazei'wa nherê, hãimana nhib'uware na 're ĩhãimana za'ra mono norĩ hã, wa za wa te 're pawapto za'ra, hãimana nhiptete na wasiré âma 're hãimana u'âsi za'ra mono da.

² Wasiré ĩsazei'wa norĩ hã marĩ te te sima 're ĩwê za'ra mono zéb zarina, wa za wa te âma 're sazei pese za'ra, marĩ ĩwê na si, wa te âma 're pawapto u'âsi za'ra mono da, hãimana prédub sina oto âma 're hãimana u'âsi za'ra mono da.

³ Cristu hã bété, ti'ai âma 're morĩ ré hã, e sima si ma tô tihãimanazéb da hã 're si'madâ'â. Mare di. 'Rãwi tihãimanazém na si, 're si'madâ'â mono ô di. Āne na duréihã ma tô ni'wa hã ĩwasu'u na âma rob'ui'ére siro:

“Īmama, ni'wam norĩ hã te te ai'âma 're ĩwasété za'ra mono norĩ hã ma tô ai'u'âbã ĩ'âma zama te te 're wasété za'ra. Tane nherê, aimawi 're ĩhãimana mono zéb da hã, te ĩsima pisutu ô di, ĩsi'uihã na hã.”

Āne na ma tô duréihã ĩbaihã na âma rob'ui'ére, ĩwasu'u na hã.

⁴ Uburé 'Re İhâimana u'âsi mono nhimiroti 'rata na rob'ui'éré hâ, e taré ma tô tinhimiroti hâ te te dama 're apisutu, da te âma 're İrob'ui'éré za'ra mono zéb da hâ. Mare di. Taré te te dama 're apisutu mono ô di. İsimiroti hâ wa te 're waihu'u pese za'ra mono da, ma tô âne hâ te te dama 're apisutu. 'Re İhâimana u'âsi mono nhimiroti 'rata na rob'ui'éré hâ wa te 're sôré u'âsi za'ra mono wamhâ, wanhiptete sina wa za âma 're wahâimana u'âsi za'ra, marî na uburé wa te 're robzépata za'ra mono nherê. Wa te 're sôré u'âsi za'ra mono wamhâ, te za wama 're rowê za'ra, wawî 're robzei'ô za'ra mono âna, 're İwahâimana za'ra mono zéb da hâ. Ôhō umnhasi sina, wa za tô âhâ zarina si 're wahâimana za'ra, 'Re İhâimana u'âsi mono 'rata 're İwahâimana u'âsi za'ra mono zéb zô, wasina 're wanhimipari za'ra mono sina.

⁵ 'Re İhâimana u'âsi mono si dapisutu'wa hâ, uburé marî na da te 're robzépata za'ra mono nherê, danhiptete sina âma 're İdahâimana u'âsi za'ra mono da hâ. Taha si te te sina dama 're İ'arowê zani mono hâ, dawî 're robzei'ô za'ra mono âna, âma 're İdahâimana za'ra mono zéb da hâ. Taha wa, wa tô te İsima 're aiwê za'ra wa'wa, ta hâ aihîni te te 're aipawaptob za'ra wa'aba mono da, asiré İsazei'wa norî hâ simisutu asimirosa'rata na 're asisazei pese za'ra wa'aba mono da oto, Cristu Zezusi 're İmorî wê zéb zarina.

⁶ Asimirosa'rata na 're asisazei u'âsi za'ra wa'aba mono wapsi, te za 'Re İhâimana u'âsi mono âma Wanhib'apito Zezu Cristuhu mama âma simisutu u'âsi, âma 're aiwata za'ra wa'aba mo.

Zudezu'ô norî hâ, Cristuhu wasu'uwê te te oto İwaihu'u za'ra zé wasu'u

⁷ Cristu hâ sitême te te 're İ'aiwaibui wa'aba mono ne, te za aihâiba zô asisô 're atob'uzu za'ra wa'aba mo, 're asisawi pese za'ra wa'aba mono sina. Taha zarina, 'Re İhâimana u'âsi mono âma 're dawata u'âsi za'ra mono da, te za âne asima 're İ'manharî wê u'âsi za'ra wa'aba mo.

⁸ Cristu hâ ma tô we ti'ai u datême mo, zudezu norî hâ te te 're apawapto mono da, duréihâ zudezu norî hi'rata mo, dama İpire za'ra norî ma, 'Re İhâimana u'âsi mono te te tâma 're İropisutu za'ra mono zéb zarina, te te dama âma 're a'uwaimrami mono da, duré uburé 'Re İhâimana u'âsi mono te te dama âma 're İ'a'uwaimrami mono zém na, tô sena na da te âma 're waihu'u pese za'ra mono da.

⁹ Duré zudezu'ô norî hâ 'Re İhâimana u'âsi mono, da'âma 're İpê'ézé mono zé hâ te te oto sina 're waihu'u za'ra mono wa, âma 're wata za'ra mono da, ma tô we Cristu hâ zudezu norî u satô, 'Re İhâimana u'âsi mono hâ. Duréihâ âne rob'ui'éré na İwasu'u hâ:

"Wa hâ zudezu'ô norî siré 're İhâimana mono ré, wa za İsiré za'ra, ai'âma 're İwata u'âsi.

İnho're na zama, wa za duré ai'âma 're İwata u'âsi."

¹⁰ Duré rob'ui'éré amo na İwasu'u hâ, âne:

"A norî wa'wa hâ zudezu'ô na 're aihâimana za'ra wa'aba mono norî, ma'âpé simisutu asiré atoi uptabi na, âma 're aihâimana za'ra wa'aba mono, 'Re İhâimana u'âsi mono nhîb'a'uwê norî me."

¹¹ Duré rob'ui'éré amo na İwasu'u hâ, âne:

"Zudezu'ô na 're aihâimana za'ra wa'aba mono norî, ma'âpé Wanhib'apito âma si 're aiwata u'âsi za'ra wa'aba mono, uburé aipoto mono bâ 're aihâimana za'ra wa'aba mono norî hâ."

¹² Iza'iza hâ ma tô duré âne na âma rob'ui'éré siro:

"Niwapsi te za Zéséhé nhihudu hâ we datême wi, apito Dawihi mama nhihudu hâ.

Wei wisi wapsi, te za 'Re İhâimana u'âsi mono hâ tâma pisutu, zudezu'ô norî nhîb'apito, 're hâimana mono da oto, daro mono bâ.

Tawamhâ ta norî hâ te za te siwî 're umnhasi, marî İwê hâ te te tâma 're İpisutu za'ra mono zéb zarina, za te te tâma âma 're İ'uwaimrami za'ra mono zém na hâ."

Âne duréihâ Iza'iza hâ te te âma İrob'ui'érezé hâ, 'Re İhâimana u'âsi mono nhimiropisutuzém na. Â hâ, 'Re İhâimana u'âsi mono te te dama İropisutuzém na, ma tô oto dama âma uwaimra.

¹³ 'Re İhâimana u'âsi mono hâ waihu'u pese wa, te za te te 're wa'apawaptob u'âsi, marî İwê hâ te te wama 're İpisutu za'ra mono zéb zarina, za te te wama âma 're İ'a'uwaimrami mono zéb zô, wa te wasiwî 're umnhasi za'ra mono sina, sô 're wanhimipari u'âsi za'ra mono da. Taha wa, wa ai'âma tâma 're İmreme u'âsi za'ra wa'wa, atoi uptabi na 're aihâimana u'âsi za'ra wa'aba mono da, duré rowê si te te aima 're pisutu za'ra wa'aba mono da, asina 're umnhasi za'ra wa'aba mono wa. İpê'ézani nhimipawaptobzéb zarina, marî İwê uptabi hâ 'Re İhâimana u'âsi mono, za te te aima 're İsômri za'ra wa'aba mono zéb zô, asiwî 're umnhasi za'ra wa'aba mono sina, sô 're asimipari za'ra wa'aba mono zém na, râwi asima âma 're sa'êté za'ra wa'aba mono da, wa tô te İsima 're aiwê za'ra wa'wa.

Paru hâ, 'Re İhâimana u'âsi mono nhimipawaptobzém na te te 're İda'apawapto mono zé wasu'u

¹⁴ Īsisānawā norī, wa hā wa tō ai'āma waihu'u pese za'ra wa'wa, asimizawi pese sina oto 're anomro wē wa'aba mono zēm na hā. Duré aima waihu'u pese za'ra wa'aba di oto, 're aihāimana wē za'ra wa'aba mono zéb da hā. Āne hā wa tō duré ai'āma waihu'u pese za'ra wa'wa, Wanhib'apito nhimiroti na oto asima 're ĩroti waihu'u pese za'ra wa'aba mono zēm na zama.

¹⁵⁻¹⁶ Tane nherē, āhāna ĩnhimi'ui'éré na, wa tō sō'awi aima rowasu'u za'ra wa'wa, ĩsina ĩpahi āna, rowasu'u ahā na te āma aipo're pu'u za'ra wa'aba da. Te aiwi udā waihu'u za'ra wa'aba āna, wa tō ĩnhimi'ui'éré na hā aima rowasu'u pese za'ra wa'wa, 'Re ĩhāimana u'āsi mono hā sōprum na te te ĩpisutu wa, Cristu Zesusihī ma si te oto 're romhuri mono da, zudezu'ō norī hā te tāma 're apawapto mono da. Sasedoti norī hā 'Re ĩhāimana u'āsi mono ma, te te da'āma 're ĩromhuri za'ra mono ne, wa duré wa hā zudezu'ō norī āma te 're romhuri u'āsi, 'Re ĩhāimana u'āsi mono ma, Zesusihī wasu'uwē na te 're pawapto za'ra mono wa, te te 're ĩsaze za'ra mono zéb zarina, 'Re ĩhāimana u'āsi mono te te 're wēsāmri za'ra mono da. 'Re ĩhāimana u'āsi mono pē'ēzani nhimipisutuzéb zarina, ta norī hā ĩsib'au'uwē oto 're nomro mono wa, 'Re ĩhāimana u'āsi mono te te 're ĩwēsāmri za'ra mono zéb da hā, wa āne na hā te tāma 're romhuri u'āsi.

¹⁷ Cristu Zesusihī āma si oto 're ĩhāimana mono wa, wa 're ĩsi'uze, 'Re ĩhāimana u'āsi mono ma si, te 're ĩromhuri mono zēm na hā oto.

¹⁸ Te 're ĩrowasu'u wē mono zéb zarina, duré te 're ĩromhuri wē mono zéb zarina ma tō zudezu'ō norī hā te te 're wapari pese za'ra, 'Re ĩhāimana u'āsi mono hā. E tawamhā ĩsi'uihā na ĩwaihu'u pese na te 're ĩ'ab'manharī wē mono na, wa za dama ĩsina 're ĩwata. Mare di. Āne hā ĩ'uwaibaba ō di. Cristuhu nhimipawaptozbéb zarina si, wa tō te tāma 're romhuri u'āsi za'ra, ĩwasu'uwē na hā.

¹⁹ 'Re ĩhāimana u'āsi mono pē'ēzani hā tiwaihu'u pese na te te 're ĩpawapto mono zēm na si, wa tō marī dama ĩ'manharī waihu'u'ō hā te dama 're ab'manharī, zudezu'ō norī hā tō sena te te 're saze za'ra mono da, ta norī hā. Zeruzarē hawi, ĩririza u 're ĩmorī ré, wa tō daza'ruī mono bā te dama 're rowasu'u, Cristuhu wasu'uwē na hā.

²⁰ Wa hā wa tō āne hā te ĩsima 're rosa'rata u'āsi, Cristuhu wasu'uwē hā zahadu dapo're na da te 're ĩwapari za'ra mono ō norī u si, 're ĩmorī da, daza'ruī mono bā ĩwasu'uwē na te āma 're da'apo're pu'u mono da. Wanhib'apito wasu'uwē na danhimi'u'ēi' rata u 're ĩzasi tō mono da, wa tō āne na te ĩsima 're rosa'rata u'āsi.

²¹ Duréihā Iza'iza hā ma tō āne na Cristuhu āma rob'ui'éré:

"Nī'wam norī ma, ĩwasu'uwē hā da te tāma 're ĩwaihu'u za'ra mono ō norī hā te za oto ta norī hā 'rāwi āma 're siwaihu'u za'ra, ĩwasu'uwē hā da te oto tāma 're wasu'u za'ra mono wa. Te te 're wapari za'ra mono āna, aré 're ĩhāimana za'ra mono norī hā te za oto 'rāwi si'āma te te 're waihu'u pese za'ra, 're ĩhāimana wē za'ra mono zēm na hā."

Paru hā, timreme te te sisōwa ĩsōmrizé wasu'u, Roma u morī da

²²⁻²⁴ Wa hā wahub ahā na, wa tō te ĩsima 're rosa'rata u'āsi, te ĩsima 're ĩrowē mono zéb uwaibaba, atēme ĩmorī za'ra wa'aba da, te asabu za'ra wa'aba da. Tane nherē, zahadu āmemhā ĩma romhuri ahā di. Taha wa, nimahā na hā āma atēme ĩwatobro waihu'u aba ō di. Tane nherē, āhāna hā ĩnhimirohuri hā āmemhā te oto 'rāsutu wamhā, atēme āma ĩmorī aba da si, wa tō ĩsima waihu'u. Taha wa, wa tō ĩsima pisutu pese, Espānha na romnhisi u ĩmorī ré, te asabu za'ra wa'aba da. Āne wa tō duré ĩsima rosa'rata, atēme āma ĩwisi za'ra wa'aba wamhā, niha bātā na a'ā ai'rata ĩnhamra za'ra wa'aba da, ĩma ĩrowē zarina, duré marī na asiwi ĩpawapto za'ra wa'aba da, Espānha u ĩmorizéb da hā. Taha parip si, wa za oto aihawi ĩmorī 'wa.

²⁵ Tane nherē, wa za a'ā Zeruzarē u si mo, ā awa'awi hā, tame 'Re ĩhāimana u'āsi mono nhib'au'uwē 're ĩsi'ubumroi mono norī hā te duré pawapto za'ra da a'ā.

²⁶ Masédoniza na danhipti'a nho'ōmo nhisi āma, duré Ataza na danhipti'a nho'ōmo nhisi āma, zudezu'ō na ĩsazei'wa na oto 're ĩhāimana za'ra mono norī hā ma tō sima wē za'ra, rob'uprazé hā te te siwi ubumro da, Zeruzarē āma ĩsazei'wa norī te te siwi āma pawapto za'ra da, simarī āna 're ĩhāimana za'ra mono norī hā, zudezu norī hā. Ta norī nhoprub za'ra zé hā, ĩsi'uihā na te tāma āri za'ra da Zeruzarē u, taha da, wa za a'ā tamomop si mo.

²⁷ Ta norī hā zudezu'ō na ĩsazei'wa norī hā si'uihā na ma tō sima pisutu za'ra, te te siwi āma ĩpawapto za'ra zéb da hā, zudezu norī hā. Āne hā tō ĩ'uwaibaba ma tō siwi āma pawapto za'ra. E marī wa. Duréihā zudezu norī ma, ma tō 'Re ĩhāimana u'āsi mono hā tiwasu'uwē na tāma siwaihu'u na'rata za'ra, tipē'e na robzei u'āsi āma 're nomro mono da. Taha na ma tō zudezu'ō norī hā te te siwi āma 're pawapto za'ra ĩwasu'uwē na, aiwapsi oto dhō āma si 're hāimana za'ra mono da. Āne wa'rāmi, te za tō zudezu'ō norī hā tinhimarī na te te siwi 're pawapto za'ra, zudezu norī hā, tō ĩsarina si.

²⁸ Tawamhã äme ìnhimiromhuri te 'räsutu parimhã, rob'uiprazé, da te dasiwi ì'ubumro hã ubuni na ìsazei'wa nori ma, te äwisi wê parip si, wa za oto mo, Esipãna u ìmorì da hã. Tawapsi, wa za aiwa'wai baba ìmorì aba ré, asabu za'ra wa'wa oto.

²⁹ Tawamhã, atême ìwisi za'ra wa'aba wamhã, Cristuhu nhoprubzém na, sa'ëtê uptabi na te za aihini wama äma tirowê za'ra.

³⁰ Ìsisånawã nori, wa za oto aiwi rowaptêrê za'ra wa'wa ìsi'äma, 'Re ìhâimana u'äsi mono ma, asiptete sina ì'äma 're aimreme zusi aba mono zéb da hã. Wanhìb'apito Zezu Cristuhu zazei'wa, wasiré oto 're wahâimana za'ra mono wa, duré 'Re ìhâimana u'äsi mono p'ëzani nhimipawaptobzéb zarina, oto 're wasisawi pese uptabi za'ra mono wa, wa äne na aiwi rowaptêrê za'ra wa'wa.

³¹ E marì da. Zudeza na danhipti'a nho'ömo nhisi äma ìsazei'ö'wa nori 're ìhâimana za'ra mono nori hã, niha te te ìma rob'manharì za'ra tó da, te za ì'äma tiwi ìrowaptêrê u'äsi za'ra wa'aba mo. Duré Zeruzarê äma 'Re ìhâimana u'äsi mono nhìb'a'uwê 're ìhâimana za'ra mono nori hã, ta nori hã zudezu na ìwamri za'ra wê te, zudezu'ö nori nhoprubzê hã za te äma ì'äri hã te te siwi wê'ö za'ra tó da, te za duré ta nori äma zama äma aimreme zusi u'äsi 'wa.

³² Ìtoi uptabi na äma atême ìwisi za'ra wa'aba da, te za ì'äma aimreme zusi u'äsi 'wa. 'Re ìhâimana u'äsi mono, ìmorizé hã te te ìma pisutu wapsi, wa za tó äma atême ìwisi 'wa. Tawapsi ìma rowê uptabi di za, wasiré ìsazei'wa nori hã 'räwi wasisabu za'ra wê te. Te äma wazere wamhã, wa za a'ä ai'rata ìwa'utu za'ra wa'wa.

³³ 'Re ìhâimana u'äsi mono hã wama rowê nhomri'wa hã 'räwi asiré 're hâimana u'äsi za'ra wa'aba mono da, wa tó te ìsima 're aiwê u'äsi za'ra wa'wa. Tane tó.

16

Paru, tisiwadi nori te te ì'azawizé wasu'u

¹ Äne, wa za aima wasu'u za'ra wa'wa, wahidiba Pebi na ìsisi hã. Ta hã simizawi pese di. Sëtireza na 'ri nho'ömo nhisi äma, te ìsazei'wa nori hã te te 're apawaptob u'äsi.

² Da'ahã na ma tó te te 're da'apawapto pese. Ìzama te duré te te 're ìpawapto. Taha wa, ma'äpé asiwi äri wê wa'aba za, wasiré Wanhìb'apito zazei'wai wa, 'Re ìhâimana u'äsi mono nhìb'a'uwê, 're ìsiwaibui wê mono zém na. Marì zô tiwi rowaptá'ä wamhã, te za duré marì na asiwi ìpawaptob za'ra wa'wa.

³ Ma'äpé, duré ìma sawi za'ra wa'aba, Prisira nori hã Atiraha me, te äma ìsawi zahuré zéb zarina, rob'ui'éré na.

⁴ Ta nori hã ìsiré te te 're ìromhuri zahuré mono, Cristu Zezusihi wasu'u na. Ta nori hã da te päri da nherê, ma tó sisawi äna te te 're ìpawaptob u'äsi zahuré, pahì äna. Taha wa, te te 're ìpawaptob zahuré mono zém na, wa tó te 're uzei u'äsi zahuré. Tane nherê, ìwétési te äma 're uze zahuré mono ö di. Uburé zudezu'ö nori hã ìsazei'wa nori hã te duré te te äma 're uzei u'äsi za'ra, daro mono bã siré 're ìsi'rã'ötö mono nori hã.

⁵ Ma'äpé, duré uburé ìma sawi za'ra wa'aba, Prisira nori nhoröwa u ìsazei'wa nori, siré 're ìsi'rã'ötö mono nori hã, rowahutu u.

Duré asiwi ìma sawi za'ra wa'aba, ìsiwadi ìma ìsawi pe hã, Epenetu na ìsisi hã. Ta hã ma tó saze na'rata Cristu hã, Azi'a na danhipti'a nho'ömo nhisi äma.

⁶ Duré Mariza hã asiwi ìma sawi wa'aba. Ta hã te te aima 're romhuri pese za'ra wa'wa, simi'ëi uptabi na.

⁷ Duré asiwi ìma sawi zahuré wa'aba, Ädoronitu nori hã, Zuni'asihi me. Ta nori hã ìsiré zudezu nori, ma tó ìsiré tihâimana zahuré, dazazéb 'remhã. Cristuhu zadawa wasu'u'wa nori siré te te 're romhuri zahuré mono wa, tãma waihu'u pese za'ra di, ìsiré romhuri'wa nori ma hã. Ta nori hã ma tó ìwana saze na'rata zahuré, Cristu hã.

⁸ Ma'äpé duré asiwi ìma sawi wa'aba, ìsiwadi uptabi hã, Äprizatu na ìsisi hã. Ta hã te Cristu äma si 're hâimana.

⁹ Duré Ubanuhu zama asiwi ìma sawi wa'aba, wasiré romhuri'wa hã Cristuhu ma. Esitati hã ìsiwadi zama te za duré asiwi ìma ìsawi wa'wa, ìma ìsawi pe hã.

¹⁰ Ma'äpé duré asiwi ìma sawi wa'aba, Aperi hã. Ta hã marì na da te 're pibui ahã mono nherê, niwa Cristuhu wi sipi'rai waihu'u ö di. Duré asiwi ìma sawi za'ra wa'aba, Aristoburuhu nhoröwa 're, 're ìhâimana za'ra mono nori hã.

¹¹ Duré, Erodì'ä hã asiwi ìma sawi wa'aba, ìsiré zudezu hã. Duré wasiré ìsazei'wa nori hã Nasizuhu nhoröwa 're, 're ìhâimana za'ra mono nori hã asiwi ìma sawi za'ra wa'aba duré.

¹² Tiripena nori hã te za duré asiwi ìma ìsawi zahuré wa'wa, Tiripozaha me. Ta nori hã te Wanhìb'apito ma, te te 're romhuri zahuré. Duré wahidiba hã ìma ìsawi pe hã asiwi ìma sawi wa'aba, Pezidi na ìsisi hã. Ta hã simi'ë na te duré Wanhìb'apito ma, te te 're romhuri pese, wa'ä äna.

¹³ Ma'āpé duré asiwi ĩma sawi wa'aba, Rupu hā. Ta hā te duré te te 're romhuri pese, Wanhīb'apito ma. ĩna zama te za duré asiwi ĩma ĩsawi wa'wa. Ta hā ĩna ō nherē, ma tō te te 're ĩpawapto pese, dana hā ti'ra te te 're ĩpawapto pese za'ra mono ne.

¹⁴ Asĩtitu norĩ hā te za duré asiwi ĩma ĩsawi za'ra wa'wa, Predotihĩ me, duré Emesi, duré Patorobasi, duré Emasi hā. Duré uburé itēme 're ĩsi'rā'ōtō mono norĩ hā asiwi ĩma sawi za'ra wa'aba, ĩsazei'wa norĩ hā.

¹⁵ Ma'āpé duré asiwi ĩma sawi za'ra wa'aba, Pirorodu norĩ hā, Zurizaha me, duré Nere'u norĩ hā ĩhidiba me, duré Orĩpasihĩ zama. Duré ta norĩ siré 're ĩsi'rā'ōtō mono norĩ hā te za asiwi ĩma ĩsawi za'ra wa'wa, 'Re ĩhāimana u'asi mono nhĩb'a'uwē norĩ hā.

¹⁶ Uburé asiré ĩsazei'wa 're aihāimana za'ra wa'aba mono wa, te za asō'utu na asisawi sina 're asitob'rata hārā za'ra wa'aba mo.

Āmemhā uburé Cristuhu zazei'wa norĩ hā, ĩ'upsātā mono bā sitēme 're ĩsi'rā'ōtō mono norĩ hā te duré āma asawi za'ra wa'wa.

Paru hā, roti na za oto te te ĩ'rāsutuzém na rowasu'u

¹⁷ ĩsisānawā norĩ, wa za oto ĩnhimiroti na aima 'rāsutu za'ra wa'wa. Ni'wam norĩ hā te aimawi tinhimirosa'rata na te te āma 're 'wa'rutu za'ra, ĩsazei'wa norĩ wi. Te te tiwi āma 're 'wa'rutu za'ra mono wa, te ĩsazei'wa norĩ hā ĩmreme hā te te 're wapari za'ra. Taha zarina, te duré sima āma 're siwanhizari. Ta norĩ nhimirob'manharĩ wasété zéb zarina, te ĩsazei'wa norĩ hā 're si'marōpārĩ za'ra, tiwasété na. Zezusihĩ nhimiroti na, da te aima 're ĩroti za'ra wa'aba mono zéb upana, te ta norĩ hā te te dama 're roti za'ra, aimawi na si. Taha wa, te za tiwi 're asisawi pese za'ra wa'aba mo, ta norĩ siré 're aihāimana za'ra wa'aba mono tō da.

¹⁸ Ta norĩ hā Wanhīb'apito Cristuhu ma, te te 're romhuri za'ra mono ō di. Te te sima 're ĩwē za'ra mono zéb zarina si, te marĩ ĩwasété zō si 're sōpré. Ta norĩ hā sadawa nhĩpese nherē, te ĩsimiroti hā sēna nēwa da te 're wapari ze za'ra, danhimirosa'rata nhĩb'uwere na 're ĩdāhāimana za'ra mono norĩ hā. Mreme wapari ze wa, duré asa ĩmreme hā da te dasima 're wē za'ra mono da, te taré timreme amo na te te dama 're rowasu'u za'ra, da'āma 're wata za'ra mono sina. Tawamhā taha zarina, te za awa'awi ĩmreme na da te 're saze za'ra.

¹⁹ Tanei ō di, a norĩ wa'wa hā. Zezusihĩ wasu'uwē 're ĩwapari pese za'ra wa'aba mono zém na, ma tō daro mono bā ĩsazei'wa norĩ hā aiwasu'u za'ra wa'wa hā te te 're wapari ze za'ra. Taha wa, ma tō āma asina ĩma 're ĩrowē zani za'ra wa'aba mo.

Āne wa, wa za duré aima roti za'ra wa'wa. Asimiza'rese sina, te za marĩ ĩwē hā 're ĩmanharĩ za'ra wa'aba mono zéb da si, asina 're asōpré wa'aba mo. Marĩ ĩwasédé hā 're ĩmanharĩ za'ra wa'aba mono da, asima 're 'madā'ā za'ra wa'aba mono ō di za. Te za tiwi 're asiptete za'ra wa'aba mo, aiwasété wi hā.

²⁰ Rowē na 're ĩdanomro mono zé hā, 'Re ĩhāimana u'asi mono hawimhā. Ta hā te za rowézé hā te te aima 're anhomri 'wa. Wahi hā dapara na da te 're ĩwati'i za'ra mono ne, te za Satanasihi nhĩptetezé hā romhutu na te te tiwi 're a'uprosi 'Re ĩhāimana u'asi mono hā, tō ō hā Satanasi hā asahāpā 're hāimana za'ra wa'aba mono da oto.

Wanhīb'apito Zezusihĩ wi, wa wa te tiwi 're rowaptērē u'asi, tinhimipawaptozbé hā te te aima 're sōmri za'ra wa'aba mono da, ai'rata 're hāimana u'asi za'ra wa'aba mono da.

²¹ Timotiu hā, āme ĩsiré romhuri'wa hā te duré āma asawi za'ra wa'wa. Duré ĩsiré zudezu norĩ te duré āma asawi za'ra wa'wa, Rusizu norĩ hā, Zasāhā me, duré Sosipaturu hā.

²² Wa hā, Tési'u hā wa duré āma asawi za'ra wa'wa, Wanhīb'apito āma wasiré 're wahāimana za'ra mono wa. Wa hā Paru te te ĩma ĩ'awaihu'u mono zéb zarina, wa tō rob'ui'éré, ā ĩbāihā na hā.

²³⁻²⁴ Wa hā Paru, āne wa za duré āma aima waihu'u za'ra wa'wa. Da'izu hā tinhorōwa u te te ĩmazébré hā, te duré āma asawi za'ra wa'wa. Taha nhorōwa āma, te wasiré ĩsazei'wa norĩ hā 're si'rā'ōtō u'asi. Duré Erasitu hā āme 'ri nho'ōmo āma danhib'apito ma, rob'ui'prazé za'rata na romhuri'wa hā, te āma asawi za'ra wa'wa. Wasisānawā Tu'atu na ĩsisi zama, te duré āma asawi za'ra wa'wa.

Paru hā, 'Re ĩhāimana u'asi mono āma ĩwatazé wasu'u

²⁵⁻²⁶ 'Re ĩhāimana u'asi mono āma si, wa za 're wawata u'asi za'ra. Taha ma si, tāma waihu'u pese di, te te 're ĩwa'apawapto mono zéb da hā, Zezu Cristuhu wasu'uwē hā wa te 're ĩsaze za'ra mono zé hā wa te 're rēme za'ra mono āna, wanhiptete u'asi āma 're ĩwanomro mono zéb da hā. Taha wasu'uwē hā wa tō te dama 're wasu'u u'asi. Duréihā ĩwasu'uwē hā, 'Re ĩhāimana u'asi mono te te dama 're awaihu'u mono ō di. ĩwasu'uwē hā dama sa'rese āna, ma tō aré 're danomro. Tane nherē, ma tō 'Re ĩhāimana u'asi mono hā ĩwasu'uwē hā dama waihu'u oto, ĩsadawa wasu'u 'rata 'wa norĩ nhĩmi'ui'éré hawimhā. Taha wa, te oto ĩsimiwada'urizéb zarina si, da te 're waihu'u za'ra daro mono bā, da te āma 're ĩsazei pese za'ra mono zéb da hā, duré da te 're ĩwapari pese za'ra mono zéb da hā oto.

²⁷ 'Re ihâimana u'âsi mono hã misire te 're hâimana. Ôhõ si siwaprosi uburé marĩ hã tãma waihu'u pese di, taha ma si. Taha wa, taha âma si, wa za 're wawata u'âsi za'ra, Zezu Cristu te te wama 're ĩ'ab'manharĩ wẽ mono zéb zarina si. Tane tõe.

1 Corītu norī Corītu norī ma, Paru te te ĩrob'ui'éré na'rata zé Ībailhâ wasu'uzé

Paru hâ Corītu u morī wamhâ, ma tō 'Re ĩhâimana u'âsi mono mreme na dama rowasu'u. Taha wa, ĩsa'u hâ ma tō ĩsimirowasu'u wē zarina ĩsazei'wa norī hâ dasina tahâ â ni.

Ā ĩbailhâ na ma tō Paru hâ tâma âma rob'ui'éré za'ra CorĪtu âma ĩsazei'wa norī ma hâ, ni'wam norī hâ wasété na 're ĩhâimana za'ra mono wasu'u hâ te te wapari wa, duré sina 're sipo'o za'ra mono wa, siré ĩsazei'wa nherē. Taha wa, ma tō tâma waihu'u za'ra, 'Re ĩhâimana u'âsi mono nhīb'a'uwē norī hâ ĩ'uwaibaba si 're ĩnomro mono zém na hâ.

Paru hâ te te tâma rob'ui'éré za'ra wana ré hâ, ma tō rob'ui'éré hâ tâma me za'ra, Corītu norī hâ Paruhu ma. Taha na ma tō siwi sadanha, tinhimi'ui'éré za'ra na marĭ hâ tâma 're ĩhâimana za'ra mono zém na, ro'wa'rudu hâ. Capituru 7 âma hâ ma tō Paru hâ asa tâma âma rowasu'u za'ra, te te ĩsadanharĭ za'ra zém na hâ. Ma tō duré tâma waihu'u za'ra, ĩsazei'wai mono bâ 'Re ĩhâimana u'âsi mono pē'ézani hâ romhuri mono bâ te te tâma 're ĩ'apisutu mono zém na hâ (capituru 12, 14 âma hâ). Capituru 13 âma ma tō duré rowasu'u, 're ĩdasisawi za'ra mono zém na hâ. Capituru 15 âma hâ te duré rowasu'u, Zezusi hâ dâ'â nherē, sena na apâ ĩhâiwa'utuzém na hâ, duré taha zarina, wa norī zama apâ 're ĩwahâiwa'utu za'ra mono zém na hâ.

Paru te te ĩdazawizé wasu'u

¹⁻² Wa hâ Paru, wa âma aima rob'ui'éré za'ra wa'wa, Corītu na 'ri nho'ômo nhisi âma, 'Re ĩhâimana u'âsi mono nhīb'a'uwē 're aihâimana za'ra wa'aba mono norī ma. Wasisânawâ Sotēni hâ te duré âma asawi za'ra wa'wa.

'Re ĩhâimana u'âsi mono hâ ma tō ĩpisutu, te te sima ĩwēzéb zarina, Cristu Zezusihi zadawa wasu'u'wa, 're ĩhâimana mono da, ĩsadawa para. A norī wa'aba zama, ma tō te te 're aipisutu za'ra wa'wa, ĩsib'a'uwē si oto âma 're anomro wē wa'aba mono da, Cristu Zezusihi âma. Daro mono bâ, uburé Wanhīb'apito Zezu Cristuhu âma 're aiwata za'ra wa'aba mono norī ma zama, wa âne aima rob'ui'éré za'ra wa'wa. Aiwa, wa tō Wanhīb'apito na wa te 're sisi za'ra, simisutu.

³ Wamama ma, wa ai'âma 're ĩmreme u'âsi za'ra wa'wa, 'Re ĩhâimana u'âsi mono ma, duré Wanhīb'apito Zezu Cristuhu ma zama, ĩsimizawizé hâ ai'âma 're hâimana u'âsi za'ra wa'aba mono da, rowē u'âsi, âma 're anomro aba mono da.

'Re ĩhâimana u'âsi mono, tinhoprubzéb zarina, ĩwē si te te dama 're ĩ'anhomri mono zé wasu'u

⁴ 'Re ĩhâimana u'âsi mono âma, wa 're ĩwata u'âsi, ĩwē hâ te te aima 're sômri za'ra wa'aba mono wa, Cristu Zezusihi âma si oto 're anomro aba mono zéb zarina.

⁵ Cristuhu âma 're anomro aba mono wa, ma tō 'Re ĩhâimana u'âsi mono hâ ĩwē si te te aima 're sômri za'ra wa'wa. Ma tō duré te te 're aipawaptob za'ra wa'wa, ĩwasu'uwē na dama 're rowasu'u za'ra wa'aba mono da, duré 're ĩhâimana mono zém na, 're waihu'u pese za'ra wa'aba mono da.

⁶ Cristuhu wasu'uwē hâ ma tō 're ĩsazei pese za'ra wa'aba mo. Taha zarina, te oto asiptete sina âma 're anomro aba mo.

⁷ Taha wa, Wanhīb'apito Zezu Cristu apâ we ĩmorizéb zô, 're asimipari za'ra wa'aba mono ré, 'Re ĩhâimana u'âsi mono, tinhoprubzéb zarina ĩwē hâ te te aima 're ĩsômri za'ra wa'aba mono zéb zô, aiwi 're rowaptâ'â za'ra wa'aba mono ô di za oto.

⁸ Wanhīb'apito Zezu Cristu te za duré te te 're aipawaptob u'âsi za'ra wa'wa, asiptete sina âma 're anomro aba mono da. Nimahâ bâtâ na za we apâ ĩmorizéb u, tiwi 're aipizari za'ra wa'aba mono tō da, te za te te 're aipawaptob u'âsi za'ra wa'wa, ti'ab ré Zezusi hâ 're udâ za'ra wa'aba mono wa, tō taha bâtâ na aiwasédé hâ te te ai'âma sa'ra za'ra wa'aba tō da.

⁹ 'Re ĩhâimana u'âsi mono hâ wama umnhasi za'ra di, uburé te te wama 're ĩ'aropisutu mono zéb zarina, te te wama âma 're ĩ'a'uwaimrami mono zéb da hâ. Ta hâ ma tō te te 're aipisutu za'ra wa'wa, ĩ'ra siré 're anomro aba mono da, Wanhīb'apito Zezu Cristuhu siré.

Īsazei'wa norī, siwanhizari 're ĩhâimana za'ra mono zé wasu'u

¹⁰⁻¹¹ ĩsisânawâ norī, Corowihi nhorôwa âma 're ĩhâimana za'ra mono norī hâ ma tō we ĩma aiwasu'u za'ra wa'wa, 're asisada'âbâ u'âsi za'ra wa'aba mono zém na hâ, asiwanhizari âma 're aihâimana za'ra wa'aba mono zém na hâ. Taha wa, Wanhīb'apito Zezu Cristuhu zadawa para, wa za oto aima âma roti pese za'ra wa'wa, simisutu âma 're asisazei pese za'ra wa'aba mono da, asiwanhizari, âma 're aihâimana za'ra wa'aba mono tō da. Misi haré te za oto 're ĩpisutu za'ra wa'aba mo, simisutu asiré âma 're aihâimana za'ra wa'aba mono da oto.

¹² Áne wa za aima waihu'u za'ra wa'wa. Ni'wam nori me asiré 're aihâimana za'ra wa'aba mono nheré, te áne dama 're asiwasu'u za'ra wa'aba mo: "Wa nori hã Paruhu nhimiroti si, wa za wa te 're 'madâ'â za'ra." Duré ni'wam nori hã te 're siwasu'u za'ra, áne: "Wa nori hã Aporuhu nhimiroti si, wa za wa te 're 'madâ'â za'ra." Duré ni'wam nori hã te 're siwasu'u za'ra, áne: "Wa nori hã Pedruhu nhimiroti si, wa za wa te 're 'madâ'â za'ra." Duré ni'wam nori hã te áne 're siwasu'u za'ra: "Wa nori hã Cristuhu nhimiroti si, wa za wa te 're 'madâ'â za'ra." Áne te dama 're asiwasu'u za'ra wa'aba mo, aimreme si'ahâ aba na.

¹³ Tane nheré, Cristuhu zazei'wa nori hã te oto simisutu 're hâimana za'ra. Siwanhizari âma 're hâimana waihu'u za'ra mono ô di. Mare di. E wa hã Paru, wa tô asada idâ'â za'ra wa'wa, wedepo'o nnonhi'râmi na. Mare di. Wa hã ô di. E inhisi na ma tô â dawabzuri hã da te aima 're 'manharî za'ra wa'wa, Zezusihi nhisi upana. Mare di. Wa hã ô di.

¹⁴⁻¹⁵ Ai'rata 're ihâimana za'ra wa'aba mono ré, ai'âma 're inhih'auwê za'ra wa'aba mono da, te isima 're aiwê za'ra wa'aba mono 'wa'âhâ, ai'ahâ na wa aré â dawabzuri hã te aima 're 'manharî za'ra wa'wa, inhisi na. Tane nheré, ai'ahâ na te aima 're ab'manharî aba mono ô di. Crisipu nori ma si, wa tô â dawabzuri hã tâma 'manharî zahuré, Da'izuhu me. Áne wa, wa tô 'Re ihâimana u'âsi mono âma 're iwata u'âsi. Taha wa, a nori wa'wa hã inhisi na â dawabzuri hã te aima 're i'manharî za'ra wa'aba mono na, dama 're asiwasu'u za'ra wa'aba mono ô di za.

¹⁶ Áne na wa tô duré isina po're puru, Esitépanasihi ma zama, â dawabzuri te i'manharîzém na hã. Duré isôrowa âma isiré 're ihâimana za'ra mono nori ma zama, wa tô tâma 'manharî za'ra isiré. Âma ipo're pu'u za'ra ô di oto, ni'wam nori âma hã, â dawabzuri te tâma i'manharî za'ra zém na hã. Ta nori ma si, wa tô 'manharî za'ra.

¹⁷ Á dawabzuri hã te dama 're ab'manharî mono da, te te datême izatôri ô di, Cristu hã. Iwasu'uwê si te dama 're wasu'u mono da, ma tô datême izatô. Taha wa, ti'ai âma danhimirowaihu'u na da te dama 're iroti za'ra mono nei ô di wa hã, te dama 're irowasu'u mono zé hã. Ti'ai âma danhimirowaihu'u na Cristu te dama 're wasu'u mono 'wa'âhâ, wedepo'o nnonhi'râmi na dazada idâ'âzé wasu'u hã te aré wapu na dama 're hâimana. Tane 'wa'âhâ, Cristuhu wasu'uwê hã marî dai ô di aré, da te âma 're saze za'ra mono wa, 'Re ihâimana u'âsi mono te te âma 're ida'anho'reptui mono da hã.

'Re ihâimana u'âsi mono waihu'u pese na rowasu'u

¹⁸ 'Re ihâimana u'âsi mono, za te te i'uprosi za'ra nori hã, wedepo'o nnonhi'râmi na Cristuhu dá'âzé wasu'u na te te âma 're rosa'rata upa za'ra, sima, taré newa. Wa nori si uburé 'Re ihâimana u'âsi mono te te 're iwa'anho'reptui mono nori si, wa tô wa te 're waihu'u za'ra, Cristuhu dá'âzé hã ipire na hã. Taha wasu'u hã, 'Re ihâimana u'âsi mono waihu'u pe, te wasu'u. Taha si waihu'u pese uptabi di, te te 're ida'anho'reptui mono da hã, Cristu hã dazada idâ'âzé zarina.

¹⁹ Áne duréihã 'Re ihâimana u'âsi mono mreme na Isadawa wasu'u'wa nhimi'ui'éré hã: "Ni'wam nori hã inhimirowaihu'u pese na te 're pawaptob za'ra mono ô nheré, tinhimirowaihu'u pese na 'râwi 're si'madâ'â ze za'ra mono wamhã, wa za isimirowaihu'u pese zé hã te tiwi 're a'uprosi, ta nori wi, ti'ab ré danhimirosa'rata waihu'u pese na 're idahâimana za'ra mono zé hã marî dai ô na 'râwi da te dasina 're iwaihu'u pese za'ra mono zéb da hã oto."

Áne na hã duréihã 'Re ihâimana u'âsi mono mreme na rob'ui'éré, te wasu'u.

²⁰ Ti'ai âma danhimirowaihu'u pe hã, tarére 'Re ihâimana u'âsi mono ma hã. 'Re ihâimana u'âsi mono nhimiroti na Mozési te te âma irob'ui'éré zarina, dama rowahutu'wa nori nhimirowaihu'u pe hã tarére duré, tâma hã. Duré danhimiroti waihu'u pese na, 'râwi da te dasima âma 're iroti nhipeze za'ra mono zé hã tarére tâma hã. Uburé danhimirowaihu'u pese na dahâimanazé hã wapure di tâma hã, 'Re ihâimana u'âsi mono waihu'u pese ma hã. Áne, 'Re ihâimana u'âsi mono hã tiwaihu'u pese na te te dama 're i'ab'manharî mono zéb zarina, wa tô waihu'u za'ra ni.

²¹ Tinhimirosa'rata waihu'u pese na ma tô 'Re ihâimana u'âsi mono hã sima pisutu, dasi'uihã na danhimirosa'rata waihu'u pese na 'râwi da te 're waihu'u za'ra mono tô da, 'Re ihâimana u'âsi mono hã. Zezusi hã dazada idâ'âzé wasu'u hã, wa te dama 're iwasu'u za'ra mono hã taré newa te dasima da te âma 're rosa'rata upai u'âsi za'ra. Tane nheré, 'Re ihâimana u'âsi mono, ma tô sima pisutu, taha wasu'u na si te te 're anho'reptui mono da, te te sina 're i'umnhasi za'ra mono nori hã.

²² Zudezu nori hã marî dama i'manharî waihu'u ô hã, 'Re ihâimana u'âsi mono te te 're i'ab'manharî mono zéb zô si, te 're sôpré. Duré zudezu'ô nori hã uburé marî te te 're iwaihu'u pese za'ra mono zéb da si, te sima te te 're wê u'âsi za'ra.

²³ Tane nheré, wa nori hã Cristu, wedepo'o nnonhi'râmi na dazada idâ'âzé wasu'u si, wa tô wa te dama 're wasu'u za'ra. Tane nheré, ma tô taha wasu'uwê hã zudezu nori hã te te

siwi 're wē'ō za'ra. Zudezu'ō norī zama ma tō duré te te sima āma 're rosa'rata upai u'āsi za'ra, taré newa, marī da ihāimana ō newa, īwasu'uwē hā.

²⁴ Ni'wam norī si ma tō 'Re ihāimana u'āsi mono hā te te sima 're pisutu za'ra, tinhib'a'uwē da, ni'wam norī hā zudezu, duré ni'wam norī hā zudezu'ō. Ta norī si te Cristuhu dā'āzé wasu'u, te te 're waparī za'ra. Tawamhā āne hā, e marī te tāma wasu'u za'ra, Cristu, wedepo'o nhonhi'rāmi na idā'āzé wasu'u hā. Danhipai u 'Re ihāimana u'āsi mono waihu'u pe, te tāma wasu'u za'ra. Duré īsimiroti wē uptabi, te tāma wasu'u za'ra.

²⁵ 'Re ihāimana u'āsi mono nhimiroti si, danhipai u īwē uptabi hā tō. Duré danhipai u waihu'u pese uptabi di.

²⁶ Īsisānawā norī, ma'āpé asina aipo're pu'u za'ra wa'aba, 'Re ihāimana u'āsi mono, tinhib'a'uwē da, te te 're aipisutu za'ra wa'aba mono ō ré, 're aihāimana 'rata za'ra wa'aba mono zém na. Ai'umro wa'aba na si ma tō asiré norī ma, asimirosa'rata waihu'u pese na si, aré 're aihāimana za'ra wa'aba mo. Ai'umro wa'aba na si, ma tō asima aipire na aré 're aihāimana za'ra wa'aba mo. Ai'umro wa'aba na si, ma tō dama ĩpire norī 'ra na 're aihāimana za'ra wa'aba mo aré. Ai'ahā wa'aba na ma tō dama aiwapu na dama 're aihāimana za'ra wa'aba mo.

²⁷ Tane nherē, ni'wam norī hā dama hāimana nhimiza'rese'ō na, Īsazei'ō'wa norī te te āma 're ĩrosa'rata za'ra mono norī hā ta norī si ma tō 'Re ihāimana u'āsi mono hā te te sima 're pisutu za'ra, ĩsib'a'uwē si 're nomro mono da. E marī da, ma tō ta norī si te te sima 're pisutu za'ra, 'Re ihāimana u'āsi mono hā. Īsazei'ō'wa norī hā simirosa'rata waihu'u pese newa 're ĩsi'madā'ā ze za'ra mono norī hā, oto sisém na 're hāimana za'ra mono da. Duré Īsazei'ō'wa norī ma ĩwapu za'ra hā, ma tō duré te te 're pisutu za'ra, ĩsib'a'uwē 're nomro mono da. Īsazei'ō'wa norī ma, ĩpire za'ra hā oto sisém na 're hāimana za'ra mono da, ma tō dama ĩwapu norī si te te 're pisutu za'ra, ĩsib'a'uwē 're nomro mono da.

²⁸ Īsazei'ō'wa norī ma 're ihāimana wapu za'ra mono norī hā ma tō 'Re ihāimana u'āsi mono hā te te 're pisutu za'ra, ĩsib'a'uwē si 're nomro mono da, Īsazei'ō'wa norī te te siwi 're ĩwē'ō pese za'ra mono norī hā. Īsazei'ō'wa norī ma, pire na 're ihāimana za'ra mono zé hā te te tiwi 're a'uprosi mono da, ma tō dama ĩwapu norī si te te 're pisutu za'ra, ĩsib'a'uwē si oto 're nomro mono da.

²⁹ E marī da, ma tō āne hā te te dama 're ab'manharī, 'Re ihāimana u'āsi mono hā. Ni'wam norī hā tinhimirosa'rata waihu'u pese na 'rāwi ĩsō'a, sina 're wata tō za'ra mono da, ma tō āne te te dama 're ab'manharī, duré dama pire wē te, 'rāwi dama sina 're wata tō za'ra mono da.

³⁰ 'Re ihāimana u'āsi mono nhimipisutuzéb zarina si, te oto Cristu Zesusihī āma 're anomro aba mo. Cristuhu āma si oto 're anomro aba mono wa, te tinhimirowaihu ĩwē hā te te aima 're waihu'u u'āsi za'ra wa'wa. Cristuhu dā'āzém na si, ma tō 'Re ihāimana u'āsi mono hā te te 're wa'awēsāmri, wawasédé hā te te oto wa'āma 're ĩ'ab'madā'ā mono ō zarina. Taha zarina si, ma tō duré te te 're wa'apisutu, ĩsib'a'uwē si oto tāma 're wahāimana wē za'ra mono da. Taha zarina si, ma tō duré wawasété hawi wa'anho'reptu, sitēme te te 're wa'awaibui mono da.

³¹ Taha wa, wa norī hā Īsazei'wa oto 're wanomro mono wa, wato sina 're ĩwahāimana za'ra mono zém na dama 're wasiwasu'u za'ra mono wamhā, Wanhib'apito nhimipawaptobzém na si, wa za tō dama 're wasiwasu'u wē za'ra, wato sina 're ĩwahāimana za'ra mono na hā. Duréihā 'Re ihāimana u'āsi mono zadawa wasu'u wa hā ma tō āne na āma rob'ui'ére:

"Ni'wam norī hā to sina oto 're hāimana za'ra mono wamhā, Wanhib'apito te te 're ĩpawaptob za'ra mono zém na si, te za tō dama 're siwasu'u wē za'ra, to sina oto 're ihāimana za'ra mono zém na hā."

Āne duréihā ĩbahā na āma rob'ui'ére hā.

2

Cristu hā wedepo'o nhonhi'rāmi na dazada idā'āzé wasu'u

¹ Īsisānawā norī, ma'āpé ĩ'āma aipo're pu'u za'ra wa'aba. Wa hā atēme āma ĩmorī aba wamhā, 'Re ihāimana u'āsi mono nhimiroti hā aré dama ĩwaihu'u'ō hā, wa tō te aima 're wasu'u za'ra wa'wa. E tawamhā ĩnreme waparī ze na, 're ĩwaparī za'ra wa'aba mono da si, wa tō te ĩsi'āma 're rosa'rata, ĩnhimiroti wē wa, ĩ'āma 're atob'uzu za'ra wa'aba mono da. Mare di. E tī'ai āma danhimirowaihu'u pese na da te dama 're ĩroti za'ra mono ne, wa tō te aima 're rowasu'u za'ra wa'wa. Mare di. Tanei ō di, ĩnhimirowasu'u hā.

² Ai'rata 're ĩnhamra aba mono ré, wa tō ĩsima pisutu pese, Zezu Cristuhu wasu'uwē si te aima 're wasu'u za'ra wa'aba mono da, 'Re ihāimana u'āsi mono, Danho'reptui'wa da, Zezusi te te ĩpisudu hā wedepo'o nhonhi'rāmi na dazada idā'āzé wasu'u si.

³ Atême ãma ãmorí aba wamhã, ãpê'ê 'remhã ãnhib'uware di. Taha wa, wa tã ãpahi te, rêrê, ãnhimromhuri na 'Re ãhãmana u'ãsi mono ma, te ãma 're ã'uwaimrami mono zém na hã te 're 'wanhi'riti mono ò'umnhasite.

⁴ Zezusihi wasu'uwê, te aima 're wasu'u za'ra wa'aba mono wamhã, ti'ai ãma danhimirowaihu'u pese na da te dama 're ãroti za'ra mono ne, te aima 're rowasu'u za'ra wa'aba mono ò di, ãma 're ãzaze za'ra wa'aba mono da hã. 'Re ãhãmana u'ãsi mono pê'êzani hã tiwaihu'u pese na te te 're ã'aipawaptob za'ra wa'aba mono na si, ma tã sena na 're ãsazei pese za'ra wa'aba mo, Zezusihi wasu'uwê hã.

⁵ Taha wa, ti'ai ãma danhimirowaihu'u pese zarina, Zezusi hã Danho'reptui'wa na 're saze za'ra wa'aba mono ò di. Mare di. 'Re ãhãmana u'ãsi mono, tiwaihu'u pese na te te 're ã'aipawaptob za'ra wa'aba mono zéb zarina si, ma tã ãma 're ãsazei pese za'ra wa'aba mo.

'Re ãhãmana u'ãsi mono waihu'u pese na rowasu'u

⁶ Ti'ai ãma ãsazei'ò'wa norí nhimirowaihu'u zarina, te aima 're rowasu'u za'ra wa'aba mono ò di. Hãiwa hawi dahãimanazém na rowaihu'u na si, wa tã ãsazei'wa norí ma, te tãma 're rowasu'u za'ra, 'Re ãhãmana u'ãsi mono pê'êzani te te tãma 're ãwaihu'u za'ra mono zéb zarina si, prédub sina ãma 're ãhãmana za'ra mono norí ma hã. ã hã rotí hã ti'ai ãma ãsazei'ò'wa norí nhimiroti nei ò di. Daro mono bã dama rotí'wa norí nhimiroti nei ò di. Ta norí nhimiroti nhiptetezê hã daro mono bã te za tiwi 're si'utõrî za'ra.

⁷ E 'wa ãwaihu'u pese nhimiroti, te dama 're ãwasu'u mono hã bétê. 'Re ãhãmana u'ãsi mono nhimiroti hã aré dama ãwaihu'u'ò si, wa wa hã te dama 're wasu'u u'ãsi, ãwaihu'u pese zarina ãsimiroti wê uptabi si. Ta hã ma tã aré dawí udã, da te 're waihu'u za'ra mono tã da a'ã, ãsimiroti wê wasu'u hã. Tane nherê, te te aropoto mono ò ré, ma tã te te sima 're wa'apisutu siro, ãwaihu'u pese siré si oto 're wahãimana u'ãsi za'ra mono da, rowê uptabi na.

⁸ Tiwaihu'u pese zarina, 'Re ãhãmana u'ãsi mono nhimirowaihu' ãwê uptabi hã te te waihu'u za'ra ò di, ti'ai ãma dama rotí'wa norí hã ãsazei'ò'wa norí hã. Te te waihu'u za'ra 'wa'ãhã, Wanhíb'apito, danhipai u' ãwaihu'u pe hã te te siwi wírî ò di aré, wedepo'õ nnonhi'rãmi na hã.

⁹ Tane nherê, ta norí hã te te waihu'u za'ra ò di tã. Duréihã 'Re ãhãmana u'ãsi mono zadawa wasu'u'wa hã ma tã ãne na ãma rob'ui'éré siro:

“‘Re ãhãmana u'ãsi mono zawi pese 'wa norí ma, ãwê hã te te tãma 're ã'apisutu mono zé hã, te te tãma ãma 're ã'uwaimrami mono zéb da hã, dasi'uihã na datõmo na da te 're 'madã'ã waihu'u za'ra mono ò di. Duré dapo're na da te 're wapari waihu'u za'ra mono ò di. Duré dapê'ê na dasi'uihã na da te dasina 're waihu'u za'ra mono ò di, da te dasina ãma 're ã'uwaimrami za'ra mono zéb da hã, 'Re ãhãmana u'ãsi mono, ãwê hã tinhíb'a'uwê norí ma, te te 're ã'apisutu mono hã.”

ãne duréihã ãwasu'u na ãma rob'ui'éré, ãbaihã na hã.

¹⁰ Wama si, ma tã tinhimiroti hã dama ãwaihu'u'ò hã te te wama 're awaihu'u, 'Re ãhãmana u'ãsi mono hã. Tipê'êzani na si ma tã te te wama 're awaihu'u tã. 'Re ãhãmana u'ãsi mono pê'êzani ma si, waihu'u pese di tã, 'Re ãhãmana u'ãsi mono nhimiroti te te wama 're ã'awaihu'u mono zéb da hã. E marí wa. Uburé marí hã tãma waihu'u pese wa, ãpê'êzani ma hã. 'Re ãhãmana u'ãsi mono, uburé te te sima 're ã'aroti mono zé hã dama ãwaihu'u'ò hã, tãma waihu'u pese di. Uburé marí na 're ãhãmana mono zém na zama, tãma waihu'u pese di, ãpê'êzani ma hã.

¹¹ Ni'wa hã 'rãwi tipê'ê na tihãimanazém na, te te sima 're ã'awaihu'u mono zé hã, e 'wa hã te za ãmana'rãmi hawim nherê, tiwi waihu'u. ã'upana nherê, da te tiwi waihu'u ò di za, ãhãimanazé hã. Marí na 'rãwi sima ãrosa'rata'wai ma si, waihu'u pese di, 're ãhãmana mono zé hã. Tane duré, 'Re ãhãmana u'ãsi mono hãimanazé hã ãpê'êzani ma si, waihu'u pese di. Taha wi hã, ni'wa te te duré waihu'u ò di.

¹² ãsazei'ò'wa norí nhimirosa'rata zarina, oto 're wahãimana za'ra mono ò di, wa norí hã. 'Re ãhãmana u'ãsi mono pê'êzani ré si, wa oto 're wahãimana za'ra, hãiwa hawi te te wei watême ãsatõrî ré si. ãwê hã te te wama 're ã'anhomri mono na, wa te 're waihu'u za'ra mono da, ma tã Tipê'êzani hã wei watême satõrî za'ra, 'Re ãhãmana u'ãsi mono hã.

¹³ Taha wa, wa norí hã ti'ai ãma danhimirowaihu'u pese zarina, wa te oto dama 're rowasu'u za'ra mono ò di. 'Re ãhãmana u'ãsi mono pê'êzani te te wama 're ã'aroti mono zéb zarina si, wa oto wa te dama 're rowasu'u za'ra. ãpê'ê 're, ãpê'êzani tãma 're ãhãmana za'ra mono norí ma si, wa ãsimiroti wê hã wa te tãma 're wasu'u za'ra, 'Re ãhãmana u'ãsi mono hãimanazé wasu'uwê na hã.

¹⁴ 'Re ãhãmana u'ãsi mono pê'êzani te te wama 're ã'aroti mono zé hã, te ãsazei'ò'wa norí hã te te siwi 're wê'ò pese za'ra, taré newa, duré 'rãwi si'uihã na rosa'rada hã te te ãma waihu'u pese za'ra ò wa, ta norí hã. 'Re ãhãmana u'ãsi mono pê'êzani, ãpê'ê 're, tãma 're hãmana za'ra

mono õ nherê, te te âma 're waihu'u za'ra mono õ di tô. 'Re İhâimana u'âsi mono pê'êzani na si, te za da te âma 're waihu'u za'ra.

¹⁵ 'Re İhâimana u'âsi mono pê'êzani, İpê'ê 're, tâma 're İhâimana za'ra mono nori si, te oto te te 're waihu'u za'ra, uburé te te tâma 're İroti za'ra mono zéb zarina, niha oto 're İhâimana za'ra mono zéb da hâ. Taha wa, İsavei'õ'wa nori hâ te te oto 're wawaihu'u za'ra mono õ di, aimawi 're wahâimana za'ra mono wa oto.

¹⁶ Durêihâ 'Re İhâimana u'âsi mono zadawa wasu'u'wa hâ ma tô âhâ wasu'u na âma rob'ui'ére siro, âne na hâ:

"E 'wa hâ, Wanhîb'apito nhimirosa'rada hâ te te tiwi İwaihu'u da bâ bété. E 'wa hâ te te durê tâma İroti da bâ."

Âne durêihâ âhâ wasu'u na âma İrob'ui'ére hâ, Wanhîb'apito nhimirosa'rada, dasi'uihâ na da te tiwi 're İwaihu'u za'ra mono õ zém na hâ. Tane nherê, wa tô wa nori hâ Cristuhu nhimirosa'rada hâ waihu'u pese za'ra ni, 'Re İhâimana u'âsi mono pê'êzani, wapê'ê 're, oto wama 're hâimana za'ra mono wa, te te wama 're İ'waihu'u mono zém na hâ.

3

Paru hâ Aporuhu me, 'Re İhâimana u'âsi mono ma, te te 're İromhuri zahuré mono zé wasu'u

¹ İsisânawâ nori, 'Re İhâimana u'âsi mono pê'êzani, İpê'ê 're, tâma 're İhâimana za'ra mono nori ma si, wa Zezusihi wasu'uwê si, wama İpire uptabi si, te tâma 're wasu'u za'ra, dama İsa'rese'õ hâ. Tane nherê, ai'rata 're İnhamra aba mono ré, âne na te aima 're rowasu'u waihu'u za'ra wa'aba mono õ di. E marî wa. İsavei'õ'wa nori 're İhâimana za'ra mono ne, zahadu 're aihâimana za'ra wa'aba mono wa, durê ai'uté hâ marî te te 're İsa'rese za'ra mono õ ne, Zezusihi wasu'uwê hâ 're wapari za'ra wa'aba mono nherê, asima 're waihu'u pese za'ra wa'aba mono õ wa.

² Ai'uté hâ tisa uptabi na 're saihuri waihu'u mono õ wa, te za tina hâiwa'u si te te 're wapsómri za'ra. İna hâ İsa uptabi hâ te te tâma 're sómri waihu'u za'ra mono õ di. Tane, wa tô wa hâ rotî İwapure na si te aima 're rotî za'ra wa'wa, Zezusihi wasu'uwê na hâ, zahadu aima pibui prâ za'ra wa'aba wa, 're İwaihu'u pese za'ra wa'aba mono zéb da hâ. Âhâna hâ bété. Zahadu tô aima waihu'u pese za'ra wa'aba õ di.

³ E marî wa. İsavei'õ'wa nori 're İhâimana za'ra mono zéb zarina, zahadu 're anomro aba mono wa. Taha wa, te zahadu 're asi'ruiwapari za'ra wa'aba mo, marî na. Te durê 're asisada'âbâ u'âsi za'ra wa'aba mo.

Âne na 're aihâimana za'ra wa'aba mono zé hâ, e marî te aima wasu'u za'ra wa'wa. Cristu hâ 're saze za'ra wa'aba mono õ ré, aiwasété na 're aihâimana za'ra wa'aba mono zé, zahadu 're İrême waihu'u za'ra wa'aba mono õ zé, te aima wasu'u za'ra wa'wa, İsavei'õ'wa nori 're İhâimana za'ra mono zém ne hâ.

⁴ Ni'wam nori me asiré 're aihâimana za'ra wa'aba mono nherê, te âne dama 're asiwasu'u za'ra wa'aba mo: "Wa nori hâ Paruhu nhimiroti si, wa wa te 're madâ'â za'ra." Durê ni'wam nori hâ te âne 're siwasu'u za'ra: "Wa nori hâ Aporuhu nhimiroti si, wa wa te 're madâ'â za'ra." Âne na dama 're asiwasu'u za'ra wa'aba mono wamhâ, e marî te wasu'u. Tô İsavei'õ'wa nori 're İhâimana za'ra mono zém na, zahadu 're aihâimana wasété za'ra wa'aba mono zé, te aima wasu'u za'ra wa'wa.

⁵ Tazahâ, âhâ zarina si te za wa'âma 're İrosa'rata u'âsi za'ra wa'aba mo. Wa nori hâ 'Re İhâimana u'âsi mono ma si, wa te 're İromhuri mono, wa 're wahâimana. İwasu'uwê na, wa te aima 're İrowasu'u za'ra wa'aba mono zéb zarina, te oto asina 're İ'umnhasi za'ra wa'aba mo, Wanhîb'apito hâ. Ta hâ te te wama İpisutuzéb zarina si, wa wa te tâma 're romhuri pese. Taha da si, wa wa nori hâ 're wahâimana.

⁶ Wa hâ Paru, buru na da te dasima 're robdî'i za'ra mono õ ré, da te 're İrobzuri mono ne, wa tô dawana te aima 're rowasu'u za'ra wa'wa, Cristuhu wasu'uwê na hâ. Durê, da te 're robzuri mono pari, da te oto 're İrobdî'i za'ra mono ne, ma tô Aporu hâ İza'u hâ te te aima âma 're rowasu'u wê za'ra wa'wa. Tane nherê, 'Re İhâimana u'âsi mono si waihu'u pese di, te te 're İ'aipawaptob za'ra wa'aba mono zéb da hâ, âma 're aihâimana préduub za'ra wa'aba mono da, Zezusihi si asina 're umnhasi u'âsi za'ra wa'aba mono da. Buru na hâ 'Re İhâimana u'âsi mono waihu'u pese na si, dama 're İro'wanhipré za'ra mono ne, ma tô 'Re İhâimana u'âsi mono si te te 're aipawaptob za'ra wa'wa, âma 're aihâimana préduub za'ra wa'aba mono da.

⁷ Taha wa, robzuri'wa nori ne, İwasu'uwê na te te dama 're İrowasu'u rata za'ra mono nori hâ, pire na 're hâimana za'ra mono õ di. Durê robdî'i'wa nori ne, daza'u te te dama âma 're İrowasu'u za'ra mono nori hâ, durê dama pire na 're hâimana za'ra mono õ di. 'Re İhâimana u'âsi mono si, te pire uptabi na 're hâimana u'âsi, taha si te te 're da'apawapto wê mono wa, Zezusihi ne dahâimana préduub sina, oto 're İdahâimana za'ra mono zéb da hâ.

8-9 Robzuri'wa norī hā robdī'i'wa norī me, tāma 're İro'wanhipré za'ra mono da si, te aiwa simisutu te te 're romhuri za'ra. Tane duré, wa hā İwasu'uwē na te aima 're rowasu'u 'rata za'ra wa'aba mono wamhā, duré Aporu hā İza'u te te aima āma 're rowasu'u za'ra wa'aba mono wamhā, aiwa wa tō wa zahuré, wa te wasima 're aiwē za'ra wa'wa, İwasu'uwē hā 're waihu'u pese za'ra wa'aba mono da. 'Re İhāimana u'āsi mono ma si, wa wa zahuré, wa te tāma 're romhuri, aiwa. Taha wa, wa te tāma 're İromhuri mono zéb zarina, te za 'Re İhāimana u'āsi mono hā wapawa'ā, İwē uptabi na.

Duré daburu hā, e 'wa te hā. E āma İromhuri'wa norī te hā, buru hā. Mare di. Misire İtede'wa na te 're hāimana, buru tede'wa hā. Tane duré, a norī wa'wa hā İnhīb'a'uwē, 're anomro aba mono o di. Duré Aporuhu nhīb'a'uwē, 're anomro aba mono o di. Mare di. 'Re İhāimana u'āsi mono nhīb'a'uwē si, te oto 're aihāimana za'ra wa'aba mo.

Āne wa za duré aima āma romnħimiré'z'ra wa'wa, 'ri na. 'Ri hā 'ri'wa norī tei o di. 'Ri tede'wa te, 'ri hā. Tane, a norī wa'wa hā wanħīb'a'uwē, 're anomro aba mono o di, İwasu'uwē na, wa te aima 're rowasu'u za'ra wa'aba mono nherē. E marī wa. 'Re İhāimana u'āsi mono nhīb'a'uwē si, oto 're anomro aba mono wa.

10 'Ri na romhuri'wa norī hā 'ri na'rata uimrehēne, te za siwi 'manha, sipese na. Tane duré wa hā, İnhimromhuri wē na, wa tō sāna'rata, te aima 're İrowasu'u za'ra wa'aba mono na hā, Cristuhu wasu'uwē na, 'Re İhāimana u'āsi mono, tiwaihu'u pese na te te oto 're İpawapto mono zéb zarina. Duré 'ri na'rada hā da te dasiwi 'manharī pari, İhāiba amo norī hā İsisiwi te te oto siwi İ'ri ne, tane te duré ni'wam norī hā te te aima āma 're rowasu'u za'ra wa'wa, İza'u hā. 'Ri na'rata 'manharī nhisiwi, da te dasiwi 'ri wamhā, pibui pese na te za dasiwi 'ri ni, marī İwē na si. Tane ni'wam norī hā Cristuhu wasu'uwē na te te dama 're rowasu'u za'ra mono wamhā, pibui pese na te za oto te te dama āma 're rowasu'u za'ra, İ'uwaiababa si.

11 'Ri'wa norī hā, 'ri na'rada te te siwi 'manharī wamhā, misire İwē uptabi si te za tō siwi 'manharé. Tane duré, misire İwasu'uwē hā te 're hāimana, dawana te aima 're İwasu'u za'ra wa'aba mono hā, tō o hā Zezu Cristuhu wasu'uwē hā. İwasu'u aimawi hā 're 'maiħāimana mono o di, da te āma 're saze za'ra mono wa, 'Re İhāimana u'āsi mono te te āma 're İda'anho'reptui mono zéb da hā.

12-13 Ni'wam norī hā, 'ri na'rata 'manharī nhisiwi te te siwi 'ri wamhā, āté marī hā unħama ro'o na 're İsi'unħama mono o na si, te za siwi 'ri, İwa'ābā za'ētē na, etē'ubuzi pré oru na, duré etē'ubuzi'a prata na, duré etē waipo na. Āté İhāiba amo norī hā te za marī İwa'ābā sryyre na si siwi 'ri, unħama wa İro'o pese na si, wede na hā, duré du na hā, duré amħho teihī na hā. Tawamhā nimahā na 'ri hā ro'o nherē, si'unħama o wamhā, te za waihu'u za'ra ni, marī İwē na si 'ri'wa norī hā te te siwi İ'manharī na hā. Tazahā si'unħama wamhā, te za marī İwē prā na si te te siwi İ'manharī na waihu'u za'ra ni. Tane te ni'wam norī hā Cristuhu wasu'uwē na, İ'uwaiababa si te te dama 're rowasu'u za'ra. Duré ni'wam norī hā senai'o na te te dama āma 're roti za'ra. Tawamhā niwapsi te za 'Re İhāimana u'āsi mono hā pibu za'ra, Zezushi wasu'u na te te dama 're İrowasu'u za'ra mono zé hā, pé tō sena zó. Za da'āma İsipo'ozéb āma, te za pibu za'ra. Tawamhā te za waihu'u za'ra, sena na Cristuhu wasu'uwē na te te dama 're İrowasu'u za'ra mono norī hā, duré senai'o na te te dama 're İrowasu'u za'ra mono norī zama.

14 'Ri'wa norī hā marī İwē na si te te siwi 'ri wa, unħama ro'o na zata o wamhā, 'ri tede'wa hā te za waihu'u, tiwi İzata o na hā, tāma 're İsab u'āsi mono na hā. Taha zarina, te za 'ri'wa norī ma, marī İwē hā tāma sōmri za'ra, İwa'rāmi. Tane duré, ni'wam norī hā İwasu'uwē na tō sena na te te dama 're İrowasu'u za'ra mono zém na, 'Re İhāimana u'āsi mono, te te waihu'u za'ra wamhā, tawapsi te za İwē hā tāma sōmri za'ra İwa'rāmi, za da'āma İsipo'ozéb āma hā.

15 Duré 'ri'wa norī hā marī İwē prā na si te te siwi 'ri wa, unħama ro'o na zata wamhā, 'ri tede'wa nhoprubzé hā te te sina uwaimrami za'ra o di za, 'ri'wa norī hā. Te za simini za'ra, 'ri tede'wa nhoprubzé hā. Tane duré, ni'wam norī hā taré āma 're datob'uzu za'ra mono da, Cristuhu wasu'uwē na te te dama 're rowasu'u za'ra mono wamhā, 'Re İhāimana u'āsi mono hā İwē hā te te tāma 're sōmri za'ra mono o di za İwa'rāmimhā, za da'āma İsipo'ozéb āma hā. Ta norī hā te za tō simini za'ra. 'Re İhāimana u'āsi mono nhoprubzé hā za te te simini za'ra nherē, tane nherē, te za tō sō'reptu za'ra, ropipa hawi.

Āté ni'wa hā 'ri para sāmra ré, te za İsōrōwa hā İré āro. Tawamhā āté unħama ro'o za'ētē 'rowi nherē, te za watobro rob u, sisō'reptu da. Tawamhā aré dā'ā da nherē, te za 'rāwi sisō'reptu. Tane, ni'wam norī hā taré āma 're datob'uzu za'ra mono da, Cristuhu wasu'uwē na te te dama 're İrowasu'u za'ra mono norī hā, ropipa u si'aba'réd da nherē, te za 'Re İhāimana u'āsi mono hā sō'reptu za'ra, Cristuhu zazei'wa 're hāimana za'ra mono wa. Tinhoprubzé hā za te te tāma sōmri za'ra dai o nherē, te za tō ta norī hā sō'reptu za'ra, 'Re İhāimana u'āsi mono hā.

¹⁶ Duréihā 'Re ihāimana u'āsi mono āma 're īdawata za'ra mono zéb 're, ma tō ō hā dama 're hāimana, 'ri īwē uptabi wa. Tane te oto aipē'ē 're, ai'āma 're sōrōwa za'ra wa'wa. Īpē'ēzani hā te oto aipē'ē 're, 're sāmra u'āsi za'ra wa'wa. E āne hā 'rāwi asina waihu'u za'ra wa'aba ō di bété.

¹⁷ 'Re ihāimana u'āsi mono hā tite da si, ma tō sima pisutu, ti'ai āma īsōrōwa 're, 'ri 're wa'wa hā siwaprosi āma 're hāimana mono da, wē uptabi na. Tane ma tō duré a norī wa'wa hā aipisutu za'ra wa'wa, īsib'a'uwē si oto 're anomro aba mono da, taha āma si 're aihāimana wē u'āsi za'ra wa'aba mono da. Taha wa, ni'wam norī hā apā te te 're aiwasété za'ra wa'aba mono wamhā, 'Re ihāimana u'āsi mono si te za ta norī hā te te 're a'uprosi.

¹⁸ A norī wa'wa hā aihāimanazé senai'ō na, taré 'rāwi asima 're asadawa nhipese za'ra wa'aba mono ō di za. Ni'wam norī hā asiré 're aihāimana za'ra wa'aba mono nheré, te rosa'rada hā te te si'āma 're upa za'ra, waihu'u pese newa, ti'ai āma īsazei'ō'wa norī nhimirowaihu'u pese si te te 're waihu'u za'ra mono nheré, te te sima 're īruiwaparī za'ra mono hā. 'Re ihāimana u'āsi mono nhimiroti īwē uptabi hā ta norī hā te te 're waihu'u za'ra mono ō nheré, te 'rāwi waihu'u pese newa, te te si'āma 're rosa'rata upa za'ra, asiré 're aihāimana za'ra wa'aba mono norī hā. Taha wa, 'Re ihāimana u'āsi mono nhimiroti īwē uptabi zō si, te za asima 're asōpré u'āsi aba mo, asimiza'rese sina 're aihāimana za'ra wa'aba mono da. Īsazei'ō'wa norī hā asimiza'rese āna 're aihāimana za'ra wa'aba mono newa, te za te te ai'āma 're rosa'rata upa za'ra wa'wa. Tane nheré, te za tō 're aihāimana wē za'ra wa'aba mo, asimiza'rese sina.

¹⁹ Ti'ai āma īsazei'ō'wa norī hā tinhimirowaihu hā te te sima 're īruiwaparī u'āsi za'ra mono hā, tarére 'Re ihāimana u'āsi mono ma hā. Duréihā ma tō āne na ni'wa hā 'Re ihāimana u'āsi mono āma rob'ui'éré siro, ībaihā na hā:

“‘Re ihāimana u'āsi mono hā te īsazei'ō'wa norī nhimirowaihu'u na 're ihāimana za'ra mono norī ma, te te tāma 're rob'manharī za'ra, tinhimirowaihu'u pese na, 'rāwi 're sisimini za'ra mono da.”

²⁰ Apito Dawi hā ma tō duré āne na āma rob'ui'éré siro, duréihā:

“Īnhib'apito ma si, 'Re ihāimana u'āsi mono ma si, waihu'u pese di, ti'ai āma īsazei'ō'wa norī nhimirowaihu hā marī da, ihāimana ō na hā. Tarére tāma hā, īsazei'ō'wa norī nhimirowaihu hā.”

Āne duréihā apito Dawihi nhimi'ui'éré, 'Re ihāimana u'āsi mono wasu'u na hā.

²¹⁻²² Ni'wam norī hā asiré 're aihāimana za'ra wa'aba mono hā te sina 're wata za'ra mono sina, te te sima 're nharī za'ra, āne: “Paruhu nhimiroti si, wa za wa norī hā wa te 're 'madā'ā za'ra, uburé rowahutu'wa norī nhimiroti nhipai u, wē uptabi wa.” Ni'wam norī hā te duré āne te te sima 're nharī za'ra: “Wa norī hā Aporuhu nhimiroti si, wa za wa te 're 'madā'ā za'ra, uburé rowahutu'wa norī nhimiroti nhipai u, wē uptabi wa, wama hā.” Āne na 'rāwi asima 're rosa'rata za'ra wa'aba mono ō di za. Wa hā Paru, duré Aporu, duré Pedru, duré uburé wasiré rowahutu'wa norī zama, simisutu wa wasiré wa te aima 're romhuri za'ra wa'wa, Zezusi hā 're īsazei pese za'ra wa'aba mono da si. Uburé marī hā ti'ai āma 're ihāimana za'ra mono hā, te aima 're hāimana za'ra wa'wa. Aihāiba ré ré, 're aihāimana za'ra wa'aba mono zé hā te duré aima 're hāimana za'ra wa'wa, Zezusihī āma si 're anomro aba mono zéb da hā. 'Re atā'ā za'ra wa'aba mono zé hā, te duré aima 're hāimana za'ra wa'wa. Āhāna uburé marī hā ai'āma 're īromhāimana za'ra wa'aba mono zé hā, te aima 're hāimana za'ra wa'wa, za ai'āma 're īromhāimana za'ra wa'aba mono zéb zama, 'Re ihāimana u'āsi mono te te aima 're īpisutu za'ra wa'aba mono zéb zarina, Zezusihī si 're sazei pese za'ra wa'aba mono da. Āne te uburé marī hā aima 're hāimana za'ra wa'wa, īsazei'wa norī ma hā.

²³ Duré a norī wa'wa hā te Cristuhu ma si 're aihāimana za'ra wa'aba mo, īsib'a'uwē na hā. Ta hā, 'Re ihāimana u'āsi mono te te pisutu wa, ma tō wei mo ti'ai u, Danho'reptui'wa da hā. Taha wa, Cristuhu nhib'a'uwē na si, te za asima 're asiwasu'u za'ra wa'aba mo. Wanhib'a'uwē na, asima 're asiwasu'u za'ra wa'aba mono ō di za.

4

Paru hā, Cristuhu zadawa wasu'u'wa na dama īsiwasu'uzé wasu'u

¹ Wa hā Paru, duré Aporu, duré ni'wam norī me, wa Cristuhu ma si, wa te 're romhuri za'ra. Īwasu'uwē hā dama īwaihu'u'ō hā, ī'uwaibaba si, wa te dama 're wasu'u za'ra mono da, ma tō wapisutu za'ra, 'Re ihāimana u'āsi mono hā. Taha na si, wanhimirohmurizé hā. Taha wa, te za āne na si wa'āma 're īrosa'rata za'ra wa'aba mo.

² Ni'wa hā īsibro, da te tāma 're 'madā'ā mono da, te te sima da'maipisutu wamhā, e niha ihāimanazé hā za, tāma īrob'madā'ā wa da hā. Īsib'apito ma, tāma umnhasi na, te za te te tāma 're rob'madā'ā wē, te te wēsāmri da.

³ Wa hã bété. 'Re ihâimana u'âsi mono ma, i'umnhasi na, wa tô te dama 're rowasuu, Cristuhu wasu'uwê na hã. Tane nherê, a nori wa'wa hã i'umnhasi na iwasu'uwê na te dama 're irowasuu mono na asiwi iwaihu'u aba zéb zarina, asiwi iwêsâmri aba zô, isina 're inhimnhasi mono ô di. Mare di. Duré ni'wam nori hã te te siwi âma iwaihu'u za'ra zô, isina 're inhimnhasi mono ô di. Izama, 're isi'umnhasi mono na, iwasu'uwê hã te dama 're iwasu'uwê na hã 'râwi isi'uihã na isiwaihu'u da hã, mare di.

⁴ Âhãna hã, 'Re ihâimana u'âsi mono wi, te âma i'upazém na hã marî ô di, inhimirosa'rata remhã oto. E taha zarina, tâma i'umnhasi sina, iwasu'uwê te dama 're iwasu'uwê mono zé, te wasu'u. Mare di. Wanhîb'apito si te za iwaihu'u, tâma i'umnhasi na hã, duré tâma i'umnhasi ô na hã.

⁵ Taha wa, bâta na, Wanhîb'apito uburé za te te Ida'awaihu'uzé wana, asiwi iwaihu'u aba zarina, asiwi iwê'ô za'ra wa'aba da, asima i'âma 're rosa'rata za'ra wa'aba mono ô di za, Wanhîb'apito apã wei morî ô ré hã. Ni'wam nori zama asiwi iwaihu'u aba zéb zarina, asiwi wê'ô za'ra wa'aba da, asima âma 're rosa'rata za'ra wa'aba mono ô di za, bâta na Wanhîb'apito za da'âma isipo'ozé wana. Taha si te za dawî a'upsibi nhamra oto sô'awi, uburé dapê'ê 're, 'râwi da te dasima 're irosa'rata za'ra mono zé hã. Marî hã barana, da te 're madâ'â za'ra mono da, da te 're i'uiwê za'ra mono ne, te za Wanhîb'apito hã sô'awi oto dawî a'upsibi nhamra, uburé marî hã da te 're 'manharî za'ra mono da, da te dasima 're iwê za'ra mono zém na, danhimirosa'rada hã. Tawapsi te za 'Re ihâimana u'âsi mono hã wasu'u wê za'ra ni'wam nori hã, ti'ab ré tihâimana wê zém na te te tâma âma 're uwaimrami za'ra mono wa, te te 're i'awaihu'u mono zéb zarina.

⁶ Isisânawã nori, te 're aipawapto b za'ra wa'aba mono da, wa tô âne na aima isiwasu'u za'ra wa'wa ihâimanazém na hã, Aporuhu hâimanazém na zama. 'Re ihâimana u'âsi mono nhimiroti 'rata na rob'ui'ére zarina si, 're aihâimana za'ra wa'aba mono da, wa tô âne na aima roti za'ra wa'wa, wasiré rowahutu'wa nori hã tisiré nori nhimiroti nhipai u, wê uptabi newa, ta nori niwî 're aihâimana za'ra wa'aba mono wê te, asina 're aiwata za'ra wa'aba mono tô da.

⁷ E asiré nori nhipai u 're aihâimana pire za'ra wa'aba mono bâ, te bété âne na 're asi'madâ'â ze za'ra wa'aba mo. E marî te aré aima 're hâimana za'ra wa'wa, 'Re ihâimana u'âsi mono te te aima 're sômri za'ra wa'aba mono ô 'wa'âhã. Marî iwê hã aima 're hâimana za'ra wa'aba mono ô di aré. Uburé iwê hã 'Re ihâimana u'âsi mono nhoprubzéb si, te oto aima 're hâimana za'ra wa'wa. E marî wa, te bété asina 're aiwata za'ra wa'aba mo, uburé marî iwê hã aima 're ihâimana za'ra wa'aba mono hã, 'Re ihâimana u'âsi mono nhoprubzéb ô newa, aihawim na aima 're wairéê aba mono newa.

⁸ A nori wa'wa hã, 'Re ihâimana u'âsi mono, Tipê'êzani na rowê te te aima 're ipisutu za'ra wa'aba mono zô, aiwi sô 're irowaptâ'â za'ra wa'aba mono ô na, te 'râwi 're asi'madâ'â ze za'ra wa'aba mo, dasa hã da te 're huri mono wa, da te 're i'mahâpârî pese za'ra mono ne. E âne bâ, te 'râwi asi'âma 're irosa'rata ze za'ra wa'aba mo. Danhibro pese wa, marî zô dawî 're irowaptâ'â za'ra mono ô ne, te asina 're aiwata za'ra wa'aba mo, 'Re ihâimana u'âsi mono, Tipê'êzani na rowê te te aima 're ipisutu za'ra wa'aba mono zô, aiwi 're rowaptâ'â za'ra wa'aba mono ô newa. Ti'ai âma danhib'apito nori hã tinhîb'a'uwê nori ma, pire na 're ihâimana za'ra mono ne, te asiré isazei'wa nori ma aipire na 're aihâimana za'ra wa'aba mono na 're asi'madâ'â ze za'ra wa'aba mo, wa nori hã 'Re ihâimana u'âsi mono zadawa wasu'u'wa nori hã danhib'apito nori ne wapire na 're wahâimana za'ra mono ô nherê. E âne hã i'uwaibaba bâ. Wê di tô. Tane hã aima wê za'ra wa'aba ze te bâ, taha na si 're aihâimana za'ra wa'aba mono, aipire na isazei'wa nori ma hã 're aihâimana za'ra wa'aba mono da. Niha hã 'wa'âhã, wa aré wa nori zama wapire na asiré 're wahâimana za'ra wa'wa, uburé isazei'wa nori ma hã.

⁹ Wa nori hã Zezusihi zadawa wasu'u'wa na dama 're iwahâimana za'ra mono hã, isazei'wa nori ma, wawapure na damana wawi taré 're iwahâimana za'ra mono da si, ma tô te te 're wa'apisutu. Wa hã âne na wa tô rosa'rata na hã isina waihu'u. Ni'wam nori hã marî te te 're i'manharî wasété za'ra mono zéb zarina, te za da te dasima âma 're roti za'ra, dasisô'a da te 're simroi mono wa, âma 're dawa'ê za'ra mono da. Tane duré, wa nori hã sô'awi wa te dama 're sadawa wasu'u za'ra mono da, ma tô 'Re ihâimana u'âsi mono hã te te 're wa'apisutu, da te dasiwi 're wawê'ô za'ra mono wa, uburé dasisô'a wa'âma 're dawa'ê za'ra mono da nherê, duré hãiwa âma 'Re ihâimana u'âsi mono ma, romhuri'wa nori nho'a zama.

¹⁰ Cristuhu wasu'uwê na si, wa te dama 're rowasuu za'ra mono wa, te isazei'ô'wa nori hã wanhimiza'rese'ô na 're iwahâimana za'ra mono na te te wa'âma 're rosa'rata upa za'ra. E a nori wa'wa hã, 'Re ihâimana u'âsi mono nhimiroti, wanhipai u aima waihu'u pese za'ra wa'aba bâ, te âne hã 'râwi asimirosa'rada hã asi'âma 're i'manharî za'ra wa'aba mo, Cristuhu âma 're aihâimana za'ra wa'aba mono na. Duré wa nori hã isazei'ô'wa nori ma, wawapure na 're iwahâimana za'ra mono na, te ta nori hã te te wa'âma 're rosa'rata za'ra. E a nori wa'aba si,

tâma aipire za'ra wa'aba bâ, te bété 'râwi âne na asi'âma 're îrosa'rata za'ra wa'aba mo. Duré wa norî hâ dama wawapure na 're îwahâimana za'ra mono na, da te wa'âma 're rosa'rata za'ra mono wa, da te dasiwi 're wawazéb za'ra mono ô di. Âté a norî wa'aba si, da te 're aiwazé pese za'ra wa'aba mono na, te 'râwi asi'âma 're îrosa'rata ze za'ra wa'aba mo. E âne hâ î'uwaibaba.

¹¹ Wa norî hâ bété, îwasu'uwê na si, wa te dama 're îrowasu'u za'ra mono norî hâ. E niha âhâna wahâimana za'ra zé hâ. Nimomo 're wanomro mono wamhâ, wa za tô mra hâ wa te 're sépata za'ra, 'rubu zama. Wa'uza hâ'ratare ré si, wa za tô 're wanomro. Te za duré da te 're wahâ za'ra, danhib'rata na, da te 're îwa'ruiwapari za'ra mono zéb zarina. Daro mono bâ 're wanomro mono ré, 're îwanhimi'wara mono zéb da, da te wama 're pisutu za'ra mono ô di za. Hâiwi si, wa za 're wanomro u'âsi.

¹² Wahâimanazéb da hâ, wawasutu nherê, wa wanhib'rata na wa te 're romhuri pese za'ra. Duré da te wa'âma 're wasété za'ra mono nherê, wa da'âma 're wamreme zusi u'âsi, 'Re îhâimana u'âsi mono ma, îwê hâ te te dama 're anhomri mono da. Duré da te wama 're rob'manharî wasété za'ra mono nherê, wa wanhiptete na ôhō âma si 're wahâimana za'ra, asa wa te dama âma 're wa'râmi za'ra mono âna.

¹³ Duré da te dasima 're wawas'u wasété za'ra mono nherê, wa wamreme wê na si, wa te dama âma 're wa'râmi za'ra, wawaimri na. Duré, ropru hâ da te dasiwi 're îsa'wari za'ra mono ne, te da te dasiwi 're wawê'ô pese za'ra. Âne 're îwahâimana za'ra mono zé hâ, âhâna hâ.

¹⁴ E âne na te aima îroti za'ra wa'aba zé ma, asiséb za'ra wa'aba da, wa tô âne na aima âma rob'ui'éré za'ra wa'wa. Mare di. Taha dai ô di. Taré înhimiroti hâ waihu'u pese za'ra wa'aba da, wa âne na aima âma rob'ui'éré za'ra wa'wa, î'ra ne oto îma 're aihâimana za'ra wa'aba mono wa, îma asawi uptabi za'ra wa'aba wa.

¹⁵ Âté da'ahâ na te oto da te aima 're roti u'âsi za'ra wa'wa, Zesusihi nhimiroti wê na hâ, taha na si âma 're anomro wê wa'aba mono da. Da'ra hâ da te dasisô 're îmadâ'â pese za'ra mono ne, te ta norî hâ te te 're ai'madâ'â pese za'ra wa'wa, Zesusi hâ 're rême za'ra wa'aba mono tô da. Tane nherê, îsiwaprosi wa aimama uptabi aba ne, aima 're îhâimana za'ra wa'wa. Îwasu'uwê na te aima 're îrowasu'u za'ra wa'aba mono zéb zarina, Cristu Zesusi hâ 're saze za'ra wa'aba mono wa, wa oto aimama uptabi aba ne, 're îhâimana, da'ra hâ damama nhimirohuri hawi, dama 're îpoto za'ra mono ne.

¹⁶ Taha zarina, wa za oto aima roti za'ra wa'wa, Cristuhu nhirâ zarina 're îmorî wê ne, oto 're anomro wê wa'aba mono da, aima âma 're îsisanho za'ra wa'aba mono zéb zarina.

¹⁷ Taha da, wa tô Timotiu hâ atême satôri za'ra wa'wa, te te âma 're aipawaptob za'ra wa'aba mono da. Ta hâ î'ra ne, oto îma 're hâimana mono wa, îma sawi uptabi di duré. Ta hâ te Wanhib'apito si te te 're 'madâ'â pese, tiwi sipi'rai âna. Ta hâ atême wibi aba wapsi, te za Cristu Zesusihi âma si 're îhâimana mono zém na âma aipo're pu'u za'ra wa'wa, daro mono bâ îsazei'wa norî hâ 're îsi'râ'ôto mono norî ma, te 're îroti mono zém na zama.

¹⁸ Ni'wam norî hâ 'Re îhâimana u'âsi mono nhimiroti na, înhipai u te te 're îwaihu'u pese za'ra mono na, ma tô 'râwi 're si'madâ'â pire za'ra, asiré 're aihâimana za'ra wa'aba mono norî hâ. Taha wa, ta norî ma îpahî za'ra newa, ma tô î'âma rosa'rata za'ra, atême wa'aba, za âma îmorî su'u ô na hâ. Taha zarina, ma tô duré 'râwi sina 're wata za'ra.

¹⁹⁻²⁰ Tane nherê, Wanhib'apito te te îma pisutu wamhâ, wa za tô âma atême îmorî su'u za'ra wa'wa, romhutu na. Ni'wam norî hâ 'Re îhâimana u'âsi mono nhib'a'uwê 're nomro mono wamhâ, timreme nhipese na Cristuhu wasu'uwê na te te dama 're rowasu'u za'ra mono ô di za, da te 're wapari ze za'ra mono da. 'Re îhâimana u'âsi mono pê'ézani, tiwaihu'u pese na te te 're îpawaptob za'ra mono zém na si, te za te te 're dapawaptob za'ra, da te âma 're saze za'ra mono da. Taha zarina si, te za âma 're hâimana wê u'âsi za'ra, ta norî hâ.

Taha wa, âma atême îmorî za'ra wa'aba wamhâ, wa za îsina aiwaihu'u za'ra wa'wa, aiwaihu'u pese na 'râwi 're asi'madâ'â ze za'ra wa'aba mono norî hâ. 'Re îhâimana u'âsi mono pê'ézani, tiwaihu'u pese na te te 're aipawaptob za'ra wa'aba mono zéb zarina, sena na 're îdapawaptob za'ra wa'aba mono na, wa za duré îsina aiwaihu'u za'ra wa'wa, sena na âma 're îdapawaptob za'ra wa'aba mono ô na zama. Asina 're aiwata za'ra wa'aba mono sina, aiwaihu'u pese na dama 're asiwasu'u za'ra wa'aba mono zép si, te waihu'u tô da, wa za âma atême îmorî za'ra wa'wa, sena na 'Re îhâimana u'âsi mono pê'ézani nhimipawaptobzéb zarina, 're aihâimana za'ra wa'aba mono na si, 'râwi te aiwaihu'u za'ra wa'aba da, îsi'uihâ na.

²¹ Âne, wa tô aima âma roti za'ra wa'wa. Tawamhâ, e ma hâ te za asima îwê za'ra wa'wa. Atême âma îmorî aba wamhâ, e da'ra, da te 're îhâ za'ra mono ne, wa za îmreme na aihâ za'ra wa'wa, înhimiroti hâ 're wapari za'ra wa'aba mono ô 'ru te. Âté wa za tô aihâ za'ra wa'wa, aihâimanazém na 're uwainrami za'ra wa'aba mono ô wamhâ. E îhâimanazém na atâma na

wa za aima ihâimana za'ra wa'wa, inhimizawi pese zéb zarina, inhimiroti hâ 're wapari pese za'ra wa'aba mono wê te. Ma'âpé, 'râwi oto asi'uihâ na asima pisutu za'ra wa'aba, niha 're anomro aba mono zéb da hâ.

5

Aibâ hâ isazei'wa norî wazari, 're i'maihâimana wasété mono zé wasu'u

¹ Airom hawimhâ, wa tô aiwasu'u wasédé hâ wapari za'ra wa'wa, ni'wa hâ asiré wa'aba nheré, pi'ô na hâimana wasété na 're ihâimana mono na hâ. Ta hâ ma tô, u, timama mro hâ ti'â. Taha wa, te oto siré 're hâimana zahuré. Âne hâ wasété uptabi di, 'Re ihâimana u'âsi mono ma hâ. Isazei'ô'wa norî hâ 're hâimana wasété uptabi za'ra mono nheré, ta norî ma zama, wê za'ra ô di, âne hâ. Tane nheré, te asiré isazei'wa hâ dame 're 'maihâimana wasété, aibâ hâ. Âne hâ wasété uptabi di.

² 'Re ihâimana u'âsi mono nhimiroti hâ aima iwaihu'u pese za'ra wa'aba na, 'râwi 're asi'madâ'â ze za'ra wa'aba mono nheré, e mari wa, asiwi wê'ô za'ra wa'aba ô di bété, asô'a za'ra wa'aba, aibâ tina waptém na isipsaihuri hâ. Aibâ hâimana wasété zarina, aiwi irobzei'ô za'ra wa'aba na, te aré asiwaihu'u za'ra wa'wa, asiré isazei'wa 're hâimana mono wa. Taha zarina, te aré tiwi irosawi za'ra wa'wa, rowahutu u asiré 're hâimana aba mono tô da oto. E âne hâ tiwi sizâri za'ra wa'aba ô di bété.

³⁻⁵ Wa hâ ai'rata inhamra aba ô nheré, wa tô romhâ hawim nheré, te âma 're rosa'rata u'âsi, aibâ 're ihâimana wasété mono âma hâ. Tane nheré, ai'rata inhamra za'ra wa'aba ne, wa za aima âma roti za'ra wa'wa. Âne wa tô waihu'u, Wanhîb'apito Zezu Cristuhu zadawa para. Taha wa, te za misi bâta na asi'râ'ô'tô'wa, aibâ zada. Tawamhâ asiré sébré aba wamhâ, inhimirosa'rata zarina, duré Wanhîb'apito Zezu Cristuhu zadawa para, te za aibâ iwasédé hâ asiwi isa'rêi wa'wa a'â asisiti, Satanasihî ma, ta hâ te te tâma 're rob'manharî wasété mono wa, robzei'ô te te sina waihu'u da, tiwasédé hâ te te oto rême pese da, tihâimana wasété na isiwaihu'uzém na hâ. Âne da, te za asiwi isa'rêi wa'wa a'â, Satanasihî ma, Wanhîb'apito hâ nimahâ bâta na apâ wei morî wapsi, te te sô'reptu da.

⁶ Aiwaihu'u pese na 'râwi asina 're aiwata za'ra wa'aba mono zé hâ, e wê di. Wê ô di. Âne, wa za aima âma romnhimîr'é za'ra wa'wa, asina iwaihu'u za'ra wa'aba zéb da hâ. I'u'êtê wapuzé hâ syryre na te za da te âma 're wazari za'ra, iduptobzéb da hâ, i'u'êne hâ. Syry na da te âma 're wazari za'ra mono nheré, sa'êtê di za oto, i'u'êne hâ. Tane duré, aibâ hâ tiwasédé te te 're i'manharî mono hâ misi nheré, te za asiré isazei'wa norî hâ âma 're hâimana wasété za'ra, te te âma 're sasômri za'ra mono wa, iwasété na hâ. E âne hâ zahadu aima pibui prâ za'ra wa'aba di bété.

⁷⁻⁸ Âne, wa za duré aima âma romnhimîr'é za'ra wa'wa. 'Re ihâimana u'âsi mono, zudezu norî hi'rata norî hâ Ezitu hawi te te isô'reptu za'ra zém na, 're sipo're pu'u za'ra mono da, tisa te te 're huri mono wamhâ, te za i'u'êtê wapuzé hâ rob u te te 're sa'ra a'â, 'ri mono bâ, 'ri para 're isimi'wara mono hâ. Taha zarina, te za i'u'êtê dupto'i'ô na si tisa hâ te te 're huri, Pascowa na dato nhisizém na hâ. Tane duré, a norî wa'wa hâ te za aiwasédé hâ oto 're i'rême pese za'ra wa'aba mo, 're aipoto téb za'ra wa'aba mono zéb zarina si, i'u'êtê wapuzé hâ rob u da te dasisiti 're isani za'ra mono ne.

Zudezu norî hâ, Pascowa na tisa te te 're huri mono wamhâ, ihi'rata norî ma, 'Re ihâimana u'âsi mono, tinhimihâzé te te tâma îba'a za'ra zém na, âma 're sipo're pu'u za'ra mono wamhâ, te za âma 're toi u'âsi za'ra. Tane ma tô duré Cristu hâ wazada dârâ, wawasédé hâ te te wama 're l'apari mono da hâ, 'Re ihâimana u'âsi mono hâ. Taha wa, zudezu norî hâ Pascowa na tito te te 're i'manharî za'ra mono ne, wa za oto wa norî zama 're watoi u'âsi za'ra, Cristuhu âma si oto 're wanomro mono wa. Zudezu norî hâ i'u'êtê wapuzém na tisa te te 're huri mono ô di, Pascowa na tito te te 're 'manharî za'ra mono wamhâ. I'u'êtê dupto'i'ô na si, te tisa hâ te te 're huri. Tane, wa norî hâ wasiré isazei'wa norî hâ, wa za wahâimanazéb 'rada iwasédé hâ wa te 're rême pese za'ra. Wawasédé hâ oto wa te 're 'manharî za'ra mono âna, wa za 're wahâimana wê u'âsi za'ra, wanhimîrosa'rada hâ sena na si, duré wahâimanazé sena na si.

⁹ Âne wana ré, inhimî'ui'ére na, wa tô aré aima roti pese za'ra wa'wa, aibâ norî, pi'ô na tiwasédé te te 're i'manharî za'ra mono norî âma 're asapa'a za'ra wa'aba mono tô da, duré pi'ô norî, aibâ na tiwasédé te te 're i'manharî za'ra mono norî âma 're asapa'a za'ra wa'aba mono tô da.

¹⁰ Âne na te aima roti za'ra wa'aba wamhâ, isazei'ô'wa norî âma, te aima roti za'ra wa'aba ô di, dahâiba na dawasédé, da te 're i'manharî za'ra mono norî âma hâ. 'Re simarî ahâ za'ra mono da, danhibrom na te te 're ida'ruiwapari za'ra mono norî âma, te aima roti za'ra wa'aba ô di, duré danhibrom na dawi 're isipsaihuri za'ra mono norî âma, duré 'Re ihâimana u'âsi mono upana romhâiba 'manharî âma 're iwata za'ra mono norî âma. Ta norî nhiti 're

aihâimana za'ra wa'aba mono tō da, te aima roti za'ra wa'aba ò di, Ìsazei'ò'wa norĩ nhiti. Mare di. Uburé Ìsazei'ò'wa norĩ nhiti 're aihâimana waihu'u za'ra wa'aba mono ò di tō.

¹¹ Āne si, wa tō aima roti za'ra wa'wa, ni'wam norĩ hā Zezusihi zazei'wa na dama 're siwasu'u za'ra mono nherē, 're hâimana wasété za'ra mono wamhā, ta norĩ hâimanazém na āma 're asapa'a za'ra wa'aba mono tō da. Āté Ìsazei'wa na dama 're siwasu'u za'ra mono nherē, te pi'ò'i hâiba na tiwasédé te te 're 'manharĩ za'ra, aibā wamhā. Duré pi'ò'i wamhā, áté aibā hâiba na te tiwasédé te te 're 'manharĩ za'ra. Duré áté 're simarĩ ahā za'ra mono da si, te danhibrom na te te 're da'ruiwapari za'ra. Duré áté 'Re Ìhâimana u'ási mono upana, te romhâiba 'manharĩ āma si 're wata za'ra. Duré áté dawasédé hā taré te te da'āma 're Ìsa'ra mono na, te ta norĩ hā te te dama 're rowasu'u wasété za'ra. Āté âzézei'wa te duré 're hâimana za'ra. Āté danhibrom na te duré dawī 're sipsaihuri za'ra. Āne hā ni'wam norĩ hā zahadu tihâimana wasété na 're hâimana u'ási za'ra mono nherē, asiré Ìsazei'wa na aima 're siwasu'u za'ra wa'aba mono wamhā, Ìhâimanazém na āma 're asapa'a za'ra wa'aba mono ò di za. Duré nimahā bātā na Ìsiré 're asaihuri aba mono da hā, mare di za.

¹²⁻¹³ Wa norĩ hā wasiré Ìsazei'wa norĩ hā, Ìsazei'ò'wa norĩ hâimanazé, wa te wasiwi 're waihu'u za'ra mono wa, wa te wasiwi 're Ìwē'ò za'ra mono da hā, 'rāwi 're wasipisutu za'ra mono ò di za. Mare di. 'Re Ìhâimana u'ási mono si, te za Zezusihi zazei'ò'wa norĩ hā te te 're awaihu'u, te te siwi 're Ì'awē'ò mono da hā. E tawamhā, ni'wam norĩ hā rowahutu u asiré 're asirā'òtō aba mono nherē, marĩ Ìwasédé hā te te 're Ì'manharĩ za'ra mono zéb zarina, asiwi 're wē'ò za'ra wa'aba mono ò di za. Te za tō asiwi 're Ìwē'ò za'ra wa'aba mo, asiré 're aihâimana za'ra wa'aba mono wa. Duréihā 'Re Ìhâimana u'ási mono zadawa wasu'u'wa hā ma tō āne na āma rob'ui'éré, Ìbaihā na hā:

"Ni'wam norĩ hā 're nomro wasété mono wamhā, te za oto asisiti tāma 're Ìrob'ru za'ra wa'aba mo, asiré wa'aba 're hâimana za'ra mono tō da."
 Āne duréihā āma rob'ui'éré hā.

6

Ìsazei'wa norĩ hā sisada 're Ìhâimana za'ra mono zé wasu'u

¹ Ni'wa hā asiré Ìsazei'wa nherē, marĩ hā te te aiwi 're 'mai'manharĩ wasété aba mono wa, sada 're ai'maihâimana aba mono wamhā, e Ìsazei'ò'wa norĩ u, te za 're Ìsimroi wa'aba mo, marĩ te te aiwi 're Ì'manharĩ wasété aba mono zém na, tāma 're wasu'u za'ra wa'aba mono da, dama rowairébé'wa norĩ ma. Mare di. Ì'uwaibaba ò di. 'Re Ìhâimana u'ási mono nhīb'a'uwē u si, te za 're Ìsimroi wa'aba mo, ta norĩ si te te 're waihu'u za'ra mono da, marĩ hā te te aiwi 're Ì'manharĩ wasété aba mono zém na hā, tāma 're wasu'u za'ra wa'aba mono da.

² Apto'oré si, da'āma Ìsipo'ozéb āma, wa norĩ hā 'Re Ìhâimana u'ási mono nhīb'a'uwē norĩ hā, Cristuhu siré, wa za wapire na dama rowairébé za'ra ni, 're Ìdahâimana wasété za'ra mono zém na hā. Oro āne hā aima waihu'u pese za'ra wa'aba za. Āne hā Cristuhu siré, wapire na za wa te dama rowairébé za'ra wamhā, e tawamhā ti'ab ré, marĩre hā asiré Ìsazei'wa norĩ wi 're 'mai'manharĩ wasété aba mono wa, asisada 're ai'maihâimana aba mono wamhā, e aima waihu'u pese za'ra wa'aba ò di bété, Ì'uwaibaba tō sena asima āma 're asiwaihu'u za'ra wa'aba mono zéb da hā, marĩ asiwi 're Ì'mai'manharĩ wasété aba mono zém na hā. Āne hā tō aima waihu'u pese za'ra wa'aba di, āma 're asiwaihu'u za'ra wa'aba mono zéb da hā.

³ Duréihā 'Re Ìhâimana u'ási mono ma, hâiba āma romhuri'wa norĩ hā tiwi Ìsipizari za'ra hā, wa za duré wapire na tāma rowairébé za'ra ni Ìsiré, za da'āma Ìsipo'ozéb āma hā. E āne hā zahadu aima pibui prā za'ra wa'aba di bété. Taha wa, ti'ab ré, marĩ wa, wasisada 're wahâimana za'ra mono wamhā, wa za wawaimri wa te wasima 're rowaihu'u za'ra, apā wama 're rowé za'ra mono da. Āne wamhā, wa za tō wa te wasina āma 're uwaimrami za'ra, wasima.

⁴ Taha wa, marĩ hā asiré Ìsazei'wai wi 're 'mai'manharĩ wasété aba mono wa, asisada 're ai'maihâimana aba mono wamhā, e marĩ wa, te Ìsazei'ò'wa norĩ u 're asisimroi wa'aba mo, ta norĩ si aiwasété na te te 're aiwaihu'u za'ra wa'aba mono da hā, ta norĩ hā asiré Ìsazei'wa na 're hâimana za'ra mono ò nherē, dawasété na dawaihu'u wa norĩ hā.

⁵ Ìnhimiroti ma, aséb za'ra wa'aba da nherē, wa āne na aima rowaihu'u za'ra wa'wa. E asiré Ìsazei'wa, 're 'mai'hâimana mono ā bā bété, aiwasété na aiwaihu'u aba 'wa da hā.

⁶ E āne hā Ì'uwaibaba bā, te asiré Ìsazei'wa 're aihâimana za'ra wa'aba mono nherē, asisada 're aihâimana za'ra wa'aba mo, Ìsazei'ò'wa norĩ u si 're asisimroi wa'aba mono da, ta norĩ si te te 're aiwaihu'u za'ra wa'aba mono da, aiwasété aba na. E āne hā Ì'uwaibaba, aima za'ra wa'aba hā.

⁷ Āne zarina, asisada 're aihâimana za'ra wa'aba mono wa, dama rowairébé'wa norĩ u, 're asisimroi wa'aba mono wamhā, Ìsazei'wai hâimanazém na asima 're uwaimrami za'ra wa'aba mono ò di za. Ni'wam norĩ hā asiré Ìsazei'wa nherē, te te aima 're rob'manharĩ wasété za'ra

wa'aba mono wamhã, tâma âma 're wa'rãmi za'ra wa'aba mono âna, te za tô õne haré 're aihâimana za'ra wa'aba mo. Ni'wam norĩ hã asibrom na aivi 're sipsaihuri za'ra wa'aba mono wamhã, tâma âma 're wa'rãmi za'ra wa'aba mono õ di za duré. Tawapsi, te za asina âma 're i'uwaimrami za'ra wa'aba mo. Isazei'wai hâimanazém na hã.

⁸ Tane nherê, a norĩ wa'wa hã asiré Isazei'wa nherê, dawasété na dawaihu'u'wai u, 're asisimroi wa'aba mono wa, te tô asima 're i'rob'manharĩ wasété za'ra wa'aba mo, 'rãwi. Taha wa, te duré asima 're asimiza'repese za'ra wa'aba mo 'rãwi, âne na hã, asiré Isazei'wa 're aihâimana za'ra wa'aba mono nherê.

⁹⁻¹⁰ Tiwasété si te te 're i'manharĩ u'âsi za'ra mono norĩ hã, ta norĩ hã 'Re ihâimana u'âsi mono, da'âma 're isib'a'uwê mono zé hã te te dame sina 're uwaimrami za'ra mono õ di za. E âne hã, zahadu waihu'u za'ra wa'aba õ di bété. Âne na hã taré 'rãwi asima 're asadawa nhípese za'ra wa'aba mono õ di za. Dahâiba na dawasédé te te 're i'manharĩ za'ra mono norĩ hã, ta norĩ hã 'Re ihâimana u'âsi mono, da'âma 're isib'a'uwê mono zém na, dame 're hâimana za'ra mono õ di za, duré 'Re ihâimana u'âsi mono upana, romhâiba 'manharĩ âma 're iwata za'ra mono norĩ hã, duré damro na dawi 're isimisaihuri za'ra mono norĩ hã, duré aibã si'uiwa na 're isivasété za'ra mono norĩ hã, duré danhibrom na dawi 're isipsaihuri za'ra mono norĩ hã, duré danhibrom na te te 're ida'ruiwapari za'ra mono norĩ hã, duré âzézei'wa 're ihâimana za'ra mono norĩ hã, duré te te da'âma 're iwasété za'ra mono norĩ hã, duré danhibrob zô dapãr'i'wa norĩ hã. Ta norĩ hã dasiré 're hâimana za'ra mono õ di za, 'Re ihâimana u'âsi mono, da'âma 're isib'a'uwê mono zéb âma hã.

¹¹ Âne na si, ma tô ni'wam norĩ hã aré 're aihâimana wasété u'âsi za'ra wa'aba mo, 're saze za'ra wa'aba mono õ di hã. Tane nherê, 'Re ihâimana u'âsi mono hã Zezusihi dâ'ázém na, ma tô oto te te 're ai'upsô za'ra wa'wa, aiwasété hawi. Ma tô duré te te 're aipisutu za'ra wa'wa, isib'a'uwê si oto âma 're anomro wê wa'aba mono da. Aiwasédé hã te te oto ai'âma 're i'ab'madã'â aba mono õ zéb zarina, ma tô duré te te 're aiwêsãmri za'ra wa'wa, Wanhib'apito Zezu Cristuhu zadawa para, 'Re ihâimana u'âsi mono pê'êzani nhimipawaptobzém na hã.

Dahâiba na 're idasiwasété za'ra mono zé wasu'u

¹² Ni'wam norĩ hã asiré Isazei'wa 're ihâimana za'ra mono norĩ hã te âne te te sima 're nharĩ za'ra: "Marĩ hã wa te 're 'manharĩ za'ra mono tô da, 'Re ihâimana u'âsi mono te te wawi 're awê'õ mono õ nherê, wa norĩ zama, wa te wasiwi 're wê'õ za'ra mono õ di za, wa te 're 'manharĩ za'ra mono tô da. Wa za tô wa te 're 'manharĩ za'ra, wa te wasima 're iwê za'ra mono zéb uwaibaba." Âne na te ni'wam norĩ hã te te sima 're nharĩ za'ra. Tane tô. Ta hã wê di. Tane nherê, marĩ hã te 're hâimana za'ra, iwê prã hã, 'Re ihâimana u'âsi mono te te wawi 're i'awê'õ mono õ hã. Tane nherê, taha si, wa te 're 'manharĩ za'ra mono õ di za. Duré wa hã marĩ hã te 're 'manharĩ mono tô da, 'Re ihâimana u'âsi mono te te i'wi 're awê'õ mono õ nherê, áté taha zô si, wa za isima te 're rob'ruiwapari u'âsi. Âne tô da, taha zarina 're ihâimana mono õ di za.

¹³ Ni'wam norĩ hã te duré âne na te te sima 're nharĩ za'ra: "Wasa hã wadub 'reb da si, te wama 're hâimana za'ra. Duré wadu hã wasai ubumrozéb da si, te wama 're hâimana za'ra. Tane, te duré wahâiba hã misi wama 're hâimana za'ra wahâiba mono bâ, uburé marĩ hã siwa'ru wa te âma 're i'manharĩ za'ra mono zéb da hã." Âne te ni'wam norĩ hã 'rãwi te te si'âma 're rosa'rata wasété za'ra, tihâiba na hã. Tane nherê, dasa hã duré dadu hã niwapsi te za 'Re ihâimana u'âsi mono hã uprosi uburé. Dasa hã da te 're huri mono wamhã, dawasédé, da te âma 're 'manharĩ za'ra mono õ di. Tane nherê, aihâiba na asiwi 're asipsaihuri za'ra wa'aba mono zéb da hã, aihâiba aimawi hã aima 're hâimana za'ra wa'aba mono õ di. Wanhib'apito ma, wa te âma 're iromhuri pese za'ra mono zéb da si, te wahâiba hã wama 're hâimana za'ra. Taha si te wahâiba hã te te wama 're ab'madã'â pese, Wanhib'apito hã.

¹⁴ Wanhib'apito hã dã'â uptabi nherê, 'Re ihâimana u'âsi mono te te ihâiwa'utu ne, te za wa'ahâiwa'utu, tiwaihu'u pese na. Taha wa, te wahâiba hã pire na wama 're hâimana za'ra oto, taré hã õ wa.

¹⁵ A norĩ wa'wa hã aihâiba mono bâ, te oto Cristuhu nhib'a'uwê si 're anomro aba mo. Taha siré si, te oto 'rãwi âma 're aihâimana za'ra wa'aba mo. E âne hã 'rãwi asina waihu'u za'ra wa'aba â hã bété. E tawamhã, Cristuhu nhib'a'uwê oto 're wanomro mono nherê, wa za pi'õi wasété hâiba hã wa te wasina 're tob za'ra. Mare di.

¹⁶ Duré aibã hã pi'õi wasété hâiba hã te te sina hâiba to wamhã, ihâiba hã misi ne oto, maparane ihâiba nherê. E âne hã zahadu aima waihu'u za'ra wa'aba õ di bété. Duréihã 'Re ihâimana u'âsi mono zadawa wasu'u'wa, ma tô âne na imreme na âma rob'ui'éré, pi'õi wasu'u na hã:

"Aibã hã pi'õi me siré 're simi'wara mono wamhã, ihâiba hã misi ne oto, maparane ihâiba nherê. Misi tô oto ihâiba zahuré hã."

Âne duréihã 'Re ihâimana u'âsi mono mre me na rob'ui'éré, ibaihã na hã.

17 Tane nherē, ni'wam norī hā Wanhib'apito te te sina 're hāiba tob za'ra mono wamhā, rāwi te za İsirē 're hāimana za'ra, İpē'ē 're.

18 Taha wa, ma'āpē, dahāiba na dawasédé, da te 're İ'manharī za'ra mono wi, asina 're asiptete u'āsi za'ra wa'aba mono. Dawasédé aimawi hā da te 're 'manharī za'ra mono wamhā, āma 're dasihāiba wasété za'ra mono ō di. Aibā norī hā pi'ō na tiwasédé te te 're 'manharī za'ra mono wapsi, te za āma 're sihāiba wasété za'ra. Duré, pi'ō norī hā aibā na tiwasédé te te 're 'manharī za'ra mono wapsi, te za duré ta norī hā āma 're sihāiba wasété za'ra aiwa.

19 'Re İhāimana u'āsi mono pē'ēzani si, te oto aipē'ē 're ai'āma 're sōrōwa za'ra wa'wa. Aipē'ē 're, te oto aima 're hāimana u'āsi za'ra wa'wa. 'Re İhāimana u'āsi mono hā ma tō te te aima 're sōmri za'ra wa'wa. Taha wa, aihāiba za'ra wa'wa hā ate za'ra wa'aba ō di oto. 'Re İhāimana u'āsi mono te si, te aihāiba hā 're hāimana za'ra wa'wa oto. E āne hā zahadu asina waihu'u za'ra wa'aba ō di bété.

20 E marī wa, aihāiba hā ate za'ra wa'aba ō di oto. 'Re İhāimana u'āsi mono, ma tō aiwa'ābā za'ra wa'wa, Cristuhu dā'āzém na. Taha wa, uburé marī hā aihāiba na tāma 're İ'manharī wē za'ra wa'aba mono zém na, te za āma 're aiwata u'āsi za'ra wa'aba mo, 'Re İhāimana u'āsi mono āma hā.

7

Dasina damrozém na rowasu'u

1 Rob'ui'éré na we asiwi İzadanharī za'ra wa'aba zém na, wa za oto aima roti za'ra wa'wa. E aibā norī hā 're mro za'ra mono ō nherē, tāma 're rowē za'ra mono di za. Áté tane nherē, tāma 're rowē za'ra mono di za tō.

2 Tane nherē, aibā norī hā mro āna 're hāimana za'ra mono nherē, pi'ō na tiwasédé te te 're İ'manharī za'ra mono zé hā, ahā uptabi di duré. Pi'ō norī hā mro āna 're hāimana za'ra mono nherē, aibā na tiwasédé te te 're İ'manharī za'ra mono zé hā, ahā uptabi di duré. Taha wa, aibā norī hā te za tō 're mro za'ra, timro me si 're hāimana za'ra mono da. Āne hā wē uptabi di, pi'ō aimawi na tiwasédé te te 're 'manharī za'ra mono tō da. Duré pi'ō norī hā te za tō 're mro za'ra aibā na, timro me si 're hāimana za'ra mono da, ta norī zama, aibā aimawi na tiwasédé te te 're 'manharī za'ra mono tō da.

3 Aibā norī hā pi'ō na oto 're mro za'ra mono wamhā, timro wi, tihāiba hā te te 're sawi za'ra mono ō di za oto. Duré pi'ō norī hā aibā na oto 're mro za'ra mono wamhā, duré timro wi tihāiba hā te te 're sawi za'ra mono ō di za oto.

4 Pi'ō norī hā 're mro za'ra mono wamhā, İhāiba hā İtei ō di oto. İmro te hā oto, İhāiba hā. Tane duré aibā norī hā 're mro za'ra mono wamhā, İtei ō di oto, İhāiba hā. İmro te hā oto, āne hā aiwa.

5 Taha wa, aimro ré 're aihāimana za'ra wa'aba mono norī, aimro wi aihāiba hā 're sawi za'ra wa'aba mono ō di za oto. Áté nimahā bātā na si te za āma 're asisaze za'ra wa'aba mo, aimro ma, aihāiba hā a'ā 're sōmri za'ra wa'aba mono tō da, 'Re İhāimana u'āsi mono ma si, a'ā 're asisōmri za'ra wa'aba mono da, tāma 're aimreme zusi aba mono zéb da si. Āne wamhā, 'Re İhāimana u'āsi mono ma, 're aimreme zusi aba mono pari, aihāiba hā aimro wi 're sawi za'ra wa'aba mono āna, te za tō aihāiba na apā asima āma 're atob za'ra wa'aba mo, aiwasédé hā aihāiba na 'rāwi nherē, aimro ō ne, asiwi 're 'manharī za'ra wa'aba mono tō da, asina 're asiptete za'ra wa'aba mono ō wa, Satanasi hā te te 're aipibu za'ra wa'aba mono tō da.

6 A norī wa'wa hā uburé asina 're aimro za'ra wa'aba mono da hā, te aima 'ru za'ra wa'aba ō di. Asi'uihā na asima 're İwē za'ra wa'aba mono zém na si, 're aimro za'ra wa'aba mono da hā, te aiwi wē'ō za'ra wa'aba ō di.

7 Tane nherē, wa hā İmro ō na 're İhāimana mono zéb zarina, aimro āna 're aihāimana za'ra wa'aba mono zéb da hā, İma wē di aré. Tane nherē, 'Re İhāimana u'āsi mono hā aiwa te te dama 're apisutu mono ō di, dahāiba mono bā, niha 're İdahāimana za'ra mono zéb da hā. Dasisarina si 're İdahāimana za'ra mono ō na hā, taha si te za te te dama 're apisutu, damro ré 're dahāimana za'ra mono da, duré damro āna 're İdahāimana za'ra mono da hā.

8 Aimro āna 're aihāimana za'ra wa'aba mono norī ma, wa za oto aima roti za'ra wa'wa, pi'ōi mrotō norī ma zama. Ōne haré, 're aihāimana za'ra wa'aba mono da hā, wē di, wa hā İmro ō na 're İhāimana mono ne. Āne hā İma wē uptabi di.

9 Tane nherē, dahāiba na dawasété wi 're İdanhıptete za'ra mono ō si, wē ō di. Taha wa, aihāiba na aiwasété wi, asina 're asiptete waihu'u za'ra wa'aba mono ō wamhā, te za tō asina 're aimro za'ra wa'aba mo, asisō 're rowasutu zahu za'ra wa'aba mono tō da oto.

10 Aimro ré, 're aihāimana za'ra wa'aba mono norī ma, wa za oto aima roti pese za'ra wa'wa. Tane nherē, İsi'uihā na İnhimirosa'rata na te aima roti za'ra wa'aba ō di za.

Wanhib'apito nhimiroti na si, wa za aima roti za'ra wa'wa, âne na hâ: Pi'ô norî hâ timro te te 're rême za'ra mono ô di za.

¹¹ Tane nherê, âté pi'ô norî hâ te za timro hâ te te 're rême za'ra. Âne hâ te te 're 'manharî za'ra mono wamhâ, aibâ aimawi na 're mro zahu za'ra mono ô di za. Timro 'rata u si, te za apâ 're sipizari za'ra. Âne na te te âma 're sahu ze za'ra mono ô wamhâ, mro âna te za tô 're hâimana u'âsi za'ra. Duré aibâ norî hâ timro te te 're rême za'ra mono ô di za, âne hâ tô aiwa.

¹² A norî wa'wa hâ 're saze za'ra wa'aba mono ô ré, asina 're aimro za'ra wa'aba mono norî ma, wa za oto aima roti za'ra wa'wa. Wanhib'apito hâ ti'ab ré, âne na te te dama 're roti mono ô nherê, tane nherê, wa za aima âma roti za'ra wa'wa, âne: Aibâ norî hâ Isazei'wa na 're hâimana za'ra mono nherê, îmro hâ Isazei'ô'wa na tâma 're hâimana za'ra mono wamhâ, duré pi'ô hâ timro siré 're hâimana u'âsi za'ra mono da, te te sima 're sawi pese za'ra mono wamhâ, âne wamhâ, aibâ norî hâ timro hâ te te 're rême za'ra mono ô di za.

¹³ Duré pi'ô norî hâ Isazei'wa na 're hâimana za'ra mono nherê, îmro hâ Isazei'ô'wa na tâma 're hâimana za'ra mono wamhâ, duré aibâ hâ timro siré 're hâimana u'âsi za'ra mono da, te te sima 're sawi pese za'ra mono wamhâ, âne wamhâ, pi'ô norî hâ timro hâ te te 're rême za'ra mono ô di za duré.

¹⁴ Duré aibâ norî hâ Isazei'ô'wa na 're hâimana za'ra mono nherê, îmro hâ Isazei'wa na tâma 're hâimana za'ra mono wamhâ, 'Re îhâimana u'âsi mono hâ pi'ô norî ma, rowê te te tâma 're îpisutu za'ra mono zéb u'âbâ, te za tô duré aibâ norî ma, te te tâma 're pisutu za'ra rowê hâ, îmro hâiba u'âbâ, Isazei'ô'wa na 're hâimana za'ra mono nherê, aibâ norî hâ. Duré pi'ô norî hâ Isazei'ô'wa na 're hâimana za'ra mono nherê, îmro hâ Isazei'wa na tâma 're hâimana za'ra mono wamhâ, 'Re îhâimana u'âsi mono hâ aibâ norî ma, rowê te te tâma 're îpisutu za'ra mono zéb u'âbâ, te za tô duré pi'ô norî ma, te te tâma 're pisutu za'ra rowê hâ, îmro hâiba u'âbâ, Isazei'ô'wa na 're hâimana za'ra mono nherê, pi'ô norî hâ. Ânei ô 'wa'âhâ, te aré î'ra norî hâ Isazei'ô'wa norî 'ra ne, 're hâimana za'ra, 'Re îhâimana u'âsi mono ma hâ. Tazahâ îmama norî hâiba u'âbâ, te za tô rowê si te te tâma 're apisutu, 'Re îhâimana u'âsi mono hâ.

¹⁵⁻¹⁶ Duré, ni'wam norî hâ Isazei'ô'wa 're hâimana za'ra mono wamhâ, timro hâ Isazei'wa te te 're rême za'ra mono da, te te sima 're wê za'ra mono wamhâ, îmro hâ te te tiwi 're rosawi za'ra mono ô di za, Isazei'wa si'uiwa sima 're hâimana za'ra mono ô wa. Si'uihâ na te za tô 're wairébé, Isazei'ô'wa hâ. 'Re îhâimana u'âsi mono hâ ma tô te te sima 're aiwê za'ra wa'wa, robze sina âma 're aihâimana za'ra wa'aba mono da. Taha wa, aimro hâ Isazei'ô'wa aima 're hâimana za'ra wa'aba mono wa, te te oto 're aiwê'ô za'ra wa'aba mono wamhâ, te za tô tâma 're îwaprosi waré za'ra wa'aba mo, te te tô 're airême za'ra wa'aba mono da.

Pi'ô norî, Isazei'wa 're anomro aba mono wamhâ, duré aimro hâ Wanhib'apito te te 're saze za'ra mono ô nherê, e te za te te 're saze za'ra, nimahâ bâtâ na hâ, Cristu hâ. Âté te za tô te te 're saze za'ra. Âté te te 're saze za'ra mono ô di za. Âne hâ aima waihu'u za'ra wa'aba ô di. Duré aibâ norî, Isazei'wa 're anomro aba mono wamhâ, aimro hâ te te 're saze za'ra mono ô nherê, e te za te te 're saze za'ra, nimahâ bâtâ na hâ. Âne hâ aima waihu'u za'ra wa'aba ô di duré. Taha wa, aimro hâ Isazei'ô'wa na aima 're hâimana za'ra wa'aba mono wa, te te oto 're aiwê'ô za'ra wa'aba mono wamhâ, îhâimanzéb zarina, te za tô tâma 're îwaprosi waré za'ra wa'aba mo, te te tô 're airême za'ra wa'aba mono da.

¹⁷ Wanhib'apito hâ te te aima 're îpisutu za'ra wa'aba mono zéb zarina si, te za oto 're aihâimana u'âsi za'ra wa'aba mo. 'Re îhâimana u'âsi mono hâ tinhîb'a'uwê da, te te sima 're aipisutu za'ra wa'aba mono ô ré, niha 're î'aihâimana za'ra wa'aba mono zém hawi, 're aiwairébé aba mono zém na, 're asi'madâ'â za'ra wa'aba mono ô di za, zudezu na, duré zudezu'ô na. Ône haré te za oto 're aihâimana u'âsi za'ra wa'aba mo. Âne na si, wa tô wa hâ te dama 're aroti u'âsi, daro mono bâ Isazei'wa norî hâ siré 're îsi'râ'ô'tô u'âsi mono norî ma hâ.

¹⁸ Ni'wam norî hâ sihâiwata nhîhâri ré, 're hâimana za'ra mono wamhâ, 'Re îhâimana u'âsi mono hâ tinhîb'a'uwê da, te te oto sima 're pisutu za'ra mono wamhâ, e taha zarina te za ta norî hâ 're si'madâ'â ze za'ra, tinhîhâiwata nhîhârizé hâ te te sima 're pari za'ra mono da, apâ sihâiwata nhîhâri ô ré, 're înomro mono ne, 're hâimana za'ra mono da. Mare di. Âne na hâ 're si'madâ'â za'ra mono ô di za. Ôhō haré te za tô 're nomro. Duré ni'wam norî hâ sihâiwata nhîhâri ô nherê, 'Re îhâimana u'âsi mono hâ tinhîb'a'uwê da, te te oto sima 're pisutu za'ra mono wamhâ, e taha zarina, te za ta norî hâ 're sisihâiwata nhîhâri za'ra. Mare di. 'Re sisihâiwata nhîhâri za'ra mono ô di za. Ôhō haré te za tô oto 're nomro, ta norî hâ.

¹⁹ Danhîhâiwata nhîhâri ré si 're îdahâimana za'ra mono zé hâ marî dai ô di, 'Re îhâimana u'âsi mono ma hâ. Duré danhîhâiwata nhîhâri ô nherê, 're îdahâimana za'ra mono zé hâ marî dai ô di, 'Re îhâimana u'âsi mono ma hâ, âne hâ tô aiwa. Âne si tâma îpire hâ, 're îdahâimana za'ra mono zéb da hâ. 'Re îhâimana u'âsi mono nhimiroti, da te 're 'madâ'â pese za'ra mono sina 're îdanomro wê mono zép si, tâma îpire hâ.

²⁰ 'Re ìhâimana u'âsi mono hâ tinhîb'a'uwê da, te te sima 're aipisutu za'ra wa'aba mono wamhâ, e niha 're ì'aihâimana za'ra wa'aba mono zé hâ za. Ône haré te za tô aihâimanazém na 're aihâimana za'ra wa'aba mo, dapoto mono bâ da te 're aiwamri za'ra wa'aba mono zéb zarina, duré aipire na dama 're aihâimana za'ra wa'aba mono zéb zarina, duré aiwapu na dama 're aihâimana za'ra wa'aba mono zéb zarina.

²¹⁻²² Ai'uipra'wa norî ma, aipawa'âbâ âna tâma 're romhuri za'ra wa'aba mono ré, 'Re ìhâimana u'âsi mono hâ tinhîb'a'uwê da, te te oto sima 're aipisutu za'ra wa'aba mono wamhâ, aipawa'âbâ âna 're ìromhuri za'ra wa'aba mono zém na, asina 're aihâtâ'â za'ra wa'aba mono ô di za. Tane nherê, âté nimahâ bâtâ na si te za tô oto te te aima 're pisutu za'ra wa'wa, aipawa'âbâ âna tâma 're romhuri za'ra wa'aba mono tô da oto. Âne zarina si, te za oto râwi 're asi'madâ'â za'ra wa'aba mo, tiwi 're aiwairébé aba mono da, romhuri hawi, asi'uihâ na oto asima 're romhuri za'ra wa'aba mono da. Ai'uipra'wa norî ma, aipawa'âbâ âna tâma 're romhuri za'ra wa'aba mono ré, Cristuhu âma oto 're anomro aba mono da, Wanhib'apito te te 're aipisutu za'ra wa'aba mono norî hâ, te oto robzei u'âsi na 're aihâimana za'ra wa'aba mo. Da te 're ì'uipra za'ra mono norî, wa'âbâ âna te te oto dama 're romhuri za'ra mono tô da, da te tâma 're ìpisutu za'ra mono ne, ma tô Cristu hâ te te 're aipisutu za'ra wa'wa, aiwasété u'âsi 're anomro aba mono tô da, aiwasédé hâ oto 're rême pese za'ra wa'aba mono da. Tane duré asi'uihâ na asima 're romhuri za'ra wa'aba mono ré, Cristuhu âma 're anomro aba mono da, Wanhib'apito te te 're aipisutu za'ra wa'aba mono norî hâ, te oto Cristuhu nhîb'a'uwê si 're anomro aba mo. Taha zarina si, te oto ìsimiroti hâ 're ì'madâ'â pese za'ra wa'aba mo, da te 're ì'uipra za'ra mono norî hâ tinhîb'apito nhimiroti si te te 're ì'madâ'â pese za'ra mono ne.

²³ Tidâ'âzém na ma tô Cristu hâ aiwa'âbâ za'ra wa'wa, aiwasété u'âsi 're anomro aba mono tô da oto. Taha wa, ìsazei'ô'wa norî ma, 're aihâimana za'ra wa'aba mono ô di za oto.

²⁴ Ìsisânawâ norî, 'Re ìhâimana u'âsi mono hâ tinhîb'a'uwê da, te te sima 're aipisutu za'ra wa'aba mono wamhâ, ône haré aihâimanazéb u'âsi za'ra wa'aba na si, te za 're aihâimana za'ra wa'aba mo, 'Re ìhâimana u'âsi mono âma si.

Mro âna 're ìhâimana za'ra mono zé wasu'u

²⁵ Rob'ui'ére na we asiwi ìzadanharî za'ra wa'aba zém na, wa za duré âma aima roti za'ra wa'wa, mro âna zahadu 're ìhâimana za'ra mono norî na hâ. Wanhib'apito hâ ti'ai âma 're morî ré, âne na te te dama âma 're roti mono ô nherê, wa za aima âma roti za'ra wa'wa. Wanhib'apito hâ tinhoprubzéb zarina, ma tô te te 're ìpawapto, dama ì'umnhasizéb zarina, ìsimiroti zarina si, te dama âma 're roti mono da. Taha zarina, wa za tô oto aima âma roti za'ra wa'wa.

²⁶ Âhâna Zezusihi zazei'wa oto 're wanomro mono wa, te da te wama 're rob'manharî wasété za'ra wa, wa te 're robzépata za'ra mono da. Taha wa, wa za oto aima roti za'ra wa'wa, aimro ré 're aihâimana za'ra wa'aba mono wamhâ, taha haré asima 're aihâimana u'âsi za'ra wa'aba mono da, duré aimro ô nherê, 're aihâimana za'ra wa'aba mono wamhâ, ône haré 're aihâimana za'ra wa'aba mono da.

²⁷ Aibâ norî, aimro ré 're aihâimana za'ra wa'aba mono norî hâ, asima 're rosa'rata wasété za'ra wa'aba mono ô di za, 're ìrême za'ra wa'aba mono zém na da hâ. Duré zahadu aimro âna 're aihâimana za'ra wa'aba mono norî hâ, asima 're rosa'rata za'ra wa'aba mono ô di za, 're aimro za'ra wa'aba mono zéb da hâ.

²⁸ Tane nherê, âté te za tô asima 're ìwê za'ra wa'aba mo, 're aimro za'ra wa'aba mono da. E tawamhâ aiwasédé te za 're ì'manharî za'ra wa'aba mo. Mare di. Ìwê si te za tô 're ì'manharî za'ra wa'aba mo. Duré pi'ôi hâiba préduptém norî hâ 're mro za'ra mono wamhâ, e te za tiwasédé hâ te te 're 'manharî za'ra. Mare di. Tiwasédé hâ te te 're 'manharî za'ra mono ô di za. Âne, wa hâ wa tô aré te ìsima 're aiwê za'ra wa'wa, asina 're aimro za'ra wa'aba mono wa, 're robzépata za'ra wa'aba mono tô da. Âne tô da, wa tô aima roti za'ra wa'wa, asina 're aimro za'ra wa'aba mono tô da.

²⁹ Ìsisânawâ norî, tô sena, wa za âne hâ aima waihu'u za'ra wa'wa. Romhure di oto, ìrob'râsutuzéb u hâ. Taha wa, taha ô ré, Wanhib'apito ma si, wa te 're ìromhuri pese za'ra mono zéb da si, wa za râwi wasina 're wanhopré u'âsi. Taha wa, aibâ norî, aimro ré 're aihâimana za'ra wa'aba mono norî hâ, aimro zawî na si 'râwi asima âma 're rosa'rata za'ra wa'aba mono ô di za.

³⁰ Duré asisô 're aiwa'ô za'ra wa'aba mono wamhâ, taha na si 're rosa'rata za'ra wa'aba mono ô di za. Duré aima 're ìrowê za'ra wa'aba mono zéb zarina, ato sina 're anomro aba mono wamhâ, taha na si 're rosa'rata za'ra wa'aba mono ô di za. Duré marî hâ asima 're uipra za'ra wa'aba mono wamhâ, taha na si 're rosa'rata za'ra wa'aba mono ô di za, asima.

³¹ Ti'ai âma uburé marî na 're romhuri za'ra wa'aba mono nherê, taha si asima 're wê uptabi za'ra wa'aba mono ô di za. E marî wa. Uburé marî hâ ti'ai âma, da te 're ì'madâ'â

za'ra mono hã te za dawi 're si'utõrõ u'âsi za'ra. Taha wa, hãwa âma uburé marĩ ïwê si 're ïhâimana za'ra mono zõ si, te za sõ 're ïrob'ruiwapari u'âsi za'ra wa'aba mo.

³² Wa hã wa ïsima te 're aiwê za'ra wa'wa, ti'ai âma marĩ zõ si asima 're asõpré wa'aba mono zarina, asina 're aihâtâ'â tõ za'ra wa'aba mono da. Aibã norĩ hã mro âna 're ïhâimana za'ra mono norĩ hã Wanhib'apito ma, te te 're ïromhuri za'ra mono zém na da si, te za sima 're sõpré u'âsi, taha zarina 'Re ïhâimana u'âsi mono hã te te 're madã'â ze za'ra mono da.

³³ Tane nherê, aibã norĩ hã mro ré 're hãimana za'ra mono wê te, te za ti'ai âma marĩ zõ zama sima 're sõpré u'âsi, timro udãna, rowê na tãma 're ïhâimana za'ra mono zéb da hã.

³⁴ Taha wa, maparane ïsimiromhuri te tãma 're hãimana za'ra, aibã norĩ ma hã, te te sima sõ 're ïrob'ruiwapari za'ra mono hã, Wanhib'apito ma, duré timro ma zama.

Duré, pi'õi hãiba pré dum norĩ, mro âna 're ïhâimana za'ra mono hã, duré pi'õ préduptém norĩ, mro âna 're ïhâimana za'ra mono hã ta norĩ hã te za simi'ê na Wanhib'apito ma si, te te tãma 're romhuri za'ra, wa'wa âna. Wanhib'apito ma si, tãma 're sihãiba nhomri u'âsi za'ra mono da, te za tõ sena te te sima 're wê za'ra, mro âna 're hãimana za'ra mono wa, ta norĩ hã. Tane nherê, pi'õ norĩ, mro ré 're ïhâimana za'ra mono norĩ hã, te za ti'ai âma marĩ zõ si sima 're sõpré u'âsi, timro udãna, robze na âma 're hãimana za'ra mono da.

³⁵ Aiwĩ 're robzei'õ za'ra wa'aba mono wa, aihãiba zeĩ õ na 're aihãimana za'ra wa'aba mono da, âne na te aima roti za'ra wa'aba õ di. Taré ïwê na si te aipawaptob za'ra wa'aba da, wa âne na aima roti za'ra wa'wa. Wa duré te ïsima te 're aiwê za'ra wa'wa, ïwê si 're 'manharĩ za'ra wa'aba mono da, duré asimirosa'rata na Wanhib'apito ma 're asimi'ê za'ra wa'aba mono da, tãma 're romhuri pese za'ra wa'aba mono da, tiwi 're asihãiba zawi za'ra wa'aba mono âna.

³⁶ Até ni'wam norĩ hã te za sina aiwê zahuré, sina mro zahuré da. Tawamhã sina mro zahuré õ ré, até aibã hã te za pi'õi hãiba na si te te sima âma 're rosa'rata u'âsi, za âma ïmro hãiba na si, tiwasété wi siptete waihu'u âna. Até te za duré te te sõ 're rowasutu u'âsi. Âne na siwaihu'u wamhã, te za tõ âma timro su'u, te te sima ïwézéb zarina. Âma mro da tõ. Tawamhã, oto âma mro wamhã, tiwasédé hã te te âma 'manharĩ õ di za. Mare di.

³⁷ Duré aibã hã até si'uihã na te za sima pisutu, mro âna a'ã 're hãimana mono da. Âne wamhã, até te za pi'õi wi, tihãiba na sina 're siptete u'âsi. Âne wamhã, te te sima ïwézéb zarina, mro âna a'ã 're hãimana mono wamhã, wê di za tõ. Âne hã ïwasété õ di.

³⁸ Taha wa, aibã norĩ hã 're mro za'ra mono wamhã, ïwê si te za tõ te te 're 'manharĩ za'ra. Duré 're mro za'ra mono õ wamhã, ïwê uptabi si te za tõ te te 're 'manharĩ za'ra.

³⁹ Pi'õ norĩ hã ïmro hã tiwi 're dá'ã za'ra mono õ ré, te te 're rême waihu'u za'ra mono õ di za. Tiwi 're dá'ã za'ra mono wapsi, te za oto pibui pese na timro na te te 're sahu za'ra, aibã aimawi na. Tane nherê, aibã ïsazei'õ'wa na 're mro za'ra mono õ di za. Aiwa ïsazei'wa si'uiwa na te za sina 're mro za'ra.

⁴⁰ Tane nherê, pi'õi mrotõ norĩ hã 're mro zahu za'ra mono õ wamhã, tãma 're rowê uptabi za'ra mono di za, ta norĩ ma hã. Âne ta norĩ âma ïnhimirosa'rada hã. 'Re ïhâimana u'âsi mono pè'èzani te te ïma ïwaihu'uzéb zarina, wa âne na aima roti za'ra wa'wa, âne si.

8

Romhãiba 'manharĩ ma, dasazé da te tãma 're ïsõmri za'ra mono zé wasu'u

¹ Rob'ui'éré na we asiwi ïzadanharĩ za'ra wa'aba zém na, wa za duré aima âma roti za'ra wa'wa, waihu'u pese newa romhãiba 'manharĩ âma 're ïdawata za'ra mono zéb da, dasa hã da te tãma 're ïsõmri za'ra mono zém na, romhãiba 'manharĩ ma hã. Âne ma tõ we ïma asiwasu'u za'ra wa'wa, rob'ui'éré na hã: "Wa norĩ hã ïsazei'wa oto 're wanomro mono wa, wama waihu'u pese za'ra di, 'Re ïhâimana u'âsi mono nhimiroti hã. Taha zarina, wa za marĩ hã dasiré, wa te 're 'manharĩ za'ra, wa te wasima 're ïwê za'ra mono zéb zarina." Âne na ma tõ we ïma asiwasu'u za'ra wa'wa. Tane tõ. Uburé wa norĩ ma hã wama waihu'u pese za'ra di tõ, 'Re ïhâimana u'âsi mono nhimiroti hã. Tane nherê, marĩ hã da te 're waihu'u pese za'ra mono wê te, te za 're dasi'madã'â ze za'ra, 'rãwi. Tane nherê, ïsazei'wa norĩ hã 're ïsisawi pese za'ra mono zéb zarina si, te za 're sipawaptob u'âsi za'ra, siptete sina siré âma 're hãimana u'âsi za'ra mono da.

² Ni'wam norĩ hã rowaihu'u pese 'wa newa, 'rãwi 're si'madã'â ze za'ra mono wamhã, sena na ta norĩ hã, marĩ te te 're waihu'u za'ra mono õ di za. Mare di.

³ Tane nherê, ni'wam norĩ hã 'Re ïhâimana u'âsi mono si te te 're sawi pese za'ra mono wapsi, te za tinhib'a'uwê na te te sina 're awaihu'u u'âsi, ta hã.

⁴ Duré, waihu'u pese newa, romhãiba 'manharĩ âma 're ïdawata za'ra mono zéb da, dasa, da te tãma 're ïsõmri za'ra mono na, wa za oto aima roti za'ra wa'wa. E romhãiba 'manharĩ ma, dasa, da te tãma 're ïsõmri za'ra mono na, te za a norĩ wa'wa hã dame âma 're asaihuri aba

mo, Ísazei'wa 're anomro aba mono nherê. E dame âma 're asaihuri aba mono ô di za. Âne, wa za aima âma waihu'u za'ra wa'wa. Romhâiba 'manharî âma 're îdawata za'ra mono hã, 'Re îhâimana u'âsi mono nei ô di. Îwaihu'u pese zéb da hã, marî hã tâma hâimana ô di. Robaba uptabi di. Taré ta hã rob'manharî. Âne hã wama waihu'u pese za'ra di. Siwaprosi, te 'Re îhâimana u'âsi mono si 're hâimana, waihu'u pese uptabi na. Ísine hã marî hã îwaihu'upe hã 're 'mai hâimana mono ô di, aimawi hã. Robaba uptabi di. Âne hã wama waihu'u pese za'ra di duré.

⁵ Tane nherê, ni'wam norî hã ma tô te te 're saze za'ra, 'Re îhâimana u'âsi mono nei ô nherê, waihu'u pese uptabi na 're hâimana za'ra mono newa, hâiwa nhirôtô na, duré ti'ai âma zama, îhâiba'ô norî hã. Ísib'apito za'ra hã ahâ uptabi na tâma 're hâimana za'ra mono ô nherê, ma tô te te âma 're saze za'ra.

⁶ Tane nherê, te siwaprosi wama 're hâimana, 'Re îhâimana u'âsi mono si, wasiré wa te 're Ísaze za'ra mono norî ma hã. Ta hã uburé Wamama, 'Re îhâimana u'âsi mono hã. Taha ma si, wa oto 're wahâimana za'ra. Wanhib'apito si te duré siwaprosi 're hâimana, Zezu Cristuhu si. Taha si, ma tô Timama zadawa para te te ro'apoto. Taha nhimipawaptobzéb zarina si, ma tô 'Re îhâimana u'âsi mono hã te te 're wa'anho'reptu, ôhô âma si 're wahâimana u'âsi za'ra mono da oto.

⁷ Tane nherê, ni'wam norî hã Ísazei'wa na oto 're hâimana za'ra mono nherê, âne na te te waihu'u za'ra ô di ta norî hã, rosa'rata nhib'uware na si 're hâimana za'ra mono wa. Te te 're saze za'ra mono ô ré, romhâiba 'manharî âma, aré dame âma 're wata u'âsi za'ra mono wa, te zahadu ta hawim haré te te âma 're rosa'rata u'âsi za'ra, romhâiba 'manharî âma hã, 'Re îhâimana u'âsi mono ne, waihu'u pese newa. Taha wa, dasa hã romhâiba 'manharî ma, da te 're ÍsôMRI za'ra mono hã te te duré dame 're huri mono wa, te ta norî hã rosa'rata na te te âma 're upa u'âsi za'ra, âne: "Â hã dasa hã romhâiba 'manharî ma, da te 're ÍsôMRI za'ra mono na, 're wasaihuri mono wamhã, wa za wasasédé hã wa te âma 're 'manharî za'ra." Âne te za ta norî hã 're siwê'ô za'ra, tinhimirosa'rata nhib'uware na 're hâimana za'ra mono wa. Romhâiba 'manharî hã 'Re îhâimana u'âsi mono ne, waihu'u pese newa, dasa hã da te tâma 're ÍsôMRI za'ra mono hã te te dasiré 're huri mono wamhã, te za âne na hã 're siwê'ô za'ra, ta norî hã.

⁸ Tazahã, dasa hã wa te 're îhuri mono zéb zarina, duré wa te 're îhuri mono ô zéb zarina, te te 're wa'awêsâmri mono ô di za, 'Re îhâimana u'âsi mono hã. Marî hã wa te 're huri tô mono da, wa te wasima 're Ípisutu za'ra mono zéb zarina, te te siwi 're wa'awê'ô mono ô di za. Duré marî hã wa te 're huri mono da, wa te wasima 're Ípisutu za'ra mono zéb zarina, te te 're wa'awêsâmri mono ô di za.

⁹ Âté te za tô asima 're îwê za'ra wa'aba mo, dasa hã romhâiba 'manharî ma, da te 're ÍsôMRI za'ra mono na dame 're asaihuri aba mono da, 'Re îhâimana u'âsi mono hã za te te siwi 're aiwê'ô za'ra wa'aba mono ô na dá'âsina. Tane nherê, te za 're asi'madâ'â u'âsi za'ra wa'aba mo, ta hã dasa hã 're huri aba mono wa, asiré Ísazei'wa nherê, sib'uware na 're înomro mono norî hã apâ tiwasété u 're rere'e mono tô da.

¹⁰ Âté dasa hã romhâiba 'manharî ma, da te tâma 're ÍsôMRI za'ra mono na, te za 're asaihuri aba mo dasiré, romhâiba 'manharî âma 're îdawata za'ra mono zéb âma hã, 'ri paramhã. Âté 'Re îhâimana u'âsi mono hã te te siwi 're aiwê'ô za'ra wa'aba mono ô na dá'âsina, te za tô asina 're aihâtâ'â za'ra wa'aba mono âna, dasiré âma 're asaihuri aba mo. Tawamhã âté asiré Ísazei'wa nherê, sib'uware na 're înomro mono norî hã te za te te 're ai'madâ'â za'ra wa'wa, dame âma 're asaihuri aba mono ré hã. Tawamhã, dasa hã romhâiba 'manharî ma, da te tâma 're ÍsôMRI za'ra mono hã te te 're huri mono tô da, te te aré siwi 're wê'ô za'ra mono nherê, e te za te te sima 're wê za'ra, dame âma 're saihuri mono da, asine wa'aba. Te za tô te te sima 're wê za'ra. E marî wa. Dame âma 're asaihuri aba mono ré, te te âma 're ai'madâ'â za'ra wa'aba mono wa.

¹¹ Tawamhã taha zarina, oto âma 're saihuri mono wamhã, te za 'râwi 're siwê'ô za'ra, asiré Ísazei'wa nherê, sib'uware na 're înomro mono norî hã, te te aré siwi 're wê'ô za'ra mono nherê, te te oto dame 're huri mono wa. Taha wa, te za Cristu te te 're Ísaze za'ra mono zém na si'uihã na 're sisimini za'ra, ta hã sada dá'â za'ra nherê.

¹² Âne hã 're 'manharî za'ra wa'aba mono wamhã, asiré Ísazei'wa norî wi, te za aiwasédé hã 're î'manharî za'ra wa'aba mo. Taha zarina, ta norî hã marî hã te te aré siwi 're wê'ô za'ra mono nherê, te te oto 're 'manharî za'ra mono wa, te za 're siwê'ô pese za'ra. Âne na aiwasédé hã tiwi 're 'manharî za'ra wa'aba mono wamhã, ta norî hãiba siré te za Cristuhu wi zama aiwasédé hã 're î'manharî za'ra wa'aba mo.

¹³ Âté Ísisânawã norî hã te za te te sima 're rosa'rata za'ra, dasa hã romhâiba 'manharî ma, da te 're ÍsôMRI za'ra mono na, dasiré âma 're saihuri mono wa, tiwasédé te te 're î'manharî

za'ra mono na hã. Āne wamhã, taha na wa hã dame 're ĩsa zahu mono õ di za oto, ĩsisãnwã norĩ hã tiwaseté u 're sipizari zahu za'ra mono tã da, apã.

9

Zezusihĩ zadawa wasu'u'wa na, Paru hã dama ĩsiwasu'uzé wasu'u

¹⁻² Ni'wam norĩ hã ma tã te te ĩãma 're rosa'rata za'ra, Zezusihĩ zadawa wasu'u'wa, sena na dama 're ĩhãimana mono õ na hã. Tane nherẽ, a norĩ wa'wa hã ma tã tããma ĩwaihu'u za'ra wa'wa, sena na ĩsadawa wasu'u'wa, 're ĩhãimana mono na hã.

Wa hã danhimiroti zarina, 're ĩhãimana mono õ di. 'Re ĩhãimana u'ãsi mono si, ma tã ĩpisutu, Zezusihĩ zadawa wasu'u'wa, dama 're ĩhãimana mono zéb da hã, ĩsadawa para. Wanhĩb'apito Zezusi hã wa tã duré sabu, ĩtãmo na. A norĩ wa'wa hã bété. E 'wa simiroti zarina, ma tã 're ĩsaze za'ra wa'aba mo. Wanhĩb'apito ma, te ai'ãma 're ĩromhuri za'ra wa'aba mono zéb zarina, ma tã 're ĩsaze za'ra wa'aba mo. Tawamhã, e marĩ te wasu'u, ã hã, Zezusi hã te aima 're ĩwasu'u za'ra wa'aba mono zéb zarina, 're ĩsaze za'ra wa'aba mono zé hã. 'Re ĩhãimana u'ãsi mono nhĩmpisutuzéb zarina, wa hã tã sena dama Zezusihĩ zadawa wasu'u'wa, te aima ĩwasu'u za'ra wa'wa.

³ Ni'wam norĩ hã, Zezusihĩ zadawa wasu'u'wa na, tã sena dama 're ĩhãimana mono õ na hã te te dama 're ĩwasu'u za'ra mono wa, wa tã ãne tãma 're ĩsiwaihu'u za'ra.

⁴ Wa norĩ hã Zezusihĩ zadawa wasu'u'wa norĩ hã, wasazéb da, duré wahãimanazéb da, wa'ãma 're ana wa'aba mono wamhã, e ĩ'uwaibaba, wa za wa'ãbã ãna, wa te 're waibu, wa'ãma 're ana wa'aba mono zé hã. ĩ'uwaibaba, wa za tã wa te 're waibu.

⁵ Zezusihĩ zadawa wasu'u'wa norĩ, wasiré norĩ hã Zezusi te te dama 're sadawa wasu'u za'ra mono da, nimomo 're nomro mono wamhã, timro hã te za siré te te 're simro. Duré Wanhĩb'apito no norĩ zama, te za timro hã siré te te 're simro. Pedru hã te za duré timro hã siré te te 're saprõni. Wa hã bété. ĩmro ré, 're ĩhãimana mono 'wa'ãhã, duré ĩsazei'wa si'uiwa 're wahãimana mono wamhã, e ĩ'uwaibaba 're ĩhãimana mono õ di aré, daza'rui mono bã, ĩsiré te 're saprõni mono wamhã. Duré wasazéb da, ĩmro ãma zama, 're ana wa'aba mono wamhã, e ĩ'uwaibaba õ di aré. ĩ'uwaibaba tã aré, wahãimanazé hã.

⁶ Wa hã Paru, duré ĩsiré romhuri'wa Banabé hã, Zezusihĩ zadawa wasu'u'wa norĩ siré, 're wahãimana mono nherẽ, e wa norĩ si, wa za wanhĩb'rata na wa te wasima 're romhuri pese, wasazéb da hã, ãma 're ĩwahãimana mono zéb da hã. E ãne hã rob'uwaibaba bã bété.

⁷ Da'wapéi'wa norĩ hã bété. E tihĩb'apito ma, te te 're romhuri za'ra mono ré, te za si'uihã na 're siwa'ãbã za'ra, tihãimanazéb da hã. Mare di. Si'uihã na 're siwa'ãbã za'ra mono õ di za. Duré uwa 'ru na romhuri'wa norĩ hã te te 're 're za'ra mono pari, uwa 'ru 'rã hã oto 're 'rã prédub za'ra mono wamhã, e misi si te te sima 're suhãri za'ra mono õ di za, te te 're huri mono da. Te za tã misi si te te sima 're suhãri za'ra, romhuri'wa norĩ hã. Duré dama pone'erebã 'madã'ã'wa norĩ hã, e a'ubuni wi te te 're 'madã'ã za'ra mono ré, ĩhãiwa'u hã te te 're ãhuri mono õ di za. Te za tã te te sima 're hãiwa'u za'ra, te te 're ãhuri mono da.

⁸ Āne na danhimirosa'rata zarina, te ãma aima rowasu'u za'ra wa'aba õ di. Duréihã 'Re ĩhãimana u'ãsi mono nhĩmiroti na Mozési te te ãma ĩrob'ui'érezéb zarina si, wa aima ãma rowasu'u za'ra wa'wa. ĩsi'uihã na hã, mare di.

⁹⁻¹⁰ Āne duréihã Mozési te te ãma ĩrob'ui'érezé hã:

"Aro 'rã ne hã, powawé hã tipara na te te aima 're sub za'ra wa'aba mono ré, 're wata wasisi za'ra wa'aba mono õ di za, 're saihuri tã mono da."

Āne duréihã 'Re ĩhãimana u'ãsi mono nhĩmiroti na rob'ui'ére hã te 're hãimana. E tawamhã, powawé si te 'Re ĩhãimana u'ãsi mono hã te te 're azawi. Mare di. Taha zawĩ nhipai u, te duré wa norĩ hã te te 're wa'azawi pese. Taha wa, duréihã ãne na te te rowasu'u wamhã, taha wasu'u nhipai u, ma tã duré wa'ãma zama romnhĩmiré'é. Buru da, ti'a te te 're ĩhãibãdã za'ra mono norĩ hã duré oto 're 'rãiré za'ra mono wa, te te 're 'rãihãri za'ra mono norĩ hã, e buru tede'wa te te tãma 're ĩpo'o za'ra mono zéb zõ, 're simnhasi za'ra mono õ di za. Te za tã sõ 're simnhasi za'ra. Āne hã aiwa, te wasu'u.

¹¹ Tane duré, robzuri'wa norĩ hã ro ubuni ré te te 're ĩrobzuri za'ra mono ne, wa tã Cristuhu wasu'uwé na wa te 're aipawaptom na'rata za'ra wa'wa. E tawamhã ãne hã ĩbãĩ õ di, aima za'ra wa'aba hã, wanhĩmipawaptobzé wa'rãmi, marĩ zõ aiwi 're wanhĩmnhasi za'ra wa'aba mono wamhã, wasazéb da hã, ãma 're ĩwahãimana za'ra mono zéb da hã. Wa za tã 're wanhĩmnhasi za'ra, rob'uwaibaba wa.

¹² Ni'wam norĩ hã Cristuhu wasu'uwé na te te 're ĩdapawaptob za'ra mono norĩ hã, tã ĩbãre te marĩ na 're ĩpawaptob u'ãsi za'ra wa'aba mo, ãma 're ĩhãimana za'ra mono zéb da hã. Tawamhã wa norĩ hã Zezusi, wa te aima 're wasu'u rata za'ra wa'aba mono nherẽ, e ta norĩ nhipai u, marĩ zõ aiwi 're wanhĩmnhasi za'ra wa'aba mono õ di za bété. E ãne hã ĩsarinaĩ õ di, aima za'ra wa'aba hã. Āne hã, tã ĩsarina.

Í'uwaibaba nherê, niwamhã marĩ zô, aiwi 're wanhimnhasi za'ra wa'aba mono ô di. Mare di. Duré, wa te aiwi 're rowaptêrê za'ra wa'aba mono âna, wa tô wa te 're robzêpata za'ra, íwasu'uwê ré daro mono bâ, wa te 're íropéi mono zé hã, wa te dawí âma 're 'wa'rutu tô za'ra mono da.

¹³ 'Re íhâimana u'âsi mono âma 're ídawata za'ra mono zéb 're, 'ri ráihã 'remhã sasedoti norĩ hã, ta norĩ hã 'Re íhâimana u'âsi mono ma, danhoprubzéb da, dasa hã da te tâma 're ísômri za'ra mono hã, te za te te sima 're po'o za'ra syry na, âma 're saihuri mono da. Danhimizama hã, 'Re íhâimana u'âsi mono ma, danhoprubzéb da, da te tâma 're ísômri za'ra mono nhi zama, te za duré te te sima 're po'o za'ra syry na, da'âma romhuri'wa norĩ hã, wedeza ne na 'Re íhâimana u'âsi mono ma, te te 're ízata za'ra mono hã. E âne hã aima waihu'u za'ra wa'aba ô di bété.

¹⁴ Tane duré, Wanhib'apito hã ma tô te te wama 're pisutu za'ra, íwasu'uwê hã wa te dama 're íwasu'u za'ra mono norĩ ma hã, danhibzari na da te 're íwapawaptob za'ra mono na, âma 're íwahâimana za'ra mono zéb da hã, wanhimirowasu'u wê wa'rãmimhã, dama.

¹⁵ Tane nherê, nimahã na hã marĩ zô aima ínhimnhasi za'ra wa'aba ô di, asibzari na asiwi 're ípawaptob za'ra wa'aba mono da hã, Cristuhu wasu'uwê na te 're aipawaptob za'ra wa'aba mono wa'rãmimhã. Mare di. Taha wasu'u na si, wa âma 're ítoi uptabi, ípê'ê 'remhã, ínhimromhuri wa'rãmi, marĩ zô aima 're ínhimnhasi za'ra wa'aba mono ô wa. Duré marĩ zô aima ínhimnhasi za'ra wa'aba zém na, te sãna'rata da, te ísina aima âma rob'uí'ére za'ra wa'aba ô di, âhána hã. Âne 'wa'âhã, aré íma 're robzei mono ô di. Ídã'â da si, aré ínhimirosa'rada hã.

¹⁶ Íwasu'uwê hã wa tô te dama 're wasu'u u'âsi, tô. Tane nherê, e taha zarina si, wa za íhâimanazém na 'rãwi 're ísi'madã'â ze. Mare di. 'Re íhâimana u'âsi mono nhimipisutuzéb zarina si, wa âne na te tâma 're romhuri u'âsi. Ísi'uihã na te tâma 're romhuri mono ô di, âne na hã. Íwasu'uwê hã te dama 're wasu'u mono ô 'wa'âhã, aré íma 're ropipa uptabi mono di.

¹⁷ Âne na te tâma 're íromhuri mono zéb da hã, wa hã ísi'uihã na ísipisutu 'wa'âhã, aré íbãre ípawa'âbã ré, íwasu'uwê na te tâma 're íromhuri mono zé hã. Tane nherê, ísi'uihã na ísipisutu ô di. 'Re íhâimana u'âsi mono si, ma tô ípisutu, taha ma í'umnhasi zarina, te tâma 're romhuri wê u'âsi mono da.

¹⁸ E marĩ na tawamhã, ípawa'âbãzé hã. 'Re íhâimana u'âsi mono zadawa wasu'u'wa norĩ siré 're íhâimana mono nherê, marĩ zô dama 're ínhimnhasi mono ô zarina, da te 're ípawa'âbã mono âna, wa íwasu'uwê si te dama 're wasu'u. Taha na si, wa 're ítoi u'âsi. Taha na si ípawa'â hã, âma 're ítoi u'âsi mono zém na si.

¹⁹ Wa hã ípawa'âbã ré, re íhâimana mono ô di. Taha wa, íwada'uri zarina si, te 're romhuri mono ô di. Tane nherê, wa tô ísima wê, dapawa'âbã âna dama romhuri'wa norĩ ne, te dama 're romhuri u'âsi mono da, ínhimirowasu'u zarina, Cristu hã da te 're ísaze za'ra mono da si, da'âhã na.

²⁰ Zudezu norĩ hã íwasu'uwê na te 're pawaptob za'ra mono da, í'rata 're íhâimana za'ra mono ré, zudezu hâimanazéb zarina, wa tô 're íhâimana, ínhimirowasu'u zarina, ta norĩ hã ahã na te te 're saze za'ra mono da, Cristu hã. Ta norĩ hã duréihã 'Re íhâimana u'âsi mono nhimiroti 'rata na Mozési te te âma írob'uí'érezé hã te zahadu te te 're 'madã'â pese za'ra, taha zarina, 'Re íhâimana u'âsi mono te te 're íwêsãmri za'ra mono da si. Tane hã, wa hã í'rata 're íhâimana za'ra mono ré, 'Re íhâimana u'âsi mono nhimiroti 'rata zarina, wa tô ta norĩ hâimanazéb zarina si 're íhâimana, ta hã te 're í'madã'â pese mono zéb zarina, te te 're íwêsãmri mono da newa, ísine za'ra, âne na ísina 're ínhimnhasi mono ô nherê. Sô'awi te tiwi wê'ô za'ra ô di, zudezu norĩ hâimanazé hã. Da'ahã na da te 're saze za'ra mono da si, wa tô âne na si te 're rosa'rata.

²¹ Tane duré, zudezu'ô norĩ 'rata, 're íhâimana mono ré, ta norĩ hâimanazéb zarina, wa tô duré 're íhâimana. Zudezu norĩ nhimiroti hã te 're 'madã'â pese mono ô di. E tawamhã 'Re íhâimana u'âsi mono nhimiroti hã te 're 'madã'â mono ô di, zudezu'ô norĩ 'rata 're íhâimana mono ré hã. Wa tô te 're 'madã'â u'âsi tô. Cristuhu nhimiroti si, wa tô te 're 'madã'â u'âsi. Âne si, wa tô te 're 'manharĩ, ta norĩ zama ahã na Wanhib'apito te te 're saze za'ra mono da, zudezu'ô norĩ hã.

²² Duré ni'wam norĩ hã wasiré Zesusihi zazei'wa 're hâimana za'ra mono nherê, sib'uware na âma 're íhâimana za'ra mono norĩ hã íwasu'uwê na te 're apawapto mono wamhã, wa za ta norĩ hâimanazéb zarina si 're íhâimana, ínhimipawaptobzéb zarina, te te 're sazei pese za'ra mono da. Âne hã dapoto mono bâ 're ídahâimana za'ra mono zép sidãpãsi, wa za dasine dama 're íhâimana, da'ahã na Cristu hã da te 're ísaze za'ra mono zéb da si.

²³ Cristuhu wasu'uwê hã daro mono bâ da te 're íwaihu'u za'ra mono zéb da si, wa âne dama 're íhâimana. Duré íwasu'uwê zarina, 'Re íhâimana u'âsi mono, ísazei'wa norĩ ma, uburé

marĩ ĩwē hā te te tāma 're ĩ'anhomri mono zém na, dame 're ĩhāimana mono da, wa tō āne dama 're ĩhāimana.

²⁴ Āne, wa za oto aima āma romnhimiré'é za'ra wa'wa. Dawara na da'ahā na 're dasipibu za'ra mono nherē, áté misi te za ni'wa hā dawi watobro. Tawamhā dawi ĩwatobro si, te za marĩ ĩwē hā sima ti'á. Āne hā aima waihu'u pese za'ra wa'aba di. Tane duré, a norĩ wa'wa hā te za asiptete sina Cristuhu āma si 're anomro wē wa'aba mo, marĩ ĩwē uptabi hā 'Re ĩhāimana u'ási mono te te aima 're ĩpisutu za'ra wa'aba mono zép si, asina 're uwaimrami za'ra wa'aba mono da, ni'wa hā dawara na wara tete wa, dawi watobro wē te, marĩ ĩwē hā te te sima ĩ'ári ne.

²⁵ Ni'wa hā dawara na dame hāimana da, te te sima wē wamhā, te za nasi sipibu, dazada sihāiba wapu da. Tawamhā dawi watobro wamhā, ropsu 'manharĩ na te za āma sōpre ni, te te da'mairēme wē te. Tane nherē, te za tiwi tiwasété su'u, ropsu 'manharĩ hā. Tanei ō di, wa norĩ hā. ĩsi'utōrĩ'ō zō si, wa za Cristuhu āma si wasina 're wanhiptete u'ási za'ra, 'Re ĩhāimana u'ási mono, marĩ ĩwē uptabi hā te te wama 're ĩ'apísutu mono zō si.

²⁶ Dawara na 're dasipibu za'ra mono wamhā, siwa'ru dasiwi 're dasisa'rei mono ō di. Awa'awi u'ási te za 're dasisa're, 're dasirēme za'ra mono da. Tane duré, wa hā siwa'ru 're ĩhāimana mono ō di, Cristuhu āma hā. Taha āma si, wa za ōhō haré 're ĩhāimana u'ási, 'Re ĩhāimana u'ási mono, ĩwē uptabi hā te te ĩma ĩpisutuzéb zō si, ĩ'upana marĩ zō tiwi 're ĩsipai mono āna. Āne duré, sib'rata ubu ré, da'wapéi'wa norĩ hā da'ubu wi simi'ahāri waihu'u ō wamhā, taré te za nasi da'āma pahairĩ siwa'ru, te te da'āma simirei āna. Tanei ō di, wa hā. Siwa'ru 're ĩhāimana mono ō di. Cristuhu āma 're ĩhāimana wē mono zém na si, wa ĩsina te tāma āma 're uwaimrami u'ási, Cristuhu ma hā.

²⁷ Ni'wa hā dame wara da, te te sima wē wamhā, te za 're siwasutu u'ási, dazada siptete da. Tane, wa duré wa hā 'rāwi 're ĩsi'wapéi u'ási, ĩwasété na 're ĩhāimana 'rata mono zéb zarina, 're ĩhāimana tō mono da oto. ĩpē'ē 're, te ĩsima 're ĩrosa'rata wasété mono zé hā wa tō oto 'rāwi te ĩsima 're a'uprosi. Taha wa, wa tō āne si te ĩsima 're ab'manharĩ, ĩnhimirowasu'u zarina, da'ahā na da te 're saze za'ra mono nherē, 'Re ĩhāimana u'ási mono, ĩwē uptabi hā te te ĩma písutu nherē, 'rāwi te ĩsiwi simini tō da.

10

Romhāiba 'manharĩ āma 're ĩdawata za'ra mono zé wasu'u

¹ ĩsisānawā norĩ, āne hā wa za oto aima āma rob'rāzarōtō za'ra wa'wa, aima āma ĩpo're pu'u za'ra wa'aba zém na, āma 're aipo're simrami za'ra wa'aba mono tō da. Duréihā wahi'rata norĩ hā Mozési hā Ezitu hawi te te sani za'ra wamhā, 'Re ĩhāimana u'ási mono hā hāiwa'a na te mo ĩsōwab za'ra, bādādi te te tāma wasu'u za'ra mono da, te te 'madā'ā pese za'ra mono da. Ā pré na pu'u nhisi wa'wai baba, ma tō duré te te simro, rob'ré na, zara u te te saprĩ za'ra da, eziipsiu norĩ wi, te te sō'reptu za'ra da.

² Āne na hāiwa'a 'rowi 're danomro mono wa, duré ā wa'wai baba rob'ré na da te saprĩ za'ra wa, ma tō Mozési hā āma uburé da te āma 're sasōmri za'ra, wa norĩ hā ā dawabzuri, wa te 're 'manharĩ za'ra mono wa, Cristuhu āma, wa te oto 're ĩsasōmri za'ra mono ne.

³ Duré a'ubuni wi 're danomro mono ré, 'Re ĩhāimana u'ási mono, hāiwa hawi te te 're ĩdapawpto mono na, ma tō dasa da te 're huri, uburé.

⁴ Ā hā 'Re ĩhāimana u'ási mono te te dama ĩ'ōb za'ra mono na ma tō duré da te 're āhuri, aihĩni pese. Ētē zahābā ĩtōmo wawē sipo'ozém hawi 're ĩpu'u mono na, ma tō da te 're āhuri, ĩsimipawptobzéb zarina. Ētē zahābā hā a'ubuni wi 're ĩsa mono na, ā hā da te āma 're ĩ'āhuri mono ne, ma tō Cristu hā 'rāwi dasiré 're hāimana, te te 're da'apawpto mono da.

⁵ Tane nherē, āne na 'Re ĩhāimana u'ási mono te te 're dapawpto mono nherē, ma tō da'ahā na siwi da'awē'ō, dapo're āna 're danomro mono 'ru te. Taha wa, a'ubuni wi 're danomro mono ré, ma tō te te 're da'uprosi, danhimizahāri mono sidāpāsi.

⁶ E marĩ, te tawamhā wama wasu'u za'ra, āne na wahi'rata norĩ wasu'u hā. Ta norĩ ne, wasasété si, wa te wasima 're 'ruiwapari za'ra mono tō da, te wama wasu'u za'ra.

⁷ Duré ta norĩ ne, romhāiba 'manharĩ āma waihu'u pese newa, āma 're ĩdawata za'ra mono āma, 're wawata za'ra mono tō da, te duré wama wasu'u za'ra. Duréihā 'Re ĩhāimana u'ási mono zadawa wasu'u'wa, ma tō āne na ĩbaihā na āma rob'ui'ére:

“Tawamhā dato hā ma tō dasiwi 'manharĩ ni, powawē hāiba ne, oru 'manharĩ āma ĩdawata za'ra zéb da hā. Taha wa, ma tō duré siwa'ru āma apese za'ra ni, dahāimana wasasété si dama wē za'ra wa.”

Āne na duréihā dawasédé, da te dasiwi ĩ'manharĩ za'ra zé wasu'u na rob'ui'ére hā.

⁸ Ta norĩ hā wahi'rata norĩ hā ahā na ma tō duré aibā norĩ hā pi'ō na tiwasédé hā 'manharĩ za'ra. Āne wa, ma tō duré 'Re ĩhāimana u'ási mono hā da'uprosi, 23 miu na dahāiba hā. Taha

wa, wa norī hā wawasédé hā āne na wa te 're 'manharī za'ra mono ō di za, wahi'rata norī ne.

⁹ Ta norī hā ma tō duré tiwasédé hā 'manharī za'ra, 'Re ihāimana u'āsi mono hā niha te te tāma rob'manharī za'ra ō zō, te te pibu za'ra da. Āne 'ru te, ma tō duré wahi nhipsari na hā da'ahā na da'uprosi, 'Re ihāimana u'āsi mono hā. Āne na hā wa norī zama, wa te 're pibu za'ra mono ō di za, Wanhib'apito hā, wawasédé hā wa te 're ī'manharī za'ra mono na, niha te te wama 're arob'manharī mono ō zō.

¹⁰ Wahi'rata norī hā ma tō duré Mozésihi ma nharī wasété za'ra. Ma tō tāma aiwapsari za'ra. Taha wa, ma tō 'Re ihāimana u'āsi mono hā hāiwa āma tāma ĩromhuri'wa hā we satō, dapārī'wa na ĩsisi hā, ta hā te te da'uprosi da. Āne tō da, wa norī hā 'Re ihāimana u'āsi mono ma, wa te tāma 're nharī wasété za'ra mono ō di za.

¹¹ Āne ma tō wahi'rata norī ma tīromhāiba duréihā, tiwasédé te te 're ī'manharī za'ra mono zéb zarina, 'Re ihāimana u'āsi mono te te 're ihā za'ra mono zém na, da te 're waihu'u za'ra mono da. Ma tō duré āne na ni'wa hā āma rob'ui'ére, āma 're ĩwasipo're pu'u za'ra mono zéb da hā, ĩsine wa te 're 'manharī za'ra mono tō da. Romhuture di oto, waré ĩrob'rāsutuzéb u hā. Taha wa, wa za wanhimiza'rese 're wahāimana u'āsi za'ra.

¹² Taha wa, Cristuhu āma asiptete sina 're aihāimana za'ra wa'aba mono na, 're asi'madā'ā ze za'ra wa'aba mono wamhā, te za asimiza'rese sina pé 're aihāimana za'ra wa'aba mo, aiwasété u apā 're aire're'e aba mono tō da.

¹³ Tō sena, asiptete sina āma 're anomro u'āsi aba mono zō, 'Re ihāimana u'āsi mono hā te te 're aipibu za'ra wa'aba mono wamhā, aimawi na te te 're aipibu za'ra wa'aba mono ō di za, ĩpire uptabi na hā. Tō ōhō na si te te 're ĩda'apibui mono zém na si, te za tō te te 're aipibu za'ra wa'wa. 'Re ihāimana u'āsi mono hā uburé wama umnhasi za'ra di, marī na uburé te te wama 're ĩ'aropisutu mono zém na hā. E tawamhā, asiptetezém nhapai u, te za ĩpire uptabi na te te aipibu na 're sahu za'ra wa'wa, aiwasété u apā tiwi 're ahire'e aba mono da. Mare di. Tō sena, asiptete sina āma 're anomro u'āsi aba mono zō, te te 're aipibu za'ra wa'aba mono wamhā, te za niha te te aima 're pisutu za'ra wa'wa, rowē ré ĩhawi 're aiwairébé aba mono zéb da hā, ōne haré asiptete sina āma 're anomro u'āsi aba mono da.

¹⁴ Taha wa, ĩsisānawā norī, ĩma asawi pese za'ra wa'aba norī hā, waihu'u pese newa romhāiba 'manharī āma 're ĩdawata za'ra mono zém na, da'āma 're sasōmri za'ra wa'aba mono ō di za. Taha nhiti te za 're aihāimana u'āsi za'ra wa'aba mo.

¹⁵ A norī wa'wa hā te oto asimiza'rese 're aihāimana za'ra wa'aba mo, tō. Taha wa, āhāna te aima āma ĩrowasu'u za'ra wa'aba zém na, te za āma 're ĩrosa'rata pese za'ra wa'aba mo, ĩ'uwaibaba te aima āma uwaimrami za'ra wa'aba zō.

¹⁶ Zezusi hā wazada ĩdā'ázém na 're ĩwasipo're pu'u za'ra mono zéb da, wasiré 're wasi'rā'ōtō mono wa, 'Re ihāimana u'āsi mono āma 're wawata za'ra mono pari, wa za hāsizém na uwa 'rāi wa'u ĩsé hā wa te 're āhuri. Āne hā wasiré, wa te 're āhuri mono wamhā, Cristuhu wi ĩwapru hā tiwi pu'u wa, wazada ĩdā'ázéb zarina, te rowézé hā wahāiba mono bā wama 're hāimana za'ra. Duré ĩ'u'ēne hā wasiré, wa te 're huri mono da, wa te wasima 're wē'ē za'ra mono wamhā, Cristu hā da te dasiwi ĩhāibapru wa, wazada ĩdā'ázéb zarina, te duré wahāiba mono bā rowézé hā wama 're hāimana za'ra.

¹⁷ Zezusi hā wazada ĩdā'ázém na 're wasipo're pu'u za'ra mono da, wasiré 're wasi'rā'ōtō mono wamhā, wa'ahā nherē, wa za ĩ'u'ēne hā wa te wasima 're wē'ē za'ra, misi nherē, wa te 're ĩhuri mono da hā. E marī te wama wasu'u za'ra, misi ĩ'u'ēne hā. Wa norī hā wasiré ĩsazei'wa norī hā wa'ahā nherē, simisutu Cristuhu siré 're ĩwahāimana za'ra mono zé, te wama wasu'u za'ra. Misi dahāiba ne oto 're ĩwahāimana za'ra mono zé, te wama wasu'u za'ra.

¹⁸ Izarazéhé nhihudu norī hā bété. Ta norī hā 'Re ihāimana u'āsi mono ma, 're sōprub za'ra mono da, tinhimizama te te 're simroi mono wa, wedeza ne na tāma danhoprubzé nomrizé nhisiwi, da te 're zata za'ra mono ō ré, te za syry na te te sima 're po'o za'ra, ĩnhi hā, āma 're saihuri mono da. Āne wamhā, 'Re ihāimana u'āsi mono siré te za 're hāimana za'ra. Tane duré, a norī wa'wa hā waihu'u pese newa, romhāiba 'manharī āma 're dawata za'ra mono da, danhimizama da te tāma 're ĩsōmri za'ra mono nhi na, dasiré āma 're asaihuri aba mono wamhā, te duré dasiré āma 're aiwata za'ra wa'aba mo, romhāiba 'manharī āma. E āne hā aima wē za'ra wa'aba di. Mare di. Ta hā wē ō di, āma 're ĩ'aiwata za'ra wa'aba mono hā, dame.

¹⁹ Āne na te aima āma ĩrowaihu'u za'ra wa'aba mono zé hā, e marī te wama wasu'u za'ra. E romhāiba 'manharī hā, 'Re ihāimana u'āsi mono, waihu'u pese na 're ihāimana mono ne, 're ihāimana za'ra mono zé, te wama wasu'u za'ra. Mare di. Duré dasa hā romhāiba 'manharī ma, da te 're ĩsōmri za'ra mono hā, e pire na te wama 're hāimana za'ra. Mare di. Wama hā, taré hā.

²⁰ Āne si, wa za duré aima āma rowaihu'u za'ra wa'wa. Īsazei'ō'wa norī hā wedeza ne na dasa te te 're zata za'ra mono wamhā, 'Re ihāimana u'āsi mono ma, ta norī hā āma 're sōprub za'ra mono ō di. Wa'uburé norī ma si, te ta norī hā tāma āma 're sōprub za'ra, āma 're Īwata za'ra mono da hā. Taha wa, a norī wa'wa hā dasa, ta norī ma, da te 're ĩsōmri za'ra mono na āma 're asaihuri aba mono wamhā, wa'uburé norī āma te za ĩsiré 're aihāimana za'ra wa'aba mo. Taha wa, āne hā dame 're 'manharī za'ra wa'aba mono da, wa hā te ai'āma 're rosa'rata za'ra wa'aba mono ō di. Mare di.

²¹ A norī wa'wa hā Cristuhu zazei'wa oto 're anomro aba mono wa, te tō asiré 're asi'rā'ōtō aba mo, uwa 'rāi wa'u ĩsé hā asiré 're āhuri aba mono da, hāsizém na, Wanhib'apito wi, ĩwapru tiwi pu'u wa, wazada ĩdā'āzém na āma 're asipo're pu'u za'ra wa'aba mono zéb da hā. Taha wa, wa'uburé norī āma 're dawata za'ra mono da, marī hā dasiré da te 're āhuri mono wamhā, āma dame 're aihāimana waihu'u za'ra wa'aba mono ō di za, ta norī nhimihāsizém na ĩsiré 're āhuri aba mono tō da. Duré Wanhib'apito hāiba, da te dasiwi hāibapru wa, wazada ĩdā'āzém na āma 're asipo're pu'u za'ra wa'aba mono da, te duré ĩ'u'ēne hā asiré 're ĩhuri aba mo. E tawamhā ĩ'uwaibaba, te za tō dame 're ĩ'manharī za'ra wa'aba mo, ĩsazei'ō'wa norī siré 're asaihuri aba mono wamhā, wa'uburé norī āma 're dawata za'ra mono da, dasa hā da te dasima 're 'manharī za'ra mono wamhā. E tō ĩ'uwaibaba āne hā aima za'ra wa'aba hā.

²² Āne hā 're 'manharī za'ra wa'aba mono wamhā, Wanhib'apito hā te za asada 're hāimana za'ra wa'wa, ĩ'upana wa'uburé norī āma si 're aiwata za'ra wa'aba mono wa. Āne zarina, wazada 're hāimana za'ra mono wamhā, e Wanhib'apito nhiptetezém nhūpai u, wanhiptetezē hā wama 're hāimana za'ra mono bā, wa za ĩsimihāzé wi 're wawairébé. Mare di. Tiwi 're wawairébé waihu'u mono ō di za.

²³ Nī'wam norī hā asiré ĩsazei'wa 're ihāimana za'ra mono norī hā, te āne na te te sima 're nharī za'ra: "Marī hā wa te 're 'manharī za'ra mono tō da, 'Re ihāimana u'āsi mono te te wawi 're awē'ō mono ō nherē, wa norī zama, wa te wasiwi 're wē'ō za'ra mono ō di za, wa te 're 'manharī za'ra mono tō da. Wa za tō wa te 're 'manharī za'ra, wa te wasima 're ĩwē za'ra mono zéb uwaibaba si." Āne ma tō nī'wam norī hā te te sima 're waihu'u za'ra. Tane hā wē di tō. Tane nherē, marī hā 'Re ihāimana u'āsi mono te te wawi 're awē'ō mono ō nherē, ātē wa te 're 'manharī za'ra mono wa, wa za wasiré ĩsazei'wa norī wi, wa te āma 're 'wa'rutu za'ra. Taha wa, marī hā dazu wa te 're 'manharī za'ra mono ō di za, wasiré ĩsazei'wa norī wi, wa te āma 're 'wa'rutu tō za'ra mono da. Duré wasiré ĩsazei'wa norī hā, Cristuhu āma si siptete sina 're nomro mono da, wa te 're ĩpawaptob za'ra mono da si, wa za tō uburé marī hā ĩwē si wa te 're 'manharī za'ra.

²⁴ Rāwip si 're asipawaptob za'ra wa'aba mono da, asina 're rosa'rata za'ra wa'aba mono ō di za. Asiré ĩsazei'wa norī hā 're pawaptob za'ra wa'aba mono da si, te za ta norī āma si 're ĩrosa'rata u'āsi za'ra wa'aba mo.

²⁵ Romnhi hā da te dasima 're ĩwede za'ra mono zéb āma, da te 're ĩ'uiupra za'ra mono hā, te za asina aihātā'ā āna 're ĩhuri aba mo romnhi hā, nima hawib zō asimnhasi aba āna. Romhāiba 'manharī ma, da te 're ĩsōmri za'ra mono na, 're rosa'rata za'ra wa'aba mono āna aipē'ē 're, āma 're asiwē'ō za'ra wa'aba mono ō di za.

²⁶ 'Re ihāimana u'āsi mono zadawa wasu'u'wa hā ma tō āne na āma rob'ui'éré, duréihā: "Uburé ti'a hā Wanhib'apito te hā. Duré uburé marī hā ti'ai āma 're ihāimana za'ra mono hā, Wanhib'apito te hā. Taha wa, uburé dasazé hā wē di, āma 're ĩwasaihuri mono zéb da hā."

Āne duréihā āma ĩrob'ui'éré hā te 're hāimana.

²⁷ ĩsazei'ō'wa hā ĩsiré ai'masai wa'aba da, asō 'mai'hārā aba wamhā, te za tō ĩsiré ai'masai wa'wa, asima 'maiwē wa'aba wamhā. Tawamhā uburé dasazé hā da te aima ĩ'a za'ra wa'wa hā te za tō ĩhuri 'wa, nima hawī, da te 'mai'āwisi zō, da'mazadhanharī aba āna, 'rāwi aipē'ē 're wa'aba, asi'maiwē'ō wa'aba zarina.

²⁸⁻²⁹ Tane nherē, ātē nī'wa hā te za āne na aima 'maiwaihu'u 'wa: "Ā hā dasazé hā romhāiba 'manharī ma, da te 're ĩsōmri za'ra mono." Āne hā nī'wa te te aima wasu'u za'ra wa'aba wamhā, taha na ai'masai wa'aba ō di za. E 'rāwi aipē'ē na asi'maiwē'ō wa'aba tō da, wa āne aima waihu'u za'ra wa'wa. Mare di. Taré dasa hā te te aima ĩ'maiwasu'u wa'aba wi, rosa'rada hā si'wa'rutu tō da, wa āne aima roti za'ra wa'wa, taha na asaihuri aba tō da.

E tawamhā, romnhi hā romhāiba 'manharī ma, da te 're ĩsōmri za'ra mono na, wa za 're ĩsa, romhāiba 'manharī āma dame 're ĩwata mono ō nherē. Āne, wa 'rāwi te ĩsima āma 're rosa'rata u'āsi.

³⁰ 'Re ihāimana u'āsi mono hā sōpru wa, āma 're wawata za'ra mono sina, wasa hā wa te 're huri mono wamhā, e ĩ'uwaibaba te za nī'wa hā te te dama 're wawasu'u wasété za'ra, tō ō hā wa te 're ĩhuri mono na hā. Mare di. Taré te za nī'wa hā te te dama 're wawasu'u wasété za'ra, tō sena newa.

³¹ Āne, wa za duré aima āma 'rāsutu za'ra wa'wa, ā ĭnhimirowasu'u na hā. Uburé marī hā te za 're ĭ'manharī wē u'āsi za'ra wa'aba mo, 're asaihuri aba mono wamhā, duré 're āhuri aba mono wamhā, duré marī aimawi hā 're 'manharī za'ra wa'aba mono wamhā, taha zarina si, 'Re ĭhāimana u'āsi mono āma 're dawata za'ra mono da.

³² Marī hā 're 'manharī za'ra wa'aba mono ō di za oŋo, da te āma 're ai'madā'ā za'ra wa'aba mono wa, dawasété u 're darere'e mono tō da. Āne hā dazada 're 'manharī za'ra wa'aba mono ō di za, zudezu norī da, duré zudezu'ō norī da, duré 'Re ĭhāimana u'āsi mono nhib'a'uwē 're ĭhāimana za'ra mono norī da.

³³ Wa hā bété. E niha dama 're ĭhāimana mono zé hā. Āne si, wa tō te ĭsima 're da'awē, uburé marī hā te 're ĭ'ab'manharī wē mono zém na, te āma 're da'apawapto mono da. ĭsima si, āne na 're ĭhāimana mono ō di. Uburé, wa dama 're ĭhāimana, 'Re ĭhāimana u'āsi mono te te 're ĭda'anho'reptui mono zé hā da te dasina 're uwaimrami za'ra mono da, ĭnhimipawaptozbéb zarina.

11

Aibā norī hā timro nhipai u 're ĭhāimana za'ra mono zé wasu'u

¹ Wa hā 're ĭmorizém na aima āma 're ĭsisanho za'ra wa'aba mono zéb zarina, te za 're anomro wē wa'aba mo. Cristu hā t'i'ai āma 're morī ré, wama āma 're ĭsisanho za'ra mono zéb zarina, wa hā 're ĭhāimana mono ne, te za duré 're anomro wē wa'aba mo.

² A norī wa'wa hā te oto ĭ'āma 're aipo're pu'u u'āsi za'ra wa'aba mo, 're ĭhāimana mono zém na hā, duré uburé te aima āma 're ĭrowasu'u za'ra wa'aba mono zém na hā. ĭsazei'wa norī 're ĭhāimana za'ra mono zém na roti hā da te ĭma 're ĭwaihū'u za'ra mono zéb zarina, te oto 're anomro u'āsi aba mo, te aima āma 're ĭroti za'ra wa'aba mono zéb zarina si. Taha wa, wa ai'āma 're ĭwata u'āsi za'ra wa'wa.

³ Tane nherē, aimawī na te aima āma ĭrowasu'u za'ra wa'aba da hā, wa tō ĭsima wē. Cristu hā uburé aibā norī nhib'apito, te 're hāimana. Duré aibā norī hā uburé timro norī nhib'apito, te 're hāimana za'ra. Duré 'Re ĭhāimana u'āsi mono hā ta hā, Cristuhu nhib'apito te 're hāimana.

⁴ A norī wa'wa hā, zudezu'ō na te 're aihāimana za'ra wa'aba mo. Taha wa, zudezu'ō na 're aihāimana za'ra wa'aba mono zéb zarina, te za tō uburé marī hā 're ĭ'manharī za'ra wa'aba mo. ĭsazei'wa norī hā asiré 're ai'rā'ōtō aba mono ré, aibā norī hā 'rā ubu ré, 'Re ĭhāimana u'āsi mono ma, 're mre me zusi mono wamhā, duré 'rā ubu ré, 'Re ĭhāimana u'āsi mono zadawa wasu'u na te te dama 're rowasu'u za'ra mono wamhā, e marī te ta norī hā imanazé hā wama wasu'u za'ra. Ta norī hā Cristu te te siwi 're ĭwazéb za'ra mono ō zé, te wama wasu'u za'ra, zudezu'ō norī hā imanazéb uwaiaba ō wa, āne hā.

⁵ Duré pi'ō norī hā 'rāi ubu āna, 'Re ĭhāimana u'āsi mono ma, 're mre me zusi mono wamhā, duré 'rāi ubu āna, 'Re ĭhāimana u'āsi mono zadawa wasu'u na te te dama 're romhuri za'ra mono wamhā, ta norī ma, ĭmro hā tāma 're wazéb za'ra mono ō di. E marī wa. Pi'ō 'rāi ubuzé hā timro zapari 're ĭhāimana za'ra mono zé, te te dama wasu'u wa, zudezu'ō norī hā imanazéb zarina. Pi'ō norī hā marī ĭwasédé hā te te 're 'manharī za'ra mono wa, te za da te 're 'rāpari za'ra, sisém na 're hāimana za'ra mono da a'ā. Tane duré, pi'ō norī hā 'rāi ubu āna, 'Re ĭhāimana u'āsi mono ma, 're mre me zusi mono wamhā, pi'ō, da te 're ĭ'rāpari za'ra mono ne, te za a'ā 're hāimana za'ra ta norī hā, sisém na.

⁶ Āne hā pi'ō norī, 'rā ubu āna 're hāimana za'ra mono wamhā, āne hā wē te bā, te za tō 're si'rāpari za'ra, sisém na dama 're ĭhāimana za'ra mono zéb da hā oto. Tawamhā 're si'rāpari za'ra mono wa, duré taré 're siséré nhihāri za'ra mono wa, dama sisém na 're hāimana za'ra mono tō da, te za 'rā ubu ré, dame 're hāimana za'ra, ĭsazei'wa norī hā 're si'rā'ōtō mono ré.

⁷ Tane nherē, ĭsazei'wa norī, siré 're si'rā'ōtō mono ré, aibā norī hā 'rā ubu ré, dasiré 're hāimana za'ra mono ō di za. E marī wa. 'Re ĭhāimana u'āsi mono ne, 're hāimana za'ra mono wa, ta norī hā. Tane nherē, pi'ō norī hā aibā norī zapari 're ĭhāimana za'ra mono zé hā, pi'ōi ma, aibā ĭpirezé, te wasu'u.

⁸ Duréihā 'Re ĭhāimana u'āsi mono hā, pi'ōi hāiba na aibā hā te te potō ō di. Aibā hāiba na si, ma tō pi'ō hā potō.

⁹ Duré aibā hā pi'ōi ma, 're hāimana mono da, te te potō ō di, 'Re ĭhāimana u'āsi mono hā. Pi'ō si, ma tō tāma potō, aibā ma, 're ĭhāimana mono da hā.

¹⁰ Taha wa, ĭsazei'wa norī hā rowahutu u 're si'rā'ōtō mono wamhā, pi'ō norī hā te za tō 'rā ubu ré dasiré 're hāimana za'ra. E marī wa. Timro norī zapari 're ĭhāimana za'ra mono zém na, da te āma 're waihū'u za'ra mono da, duré hāiwa āma 'Re ĭhāimana u'āsi mono ma romhuri'wa norī hā te te ĭré 're 'madā'ā za'ra mono wa, te te siwi 're wē'ō za'ra mono tō da, zudezu'ō norī hā imanazé hā te te sina 're uwaimrami za'ra mono da.

¹¹ Tane nherê, wa norî hã Wanhîb'apito âma oto 're wanomro mono wa, aibâ norî hã pi'ôî âna 're hâimana waihu'u za'ra mono ô di za oto. Durê pi'ôî norî zama, aibâ âna 're hâimana waihu'u za'ra mono ô di za. Âne hã aiwa te wama wasu'u za'ra.

¹² Durêihã 'Re îhâimana u'âsi mono hã aibâ hâiba na ma tô pi'ôî hã potô 'rata tô. Tane nherê, te oto ta hawîm harê aibâ norî hã pi'ôî hâiba hawî dama 're potô u'âsi za'ra. 'Re îhâimana u'âsi mono si, ma tô uburê marî hã te te apoto, aibâ norî zama, durê pi'ôî norî zama.

¹³ E tawamhã î'uwaibaba, te za pi'ôî norî hã 'râi ubu âna, 'Re îhâimana u'âsi mono ma, 're mreme zusi, îsazei'wa norî hã sirê 're si'râ'ô'tô mono wamhã. Ma'âpê, a norî wa'wa hã asi'uîhã na âma waihu'u za'ra wa'aba, âne na hã.

¹⁴ Aibâ norî hã sérê pa ré, 're nomro mono wamhã, wê'ô nherê, te siséb âna îré 're hâimana za'ra, tihâimanazéb zarinaî ô nherê, zudezu'ô norî hâimanazéb zarinaî ô nherê. Âne hã 'râwî wapê'ê na dahâimanazém na, wa te wasina 're îwaihu'u za'ra mono zéb zarina, wa âne na aima âma roti za'ra wa'wa.

¹⁵ Tane nherê, pi'ôî norî hã sérê pa ré, 're hâimana za'ra mono wamhã, dama 'madâ'â ze ti. E marî wa. 'Re îhâimana u'âsi mono si, ma tô îsérê pa hã te te tâma 're pisutu za'ra, pi'ôî norî ma hã, î'râzuwazéb da hã.

¹⁶ Âté ni'wam norî hã asirê 're îhâimana za'ra wa'aba mono norî hã te za âne na sina îzadawa 'ru za'ra, pi'ôî norî hã 'râ ubu ré 're îhâimana za'ra mono wasu'u na hã, te te îzaze za'ra ô wa. Âne wamhã, wa za âne na si îzadawa na tâma âma wa'râmi za'ra. Wa norî hã aimawî na, wa te dama 're roti za'ra mono ô di. Mare di. Durê 'Re îhâimana u'âsi mono nhîb'a'uwê, sirê 're îsi'râ'ô'tô mono norî hã te durê ôhô na si te te âma 're rosa'rata za'ra, pi'ôî norî hã 'râ ubu ré, 're îhâimana za'ra mono wasu'u na si.

Zezusi hã dazada îdâ'âzém na âma 're dasipo're pu'u za'ra mono da, dasirê 're îdasaihuri mono zé wasu'u

¹⁷ Aimawî na wa za oto aima âma roti za'ra wa'wa, aihâimanazém na 're î'upa za'ra wa'aba mono zém na hã. Taha wa, ai'âma îwata za'ra wa'aba ô di za, âhã na hã. Rowahutu u asirê 're asi'râ'ô'tô aba mono wamhã, asiptete sina Cristuhu âma 're anomro aba mono zéb da, 're asipawaptob za'ra wa'aba mono ô di. Marî na si, ma tô î'upana asiwî 're îro'wa'rutu za'ra wa'aba mo.

¹⁸ Âne uimrehêne, wa za a'â ai'âma rob'ui'éré za'ra wa'wa. Ma tô we îma aiwasu'u za'ra wa'aba ni, asirê 're asi'râ'ô'tô aba mono nherê, asima aipo'o aba na hã, 're asisada'âbã za'ra wa'aba mono 'ru te. Âne na syra na wa tô dazaze, da te we îma aiwasu'u wasétê za'ra wa'aba zém na hã. Âté tô sena, âne hã.

¹⁹ Âne hã wê'ô nherê, âté wê di tô. E marî wa. Asiwî aipo'o aba wamhã, ni'wam norî hã wa za wa te 're waihu'u za'ra, tô sena, Zezusihi zazei uptabi 'wa, 're îhâimana za'ra mono na hã.

²⁰ Asirê 're asaihuri aba mono da, 're asi'râ'ô'tô aba mono wamhã, Wanhîb'apito hã wazada îdâ'âzém na 're asipo're pu'u za'ra wa'aba mono zéb da, tâma âma 're uwaimrami za'ra wa'aba mono ô di. Marî aimawî hã 're î'manharî za'ra wa'aba mono da si, te 're asi'râ'ô'tô aba mo, siwa'ru.

²¹ Aihîni, asitême 're aihutu aba mono ô ré, te za ni'wam norî si dawana tisa hã te te 're huri, si'aba'rê na. Taha wa, te za ni'wam norî hã tisa hã te te 're simîni za'ra, îwana 're dasihutu mono wa. Taha wa, te za tô îwana da te 're uprosi za'ra. Ni'wam norî hã te za durê 're 'râ idi'iti za'ra, uwa 'râi wa'u îsê hã sa'êtê na te te 're âhuri mono wa.

²² E niha. E asôrôwa hã aima 're hâimana za'ra wa'aba mono â bâ, asapa'abã asa hã îwa 're îhuri aba mono zéb da hã. Asirê 're asi'râ'ô'tô aba mono ré, âne hã asiwî 're 'manharî wasétê za'ra wa'aba mono wamhã, asirê 'Re îhâimana u'âsi mono nhîb'a'uwê, 're î'ruiwaparî za'ra wa'aba mono zé, te aima wasu'u za'ra wa'wa. Âne hã asima 're 'manharî wasétê za'ra wa'aba mono wa, te durê îsimarî'ôî norî hã 're wazéb za'ra wa'aba mono âna, 're aihâimana za'ra wa'aba mo. Âne wamhã, e niha wa za ai'âma waihu'u za'ra wa'wa. E âne zarina, wa za durê ai'âma 're îwata za'ra wa'wa. Mare uptabi di, ai'âma 're îwata za'ra wa'aba mono da hã.

²³ Durêihã Wanhîb'apito te te îma îwaihu'uzém na, wa tô âne na aima waihu'u pari za'ra wa'wa: Zudasi hã Zezusi te te dama îhâiba nhomrizém na, tô taha barana ma tô Wanhîb'apito Zezusi hã î'u'êne hã ti'â.

²⁴ Tawamhã 'Re îhâimana u'âsi mono âma te tiwata, sôpru wa. Taha pari, ma tô te te wê'ê, î'u'êne hã. Âne te tâma nharî za'ra, tisirê 're înomro mono norî ma: "Â hã î'u'êne hã îhâiba te wasu'u, asada îsisômri za'ra wa'aba zé hã. Â hã te za 're îhuri aba mo, î'âma 're asipo're pu'u u'âsi za'ra wa'aba mono zéb da hã." Âne ma tô sina tâma rowasu'u za'ra, Zezusi hã.

²⁵ Tawamhã saihuri pari, tô õne ma tô duré hâsizé hã ti'â, uwa 'ru 'rã'i wa'ui ré hã. Æne te duré tâma nharĩ za'ra: "Á hã rob'rã'i wa'u hã, iwapru hã asada za'ra wa'aba za iwĩ pu'u wamhã, 'Re ihâimana u'âsi mono te te dama İropisutuzép té, tô sena za te te dama âma 're İ'a uwaimrami mono zé, te wasu'u. Á hã 're âhuri aba mono sidâpâsi, te za İ'âma 're asipo're pu'u u'âsi za'ra wa'aba mono zéb da, 're İ'manharĩ za'ra wa'aba mo, õne u'âsi." Æne ma tô duré sina tâma rowasu'u za'ra, Zezusi hã.

²⁶ Tawamhã, İ'u'êne hã 're huri aba mono wamhã, duré rob'rã'i wa'u hã 're âhuri aba mono wamhã, ta hã, Wanhib'apito dazada İdâ'âzém na 're asipo're pu'u za'ra wa'aba mono zé, te aima wasu'u za'ra wa'wa, za we apâ İmorizéb u hã.

²⁷ Taha wa, ni'wam norĩ hã Wanhib'apito âma 're İsipore'pu'u za'ra mono zéb da, İ'u'êne hã te te siré 're huri mono wamhã, duré rob'rã'i wa'u hã te te siré 're âhuri mono wamhã, siséb âna siré 're si'rã'õtô mono wamhã, ta norĩ hã te za Wanhib'apito hâiba na, tiwasédé hã te te âma 're 'manharĩ za'ra, iwapru na zama, dazada İdâ'âzé hã taré newa, siwa'ru te te 're huri mono wa, İ'u'êne hã, duré siwa'ru te te 're âhuri mono wa, rob'rã'i hã na.

²⁸⁻²⁹ Ni'wam norĩ hã Wanhib'apito dazada dâ'â da, İsihâiba nhomrizém na, te te 're rosa'rata za'ra mono âna, İ'u'êne hã te te 're huri mono wamhã, duré rob'rã'i wa'u hã te te 're âhuri mono wamhã, taha zarina, te za 'Re İhâimana u'âsi mono hã ta norĩ hã te te 're hã za'ra. Taha õ'umnhasite, te za a'â aipé'ê na 'rãwi 're asi'madâ'â za'ra wa'aba mo, asimirosa'rata wasédé hã aima 're hâimana za'ra wa'aba mono zô, taha uimrehêne, a'â asima 're pari za'ra wa'aba mono da. Taha parip si, te za oto İ'u'êne hã asiré 're İhuri aba mo. Duré taha parip si, te za oto rob'rã'i wa'u hã asiré 're İ'âhuri aba mo.

³⁰ Taha wa, ni'wam norĩ hã âne hã te te a'â 're 'manharĩ za'ra mono õ wa, te ta norĩ hã hâzé u'âsi 're hâimana za'ra ahã na, asiré 're İhâimana za'ra wa'aba mono norĩ hã. Ni'wam norĩ hã te duré sib'uwa u'âsi 're hâimana za'ra. Ni'wam norĩ hã ma tô duré 're dâ'â za'ra, âne wa.

³¹ Wasiré 're wasaihuri mono õ ré, wanhimirosa'rata wasédé hã wama 're hâimana za'ra mono zô, a'â wapé'ê na 'rãwi 're wasi'madâ'â za'ra mono wamhã, 'Re İhâimana u'âsi mono hã te te 're wa'ahã za'ra mono õ di za. E marĩ wa. 'Re wasiwé'ô za'ra mono wa, 're İwahâimana za'ra mono na, marĩ na, wa te 're İ'upa za'ra mono na hã.

³² Tane nheré, ti'ab ré te za tô wawasédé hã te te wa'âma 're İ'awaihu'u mono zéb zarina, te te 're wa'ahã za'ra, 'Re İhâimana u'âsi mono hã. E marĩ wa. Te te 're wa'azawi pese mono wa, taha zarina, apâ wa te âma 're sasõmri pese za'ra mono da. Nimahã na, uburé İsazei'ô'wa norĩ zu, za te te siwi wa'awé'ô tô da, te za tô âne wa, te te 're wa'ahã za'ra, ti'ai âma 're wanomro mono ré.

³³ İsisânawã norĩ, âne na wa za oto aima âma 'rãsutu za'ra wa'wa, Wanhib'apito dâ'âzém na 're asipo're pu'u za'ra wa'aba mono zéb da, asiré 're asaihuri aba mono zém na hã. Taha wa, te za a'â asisô 're asimipari za'ra wa'aba mo, aihĩni asitême 're aihutu aba mono wapsi, asiré âma 're asaihuri aba mono da. Æne hã wê di.

³⁴ Ni'wam norĩ hã asiré 're İhâimana za'ra wa'aba mono norĩ hã, mra te te 're simroi mono wamhã, tinhorôwa âma si te za a'â tisa hã te te 're huri. Taha parip si, te za oto asitême 're aihutu aba mo, asiré 're asirã'õtô aba mono da. 'Re İhâimana u'âsi mono hã te te siwi 're aiwé'ô za'ra wa'aba mono tô da, te za âne si İ'uwaibaba 're İ'manharĩ za'ra wa'aba mo.

Nimahã na, âma atême İmorĩ aba wapsi, wa za aimawi na aima âma roti za'ra wa'wa, rob'ui'ére na we asiwi İzadanharĩ za'ra wa'aba zém na hã.

12

'Re İhâimana u'âsi mono, Tipé'ezani na romhuri mono bâ te te dama 're İapisutu mono zé wasu'u

¹ İsisânawã norĩ, wasiré İsazei'wa norĩ hã romhuri mono bâ, 'Re İhâimana u'âsi mono pè'ezani nhimipawapto waihu'u pese na, âma 're İsipawapto za'ra mono zéb da hã, ta hã te te tâma 're İpisutu za'ra mono zém na, wa za oto aima âma roti za'ra wa'wa, sena âma 're İwaihu'u za'ra wa'aba mono zéb da hã, rosa'rata na âma 're upa za'ra wa'aba mono tô da.

² A norĩ wa'wa hã 'Re İhâimana u'âsi mono, 're waihu'u za'ra wa'aba mono õ ré, ma tô wa'uburé hã te te 're aiwada'uri u'âsi za'ra wa'wa, tô sena newa, romhâiba 'manharĩ hã tarére nheré, mreme õ nheré, ta norĩ âma si 're aiwata za'ra wa'aba mono da, waihu'u pese newa. Æne hã aima waihu'u pese za'ra wa'aba nheré, wa taré âma aipo're pu'u za'ra wa'wa.

³ Tane nheré, wa İsima aiwé za'ra wa'wa, aimawi roti hã waihu'u za'ra wa'aba da oto. Âté ni'wam norĩ hã te za âne na Zezusi hã te te dama 're wasu'u za'ra: "Zezusihi ma, marĩ İwasétère si tâma 're hâimana mono neza, 'Re İhâimana u'âsi mono nhimirob'manharizém na." Æne na hã ni'wam norĩ hã 'Re İhâimana u'âsi mono pè'ezani nhimipawaptozbéb ré, 're İnomro mono norĩ hã, te te dama 're wasu'u waihu'u za'ra mono õ di. Mare di. Duré âté ni'wam

norī hā te za āne na te te dama 're wasu'u za'ra, Zezusi hā: “Zezusi hā, taha Wanhīb'apito, danhipai u.” Ni'wam norī hā 'Re İhāimana u'āsi mono pē'ēzani nhimipawaptobzéb zarinaı ō nherē, āne na tō sena te te dama 're wasu'u waihu'u za'ra mono ō di.

⁴ 'Re İhāimana u'āsi mono pē'ēzani hā misi nherē, te İsavei'wa norī ma, romhuri hā te te 're apisutu, tindhimiromhuri mono bā sipu'u pese na āma 're sipawapto za'ra mono da.

⁵ Duré Wanhīb'apito hā misire nherē, wasipu'u pese na, wa wa te tāma 're romhuri za'ra, wanhimiromhuri mono bā, wasiré İsavei'wa norī hā.

⁶ Duré, 'Re İhāimana u'āsi mono hā misi nherē, ōhō si te tiwaihu'u pese na te te 're wa'apawapto, romhuri hā sipu'u pese na, wa te tāma āma 're İrob'ma'wamarī za'ra mono zéb da hā.

⁷ Wahāiba mono bā, ma tō romhuri hā te te wama 're apisutu 'Re İhāimana u'āsi mono hā, İpē'ēzani hā sena na wapē'ē 're, 're İhāimana za'ra mono na, wa te wasina 're waihu'u za'ra mono da, duré wasiré İsavei'wa norī hā āma 're wasipawapto wē u'āsi za'ra mono da.

⁸ 'Re İhāimana u'āsi mono pē'ēzani hā ni'wam norī si, te za te te 're pisutu za'ra, tō sena ta norī hā tindhimirosa'rata waihu'u pese na te te dama āma 're roti wē za'ra mono da, hāiwa hawī dahāimanazēm na rowaihu'u na hā. Ni'wam norī si, te za duré te te 're pisutu za'ra, rowaihu dama İwaihu'u'ō na, te te dama āma 're roti wē u'āsi za'ra mono da.

⁹ Ni'wam norī si, te duré 'Re İhāimana u'āsi mono hā te te 're pisutu za'ra, ta norī hā Cristu hā te te sina 're umnhasi pese za'ra mono da, tisiré İsavei'wa norī nhipai u. Ni'wam norī si te duré te te 're pisutu za'ra, İwaihu'u pese zarina, te te āma 're dapesa za'ra mono da, 're dahāzé za'ra mono wamhā.

¹⁰ 'Re İhāimana u'āsi mono waihu'u pese na si, marī dama İ'manharī waihu'u'ō hā te te dama 're 'manharī za'ra mono da, ni'wam norī si te duré te te 're pisutu za'ra. Duré 'Re İhāimana u'āsi mono zadawa wasu'u na, sena na te te dama āma 're rowasu'u za'ra mono da, te duré ni'wam norī si te te 're pisutu za'ra. Ni'wam norī si, te duré te te 're pisutu za'ra, 'Re İhāimana u'āsi mono, da te dasima 're İsadawa wasu'u za'ra mono zé hā te te āma 're pibu za'ra mono da, tō sena uptabi na hā te te 're waihu'u za'ra mono da, wa'uburé norī hawim hāi ō'umnhasite. Damreme dama İwaihu'u'ō na zama, 'Re İhāimana u'āsi mono te te dama 're sadawa wasu'u za'ra mono da, te duré ni'wam norī si te te 're pisutu za'ra, timreme nai ō nherē, te te dama āma 're İsadawa wasu'u za'ra mono zéb da hā. Ni'wam norī si, te duré 'Re İhāimana u'āsi mono pē'ēzani hā te te 're pisutu za'ra, damreme dama İwaihu'u'ō na 'Re İhāimana u'āsi mono, da te dasima 're İsadawa wasu'u za'ra mono zé hā sō'awi te te dama āma 're wasu'u pese za'ra mono da oto, da te 're İwaihu'u za'ra mono zéb da hā.

¹¹ Tō ōhō si te misi nherē, 'Re İhāimana u'āsi mono pē'ēzani hā romhuri te te dama 're apisutu, İsavei'wai mono bā, te te sima 're İda'awē mono zéb zarina, āma 're İdasipawapto za'ra mono zéb da hā.

Dahāiba misi ne, İsavei'wa norī hā 're İhāimana za'ra mono zé wasu'u

¹² Āne, wa za aima āma romnhimiré'é za'ra wa'wa, İwaihu'u za'ra wa'aba zéb da hā. Wahāiba hā misi nherē, wahāiba na marī hā wama 're İhāimana za'ra mono hā ahā di, wapara hā duré wanhīb'rada hā duré wapo're hā, duré aimawi hā. Tane nherē, misi te tō wahāiba hā wama 're hāimana za'ra, wahāiba mono bā. Tane duré, wa norī hā wasiré İsavei'wa norī hā wa'ahā uptabi nherē, wa oto simisutu āma 're wanomro, wahāiba misi ne.

¹³ Wa norī hā wasiré İsavei'wa norī hā aiwa 're wahāimana za'ra mono ō di. Ni'wam norī hā zudezu. Duré ni'wam norī hā zudezu'ō. Duré ni'wam norī hā pawā'ābā āna İwada'uri zarina si, te te dama 're İromhuri za'ra mono. Duré ni'wam norī hā wada'uri āna si'uihā na 're İhāimana za'ra mono. Āne hā aiwa 're wahāimana za'ra mono ō nherē, simisutu wa oto 're wahāimana za'ra, wahāiba misi ne, 'Re İhāimana u'āsi mono pē'ēzani na ā dawabzuri uburé, wa te 're 'manharī za'ra mono wa, duré 'Re İhāimana u'āsi mono hā, Tipē'ēzani, uburé te te wama 're anhomri mono wa, wapē'ē 're, oto 're İsāmra mono da hā.

¹⁴ Wahāiba na marī hā misi wama 're hāimana za'ra mono ō di. Marī hā ahā na te tō wahāiba na hā wama 're hāimana za'ra, tite mono bā te te 're İromhuri za'ra mono zéb da hā, wapara hā, duré wanhīb'rada hā, duré wato hā, uburé İre 're İwahāimana za'ra mono hā. Tane ma tō duré 'Re İhāimana u'āsi mono pē'ēzani hā romhuri hā sipu'u pese na te te wama 're apisutu, āma 're İwasipawapto za'ra mono zéb da hā.

¹⁵ Āne, wa za duré aima āma simiré'é za'ra wa'wa taré, wahāiba na marī hā wama 're İhāimana za'ra mono zém na hā. Até wapara, te aré wama siwasu'u, āne: “Wa hā asib'rata ō di. Taha wa, wa taré aihāiba na ai'āma 're İhāimanare. Marī dai ōre di, wa hā.” E āne hā aré İ'uwaibaba. Mare di. Pire na te tō wama 're hāimana u'āsi za'ra, wapara hā.

¹⁶ Até wapo're hā te aré duré wama siwasu'u, āne: “Wa hā atōmo ō di. Taha wa, wa taré aihāiba na ai'āma 're İhāimana. Marī dai ō di, wa hā.” E āne hā aré duré İ'uwaibaba. Mare di. Pire na te tō wama 're hāimana u'āsi za'ra, wapo're hā.

17 Duré, wahâiba na watômo si wama 're hâimana za'ra mono 'wa'âhâ, e niha wa aré 're wanhimipari za'ra. 'Re wanhimipari waihu'u za'ra mono ô di aré, tô. Duré wahâiba na wapo're si wama 're hâimana za'ra mono 'wa'âhâ, e niha wa aré 're wanhimhâ za'ra. 'Re wanhimhâi waihu'u za'ra mono ô di tô aré.

18 Tane nherê, âne na hâ 'Re îhâimana u'âsi mono te te 're wa'apoto mono ô di. Te te sima 're î'awê mono zéb zarina si, ma tô marî ahâ na te te wama 're ab'manharî, wahâiba na îrê 're îwahâimana za'ra mono zéb da hâ.

19 Wahâiba na marî hâ ahâ na wama 're hâimana za'ra mono ô 'wa'âhâ, aré wahâiba hâ wama 're hâimana za'ra mono ô di.

20 Tane nherê, marî ahâ na te tô wama 're hâimana za'ra wahâiba na hâ, wahâiba misi nherê. Taha wa, wa tô 're wahâimana za'ra.

21 Âté wato hâ te aré wanhib'rata ma tinha, âne: "A hâ tarére hâ. Marî dai ô di, îma hâ." E âne hâ aré î'uwaibaba. Âté wa'râ hâ te aré duré wapara ma tinha, âne: "A hâ tarére hâ. Marî dai ô di, îma hâ." Âne hâ î'uwaibaba ô di tô duré aré.

22 Nima norî hâ wahâiba na marî hâ wama 're îhâimana za'ra mono hâ sib'uwure na wama 're hâimana za'ra mono newa. Tane nherê, te tô pire na wama 're hâimana za'ra.

23 Duré nima norî si, wahâiba na wama 're îhâimana za'ra mono hâ wama wapure na, tarére wama 're hâimana za'ra mono newa, wa za ta norî ma 're wanhipese za'ra, wa te 're îhâiba'ubu wê za'ra mono zém na hâ, nimahâ ma si, rowazéb tô da.

24-25 Nima norî rê si, wa ai'urêiwi îrê 're wahâimana za'ra, rowazéb âna. 'Re îhâimana u'âsi mono hâ ma tô te te sima 're wa'awê, uburé marî hâ wahâiba na wama 're îhâimana za'ra mono hâ, si'u te te wama âma 're îromhuri za'ra mono zéb da hâ, sima 're siwanhizari za'ra mono âna, aihîni 're sisawi pese za'ra mono da. Âne da si, ma tô 'Re îhâimana u'âsi mono hâ wahâiba te te wama 're ab'manharî, wahâiba na hâ nima norî si wama wapu newa, pire na tô uburé wama 're hâimana za'ra mono da, simisutu haré. Tane duré, 'Re îhâimana u'âsi mono hâ ma tô te te sima 're wa'awê, wasiré îsazei'wa norî hâ, simisutu haré wa te tâma 're romhuri za'ra mono da, wasiwi 're wasiwanhizari za'ra mono âna. Ma tô te te sima 're wa'awê, wapire na wasima 're îwahâimana za'ra mono zéb da hâ, aiwapsi.

26 Wapara hâ marî âma sépu'u wa, te te robzépata wamhâ, taha u'âbâ, te za uburé wahâiba hâ îsabâdâ robzépata za'ra. Tane duré, ni'wa hâ wasiré îsazei'wa, marî na te te robzépata wamhâ, wa norî zama, wa za duré îsabâdâ robzépata za'ra ni. Duré, ni'wa hâ wasiré îsazei'wa hâ îsimiromhuri wê na da te dasima wasu'u wê za'ra wamhâ, wa norî zama, wa za duré îsabâdâ 're wato za'ra.

27 A norî wa'wa hâ te tô simisutu haré, Cristuhu nhîb'a'uwê asiré 're anomro aba mo, aihâiba misi aima 're îhâimana za'ra wa'aba mono ne. Duré dahâiba na marî hâ tite mono bâ te te 're î'manharî za'ra mono zéb da hâ, dama 're îhâimana za'ra mono ne, te a norî wa'wa hâ aihâiba mono bâ tâma 're aihâimana za'ra wa'aba mo, Cristuhu ma si, asimiromhuri aba mono bâ, tâma 're 'manharî za'ra wa'aba mono da.

28 Âne ma tô 'Re îhâimana u'âsi mono hâ romhuri hâ te te wama 're apisutu, wate mono bâ îsimipawapto waihu'u pese na tâma âma 're îwasipawapto za'ra mono zéb da hâ, wasiré îsazei'wa norî hâ. Romhuri hâ danhipai u'îpire uptabi hâ ma tô ni'wam norî ma si te te 're apisutu, Zezusi hâ te te 're îsadawa wasu'u za'ra mono zéb da hâ, îsazei'ô'wa norî ma, Zezusihi zadawa para. Romhuri aimawi hâ îpire hâ ma tô duré ni'wam norî ma si, te te 're apisutu, 'Re îhâimana u'âsi mono zadawa wasu'u na, sena na îsazei'wa norî ma si te te âma 're îrowasu'u za'ra mono zéb da hâ. Duré îsazei'wa norî 're îhâimana wê za'ra mono zéb da hâ. 'Re îhâimana u'âsi mono nhimiroti zarina, te te dama âma 're îroti za'ra mono zéb da hâ, ma tô duré ni'wam norî ma îsimiromhurizéb da hâ, te te tâma 're apisutu, 'Re îhâimana u'âsi mono hâ. 'Re îhâimana u'âsi mono waihu'u pese na, marî dama î'manharî waihu'u'ô hâ te te dama 're 'manharî za'ra mono da, ma tô duré ni'wam norî ma si te te 're apisutu, îsimiromhurizéb da hâ. Ma tô duré ni'wam norî si te te 're pisutu za'ra, îwaihu'u pese zarina te te âma 're dapese za'ra mono da, 're dahâzé za'ra mono wamhâ. Duré marî zô, tiwi 're îrowaptâ'â za'ra mono norî âma 're sina u'âsi mono da, ma tô duré ni'wam norî hâ te te 're apisutu, îsibrob'ô norî âma hâ, duré îhâzé rê norî âma hâ. Duré îsazei'wa norî 'madâ'â'wa, dama 're hâimana za'ra mono da, ma tô duré ni'wam norî hâ te te 're apisutu. Duré damreme dama îwaihu'u'ô na te te dama 're sadawa wasu'u za'ra mono da, ma tô ni'wam norî si te te 're apisutu, timreme nai ô nherê, te te dama âma 're îsadawa wasu'u za'ra mono zéb da hâ.

29 E tawamhâ îsazei'wa norî hâ te uburé Zezusihi zadawa wasu'u'wa na 're hâimana za'ra, îsazei'ô'wa norî ma hâ. Mare di. Uburé âne na dama 're hâimana za'ra mono ô di. E uburé te duré 'Re îhâimana u'âsi mono zadawa wasu'u'wa na 're hâimana za'ra, îsazei'wa norî ma hâ. Mare di. Duré e uburé te 'Re îhâimana u'âsi mono nhimiroti na dama roti'wa na 're hâimana za'ra, îsazei'wa norî 're îhâimana wê za'ra mono zéb da, te te dama 're roti za'ra mono da hâ.

Mare di. Duré, e uburé te tsazei'wa nori hã marĩ dama i'manharĩ waihu'u'õ hã te te dama 're 'manharĩ za'ra, 'Re ihãimana u'ãsi mono waihu'u pese zarina. Mare di.

³⁰ Duré, e uburé te za te te 're dapese za'ra, 're dahâzé za'ra mono wamhã, 'Re ihãimana u'ãsi mono waihu'u pese zarina hã. Mare di. Ni'wam nori si te za tã ãne na hã 're hãimana za'ra. Duré, e uburé te za damreme dama iwaihu'u'õ na te te dama 're sadawa wasu'u za'ra, 'Re ihãimana u'ãsi mono hã. Mare di. Duré e uburé te za sã'awi te te dama 're wasu'u pese za'ra, damreme dama iwaihu'u'õ na 'Re ihãimana u'ãsi mono, da te dama 're tsadawa wasu'u za'ra mono zãm na hã. Mare di. Uburé ãne na dama 're hãimana za'ra mono õ di. Tite mono bã, te za misi si tsazei'wa nori hã romhuri hã te te ãma tãma 're 'manharĩ za'ra.

³¹ Tane nherẽ, romhuri hã danhipai u dama ipire nori zõ si, te za sã 're irob'ruiwaparĩ u'ãsi za'ra wa'aba mo, asirẽ tsazei'wa nori hã ãma 're asipawaptob za'ra wa'aba mono zẽb da hã.

Aimawi na, wa za oto aima ãma rowasu'u za'ra wa'wa, ã nori wasu'u nhipai u iwasi'u wẽ uptabi na hã, ãma 're anomro wẽ uptabi aba mono zẽb da hã.

13

Danhimizawi pese zãm na rowasu'u

¹ Ti'ai ãma hãiwa ãma zama, uburé damreme mono bã te dama 're arowasu'u wẽ mono nherẽ, inhimizawi pese zẽ hã ãma 're hãimana mono õ wamhã, piza'a 're baihá 'manharĩ tede hã, da te 're tata'a za'ra mono wa, 're wamreme 'rãihã za'ra mono wa, da te 're iwaparĩ a za'ra mono ne, wa arẽ tarẽ te dama 're arowasu'u. ãne wamhã, marĩ dai õ di arẽ, dama 're inhimirowasu'u mono zẽ hã.

² 'Re ihãimana u'ãsi mono hã te dama 're sadawa wasu'u wẽ mono nherẽ, duré uburé roti hã ãma waihu'u pese nherẽ, duré uburé rowaihu hã dama iwaihu'u'õ hã ãma waihu'u pese nherẽ, inhimizawi pese zẽ hã ãma 're hãimana mono õ wamhã arẽ, tarẽ, wa arẽ 're ihãimana, 'Re ihãimana u'ãsi mono ma hã. Marĩ dai õ di arẽ, 're ihãimana mono zẽ hã. Atẽ ãma waihu'u pese di arẽ, te tãma nharĩ da, etẽ 'rãihã ma, si'rẽ da, 'Re ihãimana u'ãsi mono si, te 're umnhasi mono wa. ãne da, 'Re ihãimana u'ãsi mono te 're umnhasi mono nherẽ, inhimizawi pese zẽ hã ãma 're hãimana mono õ wamhã, arẽ marĩ dai õ di, 're ihãimana mono zẽ hã.

³ Duré uburé inhibro hã tsibrob'õ nori ma, te 're anhomri mono nherẽ, inhimizawi pese zẽ hã ãma 're ihãimana mono zarinaĩ õ wamhã, tarẽ arẽ, dama 're inhopru mono zẽ hã. Duré tsazei'wa 're ihãimana mono wa, da te 're i'ruiwaparĩ mono zẽb zarina, da te dasiwi izata da, duré dawi tsihãiba zawi õ nherẽ, tane nherẽ, duré tarẽ arẽ, inhimĩ 'manharĩ wẽ zẽ hã, inhimizawi pese zẽ hã ãma 're hãimana mono õ wamhã.

⁴ E niha tawamhã, danhimizawi pese na, Cristuhu ãma za 're idahãimana za'ra mono zẽ hã. Tsazei'wa nori hã simizawi pese na 're hãimana za'ra mono wamhã, marĩ na da'ãma 're wa'a su'u za'ra mono õ di za. Da'ãma 're ipẽ'ezẽ za'ra mono zarina, te za tã te te 're dapawaptob u'ãsi za'ra. Duré marĩ na 're si'ruiwaparĩ za'ra mono õ di za. Duré tiwẽ na sina 're wata za'ra mono õ di za. Duré danhipai u pire na 're ihãimana za'ra mono na, 're si'madã'ã ze za'ra mono õ di za.

⁵ Duré hãimana nhisẽb ãna, da'ãma 're to za'ra mono õ di za. Duré 'rãwi tihãimanazẽb da si, te te si'ãma 're rosa'rata za'ra mono õ di za. Duré wara sina, dazada 're siti'ru za'ra mono õ di za. Duré da te tãma 're rob'manharĩ wasetẽ za'ra mono wamhã, dawasẽdẽ te te da'ãma 're 'madã'ã u'ãsi za'ra mono õ di za. ãne tsazei'wa nori, simizawi pese na 're ihãimana za'ra mono zẽb da hã.

⁶ ãne duré, tsazei'wa nori, simizawi pese na 're ihãimana za'ra mono zẽb da hã. Dahãimana wasetẽ na 're idahãimana za'ra mono zẽ wasu'u hã te te 're waparĩ za'ra mono wamhã, te te ãma sima 're rowẽ za'ra mono õ di za, tsazei'wa nori hã. 'Re idanomro wẽ mono zẽ wasu'u na si, te za ãma 're toi uptabi za'ra, tã sena na.

⁷ Duré, da te tãma 're rob'manharĩ wasetẽ u'ãsi za'ra mono nherẽ, tiwi 're robzei'õ za'ra mono õ di za. Duré dawasẽtẽ wasu'u hã te te 're waparĩ za'ra mono wamhã, awa'awi te te siwi 're dawẽ'õ za'ra mono õ di za. Iwẽ si, da te 're 'manharĩ u'ãsi za'ra mono da si, te za te te sima 're dawẽ za'ra. Duré da te tãma 're rob'manharĩ wasetẽ za'ra mono nherẽ, duré te te 're robzẽpata za'ra mono nherẽ, te za siptete sina 're hãimana u'ãsi za'ra, simi'ẽ na. ãne tsazei'wa nori hã simizawi pese uptabi na, 're ihãimana za'ra mono zẽ hã za.

⁸ Tsazei'wa nori hã, 'Re ihãimana u'ãsi mono te te dama 're tsadawa wasu'u za'ra mono zẽ hã, niwapsi te za te te tiwi 're anhihãri, 'Re ihãimana u'ãsi mono hã, ta nori hã te te dama ãma 're sadawa wasu'u za'ra mono tã da oto. Duré tsazei'wa nori hã timreme nai õ nherẽ, damreme amo na te te dama 're irowasu'u za'ra mono zẽ hã, te za duré te te tiwi 're anhihãri. Duré 'Re ihãimana u'ãsi mono pẽ'ezani na, da te 're irowaihu'u za'ra mono zẽ hã, niwapsi te za duré te

te dawi 're anhihâri. Īsazei'wa norī nhimizawi pese zép si, si'utōrī waihu'u ō di za. Taha si, te za ōne u'â 're hâimana u'âsi.

⁹ Wa norī hâ 'Re Īhâimana u'âsi mono pē'ēzani na, wa te 're ĩrowaihu'u za'ra mono zé hâ, wama waihu'u pese za'ra ō di, uburé hâ. Syry na, wa tō wa te 're waihu'u za'ra. Duré 'Re Īhâimana u'âsi mono zadawa wasu'u hâ, uburé wama waihu'u pese za'ra ō di. Taha zama, wa tō duré syry na wa te 're waihu'u za'ra.

¹⁰ Tane nherē, nimahâ bâtâ na Zezusi hâ apâ wei morī wamhâ, ĩsine za oto 're wahâimana za'ra mono wa, tâibâ za oto syry na 'Re Īhâimana u'âsi mono zadawa wasu'u, wa te 're ĩwaihu'u za'ra mono zé hâ. Duré tâibâ za oto syry na Īpē'ēzani na, wa te 're ĩrowaihu'u za'ra mono zé hâ.

¹¹ Wa hâ 'watébrémi ré hâ, ai'uté mreeme na, wa tō 're ĩmreeme aré. Duré ai'uté nhimirosa'rata zarina, wa tō duré te 're rosa'rata aré, ĩpē'ē remhâ. Tane nherē, oto ĩprédu wamhâ, ai'uté hâimanazém na, 're ĩhâimana mono ō di oto. Wa tō oto rēme pese, ai'uté ré ĩhâimanazé hâ.

¹² Tane duré, wa norī hâ dasi'madâ'ázé ĩ'uzurire na âma 're ĩdasi'madâ'â pibui prâ za'ra mono ne, 'Re ĩhâimana u'âsi mono hâimanazé hâ wama waihu'u prâ za'ra di, ti'ai âma 're wahâimana za'ra mono ré hâ. Tane nherē, nimahâ na si, wa za 'râwi wa te 're 'madâ'â za'ra oto, 'Re ĩhâimana u'âsi mono hâ. Tawapsi wama waihu'u pese za'ra di za oto, 'Re ĩhâimana u'âsi mono hâimanazé hâ. 'Re ĩwahâimana za'ra mono zém na, te te 're ĩwa'awaihu'u pese mono ne, wama waihu'u pese za'ra di za.

¹³ Âne, wa za oto aima âma 'râsutu za'ra wa'wa, Īsazei'wa norī nhimizawi pese hâimanazém na hâ. 'Re ĩhâimana u'âsi mono hâ da te dasina 're ĩ'umnhasi pese za'ra mono zé hâ, si'utōrī ō di za. Duré 'Re ĩhâimana u'âsi mono umnhasi sina, ĩwē zô dasina 're ĩdanhipari za'ra mono zé hâ, si'utōrī ō di za. Duré 're ĩdanhimizawi pese za'ra mono zé hâ, si'utōrī ō di za. E ma hâ tawamhâ, danhipai u ĩpire uptabi hâ. 'Re ĩdanhimizawi pese za'ra mono zé, ta hâ danhipai u, ĩpire uptabi na te za 're hâimana.

14

Damreme dama ĩwaihu'u'ō na, 'Re ĩhâimana u'âsi mono, da te dasima 're ĩsadawa wasu'u za'ra mono zé wasu'u

¹ Asimizawi pese na 're aihâimana za'ra wa'aba mono zéb zô si, te za uburé dama 're ĩromhuri za'ra wa'aba mono zém nhipai u, asima sô 're ĩrob'ruiwari u'âsi za'ra wa'aba mo, ĩwē uptabi zô si. Tane nherē, 'Re ĩhâimana u'âsi mono pē'ēzani, romhuri hâ sipu'u pese na âma 're sipawaptob za'ra mono da, ĩsazei'wa norī ma, te te 're ĩ'apisutu mono zéb zô, te za duré asima sô 're ĩrob'ruiwari u'âsi za'ra wa'aba mo. E marī ĩpire uptabi zô, te za tawamhâ, asima sô 're ĩrob'ruiwari u'âsi za'ra wa'aba mo. 'Re ĩhâimana u'âsi mono zadawa wasu'u na, sena na ĩsazei'wa norī ma, da te 're ĩrowasu'u za'ra mono zéb zô si, te za asima 're ĩrob'ruiwari u'âsi za'ra wa'aba mo, ĩwē uptabi zô si.

² Ni'wam norī hâ timreme nai ō nherē, damreme dama ĩwaihu'u'ō na te te dama âma 're rowasu'u za'ra mono wamhâ, 'Re ĩhâimana u'âsi mono ma si, mreeme pibui pese za'ra di za, ta norī nhimirowasu'u hâ damreme dama ĩwaihu'u'ō na hâ. Ta norī hâ te te dama âma 're rowasu'u za'ra mono wamhâ, taré te za da te 're wari za'ra, dama sadaihu'u za'ra ō wa, 'Re ĩhâimana u'âsi mono pē'ēzani nhimipawaptobzéb zarina, marī dama ĩwaihu'u'ō na si, 're mreeme zusi mono wa, ta norī hâ.

³ Tane nherē, ni'wam norī hâ damreme uwaibaba, 'Re ĩhâimana u'âsi mono zadawa wasu'u na, sena na ĩsazei'wa norī ma, te te âma 're rowasu'u za'ra mono wamhâ, taha na si te za ĩsazei'wa norī hâ 're sipawaptob u'âsi za'ra, Wanhib'apito âma siptete sina 're nomro mono da, pē'ē wē na. Taha zarina si, te za duré tâma 're rowē wairébé apâ, tiwi 're robzei'ō za'ra mono wamhâ.

⁴ Ni'wa hâ timreme nai ō nherē, damreme dama ĩwaihu'u'ō na te te dama rowasu'u wamhâ, 'râwip si te âma sipawapto, Wanhib'apito âma siptete na 're hâimana u'âsi mono da. Te te âma dapawapto waihu'u ō di za, dama sadaihu'u ō wa. Tane nherē, ni'wa hâ damreme uwaibaba, 'Re ĩhâimana u'âsi mono zadawa wasu'u na ĩsazei'wa norī ma, te te rowasu'u wamhâ, aihîni te za wari waihu'u za'ra, taha zarina oto âma 're sipawaptob za'ra mono da, Wanhib'apito âma ta norī hâ siptete sina âma 're hâimana za'ra mono da oto.

⁵ Wa hâ wa tō ĩsima te 're aiwē za'ra wa'wa, uburé aimreme aba nai ō nherē, 'Re ĩhâimana u'âsi mono hâ dama 're sadawa wasu'u za'ra wa'aba mono da, damreme dama ĩwaihu'u'ō na hâ. Tane nherē, taha nhipai u, wa tō duré te ĩsima 're aiwē uptabi za'ra wa'wa, 'Re ĩhâimana u'âsi mono zadawa wasu'u na damreme uwaibaba si, dama 're rowasu'u za'ra wa'aba mono da. E marī wa. 'Re ĩhâimana u'âsi mono zadawa wasu'u na damreme uwaibaba, te te dama 're ĩrowasu'u za'ra mono norī si, te za danhipai u pire na 're hâimana za'ra, ĩsazei'wa

norĩ ma. Ni'wam norĩ hã timreme nai õ nherẽ, damreme dama İwaihu'u'õ na, 'Re İhâimana u'âsi mono te te dama 're sadawa wasu'u za'ra mono pari, ta norĩ nhimirowasu'u nhipai u, sô'awi da te oto dama 're wasu'u pese za'ra mono wapsi, tawapsi te za oto damreme dama İwaihu'u'õ na dama İsadawa wasu'u'wa norĩ hã pire na 're hâimana za'ra, aiwa 'Re İhâimana u'âsi mono zadawa wasu'u na damreme uwaibaba, te te dama 're İrowasu'u za'ra mono norĩ me. Tawapsi te za oto İsazei'wa norĩ hã âma 're sipawaptob u'âsi za'ra, siptete sina Wanhib'apito âma 're nomro u'âsi mono da, ta norĩ hã.

⁶ İsisânawã norĩ, âne wa za oto aima âma rowasu'u za'ra wa'wa. Niwapsi wa za âma atême İmorĩ 'wa, te aipawaptob za'ra wa'aba da. Tawamhã, atême âma İmorĩ aba wamhã, duré damreme dama İwaihu'u'õ na si, 'Re İhâimana u'âsi mono te aima sadawa wasu'u za'ra wa'aba wamhã, e tó İ'uwaibaba, wa aré âma aipawapto wê za'ra wa'wa. Mare di. Marĩ dai õ di aré, damreme dama İwaihu'u'õ na te aima İsadawa wasu'u za'ra wa'aba zé hã. Aimreme aba na, te aima âma rowasu'u za'ra wa'aba wapsi, te aré İwapari waihu'u za'ra wa'wa, 'rãwi oto âma 're asipawaptob za'ra wa'aba mono da, marĩ dama İwaihu'u'õ na 'Re İhâimana u'âsi mono te te İma İwaihu'uzém na hã, duré 'rãwi 'Re İhâimana u'âsi mono nhimiroti te İwaihu'u na hã, duré 'Re İhâimana u'âsi mono zadawa wasu'u na hã, duré İsazei'wa norĩ hâimanazém na roti na hã.

⁷ Âne, wa za duré aima âma romnhimiré'é za'ra wa'wa, İwaihu'u za'ra wa'aba zéb da hã. Danhimnhîrâzé İsyryre hã âma 're danhimnhîhâsi mono wamhã, İwapari pibui pese na âma 're danhimnhîhâsi mono õ nherẽ, da te 're wapari waihu'u za'ra mono õ di, danhimnhîrâzé hã. Duré, rowamremezé hã da te âma 're rowamreme za'ra mono wamhã, İwapari pibui pese na, da te âma 're rowamreme za'ra mono õ nherẽ, da te 're wapari waihu'u za'ra mono õ di, rowamremezé hã.

⁸ Duré da'wapéi'wa norĩ zó, danhimnhîrâzém na 're danhimnhîhâsi mono wamhã, e siwa'ru sô 're danhimnhîhâsi mono nherẽ, te za dasi'wapé da hã, sima 're sipese za'ra, da'wapéi'wa norĩ hã. Mare di.

⁹ Tane duré, a norĩ wa'wa hã damreme dama İwaihu'u'õ na si, dama 're rowasu'u za'ra wa'aba mono wamhã, e niha te za da te âma 're asadaihu'u za'ra wa'wa, da te âma 're aiwapari waihu'u za'ra wa'aba mono da hã. Da te âma 're asadaihu'u za'ra wa'aba mono õ di za tó. Asimirowasu'u za'ra wa'aba na hã, rowa'u'u si te za taré te te âma 're ropé, nimomo.

¹⁰ Daro mono bâ, te tó damreme mono bâ ahã uptabi na dama 're hâimana za'ra, 'rãwi âma 're idasisadaihu'u za'ra mono zéb da hã, damremezém na hã.

¹¹ Tane nherẽ, ni'wa hã damreme İma İwaihu'u'õ na, te te İma rowasu'u wamhã, İsiré a'uwê'õ na, wa za İsina waihu'u, İma sadaihu'u õ wa. Duré wa hã İsiré a'uwê'õ na, te za duré sina İwaihu'u, tâma İzadaihu'u õ wa. Tane duré, ni'wam norĩ hã timreme nai õ nherẽ, damreme dama İwaihu'u'õ na, 'Re İhâimana u'âsi mono te te dama 're sadawa wasu'u za'ra mono wamhã, da te âma 're sadaihu'u za'ra mono õ di za. Taré te za da te 're wapari za'ra, dama sadaihu'u za'ra õ wa, ta norĩ hã.

¹² A norĩ wa'wa hã bété. Ma tó sô 're asôpré u'âsi aba mo, 'Re İhâimana u'âsi mono hã Tipê'ezani na, romhuri mono bâ te te aima 're İpisutu za'ra wa'aba mono zéb zó, âma 're asipawaptob za'ra wa'aba mono zéb da hã. Romhuri hã õhõ si 're hâimana za'ra mono õ di, İpire uptabi na hã. Sisarina si õ di, romhuri hã. Taha wa, romhuri İwê uptabi zó si, te za asima 're İrob'ruiwapari u'âsi za'ra wa'aba mo, âma 're asipawaptob za'ra wa'aba mono zéb da hã, Wanhib'apito âma asiptete sina 're anomro u'âsi aba mono da, taha âma si.

¹³ Taha wa, ni'wam norĩ hã timreme nai õ nherẽ, damreme dama İwaihu'u'õ na, 'Re İhâimana u'âsi mono te te dama 're sadawa wasu'u za'ra mono wamhã, ta norĩ hã te za duré te te tiwi 're rowaptêrê za'ra, İpê'ezani si romhuri te te tâma 're pisutu pese za'ra mono da, ta norĩ ma hã, damreme dama İwaihu'u'õ na 'Re İhâimana u'âsi mono zadawa wasu'u hã, sô'awi te te oto dama 're wasu'u pese za'ra mono da.

¹⁴ Wasiré İsazei'wa norĩ hã 're wasi'rã'õtõ mono wamhã, wa hã damreme İma waihu'u õ nherẽ, 'Re İhâimana u'âsi mono ma, âma 're İmreme mono wamhã, te âma 're rosa'rata waihu'u mono õ di, İma waihu'u pese õ wa. 'Rãwi İpê'ê na si, wa tâma 're İmreme.

¹⁵ E niha tawamhã, İ'uwaibaba si te 're İ'manharĩ mono zéb da hã. İpê'ê na, wa za tó tâma 're İmreme 'rãwi, damreme İma İwaihu'u'õ na hã. Tane nherẽ, wa za duré wamremezém na tâma 're İmreme, te âma 're İrosa'rata pibui pese mono zéb da hã. Duré wasiré İsazei'wa norĩ siré 're İnho're mono wamhã, wa za tó 'rãwi İpê'ê na 're İnho're, damreme İma İwaihu'u'õ na hã. Tane nherẽ, taha nhipai u, wa za duré wamremezém na 're İnho're, te âma 're İrosa'rata pibui pese mono zéb da hã. Taha wa, âne te za duré a norĩ wa'wa hã 're İ'manharĩ za'ra wa'aba mo.

¹⁶ A norĩ wa'wa hã asiré 're asi'rã'õtõ aba mono wamhã, âté te za aipê'ê na si 'Re İhâimana u'âsi mono âma 're aiwata za'ra wa'aba mo, damreme dama İwaihu'u'õ na si, tâma 're

aimreme zusi aba mono ré. Āne wamhā, e niha te za aiwapari'wa norī hā āma 're aiwata za'ra wa'aba mono zém na, te te 're ai'uzei pese za'ra wa'wa, aimreme na te te 're asadaihu'u za'ra wa'aba mono ō nherē, ta norī hā.

¹⁷ Āne hā 'Re ihāimana u'āsi mono āma 're aiwata za'ra wa'aba mono zé hā wē nherē, tane nherē, asiré 're asirā'ōtō aba mono norī hā āma 're sipawpto waihu'u za'ra mono ō di, siptete sina Wanhīb'apito āma 're inomro u'āsi mono zéb da hā.

¹⁸ Wa hā īsiwaprosi, wa asipai u wa'aba, damreme īma īwaihu'u'ō na 're īmreme u'āsi. Taha zarina, wa 'Re ihāimana u'āsi mono āma 're iwata u'āsi.

¹⁹ Tane nherē, wasiré īsazei'wa norī hā 're wasi'rā'ōtō mono ré, damreme dama īwaihu'u'ō na, īnhimirowasu'u pa uptabi na te dama 're arowasu'u mono wamhā, e āne hā wē di aré, āma 're īdasipawaptob za'ra mono zéb da hā. Wē prā ti aré, īma hā. Īnhimirowasu'u 'rutu na nherē, damreme dama īpibui pese na te dama 're rowasu'u mono wapsi, tawapsi wē uptabi di aré īma hā, 'Re ihāimana u'āsi mono nhimiroti na te dama āma 're i'aroti mono zéb da hā.

²⁰ Īsisānawā norī, ai'utē norī hā siwa'ru te te sima 're īrosa'rata za'ra mono ne, asima āma 're rosa'rata za'ra wa'aba mono ō di za, te aima āma īrowasu'u za'ra wa'aba zém na hā. Duré ai'utēpré norī hā tiwasédé te te 're īmanharī za'ra mono ō ne, te za aiwasété āna 're anomro aba mo. Aihāimana prēdub sina, te za asima āma 're īrosa'rata u'āsi za'ra wa'aba mo.

²¹ Duréihā 'Re ihāimana u'āsi mono zadawa wasu'u'wa hā ma tō āne na āma rob'ui'éré, 'Re ihāimana u'āsi mono mre na hā:

“Darob amoi hawi te za īnhīb'a'uwē norī ma, da te 're īzadawa wasu'u za'ra, dasimremezém na, īnhīb'a'uwē norī ma, damreme tāma īsa'rese'ō za'ra na. Tane nherē, īnhīb'a'uwē norī hā te te 're īwapari za'ra mono ō di za, po're āna 're nomro u'āsi mono wa, ta norī hā.”

Āne duréihā Wanhīb'apito, zudezu norī āma te te īwaihu'u sirōmo za'ra zé hā, ībaihā na hā.

²² Taha wa, damreme dama īwaihu'u'ō na 'Re ihāimana u'āsi mono, da te dasima 're īsadawa wasu'u za'ra mono zé, īsazei'ō'wa norī ma wa ropibu ma, ta norī hā 'Re ihāimana u'āsi mono waihu'u pe hā te te 're īwaihu'u za'ra mono zéb da hā. Īsazei'ō'wa norī ma, rowasu'uzéb dai ō di, ā hā. Tane nherē, damreme uwaibaba, dama īwaihu'u pese na ni'wam norī hā 'Re ihāimana u'āsi mono te te dama 're īsadawa wasu'u za'ra mono zé hā, īsazei'wa norī ma ropibu ma, 'Re ihāimana u'āsi mono za īwē na tāma 're īsōprub za'ra mono zém na, te te sina 're īwaihu'u sirōmo za'ra mono zéb da hā, ā hā. Īsazei'ō'wa norī ma, rowasu'uzéb dai ō di, ā hā.

²³ Ātē asiré īsazei'wa norī me, te za asiré asirā'ōtō 'wa, uburé. Tawamhā ātē te za damreme aima īwaihu'u aba ō na, ai'ahā wa'aba na asima īrowasu'u za'ra wa'wa. Tawamhā ātē tane ré, te za īsazei'ō'wa norī hā asisi, atēme wa'aba, īsazei'wai hāimanazé, te te waihu'u za'ra ō nherē, te te aiwapari za'ra wa'aba da. Āne wamhā, e niha te za ō norī hā ai'āma rosa'rata za'ra wa'wa. Ātē te za ai'āma rosa'rata wasété za'ra wa'wa, ai'rā siwamnarī za'ra wa'aba newa.

²⁴ Tane nherē, ātē asiré asirā'ōtō aba ré, te za aimreme aba na si 'Re ihāimana u'āsi mono, dama īsadawa wasu'u za'ra wa'wa, ai'ahā wa'aba na. Tane ré, īsazei'ō'wa norī hā atēme sisisi aba wamhā, ta norī hā te za oto 'rāwi tīp'ē na tiwasété na siwaihu'u za'ra, 'Re ihāimana u'āsi mono zadawa wasu'u hā timremezém na te te oto īwapari za'ra zéb zarina, īsazei'wa norī 're ihāimana za'ra mono zé, te te īwaihu'u za'ra ō norī hā. Taha zarina, te za oto siwē'ō pese za'ra, tiwasété na īsiwaihu'u za'ra zéb zarina.

²⁵ 'Rāwi sima si, te te 're īrosa'rata za'ra mono zé hā te za oto tiwi waihu'u za'ra ni, īmana'rāmi hawī. Tawamhā, 'Re ihāimana u'āsi mono hā, tāma īpire za'ra na te te oto sina waihu'u za'ra wa, te za oto hi'rātītō tāma ana, āma wata za'ra da. Tawamhā āne te za oto ta norī hā 'Re ihāimana u'āsi mono hā te te aima 're wasu'u za'ra wa'wa: “‘Re ihāimana u'āsi mono hā te nare asō'a wa'aba, aima 're hāimana za'ra wa'wa.” Āne te za te aima 're wasu'u za'ra wa'wa, īsazei'ō'wa norī hā.

Īsazei'wa norī hā 're si'rā'ōtō mono wa, marī īuwaibaba si te te 're īmanharī za'ra mono zé wasu'u

²⁶ Īsisānawā norī, āhā wasu'u na, wa za oto aima 'rāsutu za'ra wa'wa. Asiré 're asirā'ōtō aba mono wamhā, ni'wam norī si te za aima 're sō're za'ra wa'wa, īsazei'wa nho'rezém na. Ni'wam norī si te za duré īsazei'wa norī 're aihāimana za'ra wa'aba mono zém na, te te aima 're roti za'ra wa'wa. Ni'wam norī si te za duré marī īwaihu'u'ō hā te te aima 're waihu'u za'ra wa'wa, 'Re ihāimana u'āsi mono hā ta norī ma si, te te 're īwaihu'u za'ra mono zéb zarina. Timreme nai ō nherē, te za duré ni'wam norī si 'Re ihāimana u'āsi mono hā te te aima 're sadawa wasu'u za'ra wa'wa, damreme aima īwaihu'u za'ra wa'aba ō na hā. Ni'wam norī si te za duré aimreme aba zarina, te te aima āma 're wasu'u pese za'ra wa'wa sō'awi, aré damreme aima īwaihu'u za'ra wa'aba ō na 'Re ihāimana u'āsi mono, da te aima 're īsadawa wasu'u za'ra wa'aba mono zé hā. Asimiromhuri aba mono hā, te za āma 're asipawaptob

u'āsi za'ra wa'aba mo aihāiba mono bā, Wanhib'apito āma si asiptete sina 're anomro aba mono da.

²⁷ Aihīni 're ai'rā'ōtō aba mono ré, ni'wam norī hā damreme dama īwaihu'u'ō na te te aima 're rowasu'u za'ra wa'aba mono wamhā, maparane te za te te aima 're 'mairowasu'u wa'wa. Si'ubdatō dahāiba wamhā, wē di duré. Tane nherē, ta norī nhipai u hā asima 're 'mairowasu'u za'ra wa'aba mono ō di za, damreme aima īwaihu'u aba ō na hā. Si'ubdatō haré te za asima 're ī'mairowasu'u wa'aba mo. Duré sisarina si, te za ta norī hā atāma te te aima 're rowasu'u za'ra wa'wa. Taha parimhā, te za oto ni'wa hā sō'awi te te aima āma 're wasu'u pese za'ra wa'wa, aimreme aba na oto 're īwaihu'u za'ra wa'aba mono zéb da hā, asi'uihā na wa'aba.

²⁸ Tane nherē, ni'wa hā aimreme aba na aima īwasu'u pese aba 'wa da hā, asiré 're 'mai hāimana aba mono ō wamhā, tawamhā, damreme dama īwaihu'u'ō na 'Re īhāimana u'āsi mono zadawa wasu'u wa norī hā te za ari'iwi 're si'ubumro. Tipē'ē na si, te za 're mreme zusi, 'Re īhāimana u'āsi mono ma, damreme tāma īwaihu'u za'ra ō na hā.

²⁹ Asiré 're asi'rā'ōtō aba mono ré, ni'wam norī hā aimreme aba na 'Re īhāimana u'āsi mono te te aima 're sadawa wasu'u za'ra wa'aba mono wamhā, maparane te za tō te te aima 're 'mairowasu'u wa'wa. Si'ubdatō dahāiba wamhā, wē di duré. Āne wamhā, ni'wam norī hā asiré īsazei'wa norī hā te za īsimirowasu'u za'ra zém na te te sima āma 're rowaihu'u pese za'ra, 'Re īhāimana u'āsi mono hawib zō, tō sena zō, te te āma īwaihu'u pese za'ra zéb da hā.

³⁰ Tawamhā duré, ni'wa hā te te aima rowasu'u za'ra wa'aba ré, ātē ni'wa īhāiba amoi ma, te za 'Re īhāimana u'āsi mono hā tāma waihu'u, tizadawa wasu'u hā, taha zama te te oto aima sadawa wasu'u za'ra wa'aba da. Āne wamhā, aima rowasu'u za'ra aba 'wa hā te za tinhirowasu'u hā sazā, ōhō si te te oto aima sadawa wasu'u za'ra wa'aba da.

³¹ Taha zarina si, te za oto 'Re īhāimana u'āsi mono hā sisāna'repsi asima 're īsadawa wasu'u za'ra wa'aba mo, aihīni oto āma 're īwaihu'u pese za'ra wa'aba mono zéb da hā asi'uihā na, duré aipē'ē wē wa'aba zarina, asiptete sina āma 're anomro aba mono da oto.

³²⁻³³ 'Re īhāimana u'āsi mono hā, marī hā siwa'ru, wa te 're ī'manharī za'ra mono zéb da hā, te te sima 're wa'awē mono ō di. Rowē na wawaimri wasiré 're wahāimana za'ra mono da si, ma tō te te sima 're wa'awē. Taha wa, ni'wam norī hā damreme uwaibaba si, 'Re īhāimana u'āsi mono zadawa wasu'u'wa na te te dama 're rowasu'u za'ra mono wamhā, te za 're si'madā'ā pese za'ra, siwa'ru te te dama 're rowasu'u za'ra mono tō da, rowahutu zō, 're dasi'rā'ōtō mono sidāpāsi, te te 're damreme nhihāri za'ra mono tō da. Daro mono bā īsazei'wa norī, siré 're īsi'rā'ōtō mono norī 're īhāimana za'ra mono zéb uwaibaba si, te za te te dama āma 're rowasu'u za'ra, īsadawa wasu'u'wa norī hā.

³⁴ īsazei'wa norī, asiré 're asi'rā'ōtō aba mono wamhā, pi'ō norī hā te za ari'iwi dame 're si'ubumro, 're īwahāimana za'ra mono zéb zarina. Timro norī zapari, te za tō 're hāimana za'ra pi'ō norī hā, duréihā 'Re īhāimana u'āsi mono nhimiroti na, Mozési āne na te te āma īrob'ui'érezéb zarina. Taha wa, asiré 're asi'rā'ōtō aba mono wamhā, pi'ō norī hā te te sima 're robzanhamri za'ra mono ō di za, timreme na asima 're rowasu'u za'ra wa'aba mono ré, te te 're ro'wa'rutu tō za'ra mono da.

³⁵ Pi'ō norī hā dasi'rā'ōtōzéb āma, rowahutu'wa norī nhimirowahudu hā te te 're wapari za'ra mono wamhā, tāma īwaihu'u za'ra ō hā te te oto 're waihu'u pese za'ra mono da, te te sima 're wē za'ra mono wamhā, 'rip si te za timro hā te te āma 're sadanharī za'ra, waimri si. īsazei'wa norī hā aihīni 're asi'rā'ōtō aba mono ré, pi'ō norī hā timreme na te te dawī 're sihāri za'ra mono wamhā, wē ō di za, pi'ō norī mreme hā.

³⁶ E 'Re īhāimana u'āsi mono zadawa wasu'u hā dawana waihu'u za'ra wa'aba bā, te za āne 're aihāimana za'ra wa'aba mo, īsazei'wa norī 're īhāimana za'ra mono zéb zarina ō nherē. E a norī wa'aba ma si, ma tō aima āma wasu'u za'ra wa'aba ni.

³⁷ Āhāna te aima āma īrob'ui'ére za'ra wa'aba zé hā, īsi'uihā na īnhimiroti na hā ō di. Wanhib'apito zadawa para, wa aima āma rob'ui'ére za'ra wa'wa, īsimiroti zarina si. Ma'āpē, āne hā asi'uihā na āma waihu'u za'ra wa'aba, 'Re īhāimana u'āsi mono zadawa wasu'u'wa na asi'āma 're īrosa'rata za'ra wa'aba mono norī hā, duré aimawī romhuri mono bā, Tipē'ēzani na te te aima 're īpisutu za'ra wa'aba mono zém na asi'āma 're īrosa'rata za'ra wa'aba mono norī hā.

³⁸ Āne na īnhimiroti na, ni'wam norī hā te te 're īzaze za'ra mono ō wamhā, tawamhā, īsazei'ō'wa na te za ta norī āma 're īrosa'rata u'āsi za'ra wa'aba mo. Taha wa, a norī wa'wa hā ta norī nhimiroti hā 're 'madā'ā za'ra wa'aba mono ō di za oto.

³⁹ īsisānawā norī, āne wa za āhā wasu'u na hā aima āma 'rāsutu za'ra wa'wa. Aimreme aba zém na, 'Re īhāimana u'āsi mono zadawa wasu'u'wa 're aihāimana za'ra wa'aba mono da, te za 'rāwi 're asi'madā'ā za'ra wa'aba mo. Duré damreme dama īwaihu'u'ō na, 'Re īhāimana

u'ási mono, asima 're sadawa wasu'u za'ra wa'aba mono tō da, 're asisadawa uwati za'ra wa'aba mono ō di za.

⁴⁰Asiré 're asi'rā'ōtō aba mono wamhā, uburé marī hā te za'ra'waibaba si' 're ī'manharī za'ra wa'aba mo, īpibui pese zarina si, aiwaimri wa'aba.

15

Cristu ihāiwa'utuzé wasu'u

¹Īsisānawā norī, āne wa za duré āma aipo're pu'u za'ra wa'wa. Duréihā Zesusihi wasu'uwē na, wa tō te aima 're rowasu'u za'ra wa'wa. Taha zarina, ma tō oto asima iwē za'ra wa'wa, asiptete sina āma 're anomro u'ási aba mono da oto.

²Āhā wasu'uwē hā te aima āma 're iwasu'u za'ra wa'aba mono zé hā, asiptete sina 're sazei utōrī za'ra wa'aba mono ō wapsi, te za 'Re ihāimana u'ási mono te te 're asō'reptu za'ra wa'aba mono zé hā asina 're ī'uwaimrami za'ra wa'aba mo. Tane nherē, āté 'Re ihāimana u'ási mono, asina 're umnhasi uptabi za'ra wa'aba mono ō wamhā, te te 're ī'asō'reptu za'ra wa'aba mono zé hā asina 're uwaimrami za'ra wa'aba mono ō di za.

³⁻⁴Zesusihi wasu'uwē hā danhipai u'ipire uptabi hā, wa tō te aima 're wasu'u za'ra wa'wa, da te īma 're īrowasu'u za'ra mono zéb zarina. Āne, Zesusihi wasu'u hā ipire uptabi hā: Cristu hā ma tō, u, wazada dārā, uburé wawasété na 're iwahāimana za'ra mono norī zada. Taha pari, ma tō dasiwi sērē ni, u, ab're 're. Tawamhā bādā maparane āma si'utōrī ō ré, ma tō duré Īmama hā hāiwa'utu, 'Re ihāimana u'ási mono hā. Āne ma tō tāma tiromhāiba, duréihā 'Re ihāimana u'ási mono zadawa wasu'u'wa norī hā ībaihā na te te āma īrob'ui'ére sirōmo za'ra zéb zarina.

⁵Tawamhā Zesusi hā hāiwa'utu pari, Pedruhu ma, ma tō sihāi'ré. Taha pari, ma tō duré tizadawa wasu'u'wa norī ma zama sihāi'ré za'ra, 12 na aré Īsiré 're ĩnomro mono norī ma hā.

⁶Taha parimhā, ma duré tizazei'wa norī nho'a sihāi'ré, 500 na ihāiba za'ra norī nho'a, aihīni siré si'ubumroi ré. Ta norī hā te zahadu dá'ā āna 're hāimana za'ra. Ni'wam norī si, ma tō tidā'ā za'ra, umro na.

⁷Taha pari, ma tō duré Ti'aduhu ma sihāi'ré. Taha za'u si, ma duré dama ĩsadawa wasu'u'wa da, za daro mono bā te te ĩsatōrī za'ra norī ma, sihāi'ré za'ra, uburé te te hāiba pibu za'ra da.

⁸Taha wa, īma hā robduma si, ma tō duré sihāi'ré, Zesusi hā. Ni'wa hā daza'u si poto wa, marī iwē uptabi hā dasiré te te sina ī'uwaimrami ō ne, wa tō wa hā daza'u si Zesusi hā 'madā, ĩtōmo na, īma sihāi'ré wa.

⁹Wa hā uburé ĩsiré Zesusihi zadawa wasu'u'wa norī zapari, wa 're ihāimana, tāma iwapu za'ra na. E marī wa. Te sazei ō ré, wa tō 'Re ihāimana u'ási mono nhib'a'uwē ma, te tāma 're rob'manharī wasété u'ási za'ra. Taha wa, ībāi ō di aré, ĩsadawa wasu'u'wa na, da te 're ĩwaptērē za'ra mono zé hā.

¹⁰Tane nherē, 'Re ihāimana u'ási mono hā tinhimizawi pese zéb zarina si, ma tō īma tinhopru, tō ōhō na si dama 're ihāimana mono da oto, Cristuhu zadawa wasu'u'wa na. E tawamhā, taré ma tō īma tinhopru, 'Re ihāimana u'ási mono hā. Mare di. Wa tō te ĩsina tāma 're uwaimrami u'ási. Uburé ĩsiré Cristuhu zadawa wasu'u'wa norī hā, wa tō romhuri na te 're rānhipai u'ási za'ra. Tane nherē, ĩsi'uihā na te dama 're romhuri mono ō di. 'Re ihāimana u'ási mono si, ma tō te te 're ĩpawapto, āne na te dama 're romhuri mono da, īma ĩsōprubzéb zarina si.

¹¹Āté, wa hā wa tō aima wasu'u na'rata za'ra wa'wa, Zesusihi wasu'uwē hā. Āté ĩsiré norī si ma tō aima wasu'u na'rata za'ra wa'wa. Āne hā wē di tō, īma hā. E marī wa. Wa norī hā Cristuhu zadawa wasu'u'wa norī hā, misire Zesusihi wasu'uwē hā wa te dama 're wasu'u za'ra mono wa, tō ōhō si wa. Tō taha wasu'uwē si, ma tō oto 're ĩsaze za'ra wa'aba mo, a norī wa'wa hā.

'Re dadā'ā za'ra mono nherē, apā 're idahāiwa'utu za'ra mono zé wasu'u

¹²Āne, wa za duré āma aima rowasu'u za'ra wa'wa. Ni'wam norī hā asiré 're hāimana za'ra wa'aba mono nherē, te āne ta norī hā te te sima 're nharī za'ra: "Re dadā'ā za'ra mono wamhā, apā 're dahāiwa'utu za'ra mono ō di za, niwamhā. Mare uptabi di za." Āne te ni'wam norī hā te te sima 're nharī za'ra. E āne hā tō sena. Mare di. Cristu hā dá'ā nherē, 'Re ihāimana u'ási mono apā te te ihāiwa'utu na, sena na, wa te dama 're wasu'u za'ra mono nherē, e niha te bété āne na te te āma 're rosa'rata upa siroptub za'ra, asiré 're ihāimana za'ra wa'aba mono norī hā.

¹³ Re dadá'á za'ra mono nherē, apá idahâiwa'utu za'ra zé hã tô senai ô 'wa'âhã, e marî te aré wama wasu'u za'ra. Cristu, apá ihâiwa'utuzé wasu'u hã, tô senai ô na, te aré tô wama wasu'u za'ra. Âne hã aiwa aré tô, wama hã.

¹⁴ Duré, Cristu hã 'Re ihâimana u'âsi mono, sena na te te apâ hâiwa'utu ô 'wa'âhã, aré marî dai ô di, Zezusihi wasu'uwê, wa te dama 're iwasu'u za'ra mono zé hã. Taré 'wa'âhã, aré marî dai ô di duré, Cristuhu âma 're isasômri za'ra wa'aba mono zé hã. Taré te aré 're isaze za'ra wa'aba mo, marî dai ô nherē aré.

¹⁵ 'Re dadá'á za'ra mono nherē, apâ 're idahâiwa'utu za'ra mono zé hã tô senai ô 'wa'âhã, Cristu hã 'Re ihâimana u'âsi mono, apâ te te ihâiwa'utuzé hã, aré tô senai ô di duré, âne hã aiwa. Senai ô 'wa'âhã, wa norî hã wazadawa nhipese na, wa aré taré wa te dama 're wasu'u za'ra 'Re ihâimana u'âsi mono hã, Cristu apâ te te ihâiwa'utuzém na, wa te dama 're rowasu'u u'âsi za'ra mono wa. Tarére aré tô, dama wanhimirowasu'u za'ra hã.

¹⁶ 'Re dadá'á za'ra mono nherē, apâ idahâiwa'utu za'ra zéb da hã tô senai ô 'wa'âhã, Cristu, apâ ihâiwa'utuzé wasu'u hã, tô senai ô na te aré wama wasu'u za'ra tô.

¹⁷ Duré, 'Re ihâimana u'âsi mono hã Cristu apâ te te ihâiwa'utuzé hã tô senai ô 'wa'âhã, aré tarére, Cristuhu âma 're isasômri za'ra wa'aba mono zé hã, aiwasété wa, asada idâ'â aba zém na, 're isaze za'ra wa'aba mono zé hã. Ihâiwa'utuzé hã senai ô 'wa'âhã, 'Re ihâimana u'âsi mono te te siwi 're aiwê'ô pese za'ra wa'aba mono haré, te aré tô zahadu aiwasété ré, 're anomro u'âsi aba mo, ône haré, aiwasété hã te te aima 're pari za'ra wa'aba mono âna.

¹⁸ Duré, Cristuhu hâiwa'utuzé hã senai ô 'wa'âhã, uburé isazei'wa, 're idâ'â za'ra mono norî hã te aré ip'ê'ê 're, dà'â u'âsi 're hâimana za'ra, 'Re ihâimana u'âsi mono nhiti.

¹⁹ Cristu hã apâ hâiwa'utu ô 'wa'âhã, tô îbare te aré wa'âma 're dapê'êzé uptabi za'ra, wasiré isazei'wa 're iwahâimana za'ra mono norî âma hã. E marî wa. Marî dai ô wa aré, wa te âma 're isasômri za'ra mono zé hã, marî da ne, wa te 're saze za'ra mono wa, ti'ab ré.

²⁰ Tazahã, 'Re ihâimana u'âsi mono hã ma tô apâ hâiwa'utu tô sena, Cristu hã. E marî te tawamhã, wama wasu'u za'ra, Cristu apâ ihâiwa'utuzé hã. Niwapsi uburé isazei'wa 're idâ'â za'ra mono norî hã, tô sena za apâ 'Re ihâimana u'âsi mono te te ihâiwa'utu za'ra zé, te wama wasu'u za'ra. Taréi ô di, â hã.

²¹⁻²² Duréihã aibã hã ma tô tiwasété 'rata, Adã na isisi hã. Taha nhirã na, te oto dadâ'âzé hã uburé dama 're hâimana za'ra. E marî wa. Taha nhihudu si, 're dahâimana za'ra mono wa. Tane duré, aibã marî iwê hã te te î'manharîzéb zarina, te oto dahâiwa'utuzé hã dama 're hâimana za'ra, aiwab zahuré, âne hã. Cristu na isisi hã. Taha âma si 're înomro mono norî ma, te za dahâiwa'utuzé hã tâma 're hâimana za'ra, ône u'âsi.

²³ Cristu hã ma tô tihâiwa'utu na'rata. Niwa ti'ai u, za we apâ dazô morî wapsi, te za isib'a'uwê norî hã tihâiwa'utu za'ra.

²⁴⁻²⁵ Tawapsi, te za oto rob'râsutuzé hã îwa waptârã. Tawapsi te za uburé dama ipire norî nhiptetezê hã tiwi a'uprosi Cristu hã, ti'ai âma uburé dama rotî 'wa norî wi hã, hâiwa nhirôto na uburé ihâiba'ô norî wib zama. 'Re ihâimana u'âsi mono hã uburé tinhitob'ru norî âma te te î'ai'utézéb u si, te za Cristu hã te te 're da'ab'madâ'â, pire na. Taha parip si, te za oto Timama ma isib'a'uwê hã sômri za'ra, ôhõ si te te 're ab'madâ'â u'âsi mono da oto, pire uptabi na.

²⁶ Dadâ'âzé hã te dazada 're hâimana. Ta hã te za oto Cristu hã uprosi pese, da'râsutu âma hã.

²⁷ Duréihã apito Dawi hã ma tô âne na âma rob'ui'ééré siro, Cristuhu âma: "Ta hã ma tô 'Re ihâimana u'âsi mono hã pisutu, uburé marî hã pire na te te 're ab'madâ'â mono da, siwaprosi."

Âne duréihã Cristuhu âma, Dawi te te îrob'ui'ééré siro hã te 're hâimana. E tawamhã, pire na dama 're ihâimana mono zéb da, Cristuhu pisutu wai ma zama, te za pire na tâma 're hâimana, 'Re ihâimana u'âsi mono ma. Mare di. Taha ma zama, te te wasu'u ô di, âne hã. Sisapari ma si, ma tô pisutu, 'Re ihâimana u'âsi mono hã. Âhã wasu'u hã wama pibui pese za'ra di oto.

²⁸ 'Re ihâimana u'âsi mono hã te za te te 're da'apisutu, Cristuhu nhimi'madâ'â si oto 're dahâimana za'ra mono da. Tawapsi, te za oto ti'ra hã pisutu 'Re ihâimana u'âsi mono hã, isapari 're hâimana mono da oto, Îmama si te te oto 're da'ab'madâ'â u'âsi mono da, danhipai u dama pire uptabi na.

²⁹ Âne, wa za duré aima âma rowasu'u za'ra wa'wa, za idahâiwa'utu za'ra zé wasu'u na hã. Ni'wam norî hã asiré 're ihâimana za'ra wa'aba mono norî hã ma tô â dawabzuri hã da te tâma 're 'manharî za'ra, isazei'wa norî, â dawabzuri da te tâma 're 'manharî za'ra mono ô ré, 're idâ'â za'ra mono norî upana, isazei'wa norî zu hâiwa'utu za'ra da. E marî da, ma tô bété ta norî hã âne hã te te 're 'manharî za'ra, dahâiwa'utuzé wasu'u hã te te 're sazei uptabi za'ra mono ô nherē. Âne wamhã, e tô î'uwaibaba, aima za'ra wa'aba hã.

³⁰ Wa norî hã bété, Cristuhu ma, wa te 're îromhuri pese za'ra mono norî hã. Wama romnhimimnhasi na, wa 're wahâimana u'âsi za'ra bâta sidâpâsi, iwasu'uwê hã wa te dama 're

wasu'u za'ra mono 'ru te, niha da te wama 're rob' manharī za'ra mono ō'umnhasite, da te 're İwa'ruiwari za'ra mono zéb zarina. Tawamhā dahāiwa'utuzé wasu'u hā senai ō 'wa'āhā, e marī da, wa aré bété wa te tāma 're romhuri za'ra Cristuhu ma hā, wama romnhimimnhasi uptabi za'ra nherē. Marī dai ō di tō aré, tāma wanhimiromhuri za'ra hā.

³¹ İsisānawā norī, awē sidāpāsi aré 're İdā'ā u'āsi mono nherē, wa tō te dama 're rowasu'u u'āsi, İwasu'uwē na. Wa norī hā Wanhib'apito Cristu Zezusihi āma simisutu oto 're wanomro mono wa, tō sena aima 're İtoi uptabi za'ra wa'aba mono zéb zarina, wa tō sena na aima İsiwasu'u za'ra wa'wa, āne na hā.

³² Epēzu āma, ni'wam norī hā ma tō İzada tihāimana wasété za'ra, robzahi hā dazō 're İwairébé mono ne. Ta norī 'rata, İhāimana ré hā, İma romnhimimnhasi uptabi di, te te siwi İwiri da newa. Tawamhā, dahāiwa'utuzé wasu'u hā taré wamhā, e sena aré İnhimiromhuri hā, Cristuhu ma hā, İma romnhimimnhasi nherē, te tāma romhuri wamhā aré. Āne hā İ'uwaibaba ō di aré, İma hā. Taré aré, te 're İromhuri mono zé hā. Dahāiwa'utuzé wasu'u hā tō senai ō 'wa'āhā, ti'ai āma 're wahāiba si'utōri pese za'ra mono 'wa'āhā, İ'uwaibaba wa aré danhimiroti wasété na, wa te da'āma 're sasōmri za'ra. Āne danhimiroti wasédé hā: "Āté romhutu na, wa za wasi'utōri. Āté awēpsi. Taha wa, āhāna hā watozém na si siwa'ru wato za'ra wa'aba, wanhirōwi da, wasazém na, duré āzé na." Āne wamhā, wa aré tō İbāre, wa te da'āma 're sasōmri za'ra, dahāiwa'utuzé wasu'u hā tō senai ō 'wa'āhā aré.

³³ Āne wa, te za dawī 're asi'madā'ā pese za'ra wa'aba mo, danhimiroti wasédé hā tō sena newa, da'āma 're sasōmri za'ra wa'aba mono tō da. Taha na da'āma 're sasōmri za'ra wa'aba mono wamhā, ta norī ne te za oto 're aihāimana wasété za'ra wa'aba mo.

³⁴ Ni'wam norī hā asiré 're İhāimana za'ra wa'aba mono norī hā 'Re İhāimana u'āsi mono hā 'rāwi te te 're waihu'u za'ra mono ō di. E āne na 're siséb za'ra mono āna. Asimiza'rese āna 're aihāimana za'ra wa'aba mono zém hawī, te za oto aipizari za'ra wa'wa, aiwasédé hā rēme pese za'ra wa'aba da, aiwē uptabi na si 're anomro aba mono da oto.

'Re İhāimana u'āsi mono hā za te te da'ahāiwa'utu wa, dahāiba té wasu'u

³⁵ Āté ni'wam norī hā asiré 're aihāimana za'ra wa'aba mono norī hā te za āne 're sisadhanarī za'ra: "E niha te za merē 'Re İhāimana u'āsi mono hā da'ahāiwa'utu. 'Re dadā'ā za'ra mono wa, 're dahāiba si'utōri pese za'ra mono nherē, e niha te za merē āne nherē, apā da'ahāiwa'utu."

³⁶ E niha te asimirosa'rata waihu'u āna, āne na 're İ'upa za'ra wa'aba mo. Amnho potozém na, wa za pé aima āma simiré'é za'ra wa'wa, waihu'u za'ra wa'aba da. Amnho hā da te 're zuri mono wamhā, İtomhā 're si'utōri mono ō nherē, 're 'wanhipré za'ra mono ō di.

³⁷ Duré, tridu hā aro 'rā ne hā da te 're zuri mono wamhā, duré aimawī amnho hā da te 're zuri mono wamhā, e İteihī zama te za İsu da te 're zuri. Mare di. İnhama uptabi si te za da te 're zuri, pibui pese na 're poto za'ra mono da, amnho hā.

³⁸ Amnho hā da te 're zuri mono wamhā, 'Re İhāimana u'āsi mono hā te te İ'aropoto mono hawim haré, te te sima 're İ'apisutu mono zéb zarina si, te za dama 're 'wanhipré wairébé, sipu'u pese na.

³⁹ Duré, ti'ai āma uburé hāiba ré 're İhāimana za'ra mono hā aiwapsi ō di. A'uwē hāiba hā aimawī. Duré abaze norī hāiba hā aimawī. Duré pe'a norī hāiba hā, aimawī. Duré si norī hāiba hā aimawī.

⁴⁰ Duré, hāiwa āma 're İhāimana za'ra mono norī hāiba hā aiwab ō di, ti'ai āma 're İdahāimana za'ra mono norī hāiba ne hā. Hāiwa āma si, dahāiba hā wē uptabi di. Duré 'madā'ā zeī uptabi di. Ti'ai āma dahāiba hā wē nherē, duré 'madā'ā ze nherē, aiwab ō di, hāiwa āma dahāiba ne hā.

⁴¹ Bādā hā bété. Ta hā 'madā'ā ze ti. Wē uptabi di. A'amo hā 'madā'ā zeī uptabi di duré. Uburé wasi hā hāiwa na 're İsimasa mono hā, 'madā'ā ze ti duré. Tane nherē, uburé aiwapsi 're hāimana za'ra mono ō di, İ'madā'ā ze da hā. Duré uburé wasi norī hā aiwapsi 're simasa mono ō di, İ'madā'ā ze da hā.

⁴² Tane duré, za niwa 'Re İhāimana u'āsi mono te te İda'ahāiwa'utuzé hā. Amnho hā da te 're zuri mono wamhā, İtomhā 're si'utōri mono wapsi, te za 're 'wanhipré za'ra. Tane duré, ti'ab ré, 're dadā'ā za'ra mono pari, ab're 're, da te oto 're danheme mono wamhā, te za tō 're dahāiba si'utōri za'ra. Tane nherē, 'Re İhāimana u'āsi mono te te oto da'ahāiwa'utu wamhā, dahāiba hā aiwa dama 're hāimana za'ra mono ō di za oto. 'Re dahāiba si'utōri za'ra mono āna, te za oto İré 're dahāimana u'āsi za'ra, ōne u'ā.

⁴³ 'Re dadā'ā za'ra mono wa, dahāiba hā ab're 're, da te 're séme mono wamhā, wasété uptabi di oto, dahāiba hā. Duré, marī hā te te 'manharī waihu'u ō di dahāiba hā, marī dai ō wa oto. Tane nherē, 'Re İhāimana u'āsi mono hā te te oto da'ahāiwa'utu wamhā, dahāiba hā wē uptabi di za oto. 'Madā'ā zeī uptabi di za duré. Tawapsi, danhiptete uptabi na te za İré 're dahāimana u'āsi za'ra oto.

⁴⁴ Re dadá'á za'ra mono wa, dahâiba hâ ab're 're, da te 're ísême mono hâ, ti'ai âma ré hâ, dahâiba si, danhi ré si, duré dahi ré si. Tazahâ 'Re îhâimana u'âsi mono hâ za te te da'ahâiwa'utu wamhâ, dahâiba aimawi ré, te za oto 're dahâimana za'ra, Îp'ê'ezani nhimipisutuzéb zarina. Ti'ab ré, te tó dahâiba na 're dahâimana za'ra. Taha zarina, te duré hâiwa âma dahâiba aimawi ré 're dahâimana za'ra, 'Re îhâimana u'âsi mono pê'êzani nhimipisutuzéb zarina.

⁴⁵ Duréihâ Mozési hâ ma tó âne na âma rob'ui'ére:

“Re îhâimana u'âsi mono hâ ma tó aibâ hâ poto 'rata, Adâ na ísisi hâ. A'uwê hâiba na 're morî da, ma tó poto 'rata tó.”

Âne duréihâ âma îrob'ui'ére hâ. Tane nherê, Adâhâ ne te 're hâimana, 'Re îhâimana u'âsi mono 'rata, dadá'â âna 're danomro mono da, te te dama 're T'apisutu mono hâ, Îp'ê'ezani nhimipisutuzéb zarina. Ta hâ Zezusi.

⁴⁶ E tawamhâ hâiwa âma hâ dahâiba aimawi ré, ma tó 're dahâimana na'rata za'ra. Mare di. Ti'ai âma dahâibazém na, te tó a'â íré 're dahâimana na'rata za'ra, ti'ai âma ré hâ. Niwapsi te za hâiwa âma dahâiba îwê uptabi ré si 're dahâimana za'ra.

⁴⁷ Duréihâ aibâ te te dama îpoto 'rada hâ ma tó ti'a na 'manha, 'Re îhâimana u'âsi mono hâ. Tane nherê, taha uirî na si, ma tó aibâ aimawi hâ wei mo hâiwa hawimhâ, ti'ai u, Adâhâ ma îpire uptabi hâ, îwê uptabi hâ.

⁴⁸ Uburé ti'ai âma 're îdahâimana za'ra mono norî hâ te Adâhâ hâiba ne, íré 're dahâimana za'ra, ti'ai 'manharî na îhâiba na'rata ne ré. Tane nherê, ni'wam norî si hâiwa âma za 're îhâimana za'ra mono norî si, te za hâiwa âma 're îmorî hâiba ne ré 're hâimana u'âsi za'ra, tó Cristuhu hâiba ne ré.

⁴⁹ Wa norî hâ, aibâ ti'ai 'manharî na îhâiba na'rata ne ré, wa ti'ab ré íré 're wahâimana za'ra. Tane, wa za duré niwapsi hâiwa hawi we îmorî hâiba ne íré 're wahâimana u'âsi za'ra. Taha wa, wa za oto ísine 're wahâimana u'âsi za'ra, ône u'âsi.

⁵⁰ Ísisânawâ norî, âne wa za aima âma waihu'u za'ra wa'wa, tó sena. Ti'ai âma ré wahâiba hâ wanhi ré hâ duré wawapuri ré hâ, taha ré, hâiwa u íré 're wanhisisi waihu'u mono ô di za, 'Re îhâimana u'âsi mono hâ da'âma 're ísib'a'uwê mono zéb u hâ. E marî wa. Ti'ai âma ré wahâiba hâ za wawi 're ísi'utôri za'ra mono hâ, hâiwa âma íré 're wahâimana waihu'u za'ra mono ô di za oto, 'Re îhâimana u'âsi mono 'rata íré 're îwahâimana u'âsi za'ra mono zéb da hâ.

⁵¹⁻⁵² Marî hâ aré dama îwaihu'u'ô hâ wa za oto aima wasu'u hâi'rê za'ra wa'wa, sô'awi. Ma'âpé îwaparî pese za'ra wa'aba za. Wa norî hâ Zezusihî zazei'wa norî hâ, ti'ab ré uburé wasi'utôri sirômo ô di za, rob'râsutuzé wana hâ. Rob'râsudu hâ oto îwa îwaptâ'ázé waihu'uzéb da, danhimnhîhârazé da'râsutu'wa, da te oto wapari za'ra wamhâ, uburé ti'ai âma zahadu wahâiba ré ré 're îwanomro mono norî hâ, wa za awa'awi wahâiba na saprî za'ra ni, waptu na 're îdatômo si'râmi za'ra mono ne. Danhimnhîhârá hâ da te wapari za'ra ni, ni'wam norî hâ ísazei'wa norî hâ dawana 're îdá'á za'ra mono hâ te za apâ ahâiwa'utu, dá'â âna oto 're hâimana u'âsi za'ra mono da, îhâiba tiwi 're si'utôri waihu'u za'ra mono âna. Tawamhâ wa norî zama wahâiba ré ré 're îwanomro mono norî hâ, wa za duré wahâiba îtém na saprî za'ra ni, za oto wawi 're ísi'utôri za'ra mono ô na hâ.

⁵³ Ti'ai âma ré hâ, wahâiba hâ si'utôri pese di. Tane nherê, wa za tó niwapsi wahâiba îtém na saprî za'ra ni, za oto wawi 're ísi'utôri waihu'u za'ra mono ô na hâ, íré 're wahâimana u'âsi za'ra mono da oto, ône u'âsi.

⁵⁴⁻⁵⁵ Âne hâ niwa za wama romhâimana za'ra wamhâ, 'Re îhâimana u'âsi mono zadawa wasu'u 'rata' wa norî hâ duréihâ te te âma îrob'ui'ére sirômo zahuré zéb zarina, te za tó wama âma uwaimramî za'ra, 'Re îhâimana u'âsi mono hâ, za apâ îwahâiwa'utu za'ra zém na hâ. Âne duréihâ âma îrob'ui'ére siro hâ:

“Re îdadá'á za'ra mono zém na, te za 'Re îhâimana u'âsi mono hâ âma ai'uté. Te za uprosi pese oto. 'Re îdadá'á za'ra mono zé hâ, e mahâta tawamhâ te te da'âma î'ai'uté za'ra zéb da hâ. Marî ô di oto. Robabi uptabi di. Duré, e mahâta te ísîptetez hâ tâma 're hâimana oto, te te âma 're îda'a'uprosi mono zéb da hâ, apa'apa 'wa nhi'oto nhîpsari ne hâ. Marî ô uptabi di oto, tâma hâ.”

Âne duréihâ âma îrob'ui'ére siro hâ te 're hâimana, za dama îromhâimanazém na hâ.

⁵⁶ E marî wa, ma tó aré 're îwadá'á za'ra mono zé hâ sîptete na wazada 're hâimana za'ra. Wawasété na 're îwanomro mono zéb zarina, ma tó aré tó sîptete na wazada 're hâimana za'ra, te te 're îwa'a'uprosi mono zéb da hâ. Duré 'Re îhâimana u'âsi mono nhimiroti na Mozési te te âma îrob'ui'érezéb zarina, 're wanomro wê mono ô wa, ma tó aré te te siwi 're wa'awê'ô pese, 'Re îhâimana u'âsi mono hâ.

⁵⁷ Tane nherê, 'Re îhâimana u'âsi mono âma si, 're wawata u'âsi za'ra wa'aba mono za. E marî wa. Ôhō si, ma tó 're îwadá'á za'ra mono zém na hâ wama âma ai'uté za'ra, Wanhib'apito Zezu Cristuhu si, îwê uptabi hâ te te wazada î'manharizém na hâ.

⁵⁸ Ísisānawā norī, ĩma asawi pese za'ra wa'aba norī hā, taha wa, te za asiptete u'āsi Cristuhu āma si 're anomro aba mo, tiwi 're aipizari za'ra wa'aba mono āna. Wanhib'apito ma, 're ĩromhuri za'ra wa'aba mono zé hā taréi ō di. Āne na asina waihu'u za'ra wa'aba wa, te za tāma 're ĩromhuri pese u'āsi za'ra wa'aba mo, asimi'ē na.

16

Zeruzarē āma ĩsazei'wa norī ma, rob'uiprazé da te dasiwi ĩ'rā'ōtōzé wasu'u

¹ ĩsazei'wa norī ma, rob'uiprazé hā asiwi ĩ'rā'ōtō aba zéb da na, wa za oto aima āma roti za'ra wa'wa. Darasiza na danhipti'a nho'ōmo nhisi āma ĩsazei'wa norī, daza'rui mono bā siré 're ĩsi'rā'ōtō mono norī ma, te tāma ĩroti za'ra zém na, wa za aima roti za'ra wa'wa, duré a norī wa'aba zama 'manharī za'ra wa'aba da.

² Dumidu sidápasi 're sāmra aba mono da, te za rob'uiprazé hā 're ĩpo'o u'āsi za'ra wa'aba mo, aihāiba mono bā wa'aba. Aipawa'ā hā syry na 're waibui wa'aba mono wamhā, syry na te za 're ĩpo'o za'ra wa'aba mo. Duré sa'ētē na 're waibui wa'aba mono wamhā, sa'ētē na te za duré 're ĩpo'o za'ra wa'aba mo. Atēme ĩwisi aba wapsi, asiwi 'rā'ōtō aba da, asima rosa'rata za'ra wa'aba ō di za. ĩwana ré, te za asiwi 're ĩ'rā'ōtō u'āsi aba mo dumidu sidápasi, ĩzō nomro sirōmo da.

³ Tawamhā atēme āma ĩwisi aba wapsi, asiwi ĩpisutu za'ra wa'aba norī hā wa za ĩré satōrī za'ra Zeruzarē u, asōprubzéb za'ra wa'aba ré hā, te te siwi āri da. Rob'ui'éré ré zama, wa za satōrī za'ra, wa te ĩwēsāmri za'ra norī wasu'u na rob'ui'éré hā.

⁴ Tawamhā, áté ĩzama wa za ĩsima rowé, Zeruzarē u ĩmorī da hā. Taha wapsi, wa za ĩsiré ĩmorī za'ra, asiwi ĩpisutu za'ra wa'aba norī siré hā.

Paru hā za datēme ĩmorīzém na dama ĩsiwasu'uzé wasu'u

⁵ Wa tō ĩsima rowairébé, Masédoniza na danhipti'a nho'ōmo nhisi u, a'ā ĩmorī da, tame ĩsazei'wa norī siré a'ā ĩnhamra hutu da. Masédoniza hawip si, wa za oto āma atēme ĩmorī 'wa, tamomo.

⁶ Tawamhā, atēme āma ĩwisi aba wamhā, áté wa za ai'rata ĩhāimana hā za'ra wa'wa. Áté rowa'u'u wahā 're sa'wari mono ré, wa za a'ā ai'rata ĩnhamra hā za'ra wa'wa. Tamep si, te za asiwi ĩpawaptob za'ra wa'wa, nimomo ĩmorīzéb da hā, rowé na ĩmorī da, aihawī za'ra wa'aba.

⁷ Āma atēme ĩwisi za'ra wa'aba wamhā, ai'rata ĩnhamra hutu za'ra wa'aba da, te ĩsina roti ō di. Ai'rata ĩnhamra hā za'ra wa'aba da si, wa tō ĩsima wé. Āne na dá'āsina, awa'awi āma atēme ĩwisi aba ō di za. Nimahā na si, wa za āma atēme ĩmorī za'ra wa'wa. Tawapsi, wa za ai'rata ĩnhamra hā za'ra wa'wa, Wanhib'apito te te ĩma pisutu pese wapsi.

⁸ Taha wa, wa za a'ā āme nhamra Épézu āma, Pētecoti na bātā nhisi hā za ĩwa ĩwaptá'ázéb u, datoī 'manharīzéb u.

⁹ ĩnhimromhuri wē'ō'wa norī hā ahā uptabi nheré, ma tō 'Re ĩhāimana u'āsi mono hā ĩnhowa ropese ĩma, āme te tāma 're ĩromhuri mono zéb da hā. Taha wa, āmemhā ĩma romhuri ahā uptabi di za, Zezusihi wasu'uwé na te dama 're ĩromhuri mono zéb da hā.

¹⁰ Duré, Timotiū hā atēme āma wisi za'ra wa'aba wamhā, ma'āpé asiwi sawi wé za'ra wa'aba za, sina hātā'ā āna ai'rata sāmra aba da. Wa hā Wanhib'apito ma, te 're ĩromhuri mono ne, te duré taha zama te te tāma 're romhuri. Taha wa, te za asiwi ĩsawi pese za'ra wa'wa.

¹¹ Mreme wapu na 're hāimana mono newa, duré taré 're ĩhāimana mono newa, asiwi wē'ō za'ra wa'aba ō di za, āma atēme wisi za'ra wa'aba wamhā. Te za āma ana wa'wa, rowé na aihawī wa'aba wei morī da apā, we ĩtēme wisi su'u da. Taha wa, wa zahadu sō mapari za'ra a'ā, ĩsiré romhuri'wa norī zō zama.

¹² Wasisānawā Aporu hā wa za duré aima āma wasu'u za'ra wa'wa. Wa tō aré nasi tāma roti u'āsi, wasiré ĩsazei'wa norī siré āma atēme morī za'ra wa'aba da, te te asabu za'ra wa'aba da. Tane nheré, te te sima rowé ō di, te ta norī siré āma atēme ĩmorī za'ra wa'aba da hā. Marī hā tāma hāimana ō wapsi, te za, u, āma atēme timorī za'ra wa'wa, te te asabu za'ra wa'aba da.

Paru hā roti na za te te oto dama ĩrāsutuzém na rowasu'u

¹³ Asimiza'rese te za asimirosa'rata na 're aihāimana za'ra wa'aba mo. Cristuhu nhimiroti zarina si 're anomro u'āsi aba mono da, te za sada 're asiptete za'ra wa'aba mo. Aihāimana prédup sina te za 're aihāimana za'ra wa'aba mo, asina 're aihātā'ā za'ra wa'aba mono āna. Asiptete sina te za āma 're anomro aba mo, tiwi 're aipizari za'ra wa'aba mono āna.

¹⁴ 'Re asimizawi pese za'ra wa'aba mono zéb zarina, te za uburé marī hā dama 're ĩ'manharī wé u'āsi za'ra wa'aba mo.

¹⁵⁻¹⁶ Esitépanasihi āma, wa za oto aipo're pu'u za'ra wa'wa, ĩsōrōwa āma ĩsiré 're ĩhāimana za'ra mono norī āma zama. Ta norī hā ma tō sazei 'rata za'ra, Ataza na danhipti'a nho'ōmo

nhisi āma, 're īsi'ubumroi mono norī hā. Ta norī hā, 'Re ihāimana u'āsi mono nhib'a'u'wē 're ihāimana za'ra mono norī hā simi'ē na te te 're pawaptob u'āsi za'ra mono da si, ma tō 're si'madā'ā za'ra. Āne hā aima waihu'u pese za'ra wa'aba di. Taha wa, īsisānawā norī, ta norī nhimiroti hā te za 're ī'madā'ā pese za'ra wa'aba mo, īsiré norī hā simi'ē na te te 're īromhuri pese za'ra mono norī nhimiroti zama.

¹⁷⁻¹⁸ Esitēpanasi norī hā we ītēme sihutu wamhā, ma tō īma rowē watobro, Potunatu norī hā Aca'ituhu me. Wa hā ai'rata 're īnhamra aba mono ō wa, wa ai'āma 're īpē'ēzé u'āsi za'ra wa'wa. Tane nherē, ta norī hā ai'upana wa'aba we ītēme sihutu wa, ma tō sina īma rowē wazere za'ra, te te sina aima 're īrowē zani u'āsi za'ra wa'aba mono ne. Ta norī hā te za asima 're īwasu'u wē u'āsi za'ra wa'aba mo.

¹⁹ Azi'a na danhipti'a nho'ōmo nhisi āma īsazei'wa norī, siré 're īsi'rā'ōtō mono norī hā te āma asawi za'ra wa'wa. Atira hā te duré āma asawi za'ra wa'wa, Prisiraha me. Uburé īsōrōwa āma rowahutu u siré 're īsi'rā'ōtō u'āsi mono norī zama, te duré āma asawi za'ra wa'wa. Simisutu, Wanhīb'apito āma oto 're anomro aba mono wa, te āma asawi za'ra wa'wa.

²⁰ Āme wasisānawā norī 're īsi'ubumroi mono norī hā te duré uburé āma asawi za'ra wa'wa. Duré 're asi'rā'ōtō aba mono wamhā, te za uburé asiré īsazei'wa na 're aihāimana za'ra wa'aba mono wa, asō'utu na asisawi sina 're asitob'rata hārā za'ra wa'aba mo.

²¹ Wa hā Paru, īsi'uihā na wa za oto aima rob'ui'éré na 'rāsutu za'ra wa'wa, īnhib'rata na te āma asawi za'ra wa'aba zéb da hā.

²² Wanhīb'apito zawi'ō'wa norī ma, 'Re ihāimana u'āsi mono hā, rowē'ō te te tāma 're apisutu mono za.

Wanhīb'apito, apā we aimorī su'u za.

²³ Wanhīb'apito Zezusihi ma, wa ai'āma tāma 're īmreme u'āsi za'ra wa'wa, te te 're asawi pese za'ra wa'aba mono wa, te te 're aipawaptob u'āsi za'ra wa'aba mono da.

²⁴ Cristu Zezusihi āma simisutu oto 're wanomro mono wa, wa asawi na āma 'rāsutu za'ra wa'wa, īma asawi uptabi za'ra wa'aba wa.

2 Corītu norī Paru hā, maparane āma te te duré ĩrob'ui'érézé, Corītu norī ma Ībaihā wasu'uzé

Īmorī'rata na Paru hā te te Corītu norī ma rob'ui'éré parimhā, ma tō duré aimawi na tāma rob'ui'éré za'ra, ĩbaihā 're, dama ĩhāimana ō na. Rob'ui'éré hā ĩtēme wisi za'ra wamhā, ma tō tiwi tīrobzei'ō za'ra, tinhimi'ui'éré na hā ĩwasété na te te tāma nharī za'ra wa, Paru hā. Nima norī hā ma tō duré Paruhu āma rosa'rata za'ra, sena na Zezusihi zadawa wasu'u'wa na 're ĩmorī ō na hā. Ma tō duré tāma nharī za'ra, ĩsazei'wa norī hā tiwasédé hā te te ĩ'manharī za'ra norī ma, te te rowairébé 'ru te. Taha wa, Paru hā tinhimi'ui'éré na ma tō asa sa'ētē tāma nharī za'ra, sada ĩhāimana za'ra norī ma. Ma tō duré tāma siwasu'u za'ra, Zezu Cristu hā sena na te te ĩtēme ĩsatōrī za'ra na hā. Ma tō duré wama rowasu'u za'ra, sena na Zezusihi nhirā zarina si 're ĩdanomro mono zém na hā, duré 're ĩwanomro mono zép tém na, Zezusihi nhimi'manharī wē zéb zarina.

¹ Wa hā Paru, wa āma aima rob'ui'éré za'ra wa'wa, Corītu na 'ri nho'ōmo nhisi āma, ĩwasu'uwē u 're asi'rā'ōtō aba mono norī ma, asiré. Uburé Ataza na danhipti'a nho'ōmo nhisi āma, 'Re ĩhāimana u'āsi mono nhīb'a'uwē 're aihāimana za'ra wa'aba mono norī ma zama, wa āma aima rob'ui'éré za'ra wa'wa. 'Re ĩhāimana u'āsi mono hā ma tō ĩpisutu, Cristu Zezusihi zadawa wasu'u'wa na ĩsada para dama 're ĩhāimana mono da, daro mono bā, te te sima ĩwēzéb uwaibaba.

Wano hā te duré āma ĩzadawa wapto, uburé te aima āma ĩrowasu'u za'ra wa'aba zém na hā, Timotiu na wano nhisi hā.

² Wamama ma, wa ai'āma 're ĩmreme u'āsi za'ra wa'wa, 'Re ĩhāimana u'āsi mono ma, duré Wanhīb'apito Zezu Cristuhu ma zama, ĩsimizawizé hā ai'āma 're hāimana u'āsi za'ra wa'aba mono da, rowē u'āsi, āma 're anomro aba mono da.

Paru hā, 'Re ĩhāimana u'āsi mono āma ĩwatazé wasu'u

³ 'Re ĩhāimana u'āsi mono āma si, 're wawata za'ra wa'aba mono za, Wanhīb'apito Zezu Cristuhu mama āma. Ta hā te wa'āma 're siwamri u'āsi. Te duré te te 're wa'apawaptob u'āsi, wapē hā ĩ're wama 're simi'wara u'āsi mono da.

⁴ Wa hā, duré Timotiu, uburé marī ĩpire hā wa te 're sépata mono wamhā, te za tō te te 're wapawapto, wapē ĩ're wama 're sa'wari mono da. Taha wa, wama waihu'u pese di oto duré, ĩsarina, wa te 're ĩdapawapto mono zéb da hā, wasine 're dapē'ē nhimi'wara mono da, marī ĩpire hā da te 're sépata za'ra mono wamhā. 'Re ĩhāimana u'āsi mono te te 're ĩwapawapto mono ne, wa za tō wa norī zama wa te 're dapawaptob za'ra, dapē hā ĩ're dama 're simi'wara mono da apā.

⁵ Wa norī hā Cristuhu zazei'wa 're wahāimana mono wa, wa wa te 're robzépata, ti'ab ré Cristu hā te te 're ĩrobzépata mono ne. ĩsine, wa te 're robzépata mono nherē, ta hā te za te te 're wapawaptob u'āsi, wapē ĩ're wama 're sa'wari mono da, wato sina duré 're wahāimana u'āsi mono da.

⁶ Wa norī hā, Cristu, wa te dama 're sadawa wasu'u mono wa, te da te wama 're rob'manharī wasété u'āsi. Taha zarina, wa te 're robzépata mono nherē, wama 're rowē mono di. E marī wa. Wanhimīromhuri zarina 're ĩsaze za'ra wa'aba mono zéb zarina, 'Re ĩhāimana u'āsi mono te te 're asō'reptu za'ra wa'aba mono wa, duré ĩsimipawaptobzéb zarina, aipē hā ĩ're aima 're simi'wara aba mono wa. Wa norī hā wa te 're robzépata mono wamhā, te tō 'Re ĩhāimana u'āsi mono hā te te 're wapawapto, wapē ĩ're wama 're sa'wari u'āsi mono da. Āne hā aima waihu'u pese za'ra wa'aba wa, te za 'rāwi asima 're ĩnharī za'ra wa'aba mo, āne: "Paru norī hā te te 're robzépata zahuré mono nherē, 'Re ĩhāimana u'āsi mono te te 're ĩwapawaptob u'āsi zahuré mono ne, te za duré te te 're wa'apawapto, wapē ĩ're wama 're simi'wara u'āsi mono da." Āne te za 'rāwi asima 're ĩnharī za'ra wa'aba mo. Taha wa, wasine 're robzépata za'ra wa'aba mono wamhā, te za asiptete sina āma 're anomro aba mo, 'Re ĩhāimana u'āsi mono āma. Tawamhā, te te 're ĩwapawapto mono ne, te za tō 'Re ĩhāimana u'āsi mono hā te te 're aipawaptob za'ra wa'wa, aipē ĩ're aima 're simi'wara aba mono da.

⁷ Āne na, wa tō wa te ai'āma 're rosa'rata u'āsi za'ra wa'wa, 're robzépata za'ra wa'aba mono nherē, 'Re ĩhāimana u'āsi mono za 're ĩrēme za'ra wa'aba mono ō na hā. Taha wa, wasine 're robzépata za'ra wa'aba mono wamhā, tō sena te za duré 'Re ĩhāimana u'āsi mono hā te te 're aipawaptob za'ra wa'wa, te te 're ĩwapawaptob u'āsi mono ne, apā 're aipē'ē nhimi'wara u'āsi aba mono da.

⁸ Wasisānawā norī, wa duré wasima wē ni, wa te āma aipo're pu'u za'ra wa'aba da, Azi'a na danhipti'a nho'ōmo nhisi āma wahāmana ré, rowasédé hā wazada ĩhāmanazém na hā. Tame, wa te robzépata za'ētē uptabi wa, wa tō aré wasina rosa'rata ni, sena na oto wadâ'â da newa.

⁹ Āne, wa tō wasina rosa'rata ni, 'rāwi: "Tō sena, wa za wadâ'â ni, romhutu na." Tawamhā e marī da, ma tō āne hā wazada tiromhāiba bété. 'Rāwi wawaihu'u pese na 're wasi'madâ'â tō mono da, 'Re ĩhāmana u'āsi mono si, wa te 're umnhasi pese mono da si, ma tō āne hā wazada tiromhāiba. 'Re ĩhāmana u'āsi mono si waihu'u pese di, te te 're ĩda'ahāiwa'utu mono da hā. Duré tāma dawaihu'u pese di, te te 're ĩda'ab'madâ'â mono da hā, rowasédé hā dzada 're hāmana mono wamhā.

¹⁰ Ta hā ma tō wanho'reptu tō, wadâ'āzém hawi, wa te wasina romnhimimnhasi uptabi nherē. Taha zarina, te za te te 're wanho'reptu duré, wazada 're ĩromhāimana wasété mono zém hawi. Taha wa, wama umnhasi uptabi di, 'Re ĩhāmana u'āsi mono hā te te 're ĩwanho'reptui mono da hā.

¹¹ A norī wa'wa hā wa'āma 're aimreme zusi aba mono zém na 're wapawaptob za'ra wa'aba mono wamhā, 'Re ĩhāmana u'āsi mono hā te za te te 're aiwapari za'ra wa'wa, te te 're wanho'reptui u'āsi mono da. Āne wamhā, ĩwē na si te za tō wama 're sōprub u'āsi. Taha zarina, te za tō da'ahā na āma 're dawata za'ra, 'Re ĩhāmana u'āsi mono āma hā, ĩwē na si wama 're sōprub u'āsi mono wa.

Paru hā datēme morī tō da, te te āma ĩsaprīzé wasu'u

¹² Ni'wam norī hā asiré 're hāmana za'ra wa'aba mono nherē, ma tō wahāmana nhipese na hā wa'āma siwi tihī. Tane nherē, senai ō di ta hā. Wa norī hā 'rāwi wapē'ē na 're wasiwē'ō mono ō di. E marī wa. Marī hā wa te ai'āma 're 'manharī za'ra wa'aba mono ō wa, 're wahāmana wē u'āsi mono wa. Pi'uriwi aiwi 're wahāmana za'ra wa'aba mono ō di. Marī ĩwē si, wa tō wa te aima 're 'manharī za'ra wa'wa. Ti'ai āma ĩsazei'ō'wa norī nhimirowaihu'u pese zarina, 're wahāmana mono ō di. 'Re ĩhāmana u'āsi mono nhimizawi pese zéb zarina si, wa āne na hā 're wahāmana oto.

¹³⁻¹⁴ Wa te āma aima ĩrob'ui'éré za'ra wa'aba zé hā e pire di, 're sórē za'ra wa'aba mono wamhā, duré āma ĩwaihu'u za'ra wa'aba da hā. Mare di. Aima wapu za'ra wa'aba di. E marī wa. Wazadawa nhipese na, marī na wa te āma aima rob'ui'éré za'ra wa'aba ō wa, aimawi na wa te āma aima 're roti za'ra wa'aba mono ō wa duré. Āne na hā sena na 're ĩwahāimana mono zé hā aima waihu'u pese za'ra wa'aba ō di. Tane nherē, wa tō wa te wasima 're aiwē za'ra wa'wa, nimahā na asiwi wawaihu'u pese za'ra wa'aba da, wazadawa nhipese ō na 're ĩwahāimana mono na hā. Tawapsi te za Wanhīb'apito Zezusi hā nimahā bātā na apā we ĩmorizéb āma, wa'āma atob'uzu za'ra wa'wa, wa norī hā za duré ai'āma ĩwatob'uzu za'ra wa'aba ne, tō taha bātā na hā.

¹⁵⁻¹⁶ 'Re ĩhāmana mono zém na, ĩwēsāmri za'ra wa'aba newa, wa tō aré ĩsima rowē, ā hawi Masédoniza na danhipti'a nho'ōmo nhisi hawi, apā ĩmorī wamhā, āma atēme ĩmorī aba na, te sahu da duré. Masédoniza u we ĩmorī 'rata wa, āma atēme ĩmorī aba ne, duré āma atēme ĩwisi aba da, te asabu na sahu za'ra wa'aba da, wa tō ĩsima rowē aré. Āhā wamhā, te aré asiwi ĩpawapto wa'wa, Zudeza u ĩmorizéb da hā. Āne 'wa'āhā, aré maparane ĩnhimipawapto wē zé hā aima wa'aba hā, ĩnhimiromhuri na hā.

¹⁷ Tane nherē, āma atēme ĩmorī aba zém na, te sahu ō di. Masédoniza hawi apā ĩmorī ré, āma atēme ĩsipai waihu'u za'ra wa'aba ō di tō. Marī hā ĩma hāmana wa, wa tō ĩnhimirosa'rata na āma saprī, āma atēme ĩmorī aba tō da a'ā. Āne wa, ni'wam norī hā asiré 're ĩhāmana za'ra wa'aba mono nori hā ma tō ĩ'āma rosa'rata wasété za'ra, ĩzadawa nhipese na hā, ĩmreme hā tō senai ō newa. E ĩnhimirosa'rata na 'rāwi te ĩsiwi ro'wa'rutu wa, wa tō āne hā ĩsima pisutu, āma atēme ĩmorī aba tō da hā. Mare di. E ĩsazei'ō'wa norī hā sima si 'rāwi te te 're ĩrosa'rata za'ra mono ne, wa tō āne hā ĩsima pisutu. Mare di. Āne wab ō di. ĩsazei'ō'wa norī hā marī na te te dama 're ropisutu za'ra mono wamhā, awa'awi te za te te dawī āma 're saprī za'ra, simirosa'rata na saprī pese wa, ta norī hā. ĩsimiropisutu na ropsi'āri ō nherē, te za te te dama 're nharī za'ra, siwa'rāmi. E āne, 're ĩhāmana mono zé hā, wa hā. Mare di. Ānei ō di.

¹⁸ 'Re ĩhāmana u'āsi mono hā, dama umnhasi uptabi di. Niwamhā dama sadawa nhipese ō di. Ta hā ma tō ĩpisutu, te dama 're sadawa wasu'u mono da, sena na. Taha wa, wa hā nimahā na hā aima ĩzadawa nhipese za'ra wa'aba ō di. Te aima 're ĩrowasu'u za'ra wa'aba mono zé hā, taréi ō di. ĩnhimirosa'rata waptu na hā te āma 're saprī mono ō di.

¹⁹ Zezu Cristu hā bété, 'Re ĩhāmana u'āsi mono 'ra hā. Ta hā tinhimiroti ahā na te te āma 're azaprī mono ō di. Tō ōhō si ĩsimiroti hā te tāma 're hāmana. Tane duré, wa norī hā ĩsadawa

wasu'u wa nori hā, Sira hā duré Timotiu hā, tō i'uwaiwaba si, wa tō wa te aima 're wasu'u za'ra wa'wa. Ta nori me, wa tō wa te aima 're sadawa wasu'u za'ra wa'wa, Cristu hā.

²⁰ Re ihāimana u'āsi mono, i'wē na te te dama 're i'aropisutu mono zé hā ahā uptabi nherē, ma tō Zezu Cristu hā pisutu, uburé te te dama āma 're i'a'uwaimrami mono da hā. Taha wa, Zezusi hā wama umnhasi di oto, uburé te te wama āma 're i'a'uwaimrami mono da hā. Wa nori hā wasiré Isazei 'wa nori hā wasiré 're wasi'rā'ōtō mono wamhā, 'Re ihāimana u'āsi mono āma 're wawata za'ra mono wamhā, wa 're wamreme zusi, āne: "Tane tō." E marī te wasu'u, ā hā. Cristu, tō sena uburé marī na te te wama 're i'a'uwaimrami mono zé, te wasu'u. Tane duré, wa nori hā isadawa wasu'u wa nori hā sena na, wa wa te aima 're rowasu'u za'ra wa'wa, i'wasu'u'wē wasu'u na hā.

²¹ Re ihāimana u'āsi mono hā ma tō te te 're wapawaptob u'āsi za'ra, wanhiptete sina Cristuhu āma 're wahāimana za'ra mono da. A nori wa'aba zama, te duré te te 're aipawaptob u'āsi za'ra wa'wa, asiptete sina āma 're anomro u'āsi aba mono da. 'Re ihāimana u'āsi mono hā ma tō wapisutu za'ra, i'wasu'u'wē na, wa te tāma 're romhuri za'ra mono da, wa nori hā.

²² Tipē'ēzani hā ma tō duré te te wama 're anhomri, wapē'ē 're, wama 're ihāimana za'ra mono da hā. E marī te tawamhā wama wasu'u za'ra, ĩpē'ēzani hā wapē'ē 're, 're ihāimana mono zé hā. 'Re ihāimana u'āsi mono nhib'a'uwē 're iwahāimana za'ra mono zé, te wama wasu'u za'ra. Duré, ĩpē'ēzani hā wapē'ē 're, oto 're sāmra mono wa, wa za wa te 're waihu'u pese za'ra, 'Re ihāimana u'āsi mono, sena na za te te wama āma 're i'a'uwaimrami mono zém na hā, uburé te te wama 're i'aropisutu mono zéb zarina.

²³ Wa hā apā ĩmorī wamhā, āma atēme ĩsipa za'ra wa'aba ō di tō, Corītu u hā. E marī wa. Marī hā 'manharī wasété za'ra wa'aba wa, te aihā za'ra wa'aba tō da, āma atēme ĩwisi aba ō di tō, apā. Tō sena, wa āne hā aima ĩsiwasu'u za'ra wa'wa, 'Re ihāimana u'āsi mono nho'a. Taha wa, ĩzadawa nhipepe wamhā, 'Re ihāimana u'āsi mono te za tō ĩ'azā.

²⁴ E wa nori hā asib'apito aima 're wahāimana za'ra wa'aba mono bā, te za bété wanhimiroti hā 're Isaze za'ra wa'aba mo. Mare di. Asib'apito hā aima 're wahāimana za'ra wa'aba mono ō di. A nori wa'wa hā te asiptete sina āma 're anomro aba mo, Cristuhu āma, 're sazei utōrī za'ra wa'aba mono āna. Taré, wa wasiré wa te tāma 're romhuri za'ra, ato sina āma 're aihāimana za'ra wa'aba mono zéb da hā.

2

¹ Āne wa, wa tō ĩsima āma saprī, apā āma atēme ĩmorī aba tō da a'ā, te ĩsina aima ropisutu za'ra wa'aba nherē, ĩmreme na te duré aihā za'ra wa'aba wa, aiwi robzei'ō za'ra wa'aba tō da. Āma atēme ĩmorī 'rata za'ra wa'aba wamhā, ĩnhimiroti na te aihā za'ra wa'aba zém na hā ma tō aiwi tirobzei'ō za'ra wa'wa. Āne tō da duré, āma atēme ĩmorī aba ō di za a'ā.

² Āma atēme ĩmorī za'ra wa'aba 'wa'āhā, āté te aré aiwi tirobzei'ō pese za'ra wa'wa duré, ai'rata ĩnhamra aba wamhā. Āne wamhā, e 'wam nori hā te aré sina ĩma rowē wazere za'ra, ĩwi robzei'ō pese wamhā. Ni'wai ō di aré, āté. E marī wa. A nori wa'aba wi, aiwi robzei'ō za'ra wa'aba wa.

³ Āne wa, wa tō rob'ui'ére si āma aima sōmri za'ra wa'wa a'ā, te ĩsina ĩropisutuzém nhibrob're. Wa tō ĩsima rosa'rata, āne: "Āté itēme ĩmorī za'ra wamhā, te za ĩwi tirobzei'ō pese, ĩnhimiroti hā te te 're wapari za'ra mono ō wa, ta nori hā. Āne wa, wa za rob'ui'ére si tāma sōmri za'ra a'ā. Tawamhā, ĩnhimiroti hā te te saze za'ra wamhā, ĩto sina, wa za itēme ĩmorī za'ra oto. Āne wamhā, tāma ĩto za'ra zéb zarina, te za duré to sina sima 're hāimana za'ra, ta nori hā." Āne wa tō ĩsima rosa'rata, ai'āma za'ra wa'aba hā. 'Re aihāimana za'ra wa'aba mono zém na, 're ĩto mono ō di. E āne hā i'uwaiwaba, ĩma hā. E wē di. Mare di. Taha wa, wa tō a'ā rob'ui'ére si āma aima sōmri za'ra wa'wa.

⁴ Te āma aima rob'ui'ére 'rata za'ra wa'aba wamhā, wa tō ai'āma robzépata za'ētē za'ra wa'wa, ĩpē'ē 're. Āne wa, ĩpē'ēzē uptabi di. Taha wa, wa tō aiwa'ō duré. E tawamhā, aiwi robzei'ō za'ra wa'aba da, wa tō āne na hā āma aima rob'ui'ére za'ra wa'wa. Mare di. Āne da hāi ō di. ĩma asawi uptabi za'ra wa'aba zém na asiwi ĩwaihu'u za'ra wa'aba da si, wa tō āne na hā āma aima rob'ui'ére za'ra wa'wa.

Aibā āma, i'wasédé hā da te oto 're i'maad'ā za'ra mono ō zé wasu'u

⁵ Ni'wa hā aibā hā, asiré 're ihāimana za'ra wa'aba mono hā misi ma tō tihāimana wasété na sina ĩwi robzei'ō. Tane nherē, e ĩwi si ma tō tirobzei'ō. Mare di. A nori wa'aba wi zama, ma tō aiwi tirobzei'ō za'ra wa'wa syry na, aibā 're ihāimana wasété mono zém na hā. E aiwi robzei'ō pese za'ra wa'aba wa, wa tō āne na hā aima rowasu'u za'ra wa'wa. Mare di. Syry na ma tō aiwi tirobzei'ō za'ra wa'wa. ĩwi si ma tō tirobzei'ō pese, tiwasédé hā te te 're ab'manharī mono wa, aibā hā.

⁶ Ō hā aibā hā ma tō asiwi īwē'ō za'ra wa'wa. Ai'ahā wa'aba na ma tō asiwi īwaihu'u za'ra wa'wa ta hā, asiré 're asirā'ōtō aba mono wa, asiré 're hāimana za'ra wa'aba mono tō da a'ā. Āne hā wē di tō.

⁷ Tane nherē, a norī wa'wa hā īwasédé hā āma 're 'madā'ā za'ra wa'aba mono ō di za oto. Tāibā. Ma tō siwē'ō, tiwasété na hā. Apā te za asiwi ī'āri wē wa'wa, robze na asiré 're hāimana aba mono da oto apā. Tiwi robzei'ō pese wa, 'Re īhāimana u'āsi mono te te rēme tō da, te za apā asiwi ī'āri wē wa'wa.

⁸ Taha wa, ma'āpé asiwi pawapto wē wa'aba, aima īsawi pese za'ra wa'aba zém na, te te sina aiwaihu'u pese za'ra wa'aba da, robzei'ō u'āsi 're hāimana tō mono da, asiti za'ra wa'aba.

⁹ Īnhimi'ui'ére 'rata na, wa tō aima āma roti za'ra wa'wa, aibā hā tō ō hā asiwi wē'ō za'ra wa'aba da. Īnhimiroti si 'madā'ā za'ra wa'aba zō, wa tō aima āma rob'ui'ére za'ra wa'wa, aibā hāiba na hā.

¹⁰ A norī wa'wa hā, dawasédé da te 're ī'manharī za'ra mono zém na hā oto da'āma 're 'madā'ā za'ra wa'aba mono tō da, asima 're pisutu za'ra wa'aba mono wamhā, īzama te oto da'āma 're ab'madā'ā mono ō di za tō. Taha wa, aibā hā tiwasédé īpire hā tō sena te te 'manharī wamhā, wa za tō īsima pisutu, asarina wa'aba, īwasédé hā te oto āma 're 'madā'ā tō mono da, simisutu ato sina asiré 're aihāimana za'ra wa'aba mono da apā. Cristuhu nho'a, wa āne na hā aima īsiwasu'u za'ra wa'wa, īwasédé hā za te oto āma 're ī'madā'ā mono ō na hā, aibā āma hā.

¹¹ Aibā hā tiwasédé te te 're ī'manharī mono zém na hā, wa te oto āma 're 'madā'ā za'ra mono tō da, wa te wasima pisutu za'ra ō wamhā, Satanasi hā te za tizadawa nhipese zéb zarina, wama 're simiza'repese za'ra. Marī na te za te wawī 're ro'wa'rutu u'āsi za'ra, wasiré īsazei'wa norī wī, robzei āna wasiré 're wahāimana za'ra mono da oto. Satanasihi hāimanazé hā wama waihu'u pese za'ra di. Taha wa, wa za tō wasima pisutu pese za'ra ni, īwasédé hā wa te oto āma 're 'madā'ā za'ra mono tō da, aibā āma hā.

Paru hā Torowadi āma sāmra ré, hātā ā na īsāmrazé wasu'u

¹² Āne wa za duré aima īsiwasu'u za'ra wa'wa. Torowadi na 'ri nho'ōmo nhisi u, wa tō mo, tame Cristuhu wasu'uwē hā te dama wasu'u da. Tamomo īmorī wamhā, Wanhib'apito hā ma tō īma 'ridawa īnhowa, tame te oto tāma romhuri da.

¹³ Tane nherē, wa tō īhātā'ā sina īhāimana, wasisānawā Titu hā īzō sāmra ō wa, tame te sōpētē da nherē aré. Taha wa, wa tō ōne haré ta hawī mo, Masédoniza u we īmorī da.

Wedewa'u īsadazei uptabi hā dama 're īsadazei pu'u mono ne, Cristuhu wasu'uwē na da te āma 're īropéi mono zé wasu'u

¹⁴ Tane nherē, 'Re īhāimana u'āsi mono āma si, wa za 're īwata u'āsi. Ta hā te za sisarina te te 're wa'anhimroi u'āsi, Cristuhu āma 're īwahāimana za'ra mono zéb zarina, wa'āma 're sib'a'uwē za'ra mono wa. Da'wapéi'wa norī nhīb'apito hā tinhitob'ru norī āma te te ai'uté za'ra wē te, da'ahā nho'a sisarina te te 're īsimroi mono ne, taha ma si wa te oto tāma 're romhuri za'ra mono da, te za sisarina si te te 're wanhimroi u'āsi, 'Re īhāimana u'āsi mono hā. Te duré te te 're wapawapto u'āsi za'ra, Cristuhu wasu'uwē si daro mono bā wa te dama āma 're ropéi mono da, Cristu hā aihīni da te oto 're waihu'u za'ra mono da. Wedewa'u īsadaze hā da te 're zata za'ra mono wa, 're īsadazei pu'u za'ra mono ne, wa za wa te dama āma 're ropé, Cristuhu wasu'uwē hā.

¹⁵⁻¹⁶ Wedewa'u īsadaze hā 're sadazei wairébé mono wa, dama 're īwē wairébé mono ne, te duré 'Re īhāimana u'āsi mono hā wama 're toi u'āsi za'ra, Cristuhu wasu'uwē hā wa te dama 're wasu'u za'ra mono wē te. Tane nherē, aiwa da te dasima 're wē za'ra mono ō di, Cristuhu wasu'uwē hā. Ni'wam norī hā īwasu'uwē te te siwi 're wē'ō za'ra mono wamhā, ta norī hā te za tipé'ē 're dā'ā u'āsi ne 're hāimana u'āsi za'ra, 'Re īhāimana u'āsi mono nhiti. Marī hā dama uzé pire wa, da te dasiwi 're īwē'ō za'ra mono ne, te ta norī hā te te siwi 're wē'ō pese za'ra, īwasu'uwē hā. Ni'wam norī si īwasu'uwē te te sima 're īwē za'ra mono norī si, te za 'Re īhāimana u'āsi mono hā te te 're anho'reptu, hāiwa āma ī'rata 're si'ubumroi u'āsi mono da. Ta norī ma si, tāma 're wē u'āsi za'ra mono di Cristuhu wasu'uwē hā, marī īsadazei uptabi hā 're sadazei wairébé mono wa, dama 're īwē wairébé mono ne. E 'wa hā 're hāimana mono bā, si'uihā na tiwaihu'u pese na Cristuhu wasu'uwē na romhuri na te te āma 're ī'uwa'imrami mono da hā, 'Re īhāimana u'āsi mono ma. Ni'wa hā sada hāimana ō di.

¹⁷ Ni'wam norī hā 're simarī ahā za'ra mono da si, te 'Re īhāimana u'āsi mono zadawa wasu'u na te te dama 're romhuri za'ra. Tane nherē, wa norī hā ta norī ne, 're wahāimana za'ra mono ō di. Marī aimawī zō, wa te wasima 're romhuri za'ra mono ō di wa norī hā, 'Re īhāimana u'āsi mono zadawa wasu'u na hā. Cristuhu waihu'u pese zarina si, wa tō wa te dama 're rowasu'u za'ra sena na, 'Re īhāimana u'āsi mono nho'a, āne da, te te wapisutu za'ra wa, ta hā.

3

'Re ihâimana u'âsi mono hâ te te dama ĩropisutuzép té wasu'u

¹ Āne na aima wasiwasu'u za'ra wa'aba wa, te za duré wa'āma ĩrosa'rata za'ra wa'wa áté, 'rāwi wasina ĩwawatazém na hâ. E wanhimiromhuri na wawasu'u na rob'ui'ééré ré, wa tō āma atēme za'ra wa'aba hâ wanem ni, sena na 'Re ihâimana u'âsi mono zadawa wasu'u'wa na, wa te dama 're ĩromhuri mono zé wasu'u na rob'ui'ééré ré hâ. Mare di. Ni'wam nori si te za atēme 're sihutu 'wa, nima hawimhâ, ĩsimiromhuri wasu'u na rob'ui'ééré ré hâ. Duré aihawi wa'aba hâ, ĩsimiromhuri na dama 're ĩwasu'u za'ra wa'aba mono zéb ré, te za ta nori hâ 're nomro, nimomo. Tane hâi ō di, wa nori hâ.

² Darob amoi u, 're wane mono wamhâ, asimirob'ui'ééré za'ra wa'aba ré, 're wane mono ō di, da te dasiwi 're ĩwawaihu'u mono zéb da hâ. Mare di. Cristuhu wasu'uwē na wanhimiromhuri zarina 're saze za'ra wa'aba mono wa, 'Re ihâimana u'âsi mono āma si 're anomro wē wa'aba mono zém na, da te 're aiwaihu'u za'ra wa'aba mono wamhâ, taha zarina si te za da te dasiwi 're wawaihu'u, sena na 'Re ihâimana u'âsi mono zadawa wasu'u'wa na dama 're ĩwahâimana mono na hâ.

³ Wanhimiromhuri zarina si, Cristu hâ 're saze za'ra wa'aba mono wa, te taha na si da te 're wawaihu'u, Cristuhu zadawa para si, wa te dama 're ĩromhuri mono zém na hâ, danhimirob'ui'ééré hâ da te 're sōré za'ra mono wa, marī hâ da te āma 're ĩwaihu'u za'ra mono ne. Tane nherē, marī na da te 're ĩrob'ui'ééré za'ra mono zéb zarina, 're saze za'ra wa'aba mono ō di, a nori wa'wa hâ. 'Re ihâimana u'âsi mono hâ ĩsi'utōrī'ō pē'ēzani nhimipawaptobzéb zarina si, ma tō 're ĩsaze za'ra wa'aba mo. E ētē tōmo baihâ na rob'ui'ééré zarina, ma tō 're ĩsaze za'ra wa'aba mo. Mare di. 'Re ihâimana u'âsi mono pē'ēzani hâ marī hâ aipē'ē 're te te aima 're ĩwaihu'u za'ra wa'aba mono zéb zarina si, ma tō oto 're ĩsaze za'ra wa'aba mo, Cristu hâ.

⁴ A nori wa'wa hâ wanhimiromhuri zarina, ma tō oto 're ĩsaze za'ra wa'aba mo. Taha zarina te za oto asiwi ĩwawaihu'u za'ra wa'wa, sena na Cristuhu zadawa para si, wa te dama 're ĩromhuri mono na hâ. Cristuhu nhimipawaptobzéb zarina si, wa tō wa nori hâ sena na wasina waihu'u ni, 'Re ihâimana u'âsi mono nho'a.

⁵ E wa nori hâ wasi'uihâ na wama waihu'u pese di āne hâ, Cristuhu wasu'uwē na wa te dama 're ĩrowasu'u mono zéb da hâ. Mare di. 'Re ihâimana u'âsi mono te te 're ĩwapawapto mono zéb zarina si, wama waihu'u pese di, ĩwasu'uwē da hâ, wa te dama 're ĩromhuri mono zéb da hâ, taha zarina, da te 're saze za'ra mono da.

⁶ Taha si ma tō te te 're wapawapto, te te dama ĩropisutuzép téb zarina, wa te dama 're romhuri wē mono da. E niha tawamhâ, 'Re ihâimana u'âsi mono te te dama ĩropisutuzép té hâ. E 'Re ihâimana u'âsi mono nhimiroti 'rata na Mozésihī nhimi'ui'ééré, te wasu'u, ā hâ. Mare di. 'Re ihâimana u'âsi mono pē'ēzani nhimipawaptobzéb zarina 're ĩdanomro mono zép té, te wasu'u, ā hâ. Mozésihī nhimi'ui'ééré zarina 're danomro mono nherē, e taha zarina te za 're dasisō'reptu za'ra, ropipa hawimhâ. Mare di. Ni'wa hâ te te sina uwaimrami waihu'u ō di, Mozésihī nhimi'ui'ééré hâ. 'Re ihâimana u'âsi mono te te dama ĩropisutuzép té hâ da te 're saze za'ra mono wapsi, te za ĩpē'ēzani hâ te te 're da'anho'reptu ropipa hawi, rowē na ĩsiré 're dahâimana u'âsi za'ra mono da oto.

⁷⁻⁸ Duréihâ 'Re ihâimana u'âsi mono hâ ma tō tinhimiroti na rob'ui'ééré, ētē tōmo baihâ na, Mozésihī ma, te te sōmri da. Rowa'a za'ētē na ma tō 'Re ihâimana u'âsi mono hâ ĩtēme wi, Mozésihī u hâ. Tawamhâ, Mozési hâ ētē tōmo baihâ na rob'ui'ééré te te mrami pari, ĩzarazéhé nhihudu nori u sa'a hawi apâ te te ĩtēme ĩré si'ra za'ra wamhâ, ĩ'ubu na hâ rowa'a hâ sa'ētē di. Sa'a hawi, mori ré, ĩ'ubu na rowa'a hâ syry na sipari nherē, tawamhâ, ĩzarazéhé nhihudu nori hâ titōmo na te te 'madâ'â hâ waihu'u za'ra ō di, Mozési hâ. E marī wa. 'Re ihâimana u'âsi mono hawi wa, rowa'a hâ. 'Re ihâimana u'âsi mono nhimiroti 'rada hâ ētē tōmo baihâ na rob'ui'ééré hâ, ĩsimirowa'a ré, Mozési hâ te te datēme āwisi nherē, wē nherē, taha si, da te 're ĩ'madâ'â za'ra mono zéb zarina, 're dasisō'reptu waihu'u za'ra mono ō di. ĩsimiroti 'rada hâ wē nherē, taha nhipai u wē uptabi di, ĩpē'ēzani nhimipawaptobzéb hâ, taha zarina, 'Re ihâimana u'âsi mono 'rata 're ĩdanomro u'âsi mono zéb da hâ, rowē uptabi āma hâ.

⁹ 'Re ihâimana u'âsi mono hâ tinhimiroti 'rata na ētē tōmo baihâ na rob'ui'ééré hâ Mozésihī ma, te te ĩsōmri hâ wē nherē, da te dasina 're uwaimrami waihu'u za'ra mono ō wa, ma tō 'Re ihâimana u'âsi mono hâ te te siwi 're da'awē'ō. Tane nherē, te te dama ĩropisutuzép té hâ taha si wē uptabi di. E marī wa. Taha zarina, 'Re ihâimana u'âsi mono hâ te te oto 're wa'awēsāmri mono wa, duré taha zarina, wawasédé hâ te te oto wa'āma 're ab'madâ'â mono ō wa, Wamama hâ.

¹⁰ Duréihâ Mozési hâ 'Re ihâimana u'âsi mono nhimiroti na rob'ui'ééré ré ētē tōmo baihâi ré, te te si'rai wamhâ, 'Re ihâimana u'âsi mono te, rowa'a na te ĩré mo, wē wa, ĩsimiroti hâ.

Tane nherē, rowa'a hā ma tō ai'utō. 'Re ĩhāimana u'āsi mono te te dama ĩropisutuzép tép si, wē uptabi di oto, Cristuhu wasu'uwē na hā.

¹¹ 'Re ĩhāimana u'āsi mono nhimiroti 'rada hā wē wa, ma tō Mozésihi hāiba na tirowa'a, ētē tōmo baihā na rob'ui'éré hā te te mrami ré hā. Tane nherē, āma ronomro hā ō di, rowa'a na hā. 'Re ĩhāimana u'āsi mono te te dama ĩropisutuzép tép si wē uptabi di, taha si 're si'utōrī waihu'u mono ō wa za, te te 're ĩda'anho'reptui mono zé wasu'u wē hā.

¹² 'Re ĩhāimana u'āsi mono te te dama ĩropisutuzép té hā, niwamhā wawi 're si'utōrī za'ra mono dai ō wa, wa taha umnhasi sina, wa te 're 'madá'á u'āsi. Taha wa, wapahi āna, wa tō wa te dama 're wasu'u u'āsi, ta hā.

¹³ Tawamhā Mozési hā ma tō 'rā ubu ré datēme simasisi, ĩ'ubu na rowa'a hā tiwi ĩsi'utōrī na te te siwi waihu'u za'ra tō da, Izarazéhé nhihudu norī hā. Tanei ō di, wa norī hā. Cristuhu wasu'uwē hā wa te dama 're wasu'u za'ra mono wamhā, wanhiséb āna, wa za tō wa te dama āma 're rowasu'u za'ra, niwamhā dawī 're si'utōrī mono dai ō wa za.

¹⁴⁻¹⁵ Duréihā Izarazéhé nhihudu norī hā ma tō 'rāihatob za'ra. Taha wa, 'Re ĩhāimana u'āsi mono nhimiroti hā te te 're waihu'u za'ra mono ō di, niha te te sina tāma 're ĩ'uwaimrami za'ra mono zéb da hā. Ta hawim haré, te zahadu da'rā ubu ré 're ĩdahāimana za'ra mono ne, 'Re ĩhāimana u'āsi mono te te tāma ĩropisutu za'ra zéb 'rata na rob'ui'éré hā te te sima 're sōré u'āsi za'ra, rowahutuzéb āma, ĩsimiroti 'rada hā te te 're ĩ'madá'á pese za'ra mono zéb zarina, te te 're sō'reptu za'ra mono da newa, ta norī hā. Tane nherē, ni'wam norī hā Cristuhu āma 're nomro mono wapsi, te za da'rā ubu āna 're ĩdahāimana za'ra mono ne 're hāimana za'ra, ta norī si.

¹⁶ Ni'wam norī hā Wanhib'apito wasu'uwē u 're sipizari za'ra mono wapsi, te za da'rā ubu āna 're ĩdahāimana za'ra mono ne, 're hāimana u'āsi za'ra, ta norī ma si, oto waihu'u pese za'ra wa za.

¹⁷ Wanhib'apito si, wa te 're saze za'ra mono wamhā, Tipē'ēzani ma, te za te te 're wa'apisutu, taha si te te 're wa'apawapto mono da, rowē na āma 're wanomro mono da, marī na wasi'uihā na wa te wasina tāma āma 're ĩ'uwaimrami za'ra mono zém na, 'rāwī 're wasi'madá'á za'ra mono tō da, duré taha zarina, 'Re ĩhāimana u'āsi mono hā te te 're wa'anho'reptui mono da newa.

¹⁸ Wa norī hā wasiré ĩsazei'wa norī hā da'rā ubu āna ne, wa oto 're wahāimana za'ra. Taha wa, Wanhib'apito 're ĩmorī wē uptabi zé hā wama waihu'u pese za'ra di oto. ĩpē'ēzani te te 're ĩwa'apawapto mono zéb zarina, wa za oto 're ĩwanomro wē mono zém na, wa te wasima āma 're sa'ētē za'ra, ĩsine āma 're ĩwahāimana za'ra mono zéb da hā.

4

Piza na zé'a 'manharī na romnhimiré'ézé wasu'u

¹ 'Re ĩhāimana u'āsi mono hā ma tō tinhimizawi pese zéb zarina wapisutu, ĩsadawa wasu'u na wa te tāma 're romhuri mono da. Taha wa, wawi 're robzei'ō mono āna, wa tō 're wahāimana u'āsi.

² Ni'wam norī hā asiré 're hāimana za'ra wa'aba mono nherē, ma tō wawasédé hā wa'āma sa'ra za'ra, wahāimana nhípese sina dawī 're wahāimana mono newa. Uburé marī hā pi'uriwi da te 're ĩ'manharī wasété za'ra mono zé hā, wa tō wa te wasiwi 're awē'ō. 'Re ĩhāimana u'āsi mono zadawa wasu'u hā, wa te dawī āma 're 'wa'rutu mono ō di. Ōhō si, wa tō sō'awi wa te dama 're wasu'u u'āsi, sena na, 'Re ĩhāimana u'āsi mono nho'a. Āhā zarina, te za 'rāwī dapē'ē na da te 're waihu'u za'ra, wazadawa nhípese āna, 're ĩwahāimana mono zém na hā.

³ Cristuhu wasu'uwē hā wa te dama 're ĩwasu'u mono hā suwai haré te ni'wam norī wi 're hāimana zahadu, 'Re ĩhāimana u'āsi mono nhiti, za 're ĩnomro u'āsi mono norī wi.

⁴ Ta norī hā, Cristu te te 're saze za'ra mono ō wa, ma tō Wa'uburé hā ĩpo're'ō norī nhīb'apito hā te te 're apo're nhito, tob'a ne 're hāimana za'ra mono da. Taha wa, Cristuhu wasu'uwē hā wē uptabi nherē, rob'uiwézém ne, te te dama 're rowa'a za'ra mono nherē, te te 're waihu'u za'ra mono ō di, ta norī hā. Cristu hā aiwa Timama ne 're morī wē uptabi nherē, ta norī hā te te siwi 're waihu'u za'ra mono ō di, sena na ĩwasu'uwē na hā.

⁵ Wa norī hā wa'āma si 're atob'uzu za'ra wa'aba mono da, duré wanhimiroti si 're 'madá'á za'ra wa'aba mono da, wa te āma aima 're rowahutu za'ra wa'aba mono ō di. Zezu Cristuhu si, wa tō wa te aima 're wasu'u za'ra wa'wa, uburé Wanhib'apito na 're waihu'u za'ra wa'aba mono da si. Taré, wa wa norī hā aima romhuri aba 'wa hā 're wahāimana. Zezusihī si 're ĩsazei pese za'ra wa'aba mono zéb da si, wa tō wa norī hā wa te aima 're sadawa wasu'u za'ra wa'wa.

⁶ Duréihā ropoto na'rata hawimhā, 'Re ĩhāimana u'āsi mono ma tō tinha, āne: "Āhāna hā robra si 're asa'wari mono nherē, oto airowa'a na." Āne te tinha. Tane ma tō duré wapē'ē

're, te te wama 're arowa'a oto, ĩsadawa wasu'u hā wa te oto āma 're ĩwaihu'u pese za'ra mono zéb da hā. Cristu hā ma tō wama waihu'u za'ra, ĩmama 're ĩmorĭ wē uptabi na hā.

⁷ Ātē ni'wa hā te za marĭ ĩwē uptabi hā ĩwa'ābā za'ēne hā piza na zé'a 'manharĭ 're tisē, piza ĩsipo'o pese wa, ĩ'manharĭ uwa wa. Tane duré, wa norĭ hā wahāiba nhĭb'uware nherē, wa marĭ ĩwē uptabi hā wa te dama 're wasu'u, tō Cristuhu wasu'uwē hā, 'Re ĩhāimana u'āsi mono si ĩwaihu'u pese na, da te 're waihu'u za'ra mono da, wawaihu'u pese newa, wa'āma si, da te 're rosa'rata za'ra mono tō da.

⁸ Wa norĭ hā Cristuhu zadawa wasu'u'wa norĭ hā marĭ ahā na wazada 're hāimana mono nherē, da te wa'āma 're ai'utē waihu'u mono ō di. Duré da te dasiwi 're wa'ruiwapari mono wa, wa'rā 'remhā wama 're ro'wa'rutu mono nherē, wasina 're wahātā'ā mono wa, wawi 're robzei'ō waihu'u mono ō di.

⁹ Wanhitob'ru norĭ hā te te wa'āma 're rob'manharĭ wasété u'āsi za'ra mono nherē, 'Re ĩhāimana u'āsi mono hā niwa te te warēme ō di. Ta norĭ hā te te siwi 're wa'ahāri mono nherē, wazō 're rob'é'ē waihu'u mono ō di.

¹⁰⁻¹¹ Da te dasiwi wapārĭ da si, te da te wa'āma 're rosa'rata u'āsi za'ra aré, Zezusi hā da te dasiwi ĩwĭrĭ ne da. Zezusihi wasu'uwē hā wa te dama 're wasu'u mono wa, wa wasina romnhimimnhasi na 're wahāimana. E marĭ te wasu'u tawamhā, da te wa'āma 're rob'manharĭ wasété u'āsi mono nherē, wasi'utōrĭ'ōzē hā. Cristu hā dá'ā nherē, apā ĩhāiwa'utuzé, te wasu'u, sena na ĩwaihu'u pese zéb da hā.

¹² Taha wa, Cristuhu wasu'uwē na wa te dama 're rowasu'u mono wa, wa awē sidāpāsi wasina romnhimimnhasi na 're wahāimana u'āsi. Taha zarina te za oto a norĭ wa'wa hā rowē na 're anomro u'āsi aba mo, 'Re ĩhāimana u'āsi mono siré si.

¹³ Duréihā apito Dawi hā ma tō āne na āma rob'ui'ére: “'Re ĩhāimana u'āsi mono hā wa tō te ĩsina 're umnhasi, te te 're ĩpawapto mono da. Taha wa, ĩmreme āna 're ĩhāimana waihu'u mono ō di. Wa tō te dama 're wasu'u u'āsi, ĩsimiroti hā tō sena wa.” Āne duréihā apito Dawihi nhimi'ui'ére, ĩbaihā na hā. Tane duré wanhimirosa'rada hā. 'Re ĩhāimana u'āsi mono hā wa te wasina 're umnhasi pese mono wa, duré wa te 're sazei pese mono wa, wa ĩsadawa wasu'u na wa te aima 're rowasu'u u'āsi za'ra wa'wa.

¹⁴ Wanhib'apito Zezusihi hāiwa'utu'wa hā te za duré wahāiwa'utu, Zezusihi āma si 're wahāimana mono wa. Tawamhā asiré wa'aba te za sitēme wazaprō, hāiwa u. Āne hā wama waihu'u pese za'ra di oto.

¹⁵ Wa norĭ hā ai'madā'ā sina za'ra wa'aba, wa marĭ hā ahā na wa te 're sépata. Tawamhā Cristuhu wasu'uwē na daro mono bá wa te 're da'apawapto mono wamhā, 'Re ĩhāimana u'āsi mono nhimizawĭ pese zéb zarina, da'āma 're ĩsiwārĭ mono zé hā, wa za wa te dama āma 're aropé, da'ahā uptabi na oto ĩrē 're dahāimana za'ra mono da. Taha zarina te za da'ahā na āma 're dawata za'ra oto, 'Re ĩhāimana u'āsi mono āma hā, tinhoprubzéb zarina, da'āma 're siwārĭ mono wa, te te duré 're da'anho'reptui mono wa oto.

Datōmo na dama ĩ'madā'ā waihu'u'ō zō, da te 're ĩrob'ruiwapari za'ra mono zé wasu'u

¹⁶ Taha wa, wawi 're robzei'ō waihu'u mono ō di, romhuri hā wa te aré 're ĩshāri mono zéb da hā. Mare di. Awē sidāpāsi wahāiba prédubzéb u, wahāiba téb ré wanhipteté zé hā wawi 're si'ré u'āsi mono nherē, wa wapé'ē 're apā 're wanhiptete u'āsi. Taha wa, wawi 're robzei'ō waihu'u mono ō di tō.

¹⁷ Tĭ'ab ré, wa za tō wa te 're robzépata a'ā. Tane nherē, ta hā wama wapure di. E marĭ wa. Taha wa'rāmi, te za 'Re ĩhāimana u'āsi mono hā ĩwē uptabi na duré ĩpire uptabi na te te wama 're wa'ābā, ĩsi'utōrĭ'ō na hā. Tĭ'ab ré, wa te 're robzépata za'ētē mono nherē, taha nhĭpai u wē uptabi di za, ĩwē na te te wama ĩropisutu sirōmo zé hā.

¹⁸ Ūburé marĭ hā tĭ'ab ré, datōmo na da te 're ĩ'madā'ā za'ra mono si, si'utōrĭ pese di, ta hā. Hāiwa āma hā marĭ hā datōmo na da te 're ĩ'madā'ā waihu'u za'ra mono ō si, 're si'utōrĭ waihu'u mono ō di za. Te za 're hāimana u'āsi za'ra. Taha wa, tĭ'ab ré datōmo na da te 're ĩ'madā'ā za'ra mono zō si, wa te 're rob'ruiwapari mono ō di za. Datōmo na da te 're ĩ'madā'ā waihu'u za'ra mono ō zō si, wa za wa te 're rob'ruiwapari u'āsi, wa norĭ hā.

5

¹ Wahāiba hā 'ri na, wa za oto āma aima simiré'ē za'ra wa'wa. A'ubuni wi 're dazāmorĭ mono ré hā, romhā 'manharĭ na 'ri hā ĩwa 're dasi'ubumroi hutu mono ré, te za dasisa'u da te dasiwi 're 'ri nhamra. Tane duré, wa norĭ hā. Tĭ'ai āma 're wahāimana hutu za'ra mono ré, te za wahāiba hā wawi 're si'utōrĭ za'ra. 'Ri ĩwē uptabi hā dama 're simasam hā mono da, te za duré ĩwē na da te dasima 're 'ri za'ra. Tane te za duré 'Re ĩhāimana u'āsi mono hā wahāiba té hā te te wama 're ab'manharĭ, ĩwē uptabi hā, hāiwa āma za wawi 're ĩsi'utōrĭ waihu'u za'ra mono ō hā, taha ré si oto ĩ'rata 're wahāimana u'āsi za'ra mono da. Āne hā wama waihu'u pese za'ra di oto, wa norĭ ma hā.

² Ti'ai āma wahāiba ré ré, wa wa te sô 're rob'ruiwapari u'āsi za'ra, hāiwa āma wahāiba ĭtém na za oto 're ĭwahāimana za'ra mono zéb zô, āne ti'ai āma da'uza ĭhā tém na 're dasi'uza za'ra mono da, da te sô 're ĭrob'ruiwapari za'ra mono ne.

³ Al'urēiwi 're danomro mono wa, dama 're ĭdanhiséb za'ra mono ne, hāiwa āma hā wahāiba āna 're wahāimana za'ra mono ō di za. Wahāiba téb ré si, wa za tō 're wahāimana u'āsi za'ra.

⁴ Ti'ai āma wahāiba ré u'āsi 're wahāimana za'ra mono ō di za. Ti'ab ré, wa 're wawab'ētē u'āsi za'ra, wa te 're robzépata za'ētē za'ra mono wa, wahāiba na hā. E tawamhā wa za wa te wasima 're rosa'rata za'ra, 're wadā'ā su'u za'ra mono da, wahāiba zô 're rob'é'é za'ra mono hā. Mare di. Āne na hā wa te wasina 're rosa'rata za'ra mono ō di za, wa norī hā. Tane nherē, wa za tō sô 're watob'uzu u'āsi za'ra, 'Re ĭhāimana u'āsi mono hā wahāiba ĭtém na ĭsi'utōrī waihu'u'ō na, za te te wama āma 're ĭ'azaprī mono zéb zô. Āne wamhā, ti'ab ré aré wahāiba hā wawi 're si'utōrī za'ra mono da nherē, wa za taha wa'rāmi ĭsi'utōrī'ō ré 're wahāimana u'āsi za'ra.

⁵ 'Re ĭhāimana u'āsi mono si, ma tō te te wama 're apisutu siro, āne hā. Tipē'ēzani hā ma tō te te wama 're anhomri, sena na wahāiba ĭté hā za te te wama 're ĭ'anhomri mono na, wa te wasina 're waihu'u za'ra mono da.

⁶ Taha wa, wa za 'Re ĭhāimana u'āsi mono umnhasi sina 're wahāimana za'ra a'ā, wato sina. Wahāiba hā ti'ab ré, za wawi 're ĭsi'utōrī za'ra mono ré, 're wanomro mono wa, wa a'ā hāiwa āma Wanhīb'apito 're ĭsāmra mono zém nhiti 're wahāimana za'ra, za 're ĭwahāimana u'āsi za'ra mono zém nhiti zama.

⁷ Wa norī hā, uburé marī hā hāiwa āma 'Re ĭhāimana u'āsi mono, za te te wama 're ĭ'anhomri mono hā, ti'ab ré watōmo na romhā ré, wa te 're ĭ'madā'ā za'ra mono zéb zarina, 're wahāimana za'ra mono ō di. Uburé te te sima wa'āma 're ĭ'aropisutu mono zém na, wa te 're ĭsaze za'ra mono zéb zarina si, wa āma 're wahāimana za'ra, watōmo na wa te wasisōwa 're 'madā'ā za'ra mono ō nherē, romhā ré.

⁸ Wa norī hā wato sina, wa oto 're wahāimana u'āsi za'ra. E marī wa. Ti'ab ré, wahāiba hā wawi 're si'utōrī pese za'ra mono nherē, wē uptabi di za, taha nhowa're're, hāiwa āma Wanhīb'apito 'rata 're ĭwahāimana u'āsi za'ra mono zé hā.

⁹ Tane nherē, 'Re ĭhāimana u'āsi mono hā 're ĭwahāimana za'ra mono zém na, wa'āma 're toi u'āsi mono da si, wa za 'rāwi 're wasi'madā'ā za'ra, ti'ai āma wahāiba ĭ'ratare ré, duré hāiwa āma wahāiba ĭtéb ré.

¹⁰ E marī wa, wa za āhā zô si, wa te 're rob'ruiwapari u'āsi za'ra, ti'ab ré hā. Niwapsi, wa za tō uburé Cristuhu nho're aimasam ni, te te wa'awaihu'u da, wahāimana wē na, duré wahāimana wasété na zama. Tame te za oto niha te te wama 're arowairébé, ti'ai āma uburé marī, wa te 're ĭ'manharī za'ra mono zéb zarina, ĭwē na, duré ĭwasété na zama.

'Re ĭhāimana u'āsi mono hā da'āma 're ĭsiwadi mono zé wasu'u

¹¹ Wa norī hā Zezusihi zadawa wasu'u'wa norī hā, wa tō Wanhīb'apito hā wa te wasiwi 're wazéb za'ra. Taha zarina, wa tō duré wa te 're dapawaptob za'ra, 'Re ĭhāimana u'āsi mono u si, 're dasipizari za'ra mono da. Wa norī hā marī zô si, wa te 're dapawaptob za'ra mono ō di. Mare di. 'Re ĭhāimana u'āsi mono ma si, wawaihu'u pese za'ra di, uburé 're ĭwahāimana za'ra mono zém na hā. Taha wa, ĭwē si, wa te 're ĭ'manharī za'ra mono zé hā, tāma waihu'u pese di duré. Āne na hā sena na aipē'ē 're, áté aima waihu'u pese za'ra wa'aba di duré.

¹²⁻¹³ Ni'wam norī hā zudezu norī hāimanazéb uwaibaba, danho'a dama 're hāimana za'ra mono wē te, te sina 're wata za'ra. Ta norī hā ma tō wanhimiromhuri hā te te 're 'madā'ā za'ra. Tane nherē, wapē'ē 're wanhimirosa'rada hā, ta norī hā te te wawi 're waihu'u za'ra mono ō di. Taha wa, te ta norī hā te te dama wa'āma 're romnomri za'ra, āne: "Paru norī hā simiza'rese āna, te 're hāimana za'ra. Ma tō duré 'rāihaiwamnarī za'ra." Wē di tō. Tane nherē, wa norī hā 'Re ĭhāimana u'āsi mono ma si, wa za tō wa te 're romhuri u'āsi za'ra, wanhimiromhuri na āma 're wawata za'ra mono da. Ta norī hā te duré āne te te wa'āma dama 're romnomri za'ra: "Paru norī hā te simirosa'rata nhipese na te te dama 're rowasu'u za'ra, ĭsimiroti hā sena newa, da te āma 're saze za'ra mono da." Wē di tō. Wa'āma romnomri wasété nherē, wa tō wa te aima 're romhuri u'āsi za'ra wa'wa, wanhimi'ē na. E wasina 're wawata za'ra mono da, wa āne hā aima wasiwasu'u za'ra wa'aba ni. Mare di. Dama 're wawasu'u wē za'ra wa'aba mono da, wa āne na aima wasiwasu'u za'ra wa'aba ni, 'rāwi wanhimirosa'rada ĭwē hā da te wa'āma 're ĭwaihu'u za'ra mono da si, ĭré 're ĭwahāimana za'ra mono hā 'rāwi.

¹⁴ Cristu hā te te 're wa'azawi pese mono wa, wa wanhimi'ē na, wa te tāma 're romhuri za'ra, da'āma. Wa norī hā wasima si, 'rāwi 're wasi'madā'ā za'ra mono ō di za. Dawasété wa'ābázéb da, ma tō Cristu hā uburé dazada dārā da'upana, dawasété wi 'rāwi 're dasiwa'ābā za'ra mono da, dasi'uihā na dasisada 're dadā'ā waihu'u za'ra mono ō wa.

¹⁵ Āma 're ĩnomro té mono norĭ hā, sima si āma 're hāimana za'ra mono tō da, ma tō dazada dārā, Cristu hā. Taha zarina, te za sada idā'ā za'ra ma si 're hāimana za'ra, duré sada ĩhāiwa'utu za'ra ma si, Cristuhu ma si.

¹⁶ Āne wa, ti'ai āma ĩsazei'ō'wa norĭ nhimirosa'rata zarina, wa te da'āma 're rosa'rata za'ra mono ō di za oto, 're ĩdahāimana za'ra mono zém na hā. Wa hā bété. ĩsazei'ō'wa norĭ nhimirosa'rata zarina, wa tō te 're rosa'rata aré, Cristu 're ĩhāimana mono zém na hā, taré newa. Tane nheré, taha zarina, te āma 're rosa'rata mono ō di oto, wa hā.

¹⁷ Ni'wam norĭ hā Cristu te te 're saze za'ra mono wa, simisutu tihāiba na sina 're sitob za'ra mono wamhā, 're ĩdapoto téb za'ra mono zéb ré si, te za oto 're hāimana za'ra. Taha wa, te za 're ĩnomro 'rata mono zé hā tāma 're si'utōrĭ za'ra. Tāibā za oto. Taha wa'rāmi, te za oto 're ĩdahāimana téb za'ra mono zém na si 're hāimana za'ra, ĩwē na si.

¹⁸ Āne hā ma tō ĩwē si te te wama 're ab'manharĭ, 'Re ĩhāimana u'āsi mono hā, āma 're ĩwanomro mono zép téb da hā. ĩsitob'ru na, wa tō aré tāma 're wahāimana za'ra. Tane nheré, Cristuhu dā'ázém na, ma tō wa'āma 're siwadi za'ra oto. Wa norĭ hā dama ĩsadawa wasu'u'wa norĭ hā ma tō duré wama pisutu za'ra, wa te da'āma 're ĩromhuri za'ra mono zéb da hā, taha zarina, da'āma zama 're siwadi mono da duré, wasine.

¹⁹ Cristuhu dā'ázém na 'Re ĩhāimana u'āsi mono, da'āma 're ĩsiwadi mono zé wasu'u na, wa wa te dama 're rowasu'u za'ra, dawasété na oto da'āma 're ĩpo're pu'u mono ō zéb zarina hā. Ma tō oto wama pisutu za'ra, āne na, wa te dama 're rowasu'u za'ra mono da.

²⁰ Taha wa, ma tō Cristu hā datéme wazatōrĭ za'ra, ĩsadawa para, wa te dama 're sadawa wasu'u za'ra mono da. Āne, wa wa te dama 're roti pese za'ra, Cristuhu nhisi na: "Ma'āpé, 'rāwi asi'madā'ā za'ra wa'aba, 'Re ĩhāimana u'āsi mono hā ai'āma siwadi za'ra wa'aba da oto." Āne na ma tō wa'u'ābā te te dama 're aroti pese, 'Re ĩhāimana u'āsi mono hā.

²¹ Cristu hā ti'ai āma 're morĭ ré, ma tō wasété āna 're hāimana u'āsi. Tiwasédé hā te te 'manharĭ ō nheré, 'Re ĩhāimana u'āsi mono hā ma tō uburé wawasédé, wa te 're ĩ'manharĭ za'ra mono zém na hāiba wati'i, wa'upana za'ra, Cristuhu āma 're wanomro mono wa, te te oto 're ĩwa'awēsāmri mono zéb da hā.

6

¹ Wa norĭ hā 'Re ĩhāimana u'āsi mono siré, wa te tāma 're ĩromhuri za'ra mono norĭ hā, wa za oto aima āma roti pese za'ra wa'aba ni. 'Re ĩhāimana u'āsi mono, ma tō tinhimizawi pese zéb zarina, aima 're sōprub za'ra wa'wa, ĩwē na hā. Taha wa, ĩsazei'wa na taré dama 're asiwasu'u za'ra wa'aba mono ō di za. 'Re aihāimana za'ra wa'aba mono zém na, te za asa ĩwa'rāmi asina tāma 're ĩ'uwaĩrami u'āsi za'ra wa'aba mo, 'Re ĩhāimana u'āsi mono ma hā.

² Duréihā Iza'iza hā ma tō 'Re ĩhāimana u'āsi mono mre me na rob'ui'éré, āne: "Ai'āma ĩpé'ēzézéb da, bādā te ĩsima ĩpisutuzém na, wa tō aiwapa. Te ĩ'asō'reptuzéb da, bādā hā ĩwa waptā'ā wamhā, wa tō aipawapto tō."

Āne duréihā 'Re ĩhāimana u'āsi mono mre me na rob'ui'éré hā. Ma'āpé, ĩwapari pese za'ra wa'aba. Bādā ma tō oto ĩwa waptārā, 'Re ĩhāimana u'āsi mono nhimizawi pese zé hā asi'uihā na asima tiwi waptērē za'ra wa'aba da, duré te te asō'reptu za'ra wa'aba da.

³ Wa norĭ hā wa 're wasi'madā'ā za'ra 'rāwi, 're ĩwanomro wē mono zō, ni'wam norĭ hā wahāimanazém na te te 're wa'madā'ā za'ra mono wa, taha zarina, tiwasété na oto 're si'marōpārĭ za'ra mono tō da, Cristuhu wasu'uwē hā duré te te siwi 're wē'ō za'ra mono tō da. Wa te dama 're ĩromhuri za'ra mono zé hā, da te dasiwi 're wē'ō za'ra mono tō da, wa āne na 'rāwi 're wasi'madā'ā za'ra, wa norĭ hā.

⁴ A norĭ wa'wa hā, 'Re ĩhāimana u'āsi mono ma, wa te 're ĩromhuri za'ra mono zém na si, asiwi wawaihu'u za'ra wa'aba da, wa uburé marĭ hā wē na wa te 're 'manharĭ za'ra. E niha tawamhā, 're ĩwahāimana za'ra mono zé hā. Uburé marĭ na, wa te 're robzépata za'ra mono nheré, duré rowasédé hā wazada 're wairébé u'āsi mono nheré, wa wanhiptete sina āma 're wanomro u'āsi, wa te 're sazei'ō utōrĭ za'ra mono āna.

⁵ 'Re ĩhāimana u'āsi mono zadawa wasu'u'wa oto 're wahāimana za'ra mono wa, ma tō da te dasiwi 're wahā za'ra. Ma tō duré nasi dasiwi wanheme ni, dazazéb 're. Wazada 're dahāimana wasété za'ra mono wa, te da te wawi 're ro'wa'ritu u'āsi za'ra, Wanhib'apito, wa te dama 're sadawa wasu'u za'ra mono ré hā. Wanhimromhuri na, wa dama 're wasiwasutu za'ētē u'āsi za'ra, Wanhib'apito wasu'uwē na hā. Āne wamhā, wanhotō āna ma tō duré wa'āma 're awē za'ra, nimahā mara na hā. Wasai āna, wa duré nimahā bātā na hā 're wasi'ubumro.

⁶ Āne na, wa te 're robzépata za'ra mono nheré, wa tō 're wanomro wē u'āsi. 'Re ĩhāimana u'āsi mono nhimirowaihu'u si, wa tō oto wa te 're waihu'u pese za'ra. Taha wa, wawara sina dazada 're wazahi za'ra mono ō di oto. Wanhimizawi pese na si, wa oto 're wahāimana za'ra. 'Re ĩhāimana u'āsi mono pē'ēzani nhimpawaptozbéb zarina si, wa duré wa te dama 're romhuri za'ra. Wazadawa nhipeše āna, wa sena na si, wa te 're dazawi pese za'ra.

Āne zarina, te za asiwi Īwawaihu'u za'ra wa'wa, sena na 'Re Īhāimana u'āsi mono zadawa wasu'u'wa, dama 're Īwahāimana za'ra mono na hā.

⁷ Īwasu'uwē hā wa tō, tō sena wa te dama 're wasu'u za'ra. 'Re Īhāimana u'āsi mono waihu'u pese zarina si, wa tō āne na wa te dama 're romhuri za'ra. 'Re Īwanomro wē mono zém na si, wa tō wanhitob'ru norī da, 're wahāimana za'ra, ta norī āma, wa te 're ai'utē za'ra mono da. Taha na, wa duré ta norī āma 're wasimanawawī u'āsi za'ra, wanhitob'ru norī āma hā.

⁸ Āne na te za tō asiwi Īwawaihu'u za'ra wa'wa, sena na 'Re Īhāimana u'āsi mono zadawa wasu'u'wa, dama 're Īwahāimana za'ra mono na hā. Taha wa, te ni'wam norī hā 're Īwanomro wē mono zém na te te wa'āma 're rosa'rata za'ra. Te te duré dama 're wawasu'u wē za'ra. Tane nherē, te ni'wam norī hā te te wa'āma 're wasété za'ra taré. Te duré te te dama 're wawasu'u wasété za'ra. Sena na dama 're wasiwasu'u u'āsi za'ra mono nherē, te wazadawa nhipe hā te te wa'āma 're sa'ra u'āsi.

⁹ Wa norī hā daro mono bā Īsazei'wa norī ma, wawaihu'u pese za'ra nherē, te ni'wam norī hā taré na si te te wa'āma 're rosa'rata za'ra. Wa te wasina 're romnhimimnhasi u'āsi za'ra mono wa, aré 're wadā'ā za'ra mono da nherē, wa zahadu wahāiba ré ré 're wahāimana za'ra. Da te 're wahā za'ra mono nherē, da te dasiwi wa'uprosi waihu'u ō di.

¹⁰ Nimahā bātā na, da te dasina 're wapē'ézé zani za'ra mono nherē, wa watoi u'āsi 're wahāimana za'ra, 'Re Īhāimana u'āsi mono āma si. Duré wanhibrob'ō na 're wahāimana za'ra mono nherē, wa wa te 're dapawaptob za'ra, Īwasu'uwē na si, danhibro pese ne, rowē na 're dahāimana u'āsi za'ra mono da, 'Re Īhāimana u'āsi mono siré. Wa norī hā wanhimarī ō nherē, 'Re Īhāimana u'āsi mono, uburé te te wama 're Ī'anhomri mono ré si, wa oto 're wanomro, ĩwē uptabi ré si.

¹¹⁻¹² Corītu āma 're aihāimana za'ra wa'aba mono norī, sō'awi wa tō aima 're wasiwasu'u za'ra wa'wa, 're Īwahāimana za'ra mono zém na hā. Aiwi 're wasi'udā waihu'u za'ra wa'aba mono ō di. Wanhimizawizém na, wa te duré 're ai'mararé za'ra wa'aba mono ō di. A norī wa'aba si te asimizawizém na 're Īwa'mararé za'ra wa'aba mo.

¹³ Taha wa, ĩra ne oto ĩma 're aihāimana za'ra wa'aba mono wa, wa za āne na aima roti za'ra wa'wa, asawi pese za'ra wa'aba sina: Ma'āpé, aipē'ē na asiwi 're wazawi pese za'ra wa'aba mono, wa norī hā wapē'ē na, wa te 're ĩ'asawi pese za'ra wa'aba mono ne.

Aiwab ō na 're Īdahāimana za'ra mono zé wasu'u

¹⁴ Cristuhu zazei'wa na 're aihāimana za'ra wa'aba mono norī, Īsazei'ō'wa norī hāimanazém na, ĩsu 're aihāimana waihu'u za'ra wa'aba mono ō di za oto. Rowa'a na 're Īdanomro wē mono zé hā, duré robra na 're Īdanomro wasété mono zé hā, e aiwa bā. Mare di. Aiwab ō di. Taha wa, Īsazei'ō'wa norī siré, 'rāwi 're aihāimana waihu'u za'ra wa'aba mono ō di za tō. Tō'ā.

¹⁵ Cristu hā bété. E Satanasihi me, te siré 're hāimana zahuré, aiwa. E tinhimirosa'rata na te duré 're sisaze zahuré, 're siwē'ō zahuré mono āna. Mare di. Tane duré, Īsazei'wa norī hā aiwa 're hāimana za'ra mono ō di, Īsazei'ō'wa norī me hā. Āne hā baba uptabi di, wama hā.

¹⁶ Romhāiba 'manharī hā āma 're Īdawata za'ra mono zé hā, e 'Re Īhāimana u'āsi mono āma 're Īdawata za'ra mono zéb 're, te aré da te 're sa'ra, 'ri 'rāihā wa. Mare di. E marī wa. Aiwab ō wa, dama hā. Tane duré, wa norī hā 'Re Īhāimana u'āsi mono āma 're Īwata za'ra mono ō norī siré, 're wahāimana waihu'u za'ra mono ō di za oto. E marī wa. 'Re Īhāimana u'āsi mono hā wapē'ē 're, wa'āma 're sōrōwa za'ra mono wa oto. Taha wa, 'Re Īhāimana u'āsi mono nhorōwa ne, wa oto 're wahāimana za'ra wasiré Īsazei'wa norī hā, 'ri 'rāihā wam ne, wapē'ē 're, 're sāmra mono wa oto. Duréihā 'Re Īhāimana u'āsi mono zadawa wasu'u'wa norī hā ma tō ĩreme na rob'ui'ére za'ra, romhā ré ĩsib'a'uwē norī āma hā, āne:

“Īnhib'a'uwē norī siré, wa za oto 're Īhāimana u'āsi za'ra, 'rāwi ĩ'rata. Wa za ĩsiré 're ĩmorī u'āsi za'ra.

Īsib'apito, wa za oto tāma 're Īhāimana za'ra.

Tawamhā ĩnhib'a'uwē te za duré ĩma 're hāimana za'ra.”

¹⁷ Āne duré Danhib'apito mreme na rob'ui'ére wasu'u amo hā:

“Dapo're āna 're Īdanomro mono norī hā, te za oto asiwi 're ĩrēme za'ra wa'aba mo, ta norī hāimana wasété zém nhiti, 're aihāimana za'ra wa'aba mono da oto.

Dapo're'ō norī hā uburé marī hā te te siwi 're ĩ'manharī wasété za'ra mono zé hā, tiwi 're upi zahu za'ra wa'aba mono ō di za oto. Tawapsi, wa za oto ĩsitēme te 're aiwaibui wē wa'wa.

¹⁸ Tawapsi, wa za duré Aimama 'wa hā aima 're Īhāimana za'ra wa'wa. Tawamhā ĩ'ra te za oto ĩma 're aihāimana za'ra wa'aba mo.”

Āne ma tō 'Re Īhāimana u'āsi mono hā danhipai u ĩsiptete uptabi hā tinhib'a'uwē norī ma, ropisutu siro.

7

¹ Īsisānawā norī, ĩma asawi pese za'ra wa'aba norī hā, āne hā uburé 'Re ĩhāimana u'āsi mono te te wama 're ĩ'aropisutu mono zé hā, oto wama 're hāimana za'ra mono wa, uburé marī ĩwasété wi, wa za 're wasi'madā'ā pese za'ra, āma 're wasihāiba wasété za'ra mono tō da, duré 'rāwi wapē'ē 're, āma 're wasiwasété za'ra mono tō da. Taha wa, 'Re ĩhāimana u'āsi mono hā wa za wa te wasiwi 're wazé pese za'ra. Wa za duré tāma 're wasisōmri u'āsi za'ra, āma 're wanomro wē u'āsi mono da.

Paru hā dama 're ĩtoi u'āsi mono zé wasu'u

² Ma'āpé, asiwi 're wazawi wē za'ra wa'aba mono, apā 're wawaibui wē wa'aba mono da. Nī'wam norī hā asiré 're hāimana za'ra wa'aba mono nherē, ma tō wawasédé hā wa'āma sa'ra. Tane nherē, asiré wa te aima romhuri za'ra wa'aba ré hā, marī ĩwasédé hā wa te aima 'manharī za'ra wa'aba ō di, nimahā na hā. Duré wanhimiromhuri zarina, aihāimana wasété na asi'marōpārī za'ra wa'aba ō di 'rāwi. Duré rob'uprazéb zō, marī hā taré, wa te aima 'manharī nhipeze za'ra wa'aba ō di. Mare uptabi di.

³ E aiwasédé hā te ai'āma sa'ra wa'aba da, wa āne āma aima rowasu'u za'ra wa'wa. Mare di. Āne da hāi ō di. A norī wa'wa hā wama asawi uptabi za'ra wa'aba di. Taha wa, niha wama 're romhāimana za'ra mono wa, 're wadā'ā za'ra mono da nherē, wama 're rowē za'ra mono di za. Āne na, wa tō aima wasiwasu'u pari za'ra wa'aba ni.

⁴ A norī wa'wa hā ĩma ai'umnhasi za'ra wa'aba di oto. Wa aima 're ĩtoi u'āsi za'ra wa'wa. Aiwasu'u wē wa'aba na, ma tō asina ĩma 're ĩrowé zani za'ra wa'aba mo. Rowasédé hā wazada 're wairébé u'āsi mono nherē, wa ĩtoi uptabi na 're ĩhāimana u'āsi.

⁵ Masédoniza u, we wasimasisi wamhā, wa te āma āpusi waihu'u ō di. Āmēmhā wazada hā ro'wa'rutu uptabi di, da'hā na wazada dahāimana za'ra wa. Duré ai'āma wahātā'ā za'été za'ra wa'aba di. E marī wa. Wanhīb'apito wasu'uwē nhiti, aipizari za'ra wa'aba ō'umnhasite.

⁶ 'Re ĩhāimana u'āsi mono hā, taha si dapē'ē nomri'wa hā te 're hāimana, dawī 're robzei'ō za'ra mono nherē. Ta hā ma tō wapē'ē hi, Titu hā aihawi wa'aba, nimosi wei watēme wisi wa.

⁷ E tawamhā, Titu wei watēme ĩwisizém na si, ma tō wapē hā ĩ're wama da'wa. Mare di. Taha na si ō di. Aiwasu'u wē wa'aba na zama, ma tō wapē hā ĩ're wama da'wa, duré Titu hā asiwi ĩpē'ē hiri aba na aiwasu'u wē za'ra wa'aba na zama. Ta hā Titu hā ma tō wama aiwasu'u wē za'ra wa'wa, āne: "Corĭtu na 'ri nho'ōmo nhisi āma ĩsazei'wa norī hā te sima aiwē za'ra, 'rāwi te te duré asabu za'ra da, tāma asawi uptabi za'ra wa. Ta norī hā ma tō duré 'rāwi sina tipē'ézé za'ra, marī hā ĩwasétére hā te te siwi ĩ'manharī za'ra zém na hā. Te duré sima aiwē za'ra, te te siwi ai'upari wē za'ra da, asitob'ru norī wi." Āne na ma tō wama aiwasu'u wē za'ra wa'wa, Titu hā. Taha wa, aima ĩtoi uptabi za'ra wa'aba di, āhāna hā.

⁸ Rob'ui'ére te aima ĩsōmri 'rata za'ra wa'wa hā sōré za'ra wa'aba wamhā, ma tō aiwi tirobzei'ō pese za'ra wa'wa, te āma aima ĩnharī za'ra wa'aba zém na hā. Taha wa, wa tō wa hā ĩsiwi āma robzei'ō, te aiwi āma ĩrobzei'ō za'ra wa'aba zém na hā. Tane nherē, te āma ĩsiwi robzei'ō na sahu ō di oto. E marī wa. Te aiwi āma ĩrobzei'ō za'ra wa'aba zém na, āma aihāimana za'ra wa'aba ō wa oto.

⁹ Taha wa, wa hā ĩtoi uptabi di, āhāna hā. E ĩnhimi'ui'ére na te aiwi robzei'ō pese za'ra wa'aba wa, wa ĩto sina ĩhāimana. Mare di. Aiwi ĩrobzei'ō pese za'ra wa'aba zéb zarina, aiwasété wi aipizari za'ra wa'aba wa, wa ĩto sina ĩhāimana. 'Re ĩhāimana u'āsi mono te te aima ĩwē za'ra wa'aba zéb zarina si, ma tō aiwi tirobzei'ō za'ra wa'wa. Taha wa, wa hā marī ĩwasédé hā te āma aima 'manharī za'ra wa'aba ō di, ĩnhimi'ui'ére na te āma aima ĩnharī za'ra wa'aba zém na hā.

¹⁰ ĩsazei'ō'wa norī hā 're ĩnomro wasété mono zéb zarina, robzei'ō u'āsi 're hāimana za'ra mono wa, te ta norī hā dá'ā u'āsi ne 're hāimana za'ra, tipē'ē 're. Tane nherē, 'Re ĩhāimana u'āsi mono te te dama 're ĩ'apisutu mono zéb zarina si, dawī 're robzei'ō pese za'ra mono wamhā, tawapsi te za dawasété wi 're dasipizari za'ra. Taha zarina si, te za oto 'Re ĩhāimana u'āsi mono hā te te 're da'anho'reptu. Āne wamhā, 're ĩdahāimana wasété za'ra mono zém na 're dasiwē'ō za'ra mono ō di za oto.

¹¹ Ma'āpé, āne na āma asipo're pu'u za'ra wa'aba, 'Re ĩhāimana u'āsi mono te te sima aiwē za'ra wa'aba zéb zarina, aiwi ĩrobzei'ō pese za'ra wa'aba zém na hā. Taha zarina, ma tō oto asiwaihu'u za'ra wa'wa, uburé ĩwasédé hā 'rāwi asiwi wē'ō pese za'ra wa'aba da. Taha wa, ma tō oto asima ĩwē uptabi za'ra wa'wa, aiwasédé hā 're ĩ'manharī za'ra wa'aba mono zém na ĩma asiwasu'u za'ra wa'aba da, apā asima ropese za'ra wa'aba da. Ma tō duré asiwē'ō pese za'ra wa'wa, aiwasédé hā aima ĩhāimana za'ra wa'aba zém na hā. 'Re ĩhāimana u'āsi mono nhimiházém na, ĩsada'wa para ĩmreme na te aihā za'ra wa'aba ō'umnhasite, ma tō ĩma aipahi za'ra wa'wa. Tane nherē, ma tō asima ĩwē za'ra wa'wa oto, apā āma atēme ĩmorī aba da, wasisabu su'u za'ra da. ĩ'uwaibaba na si, niha āma rosa'rata za'ra wa'aba da, ma tō

asi'madâ'â za'ra wa'wa, aibâ hã tiwasédé te te ĩ'manharĭzém na hã asiwi wê'ô za'ra wa'aba da. Taha wa, aiwasédé hã âma 'manharĭ za'ra wa'aba ô di. Âne, wa tô âma aiwaih'u za'ra wa'wa.

¹² Taha wa, e taré aibâ hã tiwasédé te te da'âma ĩ'manharĭ âma, ĩpê'êzé wa, wa tô âne na âma aima rob'ui'éré za'ra wa'wa, taha hãiba na te âma aima nharĭ za'ra wa'aba da. Mare di. Duré e taré aibâ hã te pawaptob da, wa tô âma aima rob'ui'éré za'ra wa'wa, âne na hã. Mare di. A norĭ wa'wa hã aima wazawi pese za'ra wa'aba wa, ĩnhimiroti hã 're ĩ'madâ'â za'ra wa'aba mono na 'Re ĩhâimana u'âsi mono nho'a 'rãwi asiwaih'u za'ra wa'aba da si, wa tô âne na hã âma aima rob'ui'éré 'rata za'ra wa'wa.

¹³ Âne hã wa te ai'âma waih'u za'ra wa'aba wa, ma tô apã wapê hã ĩ're wama da'wa. Tane nherê, taha zarina si ô di, aima wato za'ra wa'aba zé hã. Titu hã we watême wisi wamhã, ma tô wama aiwasu'u wê za'ra wa'wa. Ai'rata sãmra aba ré hã, ma tô, u, asiwi ĩpê'ê hiri 'wa, asiwi ĩpawpto wê wa'aba zém na hã. Âne wa, ma tô, to sina we watême wi, aihawi wa'aba hã. Âne wa, wa duré wa norĭ hã watoi uptabi na wahâimana, ĩsabâdã hã.

¹⁴ Titu hã âma atême morĭ aba ô ré, wa tô tâma aiwasu'u wê za'ra wa'wa, ĩsôwa, te te aiwaih'u sirômo za'ra wa'aba da. Taha wa, taré te âma tâma ai'umnhasi baba za'ra wa'aba ô di, ĩsôwamhã. Wa norĭ hã wazadawa nhĭpese âna, wa tô wanhimirowasu'u wê na si, wa te aima 're rowasu'u u'âsi za'ra wa'wa, tô sena na âma 're ĩwaih'u za'ra wa'aba mono zéb da hã. Taha zarina, Tituhu ma, wa te ĩ'aiwasu'u wê za'ra wa'aba zém na hã, tô sena na te za taha zarina si oto da te 're aiwaih'u za'ra wa'wa, a norĭ wa'wa hã.

¹⁵ Titu hã ai'rata sãmra aba ré, ma tô ĩsimiroti hã asiwi ĩwapari pese za'ra wa'wa. Ma tô duré asina aihâtâ'â za'ra wa'aba nherê, asiwi ĩ'ãri wê wa'wa, marĭ na tâma âma asina uwaimrami za'ra wa'aba ô wa, te te siwi aiwê'ô za'ra wa'aba ô'umnhasite. Taha wa, tâma asawi pese za'ra wa'aba di, âne na ai'âma po're si'ãri za'ra wa'aba ô wa.

¹⁶ Taha wa, wa hã duré, aima ĩto za'êtê za'ra wa'aba di. E marĭ wa. ĩma ai'umnhasi za'ra wa'aba wa, âne na hã oto.

8

ĩsĭbrob'ô norĭ ma, 're ĩdanhoprub za'êtê za'ra mono zé wasu'u

¹ Wasisânawã norĭ, wa wasima aiwê za'ra wa'aba ni, 'Re ĩhâimana u'âsi mono hã tinhimizawi pese zéb zarina, ĩsazei'wa norĭ ma, 're ĩsôpru mono zé wasu'u hã, waih'u za'ra wa'aba da, Masédoniza na danhipti'a nho'ômo nhĭsi âma rowahutu u, siré 're ĩsi'rã'ôto mono norĭ ma, 're ĩsôpru mono zé wasu'u hã.

² Ta norĭ hã da te âma 're ĩrowasété za'ra mono na, te te 're robzépata za'êtê za'ra mono nherê, duré sĭbrob'ôna 're hâimana za'ra mono nherê, ma tô to sina, dama tinhoprub za'êtê za'ra, tite rob'uiprazém na hã.

³⁻⁴ Marĭ hã sa hâimana za'ra ô nherê, ma tô sa'êtê na dama sômri za'ra, tinhoprubzém na te te âma dazawi za'ra da. Si'uihã na ma tô sima pisutu za'ra, âne na wa te âma saze za'ra wa, Zeruzarê âma 'Re ĩhâimana u'âsi mono nhĭb'a'uwê norĭ te te siwi âma pawaptob za'ra da, te te sima ĩwê uptabi za'ra zéb zarina. Taha wa, wê di âne hã, dama âma ĩsôprub za'ra zé hã, Masédoniza âma ĩsazei'wa norĭ nhoprubzê hã.

⁵ Wa norĭ hã âne zô, wanhimipari ô nherê, ma tô Wanhib'apito ma uimrehêne sisômri za'ra ta norĭ hã, taha ma si 're hâimana za'ra mono da. Taha zarina, ma tô duré wama sisômri za'ra, te te wapawaptob za'ra da, 'Re ĩhâimana u'âsi mono te te tâma ĩpisutu za'ra zéb zarina hã.

⁶ Titu hã âma atême morĭ 'rata aba wamhã, ma tô rob'uiprazé ubumro na sãna'rata, asôprub za'ra wa'aba zém na hã. Taha wa, wa tô tâma roti pese ni, duré âma atême morĭ aba wamhã, rob'uiprazé ubumro na te te âma sizusi da, romhuri hã wê uptabi na te te uprosi da.

⁷ A norĭ wa'wa hã te Cristu hã aima umnhasi za'ra wa'aba wa, âma 're ĩsasômri pese za'ra wa'aba mo. 'Re ĩhâimana u'âsi mono nhimiroti na, te aimreme wê na dama 're ĩrowasu'u za'ra wa'aba mo. ĩsimiroti hã ma tô duré 're ĩwaih'u pese za'ra wa'aba mo. Taha wa, asimi'ê na te 're ĩromhuri pese za'ra wa'aba mo, 'Re ĩhâimana u'âsi mono hã te te aima 're ĩwê za'ra wa'aba mono zéb zarina. Te duré asiwi 're ĩwazawi pese za'ra wa'aba mo. Âne hã aima sa'êtê uptabi za'ra wa'aba di, 're aihâimana za'ra wa'aba mono zém na hã. Taha wa, te za sa'êtê na dama asôprub za'ra wa'wa duré.

⁸ Âne hã wa hã te âma aima 'ru za'ra wa'aba ô di. Taré wa aima âma roti za'ra wa'wa, ĩnhimiroti zarina, 'manharĭ za'ra wa'aba wamhã, 're ĩdazawi pese za'ra wa'aba mono zém na, sena na da te 're aiwaih'u za'ra wa'aba mono da. Masédoniza âma ĩsazei'wa norĭ hã simi'ê na te te 're ĩdapawaptob za'ra mono ne zô pé, wa âne na taré âma aipibu za'ra wa'wa.

⁹ Wanhîb'apito Zezu Cristuhu nhimizawi pese zé hã aima waihu'u pese za'ra wa'aba di oto. Ta hã Timama siré robze na 're hãimana u'âsi mono nherê, ma tó hãiwa âma tihãmanazé hã we tiré a'â, ti'ai âma si'a'uwê da, te te a'â dame 're robzépata mono da. Asada za'ra wa'aba, ma tó dawazari si'a'uwê, taha zarina, a norî wa'aba zama 'Re îhãimana u'âsi mono 'rata 're asimroi u'âsi aba mono da, hãiwa âma hã. Taha wa, Wanhîb'apito hã sisawi âna 're îhãimana mono ne, te za asisawi âna dama asôprub za'ra wa'wa, ate rob'uiuprazé wa'aba na hã.

¹⁰⁻¹¹ Înhimirosa'rada hã wa za oto aima waihu'u za'ra wa'wa, rob'uiuprazé asiwi î'ubumroi wa'aba zém na hã. Wahub 'rata na ma tó dawana asima îpîsutu za'ra wa'wa, rob'uiuprazé hã asiwi î'rã'ôto aba zéb da hã. Dawana ma tó duré rob'uiuprazé ubumro na âma îsãna'rata za'ra wa'wa. Taha wa, ma'âpé asiwi uprosi wê wa'aba, rob'uiuprazé ubumro hã. Ato sina, âma asisaze za'ra wa'aba ne, te za oto âhãna hã âma î'uwaimrami za'ra wa'wa duré, rob'uiuprazém na hã, aihãiba mono bâ aima 're îhãimana za'ra wa'aba mono zéb zarina, niha wamhã, îsa'êté zarina, niha wamhã, îsyry zarina.

¹² Ato sina, âma asôprub za'ra wa'aba wamhã, 'Re îhãimana u'âsi mono si te za asôprubzém na aiwêsâmri za'ra wa'wa. Asimarî aba ô wa, tó syry na îsômri za'ra wa'aba zéb zarina, te za duré âma aiwêsâmri za'ra wa'wa, ato sina âma asôprub za'ra wa'aba wa.

¹³⁻¹⁴ E a norî wa'aba si, sa'êté na îsômri za'ra wa'aba na, da'upana âma robzépata za'ra wa'aba da, wa âne na aima roti za'ra wa'wa. Mare di. Taré âhãna hã sa'êté na aima hãimana za'ra wa'aba wa, te za âma îpawaptob za'ra wa'wa, Zeruzarê âma îsazei'wa norî hã, marî zô tiwi 're rowaptâ'â za'ra mono wa. Tawamhã, nimahã na marî zô, aiwi 're rowaptâ'â za'ra wa'aba mono wamhã, te za duré ta norî hã marî na te te 're aipawaptob za'ra wa'wa, asa, sa'êté na tâma hãimana za'ra wamhã. Âne wamhã, aiwa te za asôprubzém na asima âma 're îwa'rãmi za'ra wa'aba mo.

¹⁵ Duréihã Mozési ma tó âne na âma rob'ui'ééré, Izarazéhé nhihudu norî hã a'ubuni wi simizahãri mono sidâpâsi, mana na dasazém nhisi hã te te siwi î'ubumroi mono na hã:

“Nî'wam norî hã sa'êté uptabi na te te sima ubumro za'ra mono nherê, tâma si'atarême za'ra mono ô di, tisiré norî hã te te âma pawaptob za'ra mono wa. Taha wa, nî'wam norî hã syry na te te sima ubumro za'ra nherê, ta norî wi tiwi sô rowaptâ'â za'ra ô di, îsazéb zô hã.”

Âne duréihã âhã wasu'u na, Mozési te te âma îrob'ui'éérézé hã, îbaihã na hã. Tane duré, a norî wa'wa hã te za 're asipawapto pese za'ra wa'aba mo, aiwa 're aihãimana za'ra wa'aba mono da.

Titu hã to sina datême îmorîzé wasu'u

¹⁶ 'Re îhãimana u'âsi mono, ma tó Tituhu ma pisutu, tâma asawî pese za'ra wa'aba zéb zarina, te te aipawaptob za'ra wa'aba da, wa norî hã wa te duré 're î'asawi pese za'ra wa'aba mono ne. Taha wa, wa âma wawata ni, 'Re îhãimana u'âsi mono âma hã, tó sena wa, ô hã.

¹⁷ Tawamhã ône haré ma tó Titu hã sina wazaze, âma atême îmorî aba zém na da hã. Taha wa, si'uihã na te te âma sima îrowézéb zarina, to sina te za tó âma atême timorî za'ra wa'wa âhãna hã, atême za'ra wa'aba.

¹⁸ Wasisãnawã hã wa za duré îsiré âma atême satôrî za'ra wa'aba ni, aibã hã. Âme îsazei'wa norî hã ma tó te te sima 're wasu'u wê za'ra, Cristuhu wasu'uwê na simiromhuri wê uptabi wa, ta hã.

¹⁹ Duré dama simiromhuri wê uptabi wa, ma tó îsazei'wa norî hã siwi pisutu, Zeruzarê u îsazei'wa norî nhoprubzéb ré, za wasi'aba'rêi wa, âma wasiré morî da. Tawamhã Wanhîb'apito âma wawatazéb da, wa za tó âne hã 'manharî ni, duré wato sina, wa te 're îda'apawapto mono zém na, da te wawaihu'u za'ra da.

²⁰ Wanhîmisaihuri hã da te wa'âma nomri tó da, wa za asôprub za'ra wa'aba zé hã wasitême wa te wasiwi 'madâ'â pese za'ra, wasi'aba'rêi wamhã.

²¹ Î'uwaiababa, wa te âma î'uwaimrami za'ra da si, wa tó îré wasima rob'madâ'â za'ra ni, Wanhîb'apito nho'a, duré uburé danho'a zama.

²² Wasisãnawã hãiba amo hã wa za duré âma atême satôrî za'ra wa'aba ni, Titu norî siré, âma morî da. Ta hã wa tó nasi pibu za'ra ni, simi'ê na te te 're romhuri mono zô, Wanhîb'apito ma. Taha wa, wa tó waihu'u za'ra ni, tó sena îsimi'ê na hã, duré to sina te te 're îromhuri mono na hã. Ta hã aiwasu'u wê za'ra wa'wa hã te te wapari wa, tâma ai'umnhasi uptabi za'ra wa'aba di, za rob'uiuprazém na dama asôprub za'ra wa'aba zém na hã. Taha wa, toi uptabi di âhãna hã, rob'uiuprazé ubumro na za te te âma aipawaptob za'ra wa'aba wa.

²³ Titu hã bété. Ta hã îsiré Wanhîb'apito ma romhuri'wa te 're hãimana, Cristuhu wasu'uwê na îsiré te te 're î'aipawaptob za'ra wa'aba mono. Duré wasisãnawã hãiba amo norî hã za îsiré âma îneb zahuré da hã, ta norî hã te za tisiré îsazei'wa norî zadawa para, âma atême îne wa'aba na siwasu'u zahuré, aima za'ra wa'aba hã. Ta norî hã simiromhuri wê uptabi wa, te za Cristuhu âma si 're dawata za'ra.

²⁴ Taha wa, ma'āpé Īwē na si uburé marī na hā āma tāma uwaimrami za'ra wa'aba za, asimizawi pese aba zém na te te aiwaihu'u za'ra wa'aba da, duré sena na, wa te dama 're Ī'aiwasu'u wē za'ra wa'aba mono zém na, te te aiwaihu'u za'ra wa'aba da. Duré āme Īsazei'wa norī, siré 're Īsi'rā'ōtō mono norī hā, āne na te te aiwaihu'u za'ra wa'aba da, te za Īwē na si tāma āma Ī'uwaimrami za'ra wa'wa.

9

Zudeza āma Īsazei'wa norī ma, Īdanhoprub za'ra zé wasu'u

¹ E wa hā wa za āne na aima āma roti na sahu za'ra wa'wa, Īnhimi'ui'éré na hā, Zudeza na danhipti'a nho'ōmo nhisi āma 'Re Īhāimana u'āsi mono nhib'a'uwē norī ma, asōprub za'ra wa'aba da, dame. Mare di. Āne na, te aima āma roti na sahu za'ra wa'aba ō di za, āhāna hā.

² E marī wa. Zudeza āma Īsazei'wa norī hā asiwi pawaptob za'ra wa'aba da, asi'uihā na ato sina, āma asima rosa'rata za'ra wa'aba wa. Āne na, wa tō wa hā āma aiwaihu'u za'ra wa'wa, tō sena na. Āme Masédoniza na danhipti'a nho'ōmo nhisi āma Īsazei'wa norī 're Īhāimana za'ra mono norī ma, wa tō aiwasu'u wē za'ra wa'wa. Āne, wa tō ta norī ma hā tāma aiwasu'u wē za'ra wa'wa: "Ataza na danhipti'a nho'ōmo nhisi āma Īsazei'wa norī hā ma tō rob'ui'prazé ubumro na sāna'rata za'ra, wahub 'rata na hā." Āne na, wa tō tāma aiwasu'u wē za'ra wa'wa. Rob'ui'prazé hā ato sina, asiwi Ī'ubumro sirōmo za'ra wa'aba zéb zarina, ma tō ta norī zama sima āma rosa'rata za'ra, tō sina, aiwa asine wa'aba, te te siwi 'manhari wē da, aiwab da.

³ Āne na, wa tō dama aiwasu'u wē za'ra wa'wa. Tane nheré, wa za Īsisōwa āma atēme satōrī za'ra wa'wa, wasisānawā norī hā, rob'ui'prazé ubumro na te te aipawaptob za'ra wa'aba da, Īwana ré asiwi 'rā'ōtō pari aba da, te dama aiwasu'u wē za'ra wa'aba zéb zarina. Duré te dama aiwasu'u wē za'ra wa'aba zém na, taré te ai'umnhasi baba za'ra wa'aba tō da, wa za tō āne hā 'manha.

⁴ Āté Masédoniza hawimhā, wasisānawā norī hā te za āma Īsiré ai'aba'ré, atēme za'ra wa'aba. Tawamhā, āma atēme wasihutu aba wamhā, rob'ui'prazé hā asiwi 'rā'ōtō pari aba ō wamhā, āté wa aré aima aséb za'ra wa'aba ni, taré wa te ai'umnhasi baba za'ra wa'aba wa. A norī wa'wa hā bété. Te aré tō aséb za'ra wa'wa, tō sena Ī'ubumro na, āma uwaimrami za'ra wa'aba ō wa.

⁵ Taha wa, wa tō āne rosa'rata Īsima, wasisānawā norī hā Īsisōwa te āma atēme satōrī za'ra wa'aba da, rob'ui'prazé ubumro na te te aipawaptob za'ra wa'aba da, asiwi 'rā'ōtō pari aba hā Īzō, Īma Īropisutu za'ra wa'aba zéb zarina. Tawamhā, āma atēme Īwisi za'ra wa'aba wamhā, ōne haré wa za ti'ā, asi'uihā na ato sina, dama asōprub za'ra wa'aba zém na, da te dasiwi aiwaihu'u za'ra wa'aba da.

⁶ Āne na, wa za duré āma aipo're pu'u za'ra wa'wa, āma rosa'rata za'ra wa'aba da. Amnho hā syry na da te 're Īzuri mono zéb zarina, te za syry na da te 're ubumro za'ra, dama 're 'rā'prédub za'ra mono wamhā. Sa'ētē na, da te 're zuri mono wapsi, te za oto sa'ētē na da te 're ubumro za'ra. Tane duré, dasima 're Īdanhoprub za'ra mono zéb zarina, te za 'Re Īhāimana u'āsi mono hā dama 're sōpru, iwa'rāmi.

⁷ 'Rāwi aip'ē'ē 're, asima Īwaihu'u za'ra wa'aba zéb zarina si, te za aihāiba mono bâ dama asōprub za'ra wa'wa, āté sa'ētē na, āté syry na. Robzei'ō nheré, dama asōprub za'ra wa'aba ō di za. Duré taré da te aima Ī'ru za'ra wa'aba zéb zarina, dama asōprub za'ra wa'aba ō di za. Mare di. Asi'uihā na si te za asima Īwē za'ra wa'aba zéb zarina, dama asōprub za'ra wa'wa, ato sina. Āne si Īwē uptabi hā, 'Re Īhāimana u'āsi mono ma hā, dato sina dasima 're Īdanhoprub za'ra mono zé hā.

⁸ 'Re Īhāimana u'āsi mono hā waihu'u pese uptabi di, uburé marī Īwē hā te te aima 're Ī'anhomri aba mono da hā, marī zō aiwi 're rowapt'ā za'ra wa'aba mono tō da, āma 're aihāimana za'ra wa'aba mono zéb da hā, duré āma 're Īdapawaptob za'ra wa'aba mono zéb da hā.

⁹ Duréihā ni'wa hā ma tō āne na rob'ui'é'ré, Ībaihā na hā: "Īsibrob'ō norī ma, te 're sōprub u'āsi, sa'ētē na. Īsimizawi pese zé hā dawī 're si'utōrī waihu'u za'ra mono ō di za. Te za dama 're hāimana u'āsi za'ra."

Āne duréihā rob'ui'é'ré wasu'u hā.

¹⁰ E 'wa hā te robzā hā robzuri'wa norī ma, te te 're anhomri. E 'wa hā, te dasazé hā te te dama 're anhomri. Ta hā, 'Re Īhāimana u'āsi mono. Tane te za duré Īsōprubzé hā aima 're sa'ētē za'ra wa'wa, dama 're asōprub za'ra wa'aba mono zé wa'rāmi, sa'ētē uptabi na oto dama āma 're asōprub za'ra wa'aba mono da, nimahā na hā.

¹¹ Sa'ētē na te za tō Īwē hā te te aima 're sōmri u'āsi za'ra wa'wa, taha zarina, oto a norī wa'wa hā sa'ētē na āma 're dapawaptob u'āsi za'ra wa'aba mono da, aiwab da. Taha wa, da'ahā na te za oto 'Re Īhāimana u'āsi mono āma tawata za'ra ni, asōprub za'ra wa'aba zé hā za wa te datēme āwisi za'ra wē te.

¹² Īwē hā te za tō Īmanharī za'ra wa'wa, āne na dapawaptob za'ra wa'aba wamhā. E marī wa. Ta norī wi hā, marī zō tiwi 're rowaptā'ā za'ra mono ō di za oto, 'Re Īhāimana u'āsi mono nhib'a'uwē norī wi hā, Zudeza āma 're Īhāimana za'ra mono norī wi hā. Taha zarina, te za duré ahā na oto āma 're wata za'ra, 'Re Īhāimana u'āsi mono āma hā.

¹³ A norī wa'wa hā tāma asōprub za'ra wa'aba zém na, pawaptob za'ra wa'aba wa, te za tāma āma Īuwaimrami za'ra wa'wa, 'Re Īhāimana u'āsi mono ma hā. Taha wa, ahā na te za tō 'Re Īhāimana u'āsi mono āma tiwata zara, Cristuhu wasu'uwē zarina 're anomro wē wa'aba mono na, duré asōprub uptabi na pawaptob za'ra wa'aba wa, ta norī hā, duré darob amoi āma 're Īhāimana za'ra mono norī hā, pawaptob za'ra wa'aba wa.

¹⁴ Ta norī hā te te 're asawi pese za'ra wa'aba mono wa, te za ai'āma 're mreime zusi u'āsi 'wa, 'Re Īhāimana u'āsi mono ma, ta hā tinhimizawi pese zéb zarina, te te aipisutu za'ra wa'aba wa, asimarī na tāma asōprub za'ra wa'aba da, ĩsimarī'ō norī ma hā.

¹⁵ 'Re Īhāimana u'āsi mono āma si, wa za 're wawata u'āsi za'ra, ti'ra na wama ĩsōprub za'ra zé wa'rāmi. 'Re Īhāimana u'āsi mono nhoprubzē hā wē uptabi nherē, damreme na Īuwaibaba, da te dasima āma 're ĩrowasu'u za'ra mono da hā, da te dasima āma 're uwaimrami waihu'u za'ra mono ō di.

10

'Re Īhāimana u'āsi mono zadawa para, Paru te te dama 're ĩsadawa wasu'u mono zé wasu'u

¹ Ni'wam norī hā asiré wa'aba, 're Īhāimana za'ra mono norī hā te āne te te sima 're Ībāsi za'ra: "Paru hā wa'rata sāmra ré hā, wama pahi za'ra di, marī na te te wama ĩnharī za'ra da hā, wanho'a. Wanhiti 're hāimana mono wapsi, te mreime pahi āna te te wama 're anharī, tinhimi'ui'ére na si." E āne hā ĩma 're hāimana mono bā. Mare di. Wa hā Paru, wa za oto aima āma roti za'ra wa'wa. Īwapari pese za'ra wa'aba za. Cristuhu nhisi na, wa za āma aima roti za'ra wa'wa āhāna hā, ta hā simizawi pese wa, duré atāma na 're hāimana u'āsi mono wa. Marī da, 're sisapētē waihu'u mono ō di, ta hā.

² Ni'wam norī hā ma tō āne na ĩma nharī za'ra, Īhāiba na: "Paru hā ĩsazei'ō'wa norī ne, te 're hāimana." Āne te ni'wam norī hā ĩ'āma rosa'rata za'ra. Taha wa, apā āma atēme ĩmorī aba wamhā, áté ĩmreme tete na, wa za tō aima roti za'ra wa'wa, ĩpahi āna, āne hā te ĩsima wē ō nherē. Taha wa, ĩwasu'u wasédé hā wapari za'ra wa'aba ō di za, āne na te aima nharī za'ra wa'aba tō da, asō'a za'ra wa'aba.

³ Wa norī hā ti'ai āma, wa dawazari 're wahāimana tō, uburé ĩsazei'ō'wa norī wazari. Tane nherē, ti'ai āma 're idahāimana za'ra mono zéb zarina, wa te 're a'wapéi mono ō di, 'Re Īhāimana u'āsi mono nhitob'ru norī hā. Mare di.

⁴ Ti'ai āma 're ĩdasi'wapé za'ra mono zém na, wa te 're a'wapéi mono ō di duré. 'Re Īhāimana u'āsi mono nhimnhī'āsi na si, wa tō wa te 're a'wapéi u'āsi, ĩwaihu'u pese zarina. ĩsitob'ru norī nhiptetezē hā wa te tiwi āma 're ĩ'a'uprosi mono zéb da hā, wa āhā na si wa te 're a'wapéi u'āsi, ta norī hā, 'Re Īhāimana u'āsi mono nhimnhī'āsi na si.

⁵ Taha na si, wa duré danhimiroti tō senai'ō hā wa te dawī 're a'uprosi. Ni'wam norī hā tiwē na sina 're wata za'ra mono wa, te 'Re Īhāimana u'āsi mono hā tāma waihu'u āna, 're hāimana za'ra. Āne na danhimirosa'rata wasédé hā, wa duré wa te dawī 're a'uprosi u'āsi, 'Re Īhāimana u'āsi mono nhimnhī'āsi na si, ĩwaihu'u pese zarina. Uburé Cristuhu nhitob'ru norī nhimirosa'rata wasédé hā wa duré wa te tiwi 're awaibui u'āsi, Cristuhu nhimiroti zarina si, te te oto 're rosa'rata za'ra mono da, ta norī hā ĩwē na si.

⁶ A norī wa'wa hā te oto Cristuhu āma 're ĩsasōmri pese za'ra wa'aba mo. Tane nherē, ni'wam norī hā asiré 're hāimana za'ra wa'aba mono nherē, Cristuhu wi, apā tihāimana wasété zō 're sipizari za'ra mono wa, wa za ta norī zada 're wahāimana, wa te wasiwi ĩwē'ō za'ra zéb zarina, niha wa te dama āma roti za'ra da, ta norī hāiba na hā.

⁷ Atōmo na wahāiba mana wawī, asiwi 're ĩwa'madā'ā za'ra wa'aba mono zéb zarina si, ma tō asiwi 're ĩwawē'ō za'ra wa'aba mo. Ni'wam norī hā asiré wa'aba, 're Īhāimana za'ra mono norī hā te āne na te te si'āma 're rosa'rata upa za'ra 'rāwi: "Wa norī si, wa Cristuhu zadawa para, wa te 're romhuri za'ra." Āne na asi'āma rosa'rata za'ra wa'aba ze te bā, ma'āpé apā asi'āma rosa'rata pese za'ra wa'aba. E marī wa. Wa norī zama, Cristuhu zadawa para dama romhuri'wai wa.

⁸ Wanhīb'apito hā ma tō wapisutu, ĩsadawa para, wa te 're aipawaptob za'ra wa'aba mono da. E tawamhā, wanhimipawaptobzéb zarina, āma 're anomro wē wa'aba mono zé hā, wa te aiwi 're uprosi za'ra wa'aba mono da, ma tō āne hā wama pisutu. Mare di. ĩsadawa para, wa te 're ĩ'aipawaptob za'ra wa'aba mono zéb zarina, asiptete sina āma 're anomro aba mono da si, ma tō wapisutu, Wanhīb'apito hā. Āhā zarina si, aima 're ĩsiwasu'u za'ra wa'aba mono wa, āma 're ĩnhisé mono ō di, tō sena aima 're ĩsiwasu'u za'ra wa'aba mono wa, āne na hā.

⁹ Īnhimi'ui'éré na te aima āma ĩroti za'ra wa'aba zé ma, aipahi za'ra wa'aba da hā, te amo ĩsima aiwé za'ra wa'aba ō di.

¹⁰ Ni'wam norī hā te duré te te sima 're ĩwasu'u za'ra, āne: “Paruhu nhimiroti hā pire uptabi di, tinhimi'ui'éré na si te te wama 're ĩroti za'ra mono zém na hā. Mreme tete sina, te za duré āma wama roti pese za'ra, tinhimi'ui'éré na hā. Tane nheré, wa'rata sāmra wamhā, marī dai ō di. Wama mreme wapu za'rare di.” Āne te ni'wam norī hā te te sima 're ĩbāsi za'ra, ĩza're'ra si.

¹¹ Tane nheré, asiti wahāimana za'ra wa'aba ré, wanhimi'ui'éré na wamreme tete sina, wa te aima āma ĩroti za'ra wa'aba zéb zarina, wa za duré wahāimana pire na ai'rata wahāimana za'ra wa'aba ni, apā āma wane wamhā, atēme za'ra wa'aba. Āne hā ma'āpé wa'āma waihu'u za'ra wa'aba, rosa'rata na wa'āma ĩ'upa za'ra wa'aba norī hā.

¹² Ta norī hā danhipai u 're ĩhāimana wé za'ra mono na, ma tō 're si'madā'ā ze za'ra. Tane nheré, wa norī hā aiwab da hā, wa te wasina rosa'rata waihu'u ō di, wawé na hā. Tane nheré, te ta norī hā ĩsimiza'rese'ō ne 're hāimana za'ra. Tihāimana wé zéb zō si, te ta norī hā 'rāwi sina 're sōpré, taha na si danhipai u 're hāimana wé za'ra mono da newa.

¹³ Tane nheré, wa norī hā tō ĩbāre, wa aima wasiwasu'u za'ra wa'aba ni. 'Re ĩhāimana u'āsi mono te te wama ĩpisutuzém nhipai u, aima wasiwasu'u za'ra wa'aba ō di. Romhuri hā, 'Re ĩhāimana u'āsi mono te te wama ĩpisutuzéb zarina si, wa tō wa te dama 're romhuri, a norī wa'aba ma zama. Taha na si, wa aima wasiwasu'u za'ra wa'aba ni, wa te dama 're ĩromhuri wé mono zém na si.

¹⁴ 'Re ĩhāimana u'āsi mono te te wama ĩpisutuzéb zarina si, wa tō āma wanem na, atēme za'ra wa'aba, dawana ĩsawada para, wa te aipawaptob za'ra wa'aba da. Te te wama ĩpisutuzém nhipai u, wa te tiwi āma upai ō di, Cristuhu wasu'uwé hā wa te aima wasu'u 'rata za'ra wa'aba wamhā.

¹⁵ Duré, danhimirohuri na nheré, taré wa norī hā da'upana wazadawa nhipese na 're wasiwasu'u mono ō di, aima za'ra wa'aba hā. Taré, wa wa norī hā wa te wasima 're aiwé za'ra wa'wa, Cristuhu āma 're ĩsasōmri za'ra wa'aba mono zém na, asima āma 're sa'ēté za'ra wa'aba mono da, taha zarina, wa te aima 're ĩromhuri za'ra wa'aba mono zém na si, wa te aima āma 're sa'ēté za'ra wa'aba mono da, 'Re ĩhāimana u'āsi mono te te wama ĩpisutuzéb zarina si.

¹⁶ Tawapsi, wa za datēme 're wane, darob amoi u, airom nhiti za'ra wa'aba 're ĩdahāimana za'ra mono norī ma, ĩwasu'uwé hā wa te dama 're wasu'u mono da. Cristuhu wasu'uwé na ni'wa hā te te dama 're ĩromhuri mono ō zéb u si, wa za oto 're wane, darob amoi u hā, ĩwasu'uwé na, da te dama āma 're romhuri za'ra mono nheré, taré wazadawa nhipese na, da'upana dama 're wasiwasu'u tō mono da.

¹⁷ Āne na ma tō duréihā ni'wa hā ĩbahiā na āma rob'ui'éré, 'Re ĩhāimana u'āsi mono mreme na:

“Ni'wam norī hā to sina oto 're hāimana za'ra mono wamhā, Danhib'apito te te 're ĩpawapto wé za'ra mono zém na si, te za tō dama 're siwasu'u wé za'ra, to sina oto āma 're ĩhāimana za'ra mono zém na hā.”

Āne duréihā rob'ui'éré hā, 'Re ĩhāimana u'āsi mono mreme na hā.

¹⁸ Ni'wam norī hā tiwé na 'rāwi 're ĩsi'madā'ā ze za'ra mono norī hā, Wanhib'apito te te 're wēsāmri za'ra mono ō di, ta norī hā. E marī wa. Te te sima 're ĩ'wasu'u wé mono norī si, te za te 're awēsāmri, Wanhib'apito hā.

11

Cristuhu wasu'uwé upana, roti senai'ō na te te dama 're ĩroti za'ra mono norī wasu'u

¹ Āhāna, wa za ĩsisōwa āma ĩsina aipo're pu'u za'ra wa'wa, ĩ'āma aiwa'a za'ra wa'aba tō da, ĩnhimiza'rese'ō na ĩ'āma 're rosa'rata za'ra wa'aba mono nheré.

² Wa hā te 're asawi pese za'ra wa'aba mono wa, wa tō te ai'āma 're rosa'rata u'āsi za'ra wa'wa, 'Re ĩhāimana u'āsi mono te te 're ĩ'asawi pese za'ra wa'aba mono ne. Ni'wa hā aibā ma, ti'ra ubuni hā mro da, te te tāma ĩpisutu ne, wa tō aipisutu za'ra wa'wa, Cristuhu ma si oto 're aihāimana za'ra wa'aba mono da.

³ Tane nheré, wa oto ĩhātā'ā sina, te ai'āma 're rosa'rata u'āsi za'ra wa'wa. E marī wa. Cristuhu āma si, 're sasōmri pese za'ra wa'aba mono nheré, áté ni'wam norī hā roti tō senai'ō na taré te te aima 're ĩrowasu'u za'ra wa'aba mono zéb zarina, te za Cristuhu wasu'uwé hā ĩreme za'ra wa'wa. Duréihā Wa'uburé hā wahi na sihāiba wa, Ewaha ma, sadawa nhipese na te te ĩrowasu'u ne, te za tō áté ni'wam norī hā te te aima 're rowasu'u za'ra wa'wa, roti tō senai'ō na hā.

⁴ Zezusihi wasu'uwé tō sena uptabi si, wa tō aré aima wasu'u za'ra wa'aba ni. Tawamhā taha wasu'u na, wa te aima ĩrowasu'u za'ra wa'aba zéb zarina, ma tō ĩsaze za'ra wa'wa.

Taha zarina, ma tō duré asima ĭwē za'ra wa'wa, 'Re ĭhāimana u'āsi mono pē'ēzani hā aipē'ē 're, aima 're hāimana u'āsi za'ra wa'aba mono da. Tane nherē, ni'wam norī hā Zezusihi wasu'uwē upana, tō senai'ō na te te aima 're rowasu'u za'ra wa'aba mono nherē, Wanhib'apito wasu'uwē ne, tō senai'ō nherē, 'rāwi asiwi 're wē'ō za'ra wa'aba mono ō di. Ōne haré ma tō āma 're ĭsasōmri za'ra wa'aba mo. 'Re ĭhāimana u'āsi mono pē'ēzani upana, ma tō ĭhāiba'ō mreme si asima 're ĭwē za'ra wa'aba mo.

⁵ E ta norī hā Cristuhu zadawa wasu'u'wa pā, ma tō bété ĭsimirowasu'u na āma ĭsaze za'ra wa'wa. E ĭnhimiromhuri hā tāma wapu bā, ta norī nhimiromhuri ma hā.

⁶ Āté ĭmreme hā, ĭma pibu prā ti tō, da'ahā nho'a te dama 're ĭrowahutu mono zéb da hā. Tane nherē, Cristuhu wasu'uwē si, tō sena hā ĭma waihu'u pese di. Āne na ma tō oto ĭāma ĭwaihu'u pese za'ra wa'wa, a norī wa'wa hā.

⁷ Asiwi ĭpawa'ābā aba āna, wa tō 'Re ĭhāimana u'āsi mono wasu'uwē na si te 're aipawaptob za'ra wa'wa. Taha wa'rāmi, a norī wa'aba si, ĭma aipire na aihāimana za'ra wa'aba da, wa tō ĭhāimanazéb da hā, ĭsi'uihā na nasi wa'ā, ĭpire na aima ĭhāimana za'ra wa'aba tō da. E āne wamhā, ĭwasédé wa tō 'manha. E tō 're ĭhāimana mono zéb zarina, ma tō āne na ĭāma ĭrosa'rata wasété za'ra wa'wa, asima.

⁸ Cristuhu wasu'uwē na te aipawaptob za'ra wa'aba da, ai'rata ĭnhamra aba ré, rob'uprazém na ĭma asōprub za'ra wa'aba ō nherē, ma tō ai'upana za'ra wa'aba, ĭsazei'wa norī hā ĭpawaptob za'ra, darob amoi āma 're ĭsi'ubumroi mono norī hā. Ta norī hā Wanhib'apito wasu'uwē na te pawaptob za'ra dai ō nherē, ma tō tite rob'uprazém na ĭpawaptob za'ra, aima wa'aba si, te āma ĭromhurizéb da hā.

⁹ Ai'rata ĭnhamra aba ré, asimarī zō, te aiwasutu za'ra wa'aba da, te nasi aiwi rowaptērē za'ra wa'aba ō di, marī zō ĭwi rowaptā'ā wamhā. Wasīsānawā norī si, ma tō uburé marī na siwi ĭpawapto, āma ĭhāimana mono zéb da hā, Masédoniza hawi, āma ĭsiré ĭsi'aba'ré norī hā. Taha wa, ai'rata ĭnhamra aba ré hā, ĭnhiwari na hā te nasi ropire hā aima 'manharī za'ra wa'aba ō di. Tane, wa za duré ĭhāimana, apā ĭmorī na te sahu wamhā, āma atēme za'ra wa'aba.

¹⁰ Ni'wa hā marī na te wari āna, wa tō aipawaptob za'ra wa'wa, ai'rata ĭnhamra aba ré hā, asiwi ĭpawa'ābā aba āna. Āne hā ĭma wē uptabi di tō. Āhā wasu'u hā da te ĭwi pari waihu'u ō di, Ataza na danhipti'a nho'ōmo nhisi āma, 're ĭdahāimana za'ra mono norī hā. Cristuhu nhimiroti hā tō sena uptabi, te 're hāimana. Tane duré, wa hā tō sena, wa āne na aima āma rowaihu'u za'ra wa'wa.

¹¹ E marī wa, wa tō ĭnhiwari āna aima romhuri za'ra wa'wa. E ĭma asawi za'ra wa'aba ō wa. Mare di. ĭma asawi uptabi za'ra wa'aba di. Āne na ma tō 'Re ĭhāimana u'āsi mono si ĭwaihu'u, 're ĭhāimana mono zém na hā.

¹² Zezusihi zadawa wasu'u'wa newa, tō senai'ō na te te dama 're ĭroti za'ra mono norī hā, aiwa ĭsine hā te te dama 're ĭromhuri za'ra mono na dama 're siwasu'u za'ra mono tō da, wa za tō ĭpawa'ābā āna te 're da'apawaptob u'āsi.

¹³ Ta norī hā Zezusihi zadawa wasu'u'wa na, tō sena 're hāimana za'ra mono ō di. Sadawa nhipese na, te tō te 're romhuri za'ra, Zezusihi zadawa wasu'u'wa newa, da te āma 're rosa'rata wē za'ra mono da, dasima.

¹⁴ Tō ĭbāre, te ta norī hā āne hā te te 're 'manharī za'ra. E marī wa. Satanasihī nhimiroti na si, te te dama 're romhuri za'ra mono wa, ta norī hā. Duré Satanasihī ma hā waihu'u pese di, tihāiba na rowa'a na dama 're ĭsihāi'ré mono da hā, hāiwa āma 'Re ĭhāimana u'āsi mono ma romhuri'wa newa, da te āma 're saze za'ra mono da.

¹⁵ Taha wa, tō ĭbāre te za tāma ĭromhuri'wa norī hā ĭsadawa para, sadawa nhipese na dama 're hāimana za'ra, 'Re ĭhāimana u'āsi mono ma, romhuri wē 'wa, 're hāimana za'ra mono newa, da te āma 're ĭrosa'rata wē za'ra mono zéb da hā, dasima. Taha wa, ta norī hā tiwasédé te te 're ĭ'manharī za'ra mono zéb zarina, te za tō 'Re ĭhāimana u'āsi mono hā te te 're ahā za'ra.

Paru hā te te 're ĭrobzépata mono zé wasu'u

¹⁶ Āne wa za ĭsiwasu'u na āma aima sahu za'ra wa'wa. ĭnhimiromhuri wē na, aima ĭsiwasu'u za'ra wa'aba mono nherē, ĭnhimiza'rese āna 're ĭhāimana mono zém na, ĭāma rosa'rata za'ra wa'aba ō di za. Tane nherē, āté te za tō āne na ĭāma ĭrosa'rata za'ra wa'wa, ĭnhimiza'rese ō na 're ĭhāimana mono zém na hā. Āne wa, te za tō asiwi ĭwē'ō za'ra wa'aba āna, ĭwapari pese za'ra wa'wa, Wanhib'apito wasu'uwē na te dama 're ĭromhuri wē mono zém na hā aima ĭsiwasu'u za'ra wa'aba da. 'Re ĭhāimana u'āsi mono zadawa wasu'u uptabi ō 'wa norī, aima 're siwasu'u pari za'ra wa'aba mono nherē, wa za tō aima ĭsiwasu'u za'ra wa'wa.

¹⁷ Ātē Wanhīb'apito te te ĭma ĭwaihu'uzéb zarina, aima ĭsiwasu'u za'ra wa'aba ō di, āhā na hā. Ātē danhimiza'rese āna 're ĭdahāimana za'ra mono zéb zarina si, wa za aima ĭsiwasu'u za'ra wa'wa, ĭnhimiromhuri wē na hā.

¹⁸ Nī'wam norī hā te Wanhīb'apito wasu'uwē na te te dama 're ĭromhuri wē za'ra mono zém na hā aima 're siwasu'u za'ra wa'wa, āma 're ĭwēsāmri za'ra wa'aba mono zéb da hā. Tane, wa za duré wa hā aima ĭsiwasu'u za'ra wa'wa, Wanhīb'apito wasu'uwē na te dama 're ĭromhuri wē mono zém na hā, asiwi ĭwaihu'u za'ra wa'aba da.

¹⁹ A norī wa'wa hā asimiza'rese sina 're ĭaihāimana za'ra wa'aba mono zém na, 'rāwi 're asi'madā'ā ze za'ra wa'aba mono nherē, e niha te bété simiza'rese āna 're ĭhāimana za'ra mono norī nhimiroti si, 're ĭwapari pese za'ra wa'aba mo, asiwi 're wē'ō za'ra wa'aba mono āna. Tane duré, wa hā ĭnhimiza'rese āna 're ĭhāimana mono di pā, te za pé ĭzama asiwi ĭwapari pese za'ra wa'wa duré.

²⁰ Nī'wam norī hā ma tō 're ĭhāimana za'ra mono zéb zarina, 're aihāimana za'ra wa'aba mono da, te te aima 're 'rui u'āsi za'ra wa'wa, ta norī zadawa para si, uburē marī hā 're ĭmanharī za'ra wa'aba mono zéb da si. Tane nherē, asiwi 're wē'ō za'ra wa'aba mono ō di, ta norī hā. Sadawa nhipese na, aiwi 're sipsaihuri u'āsi za'ra wa'aba mono nherē, duré ta norī ma si, 're aihāimana za'ra wa'aba mono da, te te 're aiwaibui wa'aba mono nherē, e niha bā bété, asiwi wē'ō za'ra wa'aba ō di. Ta norī si, aima pire na 're hāimana za'ra wa'aba mono newa, 'rāwi 're si'madā'ā ze za'ra mono nherē, duré te te ai'āma 're wasété za'ra wa'aba mono da, atob'rata wi te te 're aihā za'ra wa'aba mono nherē, e asiwi 're wē'ō za'ra wa'aba mono āna bété.

²¹ Wa hā āne, te aima 're ĭmanharī za'ra wa'aba mono da hā, ātē aré sada ĭnhīb'uware di. Ta norī si tinhimirosa'rata na sina 're siptete za'ra mono di, āne te te aima 're ĭrob'manharī wasété za'ra wa'aba mono zéb da hā. E āne da, 're ĭhāimana mono bā, wa hā. Mare di.

Ta norī hā marī wasu'u wē na, dama 're ĭsiwasu'u za'ra mono zém na hā te te siwi āma ĭwabzu za'ra ō di, Wanhīb'apito wasu'uwē na te dama 're ĭromhuri wē mono zém na hā. Tane nherē, wa hā āne na aima ĭsiwasu'u za'ra wa'aba 'wa'āhā, ātē tō ĭnhimiza'rese'ō ne, wa aré aima 're ĭhāimana za'ra wa'wa.

²² Zezusihi zadawa wasu'u'wa newa, tō senai'ō na te te aima 're ĭroti za'ra wa'aba mono norī hā te sina aima 're wata za'ra wa'wa, ebreusi na 're ĭhāimana za'ra mono na hā, duré Izarazéhé nhihudu 're ĭhāimana za'ra mono na hā, duré Abra'āhā nhihudu 're ĭhāimana za'ra mono na hā. Tane, wa duré wa hā ebreusi na 're ĭhāimana, duré Izarazéhé nhihudu, duré Abra'āhā nhihudu, āne hā aiwa tō wama za'ra hā.

²³ Cristuhu ma romhuri'wa na, te duré ta norī hā aima 're siwasu'u u'āsi za'ra wa'wa. Tane nherē, wa hā ta norī nhipai u, Cristuhu ma romhuri'wa na 're ĭhāimana. (Ātē ĭnhimiza'rese ō na 're ĭhāimana mono na, ĭ'āma rosa'rata za'ra wa'aba da nherē, wa za tō āne na aima ĭsiwasu'u za'ra wa'wa.) E marī wa, wa ta norī nhipai u Cristuhu ma romhuri wē 'wa na 're ĭhāimana. Wa tō te tāma 're romhuri pese uptabi, ta norī nhipai u. Dazazéb 're, ma tō da te dasiwi 're ĭzai u'āsi, ta norī 're ĭhāimana za'ra mono zém nhipai u. Ma tō duré da te dasiwi 're ĭ'ahāri u'āsi, powawē hānhorō na, senai'ō na rowasu'wa norī hā da te dasiwi 're ĭhā za'ra mono zém nhipai u. Āne wa, wa tō aré 're ĭdā'ā u'āsi, te ĭsina 're romnhimimnhasi za'ētē mono wa.

²⁴ ĭsiré zudezu norī hā ma tō duré nimahā na hā te te siwi 're ĭpré'é. Āne hā nimahā bātā na ma tō 5 na ĭzada tiromhāiba. Misi bātā na, 39 na da te dasiwi 're ĭpré'é mono zé hā, zudezu norī hā te te sima 're ĭrob'manharī za'ra mono zéb zarina.

²⁵ Romanu norī hā ma tō duré te te siwi 're ĭpré'é, wedehu na. Āne hā nimahā bātā na si'ubdatō oto, ĭzada ĭromhāimana wasété zé hā. Ētē na ma tō duré dasiwi ĭhā ni, da te dasiwi āma ĭwīri da. Duré, uba're hā ma tō ĭré āzé, ā 'rowi, ā sisasi hā sa'ētē wa. Āne, taha na si'ubdatō te ĭrobzépatazé hā duré. Āne hā uba're hā misi ā na ĭrē sipo'opese wamhā, bātā na wa tō ā poré wa'wa ĭhāimana, bātā bāre, mara bāre duré.

²⁶ Daro mono bā 're ĭmorī ré hā, ĭma romnhimimnhasi uptabi nherē, wa tō āpré na te 're saprī, panho'ōmo na hā. Duré danhipsaihuri ahā di, bādādi na hā, danhibrob zō dapārī'wa norī hā. Nī'wam norī hā ĭsiré zudezu norī 're hāimana za'ra mono nherē, ma tō ĭzada 're hāimana wasété u'āsi za'ra, zudezu'ō norī zama. 'Ri nho'ōmo mono bā, ma tō duré da te dasima 're ĭ'ru za'ra, niha da te ĭma 're rob'manharī za'ra mono da. A'ubuni wi 're ĭmorī ré hā, ĭsina romnhimimnhasi na, wa tō duré 're ĭhāimana, ā poré na zama 're ĭmorī ré hā. Nī'wam norī hā tō sena Cristuhu zazei'wa 're hāimana za'ra mono newa, ma tō duré ĭzada 're hāimana za'ra, ta norī zama. Taha wa, ĭsina romnhimimnhasi uptabi nherē, wa tō 're ĭhāimana u'āsi.

²⁷ Duré āma 're ĭhāimana mono zéb da hā, wa tō te ĭsima 're romhuri pese, ĭnhīb'rata na. Bātā ahā na ma tō duré ĭnhotō āna ĭ'āma 're awē. Mram na zama te robzépata ahā di, 'rubu

na zama. Īsai āna te 're ĩromhuri mono zém na hā, wa tō duré te 're robzépata. Ī'uzā āna 're ĩhāimana mono zém na zama, wa tō duré te 're robzépata.

²⁸ Tane nherē, taha si ō di, te 're ĩrobzépata mono zé hā. Awē sidāpāsi, wa ĩpē'ē na te 're robzépata u'āsi, daro mono bā ĩsazei'wa norī, siré 're ĩsi'rā'ōtō mono norī āma, te āma 're rosa'rata u'āsi za'ra mono wa. Ta norī āma 're ĩhātā'ā za'ētē za'ra mono di duré.

²⁹ Ni'wam norī hā ĩsazei'wa norī hāimanazéb 're, sib'uware na 're ĩhāimana za'ra mono norī āma hā, e niha wa za te āma 're rosa'rata za'ra. Ta norī āma hā wa za tō āma 're ĩpē'ēzē za'ra. Duré ni'wam norī hā tisiré nħimi'manharī waseté zarina, tiwasété na 're si'marōpārī za'ra mono 'ru te, wa za sada 're ĩhāimana za'ra, tiwasédé te te 're ĩ'manharī 'rata za'ra mono norī zada hā, ta norī hā po're āna 're hāimana za'ra mono wa.

³⁰ Āté niwapsi, wa za tō āne na hā aima ĩsiwasu'u za'ra wa'wa, uburé marī na te 're ĩrobzépata mono zém na si, taha zarina, marī da hā, ĩsi'uihā na ĩnhib'uware na 're ĩhāimana mono zém na, asiwi ĩwaihu'u za'ra wa'aba da.

³¹ 'Re ĩhāimana u'āsi mono hā, Wanhib'apito Zezusihi mama hā, taha ma si ĩwaihu'u pese di, ĩzadawa nhipeše āna aima ĩsiwasu'u za'ra wa'aba zém na hā za. Taha āma si, wa za 're wawata u'āsi za'ra, wa norī hā.

³² Uburé marī da, ĩsi'uihā na ĩnhib'uware na 're ĩhāimana mono zém na hā wa za aima āma ĩsiwasu'u za'ra wa'wa. Damasitu na 'ri nħo'ōmo nħisi āma ĩnhama ré, apito Aretaha zapari da'madā'ā'wa hā ma tō damrami'wa norī ma ĩ'ru, 'ri nħo'ōmo 'wawi wa'ra, 'ridawa nħitob za'ētē mono bā, te te ĩzō rob'madā'ā za'ra mono da, te te siwi ĩsāmri wa, te te siwi ĩ'āri da.

³³ Tane nherē, ni'wam norī hā ma tō si'ōtō na siwi ĩ'āma si'ra, 'ri nħo'ōmo 'wawi wa'ra zadazāri hawi. Taha wa, wa tō rowē na dawī watobro rob u, da'wapéi'wa norī wi hā.

12

Paru hā, sōtō 'rowim ne, marī hā te te ĩab'madā'āzé wasu'u

¹ Marī dai ō nherē, wa za duré āne na aima āma ĩsiwasu'u za'ra wa'wa, ĩnhimiromhuri wē na hā. Zezusihi zadawa wasu'u'wa, tō sena 're ĩhāimana mono na, asiwi ĩwaihu'u za'ra wa'aba da. Zezusihi zadawa wasu'u'wa newa, tō senai'ō na te te aima 're ĩroti za'ra wa'aba mono norī hā te sina 're wata za'ra, sōtō 'rowim ne, marī hā ta norī si te te 're sabu za'ra mono newa, danhotō 'rowi, da te 're ĩrosawērē za'ra mono ne. Tane nherē, wa tō duré ĩzama marī ĩwaihu'u'ō hā te 're azabu, ĩnhotō 'rowim ne, Wanhib'apito te te ĩma 're ĩ'awaihu'u mono zéb zarina si.

² Duréhā 'Re ĩhāimana u'āsi mono, ma tō ĩzaprō, hāiwa u, 're ĩsāmra mono zéb u hā. Wa hā Cristuhu zazei'wa. ĩnhotō 'rowim ne, hāiwa u ĩmorizém na hā 14 na ma tō ĩ'āma tiwahu oto. Āté ĩhāiba u'āsi na, wa tō wi. Āté ĩpē'ēzani na si. Wa hā ĩsiwaihu'u ō di. 'Re ĩhāimana u'āsi mono ma si, waihu'u pese di, āne hā.

³⁻⁴ Āne na hā 'rāwi āma ĩsiwaihu'u ō di tō, wa hā. Āté ĩpē'ēzani na si, wa wi, tō. Āté ĩhāiba wahurē. 'Re ĩhāimana u'āsi mono ma si, āne hā tāma waihu'u pese di. Āne si, wa tō wa hā ĩsiwaihu'u. Rowē uptabi u hā wa tō wi, tō. Tame rowasu'u ĩwē uptabi hā wa tō te awapari, ĩsi'uihā na. Rowasu'u wē uptabi wa, damreme na ĩ'uwaibaba da te dasima āma 're ĩrowasu'u za'ra mono zéb da hā, da te dasima āma 're uwaimrami waihu'u za'ra mono ō di.

⁵ Āne na ĩma romhāimana wamhā, āté ĩbāre, wa aré aima ĩsiwasu'u za'ra wa'wa, 'Re ĩhāimana u'āsi mono te te ĩwēsāmrizém na hā. Tane nherē, taha na aima ĩsiwasu'u za'ra wa'aba ō di za. ĩsi'uihā na marī da, ĩnhib'uware na 're ĩhāimana mono zém na si, wa za aima ĩsiwasu'u za'ra wa'wa, asiwi āma ĩwaihu'u za'ra wa'aba da hā.

⁶ Āne na ĩma ĩromhāimanazém na aima ĩsiwasu'u za'ra wa'aba da, te ĩsina rosa'rata 'wa'āhā, e ĩnhimiza'rese'ō ne, wa aré aima ĩsiwasu'u za'ra wa'wa. Mare di. E marī wa. Tō sena, āne na aré aima ĩsiwasu'u za'ra wa'aba wa. Tane nherē, taha na aima ĩsiwasu'u za'ra wa'aba ō di za. ĩnhimiromhuri hā 're ĩ'madā'ā za'ra wa'aba mono zéb zarina si, duré ĩnhimiroti hā aipo're na 're ĩwapari za'ra wa'aba mono zéb zarina si, te za ĩhāimanazém na ĩ'āma 're ĩrosa'rata za'ra wa'aba mo, asima.

⁷ Danhotō 'rowi, da te 're ĩrosawērē za'ra mono ne, wa tō marī ĩwē uptabi hā te ab'madā'ā tō, ĩnhotō 'rowi te ĩrosawērē ne. Taha wa, danhipai u dama ĩpire newa, 'rāwi āma 're ĩsi'madā'ā zeī mono tō da, ma tō 'Re ĩhāimana u'āsi mono hā ĩma pisutu, ĩhāiba na te tō 're robzépata mono da, marī na, ro'wa hā te te 're dahāzu mono wa, da'āma 're 'wasi'ē za'ra mono wa, da'āma 're ĩsēpu'u siroptub za'ra mono ne. Taha zarina, te tō Satanasi hā te te 're ĩpibui u'āsi, te āma 're ĩrobzépata u'āsi mono zéb da hā. Tane nherē, 'Re ĩhāimana u'āsi mono hā te te tiwi 're ĩzawi mono ō di, āne na te te 're ĩpibu tō mono da hā. E marī wa. Dama ĩpire newa, 'rāwi te ĩsina 're rosa'rata tō mono da.

⁸ Taha wa, wa tō si'ubdatō Wanhīb'apito wi hā ĩsima rowaptē, tō ōhō na te 're ĩrobzépata mono zém na hā ta hā simisaré te te ĩ'ama sizāri da, te āma 're robzépata zahu tō mono da.

⁹ Tane nherē, āne si ma tō nasi ĩma waihu'u asa, te tiwi rowaptērē wamhā: “Te ai'āma sizāri ō di za. ĩnhimizawi pese zéb zarina si, te za 're aihāimana mo. Asi'uihā na marī da hā, asīb'uware na 're aihāimana mono nherē, te za asiptete sina ĩ'ama 're aihāimana mo, ĩnhimipawaptobzéb zarina.” Āne si, ma tō nasi ĩma waihu'u na wa'rā asa, Wanhīb'apito hā. Taha wa, ĩsi'uihā na marī da hā, ĩnhīb'uware na 're ĩhāimana mono zém na si, wa za tō ĩto sina aima ĩsiwasu'u za'ra wa'wa, taha wa'rāmi Cristuhu nhiptetezéb ré si, 're ĩhāimana u'āsi mono da.

¹⁰ ĩsi'uihā na marī da hā, ĩnhīb'uware na 're ĩhāimana mono nherē, duré Cristuhu ma, te 're romhuri mono wa, da te ĩ'ama 're wasété za'ra mono nherē, duré ĩma ropire na 're ĩhāimana mono nherē, duré da te ĩma 're rob'manharī wasété za'ra mono nherē, duré marī na te 're robzépata mono nherē, wa ĩto sina 're ĩhāimana u'āsi. E marī wa. ĩsi'uihā na marī da hā, ĩnhīb'uware na 're ĩhāimana mono nherē, wa za taha wa'rāmi, ĩnhiptete sina 're ĩhāimana, Cristuhu nhimipawaptobzém na si.

Corĭtu āma ĩsazei'wa norĭ āma, Paru hā ĩhātā'ā za'ra zé wasu'u

¹¹ Cristuhu zadawa wasu'u'wa na, asiwi ĩwaihu'u za'ra wa'aba ō wa, wa tō ĩnhimromhuri wē na si aima ĩsiwasu'u za'ra wa'wa, āne hā te ĩsima wē ō nherē. Āté ĩnhimiza'rese'ō ne, wa tō āne na aima ĩsiwasu'u za'ra wa'wa, a norĭ wa'wa hā dama 're ĩwasu'u wē za'ra wa'aba mono ō 'ru te. 'Re ĩhāimana u'āsi mono te te 're ĩpawapto mono ō 'wa'hā, aré marī dai ō di, 're ĩhāimana mono zé hā tō. Tane nherē, Zezusihi zadawa wasu'u'wa newa, senai'ō na te te aima 're ĩroti za'ra wa'aba mono norĭ ma, ĩwapu na tāma 're ĩhāimana za'ra mono ō di.

¹² Ai'rata ĩnhamra aba ré, wa tō ĩnhimĭē na marī dama ĩ'manharī waihu'u'ō hā aima 'manharī za'ra wa'wa, Zezusihi zadawa wasu'u'wa norĭ nhimromhuri na. Āne zarina, te za sena na Zezusihi zadawa wasu'u'wa na asiwi ĩwaihu'u za'ra wa'wa.

¹³ E tawamhā ai'upana wa'aba si, wa tō darob amoi āma ĩsazei'wa norĭ 're ĩhāimana za'ra mono norĭ hā te 're apawapto pese, ta norĭ si'ĩma sawi pese za'ra wa. Mare di. E marī na, wa tō bété a norĭ wa'wa hā ai'mararé za'ra wa'wa, sena Zezusihi zadawa wasu'u'wa na asiwi ĩwaihu'u za'ra wa'aba ō zéb da hā. Āté asimarĭ aba zō, te 're aiwasutu za'ra wa'aba mono ō zém na si, wa tō ai'mararé za'ra wa'wa, ai'rata ĩnhamra aba ré hā. Ma'āpé, āne na ĩwasédé hā te aima 'manharī wasété za'ra wa'aba ze te bā, ĩma pari za'ra wa'aba.

¹⁴ Si'ubdatō āma, wa za oto āma atēme ĩmorĭ 'wa, te duré asabu na sahu za'ra wa'aba da. Tawamhā, āma atēme ĩmorĭ aba wamhā, asiwi ĩpawa'ābā aba da, te aiwi rowaptērē za'ra wa'aba ō di za, asimarĭ zō, āma atēme ĩmorĭ aba ō wa za. Taré Cristuhu wasu'u'wē na te aipawapto za'ra wa'aba da si, wa za tō āma atēme ĩmorĭ 'wa. E damama norĭ ma, te za da'ra norĭ hā te te 're ubumroi pese za'ra, dasazé hā. Mare di. Damama norĭ si, te za te 're rob'ubumroi pese za'ra, ti'ra sazéb da hā. Tane duré wa hā, aimama aba ne, aima 're ĩhāimana za'ra wa'aba mono wa, te 're aipawapto za'ra wa'aba mono da si, wa tō te ai'āma 're rosa'rata u'āsi za'ra wa'wa, ĩsima. Taha wa, asiwi ĩpawa'ābā aba ō di za.

¹⁵ Tawamhā, āma atēme ĩmorĭ za'ra wa'aba wamhā, ĩto sina, wa za uburé ĩnhimarĭ hā uprosi, te āma aipawapto za'ra wa'aba da, te āma ĩ'āri hā za. Taha da, wa za duré aima romhuri pese za'ra wa'wa, ĩwasutu uptabi nherē. Āne na hā ĩma asawi pese za'ra wa'aba nherē, e te za duré ĩzawi za'ra wa'aba zém na hā ĩwi asisawi za'ra wa'wa, aiwétési.

¹⁶ Asiwi ĩpawa'ābā za'ra wa'aba da, te aiwi ĩrowaptērē za'ra wa'aba ō na, ma tō asina ĩwaihu'u za'ra wa'wa tō. Tane nherē, ma tō ni'wam norĭ hā rosa'rata na ĩ'ama upa za'ra, rob'uiprazé hā ĩzadawa nhipese na te aiwi ĩ'ubumroi wa'aba na hā. E āne hā ĩ'uiwaibaba. Mare di. ĩ'uiwaibaba ō di.

¹⁷ Wasisānawā norĭ hā, ĩzadawa para āma atēme si'aba'rēi wa'aba da, te āma ĩsatōrĭ za'ra hā e ma tō aima sadawa hapese za'ra wa'wa, rob'uiprazém na. Mare di. Āne na hā aima sadawa nhipese za'ra wa'aba ō di, ta norĭ hā.

¹⁸ Titu hā bété. Ta hā wa tō duré āma atēme satōrĭ 'wa, āma atēme morĭ aba da. Wasisānawā hāiba amo hā wa tō duré āma ĩsiré satō. E Titu hā ma tō tawamhā aima sadawa hapese 'wa, asimarĭ aba zō hā. Mare di. Tane duré, wa hā 're ĩhāimana mono zé hā. Aiwapsi wahāimanazé hā, rob'uiprazém na aiwi 're ĩwanhimisaihuri aba mono ō na hā.

¹⁹ E taré wa'āma 're rosa'rata wē za'ra wa'aba mono da, wa āne na aima wasiwasu'u za'ra wa'aba ni. Mare di. Cristuhu zazei'wa oto 're wahāimana mono wa, wa āne na aima wasiwasu'u za'ra wa'aba ni, 're ĩhāimana u'āsi mono nho'a. Wasisānawā norĭ, wama asawi pese za'ra wa'aba norĭ hā, wa te 're aipawapto za'ra wa'aba mono da si, wa tō uburé marĭ hā wa te 're ab'manharĭ, asiptete sina Cristuhu āma si 're anomro aba mono da oto.

²⁰ Ai'āma 're ĩhātā'ā za'ra wa'aba mono sina, wa tō ai'āma te 're rosa'rata u'āsi za'ra wa'wa, za āma atēme ĩmorī aba na dā'āsina, duré 're aihāmana za'ra wa'aba mono zém na, za te aiwēsāmri za'ra wa'aba ō na dā'āsina. Áté a norī wa'wa hā te za duré asiwi ĩwē'ō za'ra wa'wa, za āma atēme ĩmorī za'ra wa'aba wamhā. Áté āhāna hā te 're asisada'ābā u'āsi za'ra wa'aba mo 'rāwi. Áté te duré marī na 're asiruiwapari za'ra wa'aba mo. Áté te duré asisada 're asitī'ru za'ra wa'aba mo. Áté asi'āma si te duré 're ĩrosa'rata za'ra wa'aba mo. Áté te duré asi'āma 're ĩwasété za'ra wa'aba mo. Áté te asima 're ĩdabāsi wasété za'ra wa'aba mo. Áté dama aipire newa, te duré 'rāwi 're asi'madā'ā ze za'ra wa'aba mo. Áté siwa'ru te duré 're aihāmana za'ra wa'aba mo. Āne na 're aihāmana za'ra wa'aba mono ō'umnhasite, wa ai'āma 're ĩhātā'ā u'āsi za'ra wa'wa.

²¹ Āma atēme ĩwisi aba wamhā, áté ĩpē'ézé te, wa za aiwa'ō, ai'āma ĩpē'ézé uptabi za'ra wa'aba wa. Duréihā ai'ahā na ma tō aiwasédé hā 're ĩ'manharī za'ra wa'aba mo aré. Ma tō duré asina 're asipsaihuri za'ra wa'aba mo, pi'ō na, aibā na zama. Asiséb āna, ma tō marī ĩwasétére zō si asima 're asōpře za'ra wa'aba mo. Āne na aiwasédé hā 're 'manharī za'ra wa'aba mono nheré, aiwasété wi 're aipizari za'ra wa'aba mono ō wa, áté te za ĩwi tĩrobzei'ō pese. Taha wa, áté ĩnhiséb di za, ĩnhĩb'apito ma hā, 'Re ĩhāmana u'āsi mono ma hā, ai'āma za'ra wa'aba hā.

13

Paru hā roti na te te ĩrāsutuzém na rowasu'u

¹ Si'ubdatō āma, wa za oto ĩmorī na āma atēme sahu za'ra wa'wa, te asabu za'ra wa'aba da. Duréihā Mozési hā ma tō āne na ĩbaihā na rob'ui'ére, 'Re ĩhāmana u'āsi mono nhimiroti na hā: "Ni'wam norī da, 're dawasété za'ra mono wamhā, maparane dahāiba ma, te za 're siwasu'u za'ra, ta norī hā danho'a te te 're sadawa waptob za'ra mono da, tāma 're ĩsiwasu'u za'ra mono zém na hā." Āne duréihā 'Re ĩhāmana u'āsi mono nhimiroti na rob'ui'ére hā. Tawamhā, wa hā āma atēme ĩmorī aba wamhā, taha zarina, wa za tō sena zarina, aiwasété za'ra wa'aba na hā aiwaihu'u za'ra wa'wa.

² Maparane āma, atēme āma ĩmorī aba wamhā, wa tō aima waihu'u sirōmo za'ra wa'wa, aiwasédé 're ĩ'manharī u'āsi za'ra wa'aba mono norī, za te ĩ'aihā za'ra wa'aba zém na hā. ĩnhimi'ui'ére na, wa za oto āne na aima āma sahu za'ra wa'wa, asiti wa'aba ĩhāmana nheré. Āma atēme ĩmorī aba wamhā, ĩnhimi'ahārizé hā te aima ba'a za'ra wa'aba ō di za, aiwasédé 're ĩ'manharī u'āsi za'ra wa'aba mono norī ma hā, duré ĩza'u si tiwasété zō 're ĩsipizari za'ra mono norī ma zama.

³ Sena na Cristuhu zadawa para, te aima 're ĩrowasu'u za'ra wa'aba mono na, asiwi ĩwaihu'u za'ra wa'aba da, ma tō āne na asima ĩ'āma ĩrosa'rata za'ra wa'wa. Tane tō wē di, ĩma hā. Āma atēme ĩmorī aba wamhā, Cristuhu zadawa para, wa za tō aihā za'ra wa'wa. Tawamhā, áté te za oto asiwi ĩwaihu'u za'ra wa'wa, sena na Cristuhu zadawa para, te aima 're ĩrowasu'u za'ra wa'aba mono na hā. Cristu hā niha te te aima ĩrob'manharī za'ra wa'aba zéb da hā, e sib'uware di, asada za'ra wa'aba hā za. Mare di. Siptete uptabi di ta hā, te te ĩ'aihā za'ra wa'aba zéb da hā.

⁴ Cristu hā wedepo'o nhonhi'rāmi na, da te dasiwi sasōmri wamhā, ĩhāiba hā sib'uware di. Tane nheré, 'Re ĩhāmana u'āsi mono nhiptetezém na ma tō apā hāiwa'udu, 're hāmana u'āsi mono da oto. Tane, wa tō duré wa norī hā wanhĩb'uware na 're wahāmana. Tane nheré, 'Re ĩhāmana u'āsi mono nhiptetezém na, wa duré 're wahāmana, Cristuhu ne. Taha zarina, wa za niha aima rob'manharī za'ra wa'aba ni, wasi'uihā nai ō nheré.

⁵ Aipē'e 're, te za a'ā 'rāwi asi'madā'ā za'ra wa'wa, ĩsazei'wa norī hāimanazéb zarina, tō sena 're aihāmana za'ra wa'aba mono zō. Āne na asina tāma 're uwaimrami za'ra wa'aba mono wamhā, Zezu Cristu, aipē'e 're, 're ĩsāmra aba mono na, te za asina ĩwaihu'u za'ra wa'wa. E āne hā asina 're waihu'u za'ra wa'aba mono ō di bété. Tane nheré, Cristu hā aipē'e 're, 're sāmra aba mono ō wamhā, asina tāma 're ĩuwaimrami za'ra wa'aba mono ō na, te za asina ĩwaihu'u za'ra wa'wa, asi'uihā na.

⁶ Wa hā wa āma ĩsima aiwé za'ra wa'wa, āma atēme ĩmorī aba wamhā, asiwi waihu'u za'ra wa'aba da, 'Re ĩhāmana u'āsi mono zadawa wasu'u'wa norī 're ĩhāmana za'ra mono zém na, wa te wasina āma ĩuwaimramizém na hā.

⁷ Wa duré 're wamreme u'āsi, ai'āma za'ra wa'aba, 'Re ĩhāmana u'āsi mono ma, ta hā te te 're aipawaptob u'āsi za'ra wa'aba mono da, marī ĩwasétére hā 're 'manharī za'ra wa'aba mono tō da. E ai'āma za'ra wa'aba, wa te 're ĩromhuri mono na, da te dasiwi 're wawēsāmri mono da, wa āne hā ai'āma 're wamreme u'āsi za'ra wa'wa. Mare di. Taré a norī wa'wa hā ĩwē si oto 're 'manharī u'āsi za'ra wa'aba mono da si, wa ai'āma 're wamreme u'āsi za'ra wa'wa, 'Re ĩhāmana u'āsi mono ma hā. ĩwē si tō 're 'manharī za'ra wa'aba mono wamhā, wa te aihā za'ra wa'aba ō di za. Āne wamhā, áté te za āne na wa'āma ĩrosa'rata za'ra wa'wa,

asima: “Oro Paru norī hā, Zezusihi zadawa wasu'u'wa, tō sena 're hāimana zahuré mono za, te te wahā za'ra ō di.” Áté āne na te za wa'āma ĩrosa'rata za'ra wa'wa. Tane nherē, wama wē di tō, ĩwē si tō 're 'manharī u'āsi za'ra wa'aba mono wamhā.

⁸ Cristuhu wasu'uwē hā tō sena uptabi hā, ni'wa hā te te dawī pari waihu'u ō di, dama siptete uptabi wa, ĩwasu'uwē hā. Taha zarina si, wa za tō 're wahāimana, wa norī hā, 'rāwi wa te wasiwi 're wē'ō mono āna.

⁹ A norī wa'wa hā tō sena Cristuhu āma asiptete sina 're anomro wē wa'aba mono wamhā, wa za tō aima 're wato za'ra wa'wa. Āne wamhā, Cristuhu zadawa para, wa te aihā za'ra wa'aba ō di za. Wa te aihā za'ra wa'aba ō wamhā, áté ni'wam norī hā te za wa'āma sima rosa'rata wasété za'ra, wawē'ō'wa norī hā, aima wapahi za'ra wa'aba na hā. Tane nherē, wē di tō wama hā, tō sena Cristuhu āma si oto 're anomro wē wa'aba mono wamhā.

¹⁰ Āne wa, wa asiti ĩnhamra aba ré, aima āma rob'ui'ére za'ra wa'wa, za āma atēme ĩwisi aba wa, asō'a te aima nharī za'ra wa'aba tō da, Wanhib'apito zadawa para te te ĩma ĩpisutuzéb zarina. Ma tō ĩma pisutu tō, ĩsadawa para si te 're aipawapto wē za'ra wa'aba mono da. E tawamhā ĩnhimipawaptozbéb zarina, āma 're anomro wē wa'aba mono zé hā te aiwi 're uprosi za'ra wa'aba mono da, ma tō āne hā ĩma pisutu. Mare di. Taré ĩsadawa para si, te 're aipawapto wē za'ra wa'aba mono zéb zarina, asiptete sina āma 're anomro aba mono da si, ma tō ĩma pisutu tō, Wanhib'apito hā.

¹¹ ĩsisānawā norī, ĩnhimi'ui'ére na wa za oto aima āma 'rāsutu za'ra wa'wa. 'Re aihāimana wasété za'ra wa'aba mono zé hā te za oto ĩrēme pese za'ra wa'wa. Te aima 're ĩroti za'ra wa'aba mono zé hā te za 're ĩwapari pese za'ra wa'aba mo. Taha wa, te za simisutu asimirosa'rata na 're asisazei pese za'ra wa'aba mo. Rowē na si asiré 're aihāimana u'āsi za'ra wa'aba mono da, te za duré asina 're ĩrosa'rata wē u'āsi za'ra wa'aba mo. Āne wamhā, 'Re ĩhāimana u'āsi mono hā ĩsimizawi pe hā, te za 'rāwi asiré 're hāimana u'āsi za'ra wa'wa, dama rowē nhomri'wa hā.

¹² Taha wa, te za uburé asiré ĩsazei'wa na 're aihāimana za'ra wa'aba mono wa, asō'utu na asisawi sina 're asitob'rata hārā za'ra wa'aba mo.

Āme, 'Re ĩhāimana u'āsi mono nhib'a'uwē 're ĩsi'ubumroi mono norī hā te āma asawi za'ra wa'wa, uburé.

¹³⁻¹⁴ Wanhib'apito Zezu Cristuhu ma, wa ai'āma 're ĩmreme u'āsi za'ra wa'wa, ta hā te te 're asawi pese za'ra wa'aba mono wa, te te 're aipawapto u'āsi za'ra wa'aba mono da. 'Re ĩhāimana u'āsi mono hā tinhimizawi pese zéb zarina, ĩwē si te te aima 're pisutu za'ra wa'aba mono da, wa duré ai'āma tāma 're ĩmreme u'āsi za'ra wa'wa, duré ĩp'ēzani hā te te 're aipawapto u'āsi za'ra wa'aba mono da, simisutu āma 're anomro wē wa'aba mono da, taha āma si.

Darasiza nori **Darasiza nori ma, Paru te te ĩrob'ui'érézé** **Ĩbahiã wasu'uzé**

Zezusi hã hãwa u apã ĩmorĩzéb u hã, zudezu nori si ma tã ĩsimirowasu'u na te te 're saze za'ra. Ta nori si te uburé sihãiwata nhĩhãri ré 're hãimana za'ra, 'Re ĩhãimana u'ãsi mono hã Abra'ãhã ma, te te ĩpisutuzéb zarina. Zezusi hã hãwa u apã mori za'u si, ma tã ĩwasu'uwé hã datême ropé, zudezu'õ nori u hã, ĩsihãiwata nhĩhãri'õ nori u hã.

Ni'wam nori hã zudezu nori hã Darasiza na danhipti'a nho'õmo nhisi ãma 're ĩsi'ubumroi mono nori hã ma tã Paru hã zudezu'õ nori ma wasu'u za'ra, ĩsimiroti na te te ãma ĩ'uwaĩrami õ na hã. Ta nori hã ma tã ãne hã dama roti za'ra: 'Re ĩhãimana u'ãsi mono nhimiroti 'rata na Mozési te te ãma ĩrob'ui'éré zama te za da te 're 'madã'ã pese za'ra, te te 're da'awésãmri mono da. Taha da, te za duré 're dasihãiwata nhĩhãri za'ra. ãne na roti hã Paru hã ma tã siwi wé'õ pese. Zezusi hã wazada dã'ã wa, duré taha zarina wawasédé hã te te wama 're aparĩ mono wa, dasihãiwata nhĩhãrizé hã marĩ dai õ di. Zezusihi wapru na si te za te te 're da'a'upsõ, dawasété wi. ãne wa, ma tã Paru hã tãma rob'ui'éré za'ra, Darasiza nori ma hã, aimawi hã te te 're 'manhari za'ra mono tã da, Zezusihi si te te sina 're umnhasi pese za'ra mono da, taha zarina si 'Re ĩhãimana u'ãsi mono pè'ézani hã ĩpè'è 're, 're sãmra za'ra mono da.

¹⁻² Wanhĩb'apito nhĩb'a'uwé nori, daza'rui mono bã Darasiza na danhipti'a nho'õmo nhisi 'remhã 're aihãimana za'ra wa'aba mono nori, wa hã Paru, wa ãma asawi za'ra wa'wa. Uburé wasiré ĩsazei'wa nori hã te duré timreme na ãma asawi za'ra wa'wa, ĩ'rata ĩsi'ubumroi nori hã. ãne wa za ãma aima rob'ui'éré za'ra wa'wa. Wa hã Zezu Cristuhu zadawa wasu'u'wa, wa 're mo, ĩsadowa para. Ni'wam nori hã te te siwi ĩpisutu õ di, dazadawa para ĩsadowa wasu'u'wa na 're ĩhãimana mono da. Mare uptabi di. Zezu Cristuhu si ma tã Wamama me si, sima ĩpisutu zahuré, ab're hawi ti'ra hãwa'utu'wai me.

³ Wamama ma, wa ai'ãma 're ĩmreme u'ãsi za'ra wa'wa, 'Re ĩhãimana u'ãsi mono ma, duré Wanhĩb'apito Zezu Cristuhu ma zama, ĩsimizawizé hã ai'ãma 're hãimana u'ãsi za'ra wa'aba mono da, rowé u'ãsi, ãma 're anomro aba mono da.

⁴ Wanhĩb'apito 'Re ĩhãimana u'ãsi mono te te tãma ĩwézéb uwaibaba, ma tã Zezu Cristu hã wazada sisõ, wazada dã'ã da, te te wa'awa'ãbã da, 're wanomro wasété mono wa, 'Re ĩhãimana u'ãsi mono te te wahã za'ra tã da, rob'rãsutuzéb ãma hã, duré dapo're'õ na 're ĩdanomro mono nori ne, 're wanomro u'ãsi tã mono da.

⁵ Wamama hã wé uptabi wa, ãma 're wawata u'ãsi za'ra wa'aba mono.

Aimawi rowasu'u hã Wanhĩb'apito wasu'uwé ne, aiwa 're 'maiãhãimana mono õ na rowasu'u

⁶ ãhãna wa ai'ãma ĩtob'uzu za'ra wa'wa. E marĩ wa. Tãma asawi uptabi za'ra wa'aba wa, ma tã Cristu hã asõ'reptu za'ra wa'wa. Taha zarina, 'Re ĩhãimana u'ãsi mono hã ma tã sima aipisutu za'ra wa'wa, ĩsib'a'uwé si oto 're anomro aba mono da. Tane nheré, ma tã aiwara sina, 'Re ĩhãimana u'ãsi mono wi 're aipizari za'ra wa'aba mo, asimirosa'rata na, aimawi rowasu'u hã Cristuhu wasu'uwé me aiwam newa.

⁷ Aimawi rowasu'u hã Cristuhu wasu'uwé me, aiwa 're hãimana mono õ di. Mare uptabi di. E marĩ wa, wa tã ãne aima waihu'u za'ra wa'wa. Ni'wam nori hã ma tã sima wé za'ra, Cristuhu wasu'uwé upana te te ãma sapri za'ra da, aimawi rowasu'u u. Ta nori hã ma tã aimawi tinhirowasu'u na aiwi ro'wa'rutu za'ra wa'wa.

⁸ Wa nori hã wa tã aima rowasu'u za'ra wa'aba ni, Zezu Cristuhu wasu'uwé na. Tane nheré, nimahã na Cristuhu wasu'uwé upana, wa te dama 're rowasu'u za'ra mono wamhã, te za 'Re ĩhãimana u'ãsi mono hã te te 're wa'awé'õ pese. Tane duré nimahã na hãwa ãma tãma ĩromhuri'wa nori hã ĩwasu'uwé upana, we te te dama 're rowasu'u za'ra mono wamhã, te za duré te te siwi 're awé'õ pese.

⁹ ãne hã wa tã aima waihu'u za'ra wa'aba ni. Taha wa, wa za duré aima ãma sahu za'ra wa'wa, wa te aima ĩwaihu'u za'ra wa'aba zém na. Ni'wam nori hã wanhirowasu'u zarina si, Zezu Cristuhu wasu'uwé na te te dama 're rowasu'u za'ra mono õ wamhã, te za 'Re ĩhãimana u'ãsi mono hã te te siwi 're awé'õ pese.

¹⁰ E ĩnhimiroti na ĩ'ãma 're ĩdawata za'ra mono zéb zõ, wa ĩsina 're ĩnhimipari. Mare di. 'Re ĩhãimana u'ãsi mono si ĩ'ãma 're ĩwata mono zéb zõ si, wa ĩsina 're ĩnhimipari. Ti'ai ãma ĩ'ãma 're dawata za'ra mono da, 'rãwi ĩsi'uihã na te ĩsina 're rosa'rata mono 'wa'ãhã, Zezu Cristuhu ma romhuri'wa, 're ĩhãimana mono õ di aré.

¹¹ Īsisānawā norī, ma'āpé niha we Ī'āma waihu'u za'ra wa'aba. Ti'ai āma 're Īdahāimana za'ra mono norī nhimirowasu'u zarina ō di, Zezu Cristuhu wasu'uwē te dama 're Īwasu'u mono hā.

¹² Ni'wa āne na hā te te āma 're Īpo're pu'u mono ō di, ti'ai āma wasiré 're Īwahāimana za'ra mono norī hā. Ni'wa hā te te duré Īma 're rowasu'u mono ō di, te Īwaihu'u pese zéb da hā. Mare di. Si'uihā na ma we hāiwa hawi Īma siwaihu'u Zezu Cristu hā, Īwasu'uwē na te Īwaihu'u pese zéb da hā.

Paru hā Wanhib'apito zadawa wasu'u'wa na te te Īsāna'ratazém na Īsiwasu'uzé wasu'u

¹³⁻¹⁴ Wa hā wasiré zudezu norī nhimizazezéb zarina 're Īmorī ré, wa tō Īsima wē upta, wasiré Īwaprédū mono norī nhipai u, wahi'rata norī nhimiroti zarina si, 're Īmorī da. Āne 're Īmorī ré, 'Re Īhāimana u'āsi mono nhīb'a'uwē norī ma, Īwasété na wa tō te 're arob'manharī aré, Wanhib'apito zazei'wa norī ma hā. Wa tō te Īsima 're awē, te 're uprosi mono da. Āne ma tō Īwasu'u wasédé hā 're Īwapari za'ra wa'aba mo.

¹⁵⁻¹⁶ Tawamhā bādā ma tō oto Īwa waptārā, 'Re Īhāimana u'āsi mono ti'ra te te Īma Īwaihu'uzém na, Ī'ra wasu'uwē na si, zudezu ō norī ma, te 're wasu'u mono da. Taha da, Īpoto ō ré, ma tō sima Īpisutu siro, 'Re Īhāimana u'āsi mono hā. Taha wa, tāma Īzawi uptabi wa, ma tō oto Īzō hā, tāma Īromhuri'wa na oto 're Īhāimana mono da.

Tawamhā e'wa hā wa tō sadawa pibu, āne zarina te dama 're Īsadawa wasu'u mono da hā. Mare di. Ni'wa hā āne na te sadawa pibui ō uptabi di.

¹⁷ Duré Zeruzarē u, a'ā Īmorī ō di, Cristu hā tizadawa wasu'u'wa da, Īwana te te sima Īpisutu za'ra norī u, te sabu za'ra da. Mare di. Daza'rui amoi u si, wa tō a'ā mo, Arabiza u. Tame Īnhamra pari, wa tō apā mo, Damasitu na 'ri nho'ōmo nhisi u.

¹⁸ Si'ubdatō ma tō oto Ī'āma tiwahu, Wanhib'apito āma te Īsasōmrizém na hā. Tawamhā Zeruzarē u wa tō oto mo, Pedru hā te hāiba pibu da. Tame ma tō romhuri hā maparane Ī'āma ai'utō, Ī'rata Īnhamra ré.

¹⁹ Pedruhu siré norī hā aihīni te sōpētē za'ra ō di, Cristuhu zadawa wasu'u'wa norī hā. Ti'aduhu si, wa tō sōpētē. Wanhib'apito sisémemhā ta hā.

²⁰ Tō sena, wa rob'ui'éré na aima rowasu'u za'ra wa'wa, 'Re Īhāimana u'āsi mono nho'a.

²¹ Tawamhā Zeruzarē hawi wa tō oto watobro, daza'rui u Īmorī da, Siriza u, duré Sirisiza u.

²² Zahadu te te siwi Īhāiba pibu za'ra ō di, Zezusihī zazei'wa norī hā daza'rui mono bā, Zudeza na danhipti'a nho'ōmo nhisi āma siré 're Īsi'rā'ōtō mono norī hā.

²³ Taré ma tō Īwasu'u wē si te te 're wapari za'ra, ta norī hā. Āne Īwasu'u wē hā: "Paru hā ma tō te te wa'āma 're arowasété aré, Wanhib'apito āma, wa te 're sasōmri tō za'ra mono da. Tane nherē, Zezu Cristuhu wasu'uwē na te oto te te 're da'apawapto, Wanhib'apito āma da te 're sasōmri za'ra mono da." Āne na si ma tō Īwasu'u wē hā te te 're ropé.

²⁴ Taha wa, Wanhib'apito zazei'wa norī hā, 'Re Īhāimana u'āsi mono āma si, te 're wata u'āsi za'ra, te te Īnho'reptui wē te.

2

Ti'adu norī u, Paru norī Īsihutuzé wasu'u

¹ Tawamhā 14 na Ī'āma wahu pari, wa tō apā mo, Zeruzarē u. Tamomo Īmorī wamhā, Banabé hā te Īsiré mo. Titu hā wa duré Īsiré saprō.

² 'Re Īhāimana u'āsi mono hā za apā Īmorizém na, te te Īma waihu'u sirōmo wa, wa tō apā mo. Tawamhā 'ri nho'ōmo u wasihutu wamhā, aibā dama Īpire na 're Īhāimana za'ra mono norī me, wa tō wahāiba pisutu wasi'rā'ōtō ni. Taha wa, wa tō ta norī ma Īsiwaihu'u, zudezu ō norī ma, Wanhib'apito wasu'uwē hā te tāma 're Īwaihu'u za'ra mono zém na. Te te āma Īzaze za'ra zō, wa tō Īnhimirohmurizém na tāma Īsiwasu'u za'ra, te te āma Īzaze za'ra ō wa, taré 're hāimana mono tō da, Īnhimirohmurizé hā.

³ Tawamhā ma tō ta norī hā āma Īzaze za'ra, zudezu ō norī ma, te tāma 're Īrowasu'u za'ra mono zém na. Taha wa, te te siwi pisutu za'ra ō di, Titu hā Īsiré 're Īmorī hā, sizudezu da. Titu hā deredu na Īpodo, zudezu ō. Tane nherē, te te siwi pisutu ō di, sihāiwata nhizāri ré 're morī da, tawapsi sizudezu da. Mare di.

⁴ Ni'wam norī si, zudezu norī hā ma tō Ī'upana sima wē za'ra, Titu hā sihāiwata nhizāri ré 're morī da. Ta norī hā wasiré Wanhib'apito zazei'uptabi 'wa 're nomro mono newa, ma tō hāimana nhipese sina wasiré 're si'rā'ōtō, wapsāi'a ne wahāimanazé ma, te te 're ropibu za'ra mono da, rowē na 're Īwahāimana za'ra mono zéb zō, Cristu Zezusihī āma. Ta norī hā zudezu norī hā, ma tō sima wawē za'ra, Īsine 'Re Īhāimana u'āsi mono nhimiroti 'rata na rob'ui'éré zarina, wa te 're rob'manharī u'āsi za'ra mono da, taha zarina wanho'reptuzé hā wa te wasina 're uwaimrami za'ra mono da newa.

⁵ Tane nherē, ta norī nhimirosa'rata na, wa te āma saze za'ra ō di. Mare uptabi di. Wa tō wasima wē za'ra ni, Zezu Cristuhu wasu'uwē uptabi si, aima 're hāimana za'ra wa'aba mono da. Taha wa, ta norī nhimirosa'rata na hā wa te āma saze za'ra ō di.

⁶ Dama ĩpire za'ra norī ma, ĩnhimirohmurizém na tāma ĩsiwaihu'u za'ra parimhā, marī asa te te ĩma waihu'u za'ra ō di, ĩsadawa nhipai u, zudezu'ō norī ma te tāma 're ĩrowasu'u za'ra mono zéb da hā. Ta norī hā pire na dama 're hāimana za'ra mono nherē, ĩpire na te 're rosa'rata mono ō di, wa hā. E marī wa. 'Re ĩhāimana u'āsi mono hā dapire na te te da'āma 're rosa'rata mono ō wa. Tāma taré hā.

⁷ Āne si ma tō aibā norī hā siwi ĩwaihu'u za'ra, 'Re ĩhāimana u'āsi mono tō sena te te ĩpisutu na, zudezu'ō norī ma, Wanhīb'apito wasu'uwē hā te tāma 're wasu'u za'ra mono da, Pedru hā te te ĩpisutu ne, tisiré zudezu norī ma, te te 're rowasu'u mono da.

⁸ 'Re ĩhāimana u'āsi mono hā ma tō Pedru hā te te 're pawapto tiwaihu'u pese na, tisiré zudezu norī ma, Cristu hā te te tāma 're ĩwasu'u za'ra mono zéb da hā, ta norī u si te te satōrī wa. Tane duré wa hā tiwaihu'u pese na ma tō te te 're ĩpawapto, zudezu'ō norī ma, Cristu te tāma 're ĩwasu'u za'ra mono zéb da hā, ta norī u si te te ĩzatōrī wa, wa hā.

⁹ Taha wa, ma tō oto Ti'adu norī hā ĩ'āma waihu'u za'ra, tāma ĩzawi pese wa, 'Re ĩhāimana u'āsi mono te te sima ĩpisutuzém na hā. Ō norī hā ĩsimiroti pire na ma tō Wanhīb'apito zazei'wa norī hā āma waihu'u za'ra, Ti'adu hā, Pedru hā, duré Zuwā. Tawamhā ta norī hā 'Re ĩhāimana u'āsi mono te te ĩpisutuzém na te te ĩ'āma waihu'u za'ra wa, ma tō tinhib'rata na siwi wazawi za'ra, Banabéhé me. Wama wē za'ra di, wa norī hā zudezu'ō norī u si 're waneb da, Cristuhu wasu'uwē na, wa te tāma 're romhuri za'ra mono da. Duré wama wē za'ra di, Ti'adu norī si, tisiré zudezu norī u si 're nomro mono da, Pedru norī me. Āne na wa tō wanhimirosa'rata na wasisaze za'ra ni.

¹⁰ Āne si ma tō wama waihu'u za'ra, Ti'adu norī hā, Wanhīb'apito zazei'wa norī ĩsimarī'ō norī hā wanhimarī na wa te 're pawapto u'āsi za'ra mono da, 're wapo're simrami za'ra mono āna. Āne zō, wa ĩsima te 're rosa'rata u'āsi, ĩwē na si te 're da'apawapto mono da.

Paru hā Pedruhu ma te te ĩrowaihu'uzé

¹¹⁻¹² Tawamhā Ātizotiza āma ĩnhamra ré, ma tō wi Pedru hā, ĩzarina. Tawamhā zudezu'ō norī āma tinhimirosa'rata na te te upai wa, wa tō danho'a tāma rowaihu'u. Āne tinhimirosa'rata na te te ĩupazé hā. Ātizotiza u wisi wamhā, ma tō aré zudezu'ō norī me 're sa, Wanhīb'apito zazei'wa norī me hā. Tawamhā ĩsarina si ma duré aibā norī hā aihutu, Ti'aduhu hawimhā. Ta norī hā ma tō te te sima 're wē za'ra, Wanhīb'apito zazei'wa norī zudezu'ō hā, sihāiwata nhihāri ré si 're nomro mono da, tawapsi sizudezu za'ra da. Tawamhā zudezu'ō norī hā, Wanhīb'apito zazei'wa oto wasiré 're wahāimana za'ra mono nherē, ma tō Pedru hā tiwi sisawi za'ra, oto dasiré 're sa tō mono da. E marī wa. Zudezu'ō norī siré 're sai u'āsi mono wa, te te siwi wē'ō za'ra ō'umnhasite, we ĩsihutu norī hā.

¹³ Tawamhā Pedruhu ne dazadamnhasi te, te oto ĩsiré zudezu norī hā tiwi sisawi za'ra, zudezu'ō norī wi, Wanhīb'apito zazei'wa oto wasiré 're wahāimana za'ra mono nherē. Banabéhé zama ma tō dazadamnhasi te, tiwi sisawi za'ra.

¹⁴ Āne na ma tō Pedru norī hā tinhimirosa'rata na upa za'ra, zudezu'ō norī āma. Tō sena Cristuhu wasu'uwē zarina si oto dama 're hāimana za'ra mono ō di, Pedru norī hā. Āne wa tō āma waihu'u za'ra. Taha wa, wa tō Pedruhu ma tinha, uburé Wanhīb'apito zazei'wa norī nho'a, āne: "A hā zudezu nherē, ma tō zudezu'ō norī siré 're asai mo aré, a hā zudezu'ō 're aihāimana mono newa. E niha ma tō bété oto tiwi asisawi za'ra, zudezu'ō norī wi, a'ā sizudezu za'ra da, ĩsazei'wa norī hā." Āne wa tō tāma tinha.

¹⁵ Wa norī hā zudezu na wa tō wapoto ni. Zudezu'ō na wapoto ō di, siwa'ru 're ĩnomro mono norī ne.

¹⁶ Wa norī hā wa tō oto marī hā waihu'u ni, 'Re ĩhāimana u'āsi mono te te 're ĩda'awēsāmri mono zém na hā. Zezu Cristu, Danho'reptui'wa na da te dasina 're umnhasi za'ra mono wamhā, 'Re ĩhāimana u'āsi mono, dawasédé hā te te da'āma 're ĩ'ab'madâ'ā mono ō zéb zarina, te oto te te 're da'awēsāmri. Taha zarina, dawasété 'ru te, te te dahā za'ra ō di za, rob'rāsutuzéb āma hā. ĩsimiroti na Mozési te te ĩrob'ui'ére 'rata zarina, da te 're rob'manharī za'ra mono nherē, taha zarina te te dama 're aparī mono ō di za, dawasédé hā. Āne na wa tō oto waihu'u ni, wa norī hā.

¹⁷ Taha wa, Cristu Zezusi hā wa tō wasina umnhasi za'ra ni, taha zarina si wawasédé hā te te oto wa'āma 're ab'madâ'ā tō mono da, tawapsi te te 're wa'awēsāmri mono da, 'Re ĩhāimana u'āsi mono hā. ĩsimiroti na rob'ui'ére zarina, da te 're rob'manharī za'ra mono nherē, taha zarina te te dama 're awaihu'u mono ō di za, dawasédé te te da'āma 're ĩ'ab'madâ'ā mono ō na. Taha wa, wa norī hā 'Re ĩhāimana u'āsi mono nhimiroti 'rata na rob'ui'ére zarina, wa te 're ĩrob'manharī mono zém na wa te 're 'madâ'ā mono ō di oto, taha zarina wawasédé hā te te wa'āma 're ĩ'ab'madâ'ā mono ō zéb zarina, te te 're wa'awēsāmri mono da, 'Re ĩhāimana

u'ási mono hã. Wa nori hã Cristu, Danho'reptui'wa na wa tô wasina saze ni, taha zarina si wawasédé hã te te wa'ãma 're ab'madá'á tô mono da, tawapsi te te 're wawësãmri mono da, 'Re ìhâimana u'ási mono hã. Ìsimiroti na rob'ui'ére 'rata zarina wa te 're ìrob'manharì mono zém na, wa te 're 'madá'á mono ò di oto, taha zarina, te te wanho'reptu dai ò wa. Æne wa, ma tô ni'wam nori hã wama nharì za'ra, zudezu nori hã, wanhimirosa'rata na wa te ãma upa newa, aimawi na. E niha tawamhã. Cristu te te wama ìwaihu'uzéb zarina, wanhimirosa'rata na wa te ãma upai 'wa'áhã, te aré Cristu hã wanhowa ãma upa na'rata, te te wama ìwaihu'uzém na hã. E tô sena, ma tô Cristu hã wanhowa ãma upa na'rata. Mare di. Te te ãma upai waihu'u ò di. Robaba uptabi di.

¹⁸ Wa hã wa oto te dama 're awaihu'u u'ási, 'Re ìhâimana u'ási mono nhimiroti 'rata na rob'ui'ére zarina, da te 're rob'manharì za'ra mono nheré, taha zarina, 'Re ìhâimana u'ási mono za te te 're ìda'anho'reptui mono ò na. Tawamhã nimahã na ìnhimirosa'rata na te saprì wamhã, wa za tô tâma ãma upa. Tawapsi ìwë'òre di za.

¹⁹⁻²⁰ Æne te aré ìnhimirosa'rata 'rada hã ìma 're hâimana: 'Re ìhâimana u'ási mono nhimiroti 'rata na rob'ui'ére zarina te 're rob'manharì mono wamhã, taha zarina si ìwasédé hã te te ì'ãma 're 'madá'á mono ò di za. Tawapsi te za oto te te 're ìwësãmri. Taha zarina ìwasété 'ru te, rob'rãsutuzéb ãma te te ì'azãri ò di za, 'Re ìhâimana u'ási mono hã. Æhãna ìnhimirosa'rata 'rada hã te oto ìza'u 're simi'wara. Ta hã wa tô oto rême pese ìsipara, 'Re ìhâimana u'ási mono te te ìma ìwaihu'uzéb uwaibaba si 're ìmorì da. Zezu Cristu, wedepo'o nnonhi'rãmi na dá'ã wa, ìsiré ìdá'á ne, ìsi'uìhã na te ìsima 're ìrosa'rata mono zém na 're ìhâimana mono ò di oto, Cristuhu si oto ìpë'è 're, 're hâimana mono wa, 're ìwada'uri wë mono 'wa da hã. Cristu hã, 'Re ìhâimana u'ási mono 'ra. Ta hã te te 're ìzawi pese mono wa, ma tô ìzada sisò, ìzada dá'ã da. Taha wa, 'Re ìhâimana u'ási mono 'ra umnhasi sina, wa oto 're ìhâimana.

²¹ Wa hã te ìsiwi 're wë'ò mono ò di oto, 'Re ìhâimana u'ási mono te te 're ìzawi pese mono zé hã, Cristu te te ìwa'ãbázém na dazada ìdá'ázém na hã. Taha wa, ìsi'uìhã na ìsisò'reptu dai ò wa, 'Re ìhâimana u'ási mono nhimiroti 'rata na rob'ui'ére zarina te 're ìrob'manharì mono zém na, te 're ab'madá'á mono ò di oto, taha zarina, ìwasédé hã te te ì'ãma 're ab'madá'á tô mono da, te te 're ìwësãmri mono da oto, 'Re ìhâimana u'ási mono hã. Dasi'uìhã na dasisò'reptu dai ò wa, 'Re ìhâimana u'ási mono nhimiroti 'rata na rob'ui'ére zarina, da te 're rob'manharì za'ra mono nheré, taha zarina te te dama 're aparì mono ò di dawasédé hã, da te 're ìmanharì za'ra mono zé hã. Æne 'wa'áhã, aré marì dai ò di, Zezu Cristu dazada ìdá'ázé hã. Taha wa, te oto ìsiwi 're wë'ò mono ò di, 'Re ìhâimana u'ási mono te te 're ìzawi pese mono zé hã, Cristu te te ìwa'ãbázém na, dazada ìdá'ázém na hã. Mare uptabi di. Æne Pedruhu ma, te ìrowaihu'uzé hã.

3

'Re ìhâimana u'ási mono te te 're ìda'awësãmri mono zém na rowasu'u

¹ Darasiza nhihudu nori, e niha te rosa'rata waihu'u ãna 're anomro aba mo. Zezu Cristu hã wedepo'o nnonhi'rãmi na wazada ìdá'ázém na, wa tô te aima ãma 're rowasu'u pese za'ra wa'wa aré. E 'wa hã ma tô aiwi udã za'ra wa'wa, taré waihu'u zawã za'ra wa'aba da.

² Ma'ãpé we ìma waihu'u za'ra wa'aba. E marì wa, ma tô 'Re ìhâimana u'ási mono hã Tipë'èzani hã we aima sòmri za'ra wa'wa, aipë'è 're. E ìsimiroti 'rata na rob'ui'ére zarina, 're ìrob'manharì za'ra wa'aba mono zéb zarina, ma tô we Tipë'èzani hã aima sòmri za'ra wa'wa. Mare di. E Zezu Cristuhu wasu'uwé hã aipo're na wapari za'ra wa'aba pari, tô sena ìwasu'uwé na asina 're saze za'ra wa'aba mono wa, ma tô we aima sòmri za'ra wa'wa. Taha wa, ma tô we Tipë'èzani hã aima sòmri za'ra wa'wa tô, aipë'è 're, 're sãmra za'ra wa'aba mono da oto.

³ E niha bété rosa'rata waihu'u ãna, te oto 're anomro aba mo. 'Re ìhâimana u'ási mono, Tipë'èzani te te aima ìsòmri za'ra wa'aba zarina, ma tô aihâimanazép tém na ãma ìsãna'rata za'ra wa'wa, ìwë na. E niha te bété oto 'ràwi 're asi'madá'á za'ra wa'aba mo asi'uìhã na, asina uwaimrami za'ra wa'aba da newa, asisò'reptu za'ra wa'aba zé hã.

⁴⁻⁵ E taré ma tô ìwë há asina 're ìwaihu'u za'ra wa'aba mo, marì hã ãma waihu'u za'ra wa'aba ãna. 'Re ìhâimana u'ási mono si, ma tô we Tipë'èzani hã aipë'è 're aima sòmri za'ra wa'wa. Ma tô duré marì dama ìmanharì waihu'u'ò hã te te aima 're 'manharì wë za'ra wa'wa, tiwaihu'u pese na. E marì wa. E ìsimiroti na rob'ui'ére 'rata zarina 're rob'manharì za'ra wa'aba mono wa. Mare di. Taha zarina ò di. Zezu Cristuhu wasu'uwé hã aipo're na wapari za'ra wa'aba pari, Cristu Danho'reptui'wa na asina 're umnhasi za'ra wa'aba mono wa, ma tô we Tipë'èzani hã aima sòmri za'ra wa'wa, 'Re ìhâimana u'ási mono hã. Taha zarina si, ma tô duré marì dama ìmanharì waihu'u'ò hã te te aima 're 'manharì wë za'ra wa'wa, tiwaihu'u pese na.

⁶Tane Abra'ã hã. Ta hã ma tô 'Re ìhâimana u'âsi mono hã te te sina 're umnhasi pese, te te tâma Ìropisutuzé za te te tâma âma Ì'uwaimrami na hã. Taha wa, 'Re ìhâimana u'âsi mono hã ma tô te te 're wêsâmri, Abra'ã hã. Duréihã âne Abra'ãhã wasu'u na ma tô rob'ui'ére ìbaihã na, 'Re ìhâimana u'âsi mono zadawa wasu'u'wa hã.

⁷Tawamhã Cristu Danho'reptui'wa na, da te dasina 're umnhasi za'ra mono wamhã, simisutu Abra'ãhã nhihudu na, te za oto te te 're da'anhisi, 'Re ìhâimana u'âsi mono hã. Âne hã wa tô aima waihu'u za'ra wa'wa, waihu'u za'ra wa'aba da asina.

⁸Zahadu romhã uptabi nheré, ma tô zudezu'ô norí âma sima roti, 'Re ìhâimana u'âsi mono hã. Âne Ìsimiroti hã: Zudezu'ô norí hã, Cristu Danho'reptui'wa na te te sina 're umnhasi za'ra mono wamhã, ta norí ma zama te za duré tâma 're ìrowé za'ra mono zéb da hã te te tâma 're apisutu, 'Re ìhâimana u'âsi mono hã. Íwasédé hã te te oto âma 're ì'ab'madá'ã mono ô zéb zarina, te za te te 're awêsâmri. Taha zarina dawasété 'ru te, te te ahã za'ra ô di za, rob'rãsutuzéb âma hã. Âne Ìsimiroti hã zudezu'ô norí âma hã. Taha wa, ma tô âne Abra'ãhã ma waihu'u siro, 'Re ìhâimana u'âsi mono hã: "Aima te Ìropisutuzém na asina Ìzazei pese zéb zarina, wa za dama 're ìrowé za'ra mono zéb da hã te te dama 're apisutu, daro mono bâ." Âne ma tô ìwasu'uwé na romhã ré âma po're pu'u siro.

⁹Abra'ã hã ma tô 'Re ìhâimana u'âsi mono hã te te sina 're sazei pese, te te tâma Ìropisutuzém na. Taha wa, rowé te te tâma Ìpisutuzéb zarina, ma tô rowé uptabi na 're hâimana. Tane duré Cristu Danho'reptui'wa na, da te dasina 're saze za'ra mono wamhã, Abra'ãhã ma te te Ìpisutu ne, te za dama 're ìrowé za'ra mono zéb da hã te te dama 're apisutu, 'Re ìhâimana u'âsi mono hã.

¹⁰Tane nheré, Ìsimiroti na rob'ui'ére 'rata zarina, da te 're Ìrob'manharí za'ra mono zém na 're danhopré mono wamhã, taha zarina, 'Re ìhâimana u'âsi mono te te 're da'anho'reptui' mono da newa, e niha te za tawamhã dama 're romhâimana za'ra. Ône haré, Ìsimiroti mono bâ da te dasina tâma âma 're uwaimrami za'ra mono ô wa, te za tô te te siwi 're da'awé'ô, 'Re ìhâimana u'âsi mono hã. Duréihã ma tô âne na rob'ui'ére ni:

"Re ìhâimana u'âsi mono nhimiroti mono bâ, taha na rob'ui'ére hã te ìbaihã na dama 're hâimana, da te dasina tâma âma 're uwaimrami za'ra mono da. Âne zarina, Ìsimiroti mono bâ, da te dasina tâma âma 're uwaimrami za'ra mono ô wamhã, te za te te siwi 're da'awé'ô, 'Re ìhâimana u'âsi mono hã."

Âne ma tô ãhã wasu'u na rob'ui'ére, Ìsadawa wasu'u'wa hã.

¹¹E âne te za te te dama 're awaihu'u, 'Re ìhâimana u'âsi mono hã: "Ìnhimiroti na rob'ui'ére 'rata zarina, 're Ìrob'manharí za'ra wa'aba mono zéb zarina, te ai'âma 're ab'madá'ã aba mono ô di za oto, aiwasété 'wa hã. Wa za oto te 're ai'awêsâmri 'wa. Taha zarina, aiwasété 'ru te, te aihã za'ra wa'aba ô di za." E âne te za te te dama 're awaihu'u. Mare di. Duréihã ma tô âne na rob'ui'ére ni:

"Re ìhâimana u'âsi mono, Danho'reptui'wa na da te dasina 're Ìumnhasi za'ra mono zéb zarina si, dawasédé hã te te da'âma 're ab'madá'ã mono ô di za. Âne wamhã, te za rowé uptabi na 're dahâimana u'âsi za'ra."

Âne na da te âma rob'ui'ére wa, wa tô waihu'u za'ra ni tô.

¹²Duréihã ma tô duré âne na rob'ui'ére ni:

"Re ìhâimana u'âsi mono nhimiroti mono bâ, da te dasina tâma âma 're uwaimrami u'âsi za'ra mono wamhã, rowé uptabi na te za 're dahâimana u'âsi za'ra."

Âne ìwasu'u na rob'ui'ére hã. Tane nheré, Cristuhu wasu'u zô, te zahadu 're rob'é'é, Cristu Danho'reptui'wa na da te dasina 're umnhasi za'ra mono da, dama 're ìrowé za'ra mono zéb da hã.

¹³Wa norí hã wa te dame wasina tâma âma 're uwaimrami za'ra mono ô di, 'Re ìhâimana u'âsi mono nhimiroti mono bâ. Taha wa, te aré siwi wa'awé'ô, 'Re ìhâimana u'âsi mono hã. Tawapsi wawasété 'ru te, te aré wahã za'ra. Tane nheré, te te 're wahã za'ra mono tô da, ma tô Cristu hã wê nheré, wazada sisô, wa'upana 'Re ìhâimana u'âsi mono te te azâri da. Taha na ma tô wa'awa'ã, Cristu hã. Duréihã ma tô âne na âma rob'ui'ére ni:

"Ní'wa hã wasété uptabi wa, te za dasiwi wírí ni. Taha pari, wede na te za dasiwi sasômri ni, da te âma waihu'u za'ra da, wasété uptabi wa, 'Re ìhâimana u'âsi mono ma ìwé ô na."

Âne ìwasu'u na rob'ui'ére hã. Tawamhã âma Ìrob'ui'érezéb zarina, Cristu hã wê nheré, wedepo'o nhonhí'râmi na sa'o ré, ma tô siwi wé'ô, 'Re ìhâimana u'âsi mono hã. Wa'upana ma tô azã, wasété ô nheré.

¹⁴Âne ma tô Cristu Zezusi hã wa'awa'ãbã pa. E marí da. Simisutu Ìsib'a'uwé oto 're wanomro mono wa, zudezu'ô norí ma zama, ìwé na 'Re ìhâimana u'âsi mono te te tâma âma 're a'uwaimrami mono da, Abra'ãhã ma te te Ìropisutuzéb zarina, duré wahãiba mono bâ

wapē'ē 're, Tipē'ēzani hā te te wama 're anhomri mono da, te te wama ĩropisutu za'ra zéb zarina, Zezu Cristu hā Danho'reptui'wa na, wa te wasina 're umnhasi za'ra mono wa.

'Re ĩhāimana u'āsi mono nhimiroti 'rata na rowasu'u, Abra'āhā ma ĩwē na te te tāma ĩropisutuzém na rowasu'u me

¹⁵ ĩsisānawā norī, āne wa za oto aima āma romnhimiré'é za'ra wa'wa, 're ĩwahāimana za'ra mono zém na. Áté ni'wam norī hā te za marī ĩwē na sima roti zahuré. Tawamhā tō sena za te te sima āma ĩ'uwaimrami zahuré pibu ma, te za danho'a rob'ui'éré zahuré tinhisi na, da te āma waihu'u zahuré da. Taha parimhā, te te sima āma uwaimrami zahuré tō da, ni'wa hā te te tiwi ĩsizāri zahuré da hā, mare di. Duré, ni'wa hā tinhimiroti na te te āma 'rānhipa zahuré ō di za. Ma tō āma sisazei pari zahuré.

¹⁶ Tane Abra'āhā ma, ĩsipai u ĩsihudu na zama, 'Re ĩhāimana u'āsi mono te te ĩropisutuzé hā. Āhā wasu'u na, da te āma rob'ui'éré wamhā, ĩsihudu norī hā da te wasu'u za'ra ō di. ĩsihudu norī hā da te wasu'u za'ra 'wa'āhā, te aré ĩsihudu ahā na wasu'u ni. ĩsihudu misi, te wasu'u. Ta hā Cristu.

¹⁷ Wa za oto aima rowasu'u pese za'ra wa'wa, te aima āma ĩsimiré'é aba zém na. 'Re ĩhāimana u'āsi mono hā ma tō Abra'āhā ma ĩwē na ropisutu. Tō sena te te tāma āma uwaimrami da, ma tō tāma siwasu'u. Taha pari, te te tāma ĩropisutuzém na hā ma tō da'āma tiwahub ahā uptabi, 430 na. Tawamhā ma tō tinhimiroti mono bā dama waihu'u 'rata. E taha wa, ĩwē na te te dama āma uwaimrami ō di za, Abra'āhā ma, te te ĩropisutuzém na hā. E taha wa, te za tinhimirotipisutu na āma saprī, te te dama āma uwaimrami tō da. Mare di. Te za tō te te dama āma 're a'uwaimrami u'āsi, Abra'āhā ma, te te ĩropisutuzéb zarina.

¹⁸ Abra'āhā ma, ĩwē na te te tāma ropisutu wa, taha zarina ma tō āma tāma uwaimra. Tane ĩwē na te te dama ropisutu wa, taha zarina si, te za tō te te āma dama 're a'uwaimrami, sō 're simipari mono āna, marī na ĩsimiroti hā a'ā da te dasina tāma āma 're ĩ'uwaimrami za'ra mono zéb zō.

¹⁹ Abra'ā hā 're hāimana mono ré, ma tō ĩwē na tāma ropisutu siro 'Re ĩhāimana u'āsi mono hā, ĩsipai u ĩsihudu ma, te te tāma āma 're a'uwaimrami mono da. Abra'āhā za'u si, ma tō oto tinhimiroti mono bā dama waihu'u, 'Re ĩhāimana u'āsi mono hā. E marī da. Dawasété na 're danomro mono wa, 'Re ĩhāimana u'āsi mono ma, dawasété na 'rāwi 're dasiwaihu'u za'ra mono da. Taha da, ma tō tinhimiroti hā dama waihu'u. Abra'āhā nhihudu, ti'ai u we ĩmorizéb u si, te za pire na 're hāimana, 'Re ĩhāimana u'āsi mono nhimiroti zarina, zudezu norī te te 're ĩrob'manharī za'ra mono zéb da hā. 'Re ĩhāimana u'āsi mono hā tinhimiroti hā te te dama 're awaihu'u mono da, ma tō tinhimiroti na rob'ui'éré hā hāiwa āma tāma ĩromhuri'wa norī ma tisō, aibā ma te si'uiwī sōmri da, ĩsipai u.

²⁰ Ni'wa hā ti'ai āma si'uihā na tinhimiroti hā te te dama waihu'u wamhā, ni'wa hā ĩsāna'remhā hāimana ō di, ĩsimiroti hā te te dama ĩwaihu'u da hā. Tane 'Re ĩhāimana u'āsi mono hā. Si'uihā na ma tō Abra'āhā ma waihu'u, ĩwē na za te te tāma āma 're ĩ'a'uwaimrami mono na hā.

'Re ĩhāimana u'āsi mono nhimiroti 'rata na, Mozési te te āma ĩrob'ui'érézé wasu'u

²¹ Abra'āhā za'u si, ma tō oto tinhimiroti mono bā dama waihu'u, 'Re ĩhāimana u'āsi mono hā. E taha wa, te te dama āma uwaimrami ō di za ĩwē na, Abra'āhā ma, aré te te ĩropisutuzéb zarina. Mare di. Te za tō te te dama āma 're a'uwaimrami u'āsi. Uburé marī hā ĩsimiroti zarina, da te dasina tāma āma 're ĩ'uwaimrami za'ra mono da hā, dama waihu'u za'ra 'wa'āhā, 'Re ĩhāimana u'āsi mono te aré te te dama 're apisutu, rowē uptabi na 're dahāimana za'ra mono da.

²² Tane nherē, daro mono bā te dawasété na 're danomro. Dasi'uihā na dawasété wi 're dasipizari waihu'u za'ra mono ō di tō. Áne, da te ĩwaihu'u za'ra zéb da hā, ma tō 'Re ĩhāimana u'āsi mono zadawa wasu'u'wa hā āma rob'ui'éré. E marī da. Zezu Cristu Danho'reptui'wa na, da te dasina 're umnhasi za'ra mono da, tawapsi 'Re ĩhāimana u'āsi mono ĩwē hā te te dama āma 're uwaimrami mono da, te te dama ĩropisutuzéb zarina.

²³ Bādā ĩwa waptā'ā ō ré, Zezu Cristu Danho'reptui'wa na da te dasina 're umnhasi za'ra mono ō ré hā, āne aré dahāimanazé hā. 'Re ĩhāimana u'āsi mono hā ma tō zudezu norī hā tinhimiroti 'rata na te te 're a'uwati, Cristuhu wasu'uwē hā sō'awi te te wama waihu'u za'ra ō ré hā, Cristu Danho'reptui'wa na wa te wasina 're ĩ'umnhasi za'ra mono zéb da hā oto.

²⁴ 'Re daprédub za'ra mono ō ré, da'madā'ā'wa hā te te dama 're ĩroti mono ne, ma tō 'Re ĩhāimana u'āsi mono hā tinhimiroti 'rata na te te 're wa'a'uwati aré, Cristu hā datēme wei morī ō ré. Ta hā te we oto datēme mo, te te dawa'ābā da, Danho'reptui'wa na wa te wasina 're ĩsaze za'ra mono zéb zarina, wawasédé hā te te wa'āma 're ab'madā'ā tō mono da oto, 'Re ĩhāimana u'āsi mono hā, taha zarina te te 're wa'awēsāmri mono da oto.

²⁵⁻²⁶ Ma tō oto bādā hā ĩwa waptārā, Cristu hā wa te wasina 're ĩ'umnhasi za'ra mono zéb da hā. Taha wa, 'Re ĩhāimana u'āsi mono nhimiroti 'rata na rob'ui'éré zarina, wa te 're

Īrob'manharī za'ra mono zéb da hā, pire na wama 're hāimana za'ra mono ō di oto, Mozési te te āma Īrob'ui'éré hā. E marī wa. A norī wa'wa hā ma tō Cristu Zezusi hā Danho'reptui'wa na asina 're Īsaze za'ra wa'aba mo. Taha wa, te oto simisutu 'Re Īhāimana u'āsi mono 'ra, 're anomro aba mo, aihīni.

²⁷ Ma tō duré â dawabzuri hā ĩ'manharī za'ra wa'wa, Cristu 're Īmorizém na si oto āma 're anomro wē wa'aba mono da, simisutu Cristuhu nhib'a'uwē 're anomro aba mono wa.

²⁸⁻²⁹ Taha zarina, 'Re Īhāimana u'āsi mono hā te te siwi 're da'aba'a waihu'u mono ō di, zudezu norī hā, duré zudezu'ō norī hā, ĩwada'uri zarina si, pawa'ābā āna dama romhuri'wa norī hā, duré wada'uri āna si'uihā na 're Īhāimana za'ra mono norī hā, aibā norī hā, duré pi'ō norī hā. Simisutu Cristu Zezusihi nhib'a'uwē si, te 're aihāimana za'ra wa'aba mo. Taha wa, te oto Abra'āhā nhihudu na te te 're asisi za'ra wa'wa, 'Re Īhāimana u'āsi mono hā. Āhā wa, ĩwē na si, Abra'āhā ma te te ĩropisutuzéb zarina, te za ĩwē na si te te aima āma 're a'uwaimrami 'wa, Aimama 'wa hā.

4

¹⁻² Āne wa za duré marī hā aima waihu'u za'ra wa'wa, romnhimiré'é na ĩwaihu'u za'ra wa'aba zéb da hā. Até ai'uté mama tō hā te 're 'maihāimana, 'watébrémi hā. Prédu wapsi, ĩte hā za, ĩmama hā dá'ā ō ré, tinhibrom na te te tāma āma ĩropisutuzé hā. Tane nherē, uburé timama nhibro ré, za 're hāimana mono nherē, prédub ō ré te za danhimarī āna te te dama 're ĩromhuri za'ra mono norī ne, 're hāimana. Te za 'a'ā da te dasiwi 're 'madā'ā, hāimana wē na 're hāimana mono zō. ĩmama nhibro hā te za duré da te tāma 're 'madā'ā pese, 'watébrémi ma. Āne te za 'a'ā ĩ'ra hā 're hāimana, āma ĩwahubzé hā bādā hā ĩwa waptā'ā ō ré, ĩmama tinhibrom na te te tāma ĩropisutuzé hā.

³ Tane wa norī hā, ai'uté ne, roti tō sena wama ĩwaihu'u pese za'ra ō zarina, wa tō aré 're wahāimana za'ra, roti da te wama 're ĩwaihu'u 'rata za'ra mono zéb zarina.

⁴ Tawamhā bādā hā ma tō ĩwa waptārā oto, 'Re Īhāimana u'āsi mono hā ti'ra āma te te ĩrotizéb zarina, ti'ai u we te te ĩsatōrī da hā. We te te satōrī wamhā, ma tō pi'ōi ma ĩ'ra hā podo oto, zudezu na. Zudezu na poto wa, pire na ma tō tāma 're hāimana, 'Re Īhāimana u'āsi mono nhimiroti hā, Mozésihī ma te te 're ĩ'waihu'u mono hā.

⁵ E marī da, ma tō ti'ra hā we satō, 'Re Īhāimana u'āsi mono hā. Wanho'reptuzé hā wa te wasina 're uwaimrami za'ra mono da, ĩsimiroti na rob'ui'éré 'rata zarina, wa te 're Īrob'manharī za'ra mono na 're ĩwanhopré za'ra mono norī hā te te wa'awa'ābā da, ma tō we satō, wa'āma 're 'ra za'ra mono da oto, 'Re Īhāimana u'āsi mono hā.

⁶ Tawamhā ĩ'ra oto 're ĩwanomro mono na 'rāwi 're wasi'waihu'u za'ra mono da, ma tō we ti'ra pē'ezani hā te te wama 're anhomri, wapē'ē mono bā wama 're hāimana za'ra mono da, 'Re Īhāimana u'āsi mono hā Wamama na, wa te 're sisi za'ra mono da oto.

⁷ Taha wa, robzei'ō na danhimiwada'uri zarina si, dapawa'ābā āna 're Īhāimana za'ra mono norī ne, 're aihāimana za'ra wa'aba mono ō di oto. 'Re Īhāimana u'āsi mono 'ra si, te oto 're anomro aba mo. Āne wa, uburé marī wē na ti'ra norī ma, te te ĩropisutuzéb zarina, te za tō te te aima āma 're a'uwaimrami 'wa, Aimama 'wa hā.

⁸ Zudezu'ō norī, aima sa'rese za'ra wa'aba ō di aré, 'Re Īhāimana u'āsi mono hā. Taha wa, ma tō ĩ'upana aimawi nhimiwada'uri na 're aihāimana za'ra wa'aba mo danhimiwada'uri zarina si, pawa'ābā āna 're Īhāimana za'ra mono norī ne, robzei'ō na.

⁹ 'Re Īhāimana u'āsi mono hā ma tō oto Aimama na asiwi ĩwaihu'u za'ra wa'wa. Taha wa, aima 're rowē za'ra wa'aba mono di oto. Taha nhipai u, ti'ra na te te oto sina ai'waihu'u aba wa, aima 're rowē uptabi za'ra wa'aba mono di. Āne wamhā, e niha te za bété apā aipizari za'ra wa'wa, asimizazezéb 'rata u, taha zarina asina uwaimrami za'ra wa'aba ō nherē, asō'reptu za'ra wa'aba zé hā, duré taha zarina rowē si aima 're hāimana za'ra wa'aba mono ō nherē. E niha te za bété asima ĩwē za'ra wa'wa, danhimiwada'uri zarina si pawa'ābā āna 're Īhāimana za'ra mono norī ne, apā 're aihāimana za'ra wa'aba mono da, robzei'ō na.

¹⁰ Bādā ĩpire hā marī 'manharizéb da hā, te oto zudezu norī zarina 're ĩ'madā'ā za'ra wa'aba mo, a'amo zama, wahub zama.

¹¹ Āne wa, wa ai'āma 're ĩhātā'ā za'ra wa'wa. E marī wa. Wanhīb'apito wasu'uwē na 're ĩsiwasutu wē mono nherē, te 're aipawaptob za'ra wa'aba mono zé hā, e taré te za 're hāimana.

¹² ĩsisānawā norī, wa hā zudezu nherē, ai'rata ĩnhamra aba ré, wa tō zudezu'ō newa asine 're ĩmorī 'wa. Taha wa, ma'apé ĩsine 're anomro aba mono. Atēme amo ĩmorī 'rata aba wamhā, marī hā ĩma 'manharī wasété za'ra wa'aba ō di, ĩhāiba na hā.

¹³ ĩhāzé si ĩ'āma watobro wa, wa tō ai'rata ĩnhamra za'ra wa'wa. Āhā wa, wa tō Zezu Cristuhu wasu'uwē na aima rowasu'u na 'rata za'ra wa'wa. Āne na ma tō ĩ'āma ĩwaihu'u za'ra wa'wa aré.

¹⁴ Tawamhã ĩhâzé ré, atême ĩwisi za'ra wa'aba nherê, ĩhâzé wa, asiwi ĩwê'ô za'ra wa'aba ô di. Mare di. Hâiwa âma 'Re ĩhâimana u'âsi mono ma romhuri'wa, wê na asiwi ĩ'âri aba ne, niha wamhã, Cristu Zezusi, wê na asiwi ĩ'âri aba ne, ma tô wê na asiwi ĩ'âri 'wa.

¹⁵ E niha bété oto âhâna hã. Aré aima 're rowê za'ra wa'aba mono di, ai'rata ĩnhamra aba wa. Âhã wa, aima waihu'u pese za'ra wa'aba 'wa'âhã, te aré ato hã ĩsani za'ra wa'wa, ĩma sômri za'ra wa'aba da, ato hã.

¹⁶ E niha te bété oto âhâna hã ĩ'âma ĩrosa'rata za'ra wa'wa. E aiwê'ô wa'aba 'wa na si, te za oto ĩ'âma ĩrosa'rata za'ra wa'wa, rowasu'u tô sena na si te aima 're rowasu'u za'ra wa'aba mono nherê.

¹⁷ Aibã norĩ, aimawi rowasu'u'wa norĩ hã te sima aiwê za'ra wa'wa, ta norĩ nhimirowasu'u si asima 're wê za'ra wa'aba mono da, tô sena tinhimirowasu'u wê na te te 're aipawaptob za'ra wa'aba mono da newa. E marĩ da. ĩnhimirowasu'u nhiti, asina 're aipahã za'ra wa'aba mono da ĩtême, ĩnhimiroti nhipai u, ô norĩ nhimiroti si asima 're wê uptabi za'ra wa'aba mono da oto.

¹⁸ Roti iwê na si, da te 're aipawaptob za'ra wa'aba mono da, da te dasima 're aiwê za'ra wa'aba mono wamhã, ĩma wê di tô, ai'rata ĩnhamra aba ré, duré ĩhâiba za're'ra zama.

¹⁹ ĩ'ra norĩ, ĩma asawi pese za'ra wa'aba norĩ hã, pi'ô tiwasã te te 're ĩsêpata za'ra mono ne, wa tô wa hã ĩpê hã te ai'âma 're sêpata za'ra wa'wa, Zezu Cristu 're ĩmorizém na 're anomro aba mono ô wa. Âma 're anomro wê wa'aba mono wapsi, ĩma rowê di za.

²⁰ Âhâna ai'âma ĩhâtã'â za'ra wa'aba di. Âhã wa, ĩnhimirosa'rada hã ahã di, ai'âma za'ra wa'aba hã. Ai'rata ĩhâimana za'ra wa'aba neza, ĩwaimri te oto aima rowaihu'u za'ra wa'aba da.

Sara norĩ wasu'u hã, Adaha wasu'u me

²¹ Uburê ô nherê, ma tô asima iwê za'ra wa'wa, 'Re ĩhâimana u'âsi mono nhimiroti 'rata na rob'ui'ére zarina, 're rob'manharĩ za'ra wa'aba mono da, taha zarina si 'Re ĩhâimana u'âsi mono hã te te 're asô'reptu za'ra wa'aba mono da newa. E aima waihu'u za'ra wa'aba ô di, 'Re ĩhâimana u'âsi mono wasu'uwê hã, Abra'âhã 'ra norĩ âma hã.

²² Âne ta norĩ wasu'u na, rob'ui'ére hã: Abra'âhã 'ra norĩ hã, maparane aibã hã. ĩmorĩ'rada hã Adaha 'ra, ĩwada'uri zarina si pawa'âbã âna 're ĩhâimana mono 'ra. Duré ĩhâiba amo hã Saraha 'ra hã wada'uri âna 're ĩhâimana mono 'ra, te 're hâimana.

²³ Dasi'uihã na dahâimanazém na 're ĩda'ra za'ra mono na ma ĩ'ra hã tâma podo, romhuri'wai ma. Abra'âhã 'ra hâiba amo hã 'Re ĩhâimana u'âsi mono te te tâma ĩropisutuzéb zarina, ma ĩ'ra hã tâma podo, wada'uri âna 're ĩhâimana mono ma hã, Saraha ma. Âne Abra'âhã 'ra norĩ wasu'u hã.

²⁴ Marĩ te te ĩwasu'uzé hã, te pi'ô norĩ hã wasu'u zahuré. 'Re ĩhâimana u'âsi mono te te sima da'âma ĩrotizé hã te pi'ô norĩ wasu'u zahuré. Maparane te te sima da'âma ĩrotizé hã. ĩmorĩ'rada hã Sina'i na êtê 'rãihã nhisi âma, 'Re ĩhâimana u'âsi mono te te sima da'âma ĩrotizé. Ta hã, Ada te wasu'u. Adaha 'ra hã ma tô tina zabãdã danhimiwada'uri zarina 're hâimana, robzei'ô na. Tane Sina'i âma 'Re ĩhâimana u'âsi mono, te te sima da'âma ĩrotizém niwĩ 're ĩdanomro mono norĩ hã, Adaha 'ra ne, danhimiwada'uri zarina pawa'âbã âna 're ĩdahâimana za'ra mono ne, te robzei'ô na 're dahâimana za'ra, âhãna hã.

²⁵ Arabiza na daza'ru nhisi âma, Sina'i na êtê 'rãihã nhisi hã, Ada te wasu'u. Zeruzarê na 'ri nho'ômo nhisi, Ada te duré wasu'u. E marĩ wa. Zeruzarê 're, 're ĩdahâimana za'ra mono norĩ hã danhimiwada'uri zarina, dapawa'âbã âna 're ĩdahâimana za'ra mono norĩ ne, te robzei'ô na 're dahâimana za'ra.

²⁶ Ânei ô di, Zeruzarê ĩhâiba amo hã, hâiwa âma 're ĩsa mono hã. Rowê na si, te ĩwa 're dahâimana za'ra. Zeruzarê hã hâiwa âma 're ĩsa mono hã, wana Sara hã te wasu'u.

²⁷ Duréhã, ma tô pi'ô ĩ'ra ô na âma romnhimire'ê 'Re ĩhâimana u'âsi mono hã, Zeruzarê 're, 're ĩhâimana za'ra mono norĩ âma. Âne te 'mahã:

“Pi'ô, ai'ra hã niwa aima 'maipoto ô nherê, ma'âpê 're atoi u'âsi mono, aipê'ê 're. Aimro hã te te airême nherê, ai'ra ahã di za. Pi'ô timro ré, 're ĩsãmra mono zém nhipai u, ai'ra ahã di za. Taha wa, te za rowê te, 're atoi u'âsi mo.”

Âne te 'Re ĩhâimana u'âsi mono hã 'ri nho'u hã 'mahã.

²⁸ ĩsisânawã norĩ, âhã wasu'u zarina, te oto Abra'âhã nhihudu na te te 're asisi za'ra wa'wa, 'Re ĩhâimana u'âsi mono hã. Izati hã ma tô podo, 'Re ĩhâimana u'âsi mono hã Abra'âhã ma, te te ĩropisutuzéb zarina. Tane te te tâma ĩropisutuzéb zarina, te oto Abra'âhã nhihudu na te te 're asisi za'ra wa'wa, 'Re ĩhâimana u'âsi mono hã.

²⁹ Abra'ã hã 're morĩ ré, ma tô Izatihi ma nharĩ wasété, dasi'uihã na dahâimanazém na 're ĩda'ra za'ra mono na ĩpodo hã. 'Re ĩhâimana u'âsi mono pê'êzani, te te ĩpawaptobzém na ĩpoto ma, ma tô nharĩ wasété. Tane duré âhãna hã te za 're romhâimana.

³⁰ E niha tawamhã duré wasu'u na rob'ui'ére hã. Âne ĩwasu'u hã:

“Íra re satōrī, pi’ō hā romhuri wa hā. Ímama, tinhibrom na tāma āma sipo’o zahurē ō di za, danhimiwada’uri zarina ’re íhāimana mono ō ’ra me.”

Áne íwasu’u na rob’ui’éré hā.

³¹ Áhā wa, ísisānawā norī, wa za oto marī hā íwasu’u na waihu’u za’ra ni. ’Re íhāimana u’ási mono hā Adaha nhihudu na te te ’re wa’anhisi mono ō di za oto, danhimiwada’uri zarina ’re ímorī nhihudu, ’re íwahāimana za’ra mono na hā. Mare di. Danhimiwada’uri zarina ’re íhāimana mono ō nhihudu, ’re íwahāimana za’ra mono na, te oto te te ’re wa’anhisi, ’Re íhāimana u’ási mono hā, Saraha nhihudu uptabi na. Taha wa, wa norī hā wama ’re rowē uptabi za’ra mono di oto.

5

Wanhīb’apito āma rowē na ’re ídahāimana za’ra mono zém na rowasu’u

¹ Zezu Cristu hā ma tō wa’anho’reptui pa, rowē na āma ’re wahāimana za’ra mono da. Taha wa, ’Re íhāimana u’ási mono nhimiroti ’rata na rob’ui’éré zarina, wa te ’re írob’manharī za’ra mono zém na, ’re wanhopré mono ō di za oto, taha zarina te te ’re wa’anho’reptui mono ō wa. Áne wamhā, tō senai’ō na rowasu’u wa norī wi ’re asiptete za’ra wa’aba mono za, ísimiroti na ’re aihāimana za’ra wa’aba mono wa, apā robze’ō na ’re anomro aba mono tō da.

² Ma’ápé asina íwapari pese za’ra wa’aba za. Wa hā Paru, marī hā wa za aima waihu’u za’ra wa’wa. Da te ’re asihāiwata nhihāri za’ra wa’aba mono da, asizudezu za’ra wa’aba da, asina dazaze za’ra wa’aba wamhā, taha zarina ’Re íhāimana u’ási mono te te ’re asō’reptu za’ra wa’aba mono da newa, e niha za tawamhā. Cristu hā wazada dā’ā nherē, te te ’re wa’anho’reptui mono da, taré te za ’re sa’wari, asada ídā’ā za’ra wa’aba zé hā.

³ Wa za duré aima āma sahu za’ra wa’wa, te aima íwaihu’u za’ra wa’aba zém na hā. Ni’wam norī hā da te sihāiwata nhihāri za’ra da, te te sina dazaze za’ra wamhā, taha zarina ’Re íhāimana u’ási mono hā te te ’re sō’reptu za’ra mono da newa, e niha te za tawamhā ’re hāimana za’ra, ta norī hā. Danhíhāiwata nhihāri siré, te za ōne haré ’Re íhāimana u’ási mono nhimiroti mono hā te te siha tāma āma ’re uwaimrami za’ra, ’Re íhāimana u’ási mono te te siwi ’re awē’ō tō mono da.

⁴ Zudezu norīne, ma tō ’rāwi ’re asi’mái’madā’ā aba mo, ’Re íhāimana u’ási mono nhimiroti ’rata na rob’ui’éré zarina ’re rob’manharī za’ra wa’aba mono da, taha zarina, ’Re íhāimana u’ási mono, aiwasédé hā te te ai’āma ’re ab’madā’ā aba mono ō wa, te te re aiwēsāmri za’ra wa’aba mono da oto, taha zarina aiwasété ’ru te, te te aihā za’ra wa’aba tō da, rob’rāsutuzéb āma hā. Áne taré ’mairosa’rata aba wamhā, ma tō Zezu Cristuhu wi asina ai’maipahā wa’wa, asimirosa’rata na. Áhā wa, ma tō ’rāwi asiwi í’maiwē’ō wa’wa, ’Re íhāimana u’ási mono nhoprubzéh hā Cristu tidá’ázém na, te te ’re ída’anho’reptui mono zéb da hā.

⁵ Ánei ō di, wa norī hā. Cristu Danho’reptui’wa na, wa tō wasina wa te ’re saze za’ra. Taha zarina, wa wasina sō ’re wanhimipari za’ra, rob’rāsutuzéb āma hā, ’Re íhāimana u’ási mono te te wama íwaihu’u za’ra zéb zō, wawasédé te te oto wa’āma ’re í’ab’madā’ā mono ō zéb zarina, te te ’re íwa’awēsāmri mono zém na. Áne ’Re íhāimana u’ási mono pē’ēzani te te wama ’re í’awaihu’u mono zéb zarina, wa wasina sō ’re wanhimipari za’ra oto.

⁶ Simisutu Cristu Zesusihi nhīb’a’uwē oto ’re wanomro mono wamhā, ’Re íhāimana u’ási mono hā te te ’re wa’aba’ mono ō di za, ísihāiwata nhihāri ré norī hā, ísihāiwata nhihāri ō norī me. Zudezu na duré zudezu’ō na ’re íwahāimana za’ra mono zém na hā, te te oto ’re wa’awaihu’u mono ō di za. Zezu Cristu Danho’reptui’wa na, wa te wasina ’re umnhasi za’ra mono wa, wanhimizawi pese na ’re íwahāimana za’ra mono zém na si, te za oto te te ’re wa’awaihu’u, ’Re íhāimana u’ási mono hā.

⁷ A norī wa’wa hā ma tō aré tō sena rowasu’u na ’re anomro aba mo. E ’wa simirowasu’u hawi, ma tō sena rowasu’u na asima āma apa za’ra wa’wa.

⁸ E asima āma apa za’ra wa’aba da, ma tō ’Re íhāimana u’ási mono hā aima waihu’u za’ra wa’wa, sima asō íhārá za’ra wa’wa hā. Mare di.

⁹ Írada hā wa za aima sadawa wahutu za’ra wa’wa, āne: “Í’u’ētē wapuzé hā syryre na da te ahiri nherē, te za timapu, í’u’ētē wapu hā.” Tane duré aimawi na, da te dama ’re rowasu’u za’ra mono wamhā, te za da te āma ’re ropé, rowasu’u senai’ō na hā.

¹⁰ Tane nherē, simisutu Wanhīb’apito nhīb’a’uwē ’re wanomro mono wa, wa za te ’re ai’umnhasi za’ra wa’wa, te aima íwaihu’u za’ra wa’aba zéb zarina si, za apā ’re aihāimana za’ra wa’aba mono na. Aibā hā dama pire na ’re hāimana mono nherē, aimawi tinhimirowasu’u na te te aiwi ’re ro’wa’rutu za’ra wa’aba mono wa, tāma ’re rowē mono ō di za, ta hā ’Re íhāimana u’ási mono si za te te azāri wa.

¹¹ Ísisānawā norī, wedepo’o nhonhí’rāmi na Zezu Cristu dazada ídā’ázé hā wa tō te dama ’re wasu’u u’ási, da te āma ’re saze za’ra mono da. Taha wa, ma tō zudezu norī hā te te siwi

're ĩwē'ō za'ra, ĩmreme zarina te dama 're rowasu'u mono ō wa. Ta norī hā te duré taré te te dama 're ĩwasu'u za'ra, danhĩhāiwata nhĩhāri wapsi, 're dasizudezu za'ra mono da, te dama 're awaihu'u mono newa. Āne zahadu zudezu'ō norī ma, te 're arowaihu'u mono 'wa'āhā, e te aré zudezu norī hā te te siwi 're ĩwē'ō za'ra, te dama 're ĩrowasu'u mono zém na hā. Mare di. Te te siwi 're ĩwē'ō za'ra mono ō di aré āma.

¹² ĩmawĩ tinhimirowasu'u na te te aiwi 're ĩro'wa'rutu za'ra wa'aba mono norī hā, tinhĩhāiwata nhĩhāri siré, te za pé 're si' re zani za'ra, wē te hā.

¹³ ĩsisānawā norī, 'Re ĩhāimana u'āsi mono hā ma tō aima pisutu za'ra wa'wa, rowē na āma 're aihāimana za'ra wa'aba mono da, ĩsimiroti na rob'ui'éré 'rata zarina, 're ĩrob'manharĩ za'ra wa'aba mono zém na 're asōpré wa'aba mono tō da, taha zarina, 'Re ĩhāimana u'āsi mono te te 're asō'reptu za'ra wa'aba mono dai ō wa. Tane nheré, rowē na 'Re ĩhāimana u'āsi mono āma 're aihāimana za'ra wa'aba mono wē te, marĩ ĩwē'ō na aipé'ē 're, asima 're rosa'rata za'ra wa'aba mono wamhā, asina āma 're rob'manharĩ za'ra wa'aba mono ō di za. Āne te za oto 're anomro aba mo. Asimizawĩ pese za'ra wa'aba zéb zarina si, te za 're asipawapto za'ra wa'aba mo asib'rata na, asimarĩ na zama, asimiroti na zama.

¹⁴ 'Re ĩhāimana u'āsi mono nhimiroti 'rada hā ahā uptabi nheré, simisutu haré te wasu'u, ĩsimiroti hā āne: “Ma'āpé, 're dazawĩ pese za'ra wa'aba mono za. Marĩ ĩwē na asima 're ĩrosa'rata za'ra wa'aba mono ne, te za duré dama zama sō 're asōpré wa'aba mo.” Āne si ĩsimiroti hā.

¹⁵ Tane nheré, abaze zahi 're ĩsimiroi mono ne, asisada 're asitĩ'ruĩ u'āsi za'ra wa'aba mono wamhā, asina asapa'a za'ra wa'aba ō di za.

Wamama pē'ēzani nhimiwada'uri zarina si, rowē na 're ĩdanomro mono zém na rowasu'u

¹⁶⁻¹⁷ Wa norī hā marĩ ĩwē'ō na áté 'rāwi wapē'ē 're, wa za wasima wa te 're rosa'rata za'ra. Āne na te te sima 're wa'awē mono ō di, 'Re ĩhāimana u'āsi mono pē'ēzani hā. Marĩ ĩwē na si 'rāwi wapē'ē 're, wa te wasima 're rosa'rata za'ra mono da, te za te te sima 're wa'awē. Tawamhā marĩ ĩwē'ō na 'rāwi wapē'ē 're, wa te wasima 're rosa'rata za'ra mono wamhā, te za te te 're wa'a'uwati, 'Re ĩhāimana u'āsi mono pē'ēzani hā, wa te wasina āma 're rob'manharĩ za'ra mono tō da. Taha wa, wa za āne aima waihu'u za'ra wa'wa. Ma'āpé, 'Re ĩhāimana u'āsi mono pē'ēzani nhimiwada'uri zarina si, 're anomro aba mono za oto. Tawamhā siwa'ru marĩ ĩwē'ō na aipé'ē 're asima 're rosa'rata za'ra wa'aba mono nheré, asina 're rob'manharĩ za'ra wa'aba mono ō di za.

¹⁸ Āne 'Re ĩhāimana u'āsi mono pē'ēzani nhimiwada'uri zarina si, 're aihāimana za'ra wa'aba mono wamhā, ĩsimiroti na rob'ui'éré 'rata zarina 're ĩrob'manharĩ 'rata za'ra wa'aba mono zém na, 're asōpré wa'aba mono ō di za oto, taha zarina 'Re ĩhāimana u'āsi mono te te 're asō'reptu za'ra wa'aba mono dai ō wa.

¹⁹ Dasi'uihā na danhimirosa'rata wasété zarina 're ĩdanomro mono zé wasu'u hā, wa tō waihu'u za'ra ni. Āne te 're danomro wasété. Siwa'ru te tiwasédé hā pi'ō na te te 're 'manharĩ u'āsi za'ra, aibā na zama. Siwa'ru te dasina 're dahāimana za'ra. Danhiséb āna, te marĩ ĩwasédé hā da te 're 'manharĩ za'ra.

²⁰ Duré 'Re ĩhāimana u'āsi mono upana, te romhāiba 'manharĩ āma 're dawata za'ra. Te duré tāma 're damreme zusi. Duré abzé 'manharĩ'wa, te 're danomro. Duré te 're dasi'ruiwapari za'ra. Te duré 're dasisada'ābā za'ra. Duré marĩ na te 're dasi'ruiwapari za'ra. Dasi'aba'ré na te 're dazahi za'ra. Duré marĩ ĩwē zō, te dasima si 're danhopré. Te duré 're dasirēme za'ra, 'rāwi dasi'rata 're dahāimana za'ra mono tō da.

²¹ Marĩ na te 're dasisō'ru za'ra. Duré da'rā siwamnarĩ na te 're dahāimana za'ra, āzézei'wa 're dahāimana za'ra mono wa. Datoi wasétére u, te 're dasi'ra'ōtō, siwa'ru da te 're āhuri mono da, āzé hā. Tane te duré 're hāimana, da te 're ĩ'manharĩ wasété za'ra mono zé hā. Taha wa, wa za āma sahu, te aima ĩwaihu'u za'ra wa'aba zém na. Āne 're danomro wasété mono wamhā, hāiwa u, 'Re ĩhāimana u'āsi mono u 're ĩdanhisisi mono da hā mare di, Danhib'apito uptabi u, ĩwē uptabi si, tinhib'a'uwē norĩ ma, te te tāma 're ĩ'anhomri mono da hā.

²² Āne 're danomro wasété mono ō di za, 'Re ĩhāimana u'āsi mono pē'ēzani nhimiwada'uri zarina 're danomro mono wamhā. Te za da te 're dazawĩ pese za'ra. Duré dapé'ē 're datoi u'āsi, te za 're dahāimana za'ra. Duré dapé'ē toi u'āsi, te za 're dahāimana za'ra. Duré dawara sina dasisada 're dazahi za'ra mono ō di za. Duré danhimizawĩ pese na te za 're dahāimana za'ra. Duré marĩ ĩwē na te za dama 're danhoprub za'ra. Duré tō sena wa, ropisutu wē, te za da te dama āma 're rob'manharĩ za'ra.

²³ Duré dawaimri te za dama 're dahāimana za'ra. Duré dawasété wi, dasina 're danhiptete za'ra mono sina, te za 're dahāimana za'ra. Āne 're dahāimana za'ra mono tō da, 'Re ĩhāimana u'āsi mono nhimiroti hā robaba di.

²⁴ Cristu Zezusih nhib'a'uwē 're ĩdahâimana za'ra mono norĩ hã, tiwasédé hã aré te te 're 'manharĩ ze za'ra mono nherē, duré tiwasété zô aré te te 're rowasutu za'ra mono nherē, 'rãwi te za te te siwi 're wē'ô pese za'ra, te te 're 'manharĩ za'ra mono tô da oto.

²⁵ 'Re ĩhâimana u'âsi mono pē'êzani hã ma tô wama tisô, wahâimanazép té hã ĩwē hã. Taha wa, ma'âpé ĩsimiwada'uri zarina si, 're wanomro wē wa'aba mono.

²⁶ Danhipai u, wapipe na 're wahâimana za'ra mono newa, 'rãwi wapē'ē na wasina 're wawata za'ra mono ô di za, da te wama 're nharĩ za'ra mono tô da. Duré wanhipai u, dapire na 're ĩdahâimana za'ra mono na, wa te 're da'ruiwapari za'ra mono ô di za.

6

Roti ĩwē na 're ĩdasipawaptob za'ra mono zém na rowasu'u

¹ ĩsisânawã norĩ, âne wa za duré aima waihu'u za'ra wa'wa. Áté ni'wa hã te za tihâimanazém na upa. Tawamhã 'Re ĩhâimana u'âsi mono pē'êzani nhimiwada'uri zarina si 're aihâimana za'ra wa'aba mono wamhã, te za aiwaimri 're ĩpawapto pese za'ra wa'aba mo, apã 're hâimana wē mono da, ni'wa hã. 'Re pawaptob za'ra wa'aba mono wamhã, ma'âpé 'rãwi a'â asina 're asôpre wa'aba mono za, a norĩ wa'aba zama, wa'rui'wa nhimiwada'uri zarina, aihâimanazém na 're upa za'ra wa'aba mono tô da.

² Marĩ wa, aiwi 're robzei'ô za'ra wa'aba mono wamhã, ma'âpé 're asipawapto pese za'ra wa'aba mono za, roti ĩwē na si. Âne wamhã, Cristuhu nhimiroti wē 'madã'ã'wa te za tô 're aihâimana za'ra wa'aba mo.

³ Áté ni'wa hã simiroti pire newa, te za 'rãwi tinhimiroti pire na 're si'madã'ã ze. Âne wamhã, 'rãwi te za tipē'ē na sima 're sadawa nhipese.

⁴⁻⁵ Romhuri hã te wama 're hâimana za'ra wahâiba mono bã, wa te wasina 're ĩ'madã'ã pese za'ra mono da hã. Âne wa, wa za aihĩni 'rãwi wa te wasima 're rosa'rata pese za'ra, wa te wasina 're 'madã'ã pese za'ra mono da, wanhimirohuri hã. Wa te wasina 're 'madã'ã pese za'ra mono wamhã, wa za 'rãwi wapē'ē 're wasima 're wato za'ra. Danhimirohuri hã wanhimirohuri me aiwab ô na, wa te da'ãma 're rosa'rata za'ra mono ô di za.

⁶ Áté ni'wa hã Zezu Cristuhu wasu'uwē na, te za te te 're aipawaptob za'ra wa'wa. Âne wamhã, te za asimarĩ na tãma 're asôprub za'ra wa'aba mo asa.

⁷ Ma'âpé ĩwapari pese za'ra wa'aba za. 'Re ĩhâimana u'âsi mono wi, simani ô di za, dahâimana wē wa'rãmimhã, ĩwē na te te dama ãma 're ĩ'a'uwa'imrami mono da hã, duré dahâimana wasété wa'rãmimhã, ĩwasété na te te dama ãma 're ĩ'a'uwa'imrami mono da hã. Áhã wasu'u hã tó sena wa, senai ô na ãma 're rosa'rata za'ra wa'aba mono ô di za, 'rãwi aipē'ē 're asima 're asadawa nhipese za'ra wa'aba mono tô da.

⁸ Danhimirosa'rata wasété zarina 're danomro u'âsi mono wamhã, te za 'Re ĩhâimana u'âsi mono nhiti 're dahâimana u'âsi za'ra, rowē ĩsi'utôri'ô nhiti. 'Re ĩhâimana u'âsi mono pē'êzani nhimiwada'uri zarina si 're danomro mono wamhã, te za rowē ĩsi'utôri'ô ãma 're dahâimana u'âsi za'ra, 'Re ĩhâimana u'âsi mono 'rata.

⁹ Taha wa, ma'âpé wawa'a ãna marĩ ĩwē na, wa te 're dapawaptob u'âsi za'ra wa'aba mono za, wa norĩ hã. Tawamhã bãdã ĩwa waptã'ã wapsi, 'Re ĩhâimana u'âsi mono te te wa'ãma sima ĩrotizé hã te za ĩwa'rãmi marĩ ĩwē hã te te wama 're anhomri.

¹⁰ Âne wa, wama ĩwaihu'u pese zarina, wa za dahâiba mono bã marĩ ĩwē na, wa te 're dapawaptob za'ra. Wa te 're ĩdapawaptob za'ra mono zém nhipai u, wa za wasiré ĩsazei'wa norĩ hã marĩ ĩwē na 're wasipawapto pese za'ra.

Paru hã roti na te te ĩrãsutuzé wasu'u

¹¹ Áhãta ĩnhimi'ui'ére ĩsa'ëté na, wa aima rob'ui'ére za'ra wa'wa, ĩsi'uihã na ĩnhib'rata na.

¹² Ni'wam norĩ hã ma tó te te aima 're roti zadawa za'rēi'ô za'ra wa'wa, asihãiwata nhihãri ré, 're anomro aba mono da, tawapsi asizudezu za'ra wa'aba da. E marĩ da. ĩsiré zudezu norĩ si ãma 're wata za'ra mono da, te te aima ĩroti za'ra wa'aba zém na hã. Cristu wedepo'o nhonhi'rãmi na wazada dã'ã wamhã, ma tó wa'awa'ãbã pa. Tane nherē, taha wasu'u si te te aima 're wasu'u za'ra wa'aba mono ô di, ĩsimirowasu'u na te te siwi 're wē'ô za'ra mono tó da, ĩsiré zudezu norĩ hã.

¹³ Ta norĩ hã sihãiwata nhihãri ré, 're nomro mono nherē, uburé marĩ na 'Re ĩhâimana u'âsi mono nhimiroti 'rada hã te te sina tãma ãma 're uwaimrami za'ra mono ô di. Tane nherē, ma tó te te sima 're aiwē za'ra wa'wa, ĩsimiroti zarina, aipibu pese na 're anomro aba mono da, ĩré 're anomro aba mono wa, tisiré zudezu norĩ ma, sina 're wata za'ra mono da, ĩsimiroti zarina oto 're ĩaihâimana za'ra wa'aba mono na hã.

¹⁴ Tanei ô di, wa hã. Wanhib'apito Zezu Cristuhu ãma si, wa za 're ĩwata u'âsi, wedepo'o nhonhi'rãmi na wazada ĩdã'ã ãma. Taha wa, tiza'ozém na wazada dã'ã wa, ĩwi 're ĩdadã'ã za'ra mono ne, duré wa hã dawĩ ĩdã'ã ne, ti'ai ãma danhimirosa'rata na 're ĩhâimana mono ô di oto.

¹⁵ Danhîhâiwata nhîhârî ré si, 're ïdahâimana za'ra mono zé hã, marî dai ô di, 'Re ïhâimana u'âsi mono ma hã. Duré danhîhâiwata nhîhârî âna 're ïdahâimana za'ra mono zéb zama marî dai ô di, tâma hã. Dahâimanazép tém na, ïwê na si oto 're dahâimana za'ra mono wamhã, taha si tâma wê uptabi di.

¹⁶ Ôhõ wasu'u zarina 're dahâimana za'ra mono wamhã, wa ïsima te 're da'awê, rowê na 're danomro mono da, 'Re ïhâimana u'âsi mono da'âma 're ïpê'êzé mono zéb zarina. Taha da, wa za da'âma te tiwi 're rowaptêrê u'âsi, uburé 'Re ïhâimana u'âsi mono nhîb'a'uwê norî âma.

¹⁷ Wa hã Zesusîhi ma romhuri'wa, wa 're ïhâimana, ïsimiwada'uri na. Da te ïma 're ïrob'manharî wasété za'ra mono zéb zarina, ïhâiba hã'êtê ré, 're ïmorî wa, ïpîbui pese di, tâma ïromhuri'wa 're ïmorî na hã. Te te oto sahârî za'ra, aimawi tinhimiroti na te te ïwi 're ïro'wa'rê za'ra mono norî hã.

¹⁸ ïsisânawã norî, Wanhîb'apito Zezu Cristuhu wi, wa za te tiwi 're rowaptêrê u'âsi, aihâiba za'ra wa'aba na hã, tâma asawî za'ra wa'aba wa, te te 're aipawaptob u'âsi za'ra wa'aba mono da.

Tane tô.

ÉpÉzu norĩ

ÉpÉzu norĩ ma, Paru te te ĩrob'ui'érézé

Ĩbaihã wasu'uzé

Á ĩbaihã hã Paru hã ma tô Zezusihi zazei'wa norĩ ma sômri za'ra, ÉpÉzu na 'ri nho'ômo nhisi u. Tame ma tô Paru hã aré 're sãmra. Maparane ma tô âma tiwahu, 'Re ĩhâimana u'âsi mono zadawa wasu'u na te te dama 're rowasu'u mono ré hã. Âma ronometro wapsi, ma tô ĩbaihã na tâma âma rob'ui'éré za'ra, 'ri nho'ômo amoi hawi, dazazéb 're hâimana sirômo. Capituru 1-3 âma hã Paru hã ma tô dama waihu'u, Zezusihi zazei'wa norĩ hã misi haré simisutu 're ĩhâimana za'ra mono na hã, zudezu norĩ hã duré zudezu'ô norĩ zama, sina 're siwanhizari za'ra mono âna, Zezusi hã uburé zada dâ'â za'ra wa, duré 'Re ĩhâimana u'âsi mono pê'êzani hã ĩpê'ê 're 're sãmra za'ra mono wa, aiwa. Capituru 4-6 âma ma tô duré dama waihu'u, 're danometro mono zép tém na hã. Ma tô duré tâma roti za'ra, damama norĩ ma hã, duré da'ra norĩ ma, duré damro norĩ ma hã, dama romhuri'wa norĩ ma zama, ĩ'uwaibaba tisiré norĩ ma, 're ĩhâimana za'ra mono zéb da hã.

¹ Wa hã Paru, Cristu Zezusihi zadawa wasu'u'wa, wa 're ĩhâimana, 'Re ĩhâimana u'âsi mono te te sima ĩwézéb zarina. Taha wa, wa âma aima rob'ui'éré za'ra wa'wa, ÉpÉzu na 'ri nho'ômo nhisi âma, 'Re ĩhâimana u'âsi mono nhĩb'a'uwê, 're ĩ'aihâimana za'ra wa'aba mono norĩ ma. A norĩ wa'wa hã ma tô ône u'â Zezusihi âma si 're anomro aba mo, aihâimana nhiptete sina.

² Wamama ma, wa ai'âma 're ĩmreme u'âsi za'ra wa'wa, 'Re ĩhâimana u'âsi mono ma, duré Wanhĩb'apito Zezu Cristuhu ma zama, ĩsimizawizé hã ai'âma 're hâimana u'âsi za'ra wa'aba mono da, rowê u'âsi, âma 're anomro aba mono da.

Cristuhu âma 're ĩdanometro mono norĩ ma, 'Re ĩhâimana u'âsi mono nhoprubzé wasu'u

³ 'Re ĩhâimana u'âsi mono hã sôpru uptabi di, Wanhĩb'apito Zezu Cristuhu mama hã. Ta hã Cristuhu âma 're wanometro mono wa, ma tô marĩ mono bâ wama 're sôpru, uburé marĩ wê na, hâiwa hawi. Taha wa, wama 're sôprub za'ra mono wa, âma 're wawata u'âsi za'ra wa'aba mono za.

⁴ Ta hã ti'a te te pote ô ré, ma tô romhã ré te te 're wa'apisutu siro, tinhib'a'uwê da, Cristuhu âma za 're wanometro mono wa, wawê uptabi na âma 're wanometro mono da, marĩ, wa te 're 'manharĩ wasété za'ra mono âna. Ta hã te te 're wa'apoto mono ô ré, ma tô romhã ré te te 're wa'azawi pese.

⁵ Tâma rowê wa, ma tô wa'âma sima roti siro, wa'âma 're 'ra za'ra mono da, Zezu Cristu za te te ĩwawa'âbâzéb zarina. Te te sima 're wa'awê uptabi mono wa, ma tô âne sima roti siro, wa'âma za'ra.

⁶ Wamama hã te te 're wa'azawi pese mono wa, ma tô oto wa'âma uwaimrami wê za'ra, ĩ'ra tâma ĩsawi hã te te ĩwa'awa'âbâzéb zarina. Taha wa, wa za âma 're wawata u'âsi za'ra.

⁷⁻⁸ Cristu hã wedepo'o nnonhi'râmi na wazada dâ'â wamhã, ma tô tidâ'âzém na wa'awa'â. Marĩ, wa te 're ĩ'manharĩ wasété za'ra mono zé hã ma tô te te wama 're aparĩ, wawasédé hã te te wa'âma 're ab'madâ'â tô mono da oto. Âne wamhã, ma tô Wamama hã wa'âma uwaimrami wê, sa'êté na tâma 're hâimana mono wa, te te 're ĩwa'azawi pese mono zé hã.

⁹⁻¹⁰ Te te da'âma sima ĩrotizé hã dama waihu'u pese âna ma tô dawĩ 're hâimana aré. Tane nherê, rosa'rata wê waihu'uzé hã sa'êté na tâma 're ĩhâimana mono zéb zarina, ma tô oto wama waihu'u za'ra, Cristu za te te da'âma tâma ĩ'uwaaimramizém na. Tawamhã niwapsi bâdâ te te sima ĩpistuzém na te za da'âma uwaimra, te te da'âma sima ĩrotizé hã. Tawapsi te za uburé tinhimipoto ma nharĩ za'ra, hâiwa âma, ti'ai âma zama, simisutu Cristuhu nhimiroti na 're dahâimana za'ra mono da, ta hã da'madâ'â'wai uptabi, dama 're hâimana mono wa.

¹¹⁻¹² 'Re ĩhâimana u'âsi mono hã marĩ na te te sima 're aroti mono wamhã, te za tô te te âma 're a'uwaaimrami. Ta hã ma tô wa'apisutu siro, ĩsib'a'uwê 're wanometro mono da, Cristuhu âma za 're wanometro mono wa. Âne duréihã te te wa'âma sima ĩrotizéb zarina, ma tô wa'âma uwaimrami za'ra, danho'reptui'wa zô 're ĩwanhimipari 'rata za'ra mono norĩ ma, âma 're ĩwawata u'âsi za'ra mono zéb da hã.

¹³ A norĩ wa'aba zama te oto wasiré Cristuhu âma 're anomro aba mo. Danho'reptui'wai wasu'uwê hã ma tô ĩwari za'ra wa'wa, asi'uihã na. Tô sena Cristuhu wasu'uwê hã. Tawamhã wari za'ra wa'aba wamhã, ma tô Danho'reptui'wa na asina 're ĩ'umhãsi za'ra wa'aba mo, Cristu hã. Taha zarina ma tô 'Re ĩhâimana u'âsi mono hã Tipê'êzani hã we aima sômri za'ra wa'wa, 'râwi asina 're waihu'u za'ra wa'aba mono da, ĩsib'a'uwê oto 're anomro aba mono na. Âne ma tô ai'âma uwaimrami wê za'ra wa'wa, te te dama ĩpistuzéb zarina.

¹⁴ Tawamhã niwapsi te za uburé marĩ ìwê hã te te wama 're anhomri, tizazei'wai mono bã. Duré Ìsib'a'uwê 're wahâimana za'ra mono wa, te za rowasété hawi wa'awaibui pese. Tawapsi wama 're rowê za'ra mono di za. Áne tó sena za te te wama âma Ì'a'uwaimramizém na, wa te âma waihu'u za'ra da, ma tó Tipê'ézani hã te te wama 're anhomri. Taha wa, âma 're wawata u'âsi za'ra wa'aba mono za.

Ìsazei'wa norĩ ma, Paru te te ìrowaptêrêzé wasu'u, 'Re ìhâimana u'âsi mono wi

¹⁵ Aiwasu'u wê za'ra wa'wa hã ma tó we ìtême waptârã, Wanhib'apito Zezusihi zazei'wa oto 're anomro aba mono na, duré asiré Ìsazei'wa norĩ 're Ìsawi pese za'ra wa'aba mono na zama.

¹⁶ Taha zarina, wa ône u'âsi 're ìto, 'Re ìhâimana u'âsi mono ma, ai'âma za'ra wa'aba. Duré tâma 're ìmreme mono wamhã, aima za'ra wa'aba zama wa tó te tiwi 're rowaptêrê u'âsi, hãiwa u ai'âma 're ìpo're si'âri za'ra wa'aba mono âna.

¹⁷ Wamama hã waihu'u pese za'êtip dá'â sina, wa aima za'ra wa'aba te tiwi 're rowaptêrê u'âsi, hãiwa hawi dahâimanazém na rowaihu hã Tipê'ézani na te te aima 're sômri u'âsi za'ra wa'aba mono da, duré Wamama hã ìhâimanazém na 'rãwi 're waihu'u za'ra wa'aba mono da, 'Re ìhâimana u'âsi mono hã, Wanhib'apito Zezu Cristuhu 'madâ'â wa hã.

¹⁸⁻¹⁹ Wa hã wa ìsima wê, 'Re ìhâimana u'âsi mono te te 're aipawaptob za'ra wa'aba mono da, Ìsimiroti hã 're waihu'u pese za'ra wa'aba mono da, duré rowê uptabi zó te te Ì'aipisutu za'ra wa'aba zé wasu'u hã, 're waihu'u za'ra wa'aba mono da. Duré uburé marĩ ìwê uptabi na wama 're Ìsôprub za'ra mono zéb da hã tinhib'a'uwê norĩ ma, te te ìropisutuzéb zarina, taha wasu'u zama 're waihu'u za'ra wa'aba mono da, wa ìsima aiwê za'ra wa'wa.

²⁰ Wa duré aima za'ra wa'aba te tiwi 're rowaptêrê u'âsi, te te 're aipawaptob u'âsi za'ra wa'aba mono da, ìwaihu'u pe hã asina 're waihu'u za'ra wa'aba mono da. Tiwaihu'u pese na ma tó Cristu hã ab're hawi hãiwa'utu, dá'â nherê. Taha pari, ma tó pisutu, pire na Ìsimire niwĩ 're sãmra mono da, hãiwa âma.

²¹ Tame te pire uptabi na dama 're hâimana, pire na hãiwa âma 're ìhâimana za'ra mono norĩ ma, duré tame siptete na 're ìhâimana za'ra mono norĩ ma zama. Tí'ai âma duré hãiwa âma zama tipire na te te âma wabzu za'ra ô di, dama ìpire za'ra norĩ hã. Ône u'â te za tipire na te te 're da'a'rãnhipai u'âsi.

²²⁻²³ 'Re ìhâimana u'âsi mono hã ma tó Cristu hã pisutu, dama pire na 're hâimana mono da, Ìsimipoto mono bã. Ma tó duré Cristu hã pisutu, ropã tinhib'a'uwê norĩ 'madâ'â wa da, ôhõ si uburé Danhib'apito dama 're hâimana mono wa. Wahãiba hã misi nherê, wahãiba na marĩ mono bã wama 're ìhâimana za'ra mono ne, te Cristuhu hãiba wasu'u, Ìsib'a'uwê norĩ hã. Ìsib'a'uwê norĩ hã tâma 're hâimana za'ra mono wa, marĩ zó tiwi 're rowaptã'â mono ô di, Cristuhu wi hã. Ta hã te ropã 're hâimana u'âsi, uburé marĩ hã 're ìhâimana za'ra mono zéb da hã, Ìsadawa para.

2

Dapê'ê 're dadâ'â u'âsi 're ìdanomro mono zém hawi, danho'reptuzé wasu'u

¹ Duréihã a norĩ wa'wa hã aipê'ê 're, 're atã'â za'ra wa'aba mono ne, te 're anomro aba mono aré, 'Re ìhâimana u'âsi mono nhimiroti na 're anomro aba mono ô wa, duré aiwasédé hã 're 'manharĩ za'ra wa'aba mono wab zama.

² Ìsazei'ô'wai hâimanazém na ma tó aré 're aihâimana za'ra wa'aba mo, wa'uburé norĩ nhib'apito nhimiroti na zama. Hãiwa nho're âma te ta norĩ hã 're hâimana za'ra. Ìsimiroti hã tâma pire za'ra di, ìpo're'ô norĩ ma hã. Taha wa, te ta norĩ hã Ìsimiroti na si 're nomro, 'Re ìhâimana u'âsi mono wapari'ô'wa norĩ hã.

³ Tane wa norĩ hã wanhimirosa'rata wasété zarina, wa tó aré 're wanomro. Wa te wasima 're ìwê za'ra mono zéb zarina, wa tó aré wa te wasima âma 're uwaimrami za'ra. Áne 're wahâimana wasété za'ra mono wa, te aré dazu wahã za'ra, 'Re ìhâimana u'âsi mono hã.

⁴⁻⁵ Tane nherê, wawasété na 're wanomro mono wa, 're ìwadã'â za'ra mono ne, 're wahâimana za'ra mono nherê, ma tó Cristu te te ìhãiwa'utuzém ne wapê'ê 're te te 're wa'ahãiwa'utu, rowê na si oto âma 're wanomro mono da. Áne ma tó wama âma uwaimrami wê za'ra 'Re ìhâimana u'âsi mono hã, ìpê'ézé hã sa'êtê na tâma 're hâimana mono wa, duré tâma wazawi uptabi za'ra wa. Taha wa, te te 're ìwa'anho'reptui mono zé wa'rãmi, marĩ zó 're simipari mono âna, ma tó te te 're wa'anho'reptu.

⁶ Ta hã Cristu ab're hawi te te ìhãiwa'utu ne, ma tó wapê'ê 're te te 're wa'ahãiwa'utu, hãiwa âma 're wasi'ubumroi u'âsi mono da, Cristu Zezusihi 'rata.

⁷ E marĩ da. Da te waihu'u za'ra da, Ìsimizawizé hã sa'êtê na tâma 're ìhâimana mono hã, wa'uiri na 're ìdahâimana za'ra mono norĩ hã. Áne te za da te 're waihu'u za'ra, Cristu Zezusi te te 're ìda'azawi pese mono zéb zarina.

8 'Re ihâimana u'âsi mono te ze 're asawi pese za'ra wa'aba mono zéb zarina, ma tō asō'reptu za'ra wa'wa, Wa'anho'reptui'wa hā asina 're i'umhasi za'ra wa'aba mono zéb zarina. Asi'uihā na 're asisō'reptui waihu'u za'ra wa'aba mono ō di. Sōpru wa, ma tō Wamama hā aima āma uwaimrami za'ra wa'wa, asō'reptu za'ra wa'aba zé hā.

9 Marī hā ahā na 're 'manharī wē za'ra wa'aba mono nherē, taha zarina te te 're asō'reptu za'ra wa'aba mono ō di 'Re ihâimana u'âsi mono hā, 'rāwi asi'āma wa'aba 're a'maiwata aba mono tō da, asi'uihā na asi'manho'reptui wa'aba da newa.

10 Cristu Zesusihī āma 're wanomro mono wa, ma tō 'Re ihâimana u'âsi mono hā wama sōmri za'ra wahâimanazé ité hā, wa te āma dama 're rob'manharī wē za'ra mono da, duré iwē na wa te 're dapawaptob za'ra mono da, te te wa'āma iroti sirōmo zéb zarina.

Zudezu norī, zudezu'ō norī me aihīni Cristuhu āma oto 're īnomro mono zé wasu'u

11-12 A norī wa'wa hā ma tō zudezu'ō na 're aipoto za'ra wa'aba mo. Taha wa, ma tō asihāiwata nhihāri aba ō na te te 're asisi za'ra wa'wa, zudezu norī hā. Ta norī si ma tō tinhihāiwata nhihāri ré na 're sisisi za'ra, tihāiba na te te sima 're i'manharī za'ra mono zéb zarina. Ma'āpé rosa'rata za'ra wa'aba, 're aihâimana 'rata za'ra wa'aba mono zém na. Cristu hā Danho'reptui'wa na waihu'u za'ra wa'aba ō wa, āma 're anomro aba mono ō di aré. A norī wa'wa hā zudezu'ō wa, Izarazéhé nhihudu norī siré 're anomro aba mono ō di duré. Taha wa, 'Re ihâimana u'âsi mono hā tinhib'a'uwē norī ma si, iwē na te te iropisutuzém na 're waihu'u za'ra wa'aba mono āna, ma tō aré 're aihâimana za'ra wa'aba mo. Āne wa, rowē uptabi zō 're asimipari za'ra wa'aba mono āna, ma tō 're anomro aba mo. Duré 'Re ihâimana u'âsi mono hâimanazém na sena na waihu'u za'ra wa'aba āna, ma tō 're anomro aba mo aré.

13 Tane nherē, dasisiti 're idahâimana za'ra mono ne, 'Re ihâimana u'âsi mono nhiti, romhā na 're aihâimana za'ra wa'aba mono ō di oto, asimirosa'rata aba na. Cristu hā wazada idā'ázéb zarina, ma tō Wamama hā sitēme ai'āwisi za'ra wa'wa, Cristu Zesusihī āma oto 're anomro aba mono da, 'rāwi i'rata 're aihâimana za'ra wa'aba mono da oto, asimirosa'rata aba na.

14 Cristu hā ma tō wawi uprosi za'ra, 're iwasi'ruiwapari za'ra mono zé hā. Taha wa, aihīni wa oto isib'a'uwē 're wahâimana za'ra, zudezu norī hā, zudezu'ō norī me. 'Re wasisawi pese za'ra mono sina, wa oto 're wanomro.

15 'Re ihâimana u'âsi mono nhimiroti 'rata na rob'ui'éré hā sa'ētē na ma tō zudezu norī ma si 're hâimana za'ra, marī hā te te tãma āma 're i'uwaimrami za'ra mono zéb da hā, taha zarina iwasédé hā te te tãma 're i'apari mono zéb da hā duré. Cristu hā wazada idā'ázéb zarina, tãibā oto 'Re ihâimana u'âsi mono nhimiroti 'rada hā, marī na dawasédé hā te te dama 're i'apari mono zéb da hā. Misi dahāiba ne, aiwapsi wa oto 're wahâimana za'ra, zudezu norī, zudezu'ō norī me, wahâimanazép tém na si, iwē na si āma 're wanomro mono da, duré wasisawi pese sina oto 're wahâimana za'ra mono da wasiré.

16 Cristu hā wedepo'o nhonhi'rāmi na wazada idā'ázém na ma tō wawi uprosi za'ra, 're iwasi'ruiwapari za'ra mono zé hā, aihīni tizazei'wa norī hā te te 're wa'anhimroi mono da si oto, 'Re ihâimana u'âsi mono u.

17 Cristu hā ti'ai u wei morī wa, ma tō rowasu'uwē na te te 're da'apo're pu'u, rowē na 're idahâimana za'ra mono zém na hā, 'Re ihâimana u'âsi mono oto te te 're ida'awēsāmri mono zéb zarina. E marī da. Zudezu'ō norī hā rowē na āma 're aihâimana za'ra wa'aba mono da, 'Re ihâimana u'âsi mono nhimiroti ré, 're anomro aba mono ō norī hā, duré zudezu norī, rowē na āma 're wahâimana za'ra mono da, 'Re ihâimana u'âsi mono nhimiroti ré, 're iwanomro mono norī hā.

18 Cristu hā wazada dá'a wa, duré wama 're hâimana za'ra mono wa, te za oto Ipē'ēzani hā simisutu te te 're wa'apawapto, Wamama u 're iwasihutu mono zéb da hā wanhimirosa'rata na. Tawamhā tãma 're wamreme zusi mono wamhā, te za te te 're wa'awapari u'âsi, zudezu norī hā, zudezu'ō norī me.

19 Taha wa, zudezu'ō nherē, dasiré'ō ne 're aihâimana za'ra wa'aba mono ō di oto. 'Re ihâimana u'âsi mono nhib'a'uwē te oto dame 're aihâimana za'ra wa'aba mo. Te duré dame i'ra 're aihâimana za'ra wa'aba mo oto.

20 Ētē 'manharī na wa za 'ri na ai'āma simiré'é za'ra wa'wa. Ētē na'rata nhisiwi, da te dasiwi 're i'ri za'ra mono ne, ma tō Cristuhu wasu'uwē na te te 're aipawaptom na'rata za'ra wa'wa, isadawa wasu'u'wa norī hā. Duré Wamama pē'ēzani, marī hā te te tãma i'waihu'u za'ra zéb zarina, duréihā 'Re ihâimana u'âsi mono te te dama 're isadawa wasu'u za'ra mono norī zama ma tō te te 're aipawapto za'ra wa'wa. 'Ri uparizéb da, 'ri na'rata wē'ézéb āma, étē tōmo hâpâ wawē na, wa za Zezu Cristuhu āma simiré'é, wapawapto uptabi 'wa wama 're hâimana za'ra mono wa, ta hā.

21 Ēne hā misi 'ri na simisutu 're isimi'wara mono ne, te za te te 're wa'apawapto Cristu hā, wa'āma 're isōrōwa za'ra mono da hā, aiwapsi 're wahâimana za'ra mono da.

²² Tane a nori wa'wa hā, ētē ahā na 'ri misi da, da te dasiwi i'ri ne, te za te te aima 're nharī u'āsi za'ra wa'wa, simisutu Wanhīb'apito āma 're aihāimana za'ra wa'aba mono da, Isōrōwa misi tāma 're aihāimana za'ra wa'aba mono da oto, 'Re ihāimana u'āsi mono ma, Ipē'ēzani hā aipē'ē za'ra wa'aba 're, 're ihāimana mono zéb zarina.

3

Paru hā zudezu'ō norī āma te te 're iromhuri mono zé wasu'u

¹ Taha wa, wa hā Paru, wa 'Re ihāimana u'āsi mono wi, te tiwi 're rowaptērē u'āsi, aima za'ra wa'aba. Zudezu'ō norī, Cristu Zezusihi zadawa wasu'u'wa wa 're mo, iwasu'uwē na te 're aipawaptob za'ra wa'aba mono da. Taha 'ru te, ma tō dasiwi i'nhērē ni, dazazéb 're, izab da.

² 'Re ihāimana u'āsi mono hā simizawi pese wa, ma tō romhuri hā īma tisō, aima 're irowē za'ra wa'aba mono zéb da hā. Āne na ma tō iwapari za'ra wa'wa, tō.

³⁻⁴ Durēihā te te sima da'āma irotizé hā aré dama iwaihu'u'ō hā ma tō īma waihu'u, 'Re ihāimana u'āsi mono hā. Nimosi wa tō syry na āma aima rob'ui'éré za'ra wa'wa, waihu'u za'ra wa'aba da.

⁵ Zudezu'ō norī āma te te sima irotizé hā te te dama waihu'u o di aré, 'Re ihāimana u'āsi mono hā. Āhāna nimosi ma tō Cristuhu zadawa wasu'u'wa norī ma waihu'u, te te sima da'āma irotizé hā, Tipē'ēzani na ta norī ma te te iwaihu'uzéb zarina. Duré marī hā te te tāma iwaihu'u za'ra zéb zarina, dama isadawa wasu'u'wa norī ma zama, ma tō tāma waihu'u za'ra, te te sima da'āma irotizé hā.

⁶ Rowasu'u wē hā aré dama iwaihu'u'ō hā 're ihāimana mono hā, āne. Zudezu'ō norī hā Cristuhu wasu'uwē te te 're saze za'ra mono wa, marī iwē na zudezu norī ma 're isōpru mono zéb da hā, 'Re ihāimana u'āsi mono te te tāma 're iropisutu za'ra mono zéb ré, te za 're hāimana za'ra. Simisutu te za oto 're hāimana za'ra, dahāiba misi ne. Cristu Zezusihi āma oto 're nomro mono wa, 'Re ihāimana u'āsi mono hā tinhib'a'uwē norī ma, marī iwē na te te tāma iropisutuzéb zarina, te za zudezu'ō norī ma zama te te tāma āma 're a'uwaimrami, zudezu norī zu. Āne zudezu'ō norī āma te te sima irotizé hā.

⁷ 'Re ihāimana u'āsi mono hā simizawi pese wa, ma tō ipisutu, tāma iromhuri'wa 're imorī da, Cristuhu wasu'uwē hā te dama 're wasu'u mono da, tiwaihu'u pe hā te te īma sōmri wa.

⁸ Iwana isazei'wa norī hā iwē na te sipa za'ra o di. Ta norī si ma tō tiwē na i'nhipa za'ra. Tane nherē, ma tō ipisutu, zudezu'ō norī ma te tāma 're wasu'u za'ra mono da, iwē hā sa'ētē na Cristuhu ma 're ihāimana mono hā dama āma 're isōpru mono zéb da hā.

⁹ Ropoto mono 'wa hā ma tō aré pisutu, ropoto na'rata hawimhā dama waihu'u āna a'ā 're hāimana mono da, te te da'āma sima irotizé hā. Nimosi ma tō ipisutu, te dama 're rowasu'u mono da, za oto te te dama āma i'uwaimramizém na hā te te sima da'āma irotizéb zarina.

¹⁰⁻¹¹ Ta hā ma tō sima wē, hāiwa āma pīre na 're ihāimana za'ra mono norī hā te te waihu'u za'ra da oto, hāiwa hawi dahāimanazém na rowaihu'u wē hā ahā na tāma 're ihāimana mono na hā. Simisutu isib'a'uwē norī hā oto tāma 're hāimana za'ra mono wa, te za oto āne na waihu'u za'ra, durēihā te te sima da'āma irotizé hā te te da'āma uwaimrami wa, Wanhīb'apito Cristu Zezusi te te ida'anho'reptuzéb zarina.

¹² Taha wa, Wanhīb'apito āma oto 're wanomro mono wa, duré isimipawaptobzém na wa te wasina 're i'umnhasi za'ra mono zéb zarina, wa za wasina wapahi āna itēme 're wasihutu wanhimirosa'rata na, 'Re ihāimana u'āsi mono u, robze na tāma 're wamreme zusi mono da.

¹³ Āne wa, wa hā te irobzépata na i'āma 're rosa'rata za'ra wa'aba mono wa, aiwi 're robzei'ō za'ra wa'aba mono o di za. Cristuhu wasu'uwē hā wa tō te aima 're wasu'u za'ra wa'wa, aima 're irowē za'ra wa'aba mono zéb da hā. Taha wa, Cristuhu wasu'uwē hā te dama 're wasu'u mono 'ru te, rowasédé hā da te īma 're 'manharī za'ra mono nherē, īma 're rowē mono di. Āne wa, te irobzépata na i'āma 're rosa'rata za'ra wa'aba mono wa, aiwi 're robzei'ō za'ra wa'aba mono o di za.

Cristuhu nhimizawi pese zé wasu'u

¹⁴ Taha wa, ihi'rātitō, wa 're isimasisi, Wamama wi te tiwi 're rowaptērē u'āsi mono da, aima za'ra wa'aba.

¹⁵ Ohō si Wamama wa, wa i'ra 're wahāimana za'ra isazei'wai mono bā, hāiwa āma ti'ai āma zama 're iwahāimana za'ra mono norī hā.

¹⁶⁻¹⁹ Wamama te hā iwaihu'upe hā, te sa'ētē na 're hāimana tāma. Āne wa, wa tiwi te 're rowaptērē u'āsi, aima za'ra wa'aba, Tipē'ēzani na te te 're aipawaptob u'āsi za'ra wa'aba mono da, aihāimana nhipete sina, āma 're aihāimana u'āsi za'ra wa'aba mono da, Cristu hā aipē'ē 're, 're sāmra u'āsi za'ra wa'aba mono da, iwaihu'u pese na asina 're i'umnhasi za'ra wa'aba mono zéb zarina. Wa duré aima za'ra wa'aba, te tiwi 're rowaptērē u'āsi, te te 're

aipawaptob u'âsi za'ra wa'aba mono da, dazawizé hã aima 're Ihâimana za'ra wa'aba mono zéb zarina, dama 're 'manharî wê u'âsi za'ra wa'aba mono da. Dazawizé hã sa'êtê uptabi na, te Cristuhu ma 're hâimana. Âne wamhã, uburé asiré Îsazei'wa norî me, te te 're asawi pese za'ra wa'aba mono na, 'râwi asina 're waihu'u za'ra wa'aba mono da, wa Îsima aiwê za'ra wa'wa, ti'ab ré wa te wasina 're waihu'u uptabi za'ra mono ô nheré, Cristu te te 're İwa'azawi pese mono zé hã. E marî da. Uburé marî İwê si, 'Re Ihâimana u'âsi mono ma 're Ihâimana za'ra mono ne, aima zama 're hâimana za'ra wa'aba mono da, dazawizé hã, dahâimanzém na rowaihu'u wê zama.

²⁰ 'Re Ihâimana u'âsi mono hã waihu'u pese di, te te wama âma 're İ'a'uwaimrami mono zéb da hã, marî İwê zô wa te 're İrosa'rata za'ra mono zém nhipai u, duré marî İwê hã wa te tiwi 're İwaptêrê za'ra mono zém nhipai u zama. Tiwaihu'u pese na te te 're İwa'apawapto mono zéb zarina, tâma waihu'u pese di, İwê na te te wama âma 're İ'a'uwaimrami mono zéb da hã.

²¹ Taha wa, Îsazei'wai mono bâ Zezu Cristuhu âma 're İwanomro mono norî, Wamama âma 're wawata u'âsi za'ra wa'aba mono za.

4

Misi Cristuhu hâiba ne, aihîni Îsazei'wa norî 're Ihâimana za'ra mono zém na rowasu'u

¹ Taha wa, wa za aima roti za'ra wa'wa, Wanhîb'apito ma romhuri'wa 're İmorî 'ru te, 're İza mono ré, dazazé 're. Ma'âpé dama 're aihâimana wê za'ra wa'aba mono za, 'Re Ihâimana u'âsi mono te te sima 're İ'aiwê za'ra wa'aba mono zéb uwaibaba. Taha da, ma tô te te sima 're aipisutu za'ra wa'wa.

² Âne te za 're anomro aba mo. Aipire na asina 're asôpré wa'aba mono ô di za. Duré aiwamri te za dama 're aihâimana za'ra wa'aba mo, aihâimana wê na.

³ Wamama hã ma tô Tipê'ezani na te te wama 're anharî, rowê na oto wasiré 're wanomro mono da. Taha wa, âne 're aihâimana u'âsi za'ra wa'aba mono da, te za 'râwi asina 're asôpré wa'aba mo.

⁴ Cristuhu nhîb'a'uwê mono bâ misi dahâiba ne, wa simisutu 're wahâimana za'ra. Misi te İpê'ezani hã 're hâimana. Taha si te wama 're hâimana za'ra, wapê'e mono bâ. Duré ôhō zô si wa 're wanhîmpari za'ra oto, rowê uptabi zô. Taha zô 're asimipari za'ra wa'aba mono da, ma tô tinhib'a'uwê da, aipisutu za'ra wa'wa, 'Re Ihâimana u'âsi mono hã.

⁵ Ôhō si, Danhîb'apito te 're hâimana. Ôhō si, te Wanhîb'apito wasu'uwê hã 're hâimana, wa te âma 're İsaze za'ra mono zéb da hã. Ôhō zadawa para si, wa tô â dawabzuri hã wa te 're 'manharî za'ra.

⁶ Ôhō si uburé Damama te 're hâimana, 'Re Ihâimana u'âsi mono hã. Ôhō si danhipai u te ropâ 're hâimana. Te duré wapê'ê mono bâ 're sãmra.

⁷ Cristu hã ma tô marî İwê na İ'madâ'â waihu'u ô na wama 're sôprub za'ra, wahâiba mono bâ, te te wama 're İ'apisutu mono zéb zarina, wa te tâma 're İdapawapto za'ra mono zéb da hã.

⁸ Duréihã ma tô âne na rob'ui'éré ni, İbaihã na hã:

"Hâimo morî wamhã, dawi watobro wa, ma tô sisarina da'ahã na te te danhimro. Marî İwê na ma tô duré dama 're sôpru."

Âne 'Re Ihâimana u'âsi mono zadawa wasu'u'wa nhimirowasu'u na rob'ui'éré hã.

⁹ E marî te wasu'u, hâimo İmorizé hã. A'â ti'ai u İmorizé te wasu'u, ta hawi hâimo morî wa.

¹⁰ Ti'ai u we İmorî hã ma tô apâ mo, hâiwa nhipai u ropâ uburé da'madâ'â'wa dama 're hâimana mono da.

¹¹ Cristu hã ma tô ni'wam norî hã pisutu za'ra, İsadawa wasu'u'wa 're nomro mono da. Ni'wam norî ma hã ma tô duré pisutu za'ra, marî te te tâma İwaihu'u za'ra zéb zarina, 'Re Ihâimana u'âsi mono te te 're sadawa wasu'u za'ra mono da, Îsazei'wa norî ma. Duré ni'wam norî hã ma tô pisutu za'ra, İwasu'uwê na te te 're dapo're pu'u za'ra mono da. Duré ni'wam norî hã ma tô pisutu za'ra, dama rowahutu'wa da, İsimiroti na te te 're dapawapto za'ra mono da, âma 're dahâimana wê za'ra mono da.

¹² Âne ma tô Cristu hã da'apisutu, 'Re Ihâimana u'âsi mono nhîb'a'uwê norî te te 're pawapto za'ra mono da, taha zarina 're sipawapto pese za'ra mono wa, siptete sina 're hâimana za'ra mono da.

¹³ Tawamhã aihîni wa za oto wanhimirosa'rata na wasina wa te 're sazei pese za'ra, Wanhîb'apito wasu'uwê hã wa te âma 're İsaze za'ra mono zém na hã. Duré aihîni wa za oto 'râwi wa te 're waihu'u za'ra, 'Re Ihâimana u'âsi mono 'ra hã, niha 're Ihâimana mono na. Âne wamhã, wahâimana wê zé, wa za wasima wa te 're sa'êtê za'ra. Tawamhã wa za oto wasina wa te 're uwaimrami za'ra, Cristuhu ne 're İwanomro wê uptabi mono zé hã.

¹⁴ Āne wamhā, ai'utē ne wanhimiza'rese āna 're wanomro mono ō di za oto. Tawamhā dazadawa nhipese na da te wama 're roti za'ra mono nherē, roti tō senai'ō hā wa te 're wapari za'ra mono ō wa, roti tō senai'ō niwī 're wasipizari za'ra mono ō di za.

¹⁵ Wa norī hā roti tō sena na si, wa za wasima wa te 're roti za'ra, 're wasisawi pese za'ra mono sina. Āne wamhā, wahāimana wē na, wa za wa te 're sa'ētē za'ra. Tawamhā wa za oto wa te wasina 're uwaimrami za'ra, Cristuhu ne 're īwanomro wē uptabi mono zé hā, Wanhīb'apito ne.

¹⁶ Marī mono bā wahāiba bā wama 're hāimana za'ra mono nherē, wa za wa'rā zadawa para si marī hā wa te 're 'manharī za'ra. Tane wa norī hā Wanhīb'apito zadawa para si marī hā wa te 're 'manharī za'ra mono wamhā, rowē na wa za wasiré 're wahāimana za'ra. Tawamhā 're īwasisawi pese za'ra mono zéb zarina, wa za 're wasipawaptob za'ra, wa te wasima 're sa'ētē za'ra mono da, wahāimana wē zé hā.

Cristuhu āma oto 're īdanomro mono zép té wasu'u

¹⁷ Taha wa, tō sena Wanhīb'apito zadawa para wa za oto aima roti za'ra wa'wa, Wanhīb'apito zazei'ō'wa norī ne 're anomro aba mono tō da, ta norī nhimirosa'rada hā tō senai'ō wa.

¹⁸ Tob'a na 're īnomro mono norī ma, rob'madā hā tāma īwaihu'u za'ra ō ne, 'Re īhāimana u'āsi mono nhimiroti uwaibaba rosa'rada hā tāma waihu'u za'ra ō di, īsazei'ō'wa norī ma hā. Ta norī hā te te sima 're wē za'ra mono ō wa, īsimiroti hā te te 're wapari za'ra mono da, te za tiwasété na siwaihu'u āna 're hāimana za'ra. Taha wa, rowē na āma 're īdahāimana za'ra mono zéb ré, 're hāimana za'ra mono ō di za.

¹⁹ Siséb āna te ta norī hā te te sina 're rob'manharī wasété za'ra, tihāimana wasété na. Tiwasété zō si te duré sima 're sōpré, marī īwasété na si 're hāimana za'ra mono da.

²⁰ E āne 're aihāimana za'ra wa'aba mono da, ma tō Cristu hā īhāimanazém na 're īwaihu'u za'ra wa'aba mo. Mare di.

²¹ A norī wa'wa hā ma tō Cristuhu wasu'uwē hā aipo're na 're īwapari za'ra wa'aba mo. Oto īsiré 're aihāimana za'ra wa'aba mono wa, Zezusihi hawi roti tō sena hā aima waihu'u pese za'ra wa'aba di.

²² 'Re anomro wasété aba mono da si, te aré asima 're īrosa'rata za'ra wa'aba mo. Taha wa, te aré aiwi 're si'utōrī za'ra wa'wa, 're anomro wē wa'aba mono zé hā. Tane nherē, te za oto īrēme pese za'ra wa'wa, 're aihāimana wasété za'ra wa'aba mono zé hā.

²³ Asimirosa'rata wē na si te za oto 're īrosa'rata za'ra wa'aba mo, taha zarina 're aihāimana wē za'ra wa'aba mono da oto.

²⁴ Da'uza hā īhā tém na 're īdasi'uza za'ra mono ne, te za oto aihāimanazép tém na si 're aihāimana za'ra wa'aba mo, īwē na si. Taha da, ma tō 'Re īhāimana u'āsi mono hā aipoto téb za'ra wa'wa aipé'ē 're, īsine 're anomro wē wa'aba mono da, tō sena dama 're aihāimana wē za'ra wa'aba mono da oto.

²⁵ Taha wa, dama 're asadawa nhipese za'ra wa'aba mono ō di za oto. Aihāiba mono bā te za tō sena na si asima 're īrowasu'u za'ra wa'aba mo.

²⁶⁻²⁷ Nimahā na 're asiti'ru za'ra wa'aba mono wamhā, 're aiwasété za'ra wa'aba mono ō di za, aiwasédé hā 're 'manharī za'ra wa'aba mono tō da. Duré asiti'rui ré bādā hā wahuré ai'āma 're si'utōrī za'ra wa'aba mono tō da, te za asiwi 're īwē'ō za'ra wa'aba mo, Wa'uburé nhimiwada'uri zarina aiwasédé hā 're 'manharī za'ra wa'aba mono tō da dama.

²⁸ Danhibrom na dawi 're asimisaihuri za'ra wa'aba mono hā 're asimisaihuri za'ra wa'aba mono ō di za oto. Te za oto asib'rata na 're īromhuri za'ra wa'aba mo, aihāimana wē na oto 're aihāimana za'ra wa'aba mono da, duré asimirohmuri na īsibrob'ō norī hā 're pawaptob za'ra wa'aba mono da, āne si wē wa.

²⁹ Aimreme wasété na dama 're aimreme zusi aba mono ō di za oto. Aimreme wē na si te za oto dama 're aimreme zusi aba mo, asimiroti wē na si 're dapawaptob za'ra wa'aba mono da āma.

³⁰ 'Re aihāimana wasété za'ra wa'aba mono ō di za, aihāimanazém na Wamama pē'ēzani wi 're robzei'ō tō za'ra wa'aba mono da. E marī wa. Īpē'ēzani hā te wapē'ē 're, wama 're hāimana za'ra, wapibui pese zéb da hā, 'Re īhāimana u'āsi mono te, tāma 're īwahāimana za'ra mono na, bādā īwa waptā'ā ō ré, te te īwa'anho'reptuzéb da hā.

³¹ Taha wa, te za oto 're īrēme pese za'ra wa'aba mo, aipé'ē na 're īda'ruiwapari za'ra wa'aba mono zé hā. Asiti'ru zama te za 're īrēme pese za'ra wa'aba mo, asahi zama duré. Aimreme 'rāihā sina, duré dama 're nharī za'ra wa'aba mono ō di za. Da'āma 're wasété za'ra wa'aba mono ō di za duré. Dama 're rob'manharī wasété za'ra wa'aba mono ō di za duré.

³² Marī īwē na te za dama 're asōprub za'ra wa'aba mo, aipé'ēzé sina. 'Re īhāimana u'āsi mono hā Cristu dazada dā'ā wa, te te ai'āma 're 'madā'ā za'ra wa'aba mono ō di oto, 're ī'manharī wasété za'ra wa'aba mono zé hā. Taha wa, a norī wa'wa hā īwasédé hā da te aima

're 'manharī za'ra wa'aba mono nherē, Īsine dawasédé hā da'āma 're 'madâ'â za'ra wa'aba mono ō di za oto.

5

'Re ihâimana u'âsi mono 'ra na oto 're idanomro mono zé wasu'u

¹ A norī wa'wa hā 'Re ihâimana u'âsi mono 'ra oto 're anomro aba mono wa, tâma asawi za'ra wa'aba di. Taha wa, te za Īsirā zarina si oto 're anomro aba mo.

² Cristu te te 're ĩwa'azawi pese mono zéb zarina, te za oto 're ĩdazawi pese za'ra wa'aba mo. Ta hā te te 're wa'azawi pese mono wa, ma tō sisawi āna sisō, wazada dâ'â da. Taha wa, 'Re ihâimana u'âsi mono ma 're ĩdanhoprub za'ra mono zéb zarina, sisawi āna sisōmri wa, Wamama ma wē uptabi di, wazada ĩdâ'âzé hā.

³ A norī wa'wa hā 'Re ihâimana u'âsi mono nhib'a'uwē 're anomro aba mono nherē, siwa'ru aiwasédé hā 're 'manharī za'ra wa'aba mono ō di za, pi'ō na aibā na zama. Duré aihâimana nhiséb'ō na 're anomro aba mono ō di za. Duré danhibrom na 're da'ruiwaparī za'ra wa'aba mono ō di za, ta hā ĩ'uwaibaba ō wa 're ĩdahâimana wasété za'ra mono zé hā.

⁴ Duré aimreme nhiséb'ō na asima 're rowasu'u wasété za'ra wa'aba mono ō di za. Aimreme to na asima 're rowasu'u wasété za'ra wa'aba mono ō di za duré, āne hā ĩ'uwaibaba ō wa, Wamama nhib'a'uwē 're ĩwanomro mono zéb da hā. Wama 're ĩsōpru mono zém na si, te za asima 're ĩrowasu'u za'ra wa'aba mo oto, Wamama āma si 're aiwata za'ra wa'aba mono da.

⁵ Taha wa, te za oto ĩwaihū'u za'ra wa'wa, āne: Sina 're ĩsipisahuri za'ra mono norī hā, duré dahâimana nhiséb'ō na 're ĩnomro mono norī hā ĩtēme 're sisisi mono ō di za, 'Re ihâimana u'âsi mono u hā, duré Cristuhu u hā, da'āma 're ĩsib'a'uwē zahuré mono zéb u hā. Duré danhibrom na te te 're ĩda'ruiwaparī za'ra mono norī zama ĩtēme 're sisisi mono ō di za, marī zō si te te sima 're rosa'rata u'âsi za'ra mono wa, 'Re ihâimana u'âsi mono upana. Taha wa, ta norī hā marī ĩwē na tinhib'a'uwē norī ma te te ĩropisutuzéb ré, 're hâimana za'ra mono ō di za.

⁶ Ta norī hā po're'ō u'âsi 're nomro mono wa, te za nimahā na tâma rob'manharī pipa za'ra, 'Re ihâimana u'âsi mono hā. Tane nherē, âté ni'wam norī hā te za sadawa nhipesa na te te aima 're rowasu'u za'ra wa'wa, za te te ĩdahâ za'ra ō na hā. Āne te te aima 're rowasu'u za'ra wa'aba mono nherē, 're waparī za'ra wa'aba mono ō di za, ĩsimirowasu'u tō senai'ō wa, ta norī hā.

⁷ Taha wa, ĩpo're'ō norī siré hā 're anomro wasété aba mono ō di za oto.

⁸⁻⁹ A norī wa'wa hā roti sena hā aré waihu'u za'ra wa'aba ō di, Cristuhu nhimiroti hā. Taha wa, datob'a na 're ĩdanomro mono ne, ma tō aré robra na 're anomro aba mo, aiwasété na. Cristuhu āma oto 're anomro aba mono wa, rowa'a na damorī wē na 're ĩdanomro mono ne, te oto ĩsimiroti ré 're anomro aba mo. Taha wa, te za oto āma 're anomro wē wa'aba mono sina, 're aihâimana za'ra wa'aba mo. Ni'wam norī hā Wanhib'apito nhimiroti na 're nomro mono wamhā, te za te te dama 're rob'manharī wē za'ra. Te za duré 're nomro wē. Duré tō sena na si te za te te dama 're rowasu'u za'ra. Dahâimanazé tō sena na si te za dama 're hâimana za'ra. Taha wa, a norī wa'wa hā roti sena zarina si te za oto 're anomro wē wa'aba mo, Cristuhu nhimiroti na.

¹⁰ Āne te za 'râwi asima 're ĩnharī za'ra wa'aba mo, asimirosa'rata na: "E niha wa za 're mo, Wanhib'apito te te ĩwēsāmrizéb da hā." Āne te za 'râwi asima 're ĩnharī za'ra wa'aba mo, āma 're anomro wē wa'aba mono da.

¹¹ ĩsazei'ō'wa norī siré, marī ĩwasédé hā 're 'manharī za'ra wa'aba mono ō di za oto, ĩpē'ē 're, robra u'âsi 're ĩnomro mono norī siré hā. Ta norī ma, te za 're ĩroti pese za'ra wa'aba mo, te te 're sahâri za'ra mono da, tinhimī'manharī wasété zé hā.

¹² ĩpo're'ō norī hā te marī ĩwasédé hā pi'uriwi te te 're 'manharī za'ra. Ta norī nhimī'manharī wasété zé hā wasété uptabi wa, taha na si āma wanhiséb uptabi za'ra di, wa te āma wasima 're ĩrowasu'u za'ra mono zéb da hā. Taha wa, te za ta norī ma 're ĩroti pese za'ra wa'aba mo, te te 're sahâri za'ra mono da, tinhimī'manharī wasété zé hā.

¹³⁻¹⁴ Robra wa, wa te ro'ō wamhā, wa za marī hā wa te 're waihu'u za'ra, tō sena ĩhâimanazém na. Tane bādâ te te dama 're rob'uiwē za'ra mono wamhā, rob'madâ'â pese di za dama. Duréhā wahi'rada, ma tō āne na roti:

"A hā 're asótō u'âsi mono hā, ai'utu. Te za aiwahu, 're ĩdadâ'â u'âsi za'ra mono zém hawi. Tawamhā Cristu hā te te dama 're ĩrob'uiwē mono ne, te za roti sena hā aima waihu'u."

Āne wahi'rata nhimiroti hā dama.

¹⁵ Taha wa, wa za aima roti za'ra wa'wa, 'râwi asina 're asōpré u'âsi aba mono da, 're anomro wē wa'aba mono zéb da. Sena na roti wē waihu'u'ō'wa ne, 're anomro wasété aba mono ō di za oto. Roti sena hā oto aima waihu'u pese za'ra wa'aba wa, te za āma 're anomro wē wa'aba mo, tō sena roti wē zarina si.

¹⁶ Āhāna uburé dawasédé hā te daro mono bâ 're hāimana. Taha wa, wama 're hāimana za'ra mono ré bādā hā, wa za wa te 're dapawapto wē za'ra.

¹⁷ Tawamhā danhimiza'rese āna 're Īdanomro mono ne, 're anomro aba mono ō di za. Wanhib'apito te te sima 're Ī'ai'awē wa'aba mono zéb zō si, te za 're asōpré u'āsi aba mo, asina tāma 're uwaimrami za'ra wa'aba mono da.

¹⁸ Āsipārī na 're asi'rāiwamnarī za'ra wa'aba mono ō di za oto, taha zarina siwa'ru 're anomro wasété aba mono tō da. Wanhib'apito pē'ēzani nhimiwada'uri na si te za oto 're aihāimana za'ra wa'aba mo, robze sina āma 're anomro aba mono da oto.

¹⁹ Aima āma 're ĩrobze za'ra wa'aba mono zéb da hā, te za 're asō're za'ra wa'aba mo, Wanhib'apito pē'ēzani te te aima 're ĩwaihu'u za'ra wa'aba mono zéb zarina. Wanhib'apito hā sōpru wa, te za rowē zarina tāma 're asō're za'ra wa'aba mo, āma 're aiwata za'ra wa'aba mono da, asō're wa'aba na.

²⁰ Wamama hā sōprub di, 'Re ĩhāimana u'āsi mono hā. Taha wa, uburé marī wē na wama 're ĩsōprub za'ra mono zéb zarina, te za āma 're aiwata u'āsi za'ra wa'aba mo, Wanhib'apito Zezu Cristuhu zadawa para.

²¹ A norī wa'wa hā ma tō Cristu hā 're ĩwapari pese za'ra wa'aba mo, Asib'apito wa'wa hā. Taha zarina, te za 're asiwapari pese za'ra wa'aba mo.

Īmro ré norī ma, rotizé wasu'u

²² Pi'ō norī, aimro nhimiroti te za 're ĩwapari pese za'ra wa'aba mo, Wanhib'apito nhimiroti 're ĩwapari pese za'ra wa'aba mono zéb zarina.

²³ E marī wa. Aimro za'ra wa'wa hā asipai u 're hāimana za'ra wa'aba mono wa, Cristu tinhib'a'uwē norī nhipai u 're ĩhāimana mono ne, ta norī nho'reptui'wa 're hāimana mono wa.

²⁴ Īsib'a'uwē norī hā Cristuhu nhimiroti te te 're ĩwapari pese za'ra mono ne, te za pi'ō norī hā aimro nhimiroti 're ĩwapari pese za'ra wa'aba mo.

²⁵ Aibā norī, Cristu hā tinhib'a'uwē norī te te 're ĩ'azawi pese mono ne, te za aimro hā 're ĩsawi pese za'ra wa'aba mo, tihāiba hā sawi āna te te ĩsōmri ne, sada dā'ā za'ra da.

²⁶ Marī hā ā na da te 're ĩ'upsō za'ra mono ne, ma tō tinhimiroti na wawasété hawi te te 're wa'a'upsōi wē wapē'ē 're, 're wanomro wē mono da, ĩsib'a'uwē si oto 're wahāimana za'ra mono da tāma.

²⁷ Āne ma tō sina uwaimra dama, zazahā ĩhāi uptob ō ne, duré ĩhā'rā'ru'ō ne zama, hāimana wē uptabi na 're hāimana za'ra mono da, ĩsib'a'uwē norī hā.

²⁸ Aibā norī, Cristu te te 're ĩwa'azawi pese mono zéb zarina, te za aimro hā 're ĩsawi pese za'ra wa'aba mo. 'Re sawi pese za'ra wa'aba mono wa, marī ĩwē zō asima 're asōpré wa'aba mono ne, te za duré aimro ma zama ĩwē zō 're asōpré wa'aba mo. Tawamhā marī hā ĩwē zō aimro ma 're asōpré wa'aba mono zém na, te za marī hā ĩwē zō asima zama 're asōpré wa'aba mo.

²⁹⁻³⁰ Ni'wam norī hā sima 're sipese u'āsi za'ra mono wamhā, 're saihuri mono āna 're si'ubumroi u'āsi mono ō di za. Te za 're saihuri u'āsi. Te za duré 're si'madā'ā pese za'ra, Cristu te te wama 're ĩ'ab'manharī wē mono ne, tinhib'a'uwē norī ma.

³¹ Āne ĩwasu'u na rob'ui'ére hā: “Dasina 're damro za'ra mono wamhā, dahāiba maparane nherē, te za oto dahāiba misi ne damro me si 're dasi'ubumro, misi haré.”

³² Āhā wasu'u hawi wa tō waihu'u za'ra ni, aré dama waihu'u ō nherē, āne na hā. Aibā ĩmro hā, Cristu te wasu'u. Duré pi'ō ĩmro hā ĩsib'a'uwē norī, te wasu'u.

³³ Aima za'ra wa'aba zama, te rowasu'u hā 're hāimana, āma 're aihāimana za'ra wa'aba mono zéb da hā oto. Taha wa, aibā norī, te za aimro 're ĩsawi pese za'ra wa'aba mo. 'Re ĩsawi pese za'ra wa'aba mono zéb zarina, marī ĩwē zō asima 're asōpré wa'aba mono ne, te za duré aimro ma zama 're asōpré wa'aba mo, ĩwē zō. Duré pi'ō norī, aimro hā te za 're ĩwazéb za'ra wa'aba mo.

6

Da'ra norī ma, damama norī ma, duré dana norī ma zama rotizé wasu'u

¹ Da'ra norī, Wanhib'apito nhimiroti 're ĩwapari pese za'ra wa'aba mono zarina, te za aimama nhimiroti hā 're ĩwapari pese za'ra wa'aba mo, ana nhimiroti zama.

²⁻³ 'Re asimipari pese za'ra wa'aba mono sina, te za 're aihāimana wē za'ra wa'aba mo aimama ma, duré ana ma zama, rowē na 're aihāimana za'ra wa'aba mono da, duré 're aihāimana hā za'ra wa'aba mono da, ti'ai āma. Āne 'Re ĩhāimana u'āsi mono nhimiroti 'rada hā te 're hāimana, taha zarina marī ĩwē hā za te te dama āma 're ĩ'a'u'uwaimrami mono na hā. Duréihā ma tō āne 'Re ĩhāimana u'āsi mono hā dama roti:

“Aimama nhimiroti hā te za 're ĩwapari pese za'ra wa'aba mo, ana nhimiroti zama. Ta norī nhimiroti hā 're wapari pese za'ra wa'aba mono wamhā, aima 're rowē za'ra wa'aba

mono di za. Duré 're atá'â su'u za'ra wa'aba mono ò di za. Te za 're asi'ŋhi pese za'ra wa'aba mo."

Ãne ma tó aré dama roti. Simiroti pire di, 'Re ìhâimana u'âsi mono hã. Taha wa, te za aimama nhimiroti hã 're ìwapari pese za'ra wa'aba mo, ana nhimiroti zama.

⁴ Damama norî, ai'ra ma hã 're 'manharî wasété na za'ra wa'aba mono ò di za, asada 're sahi za'ra wa'aba mono tó da. Te za asimiroti wê na si 're ìpawapto wê za'ra wa'aba mo, Wanhîb'apito nhimiroti zarina, ai'ra norî wa'wa hã 're nomro wê mono da.

Pawa'âbâ âna dama romhuri'wa norî ma, duré danhib'apito norî ma, rotizé wasu'u

⁵ Aipawa'âbâ âna aiwada'uri zarina si dama romhuri'wa norî, asib'apito mreme hã te za 're ìwapari pese za'ra wa'aba mo, 're wazéb za'ra wa'aba mono sina. Cristuhu ma 're ìromhuri za'ra wa'aba mono ne, te za tó sena asib'apito mreme hã 're ìwapari pese za'ra wa'aba mo.

⁶ E asib'apito nho'a si te za romhuri hã tâma 're ì'madâ'â pese za'ra wa'aba mo. Mare di. Ìsa're'ra nherê, te za romhuri hã tâma 're ì'madâ'â pese za'ra wa'aba mo, te te 're aiwêsâmri za'ra wa'aba mono da, asimirohuri na. Cristuhu ma 're ìromhuri za'ra wa'aba mono ne, te za duré tí'ai âma asib'apito ma romhuri hã 're ì'madâ'â pese za'ra wa'aba mo, 'Re ìhâimana u'âsi mono te te sima 're ìwê mono zéb zarina.

⁷ Ato sina te za tâma 're ìromhuri za'ra wa'aba mo, asib'apito za'ra wa'aba ma, Asib'apito uptabi aba ma 're ìromhuri za'ra wa'aba mono ne.

⁸ Wapawa'âbâ âna wawada'uri zarina si dama romhuri'wa 're ìwahâimana za'ra mono norî, duré wawada'uri âna wasi'uihã na 're ìwahâimana za'ra mono norî me zama, wa te dama 're ì'manharî wê za'ra mono wa'râmi, te za Wanhîb'apito hã te te wama 're wa'âbâ za'ra. Æhã wasu'u na te za 're asipo're pu'u u'âsi za'ra wa'aba mo.

⁹ Danhib'apito norî, aima romhuri'wa norî ma, wa tó tâma roti za'ra, romhuri hã te te aima 're 'madâ'â pese za'ra wa'aba mono da, to sina. Taha wa, te za aima romhuri'wa norî ma 're ì'manharî wê za'ra wa'aba mo. Tâma 're ropipa za'ra wa'aba mono ò di za. Misi Asib'apito wa'wa te oto aima 're hâimana za'ra wa'wa hâiwa âma, aima romhuri'wa norî nhîb'apito zama. Aiwapsi te za te te aima 're wa'âbâ za'ra wa'wa, 're ìromhuri wê za'ra wa'aba mono zéb zarina.

'Re ìhâimana u'âsi mono hã wa'rui'wa zada, tiwaihu'u pese na te te 're ìda'apawapto mono zé wasu'u

¹⁰ Wa za oto roti na aima 'râsutu za'ra wa'wa. A norî wa'wa hã Wanhîb'apito siré si te 're aihâimana za'ra wa'aba mo. Taha wa, Wanhîb'apito ma si ìwaihu'upe hã sa'êtê na tâma 're hâimana mono wa, te za ìwaihu'u pese zarina aihâimana nhîptete sina 're anomro aba mo.

¹¹ Dasi'wapé 'manharî'wa norî hã te za sisada 're si'uzza za'ra. Tane te za 'Re ìhâimana u'âsi mono nhimipawaptozbé ré, 're anomro aba mo, Wa'uburé nhimiroti da, asiptete sina sada 're aihâimana za'ra wa'aba mono da.

¹² Wa norî hã wasiré 're ìwahâimana za'ra mono norî me, 're wasi'wapé za'ra mono ò di. Wa'uburé norî me si, wa za 're wasi'wapé za'ra, hâiwa nho're âma simiroti wasété na 're ìhâimana za'ra mono norî me. Wa'uburé norî hã tí'ai âma dapo're'ò na 're ìdanomro mono norî ma, simiroti pire di, Wanhîb'apito nhimiroti waihu'u'ò'wa 're danomro mono wa.

¹³ Taha wa, 'Re ìhâimana u'âsi mono nhimipawaptozbé ré, te za 're aihâimana za'ra wa'aba mo. Tawamhã wa'uburé norî hã nimahã bâtâ na asó 're sihutu aba mono wamhã, te za 're ì'wapé za'ra wa'aba mo. Tawamhã 're ì'wapé za'ra wa'aba mono na, âma 're ai'uté za'ra wa'aba mono wa, te za ta norî wi 're aiwairébé aba mo.

¹⁴ Taha wa, te za asimiza'rese sina 're aihâimana za'ra wa'aba mo. Da'usisizé Ìsa'êtê na, te za 're asi'usisi za'ra wa'aba mo. Da'usisizé Ìsa'êne hã tó sena 're ìdahâimana za'ra mono zé, te wasu'u. Duré danho'utu'ubuzé ìtete na te za 're asi'uzza za'ra wa'aba mo. Danho'utu'ubuzé ìtede hã 're ìdanomro wê mono zé, te wasu'u.

¹⁵ Duré dapara'uzza ìtete na te za 're asipara'uzza za'ra wa'aba mo. Dapara'uzza ìtede hã ìwasu'uwê na datoi u'âsi da te 're ìdapo're pu'u za'ra mono zé, te wasu'u, rowé u'âsi Wamama siré 're ìdanomro mono zéb da hã oto.

¹⁶ Duré ìbahiã 'manharî hã te za 're ì'wasari aba mo asi'wawi, da te 're aihâzap tó wa'aba mono da, po'o 'wa ro'o na. Wa'uburé nhimiroti, wa te 're wapari za'ra mono tó da, Wamama ìwaihu'u pese na wa te wasina 're ì'umnhasi za'ra mono zé, te wasu'u, ìbahiã 'manharî hã.

¹⁷ Da'râzaza ìtete na te za 're asi'râzaza za'ra wa'aba mo. Da'râzaza ìtede hã wanho'reptuzé, te wasu'u. Duré sib'ézé 'wa pa hã te za asiré 're ì'wasari u'âsi aba mo. Sib'ézé 'wa pa hã 'Re ìhâimana u'âsi mono zadawa wasu'u, te wasu'u, Ìpê'êzani hã te te wama 're awaihu'u mono da, Ìsimiroti hã.

¹⁸ Te aima ìroti za'ra wa'aba zéb zarina, te za uburé 're ì'manharî u'âsi za'ra wa'aba mo. Duré ìpê'êzani te te wama 're ì'waihu'u mono zéb zarina, te za Wamama ma 're aimreme

zusi aba mo. Te za tiwi 're Īrowaptērē u'âsi za'ra wa'aba mo, te te 're aipawaptob za'ra wa'aba mono da. Asimiza 'rese sina te za 're aihâimana za'ra wa'aba mo, tâma 're aimreme zusi aba mono da. Aiwi 're robzei'ō za'ra wa'aba mono ō di za. 'Re Īhâimana u'âsi mono nhib'a'uwē 're Īhâimana za'ra mono norī ma, te za duré tiwi 're Īrowaptērē u'âsi za'ra wa'aba mo, te te 're apawaptob u'âsi mono da, daro mono bâ.

¹⁹ Īma zama te za duré tiwi 're Īrowaptērē za'ra wa'aba mo, timreme te te Īma 're awaihu'u u'âsi mono da, wē na te dama 're sadawa wasu'u mono da, Īpahi āna, Cristuhu wasu'uwē hā aré dama Īwaihu'u'ō hā, da te 're waihu'u za'ra mono da oto.

²⁰ Cristu hā te te datēme Īzatōrī wa, wa oto Īsadawa wasu'u'wa 're mo, dazazéb 're, 're Īza mono nherē. Taha wa, Īpahi āna te dama 're sadawa wasu'u mono da, te za tiwi 're Īrowaptērē u'âsi za'ra wa'aba mo, Wamama wī.

Paru te te dama Īroti 'rāsutu zéb āma, te te Īda'azawizé

²¹ Titicu hā te za aima Īwasu'u za'ra wa'wa, waihu'u za'ra wa'aba da, Īhâimanazé hā. Ta hā wapawapto wē 'wa, Wanhīb'apito ma romhuri'wa duré, wama Īsawi pe hā.

²² Āme Īwahâimana za'ra na te te aima rowasu'u za'ra wa'aba da, wa tō atēme satōrī za'ra wa'wa, rowasu'u wē zarina, rowē na 're aihâimana za'ra wa'aba mono da oto.

²³ 'Re Īhâimana u'âsi mono Wamama wī, duré Wanhīb'apito Zezu Cristuhu wī, wa za aima za'ra wa'aba te tiwi 're rowaptērē u'âsi, te te 're aipawaptob u'âsi za'ra wa'aba mono da, rowē u'âsi āma 're anomro aba mono da, duré 're asisawi pese za'ra wa'aba mono sina 're anomro aba mono da, ta norī hā waihu'u pese zahuré wa, asina 're 'madâ'â u'âsi za'ra wa'aba mono da.

²⁴ Uburé Wanhīb'apito Zezu Cristuhu zawi pese 'wa norī ma, wa za te tiwi 're rowaptērē u'âsi, ta norī hā Wanhīb'apito tō sena te te 're sawi pese za'ra mono wa, Wamama hā Īwē na te te 're apawaptob u'âsi mono da.

Piripu norĩ

Piripu norĩ ma, Paru te te ĩrob'ui'érézé

Ībaihâ wasu'uzé

Ā ĩbaihâ hâ Paru hâ ma tó 'Re ĩhâimana u'ási mono nhĩb'a'uwē norĩ ma sômri za'ra, Piripu na 'ri nho'omo nhisi u. Paru norĩ hâ Siraha me, ĩmorĩ'rata na Piripu u simasisi zahuré wamhâ, ma tó ĩsazei'ô'wa norĩ hâ siwi tiza, dazazéb 're. Tame sima'wara ré hâ ma tó dazazéb 're, da'madá'á'wa hâ pawapto zahuré, ĩmro zama, duré ĩ'ra norĩ zama, Zezusi hâ te te saze za'ra da. Awē ma tó oto tâma waprozi zahuré ni, pusi da apâ.

Ā ĩbaihâ hâ darob amoi âma dazazéb 're oto sâmra ré, ma tó âma rob'ui'éré, Piripu norĩ ma. Paru hâ ma tó tâma waihu'u za'ra, âne: Zezusihi zazei'wa norĩ hâ te za tó te te 're robzépata za'etē za'ra. ĩsazeté'wa norĩ âma ma tó duré tihâtâ'â za'ra, senai'ô na rowasu'u'wa norĩ hâ ĩwazari 're hâimana za'ra mono wa. Ma tó duré tâma siwasu'u za'ra, te te 're ĩsawi pese za'ra mono na hâ. Ma tó duré tâma roti za'ra, Cristuhu nhirâ zarina si 're nomro mono da, ta hâ sina 're ĩwata mono ô ne. 'Re ĩhâimana u'ási mono hâ te te tâma 're ĩwē za'ra mono zéb zarina si, te te 're 'manharĩ za'ra mono da, ma tó duré tâma roti za'ra, Cristu hâ wedepo'ono nhĩ'râmi na dá'á'wa, ĩmama hâ te te tâma ĩpisutuzéb zarina, te te sina tâma ĩ'uwaimrami ne.

¹ Wa hâ Paru, duré Timotiú, Cristu Zezusihi ma romhuri'wa norĩ, wa âma aima rob'ui'éré za'ra wa'aba ni, Piripu na 'ri nho'omo nhisi âma uburé 'Re ĩhâimana u'ási mono nhĩb'a'uwē 're aihâimana za'ra wa'aba mono norĩ ma. Uburé Cristu Zezusihi âma si 're anomro aba mono norĩ ma, wa âma aima rob'ui'éré za'ra wa'wa, ĩsazei'wa norĩ 'madá'á'wa 're ĩhâimana za'ra mono norĩ ma zama, duré dapawapto'wa na 're ĩhâimana za'ra mono norĩ ma zama.

² Wamama ma, wa ai'âma 're ĩmreme u'ási za'ra wa'wa, 'Re ĩhâimana u'ási mono ma, duré Wanhib'apito Zezu Cristuhu ma zama, ĩsimizawizé hâ ai'âma 're hâimana u'ási za'ra wa'aba mono da, rowē u'ási, âma 're anomro aba mono da.

Paru hâ 'Re ĩhâimana u'ási mono ma, Piripu norĩ âma 're ĩmreme mono zé wasu'u

³ Ai'âma 're ĩpo're pu'u za'ra wa'aba mono sidâpâsi, wa 'Re ĩhâimana u'ási mono âma 're ĩwata u'ási, ĩnhĩb'apito âma.

⁴ Duré 'Re ĩhâimana u'ási mono ma, ai'âma 're ĩmreme za'ra wa'aba mono sidâpâsi, wa âma aima 're ĩtoi u'ási za'ra wa'wa, aihâiba mono bâ wa'aba.

⁵ Cristuhu wasu'uwē hâ 're ĩwaparĩ na'rata za'ra wa'aba mono zém hawim haré, te oto ĩsiré âma 're ĩromhuri u'ási za'ra wa'aba mo, wa te dama âma 're ĩropéi mono zém na hâ. Taha wa, wa ĩto sina ai'âma 're ĩmreme u'ási za'ra wa'wa, 'Re ĩhâimana u'ási mono ma hâ.

⁶ Ta hâ te te asô'reptu za'ra wa'aba zém na, ĩwē na te te ai'âma ĩsâna'rata za'ra wa'aba zéb zarina, te za te te 're aipawapto u'ási za'ra wa'wa ône u'â, ti'ai u apâ we ĩmorizéb u, Cristu Zezusi hâ. Taha ô ré, te te aiwi sazâri waihu'u za'ra wa'aba ô di za, te te 're aipawapto za'ra wa'aba mono zé hâ. ĩwē si te za tó te te aima 're 'manharĩ u'ási za'ra wa'wa, âma 're anomro wē u'ási aba mono da. Âne wa tó ai'âma waihu'u za'ra wa'wa, tó sena na.

⁷ ĩ'uwaibaba wa tó âne na hâ ai'âma waihu'u za'ra wa'wa. E marĩ wa. ĩpē'ē 're, ĩma asawi za'ra wa'aba zé hâ ĩma 're hâimana u'ási mono wa. Romhuri ĩwē uptabi hâ, 'Re ĩhâimana u'ási mono, tinhimizawi pese zéb zarina te te ĩma ĩpisutuzém na, ma tó ĩsiré tâma 're ĩromhuri za'ra wa'aba mo, tó. Āhâna dazazéb 're, 're ĩhâimana mono ré, ma tó a norĩ wa'aba zama 're ĩromhuri za'ra wa'aba mo ĩsiré. Duré dazazéb 're, 're ĩhâimana mono ô ré hâ ma tó duré ĩsiré dama 're ĩwasu'u za'ra wa'aba mo, Cristu hâ. Taha wasu'uwē hâ senai'ô newa da te ĩma 're ĩnharĩ za'ra mono ma, te dama 're anharĩ mono ré hâ, ma tó ĩsiré 're ĩromhuri za'ra wa'aba mo, duré sena na da te 're waihu'u za'ra mono da, te dama 're wasu'u mono ré hâ, damreme wa'râmi.

⁸ 'Re ĩhâimana u'ási mono ma si, tâma ĩwaihu'u pese di, sena na ĩma asawi uptabi za'ra wa'aba na hâ, duré ai'âma 're ĩpē'ézé uptabi za'ra wa'aba mono na zama. Cristu Zezusihi ma, tâma asawi uptabi za'ra wa'aba ne, wa tó duré wa hâ te 're asawi pese za'ra wa'wa duré.

⁹ 'Re ĩhâimana u'ási mono ma, wa duré ai'âma 're ĩmreme u'ási za'ra wa'wa, te te 're aipawapto u'ási za'ra wa'aba mono da, 're ĩdazawi za'ra wa'aba mono zé hâ aima 're sa'etē u'ási za'ra wa'aba mono da, duré 'Re ĩhâimana u'ási mono nhimirowaihu hâ 're waihu'u pese za'ra wa'aba mono da. Duré uburé marĩ hâ ĩwē na âma 're waihu'u za'ra wa'aba mono da, wa ai'âma 're ĩmreme u'ási za'ra wa'wa, duré ĩwasété na âma 're waihu'u za'ra wa'aba mono da, asiwi 're wē'ô za'ra wa'aba mono da.

¹⁰ Tawapsi te za ĩwē si asima 're ĩpisutu u'ási za'ra wa'aba mo, âma 're anomro wē wa'aba mono da hâ. Âne wapsi, 'râwi aiwasété na 're asi'marôpâri za'ra wa'aba mono ô di za,

nimahã na Cristu apã we Ìmorĩzéb u hã. Æhã zarina si, te za aiwaseté wi, aihãimana nhiptete sina 're anomro u'ási aba mo.

¹¹ Taha wa, te za Ìwē si 're Ì'manharĩ u'ási za'ra wa'aba mo, Zezu Cristuhu nhimipawapto-bzéb zarina si. Æne na ãma 're aihãimana wē za'ra wa'aba mono zém na da te 're aiwaihu'u za'ra wa'aba mono wamhã, 'Re ìhãimana u'ási mono ãma si te za 're dawata za'ra. Tane da, wa ai'ãma 're Ìmreme u'ási za'ra wa'wa, 'Re ìhãimana u'ási mono ma hã.

Paru hã Cristuhu ma si, 're Ìsisõmri mono zé wasu'u

¹²⁻¹³ Ìsisãnawã norĩ, e ãme ropipa hã Ìma ìhãimanazéb zarina, ma tó Cristuhu wasu'uwē na te te datême Ìropézé hã mazazã. Mare di. Æne Ìma romhãimana nherē, ma tó da'ahã na da te 're saze za'ra, Wanhib'apito wasu'uwē hã. Æne na Ì'ãma waihu'u za'ra wa'aba da, wa tó Ìsima aiwē za'ra wa'wa. Dazazéb 're ìhãimanazém na, ma tó da'wapéi'wa norĩ hã danhib'apito nhorõwa 'madã'ã'wa nori hã siwi Ìwaihu'u uburē, Cristuhu ma romhuri'wa 're ìhãimana mono 'ru te, da te dasiwi Ìnherézém na hã. Da'ahã na ma tó duré ãne na Ìwaihu'u za'ra ni, ãhã 'remhã. Dazazéb 're, da te dasiwi Ìnherézé õ 'wa'ãhã, ta norĩ hã Cristuhu wasu'uwē hã te te wãpãri za'ra õ di aré.

¹⁴ Duré dazazéb 're ìhãimana wa, te oto wasisãnawã norĩ hã ahã na te te sina 're umnhasi u'ási za'ra Wanhib'apito hã, taha si te te 're Ìpawapto u'ási mono wa. Taha wa, pahĩ ãna te oto 'Re ìhãimana u'ási mono wasu'u hã te te dama 're wasu'u za'ra, te te sina 're danhimimnhasi za'ra mono nherē, ta norĩ hã.

¹⁵ Ni'wam norĩ hã Ìsiniwi da'ahã na 're dahãimana za'ra mono da si, te Cristuhu wasu'uwē hã te te dama 're wasu'u za'ra, Ìnhimiromhuri wē zarina, da'ahã na da te 're saze za'ra mono 'ru te, te te ãma 're Ìruiwãpãri za'ra mono wa, ta norĩ hã. Ni'wam norĩ si te Ì'uwaibaba te te dama ãma 're rowasu'u za'ra, te te ãma 're Ìpawapto za'ra mono da, sena na ta norĩ si te te sima 're wē uptabi za'ra mono wa.

¹⁶ Ta norĩ ma, tãma Ìzawi za'ra zarina, te Cristu hã te te dama 're wasu'u za'ra, 'Re ìhãimana u'ási mono hã romhuri te te Ìma Ìsõmri na te te ãma Ìwaihu'u za'ra wa, Cristuhu wasu'uwē hã senai õ newa da te Ìma 're Ìnharĩ za'ra mono norĩ ma, tó sena na te dama 're Ì'anharĩ mono na hã, damreme wa'rãmimhã.

¹⁷ Tane nherē, Ìnhimiromhuri na te te 're Ìruiwãpãri za'ra mono norĩ hã simirosa'rata wē na te te dama 're wasu'u za'ra mono õ di, Cristu hã. Sima si te te 're Ìrosa'rata za'ra mono zéb zarina si, te ta norĩ hã te te dama ãma 're rowasu'u za'ra, taré da'ahã na Ìsimirowasu'u wē niwi 're dahãimana za'ra mono da. Ma tó duré te te 're rosa'rata za'ra, ãne hawi te ãma 're robzépata za'ëté mono da, dazazéb 're, 're ìhãimana mono ré.

¹⁸⁻¹⁹ Tane nherē, wē di tó, Ìma hã. Ni'wam norĩ hã simirosa'rata wē na Cristu te te dama 're wasu'u za'ra mono wamhã, duré ni'wam norĩ hã sima si te te 're Ìrosa'rata za'ra mono zéb zarina, Cristu te te dama 're wasu'u za'ra mono nherē, wē di tó Ìma hã. E marĩ wa. Cristuhu si te te dama 're wasu'u za'ra mono wa, ta norĩ hã. Taha si tó Ìpire uptabi hã te tó wama 're hãimana. Taha wa, ãma Ìto ti, wa hã. Ì'ãma 're aimreme zusi aba mono zéb zarina, duré Zezu Cristuhu pē'ézani nhimipawaptozbéb zarina, wa za rowē na watobro, ãne na Ìma Ìromhãimana waseté zém hawi. Æne hã Ìma waihu'u pese wa, wa rowē u'ási 're ìhãimana tó.

²⁰ Taha wa, wa tó wa hã Ìpē'e 're, 're Ìsi'madã'ã'wa pese, niwamhã Ìnhimiromhuri na 'Re ìhãimana u'ási mono ma, te ãma 're Ì'uwaimrami mono zém na Ìzõ 're robaba tó mono da, õne u'ási Ìpahĩ ãna te tãma 're romhuri u'ási mono da, ãhãna zama. Æne wa, wa 'rãwi te Ìsima 're 'ruiwãpãri u'ási. Æne na tó sena ãma 're ìhãimana mono zém na da te 're Ìwaihu'u za'ra mono wamhã, te za Cristuhu ãma si 're dawata za'ra, Ìhãiba ré ré, ãma 're ìhãimana mono na hã, duré áté Ìdá'ã da nherē, ãma 're ìhãimana u'ási mono na zama.

²¹ E marĩ da, wa za 're ìhãimana tawamhã, Ìhãiba ré ré hã. Cristuhu ma 're Ìsisõmri u'ási mono da si, 're ìhãimana mono zé hã. Duré Ìdá'ã da wamhã, Ìma wē uptabi di duré. Ìhãiba ré 're ìhãimana mono ré, Ìma 're Ìrowé mono zém nhĩpai u, Ìma wē uptabi di za, Ìdá'ã wamhã. Æne hã wa tó te Ìsina 're waihu'u u'ási.

²² E ma hã wa za tawamhã Ìsima wē. E da te dasiwi Ìwĩri su'u da si. E Ìhãiba ré ré 're ìhãimana mono da si a'ã. Wa hã 'rãwi te Ìsima pisutu waihu'u õ di, Ìsi'uihã na hã. Tane nherē, aré Ìma wē di tó, Ìhãiba ré ré a'ã 're ìhãimana siroptu mono da hã. E marĩ wa. Æne wamhã, romhuri Ìwē hã wa aré te tãma 're ab'manharĩ u'ási a'ã, Cristuhu ma, te tãma 're Ìda'awaibui mono zém na hã.

²³ Ìnhimirosa'rada hã maparane te 're si'wapé zahuré, Ìpē'e 'remhã. Ti'ai ãma 're Ìmorizé hã te rēme da, wa Ìsima wē tó, Cristuhu siré 're ìhãimana mono da oto, hãiwa ãma. Æne wamhã, Ìma 're rowē uptabi mono di aré, ti'ai ãma 're ìhãimana mono zém nhĩpai u hã.

²⁴ Tane nherē, ai'udãna za'ra wa'aba, a'ã ti'ai ãma 're ìhãimana mono da hã, Ìma wē uptabi di aré, te 're aipawapto za'ra wa'aba mono da hã a'ã.

²⁵ Āne na hā wa tō, tō sena na ĩsina waihu'u. Taha wa, 'rāwi wa tō duré ĩsina waihu'u, za a'ā asiré 're ĩhāimana za'ra wa'aba mono na hā, ĩnhimipawaptobzéb zarina 'Re ĩhāimana u'āsi mono hā asina 're ĩ'umhasi za'ra wa'aba mono zém na asima āma 're sa'ēté za'ra wa'aba mono da, duré ato sina āma 're anomro aba mono da hā.

²⁶ Āne wamhā, nimahā na apā āma atēme ĩmorī za'ra wa'aba wamhā, te za Cristu Zezusihi āma aiwata za'ra wa'wa, ĩzaba za'ra wa'aba zém na.

²⁷ Niha za ĩma romhāimana nherē, te za Cristuhu wasu'uwē zarina si 're anomro wē wa'aba mo, taha si aima pire za'ra wa'aba wa, āma 're aihāimana za'ra wa'aba mono zéb da hā. Āne 're aihāimana za'ra wa'aba mono ré, āma atēme ĩmorī za'ra wa'aba wamhā, wa za ai'āma waihu'u za'ra wa'wa, simisutu asiptete sina asitob'ru norī da, 're aihāimana za'ra wa'aba mono zém na hā, asimirosa'rata misi na, taha zarina 'Re ĩhāimana u'āsi mono, da te dasina 're umhasi za'ra mono da, Cristuhu wasu'uwē hā da te 're ĩsaze za'ra mono zéb zarina. Duré ātē āma atēme ĩmorī za'ra wa'aba ō nherē, wa za tō ōhō na si ai'āma waihu'u za'ra wa'wa, simisutu asiptete sina āma 're aihāimana za'ra wa'aba mono na hā.

²⁸ Asitob'ru norī ma, 're aipahi za'ra wa'aba mono da hā, mare di, Cristuhu zazei'wa norī 'ruiwapari'wa norī ma hā. Āne hā aipahi āna sada 're aihāimana za'ra wa'aba mono wamhā, te za ta norī hā 'rāwi 're siwaihu'u za'ra, 'Re ĩhāimana u'āsi mono za te te ĩ'uprosizém na hā, duré a norī wa'aba si za te te ĩ'asō'reptu za'ra wa'aba zém na hā.

²⁹ Tinhoprubzéb zarina ma tō aima pisutu za'ra wa'wa, Cristuhu si asina 're umhasi za'ra wa'aba mono da, Danho'reptui'wa na. Ma tō duré aima pisutu za'ra wa'wa, Cristu dama 're wasu'u za'ra wa'aba mono wa, da'āma 're ĩrobzépata za'ra wa'aba mono zém hawi, Cristuhu si da te 're saze za'ra mono da.

³⁰ Tame ai'rata ĩnhamra za'ra wa'aba ré, ma tō asiwi ĩ'madā'ā za'ra wa'wa, rowasédé hā da te ĩ'manharī na ĩma, te robzépata da. Taha na, zahadu te ĩrobzépata u'āsi na ma tō āhāna hā ĩwasu'u hā ĩwapari za'ra wa'wa. Tane te za duré a norī wa'wa hā 're ĩrobzépata za'ra wa'aba mo ĩsine, rowasédé hā da te aima 're ĩ'manharī za'ra wa'aba mono zém na hā za.

2

Cristu hā ti'ai u wei morī wa, dame ĩsi'a'uwēzé wasu'u

¹ Cristuhu āma 're aihāimana za'ra wa'aba mono wa, te oto asiptete sina āma 're anomro aba mo, tiwi 're aipizari za'ra wa'aba mono āna. Cristu hē te te 're asawi pese za'ra wa'aba mono na, 'rāwi asina 're ĩwaihu'u za'ra wa'aba mono zéb zarina, te duré aima 're rowē wairébé u'āsi 'wa, asina 're aihātā'ā za'ra wa'aba mono āna. 'Re ĩhāimana u'āsi mono pē'ēzani siré te duré asiré 're aihāimana za'ra wa'aba mo, simisutu. Da te 're robzépata za'ra mono wamhā, ma tō duré da'āma 're aipē'ēzé za'ra wa'aba mo, 're dapawaptob za'ra wa'aba mono da.

² Taha wa, ma'āpé duré asiwi āma sisiwi wa'aba, ĩma 're ĩrowē pusi u'āsi mono zéb da hā, ai'āma za'ra wa'aba. Aiwapsi te za 're ĩrosa'rata za'ra wa'aba mo. Aiwapsi te za duré 're asisawi pese za'ra wa'aba mo. Simisutu rosa'rata wē na, te za misi haré rosa'rada hā 're ĩ'manharī u'āsi za'ra wa'aba mo, uburé marī na āma 're asisaze za'ra wa'aba mono da. Ā norī na te za asiwi āma ĩsisiwi za'ra wa'wa. Tawapsi, ĩma 're rowē uptabi mono di za duré, ai'āma za'ra wa'aba hā.

³ Rāwi asina si 're ĩrosa'rata za'ra wa'aba mono zéb zarina, marī hā asima 're 'manharī za'ra wa'aba mono ō di za. Duré aipire na dama 're aihāimana za'ra wa'aba mono newa, taré asina 're aiwata za'ra wa'aba mono da, marī hā asima 're 'manharī za'ra wa'aba mono ō di za. Duré dama aipire na 're asi'madā'ā ze za'ra wa'aba mono ō di za. Taha wa'rāmi te za ĩwē na si 're ĩdahāimana wazéb za'ra wa'aba mo, aima dapire na da'āma 're ĩrosa'rata za'ra wa'aba mono zéb zarina.

⁴ Asima 're ĩwē za'ra wa'aba mono zéb uwaibaba si, asima si 're aihāimana za'ra wa'aba mono ō di za. Taha nhipai u, te za duré asiré norī āma zama 're aipo're pu'u u'āsi za'ra wa'aba mo, te te sima 're ĩwē za'ra mono zéb zarina, 're pawaptob za'ra wa'aba mono da.

⁵ Cristu Zezusi hā sima si 're hāimana mono ō di. Taha wa, ĩsimirosa'rata ne, te za duré a norī wa'wa hā 're ĩrosa'rata wē za'ra wa'aba mo.

⁶ Ta hā 'Re ĩhāimana u'āsi mono ne, aiwa uptabi 're hāimana u'āsi mono nherē, ti'ai u wei morī wamhā, 'Re ĩhāimana u'āsi mono ne waihu'u pese na 're hāimana u'āsi mono da hā, sisawi ō di. Sisawi āna, ma tō wei mo tō, ti'ai u hā.

⁷ Si'uihā na te te sima ĩwēzéb zarina, ma tō tiré a'ā, 'Re ĩhāimana u'āsi mono ne, pire uptabi na 're ĩhāimana mono zé hā. Ti'ai u wei morī wamhā, dazapari dama romhuri'wa ne, ma tō dama 're hāimana. Taha wa, ma tō si'a'uwē, dasine 're hāimana mono da, a'ā.

⁸ A'uwē hāiba na dasine 're hāimana mono wamhā, ma tō sima pisutu, dazapari dama wapu na 're hāimana mono da a'ā. 'Re ĩhāimana u'āsi mono hā ma tō duré te te 're wapari

pese, tidâ'ázéb u. Marí 'manharí wasété 'wa norí pārízém na wedepo'o nhonhi'râmi na dá'á da nheré, ma tô Timama há te te 're wapari pese, sisawi âna.

⁹ Taha wa, 'Re ihâimana u'âsi mono há ma tô tâma pisutu, dá'á nheré, apâ hâiwa'utu wa, danhipai u pire uptabi na 're hâimana mono da oto, wê uptabi na. Ma tô duré isisi há tâma pisutu, dama sisi pire uptabi na 're hâimana mono da, uburé danhisi nhipai u.

¹⁰⁻¹¹ Taha wa, niwapsi te za aihîni pese dahi'râtîtô tâma ana ni, Zezusihi ma, dama isisi pire uptabi ma. Âne da, ma tô 'Re ihâimana u'âsi mono há tâma pisutu, pire uptabi na 're hâimana mono da. Hâiwa âma uburé pese hâiba ré 're ihâimana za'ra mono norí há, duré ti'ai âma uburé pese hâiba ré 're ihâimana za'ra mono norí zama, te za dahi'râtîtô tâma ana ni, dama pire wa, adâ 're ihâimana za'ra mono zéb âma uburé pese 're ihâimana za'ra mono norí zama. Tawamhá tame te za uburé pese dasisô'a dasiwi sisi za'ra ni oto, âne: "Ô há Zezu Cristu, uburé Danhib'apito." Âne na Zezu Cristuhu âma dawata za'ra wamhá, taha u'âbâ, te za duré 'Re ihâimana u'âsi mono âma tawata za'ra ni, Wamama âma há.

Cristuhu zazei'wa norí há te te dama 're îrowa'a za'ra mono zé wasu'u

¹² Isisânawâ norí, îma asawi pese za'ra wa'aba norí há, ma'ápé îwapari pese za'ra wa'aba za. Wa há tame ai'rata ihâimana za'ra wa'aba ré, ma tô inhimiroti há îwapari pese za'ra wa'aba. Tane nheré, âhána oto ai'rata ihâimana za'ra wa'aba ô nheré, te duré inhimiroti há îwapari pese za'ra wa'aba, âma atême îwisi za'ra wa'aba ô nheré. Aihâimana prédup sina, te za 're îromhuri pese za'ra wa'aba mo, 'Re ihâimana u'âsi mono te te asô'reptu za'ra wa'aba zéb zarina, 're anomro wê wa'aba mono zém na tâma âma asina 're uwaimrami u'âsi za'ra wa'aba mono da.

¹³ E marí wa. 'Re ihâimana u'âsi mono há aipê'ê 're, te te ai'âma 're romhuri u'âsi za'ra wa'aba mono wa, isimpawaptobzém na marí na âma 're sazei pese za'ra wa'aba mono da, duré taha zarina î'uwaibaba si marí há tâma 're 'manharí wê za'ra wa'aba mono da, te te sima 're î'aiwê za'ra wa'aba mono zéb uwaibaba.

¹⁴ Marí na 're nharí wasété za'ra wa'aba mono âna, te za uburé marí há 're î'manharí wê u'âsi za'ra wa'aba mo. Duré 're asisada'âbâ za'ra wa'aba mono âna, te za marí îwê si uburé 're î'manharí u'âsi za'ra wa'aba mo.

¹⁵ Âne na te za tô 're aihâimana wê za'ra wa'aba mo, aiwasédé há sena na da te ai'âma 're sa'ra wa'aba mono tô da, duré marí 're 'manharí wasété za'ra wa'aba mono ô wa, aiwê na 're anomro aba mono da. A norí wa'wa há 'Re ihâimana u'âsi mono 'ra, 're î'anomro wê wa'aba mono norí há, wasété uptabi na 're ihâimana za'ra mono norí wazari, duré tiwasété na 're isiwamnarí pese za'ra mono norí wazari, 're aihâimana za'ra wa'aba mono nheré, te za dama 're îrowa'a za'ra wa'aba mo, 're anomro wê wa'aba mono zém na, wasi há hâiwa na te te dama 're îrowa'a za'ra mono ne.

¹⁶ Taha wa, rowasu'u îwê uptabi há te za dama 're isômri za'ra wa'aba mo, âma 're îdanomro wê u'âsi mono zéb da há. Âne há dama 're 'manharí wê u'âsi za'ra wa'aba mono wamhá, wa za aima 're îto za'ra wa'wa, Cristu za we apâ îmorízéb âma há. E marí wa, wa za aima 're îto za'ra wa'wa tamemhá. Ti'ab ré, ai'rata 're înhemra aba mono ré, taré te ai'âma 're îromhuri pese za'ra wa'aba mono ô zém na há, isiwaihu'u wa za wa há, wa za tame aima 're îto za'ra wa'wa, Cristu za apâ we îmorízéb âma há.

¹⁷ Sasedoti norí há 'Re ihâimana u'âsi mono ma, da'âma romhuri'wa norí há danhimizama na tâma danhoprubzé te te tâma 're îzata za'ra mono ne, ma tô a norí wa'wa há tâma 're asisômri u'âsi za'ra wa'aba mo, tiwi 're asisawi za'ra wa'aba mono âna, asina 're î'umnhasi za'ra wa'aba mono zéb zarina. Duré sasedoti norí há uwa 'ru 'râi wa'u ísé há, 'Re ihâimana u'âsi mono ma danhoprubzé, danhimizama te te tâma 're îzata za'ra mono nhisiwi, te te 're isa'wari za'ra mono ne, âté îwapru há wa za sa'wa, sena na za da te dasiwi îwîrî wamhá, idâ'ázém na 'Re ihâimana u'âsi mono ma, isina înhoprubzéb da. Âne na za îma romhâimana nheré, îma rowê uptabi di za. Duré aima îtoi uptabi za'ra wa'aba di za, âne na îma romhâimana nheré.

¹⁸ Taha wa, te za duré a norí wa'aba zama îzabâdâ âma ato za'ra wa'wa îsiré.

Timotiuhu wasu'u, Epaprodituhu wasu'u me

¹⁹ Aiwasu'u wê za'ra wa'wa há za te wapari wa, îma rowê há, îwasu'u há za wapari za'ra wa'aba wa, za aima îrowê za'ra wa'aba ne. Taha wa, wa tô isima wê, Timotiu há te âma atême satôri su'u za'ra wa'aba da. Wanhib'apito Zezusi há âne há sena na te te îma pisutu wamhá, wa za tô âma atême satôri za'ra wa'wa, aima îwasu'u za'ra wa'aba 'wa da há, duré apâ we îtême wisi wa, te te îma aiwasu'u za'ra wa'aba da há.

²⁰ Âmemhá ni'wa há îma hâimana ô di, isine te te 're î'asawi pese za'ra wa'aba mono 'wa há. Tô ôhō si, te isine te te 're asawi pese za'ra wa'wa. Taha si te tô sena ai'âma 're hátâ'á u'âsi za'ra wa'wa Timotiu há, rowê na si âma 're aihâimana za'ra wa'aba mono da.

²¹ Tanei ò di, ni'wam norī hā. 'Rāwi te sima si marī zō 're sōpré, te te sima 're īwē za'ra mono zéb uwaibaba si. Zezu Cristu te te tāma 're ī'awē mono zéb zō, sima 're sōpré mono ò di, ta norī hā.

²² Tane nherē, Timotiu hā 're Īmorī wē na ma tō Īwaihū'u za'ra wa'wa, da te 're pibui wasété mono nherē, 're Īsipizari mono ò na hā. Ta hā ma tō Īsiré te te 're romhuri u'āsi, Cristuhu wasu'uwē na hā. Ni'wa hā timama siré si te te 're Īromhuri u'āsi mono ne, ma tō Īsiré te te 're romhuri u'āsi, ta hā.

²³ Taha wa, wa tō Īsima wē tō, āme niha za Īma Īromhāimanazém na, te Īsina waihū'u wamhā, Timotiuhu si te āma atēme satōrī za'ra wa'aba da, romhutu na, taha si te te aima Īwasu'u za'ra wa'aba da.

²⁴ Wanhib'apito si wa tō Īsina umnhasi, te te Īma pisutu da, Īzama āma atēme Īmorī za'ra wa'aba da, romhutu na.

²⁵ Wasisānawā Epaproditu hā ma tō we Ītēme Īsatōrī za'ra wa'wa, te te Īma asadawa wasu'u za'ra wa'aba da, duré nasi Īāma siwārī da, te robzépata wa, marī zō nasi Īwi Īrowaptā'ā na hā. Cristuhu wasu'uwē na Īsiré romhuri'wa ta hā, duré wanhitob'ru norī, wasiré wa te 're Ī'a'wapéi mono. Wē uptabi di, ta hā. Tane nherē, wa tō waihū'u, Timotiuhu wana, te āma atēme satōrī za'ra wa'aba da apā.

²⁶ Ta hā te te duré apā asabu ze za'ra wa'aba di, uburé ai'āma pē'ēzé za'ra wa'aba wa. Duré ai'āma hātā'ā za'ētē za'ra wa'aba di, āme Īhāzé na Īsiwasu'uzé hā wapari za'ra wa'aba wa. Taha wa, wa za tō āma atēme satōrī su'u za'ra wa'wa, Timotiuhu wana.

²⁷ Tō sena ma tō aré dārā tō, hāzé wa. Tane nherē, 'Re Īhāimana u'āsi mono hā ma tō āma aiwamri, dā'ā tō da. Taha āma si ò di, Īsiwamrizé hā. Te te pese wamhā, Īāma zama ma tō duré aiwamri, Īwi robzei'ō nherē, robzei'ō uptabi tō da Īwi, Īsipai u.

²⁸ Taha wa, wa Īsima wē upta oto, te āma atēme satōrī su'u za'ra wa'aba da apā, atōmo na sabu za'ra wa'aba wa, aima rowé uptabi za'ra wa'aba hā. Duré wa hā ai'āma Īhātā'ā za'ra wa'aba zéb zarina, Īwi Īrobzei'ōzé hā Īma si'utōrī hā, asabādā za'ra wa'aba.

²⁹⁻³⁰ Taha wa, ma'āpé āma atēme wisi aba wamhā, asiwi sawi wē za'ra wa'aba za Epaproditu hā, ato sina za'ra wa'aba, wasiré Wanhib'apito zazei'wa oto 're wahāimana za'ra mono na dā'āsina, duré wasi'āma 're wasisānawā za'ra mono wa. Te za duré asiwi Īhāimana wazéb za'ra wa'wa. Ni'wam norī hā Īsine 're Īhāimana wē za'ra mono norī zama, te za duré asiwi Īhāimana wazéb za'ra wa'wa. E marī zarina, te za asiwi Īhāimana wazéb za'ra wa'wa, Epaproditu hā. Ta hā tāma romnhimimnhasi nherē, ma tō sisawi āna romhuri pese, Cristuhu ma. Taha na, te aré dārā. A norī wa'wa hā romhā na asimroi wa'aba wa, asiwi Īpawapto waihū'u aba ò wa, ma tō òhō si Īpawapto pese, ai'upana za'ra wa'aba. Āne wa, te za ato sina apā asiwi Ī'ari wē wa'wa, atēme wisi za'ra wa'aba wē te.

3

Dasihawim na dasisō'reptuzé da te dasina 're Īuwaimrami waihū'u za'ra mono ò zé wasu'u

¹ Īsisānawā norī, ma'āpé asima 're atoi u'āsi za'ra wa'aba mono za, Wanhib'apito āma oto 're anomro aba mono wē te. Te aima Īrob'ui'éré 'rata za'ra wa'aba zém na, te āma aima Īsisiwi za'ra wa'aba zém na hā, te Īsiwi āma ro'wa'rē ò di za. Mare di. Ai'udāna za'ra wa'aba, wa za tō Īnhimi'ui'éré na aima āma sahu za'ra wa'wa, te āma aima Īrob'ui'éré 'rata za'ra wa'aba zém na hā, tō sena Cristuhu wasu'uwē hā 're Īsaze za'ra wa'aba mono zém na, asina 're asiptete u'āsi za'ra wa'aba mono da.

² Taha wa, te za a norī wa'wa hā 're asi'madā'ā pese za'ra wa'aba mo, wapsā dazada 're Īsiwamnarī za'ra mono ne, rosa'rata wasété na dazada 're Īhāimana za'ra mono norī wi. Marī Īwasété si te ta norī hā te te 're 'manharī za'ra. Āne te ta norī hā te te dama 're rowasu'u za'ra: "Aibā norī hā Cristu te te 're saze za'ra mono da, te te sima 're wē za'ra mono wamhā, te za da te 're sihāiwata nhihāri za'ra, taha zarina 'Re Īhāimana u'āsi mono hā āma 're sib'a'uwē za'ra mono da." Āne te ta norī hā te te dama 're roti za'ra, senai'ō na. Tane nherē, te ta norī hā dahāiba hā taré te te dawī 're wamnarī za'ra, taha zarina 'Re Īhāimana u'āsi mono hā āma 're sib'a'uwē za'ra mono da newa.

³ Ta norī hā sena na 're hāimana za'ra mono ò di, 'Re Īhāimana u'āsi mono nhib'a'uwē na hā. Wa norī si, wa 'Re Īhāimana u'āsi mono nhib'a'uwē uptabi hā 're wahāimana za'ra, Īpē'ēzani nhimipawaptozbém na āma 're wawata za'ra mono wa. Taha wa, marī hā wasi'uihā na wa te 're Ī'manharī za'ra mono zém na 'rāwi 're wasi'umnhasi za'ra mono ò di, wasihawim na wanho'reptuzé hā wa te wasina āma 're Ī'uwaimrami za'ra mono da hā. Cristu Zezusi, Īwē te te wama Ī'manharī za'ra zém na si, wa tō wa te wasima āma 're rowé za'ētē uptabi za'ra, taha zarina si te te oto 're wa'anho'reptui mono wa, 'Re Īhāimana u'āsi mono hā.

⁴ Ni'wam norī hā te tō 'rāwi 're si'madā'ā ze za'ra, marī hā si'uihā na te te 're Ī'manharī za'ra mono zém na hā, taha zarina, 'Re Īhāimana u'āsi mono hā āma 're sib'a'uwē za'ra mono da

newa. Marī hā wasihawi wasi'uihā na wa te 're ī'manharī za'ra mono zém na, 'Re īhâimana u'âsi mono hā te te 're wa'anho'reptui mono 'wa'âhā, tō ĩbâre wa aré wa hā danhipai u 're ĩsi'umnhasi, marī hā ĩsihawi te 're ī'ab'manharī mono zém na hā, taha zarina, ĩsi'uihā na ĩsisō'reptuzé hā te ĩsina âma uwaimrami da.

⁵ E marī wa. Īwaptā'âzém hawi bâdâ hā 8 na Ī'âma ne parimhā, ma tō ĩnhihâiwata nhizâri ni, zudezu norī 're ĩhâimana za'ra mono zéb zarina. Wa hā Izarazéhé nhihudu 're ĩhâimana mono. Duré ĩ'ra Bézamihī nhihudu 're ĩhâimana mono. Wa hā duré ebreusi uptabi. E marī wa. Īhi'rata norī hā uburé ebreusi uptabi 're hâimana za'ra mono wa, da te 're wa'ru za'ra mono âna. Duré parisezu na dame 're ĩhâimana mono wa, wa tō 'Re ĩhâimana u'âsi mono nhimiroti 'rada hā te 're 'madâ'â pese, Mozési te te âma ĩrob'ui'éré hā, ĩsimiroti na hā.

⁶ Wasiré zudezu norī hâimanazém na, 'Re ĩhâimana u'âsi mono ma, 're ĩhâimana mono da, wa tō 're ĩsiwasutu u'âsi aré. Taha wa, Zezusihi zazei'wa norī ma, wa tō te tâma 're rob'manharī waseté za'ra, Zezusi hā 'Re ĩhâimana u'âsi mono 'ra ô newa, ta norī hā te 're ĩ'ruiwaparī za'ra mono zéb zarina, te te 're robzépata za'ra mono da. Uburé 'Re ĩhâimana u'âsi mono nhimiroti 'rada hā wa tō duré te 're 'madâ'â pese tō, taha zarina 'Re ĩhâimana u'âsi mono te te ĩwēsâmri da newa. Taha wa, nima hā ĩsimiroti te âma ĩ'upa na da te dasiwi ĩwaihu'u ô di.

⁷ Âne na 're ĩhâimana 'rata mono zém na aima ĩsi'râzarôtô za'ra wa'aba zé hā ĩma wē di aré, taha si ĩma pire wa, taha zarina 'Re ĩhâimana u'âsi mono te te ĩwēsâmri da newa. Tane nheré, Cristuhu ma oto 're ĩhâimana mono wamhā, tarére oto ĩma hā, 're ĩhâimana 'rata mono zé hā.

⁸ 'Re ĩhâimana u'âsi mono te te ĩwēsâmri da, uburé marī hā ĩsihawim na te 're ĩ'ab'manharī mono zé hā taré uptabi oto ĩma hā. Misi te ĩpire uptabi hā ĩma 're hâimana oto. ĩnhib'apito, Cristu Zezusi hā 'râwi te ĩwaihu'u pese da si, te ĩma 're hâimana oto, taha si. Marī zô 're ĩnhimipari mono ô di oto, ta hā ĩma tarére wa. Roprum ne, te ta hā ĩma 're hâimana oto, 're ĩhâimana 'rata mono zé hā. Taha wa, Cristuhu niwī ĩhâiba na te ĩsaprī wē da si, wa 're ĩsi'madâ'â wē u'âsi.

⁹ Misi haré Cristuhu âma si oto 're ĩhâimana mono da, wa tō ĩhâimanazéb 'rada hā 'râwi ĩsiwi wē'ô pese. 'Re ĩhâimana u'âsi mono nhimiroti na Mozési te te âma ĩrob'ui'éré hā, ĩsi'uihā na te 're ĩ'madâ'â pese mono na 'Re ĩhâimana u'âsi mono te te ĩwēsâmri da, ĩsina 're ĩnhimipari mono ô di oto. Cristu hā te ĩsina 're ĩ'umnhasi mono zéb zarina si, 'Re ĩhâimana u'âsi mono te te ĩwēsâmrizéb ré si, wa oto 're ĩhâimana, taha si te te ĩpisutu wa oto.

¹⁰⁻¹¹ Cristu hā 'râwi te ĩwaihu'u pese da si, wa tō ĩsima wē, wa hā. Ta hā dâ'â nheré, apâ hâiwa'utu wa, te oto siptete sina 're hâimana u'âsi. Tane duré, wa hā 're ĩhâimana 'rata mono zé hā oto ĩma si'utōrī wa, duré taha wa 'râmi ĩhâimanazép tém na si oto 're ĩhâimana mono wa, wa ĩsima wē, ĩnhiptete sina taha âma si oto 're ĩhâimana mono da, ĩsimipawaptobzé ĩwé ré si. Âne hā wa tō duré ĩsima wē, Cristu hā ti'ab ré te te 're ĩrobzépata mono ne, te 're ĩrobzépata mono da si, ĩsine. Cristu hā dazada ĩdâ'â ne, 're ĩhâimana 'rata mono zé hā ĩma ĩsi'utōrī da si, wa tō ĩsima wē, 'Re ĩhâimana u'âsi mono hā te te sima ĩwē wamhā, te te ĩma pisutu da, ĩsiré 're ĩhâimana u'âsi mono zéb da hā.

Dawara na romnhimire'ézé wasu'u

¹² Wa hā uburé marī hā 'Re ĩhâimana u'âsi mono te te ĩma ĩpisutuzéb zarina, 're ĩhâimana mono zém na te ĩsina 're ĩ'uwaimrami mono na, 're ĩsi'madâ'â mono ô di. Mare di. Zahadu te ĩsina uwe ô di, wa hā. Tane nheré, wa tō taha zô 're ĩsiwasutu u'âsi, ĩwé uptabi hā nimahā na te ĩsina sô'ôtô da. Âhā da, ma tō Cristu Zezusi hā ĩ'âma tinhib' u'uwé.

¹³ ĩsisânawā norī, wa hā 'râwi 're ĩsi'madâ'â mono ô di tō, 'Re ĩhâimana u'âsi mono te te ĩma ĩpisutuzéb zarina, 're ĩhâimana mono zém na te ĩsina ĩ'uwaimrami na hā. Dawara na 're dasirême za'ra mono da, 're dasipibu za'ra mono wamhā, dasibabarāi u apâ da te 're rob'madâ'â za'ra mono ô di. Dasisōwap si te da te 're rob'madâ'â za'ra, ône haré. Tane duré, wa hā marī te 're ĩ'ab'manharī mono zém na 're ĩsipo're pu'u zahu mono ô di. Mare di. E marī wa. Ône haré marī ĩwé hā ĩnhowa 're ĩhâimana mono zô si, wa tō te 're rob'ruiwaparī u'âsi.

¹⁴ Marī ĩwé hā da te dasina 're sô'ôtô za'ra mono da, taha zô 're dasirême za'ra mono wamhā, awa'awi u'âsi 're ĩdasisa'rei mono ne, wa marī ĩwé uptabi zô 're ĩsiwasutu u'âsi, Cristu Zezusihi dâ'âzém na 'Re ĩhâimana u'âsi mono, 're ĩhâimana mono zép té, za te te ĩma ĩsômri zô si.

¹⁵ Wa norī hā 'Re ĩhâimana u'âsi mono pê'ézani te te wama 're ĩ'awaihu'u mono zém na si, waprédup sina âma 're ĩwahâimana za'ra mono norī hā, âne zô wa za tō wa te âma 're rosa'rata u'âsi za'ra. Wa za tō âhā zô si wasima wa te 're rob'ruiwaparī u'âsi za'ra. Tane nheré, ni'wam norī hā asiré 're ĩhâimana za'ra wa'aba mono hā rosa'rada aimawi na ĩ'upana te te 're rosa'rata za'ra mono wamhā, 'Re ĩhâimana u'âsi mono hā te za te te tâma 're waihu'u za'ra, tō ôhō na si wasiré te te âma 're rosa'rata za'ra mono da oto.

¹⁶ Re ihâimana u'âsi mono pē'ēzani te te wama 're ī'awaihu'u mono zém na si, wa za tō āma 're wahâimana za'ra, tō ōhō na si.

¹⁷ Īsisānawā norī, ma'āpé 're īmorī wē ne, ĩsine 're anomro wē wa'aba mono za. Ni'wam norī ma, tāma āma 're īwasisanho za'ra mono zéb zarina, wasine 're ihâimana wē za'ra mono norī ne, te za a norī wa'aba zama āma 're aihâimana wē za'ra wa'aba mo.

¹⁸ Ni'wam norī hā ahā na Cristuhu zazei'wa 're hâimana za'ra mono newa, te tihâimana wasété zarina, Cristu hā wedepo'o nhonhi'rāmi na dazada ĩdâ'ázé wasu'u da, 're hâimana za'ra. Ā norī wasu'u na hā ahā na wa tō te āma aima 're rowasu'u za'ra wa'wa. Tane nherē, āhāna wa duré aima āma sahu za'ra wa'wa, īwawa sina te āma aima rowasu'u za'ra wa'aba nherē, rob'ui'ére na hā.

¹⁹ Ta norī hā 'Re ihâimana u'âsi mono nhiti, dapē'ē 're dadâ'ā u'âsi ne 're ĩdahâimana za'ra mono zéb u, te za 're nomro, ropipa u. E marī wa. Ta norī hā te te sima 're ĩwē za'ra mono zéb uwaibaba si, te marī hā tihâiba ma te te 're ruiwaparī za'ra, 'Re ihâimana u'âsi mono upana. E ta norī hā tihâimana wasété na 'rāwi 're siwē'ō za'ra mono ā bā, te bété sina 're wata za'ra, 're ihâimana wē uptabi za'ra mono na hā. Tī'ai āma uburé marī hā ĩwasété na si, te ta norī hā te te sima 're rosa'rata wasété u'âsi za'ra.

²⁰ Tane nherē, wa norī ma hā tī'ai āma waza'rui uptabi hā wama 're hâimana za'ra mono ō di. Hāiwa āma si te waza'rui uptabi hā wama 're hâimana za'ra. Ta hāwi za wei wazō ĩmorī zō si, wa wato sina wasina sō 're wanhimiparī u'âsi za'ra, Wanho'reptui'wa zō, Wanhīb'apito Zezu Cristuhu zō si.

²¹ Taha si te uburé marī hā tiwaihu'u pese na te te 're ab'madā'ā, siptete uptabi wa. Taha wa, tiwaihu'u pese na te za wahâiba ĩtém na wama āma saprī za'ra, wahâiba ĩsib'uware ré 're ĩwanomro 'rata mono zém hāwi, ĩsī'utōrī pese hāwi. Tawamhā wahâiba ĩtéb ré, Cristuhu hâiba ne ĩwē uptabi ré, wa za oto 're wahâimana u'âsi za'ra, ĩ'rata.

4

Paru hā te te dama ĩroti 'rāsutuzé wasu'u

¹ Taha wa, ĩsisānawā norī, ĩma asawi pese za'ra wa'aba norī hā, ma'āpé Wanhīb'apito āma asiptete sina 're aihâimana u'âsi za'ra wa'aba mono za. Ai'āma ĩpē'ēzé uptabi za'ra wa'aba wa, 'rāwi te asabu za'ra wa'aba neza. Romhā na nherē, te asina ĩma 're ĩrowē zani za'ra wa'aba mo. Taha wa, wa tō te dama 're aiwasu'u wē za'ra wa'wa, ĩto sina. Āne wa, te za asiptete sina ōhō āma si 're aihâimana u'âsi za'ra wa'aba mo.

² Ĩhidiba norī, Ewodiza duré Sītiti, āne wa za aima roti pese 'wa, asisada 're aihâimana wasété aba mono wa. A norī wa'wa hā Wanhīb'apito nhīb'a'uwē, 're aihâimana aba mono wa, ma'āpé rowē na si apā asiré 're aihâimana aba mono, asisada 're aihâimana wasété aba mono āna.

³ Duré a hā ĩpawapto wē 'wa, ma'āpé ā pi'ō norī hā pawaptob zahuré na. Ta norī hā ma tō ĩsiré te te 're romhuri pese zahuré, Cristuhu wasu'u'uwē na wa te dama āma 're ĩropéi mono na hā. Temetihi siré zama ma tō te te 're romhuri zahuré, duré uburé ĩsiré romhuri'wa norī siré zama. Uburé te ā norī nhisi hā dame 're hâimana za'ra ĩbaihā na hā, 'Re ihâimana u'âsi mono 'rata za 're ĩdahâimana u'âsi za'ra mono norī nhisi ré, ĩbaihā 're ihâimana mono na hā.

⁴ Ma'āpé atoi u'âsi 're aihâimana za'ra wa'aba mono, Wanhīb'apito āma oto 're anomro aba mono na dā'āsina. Wa za duré aima āma sahu za'ra wa'wa. Ma'āpé atoi u'âsi āma 're aihâimana za'ra wa'aba mono za.

⁵ Ai'waimri te za dama 're aihâimana za'ra wa'aba mo, ĩwē na. E marī wa. Wanhīb'apito hā za we apā morī su'u na dā'āsina.

⁶ Marī na 're aihâtā'ā za'ra wa'aba mono āna, te za oto 're aihâimana za'ra wa'aba mo. 'Re ihâimana u'âsi mono ma, 're airmreme zusi aba mono zép sidâpâsi, te za duré tiwi 're ĩrowaptéré za'ra wa'aba mo, uburé marī zō aiwi 're ĩrowaptā'ā za'ra wa'aba mono zém na hā. Aipē'ē 're, āma 're aiwata za'ra wa'aba mono sina, te za asi'āma tāma 're airmreme zusi aba mo.

⁷ Rowē hā 'Re ihâimana u'âsi mono te te wama 're ĩ'apisutu mono hā, ĩwē uptabi hā te wama 're hâimana za'ra, da te 're ĩwaihu'u za'ra mono ō hā. Taha si te za te te 're aipē'ē nomri wē za'ra wa'wa, marī na 're aihâtā'ā za'ra wa'aba mono āna 're aihâimana za'ra wa'aba mono da, Cristu Zesusihi āma oto 're anomro aba mono zéb zarina. Āne hā 'Re ihâimana u'âsi mono hāwi rowē hā aima 're hâimana za'ra wa'aba mono da, te za asi'āma tāma 're airmreme zusi u'âsi aba mo.

⁸ Īsisānawā norī, ĩnhimiroti na wa za oto āma aima 'rāsutu za'ra wa'wa, āhāna te āma aipo're pu'u za'ra wa'aba zém na hā. Uburé marī hā tō sena 're ihâimana za'ra mono na si te za asima 're ĩrosa'rata za'ra wa'aba mo, duré marī hā da te dasima 're ĩwazéb za'ra mono na hā, duré uburé marī hā 'Re ihâimana u'âsi mono ma ĩwē uptabi na hā, duré marī hā wasété

āna 're ihāimana za'ra mono na hā, duré uburé marī iwē hā da te 're īsawi pese za'ra mono na hā, duré uburé marī hā wē wa, āma 're īdatob'uzu za'ra mono na hā. Āne na si te za uburé marī iwē uptabi na asima 're īrosa'rata za'ra wa'aba mo, da te dasima 're īwasu'u wē za'ra mono na si.

⁹Te aima 're rowasu'u za'ra wa'aba mono ré, aipo're na 're īwapari za'ra wa'aba mono zéb zarina, ma tō 'Re ihāimana u'āsi mono nhimiroti hā iwaihu'u pese za'ra wa'wa. Duré ai'rata 're īnhamra aba mono ré, atōmo na asiwi 're īmadā'ā aba mono na, ma tō duré iwaihu'u pese za'ra wa'wa. Āne na uburé marī na aima 're īsisanho za'ra wa'aba mono zéb zarina, te za 're aihāimana wē za'ra wa'aba mo. Āne wamhā, 'Re ihāimana u'āsi mono hā wama rowē nhomri'wa hā te za 'rāwi asiré 're hāimana u'āsi za'ra wa'wa.

Paru hā danhoprubzé wa'rāmi, da'āma īwatazé wasu'u

¹⁰Āne wa, aima ītoi uptabi za'ra wa'aba di āhāna hā, aré ai'āma 're rob'é'é hā za'ra wa'aba mono nherē, apā ī'āma asipo're pu'u za'ra wa'aba wa, we īma asōprub za'ra wa'aba zém na hā. Taha wa, wa Wanhib'apito āma īwata, ītoi uptabi wa, aima za'ra wa'aba hā. Āté ī'āma 're aipo're pu'u u'āsi za'ra wa'aba mono nherē, marī hā aima 're hāimana za'ra wa'aba mono ō di, we īma asōprub za'ra wa'aba zém na asiwi īzawi za'ra wa'aba zéb da hā. Tane nherē, ma tō ī'āma 're aipo're pu'u u'āsi za'ra wa'aba mo tō.

¹¹E tawamhā, nimahā na marī zō īwi īro'wanhi'riti zarina, īsina 're īhātā'ā mono wa, wa āne aima īsiwasu'u za'ra wa'wa, āhāna hā. Mare di. Taha wab ō di. Āté nimahā na marī zō īwi 're ro'wanhi'riti mono nherē, duré niha īma 're romhāimana mono nherē, wa īsina 're īhātā'ā mono āna 're ihāimana u'āsi tō.

¹²Āne hā īma waihu'u pese di, marī zō dawī 're īro'wanhi'riti za'ra mono zém na 're īdahāimana za'ra mono zé hā. Āne hā te dame pibui ahā di. Duré danhimarī ahā na 're īdahāimana za'ra mono zé hā īma waihu'u pese di. Niha īma 're romhāimana mono nherē, wa tō waihu'u, robzei u'āsi 're ihāimana mono zém na hā. Nimahā na hā īsai ahā wamhā, duré mra te 're sēpata mono nherē, tane nherē, īma 're rowē u'āsi mono di, āne hā aiwa īma hā. Nimahā na hā marī zō īwi 're ro'wanhi'riti mono ō wamhā, duré āté marī zō īwi 're ro'wanhi'riti mono nherē, īma rowē di. Āne wa, wa īto sina 're ihāimana. E marī wa. īma 're īromhāimana mono zé hā aiwa wa.

¹³Āne hā niha īma 're romhāimana mono nherē, sada 're īnhiptete mono di. E marī wa. Cristu hā īnhiptetezē te te īma sada 're anhomri u'āsi mono wa.

¹⁴Tane nherē, īma wē uptabi di, we asiwi īpawaptob za'ra wa'aba zé hā, āhāna āme te robzépata ré hā.

¹⁵Piripu āma 're aihāimana za'ra wa'aba mono norī, tame duréihā īnhimirowasu'u zarina, Cristuhu wasu'u wē hā wapari na'rata za'ra wa'aba wamhā, a norī wa'aba si ma tō ī'āma ana wē wa'wa, īma asōprub za'ra wa'aba zém na hā, rowahutu u'asiré 're asi'rā'ōtō aba mono norī hā. Masēdoniza na asipti'a nho'ōmo nhisi hawi wa'aba oto īmorī wamhā, īsazei'wa norī hā daza'ruī amoi āma 're ihāimana za'ra mono norī hā ī'āma sina za'ra ō di, asine za'ra wa'aba hā. A norī wa'aba si ma tō asiwi īpawapto wē wa'wa tō, āma ihāimanazéb da hā. Āne hā aima waihu'u pese za'ra wa'aba di.

¹⁶Duré aihawi za'ra wa'aba īmorī wamhā, Tesaronita na 'ri nho'ōmo nhisi āma īnhamra ré hā, ma tō duré īpawaptobzéb da hā nasi asiwi īsōmri za'ra wa'wa, īma, marī zō nasi īwi rowaptā'ā sidāpāsi.

¹⁷E asōprub za'ra wa'aba zém na īma āma sahu za'ra wa'aba da, wa tō āne hā aima waihu'u za'ra wa'wa. Mare di. Īsāna'rata hawi ī'āma 're ana wa'aba mono zéb zarina, 'Re ihāimana u'āsi mono si, iwē na za te te aipawa'ābā za'ra wa'aba na te te aima āma sa'ētē za'ra wa'aba da si, wa tō te ai'āma 're 'madā'ā u'āsi za'ra wa'wa.

¹⁸Āme wa tō uburé marī hā īsima waibui wē, we asiwi īpawaptob za'ra wa'aba zé hā. Epaproditu hā ma tō we īma āwisi wē, we īma asōprub za'ra wa'aba zé hā. Taha wa, marī zō īwi rowaptā'ā ō di oto. Sa'ētē na te za oto marī hā īma tihāiba. Āne wa, wa īsina ai'uze za'ra wa'wa, we īma asōprub za'ra wa'aba zém na hā. Asōprub za'ra wa'aba zé hā wē uptabi di, 'Re ihāimana u'āsi mono ma hā. Wedewati īsadaze hā 'Re ihāimana u'āsi mono ma, da te 're īzata za'ra mono zéb zarina, tāma āma 're īrowē pusi mono ne, tāma wē uptabi di duré āhāna hā, we īma asōprub za'ra wa'aba zé hā.

¹⁹A norī wa'aba ma zama, te za 'Re ihāimana u'āsi mono hā Īnhib'apito hā uburé marī hā iwē uptabi hā te te aima 're sōmri za'ra wa'wa sa'ētē na, marī zō aiwi 're rowaptā'ā za'ra wa'aba mono wamhā, duré aiwi 're robzei'ō za'ra wa'aba mono wamhā. Tinhibro hā te za sa'ētē na te te aima 're sōmri za'ra wa'wa iwē hā, Cristu Zesusihi āma tō sena 're anomro aba mono zéb zarina.

²⁰ Taha wa, Wanhīb'apito 'Re ĩhâimana u'âsi mono ãma si, 're wawata u'âsi za'ra wa'aba mono za, Wamama ãma si. Tane tô.

Paru hã te te ĩdazawi 'rãsutu zé wasu'u

²¹ Ma'ãpé uburé ĩma ãma sawi za'ra wa'aba, 'Re ĩhâimana u'âsi mono nhīb'a'uwē oto 're ĩhâimana za'ra mono norĩ hã tamemhã, Cristu Zezusi, Danho'reptui'wa na te te sina 're ĩ'umnhasi za'ra mono norĩ hã.

Ãme ĩsisãnawã norĩ hã, ĩsiré romhuri'wa norĩ hã ĩ'rata 're ĩhâimana za'ra mono hã te duré ãma asawi za'ra wa'wa, ĩsiré.

²² Uburé 'Re ĩhâimana u'âsi mono nhīb'a'uwē norĩ, ãme 're ĩhâimana za'ra mono norĩ hã te duré ãma asawi za'ra wa'wa. Apito Sezaha nhorõwa ãma 'ri 'rãihã 're, romhuri'wa norĩ zama te duré ãma asawi za'ra wa'wa dame, wasiré ĩsazei'wa norĩ hã.

²³ Wanhīb'apito Zezu Cristuhu ma, wa ai'ãma 're ĩmreme u'âsi za'ra wa'wa, ta hã te te 're asawi pese za'ra wa'aba mono wa, te te 're aipawaptob u'âsi za'ra wa'aba mono da.

Corosu norĩ **Corosu norĩ ma, Paru te te ĩrob'ui'érezé** **Ībaihã wasu'uzé**

Paru hã darob amoi āma dazazéb 're hãimana sirōmo, ma tō rowasu'u hã wapa, Zezusihi zazei'wa norĩ ma, roti senai'ō na da te tãma 're ĩrowasu'u za'ra mono zém na hã, Corosu āma 're ĩsi'ubumroi mono norĩ ma hã. Taha wa, Paru hã ma tō Corosu norĩ ma rob'ui'ére za'ra, roti senai'ō wi, te te uwati za'ra da. Ma tō duré tãma roti za'ra, Zezusi hã apã te te saze za'ra da, Epaprasi hã ĩmorĩ'rata na te te tãma ĩwaihu'u za'ra zéb zarina. Epaprasi hã Corosu āma ĩsazei'wa norĩ 'madá'á'wa, ta hã. Paru hã ma tō duré tãma waihu'u za'ra, āne: Zezusihi si siminhoreptu waihu'u pese di. Duré taha si dawasédé hã te te dama 're aparai waihu'u pese mono di.

¹⁻² Wa hã Paru, Cristu Zezusihi zadawa wasu'u'wa, wa 're ĩhãimana, 'Re ĩhãimana u'ási mono te te sima ĩwēzéb zarina. Taha wa, wa āma aima rob'ui'ére za'ra wa'wa, Corosu na 'ri nho'ōmo nhisi āma 'Re ĩhãimana u'ási mono nhib'a'uwē 're aihãimana za'ra wa'aba mono norĩ ma. Wasisānawā Timotiu te duré āma asawi za'ra wa'wa. A norĩ wa'wa hã te oto wasiré wasisānawāi wa, 're anomro wē wa'aba mo Cristuhu āma si, tiwi 're aipizari za'ra wa'aba mono āna.

Wamama ma, wa ai'āma 're ĩmreme u'ási za'ra wa'wa, 'Re ĩhãimana u'ási mono ma, ĩsimizawizé hã ai'āma 're hãimana u'ási za'ra wa'aba mono da, rowē u'ási, āma 're anomro aba mono da.

Paru hã 'Re ĩhãimana u'ási mono āma ĩwatazé wasu'u

³ 'Re ĩhãimana u'ási mono ma, ai'āma 're wamreme zusi aba mono sidápasi, wa āma 're wawata u'ási za'ra, Wanhib'apito Zezu Cristuhu mama āma hã.

⁴ Cristu Zezusihi si asina 're ĩ'umnhasi za'ra wa'aba mono zé wasu'u hã, duré uburé 'Re ĩhãimana u'ási mono nhib'a'uwē 're ĩsawi pese za'ra wa'aba mono zé wasu'u hã wa te 're wapari za'ra mono wa, wa āma 're wawata u'ási za'ra, 'Re ĩhãimana u'ási mono āma, āne na oto 're aihãimana wē za'ra wa'aba mono wa.

⁵ Cristuhu wasu'uwē hã tō sena uptabi hã ĩmorĩ'rata na da te atēme āwisi za'ra wa'aba wamhã, tame ma tō ĩwapari na'rata za'ra wa'wa, ĩwē uptabi hã hãiwa āma dazō 're ĩsimi'wara mono zé wasu'u hã, duré taha zō si 're ĩdanhimipari u'ási za'ra mono zé wasu'u zama. Taha zō asina 're asimipari za'ra wa'aba mono zéb zarina, ma tō Cristuhu si asina 're ĩ'umnhasi pese za'ra wa'aba mo. Taha zarina ma tō duré 'Re ĩhãimana u'ási mono nhib'a'uwē norĩ hã 're ĩsawi pese za'ra wa'aba mo. Hãiwa āma, wē uptabi na asō 're ĩsimi'wara aba mono hã, te tō 'Re ĩhãimana u'ási mono hã te te asō 're 'madá'á' pese za'ra wa'wa. Taha zō si te tō asina 're asimipari u'ási za'ra wa'aba mo.

⁶ Cristuhu wasu'uwē hã ma tō da te āma ropé oto, ropã. Taha wa, ma tō ĩsazei'wa norĩ hã dasina tahã'á ni oto. Taha wa, ma tō dahãimanazém na da te 're saprĩ za'ra, ĩwē u'ási hã. Tane ma tō duré ĩwasu'uwē hã aima 're hãimana za'ra wa'wa, ĩwapari na'rata za'ra wa'aba zém hawimhã. Tame ma tō oto ĩwaihu'u za'ra wa'wa, tō sena na 'Re ĩhãimana u'ási mono te te 're ĩda'azawi pese mono zém na hã.

⁷ Epaprasihĩ nhimirowasu'u zarina, ma tō āma ĩwaihu'u za'ra wa'wa. Ta hã Cristuhu ma wasiré romhuri'wa, wama ĩsawi pe hã. Simi'ē na te Cristuhu ma, te te ai'āma 're romhuri pese za'ra wa'wa, wa'upana.

⁸ Ta hã ma tō wama aiwasu'u wē za'ra wa'wa, 'Re ĩhãimana u'ási mono pē'ēzani te te 're aipawaptob za'ra wa'aba mono zéb zarina, asimizawi pese zé hã oto ĩwaihu'u za'ra wa'aba zém na hã.

⁹ Taha wa, aiwasu'u wē hã wa te ĩwapari na'rata za'ra wa'aba zém hawim haré, wa tō ōne u'ási ai'āma 're wamreme zusi u'ási 'wa, 'Re ĩhãimana u'ási mono ma. Ta hã te te sima 're aiwē za'ra wa'aba mono zéb uwaibaba, niha oto āma 're aihãimana za'ra wa'aba mono da, duré te te aima 're waihu'u za'ra wa'aba mono da, wa tō wa te tiwi aima 're rowaptērē u'ási za'ra wa'wa. Īpē'ēzani hã te za tō te te 're aipawaptob u'ási za'ra wa'wa, hãiwa hawi dahãimanazém na rowaihu ĩwē uptabi hã oto āma waihu'u za'ra wa'aba da, taha zarina 'Re ĩhãimana u'ási mono te te sima 're aiwē za'ra wa'aba mono zé hã asina 're waihu'u za'ra wa'aba mono da oto, 'rãwi.

¹⁰ Tawapsi, te za Wanhib'apito zazei'wa hãimanazéb zarina 're anomro wē wa'aba mono zém na, tãma āma asina 're ĩ'uwaĩmrami za'ra wa'aba mo. Marĩ ĩwē si 're 'manharĩ za'ra wa'aba mono wamhã, Wanhib'apito hã te za toi uptabi na aihãimanazém na te te 're ai'uzēi pese za'ra wa'wa. Tawamhã 're aihãimana wē za'ra wa'aba mono zém hawi, te za tō marĩ

're ĩ'manharĩ wē za'ra wa'aba mono zém na asima 're ĩsa'ětē za'ra wa'aba mo. Tawamhã 'Re ĩhãimana u'ási mono hã ĩwaihu'u za'ra wa'aba zém na te za duré asima 're ĩsa'ětē za'ra wa'aba mo, asi'uĩhã na.

¹¹ Wa duré wa te tiwi aima 're rowaptērē u'ási za'ra wa'wa, 'Re ĩhãimana u'ási mono wi hã, tiwaihu'u pese na ĩwē uptabi na si te te 're aipawaptob za'ra wa'aba mono da, asiptete u'ási ãma 're anomro aba mono da, taha na si. ãne wamhã, te za tō ato sina asiptete sina ãma 're anomro aba mo. Duré ãne wamhã, uburé marĩ na 're robzépata za'ra wa'aba mono nherē, asa dama ãma 're wa'rãmi za'ra wa'aba mono ō di za.

¹² ãne wamhã, Wamama ãma te za duré ãma 're aiwata u'ási za'ra wa'aba mo. Ta hã ma tō aima pisutu za'ra wa'wa, hãiwa ãma tinhib'a'uwē norĩ ma, ĩwē uptabi hã te te sō 're ĩ'apisutu mono hã aima wa'aba zama aima 're hãimana za'ra wa'aba mono da dasine, da'ãma 're ĩsib'a'uwē mono zéb ãma hã rowa'a za'ēne 're ĩsa'wari u'ási mono ãma hã.

¹³ Ta hã ma tō wa'anho'reptu tō, robra hawĩ, Satanasihi nhipতেজেম hawĩ. Ta hawĩ ma tō te te 're wa'awaihu, ĩ'ra nhĩmi'madã'ã si oto tãma 're wahãimana za'ra mono da, tãma ĩsawi uptabi nhĩmi'madã'ã si.

¹⁴ Tĩ'ra dã'ázém na ma tō wa'awa'ã, marĩ wa te 're ĩ'manharĩ wasété za'ra mono zé hã te te wama 're aparĩ mono da, taha zarina wawasédé hã te te wa'ãma 're ab'madã'ã tō mono da oto.

Cristu hã 're ĩhãimana mono zé wasu'u

¹⁵ Cristu hã 'Re ĩhãimana u'ási mono ne, te tō 're mo, aiwa wa. Tane nherē, 'Re ĩhãimana u'ási mono hã datōmo na da te dasiwi 're 'madã'ã waihu'u za'ra mono ō di. ĩ'ra si ma tō da te dasiwi 're 'madã'ã za'ra datōmo na, ti'a 're morĩ ré hã. Ta hã duréihã marĩ ō uptabi ré hã, te tō 're hãimana u'ási, ĩ'ra hã. Uburé ropoto nhipai u, te ta hã pire uptabi na 're hãimana.

¹⁶ Ōhō si ma tō Timama zadawa para uburé marĩ hã te te apoto, hãiwa ãma, duré ti'ai ãma zama, datōmo na da te 're ĩ'madã'ã za'ra mono hã, duré da te 're ĩ'madã'ã waihu'u za'ra mono ō zama. Uburé hãiwa nho're ãma dapo're'ō norĩ ma simiroti pire na 're ĩhãimana za'ra mono norĩ zama ma tō te te apoto, ĩhãiba'ō norĩ hã. Uburé marĩ hã taha ma si 're hãimana za'ra mono da, ma tō te te ro'apoto tō, Timama zadawa para.

¹⁷ Cristu hã ãne u'ási te tō 're hãimana, marĩ ō uptabi ré hã. Ta hã te uburé marĩ hã tinhimipoto mono bã te te 're atété tiwaihu'u pese na, si'wa'rutu na tiwi 're hãimana za'ra mono ãna, tãma 're hãimana za'ra mono da, simisutu.

¹⁸ Ta hã uburé tizazei'wa norĩ 'madã'ã'wa te 're hãimana, pire uptabi na. Ta hã dapisutu'wa, 're ĩdapoto téb za'ra mono zéb da hã. Dã'ã nherē, apã hãiwa'utu wa, te oto dama pire na 're hãimana u'ási, uburé za ĩdahãiwa'utu za'ra norĩ nhipai u. Taha wa, te oto danhipai u pire uptabi na 're hãimana tō.

¹⁹ 'Re ĩhãimana u'ási mono hã te te sima ĩwézéb zarina, ma tō ĩ'ra hã pisutu, ĩsine uptabi 're hãimana mono da, aiwa.

²⁰ Ma tō duré sima ãma roti siro, ĩ'ra hã wedepo'o nhonhi'rãmi na dazada ĩdã'ázém na oto da'ãma 're siwadi mono da, uburé hãiwa ãma 're ĩdahãimana za'ra mono norĩ ãma hã, duré uburé ti'ai ãma 're ĩdahãimana za'ra mono norĩ ãma zama.

²¹ A norĩ wa'wa hã ma tō aré 'Re ĩhãimana u'ási mono nhiti si 're anomro aba mo, aip'ē 're wa'aba hã. Asitob'ru na ma tō ãma 're ĩrosa'rata za'ra wa'aba mo aré, aip'ē 're marĩ ĩwasété na si asima 're rosa'rata za'ra wa'aba mono wa. Duré marĩ ĩwasété si 're 'manharĩ za'ra wa'aba mono wa, ma tō aré ĩsiti 're aihãimana za'ra wa'aba mo.

²² Tane nherē, ĩ'ra hã dasiré a'uwē hãiba na dazada ĩdã'ázéb zarina, te oto ai'ãma 're siwadi za'ra wa'wa, romhutu'omhã sisō're te te asōrē wa'aba da, aiwasédé hã da te ai'ãma sa'ra waihu'u aba ō wa za tamemhã oto, Cristu hã tidã'ázém na aiwasédé te te aima 're ĩ'aparĩ aba mono zéb zarina.

²³ Taha wa, ãne haré te za Cristuhu wasu'uwē si asina 're ĩ'umhãsi za'ra wa'aba mo asiptete sina, 'ri hã étē nhisiwi siptete na 're sa mono wa, simeĩ waihu'u ō na 're ĩsa mono ne. Te za tō ãma 're aihãimana u'ási za'ra wa'aba mo, tiwi asina 're aipahã za'ra wa'aba mono ãna. ĩmorĩ'rata na Cristuhu wasu'uwē hã wapari na'rata za'ra wa'aba wamhã, ĩwē uptabi hã hãiwa ãma asō 're ĩsimi'wara aba mono wasu'u wi, tiwi asina 're ai'ré za'ra wa'aba mono ō di za, sō 're asimipari za'ra wa'aba mono wasu'u wi hã. ãhã wasu'uwē hã ropã ma tō da te dasima 're wasu'u za'ra, da te 're waihu'u za'ra mono da. Duré wa hã Paru, wa ãhã wasu'uwē na te dama 're romhuri u'ási.

Paru hã ĩsazei'wa norĩ te te 're ĩpawaptob za'ra mono zé wasu'u

²⁴ Wa hã ai'udãna za'ra wa'aba, te ai'ãma 're robzépata za'ra wa'aba mono nherē, wa ĩto sina 're ĩhãimana. Cristuhu ma si, te 're romhuri mono wa, wa tō te 're robzépata za'ētē tō, ta hã ti'ai ãma 're morĩ ré, dazada te te ĩrobzépata ne. Tane nherē, Cristuhu nhĩb'a'uwē norĩ ma,

Īnhimiromhuri na te tãma ãma 're uwaimrami mono da, wa za tã taha na te 're robzépata u'ãsi.

²⁵ 'Re Īhãimana u'ãsi mono hã ma tã ĩpisutu, ĩsib'a'uwẽ norĩ te tãma 're apawapto mono da. Ai'udãna za'ra wa'aba te 're romhuri mono da, ma tã romhuri hã ĩma tisõ, uburẽ ĩsadawa wasu'uwẽ na te aima 're rowasuu' za'ra wa'aba mono da.

²⁶ Āhã wasu'u hã 'Re Īhãimana u'ãsi mono, ĩsãna'rata hawimhã te te aré dama 're ĩ'awaihu'u mono õ hã ma tã oto sõ'awi dama upsibi nhamra, tinhib'a'uwẽ norĩ ma si.

²⁷ 'Re Īhãimana u'ãsi mono hã ma tã sima ãma roti, āhã wasu'u hã ĩwẽ uptabi hã aré da te 're ĩwaihu'u za'ra mono õ hã te te oto dama awasu'u hã ĩ'ré da sõ'awi, dapoto mono bã da te oto 're waihu'u za'ra mono da, zudezu'õ norĩ zama. Āhã wasu'u hã aré da te 're ĩwaihu'u za'ra mono õ hã, āne: Cristu hã te oto aipẽ'ẽ 're, 're sãmra za'ra wa'wa. Taha wa, te za tã taha zõ si 're asimipari za'ra wa'aba mo, 'Re Īhãimana u'ãsi mono, ĩwẽ uptabi hã za te te wama 're ĩ'apisutu mono zõ si. Āne 'Re Īhãimana u'ãsi mono wasu'u hã, ā hã aré da te 're ĩwaihu'u za'ra mono õ hã.

²⁸ Taha wa, Cristuhu si wa oto wa te dama 're wasu'u za'ra. Hãiwa hawi dahãmanazém na rowaihu ĩwẽ hã wa te 're ĩwaihu'u za'ra mono zéb zarina, wa tã wa te 're da'uwati wẽ za'ra dahãiba mono bã, marĩ hã da te 're 'manharĩ waseté za'ra mono tã da. Wa tã duré wa te dama 're roti za'ra, marĩ da te 're 'manharĩ wẽ za'ra mono da, ĩ'uwaibaba si. Ni'wam norĩ hã Cristuhu ãma prẽdup sina 're ĩnomro mono norĩ hã 'Re Īhãimana u'ãsi mono nho're u, wa te 're simroi mono da, wa tã āne hã wa te dama 're roti za'ra, rosa'rata wẽ hã wa te oto 're ĩwaihu'u za'ra mono zém hawimhã.

²⁹ Āne da, wa tã 're ĩsi'wapéi u'ãsi, ĩnhiptete sina te tãma 're romhuri mono da. Cristu hã tinhiptezé te te ĩma 're sãmri mono wa, wa ĩré te ãma 're romhuri pese, taha na si 're ĩnhiptete uptabi mono wa.

2

¹ Wa hã wa ĩsima wẽ āne hã, te ai'ãma 're ĩromhuri pese za'ra wa'aba mono na asiwi ĩwaihu'u za'ra wa'aba da, ĩhãiba pibu za'ra wa'aba õ nherẽ. Duré Radiseza na 'ri nho'õmo nhisi ãma ĩsazei'wa norĩ 're ĩsi'ubumroi mono norĩ ãma te 're ĩromhuri pese mono na asiwi ĩwaihu'u za'ra wa'aba da, wa duré ĩsima wẽ, daro mono bã ni'wam norĩ ãma te duré 're ĩromhuri pese mono na zama, uburẽ te te ĩhãiba pibu za'ra õ norĩ ãma hã.

² Ta norĩ hã tipẽ'ẽzani wẽ ré, siptete sina 're hãimana za'ra mono da, wa tã te ãma 're romhuri pese za'ra. A norĩ wa'aba ãma zama wa tã duré te 're romhuri pese, aipẽ'ẽzani wẽ ré asiptete sina 're aihãimana za'ra wa'aba mono da. Taha wa, te za 'rãwi simisutu siré 're hãimana za'ra ta norĩ hã, 're ĩsawĩ pese za'ra mono zéb zarina. A norĩ wa'aba zama te za duré āne zarina simisutu asiré 're aihãimana za'ra wa'aba mo. Tawamhã, 'Re Īhãimana u'ãsi mono wasu'uwẽ hã aré dama ĩwaihu'u'õ hã te te oto waihu'u pese za'ra wa, te za tã sena na te te 're waihu'u za'ra, a norĩ wa'aba zama. 'Re Īhãimana u'ãsi mono wasu'u hã aré dama ĩwaihu'u'õ hã, ā hã Cristuhu wasu'uwẽ, te dama wasu'u.

³ Cristu hã rowasuu' aré dama ĩwaihu'u'õ na 'Re Īhãimana u'ãsi mono nhimiroti wẽ wasu'u waihu'u'wa, ta hã. Ētẽ'ubuzi ĩwa'ãbã za'ēne hã ti'ai 'rowi 're simi'wara mono nherẽ, da te oto 're ĩsõpẽtẽ za'ra mono ne, ma tã Cristu hã te te dama 're wasu'u hã ĩ'ré sõ'awi, 'Re Īhãimana u'ãsi mono nhimiroti wẽ wasu'u hã.

⁴ Ni'wam norĩ hã roti senai'õ na taré te te aima 're ĩrowasuu' za'ra wa'aba mono hã wapari ze nherẽ, ãma 're saze za'ra wa'aba mono tã da, wa āne na aima nharĩ za'ra wa'wa.

⁵ Ai'rata ĩnhamra aba õ nherẽ, ĩpẽ'ẽ na wa tã te ai'ãma 're rosa'rata u'ãsi za'ra wa'wa, 'rãwi asiré 're ĩhãimana za'ra wa'aba mono ne. Cristu hã asina 're ĩ'umnhasi za'ra wa'aba mono zém na, simisutu asiré 're aihãimana nhiptete za'ra wa'aba mono wa, wa ai'ãma 're ĩtoi u'ãsi za'ra wa'wa, romhã na nherẽ.

Cristuhu ãma 're ĩdanomro mono zé wasu'u

⁶ Taha wa, Cristu Zezusi hã Asib'apito za'ra wa'aba na 're saze za'ra wa'aba mono wa, ma'apé simisutu ĩsiré ãma 're aihãimana u'ãsi za'ra wa'aba mono za, 'rãwi.

⁷ Rowede hã sari pa na 're simasa mono wamhã, 're sina waihu'u mono õ di. Tane duré a norĩ wa'wa hã Cristu te te 're ĩ'aipawapto za'ra wa'aba mono zéb zarina si, te za aihãimana nhiptete sina ãma 're aihãimana za'ra wa'aba mo. Tawamhã taha si asina 're ĩ'umnhasi za'ra wa'aba mono zém na te za asima 're ĩsa'ētẽ za'ra wa'aba mo, Cristuhu wasu'uwẽ na tã sena da te aima ãma 're ĩrowasuu' za'ra wa'aba mono zéb zarina. Te za duré ãma 're aiwata u'ãsi za'ra wa'aba mo, 'Re ĩhãimana u'ãsi mono ãma, Cristuhu nhimipawaptozbéb zarina.

⁸ Taha wa, te za 're asi'madã'ã pese za'ra wa'aba mo, dasi'uihã na senai'õ na danhimirosa'rata nhipese na da te aima 're roti za'ra wa'aba mono wamhã, ãma 're dazaze za'ra wa'aba mono tã da, tã sena newa taha ãma si 're aihãimana za'ra wa'aba mono tã da.

Ni'wam nori hã danhimiwada'uri zarina pawa'âbã âna te te dama 're ïromhuri za'ra mono ne, robzei'ô na apã 're aihâimana za'ra wa'aba mono ô'umhhasite, te za dawî 're asi'madã'â pese za'ra wa'aba mo. Danhimirosa'rata nhipe hã Cristuhu hawib'ô di. Dahi'rata sidãpãsi tã senai'ô na taré da te dasima 're iroti za'ra mono zém hawimhã ta hã, duré ìhãiba'ô nori hã wasété uptabi na 're ìhâimana za'ra mono nori hã ropã siptete sina marî te te 're ì'madã'â za'ra mono hawimhã, danhimirosa'rata nhipe hã.

⁹ Cristu hã ti'ai âma a'uwê hãiba na 're mori ré, te tã 're ìhâimana u'âsi mono ne 're hâimana, aiwa uptabi wa. Taha wa, marî zô tiwi 're rowaptã'â mono ô di, Cristuhu wi hã.

¹⁰ Tane duré a nori wa'wa hã, Cristuhu âma 're anomro aba mono wa, marî zô aiwi 're rowaptã'â za'ra wa'aba mono ô di, rowê na âma 're ì'anomro u'âsi aba mono zéb da hã. Cristu hã uburé ìhãiba'ô nori 'madã'â wa nori nhipai u, te pire uptabi na 're hâimana u'âsi, siwaprosi ôhõ si.

¹¹ Zudezu nori hã te 're sisihãiwata nhihãri za'ra, 'Re ìhâimana u'âsi mono nhib'a'uwê 're ìnomro mono na da te âma 're ìwaihu'u za'ra mono zéb da hã. Tane duré, wa nori hã Cristuhu âma oto 're wanomro mono wa, ta hã ma tã wapê'ê 're wanhimirosa'rata wasété na 're ìwanomro wasété mono zé hã te te wawî 're anhihãri, wawê na si oto âma 're wahâimana za'ra mono da.

¹² Â dawabzuri hã 're manharî za'ra wa'aba mono wamhã, â da te 're asãmra aba mono zé hã, Cristuhu siré 're atã'â za'ra wa'aba mono zé, te ai'âma simiré'ê za'ra wa'wa. Ab're 're, ìsiré da te 're aséme aba mono zéb zama, te ai'âma simiré'ê za'ra wa'wa. Ta hã 're anomro 'rata aba mono zé hã oto 're ìrême pese za'ra wa'aba mono zé, te aima wasu'u za'ra wa'wa. Duré Cristu hã dã'â uptabi nherê, Ìmama hã tiwaihu'u pese na te te ìhãiwa'utu ne, ma tã duré ìsiré aihãiwa'utu za'ra wa'wa. ìsiré 're aihãiwa'utu za'ra wa'aba mono zé hã 're anomro aba mono zép té, te oto aima wasu'u za'ra wa'wa. 'Re ìhâimana u'âsi mono hã ìwaihu'u pese na asina 're ì'umhhasi za'ra wa'aba mono zéb zarina, ma tã âne hã aima pisutu za'ra wa'wa, taha âma si 're anomro aba mono zép téb da hã oto.

¹³ A nori wa'wa hã aipê'ê 're, 're atã'â za'ra wa'aba mono ne, ma tã aré 're anomro aba mo, aiwasété si 're manharî u'âsi za'ra wa'aba mono wa, duré 'Re ìhâimana u'âsi mono nhiti 're aihâimana u'âsi za'ra wa'aba mono wa aré. Taha ré, ma tã oto 'Re ìhâimana u'âsi mono hã te te aima 're pisutu za'ra wa'wa, 're anomro aba mono zép téb da hã, aipê'ê 're ato sina âma 're anomro u'âsi aba mono da, Cristu hã dã'â uptabi nherê, apã te te ìhãiwa'utu ne. Taha wa, wawasédé wa te 're ì'manharî za'ra mono zé hã te te oto wa'âma 're ab'madã'â mono ô di za, ta hã.

¹⁴ Wawasédé wa te 're ì'manharî za'ra mono zém na te te aré wa'âma sima ìrob'ui'éré za'ra zé hã ma tã te te wama 're aparî, wawasété na wa te aré tãma 're ìwa'âbã za'ra mono ô na wa'âma rob'ui'éré hã. Ìsimiroti hã wa te wasina âma 're ì'uwaimrami za'ra mono ô zarina, wawasété na te te wa'âma 're ì'arob'ui'éré mono zé hã ma tã te te wama 're a'uprosi oto. Niha 're ìdahâimana za'ra mono zéb da, duréihã te te dama 're ì'aroti 'rata mono hã ma tã duré te te dama 're a'uprosi oto. Cristu hã wedepo'o nnonhi'rãmi na wazada idã'âzém na ma tã te te wama 're a'uprosi tã.

¹⁵ Uburé hãiwa nho're âma ìhãiba'ô nori nhiptetezê hã ma tã tiwi uprosi za'ra 'Re ìhâimana u'âsi mono hã, dapo're'ô nori ma simiroti pire na tãma 're ìhâimana za'ra mono nori nhiptetezê hã aré. Da'wapéi'wa nori nhib'apito hã tinhitob'ru nori âma te te ai'uté za'ra wê te, da'ahã nho'a sisarina te te ìsimroi mono ne, ma tã danho'a ta nori âma ai'uté za'ra, wedepo'o nnonhi'rãmi na Cristuhu dã'âzém na hã, Cristuhu ma wapu na 're ìhâimana za'ra mono na, uburé da te oto 're waihu'u za'ra mono da.

¹⁶ Âté ni'wam nori hã te za âne na te te aima 're roti za'ra wa'wa: "Romnhi hã siwa'ru 're huri aba mono ô di za. Duré uwa 'ru 'rãi wa'u ìsé hã siwa'ru bãtã na 're âhuri aba mono ô di za. Duré sabadu na romhuri zahãrizém na 're romhuri za'ra wa'aba mono ô di za. Duré a'amo hã 're pusi mono sidãpãsi, 'Re ìhâimana u'âsi mono ma, dato da te tãma 're manharî za'ra mono wamhã, te za dame 're ì'madã'â pese za'ra wa'aba mo. Bãdã ahã na pire na dama 're ìhâimana za'ra mono zama, te za dame 're ì'madã'â pese za'ra wa'aba mo, 'Re ìhâimana u'âsi mono âma 're ìdawata za'ra mono zéb da, dama ìpire mono hã. Âne hã asina tãma âma 're uwaimrami za'ra wa'aba mono wapsi, te za 'Re ìhâimana u'âsi mono hã te te 're aiwêsãmri za'ra wa'wa." Âne na ni'wam nori hã te te aima 're roti za'ra wa'aba mono wamhã, âma 're saze za'ra wa'aba mono ô di za, dasi'uhã na danhimi'manharizém hawî 'Re ìhâimana u'âsi mono hã te te 're da'awêsãmri mono dai ô wa.

¹⁷ Da'awã da te 're 'madã'â za'ra mono wamhã, dahãiba uptabi hã dama 're ìhâimana za'ra mono na te za da te 're waihu'u za'ra. Tane nherê, da'awã si hã marî âma 're hâimana mono ô di, ìpire hã. Tane duré, danhimiroti zarina uburé danhimi'manharizé mono hã. Marî

ĩ'uptabi hã dama ãma 're hãimana za'ra mono õ di. Īwē hã za dama 're ĩhãimana za'ra mono zép si, te wasu'u. Marĩ ĩwē uptabi hã, ta hã Cristu te tō wama wasu'u za'ra, taha si.

¹⁸ Āté ni'wam norĩ hã te za sadawa nhipese na dama 're siwasu'u za'ra, dama wapu na 're ĩhãimana za'ra mono na, 'rãwi 're si'madã'ã ze za'ra mono nherē. Āté te za duré ta norĩ hã hãiwa ãma romhuri'wa norĩ ãma si 're wata za'ra, 'Re ĩhãimana u'ãsi mono upana. Tawamhã áté ta norĩ hã te za aima roti za'ra wa'wa, ãne: "A norĩ wa'wa hã wasine 're aihãimana za'ra wa'aba mono õ wamhã, 'Re ĩhãimana u'ãsi mono hã ĩwē uptabi hã te te aima sòmri za'ra wa'aba õ di za. Te za ĩsimini za'ra wa'wa." Āne na ta norĩ hã te te aima 're nharĩ za'ra wa'aba mono wamhã, ãma 're saze za'ra wa'aba mono õ di za. Tō'ã. Ta norĩ hã marĩ aimawi hã dama ĩwaihu'u'õ hã sõtõ 'rowim ne, te te 're ĩsabu za'ra mono na dama 're ĩsiwasu'u za'ra mono na, te 're si'madã'ã ze za'ra, dama pire na 're hãimana za'ra mono newa, 'Re ĩhãimana u'ãsi mono waihu'u'õ'wa norĩ nhimirosa'rata wasété zarina.

¹⁹ Ta norĩ hã Cristuhu wasu'uwē si te te sima 're tété za'ra mono õ di. Cristu hã uburé tizazei'wa norĩ 'madã'ã'wa te pire na 're hãimana taha si, da'rã hã dahãiba ma pire na 're ĩhãimana za'ra mono ne. Dahãiba na danhorõ 're ĩhãimana za'ra mono hã te dahi hã te te sitēme 're tété tete za'ra, danhiptete sina ãma 're dahãimana za'ra mono da, dahãiba na hã. Tane duré Cristu hã te za tinhib'a'uwē norĩ hã te te 're apawapto, ta norĩ hã 're sipawapto ba za'ra mono da, siptete sina ãma 're hãimana u'ãsi za'ra mono da. Te za duré te te 're apawapto, prédup sina ãma 're ĩhãimana za'ra mono zém na te te sima 're sa'ëtē u'ãsi za'ra mono da, 'Re ĩhãimana u'ãsi mono te te tãma 're ĩ'awē mono zéb zarina.

Cristuhu siré 're ĩdahãiwa'utu za'ra mono zé wasu'u

²⁰ Cristu hã dã'ã wamhã, 're anomro 'rata aba mono zé hã ma tō ĩsiré aiwi ai'utõrĩ za'ra wa'wa. Taha wa, ti'ai ãma danhimiroti zarina 're aihãimana za'ra wa'aba mono õ di za oto, taha zarina 'Re ĩhãimana u'ãsi mono te te 're aiwēsãmri za'ra wa'aba mono dai õ wa. Ta hã tãibã oto. Ta hawi ma tō ĩhawi aiwairébé 'wa. E marĩ da, te bété zahadu ãne hã ĩsazei'õ'wa norĩ nhimiroti hã asina 're ĩsazei pese za'ra wa'aba mo, taha na zahadu 're aihãimana za'ra wa'aba mono õ nherē.

²¹⁻²² Ni'wam norĩ hã te ãne te te aima 're roti za'ra wa'wa, 'Re ĩhãimana u'ãsi mono nhimiroti na newa: "Ā hã dasa hã asib'rata na ãri õ di za, wasété wa. Duré ã hã téiwai õ di za, asadawa na. Duré ã hã asib'rata na upi tō. Wasété uptabi di." Āne hã te ni'wam norĩ hã dasa na te te aima 're roti wasété za'ra wa'wa, 're upi za'ra wa'aba mono tō da. Tane nherē, dasai mono bã dama 're hãimana hutu za'ra mono di. Taha wa, dasa da te dasiwi 're ĩsawi za'ra mono zém na roti hã tarére duré. Marĩ dai õ di ãne hã, 'rãwi dasi'uihã na da te dasima 're ĩrosa'rata za'ra mono zé hã.

²³ Dasa na te te dama 're ĩroti wasété za'ra mono norĩ hã waihu'u pese newa, te ta norĩ ãma da te 're sasòmri za'ra. Tane nherē, ta norĩ hã waihu'u pese na 're hãimana za'ra mono õ di. Ta norĩ hã te ãne te te 're dawada'uri za'ra, hãiwa ãma 'Re ĩhãimana u'ãsi mono ma romhuri'wa norĩ ãma si 're dawata za'ra mono da, 'Re ĩhãimana u'ãsi mono upana. Ta norĩ hã 'rãwi sina 're wata u'ãsi za'ra mono nherē, te dama wapu na 're ĩhãimana za'ra mono na dama 're siwasu'u za'ra, sadawa nhipese na. Dasa hã te te siwi 're ĩwē'õ za'ra mono na te ta norĩ hã te te 're robzépata za'ra tihãiba na, 'Re ĩhãimana u'ãsi mono hã taha zarina te te 're wēsãmri za'ra mono da newa. Tane nherē, taré uptabi ta hã. Marĩ dai õ di, dasi'uihã na da te dasima 're ĩroti za'ra mono na 're wahãimana za'ra mono wa, wa za wa te wasina ãma 're uwaimrami za'ra, wanhimirosa'rata wasété zarina marĩ ĩwasédé hã wa te 're 'manharĩ za'ra mono tō da. Mare di. Sib'uwere di, marĩ da, wama 're hãimana za'ra mono õ wa, ta hã.

3

¹ Cristu hã dã'ã uptabi nherē, 'Re ĩhãimana u'ãsi mono te te apã ĩhãiwa'utu ne, ma tō a norĩ wa'aba zama aihãiwa'utu za'ra wa'wa, aipē'ē 're atã'ã u'ãsi ne 're aihãimana za'ra wa'aba mono zém hawi, 're anomro aba mono zép téb da hã oto. Taha wa, ma'ãpé ĩwē uptabi hã hãiwa ãma otõ 're ĩsimi'wara aba mono zõ si, 're rob'ruiwapari u'ãsi za'ra wa'aba mono za. Tame te ato Cristu hã danhib'apito simasisizéb ãma 're sãmra u'ãsi pire na, Timama nhimire niwĩ, 'Re ĩhãimana u'ãsi mono nhimire niwĩ.

² Hãiwa ãma uburé marĩ wē uptabi na 're ĩhãimana za'ra mono na si, te za asima ãma 're ĩrosa'rata u'ãsi za'ra wa'aba mono. Āme ti'ai ãma uburé marĩ 're ĩhãimana za'ra mono na asima 're rosa'rata za'ra wa'aba mono õ di za oto.

³ 'Re anomro 'rata aba mono zé hã ma tō aima ai'utõrĩ za'ra wa'wa oto. 'Re ĩhãimana u'ãsi mono ãma Cristuhu siré 're anomro aba mono zép tém na da te ai'ãma 're rosa'rata waihu'u za'ra wa'aba mono õ di zahadu. E marĩ wa. 'Re ĩhãimana u'ãsi mono hã zahadu te te dama 're awaihu'u mono õ wa, ãne na hã.

⁴ Cristuhu āma si tō sena 're wahāimana za'ra mono wamhā, taha na si āma 're īwanomro mono zép té, te wama wasu'u za'ra. Ta hā nimahā na tinhimirowa'a na ti'ai u apā wei mori wamhā, a nori wa'wa hā te za duré danho'a ĩsiré aihāimana za'ra wa'wa, ĩsine aiwē uptabi na 're aihāimana za'ra wa'aba mono na, da te āma aiwaihu'u za'ra wa'aba da hā.

'Re ĩdanomro mono zép té wasu'u

⁵ Ti'ai āma ĩsazei'ō'wa nori hāimanazéb zarina, marī wasété zō 're ĩrob'ruiwapari za'ra wa'aba mono zé hā te za asiwi 're ĩ'uprosi pese za'ra wa'aba mo asiwi, 're dadā'ā za'ra mono wa, marī zō da te oto 're ĩrob'ruiwapari za'ra mono ō ne. Pi'ō na aibā na zama siwa'ru aiwasédé, 're ĩmanharī za'ra wa'aba mono zé hā te za 're ĩ'uprosi pese za'ra wa'aba mo asiwi, duré asisō 're ĩrowasutu za'ra wa'aba mono zé hā, duré marī wasété zō si asima 're ĩrob'ruiwapari za'ra wa'aba mono zé hā, duré danhipai u asibro pese na 're aihāimana za'ra wa'aba mono da, marī zō si asima 're asōpré wa'aba mono zé hā. Āne hā 'Re ĩhāimana u'āsi mono ma, wē ō di, marī zō ĩ'upana asima 're ĩrob'ruiwapari za'ra wa'aba mono zé hā. Taha wa, te za tō uburé aiwasédé hā asiwi 're ĩ'uprosi pese za'ra wa'aba mo, aiwi 're si'utōri pese za'ra wa'aba mono wa, 're anomro wē wa'aba mono da oto.

⁶ Āne hā dawasété si, da te dasima 're ĩruiwapari za'ra mono zéb zarina, te za 'Re ĩhāimana u'āsi mono hā dama arob'manharī za'ētē ĩpīpa na hā, te te siwi ĩda'awē'ō pese zéb zarina.

⁷ A nori wa'aba zama ma tō aré āna na 're aihāimana za'ra wa'aba mo, aiwasété si asima 're ĩruiwapari za'ra wa'aba mono zéb zarina, aré āma 're aihāimana za'ra wa'aba mono ré hā.

⁸ Taha wa, te za uburé marī hā 're ĩmanharī wasété za'ra wa'aba mono zé hā ĩrēme pese za'ra wa'wa oto, 're ĩda'ruiwapari za'ra wa'aba mono zé hā, duré asisada 're asiti'ru za'ra wa'aba mono zé hā, duré niha dama 're rob'manharī za'ra wa'aba mono da, asima da'āma 're ĩrosa'rata wasété za'ra wa'aba mono zé hā, duré da'āma 're ĩwasété za'ra wa'aba mono zé hā, duré uburé aimreme wasété 'wa hā. Ā nori hā te za uburé ĩrēme pese za'ra wa'wa.

⁹ Taré asima 're asadawa nhīpese za'ra wa'aba mono ō di za oto, 're anomro 'rata aba mono zé hā 're rēme pese za'ra wa'aba mono nherē, uburé aiwasédé 're ĩmanharī za'ra wa'aba mono zé hā.

¹⁰ Taha wa'rāmi, te oto 're ĩdanomro mono zép tém na si 're anomro aba mo, ĩwē na. 'Re ĩhāimana u'āsi mono, ma tō te te 're aipoto téb za'ra wa'wa aipē'ē 're, ĩsine 're aihāimana u'āsi za'ra wa'aba mono da oto, taha zarina ōhō si 're waihu'u pese za'ra wa'aba mono da.

¹¹ Taha wa, dapoto mono hā dasipu'u pese na tāma 're dahāimana za'ra mono nherē, te te siwi 're da'ahāiba wē'ō mono ō di oto, 'Re ĩhāimana u'āsi mono hā. E marī wa. Cristuhu zazei'wa nori hā aiwapsi te te 're azawi pese mono wa, zudezu'ō nori hā zudezu nori me, duré sihāiwa nhīhāri ré 're ĩnomro mono nori hā, duré sihāiwa nhīhāri āna 're ĩnomro mono nori hā, duré a'uwē pahī nori, marāi 'rowi 're ĩhāimana za'ra mono hā darob amoi āma, duré ĩwada'uri zarina si pawa'ābā āna te te dama 're ĩromhuri za'ra mono nori hā, duré wada'uri āna si'uihā na 're ĩhāimana za'ra mono nori hā. Āne hā te uburé ĩsazei'wa nori hā aiwapsi tāma 're hāimana za'ra, 'Re ĩhāimana u'āsi mono ma hā. Cristuhu si te pire uptabi na wama 're hāimana za'ra, danhipai u. Taha si wama ĩpire uptabi za'ra hā, wasiré ĩsazei'wa nori ma hā. Taha si te za tizazei'wa nori pē'ē 're, 're sāmra, ĩhāiba mono hā.

¹² A nori wa'wa hā 'Re ĩhāimana u'āsi mono nhīb'a'uwē, te tō 're aihāimana za'ra wa'aba mo. Ta hā te te 're asawi pese za'ra wa'aba mono wa, ma tō sima aipisutu za'ra wa'wa, taha ma si tāma 're aihāimana za'ra wa'aba mono da oto. Taha wa, da te 're robzépata za'ra mono wanhā, te za da'āma 're aiwamri za'ra wa'aba mo. Te za duré 're ĩdapawapto wē za'ra wa'aba mo. Asiré nori ma, aipire na 're aihāimana za'ra wa'aba mono na, 'rāwi 're asi'madā'ā ze za'ra wa'aba mono ō di za. Aiwaimri te za dama 're aihāimana za'ra wa'aba mo. Duré aiwara sina dazada 're asahi za'ra wa'aba mono ō di za.

¹³ Ni'wam nori hā asiré nherē, marī na te te aiwi 're ro'wa'rē za'ra wa'aba mono nherē, āma 're aiwa'a za'ra wa'aba mono ō di za, ta nori āma hā. Duré marī na te te aiwi 're ro'wa'rē za'ra wa'aba mono nherē, āma 're 'madā'ā u'āsi za'ra wa'aba mono ō di za. Wanhīb'apito hā aiwasédé te te oto ai'āma 're ĩ'ab'madā'ā aba mono ō ne, āma 're 'madā'ā za'ra wa'aba mono ō di za, ta nori āma hā.

¹⁴ Danhipai u, dama ĩpire uptabi na roti hā, āne: Te za 're asisawi pese za'ra wa'aba mo. Taha zarina si, te za uburé asiré ĩsazei'wa nori hā rowē na asiré 're aihāimana za'ra wa'aba mo, aihāiba za'ra wa'wa hā misi ne.

¹⁵ Cristu hā te za te te 're aipawapto u'āsi za'ra wa'wa, rowē na asiré āma 're aihāimana za'ra wa'aba mono da. Taha wa, te za aipē'ē 're ĩré 're anomro u'āsi aba mo, uburé marī hā ĩ'uwaibaba si āma 're ĩmanharī za'ra wa'aba mono zéb da hā, 'rāwi asina 're waihu'u za'ra wa'aba mono da. 'Re ĩhāimana u'āsi mono hā ma tō aipisutu za'ra wa'wa, simisutu dahāiba misi ne, asiré 're aihāimana za'ra wa'aba mono da, taha zarina aipē'ē 're rowē na asiré 're

aihâimana za'ra wa'aba mono da, âma. Taha wa, te za âma 're aiwata u'âsi za'ra wa'aba mo, 'Re îhâimana u'âsi mono âma si.

¹⁶ Cristuhu wasu'uwê na te za âma 're asipo're pu'u u'âsi za'ra wa'aba mo, aipê'ê 're aima 're hâimana u'âsi za'ra wa'aba mono da, taha zarina aihâimana wê na 're anomro aba mono zê hâ asima 're sa'ê'tê za'ra wa'aba mono da oto. 'Re îhâimana u'âsi mono hawi, dahâmanazém na rowaihu îwê hâ âma 're îwaihu'u za'ra wa'aba mono zêb zarina, te za dama âma 're îroti pese za'ra wa'aba mo. 'Re îhâimana u'âsi mono hâ sôprub uptabi wa, te za tâma 're asô're u'âsi za'ra wa'aba mo, aipê'ê 're âma 're aiwata za'ra wa'aba mono sina. Îpê'êzani te te aima 're îwaihu'u za'ra wa'aba mono zém na, te za rowê zarina tâma 're asô're za'ra wa'aba mo, Saumusi na îbaihâ nhisi na tâma 're îdanho're za'ra mono zém na zama, duré Wanhîb'apito âma 're îdanho're za'ra mono na zama.

¹⁷ Uburé marî hâ 're 'manharî za'ra wa'aba mono wamhâ, duré uburé marî na 're aimreme zusi aba mono wamhâ, Wanhîb'apito Zezusihi zadawa para si, te za uburé marî hâ 're î'manharî wê u'âsi za'ra wa'aba mo. Tawamhâ Zezusi hâ îwê uptabi hâ wanhowa te te î'manharî wê zêb zarina, te za tô marî hâ 're î'manharî wê u'âsi za'ra wa'aba mo, Wamama 'Re îhâimana u'âsi mono âma 're aiwata za'ra wa'aba mono sina.

'Ri 're, 're îdahâimana za'ra mono norî ma rotizé wasu'u

¹⁸ Pi'ô norî, aimro nhimiroti hâ te za 're îwaparî pese za'ra wa'aba mo, Cristuhu zazei'wa tô sena âma 're îhâimana za'ra mono zêb zarina.

¹⁹ Aibâ norî, aimro te za 're îsawi pese za'ra wa'aba mo. Tâma 're aihâimana wasété za'ra wa'aba mono âna, te za asima 're îsawi pese za'ra wa'aba mo.

²⁰ Ai'uté norî, aimama nhimiroti te za 're îwaparî pese za'ra wa'aba mo, ana nhimiroti zama, Cristuhu zazei'wa oto 're îhâimana za'ra mono zêb zarina. E marî wa. 'Re îhâimana u'âsi mono hâ te te aima 're wê za'ra wa'aba mono wa, âne hâ.

²¹ Damama norî, ai'ra norî ma, ai'aba're na aimreme hâ 're sani za'ra wa'aba mono ô di za, ta norî hâ te te sina 're aimreme wazêb za'ra wa'aba mono wa, tiwi 're robzei'ô pese za'ra mono tô da.

²² Aiwada'uri zarina si, aipawa'âbâ âna dama romhuri'wa norî, ti'ai âma asib'apito norî mreme hâ te za 're îwaparî pese za'ra wa'aba mo. E asib'apito norî hâ 'râwi titômo na te te 're ai'madâ'â za'ra wa'aba mono wapsi, te za romhuri hâ tâma 're î'madâ'â pese za'ra wa'aba mo, asimiromhuri na te te 're aiwêsâmri za'ra wa'aba mono zêb da hâ. Mare di. Îhâiba za're'ra nherê, te za tô romhuri hâ tâma 're î'madâ'â pese za'ra wa'aba mo, Wanhîb'apito hâ asiwi 're îwazêb za'ra wa'aba mono zêb zarina.

²³ Ato sina te za tô tâma 're îromhuri u'âsi za'ra wa'aba mo asib'apito norî ma, hâiwa âma Wanhîb'apito 're îsâmra mono ma, ato sina 're îromhuri za'ra wa'aba mono ne.

²⁴ Aipawa'âbâ aba zê hâ hâiwa âma asô 're îsimi'wara aba mono hâ, Wanhîb'apito hâ za te te aima îsômri za'ra wa'aba na asina waihu'u sirômo za'ra wa'aba wa, te za âne hâ tô sena ti'ai âma asib'apito norî ma 're îromhuri wê u'âsi za'ra wa'aba mo. Tane nherê, ta norî ma si 're romhuri za'ra wa'aba mono ô di. Ta norî u'âbâ, te Wanhîb'apito Cristuhu ma zama 're îromhuri za'ra wa'aba mo, ta hâ Wanhîb'apito uptabi wama 're hâimana mono wa.

²⁵ Ni'wam norî hâ tiwasété si te te 're 'manharî u'âsi za'ra mono wamhâ, taha wa'râmi te za 'Re îhâimana u'âsi mono hâ hâ za'ra, nimahâ na hâ. E marî wa. Ni'wam norî hâ po're'ô na 're nomro u'âsi mono nherê, tinhimihâzê te te tâma ba'a waihu'u za'ra ô wa za, 'Re îhâimana u'âsi mono hâ, dama pira na 're îhâimana za'ra mono norî hâ, dama wapu na 're îhâimana za'ra mono norî zama.

4

¹ Danhîb'apito norî, pawa'âbâ âna aima romhuri'wa norî ma, te za 're î'manharî wê u'âsi za'ra wa'aba mo, î'uwaibaba si. Asib'apito za'ra wa'wa hâ hâiwa âma 're îsâmra mono hâ te te 're ai'madâ'â u'âsi za'ra wa'aba mono na, asina 're waihu'u za'ra wa'aba mono wa, te za âne na hâ tâma 're î'manharî wê u'âsi za'ra wa'aba mo, aima romhuri'wa norî ma hâ.

'Re îhâimana u'âsi mono ma, 're damreme zusi mono da, rotizé wasu'u

² 'Re îhâimana u'âsi mono ma, te za 're aimreme zusi aba mo, ône u'âsi. Asimiza'rese te za tâma 're aimreme zusi aba mo, âma 're aiwata za'ra wa'aba mono sina.

³ 'Re îhâimana u'âsi mono ma, 're aimreme zusi aba mono wamhâ, wa'âma zama te za duré tâma 're aimreme zusi aba mo, ta hâ te te wama 're a'ridawa mono da, îmreme wasu'u hâ wa te dama 're wasu'u za'ra mono da, Cristuhu wasu'uwê aré dama îwaihu'u'ô hâ wa te dama 're waihu'u za'ra mono da oto. Taha para, ma tô oto dasiwi î'âri ni, dzazazêb 're, da te înherê da. Taha wa, wa oto taha 're nhamra.

⁴ Taha wa, ma'âpê 'Re îhâimana u'âsi mono ma si, î'âma 're aimreme zusi aba mono za, taha si te te 're îpawaptob u'âsi mono da, Cristuhu wasu'uwê dama îwaihu'u'ô hâ îpibu pese na si

te dama 're wasu'u mono da, da te oto āma 're īwaihu'u pese za'ra mono zéb da hā, āhā da si te te īpisutu wa, 'Re īhāimana u'āsi mono hā.

⁵ Asimirosa'rata wē, oto āma 're īwaihu'u za'ra wa'aba mono zéb zarina, te za Cristuhu zazei'ō'wa norī ma aihāimana prédup sina tāma 're aihāimana za'ra wa'aba mo. Duré 're danhopētē za'ra wa'aba mono sidāpāsi, te za Cristuhu wasu'uwē hā dama 're īwasu'u za'ra wa'aba mo, dasiré 're aihāimana za'ra wa'aba mono ré hā, da te 're waihu'u za'ra mono āna 're dahāimana za'ra mono tō da, Cristuhu wasu'uwē hā.

⁶ Īsazei'ō'wa norī ma, 're rowasu'u za'ra wa'aba mono wamhā, aimreme wē na si te za tāma 're īrowasu'u za'ra wa'aba mo, tāma āma 're rowē zani za'ra wa'aba mono da, aimreme wē na te te āma 're aiwapari ze za'ra wa'aba mono da. Āne wamhā, ī'uwaiwaba si te za tō aimreme na tāma āma 're īwa'rāmi za'ra wa'aba mo, Cristuhu wasu'uwē na te te āma 're asadanharī za'ra wa'aba mono zéb uwaiwaba.

Paru hā te te īdazawi 'rāsutu zé wasu'u

⁷ Wasisānawā Titicu hā, wama īsawi pe hā te za aima īwasu'u za'ra wa'wa, āme īhāimana na hā. Ta hā wasiré Wanhib'apito ma romhuri wē 'wa, te tō wama umnhasi na 're hāimana.

⁸ Taha wa, wa za oto atēme āma satōrī za'ra wa'wa ā īnhimi'ui'ééré ré, āme rowē na īwahāimana za'ra na te te aima wawasuu wē za'ra wa'aba da, taha zarina aima rowē wairébé aba da, wazabādā.

⁹ Taha siré, te za duré Onezimo hā āma mo, wasisānawā wama īsawi pese hāiba amo hā, wama ī'umhna hā ta hā duré, tame asiré īsazei'wa norī, asiré 're aihāimana za'ra wa'aba mono hā. Ta norī si te za aima rowasu'u za'ra wa'wa, āme īromhāimanazém na hā, duré īwahāimana za'ra zém na zama.

¹⁰ Aritacu hā āme dazazéb 're, īsiré īhāiba hā te āma asawi za'ra wa'wa, timreme na. Marcusi hā te duré āma asawi za'ra wa'wa, Banabéhé mama amoi 'ra hā. Taha na wa tō nimahā na hā aima āma roti pari za'ra wa'wa, niwa atēme wisi za'ra wa'aba wamhā, asiwi sawi wē wa'aba da.

¹¹ Zuzuwé hā te duré āma asawi za'ra wa'wa, Zusitu na īsisi amo hā. Ā norī hā zudezu na 're īhāimana za'ra mono, si'ubdatō īhāiba za'ra hā. Īsiré romhuri'wa norī hā ahā uptabi nherē, si'ubdatō si te zudezu norī hā te te īsiré 're romhuri za'ra, tō ā norī hā, 'Re īhāimana u'āsi mono, da'āma 're īsib'a'uwē mono zéb u, wa te tāma 're īda'awaiwui mono na hā. Ā norī hā ma tō siwi īpawapto pese za'ra tō.

¹² Epaprasī te duré āma asawi za'ra wa'wa, tame asiré īsazei'wa norī siré 're īhāimana mono hā, Cristu Zezusihi na romhuri'wa hā. Ta hā te ai'āma 're mreme u'āsi 'wa simi'ē na, 'Re īhāimana u'āsi mono ma, taha si te te 're aipawapto u'āsi za'ra wa'aba mono da, asiptete sina āma 're anomro aba mono da, duré aihāimana prédup sina 're aihāimana wē za'ra wa'aba mono da, ta hā te te aima 're īwē za'ra wa'aba mono zéb zarina si. Cristu hā asina 're ī'umhasi za'ra wa'aba mono zém na 're asiptete za'ra wa'aba mono da, te duré ai'āma 're mreme u'āsi 'wa.

¹³ Ta hā te te ai'āma 're īromhuri pese za'ra wa'aba mono na, wa tō ta hā īsi'uihā na waihu'u. Radiseza na 'ri nho'ōmo nhisi āma īsazei'wa norī 're īhāimana za'ra mono norī āma, te te 're īromhuri pese mono na wa tō duré waihu'u. Duré Irapuri na 'ri nho'ōmo nhisi āma īsazei'wa norī 're īsi'ubumroi mono norī āma, te te 're īromhuri pese mono na zama, wa tō waihu'u, ta hā.

¹⁴ Rucasi hā, dawede'wa wama īsawi pe hā te duré āma asawi za'ra wa'wa. Demasihi zama te duré āma asawi za'ra wa'wa.

¹⁵ Ma'āpé, duré wasisānawā norī hā wama sawi za'ra wa'aba, Radiseza na 'ri nho'ōmo nhisi āma 're īsi'ubumroi mono norī hā. Duré Nipaha zama wama sawi za'ra wa'aba. Duré taha nhorōwa āma Cristuhu zazei'wa, siré 're īsi'rā'ōtō u'āsi mono norī zama, wama sawi za'ra wa'aba.

¹⁶ Ā hā te āma aima īrob'ui'ééré za'ra wa'wa hā asisō'a asima sōré pari za'ra wa'aba wamhā, te za asiwi īsōmri 'wa, Radiseza u, tame īsazei'wa norī hā sisō'a te te duré sima sōré za'ra da. Duré Radiseza u te dama īrob'ui'ééré hā te za duré īwa'rāmi aima sōmri za'ra wa'wa, ta hā duré asima sōré za'ra wa'aba da.

¹⁷ Atipuhu ma, ma'āpé āne hā 'maiwaihu'u aba za: "Re īhāimana u'āsi mono, romhuri te te aima īpisudu hā 'mairēme ō di za. Uburé te za tāma āma ī'auwaimrami mo." Āne hā te za tāma ī'maiwaihu'u 'wa, Atipuhu ma hā.

¹⁸ Wa hā Paru, wa īnhimi'ui'ééré na āma asawi za'ra wa'wa. Ma'āpé ī'āma 're aipo're pu'u u'āsi za'ra wa'aba mono za, dazazéb 're zahadu īhāimana na hā.

Rowē u'āsi 're aihāimana za'ra wa'aba mono za, Wamama hā ai'āma 're īsiwārī za'ra wa'aba mono zéb zarina.

1 Tesaronita norĩ Tesaronita norĩ ma, Paru te te ĩrob'ui'éré na'rata zé Ībahiã wasu'uzé

Paru norĩ hã Tesaronita u si'aba'rêi wamhã, da'hã na ma tô saze za'ra ni, ĩsimiromhuri za'ra na hã. Tazahã zudezu norĩ hã Zezusihi zazei'õ'wa norĩ hã ma tô sada tihãimana za'ra, te te siwi wĩrĩ da. Taha wa, Paru norĩ hã ma tô dahawi aimani zahuré, Siraha me, Bereza na 'ri nho'õmo nhisi u. Tane nherẽ, zudezu norĩ hã ma tô ĩsarina ai'aba'ré, Tesaronita hawi (Atusi 17.1-13). Tawamhã ãma ronometro wapsi, Timotiu hã ma tô Tesaronita ãma ĩsazei'wa norĩ wasu'u wẽ hã tãma ãwisi za'ra, Paru norĩ ma, Corĩtu ãma hãimana za'ra ré. Taha wa, Paru hã ma tô Tesaronita norĩ ma rob'ui'éré za'ra, 'Re ĩhãimana u'ãsi mono ãma siptete sina 're ĩnomro mono na ĩwasu'u za'ra hã te te wapari wa, tãma ĩrowẽ na hã.

Ma tô duré pawaptob za'ra, ĩsisãnawã norĩ hã tiwi 're ĩdã'ã za'ra mono norĩ wi, 're robzei'õ tô za'ra mono da, Zezusi hã apã we ĩmorizéb zô, wato sina 're wanhimipari za'ra mono na dã'ãsina.

¹ ĩsazei'wa norĩ, wa hã Paru, Sira, duré Timotiu, wa ãma aima rob'ui'éré za'ra wa'aba ni, Tesaronita na 'ri nho'õmo nhisi ãma asiré 're asi'rã'õtõ aba mono norĩ ma.

Wamama hã 'Re ĩhãimana u'ãsi mono hã, duré Wanhib'apito Zezu Cristu hã te asina 're ĩ'umnhasi za'ra wa'aba mo, ĩsib'a'uwẽ, 're aihãimana za'ra wa'aba mono da. Wa norĩ hã ta norĩ ma, wa ai'ãma 're wamreme zusi u'ãsi 'wa, ĩsimizawizé hã ai'ãma 're hãimana u'ãsi za'ra wa'aba mono da, rowẽ u'ãsi, ãma 're anomro aba mono da.

Tesaronita ãma ĩsazei'wa norĩ, tô sena 're ĩhãimana wẽ za'ra mono zé wasu'u

² Wa norĩ hã 'Re ĩhãimana u'ãsi mono ãma, wa 're wawata u'ãsi za'ra, 're aihãimana wẽ za'ra wa'aba mono wa. Ai'ãma 're wamreme zusi aba mono wamhã, wa duré wa te tiwi 're rowaptêrẽ za'ra, te te 're aipawaptob za'ra wa'aba mono da.

³ Tãma 're wamreme zusi mono sina, wa ai'ãma 're wapo're pu'u u'ãsi za'ra wa'wa, 're aihãimana wẽ za'ra wa'aba mono zẽm na, ãma 're wawata za'ra mono da. A norĩ wa'wa hã sazei pese za'ra wa'aba wa, marĩ ĩwẽ si te 're ĩ'manharĩ za'ra wa'aba mo. Wamama hã, Wanhib'apito 'Re ĩhãimana u'ãsi mono, te 're ĩsawi pese za'ra wa'aba mo. Taha zarina, te duré 're ĩdazawi pese za'ra wa'aba mo. Taha wa, dawi 're asisawi za'ra wa'aba mono õ di, marĩ ĩwẽ hã dama 're 'manharĩ za'ra wa'aba mono tô da. Duré Wanhib'apito Zezu Cristu we ĩmorizéb zô, asimi'ẽ na te só 're asimipari u'ãsi za'ra wa'aba mo. ãne na 're anomro wẽ wa'aba mono na, wa ai'ãma 're wapo're pu'u u'ãsi za'ra wa'wa, wawa'ãna, Wamama ma 're wamreme zusi mono wamhã.

⁴ Wasiré ĩsazei'wa norĩ, wa tô duré ai'ãma waihu'u za'ra wa'aba ni, 'Re ĩhãimana u'ãsi mono te te 're asawi pese za'ra wa'aba mono na hã, duré ĩsib'a'uwẽ 're anomro aba mono da, te te sima aipisutu za'ra wa'aba na hã.

⁵ Zezusihi wasu'uwẽ na, wa te aima rowasu'u za'ra wa'aba wamhã, taré wamreme na si, wa te aima ãma rowasu'u za'ra wa'aba õ di. 'Re ĩhãimana u'ãsi mono pê'ẽzani hã tiwaihu'u pese na te te 're ĩwapawaptob za'ra mono zẽm na, wa tô duré aima rowasu'u za'ra wa'aba ni. Zezusihi wasu'uwẽ hã tô sena na, wa te 're ĩ'umnhasi za'ra mono zẽb zarina, wa tô duré aima ãma rowasu'u za'ra wa'aba ni. Taha wa, wa tô ai'ãma waihu'u za'ra wa'aba ni, 'Re ĩhãimana u'ãsi mono te te sima ĩ'aiwẽ za'ra wa'aba na hã. Duré a norĩ wa'wa hã ma tô wa'ãma ĩwaihu'u za'ra wa'wa, ai'rata wahãimana za'ra wa'aba ré, 're ĩwanomro wẽ mono zẽm na, wa te aipawaptob za'ra wa'aba da.

⁶ ãne wa tô aima ãma asanho za'ra wa'aba ni, Wanhib'apito hã ti'ai'ãma 're morĩ ré, wama ãma ĩsisanho ne. Tawamhã ĩwasu'uwẽ ma tô ĩsaze za'ra wa'wa. Ma tô 're anomro wẽ wa'aba mo, wasisanhozéb zarina, duré Wanhib'apito sisanhozéb zarina. ĩwaihu'u pese pê'ẽzani hã ma tô te te 're aipawaptob u'ãsi za'ra wa'wa, atoi uptabi za'ra wa'aba na 're sazei pese za'ra wa'aba mono da, da te ai'ãma 're ĩrowasété za'ra wa'aba mono na 're robzépata za'ra wa'aba mono nherẽ.

⁷ Taha na a norĩ wa'wa hã ma tô duré dama ãma asanho za'ra wa'wa, aihĩni ĩsazei'wa norĩ, Masédoniza na danhipti'a nho'õmo nhisi ãma 're ĩsi'ubumroi mono norĩ ma, duré Ataza na danhipti'a nho'õmo nhisi ãma 're ĩsi'ubumroi mono norĩ ma zama.

⁸ Tame 're ĩsi'ubumroi mono norĩ hã ma tô 'Re ĩhãimana u'ãsi mono zadawa wasu'u hã wapari za'ra, a norĩ wa'wa hã dama 're sadawa wasu'u pese za'ra wa'aba mono wa, Wanhib'apito wasu'uwẽ hã. Duré ĩsipai u, daza'rui mono bã ma tô ĩsadawa wasu'u hã datẽme waptã'ã. Duré 're ĩsazei pese za'ra wa'aba mono na, ma tô aiwasu'u wa'wa hã da te 're wapari za'ra, daro mono bã. Taha wa, wa norĩ hã 're ĩsaze za'ra wa'aba mono na, wa te

duré dama 're aiwasu'u za'ra wa'aba mono ò di, aiwasu'u za'ra wa'wa hã da te 're wapari sirômo za'ra mono wa.

⁹ Aiwasu'u wapari'wa norĩ hã, si'uihã na te wama rowasu'u za'ra, atême ïwasihutu aba zém na. Ma tó, u, asima ïwawê za'ra wa'wa. Te duré wama aiwasu'u za'ra wa'wa, âne: "Ta norĩ hã, 'Re ïhâimana u'âsi mono te te 're sazei pese za'ra. Taha wa, romhâiba 'manharĩ âma, nasi wata za'ra ò di oto. Te te tâma 're romhuri za'ra mono ò di oto. Ma tó rême pese za'ra. 'Re ïhâimana u'âsi mono si, tó sena hã, u. Taha wa, ïsadowa wasu'u, ma tó saze za'ra. Taha wa, te taha na si te te tâma 're romhuri pese za'ra.

¹⁰ Ì'ra hã hãwa hawĩ apã we ïmorizéb zô, te 're simipari u'âsi za'ra, ab're hawĩ apã te te ïhãwa'utu zô." Âne te wama aiwasu'u za'ra wa'wa. Tane tó. Ta hã Zezusi hã, Wanho'reptui'wa. Ma tó wanho'reptu za'ra, 'Re ïhâimana u'âsi mono hã za te te ïdahã za'ra zé wi hã.

2

Tesaronita âma Paru hã ïwê na si te te ïromhurizé wasu'u

¹ Wasisânawã norĩ, ai'rata wasi'ubumroi wa'aba ré, aima wanhimromhuri za'ra wa'aba zé hã taré ò di. Tô sena, wa tó aipawaptob za'ra wa'aba ni, sazei pese za'ra wa'aba da. Âne na ma tó wa'âma ïwaihu'u za'ra wa'wa.

² Piripu na 'ri nho'ômo nhisi hawĩ, wa tó atême aihutu aba ni. Tame wasi'ubumroi ré, wa tó robzépata za'ra ni, ïsazei'ô'wa norĩ nhimihâzém na, duré damreme wasété na zama. Taha wasu'u na ma tó wa'âma ïwaihu'u za'ra wa'wa. Tane nherê, Wanhib'apito 'Re ïhâimana u'âsi mono hã ma tó wapawaptob za'ra, wapahi âna, ïsadowa wasu'u hã wa te aima wasu'u za'ra wa'aba da, Cristuhu wasu'uwê na hã. Taha wa, wamreme wa'rãmi, da te wawi ro'wa'rutu za'ra nherê, wa tó ïwasu'uwê na aima rowasu'u za'ra wa'aba ni tó, wapahi za'ra âna.

³ Roti tó sena na si, wa aima roti za'ra wa'aba ni, âhãna hã. Rowasu'u wê upana, wa te aima roti za'ra wa'aba mono ò di. Duré marĩ ïwê hã wa te wasima waibu da, wa te ai'âma 're rosa'rata za'ra wa'aba mono ò di. Marĩ ïwê hã wa te aiwi udã za'ra wa'aba ò di.

⁴ Mare di. Ânei ò di. Tô sena, 'Re ïhâimana u'âsi mono te te sima 're ïwawê za'ra mono zéb zarina, te te wapisutu za'ra wa, wa ïwasu'uwê na wa te dama 're rowasu'u za'ra, âne na romhuri'wa da, te te wawêsãmri za'ra wa.

Tawamhã wanhimrowasu'u wê wa, taré wama dato za'ra da, wa te wasina 're rosa'rata za'ra mono ò di. Mare di. 'Re ïhâimana u'âsi mono hã te te 're ïwawêsãmri za'ra mono da si, wanhimirosa'rata za'ra hã. Ôhõ si te za te te 're wapibu za'ra, 're ïwanomro wê mono zéb zô, ïwê na si 're ïwanhimirosa'rata za'ra mono zéb zô zama. Taha wa, ïsadowa wasu'u na, wa te dama 're ïrowasu'u wê za'ra mono na, wa'âma 're toi mono da, wa wa te wasina 're rosa'rata za'ra.

⁵ Ai'rata wahâimana za'ra wa'aba ré, taré wamreme to na ai'âma wawata za'ra wa'aba ò di. Duré marĩ ïwê hã wanhimrowahutu wa'rãmi, wama sômri za'ra wa'aba da, wa te wasina rosa'rata za'ra ò di. Âne na ma tó wa'âma ïwaihu'u za'ra wa'wa. 'Re ïhâimana u'âsi mono ma, waihu'u pese di, âne na wapê'ê 're, wanhimirosa'rata za'ra hã.

⁶ Wanhimrowahutu wê na wa'âma 're aiwata za'ra wa'aba mono da, wa te wasina rosa'rata za'ra ò di. Duré, aimawi norĩ hã âne zarina, wa'âma wata za'ra da, wa te wasina rosa'rata za'ra ò di duré.

⁷ Cristu hã ma tó wazatõri za'ra, ïwasu'uwê hã wa te dama 're waihu'u za'ra mono da, ïsadowa para. Taha wa, dama wamreme pire za'ra di. Tane nherê, wamreme pire na, wa te duré 're aiwari za'ra wa'aba mono ò wa, wa te âma aiwi robzei'ô za'ra wa'aba ò di. Mare di. Ânei ò di, wa te aima ï'manharĩ za'ra wa'aba zé hã. Wamreme wê na si, wa tó aima rowasu'u za'ra wa'aba ni. Wa tó ai'madã'ã pese za'ra wa'aba ni, dana norĩ hã ti'ra te te 're ï'madã'ã pese za'ra mono ne.

⁸ 'Re ïhâimana u'âsi mono zadawa wasu'u hã, ïwasu'uwê hã wawa'a âna, wa tó aima wasu'u za'ra wa'aba ni, wama asawi pese za'ra wa'aba wa. Taha wa, aiwi 're wasisawi za'ra wa'aba mono ò di, wa te 're aipawaptob za'ra wa'aba mono tó da. Tô sena, a norĩ wa'wa hã wama asawi uptabi za'ra wa'aba di.

⁹ Wasisânawã norĩ, âne na te tó wa'âma 're aipo're pu'u u'âsi za'ra wa'aba mo, 're ïwanomro wê mono zém na. Wa norĩ hã wahâimanazéb da, wa tó wasima romhuri pese za'ra ni, wapata'ã nherê, duré wawasutu nherê. Bãtã sidãpãsi wasi'uihã na wanhib'rata na wa tó romhuri za'ra ni, wahâimanazéb da. Bãdã 'rãiwatobro ò ré, duré bãdã sébré nherê, wa tó wasima romhuri za'ra ni, wa te aiwari za'ra wa'aba tó da, wama asôprub za'ra wa'aba na wapire na wa'madã'ã za'ra wa'aba tó da, 'Re ïhâimana u'âsi mono zadawa wasu'u na, wa te aima rowasu'u za'ra wa'aba ré.

¹⁰ A norī wa'wa hā ma tō īwawaihu'u za'ra wa'wa, asō'a za'ra wa'aba, 're īwanomro mono zé hā. 'Re īhāimana u'āsi mono hā ma tō duré wawaihu'u za'ra, 're īwanomro wē mono zém na hā. Wawasédé hā wa te 'manharī za'ra ō di. Īwē na si wa tō wahāimana za'ra ni, asō'a za'ra wa'aba. 'Re īhāimana u'āsi mono nhimiroti na hā āma wasipa za'ra ō di. Āne āma 're īwanomro mono zé hā, tō ībā.

¹¹ Damama hā, dahāimanazém na te za ti'ra norī ma rowahutu. Tane, wa norī hā aihāiba bā wa'aba, wa tō aima rowahutu za'ra wa'aba ni, 'Re īhāimana u'āsi mono zadawa wasu'u na 're anomro wē wa'aba mono da.

¹² Duré da te aima 're amhāzépa za'ra wa'aba mono nherē, wa tō āma aima robze za'ra wa'aba ni īwasu'uwē na, aiwi 're robzei'ō tō za'ra wa'aba mono da. Wa tō aima roti pese za'ra wa'aba ni, 'Re īhāimana u'āsi mono nho'a 're anomro wē wa'aba mono da, toi uptabi na te te 're ai'madā'ā za'ra wa'aba mono da. Ta hā ma tō te te sima 're aiwē za'ra wa'wa, hāiwa āma ihāiba na rowa'na īsiré 're aihāimana u'āsi za'ra wa'aba mono da, rowē uptabi na.

¹³ 'Re īhāimana u'āsi mono zadawa wasu'u hā wa te aima īwasu'u za'ra wa'wa hā wapari za'ra wa'aba wamhā, ma tō asima īwē za'ra wa'wa. Taré ti'ai āma aibā nhimirowasu'u newa, āma rosa'rata za'ra wa'aba ō di. Tō sena 'Re īhāimana u'āsi mono mrema na, ma tō āma īrosa'rata za'ra wa'wa. Tane tō, 'Re īhāimana u'āsi mono zadawa wasu'u na si wanhimirowasu'u za'ra hā. Īsadawa wasu'u hā te tō ai'āma te te 're romhuri pese za'ra wa'wa, aipē'ē 're, īwē na si 're anomro aba mono da. Taha wa, 'Re īhāimana u'āsi mono āma si, wa 're wawata za'ra, īmreme hā asina 're waihu'u za'ra wa'aba mono wa.

Īsazei'wa norī te te 're īrobzépata za'ra mono zé wasu'u

¹⁴ Zudeza na danhipti'a nho'ōmo nhisi āma hā, aiwana za'ra wa'aba, ma tō da te 're sazei pese za'ra, 'Re īhāimana u'āsi mono zadawa wasu'u hā, īwasu'uwē hā. Tawamhā, Cristu Zezusihī āma ma tō 're danomro, Īsazei'wa norī, siré 're īsi'rā'ōtō mono norī hā. Tawamhā, īsiré norī hā Īsazei'ō'wa norī hā ma tō te āma 're rowasété za'ra, Īsazei'wa norī hā te te 're saze za'ra mono tō da, īwasu'uwē hā, tisiré nherē. Tane, a norī wa'wa hā wasiré Īsazei'wa norī hā, ta norī ne, ma tō 're īrobzépata za'ra wa'aba mo, asiré norī hā asada 're sahi za'ra wa'aba mono wa, Zudeza norī ne.

¹⁵ Duréihā, zudezu norī hā ma tō te te 're simro, 'Re īhāimana u'āsi mono zadawa wasu'u 'rata 'wa norī hā. Duré, āhāna zama īsihudu norī hā īhi'rata norī hā te te 're īrob'manharī za'ra mono zéb zarina, ma tō siwi tīwī, Wanhib'apito Zezusi hā. Ma tō duré te te wa'āma 're rowasété za'ra, īwasu'uwē hā wa te dama 're wasu'u za'ra mono tō da. Ma tō sisiti siwi wazatōri za'ra, īsiti wasi'aba'ré da. Ma tō duré uburé da'āma tinhitob'ru za'ra. Taha wa, 'Re īhāimana u'āsi mono ma, wē ō di, 're īhāimana za'ra mono zé hā.

¹⁶ Tawamhā, wa norī hā zudezu'ō norī ma, wa tō wa te tāma 're rowasu'u za'ra īwasu'uwē na, da te 're sazei pese za'ra mono da, Zezusi hā te te 're da'anho'reptui mono da. Tawamhā, ta norī hā zudezu nherē, Īsazei'ō'wa norī hā, ma tō te te wawi 're ro'wa'rutu za'ra, te te 're wazadawa uwati za'ra mono da aré, īwasu'uwē na wa te dama 're rowasu'u za'ra mono tō da. Āne tiwasété na 're īhāimana za'ra mono zém na, ma tō 're siwasété za'ētē za'ra. Tawamhā, tāibā oto. 'Re īhāimana u'āsi mono hā ma tō wawi ro'wa'rutu'wa norī hā te te 're wē'ō pese za'ra. Rowē'ō, ma tō duré tāma pisutu za'ra. Tawamhā, īsiti te za oto 're nomro u'āsi.

Paru hā Tesaronita u apā īmorīzém na īsiwasu'uzé wasu'u

¹⁷ Wasisānawā norī, Īsazei'ō'wa norī nhimirob'manharīzéb zarina, wasi'aba'ré na aihawi za'ra wa'aba, wasi'aba'rēi wamhā, asiti za'ra wa'aba, wa a'ā 're wasi'ubumro. Tane nherē, ai'rata 're īwasi'ubumroi u'āsi aba mono ne, wa wanhimirosa'rata na wa te ai'āma 're rosa'rata wē u'āsi za'ra wa'wa. Awa'awi hā wapē'ézé uptabi na, wa 're wahāimana za'ra. Taha wa, apā atēme wasihutu su'u aba da, wa tō wasima waihu'u za'ra ni, wa te asabu za'ra wa'aba da.

¹⁸ Wa te duré asabu tēb za'ra wa'aba neza. Wa hā Paru hā, apā atēme īmorī aba neza. Taha wa, atēme īmorī aba da, bādā, wa tō nasi īsima pisutu. Tane nherē, Satanasi hā wanhitob'ru hā ma tō nasi wa'āma ro'wa'rutu za'ra, āma atēme īwisi za'ra wa'aba tō da.

¹⁹ Tane tō. Ni'wam norī me asōwa're're za'ra wa'aba, wasisōpētē za'ra ō di za, Wanhib'apito Zezusi apā wei morī wamhā. Ni'wam norī hā, asōwa're're za'ra wa'aba, te te wama 're rowē zani za'ra mono ō di za. Wanhib'apito wei morī wamhā, ni'wam norī hā asōwa're're za'ra wa'aba, te te dama wawaihu'u za'ra ō di za, tō sena aima za'ra wa'aba, wa te 're Īsadawa wasu'u za'ra mono zém na.

²⁰ Tane tō, wato sina, wa wa te 're aiwasu'u wē za'ra wa'wa dama, a norī wa'wa hā wama 're rowē zani za'ra wa'aba mono wa, 'Re īhāimana u'āsi mono 're Īsaze za'ra wa'aba mono zém na.

3

Timotiu hã İsazei'wa nori ma rowê zô, Tesaronita u İmorizé wasu'u

¹⁻³ Tawamhã, ai'ama wapê'êzé uptabi za'ra wa'aba wa, apâ wasi'aba'rézéb zô wanhimi-pari waihu'u za'ra ô di oto. Taha wa, wa tô wasisaze za'ra ni, Timotiu hã wa te âma atême satôri za'ra wa'aba da, wa hã İsiwaprosi Atena na 'ri nho'ômo nhisi âma İnhamra da nherê. Tawamhã, wa tô âma atême satôri za'ra wa'aba ni, Timotiu hã. Ta hã wasiré İsazei'wa, 'Re İhâimana u'âsi mono ma romhuri'wa, Cristuhu wasu'uwê na te te dama 're rowasu'u mono da, wasiré. Taha wa, wa tô atême satôri za'ra wa'aba ni, te te 're aipawaptob za'ra wa'aba mono da, aihâimana nhiptete sina 're sazei pese za'ra wa'aba mono da, İwasu'uwê hawi apâ 're aipizari za'ra wa'aba mono tô da, da te ai'ama 're rowasété pese za'ra wa'aba mono nherê. A nori wa'wa hã aima waihu'u pese za'ra wa'aba di, 'Re İhâimana u'âsi mono nhimipisutu zarina, da te wa'ama 're rowasété za'ra mono wa, wa te 're İrobzépata za'ra mono na hã.

⁴ Âne na wa tô İwana aima rowaihu'u sirômo za'ra wa'wa, ai'rata wasi'ubumroi wa'aba ré, za da te wama 're İrob'manharî pipa za'ra mono zém na hã. Âhâna, tô sena na ma tô asina İwaihu'u za'ra wa'wa, tô wa'ama 're romhâimana za'ra mono wa.

⁵ Taha wa, asada 're dazahi za'ra wa'aba mono wa, apâ âma atême İmorî aba neza, 're İsazei'ô utôri za'ra wa'aba mono zé hã te aiwi waihu'u za'ra wa'aba da. Taha wa, Timotiu hã wa tô âma atême satôri za'ra wa'wa, apâ te te we wama aiwasu'u za'ra wa'aba da. Wa'uburé hã dawasété da, dawada'uri'wa hã te te aipibu za'ra wa'aba wa, 're saze zahâri za'ra wa'aba mono ô'umnhasite, wa tô ai'ama 're İhâtâ'â za'ra wa'wa. Aima wanhimirohmuri za'ra wa'wa hã taré 're hâimana mono ô'umnhasite, wa tô âma atême satôri za'ra wa'wa Timotiu hã, te te aiwaihu'u za'ra wa'aba da.

Tesaronita hawi, Timotiuhu nhimirowasu'u wê na Paru nori İto za'ra zé wasu'u

⁶ Tawamhã Timotiu hã ma tô we apâ watême tiwisi za'ra, aihawi za'ra wa'aba. Ma tô aiwasu'u wê za'ra wa'wa hã wei wama âwisi. Wa te waparî ze za'ra di, aiwasu'u wê za'ra wa'wa hã. Cristu hã te, u, asina 're İ'umnhasi pese za'ra wa'aba mo. Asimizawi pese za'ra wa'aba na te, u, 're anomro aba mo. Duré, İwê na si te, u, wa'ama 're İrosa'rata za'ra wa'aba mo. İwazabu za'ra wa'aba da si, te, u, 're asimipari za'ra wa'aba mo. Âne, aiwasu'u wê za'ra wa'wa hã, wa te waparî ze za'ra di. Tane tô, wa nori zama wa te asabu za'ra wa'aba neza. Wa duré sô mapari za'ra ni aré, wa te İ'asabu za'ra wa'aba zéb zô.

⁷ Wasisânawâ nori, da te wa'ama 're rowasété za'ra mono nherê, duré marî İpire na wa te 're robzépata za'ra mono nherê, 'Re İhâimana u'âsi mono zadawa wasu'u hã 're sazei pese za'ra wa'aba mono wa, wa tô apâ pê'ê daba'wara pese ni.

⁸ Âne wa, wahâtâ'â âna wa oto 're wahâimana za'ra apâ, Wanhîb'apito âma asiptete sina âma 're anomro aba mono wa.

⁹ Taha wa, wa oto Wanhîb'apito 'Re İhâimana u'âsi mono âma 're wawata u'âsi za'ra, İsô'a, wama 're robze zani za'ra wa'aba mono wa, Zezusi hã asina 're İ'umnhasi pese za'ra wa'aba mono zém na hã.

¹⁰ Awê sidâpâsi, wa wanhimi'ê na tâma 're wamreme zusi, bâtâ na barana zama, ta hã te te wama pisutu za'ra da, nimahã na âma atême wasi'aba'rêi wa'aba da, wasisabu za'ra da apâ, duré zahadu İwaihu'u za'ra wa'aba ô hã, wa te aima waihu'u za'ra wa'aba da, 're İsazei uptabi za'ra wa'aba mono zéb da hã.

¹¹ Wanhîb'apito 'Re İhâimana u'âsi mono wi, Wamama wi hã, duré Wanhîb'apito Zezusihi wi hã, wa wa te 're rowaptêrê za'ra, te te wama ropese za'ra da, apâ wasihutu da, atême wa'aba.

¹² Tô sena ma tô 're asisawi pese za'ra wa'aba mo. Uburé ma tô duré 're İdazawi pese za'ra wa'aba mo. Tane tô, wê di. Taha wa, wa duré wa te tiwi 're rowaptêrê za'ra, Wanhîb'apito wi, te te 're aipawaptob za'ra wa'aba mono da, awê sidâpâsi asimizawi pese za'ra wa'aba zé hã, te te aima 're sa'êtê za'ra wa'aba mono da. Sa'êtê na, wa te 're İ'asawi pese za'ra wa'aba mono zém ne, aiwa sa'êtê na 're dazawi pese za'ra wa'aba mono da, wa wa te tiwi 're rowaptêrê za'ra.

¹³ Tawamhã taha na te za te te 're aipawaptob u'âsi za'ra wa'wa, aihâimana nhiptete za'ra wa'aba sina, İwê uptabi na si âma 're anomro aba mono da. Tawamhã Wanhîb'apito Zezusi hã, uburé tnhîb'a'uwê nori me, wei wazô si'aba'rêi wapsi, asi'wa'rutu za'ra wa'aba âna te za İsô'a aimesa wa'wa, Wamama 'Re İhâimana u'âsi mono nho'a.

4

'Re İdanomro wê mono zéb zarina, 'Re İhâimana u'âsi mono, dama 're İtoi mono zé wasu'u

¹ Wasisānawā norī, wa tō aima waihu'u pari za'ra wa'aba ni, niha 're anomro wē wa'aba mono da, taha zarina, 'Re İhâimana u'âsi mono hâ ai'âma 're to za'ra wa'aba mono da. Taha zarina, te tō âma 're anomro wē wa'aba mo oto. Âhâna wa za duré aima roti pese za'ra wa'aba ni, 're anomro wē wa'aba mono zém nhipai u, asima 're sa'êtê za'ra wa'aba mono da, Wanhîb'apito Zezusihi zadawa para.

² Taha zadawa para, wa te aima 're İroti za'ra wa'aba mono zé hâ ma tō İwaihu'u pese za'ra wa'wa.

³ 'Re İhâimana u'âsi mono hâ ma tō te te sima 're aiwē za'ra wa'wa, 're anomro wē wa'aba mono da, duré pi'ô norī, duré aibâ norī zama aihâiba na asiwi 're İ'asipsaihuri si'uiwa za'ra wa'aba mono zé hâ ai'âma 're hâimana za'ra wa'aba mono tō da oto.

⁴ Aibâ norī hâ aimro si te za 're İ'madâ'â za'ra wa'aba mo, aiwasédé hâ 're 'manharî za'ra wa'aba mono tō da.

⁵ Rowasutu zô si asima 're rob'ruiwapari za'ra wa'aba mono ô di za. Ta hâ, İsazei'ô'wa norī 're İhâimana za'ra mono zé, 'Re İhâimana u'âsi mono te te waihu'u za'ra ô wa.

⁶ Tane 're anomro aba mono ô di za. İsazei'wa norī hâ, asisānawâ te 're anomro aba mo. Taha wa, asisānawâi mro nherê, asiwi 're upi za'ra wa'aba mono ô di za, asiwi 're asipsaihuri za'ra wa'aba mono tō da, aiwasédé hâ asi'âma 're 'manharî za'ra wa'aba mono tō da. Tane, ni'wa hâ tiwasédé te te 're 'manharî mono wamhâ, 'Re İhâimana u'âsi mono hâ te za niha tâma rob'manha. Âne tō sena, wa tō aima waihu'u za'ra wa'aba ni, waihu'u pese za'ra wa'aba da. Tane nherê, wa duré âma aima sahu za'ra wa'aba ni.

⁷ Aibâ norī, aimro hâiba upana aimawi pi'ô hâ 're upi za'ra wa'aba mono ô di za. Duré pi'ô norī hâ aimro hâiba upana aimawi aibâ hâ 're upi za'ra wa'aba mono ô di za. Dahâimana nhiséb ô ré, 're wanomro mono da, 'Re İhâimana u'âsi mono te te sima 're wa'apisutu mono ô di. Wanhîmî'ê na âma 're wanomro wē uptabi mono da si, ma tō te te sima 're wa'apisutu.

⁸ Taha wa, âne wa te aima İroti za'ra wa'wa hâ, asiwi wē'ô za'ra wa'aba ô di za. Ni'wa hâ te te siwi wē'ô wamhâ, e ta hâ ti'ai âma dahâiba te za siwi wē'ô. Mare di. 'Re İhâimana u'âsi mono te za siwi wē'ô, wama Tip'ê'ezani nhomri'wa hâ.

⁹ İsazei'wai mono bâ 're asisawi pese za'ra wa'aba mono zém na, wa te aima rob'ui'ére za'ra wa'aba ô di za oto. Tō sena ma tō 'Re İhâimana u'âsi mono hâ si'uihâ na âma aima rowahutu za'ra wa'wa, 're asisawi pese za'ra wa'aba mono zéb da hâ.

¹⁰ Ma tō 're İdazawi pese za'ra wa'aba mo tō, Masédoniza na danhipti'a nho'ômo nhisi âma 're İdasi'ubumroi mono norī hâ, 'Re İhâimana u'âsi mono te te 're İsaze za'ra mono norī hâ. Tane nherê, wa aima roti pese za'ra wa'aba ni, asimizawi pese zém nhipai u, asima 're sa'êtê za'ra wa'aba mono sina, İwê uptabi hâ 're 'manharî za'ra wa'aba mono da.

¹¹ Ai'rata wasi'ubumroi wa'aba ré, âne wa tō aima roti za'ra wa'aba ni, rowê na si 're aihâimana za'ra wa'aba mono da, duré asima 're ropibui wē za'ra wa'aba mono da, duré asimî'ê na asi'uihâ na aihâimanazéb da, 're romhuri za'ra wa'aba mono da, aihâiba mono bâ wa'aba. Âne, wa tō aima roti za'ra wa'aba ni. Âne İwê uptabi hâ te za tō 're İ'manharî u'âsi za'ra wa'aba mo.

¹² Tawamhâ danho'a 're anomro wē wa'aba mono wa, İsazei'ô'wa norī hâ te za te te 're aiwêsâmri za'ra wa'wa. Te za te te 're aiwazéb za'ra wa'wa. Duré asimî'ê na 're romhuri za'ra wa'aba mono wamhâ, 're dawari za'ra wa'aba mono âna, te za 're anomro aba mo.

Apâ 're İdahâiwa'utu za'ra mono zé wasu'u

¹³ Wasisānawâ norī, ni'wa hâ 'Re İhâimana u'âsi mono zazei'ô'wa hâ, dawî dâ'â wamhâ, İsiré norī hâ te za âma 're pê'êzé pese za'ra, apâ 're İdahâiwa'utu za'ra mono zé wasu'u hâ te te 're waihu'u za'ra mono ô wa. Tanei ô di za, a norî wa'wa hâ. Taha wa, wa wasima wē za'ra ni, sena na waihu'u za'ra wa'aba da, dadâ'â wasu'u hâ.

¹⁴ Zezusi hâ ma tō dârâ. Ma tō pê'êhai'utô. Pê'ê si'utôri nherê, ma tō apâ hâiwa'udu. Âhâna te 're morî u'â oto. Âne na wa tō saze za'ra ni. Taha wa, wa tō duré waihu'u za'ra ni, İsazei'wa norî hâ 're dâ'â za'ra mono wamhâ, apâ 're İhâiwa'utu za'ra mono na hâ. 'Re İhâimana u'âsi mono hâ te za apâ te te 're ahâiwa'utu, Zezusi te te apâ İhâiwa'utu ne.

¹⁵ Tawamhâ, Wanhîb'apito we apâ wazô morî wamhâ, âté wa norî hâ zahadu wahâiba ré 're wanomro mono ré, te za wei mo. Tane nherê, 're İdâ'â za'ra mono norî wana, İtême wasihutu ô di za. Âne Wanhîb'apito te te wama İrowahutu za'ra zarina, wa aima rowasutu za'ra wa'aba ni.

¹⁶ Tō sena, Wanhîb'apito hâ te za wei wazô si'ra, hâiwa hawî. Tawamhâ, te za tâma wa'ru za'ra, hâiwa âma tâma İromhuri pese 'wai ma. Hâiwa âma tâma İromhuri pese 'wa hâ, te za wei hâ, hârâ 'râihâ na, 'Re İhâimana u'âsi mono nhimnhîhârâzém na. Tawamhâ, İsazei'wa norî hâ 're İdâ'â za'ra mono norî hâ, ta norî uimrehêne te za apâ hâiwa'utu za'ra.

¹⁷ Tawamhâ wa norî hâ İsazei'wa norî hâ, zahadu wahâiba ré ré 're İwahâimana za'ra mono norî hâ, apâ İhâiwa'utu za'ra norî me, İsazei'wa norî me, te za sitême wa'ubumro awa'awi,

hâiwa'a âma. Tawamhâ, Wanhîb'apito hâ wa za oto aihîni sôpêtê za'ra ni, hâiwa nho're âma. Tawamhâ, î'rata wa za 're wahâimana u'âsi za'ra.

¹⁸ Âne te za îwasu'u na 're asipawaptob u'âsi za'ra wa'aba mo.

5

Wanhîb'apito apâ wei morî õ ré, 're îdanomro wê mono zé wasu'u

¹ Wasiré Îsazei'wa norî, Wanhîb'apito apâ wei wazô îmorizé hâ, wa tô aima waihu'u pese za'ra wa'aba ni. Tane nherê, wa za duré apâ aima âma rob'râzarôtô za'ra wa'wa, rob'ui'ére na. Niwapsi, te za wei mo apâ wazô. Tane nherê, bâdâ hâ wa te waihu'u za'ra õ di. Nimahâ na we îmorizé hâ, wa te waihu'u za'ra õ di. A norî wa'wa hâ ma tô âne hâ îwaihu'u pese za'ra wa'wa.

² Wanhîb'apito apâ wei morî wapsi, awa'awi te za wei mo. Tane tô, ni'wa hâ barana simisaihuri da, marî zô 'ri para u sébré wamhâ, 'ri para isi'ubumro norî hâ te za tâma a'râmi za'ra, sô simipari za'ra õ nherê, sébré wa. Tane, Wanhîb'apito apâ we îmorizéb zô 're danhimipari za'ra mono õ ré, te za wei mo.

³ Sô 're danhimipari za'ra mono õ wa, te za Îsazei'õ'wa norî hâ da te dasima 're rowasu'u za'ra, âne: "Rowê na wa za oto 're wasi'ubumroi u'âsi, marî hâ wazô 're wairébé mono âna." Âne te za dasima da te 're rowasu'u za'ra, da te 're waihu'u za'ra mono õ wa. Âne, da te dasima 're rowasu'u za'ra mono wapsi, tawapsi, awa'awi te za ropipa hâ dazô watobro, Wamama hâ za te te dama îrob'manharizém na hâ. Tiwi dasimani waihu'u za'ra õ di za, pi'õi ma, î'ra tâma 're rere'e mono da, îwasâ âma 're sépu'u za'ra mono wa, ai'uté zépu hâ tiwi 're îsimani za'ra mono õ ne.

⁴ Wasiré Îsazei'wa norî, a norî wa'wa hâ Wanhîb'apito apâ wei îmorizéb zô, te sô 're asimipari za'ra wa'aba mo. Taha wa, awa'awi za wei morî nherê, tâma a'râmi za'ra wa'aba õ di za, barana îsimisaihuri norî ma, 're îdasi'râmi za'ra mono ne.

⁵ Tawamhâ Wanhîb'apito apâ we îmorizéb zô, aihîni 're î'asimipari za'ra wa'aba mono norî hâ, rowa'a na 're îdahâimana za'ra mono zém ne, 're aihâimana za'ra wa'aba mono zé hâ, a norî wa'wa hâ ti'ai âma. Apâ we îmorizéb zô 're îdanhimipari za'ra mono õ norî ne, robra na 're wahâimana za'ra mono õ di tô, wa norî hâ.

⁶ Taha wa, 're îdanhotô za'ra mono ne, wanhimiza'rese âna 're wahâimana za'ra mono tô da, wa za sô 're wanhopré u'âsi.

⁷ Barana si te rosa'rese âna 're danhotô za'ra. Barana si te duré âzézei'wa norî hâ 're siwamnarî za'ra.

⁸ Tazahâ, wa norî hâ Wanhîb'apito apâ we îmorizéb zô, 're wanhimipari za'ra mono wa, wanhimî'ê na sô 're wanhopré mono sina, wa za 're wahâimana za'ra. Tawamhâ wa za wasi'upari za'ra ni, wanhitob'ru wi, Wanhîb'apito wa te 're Îsaze za'ra mono zém na, duré 're îwanhimizawi pese za'ra mono zém na, duré Zezusi te te 're îwanho'reptu za'ra mono zéb zô, 're îwanhimipari za'ra mono zém na. Da'wapéi'wa norî hâ, tinho'utu'u îhâtete na, duré î'râzaza îhâtete na te 're si'uza za'ra, tinhitob'rui wi, da te 'manhiptâ'â tô da. Âne, Wanhîb'apito wa te 're Îsaze za'ra mono zém na, duré 're wanhimizawi pese za'ra mono zém na, wa za 're wahâimana za'ra, wapê'ê wê te te wawi wasété tô da, wanhitob'ru hâ. Duré Zezusi te te 're îwanho'reptu za'ra mono zéb zô, 're îwanhimipari za'ra mono zém na, wa za 're wahâimana za'ra, wanhimirosa'rata na te te wawi ro'wa'rutu tô da.

⁹ Tane tô. 'Re îhâimana u'âsi mono hâ niha te te wama 're arob'manharî mono da, te te sima 're wa'awê mono õ di. Ma tô te te sima 're wa'awê, Wanhîb'apito Zezu Cristu hâ te te 're wa'anho'reptui mono da.

¹⁰ Ta hâ ma tô wazada dârâ, î'rata 're wasi'ubumroi mono da. Tawamhâ, apâ wei wazô morî wapsi, wahâiba ré 're îwanomro mono norî hâ, duré wawana 're îdadâ'â za'ra mono norî me, wa za î'rata wasiré 're wasi'ubumroi u'âsi.

¹¹ Taha wa, te za 're asipawaptob za'ra wa'aba mo, aipê'ê wê za'ra wa'aba na asiptete sina 're aihâimana za'ra wa'aba mono da. Tô sena na âhâna hâ âma 're asipawaptob za'ra wa'aba mono ne, te za duré âma 're asipawaptob u'âsi za'ra wa'aba mo, õne u'âsi.

'Re îdanomro wê mono zéb da na roti wasu'u

¹² Wasiré Îsazei'wa norî, wa aima roti za'ra wa'aba ni, te te aima 're îromhuri za'ra wa'aba mono norî hâ 're hâimana wazéb za'ra wa'aba mono da. Ta norî hâ, Wanhîb'apito ma romhuri'wa norî. Taha wa, te za marî hâ îwê si te te aima 're wê za'ra wa'wa. Duré tímreme wê na si te za aima te te 're roti za'ra wa'wa. Tawamhâ, ta norî mreeme, te za 're îwapari pese za'ra wa'aba mo.

¹³ Ta norî hâ te te aima 're romhuri pese za'ra wa'aba mono wa, te za 're îwazéb za'ra wa'aba mo. Te za duré 're Îsawi pese za'ra wa'aba mo. Asima 're aimreme wasété za'ra wa'aba mono âna, te za asiré 're aihâimana za'ra wa'aba mo, rowê na.

¹⁴ Wasiré İsavei'wa norī, wa za duré aima roti za'ra wa'aba ni. Ni'wam norī hā 're wa'a za'ra mono wamhā, te za tāma 're İroti pese za'ra wa'aba mo, simi'ē na si'uihā na te te sima 're romhuri za'ra mono da. Duré ni'wam norī hā robzei ō wamhā, te za 're İpawaptob za'ra wa'aba mo, robzei'ō u'āsi 're nomro tō mono da. Duré ni'wam norī hā, 'Re İhāimana u'āsi mono zadawa wasu'u te te waihu'u za'ra nherē, İwē na si 're nomro mono da, te te sima 're rosa'rata za'ra mono ō wamhā, te za 're İpawaptob za'ra wa'aba mo. Da'āma 're aiwa'a za'ra wa'aba mono ō di za. Aiwaimri te za 're aihāimana za'ra wa'aba mo, sada.

¹⁵ Ni'wai ma İwē'ō hā da te 'manharī wamhā, te za 're asipawaptob za'ra wa'aba mo, asa marī İwē'ō hā dama 're 'manharī za'ra wa'aba mono tō da. Marī İwē'ō hā da te aima 're 'manharī za'ra wa'aba mono nherē, İwē na si te za 're asipawaptob za'ra wa'aba mo, asa tāma āma 're wa'rāmi za'ra wa'aba mono tō da. İwē na si te za asima 're İ'manharī u'āsi za'ra wa'aba mo, asiré İsavei'wa norī ma. Uburé te za dama 're İ'manharī wē u'āsi za'ra wa'aba mo, a'uwē mono bā.

¹⁶ 'Re atoi uptabi za'ra wa'aba mono na, te za 're anomro u'āsi aba mo.

¹⁷ 'Re İhāimana u'āsi mono ma, te za 're aimreme zusi u'āsi aba mo.

¹⁸ Wē wa, te za āma 're aiwata u'āsi za'ra wa'aba mo. Rowē na 're anomro aba mono wamhā, duré robzei'ō na 're anomro aba mono nherē, wē wa, te za āma 're aiwata u'āsi za'ra wa'aba mo. Āne na 're aihāimana za'ra wa'aba mono da, 'Re İhāimana u'āsi mono, ma tō aima pisutu za'ra wa'wa, Cristu Zezusihi nhib'a'uwē 're anomro aba mono wa.

¹⁹ 'Re İhāimana u'āsi mono pē'ēzani nhimpawaptobzēm na asiwi 're ro'wa'rutu za'ra wa'aba mono ō di za.

²⁰ Ni'wa hā, 'Re İhāimana u'āsi mono pē'ēzani zarina, marī hā te te waihu'u wamhā, İsimirowasu'u hā asiwi wē'ō za'ra wa'aba ō di za, taré newa.

²¹ Uburé marī hā te za 're İpibu za'ra wa'aba mo, İwē zō. Tawamhā, marī İwē si te za asima 're İtété za'ra wa'aba mo.

²² Uburé marī İwasédé hā te za asiwi 're İwē'ō pese za'ra wa'aba mo, İré 're anomro aba mono tō da.

²³ 'Re İhāimana u'āsi mono wi, rowē nhomri'wai wi, wa wa te 're rowaptērē za'ra, te te 're aipawaptob za'ra wa'aba mono da, asimi'ē na İsine, İwē na si āma 're aihāimana u'āsi za'ra wa'aba mono da, duré uburé asimirosa'rata wē na si, 're aihāimana u'āsi za'ra wa'aba mono da. Wanhīb'apito Zezu Cristu hā apā wei wazō morī wamhā, İwē na si te za ai'madâ'â za'ra wa'wa.

²⁴ 'Re İhāimana u'āsi mono hā tinhīb'a'uwē da, te te 're İ'apisutu za'ra wa'aba mono hā, umnhasi uptabi wa, te za tō te te 're aipawaptob za'ra wa'wa, İwē na si 're anomro u'āsi aba mono da.

Rob'ui'éré 'rāsutu zé

²⁵ Wasiré İsavei'wa norī, te za wa'āma 're aimreme zusi aba mo, Wamama ma.

²⁶ Uburé asiré İsavei'wa 're aihāimana za'ra wa'aba mono wa, te za asō'utu na asisawi sina 're asitob'rata hārâ za'ra wa'aba mo.

²⁷ Wanhīb'apito zadawa para, İmreme pire na wa aima nharī za'ra wa'wa, ā hā wa te aima İrob'ui'éré za'ra wa'wa hā, dama 're sōré za'ra wa'aba mono da, İsavei'wai mono bā.

²⁸ Wanhīb'apito Zezu Cristuhu wi, wa wa te 're rowaptērē za'ra, tinhimpawaptobzē hā te te aima sōmri za'ra wa'aba da, ai'āma 're hāimana za'ra wa'aba mono da.

2 Tesaronita norĩ **Paru hã, maparane ãma te te duré ĩrob'ui'érézé, Tesaronita norĩ** **ma** **Ĩbaihã wasu'uzé**

Paru hã Tesaronita ãma Zezusihi zazei'wa norĩ ma, ĩmorĩ'rata na te te rob'ui'éré pari, ma tó duré tinhimi'ui'éré na tãma ãma sahu za'ra, maparane ãma.

Ni'wam norĩ hã Tesaronita norĩ hã ma tó te te dama 're rowasu'u za'ra, Zezusi hã apã we ĩmorĩ pari na hã. Nima norĩ hã ma duré te te 're rowasu'u za'ra, Zezusi hã apã we ĩmorizéb u hã ĩromhure na hã. Taha wa, ma tó danhimromhuri na sahãri za'ra ni. Taha wa, ma tó 'ribabam na si dawĩ 're hãimana za'ra, dasa na Zezusihi zó simipari za'ra mono sina. Taha wa, Paru hã ma tó tãma roti za'ra, ãne na 're hãimana za'ra mono tó da.

Ma tó duré tãma waihu'u za'ra, rowasédé hã duré dawasédé hã Satanasihĩ nhipete zarina za ĩsa'ěté u'ási mono na hã, Zezusi apã za we ĩmorizéb u hã. Tamemhã 'Re ĩhãimana u'ási mono si te za oto ãma ai'uté, Satanasihĩ ãma hã. ĩsptede hã te za tiwi uprosi.

¹⁻² ĩsazei'wa norĩ, wa hã Paru, Sira, duré Timotiu, wa ãma aima rob'ui'éré za'ra wa'aba ni, Tesaronita na 'ri nho'õmo nhisi ãma asiré 're asi'rã'õtó aba mono norĩ ma.

Wamama hã 'Re ĩhãimana u'ási mono hã, duré Wanhib'apito Zezu Cristu hã te asina 're ĩ'umnhasi za'ra wa'aba mo, ĩsib'a'uwé 're aihãimana za'ra wa'aba mono da. Wamama ma, wa ai'ãma 're wamreme zusi u'ási 'wa, 'Re ĩhãimana u'ási mono ma, duré Wanhib'apito Zezu Cristuhu ma zama, ĩsimizawizé hã ai'ãma 're hãimana u'ási za'ra wa'aba mono da, rowé u'ási, ãma 're anomro aba mono da.

Zezu Cristu apã wei morĩ wa, dahãimanazéb zarina za te te dama ĩrowairébézé wasu'u

³ Wasisãnawã norĩ, 'Re ĩhãimana u'ási mono ãma, wa 're wawata u'ási za'ra, 're aihãimana wé za'ra wa'aba mono wa. Ta hã te te 're aipawaptob za'ra wa'wa, tiwaihu'u pese na. Tawamhã ma tó oto 're ĩsazei pese za'ra wa'aba mo. Awé sidãpãsi 're ĩsazei pese za'ra wa'aba mono zé hã, te ãma 're ĩsa'ěté za'ra wa'aba mo. Aihãiba mono bã, te 're asisawi za'ra wa'aba mo. Duré awé sidãpãsi 're asisawi pese za'ra wa'aba mono zé hã te ãma 're ĩsa'ěté za'ra wa'aba mo. Taha wa, 'Re ĩhãimana u'ási mono ãma, wa 're wawata u'ási za'ra. ãne, wa te 're 'manharĩ za'ra mono da, wama wé za'ra di. Tó ĩ'uiwaibaba si.

⁴ Taha wa, wa norĩ hã wa wa te 're aiwésãmri za'ra wa'wa, wato sina. ĩsazei'wa norĩ hã, daro mono bã siré 're ĩsi'rã'õtó mono norĩ ma, wa tó wa te 're aiwasu'u wé za'ra wa'wa. Tawamhã, 're sazei pese za'ra wa'aba mono wa, ma tó da te ai'ãma 're rowasété za'ra wa'wa. ĩwasédé hã da te aima 're ĩ'manharĩ za'ra wa'aba mono zé hã, ma tó 're ĩsépata za'ra wa'aba mo. Tazahã, asimi'ê na te asina 're ĩ'umnhasi za'ra wa'aba mo. Taha na, wa tó wa te dama 're aiwasu'u wé za'ra wa'wa, wapê'ê 're wato sina.

⁵ Tawamhã, wa tó wa norĩ hã waihu'u za'ra ni. 'Re ĩhãimana u'ási mono hã, sena na te za dahãimanazém na te te dama 're arowairébé. A norĩ wa'wa hã 're sazei pese za'ra wa'aba mono wa, te 're ĩrobzépata za'ra wa'aba mo. Tawamhã 'Re ĩhãimana u'ási mono hã te te 're aipawaptob za'ra wa'wa, ãma 're anomro wé u'ási aba mono da. Taha wa, te za te te 're aipisutu za'ra wa'wa, ĩ'rata 're aihãimana u'ási za'ra wa'aba mono da, ĩsimiroti ré 're anomro wé u'ási aba mono da. Taha wa, za ĩré 're anomro wé wa'aba mono wa, te a'á 're ĩrobzépata za'ra wa'aba mo, asiróiwĩ da, 're sazei pese za'ra wa'aba mono wa. ãne na te te 're aipawaptob za'ra wa'aba mono na, wa tó waihu'u za'ra ni, tó ĩbã ĩsimirowairébézé hã.

⁶ Tane tó, 'Re ĩhãimana u'ási mono, tó sena. Tawamhã, te za niha te te dama 're arob'manharĩ, te te aima 're ĩrob'manharĩ wasété za'ra wa'aba mono norĩ ma.

⁷ Duré te za aipawaptob za'ra wa'wa, rowé na si 're aihãimana za'ra wa'aba mono da. Wa norĩ zama, robzépata na 're ĩwahãimana za'ra mono norĩ zama, te za wapawaptob za'ra, rowé na si 're wahãimana za'ra mono da. Tó sena, te za Wanhib'apito Zezusi hã wei wama sihã'i'ré hãiwa hawĩ, te te tãma 're ĩromhuri pese za'ra mono norĩ me. Tawamhã, wei morĩ wamhã, te za tó dahã za'ra. Te za duré wa norĩ hã wapawaptob za'ra.

⁸ Tawamhã unhamã ro'o wa'wam ne, te za we nhamra, Zezusi hã. Niha te za dama arob'manharĩ, 'Re ĩhãimana u'ási mono, da te dasima 're ĩwé'õ pese za'ra mono norĩ ma, duré Wanhib'apito Zezusihi nhiminhõ'reptuzém na, ĩwasu'uwé te te 're ĩsazei õ za'ra mono norĩ ma zama.

⁹ Ta norĩ hã te za sisiti satõrĩ za'ra, ĩsiti 're si'ubumroi u'ási mono da, rowé'õ u'ási na. Taha na te za te te 're robzépata u'ási za'ra. Tawamhã, Wanhib'apito nhiti 're dahãimana za'ra mono wamhã, tiwaihu'u pese na marĩ hã rowé uptabi na, te te 're da'apawapto mono õ di za. Taha ré 're dahãimana za'ra mono õ di za. ãne, sena na te za dama arowairébé.

¹⁰ Tawamhã, wei morĩ wamhã, ïsimiroti zarina 're danomro wê mono da, te te 're ïdapawaptob za'ra mono norĩ hã te za ãma tiwata za'ra, te te sina 're ï'umhãsi za'ra mono norĩ hã. Te za tô ãma titob'uzu za'ra. A norĩ wa'aba zama, wanhimirowasu'u zarina ïwasu'uwê na 're ïsaze za'ra wa'aba mono norĩ hã, te za ãma dame aiwata za'ra wa'wa. Te za duré ãma atob'uzu za'ra wa'wa. Tane tô, bâdã ïpire, ïwa waptã'ã wapsi, te za uburé dama ãma uwaimra.

¹¹ Taha wa, Wanhib'apito 'Re ïhãimana u'ãsi mono wi, wa wa te 're rowaptêrê u'ãsi za'ra, ïwê na te te 're aipawaptob za'ra wa'aba mono da, taha zarina, 're ïdanomro mono zép tém na 're anomro wê wa'aba mono da, te te aima 're ïpisutu za'ra wa'aba mono zéb zarina si. Wa duré wa te tiwi 're rowaptêrê za'ra, asimirosa'rata wê 'manharĩ'wai wa'wa hã, tiwaihu'u pese na te te aima ãma 're uwaimrami za'ra wa'aba mono da, marĩ hã, ïwê si 're 'manharĩ za'ra wa'aba mono da, 're sazei pese za'ra wa'aba mono wa.

¹² Tawamhã Wanhib'apito Zezusihi ãma te za 're dawata za'ra, Wanhib'apito 'Re ïhãimana u'ãsi mono me, te te 're ïaipawaptob za'ra wa'aba mono zém na ãma 're aihãimana wê za'ra wa'aba mono wa. Te za duré te te dama 're aiwasu'u wê za'ra wa'wa, Wanhib'apito Zezusi hã.

2

Wanhib'apito Zezu Cristu apã za we ïmorizé wasu'u

¹⁻³ Átê ni'wa hã ma tô aima rowasu'u za'ra wa'wa, Wanhib'apito Zezu Cristu za apã wei wazô ïwisizém na hã. Átê bâdã hã ïwa waptã'ã newa, ma tô aima rowasu'u za'ra wa'aba ni. Tawamhã ïwasu'u hã tô sena newa, ãma 're rosa'rata za'ra wa'aba mono ô di za, 're aipê'ewara za'ra wa'aba mono tô da. Átê 'Re ïhãimana u'ãsi mono hã, marĩ hã ni'wai ma, te te ïwaihu'u zarina newa, átê duré marĩ hã te te ïwãpari zarina newa, átê duré wanhimi'ui'ére zarina newa, ni'wa hã ma tô ãne aima rowasu'u za'ra wa'wa. Mare di. ãne danhimirowasu'u hã 're saze za'ra wa'aba mono ô di za, dazadawa nhipese na da te aiwi 're udã tô za'ra wa'aba mono da. Wanhib'apito wei morĩ ô ré, daro mono bâ te za 'Re ïhãimana u'ãsi mono nhimiroti zãda 're dahãimana za'ra. Duré ni'wa hã ïwasétê uptabi hã te za dama sihã'i'ré. Ta hã, ropipa ãma za oto 're ïhãimana mono zé hã.

⁴ Ta hã, 'Re ïhãimana u'ãsi mono upana waihu'u pese newa, ãma 're ïdawata za'ra mono norĩ hã te za dawi wê'ô za'ra, ta norĩ ãma 're dawata za'ra mono tô da oto. Romhãiba hã te za duré dawi wê'ô za'ra, ãma 're dawata za'ra mono tô da. Duré 'Re ïhãimana u'ãsi mono te te dama 're ï'apisutu mono hã te za dawi wê'ô za'ra. Uburé ãma 're ïdawata za'ra mono na te te ãma ïdã'rãnhipa na, te za siwasu'u dama: "Wa hã, ïwaihu'u'upe. Wa hã 'Re ïhãimana u'ãsi mono." ãne te za siwasu'u. Tawamhã ti'ai ãma 'Re ïhãimana u'ãsi mono ãma 're ïdawata za'ra mono zéb u, te za ãzé, tame sãmra da.

⁵ Tawamhã e ma tô aiwi aimani za'ra wa'wa, ãne na hã te aima ïrowahutu za'ra wa'aba zé hã ai'rata ïnhamra za'ra wa'aba ré hã.

⁶ Tane nheré, aibã ïwasétê uptabi hã 'Re ïhãimana u'ãsi mono, bâdã te te tãma ïpisutu ô ré, we datême watobro ô di za a'ã. Niwa bâdã hã ïwa waptã'ã wapsi, te za wei watobro, 'Re ïhãimana u'ãsi mono nhimipisutuzém na si. ãne na hã ma tô duré ïwaihu'u za'ra wa'wa.

⁷ Åhãna pi'uriwi, ma tô Wa'uburé hã tinhimiromhuri na ãma sãna'rata. Tawamhã 'Re ïhãimana u'ãsi mono te te tiwi ïsawizé hã te za a'ã ãma 're hãimana, ïwasétê uptabi ãma, bâdã ïwa waptã'ã ô wa a'ã. Taha parip si, te te tiwi ïsawizé hã ãma 're hãimana mono ô di za oto.

⁸ Tawamhã ïwasétê uptabi hã te za we sihã'i'ré oto, danho'a te te romhuri da. Tane nheré, Wanhib'apito Zezusi hã wei morĩ wamhã, tizadawa wa'u'u na te za tiwĩ. Rowa'a za'ëtê ré wei wisi wamhã, ïwasétê uptabi hã tâibã za oto.

⁹ Tane nheré, Wanhib'apito wei morĩ ô ré, te za ïwasétê uptabi hã Satanasihĩ waihu'u pese zéb zarina, te te dama 're romhõsi. Marĩ hã tô sena newa, da te ãma ïwaihu'u za'ra zéb da hã, duré marĩ na ïdatob'uzu za'ra zéb da, te za te te dama 're romhõsi.

¹⁰ Tinhimiromhuri wasétê na te za dawi udã pese za'ra, 'Re ïhãimana u'ãsi mono nhiti za 're ïdahãimana u'ãsi za'ra mono norĩ wi. Ta norĩ hã te ïwasu'uwê hã te te siwi 're wê'ô za'ra, tô sena ïwasu'uwê hã. Taha wa, ta norĩ hã te te 're sô'reptu za'ra mono ô di za, 'Re ïhãimana u'ãsi mono hã.

¹¹ Tô sena ïwasu'uwê hã da te dasiwi 're wê'ô za'ra mono wa, 'Re ïhãimana u'ãsi mono hã te te dapawaptob ô di za. Tawamhã, te te dapawaptob ô wamhã, te za oto dama pisutu za'ra, tizadawa nhipese na tô sena newa te te dawi ï'udã nhimiroti si, da te 're sazei pese za'ra mono da oto.

¹² Taha wa, sisiti te za dazatõrĩ za'ra ropipa u, tô sena ïwasu'uwê hã da te 're ïsaze za'ra mono ô norĩ hã, ïwasétê si, da te dasima 're ïwê za'ra mono norĩ hã.

'Re ĩdasisō'reptu za'ra mono zé wasu'u

¹³Wasisānawā norī, 'Re ĩhāimana u'āsi mono āma, wa 're wawata u'āsi za'ra, āma 're anomro wē wa'aba mono wa, Wanhib'apito te te 're ĩ'asawi pese za'ra wa'aba mono norī hā. 'Re ĩhāimana u'āsi mono hā ma tō marī ō uptabi ré sima aipisutu za'ra wa'wa, ĩmorī'rata na te te 're asō'reptu za'ra wa'aba mono da. Tawamhā, Tipē'ĕzani hā ma tō te te aima 're anhomri 'wa, ĩtēme 're anomro wē wa'aba mono da. Ma tō duré ai'āma tinhib'a'uwē uptabi za'ra wa'wa. Ma tō duré te te 're aipawaptob u'āsi za'ra wa'wa, tō sena ĩwasu'uwē hā 're sazei pese za'ra wa'aba mono da.

¹⁴Te te 're asō'reptu za'ra wa'aba mono da, ma tō aipē'ĕ 're aima nharī za'ra wa'wa, ĩwasu'uwē, wa te aima wasu'u za'ra wa'aba wamhā, Wanhib'apito Zezu Cristuhu siré rowē uptabi ré 're aihāimana u'āsi za'ra wa'aba mono da, ĩsine rowa'a za'ĕtē ré.

¹⁵Tawamhā, wasiré ĩsazei'wa norī, 're sazei pese za'ra wa'aba mono za, sena na wa te aima 're ĩrowahutu za'ra wa'aba mono hā. Uburé wamreme na duré uburé wanhimi'ui'éré na, wa te aima āma 're ĩrowahutu za'ra wa'aba mono zé hā te za 're ĩsazei pese za'ra wa'aba mo, ĩsarina 're anomro wē wa'aba mono da.

¹⁶⁻¹⁷'Re ĩhāimana u'āsi mono hā Wamama hā, te te 're wa'azawi pese. Te duré te te 're wa'apawapto, wapē'ĕ 're, 're wanomro wē u'āsi mono da, wahāimana nhiptete sina wanhimi'ĕ na sō 're wanhimipari u'āsi za'ra mono da, ĩwē zō. Taha wa, wa za Wamama wi, wa te 're rowaptērē u'āsi za'ra, duré Wanhib'apito Zezu Cristuhu wi zama, ato sina 're aihāimana za'ra wa'aba mono da, duré asiptete sina ĩwē na si tāma 're romhuri pese za'ra wa'aba mono da, asimirowasu'u wē za'ra wa'aba na.

3

Paru norī āma ĩsazei'wa norī 're ĩmreme zusi mono zé wasu'u

¹Wasisānawā norī, te za wa'āma 're aimreme zusi aba mo, 'Re ĩhāimana u'āsi mono ma, te te 're wapawaptob u'āsi za'ra mono da, Wanhib'apito zadawa wasu'u hā, dahāiba mono bā da te 're wapari su'u za'ra mono da, da te 're saze za'ra mono da, asine za'ra wa'aba.

²Tazahā, aihīni da te 're saze za'ra mono ō di, ĩsada wasu'uwē hā. Taha wa, te za duré wa'āma tāma 're aimreme zusi aba mo, te te dawī wanho'reptu za'ra da, ĩwasété uptabi na si 're ĩdanomro mono norī wi.

³Wanhib'apito Zezusihī si, umnhasi za'ĕtē di. Taha wa, te za te te 're aipawaptob za'ra wa'wa, 're sazei utōrī za'ra wa'aba mono tō da, aihāimana nhiptete sina āma 're anomro aba mono da. Duré Wa'uburé wi, ĩwasété uptabi wi, te za tiwi aihāiba zawi za'ra wa'wa.

⁴Wa norī hā Wanhib'apito āma simisutu 're wanomro mono wa, wa wa te ai'āma 're umnhasi za'ra wa'wa. Taha wa, wa aiwaihū'u za'ra wa'aba ni, tō sena, wanhimiroti zarina āma 're ĩ'anomro aba mono na hā. Tane tō, ōne u'ā te za āma 're anomro aba mo.

⁵'Re ĩhāimana u'āsi mono wi, wa wa te 're rowaptērē u'āsi za'ra, ĩsimizawizé hā asina waihū'u pese za'ra wa'aba da, duré Cristuhu nhimipawaptobzéb zarina asimi'ĕ na āma 're ĩ'aihāimana za'ra wa'aba mono zé hā asina waihū'u pese za'ra wa'aba da.

ĩsazei'wa norī, tinhimarī zō te te sima 're ĩromhuri za'ra mono zé wasu'u

⁶Wasisānawā norī, Wanhib'apito Zezu Cristuhu zadawa para, wa aima roti pese za'ra wa'aba ni, ni'wam norī wi, a'ā 're aihāimana za'ra wa'aba mono da. Ta norī hā asiré ĩsazei'wa norī nherē, wa'a u'āsi te 're hāimana za'ra. Wanhimiroti zarina 're hāimana za'ra mono ō di. Taha wa, ĩhāiba zu 're aihāimana za'ra wa'aba mono ō di za.

⁷Wa norī hā ai'rata wahāimana za'ra wa'aba ré, wa tō āma aima asanho za'ra wa'aba ni, ĩsazei'wa norī hāimanazém na hā. Siwa'ru 're wahāimana za'ra mono ō di. Mare di. Taha wa, āma aima ĩwasisanho za'ra wa'aba zé hā ma tō ĩwaihū'u za'ra wa'wa, ĩsarina āma 're anomro wē wa'aba mono da.

⁸Ai'rata wahāimana za'ra wa'aba ré, dasa hā wa'ābā āna wa te 're huri mono ō di. Wa tō wa te wasima 're romhuri pese za'ra, wapatā'ā nherē, duré wawasutu nherē. Bādā 'rāi watobro ō ré, duré bādā sébré nherē, wa tō wa te wasima 're romhuri za'ra, wama 're asō'prub za'ra wa'aba mono na, aima wapire za'ra wa'aba na 're wahāimana za'ra mono tō da.

⁹Wanhib'apito wasu'uwē na, wa te aima 're ĩromhuri za'ra wa'aba mono zé wa'rāmi, marī na 're wapawaptob za'ra wa'aba mono da, wama 're ĩ'ru za'ra wa'aba mono zé hā, tō sena te aré tō wama 're ĩ'ru za'ra wa'aba mo. Tane nherē, marī na wa te 're rowaptērē za'ra mono ō di, ai'rata 're wahāimana za'ra wa'aba mono ré hā. Āne wa tō aima āma asanho za'ra wa'aba ni, 're ĩwahāimana za'ra mono zéb zarina, 're anomro aba mono da.

¹⁰Ai'rata 're wahāimana za'ra wa'aba mono ré hā, wa tō āne na nasi aima roti za'ra wa'aba ni: "Ni'wa hā, romhuri te te siwi 're wē'ō mono wamhā, dame 're sai mono ō di za, mram na hā."

¹¹ Ni'wam norī hā asiré wa'aba 're īsi'ubumroi mono norī hā, īsazei'wa nherē, taré te, u, 're hāimana za'ra. Te te 're romhuri za'ra mono ō di, u. Taré te, u, te te dawī 're ro'wa'rutu za'ra, da te 're īromhuri pese za'ra mono norī wi. Āne wa, wa aima āma sahu za'ra wa'aba ni, wanhimiroti na hā.

¹² Tawamhā Wanhīb'apito Zezu Cristuhu zadawa para, wa tāma roti pese za'ra ni, ta norī ma, rowē na te te 're romhuri pese za'ra mono da, tihāimana za'ra zéb da hā.

¹³ Wasisānawā norī, marī hā dama 're 'manharī wē za'ra wa'aba mono da, 're aiwa'a za'ra wa'aba mono tō.

¹⁴ Ā rob'ui'éré na wa te aima īnharī za'ra wa'aba na, ni'wa hā asiré īsazei'wa nherē, āma 're morī wē da, te te sima wē ō wamhā, ta hā te za oto āma īwaihu'u za'ra wa'wa. Tawamhā, īhāiba zu āma 're anomro aba mono da, asima 're wē za'ra wa'aba mono ō di za, siséb za'ra da, ta norī hā.

¹⁵ Tane nherē, asitob'ru na āma 're rosa'rata za'ra wa'aba mono ō di za. Asisānawāi ma, 're īroti za'ra wa'aba mono ne, te za tō tāma 're īroti pese za'ra wa'aba mo.

Rob'ui'éré na rowasu'u 'rāsudu

¹⁶ Wanhīb'apito wi, wama rowē nhomri'wai wi, wa wa te 're rowaptērē za'ra, rowē u'ā hā ai'āma 're hāimana u'āsi za'ra wa'aba mono da.

¹⁷ Īsi'uihā na wa aima āma rob'ui'éré za'ra wa'wa, īnhīb'rata na, āhā na hā: “Wa hā Paru, wa asawi za'ra wa'wa.” Āne u'āsi, wa nasi dama rob'ui'éré, īnhisi na. Āne wa aima rob'ui'éré za'ra wa'wa.

¹⁸ Wanhīb'apito Zezu Cristuhu wi, wa wa te 're rowaptērē za'ra, īsimizawizé hā uburé aihāiba mono bā ai'āma 're hāimana za'ra wa'aba mono da.

1 Timotiu Paru hã Timotihu ma, te te ĩrob'ui'éré na'rata zé Ībaihã wasu'uzé

Ā ĩbaihã na Paru hã aibã ĩprédupté ma, ma tō rob'ui'éré, Timotiu na ĩsisi ma. Ta hã ĩsazei'wa. Īmama hã deredu, zudezu'ō. Īna si zudezu hã. Paru hã 're ĩhãimana u'ãsi mono zadawa wasu'u na te te dama 're rowasu'u mono da, zahadu daro mono bâ 're morĩ ré, ma tō Timotiu hã ĩsiré 're mo. Tawamhã Paru hã timorĩ na te te uzusi da, Ēpézu hawi watobro wamhã, Timotiu hã te tame ĩsa'u nhamra. Tawamhã tame zahadu sãmra ré, ma tō Ā ĩbaihã na rob'ui'ére hã Paru hã tãma time.

¹⁻² Ī'ra Timotiu, wa hã Paru, Cristu Zezusihi zadawa wasu'u'wa, wa āma aima rob'ui'ére. Wanhib'apito wasu'uwē na te āma aipo're pu'uzéb zarina, ĩsazei'wa oto 're aimorĩ wa, wa ĩ'ra na asisi. 'Re ĩhãimana u'ãsi mono hã Wanho'reptu'wa hã ma tō ĩpisutu, te dama 're sadawa wasu'u mono da. Taha da, ma tō Cristu Zezusihi zama ĩpisutu. Ōhō zō si, wa sō 're wanhipari za'ra, marĩ ĩwē uptabi hã te te wama ĩpisutu za'ra zéb zarina, te te wama āma 're a'uwaimrami mono da.

Wamama ma, wa ai'āma 're ĩmreme u'ãsi, 'Re ĩhãimana u'ãsi mono ma, duré Wanhib'apito Cristu Zezusihi ma zama, ĩsimizawizé hã ai'āma 're hãimana u'ãsi mono da, duré ai'āma 're pē'ézé u'ãsi zahuré mono da, rowē u'ãsi, āma 're aimorĩ da.

³ Masédoniza na danhipti'a nho'ōmo nhisi u ĩmorĩ u'ābã, wa tō ai'āma ropti, Ēpézu āma a'ā asãmra da. Tane da, wa za duré ĩzadawa na aima āma sahu, tame a'ā asãmra da. Tame ni'wam norĩ hã te ĩsazei'wa norĩ ma, siwa'ru te te 're rowasu'u za'ra. Taha wa, te za a'ā tame asã, sadawa uwati za'ra da, tinhimirowasu'u hã te te sahãri pese za'ra da.

⁴ Ta norĩ hã te dahi'rata norĩ nhimirob'rãzarōtō 'ratara hã te te 're 'madã'ã za'ra. Dahi'rata sidãpãsi dahi'rata nhisi wasu'u zama, te ta norĩ hã te te 're 'madã'ã za'ra. Taha zarina, te āma 're dasisada'ābã za'ra. Āne wamhã, ta norĩ hã te te 're dapawaptob za'ra mono ō di, Wanhib'apito zazei'wa norĩ 're hãimana wē za'ra mono da.

⁵ E marĩ da, wa tō āne hã aima waihu'u. Wa tō ĩsima aiwē, ĩsazei'wa norĩ hã 're pawaptob za'ra mono da, Wamama zawi pese 'wa 're nomro mono da, dazawi pese 'wa zama. ĩsazei'wa norĩ hã simirosa'rata wē ré si, te za 're nomro. Āne wamhã, marĩ te te 're ĩmanharĩ wasété za'ra mono na, 'rãwi 're siwē'ō za'ra mono ō di za. Wanhib'apito zazei uptabi 'wa, te za 're nomro. Tawamhã te aima ĩwaihu'uzéb zarina 're nomro mono wamhã, te za tō dasisawizé hã ĩpē'ē 're tãma 're hãimana za'ra.

⁶ Ni'wam norĩ hã te aima ĩwaihu'uzéb zarina, 're nomro mono ō di oto. Roti sena hawi, ma tō aipizari za'ra. Taha wa, te taré marĩ ĩpire ō na si āma 're sisada'ābã za'ra.

⁷ Ta norĩ hã te te sima 're wē za'ra, 'Re ĩhãimana u'ãsi mono nhimiroti 'rata na rob'ui'ére na dama rowahutu'wa, 're nomro mono da. Tane nherē, tãma waihu'u pese za'ra ō di, ĩsimiroti hã. Tãma waihu'u pese za'ra newa, tazahã tãma pibu prã za'ra di, te te dama 're ĩrowasu'u za'ra mono zé hã.

⁸ 'Re ĩhãimana u'ãsi mono nhimiroti hã, Mozési te te dama 're ĩ'awaihu'u mono hã wē di, da te dama āma 're ĩroti za'ra mono zéb da hã. Āne wama waihu'u pese za'ra di.

⁹⁻¹⁰ E 're ĩnomro wē mono norĩ ma, rotizéb da, te 're hãimana, Wamama nhimiroti hã. Mare di. Roti wē wē'ō'wa norĩ ma, rotizéb da, te 're hãimana. Duré rob'manharĩ wasété'wa norĩ ma zama, rotizéb da, te 're hãimana. Duré 'Re ĩhãimana u'ãsi mono nhimiroti wē'ō'wa norĩ ma zama, rotizéb da, te 're hãimana. Duré ĩwasété norĩ ma zama, rotizéb da, te 're hãimana. Duré 'rãwi pesere dasisō 're ĩda'a're nhi'oto za'ra mono norĩ ma zama, rotizéb da, te 're hãimana. Duré uburé romhuri Wamama te hã, te te āma 're ĩwasété za'ra mono norĩ ma zama, rotizéb da, te 're hãimana. Duré timama te te 're ĩsimroi mono norĩ ma zama, rotizéb da, te 're hãimana. Duré tina te te 're ĩsimroi mono norĩ ma zama, rotizéb da, te 're hãimana. Duré dapãri'wa norĩ ma zama, rotizéb da, te 're hãimana. Duré dahãiba na da'āma 're ĩsipsaihuri za'ra mono norĩ ma zama, rotizéb da, te 're hãimana. Duré aibã si'uiwa dasina 're ĩdanhipsaihuri za'ra mono norĩ ma zama, rotizéb da, te 're hãimana. Duré ĩwada'uri zarina si pawã'ābã āna dama romhuri'wa da, a'uwē hã da te dasiwi 're ĩsimi'uri za'ra mono norĩ ma zama, rotizéb da, te 're hãimana. Duré 're ĩsadawa nhipese za'ra mono norĩ ma zama, rotizéb da, te 're hãimana. Duré timreme hã tō sena na dama 're siwasu'u za'ra mono nherē, taré te te sina 're ĩroti za'ra mono norĩ ma zama, rotizéb da, te 're hãimana. Duré roti tō sena'ō na siwa'ru, āma 're ĩdanomro wasété mono norĩ ma zama, rotizéb da, te 're hãimana, 'Re ĩhãimana u'ãsi mono nhimiroti hã.

¹¹ Roti tō sena na si, wa tō te dama āma 're aroti, Wanhīb'apito wasu'uwē na te dama 're rowasu'u mono wamhā. Wē uptabi di, Wanhīb'apito wasu'u hā. Taha da, ma tō ĩma pisutu, ĩwasu'uwē na te āma 're da'apo're pu'u mono da, 'Re ĩhāimana u'āsi mono hā, rowē u'āsi 're ĩmorī hā.

Paru hā Wanhīb'apito āma ĩwatazém na rowasu'u

¹²⁻¹³ Āhāna wa za āma ĩwata, Wanhīb'apito Cristu Zesusihī āma hā. Ta hā ma tō ĩwaihu'u siro, ĩnhimiromhuri hā za te tāma āma 're ĩ'uwaimrami mono na hā. Taha zarina ma tō ĩpisutu, dapawaptom na te tāma 're romhuri mono da. Taha da, ma tō te 're ĩnhiptete u'āsi. Taha wa, wa za āma 're ĩwata u'āsi, ĩma 're rowē mono wa. Wanhīb'apito āma wa tō aré te āma 're wasété aré, ĩmreme wasété na. ĩsazei'wa norī hāiba u'ābā, wa tō aré te tāma 're rob'manharī wasété. Ta norī hāiba u'ābā, wa tō aré sada 're ĩzahi. Wanhīb'apito hā Danho'reptui'wa na 're ĩmorī na hā ĩma waihu'u ō di aré. Te duré sazei ō di aré. Taha wa, zahadu ĩnhimiza'rese āna 're ĩmorī wa, ma tō ĩāma tipē'ézé, 'Re ĩhāimana u'āsi mono hā, te te ĩ'azāri tō da.

¹⁴ Wanhīb'apito hā tinhimizawī pese zém na ma tō ĩpawapto pese, te saze da, duré dazawizéb da, ĩma hāimana da. Aihīni Cristu Zesusihī āma 're ĩhāimana za'ra mono norī hā te te 're ĩpawapto za'ra mono ne, ma tō ĩpawapto duré.

¹⁵ Ti'ai u ma tō wei mo, Cristu Zesusi hā, 're ĩdanomro wasété mono hawi te te 're da'anho'reptui mono da. Āne te dasima da te 're rowasu'u za'ra. Danhimirowasu'u hā tō sena wamhā, aihīni āma 're ĩdasisaze za'ra mono da hā, ĩma wē di. Wa hā dawasété nhipai u, ĩwasédé hā sa'ētē di.

¹⁶ Tane nherē, ma tō ĩāma tipē'ézé, te te ĩ'azāri tō da, 'Re ĩhāimana u'āsi mono hā. E marī da. Cristu Zesusi hā ĩāma wa'a su'u ō wa, da'āma ĩwa'a su'u ō na, da te āma 're waihu'u za'ra mono da, za ĩza'u da te dasina 're ĩ'umnhasi za'ra mono norī hā, ĩ'rata 're dahāimana u'āsi za'ra mono da, rowē u'āsi hā.

¹⁷ Taha wa, Danhīb'apito uptabi āma si wa za 're wawata u'āsi za'ra. Ta hā Apito u'āsi te dama 're sāmra, ĩdā'ā'ō hā, ni'wa hā niwa te te ĩmadā'ā ō hā. Ōhō si Danhīb'apito uptabi hā, 'Re ĩhāimana u'āsi mono hā. Wē uptabi wa, wa za āma 're wawata u'āsi za'ra.

¹⁸⁻¹⁹ Duréi pese hā ma tō ni'wam norī hā Wamama zadawa hawimhā marī na aima rowasu'u za'ra, za tāma asimiromhuri na ĩwaihu'u sirōmo zéb da. Taha zarina ĩ'ra Timotiu, wa za aima ti'ru, da te aima ĩwaihu'uzé hā asina 're 'madā'ā u'āsi mono da, roti tō senai ō da, āma 're 'wapéi u'āsi mono da. Āne te za 're aimo, āma 're 'wapéi u'āsi mono da. Roti tō sena si te za 're ĩmadā'ā pese mo, Zezu Cristuhu wasu'uwē hā wa te 're ĩsaze za'ra mono zép si. Te za duré 're aimorī wē. Āne wamhā, aiwasété ō wamhā, 'rāwi 're asisāmri mono ō di za, aiwasété na. Āhāna ni'wam norī hā tiwasété na 're sisāmri za'ra mono nherē, 're siwē'ō za'ra mono ō di. Taha wa, ma tō oto sazei utōri za'ra, Wanhīb'apito nhimiroti hā wa te 're ĩsaze za'ra mono zé hā.

²⁰ Āne Imenezu norī hā te oto 're tineb zahuré, Aresādirihī me. Taha wa, wa tō a'ā tāma hāiba za're zahuré, Satanasihī ma, robzei'ō hā a'ā te te sina waihu'u zahuré da. E marī da. Roti tō sena upana te te dama 're rowasu'u zahuré mono tō da, taha u'ābā te te 're wē'ō zahuré mono tō da, 'Re ĩhāimana u'āsi mono hā.

2

'Re ĩhāimana u'āsi mono ma, 're ĩdamreme zusi mono zém na rowasu'u

¹ Āhāna marī ĩpire na wa za aima rowasu'u. 'Re ĩhāimana u'āsi mono ma 're damreme zusi mono wamhā, te za uburé da'āma tāma 're damreme zusi, te te 're da'apawapto mono da. Marī zō dawi 're rowaptā'ā za'ra mono wamhā, uburé dama te za da te tiwi 're rowaptērē za'ra, marī hā te te dama 're anhomri mono da. Duré marī na dama 're sōpru mono wamhā, te za āma 're dawata za'ra.

² Danhīb'apito mono hā, dama 're ĩhāimana za'ra mono norī āma, te za tāma 're damreme zusi, uburé dama ĩpire za'ra norī āma zama. E marī da. Ta norī hā te te dama 're roti wē za'ra mono da, taha zarina 're dasi'wapé za'ra mono ō wa, rowē na dasiré 're wanomro mono da, duré dama 're wahāimana wē za'ra mono da, 'Re ĩhāimana u'āsi mono nhimiroti 'madā'ā sina.

³⁻⁴ 'Re ĩhāimana u'āsi mono hā Wa'anho'reptui'wa. Ta hā ma tō te te sima 're da'awē, uburé te te 're da'anho'reptui mono da. Ma tō duré te te sima 're da'awē, aihīni pese ĩsimiroti hā da te 're waihu'u za'ra mono da, āma 're danomro wē mono da, ĩsimiroti hā tō sena uptabi wa. Aihīni āma 're wanreme zusi mono wamhā, tāma rowē di. Taha wa, te za wama 're to za'ra.

⁵ Misire hāiwa āma 're ĩhāimana mono si, uburé Danhīb'apito uptabi hā. Misire da'āwisi wē 'wa Wamama u hā. Ta hā Cristu Zesusi, aibā na 're ĩhāimana mono.

⁶ Ta hã ma tô dazada sisõ, uburé te te da'awa'âbã da. 'Re ìhâimana u'âsi mono hã bâdã te te ìpisutuzém na, ma tô da'awa'â. Taha wa, 'Re ìhâimana u'âsi mono te te sima 're ìda'awê mono zé hã, uburé pese te te 're ìda'anho'reptui mono zéb da hã, wa tô waihu'u za'ra ni.

⁷ Ta hã ma tô ìpisutu, ìsadowa wasu'u'wa 're ìhâimana mono da, zudezu'õ nori hã te 're po're pu'u za'ra mono da, ìsadowa para, Wanhib'apito wasu'uwê na. E marĩ da. Wanhib'apito hã te te 're saze za'ra mono da, duré te te âma 're sasõmri za'ra mono da, ìsimiroti zarina si 're nomro wê mono da, tô sena uptabi wa, ìsimiroti hã. Ìzadawa nhipese na aima ìsiwasu'u õ di. Tô sena wa tô aima 're ìsiwasu'u.

⁸ Wa za oto aima waihu'u, te ìsima 're ìda'awê mono zém na hã. Aibã nori hã nimame 're ìhâimana za'ra mono zé mono bâ te za 're mreme zusi, 'Re ìhâimana u'âsi mono ma. Ta nori hã dama 're hâimana wê za'ra mono wamhã, te za tâma 're mreme zusi, tâma 're simiwê za'ra mono sina, hãiu wa. Te te 're ìda'ruiwapari za'ra mono da hã, mare di. Duré tizadawa na 're ìsi'wapé za'ra mono da hã, mare di.

⁹⁻¹⁰ Pi'õ nori hã, aibã nori te te sima 're 'madã'ã ze za'ra mono da, dama 're si'uzã wamnarĩ za'ra mono õ di za. Duré dama 'madã'ã ze da, 're siséré tété wê za'ra mono da hã mare di. Duré tinho'rebzui wê na si, sima 're ìsipese za'ra mono da hã mare di. Duré tinhipsisi wê na si, sima 're ìsipese za'ra mono da hã mare di. Duré da'uzazé ìwa'âbã za'êtê na si, 're ìsi'uzã za'ra mono da hã mare di. Dama rob'manharĩ wê zéb zô si, te za sina 're sõpré, 'Re ìhâimana u'âsi mono nhimiroti 'madã'ã'wa na 're ìsiwasu'u za'ra mono zéb zarina.

¹¹ Ìsazei'wa nori 'madã'ã'wa nori hã te te dama 're rowahutu za'ra mono ré, te za pi'õ nori hã ari'iwĩ te te 're wapari za'ra. Ì'madã'ã'wa nori zapari 're ìhâimana za'ra mono na te za 're si'madã'ã'wa za'ra pi'õ nori hã, ari'iwĩ te te 're ìwapari za'ra mono da hã.

¹²⁻¹³ Pi'õ nori hã aibã nori ma, te te 're ìrowahutu za'ra mono da hã, mare di. Aibã nori ma, timreme pire na 're si'madã'ã'wa za'ra mono õ di za. Ari'iwĩ te za 're si'ubumro, pi'õ nori hã. E marĩ wa, wa âne aima waihu'u. 'Re ìhâimana u'âsi mono hã ma tô aibã hã poto na'rata, Adã na ìsisi hã. Taha za'u si ma duré pi'õ hã poto, Ewa hã.

¹⁴ Pi'õ si, Wa'uburé nhimiroti hã tô senai'õ na te te waihu'u õ di. Tanei õ di, Adã hã. Pi'õ si Wa'uburé nhimiroti hã tô senai'õ na te te ìwaihu'u õ zéb zarina, ma tô Wamama nhimiroti na upa na'rata.

¹⁵ Tane nherê, pi'õi mono bâ hâimana wê na 're hâimana za'ra mono wamhã, tâma 're rowê za'ra mono di za. Wanhib'apito umnhasi sina, te za 're hâimana za'ra. Te za duré te te 're dazawi pese za'ra. Hâimana wê uptabi na te za dama 're hâimana za'ra. Tawamhã, ìwasã hã âma 're sépu'u za'ra mono wamhã, ì'ra hã tâma 're rere'e wê mono da, te za Wamama hã te te 're anho'reptu, pi'õ nori hã.

3

Wanhib'apito zazei'wa nori 'madã'ã'wa na rowasu'u

¹ Ì hã te aima ìwaihu hã, tô sena uptabi. Âté ni'wa hã te za sima wê, ìsazei'wa nori hã te te 're 'mai'madã'ã mono da. Âne wamhã, te te sima ìwézé hã wê di, da'madã'ã na te te 're ì'mairomhuri mono da hã.

² Ìsazei'wa nori 'madã'ã'wai mono bâ, te za 're hâimana wê za'ra. Tawamhã, ìwasédé hã da te âma 're ìsa'ra mono da hã, mare di. Timro uptabi si te za te te sima 're 'madã'ã'za'ra, misi haré. Hâimana prédu na te za dama 're hâimana za'ra. Tiwasété wi te za sina 're siptete u'âsi za'ra, 're nomro wê mono da. Te za duré dama 're hâimana wê za'ra. Duré ìtême 're dasihutu mono wamhã, te za te te 're da'mazasi su'u za'ra. Duré roti na rowaihu hã te za tâma 're hâimana za'ra, te te âma 're ìdapawaptob za'ra mono zéb da hã.

³ Duré âzézei'wa, 're nomro mono õ di za. Duré da'ahãri ze'i'wa, 're hâimana za'ra mono õ di za. Simizawi pese uptabi na, te za dama 're hâimana za'ra. Duré 're hâimana ui'prazéb zô si te te sima 're rob'ruiwapari za'ra mono õ di za.

⁴ Ti'ra nori hã te za duré te te 're pawapto pese za'ra, timama mreme si te te 're 'madã'ã'pese za'ra mono da, timama hã ìsimiroti na te te 're wazéb za'ra mono da.

⁵ Da'madã'ã'wa nori hã ì'ra nori hã tâma 're nomro wê mono da, te te 're pawapto pese za'ra mono õ nherê, e niha te za tawamhã 'Re ìhâimana u'âsi mono zazei'wa nori hã te te 're pawapto za'ra duré, 're nomro wê mono da, ta nori zama. Te te 're pawapto waihu'u za'ra mono õ di za.

⁶ Ni'wa hã Wanhib'apito te te ìsazézém na âma ronomro õ nherê, da'madã'ã'wa na 're 'mai'hâimana mono õ di za. E marĩ wa. Ìsazeté'wa hã da'madã'ã'wa, 're 'maimori wamhã, âté da'madã'ã'wai wa, te za 'rãwi sina 're 'maiwata, tipire na taré. Âne wamhã, 'Re ìhâimana u'âsi mono hã wa'uburé nori nhib'apito hã 'rãwi sina 're wata mono wa, te te ìwê'õ ne, te za ta hã wê'õ.

⁷ Īsazei'wa norī 'madā'ā'wai mono bā te za dama 're hāimana wē za'ra. Āne wamhā, dama 're ihāimana wē mono zēm na te za Īsazei'ō'wa norī zama te te dama 're wasu'u wē za'ra. Dama 're hāimana wē za'ra mono ō wamhā, te za damreme hā te te sina 're 'rā'ōtō za'ra. Āne wamhā, wa'uburé norī nhib'apito te te da'āma sima ĩroti wasété zé hā te za te te sina 're 'mai'uwaimrami tāma, da'madā'ā'wa norī hā.

Dapawapto'wa norī wasu'u

⁸ Dapawapto'wai mono bā te za 're hāimana wē za'ra. Duré ázézei'wa na 're hāimana za'ra mono ō di za. Rob'ui'prazéb zō si mreme si'ahā na 're hāimana za'ra mono ō di za.

⁹ Wanhib'apito nhimiroti hā aré dama sa'rese ō nherē, ma tō oto te te dama 're awaihu'u, 'Re ihāimana u'āsi mono hā, da te āma 're ĩsaze za'ra mono zéb da hā. Īsimiroti hā tō sena wa, te za dapawapto'wa norī hā te te 're 'madā'ā pese za'ra, hāimana wē sina. Īwasu'uwē hā tō sena na te za te 're saze za'ra. Āne wamhā, 'rāwi tipē'ē na 're siwē'ō za'ra mono ō di za, tō sena na te te 're ĩsaze za'ra mono ō na hā.

¹⁰ Dapawapto'wa da, da te dasiwi pisutu ō ré hā, te za a'ā da te dasiwi 're 'mai'madā'ā, dama 're ĩ'maihāimana wē mono zō. Tawamhā dama 're 'maihāimana wē mono wamhā, te za oto dapawapto'wa na 're 'maihāimana.

¹¹ Īmro zama te za dama 're hāimana wē, pi'ō hā. Damreme hā ĩwē'ōre na te te dama 're robzanhamri mono ō di za. Hāimana prédup sina te za dama 're hāimana. Tiwasété wi, te za sina 're siptete. Hāimana nhiptete na, te za 're hāimana.

¹² Dapawapto'wai mono bā timro uptabi si te za sima te te 're 'madā'ā pese za'ra, misi haré. Duré tí'ra norī hā te za te te 're 'madā'ā pese za'ra, 're nomro wē mono da. Duré uburé ĩsōrōwa āma ĩsiré 're ihāimana za'ra mono norī zama, te za te te 're 'madā'ā pese za'ra, ta norī zama 're nomro wē mono da.

¹³ Dapawapto'wa norī hā te te 're dapawapto wē za'ra mono wamhā, ĩsimipawapto wē na te za da te 're wasu'u wē za'ra. Āne wamhā, mreme nhiséb āna te za duré dama 're siwasu'u za'ra, Cristu Zezusi hā te te 're ĩsaze za'ra mono zém na hā.

Wanhib'apito wasu'uwē hā dama ĩsihāi'réze wasu'u

¹⁴⁻¹⁵ Atēme āma ĩwisi su'u da hā ĩma wē nherē, āma ĩwisi su'u ō na dā'āsina, wa āne na āma aima rob'ui'ére. E marī da. Niha dama 're ĩwahāimana za'ra mono zéb da na waihu'u da. Wa norī hā 'Re ihāimana u'āsi mono 'ra, wa 're wanomro. Īsib'a'uwē, wa oto 're wahāimana za'ra, daro mono bā wa te 're ĩsaze za'ra mono hā. Wanhib'apito nhimiroti hā tō sena wa, ĩsazei'wa mono bā wa za wa te 're 'madā'ā u'āsi za'ra. Ōne haré te za dama 're hāimana u'āsi, da te āma 're ĩsaze za'ra mono zéb da hā.

¹⁶ Tō sena Zezu Cristuhu wasu'uwē hā wē uptabi di, aré dama sa'rese ō nherē, Wamama hā te te oto dama ihāi're hā wa te 're ĩsaze za'ra mono zé hā, āma 're ĩwanomro wē mono zéb da hā. Āne te te dama ĩwaihu'uzé hā:

"A'uwē na ma podo, ti'ai āma.

Duré tō sena ĩ'ra 're ĩmorī wē uptabi na, ma tō Tipē'ēzani na dama waihu'u za'ra.

Duré hāiwa āma 'Re ihāimana u'āsi mono ma romhuri'wa norī hā ma tō titōmo na 'madā'ā za'ra.

Duré a'uwē mono bā 're ĩdahāimana za'ra mono norī hā ma tō ĩwasu'uwē na da te 're dapo're pu'u za'ra, daro mono bā.

Ma tō duré da te dasina 're umnhasi za'ra.

Duré rowé uptabi u ma tō mo, hāiwa u."

Āne Zezu Cristuhu wasu'uwē na Wamama hā te te dama ĩwaihu'uzé hā.

4

Danhimiroti senai'ō na rowasu'u

¹ 'Re ihāimana u'āsi mono hā, Tipē'ēzani na ma tō āne dama waihu'u: "Rob'rāsutuzéb u romhuture wapsi, te za ni'wam norī hā ĩzadawa para ō nherē, rēme za'ra, Zezu Cristuhu nhimiroti hā aré te te 're ĩsaze za'ra mono zé hā. Īhāiba'ō norī nhimiroti hā tō sena newa te za te te 're wapari za'ra, wa'uburé norī nhimiroti zarina 're nomro mono da oto." Āne ma tō dama waihu'u.

² Wa'uburé nhimiroti hā te za te te datēme 're ropé, aibā norī zadawa hawi. Aibā norī hā rotī tō sena na te te dama 're rowasu'u za'ra mono newa, te sadawa nhipese na te te dama 're rowasu'u za'ra. Tane nherē, ta norī hā 'rāwi 're siwaihu'u za'ra mono ō di, tizadawa nhipese na hā.

³ Ta norī hā te za dasina 're ĩdamro za'ra mono zé hā dawi sawi za'ra, dasina 're damro za'ra mono tō da, dasiwaprosi 're dahāimana za'ra mono da. Te za duré dasazé hā dawi sawi za'ra, marī mono bā 're dasaihuri tō mono da, 'Re ihāimana u'āsi mono hā uburé dasazé hā

te te apoto mono nherē, āma 're Īdasaihuri mono zéb da hā. Īsazei'wai mono bâ wama waihu'u pese za'ra di, dasazém na Īsimiroti hā. Āne wa, sōpru wa, āma 're wawata za'ra mono pari, wa za Īsimipoto na 're wasaihuri.

⁴⁻⁵ Uburé dasazé hā wē di, 'Re Īhâimana u'âsi mono nhimipodo hā āma 're Īwasaihuri mono zéb da hā. Wē wa, wa te wasiwi 're wē'ō za'ra mono ō di za, āma 're wasaihuri mono tō da hā. Sōpru wa, āma 're wawata za'ra mono sina, wa za āma 're wasaihuri, Īwē na te te nharī wa, 'Re Īhâimana u'âsi mono hā. Āne wamhā, tâma wē di, Īsimipoto na 're Īwasaihuri mono zéb da hā.

⁶ Tawamhā uburé te aima Ī'awaihu'uzéb zarina si, te za wasiré Īsazei'wa norī ma 're Ī'awaihu'u mo. Āne wamhā, Cristu Zezusihi ma, romhuri wē 'wa, te za tō 're aimo. Wanhib'apito nhimiroti hā wa te 're Īsaze za'ra mono zéb zarina, 're aimorī u'âsi sina, te za tâma 're Īwaihu'u u'âsi za'ra mo, roti tō sena zarina zama, āma 're aimorī u'âsi ne. Ōhō na si 're aimorī wamhā, asiptete sina te za 're aihâimana mo, Wanhib'apito āma hā.

⁷ Dahi'rata norī nhimirob'rāzarōtō 'ratara hā 're wapari mono ō di za. Ta norī hā Īsazei'ō'wa norī te hā, taré. Ta hā te za asima 're Ī'madâ'â pese mo, 're aihâimana wē mono da, Wamama nhimiroti zarina.

⁸⁻⁹ Āne wa za duré aima waihu'u. Ātē ni'wam norī hā te za te te sima 're pisutu za'ra, 're sihâiba wairob za'ra mono da, dahâiba wairobzé hā wē wa, dahâiba ma hā. Āne hā dama 're rowé za'ra mono nherē, 'Re Īhâimana u'âsi mono nhimiroti zarina 're danomro wē mono da, da te dasima 're pisutu pese za'ra mono wamhā, dama 're rowé uptabi za'ra mono di za. Rowē na te za āma 're danomro, ti'ai āma, hâiwa āma zama. Tō sena wa tō aima rowaihu'u. Āhā wasu'u hā tō sena wa, aihini te za da te āma 're saze za'ra.

¹⁰ Taha da, wa za sada 're wanhiptete u'âsi za'ra, wa te 're dapawaptob za'ra mono da, da te āma 're saze za'ra mono da. 'Re mori u'âsi wa, wa tō wasina wa te 're umnhasi za'ra, te te 're wapawaptob u'âsi za'ra mono da. Ta hā uburé Danho'reptui'wa, te 're hâimana. Īsazei'wai mono bâ te za tō te te 're wa'anho'reptu.

¹¹ Taha wa, uburé te aima Ī'awaihu'uzém na te za Īsazei'wa norī ma 're Ī'awaihu'u mo, asimiroti pire sina.

¹² Aihâiba prédu pese ō nherē, te za 're aimorī wē, aiprédu pese ō wa, asimiroti na Īsazei'wa norī hā te te 're aiwē'ō za'ra mono tō da. Te za dama 're asanho mo, aimreme wē na, duré dama aihâimana wē na, duré asimizawi pese na, duré asimirosa'rata wē na. Taha na, te za dama 're asanho mo, asirā zarina 're nomro wē mono da, Īsazei'wa norī hā.

¹³ Nimahā na wa za āma atēme wi. Ma'āpé, āma atēme Īwisi ō ré hā, dama 're sōre u'âsi mono za, 'Re Īhâimana u'âsi mono nhimiroti 'rata na rob'ui'ére hā. Te za duré Wanhib'apito wasu'uwē na dama 're Īrowasu'u u'âsi mo. Te za duré 're Īdapawaptob u'âsi mo, Īsimiroti zarina 're danomro wē mono da. Taha da, te za asina 're Ī'madâ'â u'âsi mo.

¹⁴ Marī Īwē hā ma tō Wamama hā aipé'ē 're aima tisō, āma 're Īdapawapto mono zéb da hā. Hâiwa hawi te te tâma Īwaihu'u za'ra zém na, ma tō Īsada wasu'u'wa norī hā aima waihu'u za'ra, Īwē hā te te aima Īsōmri na. Duré ma tō da'madâ'â'wa norī hā, tinhib'rada hā ai'āma sa'ra za'ra, ai'rā nhiswi. Taha ré ma tō 'Re Īhâimana u'âsi mono hā Īwē hā aima tisō. Taha zarina, te za asina tâma 're Ī'uaimrami u'âsi mo, dapawaptom na, asimirohmuri hā Wamama ma.

¹⁵ Uburé te aima Ī'awaihu'u mono zéb zarina, te za asina 're Ī'madâ'â u'âsi mo. Ōhō si te za asima 're Īpisutu pese mo, asina 're Ī'uaimrami mono zéb da si. Āne wamhā, dapawaptom na rowaihu hā asima āma 're Īsa'ētē mono na te za da te ai'āma 're waihu'u za'ra.

¹⁶ 'Re aimorī wē da, duré Ī'uwaibaba si dama 're sadawa wasu'u mono da, te za 'râwi 're asi'madâ'â pese mo. Āne wamhā, te za 're asisō'reptui u'âsi mo. Aiwapari'wa norī zama, te za 're Ī'anho'reptui u'âsi mo.

5

Īsazei'wa norī pawaptobzém na rowasu'u

¹ Ātē aibâ Īprédu hā te za tihâimanazém na 'mai'upa. Āne wamhā, aimreme Īpire na tâma nharī ō di za. Aimama ma, 're aimreme wē mono ne, te za duré aimreme wē na 're Īpawapto mo, 're morī wē da oto. Duré Īpréduptém norī hā te za aimreme wē na 're Ī'apawapto mo, aimreme wē na ano norī hā 're Ī'apawapto mono ne.

² Duré pi'ō Īprédum norī hā te za aimreme wē na 're Ī'apawapto mo, aimreme wē na ana hā 're Īpawapto mono ne. Duré pi'ō Īpréduptém norī hā te za aimreme wē na 're Ī'apawapto mo, aimreme wē na si aihidiba norī hā 're Ī'apawapto mono ne. Aiprédup sina te za ta norī ma 're aihâimana mo.

³ Pi'ōi mrotō norī pawapto'wa da hā ni'wai ō uptabi wamhā, te za marī na 're Ī'apawapto pese mo.

⁴ Pi'oi mrotō 'ra norī hā 're hāimana za'ra mono wamhā, tiwarahuzé wa'rāmi, te za tina hā marī na te te 're pawapto pese za'ra. Duré pi'oi mrotō nhihudu norī hā 're hāimana za'ra mono wamhā, tiwarahuzé wa'rāmi, te za ti'rata norī hā marī na te te 're pawapto pese za'ra. Āne te za 'Re ihāimana u'āsi mono nhimiroti zarina te te tāma āma 're uwaimrami za'ra, āne si tāma wē wa.

⁵ Pi'oi mrotō hā áté siwaprosi te 're 'manhamra. Īpawapto'wa da hā, ni'wai ō uptabi di. Tane wamhā, 'Re ihāimana u'āsi mono zō si, te za 're simnhasi, marī na te te 're pawapto mono da. Bātā na te za tāma 're mreme u'āsi, barana zama, marī na te te 're pawapto mono da.

⁶ Pi'oi mrotō hāiba amo hā, áté āne 're 'maihāimana mono ō di za. Āté marī zō si te za sina 're simnhasi u'āsi. Āne wamhā, Īpē'ē 're dā'ā u'āsi ne, te za oto 're 'maimo.

⁷ Taha wa, te za tāma 're ĩroti pese za'ra mo, ĩsazei'wa norī ma, ĩmrotō norī āma te aima ĩroti mono zé hā te te siwi 're 'madā'ā pese za'ra mono da. Tawamhā ĩsazei'wa norī hā damreme hā te te sina 're 'rā'ōtō za'ra mono ō di za.

⁸ Āté ni'wam norī hā tinhimari na te te 're pawapto pese za'ra mono ō di za, tisisānawā norī hā. Āté ĩsōrōwa 're, 're ihāimana za'ra mono norī zama, te te 're pawapto za'ra mono ō di za. Āne wamhā, Wanhib'apito nhimiroti zarina te te 're pawapto pese za'ra mono ō wamhā, te aré ĩsazei'ō'wa ne oto 're nomro. Āne wamhā, te te 're ĩpawapto za'ra mono ō na, te aré ĩsazei'ō'wa norī hā 'rānhipa za'ra, tihāimana wasété na hā.

⁹⁻¹⁰ Pi'oi mrotō hāiba tém norī nhisi na 're rob'ui'éré za'ra mono ō di za, pi'oi mrotō si'hi norī nhisi zu hā. 60 na āma 're wahub za'ra mono parip si, te za ĩsisi na da te 're rob'ui'éré za'ra, ti'amo'aba si te te 're 'madā'ā pese za'ra mono wamhā, duré ti'ra norī hā te te 're warahu wē za'ra mono wamhā, duré te te 're da'mazasi su'u za'ra mono wamhā, duré dawi 're sipa zawi za'ra mono āna, ĩsazei'wa norī ma, te te 're romhuri za'ra mono wamhā, dapara upsō na zama, duré robzei'ō na 're ĩdanomro mono norī hā te te 're pawapto za'ra mono wamhā, duré simi'ē na te te dama 're 'manharī wē u'āsi za'ra mono wamhā. Āne wamhā, pi'oi mrotō norī hā dama waihu'u pese za'ra di za, te te 're ĩdapawapto za'ra mono na, siwapto na. Tawapsi, te za ĩsisi na da te 're rob'ui'éré za'ra, pi'oi mrotō si'hi norī nhisi zu.

¹¹ Pi'oi mrotō hāiba tém norī nhisi na ĩhi norī nhisi zu, āma 're rob'ui'éré za'ra mono ō di za. E marī wa. Āté hāiba téb uptabi ré, 're mrotō za'ra mono wa, te za te te sima 're wē uptabi za'ra, timro na te te 're sahu za'ra mono da. Āté Cristuhu ma si te te 're romhuri za'ra mono da, te te sima 're wē uptabi za'ra mono ō di za oto.

¹² Tawamhā timro na te te āma 're sahu za'ra mono wamhā, Cristuhu ma, te te sina 're ĩroti za'ra mono zé hā āma 're nomro mono ō di za oto. Taha wa, áté te za oto da te dasiwi 're wē'ō za'ra, āma 're sōpré u'āsi mono ō wa.

¹³ Duré pi'oi mrotō hāiba tém norī nhisi na ĩhi norī nhisi zu, 're rob'ui'éré za'ra mono wamhā, áté dawapto na te za dama 're wa'a za'ra. Āté sihāwi na te za 'ri babap si oto 're nomro, mro ō wē te. Āté marī te te wapari wamhā, te za te te dama 're rowasu'u za'ra. Āté aimawi timreme na te za te te dawi āma 're ro'wa'rutu za'ra. Āté marī na taré 're sōpré mono āna, te za te te dama 're rowasu'u za'ra.

¹⁴ Taha wa, wa tō ĩsima wē za'ra, duré apā timro na te te 're sahu za'ra mono da, pi'oi mrotō hāiba tém norī hā. Te za duré apā 're 'ra za'ra. Tawamhā tinhorōwa āma te za ti'ra norī hā te te 're 'madā'ā pese za'ra. Āne dama 're hāimana wē za'ra mono wamhā, damreme hā te te sina 're 'rā'ōtō za'ra mono ō di za, wazawi'ō'wa norī mreme hā.

¹⁵ Āne wa tō aima waihu'u. E marī wa. Ni'wam norī hā ma tō wairé, pi'oi mrotō norī hā, Wanhib'apito nhimiroti wē nhiti, Satanasihī nhimiroti na te oto 're 'madā'ā za'ra mono da. Taha wa, wa tō āne na aima waihu'u.

¹⁶ Pi'oi hā ĩsazei'wa 're 'maimori wamhā, te za pi'oi mrotō hā marī na te te 're 'maipawapto u'āsi, tina wamhā, ti'rata wamhā. Āne wamhā, rosa'rata pire hā pi'oi mrotō norī āma te te āma 're sépata za'ra mono ō di za, ĩsazei'wa norī hā. Tāma waihu'u pese za'ra di za, pi'oi mrotō hā 'ra āna 're ihāimana za'ra mono norī si te te 're ĩpawapto za'ra mono da hā.

Īsazei'wa norī 'madā'ā wai wasu'u

¹⁷⁻¹⁸ Aibā norī hā ĩsazei'wa norī te te 're 'madā'ā wē za'ra mono wamhā, te za ĩwa'rāmi marī ĩwē hā te te tāma 're sōmri za'ra, ĩsazei'wa norī, siré 're ĩsi'rā'ōtō mono norī hā. Cristuhu wasu'u wē na te te tāma 're rowasu'u za'ra mono wamhā, duré ĩsimiroti wasu'u na te te 're pawapto za'ra mono wamhā, marī hā ĩwē hā sa'ētē na te te tāma 're ĩsōmri za'ra mono da hā, wē di. Āne hā wa tō waihu'u za'ra ni, 'Re ihāimana u'āsi mono nhimiroti 'rata hawimhā, āne:

"Powawê hã aro 'rã ne tipara na dasazéb da, te te aima 're sub za'ra wa'aba mono ré hã, 're wata wasisi za'ra wa'aba mono ô di za, 're saihuri tō mono da."

Ñe hã, 'Re ìhâimana u'âsi mono nhimiroti na rob'ui'éré 'rada hã. Duré ìsimiroti hâiba amo hã ãne:

"Romhuri'wa norĩ hã te te dama 're romhuri za'ra mono wamhã, tō t'uwaiwaba te za da te 're pawa'âbã za'ra."

Taha zarina te za ìsazei'wa norĩ hã da'madã'â'wa norĩ hã te te 're pawaptob za'ra asa, marĩ na.

¹⁹ Áté da'madã'â'wai ãma te za ni'wa hã ìwasédé hã ãma tihi. Tawamhã, siwaprosi te te ãma hiri wamhã, wapari ô di za, ìmreme hã. Áté si'ubdatô te za ãma sisadawa waptob za'ra, ãma t'madã'â'wa norĩ hã, ìwapari'wa norĩ hã. Áté maparane te za ãma sisadawa waptob zahuré. ãne wamhã, da'madã'â'wa zô te za aihã, ìhâimanazém na sadawa pibu da.

²⁰ Tawamhã tō sena tiwasédé hã te te 'manharĩ wamhã, te za ìsazei'wa norĩ nho'a tãma ìroti, tiwasété na te te ãma sahu tō da. Danho'a te za tãma ìroti, ìsipai u da'madã'â'wa hâiba amo norĩ hã sina 're hâtã'â za'ra mono wa, ìsine tiwasédé hã te te 're 'manharĩ za'ra mono tō da, ta norĩ hã.

²¹ Da'madã'â'wa hã aima sawi uptabi nherê, te za danho'a tãma ìroti, tiwasété na te te ãma sahu tō da. Asimiroti na 're da'mairême mono ô di za. 'Re ìhâimana u'âsi mono hã te we te te 're wa'ab'madã'â, Cristu Zesusihi me. Hâiwa ãma romhuri'wa norĩ zama, te duré te te we 're wa'madã'â za'ra, 're ìnomro wê mono norĩ hã. Taha wa, ta norĩ nho'a 're wanomro mono wa, da'madã'â'wa norĩ ãma te aima ìroti mono zé hã te za 're t'madã'â pese mo.

²²⁻²⁵ ãne wa za duré aima waihu'u. ìsazei'wa norĩ 'madã'â'wa da, da'maipisutu da wamhã, asapa'abã da'maipisutu ô di za, aiwara sina. Asapa'abã asib'rada hã da'rã nhisiwi 're aza'ra mono ô di za, Wanhib'apito ma, romhuri'wa da, 're da'apisutu mono da. E marĩ wa, wa ãne aima waihu'u. Asimipisudu hã dama 're hâimana wê prã za'ra mono wamhã, ìsabãdã da te dasiwi 're aiwê'ô za'ra mono ô'umhhasite. Te za 'rãwi 're asi'madã'â u'âsi mo, asimiroti na duré aihâimanazém na 're upa tō mono da.

Wa za a'ã aima waihu'u, asi'ãma waihu'u da. Â si 're hâsi mono nherê, te za oto uwa 'rãi wa'u ìsé hã syry na 're ìhâsi mo, ãma 're asiwede mono da. E marĩ da. 'Re asai mono wa, 're adi'izé u'âsi tō mono da. Aiházé hã te te aimrami siwapto wa, asib'uwa na 're aimorĩ wa, te za 're ìhâsi u'âsi mo, syry na.

ãne wa za duré aima waihu'u, da'madã'â'wa da, asapa'abã 're ìda'apisutu mono ô zém na hã za. Áté ni'wam norĩ hã sô'awi tiwasédé hã te te 're 'manharĩ za'ra mono wamhã, ìwasété na dama waihu'u pese za'ra di za, 'Re ìhâimana u'âsi mono hã bãtã na dahâimanazém na te te da'awaihu'u ô ré hã. Áté nimahã na si te za ta norĩ hã ìwasété na da te 're waihu'u za'ra. Áté ni'wam norĩ hã te te dama 're t'manharĩ wê za'ra mono zém na, dama waihu'u pese za'ra di za. Áté nimahã na si te za ta norĩ hã da te 're waihu'u za'ra, te te dama 're t'manharĩ wê za'ra mono zém na. ãne wa, wa tō ãne na hã aima roti, asapa'abã 're da'apisutu tō mono da, da'madã'â'wa da hã.

6

¹ Ìwada'uri zarina si, pawa'âbã ãna dama romhuri'wa norĩ hã te za titede'wa hã ìsimiroti na te te 're wazéb za'ra. ãne 're hâimana za'ra mono ô wamhã, áté te za 'Re ìhâimana u'âsi mono nhisi na da te ãma 're wasété za'ra. Áté wa'ãma zama te za duré da te 're wasété za'ra, ìsazei'wa norĩ ma, wa te 're roti wasété za'ra mono newa.

² Áté pawa'âbã ãna dama romhuri'wa norĩ tede'wa hã te za ìsazei'wa 're 'maimo. E tawamhã ìmreme hã te te 're 'madã'â pese za'ra mono ô di za, ìsisãnanawã ne tãma 're 'mai'hâimana mono nherê, ìtede'wa hã. Mare di. ìsimiroti na te za te te 're wazéb za'ra. ìsazei'wa 're 'maimorĩ wa, duré tãma sawi pese za'ra wa, te za titede'wai ma, te te tãma 're romhuri wê uptabi za'ra. ãne na te aima 're ìroti mono zéb zarina, te za ìsazei'wa norĩ ma 're t'aroti pese mo, ãma 're nomro wê mono da.

³⁻⁵ Áté ni'wam norĩ hã aimawi na te za ìsazei'wa norĩ ma te te tãma 're rowasu'u za'ra. Áté Wanhib'apito Zezu Cristuhu nhimiroti na te te ãma 're saze za'ra mono ô di za, ta norĩ hã, tō sena nherê, Wanhib'apito nhimiroti hã rowê na ãma 're ìdanomro mono zéb da hã, duré dawê na si ãma 're ìdanomro mono zéb da hã. ãne wamhã, roti tō sena hã tãma waihu'u za'ra ô di za. Taré te za tinhimiroti wê na 'rãwi sina 're wata za'ra. Ta norĩ ma, wê di, marĩ wasu'u na 'rãwi ãma 're ìsada'âbã za'ra mono da hã, duré 'rãwi timreme na 're ìsi'wapé za'ra mono da hã. Taha zarina, te za tisi'ruiwapari na te te sima ãma 're wa'rãmi za'ra, ãma 're sisada'âbã za'ra mono da. Te za duré te te 're dawasu'u wasété za'ra. Te za duré si'ãma te te 're rosa'rata wasété za'ra. Roti tō sena hã tãma waihu'u pese za'ra ô wa, roti tō sena zarina si te te 're

rosa'rata wê za'ra mono ô di za. Ta norî hâ te te sima 're rosa'rata siwamnari' za'ra, Isazei'wa norî hâ rob'uprazé hâ te te tâma 're sômri za'ra mono da, Isimirowasu'u wa'râmi, sibro pese na 're hâimana za'ra mono da.

⁶ Re îhâimana u'âsi mono nhimiroti 'madâ'â'wa, 're wanomro mono wamhâ, duré marî zô si wasima 're wanhopré mono âna 're wanomro mono wamhâ, wama 're rowê uptabi za'ra mono di za.

⁷ E rob'uprazé ma tô wazababa 're wairébé, wana dub're hawi 're wapoto za'ra mono wamhâ. Mare di. Wa'ubana wa tô 're wapoto za'ra. Duré 're wadâ'â za'ra mono wamhâ, e wanhimari hâ wa za wasiré wa te 're 'wasari. Mare di.

⁸ Taha wa, ti'ab ré, wasai ré 're wahâimana za'ra mono wamhâ, duré wa'uza ré 're wahâimana za'ra mono wamhâ, marî zô si wasima 're wanhopré za'ra mono ô di za, marî na wa te wasima âma 're îrowé za'ra mono zéb da hâ.

⁹ Rob'uprazéb zô, da te dasima 're rosa'rata siwamnari' u'âsi za'ra mono wamhâ, âté te za da te 're wapari za'ra, rob'uprazém na wa'uburé te te dama 're î'aroti wasété mono zé hâ. Âne wamhâ, âté Isimiroti hâ da te 're rême waihu'u za'ra mono ô di za oto. Âté rosa'rata âna te za Isimiroti zarina, marî zô si oto da te 're rob'ruiwapari za'ra, marî wasété zô zama. Âne wamhâ, te za oto dawî tirobzei'ô pese za'ra. Rowê u'âsi 're îdanomro mono zé hâ tâma 're hâimana za'ra mono ô di za oto.

¹⁰ E marî wa. Rob'uprazéb zô si, da te dasima 're rosa'rata za'ra mono wamhâ, siwa'ru te za marî hâ iwasédé hâ da te 're 'manhari' za'ra. Ni'wam norî hâ roti wê hâ aré te te 're isaze za'ra mono zém hawi, ma tô 're sipa za'ra, rob'uprazéb zô si te te sima 're rob'ruiwapari za'ra mono wa. Ta norî hâ te oto robzei'ô si te te 're sêpata za'ra.

¹¹ A hâ 'Re îhâimana u'âsi mono ma romhuri'wa. Taha wa, ta norî ne 're aimorî ô di za. Te za 're aihâimana wê u'âsi mono, 'Re îhâimana u'âsi mono nhimiroti zarina si. Ôhō si te za 're î'madâ'â pese mo, 'Re îhâimana u'âsi mono si, ai'âma 're siwârî u'âsi mono da. Te za duré 're îda'azawi pese mo. Rowsédé hâ taré da te aima 're 'manhari' za'ra mono nherê, asiptete sina te za Wanhîb'apito âma 're aimorî u'â. Atoi u'âsi te za 're aimo. Taha na si 're aimorî da, te za asina 're î'madâ'â u'âsi mo.

¹² A hâ Isazei'wa, 're aimorî wa, te za sô 're asi'wapéi u'âsi mo, 're î'aimorî wê zéb zô, rowê u'âsi 're aihâimana u'âsi mono zéb da hâ, hâiwa âma hâ asina uwaimrami da. Taha da, ma tô bâtâ na apisutu 'Re îhâimana u'âsi mono hâ, da'ahâ norî nho'a Isazei'wa na asiwaihu'u wê zém na.

¹³⁻¹⁴ Âhâna, wa za aima pisutu, uburé te aima îroti mono zé hâ asina 're 'madâ'â u'âsi mono da. 'Re îhâimana u'âsi mono nho'a, wa aima pisutu, ti'ai âma 're îdanomro mono zé hâ te te dama 're î'apisutu mono nho'a. Cristu Zesusihî nho'a zama wa aima pisutu, Pôsi'u Piratuhu ma, tihâimanazém na îsiwaihu'u wê nho'a zama. Uburé te aima îroti mono zé hâ te za asina 're î'madâ'â u'âsi mo, apâ we îmorizéb u, Wanhîb'apito Zezu Cristu hâ. Asina 're 'madâ'â u'âsi mono wamhâ, tawamhâ da te aima 're nharî za'ra mono ô di za, asina 're î'madâ'â mono ô zém na hâ.

¹⁵ Bâdâ te te îpisutuzém na te za 'Re îhâimana u'âsi mono hâ tâma tinha, apâ wei morî da, Wanhîb'apito hâ. Wê uptabi di, 'Re îhâimana u'âsi mono hâ. Ôhō si uburé Danhîb'apito uptabi. Uburé ti'ai âma danhîb'apito norî nhîpai u, pire uptabi di. Uburé dama îpire norî nhîpai u, pire uptabi di.

¹⁶ Ôhō si siwaprosi 're îmorî u'â hâ. Ta hâ, rowa'a za'êté na te 're hâimana u'âsi. Taha wa, ni'wa hâ îtême Îsêbré da hâ mare di. Da te dasiwi îhâiba pibu da hâ, mare di duré. Ta hâ wê uptabi di. Waihu'u pese di duré. Taha wa, wa za âma 're wawata u'âsi za'ra.

¹⁷ Âne te za duré Îsîbrob ahâ norî ma 're î'aroti mo, sibrob ahâ wê te, 'râwi sina 're wata tô za'ra mono da. Danhîbro hâ dama 're hâimana u'âsi za'ra mono ô di za, dama âma 're îrowé za'ra mono zéb da hâ. Taha wa, tinhîbrop si te te 're 'madâ'â za'ra mono ô di za. 'Re îhâimana u'âsi mono zô si, te za 're simnhasi za'ra, taha si, marî wê na uburé wama 're sôpru mono wa, wama âma 're îrobze za'ra mono zéb da hâ.

¹⁸ Âne te za duré Îsîbrob ahâ norî ma 're î'aroti mo, te te dama 're 'manhari' wê u'âsi za'ra mono da. Te za duré uburé marî wê na dama 're sôprub za'ra. Te za duré simi'ê na marî na te te 're dazari u'âsi za'ra.

¹⁹ Âne wamhâ, îte uptabi da hâ te za marî hâ îwê hâ sô 're simi'wara u'âsi za'ra, niwab da hâ. Duré rowê u'âsi te za ta norî hâ 're hâimana u'âsi za'ra, hâiwa âma.

²⁰⁻²¹ Timotiu, ma'âpé roti hâ tô sena si asina 're 'madâ'â u'âsi mono za, 'Re îhâimana u'âsi mono te te aima îwaihu'uzé hâ, âma 're îda'apawapto mono zéb da hâ. Ni'wam norî hâ taré te dama 're siwasu'u za'ra, roti tô sena hâ tâma îwaihu'u za'ra na hâ. Tane nherê, Zezu Cristuhu nhimiroti hâ wa te 're isaze za'ra mono zém hawi, ma tô ta norî hâ 're sipa za'ra. Ta norî hâ

te te dama 're ĩrowasu'u za'ra mono zé hã, Wanhíb'apito nhimiroti zarinaĩ õ di. Taha wa, roti tō senai'õre wi, te za asina 're asiptete u'âsi mo, 're wapari tō mono da.

Wa ĩsima aiwē za'ra wa'wa, rowē u'âsi 're anomro aba mono da, Wamama te te 're ĩ'aipawaptob za'ra wa'aba mono zéb zarina si.

2 Timotiu

Paru hã, maparane ãma te te duré ĩrob'ui'ééréz, Timotiuhu ma ĩbaihã wasu'uzé

Ã ĩbaihã na ma tã Paru hã Timotiuhu ma tinhimĩ'ui'ééré na tãma ãma sahu, maparane ãma. Roma ãma dazazéb 're, hãimana sirõmo, ma tã tãma rob'ui'ééré. Tidã'ázé hã ma tã sina waihu'u, ĩromhutu na hã oto. Taha wa, ma tã tãma roti, Timotiuhu ma, 'Re ĩhãimana u'ãsi mono si te te sina 're umnhasi pese mono da, duré Zezusihi ma, te te 're romhuri wẽ mono da zama. Ma duré tãma waihu'u, da'madã'ã'wa na sena na 're hãimana mono da.

¹⁻² ĩ'ra Timotiu, ĩma asawi pe hã, wa hã Paru wa ãma aima rob'ui'ééré. 'Re ĩhãimana u'ãsi mono hã te te sima ĩwẽzéb uwaiwaba, ma tã ĩpisutu, Cristu Zezusihi zadawa wasu'u'wa, 're ĩmorĩ da. 'Re ĩhãimana u'ãsi mono hã ma tã dama ropisutu, rowẽ na ĩ'rata 're dahãimana u'ãsi za'ra mono da, Cristu Zezusihi ãma 're danomro mono wa. ãne wa, taha wasu'u na te dama 're rowasu'u mono da, ma tã oto datẽme ĩzatõ.

Wamama ma, wa ai'ãma 're ĩmreme u'ãsi, 'Re ĩhãimana u'ãsi mono ma, duré Wanhib'apito Cristu Zezusihi ma zama, ĩsimizawizé hã ai'ãma 're hãimana u'ãsi mono da, duré ai'ãma 're pẽ'ézẽ u'ãsi zahuré mono da, rowẽ u'ãsi, ãma 're aimorĩ da.

Paru hã Timotiuhu ma, te te ĩrotizé wasu'u

³ 'Re ĩhãimana u'ãsi mono ãma, wa 're ĩwata u'ãsi. Marĩ na te tiwi ãma ĩ'upazém na, te te oto ĩ'ãma 're ab'madã'ã mono õ wa, wa oto rowẽ na te tãma 're romhuri u'ãsi. Tane duréihã ma tã duré ĩhi'rata norĩ hã te te tãma 're romhuri za'ra. Tawanhã tãma 're ĩmreme mono wanhã, bãtã na wa aima te tiwi 're rowaptẽrẽ u'ãsi, barana zama, te te 're aipawaptob u'ãsi mono da.

⁴ Aiwa'õzém na ai'ãma ĩpo're pu'u wa, wa ĩsima rowẽ za'etẽ, te asabu da, rowẽ uptabi na 're ĩhãimana mono da.

⁵ Duré Wanhib'apito zazei'wa na tã sena 're aihãimana mono na, wa ai'ãma po're puru. Ai'rada Ro'idi norĩ hã ma tã ana me hã Wanhib'apito zazei'wa na 're hãimana zahuré, E'unisihi me. Ta norĩ ne, tã sena Wanhib'apito zazei'wa 're aimorĩ na, tã ĩma aiwaihau'u pese di.

⁶ ãne wa, wa za ãma aipo're pu'u oto, 'Re ĩhãimana u'ãsi mono hã sõpru wa, te te aima ĩsõmrizém na, dapawaptom na tãma 're romhuri mono da. Ai'rã nhisiwi ĩnhĩb'rada hã te hiri wanhã, ma tã aipẽ'ẽ 're aima tisõ, ĩwẽ hã. Taha wa, ma'ãpé asimi'ẽ na tãma 're romhuri u'ãsi mono.

⁷ E wasina wapahi sina 're wahãimana za'ra mono da, ma tã 'Re ĩhãimana u'ãsi mono hã Tipẽ'ẽzani hã te te wama 're anhomrĩ. Mare di. Wanhĩptete sina ãma 're wahãimana za'ra mono da, duré wanhimizawi pese sina 're wahãimana za'ra mono da, duré wanhimirosa'rata na hã atãma 're wahãimana za'ra mono da, ma tã te te wama 're anhomrĩ, Tipẽ'ẽzani hã.

⁸ ãne wanhã, 're asisé mono õ di za, Wanhib'apito wasu'uwẽ hã dama 're wasu'u tã mono da. Duré ĩma 're asisé mono õ di za, ĩwasu'u na. Wanhib'apito wasu'uwẽ na te dama 're rowasu'u mono 'ru te, ma tã dasiwi ĩnherẽ ni, dazazéb 're. Taha wa, wa oto te 're robzẽpata. ãne wa, ma'ãpé 'Re ĩhãimana u'ãsi mono hã tinhiptede te te aima ĩsõmri na, sada 're asiptete mono, ĩsine 're robzẽpata mono da.

⁹ 'Re ĩhãimana u'ãsi mono hã ma tã te te 're wa'anho'reptu, rowsasété hawi. Ma tã duré te te sima 're wa'apisutu, ĩsib'a'uwẽ oto 're wahãimana za'ra mono da, wawẽ uptabi na. E marĩ wa, ma tã sima wa'apisutu. E marĩ ĩwẽ hã wa te dama 're 'manharĩ za'ra mono wa. Mare di. Taha wab õ di. Taré te te sima 're wa'awẽ mono wa, duré simizawi pese wa, ma tã te te 're wa'anho'reptu. Ma tã duré wa'ãma tinhib'a'uwẽ za'ra. Zahadu ropoto na te te sãna'rata õ ré hã, 'Re ĩhãimana u'ãsi mono hã simizawi pese wa, ma tã sima wa'ãma roti sirõmo za'ra, te te 're wa'apawapto mono da, Cristu Zezusihi nhiminho'reptuzém na hã.

¹⁰ Wanho'reptui'wa Cristu Zezusi we datẽme ĩwisizém na, ma tã oto wama siwaihau'u za'ra, tinhimipawaptobzém na. 'Re idadã'ã za'ra mono zé wasu'u hã, pipa nherẽ, ma tã wawi uprosi za'ra wapahi hã, Wanho'reptui'wa hã. Duré Wanho'reptui'wai wasu'uwẽ hã wa te 're Isaze za'ra mono zéb zarina, ma tã wama waihu'u za'ra, rowẽ na 're idahãimana u'ãsi za'ra mono zé wasu'u na hã.

¹¹ Taha wasu'uwẽ na te 're da'apo're pu'u mono da, ma tã 'Re ĩhãimana u'ãsi mono hã ĩpisutu, Wanhib'apito zadawa wasu'u'wa 're ĩmorĩ da, ĩsimiroti na te 're da'apawapto mono da.

¹² Taha wa, te te ĩpisutuzéb zarina, te ĩsina uwaimrami wa, wa oto te 're robzépata. Tane nherê, 're ĩnhisé mono ô di, ĩsada wasu'u'wa 're ĩmorĩ tã da. Wanhĩb'apito hã wa ĩsina te 're umnhasi, te te 're ĩpawaptob u'ási mono da. Ta hã ĩma waihu'u pese di, ĩwaihu'u pese na hã. Wa hã wa tã tãma ĩsihãiba nho, tã sena tãma waihu'u pese wa, te te 're ĩmadã'ã mono zéb da hã, bãdã ĩwa waptã'ã ô ré, apã we ĩmorĩzéb u hã.

¹³ Āne wamhã, roti tã sena hã te aima 're ĩ'awaihu'u mono hã, te za 're ĩmadã'ã u'ási mo. Cristu Zezusihi ãma 're aimorĩ wa, te za Wanhĩb'apito umnhasi sina, 're aihãimana mo. Te za duré 're ĩda'azawi pese mo.

¹⁴ Roti tã sena hã te aima 're ĩ'awaihu'u mono hã, wẽ uptabi di. Ta hã te za 're ĩmadã'ã pese mo, ãma 're ĩda'apawapto mono da hã, aimawĩ rowasu'u na da te ãma saprĩ za'ra tã da. Taha da, te za te 're aipawaptob u'ási, 'Re ĩhãimana u'ási mono pẽ'êzani hã, wapẽ'ê 're, 're ĩhãimana mono hã.

¹⁵ Azi'a na danhipti'a nho'õmo nhisi ãma, uburé ĩsazei'wa norĩ hã ma tã ĩrẽme za'ra. Pideru norĩ zama, ma tã Emozenihi me dame ĩrẽme zahuré. Āne hã aima waihu'u pese di.

¹⁶⁻¹⁷ Onesiporuhu si ma tã tinhimipawaptobzẽm na nasi ĩma rowẽ zani. Taha wa, wa ĩsima wẽ, Wanhĩb'apito hã Onesiporu norĩ hã, duré ĩsõrõwa ãma ĩsiré 're ĩhãimana za'ra mono norĩ zama, ĩwẽ na te te 're apawapto mono da. Ta hã ĩma 're sisé mono ô di, ĩwasu'u na hã. Taha wa, Roma na 'ri nho'õmo nhisi u wei wisi wamhã, ma tã te te ĩzõ aba, te te ĩnhopetẽ da.

¹⁸ Āne wa, wa ĩsima wẽ, Wanhĩb'apito hã ĩwẽ na te te ãma tãma uwaimrami da, bãdã ĩwa ĩwaptã'ãzẽm na, dahãimanazẽm na te te ĩda'awaihu'uzéb da hã. Onesiporu hã ma tã marĩ mono bã nasi ĩpawapto, Ēpẽzu ãma 're ĩhãimana mono ré hã. Āne na hã aima waihu'u pese di.

2

Paru hã ĩmotiuhu ma, roti te te tãma ĩsõmrizẽm na rowasu'u

¹ ĩ'ra, ma'ãpẽ ĩwapari pese, asina. Cristu Zezusihi ãma wa 're wanomro. Āne wa, te za ĩsimipawaptobzéb zarina, asiptete sina ãma 're aihãimana mo.

² ĩnhimirowasu'u hã ma tã aipo're na 're ĩwapari mo, ĩsazei'wa norĩ nho'a te dama 're rowasu'u mono wamhã. Ta norĩ hã ahã di. Tawamhã 're ĩ'awapari mono zé hã te za aibã norĩ ma 're ĩ'awaihu'u mo, aima ĩ'umnhasi za'ra norĩ ma hã, tãma waihu'u pese za'ra wamhã, ĩnhimirowasu'uzẽm na te te duré ãma 're uzusi za'ra mono da, dapawapto ma.

³ Da'wapẽi'wa dama ĩ'umnha hã dasi'wapẽi 're, hãimana wamhã, te te 're robzépata tã mono da, sisawĩ ô di za. Tane a hã, Cristu Zezusihi nhĩb'a'u'uwẽ na 're aihãimana mono wa, te za asina 're ĩsazei u'ási mo, asisawĩ ãna ĩsine 're robzépata mono da.

⁴ Da'wapẽi'wa norĩ hã tinhib'apito ma te te 're romhuri za'ra mono ré hã tãma wẽ za'ra di, ĩsĩb'apito ĩsimiromhuri na te te 're awẽsãmri mono da. Āne wa, tinhimiromhuri upana, marĩ mono bã te te sima 're rosa'rata za'ra mono ô di za, te te sima ãma 're uwaimrami za'ra mono da.

⁵ Duré, ni'wa hã dawara na hãimana wamhã, dawĩ watobro nherẽ, marĩ ĩwẽ hã te te sima ãri ô di za, dawara na roti hã te te sina 'madã'ã ô wamhã. Dawara na roti hã te te sina ĩ'madã'ãzéb zarina si, te za marĩ ĩwẽ hã sima ti'ã, dawĩ watobro wamhã.

⁶ Duré, buru na romhuri pire 'wa hã, amnho hã uburé da te ubumroi pari, ĩmorĩ'rata na te za tite da ãri 'rata.

⁷ Ma'ãpẽ, ãma 're rosa'rata u'ási mono, te aima ĩrowasu'uzẽm na hã. Āne wamhã, Wanhĩb'apito hã te za te te 're aipawapto, ãhã wasu'u na hã 're awaihu'u mono da.

⁸ Ma'ãpẽ, Zezu Cristuhu ãma 're rosa'rata pese mono. Ta hã dã'ã nherẽ, ma tã ab're hawĩ hãiwa'udu, Dawihĩ nhĩhudu hã. Wanhĩb'apito wasu'u'uwẽ na te 're dã'apo're pu'u mono wamhã, taha wasu'u na wa tã te dama 're rowasu'u u'ási.

⁹ Tawamhã Wanhĩb'apito wasu'u'uwẽ na te dama 're rowasu'u mono 'ru te, wa oto te 're robzépata. ĩwasédé hã te 're manharĩ mono newa, wa oto 're ĩza, dazazéb 're, ĩsi'uwazi nhorõ rutu na ĩpawasisi ré. Tane nherẽ, 'Re ĩhãimana u'ási mono zadawa wasu'u hã pawasisi ãna ne, te 're hãimana u'ási. Te za da te dama ãma 're rowasu'u u'ási za'ra.

¹⁰ Te ĩrobzépata da hã ĩma pire nherẽ, ĩsisawĩ ô di, te robzépata tã da hã. Te 're robzépata mono nherẽ, 'Re ĩhãimana u'ási mono hã tinhib'a'u'uwẽ da, te te sima ĩpisutu za'ra norĩ hã wa za te 're apawaptob u'ási, Cristu Zezusi hã te te 're saze za'ra mono da, taha zarina tinho'reptuzé hã te te sina 're uwaimrami za'ra mono da, rowẽ na ĩ'rata 're hãimana u'ási za'ra mono da.

¹¹ Tã sena da te dasima 're ĩrowasu'u za'ra mono zé hã ãne:

"Cristuhu siré 're wadã'ã za'ra mono wa, duré ta hã dã'ã uptabi nherẽ, ab're hawĩ hãiwa'utu wa, wa za ĩsiré 're wahãimana u'ási za'ra.

¹² Robzépada hã wa te wasina 're waihu'u za'ra mono nherê, wanhiptete sina âma 're wahâimana u'âsi za'ra mono wamhã, wa za Cristuhu siré wapire na wa te 're da'madâ'â u'âsi za'ra. Cristuhu zazei'ô'wa na dama 're wasiwasu'u za'ra mono wamhã, tizazei'wa na te te sina 're wa'awaihu'u mono ô di za. Te za te te siwi 're wa'awê'ô oto.

¹³ Wa norî hã Wanhib'apito ma, wa tô wasina tâma ropisutu za'ra ni, âma 're wanomro u'âsi mono da. Tawamhã wa te wasina âma tâma 're uwaimrami za'ra mono ô nherê, Wanhib'apito hã wama umnhasi za'ra di, uburé te te wama 're î'aropisutu mono zé hã te te wama âma 're î'a'uwaimrami mono zéb da hã. Marî na taré te te dama î'aropisutu da hã, mare di."

¹⁴ Âhã wasu'u na te za asimi'madâ'â norî hã âma 're îpo're pu'u za'ra mo. Te za duré aihâimana prédup sina tâma 're î'aroti mo, 'Re îhâimana u'âsi mono nho'a 're wahâimana za'ra mono nherê, taré marî wasu'u na 're sisada'âbâ za'ra mono tô da. Dasisada'âbâzê hã wê ô wa, taha zarina 're dahâimana za'ra mono wamhã, te za dawî 're si'utô'î, dahâimana wê zé hã.

¹⁵ Romhuri'wa nhimiromhuri hã wê wamhã, tinhimiromhuri ma, 're sisé mono ô di za. Tane te za sada 're asiptete u'âsi mo, î'uwaibaba si roti tô sena na si 're da'apawapto mono da, asimirohuri na te te 're aiwêsâmri mono da, 'Re îhâimana u'âsi mono hã.

¹⁶ 'Re îhâimana u'âsi mono nhimiroti zarinaî ô na rowasu'u'wa norî nhiti, te za 're aihâimana mo. Ta norî nhimirowasu'u zarina, 're dahâimana za'ra mono wamhã, te za danhimirosa'rata na dasina 're dapahâ za'ra, Wamama nhimiroti nhiti.

¹⁷ Ta norî nhimirowasu'u hã da'wa're ne, te 're hâimana. Da'wa're hã sa'etê wamhã, te za uprosi, danhi hã. Tane, ta norî nhimirowasu'u hã îsazei'wa norî âma te te ropéi mono wamhã, te za tiwi uprosi za'ra, dahâimana wê zé hã. Tane, Imenezu norî nhimirowasu'u hã Piretuhu nhimirowasu'u na me.

¹⁸ Ta norî hã senai'ô na rowasu'u na te te dama 're rowasu'u zahuré, âne: "Tâibã, bâdã ma tô îwa waptã'ã pa, 'Re îhâimana u'âsi mono ab're hawî te te îda'ahâiwa'utuzéb da hã. Niwab da hã te te âma sahu ô di za, te te îda'ahâiwa'utuzém na hã." Âne ta norî nhimirowasu'u hã. Taha zarina ma tô dawî uprosi zahuré, Wanhib'apito wasu'uwê na da te 're îsaze za'ra mono zé hã.

¹⁹ Tane nherê, êtê 'manharî na 'ri na'rada hã, siptete na 're îhâimana mono ne, te za 'Re îhâimana u'âsi mono nhimiroti hã pire na 're hâimana u'âsi. Âne îsimiroti na rob'ui'éré hã: "Wanhib'apito hã te za tinhib'a'uwê norî hã tite na te te 're awaihu'u." Âne duré âma îrob'ui'éré hãiba amo hã: "Ni'wam norî hã Wanhib'apito nhib'a'uwê na dama 're siwasu'u za'ra mono wamhã, te za tiwasédé hã rême pese za'ra, 're nomro wê mono da oto." Âne îsimiroti na rob'ui'éré hã.

²⁰ 'Ri wawê âma hã piza hã ahã na te 're hâimana za'ra, êtê'ubuzi pré oru 'manharî hã, duré êtê'ubuzi'a'prata 'manharî hã, duré wede 'manharî hã, duré zé'a 'manharî hã. Nima norî hã, marî da hã wê uptabi di, marî hã da te âma 're î'manharî za'ra mono zéb da hã. Duré nima norî hã marî da hã wê uptabi ô di, marî hã da te âma 're î'manharî za'ra mono zéb da hã.

²¹ Tane ni'wam norî hã te aima îwaihu'u mono zéb zarina, tô senai'ô na rowasu'u'wa nhimiroti hã te te siwi 're wê'ô pese za'ra mono wamhã, Wanhib'apito ma, wê uptabi di za, romhuri hã za te te tâma 're î'apisutu mono da hã. Âne wa, Wanhib'apito ma, sisômri za'ra wa, te za tâma pisutu za'ra, îwê na te te tâma 're dapawapto za'ra mono da.

²² Âne wa, dahâiba téb ré, dawasété zô 're îdasidasutu za'ra mono norî ne, 're aihâimana mono ô di za. Te za asina 're îrosa'rata u'âsi mo, aihâimana wê na 're aihâimana mono da, duré Wanhib'apito umnhasi sina 're aihâimana mono da zama, duré asimizawi pese na 're aihâimana mono da zama, duré rowê na si dasiré 're aihâimana mono da zama. Taha da, te za asina 're îrosa'rata u'âsi mo, uburé Wanhib'apito zazei'wa norî me, hâimana wê sina, îsimipawaptozbéb zô te te tiwi 're îrowaptêrê za'ra mono norî me.

²³ Siwa'ru marî na 're dasisada'âbâ za'ra mono wamhã, 're dawapari mono ô di za. Âne, da te 're dazada'âbâ za'ra mono wamhã, te za oto damreme na 're dasi'wapé za'ra. Âne na aima waihu'u pese di.

²⁴ Ni'wa hã Wanhib'apito ma romhuri'wa na 're hâimana mono wamhã, timreme na te te 're da'a'wapéi mono ô di za. Simizawi pese na te za dama 're hâimana, aihîni ma. Waimri na te za duré te te dama 're arowaihu'u, waptu na dazada 're sahi mono âna.

²⁵⁻²⁶ Ni'wam norî hã îsimiroti na hã sada 're hâimana za'ra mono wamhã, atâma te za tinhimiroti wê na te te 're pawapto za'ra, tinhimirosa'rata na te te âma saprî za'ra da, Wamama nhimiroti hã tô sena na te te sina waihu'u za'ra da oto, îsimipawaptozbéb zarina. Wa'uburé norî nhib'apito hã ma tô aré tâma 're sadawa nhipese za'ra, te te sima 're îda'awê mono zéb uwaibaba, îsimiroti na 're hâimana za'ra mono da. Tane nherê, a'uwê norî

hã tinhimirosa'rata na te te âma saprĩ za'ra wamhã, te za oto Wa'uburé nhimiroti hawi 're wairébé. Taha da, te za Wanhib'apito ma romhuri'wa hã atãma te te 're apawapto, tinhimiroti wê na hã.

3

Rob'rāsutu u, za 're idahãimana wasété za'ra mono zém na rowasu'u

¹ Wa za oto marĩ na aimã rowasu'u, âma 're rosa'rata mono da. Nimahã na rob'rāsutu u hã romhuture wamhã, dama ropire di za.

² Âne dahãimanazé hã za: Dasima si te za marĩ zô 're danhopré. Duré rob'uiprazéb zô si te za da te dasima 're rob'ruiwapari za'ra. Duré 'rãwi dapê'ê na, te za marĩ na dasina 're dawata za'ra. Duré te za da te dasima 're nharĩ wasété za'ra. Duré marĩ na dama 're danhoprub za'ra mono nherê, danhoprum na da'âma 're dawata za'ra mono ô di za. Duré damama norĩ nhimiroti hã da te 're wapari za'ra mono ô di za. 'Re ihãimana u'âsi mono nhimiroti hã da te 're wazéb za'ra mono ô di za duré.

³ Duré 're idasisawi pese za'ra mono zé hã dama 're hãimana mono ô di za, dapê'ê 'remhã. Duré da'âma dapê'êzézé hã dama 're hãimana za'ra mono ô di za. Duré taré te za dawasédé hã da te da'âma 're sa'ra za'ra. Duré dawasété wi dasina 're danhiptete za'ra mono ô di za. Duré dazahi u'âsi te za 're dahãimana za'ra. Duré 're idahãimana wê za'ra mono norĩ hã te za taré dasi'upana da te 're ruiwapari za'ra.

⁴ Duré dasiré nherê, te za 'rãwi dasisada 're dahãimana za'ra. Duré dapê'ê 're, rosa'rata waptu na, marĩ iwasédé hã te za da te 're 'manharĩ za'ra. Duré danhipai u dawaihu'u pese newa, te za 'rãwi dapê'ê na dasina 're dawata za'ra. Duré 'Re ihãimana u'âsi mono zawĩ'wa, 're danomro mono ô di za. Ta hã dama wê ô di za. Dato si dama iwê hã za oto.

⁵ 'Re ihãimana u'âsi mono nhimiroti na 're dahãimana wê za'ra mono da, da te dasima 're wê za'ra mono newa, tazahã, da te dasima 're wê za'ra mono ô di za, tiwaihu'u pese na te 're ida'apawapto mono da hã, âma 're idahãimana wê za'ra mono zéb da hã. Taha wa, te za ta norĩ nhiti 're aihãimana mo.

⁶ Ta norĩ hã hãimana nhipese na danhorôwa u te za datême 're sihutu. Te za pi'ô norĩ hã tizadawa nhipese na te te 're 'rãmi za'ra. Tawamhã sib'uwa na 're hãimana za'ra mono wamhã, te za te te âma 're sasômri za'ra. Pi'ô norĩ hã marĩ ahã na te te 're 'manharĩ wasété za'ra mono wa, te za robzei'ô na 're hãimana za'ra. Siwa'ru te za ta norĩ hã 're hãimana za'ra, te te sima 're iwê za'ra mono zéb uwaibaba.

⁷ Pi'ô norĩ hã, ni'wam norĩ nhimirowasu'u hã te te 're wapari ze za'ra mono nherê, roti tô sena hã niwa te te iwaihu'u za'ra da hã, mare di za.

⁸ Duréihã ma tô aibã norĩ hã Mozésihi nhimiroti da, sada 're hãimana zahuré, Zanesi norĩ hã Zabirihĩ me. Tane ahãna senai'ô na rowasu'u wa norĩ hã te tô sena roti zada 're hãimana za'ra. Ta norĩ nhimirosa'rata wê hã robaba di. Duré Wanhib'apito âma Isimirowasu'u hã tô senai ô di. Taha wa, te za 'Re ihãimana u'âsi mono hã ta norĩ hã te te siwi 're awê'ô.

⁹ Zanesi norĩ hã Zabirihĩ me, ma tô dasiwi waihu'u zahuré ni, Isimiza'rese'ô na. Tane te za oto Isimiza'rese'ô na dasiwi waihu'u za'ra ni, senai'ô na rowasu'u wa norĩ hã. Tawamhã ta norĩ nhimirowasu'u hã da te 're wapari hã za'ra mono ô di za oto.

Paruhu nhimiroti 'rāsutu na rowasu'u

¹⁰⁻¹¹ A hã ma tô iwaihu, ãnhimiroti na, duré ihãimanazém na, duré dapawaptom na ãnhimiromhuri na te ãsina 're iroti mono zém na, duré Wanhib'apito umnhasĩ sina 're ihãimana mono zém na, duré da'âma iwa'a su'u ô na 're ihãimana mono zém na, duré te 're ida'azawi pese mono zém na, duré marĩ ahã na izada 're hãimana mono nherê, Wanhib'apito âma ãsina ãnhiptete sina 're ihãimana mono zém na zama. Ma tô duré iwaihu, da te ãma 're irob'manharĩ wasété za'ra mono zém na hã, duré te 're irobzépata mono zém na hã. Ma tô duré iwaihu, marĩ hã izô 're iwairébé mono zém na hã. Âtizotiza na 'ri nho'ômo nhisi âma, duré Iconizu âma, duré Risitira âma. Ípipa na da te ã'âma 're rob'manharĩ wasété za'ra mono wa, wa tô te 're robzépata za'êtê. Tane nherê, idá'á tô da, ma tô Wanhib'apito hã nasi ãnho'reptu a'ã.

¹² Cristu Zesusihĩ âma 're dahãimana wê za'ra mono da, da te dasima 're wê za'ra mono 'ru te, dasi'uihã na te za tô Isazei'wa norĩ ma, da te 're rob'manharĩ wasété za'ra.

¹³ Iwasété norĩ hã, duré ihãimana nhipese norĩ hã te za 're siwasété pese za'ra. Ísada wa nhipese na te za da te âma 're sasômri za'ra. Te za duré dapê'ê 're dasima 're dazadawa nhipese za'ra.

¹⁴ Tane nherê, ta norĩ ne 're aihãimana mono ô di za. Tô sena roti hã ma tô dawĩ 're i'waihu'u mo. Taha na si te za 're aihãimana u'âsi mo. Roti hã tô sena hã ma tô asina 're Isazei mo. Tô sena roti na aimã rowaihu'u wa norĩ hã, aimã waihu'u pese za'ra di.

¹⁵ Watébrémi na 're aihâimana mono zém hawi, aima waihu'u pese di, 'Re ihâimana u'âsi mono nhimiroti 'rata na rob'ui'éré hã. Taha zarina hãwa hawi rowaihu hã te aima 're hâimana, asô'reptuzé hã asina i'uwaimramizéb da hã, Cristu Zezusihi zazei'wa 're aimorî wa.

¹⁶ Uburé İsimiroti wê na rob'ui'éré hã, 'Re ihâimana u'âsi mono te te dama 're i'awaihu'u mono zéb zarina si, te dama 're hâimana za'ra. Āne wa, İsimiroti mono bâ wê di, roti tó sena na, da te âma 're İdapawaptob za'ra mono zéb da hã. Duré wê di, İsimiroti hã, danhimiroti tó senai'ô na, da te dama âma 're İrowaihu'u za'ra mono zéb da hã. Duré wê di, İsimiroti hã, dahâimanazém na da te 're upa za'ra mono wamhã, da te dama âma 're İroti za'ra mono zéb da hã, âma 're İdahâimana wê za'ra mono da hã oto.

¹⁷ Taha da, te dama 're hâimana, 'Re İhâimana u'âsi mono nhimiroti hã, tâma İromhuri'wa norî ma İwaihu'u pese zéb zarina, İwê na te te tâma âma 're İdapawaptob za'ra mono zéb da hã.

4

¹⁻² Wa za oto marî hã aima ti'ru, 'Re ihâimana u'âsi mono nho'a, Cristu Zezusihi nho'a zama. Nimahã bâta na te za Cristu Zezusi hã dahâimanazém na da'awaihu'u, dawasété na, dawê na zama. Taha zarina, te za aihîni norî ma dama arowairébé, dahâiba ré norî ma, duré adâ'â norî ma zama. Wanhîb'apito hã te za wei mo apâ, Danhîb'apito uptabi na oto dama 're sãmra mono da. Āne wa, wa za aima ti'ru. Ma'âpé, Wanhîb'apito wasu'uwê na dama 're rowasu'u u'âsi mono za. Asô danhimiparizém na, duré asô danhimipari ô zém na zama, te za Wanhîb'apito wasu'uwê na 're İda'apo're pu'u u'âsi mo. Da'âma aiwa'âna, te za asimiroti na 're İda'apawapto mo, dawasété na 'râwi 're dasisãmri za'ra mono da, dawasédé hã da te 're rême pese za'ra mono da, dawê na si oto 're dahâimana za'ra mono da.

³ E marî wa, wa âne aima ti'ru. Nimahã na hã sena roti hã da te 're wapari ze za'ra mono ô di za. Rowasu'u hã da te 're İwapari ze za'ra mono zéb uwaibaba si, te za da te 're wapari za'ra. Dama rowahutu'wa da, te za da'ahã na da te dasima 're pisutu za'ra, rowasu'u hã da te 're İwapari ze za'ra mono zéb uwaibaba si, te te dama 're wasu'u za'ra mono da.

⁴ Roti tó sena uptabi hã te za da te 're rême za'ra, da te 're wapari za'ra mono tó da, dahi'rata norî nhimirob'rãzarô'tô 'rata si, da te 're wapari za'ra mono da oto.

⁵ Ta norî ne 're aihâimana mono ô di za. Asimiza'rese te za 're aihâimana mo. Aihâiba na te za 'râwi 're asi'madâ'â mo. Duré, Wanhîb'apito zazei'wa 're aimorî 'ru te, da te aima 're rob'manharî wasété za'ra mono nherê, 're asisawi mono ô di za, 're robzépata mono tó da hã. Te za duré Wanhîb'apito wasu'uwê na 're İda'apo're pu'u u'âsi mo, 'Re İhâimana u'âsi mono te te aima İpisutuzéb zarina, asimirohuri na tâma âma 're uwaimrami mono da.

⁶ Wa za oto aima İsiwasu'u. İnhîbâdâ hã romhure di oto. Wanhîb'apito zadawa wasu'u'wa 're İmorî 'ru te, za da te dasiwi İwîrî nherê, İdâ'â tó da, İsisawi ô di za.

⁷⁻⁸ 'Re dasi'wamhãri za'ra mono wa, danhiptete na dasiwi 're İdawairébé mono ne, wa tó wa hã İnhîptete na 're İpusi. Duré dawara na dawî İwatobro ne, wa 're İhâimana, Wanhîb'apito ma, İnhimirohuri na te İsina tâma uwaimrami pari wa. Cristu umnhasi sina, wa tó duré 're morî u'â, İsimiroti 'madâ'â sina. Ni'wa hã dawara na dawî watobro wê te, te za ropsu 'manharî wasété hã sô tihâiba, da te âma İsôprezéb da hã. Tane, te marî İwê uptabi hã İzô 're hâimana, Wanhîb'apito ma, İnhimirohuri na te İsina tâma uwaimrami wê te. Nimahã na te za bâdâ hã İwa waptârâ, Wanhîb'apito apâ we İmorîzéb da hã, dahâimanazém na te te İda'awaihu'uzéb zarina, te te dama i'arowairébézéb da hã. Tawapsi, ta hã wê uptabi wa, te za marî İwê uptabi hã İma pisutu, i'uwaiwaba si. E İma si te za pisutu. Mare di. Aihîni Wanhîb'apito zawi te, wei İmorîzéb zô 're İsimipari za'ra mono norî ma zama, te za duré marî İwê uptabi hã tâma pisutu za'ra.

Paru hã Timotiuhu ma, marî na te te İpo're pu'uzém na rowasu'u

⁹ Ma'âpé, asima rowairébé su'u, we İtême aimorî su'u da, İzabu da.

¹⁰ Demasi hã İ'âma sapa'â ô di oto. Ma tó İwi watobro, Tesaronita na 'ri nho'ômo nhisi u morî da, marî hã te te sima awê wa, taha na oto 're morî da. Teresêti hã ma tó mo, Darasiza na danhipti'a nho'ômo nhisi u. Titu hã ma tó duré mo, Damasiza na danhipti'a nho'ômo nhisi u.

¹¹ Rucasihî si te i'rata nhamra. Āne wamhã, Marcusihî zô rowaimrami mono za, sôpê'tê da, asiré we saprôni da, İnhimirohuri na te te 're İpawapto mono da.

¹² Wa hã wa tó Titicu hã satô, Épézu na 'ri nho'ômo nhisi u morî da.

¹³ Tawamhã, we aimorî wamhã, İsi'ubuzé hã we İma âri za, Capuhu nhorôwa âma te İrême hã, Torowadi na 'ri nho'ômo nhisi âma. İbahiã zama, we İma duri za. İbahiã hã romhã 'manharî hã, İma wê uptabi wa, ta norî zama we İma duri za.

¹⁴ Aresâdiri hã ma tó İwi ro'wa'rutu pese, İsi'uwazi na romhuri'wa hã. Wanhîb'apito si te za tâma âma wa'rã, marî te te İma i'ab'manharî wasété zé wa'rãmihã.

¹⁵ Taha aibâ hã ma tô wanhimirowasu'u na hã wazada tihâiba, sahi sina. Ma'âpé tiwi 're asi'madâ'â pese mono za.

¹⁶ Da'âma rowairébé'wai ma, ĩsiwasu'u 'rata wanhã, ĩhâimana wasété õ zém na hã, ni'wa hã ĩ'âma sapa'a õ di aré, tinhimiroti na ĩ'âma sime da. Aihĩni ma tô ĩwi sina tipahã za'ra. Tane nherê, te ĩsima wê õ di, da te ĩrêmezém na te te dama âma ĩ'awa'rãmi da hã, 'Re ĩhâimana u'âsi mono hã.

¹⁷ Da te ĩrême za'ra nherê, ma tô Wanhib'apito hã ĩ'rata tihâiba, te te ĩnhiptete da, 'ri para zudezu'õ norĩ ma, te rowasu'u da, Wanhib'apito wasu'uwê na. Âne wanhã, ma tô Wanhib'apito hã ĩnho'reptu, ĩdã'â tô da a'â.

¹⁸ Tane te za Wanhib'apito hã duré rowasété hawi ĩnho'reptu, hãiwa u te te ĩ'ãwisi wê da, tinhib'a'uwê norĩ te te 're ĩ'ab'madâ'â mono zéb u hã. Ta hã wê uptabi wa, aihĩni wa za âma 're wawata u'âsi za'ra.

Paru hã sisa'u te te ĩdazawizém na rowasu'u

¹⁹ Ma'âpé ĩma sawi zahuré na, Prisira norĩ hã Atiraha me. Duré ĩma sawi za'ra na, Onesiporuhu nhorõwa 're, 're ĩhâimana za'ra mono norĩ hã.

²⁰ Erasitu hã ma tô ĩza'u nhamra, Corĩtu na 'ri nho'õmo nhisi âma. Toropimu hã hãzé wa, wa tô tirê, Miretu na 'ri nho'õmo nhisi âma.

²¹ Ma'âpé, niha asina rosa'rata, rowa'u'u wahã 're sa'wari mono õ ré, we aimorizéb da hã. Wasiré ĩsazei'wa norĩ hã te âma asawi za'ra, Eburu, duré Pudeti, duré Rino, duré Caradiza. Uburé ĩsazei'wa hãiba amo norĩ hã te duré âma asawi za'ra.

²² Timotiu, wa ĩsima aiwê, Wanhib'apito hã 'rãwi aipê'ê 're, 're ĩsãmra mono na, asina 're waihu'u u'âsi mono da. Duré 'Re ĩhâimana u'âsi mono wĩ, wa tô te tiwi 're waptêrê u'âsi, ĩsimizawizé hã uburé ai'âma za'ra wa'aba 're hãimana u'âsi mono da.

Titu Tituhu ma, Paru te te ĩrob'ui'érezé Ībaihâ wasu'uzé

Ā ĩbaihâ hâ Paru hâ aibâ ĩprédupté ma, ma tô rob'ui'ére, Titu na ĩsisi ma. Ta hâ Paruhu siwadi uptabi, duré 'Re ĩhâimana u'âsi mono ma romhuri na ĩpawapto'wa (Darasiza. 2.1-3). Titu hâ zudezu ô di. Ta hâ deredu na ĩwaptêrê. Tereta na rob're za'iti nhisi âma, ma tô Zesusihi zazei'wa norĩ hâ 're hâimana za'ra. Tame ma tô Paru hâ Titu hâ tirê, 'Re ĩhâimana u'âsi mono ma romhuri hâ te te 'manharĩ da. Ā ĩbaihâ na ma tô tâma rob'ui'ére, Tereta âma hâ te te 're da'ab'madâ'â wê mono da, duré 'Re ĩhâimana u'âsi mono nhib'a'uwê norĩ hâ te te 're ĩpisutu mono da, ĩsazei'wa norĩ 'madâ'â'wa da hâ.

Paru hâ wama zama, ma duré waihu'u za'ra, âne: Ni'wam norĩ hâ si'uihâ na tinhiptete na tiwasété wi hâ 're wairébé waihu'u mono ô di. Tazahâ 'Re ĩhâimana u'âsi mono hâ wama ĩšôprub za'ra zém na si wanho'reptuzé hâ Cristuhu dâ'âzém na si.

¹ Wa hâ Paru, 'Re ĩhâimana u'âsi mono ma romhuri'wa, duré Zezu Cristuhu zadawa wasu'u'wa 're ĩmorĩ, wa âma aima rob'ui'ére. Zezu Cristu hâ ma tô ĩpisutu, te te datême ĩzatôri da, 'Re ĩhâimana u'âsi mono nhib'a'uwê norĩ u, te tâma 're apawapto mono da, Wanhib'apito umnhasi sina 're hâimana za'ra mono da, duré Wanhib'apito âma tô sena rowasu'u wê na te 're apawapto mono da, âma 're nomro wê mono da. Taha da, ma tô datême ĩzatô.

² 'Re ĩhâimana u'âsi mono hâ sadawa nhipese ô di. Marĩ te te apoto mono ô ré, ma tô tizazei'wa norĩ âma sima roti siro, rowê ĩsi'utôri'ô âma ĩ'rata 're hâimana u'âsi za'ra mono da. Taha zô si, wa wasina 're wanhimipari u'âsi za'ra.

³ Tawamhâ bâdâ ma tô oto ĩwa waptârâ, te te dama ĩwaihu'uzéb da hâ, âhâ wasu'u hâ. Taha wa, ma tô we ĩma tisô, tinhimiroti hâ, ĩsadawa para te dama 're sadawa wasu'u mono da, 'Re ĩhâimana u'âsi mono hâ Wa'anho'reptui'wa hâ.

⁴ Titu, taha wa, wa âma aima rob'ui'ére. Te ĩ'aipawaptozbéb zarina, wasiré Wanhib'apito zazei'wa 're aimorĩ wa, ĩ'ra na wa asisi, asawi te.

Wamama ma, wa ai'âma 're ĩmreme u'âsi, 'Re ĩhâimana u'âsi mono ma, duré Wanhib'apito Cristu Zesusihi ma zama, ĩsimizawizé hâ ai'âma 're hâimana u'âsi mono da, rowê u'âsi, âma 're aimorĩ da.

Cereta na rob're za'iti nhisi âma, Titu te te 're ĩdapawapto mono zé wasu'u

⁵ Titu, Cereta na rob're za'iti nhisi âma wa tô airê, tame asâmra da a'â. E marĩ da. Romhuri hâ ĩ'uwaibaba dama hiri da. Duré ĩprédum norĩ hâ 're ĩpisutu mono da, 'ri nho'ômo mono bâ ĩsazei'wa norĩ te te 're 'madâ'â za'ra mono da. Tawamhâ te aima ĩrotizéb zarina si, te za oto 're ĩ'apisutu mo.

⁶ Āne wa tô aima roti, ta norĩ âma. Wê na 're ĩnomro mono norĩ si te za 're ĩ'apisutu mo, da'madâ'â'wa da. Wê na 're nomro mono wa, ĩwasédé hâ da te âma 're ĩsa'ra mono ô norĩ si, te za 're ĩ'apisutu mo. Timro uptabi si te te 're ĩ'madâ'â za'ra mono norĩ si, te za 're ĩ'apisutu mo, da'madâ'â'wa da hâ. ĩ'ra norĩ hâ tô sena ĩsazei'wa 're ĩnomro mono norĩ mama si, te za 're ĩ'apisutu mo. ĩ'ra norĩ hâ po're ô wamhâ, duré te te 're rowasutu za'ra mono wamhâ, te za ĩwasu'u na da te âma 're ropé. Tawamhâ ta norĩ mama hâ 're ĩpisutu mono ô di za, da'madâ'â'wa da hâ.

⁷ Da'madâ'â'wa norĩ hâ te za dama 're hâimana wê za'ra, 're nomro wasété mono wa, da te dasiwi 're wê'ô tô za'ra mono da. 'Re ĩhâimana u'âsi mono ma, te te 're da'madâ'â za'ra mono wa, dama 're hâimana wê za'ra mono di za. Āne te za 're nomro, da'madâ'â'wa norĩ hâ. Dama pire wê te, 'râwi sina 're wata za'ra mono ô di za. Duré hâimana nhiti'ru na 're hâimana za'ra mono ô di za. Duré âzézei'wa na 're nomro mono ô di za. Duré sahi wa, te te 're dahâ za'ra mono ô di za. Duré sadawa nhipese na te te dama 're rob'râmi za'ra mono ô di za.

⁸ Te za duré te te 're da'mazasi su'u za'ra. Duré 're nomro wê mono da si, te za te te sina 're rosa'ra za'ra. Duré hâimana préduum na, te za 're hâimana za'ra. Te za duré dama 're hâimana wê za'ra. 'Re ĩhâimana u'âsi mono âma si te za 're nomro wê. Duré tihâiba na te za sina 're siptete za'ra, 're nomro wê mono da.

⁹ Wanhib'apito wasu'uwê, te dama 're ĩwasu'u mono hâ tô sena. Taha wa, te za da'madâ'â'wa norĩ hâ ĩwasu'uwê hâ te te 're 'madâ'â pese za'ra, ĩ'uwaibaba si te te dama âma 're roti za'ra mono da, rowê na si Wanhib'apito âma 're danomro mono da, duré 're siwaihu'u za'ra mono da, tinhimiroti na te te 're ĩ'upa za'ra mono norĩ hâ.

¹⁰ Āhâna te aibâ norĩ hâ ahâ na 're hâimana za'ra, ĩsazei'wa nherê, Wanhib'apito nhimiroti na te te 're ĩwawapari za'ra mono ô norĩ hâ. Ta norĩ nhimirowasu'u hâ dama ĩ'uwaibaba ô di.

Tizadawa nhipese na te ta norī hā te te dama 're rob'rāmi za'ra. Āne te 're dahāimana za'ra da'ahā na, zudezu na 're idapoto za'ra mono hā.

¹¹ Taha wa, te za ta norī wi 're ī'azawi mo, aimawi na īsazei'wa norī ma te te 're rowasu'u za'ra mono tō da. E marī wa. Ta norī nhimirowasu'u zarina, ma tō ni'wam norī hā 're sipa za'ra, roti tō senai'ō niwī, damama siré 're idahāimana za'ra mono norī hā. Aimawi rowasu'u'wa norī hā rob'uiprazé hā da te tāma 're sōmri za'ra mono da, te te sima 're rosa'rata za'ra, rowahutu wa'rāmi.

¹² Cereta nhihudu hā tō sena na ma tō tisiré norī hāmanazém na rowasu'u. Āne te tinha, romhā ré dapo're pu'u'wa hā: "Cereta nhihudu norī hā sadawa nhipese na te 're nomro. Abaze zahi ne, te duré 're nomro, sahi u'āsi. Wa'a za'ra nherē, te tisa zō si 're sōpré." Āne te dawasu'u, romhā ré dapo're pu'u'wa hā.

¹³ Īsimirowasu'u hā tō sena. Taha wa, aimreme pire na te za īsazei'wa norī ma 're ī'aroti mo, Wanhib'apito nhimiroti si te te 're sazei pese za'ra mono da, rowē na āma 're hāimana za'ra mono da.

¹⁴ Zudezu norī nhimirob'rāzarōtō 'rada hā tō senai ō wa, te te 're wapari za'ra mono ō di za, īsazei'wa norī hā. Duré Wanhib'apito āma tō sena roti hā te te siwi 're īwē'ō za'ra mono norī nhimiroti hā te te 're wapari za'ra mono ō di za.

¹⁵ Danhimirosa'rata wē u'āsi 're danomro mono wamhā, uburé marī īwē na 'rāwi āma 're dasiwasété za'ra mono ō di za. Tane nherē, danhimirosa'rata wasété u'āsi 're danomro mono wamhā, marī wē nherē, da te āma 're rosa'rata wasété za'ra mono wamhā, te za 'rāwi āma 're dasiwasété za'ra, īsazei'ō'wa norī hā. Tane nherē, dawasété na 'rāwi 're dasiwaitu'u za'ra mono āna, te za 're dahāimana za'ra.

¹⁶ Ta norī hā te 're siwasu'u za'ra, 'Re ihāimana u'āsi mono te te iwaihu'u za'ra na. Tane nherē, 're nomro wasété mono wa, tō senai ō di, 're īsiwasu'u za'ra mono zé hā. Te te 're īda'ruiwapari za'ra mono zép si, te tāma 're hāimana za'ra. Duré po're'ō u'āsi te 're nomro. Marī īwē hā te te 're manharī waihu'u za'ra mono ō di, ta norī hā.

2

Rowasu'u uwaibaba na si rowasu'u

¹ Titu, rowasu'u uwaibaba si te za īsazei'wa norī ma 're īrowahutu mo, āma 're nomro wē mono da.

² Aibā īhi norī ma, te za 're ī'aroti mo, hāimana prédu na 're hāimana za'ra mono da, tiwasété wi sina 're siptete za'ra mono sina, 're hāimana za'ra mono da. Wanhib'apito nhimiroti si te za duré te te 're sazei pese za'ra, ta hā tō sena wa. Te za duré te te 're dazawi pese za'ra. Marī hā sada 're hāimana za'ra mono nherē, Wanhib'apito āma si te za 're hāimana u'āsi za'ra.

³⁻⁴ Pi'ō īhi norī ma zama, te za duré 're ī'aroti mo, hāimana wē uptabi na 're hāimana za'ra mono da. Te te 're dawasu'u wasété za'ra mono ō di za, dama. Āzézei'wa 're hāimana za'ra mono ō di za. Roti wē na si te za ī'ra ré norī hā te te 're pawaptob za'ra, timro hā duré ti'ra norī zama te te 're sawi pese za'ra mono da.

⁵ Te za sina 're siptete za'ra, 're nomro wē mono da, ī'ra ré norī hā. 'Ri 're, romhuri wē 'wa te za 're hāimana za'ra. Duré timro mreme te za te te 're 'madā'ā pese za'ra. Tawamhā da te tāma 're nharī wasété za'ra mono ō di za, 'Re ihāimana u'āsi mono nhimiroti na oto 're nomro wē mono wa, ī'ra ré norī hā.

⁶ Ritéi'wa norī ma zama, te za duré 're ī'aroti pese mo, sina 're siptete za'ra mono sina, 're nomro wē mono da.

⁷ A hā aihāimana wē na, te za dama āma 're asanho mo, asirā zarina si 're danomro wē mono da. Dama 're rowahutu mono wamhā, aimreme tō sena na si, te za dama 're īrowahutu mo.

⁸ Īwasu'u uwaibaba si, te za dama 're īrowahutu mo, da te aima 're nharī za'ra mono tō da, taré da te aima 're nharī za'ra mono wa, timreme niwī wawē'ō'wa norī hā 're siséb za'ra mono da.

⁹ Īwada'uri zarina si, pawā'ābā āna dama romhuri'wa norī ma zama, te za 're ī'aroti mo, tinhib'apito mreme hā te te 're wapari pese za'ra mono da, īsimiromhuri na te te 're wēsāmri za'ra mono da, īsib'apito hā. Romhuri'wa norī hā timreme na te te tāma 're wa'rāmi za'ra mono ō di za, tinhib'apito ma hā.

¹⁰ Duré marī hā tinhib'apito wi te te 're simi'uri za'ra mono ō di za. Te za te te tāma 're romhuri wē za'ra, te te tiwi 're upa za'ra mono āna. Tawamhā 'Re ihāimana u'āsi mono nhimiroti zarina si 're nomro wē mono wa, te za Wa'anho'reptui'wa nhimiroti wē na 're dawata za'ra.

¹¹ Re ihâimana u'âsi mono hã ma tô dama siwaihu'u, tinhimizawi pese zém na, uburé te te 're ìda'anho'reptui mono zéb da hã.

¹² Ta hã te te 're wa'azawi pese mono wa, ma tô wama waihu'u, wa te 're rême pese za'ra mono da, İsazei'ô'wa norî hâimanazé hã, dawê te, wawasété zô wa te 're rowasutu tô za'ra mono da, ti'ab ré wasina 're wanhiptete za'ra mono da, 'Re ihâimana u'âsi mono âma si 're wanomro wê mono da.

¹³ Âne wa za 're wanomro, Wa'anho'reptui'wa zô wanhimipari sina. Wa za rowê u'âsi 're wahâimana za'ra, wasina 're wanhimipari za'ra mono sina. Rowa'a za'êtê ré, apâ wei morî wapsi, wa za watômo na 'madâ'â za'ra ni, danhipai u 're ihâimana mono hã, Wanhîb'apito Zezu Cristu hã.

¹⁴ Ta hã ma tô wazada sisô, wazada dá'â da, 're îwanomro wasété mono hawi, te te 're wa'anho'reptui mono da, İsib'a'uwê si 're wahâimana za'ra mono da. E marî da. Sena na 're wanomro mono da oto, duré wawa'a âna îwê na wa te 're dapawaptob za'ra mono da.

¹⁵ Ìnhimiroti zarina si, te za 're ìda'apawapto mo, Wanhîb'apito âma 're danomro wê mono da. 'Re danomro wasété mono tô da, te za dawî 're îazawi pese mo. Wanhîb'apito zadawa para te za aimreme pire na dama 're î'aroti mo, asimiroti wapu wa, da te dasiwi 're aiwê'ô za'ra mono tô da, dama 're î'aroti mono na hã.

3

İsazei'wa norî hã 're ihâimana wê za'ra mono zé wasu'u

¹ Titu, İsazei'wa norî hã te za 're î'apo're pu'u u'âsi mo, dama îpire norî nhimiroti si te te 're wapari pese za'ra mono da, roti'wa norî nhimiroti zama. Simi'ê na te za îmreme hã te te tâma âma 're uwaimrami za'ra.

² Duré te te 're dabâsi wasété za'ra mono ô di za. Te te duré 're dazada'âbâ za'ra mono ô di za. Simizawi pese na si, te za 're hâimana za'ra. Duré waimri na te za uburé dama 're hâimana za'ra, hâimana wê na.

³ Wa norî zama, Cereta nihudu norî ne, wanhimiza'rese âna, wa aré 're wanomro. Wapo're'ô u'âsi, wa aré 're wahâimana za'ra. Dazadawa nhîpese na ma tô da te wama 're rob'râmî za'ra. Uburé marî hã sipu'u pese na, wa tô aré wa te wasima 're wê za'ra, îwê newa, âma wama 're robze za'ra mono da. Wa tô duré wa te dama 're rob'manharî wasété za'ra. Danhimarî na da'ruiwapari hã ma tô wama 're hâimana za'ra duré. Wawasédé wa te 're 'manharî za'ra mono 'ru te, ma tô da te 're wa'ruiwapari za'ra aré. Wa norî hã wa tô duré asa wa te 're da'ruiwapari za'ra aré.

⁴ Tane nherê, wawasété na 're wanomro mono nherê, tinhoprubzém na ma tô dama 're siwaihu'u, 'Re ihâimana u'âsi mono hã Wanho'reptui'wa hã. Duré uburé te te 're ìda'azawi pese mono zém na zama, ma tô dama 're siwaihu'u.

⁵ 'Re îwanomro wasété mono hawi, ma tô te te 're wa'anho'reptu. E 're wanomro wê mono wa, duré e wa te dama 're rob'manharî wê za'ra mono wa, ma tô te te 're wa'anho'reptu. Mare di. Wa'âma 're îpê'ézé mono zarina, ma tô te te 're wa'anho'reptu. Tipê'ézani te te wama 're î'anhomri mono na, ma tô wapê'ê 're te te 're wa'apoto té. Wawasété hawi, ma tô wapê'ê 're, te te 're wa'a'upsô, âma 're wanomro wê mono da oto.

⁶ Sôpru uptabi wa, ma tô wei wama te te 're anhomri Tipê'ézani hã, Zezu Cristu te te 're îwa'anho'reptui mono zéb zarina. Wê uptabi di, Îpê'ézani hã.

⁷ Wawasété na 're wanomro mono nherê, ma tô te te 're wa'azawi pese, 'Re ihâimana u'âsi mono hã. Taha wa, ma tô te te 're wa'awêsâmri, wawasédé hã te te oto wa'âma 're î'ab'madâ'â mono ô zéb zarina, rowê İsi'utô'î'ô âma î'rata 're wasi'ubumroi u'âsi mono da. Taha wa, wa za wasina sô 're wanhimipari u'âsi za'ra, î'rata 're îwasî'ubumroi u'âsi mono zéb zô hã.

⁸ Te aima îrowasu'uzé hã tô sena.

Taha wa, te za İsazei'wa norî ma 're î'aroti mo, marî wê na te te 're dapawaptob u'âsi za'ra mono da. Te aima 're îrowasu'u mono zé hã wê uptabi di, dama 're îrowê za'ra mono zéb da hã.

⁹ Ni'wam norî hã zudezu norî hi'rata norî nhisi wasu'u na, te âma 're sisada'âbâ za'ra. 'Re ihâimana u'âsi mono nhimiroti, zudezu norî ma 're ihâimana za'ra mono na zama, te duré 're sisada'âbâ za'ra. Âne wamhã, dama 're îrowê za'ra mono zé hã, mare di. Taha wa, marî na 're îdasisada'âbâ za'ra mono zé hã, 're wapari mono ô di za.

¹⁰ Até ni'wa hã te za aimawi tinhimirowasu'u na te te 're ro'wa'rutu, İsazei'wa norî wi. Taha zarina, İsazei'wa norî hã sima âma 're siwanhizari za'ra mono wamhã, te za tâma 're î'aroti mo, âne na te te dama 're rowasu'u tô mono da. Taha parimhã te te aiwapari ô wamhã, te za duré tâma âma İsahu. Taha na duré te te aiwapari ô wamhã, ma'âpê, tiwi 're asi'madâ'â pese mono. Tawamhã İsirê 're aihâimana mono ô di za oto.

¹¹ E marĩ wa. Tāma roti nherē, te te ĩ'aiwapari ō na, waihu'u wa. Roti sena hawi sipai wa, te za ĩwasété na dasiwi waihu'u ni.

Paru hā, Tituhu ma te te ĩrowaihu'u 'rāsutu zé

¹² Nimahā na, wa za aibā hā atēme satō, āté Atemasi hā, āté Titicu hā. Taha wa, ma'āpé rosa'rata, we aimorĩ da, wasisōpētē da, Nicopuri na 'ri nho'ōmo nhisi āma. Taha na wa tō ĩsima rosa'rata, rowa'u'u wahā nomro ré, tame ĩnhamra da.

¹³ Duré aibā norĩ hā pawaptob zahuré na, Zena norĩ hā Aporuhu me. Danhimirob'manharĩzém na dawasu'u'wa, te 're hāimana, Zena hā. Marĩ hā aima ĩhāimana zarina, te za ĩpawaptob zahuré, marĩ hā tāma hāimana zahuré ō wa, ĩnezbéb da hā.

¹⁴ Wa tō ĩsima wē, wasiré ĩsazei'wa norĩ hā marĩ zō dawi 're ro'wanhi'riti za'ra mono wamhā, te te 're dapawaptob za'ra mono da, taré 're hāimana za'ra mono tō da, dapawaptob āna.

¹⁵ Uburé ĩsiré 're ĩsi'ubumroi mono norĩ hā ma tō timreme na āma asawi za'ra. Wasiré ĩsazei'wa norĩ hā wa wamreme na āma sawi za'ra ni, wazawi'wa norĩ hā.

'Re ĩhāimana u'āsi mono wi, wa aima za'ra wa'aba, te tiwi 're rowaptērē u'āsi, aihĩni te te 're aipawaptob u'āsi za'ra wa'aba mono da, rowē u'āsi āma 're anomro aba mono da.

Piremo Piremohõ ma, Paru te te ĩrob'ui'érézé Ībaihã wasu'uzé

Duréhã ma tã aibã norĩ hã da te 're uipra za'ra, pi'õ norĩ zama, te te dama 're romhuri za'ra mono da. Taré dasa si, duré da'uzazép si ma tã da te tãma 're sãmri za'ra. Romhuri wa'ã hã da te tãma 're sãmri za'ra mono õ di. Ma tã duré da te tiwi 're rosawi za'ra, nimomo si'uihã na 're wairébé mono tã da. Āne wa, ma tã robzei āna 're hãimana za'ra, romhuri'wa norĩ hã. Tawamhã nimomo apito norĩ hã te te satõrĩ za'ra õ nheré, si'uihã na 're wairébé mono wa, te za sada 're sahi za'ra. Taha wa, te za dama 'ru za'ra, da te sãpētē za'ra wa, apã da te simroi mono da. Tawamhã apito hã te za nasi hã za'ra áté, romhuri'wa norĩ hã si'uihã na 're wairébé mono 'ru te.

Āne hã tãma waihu'u pese wa, ma tã Paru hã rob'ui'éré, Piremohõ ma. Ta hã ma tã aré uipra aibã hã, Onezimo na ĩsisi hã, tãma ĩromhuri'wa da hã. Tane nheré, ma tã tiwi watobro Onezimo hã, nimomo morĩ da. Morĩ wamhã, Paruhu u ma tã wi. Tawamhã Zezusihi wasu'uwé hã ma tã tãma wasu'u, Paru hã. Taha zarina, ma tã Onezimo hã saze. Taha wa, ma tã Paru hã Piremohõ ma rob'ui'éré, te te āma waihu'u da, Onezimohõ hãimanazép tém na hã. Piremo hã duré ĩsazei'wa. Taha wa, Paru hã ma tã tiwi rowapté, Piremohõ wi, te te āri wé da, Onezimo hã apã ĩ'rata 're sãmra mono da, ĩsiré ĩsazei'wai wa oto.

¹⁻² Piremo, a hã wasiwadi wama asawi pe, duré wasiré Cristu Zezusihi ma romhuri'wa. Āhãna, wa hã Paru, wa za asawi, ĩnhimi'ui'éré na. Wano hã Timotiuhu me, wa za asawi ni. Duré Zezusihi zazei'wa norĩ, asõrõwa u siré 're ĩsi'rã'õtõ mono norĩ zama, wa za āma sawi za'ra ni. Duré wahidiba hã Apiza hã wa za āma sawi ni. Duré aibã hã Atipu hã wa za āma sawi ni. Ta hã te duré wasiré Wanhĩb'apito ma, te te 're romhuri pese. Wa hã Zezu Cristuhu ma romhuri'wai wa, ma tã dasiwi ĩ'āri ni. Dazazéb 're ma tã duré dasiwi ĩnheré ni. Tawamhã dazazéb 're, ĩnhamra ré, wa za aima rob'ui'éré za'ra wa'wa.

³ Wamama ma, wa ai'āma 're wamreme zusi u'āsi, 'Re ĩhãimana u'āsi mono ma, duré Wanhĩb'apito Zezu Cristuhu ma zama, ĩsimizawizé hã ai'āma 're hãimana u'āsi mono da, rowé u'āsi, āma 're aimorĩ da.

⁴⁻⁵ Piremo, asawi di. Āhãna wa za aima waihu'u, Wamama āma ĩwatazém na, ai'āma hã. Aiwasu'u wé hã ma tã we nasi ĩtème waptārã. Wanhĩb'apito Zezusihi zazei'wa te, u, 're aimo. Te duré, u, 're ĩ'azawi pese mo, uburé ĩsazei'wa norĩ hã. Taha wa, aiwasu'u wé hã we ĩtème 're waptã'ã mono wa, ĩto ti, wa hã. Duré 'Re ĩhãimana u'āsi mono ma, ai'āma 're ĩmreme mono wamhã, wa duré āma 're ĩwata u'āsi, ĩnhĩb'apito āma.

⁶ 'Re ĩhãimana u'āsi mono hã ma tã uburé Cristuhu zazei'wa norĩ ma 're sãpru, uburé marĩ ĩwé na. A hã, Cristuhu zazei'wai wa, wa oto wasiré 're wahãimana za'ra. Tawamhã, wa ai'āma 're ĩmreme, 'Re ĩhãimana u'āsi mono ma, te te aima 're awaihu'u pese mono da, aipé'ē 're, uburé marĩ ĩwé hã Cristuhu zazei'wa norĩ ma, te te 're ĩ'anhomri mono hã.

⁷ A hã ĩno. ĩma asawi di. 'Re asimizawi pese mono wa, ĩto ti. ĩtoi uptabi di, ĩpé'ē 'remhã. Taha wa, ĩma rowé uptabi di. Duré uburé ĩsazei'wa norĩ hã robze na oto 're si'ubumroi mono wa, marĩ na a hã 're apawapto mono wa, ĩtoi uptabi di, aima.

⁸ Tawamhã, marĩ na wa za aima rowaihu'u. Wa za duré aiwi rowapté. Wa hã asiré Cristuhu zazei'wai wa, adub'rada, wa oto 're mo. E taha wa, wa za āma aima ti'ru, marĩ hã 'manharĩ da. Mare di. Te āma aima 'rui õ di za.

⁹ ĩma asawi pese wa, wa hã Paru, dazazéb 're ĩnhamra nheré, Cristu Zezusihi zadawa wasu'u'wai wa, wa za taré aiwi rowapté, asi'uihã na si marĩ hã 'manharĩ da.

¹⁰ Āne āhãna Onezimohõ āma, wa za aima rowaihu'u. Wa za duré aiwi rowapté, Onezimohõ ma. Cristuhu zazei'wa te oto 're mo, ta hã. Wanhĩb'apito wasu'uwé hã wa tã tãma waihu'u, dazazéb 're ĩnhamra ré. Ma tã saze. Taha wa, ĩ'ra ne, wa ĩsina te 're waihu'u oto, Onezimo hã.

¹¹ Te te aima 're romhuri zei mono āna, te aré 're mo, Onezimo hã. Taha wa, aima wé õ di aré. Tazahã, aimawi ĩhãimanazé hã oto. Ma tã aipi'ra. Taha wa, aima wé di za oto. ĩma zama duré wé di.

¹² ĩma sawi di duré. ĩma sawi uptabi nheré, āhãna wa za oto Onezimo hã atème satõ, ai'rata 're sãmra mono da, apã.

¹³ ĩ'rata 're sãmra mono 'wa'ãhã, te aré te te 're ĩpawapto, ai'upana. Te te 're ĩpawapto mono da, wa tã ĩsima wé, dazazéb 're ĩnhamra ré, wa hã ĩwasu'u wé 'wai wa.

¹⁴ Tane nheré, te za asi'uihã na si tãma ĩpisu, apã we ĩtème satõrĩ da, aima wé wamhã. Aima wé õ wamhã, mare di za. Āne wapsi, ĩma wé di za. Wa hã te āma pisutu õ di. Mare di.

¹⁵ Ta hā Onezimo hā ma tō aré airē. Áté syry na asiti 're sāmra mono nherē, wē di. E marī wa, wē di. Atēme wisi wapsi, áté te za oto ai'rata 're sāmra u'âsi. Taha wa, aima wē di za oto, áté.

¹⁶ Cristuhu zazei'wa te za oto 're mo, Onezimo hā. Pawa'âbâ âna aima romhuri'wa si 're morī ō di za oto. Cristuhu zazei uptabi 'wa oto 're morī wa, wano te za oto 're hâimana, Onezimo hā. Tō sena sawi di, ĩma. Tawamhā aima sawi uptabi di za oto, ta hā. Asiré ĩsazei'wai wa, ano te za oto 're mo, asiré.

¹⁷ Āhāna, wa za aiwi rowaptē, Onezimohō ma. Ma'âpé, atēme wisi wi, sawi na za, ai'rata apā 're hâimana u'âsi mono da oto. Wa hā asiré ĩsazei'wai wa, atēme ĩwisi 'wa'âhā, te aré ĩzawi. Tane te za ĩsawi, Onezimo hā, apā aima 're hâimana mono da.

¹⁸ Áté ai'rata sāmra ré hā, ma tō marī hā aiwi wasété. Áté marī, ma tō aiwi ti'â, asiti morī ō ré. Sena wamhā, ma'âpé we ĩma waihu'u za, apā ĩwa'âbâzéb zarina te aima sōmri da, ĩsōwa're're, Onezimohō upana.

¹⁹ Tō sena, ĩmreme hā. Wa hā Paru hā wa za aima wa'â. Āne wa oto aima rob'ui'éré, waihu'u da. A hā, Zezusihi zazei'wa. Āhāna Zezusihi wasu'uwē zarina, robze na te oto 're aimo, ĩwasu'uwē hā te aima waihu'u wa, wa hā.

²⁰ Taha wa, wa āne aima roti. Duré wa aiwi rowaptē, Onezimohō ma, sawi da, duré ai'rata 're sāmra mono da, a hā ĩno, Cristuhu zazei'wai wa. Āne wamhā, wē di za ĩma.

²¹ Āne, wa aima rob'ui'éré, ĩnhimiroti hā waihu'u da. Zahadu wapsi, uburé 're ĩ'ab'manharī wē mono zé hā, Onezimohō āma hā, ĩnhimiroti zarina hā wa za waihu'u. Áté ĩnhimiroti zarina si ō di za. Áté asi'uihā na asimirosa'rata zarina zama, te za tāma ĩ'manharī wē.

²² Duré misi wa za aiwi waptē. Ma'âpé, daza'warizé hā ĩma pisutu, ai'rata za'ra wa'aba a'â ĩnhamra da. A norī wa'wa hā ma tō duré ĩma 're ĩrowaptērē za'ra wa'aba mo, hāiwa u, 'Re ĩhâimana u'âsi mono wi, te te ĩzatōrī da, dazazém hawi atēme za'ra wa'aba, ĩmorī da apā. Taha wa, wa sō mapa, ĩmorizéb zō, atēme za'ra wa'aba, ĩma 're ĩrowaptērē za'ra wa'aba mono zéb zarina, āma ĩmorī da apā. Āne si.

²³ Āhāna Epaprasī hā te āma asawi. Ta hā duré Cristu Zezusihi wasu'u'wai wa, dazazéb 're te nhamra, ĩme.

²⁴ Marcusi hā te duré āma asawi, duré Aritacu hā, duré Demasi, duré Rucasi. Ta norī hā, ĩsiré Wanhib'apito ma romhuri'wa norī. Āne si, wa ĩnhimirob'ui'éré hā 'rāsutu.

²⁵ Wa hā wa duré 're ĩmreme u'âsi, Wamama ma, ai'āma za'ra wa'aba, Wanhib'apito Zezu Cristu hā te te 're aipawaptob u'âsi za'ra wa'aba mono da, robzei u'âsi, āma 're anomro aba mono da.

Ebreusi Ebreusi nori ma, rob'ui'ére Ibahi wasu'uzé

Á ibaihá na rob'ui'ére há zudezu nori ma há, Zezusihi zazei'wa nori ma há. Ebreusi há zudezu nori waptêrêzé háiba amo. Á ibaihá na rob'ui'ére'wa há ni'wa há te te waihu'u ô di.

Zudezu nori há Zezusihi zazei'wa nori há ma tô te te 're robzépata za'êtê za'ra, Ísiré zudezu nori há te te siwi 're wê'ô za'ra mono wa, 'Re íhâimana u'âsi mono nhimiroti 'rata na rob'ui'ére há te te oto 're 'madâ'â za'ra mono ô newa. Taha wa, ma tô Ebreusi na rob'ui'ére'wa há Ísazei'wa nori âma tihâtâ'â za'ra, zudezu nori nhimizaze 'rata zéb u apâ sipizari za'ra ô'umnhasite. Ma tô duré dama waihu'u za'ra, Zezusi há 'Re íhâimana u'âsi mono 'ra uptabi na há. Ta há háiwa âma romhuri'wa nori ma, pire uptabi di, ti'ai âma uburé 'Re íhâimana u'âsi mono ma romhuri'wa nori ma zama, Mozésihi ma, duré Zuzuwéhé ma.

Ma tô duré dama waihu'u za'ra, âne: Zezusi há dazada Ísisômrizé há danhipai u wê uptabi di, 'Re íhâimana u'âsi mono ma, danhimizama há dasi'udâna da te tâma 're Ísômri za'ra mono na há.

Capituru 11 âma há ma tô duré wama sisi nhoré za'ra, ni'wam nori há 'Re íhâimana u'âsi mono si te te sina 're í'umnhasi za'ra mono zém na há, te te 're robzépata za'ra mono nherê.

'Re íhâimana u'âsi mono 'ra wasu'u

¹ Duréihá 'Re íhâimana u'âsi mono há ma tô tizadawa wasu'u 'rata 'wa nori ma te te 're rowasu'u, ta nori há te te oto wahi'rata nori ma âma 're rowasu'u za'ra mono da, Ísadawa nhipai u há. Ta nori ma, ma tô marí na misi si te te tâma 're rowasu'u za'ra, âma ípu'u na há, 'Re íhâimana u'âsi mono te te tâma 're íwaihu'u za'ra mono zép sidâpâsi.

² Tane nherê, ti'ra si ma tô oto pisutu, Ísadawa nhipai u te te oto wama âma 're írowasu'u za'ra mono zéb da há, rob'râsutuzéb u romhutu na za 're íwahâimana za'ra mono nori ma. Taha si ma tô Timama zadawa para uburé te te ro'apoto. Taha si ma tô duré pisutu Ímama há, niwapsi uburé roptede'wa na 're háimana mono da oto.

³ Ôhó si te oto Timama há íwê uptabi na te te dama 're wasu'u, rowa'a Ísa'êtê na há. Taha si te Timama ne 're háimana, aiwa wa. Tinhimiroti nhiptete na te uburé marí há te te 're a'upari wê, 're si'utôri tô za'ra mono da. Ôhó si dawasédé há te te dama 're aparí mono da, dazada dá'â wa, taha pari háiwa'utu wa, te oto 'Re íhâimana u'âsi mono nhimire niwí 're sâmera, háiwa âma. Danhipai u íwaihu'u pese uptabi nhimire niwí te oto 're sâmera, Ísiré te te 're da'ab'madâ'â mono da oto, pire uptabi na.

Zezusi há háiwa âma romhuri'wa nori ma, pire na 're íhâimana mono zé wasu'u

⁴ Ímama há ma tô Ísisi há tâma tisô, sisi pire da, 'Re íhâimana u'âsi mono 'ra na Ísisi da há, uburé háiwa âma tâma íromhuri'wa nori nhisi ma, pire uptabi da. Tane ma duré Ímama há pisutu, háiwa âma romhuri'wa nori ma, pire uptabi na 're háimana mono da oto, í'ra há.

⁵ Duréihá 'Re íhâimana u'âsi mono zadawa wasu'u'wa há ma tô âne na âma rob'ui'ére, 'Re íhâimana u'âsi mono mre me na:

"A há í'ra te íme 're aihâimana mo. Taha wa, wa za oto í'ra na te 're asisi, dama aipire na 're aihâimana mono da oto."

Áne duré íháiba amo na rob'ui'ére há:

"Wa há Ímama wa za tâma 're íhâimana. Taha wa, íra te za 're háimana."

Áne duréihá 'Re íhâimana u'âsi mono mre me na rob'ui'ére há. Tawamhá e háiwa âma tâma íromhuri'wa nori âma zama, ma tô âne na há rowasu'u, 'Re íhâimana u'âsi mono há. Mare di. Zezusihi âma si, ma tô âne na há rowasu'u.

⁶ Áne ma tô duré ni'wa há âma rob'ui'ére, 'Re íhâimana u'âsi mono mre me na, ti'ra há ti'ai u za te te we ísatôrizém na, da'ra há dama 're ípoto 'rata za'ra mono ne ípire uptabi na há:

"Uburé háiwa âma íma romhuri'wa nori há te za âma tiwata za'ra."

Áne ma tô Zezusihi âma rowasu'u siro, 'Re íhâimana u'âsi mono há.

⁷ Áne na si ma tô háiwa âma romhuri'wa nori âma há rob'ui'ére za'ra, ni'wa há:

"Re íhâimana u'âsi mono há ma tô háiwa âma tâma íromhuri'wa nori há pisutu za'ra, rowa'u'u ne 're háimana za'ra mono da, duré unhama ro'o ne 're háimana za'ra mono da."

Áne na si ma tô íwasu'u za'ra na ni'wa há rob'ui'ére.

⁸ Tazahá, í'ra si dama pire uptabi na 're íhâimana mono zém na ma tô rowasu'u 'Re íhâimana u'âsi mono há, âne:

"A há Ropoto'wa. Da'âma 're asib'a'uwê mono zé há aiwi 're si'utôri mono ô di za. Te za tô aima 're háimana u'âsi.

Duré marĩ na 're upai mono āna, te za 're ĩda'ab'madā'ā u'āsi mo.

⁹ Uburé marĩ ĩwē hā da te 're ĩmanharĩ za'ra mono si, aima wē uptabi di. Duré uburé marĩ ĩwasédé hā da te 're ĩmanharĩ za'ra mono si, ma tō da'āma 're ĩa'ruiwaparĩ mo.

Taha wa, wa hā 'Re ĩhāimana u'āsi mono, Asib'apito hā wa tō aipisutu, uburé asiré 're ĩhāimana za'ra mono norĩ nhapai u, aipire na tāma 're aihāimana za'ra mono da, duré āne zarina āma 're atoi u'āsi mono da."

Āne ma tō 'Re ĩhāimana u'āsi mono hā ti'ra ma roti.

¹⁰ Āne ma tō duré ti'ra ma tinha, 'Re ĩhāimana u'āsi mono hā:

"A hā uburé Danhib'apito. Duréihā ropoto na'rata hawimhā ma tō ti'a hā ĩmanha. Asi'uihā na ma tō duré hāiwa hā ĩmanha.

¹¹⁻¹² Tane nherē, te za niwamhā ai'utōrĩ zahuré, sahuré ta norĩ hā, da'uza hā dawĩ 're ĩhāsiwamnarĩ su'u za'ra mono ne. Duré da'uza pano pa hā dawĩ 're hāsiwamnarĩ za'ra mono wa, rob u da te oto 're sāmra mono da, da te 're ĩhānhinha za'ra mono ne, te za ta norĩ hā ĩ'uprosi zahuré, ĩtép si 'manharĩ zahuré da, ĩsōwa're're. Da'uza 'rada hā da te oto dasiwi 're wē'ō za'ra mono wa, ĩhâtép si da te āma 're ĩsaprĩ za'ra mono ne, te za tō ĩtép si ĩmanharĩ zahuré, ti'a hā, hāiwa me.

Tane nherē, niwamhā ai'utōrĩ ō di za, a hā. Aiwétési te za 're aihāimana u'āsi mo. Nimahā na hā āma saprĩ waihu'u ō di za, aihāimanazém na hā. Tō ōhō si, 're aihāimana mono zé hā za."

Āne ma tō 'Re ĩhāimana u'āsi mono hā ti'ra ma, waihu'u siro.

¹³ Āne ma tō duré 'Re ĩhāimana u'āsi mono hā tāma waihu'u siro:

"Ī'rata te za 're asāmra u'āsi mo ĩnhimire niwĩ, dama aipire na ĩsiré 're aihāimana u'āsi mono da. Asitob'ru norĩ nhiptetezē hā wa za tiwi uprosi za'ra, wapu na aima 're hāimana za'ra mono da oto, duré aima sib'uware na 're hāimana za'ra mono da oto."

Tawamhā, e hāiwa āma tāma ĩromhuri'wa norĩ ma, ma tō āne hā waihu'u za'ra, 'Re ĩhāimana u'āsi mono hā. Mare di. Ti'ra ma si, ma tō āne hā waihu'u siro, ta norĩ ma, pire u'āsi 're hāimana mono wa za, Zezusi hā.

¹⁴ E niha tawamhā, hāiwa āma romhuri'wa norĩ 're ĩhāimana za'ra mono zé hā. Ta norĩ hā ĩhāiba'ō, 'Re ĩhāimana u'āsi mono ma, romhuri'wa norĩ. Ta norĩ si ma tō 'Re ĩhāimana u'āsi mono hā te te 're satōrĩ za'ra ti'ai u, za te te ĩsō'reptu za'ra norĩ hā te te 're pawaptob za'ra mono da, ti'ab ré. Taha na si, ta norĩ nhimiromhurizé hā.

2

Danho'reptuzé ĩwē uptabi wasu'u

¹ Taha wa, Cristuhu wasu'uwē hā wa te 're ĩwaparĩ za'ra mono zép si, wa za wa te 're 'madā'ā pese za'ra, wasina 're waphāhā za'ra mono tō da, tiwi.

² Duréihā 'Re ĩhāimana u'āsi mono nhimiroti hā, hāiwa āma tāma ĩromhuri'wa norĩ hā wahi'rata norĩ ma, te te ĩwaihu'u za'ra zé hā tō sena na 're ĩhāimana mono na ma tō da te 're waihu'u za'ra. Duré ni'wam norĩ hā ōhō si te te 're 'madā'ā za'ra mono ō wa, duré ĩsarina si 're nomro wē mono ō wa, ma tō 'Re ĩhāimana u'āsi mono hā ĩsarina te te 're há za'ra.

³ Āne wa, te te 're ĩwa'anho'reptui mono zéb zō, ĩwē uptabi zō, wa te sō 're rob'ruiwaparĩ za'ra mono ō nherē, e ĩsimiházé wĩ, wa za wasi'uihā na 're wawairébé. 'Re ĩhāimana u'āsi mono te te 're ĩwa'anho'reptui mono zé wasu'u na ma tō Wanhib'apito hā dama rowasu'u 'rata, si'uihā na. ĩmreme waparĩ'wa norĩ hā ma tō duré āne na wama āma rowasu'u za'ra, tō sena danho'reptuzém na wa te āma 're ĩsaze za'ra mono zéb da hā.

⁴ 'Re ĩhāimana u'āsi mono zama, ma tō te te 're wa'apawapto, te te 're ĩda'anho'reptui mono zé wasu'u hā, tō sena na 're ĩhāimana mono na wa te wasina āma 're waihu'u pese za'ra mono da oto. Tiwaihu'u pese na marĩ ĩwē hā dama ĩmanharĩ waihu'u'ō hā ma tō te te dama 're ab'manharĩ wē, āma 're ĩdatob'uzu za'ra mono zé hā, taha zarina tō sena, wa te āma 're ĩwaihu'u pese za'ra mono zéb da hā, te te 're ĩda'anho'reptui mono zé wasu'u hā. Ma tō duré Tipē'ézani ma pisutu, romhuri hā ĩsazei'wai mono bā te te sima 're ĩawē mono zéb zarina, te te tāma 're apisutu mono da, āma 're ĩsipawapto za'ra mono zéb da hā. Taha zarina, wasi'uihā na tō sena, wa te āma 're waihu'u pese za'ra mono da, ma tō duré te te 're wa'apawapto, 'Re ĩhāimana u'āsi mono hā.

Zezu Cristu hā Danho'reptui'wai wasu'u

⁵ Za 're ĩdahāimana téb za'ra mono na, wa tō aima āma rowasu'u pari za'ra wa'wa. E taha wa, te za hāiwa āma tāma ĩromhuri'wa norĩ hā pisutu za'ra 'Re ĩhāimana u'āsi mono hā, ta norĩ hā pire na te te 're da'madā'ā za'ra mono da, za 're ĩdahāimana téb za'ra mono āma hā. Mare di. Ta norĩ hā danhib'apito da, te te pisutu za'ra ō di.

⁶ Tazahā duréihā ni'wa hā ma tō āne na ĩbaihā na āma rob'ui'éré, 'Re ĩhāimana u'āsi mono ma, te te ĩrowasu'uzém na hā:

“Re İhâimana u'âsi mono, e dahâimana pire na aima 're dahâimana za'ra mono bâ, te da'âma 're aipo're pu'u u'âsi mo. E niha da, te bété da'âma 're aiwamri u'âsi mo, a'uwê na si 're dahâimana za'ra mono nherê.

7 Ma tó aré dama İpisu, hâiwa âma aima romhuri'wa norî zapari, dawapu na 're dahâimana za'ra mono da a'â. Tazahâ, ma tó oto dama İpisu, dapire na oto 're dahâimana za'ra mono da, İwê na si.

8 Ma tó duré dama İpisu oto, uburé marî hâ niwapsi da te 're 'madâ'â za'ra mono da, dapire na.”

Âne na ma tó duréihâ dawasu'u na rob'ui'éré, ni'wa hâ.

'Re İhâimana u'âsi mono hâ ma tó oto dama pisutu, niwapsi uburé marî hâ da te 're İ'madâ'â za'ra mono zéb da hâ, dapire na. Marî hâ taré 're 'maiİhâimana mono ô di za, da te 're İ'madâ'â za'ra mono ô na hâ. Tane nherê, zahadu uburé marî hâ da te 're 'madâ'â za'ra mono ô di, ti'a 're dahâimana za'ra mono ré hâ.

9 Zezusi 're İmorîzép si wa tó wa te 're waihu'u pese za'ra. Ta hâ ma tó 'Re İhâimana u'âsi mono hâ pisutu, ti'ai âma 're hâimana mono ré hâ, hâiwa âma tâma İromhuri'wa norî ma, wapu na a'â 're hâimana mono da, dasine. Zezusi hâ dazada dâ'â da si, ma tó pisutu 'Re İhâimana u'âsi mono hâ, da'âma 're pê'êzé mono wa, da'âma 're İsiwâri mono zéb da hâ. Ma tó duré pisutu ti'ra hâ, pire na dama 're hâimana u'âsi mono da oto, dazada idâ'â zarina, te te İrobzépata na te te sina tâma uwaimrami wa, Timama ma hâ.

10 'Re İhâimana u'âsi mono hâ ma tó uburé te te ro'apoto. Taha ma si te uburé marî hâ tâma 're hâimana. Ta hâ tó İbâ, ma ti'ra hâ pisutu Zezusi hâ, dazada dâ'â wa, te te robzépata da a'â, taha zarina te te 're da'anho'reptui mono da, te te sina uwaimrami da, 'Re İhâimana u'âsi mono te te tâma İpisutuzéb zarina. Da'ahâ na hâiwa âma rowê uptabi na İ'rata 're danomro u'âsi mono da, ma tó âne da hâ tâma pisutu, 'Re İhâimana u'âsi mono hâ.

11 Zezusi hâ Timama nhîb'a'uwê norî pisutu'wa, duré İsis'b'a'uwê da, Zezusi te te 're İpisutu za'ra mono norî hâ misire İmama za'ra hâ tó ôhō si. Taha wa, Zezusi hâ âma 're sisé mono ô di, ta norî hâ tisisânawâ na za te te 're İ'anhisi mono da hâ, 'Re İhâimana u'âsi mono hâ misire İmama za'ra wa, simisutu. Te za tó tisisânawâ na te te 're anhisi, Zezusi hâ.

12 Duréihâ 'Re İhâimana u'âsi mono zadawa wasu'u'wa hâ ma tó âne na âma rob'ui'éré, Zezusi hâ Timama ma, za te te tâma İrowasu'uzém na hâ:

“İsisânawâ norî ma, wa za te tâma 're aiwasu'u wê za'ra.

Siré 're si'râ'ôto mono ré, wa za ai'âma 're İwata u'âsi, İsō'a za'ra.”

13 Ma tó duré ni'wa hâ âne na âma rob'ui'éré, Zezusi hâ mreme wasu'u na hâ:

“İzama wa za te İşina 're umnhasi pese u'âsi, 'Re İhâimana u'âsi mono hâ.”

Duréihâ âne, Zezusi hâ mreme wasu'u amo na da te âma İrob'ui'érézê hâ, İsazei'wa norî âma hâ:

“Âhâta wa hâ wa oto 're İhâimana, 'Re İhâimana u'âsi mono 'ra na oto tâma 're İhâimana za'ra mono norî siré, ô hâ te te İma 're İ'apisutu mono norî siré.”

Âne duréihâ Zezusi hâ mreme wasu'u na rob'ui'éré hâ.

14 'Re İhâimana u'âsi mono 'ra ne, tâma 're İhâimana za'ra mono norî hâ te a'uwê hâiba na 're hâimana za'ra, nhi ré, duré wapruî ré. Taha wa, ma tó Zezusi hâ dasiré si'a'uwê, a'uwê hâiba na a'â 're morî da. Tidâ'âzém na Wa'uburé nhîptede hâ te te tiwî prub da, ma tó a'uwê hâiba na podo, Wa'uburé nhîmiromhuri ma, dadâ'âzê ma, marî zô dasipibuma 're danhopré tó mono da oto.

15 Ni'wam norî hâ te tó Wa'uburé nhîmiromhuri zarina, pahi u'âsi 're hâimana za'ra, tidâ'âzê ma hâ, İwada'uri zarina si pawâ'âbâ âna te te dama 're İromhuri za'ra mono hâ tihîb'apito nhîmiwada'uri na si sina hâtâ'â u'âsi 're İhâimana za'ra mono ne. Ta norî hâ tidâ'âzê ma, pahi âna oto 're hâimana za'ra mono da, ma tó sada tidâ'â za'ra, Zezusi hâ.

16 E hâiwa âma romhuri'wa norî hâ te te 're pawaptob za'ra mono da, ma tó we ti'ai u mo Zezusi hâ, dawazari si'a'uwê da. Mare di. Abra'âhâ nhîhudu mono bâ te te 're İpawaptob za'ra mono da si, ma tó wei mo. Âne hâ wama waihu'u pese za'ra di oto, wa norî hâ.

17 Taha wa, tisisânawâ norî me, aiwa uptabi a'â 're hâimana mono da, ma tó si'a'uwê Zezusi hâ, 'Re İhâimana u'âsi mono ma, da'âma romhuri'wa İpire uptabi ne 're hâimana mono da, sasedoti İpire uptabi ne, tâma umnhasi na te te tâma 're romhuri mono da, da'âma pê'êzé uptabi sina. Taha da, ma tó si'a'uwê tó, taha zarina dawasédê hâ te te oto dama 're apari mono da. Ta hâ dasiré si'a'uwê ô 'wa'âhâ, âne hâ te te aré sina uwaimrami waihu'u ô di, 'Re İhâimana u'âsi mono ma hâ.

18 Zezusi hâ ma tó robzépata za'êtê tó, ti'ab ré. Duré Wa'uburé hâ ma tó aré pibu, tiwasédê hâ te te 'manharî da. Tane nherê, te te İwapari ô zarina, tiwasédê hâ te te 'manharî ô di. Taha wa, Wa'uburé hâ te te oto 're wapibu za'ra mono wamhâ, tó ô hâ te za te te 're

wa'apawapto, ĩsine wawasédé há wa te 're 'manharĩ za'ra mono āna, wanhiptete sina ōhō āma si 're wanomro mono da, Zezusihĩ āma si.

3

Mozésihĩ wasu'u, Cristuhu wasu'u me

¹ ĩsisānawā norĩ, a norĩ wa'aba zama ma tō 'Re ĩhāimana u'āsĩ mono há aipisutu za'ra wa'wa, ĩsib'a'uwē si oto 're anomro aba mono da, háiwa āma ĩ'rata 're aihāimana u'āsĩ za'ra wa'aba mono da. Taha wa, te za Zezusihĩ āma si 're ĩrosa'rata u'āsĩ za'ra wa'aba mo, 'Re ĩhāimana u'āsĩ mono há ti'ai u, we te te ĩsatōrĩ na, duré dama ĩsada wa wasu'u'wa na. Ta há sasedotĩ ĩpire uptabi na te wa'āma te te 're romhuri u'āsĩ, ĩwasu'uwē na wa te 're ĩsaze za'ra mono zém na te te 're wa'apawapto mono da.

² Ta há ma tō 'Re ĩhāimana u'āsĩ mono ma, umnhasi sina te te tāma 're romhuri wē u'āsĩ, te te tāma 're ĩ'apísutu mono zéb zarina si. Tane aiwa, duréihā Mozésĩ há ma tō 'Re ĩhāimana u'āsĩ mono nhib'a'uwē norĩ ma, umnhasi sina te te tāma 're romhuri wē u'āsĩ za'ra.

³ Nĩ'wa há simiromhuri wē na te te sima 'ri wamhā, te za āma tatob'uzu za'ra ni, ĩsimiromhuri wē na há. E tawamhā 'ri na si te za āma tatob'uzu za'ra ni. Mare di. Taha nhĩpai u, te za 'ri 'manharĩ'wai āma zama tatob'uzu za'ra ni. Tane duré, Mozésĩ há dama pire na 're hāimana mono nheré, taha hāimanazém nhĩpai u há, Zezusihĩ si dama pire uptabi di.

⁴ Tĩ'ai āma uburé 'ri há danhib'rata na rob'manharĩ há si'uihā na 're si'manharĩ za'ra mono ō di. Taha wa, te 'ri'wa norĩ há 'ri nhĩpai u, pire na 're hāimana za'ra. Tane nheré, 'Re ĩhāimana u'āsĩ mono si ma tō uburé marĩ há te te 're ab'manharĩ. Taha wa, te uburé marĩ nhĩpai u, pire uptabi na 're hāimana u'āsĩ ta há siwaprosi.

⁵ Mozésĩ há ma tō 'Re ĩhāimana u'āsĩ mono ma, umnhasi sina te te tāma 're romhuri wē u'āsĩ, ĩsib'a'uwē te te tāma 're ĩpawapto za'ra mono zém na há. Marĩ na 'Re ĩhāimana u'āsĩ mono há za ti'ab ré te te dama 're ĩ'arowaihu'u mono zém na, ma tō ĩsib'a'uwē ma te te 're rowaihu'u sirōmo za'ra, Mozésĩ há. 'Re ĩhāimana u'āsĩ mono ma, romhuri'wa na si, te ta há 're hāimana.

⁶ Tane nheré, te Cristuhu si tāma umnhasi na uburé ĩsib'a'uwē norĩ há te te tāma 're 'madá'ā pese za'ra, pire uptabi na, 'Re ĩhāimana u'āsĩ mono 'ra há. Wa norĩ há Cristuhu āma si 're wanomro mono wa, da te wama 're rob'manharĩ wasété za'ra mono nheré, wapahĩ āna wanhiptete sina āma 're wanomro mono wamhā, wa za tō ĩsib'a'uwē na tāma 're wahāimana u'āsĩ za'ra. 'Re ĩhāimana u'āsĩ mono há ĩwē si, za te te wama ĩpísutu za'ra zéb zó, wama umnhasi sina só 're ĩwanhimipari u'āsĩ za'ra mono zéb zarina, tiwi 're wasipizari za'ra mono ō wamhā, tawapsi wa za tō ĩsib'a'uwē na tāma 're wahāimana u'āsĩ za'ra.

'Re ĩhāimana u'āsĩ mono nhib'a'uwē norĩ 're ĩwa'utu za'ra mono zé wasu'u

⁷⁻⁸ Duréihā nĩ'wa há ma tō 'Re ĩhāimana u'āsĩ mono pē'ézani zadawa para, āne na āma rob'ui'ére:

“Á bátā na, 'Re ĩhāimana u'āsĩ mono mreme há wapari za'ra wa'aba wamhā, aipo're si'ári 're aihāimana za'ra wa'aba mono ō di za, ai'rā tete aba na. Duréihā aihĩ'rata norĩ wa'wa há ma tō āne na há po're āna sada tihāimana za'ra, 'Re ĩhāimana u'āsĩ mono da. Ta norĩ há a'ubuni wi 're nomro mono ré, nimahā bátā na ma tō tiwasédé há 'manharĩ za'ra, 'Re ĩhāimana u'āsĩ mono há te te sina pibu za'ra da, niha te te tāma rob'manharĩ za'ra ō zó pé, āma ĩwa'a su'u za'ra ō na há.”

Āne ma tō nĩ'wa há āma rob'ui'ére.

⁹ Āne duré, 'Re ĩhāimana u'āsĩ mono mreme na rob'ui'ére há:

“Aihĩ'rata norĩ há ma tō siwi ĩpibu, āma ĩwa'a su'u za'ra ō zarina, niha te tāma rob'manharĩ za'ra ō zó pé, te te sina ĩpibu za'ra da. 40 na āma wahub za'ra ré, marĩ ĩwē na si te 're pawapto u'āsĩ za'ra mono nheré, ma tō siwi ĩwē'ō, aihĩ'rata norĩ wa'wa há.

¹⁰ Taha wa, wa tō ta norĩ há oto ĩsiwi wē'ō pese za'ra. Taha wa, wa tō āne ĩsima tinhā: 'Ta norĩ há ĩzō si 're sōpré mono ō di oto. ĩnhimiroti zarina si 're ĩhāimana za'ra mono da há, te te sima 're wē za'ra mono ō di duré. Āne ta norĩ āma te ĩsima ĩrotizé há.

¹¹ Taha wa, te oto ĩsiwi ĩwē'ō za'ra zéb zarina, wa tō ĩmreme pire na ta norĩ āma tinhā, āne: “Tō sena, ta norĩ há nimahā na há dame sisisi ō di za, ti'ai wē u há, ĩwa 're ĩwa'utu za'ra mono zéb da, te aré tāma ĩpísutu za'ra zéb u há.”

Āne duréihā 'Re ĩhāimana u'āsĩ mono mreme na rob'ui'ére siro há.

¹² ĩsisānawā norĩ, 'rāwi te za 're asi'madá'ā pese za'ra wa'aba mo, 'Re ĩhāimana u'āsĩ mono nhimiroti há asimirosa'rata wasété aba zarina, asiwi 're wē'ō za'ra wa'aba mono wa, tiwi 're aipizari za'ra wa'aba mono tō da, ĩ'rata 're dasi'ubumroi u'āsĩ mono da, dapísutu'wai wi há.

¹³ Awē sidāpasi te za duré asimiroti na 're asipawapto u'āsĩ za'ra wa'aba mo, aipē'ē toi u'āsĩ Cristuhu āma si 're anomro wē wa'aba mono da, asiptete sina. Satanasihĩ nhimiroti wasédé há wē newa, aiwasédé há 're 'manharĩ za'ra wa'aba mono tō da, duré 'Re ĩhāimana

u'âsi mono nhimiroti hã asiwi 're wê'ô za'ra wa'aba mono wa, ai'rã tete na tiwi 're aihâimana za'ra wa'aba mono tã da, te za tã 're asipawaptob u'âsi za'ra wa'aba mo, rowê na wasiré 're wahâimana za'ra mono ré, ti'ai âma.

¹⁴ Wa norĩ hã Zezusi, wa te 're İsaze na'rata za'ra mono zém hawi, wa tã wa te 're umnhasi za'etê za'ra. Ta hawim haré, 're İwadá'â za'ra mono zéb u, wa te wasina 're umnhasi u'âsi za'ra mono wamhã, tawapsi wa za Zezusi siré 're wahâimana u'âsi za'ra, İsine dama wapire na wa te 're da'madá'â u'âsi za'ra mono da.

¹⁵ Duréihã ni'wa hã 'Re İhâimana u'âsi mono pê'êzani zadawa para, te te âma İrob'ui'ére na wa za âma aima sahu za'ra wa'wa, âma aipo're si'âri za'ra wa'aba tã da:

“Â bâtâ na, 'Re İhâimana u'âsi mono mreme hã wapari za'ra wa'aba wamhã, aipo're si'âri 're aihâimana za'ra wa'aba mono ô di za, ai'rã tete aba na. Duréihã aihî'rata norĩ hã ma tã âne na hã po're âna sada tihâimana za'ra, 'Re İhâimana u'âsi mono da hã.”

Âne duréihã âma rob'ui'ére, İbaihã na hã.

¹⁶ E 'wam norĩ hã ma tã bété 'Re İhâimana u'âsi mono mreme hã te te wapari za'ra nherê, siwi wê'ô pese za'ra. E 'wam norĩ hã te bété wasu'u, âne na âma İrob'ui'ére hã. Mozési hã 'Re İhâimana u'âsi mono waihu'u pese na, Ezitu hawi te te İsimroi mono norĩ, te wasu'u za'ra. Ma'âpê âma asipo're pu'u za'ra wa'aba a'â, asi'uihã na.

¹⁷ Duré, e 'wam norĩ hã ma tã bété 'Re İhâimana u'âsi mono hã siwi wê'ô pese za'ra, Mozési hã Ezitu hawi te te dazani za'ra pari, 40 na da'âma wahub ré, a'ubuni wi 're danomro mono ré hã. Tã ô norĩ hã tiwasédé te te İ'manharĩ za'ra norĩ hã ma tã siwi wê'ô pese za'ra. Tiwasédé hã te te İ'manharĩ za'ra zéb zarina, ma tã a'ubuni wi ai'utã, ta norĩ hã. Ma'âpê ta norĩ wasu'u na asipo're pu'u za'ra wa'aba duré, waihu'u za'ra wa'aba da.

¹⁸ 'Re İhâimana u'âsi mono hã ma tã ta norĩ âma timreme pire na rowaihu'u sirõmo za'ra, âne: “Ta norĩ hã nimahã na hã sisisi ô di za, ti'ai wê u hã, İwa 're İwa'utu za'ra mono zéb da, te aré tâma İpisutu za'ra zéb u hã.” Âne ma tã ta norĩ âma waihu'u siro, 'Re İhâimana u'âsi mono hã, duréihã a'ubuni wi 're nomro mono ré, 'Re İhâimana u'âsi mono nhimiroti te te siwi İwê'ô za'ra zéb zarina, po're'ô u'âsi tiwi 're İhâimana za'ra mono norĩ âma hã.

¹⁹ Tawamhã e marĩ, wa za wa norĩ hã âma waihu'u za'ra ni, ta norĩ wasu'u na hã. Ta norĩ hã 'Re İhâimana u'âsi mono si te te 're saze za'ra mono ô wa, sisisi ô di, ti'ai wê u hã, İwa 're wa'utu za'ra mono da, te te aré tâma İpisutu za'ra zéb u hã. Taha wa, a norĩ wa'wa hã ta norĩ ne aiwasédé hã 're 'manharĩ za'ra wa'aba mono ô di za, 'Re İhâimana u'âsi mono nhimiroti si 're İ'madâ'â za'ra wa'aba mono ô na hã.

4

¹ Duréihã wahi'rata norĩ ma, te te ropisutu za'ra wamhã, e ta norĩ ma si ma tã rowê hã tâma pisutu za'ra, 'Re İhâimana u'âsi mono hã. Mare di. Wa norĩ ma zama na tã tã wama pisutu za'ra oto, 're İdawa'utu u'âsi za'ra mono ne, 're wahâimana za'ra mono da oto, rowê uptabi na. Taha wa, 'rãwi te za 're asi'madâ'â pese za'ra wa'aba mo, 'Re İhâimana u'âsi mono te te wama İropisutu za'ra zé hã asiwi 're simini za'ra wa'aba mono tã da, duréihã wahi'rata norĩ hã te te İsimini za'ra ne.

² Ta norĩ hã 'Re İhâimana u'âsi mono nhimiropisutu wê hã te te wapari za'ra nherê, te te sina uwaimrami za'ra ô di, te te âma saze za'ra ô wa. Tane duré, wa norĩ zama wa tã 'Re İhâimana u'âsi mono wasu'uwê hã wa te 're wapari za'ra. Tane aiwa İsimiropisutu wê na wa te 're saze za'ra mono ô wamhã, wa norĩ zama wa te wasina 're uwaimrami za'ra mono ô di za, te te wama İropisutu za'ra zé hã, 're İdawa'utu u'âsi za'ra mono ne, 're wahâimana za'ra mono da hã oto, rowê uptabi na hã.

³ 'Re İhâimana u'âsi mono, wa te wasina 're İ'umnhasi za'ra mono norĩ si, wa za tã wasina wa te 're uwaimrami za'ra, 're İdawa'utu u'âsi za'ra mono ne, rowê uptabi na oto âma 're İwahâimana u'âsi za'ra mono zéb da hã, te te wama İropisutu za'ra zém na hã. 'Re İhâimana u'âsi mono te te sina 're İ'umnhasi za'ra mono ô norĩ si te te sina 're uwaimrami za'ra mono ô di za, rowê hã. Duréihã ni'wa hã ma tã âne na âma rob'ui'ére, 'Re İhâimana u'âsi mono mreme na, wahi'rata norĩ âma hã:

“Te İsiwi İwê'ô za'ra zéb zarina, wa tã İmreme pire na ta norĩ âma tınha, âne: ‘Tã sena, niwamhã dame sisisi ô di za, ti'ai wê u hã, 're İdawa'utu za'ra mono ne, aré İwa 're İhâimana za'ra mono da, te tâma İpisutu za'ra zéb u hã.’”

Âne duréihã 'Re İhâimana u'âsi mono mreme wasu'u na rob'ui'ére hã.

E tawamhã, 'Re İhâimana u'âsi mono hã zahadu te te tâma pisutu za'ra ô wa, te te sina uwaimrami za'ra ô di, wahi'rata norĩ hã. Mare di. Taha wab ô di. Ropoto na'rata hawimhã ma tã uburé marĩ hã te te sima apisutu sirõmo, marĩ hã te te dama âma 're İ'ab'manharĩ mono zéb da hã.

⁴ Duréihã 'Re İhâimana u'âsi mono zadawa wasu'u na ma tã ni'wa hã âne na âma rob'ui'ére, te te ro'apoto mono pari, âma İ'awézém na hã, âne:

“Re ihâimana u'âsi mono hâ zahadu 6 na bâdâ hâ âma morî ré, ma tô te te ro'apoto. Taha pari, âma awê wamhâ, te oto wa'udu, romhuri âna.”

⁵ Âne tô ôhō wasu'u hâ, duréihâ wahi'rata norî âma ni'wa te te âma îrob'ui'érezé hâ, 'Re ihâimana u'âsi mono mreme na hâ:

“Tô sena niwamhâ dame sisisi ô di za, ti'ai wê u hâ, 're îdawa'utu u'âsi za'ra mono ne, aré îwa 're hâimana za'ra mono da, te tâma îpisutu za'ra zéb u hâ.”

⁶ Duréihâ ti'ai wê wa, 're îdanomro wê mono zé wasu'u wapari 'rata 'wa norî hâ, ta norî hâ 're îdawa'utu u'âsi za'ra mono ne, îwa 're hâimana za'ra mono da, 'Re ihâimana u'âsi mono te te tâma îpisutu za'ra zé hâ te te sina uwaimrami za'ra ô di, îsimiroti hâ te te 're 'madâ'â za'ra mono ô wa, ta norî hâ. E tawamhâ ôhō haré ma tô dawî sizâ 'Re ihâimana u'âsi mono hâ, 're îdawa'utu u'âsi za'ra mono ne, rowê uptabi na 're îdanomro u'âsi mono zé hâ. Mare di. Si'utôri waihu'u ô di, ta hâ. Ni'wam norî hâ te za tô rowê uptabi na 're îdahâimana za'ra mono zéb u 're sisisi, 'Re ihâimana u'âsi mono te te tâma îpisutu za'ra zéb zarina.

⁷ E niha wa za tawamhâ âne na sena na wa te âma 're waihu'u za'ra. 'Re ihâimana u'âsi mono hâ ma tô bâdâ hâ tô sena na pisutu, 're îdawa'utu u'âsi za'ra mono ne, rowê uptabi na 're îdanomro mono zéb u 're îdanhisisi mono zéb da hâ. Tawamhâ, âne te te pisutu wamhâ, “â bâtâ na” ma tô sisi, 'Re ihâimana u'âsi mono hâ. Âne na ma tô apito Dawi hâ dama sadawa wasu'u, duréihâ wahi'rata norî hâ a'ubuni wi 're înomro mono zém hawi, âma wahub ahâ za'ra parip si. Âne apito Dawi te te âma îrob'ui'érezém na te aima âma îrob'ui'ére pari za'ra wa'aba zé hâ, âne:

“Â bâtâ na, 'Re ihâimana u'âsi mono mreme hâ wapari za'ra wa'aba wamhâ, aipo're si'âri 're aihâimana za'ra wa'aba mono ô di za, ai'râ tete aba na.”

⁸ Duréihâ Zuzuwê hâ ti'ai wê u te te îdanhimroi mono zé hâ, e taha si, 'Re ihâimana u'âsi mono, 're îdawa'utu za'ra mono zéb da, te te dama îpisutuzé hâ, te wasu'u. Mare di. Taha si ô di. Taha si 'wa'âhâ, 'Re ihâimana u'âsi mono hâ niwamhâ te te aré wasu'u zahu ô di âne hâ, 're îdawa'utu u'âsi za'ra mono ne, rowê uptabi na 're îdanomro mono zé wasu'u hâ.

⁹ 'Re îdawa'utu u'âsi za'ra mono ne, rowê uptabi na 're îdanomro mono zé hâ, te tô 'Re ihâimana u'âsi mono nhib'a'uwê norî ma 're hâimana u'âsi, ône u'â, duréihâ ropoto na'rata hawi bâdâ hâ 6 na âma si'utôri pari, bâdâ misi na romhuri âna îwa'utu ne, 'Re ihâimana u'âsi mono hâ.

¹⁰ Ni'wam norî hâ 're îdawa'utu u'âsi za'ra mono ne, rowê uptabi na 're îdanomro mono zéb da hâ, 'Re ihâimana u'âsi mono te te dama îpisutuzém na te te sina 're îuwaimrami za'ra mono norî hâ, 're siwasutu za'ra mono ô di za oto, taha na 'Re ihâimana u'âsi mono te te 're î'awêšâmri mono zéb da hâ. 'Re ihâimana u'âsi mono hâ duréihâ te te ro'apoto mono pari, romhuri te te îsazâri ne, 're siwasutu zahu za'ra mono ô di za oto, ta norî hâ apâ.

¹¹ Taha wa, rowê uptabi na 're îwanomro mono zéb zô si, wa za wasima 're wanhopré u'âsi, âma 're wahâimana u'âsi za'ra mono da. Duréihâ Izarazéhé nhihudu norî hâ a'ubuni wi 're nomro mono ré, 'Re ihâimana u'âsi mono nhimiroti te te siwi wê'ô pese za'ra wa, ta norî hâ te te sina uwaimrami za'ra ô di, 're îdawa'utu u'âsi za'ra mono zé hâ. Ta norî ne, wa te wasiwi 're simini tô za'ra mono da, wa za tô taha zô si wasima 're wanhopré u'âsi, îwê uptabi zô si.

¹² 'Re ihâimana u'âsi mono zadawa wasu'u hâ ihâiba ré ne, te tô wama 're hâimana u'âsi za'ra. Siptete uptabi di duré îmreme hâ, uburé marî hâ îsarina si te te dama âma 're î'ab'manharî mono zéb da hâ, 'Re ihâimana u'âsi mono hâ. Sib'ézé 'wa si'uiwa î'wa pese ne, te wama 're hâimana za'ra, îsadawa wasu'u hâ. Sib'ézé î'wa pese na te za romnhi hâ da te 're nhizazari za'ra, îhi si da te 're urîri za'ra mono da. Tane duré, 'Re ihâimana u'âsi mono zadawa wasu'u hâ wa te 're wapari za'ra mono wamhâ, 'râwi wapê'é na wanhimirosa'rada îwê hâ duré îwasédé hâ wa za wa te âma 're waihu'u za'ra.

¹³ Uburé marî hâ 'Re ihâimana u'âsi mono wi, da te 're upsibi waihu'u za'ra mono ô di, te te 're ab'madâ'â tô mono da hâ. Ai'uréwi ne, te uburé marî hâ tâma 're hâimana, sô'awi. Taha ma si, wa za nimahâ na hâ wahâimanazém na tâma wasiwasu'u za'ra ni. Taha wa, wahi'rata norî ne, 're wahâimana za'ra mono ô di za, wa norî hâ.

Zezi hâ sasedoti îpire uptabi na te te da'âma 're îromhuri mono zé wasu'u

¹⁴ Sasedoti îpire uptabi na te tô ni'wa hâ te te wa'âma 're romhuri u'âsi. Ta hâ Zezusi, 'Re ihâimana u'âsi mono 'ra. Timama u ma tô mo hâiwa u, 'râwi te te tiwi 're rowaptêré u'âsi mono da, wama za'ra. Taha wa, Zezusi, wa te 're îsaze za'ra mono zém na tô sena dama 're îwasiwasu'u za'ra mono zéb zarina, wa za tô ta hawim haré wanhiptete sina âma 're wahâimana u'âsi za'ra.

¹⁵ Tawamhâ tô ô hâ sasedoti îpire uptabi na, te te wa'âma 're îromhuri mono hâ, e wahâimana nhib'uwere na 're wahâimana za'ra mono nheré, wa'âma 're siwamri mono ô di za, ta hâ. Te za tô wa'âma 're siwamri u'âsi. E marî wa. Ta hâ ma tô Wa'uburé hâ te te 're pibu aré, tiwasédé hâ te te 'manharî da, wawasédé hâ wa te 're 'manharî za'ra mono da, te

te 're ĩwa'apibui u'ási mono ne. Tane nherē, tiwasédé há te te 'manharĩ õ uptabi di, Zezusi há.

¹⁶ Taha wa, wasina 're wahâtá'á za'ra mono ána, wa za 'râwi wapē'ē 're 'Re ĩhâimana u'ási mono u 're wasihutu, da'âma 're siwârĩ mono da, te te 're ĩda'ab'madá'á u'ási mono u há. Wa'uburé te te 're wa'wapé za'ra mono ré, wa'âma 're siwamri mono da, duré wa'âma 're siwârĩ mono da, wa za áhâ ré wapē'ē 're, ĩtēme 're wasihutu u'ási, 'Re ĩhâimana u'ási mono u há.

5

¹ Duréihâ ma tô ni'wam norĩ há 'Re ĩhâimana u'ási mono há te te 're apisutu, tisiré sasedoti norĩ nhĩpai u, pire uptabi na te te 're romhuri za'ra mono da, tisiré zudezu norĩ áma, 'Re ĩhâimana u'ási mono ma. Ta norĩ si ma tô 'Re ĩhâimana u'ási mono ma, danhoprubzé há te te tãma 're sômri za'ra da'upana, áma 're ĩwata za'ra mono zéb da há. Danhimizama ma tô duré da'upana te te tãma 're simro, dawasédé há te te dama áma 're ĩ'apari mono zéb da há.

² Ta norĩ há sasedoti ĩpire uptabi norĩ há ma tô hâimana nhĩb'uware na 're hâimana za'ra, ti'ai áma dasiré 're hâimana za'ra mono wa, aiwa. Taha wa, ni'wam norĩ há tiwasédé te te 're ĩ'manharĩ za'ra mono zém na 'râwi 're ĩsiwaihu'u za'ra mono õ norĩ áma, ma tô sasedoti norĩ há 're siwamri za'ra, sada 're sahi su'u za'ra mono ána. E marĩ wa. Ta norĩ há aiwa tiwasété wi, 're hâimana nhĩtete waihu'u za'ra mono õ wa, ma tô tisiré norĩ áma 're siwamri za'ra sasedoti norĩ há, aiwa 're hâimana za'ra mono wa.

³ Duré ta norĩ há da'udána si, marĩ há 'Re ĩhâimana u'ási mono ma, te te 're sômri za'ra mono õ di, dawasédé há te te dama áma 're ĩ'apari mono zéb da há. Si'udána zama ma tô marĩ há te te tãma 're sômri za'ra sasedoti norĩ há, dasine tiwasédé há te te 're 'manharĩ za'ra mono wa.

⁴ E tawamhá ma tô 'râwi ni'wam norĩ há 're sipisutu za'ra, sasedoti ĩpire uptabi na dama 're ĩhâimana za'ra mono da há. Mare di. Dasi'uĩhá na 're dasipisutu za'ra mono õ di, dapire da há. 'Re ĩhâimana u'ási mono nhĩmipisutu zarina si, ma tô sasedoti ĩpire uptabi na há 're hâimana za'ra. Duréihâ Arâ há sasedoti ĩpire uptabi na tisiré norĩ ma, 're hâimana mono da, 'Re ĩhâimana u'ási mono te te ĩpisutu ne, ma tô ta norĩ há te te 're apisutu, tô õhõ si dapisutu'wai wa.

⁵ Tane duré, Cristu há si'uĩhá na sipisutu õ di, sasedoti ĩpire uptabi na dama 're ĩhâimana mono da há. 'Re ĩhâimana u'ási mono si ma tô pisutu. Duréihâ ma tô ni'wa há áne na áma rob'ui'éré, 'Re ĩhâimana u'ási mono te te ĩrotizém na há, ti'ra ma: "A há ĩ'ra te oto 're aihâimana mo. Taha wa, wa za ĩ'ra na te 're asisi, dama aipire na 're aihâimana mono da oto."

⁶ Áne duré, 'Re ĩhâimana u'ási mono mreme na áma ĩrob'ui'éré amo há, Cristuhu áma há: "A há sasedoti norĩ, dama 're ĩhâimana za'ra mono ne, te za dama 're aihâimana u'ási mo, duréihâ Metizédéti há sasedoti na pire na dama 're ĩhâimana mono ne há."

Áne duréihâ 'Re ĩhâimana u'ási mono mreme na rob'ui'éré há, Cristuhu áma há.

⁷ Zezusi há ti'ai áma 're morĩ ré, ma tô wawa sina Timama ma mre, mreme 'râihâ na, za te te ĩrobzépatazém na te te pawaptob da. Tawamhá 'Re ĩhâimana u'ási mono, Zezusihi mreme te te wapari wamhá, ma tô sima wē tô, te te pawaptob da. Zezusi há uburé marĩ há ĩmama te te tãma ĩpisutuzéb uwaibaba si, te te 're ab'manharĩ mono da, te te sima 're wē u'ási mono wa, ma tô ĩmama há sima wē, te te pawaptob da. 'Re ĩhâimana u'ási mono há te te sima wē 'wa'áhâ, te aré tô tiwaihu'u pese na sô'reptu, dá'á tô da.

⁸ Zezusi há 'Re ĩhâimana u'ási mono 'ra, 're hâimana mono nherē, ma tô te te 're robzépata, ti'ai áma 're morĩ ré há. Taha zarina ma tô áne há si'âma waihu'u: Ni'wam norĩ há, 'Re ĩhâimana u'ási mono nhĩmiroti te te 're 'madá'á pese za'ra mono da, te te sima 're wē za'ra mono wamhá, taha zarina te za tô te te 're robzépata za'ra, ti'ab ré. Áne ma tô Zezusi há si'âma waihu'u.

⁹ Tawamhá Zezusi há ti'ab ré, te te 're robzépata mono nherē, ĩmama te te tãma ĩwēzéb zarina si te te 're ab'manharĩ mono wa, ma tô sina uwaimra, uburé ĩsimiroti te te 're ĩ'madá'á pese za'ra mono norĩ há te te 're sô'reptu za'ra mono da, hâiwa áma dá'á ána 're hâimana u'ási za'ra mono da.

¹⁰ Duréihâ 'Re ĩhâimana u'ási mono, ma tô Zezusi há pisutu, sasedoti ĩpire uptabi na dama 're hâimana mono da, tãma da'âma romhuri'wa da, duréihâ Metizédéti há sasedoti na pire na dama 're ĩhâimana mono ne, uburé ma, 're hâimana mono da.

'Re ĩhâimana u'ási mono nhĩmiroti mono bâ ĩpire wasu'u

¹¹ Áne na te duré aima áma rowasu'u za'ra wa'aba da, wa tô aré ĩsima wē. Tane nherē, pire di, te aima áma ĩwaihu'u za'ra wa'aba zéb da há. E marĩ wa. Aima rowasu'u hátob za'ra wa'aba wa.

¹² A norĩ wa'wa hã Cristu, 're ãsaze na'rata za'ra wa'aba mono zém na ma tó ai'ãma tironomro pese za'ra wa'wa. ãhã wamhã, te aré oto ãsazei'wa norĩ ma, romnhoré'wa da, 're aihãimana za'ra wa'aba mo, 'Re ãhãimana u'ãsi mono nhimiroti na rowasu'u'wa da hã, ta norĩ ma. Tane nherê, te zahadu a norĩ wa'wa hã ãsazeté'wa ne, 're aihãimana za'ra wa'aba mo. 'Re ãhãimana u'ãsi mono nhimiroti hã duréihã da te aima 're ãwasu'u na'rata za'ra wa'aba mono zé hã e aima waihu'u za'ra wa'aba ã bâ, te za apã ãwasu'u na ãma aima sahu za'ra wa'aba ni. Ai'uté hã tisai uptabi na 're saihuri waihu'u mono õ wa, te za tinho'u na si 're saihuri. ãna norĩ hã ãsai uptabi hã te te tãma 're ai waihu'u za'ra mono õ di. Tane, a norĩ wa'aba ma, te za tó 'Re ãhãimana u'ãsi mono nhimiroti hã duréihã da te aima 're ãwasu'u na'rata za'ra wa'aba mono zép si, da te aima 're wasu'u za'ra wa'wa apã, 'Re ãhãimana u'ãsi mono nhimiroti ãpire hã zahadu aima pibui prã za'ra wa'aba wa, 're ãwaihu'u pese za'ra wa'aba mono zéb da hã, asi'uihã na hã.

¹³ Ai'uté norĩ ma, tãma waihu'u õ di, 'Re ãhãimana u'ãsi mono ma ãwê hã da te 're ã'manharĩ za'ra mono zéb da hã, duré tãma ãwê'õ hã da te 're 'manharĩ za'ra mono tó da hã. Tane te duré a norĩ wa'wa hã zahadu ãne na 're aihãimana za'ra wa'aba mo. Ai'uté ne, te zahadu asimiza'rese'õ u'ãsi 're aihãimana za'ra wa'aba mo, aima waihu'u za'ra wa'aba õ wa.

¹⁴ ãprédum norĩ si te tisai uptabi na hã 're saihuri. Tane duré, 'Re ãhãimana u'ãsi mono nhimiroti ãpire hã tãma ãwaihu'u pese za'ra norĩ si te za waihu'u za'ra, 'Re ãhãimana u'ãsi mono ma, ãwê si da te 're ã'manharĩ za'ra mono zé hã, duré tãma ãwê'õ hã da te 're ã'manharĩ za'ra mono õ zé hã. Uburé marĩ hã ãwê zó, duré ãwasété zó, te te 're ãpibu za'ra mono zéb zarina si, te za te 're waihu'u pese za'ra, ta norĩ ma si waihu'u pese wa.

6

¹ Taha wa, Cristuhu wasu'u'uwê na 're saze za'ra wa'aba mono da, duréihã da te aima ãma 're ãrowasu'u na'rata za'ra wa'aba mono zém na si asima ãma 're rosa'rata u'ãsi za'ra wa'aba mono õ di za oto. Taha nhipai u, te za 'Re ãhãimana u'ãsi mono nhimiroti mono bâ ãpire uptabi hã 're ãwaihu'u pese za'ra wa'aba mo Cristuhu wasu'u'uwê hã, aihãimana prédub sina ãma 're aihãimana za'ra wa'aba mono da. 'Re ãhãimana u'ãsi mono nhimiroti mono bâ, duréihã da te aima ãma 're ãrowasu'u na'rata za'ra wa'aba mono zém na apã asima ãma 're roti zahu za'ra wa'aba mono õ di za oto. Taha na rowasu'u mono hã ma tó 're ãwaihu'u pari za'ra wa'aba mo, dadã'ê 're, dadã'á u'ãsi ne dawasédé, da te 're 'manharĩ za'ra mono pari, ta hawi 're ãdasipizari za'ra mono zém na rowasu'u hã, duré 'Re ãhãimana u'ãsi mono, da te dasina 're ã'umnhasi za'ra mono zém na rowasu'u hã.

² Duré ã dawabzuri wasu'u na hã apã asima ãma 're roti zahu za'ra wa'aba mono õ di za oto. Ta hã ma tó 're ãwaihu'u pari za'ra wa'aba mo. Rowahutu'wa norĩ hã, tinhĩb'rada hã da'rã nhisiwi te te 're ãsa'ra mono zarina, romhuri da, te te 're ãdapisutu za'ra mono wasu'u zama ma tó 're ãwaihu'u pari za'ra wa'aba mo, Cristuhu wasu'u'uwê na 're saze za'ra wa'aba mono da, da te aima ãma 're ãrowasu'u na'rata za'ra wa'aba mono zé hã. Tãibã duré, dahãiwa'utuzé wasu'u hã, duré 'Re ãhãimana u'ãsi mono za te te dama 're ã'apisutu mono zéb zarina, ãsimirob'manharĩ pipa ãma za 're ãdahãimana u'ãsi za'ra mono zé wasu'u hã. ã norĩ wasu'u mono hã ma tó 're ãwaihu'u pari za'ra wa'aba mo.

³ Taha wa, ã norĩ wasu'u nhipai u, wa za oto roti ãpire uptabi hã wa te 're waihu'u za'ra, wahãimana prédum na oto ãma 're wahãimana za'ra mono da, 'Re ãhãimana u'ãsi mono te te wama 're ã'apisutu mono zéb zarina si.

⁴⁻⁶ ãté ni'wam norĩ hã te za 'Re ãhãimana u'ãsi mono nhimiroti hã sena na te te 're waihu'u za'ra, taha zarina 'Re ãhãimana u'ãsi mono nhimirowa'a na si 're hãimana za'ra mono da oto. ãté dasa ãse hã da te 're ãtê'ê za'ra mono ne, te za 'Re ãhãimana u'ãsi mono nhoprubzê hã tê'ê za'ra, ta norĩ hã. ãté 'Re ãhãimana u'ãsi mono pẽ'ezani ré, te za duré ta norĩ hã dame 're hãimana za'ra. 'Re ãhãimana u'ãsi mono mreme hã te za duré ãté waihu'u za'ra, ãsei uptabi hã, si'uihã na. ãté te za duré 'Re ãhãimana u'ãsi mono pẽ'ezani nhimipawaptobzê hã ãsiré 're hãimana u'ãsi za'ra, te te 're waihu'u pese za'ra mono wa, ãma 're ãhãimana wê za'ra mono da hã. ãté ta norĩ hã Cristuhu nhimipawaptobzê hã te te waihu'u pari za'ra nherê, te za oto tiwi 're sipizari za'ra, apã. E tawamhã apã da te 're pizari waihu'u pese za'ra mono di za, 'Re ãhãimana u'ãsi mono u hã. Mare di. 'Re ãhãimana u'ãsi mono 'ra, wedepo'o nhonhĩ'rãmi na dã'ã da, da te dasiwi sasõmri wa, da te dasiwi ãwê'õ pese za'ra ne, te za duré ta norĩ hã siwi wê'õ pese za'ra oto. Taha zarina, te za duré Cristuhu ãma da te 're wasété za'ra, Cristuhu wi apã 're sipizari za'ra mono wa, ta norĩ hã.

⁷ ãne wa za oto ti'ai wasu'u na aima ãma romnhimire'é za'ra wa'wa. Ti'a hã wê wamhã, tã hã 're ta'a mono sidãpãsi, te za ãma 're ro'wanhipré wê za'ra, ãtede'wa norĩ ma. 'Re ti'ai ré su'u mono õ wa, te za ãma 're ro'wanhipré wê za'ra, ti'ai wê na hã. ãne wa, te za 'Re ãhãimana u'ãsi mono hã ãwê hã tãma pisutu, ti'ai wê ma hã.

⁸ Tazahā, ro'wa si duré wab'ru zama, āma 're potō za'ra mono wamhā, marī dai ō di, ti'a hā. Taha wa, ātē te za 'Re ihāimana u'āsi mono hā siwi wē'ō pese. Āne wamhā, nhama ro'ō na te za uprosi, ti'a hā. Āne 're idahāimana za'ra mono zēm na romnhimiré hā.

⁹ Īsisānawā norī, īma asawi pese za'ra wa'aba norī hā, āne na te aima āma romnhimiré'ē za'ra wa'aba nherē, ai'āma 're ihātā'hā za'ra wa'aba mono ō di. Sena na wa tō oto āma aiwaihu'u za'ra wa'wa, marī iwē si 're i'manharī za'ra wa'aba mono zēm na hā, 'Re ihāimana u'āsi mono te te 're i'asō'reptu za'ra wa'aba mono zéb zarina.

¹⁰ 'Re ihāimana u'āsi mono hā i'uwaibaba si te uburé marī hā te te dama 're ab'manharī, te te dawī āma 're a'upai mono āna. Taha wa, tāma 're iromhuri za'ra wa'aba mono zēm na nimahā na hā āma po're si'āri ō di za. Īsib'a'uwē norī hā tāma 're ipawaptob za'ra wa'aba mono zēm na hā, duré tāma 're isawi pese za'ra wa'aba mono zēm na hā, āma po're si'āri waihu'u ō di za. Te za tō āma 're sipō're pu'u u'āsi, ta norī āma hā.

¹¹ Wa tō ĩsima aiwē za'ra wa'wa, tō ōhō na si 'Re ihāimana u'āsi mono ma, 're aihāimana u'āsi za'ra wa'aba mono da, rob'rāsutu u, iwē uptabi zō 're asimipari za'ra wa'aba mono zé hā asina 're uwaimrami za'ra wa'aba mono da.

¹² Aiwa'a āna ōhō āma si 're aihāimana za'ra wa'aba mono da, wa tō te ĩsima 're aiwē za'ra wa'wa. Ni'wam norī hā siptete sina, Cristu te te sina 're i'umnhasi za'ra mono norī hā te za 'Re ihāimana u'āsi mono hā iwē uptabi hā tāma sōmri za'ra, te te tāma ĩropisutu za'ra zéb uwaibaba. Ta norī, 're ihāimana za'ra mono ne, Cristu hā asina 're umnhasi za'ra wa'aba mono da, wa tō te ĩsima 're aiwē za'ra wa'wa.

'Re ihāimana u'āsi mono hā sena na te te dama ĩropisutuzé wasu'u

¹³ Duréihā 'Re ihāimana u'āsi mono hā Abra'āhā ma, te te ropisutu wamhā, tinhisi na ma tō tāma ropisutu, ni'wa hā 'Re ihāimana u'āsi mono ma ĩsisi pire hā tāma 're hāimana mono ō wa, ĩsisi na te te tāma ĩropisutu da hā.

¹⁴ Āne ma tō Abra'āhā ma ropisutu: "Īwē uptabi hā wa za te aima 're anhomri u'āsi. Asihudu sidāpāsi, ahā uptabi na te za 're hāimana za'ra." Āne ma tō 'Re ihāimana u'āsi mono hā si'uihā na tāma ropisutu, Abra'āhā ma hā.

¹⁵ Tawamhā Abra'ā hā wahub ahā na te sō 're simipari, simi'ē na. Taha wa, 'Re ihāimana u'āsi mono, ma tō āma tāma uwaimra oto, te te tāma ĩropisutuzēm na hā.

¹⁶ Tane nherē, wa norī hā marī pire na wa te dama 're ropisutu za'ra mono wamhā, dama ĩpire norī nhisi na, wa za wa te dama 're ropisutu za'ra, sena na da te āma 're wazaze za'ra mono da, duré da te āma 're wawawā za'ra mono tō da.

¹⁷ Tane hā ma tō duré 'Re ihāimana u'āsi mono hā tinhisi pire na tāma āma ropisutu za'ra, tinhib'a'uwē norī ma hā, tinhimirosa'rata na tō sena te te āma 're isapri' mono ō na, ta norī hā te te āma 're sazei pese za'ra mono da, 'Re ihāimana u'āsi mono te te tāma ĩropisutu za'ra zéb zarina, iwē hā za te te sima 're i'waibui mono norī hā.

¹⁸ 'Re ihāimana u'āsi mono hā sadawa nhipese ō uptabi di. Taha wa, te te dama ĩropisutuzé hā te te āma sapri' waihu'u ō di. Tinhisi pire na te te dama ĩropisutuzé hā te te āma sapri' waihu'u ō di duré. Taha wa, wa norī hā 'Re ihāimana u'āsi mono, wa'āma 're sisapri' za'ra mono da, itēme 're i'wasisa'rei mono norī hā wa za oto wato sina 're wahāimana za'ra, iwē uptabi zō wasina 're i'wanhimipari u'āsi za'ra mono zé hā, wanhiptete sina wa te wasima 're tété u'āsi za'ra mono da, 'Re ihāimana u'āsi mono te te wama ĩpisutu za'ra zé hā.

¹⁹ Uba're tétézé hā āi ba da te mei wamhā, te za tété uba're hā, wara tō da. Tane duré, iwē uptabi zō wasina 're i'wanhimipari u'āsi za'ra mono hā. Taha zō si wasina 're wanhimipari za'ra mono wamhā, wanhiptete u'āsi wa za āma 're wanomro, wapē'ē na wa te āma 're wawā za'ra mono āna. Zezusi hā wa te wasina 're i'umnhasi za'ra mono hā sō 're i'wanhimipari za'ra mono hā ma tō āzé 'ri para u, 'Re ihāimana u'āsi mono nhorōwa u, hāiwa āma hā. Zazahā ihāpa na 'ri 're wa'wa nhitobzé wa'wai baba ma tō āzé, 'ri 're wa'wa iwē uptabi u, 'Re ihāimana u'āsi mono, dazō 're isāmra mono zéb u hā.

²⁰ Zezusi hā wa'udāna ma tō tamomo āzé, wawana za'ra. Ta hā te oto sasedoti ĩpire uptabi na dama 're hāimana u'āsi, 'Re ihāimana u'āsi mono ma, da'āma romhuri'wa na. Duréihā Metizédéti hā sasedoti na pire na dama 're ihāimana mono ne, te oto Zezusi hā pire uptabi na dama 're hāimana u'āsi.

7

Metizédétihi wasu'u

¹ Ta hā Metizédéti hā Sarē na 'ri nho'ōmo nhisi āma danhib'apito, ma tō dama 're hāimana. Sasedoti na te duré dama 're hāimana, 'Re ihāimana u'āsi mono ma, da'āma romhuri'wa na. Danhipai u dama pire uptabi na 're ihāimana mono ma, romhuri'wa na te 're hāimana. Duréihā Abra'ā norī hā, danhib'apito norī, maparane si'uiwa na te te āma ai'utē za'ra pari,

apâ si'aba'rei ré, ma tô sôpētē Metizédéti hā, Abra'ā hā. Taha wa, ma tô mre me pire na Metizédéti hā āma mre, 'Re İhāimana u'āsi mono ma, marī hā İwē si te te tāma 're apisutu mono da, Abra'āhā ma hā.

² Tawamhā Abra'ā norī hā te te da'āma ai'uté za'ra pari, danhibro te te İwasari hā ma tô po'o, Abra'ā hā. Tinhiptōmo hi bâ ma tô te te po'o. Te te po'o mono pari, ma tô misi tāma tisō, Metizédétihi ma. Metizédétihi nhisi hā: "Danhib'apito, sēna na si da'madā'a'wa" te wasu'u. Durē İwaptērēzēb amo hā "Sarē āma danhib'apito", İwaptērēzēb amo hā. Sarē hā "rowē" te wasu'u. Taha zarina, Sarē āma danhib'apito na İwaptērēzē hā, "Danhib'apito, dama rowē nhomri'wa" te wasu'u.

³ Taha mama nhisi ui'ére hā hāimana ō di, İbaihā na hā, İna nhisi me hā. İhi'rata norī nhisi ui'ére zama, hāimana ō di durē. İwaptā'āzēm na āma İrob'ui'ére hā hāimana ō di durē, İdā'āzēm na İrob'ui'ére na zama. 'Re İhāimana u'āsi mono 'ra ne, te pire na dama 're hāimana u'āsi ta hā, Wanhib'apito ne, sasedoti na da'āma romhuri'wa 're hāimana u'āsi mono wa.

⁴ Metizédéti hā dama pire uptabi di. Ma'āpē āne na āma rosa'rata pese za'ra wa'aba. Abra'ā hā wahi'rata uptabi hā ma tô danhibro hā Metizédétihi ma po'o, pire na dama 're hāimana mono wa, ta hā. Te te da'āma ai'uté za'ra pari, danhibro te te apâ sirē İwasari hā tinhiptōmo hi bâ ma te te po'o, Abra'ā hā. Taha pari, misi ma tāma tisō, Metizédétihi ma hā.

⁵ Réwihi nhihudu norī hā sasedoti na dama 're İhāimana za'ra mono hā, 'Re İhāimana u'āsi mono nhimiroti na Mozési te te āma İrob'ui'ére zarina, te za danhibro hā te te dawī 're waihu, tisirē a'uwē norī wi, tô İzarazéhé nhihudu norī wi. Danhibro hā danhiptōmo hi bâ da te 're po'o za'ra mono parip si, misi te za da te tāma 're sōmri za'ra, Réwihi nhihudu norī ma hā. Abra'āhā nhihudu si, sirē 're hāimana za'ra mono nherē, te za te te tāma 're sōmri za'ra, Réwihi nhihudu norī ma hā.

⁶ Tawamhā, Metizédéti hā Réwihi nhihudu, 're hāimana mono ō nherē, ma tô Abra'ā hā danhibro hā tāma tisō. Tinhiptōmo hi bâ te te po'o mono pari, ma tô misi tāma tisō. Tawamhā Metizédéti hā mre me pire na ma tô āma mre, 'Re İhāimana u'āsi mono ma, İwē uptabi hā te te tāma 're apisutu mono da, Abra'āhā ma hā. Taha ma, ma tô 'Re İhāimana u'āsi mono hā tāma ropisutu, durēihā.

⁷ 'Re İhāimana u'āsi mono hā İwē hā te te dama 're apisutu mono da, ni'wa hā da'āma mre me wamhā, ta hā pire na dama 're İhāimana mono. Āne hā wama waihu'u pese za'ra di. Taha wa, wa za āne na āma waihu'u za'ra ni, Metizédéti hā Abra'āhā ma, pire na 're İhāimana mono zēm na hā.

⁸ Réwihi nhihudu norī hā, sasedoti na da'āma romhuri'wa norī hā te za tô te te dawī 're waihu danhibro hā, danhoprubzē da te tāma 're İpo'o za'ra mono hā. Tane nherē, te za uburē ta norī hā 're dā'a za'ra, Réwihi nhihudu norī hā. Metizédétihi si, dā'a āna wama 're İhāimana mono ne, te wama 're hāimana sasedoti na hā, İdā'āzēm na āma İrob'ui'ére hā āma hāimana ō wa, İbaihā na hā.

⁹⁻¹⁰ Réwi hā uburē sasedoti norī hi'rada te 're hāimana, uburē da'āma romhuri'wa norī hi'rada, danhoprubzē te te dawī 're İwaibui mono norī hi'rada. Metizédéti hā Abra'ā te te sôpētē wamhā, Réwi hā zahadu poto ō di. Tane nherē, te Abra'āhā hāiba 're tihāiba, tihī'rata hāiba 're. Taha wa, Abra'ā hā danhibro, Metizédétihi ma te te po'o wamhā, taha nhipai u ma durē Réwi hā tāma po'o, Abra'āhā hāiba 're, hāimana wa. Tawamhā Metizédéti hā Réwihi ma zama pire na 're İhāimana mono zē, te wasu'u, ā hā.

¹¹ Durēihā 'Re İhāimana u'āsi mono hā āma 're dahāimana wē za'ra mono da, tinhimiroti te te dama 're anhomri mono wamhā, ma tô durē sasedoti norī te te da'āma 're İromhuri za'ra mono zēb da hā, te te dama 're awaihu'u. Sasedoti norī hā Réwihi nhihudu norī hā tinhimirohuri na 'Re İhāimana u'āsi mono ma, te te āma 're uwaimrami uptabi za'ra mono 'wa'āhā, taha zarina te arē 'Re İhāimana u'āsi mono hā te te 're da'awēsāmri, dawasédé hā taha zarina te te da'āma 're ab'madā'a' mo ō wa arē. Tane nherē, ta norī hā tinhimirohuri na te te āma 're uwaimrami uptabi za'ra mono ō di, 'Re İhāimana u'āsi mono ma hā. Taha wa, sasedoti İhāiba amo hā Réwihi nhihudu norī nhibro'bre İsébré hā te oto dama 're hāimana, Réwihi nhihudu 're hāimana mono ō nherē, durē Arāhā nhihudu hā 're hāimana mono ō nherē. Metizédéti hā sasedoti na pire na dama 're İhāimana mono ne, te ta hā dama pire uptabi na 're hāimana oto.

¹² Durēihā sasedoti norī hā 'Re İhāimana u'āsi mono ma da'āma romhuri'wa norī hā tinhimirohuri na te te tāma āma 're uwaimrami uptabi za'ra mono ō wa, ta norī nhibro'bre sasedoti İhāiba amo hā ma tô durē āzē. Sébré wamhā, ma tô durē 'Re İhāimana u'āsi mono hā tinhimiroti té hā İsu dama tisō, sasedoti norī hāimanazēm na İsimiroti 'rata na Mozési te te āma İrob'ui'ére nhowa're're.

¹³ Ta hā sasedoti İhāiba amo hā danhowa're're İsébré té hā, Wanhib'apito, te wasu'u. Ta hā Réwihi nhihudu 're hāimana mono ō di. İzarazéhé 'ra hāiba amo nhihudu te 're hāimana.

Niwamhã ni'wa hã İsiré Izarazéhé 'ra hâiba amo nhihudu hã sasedoti na dama 're hâimana mono ô di, İsine da hã. Mare uptabi di.

¹⁴ Wanhîb'apito hã Zudaha nhihudu, te 're hâimana. Āne hã dama waihu'u pese uptabi di, İwasu'u na hã. Mozési hã, Zudaha nhihudu norî âma te te dama âma rowasu'u ô di, sasedoti na te te da'âma 're İ'mairomhuri mono da hã.

Sasedoti aimawi hã Metizédétihî ne, dama 're İhâimana mono zé wasu'u

¹⁵ Āhã wasu'u hã wama waihu'u pese za'ra di oto. E marî wa. Sasedoti İhâiba amo hã oto danhowa're 're wama sébré za'ra wa, Metizédéti hã sasedoti na dama 're hâimana mono ne, 'Re İhâimana u'âsi mono ma da'âma romhuri uptabi 'wa da hã oto.

¹⁶ 'Re İhâimana u'âsi mono nhimiroti 'rata na Mozési te te âma İrob'ui'ééré zarina, ma tō Réwihî nhihudu norî si, sasedoti na dama 're hâimana za'ra. E tawamhã Wanhîb'apito hã Réwihî nhihudu 're hâimana mono wa, ma tō âzé, sasedoti na dama 're hâimana mono da. Mare di. Ta hã Réwihî nhihudu 're hâimana mono ô di. E marî zarina, ma te âzé, tawamhã. Ta hã si'utôri waihu'u ô wa, ma tō âzé, sasedoti na dama 're hâimana u'âsi mono da. Nîmahã na hã si'utôri waihu'u ô di za tō, sîptete uptabi wa, duré waihu'u pese uptabi wa.

¹⁷ Duréihã, ma tō ni'wa hã İbaihã na âma rob'ui'ééré İwasu'u na hã, 'Re İhâimana u'âsi mono, ti'ra ma te te İrotizém na hã, âne:

"A hã, sasedoti norî, dama 're İhâimana za'ra mono ne, te za sasedoti na dama 're aihâimana u'âsi mo, duréihã Metizédéti hã sasedoti na pire na dama 're İhâimana mono ne."

¹⁸⁻¹⁹ Āne wa, 'Re İhâimana u'âsi mono nhimiroti 'rata na Mozési te te âma İrob'ui'ééré hã pire na dama 're hâimana mono ô di oto. E marî wa. Marî dai ô wa, te te âma 're İda'anho'reptui mono zéb da hã. 'Re İhâimana u'âsi mono nhimiroti 'rata zarina, da te dasina tâma 're uwaimrami waihu'u za'ra mono ô wa, taha na te te sima da'âma 're aroti mono ô di, dawasédé hã te te oto da'âma 're İ'ab'madâ'â mono ô zéb da hã, duré taha zarina te te 're İda'awésâmri mono da hã. Taha wa, aimawi hã İwé uptabi hã ma tō 'Re İhâimana u'âsi mono hã wama pisutu za'ra oto, sô 're İwanhimipari za'ra mono zéb da hã: Cristuhu si te oto sasedoti na pire uptabi na dama 're hâimana. Taha zô si wasina 're wanhimipari za'ra mono wamhã, wa za İtème 're washihutu wapé'ê 're 'râwi, 'Re İhâimana u'âsi mono u hã.

²⁰⁻²¹ Duréihã sasedoti norî hã da'âma romhuri'wa da, 're sisisi mono wamhã, tinhisi na mreme pire na te te tâma 're ropisutu za'ra mono ô di, 'Re İhâimana u'âsi mono hã. Tazahã, Zezusi hã dama sisasedoti da, 'Re İhâimana u'âsi mono te te oto pisutu wamhã, mreme pire na ma tō tâma ropisutu, âne:

"Wa hã Danhîb'apito uptabi, İmreme İpire na wa za oto aima ropisutu, âne: 'A hã sasedoti na te za dama 're aihâimana u'âsi mo. Niwamhã te dawi aiwazere ô di za, ta hawimhã.' Āne wa aima ropisutu. İnhimiropisutu na te aima âma İsaprî da hã, mare uptabi di za."

Āne ma tō 'Re İhâimana u'âsi mono hã timreme İpire na tâma ropisutu siro, ti'ra ma, Zezusihi ma hã.

²² Āne na Zezusihi ma, timreme İpire na te te tâma ropisutu wa, 'Re İhâimana u'âsi mono te te dama İropisutuzép té İwé uptabi hã te wasu'u. Duréihã 'Re İhâimana u'âsi mono te te dama İropisutuzém nhîpai u İwé uptabi hã, te wasu'u.

²³ Duréihã sasedoti norî hã ahã uptabi na ma tō sisôwa're're te te da'âma 're romhuri za'ra, 're si'utôri mono sidâpâsi.

²⁴ Tazahã, Zezusi hã nîmahã na tidâ'â na te te sahu ô di za. Ōne u'â te za 're hâimana u'âsi. Taha wa, sasedoti na te za tō dama 're hâimana u'âsi oto, watobro waihu'u âna dawi.

²⁵ Taha wa, te te 're da'anho'reptui waihu'u pese mono di ta hã, da te dasina 're İ'umnhasi za'ra mono zéb zarina, 'râwi dapé'ê 're İtème 're İdasihutu mono norî hã, 'Re İhâimana u'âsi mono u hã. 'Re İhâimana u'âsi mono ma, da'âma 're mreme mono da, dama 're hâimana u'âsi mono wa, te te 're da'anho'reptui waihu'u pese mono di, ta hã oto.

²⁶ Taha wa, te oto ôhō si sasedoti İpire uptabi na hã wama 're hâimana za'ra, Timama ma, te te wa'âma 're romhuri mono da. Taha si te 're timorî wé uptabi. Ōhō si ma tō 'Re İhâimana u'âsi mono hã te te 're wésâmri, marî te te 're ab'manharî wasété mono ô wa. Taha wa, İwasédé hã sena na da te âma 're sa'ra waihu'u za'ra mono ô di. 'Re İhâimana u'âsi mono hã ma tō tâma pisutu, ti'ai âma dawasété na 're İdanomro mono norî nhiti 're sãmra mono da oto, hâiwa âma danhîpai u dama pire uptabi na 're hâimana u'âsi mono da.

²⁷ Duréihã sasedoti norî 're İhâimana za'ra mono ne, 're hâimana mono ô di, Zezusi hã. Ta norî hã awé sidâpâsi te za tinhoprubzé hã si'udâna te te tâma 're sômri 'rata za'ra 'Re İhâimana u'âsi mono ma, tiwasété parizéb da hã. Taha pari, te za duré da'udâna zama danhoprubzé hã te te tâma 're sômri za'ra, dawasédé te te dama âma 're aparî mono da. Tanei ô di, Zezusi hã sasedoti na te te wa'âma 're İromhuri mono zé hã. Niwa marî te te 'manharî wasété waihu'u ô wa, awé sidâpâsi si'udâna tinhoprubzé hã te te tâma 're anhomri mono ô di, Timama ma

hã. Misi haré ma tó tinhoprubzém na hã tãma sisõ, 'Re Ìhâimana u'âsi mono ma, dazada dâ'â da, sihâiba zawi âna tãma sisõmri wamhã, òhõ haré dawasédé hã te te oto âma dama 're Ì'apari mono zéb da hã.

²⁸ Duréihã 'Re Ìhâimana u'âsi mono nhimiroti 'rata na Mozési te te âma Ìrob'ui'ééré zarina, ma tó sasedoti da, te te 're da'apisutu, 'Re Ìhâimana u'âsi mono hã. 'Re danomro wasété mono wa, danhib'uware na 're dahâimana za'ra mono nherê, ma tó âne da hã te te 're da'apisutu. Tane nherê, ma tó 'Re Ìhâimana u'âsi mono hã timreme pire na ti'ra ma ropisutu, taha si sasedoti na misi wama 're hâimana za'ra mono da oto. Ta hã te uburé marĩ hã Ìmama te te tãma 're Ì'apisutu mono zéb zarina, te te tãma âma 're a'uwaimrami u'âsi, Timama ma hã.

8

Sasedoti ìpire uptabi na Zezusi hã wama 're ìhâimana mono zé wasu'u

¹ Àhãna te aima âma Ìrowasu'u za'ra wa'aba zé hã, e marĩ te wama wasu'u za'ra, ìpire hã. Sasedoti ìpire uptabi hã te oto wama 're hâimana za'ra. Àhã wasu'u si, ìpire uptabi hã. 'Re Ìhâimana u'âsi mono 're Ìsãmra mono zém nhimire niwĩ, te pire uptabi na 're sãmra u'âsi hãiwa âma, ìwê uptabi nhimire niwĩ.

² Taha si te sasedoti ìpire uptabi na te te 're romhuri, 'Re Ìhâimana u'âsi mono nhorõwa âma ìwê uptabi 're, hãiwa âma. Hãiwa âma 'ri hã ni'wa te te Ì'ri ò di. Tó òhõ si ma tó ìwa 're Ìsãmra mono zéb da hã si'uihã na sima 'ri, Danhib'apito uptabi hã.

³ 'Re Ìhâimana u'âsi mono hã ma tó sasedoti ìpire uptabi norĩ hã te te 're apisutu, danhoprubzê hã da'upana te te tãma 're sòmri za'ra mono da, âma 're ìwata za'ra mono zéb da hã, duré danhimizama hã da'upana te te tãma 're simroi mono da, taha na dawasédé hã te te dama âma 're Ì'apari mono zéb da hã. Taha zarina, ma tó duré Cristu hã tinhoprubzém na tãma sihâiba nho, 'Re Ìhâimana u'âsi mono ma, sasedoti ìpire uptabi na taha si wama 're hâimana za'ra mono wa oto.

⁴ Cristu hã ti'ai âma 're sãmra u'âsi mono 'wa'âhã, sasedoti na dama 're hâimana mono ò di aré. E marĩ wa. Sasedoti norĩ hã 'Re Ìhâimana u'âsi mono ma, danhoprubzê hã da'upana te te tãma 're sòmri za'ra mono da, ìwana dama 're hâimana u'âsi za'ra mono wa ta norĩ hã, zudezu norĩ 're Ìhâimana za'ra mono zéb zarina.

⁵ Da'awã da te 're 'madã'â za'ra mono wamhã, dahâiba uptabi hã dama 're Ìhâimana za'ra mono na te za da te 're waihu'u za'ra. Tane nherê, da'awã si hã marĩ hã âma 're hâimana mono ò di. Tane duré, ti'ai âma 'Re Ìhâimana u'âsi mono nhorõwa hã, sasedoti norĩ hã Ì're te te da'âma 're Ìromhuri za'ra mono zé hã. Hãiwa âma 'Re Ìhâimana u'âsi mono nhorõwa awã ne, te ta hã 're hâimana. Aiwab uptabi ò di. Hãiwa âma Ìsõrõwa si, ìwê uptabi hã. Duréihã Mozési hã romhã 'manharĩ na 'ri hã 'Re Ìhâimana u'âsi mono ma, te te 'manharĩ ò ré, ma tó 'Re Ìhâimana u'âsi mono hã âne hã tãma pisutu: "Ètê 'ràihã na asãmra ré, romhã 'manharĩ na 'ri 'manharĩ da, te aima Ìpisutuzéb uwai'baba si, te za Ì'manha." Àne ma tó 'Re Ìhâimana u'âsi mono hã tãma waihu'u, Mozésihi ma hã.

⁶ Tane nherê, 'Re Ìhâimana u'âsi mono hã ma tó oto tãma pisutu Zezusihi ma, taha si te te oto da'âma tãma 're romhuri mono da, pire uptabi na, sasedoti norĩ te te da'âma 're Ìromhuri za'ra mono zém nhipai u. Tane duré, 'Re Ìhâimana u'âsi mono te te dama Ìropisutuzép té hã, Cristu hã 'Re Ìhâimana u'âsi mono ma, te te wa'âma 're Ì'ab'madã'â mono hã. Wê uptabi di ta hã, duréihã 'Re Ìhâimana u'âsi mono te te dama Ìropisutuzéb 'rata ma hã. Danhipai u uptabi hã, marĩ ìwê uptabi na te te dama 're aropisutu mono wa, te wê uptabi na dama 're hâimana, te te dama Ìropisutuzép té hã.

⁷ 'Re Ìhâimana u'âsi mono te te dama Ìropisutuzéb 'rada hã wê uptabi 'wa'âhã, te aré tó òhõ si dama 're hâimana u'âsi. Te te dama Ìropisutuzép té hã te te aré dama pisutu ò di.

⁸ Tane nherê, 'Re Ìhâimana u'âsi mono hã te te dama Ìropisutuzéb 'rada hã ma tó 'ràwi siwi wê'ò. Àne na ma tó dama âma rowasu'u, duréihã:

"Wa hã Danhib'apito uptabi, wa za oto aima rowasu'u za'ra wa'wa, âne: Nimahã na hã Ìzarazéhé nhihudu norĩ ma, wa za Ìnhimiroti té hã tãma pisutu za'ra, Zudaha nhihudu norĩ ma zama.

⁹ Ta norĩ hi'rata norĩ ma, te Ìropisutu 'rata ne, 're hâimana mono ò di za, te dama Ìropisutuzép té hã. Ìhi'rata norĩ hã Ezitu hawi te simroi mono wamhã, te tãma Ìropisutu za'ra zé wa'rãmi, Ìnhimiroti hã te te 're 'madã'â za'ra mono ò di, ta norĩ hã. Taha wa, wa tó ta norĩ wi tiwi aipi'ra za'ra, si'uihã na 're hâimana za'ra mono da oto.

¹⁰ Tane nherê, nimahã bâtã na wa za te dama Ìropisutuzép té hã tãma pisutu za'ra Ìzarazéhé nhihudu norĩ ma hã, duréihã te dama Ìropisutuzém nhowa're're. À hã, wa wa hã Danhib'apito uptabi hã aima wasu'u za'ra wa'wa, Ìnhimiroti tém na te dama Ìropisutuzé hã.

Tawapsi wa za ĩnhimiroti hã ĩp'ê 're te tãma 're anhomri, ĩrê 're nomro u'ãsi mono wa, te te 'madã'ã pese za'ra mono da.

Ta norĩ nhĩb'apito, wa za oto tãma 're ĩhãimana za'ra. Tawamhã ĩnhĩb'a'uwê na si te za tã ma norĩ hã ĩma 're hãimana za'ra.

¹¹ Wa hã Danhib'apito uptabi hã, ĩnhĩb'a'uwê norĩ te te 're ĩwaihũ'u za'ra mono da, te te sima 're ĩwasu'u za'ra mono zéb zarina si, te te 're ĩwaihũ'u za'ra mono õ di za oto ta norĩ hã. Duré ĩsisãnawã norĩ te te tãma 're ĩwasu'u za'ra mono zéb zarina si, te te 're ĩwaihũ'u za'ra mono õ di za. Si'uihã na te za ĩnhĩb'a'uwê norĩ hã tip'ê na te te 're ĩwaihũ'u za'ra oto, dama wapu na 're ĩhãimana za'ra mono norĩ hã, duré dama pire na 're ĩhãimana za'ra mono norĩ zama.

¹² ĩwasédé hã te ãma 're ab'madã'ã mono õ di za oto. Marĩ te te 're ĩ'manharĩ wasété za'ra mono zém na hã 're ĩsipo're pu'u mono õ di za duré."

Ãne 'Re ĩhãimana u'ãsi mono te te dama ĩropisutuzép tém na te te ĩrowasu'uzé hã.

¹³ Duréihã 'Re ĩhãimana u'ãsi mono te te dama ĩropisutu 'rata nhowa're're, te te dama ĩropisutuzép té hã te te dama pisutu wamhã, marĩ dai õ di oto, ĩsimiropisutu 'rada hã. Taha wa, te za oto ai'utõ, marĩ ĩ'ratare hã 're ĩsi'utõrĩ pese za'ra mono ne.

9

Romhã 'manharĩ na 'ri wasu'u

¹ 'Re ĩhãimana u'ãsi mono hã duréihã tinhimiropisutu 'rada hã te te dama sãmri wamhã, ma tã dama pisutu za'ra, ãma 're ĩdawata za'ra mono zéb da hã. Zãmori za'ra ré, danhimizahãri sidãpãsi, romhã 'manharĩ na 'ri hã da te dasiwi ĩsimizusi mono zéb da hã, ma tã duré dama pisutu, ãma 're ĩdawata za'ra mono zéb da hã, duré ĩwa 're ĩsãmra mono zéb da zama.

² Duréihã romhã 'manharĩ na 'ri hã danhimizahãri sidãpãsi, 'Re ĩhãimana u'ãsi mono ma, da te dasiwi 're ĩsimizusi mono hã maparane te 'ri 're wa'wa hã 're hãimana zahuré. 'Ri 're wa'wa ĩmorĩ'rata ãma, te rob'uiwézé sima'warazé hã 're sa. Wedeza hã te duré ĩwa 're sa, ĩ'u'êne hã 'Re ĩhãimana u'ãsi mono ma, ĩwa da te 're ĩsa'ra mono zéb da hã. 'Re ĩhãimana u'ãsi mono te, 'ri 're wa'wa hã ĩwê uptabi na ĩsisi hã.

³ Duré zazahã ĩhãpa na 'ri 're wa'wa nhitobzé babarã niwĩ, 're ĩhãimana mono hã maparane ãma 'ri 're wa'wa hãiba amo nhisi hã, 'Re ĩhãimana u'ãsi mono te, danhipai u ĩwê uptabi hã, ĩwa 're ĩsãmra mono zém na taha nhisi hã.

⁴ Tame te êtê'ubuzi pré oru 'manharĩ na wedeza ne hã 're sa, 'Re ĩhãimana u'ãsi mono ma, wedewa'u zadaze zatazéb da hã. Wedehã're hã te duré 'ri para 're sa. Wedehã're mana wawimhã, oru 'manharĩ. Duréihã rob'ui'ére na 'Re ĩhãimana u'ãsi mono te te dama ĩropisutuzém na, wedehã're nhisi hã. Wedehã're 're, te oru 'manharĩ hã simhi ne hã 're sa, mana na dasa nhisi hã ĩ're 're ĩsa'wari mono hã. Arãhã nhiwedehu zama te duré wedehã're wa 're sa'wari, duréihã 'Re ĩhãimana u'ãsi mono nhimipawaptozbéz zarina, wedehu na ĩsuire 're ĩwairébé mono hã. Rob'ui'ére hã te duré ĩwa 're sa'wari zahuré, 'Re ĩhãimana u'ãsi mono hã te te tinhib'a'uwê norĩ ma ĩropisutuzém na rob'ui'ére hã, êtê tãmo baihã na.

⁵ Wedehã're nhisiwi te duré ropodo hã 're sima'wara zahuré, rob'manharĩ hã ropoto hãiba hã ĩsaripi ré hã. 'Re ĩhãimana u'ãsi mono, tame 're ĩsãmra mono zé, te ta norĩ hã wasu'u zahuré. Wedehã're nhisiwi, te ta norĩ hã 're papo zahuré. Wedehã're nhitobzé nhisi hã 'Re ĩhãimana u'ãsi mono, dawasédé te te dama 're ĩ'apari mono zém na ĩsisi hã. Ãne duréihã romhã 'manharĩ na 'ri wasu'u hã. Tane nheré, ãhãna hã te ãma aima rowasu'u uptabi za'ra wa'aba õ di. Syry na wa tã ãma aima rowasu'u za'ra wa'wa.

⁶ Ãne ma tã danhimizahãri sidãpãsi 'ri paramhã marĩ hã sipu'u pese na ĩwa da te 're sa'ra. Tawamhã sasedoti norĩ hã 'Re ĩhãimana u'ãsi mono ma da'ãma romhuri'wa norĩ hã awé sidãpãsi ma tã 're sisisi, 'ri 're wa'wa ĩmorĩ'rata u hã, tamé ĩwa tinhimioromhuri mono bã marĩ na te te 're romhuri za'ra mono da.

⁷ Tane nheré, sasedoti norĩ nhĩb'apito, tisiré norĩ ma ĩpire uptabi si ma tã maparane ãma 'ri 're wa'wa u 're zasi, 'Re ĩhãimana u'ãsi mono te hã, danhipai u ĩwê uptabi hã ĩwa 're ĩsãmra mono zéb u hã. Wahub sidãpãsi ma tã misi haré 're zasi. Tamomo 're zasi mono wamhã, danhimizama waprui ré, te 're zasi, dawasété parizéb da hã, 'Re ĩhãimana u'ãsi mono ma, te te tãma 're sãmri mono da, si'udãna, duré da'udãna zama, duré da te dasina 're waihũ'u za'ra mono õ nheré, dawasédé da te 're ĩ'manharĩ za'ra mono zé parizéb da hã.

⁸ E marĩ te tawamhã wama wasu'u za'ra ãne hã, duréihã sasedoti norĩ hã 'Re ĩhãimana u'ãsi mono ma, te te da'ãma 're ĩromhuri za'ra mono zé hã. 'Re ĩhãimana u'ãsi mono p'ê'ezani hã ma tã ãne hã wama waihũ'u za'ra. Duréihã romhã 'manharĩ na 'ri ãma hã, 'ri 're wa'wa ĩmorĩ'rata u danhimizama hã dawasété parizéb da, 'Re ĩhãimana u'ãsi mono ma, da te 're ĩsimroi mono zé hã, zahadu 're hãimana mono ré, te 'ri 're wa'wa hãiba amoi u da hã sitom haré 're sa dawĩ,

zahadu. Taha wa, 'Re ihâimana u'âsi mono, iwa 're isâmra mono zéb u hã, zahadu itême 're danhisisi waihu'u mono ô di. Ahã wasu'u, te â hã wama wasu'u za'ra.

⁹ E marî te duré wama wasu'u za'ra, 'ri 're wa'wa imorî'rata âma danhimizama iwa da te 're izata za'ra mono zé hã. Danhimizama hã dawasété parizéb da, da te tâma 're isômri za'ra mono zém na, dapê'ê 're dadâ'â u'âsi ne 're idanomro mono zéb zarina, dawasété si da te 're 'manharî za'ra mono wa, 'râwi 're idasiwê'ô u'âsi za'ra mono zé hã da te dasima âma 're pari waihu'u za'ra mono ô di, dasi'uiahã na hã.

Duré, 'Re ihâimana u'âsi mono ma danhoprubzé hã, âma 're dawata za'ra mono da, da te tâma 're isômri za'ra mono zém na hã da te dasima 're pari waihu'u za'ra mono ô di, dapê'ê 're dadâ'â u'âsi ne 're idanomro mono zéb zarina, dawasété si da te 're 'manharî za'ra mono wa, 're idasiwê'ô u'âsi za'ra mono zé hã. Âne, wa te oto âma 're iwaihu'u za'ra mono zé hã, â hã ipire wasu'u na hã.

¹⁰ 'Re ihâimana u'âsi mono ma, danhoprubzé, da te 're isômri za'ra mono zé hã dapê'ê 're, da te dasima 're irosa'rata za'ra mono zém na te te wama rowasu'u ô di. Taré dasa hã marî, da te 're ihuri mono zém na roti te wasu'u, duré marî wa'u, da te 're i'âhuri mono zém na rowasu'u zama, duré 're dasihâiba wasété za'ra mono tô da, 're idasi'upsô'i pese za'ra mono zém na zama roti. Â norî na roti hã taré sô'awi dahâiba na roti, ma tô dama 're hâimana za'ra. Tane nherê, 'Re ihâimana u'âsi mono hã 're idanomro mono zép té hã, te te dama ipisutuzép tép âma, ma tô oto dawi ai'utô, â norî na roti 'rada hã.

¹¹ Cristu hã ma tô oto sisasedoti tô, sasedoti ipire uptabi na dama 're hâimana mono da, 're idanomro mono zép té hã iwê uptabi hã te te dama 're ab'madâ'â mono da oto. Tawamhã, hâiwa âma 'ri hã, 'Re ihâimana u'âsi mono hã iwa 're isâmra mono zéb u, ma tô oto âzé Cristu hã, danhib'rata na da te dasiwi i'ri ô u, ropoto wazari ti'ai âma 're isa mono ô u. Ti'ai âma romhã 'manharî na 'ri nhpai u, wê uptabi di 'ri hã, hâiwa âma hã. Pire uptabi na te ta hã 're sab u'âsi.

¹² Tawamhã Cristu hã hâiwa âma 'ri 're wa'wa u sébré wamhã, misi haré ma tô wanhowab za'ra âzé, 'ri 're wa'wa iwê uptabi u hã, 'Re ihâimana u'âsi mono, iwa 're isâmra mono zéb u hã. Tamomo itême sébré wamhã, e pone'ërebâi wapru ré ma tô âzé. E powawê 'ra wapru ré zama, ma duré âzé, te te tâma isômri da hã, duréihã sasedoti norî te te tâma 're isômri za'ra mono ne hã. Mare di. Tiwapru ré si ma tô itême âzé Timama u hã, te te tâma sômri da, taha na si wawasété hawi te te 're wa'anho'reptui mono da, misi haré.

¹³ Sasedoti norî hã 'Re ihâimana u'âsi mono nhimiroti 'rata na Mozési te te âma irob'ui'éré zarina, te za pone'ërebâi wapru hã syry na dahâiba nhisiwi te te 're sa'wari za'ra, niha wamhã, powawê i'ba'ômo wapru hã, marî na dahâiba mana wawip si 're dasihâiba wasété za'ra mono wa, apâ te te âma 're dahâiba wê za'ra mono da, taha zarina pibu pese na 'Re ihâimana u'âsi mono âma 're dawata za'ra mono da. Niha wamhã, powawê 'ra sipi'ô hã da te 're 'wa'a pese za'ra mono wa, taha pro hã 're isi'ru'a za'ra mono hã te za duré ta norî hã te te dahâiba nhisiwi 're sa'wari za'ra, te te âma 're dahâiba wê za'ra mono da, duré taha na hã.

¹⁴ Âne hã duréihã danhimizama wapru na dahâiba mana wawi marî na 're idasihâiba wasété za'ra mono parizéb da hã, wê nherê, taha nhpai u, Cristuhu wapru si siptete uptabi di, dawasété parizéb da hã. E marî wa. Taha si wasété âna 're hâimana u'âsi mono wa. Taha wa, 'Re ihâimana u'âsi mono pê'ëzani waihu'u pese zarina ma tô wazada sisômri za'ra 'Re ihâimana u'âsi mono ma, wazada dâ'â da, tiwapru na te te 're wa'a'upsô'i mono da, wapê'ê 're wadâ'â u'âsi ne 're iwanomro mono zéb zarina, wawasété si wa te 're 'manharî za'ra mono wa, 'râwi 're iwasiwê'ô u'âsi za'ra mono zé hã te te oto wama 're aparî mono da. Taha zarina, wa za oto 'Re ihâimana u'âsi mono ma si, wa te 're romhuri za'ra, wawê na si wahâimanazém na wa te 're upa za'ra mono âna.

'Re ihâimana u'âsi mono te te dama i'ropisutuzép té wasu'u

¹⁵ Taha wa, te oto Cristuhu si te te da'âma 're ab'madâ'â, 'Re ihâimana u'âsi mono te te dama i'ropisutuzép té hã. Tidâ'âzém na ma tô da'awa'â Cristu hã, dawasété na 're idanomro mono zém hawi te te 're da'anho'reptui mono da, zahadu 'Re ihâimana u'âsi mono te te dama i'ropisutuzéb 'rada hã dama 're hâimana mono ré. Taha zarina te za oto 'Re ihâimana u'âsi mono hã tinhîb'a'uwê da, te te 're i'apisutu mono norî hã te te sima 're awaihu, iwê uptabi na te te tâma 're i'aropisutu mono zéb ré si, 're hâimana u'âsi za'ra mono da i'ré, ta norî hã.

¹⁶⁻¹⁷ Ni'wa hã dâ'â ô ré, te za tinhîbrom na sisa'u dama roti, i'uirî na si da te niha dasima ipo'o mono da hã. Sisô'a ré, te za âne na hã âma rob'ui'éré ibaihã na hã, pibu pese na isibro hã i'uirî na da te dasima ipo'o mono zéb da hã. Tawamhã, e zahadu dâ'â ô ré, te za te te sima po'o, isimi'ui'éré zarina, te te tâma i'roti za'ra zéb zarina. Mare di. I'uirî na si te za tô ta norî hã isibro hã te te sima po'o, idâ'âzém na te te waihu'u za'ra wapsi. Tane duré, 'Re ihâimana u'âsi mono te te dama i'ropisutuzé hã.

¹⁸ Duréihâ sasedoti norî hâ danhimizama te te 're Îsimroi mono wapru na te te da'âma 're romhuri za'ra mono ô 'wa'âhâ, 'Re Îhâimana u'âsi mono te te dama Îropisutuzéb 'rada hâ pire na aré dama 're hâimana mono ô di. Taré te aré dama 're hâimana.

¹⁹ Duréihâ Mozési hâ Îmorî'rata na ma tô uburé 'Re Îhâimana u'âsi mono nhimiroti na dama rowasu'u. Taha pari, ma tô powawê wapru hâ â na waza, pone'êrebâi wapru zama. Tawamhâ wesuirâ suiro panhipti hâ ma tô sada si'ê za'ra. Taha pari, simisutu ma tô pone'êrebâ zéré na wasisi, da te Îséré pré na. Tawamhâ danhimizama wapru na ma tô âma di'i, â wazari powawê wapru na hâ. Tawamhâ Îbailhâ nhisiwi ma tô wesuirâ suiro panhipti wasi hâ sâsâ'â, danhimizama wapru na te te âma di'i da, 'Re Îhâimana u'âsi mono nhimiroti na rob'ui'éré ré nhisiwi. Dahâiba nhisiwi zama ma tô duré te te sâsâ'â, te te âma da'ahâiba di'i mono da, danhimizama wapru na.

²⁰ Tawamhâ Mozési hâ âne na te duré dama roti:

"Â danhimizama wapru hâ 'Re Îhâimana u'âsi mono te te aima Îropisutu za'ra wa'aba zé hâ, pire na oto aima 're Îhâimana za'ra wa'aba mono da hâ, te aima wasu'u za'ra wa'wa. Taha wa, te te aima âma Îroti za'ra wa'aba zéb zarina, te za oto 're Î'madâ'â pese za'ra wa'aba mo, tâma âma 're uwaimrami za'ra wa'aba mono da."

Âne te Mozési hâ dama âma roti.

²¹ Tawamhâ romhâ 'manharî na 'ri nhisiwib zama, ma tô duré wesuirâ suiro panhipti wasi hâ sâsâ'â, danhimizama wapru na te te âma di'i da. Uburé marî hâ 'Re Îhâimana u'âsi mono âma 're Îdawata za'ra mono zéb da, 'ri para 're Îsimasa mono nhisiwib zama ma duré sâsâ'â, te te âma adî'i mono da.

²² Tane tô. 'Re Îhâimana u'âsi mono nhimiroti 'rata na Mozési te te âma Îrob'ui'éré zarina, ma tô danhimizama wapru na marî hâ da te te âma 're di'i za'ra, 'ri para 're Îsimasa mono hâ, wasété âna 're simasa mono da, 'Re Îhâimana u'âsi mono ma hâ. Dahâiba wib zama, ma tô duré âma 're dasihâiba di'i za'ra, 'Re Îhâimana u'âsi mono ma, dahâiba wasété âna oto 're dahâimana za'ra mono da. Danhimizama hâ da te 're simroi mono wa, Îwapru hâ tiwi 're Îsisa'wari za'ra mono na si, te za âma 're dasihâiba wê za'ra dahâiba mana wawip si, marî na 're dasihâiba wasété za'ra mono wamhâ.

Cristu hâ Timama ma dazada Îsisômrizé wasu'u

²³ Â norî hâ ti'ai âma romhâ 'manharî na 'ri hâ, duré uburé marî hâ Îwa 're Îsimasa mono hâ, hâiwa âma 're Îhâimana za'ra mono ne, te 're hâimana za'ra. Tane nherê, aiwab uptabi ô di, marî Îpire da, 're hâimana za'ra mono ô nherê, 'ri hâ ti'ai âma hâ, duré uburé Îwa 're Îropisimasa mono hâ. Ta hâ ma tô sasedoti norî hâ danhimizama wapru na te te 're di'i za'ra, taha zarina si 'Re Îhâimana u'âsi mono ma, wasété âna 're hâimana za'ra mono da. Tane nherê, hâiwa âma marî hâ sena 're Îhâimana za'ra mono hâ Îwê na si, 'Re Îhâimana u'âsi mono ma, 're hâimana za'ra mono da, ma tô Îwê uptabi hâ sada dârâ.

²⁴ Âne wa, Cristu hâ dâ'â pari hâiwa'utu wa, ti'ai âma danhib'rata na 'ri 're, sébré ô di, 'Re Îhâimana u'âsi mono hâ Îwa 're Îsâmra mono zéb u hâ. E marî wa. Ta hâ ti'ai âma 'ri hâ, taré hâiwa âma 'ri Î'uptabi ne si 're hâimana mono wa, Î'uptabi ô wa. Hâiwa âma 'Re Îhâimana u'âsi mono hâ Îwa 're Îsâmra mono zéb u si ma tô âzé Cristu hâ, tame te te oto wa'âma 're romhuri u'âsi mono da, Timama nho'a.

²⁵ 'Re Îhâimana u'âsi mono ma, da'âma romhuri'wa Îpire uptabi hâ ma tô duréihâ siwaprosi Îtême 're zasi, 'Re Îhâimana u'âsi mono te, 'ri 're wa'wa Îwê uptabi u hâ, sasedoti Îpire uptabi hâ. Wahub sidâpâsi ma tô Îtême 're zasi misi haré, danhimizama wapru hâ te te tâma 're sômri mono da, da'udâna. Tane nherê, Cristu hâ wahub sidâpâsi hâiwa âma 'Re Îhâimana u'âsi mono hâ Îwa 're Îsâmra mono zéb u hâ, Îtême 're zasi u'âsi mono ô di. Misi haré ma tô Îtême âzé, Timama u hâ, ôhō haré dazada tâma sisômri wa, Timama ma hâ.

²⁶ Cristu hâ wahub sidâpâsi 'Re Îhâimana u'âsi mono ma, dazada 're sisômri u'âsi mono 'wa'âhâ, te aré ropoto na'rata hawim haré dazada 're dâ'â u'âsi. Tawamhâ robzépata za'êtê na te aré tô te te 're robzépata u'âsi. Tane nherê, za rob'râsutu u Îrob'umhutuzéb u si ma tô misi haré tâma sisô, 'Re Îhâimana u'âsi mono ma hâ, dazada dâ'â da, taha zarina dawasédé hâ te te dama 're apari mono da oto, 'Re Îhâimana u'âsi mono hâ.

²⁷ Misi haré te za aihîni 're dadâ'â za'ra. Taha parip si te za 'Re Îhâimana u'âsi mono hâ niwapsi da'awaihu'u, dawê na dawasété na zama, taha zarina te te dama arowairébé mono da oto.

²⁸ Tane ma tô duré Cristu hâ misi haré dazada dârâ, dawasédé hâ da'ahâ na te te oto dama âma 're Î'apari mono zéb da hâ. Tawamhâ ti'ai u apâ wei morî zahu wamhâ, dazada dâ'â da, wei morî ô di za oto, taha zarina dawasédé hâ te te duré dama 're Î'apari mono da hâ. Mare di. Sô 're Îsimipari za'ra mono norî si, te te oto Îsô'reptu pese za'ra da si, te za wei mo apâ Cristu hâ, ta norî zô si.

10

¹ 'Re ìhâimana u'âsi mono nhimiroti 'rata na Mozési te te âma ìrob'ui'éré zarina, ìwê hã oto wama 're ìhâimana za'ra mono zém na wa te âma 're waihu'u uptabi za'ra mono ò di. Wahub sidâpâsi ma tô danhimizama hã dasi'udâna da te tâma 're simroi u'âsi, 'Re ìhâimana u'âsi mono ma hã, da te 're sahâri za'ra mono âna. Tane nherê, danhimizama da te tâma 're ìsimroi mono zé hã sib'uware di, dawasédé hã tô sena te te dama 're ì'apari mono da hã, âma 're dawata za'ra mono da, 'râwi dapê'ê 're 'Re ìhâimana u'âsi mono u 're ìdanomro mono norî ma hã. Dapê'ê 're, rowê na 're ìdahâimana za'ra mono zéb da hã, sib'uware di tô, 'Re ìhâimana u'âsi mono ma, danhimizama da te 're ìsimroi mono zé hã.

² 'Re ìhâimana u'âsi mono âma 're ìdawata za'ra mono norî hã danhimizama hã dasi'udâna da te tâma 're ìsimroi mono zém na, òhò haré dawasédé hã te te dama 're apari uptabi mono 'wa'âhã, taha zarina 'râwi 're dasiwê'ò u'âsi za'ra mono ò di aré, dawasété na hã. Taha zarina te aré oto danhimizama pâri hã da te 're sahâri za'ra.

³⁻⁴ Tane nherê, powawê ìba'ômo wapru hã duré pone'ërebâi wapru hã dawasédé hã te te dama 're pari uptabi za'ra mono ò di. Taré te za danhimizama hã wahub sidâpâsi dasi'udâna 'Re ìhâimana u'âsi mono ma, da te 're ìsimroi mono zéb zarina, âma 're dasipo're pu'u u'âsi za'ra, dawasété ré 're ìdahâimana za'ra mono zém na hã.

⁵ Taha wa, Cristu hã ti'ai u wei ìmorîzéb u, ma tô Timama ma tinha, âne: "Danhimizama na duré dasazém na aima 're danhoprub za'ra mono da, a hã asina sô 're asimipari mono ò di.

Tane nherê, ìhâiba hã ma tô ìma ìsô, da'upana ìsina aima ìnhoprub da hã.

⁶ Danhimizama hã dawasété parizéb da, wahuré da te aima 're ìzata za'ra mono zém na zama, 're atoi mono ò di. Duré dawasété parizéb da, danhoprubzéb, da te aima 're ìsômri za'ra mono na zama, asima 're atoi mono ò di."

⁷ Âne te duré tâma tinha, Timama ma:

"'Re ìhâimana u'âsi mono, wa hã wa wei âwa mo ti'ai u, ìma ìpisutuzéb zarina, te oto ìsina aima âma uwaimrami da, ìbaihã na ìwasu'u na duréihã da te ì'âma ìrob'ui'éré za'ra zéb zarina."

Âne ma tô Cristu hã Timama ma siwasu'u.

⁸ Âne ma tô Cristu hã ìmorî'rata na Timama ma rowasu'u, tô: "Danhimizama da te aima 're ìzata za'ra mono zô, duré dasazém na aima 're ìdanhoprub za'ra mono zô, asina 're asimipari mono ò di a hã, dawasété parizéb da hã. Asima âma 're atoi mono ò di, taha na hã." Âne na ma tô Cristu hã Timama ma rowasu'u, Mozési hã ìsimiroti 'rata na te te âma ìrob'ui'éré zarina, âne hã da te 're 'manharî za'ra mono nherê.

⁹ Taha pari, ma tô duré Timama ma siwasu'u, âne: "Âwa wa tô wei wa hã ti'ai u mo, ìma ìpisutuzéb zarina, te oto ìsina aima âma uwaimrami da." Âne ma tô Cristu hã Timama ma siwasu'u, duréihã dawasété parizéb da, danhimizama na duré dasazém na 'Re ìhâimana u'âsi mono ma, 're ìdanhoprub za'ra mono zé hã te te oto dawî sina sizâri da, taha nhowa're're tihâiba na tâma sôprub da oto, taha na si dawasédé hã te te dama âma 're ì'apari mono zéb da hã.

¹⁰ Zezu Cristu hã 'Re ìhâimana u'âsi mono te te tâma ìpisutuzéb zarina, te te tâma âma uwaimrami wa, tihâiba na tâma sôpru wa, ma tô te te 're wa'a'upsô wawasété hawi, tâma 're wanomro wê mono da oto. Misi haré ma tô tâma sisô, dazada dâ'à da, tô òhò na si dawasédé hã te te dama âma 're apari mono da.

¹¹ Sasedoti norî hã awê sidâpâsi te te da'âma 're romhuri za'ra, 'Re ìhâimana u'âsi mono nhorôwa âma. Danhimizama na 're ìdanhoprub za'ra mono zé hã te ahã uptabi na te te tâma 're sômri za'ra, 'Re ìhâimana u'âsi mono ma, tô òhò si. Tane nherê, â norî hã danhimizama na 're ìdanhoprub za'ra mono zé hã, dawasédé hã te te dama 're pari waihu'u za'ra mono ò di.

¹² Cristuhu si, ma tô misi haré tihâiba hã tâma tisô, dazada dâ'à da, òhò haré dawasédé hã te te dama âma 're ì'apari mono zéb da hã. Taha pari, te 'Re ìhâimana u'âsi mono nhimire niwî 're sâmra, pire uptabi na ìsiré te te 're da'ab'madâ'à mono da oto, òne u'âsi.

¹³ Tame te oto Cristu hã sô 're simipari u'âsi, 'Re ìhâimana u'âsi mono hã tinhitob'ru norî nhiptetezéb hã te te tiwi ì'uprosi za'ra zéb zô hã, tâma sib'owa uptabire na 're hâimana za'ra mono da oto, ta norî hã.

¹⁴ Misi haré 'Re ìhâimana u'âsi mono ma, dazada sisômri wa, ma tô dawasété hawi te te 're da'awaibu, 'Re ìhâimana u'âsi mono nhîb'a'uwê si oto âma 're danomro wê mono da.

¹⁵ 'Re ìhâimana u'âsi mono pe'ëzani hã ma tô âne na wama waihu'u za'ra, sena na wa te wasina 're waihu'u za'ra mono da. Âne te te wama âma ìwaihu'u na'rata za'ra zé hã:

16 “Nimahã båtã na wa za, te dama İropisutuzép té hã, dama pisutu, duréihã te dama İropisutuzém nhowa're're. Åne, wa wa hã Danhib'apito uptabi hã aimã wasu'u za'ra wa'wa, İnhimiroti tém na te dama İropisutuzé hã.

Tawapsi wa za İnhimiroti hã dapë'ë 're te dama 're anhomri, İre 're danomro u'ãsi mono wa, da te 're 'madã'ã pese za'ra mono da, İmreme hã.”

17 Åne ma tô duré İwasu'u nhana'remhã wama waihu'u za'ra:

“Dawasété na 're İsipo're pu'u mono õ di za oto, marĩ, da te 're İ'manharĩ wasété za'ra mono zém na hã. Mare uptabi di za.”

18 Åhã wamhã, dawasédé hã 'Re İhãimana u'ãsi mono te te oto dama 're T'apari mono zéb da hã, marĩ dai õ di oto, danhimizama na tãma 're İdanhoprub za'ra mono zé hã, dawasété parizéb da hã. Tãibã oto ta hã.

'Re İhãimana u'ãsi mono u, 'rãwi dapë'ë na 're İdasihutu mono zé wasu'u

19 İsisãnawã norĩ, Zezusihi waprũ hã tiwi İpu'uzém na wazada İdã'ãzéb zarina, wa za oto wasina wapahi ãna 'Re İhãimana u'ãsi mono u 're wasihutu 'rãwi wapë'ë na, robzei u'ãsi tãma 're wamreme zusi mono da. Duréihã sasedoti norĩ hã, 'Re İhãimana u'ãsi mono 're İsãmra mono zéb u, 'ri 're wa'wa u 're İsisisi mono ne, wa za oto wa norĩ hã 'rãwi İtème 're wasihutu, wasina 're wapahi za'ra mono ãna, tãma.

20 Duréihã 'Re İhãimana u'ãsi mono 're İsãmra mono zéb 're, 'ri 're wa'wa nhitobzé hã zazahã İhãpa hã te dawĩ 're hãsipra u'ãsi pi'reba, İtème 're danhisisi tã mono da. Tane nheré, Cristu hã ma tô oto wama 'ridawa za'ra tidã'ãzém na, zazahã İhãpa na 'ri 're wa'wa nhitobzé wa'wai baba, İtème 're İdanhisisi mono ne, wapë'ë na İtème 're wasihutu mono da, 'Re İhãimana u'ãsi mono u, robzè uptabi na İme 're wanomro u'ãsi mono da oto.

21 Sasedoti İpire uptabi na te oto wama 're hãimana. Taha si te tãma umnhasi na uburé 'Re İhãimana u'ãsi mono nhib'a'uwé norĩ hã te te 're ab'madã'ã tãma, pire uptabi na.

22 Wawasété na 're wanomro mono wa, 'rãwi 're İwasiwë'õ sãmri za'ra mono zé hã ma tô Cristu hã tiwaprũ na te te wama 're apari, duréihã sasedoti norĩ hã te te ãma 're dahãiba wé za'ra mono da, danhimizama waprũ na syry na te te ãma 're İdahãiba di'ĩ za'ra mono ne. Sasedoti norĩ hã 're sihãiba wasété za'ra mono ãna, 'Re İhãimana u'ãsi mono u 're sisisi mono da, 're İsihãiba upsõĩ pese za'ra mono ne, wa oto wa norĩ hã wahãiba upsõĩ pese ne tãma 're wahãimana wé za'ra, 'Re İhãimana u'ãsi mono ma si. Taha wa, wa za oto wapë'ë na 'rãwi İtème 're wasihutu, wahãimanazé sena ré si, 'Re İhãimana u'ãsi mono u hã, õhõ si wa te oto wasina 're İ'mnhasi za'ra mono zéb zarina.

23 'Re İhãimana u'ãsi mono hã wama umnhasi za'ra di, te te wama 're İ'aropisutu mono zéb uwaibaba, te te wama ãma 're İ'a'uwaĩmrami mono da hã. Taha wa, wanhiptete sina wa za İwé uptabi zõ 're wanhimipari u'ãsi za'ra, 'Re İhãimana u'ãsi mono hã te te wama İropisutu za'ra zém na wa te 're wawã za'ra mono ãna, sena na za wama 're İhãimana za'ra mono na wa te dama 're İwasu'u za'ra mono zéb zarina.

24 Wa za duré wasi'ãma 're wapo're pu'u u'ãsi za'ra, marĩ na 're İwasipawaptob za'ra mono zéb da hã, duré taha zarina 're İwasisawi pese za'ra mono zém na wa te wasima ãma 're İ'uwaĩmrami za'ra mono zéb da hã, duré marĩ wé na wa te wasima ãma 're İwa'rãmi wé za'ra mono zém na zama.

25 Ni'wam norĩ hã Cristuhu zazei'wa dasiré 're hãimana za'ra mono wa, rowahutu u dasiré 're si'rã'õtõ mono nheré, ma tô ta norĩ hã rosahãri pese za'ra oto. Tane nheré, wa norĩ hã wasiré 're İwasi'rã'õtõ mono zé hã wa te wasiwi sazãri za'ra õ di za. Tõ'ã. Wa za tô wasiré 're wasi'rã'õtõ u'ãsi, ãma 're wasipawapto pese za'ra mono da, 'Re İhãimana u'ãsi mono hã wa te wasina 're İ'mnhasi za'ra mono zém na si 're wanhiptete za'ra mono da. E marĩ wa. Wanhib'apito apã we İmorizéb u hã bãdã hã romhutu na aimã waihu'u pese za'ra wa'aba wa.

26 Ni'wam norĩ hã Cristuhu wasu'uwé, sena na 'rãwi te te sina 're waihu'u pese za'ra mono nheré, duré te te sima 're İwé za'ra mono zéb zarina, 're İhãimana wasété 'rata za'ra mono zém na si 're hãimana u'ãsi za'ra mono wamhã, marĩ hã 're 'maihãimana mono õ di, ta norĩ da hã, İwasédé te te tãma 're İpari za'ra mono zéb da hã, ta norĩ ma hã.

27 Ta norĩ hã 'Re İhãimana u'ãsi mono zãda, 're hãimana za'ra mono wa, te za 'Re İhãimana u'ãsi mono hã uprosi unhamã ro'o za'ëté na, te te siwi 're İwë'õ pese za'ra mono norĩ hã. Taha u hã, te za ta norĩ hã sina pahĩ na 're simipari za'ra oto.

28 Duréihã 'Re İhãimana u'ãsi mono nhimiroti 'rata na, Mozési te te ãma İrob'ui'éré hã ni'wam norĩ hã te te siwi 're wë'õ pese za'ra mono wamhã, ta norĩ hã ma tô da te dasiwi 're simro, ãma 're dapë'ëzè waihu'u za'ra mono ãna. Marĩ İwasédé hã ta norĩ hã te te 're 'manharĩ za'ra mono ré, siwaptom na İ'madã'ã za'ra 'wa norĩ hã, İwasété na te te dama 're İwasu'u za'ra mono zéb zarina, ma tô da te dasiwi 're simro, ta norĩ hã.

²⁹ Āne, duréihā 'Re ihāimana u'āsi mono nhimiroti 'rata wē'ō'wa norī ma, 're ropipa za'ra mono di. E niha tawamhā za, 'Re ihāimana u'āsi mono 'ra, te te siwi 're īruiwapari za'ra mono norī ma, 're īromhāimana za'ra mono zé hā za. Tāma 're ropipa uptabi za'ra mono di za tō. 'Re ihāimana u'āsi mono hā te za tō ta norī hā hā za'ra za'ētē, rob'rāsutuzéb āma hā. Duré 'Re ihāimana u'āsi mono te te dama īropisutuzép tém na, Cristu hā dazada idā'āzé hā taré newa, te ta norī hā te te āma 're rosa'rata upa za'ra. Ta norī hā te duré 'Re ihāimana u'āsi mono pē'ēzani āma te te 're wasété u'āsi za'ra, īsimizawi uptabi āma.

³⁰ Taha wa, te za tō ta norī hā nimahā na hā hā za'ra, 'Re ihāimana u'āsi mono hā. Duréihā ma tō āne na ni'wa hā āma rob'ui'éré siro, 'Re ihāimana u'āsi mono mreme na hā. Āne na hā 'Re ihāimana u'āsi mono mreme hā wama waihu'u pese za'ra di oto:

“Wa hā īsiwaprosi wa za te 're da'a'ruiwa'ābā. Īwétési wa za te dama āma 're awa'rāmi, marī, da te 're ī'manharī wasété za'ra mono norī ma hā.”

Āne duré 'Re ihāimana u'āsi mono mreme na rob'ui'éré amo hā:

“Wa hā uburē Danhib'apito uptabi hā wa za ī'uwaibaba uptabi na si te 're da'ahā za'ra, dawasété na īsiwaprosi te 're ida'awaihu'u mono zéb zarina.”

Āne 'Re ihāimana u'āsi mono mreme na rob'ui'éré hā.

³¹ Ni'wam norī hā 'Re ihāimana u'āsi mono nhīb'rata, 're īrere'e mono ne, te te 're hā za'ra mono wamhā, tāma 're ropipa uptabi za'ra mono di za, ta norī ma hā.

³² Ma'āpé, āma asipo're pu'u za'ra wa'aba, duréihā Cristu hā Danho'reptui'wa na asina 're īwaihu'u na'rata za'ra wa'aba mono zém na hā, 'Re ihāimana u'āsi mono nhimipawaptobzéb zarina. Ta hawim haré, Cristuhu zazei'wa oto 're anomro aba mono wa, marī na 're robzépata za'ētē za'ra wa'aba mono nherē, ma tō asiptete sina āma 're aihāimana u'āsi za'ra wa'aba mo, tiwi 're aipizari za'ra wa'aba mono āna.

³³ Nimahā na hā ma tō ni'wam norī hā danho'a te te ai'āma 're wasété za'ra wa'wa. Ma tō duré da te aima 're rob'manharī wasété za'ra wa'wa, danho'a. Duré nimahā na asiré norī ma, da te 're rob'manharī wasété za'ra mono wamhā, ma tō 're īpawaptob za'ra wa'aba mo, ta norī zu, da te aima 're rob'manharī wasété za'ra wa'aba mono da nherē.

³⁴ Dazazéb 're, 're ihāimana za'ra mono norī āma 're aipē'ézé za'ra wa'aba mono zéb zarina, ma tō ta norī me aipē'ē na 're īrobzépata za'ra wa'aba mo, ihāiba zu. Duré asibro hā da te aiwi 're waihu'wa'aba mono nherē, ma tō ato sina 're aihāimana za'ra wa'aba mo. Aiwi 're robzei'ō za'ra wa'aba mono ō di, taha na hā. E marī wa. Ti'ai āma asibrom nhipai u, hāiwa āma īwē uptabi hā īsi'utōrī'ō hā za aima 're ihāimana za'ra wa'aba mono na hā aima waihu'u pese za'ra wa'aba wa.

³⁵ Taha wa, Cristu hā aipahi āna asina 're ī'umnhasi za'ra wa'aba mono zé hā asiwi 're īwē'ō za'ra wa'aba mono zéb zarina, 're rēme za'ra wa'aba mono ō di za. Asiptete sina te za tō āma 're anomro u'āsi aba mo. Āne 're aihāimana za'ra wa'aba mono wamhā, taha zarina te za 'Re ihāimana u'āsi mono hā īwē uptabi na aima wa'ābā za'ra wa'wa, nimahā na hā.

³⁶ Marī na 're robzépata za'ra wa'aba mono nherē, duré Cristuhu zazei'wa 're anomro aba mono wa, da te aima 're rob'manharī wasété za'ra wa'aba mono nherē, te za tō asiptete sina, asina 're ī'umnhasi u'āsi za'ra wa'aba mo, tiwi 're aipizari za'ra wa'aba mono tō da. Āne zarina, asina tāma āma 're uwaimrami za'ra wa'aba mono wamhā, 'Re ihāimana u'āsi mono te te aima 're īwē za'ra wa'aba mono zéb zarina, te za tō tāma 're anomro wē wa'aba mo. Tawapsi, te za 'Re ihāimana u'āsi mono hā te te aima īropisutu za'ra wa'aba zé hā īwē uptabi hā oto asina ī'uwaimrami za'ra wa'wa.

³⁷ Duréihā 'Re ihāimana u'āsi mono zadawa wasu'u'wa hā ma tō āne īmreme na rob'ui'éré, Cristuhu wasu'u na hā:

“Ta hā za we īmorī hā niwamhā oto wei morī wamhā, sō rowaptā'ā ō di za. Romhutu na te za tō wei mo.

³⁸ Ni'wam norī hā te tāma 're īwē za'ra mono zéb zarina si 're īnomro wē mono norī hā, ta norī hā Danho'reptui'wa na te te sina 're īzaze za'ra mono zéb zarina si, wa za te 're awēsāmri, īwasédé hā te āma 're ab'madā'ā mono ō wa za oto, ta norī āma hā. Āne wa, te za rowē uptabi na ī'rata 're hāimana u'āsi za'ra, ta norī hā.

Tane nherē, ni'wam norī hā īwi 're sipizari za'ra mono wamhā, āma 're īto za'ra mono ō di za oto, ta norī āma hā.”

Āne duréihā 'Re ihāimana u'āsi mono zadawa wasu'u'wa te te īmreme na āma īrob'ui'érézē hā, ībaihā na hā.

³⁹ Tane nherē, ta norī ne, wa norī hā 're wahāimana za'ra mono ō di. Nimahā na 'Re ihāimana u'āsi mono wi 're wasipizari za'ra mono ō di, ta norī ne. Taha wa, 'Re ihāimana u'āsi mono hā niwamhā ta norī zu te te wa'uprosi ō di za. Taha si wa tō wa te wasina 're umnhasi u'āsi za'ra, te te 're īwa'anho'reptui mono da hā. Taha zarina te za tō wa norī hā wa'anho'reptu, ī'rata oto 're īwahāimana u'āsi za'ra mono da hā, rāwi.

11

'Re ihâimana u'âsi mono, da te dasina 're ĩ'umnhasi za'ra mono zé wasu'u

¹ E niha, wa te wasina 're ĩ'umnhasi za'ra mono zé hã, 'Re ihâimana u'âsi mono hã. 'Re ihâimana u'âsi mono hã wa te wasina 're umnhasi za'ra mono wamhã, ta hã te te wama 're ĩ'apisutu mono zéb zarina, ĩwē uptabi zô si 're ĩwanhimipari u'âsi za'ra mono na, tô sena za te te wama âma ĩ'uwaïmrani za'ra na, wa za wa te wasina 're waihu'u za'ra. Duré uburé marĩ hã watômo na wa te 're ĩ'madã'ã waihu'u za'ra mono ô zama, wa za duré wa te 're waihu'u za'ra, sena na 're ihâimana za'ra mono na hã. Âne 'Re ihâimana u'âsi mono hã wa te wasina 're ĩ'umnhasi za'ra mono zé hã.

² Duréihã wahi'rata norĩ hã, 'Re ihâimana u'âsi mono te te sina 're ĩ'umnhasi za'ra mono zéb zarina si, ma tô 'Re ihâimana u'âsi mono hã te te 're awêsãmri, ta norĩ hã.

³ 'Re ihâimana u'âsi mono, wa te wasina 're ĩ'umnhasi za'ra mono zéb zarina, wa tô, sena na wa te 're waihu'u za'ra, 'Re ihâimana u'âsi mono te te ĩnharizéb zarina, marĩ ô uptabi ré, te te ĩ'aropoto mono na hã. Datômo na da te 're ĩ'madã'ã waihu'u za'ra mono ô na si, ma tô te te ro'apoto, watômo na wa te oto 're ĩ'madã'ã za'ra mono da hã. Âne na wa tô duré sena na wa te 're waihu'u za'ra, 'Re ihâimana u'âsi mono si, wa te wasina 're ĩ'umnhasi za'ra mono zéb zarina hã.

⁴ Abé hã, 'Re ihâimana u'âsi mono si te te sina 're ĩ'umnhasi mono zéb zarina, ma tô ĩwē uptabi na tâma tinhopru, 'Re ihâimana u'âsi mono ma. Ca'ĩhĩ nhĩbzari si, te te wêsãmri ô di, 'Re ihâimana u'âsi mono hã. Taha wa, Abé hã 'Re ihâimana u'âsi mono si te te sina 're ĩ'umnhasi mono zéb zarina, ma tô 'Re ihâimana u'âsi mono hã wêsã, 're ĩmorĩ wē na zama. Taha wa, ma tô Abéhé nhoprubzép si wêsã. Âne na Abé hã 'Re ihâimana u'âsi mono te te sina 're umnhasi mono wa, duréihã dá'ã nheré, zahadu hãiba ré wama 're ihâimana za'ra mono ne, te wama 're hãimana za'ra, taha âma 're wasipo're pu'u u'âsi za'ra mono wa.

⁵ Duré Enotĩ hã 'Re ihâimana u'âsi mono te te sina 're ĩ'umnhasi mono zéb zarina, ma tô hãiba ré ré mo, hãïwa u. 'Re ihâimana u'âsi mono hã ma tô hãiba ré ré sitême ti'ã. Taha wa, ni'wa te te waihu'u ô di ta hã, ĩdã'ázém na hã. Duréihã 'Re ihâimana u'âsi mono zadawa wasu'u wa hã ma tô âne na rowasu'u ĩbaihi na, Enotihĩ wasu'u na hã: "'Re ihâimana u'âsi mono hã hãïwa u sitême te te âri ô ré, ma tô Enotihĩ ma 're to, 're ĩmorĩ wē zéb zarina, 'Re ihâimana u'âsi mono hã."

⁶ Ni'wam norĩ hã 'Re ihâimana u'âsi mono te te sina 're umnhasi za'ra mono ô nheré, ta norĩ ma, 're to za'ra mono ô di za, 'Re ihâimana u'âsi mono hã. Duré ni'wam norĩ hã 'Re ihâimana u'âsi mono âma 're wata za'ra mono da, tipê'ê na 'rãwi ĩtême 're sihutu mono da, te te sima 're wē za'ra mono wamhã, tô sena 're ihâimana mono na, te za te te 're saze za'ra a'ã. Duré 'Re ihâimana u'âsi mono zô si 're ĩsôpré mono norĩ ma, ĩwē na za te te ta norĩ ma ĩwa'ãbã za'ra na, te za ta norĩ hã te te sina 're umnhasi u'âsi za'ra.

⁷ Nowé hã, 'Re ihâimana u'âsi mono si te te sina 're ĩ'umnhasi mono zéb zarina, ma tô duré âma saze, ropipa hã za dazô ĩwatobrozém na 'Re ihâimana u'âsi mono hã romhã ré te te âma ĩpo're pu'uzém na, zahadu marĩ hã titômo na te te 'madã'ã ô nheré, Nowé hã. Taha wa, ĩsimiroti zarina ma tô uba're za'êne hã 'manha, ti'ra norĩ hã te te âma sô'reptu za'ra da, timro zama, duré tisani'aba norĩ zama. Taha zarina, ma tô 'Re ihâimana u'âsi mono hã siwi da'awê'ô pese, dawasété na si 're dahãimana za'ra mono wa, Nowéhé si ĩsimiroti hã te te 're 'madã'ã pese mono wa. Tawamhã Nowé hã, 'Re ihâimana u'âsi mono si te te sina 're umnhasi mono wa, ma tô 'Re ihâimana u'âsi mono hã âma tiwata, âne: "'Ahã si te 're timorĩ wē." Âne 'Re ihâimana u'âsi mono hã, Nowéhé âma ĩwatazé wasu'u hã.

⁸ Abra'ã hã, 'Re ihâimana u'âsi mono si te te sina 're ĩ'umnhasi mono zéb zarina, ma tô duré ĩsimiroti na saze, tirom nhĩti watobro da, darob amoi u morĩ da, âma ĩsa'ru da hã 'Re ihâimana u'âsi mono te te tâma ĩpisutu u. Tawamhã tirom hawi ma tô watobro tô, darob amoi u morĩ da, tamomomhã bådãdi hã te te waihu'u ô nheré.

⁹ 'Re ihâimana u'âsi mono si te te sina 're ĩ'umnhasi mono zéb zarina, ma tô darob amoi âma 're sãmra Abra'ã hã, dasiré ô nheré, 'Re ihâimana u'âsi mono, za âma ĩsa'ru da hã te te tâma ĩpisutuzéb âma. Tawamhã romhã 'manharĩ na 'ri wa, te oto 're sãmra, 'ri uptabi ô wa. Izati norĩ hã ma tô duré romhã 'manharĩ na 'ri wa, 're simasisi zahuré, Zacoho me. Ta norĩ ma, ma tô duré ropisutu zahuré, Abra'ãhã ma te te ĩropisutu ne, 'Re ihâimana u'âsi mono hã.

¹⁰ Abra'ã hã 'ri nho'u ĩsi'utôĩ'ô zô si ma tô 're simipari u'âsi, 'Re ihâimana u'âsi mono hã te te sima ĩwē na hãïwa âma te te dama ĩ'ri zô si. Taha wa, te te siwi wê'ô ô di Abra'ã hã, romhã 'manharĩ na 'ri hã wasété wa, a'ã ĩ're 're sãmra tô mono da.

¹¹ Abra'ã hã 'Re ihâimana u'âsi mono si te te sina 're ĩ'umnhasi mono zéb zarina, ma tô duré ĩ'ra hã tâma podô, si'ĩhi uptabi nheré, duré ĩmro hã Sara hã prédupté ré, 'ra waihu'u ô nheré. 'Re ihâimana u'âsi mono te te tâma ĩropisutuzém na te te âma sazei pese wa, ma tô ĩ'ra hã tâma podô tô.

¹² Abra'ã hã si'ĩhi uptabi wa, ĩdã'ázéb u romhutu nherë, ma tã ĩhãiba hawi da'ahã uptabi na dasina dahã'ã u'ási, ĩsihudu sidãpãsi. Wasi hã hãwi na ahã uptabi na 're ĩsimasa mono ne, ma tã da'ahã uptabi na atëbré ni. Á zaihã na supara, ahã uptabi na 're ĩsimi'wara mono ne, ma tã atëbré ni.

¹³ Á norĩ hã 'Re ĩhãimana u'ási mono te te sina 're umnhasi za'ra mono ré, 're dã'ã za'ra mono nherë, 'Re ĩhãimana u'ási mono te te tãma ĩropisutu za'ra zé hã te te sima 're waĩbu mono õ di ta norĩ hã, ti'ai ãma hãiba ré ré 're hãimana za'ra mono ré hã. Tane nherë, 'Re ĩhãimana u'ási mono te te tãma ĩropisutu za'ra zé hã romhã na uptabi na za te te tãma ãma ĩ'uwaimrami za'ra na, sena na te te 're waihu'u za'ra mono wa, ma tã ãma 're to za'ra ta norĩ hã, ti'ai ãma 're nomro mono ré. Ma tã duré sã'awi dama 're siwasu'u za'ra, ti'ai ãma dasiré 're ĩhãimana uptabi za'ra mono õ na hã.

¹⁴ ãne na ta norĩ hã dama 're siwasu'u za'ra mono wamhã, daro hã aimawi ĩtëb zõ 're ĩsõpré u'ási mono zé, te wama wasu'u za'ra, taha na si za oto 're ĩrob uptabi za'ra mono na hã.

¹⁵ Tirob 'rata hawi 're ĩwairëbé mono na te te 're rosa'rata za'ra mono õ di, ta norĩ hã. Mare di. ãne 'wa'ãhã, átë apã te aré ta norĩ hã tirob 'rata u 're nomro.

¹⁶ Tane nherë, daro ĩwë uptabi zõ si ma tã ta norĩ hã sima 're sõpré, hãwi ãma sã 're ĩhãimana za'ra mono zõ si, ĩwa 're ĩsi'ubumroi u'ási mono zëb da hã. Taha wa, 'Re ĩhãimana u'ási mono te te siwi wë'õ za'ra õ di, tinhib'apito na te te 're sisi za'ra mono tã da hã. Taha zarina, ma tã oto tã 'ri nho'u hã ĩwë uptabi hã tãma 'manharĩ za'ra, ĩwa 're ĩsi'ubumroi u'ási mono zëb da hã, tirop tãb ãma.

¹⁷⁻¹⁸ Abra'ã hã 'Re ĩhãimana u'ási mono si te te sina 're ĩ'umnhasi mono zëb zarina, ma tã aré ti'ra hã tãma tiwĩ Izati hã, tãma ãma ĩsõprubzëb da, 'Re ĩhãimana u'ási mono hã te te pibui wamhã. Taha õ ré, ma tã 'Re ĩhãimana u'ási mono hã tãma ropisutu siro, Abra'ãhã ma hã, ãne:

"Ai'ra Izatihi hawip si, te za asihudu norĩ hã ahã uptabi na 're hãimana za'ra, asihudu sidãpãsi te aima ĩropisutuzëb zarina."

ãne na 'Re ĩhãimana u'ási mono te te tãma ropisutu nherë, ma tã aré Abra'ã hã ti'ra hã tiwĩ Izati hã, ĩ'ra si'aibã hã misi tãma potõ nherë. Duré ta hawip si za ĩsihudu norĩ hã sitëbré da nherë, ma tã aré tãma tiwĩ, 'Re ĩhãimana u'ási mono ma hã.

¹⁹ Abra'ã hã ãne ma tã sima rosa'rata: "'Re ĩhãimana u'ási mono ma si, waihu'u pese di, 're dadã'ã za'ra mono nherë, apã te te 're ĩda'ahãwi'utu mono da hã. Taha wa, ĩ'ra hã te aré tãma ĩwĩrĩ hã, te te duré waihu'u pese di, apã te te ĩma ĩhãwi'utu da hã, te te ĩma ĩropisutuzëm na te te ĩma ãma uwaimrami da hã." ãne ma tã sima rosa'rata, Abra'ã hã. Tawamhã, ĩ'ra Izati hã dã'ã uptabi õ nherë, aré dã'ã wa, apã te te tãma ĩhãwi'utu ne, ma tã dã'ã ãna tãma tisõ apã, 'Re ĩhãimana u'ási mono hã.

²⁰ Duré Izati hã 'Re ĩhãimana u'ási mono si te te sina 're ĩ'umnhasi mono zëb zarina, ma tã ti'ra norĩ ãma rowaptë tiwi, ĩwë na si te te 're pawaptob u'ási zahuré mono da, duré ĩwë si te te tãma 're pisutu zahuré mono da, Zaco norĩ ma hã Eza'uhu me.

²¹ Duré Zaco hã 'Re ĩhãimana u'ási mono si te te sina 're ĩ'umnhasi mono zëb zarina, ma tã Zuzéhé 'ra norĩ ma rowaptë 'Re ĩhãimana u'ási mono wi, ĩwë na si te te 're pawaptob u'ási zahuré mono da, duré ĩwë si te te tãma 're pisutu zahuré mono da. Taha zarina, ma tã duré tisiwazusizëm na si'upari sina ãma tiwata, 'Re ĩhãimana u'ási mono ãma, Zaco hã.

²² Duré Zuzé hã 'Re ĩhãimana u'ási mono si te te sina 're ĩ'umnhasi mono zëb zarina, ma tã tidã'ázëb u tidub'rata norĩ ma rowaihu'u sirõmo za'ra, Izarazéhé nhihudu norĩ, za Ezitu hawi ĩwairëbézëm na hã. ãne na, 'Re ĩhãimana u'ási mono si te te sina 're umnhasi mono wa, te duré tãma sina roti za'ra, ĩ'uĩri na si, ĩhi hã te te siwi ãri da apã, tirob 'rata u, tamep si te te siwi sërë da.

²³ Duré Mozësihi mama norĩ hã, 'Re ĩhãimana u'ási mono si te te sina 're ĩ'umnhasi zahuré mono zëb zarina, ma tã dawi simi'uri zahuré Mozësi hã, 'watëbrëmi na tãma potõ zahuré wa. Duré tãma 'madã'ã ze zahuré wa, tãma sawi uptabi zahuré di. Taha wa, ma dawi simi'uri zahuré. A'amo hã si'ubdatõ ma tã ãma ai'utõ, te te dawi ĩsimi'uri zahuré zëm na hã. Apito ma, ta norĩ hã pahĩ zahuré õ di, 'watëbrëmi na 're ĩpoto za'ra mono norĩ hã, te te dama 're a'rui mono nherë. ãne ma tã 'manharĩ zahuré Mozësihi mama norĩ hã, 'Re ĩhãimana u'ási mono si te te sina 're umnhasi zahuré mono wa, duré ta norĩ hã.

²⁴ Mozësi hã prédu wamhã, 'Re ĩhãimana u'ási mono si te te sina 're ĩ'umnhasi mono zëb zarina, ma tã dawi sisawi, Ezitu ãma apito Para'oho 'ra sipi'õi 'ra na da te dasima 're wasu'u za'ra mono tã da, pi'õ te te ĩprédum na hã.

²⁵ Apito Para'oho nhorõwa ãma, uburé marĩ ĩwasédé hã te te a'ã dame 're ĩ'ab'manharĩ mono da hã, te te sima wë õ di Mozësi hã, taha na si wë uptabi newa ãma 're ĩtoi mono da hã. 'Re ĩhãimana u'ási mono nhĩb'a'uwë norĩ siré, te te 're ĩrobzëpata mono da si, ma tã sima wë.

²⁶ Apito Para'oho nhorōwa āma 're sāmra u'āsi mono 'wa'āhā, te aré marī īwa'ābā za'ētē na tinhibro pese, Ezitu āma uburé marī hā īwa'ābā za'ēne hā 're īsimi'wara mono na. Ta hā marī wa'ābā za'ētē mono hā wē nherē, taha upana marī īwē uptabi si ma tō sima wē, Mozési hā. Danho'reptui'wa da, 'Re īhāimana u'āsi mono te te īpisutu ma si, te te 're robzépata mono da si, ma tō sima wē. Īwē hā 'Re īhāimana u'āsi mono, niwa za te te tāma īsōmri na si, ma tō te te āma 're rosa'rata u'āsi, Mozési hā.

²⁷ 'Re īhāimana u'āsi mono si te te sina 're ī'umnhasi mono zéb zarina, ma tō duré Mozési hā watobro Ezitu hawi, apito Para'o hā te te sima simimnhasi āna. 'Re īhāimana u'āsi mono hā datōmo na da te 're 'madā'ā waihu'u za'ra mono ō nherē, Mozési hā titōmo na te te 're ī'madā'ā mono na ne, te te sina 're ī'umnhasi mono wa, apā sipi'rai ō di, Ezitu u hā. Ōne haré ma tō ta hawi watobro, siptete sina.

²⁸ Mozési hā 'Re īhāimana u'āsi mono si te te sina 're ī'umnhasi mono zéb zarina, ma tō duré Pascowa na dato hā te te 're ī'manharī za'ra mono zéb da na tāma roti za'ra Izarazéhé nhihudu norī ma hā, ta norī hā tisi ai 'manharī na te te āma sāna'rata za'ra da, 'Re īhāimana u'āsi mono hā Mozési hā te te īpisutuzéb zarina. 'Re īhāimana u'āsi mono si te te sina 're ī'umnhasi mono zéb zarina, ma tō duré Mozési hā tāma roti za'ra Izarazéhé nhihudu norī ma hā, tinhimizama wapu na 'ridawa zada'rē hā te te āma sapré za'ra mono da, hāiwa āma romhuri'wa hā Dapārī'wa na īwaptērē hā, aibā tāma 're īpoto'rata za'ra mono hā te te tiwi simroi mono tō da, Izarazéhé nhihudu norī wi hā.

²⁹ Duré Izarazéhé nhihudu norī hā, 'Re īhāimana u'āsi mono si te te sina 're ī'umnhasi za'ra mono zéb zarina, ma tō ā poré na saprī za'ra, zara u, Ā pré na ā poré nhisi na. Ā 'ré na da te 're īsaprī za'ra mono ne, ma tō rob'rē na saprī za'ra, ā zada'rē amoi u hā, zara u. Tane nherē, eziptu norī hā rob'rē na dazarina te te aré saprī za'ra da, si'aba'rēi wamhā, ma tō ā hā apā īrē atob za'ra. Taha wa, eziptu norī hā ā poré na ma tō uburé ai'utō.

³⁰ Duré Izarazéhé nhihudu norī hā, Zerico na 'ri nho'ōmo nhisi āma 'ri 'wawi wa'ra 'rāihā hā ma tō nasi te te uirī za'ra, sime da, 'Re īhāimana u'āsi mono te te tāma īpisutu za'ra zéb zarina. Bādā hā 7 na ma tō āma ai'utōrī za'ra, te te nasi siwi uirī za'ra mono ré hā. Tawamhā 'ri 'wawi wa'ra 'rāihā hā ma tō aime. Ta norī hā 'Re īhāimana u'āsi mono si te te sina 're ī'umnhasi za'ra mono zéb zarina, ma tō aime.

³¹ Duré Ra'abi hā pi'ō aré 're īhāimana wasété mono hā, 'Re īhāimana u'āsi mono si te te sina 're ī'umnhasi mono zéb zarina, ma tō wapsāi'a'wa norī hā tinhorōwa u 'mazasi wē zahuré, ti'ai wē zō pi'uriwi dama robzabui'wa norī hā. Taha wa, 'Re īhāimana u'āsi mono hā te te dazū wīrī ō di Ra'abi hā, 'ri nho'ōmo āma uburé 'Re īhāimana u'āsi mono nhimiroti 'madā'ā'ō'wa norī zu hā.

³² Āne na 'Re īhāimana u'āsi mono si, da te dasina 're ī'umnhasi za'ra mono zém na, ahā uptabi na te āma aima rob'rāzarōtō za'ra wa'aba neza. Āhā wamhā, īnhimirob'rāzarōno hā te aré sina tipahā. E marī wa. Ahā uptabi wa. Ahā uptabi di tō, 'Re īhāimana u'āsi mono te te sina 're ī'umnhasi za'ra mono norī hā, zahadu te āma aima īrowasu'u za'ra wa'aba ō hā: Zidi'ā hā, duré Barati, duré Sāsā, duré Zepté, duré Dawi, duré Samuwé, duré aimawi norī hā uburé 'Re īhāimana u'āsi mono zadawa wasu'u 'rata' wa 're īhāimana za'ra mono norī hā.

³³ Ta norī hā 'Re īhāimana u'āsi mono si te te sina 're ī'umnhasi za'ra mono zéb zarina, ma tō te te da'āma 're ai'utē za'ra, 'Re īhāimana u'āsi mono zadawa para, daro hā te te dawī 're waibui mono da. Ta norī hā īwē si te te 're 'manharī u'āsi za'ra mono wa, ma tō īwē uptabi hā te te sina 're waibu, 'Re īhāimana u'āsi mono te te tāma īropisutu za'ra zéb zarina. Duré hu'u zérépa hā ma tō te te 're sada'i'rē nhitob za'ra tinhib'rata na, te te 're simro tō mono da.

³⁴ Ta norī hā ma tō duré unhamā ro'o za'ēne hā te te 're simro, siwi. Ma tō duré dawī 're sisō'reptu za'ra, sib'ézé'wapa na da te 're simroi mono da nherē. Sib'uware na 're hāimana za'ra mono nherē, 'Re īhāimana u'āsi mono nhimipawaptobzém na ma tō siptete na dazada 're hāimana za'ra. Siptete uptabi na te te 're da'wapé za'ra mono wa, ma tō ta norī hā tizahui'wa norī hā te te 're wano'ō apā, darob amoi hawi dazahui'wa norī hā.

³⁵ Duré pi'ō norī wi, aré tiwi 're idā'ā za'ra mono norī hā, ma tō apā tāma 're hāiwa'utu za'ra, pi'ō norī ma. Duré ta norī hā 'Re īhāimana u'āsi mono si te te sina 're ī'umnhasi za'ra mono norī hā dazazéb 're, 're hāimana za'ra mono ré, 'Re īhāimana u'āsi mono te te dawī 're udā za'ra mono 'wa'āhā, taha zarina te aré dazazém hawi da te tāma 're rob'ru za'ra, ta hawi 're wairébé mono da. Tane nherē, ta norī hā 'Re īhāimana u'āsi mono te te dawī 're udā waihu'u za'ra mono ō di. Taha wa, ma tō danhimirob'manharī wasété na 're si'utōrī. Rowē uptabi na 're idanomro u'āsi mono zéb u hā, 'Re īhāimana u'āsi mono si te te 're hāiwa'utu za'ra mono da, ma tō āne zō si 're si'madā'ā za'ra, ta norī hā.

³⁶ Ni'wam norī āma, ma tō duré 're dawa'ē za'ra. Powawē hāiwaré 'manharī na ma tō da te dasiwi 're hā za'ra duré. Ni'wam norī hā ma tō da te 're pawasisi za'ra, isi'uwazi nhorō rutu na, dazazéb 're, da te 're sēme mono da.

³⁷ Ni'wam norī hā ma tō duré êtē tōmo wawē na da te 're simro. Ni'wam norī hā ma tō duré ihāiba wāiwa āma 're dasiwā za'ra, wede'ézém na ne. Sib'ézé 'wapa na ma tō duré da te 're simro. Pone'êrebāi hā na si ma tō duré ni'wam norī hā 're si'uza za'ra. Sibrob āna ma tō duré ta norī hā 're hāimana za'ra. Danhimirob'manharī wasété na ma tō duré ni'wam norī hā te te 're robzépata za'ra, da te 're 'ruiwaparī za'ra mono wa. Āne 'Re ihāimana u'āsi mono si te te sina 're ī'umnhasi za'ra mono norī wasu'u 'rāzarōno hā.

³⁸ Ta norī hā hāiwi si ma tō 're nomro a'ubuni wi, êtē 'rāihā u zama. Duré êtē 'rāihā zahâpâ êtē're wa, ma tō duré dawī 're si'ubumro, ab're wab zama. Ta norī si ma tō 'Re ihāimana u'āsi mono ma 're hāimana wē za'ra.

³⁹ Ta norī āma si ma tō 'Re ihāimana u'āsi mono hā 're wata za'ra uburé, ôhō si te te sina 're umnhasi za'ra mono wa. 'Re ihāimana u'āsi mono te te tāma ĩropisutu za'ra zéb zarina, ĩwē uptabi hā ti'ab ré te te sima 're waibui mono ô nherē, ma tō te te sina 're umnhasi u'āsi za'ra, 're ĩsi'utōrī za'ra mono zéb u.

⁴⁰ 'Re ihāimana u'āsi mono hā ĩwē uptabi hā niwamhā za te te wama ĩsōmri za'ra na, te te sima wā'ama rōti sirōmo za'ra wa, ti'ab ré ta norī hā te te sima waibui ô di tō, 'Re ihāimana u'āsi mono te te tāma ĩropisutu za'ra zé hā. Uburé wasiré si te za rowē uptabi na ĩ'rata 're ihāimana u'āsi za'ra mono zé hā sima waibu za'ra, ta norī hā.

12

'Re ihāimana u'āsi mono hā ti'ai āma damama ne te te 're ĩda'ahā za'ra mono zé wasu'u

¹ Duréhā ni'wam norī hā 'Re ihāimana u'āsi mono te te sina 're ī'umnhasi za'ra mono zéb zarina, danho'a 're ĩnomro wē mono norī hā ahā uptabi na 'rāwi wamana wawi 're ĩsimasab u'āsi mono ne, wa za ta norī āma 're wasipo're pu'u u'āsi za'ra. Taha wa, wa za uburé marī ĩwasédé hā wa te wasiwi 're wē'ō pese za'ra, 're ĩwanomro wē mono zé wi, te te 're wanhowada za'ra mono tō da, te te 're ĩwawasutu u'āsi za'ra mono hā, wawasédé hā. Dawara na 're dasipibu za'ra mono wa, dahāiba wapu na 're dasisa'rei mono da, marī ĩpire hā dahāiba na dama 're ihāimana za'ra mono hā da te dasisa 're ĩsani za'ra mono ne, wa za wawasédé hā wa te wasiwi 're wē'ō pese za'ra. Tawamhā wanhiptete na wa za tō āma 're wahāimana za'ra Cristuhu āma si, tiwī 're wasipizari za'ra mono āna. Dawara na 're dasipibu za'ra mono wamhā, dawara tete haré dasiwi 're ĩdasisa'rei mono ne, wa za tō wanhiptete na āma 're wahāimana u'āsi za'ra, Cristuhu āma si.

² Dawara na 're dasipibu za'ra mono wa, dawara, da te 're ĩ'rāsutu za'ra mono zéb u si, da te 're ĩrob'madâ'ā za'ra mono ne, wa za Zezusihi āma si wa te wasina 're rosa'rata u'āsi za'ra. Ta hā Zezusi hā ma tō ĩsāna'rata hawimhā te te 're wa'apawapto, 'Re ihāimana u'āsi mono si wa te wasina 're umnhasi u'āsi za'ra mono da. Tane te za duré te te 're wa'apawapto u'āsi, 're ĩwadâ'ā za'ra mono zéb u, ôhō si wa te wasina 're umnhasi u'āsi za'ra mono da, tiwī 're wasipizari za'ra mono āna. Ta hā Cristu hā sihāiba zawi ô di, wedepo'o nhonhi'rāmi na dazada dâ'ā tō da hā, wedepo'o nhonhi'rāmi hā dazada 're ihāimana wasété za'ra mono norī pārizép si nherē. Taha wa'rāmi, hāiwa āma to sina 're ihāimana u'āsi mono zé hā za tāma 're ihāimana mono na, te te sina waihu'u sirōmo wa, taha wa, sihāiba zawi ô di tō, wedepo'o nhonhi'rāmi na dazada dâ'ā tō da hā. Āhāna hā 'Re ihāimana u'āsi mono nhimire niwī, te oto pire uptabi na 're sāmra, ĩsiré 'rāwi te te 're da'ab'madâ'ā u'āsi mono da oto.

³ Mā'āpé āma rosa'rata pese za'ra wa'aba, Zezusi hā ti'ab ré te te 're ĩrobzépata mono na hā. Tiwasété si te te 're ĩmanharī za'ra mono norī hā te te 're 'ruiwaparī za'ra mono wa, te te tāma 're ĩrob'manharī wasété za'ra mono zém na, ma tō te te 're robzépata za'ētē, Zezusi hā. Tane nherē, siptete u'āsi ma tō 're hāimana. Tane duré a norī wa'wa hā te za marī ĩwasété wi 're asi'madâ'ā pese za'ra wa'aba mo, asiptete sina 're aihāimana za'ra wa'aba mono da, aiwi 're robze'ō za'ra wa'aba mono tō da. Taha zarina, 'Re ihāimana u'āsi mono hā asina 're ī'umnhasi za'ra wa'aba mono zé hā aiwi 're si'utōrī za'ra wa'aba mono tō da, te za tō asiptete sina 're aihāimana za'ra wa'aba mo.

⁴ Dawasété nhiptete da, asiptete sina 're aihāimana za'ra wa'aba mono nherē, zahadu ai'matâ'ā aba ô di, da te aima ĩ'mairob'manharī za'ētē aba na hā, Zezusi ĩdâ'ā ne hā.

⁵ E ma tō bété āma aipo're si'āri za'ra wa'wa, 'Re ihāimana u'āsi mono hā te te aima ĩroti za'ra wa'aba zém na hā, duré ti'ra na te te aima ĩnharī za'ra wa'aba zém na hā. Āne ma tō āhā wasu'u na ni'wa hā āma rob'ui'éré, duréhā:

"A norī wa'wa hā ĩ'ra na ĩma 're aihāimana za'ra wa'aba mono nherē, aiwasédé hā 're ĩmanharī za'ra wa'aba mono zém na 're asisāmri za'ra wa'aba mono da, wa hā Danhib'apito uptabi hā te 're aihā za'ra wa'aba mono wamhā, ĩ'āma 're rosa'rata u'āsi za'ra wa'aba mono ô di za, taré newa.

Duré apâ 're anomro wê wa'aba mono da, niha te aima 're rob'manharî za'ra wa'aba mono wamhâ, aiwi 're robzei'ô za'ra wa'aba mono ô di za. Te za ĩ'âma asima 're ĩrosa'rata wê u'âsi za'ra wa'aba mo.

⁶ E marî wa, aiwi 're robzei'ô za'ra wa'aba mono ô di za. Wa hâ Danhib'apito uptabi hâ uburé te 're ĩazawi pese mono norî hâ te 're ahâ za'ra mono wa. Duré tiwasété na 'râwi 're sisâmri za'ra mono da, uburé ĩ'ra na te 're ĩsisi za'ra mono norî hâ apâ 're nomro wê mono da, wa wa hâ te tâma 're arob'manharî, ta norî ma hâ."

Âne wa, aiwi 're robzei'ô za'ra wa'aba mono ô di za, 'Re ĩhâimana u'âsi mono te te 're aihâ za'ra wa'aba mono wamhâ.

⁷ Damama norî hâ bété. E ti'ra norî hâ te te 're hâ za'ra mono ô di za, po're âna 're hâimana za'ra mono wamhâ. Te za tô te te 're hâ za'ra. Tane te duré Aímama 'wa hâ 'Re ĩhâimana u'âsi mono hâ te te 're aihâ za'ra wa'wa. E marî wa. ĩ'ra si tâma 're aihâimana za'ra wa'aba mono wa oto. Taha wa, marî na 're robzépata za'ra wa'aba mono nherê, te za sada 're asiptete za'ra wa'aba mo, aiwi 're robzei'ô za'ra wa'aba mono âna. 'Re ĩhâimana u'âsi mono 'ra si, oto tâma 're aihâimana za'ra wa'aba mono wa, te te 're ĩaihâ za'ra wa'aba mono zém na asina 're waihu'u pese za'ra wa'aba mono wa, te za sada 're asiptete za'ra wa'aba mo.

⁸ Uburé te tô ti'ra norî hâ te te 're ahâ za'ra 'Re ĩhâimana u'âsi mono hâ, tiwasédé hâ te te 're ĩ'manharî za'ra mono zém na âma 're siwaihu'u za'ra mono da oto, ta norî hâ. Taha wa, te te 're ai'mai'ahâri aba mono ô wamhâ, ĩ'ra'ô na te za 'râwi 're ai'masiwaihu'u aba mo. Âne wamhâ, ni'wa hâ mama ô wa, da te 're ĩ'ahâri mono ô ne, 're ai'mai'hâimana aba mono na te za 'râwi 're ai'masiwaihu'u aba mo, sena na ĩ'ra na tâma 're ai'mai'hâimana aba mono ô na hâ.

⁹ Ti'ai âma wamama uptabi norî hâ wawasété na 'râwi 're wasiwaihu'u za'ra mono da, wanhimiza'rese wi te te 're wahâ za'ra mono wamhâ, wa tô ta norî hâ wa te 're hâimana wazéb za'ra, wama pire na 're hâimana za'ra mono wa. Taha nhipai u, wa za duré hâiwa âma Wamama uptabi hâ wa te 're waparî pese za'ra, te te 're wa'ahâ za'ra mono nherê, rowê na ôhō âma si 're wanomro u'âsi mono da oto.

¹⁰ Ti'ai âma wamama uptabi norî hâ ma tô wanhimiza'rese wi te te 're wa'ahâ za'ra tô, 're waprédub za'ra mono ô ré hâ. Wawasété na 'râwi 're wasiwaihu'u za'ra mono da, ma tô te te 're wa'ahâ za'ra, niwamhâ ĩ'uwaibaba uptabi ô nherê, damama norî nhimi'ahârizé hâ. Tazahâ, 'Re ĩhâimana u'âsi mono si, te ĩ'uwaibaba si te te 're wa'ahâ za'ra. Te te 're ĩwa'apawapto mono da si, te za tô ti'ai âma 're wanomro mono ré, te te 're wa'ahâ za'ra, wawasété âna ĩsine 're wahâimana za'ra mono da oto, wa norî hâ.

¹¹ Wawasédé hâ wa te 're ĩ'manharî za'ra mono zém na 'râwi 're wasiwaihu'u za'ra mono da, 'Re ĩhâimana u'âsi mono te te 're wahâ za'ra mono wamhâ, awa'awi 're watoi waihu'u za'ra mono ô di, taha na hâ. Robzei'ô na si wa za a'â 're wahâimana za'ra. Tane nherê, 'Re ĩhâimana u'âsi mono te te 're ĩwahâ za'ra mono zém na oto 'râwi 're wasiwaihu'u za'ra mono wamhâ, duré wa'âma 're ronomro pese za'ra mono wapsi, te za wapê hâ ĩ're wama 're simi'wara wê oto, ôhō âma si 're ĩwanomro wê mono zéb zarina wa.

'Re ĩhâimana u'âsi mono mreime, da te 're ĩwaparî pese za'ra mono zé wasu'u

¹² Taha wa, marî na 're robzépata za'ra wa'aba mono wamhâ, aipê'ê wê zarina te za asiptete sina âma 're aihâimana za'ra wa'aba mo, 'Re ĩhâimana u'âsi mono âma si, aiwi 're robzei'ô pese za'ra wa'aba mono wa, tiwi asina 're aipahâ za'ra wa'aba mono tô da.

¹³ Bâdâdi na awa'awi u'âsi 're ĩdanomro mono ne, te za Cristuhu nhirâ zarina si awa'awi 're anomro u'âsi aba mo, ĩwê na si. Âne wamhâ, ĩ'râtêire hâ morî wasété na 're ĩmorî ne, ni'wam norî hâ Cristuhu âma sib'uware na 're ĩhâimana za'ra mono norî hâ asine wa'aba, awa'awi u'âsi 're nomro wê mono wamhâ, ta norî hâ tiwasété na 're si'marôpârî zahu za'ra mono ô di za oto. Apâ te za ai'âma 're siptete za'ra wa'wa, ĩsazei uptabi 'wa na 're ĩaihâimana za'ra wa'aba mono zém na hâ.

¹⁴ Rowê zô te za 're asôpré wa'aba mo, dasiré 're aihâimana za'ra wa'aba mono da. Duré 'Re ĩhâimana u'âsi mono ma si 're asisômri u'âsi za'ra wa'aba mono da, te za 're asi'madâ'â pese za'ra wa'aba mo. Âne hâ ni'wam norî hâ 're hâimana wê za'ra mono ô nherê, niwamhâ Wanhib'apito hâ titômo na te te dame 'madâ'â za'ra ô di za, ta norî hâ.

¹⁵ 'Re aihâimana za'ra wa'aba mono zém na, 'Re ĩhâimana u'âsi mono ma, asina âma 're uwaimrami za'ra wa'aba mono ô wa, tinhoprubzéb zarina, ĩwê uptabi hâ te te aima 're ĩpisutu za'ra wa'aba mono hâ 're simini za'ra wa'aba mono tô da, te za 're asi'madâ'â pese za'ra wa'aba mo. Wede pa hâ, ti'ai 'rowi 're simi'wara mono ré hâ, taha wa'uzé hâ dama simimnhasi ô di. Tane nherê, ĩpa hâ da te oto 're sa'o'o za'ra mono wa, da te oto 're huri mono wamhâ, te za te te 're da'râiwamnarî za'ra, taha pa wa'u hâ sé wa. Tane duré, a norî wa'wa hâ te za ni'wam norî wi 're asi'madâ'â pese za'ra wa'aba mo, ta norî hâ te te aiwi 're

rowasété za'ra wa'aba mono tō da, duré taha zarina a norī wa'wa hā 'rāwi aiwasété na 're asi'uptob za'ra wa'aba mono tō da, ta norī zu.

¹⁶ Duréihā Eza'u hā tāma mrab uptabi wa, ma tō tino nhipi hā tiwi waptē, Zacoho wi. Tawamhā imama ma ipoto'rata zarina, uburé marī hā imama te te tāma ipisudu hā, duré 'Re ihāimana u'āsi mono, iwē hā te te tāma ipisudu hā 'tupana inoi ma 're hāimana mono da, ma tō tinoi ma ti'ru, isipi wa'rāmi Eza'u hā, taha na sai ō ré. Āne hā Eza'u hā 're ihāimana wasété mono ne, te duré ni'wam norī hā asiré 're hāimana wasété za'ra wa'wa. Ta norī wi, te za 're asi'madā'ā pese za'ra wa'aba mo, sina 're isipsaihuri za'ra mono norī wi, 'Re ihāimana u'āsi mono hāimanazé te te 're iwazéb za'ra mono ō norī wi hā.

¹⁷ Tawamhā taha na āma romono parip si, ma tō Eza'u hā timama ma tinha, 'Re ihāimana u'āsi mono ma, āma mreme da, iwē hā te te tāma 're anhomri mono da, inoi upana. Tane nherē, ma tō imama hā siwi wē'ō, āma mreme tō da. Taha wa, tiwasédé te te 'manharī pari nherē, apā te te sima pari waihu'u ō di, timama ma te te nharī sina, wawa 'rāihā na wawa nherē. Āhā wasu'u hā aima waihu'u pese za'ra wa'aba di, āne na hā.

¹⁸ Duréihā Izarazéhé nhihudu norī hā ma tō Sina'i na étē 'rāihā nhisi u sina rotété za'ra, tame i'rata si'ubumro da a'ā, 'Re ihāimana u'āsi mono 'rata. Ta hā étē 'rāihā hā danhib'rata na da te upi waihu'u pese di. Tane nherē, a norī wa'wa hā tane 're aihāimana za'ra wa'aba mono ō di oto, āhāna hā. 'Re ihāimana u'āsi mono u, aip'ē na 'rāwi itēme 're aihutu aba mono wamhā, marī hā asib'rata na 're upi waihu'u za'ra wa'aba mono ō di za. Izarazéhé nhihudu norī si ma tō 'rāwi unhamo ro'o za'ēne hā 'madā'ā za'ra, étē 'rāihā nhisiwimhā. Tamemhā ma duré hāiwa nhirōtō 'rādā hā watobro, i'rādā'āra uptabi hā. Rowa'u'u za'ētē zama ma tō duré watobro, étē 'rāihā nhisi āma hā. Āne ma tō ta norī hā 'madā'ā za'ra titōmo na, Izarazéhé nhihudu norī hā.

¹⁹ Danhimnhihārāzé hā ihārā 'rāihā hā ma tō duré wapari za'ra. 'Re ihāimana u'āsi mono mreme zama ma tō duré wapari za'ra, Izarazéhé nhihudu norī hā. Ta hā te te wapari za'ra wamhā, 'Re ihāimana u'āsi mono hā niha te tāma rob'manharī za'ra ō'ummhasite, ma tō sima wē za'ra, Mozésihī ma si te te rowaihu'u mono da, 'Re ihāimana u'āsi mono hā, hāiba pisutu.

²⁰ E marī wa, ma tō ta norī hā 'Re ihāimana u'āsi mono ma tipahi za'ra, Izarazéhé nhihudu norī hā. 'Re ihāimana u'āsi mono hā ma tō étē 'rāihā hāiba na tāma roti za'ra, āne: "Ni'wa hā ā étē 'rāihā hā te te upi wamhā, te za asiwi iwiri 'wa, étē na. Asimizama aba zama, te te sina 'mai'upi wamhā, te za iwiri 'wa, étē na." Āne ma tō étē 'rāihā hāiba na ta norī ma mreme pire na tāma roti za'ra aré, 'Re ihāimana u'āsi mono hā. Taha pipa te, ma tō Izarazéhé nhihudu norī hā sima wē za'ra, Mozésihī ma si, hāiba pisutu te te rowaihu'u mono da, 'Re ihāimana u'āsi mono hā, taha ma si.

²¹ Ā hā te te i'madā'ā za'ra hā pipa uptabi wa, te Mozési hā 'rāwi sima tinha, āne: "Ipahi wa, wa tāma rērē." Āne te sima tinha, Mozési hā. Āne ma tō ropipa uptabi hā étē 'rāihā āma isō'a iwatobro za'ra hā 'madā'ā za'ra duréihā, Izarazéhé nhihudu norī hā, 'Re ihāimana u'āsi mono u te te sina rotété za'ra wamhā.

²² Tazahā, a norī wa'wa hā tane 're aihāimana za'ra wa'aba mono ō di oto, āhāna hā. 'Re ihāimana u'āsi mono u aip'ē na 'rāwi 're rob'umhutu za'ra wa'aba mono wamhā, hāiwa āma Si'ā na étē 'rāihā nhisi u ne, ma tō 're i'rob'umhutu za'ra wa'aba mo. Duré hāiwa āma Zeruzarē hā 'ri nho'ōmo u ne, ma tō 're i'rob'umhutu za'ra wa'aba mo, 'Re ihāimana u'āsi mono 're i'sāma u'āsi mono zéb u hā, hāiwa āma tāma iromhuri'wa norī hā ahā uptabi na, i'rata 're isi'ubumroi mono zéb u zama.

²³ Tame te oto 'Re ihāimana u'āsi mono nhib'a'uwē norī hā to sina 're si'rā'ōtō, aibā hā dama 're poto 'rata za'ra mono wa, dama isawi pese ne, 'Re ihāimana u'āsi mono te te 're i'azawi pese mono norī hā, hāiwa āma sisi ui'éré ré 're ihāimana za'ra mono norī hā. Tamomo ma tō itēme 're i'rob'umhutu za'ra wa'aba mo, dahāimanazém na i'uwaibaba si te te 're ida'waihu'u mono zéb zarina, dama rowairébé'wai u hā. Duré ti'ai āma ré iwē si te te 're i'manharī za'ra mono norī hā 're ihāimana za'ra mono zéb u, ma tō duré 're i'rob'umhutu za'ra wa'aba mo, 'Re ihāimana u'āsi mono te te tāma 're iwē za'ra mono zéb zarina si, rowē uptabi na oto 're ihāimana za'ra mono norī u hā.

²⁴ Zezusihī u ma tō duré 're i'rob'umhutu za'ra wa'aba mo. Ta hā te oto 'Re ihāimana u'āsi mono te te dama i'ropisutuzép té hā te te wa'āma 're ab'madā'ā u'āsi. Duréihā Caī hā tino te te wiri wa, iwapru hā tiwi pu'u wamhā, 'Re ihāimana u'āsi mono te te i'ruwa'ābāzé, te wasu'u, Abéhé wapru hā. Tanei ō di, Zezusihī wapru hā. Dazada dá'ā wa, iwapru hā tiwi pu'u wamhā, 'Re ihāimana u'āsi mono hā dawasédé te te dama 're i'apari mono zé, te wasu'u, Zezusihī wapru hā.

²⁵ Taha wa, te za 're asi'madā'ā pese za'ra wa'aba mo, 'Re ihāimana u'āsi mono hā te te aima 're rowasu'u za'ra wa'aba mono wamhā, tiwi 're asipo're nhitob za'ra wa'aba mono tō da. Duréihā Sina'i na étē 'rāihā nhisi āma, 'Re ihāimana u'āsi mono hā ti'ai u te te we dama

rowasu'u wamhã, ïsimiroti wapari'õ'wa norĩ hã wairébê õ di, te te ïdahã za'ra zé wi hã. Wa norĩ hã bété. E 'Re ìhâimana u'âsi mono hã hãwi hawi te te wei wama 're aroti wê mono nherê, tiwi 're wasipizari za'ra mono wamhã, e ïsimiházê wi wasi'uihã na 're wawairébê mono da bã, wa za wanhimipari âna 're wanomro u'âsi bété.

²⁶ Duréihã 'Re ìhâimana u'âsi mono hã Sina'i na êtê 'rãihã nhisi âma te te dama roti wamhã, ma tó ti'a hã sãsã'ã. Tane nherê, taha za'u hã ma tó oto dama ropisutu, âne: "Ti'a hã niwapsi wa za duré sãsã'ã, ïrême ma. Tawamhã, ti'a si te sãsã'ã õ di za oto. Hãwi nhirõtõ zama, wa za ïsu sãsã'ã, nimahã na hã." Âne 'Re ìhâimana u'âsi mono te te dama ïropisutuzép tém na rob'ui'ére hã.

²⁷ E marĩ te tawamhã wama wasu'u za'ra ïmreme hã, "ïrême ma" na hã. Uburé marĩ hã ti'ai âma, 'Re ìhâimana u'âsi mono nhimipodo hã nimahã na te te sãsã'ã za'ra wa, za ïsi'utõrĩ mono zé, te wama wasu'u za'ra. Tawamhã taha nhowa're're, te za ïwê uptabi hã da te oto ïsãsã'ã waihu'u'õ hã 're hãimana u'âsi za'ra hãwi âma, ïsi'utõrĩ waihu'u'õ hã.

²⁸ 'Re ìhâimana u'âsi mono hã 'rãwi te te 're wa'ab'madã'ã mono da, ï'rata 're ïwahâimana u'âsi za'ra mono zéb da hã, ma tó te te wama 're apisutu, da te wawĩ âma ï'ai'uté waihu'u' za'ra õ hã. Taha wa, wa za 'Re ìhâimana u'âsi mono âma 're wawata u'âsi za'ra, sõpru wa. Te te sima 're ïwa'awê mono zéb zarina, wa za âma 're wawata u'âsi za'ra, wa te wasiwi 're wazéb za'ra mono sina, wama 're toi u'âsi mono da.

²⁹ 'Re ìhâimana u'âsi mono hã Wanhib'apito za'ra hã ïpo're'õ norĩ hã te te uprosi waihu'u' pese di, unhama ro'o za'etê na marĩ hã 're ïsi'unhama pese mono ne hã. Taha wa, wa za tó wa norĩ hã ïmreme hã wa te 're wapari u'âsi za'ra, Wanhib'apito nhimiroti hã.

13

'Re ìhâimana u'âsi mono hã dama 're ïtoi mono zé wasu'u

¹ Cristuhu âma si oto 're asisãnwã za'ra wa'aba mono wa, te za a norĩ wa'wa hã õne u'âsi 're asisawĩ pese za'ra wa'aba mo oto.

² Darob amoi hawi atême 're dasihutu za'ra wa'aba mono wamhã, asõrõwa u, te za duré 're ïda'mazasi wê za'ra wa'aba mo. Ni'wam norĩ hã tinhorõwa u te te 're da'mazasi wê za'ra mono wamhã, hãwi âma 'Re ìhâimana u'âsi mono ma romhuri'wa norĩ hã ma tó te te 're 'mazasi wê za'ra, tâma sa'rese za'ra õ nherê, hãwi âma romhuri'wa norĩ hã.

³ Duré wasiré ïsazei'wa norĩ âma te za 're aipo're pu'u u'âsi za'ra wa'aba mo, dazazéb 're, 're ïsimasa mono norĩ âma hã, ta norĩ hã asiwi 're pawaptob za'ra wa'aba mono da. Dazazéb 're, ta norĩ siré 're aimesa wa'aba mono ne, te za âma 're aipo're pu'u u'âsi za'ra wa'aba mo. Duré marĩ na te te 're ïrobzépata za'ra mono norĩ âma zama, te za duré 're aipo're pu'u u'âsi za'ra wa'aba mo, ta norĩ siré 're ïrobzépata za'ra wa'aba mono ne.

⁴ Damro ré norĩ hãimanazé hã te za 're ïwazé pese za'ra wa'aba mo, 'Re ìhâimana u'âsi mono ma, pire uptabi wa. Airmo si te za asima 're ï'madã'ã u'âsi za'ra wa'aba mo. E marĩ wa. Ni'wam norĩ hã tihãiba na tiwasédé hã te te 're 'manharĩ za'ra mono wamhã, 'Re ìhâimana u'âsi mono hã te za ta norĩ hã te te 're hã za'ra. Duré ni'wam norĩ hã mro ré nherê, ïmro'õ na 're sipsaihuri za'ra mono wamhã, te za ta norĩ hã duré te te 're hã za'ra, 'Re ìhâimana u'âsi mono hã.

⁵ Rob'ui'prazép si, asima 're sawi za'ra wa'aba mono õ di za. Asibro hã aima 're ìhâimana za'ra wa'aba mono nhipai u, marĩ zô 're rob'ruiwapari zahu za'ra wa'aba mono õ di za. Duréihã 'Re ìhâimana u'âsi mono hã ma tó âne dama sina ropisutu: "Niwamhã asiti za'ra wa'aba 're ìhâimana mono õ di za. Duré te airême waihu'u' za'ra wa'aba õ di za." Âne te te dama sina ïropisutuzém na rob'ui'ére hã, ïbaihã na hã.

⁶ Taha wa, 'Re ìhâimana u'âsi mono hã wa te wasina 're ï'umnhasi za'ra mono zéb zarina, wa za âne wa te wasima 're nharĩ za'ra, duréihã apito Dawi hã te te sima ïnharĩ ne, âne: "Danhib'apito uptabi hã te te 're ïpawaptob u'âsi. Taha wa, ïsina 're ïpahĩ mono õ di, wa hã. Âne wamhã, e niha da te ïma rob'manharĩ da bã."

Âne duréihã Dawi hã 'rãwi te te sima ïnharĩ ne, wa za duré wa norĩ hã wa te wasima 're nharĩ za'ra, ïsine.

⁷ Ma'ãpé âma asipo're pu'u za'ra wa'aba, 'Re ìhâimana u'âsi mono zadawa wasu'u na ïsãna'rata hawi te te âma aima 're ïrowasu'u za'ra wa'aba mono norĩ âma hã, ai'madã'ã'wa za'ra wa'aba norĩ âma hã. Ta norĩ 're ìhâimana za'ra mono zém na, duré 're ïdã'ã za'ra mono zém na zama, te za âma 're asipo're pu'u u'âsi za'ra wa'aba mo. Ta norĩ hã 'Re ìhâimana u'âsi mono si te te sina 're ï'umnhasi za'ra mono ne, te za duré a norĩ wa'wa hã ïsine asina 're ï'umnhasi za'ra wa'aba mo, 'Re ìhâimana u'âsi mono hã.

⁸ Zezu Cristu hã tihãimanazém na hã te te âma 're saprĩ waihu'u' mono õ di. Õne u'âsi te tó misi haré âma 're hãimana u'âsi, bãtã sidãpãsi.

⁹ Cristuhu wasu'uwē upana, danhimiroti aimawi na da'āma 're sasōmri za'ra wa'aba mono ō di za, senai'ō na da te dasima 're irowasu'u za'ra mono na hā. 'Re ihāimana u'āsi mono hā tinhoprubzéb zarina, iwē uptabi hā te te wama 're ī'apisutu mono na si, wa za wapē'ē 're āma 're wanhiptete za'ra. Taha si wa norī hā wama iwē uptabi za'ra hā. Dasa hā da te dasiwi 're īsawi za'ra mono na roti hā da te 're ī'madā'ā za'ra mono na, āma 're danhiptete waihu'u za'ra mono ō di, dapē'ē remhā. Mare di. E marī wa. Taré wa, dasa hā. Taha na āma 're dasipawapto waihu'u za'ra mono ō di tō, dasa da te dasiwi 're īsawi za'ra mono na roti na hā.

¹⁰ Durēihā 'Re ihāimana u'āsi mono ma, da'āma romhuri'wa norī hā, sasedoti norī hā dawasété parizéb da, danhimizama te te tāma 're simroi mono wamhā, ta norī hā īnhi na hā 're saihuri waihu'u mono ō di. Tane duré, ni'wam norī hā danhimizama wapru na 'Re ihāimana u'āsi mono hā dawasédé hā zahadu te te dama āma 're aparī mono newa, te za Cristu hā sada idā'ā za'ra zé hā ta norī hā te te 're simini za'ra. Wa norī si Cristuhu zazei'wa norī si, wa za wa te wasina āma 're uwaimrami za'ra, wazada idā'ā za'ra zém na hā.

¹¹ Sasedoti norī nhīb'apito, tisiré nori ma ipire uptabi si wahub sidāpāsi ma tō danhimizama wapruī ré itēme 're sisisi, 'ri 're wa'wa u, 'Re ihāimana u'āsi mono, iwa 're īsamra mono zéb u hā. Dawasété parizéb da, ma tō ta norī hā tāma āma 're sōprub za'ra, 'Re ihāimana u'āsi mono ma. Tane nherē, ma tō romhā na danhimizama hāiba hā da te 're zata pese za'ra, danhimizahāri sidāpāsi 'ri hā da te dasima 're īsōré za'ra mono zém nhiti.

¹² Āne wa, ma tō duré Zezusi hā 'ri 'wawi wa'razém nhiti dārā, te te īrobzépata za'ētē zarina, tiwapru na taha si te te oto 're da'a'upsōi mono da, dawasété hawi.

¹³ Taha wa, wa za oto wa norī hā Zezusihi u si dawī 're wawairébé, taha si tō sena te te 're wa'anho'reptui mono da. Taha wa, wa za tō, 're īdanomro 'rata mono zé hā, wa te 're rēme pese za'ra. Zezusi hā wazada dā'ā wa, da te dasiwi ī'ruiwapari ne, da te 're wa'ruiwapari za'ra mono da nherē, wa za tō itēme 're wawairébé, 're īwanomro 'rata mono zém hawi, Zezusihi u hā.

¹⁴ Āme ti'ai āma 'ri nho'u hā 're ī'maihāimana u'āsi mono hā wama 're mairāimana mono ō di, āma 're īwahāimana u'āsi za'ra mono zéb da hā. Robaba uptabi di. Hāiwa āma 'ri nho'ōmo zō si, wa za wasima 're wanhopré u'āsi, za tame wama 're ihāimana u'āsi za'ra mono zō si.

¹⁵ Taha wa, Zezusi hā wazada idā'āzéb zarina, wa za 'Re ihāimana u'āsi mono āma 're wawata u'āsi za'ra, taha si wama 're toi u'āsi za'ra mono da. Durēihā danhimizama na duré dasa na 'Re ihāimana u'āsi mono ma, 're danhoprub za'ra mono wa, dama 're itoi mono ne, wa za āma 're wawata u'āsi za'ra, wama 're toi u'āsi mono da. 'Re ihāimana u'āsi mono hā wa te wasina 're ī'umhāsi za'ra mono zém na sō'awi dama 're īwasiwasu'u za'ra mono na zama, wa za tāma āma 're wanhoprub za'ra, 'Re ihāimana u'āsi mono ma hā.

¹⁶ Marī iwē hā 're manharī za'ra wa'aba mono da dama, duré 're īdapawapto za'ra wa'aba mono zém na hā, āma 're aipo're simrami za'ra wa'aba mono ō di za. Taha na zama te duré tāma 're asōprub za'ra wa'aba mo, taha na aima 're toi u'āsi za'ra wa'aba mono wa, 'Re ihāimana u'āsi mono hā.

¹⁷ Asiré īsazei'wa 'madā'ā'wa norī nhimiroti hā te za 're īwapari pese za'ra wa'aba mo. Te te aima 're īroti za'ra wa'aba mono zéb zarina, te za marī hā 're ī'manharī za'ra wa'aba mo. Ta norī hā niwapsi te za 'Re ihāimana u'āsi mono ma siwasu'u za'ra, te te ai'āma 're īromhuri za'ra wa'aba mono zém na hā. Taha wa, te ta norī hā ai'āma 're hātā'ā u'āsi za'ra wa'wa, te te 're ī'ai'madā'ā za'ra wa'aba mono zém na hā, Cristuhu zazei'wa 're ihāimana za'ra mono zém na si 're anomro aba mono da. Ta norī nhimiroti hā 're wapari pese za'ra wa'aba mono wamhā, to sina te za tō ta norī hā te te ai'āma 're romhuri za'ra wa'wa. Tane nherē, 're wapari za'ra wa'aba mono ō wamhā, robzei āna te za te 're romhuri za'ra. Āne wamhā, te te 're aipawapto waihu'u za'ra wa'aba mono ō di za, ta norī hā.

¹⁸ Ma'āpé, wa'āma 're aimreme zusi u'āsi aba mono za, 'Re ihāimana u'āsi mono ma. 'Re īwanomro wē mono da si, wa tō wa norī hā wa te wasima 're wē u'āsi za'ra. Taha wa, marī na 're īwahāimana wasété za'ra mono zém na hā 'rāwi wapē'ē na 're wasisāmri za'ra mono ō di oto, wama 're hāimana za'ra mono ō wa.

¹⁹ Taha wa, wa duré wa hā īsima aiwē uptabi za'ra wa'wa, ī'āma zama 're aimreme zusi aba mono da, 'Re ihāimana u'āsi mono hā te te āma īzatōrī su'u da, atēme za'ra wa'aba, te asabu za'ra wa'aba hā.

²⁰⁻²¹ Wanhib'apito Zezusi hā wazada idā'āzéb zarina, te oto pone'ērebā 'madā'ā'wa ne, wama 're hāimana za'ra, wa'madā'ā'wa iwē uptabi na hā. Wazada idā'āzéb zarina, ma tō 'Re ihāimana u'āsi mono hā taha na dama ropisutu té, āma 're dahāimana u'āsi za'ra mono da oto, taha āma si. Zezusi hā dā'ā nherē, ma tō īmama hā apā hāiwa'utu.

'Re ihāimana u'āsi mono hā dama rowé pisutu'wa hā, iwē si te te aima 're sōmri za'ra wa'aba mono da, wa taha na si te ai'āma 're umhāsi za'ra wa'wa, taha zarina uburé marī hā te te

aima 're ĩwē za'ra wa'aba mono zéb zarina si, tãma ãma asina 're uwaimrami za'ra wa'aba mono da. Duré Zezu Cristuhu waihu'u pese na te te 're wa'apawapto mono da, wa duré taha na si te ai'ãma 're umnhasi za'ra wa'wa, ĩwē si wa te oto tãma 're 'manharĩ za'ra mono wa, wa'ãma 're toi u'ãsi mono da, 'Re ĩhãimana u'ãsi mono hã.

Taha wa, Zezu Cristuhu ãma si ãma 're wawata u'ãsi za'ra wa'aba mono za. Tane tō.

Rowasu'u 'rãsutuzé wasu'u

²² ĩsisãnawã norĩ, ã te aima ãma ĩroti za'ra wa'aba zém na, ma'ãpé aiwaimri ãma rosa'rata pese za'ra wa'aba za. Taha da, wa tō ĩmreme 'rutu na ãma aima rowasu'u za'ra wa'wa, ã ĩnhimi'ui'éré na hã.

²³ Wasisãnawã Timotiu hã ma tō dazazém hawi watobro, da te tãma ĩrob'ruzéb zarina. ãne hã waihu'u za'ra wa'aba da, wa tō ĩsima aiwē za'ra wa'wa. Tawamhã, ta hã we ĩtēme wisi su'u wamhã, ãme ĩnhamra ré, te te ĩnhiza wamhã, te za ãma ĩsiré mo, atēme za'ra wa'aba, taha zama te te duré asabu za'ra wa'aba da, ĩsiré.

²⁴ Ma'ãpé uburé ai'madâ'ã za'ra wa'aba 'wa norĩ hã wama sawi za'ra wa'aba za. Uburé 'Re ĩhãimana u'ãsi mono nhib'a'uwē, tame 're ĩhãimana za'ra mono norĩ zama, wama sawi za'ra wa'aba za duré.

Itaria na danhipti'a nho'õmo nhisi hawi 're ĩwairébé mono norĩ zama te ãma asawi za'ra wa'wa duré, ĩsazei'wa norĩ, siré 're ĩsi'ubumroi mono norĩ hã.

²⁵ 'Re ĩhãimana u'ãsi mono ma, wa ai'ãma 're ĩmreme u'ãsi za'ra wa'wa, ĩsimizawizé hã aima 're hãimana u'ãsi za'ra wa'aba mono da.

Ti'adu **Daro mono bâ ĩsazei'wa norĩ ma, Ti'adu te te ĩrob'ui'érezé** **Ībailhâ wasu'uzé**

Ā ĩbailhâ na rob'ui'ére'wa hâ Ti'adu na ĩsisi hâ. Zezusihi no, ta hâ (Marcusi 6.3). Atusi 21.18 āma hâ ma tō Ti'adu hâ wasu'u, āne: Zeruzarē āma ĩsazei'wa norĩ 'madâ'â'wa. Ta hâ ma tō 'Re ĩhâimana u'āsi mono nhib'a'uwē norĩ ma rob'ui'ére' hâ tisō, da te āma 're rob'manharĩ waseté za'ra mono wa, daro mono bâ te te ĩropéi mono norĩ ma hâ. Ti'adu hâ ma tō Wamama zazei'wa norĩ ma waihu'u za'ra, Zezusi hâ te te sina 're ĩ'umnhasi za'ra mono zém na taré dama 're siwasu'u za'ra mono tō da, ĩsarina si 're hâimana za'ra mono ō nherē. Ni'wam norĩ hâ sena na Zezusi hâ te te sina 're umnhasi pese za'ra mono wamhâ, ĩsiré u'āsi te za 're hâimana wē u'āsi za'ra.

Marĩ ahâ na dazada 're ĩhâimana za'ra mono zém na rowasu'u

¹ Wa hâ Ti'adu, 'Re ĩhâimana u'āsi mono ma romhuri'wa, duré Wanhib'apito Zezu Cristuhu ma romhuri'wa, wa 're mo. Uburé 'Re ĩhâimana u'āsi mono nhib'a'uwē norĩ, daro mono bâ 're aihâimana za'ra wa'aba mono norĩ hâ, wa za ĩnhimi'ui'ére na āma asawĩ za'ra wa'wa.

² ĩsisānawā norĩ, marĩ hâ ahâ na asada 're hâimana za'ra wa'aba mono nherē, te za atoi u'āsi 're anomro aba mo.

³ E marĩ wa, wa āne aima waihu'u za'ra wa'wa. 'Re ĩhâimana u'āsi mono hâ ro'wa'rudu hâ te te aima 're ba'a za'ra wa'aba mono ō nherē, te za ĩsimipawaptobzém na asina 're ĩ'madâ'â u'āsi za'ra wa'aba mo. Tawamhâ, te za asiptetezé hâ asima 're ĩsa'etē za'ra wa'aba mo, Wanhib'apito āma si 're ĩ'aihâimana za'ra wa'aba mono zéb da hâ.

⁴ Tawamhâ wē uptabi di za, 're aihâimana za'ra wa'aba mono zé hâ.

⁵ 'Re ĩhâimana u'āsi mono hawĩ, dahâimanazém na rowaihu'u ré 're aihâimana za'ra wa'aba mono ō wamhâ, te za asima tiwi 're ĩrowaptērē za'ra wa'aba mo. Ta hâ sōpru uptabi di. Duré uburé dama marĩ wē nhomri'wa. Āne wa, tiwi 're ĩrowaptērē za'ra wa'aba mono zéb uwaibaba, te za te aima 're sōmri za'ra wa'wa, dahâimanazém na rowaihu ĩwē uptabi hâ.

⁶ 'Re ĩhâimana u'āsi mono umnhasi sina, te za tiwi 're ĩrowaptērē za'ra wa'aba mo, 'râwi āma 're asiwawā za'ra wa'aba mono āna. ĩsimipawaptobzém na, 'râwi āma 're asiwawā za'ra wa'aba mono wamhâ, misi asimirosa'rata 'wa aima 're hâimana za'ra wa'aba mono ō di za. Tawamhâ rowa'u āsisis te te āma 're ĩ'a'ube mono ne, te za 're aihâimana za'ra wa'aba mo.

⁷⁻⁸ Āne wamhâ, misi asimirosa'rata 'wa aima 're hâimana za'ra wa'aba mono ō wamhâ, duré asiptete sina āma 're aihâimana za'ra wa'aba mono ō wamhâ, Wanhib'apito hawi dahâimanazém na rowaihu'uzéb zō, 're asimipari za'ra wa'aba mono ō di za.

⁹ Wasiré ĩsazei'wa norĩ hâ simarĩ ō nherē, Wanhib'apito zazei'wai wa, te za tip'é na 're toi u'āsi za'ra.

¹⁰ Wasiré ĩsazei'wa norĩ hâ sibro pese wē te, tip'é na 're to za'ra mono ō di za. Wanhib'apito zazei'wa 're nomro mono wa, te za tip'é na si 're toi u'āsi za'ra. Sibro pese nherē, te za, rom na romnhirārā ne, dawi 're hâiba simani za'ra oto.

¹¹ Bādâ hâ 'râi watobro wamhâ, rowa'ro uptabi wa, te za rob're hâ dawi 're ré za'ra. ĩsirārâ zama te za ti'a'a, ti'ai u. Tawamhâ dama 'madâ'â ze nherē, tâibâ za oto ĩsirārâ hâ. Tane ĩsibro pese norĩ hâ rob're 're ĩsi'utōrĩ su'u za'ra mono ne, tinhimĩromhuri te te 're 'madâ'â za'ra mono zawéré ré, te za 're dâ'â za'ra.

¹² Wa za duré āne aima waihu'u za'ra wa'wa. Marĩ ahâ na dazada 're hâimana za'ra mono wamhâ, 'Re ĩhâimana u'āsi mono hâ ro'wa'rudu hâ te te dama 're ba'a za'ra mono ō nherē, te za danhĩptete sina āma 're dahâimana u'āsi za'ra. Āne wamhâ, 'Re ĩhâimana u'āsi mono hâ te za āne na da'awaihu'u. Tawamhâ ĩsawi pese 'wa 're dahâimana za'ra mono wa, te za tâma wa'ābâ za'ra oto, rowē uptabi na, ĩ'rata 're ĩdahâimana u'āsi za'ra mono zém na, te te dama ĩropisutuzéb zarina. Tawamhâ dama 're rowē uptabi za'ra mono di za.

Marĩ zarina dawasédé hâ da te 're ĩmanharĩ za'ra mono zé wasu'u

¹³ Āté ni'wam norĩ hâ te za 'râwi sina rosa'rata wasété za'ra, tiwasédé hâ te te ĩ'manharĩ za'ra da hâ. Āne wamhâ, 'râwi te te sima 're rosa'rata za'ra mono ō di za: "Re ĩhâimana u'āsi mono hâ ma tō ĩnhimirosa'rada hâ ĩma tisō, ĩwasédé te ĩ'manharĩ da hâ." Āne te te sima 're rosa'rata za'ra mono ō di za. E marĩ wa. 'Re ĩhâimana u'āsi mono hâ te te sina 're rosa'rata mono ō di, tiwasédé te te 're ab'manharĩ mono da, marĩ wasété na. Duré dawasédé hâ da te 're ĩ'manharĩ za'ra mono da hâ, te te dama 're rosa'rata mono ō di.

¹⁴ Āté marĩ ĩwasété na te za da te dasima 're rosa'rata za'ra, dawasédé hâ da te ĩ'manharĩ za'ra da hâ, āma dama 're robze za'ra mono da newa.

¹⁵ Tawamhã dawasété na da te dasima ãma 're rosa'rata wasété za'ra mono wamhã, dawasédé hã dasi'uinhã na te za da te 're 'manharĩ za'ra. Tawamhã õne u'ãsi 're danomro mono wamhã, te za 'Re ãhãimana u'ãsi mono nhiti 're dahãimana u'ãsi za'ra, rowẽ ãsi'utõrĩ'õ nhiti.

¹⁶ Ìsisãnawã norĩ, ãma asawi pese za'ra wa'aba norĩ hã, 'Re ãhãimana u'ãsi mono wasu'uwẽ na ãma 're upa za'ra wa'aba mono õ di za, asimirosa'rata na.

¹⁷ 'Re ãhãimana u'ãsi mono hã hãiwa na rob'uiwẽ'wa 'manharĩ'wa hã, hãiwa hawi ma tã marĩ ãwẽ na uburẽ we dama 're sõpru, ãwẽ uptabi na si. Ta hã tihãimanazém na te te saprĩ õ di. Õne u'ã, te hãimana wẽ u'ãsi 're hãimana.

¹⁸ Te te sima 're ãda'awẽ mono zéb uwaibaba, ma tã timreme na te te 're wa'apoto té, wapẽ'ẽ 're, uburẽ ãsimipoto norĩ nhipai u, ãsib'a'uwẽ tãma 're wahãimana za'ra mono da oto. Ma tã tã sena na timreme na te te 're wa'apoto té, wapẽ'ẽ 'remhã.

'Re ãhãimana u'ãsi mono nhimiroti 'madã'ã pese 'wa, 're ãhãimana za'ra mono zé wasu'u

¹⁹ Ìsisãnawã norĩ, ãma asawi pese za'ra wa'aba norĩ hã, ãne wa za duré aima waihu'u za'ra wa'wa, ãma 're ã'asipo're pu'u u'ãsi za'ra wa'aba mono zéb da hã. Arĩ'iwĩ te za a'ã 're ãdawapari za'ra wa'aba mo, aiwara sina aimreme hã 're sani za'ra wa'aba mono tã da, duré dazada 're asahi za'ra wa'aba mono tã da.

²⁰ Dahãimana zahi sina 're dahãimana za'ra mono wamhã, e te za 'Re ãhãimana u'ãsi mono hã te te 're da'awẽsãmri. Mare di. Taha na te te 're da'awẽsãmri mono õ di za.

²¹ Taha wa, asima 're aihãimana wasété za'ra wa'aba mono zé hã, duré uburẽ marĩ hã 're ã'manharĩ wasété za'ra wa'aba mono zéb zama, te za 're ãrẽme pese za'ra wa'aba mo. 'Re ãhãimana u'ãsi mono ma, te za aiwapu na tãma 're asi'madã'ã za'ra wa'aba mo, ãsimiroti hã 're 'manharĩ za'ra wa'aba mono da. Ta hã ma tã tinhimiroti hã te te aima 're sõmri za'ra wa'wa, 'rãwi aipẽ'ẽ 're, aima 're hãimana u'ãsi za'ra wa'aba mono da. Ta hã simiroti waihu'u pese di, 're aihãimana wasété za'ra wa'aba mono hawi, te te 're asõ'reptu za'ra wa'aba mono zéb da hã.

²² Taré ãsimiroti hã aipo're na 're wapari za'ra wa'aba mono õ di za, ãmreme wapari pese 'wa na, taré 'rãwi asima 're asadawa nhipese za'ra wa'aba mono tã da. Tã sena te za ãsimiroti hã 're ã'madã'ã za'ra wa'aba mo.

²³⁻²⁴ Æté aibã hã rob'madã'ãzém na te za si'madã. Tawamhã si'madã'ã pari, morĩ wamhã, awa'awi te za sina po're ha'ã. Tane, 'Re ãhãimana u'ãsi mono mreme hã dapo're na da te 're wapari za'ra mono nherẽ, da te 're 'madã'ã za'ra mono õ wamhã, awa'awi te za ãma 're dapo're simrami za'ra.

²⁵ 'Re ãhãimana u'ãsi mono nhimiroti hã wẽ uptabi di. Ta hã wapawapto'wa da, te wama 're hãimana, wawasédé, wa te 're ãrẽme pese za'ra mono zéb da hã. Tawamhã ãsimiroti na da te 're rosa'rata pese za'ra mono wamhã, duré õne u'ãsi ãma 're dahãimana za'ra mono wamhã, taré ãmreme wapari'wa 're danomro mono õ di za. Tã sena ãmreme wapari pese 'wa, te za oto 're danomro. Taha zarina rowẽ u'ãsi te za ãma 're dahãimana za'ra.

²⁶ Æté ni'wam norĩ hã te za taré te te sina 're rosa'rata za'ra, 'Re ãhãimana u'ãsi mono nhimiroti 'madã'ã'wa na, tã sena newa. Tane nherẽ, ãté 'rãwi 're si'uwati za'ra mono õ di za, 're mreme wasété tã za'ra mono da. Æne wamhã, tã sena 'Re ãhãimana u'ãsi mono nhimiroti 'madã'ã'wa na 're hãimana za'ra mono õ di za. Taré te za tinhimirosa'rata na 'rãwi sima 're sadawa nhipese za'ra.

²⁷ Æne 're hãimana za'ra mono õ di za, 'Re ãhãimana u'ãsi mono nhimiroti 'madã'ã pese 'wa norĩ hã. Æne te za 're hãimana za'ra. ãmama'õ norĩ hã duré ãna'õ norĩ hã te za te te 're pawapto'wa za'ra. Pi'õi mrotõ norĩ zama te za te te 're pawapto'wa za'ra, ropire hã tãma 're hãimana za'ra mono wamhã. Tihãimanazém na te za duré 're sipibu pese za'ra, Wanhib'apito zazei'õ'wa norĩ nhimirosa'rata zarina 're hãimana wasété za'ra mono tã da. Æne wamhã, te za Wamama hã te te 're da'awaihu'u, tã sena ãsimiroti 'madã'ã pese 'wa na hã.

2

Aiwapasi danhimizawizém na 're ãdahãimana za'ra mono zém na rowasu'u

¹ Ìsisãnawã norĩ, ãne wa za duré aima waihu'u za'ra wa'wa. Wanhib'apito Zezu Cristu hã rowa'a za'etẽ ré, te 're hãimana u'ãsi, wẽ uptabi na. Tawamhã ãsazei'wa 're aihãimana za'ra wa'aba mono nherẽ, dahãiba 'madã'ã zarina asiwi 're daba'a za'ra wa'aba mono õ di za, asimizawizém na.

² Æté aibã ãsibro pe hã te za ãzé asi'rã'õtõ aba ré, etẽ'ubuzi prẽ oru 'manharĩ na siptõmo hi wasisi ré, duré uza wẽ ré zama. Æté aibã hã te za duré ãzé ãsimar'õ hã, uza wasété ré.

³ Tawamhã ãtê ì'uzá wê ré ma, te za tâma ìnharĩ 'wa: "Ãhãta wedeza ìwê. Ãme asãmra." Taha pari, te za duré ìsimarĩ'õ ma ìnharĩ 'wa: "Hãiwim haré asa na." Niha wamhã, "Ïpapara asãmra, ti'ai wa."

⁴ Ãne dama 're nharĩ za'ra wa'aba mono wamhã, aiwab õ di, 're ìdazawi za'ra wa'aba mono zé hã. Asimirosa'rata wasété zarina, te za asiwi 're ìdahãiba ba'a za'ra wa'aba mo, asimizawizéb õ na.

⁵ Ìsisãnawã norĩ, ìma asawi pese za'ra wa'aba norĩ hã, ma'ãpé ìwapari pese za'ra wa'aba. Ti'ai ãma, átê simarĩ ãna te za 're hãimana za'ra, 're ìhãimana u'ãsi mono zawi pese 'wa norĩ hã. Tane nherê, Wanhib'apito zazei'wa 're hãimana za'ra mono wa, ma tô ta norĩ hã pisutu za'ra, uburé marĩ ìwê ré, 're hãimana za'ra mono da, tâma 're ìsõprub za'ra mono zéb zarina. Ma tô duré tâma pisutu za'ra, rowê uptabi na T'rata 're hãimana u'ãsi za'ra mono da, 're ìsãmra mono zéb ãma, te te tâma ìropisutu za'ra zéb zarina.

⁶ Tane nherê, ma tô a norĩ wa'wa hã ìsibrob'õ norĩ hã 're ìhãiba wê'õ za'ra wa'aba mo. Ma'ãpé rosa'rata za'ra wa'aba. E 'wam norĩ hã ma tô te te aima 're rob'manharĩ wasété za'ra wa'wa, aipawa'ãbã za'ra wa'aba na hã. Duré e 'wam norĩ hã ma tô datême te te 're asimroi wa'wa, da'ãma rowairébé'wa norĩ u, ìpipa na te te ai'ãma 're rowairébé za'ra wa'aba mono da. Ìsibro pese norĩ si, ma tô ãne na te te aima 're rob'manharĩ wasété za'ra wa'wa.

⁷ Ta norĩ si ma tô Asib'apito za'ra wa'wa hã te te 're sisi wasété za'ra, wê uptabi nherê, Cristu hã.

⁸ Ìbãihã na te tihãiba, Danhib'apito uptabi nhimiroti hã 're ìhãimana u'ãsi mono nhimiroti hã. Ìsimiroti hã ãne: "Dahãiba mono bã te za 're ìdazawi pese za'ra wa'aba mo. Taha zarina marĩ ìwê zõ, asima 're asõpré wa'aba mono ne, te za duré uburé ìwê zõ dama zama 're asõpré wa'aba mo." Ãne ãma ìrob'ui'éré ì hã, ìbãihã na hã. Tawamhã ìsimiroti hã 're 'madã'ã pese za'ra wa'aba mono wamhã, wê di.

⁹ Tane nherê, asimizawizém na asiwi 're daba'a za'ra wa'aba mono wamhã, te za aiwasété na 're aihãimana za'ra wa'aba mo. Taha wa, Wamama nhimiroti hã asimizawizém na hã ãma tâma 're uwaimrami pese za'ra wa'aba mono õ di.

¹⁰ Áté ni'wa hã Wamama nhimiroti, Mozésihã ma te te T'awaihu hã, te za misi ãma tizaihá. Ãne wa, te za 're ìhãimana u'ãsi mono hã ìwasédé hã ãma sa'ra, ìsimiroti mono bã te te 're 'madã'ã pese mono õ wa.

¹¹ Ta hã ma tô ãne dama roti aré: "Aimro na asiwi 're asipsaihuri za'ra wa'aba mono õ di za." Ma tô duré dama roti: "'Re danhimroi wa'aba mono õ di za." Ãne ìsimiroti hã. Tane nherê, aimro na asiwi 're asipsaihuri za'ra wa'aba mono õ nherê, 're danhimroi wa'aba mono wamhã, aiwasété na te za 're aihãimana za'ra wa'aba mo, Wamama nhimiroti hã 're 'madã'ã pese za'ra wa'aba mono õ wa.

¹² Ìsimiroti hã wapawapto'wa da, te wama 're hãimana za'ra, wawasédé hã wa te 're ìrême pese za'ra mono zéb da hã. Nimahã na te za wahãimanazém na te te 're wa'awaihu'u Wamama hã, ìsimiroti 'madã'ã pese 'wa na. Ãne wa, wa za wamreme wê na si wasima wa te 're rowasu'u u'ãsi za'ra. Duré wahãimanazé ìwê na si, wa za dama 're wahãimana u'ãsi za'ra.

¹³ Nimahã bãtã na dahãimanazém na te te da'awaihu'u wapsi, da'ãma 're ìpê'ézé za'ra mono õ norĩ ãma, pê'ézé õ di za, 're ìhãimana u'ãsi mono hã, ti'ab ré da'ãma 're ìsiwamri za'ra mono õ norĩ ãma hã. Da'ãma 're ìpê'ézé u'ãsi za'ra mono norĩ ãma si, te za ãma 're pê'ézé za'ra.

Zezu Cristuhu zazei'wa na 're ìdasiwasu'u za'ra mono zé wasu'u

¹⁴ Ìsisãnawã norĩ, ãne wa za duré aima waihu'u za'ra wa'wa. Áté ni'wa hã te za taré dama 're siwasu'u, Zezu Cristuhu zazei'wa 're ìmorĩ na, marĩ ìwê na te te 're dapawapto mono õ nherê. Tawamhã, e te za sina uwaimra, tinho'reptuzé hã. Mare di. Te te sina uwaimrami õ di za.

¹⁵⁻¹⁶ Áté wasiré ìsazei'wa norĩ wi, te za marĩ zõ tiwi 're ro'wanhi'riti za'ra, ì'uzazéb zõ, duré ìsazéb zõ, aibã norĩ wi, duré pi'õ norĩ wi. Tawamhã ãne tâma 're nharĩ za'ra wa'aba mono wamhã: "Ma'ãpé, rowê na si 're ai'ubumroi wa'aba mono, ai'uzá wê ré si, duré asai wê na si," ãne wamhã, marĩ zõ dawĩ 're ìro'wanhi'riti za'ra mono zéb uwaibaba, dama ãma 're uwaimrami za'ra wa'aba mono õ wamhã, taré dama 're ìnharĩ za'ra wa'aba mono zé hã za. Ãne wamhã, e te za da te 're aiwêsãmri za'ra wa'wa. Mare di.

¹⁷ Tane, Zezu Cristuhu zazei'wa na dama 're dasiwasu'u za'ra mono nherê, marĩ ìwê na te te 're dapawapto za'ra mono õ wamhã, taré dama 're ìdasiwasu'u za'ra mono zé hã.

¹⁸ Áté ni'wa hã te za ãne dama siwasu'u: "Wa hã marĩ ìwê na, wa tô te 're da'apawapto u'ãsi. A hã ma tô dama 're asiwasu'u mo, Zezu Cristuhu zazei'wa 're aimorĩ na." Áté ãne te za dama tinha, ni'wa hã. Tawamhã, wa hã wa aré asa tâma waihu'u, ãne: "Ni'wa hã Zezu Cristuhu zazei'wa na dama 're siwasu'u mono nherê, ìwê na te te 're da'apawapto mono õ wamhã, tô senai õ di, dama 're ìsiwasu'u mono zé hã. Wa hã Zezu Cristuhu zazei'wa, wa

're mo. E niha te za āne wamhā, dasiwi īwaihu'u ni, tō sena na, īsazei'wa 're īmorī na. Marī īwē na te 're ida'apawapto mono zēb zarina si, te za dasiwi īwaihu'u ni, tō sena na dama 're īsiwasu'u mono na, Zezu Cristuhu zazei'wa 're īmorī na.

¹⁹ Misire uburē danhib'apito uptabi hā te 're sāmra. Āne na hā aima waihu'u pese di. Taha wasu'u na ma tō āma īsaze. Wa'uburē norī zama ma tō misire Danhib'apito uptabi wasu'u hā waihu'u za'ra. Taha wa, te pipa te, 're rērē'ē za'ra.

²⁰ E niha te rosa'rata āna 're aihāimana mo. Ātē ni'wa hā te za dama 're siwasu'u, Zezu Cristuhu zazei'wa 're īmorī na. Tane nherē, marī īwē na te te 're da'apawapto mono ō wamhā, marī dai ō di za, dama 're īsiwasu'u mono zē hā. Ma'āpē, āne hā waihu'u.

²¹ Durē ma'āpē āma rosa'rata pese, wahi'rada Abra'āhā wasu'u na. E marī wa, ma tō 'Re īhāimana u'āsi mono hā wahi'rada hā te te 're wēsāmri. Tī'ra Izati hā te te tiwi sawi āna, te arē tīwī, ētē za'ra nhisiwi, 'Re īhāimana u'āsi mono ma īsōprubzēb da hā, te te ī'ruzēb zarina. Taha wa, ma tō wēsā.

²² Abra'ā hā ma tō mreime 'manha, te te sina 're umnhasi za'ētē mono wa, 'Re īhāimana u'āsi mono te te tāma īropisutuzēm na, īsihudu hā ahā da. Īmreme hā te te ī'manharīzēb zarina, wa tō āma waihu'u za'ra ni, 'Re īhāimana u'āsi mono nhimiropisutuzē hā tō sena te te sina 're ī'umnhasi mono zēm na.

²³ Tō sena, Abra'āhā wasu'u na da te āma īrob'ui'éré hā. Āne āma īrob'ui'éré hā: 'Abra'ā hā ma tō 'Re īhāimana u'āsi mono hā, danhib'apito uptabi na waihu'u. Ma tō durē te te sina 're umnhasi za'ētē, 'Re īhāimana u'āsi mono, te te tāma īropisutuzēm na. Taha wa, ma tō 'Re īhāimana u'āsi mono hā te te 're wēsāmri, Abra'ā hā.' Āne āma īrob'ui'éré hā. Durē, Abra'ā hā tāma sawi pese wa, ma tō sima sisi, tisiwadi uptabi na." Āne wa arē asa tāma waihu'u.

²⁴ Taha wasu'u zarina, ma'āpē marī hā āma waihu'u za'ra wa'aba. Zezu Cristuhu zazei'wa na dama 're dasiwasu'u za'ra mono nherē, marī īwē na da te 're da'apawapto za'ra mono ō wamhā, e te za te te 're da'awēsāmri, 'Re īhāimana u'āsi mono hā. Mare di. Wanhib'apito zazei'wa 're danomro mono wamhā, te za marī īwē na da te 're dapawapto za'ra. Tawapsi, te za 'Re īhāimana u'āsi mono hā te te 're da'awēsāmri.

²⁵ Ra'abihi zama ma tō wēsā, 'Re īhāimana u'āsi mono hā īsimipawapto wē zēm na. Ra'abi hā, pi'ō arē 're īhāimana wasété mono. Ta hā ma tō durēihā Izarazéhé nhihudu norī hā pawapto zahuré, wapsāi'a'wa norī hā, pi'uriwi ti'ai wē zō robzabui'wa norī hā. Tinhorōwa u ma tō 'mazasi zahuré, tame sōtō zahuré da, durē sa zahuré da. Bādādi amo na pi'uriwi apā datēme neb zahuré da, ma tō durē pawapto zahuré. Taha wa, ma tō 'Re īhāimana u'āsi mono hā wēsā pi'ō hā, aibā norī hā te te pawapto wē zahuré wa.

²⁶ Wa za durē aima romnhimire'é za'ra wa'wa. Ni'wa hā dā'ā wamhā, oto ip'ēzani hā tāma hāimana ō wa, ihāiba hā si te za tihāiba. Tane ni'wa hā Zezu Cristuhu zazei'wa na dama 're siwasu'u mono nherē, marī īwē na dapawapto āna 're hāimana mono wamhā, dama 're īsiwasu'u mono zēp si, te za tarē 're hāimana.

3

Damreme wasété āna 're īdahāimana za'ra mono zēm na rowasu'u

¹ Īsisānawā norī, Wanhib'apito zazei'wa norī ma rowahutu'wa da hā, ātē ai'umro na si te za 're asirowahutu'wa za'ra wa'aba mo. E marī wa, wa āne aima waihu'u za'ra wa'wa. Nimahā bātā na te za wahāimanazēm na wa'waihu'u, Wanhib'apito hā. Tawamhā wa norī hā dama rowahutu'wa nherē, marī, wa te 're ī'manharī wasété za'ra mono zēm na, te za sa'ētē wama nharī za'ra, Wanhib'apito hā, wasiré īsazei'wa norī nhapai u.

² Uburē wa norī hā wa za nimahā na wahāimanazēm na upa za'ra ni. Ni'wa hā timreme na te te 're upai mono ō 'wa'āhā, arē 're hāimana wē mono di. Tiwasédé hā te te 're 'manharī tō mono da, 'rāwi sihāimanazēb uwati da hā, arē tāma waihu'u pese di.

³ Marī īsyrre na wa za aima āma romnhimire'é za'ra wa'wa. Īsi'uwazi nhi'odo hā, wa za awaru zadaí'ré 're, wa te 're sé, wa te wasima īwēzēb uwaibaba, wa te wata pi'ra da, awaru hā.

⁴ Uba're wasu'u na, te za durē āma īrosa'rata za'ra wa'wa. Uba're hā sa'ētē nherē, te za rowa'u'u za'ēne hā te te 're simro. Tawamhā, īwairīzē hā syryre nherē, te za taha na ī'mapraba'wa hā te te 're pizari uba're hā, te te sima īwēzēb uwaibaba, wara da.

⁵ Tane danhoto hā syryre nherē, te za marī hā īhawi te te 're ropé. Wa za durē unhama ro'o wasu'u na aima āma romnhimire'é za'ra wa'wa, īsyrre na. Unhama ro hā syryre nherē, te te 're ropéi mono wamhā, te za marā za'ēne hā 're sihōmo.

⁶ Tane danhoto hā unhama ro'o ne, te aiwa dama 're hāimana za'ra. Danhoto hawi, te za sipu'u pese na damreme wasédé hā te te 're ropé. Ta hawi te za 'rāwi 're dasiwasété za'ra. Unhama ro hā te za danhimarī hā te te dawī 're uprosi. Tane danhoto wasété na, te za

dahâimana wê hã da te dasiwi 're uprosi za'ra. Ropipa hawimhã te za damreme wasédé hã te te dama âma 're sãna'rata, wa'uburé hã.

⁷ A'uwê norĩ hã ti'ai âma 're ihâimana za'ra mono hã, siptete di, abaze norĩ da hã, duré si norĩ da hã, duré ti'ai baba di'na 're Ìnomro mono norĩ da hã, duré â na 're Ìnomro mono norĩ da zama.

⁸ Tane nherê, ni'wa hã si'uihã na 'rãwi si'uwati waihu'u ô di, mreme wasété tã da hã. Danhoto hã dama 're ihâimana za'ra mono hã, ta hã Ìwasédé. Wahi 'wa wa'u ne dapãri'wa, damreme wasédé hã.

⁹ Wanhoto na wa za uburé Danhib'apito uptabi âma 're wawata za'ra, Wamama âma hã. Wa za duré wa te da'âma 're wasété za'ra, wanhoto ihâiba amo na, 'Re ihâimana u'âsi mono hã te te 're wa'apoto mono nherê, Ìsine 're wanomro mono da.

¹⁰ Siwazari wazadawa hawip si, te wamreme hã 're wairébé, Wamama âma 're Ìwawata za'ra mono zém na hã, duré wa te da'âma 're Ìwasété za'ra mono zém na zama. Ìsisânawã norĩ, âne aimreme hã 're 'manharĩ za'ra wa'aba mono ô di za.

¹¹ Ma'ápé â na duré rosa'rata za'ra wa'aba. E siwazari te â wê hã ub're hawi 're wairébé, â Ìsei ô me hã. Mare di.

¹² Ma'ápé duré rosa'rata za'ra wa'aba, rob'rã na. Azeitona 'rã hã e te za ti'rã, aimawi rowede na, pidera wede na. Mare di. Misi haré Ì'rã hã. E uwa 'ru u, te za podó Ì'rã amo hã, pidera na Ì'rã nhisi hã. Mare di. Taha wazari poto ô di. Tane duré â wê hã hâimana ô di, â warĩri wazari. Duré siwazari ub're hawi 're wairébé mono ô di, â hã. Tane aimreme hã siwazari 're sani za'ra wa'aba mono ô di za.

'Re ihâimana u'âsi mono hawi dahâimanazém na rowaihu'u na rowasu'u

¹³ E 'wam norĩ hã te 'Re ihâimana u'âsi mono hawi dahâimanazém na rowaihu'u ré 're hâimana za'ra, asiré wa'aba hã Ìsimirosa'rata za'êne hã. Âne hã ni'wam norĩ hã asiré 're hâimana za'ra wa'aba mono wamhã, hâimana wê na te za 're hâimana za'ra. 'Rãwi tiwê na sina 're wata za'ra mono ô di za. Âne wamhã, hãiwa hawi rowaihu'u ré 're Ìnomro mono na, te za da te âma 're waihu'u za'ra.

¹⁴⁻¹⁵ Tane nherê, aipê'ê 're marĩ na 're da'ruiwaparĩ za'ra wa'aba mono wamhã, duré marĩ Ìwê zô asima si 're asôpré wa'aba mono wamhã, hãiwa hawi dahâimanazém na rowaihu'u ré, 're aihâimana za'ra wa'aba mono ô di za. Âne wa, hãiwa hawi dahâimanazém na rowaihu'u ré 're anomro aba mono newa, 'rãwi asina 're aiwata za'ra wa'aba mono ô di za, 'rãwi asimirosa'rata na asima 're asadawa nhipeze za'ra wa'aba mono tã da. Âne 're dahâimana wasété za'ra mono wamhã, Ìsazei'ô'wa nhimirosa'rata wasété zarina, duré Wa'uburé nhimirosa'rata zarina te za 're danomro. Hãiwa hawi, 'Re ihâimana u'âsi mono nhimirosa'rata zarina 're danomro mono ô di.

¹⁶ Marĩ na da te 're da'ruiwaparĩ za'ra mono wamhã, duré marĩ Ìwê zô dasima si 're danhopré mono wamhã, rowê hã dama 're hâimana za'ra mono ô di za. Te za dasiwi da te 're ro'wa'rutu za'ra. Te za duré 're dahâimana wasété za'ra.

¹⁷ Hãiwa hawi dahâimanazém na rowaihu'u ré, 're dahâimana za'ra mono wamhã, te za daswété âna 're danomro. Roti wê na te za da te 're dapawaptob za'ra, rowê na dasiré 're dahâimana za'ra mono da. Duré danhimizawi pese na, te za 're danomro. Duré danhimipari pese na, te za 're danomro. Duré te za da'âma 're dapê'êzé za'ra. Te za duré dasina 're dapê'êzé za'ra. Duré marĩ Ìwê na te za 're dasipawaptob za'ra. Duré danhimizawizé hã da te dama 're ba'a za'ra mono ô di za. Duré dahâimana zadawa nhipeze na 're dahâimana za'ra mono ô di za.

¹⁸ Amnho Ìwê hã da te 're zuri mono wamhã, te za Ìwê si da te 're ubumro za'ra, amnho hã. Tane roti Ìwê na 're dasipawaptob za'ra mono wamhã, rowê na dasiré 're dahâimana za'ra mono da, duré Ìsimiroti na 're danomro mono wamhã, dahâimana wê na si te za dasima 're dahâimana za'ra oto.

4

Wamama nhimiroti ma, dawapu na 're Ìdanomro mono wasu'u

¹ A norĩ wa'wa hã te aimreme na 're asi'wapé za'ra wa'aba mo. Te duré 're asisada'âbã za'ra wa'aba mo. E marĩ wa. Asimirosa'rata wasété zarina, marĩ zô 're rowasutu za'ra wa'aba mono wa.

² A norĩ wa'wa hã ma tã marĩ hã ahã na asima 're Ìwê za'ra wa'aba mo. Tawamhã uburé asima âma 're uwaimrami za'ra wa'aba mono ô wa, te za sô 're Ìdanhimro za'ra wa'aba mo, âma asima 're uwaimrami za'ra wa'aba mono da. Marĩ na te duré 're Ìda'ruiwaparĩ za'ra wa'aba mo. Tawamhã âma asima 're uwaimrami za'ra wa'aba mono ô wa, te aimreme na 're asi'wapé za'ra wa'aba mo. Marĩ Ìwê na 'Re ihâimana u'âsi mono wi, a'â 're rowaptêrê za'ra wa'aba mono ô wa, te te aima 're sômri za'ra wa'aba mono ô di za, Ìwê hã.

³ Ātē te za asima si tiwi 're ĩrowaptērē za'ra wa'aba mo. Tane nherē, asimirosa'rata wasété zarina si, tiwi 're rowaptērē za'ra wa'aba mono wamhā, te te aima 're sōmri za'ra wa'aba mono ō di za.

⁴ E Wamama nhimiroti hā 're 'madā'ā za'ra wa'aba mono bā, te ĩsazei'ō'wa norī nhimiroti si, 're ĩ'madā'ā za'ra wa'aba mo. Āne wamhā, Wamama zawi'wa 're aihāimana za'ra wa'aba mono ō di za. E āne na aima waihu'u za'ra wa'aba ō di bété. ĩsazei'ō'wa norī nhimiroti si, da te dasima 're wē za'ra mono wamhā, Wamama āma te za 're sitob'ru za'ra.

⁵ Durēihā ma tō āne ĩmreme na rob'ui'éré, 'Re ĩhāimana u'āsi mono zadawa wasu'u'wa hā, āne: "Wamama, Tipē'ēzani te te wama 're ĩsōmri mono hā, wapē'ē 're wama 're hāimana za'ra mono da, te te sima 're wa'awē uptabi, Wamama zawi'wa 're wanomro mono da." E taré ma tō āne na hā rob'ui'éré, ĩbaihā na hā. Mare di. Taré te te āma rob'ui'éré ō di. Tō sena ma tō āma rob'ui'éré.

⁶ Āne wa, Wamama zawi'wa 're wanomro mono da, te za te te 're wa'apawaptob u'āsi. Durēihā ma tō taha wasu'u na rob'ui'éré, ĩsadawa wasu'u'wa hā, āne: "S'i'uihā na 'rāwi tinhimirosa'rata na 're ĩsi'madā'ā za'ra mono norī zada, te za 're hāimana, Wamama hā. 'Rāwi tinhimirosa'rata na 're ĩsi'madā'ā za'ra mono ō norī si, te za te te 're apawapto." Āne āma ĩrob'ui'éré hā.

⁷ Taha wa, 'Re ĩhāimana u'āsi mono nhimiroti ma, ma'āpē 're asiwapu za'ra wa'aba mono, ĩsimiroti na si 're anomro aba mono da. Wa'uburē norī nhīb'apito nhimipibui wasété zé wi, te za 're asiptete za'ra wa'aba mo. Tawamhā si'aba'rē na, te za asiti timorī 'wa.

⁸ Ma'āpē Wamama u asimirosa'rata na 're aihutu aba mono. Tawamhā ō hā te za duré 'rāwi atēme 're simasisi 'wa. ĩpo're'ō norī, asib'rata u're wa, 're asimisō za'ra wa'aba mono ne, te za 'rāwi aipē'ē na aiwasété na 're asiwē'ō za'ra wa'aba mo, aiwē na 're anomro aba mono da oto. Wamama āma tō sena 're aihāimana za'ra wa'aba mono newa, tō sena āma 're aihāimana za'ra wa'aba mono ō di. Taha wa, ma'āpē aihāimana wasété wi 're aipizari za'ra wa'aba mono, aihāimana wē na āma 're aihāimana za'ra wa'aba mono da.

⁹ Aiwasété na 'rāwi 're asisāmri za'ra wa'aba mono wa, te za 're ai'ry'ry wa'aba mo. Rowē te, aipē'ē 're, 're ato za'ra wa'aba mono ō di za a'ā. Robzei'ō na te za a'ā 're aihāimana za'ra wa'aba mo.

¹⁰ Aihāimana wē na tāma 're asiwasu'u za'ra wa'aba mono ō di za, Danhib'apito uptabi ma hā, asina 're aiwata za'ra wa'aba mono tō da. Aihāimana wasété na si te za tāma 're asiwasu'u za'ra wa'aba mo. Tawamhā robzei'ō hawi te za ai'āma 're sisapri za'ra wa'wa, rowē na oto 're aihāimana za'ra wa'aba mono da.

¹¹ ĩsisānawā norī, asisa're'ra 're asibāsi za'ra wa'aba mono ō di za. Ni'wam norī hā tisiré ĩsazei'wai āma, te te āma 're wasété za'ra mono wamhā, niha wamhā, te te 're wē'ō za'ra mono wamhā, tisiré ĩsazei'wai u'ābā, Wanhib'apito nhimiroti hā 're ĩdisisawi pese za'ra mono zé hā te za te te siwi 're wē'ō za'ra. Āne wamhā, ĩsimiroti te te 're 'madā'ā pese za'ra mono āna, te za 're nomro.

¹² 'Re ĩhāimana u'āsi mono si danhipai u roti wē 'manharī'wa hā te 're hāimana. Taha si dahāimanazéb zarina da'āma rowairébé'wai uptabi hā te 're hāimana. Ōhō ma si waihu'u pese di, te te 're ĩda'anho'reptui mono zéb da hā, duré te te 're ĩda'a'uprosi mono zéb da hā. E a norī wa'wa hā dahāimanazéb zarina da'āma rowairébé'wa pā, te bété asiré Cristuhu zazei'wa 're ĩwē'ō za'ra wa'aba mo.

Dasisō'wa rowaihu'u nhomri na rowasu'u

¹³⁻¹⁴ Ma'āpē ĩwapari pese za'ra wa'aba. Ātē āne te za asisōwa wa'aba, dama 're asiwasu'u za'ra wa'aba mo: "Ātē āhāna 'ri ahā u wa za ai'aba'rē ni, niha wamhā awēpsi. Tame te za misi wa'āma tiwaha, rob'uprazéb zō wa te romhuri za'ra ré, wa te wasima sa'ētē za'ra da, rob'uprazé hā." Ātē āne te za dama 're asiwasu'u za'ra wa'aba mo. E awēmhā niha ai'āma ĩromhāimana za'ra wa'aba zé hā aima waihu'u pese za'ra wa'aba bā, te za āne dama 're asiwasu'u za'ra wa'aba mo. Aihāimana za'ra wa'aba zé hā aiwa romnhizédé ne hā. Romnhizé hā 're hāimana za'ra mono wamhā, te za awa'awi ai'utō. Tane 're aihāimana za'ra wa'aba mono zé hā, aiwa romnhizédé ne te za aiwi 're si'utōri su'u za'ra wa'wa.

¹⁵ Taha wa, te za āne si asima 're asiwasu'u za'ra wa'aba mo: "'Re ĩhāimana u'āsi mono te te sima 're wa'awē mono wamhā, marī wa te 're ĩ'manharī za'ra mono da hā, wa za tō wa te 're 'manharī za'ra." Āne te za asima 're asiwasu'u za'ra wa'aba mo.

¹⁶ Tane nherē, niwa romhāimanazé hā waihu'u pese za'ra wa'aba newa, te 'rāwi asi'uihā na 're asi'madā'ā za'ra wa'aba mo. Ta hā dawasédé.

¹⁷ Taha wa, wa za āne aima waihu'u za'ra wa'wa. Marī ĩwē na da te dama āma 're ĩ'uwaimrami za'ra mono da hā, wē di. Tane nherē, taha wasu'u hā dama waihu'u pese za'ra nherē, marī ĩwē na da te dama āma 're uwaimrami za'ra mono ō wamhā, ta hā dawasédé.

5

Īsibro pese norī āma, Wamama nhimihâzém na rowasu'u

¹ Asimarī ahâ na 're aihâimana za'ra wa'aba mono norī, ma'āpé ĩwapari pese za'ra wa'aba. Niwapsi te za robzei'ō hâ 're ĩsépata za'ra wa'aba mo. Taha wa, ĩwana ré te za asina 're ai'ry'ry sirōmo aba mo.

² Asimarī za'ra wa'wa hâ te za aiwi 're si'utōrī za'ra wa'wa. Duré ai'uzazé ĩwē hâ te za ĩhâ tetere hâ te te aiwi 're hâzapu'u za'ra wa'wa.

³ Marī hâ ate za'ra wa'wa hâ, êtê'ubuzi pré oru 'manharī hâ duré êtê'ubuzi'a prata 'manharī hâ 're si'ubuzi za'ētê za'ra mono ō di za oto. Ta norī hâ asima si 're ubumroi pese za'ra wa'aba mono wamhâ, te za asōti na aiwaihu'u za'ra wa'aba ni. E asibrob ahâ hâ asima si 're ĩsa'êtê za'ra wa'aba mono zarina, te za rowē hâ aima 're hâimana u'âsi za'ra wa'wa. Mare di. Danhimarī hâ unhama ro'o na, dawi 're ĩsi'utōrī za'ra mono ne, te za rowē hâ aiwi ai'utōrī za'ra wa'wa. Rob'râsutuzéb u romhutu nherē, ma tô asima si 're ĩsa'êtê za'ra wa'aba mo, rob'ubumro hâ.

⁴ Aiburu na romhuri'wa norī hâ 're pawa'âbâ za'ra wa'aba mono ō di. Ōhōta te aiwapsari za'ra. Hâiwa hawi te za dawapa, amnho ubumroi'wa norī 're ĩsiwapsari za'ra mono zé hâ 'Re ĩhâimana u'âsi mono hâ, danhipai u ĩwaihu'u pe hâ.

⁵ Ti'ai āma te asibro hâ asima si 're ĩ'ubumroi pese za'ra wa'aba mo, asima āma 're rowē za'ra wa'aba mono da, asibrom na. Wa za aima āma romnhimírê'é za'ra wa'wa. Powawē hâ hâipse wamhâ, romhuture di oto, da te ĩwīrízéb u hâ. Tane, romhuture di oto, 'Re ĩhâimana u'âsi mono hâ dazu te te ĩ'aihâ za'ra wa'aba zéb u hâ.

⁶ Ni'wam norī hâ marī hâ te te 're 'manharī wasété za'ra mono ō nherē, ma tô a norī wa'wa hâ taré dama 're ĩ'ru za'ra wa'aba mo, da te 're simroi mono da. Ta norī ma, waihu'u za'ra ō di, 're ĩsis'ō'reptu za'ra mono zéb da hâ.

Wanhib'apito zô danhimi'ē na sô 're ĩdanhimipari za'ra mono zém na rowasu'u

⁷ ĩsisânawā norī, rowasédé hâ 're hâimana mono nherē, te za asimi'ē na Wanhib'apito zô 're asimipari za'ra wa'aba mo, apâ wei morī ō ré. Ma'āpé rosa'rata za'ra wa'aba, buru tede'wa na. Buru tede'wa norī hâ te simi'ē na, tâ zô 're simipari za'ra, a'ē ta'a zô, duré ĩpīni 'râsutuzéb zô zama. Simi'ē na te sô 're simipari za'ra, ropoto té te te 're ĩ'ubumro za'ra mono zéb zô, tâma sawi za'ra wa, buru nho hâ.

⁸ Tane a norī wa'wa hâ te za duré asimi'ē na Wanhib'apito zô 're asimipari za'ra wa'aba mo. Za wei apâ morī su'u na dâ'âsina, te za robze na sô 're asimipari u'âsi za'ra wa'aba mo.

⁹ ĩsisânawā norī, asima 're aiwapsari za'ra wa'aba mono ō di za, 'Re ĩhâimana u'âsi mono hâ aiwasédé hâ te te ai'āma 're sa'ra za'ra wa'aba mono tô da. Dahâimanazéb zarina da'āma rowairébé'wa hâ we ĩmorízéb u hâ romhuture di oto. Āne wa, asima 're aiwapsari za'ra wa'aba mono ō di za.

¹⁰ Duréihâ Danhib'apito uptabi zadawa wasu'u 'rata 'wa norī hâ, da te tâma 're rob'manharī wasété za'ra mono nherē, ma tô simi'ē na te te 're robzépata za'ra, hâimana wē na. Tane te za duré ta norī wasu'u na 're ĩrosa'rata u'âsi za'ra wa'aba mo, ĩsine 're aihâimana za'ra wa'aba mono da.

¹¹ Ta norī hâ te te 're robzépata za'ētê za'ra mono nherē, siptete sina ma tô Wamama āma 're hâimana u'âsi za'ra. Taha wa, tâma 're rowē za'ra mono di oto. Taha wasu'u hâ wama waihu'u pese za'ra di. A norī wa'wa hâ ma tô Zoho wasu'u hâ 're ĩwapari za'ra wa'aba mo. 'Re ĩhâimana u'âsi mono umnhasi sina ma tô āma 're mo, Zo hâ. 'Re ĩhâimana u'âsi mono hâ, ĩsimizawizé hâ sa'êtê uptabi di. Duré da'āma 're ĩpê'ézé mono zé hâ sa'êtê di. Āne wa, Zo hâ te te robzépata mono pari, ma tô marī hâ ĩwē hâ apâ tâma tisō.

¹² ĩsisânawā norī, âhâna marī ĩpire hâ wa za aima waihu'u za'ra wa'wa. Marī na dama 're ropisutu za'ra wa'aba mono wamhâ, te za aimreme uptabi na si dama 're ĩropisutu za'ra wa'aba mo. Āté ni'wa hâ te za marī na dama ropisutu. Tawamhâ âté te za āne dama tinha, tô sena na te te dama ĩropisutuzém na, da te āma waihu'u za'ra da: "'Re ĩhâimana u'âsi mono hâ hâiwa 'manharī'wa, ti'ai 'manharī'wa, uburé marī 'manharī'wa, te 're hâimana. Ta hâ ma tô ĩwaihu'u, tô sena na te aima ĩropisutuzém na." Āté āne te za ni'wa hâ dama tinha, 'Re ĩhâimana u'âsi mono nhisi hâ, te te dama āma waptob sina. Āne dama 're nharī za'ra wa'aba mono ō di za. Aimreme uptabi na si, te za dama 're ĩropisutu za'ra wa'aba mo, 're sisi za'ra wa'aba mono āna, aimreme hâ tô senai ō wa, Wamama hâ aiwasédé hâ te te ai'āma 're sa'ra za'ra wa'aba mono tô da.

Īhâzéré norī wasu'u

¹³ Āté asiré ĩsazei'wai wa'wa hâ te za robzépata. Āne wamhâ, te za sina rowaptê, hâiwa u. Duré ni'wa hâ rowé tâma hâimana wamhâ, tinho're na te za Wamama āma tiwata.

¹⁴ Duré ni'wa hã hâzé wamhã, te za sô tihârâ za'ra, ãsazei'wa norĩ pawapto'wa norĩ zô, Wamama wi te te âma rowaptêrê za'ra da, duré azeitona 'rãi wa'ui wabre na te te âma 'rãi u'rê za'ra da, Wanhib'apito zadawa para.

¹⁵ Tawamhã, Wanhib'apito umnhasi sina te te tiwi rowaptêrê za'ra wamhã, Wanhib'apito te za sô'reptu, ãhâzé ré hã. Te za pese. Duré ãhâzé ré hã tiwasédé hã te te 're ab'manharĩ mono nherê, ãwasédé te te âma 're ab'madâ'â mono ô di za oto.

¹⁶ Âne wa, Wanhib'apito hã aihâzé wa, te te 're aipese za'ra wa'aba mono da, marĩ 're 'manharĩ wasété za'ra wa'aba mono wamhã, te za asima 're asiwasu'u za'ra wa'aba mo. Te za duré asima tiwi 're ãrowaptêrê za'ra wa'aba mo, Wanhib'apito wi. Tawamhã dahâimana wê sina, da te tiwi 're rowaptêrê za'ra mono wamhã, da te tiwi 're ãrowaptêrê za'ra mono zéb zarina, te za tô te te dama âma 're a'uwaimrami, Wanhib'apito hã.

¹⁷ Duréihã Wamama zadawa wasu'u'wa hã te 're hâimana, Eriasi hã. Ta hã wasine hã te a'uwê na 're mo. Ta hã ma tô rowaptê hâiwa u, tâ we ta'a tô da, ti'ai u. Taha wa, si'ubdatô wahu wâiwa, tâ we ta'a ô di.

¹⁸ Taha pari, ma tô duré rowaptê, tâ we ta'a da. Taha wa, te we tita'a oto. Tawamhã amnho ahâ di oto, da te 're ã'ubumro za'ra mono zéb da hã.

¹⁹⁻²⁰ ãsisânawã norĩ, âne wa za duré aima waihu'u za'ra wa'wa. Âté asiré ãsazei'wa hã te za aipi'ra, roti senai'ô niwĩ. Tawamhã âté misi te za ã'maipawapto wa'wa, apâ te te sina siri da, roti tô sena niwĩ 're hâimana mono da apâ. Âne asimiroti wê na 'manho'reptui wa'aba wamhã, ãpo're'ô hã, 'Re ãhâimana u'âsi mono nhiti 're hâimana u'âsi mono ô di za, rowê u'âsi nhiti. Duré Wamama hã te te âma 'madâ'â ô di za, marĩ hã ahâ na tiwasédé hã te te 're ã'ab'manharĩ mono zé hã. Te za tâma pari za'ra.

1 Pedru

Īsazei'wa norī ma, Pedru te te ĩrob'ui'ééré na'rata zé Ībaihâ wasu'uzé

Ā Ībaihâ hâ Pedru te te ĩrob'ui'ééré hâ Zezusihi zazei'wa norī hâ daro mono bâ 're ĩsi'ubumroi mono norī ma, ma tō rob'ui'ééré, Īsazei'wa 're nomro mono 'ru te, da te tãma 're ĩrob'manharī za'ra mono norī ma. Īsazei'wa norī hâ danhib'rata te te 're robzépata za'ra mono wa, ma tō Pedru hâ tinhimī'ui'ééré na pē'ēhiri za'ra. Taha na ma tō pawaptob za'ra, siptete sina Zezusihi āma si 're nomro mono da. Cristu hâ wanhowa te te ĩrobzépata na hâ ma tō duré tãma waihu'u za'ra, duré wa norī hâ ĩsiré 're wanomro mono wa, za ĩsine wa te 're ĩrobzépata za'ra mono zém na hâ. Āne ma tō duré tãma waihu'u za'ra: 'Re ĩhâimana u'ási mono hâ ma tō te te 're aipibu za'ra wa'wa, tō sena 're umnhasi za'ra wa'aba mono zō.

¹ Wa hâ Pedru, Zezu Cristu te te ĩpisudu, ĩsadawa wasu'u'wa 're ĩmorī da. Āhãna wa za āma aima rob'ui'ééré za'ra wa'wa, 'Re ĩhâimana u'ási mono nhib'a'uwē norī ma. Airom nhiti te dawazari 're aihâimana za'ra wa'aba mo, danhipti'a nho'ōmo mono bâ, Pōtu āma, duré Darasiza āma, duré Capadosiza āma, duré Azi'a āma, duré Bitinha āma.

² Aipoto za'ra wa'aba ō ré, ma tō Wamama hâ sima aipisutu sirōmo za'ra wa'wa, 'Re ĩhâimana u'ási mono hâ, ĩsib'a'uwē oto 're anomro aba mono da. Taha da, ma tō oto Tipē'ēzani hâ aipē'ē 're aima sōmri za'ra wa'wa, aiwē uptabi na oto ōhō āma si 're anomro aba mono da, duré Zezu Cristuhu nhimiroti si 're wapari pese za'ra wa'aba mono da, duré Cristu hâ dazada ĩdâ'âzéb zarina, aipē'ē 're te te 're ai'a'upsōi wa'aba mono wa, aiwasété āna āma 're anomro aba mono da oto.

'Re ĩhâimana u'ási mono ma, wa ai'āma 're ĩmreme u'ási za'ra wa'wa, ĩsimizawizé hâ ai'āma 're hâimana u'ási za'ra wa'aba mono da, rowē u'ási, āma 're anomro aba mono da, taha āma si.

Rowē uptabi zō, 're ĩdanhimipari za'ra mono zé wasu'u

³ 'Re ĩhâimana u'ási mono āma si oto 're wawata u'ási za'ra wa'aba mono, Wanhib'apito Zezu Cristuhu mama āma. E marī wa. Īpē'ēzézé hâ sa'ētē na tãma 're hâimana mono wa, ma tō wa'apoto té, wapē'ē 're, wahâimanazép té ĩwē na si oto āma 're wahâimana za'ra mono da. Zezu Cristu hâ dâ'â uptabi nherē, ma tō ĩmama hâ ab're hawi hãiwa'utu, tiwaihu'u pese na. Taha zarina, wa za duré wasina sō 're wanhimipari za'ra, 're wadâ'â za'ra mono pari, te te 're ĩwa'ahãiwa'utu mono zéb zō.

⁴ Nimahã na, te za marī hâ ĩwē hâ te te wama 're anhomri, tinhib'a'uwē norī zō te te 're ĩ'ab'madâ'â mono hâ hãiwa āma. Tame ĩwē uptabi si te asō 're simi'wara u'ási 'wa, dawī 're ĩsi'utōrī waihu'u za'ra mono ō hã, dawī 're ĩwasété za'ra mono ō hã duré.

⁵ Ate za'ra wa'aba da, te ĩwē hã asō 're hâimana u'ási za'ra wa'wa. A norī wa'wa hã ĩwaihu'u pese na te oto asina 're ĩ'umnhasi za'ra wa'aba mo. Taha wa, te za ĩwasété wi te te 're ai'madâ'â pese za'ra wa'wa, asō'reptui wa'aba zé hã asina uwaimrami za'ra wa'aba da, ro ĩsi'utōrizéb āma.

⁶ Taha wa, te za ĩwasu'uwē zarina aipē'ē 're, 're atoi u'ási za'ra wa'aba mo, rowasédé hã asada 're hâimana za'ra wa'aba mono wa, 're robzépata za'ra wa'aba mono nherē.

⁷ Wanhib'apito umnhasi sina 're aihâimana za'ra wa'aba mono zō, te za rowasédé hã asada 're hâimana za'ra wa'wa. Wanhib'apito Zezu Cristuhu ma, wē di, Wanhib'apito umnhasi sina 're aihâimana za'ra wa'aba mono zé hã. Ētē'ubuzi pré oru hã dama ĩsawi pese zém nhipai u, tãma wē di. Ētē'ubuzi pré oru hã wa'âbâ za'ētē wa, dama sawi pese di, ta hã dama 're hâimana u'ási mono dai ō nherē. Zata ō zō, te za unhamã wa hiri ni, zata ō wa, da te ĩwaihu'uzéb da hã, oru uptabi na. Tane, a norī wa'wa hã rowasédé hã asada 're hâimana za'ra wa'aba mono nherē, Wanhib'apito umnhasi sina 're aihâimana u'ási za'ra wa'aba mono wanhã, apã wē morī wapsi, te za danho'a ai'āma tiwata za'ra wa'wa, ōhō umnhasi sina āma 're ĩ'aihâimana u'ási za'ra wa'aba mono zém na. Tame te za duré marī hã ĩwē hã aima sōmri za'ra wa'wa. Rowē uptabi hã te za duré aima pisutu za'ra wa'wa. Tawapsi, aima 're rowē uptabi za'ra wa'aba mono di za oto.

⁸⁻⁹ A norī wa'wa hã atōmo na asiwi 're 'madâ'â za'ra wa'aba mono ō di, Zezu Cristu hã. Tane nherē, aima sawi uptabi za'ra wa'aba di, Wanhib'apito hã. Atōmo na asiwi 're 'madâ'â za'ra wa'aba mono ō nherē, te Wanhib'apito umnhasi sina 're aihâimana za'ra wa'aba mo. Taha wa, aima 're rowē za'ra wa'aba mono wa, te aipē'ē 're, 're atoi u'ási za'ra wa'aba mo, ato za'ētē za'ra wa'aba na. E marī wa. 'Re aihâimana wasété za'ra wa'aba mono zém hawi, te

te 're asô'reptu za'ra wa'aba mono wa. Taha da, te Wanhîb'apito hã asina 're ï'umnhasi za'ra wa'aba mo, te te 're asô'reptu za'ra wa'aba mono da.

¹⁰ Duréihã aibã norî hã te te 're hâimana za'ra, 'Re îhâimana u'âsi mono zadawa wasu'u 'rata 'wa hã. Ta norî hã danho'reptuzé wasu'u te te waihu'u pese za'ra da, ma tô te te sô 're rosa'rata za'ra. Îwana ré ma tô te te dama 're rowasu'u sirômo za'ra, danho'reptuzém na, 'Re îhâimana u'âsi mono za te te aima âma 're ï'a'uwaimrami za'ra wa'aba mono zém na.

¹¹ Âne te ta norî hã te te sima 're nharî za'ra: "E 'wa hã, Danho'reptui'wa za. E niwa te za tawamhã te te 're da'anho'reptu." Âne te ta norî hã te te sô 're rosa'rata pese za'ra, te te waihu'u za'ra da. Cristuhu pê'êzani hã îpê'ê 're, 're hâimana za'ra mono wa, ma tô tâma waihu'u sirômo za'ra, Cristu hã za te te îrobzépatazém na. Taha pari, rowé uptabi hã hâiwa âma za tâma 're îhâimana mono na ma tô duré tâma waihu'u sirômo za'ra.

¹² 'Re îhâimana u'âsi mono, ma tô duré âne hã tâma waihu'u sirômo za'ra: "Aima wa'aba si, te waihu'u za'ra wa'aba ô di, danho'reptui'wai wasu'u hã. Ai'uirî na wa'aba, za 're îdahâimana za'ra mono norî pibu ma, wa tô âne hã aima waihu'u sirômo za'ra wa'wa." Âne ma tô tâma waihu'u za'ra, aipibu ma za'ra wa'aba zama. Wanhîb'apito zadawa wasu'u'wa norî hã ma tô oto rowasu'uwê na aipo're pu'u za'ra wa'wa, Cristu te te 're îda'anho'reptui mono zém na. Hâiwa hawi, Wanhîb'apito pê'êzani nhimipawaptobzéb zarina, tô sena Cristuhu wasu'uwê na ma tô aipo're pu'u za'ra wa'wa. Taha wasu'u hã wê uptabi wa, te oto hâiwa âma romhuri'wa norî hã te te sima 're wê uptabi za'ra, te te 're waihu'u pese za'ra mono da.

'Re îhâimana u'âsi mono, dahâimana wê da, te te 're îda'apisutu mono zé wasu'u

¹³ Zezu Cristu hã nimahã na te za wei mo apã. Taha wa, te za aihâimana nhimiza'rese 're aihâimana za'ra wa'aba mo. Aihâiba na te za 'râwi 're asi'madã'â za'ra wa'aba mo. Zezu Cristu hã apã wei morî wapsi, te za aima 're îrowé za'ra wa'aba mono zé hã aima pisutu za'ra wa'wa, hâiwa âma. Taha zô si te za asina 're asimipari u'âsi za'ra wa'aba mo.

¹⁴ Taha wa, te za 'Re îhâimana u'âsi mono nhimiroti hã 're îwari pese za'ra wa'aba mo. Îsimiroti hã 're waihu'u za'ra wa'aba mono ô ré, ma tô marî hã îwasété zô si 're îrowasutu za'ra wa'aba mo. Taha zarina 're anomro aba mono ô di za oto.

¹⁵ 'Re îhâimana u'âsi mono hã ma tô sima aipisutu za'ra wa'wa, îsib'a'uwê si oto 're anomro aba mono da. Ta hã hâimana wê uptabi na, te 're hâimana. Taha wa, te za a norî wa'aba zama, aihâimana wê uptabi na oto 're aihâimana za'ra wa'aba mo, îsine.

¹⁶ Duréihã ma tô âne siwasu'u, 'Re îhâimana u'âsi mono hã: "Wa hã îhâimana wê uptabi na, wa 're îhâimana. Taha wa, a norî wa'aba zama te za aihâimana wê uptabi na 're aihâimana za'ra wa'aba aba mo, îsine."

Âne Îsimiroti na rob'ui'éré, îbaihã na hã.

¹⁷ A norî wa'wa hã, 'Re îhâimana u'âsi mono ma 're aimreme zusi aba mono wamhã, Wamama na te 're îsisi za'ra wa'aba mo. Ta hã dahâimanazéb zarina da'âma rowairébé'wa, te 're hâimana. Âhã wa, 're îdahâimana za'ra mono zéb zarina, te za dahâiba mono bâ te te dama âma 're a'uwaimrami, dahâimana wê zém na, dahâimana wasété na zama. Taha wa, te za 're îhâimana mono zém na asiwi 're îwazéb za'ra wa'aba mo, Wamama hã, ti'ai âma 're anomro aba mono ré.

¹⁸ A norî wa'wa hã ma tô îwaihu'u za'ra wa'wa, aiwa'âbã za'ra wa'aba zé hã. Cristu hã ma tô aiwa'âbã za'ra wa'wa, 're anomro wasété aba mono zém hawi, te te 're asô'reptu za'ra wa'aba mono da, aihî'rata norî ne, 're aihâimana za'ra wa'aba mono tô da oto. E rob'ui'prazém na ma tô Cristu hã aiwa'âbã za'ra wa'wa, e êtê'ubuzi pré oru na, niha wamhã, e ï'a na prata na. Mare di. Ta hã wê u'âsi 're hâimana za'ra mono ô di za. Taha na te te aiwa'âbã za'ra wa'aba ô di.

¹⁹ Dazada îdã'âzém na si ma tô aiwa'âbã za'ra wa'wa, îwapru hã tiwi îpu'uzém na. Ta hã te 're mo, pone'êrebã îwê uptabi ne, da te dasiwi îwirî da hã, dawasété wa, dawa'âbâzéb da. Cristu hã wê uptabi na 're îhâimana mono hã ma tô tidã'âzém na aiwasédé hã wa'âbã za'ra wa'wa. Ta hã te te îwawa'âbã za'ra zé hã wê uptabi di.

²⁰ 'Re îhâimana u'âsi mono hã te te ro'apoto mono ô ré, ma tô Cristu hã pisutu siro, dazada dã'â da, dawasété wa'âbâzéb da hã. Âhãna ro îsi'utô'rîzéb u hã, ma tô we datême wi oto Cristu hã, aima âma 're îrowé za'ra wa'aba mono zéb da hã.

²¹ Cristu hã dã'â uptabi nherê, ma tô ab're hawi hâiwa'utu, 'Re îhâimana u'âsi mono hã, rowé uptabi te te tâma pisutu da, hâiwa âma. Âhã wasu'u hã aima waihu'u pese za'ra wa'aba wa, te oto ôhõ si asina 're ï'umnhasi za'ra wa'aba mo, te te dama îropisutuzé hã te te aima âma uwaimrami za'ra wa'aba da.

²² Wanhîb'apito nhimiroti hã, tô sena. A norî wa'wa hã ma tô Îsimiroti hã 're îwari pese za'ra wa'aba mo. Taha wa, marî îwasété na asima 're rosa'rata za'ra wa'aba mono ô di oto.

Aiwê na 're anomro aba mono da si, te oto asima 're ĩrosa'rata za'ra wa'aba mo. Dazawizé hã tô sena te oto aima 're hãimana za'ra wa'wa, asiré Wanhib'apito zazei'wa norĩ âma. Taha wa, te za ône u'âsi 're asisawi pese za'ra wa'aba mo.

²³ Re ĩhãimana u'âsi mono zadawa wasu'u hã pire na te 're hãimana u'âsi. Niwa si'utõri waihu'u ô di za. Ta hã ma tô oto timreme na aipoto téb za'ra wa'wa aipê'ê 're, ĩ'ra si oto 're anomro aba mono da. Ti'ai âma damama norĩ si te za nimahã na dawí 're si'utõri za'ra. Tanei ô di, Aímama 'wa hã aipê'ê 're te te 're aipoto téb za'ra wa'aba mono hã. Niwa dame si'utõri waihu'u ô di.

²⁴ Duréihã ma tô ahã wasu'u na âma rob'ui'ééré, 'Re ĩhãimana u'âsi mono zadawa wasu'u wa hã. Âne te rowasu'u:

"Du hã 're wapti'i hã za'ra mono ô ré, te za 're 'ré za'ra. Duré romnhirãrã norĩ hã wê nherê, te za 're sirãrã a'a za'ra. Tane duré dahãiba hã wê nherê, te za 're dasi'utõri su'u.

²⁵ Tanei ô di, uburé Danhib'apito nhimiroti hã. Pire na te 're hãimana u'âsi. Niwa si'utõri waihu'u ô di za."

Âne âma ĩrob'ui'ééré hã.

Tawamhã Wanhib'apito wasu'uwê na da te 're aipo're pu'u za'ra wa'aba mono wamhã, ma tô uburé Danhib'apito nhimiroti wasu'uwê na te te aima 're rowasu'u za'ra wa'wa.

2

¹ Taha wa, te za aiwasédé hã 're ĩrême pese za'ra wa'aba mo, dasi'ruiwapari hã, duré dazadawa nhipe hã, duré dahãimanazé tô senai'ô hã, duré danhimarĩ na dasi'ruiwapari hã, duré dasima dawasu'u wasédé hã.

² Ai'uté ĩpoto té hã tina hãiwa'u zô 're ĩ'ry'ry mono ne, te za Wanhib'apito nhimiroti zô 're ĩrob'ruiwapari za'ra wa'aba mo, âma 're asiptete za'ra wa'aba mono da, aihãimana wasété hawi asô'reptuzé hã 'ráwi oto asina 're waihu'u za'ra wa'aba mono da.

³ Wanhib'apito dama 're ĩsôpru mono zé hã 'ráwi asina 're waihu'u za'ra wa'aba mono wa, wa âne aima waihu'u za'ra wa'wa.

Êtê na Cristuhu âma te te âma ĩsimir'ézé wasu'u

⁴ Ma'ápé, Wanhib'apito u asimirosa'rata na si nherê, 're aihutu aba mono. Ta hã wê nherê, ma tô dasiwi wê'ô ni, êne hã 'ri'wa norĩ te te siwi ĩwê'ô ne. Tane nherê, da te dasiwi wê'ô nherê, 'Re ĩhãimana u'âsi mono ma, wê uptabi di, Wanhib'apito hã. Tãma sawi uptabi di duré.

⁵ Êne ahã nherê, 'ri hã da te dasiwi âma ĩ'ri ne, te za 'Re ĩhãimana u'âsi mono hã te te aima 're nharĩ za'ra wa'wa, ĩsôrôwa na tãma 're aihãimana u'âsi za'ra wa'aba mono da. E marĩ da. ĩsôrôwa âma tãma ĩromhuri'wa norĩ ne, sasedoti norĩ ne, tãma ĩromhuri'wa 're aihãimana za'ra wa'aba mono da, duré aihãiba na tãma 're asôprub za'ra wa'aba mono da. Zezu Cristu wazada ĩdá'ázéb zarina, tãma 're asôprub za'ra wa'aba mono wamhã, Wamama ma wê di, tãma 're ĩ'asôprub za'ra wa'aba mono zé hã.

⁶ Duréihã ĩwana ré 'Re ĩhãimana u'âsi mono, ma tô êtê na Zezu Cristuhu âma simir'é. Âne te tĩnha:

"Êtê tómo wawê hã wa tô pisutu, ĩnhorôwa âma te hiri da, Si'ã na 'ri nho'ômo nhisi âma. 'Ri na'rata wê'ézéb âma wa za tihi, 'ri hã siptete na sab da. Êne hã ĩma wê uptabi di. ĩma sawi uptabi di duré. Taha umnhasi sina 're dahãimana za'ra mono wamhã, ĩwê na za te te dama âma 're a'uwaimrami u'âsi mono wa, dawí 're robzei'ô za'ra mono ô di za."

Âne âma ĩrob'ui'ééré hã, ĩbahã na hã.

⁷ Êtê na ĩsisi hã aima sawi uptabi za'ra wa'aba di, Cristu hã, Danho'reptui'wa na asina 're umnhasi za'ra wa'aba mono wa. Da te dasina 're ĩ'umnhasi za'ra mono ô norĩ âma, ma tô 'ri'wa norĩ âma simir'é, 'Re ĩhãimana u'âsi mono zadawa wasu'u wa hã. Âne te ta norĩ âma rowasu'u:

"Êtê tomhãpê wê hã 'ri na'ratazéb da hã, wê uptabi nherê, wasété newa, 'ri'wa norĩ te te aré siwi ĩwê'ô hã 'ri na'rata uparizéb da, te oto 're sa'wari u'âsi, pire na."

Âne ĩwasu'u na rob'ui'ééré hã.

⁸ Duré êtê tómo wawê wasu'u amo na rob'ui'ééré hã, âne:

"Êne hã te za nasi da'marôpãri za'ra."

Taha na rob'ui'ééré hã, âne. Êne te te nasi da'marôpãri za'ra wamhã, dama 're rowé za'ra mono ô di za. Tane Cristuhu wasu'uwê hã da te 're saze za'ra mono ô wamhã, dama 're rowé za'ra mono ô di za, 'Re ĩhãimana u'âsi mono hã te te siwi 're ĩda'awê'ô mono zéb zarina.

⁹ Tanei ô di, a norĩ wa'wa hã. 'Re ĩhãimana u'âsi mono, ma tô sima aipisutu za'ra wa'wa, ĩsib'a'uwê si oto 're anomro aba mono da. Sasedoti norĩ hã te te sima 're ĩ'apisutu mono ne, te oto a norĩ wa'wa hã uburé Danhib'apito ma romhuri'wa, 're anomro aba mo, ôhõ âma si 're anomro aba mono da, ĩte da. Ta hã robra hawi ma tô rowa'a u sitême asô tihãrã za'ra

wa'wa, 're anomro wasété aba mono zém hawī, rowē uptabi na si 're anomro aba mono da oto. Taha wasu'u na, tiwaihu'u pese na te te aima āma 're īuwaimrami wē za'ra wa'aba mono zém na, ma tō sima aipisutu za'ra wa'wa, āma 're dapo're pu'u u'āsi za'ra wa'aba mono da.

¹⁰ A norī wa'wa hā 'Re īhāimana u'āsi mono nhīb'a'uwē 're anomro aba mono ō di aré. Āhāna te oto īsib'a'uwē tāma 're aihāimana za'ra wa'aba mo. Duré da'āma 're īpē'ézé mono zé hā asina 're waihu'u za'ra wa'aba mono ō di aré. Āhāna ma tō oto asina īwaihu'u za'ra wa'wa, da'āma 're īpē'ézé mono zé hā.

Dahāimana wē zém na rowasu'u

¹¹ Īsisānawā norī, īma asawī pese za'ra wa'aba norī hā, darom nhiti 're īdahāimana za'ra mono ne, te 're aihāimana za'ra wa'aba mo, ti'ab ré. Taha wa, marī wasété na 'rāwi asima 're rosa'rata za'ra wa'aba mono ō di za, asimirosa'rata wasété zarina 're 'manharī za'ra wa'aba mono tō da, aiwasété 'wa hā.

¹² A norī wa'wa hā Wanhib'apito zazei'ō'wa norī wazari, te 're aihāimana za'ra wa'aba mo. Taha wa, te za aihāimana wē na si dama 're aihāimana za'ra wa'aba mo. Tawamhā aihāimana wasété na, taré da te aima 're nharī za'ra wa'aba mono nherē, te za da te 're aiwaihu'u za'ra wa'wa, dama 're aihāimana wē za'ra wa'aba mono zém na. Tawamhā Cristu hā apā wei morī wapsi, te za 'Re īhāimana u'āsi mono āma tawata za'ra ni, īsimiroti zarina aihāimana wē na, dama 're aihāimana za'ra wa'aba mono wa.

¹³ Wanhib'apito nhīb'a'uwē oto 're anomro aba mono wa, uburé dama īpire norī nhimiroti hā te za 're īwapari pese za'ra wa'aba mo. Taha wa, ti'ai āma danhipai u da'madā'ā'wa nhimiroti hā te za duré 're īwapari pese za'ra wa'aba mo.

¹⁴ Duré tāma da'madā'ā'wa da, te te 're īda'apisutu mono norī nhimiroti zama, te za 're īwapari pese za'ra wa'aba mo. Īhāimana wasété norī hā, īsadawa para te te 're hā za'ra mono da, duré īhāimana wē norī āma 're wata za'ra mono da, taha da, ma tō ta norī hā pisutu za'ra.

¹⁵ 'Re īhāimana u'āsi mono hā ma tō sima aiwē za'ra wa'wa, aihāimana wē na dama 're aihāimana za'ra wa'aba mono da. E marī da. Aihāimana wē na dama 're aihāimana za'ra wa'aba mono nherē, taré da te aima 're nharī wasété za'ra wa'aba mono tō da.

¹⁶ Pawa'ābā āna dama romhuri'wa norī ne, robzei'ō na 're aihāimana za'ra wa'aba mono ō di oto, a norī wa'wa hā. Tane nherē, Cristuhu āma rowē na 're anomro aba mono nherē, āne taré 'rāwi asi'āma 're rosa'rata za'ra wa'aba mono ō di za: Īwaséde te 're 'manharī mono nherē, rowē u'āsi wa za 're Īhāimana. Āne taré 'rāwi asi'āma 're rosa'rata za'ra wa'aba mono ō di za. 'Re īhāimana u'āsi mono ma romhuri'wa, 're aihāimana za'ra wa'aba mono wa, te za aihāimana wē na 're aihāimana za'ra wa'aba mo.

¹⁷ Āne wa, te za dahāiba mono bā 're īdahāiba wazéb za'ra wa'aba mo. Uburé asiré Īsazei'wa norī hā te za 're īsawī pese za'ra wa'aba mo. 'Re īhāimana u'āsi mono hā te za duré asima 're īpipa za'ra wa'aba mo, īwaihu'u pese uptabi na. Duré ti'ai āma danhipai u da'madā'ā'wa hā te za asiwi 're īhāiba wazéb za'ra wa'aba mo.

Pawa'ābā ō nherē, romhuri'wa norī hā 're īnomro wē mono zé wasu'u

¹⁸ Aiwada'uri zarina aipawa'ābā āna dama romhuri'wa norī, asib'apito nhimiwada'urizé hā te za 're īwapari pese za'ra wa'aba mo, īsimizawī pese norī mre me hā, duré īsimizawī'ō norī mre me zama.

¹⁹ Taré nherē, da te aima 're rob'manharī za'ra wa'aba mono wamhā, te za 're īrobzépata za'ra wa'aba mo. Āne wamhā, ari'iwī te za 're aihāimana za'ra wa'aba mo, taha da, te te sima 're aiwē za'ra wa'aba mono wa, 'Re īhāimana u'āsi mono hā. Āne zarina te za te te 're aiwēsāmri za'ra wa'wa.

²⁰ Marī hā 're 'manharī wasété za'ra wa'aba mono wa, da te 're aihā za'ra wa'aba mono wamhā, ari'iwī 're aihāimana za'ra wa'aba mono nherē, e te za ai'āma 're dawata za'ra wa'wa. Mare di. Aihāimana wē na dama 're aihāimana za'ra wa'aba mono nherē, da te aima 're rob'manharī za'ra wa'aba mono wamhā, ari'iwī te za 're īsépata za'ra wa'aba mo. Tawamhā, 'Re īhāimana u'āsi mono si te za te te 're aiwēsāmri za'ra wa'wa.

²¹ Cristu hā ma tō robzépata, asada za'ra wa'aba. Ta hā ma tō āne na aima āma asanho za'ra wa'wa, īsirā zarina si ari'iwī 're robzépata za'ra wa'aba mono da. Taha da, ma tō sitēme asō tihārā za'ra wa'wa, 'Re īhāimana u'āsi mono hā.

²² Cristu hā marī na tiwaséde te te 'manharī ō uptabi di. Tō sena na te te dama 're rowasu'u mono wa, sadawa nhipese na da te 're wapari mono ō di, dasiwi.

²³ Da te tāma 're nharī wasété za'ra mono nherē, asa te te dama āma 're nharī wasété mono ō di. Duré da te tāma īrob'manharī wasété mono na te te robzépata mono nherē, te te dama ropipa ō di asa. 'Re īhāimana u'āsi mono ma si, ma tō sisō, taha si dahāimanazéb zarina da'āma rowairébé'wai wa, te te āma dama 're a'upai mono ō wa.

²⁴ Cristu hã wedepo'o nnonhi'rãmi na dâ'â wamhã, ma tô wawasété wa, wawa'âbã za'ra, wawasédê hã wa te oto 're 'manharĩ tô za'ra mono da, wahãimana wê na si oto 're wahãimana za'ra mono da. Ìhãiba na da te tãma Ìrob'manharĩ wasétézém na, ma tô robzépata za'êtê. Taha zarina, a norĩ wa'wa hã rowê na te oto 're aihãimana za'ra wa'aba mo.

²⁵ Rowê na 're aihãimana za'ra wa'aba mono ò di aré, pone'ërebã, bãdãdi nhiti 're Ìsipa za'ra mono ne, 're anomro aba mono wa aré. Æhãna ma tô apã aipizari za'ra wa'wa, Da'madã'ã wê 'wai u, Ìsarina si oto 're anomro aba mono da, rowê na.

3

Damro ré norĩ hãimanazé wasu'u

¹⁻² Pi'ò norĩ, romhuri'wa norĩ hã tinhib'apito mreme te te 're Ìwapari pese za'ra mono ne, te za duré aimro mreme hã 're Ìwapari pese za'ra wa'aba mo. Até aimro za'ra wa'wa hã zahadu te te saze za'ra ò di, 'Re Ìhãimana u'ási mono nhimiroti hã. Tane nherê, tãma 're aihãimana wê za'ra wa'aba mono zéb zarina, te za oto sima wê za'ra, Cristuhu zazei'wa oto 're hãimana za'ra mono da. Te te 're saze za'ra mono da, tãma 're roti za'ra wa'aba mono ò nherê, te za uihã na te te 're saze za'ra. E marĩ wa. Tãma 're aihãimana wê za'ra wa'aba mono wa, duré Ìmreme hã 're wapari pese za'ra wa'aba mono wa.

³⁻⁴ Asima 're asipese za'ra wa'aba mono na si, 're asòpré wa'aba mono ò di za, ai'rãĩ waipo Ìwê na, duré asò'rebzu Ìwê na. Duré ai'uza Ìwê na 're rosa'rata za'ra wa'aba mono ò di za. Asimirosa'rata wê na oto 're Ì'anomro aba mono zéb zô si, te za asima 're asòpré wa'aba mo, duré aiwaimri 're Ì'aihãimana za'ra wa'aba mono zéb zô zama. Æne si tãma wê uptabi di, 'Re Ìhãimana u'ási mono ma hã.

⁵ Æne si ma tô wahi'rata sipi'ò norĩ hã 're nomro, 're Ìhãimana wê za'ra mono norĩ hã. 'Re Ìhãimana u'ási mono si, ma tô ta norĩ hã te te sina 're umnhasi za'ra, te te 're pawapto wê za'ra mono da. 'Re Ìnomro wê mono na, ma tô duré ta norĩ hã sina 're sòpré. Taha wa, ma tô timro mreme si te te 're wapari pese za'ra.

⁶ Æne Sara hã ma tô 're mo. Timro mreme hã ma tô te te 're wapari pese, Abra'ãhã mreme hã. Taha wa, ma tô tinhib'apito na te te 're sisi Sara hã, Abra'ã hã. Tane te za duré a norĩ wa'wa hã aimro ma 're aihãimana wê za'ra wa'aba mo. Asina aihãtã'ã Æna, te za duré 're anomro aba mo. Tawamhã Saraha nhihudu na te za te 're asisi za'ra wa'wa, 'Re Ìhãimana u'ási mono hã.

⁷ Duré aibã norĩ, aimro siré te oto 're aihãimana za'ra wa'aba mo. A norĩ wa'wa hã aibã wa, aihãiba hã siptete za'ra wa'aba di, aimro hãiba za'ra wa'aba ma hã. Æne hã te za asina Ìwaihu'u za'ra wa'wa. Taha wa, te za aimro ma 're aihãimana wê za'ra wa'aba mo. Rowê Ìsi'utõrĩ'ò hã te za 'Re Ìhãimana u'ási mono hã aima sòmri za'ra wa'wa, hãiwa Æma. Aimro norĩ wa'aba ma zama, te za sòmri za'ra. Taha wa, te za aimro ma 're aihãimana wê za'ra wa'aba mo. Tawamhã 'Re Ìhãimana u'ási mono ma, asiré 're aimreme zusi aba mono wamhã, te za te te 're ai'awapari 'wa, Wamama hã.

Ìsazei'wa norĩ, dama 're hãimana wê za'ra mono nherê, te te 're Ìrobzépata za'ra mono zé wasu'u

⁸ Ìmreme na wa za oto aima 'rãsutu za'ra wa'wa. Asimirosa'rata wê na te za aihĩni 're asisazei pese za'ra wa'aba mo. Duré dapê'ézé zarina da te 're robzépata za'ra mono wamhã, te za dasiré aipê hã 're Ìsépata za'ra wa'aba mo, aipê'ézé sina. Duré uburé marĩ wê na dama 're rowê za'ra mono wa, 're dato za'ra mono wamhã, te za dasiré 're ato za'ra wa'aba mo. Te za duré 're asisawi pese za'ra wa'aba mo. Asima aipire na 're aihãimana za'ra wa'aba mono ò di za.

⁹ Duré asada 're dahãimana wasété za'ra wa'aba mono wamhã, asa dama Æma 're wa'rãmi za'ra wa'aba mono ò di za, aihãimana wasété na. Duré dapê'ë na taré da te 're ai'ruiwapari za'ra wa'aba mono wa, da te aima 're nharĩ za'ra wa'aba mono nherê, asa dama Æma 're wa'rãmi za'ra wa'aba mono ò di za, aimreme wasété na hã. Wamama wi si, te za ta norĩ ma 're Ìwaptêrê za'ra wa'aba mo, Ìwê si te te tãma 're sòmri za'ra mono da, ta norĩ ma. Æne da, ma tô Wamama hã sitême asò tihãrà za'ra wa'wa, Ìwê na si aima 're sòprub za'ra wa'aba mono da.

¹⁰ Duréihã Æne na ma tô 'Re Ìhãimana u'ási mono zadawa wasu'u'wa hã dama roti: "Aihãiba ré ré, robzei u'ási 're anomro aba mono da, asima 're wê za'ra wa'aba mono wamhã, aimreme wasété na dama 're nharĩ za'ra wa'aba mono ò di za. Duré dama 're asadawa nhipese za'ra wa'aba mono ò di za.

¹¹ Te za duré aiwasété wi 're aipizari za'ra wa'aba mo, Ìwê si dama 're 'manharĩ za'ra wa'aba mono da oto. Duré rowê na si asiré 're aihãimana za'ra wa'aba mono da si, te za asina 're Ìrosa'rata pese za'ra wa'aba mo.

¹² Hâimana wê na dama 're ihâimana za'ra mono norî si, te za te te 're ab'madâ'â pese, 'Re ihâimana u'âsi mono hâ. Te te duré tiwi 're rowaptêrê za'ra mono wamhâ, te za te te 're awapari, ïmreme zarina te te tâma âma 're a'uwaimrami mono da. Tane nherê, dahâimana wasété na dama 're dahâimana za'ra mono wamhâ, te za dazada 're hâimana."

Âne âma ïrob'ui'éré hâ, ïbaihâ na hâ.

¹³ A norî wa'wa hâ 're anomro wê wa'aba mono da, tô sena asina 're rosa'rata za'ra wa'aba mono wamhâ, e 'wa hâ te za rowasédé hâ te te aima 're 'manharî za'ra wa'wa.

¹⁴ Tane nherê, dama 're aihâimana wê za'ra wa'aba mono nherê, taré da te aima 're rob'manharî wasété za'ra wa'aba mono wamhâ, dama 're aipahi za'ra wa'aba mono ô di za. Asimirosa'rata na 're aihâtâ'â za'ra wa'aba mono ô di za duré.

¹⁵ Cristu hâ Asib'apito aima 're hâimana za'ra wa'aba mono wa, te za aihâimana prédup sina 're iwapari pese za'ra wa'aba mo. Duré Cristu 're ïsaze za'ra wa'aba mono zém na, da te 're asadanharî za'ra wa'aba mono wamhâ, awa'awi te za dama 're asiwasu'u waré za'ra wa'aba mo.

¹⁶ Aiwaimri te za 're asiwasu'u za'ra wa'aba mo, aimreme wasété âna. Aihâimana wê na te za dama 're aihâimana za'ra wa'aba mo, asimirosa'rata wasété na 'râwi 're asiwê'ô za'ra wa'aba mono tô da. Tawamhâ dama 're aihâimana wê za'ra wa'aba mono wamhâ, Cristuhu zazei'wa 're aihâimana za'ra wa'aba mono 'ru te, taré da te aima 're nharî wasété za'ra wa'aba mono nherê, te za damreme niwî 're danhiséb za'ra.

¹⁷ Âté 're aihâimana wê za'ra wa'aba mono 'ru te, te za da te aima 're rob'manharî wasété za'ra wa'wa. Âne zarina, 're robzépata za'ra wa'aba mono wamhâ, te za ïwaihu'u za'ra wa'wa, 'Re ihâimana u'âsi mono te te sima 're aiwê za'ra wa'aba mono zéb zarina, a'â 're ïrobzépata za'ra wa'aba mono na. Âne hâ te te wama 're awê mono ô di, dama 're ïwahâimana wasété za'ra mono zéb da hâ. Dama 're wahâimana wasété za'ra mono wamhâ, âté te za da te 're wahâ za'ra. Âne zarina, wa te 're robzépata za'ra mono wamhâ, ï'uwaibaba wa za tô wa te 're robzépata za'ra.

¹⁸ Misi haré ma tô Cristu hâ dazada dârâ, 're ïdahâimana wasété za'ra mono hawi, te te 're da'anho'reptui mono da. 'Re ïmorî wê uptabi hâ ma tô dârâ, 're ïdanomro wasété mono norî da, te te 're wa'anhimroi mono da, 'Re ihâimana u'âsi mono u. Cristu hâ dâ'â uptabi nherê, ma tô ïmama hâ hâiwa'utu, apâ 're hâimana u'âsi mono da.

¹⁹ Tihâiba na u'âsi, te adâ'â norî u mo, dazazéb 're, 're ïdasimasa mono ne, nimomo 're ïwairébé mono ô norî u. Uburé Danhib'apito uptabi na te te sina po're pu'u za'ra da, te ïtème timorî za'ra.

²⁰ Ta norî hâ Nowé ti'ai âma 're morî ré, te te 're wapari za'ra mono ô di, 'Re ihâimana u'âsi mono nhimiroti hâ. Nowé hâ 'ri ne uba're, te te 'manharî ré, te ta norî hâ po're âna 're nomro. Tane nherê, da'âma wa'a su'u ô wa, te te da'uprosi su'u ô di, 'Re ihâimana u'âsi mono hâ. Te te oto da'uprosi wamhâ, 'ri ne uba're wa, ïsisisi norî si, ma â wi sô'reptu za'ra. Ta norî hâ umro za'ra di. 8 na ihâiba za'ra hâ.

²¹ Ta hâ â hâ, â dawabzuri, te wasu'u, danho'reptuzé. E da'u're wa, da'upsôzé, te â dawabzuri hâ wasu'u. Mare di. 'Re ihâimana u'âsi mono ma, da te dasi'âma 're ïropisutu za'ra mono zé te wasu'u, â dawabzuri hâ. Dawasédé te te dama 're aparî mono wa, 'râwi 're dasiwaihu'u za'ra mono ô di oto, dawasété na hâ. Taha wa, dama 're ïrowé za'ra mono zéb zarina, te za oto dasina da te tâma 're ropisutu za'ra, âma 're ïdanomro mono zéb da hâ. Zezu Cristu hâ dâ'â uptabi nherê, ïmama hâ ab're hawi te te hâiwa'utu wa, apâ 're morî wa, te asô'reptuzé hâ aima tihâimana za'ra wa'wa.

²² Cristu hâ hâiwa u morî wa, te oto pire na Timama nhimire niwî 're sâmra, Danho'reptui'wa hâ. 'Re ihâimana u'âsi mono ma romhuri'wa norî 'madâ'â'wa, te 're hâimana. Uburé hâiwa nho're âma, pire na duré waihu'u pese na 're ihâimana za'ra mono norî ma zama, te pire uptabi na tâma 're hâimana za'ra.

4

'Re ïdanomro mono zép tém na rowasu'u

¹ Cristu hâ ma tô tihâiba na robzépata. Taha wa, te za asina 're asiptete za'ra wa'aba mo, asihâiba zawi âna, ïsine 're ïrobzépata za'ra wa'aba mono zéb da hâ. Âne, da te 're robzépata za'ra mono wamhâ, marî, da te 're ï'manharî wasété za'ra mono zé hâ, te za oto da te 're rême pese za'ra.

² Taha wa, ti'ai âma 're aihâimana za'ra wa'aba mono ré, te za 're aihâimana wê za'ra wa'aba mo, 'Re ihâimana u'âsi mono te te sima 're ïwê mono zéb zarina si. Duré marî na asima 're ïrosa'rata wasété za'ra wa'aba mono zéb zarina, 're aihâimana za'ra wa'aba mono ô di za oto.

³ Wahub ahâ na ma tô ai'âma 're si'utôri' za'ra wa'wa, 'Re İhâimana u'âsi mono nhimiroti waihu'u'ô'wai hâimanazém na, 're aihâimana wasété za'ra wa'aba mono ré. Ma tô asisô 're İrowasutu za'ra wa'aba mo aré. Âzézei'wa te aré 're anomro aba mo. Duré dato İwê'ôre hâ 're 'manharî za'ra wa'aba mono ré, ma tô asina 're asipsaihuri za'ra wa'aba mo aré. Duré âzézei'wa 're aihâimana za'ra wa'aba mono wa, ma tô ai'râ siwamnarî na 're aihâimana za'ra wa'aba mo. Duré 'Re İhâimana u'âsi mono upana, ma tô romhâiba 'manharî âma 're aiwata za'ra wa'aba mo, ta hâ waihu'u pese newa rob'manharî hâ.

⁴ 'Re anomro wasété aba mono zé hâ, tâibâ oto. Taha wa, siwa'ru dasiré 're aihâimana za'ra wa'aba mono ô wa, te ai'âma 're tob'uzu za'ra wa'wa, Wamama nhimiroti waihu'u'ô'wa norî hâ. Taha wa, 're aihâimana wê za'ra wa'aba mono 'ru te, te oto ta norî hâ taré te te aima 're nharî wasété za'ra wa'wa.

⁵ Tane nherê, nimahâ na ta norî hâ 're İhâimana wasété za'ra mono zém na te te İwaihu'u za'ra zéb zarina, te za ta norî ma rowairébé za'ra, 'Re İhâimana u'âsi mono hâ. Ta hâ te te İda'awaihu'uzéb zarina, te za romhutu na uburé norî ma rowairébé, İhâiba ré norî ma, 're İdâ'â za'ra mono norî ma zama.

⁶ Taha wa, dahâimanazém na za te te dama 're arowairébé mono wa, ma tô Wanhib'apito zadawa wasu'u'wa norî hâ Cristuhu wasu'uwê na te te 're dap'o're pu'u za'ra, da te âma 're saze za'ra mono da. Ta norî wapari'wa norî hâ ma tô oto tidâ'â za'ra. Ti'ai'âma 're nomro mono ré, ma tô İwasété na wê'ô za'ra, 'Re İhâimana u'âsi mono hâ, uburé 're İdahâimana za'ra mono norî hâ İwasété na te te 're İ'awê'ô mono ne. Tane nherê, hâiba ré 're nomro mono ré, ma tô Wanhib'apito zadawa wasu'u'wa norî hâ Cristuhu wasu'uwê na po're pu'u za'ra, ta norî hâ rowê İsi'utôri'ô âma 're hâimana u'âsi za'ra mono da, 'Re İhâimana u'âsi mono ne.

'Re dasipawaptob za'ra mono da, dama İrotizé

⁷ Ro İsi'utôri'zéb u hâ, romhuture di oto. Taha wa, te za aihâiba na asina 're asiptete za'ra wa'aba mo. Duré aihâimana nhimiza'rese te za 're aihâimana za'ra wa'aba mo, 'Re İhâimana u'âsi mono ma, 're aimreme zusi u'âsi aba mono da.

⁸ Dazawizé wasu'u si, İpire uptabi hâ. Taha zarina si, 're asisawi pese za'ra wa'aba mono sina, te za 're aihâimana za'ra wa'aba mo. E marî da. Dazawizé hâ aima 're hâimana za'ra wa'aba mono wa, dawasédé hâ da'âma 're 'madâ'â za'ra wa'aba mono tô da, ahâ nherê, da te 're 'manharî za'ra mono nherê, dawasédé hâ.

⁹ Te za duré 're İda'mazasi su'u za'ra wa'aba mo ari'iwî, 're dawata'ê za'ra wa'aba mono âna.

¹⁰ 'Re İhâimana u'âsi mono hâ sôpru wa, ma tô aihâiba mono bâ dama 're İromhuri za'ra wa'aba mono zéb da hâ, aima sômri za'ra wa'wa, sipu'u pese na. Taha zarina si, te za oto dama âma 're İ'uwaimrami za'ra wa'aba mo.

¹¹ Tawamhâ dama 're rowahutu za'ra wa'aba mono wamhâ, duré dama 're roti za'ra wa'aba mono wamhâ, timreme te te aima 're İsômri za'ra wa'aba mono na si, te za dama 're İrowasu'u za'ra wa'aba mo. Duré aihâiba na zama 're dapawaptob za'ra wa'aba mono wamhâ, 'Re İhâimana u'âsi mono, tinhiptede te te aima 're İsômri za'ra wa'aba mono na, te za 're İdapawaptob za'ra wa'aba mo. Âne na hâ te za dama âma 're İ'uwaimrami za'ra wa'aba mo, 'Re İhâimana u'âsi mono âma 're dawata za'ra mono da, Zezu Cristuhu nhîb'a'uwê 're aihâimana za'ra wa'aba mono wa, dama âma 're İ'uwaimrami za'ra wa'aba mono zém na. 'Re İhâimana u'âsi mono hâ wê uptabi wa, duré waihu'u pese uptabi wa, wa za âma 're wawata u'âsi za'ra.

Wanhib'apito zazei'wa norî te te 're İrobzépata za'ra mono zé wasu'u

¹² İsiwadi norî, İma asawi pese za'ra wa'aba norî hâ, âhâna rowasédé hâ da te aima 're 'manharî za'êté za'ra wa'aba mono wa, te a'â 're İrobzépata za'ra wa'aba mo. Tane nherê, 're İrobzépata za'ra wa'aba mono zém na, da te aima 're atob'uzu za'ra wa'aba mono ô di za, te aima 're rob'manharî za'êté za'ra wa'aba mono ô newa.

¹³ Cristu hâ aiwana za'ra wa'aba, ma tô robzépata za'êté. Taha wa, İsine 're robzépata za'ra wa'aba mono wa, te za aipê'ê 're, 're ato za'ra wa'aba mo. E marî wa. Cristu hâ tiwaihu'u pese na apâ wei morî wapsî, za ato za'êne hâ aima 're hâimana za'ra wa'aba mono wa.

¹⁴ Âté Cristuhu âma si 're aihâimana za'ra wa'aba mono 'ru te, te za da te aima 're nharî wasété za'ra wa'wa. Tane nherê, aima 're rowê za'ra wa'aba mono di za. E marî wa. 'Re İhâimana u'âsi mono pê'ézani hâ aipê'ê 're aima 're hâimana za'ra wa'aba mono wa oto, rowê uptabi zé hâ.

¹⁵⁻¹⁶ Cristuhu zazei'wa oto 're anomro aba mono nherê, 're danhimroi wa'aba mono ô di za. Duré marî na dawî 're asipsaihuri za'ra wa'aba mono ô di za. Duré marî na dawî 're ro'wa'rutu za'ra wa'aba mono ô di za. Duré danhimirosa'rada hâ dawî 're 'wa'rutu za'ra wa'aba mono ô di za. Âté nimahâ na dama 're aihâimana wasété za'ra wa'aba mono

wamhã, te za da te aima 're rob'manharĩ waseté za'ra wa'wa. Æne zarina, 're robzépata za'ra wa'aba mono wamhã, Ìuwaibaba te za tã 're Ìrobzépata za'ra wa'aba mono. Tane nherê, Cristuhu zazei'wa 're anomro aba mono 'ru te, 're robzépata za'ra wa'aba mono wamhã, 're aséb za'ra wa'aba mono ò di za. Cristuhu zazei'wa na, da te 're asisi za'ra wa'aba mono wê te, te za 'Re Ìhâimana u'âsi mono âma si 're aiwata za'ra wa'aba mono.

¹⁷ Bádã hã ma tã oto Ìwa waptãrã, 'Re Ìhâimana u'âsi mono hã te te dama Ìarowairébézéb da hã, ta hã dahâimanazém na dawaihu'u'wa 're hâimana mono wa. Taha wa, te za a'ã tinhib'a'uwê norĩ ma arowairébé, 're Ìwahâimana za'ra mono zém na, te te wa'awaihu'u wa. Tawamhã e niha za Ìsazei'õ'wa norĩ ma te te Ìrowairébézéb hã. Wanhib'apito wasu'u'wê na, 'Re Ìhâimana u'âsi mono, we te te dama Ìwaihu hã te te âma saze za'ra ò wa dame, ta norĩ ma, 're rowê za'ra mono ò di za.

¹⁸ Duréihã ãhã wasu'u na ma tã ãne na dama rowasu'u, 'Re Ìhâimana u'âsi mono zadawa wasu'u'wa hã:

“Áté marĩ ahã na te za sada 're hâimana za'ra, 're Ìnomro wê mono norĩ zada hã, tinho'reptuzé hã te te sina 're uwaimrami za'ra mono ò ré. Tawamhã e niha te za tãma 're romhâimana za'ra, 'Re Ìhâimana u'âsi mono wê'õ'wa norĩ ma hã, siwa'ru 're Ìhâimana za'ra mono norĩ ma hã.”

Æne ta norĩ wasu'u na rob'ui'éré hã, Ìbaihã na hã.

¹⁹ Áté wa za a'ã robzépada hã wa te wasina 're 'madã'ã za'ra, 'Re Ìhâimana u'âsi mono te te wama 're Ìawê mono zéb zarina. Tane nherê, 'Re Ìhâimana u'âsi mono, wa'apoto mono 'wai umnhasi sina, wa za dama 're wahâimana wê za'ra, ta hã tinhimiropisutu wê na za te te wama âma 're a'uwaimrami u'âsi mono wa.

5

Wanhib'apito zazei'wa 'madã'ã'wa norĩ ma rowasu'u

¹ Da'madã'ã'wa norĩ, ãhãna wa za aima Ìsiwasu'u za'ra wa'wa. Wa hã da'madã'ã'wa, wa duré 're Ìhâimana. Cristu hã te te robzépata wamhã, wa tã Ìtãmo na 'madã, te te Ìrobzépatazé hã. Wa hã wa za duré Ìsazei'wa norĩ siré, rowê uptabi hã Ìsina waihu'u hãiwa âma, rowê uptabi hã sã'awi te te wama pisutu za'ra wapsi, Wanhib'apito hã.

² Taha wa, wa za aima waihu'u za'ra wa'wa, 'Re Ìhâimana u'âsi mono hã tinhib'a'uwê te te aima 're Ìpisutu za'ra wa'aba mono hã ato sina tãma 're pawaptob za'ra wa'aba mono da, tãma 're aiwa'a za'ra wa'aba mono ãna. Æne da, ma tã sima aiwê za'ra wa'wa, Wamama hã. Rob'ui'prazéb zã tãma 're dapawaptob za'ra wa'aba mono ò di za. Tã sena asima 're Ìwê uptabi za'ra wa'aba mono zéb zarina si, te za tãma 're Ìdapawaptob za'ra wa'aba mono.

³ Asimi'madã'ã za'ra wa'wa hã tãma 're 'madã'ã pese za'ra wa'aba mono da, ma tã aipisutu za'ra wa'wa, 'Re Ìhâimana u'âsi mono hã. Taha wa, a norĩ wa'wa hã dama aipire wê te, 're dawada'uri za'ra wa'aba mono ò di za. Asimipawapto wê na te za tãma âma 're asanho wê za'ra wa'aba mono, asimi'madã'ã za'ra wa'aba mono hã.

⁴ Tawamhã Da'madã'ã'wai uptabi hã apã wei morĩ wapsi, tãma 're Ìdapawapto wê za'ra wa'aba mono zé wa'rãmi, te za oto aima wa'ãbã za'ra wa'wa, Ìwê uptabi na, Ìsi'utõrĩ'õ na oto aima 're hâimana u'âsi za'ra wa'aba mono da.

⁵ Ìpréduptém norĩ, Ìprédum norĩ mreme si te za 're Ìwapari pese za'ra wa'aba mono. Ìsazei'wa norĩ, aihĩni te za romhuri na 're asipawaptob za'ra wa'aba mono, aipire na 're asi'madã'ã za'ra wa'aba mono ãna. Duréihã ãne na ma tã rob'ui'éré, 'Re Ìhâimana u'âsi mono zadawa wasu'u'wa hã:

“Dapire na 'rãwi 're Ìdasi'madã'ã za'ra mono norĩ da si, te za 're hâimana, 'Re Ìhâimana u'âsi mono hã. Dapire na 'rãwi da te dasi'ãma 're Ìrosa'rata za'ra mono ò norĩ si, te za te te 're apawaptob u'âsi.”

Æne âma rob'ui'éré hã, Ìbaihã na hã.

⁶ Æhã wa, te za Wamama ma 'rãwi aiwapu na 're asi'madã'ã za'ra wa'aba mono, taha si waihu'u pese uptabi na 're hâimana mono wa. Æne wamhã, bádã te te ai'ãma sima Ìpisutuzém na, te za ai'ãma uwaimrami za'ra wa'wa, aipire na oto dama 're aihâimana za'ra wa'aba mono zéb da hã.

⁷ 'Re Ìhâimana u'âsi mono hã te te 're ai'madã'ã wê za'ra wa'wa. Taha wa, marĩ na 're aihãtã'ã za'ra wa'aba mono wamhã, te za tãma 're asiwasu'u za'ra wa'aba mono, marĩ na 're Ìaihãtã'ã za'ra wa'aba mono zéb zarina. Taha parimhã, âma 're rosa'rata za'ra wa'aba mono ò di za oto, marĩ na 're Ìaihãtã'ã za'ra wa'aba mono ãna hã.

⁸ Ma'ãpé, aihâimana nhimiza'rese sina 're aihâimana za'ra wa'aba mono. Duré 're asi'madã'ã pese za'ra wa'aba mono. E marĩ wa. Da'rui'wa hã datême 're morĩ wa, wa'uburé norĩ nhib'apito hã. Hu'u zéré pa hã wairõ sina, tisa zã 're Ìnomro mono ne, te datême 're morĩ

u'â, Wanhîb'apito si da te dasina 're ĩ'madâ'â u'âsi za'ra mono zé hã te te dawî 're a'uprosi mono da.

⁹ Asiré Wanhîb'apito zazei'wa norĩ hã daro mono bâ 're hâimana za'ra mono 'ru te, da te tãma 're ĩrob'manharĩ za'ra mono zém na, te a'â te te 're robzépata za'ra, asine za'ra wa'aba. Ā norĩ wasu'u hã ma tō ĩwaihu'u za'ra wa'wa. Taha wa, Wanhîb'apito umnhasi sina te za 're aihâimana za'ra wa'aba mo, da'ru'i'wai wi asina 're asiptete u'âsi za'ra wa'aba mono sina.

¹⁰ Tane nherē, 're robzépata hã za'ra wa'aba mono ô ré, rowēzé hã te za te te aima āma 're a'uwaimrami 'wa, 'Re ĩhâimana u'âsi mono hã. Taha si te za te te 're asiptete u'âsi za'ra wa'wa, tiwaihu'u pese na, asiptete u'âsi āma 're aihâimana za'ra wa'aba mono da. Ōhō ma si te ĩsimizawizé hã sa'ētē na tãma 're hâimana. Taha wa, ma tō sitēme asō tihârâ za'ra wa'wa, rowē ĩsi'utōrĩ'ō āma ĩsiré 're aihâimana u'âsi za'ra wa'aba mono da, Cristuhu nhîb'a'uwē oto 're anomro aba mono wa.

¹¹ 'Re ĩhâimana u'âsi mono hã danhipai u dama pire uptabi na 're hâimana mono wa, wa za taha āma si 're wawata u'âsi za'ra.

Pedru te te ĩdazawizé wasu'u

¹² Sira hã ma tō ĩpawapto, aima ĩnhimiroti syry za'ra wa'aba nherē, te te aima rob'ui'éré za'ra wa'aba da. Ta hã ĩsisānawā ne, te ĩma 're hâimana. Taha wa, ĩma umnhasi di. Wa hã wa tō ĩsima aiwē za'ra wa'wa, ĩnhimiroti na te aipawapto za'ra wa'aba da, Wanhîb'apito āma si asiptete sina 're anomro aba mono da, 'Re ĩhâimana u'âsi mono nhîpawaptozbé hã asî'uihã na asina 're waihu'u za'ra wa'aba mono da. Taha wasu'u na si, wa tō te aima 're rowasu'u za'ra wa'wa, tō sena wa. Taha wa, te te 're aipawapto wē za'ra wa'aba mono wa, te za asiptete sina āma 're anomro aba mo.

¹³ Wanhîb'apito zazei'wa norĩ hã, Babironiza na 'ri nho'ōmo nhisi āma 're ĩhâimana za'ra mono norĩ hã, ma tō Wamama hã sima pisutu za'ra, ĩsib'a'uwē oto 're hâimana za'ra mono da. Ta norĩ zama ma tō timreme na āma asawi za'ra wa'wa. ĩ'ra na te 're ĩsisi mono zama, ma tō duré timreme na āma asawi za'ra wa'wa, Marcusi hã.

¹⁴ Tame te za uburé asiré ĩsazei'wa 're aihâimana za'ra wa'aba mono wa, asō'utu na asisawi sina 're asitob'rata hârâ za'ra wa'aba mo.

Cristuhu nhîb'a'uwē norĩ, rowē na āma 're aihâimana za'ra wa'aba mono da si, wa aima za'ra wa'aba te tiwî 're rowaptērē u'âsi, Wamama wi.

2 Pedru Pedru hã, maparane ãma te te duré ĩrob'ui'érézé, ĩsazei'wa norĩ ma Ībaihã wasu'uzé

Ā ĩbaihã na Pedru hã ma tō duré rob'ui'éré, Zezusihi zazei'wa norĩ ma, senai'ō na rowasu'u'wa norĩ hã dawazari 're ĩhãimana za'ra mono norĩ mreme hã te te 're wapari za'ra mono tō da. Ta norĩ hã sadawa nhipese na ma tō te te 're rowasu'u za'ra, Zezusi hã za apă we ĩmorĩ ō na hã. Taha wa, ma tō Pedru hã tãma waihu'u za'ra, 'Re ĩhãimana u'ási mono hã da'ãma 're ĩwa'a su'u mono ō zém na hã. Ta hã ma tō te te sima 're da'awē, ĩ'ra hã da te dasina 're umnhasi za'ra mono da, uburé. Senai'ō na rowasu'u'wa norĩ hã wasété uptabi na te 're hãimana za'ra. Taha na ma tō sitême te te 're dapizari za'ra. Taha wa, Pedru hã ma tō ãma tãma rob'ui'éré za'ra, nimahã bātã na 'Re ĩhãimana u'ási mono hã ta norĩ hã za te te ĩhã za'ra zém na hã, duré ĩsine 're ĩdahãimana za'ra mono norĩ zama.

¹ Wa hã Sima Pedru, Zezu Cristuhu ma romhuri'wa, duré ĩsadawa wasu'u'wa, wa ãma aima rob'ui'éré za'ra wa'wa, wasiré ĩsazei'wa 're ĩanomro aba mono norĩ ma. Wanhĩb'apito 'Re ĩhãimana u'ási mono hã wē uptabi di. Wa'anho'reptui'wa Zezu Cristuhu zama wē uptabi di. Wē uptabi zahuré wa, ma tō te te 're aipawaptob za'ra wa'wa, wasine asina 're umnhasi za'ra wa'aba mono da, te te 're asō'reptu za'ra wa'aba mono da.

² 'Re ĩhãimana u'ási mono hã, duré Wanhĩb'apito Zezusi hã, aima waihu'u pese za'ra wa'aba di. Āne wa, wa ai'ãma tãma 're ĩmreme u'ási za'ra wa'wa, ĩsimizawizé hã ai'ãma 're hãimana u'ási za'ra wa'aba mono da, duré rowē u'ási, ãma 're anomro u'ási aba mono da.

³ 'Re ĩhãimana u'ási mono hã ma tō tiwaihu'u pese na uburé marĩ ĩwē na wama 're sōpru, wap'ē'ē 're, ĩsine wawē uptabi na ãma 're ĩwahãimana za'ra mono zéb da hã, duré ĩsine wa te dama 're ĩmanharĩ wē za'ra mono zéb da zama.

⁴ Āne zarina, te te wama 're ĩ'aropisutu mono zéb zarina, ma tō marĩ ĩwē hã wap'ē'ē 're, te te wama 're anhomri, sa'ētē na. Wama wē uptabi di, wama 're ĩsōprub za'ra mono zé hã. E marĩ da, ma tō wama 're sōprub za'ra. ĩsine wahãimana wē na oto ãma 're wahãimana za'ra mono da. Āne wamhã, ĩsazei'ō'wa norĩ ne, wawasété zō 're wasiwasutu u'ási za'ra mono ō di za, wawasété na 're wahãimana za'ra mono da.

⁵⁻⁷ Āne wa, ĩsazei'wa 're aihãimana za'ra wa'aba mono wa, te za sada 're asiptete za'ra wa'aba mo, aiwē uptabi na si ãma 're aihãimana za'ra wa'aba mono da oto. Duré Wanhĩb'apito nhimiroti hã te za 're ĩwaihu'u pese za'ra wa'aba mo. Duré aiwasété wi, te za asina 're asiptete za'ra wa'aba mo. Duré ro'wa'rudu hã ai'ãma 're hãimana za'ra wa'aba mono nherē, te za ōne haré Wanhĩb'apito ãma si 're aihãimana za'ra wa'aba mo. Te za duré 'Re ĩhãimana u'ási mono nhimiroti na si, 're aihãimana wē za'ra wa'aba mo. Duré, asisãnawã norĩ hã 're ĩsawi pese za'ra wa'aba mono ne, te za asiré ĩsazei'wa norĩ hã 're ĩsawi pese za'ra wa'aba mo. Te za uburé 're ĩdazawi pese za'ra wa'aba mo duré.

⁸ Āhã zarina si 're aihãimana za'ra wa'aba mono wamhã, te za aihãimana wē hã asima 're ĩsa'ētē za'ra wa'aba mo. Āne wamhã, Wanhĩb'apito Zezu Cristuhu nhimiroti hã taré waihu'u za'ra wa'aba ō di za. Te za tō marĩ ĩwē na ãma 're ĩ'uwaimrami u'ási za'ra wa'aba mo.

⁹ Tane nherē, ãne 're aihãimana za'ra wa'aba mono ō wamhã, datob'a na 're ĩdanomro mono ne, te za 're anomro aba mo, duré syru na da te 're ĩrob'madã'ã za'ra mono ne. E marĩ wa. 'Re ĩhãimana u'ási mono hã 're ĩmanharĩ wasété za'ra wa'aba mono zé hã, te te aima 're pari za'ra wa'aba mono nherē, ãma 're aipo're si'ãri za'ra wa'aba mono wa, te za datob'a na 're ĩdanomro mono ne, 're anomro aba mo.

¹⁰ ĩsisãnawã norĩ, tō sena ma tō 'Re ĩhãimana u'ási mono hã aipisutu za'ra wa'wa, ĩsib'a'uwē 're anomro aba mono da. Āne wa, te za sada 're asiptete za'ra wa'aba mo, ãma 're aihãimana wē za'ra wa'aba mono da, 'rãwi ĩsib'a'uwē na asina 're waihu'u za'ra wa'aba mono da. Āne wamhã, Wanhĩb'apito hã rēme za'ra wa'aba ō di za. Duré aiwasété u 're aipizari za'ra wa'aba mono ō di za oto.

¹¹ Taha zarina, te za 'Re ĩhãimana u'ási mono hã to sina te te 're ai'a'mazasi 'wa hãiwa u, Wanho'reptui'wai u, Wanhĩb'apito Zezu Cristuhu u, Danhib'apito uptabi na dama 're ĩhãimana u'ási mono u.

¹² Āhã wasu'u hã aima waihu'u pese za'ra wa'aba nherē, duré asiptete sina ãma 're aihãimana za'ra wa'aba mono nherē, wa za te ãma 're aipo're pu'u u'ási za'ra wa'wa, aiwi simani za'ra wa'aba tō da, ĩwasu'u hã.

13-14 Īma wē di tō, Īhâiba ré 're Īhâimana mono ré hâ, âhâ wasu'u na, te âma 're aipo're pu'u u'âsi za'ra wa'aba mono da hâ, Īdâ'âzéb u'romhuture na, te Īsina waihu'u wa, Wanhîb'apito Zezu Cristu te te Īma Īwaihu'u sîrômo zéb zarina.

15 Taha wa, Īma Īwaihu'u pese na si, wa za te 're aipawapto' za'ra wa'wa, uburé te aima âma Īrob'ui'ééré za'ra wa'wa hâ, aiwi simani za'ra wa'aba tō da, Īuîrî na hâ.

Wanhîb'apito hâ rowa'a za'êtê ré, sab ré, te te siwi Īmadâ'â na rowasu'u

16 Wa norî hâ wa tō Wanhîb'apito hâ wa te aima 're wasu'u za'ra wa'wa, Īwaihu'u pese uptabi na, duré za apâ we Īmorî na zama. E tawamhâ taré danhimirosa'rata nhîpese zarina, wa tō Wanhîb'apito wasu'uwê hâ wa te aima 're wasu'u za'ra wa'wa. Mare di. Wa norî hâ Wanhîb'apito Zezu Cristu hâ rowa'a za'êtê ré, sab ré, wa tō watômo na 'madâ'â za'ra ni.

17-18 Īrata wa tō aimasam ni, Īmama hâ âma wata wamhâ, 'Re Īhâimana u'âsi mono hâ. Hâiwa hawi te we tâma tinha, rowê uptabi hawi, âne: "Â hâ Ī'ra, te 're Īsawi pese mono, tâma 're Īto za'êtê mono." Âne te we tâma tinha. Wa norî hâ wa tō âne wapari za'ra ni, 'Re Īhâimana u'âsi mono hâ hâiwa hawi te te tâma Īnharî na, êtê 'râihâ Īwê uptabi âma, Wanhîb'apito Zezusihî 'rata wasimasab ré.

19 Marî, wa te Īsabu za'ra zéb zarina, wa tō waihu'u za'ra ni, tō sena na Danho'reptui'wa na 'Re Īhâimana u'âsi mono zadawa wasu'u 'rata 'wa norî te te dama 're Īrowasu'u za'ra mono zém na hâ. Awê u te za wasi wawê hâ 're pusi, dama rowa'a'wa da, damorî wê da. Tane wapawapto'wa da, te wama 're hâimana, Īsadawa wasu'u 'rata 'wa norî nhimirowasu'u hâ, âma 're Īwanomro wê mono zéb da hâ. Âne wamhâ, te za âma 're Īrosa'rata u'âsi za'ra wa'aba mo.

20-21 'Re Īhâimana u'âsi mono zadawa wasu'u 'rata 'wa norî nhimirowasu'u na rob'ui'ééré hâ, marî te te Īwasu'uzé hâ, ni'wa hâ si'uihâ na te te waihu'u ô di, te te dama 're Īwaihu'u mono da hâ. E marî wa. Ta norî hâ, si'uihâ na te te dama 're rowasu'u za'ra mono ô wa. 'Re Īhâimana u'âsi mono si, ma tō Tipê'êzani na te te tâma 're awaihu'u, te te dama 're wasu'u za'ra mono da. Tane, wa norî zama Īsadawa wasu'u'wa norî nhimirowasu'u hâ, wasi'uihâ na wa te 're waihu'u za'ra mono ô di, marî te te Īwasu'uzé hâ wa te dama 're Īwaihu'u za'ra mono da hâ. Taha wasu'u hâ pire wa, ma'âpê âma 're rosa'rata pese za'ra wa'aba mono, waihu'u za'ra wa'aba da.

2

*Senai'ô na rowasu'u'wa norî na rowasu'u
Zudasi 3-16*

1 Durêihâ ma tō ni'wam norî hâ wahi'rata norî wazari 're hâimana za'ra, 'Re Īhâimana u'âsi mono zadawa wasu'u'wa newa. Tane, tō senai'ô na rowasu'u'wa norî hâ, te za duré aiwazari 're hâimana za'ra wa'wa. Ta norî nhimirowasu'u hâ tō sena newa, da te âma 're saze za'ra mono wamhâ, te za dahâimana wê zé hâ dawî 're si'utōrî za'ra. Wanhîb'apito hâ tidâ'âzém na te te 're wa'âbâ za'ra mono nherê, te za 're simrami za'ra, tinhib'apito zô, tō senai'ô na rowasu'u'wa norî hâ. Taha wa, te za 'Re Īhâimana u'âsi mono hâ te te 're ahâ za'ra, 're dâ'â za'ra mono da.

2 Ta norî hâ imanazéb zarina, te za da'ahâ na da te âma 're sasômrî za'ra, dahâimana nhîséb'ô na, Wanhîb'apito zazei'wa na dama 're siwasu'u za'ra mono nherê. Taha wa, te za da'ahâ na Wanhîb'apito nhimiroti ma, da te 're nharî wasété za'ra, taré.

3 Tō senai'ô na rowasu'u'wa norî hâ te za taré rob'ui'prazéb zô, tinhimirosa'rata na si, marî na te te aima 're rowasu'u za'ra wa'wa. Tane nherê, ta norî hâ Īwasété na 'Re Īhâimana u'âsi mono ma, waihu'u pese di. Taha wa, Īsimihâzê wi, sisô'reptu waihu'u za'ra ô di za.

4 Tane, hâiwa âma 'Re Īhâimana u'âsi mono ma romhuri'wa norî hâ, durêihâ tiwasédé te te 're 'manharî za'ra mono wamhâ, tinhimihâzê hâ te te tâma ba'a za'ra ô di, 'Re Īhâimana u'âsi mono hâ. Ropipa u ma tō sisiti satōrî za'ra, tame 're simasa mono da, pawasisi ré robra âma. Tame te za ta norî hâ 're simasa, bâdâ Īwa Īwaptâ'âzéb u, dahâimanazém na te te Īda'awaihu'uzéb zarina te te dama Ī'arowairébézéb u hâ. Tawapsi te za ta norî hâ hâ za'ra.

5 Durêi uptabi hâ 'Re Īhâimana u'âsi mono hâ tinhimihâzê hâ te te dama ba'a ô di, ti'ai âma 're Īdahâimana za'ra mono norî ma. Â ma, ma tō tinha, â pusi mono da, â na te te da'uprosi da, 're dahâimana wasété za'ra mono wa. Nowé norî si ma tō sô'reptu za'ra, 7 na Īhâiba za'ra norî me. Nowé hâ te te aré dama 're roti u'âsi, 're dahâimana wê za'ra mono da, 'Re Īhâimana u'âsi mono nhimiroti na.

6 Duré, dahâimana wasété wa, ma tō 'Re Īhâimana u'âsi mono hâ siwi da'awê'ô, Sodoma na 'ri nho'ômo nhîsi âma, duré Domora na 'ri nho'ômo nhîsi âma zama. Unhama ro'o na ma tō da'uprosi, da te âma waihu'u za'ra da, dawasété na si 're dahâimana za'ra mono wa, aiwa za te te 're Īda'ahâ za'ra mono na.

⁷ Roho si 're mori wē wa, ma tō sō'reptu, 'Re ihāimana u'āsi mono hā. Dahāimana nhiséb'ō na, 're dahāimana za'ra mono wa, ma tō tipē'ē na aré te te 're robzépata, Ro hā.

⁸ Da'rata 're hāimana mono ré, awē sidápāsi dawasété na te te 're da'awaihu'u mono wa, duré damreme wasédé hā te te 're awapari mono wa, pē'ēzé ahā uptabi di, Ro hā.

⁹ 'Re ihāimana u'āsi mono ma, waihu'u pese di, Ro hā te te 're īsō'reptuzéb da hā. Tane duré, Wanhib'apito ma waihu'u pese di, ro'wa'rutu hawi te te 're l'anho'reptui mono zéb da hā, īsimiroti 'madā'a pese 'wa nori hā. Duré tāma waihu'u pese di, te te 're īda'ahā za'ra mono zéb da hā, 're īdanomro wasété mono nori hā, bādā īwa īwaptā'āzéb u hā, dahāimanazém na te te īda'awaihu'uzéb da hā. Tawapsi te za dahāimanazéb zarina te te dama 're arowairébé, rob'rāsutuzéb āma.

¹⁰ Dahāimana nhiséb'ō na 're dahāimana za'ra mono wamhā, duré īsimiroti hā da te dasiwi 're wē'ō za'ra mono wamhā, te za sa'ētē na da te 're robzépata za'ra, 'Re ihāimana u'āsi mono nhimihāzéb zarina.

Senai'ō na rowasu'u'wa nori hā, te simipari āna 're hāimana za'ra. Ta nori hā hāiwa āma romhuri'wa nori hā te te 're wazéb za'ra mono ō di. Timreme na te te āma 're wasété u'āsi za'ra, sina pahi za'ra āna.

¹¹ Hāiwa āma 'Re ihāimana u'āsi mono ma romhuri'wa nori hā, senai'ō na rowasu'u'wa nori ma, siptete za'ra di. Duré tāma waihu'u pese za'ra di. Tane nherē, Wanhib'apito nho'a 're hāimana za'ra mono wa, senai'ō na rowasu'u'wa nori āma, 're mreime wasété za'ra mono ō di, asa.

¹²⁻¹³ Tanei'ō di, aibā nori hā senai'ō na rowasu'u'wa nori hā. Roti hā uburé tāma waihu'u za'ra ō wamhā, te roti ma te te 're nharī wasété za'ra, wē nherē, roti hā. Ta nori hā abaze ne, te rosa'rata āna 're hāimana za'ra, simiza'rese āna. Taha zarina, abaze hā da te 're simroi mono wa, 're īre're'e mono ne, te za ta nori hā 'Re ihāimana u'āsi mono hā te te 're hā za'ra, 're ihāimana wasété za'ra mono zé wa'rāmi.

Ta nori hā te marī hā te te sima 're wē ahā za'ra. Siséb āna, te rowa'a na te te 're rob'manharī wasété za'ra. Taha wa, ta nori wazari, 're asaihuri aba mono wa, te ai'āma 're mreime wasété za'ra wa'wa, īsazei'ō'wa nori hā.

¹⁴ Senai'ō na rowasu'u'wa nori hā te pi'ō īwasété nori zō te te 're rob'madā'a u'āsi za'ra. Ta nori ma hā wē za'ra di, tiwasédé hā te te āma 're ī'manharī u'āsi za'ra mono zéb da hā. Hāimana nhipse na te ta nori hā 're nomro, da te āma 're sasōmri za'ra mono da. Tawamhā n'wam nori hā siptete sina Wanhib'apito āma 're nomro mono ō wamhā, te za ta nori āma te te 're sasōmri za'ra. Duré senai'ō na rowasu'u'wa nori hā te tinhimari wē zō si, te te sima 're rob'ruiwapari u'āsi za'ra. Taha wa, ta nori hā tāma wē ō di, 'Re ihāimana u'āsi mono ma hā.

¹⁵ Ta nori hā ma tō 're īdanomro wē mono zé hā rēme za'ra, Bara'ā hā 're īmorizéb zarina, oto 're nomro mono da. Bara'ā hā Be'oho 'ra. Duréihā ma tō Bara'ā hā sima wē, rob'uiprazé hā da te tāma sōmri da, īsimiromhuri wasété wa'rāmi.

¹⁶ Tawamhā 'Re ihāimana u'āsi mono zadawa para, ma tō īsimizama hā awaru po'repore hā, a'uwē mreime na tāma tinha, simiza'rese āna 're mori tō da. Āne na ma tō tiwi sizā, za te te ī'manharī wasété zé hā.

¹⁷ Senai'ō na rowasu'u'wa nori hā, tinhimirowasu'u na te te āma 're dapawaptob za'ra mono ō wa, wa za oto marī na aima āma romnhimire'é za'ra wa'wa. Ta nori hā sipti hā 're ī'ā'ré mono ne, te 're hāimana za'ra. Duré hāiwa nhirōno hā rowa'u hā nimomo te te 're sate mono wa, tā hā ihawi we 're ita'a mono ō ne, te 're hāimana za'ra. 'Re ihāimana u'āsi mono hā ma tō ta nori hā pisutu sirōmo za'ra, robra si 're isa'wari mono zéb āma, īwa 're hāimana u'āsi za'ra mono da.

¹⁸ Ta nori hā simiroti pire newa, 'rāwi sina 're wata za'ra mono sina, te za te te dama 're rowasu'u' za'ra, da te dasima 're iwē za'ra mono zéb uwaiwaba, 're dahāimana wasété za'ra mono da, dama 're īrowē za'ra mono zéb da newa. Āne wamhā, nimosi īsazei'ō'wa nori hāimana wasétézém hawi 're īdasipizari za'ra mono nori hā, te za oto te te āma 're sasōmri za'ra, senai'ō na rowasu'u'wa nori āma hā.

¹⁹ Dasi'uihā na dahāimanazém na 're dahāimana wasété za'ra mono nherē, rowē na si za 're īdanomro mono na, te ta nori hā te te dama 're rowasu'u' za'ra, taré. Tane nherē, rowē na si 're nomro mono ō di, ta nori hā, tihāimana wasété hawi īwairébézéb da hā, tāma waihu'u za'ra ō wa. Marī hā da te 're sei hōsi za'ra mono wamhā, dasi'uihā na da te 're rēme waihu'u za'ra mono ō di za. Tane, senai'ō na rowasu'u'wa nori hā si'uihā na tiwasédé hā te te sahāri waihu'u za'ra ō di.

²⁰ Āté ta nori hā Danho'reptui'wa na ma tō Wanhib'apito Zezu Cristu hā te te 're waihu'u za'ra. Taha zarina ma tō īsazei'ō'wa hāimana wasétézém hawi 're sipizari za'ra. Tane nherē, apā dasiré 're hāimana wasété za'ra mono wamhā, e niha za tawamhā, 're ihāimana za'ra

mono zé hã. Wanhîb'apito hã te te 're saze za'ra mono ò ré, rowê'ô na 're îhâimana za'ra mono zém nhîpai u hã, tâma 're rowê'ô uptabi za'ra mono di za oto.

²¹ Ta norî hã hâimana wê na 're hâimana za'ra mono da, te te sina 're waihu'u za'ra mono ò ré, ma tô robzei'ô na 're hâimana za'ra. Tazahã, dahâimana wê zé hã te te oto siwi 're wê'ô pese za'ra mono wa, te oto robzei'ô uptabi na 're hâimana za'ra.

²² Ta norî hã apâ tiwasété u 're sipizari za'ra mono wa, ma tô te te sina âma 're uwaimrami za'ra, dahâimanazém na tô sena na da te dasima 're înhari za'ra mono zé hã, âne: "Wapsã hã te za apâ mo, tinho'o'ô zô, te te 'rêne da. Duré uhâbã hã da te 're upsô za'ra mono nherê, te za apâ 're si'uptob za'ra, ti'ai wai'o na."

3

Wanhîb'apito Zezu Cristu hã za apâ we îmorîzé wasu'u

¹ Îsiwadi norî, îma asawi pese za'ra wa'aba norî hã, wa za duré rob'ui'ére na âma aima sisiwi za'ra wa'wa, maparane te aima îrob'ui'ére za'ra wa'aba zéb zarina, rosa'rata wê na 're aihâimana za'ra wa'aba mono da.

² Wa tô îsima wê, durêihã 'Re îhâimana u'âsi mono zadawa wasu'u 'rata 'wa norî nhimiroti na, te âma aipo're pu'u za'ra wa'aba da. Wa tô duré îsima wê, Wanhîb'apito nhimiroti na zama, te âma aipo're pu'u za'ra wa'aba da, Wanho'reptui'wa nhimiroti na hã, wasiré îsadawa wasu'u'wa norî hã wa te aima âma 're îrowasu'u za'ra wa'aba mono zém na hã.

³⁻⁴ Marî îpire na, wa za oto aima rowasu'u za'ra wa'wa, waihu'u za'ra wa'aba da. Rob'râsutu u hã romhuture wamhã, te za ni'wam norî hã âne 're hâimana za'ra. Marî îwasété zô si te za te te 're rowasutu za'ra. Âne te za te te aima 're nhari za'ra wa'wa: "Oro apâ wei morî su'u 'ruza, Zezu Cristu hã. Ropoto na'rata hawimhã, tô ôhõ u'â romhâimanazé hã. Apâ wei morî ò ré, ma tô wamama norî hã wawi 're dâ'â za'ra." Âne te za te te aima 're nhari za'ra wa'wa.

⁵⁻⁶ Ta norî hã te te 're 'madâ'â za'ra mono ò di, duréi pese timreme na hã hâiwa te te îpoto na, ti'a te te îpoto na zama, 'Re îhâimana u'âsi mono hã. Ta hã ma tô â na âma aiwanhiza, â hã ti'a hã te te 're uirî mono da oto. Duré âma ronomro pari, ma tô â pusi. Ma tô tâ si nomro. Ma tô uburé marî hã ti'ai âma hã uprosi, â na.

⁷ Duré 'Re îhâimana u'âsi mono mreme zarina, hâiwa norî hã ti'ai me te za a'â 're hâimana zahuré. Bâdã îwa îwaptã'âzéb u, te za dahâimanazéb zarina dama arowairébé, 'Re îhâimana u'âsi mono hã. Tawamhã te za da'uprosi, 're îdahâimana wasété za'ra mono norî hã. Duré unhamar'o'ô na te za oto hâiwa norî hã uprosi zahuré, ti'ai me.

⁸ Îsiwadi norî, îma asawi pese za'ra wa'aba norî hã, Wanhîb'apito hã zahadu apâ wei morî ò nherê, ma'âpé marî na âma 're rosa'rata pese za'ra wa'aba mono, aiwi 're simani tô za'ra wa'aba mono da. Bâdã hã wa te 're îsa'rata za'ra mono nei ò di, Wamama nhimiza'ratazé hã. Bâdã misi nherê, tâma hã wahub ahã ne. Duré miu na wahum nherê, tâma hã misi bâtã na.

⁹ Wanhîb'apito hã wa'â ò di, îwê na te te dama îropisutuzém na, te te dama âma 're î'uwaimrami za'ra mono da hã. Ai'âma wa'â su'u za'ra wa'aba ò di, te te î'aihã za'ra wa'aba da hã. E marî wa. Te te îda'uprosi da hã tâma wê ò di. Uburé dawasété wi 're îdasipizari za'ra mono da si, tâma îwê hã, îsimiroti zarina 're danomro wê mono da si.

¹⁰ Wa za oto aima âma romnhimîré'ê za'ra wa'wa, waihu'u za'ra wa'aba da. Îsipsaihuri hã sô îdanhimipari ò zém na si, te za âzé, 'ri para u hã. Tane, Wanhîb'apito zô 're îdanhimipari za'ra mono ò zém na si, te za wei mo apâ. Âne wamhã, hâiwa te za ai'utõ. Rãrã'ã za'eté uptabi di za. Uburé marî hã hâiwa na 're îsimasa mono hã te za ai'uzã. Danhipti'ai mono bâ, marî hã 're îhâimana za'ra mono hã te za si'utõri.

¹¹ Tawamhã, uburé marî hã îsi'utõrîzém na hã aima waihu'u pese za'ra wa'aba wa, e niha te za tawamhã 're aihâimana za'ra wa'aba mo. Te za aiwê uptabi na 're aihâimana za'ra wa'aba mo, 'Re îhâimana u'âsi mono nhimiroti zarina si.

¹² Te za duré asimî'ê na sô 're asimipari za'ra wa'aba mo, 'Re îhâimana u'âsi mono bâdã te te îpisutu zô. Bâdã hã îwa waptã'ã su'u da, te za asiptete sina 're aihâimana wê za'ra wa'aba mo. Bâdã îwa waptã'ã wamhã, te za hâiwa hã ai'utõ, unhamar'o'ô na. Duré uburé marî hã hâiwa na 're îsimasa mono hã te za ai'utõ.

¹³ Âne za romhâimana wa, hâiwa îtéb zô, duré ti'a îtéb zô zama, wa za sô 're wanhimipari u'âsi za'ra, tame dawê na si 're îdahâimana za'ra mono zéb zô. 'Re îhâimana u'âsi mono hã âne îwê na te te dama ropisutu wa, wa za sô 're wanhimipari u'âsi za'ra.

¹⁴ Taha wa, îsiwadi norî, îma asawi pese za'ra wa'aba norî hã, rowê zô 're asimipari za'ra wa'aba mono sina, te za sada 're asiptete za'ra wa'aba mo, aihâimana wê na 're aihâimana za'ra wa'aba mono da, 'Re îhâimana u'âsi mono hã aihâimana wê uptabi na, te te 're aiwaihu'u za'ra wa'aba mono da, rowê u'âsi âma 're anomro aba mono da.

¹⁵ Ma'āpé, āma 're rosa'rata pese za'ra wa'aba mono, Wanhīb'apito hã da'āma ĩwa'a su'u ō zém na hã. Ta hã te simi'ē na 're hãimana, tinhimiházé wi te te 're ĩda'anho'reptui mono da hã. Āne na ma tō duré Paru hã wama ĩsawi pe hã aima rob'ui'ééré za'ra wa'wa, hãiwa hawi rowaihu'u na 'Re ĩhãimana u'āsi mono te te tãma ĩwaihu'uzéb zarina.

¹⁶ Āne na ma tō te te dama 're awaihu'u, Paru hã te te dama āma 're rob'ui'ééré mono wanhã. Nimame te tihãimana za'ra, ĩsimi'ui'ééré pire hã. Ta hã dama pire za'ra di, da te 're ĩwaihu'u za'ra mono zéb da hã. Āne wa, ma tō ni'wam norĩ hã ĩsimiroti na te te āma 're upa za'ra, te te 're waihu'u pese za'ra mono ō wa, wē nherē, ĩsimiroti hã. Ta norĩ hã Wanhīb'apito āma siptete sina 're hãimana za'ra mono ō wa, ma tō Paruhu nhimiroti na te te āma 're upa za'ra. Duré 'Re ĩhãimana u'āsi mono nhimiroti 'rata na rob'ui'ééré hãiba amo na zama, ma tō te te āma 're upa za'ra. Taha wa, te za 'Re ĩhãimana u'āsi mono hã hã za'ra.

¹⁷ ĩsiwadi norĩ, ĩma asawi pese za'ra wa'aba norĩ hã, āne hã aima waihu'u pese za'ra wa'aba wa, ma'āpé 'rãwi 're asi'madã'ã pese za'ra wa'aba mono, 'Re ĩhãimana u'āsi mono nhimiroti wē'ō'wa norĩ nhimirowasu'u hã 're wapari za'ra wa'aba mono tō da, Wanhīb'apito āma asiptete sina 're aihãimana u'āsi za'ra wa'aba mono da.

¹⁸ Ma'āpé, 're aihãimana wē u'āsi za'ra wa'aba mono, aihãimana wē hã asima 're sa'ētē za'ra wa'aba mono da, Wanhīb'apito Zezu Cristu te te 're ĩwa'apawapto mono zém na. Duré Wanho'reptui'wa Zezu Cristuhu āma rowaihu hã, te za asima 're ĩsa'ētē za'ra wa'aba mo. Ta hã Wanho'reptui'wai wa, wa za āma 're wawata u'āsi za'ra. Tane tō.

1 Zuwā

Īsazei'wa norī ma, Zuwā te te ĩrob'ui'éré na'rata zé

Ībahiã wasu'uzé

Ā Ībahiã na rob'ui'éré hã Zuwā hã āma sisisi ō di. Tane nherē, ĩsãna'rata hawim na hã dama waihu'u pese za'ra di, ĩsimi'ui'éré na hã. Zuwā hã ma tō wama waihu'u za'ra tinhimi'ui'éré na hã, 're wasisawi pese za'ra mono da, 'Re ĩhãimana u'ási mono te te 're ĩwa'azawi pese mono ne. Duré rowa'a na si' re wanomro mono da, ma tō wama waihu'u za'ra, wawasédé hã wa te 're 'manharī za'ra mono āna.

Zezu Cristu ĩsi'a'uwézé wasu'u

¹ Wa hã Zuwā, wa za oto aima āma rob'ui'éré za'ra wa'wa, Wanhib'apito zazei'wa, 're ĩ'ahãimana za'ra wa'aba mono nori ma. Duréihã marī ō uptabi ré, 're ĩhãimana mono āma, wa za aima āma rob'ui'éré za'ra wa'wa. Ta hã ma tō si'a'uwé, ti'ai āma hã. Ta hã wa tō wa te 're wapari za'ra, ti'ai āma 're morī ré, ĩsiré 're ĩwanomro mono nori hã. Wa tō duré wa te 're hãiba 'madã'ã u'ási za'ra, watōmo na. Dã'ã pari, hãiwa'utu wa, wa tō duré wanhib'rata na hãiba upi za'ra ni. Ta hã 'Re ĩhãimana u'ási mono mre me na ĩsisi hã, duré 're ĩdanomro mono zép té, te te dama 're ĩ'apisutu mono.

² Duréihã marī ō ré hã Wamama siré te 're hãimana u'ási, ta hã. Tawamhã ma tō we datéme sihãiré, sō'awi āma 're ĩdanopré mono da hã. Wa nori hã wa tō wa te 're 'madã'ã za'ra. Taha wa, sena na wa aima wasu'u za'ra wa'aba ni, 're ĩdanomro u'ási mono zé te te dama 're ĩ'apisutu mono hã.

³ E marī da, wa āne aima rowasu'u za'ra wa'aba ni, wa te 're ĩ'madã'ã za'ra mono zém na hã, duré wa te 're ĩwapari za'ra mono zém na zama. Wamama siré 'rãwi 're ĩwahãimana za'ra mono ne, duré ĩ'ra siré Zezu Cristuhu siré 'rãwi 're ĩwahãimana za'ra mono ne, a nori wa'aba zama ĩsiré 're aihãimana za'ra wa'aba mono da, wa āne aima waihu'u za'ra wa'aba ni.

⁴ Watōi uptabi zé hã wa te wasima 're 'masisi za'ra mono da, wa āne aima āma rob'ui'éré za'ra wa'aba ni, āma 're ĩwahãimana za'ra mono zéb da hã.

'Re ĩhãimana u'ási mono, rowa'a u'ási 're ĩhãimana mono zé wasu'u

⁵ Zezu Cristu hã ma tō Timama hã te te wama 're sadawa wasu'u za'ra. Taha nhimirowasu'u hã wa te 're ĩwapari za'ra mono zém na wa oto aima rowasu'u za'ra wa'aba ni. E niha Timama hã te te wama 're ĩsadawa wasu'u za'ra mono zé hã. Āne na wa tō wa te 're wapari za'ra: "Rowa'a wamhã, robra ō di. Tane, 'Re ĩhãimana u'ási mono hã wé uptabi wa, marī ĩwasédé hã āma 're hãimana mono ō di." Āne Timama hã te te wama 're ĩsadawa wasu'u za'ra mono zé hã.

⁶ Āté wa za wawasété na 're wahãimana za'ra. Tawamhã, wawasété na 're wahãimana za'ra mono wamhã, robra u'ási wa za 're wahãimana za'ra, wap'ê 'remhã. Tawamhã robra u'ási 're wahãimana za'ra mono nherē, 'Re ĩhãimana u'ási mono siré, 'rãwi 're ĩwahãimana za'ra mono na dama 're wasiwasu'u za'ra mono wamhã, wazadawa nhipe na wa za 're wahãimana za'ra, wap'ê 're, robra u'ási 're wahãimana za'ra mono nherē. Āne wamhã, tō senai ō di, 're ĩwahãimana za'ra mono zé hã.

⁷ Tane nherē, 'Re ĩhãimana u'ási mono nhimiroti zarina 're wahãimana za'ra mono wamhã, rowa'a na 're ĩhãimana mono ne, wa za duré wa nori hã rowa'a na 're wahãimana za'ra. Taha zarina, wa za duré 'rãwi wasiré āma 're wahãimana za'ra, wasisawi pese sina. 'Re ĩhãimana u'ási mono 'ra hã te za duré wawasédé hã te te wama 're aparī tidã'ázém na Zezusi hã, wawasété āna oto āma 're wanomro mono da.

⁸ Āté wa za taré 'rãwi wasi'āma wa te 're rosa'rata za'ra, āne: "Wa nori hã wawasété āna, wa 're wahãimana za'ra." Āne wasi'āma wa te 're rosa'rata za'ra mono wamhã, wa za 'rãwi wasima 're wazadawa nhipe za'ra, wawasété ō na wasina 're ĩwawata za'ra mono na. 'Re ĩhãimana u'ási mono nhimiroti hã tō sena uptabi hã wap'ê 're, wama 're hãimana za'ra mono ō di, āne wamhã.

⁹ Tane nherē, wawasédé hã wa te 're ĩ'manharī za'ra mono na 'Re ĩhãimana u'ási mono ma, 'rãwi 're wasiwé'ō za'ra mono wamhã, te te dama 're ĩ'aropisutu mono zéb zarina, te za te te wama āma 're a'uwaimrami, te te wama āma 're a'upai mono āna. Tãma 're ĩwasiwasu'u za'ra mono zéb zarina, wawasédé hã wa te 're ĩ'manharī za'ra mono hã te te wa'āma 're ab'madã'ã mono ō di za oto. Te za te te wama 're aparī, wawasédé hã.

¹⁰ Duréihã 'Re ĩhãimana u'ási mono hã ma tō da'āma waihu'u siro, uburé 're ĩdahãimana wasété za'ra mono zém na hã. Taha wa, wa nori hã wawasété āna 're ĩwahãimana za'ra mono na dama 're wasiwasu'u za'ra mono wamhã, 'Re ĩhãimana u'ási mono āma, wa ĩsadawa nhipe

hā wa te āma 're sa'ra za'ra. Tawamhā 'Re ĩhāimana u'āsi mono nhimiroti hā wapē'ē 'remhā, wama 're hāimana za'ra mono ō di za.

2

Zezu Cristu hā Timama ma, te te 're ĩda'apawapto mono zé wasu'u

¹ Īra norī, ĩma asawi pese za'ra wa'aba norī hā, e marī da, wa āne na aima rob'ui'éré za'ra wa'wa. Aiwaseté āna āma 're aihāimana za'ra wa'aba mono zéb da hā, wa āne ĩnhimi'ui'éré na āma aipo're pu'u za'ra wa'wa. Tane nherē, aiwasédé hā 're 'manharī za'ra wa'aba mono wamhā, 're 'manharī za'ra wa'aba mono nherē, Zezu Cristu hā 're ĩmorī wē uptabi hā te za ai'āma 're sisapri' za'ra wa'wa, tinhimiroti wē na. Timama ma, te za āne te te 're aiwasu'u za'ra wa'wa, Zezusi hā: "Ā norī hā, tiwasédé te te 're 'manharī za'ra mono wa, asiwi 're awē'ō mono ō di za. Wa hā wa tō ĩ'upana sada ĩdā'ā za'ra, uburē ĩwasédé hā te tāma 're ĩ'apari mono zéb da hā." Āne te za Timama wi te te 're rowaptērē, ai'upana za'ra wa'aba.

² Ta hā ma tō wazada dārā, 'Re ĩhāimana u'āsi mono hā wawasédé hā te te wama 're ĩ'apari mono zéb da hā. Tane nherē, wazada si dā'ā ō di. Uburē da'udāna dawasédé hā da te 're ĩ'manharī za'ra mono norī zada zama, ma tō dārā, da'upana.

³ E niha, wa za tawamhā wasina waihu'u pese za'ra ni, 'rāwi ĩsiré 're ĩwahāimana za'ra mono na hā. 'Re ĩhāimana u'āsi mono nhimiroti hā wa te 're 'madā'ā pese za'ra mono wapsi, wa za wasina wa te 're waihu'u za'ra, 'rāwi ĩsiré 're ĩwahāimana za'ra mono na.

⁴ Āté ni'wa hā te za āne dama 're siwasu'u: "Wa hā, 'Re ĩhāimana u'āsi mono hāimanazé hā ĩma waihu'u pese di." Ta hā ĩsimiroti hā te te 're 'madā'ā pese mono ō nherē, te za taré dama 're siwasu'u, sadawa nhipese na. Duré 'Re ĩhāimana u'āsi mono nhimiroti hā tō sena uptabi hā ĩpē'ē 're, tāma 're hāimana mono ō di.

⁵⁻⁶ Tane nherē, ni'wam norī hā 'Re ĩhāimana u'āsi mono nhimiroti si te te 're 'madā'ā pese za'ra mono wamhā, 'Re ĩhāimana u'āsi mono te te 're ĩda'azawi pese mono zém ne, 're ĩsisawi pese za'ra mono zéb zō, ta norī wi tiwi 're rowaptā'ā za'ra mono ō di za. Te za te te tāma āma 're uwaimrami u'āsi za'ra, 'Re ĩhāimana u'āsi mono ma. Duré ni'wam norī hā 'Re ĩhāimana u'āsi mono āma 're ĩhāimana za'ra mono na dama 're siwasu'u za'ra mono wamhā, e niha tawamhā, 're ĩhāimana za'ra mono zé hā za. Zezu Cristu hā ti'ai āma 're morī ré, 're ĩhāimana wē mono zém ne, te za 're hāimana wē za'ra. Āne hā wa norī hā 're wahāimana za'ra mono wamhā, wa za sena na wa te wasina 're waihu'u pese za'ra, 'Re ĩhāimana u'āsi mono āma si 're ĩwahāimana za'ra mono zém na hā.

Duréi nherē, 'Re ĩhāimana u'āsi mono nhimiroti té wasu'u

⁷ ĩsisānawā norī, ĩma asawi pese za'ra wa'aba norī hā, āhāna 'Re ĩhāimana u'āsi mono te te dama ĩrotizép tém na te āma aima rob'ui'éré za'ra wa'aba ō di. 'Re ĩsaze na'rata za'ra wa'aba mono zém hawi, aima 're ĩhāimana za'ra wa'aba mono zém na, wa āma aima rob'ui'éré za'ra wa'wa, za 're ĩwasisawi pese za'ra mono zéb da na. Ta hā te 're ĩwapari u'āsi za'ra wa'aba mo.

⁸ 'Re ĩhāimana u'āsi mono te te dama ĩrotizé hā āhāna te āma ĩrob'ui'éré hā duréi nherē, āhāna hā duréi ité oto. E marī wa. Cristu hā ti'ai āma 're morī ré, ma tō Timama nhimiroti zarina te te 're da'azawi pese, tō ōhō zarina si. A norī wa'aba zama te duréi ĩsimiroti zarina 're aihāimana za'ra wa'aba mo, 're asisawi pese za'ra wa'aba mono sina. Taha wa, wa tō oto wa te 're waihu'u za'ra, duréi nherē, āhāna hā ité duré, Wamama nhimiroti hā, ōhō si nherē. Zezusi hā ti'ai āma 're morī ré, ma tō te te dama 're rowasu'u, rowa'a na si 're danomro wē mono da, robra na si 're danomro waseté tō mono da, danhimiza'rese āna. Taha wa, te oto robra hā te te sina rosapari u'āsi. ĩwa'rāmi te rowa'a isa'ēne hā te te sina rosa're, hāimo.

⁹ Āté ni'wa hā dasiré ĩsazei'wa newa te za taré āne dama 're siwasu'u: "Wa hā, 're ĩmorī wē di. Rowa'a na si wa 're ĩhāimana, 'Re ĩhāimana u'āsi mono nhimiroti zarina." Āne ni'wa hā dama 're siwasu'u mono nherē, ĩsazei'wa norī te te 're a'ruiwapari mono wamhā, ta hā te zahadu robra na 're hāimana.

¹⁰ Ni'wa hā ĩsazei'wa norī te te 're azawi pese mono wapsi, te za rowa'a na 're hāimana u'āsi, tipē'ē 're. Tawamhā rowa'a na si 're morī wamhā, 're si'marōpāri mono ō di za tiwasété na, 'Re ĩhāimana u'āsi mono nhimiroti zarina 're hāimana wē mono wa.

¹¹ Tane nherē, ni'wa hā ĩsazei'wa norī te te 're a'ruiwapari mono wamhā, ta hā te zahadu robra u'āsi siwa'ru 're hāimana, tipē'ē 're. Robra na datob'a ne siwa'ru 're ĩdahāimana za'ra mono ne, te 're hāimana waseté.

¹²⁻¹⁴ Īra norī, ĩma asawi pese za'ra wa'aba norī hā, 'Re ĩhāimana u'āsi mono hā aiwaseté 'wa hā te te ai'āma 're ab'madā'ā aba mono ō di oto, Zezusi hā dazada ĩdā'ázéb zarina. Duré Wamama hāimanazé hā aima waihu'u pese za'ra wa'aba di. Taha wa, wa aima āma rob'ui'éré za'ra wa'wa.

Īprédum norī, duréihā marī ō uptabi ré, 're ĩhāimana mono siré 'rāwi 're aihāimana za'ra wa'aba mono wa, wa duré aima rob'ui'éré za'ra wa'wa.

Duré ĩpréduptém norĩ, ĩwasété uptabi āma ai'uté za'ra wa'aba wa, wa aima rob'ui'éré za'ra wa'wa. Duré, 'Re ĩhāimana u'āsi mono zadawa wasu'u zarina si asiptete na 're aihāimana za'ra wa'aba mono wa, wa oto āne aima āma rob'ui'éré za'ra wa'wa.

¹⁵⁻¹⁶ Ti'ai āma dapo're'ō u'āsi 're ĩdanomro mono na, wa za oto aima rowasu'u za'ra wa'wa. Dawasété zō, da te dasima 're ĩrob'ruiwaparĩ u'āsi za'ra mono zé hā, Wamama tei ō di. Duré, datōmo na marĩ hā da te 're 'madā'ā za'ra mono wa, da te dasima 're ĩruiwaparĩ za'ra mono zé hā, Wamama tei ō di. Duré, danhimarĩ ahā wa, 'rāwi dasina 're ĩdawata za'ra mono zé hā, Wamama tei ō di. Duré, dahāimana pire na 'rāwi dasina 're ĩdawata za'ra mono zéb zama, Wamama tei ō di. Uburé marĩ hā ti'ai āma ĩwasétére hā dapo're'ō u'āsi 're ĩdanomro mono norĩ te hā.

Taha wa, ti'ai āma uburé 're ĩdahāimana wasété za'ra mono norĩ ne, aiwasété zō asima 're rob'ruiwaparĩ za'ra wa'aba mono ō di za. Aiwasété zō asima 're rob'ruiwaparĩ za'ra wa'aba mono wamhā, tō sena Wamama hā 're sawi waihu'u za'ra wa'aba mono ō di za.

¹⁷ Ti'ai āma uburé 're ĩdahāimana wasété za'ra mono zé hā ĩsi'utōrízéb u, āhāna hā te te sina rotété u'āsi, duré uburé marĩ ĩwasédé hā da te dasima 're ĩruiwaparĩ za'ra mono zama. Zahadu wapsi te za ai'utō, simisutu. Ni'wam norĩ hā 'Re ĩhāimana u'āsi mono nhimipisutuzém na si 're hāimana za'ra mono wapsi, ta norĩ si te za 're hāimana u'āsi za'ra, si'utōrĩ āna.

Cristuhu zada za 're ĩhāimana mono wasu'u

¹⁸ ĩ'ra norĩ, ĩma asawĩ pese za'ra wa'aba norĩ hā, ropsi'utōrízéb u hā romhuture di oto. Tame te za oto aibā ĩwasédé hā dama 're hāimana sō'awi, Cristuhu zada 're ĩhāimana mono hā. Cristuhu newa te za ĩsimiroti hā da te 're waparĩ za'ra. Taha wasu'u hā ma tō 're ĩwaparĩ u'āsi za'ra wa'aba mo. Tane nheré, te duré āhāna wanho'a 're hāimana za'ra ahā uptabi na, za Cristuhu zada dama 're ĩhāimana mono ne. Taha wa, wama waihu'u pese za'ra di oto, ropsi'utōrízéb u ĩromhuture na hā.

¹⁹ Ta norĩ hā ma tō aré wasiré 're si'rā'ōtō u'āsi, ĩwasu'uwē u. Wasiré uptabi 're hāimana za'ra mono ō nheré, ma tō aré wasiré 're hāimana za'ra. Wasiré uptabi, 're hāimana za'ra mono 'wa'āhā, te aré wasiré 're hāimana u'āsi za'ra, 'rāwi. Tane nheré, ma tō wahawĩ 're wairébé. Taha wa, wa tō wasina waihu'u za'ra ni oto, wasiré uptabi 're ĩhāimana za'ra mono ō na hā.

²⁰ A norĩ wa'wa hā ma tō Zezusi hā 're ĩmorĩ wē uptabi hā te te 're aipisutu za'ra wa'wa, Timama pē'ēzani hā te te aima 're sōmri za'ra wa'aba mono da. Taha wa, ma tō oto Wamama nhimiroti tō sena uptabi hā aihāiba mono bā ĩwaihu'u za'ra wa'wa.

²¹ E Wamama nhimiroti hā tō sena uptabi hā waihu'u za'ra wa'aba ō wa, wa āne āma aima rob'ui'éré za'ra wa'wa. Mare di. Āne wab ō di. ĩsimiroti hā waihu'u pese za'ra wa'aba wa, wa āne aima āma rob'ui'éré za'ra wa'wa. Duré 're ĩdazadawa nhipese za'ra mono zé hā 'Re ĩhāimana u'āsi mono nhimiroti tō sena uptabi hawib ō na hā waihu'u pese za'ra wa'aba wa, wa āne aima rob'ui'éré za'ra wa'wa.

²² E 'wam norĩ hā bété 're ĩsadawa nhipese za'ra mono hā. Ta norĩ hā te āne Zezusi hā te te dawi 're udā za'ra: "Zezusi hā Danho'reptui'wa da, 'Re ĩhāimana u'āsi mono te te ĩpisutu ō di." Ta norĩ hā sadawa nhipese uptabi na 're ĩhāimana za'ra mono. Ta norĩ hā te Cristuhu zada 're hāimana za'ra, te te dawi 're udā za'ra mono wa. ĩmama zada zama te duré 're hāimana za'ra, ta norĩ hā.

²³ Ni'wam norĩ hā 'Re ĩhāimana u'āsi mono 'ra, te te dawi 're udā za'ra mono wamhā, ta norĩ hā ĩmama siré 'rāwi 're hāimana za'ra mono ō di. Ni'wam norĩ si, Zezusi hā Wamama hawĩ we ĩmorĩ na te te 're ĩsaze za'ra mono na tō sena dama 're ĩsiwasu'u za'ra mono norĩ si, te Wamama siré 'rāwi 're hāimana za'ra, rowē na.

²⁴ Ma'āpé, ĩwasu'uwē hā 're ĩsaze na'rata za'ra wa'aba mono zém hawĩ 're ĩwaparĩ za'ra wa'aba mono zém na si 're anomro u'āsi aba mono. Āma 're anomro u'āsi aba mono wapsi, te za duré 'Re ĩhāimana u'āsi mono 'ra āma 're anomro aba mo, duré ĩmama āma zama.

²⁵ Cristu hā ma tō āne wama ropisutu sirōmo za'ra, 're wadā'ā za'ra mono āna, ĩ'rata 're ĩwasu'ubumroi u'āsi mono zéb da hā.

²⁶ E 'wam norĩ āma, wa aima rob'ui'éré za'ra wa'wa. Sadawa nhipese na taré te te aima 're ĩroti za'ra wa'aba mono norĩ āma, wa aima rob'ui'éré za'ra wa'wa. ĩsiniwĩ 're aipizari za'ra wa'aba mono da, te ta norĩ hā tinhimiroti tō senai ōre na te te 're aipibui u'āsi za'ra wa'wa.

²⁷ Tane nheré, ma tō Cristu hā Timama pē'ēzani hā te te aima 're sōmri za'ra wa'wa. Taha ré, te oto ĩré 're anomro u'āsi aba mo. Aipé'é 're, te aima 're hāimana u'āsi za'ra wa'wa. Taha wa, roti aimawĩ zō asina 're asimipari za'ra wa'aba mono ō di za. Taha si te za uburé marĩ ĩwē hā te te aima 're waihu'u za'ra wa'wa, 'Re ĩhāimana u'āsi mono pē'ēzani hā. Tō sena uptabi, ĩsimiroti hā. Taré te te aima 're roti za'ra wa'aba mono ō di. Taha wa, te za ĩsimiroti si 're ĩmadā'ā pese za'ra wa'aba mo. Cristuhu āma si te za duré 're anomro u'āsi aba mo.

²⁸ Ī'ra norī, āne wa za oto aima roti za'ra wa'wa. Zezusi hā apā wei morī ō ré, ma'āpé dhō āma si 're anomro u'āsi aba mono, apā za wei morī wa, tāma aipahi za'ra wa'aba tō da, duré rowazép te, tāma ai'rāpo za'ra wa'aba tō da.

²⁹ Cristu hā 're ĩmorī wē uptabi na hā aima waihu'u pese za'ra wa'aba di oto, marī na 're ĩwasété mono ō na hā. Taha wa, ni'wam norī hā 'Re ĩhāimana u'āsi mono te dama 're ĩapisutu mono zéb zarina si 're nomro wē mono wamhā, tawapsi te za oto ĩwaihu'u za'ra wa'wa, ta norī hā 'Re ĩhāimana u'āsi mono nhīb'a'uwē, tō sena 're ĩnomro mono na hā.

3

'Re ĩhāimana u'āsi mono 'ra norī 're ĩhāimana za'ra mono zé wasu'u

¹ Ma'āpé, āma aipo're pu'u za'ra wa'aba. Wamama hā 'Re ĩhāimana u'āsi mono hā, tō sena te te 're wa'azawi pese uptabi. Te te 're wa'azawi pese mono wa, te ti'ra na te te 're wa'anhsi. Taha wa, tō sena, wa oto Ī'ra hā 're wahāimana za'ra, ĩsazei'wai mono bā. Dapo're'ō u'āsi 're ĩdanomro mono norī hā, Wamama hā te te siwi 're waihu'u za'ra mono ō wa, wa norī zama Ī'ra na te te duré siwi 're waihu'u za'ra mono ō di, ta norī hā.

² ĩsisānawā norī, ĩma asawi pese za'ra wa'aba norī hā, 'Re ĩhāimana u'āsi mono 'ra, wa oto 're wahāimana za'ra. Tane nherē, za 're ĩwahāimana za'ra mono zéb da hā, zahadu wama waihu'u prā za'ra di. Cristu hā apā wei wazō morī wamhā, ĩsine wa za oto 're wahāimana za'ra. Āhā si wama waihu'u pese za'ra di. E marī wa, wa za ĩsine 're wahāimana za'ra. Tō sena Cristu hā 're ĩhāimana mono zém na 'rāwi wa te oto wasiwi waihu'u za'ra wa, wa za ĩsine 're wahāimana za'ra.

³ Ōhō zō rob'umnhasi sina, sō 're wanhimipari za'ra mono ré, wa za uburé marī ĩwasédé hā wa te wasiwi 're wē'ō pese za'ra 'rāwi, ĩwē na si 're wahāimana za'ra mono da. Cristu hā wasété āna 're ĩmorī ne, wa za 're wahāimana za'ra.

⁴ E marī tawamhā, 're ĩdawasété za'ra mono zé hā. 'Re ĩhāimana u'āsi mono nhimiroti, da te dasiwi 're wē'ō pese za'ra mono wamhā, ta hā dawasédé. Taha wa, ni'wam norī hā 're wasété za'ra mono wamhā, ta norī hā 'Re ĩhāimana u'āsi mono nhimiroti te te siwi 're wē'ō za'ra, 'rāwi.

⁵ Tane nherē, Cristu hā ma tō we ti'ai u mo, dawasédé hā te te dama 're apari mono da. Ā hā aima waihu'u pese za'ra wa'aba di. Ta hā 're ĩmorī wasété ō, duré marī ĩwasédé hā te te 're ĩ'ab'manharī mono ō.

⁶ Taha wa, ni'wam norī hā Cristuhu āma si 're hāimana za'ra mono wamhā, ta norī hā 're hāimana wasété za'ra mono ō di. Tane nherē, ni'wam norī hā 're hāimana wasété u'āsi za'ra mono wamhā, ta norī hā Zezusi hā Danho'reptui'wa na te te 're waihu'u za'ra mono ō di. Ta norī ma, Zezusi hā tāma waihu'u za'ra ō di tō.

⁷ Ī'ra norī, dahāimana wasété na 're ĩdanomro mono na, da'āma 're sasōmri za'ra wa'aba mono ō di za, danhimiroti senai'ō na dama 're ĩhāimana za'ra mono na zama. Ma'āpé 'rāwi asina 're asōpré pese aba mono. Ni'wam norī hā 're nomro wē mono wamhā, 'Re ĩhāimana u'āsi mono nhimiroti na sima āma 're sipa za'ra mono ō wamhā, ta norī si 're hāimana wē za'ra mono di, Cristu hā 're ĩmorī ne.

⁸ Wa'uburé hā, wa'rui'wa hā ropoto na'rata hawim haré, te tiwasédé hā te te 're ab'manharī u'āsi. Taha wa, ni'wam norī hā tiwasédé te te 're 'manharī u'āsi za'ra mono wamhā, ta norī hā Wa'uburé nhīb'a'uwē te 're hāimana za'ra. Taha nhimirohmuri wasédé hā te te tiwi pari da, ma tō 'Re ĩhāimana u'āsi mono 'ra hā we ti'ai u datēme mo.

⁹ Ni'wam norī hā 'Re ĩhāimana u'āsi mono 'ra, 're hāimana za'ra mono wamhā, ta norī hā tiwasédé te te 're 'manharī u'āsi za'ra mono ō di. Mare di. E marī wa. 'Re ĩhāimana u'āsi mono hā ĩpě'ē 're, 're ĩpoto téb za'ra mono zé hā te te tāma 're anhomri mono wa. Duré 'Re ĩhāimana u'āsi mono hā, āma 're 'ra za'ra mono wa, tiwasédé hā ōne u'āsi te te 're 'manharī waihu'u za'ra mono ō di za.

¹⁰ E niha wa za bété waihu'u za'ra ni, 'Re ĩhāimana u'āsi mono 'ra norī hā, duré Wa'uburé 'ra norī hā. Ni'wam norī hā 're hāimana wē za'ra mono ō wamhā, duré te te 're dazawi pese za'ra mono ō wamhā, ta norī hā 'Re ĩhāimana u'āsi mono 'ra, 're nomro mono ō di. Āne na wa za ta norī hā Wa'uburé 'ra na waihu'u za'ra ni.

'Re ĩdasisawi pese za'ra mono zém na roti wasu'u

¹¹ Duréihā ĩsāna'rata hawimhā, ma tō Zezusihi wasu'uwē hā 're ĩwapari za'ra wa'aba mo, uburé 're ĩwasawi pese za'ra mono zém na hā.

¹² Duréihā Ca'Ī, tino te te ĩ'ruiwapari ne, 're wasi'ruiwapari za'ra mono ō di za. Ta hā ĩwasété nhīb'a'uwē te 're hāimana, Wa'uburé nhīb'a'uwē. Ta hā ma tō tino tīwī. E marī wa. ĩno si 're hāimana wē mono wa, 'Re ĩhāimana u'āsi mono hā te te wēsāmri 'ru te.

¹³ ĩsisānawā norī, ĩpo're'ō norī hā te za te te 're ai'ruiwapari za'ra wa'wa. Te te 're ai'ruiwapari za'ra wa'aba mono wa, áté te za 'rāwi asima 're ĩnharī za'ra wa'aba mo, āne: "E

marī wa, te ō norī hā te te 're īruiwapari za'ra." Āne hā 'rāwi asima 're nharī za'ra wa'aba mono ō di za. Te za tō īhāimana wasaté norī hā te te 're ai'ruiwapari za'ra wa'wa. Āne, wa aima waihu'u za'ra wa'wa, īpo're'ō norī hā te te 're ai'ruiwapari za'ra wa'aba mono ō newa, 'rāwi asima 're nharī za'ra wa'aba mono tō da.

¹⁴ Ni'wam norī hā te te 're dazawi pese za'ra mono ō wamhā, ta norī hā te dā'ā u'āsi ne 're hāimana za'ra, tipē'ē 'remhā, 'Re īhāimana u'āsi mono nhiti. Tanei ō di, wa norī hā wasiré īsazei'wa norī hā. 'Re īhāimana u'āsi mono nhiti, wapē'ē 're aré wadā'ā u'āsi ne 're wanomro mono nherē, wa tō īhawi 're wawairébé, 'Re īhāimana u'āsi mono niwī, rowē na oto 're wanomro u'āsi mono da, wapē'ē 'remhā. Āne, wa tō oto wasi'āma waihu'u pese za'ra ni. 'Re 're wasisawi pese za'ra mono wa, wa āne hā tō sena na wasi'āma waihu'u pese za'ra ni.

¹⁵ Dapārī'wa norī ma, 'Re īhāimana u'āsi mono 'rata 're īdahāimana u'āsi za'ra mono zé hā tāma 're hāimana za'ra mono ō di. Āne hā aima waihu'u pese za'ra wa'aba di. Duré ni'wam norī hā te te 're da'ruiwapari za'ra mono wamhā, ta norī hā dapārī'wa ne, te 'Re īhāimana u'āsi mono ma hā 're hāimana za'ra. Taha wa, wa te 're da'ruiwapari za'ra mono wamhā, 'Re īhāimana u'āsi mono 'rata 're īdahāimana u'āsi za'ra mono zé hā wama 're hāimana za'ra mono ō di za, aiwa.

¹⁶ E niha wa za, 're īdasisawi pese za'ra mono zé hā waihu'u pese za'ra ni. Āne wa za waihu'u pese za'ra ni. Cristu hā te te 're wa'azawi pese mono wa, ma tō sisawi āna wazada dārā. Taha zarina wa za duré wa norī hā 're wasipawaptob za'ra, 're wasisō'reptu za'ra mono da. 'Re wadā'ā za'ra mono da nherē, wa za tō 're wasipawaptob za'ra, 're wasihāiba zawi za'ra mono āna. Āne 're īdasisawi pese za'ra mono zé hā za oto.

¹⁷ Ni'wam norī hā marī, tāma 're hāimana za'ra mono nherē, marī zō dawi 're īro'wanhi'riti za'ra mono na te te 're dawaihu'u za'ra mono nherē, da'āma 're pē'ézé za'ra mono ō wamhā, e ta norī hā 'Re īhāimana u'āsi mono nhimizawi pese zéb ré te 're hāimana za'ra. Mare di. 'Re īhāimana u'āsi mono nhimizawi pese zé hā te te 're waihu'u za'ra mono ō di, ta norī hā.

¹⁸ Ī'ra norī, e wazadawa na si wa za wa te 're dazawi wapti za'ra. Mare di. Wamreme na si wa te 're dazawi wapti za'ra mono ō di za. Uburé wa za marī īwē na wa te 're dapawaptob za'ra, wanhimizawizé hā tō sena na.

'Re īhāimana u'āsi mono nho'a, dasina dahātā'ā āna 're īdanomro mono zé wasu'u

¹⁹ Ōhō na si 're wahāimana za'ra mono wamhā, 'Re īhāimana u'āsi mono 'ra, 're īwanomro mono na wa za wasina waihu'u pese za'ra ni, roti tō sena uptabi na si 're īwanomro mono na. Duré īsō'a 're wahāimana za'ra mono nherē, 'rāwi wasina 're wahātā'ā za'ra mono tō da, te za wapē hā wama 're siwaihu'u u'āsi za'ra, wapē hā ī're wama 're simi'wara mono da.

²⁰ 'Re īhāimana u'āsi mono ma hā, uburé marī hā tāma waihu'u pese uptabi di. Wa norī hā marī hā wapē'ē na 'rāwi wa te 're īwaihu'u za'ra mono zém nhipai u, uburé marī hā tāma waihu'u pese uptabi di. Taha wa, 'Re īhāimana u'āsi mono 'ra, 're īwahāimana za'ra mono na 'rāwi wapē'ē na 're wasiwawā za'ra mono nherē, te za 'Re īhāimana u'āsi mono hā wa'āma 're po're pu'u u'āsi, taha ma uburé marī hā tāma waihu'u pese uptabi wa. Wa'āma 're pē'ézé uptabi mono wa, te za wapē hā ī're wama 're simi'wara, ī'ra 're īwahāimana za'ra mono na, 're wasiwawā za'ra mono ō wamhā.

²¹ Īsisānawā norī, īma asawi pese za'ra wa'aba norī hā, wa norī hā tō sena 're wahāimana wē za'ra mono wamhā, tawamhā, 'Re īhāimana u'āsi mono nhib'a'uwē 're īwahāimana za'ra mono na 'rāwi 're wasiwawā za'ra mono ō di za. Āne wamhā, 'Re īhāimana u'āsi mono ma, wasina 're wapahi za'ra mono ō di za. Wasina wahātā'ā āna, wa za tāma 're wamreme zusi u'āsi, īsō'a.

²² Duré, īsimiroti hā wa te 're 'madā'ā pese za'ra mono wamhā, te te wama 're ī'awē mono zéb uwaibaba si 're wahāimana za'ra mono wamhā, wa te tiwi 're īrowaptērē za'ra mono zéb uwaibaba si, te za uburé marī hā īwē hā te te wama 're anhomri.

²³ E niha tawamhā, 'Re īhāimana u'āsi mono nhimiroti hā, wa te 're ī'madā'ā pese za'ra mono zéb da hā. Āne īsimiroti hā. Ī'ra Zezu Cristu, wa za wa wasina 're umnhasi za'ra, Danho'reptui'wa na. Duré te te wama 're īroti za'ra mono zéb zarina si, wa za 're wasisawi pese za'ra. Āne īsimiroti hā.

²⁴ Ni'wam norī hā 'Re īhāimana u'āsi mono nhimiroti te te 're 'madā'ā pese za'ra mono wamhā, tō sena te ta norī hā āma 're hāimana za'ra, 'Re īhāimana u'āsi mono āma. Ta hā te duré ī'rata 're sāmra u'āsi za'ra, 'rāwi. E niha wa za tawamhā, wasina waihu'u pese za'ra ni, 'Re īhāimana u'āsi mono, wa'rata 're īsāmra u'āsi mono zém na hā. Ta hā ma tō Tipē'ēzani hā te te wama 're anhomri, wapē'ē 're, 're sāmra mono da, uburé marī hā te te wama 're awaihu'u mono da. Taha na wa za wasina waihu'u za'ra ni, wa'rata 're īsāmra mono na, 'Re īhāimana u'āsi mono hā.

4

'Re ihāimana u'āsi mono nhimiroti upana, dama rowasu'u nhipese'wa nori wasu'u

¹ Īsisānawā norī, ĩma asawi pese za'ra wa'aba norī hā, ātē ni'wam norī hā te za āne aima 're siwasu'u za'ra wa'wa: "Re ihāimana u'āsi mono hā ma tō Tipē'ēzani hā te te wama 're anhomri. Īpē'ēzani te te wama 're ī'awaihu'u mono zēb zarina si, wa tō wa te dama 're sadawa wasu'u za'ra." Āne ni'wam norī hā aima 're siwasu'u za'ra wa'aba mono nherē, ĩsimirowasu'u na 're saze su'u za'ra wa'aba mono ō di za, a'ā. Āhāna hā 'Re ihāimana u'āsi mono zadawa wasu'u uptabi 'wa newa, roti tō senai'ō na te te dama 're ĩroti za'ra mono norī hā ahā uptabi di oto. Daro mono bā te dawazari 're hāimana za'ra. Taha wa, te za uburē roti hā tō sena zō 're ĩpibui u'āsi za'ra wa'aba mo, 'Re ihāimana u'āsi mono pē'ēzani hawīb zō si.

² E niha te za tawamhā ĩwaihu'u pese za'ra wa'wa, ni'wam norī hā 'Re ihāimana u'āsi mono pē'ēzani ré sena na te te dama 're ĩsadawa wasu'u za'ra mono na hā. Ātē ni'wam norī hā te za āne sena na aima 're siwasu'u za'ra wa'wa, 'rāwi tipē'ē hawim na te te 're ĩrosa'rata za'ra mono hā: "Zezusi hā ta hā Cristu, tō sena Danho'reptui'wa da, 'Re ihāimana u'āsi mono te te ĩpisudu. Ta hā ti'ai āma dawazari potō wa, ma tō si'a'uwē." Āne aima 're siwasu'u za'ra wa'aba mono wamhā, tō sena na te za āma 're ĩwaihu'u za'ra wa'aba mo oto, 'Re ihāimana u'āsi mono zadawa wasu'u uptabi 'wa na, durē Īpē'ēzani ré 're ihāimana za'ra mono na zama.

³ Tane nherē, ni'wam norī hā Zezusi hā Danho'reptui'wa da, ti'ai āma dawazari ĩsi'a'uwē na te te dawī 're udā za'ra mono wamhā, ta norī hā 'Re ihāimana u'āsi mono pē'ēzani ré 're hāimana za'ra mono ō di, tō sena. Zezusihi zada, 're ihāimana mono nhimirosa'rata zarina si te te 're rosa'rata za'ra, tipē'ē na hā. Ma tō ĩwaihu'u sirōmo za'ra wa'wa, Zezusihi zada, 're ihāimana mono nhimiroti wasétē na, za daro mono bā dasima da te āma 're ĩropéi mono na. Āhāna ĩsōwam nherē, te ĩsimiroti wasétē na 're dahāimana za'ra durē.

⁴ Īra norī, a norī wa'aba si te oto 'Re ihāimana u'āsi mono nhib'a'uwē 're aihāimana za'ra wa'aba mo. 'Re ihāimana u'āsi mono zadawa wasu'u uptabi 'wa newa, tō senai'ō na te te dama 're ĩroti za'ra mono norī da, ma tō asiptete sina 're aihāimana za'ra wa'aba mo, asimirosa'rata na. E marī wa. Aipē'ē 're, 're ĩsāmra za'ra wa'aba mono hā, Wa'uburē ma tiwaihu'u pese na siptete uptabi wa, ti'ai āma dawada'uri wasétē 'wai ma.

⁵ Ta norī hā 'Re ihāimana u'āsi mono zadawa wasu'u uptabi ō 'wa norī hā, te 'Re ihāimana u'āsi mono wē'ō'wa norī me 're hāimana za'ra. Taha wa, te 'Re ihāimana u'āsi mono wē'ō'wa norī nhimirosa'rata wasétē zarina si te te tāma 're rowasu'u za'ra, ta norī hā. Taha na si te te tāma 're rowasu'u za'ra mono wamhā, wapari ze ti, ĩsimiroti wasétē za'ra hā, 'Re ihāimana u'āsi mono wē'ō'wa norī ma hā.

⁶ Wa norī hā 'Re ihāimana u'āsi mono nhib'a'uwē, wa oto 're wanomro. Ni'wam norī hā 'Re ihāimana u'āsi mono hāimanazé hā 'rāwi te te 're ĩwaihu'u za'ra mono hā, ta norī si te te 're wawapari za'ra. Tane nherē, 'Re ihāimana u'āsi mono nhib'a'uwē'ō, 're ĩnomro mono norī hā te te 're wawapari za'ra mono ō di, 'Re ihāimana u'āsi mono wasu'u na hā. Taha wa, ni'wam norī hā 'Re ihāimana u'āsi mono wasu'u na te te 're wawapari za'ra mono ō wamhā, wa za wasina waihu'u pese za'ra ni, Wa'uburē hawi roti tō senai'ō zarina 're ihāimana za'ra mono na. Durē ni'wam norī hā 'Re ihāimana u'āsi mono wasu'u na te te 're wawapari ze za'ra mono wamhā, wa za durē wasina waihu'u pese za'ra ni, 'Re ihāimana u'āsi mono pē'ēzani hawi roti sena uptabi zarina 're ihāimana za'ra mono na hā.

'Re ihāimana u'āsi mono nhimizawi pese zé wasu'u

⁷ Īsisānawā norī, 're ĩdasawi pese za'ra mono zé hā 'Re ihāimana u'āsi mono te wa, wa za āma 're wasisawi pese uptabi za'ra. Ni'wam norī hā te te 're dazawi pese za'ra mono wamhā, ta norī hā 'Re ihāimana u'āsi mono 'ra, te oto 're hāimana za'ra. 'Rāwi te durē te te 're waihu'u pese za'ra, 'Re ihāimana u'āsi mono hāimanazé hā.

⁸ 'Re ihāimana u'āsi mono hā, simizawi pese uptabi di. Tinhimizawi zarina te uburē marī hā te te dama 're ab'manharī u'āsi. Taha wa, ni'wam norī hā te te 're dazawi pese za'ra mono ō wamhā, 'Re ihāimana u'āsi mono siré 'rāwi 're nomro mono ō di, ta norī hā.

⁹ 'Re ihāimana u'āsi mono hā ma tō tinhimizawi pese zé hā wama waihu'u za'ra. E niha ma tō wama waihu'u za'ra. Ti'ra hā misi nherē, ma tō we satō ti'ai u, taha āma si rowē na 're wanomro u'āsi mono da.

¹⁰ Wa norī hā 'Re ihāimana u'āsi mono, wama sawi pese za'ra di. Tane nherē, te taha nhipai u te te 're wa'azawi pese uptabi. Taha wa, ma tō ti'ra we satō ti'ai u, wazada dā'ā da, wazada dā'ā wa, wawasétē na te te oto 're wa'ab'madā'ā tō mono da. Tō sena ĩsimizawi pese zé hā siwaprosi te tāma 're hāimana, danhipai u.

¹¹ Īsisānawā norī, 'Re ihāimana u'āsi mono hā āne hā te te 're wa'azawi pese mono wa, wa za wa norī zama taha zarina 're wasisawi pese za'ra, ĩsine.

¹² 'Re ihâimana u'âsi mono hâ ni'wa titômo na te te 'madâ'â ô di. Tane nherê, 're wasisawi pese za'ra mono wamhâ, 'Re ihâimana u'âsi mono hâ te za wa'rata 're sâmbra u'âsi, 'râwi. Te te 're iwa'azawi pese mono zé hâ wa za duré wa te wasina âma 're uwaimrami u'âsi za'ra.

¹³ E niha wa za wasina waihu'u pese za'ra ni, 'Re ihâimana u'âsi mono âma si 're iwanomro mono na, duré ôhõ si wa'rata 're isâmbra u'âsi mono na. 'Re ihâimana u'âsi mono hâ ma tô Tipê'ezani hâ te te wama 're anhomri. Taha na wa za wa te wasina 're waihu'u pese za'ra.

¹⁴ Wamama hâ ma tô ti'ra hâ we satô, Danho'reptui'wa da. Ta hâ wa tô wa te 're 'madâ'â za'ra, watômo na. Âhâna wa oto wa te dama 're wasu'u za'ra, Danho'reptui'wa na, I'ra hâ.

¹⁵ Âté ni'wam norî hâ te za âne te te dama 're wasu'u za'ra: "Zezusi hâ 'Re ihâimana u'âsi mono 'ra. Ta hâ ma tô 'Re ihâimana u'âsi mono hâ we ti'ai u satô, Danho'reptui'wa da." Âne na ni'wam norî hâ te te dama 're wasu'u za'ra mono wamhâ, ta norî 'ratap si te 'Re ihâimana u'âsi mono hâ 're hâimana, 'râwi. Ta norî si te 'Re ihâimana u'âsi mono siré 're hâimana u'âsi za'ra, 'râwi.

¹⁶ 'Re ihâimana u'âsi mono hâ simizawi pese uptabi di. Tane ni'wam norî hâ te te 're dazawi pese za'ra mono wamhâ, ta norî si te 'Re ihâimana u'âsi mono âma 're hâimana za'ra, 'râwi. Ta norî 'ratap si te 'Re ihâimana u'âsi mono hâ 're sâmbra, 'râwi. 'Re ihâimana u'âsi mono te te 're iwa'azawi pese mono zé hâ wama waihu'u pese za'ra di oto. Taha na wa te wasiwi âma 're wawâ za'ra mono ô di oto.

¹⁷ Niwapsi te za Zezusi hâ dahâimanazém na da'waihu'u, za te te da'âma I'arowairébézéb âma hâ. Tawamhâ 're ihâimana wasété za'ra mono norî si te za hâ za'ra oto. Cristu hâ ti'ai âma 're morî ré, sihâiba zawi âna te te 're idazawi pese mono ne, ti'ab ré 're wasisawi pese za'ra mono wamhâ, tawapsi, wasina wapahi za'ra ô di za, za da'âma isipo'ozéb âma hâ oto. 'Re ihâimana u'âsi mono te te 're iwa'azawi pese mono zé hâ wa te tâma âma 're uwaimrami u'âsi za'ra mono wa, wa za wasina wapahi âna isô'a wahâimana za'ra ni.

¹⁸ 'Re ihâimana u'âsi mono ma, tâma wazawi pese za'ra nherê, wasina 're wapahi za'ra mono ô di za oto. Te te 're iwa'azawi pese mono zé hâ te te wama âma 're a'uwaimrami u'âsi mono nherê, tâma 're wapê'ewara waihu'u za'ra mono ô di za oto. Tane nherê, ni'wam norî hâ sina pahî na 're hâimana za'ra mono wamhâ, tawamhâ, te te 're isawi pese za'ra mono zém na te te tâma âma 're uwaimrami za'ra mono ô di za, 'Re ihâimana u'âsi mono ma. Ta norî hâ sina pahî u'âsi 're hâimana za'ra mono wa, te za romhâ ré robzei'ô na 're hâimana za'ra ti'ab ré, 'Re ihâimana u'âsi mono hâ za da'âma isipo'ozéb âma te te da'ahâ za'ra wa, da te 're irobzépata za'ra mono ne.

¹⁹ 'Re ihâimana u'âsi mono hâ imorî'rata na te te 're wa'azawi pese mono wa, wa duré wa norî hâ wa te wasiwi 're sawi pese za'ra, asa. Taha wa, wa duré 're wasisawi pese za'ra.

²⁰ Âté ni'wam norî hâ te za taré âne dama 're siwasu'u za'ra: "'Re ihâimana u'âsi mono hâ wa wa te 're sawi pese za'ra.'" Âne dama 're siwasu'u za'ra mono nherê, te te 're da'ruiwapari u'âsi za'ra mono wamhâ, sadawa nhipese na te ta norî hâ 're hâimana za'ra. Titômo na 'râwi te te 're i'madâ'â za'ra mono norî hâ te te 're sawi pese za'ra mono ô nherê, e niha te za tawamhâ 'Re ihâimana u'âsi mono hâ dahâiba u'âbâ te te siwi 're sawi pese, titômo na te te siwi 're 'madâ'â mono ô nherê. Âne wamhâ, tâma sawi waihu'u za'ra ô di, ta norî ma hâ.

²¹ Zezusi hâ ma tô âne te te wama 're roti za'ra: "Ni'wam norî hâ 'Re ihâimana u'âsi mono te te siwi 're sawi pese za'ra mono wamhâ, taha zarina te za duré te te 're dazawi pese za'ra.'" Âne isimiroti hâ, wama za'ra hâ.

5

Îsazei'wa norî hâ siptete sina dawi 're ihâimana za'ra mono zé wasu'u

¹ Ni'wam norî hâ, Zezu Cristu, Danho'reptui'wa da, 'Re ihâimana u'âsi mono te te ipisutu na te te 're sazei pese za'ra mono wamhâ, ta norî si te 'Re ihâimana u'âsi mono 'ra, 're hâimana za'ra. Ni'wa hâ aibâ hâ wama sawi pese za'ra wamhâ, taha u'âbâ, wa duré i'ra norî hâ wa te 're sawi pese za'ra.

² Taha zarina wa za duré âne hâ waihu'u za'ra ni: 'Re ihâimana u'âsi mono hâ wama sawi pese za'ra wamhâ, duré isimiroti hâ wa te 're 'madâ'â pese za'ra mono wamhâ, taha u'âbâ, wa za i'ra hâ tô sena 're wasisawi pese za'ra, wasiré isazei'wa norî hâ.

³⁻⁴ Tawamhâ 'Re ihâimana u'âsi mono hâ wa te wasiwi 're sawi pese za'ra mono wamhâ, e niha wa za tawamhâ 're wahâimana za'ra. Isimiroti si wa za wa te 're 'madâ'â pese za'ra. E isimiroti hâ wama pire za'ra di, wa te 're i'madâ'â pese za'ra mono zéb da hâ. Mare di. 'Re ihâimana u'âsi mono 'ra, oto 're wanomro mono wa, wama waihu'u pese za'ra di, wa te tâma âma 're i'uwaimrami za'ra mono zéb da hâ. Taha wa, wanhiptete na wa za 'Re ihâimana u'âsi mono wê'ô'wa norî da, 're wahâimana za'ra, uburé marî îwasédé hâ ti'ai âma 're ihâimana za'ra mono wi. E niha wa za wanhiptete sina âma 're wahâimana za'ra. Zezusi hâ

Wanho'reptui'wa na wa te wasina 're ĩ'umnhasi pese za'ra mono zém na wa za wanhiptete sina dawi 're wahâimana za'ra.

⁵ E 'wam norĩ hã te za tawamhã 'Re ĩhâimana u'âsi mono wê'ô'wa norĩ zada hã, siptete sina 're hâimana za'ra. Zezusi hã, 'Re ĩhâimana u'âsi mono 'ra na te te 're ĩsaze za'ra mono norĩ si, te za sada 're hâimana u'âsi za'ra, 'Re ĩhâimana u'âsi mono wê'ô'wa norĩ zada hã.

Cristu hã a'uwê hâiba na dasiré ĩpoto na tô sena na da te 're ĩwaihu'u za'ra mono zé wasu'u

⁶⁻⁸ Zezu Cristu hã ti'ai u wei morĩ wamhã, a'uwê hâiba na ma tô podó. E niha wa za tawamhã wasiwi waihu'u pese za'ra ni, sena na Zezusi hã a'uwê hâiba na ĩpoto na, duré ti'ai âma a'uwê hâiba na 're ĩmorĩ na. Si'ubdatô ĩwaihu'uzé hã. ĩmorĩ'rata na ĩwaihu'uzé hã âne: Ti'ai âma poto wamhã, â na ma podó, tina dub're hawi, dasine. Duré maparane âma ĩwaihu'uzéb da hã âne: Ô hã dá'â wamhã, ĩwapru hã ma tô tiwi puru, da te dasiwi ĩwa'rézéb âma hã. Taha na wa za wasiwi waihu'u pese za'ra ni, a'uwê hâiba na 're ĩmorĩzém na. Duré si'ubdatô âma ĩwaihu'uzéb da hã âne: 'Re ĩhâimana u'âsi mono pē'ēzani, tô sena na si te te wama 're ĩwaihu'u mono zém na, wa za duré wa te âma 're waihu'u pese za'ra. Ta hã te sadawa nhipepe âna 're hâimana u'âsi. Tô sena uptabi na si ĩsimiroti hã. Â na ĩpotozé wasu'u hã, duré dá'â wa, ĩwapru tiwi ĩpu'uzé wasu'u hã, duré 'Re ĩhâimana u'âsi mono pē'ēzani nhimirowasu'u hã, â norĩ waihu'uzém na marĩ aimawi na wa te âma 're waihu'u za'ra mono ô di. Âhã wasu'u si wa tô upsâtã pese na wasiwi waihu'u pese za'ra ni, Zezusi hã a'uwê hâiba na ĩpotozé wasu'u si.

⁹ Marĩ na tô sena na da te wama 're rowasu'u za'ra mono wamhã, wa za tô wa te âma 're saze za'ra. Tawamhã, 'Re ĩhâimana u'âsi mono hã marĩ hã te te wama 're awaihu'u mono wamhã, e wa te âma 're saze za'ra mono ô di za. Da te wama 're ĩrowasu'u za'ra mono zém nhĩpai u hã, wa za tô wa te âma 're sazei pese za'ra, simiroti pire uptabi wa, 'Re ĩhâimana u'âsi mono hã. E niha tawamhã ma tô wama waihu'u za'ra. Zezusi hã tô sena, ti'ra uptabi na ma tô wama waihu'u za'ra. Taha wa, tô sena wa, wa za wa te âma 're sazei pese za'ra, ône haré.

¹⁰ Ni'wam norĩ hã, Zezusi, 'Re ĩhâimana u'âsi mono 'ra hã te te sina 're umnhasi za'ra mono wamhã, ta norĩ si te za tipē'ē na sena na te te 're waihu'u za'ra, â na ĩpotozé wasu'u na, duré ĩwapru, tiwi ĩpu'uzé wasu'u na. 'Re ĩhâimana u'âsi mono pē'ēzani te te tâma 're ĩwaihu'u mono zéb zarina si, te za sena na te te 're waihu'u za'ra, a'uwê hâiba na ĩpoto na, Zezusi hã. Tane nheré, ti'ra na Zezusi te te dama 're ĩwaihu'u mono zém na, ni'wam norĩ hã 'Re ĩhâimana u'âsi mono hã te te âma 're saze za'ra mono ô wamhã, ĩsadawa nhipe hã te te âma 're sa'ra za'ra, ta norĩ hã.

¹¹ E niha 'Re ĩhâimana u'âsi mono hã, ti'ra te te dama 're ĩwaihu'u mono zé hã. Ta hã ma tô te te wama 're apisutu, ĩ'ra wazada ĩdã'âzém na âma 're ĩwanomro u'âsi mono zéb da hã.

¹² Ni'wam norĩ hã 'Re ĩhâimana u'âsi mono 'ra siré, 'rãwi 're nomro mono wamhã, ta norĩ hã te za dá'â âna 're hâimana u'âsi za'ra, 'Re ĩhâimana u'âsi mono 'rata. Tane nheré, ni'wam norĩ hã 'Re ĩhâimana u'âsi mono 'ra siré 're nomro mono ô wamhã, ta norĩ hã ĩ'rata dá'â âna 're hâimana u'âsi za'ra mono ô di za.

'Re ĩdanomro u'âsi mono zé, da te dasina 're ĩuwaimrami za'ra mono zé wasu'u

¹³ E marĩ da, wa âne aima rob'ui'ére za'ra wa'wa, 'Re ĩhâimana u'âsi mono 'ra, asina 're ĩ'umnhasi za'ra wa'aba mono norĩ ma. Aipē'ē 're, atã'â âna 're anomro u'âsi aba mono zém na sena na asina waihu'u pese za'ra wa'aba da, wa âne aima rob'ui'ére za'ra wa'wa.

¹⁴ 'Re ĩhâimana u'âsi mono te te wama 're ĩawé mono zéb uwaibaba si, uburé marĩ na wa te tiwi 're rowaptērē za'ra mono wamhã, tô sena te za wamreme hã te te 're awapari pese, te te wama âma 're ĩ'a'uwaimrami mono zéb da hã. Taha wa, wasina wahâtã'â âna, wa za 'rãwi wapē'ē 're ĩtème 're wasihutu, 'Re ĩhâimana u'âsi mono u hã.

¹⁵ Uburé marĩ na wa te tiwi 're ĩrowaptērē za'ra mono zém na te wa'âma 're po're pu'u u'âsi, wamreme na. Tô sena na, wa tô âne na waihu'u za'ra ni. Taha zarina wa duré wasina waihu'u pese za'ra ni, za te te wama âma 're ĩ'a'uwaimrami mono zém na hã.

¹⁶⁻¹⁷ Uburé da te 're ĩ'manharĩ wasété za'ra mono zé hã, dawasédé tô, simisutu. Tane nheré, ni'wam norĩ hã tiwasédé hã te te 're 'manharĩ za'ra mono nheré, 'Re ĩhâimana u'âsi mono nhimiroti u tiwasété wi oto 're sipizari za'ra mono wamhã, ô hã te te âma 're ab'madã'â mono ô di za oto. Tawamhã 'Re ĩhâimana u'âsi mono 'rata 're ĩdanomro u'âsi mono zé hã, tiwi 're simani za'ra mono ô di za oto.

Tawamhã ni'wam norĩ hã ĩwasédé hã âne na te te 're 'manharĩ za'ra mono wamhã, duré ĩwasété na waihu'u za'ra wa'aba wamhã, te za âma 're aimreme zusi aba mo, 'Re ĩhâimana u'âsi mono ma, ĩpē'ē 're, dá'â âna 're ĩhâimana u'âsi za'ra mono zé hã te te tâma 're apisutu mono da oto.

Tane nherē, ni'wam norī hā tiwasété wi 're Isipizari za'ra mono zéb zô, 'Re İhâimana u'âsi mono pê'êzani te te tâma 're İroti za'ra mono zé hā te te 're wapari za'ra mono ô wamhā, 'Re İhâimana u'âsi mono hā te za İwasédé hā te te âma 're ab'madâ'â u'âsi. 'Re İhâimana u'âsi mono 'rata 're İdanomro u'âsi mono zé hā te te sina 're uwaimrami za'ra mono ô di za. Tiwasété wi 're sipizari za'ra mono ô nherē, e niha te za 'Re İhâimana u'âsi mono hā âma 're siwamri za'ra, te te 're isô'reptu za'ra mono zéb da hā. Taha wa, ta norī âma hā te âma aima roti za'ra wa'aba ô di za, âma 're aimreme zusi aba mono zéb da hā.

¹⁸ Ni'wam norī hā 'Re İhâimana u'âsi mono hā âma 're 'ra za'ra mono wa, İsib'a'uwē oto 're nomro wē mono wamhā, tiwasédé te te oto 're 'manharī u'âsi za'ra mono ô di. 'Re İhâimana u'âsi mono 'ra hā, Zezusi hā oto âma 're sisaprī u'âsi za'ra mono wa, tiwasédé hā te te 're 'manharī waihu'u za'ra mono ô di oto. Taha wa, İwasété uptabi hā te te oto 're upi waihu'u za'ra mono ô di za, Wa'uburé hā. Âne hā wama waihu'u pese za'ra di oto.

¹⁹ Ti'ai âma uburé 'Re İhâimana u'âsi mono wē'ô'wa norī hā İwasété uptabi zadawa para te 're hâimana za'ra. Wa norī si 'Re İhâimana u'âsi mono nhib'a'uwē, wa 're wanomro. Âne hā wama waihu'u pese za'ra di duré.

²⁰ Âne wa tô duré waihu'u za'ra ni. Zezusi hā, 'Re İhâimana u'âsi mono 'ra hā ma tô wei mo, ti'ai u. Ta hā ma tô tinhimiroti na te te 're wa'apawapto, 'Re İhâimana u'âsi mono hā tô sena uptabi hā wa te 're İwaihu'u pese za'ra mono zéb da hā. İ'ra âma, Zezu Cristuhu âma 're wanomro mono wa, wa duré İmama âma 're wanomro, tô sena uptabi âma. Zezusi hā, ta hā uburé Danhib'apito uptabi. Ta hā dapê'ê 're dadâ'â âna 're İdanomro u'âsi mono zé hā, te te dama 're İ'apisutu mono. Âne na wa tô wasiwi waihu'u pese za'ra ni.

²¹ İ'ra norī, İma asawi pese za'ra wa'aba norī hā, 'Re İhâimana u'âsi mono upana waihu'u pese newa, marī na 're İdawata za'ra mono norī wi, te za 're asi'madâ'â pese za'ra wa'aba mo, 'râwi da'âma 're sasômri za'ra wa'aba mono tô da.

2 Zuwā

Zuwā hā maparane āma te te duré ĩrob'ui'érézé, ĩsazei'wa norĩ ma ĩbaihā wasu'uzé

Ā ĩbaihā na rob'ui'éré na Zuwā hā ma tō ĩsazei'wa norĩ hā āma pawaptob za'ra, 're sisawi pese za'ra mono da, duré roti senai'ō hā te te 're wapari za'ra mono tō da, daro mono bā te te ĩropéi mono hā.

¹ Wa hā, Wanhĩb'apito zazei'wa norĩ 'madā'ā'wa, wa āma aima rob'ui'éré za'ra wa'wa, tinhib'a'uwē da, 'Re ĩhāimana u'āsi mono te te 're ĩ'āipisutu za'ra wa'aba mono norĩ ma. Tame te asiré ĩsazei'wa norĩ hā asiré 're asi'rā'ōtō u'āsi aba mo. Pi'ō norĩ hā t'i'ra te te 're ĩ'madā'ā pese za'ra mono ne, te 're asi'madā'ā pese za'ra wa'aba mo, ĩsazei'wai mono bā. Taha wa, simisutu ĩma asawi pese za'ra wa'aba di, tō sena. Tane nherē, ĩma si asawi za'ra wa'aba ō di. Uburé Zesusihĩ wasu'uwē hā te te ĩwaih'u'u pese za'ra norĩ ma zama, asawi za'ra wa'aba di duré.

² ĩwasu'uwē hā tō sena uptabi hā wasiré wa te 're 'madā'ā pese za'ra mono wa, wa wa te 're asawi pese za'ra wa'wa. Ōne u'āsi te za ĩwasu'uwē hā wasiré 're hāimana u'āsi.

³ Wamama ma, wa 're ĩmreme u'āsi, 'Re ĩhāimana u'āsi mono ma, duré ĩ'ra Zezu Cristuhu ma zama, ĩsimizawizé hā wa'āma 're hāimana u'āsi za'ra mono da, ta norĩ āma si rowē u'āsi, āma 're wanomro mono da. Wa'āma 're siwārĩ u'āsi zahuré mono da, wa duré tāma 're ĩmreme u'āsi zahuré. Āne te za te te wama 're apisutu zahuré, Wamama nhimiroti si tō sena na wasiré wa te āma 're ĩ'madā'ā pese za'ra mono norĩ ma, duré 're ĩwasisawi pese za'ra mono norĩ ma zama.

ĩsazei'wa norĩ, tō sena Cristuhu wasu'uwē zarina si 're ĩhāimana za'ra mono zé wasu'u

⁴ Ni'wam norĩ hā asiré 're ĩ'āihāimana za'ra wa'aba mono norĩ hā ĩwasu'uwē tō sena zarina si te, u, 're hāimana za'ra, Wamama te te wama 're ĩ'aroti mono zéb zarina si. Āne hā te wapari wamhā, ma tō ĩwasu'u wē za'ra hā ĩma rowē waze. Taha wa, ĩtoi uptabi di, āhāna hā.

⁵ Wasiré ĩsazei'wa norĩ, ĩma asawi pese za'ra wa'aba norĩ hā, āne wa za oto aima roti za'ra wa'wa. Uburé wasiré ĩsazei'wa norĩ hā, oto 're wasisawi pese za'ra wa'aba mono. Ā hā roti hā āhāna si ō di. Duréihā ĩsāna'rata hawimhā, Zezusi wa te 're ĩsaze na'rata za'ra mono zém hawĩ, wama 're ĩhāimana u'āsi za'ra mono, ā hā.

⁶ E niha tawamhā, āma 're ĩwasisawi pese za'ra mono zé hā za. 'Re ĩhāimana u'āsi mono nhimiroti si wa za wa te 're 'madā'ā pese za'ra. Āne ma tō ĩsāna'rata hawimhā, ĩsimiroti wasu'u hā 're ĩwapari za'ra wa'aba mo, āma 're asisawi pese za'ra wa'aba mono sina āma 're āihāimana u'āsi za'ra wa'aba mono da.

⁷ 'Re ĩhāimana u'āsi mono zadawa wasu'u uptabi 'wa newa, roti tō senai'ō na te te dama 're ĩroti za'ra mono norĩ hā ahā uptabi di oto. Daro mono bā te dawazari 're hāimana za'ra. Zezu Cristu hā, a'uwē hāiba na dasiré ĩpoto ō na, te ta norĩ hā sō 're simrami za'ra dama, 'Re ĩhāimana u'āsi mono hā Danho'reptui'wa da, te te ĩpisudu hā. Ni'wam norĩ hā ta norĩ ne 're hāimana za'ra mono wamhā, te za ĩwaih'u'u za'ra wa'wa, roti tō senai'ō na te te dama 're ĩroti za'ra mono hā. Te za duré ĩwaih'u'u za'ra wa'wa, Cristuhu zada 're ĩhāimana za'ra mono na hā.

⁸ Taha wa, roti tō senai'ō na te te dama 're ĩroti za'ra mono norĩ wi, te za 're asi'madā'ā pese za'ra wa'aba mo 'rāwi, 're ĩromhuri za'ra wa'aba mono zé wa'ā hā 're simini tō za'ra wa'aba mono da. Uburé marĩ ĩwē na 'Re ĩhāimana u'āsi mono, za te te aima ĩwa'ābā za'ra wa'aba zé hā ubuni na asima 're waibui wa'aba mono da, te za 'rāwi 're asi'madā'ā pese za'ra wa'aba mo.

⁹ Ni'wam norĩ hā Cristuhu nhimiroti si te te 're wapari za'ra mono ō wamhā, tinhimirosa'rata na te te āma 're uzusi za'ra mono wamhā, ta norĩ hā 'Re ĩhāimana u'āsi mono siré 'rāwi 're hāimana za'ra mono ō di. Tane nherē, ni'wam norĩ hā Cristuhu nhimiroti zarina si 're nomro mono wamhā, ta norĩ si te Wamama siré 're hāimana za'ra 'rāwi, ĩ'ra siré zama.

¹⁰ Duré Cristuhu nhimiroti upana te te dama 're ĩroti za'ra mono hā ta norĩ hā atēme 're sihutu aba mono wamhā, sō 're atob'uzu za'ra wa'aba mono ō di za, asōrōwa u 're sisisi aba mono da.

¹¹ Sō 're atob'uzu za'ra wa'aba mono wamhā, ĩsimiromhuri wasété na te za ĩme 're aiwasété za'ra wa'aba mo, āma 're sasōmri za'ra wa'aba mono wa.

Zuwāhā nhimi'ui'éré 'rāsutuzé wasu'u

¹² Zahadu marĩ hã ahã uptabi di, te aima ĩwaihu'u za'ra wa'aba zéb da hã. Tane nherẽ, ãhãna hã te ĩsima wẽ õ di, ĩbaihã na te aima ãma ĩrob'ui'éré za'ra wa'aba da hã. ãma atẽme ĩmorĩ aba da si, wa ĩsima rob'madã, wasisabu za'ra da. Tawapsi wa za 'rãwi wasisadawa 'madã'ã za'ra ni. Tawapsi wasima watoi uptabi za'ra di za oto.

¹³ ãme wasiré ĩsazei'wa norĩ hã te duré ãma asawi za'ra wa'wa, ai'ra waptéb za'ra wa'aba ne, 're ĩnomro mono norĩ hã, 'Re ĩhãimana u'ãsi mono, tinhĩb'a'uwẽ da, te tẽ ĩpisutu za'ra norĩ hã.

3 Zuwā Zuwā hā si'ubdatō āma te te duré ĩrob'ui'érézé, Da'izuhu ma Ībahiā wasu'uzé

Ā ĩbahiā na rob'ui'éré hā Zuwā hā ma tō aibā ma tisō, Da'izu na ĩsisi ma. Īsazei'wa norī 'madā'ā'wa, ta hā. Zuwā hā ma tō āma tiwata, ĩsimiromhuri na, duré aibā ĩhāiba amo āma zama, Demetirizuhu āma. Tazahā aibā ĩhāiba amoi ma, ma tō timreme hā pētē, Di'oterepesi na ĩsisi ma, ta hā rob'uwaibaba 're morī ō wa.

¹ Da'izu, a hā ĩsiwadi uptabi, ĩma asawi uptabi di, tō sena. Wa hā, Wanhīb'apito zazei'wa norī 'madā'ā'wa, 're ĩhāimana mono, wa za oto aima āma rob'ui'éré.

² ĩsiwadi, 're aimorī wē u'āsi wa, te 'rāwi asiwē'ō āna 're aihāimana mo, ato sina. Taha wa, wa tō te ĩsima 're aiwē, uburé marī ĩwē si aima 're hāimana u'āsi mono da. Wa duré te ĩsima 're aiwē, aihāzé āna 're aihāimana mono da.

³ 'Re aihāimana mono zém hawī, ma tō wasisānawā norī hā we ĩtēme 're sihutu. We 're sihutu mono sidāpāsi, ma tō siparabāsi te te ĩma 're aiwasu'u wē za'ra, 'Re ĩhāimana u'āsi mono nhimiroti zarina si 're aihāimana wē mono na hā. Taha wa, aiwasu'u ma hā ĩtoi uptabi di. Ōhō na si te tō 're aihāimana u'āsi mo, rēme waihu'u āna.

⁴ Āne hā ĩra norī āma te 're waparī wē za'ra mono wa, ĩma 're rowē uptabi mono di, Wanhīb'apito wasu'u'uwē na te āma 're ĩpo're pu'u za'ra mono zéb zarina te te 're ĩsazei pese za'ra mono norī āma. ĩra norī 're ĩhāimana wē za'ra mono wasu'u te 're waparī mono wamhā, ĩma 're rowē uptabi mono di. Marī na uburé rowasu'u hā te 're waparī wē mono nherē, te te siwī āma wabzu ō di, ĩra norī wasu'u te 're ĩwaparī zeī mono zém na hā.

Da'izuhu wasu'u wē wasu'u

⁵ ĩsiwadi, ĩma asawi pe hā, asimi'ē na te ĩsazei'wa norī āma 're aiwāri u'āsi mo, darob amoi hawī atēme 're ĩsihutu mono norī āma. Ta norī hā aima sa'rese za'ra ō nherē, te ai'umnhasi na tāma 're aihāimana za'ra mo.

⁶ Ta norī hā ma tō asimizawī pese zém na we te te 're aiwasu'u za'ra, āme ĩsazei'wa norī 're ĩsi'rā'ōtō mono norī nho'a. ĩsazei'wa norī hā darob amoi hawī atēme 're ĩsihutu mono norī hā, aihawī nimomo 're nomro mono ō ré, marī na āma 're aiwāri za'ra mono wamhā, wē di, ubana 're nomro tō mono da. Wē uptabi di. 'Re ĩhāimana u'āsi mono te te aima 're ĩawē mono zéb zarina si te za āma 're aiwāri za'ra mo.

⁷ Ta norī hā Wanhīb'apito ma, te te 're romhuri za'ra mono da, ma tō si'uihā na asatōri za'ra, tirom hawī, daro mono bā te te dama 're sadawa wasu'u za'ra mono da. Duré ĩsazei'ō'wa norī hā marī na āma 're siwāri za'ra mono da, sina sō 're simnhasi za'ra mono ō di, ĩsadawa wasu'u'wa norī hā. Mare di.

⁸ Taha wa, wa norī si wa za āma 're wasina u'āsi. Zezusihi wasu'u'uwē hā ta norī hāiba u'ābā, wa te āma 're ropéi mono da, wa za āma 're wasina u'āsi, tō sena.

Di'oterepesihi wasu'u, Demetirizuhu wasu'u me

⁹ Āne wa za duré āma aima waihu'u. ĩnhimi'ui'éré hā tamomo wa tō āma tisō ĩsryre hā, ĩsazei'wa norī hā asiré 're ĩsi'rā'ōtō mono norī ma. Tane nherē, te ni'wa hā tame 're sāmra, ĩwē'ō'wa hā, Di'oterepesi na ĩsisi hā. Ta hā uburé asiré ĩsazei'wa norī ma, si'apito da si te te sina 're rob'ruiwaparī u'āsi mono wa, ĩnhimiroti hā te te 're waparī mono ō di, ĩsipai u da'madā'ā'wa na 're ĩhāimana mono 'ru te.

¹⁰ Taha wa, atēme āma ĩwisi wapsi, wa za ĩsimiromhuri wasété na asiré ĩsazei'wa norī hā āma po're pu'u za'ra, ĩsō'a. Ta hā te sadawa nhipese na taré te te dama 're wabāsi wasété u'āsi. Tane nherē, taha si ō di, tiwasédé te te 're ĩ'manharī mono zé hā. ĩsazei'wa norī hā darob amoi hawī ĩtēme 're sihutu mono wamhā, ĩsōrōwa u ĩtēme 're ĩsisi mono da hā, te te 're dawaihui mono ō di. Ōne haré te te tāma 're arob'ru. Duré tame ĩsazei'wa norī hā 're ĩsi'ubumroi mono norī wi, te duré te te 're awē'ō, ĩsiré ĩsazei'wa norī hā darob amoi hawī ĩtēme 're sihutu mono wa, sō 're hāsi tō mono da, ĩsōrōwa u ĩtēme 're sisisi tō mono da. Tane nherē, ĩsazei'wa norī hā te te 're waparī za'ra mono āna, tisiré ĩsazei'wa norī hā tinhorōwa u te te 're 'mazasi za'ra mono wa, te duré ō hā da'mazasi'wa norī ma, te te tāma 're arob'ru, tisiré ĩsazei'wa norī wi 're wairébé mono da, siré 're hāimana tō za'ra mono da oto, rowahutuzéb 'remhā.

¹¹ ĩsiwadi, ĩma asawi pe hā, dapo're āna dawasédé da te 're ĩ'manharī za'ra mono ne, 're aihāimana mono ō di za, ō aibā hā 're ĩmorī wasété ne hā. Marī ĩwē zō si te za asima 're ĩrob'madā'ā u'āsi mo, 're idahāimana wē za'ra mono norī ne. Ni'wam norī hā marī ĩwē si te te sima 're 'madā'ā za'ra mono wamhā, ta norī si te 'Re ĩhāimana u'āsi mono nhīb'a'uwē 're hāimana za'ra. Duré ni'wam norī hā tihāimana wasété si te te sima 're wē uptabi za'ra mono

wamhã, ta norĩ hã 'Re ìhâimana u'âsi mono hâimanazé hã 'râwi te te 're waihu'u za'ra mono ò di.

¹² Aibã hã te aihĩni ìsazei'wa norĩ hã te te siwi 're wasu'u wê za'ra, Demetirizu na, ìsisi hã. Duré 'Re ìhâimana u'âsi mono te te tãma 're ìwê mono zéb zarina si, sena na 're ìhâimana mono na ma tô ìwaihu, 're ìhâimana wê mono zém na hã, ta hã. Ìzama wa duré te ãma 're wasu'u u'âsi, wê na dama 're ìhâimana mono na hã. A hã ma tô, tô sena ìnhimiroti na hã ìwaihu.

Zuwã te te ìrob'ui'ééré 'rãsutu zéb ãma, ìsazei'wa norĩ te te ìazawizé

¹³ Zahadu marĩ hã ahã uptabi di, te ãima ãma ìwaihu'uzéb da hã. Tane nherê, te ìsima wê ò di, ìbaihã na te ãima ãma ìrob'ui'ééré da hã, ãhãna hã.

¹⁴ 'Râwi ìwasisõpētē su'u da si, wa ìsima te rosa'rata u'âsi. Tawapsi wa za 'râwi wasisadawa 'madã'ã ni.

¹⁵ Wa duré ai'ãma 're ìmreme u'âsi, 'Re ìhâimana u'âsi mono ma, rowê u'âsi 're aihâimana mono zé hã te te ãima 're pisutu u'âsi mono da. ãhãna wasiwadi norĩ zama te ãma asawi za'ra, ãme ìsiré 're ìhâimana za'ra mono norĩ hã. Ma'ãpé, wasiwadi norĩ hã ai'rata 're ìhâimana za'ra mono norĩ hã ìhãiba mono bã ìma sawi za'ra na.

Zudasi

Īsazei'wa norĩ ma, Zudasi te te ĩrob'ui'érézé

Ībaihâ wasu'uzé

Ā ĩbaihâ na rob'ui'éré há Zudasi há ma tó âma rob'ui'éré. Āté tó ô há Zezusihi no, Marcusi te te ĩwasu'u há Marcusi 6.3 âma há. Zezusihi zazei'wa norĩ ma, ma tó â há tinhimĩ'ui'éré há time, roti senai'ô na rowasu'u'wa norĩ da, hâimana nhimiza'rese 're hâimana za'ra mono da.

Zudasi há ma tó sima wê, tinhimĩ'ui'éré na ĩsazei'wa norĩ há te te 're pawaptob za'ra mono da, 'Re ĩhâimana u'âsi mono nhimipawaptobzém na hâimana nhiptete sina 're nomro mono da. Ma tó duré tâma roti za'ra, 'Re ĩhâimana u'âsi mono zadawa wasu'u há te te dawĩ 're t'udâ za'ra mono norĩ há te te 're wapari za'ra mono tó da, 'Re ĩhâimana u'âsi mono za te te 're ĩhâ za'ra mono norĩ há.

¹ Wa há Zudasi, Zezu Cristuhu ma romhuri'wa, duré Ti'aduhu no, wa aima âma rob'ui'éré za'ra wa'wa. 'Re ĩhâimana u'âsi mono há ma tó te te 're aipisutu za'ra wa'wa, ĩsib'a'uwé oto 're aihâimana za'ra wa'aba mono da. Taha wa, tâma asawi pese za'ra wa'aba di, Wamama ma há. Duré Zezu Cristu há te te 're ai'madâ'á pese za'ra wa'aba mono di oto.

² Wa há wa ai'âma 're ĩmreme u'âsi za'ra wa'wa, 'Re ĩhâimana u'âsi mono ma, da'âma 're ĩpê'ézé mono zé há aima 're hâimana u'âsi za'ra wa'aba mono da, sa'été na, duré rowé há te te aima 're pisutu za'ra wa'aba mono da. Wa te te tiwi 're rowaptêrê u'âsi duré, ĩsimizawizé há ai'âma 're hâimana u'âsi za'ra wa'aba mono da.

'Re ĩhâimana u'âsi mono nhimiroti upana, ĩsazei'wa norĩ ma, rowasu'u nhipese'wa norĩ wasu'u

2 Pedru 2.1-22

³ ĩsisânawâ norĩ, ĩma asawi pese za'ra wa'aba norĩ há, wa tó aré ĩsima rosa'rata, 'Re ĩhâimana u'âsi mono te te 're ĩwa'anho'reptui mono zém na te aima rob'ui'éré za'ra wa'aba da. Tane nherê, marĩ ĩwasétére há ai'âma 're hâimana za'ra wa'aba mono wa, wa tó ĩnhimirosa'rata na ĩsima âma saprĩ, taha na si te âma aima rob'ui'éré za'ra wa'aba da. Wa norĩ há 'Re ĩhâimana u'âsi mono nhĩb'a'uwé, wa oto 're wahâimana za'ra. Ta há ma tó misi haré te te wama 're anhomri, Cristuhu wasu'uwé na roti há âma 're ĩwanomro mono zéb da há. Taha wa, wa oto aima âma rob'ui'éré za'ra wa'wa, taha na si dama 're asiwasu'u nhiptete za'ra wa'aba mono da.

⁴ E marĩ wa. Ni'wam norĩ há, 'Re ĩhâimana u'âsi mono nhimiroti wê'ô'wa norĩ há te aiwazari 're hâimana za'ra wa'wa. Sô'awi te te 're rowahutu za'ra mono nherê, te ta norĩ há roti na te te aiwi âma 're upa za'ra wa'wa. Taha wa, ĩsimiroti za'ra há tó sena newa, te asiré ĩsazei'wa norĩ há 're ĩwapari za'ra wa'aba mo. Duré ô norĩ há aibâ ĩwasété norĩ há 'Re ĩhâimana u'âsi mono há te te siwi 're wazé mono ô di. Duré Wanhib'apito Zezu Cristu há misi uptabi 're ĩhâimana mono há ma tó te te siwi 're wê'ô za'ra. 'Re ĩhâimana u'âsi mono nhimiroti há te te duré 're 'madâ'á pese za'ra mono ô di. Aimawi na si te dama 're rowasu'u za'ra. Āne ĩsimiroti za'ra há: "Re ĩhâimana u'âsi mono há te te 're da'azawi pese uptabi mono wa, te dawasédé há te te dama 're aparĩ. Taha wa, da te 're saze za'ra mono nherê, tane nherê, te za da te dasima 're ĩwê za'ra mono zéb uwaibaba, 're danomro wasété, 'Re ĩhâimana u'âsi mono nhimiházém na dasina 're dapahi za'ra mono âna." Āne ĩsimiroti wasété za'ra há, dama. Duréihâ 'Re ĩhâimana u'âsi mono há ma tó ta norĩ âma waihu'u siro ĩbaihâ na há, 're ĩnomro wasété mono norĩ âma, te te 're ĩwê'ô pese za'ra mono zém na, za te te 're ĩhâ za'ra mono zém na há.

⁵ Wa za oto âma aipo're pu'u za'ra wa'wa, waihu'u pese za'ra wa'aba nherê. Duréihâ Wanhib'apito há ma tó Izarazéhé nhĩhudu norĩ sô'reptu za'ra. Ezitu hawi ma tó sani za'ra. Tawamhá te te sô'reptu za'ra nherê, ni'wam norĩ há te te sina 're ĩ'umnhasi za'ra mono ô norĩ há ma tó uprosi.

⁶ Tane duré, hâiwa âma 'Re ĩhâimana u'âsi mono ma romhuri'wa norĩ há, ĩsipizari za'ra norĩ âma, wa za duré âma aipo're pu'u za'ra wa'wa. Ta norĩ há ma tó 'Re ĩhâimana u'âsi mono há pisutu za'ra aré, ĩsadawa para te te tâma 're romhuri za'ra mono da, pire na. Tane nherê, ma tó hâiwa âma romhuri na te te tiwi âma 're upa za'ra. Tiwasété na 're ĩnomro mono zéb zô si, ma tó rême za'ra oto, 're ĩhâimana za'ra mono zé há. Taha wa, ma tó oto 'Re ĩhâimana u'âsi mono há satōrĩ za'ra, robra si 're ĩsa'wari mono u, tame pawasisi ré 're simasab u'âsi mono da. 'Re ĩhâimana u'âsi mono há ropsi'utōrízéb u za te te da'âma ĩrowairébézéb u, te za tame 're hâimana u'âsi za'ra. Tawapsi te za oto wê'ô pese za'ra.

⁷ Ma'ápé duré, âma asipo're pu'u za'ra wa'aba, duréihâ Sodoma na 'ri nho'ômo nhisi âma 're ĩdahâimana wasété za'ra mono norĩ âma, duré Domora na 'ri nho'ômo nhisi âma 're

Īdahâimana wasété za'ra mono norî âma, duré ĩ'rata 'ri wa'ôto mono bâ 're Īdahâimana wasété za'ra mono norî âma hâ. Tame ma tō uburé dahâimana wasété uptabi na 're dahâimana za'ra, dasiwazari. Dahâiba na ma tō dasina 're danhipsaihuri za'ra. Duré aibâ nherê, ma tō aibâ si'uiwa na dasina 're dawasété za'ra. Hâiwa âma aré te te 're ĩromhuri za'ra mono norî hâ, 're ĩhâimana u'âsi mono hâ te te 're ĩwaparî za'ra mono ô ne, da te 're waparî za'ra mono ô di. Taha wa, ma tō unhama ro'o na dama rob'manharî za'ra, 're ĩhâimana u'âsi mono hâ, da te 're robzêpata u'âsi za'ra mono da, unhama ro'o u'âsi âma. Taha na te za âma 're dasipo're pu'u u'âsi za'ra, ta norî zarina oto âma 're danomro wasété tō mono da.

⁸⁻⁹ Duréihâ 're Īdawasété za'ra mono ne, te âhâna hâ aibâ norî hâ 're hâimana wasété za'ra, roti tō senai'ô na te te aima 're ĩroti za'ra wa'aba mono norî hâ. Ta norî hâ sôtô 'rowim ne sôtô 'rowib ô nherê, marî ĩwasétére hâ te te 're ĩ'madâ'â za'ra mono zéb zarina, te tihâiba na 're siwasété za'ra. 'Re ĩhâimana u'âsi mono nhimiroti hâ ma tō duré te te siwi 're wê'ô za'ra. Hâiwa âma 're ĩhâimana u'âsi mono ma, romhuri'wa norî âma, te duré te te 're wasété za'ra, ta norî hâ. Tanei ô di, Midé hâ hâiwa âma romhuri'wa norî ma ĩpire za'ra hâ. Ta hâ duréihâ ma tō Mozésihî hâiba hâ sawi Wa'uburé wi, te te âri tō da. Tawamhâ, Midé hâ aré sada sahi nherê, ĩwasédé hâ te te âma hiri ô di, te te âma ĩwasété na hâ. Âne si ma tō tâma waihu'u, Wa'uburé ma: "Wanhîb'apito si te za sa'êtê aima tinha." Ô hâ Wa'uburé hâ aré dama pire na hâiwa âma romhuri'wa na 're hâimana mono wa, te te âma wasété ô di, Midé hâ. Tane nherê, te ta norî hâ hâiwa âma 're ĩhâimana u'âsi mono ma romhuri'wa norî âma, te te 're wasété za'ra, aibâ ĩwasété norî hâ.

¹⁰ Tane nherê, te aibâ ĩwasété norî hâ rosa'rada hâ uburé tâma ĩwaihu'u za'ra ô ma, nharî wasété za'ra. Robzari norî hâ rosa'rata âna siwa'ru 're ĩhâimana za'ra mono ne, te ta norî hâ 're hâimana za'ra, simirosa'rata wa'rutu na. Taha zarina te za ai'utô.

¹¹ Ta norî ma, tâma ropipa uptabi za'ra di za, duréihâ Ca'ĭ, 're ĩhâimana wasété mono zém ne, 're hâimana za'ra mono wa. Duré Bara'â hâ rob'uprazéb zô 're ĩmorî wasété ne, te te 're rob'ruiwaparî za'ra mono wa, tâma 're ropipa uptabi za'ra mono di za. Duréihâ Cora hâ ma tō ti'madâ'â'wa hâ wê'ô, 're ĩhâimana u'âsi mono nhimipisutu nherê. Tane te duré aibâ ĩwasété norî hâ ĩsazei'wa norî 'madâ'â'wa norî nhimiroti hâ te te 're wê'ô pese za'ra, 're ĩhâimana u'âsi mono nhimipisutu nherê. Taha wa, Cora ĩsi'utôri ne te za duré ai'utô, aibâ ĩwasété norî hâ.

¹² A norî wa'wa hâ te asiré ĩsazei'wa norî me 're asisawi za'ra wa'aba mono sina, asa hâ asima 're ĩ'manharî za'ra wa'aba mo, simisutu. Tane nherê, te ĩwasété norî hâ atême 're sihutu 'wa, asa hâ asima 're 'manharî za'ra wa'aba mono ré. Siséb ô zarina te ta norî hâ te te aiwi 're ro'wa'rutu za'ra wa'wa, siwa'ru. A norî wa'wa hâ zazahâ ĩhâirâ ne te 're aihâimana wê za'ra wa'aba mo, ĩwê na si. Tane nherê, ta norî hâ zazahâ ĩhâirâ, da te 're ĩhâ'uptob za'ra mono ne, te 're hâimana wasété za'ra, sima si te te 're rosa'rata wasété za'ra mono wa. Ta norî hâ hâiwa nhirôno hâ, tâ ĩhawî 're ta'a za'ra mono âna, rowa'u te te 're ĩmapraba za'ra mono ne, marî ĩwê hâ te te 're 'manharî za'ra mono ô di. Duré rob'râ, 're ĩ'râ prédu mono zéb u, wedé hâ 'râi âna 're ĩsimasa mono ne, duré da te oto 're sariza'o'o za'ra mono wa, 're ĩ'rê pese za'ra mono ne, marî ĩwê hâ te te 're 'manharî za'ra mono ô di, ta norî hâ.

¹³ Á sisasi hâ 're ĩsibzaihâ za'ra mono ne, te ta norî hâ tâma 're rowê za'ra mono da newa, hâiwi si 're nomro, 're wa'utu za'ra mono âna. Duré â nhîbzaihâ zaipro ĩwasédé, supara 'ré u te te 're ĩsâma mono ne, te marî ĩwasété si te te 're 'manharî za'ra, ta norî hâ. Wasi hâ siwa'ru 're ĩnomro mono ne, te duré ta norî hâ siwa'ru 're hâimana za'ra, te te 're rob'uptabi za'ra mono âna. Ta norî âma ma tō 're ĩhâimana u'âsi mono hâ sima âma roti sirômo za'ra, za te te ĩhâ za'ra zém na hâ. Robra si 're ĩsa'wari mono zéb u te za satôri za'ra, robra u'âsi u, ĩwa 're hâimana u'âsi za'ra mono da, tame.

¹⁴ Duréihâ Enoti hâ te 're hâimana, Adâhâ 'ra nhîhudu hâ. Ta hâ ma tō romhâ ré da'âma waihu'u siro, 're Īdahâimana wasété za'ra mono norî âma hâ. Âne ma tō da'âma waihu'u siro: "Ma'âpé waihu'u za'ra wa'aba. Wanhîb'apito te za wei mo. Tâma ĩromhuri'wa norî hâ ahâ uptabi na te za we ĩsiré ai'aba'rê.

¹⁵ Tawamhâ te za oto da'awaihu'u, 're Īdahâimana wasété za'ra mono na, duré 're Īdahâimana wê za'ra mono na zama. Taha zarina te za oto da'âma arowairébé. Tamep si te za oto 're ĩhâimana wasété za'ra mono norî hâ awê'ô pese. Uburé marî ĩwasédé hâ te te 're 'manharî za'ra mono wa, te za awê'ô pese, duré mreime wasété na 're ĩhâimana u'âsi mono âma te te 're wasété za'ra mono wa."

Âne ma tō Enoti hâ romhâ ré da'âma waihu'u siro, tame aiwazari wa'aba aibâ norî hâ 're ĩhâimana wasété za'ra mono norî âma zama.

¹⁶ Ta norî hâ te 're siwapsari u'âsi za'ra, soto wasété na. Si'upana si te duré ta norî hâ dawasédé hâ te te da'âma 're sa'ra, 're danomro wê mono nherê. Si'uihâ na marî hâ te te sima 're ĩwê za'ra mono zéb uwaibaba si, te te 're 'manharî za'ra, ĩwasétére hâ. 'Râwi te ta norî

hã sina 're wata u'âsi za'ra, tiwê na. Te duré taré dawê te te da'âma 're sa'ra za'ra, Iwa'râmi marî iwê hã da te tâma 're sômri za'ra mono da.

Zudasi hã, isazei'wa norî hã siptete sina âma 're nomro mono da, te te tâma îroti za'ra zé wasu'u

¹⁷ Îsisânawâ norî, ta norî nhimiroti wasu'u wasédé hã 're wapari za'ra wa'aba mono ô di za. Wanhib'apito Zezu Cristuhu zadawa wasu'u'wa norî nhimirowasu'u na si te za 're asipo' re pu'u u'âsi za'ra wa'aba mo.

¹⁸ Âne ma tô ta norî hã wama waihu'u sirômo za'ra: "Nimahã na îropsi'utôrizéb u hã aibã norî hã te za dawazari 're hâimana za'ra, îwasété norî hã. 'Re îhâimana u'âsi mono hã te te siwi 're wazé mono ô di za. Te za duré ai'âma 're wa'ê za'ra wa'wa. Si'uihã na marî hã te te sima 're îwê za'ra mono zéb uwaibaba si, te za te te 're 'manharî za'ra, îwasétére hã." Âne ma tô wama waihu'u sirômo za'ra, Zezu Cristuhu zadawa wasu'u'wa norî hã.

¹⁹ Aibã îwasété norî hã te isazei'wa norî wi tinhimirowasu'u wasété na te te 're ro'wa'rutu za'ra, isazei'wa norî hã siré 're si'rã'ôtô u'âsi mono nherê, siwi 're siwanhizari za'ra mono da, ta hawî. 'Re idahâimana wasété za'ra mono norî nhimirosa'rata zarina si te ta norî hã te te 're rosa'rata za'ra. 'Re îhâimana u'âsi mono pê'êzani hã ta norî pê'ê 're, 're hâimana za'ra mono ô di.

²⁰ Îsisânawâ norî, tane nherê, te za âma 're asipawaptob u'âsi za'ra wa'aba mo, Wanhib'apito wasu'uwê na 're isaze za'ra wa'aba mono zém na, aihâimana prédub sina asima 're sa'êtê u'âsi za'ra wa'aba mono da. Duré 'Re îhâimana u'âsi mono ma, 're aimreme zusi aba mono wamhã, Îpê'êzani te te aima 're îwaihu'u za'ra wa'aba mono zém na si, te za tâma 're aimreme zusi aba mo.

²¹ 'Re îhâimana u'âsi mono nhimiroti zarina si, te za 're aihâimana u'âsi za'ra wa'aba mo, îsimizawi pese zém hawî asina tiwi 're aipahã za'ra wa'aba mono tô da. Duré Wanhib'apito Zezu Cristuhu nhimizawi pese na dama 're isôpru mono zéb zô, te za asina 're asimipari u'âsi za'ra wa'aba mo, 'Re îhâimana u'âsi mono 'rata 're aihâimana u'âsi za'ra wa'aba mono zéb da hã, te te aima isômri za'ra wa'aba zô.

²² Âne wa za duré aima waihu'u za'ra wa'wa. Ni'wam norî hã Wanhib'apito zadawa wasu'uwê hã te te 're saze za'ra mono nherê, âma 're îsiwawã za'ra mono norî âma, te za âma 're aipê'êzé za'ra wa'aba mo, Wanhib'apito wasu'uwê na apã 're pê'ê nhimi'wara mono da.

²³ Duré, unhamu u aré 're darere'e mono wa, da te 're îdanho'reptu za'ra mono ne, te za ni'wam norî hã 're îpawaptob za'ra wa'aba mo, Zezusi te te 're saze za'ra mono da, ropipa u 're sisisi tô mono da. Duré ni'wam norî hã, wasété uptabi na 're îhâimana za'ra mono norî hã ta norî âma zama te za duré 're aipê'êzé za'ra wa'aba mo. Âma 're aipê'êzé za'ra wa'aba mono nherê, te za ta norî wi 're asi'madá'â pese za'ra wa'aba mo, tihâimana wasété zéb u te te 're aipizari za'ra wa'aba mono tô da, sitême. Da'uzã hã hã wê nherê, da te dasiwi 're hã uptob za'ra mono wa, da te 're îwê'ô pese za'ra mono ne, tihâimana wasété zém na 're îsi'uptob za'ra mono zép si te za asiwi 're îwê'ô pese za'ra wa'aba mo.

Zudasi hã, 'Re îhâimana u'âsi mono âma îwatazé wasu'u

²⁴⁻²⁵ 'Re îhâimana u'âsi mono âma si 're wawata u'âsi za'ra wa'aba mono za. Taha si uburé Danhib'apito hã te 're hâimana, Wa'anho'reptui'wa hã. Wanhib'apito Zezu Cristu we te te wazada isômrizém na ma tô te te 're wa'anho'reptu, wazada idâ'ázém na. Ta hã wê uptabi di. Wê uptabi wa, uburé wa te 're wazéb u'âsi za'ra wa'aba mono za. Waihu'u pese uptabi di duré. Danhipai u dama pire uptabi di, ôhõ si. Âne 'Re îhâimana u'âsi mono hã, marî ô ré 're îhâimana mono zé hã, duré âhãna hã. Ône u'ã te 're hâimana u'âsi, tiwaihu'u pese uptabi na. Taha wa, âma 're wawata u'âsi za'ra wa'aba mono za.

Taha ma, uburé marî hã tâma waihu'u pese di, te te 're aipawaptob za'ra wa'aba mono zéb da hã, 're rême za'ra wa'aba mono tô da, aiwasété u 're aipizari za'ra wa'aba mono tô da. Te za duré sitême aiwaibui wa'wa, aiwasété âna isô'a 're aihâimana u'âsi za'ra wa'aba mono da, duré ato sina î'rata 're anomro u'âsi aba mono da, rowê âma. Tane tô.

Apocaripsi

Rob'rāsutuzéb āma za ĩropsihāi'ré mono zém na, Zuwā te te āma ĭrob'ui'érézé ĭbaihā wasu'uzé

Ā ĭbaihā na rob'ui'éré'wa hā Zuwā na ĩsisi hā, Zezusihi zadawa wasu'u'wa. Ta hā Zezusihi wasu'uwē na te te dama 're rowasu'u za'ra mono 'ru te, si'łhi wapsi, ma tō sērē ni, dazazéb 're, Patemosi na rob'rē za'iti nhisi āma. Tame sāmra ré, ma tō rob'ui'éré, ā ĭbaihā na hā.

Ā ĭbaihā hā Azi'a na danhipti'a nho'ōmo nhisi āma, Zezusihi zazei'wa, siré 're ĩsi'rā'ōtō za'ra mono norī ma, ma tō rob'ui'éré, 7 na tiza'rui mono bā 're ĩsi'rā'ōtō mono norī ma hā. Tinhimi'ui'éré na ma tō tāma roti za'ra, siptete sina Zezusihi āma 're nomro u'āsi mono da, danhib'rata te te 're robzépata za'ra mono nherē, te te 're rēme za'ra mono tō da.

Sōtō 'rowim ne, da te 're ĩrosawērē za'ra mono ne, 'Re ĩhāimana u'āsi mono te te tāma 're ĩ'awaihu'u mono na ma tō rob'ui'éré, Zuwā hā. Satanasihhi nhiptetezé hā za ĩsi'utōrīzém na ma tō rob'ui'éré, Zezusi za te te āma ĩ'ai'utézém na hā, rob'rāsutuzéb āma.

Āhāna hā Zuwā hā sōtō 'rowim ne, marī te te ĩ'ab'madā'ā mono zém na rob'ui'éré hā wa te 're sōré za'ra mono wamhā, wama pire za'ra di, wa te ĩwaihu'u za'ra da hā. E marī wa. Za 're ĩromhāimana mono zém na, te te rowasu'u mono wa, wanhowa, duré zahadu te te wama romhāi'ré mono ō wa. Zuwā hā ma tō te te sima 're wa'awē, ĩpire hā wazō 're wairébé mono wa, 're wapahi za'ra mono tō da. E marī wa. Zezu Cristu hā uburé dama pire uptabi wa, duré taha si dama pire na 're ĩhāimana za'ra mono norī wada'uri'wa, 're hāimana mono wa.

¹⁻² Duréihā, 'Re ĩhāimana u'āsi mono hā ma tō Zezu Cristuhu ma awaihu'u siro, tō sena na za romhutu na 're ĩromhāimana mono zém na, tinhib'a'uwē norī ma, te te duré waihu'u sirōmo za'ra da.

Taha wa, Zezusi hā ma tō hāiwa āma romhuri'wa hā we satō Zuwāhā u, marī te te tāma waihu'u da. Tawamhā ma tō ĩtēme wi. ĩtēme wisi wamhā, Zezusihi ma, 'Re ĩhāimana u'āsi mono hā sō'awi te te oto tāma ĩromhāi'rézém na ma tō Zuwāhā ma waihu'u. Sōtō 'rowim ne, ma tō marī hā sabu, da te 're ĩrosawērē za'ra mono ne. Taha wa, tō sena na te za oto Zuwā hā āne aima āma rob'ui'éré za'ra wa'wa, waihu'u za'ra wa'aba da, uburé marī hā te te ĩ'madā'āzém na, tō sena 'Re ĩhāimana u'āsi mono nhimiwaihu'uzém na hā, Zezusi hā sena na te te ĩwaihu'uzém na hā.

³ Tawamhā āhā wasu'u hā za 're ĩromhāimana mono zém na ni'wa te te dama 're sōré mono wamhā, tāma 're rowē u'āsi mono di za. Duré, āhā wasu'u hā ni'wa te te 're wapari pese mono wamhā, tāma 're rowē u'āsi mono di za. Āma ronomro ō ré, te za 're romhāimana, 'Re ĩhāimana u'āsi mono te te ĩwaihu'uzém na hā. Taha wa, ni'wa hā hāimana nhimiza'rese sina, te te 're wapari pese mono wamhā, tāma 're rowē u'āsi mono di za.

Azi'a na ti'a nhisi āma ĩsazei'wa norī, Zuwā te te ĩsawi za'ra zé wasu'u

⁴ Wa hā, Zuwā. ĩnhimi'ui'éré na wa āma asawi za'ra wa'wa, Azi'a na danhipti'a nho'ōmo nhisi āma, Zezusihi zazei'wa, asiré 're asi'rā'ōtō u'āsi za'ra wa'aba mono norī hā, 7 na daza'rui mono bā 're ai'rā'ōtō aba mono norī hā.

Wa hā wa ai'āma 're ĩmreme u'āsi za'ra wa'wa, 'Re ĩhāimana u'āsi mono ma, ĩsimizawizé hā ai'āma 're hāimana u'āsi za'ra wa'aba mono da, rowē u'āsi, āma 're anomro aba mono da. Ta hā duréihā marī ō uptabi ré, ma tō 're hāimana u'āsi. Ōne u'āsi te za duré 're hāimana. Hāiwa āma te 're sāmra u'āsi, danhib'apito simasisizém na. Duré ĩp'e'ézani zama te te 're aipawaptob u'āsi za'ra wa'aba mono da, wa duré ai'āma te 're rosa'rata u'āsi za'ra wa'wa. Ta hā te 'Re ĩhāimana u'āsi mono simasisizé uiwada 're hāimana u'āsi. Ta hā ĩp'e'ézani hā 7 na ĩsimiromhuri hā.

⁵ Zezu Cristuhu zama te te 're aipawaptob u'āsi za'ra wa'aba mono da, wa duré ai'āma te 're rosa'rata u'āsi za'ra wa'wa. Ta hā dama ĩ'umna, te simi'ē na 're hāimana, 'Re ĩhāimana u'āsi mono zadawa wasu'uwē 'wa da hā. Ta hā ma tō dawana tihāiwa'utu 'rata, ĩhāiba si'utōrī waihu'u ō na. Uburé ti'ai āma danhib'apito norī nhipai u, Zezusi hā. Misi, Danhib'apito uptabi, te 're hāimana.

Ta hā te te 're wa'azawi pese. Taha wa, ma tō wazada dārā. Wazada dā'ā wamhā, ĩwapru ma tiwi puru. Tawamhā wawasété na 're wanomro mono ré, ma tō tiwapru na tidā'āzém na te te 're wa'a'upsō, wawasété āna āma 're wanomro mono da oto.

⁶ Ma tō duré te te 're wa'apisutu, ĩmama ma, wa te da'āma 're romhuri u'āsi za'ra mono da, sasedoti norī ne, ĩsib'apito ma hā. Ma tō duré te te 're wa'apisutu, ĩsada para, wapire na

're wahâimana za'ra mono da. Ta hã Zezusi hã wê uptabi wa, duré waihu'u pese uptabi wa, âma 're wawata u'âsi za'ra wa'aba mono za.

⁷ Ma'âpé, asiwi waihu'u pese za'ra wa'aba. Zezusi hã te za wei mo, hâiwa'ana. Wei morĩ wamhã, uburé te za dasiwi 'madâ'â za'ra ni. Ī'a're wi, siwi ĩwa're'wa norĩ hã te za duré 'madâ'â za'ra, siwi ĩwĩr'wa norĩ hã. Tawamhã da'upsâtã mono bâ te za só aiwa'ô za'ra ni, daro mono bâ. Tô sena te za âne hã tiromhãiba.

⁸ 'Re ĩhâimana u'âsi mono, dama ĩsuiwahu'uzé hã, âne: "Wa hã ĩmorĩrata na, wa tô 're ĩhâimana u'âsi. Ône u'â, wa za duré 're ĩhâimana u'âsi. Uburé marĩ hã si'utõrĩ pese nherê, ĩsarina ĩsi'utõrĩ ô di za." Âne uburé Danhib'apito uptabi hã ĩsiwasu'uzé hã.

Zuwã hã Zezusi te te ĩsabuzé wasu'u, sõtõ 'rowim ne

⁹ Wa hã Zuwã, asisânawã wa'wa. A norĩ wa'wa hã Zezusi hã si 're anomro aba mono wa, danhimirob'manharĩ, 're ĩsêpata za'ra wa'aba mono ne, wa duré te 're robzêpata, asine za'ra wa'aba, Zezusi hã si 're ĩmorĩ wa. Zezusi hã si wasiré 're wanomro mono wa, wa duré 'Re ĩhâimana u'âsi mono nhib'a'uwê 're wahâimana za'ra. Ta hã te za duré te te 're wa'apawaptob u'âsi, da te 're wa'ruiwapari za'ra mono wa, wa te 're robzêpata za'ra mono nherê, wawasété u tiwi 're wasipizari za'ra mono tô da, wanhiptete u'âsi âma 're wanomro mono da.

Wa hã wa tô te dama 're sadawa wasu'u, 'Re ĩhâimana u'âsi mono hã. Tô sena na Zezusi hã zazei'wa na wa tô duré dama 're ĩsiwasu'u u'âsi. Taha wa, ma tô dasiwi ĩ'ârĩ ni. Ma tô dasiwi ĩzâtõrĩ ni, Patemosi na rob'rê za'iti nhisi u.

¹⁰ Tawamhã tame ĩnhamra ré, Wanhib'apito nhibâtã na 'Re ĩhâimana u'âsi mono pê'êzani hã ma tô ĩ'uihã pi'ra. Te te ĩ'uihã pi'rai wa, wa tô aimawi ĩhãiba, ĩhãiba waihu'u ô na. Tawamhã ĩhãiba waihu'u ô na ĩhâimana ré, wa tô ni'wai mreme hã wapa, ĩbabarã hawi. Mreme 'rãihã na te ĩma tinha, ĩsimnhãhãzê hãrã 'rãihã na ne hã.

¹¹ Âne te ĩma tinha:

— Âhãna marĩ hã te za ĩ'ab'madã'â mo. Tawamhã uburé ĩ'ab'madã'â mono hã te za ĩbahã na âma ĩrob'ui'é. Âma rob'ui'ére parimhã, Zezusi hã zazei'wa norĩ, 'ri nho'ômo mono bâ siré 're ĩsi'rã'õtõ mono norĩ ma, te za ĩbahã hã ĩsõmri za'ra. 'Ri nho'ômo nhisi mono hã, âne: Épêzu, duré Esimina, duré Pedamo, duré Ti'atira, duré Sadesi, duré Piradêpiza, duré Radiseza. Â norĩ ma, te za asimĩ'ui'ére hã ĩsõmri za'ra, ĩsazei'wa norĩ ma, 7 na 'ri nho'ômo âma 're ĩsi'rã'õtõ mono norĩ ma hã. — Âne ma tô ĩma waihu'u.

¹² Tawamhã wa tô ĩsibabarãi u 'rãihãipi'ra, ĩma ĩnharĩ'wa zô. Sô ĩsipi'rai wamhã, rob'uiwézé sima'warazé hã 7 na ĩhãiba za'ra hã duré ĩsisiwimhã ĩro'o ré hã wa tô 'madã'â za'ra. Rob'uiwézé sima'warazé mono hã, êtê'ubuzi pré oru 'manharĩ. Te rob'madã'â nherê, ĩnhotõ 'rowi te ĩrosawêré ne, wa rob'madã.

¹³ Tawamhã rob'uiwézé wa'wa, te ni'wa hã za, aibã ne hã. Ī'uzã hãpa, ĩpara u te tiwi hãihãira. Duré sõ'utu wasisi ré, te za. ĩsõ'utu wasisizé hã, oru 'manharĩ.

¹⁴ Duré ĩséré hã, rã uptabi di. Pone'êrebã zéré ne hã, rã uptabi di, ĩséré hã. Duré, ĩto hã, unhamã ro'o si'ubuzi ne te 're si'ubuzi zahuré.

¹⁵ Duré ĩpara hã ĩsi'uwazi waipo ne, te 're si'ubuzi zahuré. Duré ĩmreme hã, â'a'a 'rãihã ruru'u ne.

¹⁶ Wasi hã 7 na te tété za'ra, tinhib'rata nhimire niwĩ. Duré ĩsada'i'ré hawimhã, sib'ézé 'wa si'uiwa 'wa pa te da'o, ĩ'wa pe hã. Duré ĩ'ubu hã te rowa'a za'êtê. Abzuma bâdã te te 're ĩrowa'a mono ne, te rowa'a za'êtê.

¹⁷ Tawamhã ô hã te 'madã'â wamhã, wa tô ĩpapara aime sa'êtê, ĩdã'â ne, ĩpahi te. Tane nherê, ma tinhib'rata nhimire niwĩ ĩ'upi, ĩpahi tô da. Âne te ĩma tinha:

— ĩma aipahi tô. Wa hã ĩsãna'rata hawimhã marĩ ô ré hã, wa tô 're ĩhâimana. Uburé marĩ hã si'utõrĩ pese nherê, ĩsarina ĩsi'utõrĩ ô di za, wa hã. Ône u'âsi, wa za 're ĩhâimana.

¹⁸ Wa tô dãrã aré. ĩdã'â nherê, wa oto 're ĩhâimana u'âsi. ĩdã'â waihu'u ô di za oto. Ma'âpé, âne hã waihu'u pese. Te ĩsima ĩpisutuzéb zarina, wa te te 're da'anho'reptu, adã 're ĩhâimana za'ra mono zém hawi, 'Re ĩhâimana u'âsi mono 'rata, 're dahâimana u'âsi za'ra mono da.

¹⁹ Taha wa, uburé marĩ hã ĩ'ab'madã hã te za ĩ'a'ui'é, âhãna ĩpusi mono hã, duré nimahã na ĩpusi mono da hã.

²⁰ Âhãna wa za duré aima waihu'u. Wasi hã ĩnhib'rata nhimire niwĩ te ĩtété za'ra hã ĩ'madã hã, te âma ĩsimiré'ézé hã waihu'u ô di, a hã. Duré rob'uiwé uparizé hã ĩ'madã'â za'ra hã te âma ĩsimiré'ézé hã, waihu'u ô di duré. Taha wa, wa za oto aima waihu'u, te âma ĩsimiré'é zahuré zé hã, waihu'u da. Wasi hã 7 na ĩhãiba za'ra hã, ĩnhib'rata nhimire niwĩ te ĩtété za'ra hã, ĩsazei'wa 'madã'â'wa norĩ, te wasu'u. Duré rob'uiwézé sima'warazé hã, duré ĩsisiwimhã ĩro'o ré hã 7 na ĩhãiba za'ra hã, ĩsazei'wa norĩ te wasu'u, 'ri nho'ômo mono bâ siré 're ĩsi'rã'õtõ mono norĩ hã. Âne te âma ĩsimiré'é zahuré zé hã. — Âne ma tô ĩma waihu'u, ĩtême ĩwi hã.

2

Ēpézu āma ĩsazei'wa norī ma rotizé wasu'u

¹Tawamhā Zezusi hā ĩtēme ĩwi hā ma tō duré ĩma roti, āne:

— Zuwā, te za oto ĩrob'ui'é, Ēpézu na 'ri nho'ōmo nhisi āma ĩzazei'wa norī 'madā'ā'wai ma. Te aima ĩwaihu'uzém na te za tāma ĩrob'ui'é, āne:

“Wa hā wa ĩs'i'uihā na aima roti za'ra wa'wa, wasi hā 7 na ĩhāiba za'ra hā ĩnhib'rata nhimire niwī te ĩtété za'ra hā, duré 7 na rob'uiwézé sima'warazé wa'wa 're ĩmorī hā, oru 'manhari wa'wamhā.

²Ēpézu āma ĩzazei'wa norī, uburé 're aihāimana za'ra wa'aba mono zé hā ĩma waihu'u pese di. Asimī'ē na te ĩma 're ĩromhuri pese za'ra wa'aba mo. Da te aima 're rob'manhari za'ēté za'ra wa'aba mono nherē, aiwasété u 're aipizari za'ra wa'aba mono ō di, apā. 'Re ĩdanomro wasété mono nori nhimiroti hā te 're ĩwé'ō pese za'ra wa'aba mo. Ni'wa hā Zezusihi zadawa wasu'u'wa na aima siwasu'u za'ra wa'aba wamhā, awa'awi 're saze za'ra wa'aba mono ō di. ĩsimiroti hā te a'ā 're ĩwaparī za'ra wa'aba mo. Tawamhā ĩ'uwaibaba'ō na te te aima 're sadawa wasu'u za'ra wa'aba mono wamhā, awa'awi te asina 're ĩwaihu'u za'ra wa'aba mo, ĩsadawa nhipse na. Taha wa, te ā norī hā 're ĩwé'ō za'ra wa'aba mo.

³Da te 're ai'ruiwaparī za'ra wa'aba mono wa, 're robzépata za'ēté za'ra wa'aba mono nherē, 're ĩrēme za'ra wa'aba mono ō di. ĩwi 're aipizari za'ra wa'aba mono ō di. ĩ'āma si te 're aihāimana nhiptete za'ra wa'aba mo.

“Āne wa tō te 're aiwaihu'u za'ra wa'wa, 're aihāimana wē za'ra wa'aba mono zém na hā.

⁴Tane nherē, marī hā te ĩwi ro'wa're, te ai'āma ĩwaihu'u za'ra wa'wa hā. Duréihā ĩzazei 'rata za'ra wa'aba hawimhā, aré aima ĩzawi pese za'ra wa'aba di. Aré aima dazawī pese za'ra wa'aba di duré. Tane nherē, oto aima dazawī prā za'ra wa'aba di, ĩzama.

⁵Ma'āpé, ĩ'āma asipo're pu'u za'ra wa'aba. 'Re ĩzawi pese za'ra wa'aba mono zém hawi ma tō asina ĩrosaparī za'ra wa'wa. Taha wa, aiwasété wī, te za oto 're aipizari za'ra wa'aba mo, apā. 'Re ĩzazei 'rata za'ra wa'aba mono hawi, 're aihāimana wē za'ra wa'aba mono ne, te za oto apā 're aihāimana wē za'ra wa'aba mo. Ānei ō wamhā, aiwasété wī 're aipizari za'ra wa'aba mono ō wamhā, wa za atēme ĩmorī za'ra wa'wa, rob'uiwézé sima'warazé hā ate wa'wa hā te aiwī āri za'ra wa'aba da. Te aiwī āri za'ra wa'aba wamhā, robaba di za oto, ate za'ra wa'wa hā. Āne, wa aima waihu'u sirōmo za'ra wa'wa.

⁶Duré, misi asimirosa'rata za'ra wa'wa hā, ĩma ĩwé hā. Nicora'ihī nhimiroti wasédé hā te te 're ĩwaparī za'ra mono norī hā te 're hāimana wasété za'ra. 'Re ĩhāimana wasété za'ra mono zé hā ĩma wē ō di, wa hā. Ta hā ĩsine 're wé'ō pese za'ra wa'aba mono wa, taha wa, ai'āma ĩma 're rowé za'ra wa'aba mono di.

⁷“A norī wa'wa hā asimipari pese aba wamhā, ma'āpé waparī pese za'ra wa'aba, ĩmama pē'ēzani hā ĩzazei'wa norī ma, te te ĩrotizém na hā. Āne ĩsimiroti hā: Ni'wam norī hā tidā'ázéb u ĩwi sipizari āna Satanasihi āma te te ĩ'ai'uté za'ra norī hā ta norī ma si, wa za tāma pisutu za'ra, rob'rāi u'ā hā te te 're huri u'āsi mono da. Taha wede hā 'Re ĩhāimana u'āsi mono 're ĩsāma u'āsi mono zéb āma te 're sa, rowé uptabi āma hā, ĩ'rā hā da te 're huri mono wa, dadā'ā āna 're ĩdanomro u'āsi mono zé hā. Āne ĩmama pē'ēzani te te ĩrotizé hā.” — Āne ma tō Zezusi hā ĩma waihu'u, Ēpézu āma ĩsazei'wa norī, siré 're ĩs'i'rā'ōtō mono norī ma, te āma rob'ui'ére da.

Esimina āma ĩsazei'wa norī ma rotizé wasu'u

⁸Tawamhā Zezusi hā ĩtēme ĩwi hā ma tō duré ĩma roti, āne:

— Zuwā, te za oto ĩrob'ui'é, Esimina na 'ri nho'ōmo nhisi āma ĩzazei'wa norī 'madā'ā'wai ma. Te aima ĩwaihu'uzém na te za tāma ĩrob'ui'é, āne:

“Wa hā wa aima roti za'ra wa'wa, duréihā marī ō ré 're ĩhāimana mono. Uburé marī hā si'utōrī pese nherē, ĩsarina ĩsi'utōrī ō di za, wa hā. Wa za 're ĩhāimana u'āsi. Wa tō dārā aré. ĩdā'ā nherē, wa tō apā hāiwa'udu, 're ĩhāimana u'āsi mono da oto.

⁹ĩma waihu'u pese di, da te aima 're ĩrob'manhari wasété za'ra wa'aba mono zém hawi, 're ĩrobzépata za'ra wa'aba mono zé hā. Duré, ĩma waihu'u pese di, asibrob'ō na 're ĩrobzépata za'ra wa'aba mono zé hā. Tane nherē, te asibrob ahā ne, rowé na 're aihāimana za'ra wa'aba mo, ĩnhimipawaptobzém na si 're aihāimana za'ra wa'aba mono wa. Duré ni'wam norī hā te te dama 're aiwasu'u wasété za'ra wa'wa. Te te dama 're aiwasu'u wasété za'ra wa'aba mono zé hā ĩma waihu'u pese di. Ta norī hā zudezu na 're potō za'ra mono zahā, te Satanasihi nhimiroti zarina si, siwa'ru 're hāimana za'ra.

¹⁰Za 're ĩrobzépata za'ra wa'aba mono zém na hā asina 're aipahi za'ra wa'aba mono ō di za. ĩwaparī pese za'ra wa'aba. Wa'uburé hā nimahā na te za dama ai'mai'ru za'ra wa'wa, da te ai'maiwaibui wa'aba da, dazazéb 're, da te ai'manheme aba da, te te aipibu za'ra wa'aba da, tō sena ĩzaze za'ra wa'aba zō. Tawamhā 10 na bādā hā te za ai'āma 'mai'hai'utōrī za'ra wa'wa,

dazazéb 're ai'masimasa wa'aba ré hã, 'mairobzépata za'ra wa'aba mono ré hã. Æne wamhã, ma'ápé ĩmairême aba tó. Tawamhã da te ai'manhimroi wa'aba zém na ai'masi'utóri aba nheré, ĩmairême aba ó wamhã, dawi ĩ'mai'udá wa'aba ó wamhã, wa za aima wa'ábã za'ra wa'wa. Rowê, wa za aima pisutu za'ra wa'wa, ĩ'rata 're ai'ubumroi u'ási aba mono da.

¹¹ “Asimipari pese aba wamhã, ma'ápé ĩwapari pese za'ra wa'aba, ĩmama pē'ēzani hã ĩzazei'wa norĩ ma, te te ĩrotizé hã. Æne ĩsimiroti hã: 'Ni'wam norĩ hã tidá'ázéb u'ĩwi sipizari ãna Satanasihĩ ãma te te ĩ'ai'uté za'ra norĩ hã ta norĩ hã 're ĩdadá'à zahu za'ra mono norĩ siré, te te 're robzépata za'ra mono ó di za, unhama ro'o u'ási ãma hã. Robze na te za 're hãimana u'ási za'ra.' Æne ĩmama pē'ēzani te te ĩrotizé hã.” — Æne ma tó Zezusi hã ĩma waihu'u, Esimina ãma ĩsazei'wa norĩ, siré 're ĩsi'rã'ótó mono norĩ ma, te ãma rob'ui'éré da.

Pedamo ãma ĩsazei'wa norĩ ma rotizé wasu'u

¹² Tawamhã Zezusi hã ĩtême ĩwi hã ma tó duré ĩma roti, ãne:

— Zuwã, te za oto ĩrob'ui'é, Pedamo na 'ri nho'ómo nhisi ãma ĩzazei'wa norĩ 'madã'ã'wai ma. Te aima ĩwaihu'uzém na te za tãma ĩrob'ui'é, ãne:

“Wa hã sib'ézé 'wa si'uiwa 'wa pa ré ĩza hã, wa aima roti za'ra wa'wa, ĩ'wa pese ré hã.

¹³ ĩma waihu'u pese di, 're ai'ubumroi wa'aba mono zé hã. Tame te Satanasihĩ nhimi-wada'uri na 're dahãimana za'ra. Tame ma tó Átipasi hã dasiwi wĩri ni asó'a za'ra wa'aba, simi'ē na te te dama 're ĩzadawa wasu'u mono hã. Tane nheré, asó'a za'ra wa'aba da te dasiwi wĩri nheré, tãma aipahi za'ra wa'aba ó di. ĩrême za'ra wa'aba ó di duré. Óne haré te ĩnhimiroti na si 're aihãimana za'ra wa'aba mo.

¹⁴ Tane nheré, te duré marĩ hã ĩwi ro'wa'ré, te ai'ãma ĩwaihu'u za'ra wa'wa hã. Ni'wam norĩ hã ma tó aibã nhimiroti na 're hãimana za'ra, Bara'ã na aibã nhisi hã. Ta hã ma tó duréihã Baratihĩ ma te te 're roti, ĩzarazéhé nhihudu norĩ ma, sadawa nhipese na te te 're roti wasété za'ra mono da, simiroti wê newa, ĩsine 're hãimana wasété za'ra mono da. 'Re ĩhãimana u'ási mono upana, romhãiba 'manharĩ ãma 're dawata za'ra mono da, danhimizama da te tãma 're ĩsómri za'ra mono hã, ma tó Barati hã te te 're a'ru, ĩzarazéhé nhihudu norĩ ma, te te 're huri mono da. Ma tó duré te te tãma 're roti pese za'ra, pi'ó, mro ré nheré, aibã aimawi na 're simisaihuri za'ra mono da, duré aibã, mro ré nheré, pi'ó aimawi na 're simisaihuri za'ra mono da.

¹⁵ Tane, te ãhãna ni'wam norĩ hã Nicora'ihĩ nhimiroti wasété na 're hãimana za'ra, asiré 're aihãimana za'ra wa'aba mono norĩ hã.

¹⁶ Ma'ápé ãhãna hã aihãimana wasédé hã sahãri za'ra wa'aba, aiwasété wi 're aipizari za'ra wa'aba mono da, 'Re ĩhãimana u'ási mono u. Aihãimana wasédé hã sahãri za'ra wa'aba ó wamhã, wa za ãma atême ĩmorĩ su'u za'ra wa'wa, 're aihãimana wasété za'ra wa'aba mono norĩ hã ĩzadai'ré hawi sib'ézé 'wa si'uiwa ĩsa'o na te ai'wapé za'ra wa'aba da.

¹⁷ “Asimipari pese aba wamhã, ma'ápé wapari pese za'ra wa'aba, ĩmama pē'ēzani hã ĩzazei'wa norĩ ma, te te ĩrotizé hã. Æne ĩsimiroti hã: Ni'wam norĩ hã tidá'ázéb u'ĩwi sipizari ãna Satanasihĩ ãma te te ĩ'ai'uté za'ra norĩ hã ta norĩ ma, wa za dasa ĩse hã duré te dama ĩhã'i'ré'ó hã te tãma 're anhomri, mana na dasa nhisi hã. Duré étē'a, wa za te tãma 're anhomri ĩhãiba mono bã, ĩsisi ĩtém na ãma ĩ'ui'éré ré hã dama ĩsa'rese'ó hã. Te te 're ĩwaihui mono norĩ ma si waihu'u pese di, tinhisi ĩtē hã. Æne ĩmama pē'ēzani te te ĩrotizé hã.” — Æne ma tó Zezusi hã ĩma waihu'u, Pedamo ãma ĩsazei'wa norĩ, siré 're ĩsi'rã'ótó mono norĩ ma, te ãma rob'ui'éré da.

Tĩ'atira ãma ĩsazei'wa norĩ ma rotizé wasu'u

¹⁸ Tawamhã Zezusi hã ĩtême ĩwi hã ma tó duré ĩma roti, ãne:

— Zuwã, te za oto ĩrob'ui'é, Tĩ'atira na 'ri nho'ómo nhisi ãma ĩzazei'wa norĩ 'madã'ã'wai ma. Te aima ĩwaihu'uzém na te za tãma ĩrob'ui'é, ãne:

“Wa hã 'Re ĩhãimana u'ási mono 'ra, wa aima roti za'ra wa'wa. ĩto hã te unhama ro'o si'ubuzi ne 're si'ubuzi zahuré. Duré ĩpara hã te ĩsi'uwazi waipo ne 're si'ubuzi zahuré.

¹⁹ Marĩ hã 're ĩ'manharĩ wê za'ra wa'aba mono zé hã ĩma waihu'u pese di. Te 're asisawi pese za'ra wa'aba mo. Te duré 're ĩzawi pese za'ra wa'aba mo. Te duré asina 're ĩ'umnhasi za'ra wa'aba mo. Te duré ĩma 're ĩromhuri pese za'ra wa'aba mo. Da te aima 're rob'manharĩ wasété u'ási za'ra wa'aba mono nheré, te ĩ'ãma si 're anomro u'ási aba mo. 'Re ĩzaze na'rata za'ra wa'aba mono hawi, ĩma 're ĩromhuri za'ra wa'aba mono zém nhĩpai u, te oto ĩma 're ĩromhuri pese za'ra wa'aba mo. Æne wa tó ĩsi'ãma aiwaihu'u za'ra wa'wa.

²⁰ Tane nheré, marĩ hã misi te ĩwi ro'wa'ré, te ai'ãma ĩwaihu'u za'ra wa'wa hã. Pi'ó ĩwasédé hã te ai'rata 're hãimana za'ra wa'wa, Zézabé na ĩsisi hã. Ta hã 'Re ĩhãimana u'ási mono zadawa wasu'u'wa na te dama 're siwasu'u, taré. Æne dama 're siwasu'u mono nheré, te ĩzazei'wa norĩ ma, simiroti wasété na te te 're roti. Taha zarina, te ta norĩ hã pi'ó aimawi na mro ré nheré, ãma dawi 're simisaihuri za'ra. Duré pi'ó, mro ré nheré, aibã aimawi na te ãma

dawi 're simisaihuri za'ra. Duré romhâiba 'manharî âma 'Re îhâimana u'âsi mono upana 're dawata za'ra mono da, danhimizama da te tâma 're îsômri za'ra mono hâ te duré te te 're huri. Ta hâ, pi'ô hâ e niha te simiroti wasété nherê, ai'rata 're hâimana 'wa. E asiwi wê'ô za'ra wa'aba âna.

²¹ Ta hâ pi'ô hâ simiroti wasété nherê, âma îwa'a ô di aré, te î'azârizéb da hâ. Tiwasété wi sipi'ra da newa, wa tô aré te 're 'madâ'â. Tane nherê, tiwasété wi sipi'rai ô di, aibâ aimawi na dawi 're îhâimana mono zém hawimhâ.

²² Ma'âpé, waihu'u pese za'ra wa'aba. Pi'ô hâ tiwasété wi sipi'rai ô wa, wa za oto azâ, te te robzépata za'êtê da. Si'âma 're îhâimana wasété za'ra mono norî zama â pi'ô'i hawi sipizari za'ra ô wamhâ, wa za îsu hâ za'ra, te te robzépata za'êtê za'ra da.

²³ Pi'ô'i 'ra ne 're îhâimana za'ra mono norî hâ wa za duré hâ za'ra, si'utôri da, îsimiroti zarina 're hâimana za'ra mono wa. Tawamhâ âne te tâma rob'manharî za'ra wamhâ, te za uburé îzazei'wa norî hâ âma îwaihu'u za'ra, pi'uriwi marî hâ da te 're 'manharî za'ra mono newa, duré pi'uriwi danhimirosa'rada hâ da te 're 'manharî za'ra mono newa, uburé marî hâ te dawi 're î'awaihu'u mono na hâ. Uburé danhimirosa'rada hâ îma waihu'u pese di, duré marî zô 're îdanhimhasi za'ra mono zéb zama. Tawamhâ ni'wam norî hâ marî îwê hâ te te 're î'manharî za'ra mono zé wa'râmp si, wa za marî îwê na te tâma 're awa'âbâ. Duré ni'wam norî hâ marî te te 're î'manharî wasété za'ra mono zéb zarina si, wa za te 're ahâ za'ra.

²⁴ "Pi'ô nhimiroti 're îwaparî za'ra wa'aba mono ô norî ma si, wa za oto aima waihu'u za'ra wa'wa, îzazei'uptabi 'wa norî ma si. A norî wa'wa hâ Satanasihî nhimiroti sima'uri pe hâ dawi waihu'u za'ra wa'aba ô di. Tô sena, wa aima waihu'u za'ra wa'wa. Te oto aima âma sahu za'ra wa'aba ô di za, înhimiroti î'amo na hâ îpire na hâ, te te 're asi'wa'rutu tô za'ra wa'aba mono da.

²⁵ Ôhô na si te za asiptete na î'âma 're anomro aba mo, we îmorizéb u.

²⁶⁻²⁷ "Tawamhâ ni'wam norî hâ tidâ'âzéb u îwi sipizari âna Satanasihî âma te te 're ai'uté za'ra mono wamhâ, duré rob'râsutu u te tâma 're îwê za'ra mono zéb zarina si, te te 're 'manharî za'ra mono wamhâ, ta norî hâ wa za pisutu za'ra, îzadawa para dama pire za'ra da, danhib'apito na 're hâimana za'ra mono da. Îmama hâ dama îpire da, sisadawa para te te îpisutu ne, wa za pisutu za'ra, daro mono bâ te te 're da'madâ'â za'ra mono da. Simiroti nhiptete na te za te 're dawada'uri za'ra. Ub'rê ne hâ zé 'manharî hâ da te 're îprub za'ra mono ne, te za te te 're daprub za'ra.

²⁸ Duré awê u, wasi wawê 're ro'o pese mono ré, da'âma 're î'awê za'ra mono ne, wa za romhâimanazép té, te tâma 're apisutu, rowê hâ.

²⁹ "Asimipari pese aba wamhâ, ma'âpé waparî pese za'ra wa'aba, Îmama pê'êzani hâ îzazei'wa norî ma, te te Irotizé wasu'u hâ." — Âne ma tô Zezusi hâ îma waihu'u, Ti'atira âma îzazei'wa norî, siré 're îsi'râ'ôtô mono norî ma, te âma rob'ui'ééré da.

3

Sadesi âma îsazei'wa norî ma rotizé wasu'u

¹ Tawamhâ Zezusi hâ îtême îwi hâ ma tô duré îma roti, âne:

— Zuwâ, te za duré îrob'ui'é, Sadesi na 'ri nhô'ômo nhisi âma îzazei'wa norî 'madâ'â'wai ma. Te aima îwaihu'uzém na te za tâma îrob'ui'é, âne:

"Wa hâ wasi hâ 7 na înhîb'rata te îtêté za'ra hâ, wa za oto aima waihu'u za'ra wa'wa. 'Re îhâimana u'âsi mono pê'êzani hâ 7 na te te 're îromhuri mono zéb ré, te 're î'madâ'â mono, wa hâ. Uburé marî hâ 're î'manharî za'ra wa'aba mono zé hâ, îma waihu'u pese di. Înhimiroti na si 're anomro aba mono na, da te 're aiwasu'u za'ra wa'aba mono zahâ, te aipê'ê 're, atâ'â ne 're anomro aba mo, î'âma 're anomro aba mono zahâ.

² Î'âma 're anomro zeî wa'aba mono da, Înhîb'apito 'Re îhâimana u'âsi mono te te aima îpisutu za'ra wa'aba zéb zarina, î'âma 're anomro aba mono ô di. Taha wa, ma'âpé âma asipo're pu'u za'ra wa'aba. Marî hâ 're î'manharî wê za'ra wa'aba mono zé hâ, aiwi si'utôri pese aba ô ré, ma'âpé apâ î'âma romhuri wê zé hâ î'âma asiwi sa'êtê za'ra wa'aba.

³ Ma'âpé duré î'âma 're anomro na'rata aba mono zém hawi înhimiroti hâ aipo're na 're îwaparî za'ra wa'aba mono zém na, duré 're îwaihu'u za'ra wa'aba mono zém na, î'âma asipo're pu'u za'ra wa'aba. Ta hâ înhimiroti hâ te za 're î'madâ'â pese za'ra wa'aba mo. Duré aiwasété wi te za 're aipizari za'ra wa'aba mo. Âne hâ apâ î'âma asipo're pu'u za'ra wa'aba ô wamhâ, wa za oto aihâ za'ra wa'wa. Nimahâ na îsimisaihuri norî hâ sô 're danhimipari za'ra mono ô nherê, danhorôwa u 're Isisisi mono ne, wa za atême îwisi 'wa, te aihâ za'ra wa'aba da. Bâdâ hâ atême îwisi za'ra wa'aba zéb da hâ waihu'u za'ra wa'aba ô di za.

⁴ Tane nherê, nima norî si Sadesi âma 're aihâimana za'ra wa'aba mono norî hâ te î'âma 're anomro wê wa'aba mo, ai'umro wa'aba nherê. Da'uza hâirâ da, hâ upto wi da te 're î'madâ'â pese za'ra mono ne, te aiwê na î'âma 're anomro aba mo. A norî wa'aba si da'uza hâirâ ne

aiwasété âna 're anomro aba mono si, te za ĩsiré 're aihâimana za'ra wa'aba mo. 'Re ĩhâimana u'âsi mono te te 're aiwêsâmri za'ra wa'aba mono wa, te za ĩ'rata 're anomro u'âsi aba mo.

⁵ “Duré ni'wam norĩ hã tidã'âzéb u ĩwi sipizari âna Satanasihĩ âma te te ĩ'ai'uté za'ra norĩ hã te za duré uza hãirã na ĩ'rata 're hâimana za'ra, âne hã. ĩbaihã na 're ĩdahâimana u'âsi za'ra mono norĩ nhisi, 're ĩsimi'wara mono zém na ĩsisi'ĩsimi'wara hã te tiwi pari za'ra ô di za. ĩmama nho'a, wa za sô'awi ĩnhib'a'uwê na te tâma 're wasu'u za'ra, hãiwa âma tâma ĩromhuri'wa norĩ nho'a zama.

⁶ “Asimipari pese aba wamhã, ma'âpé wapari pese za'ra wa'aba, ĩmama pê'êzani hã ĩzazei'wa norĩ ma, te te ĩrotizém na.” — Âne ma tó Zezusi hã ĩma waihu'u, Sadesi âma ĩsazei'wa norĩ, siré 're ĩsi'rã'õtô mono norĩ ma, te âma rob'ui'éré da.

Piradépiza âma ĩsazei'wa norĩ ma rotizé wasu'u

⁷ Tawamhã Zezusi hã ĩtême ĩwi hã ma tó duré ĩma roti, âne:

— Zuwã, te za oto duré ĩrob'ui'é, Piradépiza na 'ri nho'ômo nhisi âma ĩzazei'wa norĩ madã'â'wai ma. Te aima ĩwaihu'uzém na te za tâma ĩrob'ui'é, âne:

“Wa hã 're ĩwasété mono ô, wa za oto aima roti za'ra wa'wa, ĩnhimiropisutuzéb zarina, sena na te dama âma 're ĩ'a'uwaimrami mono 'wa hã. Duréihã Dawi hã te 're hâimana, dama ĩpire hã. ĩsôrôwa hã 'ri za'êté uptabi di. Tame te ni'wa hã 're sãmra, 'ridawazéb ré hã, te te dama 're ĩridawa mono da hã, duré te te dawĩ 're ĩridawa nhito mono da hã. Tane wa hã, wa hãiwa âma ĩmama nhorôwa 'ridawazéb ré 're ĩhâimana u'âsi, ĩwétési. Wa hã te dama 'ridawa wamhã, ni'wa apã te te dawĩ sito waihu'u ô di. Duré te 'ridawa nhito wamhã, ni'wa te te 'ridawa waihu'u ô di.

⁸ “Duré 're ĩmanharĩ za'ra wa'aba mono zé hã ĩma waihu'u pese di. Ai'umrore wa'aba nheré, dama aipire na 're aihâimana za'ra wa'aba mono ô nheré, te ĩ'âma si 're anomro wê wa'aba mo. Te duré ĩnhimiroti si 're ĩwapari pese za'ra wa'aba mo. Ma'âpé, waihu'u pese za'ra wa'aba. Wa tó asôwa 'ridawa za'ra wa'wa, ĩmama, da'âma 're ĩsib'a'uwê mono zéb u 're asisisi aba mono da. Taha 'ridawa hã ni'wa te te aiwi 'ridawa nhito waihu'u za'ra wa'aba ô di.

⁹ Ma'âpé duré, waihu'u pese za'ra wa'aba. Satanasihĩ niwĩ 're ĩhâimana za'ra mono norĩ hã, e niha wa za tâma rob'manharĩ za'ra, ta norĩ ma hã. Ta norĩ hã zudezu nheré, zudezu norĩ hâimana wê zém na 're ĩhâimana za'ra mono na, dama 're siwasu'u za'ra mono zahã, te Satanasihĩ nhimiroti zarina si 're hâimana za'ra, sadawa nhipse na. Taha wa, wa za âne tâma rob'manharĩ za'ra. Aipapara te za 're sina wa'wa, tâma aipire za'ra wa'aba wa. Taha wa, te za aiwaihu'u za'ra wa'wa, te 're ĩ'asawi pese za'ra wa'aba mono na.

¹⁰ Da te aima 're rob'manharĩ wasété za'ra wa'aba mono nheré, te aima ĩroti za'ra wa'aba zéb zarina, ĩmreme na zé 're anomro aba mono wa, ma tó asina ĩ'uwaimrami za'ra wa'wa, ĩnhimiroti hã. Taha wa, ropsi'utôrizéb u, za marĩ ĩpipa hã ĩwairébé mono hã wa za aima ba'a za'ra wa'wa, ĩwasété norĩ, za te te ĩda'apibui mono zéb âma hã, ti'ai âma daro mono bâ 're ĩdahâimana za'ra mono norĩ hã.

¹¹ Atême ĩmorĩ aba zé hã romhuture di oto. Taha wa, ma'âpé asiptete u'âsi ĩ'âma 're anomro u'âsi aba mono, 'Re ĩhâimana u'âsi mono nhoprubzéb hã da te aiwi 'mai'ári tó wa'aba da.

¹² “Tawamhã ni'wam norĩ hã tidã'âzéb u ĩwi sipizari âna Satanasihĩ âma te te ĩ'ai'uté za'ra norĩ hã, ta norĩ hã wa za te 're pisutu za'ra, 'Re ĩhâimana u'âsi mono âma hâimana nhiptete na 're hâimana u'âsi za'ra mono da, 'ri uparizé, rési âna 're ĩsimasab u'âsi mono ne. 'Ri uparizé hã marĩ te te 're rési za'ra mono ô di. Tane te za 'Re ĩhâimana u'âsi mono ma, simirosa'rata si'rúi âna, âma 're wata u'âsi za'ra. Taha wa, wa za ĩhãiba na âma ui'éré za'ra, ĩnhib'apito nhisi hã. 'Re ĩhâimana u'âsi mono te, 'ri nho'ômo nhisi na, wa za duré ĩhãiba na rob'ui'éré za'ra. 'Re ĩhâimana u'âsi mono te, 'ri nho'ômo nhisi hã, Zeruzaré ĩtém na ĩsisi hã, hãiwa hawi za te te we ĩsi'ra hã, 'Re ĩhâimana u'âsi mono hawi. ĩnhisi tém na, wa za duré ĩhãiba na rob'ui'éré za'ra.

¹³ “Asimipari pese aba wamhã, ma'âpé wapari pese za'ra wa'aba, ĩmama pê'êzani hã ĩzazei'wa norĩ ma, te te ĩrotizém na.” — Âne ma tó Zezusi hã ĩma waihu'u, Piradépiza âma ĩsazei'wa norĩ, siré 're ĩsi'rã'õtô mono norĩ ma, te âma rob'ui'éré da.

Radiseza âma ĩsazei'wa norĩ ma rotizé wasu'u

¹⁴ Tawamhã Zezusi hã ĩtême ĩwi hã ma tó duré ĩma roti, âne:

— Zuwã, te za oto ĩrob'ui'é, Radiseza na 'ri nho'ômo nhisi âma ĩzazei'wa norĩ 'madã'â'wai ma. Te aima ĩwaihu'uzém na te za tâma ĩrob'ui'é, âne:

“Wa hã tó sena, ĩ'umhãsi sina, sena na 'Re ĩhâimana u'âsi mono te dama 're sadawa wasu'u wê mono da, 're ĩhâimana mono. Wa hã 'Re ĩhâimana u'âsi mono nhimiropoto waihu'u pese zarina, ropoto na'rata 'wa, 're ĩhâimana mono.

15-16 'Re ĩmanharĩ za'ra wa'aba mono zé hã ĩma waihu'u pese di. Wa za oto āma aima romnhimíré'é za'ra wa'wa. Ā wahã hã dama se ti, da te 're ĩ'áhuri mono da hã. Duré á wa'ro hã marĩ ĩse da, da te 're ĩ'áwa'ro za'ra mono da hã, dama wē di. Tane nherē, á wapu hã dama sei ō di, da te 're ĩ'áhuri mono da hã. Dama sei ō wa, te za sa'wari ni.

"Tane, te a norĩ wa'wa hã á wapu dama ĩsei ō ne, ĩma 're aihãimana za'ra wa'aba mo. ĩ'āma si 're anomro aba mono na dama 're asiwasu'u za'ra wa'aba mono zahã, te 're aihãimana waseté za'ra wa'aba mo. ĩ'āma si 're anomro aba mono na dama 're asiwasu'u za'ra wa'aba mono ō 'wa'áhã, aré ĩma wē di. Tane nherē, 're aihãimana waseté za'ra wa'aba mono nherē, ĩzazei'wa na asadawa nhipese na dama 're asiwasu'u za'ra wa'aba mono wa, te da te 're ĩwasu'u waseté za'ra.

"Taha wa, á wapu ĩsei'ō hã da te 're ĩsa'wari za'ra mono ne, wa za oto aiwē'ō pese za'ra wa'wa.

17 "Āne te duré 'rãwi asima 're ĩnharĩ za'ra wa'aba mo: 'Wa norĩ hã wanhibro pese za'ra di. Marĩ zô wawi 're ro'wanhi'riti waihu'u za'ra mono ō di.' Āne te asima 're ĩnharĩ za'ra wa'aba mo. Tane nherē, robzei'ō na si te 're aihãimana za'ra wa'aba mo. Āne na 'rãwi 're asiwaihu'u za'ra wa'aba mono ō di. Taha wa, wa ai'āma 're ĩpē'ézé za'ra wa'wa. Asibroh ahã na 're aihãimana za'ra wa'aba mono nherē, asibroh'ō ne, te ĩma 're aihãimana za'ra wa'aba mo, aipē'ē 're wa'aba hã. Duré da'uza ō na 're ĩdahãimana za'ra mono ne, te 're aihãimana za'ra wa'aba mo, ai'urēiwi. Datob'a na 're ĩdahãimana za'ra mono ne, te duré 're anomro aba mo.

18 Taha wa, wa za oto aima roti pese za'ra wa'wa. Ētē'ubuzi pré oru uptabi hã ĩwazari'ō hã da te 're ĩ'ruiwaparĩ za'ra mono zéb zarina, da te dawĩ 're ĩ'uipra za'ra mono ne, te za ĩnhimiroti zô si 're asōpré wa'aba mo, ĩwē uptabi zô si, aipē'ē 're asibro pese ne, rowē na si ĩ'āma 're aihãimana u'ási za'ra wa'aba mono da. Duré da'uza hãirã hã te za da te dawĩ 're uipra za'ra, āma 're dasi'uza za'ra mono wa, da te 're 'madã'á ze za'ra mono da. Tane te za duré a norĩ wa'wa hã ĩwi 're ĩrowaptērē u'ási za'ra wa'aba mo, wa hã te 're aipawaptob za'ra wa'aba mono da, ĩ'āma 're anomro wē wa'aba mono da, taha zarina, asisém na 're aihãimana za'ra wa'aba mono tō da oto. Duré datōmo nhiházém na 're dasitōmo wē za'ra mono da, 're dasitōmonhĩhã za'ra mono da, da te dawĩ 're ĩ'uipra za'ra mono ne, te za ĩzō 're asōpré u'ási aba mo, ĩnhimiroti hã waihu'u pese za'ra wa'aba da.

19 Wa hã te 're ĩ'azawi pese mono norĩ hã wa te tãma 're roti pese za'ra, tiwasété na 're sisãmri za'ra mono da. Wa duré te 're hã za'ra, apã 're nomro wē mono da. Taha wa, te za aiwasété wi aipizari za'ra wa'wa, sena ĩ'āma 're anomro u'ási aba mono da oto.

20 "Ma'ápé duré, waparĩ pese za'ra wa'aba, te āma ĩsimíré hã. Aibã te 'ridawab za. Tawamhã 'ri tede'wa te 'mahã, sãmra zô, ĩtēme sébré da. Tawamhã 'ri tede'wa te te waparĩ wamhã, te za tãma 'ridawa, sitēme te te 'mazébré da, siré sa zahuré wa, rowē na te te sima rowasu'u zahuré da. Tane wa hã aibã, 'ridawa ĩsam ne, wa asó 're ĩnhimipari za'ra wa'wa. ĩmreme 're waparĩ za'ra wa'aba mono wa, ĩzō 're aihãsi aba mono zô, wa 're ĩnhimipari u'ási. Tawamhã ĩzō 're aihãsi aba mono wapsi, duré asitēme 're ĩ'mazasi za'ra wa'aba mono wapsi, wa za aipē'ē 're, 're ĩnhamra u'ási za'ra wa'wa. Tawapsi, wa za wasiré rowē na 're wahãimana u'ási za'ra.

21 "Duré, ni'wam norĩ hã tidã'ázéb u ĩwi sipizari āna Satanasihĩ āma te te ĩ'ai'uté za'ra norĩ hã, ta norĩ hã wa za pisutu za'ra, danhib'apito 're ĩsimasisi mono zéb āma, ĩzababa 're si'ubumroi u'ási mono da. Wa hã ĩdã'ázéb u ĩsipi'rai ō na Satanasihĩ āma te ai'uté wa, ĩmama zababa 're ĩnhamra u'ási mono ne, te za ta norĩ hã ĩzababa 're si'ubumroi u'ási.

22 "Asimipari pese aba wamhã, ma'ápé waparĩ pese za'ra wa'aba, ĩmama pē'ézani hã ĩzazei'wa norĩ ma, te te ĩrotizé hã." — Āne ma tō Zezusi hã ĩma waihu'u, Radiseza āma ĩzazei'wa norĩ, siré 're ĩsi'rã'ótō mono norĩ ma, te āma rob'ui'éré da.

4

Hãwi āma, 'Re ĩhãimana u'ási mono āma 're ĩdawata za'ra mono zé wasu'u

1 Taha za'u si, wa tō duré marĩ hã te ab'madã'á, danhotó 'rowim ne da te 're ĩrosawērē za'ra mono ne. Hãwi u wa tō rob'madã. Te rob'madã'á wamhã, wa tō 'madã, hãwi 'ridawa hã. Ōne haré 'ridawa hã.

Tawamhã ni'wai mreme, mreme 'rãihã na ĩsimnhãihãrãzém hãrã ne te ĩwaparĩ 'rata ne hã wa tō duré wapa. Āne te ĩ'mahã:

— We āwa aimorĩ hãimo, te aima awasu'u mono da, za 're ĩromhãimana mono zéb da hã ab'madã'á mono da. — Āne te ĩ'mahã.

2 Tawamhã 'Re ĩhãimana u'ási mono pē'ézani hã ma tō duré ĩ'uihã pi'ra, awa'awi. Te te ĩ'uihã pi'rai wa, wa tō duré aimawi ĩhãiba, ĩhãiba waihu'u ō na. Tawamhã ma tō ĩzaprō, hãwi u. Hãwi u, te te ĩzaprōni wamhã, danhib'apito simasisizé hã wa tō sabu. Ni'wa te āma nhamra.

³ Tawamhã âma Îsãmra hã te nasi hãibahai'ubuzi, êtê'ubuzi zarob'a uptabi ne hã. Duré êtê'ubuzi Îtobro'o préro'o ne hã te nasi ai'ubuzi. Tawamhã Îsimasisizé mana wawi, te tâiwaipo ne hã nasi ai'ubuzi, êtê'ubuzi ro'o uzé ne hã.

⁴ Tawamhã danhib'apito simasisizé mana wawi te dasimasisizé hã aimasa, 24 na danhib'apito te ne hã. Taha na te asimro, dama Ìpire norĩ hã 24 na ìhãiba za'ra hã, 'Re ìhãimana u'âsi mono nhimiroti na si 're Ìsôpré pese mono norĩ hã. Uza hãpa hãirã ré te asimro. Êtê'ubuzi pré oru 'manharĩ na da'rãzaza ré zama te asimro.

⁵⁻⁶ Duré danhib'apito simasisizém hawi te tâ si'ubuzi ne hã nasi ai'ubuzi, Ìwapsa'a zama, duré Ìrãrã'ã zama. 'Rãsitô hã te duré Ìsô're tiro'o za'ra, 7 na ìhãiba hã, Ìro'o hã hã. Ta norĩ hã 'Re ìhãimana u'âsi mono pê'êzani nhimromhurizéb zarina hã 7 na. Á poré hã te duré Ìsô're nomro. Á hã Ìsarob'a uptabi, simhi Ìsarob'a uptabi ne.

Maparane si'uuiwa na ropoto na ìhãiba norĩ hã te duré 'rãwi Ìmana wawi si'uuiwada za'ra. Á norĩ hã ìhãiba nho're niwĩ tob ahã di. Duré Ìbabarã niwĩmhã tob ahã di duré. Á norĩ hã tob ahã wa, ìhãiba upsibi ré norĩ hã wa tô 'madã'ã za'ra.

⁷⁻⁸ Ìmorĩ'rada hã, hu'u zérépa 'rã ne Ìrã hã. Duré Ìsãna'remhã powawê Ìba'ômo 'rã ne Ìrã hã. Duré si'ubdatô âma hã da'rã ne Ìrã hã. Duré maparane si'uuiwa na âma hã si'ômo 'rã ne Ìrã hã, hãwi 're sisa'rei mono wa, Ìrã ne hã. Á norĩ hã 6 na Ìpaihi za'ra hã, ìhãiba mono bâ. Duré ã norĩ hã ìhãiba upsibi ré norĩ, tob ahã wa, ìhãiba na hã.

Tawamhã båtã bãre duré mara bãre te tinho're za'ra, tinho're te te 're sahãri za'ra mono âna, âne:

"Uburé Danhib'apito uptabi hã 'Re ìhãimana u'âsi mono hã, 're Ìwasété mono ô. Siwaprosi 're Ìwasété waihu'u mono ô uptabi. Wê uptabi di. E ni'wa hã Ìsipai u waihu'u pese na 're hãimana mono bâ. Ôhõ si, siwaprosi Ìwaihu'u pese uptabi hã. Duréihã marĩ ô uptabi ré, ma tô 're hãimana u'âsi. Te za duré 're hãimana u'âsi. Si'utôri waihu'u ô di."

⁹ Áne te ã norĩ hã maparane si'uuiwa na ropoto na ìhãiba norĩ hã nasi âma tiwata za'ra, danhib'apito simasisizém na Ìsãmra âma, 'Re ìhãimana u'âsi mono âma. Waihu'u pese uptabi wa, te nasi âma tiwata za'ra, duré sôpru uptabi wa.

¹⁰ Nasi âma wata za'ra siré, te nasi 24 na dama Ìpire za'ra norĩ hã danhib'apito simasisizém na Ìsãmra nho're hi'rãtitô ana, siré âma wata za'ra da. Te duré nasi hi'rãtitô si'ubumro sina, Ìrãzaza sani za'ra Ìsô're, tâma pire za'ra wa, âma wata za'ra da.

¹¹ Áne te nasi âma tiwata za'ra:

"Wanhib'apito, 'Re ìhãimana u'âsi mono, a hã aiwê uptabi di. Aiwaihu'u pese di. Aiwaihu'u pese na ma tô Ì'aropoto mo. Asima Ìwê zarina ma tô uburé pese Ì'aropoto mo. Asima Ìwê zarina te oto uburé marĩ hã 're hãimana za'ra, asimipoto mono bâ. Taha wa, uburé Ì'aropoto mono zéb zarina tô Ìbãre, wa ai'âma si 're wawata u'âsi za'ra."

Áne te âma tiwata za'ra, 24 na dama Ìpire za'ra norĩ hã.

Áne, wa tô te ab'madã'ã, Ìnhotô 'rowim ne.

5

Pone'êrebã hã, 'Re ìhãimana u'âsi mono wi, Ìbaihã Ìsinhai ré te te Ì'ãrizé wasu'u

¹ Tawamhã wa tô duré sabu, Ìbaihã Ìsinhai ré hã. Danhib'apito simasisizém na Ìsãmra hã te tinhib'rata nhimire niwĩ tété. Ìbaihã nhinha hã, Ì'ui'éré si'uuiwa ré hã. Duré 7 na ìhãiba hã Ì'uptobzé hã siwasihu tô da, ni'wa te te sôré tô da.

² Tawamhã wa tô duré sabu, hãiwa âma 'Re ìhãimana u'âsi mono ma romhuri'wa, Ìsimiwada'uri pire hã. Áne te nasi anha, mreme 'rãihã na:

— E 'wa hã danhipai u Ìwê uptabi hã, duré Ìwaihu'u pese uptabi hã te za 7 na Ìbaihã nhinha uptobzé hã prub za'ra, Ìbaihã te te sô'a da. E 'wa hã te sada tihãiba. — Áne te nasi anha.

³ Tane nheré, ni'wa hã sada hãimana ô di hãiwa âma hã, Ìpru'wa da hã, te te pru wa, Ìbaihã nho'a'wa da hã, duré te te Ìsôré da hã. Duré ti'ai âma 're Ìdahãimana za'ra mono hã sada da'maihãimana ô di. Duré ti'ai 'rowi adã 're ìhãimana za'ra mono hã ni'wai ô di, sada hã.

⁴ Taha wa, wa tô sa'êtê aiwa'ô, 're Ìdahãimana za'ra mono hã sada da'maihãimana ô wa, Ìpru'wa da hã, duré te te Ìsabu da hã.

⁵ Tawamhã 24 na dama Ìpire norĩ te misi Ìma tinha, âne:

— Aiwa'ô tô. Ma'ápé 'madã'ã. Ôhõta te za, Zudaha nhihudu hã. Hu'u zérépa nhiptete nhipai u 're ìhãimana mono ne, te ô hã danhipai u 're hãimana, danhib'apito na. Ta hã apito Dawihi nhihudu, za Ìsine pire na te te 're Ìda'ab'madã'ã mono da hã. Ta hã uburé dama waihu'u pese uptabi di. Ta hã tinhitob'ru norĩ nhimromhuri wasété nhiptetezé hã ma tô tiwi uprosi za'ra. Taha wa, te ôhõ si sada tihãiba, 7 na Ì'uptobzé hã te te Ìprub za'ra da hã, duré Ìbaihã Ìsinhai ré te te Ìsô'a da hã. — Áne ma Ìma 'maiwaihu'u, dama Ìpire norĩ hã.

⁶ Tawamhã wa tô 'madã, Pone'ërebã hã. Danhib'apito simasisizéb 'rata te za, maparane si'uiwa na ropoto na ìhãiba norĩ wa'wab zama, duré 24 na dama ìpire norĩ wa'wab zama. Da te dasiwi wĩrĩ wa, da te ìwa'rézéb ré te za. 7 na ì'ômo ré hã, Pone'ërebã hã. Duré 7 na ìtômo ré hã. 'Re ìhãimana u'ãsi mono pë'ëzani hã danhipai u uburé marĩ na ìwaihu'u pese zé, te wasu'u, ìtômo za'ra hã.

⁷ Tawamhã Pone'ërebã hã ma tô ai'ré, danhib'apito simasisizém na ìsãmra u, ìbaihã ninhã hã te te àri da, tinhimire niwĩ te te ìtéde hã. Tawamhã Pone'ërebã hã ma tô ti'ã, ìbaihã ninhã hã.

⁸ Te te àri wamhã, ma tô maparane si'uiwa na ropoto na ìhãiba norĩ hã Pone'ërebã ma, hi'rãitô ana, 24 na dama ìpire norĩ zama. Rowamremezéb ré ma tô tãma aiwë'ë za'ra, ëtë'ubuzi pré oru 'manharĩ u'awi ne ré zama. U'awi 'remhã wedewa'u ìsãdaze, te ì're tiro'o za'ra. Taha nhizé hã hãimo haré ìsizé hã, ta hã 'Re ìhãimana u'ãsi mono nhib'a'uwë norĩ, tãma 're ìmreme zusi mono zé, te wasu'u.

⁹ Tawamhã ta norĩ hã te Pone'ërebã ma tinho're za'ra, tinho're ìtém na. ãne te tãma tinho're za'ra:

"A hã ma tô dasiwi aiwĩrĩ ni. Ma tô dazada atã. Dazada atã'ázém na ma tô ìdawa'ã, dawasédé hã dama 're aparĩ mono da, 'Re ìhãimana u'ãsi mono nhib'a'uwë oto 're danomro mono da.

Dapoto mono bã a hã ma tô ìda'awa'ã, damreme sipo'o mono bã 're ìdahãimana za'ra mono hã. Danhipai u aiwë uptabi di, a hã. Aiwaihu'u pese uptabi di duré.

Taha wa, te aiwëtési sada aihãiba, ìbaihã ìsinhai ré hã àri da, duré ì'uptobzé hã prub za'ra da.

¹⁰ A hã ma tô duré Wanhib'apito 'Re ìhãimana u'ãsi mono te te 're ì'awa'ãbã mono norĩ hã 're ì'apisutu mo, sasedoti na te te tãma da'ãma 're romhuri u'ãsi za'ra mono da, duré ti'ai ãma pire na za dama 're hãimana za'ra mono da."

ãne te tãma tinho're za'ra, tinho're ìtém na.

¹¹ Tawamhã wa tô duré 'madã. Te 'madã'ã wamhã, hãiwa ãma romhuri'wa norĩ hã te nemo tizadawa'a'a. Ahã uptabi di. Da te ìsa'rata waihu'u ò. Danhib'apito simasisizé hã ma siwi uirĩ. Duré maparane si'uiwa na ropoto na ìhãiba norĩ mana wawĩ te asôre, 24 na dama ìpire za'ra norĩ hã ìsisôre mana wawib zama.

¹² ãne te sô're 'rãihã na tizadawa'a'a:

"Pone'ërebã hã da te dasiwi ìwĩrĩ hã, ò hã danhipai u wë uptabi di. Ôhõ si wë uptabi wa, ôhõ ãma si 're wawata u'ãsi za'ra wa'aba mono. Ô hã uburé Roptede'wa. Tô sena waihu'u pese uptabi di. Waihu'u pese uptabi wa, ãma 're wawata u'ãsi za'ra wa'aba mono. Wama pire uptabi wab zama, ãma 're wawata u'ãsi za'ra wa'aba mono."

ãne ma tô sô're 'rãihã na ãma tizadawa'a'a, hãiwa ãma romhuri'wa norĩ hã.

¹³ Tawamhã wa tô duré wapa, uburé pese 'Re ìhãimana u'ãsi mono te te ìda'apoto mono bã, duré te te ì'apoto mono bã, ìhãiba ré mono hã, hãiwa ãma, duré ti'ai ãma, duré ti'ai 'rowi adã 're ìhãimana za'ra mono zéb ãma, duré ã 'rowi uburé pese ìhãiba ré mono hã. Uburé pese te simisutu dasiwazari tazadawa'a'a ni, 'Re ìhãimana u'ãsi mono te te ìda'apoto mono bã. ãne te tazadawa'a'a ni:

"Danhib'apito simasisizém na ìsãmra ãma, 're wawata u'ãsi za'ra wa'aba mono. Duré Pone'ërebã ãma, 're wawata u'ãsi za'ra wa'aba mono. Wë uptabi zahuré wa, duré waihu'u pese uptabi zahuré wa, wa za ãma 're wawata u'ãsi za'ra."

ãne te ãma tawata zahuré ni.

¹⁴ Tawamhã maparane si'uiwa na ropoto na ìhãiba norĩ hã te ãma sô're uze pese za'ra:

— Tô sena, tô sena. — ãne te ãma sô're uzei pese za'ra. Duré 24 na dama ìpire za'ra norĩ hã ma tô hi'rãitô tãma ana, ãma wata za'ra da.

ãne ìnhotô 'rowim ne, te ì'azabui mono hã, duré te ì'awapari mono hã.

6

Pone'ërebã, ìbaihã ninhã uptobzé te te ìprub za'ra zé wasu'u

¹ Tawamhã wa tô duré 'madã. Te 'madã'ã wamhã, Pone'ërebã hã da te dasiwi ìwĩrĩ hã ma tô ìbaihã ninhã uptobzé ìmorĩ'rada hã pru. Tawamhã maparane si'uiwa na ropoto na ìhãiba norĩ hã te ìmorĩ'rada hã hã, mreme 'rãihã na:

— We aiwatobro. — ãne te hã.

² Tawamhã ãne hãrã wĩ, wa tô marĩ sabu, awaru ìrã hã. ì'mapra'wa hã te umnhi'ãsi ré nhamra. Tawamhã ma tô ì'rãzaza hã tãma sërë ni. ì'rãzaza hã za te te da'ãma ì'ai'utézé, te wasu'u. Tawamhã ma tô wara ti'ai u, tinhitob'ru norĩ zô, siwamnhasi sina te te ãma ai'uté za'ra da, ãma sib'apito za'ra da.

³Tawamhã Pone'ërebã hã ma tô duré ìbaihã nhinha uptobzé hã Ìsãna'remhã pru. Te te pru wi, ropoto na ìhãiba norì hã ma tô duré Ìsãna'remhã hã:

— We aiwatobro. — Ìne te hã.

⁴Tawamhã awa'awi awaru ìpré uptabi hã ma tô watobro. Ì'mapra'awa Ìsisiwi te nhamra. Tawamhã sib'ézé 'wapa ma tô tâma sômri ni, da'wapézb da hã. Ma tô tâma pisutu ni, dasi'wapé hã te te dazada wazere da, dasi'wapé na 're dasimroi mono da.

⁵Tawamhã Pone'ërebã hã si'ubdatô âma ìbaihã nhinha uptobzé hã ma tô duré pru. Te te pru wi, wa tô duré wapa, si'ubdatô âma ropoto na ìhãiba norì hã hã hã, âne:

— We aiwatobro. — Ìne te hã.

Tawamhã awa'awi wa tô awaru tisã, ì'rãdã hã. Ì'mapra'awa hã te marì pibuzé hã 're ti'ã, tinhìb'rata, amnho pibuzéb da hã.

⁶Tawamhã wa tô duré wapa, damreme uptabi ne hã, maparane si'uiwa na ropoto na ìhãiba norì Ìsimasabzém hawi. Ìne te rowa'âbázé hã tâma anhoré, awaru 'mapra'awai ma:

— Ìne misi båtã na dapawa'ã hã, tô misi ìpibu, tridu wa'âbázéb zarina hã za. Ìne te za dawì Ìsarô hãimo, rowa'âbázé hã. Tane nheré, azeitona wede hã 're Ìsimasa mono hã, duré uwa 'ru hã 're Ìsimhatã mono hã u'a za'ra ô di za, azeitona 'rã wa'ui wabre hã si'utõrì tô da a'ã, uwa 'ru 'rã wa'u Ìsé zama. — Ìne ma tô âma pa'uwati.

⁷Tawamhã Pone'ërebã hã ma duré pru, maparane si'uiwa na âma ìbaihã nhinha uptobzé hã. Te te pru wi, wa tô duré wapa, ropoto na ìhãiba norì hã maparane si'uiwa na âma hã, da'rãsutu'wa hã. Ìne te hã:

— We aiwatobro.

⁸Tawamhã hãrã wi, wa tô duré sabu, dadã'ã wa, dahãiba'a ne awaru ìhãiba'a hã. Ì'mapra'awa nhisi hã Adã'ã na Ìsisi hã. Duré ìhãiba amo, 'rãwi te te Ìsa'u mono nhisi hã, Adã 're ìhãimana za'ra mono zé. Tawamhã ma tô pisutu zahuré ni, te te da'a'uprosi zahuré mono da, daro mono bã, dasi'wapé na. Duré mram na te te da'uprosi zahuré mono da, ma tô pisutu zahuré ni, duré daházé pire na te te 're ìdaduri mono na, duré abaze zahi na zama. Tawamhã daza'rata ahã prã na te za dasi'utõrì, daro mono bã. Maparane si'uiwa na dahãiba wamhã, misi si te za dadã'ã za'ra. Taha zarina te za da'ahã prã na ai'utõrì ni, daro mono bã.

⁹Tawamhã Pone'ërebã hã ma tô duré Ìmrotô hã pru, ìbaihã nhinha uptobzé hã. Tawamhã te te pru wamhã, wa tô duré 'madã'ã za'ra, 'Re ìhãimana u'ãsi mono nhimiroti te te 're sazei pese za'ra mono 'ru te, da te 're Ìsimroi mono norì pë'èzani hã, tô sena na Zezusihì zazei'wa na pahi ãna dama 're siwasu'u za'ra mono 'ru te, da te 're Ìsimroi mono norì pë'èzani hã. 'Re ìhãimana u'ãsi mono ma, danhoprubzé nomrizéb 'rowi te asimro, wedeza ne 'rowi.

¹⁰Tawamhã mreme 'rãihã na te hã:

— Wanhib'apito, danhipai u aiwaih'u pese di. Aiwë uptabi di. Tô sena, a hã. Taha wa, e nimahã na hã wa'uprosi'wa norì âma ìwasédé hã sa'ra ô di za, ti'ai âma 're ìhãimana wasété za'ra mono âma. E niwamhã wa'ruiwa'ãbã za'ra ô di za, asimì'ahãrizém na hã. — Ìne te hã, mreme 'rãihã na.

¹¹Tawamhã da'uza hãirã hãpa, ma tô tâma sômri za'ra ni, tidã'ázéb u sipizari ãna, Zezusihì âma 're hãimana za'ra mono wa. Ma tô duré tâma nharì za'ra ni:

— Ma'ápé, asimì'è na a'ã 're asimipari za'ra wa'aba mono. Da te 're Ìsimroi mono norì za'ratazé hã 'Re ìhãimana u'ãsi mono te te ìpisutuzé hã zahadu da te dasina azahutu ô di. Da te ai'uprosi aba ne, asiré Ìsazei'wa norì, za da te 're Ìsimroi mono norì za'ratazé wab ô wa, te za a'ã asimì'è na sô 're asimipari za'ra wa'aba mo. — Ìne ma tô tâma nharì za'ra ni.

¹²Tawamhã wa tô duré 'madã. Te 'madã'ã wamhã, ma tô Pone'ërebã hã duré pru Ìmropã âma hã, ìbaihã nhinha uptobzé hã. Te te pru wamhã, awa'awi ma tô ti'a hã sãsã'ã, sa'été uptabi. Bãdã hã ma tô duré tìtopã'ã, zazahã ìhã 'rãdã'ã uptabi ne. A'amo hã ma tô duré tìtõmo wapru.

¹³Wasi hã ma tô duré rere, ti'ai u. Pidera wede 'rã hã rowa'u'u za'ëne hã te te 're pari za'ra mono wa, 're ì'a'a mono ne, ma tô wasi hã rere, ti'ai u.

¹⁴Tawamhã ma tô duré hãiwa nhirõno hã ai'ub'rã, ìbaihã da te 're ì'ub'rã za'ra mono ne. Duré ti'a hã sãsã'ã wamhã, été 'rãihã, daro mono bã 're Ìsimasa mono hã ma tô sina si'ré, 're Ìsimasa mono zém nhiti. Rob'ré za'iti zama, ma duré uburé sina si'ré, 're Ìsimi'wara mono zém nhiti.

¹⁵Tawamhã ti'ai âma danhib'apito mono bã dama ìpire mono bã ma tô été 'rãihã zahãpã sima'uri, da'madã'ã'wa norì hã, duré da'wapéi'wa norì nhìb'apito norì hã. Ìsìbrob ahã norì zama ma tô sima'uri, Ìsìbrob'õ norì zama, pawa'ãbã ãna ìwada'uri zarina si te te dama 're ìromhuri za'ra mono norì zama, duré wada'uri ãna si'uihã na 're ìhãimana za'ra mono norì zama. Uburé ma tô dasima'uri, été 'rãihã zahãpã été're 're, duré été nhì'rìti 're, dasi'utõrì tô mono da.

¹⁶Tawamhã êtê 'râihâ norî ma, te nasi si'mahârâ za'ra, êtê tōmo wawê norî ma zama. Āne te nasi tâma si'mahârâ za'ra:

— Ma'âpé, wanhisíwi we airere'e aba mono, wa'upsibi za'ra wa'aba mono da, hâiwa âma danhib'apito simasisizém na Ìsâma hã te te wa'asâmri tō da. Duré Pone'êrebâ nhimiházé wi, wanhisíwi we asa'wari aba, tiwi wazuwa za'ra wa'aba mono da.

¹⁷Bádâ Ìpípa hã ma tō oto Ìwa waptârâ, ò norî hã te te Ìwa'uprosi zahuré mono zéb da hã. E 'wa hã hâiba ré tiwi watobro da bâ. Ni'wa hã dâ'â âna tiwi watobro waihu'u ò di za. Sô'rata waihu'u zahuré ò di za. — Āne ma tō êtê tōmo wawê norî ma, nasi si'mahârâ za'ra.

Āne Ìnhotô 'rowim ne, te Ì'azabui mono hã, duré te Ì'awapari mono hã.

7

Izarazéhé nhihudu uihâi u'éré za'ratazé wasu'u, 144 miu na

¹Tawamhã wa tō duré sabu za'ra, maparane si'uiwa na hâiwa âma 'Re Ìhâimana u'âsi mono ma, romhuri'wa norî hã. Bâtâ pusizém niwî misi te za, ti'ai âma hã. Bâtâ zasizém niwî te duré misi za. Duré hâiwa'a're si'uiwa na te duré si'uiwada zahuré. 'Re Ìhâimana u'âsi mono te te tâma Ìpisutu za'ra zéb zarina, te ta norî hã rowa'u hã si'u tété za'ra, bâtâ pusizém niwî, duré bâtâ zasizém niwî, duré hâiwa'a're si'uiwa na, te te 're rowapõrî tō za'ra mono da. Te te 're âzasisi za'ra tō mono da, te rowa'u hã siwi tété za'ra, duré wede hã te te 're rési tō za'ra mono da.

²⁻³Taha parimhã, wa tō duré sabu, hâiwa âma romhuri'wa hã aimawi hã. Bâtâ pusizém hawi ma tō we sihâi'ré. Ta hã te rob'ui'éré siro hã tinhib'rata we 're ti'â, 'Re Ìhâimana u'âsi mono nhîb'a'uwê âma te te 're Ì'aza'ra mono zéb da hã. Tawamhã maparane si'uiwa na hâiwa âma romhuri'wa norî hã te 'mahârâ za'ra, mreme 'râihâ na:

— Tō'â. Ti'ai ma, rob'manharî za'ra wa'aba tō a'â, â poré ma zama, duré wede ma zama. Wanhib'apito 'Re Ìhâimana u'âsi mono nhîb'a'uwê hã a'â wa te a'uihâ u'éré mono, pibui pese da, 'Re Ìhâimana u'âsi mono nhimiházém na dazu te te robzépata za'ra tō da. — Āne te 'mahârâ za'ra hâiwa âma romhuri'wa hã, tinhib'rata rob'ui'éré siro te te 're Ì'râ'âri hã. Tawamhã ma tō oto a'uihâ u'éré, bâtâ pusizém hawi Ìwatobro hã tisiré norî me. Maparane si'uiwa na hâiwa âma romhuri'wa norî ma, ma tō 'Re Ìhâimana u'âsi mono hã tâma 'ru za'ra aré, Ìsimi'manharî waihu'u pese zém na ti'ai ma, te te rob'manharî za'ra da aré, duré â poré ma, te te rob'manharî za'ra da. Tane nherê, hâiwa âma romhuri'wa aimawi hã ma tō âma pa'uwati za'ra, ti'ai ma, te te a'â rob'manharî tō za'ra da.

⁴Tawamhã wa tō duré wapa, ni'wai mreme hã. Te Ìma wasu'u, 'Re Ìhâimana u'âsi mono nhîb'a'uwê za'ratazé hã. Āne te Ìma wasu'u:

— 'Re Ìhâimana u'âsi mono nhîb'a'uwê za'ratazé hã âne, Ì'uihâ u'éré ré norî hã 144 miu na Ìhâiba za'ra hã. — Āne ma tō ni'wa hã Ìma waihu'u. Ā hã Izarazéhé nhihudu norî za'ratazé, te wasu'u. Ìshidu sidâpâsi, te awasu'u.

⁵Zudaha nhihudu uihâ u'éré za'ratazé hã 12 miu na. Duré Rubêhê nhihudu uihâ u'éré za'ratazé hã 12 miu na. Duré Dadihi nhihudu uihâ u'éré za'ratazé hã 12 miu na.

⁶Duré Aséhé nhihudu uihâ u'éré za'ratazé hã 12 miu na. Duré Naptarihi nhihudu uihâ u'éré za'ratazé hã 12 miu na. Duré Manaséhé nhihudu uihâ u'éré za'ratazé hã 12 miu na.

⁷Duré Simi'âhã nhihudu uihâ u'éré za'ratazé hã 12 miu na. Duré Réwihî nhihudu uihâ u'éré za'ratazé hã 12 miu na. Duré Isacaha nhihudu uihâ u'éré za'ratazé hã 12 miu na.

⁸Duré Zeburôhõ nhihudu uihâ u'éré za'ratazé hã 12 miu na. Duré Zuzéhé nhihudu uihâ u'éré za'ratazé hã 12 miu na. Duré Bêzamihi nhihudu uihâ u'éré za'ratazé hã 12 miu na. Simisutu hã, Ì'uihâ u'éré za'ratazé hã 144 miu na Ìsa'ratazé hã, Izarazéhé nhihudu norî za'ratazé hã, Ìshidu sidâpâsi.

Āne wa tō waihu'u, Ìnhotô 'rowim ne.

Da'ahâ uptabi na 'Re Ìhâimana u'âsi mono nho're Ìdahâimana za'ra zé wasu'u

⁹⁻¹⁰Taha parimhã, wa hã Zuwã, wa tō duré 'madâ. Te 'madâ'â wamhã, wa tō da'ab'madã, da'ahâ uptabi na, da te Ìdaza'rata waihu'u ò hã. Dapoto mono bâ te aimasam ni, damreme sipo'o mono bâ 're Ìdahâimana za'ra mono hã. Danhib'apito simasisizém nho're te aimasam ni, duré Pone'êrebâ nho'reb zama. Da'uza hâpa hâirã ré te Ìsô're aimasam ni. Tawamhã wa'asu ne hã, da te tété za'ra sina, te damreme 'râihâ na âma tawata za'ra ni, âne:

— Wanhib'apito 'Re Ìhâimana u'âsi mono, danhib'apito simasisizém na Ìsâma hã ta hã, Wa'anho'reptui'wa. Duré Pone'êrebâ hã Ìsiré Wa'anho'reptui'wa. Ā norî hã ma tō wawasété wi te te 're wa'anho'reptu zahuré, 're Ìwasi'utõrî za'ra mono zé wib zama. — Āne te damreme 'râihâ na âma tawata zahuré ni.

¹¹Tawamhã hâiwa âma romhuri'wa norî hã te zahadu danhib'apito simasisizé mana wawi aimasa. 24 na dama Ìpire za'ra norî hã Ìsisoré mana wawib zama te zahadu aimasa,

maparane si'uiwa na ropoto na ihâiba norî mana wawib zama. Ta norî hã hâiwa âma romhuri'wa norî hã ma tô duré danhib'apito simasisizém nho're hi'râtitô ana, 'Re ihâimana u'âsi mono âma wata za'ra da.

¹² Âne te âma tiwata za'ra:

— Tô sena, wa ai'âma si 're wawata u'âsi za'ra. Tô sena, aiwaihu'u pese uptabi di. Duré aiwê uptabi di. Duré asôprub uptabi di. Tô sena danhipai u uptabi dama aipire na te 're aihâimana mo. Tô sena, wa âne ai'âma wawata za'ra ni. — Âne te âma tiwata za'ra, hâiwa âma romhuri'wa norî hã.

¹³ Tawamhã âma wata za'ra pari, ma tô 24 na dama ïpire norî siré hã misi ï'mazadanha, âne:

— E 'wam norî hã, ô norî hã, da'uza hâpa hâirã ré hã. E ma hawi we ïdasi'aba'ré. — Âne te ï'mazadanha.

¹⁴ Tawamhã asa wa tâma tinha:

— Me. Wa hã te waihu'u ô di. Aima waihu'u pese di, a hã.

Tawamhã ma tô oto ïma waihu'u, âne:

— Â norî hã ropsi'utôrizéb âma, ti'ai âma da te 're ïrobzépata za'êtê za'ra mono zéb 'rãsutu u, hâiba ré ré 're ihâimana za'ra mono. Da te dasima 're ïrob'manharî wasété za'ra mono zém na 're ïdasi'utôri mono zém hawib ô di. Te te 're robzépata za'êtê za'ra mono nherê, hâiba ré ré we ïwairébê, â norî hã. 'Re ihâimana u'âsi mono ma, ma tô sihâiba 'ru za'ra, Pone'ërebâ wapru na dazada idâ'ázém na ïwasété wi te te 're a'upsôï pese mono da, da'uza hã hâirã da, da te 're ï'upsôï pese za'ra mono ne.

¹⁵ Taha wa, te â norî hã 'Re ihâimana u'âsi mono simasisizém nho're aimesa, uza hâpa hâirã ré. Romhuri zahâri âna te te tâma 're romhuri u'âsi za'ra, âma 're ïdawata za'ra mono zéb âma hã. Duré danhib'apito simasisizém na ïsâmra hã te za duré 'râwi âma 're sisapri u'âsi za'ra, ï'uza hâpa hâirã ré norî âma hã, ï'rata za oto 're sãmra u'âsi za'ra mono wa.

¹⁶ Tawamhã â norî hã mra te te 're sêpata zahu za'ra mono ô di za oto. Duré te te 're 'rubu zahu za'ra mono ô di za oto. Bâdâ hã te te 're hâiba zata waihu'u za'ra mono ô di za oto. Duré aimawi rowa'ro ïpire hã te te 're hâiba zata waihu'u za'ra mono ô di za oto.

¹⁷ E mari'wa, te te 're robzépata waihu'u za'ra mono ô di za oto. Pone'ërebâ hã danhib'apito simasisizéb âma ïsa hã te te 're 'madâ'â pese za'ra mono wa, te te 're robzépata waihu'u za'ra mono ô di za. A'ubuni wi, danhimizama da te 're ï'madâ'â pese za'ra mono ne, te za te te 're 'madâ'â pese za'ra. Te za duré ub're u te te 're simroi u'âsi, â u'âsi u, da te 're âhuri mono wa, 're ïdanomro u'âsi mono zéb u. 'Re da'ry'ry mono wa, da'upî hã da te dasima 're ï'u'ô za'ra mono ne, te za duré te te 're apawapto, pë'ëzé âna oto 're nomro u'âsi mono da. — Âne ma tô 24 na dama ïpire norî siré hã misi ïma 'maiwaihu'u.

Âne ïnhotô 'rowim ne, te ï'ab'madâ'â mono hã, duré te ï'awapari mono hã.

8

Pone'ërebâ hã 7 âma ïbaihã nhinha uptobzé te te ïprubzé wasu'u

¹ Tawamhã ïmrotô âma hã 7 âma hã ma tô Pone'ërebâ hã ïbaihã nhinha uptobzé hã pru. Te te pru wi, ma tô rowarôtârâ, hâiwa âma hã. Bâtâ pibuzé za'ratazé wâiwa ma tô âma ai'utô, rob'é'é ré hã.

² Tawamhã wa tô duré 'madâ'â za'ra, 7 na hâiwa âma romhuri'wa norî hã 'Re ihâimana u'âsi mono nho're, ïsimasam norî hã. Ta norî ma, ma tô 7 na danhimnhihârzéb hã sômri za'ra ni.

³⁻⁴ Tawamhã hâiwa âma 'Re ihâimana u'âsi mono ma romhuri'wa hã ma tô wei mo, misi aimawi hã. Wedeza ne 'rata te za, 'Re ihâimana u'âsi mono ma, danhoprubzéb da, wedewati ïsadaze hã da te tâma 're ïzata za'ra mono zéb 'rata. U'awire ne hã êtê'ubuzi pré oru 'manharî te 're ti'â, wedewati ïsadaze nhemezéb da hã. Tawamhã wedewati ïsadaze hã ma tô ahã na tâma sômri za'ra ni, 'Re ihâimana u'âsi mono ma, te te zata za'ra da. Tawamhã wedeza ne oru 'manharî âma ma tô zata za'ra, danhib'apito simasisizém nho're. 'Re ihâimana u'âsi mono hã ïsadaze hã te te hã da, ma tô zata za'ra, wedewati ïsadaze hã. Te te zata za'ra wamhã, ma tô ïsizé hã si'rê hâimo, 'Re ihâimana u'âsi mono nhîb'a'uwê 're ïmreme zusi mono mreme siré. Hâiwa âma romhuri'wa nhîb'rata hawi, te ïsizé hã si'rê hâimo, 'Re ihâimana u'âsi mono nho're ïsam nhîb'rata hawi.

⁵ Tawamhã hâiwa âma romhuri'wa hã ma tô pré'a 'manhe, u'awire ne hã oru 'manharî 're, wedewati ïsadaze nhemezéb 're. Wedeza ne na, wedewati zadaze hã da te 're ïzata za'ra mono zém hawi ma tô pré'a 'masisi. Te te 'masisi wamhã, ma tô ône haré ti'ai u sa'wa, uzâ hã. Te te sa'wari wamhã, ma tô tâiwapsa hã watobro, tâirârâ'â zama. Tâsi'ubuzi zama, ma tô duré watobro. Ma tô duré ti'a hã sãsã'â.

Hâiwa âma romhuri'wa norî, tinhimnhihârzém na ïsimnhihâsizé wasu'u

⁶ Tawamhã 7 na hâiwa âma romhuri'wa norĩ hã ma tã oto asõré pese, tinhimnhihârâzém na simnhihãsi da.

⁷ Tawamhã ìmorĩ'rada hã ma tã tinhimnhihârâzém na amnhihârã. Simnhihârã wi, ma tã tâzã hã rere ti'ai u, unhamã zama. Dawapruĩ wazari, ma rere uzã hã, duré tâzã hã. Ti'ai u rere'e wamhã, daro mono bã ma tã ti'a hã zada, iwãiwa prã na. Wede hã 're ìsimasa mono hã ma tã duré si'uzã, ìsa'ratazé wãiwa prã na. Du zama ma tã uburé sihõmo, daro mono bã.

⁸ Tawamhã maparane âma hã hãiwa âma romhuri'wa hã ma tã duré amnhihârã, tinhimnhihârâzém na. Simnhihârã wi, ma tã marĩ hã êtê 'rãihã ne hã âi ba waptãrã, unhamã ro'o ré. Waptã'ã wamhã, â poré mono bã ma tã â wãiwa prã na âwapru.

⁹ Tepe norĩ hã â 'rowi 're ìhãimana za'ra mono hã ma tã duré si'utõrĩ, ahã prã na, ìsa'ratazé wãiwa prã na. Ma tã duré uba're hã ahã prã na si'utõrĩ, â nhisi baba 're ìsisa'rei mono hã. ìsa'ratazé wãiwa prã na ma si'utõrĩ.

¹⁰ Tawamhã hãiwa âma romhuri'wa hã si'ubdatõ âma hã ma tã duré tinhimnhihârâzém na amnhihârã. Simnhihârã wi, ma tã wasi ìsa'êne hã waptãrã, hãiwa hawimhã. 'Rãsitõ ro'o ne, te ro'o'a'a. Waptã'ã wamhã, nima niwĩmhã panho'õmo norĩ nhisiwi, ma tã waptãrã. ìsa'ratazé wãiwa prã na panho'õmo nhisiwi, ma waptãrã, ub're nhisiwib zama.

¹¹ Tawamhã pa nho'õmo norĩ nhisiwi ìwaptã'ãzéb âma hã ma tã dawĩ ti'ázé pire. Tawamhã da te âhuri wamhã, ma tã da'ahã na dasi'utõrĩ, ázé pire uptabi wa. Wasi ìsa'êtê nhisi hã ázé'wa na ìsisi hã.

¹² Tawamhã hãiwa âma romhuri'wa hã maparane si'uiwa na âma hã ma tã duré tinhimnhihârâzém na amnhihârã. Simnhihârã wi, ma tã bãdã hã ìtõmo wãiwa prã na titobra. A'amo zama ma duré ìtõmo wãiwa prã na titobra. Wasi norĩ zama, ma duré ìtõmo wãiwa prã na tobra. Taha wa, te te rob'uiwẽ prã za'ra di wasi hã, duré bãdã hã, duré a'amo hã.

¹³ Taha pari, wa tã duré 'madã, si'u hã. Hãimo uptabi te 're wara. Wara sina, te mreme 'rãihã na dama rob'mahã, âne:

— Ni'ãpé, ni'ãpé, ni'ãpé. Ti'ai âma uburé pese 're aihãimana za'ra wa'aba mono norĩ ma, aima ropipa uptabi za'ra wa'aba di za. Hãiwa âma romhuri'wa norĩ si'ubdatõ ìsimnhihãsi õ, tinhimnhihârâzém na oto simnhihãsi wamhã, ìsimnhihãsi sidãpãsi te za ropipa uptabi hã asõ tiwairébé 'wa. — Æne te si'u hã dama rob'mahã.

Æne ìnhotõ 'rowim ne, te ì'azabui mono hã, duré te ì'awapari mono hã.

9

¹ Taha pari, ma tã ìmrotõ âma hã amnhihârã duré, hãiwa âma romhuri'wa hã, tinhimnhihârâzém na. Simnhihârã wi, wa tã sabu wasi hã, hãiwa hawi ti'ai u ìwaptã hã. 'Ridawazé hã ma tã wasi ma sõmri ni, ab're 'rehã 'ridawazé hã. (Ab're 'rehã hã, wa'uburé norĩ 're ìhãimana za'ra mono zã).

² Tawamhã wasi hã ma tã ab're 'rehã hã 'ridawa. Te te 'ridawa wamhã, ma tã ìsizé hã watobro, ab're 'rehã hã. ìsizé hã unhamã ro'o za'êtê nhizédé ne hã. Tawamhã, watobro wamhã, ma tã bãdã hã tõmo zuwa. Ma tã duré hãiwa'utõ, ab're 'rehã nhizé hã. Taha wa, ma tã daro mono bã tirobra.

³ Tawamhã ìsizédé hawimhã ma tã 'ridi hã wairé, ti'ai u. Tawamhã ta norĩ ma, ma tã pisutu za'ra ni, apa'apa 'wa nhi'oto nhipsari ne ìsé uptabi ne, te te dama 're rob'manharĩ za'ra mono da, 'Re ìhãimana u'ãsi mono nhimi'manharĩ waihu'u pese zém na.

⁴ Æne te ni'wa hã tãma nharĩ za'ra:

— Dui ma, 're rob'manharĩ wasété za'ra wa'aba mono õ di za, wesuirã ma zama, wede ma zama. — Æne te âma uwati za'ra. Te duré tãma da'ru za'ra:

— 'Re ìhãimana u'ãsi mono nhib'a'uwẽ'õ, uihã ui'ére ãna 're ìnomro mono norĩ ma si, te za 're ìrob'manharĩ wasété za'ra wa'aba mo.

⁵ Tane nheré, 're danhimroi wa'aba mono õ di za. A'amo ìmrotõ na si te za dama 're ìrob'manharĩ wasété za'ra wa'aba mo. Apa'apa 'wa nhi'oto nhipsari ne ìsé pire ne, te za dama 're ìrob'manharĩ wasété za'ra wa'aba mo, da te 're robzépata za'êté uptabi za'ra mono da. — Æne te tãma dahãiba 'ru za'ra.

⁶ Tawamhã a'amo ìmrotõ na da te 're robzépata za'êté za'ra mono wa, te za 'rãwi da te dasima 're rosa'rata wasété za'ra, dasi'uihã na 'rãwi 're dasisimroi mono da. 'Re dasisimroi mono da nheré, 're dasisimroi waihu'u mono õ di za. Te za da te 're robzépata hã za'ra, a'ã.

⁷ Tawamhã 'ridi hã te asõré, awaru hã dasi'wapé da, da te 're ìpese za'ra mono ne. Êtê'ubuzi prẽ oru 'manharĩ na da'rãzaza ne ré, te asõré. Duré da'ubu ne ì'ubu mono, awaru hã.

⁸ Duré ìséré mono hã aiwa pi'õ zéré ne. Duré ì'wa mono hã, aiwa hu'u zérépa 'wa ne, ì'wa hã.

⁹ Tawamhã İsi'uwazi tete 'manharĩ ne ré, te sô'utu ubu ré aimasa. Duré İsaripi ruru hã ruru'u za'êtê uptabi di. Aiwa awaru na wedewarare tete 'manharĩ ruru'u ne hã, dasi'wapé zô âma 're İdasisa'rei mono ruru'u ne, İsaripi ruru hã.

¹⁰ Duré İna're 'wamhi mono hã apa'apa 'wa nhi'oto na're 'wamhi ne. Taha nhipsari ne, sé pire di, İsimiwa'rezé hã. Tawamhã tina're 'wamhi na te za tó te te dama 're rob'manharĩ wasété za'ra. A'amo İmrotó na te za te 're daházub u'asi.

¹¹ Duré İsib'apito za'ra hã te 're hâimana, ab're 'rehâ 'madâ'â'wa hã. Zudezu norĩ nhiminhisizém na hã, Abado na İsiminhisizé hã. Duré deredu norĩ nhiminhisizém na hã Apori'ã na İsiminhisizé hã. İsisi hã da'uprosi'wa, te wasu'u.

¹² Tawamhã ropipa hã İmorĩ'rata na İwatobro hã ma tó ai'utó. Tane nheré, te za duré ropipa hã maparane dazó pu.

¹³ Tawamhã hâiwa âma 'Re İhâimana u'asi mono ma romhuri'wa hã İmropâ âma hã ma tó duré tinhmnhihârzém na amnhihârâ. Simnhihârâ wi, wa tó duré ni'wai mreme hã wapa. Oru 'manharĩ na wedeza ne na 'Re İhâimana u'asi mono ma, danhoprubzéb da, wedewati İsadaze, da te tâma 're İzata za'ra mono zé 'râ'wa mono hawi, İmreme hã.

¹⁴ Hâiwa âma romhuri'wai ma, İmropâ âma İsimnhihârâ ma, te te İnharĩ hã wa tó wapa. Æne İmreme hã:

— Ma'ápé, wa'uburé maparane si'uiwa na İpawasisi ré norĩ ma, İpawasisizé hã wasihu za'ra na, Eprati na pa nho'ômo nhisi âma 're İsi'ubumroi mono norĩ ma. — Æne İmreme hã.

¹⁵ Tawamhã ma tó oto tâma wasihu za'ra. Duréihã ma tó 'Re İhâimana u'asi mono hã âma ropisutu sirômo za'ra, niwapsi bâdâ te te İpisutuzé hã, İwa waptâ'ã wapsi, te te da'uprosi mono da. Tó ã bâtâ na İwa waptâ'ã wa, ma tó İpawasisizé hã tâma wasihu za'ra. Tawamhã daro mono bâ da'ahâ uptabi prã na te za wa'uburé norĩ hã te te da'uprosi, daza'ratazé wâiwa prã na.

¹⁶ Tawamhã wa tó wapa, daza'ratazé 'mahârâ hã, dasi'wapé zô awaru na İdasisa'rei mono norĩ za'ratazé hã. Æne daza'ratazé 'mahârâ hã, te İwaparĩ hã, 200 mirôisi na. Da'ahâ uptabi di.

¹⁷ Tawamhã awaru, wa tó sabu za'ra, dasi'wapé zô âma 're İdasisa'rei mono zé hã. Danhotó 'rowi, da te 're İrosawêré za'ra mono ne, wa tó İnhotó 'rowim ne sabu za'ra, İsisiwi İsi'ubumroi mono norĩ zama. Ta norĩ hã İsi'uwazi tete 'manharĩ ne ré, te sô'utu ubu ré İsisi asimro. İsô'utu ubu mono hã unhamã ro'o pré ne na, İwamnarĩ mono hã. Duré sôté uzé ne na İsô'utu ubu zé wamnarĩ mono hã. Duré 'rênhipré nho'utu uzé ne na, İsô'utu ubu zé wamnarĩ mono hã. Duré awaru 'râi mono hã, aiwa hu'u zérépa 'rã ne. İsadai're hawi mono hã te unhamã ro'o mono ne hã nasi wairé, duré İsizédé hã, êtê ro'o nhizédé uzé pire zama. Duré İsizédé uzé pire hã te duré nasi wairé, dapârízé hã.

¹⁸ Tawamhã ã hã, unhamã ro'o ne hã duré İsizé hã duré êtê ro'o nhizédé uzé pire hã ma tó te te da'uprosi, awaru zadai're hawi, İwairébé mono hã. Daro mono bâ da'ahâ uptabi prã na ma tó te te da'uprosi, daza'ratazé wâiwa prã na.

¹⁹ Æne ma tó tizadai're ro'o nhipârĩ na te te da'uprosi, tizamo na zama. İsamõ mono hã wahĩ ne İsamõ hã. Tó wahĩ 'rã ne na İsamõ 'rãsutu mono hã. Taha na ma tó te te daházub.

²⁰ Tawamhã dahâiba ré İdasi'atarême mono hã İdadâ'â mono ô hã, 'râwi dasi'uihã na 're dasisâmri za'ra mono ô di. Zahadu te wa'uburé norĩ âma si 're dawata za'ra. Te duré zahadu ropoto hâiba 'manharĩ âma si 're dawata za'ra, danhib'manharĩ nhipse na da te 're İrob'manharĩ za'ra mono âma, êtê'ubuzi pré oru 'manharĩ âma, duré êtê'ubuzi'a prata 'manharĩ âma, duré İsi'uwazi waipo 'manharĩ âma, duré êtê 'manharĩ âma, duré wede 'manharĩ âma. Zahadu da te rême mono ô di. Ropoto hâiba 'manharĩ hã te te rob'madâ'â ô nheré, duré simipari ô nheré, duré mori ô nheré, te zahadu âma 're dawata za'ra, 'Re İhâimana u'asi mono upana.

²¹ Duré zahadu dasipârĩ hã da te sahâri mono ô di. Duré simi'â, da te sahâri mono ô di. Duré pi'õ na danhimisaihuri hã da te sahâri mono ô di, duré aibã na zama. Duré dasiwi romnhimi'uri hã da te sahâri mono ô di. Zahadu dawasété wi 're dasipizari za'ra mono ô di. Ône u'asi te marĩ İwasété na si 're dahâimana za'ra.

Æne İnhotó 'rowim ne, te İ'awaihu'u mono hã.

10

Hâiwa âma romhuri'wa hã İbaihã nhinha İsyryre te te 're İ'râ'ârizé wasu'u

¹ Tawamhã wa tó duré sabu, hâiwa âma 'Re İhâimana u'asi mono ma romhuri'wa hã aimawi hã İsimiwada'uri pire hã. Hâiwa hawi ma we si'ra, hâiwa'a na ubu ré. Tâiwaipore te duré İ'râ nhisiwimhã za. Duré İ'ubu hã aiwa bâtâ ro'o ne. Duré unhamã ro'o pa ne, İza hã.

² Tawamhã Ìbaihã nhinha Ìsryre te sôzi haré 're ti'â, tinhib'rata. Tawamhã â poré nhisiwi ma tô tipara nhimire niwĩmhã tipara hã tisã. Ti'a nhisiwi ma tô duré tipara nhimi'e niwĩmhã tipara hã tisã.

³ Tawamhã mreme 'rãihã na te hã. Hu'u zérépa wairô 'rãihã ne, ìhãrã hã. Hãrã wamhã, awa'awi ma tô tãiwapsa hã tiwapsa'a za'ra, wapsa'a 'rãihã na. 7 na Ìwapsa'a za'ra hã.

⁴ Wapsa'a za'ra wamhã, damreme ne hã wa tô wapa. Taha wa, wa tô ìmreme za'ra hã te Ìwapari na aré rob'ui'éré. Tane nherê, te ni'wa hã hãiwa hawimhã ìma tinha, te rob'ui'éré tô da. Æne te ìma tinha:

— Tô'ã. Rob'ui'éré tô. Asima si waihu'u, tãiwapsa'a norĩ mreme hã. — Æne te ãma Ìpa'uwati.

⁵ Tawamhã hãiwa ãma romhuri'wa hã â nhisiwi Ìsa hã ti'a nhisiwib zama Ìsa hã te Ì'madã hã ta hã ma tô hãiwa nho'ômo tinhib'rada hã wê, tinhimire niwĩ hã.

⁶⁻⁷ Tawamhã simiwê sina, ma tô waihu'u:

— 'Re ìhãimana u'âsi mono hã za te te Ìrob'manharizéb da hã sô rowaptã'â ô di za oto. 7 ãma hãiwa ãma romhuri'wa hã tinhimnhihãrãzém na simnhihãrã wamhã, te za 'Re ìhãimana u'âsi mono hã ãma uwaimra, duréihã te te da'ãma sima Ìropisutuzé hã dama Ìwaihu'u'ô hã. Duréihã tizadawa wasu'u 'rata 'wa norĩ ma, te te Ìropisutuzém na te za oto dama rob'manha. Æne, wa tô sena na awaihu'u, 'Re ìhãimana u'âsi mono nho'a, Ìsimiropisutuzém na zama. — Æne ma tô 'Re ìhãimana u'âsi mono zadawa para waihu'u, hãiwa ãma romhuri'wa hã, hãiwa nho'ômo tinhib'rada te te Ìwê hã. 'Re ìhãimana u'âsi mono hã ta hã hãiwa 'manharĩ'wa, duré ti'ai 'manharĩ'wa, duré â poré 'manharĩ'wa, duré uburé iwa 're Ìdahãimana za'ra mono poto 'wa.

⁸ Tawamhã hãiwa hawi we te te ìma Ìnharĩ 'rata mreme hã wa tô duré wapa. Æne te duré ìma tinha:

— Ma'ãpé, sô aimorĩ, Ìbaihã nhinha Ìsryre zô, âri da, hãiwa ãma romhuri'wa, sô'a haré tinhib'rata te te 're Ìrã'ãri zô. Ô hã hãiwa ãma romhuri'wa, â nhisiwi Ìsa hã, ti'a nhisiwib zama. — Æne te sô Ìzatô.

⁹ Tawamhã wa tô Ìtème sô mo. Sô Ìwisi wamhã, wa tô tiwi waptê, Ìbaihã nhinha Ìsryre hã. Te tiwi waptêrê wamhã, te ìma ti'ru, ãne:

— Ma'ãpé âri, 'rêne da. 'Rêne wamhã, ropĩni ne hã Ìsei uptabi za, asadai're 'remhã. Tane nherê, oto sômri wamhã, adi'i 'remhã te za anomozé. — Æne ma tô ìma waihu'u.

¹⁰ Tawamhã wa tô oto ti'â, Ìsib'rata hawi Ìbaihã nhinha Ìsryre hã. Te âri wamhã, wa tô ti'rê. Te 'rêne wamhã, ropĩni ne hã sei uptabi di, Ìzadai're 'remhã. Tane nherê, te sômri wamhã oto, Ìdi'i 're, ma oto Ìnomozé.

¹¹ Tawamhã ni'wa hã te ìma tinha:

— Te za duré 'Re ìhãimana u'âsi mono hã dama 're Ìsadawa wasu'u mo, dapoto mono bâ za dama 're Ìromhãimana za'ra mono zém na hã, damreme sipo'o mono bâ. Daro mono bâ dama Ìpire za'ra norĩ ma, za 're Ìromhãimana mono zém na zama te za duré dama 're Ìsadawa wasu'u mo. — Æne ma tô ìma waihu'u.

Æne Ìnhotô 'rowim ne, te Ì'ab'madã'ã mono hã, duré te Ì'awapari mono hã.

11

'Re ìhãimana u'âsi mono zadawa wasu'u'wa norĩ wasu'u

¹ Tawamhã ma tô ìma sômri ni, wedehu waré ne hã marĩ pibuzé hã. Tawamhã 'Re ìhãimana u'âsi mono hã ma tô Ìzatô:

— Mo oto aimorĩ ti'ai ãma Ìnhorôwa u, wedehu waré ne na, 'ri hã pibui mono da, duré ìma danhoprubzê nomrizé hã pibui mono da, wedeza ne hã, danhimizama da te ìma 're Ìzata za'ra mono zé hã. Ma'ãpé duré Ìnhorôwa ãma, Ì'ãma 're Ìdawata za'ra mono norĩ hã sa'rata za'ra na.

² Tane nherê, 'ri 'wawi wa'ra 're, 'ri nho'remhã pibui mono ô di za. Ta hã wa tô pisutu, Ìnhib'a'uwê'ô norĩ si te te ãma 're ubumroi mono da. Ta norĩ hã niwapsi te za Zeruzarê ãma hã 'ri nho'u Ìwê uptabi ãma hã da'ãma ai'uté za'ra. Taha wa, te za te te sina dawasi za'ra. 42 na a'amo ìhãimana u te za te te da'ãma rowamnarĩ za'ra, 1,260 na bâdã da da'ãma Ìsi'utôrizéb u.

³ Taha ré, wa za Ìzadawa wasu'u'wa norĩ hã satôri zahuré, tô 1,260 na bâdã Ìsi'utôrizéb u simi'ê na te te Ìzadawa wasu'u zahuré mono da. Tawamhã pone'êrebã zéré 'manharĩ na uza wasété ré, te za tineb zahuré, pê'êzé uptabi zahuré wa, da te dasiwi 're Ìwê'ô pese za'ra mono wa. — Æne ma tô ìma waihu'u, 'Re ìhãimana u'âsi mono hã.

⁴ Æ norĩ hã azeitona wede ne, te duré 're hãimana zahuré, Ì'rãni wa'ui wabre hã Ìro'o pese ne, simi'ê na te te dama 're sadawa wasu'u zahuré mono wa. Rob'uiwézém ne, te duré 're

hâimana zahuré, 'Re ìhâimana u'âsi mono zadawa wasu'u na te te dama 're rob'uiwê zahuré mono wa. Uburé Danhib'apito nho'a te 're sima'wara zahuré.

⁵Tawamhâ ni'wa hâ te te tâma rob'manharî wasété zahuré da nherê, te za tizadai're hawi unhamo ro'o na wîrî zahuré. Âne na te za si'utôrî Ìsitob'ru norî hâ, te te tâma rob'manharî wasété za'ra mono da nherê.

⁶Tawamhâ 'Re ìhâimana u'âsi mono zadawa wasu'u'wa norî hâ ìsimipawapto waihu'u pese zém na te za hâiwa pese zahuré, tã ta'a tō da, te te dama sadawa wasu'u zahuré mono sina. Duré te te waihu'u pese zahuré di, te te âwapru zahuré da hâ, duré te te sima iwê zahuré zéb zarina, ti'ai ma, te te nasi ìrob'manharî wasété zahuré da hâ. 'Re ìhâimana u'âsi mono u, dawasété wi 're dasipizari za'ra mono da, te za âne te te dama arob'manharî zahuré.

⁷Tawamhâ te te sadawa wasu'u zahuré mono pari, te za ropoto siwamnarî hâ ab're 'rehâ hawi ìwatobro hâ sô tisuus zahuré, te te 'wapé zahuré da. Tawamhâ ropoto siwamnarî hâ aibâ norî ma, siptete zahuré wa, te za pãrî zahuré.

⁸Tawamhâ 'ri nhi'rîti 're za'êtê âma, te za taré ìhâiba hâ hâ tiza'wari zahuré, 'ri nho'ômo za'êtê âma, wede nhonhi'râmi na Ìsib'apito za'ra, da te dasiwi ìwîrîzém nho'ômo âma, dama Ìsa'rese za'êtê âma. Sodoma na 'ri nho'ômo nhisi âma, 're ìdahâimana wasété za'ra mono ne, â 'ri nho'u hâ. Duré Ezitu na romnhisi âma 're ìdahâimana wasété za'ra mono ne hâ, â 'ri nho'u hâ. Âne 'ri nho'ômo zahuré na âma Ìsimiré'ézé hâ, Zeruzarê hâ.

⁹Tawamhâ da'ahâ uptabi na te za ìtême ubumro zahuré ni, ìhâiba hâ hâ da te dasiwi 'madâ'â zahuré da, 'ri nhi'rîti sa'wari ré. Si'ubdatō bādâ ìne wâiwab u, te za dapoto mono bâ dasiwi 'madâ'â zahuré ni, damreme sipo'o mono bâ, 're ìdahâimana za'ra mono hâ. Te za duré âma tasi'uwati za'ra ni, da te dasiwi za tō da.

¹⁰Tawamhâ ti'ai âma daro mono bâ 're ìdahâimana wasété za'ra mono norî ma hâ rowê za'ra di za, ìsadawa wasu'u'wa norî hâ dâ'â zahuré wa. Taha wa, te za 're dato za'ra. Te za duré danhibzari na tasisawi za'ra ni. ìsadawa wasu'u'wa norî hâ dawasété wi 're dasipizari za'ra mono da, te te dama 're ropipa zahuré mono ré, dâ'â zahuré wa, te za 're dato za'ra.

¹¹Tawamhâ si'ubdatō bādâ, âma ìneb zahuré zé wâiwa pari, te za 'Re ìhâimana u'âsi mono hâ ìpé'èzani hâ apâ tâma sômri zahuré, hâiba ré 're neb zahuré da apâ. Taha pari, te za oto hâiwi aima'wara zahuré. Sima'wara zahuré wamhâ, te za tâma tapahi uptabi za'ra ni, da te ì'madâ'â za'ra norî hâ.

¹²Tawamhâ 'Re ìhâimana u'âsi mono zadawa wasu'u'wa norî hâ te za wapari zahuré, hâiwa hawi ni'wai mreme hâ. Mreme 'râihâ na te za sô tihârâ zahuré:

— We ane wa'aba, hâimo. — Âne te za ni'wa hâ sô tihârâ zahuré.

Tawamhâ ì'ruiwapari'wa norî hâ te te 'madâ'â za'ra mono ré, te za hâiwa'a na tizasi zahuré, hâiwa u.

¹³Tawamhâ zasi zahuré wi, awa'awi te za sa'êtê uptabi ti'a sâsâ hâ watobro. Watobro wamhâ, 'ri hâ nima norî hâ te za sina, Zeruzarê âma, 'ri nho'ômo 'remhâ 're ìsimasa mono hâ. 10 na 'ri 'mailhâimana wamhâ, te za misî si dawi rere'e. Te za duré 7 miu na tadâ'â za'ra ni, ti'a sâsâ'â na hâ. Tawamhâ dadâ'â âna ìdasi'atarême mono hâ te za tapahi uptabi za'ra ni. 'Re ìhâimana u'âsi mono âma te za tawata za'ra ni, hâiwa âma 're ìsâmra mono âma, simi'manharî waihu'u pese uptabi wa.

Âne ìnhotō 'rowim ne, te ì'awapari mono hâ, duré te ì'azabui mono hâ.

¹⁴Tawamhâ ropipa hâ maparane ìpu hâ tâibâ oto. Tane nherê, zahadu si'ubdatō âma zô, te rowaptâ. Romhuture di oto, duré ropipa ìwatobro da hâ. Ma'âpé âne waihu'u pese za'ra wa'aba.

7 âma hâiwa âma romhuri'wa hâ tinhimnhîhârâzém na ìsimnhîhârâzém wasu'u

¹⁵Tawamhâ 7 âma hâiwa âma romhuri'wa hâ ma tō tinhimnhîhârâzém na amnhîhârâ. Simnhîhârâ wi, hâiwa âma damreme 'râihâ hâ wa tō wapa. Âne te nharî za'ra:

— Satanasîhi nhimi'madâ, 're danomro mono da, ma tō da te dasima 're wê za'ra aré, daro mono bâ. Tane nherê, ropâ te za oto 'Re ìhâimana u'âsi mono nhimi'madâ'â si 're danomro, Wanhib'apito nhimi'madâ hâ. Danho'reptui'wa da, te te ìpisutu nhimi'madâ'â zama te za 're dahâimana za'ra oto. Wanhib'apito hâ te za tō te te 're da'ab'madâ'â u'âsi oto, ône u'âsi. — Âne wa tō wapa, hâiwa âma damreme 'râihâ hâ.

¹⁶Tawamhâ 24 na dama ìpire za'ra norî hâ 'Re ìhâimana u'âsi mono nho'a tisimasisizém na ìsi'ubumro norî hâ ma tō hî'râtîtō tâma ana, âma wata za'ra da.

¹⁷Âne te âma tiwata za'ra:

“Uburé Danhib'apito uptabi, 'Re ìhâimana u'âsi mono, a hâ danhipai u asiptete uptabi di. Duréihâ marî ô ré hâ, te 're aihâimana u'âsi mo. Ai'utôrî waihu'u ô di. Ône u'âsi te 're aihâimana mo. A hâ aiwaihu'u pese zé hâ, duré danhipai u asiptetezê hâ ma tō oto dama ìhâi're, da te oto 're 'madâ'â za'ra mono da. Taha zarina ma tō oto danhipai u da'madâ'â pire na âma ìsâna'ra, âhâna hâ. Taha wa, wa ai'âma wawata za'ra ni.

18 Ai'āma 're īdawata za'ra mono ō norī hā ma tō asada tizahi pese za'ra. Taha wa, ma tō oto īwa waptārā, asiwi īda'awē'ō pese zéb zarina, dama īrob'manharī wasété zéb da hā. Ma tō duré īwa waptārā, dahāimanazéb zarina dama ī'arowairébézéb da hā, uburé adā'ā norī ma hā, asimiroti hā te te 're īwapari za'ra mono ō norī hā uburé 're ahā za'ra mono da, duré uburé asimiroti wapari pese 'wa norī ma, tāma 're ab'manharī wē mono da. Ma tō īwa waptārā, asadawa wasu'u'wa norī ma, marī īwē hā 're anhomri mono da, te te aima 're īromhuri pese za'ra mono zé wa'rāmi. Uburé pese asib'a'uwē norī ma, marī īwē hā 're anhomri mono da, ma tō īwa waptārā, ai'āma 're īwata za'ra mono norī ma, dama īpire norī ma, dama īwapu norī ma zama.

Ma tō duré īwa waptārā, ti'ai āma da te 're īrowasété za'ra mono norī hā uprosi da."

Āne 24 na dama īpire za'ra norī hā ma tō āma po're pu'u za'ra.

19 Tawamhā hāiwa āma 'Re īhāimana u'āsi mono āma 're īdawata za'ra mono zéb āma hā, ma tō ni'wa hā 'ridawa hā 'ridawa. Te te 'ridawa wamhā, te oto wedehā 're hā sō'awi 'ri para za. Wedehā 're 're, te etēpo'ui'éré ré hā da'wa, duréihā 'Re īhāimana u'āsi mono te te tinhīb'a'uwē ma īropisutuzéb ui'éré ré hā. Tawamhā ma tō tāiwapasa hā watobro, tāirārā'ā zama, tāsi'ubuzi zama. Ti'a hā ma tō duré sāsā'ā. Tāzā hā ma duré asa'wa, īpire hā.

Āne īnhotō 'rowim ne, te ī'azabui mono hā, duré te ī'awapari mono hā.

12

Pi'ōi wasu'u, Satanasihī wasu'u me

1 Tawamhā wa tō duré 'madā. Te 'madā'ā wamhā, marī hā ma tō hāiwa nho're na sihāi're, dama īsa'rese'ō hā, āma 're īdatob'uzu za'ra mono hā. Ta hā dama īwaihu'u'ō hā wa tō 'madā, pi'ō īsa hā. Bātā ro'o ne na ī'uzā hā. Īpara 'rowimhā a'amo te za. Duré 'rāzaza ré te za. Ī'rāzaza na hā wasi te aimasa, 12 na.

2 Ī'ra te duré āma sépu, pi'ōi āma. Āma sépu'u wa, te hāzé te, 're sadari.

3 Tawamhā ma duré marī hā sihāi're, hāiwa nho're na, marī īsa'rese'ō hā. Ho'orā hāiba ne ropoto siwamnarī hāiba za'ēne hā te za. Īhāiba hā Īhāiba pré. Duré 7 na Ī'rā hā. 10 na duré Ī'u hā. Powawē ōmo ne, Ī'ōmo za'ra hā. Duré 7 na Ī'rā za'ra 'rāzaza hā, danhib'apito 'rāzaza ne hā. Ī'rāzaza si'ubuzi na Ī'rāzaza za'ra hā.

4 Tawamhā tizamo na ma tō wasi hā waibu, hāiwa āma 're īsimasa mono hā. Ahā uptabi prā na ma tō waibu, īsa'ratazé wāiwa prā na. Tawamhā te te waibui wamhā, ti'ai u ma tō sā'ētē sāmra.

Tawamhā pi'ō nho're te za, ho'orā hāiba ne ropoto siwamnarī hā. Pi'ō te sapa Ī'ra zō, waptā'ā wi te te 'rēne da.

5 Tawamhā ma tō tāma waptārā aibā na, simiwada'uri nhīptete na za daro mono bā te te 're īda'awada'uri mono da hā. Tawamhā ma tō tiwi āri ni, 'Re īhāimana u'āsi mono u, danhib'apito simasisizém na 're īsāmra mono u, īsiré danhib'apito na 're hāimana mono da.

6 Tawamhā ho'orā hāiba ne ropoto siwamnarī wi, te pi'ō wara, a'ubuni u, 'Re īhāimana u'āsi mono te te tāma īropese sirōmo zéb u, te te tāma īpisutuzéb u. Tame hāimana mono ré, te za 1,260 na bādā īhāimana u te te 'madā'ā, 'Re īhāimana u'āsi mono hā.

7 Tawamhā dasi'wapé, hāiwa nho're āma ma tō watobro. Hāiwa āma romhuri'wa hā Midé na Īsisi hā, duré hāiwa āma īsiré tāma īromhuri'wa norī hā, te ho'orā hāiba ne ropoto siwamnarī hāiba za'ēne hā siwi 'wapé. Tawamhā ho'orā hāiba ne ropoto siwamnarī hā ma tō sina ana, hāiwa āma tāma īromhuri'wa norī me.

8 Tane nheré, ma tō Midé norī hā āma ai'uté za'ra. Taha wa, hāiwa āma 're hāimana waihu'u za'ra mono ō di za oto.

9 Tawamhā ho'orā hāiba ne ropoto siwamnarī hā ma tō siwi time ti'ai u, apā morī tō da. Ta hā Satanasī, wanhitob'ru. Ta hā duréihā wahi na īsihāiba. Uburé tizadawa nhīpese na te te 're īda'a'rāmi mono, 'Re īhāimana u'āsi mono zadawa para newa, ti'ai āma daro mono bā. Tawamhā wa'uburé norī zama īsib'a'uwē zama ma tō īsiré siwi sāmra ti'ai u, apā si'aba're tō da.

Āne wa tō te ab'madā'ā, īnhotō 'rowim ne.

10 Tawamhā wa tō duré ni'wai mreime hā wapa. Mreime 'rāihā na te tinha:

— 'Re īhāimana u'āsi mono hā ma tō oto wa'anho'reptuzém na wama āma uwaimra, wanhitob'ru wi. Danhib'apito na siptete na te te 're īda'ab'madā'ā mono zé hā ma tō duré dama hāi're'oto. Duré Danho'reptui'wa da, te te īpisudu hā te duré īsiré te te 're da'ab'madā'ā oto, waihu'u pese na. Wasiré īsazei'wai āma, awē sidāpāsi simizazāri āna īwasédé hā te te āma 're ī'aza'ra mono hā ma tō oto 'Re īhāimana u'āsi mono hā sihawī time hāiwa hawī, ti'ai u, Wa'uburé hā.

11 Pone'ērebā hā dazada īdā'ázéb zarina, ma tō wasiré īsazei'wa norī hā āma ai'uté za'ra, Satanasihī āma. Īwasu'uwē hā sena na te te dama 're īsadawa wasu'u za'ra mono zém na zama,

ma tō āma ai'utē za'ra. Duré da te 're 'ruiwapari za'ra mono wa, dawī 're sihâiba zawi za'ra mono ō di, 're dâ'â tō za'ra mono da. Taha wa, 'Re İhâimana u'âsi mono wi sipizari āna, ma tō duré Satanasihi āma ai'utē za'ra.

¹² Taha wa, ma'âpé 're ato za'ra wa'aba mono, hâiwa āma 're aihâimana za'ra wa'aba mono norī hâ. Tane nherē, ti'ai āma 're aihâimana za'ra wa'aba mono norī hâ aima 're ropipa uptabi za'ra wa'aba mono di za, â poré na 're aihâimana za'ra wa'aba mono norī ma zama. E marī wa. Wa'uburé hâ sahi uptabi na atēme morī aba na dâ'âsina, ti'ai u. Ti'ai āma te te aima 're rob'manharī wasété za'ra wa'aba mono da, za 're İhâimana hutu mono zém na te te sina waihu'u wa, ma tō tizahi pese. Taha wa, aima 're ropipa uptabi za'ra wa'aba mono di za. — Āne te ni'wa hâ tinha, mreme 'râihâ na.

¹³ Tawamhâ ho'orâ hâiba ne ropoto siwamnarī hâiba za'ēne hâ hâiwa hawi da te ĩme na siwaihu'u wamhâ, ma tō pi'ō zarina 're mo, aibâ na İ'ra tâma İwaptâ'â zarina.

¹⁴ Tane nherē, ma tō si'ōmo wawē paihi hâ İsaripi ré hâ pi'ōi ma za ni, a'ubuni u 're İsamra mono zéb u, āma wara da, tō ōme, 'Re İhâimana u'âsi mono te te tâma İropese sirōmo zéb u. Tame te za 'Re İhâimana u'âsi mono hâ te te 're 'madâ'â, si'ubdatō wahum nhpai u wâiwa, ho'orâ hâiba ne ropoto siwamnarī wi.

¹⁵ Tawamhâ ho'orâ ne hâ ma tō â hâ tizadai're hawi sa'wa pi'ō zarina, â pré da, â te te 'mapraba da.

¹⁶ Tane nherē, ti'a hâ ma tō pi'ōi āma aime. Ti'a hâ ma tō si'ridawa, â zô, â hâ İwa a'a da. Tawamhâ ma tō â hâ İwa ti'a'a tō, ho'orâ hâiba ne tizadai're hawi pi'ō zarina te te İsa'wari hâ.

¹⁷ Tawamhâ ho'orâ hâiba ne ropoto siwamnarī hâ ma tō pi'ō da tizahi pese, tiwi simani wa. Taha wa, ma tō İsihudu norī zô mo, te te 'wapé za'ra da. E 'wam norī hâ te wasu'u, İsihudu norī hâ. Ta norī hâ 'Re İhâimana u'âsi mono nhimiroti te te 're İwapari pese za'ra mono, duré tō sena na Zezusihi zazei'wa na 're İsiwasu'u za'ra mono, te wasu'u. Ta norī zô te mo, ho'orâ hâiba ne ropoto siwamnarī hâ te te 'wapé za'ra da.

¹⁸ Tawamhâ te oto ta hâ â poré zaihâ na za, supara're wa.

Āne İnhotō 'rowim ne, te İ'azabui mono hâ, duré te İ'awapari mono hâ, za İromhâimana mono zém na hâ.

13

Ropoto siwamnarī pipa zahuré wasu'u, â 'rowimhâ, duré ti'ai 'rowimhâ

¹ Tawamhâ wa hâ wa tō duré sabu, â 'rowi ropoto siwamnarī hâ â hawi watobro ré. İhâiba misi nherē, 7 na İ'râ hâ. Duré 10 na powawé ōmo ne, İ'ōmo mono hâ. İ'ōmo na hâ danhib'apito 'râzaza si'ubuzi ne ré, te ōmo 'râzaza ré aimesa, 10 na. Duré İ'râi mono na rob'ui'ére za'ra ré hâ aiwa 'Re İhâimana u'âsi mono newa, 'Re İhâimana u'âsi mono wamri na İsiwaptêrê ui'ére wasédé hâ.

² Duré İhâiba hâ, hu'u hâiba ne. İpara hâ robzahi para ne hâ ursu para ne. Duré İsadai're hâ, aiwa hu'u zérépa zadai're ne, İsadai're hâ. Tawamhâ ho'orâ hâiba ne ropoto siwamnarī hâ, Satanasi hâ ma tō tinhiptetezê hâ tâma tisô, İsadawa para siré te te da'âma 're romhuri wasété zahuré mono da, İsimirohuri waihu'u pese zém na.

³ Tawamhâ misi İ'râi āma hâ İ'u'a ré hâ da te wīrī wa, İ'wa're ne hâ. Tane nherē, İ'wa're hâ ma tō tâma ato. Taha wa, daro mono bâ uburé 're İdahâimana za'ra mono hâ ma āma tatob'uzu za'ra ni. Ma duré āma sasômri za'ra ni, İsimiwada'uri na.

⁴ Ma tō duré ho'orâ hâiba ne ropoto siwamnarī āma tawata za'ra ni aihîni, â hawi ropoto siwamnarī ma, tinhimi'manharī waihu'u pese zé hâ te te tâma sômri wa. Tane ma tō duré â hawi ropoto siwamnarī āma tawata za'ra ni. Āne te āma tawata za'ra ni:

— E 'wa hâ İsine hâimana waihu'u pese bâ. E 'wa hâ İsiptete wabzu'wa pâ. — Āne te āma tawata za'ra ni, daro mono bâ da'ahâ na.

⁵ Tawamhâ â hawi ropoto siwamnarī hâ, te 'Re İhâimana u'âsi mono hâ wa'ēi wasété, 'râwi waihu'u pese na sina wata dâ'âsina. 'Re İhâimana u'âsi mono te te sadawa uwati ō di. Ma tō duré tâma waprozi, dama pire na te te da'awada'uri wasété mono da a'â, 42 na a'amo İsisôré mono u.

⁶ Taha ré, ma tō 'Re İhâimana u'âsi mono hâ wa'ēi wasété tō, İsisi na zama. 'Re İsamra mono zém na ma tō duré timreme wasété, duré hâiwa āma 're İhâimana za'ra mono norī āma zama.

⁷ Tawamhâ 'Re İhâimana u'âsi mono hâ ma tō duré tâma waprozi, â hawi ropoto siwamnarī ma, İsib'a'uwê te te 'wapé za'ra da, te te āma ai'utē za'ra da, İsib'a'uwê norī āma. Ma tō duré tâma waprozi, simiwada'uri wasété nhiptete sina te te 're da'awada'uri mono da, dapoto mono bâ, duré damreme sipo'o mono bâ 're İdahâimana za'ra mono hâ.

⁸ Tawamhâ ti'ai āma daro mono bâ 're İdahâimana za'ra mono norī hâ te za āma 're dawata za'ra, da'ahâ uptabi na. Tane nherē, ni'wam norī hâ āma 're wata za'ra mono ō di za, İbaihâ na 're İdahâimana u'âsi za'ra mono norī nhisi, 're İsimi'wara mono zém na İsisi 're İsimi'wara

mono nori hã. Duréihã 'Re ihâimana u'âsi mono hã te te ropoto mono õ ré, danhisi na te te âma irob'ui'ére za'ra hã ã ibaihã hã, Pone'érebã, da te dasiwi iwi'ri te hã.

Âne za iromhâimana mono zém na inhotõ 'rowim ne, te i'azabui mono hã, duré te i'awapari mono hã.

⁹Ma'ápé, aipo're 'repu'u ré za'ra wa'aba wamhã, wapari pese za'ra wa'aba.

¹⁰Ni'wa hã isazei'wai wamhã, dazazéb 're da te 're séme mono da, 'Re ihâimana u'âsi mono te te dawí 're sawi za'ra mono õ wamhã, te za tô da te 're sé. Duré sib'ézéb 'wapa na da te 're simroi mono da, 'Re ihâimana u'âsi mono te te dawí 're sawi za'ra mono õ wamhã, te za tô da te 're simro. Âne da nheré, te za sipizari âna âma 're nomro, 'Re ihâimana u'âsi mono âma.

¹¹Tawamhã wa tô duré sabu ropoto pipa hã, ti'ai hawi iwatobro hã. Maparane i'u hã, pone'érebã 'rare õmo ne hã. Tane nheré, imreme hã ho'orã hãiba ne ropoto siwamnarí mreme ne, imreme hã.

¹²Tawamhã â hawi ropoto siwamnarí nho'a te te 're romhuri, ti'ai hawi iwatobro hã. Isadawa para te te 're da'awada'uri pese, ti'ai âma daro mono bâ 're idahâimana za'ra mono nori hã â hawi ropoto siwamnarí âma 're dawata za'ra mono da, i'rái âma i'u'azé tâma isitob âma.

¹³Tawamhã ti'ai hawi ropoto pipa hã ma tô te te 're aromhõsi, marí iwaihu'u'õ na, dama isa'rese'õ na. Hãiwa hawi unhama ro iwaptã'ã na ma tô datõmo nho'a romhõsi.

¹⁴Âne 'Re ihâimana u'âsi mono hã ma tô tâma waprosi, â hawi ropoto siwamnarí nho'a te te 're romhõsi mono da. Âne ma tô tinhimirohmõsi na dama 're sadawa nhípese, 'Re ihâimana u'âsi mono zadawa para newa, ti'ai âma daro mono bâ 're idahâimana za'ra mono nori ma hã. Ma tô duré dama ti'ru, romhãiba, da te dasiwi 'manharí da, â hawi ropoto siwamnarí hãiba na, sib'ézéb 'wapa na da te dasiwi wíri nheré, apã ihãiwa'utu hãiba na.

¹⁵Tawamhã romhãiba hã da te dasiwi 'manharí parimhã, ma tô 'Re ihâimana u'âsi mono hã ti'ai hawi ropoto pipa ma waprosi, romhãiba ma, ipé'ézani te te tâma sòmri da, mreme ré oto 're morí da, duré romhãiba âma 're idawata za'ra mono õ nori hã te te 're anhimroi mono da, ti'ai hawi ropoto pipa hã.

¹⁶Tawamhã ti'ai hawi ropoto pipa hã ma tô te te da'awada'uri, da te dasima waprosi za'ra da, ni'wam nori hã isib'rata nhimire niwí da te sib'rata ui'ére za'ra mono da, duré ni'wam nori hã i'uihã mono na da te uihã ui'ére za'ra mono da. Tawamhã ma tô da te a'ui'ére tô, daro mono bâ 're idahâimana za'ra mono hã, dama iwapu mono bâ duré dama ipire mono bâ, duré danhibro pese mono bâ, duré danhibrob'õ mono bâ, duré dapawa'ãbã âna dawada'uri zarina si da te dama 're iromhuri za'ra mono bâ, duré dawada'uri âna dasi'uihã na 're idahâimana za'ra mono bâ. Da'upsãtã mono bâ ma tô da te da'ui'ére za'ra.

¹⁷Tawamhã danhib'rata ui'ére õ nheré, da'uihã ui'ére õ nheré, da te 're rob'uipra waihu'u za'ra mono õ di. Duré da te 're rowede waihu'u za'ra mono õ di. Â hawi ropoto siwamnarí nhisi na da'uihã ui'ére hã, duré danhib'rata ui'ére hã, isisi za'ratazéb hã. Âne wa tô te awaihu'u, inhotõ 'rowim ne.

¹⁸A nori wa'wa hã ai'maiwaihu'u pese aba wamhã, ma'ápé isisi za'ratazéb ui'ére hã 'maiwaihu'u aba, iwasu'uzé hã. 666 na isisi za'ratazéb hã danhisi za'ratazém na isisi hã te wasu'u.

14

'Re ihâimana u'âsi mono, iwasété hawi te te iwa'ãbã za'ra nori nho're wasu'u

¹Tawamhã wa tô duré 'madã. Te 'madã'ã wamhã. Pone'érebã hã wa tô sabu, da te dasiwi iwi'ri hã. Si'ã na été 'ráihã nhisiwi te za. Duré 144 miu na dahãiba hã te isiré aimasam ni, isisi na i'uihã ui'ére ré mono hã, duré imama nhisi na zama i'uihã ui'ére mono hã.

²Tawamhã wa tô duré wapa, hãiwa hawi ni'wai mreme hã. Â'a'a 'ráihã ruru'u ne, imreme hã. Duré tâiwapsa'a za'été rãrã'ã ruru'u ne, imreme hã. Rowamreme'wa, tinhimirowamremezém na te te 're irowamreme za'ra mono ne, imreme hã.

³Tawamhã 144 miu na ihãiba za'ra nori hã te danhib'apito simasisizém nho're asóre, maparane si'uiwa na ropoto na ihãiba nori nho'reb zama, duré dama ipire za'ra nori nho'reb zama. Tinho're itém na te tinho're za'ra, dama isa'rese'õ na. Â nori si 're idanomro wasété mono zém hawi, 'Re ihâimana u'âsi mono te te iwa'ãbã za'ra nori si te te waihu'u pese za'ra di, isõ're hã.

⁴Â nori hã ma tô 're si'madã'ã pese za'ra, 're siwasété tô za'ra mono da, pi'õ na 're idanhimisaihuri za'ra mono õ ne. Duré pi'õ za'rese'õ'wa 're ihâimana za'ra mono ne, ma tô 're si'madã'ã pese za'ra. Pone'érebã nhirã zarina si ma tô 're nomro. Ta nori si ma tô 're idanomro wasété mono zém hawi wa'ãbã za'ra. Ta nori hã ma tô 'Re ihâimana u'âsi mono ma sisõmri na'rata za'ra, Pone'érebã ma zama.

⁵ Duré 're sadawa nhipese za'ra mono ò di. Duré ìwasédé hã sena na da te ãma 're sa'ra waihu u' mono ò di, ìwê na si 're hãimana za'ra mono wa.

Si'ubdatò hãiu ãma romhuri'wa norì nhimirowasu'uzé wasu'u

⁶ Tawamhã wa tò duré 'madá, hãiuwa ãma 'Re ìhãimana u'ási mono ma, romhuri'wa hã. Hãimo uptabi te 're wara. Ìwasu'uwê hã te dama 'mahá, ìsi'utòrì'ò hã, dapoto mono bâ 're ìdahãimana za'ra mono norì ma, duré damreme sipo'o mono bâ 're ìdahãimana za'ra mono norì ma.

⁷ Æne te mreme 'ràihã na te te dama 'mahârã:

— 'Re ìhãimana u'ási mono nhimiroti hã 're wazé pese za'ra wa'aba mono. Duré wê uptabi wa, ãma 're aiwata uptabi za'ra wa'aba mono. Ma tò ìwa waptârã, 'Re ìhãimana u'ási mono te te da'ãma ì'arowairébézé u' da hã, uburé pese. Taha wa, te za Ropoto'wai ãma 're aiwata u'ási za'ra wa'aba mo, hãiuwa 'manharì'wai ãma, duré tí'ai 'manharì'wai ãma, duré à poré 'manharì'wai ãma, duré ub're 'manharì'wai ãma. — Æne te hãiuwa ãma romhuri'wa hã te te dama hãiba 'ru 'Re ìhãimana u'ási mono hã, ãma 're dawata u'ási za'ra mono da.

⁸ Tawamhã te duré ìsãna'remhã 're wara, hãiuwa ãma romhuri'wa hã ìhãiba amo hã. Æne te duré ta hã te te rob'mahârã:

— Ma tò daré ai'utò. 'Ri nho'òmo za'ène hã ma tò daré ai'utò, Babironiza hã. Ma tò uprosi ni. Àsipãrì na si pi'ò hã 're ìsai mono hã te za tihãiba amo norì ma tí'ru, ìsiré te te àhuri wa, si'rã idi'iti pese za'ra da, ìsiré. Tane ma tò Babironiza ãma 're ìdahãimana waseté za'ra mono norì hã te te 're dawada'uri za'ra daro mono bâ, da'rã idi'iti wa, siwa'ru 're ìdanomro mono ne, ìsine 're danomro waseté mono da. Taha wa, ma tò daré ai'utò, Babironiza hã. — Æne te hãiuwa ãma romhuri'wa ìsãna'remhã te te rob'mahârã.

⁹⁻¹⁰ Tawamhã si'ubdatò ãma hãiuwa ãma romhuri'wa hã te duré 're wara, hãimo uptabi, maparane nhana're ìwatobro hã. Æne te duré ta hã mreme 'ràihã na te te rob'mahârã:

— Ni'wa hã à hawi ropoto siwamnarì ãma 're wata mono wamhã, duré ìhãiba 'manharì na romhãiba ãma 're wata mono wamhã, duré ìsisi na uihã ui'ére ré 're morì wamhã, duré sib'rata ui'ére ré 're morì wamhã, 'Re ìhãimana u'ási mono nhimihãzé ìpire uptabi hã te za te te 're sépata. Ni'wa hã àzé te za dama tí'ru, à na ìwazari'ò hã ìsé pire uptabi hã te te hã'rène da. Te te hã'rène wamhã, tí'uihã idi'iti na, te za sépata. Tane, ropoto siwamnarì ãma 're ìwata za'ra mono norì hã 'Re ìhãimana u'ási mono nhimihãzé ìpipa uptabi hã te za te te 're sépata za'èté uptabi za'ra, tãma wê'ò pese za'ra wa, 'Re ìhãimana u'ási mono ma hã. Unhama ro'o na te za te te 're robzépata za'ra, ètè ro'o nhizédé uzé pire na, ìsi'utòrì'ò na. 'Re ìhãimana u'ási mono ma, hãiuwa ãma romhuri'wa norì nho'a, te za te te 're robzépata za'èté za'ra, Pone'èrebã nho'a zama.

¹¹ Tawamhã unhama ro'o nhizé hã te te ãma 're ìrobzépata za'ra mono nhizé hã te òne u'ási 're sizédé 'ràti u'ási, hãimo. Unhama ro hã ro'o nhimizazãri waihu u' ò di, à hawi ropoto siwamnarì ãma 're ìwata za'ra mono norì ma hã, duré ìhãiba 'manharì na romhãiba ãma 're ìwata za'ra mono norì ma hã, duré ìsisi na ì'ui'ére za'ra norì ma hã. Òne u'ási te à norì hã robzépata wi 're wairébé waihu u' mono ãna, te te 're robzépata u'ási za'ra. — Æne te si'ubdatò ãma hãiuwa ãma romhuri'wa hã te te rob'mahârã.

Æne ìnhotò 'rowim ne, te ì'azabui mono hã, duré te ì'awapari mono hã.

¹² Æne hã za 're romhãimana mono dà'ásina, te za 'Re ìhãimana u'ási mono nhib'a'uwê hã sipizari ãna 're hãimana nhiptete za'ra, ìsimiroti te te 're ìwapari pese za'ra mono hã, Zezusihi ãma si 're ìnomro mono hã.

¹³ Tawamhã wa tò duré wapa, hãiuwa hawi ni'wai mreme hã. Æne te ìma tí'ru:

— Ma'ápé, ãne ãma rob'ui'ére: "Àhãna te ìwaihu'uzém hawi, ni'wam norì hã Wanhib'apito ma, te te 're romhuri zawéré za'ra mono ré, 're dà'á za'ra mono wamhã, tãma 're rowé uptabi za'ra mono di za."

Tawamhã 'Re ìhãimana u'ási mono pè'èzani hã ma ãma saze, timreme na. Æne ma ãma saze: "Tane tò. Tãma 're rowé uptabi za'ra mono di za tò. Simi'è na tinhimirohuri wê ré, te za hãiuwa u' ìré 're sisisi. Taha wa, te za oto romhuri na tisiwasudu hã sahãri za'ra." Æne 'Re ìhãimana u'ási mono pè'èzani te te ãma ìsazézé hã. Æne te za ãma ìrob'ui'é. — Æne ma tò ìma tí'ru, te ãma rob'ui'ére da.

Tí'ai ãma roptehãrizém na, ãma ìsimiré'ézé wasu'u

¹⁴ Tawamhã wa tò duré 'madá. Te 'madá'á wamhã, hãiuwa' a hã te za. Ìsisiwimhã aibã hã te nhamra, tí'ai ãma dasiré ìpodo hã ètè'ubuzi pré oru 'manharì na 'ràzaza ré. Roptehãrizéb ré zama te nhamra, ì'wa pese ré.

¹⁵ Tawamhã hãiuwa ãma romhuri'wa hã ìhãiba amo hã ma tò hãiuwa ãma 'Re ìhãimana u'ási mono 're ìsãmra mono zém hawi watobro, 'ri 'ràihã hawi. Watobro wamhã, te mreme 'ràihã na 'mahá, hãiuwa' a na ìsãmra hã. Æne te 'mahã:

— Ti'ai âma daro mono bâ ma tô rob'râi're pese. Ma tô îwa waptârâ, Îroptehâri mono zéb da hâ. Taha wa, ma'âpé roptehâri mono, asimiroptehârizém na. — Âne ma tô hâiwa âma romhuri'wa hâ tâma ti'ru, âma îromnhimire'ézém na, rob'râsutuzém na hâ. Ti'ai âma 're îdahâimana za'ra mono norî ubumrozé hâ te wasu'u, roptehârizé hâ.

¹⁶ Tawamhâ hâiwa'a na îsâmra hâ ma tô te te roptehâri tô, daro mono bâ tinhiroptehârizém na.

¹⁷ Tawamhâ wa tô duré 'madâ, hâiwa âma romhuri'wa hâ aimawi hâ. Hâiwa âma 'Re îhâimana u'âsi mono 're îsâmra mono zém hawi ma duré watobro, 'ri 'râihâ hawi. Roptehârizé hâ te duré ta hâ 're ti'â, tînhib'rata.

¹⁸ Tawamhâ ma tô duré hâiwa âma romhuri'wa aimawi hâ watobro, wedeza ne hawi, 'Re îhâimana u'âsi mono ma, danhoprubzé nomrizém hawi. Ta hâ wedeza ne na unhama 'madâ'â'wa. Ta hâ roptehârizé te te 're î'râ'âri hâ te 'mahâ. Âne te 'mahâ:

— Ma'âpé, uwa 'ru 'râ hâ anhimizuhâri mono, daro mono bâ 're îsimnhatâ mono hâ. Asimiroptehârizém na te za oto î'anhimizuhâri mo, 'râ prédu mono wa. — Âne te tâma ti'ru.

¹⁹ Tawamhâ hâiwa âma romhuri'wa hâ ma tô te te anhimizuhâri tô, uwa 'ru 'râ hâ daro mono bâ, ti'ai âma hâ. Te te anhimizuhâri mono wamhâ, ma tô te te anhamra êtê're 're, îwa'u zô, dapara na da te 're îwati za'ra mono zéb 're.

²⁰ Tawamhâ uwa 'ru 'râ, êtê're 're te te anhamra mono wamhâ, ma tô a'râiwati, îwa'u zô. 'Ri nho'ômo nhiti da te 're îwati za'ra mono zéb 're, ma tô a'râiwati. Te te awati wamhâ, dawapru na îwa'u hâ tawamhâ, ma tô puru, êtêzapu'u hawi. Pu'u wamhâ, â wara tete ne te tipraba, dawapru na îwa'u hâ. 300 na ti'ai pibuzéb zarina te tipraba, dawapru hâ. Duré misi îpibuzé wâiwa, ma ti'â masisi hâimo, â 'rehâ præ na. Âne 'Re îhâimana u'âsi mono, 're îdahâimana wasété za'ra mono norî ahârizém na âma îsimiré'ézém hâ.

Âne înhotô 'rowim ne, te î'azabui mono hâ, duré te î'awapari mono hâ, za îromhâimana mono zém na hâ.

15

7 na hâiwa âma romhuri'wa norî hâ, oru 'manharî na u'awi ré îsimasabzé wasu'u

¹ Tawamhâ wa tô duré marî hâ sabu, hâiwa nhirôtô na dama îsa'rese'ô hâ âma 're îdatab'uzu za'ra mono hâ. Hâiwa âma romhuri'wa norî hâ 7 na te aimasa. Ta norî ma, ma tô 'Re îhâimana u'âsi mono hâ pisutu, 7 na rob'manharî pipa mono hâ, îrême ma te te dama 're rob'manharî za'ra mono da. Â norî hâ 'Re îhâimana u'âsi mono nhimi'ahârizéb 'râsudu, te wasu'u.

² Tawamhâ wa tô duré sabu, â poré ne hâ. Simhi îsarob'a uptabi ne hâ â hâ, unhama ro'ô na îwazari ré hâ.

Tawamhâ wa tô duré sabu, â hawi ropoto siwamnarî âma te te âma î'ai'uté za'ra norî hâ, tô ôhô âma 're îwata za'ra mono ô norî hâ. Taha nhisi hâ danhisi za'ratazém na îsisi hâ. Îhâiba na romhâiba âma te te î'ai'uté za'ra norî hâ wa tô duré sabu za'ra. Ta norî hâ te aimasa, simhi îsarob'a ne â poré zarob'a 'rata. Rowamremezéb ré te aimasa, 'Re îhâimana u'âsi mono te te tâma îsôMRI za'ra ré.

³ Te duré tizadawa'a'a, Mozésihi nho'rezém na, 'Re îhâimana u'âsi mono ma romhuri'wa nho'rezém na, Ezitu hawi isib'a'uwê norî, 'Re îhâimana u'âsi mono te te dawî isô'reptu za'ra zém na. Te duré tizadawa'a'a, Pone'êrebâ te te 're îda'anho'reptui mono zém na. Âne te âma tizadawa'a'a:

“Uburé Danhib'apito uptabi, 'Re îhâimana u'âsi mono, aiwaihui'u pese uptabi di.

'Re î'ab'manharî mono zé hâ wê uptabi di.

A hâ daro mono bâ uburé pese Danhib'apito.

Tô sena uptabi na si te dama 're î'aroti wê uptabi mo. Upai âna, te duré 're îda'ab'madâ'â wê mo.

⁴ Wanhib'apito, dama aipire uptabi wa, te da te dasiwi 're aiwazé.

Uburé pese, te da te 're aiwasu'u wê za'ra, danhipai u pese, aiwê uptabi wa.

Aiwétési tô sena aiwê uptabi hâ.

Daro mono bâ 're îdahâimana za'ra mono norî hâ te za we ai'âma 're dawata u'âsi za'ra, upai âna dama 're î'arob'manharî wê mono zé hâ da te 're 'madâ'â za'ra mono wa.”

Âne te tizadawa'a'a, â hawi ropoto siwamnarî âma te te î'ai'uté za'ra norî hâ.

⁵ Taha parimhâ, wa tô duré sabu, hâiwa âma 'Re îhâimana u'âsi mono âma 're îdawata za'ra mono zé hâ, 'ri paramhâ 'ri 're wa'wa âma, 'Re îhâimana u'âsi mono 're îsâmra mono zé hâ. Ni'wa hâ ma tô 'ridawa hâ 'ridawa.

⁶ Tawamhâ ni'wa te te 'ridawa wamhâ, ma tô 7 na hâiwa âma romhuri'wa norî hâ tô ô norî hâ wairé 'ri para hawi, 'Re îhâimana u'âsi mono te te îpisutu za'ra norî hâ rob'manharî pipa na te te dama 're rob'manharî za'ra mono da. Uza hâirâ ré îhâ si'ubuzi ré ma wairé, duré êtê'ubuzi pré oru 'manharî na sô'utu wa'râmi ré.

⁷ Tawamhã maparane si'uiwa na, ropoto na ìhâiba norî siré hã misi ma tô 7 na hâiwa âma romhuri'wa norî ma sômri za'ra, oru 'manharî na u'awi hã, 7 na ìhâiba za'ra hã. U'awi hã uwa 'ru 'râi wa'u ìsé pire ré hã. Uwa 'ru 'râi wa'u ìsé pire hã, 'Re ìhâimana u'âsi mono nhimihâzé, te wasu'u.

⁸ Tawamhã hâiwa âma 'Re ìhâimana u'âsi mono âma 're ìdawata za'ra mono zéb 'remhã ma tô romhizé hã rob'utô, 'Re ìhâimana u'âsi mono nhimirowa'a za'êtê hawimhã. Tawamhã 'ri para u 're danhisisi waihu'u mono ô di za, a'â. 7 na rob'manharî pipa na hâiwa âma romhuri'wa norî te te dama 're rob'manharî 'râsutu za'ra mono parip si, te za 're danhisisi.

Âne ìnhotô 'rowim ne, te ì'azabui mono hã, duré te ì'awapari mono hã, za ìromhâimana mono zém na hã.

16

U'awi 're, uwa 'ru 'râi wa'u ìsé na 'Re ìhâimana u'âsi mono, 7 na te te dama ìrob'manharî pipa mono zé wasu'u

¹ Tawamhã wa tô duré wapa, 'Re ìhâimana u'âsi mono mreme hã, ìmreme 'râihã hã hâiwa âma, âma 're ìdawata za'ra mono zém hawi. 7 na hâiwa âma tâma ìromhuri'wa norî ma, te rob'ru za'ra. Âne te tâma rob'ru za'ra:

— Mo oto ai'aba'réi wa'aba ti'ai u, 7 na u'awi hawi ìnhimihâzé hã sa'wari za'ra wa'aba mono da. — Âne te tâma rob'ru za'ra.

² Tawamhã hâiwa âma romhuri'wa hã ìmorî'rata uimrehêne ma tô mo, ti'ai u. Tinhi'u'awi wamhã, ma tô te sa'wari ti'ai wa, daro mono bâ. Te te sa'wari mono wamhã, ma tô da'wa're ìwasété uptabi hã duré ìsé uptabi hã te te daduri, â hawi ropoto siwamnarî nhisi na ì'ui'éré ré mono norî hã, ìhâiba 'manharî na romhâiba âma 're ìwata za'ra mono norî hã.

³ Tawamhã ìmorî'rata nhana'remhã ma tô duré hâiwa âma romhuri'wa hã tinhi'u'awi wamhã, te te sa'wari âi ba, â poré mono bâ. Te te sa'wari mono wamhã, ma âwapru, â poré mono bâ. Adâ'â wapru si'u'êtê ne na, ma te te âwapru. Ma tô duré si'utôî, â 'rowi uburé pese 're ìnomro mono hã.

⁴ Tawamhã si'ubdatô âma hâiwa âma romhuri'wa hã ma tô duré tinhi'u'awi wamhã, te te sa'wari, âi ba, panho'ômo mono bâ, duré ub're mono bâ. Te te sa'wari mono wamhã, ma duré âwapru.

⁵ Tawamhã wa tô wapa, hâiwa âma romhuri'wa hã, â mono bâ, â 'madâ'â'wa hã. 'Re ìhâimana u'âsi mono âma te tiwata, âne:

— A hã tô sena te marî na upai âna ì'uiwaibaba si dama 're ì'arowairébé mo. A hã 're aiwasété mono ô. Marî ô ré hã te 're aihâimana u'âsi mo. Ai'utôî waihu'u ô di. Ône u'âsi te 're aihâimana mo.

⁶ 'Re ìdanomro wasété mono norî hã ma tô asib'a'uwê norî te te 're simro, asadawa wasu'u'wa norî zama. Ma tô te te 're wapru pu'u za'ra. Taha wa, ma tô ìwa'râmi dawapru hã tâma ì'anhomri mo, ôhô si da te 're âhuri mono da. Ìbâre ma tô rowasébé hã sô tiwatobro za'ra tô. — Âne te âma tiwata, 'Re ìhâimana u'âsi mono âma, ìsimi'manharîzém na.

⁷ Tawamhã wa tô duré wapa ni'wai mreme hã, wedeza ne hawi, 'Re ìhâimana u'âsi mono ma, danhoprubzé nomrizém hawi. Te duré 'Re ìhâimana u'âsi mono âma tiwata, âne:

— Uburé Danhib'apito uptabi, 'Re ìhâimana u'âsi mono, tô sena aiwaihu'u pese uptabi di. Marî na upai âna te ì'uiwaibaba si dama 're ì'arowairébé mo, sena na. — Âne te âma tiwata.

⁸ Taha pari, hâiwa âma romhuri'wa hã maparane si'uiwa na âma ma tô duré ta hã tinhi'u'awi wamhã sa'wa, bâtâ nhisiwi. Te te sa'wari wamhã, ma tô titômo wa'ro pese. Taha wa, ma tô te te dahâiba zata, bâtâ tômo wa'ro zé pire hã.

⁹ Ma tô te te dahâpéré pese. Tawamhã ma tô 'Re ìhâimana u'âsi mono hã 'ruiwapti za'ra ni, rob'manharî pipazém na te te dadata âma 're rowairébé mono wa. Tane nherê, dawasété wi dasipizari za'ra ô di. Duré siptete uptabi nherê, 'Re ìhâimana u'âsi mono âma 're dawata za'ra mono ô di.

¹⁰⁻¹¹ Tawamhã ìmrotô âma hã ma tô hâiwa âma romhuri'wa hã tinhi'u'awi wamhã sa'wa, ropoto siwamnarî â hawi ìwatobro simasisizém nhisiwi, danhib'apito simasisizém ne nhisiwi. Te te sa'wari wamhã, ma tô robra hã watobro, ropoto siwamnarî nhimi'madâ'â norî, 're ìhâimana za'ra mono zéb âma. Tame te dahâzé hã sêpata za'êtê za'ra ni. Dahâzé te, te da'wa na 're dasisoto ubu'iti za'ra. Tawamhã te duré 'Re ìhâimana u'âsi mono âma wasété uptabi za'ra ni, hâiwa âma 're ìsâmra mono âma, dahâzé da te sêpata za'êtê za'ra 'ru te, da'wa're te te daduri mono 'ru te zama. Tane nherê, dawasété wi 're dasipizari za'ra mono ô di.

¹² Tawamhã ìmropâ âma hâiwa âma romhuri'wa hã ma tô duré tinhi'u'awi wamhã sa'wa, Eprati na panho'ômo za'êtê nhisi nhisiwi. Te te sa'wari wamhã, ma tô ti'â'ré. Bâtâ puzizém

hawi darob amoi hawimhã dama ìpire norĩ hã, tisiré da'wapéi'wa norĩ zama â 'ré na te te saprĩ za'ra da, ma tó ti'â'ré.

¹³ Tawamhã wa tó duré sabu, si'ubdató wa'uburé norĩ hã, ìwasété norĩ hã. Uti hãiba ne ìhãiba za'ra hã. Ropoto siwamnarĩ zadai'ré mono hawi, ma tó misi si wairé, ho'orã hãiba ne ropoto siwamnarĩ hãiba za'êté zadai'ré hawi, duré â hawi ropoto siwamnarĩ zadai'ré hawi, duré ti'ai hawi ropoto pipa zadai'ré hawi. Ti'ai hawi ropoto pipa hã, ta hã 'Re ìhãimana u'âsi mono zadawa wasu'u uptabi ô 'wa, 'Re ìhãimana u'âsi mono nhimipisutu newa sadawa nhipse na te te 're ìda'a'rãmi mono.

¹⁴ Ta norĩ hã si'ubdató wa'uburé norĩ hã simiromhõsi waihu'u pese za'ra di. Ta norĩ hã niwamhã te za ropé daro mono bã, dama ìpire za'ra mono zô, da'wapéi'wa norĩ zô zama te te ubumroi mono da, 'Re ìhãimana u'âsi mono te te siwi 'wapé da. Â hã bãdã hã 'Re ìhãimana u'âsi mono nhimipisudu, danhipai u bãdã ìpire hã.

¹⁵ Tawamhã âne danhotó 'rowim ne, da te 're ìrosawêrẽ za'ra mono ne, te azabui mono ré, wa tó Zezusihĩ mreme hã wapa, tizazei'wa norĩ te te ìpo're pu'uzé hã. Âne te tinha: "Ma'ápé, aipo're pu'u za'ra wa'aba. Ìsimisaihuri zô 're danhimipari za'ra mono ô nheré, danhorôwa u 're ìsisisi mono ne, wa za wei mo apã. Âté ni'wa hã tisiwadi zô simipari wamhã, sôto ãna te za sô rob'madã'â u'âsi. Tawamhã ì'uzã hã te za ì'rata nomro 'rãwi, ìsiwadi hã we ìtême wisi wa, si'aba'ré na te te sisada âri su'u da, âma si'uzã da. Tane asimiza'rese sina, ìzô 're asimipari za'ra wa'aba mono ré, we ìmorĩ wamhã, aima 're rowé uptabi za'ra wa'aba mono di za. Ni'wa hã datómo nho'a ai'uréwi 're morĩ wa, 're ìsisé mono ne, ìma aséb za'ra wa'aba tó da, asimiza'rese sina ìzô 're asimipari za'ra wa'aba mono ré, we ìmorĩ wamhã, aima 're rowé uptabi za'ra wa'aba mono di za." Âne Zezusihĩ nhimiroti hã.

¹⁶ Tawamhã wa'uburé norĩ hã ma tó oto ubumro, dama ìpire za'ra norĩ hã, dama ìpire norĩ siré, da'wapéi'wa norĩ zama. Amadedo na zudezu norĩ mreme na romnhisi âma ma ubumro.

¹⁷ Tawamhã da'rãirême hã 7 âma hãiwa âma romhuri'wa hã ma tó duré tinhi'u'awi wamhã sa'wa, hãiwa nho're 're ìromhãimana mono nhisiwi. Te te sa'wari wamhã, hãiwa âma 'Re ìhãimana u'âsi mono âma 're ìdawata za'ra mono zéb 're, danhib'apito simasisizém hawi te tinha, mreme 'rãihã na:

— Tãibã za oto. Â hã, da'rãsutu'wa. — Âne te tinha.

¹⁸ Tawamhã tãiwapsa hã ma tó watobro, tãirãrã'ã zama, tãsi'ubuzi zama. Ti'a hã ma tó duré sãsã'ã, sa'êté uptabi. Niwamhã âne hã 'maiwatobro ô di, dapoto na'rata hawimhã, ti'a sãsã hã.

¹⁹ Tawamhã Babironiza na 'ri nho'ômo za'êté nhisi âma, ma ti'a sãsã'ã na ti'a sipo'o. Si'ubdató ma tó âma aiwã. Âne ma tó 'Re ìhãimana u'âsi mono hã tinhimi'ahãri pipa zém na te te dama arob'manharĩ, Babironiza âma 're ìdahãimana wasété za'ra mono norĩ ma. 'Re ìdahãimana wasété za'ra mono zé hã tiwi simani ô di. Taha wa, uwa 'ru 'rãi wa'u ìsé pire hã da te 're huri mono wa, da te 're ìsépata za'ra mono ne, ma tó 'Re ìhãimana u'âsi mono nhimihãzé hã da te 're sépata za'ra. Duré daro mono bã 'ri nho'ômo mono bã ma duré ropsisa'wari. Uburé ma ropsi'utóri pese, 'ri nho'ômo mono bã.

²⁰ Rob'ré za'iti zama ma uburé pese sisa'wari. Â si ma tó te te sina sinarĩ. Duré êté 'rãihã 're ìsimasa mono zama ma rere'e, uburé pese.

²¹ Duré tãzã hã ìsa'êté uptabi hã ma danhisiwi sisa'wari. Ìnhama pibuzé hã 35 na. Tawamhã 'Re ìhãimana u'âsi mono hã tinhimirob'manharĩ pipa uptabi na te te dama rob'manharĩ 'ru te, te âma wasété za'ra ni.

Âne ìnhotó 'rowim ne, te ì'azabui mono hã, duré te ì'awapari mono hã, za ìromhãimana mono zém na hã.

17

Pi'ôï wasété wasu'u

¹ Tawamhã 7 na hãiwa âma romhuri'wa norĩ siré hã ma tó we ìtême 'maimo, u'awi ré norĩ siré hã. Tawamhã te ìzató, âne:

— We ìsiré aimorĩ, Babironiza na 'ri nho'ômo za'êté nhisi âma 're ìdahãimana wasété za'ra mono norĩ ma, 'Re ìhãimana u'âsi mono te te ìrob'manharĩ pipa zé hã sabu da. Panho'ômo si'rutu 'rata, te 'ri nho'ômo za'êne hã 're hãimana. Pi'ôï wasédé ìmro'ô hã albã zô si te te 're ìrowasutu mono ne, te Babironiza âma hã 're dahãimana wasété uptabi za'ra.

² Aibã hã pi'ôï hãimana wasété na 're ìhãimana wasété mono ne, ma tó daro mono bã danhib'apito norĩ hã dama ìpire za'ra hã Babironiza âma 're ìdahãimana wasété za'ra mono norĩ siré 're wasété uptabi za'ra. Âzé nhipãri para da'uihã idi'iti zarina, da te 're ìrobzanhamri za'ra mono ne, tane ma tó daro mono bã Babironiza âma 're ìdahãimana wasété za'ra mono norĩ siré, 're dahãimana to za'ra, dawasété na. — Âne ma tó ìma waihu'u, pi'ô ìwasété na âma

Isimiré'ézém na hã. Pi'õ İwasédé hã timro upana aibâ aimawi zô si te te 're İrowasutu mono hã, Babironiza âma 're İdahâimana za'ra mono norî hã marî İwasété zô, da te 're İrob'ruiwapari za'ra mono norî, te wasu'u, 'Re İhâimana u'âsi mono upana.

³ Tawamhã 'Re İhâimana u'âsi mono pê'ëzani hã ma tó duré İ'uihã pi'ra. Te te İ'uihã pi'rai wa, wa tó duré aimawi İhâiba. Tawamhã hãıwa âma romhuri'wa hã ma tó İzapró, a'ubuni u, supara're u. Tame pi'õ hã wa tó sabu. Ropoto siwamnari pré nhisiwi, te nhamra. Ta hã ropoto siwamnari hã İhâiba na hã rob'ui'ére. Rob'ui'ére hã ma hãiba'utó. Aıwa 'Re İhâimana u'âsi mono newa, 'Re İhâimana u'âsi mono wamri na, İsiwaptêre ui'ére wasédé hã. Duré 7 na İ'rã hã, ta hã. Duré İ'u hã 10 na. Taha hãiba nhisiwi, te pi'õ nhamra.

⁴ Pi'õı uza hã İhãpre pese na İ'uzã hã, duré İhã'uzé dá'ã na, uburé da'uzã wamri nhıpai u, İwa'ãbã za'ëne hã. Uburé marî hã tisıpesezé hã İwa'ãbã za'ëté mono bã te te si'ãma İ'aza'ra mono ré, te nhamra, oru 'manharî ré, duré êtê'ubuzi 'manharî ré, duré a'é tómo wawê ne İtob'a 'manharî ré, İwa'ãbã za'ëté ré. Hãsize hã oru 'manharî na İ'manharî hã te duré 're ti'ã tinhib'rata, uwa 'rãı wa'ı İsé pire ré hã. Uwa 'ru 'rãı wa'ı İsé hã pi'õ İpo're'õ siwamnari hãımanazé, te wasu'u. Aıbã na 're İhâimana siwamnari u'âsi mono zé, te wasu'u.

⁵ Duré pi'õı uihã na rob'ui'ére hã dama İwaihu'ı'õ na İwamrizé hã, âma İsimiré'ézém na hã. Âne İwamrizé hã, İmorî'rada hã: Babironiza na 'ri nho'õmo za'ëté na. Duré daro mono bã dawasété 'ru na'rata 'wa na, İwamrizéb amo hã. Duré İwamrizéb amo hã pi'õı wasété norî na na, İwamrizéb amo hã, İsine aıbã na 're hãımana wasété za'ra mono da, pi'õ norî te te 're wada'uri za'ra mono wa.

⁶ Tawamhã ã hã pi'õ hã wa duré 'madã, apã. Da'uihã idi'ti wa, dato sina da te 're İrobzanhamri za'ra mono ne, te pi'õ hã robzanha. 'Re İhâimana u'âsi mono nhıb'a'uwê, İsadawa para, da te 're simroi mono wê te, te 're to, pi'õ hã. Duré Zezusıhi zazeı'wa norî sipizari âna, Zezusi te te 're sazeı pese za'ra mono 'ru te, da te 're simroi mono wê te, te pi'õ hã 're to.

Tawamhã pi'õ hã te 'madã'ã wamhã, wa âma İtob'uzu, İma sa'rese õ wa.

⁷ Tawamhã hãıwa âma 'Re İhâimana u'âsi mono ma romhuri'wa hã te İzadanha, âne:

— E marî da, ma tó âma atob'uzu. E waihu'ı ã bã. Waihu'ı õ wa, wa za oto aıma hãı're, pi'õı hãımanazé hã dama İsa'rese'õ hã. Duré ã hawi ropoto siwamnari hãımanazé hã wa za duré aıma hãı're, İsısiwi pi'õ İsãmra hãımanazé hã, 7 na İ'rãı ré hã, duré 10 na İ'õmo ré hã.

⁸ ã hã ã hawi ropoto siwamnari hã İ'madã hã İhãiba ré hã aré. Tane nherê, âhãna hãiba ré, hãımana õ di a'ã. Tane nherê, te za romhutu na hãiba ré watobro, ab're 'rehã hawi. Watobro wamhã, niwapsi te za 'Re İhâimana u'âsi mono hã uprosi. Taha õ ré, aré dá'ã nherê, hãiba ré ab're 'rehã hawi watobro wa, te za da te 'madã'ã za'ra sina âma tatob'uzu za'ra ni, ti'ai âma daro mono bã 're İdahâimana za'ra mono hã. Ropoto na'rata hawimhã, ma tó 'Re İhâimana u'âsi mono hã danhisi hã a'ui'ére İbãihã na, za İ'rata rowê na 're İdahâimana u'âsi za'ra mono norî nhisi hã. Tawamhã İbãihã na İsısi İsimi'wara õ norî hã te za âma tatob'uzu za'ra ni, ropoto siwamnari âma hã.

⁹ — ã hã te aıma İhãı're hã ni'wa hã simirosa'rata nhiptete uptabi wapsi, te za waihu'ı. ã hã 7 na İ'rã za'ra hã 7 na êtê 'rãihã mono hã te wasu'u, pi'õ, İhãiba nhisiwi İsãmra za'ra hã. Duré 7 na dama rotı'wa norî hã te wasu'u za'ra.

¹⁰ 7 na İhãiba za'ra hã ma tó İmrotõ na siparabãsi nasi ai're za'ra, da'madã'ã hawi. Ta norî za'u hã te oto misi te te 're da'ab'madã'ã. Duré İhãiba amo, da'rãısutu'wa hã zahadu sébré õ di, da'madã'ã'wa da hã. Sébré wamhã, tó sena te za te te 're da'ab'madã'ã hutu.

¹¹ Da'madã'ã'wa norî hã uburé İsarına wairébé parıp si, te za ropoto siwamnari ã hawi İwatobro hã äzé, te te 're da'madã'ã mono da, aré hãiba ré nherê, İdã hã. 8 âma te za äzé daza'u, te te 're da'madã'ã mono da. Ta hã te za niwapsi 'Re İhâimana u'âsi mono hã uprosi.

¹² — Tawamhã duré ã hawi ropoto siwamnari u hã 10 na İ'madã'ã za'ra hã, 10 na dama İpire za'ra norî hã te wasu'u, da'madã'ã'wa na zahadu te te âma İsãna'rata za'ra õ hã. Niwapsi te za tãma wãprosi za'ra ni, ã hawi ropoto siwamnari siré te te 're da'madã'ã hutu za'ra mono da.

¹³ ã norî hã misi haré simisutu İsimiroti za'ra hã za, marî 'manharı da hã. Taha wa, te za simisutu tãma sisõmri za'ra, ã hawi ropoto siwamnari ma hã, İsadawa para te te 're da'madã'ã za'ra mono da, tinhiptetezém na te te 're pawaptob za'ra mono da.

¹⁴ Te za duré ropoto siwamnari siré siwi 'wapé, Pone'ërebã hã. Tane nherê, te za Pone'ërebã hã âma ai'uté za'ra. Ta hã Pone'ërebã hã danhipai u Uburé Danhib'apito uptabi na 're hãımana mono wa, duré danhipai u dama pire na 're hãımana mono wa, te za âma ai'uté za'ra. Ni'wam norî hã İsirã zarına si 're nomro mono da, Pone'ërebã te te 're İ'apısutu mono norî hã, duré simi'ë na õhõ âma si 're İnomro mono norî hã, ta norî hã te za Pone'ërebã siré âma ai'uté za'ra, ropoto siwamnari norî âma hã. — Âne te hãıwa âma romhuri'wa hã İma rowasu'u.

¹⁵ Tawamhã te duré İma tinha, âne:

— Ā pa nho'ōmo si'rudu hā ī'madā hā pi'ōi wasédé Īsisiwi Īsāmra hā, daro mono bā, damreme sipo'o mono bā 're Īdahāimana za'ra mono, te wasu'u, ā pa nho'u hā.

¹⁶⁻¹⁷ 'Re Īhāimana u'āsi mono hā te za pisutu za'ra, 10 na dama Īpire za'ra norī hā, 'Re Īhāimana u'āsi mono te te sima Īpisutuzéb zarina, misi haré simisutu te te 're rosa'rata za'ra mono da, duré ropoto siwamnarī ma sisōmri za'ra wa, Īsapari te te 're romhuri za'ra mono da, tinhiptetezém na te te 're pawapob za'ra mono da. 'Re Īhāimana u'āsi mono hā tinhimipisudu hā romnhowa te te ī'aza'ra mono hā za te te āma ī'a'uwaimrami mono zéb u, te za ropoto siwamnarī zapari te te 're da'madā'ā 'rāsutu za'ra.

Taha wa, ropoto siwamnarī ī'madā hā ī'ōmo norī me hā te za ā pi'ōi wasédé hā siwi 'ruiwapa. Tawamhā pi'ōi wi, te za rob'ubumro za'ra, ai'urēiwi hāimana da. Te za duré Īnhi hā siwi ti'rē. Te za duré siwi uprosi, unhamana na. Āne te za Babironiza āma hā 're dasi'utōrī.

¹⁸ — Duré ā pi'ō ī'madā hā ā 'ri nho'ōmo za'ēne hā te wasu'u, dama Īsa'rese za'ēne hā. Ā 'ri nho'ōmo āma danhib'apito hā dama Īpire hā, daro mono bā dama Īpire mono nhipai u 're Īhāimana mono. Ō norī hā te te 're ī'awada'uri mono. — Āne ma tō hāiwa āma romhuri'wa hā Īma rowasu'u 'rāsutu. Za Īromhāimana mono zém na ma tō Īma romhāi'rē, romnhimiré'ézém na hā.

18

Babironiza hā 'Re Īhāimana u'āsi mono te te ī'uprosizé wasu'u

¹ Taha pari, wa tō duré 'madā, hāiwa āma 'Re Īhāimana u'āsi mono ma romhuri'wa hā aimawi hā. Hāiwa hawi te wei mo, Īsimiwada'uri pire hā. Īhāiba hā te rowa'a za'ētē. Uburé daro mono bā te sina rowa'a.

² Tawamhā mreme 'rāihā na te 'mahā. Āne te 'mahā:

— Babironiza hā dahu nho'u dama Īsa'rese za'ēne hā ma tō daré ai'utō. Ma tō uprosi ni. Ahā uptabi na te oto Īwasété norī hā Īwa 're hāimana za'ra, wa'uburé norī hā. Sipahutu norī zama, duré si'ōmo norī zama te oto ahā uptabi na Īwa 're hāimana za'ra, uburé si'īwasété norī hā.

³ Īwa 're Īdahāimana wasété za'ra mono norī hā ma tō aré te te 're dawada'uri wasété za'ra, daro mono bā 're Īdahāimana za'ra mono norī hā Īsiré 're dahāimana wasété uptabi za'ra mono da, da'rā idi'iti wa, siwa'ru 're Īdanomro mono ne. Da te āma 're sasōmri za'ra mono wa, ma tō Īsine 're danomro wasété. Ma tō duré daro mono bā danhib'apito norī hā dama Īpire za'ra hā siré 're wasété uptabi za'ra. Aibā hā timro upana pi'ō aimawi zō si te te 're Īrowasutu za'ra mono ne, ma tō 'Re Īhāimana u'āsi mono upana, marī Īwasété zō si da te 're rob'ruiwapari za'ra. Duré Babironiza āma marī zō si, da te 're Īrob'ruiwapari za'ētē uptabi za'ra mono zarina, ma tō marī hā da te 're uipra za'ētē uptabi za'ra, siwa'ru. Taha na da te tiwi 're Īrob'uipra za'ra mono zém na, ma tō daro mono bā dama rowede'wa norī hā 're sisibro pese uptabi za'ra. Āne wa, ma oto Babironiza hā ai'utō. — Āne te 'mahā, hāiwa āma romhuri'wa hā.

⁴ Tawamhā wa tō duré wapa, damreme hāiba amo hā hāiwa hawi te te Īnharī hā. Āne te tinha:

— Īnhib'a'uwē norī, ma'āpé ta hawi aiwairébé aba, 'ri nho'ōmo za'ētē hawi, dasine 're aiwasété tō za'ra wa'aba mono da, duré dawasété norī hā za te te 're Īrobzépata za'ra mono norī zu, 're robzépata tō za'ra wa'aba mono da.

⁵ Marī hā da te 're Īsibu 'rāihā za'ra mono ne, ma tō Babironiza āma 're Īdawasété za'ra mono zé hā tinhibu 'rāihā uptabi, hāiwa u. Tawamhā 'Re Īhāimana u'āsi mono hā ma tō āma sipo're pu'u, Babironiza āma 're Īdawasété uptabi za'ra mono zéb āma.

Āne wa tō wapa, hāiwa hawi damreme hā.

⁶ Tawamhā te duré tinha, hāiwa āma romhuri'wa norī ma:

— Ma'āpé Babironiza āma 're Īdahāimana za'ra mono norī ma, tāma āma wa'rāmi za'ra wa'aba asa, aiwab da, Īnhib'a'uwē norī ma, te te 're Īrob'manharī za'ra mono ne. Ta norī nhimirob'manharizéb zarina ma tō Īnhib'a'uwē norī hā te te 're robzépata za'ētē za'ra. Taha wa, Īnhib'a'uwē norī ma, te te tāma 're Īrob'manharī za'ra mono zém nhipai u, te za tāma āma Īwa'rāmi za'ra wa'wa, Babironiza āma 're Īdahāimana za'ra mono norī ma, Īsipai u te te 're robzépata za'ētē za'ra mono da.

⁷ Ta norī hā ma tō sina 're wata pese za'ra. Tinhimirosa'rata wasété zarina ma tō sina 're hāimana wasété uptabi za'ra. 'Re Īhāimana wasété za'ra mono zarina, te za aiwa tāma 're Īrob'manharī wasété za'ra wa'aba mo, te te 're robzépata za'ētē za'ra mono da, duré tiwi 're robzei'ō pese za'ra mono da. Tawamhā pi'ō te nasi si'āma tinha: Wa hā dama Īpire na, wa 're Īnhamra. Duré Īmrotō hā timro zō 're Īsiwa'ō za'ra mono ne, 're Īhāimana mono ō di. Īsiré norī hā ahā uptabi di. Niwamhā Īwi robzei'ō waihu u ō di

za. Āne te pi'ō hā si'āma nasi tinha, Babironiza āma 're ĩdahāimana za'ra mono norĩ āma ĩsimiré hā.

⁸ Āne te te nasi si'āma nharĩ wa, te za niwapsi rob'manharĩ pipa hā bātā na ōne haré sō watobro, dahāzé hā, duré dadā'āzé hā, duré mra hā. Tawamhā uburé Danhib'apito uptabi, 'Re ĩhāimana u'āsi mono hā ĩwasédé te te āma ĩhiri hā waihu'u pese uptabi wa, te za uprosi unhamā na, pi'ō hā.

Āne te ni'wa hā pi'ō na āma simiré, Babironiza āma 're ĩdahāimana wasété za'ra mono norĩ āma hā.

⁹ Tawamhā daro mono bā danhib'apito norĩ hā dama ĩpire za'ra norĩ hā ā pi'ō na 're ĩhāimana wasété za'ra mono norĩ hā pi'ō ĩzata nhizé te te sāmri za'ra wamhā, te za āma aiwa'ō za'ra.

¹⁰ Tawamhā pi'ō te te ĩrobzépata pipa te, te za romhā na aimasa. Āne te za ĩpibu ma 're sadari za'ra:

— Ropipa uptabi hā ma tō asō tiwatobro 'wa, Babironiza āma 're aihāimana za'ra wa'aba mono zō. Ropipa uptabi di. Misi bātā na ma ropipa uptabi hā ōne haré asō tiwatobro 'wa, 'ri nho'ōmo za'ētē āma 're aihāimana za'ra wa'aba mono zō. Taha na ma tō ĩrobzépata za'ētē za'ra wa'wa. — Āne te za dama ĩpire za'ra norĩ hā āma tipē'ézé za'ra.

¹¹ Tawamhā daro mono bā roptede'wa norĩ hā dama rowede'wa norĩ hā te za duré sō ti'ry'ry. Te za sō aiwa'ō za'ra, ni'wa hā za oto te te tiwi 're rob'uipra za'ra mono dai ō wa.

¹² Āne rowede'wa norĩ wi, aré da te 're ĩ'uipra za'ra mono hā; ētē'ubuzi pré oru hā, duré ētē'ubuzi 'a prata hā, duré ētē'ubuzi ĩwa'ābā za'ētē upsātā mono bā, duré a'é tōmo wawē ne ĩtob'a 'manharĩ hā, ĩwa'ābā za'ēne hā. Āne duré, rowede'wa norĩ wi, aré da te 're ĩ'uipra za'ra mono hā; zazahā ĩhāi wē uptabi 'manharĩ hā, ĩhā prépe hā duré ĩhā uzétā hā ĩwa'ābā za'ēne hā. Duré wede hā ĩwa'ābā za'ētē upsātā mono bā, te te dama 're wede za'ra aré, duré wede wa'ābā za'ētē 'manharĩ mono hā, duré uhā nhisi'reti 'wa'ratahi 'manharĩ mono hā, duré ĩsi'uwazi waipo pré 'manharĩ mono hā, duré ĩsi'uwazi tete 'manharĩ mono hā, duré ētē su'u rā 'manharĩ mono hā.

¹³ Āne duré, rowede'wa norĩ wi, aré da te 're ĩ'uipra za'ra mono hā; wedewa'u zadaze upsātā mono bā, dasai warĩrízéb da hā, duré 'ri 're zadazezéb da hā, duré dasihāiba'u'rézéb da hā, wedewa'u zadaze ĩwa'ābā za'ētē mono hā. Ā hā rowede'wa norĩ wi, aré da te 're ĩ'uipra za'ra mono hā; uwa 'ru 'rāi wa'u ĩsé hā, duré azeitona 'rāi wa'ui wa hā, duré tridu 'rāi ré hā, duré ĩsu pese uptabi hā, duré powawē hā, duré pone'ērebā hā, duré awaru hā, duré wede na wedewara hā, duré dapawa'ābā āna da te dama 're ĩromhuri za'ra mono hā. Āne te uburé marĩ hā da te 're uipra za'ra aré, rowede'wa norĩ wi hā.

¹⁴ Tawamhā rowede'wa norĩ hā te za 'ri nho'ōmo ma nharĩ za'ra, āne:

— Uburé pese marĩ ĩwē hā sō 're ĩrob'ruiwapari za'ra wa'aba mono hā ma si'utōrĩ. Uburé asibro hā ma tō ĩsimini pese za'ra wa'wa. Oto sōpētē zahu za'ra wa'aba ō di za. — Āne te za rowede'wa norĩ hā nharĩ za'ra, Babironiza āma 're ĩdahāimana za'ra mono norĩ ma.

¹⁵ Tawamhā roptede'wa norĩ hā dama rowede'wa norĩ hā danhibro pese na da te tiwi 're ĩrob'uipra za'ra mono zém na 're ĩsisibro pese uptabi za'ra mono norĩ hā te za duré romhā na aimasa, 'ri nho'ōmo nhiti. Babironiza āma da te ĩrobzépata za'ra pipa te, te za romhā na aimasa. Te za duré sō aiwa'ō za'ra.

¹⁶ Sō siwa'ō za'ra sina, te za āne sima āma nharĩ za'ra:

— Ropipa uptabi hā ma tō dazō watobro, 'ri nho'ōmo za'ētē āma 're ĩdahāimana za'ra mono norĩ zō hā. Da'uzā ĩhāiwē uptabi na te aré 're dasi'uzā za'ra, ĩhāpré pese na duré ĩhāpré dā'ā na ĩwa'ābā za'ētē na si. Dasipesezém na ĩwa'ābā za'ētē na ma tō aré 're dasipese za'ra, oru 'manharĩ na, duré ētē'ubuzi ĩwa'ābā za'ētē na, duré a'é tōmo wawē ne ĩtob'a 'manharĩ na. Āne aré marĩ na 're ĩdasipese za'ra mono zé hā.

¹⁷ Tane nheré, ma tō ōne haré ropsi'utōrĩ, si'aba'rei waré na danhibro hā. — Āne te za rowede'wa norĩ hā sō siwa'ō za'ra sina, sima nharĩ za'ra.

Tawamhā ā poré mono bā uba're na 're ĩdahāimana za'ra mono hā te za duré romhā na aimasam ni, uba're na roti'wa norĩ hā, duré āma ĩromhuri'wa norĩ hā, duré uba're na 're ĩdanomro mono hā dama rowede'wa norĩ hā.

¹⁸ Tawamhā ā norĩ hā 'ri nho'ōmo nhizé, te te sāmri za'ra wamhā, te za duré 're sadari za'ra. 'Re sadari za'ra mono sina, te za āne sima nharĩ za'ra:

— Ō hā 'ri nho'u hā ĩwē uptabi aré. ĩsine hā 'ri nho'u hā ĩ'maihāimana ō. — Āne te za sima nharĩ za'ra, uba're na 're ĩdahāimana za'ra mono hā.

¹⁹ Tawamhā rob'ru te, te za duré robzapru hā ti'rā nhisiwi sa'wari za'ra. Siwa'ō za'ra sina, te za duré āne sima nharĩ za'ra:

— Ropipa uptabi hā ma tō sō tiwatobro za'ra, 'ri nho'ōmo za'ētē āma 're ĩdahāimana za'ra mono zō hā. Ropipa uptabi di. Danhibro pese na ĩwa da te wawĩ 're ĩrob'uipra za'ra mono

zém na, wa tô aré 're wasisibro pese za'ra, uba're na 're ïwahâimana za'ra mono hã. Tane nherê, ma tô si'aba'rêi waré na ropsi'utôri ône haré. — Âne te za uba're na 're ïdahâimana za'ra mono hã sô dasiwa'ô za'ra sina, dasima nharî za'ra ni.

²⁰ Âne te ï'awapari mono hã, ïnhotô 'rowim ne.

Taha wa, ma'âpé hâiwa âma 're aihâimana za'ra wa'aba mono hã âma 're atoi u'âsi za'ra wa'aba mono, 'ri nho'ômo za'êne hã ïsi'utôrizém na. Duré 'Re ïhâimana u'âsi mono nhîb'a'uwê norî, ma'âpé 're atoi u'âsi za'ra wa'aba mono, ïsadawa wasu'u'wa norî zama, duré Cristuhu zadawa wasu'u'wa norî zama. E marî wa. Babironiza âma da te aima 're rob'manharî wasété za'ra wa'aba mono wa, 'Re ïhâimana u'âsi mono hã te te da'uprosi wa oto. Taha wa, te za âma 're atoi u'âsi za'ra wa'aba mo.

²¹ Tawamhã âne, wa tô duré te azabu. Hâiwa âma romhuri'wa ïsimiwada'uri pire hã ma tô êtê tômo wawê uptabi hã sarôtô. Te te sarôtô wamhã, ma tô âi ba time, â poré âma. Te te me sina, te âne tinha:

— Âne te za Babironiza hã 'ri nho'ômo za'êne hã sa'êtê uptabi daré uprosi, si'utôri da. Tawamhã ropsi te za oto sô nomro.

²² Tawamhã rowamremezéb ô di za oto. Danhimnhîhârâzéb ô di za. Duré danhimnhîhârâzê ïsryre hã robaba di za. Rowamreme'wai ô di za, duré ïsô're'wai ô di za, da te aré 're ïwari za'ra mono hã. Rob'éé uptabi di za. Duré romhuri nhîpese'wa norî hã robaba uptabi di za. Duré êtê tômo wawê 'manharî na amnho, da te 're ïsib za'ra mono zé ruru hã da te 're wapari za'ra mono ô di za. Rob'éé uptabi di za.

²³ Duré rob'uiwêzé hã te te oto dama 're rob'uiwê za'ra mono ô di za, Babironiza âma hã. Duré dasina 're damro za'ra mono ô di za oto.

Babironiza âma dama rowede'wa norî hã ma tô aré danhipai u sibro pese na 're hâimana za'ra, dama pire na. ïwa 're ïdahâimana za'ra mono norî hã ma tô simi'â na te te da'âma 're romhuri za'ra, 'Re ïhâimana u'âsi mono upana, ïsine marî zô si da te 're rob'ruiwapari pese za'ra mono da, ôhõ na dama 're rowê za'ra mono da newa.

²⁴ Babironiza âma ïwa 're ïdahâimana wasété za'ra mono norî hã ma tô 'Re ïhâimana u'âsi mono nhîb'a'uwê te te 're simro, ïsadawa wasu'u'wa norî zama. Babironiza norî zadawa para, ma tô duré daro mono bâ dasiwazari da te 're danhimro. Taha wa, ma tô Babironiza hã daré uprosi ni. — Âne hâiwa âma romhuri'wa ïsimiwada'uri pire hã te te ïrowasu'uzê hã romnhowa.

Âne ïnhotô 'rowim ne, te ï'awaihu'u mono hã, za ïromhâimana mono zém na hã.

19

¹ Taha pari, wa tô duré wapa, hâiwa âma da'ahâ uptabi na damreme 'râihâ na da te ïnharî za'ra ne hã. Âne te damreme 'râihâ na nharî za'ra ni:

— Wanhib'apito 'Re ïhâimana u'âsi mono âma 're wawata u'âsi za'ra wa'aba mono. Ta hã Danho'reptui'wa. Danhipai u wê uptabi di, duré waihu'u pese uptabi di.

² Marî na te te upai âna, te ï'uwaibaba si te te dama 're arowairébé, sena na. Pi'õi wasédé hã 're ïhâimana wasété mono zéb zarina, ïsine daro mono bâ 're dahâimana wasété za'ra mono wa, ma tô 'Re ïhâimana u'âsi mono hã ïwasédé hã âma tihi. Ma tô wê'ô pese. ïsib'a'uwê norî te te 're simroi mono wa, ma tô 'Re ïhâimana u'âsi mono hã uprosi, pi'ô hã. — Âne pi'ô na 'ri nho'ômo za'êtê na 're ïdahâimana za'ra mono norî âma ïsimiré'ézé hã.

³ Tawamhã te duré damreme 'râihâ na nharî za'ra ni:

— 'Re ïhâimana u'âsi mono âma 're wawata u'âsi za'ra wa'aba mono. 'Ri nho'ômo za'êtê ro'o nhizé hã ône u'âsi hâimo 're sizédé si'rêi mono wê te, âma 're wawata u'âsi za'ra wa'aba mono. — Âne te nharî za'ra ni.

⁴ Tawamhã 24 na dama ïpire za'ra norî hã duré maparane si'uiwa na ropoto na ïhâiba norî hã ma tô hi'râtîtô ana, 'Re ïhâimana u'âsi mono âma wata za'ra da, danhib'apito simasisizém na ïsâmra âma. Âne te âma tiwata za'ra:

— Tane tô. 'Re ïhâimana u'âsi mono âma si 're wawata u'âsi za'ra wa'aba mono. — Âne te âma si'uzei pese za'ra.

Pone'érebâ ïmrozém na datozé wasu'u, âma ïsimiré'ézém na hã

⁵ Tawamhã danhib'apito simasisizém hawi te ni'wa hã tinha:

— Ma'âpé, Wanhib'apito 'Re ïhâimana u'âsi mono âma si 're aiwata u'âsi za'ra wa'aba mono, uburé ïsib'a'uwê norî hã, dama aipire za'ra wa'aba norî hã, dama aiwapu za'ra wa'aba norî hã, duré uburé 'Re ïhâimana u'âsi mono 're ïhâimana wazéb za'ra wa'aba mono norî zama. — Âne te ni'wa hã tinha.

⁶ Tawamhã wa tô duré wapa, da'ahâ uptabi na 're ïdamreme zusi mono mreme hã. Â'a'a 'râihâ ruru'u ne, damreme hã. Duré tâiwapsa'a za'êtê rârâ'ã ruru'u ne, damreme hã. Âne te damreme 'râihâ na nharî za'ra ni:

— Uburé Danhib'apito uptabi, İwaihū'u pese uptabi hā ta hā danhipai u, pire uptabi na te 're İhāimana, 'Re İhāimana u'āsi mono hā. Taha wa, āma 're wawata u'āsi za'ra wa'aba mono za.

⁷ Bādā hā ma tō İwa waptārā, Pone'ērebā İmrozéb da hā. Duré āma İmro da hā ma tō sima apese. Taha wa, āma 're watoi u'āsi za'ra wa'aba mono. Duré 'Re İhāimana u'āsi mono hā wē uptabi wa, āma 're wawata u'āsi za'ra wa'aba mono.

⁸ Za āma İmro ma hā, ma tō 'Re İhāimana u'āsi mono hā tāma tisō, T'uzā hāirā wē uptabi hā, āma si'uzā da. — Āne te da'ahā uptabi na damreme 'rāihā na nharī za'ra ni.

Āma İmro da uza hā 'Re İhāimana u'āsi mono nhib'a'uwē te te 're İromhuri wē za'ra mono zé, te wasu'u.

⁹ Tawamhā hāiwa āma 'Re İhāimana u'āsi mono ma romhuri'wa hā te İma tinha:

— Ma'āpé, āne āma rob'ui'ére: "Pone'ērebā İmrozém na datozéb u 'Re İhāimana u'āsi mono hā sō İhārā za'ra norī ma, tāma 're rowē uptabi za'ra mono di za." — Āne te hāiwa āma romhuri'wa hā İma tinha, te āma rob'ui'ére da.

Āne te duré İma tinha:

— Ā hā 'Re İhāimana u'āsi mono mreme hā tō sena uptabi. — Āne te we İma tinha.

¹⁰ Tawamhā tō ō hā hāiwa āma romhuri'wa papara, wa tō İhi'rātitō aime, āma İwata da aré. Tane nheré, te İma tinha, āne:

— Tō'ā. Āne 'manharī tō. Wa hā asine, 'Re İhāimana u'āsi mono ma romhuri'wa, wa 're İhāimana, asisānawā norī ne hā, asiré İsazei'wa norī ne hā. Ta norī hā roti tō sena uptabi hā, Zezusi te te dama 're İ'awaihu'u mono hā te te 're İwapari pese za'ra mono. Ta norī ne, wa 're İhāimana, wa hā. Ma'āpé 'Re İhāimana u'āsi mono āma si 're aiwata mono.

'Re İhāimana u'āsi mono zadawa wasu'u 'rata 'wa norī hā, İp'ēzani te te tāma 're İwaihū'u za'ra mono zéb zarina si, te ta norī hā te te dama 're sadawa wasu'u za'ra. E marī na te bété te te dama 're sadawa wasu'u za'ra. Tō ōhō na, Zezusi, ti'abré uburé te te dama 're İ'awaihu'u mono na si, te ta norī hā te te dama 're sadawa wasu'u za'ra, 'Re İhāimana u'āsi mono hā. — Āne te İma tinha, hāiwa āma romhuri'wa hā.

Awaru İrā nhisi İsāmra hā ā hawi ropoto siwamnarī āma te te İ'ai'utéze wasu'u

¹¹ Taha pari, wa tō duré 'madā. Te 'madā'ā wamhā, ma tō İma si'ridawa, hāiwa hā. Tawamhā awaru İrā hā wa tō 'madā. İ'mapra'ba'wa nhisi hā, Dama İ'umha. Duré İsisi amo hā, Tō sena uptabi na, İsisi hā. Ta hā dawasédé hā da te 're İ'manharī za'ra mono zéb zarina te te 're da'awē'ō mono wamhā, tō İ'uwaibaba si te te 're da'awē'ō. Tō İsarina si te duré te te 're da'ahā za'ra, te te āma upai āna. Duré dawasété na 're İdanomro mono norī hā te te 're 'wapé za'ra mono wamhā, tō İsarina si te te tāma 're rob'manharī za'ra, te te āma upai āna.

¹² Duré İto hā aiwa unhama ro'ō ne, İto hā. Duré İ'rā na hā İ'rāzaza si'ubuzi hā, ahā uptabi di. Danhib'apito 'rāzaza si'ubuzi ne, İ'rāzaza mono hā. Duré İhāiba na danhisi na rob'ui'ére hā, dama İsa'rese'ō hā. Ōhō ma si waihu'u pese di, āma İsimir'ézé hā.

¹³ Duré İ'uzā hā dawapru na hāzapré di. Taha nhisi hā 'Re İhāimana u'āsi mono mreme na, İsisi hā.

¹⁴ Tawamhā hāiwa āma da'wapéi'wa norī hā te duré İsarina sisa're, awaru İrā na uza hāirā wē uptabi na.

¹⁵ Duré awaru İrā na İsāmra zadai're hawimhā, te sib'ézé 'wa si'uiwa İ'wa pe hā aipra. Taha na, te za da'āma ai'uté, daro mono bâ 're İdahāimana wasété za'ra mono norī āma hā. Simiwada'uri nhiptete na te za duré te te 're da'awada'uri. Uwa 'ru 'rā hā ētē're 're, İwa'u zō da te 're wati za'ra mono wamhā, te za İwa'u hā 're pu'u za'ra. Tane te za dawapru hā dawī 're pu'u za'ra, 'Re İhāimana u'āsi mono İsiptete uptabi hā sa'ētē te te 're da'ahā za'ra mono wamhā.

¹⁶ Tawamhā duré İ'uzā hāpa na İsisi na rob'ui'ére hā, İza na zama. Āne İsisi na rob'ui'ére hā, uburé danhipai u Danhib'apito. Duré İsisi amo na rob'ui'ére hā, Danhipai u dama İpire.

¹⁷ Tawamhā wa tō duré sabu hāiwa āma romhuri'wa hā, aimawi hā. Bātā nhisiwi te za. Tawamhā te hārā 'rāihā na uburé si norī zō hā, hāimo uptabi 're İsisa'rei mono norī zō. Āne te sō tihārā za'ra:

— We asina ubumroi wa'aba. 'Re İhāimana u'āsi mono hā te za oto aima a za'ra wa'wa, sa'ētē na asaihuri aba da.

¹⁸ Tawamhā daro mono bâ da'upsātā mono nhi na te za asaihuri 'wa, adā'ā norī nhi na, ti'ai āma danhib'apito norī nhi na, da'wapéi'wa norī nhib'apito nhi na, duré da'wapéi'wa norī nhi na, duré awaru nhi na, duré awaru 'mapra'ba'wa norī nhi na, duré dapawa'ābā āna dawada'uri zarina si da te dama 're İromhuri za'ra mono norī nhi na, duré dawada'uri āna dasi'uihā na 're İdahāimana za'ra mono norī nhi na, duré dama İpire norī nhi na, dama İwapu norī nhi na zama. Uburé pese daro mono bâ 're İdahāimana wasété za'ra mono norī

dâ'â nhi na te za asaihuri 'wa. — Æne ma si norĩ ma waihu'u za'ra, hâiwa âma romhuri'wa hâ.

¹⁹ Tawamhâ â hawi ropoto siwamnari hâ wa tô 'madâ, ti'ai âma dama ïpire za'ra mono norĩ me. Ta norĩ hâ ma tô tite da'wapéi'wai mono bâ te te 'râ'õtô, awaru ïrâ 'mapraba'wa hâ te te siwi 'wapé da, duré ïsiré da'wapéi'wa norĩ zama te te siwi 'wapé za'ra da.

²⁰ Tawamhâ â hawi ropoto siwamnari hâ ma tô âri ni. Awaru ïrâ 'mapraba'wa ma tô ti'â. 'Re ïhâimana u'âsi mono zadawa wasu'u uptabi ô 'wa, 'Re ïhâimana u'âsi mono nhimipisutu newa, romhõsi na dama 're ïsadawa nhipese mono, ma tô duré ïsiré ti'â. Ta hâ ma tô aré â hawi ropoto siwamnari nho'a te te 're romhõsi, dama ïsa'rese'õ na. Te te 're ïromhõsi mono zém na ma tô dama 're sadawa nhipese aré, â hawi ropoto siwamnari nhisi na ïhâiba ui'ére mono hâ, ïhâiba 'manhari na romhâiba âma 're ïdawata za'ra mono hâ. Tawamhâ awaru ïrâ 'mapraba'wa hâ ma tô â hawi ropoto siwamnari hâ wabzu, dama 're ïsadawa nhipese mono me. Unhama ro'o u'âsi u, ma tô hâiba ré wabzu, eté ro'o nhizédé uzé pire u.

²¹ Tawamhâ awaru ïrâ na ïsâmra hâ tizadai'ré hawi sib'ézé 'wapa ï'wa pese si'uiwa zahuré na ma tô uprosi, uburé pese da'wapéi'wa norĩ hâ. Uburé ma sô'rebzâri pese. Tawamhâ si norĩ hâ danhi na saihuri mono wa, ma tô te te 'mahâpâri pese.

Æne ïnhotô 'rowim ne, te ï'azabui mono hâ, za ïromhâimana mono zém na hâ.

20

Miu na Satanasihi âma pawasisi ré ïwahubzé wasu'u

¹ Tawamhâ wa tô duré 'madâ, hâiwa âma 'Re ïhâimana u'âsi mono ma romhuri'wa hâ. Hâiwa hawi te wei mo, 'ridawazébéré, ab're 'rehâ 'ridawazébéré, ïsi'uwazi nhorõ rutu ré zama.

² Tawamhâ te te si'rai wi, ma tô ho'orâ hâiba ne ropoto siwamnari hâ õne haré sa'ëté uptabi ti'â, siptete uptabi na. Ho'orâ hâiba ne ropoto siwamnari hâ ta hâ Satanasi, wanhitob'ru, duréihâ wahi na ïsihâiba. Ta hâ hâiwa âma romhuri'wa hâ te te sa'ëté âri wamhâ, ma tô pawasisi, miu na wahub u pawasisi ré, 're hâimana mono da.

³ Taha da, ma tô oto time, ab're 'rehâ u. Ma tô ïré sito. Ma tô ïré upto, miu na wahub u daro mono bâ sadawa nhipese na te te 're da'a'râmi tô mono da. Miu na wahub 'râsutu parip si, te za 'Re ïhâimana u'âsi mono zadawa para tâma wasihu ni, syry na a'â 're morĩ da, Satanasi hâ.

⁴ Tawamhâ wa tô duré sabu, danhib'apito simasisizém ne 're ïdasi'ubumroi mono zé hâ. Âma ïsi'ubumroi mono ma, ma tô 'Re ïhâimana u'âsi mono hâ tâma pisutu za'ra, dahâimanazém na te te 're ïda'awaihu'u mono zéb zarina, dama pire na te te dama 're arowairébé mono da, ïsadawa para. Tawamhâ wa tô duré 'madâ'â za'ra, 'Re ïhâimana u'âsi mono zadawa wasu'u te te 're sazei pese za'ra mono 'ru te, da te 're ï'rânhihâri za'ra mono norĩ pë'ézani hâ, tô sena na Zezusihi zazei'wa na dama 're siwasu'u za'ra mono 'ru te, da te 're ï'rânhihâri za'ra mono norĩ pë'ézani hâ. Ta norĩ hâ â hawi ropoto siwamnari âma 're ïwata za'ra mono ô. Duré ïhâiba 'manhari na romhâiba âma 're ïwata za'ra mono ô. Duré â hawi ropoto siwamnari nhisi na ï'uihâ ui'ére za'ra ô, duré ïsib'rata ui'ére za'ra ô. Ta norĩ hâ ma tô oto hâiba ré apâ 're hâimana za'ra. Ma tô tihâiwa'utu za'ra. Tawamhâ Cristuhu siré te oto dama pire na te te dama 're roti za'ra, Satanasi hâ pawasisi ré, miu na âma ïwahub u.

⁵ Æ hâ, 're ïdahâiwa'utu 'rata za'ra mono zé. Tawamhâ miu na wahub 'râsutu parip si, ma tô daro mono bâ uburé pese 're ïdadâ'â za'ra mono hâ tahâiwa'utu za'ra ni, dahâiwa'utu 'rata na 're ïdahâiwa'utu za'ra mono ô norĩ hâ. Æne wa tô te azabu.

⁶ Tawamhâ, 're ïdahâiwa'utu 'rata za'ra mono norĩ ma hâ, tâma 're rowé uptabi za'ra mono di za. Ta norĩ hâ 're ïdadâ'â zahu za'ra mono ne, unhama ro'o u'âsi u, da te 're ïdanhamra za'ra mono norĩ zu 're sisisi mono ô di za. Miu na wahub u te za 'Re ïhâimana u'âsi mono ma sasedoti na 're hâimana za'ra, Cristuhu ma zama. Te za duré ïsiré dama pire na te te dama 're roti za'ra, miu na wahub u.

Satanasi, unhama ro'o u'âsi u, da te ïmezé wasu'u

⁷ Tawamhâ miu na wahub 'râsutu wapsi, te za Satanasihi ma wasihu ni, 're ïsa mono zém hawi oto watobro da.

⁸ Tawamhâ watobro wamhâ, daro mono bâ te za oto te te 're da'a'râmi, sadawa nhipese na. Ti'ai âma hâ darom nhisi zahuré hâ maparane za oto. Dodi na duré Madodi na darom nhisi zahuré hâ. Tame te za Satanasi hâ da'râ'õtô, dasi'wapé da. Da'ahâ uptabi na te za da'a'râ'õtô. Â poré zaihâ na supara 're ïsimi'wara mono ne, da'ahâ uptabi di za.

⁹ Tawamhâ daro mono bâ te za oto dasiwi romnhitom ni. Da te dasiwi romnhito wamhâ, te za 'ri nho'u hâ dasiwi ubu ni, 'Re ïhâimana u'âsi mono te te 're ïsawi mono hâ, ïsib'a'uwé norĩ, ïwa 're ïhâimana za'ra mono zé hâ. Ta norĩ hâ da te dasiwi uprosi da, te za dasiwi ubu ni.

Tane nherē, 'Re ihāimana u'āsi mono hā te za hāiwa hawi uzā hā sāmra. Te te sāmra wamhā, te za āma da'uprosi, unhama ro'o na.

¹⁰ Tawamhā Wa'uburé hā sadawa nhipese na te te 're īda'a'rāmi mono hā te za me ni, unhama ro'o u'āsi u, ētē ro'o nhizédé uzé pire u. Ā hawi ropoto siwamnarī norī, da te īwabzurizéb u te za me ni. Tawamhā tame te za oto te te 're robzépata za'ētē u'āsi za'ra, ōne u'āsi.

Āne wa tō te awaihu'u, īnhotō 'rowim ne.

Da te 're īdaza're za'ra mono zé 'rāsutu wasu'u

¹¹ Tawamhā wa tō duré 'madā, danhib'apito simasisizé īrā hā, īsa'ētē uptabi hā. Āma īsāmra hā wa tō duré sabu. Tawamhā uburé uptabi, ma tō ti'a hā ai'utō, hāiwa zama. Marī ō uptabi di oto. Da te 're 'madā'a zahuré mono ō di oto, ti'a hā hāiwa me. Tāibā ma tō ai'utōri pese zahuré.

¹²⁻¹³ Tawamhā wa tō duré 'madā'a za'ra, 're īdadā'ā za'ra mono hā, dama īpire norī hā, duré dama īwapu norī hā. Da'upsātā mono bā, te aihīni pese danhib'apito simasisizém nho're aimasam ni. Ā poré mono bā, ā na 're īdasi'utōri mono norī zama te aimasam ni, adā 're ihāimana za'ra mono zém hawib zama. Tawamhā ībaihā ahā na ma tō sōzi za'ra ni, ti'ab 're uburé marī, da te 're ī'manharī za'ra mono zém na rob'ui'ére hā, marī īwē na, duré īwasété na zama. Ma tō duré sōzi ībaihā hā, 'Re ihāimana u'āsi mono 'rata za rowē na 're īdahāimana u'āsi za'ra mono norī nhisi ré hā. Tawamhā ībaihā na da te 're ī'manharī wē za'ra mono zéb ui'ére zarina, ma tō da'āma rowairébé za'ra ni. Da te 're ī'manharī wasété za'ra mono zéb ui'ére zarina zama, ma tō aihīni pese da'āma rowairébé za'ra ni.

¹⁴⁻¹⁵ Tawamhā ni'wam norī hā ībaihā na 're ihāimana u'āsi za'ra mono norī nhisi, 're īsimi'wara mono zém na īsisi īsimi'wara ō norī hā ma tō sāmra ni, unhama ro'o u'āsi u. (Ā hā unhama ro'o u'ā hā maparane āma 're īdadā'ā zahu za'ra mono zé, te wasu'u.)

'Re īdadā'ā za'ra mono zé hā tāibā oto. Duré adā hā aré 're ihāimana za'ra mono zé hā, tāibā duré oto. Ma tō ab're 're sāmra ni, uburé adā'ā norī hā, unhama ro'o u'āsi u. Taha wa, tāibā oto, adā 're ihāimana za'ra mono zé hā.

Āne wa tō, za īromhāimana mono zé hā te azabu, danhotō 'rowim ne da te 're īrosawērē za'ra mono ne.

21

Hāiwa ité wasu'u, ti'a ité wasu'u me

¹ Tawamhā wa tō duré 'madā hāiwa ité hā, ti'a itéb zama. Hāiwa 'rada hā ma tō ai'utōri pese, ti'ai 'rata zama. Ā zama ma tō ai'utōri pese.

² Tawamhā wa tō duré 'madā, 'ri nho' u hā, īwasédé hā īwa 're ihāimana mono ō hā, Zeruzarē itém na īsisi hā. Hāiwa hawi te wei mo, 'Re ihāimana u'āsi mono hawī. Pi'ō hā oto mro da, 're īsi'uza wē uptabi za'ra mono ne, ma we si'ra, 'ri nho' u īwē uptabi hā.

³ Tawamhā damreme 'rāihā hā wa tō duré wapa, danhib'apito simasisizém hawi we te te īnharī hā. Āne te we īma tinha:

— Ma'āpé, waihu'u. 'Re ihāimana u'āsi mono hā te za oto dasiré 're hāimana u'āsi, 'rāwi. Īsib'a'uwē te za oto 're dahāimana u'āsi za'ra. Te za tō oto dasiré 're hāimana u'āsi. Īsib'apito za'ra te za oto 're hāimana, 'Re ihāimana u'āsi mono hā.

⁴ Te za duré da'atōmo u'ō, oto dapē'ēzé ō u'āsi 're dahāimana u'āsi za'ra mono da. 'Re dadā'ā za'ra mono ō di za oto. Duré 're dasiwa'ō za'ra mono ō di za oto. Duré dahāzé, da te 're sēpata za'ra mono ō di za oto. E marī wa. Uburé 're īromhāimana 'rata mono zé hā si'utōri pese wa oto. — Āne ma tō ni'wa tinha, mreme 'rāihā na.

⁵ Tawamhā 'Re ihāimana u'āsi mono hā danhib'apito simasisizém na īsāmra hā te īma tinha, āne:

— Ma'āpé waihu'u. Wa hā wa za tō marī ité hā te ab'manharī, āhāna hā. — Āne te īma tinha.

Tawamhā te duré īma ti'ru:

— Ma'āpé āne āma arob'ui'ére mono. Āhā wasu'u hā uburé marī ité hā za te ī'ab'manharī mono na hā, tō sena. Tō sena wa, āhā na da te 're rob'umnhasi za'ra mono sina, da te 're įzazei pese za'ra mono da na, te za āma ī'arob'ui'ére mo.

⁶ Tawamhā te duré īma tinha:

— Tāibā oto. Wa tō te āma a'uwaimrami. Wa hā īsāna 'rata hawimhā marī ō ré hā, wa tō 're ihāimana u'āsi. Uburé marī hā si'utōri pese nherē, īsarina īsi'utōri ō di za, wa hā. Ōne u'āsi, wa za 're ihāimana.

Tawamhā ni'wam norī hā te te 're 'rubu za'ra mono wamhā, wa za ā u'ā hā te tāma 're ōb za'ra, wa ābā āna, da te 're āhuri mono wa, įsiré rowē na 're īdanomro u'āsi mono zéb da hā.

⁷ Ni'wam nori hã tidã'âzéb u iwi sipizari âna, Satanasihî âma te te i'ai'utê za'ra nori hã ta nori ma, wa za Isib'apito za'ra 're ihâimana. Inhib'auwê si te za oto 're hâimana za'ra.

⁸ Tane nherê, ni'wam nori hã te za unhama ro'o u'âsi wa'wa 're hâimana u'âsi za'ra, arê da te 're simroi mono pipa te, iwi 're isipizari za'ra mono nori hã, durê te te 're izazei utôri za'ra mono nori hã, durê mari iwasêté uptabi na 're ihâimana wasêté za'ra mono nori hã, durê dapãri'wa nori hã, durê dahâiba na 're ihâimana wasêté za'ra mono nori hã, durê simi'â na 're ihâimana za'ra mono nori hã, durê romhâiba 'manharî âma i'upana 're iwata za'ra mono nori hã, durê sadawa nhipese na 're ihâimana za'ra mono nori hã. Uburê pese, te za êtê ro'o nhizédé uzé pire wa'wa 're dahâimana u'âsi za'ra, 're idahâimana wasêté za'ra mono nori hã, unhama ro'o u'âsi wa'wa. Unhama ro'o u'â hã maparane âma 're idadã'â zahu za'ra mono zê, te wasu'u. — Âne ma tô îma rowaihu' u siro, 'Re ihâimana u'âsi mono hã.

Zeruzarê itê wasu'u

⁹ Tawamhã 7 na hâiwa âma romhuri'wa nori sirê hã ma tô misi we itême 'maimo, 7 na u'awi rê ihâimana za'ra nori sirê hã, rob'manharî pipa na te te dama 're irob'manharî wasêté za'ra mono nori sirê hã. Tawamhã âne te izatô:

— We Isirê aimorî, Pone'ërebã mro da hã sabu da. — Âne te izatô.

¹⁰ Tawamhã 'Re ihâimana u'âsi mono pê'êzani hã ma tô durê aimawi i'uihã pi'ra. Te te i'uihã pi'rai wa, wa tô durê aimawi ihâiba. Taha pari, ma tô hâiwa âma romhuri'wa hã izaprô, êtê rãihã za'êtê uptabi u, i'rãihã uptabi u. Te te izaprôni wamhã, Zeruzarê itê hã wa tô 'madã, mari iwasêdé hã iwa 're ihâimana mono ô hã, hâiwa hawi we te te isi'ra, 'Re ihâimana u'âsi mono hawi.

¹¹ 'Re ihâimana u'âsi mono nhimirowa'a na, te 'ri nho'u hã tirowa'a za'êtê. Êtê'ubuzi zarob'a si'ubuzi ne, ma ai'ubuzi, 'ri nho'u hã.

¹²⁻¹³ Durê 'ri nho'ômo 'wawi wa'ra hã 'rãihã uptabi di. 'Ridawa isa'êne hã 12 na ihâiba hã. Bâtã pusizém niwîmhã si'ubdatô 'ridawa isa'êne hã, durê bâtã zasizém niwîmhã si'ubdatô 'ridawa isa'êne hã. Durê hâiwa'a're nhimire niwîmhã, si'ubdatô. Durê hâiwa'a're nhimi'e niwîmhã si'ubdatô, 'ridawa isa'êne hã. Uburê hã 12 na ihâiba hã. Durê 'ridawa za'êtê mono bâ te hâiwa âma 'Re ihâimana u'âsi mono ma romhuri'wa nori hã misi si simasa, 'ridawa 'madã'â'wa nori hã. Durê 'ridawa za'êtê mono bâ rob'ui'ére hã misi si, Izarazéhé 'ra nhisi mono na rob'ui'ére hã, 12 na i'ra nhisi mono na rob'ui'ére hã.

¹⁴ Durê wa'ra nhana'rata uparizé mono hã êtê tômo wawê topa hã 12 na ihâiba hã. Taha na 12 na Pone'ërebã zadawa wasu'u'wa nori nhisi mono hã. Misi si âma isisi ui'ére mono hã.

¹⁵ Tawamhã hâiwa âma romhuri'wa hã te te îma inharî hã te wedehu waré ne hã 're ti'â, mari pibuzé hã, êtê'ubuzi pré oru 'manharî hã. 'Ri nho'ômo zadaré te te âma ipibuzéb da hã te 're ti'â, durê 'ridawa isa'êtê mono pibuzéb da zama, durê 'ri nho'ômo 'wawi wa'ra pibuzéb da zama.

¹⁶ Tawamhã 'ri nho'ômo zadaré te te pibui mono wamhã, isasé're mono hã aiwapsi ma wairébé, ti'ai pibuzém na ipibuzé mono hã. Îna're pibuzé mono hã aiwapsi ma wairébé. Durê i'a're mono pibuzé hã aiwapsi ma wairébé, durê isihâi mono hã. Uburê pese aiwapsi ipibuzé mono hã. Âne ipibuzé mono hã, 2200 na ti'ai pibuzém na îna're pibuzé mono hã durê i'a're pibuzé mono hã, durê isihâi pibuzé mono hã.

¹⁷ Tawamhã ma tô durê pibu, wa'ra hã isimi'rãmi na hãza'ôtô zô. Te te pibui wamhã, 64 na ipibuzé hã. Ti'ai âma da te 're iropibu za'ra mono zéb za'ratazéb zarina, ipibuzé hã.

¹⁸ Durê 'ri nho'ômo 'wawi wa'ra hã êtê'ubuzi zarob'a na i'manharî hã. Durê 'ri nho'u hã oru uptabi na si 'ri mono hã, aimawi na wazari âna. Aiwa simhi ne hã sarob'a uptabi di durê.

¹⁹⁻²⁰ Durê 'ri nho'ômo 'wawi wa'ra nhana'rata uparizé mono wazarimhã, misi si êtê'ubuzi wa'âbã za'êtê mono hã iwamri mono bâ. 12 na êtê'ubuzi wa'âbã za'êtê mono hã, iwamri mono bâ, îto pré wamri mono bâ, durê itob'uzé wamri mono bâ.

²¹ Durê 12 na 'ri nho'ômo 'wawi wa'ra 'ridawa za'êtê mono hã, a'é tômo wawê ne itob'a 'manharî mono hã, misi si. Durê 'ri nho'ômo 'ri wa'wa 'ri nhi'rity wawê hã êtê'ubuzi pré oru uptabi na i'manharî hã, iwazari ô na. Aiwa simhi ne sarob'a uptabi di.

²² Tawamhã 'ri nho'ômo âma 'Re ihâimana u'âsi mono âma 're idawata za'ra mono zé hã te iwa sãmri ô di. Robaba di. Uburê Danhib'apito uptabi hã, 'Re ihâimana u'âsi mono iwaihu' u pe hã, durê Pone'ërebã me oto 'rãwi da'rata 're hâimana u'âsi zahuré mono na dã'âsina, isôrowa hã oto hâimana ô di.

²³ Durê 'ri nho'ômo na hã bâdã te te 're rob'uiwê mono ô di za oto, a'amo zama. 'Re ihâimana u'âsi mono nhimirowa'a na te za oto te te 're rowa'a, Pone'ërebã nhimirowa'a na zama.

²⁴ Tawamhã daro mono bâ 're idahâimana za'ra mono nori hã te za isimirowa'a na 're dahâimana za'ra. Durê dama ipire za'ra nori hã te te 're ida'madã'â za'ra mono nori hã te za tinhibro hã ahã uptabi na 'wasa, 'ri nho'u itêb u.

²⁵ Tawamhã duré 'ridawa za'ëtê mono hã 'ri nho'ômo 'wawi wa'ra 'ridawa za'ëtê mono hã te za 'ridawa haré 're simasab u'âsi, ône u'âsi sitob âna. Tame oto 're mara waihu'u mono ô wa, te za 'ridawa haré 're simasab u'âsi.

²⁶ Tawamhã daro mono bâ te za danhibro hã 'wasari ni, 'ri nho'u'îtêb u. Uburé dawaihu'u pese na romhuri pese zéb ré, te za asisi ni.

²⁷ Tawamhã marî îwasédé hã da te 'mazasi za'ra ô di za. Duré 're îdahâimana wasété za'ra mono norî hã, duré 're îdazadawa nhípese za'ra mono norî hã îtême 're danhisisi waihu'u mono ô di za oto. Îbaihã na 're îdahâimana u'âsi za'ra mono norî nhisi 're îsimi'wara mono zém na, isisi, 're îsimi'wara mono norî si, te za îtême 're sisisi, Pone'ërebâ te na isisi u'î'éré ré mono hã.

Âne romnhowa îromhâimana mono hã, te î'azabui mono hã.

22

¹ Tawamhã hâiwa âma 'Re îhâimana u'âsi mono ma romhuri'wa hã, tô ô hã ma tô duré îzaprô, â u'â hã te 'madâ'â da. Â u'â hã da te 're âhuri mono wa, dato sina 're îdanomro u'âsi mono zé hã. Simhi zarob'a uptabi ne â zarob'a uptabi di, â u'â hã. Panho'u 're îpraba za'ra mono ne, te 'Re îhâimana u'âsi mono norî simasisizéb zahâpâ hawi tipraba, Pone'ërebâi me.

² 'Ri nho'ômo wa'wa, 'ri nhi'ridi înomro wa'wa, te tipraba. Duré wede hã â praba zaihâ si'uiwa na Isâna'rata si'uiwa hã te tame 're sa, î'râ hã da te 're huri mono wa, 'Re îhâimana u'âsi mono 'rata, dato sina 're îdanomro u'âsi mono zé hã. A'amo sidâpâsi î'râzê hã. Wahub sidâpâsi te 're 'râi u'âsi. Duré îsu hã daro mono bâ apâ âma 're îdazéptâ'â za'ra mono zéb da hã.

³ Duré marî îwasédé hã 'Re îhâimana u'âsi mono te te 're î'awê'ô pese mono hã, îwa 're hâimana za'ra mono ô di za, 'ri nho'ômo âma hã. Duré 'Re îhâimana u'âsi mono hã te te 're îda'awê'ô pese mono hã îwa 're dahâimana za'ra mono ô di za.

Taha wa, 'Re îhâimana u'âsi mono norî simasisizé hã te za 're hâimana, Pone'ërebâi me, danhib'apito simasisizém ne hã, te te âma 're îda'ab'madâ'â u'âsi zahuré mono zéb da hã. Taha wa, te za îsib'a'uwê norî hã âma 're wata u'âsi za'ra.

⁴ Te za duré î'ubu hã te te siwi 're 'madâ'â u'âsi za'ra. Duré îsisi na uihâ u'î'éré ré, te za 're hâimana za'ra.

⁵ Tamemhã 're mara waihu'u mono ô di za. 'Re robra waihu'u mono ô dá'âsina, rob'uiwézém na da te 're rob'uiwê za'ra mono ô di za oto. Duré bâdâ hã te te 're rob'uiwê mono ô di za oto. Uburé Danhib'apito uptabi, 'Re îhâimana u'âsi mono si te za te te dama 're rowa'a. Tawamhã îsib'a'uwê norî hã te za îsadawa para pire na 're hâimana u'âsi za'ra, ône u'âsi.

Âne romhã ré îromhâimana mono hã, înhotô 'rowim ne, te î'azabui mono hã, duré te î'awaihu'u mono hã.

Zezusi apâ we timorizém na te te sina îdapo're pu'uzé wasu'u

⁶ Tawamhã hâiwa âma romhuri'wa hã tô ô hã te duré îma tinha, âne:

— Âhã wasu'u hã tô sena. Tô sena wa, te za rob'umnhasi sina da te 're sazei pese za'ra, da te 're wawã za'ra mono âna. 'Re îhâimana u'âsi mono hã te tizadawa wasu'u'wa norî ma, Tipê'êzani hã te te tâma 're anhomri, taha na te te dama 're sadawa wasu'u za'ra mono da. Ta hã 'Re îhâimana u'âsi mono hã ma tô hâiwa âma tâma îromhuri'wa hã we îzatô, tô sena za îromhâimana mono zém na te aima awaihu'u sirômo mono da, duré înhîpai u'îsib'a'uwê norî ma, te aima î'awaihu'u mono zéb zarina tâma waihu'u za'ra mono da. — Âne hâiwa âma romhuri'wa hã ma tô îma waihu'u.

⁷ Tawamhã Zezusihi mreme hã wa tô wapa, tizazei'wa norî te te îpo're pu'uzé hã. Âne te tinha:

— Ma'âpé, waihu'u pese za'ra wa'aba. Wa za wei morî su apâ. Âhã wasu'u hã tô sena, îbaihã na za îromhâimana mono zém na rob'ui'ééré hã ni'wa hã te te 're wapari pese mono wamhã, tâma 're rowê u'âsi mono di za. — Âne te tinha, Zezusi hã.

⁸ Wa hã Zuwã hã wa tô âne uburé marî hã te awapari. Wa tô duré âne te ab'madâ'â. Tawamhã âne te awapari mono pari, duré âne hã te ab'madâ'â mono pari, wa tô hâiwa âma romhuri'wai papara aime, âma îwata da, za îromhâimana mono zém na te te îma î'awaihu'u mono âma.

⁹ Tane nherê, te sina î'uwati, âma îwata tô da. Âne te îma tinha:

— Tô'â. Âne 'manharî tô. Wa hã asine, 'Re îhâimana u'âsi mono ma romhuri'wa, wa 're îhâimana, duré asisânawã norî ne hã, îwasu'uwê na te te dama 're îsadawa wasu'u za'ra mono norî ne hã. Duré âhã wasu'u na î'arob'ui'ééré mono wapari pese 'wa norî ne hã wa hã, 'Re îhâimana u'âsi mono ma romhuri'wa. Taha wa, ma'âpé 'Re îhâimana u'âsi mono âma si 're aiwata u'âsi mono. — Âne te âma îwada'u.

¹⁰ Tawamhã te duré ĩma tinha, âne:

— Àhã wasu'u hã za ĩromhãimana mono zém na ĩ'arob'ui'ééré mono hã asima sawi ô di za. Āma ronomro ô ré, za romhãimana mono na dá'ásina, te za sô'awi dama 're ĩ'awaihu'u mo.

¹¹ Āne na za romhutu na ĩromhãimana mono zém na dama 're awaihu'u mono nherê, ni'wam norĩ hã tiwasété si ône haré te te 're 'manharĩ u'ási za'ra mono wamhã, ôhõ na si âma 're hãimana za'ra mono tô. Duré ni'wam norĩ hã tihãiba na 're hãimana siwamnarĩ u'ási za'ra mono wamhã, ôhõ na si âma 're hãimana u'ási za'ra mono tô duré, rob'rãsutu u hã. Duré ni'wam norĩ hã te te 're 'manharĩ wê u'ási za'ra mono wamhã, wê u'ási âma 're hãimana u'ási za'ra mono. Duré ni'wam norĩ hã 'Re ĩhãimana u'ási mono âma si 're nomro u'ási mono wamhã, tô ôhõ na si 're nomro u'ási mono tô, rob'rãsutu u hã. — Āne hãiwa âma romhuri'wa hã ma tô ĩma waihu'u.

¹² Tawamhã Zezusihi mreme hã wa tô duré wapa, tizazei'wa norĩ te te ĩpo're pu'uzé hã. Āne te tinha:

— Ma'ápé waihu'u pese za'ra wa'aba. Wa za wei morĩ su apã. We ĩmorĩ wamhã, ĩnhimipawa'âbázé hã wa za we ĩsiré ti'ã, da te ĩma 're ĩromhuri wê za'ra mono zéb zarina te âma da'apawa'âbã mono da.

¹³ Wa hã duréihã marĩ ô ré hã wa tô 're ĩhãimana. Uburé marĩ hã si'utõrĩ pese nherê, ĩsarina ĩsi'utõrĩ ô di za wa hã. Ône u'ási, wa za 're ĩhãimana u'ási. — Āne Zezusihi mreme, te ĩwaparĩ hã.

¹⁴ Duré, ni'wam norĩ hã uza hãirã da, ti'uza te te 're ĩ'upsõĩ pese za'ra mono hã, ta norĩ ma si tâma 're rowê uptabi za'ra mono di za. Tane tiwasété wi, 're ĩsipizari za'ra mono hã, 'Re ĩhãimana u'ási mono, ĩwaséde te te tâma 're ĩ'a'upsõĩ mono zé, te wasu'u, ĩ'uza hãirã hã. Ta norĩ si te za rob'rãĩ u'ã hã te te 're huri, da te 're huri mono wa, 'Re ĩhãimana u'ási mono 'rata âma 're ĩdanomro u'ási mono zé hã. Ta norĩ si te za duré ône haré 'ri nho'õmo u 're sisisi, 'ridawa za'êté na, ni'wa te te tiwi sitob za'ra âna.

¹⁵ Ni'wam norĩ si 'ri nho'õmo u 're sisisi waihu'u mono ô di za, marĩ ĩwaséde uptabi na 're ĩdahãimana waséde uptabi za'ra mono norĩ hã, duré simĩ'ã na 're ĩdahãimana za'ra mono norĩ hã, duré dahãiba na 're ĩdahãimana waséde za'ra mono norĩ hã, duré dapãrĩ'wa norĩ hã, duré romhãiba 'manharĩ âma, 'Re ĩhãimana u'ási mono upana 're ĩdawata za'ra mono norĩ hã, duré sadawa nhipese ze te, uburé dama 're ĩsadawa nhipese za'ra mono norĩ hã. Ta norĩ hã 're sisisi waihu'u mono ô di za, 'ri nho'õmo u hã.

¹⁶ Tawamhã Zezusihi mreme hã wa tô duré wapa. Āne te ĩma tinha:

— Wa hã Zezusi, wa tô hãiwa âma ĩma romhuri'wa hã we atême satõ, ã hã te ĩ'awaihu'u mono hã te te aima awaihu'u mono da, 'ri nho'õmo mono bâ ĩzazei'wa norĩ, siré 're ĩsi'rã'õtõ u'ási mono norĩ ma, awaihu'u mono da, ĩsipai u. Wa hã apito Dawihĩ nhĩhudu, za ĩsine ĩpire na te 're ĩda'ab'madã'ã mono da hã. Wa hã awê u, wasi wawê 're ro'o pese mono ré, da'âma 're ĩ'awê za'ra mono ne, wa za romhãimanazép té, te dama 're apisutu, ĩmama nhĩb'a'uwê norĩ ma. — Āne te duré ĩma siwasu'u, Zezusi hã.

¹⁷ 'Re ĩhãimana u'ási mono pẽ'êzani hã te Pone'êrebãĩ mro da me, dazõ 're hãrã u'ási zahuré, âne:

— We 're anomro aba mono, ã u'ási u. — Āne te dazõ 're hãrã u'ási zahuré.

Tawamhã ni'wam norĩ hã âne hã te te 're waparĩ za'ra mono wa, ã u'ási u 're nomro mono wamhã, te za duré ĩhãrã zahuré na dazõ 're hãsi u'ási.

Da te 're 'rubu za'ra mono wa, da te 're ĩ'ãhuri mono ne, ni'wam norĩ hã te te sima 're wê za'ra mono wamhã, te za tô ã u'ási u 're nomro, te te 're ãhuri u'ási mono da, wa'âbã âna. Ā u'ã hã da te 're ãhuri mono wa, 'Re ĩhãimana u'ási mono 'rata 're ĩdanomro u'ási mono zé.

Zuwã, te te dama âma ĩrob'ui'ééré 'rãsutu zé wasu'u

¹⁸ Wa hã Zuwã hã, wa za oto âma aipo're pu'u sirõmo za'ra wa'wa ĩmreme pire na, ãhã wasu'u na, ã ĩbãihã na, za ĩromhãimana mono zém na te ĩ'arob'ui'ééré mono hã, 're ĩwaparĩ za'ra wa'aba mono norĩ hã. Ni'wam norĩ hã ãhã wasu'u hã siwa'ru sihawim na te te âma 're sa'êté za'ra mono wamhã, te za 'Re ĩhãimana u'ási mono hã te te 're hã za'ra, ã ĩbãihã na te te dama 're ĩrob'manharĩ pipa mono zé ĩsimi'wara mono zarina. Taha na, te za te te tâma 're sa'êté za'ra, ĩ'ahãrĩ hã.

¹⁹ Duré ni'wam norĩ hã ãhã wasu'u hã za ĩromhãimana mono zém na te ĩ'arob'ui'ééré mono hawimhã tô senai ô newa, te te 're sani za'ra mono wamhã, te za 'Re ĩhãimana u'ási mono hã rob'rãĩ u'ã hã te te tiwi 're sawi za'ra, te te dame 're huri tô mono da, 'Re ĩhãimana u'ási mono 'rata rowê na 're danomro u'ási tô mono da. Te za duré 'ri nho'u ĩté hã ĩwê uptabi hã te te tiwi 're sawi za'ra, ĩwaséde hã ĩwa 're ĩhãimana mono ô hã. Āhã na, wa tô ã ĩbãihã na âma rob'ui'ééré pa, ã 'ri nho'õmo na hã, duré rob'rãĩ u'ási na hã.

²⁰ Tawamhã Zezusi hã te duré ĩrême ma siwasu'u, ã te âma ĩ'arob'ui'ééré mono na te te ĩma ĩ'awaihu'u mono 'wa hã. Āne te siwasu'u:

— Tô sena, wa za wei morĩ su apâ. — Āne te siwasu'u.

Tane tō. Wanhīb'apito Zezusi apâ we aimorĩ su'u tō.

²¹ Wa hã Zuwã hã wa za oto asawi za'ra wa'wa, ĩrēme ma. Wa ĩsima te 're aiwē u'âsi za'ra wa'wa, Wanhīb'apito Zezusi te te 're asawi pese za'ra wa'aba mono da, duré te te 're aipawaptob u'âsi za'ra wa'aba mono da. Āne wa ai'āma te 're rosa'rata u'âsi za'ra wa'wa.